

भारतीय, कलकत्ता
प्रकाशक

33/40

भारतीय
प्रकाशक
कलकत्ता-भारत

2.2

पूरसागर

आम्नाय-मन्थालय,
भारतनिधि, कलकत्ता
कादाकली-5

आम्नाय-मन्थालय,
भारतनिधि, कलकत्ता
कादाकली-5









समुद्रक

तो हो और हाहा करके क-
चकाचौधमें सभी सूर हो जा-
और सृष्टा भी सो जुवान बंद.

मेरी बहुत दिनोंसे इच्छा थी कि इसका दर्शन तो करता
परंतु संयोग न आया एकदिन पूज्यपाद श्रीभारतेन्दु बाबू
हरिश्चन्द्रजीके पुस्तकालयमें पुस्तकोंको उलटतेपलटते एक
वस्तेमें सूरसागरका केवल दशमस्कंधका पूर्वार्द्ध हाथ आया
उसे देखकर और भी पिपासा बढ़ी इसी बीच बांकीपुर
जानेका संयोग हुआ और वहां मित्रवर बाबू रामदीनसिंहजी-
के यहां सूरसागरका प्रथमसे नवमस्कंधतक देखनेमें आया.
मुझे उत्साह हुआ कि, यदि यह अमूल्य ग्रंथ छपजाता तो
भाषारसिकोंको बड़ा आनंद आता और भक्तोंको तो एक
निधि ही हाथ आजाता. मैंने भापाके सच्चे प्रेमी सेठजी
श्रीखेमराज श्रीकृष्णदासजीको लिखा और उन्होंने सहर्ष
से छापना स्वीकार किया दशम उत्तरार्द्ध और एकादश
रादश स्कंध श्री १०८ महाराज काशिराज बहादुरके पुस्त-
कालयसे मंगाया गया. अतएव मैं उक्त महामान्यवरोंको
हृदयसे धन्यवाद देता हूं.

सेवक—

श्रीराधाकृष्णदास,
चौखम्भा—काशी.

यथा स्थान सन्निवेशि-
दिए ... और यथा सम्भव नोट आदिभी दिये जा-
इस प्रकार जो उस समय शीघ्रताके कारण नहीं होसकाथा
वह सब अतिश्रमसे अवकी आवृत्तिमें यथास्थानसन्निवेशित
कर यह उत्तम ग्रंथ मुद्रित किया गया है.

यह किंवदन्ती प्रसिद्ध है कि, सूरदासजीने सवाल
पद बनाये और सूरसागर सारावलीके देखनेसे भी विदित
हुआ कि एक लाख पद तक तो उन्होंने सारावलीके बनाने
तक बनाये थे, परंतु इस ग्रंथमें बहुत कम पद हैं. वह दिन
परमसौभाग्यका होगा जब कि वह सब पद देखनेमें आवेंगे
और भाषा रसिकोंके लिये वह दिन चिरस्मरणीय होगा
जब कि सब पद छपकर प्रकाशित हो जायेंगे। मैं बड़े हर्षके
साथ प्रकाशित करता हूं कि, श्री १०८ गोस्वामि श्रीबाल-
कृष्ण लालजी महाराज कांकरौली नरेशने आज्ञाकी है कि,
मेरे पुस्तकालयमें पूरे सवालख पद हैं और उन्होंने यह भी
प्रतिज्ञा की है कि यदि तुम चाहोगे तो मैं उसे नकल कर-
नेकी आज्ञा दूंगा यदि 'श्रीवेङ्कटेश्वर' भगवानसे प्रेरित हुए
हमारे ग्राहकोंसे उत्साह पाकर उत्साहित हुआ मैं उसे छापने
की इच्छा करता हुवा उस ग्रंथको प्राप्त करनेका उद्योग करूंगा.

मैं फिर उन महाशयोंको हृदयसे धन्यवाद देता हूं जिनसे
इस बड़े काममें मुझे सहायता मिली है और आशा करता हूं
कि, मेरी अनुपयुक्तताके कारण जो इसमें त्रुटियाँ रह गई हैं
उन्हें सज्जन क्षमा करके मूल ग्रंथकी ओर दृष्टिदेंगे ॥

आपका लुपाकांक्षी-

खेमराज श्रीकृष्णदास,
“श्रीवेङ्कटेश्वर” स्टीम् प्रेस—मुंबई.





दशमस्कंध पूर्वार्धः


नाय-ग्रन्थालय,
ललित, करीब
वाराणसी-5

32/40

नाय-ग्रन्थालय,
ललित, करीब
वाराणसी-5

दशमस्कंध उपाख्यान





॥ श्रीहरिः ॥

श्रीसूरदासजीका जीवनचरित्र ।

न जाने क्यों हमारे देशके विद्वानोंका ध्यान इतिहासकी ओर तनिक भी न आया ? कि जिसके कारण अनेकानेक प्रसिद्ध पुरुषोंके नामभी नहीं सुननेमें आते। सूरदासजीको हुए अभी कुछ बहुत दिन नहीं हुए परंतु इतनेही थोड़े कालमें भारतवर्षके एक इतने बड़े प्रसिद्ध कविके जीवन चरित्रका पता ठीक ठीक नहीं लगता, यहाँतक यहाँके लोगोंका ध्यान इस ओर कम था कि सूरदासजीके थोड़ेही दिन पीछे गोस्वामी श्रीविठ्ठलनाथजी महाराजके पुत्र श्रीगोकुलनाथजीने जो चौरासी वैष्णवोंकी बातों लिखी उसमें भी सूरदासजीका चरित्र सुना सुनायाही लिख दिया; यदि उस समय थोड़ाभी परिश्रम किया जाता तो इनका पूरा पता लगजाता परंतु खेद कि इधर तो किसीका ध्यानही न था ॥

सूरदासजीके विषयमें चौरासी वैष्णवोंकी बातोंमें तथा पूज्यपाद भारतेन्दु बाबू हरिश्चन्द्रजीने जो लिखाहै वह और साहित्यलहरीमें बाबू रामदीनसिंहने जो कुछ छापाहै स्थानान्तरमें प्रकाशित कियाजाताहै यहाँ हम केवल समयका निरूपण करते हैं ॥

सूरदासजीका समय निर्णय करना कुछ बहुत कठिन नहीं है क्योंकि श्रीवल्लभाचार्य महाप्रभुके ये शिष्य थे ("श्रीवल्लभगुरु तत्त्व सुनायो लीला भेद बतायो" सू. सा. सा. ११०२) और श्रीगोसाई जी (श्रीविठ्ठलनाथजी) के समयमें ये मरे यह तो इनके लेखहीसे विदित है "थापि गोसाई करी मेरी आठ मद्धे छाप" (भारतेन्दुजी लिखित लेख) श्रीवल्लभाचार्य महाप्रभुका जन्म संवत् १५३५ वैशाख कृष्ण ११ को और अन्तर्धान संवत् १५८७ आपाढ़ शु. ३ को और श्रीगोस्वामी विठ्ठलनाथजीका जन्म संवत् १५७२ पौषकृष्ण ९ और अन्तर्धान संवत् १६४२ माघ कृष्ण ७ को हुआ। अब इनका समय संवत् १५३५ से लेकर संवत् १६४२ के बीच १०७ वर्ष के भीतर ही निर्णय होना चाहिये। अब बिचारना चाहिये कि इन्होंने अल्पायु पाई या दीर्घायु ।

१ पहिले तो उनके पदोंकी बड़ी संख्या ही उन्हें दीर्घायु बताती है परन्तु मुझे उनकी अवस्था लगभग अस्सी वर्षकी होनेका पक्का प्रमाण मिला है। सूरदासजीने सूरसागर सारावलीकी अपनी सरसठ वर्षकी अवस्थामें लिखा है ॥ यथा:-

गुरु प्रसाद होत यह दर्शन सरसठ बरस प्रवीन । शिव विधान तप करेउ बहुत दिन तऊ पार नहिं लीन ॥ १००२ ॥ सुख पर्यंक अंक ध्रुव देखियत कुसुम कन्द दुम छाये । मधुर मल्लिका कुसुमित कुंजन दम्पति लगत सोहाये ॥ १००३ ॥ गोवर्द्धन गिरि रत्नसिंहासन दम्पति रस सुख मान । निबिड कुंज जहँ कोउ न आवत रस विलसत सुखखान ॥ १००४ ॥ निशा भोर कबहूँ नहिं जानत प्रेममत्त अनुराग । ललितादिक सींचत सुख नैननि जुर सहचारै बडभाग ॥ १००५ ॥ यह निकुंजको वर्णन करिदे वेद रहे पचिहारानेति नेति करि कहेउ सहस बिधि तऊ न पायो पार ॥ १००६ ॥

दर्शन दियो कृपा करि मोहन नेग दियो वरदान । आगम कल्पमन तुव है है श्रीमुख
कही बखान* ॥ १००७ ॥

सूरसागर सारावलीको सूरदासजीने एक लाख पद बनानेके उपरांत बनायाहै:-

कर्मयोग पुनि ज्ञान उपासन सबही भ्रम भरमायो । श्रीवल्लभगुरु तत्त्व सुनायो लीला भेद बतायो
॥ ११०२ ॥ तादिनते हरिलीला गाई एक लक्ष पदबन्द । ताको सार सूरसारावलि गावत अति
आनन्द ॥ ११०३ ॥ तब बोले जगदीश जगतगुरु सुनो सूर मम गाथ । तू कृत मम यश जो
गावैगो सदा रहै मम साथ ॥ ११०४ ॥

सूरदासजीके सवालक्ष पद बनानेकी किम्बदन्ती जो प्रसिद्ध है वह ठीक विदित होती है क्यों-
कि एकलाख पद तो श्रीवल्लभाचार्यके शिष्य होनेके उपरांत और सारावलीके समाप्त होने तक
बनाये इसके आगे पीछे के अलगही रहे ॥

अब देखना चाहिये कि यह सारावली कब बनी ? इसके अंतमें सूरदास जी लिखतेहैं:-

“सरस समतसर लीला गावै युगल चरण चित लखै । गर्भवास बंदीखानेमें बहुरि सूर नहिं
आवै ॥ ११०७ ॥” मुझे सरस सम्बत्सरका शब्द खटका और इसपर मैंने माननीय महामहोपाध्याय
श्रीपंडित सुधाकर द्विवेदीजीसे पूछा इन्होंने बताया कि सरस नहीं यह शब्द परस होसकता
है जिसका अर्थ साठ होता है और पहिले लोग सैकडाको छोडकर प्रायः लिखदिया करते थे,
इससे संवत् १५६० का अनुमान हुआ. परंतु जो विचारकर देखा तो यह बात सर्वथा असंगत
प्रतीत हुई. क्योंकि एक तो “सरस सम्बत्सर लीला गावै” से विदित होताहै कि, यह फलस्तुतिहै.
सम्भवहै इसलीलाहीका नाम सरस सम्बत्सर लीलाहो. क्योंकि गोवर्धनपूजाके प्रसंगमेंभी सूरदास
जीने लिखाहै “श्याम कञ्जो सूरदास सों मेरी लीला सरस बनाय” दूसरे यह कि, हम ऊपर
दिखला चुकेहैं कि सरसठ वर्षकी अवस्थामें यह ग्रंथ बना तो १५६० मेंसे ६७ निकाल दीजिये
तो १४९३ बचताहै जो कि श्रीवल्लभाचार्य महाप्रभुके जन्मके बहुत पहिले आता है और यदि
श्रीगोसाईंजीके कालमें सूरदासजीकी मृत्यु उनके लेखानुसार मानीजाय तथा सूरदासजीने
सम्बत् १६०७ में साहित्यलहरी बनायीहै तब तो सूरदासजीकी अवस्था ११४ वर्षसेभी अधिक
हो जातीहै, इससे इसे छोडकर साहित्यलहरीहीके सम्बत्पर ध्यान देना चाहिये ॥

साहित्यलहरीमें सूरदासजीने यों सम्बत् दियाहै:-

“मुनि पुनि रसनके रस लेष । दशन गौरीनंदको लिखि सुवल सम्बत् पेष ॥ नंदनंदन मास
छैतें हीन त्रितियावार । नंदनंदन जनमतेहैं बाणसुख आगार ॥ त्रितिय रिक्ष सुकर्म योग बिचारि
सूर नवीन । नंदनंदन दासहित साहित्य लहरीकीन ॥ १०९ ॥”

मुनि = सात, रसन = एक, रस = छ, दशन गौरीनंद = एक अर्थात् १६०७ (“अंकानां
वामतो गतिः”) नंदनंदनमास = वैशाख, अक्षय तृतीया कृत्तिकाक्षत्र सुकर्म योगमें साहि-
त्यलहरी बनाया ।

साहित्य लहरीको सूरदासजीने सूरसागरसे दृष्टकूट पदोंको छांटकर संग्रह कियाहै अस्तु अब

* इसको जीवनचरित्रवाले पद “प्रथमही प्रथजगात” के इनपदोंसे मिलाइये “सातहैं दिन आय यहुपाति कीन आप उद्धार”
दियो चखदै कही शिशु पुन मांगु वर जो चाइ । हैं कही प्रभु भगति चाहत शत्रुनाश सुभाइ ॥ दूसरो ना रूप देखों देखि राधा
इयाम । मुनत करुणासिन्धु भाषी एवमस्तु सुधाम ॥ प्रबल दक्षिण विप्रकुलते शत्रुहैं है नास । अमित बुद्धि विचारि विद्यामान
मानै मास ॥ नाम राखे मोर सूरजदास सूर सु इयाम । भए अन्तर्धान बीते पाछली निशि याम ॥

१६०७ मेंसे सरसठ वर्ष निकाल दीजिये तो १५४० सम्बत्के लगभग उनके जन्मका समय आया और इसके पीछे सम्बत् १६२० के लगभग उनकी मृत्यु मानलेनी चाहिये ॥

सूरसागरके देखनेसे विदित होताहै कि उस समयमें श्रीगोस्वामि हित हरिवंशजीको और स्वामि हरिदासजीके पूरे अभ्युदय का समयथा और उससमयके सब बैष्णवोंमें प्रेमथा सूरदासजी लिखते हैं:-

निशिदिन श्याम सेऊं मैं तोहिँ । इहै कृपा करि दीजै मोहिँ ॥ नवनिकुंज सुखपुंजमें हरिवंशी हरिदासी जहाँ । हरि करुणा करि राखहु तहां ॥ नित विहार आभार दै (पृष्ठ ३६२ पंक्ति १०) ॥

ऐसा प्रतीत होताहै कि सूरदासजीने श्रीमद्भागवतको शृंगलापूर्वक एक समयमें नहीं बनाईथी क्योंकि वार्ता इत्यादिमें समयसमय पर जो सबपद “खंजन नैन रूप रस माते ।” आदि लिखेहैं प्रायः वे सभी इसमें आगयेहैं, और पूरा पूरा भागवतका अनुवादभी नहीं है बहुतसी कथा छोडभीदीहै और कई एक उपासनाके अनुसार बढाभीदीहै कुछ और पुराणोंसेभी सहायता ली है. आप लिखतेहैं:-

“वंदन रज विधि सबै कह्यो विधि दियो ऋषिन्ह बैताइ । व्यास त्रिपद वामनपुराण कह्यो सूर सोइ अंब गाइ ॥ ” (पृष्ठ ३६४ पंक्ति २३)

एक सूरदास और हुएहैं वह अपना नाम कवितामें सूरदास मदनमोहन रखतेथे सूरदासजीका नाम भारतवर्षमें ऐसा प्रसिद्ध होगयाहै कि सभी अंधोंको लोग सूरदास कहतेहैं और बहुतसे लोग आप कविता करिके सूरदासजीकी छाप उसमें रखदेतेहैं. जिसमें वह कविता प्रसिद्ध होजाय. श्रीशुत वावू अक्षयकुमारदत्तने भ्रमवश अपने बंगला ग्रंथ “भारतवर्षीय उपासक सम्प्रदाय” में लिख दियाहै कि जितने अंधे फकीर एकतारा लेकर गाते हुये घूमते फिरतेहैं सब सूरदासके सम्प्रदायमें हैं ॥

सूरदासजीका जीवनचरित्र आगे दियेहुये लेखोंसे प्रगट होजायगा अतएव हम यहाँ कुछ अधिक लिखना आवश्यक नहीं समझते ॥

पूज्यपाद भारतेन्दु वावू हरिश्चन्द्रजी लिखित नोट सूरदासजीका ।

संसारमें जो लोग भाषाकाव्य जानते होंगे वह सूरदासजीको अवश्य जानते होंगे और उसी तरह जो लोग थोडेभी बैष्णव होंगे, वे इनका थोडा बहुत जीवनचरित्रभी अवश्य जानते होंगे. चौरासी वार्ता, उसकी टीका, भक्तमाल और उसकी टीकामें इनका जीवन विवृत कियाहै. इन्हीं ग्रंथोंके अनुसार संसारको (और हमकोभी (१) विश्वास था किये सारस्वत ब्राह्मणहैं, इनके पिताका नाम रामदास, इनके माता पिता दरिद्रीथे, ये गऊ घाटपर रहतेथे, इत्यादि.) अब सुनिये एक पुस्तक सूरदासजीके दृष्टिकूट पर टीका (टीकाभी सम्भव होताहै उन्हींकीहै, क्योंकि टीकामें जहाँ अलंकारोंके लक्षण दियेहैं वह दोहे और चौपाई भी सूरनामसे अंकितहैं.) मिली है. इस पुस्तकमें ११६ दृष्टिकूटके पद अलंकार और नायिकाके क्रमसेहैं और उनका स्पष्ट अर्थ और उनके अलंकार नायिका इत्यादि सब लिखे हैं. इस पुस्तकके अंतमें कविने अपना जीवनचरित्र दियाहै, जो नीचे प्रकाश किया जाताहै. अब इसको देखकर सूरदासजीके जीवनचरित्र और

(१) कविचनसुधा प्राचीन पुस्तकावलीकी दूसरी जिल्दमें सूरदासजीका जीवनचरित्र देखो ।

वंशको हमलोग औरही दृष्टिसे देखने लगे. वह लिखतेहैं “प्रथमजगात” (२) प्रार्थज गोत्र (?) वंशमें इनके मूल पुरुष ब्रह्मराव (३) हुए जो बड़े सिद्ध और देवप्रसाद लब्ध थे. इनके वंशमें भौचंद (४) हुआ पृथ्वीराजने (५) जिसको ज्वालादेश दिया। उसके चार पुत्र जिनमें पहिला राजा हुआ. दूसरा गुणचंद्र उसका पुत्र शीलचंद्र उसका वीरचंद्र यह वीरचंद्र रत्नभ्रमर (रत्नभ्रमर) के राजा प्रसिद्ध हम्मीर (६) के साथ खेलताथा। इनके वंशमें हरिचन्द्र (७) हुआ उसके पुत्रके ७ पुत्र हुए जिनमें सबसे छोटा (कवि लिखताहै) मैं सुरतचन्द्रथा मेरे ६ भाई मुसलमानोंके युद्ध (८) में मारे गए। मैं अन्धा कुबुद्धिथा। एक दिन कुंए में गिरपडा तो सात दिन तक उस (अन्धे) कुंए में पडा रहा किसीनेन निकाला सातवें दिन भगवानने निकाला और अपने स्वरूपका (नेत्र देकर) दर्शन कराया और मुझसे बोले कि बर मांग मैंने वर मांगा कि आपका रूप देखकर अब और रूप न देखूं और मुझको दृढभक्ति मिले और शत्रुओं (९) का नाशहो। भगवान्ने कहा ऐसा ही होगा तू सब विद्यामें निपुण होगा प्रबल दक्षिणके ब्राह्मण (१०) कुलसे शत्रुका नाश होगा और मेरा नाम सूरजदास, सुर, सूरश्याम इत्यादि रखकर भगवान् अन्तर्धान होगये। मैं ब्रजमें बसने लगा फिर गोसाईं (११) ने मेरी अष्ट (१२) छापमें थापना की इत्यादि। इस लेखसे और लेख अशुद्ध मालूम होते हैं क्योंकि जैसे चौरासी वार्ताकी टीकामें लिखाहै कि दिल्लीके पास सीही गाँवमें इनका दरिद्री माता पिताके घर जन्म हुआ यह बात नहीं आई। यह एक बड़े कुलमें उत्पन्न थे और आगरे वा गोपाचलमें इनका जन्म हुआ हो यह मान

(२) “प्रथमजगात”—इस जाति वा गोत्रके सारस्वत ब्राह्मण सुननेमें नहीं आए। पंडित राधाकृष्ण संगृहीत सारस्वत ब्राह्मणोंकी जातिमालामें “प्रथमजगात” “प्रथ” —वा “जगात” नामके कोई सारस्वत ब्राह्मण नहीं होते। ‘जगा वा जगातिया’ तो भाटकी कहतेहैं।

(३) ब्रह्मराव नामसेभी सन्देह होताहै कि यह पुरुष या तो राजा रहाहो या भाट।

(४) भौ का शब्द हुआ अर्थमें लीजिए तो केवल चन्द्रनामथा। चन्द्र नामका एक कवि पृथ्वीराज की सभामेंथा। आश्चर्य!!!

(५) पृथ्वीराजका काल सन् ११७६।

(६) हम्मीर चौहान, भीमदेवका पुत्र था। रणथंभौरके किलेमें इसीकी रानी इसके अलाउद्दीन (दुष्ट) के हाथसे मारेजाने पर सह्यावधि स्त्रीके साथ सती हुईथीं। इसका वीरत्व यश सर्वसाधारणमें हमीर हठके नामसे प्रसिद्ध है।

(तिरिया तेल, हमीरहठ, चढे न दूजीवार) इसीकी स्तुतिमें अनेक कवियोंने वीररसके सुन्दर श्लोक बनाएहैं। ‘मुञ्चति मुञ्चति कोपं भजति च भजति प्रकम्प मरिचगम्। हम्मीरवीरखड्गे त्यजति त्यजति क्षमामाशु।’ इसका समय सन् १२९०। (एक हमीर सन् ११९२ में भी हुआहै)।

(७) सम्भवहै कि हरिचन्द्रके पुत्रका नाम रामचन्द्र रहाहो जिसे वैष्णवोंने अपनी रीतिके अनुसार रामदास कर लियाहो।

(८) उस समय तुगलकों और मुगलों का युद्ध होताथा ॥

(९) शत्रुओंसे लौकिक अर्थ लीजिए तो मुगलोंका कुल (इससे सम्भव होताहै कि इनके पूर्वपुरुष सदासे राजाओंका आश्रय करके मुसलमानोंको शत्रु समझते थे या तुगलकोंके आश्रितथे इससे मुगलोंको शत्रु समझतेथे) यदि अलौकिक अर्थ लीजिए तो काम, क्रोधादि।

(१०) शिवाजीके सहायक पेशवाका कुल जिसने पीछे मुसलमानोंका नाश किया (अलौकिक अर्थ लीजिए तो सूरदास-जीके गुरु श्रीवल्लभाचार्य दक्षिण ब्राह्मण कुलके थे।

(११) “गोसाईं”—श्रीविठ्ठलनाथजी श्रीवल्लभाचार्यके पुत्र।

(१२) अष्टछाप-यथा-सूरदास, कुम्भनदास, परमानन्ददास, और कृष्णदास ये चार महात्मा आचार्यजीके सेवक और छीत स्वामि गोविन्दस्वामि, चतुरभुजदास और नन्ददास ये गोसाईंजीके सेवक। ये आठों महाकविये।

लिया जाय कि सुसल्मानोंके युद्धमें इनके भाइयोंके मारेजानेके पीछेभी इनके पिता जीते रहे और एक दरिद्र अवस्थामें पहुँच गये और उसी समयमें सीदी गाँवमें चले गये हों तो लड मिल सकती है। जो हो हमारी भाषा कविताके राजाधिराज सूरदासजी एक इतने बड़े वंशक हैं यह जान कर हमलोगोंको बड़ा आनन्द हुआ। इस विषयमें कोई और विद्वान जो कुछ और विशेष पता लगा सके तो वहभी उसे पत्र द्वारा प्रकाशित करें ॥

प्रथम ही प्रथ जगाते में प्रगट अद्भुत रूप । ब्रह्मराव बिचारि ब्रह्मा राखु नाम अनूप ॥ पान-पय देवी दियो शिव आदि सुर सुख पाय । कहा दुर्गा पुत्र तेरो भयो अति सुख दाय ॥ पार पायन सुरनके पितु सहित अस्तुति कीन । तासुवंश प्रशंसमें भौ (१) चंद चारु नवीन ॥ भूप

* दीपनिर्वाण नामक उपन्यासके पहले भागमें मुन्शी उदितनारायण वर्माने लिखा है:-

“ कविचन्द यथार्थ में एक प्रसिद्ध राजपूत महाकवि पृथ्वीराजके परमवन्धु थे, और पृथ्वीराजके सहवास ही में सर्व्वदा रहते थे। चन्दकवि पुस्तकमें कविचन्द्र के नाम से लिखे गये हैं। इङ्ग्लैण्डके सर फिलिपसिडनी और सर वाल्टर रयाली-के समान वे काव्यविषयमें निपुण थे, युद्धविषय में भी वेसेही दूरदर्शी थे, किन्तु काव्यही उनके यशका चिह्न है। उनका सकल महाकाव्य राजपूत लोगोंके, विशेषतः पृथ्वीराजके कीर्तिकलाप और शूरता पराक्रम में वर्णन हुआ है। सुतराम् समस्त आर्यजाति में जैसे रामायण और महाभारत आदरणीय है, ग्रीक (यूनान) लोगोंमें जैसे होमर आदरणीय है, राजपूत लोगोंमें चन्दकवि का काव्यसमूह भी वेसेही आदरणीय है। किन्तु चन्दकविका कपोलकल्पित काव्य बहुत कम है, प्रकृत वृत्तान्तका भाग अधिक है। दुःखका विषय यही है कि उनका समस्त जीवनचरित्र कहींभी नहीं पाया जाता और उनके काव्य समूहका अधिकांश प्रायः प्राचीन हिन्दीभाषामें छन्दोबद्ध है।

चन्दकविके विषय में शिवसिंहसरोजमें यों लिखा है:-

चन्दकवि प्राचीन बंटीजन संभल निवासी संवत् ११९६ ए. चन्दकवि महाराजा वीसल देव चौहान रनथंभौर वालेके प्राचीन कवीश्वरकी औलाद में थे. संवत् ११२० में राजा पृथ्वीराज चौहानके पास आये और मंत्री कवीश्वर दोनों पदको प्राप्त हुआ और पृथ्वीराज रायसा नाम एक ग्रन्थ एक लक्ष श्लोक संख्या भाषामें रचा जिसमें ६९ खंड हैं और जिसमें पुरानी बोली हिन्दुओं की है इस ग्रन्थमें चन्दकविने संवत् ११२० से संवत् ११४९ तक पृथ्वीराज का जीवनचरित्र महाकविताईके साथ बहुत छन्दों में वर्णन किया है छप्पय छंद तो मानों इसी कविके भागमें था जैसा चौपाई छंद श्रीगोसाई तुलसीदासके हिस्से में पड़ी थी इस ग्रन्थमें क्षत्रियोंकी वंशावली और अनेक युद्ध और आवू पहाडका माहात्म्य और दिल्ली इत्यादि राजधानियों की शोभा और क्षत्रियोंके स्वभाव चालचलन-व्यवहार बहुत विस्तारपूर्वक वर्णन किये हैं ये कवि केवल कवीश्वरही नहीं थे वरन् नीतिशास्त्र और चारनके काम काजमें महाशूरवीर थे संवत् ११४९ में साथ पृथ्वीराजके येभी मारेगए इन्हींकी औलादमें शार्ङ्गधर कवि थे जिन्होंने हमीररायसा और हमीरकाव्य भाषामें बनाया है।

शार्ङ्गधर कवि बंटीजन चंद कवीश्वर वंशी संवत् १३५७ ये प्राचीन कवि चंद कवीश्वर के वंशमें संवत् १३३० के करीब उत्पन्न हुए थे। और राजा हमीरदेव चौहान रनथंभौर वालेके यहां जो राजा विशालदेवके वंशमें था रहा करते थे इन्होंने हमीररायसा १ और हमीरकाव्य २ ये दो ग्रन्थ महाउत्तम बनाए हैं हमीररायसा राजा हमीरकी प्रशंसामें लिखा है।

दोहा-सिंहगवन सपुरुष वचन, कदलि फरै इक वार । तिरिया तेल हमीर हठ, चढै न दूजी वार ॥ १ ॥

क्रवित्त-तंगन समेत काटि विहित मतंगन सों रुधिरसों रंगरण मंडलसों भारिगो । सारंग सु कवि भनै भूपति भवानीसिंह पारथ समान महाभारत सों करिगो ॥ मोर देखि मुगुल तुरावरान ताहि समै काहू अस न जाना काहू नट सों उचरिगो । वाजीगर कैसी दगावाजी करि हाथी हाथा हाथी हाथी ते सहादति उतरिगो ॥ १ ॥

चन्दकविके विषयमें पंडित श्रीमोहनलाल विष्णुलाल पंडाने पृथ्वीराजरायसा की टिप्पणीमें लिखा है।

चंद वरदई-इस महाकाव्य का ग्रंथकर्ता कि जो हिन्दुओंके अंतिम बादशाह पृथ्वीराज जी चौहानका लंगोटिया भिन्न और उनके दरबारका कविराज था। वह भट्ट जाति जो आज कल राव करके कहलाते हैं उसके जगात नामक गोत्रका था और उसके पुरुषा पंजाब देशलहौर नगरके रहनेवाले थे और उनकी यजमानी अजमेरके चौहानोंकी थी। उसकी जैसी शूरवीरता इस महाकाव्यसे विदित होती है उसका मुख्य कारण यही है कि, वह पंजाब देशकी अद्यावधि

पृथ्वी (२) राज दीनों तिन्हें ज्वाला देश । तनय ताके चार कीन्हों प्रथम आप नरेश ॥ दूसरे (३) गुणचंद तासुत शीलचंद सरूप । (४) वीरचंद प्रताप पूरण भयो अद्भुत रूप ॥ रंतभार

प्रसिद्ध वीरभूमिकें तत्त्वों से उत्पन्न हुआ था और राजपूतानेके हृदयरूपी अजमेर नगरमें बड़ा हुआ था । वह पद भाषा, व्याकरण, काव्य, साहित्य, छंद शास्त्र, ज्योतिष, वैद्यक, मंत्रशास्त्र, पुराण, नाटक और गान आदिक विद्याओंमें अच्छा व्युत्पन्न पंडित था । उसके पिताका नाम वेण और विद्या-गुरुका नाम गुरुप्रसाद था । उसकी दो स्त्रियोंके नाम कमला अर्थात् मेवा और गौरी अर्थात् राजेरा और एक लड़कीका नाम राजवाई और दश लड़कोंके नाम सूर १ सुन्दर २ मुजान ३ जल्ह ४ बल्ह ५ बलिभद्र ६ केहरि ७ वीरचंद ८ अवधूत अर्थात् योगराज ९ और गुणराज १० थे । इस महाकाव्यके विषयोंको बैसे तौ उसने समय २ परवनाकर कंठ कर रखे थे परंतु उनको ग्रंथाकारमें उसने ६० दिनमें रचा था और अंतको उसने रायसाकी पुस्तक अपने लड़के जल्ह नामकको दी थी । इस रायसेके अतिरिक्त उसके रचे और भी कई एक ग्रंथ सुनने में आते हैं परंतु उनमें सबसे बड़ा ग्रंथ यह रायसा है और अन्य सब ग्रंथ अब विलकुल नहीं मिलते हैं । उसका सविस्तर जीवनचरित्र और वंशावली जहाँ तक हमारे जाननेमें ख्यातादिसे आई है वह हम इस ग्रंथके समाप्त होने पर छापकर प्रसिद्ध करेंगे ।

फिर लिखा है—

छप्पय—“सम वनिता वर बांदि चंद जपिय कोमल कल । शब्द ब्रह्म यह सत्य अपर पावन कहि निर्मल ॥

जिहित शब्द नहि रूप रेख आकार ब्रज नहि ॥ अकल अगाव अपार पार पावन त्रयपुर माहि ॥

तिहि शब्द ब्रह्म रचना करौं गुरुप्रसाद सरस प्रसन ॥ यद्यपि सु उक्ति बूकीं जुगति तौ कमल वदनि कवितह हसन ॥

छंद ॥ १३ ॥ रू० ॥ ८ ॥

८ चंद इस रूपक में अपनी स्त्रीको उसकी शंकाका उत्तर देकर समाधान करवा है । शब्द ब्रह्म (सं० शब्दात्मकं ब्रह्म) शब्दका प्रयोग चंदकी व्याकरण और वेदान्त विद्याके ज्ञान का द्योतक है गुरुप्रसाद शब्द यहाँ श्लेषार्थमें कविने प्रयोग किया है क्योंकि ख्यातियोंके अनुसार चंदके विद्या गुरुका नाम गुरुप्रसाद था । यद्यपि कुछ विशेष वृत्त नहीं मिलते तथापि यह गुरुप्रसाद नामक पंजाब देशका रहनेवाला एक बड़ा पंडित हुआ है । कवितह चंदकी हिन्दीका निज प्रयोग है और उसका अर्थ कवित अर्थात् काव्य रचनेवाले कविका है । किसी २ पुस्तकमें जो वरवादि, अमल, अवल, त्रयपूर, महि, तिहि और प्रसन्न पाठ हैं वे अशुद्ध हैं ।

फिर लिखा है—

“विहु बाह सूर सजे समंत । वनै विरह बंधे अनंत” ॥ छंद ॥ ६२३ ॥

यह छंद सं० १६४७ । १७७० और १८४५ की पुस्तकोंमें नहीं है किन्तु सं० १८५९ की लिखी में है ।

इस छंदकी अंतकी तुक में “वनै विरह बंधे अनंत” है कि जिसका अर्थ यह होता है कि वेनने अनेक विरह बांधे अर्थात् कहे । यह वेन कवि इस महाकाव्यके रचनेवाले चंदका पिता था और वह सोमेश्वर जीके इस समय साथ था । अब तक चंदसे पहिलेका कोई काव्य किसी भी कविका किसीके जानने में नहीं है किन्तु हमने जो एक चंद छंद वर्णन की महिमा नामक पुस्तक सं० १६२९ की लिखी शोध की है उसके पीछे मेवाडराजके महाराणा जी श्री उदयसिंह जी के महाराजकुमार श्री सगतसिंहजीके पंडित विष्णुदासजीने अकबर बादशाहके भाट गंग जीसे अजमेरमें पटोलावायके मुकामपर चंदके बाप कवि राव वेनका नीचे लिखा छप्पय अर्थात् कवित लिखा था वह हम प्रकाश करते हैं । इस छप्पयसे वेन ने पृथ्वीराज जीके पिता सोमेश्वर जीको आशीश दी थी—

छप्पय—अटल ठाट महि पाट, अटल तारागढ थान । अटल नग्न अजमेर, अटल हिंदव स्थान ॥

अटल तेज परताप, अटल लंका गढ डंडिव । अटल आप चहुवान, अटल भूमि यश मंडिव ॥

संभरी भूप सोमेश नृप, अटल छत्र ओपै सूर । कविराव वेन आशीशदैं, अटल युगां राजैश कर ॥

इसीके साथ उसी पुस्तक में चंदके नागापत्रकरणाका कहा हुआ यह नीचे लिखा दोहा भी लिखा है—

दोहा—लै कूजा नृप पीथुला, सामंत चमू समंद । वेन नंदन कनवज गमन, चंद करन कइ दंद ॥

पृथ्वीराज रायसेकी प्रथम संरक्षा में लिखा है—

इसके सिवाय फारसी और जर्मनीकी तबारीख भी इस बातकी साक्षी देती है कि चंद हमारे हिन्दुओंके अंतिम बादशाहका परमप्रिय कविराज और सहचर था । यदि हम उन पुस्तकोंका मूल उद्धृत करके यहाँ प्रमाण में प्रवेश करें तो ग्रंथके बहुत बड़ जाने का भय है । अतएव हम मेजर रेवर्टी साहबकी एक टिप्पणीको उद्धृत कर प्रमाणमें इस अभिप्रायसे देते हैं कि हमारे पाठकोंको इस विषयका अनुभव एक थोड़ीसी पंक्तियोंसे ही होजाय । नीचे लिखी थोड़ी सी पंक्तियें केवल

हमीर भूपत संग खेलत आप । तासु वंश अनूप भो हरचंद अति विख्यात ॥ आगरे रहि गोपचल में रहो ता सुत बीर । पुत्र जनमें सात ताके महाभट गंभीर ॥ कृष्णचंद (५) उदारचंद जो रूपचंद सुभाइ । बुधचंद प्रकाश चौथो चंद भै सुखदाइ ॥ देवचंप्रबोध संश्रुत (६) चंद ताको नाम । भयो सप्तो नाम सूरज चंद मंद निकाम ॥ सो समर करि साहि सेवक गये (७) विधिक लोक । रहो सूरजचंद दृग ते हीन भर वर शोक ॥ परो कूप पुकार काहु सुनी ना संसार । सातयें दिन आइ यदुपति कियो आप उधार ॥ दियो (८) चखदै कही शिशु सुनु मांग वर जो चाइ । हों कहीं प्रभु भगत चाहत शत्रु नाश सुभाइ ॥ दूसरो ना रूप देखों देखि राधा श्याम । सुनत करुणासिंधु भाषी एवमस्तु सुधाम ॥ प्रबल छद छिन विप्र कुलते शत्रु दूहै बास । अपित (९) बुद्धि बिचारि विद्यामान माने मास ॥ नाम राखे मोर सूरजदास, सूर, सु श्याम । भये अंतर्धान बीते पाछली निशि याम ॥ मोहि पनसो (१०) इहै ब्रजकी बसे सुख चित थाप । थपि (११) गोसाईं करी मेरी आठ मध्ये छाप ॥ विप्र प्रथजगात को है भाव भूर निकाम । सूरहै नंदनंदजूको लयो मोल गुलाम ॥ ११८ ॥

अर्थ सुगम—सूर आपन वंश वर्णित है ॥ ११८ ॥

यही नहीं सिद्ध करती कि चंद कवि पृथ्वीराजजीके समयमें हुआ है या परन्तु रायसेम लिखे कतिपय और वृत्तान्त भी कुछ फेरफारके साथ सिद्ध करता है ।

(मजर रैवटीं साहबकृत तबकात नासरी पृष्ठ ४८६)

हिन्दू लोग एक भिन्न वृत्तांत लिखते हैं कि उसीको अब्बुलफज़लने और जम्मूकी तवारीख वालेने भी थोड़ेसे फरकके साथ वर्णन किया है—

यद्यपि फारसी इतिहासवेत्ता लिखते हैं कि रायपिथौरा तलावरी (तराई) पर लडाईं में मारा गया और सुईजुदीन दमयकमें एक खोखरके हाथसे मारा गया कि जो इसी कामके लिये उतारू हो रहा था, और ऐसेही वृत्तान्तका अवलंब तबकात और अकबरी और फरिश्ता के ग्रंथकर्त्ताओंने किया है, तथापि हिन्दू भटोंके जुवानी वर्णनसे कि जो प्रत्येक नामांकित शाखेकी ख्यातोंके भंडार हैं, और जो पीढियों तक कंठस्थ वृत्तान्त एक दूसरे को उपदेश करते आये हैं, यह वर्णन किया गया है कि राव पिथौराके लडाईंमें कैदहोजाने और गज़नीको ले गये पीछे एक चंद जिसे कोई चांदा करके भी लिखते हैं कि जो राय पिथौराका स्तुतिपाठक और विश्वासी सहचर था और कोई कोई ग्रंथकर्त्ता उसे राय पिथौराका कविराज करके भी लिखते हैं, वह अपने आपदाग्रस्त स्वामीकी खबर लेनेको गज़नी पहुँचा वह अपने अच्छे प्रयत्नोंके बलसे प्रबंध कर मुलतान सुईजुदीनकी सेवामें प्राप्त हुआ और बंदीगृहमें राय पिथौराके साथ बातचीत करनेमें भी सफल हुआ. यह दोनों किसी एक युक्ति पर सम्मत हुए और एक दिन चंदने अपने छलबलके द्वारा मुलतानके मनमें राय पिथौराकी वाणविद्यामें परमकुशलता देखनेकी नितान्त इच्छा उत्पन्न की और उसको चंदाने इतनी सराही कि मुलतानका मन उसे देखे बिना न रहने लगा. निदान वैधुआ राजा सन्मुख लाया गया और उससे उसकी वाण विद्याकी परमकुशलता दिखानेकी विनती की गई । उसके हाथमें एक धनुष और वाण दिये गये । उसने अपनी स्वीकृत युक्तिके अनुसार जो निशाना मुलतानने नियत कराया था उसे छोड़ कर खास मुलतानके ही वाण मारा कि वह वहीं मरगया और मुलतानके पासवालोंने राय पिथौरा और चंदाको काटकर टुकड़े टुकड़े कर डाले ।

जम्मूकी तवारीखवाला लिखता है कि राय पिथौरा अंधाकर (देखो टिप्पण १ पृष्ठ ४६६) दिया गया था और जब वह बंदीगृह से बाहर लाया गया और उसके निज धनुष और वाण उसे दिये गये । यद्यपि वह अंधाथा तथापि उसने वाण चढाकर और साध कर मुलतानके शब्दके अनुसंधान और चंदा की सूचनाके अनुसार सीधा ऐसा मारा कि वह मुलतानके जाकर लगा । बाकी का वृत्तान्त तदनुसार ही है ।

इति श्रीपदकूट सूरदासटीका संयुक्त संपूर्णम् ।

टिप्पणी—सरदार कविने कईएक स्थान इस भजन में पाठांतर किया है वह अंक देकर नीचे लिखा है ।

(१) शुभमें (२) पृथ्वीराज (३) रंतभौर (४) सुखअवदात (५) कृतचंद (६) पष्टम (७) साहिसे सब (८) दिव्य (९) अखिल (१०) मनसा (११) श्रीसूरदासके विषयमें ग्रंथके अन्त में लिखा जायगा ।

एकसौ अठारह पदकी टिप्पणीमें लिखा है कि ग्रंथके अंतमें सूरदासके विषयमें लिखा जायगा अतएव यहाँ इस समय मुझे जहाँतक सूरदासके विषयमें लेख मिले हैं उन सबोंको यहाँ प्रकाश करता हूँ । भारतेन्दु हरिश्चन्द्र जीने चरितावली और सूरशतक पूर्वार्द्धमें जो लिखा है उसे छोड़ देता हूँ । सूरदासके समयसे अनेक कवियोंका समय निर्णय होगा ।

रामरसिकावली—महाराज रघुराजसिंहकृतसे—

दोहा—सूरदासजी जग विदित, श्री उद्धव अवतार । कथा पुराणांतर कथित, वर्णन करो उदार ॥१॥

चौपाई—जब मथुरामें श्रीनंदलाल । गोपिनको विज्ञान विशाला ॥ १ ॥

सादर करन हेतु उपदेश । पठयो उद्धव गोकुल देश ॥ २ ॥

तहँ गोपिन पर प्रेम परेपी । उद्धव बोले ज्ञान विशेषी ॥ ३ ॥

धारि भक्तिहरि निज उरमाहीं । आवत भे पुर मथुरा काहीं ॥ ४ ॥

राखि भाव उर गोपिन केरो । लख्ये संग हरि चरित घनेरो ॥ ५ ॥

तब उद्धवको श्री यदुराया । बदरीनाथ कान्ह पठवाया ॥ ६ ॥

यह सुवासना ऊधवके तब । रही आय ब्रज एक बार कब ॥ ७ ॥

गोपिनको अनूप अनुरागा । हरिलीला जो ब्रज सब जागा ॥ ८ ॥

सो रसनाते वर्णन करहूँ । बर संतोष हियेपर धरहूँ ॥ ९ ॥

कीन्हें यही वासना काही । उद्धव प्रगट भये कलि माहीं ॥१०॥

सूरदासते संत शिरोमणि । विरचन सवालाख पदको गुणि ॥११॥

करि संकल्प मुदित मनसामें । हरि लीला विभूति हू तामें ॥१२॥

दोहा—वरण्यो तिमि गोपीनको, जो यथार्थ अनुराग । विरचि कृष्णपद सूर बदि, सहस पचीस अदाग ॥

पूरण कीन्हों सूर प्रण, सूरश्याम जहँ होय । सो पद विरच्यो कृष्णही, जानि लेहु सब कोय ॥३॥

महाघोर कलिकाल महँ, जन्म लेब दुख दूर । दृग विकार गुणि याहिते, सूरदास भे सूर ॥४॥

चौपाई—जन्महिते हैं नैन विहीना । दिव्य दृष्टि देखिहिं सुखभीना ॥ १ ॥

लीन परीक्षा सो तेहि नारी । एक समै अस वचन उचारी ॥ २ ॥

प्रिय मोहिं सकल ग्रामकी वामा । मोसों कहाहिं वचन असि वामा ॥ ३ ॥

तू केहि देखन करहि श्रृंगारा । तेरो पति तो अंध अपारा ॥ ४ ॥

सुनिकै सूर कही यह बानी । आजु श्रृंगार भली विधि ठानी ॥ ५ ॥

बहु इच्छिनको लै निज संग । बैठहु आइ इहां सउमंगा ॥ ६ ॥

भूषण तुव बिगरो जो होई । देहैं हम बताइ सत सोई ॥ ७ ॥

सुनि यह सूरदासकी नारी । सब भूषण निज अंग सँवारी ॥ ८ ॥

बंदी देत भये नहिं भाला । सूर बोलायो ढिग तब बाला ॥ ९ ॥

तिय भूषन सब अंग निहारी । सूरदास बोल्यो सुपधारी ॥ १० ॥

बंदी भाल दियो क्यों नांही । लखि प्रभाव यह सूर तहाँही ॥ ११ ॥

कीन्हें सकल लोग जय शोरा । ख्यात बात भै जग सब ठोरा ॥ १२ ॥

दो०—हैं विरक्त संसारते, दिव्यदृष्टि हरि ध्यान । सूरदास करते रहे, निशिदिन विदित जहान ॥ १ ॥

सूरदास इतिहास बहु, परचै अहैं अनेक । जानि लेहु सब संतजन कहौं नेक सविवेक ॥ २ ॥

कवित्त—कविकुल कोक कंज पाइकै किरिनि काव्य विकसे चिनोदित है नेरे और दूरके ।
सूखिगो अज्ञानपंक मन्दभो मयंक मोह विषय विकार अन्धकार मिटै कूरके ॥ हरिकी विमुखताइ
रजनी पराई गई मूक भये कुकवि उलूक रस झुकके । छाये तेज पुहुमिमें रघुराज रुर हरिजन
जीव सूर सूर उदय होत सूरके ॥ १ ॥ मतिराम (१) भूषण (२) बिहारी (३) नीलकंठ (४)
गंग (५) बेनी (६) शंभु (७) तोष (८) चिंतामणि (९) कालिदास (१०) की । ठाकुर (११)
नेवाज (१२) सेनापति (१३) शुकदेव (१४) देव (१५) पजन (१६) घनआनंद (१७)
घनश्यामदास (१८) की ॥ सुंदर (१९) मुरारि (२०) बोधा (२१) श्रीपति हूं (२२)
दयानिधि (२३) युगल (२४) कविंद (२५) त्योंगोविंद (२६) केशवदास (२७) की । भनै
रघुराज और कविन अनूठी उक्ति मोहिं लगी जूठी जानि जूठी सूरदास की ॥ २ ॥ अखिल अनूठी उक्ति
युक्ति नहिं झूठी नेकु सुधाहूं ते सरस सरस को सुनावतो । उद्धत विराग भाग सहित अनेक राग
हरिको अदाग अनुराग को सिखावतो ॥ जगत उजागर अमलपद आगर सु नट नागर ध्याय सूर-
सागर को गावतो । भाषै रघुराज राधा माधवको रास रस कौन प्रगटावतो जो सूर नहिं आवतो
॥ ३ ॥ साह सुन्यो सुरनसे बेगही बुलायो दिछी पूछयो कौन हो तू सूर कह्यो पूछो बेटीसों ।
साह कह्यो जानो कैसे सूर कह्यो जंच तिल साह पुछवायो सो तुरत एक चेटीसों ॥ कन्या कह्यो
कहत तुरंत ही शरीर छूटी हठपरे कहि तनु तजि हरि भेटीसों । भनै रघुराज साह सूर पद शिर-
नाय पूछ हरिदास मोरि भवभीत भेटीसों ॥ ४ ॥ गोकुल में रास होत राधा जूने मान कीन्हों हरि
मान मोरिबे को उद्धवे पठायो है । जानि गुरुमान कह्यो नेसुक कटुक बैन दीनी वृषभानुसुता
शाप को पछायो है ॥ धारिये मनुज तनु तारिये जगत जाइ सकल सुनाइये जो रास रस भायो
है । भनै रघुराज सोई उद्धव अवनिमें आइ रसिक शिरोमणि सो सूर कहवायो है ॥ ५ ॥

भारतेन्दु हरिश्चन्द्र ने 'शिवसिंहसरोज' पढनेके समय में जिन जिन कवियोंके विषय में कुछ लिखा है उनमें अकबर और गंगके इतिहास पर अपनी राय नाम मात्रको लिखी है उसे नीचे प्रकाश करता हूं ।

अकबर ।

अकबर बादशाह दिछी सं० १५८४ में हुए इनके हालात में अकबरनामा १ आईन अकबरी २ तब काहत अकबरी ३ तारीख अबदुल्कादिर बदाऊनी ४ इत्यादि बड़ी बड़ी किताबें लिखी गई हैं जिनसे इस महाप्रतापी बादशाहका जीवनचरित्र साफ साफ प्रगट होता है यहां केवल हमको उनकी कविता का वर्णन करना अवश्य है सो हमको कोई ग्रंथ इनका नहीं मिला दो चार कवित्त जो मिले हैं सो हमने लिखा है । जहांगीर बादशाहने अपने जीवनचरित्रकी किताब तुजुक जहांगीरीमें लिखा है कि अकबर बादशाह कुछ पढे लिखे न थे परंतु मौलाना अबदुल्कादिरकी किताब से प्रगट है कि अकबर शाह संस्कृत महाभारतको एक रात आपही उल्था कराने बैठे और सुल्तान मोहम्मद थानेसरी और खुदमौलाना बदायूनी और शेख फैजीने जहां जहां कुछ आशय छोड दियाथा उसे

* अंकवाले कवियोंका वर्णन आगे किया जायगा ।

फिर तर्जुमा होनेको हुकुम दिया इनके समय में नरहरि १ करन २ हाल ३ खानखाना ४ बीस्बर ५ गंग ६ इत्यादि बड़े बड़े कवि हुए हैं परंतु खास जो कवि नौकर थे उनके नाम इस सवैसे प्रगट होंगे । सवैया—पूषी प्रसिद्ध पुरंदर ब्रह्म सुधारस अमृत अमृत वानी । गोकुल गोप गुपाल गणेश गुणी गुणसागर गंग सु ज्ञानी ॥ जोध जगन्नज में जगदीश जगामग जैत जगत है जानी । कोर अकबर सैन कथी एतने मिलिकै कविता जु बखानी ॥ १ ॥

श्रीगोसाईं तुलसीदास तौ दरबार में हाजिर नहीं हुए ❀ सूरदास जी औ बाबा रामदास उन के पिता गानवालोंमें नौकर थे ः जैसा कि आईन अकबरी में लिखा है केशवदास जी उस समय में इनके मंत्री श्रीराजा बीरबरके दरबार में हाजिर हुए थे जब इन्द्रजीत राजा उडछा बुंदेलखंडी प्रवीन राइ पातुरीके लिये बादशाही कोपमें था ।

दोहा—जाको यश है जगतमें, जगत सराहे जाहि । ताको जीवन सफल है, कहत अकबर शाहि ॥ १ ॥

गंग ।

गंगकवि (गंगाप्रसाद ब्राह्मण एकनौर जिला इटावा अथवा बंदीजन दिल्लीवाल) सं० १५९५ में हुए. गंगकविको हम सुनते रहे कि दिल्लीके बंदीजन हैं और अकबर बादशाहके यहां थे जैसा किसी कविने बंदीजनोंकी प्रशंसा में यह कवित्त लिखा है ।

कवित्त—प्रथम विधाताते × प्रगट भये बंदीजन पुनि पृथु यज्ञ ते प्रकाश सरसात है ।

माने सूत शौनकन सुनत पुराण रह यशको बखाने महासुख बरसात है ॥

चंद्र चौहानके केदार गोरी साह जूके गंग अकबरके बखाने गुण गात है ।

काग कैसे मास अजनास धन भाटनको लूटि धैर जाको खरा खोज मिटि जात है ॥ १ ॥

परंतु अब जो हमने जांचा तौ विदित हुआ कि गंग कवि एकनौर गांउ जिला इटावाके ब्राह्मण थे जब गंग मरगये हैं और जैनखाँ हाकिमने एकनौर में कुछ जुलुम किया तब गंगजीके पुत्रने जहाँगीर शाहके यहाँ यह कवित्त अरजीके तौरपर दिया है । जैनखाँ जुनारदार मारे एकनौरके, । जुनारदार फारसीमें जनेऊ रखनेवालेका नाम है लेकिन खास ब्राह्मणहीको जुनारदार कहते हैं खैर जो हो हम को इस बातमें बहुत लिखनेसे कुछ मतलब नहीं गंगजी महान् कविथे राजा बीरबलने गंगको इस छप्पयमें (भ्रमर भ्रमत) एक लक्ष रुपया इनाम दिया इसी प्रकारसे अकबर, जहाँगीर, बीरबर खानखाना, मानसिंह सवाई इत्यादि सबोंने गंगको बहुत दान मान दिया है ।

भक्तविनोद—कवि मियाँसिंह कृतसेः—

दो०—करन विमल मन हरन तम, दमन त्रिविध दुख दोष । भक्ति महातम करहुँकल, कथन ललित प्रदमोष नाशन कुमति कृतांत भय, भासन भानु प्रबोध । सुमति बिकासन भक्तजन, दलन मदन मदक्रोध

चौपाई—कृष्ण दैव जब जनन उवारा । मथुरा लीन ललित अवतारा ।

किए कृपालु चरित जस चाह । सो मनहरन विदित संसाह ॥ १ ॥

तब यादव इक भक्त प्रवीना । कृष्ण सरोज चरण मन लीना ।

सूर नयन बर वंश उजागर । उपज्यो भक्त सृष्ट गुणसागर ॥ २ ॥

* श्रीतुलसीदासजीका काल यह नहीं है । हरिश्चंद्र ः श्रीसूरदास कहीं नौकर न हुए ।

हरिश्चंद्र सूरदास जीके पद से मिलाना । हरिश्चंद्र ।

सखा पुनीत मीत व्रतधारी । मन वच कर्म कृष्ण हितकारी ।
 जब मथुरा तजि करत पयाना । द्वारावती आय भगवाना ॥ ३ ॥
 ते किमि चंचरीक बड भागी । सकहिं सरोज चरण प्रभु त्यागी ।
 भक्ति प्रेम कल नवल उमंगा । आयो दीनदयालु कर संगी ॥ ४ ॥
 यद्यपि आनंद भवन प्रसाद । ताके तहाँ सुलभ सब साधू ।
 पै निवास बृन्दावन चारू । बिहरन कुंज गलिन मनहारू ॥ ५ ॥
 कृष्ण संग नित नवल विलासा । सो न पलक कल बिसरत तासा ।
 तन मथुरा बृन्दावन मनुआं । लग्यो रहत निशि दिवस अननुआं ॥ ६ ॥
 करि स्मरण कल कुंजन शोभा । होत प्रबल जिय यादव छोभा ।
 प्रभु सन बार बार अस बरनी । नम्रत बिनय दिवस निशि करनी ॥ ७ ॥
 कृपानिकेत जनन सुखदाई । तुव सन कवन दिवस शुभ जाई ।
 शुचि भंडीर विपिन मनहरना । रविजा कुंज स नख नग धरना ॥ ८ ॥
 आन ललित लावण्य तनीके । देहु दैव परमप्रिय जीके ।
 जबलगि जियन नाथ संसारा । सो प्रमोद किमि बिसरन हारा ॥ ९ ॥
 अस प्रकार उत्कंठित रहना । बृन्दाविपिन अहिर निशि कहना ।
 काल पाय तब भक्त उबारा । लिये संग यादव परिवारा ॥ १० ॥

दो०—करिकौतुक करुणायतन, निज विकुंठ कलधाम । गए गमनकरि भवनमुद, रमारमन अभिराम ॥
 चौपाई—ते यादव हरिभक्त सुजाना । तहाँपिजोरि थुगल निज पाना ।

बृन्दावन दरशन अनुरागा । नम्रत बिनय करन अस लागा ॥ १ ॥
 चलन होहिं तुव दीन सनेह । कब कृपालु बृन्दावन तेहू ।
 सो प्रणय कल कुंज सुहाए । दीननाथ मोरे मनभाए ॥ २ ॥
 बिसरत सो न भक्त सुखदाई । एकबार प्रभु देहु दिखाई ।
 तासु कथन सुनि त्रिभुवनराई । बोले वदन वचन मुसकाई ॥ ३ ॥
 सुनहु मीत पूरवत ताहीं । मोर गमन बृन्दावन माहीं ।
 अब न होहिं पय भक्त सुजाना । मैं परिवार सहित निज नाना ॥ ४ ॥
 कुंज कुंज राधा युत चारू । तहाँ निवास करहुँ मन हारू ।
 ते मथुरा बृन्दावन जोहीं । जन वैकुंठ अधिक प्रिय मोहीं ॥ ५ ॥
 जबते तज्यो मनोहर नगरी । कलित कुंज लीला निज सगरी ।
 तबते यद्यपि मोर सुहावा । इह वैकुंठ अखिल सुख छावा ॥ ६ ॥
 तद्यपि तिहि समान सुखदाई । उपज्यो नहिं न तनक सुखभाई ।
 जिमि वाराणशि शंकर काहीं । विदित विश्व प्रिय मानस माहीं ॥ ७ ॥
 तजत न तासु दैव त्रिपुरारी । तिमि मथुरा मोहिं प्राणन प्यारी ।
 अजहुँ स्मरण होत मन भाई । ललित बाललीला सुखदाई ॥ ८ ॥

दो०—मृत्तिका भक्षण पूतना, शकट विभंजन मित्र । अर्जुन जयमल मदहरन, अघ बकबदन चरित्र ॥
 कालीपद क्षय करन पुनि, मोह नलन भवदेन । बृन्दावन बंसीबजन, चरन चारु बरधेन ॥ २ ॥

धेनुक वधन प्रलंब पुनि, तृणावर्त वश काल । बृंदावन रक्षाकरन, नग नख धरण रसाल ॥३॥
 रचन रास लीलादि पुनि, वचन सखन सखिसंगाकेसि विध्वंसन नंदकल, त्रातन हृदय उमंग ॥
 दावानल कर शमन पुनि, ग्वालन सन मन चाउ । वन वन विहरन सजन सुन, इनन कंसरिपु राउ ॥५॥
 जननि जनक वंधन मुकत, चरित चारु इत्यादि । जब जब होत स्मरण इह, उपजत हृदय दुखादि ॥

चौपाई—सदा रहत मानस उतकंठा । तजि निज रुचिर धाम वैकुंठा ।

पुनि कब वपुष पूर्ववत धारी । अद्भुत करहु चरित मनहारी ॥ १ ॥

जे जन भक्ति निरत बड भागे । मोर प्रेम पावन रस पागे ।

हृदय कुतर्क कपट सब खोई । मोर रुचिर लीला कृत जोई ॥ २ ॥

यथा विधान रास विरचाई । गायन श्रवण करहिं मन लाई ।

सो साक्षातविश्व शुभ चारी । मोर स्वरूप भक्त व्रत धारी ॥ ३ ॥

मथुरा धारि जन्म त्रिय जोई । मोर ललित उत्सव पर होई ।

सो मोहिं यशुमति मातु समाना । सुनहु आन अब भक्त सुजाना ॥ ४ ॥

जे नर मोर जन्म दिन लेखी । धारि रुचिर व्रत भक्ति विशेषी ।

बालरूप मम पूजन करहीं । आवागमन सहज श्रम हरहीं ॥ ५ ॥

करि प्रवेश मथुरापुरि माहीं । जो जन करहिं रटन मोहिं काहीं ।

भक्त मोर सो प्राणन प्यारु । ताकर तरन सुमन संभारु ॥ ६ ॥

अब तोहिं जोपि भक्तबडभागा । मथुरा गमन प्रीति अनुरागा ।

तो अब सुनहु कथन कल मोरा । संतत भक्त सृष्ट हित तोरा ॥ ७ ॥

जेहि ते तहां सजन तुव जाई । सोउ लेहु सुख कीरति पाई ।

अस कहि कृष्ण दैव भगवाना । लागे तासु प्रबोधन ज्ञाना ॥ ८ ॥

कलीकाल सन्ध्या अवसाना । मथुरा प्रांत भक्त गुणखाना ।

सुभ्रत विप्र वंश उपजाई । मथुरा मोर ललित पुर आई ॥ ९ ॥

मोर जन्म लीला गत पारु । करत करत गायन व्रत धारु ।

सोउ अखंड सुशय सुख जोहीं । होहिं भक्तजन प्रापत तोहीं ॥ १० ॥

बहुरि मोर लीला मनभायन । प्राकृत वदन सफुट जब गायन ।

कीन तुमहुं संगीत प्रकारु । सुभ्रत ललित प्रेम रस सारु ॥ ११ ॥

सुनत लोक कलिकाल मैझारा । हुइहै भक्ति निरत संसारा ।

बढहि मोर चरणन अनुरागा । उधरहिं तुव प्रसाद बड भागा ॥ १२ ॥

पै तुव जन्म अन्ध दृग हीना । जननि जनक अस देखि प्रवीना ।

दोहा—पालहिं जन समान कछु, सुत सनेह वश तोहिं । आन शंक बांधव सुहृद, सो न करहिं हितकोइ ॥

चौपाई—केवल जननि करहिं तुम सेवा । अस कहि बदन भक्त द्रुम देवा ।

भए बिराम कृष्ण घन बरना । तब प्रणाम करि यादव चरना ॥ १ ॥

कलि सन्ध्या कर अंत प्रवीना । सोचन लग्यो भक्ति मन लीना ।

सो जब समय आय नियराना । तजि विकुंठ यादव गुणखाना ॥ २ ॥

मथुरा प्रांत विप्र बर गेहा । भा उत्पन्न भक्त हरि नेहा ।

जन्म अंध दृग ज्योति विहीना । जननि जनक कछु हर्ष न कीना ॥ ३ ॥
 रहे मौन बांधव समुदाई । करहि प्रीति केवल इक माई ।
 अष्ट वर्ष कर जानि सुहावा । यज्ञोपवीत जनक तब पावा ॥ ४ ॥
 भयो प्रसिद्ध नगर अभिरामा । सूरदास ताकर अस नामा ।
 अवसर एक मातु पितु संग । आन लोक पुर प्रेम उमंगा ॥ ५ ॥
 कृष्ण जन्म पुरि दरशनलागी । आए सकल सदन निज त्यागी ।
 करि यात्रा विधिवत अनुरागे । जब निज सदन चलन सब लागे ॥ ६ ॥
 सूरदास तब कहत उचारी । मैं अब इहां सदन नगधारी ।
 कछुदिनकरहुँललितनिजबासा । कृष्णप्रसाद विगत श्रम त्रासा ॥ ७ ॥
 तुव निज गवहुँ सदनशुभ काहीं । चिंता मोर करहु कछु नाहीं ।
 सुनिअसजननिजनकतहिबानी । सुत सनेह निज मानसबानी ॥ ८ ॥
 रुदन करत अस वचन उचारे । बसत अंध दृग युगल तुम्हारे ।
 करहि कवन भोजन पट दाना शिशु निदान तुव देश बिराना ॥ ९ ॥
 कसतजिजाहि सुवनपितु माता । काहु न देखि परत तुव त्राता ।
 सुनिअसजननिजनकमुखबानी । कृष्ण भरोस सूर जिय मानी ॥ १० ॥

दो०—बोल्हो अभय प्रसन्न मन, बदनवचन सुखदान । तुवजियकरहुनसोच कछु, मोहिंविदेश असजान ॥

चौपाई—मोरे कृष्ण देव भगवाना । करनहार कल पालन त्राना ।
 अन्ध दीन बलहीन न कोहीं । पोषन करत दैव प्रभु सोहीं ॥ १ ॥
 शरन चरन दुख हरन करीके । परे कोटि अस मोर सरीके ।
 दीनबन्धु जन दीननपाला । दीननाथ प्रभु दीनदयाला ॥ २ ॥
 दीनहरन भय दीन उबारन । दीन सुखद दुख दीन निवारन ।
 अस प्रकार जब दीन सहाए । विदित पुराण वेद श्रुति गाए ॥ ३ ॥
 मोरे कसन होहिं तब मय्या । जानि दीन दृग हीन सहय्या ।
 तब अस सुनत वचन वर ताहु । साधु जठर दाया वश काहु ॥ ४ ॥
 बोल्हो सूर मातु पितु काहीं । तुव न करहु चिन्ता जिय माहीं ।
 हर्ष जाहु सु भ्रम निज गेहु । तुव दृग हीन बाल बर एहु ॥ ५ ॥
 मोरे बसहि सदन सुख मानी । अस कहि गहत संत शुभ पानी ।
 चल्हो प्रसन्न लेत कल भवने । उत पितु मातु सदन निज गवने ॥ ६ ॥
 साधु सनेह प्रीति अवलोकी । भई प्रसन्न मातु गत शोकी ।
 सूरदास मानस अनुरागा । प्रसुदित बसन संत गृह लागा ॥ ७ ॥
 पूरब चरित कृष्ण कल गायन । रह्यो सुनत सादर मनभायन ।
 आपु प्रेम युत भक्ति उमंगा । वैष्णव संत जनन कर संग ॥ ८ ॥
 नृत्य गीत गायन करि चारु । कृष्ण चरित्र विमल मन हारु ।
 प्रभु अद्भुत लीला जिमि कीनी । आदि उपांत श्रवन करि लीनी ॥ ९ ॥
 तासु प्रसाद कृष्ण भगवाना । सो पूरब संचित निज ज्ञाना ।

अनुभव भयो विदित सब भास्यो । दैवचरित लीलादि बिलास्यो ॥ १० ॥

दो०—भयो छकते उनमत्तवत, प्रेमासवकरिपान । कृष्णचरित पदनवल नित, निज विरचितरुचिमान ॥ १॥

चौपाई—अस प्रकार कृत नवल सुहाई । भक्त सृष्ट कल कुंजन जाई ।
करि प्रति दिवस मधुर स्वर गायन । भयो कृष्ण पद भक्ति परायन ॥ १ ॥

मथुरा निवसि सुयश सुख लय्यो । सूर विदित सब देशन भय्यो ।
निर्मत तास ललित पद पावन । संसृति गाय लोक मनभावन ॥ २ ॥

वैष्णव भए भक्ति रसनागर । भक्त प्रधान सुयश वन सागर ।
सूरदास हरि गुण गण गाते । जहाँ जहाँ फिरहिं भक्त मदमाते ॥ ३ ॥

तहाँ तहाँ भक्ति विवश अनुरागे । पाछे फिरहिं तासु प्रभुलागे ।
सूर चरित पाछिल भगवाना । ग्वाल कोलि वन धेनु चराना ॥ ४ ॥

निज अनुभव इत्यादि सुहाए । देखत रहत भक्ति सरसाए ।
ब्रह्मानंद मगन दिन राती । प्रेम भक्ति कछु कही न जाती ॥ ५ ॥

दो०—एक दिवस मारगचलत, विधुन कूपकल कोथ । दृगविहीन चीन्ह्यो न कछु, लग्यो भक्तच्युत होय

चौपाई—तब भगवान भक्त रखवारे । अद्भुत गोप वेष निजधारे ॥
गहत करन कर तुरत मुरारी । भक्त कूप च्युत लीन निवारी ॥ १ ॥

करि कर हरण त्रास कर केरा । सूरस परश लेत जिय हेरा ॥
इहकर जानि परत नर नाहीं । करि बिचार करुणानिधि काहीं ॥ २ ॥

करते लीन पकरि कर संग । कहि स वचन मन मोद उमंगा ॥
अब न तजहुँ विन साँच बखाने । तब भगवान वदन सुसकाने ॥ ३ ॥

सूर करन कर करि बरजोरा । चले छुडाइ भक्त चितचोरा ॥
अस जिय जानि दैव चतुराई । ब्रह्मानन्द सूर सुखपाई ॥ ४ ॥

मानत भयो भूरि निज भागा । करसों कर कृपालु जब लागा ॥
गदगद गिरा प्रेम दृग वारी । बोल्यो बदन बचन मनहारी ॥ ५ ॥

बंदहुँ बार बार प्रभु तोहीं । जो अस निबल जानि जिय मोहीं ॥
केशी कंस असुर मद गंजा । लीन छुडाय सबल कर कंजा ॥ ६ ॥

दो०—काह भयो करते छुटे, कर्णधार भवसिंधु । मनते छूटन कठिन जन, भक्त कुमुद उर इंदु ॥ १॥

अबतो बलकर तोरि कर, चले निबल कर मोहिं । पै मनते टूटों न जब, तब देखों प्रभु तोहिं ॥ २॥

चौपाई—सुनि कटाक्ष मय वचन सुहाए । सूरदास कर प्रभु मनभाए ॥
हपैं दीनदयालु भगवाना । कीन स्पर्स दृगन तिहि पाना ॥ १ ॥

तत्क्षण अंग नयन युग तासा । असल विमल कल ज्योतिप्रकासा ॥

पाय दिप्ति अस सूर सुजाना । सन्मुख कृपासिंधु भगवाना ॥ २ ॥

कलित कंजलोचन घनवरना । आनन हृदय भक्ततमहरना ॥

चारु लिलाट खोर श्रीखंडन । माल जयंति जनन मनमंडन ॥ ३ ॥

यज्ञोपवीत पीतपट राजा । निज छवि कोटि मदनमद लाजा ॥

चितवनि चारु मुनिन मनमोहन । धृत गोपाल वेष बर सोहन ॥ ४ ॥

सूरति विमल बाल बल भय्या । निरत प्रवर परचारन गय्या ॥
 सूर विलोकि रूप मनहरना । परचो दंडवत चरणन धरना ॥ ५ ॥
 सुमिरि कृष्ण जब शीश उठाया । कीन तुरंत मुग्ध प्रभु माया ॥
 जानत भयो सूर मनमाहीं । गोप बाल नैदनंदन काहीं ॥ ६ ॥
 लग्यो बहुरि अस वचन उचारन । तुमहुँ कूप च्युत कीन निवारन ॥
 भयो सहाय अंध तकि मोरा । अहो कीन उपकार न थोरा ॥ ७ ॥
 बंदहु बार बार अब तोहीं । कीन्ह्यो कूप त्रास गत मोहीं ॥
 अब वृतांत निज देहु सुनावा । केहि ते आव कवन कित जावा ॥ ८ ॥
 मोह विवश अस तासु निहारी । बोले गोप वेष गिरिधारी ॥
 मथुरा बसहुँ गोपसुत भय्या । आवा विपिन चरन हितगय्या ॥ ९ ॥
 तोरे देखि भक्त दृग हीना । कूप उहाँ निवरन चुत कीना ॥
 अब तुमजाहु सदनसुखमाना । मै इत करहुँ विपिन निज प्याना ॥ १० ॥

दो०-अस कहिबत्सलभक्त प्रभु, कृष्णदलनदुख कूरो दुमन ओट करुनायतन, गण कछुकजबदूर ॥ १ ॥

चौपाई-तब दर्शन हित सूर सुजाना । पाछिल चलयो वेग अकुलाना ॥

गवन्यो कहाँ बाल मृदु अंगा । हरण ललित छवि कोटि अनंगा ॥ १ ॥

इत उत फिरहिं विथित मनमाहीं । आवत दृष्टि बाल प्रभु नाहीं ॥

अतिशय क्लेश सूर तब पावा । पूँछत पथिक देखि जित आवा ॥ २ ॥

को अस बरन श्याम मृदु चारु । वेत्रपानि गय्यन चरवारु ॥

कामर कन्ध माल बन सोहा । देखा तुमहुँ बाल मन मोहा ॥ ३ ॥

सुनतहि कथन पथिक इहि भाँती । इह कस कहत कवन तोहि भाँती ॥

इहाँ न काउ धेनु वनचारी । जाहु सजन निज सदन सिधारी ॥ ४ ॥

सूर सुनत अस पथिक बखाना । आगल चलयो विपिन बिसमाना ॥

खोजत नील जलधवत बरना । गोपबाल कानन मनहरना ॥ ५ ॥

भ्रमत भ्रमत दारुण श्रम पाया । बैठयो अंत व्यथित दुमछाया ॥

तोलो दुरयो सूर निशि छायो । भक्त सूर व्याकुल उठि धायो ॥ ६ ॥

जहँ तहँ लग्यो भ्रमन वन माहीं । खोजत गोपबाल मृदुकाहीं ॥

गति अनन्य अस भक्त जुडाना । गग तद्रूप कृष्ण भगवाना ॥ ७ ॥

पावन भक्ति प्रीति मनमाहीं । तजि न जाहि कानन पुर काहीं ॥

तब निशि स्वप्न रूप मृदु सोई । देखे दिवस गोपसुत जोई ॥ ८ ॥

मंदहास युत भक्त सहय्या । बोले बदन बचन सुखदय्या ॥

इहाँ न भक्त गोपसुत कोई । मैहुँ कीन कौतुक कल सोई ॥ ९ ॥

कीन्ह्यो तुमहिं कूप चुत वारन । बनत गोप बन गय्यन चारन ॥

ज्योति विमल तुव दृगन प्रकासा । भक्त मृष्ट सब मोर विलासा ॥ १० ॥

तुव नयनन इन लीन निहारी । मोर स्वरूप भक्त व्रतधारी ॥

तुव हित देन दरश मन हारु । इह मै कीन चेष निज चारु ॥ ११ ॥

दो०-अब मथुरा तुव गवन करि, मोरचरित गुणगान । करि गायन भवपूर्ववत्, विचरहु अभयसुजान ॥ १ ॥

चौपाई-सुनि प्रभुवचन सुखद अभिरामा । सूर दंडवत करत प्रणामा ॥
 बोल्यो आज धन्य जगदीना । जेहिइन दृगन दरश प्रभु कीना ॥ १ ॥
 मुनि योगिन सुर दुर्लभ जोई । मोरे सुलभ आज जग सोई ॥
 अब न दैव कछु संसृति कामा । एक स्मरण तोर अभिरामा ॥ २ ॥
 मोरे हृदय लालसा छाई । बिसरहिं सो न भक्त सुखदाई ॥
 अरु तुम्हार माया बलवाना । करहिं न मोहिं मुग्ध भगवाना ॥ ३ ॥
 हे कृपालु कल कमल विलोचन । हृदय भक्तजन सोच विमोचन ॥
 जिन नयनन अस रूप तुम्हारा । मैं प्रत्यक्ष प्रभु लीन निहारा ॥ ४ ॥
 तिनसन जगत बिलोकन काहीं । दीनदयालु मोर रुचि नाहीं ॥
 ताते करहु पूर्ववत् मोरे । दृग विहीन बन्दहुँ प्रभु तोरे ॥ ५ ॥
 तुव स्वरूप नित दीन सनेह । देखत रहहुँ दिवसनिशि एह ॥
 करि अस विनय वदन अनुरागा । भयो विराम सूर बडभागा ॥ ६ ॥
 बोले कृष्ण भक्त चित चोरा । सूर कथन सब सन्तत तोरा ॥
 होहिं सत्य संशय कछु नाहीं । भाषि वदन अस त्रिभुवन साई ॥ ७ ॥
 भये लुप्त प्रभु भक्त उवारयो । उठे सूर जनु स्वप्न विचारयो ॥
 युगल अंध लोचन निज पायो । प्रभु पद शीश मनाहिं मनभायो ॥ ८ ॥
 निज कल्पित पद पावन चारु । लग्यो करन गायन मन हारु ॥
 उदय अरुण तजि विपिन सिधाए । यमुना तीर भक्त बर आए ॥ ९ ॥
 करि स्नान गुण गण प्रभु गाते । मथुरा आय भक्ति मद माते ॥
 भजन प्रभाव देखि अधिकाई । सादर करहिं लोक सेवकाई ॥ १० ॥

दो०-सबकर हित जिय मानिनिज, द्विज विरक्त संसाररटन कृष्ण गुणगण निरत, सूर भक्त व्रतधार ॥

चौपाई-अवसर एक मलेश सुहावा । विदित दिलीश लोक सब गावा ॥
 संयुत भक्ति प्रीति हरपाए । तासु सूरजन लीन बुलाए ॥ १ ॥
 आवत देखि भक्त अभिरामा । शाह कीन उठि दंडप्रणामा ॥
 सादर शुचि आसन बैठारे । भक्तीपूर्वक वचन उचारे ॥ २ ॥
 तुव यादव प्रभु लोगन गाए । भक्त कृष्ण भगवान सुहाए ॥
 मोर प्रश्न कर दीन सनेह । देहु उतर उरहरहु सँदेह ॥ ३ ॥
 सदन मोर प्रभु अगणित भामा । इकते एक सरस अभिरामा ॥
 तिनहुँ मध्य यादव कुलवारी । ऐहिं कोउ किन भक्त मुरारी ॥ ४ ॥
 सुनि दिलीश अस कथन सुहावा । सूर वदन अस वचन अलावा ॥
 सुनहु धरणिनायक बडभागी । करहुँ कथन कछु तुव हितलागी ॥ ५ ॥
 जिहिते तोर मनोरथ एहा । अबहिं होहि फुर विगत सँदेहा ॥
 इह तुम्हारि संकुल वरनारी । तुमहिं देखि पुनि मोहिं निहारी ॥ ६ ॥
 क्रम ते एक एक अस आई । करहिं गमन इत मारगराई ॥

तिनहुँ मध्य तब कर त्रिय जोई । सो निज सकुच लाज सब खोई ॥ ७ ॥
 मोहिंसन करहिं रुचिर संभाषा । होहिं तुरंत बहुरि मृत तासा ॥
 साह सुनत अस दीन रजाई । महिषी सुनत सकल चलिआई ॥ ८ ॥
 एक एक करि नम्र प्रणामा । चली जात भामिनि निज धामा ॥
 आई एक सबन ते पाछे । पतिप्रिय रूप ललित गुण आछे ॥ ९ ॥

दो०—निरखत सन्मुख हर्षवश, कहिसि वदन मुसकाया । कहिते कीन आगमनतुव, मोर मर्म कछु पाय ॥

चौपाई—देखत कहि स सूर तिहि ओरा । शुभ्रे मोहिं मर्म सब तोरा ॥
 भामिनि सुनत चरण गहि लीने । देखत सबन प्राण तजि दीने ॥ १ ॥
 महिषी आन देखि अस तासा । लागी रुदन करन संभाषा ॥
 साहु व्यथित मानस विसमायो । धरत धीर पुनि बदन अलायो ॥ २ ॥
 बन्दहुँ बार बार अब तोहिं । भगवन करहु कथन सब मोहिं ॥
 को इह रही भवन मम भामा । जहि अस तज्यो वपुष निष्कामा ॥ ३ ॥
 तब पूर्ववत् कथा सुहायन् लागे । सूरदास मुखगायन ॥
 इह मथुरा पुरि वसहि सुहाई । बीर बधू सब लोगन गाई ॥ ४ ॥
 हाव भाव कल निरत परायन । कला प्रवीन परमपटु गायन ॥
 सभा महिंद्र धनक जन जाई । निज प्रभाव गुण लेत रहाई ॥ ५ ॥
 काहु धनाढ्य काल शुभ पायो । पाणिग्रहण निज सुवन रचायो ॥
 इहि कहँ पढ्यो बोलि सन्माना । लाग्यो होन नृत्य कलगाना ॥ ६ ॥
 करि निज कला ललित चतुराई । मूर्छित सभा कीन समुदाई ॥
 तब कोउ आन देशकर राई । इहि नृत गीत देखि चतुराई ॥ ७ ॥
 निज पुर गयो लेत हरषाना । पावा तहाँ विविध सन्माना ॥
 एक दिवस रत नृत्य अगारा । देखि सरुचिर धरणिपतिदारा ॥ ८ ॥
 सजि शृंगार आभरण सोहन । ठाढी मनहु मान रति मोहन ॥
 चारि ओर परिवारत दासी । सेवइ सुखद रूप गुण रासी ॥ ९ ॥
 अस प्रभाव दृग देखि सुहावा । तेहि कर हृदय मनोरथ छावा ॥
 हमहुँ होव इहि सम कस रानी । अस बिचारि मानस सकुचानी ॥ १० ॥
 इन कर भूप पुण्य संसारा । हमहु अधम धिग जनम हमारा ॥
 पुनि देखिस छित पत पटरानी । देत दान दीनन रति मानी ॥ ११ ॥

दो०—धन भूषण पट भक्तियुत, करत सकल सेवकाइ । अतिथि संत आवत सदन, भोजन देहुँ जिवाइ ॥
 हमहुँ करब यदि पुण्य अस, कहत गुणत जियमाहिं । तो पावहुँ संशय नहीं, भूप पतनि पद काहिं ॥

चौपाई—अस प्रकार पावन शुभ तासा । ललित दान रुचि हृदय प्रकासा ॥
 तब तहिं दैवयोग कर आई । ज्वररुज उपज प्रबल दुखदाई ॥ १ ॥
 पुनि पंचत्वभाव कहँ सोई । प्रापत भई व्याधि सब खोई ॥
 धर्म दूत रौरव तेहि डारयो । तहाँ भोग निज कृत अगसारयो ॥ २ ॥
 सुर पुर गवनि बहुरि हरषाती । अपसर नृत्य गीत कलराती ॥

मथुरा भवन भवन भगवाना । जो नृत गीत ललित पुनि गाना ॥ ३ ॥
 कीन्हेसि भक्ति प्रेम सरसाए । तेहि परिणाम अमर पुर पाए ॥
 अरु उपकार देखि नृप रानी । जोतहि हृदय दान रुचिमाना ॥ ४ ॥
 ताहि प्रसाद भवन तुव आई । भोगे विविध भोग सुखपाई ॥
 आजु विदित देखत तुव एहा । मृत वश भई तुरत तजि देहा ॥ ५ ॥
 पै यादव वंशी त्रिय जेहू । रही सो दैव रूप सब तेहू ॥
 कौतुक करन दैव पुर त्यागी । आई धरणि कृष्ण अनुरागी ॥ ६ ॥
 गवनी बहुरि अमरपुर काहीं । रही सो मनुज रूप कछु नाहीं ॥
 अस कहि सूरदास हरषाते । माँगि बिदाय भक्ति मदमाते ॥ ७ ॥
 तब दिलीश सादर धन दीना । भक्त सृष्ट सुइकार न कीना ॥
 हमरे नहिन द्रव्य कछु कामा । तब दिलीश वर्णन अभिरामा ॥ ८ ॥
 धरयो शीश नम्रत कर जोरी । विनय वदन कछु कीन न थोरी ॥
 चले सूर तब होत बिदाए । हर्षत कृष्ण ललित पुर आए ॥ ९ ॥
 अगणित विमलभक्ति सरसावन । विरचित कृष्णचरित पदपावन ॥
 रहे करत गायन संसारा । सकल लोक हित हृदय बिचारा ॥ १० ॥
 पदन प्रबंध सूर जन नागर । बाँध्यो जनहु सेतु भवसागर ॥
 विनु प्रयास कलिकाल मँझारा । तेहि प्रसाद उतरत सब पारा ॥ ११ ॥

दो०—सूर सूर सम विदितजग, सकलकविन शिरमोर । सूर श्याम जेहि भक्ति वश, भए भक्त चितचोर ॥
 जौलौ विचरे धरणि तल, पल न बिसारे श्यामा भए अंत अलचरणकल, कंजकृष्ण अभिराम ॥ २ ॥
 बाबू रघुनाथ सिंह तअल्लुकेदार भदवर ने मुझे १६ दोहे दियेथे उन दोहों में सूरदास के समय-
 के कवियोंके नाम हैं पर कई एकमें मुझे सन्देह है जोहो वे दोहे नीचे प्रकाश किये जाते हैं ।

दो०—सूरदासके समयमें, जोकवि भये महान । उन सबसे बाढिके सबै, इन्हें करत सन्मान ॥ १ ॥
 ओल्लिराम अकबर अगैर, दासकवी करनेश । चतुरविहारी गोपकवि, वनआनंद अमरेश ॥ २ ॥
 आशकरन अजबेस अरु, कादर केशवदास । टोडर गोबिंद जैतकवि, चरण चतुर्भुजदास ॥ ३ ॥
 जीवन केशव ताजकवि, होलराय कवि खेभ । योधा जोर्यसी चंदसखि, कृष्णदास कवि क्षेम ॥ ४ ॥
 अमृत खानखाना जगन, ऊधोराम कर्माल । जमालुदीन जगनन्दकवि, गोबिंददास जमाल ॥ ५ ॥
 जमालुदीन कल्याण कवि, फैजी ब्रह्म फैहीम । अभयराम परसिद्धकवि, बिट्टलविपुल रहीम ॥ ६ ॥
 अमरसिंह वनश्यामहं, दीर्ह नरोत्तमदास । चेतनचंद कविन्द भट, बैरक विद्यादास ॥ ७ ॥
 छितस्वामी भगवतरसिक, छत्र बिहारीलाल । मिश्रगदाधर मानसिंह, लालन मोतीलाल ॥ ८ ॥
 हरीदास हरिनोथकवि, मानराय रघुनाथ । मिश्रगणेश कबीरअरु, लीलधर कविनाथ ॥ ९ ॥
 दामोदर दिलदार कवि, दौलत नागर दास । नंदन हितहरिबंस कवि, सेन नारायणदास ॥ १० ॥
 नीलकंठ नंदलाल कवि, नंददास रसखान । नाभा नरबाहन नरसि, नारायणभट तीन ॥ ११ ॥
 निपटनिरंजन इंद्रजित, पृथ्वीराज को जान । लक्ष्मीनारायण हरी, बलीभद्र को मान ॥ १२ ॥

३ । ४—अगरदास और अगर कवि ।

११—धीर नरिन्द्रभी इनका नाम है ।

विठ्ठलनाथ विशुनाथ कवि, पद्मनाभ परवीन । भगवन्दास मनोहरा, परमानन्द नवीन ॥१३॥
 माणिक्यचंद निर्हालकवि, मुकुन्द सुबार्क बीर । देव दिनेशनदास कवि, तेही तोषी नधीर १४
 श्रीपति यद्यपि भक्तिमें, न्यून न कछुकलखात। तद्यपि कवितामें कहां, समता कछु न दिखात १५॥
 विद्यापति आदिक कविन, जितने भये सुजान । काव्य भावमें सूरसम, तुलसी एकप्रमान १६॥

चौरासीवार्ता—बालकृष्णजीसे ॥

अब श्री आचार्यजी महाप्रभूनके सेवक सूरदासजी गऊघाट ऊपर रहते तिनकी वार्ता ।

सो एकसमय श्री आचार्यजी महाप्रभु अंडेलते ब्रजको पाँउ धारे सो कितनेक दिनमें गऊघाट आये सो गऊघाट आगे और मथुराके बीचा बीच है तहां श्री आचार्य जी महाप्रभु पांवधारे सो गऊघाट ऊपर श्री आचार्य जी महाप्रभु उतरे तहां श्री आचार्य जी महाप्रभु स्नान करिके संध्यावंदन करिके पाककरन को बैठे और श्री आचार्य जी महाप्रभूनके सेवकनको समाज बहुत हुतो और सेवकहू अपने अपने श्रीठाकुर जी की रसोई करन लगे सो गऊघाट ऊपर सूरदास जीको स्थल हुतो सो सूरदास जी स्वामीहैं । आप सेवक करते सूरदास जी भगवदीय हैं गान बहुत आछे करते ताते बहुत लोग सूरदासजीके सेवक भयेहुते सो श्री आचार्य जी महाप्रभु गऊघाट ऊपर उतरे सो सूरदास जीके सेवक देखके सूरदास जीसों जाय कही जो आज श्री आचार्य जी महाप्रभु आप पधारे हैं जिनने दक्षिणमें दिग्विजय कियो है सब पंडितनको जीते हैं भक्तिमार्ग स्थापन कियो है सो श्री वल्लभाचार्य यहाँ पधारे हैं तब सूरदास जीने अपने सेवकनसों कह्यो जो तू जायके दूर बैठि जब आप भोजन करिके विराजें तब खबर करियो हम श्री आचार्य जी महाप्रभूनके दर्शनको जायेंगे सो वह तनक दूर जाय बैठयो तब श्री आचार्य जी महाप्रभु आप पाक करत हुते सो पाक सिद्धि भयो तब श्री ठाकुर जीको भोग समझ्यो पाछे समयानुसार भोग सराय अनोसर करके महाप्रसाद लै के श्री आचार्य जी महाप्रभु गादी ऊपर बिराजे तहां सब सेवकहू पहुँचिके श्री आचार्यजी महाप्रभून के आसपास आय बिराजे हैं तब वह सूरदासको सेवक आयो सो सूरदास सों कही जो श्री आचार्यजी महाप्रभु विराजे हैं तब सूरदास जी अपने स्थल ते आय के श्री आचार्य जी महाप्रभून के दर्शन को आये तब श्री आचार्य जी महाप्रभूनने कह्यो जो सूर आवो बैठो तब सूरदास जी श्री आचार्य जी महाप्रभून को दर्शन करिके आगे आय बैठे तब श्री आचार्यजी महाप्रभूनने कह्यो जो सूर कछु भगवत् यश वर्णन करो तब सूरदासने कही जो आज्ञा तब सूरदास जी ने श्री आचार्य जी महाप्रभून के आगे एक पद गायो सो पद ।

राग धनाश्री—हैं हरि सब पतितन को नायक ॥ कोकरि सके बराबर मेरी इते मानको लायक ॥१॥

जो तुम अजोमलसोंकीनी जो पाती लिखपाऊं। होयविश्वास भलोजिय अपने औरहु पतित बुलाऊं२
 सिमिट जहां तहां ते सब कोऊ आय जुरे एकठौर। अबके इतने आन मिलाऊं बेर दूसरी और ॥ ३ ॥
 होडा होडी मन हुलास करि करे पाप भरिपेट ॥ सबहिनले पाँयन तर परिहों यही हमारी भेंट ।

९९—प्रवीनराय पातुरी ।

१००—भगवानदास

* अंक वाले कवियोंका आगे वर्णन किया जायगा ।

ऐसी कितनीक बनाउंप्राणपतिसुमिरनहैभयोआडो।अबकीबेरनिवारलेउप्रभु सूर पतित काटाडो।
फिर दूसरो और पद गायो सो पद ।

रागधनाश्री-प्रभुमें सब पतितनको टीको । और पतित सब द्यौस चारके मैतो जन्मतहीको ॥ १ ॥
वधिक अजामिल गणिका तारी और पूतनाहीको । मोहिछाँडि तुम और उधारे मिटेझूल कैसेजीको
कोऊ न समर्थ सेव करनको खँचकहतहौलीको । मरियतलाज सूरपतितनमेंकहत सबनमेंनीको
ऐसो पद श्रीआचार्यजी महाप्रभूनके आगे सूरदासजीने गायो सो सुनिके श्रीआचार्यजी
महाप्रभूनने कह्यो जो सूरहैंके ऐसो काहेको विधियातहै कछु भगवत् लीला वर्णन करु तब सूर-
दासने कह्यो जो महाराज हों तो समझत नाही तब श्री आचार्यजी महाप्रभूनने कह्यो कि जा स्नान
करिआउ हम तोको समझावेंगे तब सूरदासजी स्नान करिआये तब श्रीमहाप्रभुजीने प्रथम सूर-
दासको नाम सुनायो पाछे समर्पण करवायो और दशमस्कन्धकी अनुक्रमणिका कही सो ताते
सब दोष दूर भये ताते सूरदासजीको नवधाभक्ति सिद्धभई तब सूरदासजीने भगवत् लीला वर्णन
करी अनुक्रमणिकाते सम्पूर्ण लीला फुरी सो क्यों जानिये सो दशमस्कन्धकी सुबोधनीजी में
मंगलाचरणको प्रथम कारका कियेहैं सो यह श्लोक-सूरदासजीने कह्यो सो-श्लोक ।

नमामि हृदये शेषं लीलक्षीराविशायिनम् । लक्ष्मी सहस्रलीलाभिः सेव्यमानं कलानिधिम् ॥१॥
और ताही समय श्रीमहाप्रभूनके सन्निधि पद किये सो पद ।

रागबिलावल-चकई री चलि चरण सरोवरि जहाँ न प्रेम बियोग । यह पद सम्पूर्ण करिके सूर-
दासजीने गायो सो यह पद दशमस्कन्धके मंगलाचरणकी कारकाके अनुसार कियो सो यामें
कह्योहैं जो तहाँ श्री सहस्र सहित नित क्रीडत शोभित सूरदासने या भाँति पद किये ताते जानी
जो सूरदासको सम्पूर्ण सुबोधनी स्फुरी सो श्रीआचार्यजी महाप्रभूनने जान्यो जो लीलाको अभ्यास
भयो पाछे सूरदासजीने नन्दमहोत्सव कियो सो श्रीआचार्यजी महाप्रभूनके आगे गायो सो पद ।
राग देवगंधार-ब्रज भयो महर के पूत जब यह बात सुनी ।

सो यह श्रीआचार्य जो महाप्रभूनके आगे गायो सो सुनके श्री आचार्यजी महाप्रभू बहुत प्रसन्न
भये और अपने श्रीमुखते कहे जो सूरदास मानों निकटही हुते पाछे सूरदासजीने अपने सेवक
किये हुते तिन सबनको नाम दिवायो पाछे सूरदासजीने बहुत पद किये पाछे श्री आचार्य जी
महाप्रभूनने सूरदासजी को पुरुषोत्तम सदसनाम सुनायो तब सूरदासजीको संपूर्ण भागवत स्फुर्तना
भई पाछे जो पद किये सो भागवत प्रथमस्कंधते द्वादशस्कंध पर्यंत (ताई) किये ताते वे सूरदास
जी श्रीआचार्यजी महाप्रभूनके ऐसे परमभगवदीय हैं पाछे श्रीआचार्यजी महाप्रभू गऊघाट
ऊपर दिन तीन विराजे पाछे फिर ब्रजको पाँवधारे तब सूरदासजीहू श्रीआचार्यजी महा-
प्रभूनके साथ ब्रजको आये ।

॥ वार्ता प्रसंग ॥ १ ॥

अब जो श्रीआचार्यजी महाप्रभु ब्रजको पाँव धारे सो प्रथम श्रीगोकुल पधारे तब
श्रीआचार्यजी महाप्रभूनके साथ सूरदासजीहू आये तब श्रीमहाप्रभुजी अपने श्रीमुखसों कह्यो जो
सूरदासजी श्रीगोकुलकोदर्शन करौ सो सूरदासने श्रीगोकुलको दंडवत करी सो दंडवत करतमात्र
श्रीगोकुलकी बाललीला सूरदासजीके हृदयमें फुरी और सूरदासजीके हृदयमें प्रथम श्रीमहाप्रभूने
सकल लीला श्रीभागवतकी स्थापी है ताते दर्शन करत मात्र सूरदासजीको

श्रीगोकुलकी बाललीला स्फूर्तना भई तब सूरदासजीने मनमें विचारयो जो श्रीगोकुलकी बाललीलाको वर्णन करिके श्रीआचार्यजीके महाप्रभुनके आगे सुनाइये जन्मलीलाको पद तौ प्रथम सुनायो है अब श्रीगोकुलकी बाललीलाको पद गायो सो पद ॥ १ ॥

रागबिलावल—शोभित कर नवनीत लिये । धुटुखन चलत रेणुतनुमंडित मुखमें लेप किये ॥ १ ॥
चारुकपोललोललोचनछवि गोरोचनको तिलकदिये । लरलटकनमानोमत्तमधुपगनमाधुरीमधुरपियेर
कटुलाकंठवज्रकेहरिनखराजतहैंसखिरुचिरहिये । धन्यसूरएकौपलयहसुखकहाभयोसतकल्पजिये ॥ ३ ॥

यह पद सूरदासने गायो सो सुनिके आप बहुत प्रसन्न भये पाछे औरहु पद गाये तब श्रीमहाप्रभुजी अपने मनमें बिचारे जो श्रीनाथजीके इहां और तौ सब सेवाको मंडान भयो है पर कीर्तनको मंडान नहीं कियो है ताते अब सूरदासजीको दीजिये तब आप श्रीजीद्वार पधारे सो सूरदासजीको साथ लिये ही सो श्रीनाथजी द्वार जाय पहुँचे तब आप स्नान करिके मंदिरमें पधारे तब सूरदासजीसों कह्यो जो सूरदासजी ऊपर आउ स्नान करिके श्रीनाथजीको दर्शन कर तब सूरदास पर्वत ऊपर जायके श्रीनाथजीको दर्शन कियो तब आपने कह्यो जो सूरदास कछू श्रीनाथजीको सुनावो तब सूरदासने प्रथम क्लृप्तिको पद गायो सो पद—

राग धनाश्री—अब हों नाच्यो बहुत गुपाल ॥

यह पद संपूर्ण करिके श्रीनाथजीके आगे गायो तब श्रीमहाप्रभुजीने कह्यो जो सूरदास अब तौ तुममें कछू अविद्या रही नहीं तुम्हारी अविद्या प्रभुनने दूर कीनी ताते कछू भगवत् यश वर्णन करो तब सूरदासने माहात्म्य और लीला ऐसो यश करिके गाय सुनायो सो पद—

राग गौरी—कौन सुकृत इन ब्रजवासिनको ।

यह पद संपूर्ण करिके गायो सो सुनिके श्रीमहाप्रभुजी बहुत प्रसन्न भये सो जैसो श्रीआचार्यजी महाप्रभुनने मार्ग प्रकाश कियो हो ताके अनुसार सूरदासजीने पद किये श्रीआचार्यजी महाप्रभुनके मार्गको कहा स्वरूपहै माहात्म्य ज्ञानपूर्वक सुदृढ स्नेहकी तौ परम काष्टहै और स्नेह आगे भगवान्को रहत नहीं ताते भगवान् बेर बेर माहात्म्य जनावतहैं नाम प्रकरणमें घृतना करि शकट तृणावर्त करि गर्गाचार्य करि यमलार्जुन करि बैकुण्ठ दर्शन करि ऐसे करिके भगवान्ने बहुत माहात्म्य जतायो परि इन ब्रज भक्तनको स्नेह परमकाष्टापन्नहै ताते ताही समय तौ माहात्म्य रहे पाछे विस्मृत होय जाय ।

वार्ता प्रसंग ॥ २ ॥

और सूरदासजीने सहस्रावधि पद कियेहैं ताको सागर कहिये सो सब जगत्में प्रसिद्ध भये सो सूरदासजीके पद देशाधिपतिने सुने सो सुनिके यह विचारयो जो सूरदासजी काहू रीत (विधि) सों मिलें तौ भलो सो भगवत् इच्छाते सूरदासजी मिले सो सूरदासजीसों कह्यो देशाधिपतिने जो सूरदासजी मैं सुन्योहैं जो तुमने विष्णुपद बहुत कियेहैं जो मोको परमेश्वरने राज्य दियो है सो सब गुणीजन मेरो यश गावतहैं ताते तुमहूँ कछु गावो तब सूरदासजीने देशाधिपतिके आगे कीर्तन गायो सो पद ।

राग बिलावल—मना रे तू करि माधव सों प्रीति ॥ यह पद देशाधिपतिके आगे संपूर्ण करिके सूरदास जीने गायो सो यह पद कैसो है जो या पदको अहर्निश ध्यान रहे तो भगवत् अनुग्रहकी सदा सार्ति रहे और संसारते सदा वैराग्य रहे और कुसंगको सदा भय रहे और भगवदीयके

संगकी सदा चाह रहै और श्रीठाकुरजीके चरणारविंद ऊपर सदा स्नेह रहै देशाधिक ऊपर आसक्ति न होय ऐसो पद देशाधिपतिको सुनायो सो सुनिके देशाधिपति बहुत प्रसन्न भयो और कह्यो जो सूरदासजी मोको परमेश्वरने राज्यदीनो है सो जब गुणीजन मेरो यश गावत हैं ताते मेरो यश कछु गावो तब सूरदासजीने यह पदगायो सो पद ।

राग केदारो—नाहिंन रह्यो मनमें ठौर ॥ यह पद संपूर्ण करिके गायो सो सुनिके देशाधिपति अकबर बादशाह अपने मनमें विचारयो जो ये मेरो यश काहेको गावेंगे जो इनको मेरो कछु बातको लालच होय तौ गावें ये तो परमेश्वरके जनहैं और सूरदास जीने या पदके अंतमें गायो हो जो “सूरऐसे दर्शको ए मरत लोचन प्यास” यह गायो हो सो देशाधिपतिने पूछो जो सूरदासजी तुम्हारे लोचन तौ देखियत नाहीं सो प्यासे कैसे मरतहैं और बिन देखे तुम उपमाको देतहौ सो तुम कैसे देतहौ तब सूरदासजी कछु बोले नहीं तब फिर देशाधिपति बोल्यो जो इनके लोचनहैं सो तो परमेश्वरके पासहैं सो वहाँ देखतहैं सो वर्णन करते हैं तब देशाधिपतिने सूरदासजीके समाधानकी मनमें विचारी जो इनको कछु दियो चाहिये पर यह तौ भगवदीयहैं इनको काहु बातकी इच्छा नाहीं पाछे सूरदासजी देशाधिपतिंसां बिदा होयकै श्रीनाथजी द्वार आये ।

वार्ता प्रसंग ॥ ३ ॥

एक समय सूरदासजी मार्गमें चले जातेहैं सो कोऊ चौपड खेलते हुते सो वा चौपड खेलमें ऐसे लीन हो जो कोऊ आवते जातेकी सुधि नाहीं ऐसे खेलमें मग्नहै सो देखके सूरदासजीके संग भगवदीयहैं तिनसों सूरदासजीने कह्यो जो देखौ वह प्राणी कैसो अपनो जमारो खोवतहै भगवानने तौ मनुष्य देह दीनी है सो तो अपनी सेवा भजनके लिये दीनीहै सो तौ या देहसों हाड कूटतहै यामें यह लौकिक सिद्ध नाहीं सो काहेते जो या लोकमें तौ अपयश और परलोकमें भगवानते बहिर्मुखता ताते श्रीठाकुरजीने इनको मनुष्य देह दीनीहै तिनको चौपड ऐसी खेलनी चाहिये सो ता समय एक पद सूरदासजीने अपने संगिनसों कह्यो सो पद ।

राग केदारो—मन तू समझ सोच विचार । भक्ति बिन भगवान दुर्लभ कहत निगम पुकार ॥ १ ॥ साधु संगति डार पासा फेर रसना सार । दाँव अबके परयो पूरो उतरि पहिली पार ॥ २ ॥ बाक सत्रे सुनि अठारे पंचहीको मार । दूरते तजि तीन काने चमकि चौकि विचार ॥ ३ ॥ काम क्रोध जंजाल भूल्यो ठग्यो ठगनी नार । सूर हरिके पद भजन बिन चल्यो दोड करझार ॥ ४ ॥

यह पद सूरदासजीने अपने संगके भगवदीयनसों कह्यो सो या पदमें सूरदासजीने कहा कह्यो मन तू समझ शोच विचार । ये तीनों वस्तु चौपडमें चाहिये सोई तीनों वस्तु भगवानके भजनमें चाहिये काहेते जो समझ न होय तौ श्रवण कहा करेगौ ताते पहिले तौ समझ चाहिये और शोच कहिये चिन्ता सो भगवानके प्राप्तिकी चिन्ता न होय तौ संसार ऊपर वैराग्य कैसे आवै ताते शोच चाहिये और विचार जो या जीवको विचारही नहीं तौ संग दुसंगमें कहा करेगौ ताते विचार चाहिये सो ये तीनों वस्तु होय तौ भगवदीय होय ताते ये तीनों वस्तु भगवदीयको अवश्य चाहिये और चौपडमें तीनों वस्तु चाहिये समझ कहैं गनबो न आवै तौ गोटे कैसे चले और शोच अगम जो मेरे यह गोटे दाँव पडे तौ यह चलूं विचार जो वाहीमें तन मन जो ये तीनों वस्तु होय तौ चौपड खेली जाय सो वे सूरदासजी श्रीआचार्यजी महाप्रभुनके ऐसे परम भगवदीयहैं ।

वार्ता प्रसंग ४.

बहुरि श्रीसूरदासजी श्रीनाथजी द्वार आयके बहुत दिन ताई श्रीनाथजीकी सेवा कीनी बीच बीचमें श्रीगोकुल श्रीनवनीत प्रियाजीके दर्शनको आवते सो एक सधय सूरदासजी श्रीगोकुल आये श्रीनवनीत प्रियाजीके दर्शन किये और बाललीलाके पद बहुत सुनाये सो श्रीगुमाईजी सुनिके बहुत प्रसन्न भये पाछे श्रीगोसाईजीने एक पालना संस्कृतमें कियो सो पालना सूरदासजीको सिखायो सो पालना सूरदासजीने श्रीनवनीत प्रियाजी झूलत हुते ता समय गायो सो पद ।

राग रामकली ॥

प्रेषपर्यंकशयनम् ।

यह पद सूरदासजीने सम्पूर्ण करिके गायो सुनायो श्रीनवनीत प्रियाजीको पाछे या पदके भाव के अनुसार बहुत पद किये सो सुनिके श्रीगोसाईजी बहुत प्रसन्न भये पालनाके भाव अनुसार पद गायो सो पद ।

राग बिलावल—बाल विनोद आंगनमेंकी डोलनि ॥ मणिमय भूमि सुभग नंदालय बलि बलि गई तोतरी बोलनि ॥ १ ॥ कटुलाकंठ रुचिर केहस्त्रिख ब्रजमाला बहु लई अमोलनि । वदन सरोज तिलक गोरोचन लर लटकन मनु मधु गनि लोलनि ॥ २ ॥ लीन्यो कर परसत आनन पर कछू खाय कछू लग्यो कपोलनि । कहे जन सूर कहालों वणों धन्य नंद जीवन जग तोलनि ॥ ३ ॥

और पद राग बिलावल—गोपाल दुरेहें माखन खात । देख सखी शोभा जो बढी अति श्याम मनोहर गात ॥ १ ॥ उठि अवलोकि ओट ठाढी है जिहि विधि नहिं लिखिलेत । चकृत नैन चहुँ दिश चितवत और सबनको देत ॥ २ ॥ सुंदर करे आनन समीप हरि राजत यहै अकार । जनु जलरुह तजि वेर विधीसों लाय मिलत उपहार ॥ ३ ॥ गिरिगिरि परत वदनते ऊपर द्वै दधिसुतके बिंदु । मानहुँ सुधाक न खोरवत प्रियजन बिंदु ॥ ४ ॥ बाल विनोद विलोकि सूर प्रभु वित भई ब्रजकी नारि । फुरतन वचन बरजिवेको मन गहि विचार विचारि ॥ ५ ॥

राग जैतश्री—कहाँ लगि वरणों सुन्दरताई । खेलत कुँवर कतिक आँगनमें नैन निरखि सुखपाई ॥ १ ॥ कुलहे लसत श्यामसुंदरके बहुविधि रंग बनाई । मानउ नव घन ऊपर राजत मधवा धनुष चढाई श्वेत पीत अरु असिततालमणि लटकनभाल रुलाई । मानहुँ असुरदेवगुरुसों मिलि भूमिजसो समुदाई अतिसुदेशमृदु चिहुर हरत मनमोहनमुखबिगराई । मानहुँ मंजुल कंचनऊपर आलि आवालि फिरिआई दूधदंतछबि कहीनजातकछु अलिपलपलझलकाई । किलकतहंसतदुरितप्रगटतमानों बिंदुमें विपुलताई खंडितवचनदेतपूरणमुख अद्भुत यहउपमाई । घुटुरुनचलत उठत प्रभुदितमन सूरदासबलिजाई ॥ ६ ॥

राग रामकली—देखो सखी एक अद्भुतरूप । एक अंबुज मध्य देखियत बीस दधिसुत जूप ॥ १ ॥ एकअवलि दोय जलचर उभे अर्क अनूप । पंजचार चढि गहि देखियत कहो कहाँ स्वरूप ॥ २ ॥ शिशुगणमें भई शोभा करो कोउ विचार । सूर श्री गोपालकी छबि राखो यह निरधार ॥ ३ ॥

ऐसे पद सूरदासजीने गाये पाछे फेर श्रीनाथजी द्वार आये ॥

वार्ता प्रसंग ॥ ५ ॥

अब सूरदासजीने श्री नाथजीकी सेवा बहुत कीनी बहुत दिनताई ता उपरांत भगवत इच्छा जानी जो अब प्रभुनकी इच्छा बुलायवेकी है यह विचारके जो नित्य लीला फलात्मक रासलीला जो जहाँ करे है ऐसो जो परासोली तहाँ सूरदासजी आये श्रीनाथजीकी ध्वजाको दण्डवत करिके

ध्वजाके साम्हें सन्मुख करिके सूरदासजी सोये. परि अंतःकरणमें यह जो श्री आचार्यजी महाप्रभु दर्शन देंगे अब यह देह तौ थकी ताते अब या देहसों श्रीनाथजीको दर्शन होय तौ जानिये परम भाग्य है श्री गुसाईंजी को नाम कृपासिंधु है भक्तनके मनोरथ पूर्णकर्ता है ऐसे विचारके सूरदासजी श्री गुसाईंजीको चितवन करते हैं और श्री गुसाईंजी कैसे कृपासिंधु हैं जैसे सूरदासजी वहाँ स्मरण करते हैं तैसे श्रीगुसाईंजी इनको छिनहूँ नाहिं भूलत हैं. श्रीनाथजीको शृंगार हो तो ता समय सूरदासजी मणिकोठमें ठाढे ठाढे कीर्तन करते सो ता दिन श्रीगुसाईंजी श्रीनाथजीको शृंगार करत हुते और सूरदासजीको कीर्तन करत न देख्यो तब श्रीगुसाईंजीने पूछो जो सूरदासजी नाहीं देखियत सो काहेते ? तब काहू वैष्णवने कह्यो जो महाराज सूरदासजी तौ आज परासोलीकी ओरी जात देखे हैं तब श्रीगुसाईंजीने जान्यो जो भगवत् इच्छाते अवसान समय है ताते सूरदासजी परासोली गये हैं तब श्रीगुसाईंजीने अपने सेवकन सों कह्यो जो पुष्टिमार्गको जहाज जात है जाको कछू लेनो होय सो लेउ और जो भगवत् इच्छाते राजभोग आरती पाछे रहत है तौ मैहूँ आवत हों पाछे श्रीगुसाईंजी बेरबेर सूरदासजी की खबरि मँगायो करें जो आवै सौई कहै जो महाराज सूरदासजी तौ अचेत हैं कछू बोलत नाहीं ऐसे करत श्रीनाथजीके राजभोगको समय भयो सो राजभोग आरती करिके श्रीगुसाईंजी गिरिराजते नीचे उतरे सो आप परासोली पधारे भीतरके सेवक रामदासजी प्रभृति और कुंभनदासजी और श्रीगुसाईंजीके सेवक गोविंद स्वामी चतुर्भुजदास प्रभृति और सब श्रीगुसाईंजीके साथ आये सो आवतही सूरदासजीसों श्रीगुसाईंजीने पूछो जो सूरदासजी कैसे हो तब सूरदासजीने श्रीगुसाईंजीको दंडवत करिके कह्यो जो महाराज आये हो महाराजकी बाट देखत हुतौ यह कहिके सूरदासजीने एक पद कह्यो सो पद ॥

रागसारंग—देखो देखो हरि जूको एक सुभाय॥ अति गंभीर उदार उदधिप्रभु जानि शिरोमणिराय ॥ १ ॥

राई जितनी सेवाको फल मानत मेरु समान । समाझि दास अपराध सिंधुसमबूदन एकौ जान ॥ २ ॥

बदनप्रसन्नकमलपदसन्मुख दीखतहीहैऐसे ॥ ऐसेविमुखहु भयेकृपायामुखकीजबदेखौतबतैसे ॥ ३ ॥

भक्तविरहकरतकरुणामयडोलतपाछेलागे ॥ सूरदास ऐसे प्रभुको कत दीजै पीठ अभागे ॥ ४ ॥

यह पद सूरदासजीने कह्यो सो सुनिके श्रीगुसाईंजी बहुत प्रसन्न भये और कह्यो जो ऐसे दैन्य प्रभु अपने सेवकनको देहिं या दैन्यके पात्र एहीहैं तब वा बेर श्रीगुसाईंजीके पास ठाढ़ेहुते और चतुर्भुजदासहू ठाढे हुते तब चतुर्भुजदासने कह्यो जो सूरदासजीने बहुत भगवत् यश वर्णन कियो परि श्रीआचार्यजी महाप्रभुनको वर्णन नाहीं कियो तब यह वचन सुनिके सूरदासजी बोले जो मैं तौ सब श्रीआचार्यजी महाप्रभुन कोही यश वर्णन कियौहै कछू न्यारो देखूं तौ न्यारो करूं परि तेरे साथ कहतहों या भांति कहिके सूरदासजीने एक पद कह्यो सो पद ॥

राग विहागरो—भरोसो दृढ इन चरणन केरो॥ श्रीवल्लभनख चंद छटा बिनु सब जग मांझ अँधेरो॥ १ ॥

साधन और नहीं या कलिमें जासों होत निबेरो॥ सूरकहा कहे दुबिधि आंधरो बिनामोलको चेरो॥ ३ ॥

यह पद कह्यो पाछे सूरदासजीको मूर्छा आई तब श्रीगुसाईंजी कहें जो सूरदासजी चित्त की वृत्ति कहां है तब सूरदासजीने एक पद और कह्यो सो पद ॥

राग विहागरो—बलि बहि बलि हों कुमारि राधिका नंदसुवन जासों रति मानी ॥ वे अति चतुर तुम चतुर शिरोमणि प्रीति करी कैसे होत है छानी ॥ १ ॥ वे जु धरत तन कनक पीतपट सो तो सब

तेरी गति ठानी ॥ ते पुनि श्याम सहजबे शोभा अंबर मिस अपने उर आनी ॥ २ ॥ पुलकित अंग अबहिं है आयो निरखि देखि निज देह सियानी ॥ सूर सुजान के बूझे प्रेम प्रकाश भयो बिहँसानी ॥

यह पद कह्यो इतनो कहिकै श्रीसूरदासजीके चित्त श्रीठाकुरजीको श्रीमुख तामें करुणा रसके भरे नेत्र देखे तब श्री गुसाईजी पूछो जो सूरदासजी नेत्रकी वृत्ति कहाँ है तब सूरदास जीने एक पद और कह्यो सो पद ॥

राग विहागरो-खंजन नैन रूप रसमाते ॥ अतिशय चारुचपल अनियारे पल पिंजरा न समाते ॥ चलचलजातनिकट श्रवणनके उलटपलटताटकफँदाते ॥ सूरदासअंजनगुणअटकेनातरअबउडिजाते ॥

इतनो कहतही सूरदासजीने या शरीरको त्याग कियो सो भगवत लीलामें प्राप्ति भये पाछे श्रीगुसाईजी सब सेवकन सहित श्रीगोवर्द्धन आये ताते सूरदासजी श्रीआचार्यजी महाप्रभुनके ऐसे कृपापात्र भगवदीयहैं ताते (सो) इनकी वार्ताको पार नहीं पाते इनकी वार्ता कहाँताईलिखिये।

सीधीहिन्दी-पहिले भागमें गया गवर्नमेन्ट स्कूलके पंडित बलदेव मिश्रने लिखाहै कि सूरदास का घर कृष्णाबेना गाँवमें देवशर्मा ब्राह्मण का बेटा विलमङ्गल पांडे इनका नामथा । पहले इनकी चालचलन अच्छी नहींथी । पीछे ये सुधरे और सवालाख भजनका सूरसागर बनाकर बड़े नामी हुए । लोग कहते हैं कि इन्होंने अपनी आँख आपही फोड़ीथी ।

‘सुगम पंथमें पंडित गणपत लाल चौबे फर्स्ट असिस्टेंट मास्टर स्कूल रायपुरने लिखाहै कि- सूरदास किंवा सूरदास-मदनमनोहर शूरध्वज ब्राह्मण दिल्लीनगरके समीप किसी ग्रामके रहनेवाले थे । किसीसमय दिल्लीआये वहाँ एक दिन किसी स्त्रीको कोठेपर खड़ीदेख उसपर मोहित हुए और कोठेकी ओर इकटक चितै रहे । लोग इनकी दशादेख धिक्कारनेलगे परंतु वह स्त्री घरसे बाहर निकल बोली “विप्रजी क्या आज्ञा होती है” विप्र बोले “क्या सचमुच मेरी आज्ञा पालेगी” वह बोली “निस्सन्देह” सुझे ईश्वर साक्षी है तबतो वह विप्रके कहनेके अनुसार दो सुइयां ले आई और जब विप्रने कहा कि मेरी छातीपर बैठ इन दोनों सुइयोंको मेरे नेत्रोंमें धुसेउदे उसने वैसाही किया और तबहींसे सूरदास कहलानेलगे । लोगोंने इनकी बड़ी प्रशंसाकर इनके कहनेके अनुसार मथुरा वृन्दावनमें पहुँचादिया यहाँपर इन्होंने सवालाख विष्णुपदका एक बहुत बड़ा सूरसागर नामीग्रंथ बनाया निदान कुछ कालतक ये अकबर बादशाहकी सभामें रहे और फिर परलोकको सिधारे ।

प्राचीन मनुष्योंकी कहावतहै कि, ये उद्धवका अवतारथे वे सब कवियोंमें श्रेष्ठ गिनेजाते हैं यथा दो०-सूर सूर्य तुलसी शशी, उडगण केशवदास । अबके कवि खद्योत सम, जहाँ तहाँ करहिं प्रकाश ।

रामरसिकावलीकी टिप्पणीमें लिखाहै कि ‘अंक वाले कवियोंका आगे वर्णन किया जायगा ।’ परंतु मतिराम कविका वर्णन काव्यरत्नाकरमें लिखागयाहै अतएव यहाँ उनका कुछ काव्य लिखा जाता है ।

(१) मतिराम त्रिपाठी टिकमापुरवाले ।

कवित्त-पूरण पुरुषके परम दृग दोऊ जानि कहत पुराण वेद बानियो रतिगई ।

कवि मतिराम दिनपति यों निशापतियों दुहुँनकी कीरति दिशान माँझ मठिगई ॥

रविके करन भये एक महादानी यह जानि जिय आनि चिंता चित्त माँझ चढिगई ।

तोहि राज बैठत कुमाऊं श्रीउदोत चंद्र चंद्रमाकी करक करेजेहुँते कढिगई ॥ १ ॥

ललितललाम ।

परम प्रवीन धीर धरम धुरीन दीनबंधु सदा जाकी परमेश्वरमें मतिहै ।
 दुर्जन बिहाल करि याचक निहाल करि जगतमें कीरति जगाई ज्योति अतिहै ॥
 राउ शत्रुशालके सपूत पूत भाउसिंह मतिराम कहै जाहि साहिबी फवतिहै ।
 जानपति दानपति हाडा हिन्दुवानपति दिल्लीपति दलपति बालाबंद पतिहै ॥ २ ॥
 कैसे आसमानसे विमानसे घटासे गज रावरे चलत मानौ मेरुसे लहतहै ।
 अतल वितल तल हलत चलत दल गज मद राजै दिगदंती चिक्करतिहै ॥
 कहै मतिराम शम्भु द्विरद दराज ऐसे जिन्हें पाइ कविराज आनंद भरतिहै ।
 कुंभ छाये षटपद मदन करद नद कदनि विलंद गढ गरद करतिहै ॥ ३ ॥

छप्पय ।

जबलगि कच्छप कोल सहस मुख धरणिभार धर । जबलगि आठौ दिशनि दाबि सोहत दिग्गजबर
 जबलगि कवि मतिराम सगिरि सागर महिमंडल । जबलगि सुवरण मेरु सघनघन मगन अगनचल
 नृप शत्रुशालनंदन नवल भावसिंह भूपाल मनिजग चिरंजीव तबलगि सुखितकहत सकल संसार धनि
 दो०—भौह कमान कटाक्ष शर, समरभूमि विचरै नैन । लाज तजेहुं दुहुँनके, सजल सुहृदसे बैन ॥ १ ॥
 रूपजाल नंदलालके, परिकरि बहुरि छुटैन । खंजरीट मृगमीनसे, ब्रजबनितनके नैन ॥ २ ॥
 क०—बानीको बसन कैधौं बातको विलास डोलै कैधौं मुखचंद्र चारु चांदनी प्रकास है ।
 कवि मतिराम कैधौं कामको सुयश कै पराग पुंज प्रफुलित सुमन सुवास है ॥
 नासा नथुनीके गजमोतिनके आभा कैधौं रतिवत प्रगटित हियेको हुलास है ।
 सीत करिवेको पिय नैन घनसार कैधौं बालाके बदन बिलसत मृदु हास है ॥ ४ ॥

छंदसार पिंगल ।

दाता एक जैसो शिवराज भयो जैसो अब फतेसाहिसी नगर साहिबी सम्राजुहै ।
 जैसो चितौर धनी राना नरनाह भयो जैसोई कुमाऊं पति पूरो रज लाजु है ॥
 जैसे जयसिंह यशवंत महाराज भयो जिनको महीमें अजों बाढ्यो बलसाजुहै ।
 मित्रासाहि नंद सी बुंदेल कुलचंद जग ऐसो अब उदित स्वरूप महाराजु है ॥ ५ ॥
 लछमनही संगलिये जोवन विहार किये सीता हिये बसे कहो तासों अभिरामको ।
 नव दल शोभा जाकी विकसे सुमित्रे लखि कोशलै बसत कोऊ सुठि धाम ठामको ॥
 कवि मतिराम शोभा देखिये अधिक नित सरस निधान कवि कोविदके कामको ।
 कीन्होहै कवित्त एक तामरसहीको यासों रामको कहतकै कहत कोऊ वामको ॥ ६ ॥

रसराज ।

चंदन चढारी नभ चंदन चढारी अंग चंद उजियारी देखि नकराति कैसी है ।
 फंद फंदफवदी गंसीली गांठि गूदि गूदि मूदि मूदि मुख मंद मंतरात कैसी है ॥
 मतिराम मिलन बिहारी सुं तूं प्यारी चलु नितरति बारी आजु जकराति कैसीहै ।
 कतरात कैसी बात बतरात कैसी जात सतरात कैसी रात रत रात कैसी है ॥ ७ ॥

चोरकीचोर छिनारछिनारकीसाहुवलीकीबली । ठगकीठगकामुककामुककीअरुछैलकीछलछलीकीछली
 प्रवीणनकीपरवीणहीजानैमतिरामनजानैकहाधौंचली । उनफेरिदईनथकीमुक्ताउनफेरिकैफूकीगुलावकली ।
 गोपबधूतनतोलतडोलतबोलतबोलजुकोनलभापै । ऊरूनितंबनिकीगुरुतापगजातगयंदनिकीगतिनापै
 आगमभोतरुणापनकोमतिरामभनैभईचंचलआपै । खंजनकेयुगसावकज्योंउडिआवतनाफरकावतपापै

क०—यैरे मतिमन्द चन्द ढिगहै अनन्द तेरो जोपै विरहीन जाति ।
 तूतो दोषाकार दूजे धरेहैं कलंकउर तीसरे सखानि संग देखो शिर छापते ॥
 कहै मतिराम हाल जाहिर जहान तेरो वारुणीके वासी भासी राहुके प्रतापते ।
 बाँधोगयो मथोगयो पियोगयो खारोभयो बापुरो समुद्र ऐसे पृतर्हीके पापते ॥ ९ ॥

(२) शिवसिंहसरोजमें लिखाहै भूषण त्रिपाठी टिकमापुर जिले कानपुर सं० १७३८ में हुए ।
 रौद्र वीर भयानक ए तीनों रस जैसे इनकी काव्यमेंहैं ऐसे और कवि लोगोंकी कवितामें नहीं पाए
 जाते ए महाराज प्रथम राजा छत्रशाल परना नरेशके यहाँ छः महीनेतक रहे तेहि पीछे महाराज
 शिवराज सुलंकी सतारागढ वालेके इहाँ जाय बडा मानपाया और जब यह कवित्त भूषणजीने
 पढा (इन्द्र जिमि जंघ पर) तब शिवराजने पांच हाथी औ २५ हजार रुपिया इनाम दिया इसी
 प्रकारसे भूषणने बहुत वार बहुत २ रुपया हाथी घोडा पालकी इत्यादि दानमें पाये ऐसे शिवराजके
 कवित्त बनाए हैं जिनकी बराबर किसी कविने वीरयश नहीं बनाय पाया । निदान जब भूषण
 अपने घरको चले तौ परना होकर राजा छत्रशालसे मिले छत्रशालने बिचारा अबतो शिवराजने इन
 को ऐसा कुछ धनधान्य दिया है कि हम उसका दूधवां हिस्सा भी नहीं दे सकते ऐसा शोच बिचार
 करि चलते समय भूषणकी पालकीका बांस अपने कंधे पर धरि लिया ब्राह्मण कोमल हृदय
 तो होतेही हैं भूषणजी बहुत प्रसन्न हैं यह कवित्त पढा । साहूको सराहों की सराहों छत्रशाल
 को । और दूसरा यह कवित्त बनाया । तेरी बरछीने बरछीने हैं खलनके । औ दो दोहा बनाय
 छत्रशालको दै घरमें आए ॥

दोहा—एक हाडा बूंदी धनी, मरद महेवाबाल । शालत नौरंगजेबके, ए दोनों छत्रशाल ॥ १ ॥
 ए देखौ छत्तापत्ता, ए देखौ छत्रशाल । ए दिल्लीकी ढाल ए, दिल्ली ढाहनवाल ॥ २ ॥

भूषणजी थोडे दिन घरमें रहि बहुत देशान्तरोंमें घूमि घूमि रजवाडोंमें शिवराजका यश प्रगट
 करते रहे जब कुमाऊंमें जाय राजा कुमाऊंके यशमें यह कवित्त पढा (उलदत्त मद अनुमद ज्यों
 जलधिजल) ।

तब राजाने सोचाकि ये कुछ दान लेने आएहैं और हमने जो सुनाथाकि शिवराजने लाखों रुपया
 इनको दिया सो सब झूठहै ऐसा बिचार हाथी घोडे मुद्रा बहुत कुछ भूषणके आगे किया भूषणजी
 बोले इसकी अब भूँख नहीं हम इसलिये इहाँ आएथे कि देखैं शिवराजका यश यहाँतक फैलाहै
 या नहीं—इनके बनाए हुए ग्रंथ शिवराजभूषण १ भूषणहजारा २ भूषणउल्लास ३ भूषणउल्लास ४ ए
 चारि ग्रंथ सुने जातेहैं कालिदासजूने अपने ग्रंथ हजाराकी आदिमें ७० कवित्त नवरसके इन्हीं
 महाराजके बनाएहुए लिखेहैं ।

(३) बिहारीलाल चौबे ब्रजवासी सम्वत् १६०२ हुए । ये कवि जयसिंह कछवाहे
 महाराज आमेरके इहाँथे जयपुरकी तवारीख देखनेसे प्रगटहै कि महाराज मानसिंह
 से जो संवत् १६०२ में विद्यमान थे संवत् १८७६ तक तीनि जयसिंह होगये हैं । पर
 हमको निश्चय है कि ये कवि महाराजे मानसिंह के पुत्र जयसिंहके पास थे जो महागुणग्राहकथे
 औ दूसरे सवाई जयसिंह इन जयसिंहके प्रपौत्र संवत् १७५५ में थे । यह बात प्रगट है कि जब
 महाराजे जयसिंह किसी एक थोरी अवस्था वाली रानी पर मोहित हैं रात दिन राजमंदिर में

श्रीसूरदासजीका जीवनचरित्र ।

(१२८)

रहने लगे राज्यक सा... तब बिहारीलाल ने यह दोहा बनाय राजाके पास तक किसी उपाय से पहुँचाया ।

दो-नहिं पराग नहिं मधुर रस, नहिं विकास यहिकाल । अली कलीहू सो विंध्यो, आगे कौन हवाला ॥ १॥
 इस दोहा पर राजा अत्यन्त प्रसन्न है १०० मोहर इनाम दे कहा इसी प्रकार के और दोहा बनावो बिहारीलालने सातसौ दोहा बनाए औ ७०० अशरफी इनाम में पाया । यह सतसई ग्रंथ अद्वितीय है बहुत कविलोगोंने इसके ढंग पर सतसई बनाकर अपनी कविता का रंग जमाना चाहा पर किसी कविको सुखरुई प्राप्त नहीं हुई । यह ग्रंथ ऐसा अद्भुत है कि हमने १८ तिलक तक इसके देखे हैं और आज तक तृप्ति नहीं है। लोग कहते हैं कि अक्षर कामधेनु होते हैं सो वास्तव में इसी ग्रंथके अक्षर कामधेनु दिखाई देते हैं ।

सब तिलकों में सूरतिमिश्र आगे वाले का तिलक विचित्र है और सब सतसैयों में विक्रमसतसई और चंदनसतसई इसके लगभग है ।

बिहारी कवि सं० १७३८ इनके महासुंदर कवित्त हजारमें हैं । बिहारी कवि ३ बुंदेलखंडी सं० १८०६ सरस कविता करीहै । बिहारीदास कवि ४ ब्रजवासी सं० १६७० इनके पद रागसागरोद्भव रागकल्पद्रुममें हैं ।

(४) नीलकंठमिश्र अंतर्वेदी वासी संवत् १६४८ दासजीने इनकी प्रशंसा ब्रजभाषा जाननेमें करीहै ।

(५) नीलकंठत्रिपाठी टिकमापुर वाले मतिरामके भाई । संवत् १७३० इनका कोई ग्रंथ हमने नहीं देखा ॥

(६) बेनीकवि प्राचीन असनी जिले फतेपुरवाले । संवत् १६९० ए महान् कवीश्वर हुए हैं इनका एक ग्रंथ नायकाभेदमें अति विचित्र देखनेमें आयाहै इनकी कविताई बहुतही सरस ललित मधुरहै ।

बेनीकवि २ बन्दीजन बैती जिले रायबरेलीके निवासी संवत् १८४४ ए कवि महाराजे टिकेत राइ दीवान नवाब लखनऊ के इहाँ थे और बहुत वृद्ध हैं संवत् १८९२ के करीब मरगए ।

बेनी प्रवीन ३ बाजपेयी लखनऊ के निवासी संवत् १८७६ ए कवि महासुंदर कविता करने में विख्यात हैं इनका ग्रंथ नायकाभेद में देखनेके योग्य है ।

बेनी प्रगट ४ ब्राह्मण कविद कवि नरवरी निवासीके पुत्र संवत् १८८० इनकी काव्य महासुंदर है ।

(७) एक शंभु कवि का वर्णन काव्यरत्नाकर की टिप्पणी में है उसके सिवाय यहां लिखा है । शंभुनाथ मिश्र कवि सं० १८०३ ए महाराज महान कवि भगवंत राइ खीची के यहां असोथर में रहा करते थे शिव कवि इत्यादि सैकड़ों मनुष्यों को इन्होंने कवि कर दिया । कवितामें महानिपुण थे रसकल्लोल १ रसतरंगिणी २ अलंकारदीपक ३ ए तीनि ग्रंथ इनके बनाये हुए हैं ।

शंभुनाथकवि बन्दीजन सं० १७९८ ये कवि सुखदेव के शिष्य थे रामविलास नाम रामायण बहुत ही अद्भुत ग्रंथ बनाया है रामचंद्रिका की ऐसी इस ग्रंथ में भी नाना छंदें हैं ।

शंभुनाथकवि त्रिपाठी डौंडिया खेरेवाले सं० १८०९ ए महाराज राजा अचलसिंह बैस डौंडिया खेरे के इहाथे रावरघुनाथसिंह के नाम बैतालपचीसी को संस्कृतसे भाषा किया है और सुहृत्तचित्तामणि ज्योतिषग्रंथ को भाषा में नाना छंदों में बनाया है ए दोनों ग्रंथ सुंदर हैं ।

शम्भुनाथमिश्र कवि बैसवारे वाले सं० १९०१ ए कवि गंगा नदी खजुरगांवके इहाँथे थोरी अवस्थामें अल्पायु होगया बैस वंशावली और शिवपुराणका चतुर्थखंड भाषामें बनायाहै ।

शम्भुप्रसाद कवि शृंगारमें सुन्दर कवित्तहै ।

(८) तोष कवि सं० १७०५ ये महाराज भाषाकाव्यके आचार्योंमें हैं ग्रन्थ इनका कोई हम को नहींमिला पर इनके कवित्तोंसे हमारा कुतुबखाना भराहुवाहै कालिदास तथा तुलसीजीने भी इनकी कविता अपने ग्रन्थोंमें बहुत सारी लिखीहै ।

(९) चिन्तामणि त्रिपाठी टिकमापुर जिले कानपुर वाले सं० १७२९ ए महाराज भाषा साहित्यके आचार्योंमें गिनेजातेहैं अन्तर्वेदमें विदित है कि इनके पिता दुर्गापाठ करने नित्य देवीजीके स्थानमें जातेथे वे देवीजी बनकी भुइआं कहाती हैं टिकमापुरसे एक मैल के अंतर पर हैं एक दिन महाराज राजेश्वरी भगवती प्रसन्न है चारि भुंड दिखाय बोलीं यही चारों तेरे पुत्र होंगे निदान ऐसाही हुवा कि चिन्तामणि १ भूषण २ मतिराम ३ जटाशंकर या नीलकण्ठ चारि पुत्र उत्पन्न हुए इनमें केवल नीलकण्ठ महाराज तो एक सिद्ध के आशीर्वाद से कवि हुए शेष तीनों भाई संस्कृत काव्यको पढ़ि ऐसे पंडित हुए कि उनका नाम प्रलय तक बाकी रहैगा इन्हीं के वंश में शीतल और बिहारी लाल कवि जिनका लाल भोग है संवत् १९०१ तक विद्यमान थे निदान चिन्तामणि महाराज बहुत दिन तक नागपुर में सूर्यवंशी भोंसला मकरंदशाहिके इहाँरहे और उन्हीं के नाम १ छंदबिचार नाम पिंगल बहुत भारी ग्रंथ बनाया और काव्य विवेक २ कविकुलकल्पतरु ३ काव्यप्रकाश ४ रामायण ५ ए पांच ग्रंथ इनके बनाए हुए हमारे पुस्तकालय में मौजूद हैं इनकी बनाई हुई रामायण कवित्त और नाना अन्य छंदों में बहुत अपूर्व है बाबू रुद्रसाहि सुलंकी औ शाहिजहां बादशाह और जैनदी अहमद ने इनको बहुत दान दिए हैं इन्होंने अपने ग्रंथों में कहीं कहीं अपना नाम मणिलाल करिके कहा है ।

चिन्तामणि २ ललित काव्य करीहै ।

(१०) कालिदास त्रिवेदी बनपुरा अन्तर्वेदके निवासी सं० १७४९ ये कवि अन्तर्वेदमें बड़े नामी गिरामी हुएहैं । प्रथम औरंगजेब बादशाहके साथ गोलकुंडा इत्यादि दक्षिणके देशोंमें बहुत दिन तक रहे तेहि पीछे राजा योगाजीतसिंह रघुवंशी महाराज जम्बूके इहाँ रहे और उन्हींके नाम बधूविनोद नाम ग्रन्थ महाअद्भुत बनाया और एक ग्रन्थ कालिदास हजारा नाम संग्रह बनाया जिस्में सं० १४८० से लेकर अपने समय तक अर्थात् सं० १७७५ तकके कवि लोगोंके एक हजार कवित्त २१२ कवि लोगोंके लिखेहैं हमको इस ग्रन्थके बनानेमें कालिदासके हजारासे बड़ी सहायता मिली है और एक ग्रन्थ और जंजीरा बन्दनाम महाविचित्र इन्हीं महाराजका हमारे पुस्तकालयमेंहै इनके पुत्र उदयनाथ कविन्द और पौत्र कवि दूलह बड़े महानकवि हुएहैं ।

(११) ठाकुर कवि प्राचीन सं० १७०० ठाकुर कविको किसीने कहाहै कि वे असनी ग्रामके बन्दीजनथे संवत् १८०० के करीब मोहम्मदशाह बादशाहके जमानेमें हुएहैं और कोई कहतहैं कि नहीं ठाकुर कवि कायस्थ बुंदेलखण्डके बासीहैं । किसी बुंदेलखण्डी कविका बयानहैं कि छत्र पुर बुंदेलखण्ड में बुंदेला लोग हिम्मत बहादुर गोसाई के मारने को इकट्ठा थे ठाकुर कविने यह कवित्त (समयो यह बीर बरावने हैं) लिखि भेजा सब बुंदेला चले गए और हिम्मत बहादुरने ठाकुर को बहुत रुपया इनाम दिया हिम्मत बहादुर संवत् १८०० में थे और कवि कालिदास

ने हजारों संवत् १७००... है और उसमें ठाकुरके बहुत कवित्त और ऊपर लिखा हुआ कवित्त भी लिखा है। इससे हम अनुमान करते हैं कि ठाकुर कवि बुंदेलखण्डी अथवा असनी वाले भाट या कायथ कछु होवै पर ए कवि अवश्य संवत् १७०० में थे इनकी काव्य महामधुर लोकोक्ति इत्यादि अलंकारों से भरी पुरी सर्व प्रसन्नकारी है। सवैया इनके बहुत ही चोटीले हैं इनके कवित्त तो हमारे पुस्तकालय में सैकड़ों हैं पर ग्रंथ कोई नहीं और न हमने किसी ग्रंथ का नाम सुना।

ठाकुरप्रसाद त्रिपाठी किशुनदासपुर जिले रायबरेली सं० १८८२ ये महान् पंडित संस्कृत साहित्य में महाप्रवीण सारे हिन्दुस्तान में काव्य ही के हेतु फिर ७२ वस्ते पुस्तकें केवल काव्य की इकट्ठा की थीं अपने हाथसे भी नानाग्रन्थ लिखे थे और बुंदेलखण्ड में तो घर घर कवि लोगोंके इहाँ फिरि फिरि एक संग्रह भाषा कवि लोगोंकी इकट्ठा की थी रसचन्द्रोदय ग्रन्थ इनका बनाया हुआ है तत्पश्चात् काशीजीमें गणेश और सरदार इत्यादि कवि लोगोंसे बहुत मेल जोल रहा और अवधदेशके राजा महाराजाओंके इहाँ भी गये जब इनका संवत् १९२४ में देहान्त हुआ तो इनके चारों महामूर्ख पुत्रोंने १८। १८ वस्ते बाँटलिये और कौडियोंके मोल बेचि डाले हमने भी प्रायः दोसौ ग्रन्थ अन्तमें मोल लिया था।

ठाकुररामकवि इनके कवित्त शान्तरसमें सुंदर हैं।

ठाकुरप्रसाद त्रिवेदी अलीगंज जिले खीरी विद्यमान हैं सतकवि हैं।

(१२) निवाजकवि जुलाहा बिलग्रामी सं० १८०४ शृंगारमें अच्छे कवित्त हैं।

निवाज २ ब्राह्मण अन्तर्वेद वाले सं० १७३९ ये कवि महाराज छत्रशाल बुंदेला परना नरेश के इहाँ थे आजमशाहकी आज्ञानुसार शकुंतला नाटकको संस्कृतसे भाषा बनाया एक दोहासे लोगोंको शक है कि निवाजकवि सुसलमान थे पर हमने बहुत जांचा तो १ निवाज सुसलमान और २ हिन्दू पाये गये हैं।

दो०—तुम्हें न ऐसी चाहिये, छत्रशाल महाराज। जहाँ भगवत गीतापढ़ै, तहाँ कवि पढ़ै निवाज ॥ १ ॥

निवाज ३ ब्राह्मण बुंदेलखण्डी सं० १८०१ ये कवि भगवंतराई खींची गाजीपुर वालेके इहाँ थे।

(१३) सेनापति कवि वृंदावन वासी १६८० ए महाराज वृंदावनमें क्षेत्र संन्यास लै सारी वैस वहाँहीं व्यतीत किया। काव्यमें इनकी प्रशंसा हम कहाँतक करें अपने समयके भाष्ये काव्य कल्पद्रुम इनका ग्रंथ बहुत ही सुंदर है हजारोंमें इनके बहुत कवित्त हैं।

(१४) सुखदेव मिश्र कंपिला वासी १७२८ ए कवि भाषा साहित्यके आचार्योंमें गिने जाते हैं प्रथम राजा अर्जुनसिंहके पुत्र राजाराज सिंह गौरके इहाँ जाय कविराजकी पदवी पाय वृत्तविचार नाम पिंगल सब पिंगलोंमें उत्तम ग्रंथको रचा तत्पश्चात् राजा हिम्मतिसिंह बंधलगाँती अमेठीके इहाँ आय छेदविचार नाम पिंगल बनाया फिरि नवाब फाजिलअली खाँ मंत्री औरंगजेब बादशाहके नाम भाषासाहित्यमें फाजिलअलीप्रकाश नाम ग्रंथ महाअद्भुत रचा ए तीनों ग्रंथोंके सिवाय हमने कहीं लिखा देखा है कि अध्यात्मप्रकाश १ दशरथराय २ ए दो ग्रंथ और भी इन्हीं महाराजके किये हुये हैं।

सुखदेव मिश्र कवि २ दौलतपुर जिले रायबरेली वाले। १८०३ ए महाराज महान् कवि

बैसवारेमें होगये हैं राव मर्दनसिंह बैस डौंडियाखेरेके इन्होंने और उनका नाम रसार्णव नाम ग्रंथ नायकाभेदमें बहुत सुंदर बनाया है शंभुनाथ इत्यादि कवि इन्हींके शिष्यथे ।

सुखदेव कवि ३ अंतर्वेदी वाले । १७९१ ए कवि महाराज भगवंत राय खीची असोथर वाले के इहांथे कुछ आश्चर्य नहीं है कि ए महाराज सुखदेव मिश्र दौलतिपुर वाले न होवें ।

(१५) देव कवि प्राचीन देवदत्त ब्राह्मण समानेगांव जिले मैनपुरीके निवासी सं० १६६१ ये महाराज अद्वितीय अपने समयके भाम मम्मट के समान भाषा काव्यके आचार्य होगयेहैं शब्दों में ऐसी समाई कहां है जिनमें इनकी प्रशंसा की जावे इनके बनाये ग्रंथोंकी संख्या आज तक ठीक ७२ हमको मालूम हुईहै तिनमें केवल ११ ग्रंथके नाम जो हमको मालूम हैं लिखे जाते हैं जिन्हें अबसर हमने भी देखाहै ।

१ प्रेमतरंग २ भावविलास ३ रसविलास ४ रसानंदलहरी ५ सुजानविनोद ६ काव्यरसायन पिंगल ७ अष्टयाम ८ देवमायाप्रपंचनाटक ९ प्रेमदीपिका १० सुमिलविनोद ११ राधिकाविलास

देव (काष्ठजिह्वा स्वामी) काशीस्थ । १९११ ए महाराज पंडितराज षट्शास्त्रके वक्ता प्रथम संस्कृत काशीजीमें पढि दैवयोगसे एकबार अपने ~~हृत्से~~ बादकर पीछे पछिताय काष्ठकी जीभ मुहमें डालि बोलना बंद करिदिया पाटीमें लिखिके बातचीत करतेथे उन्हीं दिनों श्रीमन्महाराज ईश्वरीनारायणसिंह काशीनरेशने इनसे उपदेश लै रामनगरमें टिकाया तब ए महाराज भाषामें नाना ग्रंथ बिनयामृत इत्यादि बनाए इन्हींके पद आजतक काशीनरेशकी सभामें गाए जाते हैं ।

(१६) पजनेशकवि बुंदेल खण्डी १८७२ ए कवि परनामें थे और मधुप्रिया नाम ग्रंथ भाषासाहित्यमें अद्भुत बनायाहै इस कविकी अनूठी उपमा अनूठे पद अनुप्रासैं जमक तारीफके योग्य हैं पर टवर्ग शृंगार रसमें और कटु अक्षरोंसे जो अपनी कवितामें भरिदियाहै इस कारणसे इनकी काव्य कविलोगोंके तीररूपी जिह्वाकी निशाना हो रही है इनका नखशिख देखने योग्यहै इन्होंने पारसी विद्यामेंभी श्रम कियाथा ।

(१७) घनआनंद कवि । १६१५ ए कवि कविलोगोंमें महाउत्तम कवि होगए हैं ।

(१८) घनश्याम शुक्ल असनी वाले १६३५ ए कवि कवितामें महानिपुण बांधवनरेशके इहां थे ग्रंथ तौ पूरा हमने कोई नहीं पाया कवित्त २०० तक इनके हमारे पास हैं कालिदासने भी इनके कवित्त हजारमें लिखेहैं ।

(१९) सुंदरकविब्राह्मण ग्वालियरनिवासी सं० १६८८ ये महाराज शाहजहां बादशाहके कवि थे पहिले कविरायकी पदवी पाया इनका बनाया हुवा सुंदर शृंगार नाम ग्रंथ भाषासाहित्य में बहुत सुंदर है इन्हीं कविके पदमें यह अगन परा था (सुंदर कोप नहीं सपने) यह कवित्त इस ग्रंथमें है ।

सुंदर कवि दादूजीके शिष्य मेवाडदेशके निवासी । इनकी कविता शांतरसमें कुछ अच्छी है सुंदर सांख्य नाम एक इनका बनाया हुआ ग्रंथभी सुना जाताहै ।

(२०) सुंदरकवि बंदीजन असनीवाले रसप्रबोध ग्रंथ बनायाहै ।

मुरारिदास ब्रजवासी इनके पद राग सागरोद्भवमें हैं ।

(२१) बोधाकवि सं० १८०४ इनके कवित्त बहुतही सुंदर हैं ।

बोधकवि बुंदेलखण्डी । सं० १८५५ ऐजन् ।

श्रीसूरदासजीका जीवनचरित्र ।

(२२) श्रीपतिकवि प्रयागपुर जिले जलियाच निवासी सं० १७०० ये महाराज भाषासाहित्यके आचार्योंमें गिनेजातेहैं इनके बनाएहुए काव्यकल्पद्रुम १ काव्यसरोज २ श्रीपतिसरोज ३ ये तीन ग्रंथ विख्यातहैं हमने ये तीनों ग्रंथ नहीं देखे और न इनके कुल और न जन्मभूमिसे हमको ठीक ठीक आगाही है ।

(२३) दयानिधिकवि बैसवारेके सं० १८११ राजाअचलसिंह बैसकी आज्ञानुसार शालिहोत्र ग्रंथ बनाया ।

(२४) युगलकिशोरभट्ट कैथल बासी सं० १७९५ ए महाराज मोहम्मद शाह बादशाहके बड़े मुसाहिवों में थे इन्होंने संवत् १८०३ में अलंकारनिधि नाम एक ग्रंथ अलंकार में अद्वितीय बनाया है जिसमें ९६ अलंकार उदाहरण समेत वर्णन किये हैं उसी ग्रंथ में ए दो दोहा अपने नाम और सभा के समाचार में कहे हैं ।

दोहा—ब्रह्म भट्ट हौं जाति मैं, निपट अधीन निदान । राजा पद मोको दयो, महमद शाह सुजान ॥ १ ॥
चारि हमारी सभा में, कोविद कविमतिचारु । सदा रहत आनंद बडे, रसको करत विचारु ॥ २ ॥
मिश्र रुद्रमणि विप्रवर, अरु सुखलाल रसात् शतंजीव सुगुमान हैं, शोभित गुणनि निशाल ॥ ३ ॥
युगलकिशोर कवि २ शृंगाररस में कवित्त नीके हैं ।

जुगराज कवि बहुतही सरस काव्य इनकी है ।

जुगुलप्रसाद चौबे । इनकी बनाई हुई दोहावली बहुत सुंदर काव्य है ।

जुगुलदास कवि—पद बनाए हैं ।

जुगुलकवि सं० १७५५ इनके बनाए हुए पद अति अनूठे महाललितहैं ।

(२५) कविद (उदयनाथत्रिवेदी) बनपुरा निवासी कविकालिदासजूके पुत्र सं० १८०४ ये कवि अपने पिताके समान महान्कवीश्वरहो गुजरेहैं प्रथम राजाहिम्मतसिंह बंधलगोत्री अमेठी महाराजके इहां बहुत दिनतक रहे और कवितामें अपना नाम उदयनाथ वर्णन करतेरहे जब राजाके नामसे रसचन्द्रोदयनाम ग्रंथबनाया तब राजाने कविद पदवी दिया तबसे अपनानाम कविदकरके धरतेरहे । इस ग्रंथके चारिनामहैं रतिविनोदचंद्रिका १ रतिविनोदचंद्रोदय २ रसचंद्रिका ३ रसचंद्रोदय ४ यह ग्रंथ भाषासाहित्यमें महाअद्भुतहैं तेहि पीछे कविंदजी थोरेदिन राजागुरुदत्तसिंह अमेठी के इहां रहि भगवंतराइखीची और गजसिंह महाराज आमेर और राव बुद्धहाडा बूंदीवालेके यहां महामान सन्मानके साथ काल व्यतीत करतेरहे और एक कविद त्रिवेदी बैतगांव जिलेरायबरेलीमें भी महान्कवि होगयेहैं ।

कविद २ सखीसुख ब्राह्मण नरवर बुंदेलखंड निवासीके पुत्र सं० १८५४ इन्होंने रसदीपक नाम ग्रंथ बनाया है ।

कविद ३ सरस्वती ब्राह्मण काशीनिवासी सं० १६२२ ये कविन्दाचार्य महाराज संस्कृत साहित्य शास्त्रमें अपने समयके भामनु थे । शाहजहां बादशाहके हुकुमसे भाषाकाव्य बनाना प्रारंभ किया और बादशाही आज्ञानुसार कविद कल्पलता नाम ग्रंथ भाषामें रचा जिसमें बादशाह के पुत्र दाराशिकोह और बेगम साहेबकी तारीफमें बहुत कवित्त हैं ।

(२६) गोविंद अटलकवि सं० १६७० इनके कवित्त हजारामें हैं ।

गोविंदजी कवि सं० १७५० ऐजन् ।

गोविंददासजी ब्रजवासी सं० १६१५ राग सागरोद्भवमें इन्द्रजीतसिंह ९ काव्य नामांजीके शिष्यथे।
गोविंदकवि सं० १७९८ एकवीथर बडे नामी कवि हो गए हैं। इनका बनायाहुवा करुणा-
भरण ग्रंथ बहुत कठिन और साहित्य में शिरोमणि है ।

केशवदास सनाढ्य मिश्र बुंदेलखंडी सं० १६२४ इनका प्राचीन निवास टिहरीथा। राजा मधुकर
शाह उडछावाले के इहां आये और वहां उनका बडा सन्मान हुवा राजा इन्द्रजीतसिंहने २१
गांव संकल्प दिये तब कुटुंब सहित उडछे में रहने लगे । भाषा काव्यके तौ
भाम मम्मट भरता के समान प्रथम आचार्य्य समुझना चाहिये काहेते कि काव्यके
दशौ अंग पहिले पहिले इन्हींने कविप्रिया ग्रन्थमें वर्णन किये तेहि पीछे अनेक आचार्य्योंने
नानाग्रन्थ भाषामें रचे प्रथम मधुकर शाहके नाम विज्ञानगीता ग्रंथ बनाया
औ कविप्रिया ग्रन्थ प्रवीनराइ पातुरीके लिये रचा और रामचंद्रिका राजा मधुकरशाहके पुत्र इन्द्र-
जीतके नामसे बनाया और रसिकप्रिया साहित्य और राम अलंकृतमंजरी पिंगल ए दोनों ग्रन्थ
विद्वज्जनोंके उपकारार्थ रचे । जब अकबर बादशाहने प्रवीनराइ पातुरीके हाजिर न होने और उदूल
हुकुमी और लडाईके कारण राजा इन्द्रजीत पर एक करोड रुपया जुर्माना किए तब
केशवदासजीने छिपकर राजा बीरबर मंत्रीसे मुलाकात किया और बीरबरजूकी प्रशंसामें (दियो
करतार दुहूँ करतारी) यह कवित्त पढा तब राजा बीरबरने महाप्रसन्न है जुर्माना माफ कराया
परन्तु प्रवीणराइको दरबारमें आनेपडा ।

केशवदास २ सामान्य कविताहै ।

केशवराइ बाबू बघेलखंडी सं० १७३९ इन्होंने नायकाभेदमें एक ग्रन्थ बहुत सुन्दर बनायाहै
और इनके कवित्त बलदेवकविने अपने संगृहीत ग्रन्थ सतकवि गिराबिलासमें लिखेहैं ।

केशवरामकवि इन्होंने भ्रमरगीत नाम ग्रन्थ रचाहै ।

बाबू रघुनाथ सिंहके दोहेके अनुसार कवियोंका समय 'शिवसिंह सरोजसे' निरूपण किया जाताहै ।

(१) ओली रामकवि सं० १६२१ कालिदासजीने इनकी काव्य अपने हजारमें लिखाहै ।

(२) अकबरका हाल पहले लिखा गयाहै ।

(३) अगर कवि सं० १६२६ नीति संबंधी कुंडालिया छप्पय दोहा इत्यादि बहुत बनाएहैं ।

(४) अगरदास गलता जयपुर राज्यके निवासी सं० १५९५ इनके बहुत पद रागसागरोद्भव
रागकरुणामयमें हैं ए महाराजे कृष्णदास पयअहारीके शिष्यथे और इन महाराजके नाभादास
भक्तमाल ग्रंथकर्ता शिष्यथे ।

(५) करनेशकवि बंदीजन असनीवाले सं० १६११ ये कवि नरहरि कविके साथ दिल्लीमें
अकबरशाहकी सभामें जाते आते थे इन्होंने कर्णाभरण १ श्रुतिभूषण २ भूपभूषण ३ ये तीनि
ग्रन्थ बनाये हैं ।

(६) चतुरबिहारीकाव ब्रजवासी संवत् १६०५ इनके पद राग सागरोद्भवमें बहुतहैं ।

(७) गोपकवि सं० १५९० रामभूषण १ अलंकारचन्द्रिका २ ए दो ग्रन्थ बनाएहैं ।

(९) अमरेशकवि सं० १६३५ इनकी कविता महाउत्तमहै कालिदासजीने अपने हजारमें
इनकी कविता बहुतसी लिखीहै ।

श्रीमूरदासजीका जीवनचरित्र ।

(१०) आशकरनेदास भीमसिंह नरवरगढ वालेके पुत्र सं० १६१५ पद बहुत बनाए हैं जो कृष्णानंद व्यासदेवके संगृहीत ग्रन्थमें मौजूद हैं ।

(११) अजबेस प्राचीन सं० १५७० ये कवि श्रीराजा बीरभानसिंह जोधपुरके इहाँथे और उसी देशके रहनेवाले बंदीजन मालूम होते हैं ।

अजबेस नवीन भाट सं० १८९२ ये कवि श्रीमहाराज विश्वनाथसिंह बांधव रीवाँनरेशके इहाँथे ।

(१२) कादर, [कादिरवख्श मुसल्मान पिहानीवाल] सं० १६३५ कवितामें निपुणथे और सैयद इब्राहिम पिहानीवाल रसखानिके शिष्यथे ।

(१४) टोडर, (राजा टोडरमल खत्री पंजाबी) सं० १५८० ये राजा टोडरमल अकबर बादशाहके दीवान आला थे इनके हालातमें तारीख फारसी भरी हुई है अरबी फारसी संस्कृत विद्यामें महानिपुणथे श्रीमद्भागवतको संस्कृतसे फारसीमें उल्था किया है और भाषामें नीति संबंधी बहुत कवित्त कहे हैं इन महाराजने दो काम बहुत शुभ हिन्दुस्तानियोंके लिए किए हैं एक तौ पंजाब देशमें खत्रियोंके इहाँ रिवाज तीन साला मातमको उठाय केवल वार्षिक रसमको नियत किया दूसरे फारसी हिसाब किताबको ईरान देशके माफिक हिन्दुस्तानमें जारी किया सं० ९९८ हिजरीमें शहर लाहौरमें देहान्त हुआ ।

(१६) जैतकवि सं० १६०१ अकबर बादशाहके इहाँथे ।

(१७) चरणदास ब्राह्मण पंडितपुर जिला फैजाबाद सं० १५३७ सुरोदय ग्रन्थ बनाया ।

(१८) चतुर्भुज सुन्दर कविता करी है ।

चतुर्भुजदास सं० १६०१ रागसागरोद्भवमें इनके बहुत पद हैं ए महाराज करौलीके राजा स्वामी विठ्ठलनाथजी गोकुलस्थके शिष्यथे अष्टछापमें इनका भी नाम है ।

(१९) जीवन कवि सं० १६०८ इनके कवित्त हजारामें हैं ।

(२१) ताजकवि सं० १६५२ हजारामें इनके कवित्त हैं ।

(२२) होलरायकवि बंदीजन होलपुर जिले बाराबंकी सं० १६४० ए महान कवि अकबरके दरबार तक राजा हरिवंशराइ दिवान कायथ बदरकावासीके बसिलेसे पहुँचे और एक चक पाइ उसीमें होलपुर नाम ग्राम बसाया एक दिन श्रीगोस्वामी तुलसीदासजी अयोध्यासे लौटते समय होलपुरमें आए होलरायने गोसाँईजीके लोटाकी प्रशंसामें कहा ।
दोहा—लोटा तुलसीदासको, लाख टकाको मोल ।—तब गोसाँईजी बोले—

मोल तोल कछु है नहीं, लेहु राय कवि होल ॥ १ ॥

होलराइने उस लोटाको मूर्तिके समान स्थापन करि उसके ऊपर चवुतरा बांधि पूजन करते रहे हमने अपने आँखसे देखा है कि आज तक उसकी पूजा होती है इस होलपुरमें सिवाय गिरिधर और नीलकण्ठ इत्यादिके कोई नामी कवि नहीं हुए इन दिनों लछिराम और संतबक्स ए दो कवि अच्छे हैं यह गाँव आज तक इन्हीं बंदीजनोंके नंबरमें है ।

(२३) खेमकवि २ ब्रजवासी सं० १६३० रागसागरोद्भव रागकरुणामें इनके पद हैं । एक खेमकवि बुंदेलखंडी हैं ।

(२४) जोधकवि सं० १६९० अकबरबादशाहके इहाँथे ।

१ संवत् १८९२ के अजबेस मूरदासके समयके नहीं हैं ।

(२५) जोयसीकवि सं० १६५८ इनके कवित्त हजस्त हैं ।

(२६) चंद्रसखी ब्रजबासी सं० १६३८ इनके पद रागसागरोद्भवमें हैं ।

(२७) कृष्णदास गोकुलस्थ वल्लभाचार्यके शिष्य सं० १६०१ इनके बहुत पद राग सागरोद्भवमें लिखे हैं और इनकी कविता अत्यंत ललित और मधुर है एक कवि और सूरदास और परमानंददास और कुंभनदास चारों श्रीवल्लभाचार्यके शिष्य थे कृष्णदासजीकी कविता सूरदासकी कवितासे मिलती थी एकदिन सूरजी बोले आप अपना कोई ऐसा पद सुनावो जो हमारी काव्यमें न मिले तब कृष्णदासजीने चार पद सुनाये उन सब पदोंमें सूरजीने चोरी अपने पदोंकी साबित किया तब कृष्णदासजीने कहा कालिह हम अनूठे पद सुनावेंगे ऐसा कहि सर्व रात्रि इसी शोचमें नहीं सोये प्रातःकाल अपने सिरहाने यह पद लिखा हुआ देखि सूरजीके आगे पढा ॥ आवत बने कान्ह गोप बालक संग नैचुकी खुर रेनु छुरित अलकावली ॥ सूरजी जान गये कि यह करतूति किसी और ही कौतुकीकी है बोले अपने बाबाकी सहायता लीनी है इनकी गिनती अष्टछापमें है अर्थात् ब्रजमें आठ ८ बडेकवि हुए हैं वैष्णव तुलसीशब्दार्थप्रकाश ग्रंथमें गोपालसिंहने व्यास अष्टछापका लिखा है इत भांतिसे कि जुरैस ॥ कृष्णदास २ परमानंद ३ कुंभनदास ४ ए चारों वल्लभाचार्यके शिष्य और चतुर्भुज ५ छोटस्वामी ६ नंददास ७ गोविंददास ८ ए चारों विठ्ठलनाथ वल्लभाचार्यके पुत्रके शिष्य अष्टछाप करिके विख्यात हैं । कृष्णदासजीका बनाया हुआ प्रेमसरसग्रंथ बहुत सुंदर है ।

(२८) छेमकवि २ बंदीजन दलमऊके सं० १५८२ ए कवि हुमायूं बादशाहके इहां थे ।

(२९) अमृत कवि संवत् १६०२ अकबर बादशाहके यहां थे ।

(३०) खानखाना नवाब अब्दुलरहीम खानखाना बैरमखांके पुत्र रहीम और रहिमान छाप है । सं० १५८० ए महाविद्वान् अरबी फारसी तुरकी इत्यादि यामनीभाषा और संस्कृत ब्रजभाषाके बडे पंडित अकबर बादशाहकी आंखकी पुतली थे इन्हींके पिता बैरमकी जवांमरदी और तदबीरसे हुमायूंको दुबारा दिल्लीका राज्य प्राप्त हुआ खानखानाजी पण्डित कवि मुछाशायर ज्योतिषी और सब गुणवान मनुष्योंके बडे कदरदान थे इनकी सभा रातदिन विद्वज्जनोंसे भरी पुरी रहती थी संस्कृतमें इनके बनाए श्लोक बहुत कठिन हैं और भाषामें नवोरसके कवित्त दोहा बहुतही सुंदर हैं नीति संबन्धी दोहा ऐसे अपूर्व हैं कि जिनके पढनेसे कभी पढनेवालेको तृप्ति नहीं होती फारसीमें इनका दिवान बहुत उमदा है वाकियात बावरी अर्थात् बाबर बादशाहने जो अपना जीवनचरित्र तुरकी जबानमें आपही लिखा है उसको इन्होंने फारसी जबानमें तर्जुमा किया है ७२ वर्षकी अवस्था में सन् १०३६ हिजरीमें सुरलोकको सिधारे ।

श्लोक—आनीता नटवन्मया तव पुरः श्रीकृष्ण या भूमिका व्योमाकाशखखांबराब्धिवसवस्त्वत्प्रीतये
ऽद्यावधि ॥ प्रीतो यद्यासि मां निरीक्ष्य हि भगवन्मत्प्रार्थितं देहि मे नो चेद् ब्रूहि कदापि मानय
पुनर्मां दृशीर्भूमिकाः ॥ १ ॥

शृङ्गार सोरठा—भाषा ।

पलटि चली मुसक्याय, दुति रहीम उजियाय अति । बाती सी उसकाय, मानौ दीनी दीप की ॥ १ ॥
गई आगि उरलाय, आगि लेन आई जु तिय । लागी नहीं बुझाय, भभकि भभकि बरि बरि उठै ॥ २ ॥
नीति, दोहा—खीरा शिर धरि काटिये, मलिये निमक लगाय ।
करुये सुखको चाहिये, रहिमान यही सजाय ॥ १ ॥

श्रीसूरदासजीका जीवनचरित्र ।

फारसी ।

शुमार शौक नदानिस्तामकि ताचंदअस्त, जुज ई कद्र कि दाम सस्त आरजूमन्द अस्त,
नदाना दानम्, वनैदानम्, ईकदरदानम्, कि पाय ताबसरम हचै हस्तदर बंदस्त,
एक दिन खानखानाने यह आधा दोहा बनाया—

तारायन शशि रैन प्रति, सूर होहिं शशि गैन ।

औ दूसरा चरण नहीं बना रोज रात्रि को यह आधा दोहा पढा करते थे दिह्नीमें एक खत्रानी ने—
यह हाल सुनि आधा चरण बनाय बहुत इनाम पाया ।

तदपि अँघेरो है सखी, पीव न देखे नैन ॥ १ ॥

(३१) जगनकवि सं० १६५२ शृङ्गाररस में कवित्त चोखे हैं ।

(३२) ऊधोराम कवि सं० १६१० इनकी कविता कालिदास जू ने अपने हजारामें लिखी है ।

(३३) कमाल कवि (कबीरजु के पुत्र) कायस्थ सं० १६२२ इनकी कविता कालिदासने
हजारा में लिखी है । तत्पश्चात् :

(३४) जमालउद्दीन पद्मिनीवाल् सं० १६२५ कवि अच्छे थे ।

(३५) जगनंद कवि वृंदावनवासी सं० १६५८ इनके कवित्त हजारा में हैं ।

(३७) जमाल सं० १६०२ ए कवि गूढ कवि कूट में बहुत निपुण थे इनके दोहा बहुत सुंदर हैं ।

(३८) जलालउद्दीन कवि सं० १६१५ हजारा में इनके कवित्त हैं ।

(३९) कल्याणदास ब्रजवासी कृष्णदास पय अहारिके शिष्य सं० १६०७ इनके पद
रागसागरोद्भव में हैं । पुनः कल्याण सिंह भट्ट एक और है ।

(४०) फैजी शेख अवल फैज नागौरी शेख मुबारक के पुत्र सं० १५०८ इनको छोटे बड़े
विद्वान् भली भाँति जानते हैं कि ए फैजी अरबी फारसी संस्कृत भाषामें महानिपुण थे इनका
ग्रंथ हमने भाषामें नहीं पाया केवल दोहरा मिलेह ए अकबरके कविथे ।

(४१) ब्रह्मकवि राजा बीरबल ब्राह्मण अंतर्वेदिवाले सं० १५८५ इनका नाम प्रथम महेशदासथा
ए कान्यकुब्ज दुबे ब्राह्मण जिले हमीरपुरके किसी गांवके रहनेवाले थे काव्य पढि लिखि राजा
भगवानदास आविर नरेश के इहाँ कवि लोगोंमें नौकर होगये राजा भगवानदास इनकी कवितासे
बहुत प्रसन्न है अकबर बादशाहको नजरके तौर इनको देदिया ए कवि काव्यमें अपना नाम ब्रह्म
करिकै वर्णन करते थे अकबर कविताके सिवाय इनमें सब प्रकारकी बुद्धि पाय पूर्व संस्कारके अनु-
सार प्रथम अपना मित्र बनाय कविराइकी पदवी दिया तेहि पीछे पांच हजारीका मनसब औ मुसा-
हेब दानिश वरराजै बीरबरका खिताब दिया इनके जीवनचरित्र विचित्र तवारीखोंमें लिखे हैं सन्
९९० हिजरीमें बिजौर इलाके काबुलमें पठानोंके हाथसे समरभूमिमें मारेगए इनका समग्र ग्रंथ तौ
कोई हमने देखा सुना नहीं पर इनकी कविताई बहुतही फुटकर हमारे पुस्तकालयमें है सूरदासजी
ने कहा है ।

दोहा ।

सुंदर पद कविगंग के, उपमाको बरबीर । केशव अर्थ गंभीर को, सूर तीनि गुण तीर ॥

राजा बीरबर ने अकबरके हुक्मसे अकबरपुर गाँउ जिले कानपुरमें बसाय आप भी अपना
निवासस्थान उसीको नियत किया और नारे नौल कसबामें इनकी पुरानी इमारतें बड़ी

आलीशान आज तक मौजूद हैं चौधराई का ओहदा जो तुलसीदासजीका मिला और गोवध बंद हुआ और हिंदू मुसलमानों में बहुत मेलजोल हो गया ए सब बातें इन्हीं महाराज की कृपा से हुई थीं ।

(४२) फहीम शेख अबदुल फजल फैजीके कनिष्ठ सहोदर सं० १५८० इनके केवल दोहरा हमने पाये हैं ग्रंथ कोई नहीं मिला ए अकबरके वजीर थे ।

(४३) अभयराम सं० १६०२ कालिदास जीने इनकी काव्य अपने हजारों में लिखा है ।

(४४) परसिद्धकवि प्राचीन सं० १५९० ए महान् कवीश्वर खानखानाके इहाँथे ।

(४५) विट्ठल विपुल २ गोकुलस्थ श्रीस्वामी हरिदासके शिष्य १५८० इनके पद रागसागरोद्भवमें हैं ए महाराज मधुवनमें बहुधा रहा करते थे ।

(४६) रहीम कवि ए रहीमकवि खानखानाके सिवाइ दूसरे रहीम हैं कविता इनकी सरस है काव्य-निर्णयमें दासकविने इनका नाम एक कवित्तमें लिखा है परंतु दोनों रहीम अर्थात् अबदुलरहीम-खानखाना और इनरहीमकी फुटकर काव्यका भिन्न भिन्न करना कठिन है ।

कवित्त—सूर केशो मंडन बिहारी कालिदास ब्रह्म चिंतामणि मतिन नख गुण सो जानिये नीलकंठ नीलाधर निपटि नेवाज निधि नीलकंठमिश्र सुखेन देन ताजवैजयंती ॥ अलिमें रहीम खानखाना रसलीनवली सुंदर अनेक गनगनती बखानिये । ब्रजभाषाहेत ब्रजसबकीन अनुमान एते एते कविनकी वाणीहूँ ते जानिये ॥ १ ॥

(४७) अमरसिंह हाडा जोधपुरके राजा सं० १६२१ ए महाराज अमरसिंह श्रीहाडावंशावतंस सूरसिंहके पौत्र हैं जिन सूरसिंहने छः लाख रुपया एक दिनमें छः कवि लोगोंको इनाम दियाथा और जिनके पिता गजसिंहने राजपुतानेके कविलोगोंको धनाधीश करदियाथा राजा अमरसिंहकी तारीफमें जो बनवारी कविने यह कवित्त कहा है कि (हाथकी बड़ाई की बड़ाई जमधरकी) सो इसकी बाबत टाड साहेबकी किताब टाडराजिस्तानसे हम कछु लिखते हैं । प्रगटहो कि राजा अमरसिंह हाडा महागुणगाहक और साहित्यशास्त्रके बड़े कदरदान और खुदभी महाकवि थे । इन्हीं महाराजने पृथ्वीराजरायसा चंदकवि कृतको सारे राजपुतानेमें तलास कराय ६९ उनहत्तर खंड तक जमा किया जो अब सारे राजपुतानेमें बड़े बड़े पुस्तकालयोंमें मौजूद है । शाहजहां बादशाहके इहां अमरसिंहका मनसब तीन हजारीथा जो कि अमरसिंह बहुधा सैर शिकारमें रहा करते थे इस लिए एकदफे शाहजहानि नाराज है कछु जुर्माना किया और सलावतिखां वरुशी उल्मुमालिकको जुर्माना वसूल करनेको नियत किया अमरसिंह महाक्रोधाग्निसे प्रज्वलित दरबारमें आया । पहिले एक खंजरसे सलावतिखांका काम तमाम किया पीछे शाहजहां परभी तलवार आबदार झारी तलवार सितूनमें लगी बादशाह तौ भागबचे अमरसिंहने पाँच और बड़े सरदार मुगलोंको मारि आपभी उसीजगह अर्जुन गौर अपने सालेके हाथसे मारे गये विस्तारके भयसे संक्षेपसे लिखा है ।

(४९) दीलहकवि सं० १६२५

(५०) नरोत्तमदास ब्राह्मण बाडी ज़िले सीतापुरवाले सं० १६०२ सुदामा चरित्र बनाया है मानो प्रेमसमुद्र बहाया है ।

(५१) चेतनचंद्रकवि सं० १६१६ राजाकुशलसिंहसेंगर वंशावतंसकी आज्ञानुसार अश्वविनोद नाम शालिहोत्र बनाया ।

(५४) बारककवि सं० १६५५

श्रीमुरदासजीका जीवनचरित्र ।

(५५) इनके पद रागसागरोद्भवमें हैं ।

(५६) छीतस्वामी ब्रजवासी सं० १६०१ इनके पद बहुत रागकल्पद्रुममें हैं ए महाराज बल्लभाचार्यके पुत्र बिट्टलनाथजीके शिष्यथे इनकी गिनती अष्टछापमें है ।

(५७) भगवत रसिक वृंदावननिवासी माधवदास जीके पुत्र हरिदास जीके शिष्य सं० १६०१ इनकी कुंडलियां बहुत सुंदर हैं ।

(५८) छत्रकवि सं० १६२५ विजयमुक्तावली नाम ग्रन्थ अर्थात् भारतकी कथा बहुतही संक्षेपसे सूचीपत्रके तौरसे नानाछंदोंमें वर्णन किया है ।

(५९) गदाधर मिश्र ब्रजवासी सं० १५८० इनके पद रागसागरोद्भवमें हैं इनका बनाया हुआ यह पद 'सखी हौं श्यामके रंग रंगी । देखि बिकाय गई वह मूरति मूरति हाथ बिकी ।' देख स्वामी जीव गोसाईं जो उस समय बड़े महात्मा थे गदाधर भट्टसे बहुत प्रसन्न हुए ।

(६०) मानसिंह महाराज कछवाह आमेरवाले सं० १५९२ ए महाराज कवि कोविदोंके बड़े कदरदान थे हरिनाथ इत्यधिक कवीश्वरोंको एक एक दोहामें स्था लक्ष रुपया इनाम दिया इन्होंने अपने जीवनचरित्रका कवि-विशुद्ध निरूपण बनाया है जिसका नाम मानचरित्र है उसी ग्रंथमें लिखा है कि जब राजा मानसिंह काबुलकी ओर अकबरके हुकुमसे चले और अटक नदीपर पहुँचकै धर्मशास्त्रको विचारि उतरनेमें शोच विचार करने लगे और अकबर शाहको लिखा तब अकबरने यह दोहा लिखा ।—

दोहा—सबै भूमि गोपालकी, तामें अटक कहा । जाके मनमें अटक है, सोई अटक रहा ॥ १ ॥

यह दोहा पढ़ि मानसिंह अटकपर जाय स्वामिकायमें बड़ी वीरता करी ॥

(६१) लालनदास ब्राह्मण दलमऊ वाले सं० १६५२ ए महाराज बड़े महात्मा हो गुजरे हैं इनके कवित्त शांतरसमें हैं और हजारामें भी कालिदासने इनका नाम लिखा है । एक और मोतीलाल कवि हुए हैं ।

(६२) मोतीलाल कवि वांसी राज्यके निवासी सं० १५९७ गणेशपुराण भाषामें बनाया । एक और मोतीलाल कवि हुए हैं ।

(६३) हरिदास स्वामी वृंदावन निवासी सं० १६४० इन महाराजका जीवनचरित्र भक्तमाला में है इहां केवल हमको काव्यहीका वर्णन करना अवश्य है सो संस्कृतकाव्यमें जयदेव कवि से इनकी कविता कम नहीं है और भाषामें इनके पद सूर और तुलसीके पदोंके समान मधुर और ललित हैं इन्होंने बहुत ग्रंथ बनाये हैं पर हमने इनकी कविता केवल वही देखा है जो राग सागरोद्भव रागकल्पद्रुममें है तानसेनको इन्हीं महाराजने काव्य और संगीतविद्या पढ़ाया था ।

(६४) हरिनाथ कवि महापात्र बंदीजन असनीवाले सं० १६४४ ए महान् कवीश्वर नरहरि जूके पुत्र बड़े भाग्यवान् पुरुष थे जहां जिस दरबारमें गये लाखों रुपया हाथी घोड़े गांव रथ पालकी पाय लौटे श्रीबांधवनरेश राजाराम बघेलकी प्रशंसामें यह दोहा पढ़ा ।

दोहा—लंका लौ दिछी दई, साहि विभीषण काम । भये बघेलो राम सों, राजा राजाराम ॥ १ ॥

इस दोहा पर एक लक्ष रुपया इनाम पाया । और राजा मानसिंह सवाई आमेरवाले के पास ए दोहा पढ़ि दो लक्ष रुपया दान पाया ।

दोहा । बलिबोई कीरति लता, कर्ण करी द्वै पात । सींची मान महीपने, जब देखी कुँभिलात ॥ १ ॥

श्रीसूरदासजीका जीवनचरित्र ।

(८२) १७८५ ई. १६०१ कवित्त सुंदर हजारामें इनके कवित्त हैं ।

(८४) रसखानकवि सैदय इबराहाम पिहानीवाले सं० १६३१ एकवि सुसल्मानथे श्रीवृंदावनमें जाय कृष्णचंद्रकी भक्तिभावमें ऐसे डूबे कि फिर सुसल्मानी त्याग करि माला कंठी धारण किए हुए वृंदावनकी रजमें मिलि गए इनकी कविता निपट ललित माधुर्य्यतासे भरी हुई है इनकी कथा भक्तमालमें पढ़ने योग्य है ।

(८५) नाभादास कवि नाम नाराणदास महाराष्ट्र दक्षिणी सं० १५४० इनको स्वामी अग्रदास जीने गलता नाम इलाके आमेरमें लाय अपना शिष्य बनाय भक्तमाल नाम ग्रंथ लिखने की आज्ञाकरी नाभाजी ने ११८ छप्पय छन्दमें इस ग्रंथको रचा तेहि पीछे स्वामी प्रियादास वृंदावनीने उसका तिलक कवित्तोंमें किया तेहि पीछे लालजी कायथ कांथलाके निवासी वे सन् ११५८ हिजरी में उसीका टीका बनाय भक्त उरवासी नाम रक्खा इनदिनों उसी भक्तमालको महारासिक भगवत् भक्त तुलसीराम अगरवाले मीरापुर निवासीने ऊर्दूमें उल्थाकरि भक्तमाल प्रदीपन नाम धरा है नाभादासकी विचित्रकथा भक्तमालमें लिखी है ।

(८६) नरवाहनजी ज्यकि भौगाँव निवासी सं० १६०० एकवि स्वामी हितहरिवंशजीके शिष्य हैं इनके पद चतुष्टय नामकी इतिहासकी भक्तमालमें हैं ।

(८७) नरसिया कवि अर्थात् नरसाजी जूनागढ निवासी सं० १५९० इनके पद रागसागरोद्भवमें हैं ।
(८८) नारायणभट्ट गोसाईं गोकुलस्थ ऊंचगाँव बरसानेके समीपके निवासी सं० १६२० इनके पद रागसागरोद्भवमें हैं ये महाराज बडेभक्तथे वृंदावन मथुरा गोकुल इत्यादिमें जे तीर्थस्थान लुप्तहोगयेथे उन सबको प्रगट करि रासलीलाकी जड इन्होंने प्रथम डाली है ।

(८९) तानसेनकवि ग्वालियर निवासी सं० १५८८ एकवि मकरंद पौंडे गौड ब्राह्मणके पुत्रथे प्रथम श्रीगोसाईं स्वामी हरिदासजू गोकुलस्थके शिष्यहैं काव्य विद्याको यथावत् सीखा तत्पश्चात् शेख महम्मद गौस ग्वालियरवासीके पास जाय संगीतविद्याके लिये प्रार्थनाकरी शाहसाहेब तंत्रविद्या में अद्वितीयथे बरन् सुसल्मानोंने इन्हींको इसविद्याका आचार्य्य सब तवारीखोंमें लिखाहै शाहसाहेबने अपनी जीभ तानसेनकी जीभमें लगाय दिया उसीसमयसे तानसेन गानविद्यामें महा-निपुण होगए इनकी प्रशंसामें आईन अकबरीमें ग्रंथकर्ता फहीमने लिखाहै ऐसा गानेवाला पिछले हजारामें कोई नहीं हुवा निदान तानसेन दौलतिखां शेरखां बादशाहके पुत्रपर आशिकहैं उनके ऊपर बहुतसीकविता करी तेहि पीछे दौलतिखांके मरनेपर श्रीबांधवनरेश रामसिंह बघेलाके इहां गए और वहांसे अकबर बादशाहने अपने इहां बुलाय लिया तानसेन और सूरदासजीसे बहुत मित्रताथी तानसेन जीने सूरदासकी तारीफमें यह दोहा बनाया ।
दो०—किधौं सूरको शर लग्यो, किधौं शूरकी पीर । किधौं सूरको पदलग्यो, तनमनधुनत शरीर ॥१॥

तब सूरदासजीने यह दोहा कहा ।
दोहा । बिधना यह जिय जानिकै, शेष न दीन्हें कान । धरा मेरु सब डोल तो, तानसेन की ताना ॥२॥
इनके ग्रंथ रागमाला इत्यादि महाउत्तम काव्यके ग्रंथ हैं ।

(९०) निपट निरंजन स्वामी सं० १६५० एक महाराज गोस्वामी तुलसीदासके समान सिद्ध होगए हैं और इनके ग्रंथोंकी ठीक ठीक संख्या मालूम नहीं होती पुरानी संग्रहीत पुस्तकोंमें सैकड़ों कवित्त हम इनके देखतेहैं हमारे पुस्तकालयमें शांत सरसी १ और निरंजन संग्रह २ दो ग्रंथ इन महाराजके बनाये हुए हैं इनकी कवितामें बहुत बड़ा प्रताप यह है कि मनुष्य कैसाही काम क्रोध इत्यादि पाशोंसे बद्ध होवै इनकी वाक्यके श्रवण कीर्तनसे निःसंदेह मुक्त होजावे ।

(९१) इंद्रजीत त्रिपाठी बनपुरा अंतर्वेदीवाले सं० १७३९ और
(९२) पृथ्वीराज कवि सं० १६२४ हजारामें इनके कवित्त हैं य कावे बीकानेरके राजा संस्कृत और भाषाके बड़े कवि थे ।

(९३) लक्ष्मीनारायण मैथिल सं० १५८० ये कवि खानखानाके यहाँ थे ।

(९४) हरिकवि ये महान् कवि थे इन्होंने चमत्कारचंद्रिका नाम ग्रंथ भाषाभूषणका टीका १ और कविप्रियाभरण नाम ग्रंथ कविप्रियाका तिलक २ विस्तारपूर्वक बनाया है और तीनों काण्ड अमरकोश भाषा किया है ।

(९५) बलिभद्र सनाढ्य उडछेवाले केशवदास कविके भाई सं० १६४२ इनका नखशिख सारे कवि कोविदोंमें महाप्रमाणिक ग्रंथ है और भागवतपुराणपर टीका बहुत सुंदर किया है ।

(९६) विठ्ठलनाथ गोकुलस्थ गोसाईं वल्लभाचार्यके पुत्र सं० १६२४ ये महाराज वल्लभाचार्य जीके पुत्र परमभक्तवात्सल्यनेष्टाके हुए हैं इनके सात पुत्रोंकी सात गादियाँ गोकुलजीमें चली आती हैं इनकी कविता पद इत्यादि बहुतसे रागसागरोद्भवमें हैं ।

(९७) विश्वनाथ कवि प्राचीन सं० १६५५

(९८) पद्मनाभजी ब्रजवासी कृष्णदास पयहारी गलताजीके पुत्र सं० १६५५ ये महाराज बहुत रागसागरोद्भवमें हैं अर्थात् कीलह, अग्रदास, केवल, देवा, कल्याण, हठीनारायण पद्मनाभ ये सब कृष्णदासजीके शिष्य, और महान् कवि हुए हैं और अग्रदासके शिष्य नाभादास थे ।

(९९) प्रवीनराइ पातुरी उडछा बुंदेलखण्डबासिनी सं० १६४० इस वेश्याकी तारीफमें केशव दासजूनै कविप्रिया ग्रंथकी आदिमें बहुत कुछ लिखा है इसके कवि होनेमें कुछ संदेह नहीं इसका बनाया हुआ ग्रंथ तो हमको नहीं मिला केवल एक संग्रह मिली है जिसमें इसके सैकड़ों कवित्त बनाए हुए हैं हमने किसी तवारीखमें लिखा नहीं देखा कि बादशाह अकबरने प्रवीनको बोलाया केवल विदित है कि अकबरने प्रवीनकी प्रवीनताई सुनी दरबारमें हाजिर होनेका हुकुम दिया तो प्रवीनरायने प्रथम राजा इंद्रजीतकी सभामें जाय ये तीनि कूट कवित्त पढ़े (आईहो बूझन मंत्र) तेहि पीछे जब प्रवीन सभामें बादशाहके गई तो बादशाहसे प्रश्नोत्तर हुए ।

बादशाह—युवन चलत तिय देहते, चटकि चलत किहि हेतु ।

प्रवीन—मन्मथ वारि मसालको, सैति सिहारो लेतु ॥ १ ॥

बादशाह—ऊंचे ह्वै सुर वश किये, सम ह्वै नर वश कीन ।

प्रवीन—अब पताल वश करनको; ढरकि पयानो कीन ॥ २ ॥

इसके पीछे जब प्रवीनने यह दोहा पढ़ा ।

विनती राय प्रवीनकी, सुनिये शाह सुजान । जूंठी पतरी भखतहैं, बारी बायस श्वान ॥ १ ॥

तब बादशाहने बिदाई दई और प्रवीन इंद्रजीतके पास आई ।

(१००) भगवानदास निरंजनी भृत्यहरि सत कवित्तोंमें भाषा किया है । पुनः भगवानदास मथुरा निवासी सं० १५९० रागसागरोद्भवमें इनके पद हैं ।

(१०१) मनोहर कवि (राजा मनोहरदास) कछवाहा सं० १५९२ ये महाराज अकबर शाहके मुसाहिब फारसी संस्कृत भाषाके महान् कवि थे फारसीमें अपना नाम (तौसनी) करिके वर्णन करते थे ।

* मार्कंडेय कविने मुझसे यह कवित्त कहा था—

कवित्त—जबते सुनीहैं बैन तवते न मोको चैन पातीपढी नेकु सो बिलंबनालगावैगो । लेके यमदूतसो समस्त राजपूत आज आठघडी आगरामें उद्धम मचावैगो ॥ कहै पृथ्वीराज प्रिया नेक उर धीर धारो चिरजीव राना ये मलेछन भगावैगो । मान को मरदि मान परबल प्रतापसिंह बन्बर लो तडपि अकब्र पै आवैगो ॥

(१०३) धीरज नरिंद महाराज के शिष्य सं० १६०१ इनके पद रागसागरोद्भव-
में बहुत हैं और इनकी गिनती अष्टछापमें है ।

(१०३) नवीनकवि बहुतही सुंदर कवित्त शृंगाररसके हैं ।

(१०४) माणिकचंद्र कवि सं० १६०८ रागसागरोद्भवमें इनके पद हैं ।

(१०५) निहाल प्राचीन सं० १६३५ ।

(१०६) मुकुंदसिंह हाडा महाराज कोटा सं० १६३५ ये महाराजा शाहजहां बादशाहके बड़े
सहायक और कविताईमें महानिष्ठुण कवि कोविदोंके चाहकथे ।

(१०७) सुबारक सैयदसुबारक अली विलग्रामी सं० १६४० इनकी काव्य तौ विदित है इन-
का ग्रंथ कोई हमने नहीं पाया कवित्त सैकड़ों हमारे पुस्तकालयमें हैं ।

(१०८) बीरबर (बीरबर कायस्थ दिल्ली निवासी) सं० १७७७ ये महान्कविथे इनका बनाया
हुवा कृष्णचन्द्रिका नाम ग्रंथ साहित्यमें बहुत सुन्दर और हमारे पुस्तकालयमें मौजूद है ।

(११०) दिनेशकवि इनका नखशिख बहुतही विचित्र है ।

(१११) दानकवि धांकरमें सरस कविताई है ।

(११२) तेहीकवि ।

(११४) धीरज नरिंद महाराज ईंद्रजीतसिंह बुंदेला उडछावाले सं० १६१५ इन्हीं महाराजके
इहाँ कवि केशवदासथे और प्रवीनराइ पातुरीभी इन्हींके सभामें विराजमानथी इनके समयमें
उडछा बड़ी राजधानीथी । ❀

(११७) श्रीगोस्वामी तुलसीदासजी सं० १६०१ ये महाराज सरवरिया ब्राह्मण राजापुर जिले
परागके रहनेवाले प्रायः संवत् १५८३ के करीब उत्पन्न हुए थे और सं० १६८० में स्वर्गवास हुवा
इनके जीवनचरित्रकी पुस्तक बेनीमाधवदास कवि पुसकाग्रामवासीने जो इनके साथ
साथ रहे हैं बहुत विस्तारपूर्वक लिखी है उसके देखनेसे इन महाराजके सब चरित्र प्रगट होतेहैं इस
पुस्तकमें ऐसे विस्तार कथाको हम संक्षेप करिके वर्णनकरें निदान गोसाईंजी बड़े महात्मा
रामोपासक महायोगी सिद्ध होगएहैं इनके बनाये ग्रंथोंकी ठीक ठीक संख्या हमको मालूम नहीं
हुई केवल जो ग्रंथ हमने देखे अथवा हमारे पुस्तकालय में हैं उनका जिकर किया जाता है प्रथम
४९ कांड रामायण बनाया है इस तफसीलसे ।

१ चौपाई रामायण ७ कांड । २ कवित्तावली ७ कांड । ३ गीतावली ७ कांड । ४ छंदावली ७ कांड ।
५ बरवै ७ कांड । ६ दोहावली ७ कांड । ७ कुंडलिया ७ कांड । और सिवाय इन ४९ कांडके
१ सतसई । २ रामसलाका । ३ संकटमोचन । ४ हनुमतवाहुक । ५ कृष्णगीतावली । ६ जानकी-
मंगल । ७ पार्वतीमंगल । ८ कडकाछंद । ९ रोलाछंद । १० झूलनाछंद । इत्यादि औरभी ग्रंथ
बनाएहैं अन्तमें बिनयपत्रिका महाविचित्र मुक्तिरूप प्राज्ञानंद सागरग्रंथ बनायाहै चौपाई गोसाईं
महाराजकी ऐसी किसी कविने बनाय नहीं पाया और न बिनयपत्रिकाके समान अद्भुतग्रंथ आज
तक किसी कवि महात्माने रचा इस कालमें जो रामायण न होती तौ हम ऐसे सूखोंका बेडा पार

* (११५) श्रीपति कविका वर्णन पहले हुआहै परंतु वह इस दोहेका नहीं है ।

रत्नाकर कविने हमसे कहा है कि श्रीपति कवि अकबर बादशाहके नौकर थे परंतु खुशामदी नथे कई एक कवियोंने मिल-
कर अकबर बादशाहके सामने [करो मिल आश अकबरकी] समस्या दिये परन्तु कविने स्पष्ट बादशाहको फटकारा यह
कवि भक्त था वहतों कवितासे स्पष्ट ही मालूम हुआ ।

अबके मुलताँ फुनियान समान हैं बांधत पाग अटवरकी । तंजि एक को दूजो भजै जो कोऊ तब जीभ कटै वह लवरकी ॥
शरणागत श्रीपति श्रीपति की नहिं त्रास जरा कोऊ जवरकी । जिनको नहिं आश कछु हरिकी सो करो मिलि आश अकबरकी ॥

नहीं लगता गोसाईजी श्रीअयोध्याजी, मथुरा, वृन्दावन, कुरुक्षेत्र, प्रयाग, उन्नाव, मथुरा, इत्यादि क्षेत्रोंमें बहुत दिनतक घूमते रहे हैं सबसे अधिक श्रीअयोध्या, काशी, पराग और उत्तराखण्ड, बंशीबट, इत्यादि जिले सीतापुरमें रहे हैं । इनके हाथकी लिखी हुई रामायण जो राजापुरमें थी वह खण्डित होगई है पर मलिहाबाद में आजतक सम्पूर्ण ७ काण्ड मौजूद हैं १ पत्रा नहीं है विस्तार भयसे अधिक हालात हम नहीं लिख सकते दो दोहा पर इन महाराजका वृत्तांत समाप्त करते हैं । दोहा—कविता करता तीनि हैं, तुलसी केशव सूर ॥ कविता खेती इन लुनी, सीला बिनत मजूर ॥ १ ॥ तुलसी रवि सूरज शशी, उडगण केशव दास ॥ अबके कवि खद्योत सम; जहँ तहँ करत प्रकाश ॥ २ ॥

इति श्रीसूरदासजीका जीवनचरित्र समाप्त ।

* बाबू रघुनाथसिंहने जो दोहे मुझे दिये थे उससे मालूम हुआ कि ११७ कवि सूरदास के समयमें वर्तमान थे । इनमेंसे दो तीन कविको छोड़कर सभीका नाम “शिवसिंह सरोज” में मिलता है पर इससे (शिवसिंहसरोज) जो मैंने समय लिखा है सबका समय सूरदासके समयसे नहीं मिलता । सूरदास का समय संवत् १६४० “शिवसिंहसरोज” में लिखा है और सूरदास जीने स्वयं “साहित्यलहरी” नामक पुस्तकमें “साहित्यलहरी” के बनानेका समय सं० १६०७ लिखा है । और भारतेंदु हरिश्चन्द्रने लिखा है कि संवत् १६२० के लगभगमें इन्होंने शरीर त्यागा अब यदि सूरदासजीके जन्मसे मरण पर्यंत १२५ वर्ष रख लेते हैं तो भी संवत् १५०५ से लेकर १६२० तक होता है अब यदि संवत् १७०० से अधिकके समयके कवियोंको सूरदासजीके सामयिक रघुनाथसिंहके दोहे और “शिवसिंहसरोज” के अनुसार ठहराया गया है तो यह ठीक नहीं है । अब सोचना पड़ा कि बाबू रघुनाथसिंहके दोहे ठीक हैं कि नहीं । यह तो मुक्तकाले कहना पड़ेगा कि नहीं ॥ २५२ ॥ रघुनाथसिंहके दोहे ठीक हैं परन्तु कई एकमें भ्रम है उसमें भी यह नहीं कहा जा सकेता है कि इस नामके और कवि न हुये हों परन्तु “शिवसिंहसरोज” से जो मैंने कवियोंका समय प्रकाश किया है उसमें अवश्य भ्रम है ।

हरिश्चन्द्रजीने लिखा है सूरदासके समयमें तुलसीदासजी न हुए उसका कारण सोचनेसे यह मालूम होता है कि नन्ददासजीके भाई तुलसीदासजीपर ध्यान गया है क्योंकि वैष्णवोंकी चौरासी वार्तामें लिखा है कि तुलसीदास और नन्ददास भाई हैं और नन्ददासका समय संवत् १५८५ का है और तुलसीदास नन्ददासका भाई गोसाईचरित्र उर्दूमें भी लिखा है । अथवा मीराबाईके समयपर ध्यान गया होगा क्योंकि “भक्तकल्पद्रुम” और “रामरसिकावली” तथा “हरिभक्तिप्रकाशिका” में मीराबाई और तुलसीदासकी बातचीत लिखी है परन्तु मीराबाईका समय तुलसीदासके समयमें भेरी सम्मतिसे नहीं है ।

क्योंकि “शिवसिंहसरोज” में मीराबाईके विषयमें यह लिखा है ।

मीराबाई सं० १४७५ में हुई हमने इनका जीवनचरित्र भक्तमाल तुलसीदास कायस्थकृतमें देखा और तारीख चित्तौरसे मिलाया तो बड़ा फरक पाया गया अब हम इनका हाल चित्तौरके प्राचीन प्रबंधसे लिखते हैं ये मीराबाई माडवार देशमें राना राठौरवंशावतंस में रेतिया देशाधिपतिके यहां उत्पन्न हुई थीं यह रियासत सारे मारवाडके फिरकोंमें उत्तरोत्तर है और मीराबाईका विवाह सं० १४७० के करीब राना मोकल देवके पुत्र राना कुम्भकरन चित्तौर नरेशके साथ हुआ था संवत् १५२५ ऊदारानाके पुत्रने रानाको मार डाला मीराबाई महास्वरूपवान और कवितामें अति निपुणा थीं । रागगोविंद ग्रंथ भाषा में बहुत ललित बनाया है चित्तौरगढमें दो मंदिर करीब महल राना राय मलके थे । एक राना कुम्भूका और दूसरा मीराबाईका सो मीराबाई अपने इष्टदेव श्यामनाथकी उसी मंदिरमें स्थापन करि नृत्य गीत भाव भक्तिसे रिझाया करती थीं । एक दिन श्यामनाथ मीराके प्रेमवश है चौकीसे उतरि अंकमें ले बोले हे मीरा, केवल इतनाही शब्द राधानाथके मुंहसे सुनि मीराबाई प्राणत्याग करि रसिकविहारी गिरिधारीके नित्यविहारमें जायमिली इन दोनों मंदिरोंके बनानेमें नब्बेलाख रुपया खर्च हुआ था ।

मीराबाईके विषयमें ‘तारीख तुहफए राजस्थान’ से मौलवी मुहम्मद उवैदुल्लाह फरहवीने लिखा है ।

“सांगाको इस शिकस्तका निहायत रंज हुआ, वह इसी सालके अन्दर मेवाडके पहाड़ी इलाक़ेमें मौतसे या किसीके जहरदेनेने इन्तिकाल करगये, और उनके साथ मेवाडकी तरक्की खत्म होगई अगर वह जिन्दह रहते तो दोवारह लडाईमें किस्मत आजमाइ करते यह महाराणा जोरावर, खूबसूरत और दामियानी कदके आदमी थे । इन महाराणाके दो बेटे उनके सामने गुजर चुके थे जिनमेंसे बड़े भोजराजके साथ मेडतिया राठौर जयमलकी रिस्तहदारी वहिन मीराबाई, जिसके फकीरानह भजन अवाममें मशहूर हैं, व्याही गई थी । कर्नल टाडने गलत तौरपर उसकी शादी महाराणा कुम्भाके साथ लिख दी है, जो सांगाजीके दादा थे । एशियाई मुल्कोंमें जियादह व्याह करनेसे आदतें खराब और जिस्म जईफ होनेके सिवाय हर एक औरत अपनी औलादकी बिहारीके वास्ते हर तरहकी तदबीर करना चाहती है, जिससे बहुत खराबियां पैदा होती हैं । इसलिये कर्नल टाडने खयाल किया कि महाराणा सांगाको उनके खानदानमेंसे किसीने जहर दे दिया । ”

अब पं० बलदेवमिश्र और पं० गनपतलाल चौबेकी बातपर विशेष ध्यान दिया जाय तो इन्हें शुद्ध भ्रम होगया है जरा भक्तमालभी पढ़े होते तो सूरदास कितने हुए हैं मालूम होजाता, फिर जिस सूरदासका सूरसागर बनाया है व्यर्थ उनमें और सूरदासका हाल न लिखते । इति ।

॥ श्रीः ॥

अथ श्रीसूरसागरकी विषयानुक्रमणिका ।

विषय.	पृष्ठ.	विषय.	पृष्ठ.
अथ प्रथमस्कंध ।		अथ द्वितीयस्कंध ।	
चन्दना वर्णन...	...	श्रीशुकदेव वचन वर्णन ...	३५
भक्त अंग वर्णन ...	...	अनन्यभक्ति महिमा वर्णन ...	३६
भक्तवत्सल अंग वर्णन ...	...	नाम महिमा वर्णन ...	३७
भक्तमहिमा वर्णन ...	...	हारविमुखनिंदा वर्णन ...	३८
माया वर्णन ...	...	सत्संगमहिमा वर्णन ...	३९
अविद्या वर्णन ...	...	भक्तिसाधन वर्णन ...	४०
कृष्णा वर्णन ...	...	आत्मज्ञान वर्णन ...	४१
विनती अंग वर्णन ...	...	विराट रूप वर्णन ...	४२
व्याससौं शुक उत्पत्ति वर्णन ...	...	आरती वर्णन...	४३
श्रीभागवत वक्ता श्रोता प्रस्ताव वर्णन ...	...	नृप विचार वर्णन ...	४४
सूत संवाद वर्णन ...	...	नृपको वचन शुकदेव प्रति वर्णन ...	४५
व्यास अवतार वर्णन ...	...	शुकदेव वचन वर्णन ...	४६
श्रीभागवत आदितरण कारण वर्णन...	...	नारद ब्रह्मा संवाद वर्णन...	४७
नाम माहात्म्य वर्णन ...	...	चतुर्विंशति अवतार वर्णन ...	४८
भगवान् विदुर गृह भोजन करन वर्णन ...	...	ब्रह्मा उत्पत्ति चतुःश्लोकी प्रति वर्णन...	४९
उद्धव प्रति वचन वर्णन ...	...	चतुःश्लोकी श्रीमुखवाक्य वर्णन ...	५०
भगवान् दुर्योधन संवाद वर्णन ...	...	अथ तृतीयस्कंध ।	
द्रौपदी सहाय वर्णन ...	...	शुकवचन वर्णन ...	४०
सूत वचन शौनक प्रति वर्णन ...	...	उद्धव विदुर संवाद कृष्णज्ञान संदेश मैत्रेय निकट वतावन	...
भीष्मोपदेश युधिष्ठिर प्रति वर्णन ...	...	वर्णन ...	...
भारत वर्णन ...	...	विदुर जन्म वर्णन ...	...
अर्जुन दुर्योधनको गवन कृष्ण गृह वर्णन ...	...	सनकादिकावतार वर्णन ...	...
दुर्योधन वचन भीष्म प्रति वर्णन ...	...	रुद्र उत्पत्ति वर्णन ...	...
भीष्म प्रतिज्ञा वर्णन ...	...	सप्तऋषि चार मनु उत्पत्ति वर्णन ...	...
भगवत वचन अर्जुन प्रति वर्णन ...	...	सुर असुर उत्पत्ति वर्णन ...	४१
अर्जुन भीष्म संवाद वर्णन ...	...	वाराह रूप वर्णन ...	...
भीष्म देहत्याग वर्णन ...	...	कपिल देव मुनि अवतार वर्णन ...	...
भगवान्को द्वारका गमन वर्णन ...	...	कर्दम प्रसंग वर्णन ...	...
कुन्तीको विनय वर्णन ...	...	देवहूति माताको प्रश्न कपिल मुनिसौं वर्णन ...	४२
विदुरको उपदेश राजा धृतराष्ट्र गांधारी प्रति गमन राजा	...	भक्ति प्रश्न वर्णन ...	...
युधिष्ठिरको वैराग्य वर्णन ...	...	हरिमाया प्रश्न वर्णन ...	...
हरिविद्योग पांडवनको उत्तर गवन वर्णन ...	...	देवहूति प्रश्न सुगम उपाय वर्णन ...	४३
श्रीभगवान् परीक्षित गर्भरक्षा जन्म वर्णन ...	...	भक्त महिमा वर्णन ...	४४
परीक्षित राजाको कलियुग दंड ऋषिशाप वर्णन ...	...	देवहूति हरिपद प्राप्त वर्णन ...	...
वैराग्य उपदेश परीक्षित मन प्रति वर्णन ...	...	अथ चतुर्थस्कंध ।	
चित्त बुद्धिको संवाद वर्णन ...	...	शुकदेव वचन वर्णन ...	४५
मन बुद्धिको संवाद वर्णन ...	...	यज्ञपुरुष अवतार वर्णन ...	...
मन प्रबोध वर्णन ...	...	संक्षिप्त यज्ञपुरुष अवतार कथा वर्णन ...	४७
		पार्वती विवाह वर्णन ...	...

विषय.	पृष्ठ.
ध्रुवकथा वर्णन	४७
ध्रुववर देन अवतार वर्णन	"
पृथु अवतार वर्णन	४८
पुरंजन कथा वर्णन	४९

अथ पंचमस्कंध ।

शुकदेव वचन वर्णन	५२
ऋषभदेव अवतार वर्णन	"
जडभरत कथा वर्णन	"
जडभर रहुगण गोष्ठ वर्णन	५३

अथ षष्ठस्कंध ।

शुकदेव वचन वर्णन	५५
अजामिल उद्धार वर्णन	"
श्रीगुरुमहिमा, बृहस्पति अनादरते विश्वरूप घृत्तासुर ब्राह्मणहत्या प्रति पुनि गुरु कृपासे इन्द्रासन प्राप्ति वर्णन	५६
गुरुमहिमा वर्णन	५७

अथ सप्तमस्कंध ।

श्रीनृसिंहरूप अवतार वर्णन	५८
श्रीभगवान् शिवसहाय वर्णन	६१
नारद उत्पति कथा वर्णन	"

अथ अष्टमस्कंध ।

शुकदेव वचन वर्णन	६२
गजमोचन अवतार वर्णन	"
कूर्म अवतार समुद्रमथन अमृतादि निमित्त वर्णन	६३
मोहिनी रूप वर्णन	६४
वामन अवतार वर्णन	"
मत्स्य अवतार वर्णन	६५

अथ नवमस्कंध ।

राजापुरुषवाको वैराग्य वर्णन	६६
च्यवनऋषि कथा वर्णन	६७
हलधर विवाह वर्णन	६८
राजाअंबरीष कथा वर्णन	"
सौभरिकऋषि कथा वर्णन	६९
श्रीगंगा सुवलोक आगमन वर्णन	७०
श्रीगंगा विष्णुपदोदककी स्तुति वर्णन	"
परशुरामअवतारवर्णन	७१
श्रीराम अवतार कारण वर्णन	"
बालकाण्ड श्रीरामजन्म वर्णन	"
शरक्रीडावर्णन	७२
विश्वामित्र यज्ञ रक्षा ताडकावध सीतास्वयंवर वर्णन	"
सीतापति दर्शन वर्णन	"
सीता मनोरथ पूर्ण वर्णन	"
दशरथका जनकपुर आगमन रामजूके विवाह. हेतु वर्णन	"
कंगना खोलन वर्णन	"

विषय.	पृष्ठ.
धनुमंग पाणिग्रहण वर्णन	७३
जनक दशरथ रामजी सीतासमेत विदाकरण वर्णन	"
मार्गविषे परशुरामका रामजीसों मिलाप परस्पर विवाद वर्णन	"
अवधपुरी प्रवेश वर्णन	"
दशरथाविचार रामजीको राज्य दे आप वनगवन कैकेयी विन्ती भरत राज्य वर्णन	"
दशरथ कौशल्या विनय वर्णन	"
दशरथ पञ्चात्ताप कैकेयीप्रति वचन वर्णन	"
कैकेयी वचन रामप्रति वर्णन	७४
श्रीरामचंद्रप्रति दशरथ मिलाप वर्णन	"
श्रीराम वचन जानकी प्रति वर्णन... ..	"
जानकी वचन श्रीरामजु प्रति वर्णन	"
श्रीराम वचन लक्ष्मण प्रति विदाकरण हेतु वर्णन	"
लक्ष्मण संगलेन वर्णन	"
अहल्या तारण वर्णन	"
लक्ष्मण केवटसंग वर्णन ॥ २०३ ॥	"
केवट वर्णन	"
केवट वचन श्रीरामजी प्रति वर्णन... ..	७५
पुरवासी वचन जानकी प्रति वर्णन... ..	"
दशरथ प्राणतजन श्रीराम हेतु वर्णन	"
राजाको तेल घटस्थापन मंत्री गमन भरत निकट वर्णन	"
कौशल्या विलाप भरत आवन मातापर अति क्रोध करण वर्णन	"
भरत शत्रुघ्न वचन माता प्रति वर्णन	"
भरत गमन रामजीनिकट वनविषे परस्पर संवाद वर्णन... ..	७६
श्रीराम सीता विलाप दशरथ परलोकश्रवणसुनि वर्णन	"
श्रीराम भरत संवाद वर्णन	"
श्रीराम उपदेश भरत प्रति वर्णन	"
भरत विदाकरण वर्णन	"
दंडकवनमें शूर्पणखाकी नाक छेदन वर्णन	"
खरदूषण वध मारीच रावणको वनमें आवन वर्णन	"
मारीच वध सीताहरण मार्गमें गुध्रसों युद्ध वर्णन	"
श्रीराम स्वरूप मृगपीछे धावनसमयका वर्णन	७७
सीताछायाहरण रावण गुध्रसे युद्ध वर्णन	"
अशोकवनमें सीताका स्थापन वर्णन	"
श्रीराम विलाप सीता वियोग वर्णन	"
श्रीरामजीका गुध्रसों मिलाप सीताका समाचार श्रवण वर्णन	"
गुध्रहरिपद प्राप्त वर्णन	७८
शबरीका हरिपद प्राप्ति वर्णन	"
सुग्रीव आज्ञा हनुमान् रामका मिलाप वर्णन	"
हनुमान् रामसंवाद वा सुग्रीवको श्रीरामजीका दर्शन वर्णन	"
बालिवध सीता भूषणदर्शन सप्ततालभेद वर्णन	"
सुग्रीव राज अंगदसमाधान वर्णन	"
पवनपुत्र अंगदादि मुद्रिकासहित सीतासुधिहित संपाति- मिलाप वर्णन	"

श्रीमूरसागरकी अनुक्रमणिका ।

(४६)

विषय.	पृष्ठ.	विषय.	पृष्ठ.
संपातीका सीताजबस्था कपिन प्रति वर्णन समुद्रतीर परस्पर		श्रीरघुपति सेतु उलंघन वर्णन	८८
मंत्र हनुविदा सुरसामुख प्रवेश वर्णन	७८	मन्दोदरी प्रति रावण गर्व वचन वर्णन	८८
हनुमत लंकादर्शन सीतामिलापहित अशोकवन प्रवेश वर्णन	७९	रावणकेपास अंगद दूतत्व वर्णन	८९
आकाशवाणी हनूप्रति सीयनिश्चय वर्णन	८०	रावण प्रति श्रीराम संदेश वर्णन	८९
निशिचरी रावण बड़ाई सीताकीनिन्दा वर्णन...	८०	रावण प्रति अंगद उत्तर वर्णन	८९
निशिचरी सीतासत प्रगट करना रावण उद्धार ज्ञान वर्णन	८०	अंगद वचन रावण प्रति वर्णन	८९
रावण लोभदिखावन जानकी निरादरकरन वर्णन	८०	रावण भेद उपजावन अंगद श्रीराम प्रशंसा वर्णन	८९
त्रिजटाने सीताका समाधानकिया सो वर्णन	८०	इन्द्रजीत युद्ध आज्ञा अंगद पाँच रोपन वर्णन...	९०
त्रिजटा प्रति सीतामनोरथ वर्णन	८०	अंगद आवन राघव निकट वर्णन	९०
सीताप्रति त्रिजटास्वप्रवर्णके हनूसीयदरश परस्पर संवाद सु-		श्रीरघुनाथप्रति लक्ष्मण प्रतिज्ञा युद्ध निमित्त वर्णन	९०
त्रिका अर्पण वर्णन	८१	लक्ष्मणका सेना सहित युद्ध गवन वर्णन	९०
हनुमत सीता समाधान वर्णन	८२	मन्दोदरी वचन रावण प्रति वर्णन...	९०
हनुमत निरखि सीतासन्नेह सुत्रिका अरपेते प्रतीति वर्णन	८२	मेघनाद युद्ध नारद शिक्षा नागफास मोचन वर्णन	९०
हनूका श्रीराम लक्ष्मणका समाचार कहना अपना पराक्रम	८२	कुंभकर्ण रावण संवाद वर्णन	९०
वर्णन	८२	लक्ष्मण वचन खड्गधारण वर्णन	९०
सीता आगमन प्रसन्न हनु धीरज वैराग्य वर्णन	८३	रावण लक्ष्मण युद्ध लक्ष्मण मूर्छा वर्णन	९१
सीता रामपराक्रम उराहनासमेत वेगि मिलाप वर्णन	८३	श्रीराम कर्णवर्णन	९१
सीता निज दुःख हनूप्रति वर्णन	८३	श्रीराम हनु प्रशंसा	९१
सीता विनय निजदुःख निवारण निमित्त श्रीराम प्रति वर्णन	८३	राघव प्रति हनुमत वचन लक्ष्मण मूर्छा उपाय वर्णन	९१
सीता निज अपराध प्रगटन वर्णन	८३	सजीवन निमित्त हनुमत गवन वर्णन	९१
हनुमत वचन वर्णन	८३	हनु पर्वत लावन भरत मिलाप वर्णन	९१
अशोकवन मंग इन्द्रजीत हनुमत प्रति ब्रह्मशर बंधन वर्णन	८३	भरत कुशल प्रश्न पूछन हनु लक्ष्मण मूर्छा कथन करुणामें	९१
हनूमान रावण संवाद ब्रह्मशर मुक्ति वर्णन	८४	सुमित्रा धैर्य वर्णन	९२
हनूमान लंकाजारन वर्णन	८४	धैर्य सहित सुमित्रा वचन वर्णन	९२
आकाशवाणी सीता कुशल वर्णन	८४	हनुमत भरत प्रति उत्तर वर्णन	९२
लंका दृग्ध पुनः सियदर्शन वर्णन	८४	कौसल्या संदेश राम प्रति वर्णन	९२
श्रीरामचन्द्र प्रति सीता संदेश हनुमंतविदा वर्णन	८४	हनूमान सजीवन लावन लक्ष्मण चेतहोन वर्णन	९२
अंगदादि निकट हनुमानका पुनः आगमन सीतासुधिदेन	८४	श्रीराम वचन जयप्रतिज्ञा सहित वर्णन	९२
वर्णन	८४	रावण कुल वध वर्णन	९२
सुग्रीवादि कृत हनुमान प्रशंसा वर्णन	८४	रावण मरणसमय मन्दोदरी आदिविलापवर्णन	९३
श्रीरामचन्द्र हनुमान गोष्ठी वर्णन	८४	आकाशसे अमृतवर्षा वर्णन	९३
श्रीराम वचन वर्णन	८४	सीतामिलाप वर्णन	९३
सेनासमेत सिन्धुतट श्रीरामपयान वर्णन	८४	परीक्षाहेतु सीता अग्निप्रवेश वर्णन	९३
हनूमान निज शरीरबल कथन वर्णन	८४	कौशल्या शकुन विचार काग वचन वर्णन	९३
हनूमानका निज पराक्रम युद्धनिमित्त कथन वर्णन	८६	अंगद वसीठी रावणवध आदि पथ्यत लीला वर्णन	९३
सिन्धु सेतुनिमित्त हनुमान विनय वर्णन	८६	अयोध्या प्रशंसा वर्णन	९३
सीतादेननिमित्त विभीषण वचन रावण प्रति वर्णन	८६	श्रीराम आगमन श्रवणसुनि भरत रचनाकर उत्सव प्रकाश	९३
श्रीरामचन्द्रसों विभीषणमिलाप वर्णन	८६	वर्णन	९३
समाप्त्यश्रीरामचन्द्र वचन वर्णन	८६	श्रीराम वचन सुग्रीव प्रति भरत दरशावन परस्पर मिलाप	९३
सियदे मिलननिमित्त मन्दोदरीशिक्षा रावण प्रति वर्णन	८६	वर्णन	९३
मन्दोदरी रावण संवाद वर्णन	८६	कौशल्या सुमित्रा आदि आरती संगलाचार वर्णन	९४
सेतुबन्ध आरंभ सिन्धु मिलन वर्णन	८६	श्रीराम राज्याभिषेक वर्णन	९४
सेतुबंधन वर्णन	८६	राज समाज वर्णन	९४
रावणदूत ग्रहण पहिरावन दे विदाकरन वर्णन	८६	इन्द्र दुराचार इन्द्र अहल्या प्रति गौतम शाप वर्णन	९४
राम सागरसंवाद रावणदूत पुनः लंका गमन युद्धनिमित्त	८६	राजा नहुष राज्य प्राप्ति इन्द्राणी चाह ब्रह्मशापते सर्प देह	९४
कुंभकर्ण मंत्र वर्णन	८६	पावन वर्णन	९४

विषय.	पृष्ठ.
कच संजीवनी विद्या हेतु शुक्र गेह गवन देवयानी लोभा- वन परस्पर शाप वर्णन	९६
देवयानी कूप निपातन राजा ययाति पाणिग्रहण शुक्र शाप राजपुत्रयौवन भोग वैराग्यकर मोक्ष प्राप्ति वर्णन ... "	"

अथ दशमस्कंध पूर्वार्द्ध ।

श्रीशुकदेव वचन वर्णन	९८
श्रीभगवान् जन्मलीला वर्णन	"
श्रीभगवान् मथुराते गोकुल आए वर्णन	१००
छठी व्यवहार वर्णन	१०५
पूतना वध वर्णन	१०६
कागासुरका आयबो वर्णन	१०८
शकटासुरका कंस आज्ञा माँगन वर्णन	"
सप्तम अध्याय तृणावर्त वध गोडा तोरन वर्णन	११०
नामकर्म वर्णन	१११
अन्नप्राशन लीला वर्णन	"
बरस गांठि लीला वर्णन	११२
कनछेदन लीला वर्णन	११३
घुदुरवनि चलिबो वर्णन	"
पाँयन चलन समय वर्णन	११५
बाल वेप वर्णन	१२१
चन्द्रप्रस्ताव वर्णन	१२३
कलेवा भोजन समय वर्णन	१२६
खेलन समय वर्णन	"
ब्राह्मणको प्रस्ताव वर्णन	१३०
माटीको प्रसंग वर्णन	१३१
माखनचोरी प्रथम वर्णन	१३२
हरि दौवरि बन्धन वर्णन	१३९
यमलार्जुन उद्धारन दूसरी लीला वर्णन	१४५
धेनु दुहन सीखन वर्णन	१४९
वत्सासुर वध वर्णन	"
वकासुर वध वर्णन	१५०
अघासुर वध वर्णन	१५१
ब्रह्मा वत्स बालक हरन वर्णन	१५२
बंहुरि बाल वीभत्स हरन वर्णन	१५७
चकई भौरा खेलन समय वर्णन	१६१
श्रीराधा कृष्णजीका प्रथम मिलाप वर्णन	"
मुख विलास वर्णन	१६२
गृह गवन वर्णन	१६३
श्रीराधिकाजीको यशोदा गृह गवन वर्णन	१६४
श्रीश्याम राधा खेलन समय वर्णन	१६५
श्रीराधा गृह गवन वर्णन	"
गौचारन वर्णन	१६६
धेनुक वध वर्णन	१६७
वृन्दावन प्रवेश शोभा वर्णन	१६९
कंस कमलकाफूल मँगाए काली दसन वर्णन	१७०
काली लीला दूसरी वर्णन	१७७
दावानल पान वर्णन	१८२

विषय.	पृष्ठ.
प्रलंब वध वर्णन	१८४
गौचारन वर्णन	१८५
सुरली स्तुति वर्णन	१८६
गोपी वचन वर्णन	१९०
श्रीराधा यशोदाके गृह आई वर्णन	१९१
चीरहरन लीला वर्णन	१९६
बख्हरन लीला दूसरी वर्णन	२००
पनघटका प्रस्ताव वर्णन	२०२
यज्ञपत्नी लीला वर्णन	२०८
गोवर्धन पूजा वर्णन	२१०
इन्द्र विचार वर्णन	२१५
इन्द्र शरण चले सो वर्णन	२१९
गोवर्धनकी दूसरी लीला वर्णन	२२२
नन्दको वरुण लेगये वर्णन	२३२
दानलीला वर्णन	२३३
दानलीला दूसरी वर्णन	२५२
श्रीमलीला सती अवतार ॥ २५२ ॥	"
अनुराग स्नेहक पद वर्णन	२८०
आँखिया समयके पद वर्णन	३३७
वंशी ध्वनि सुन गोपी मोह वा रास पंचाध्यायी वर्णन	३३८
श्रीकृष्ण विवाह वर्णन	३४७
श्रीकृष्ण अंतर्धान लीला वर्णन	३५३
गोपी बिरह वर्णन	"
श्रीकृष्ण मिले गोपिनको फेर रासलीला वर्णन	३५७
जलक्रीडा वर्णन	३५८
श्रीराधिकाजीका मान वर्णन	३६४
खंडिता समय वर्णन	३७२
श्रीराधाजीका नाम वर्णन	३८१
बडीमानलीला वर्णन	४००
हिंडोला लीला वर्णन	४१२
विद्याधर शापमोचन वृन्दावन विहार शंखचूड दानव वध वर्णन	४१६
वृषभासुर वध वर्णन	४२७
केशीवध वर्णन	४२८
मौमासुर वध वर्णन	४२९
वसंत वा होरीलीला वर्णन	४३०
अक्रूर प्रस्ताव कथा वर्णन	४५१
अक्रूर गोकुल गवन वर्णन	४५४
श्रीकृष्ण मथुरा गवन वर्णन	४६०
रजकवध वर्णन	४६४
श्रीकृष्ण धनुषभूमि आगमन कूबरी उद्धार वर्णन	४६६
कुवलिया हस्ती वा मुष्टिक चाणूर वध वर्णन	"
कंसवध उपसेन राज हेतु वर्णन	४७०
वसुदेव दर्शन यज्ञोपवीत उत्सव कुबिजागृह आगमन नन्द विदा वर्णन	४७२
नन्द ब्रज आगमन यशोदावचन नन्दप्रति वर्णन	४७७
नन्दवचन यशोदा प्रति वर्णन	४७८
यशोदा वचन नन्द प्रति वर्णन	"

(४८)

श्रीसूरसागरकी अनुक्रमणिका ।

विषय.	पृष्ठ.	विषय.	पृष्ठ.
समूह ब्रज लोग वचन वर्णन	४७८	पुंडरीक उद्धार वर्णन	५८१
स्वालय वचन वर्णन	"	द्विविध वा सुतीक्ष्ण वध वर्णन	"
गोपी वचन कुविजाप्रति परस्पर तरक वदत वर्णन	४८०	सांघ विवाह वर्णन	५८२
इश्याम रंगको तरक वदति वर्णन	"	नारद संशय द्वारका आगमन वर्णन...	"
नन्द यशोदा वचन परस्पर वर्णन	४८२	भगवान् हस्तिनापुरचले जरासंध वध हेतु वर्णन	५८३
पंथी वाक्य देवकी प्रति वर्णन	"	जरासंध वध वर्णन	"
गोपी विरह अवस्था परस्पर वर्णन	४८७	पांडवयज्ञमें शिशुपाल वध वर्णन	५८४
नैन प्रस्थांयु पद वर्णन	४८९	पांडवसभामें दुर्योधन क्रोध वर्णन	"
स्वप्न दर्शन वर्णन	४९३	शास्त्र द्वारका आक्रमण प्रद्युम्नशास्त्र युद्ध शास्त्रवध वर्णन ..	"
पावस समय वर्णन	४९७	दन्तवक्र वध वर्णन	५८५
चन्द्र प्रति तरक वदति वर्णन	५०३	बल्लव वध राम तीर्थ गमन वर्णन...	"
उद्धव ब्रज आगमन हेतु वर्णन	५०७	सुदामा दारिद्र्य भंजन वर्णन	५८६
भैरव गीत वर्णन	५६३	श्रीकृष्ण द्वारका गमन हेतु पंथी प्रति ब्रजनारीवचनवर्णन	५८८
उद्धव मथुरागमन श्रीकृष्णप्रति वचनवर्णन	५६३	कुरुक्षेत्र यशोमति गोपी आगमन वर्णन	"
अथ दशमस्कंध उत्तरार्द्ध ।		रुक्मिणी वचन श्रीभगवान् प्रति	५९१
जरासंध की मृत्यु वर्णन	५७०	श्रीकृष्ण कुरुक्षेत्र आगमन वर्णन	"
कालयवन दहन मुचुकुन्द उद्धार वर्णन	"	सखी वचन राधिका प्रति शकुन विचार	"
द्वारका प्रवेश वर्णन	५७१	कुरुक्षेत्रमें श्रीकृष्ण वा नन्द यशोदा गोपी मिलन वर्णन	५९२
द्वारकाकी शोभा वर्णन.... ..	"	श्रीकृष्ण देवकीके पद पुत्रलाये सो वर्णन	५९४
रुक्मिणी पत्रिका आवन वर्णन	५७३	वेदस्तुति वर्णन	५९५
द्विज संदेश कृष्णप्रति वचन वर्णन...	"	नारदस्तुति वर्णन	"
श्रीकृष्ण कुंदनपुर गवन वर्णन	"	सुभद्रा अर्जुन विवाह वर्णन	५९६
सखी वचन रुक्मिणी प्रति वर्णन	"	जनक देव मिलाप परमार्थ वर्णन	"
रुक्मिणी हरन वर्णन	"	भस्मासुर वध वर्णन	"
श्रीकृष्ण रुक्मिणी विवाह वर्णन	५७४	भृगुपरीक्षा अर्जुन निजरूप दर्शन शंखचूड़पुत्र ल्यावन वर्णन ..	"
प्रद्युम्न जन्म वर्णन	५७६	अथ एकादशस्कंध ।	
मणिहेतु सत्यभामा जाम्बवती विवाह वर्णन	"	उद्धवको श्रीकृष्ण वद्वारकाभ्रम भेजन वर्णन	५९८
शतधन्वावध अक्रूर संवाद वर्णन	"	हंसअवतार वर्णन	५९९
पंचपटरानीसों श्रीकृष्ण विवाह वर्णन	५७७	अथ द्वादशस्कंध ।	
द्वारका प्रवेश शोभा वर्णन	"	श्रीशुकदेव वचन वर्णन... ..	६००
सौमसासुर वध नृपकन्या मोक्ष सुरतरुआगमन पौडससहस्र	"	वौद्धावतार वर्णन	"
रानी विवाह वर्णन	"	भविष्य कल्कीअवतार वर्णन	"
रुक्मिणी भक्ति परीक्षा वर्णन	५७८	राजा परीक्षित हारिपदप्राप्ति वर्णन	६०१
प्रद्युम्नविवाह रुक्म कलिंग राजा वध वर्णन	५७९	जन्मेजय कथा वर्णन	"
ऊषा अनिरुद्ध विवाह वर्णन	"		
नृग राजा उद्धार वर्णन... ..	५८०		
दलभद्र वृन्दावन गवन वर्णन	"		

इति श्रीसूरसागरकी विषयानुक्रमणिका समाप्ता ।



॥ श्रीः ॥

❀ अथ सूरसागर. ❀

अथ श्रीमूरदासजीरचित मूरसागर सारावली ।

तथा सवालाखपदोंका सूचीपत्र ।

राग कल्पद्रुम ॥ वन्दौ श्रीहरिपद सुखदाई। जाकी कृपा पंगु गिरि लँघै अँधरेको सबकुछ दरशाई॥
 बहिरो सुनै गूँग पुनि बोलै रंक चलै शिर छत्र धराई । सूरदास प्रभुकी शरणागत बारम्बार नमो
 ते पाई ॥ रागिनी काफ़ी तालजति ॥ खेलत यहि विधि हरि होरी हो होमि-येह वेद विदित यह बात ॥
 टेक-अविगति आदि अनन्त अनूपम अलख पुरुष अविनासी तजवनेन ॥ १ ॥ पुरुषोत्तम गिरि
 निज लोकविलासी ॥ १ ॥ जहँ वृन्दावन आदि अजर जहँ कुंजलता विस्तार । तहँ विहरत प्रिय
 प्रीतम दोऊ निगम भृंग गुंजार ॥ २ ॥ रत्न जटित कालिंदीके तट अति पुनीत जहँ नीर । सारस
 हंस चकोर मोर खग कूजत कोकिल कीर ॥ ३ ॥ जहँ गोवर्द्धन पर्वत मणिमय सघन कंदरासार ।
 गोपिनमंडल मध्य बिराजत निशि दिन करत विहार ॥ ४ ॥ खेलत खेलत चितमें आई सृष्टि
 करन विस्तार । अपने आप करि प्रकट कियोहै हरी पुरुष अवतार ॥ ५ ॥ माया कियो क्षोभ
 बहु विधि करि कालपुरुष के अंग । राजस तामस सात्त्विक त्रयगुण प्रकृति पुरुषको संग ॥ ६ ॥
 कीन्हें तत्त्व प्रकट तेही क्षण सबै अष्ट अरु वीश । तिनके नाम कहत कवि सूरज निर्गुण सबके
 ईश ॥ ७ ॥ पृथिवी अप तेज वायु नभ संज्ञा शब्द परस अरु गन्ध । रस अरु रूप और मन
 बुधि चित अहंकार मति अन्ध ॥ ८ ॥ पान अपान व्यान उदान अरु कहियत प्राण समान ।
 तक्षक धनंजय पुनि देवदत्त अरु पौण्ड्रक शंख द्युमान ॥ ९ ॥ राजस तामस सात्त्विक तीनों
 जीव ब्रह्म सुखधाम । अट्टाईस तत्त्व यह कहियत सो कवि सूरज नाम ॥ १० ॥ नाभिकमल
 नारायणकी सो वेद गर्व अवतार । नाभिकमलमें बहुताहि भटक्यो तऊ न पायो पार ॥ ११ ॥
 तब आज्ञाभइ यह हरिकी अज करो परमतप आप । तब ब्रह्मा तप कियो वर्षशत दूरिभये सब
 पाप ॥ १२ ॥ तब दर्शन दीन्हों करुणाकर परमधाम निज लोक । ताको दर्शन देखि भयो अज
 सब बातन निःशोक ॥ १३ ॥ जहां आदि निजलोक महानिधि रमा सहस संयूत । आंदोलन
 झूलत करुणानिधि रमासुखद अतिपूत ॥ १४ ॥ अस्तुति करें विविध नाना करि परम पुरुष
 आनन्द । जय जय जय श्रुति गीत गायकै पढ़त हैं नानाछंद ॥ १५ ॥ आज्ञा करी नाथ
 चतुरानन करो सृष्टि विस्तार । होरी खेलन की विधि नीकी रचना रचे अपार ॥ १६ ॥ चौदह लोक
 करो नानाविधि रचि वैकुण्ठ पताल । नाना रचना रची विधाता होरीखेल रसाल ॥ १७ ॥
 दशहीपुत्र भये ब्रह्माके जिन संच्यो संसार । स्वायंभुवमनु प्रकट तब कीन्हें अरु शतरूपा नार ॥
 १८ ॥ भुवकी रक्षा करन जु कारण धरि वराह अवतार । पीछे कपिलरूप हरि धारचो कीन्हें
 सांख्य विचार ॥ १९ ॥ दीन्हों ज्ञान आप माताको कीन्हों भवनिस्तार । आठों लोकपाल तब

कीये अपन अपन अधिकार ॥ २० ॥ तेज, अग्नि, यम, मरुत, वरुण औ सूर्य चन्द्र यह नाम ।
 मृत्यु, कुबेर, यक्षपति कहियत जहँ शंकर को धाम ॥ २१ ॥ सत्यलोक, जनलोक, तपलोक, और
 महर निजलोक । जहँ राजत ध्रुवराज महानिधि निशि दिन रहत अशोक ॥ २२ ॥ जननी आज्ञा
 पाय चले वन पांच वर्ष सुकुमार । ताको आप कृपा हरि कीन्हीं धरि आये अवतार ॥ २३ ॥
 पाछे पृथुको रूप हरि कीन्हीं नानारस दुहि काढ़े । तापर रचना रची विधाता बहु विधि यत्न
 न बाढ़े ॥ २४ ॥ रचि नवखण्ड द्वीपसातों मिलि कीन्हीं जोरि समाज । वन उपवन पर्वत बहुफूले
 सब वसन्तको साज ॥ २५ ॥ दानव देव लगे आपसमें कीन्हीं युद्ध प्रकार । विविधशस्त्र छूटत
 पिचकारी चलत रुधिर की धार ॥ २६ ॥ दीन्हें मारि असुर हरिने तब देवन दीन्हीं राज ।
 एकन को फगुवा इन्द्रासन इक पतालको साज ॥ २७ ॥ विद्याधर, गन्धर्व, अप्सरा गानकरत
 सब ठाढ़े । चारण, सिद्ध पढत विरुदावालि लै फगुवा सुख बाढ़े ॥ २८ ॥ चन्द्रलोक दीन्हों शशिको
 तब फगुवामें हरि आप । सब नक्षत्रको राजा दीन्हों शीशमंडल में छाप ॥ २९ ॥ मंगल बुद्ध
 शुक अरु शनि अरु राहुकेन यह जान । रवि अरु शशि सबहिनको फगुवा दीन्हों चतुर सुजान ॥
 ३० ॥ आपने पताल कीन्हीं तलातल और महातल जान । पाताल और रसातल मिलि
 सातों भुवन प्रमान ॥ ३१ ॥ संकषणको धाम परमरुचि तहँ राजत निज वीर । शेषनाग ताके
 तर क्रम वसत महाधन धीर ॥ ३२ ॥ इलावर्त और किम्पुरुषा कुरु और हरिवर्ष केंतुमाल । हिरन
 मै रमनक भद्रासन भरतखण्ड सुखपाल ॥ ३३ ॥ सातों द्वीप कहे शुक मुनिने सोइ कहत अबसूर।जंबु,
 पुक्ष, क्रौंच, शाक, शालमलि, कुश, पुष्कर भरपूर ॥ ३४ ॥ अपने २ स्थाननपर तब फगुवा दियो
 चुकाय । जब जब हरि मायाते दानव प्रकट भयेहैं आय ॥ ३५ ॥ तब तब धरि अवतार कृष्णने कीन्हीं
 असुर संहार । सो चौबीस रूप निज कहियत वर्णन करत विचार ॥ ३६ ॥ प्रथम किये स्वायंभुवमनु
 नृप अज आज्ञा यह दीन्हीं । भूपर जाय राज तुम करिहौ सृष्टि विस्तार यह कीन्हीं ॥ ३७ ॥
 स्वायंभुवमनु अरु शतरूपा तुरत भूमि पर आये । जलमें मगन भये भुवदेखे फिरि अजपै
 चलिआये ॥ ३८ ॥ जासों आय कही सबही विधि भुवद्रव देखियत नाहीं । तब अति ध्यान कियो
 श्रीपतिको केशव भये सहाहीं ॥ ३९ ॥ आई छींक नाकते प्रकटे शूकर अति लघु रूप । देखत
 गजसे होयगये हैं कीन्हीं बृहत स्वरूप ॥ ४० ॥ जय जय करत सकल सुर नर मुनि जल में
 कियो प्रवेश । जाय पताल बाट महिलीन्हीं धरणी रमानेश ॥ ४१ ॥ ते भुवकमल कुसुमकी
 नाई चले मनहुँ गजराज । कछुडर नाहिन जियमें डरपति अति आनन्द समाज ॥ ४२ ॥ योगी
 साधु, सनकादिक चारों गये हरिके निज लोक । कीन्हें क्रोधमने जब कीन्हें दियो शाप अति
 शोक ॥ ४३ ॥ जय अरु विजय असुर योनिनको भये तीन अवतार । तिनमें प्रथम लियो
 कश्यप गृह दितिकी कोखि मैझार ॥ ४४ ॥ प्रथम भयो हिरण्याक्ष महाबल जिन जीते लोकपाल ।
 नारद सीखगयो शूकरपै देखो रूप बिकराल ॥ ४५ ॥ सहस्र वर्षलौं जलमें जूझे कियो दनुज संहार ।
 पाछे आय भूमिको थापी कियो यज्ञ विस्तार ॥ ४६ ॥ स्वायम्भुव शतरूपा तनया कहियत
 तीन प्रमान । आकूती देवहूती और परसूती चतुर सुजान ॥ ४७ ॥ परसूती दई दक्षप्रजापति
 तिनकी सती सयान । सो दीन्हीं महादेव देवको अति आनंद सुज्ञान ॥ ४८ ॥ तज्यो देह अप-
 मान पायकै बहुरि दक्षगृहजाई । पातिव्रतहि धर्म जब जान्यो बहुरो रुद्र बिहाई ॥ ४९ ॥ आकूती दई
 रुचि प्रजापति भये यज्ञ अवतार । इन्द्रासन बैठे सुख विलसत दूर किये भुवभार ॥ ५० ॥

देवहुती कर्दमको दीन्हों तिन कीन्हों तपभारी । बिन्दु सरोवर आये माधव किये गरुड अस-
 वारी ॥ ५१ ॥ दियो बरदान सृष्टि करिबेको अस्तुति करी प्रमान । मेरो अंश अवतार होयगो कहि
 भये अन्तर्धान ॥ ५२ ॥ पाछे ऋषि निज तप मनलायो कीन्हों प्रकट विमान । तामें बैठि सकल
 जग देख्यो कन्यानो सुखदान ॥ ५३ ॥ पाछे कपिलरूप हरि प्रकटे दर्शनकरि मुनिराय । कीन्हों
 त्याग गये वनको तब ब्रह्म परमपदपाय ॥ ५४ ॥ पाछे विविध ज्ञान जननीको दीन्हों कपिल दृढाय ।
 सांख्ययोग अरु ज्ञानभक्ति दृढ़ वरणी विविध बनाइ ॥ ५५ ॥ जलको रूप तुरत ह्वै गइ वह हरिके
 रूप समाय । चले मगनह्वै ब्रह्मध्यान कर गंगासागर न्हाय ॥ ५६ ॥ अजहूंलौं राजत नीरधि तट
 करत सांख्य विस्तार । सांख्यायनसे बहुत महासुनि सेवत चरण सुचार ॥ ५७ ॥ अत्रै पुत्रभये
 ब्रह्माके तिन कीन्हों तप जाय । आये तीन देवताके ढिग ब्रह्मा शिव हरिराय ॥ ५८ ॥ तब उन
 मांग्यो सुत तुमहींसे तीनों प्रकटे आय । अज, शशि, अंश, रुद्र, दुर्वासा, दत्तात्रेय, हरिराय ॥ ५९ ॥
 अनसूयाके गर्भ प्रकटह्वै कियो योग आराधि । यम अरु नियम प्रणाम प्रत्याहार धारण
 ध्यान समाधि ॥ ६० ॥ आसन के सब सिद्ध योगकर प्रकटह्वै जगदीश । दीन्हों
 भोग सहस नृपको बहु करुणानिधि जगदीश ॥ ६१ ॥ कीन्हों जवनैत ॥ ६२ ॥ ॥ ॥ ॥ ॥ ॥ ॥ ॥ ॥ ॥ ॥ ॥ ॥
 दीन्हों ज्ञान । पातंजलिसे मुनिपद सेवत करत सदा अज ध्यान ॥ ६२ ॥ जब
 सृष्टिनपर किरपा कीन्हों ज्ञानकला विस्तार । सनक सनंदन और सनातन चारों सनतकुमार ॥ ६३ ॥
 उनसे कह्यो सृष्टि नानाविधि रचना करो बनाय । उन नहि मान्यो तब चतुरानन खीझे क्रोध उपाय ॥
 ॥ ६४ ॥ शंकर प्रकटभये भुक्कुटीते करों सृष्टि निर्माण । भूत प्रेत बेताल रचो बहु दैरे विधिको
 खान ॥ ६५ ॥ पूरण करो कह्यो चतुरानन सृष्टि महादुख दैन । तब शंकर तपस्या को निकसे
 चितै कमलदल नैन ॥ ६६ ॥ मूरति त्रिया जु भई धर्मकी तिनके हरि अवतार । नारायण जब भये प्रकट
 वपु तिन मेट्यो भुवभार ॥ ६७ ॥ सहस कवच इक असुर सँहारेउ बहुरि कियो तप भारी । शोच
 परेउ सुरपति को तब उन पठइ अप्सरा नारी ॥ ६८ ॥ बहुत भांति उन कियो परमछल तपमें
 उनके काज । कछु नहि चली ब्रह्मनारायण सुखसमाज तिय साज ॥ ६९ ॥ इक उर्वशी हृदय
 उपजाई दई शक्रकोताय । ताको देखि देखि जीवतहैं अजहूं इन्द्र सुख पाय ॥ ७० ॥ स्वायंभुव
 के द्वितिय पुत्र उत्तानपाद मतिधीर । तिनके ध्रुव बालक जो जाये औ उत्तम गंभीर ॥ ७१ ॥
 नृपके पास गये गोदीमें बैठनको सुकुमार । तब लघु मात कह्यो तब बैठो जब मेरे अवतार ॥ ७२ ॥
 सुनि कटु वचन गयो माता पै तब उन ज्ञान दृढायो । हरिकी भक्ति करो सुख नीके जो चाहो
 सुख पायो ॥ ७३ ॥ पांचवर्षके निकसि चले तब मधुवन पहुँचे आय । बिच नारदमुनि तत्त्व बतायो
 जपें मंत्र चितलाय ॥ ७४ ॥ कछुदिन पत्र भक्ष करि बीते कछु दिन लीन्हों पानी । कछु दिन पवन
 कियो अनुप्राशन रौक्यो श्वास यह जानी ॥ ७५ ॥ दारुण तप जब कियो राजसुत तब कांप्यो
 सुरलोक । त्राहि २ हरिसों सब भाष्यो दूर करो सब शोक ॥ ७६ ॥ तब हरि कह्यो कोऊ जिन डरपो
 अबहिं तुरत मैं जैहों । बालक ध्रुव वन करत गहन तप ताहितुरत फल दैहों ॥ ७७ ॥ इतनी
 कहत गरुड पर चढिकै तुरतहि मधुवन आये । कंबु कपोल परसि बालकके वाणी प्रकट कराये ॥
 ॥ ७८ ॥ अस्तुति करी बहुत ध्रुव सब विधि सुनि प्रसन्न भये आप । दीये राज भूमि मण्डलको
 सब विधि थिरकरि थाप ॥ ७९ ॥ हरि बैकुण्ठ सिधोर पुनि ध्रुव आये अपने धाम । कीन्हों राज
 तीस षट वर्षन कीन्हें भक्तन काम ॥ ८० ॥ यक्ष प्रबल बाढे भुव मंडल तिन गारयो निज भ्रात ।

तिनके काज अंश हरि प्रगटे ध्रुव जगत विख्यात ॥ ८१ ॥ बहुत वर्षलौं राज कियो भुव फिर
 आये निजलोक । सबके ऊपर सदा विराजत ध्रुव सदा निःशोक ॥ ८२ ॥ सनकादिक
 पुष्टियो चतुरानन ब्रह्मजीवको बीच । प्रकट हंसवपु धरयो जगत पुर जोपै नीर सुमीच ॥
 ८३ ॥ यह भुवमंडल को रसकाढ्यो भांति २ निज हाथ । धरि पृथुरूप कियो
 जगआनंद अखिल लोकके नाथ ॥ ८४ ॥ प्रियव्रत वंश धरेउ हरि निजवपु ऋषभदेव यह
 नाम । कीन्हें काज सकल भक्तनको अंग अंग २ अभिराम ॥ ८५ ॥ कीन्हों गर्व महा मघवाने वर्षा
 वरषो नाहिं । तब हरि आप मेघहै वरषे करी परम सुख छाहिं ॥ ८६ ॥ ज्ञान उपदेश कियो पुत्रन
 को ब्रह्मावर्त मैझार । पाछे करि संन्यास जगतमें विचरे परम उदार ॥ ८७ ॥ आठों सिद्धि भई
 सन्मुख जब करी न अंगीकार । जय जय जय श्रीऋषभदेव मुनि परब्रह्म अवतार ॥ ८८ ॥ ब्रह्मसभामें
 यज्ञकियो जब करन वेदउच्चार । प्रकटभये हयग्रीव महानिधि परब्रह्म अवतार ॥ ८९ ॥ चार वेद
 लैगो शंखासुर जलमें रख्यो छिपाय । धरि हयग्रीव रूप हरि मारयो लीन्हें वेद छुड़ाय ॥ ९० ॥
 सत्यवर्त राजा रघुवंशी प्रभु भये मनुवंश । कीन्हों तप बहु भांति परमरुचि प्रकट भये हरिअंश
 ॥ ९१ ॥ तब पाछे उरुचि निधिविधि पावै । तब उन जलमें डारिदियो फिर तब
 बोले हरि वानि ॥ ९२ ॥ जलके बाँच डारि जिन मोकों बडे मच्छ डर लाग । यह कहि बृहत रूप
 हरि धरेउ सत्यव्रत के भाग ॥ ९३ ॥ सतयें दिवस होयगी परलय आवेगी इकनाव । तामें बैठ
 सप्तऋषि अरु तुम करो भजन मम भाव ॥ ९४ ॥ इतनो कहि हरिनृप देखतही भये जो अन्तर्धान ।
 सातैं दिवस भयो जब परलय तब कीन्हों नृप ज्ञान ॥ ९५ ॥ सबहि अन्नको बीज लियो नृप और
 लियो ऋषि साथ । बैठो नाव ध्यान हरिको करि दर्शन दीन्हों नाथ ॥ ९६ ॥ वासुकि नाग आय
 तहैं तत्क्षण बांधी दृढ़करि नाव । पूँछयो ज्ञान कछ्यो सो सब हरि तत्त्व विधान बनाव ॥ ९७ ॥
 बहुत काललौं विचरे जलमें तब हरि भये सुशांति । बीसै प्रलय विविध नानाकर सृष्टि रची
 बहुभांति ॥ ९८ ॥ यह हरि मच्छरूप जब लीन्हों कियोचरित विस्तार । जय जय जय श्रीमान्
 महावपु जय जय जगत अधार ॥ ९९ ॥ सुर अरु असुर मथन कीन्हों निधि चौदह रत्न निकार ।
 पर्वत प्रीठ धरेउ हरि नीके लियो कूर्म अवतार ॥ १०० ॥ हिरण्यकशिपु अति प्रबल दनुज है
 तप कीन्हों परचण्ड । तब उन वर दीन्हों चतुरानन कीन्हों अमरअखण्ड ॥ १०१ ॥ जप तप गयो
 तबहिं मघवाने सब संपति गहि लीन्ही । गहे जब कच कामिनि राजाकी तब नारद सिख दीन्ही ॥
 १०२ ॥ याके गर्भ बसतहै हरिजन सुनु सुरपति यह बात । तब तजि दई आप लै आये निज
 आश्रम विख्यात ॥ १०३ ॥ नित प्रति ज्ञानकथा हंसनसों कहत रहत मुनिराज । मुनि प्रह्लाद
 प्रसन्न कोषिमें अति आनंद समाज ॥ १०४ ॥ ता पाछे तपकियो असुरबहु फिरि देख्यो निजधाम
 तब नारद मुनि दई कथा ध्रुव लैआयो है ग्राम ॥ १०५ ॥ पाछे लोकपाल सब जीते सुरपति दियो
 उठाय । वरुण कुबेर अग्नि यम मारुत सुबस कियो क्षण माय ॥ १०६ ॥ हाहाकार भयो सुरलो-
 कन गये सबै अजपास । तब अज ध्यान कियो माधवको वाणी भई अकास ॥ १०७ ॥ सकललोक यह
 देत असुर दुख तऊ न करौं सँहार । जब मेरे जनको दुखदेहै क्षणहिंमें डारौं मार ॥ १०८ ॥ जब
 प्रह्लाद प्रकट ताके गृह पाँच वर्षके भैंहैं । आदर बहु कीन्हों राजाने पढन विप्रगृह गै हैं ॥ १०९ ॥
 जब वह विप्र पढ़ावै कुछ २ सुनके चित धरि राखै । जब वह जाय तबहिं सबहिनसों राम राम
 मुख भाखै ॥ ११० ॥ लरिका और पढत शालामें तिनहिं करत उपदेश । हरिको भजन करो सबही

मिलि और जगत सुखलेश ॥ १११ ॥ यहि विधि करि उपदेश सबनको किये भजन रसलीन ।
 षण्डामर्क जो पूँछन लाग्यो तब यह उत्तर दीन ॥ ११२ ॥ राम कृष्ण अवतार मनोहर भक्तनके
 हितकाज । सोई सार जगत्में कहियत सुनो देव द्विजराज ॥ ११३ ॥ येही बात जगत्में नीकी सोइ
 पढ़त हम आज । जबहीं विप्र कहेउ जो असुरसों पुत्र पढत बिनकाज ॥ ११४ ॥ तबहिं असुर
 प्रह्लाद बुलाये लिये गोद भरिअंक । कहो पुत्र तुम कहा पढौहौ पूँछत कहेउ निशंक ॥ ११५ ॥
 श्रवण, कीर्तन, स्मरणपाद, रत, अरचन, बंदनदास । सख्य और आत्मनिवेदन, प्रेमलक्षणा जास
 ॥ ११६ ॥ सुनो पिता हौं यही पढ्यो हूं और बात नहिं जानूं । इनते और मोहिं जो कहियत सो
 कबहुं नहिं मानूं ॥ ११७ ॥ दीन्हों पटक भूप धरणीपर कहेउ विप्रसों खीझ । रे मूरख तू कहा
 पढायो कैसे देउं तोहिं रीझ ॥ ११८ ॥ जो यह मेरो बैरी कहियत ताको नाम पढायो । देहु गिराय
 याहि पर्वतते क्षण गत जीव करायो ॥ ११९ ॥ दीन्हों डारि शैलते भूपर पुनि जल भीतर डारो ।
 डारि अग्निमें शस्त्रनमारो नानाभांति प्रहारो ॥ १२० ॥ तऊ न घातभई अंगनकी जहँ तहँ राम
 बचायो । तब नृप आप शस्त्रकर गहिकै बहुतहि त्रास दिखायो ॥ १२१ ॥ कहाँ है राम कृष्ण वह
 तेरो यों कहि गर्जन कीन्हीं । घट घट जल थल ज्येष्ठ धर्मणि सेजवनिन ॥ १२२ ॥ एन्हीं १२२ ॥
 तब लै खड्ग खम्भमें मारो भयो शब्द अतिभारी । प्रकट भये नरहरि वपु धरि हरि कट कट करि
 उच्चारी ॥ १२३ ॥ पकरिलियो क्षणमाँझ असुर बल डारो नखन विदारी । रुधिर पानकरि आंत
 मालधरि जय जय शब्द उचारी ॥ १२४ ॥ मारो दैत्य दुष्ट इकक्षणमें जय नृसिंह वपुधारे । पुष्पन
 वृष्टि करत सुर नर सुनि भये भक्त रखवारे ॥ १२५ ॥ रमा निकट नहिं आवत हरिके ऐसो वपु
 हरिधारो । अज सनकादि देव नारद सुनि जानत रूपनिहारो ॥ १२६ ॥ अपनी अपनी अस्तुति करि
 कै सबहिन यहै सुनायो । गन्धर्व अरु विद्याधर चारण विमल विमल यशगायो ॥ १२७ ॥ तब प्रह्लाद
 आय हरि पदसों शीशनाय यह भाख्यो । जय जय जय जगदीश जगतगुरु मोर अधम प्रण राख्यो
 ॥ १२८ ॥ तुमहीं आदिअखंड अनूपम अशरण शरण मुरार । देव देव परब्रह्म परिपूरण भक्तहेतु अवतार
 ॥ १२९ ॥ जहँ जहँ भीरपरत भक्तनको तहँ तहँ होत सहाय । अस्तुतिकरि मनहर्ष बढ़ायो लेहनजीभ
 कराय ॥ १३० ॥ तब बोले नरसिंह कृपाकरि सुनहु भक्त मम बात । मन्वन्तर को राजदियो
 तोहिं धरयो शीशपर हाथ ॥ १३१ ॥ निर्गुण सगुणहोय मैं देख्यो तोसों भक्त न पाऊं । जहँ जहँ भीर
 परत भक्तनको तहां प्रकट हो आऊं ॥ १३२ ॥ सुत प्रह्लाद प्रतिज्ञा मेरी तोको कबहुं न त्यागूं ।
 जैसे धेनु बच्छको चाटत तैसे मैं अनुरागूं ॥ १३३ ॥ जो मांगो सो देहुं तुरतही नहिं बिलम्ब कछ
 लाग । तब प्रह्लाद यही वर मांग्यो चरण कमल अनुराग ॥ १३४ ॥ करी कृपा दीन्हों करुणानिधि अटल
 भक्ति थिरराज । अन्तर्धान भये हरि तहँते सफलभये सबकाज ॥ १३५ ॥ नारदरूप जगत उद्धारण वि-
 चरत लोकन माय । करि उपदेश ज्ञान हरि भक्तहि अरु बैराग्यदृढाय ॥ १३६ ॥ स्वायंभुव शतरूपा दोऊ
 कहियतहँ अवतार । जगको धर्म प्रचार किये भुव भक्त कर्म आचार ॥ १३७ ॥ करुणाकर जलानिधिते
 प्रकटे सुधाकलश लैहाथ । आयुर्वेद विस्तारण कारण सब ब्रह्माण्डके नाथ ॥ १३८ ॥ क्षत्रिय दुष्टबडे
 जो भुवपर लियो कृष्ण अवतार । परशुराम हँकै द्विजथापे दूरकियोभूभार ॥ १३९ ॥ रघुकुलवंश चतुर
 चूडामणि पुरुषोत्तम अवतार । दशरथके गृह जन्म लियो हरि रूपराम सुकुमार ॥ १४० ॥ रावण
 कुम्भकर्ण असुराधिप बडे सकल जगमाहिं । सबहिन लोकपाल उन जीते कोऊ बाच्यो नाहिं ॥
 ॥ १४१ ॥ सकल देव मिलि जाय पुकारे चतुराननके पास । लै शिवसंग चले चतुरानन क्षीरसिन्धु

(६)

सूरसागर-सारावली ।

सुखवास ॥ १४२ ॥ अस्तुतिकरि बहुभांति जगाये तब जागे निजनाथ । आज्ञादई जाय कपिकुलमें
 प्रकटो सब सुर साथ ॥ १४३ ॥ तब ब्रह्मा सबहिनसों भाष्यो सोई सब सुर कीन्हों । सातों द्वीप
 जाय कपिकुलमें आय जन्म सुर लीन्हों ॥ १४४ ॥ अपने अंश आप हरि प्रकटे पुरुषोत्तम निजरूप ।
 नारायण भुवभार हरोहै अति आनन्द स्वरूप ॥ १४५ ॥ वासुदेव यों कहत वेदमें हैं पूरण अवतार ।
 शेषसहसमुख रटत निरंतर तऊ न पावत पार ॥ १४६ ॥ सहस्रवर्षलों ध्यान कियो शिव रामचरित
 सुखसार । अवगाहन करिकै सब देख्यो तऊ न पायो पार ॥ १४७ ॥ वितीसमाधि सती तब
 पूछ्यो कहो मर्मगुरुईश । काको ध्यान करत उरअंतर को पूरण जगदीश ॥ १४८ ॥ तब शिव
 कहेउ राम अरु गोविंद परमइष्ट इक मेरे । सहस्र वर्ष लौं ध्यान करत हैं राम कृष्ण
 सुख केरे ॥ १४९ ॥ तामें रामसमाधि करी अब सहस्र वर्ष लौं वाम । अतिआनन्द मगन
 मेरो मन अँग अँग पूरण काम ॥ १५० ॥ दाया करि मोको यह कहिये अमर होहुं जेहि भांति । मोहिं
 नारद मुनि तत्त्व बतायो ताते जिय अकुलाति ॥ १५१ ॥ तब महादेव कृपाकरिकै यह चरितकिया
 विस्तार । सो ब्रह्मांडपुराणक्यसमुनि कियो वदन उच्चार ॥ १५२ ॥ मुनि वाल्मीकि कृपा सातो
 कवि राम मन्त्रोत्तरनी । निमावे नाम जपत अरु वीत्यो पुनि उपदेश करायो ॥ १५३ ॥ रामचरित
 वर्णनके कारण वाल्मीकि अवतार । तानोलोक भये परिपूरण रामचरित सुखसार ॥ १५४ ॥
 शतकोटी रामायण कीनो तऊ न लीन्हों पार । कह्यो वसिष्ठमुनि रामचन्द्र सो रामायणउच्चार
 ॥ १५५ ॥ कागभुशुंड गरुड सों भाष्यो रामचरित अवतार । सकल वेद अरु शास्त्र कह्यो है रामचन्द्र
 यश सार ॥ १५६ ॥ कछु संक्षेप सूर अब वर्णत लघुमति दुर्बल बाल । यह रसना पावनके कारण
 भेटन भव जंजाल ॥ १५७ ॥ तीनों व्यूह संगलै प्रकटे पुरुषोत्तम श्रीराम । संकर्षण प्रद्युम्न लक्ष्मण
 भरत महासुखधाम ॥ १५८ ॥ शत्रुघ्रहि अनिरुध कहियतु है चतुर्व्यूह निज रूप । रामचन्द्र प्रकटे जब
 गृहमें हरषे कोशलभूप ॥ १५९ ॥ पुण्य नक्षत्र नौमी जु परम दिन लग्न शुद्ध शुभवार । प्रकटभये द-
 शरथ गृह पूरण चतुर्व्यूह अवतार ॥ १६० ॥ अति फूले दशरथ मनहीं मन कौशल्या सुख पायो ।
 सौमित्रा कैकयी मन आनंद यह सबहिन सुत जायो ॥ १६१ ॥ गुरु वशिष्ठ नारदमुनि ज्ञानी
 जन्मपत्रिका कीनी । रामचन्द्र बिख्यात नाम यह सुर मुनि की सुधि लीनी ॥ १६२ ॥ देत दान नृप
 राज द्विजनको सुरभी हेम अपार । सब सुन्दरि मिलि मंगल गावत कंचन कलश दुवार ॥ १६३ ॥
 आये देव और मुनिजन सब दे अशीश सुख भारी । अपने अपने धाम चले सब परममोद
 रुचिकारी ॥ १६४ ॥ मनबांछित फल सबहिन पाये भयो सबन आनन्द । बालरूप हैकै दशरथसुत
 करत केलि स्वच्छन्द ॥ १६५ ॥ घुटुरुन चलत कनक आँगन में कौशल्या छबि देखत । नील
 नलिन तनु पीत झंगुलिया घनदामिनि छुति पेखत ॥ १६६ ॥ कबहुँक माखन रोटी लैकै खेल
 करत पुनि मांगत । मुख चुंबत जननी समझावत आय कंठ पुनि लागत ॥ १६७ ॥ कागभुशुंड
 दश को आये पांच वर्षलौं देखे । स्तुति करी आपु बर पायो जन्म सफल करि लेखे ॥ १६८ ॥
 कृपा करी निज धाम पठायो अपनो रूप दिखाय । वाके आश्रम कोउ बसतहै माया लगत न
 ताय ॥ १६९ ॥ प्रातकाल उठि जननि जगावत उठो मेरे बारे राम । उठि बैठे दंतुवन लै आई
 करी सुखारी श्याम ॥ १७० ॥ चारों भ्रात मिल करत कलेऊ मधु मेवा पकवान । जल आचमन
 आरती करिकै फिर कीन्हों अस्नान ॥ १७१ ॥ करत श्रृंगार चार भइया मिलि शोभा वरणि न
 जाई । चित्र विचित्र सुभग चौतनिया इन्द्र धनुष छबि छाई ॥ १७२ ॥ अलकावलि मुक्तावलि

गूथी डोर सुरंग बिराजै । मनहुँ सुरसरी धार सरस्वति यमुना मध्य बिराजै ॥ १७३ ॥ तिलक
 भाल पर परम मनोहर गोरौचन को दीनो । मानो तीन लोककी शोभा अधिक उदय सो कीनो ॥
 ॥ १७४ ॥ खंजन नैन बीच नासापुट राजत यह अनुहार । खंजन युग मनो लरत लराई कीर
 बुझावत रार ॥ १७५ ॥ नासाके बेसर में मोती वरण बिराजत चार । मनो जीव शनि शुक्र
 एक है बाढे रविके द्वार ॥ १७६ ॥ कुंडल ललित कपोल विराजत झलकत आभागंड । इन्दी
 वरपर मनो देखियत रविकी किरण प्रचंड ॥ १७७ ॥ अरुण अधर दमकत दशनावलि चारु
 चिबुक मुसक्यान । अति अनुराग सुधाकर सींचत दाडिमबीज समान ॥ १७८ ॥ कंठसिरी
 बिच पदिक विराजत बहुमणि मुक्ताहार । दहिनावर्त देत ध्रुव तारे सकल नखत बहुवार ॥
 ॥ १७९ ॥ रत्न जटित कंकण बाजूबंद नगन मुद्रिका सोहै । डार डार मनु मदन
 बिटपतरु विकच देखि मन मोहै ॥ १८० ॥ कल्पित मणि रुनु झुनु सुनि तनकी
 हंस करत किलकारी । नृपुरध्वनि पग लालि पन्हैया उपमा कौन विचारी ॥ १८१ ॥
 भूषण बसन आदि सब राचि राचि माता लाड लडावै । रामचन्द्र की देख माधुरी दर्पण देख
 दिखावै ॥ १८२ ॥ निज प्रतिबिंब विलोक मुकुर में है माधुरी राजवैन ॥ १८३ ॥ प्रभु भरत
 शत्रुहन खेलत डोलत पास ॥ १८३ ॥ दशरथ राय न्हाय भाजन को बैठे अपने धाम । लावो
 वेगि राम लक्ष्मण को सुनि आये सुखधाम ॥ १८४ ॥ बैठे सँग बाबा के चारों भैया जेवन लागे ।
 दशरथ राय आपु जेवतहैं अति आनंद अनुरागे ॥ १८५ ॥ लघु लघु ग्रास राम मुख मेलत आपु
 पिता मुख मेलत । बालकेलि को विशद परमसुख सुखसमुद्र नृप झेलत ॥ १८६ ॥ दाल भात
 घृत कढी सलोनी अरु नाना पकवान । आरोगत नृप चारिपुत्र मिलि अतिआनन्द निधान ॥
 ॥ १८७ ॥ अचवनकर पुनि जलअचवायो जबनृप बीरा लीनो । राम लषण अरु भरत शत्रुहन
 सबहिन अचवन कीनो ॥ १८८ ॥ बीरा खायचले खेलनको मिलिकै चारों वीर । सखासंग सब
 मिले बराबर आये सरयू तीर ॥ १८९ ॥ तीर चलावत शिष्य सिखावत धर निशान देखरावत ।
 कबहुँक सधे अश्व चढि आपुन नानाभांति नचावत ॥ १९० ॥ कबहुँक चारभ्रात मिलि अगिआ
 जात परम सुख पावत । हरिनआदि बहुजंतु किये वध निज सुरलोक पठावत ॥ १९१ ॥ यहि
 विधि वन उपवन बहुक्रीडा करी राम सुखदाई । वाल्मीकि मुनि कही कृपाकर कछुयक सूर जो
 गाई ॥ १९२ ॥ भई सांझ जननी टेरतहै कहां गए चारोंभाई । भूख लगी हैहै लालन को लावो
 वेगि बुलाई ॥ १९३ ॥ इतने मांझ चार भैया मिलि आये अपने धाम । सुखचुंबत आरती उतारत
 कौशल्या अभिराम ॥ १९४ ॥ सौमित्रा कैकयि सुख पावत बहु विधि लाड लडावत । मधु मेवा
 पकवान मिठाई अपने हाथ जेवावत ॥ १९५ ॥ चारों भ्रातन श्रमित जानिकै जननी तब पौढाये ।
 चापत चरण जननि अप अपनी कछुक मधुर स्वर गाये ॥ १९६ ॥ आई नींद राम सुख पायो
 दिनको श्रम बिसरायो । जागे भोर दौरि जननी ने अपने कंठलगायो ॥ १९७ ॥ विश्वामित्र बड़े
 मुनि कहियत यज्ञकरत निजधाम । मारिच और सुबाहु महासुर बिघ्न करत दिनयाम ॥ १९८ ॥
 परब्रह्म अवतार जानिकै आये नृपके पास । दशरथ राय बहुत पूजा विधि किये प्रसन्न हुलास ॥
 ॥ १९९ ॥ भोजन कर जबहीं जु बिराजे तब भाष्यो मुनिराय । यज्ञ सकल कीजै मेरो अब दीजै
 राम पठाय ॥ २०० ॥ तब नृप कह्यो राम हैं बालक मोको आज्ञा कीजै । तब द्विज कह्यो राम
 परमेश्वर वचन मान यह लीजै ॥ २०१ ॥ गुरु वशिष्ठ सब विधि समझाये राम लषण सँग दीन्हें ।

सूरसागर-सारावली ।

(८)

मारगमें अहल्या उद्धारी नावक निज पद छीने ॥ २०२ ॥ विश्वामित्र सिखाई बहुविधि विद्या
 धनुष प्रकार । मारग में ताडका जु आई धाई वदन पसार ॥ २०३ ॥ छिनमें राम तुरत सो मारी
 नेक न लागीवार । दीन्हों मुक्ति जानि निज महिमा आये ऋषिके द्वार ॥ २०४ ॥ कीन्हें विप्र
 यज्ञ परिपूरण असुर विघ्नको आये । अग्निबाण कर दहन कियोहै एक समुद्र पठाये ॥ २०५ ॥
 जनक विदेह कियो जु स्वयम्बर बहु नृप विप्र बुलाये । तोरन धनुषदेव त्र्यम्बकको काहू यतन
 न पाये ॥ २०६ ॥ विश्वामित्र मुनि वेग बुलाये सकल शिष्यलै संग । राम लषण सँगलिये आपने
 चले प्रेमसरंग ॥ २०७ ॥ जहँ तहँ उझकि झरोखा झांकत जनक नगरकी नार । चितवनि
 कृपाराम अवलोकत दीन्हों सुख जो अपार ॥ २०८ ॥ कियो सन्मान विदेह नृपतिने उपवनवासी
 कीन्हों । देखन रामचले निजपुरको सुख सबहिन को दीन्हों ॥ २०९ ॥ सब पुरदेखि धनुषपुर
 देख्यो देखे महल सुरंग । अद्भुत नगर विदेह विलोकत सुखपायो सब अंग ॥ २१० ॥ कहत
 नारिसब जनक नगरकी विधि सों गोद पसार । सीताजूको बर यह चाहिये है जोरी सुकुमार ॥ २११ ॥
 अपने धामफिरे तब कोक आये जान भई कछु सांझ । कर दण्डवत परसिपद ऋषिके बैठे उपवन
 मांझ ॥ २१२ ॥ ~~सूरदेवी निज नृपति~~ कीन्हों ऋषि परणाम । पौढे जाय चरण सेवा द्विज
 करके अति विश्राम ॥ २१३ ॥ ब्रह्म सुदूरत भयो सबेरो जागे दोऊ भाई । कर परणाम देवगुरु
 द्विजको जल सुस्नान कराई ॥ २१४ ॥ आयेभूप देश देशनके जुरी सभा अतिभारी । तहां
 बुलाये सकल द्विजनको जनक सभा मंझारी ॥ २१५ ॥ कौशिक मुनि तहँ छबिसों पधारे लिये
 शिष्य सँग सात । चले नित्य आह्निक सबकर द्विज उर आनंद न समात ॥ २१६ ॥ दोनों भ्रात
 संगमें लीन्हें आये राजदुवार । जहँ बैठे सब भूप ओपसों बाढ्यो गर्व अपार ॥ २१७ ॥ अपने
 अपने भुज बल तोलत तोरन धनुषपुरार । कछुनहिं चलत खिसायगये सब रहेबहुत पचिहार ॥ २१८ ॥
 सीता कहत सहेलिनसों पुनि यही कहत रघुनन्द । तब उन कह्यो सकलसुखसागर सोये परमानन्द
 ॥ २१९ ॥ बार बार जिय शोचकरत हैं विधिसों वचन उचारी । मन क्रम वचन यहै बरदीजो मांगत
 गोदपसारी ॥ २२० ॥ एकवार सूरदेवी पूजत भयो दरश साखि मोहिं । तादिनते छिन कल न
 परतहै सत्य कहतहों तोहिं ॥ २२१ ॥ सबनृपपचे धनुषनहिं दूख्यो तब विदेह दुखपायो । क्रोध
 वचनकरि सबसे बोले क्षत्री कोउ न रहायो ॥ २२२ ॥ यहमुनि लक्ष्मण भये क्रोधयुत विषम
 वचन यों बोले । सूरजवंश नृपति भूतलपर जाके बल बिन तोले ॥ २२३ ॥ कितकबात यह
 धनुष रुद्रको सकल विश्वकर लैहों । आज्ञापाय देव रघुपतिकी छिनकमांझ हठगैहों ॥ २२४ ॥
 सबके मनको देख अँदेशो सीता आरत जानी । रामचन्द्र तबही अकुलाने लीन्हों शारंग-
 गपानी ॥ २२५ ॥ छिनमें करलैकै जु चढायो देखत हैं सबभूप । डारयो तोर अघात
 शब्दभयो जैसे कालको रूप ॥ २२६ ॥ सबही दिशा भई अति आतुर परशुराम
 मुनि पायो । परशुसमहार शिष्यसँगलैकै छिनही मेंतहँ आयो ॥ २२७ ॥ जयजयकार भयो जगतीपर
 जनकराज अति हरषे । सूर विमान सब कौतुकभूले जयध्वनि सुमनन वरषे ॥ २२८ ॥ जनकराज
 तब विप्रपठाये वेगबरात बुलाई । दशरथराज बाजि गजलैकै सबहीं सौज तुराई ॥ २२९ ॥ चली
 बरात विपुल धनलैकै जुरे मनुज नहिंपार । शोभासिंधु करत नहिं आवे वर्णन करत उचार ॥ २३० ॥
 गुरु वशिष्ठ मुनि लग्न दियो शुभ शुभनक्षत्र शुभवार । आयेजान नृपति सन्माने कीन्हों अति
 मनुहार ॥ २३१ ॥ व्याह केलि सुख वर्णन कीन्हों मुनि वाल्मीकिअपार । सो सुख सूर कह्यो वह

कीरति जगतकरी विस्तार ॥ २३२ ॥ वेद शास्त्र मथकरी व्याहविधि सोइ कीन्हीं नृपराय । राम
लषण अरु भरत शत्रुहन् चारों दिये विवाय ॥ २३३ ॥ होम हवन द्विज पूजा गणपति सूरज शक्र महे-
श । दीन्हों दान बहुत विप्रनको राजा मिथिल नरेश ॥ २३४ ॥ उत्सव भयो परम आनंदको बहुत
दायजो दीन्हों । भये विदा दशरथनृप नृपसों गमन अवधपुर कीन्हों ॥ २३५ ॥ भृगुपति आय जानि
जब रघुपति मिले धाय शिरनाय ॥ दशरथराय विनय बहु कीन्हों जियमें अति डरपाय ॥ २३६ ॥
तब मुनि कह्यो धनुष क्यों तोरेउ रुद्र परम गुरु मेरे । रामचंद्र पूरण पुरुषोत्तम नेक नयन जब हेरे
॥ २३७ ॥ लीन्हों अंश खैंचि भृगुपतिको अपनेरूप समायो । करो जाय तप शैल महेंद्रपै मुनि
मुनिवर शिरनायो ॥ २३८ ॥ अति आनन्द अयोध्या आये कियो नगर शृंगार । कदलीखंभः चौक
मोतिनके बाँधी बंदनवार ॥ २३९ ॥ कियो प्रवेश राजभवननमें रामचन्द्र सुखराश । अद्भुत भवन
विराजत रत्नन सूरजकोटि प्रकाश ॥ २४० ॥ द्वादश वर्ष विराजै बालक फिर भूभार हरो ।
कैकेयीके वचन प्रमान किये नृप तब यह काज करो ॥ २४१ ॥ वचन समझ नृप आज्ञा कीन्हों देव
उपाय करो । रामचन्द्र पितुआज्ञा मानी जियमें वचन धरो ॥ २४२ ॥ यह भू भार उतारन रघुपति
बहुत ऋषिन सुखदेन । वनोबासको चले सियासंग सुखनिधि राजिवनैन ॥ २४३ ॥ मारगमें हरि
कृपा करीहै परमभक्त इकजान । तहँतेगये जु चित्रकूटको जहां मुनिनकी खान ॥ २४४ ॥
वाल्मीकि मुनि वसत निरंतर राममंत्र उच्चार । ताको फल यह आज भयो मोहि दर्शन दियो कुमार ॥
॥ २४५ ॥ पूजाकर पधराय भवनमें रामचन्द्र परनाम । कियो विविध विधि पूजाकरिकै ऋषि चरनन
शिरनाम ॥ २४६ ॥ बहुत दिवसलों बसे जगतगुरु चित्रकूट निजधाम । किये सनाथ बहुत
मुनिकुलको बहुविधि पूरे काम ॥ २४७ ॥ भरतजान जियमें रघुपतिको दुःसह परम वियोग ।
आये धायसंग सब लैकै पुरबासी गृहलोग ॥ २४८ ॥ बिन दशरथ सब चले तुरतही कोशलपुरके
बासी । आये रामचन्द्र सुख देख्यो सबकी मिटी उदासी ॥ २४९ ॥ रामचन्द्र पुनि सबजन देखे
पिता न देखनपाये । पूछी बात कह्यो तब काहू मन बहुविधि बिलखाये ॥ २५० ॥ वेदरीति करि
रघुपति सबविधि मर्यादा अनुसार । बहुतभाँति सब विधि समुझाये भरत करी मनुहार ॥ २५१ ॥
गुरु वशिष्ठ मुनि कह्यो भरतसों राम ब्रह्मअवतार । वनमें जाय बहुत मुनि तारे दूरकरैं भुवभार ॥
॥ २५२ ॥ पुनि निजविश्वरूप जो अपनो सो हरिजाय देखायो । आज्ञापाय चले निजपुरको प्रभु
हि गीत समझायो ॥ २५३ ॥ कछु दिनबसे जु चित्रकूटमें रामचन्द्र सहभ्रात । तहँते चले
दंडकावनको सुख निधि साँवलगात ॥ २५४ ॥ मारगमें बहुमुनिजन तारे अरु विराध रिपुमारे ।
बंदनकर शरभंग महामुनि अपने दोष निवारे ॥ २५५ ॥ दर्शन दियो सुतीक्ष्ण गौतम पंचवटी
पग धारे । तहां दुष्ट शूर्पणखानारी करि बिन नाक उधारे ॥ २५६ ॥ यह मुनि असुर प्रबल दल आये
छिनमें राम सँहारे । कीन्हें काज सकल सुर मुनिके भुवके भार उतारे ॥ २५७ ॥ मुनिअंगस्त्य
आश्रम जु गये हरि बहुविधि पूजा कीन्हों । दिव्य बसन दीने जब मुनिने फिर यह आज्ञा दीन्हों ॥
॥ २५८ ॥ दशकंधरको वेगि सँहारो दूरकरो भुवभार । लोपासुद्रा दिव्य वस्त्र लै दीने जनक
कुमार ॥ २५९ ॥ शूर्पणखा जब जाय पुकारी नाक कान ले हाथ । रावण क्रोध कियो अतिभारी
अधर फरक अतिगात ॥ २६० ॥ गयो मारीच आश्रमहि तबहीं वानै बहु समझायो । तब मारीच
कह्यो दशकंधर विनती बहुत करायो ॥ २६१ ॥ रामचन्द्र अवतार कहत हैं मुनि नारद मुनि
पास । प्रकट भये निश्चर मारनको मुनि वह भयो उदास ॥ २६२ ॥ करगहि खड्ग तोर वध

करिहैं सुनि मारिच डर मान्यो । रामचन्द्रके हाथ मंहंगो परम पुरुष फल जान्यो ॥ २६३ ॥
 कपट कुरंग रूपधरि आयो सीता बिनती कीन्हैं । रामचन्द्र कर सायक लैकै मारनकी विधि
 कीन्हैं ॥ २६४ ॥ मारयो धनुष बाणले ताको लक्ष्मण नाम पुकारेव । लक्ष्मण नाम सुनत तहैं
 आये अवसर दुष्ट विचारेव ॥ २६५ ॥ धरि कै कपट भेष भिक्षुकको दशकन्धर तहैं आयो ।
 हरि लीन्हों छिनमें मायाकरि अपने रथ बैठायो ॥ २६६ ॥ चलयो भाज गोमायु जंतु ज्यों लैकै
 हरिको भाग । इतने रामचन्द्र तहैं आये परमपुरुष बडभाग ॥ २६७ ॥ जब माया सीता नहिं
 देखी जियमें भये उदास । पूछनलगे राम दुमगनसों बहुत बढी दुखरास ॥ २६८ ॥ मारगमें
 जटायुखग देख्यो विकल भयो तनुहीन । बिनती करी राम मै तासों बहुत लडाई कीन ॥ २६९ ॥
 जब तनु तज्यो गृध्र रघुपति तब बहुत कर्म विधि कीनी । जान्यो सखा राय
 दशरथको अपनी निजगति दीनी ॥ २७० ॥ मारगमें कबंधरिषु मारयो सुरपति काज
 सँवारयो । पंपापुर हरि तुरत पधारे जलको दोष निवारयो ॥ २७१ ॥ शबरी परमभक्त रघुपति
 की बहुत दिनन की दासी । ताके फल आरोगे रघुपति पूरण भक्ति प्रकासी ॥ २७२ ॥ दीन
 मुक्ति निजपुरकी ताको तब रघुपति चले आये सीता सीता विलपत डोलत परम विरहसों पागे ॥
 २७३ ॥ रविनन्दन जब मिले राम को अरु भेटे हनुमान । अपनी बात कहा उन हरिसों बालि
 बडो बलवान ॥ २७४ ॥ सप्तताल वेधन हरि कीन्हों बालि छिनकमें तारो । दीन्हों राज राम रवि नंदन
 सब विधि काम सँवारो ॥ २७५ ॥ सप्तद्वीप के कपिदल आये जुरी सेन अतिभारी । सीताकी सुधि
 लेनचले कपि ढूँढत विपिन मँझारी ॥ २७६ ॥ जलनिधि तीरगये सब कपि मिल सुन संपतिकी
 बानी । लंकवसत सीता रिपु वनमें सब वानर यह जानी ॥ २७७ ॥ रामचरण कर सुमिरन मनमें
 चले पवनसुत धाय । रामप्रताप विघ्न सब भेटे पैठि नगर सुखपाय ॥ २७८ ॥ धरि लघुरूप
 प्रवेशकियो कपि लंका नगर मँझार । रामभक्त निज जान बिभीषण भेटे हरि अँकवार ॥ २७९ ॥
 तब वाने सबभेद बतायो देखी कपि सबलंक । रामचरण धरिहृदय मुदितमन विचरत फिरत
 निशंक ॥ २८० ॥ जाय अशोकवाटिका देखी दरशन सीता कीन्ह । कर दण्डवत बहुत बिनती
 कर राम मुद्रिका दीन्ह ॥ २८१ ॥ सब संदेश कह्यो कपि सियप्रति सुनि हियमें धरि राख्यो ।
 राम संदेश कहेउ तब सीता जो बूझो सो भाख्यो ॥ २८२ ॥ लागीभूख चले उपवनमें नानाविधि
 फल खायो । विटप उखार उजार विपिनको सबहिनको दरशायो ॥ २८३ ॥ सुनि पुकार निश्चर
 बहु आये कूदि सवन संहारे । इन्द्रजीत बलनिधि जब आयो ब्रह्मअस्त्र उन डारे ॥ २८४ ॥ तासों
 बँधे दशानन देखत चले पवनसुत धीर । रावण बहुत ज्ञान समझायो कथ कथ कथा गँभीरा ॥ २८५ ॥
 चले छुडाय छिनकमें तबहीं जारदई सब लंक । कूदिचले गजवनको जयकर ज्यों मृगराज निशं-
 क ॥ २८६ ॥ आये तीर समुद्र मिले कपि मिले आय जहँ राम । सुनि सुनि कथा श्रवण सीताकी
 पुलकित अति अभिराम ॥ २८७ ॥ करि कपिकटक चले लंकाको छिनमें बाँध्यो सेत । उतरगये पहुँचे
 लंकापै विजयध्वजा संकेत ॥ २८८ ॥ पठये वालिकुमार विनयकरि समझाये बहुबार । चित नहिं
 धरो कालवश जान्यो फिर आयो सुकुमार ॥ २८९ ॥ अशरण शरण उदार कल्पतरु रामचन्द्र रण-
 धीर । रिपुभ्राता जान्यो जु बिभीषण निश्चर कुटिलशरीर ॥ २९० ॥ राखिशरण लंकेशकियो पुनि
 जब निश्चर सब मारे । मायाकरी बहुत नानाविधि सबको राम निवारे ॥ २९१ ॥ कुंभकर्ण पुनि
 इन्द्रजीत यह महाबली बलसार । छिनमें लिये सोख मुनिवर ज्यों क्षत्री बली अपार ॥ २९२ ॥

कियो प्रसाद शांतना करिकै राजविभीषण दीन्ही । पुनि मंदोदरि अचल आयु दै अमयदान
 सबकीन्हीं ॥ २९३ ॥ समाधान सुरगणको करिकै अमृत मेघ बरपायो । कृपादृष्टि अवलोकन
 करिकै हतकपि कटक जियायो ॥ २९४ ॥ निश्चर किये मुक्त सब माधव ताते जिये न कोय ।
 निर्भय किय लंकेश बिभीषण रामलषण नृप दीय ॥ २९५ ॥ सीता मिली बहुत सुखपायो धरो
 रूप निज मायो । पुष्पकयान बैठके नीके चले भवन सुखछायो ॥ २९६ ॥ चले पवनसुत
 विप्ररूप धरि भरतहि देन बधाई । जानि दूत रघुपतिको प्रसुदित भरतमिले तबधाई ॥ २९७ ॥
 सुनत नगर सबहिन सुख मान्यो जहँतहँते चलेधाई । रामचन्द्र पुनि मिले भरतसों आनंद उर न
 समाई ॥ २९८ ॥ कियो प्रवेश अयोध्या में तब घर घर बजत बधाई । मंगल कलश धराये द्वारे
 बंदनवार बैधाई ॥ २९९ ॥ राजभवनमें राम पधारे गुरु वशिष्ठ दरशायो । शीशनवाय बहुत
 पूजाकरि सूरजवंशबढायो ॥ ३०० ॥ समाधान सबहिनको कीन्हीं जो दर्शनको आयो ।
 कौशल्या कैकयी सुमित्रा मिलि मनमें सुखपायो ॥ ३०१ ॥ बैठे राम राजसिंहासन जगमें फिरी
 दुहाई । निर्भय राज रामको कहियत सुर नर मुनि सुख पाई ॥ ३०२ ॥ चार मूर्तिधर दरशन
 आये चार वेद निज रूप । अस्तुति करी बहुत नानाविधि रीझे कोशल भूप ॥ ३०३ ॥ शिव विरंचि
 नारद सनकादिक सब दरशनको आये । रामराज बैठे जब जाने सबहिन मन सुखपाये ॥ ३०४ ॥
 लोकपाल अतिही मन हरषे सब सुमनन वरपायो । पुष्पविमान बैठि हरि आये लै कुबेर पहुँचायो ॥
 ॥ ३०५ ॥ अति आनन्द भयो अवनीपर रामराज सुखदास । कृतयुग धर्म भये त्रेतामें पूरण
 रमा प्रकास ॥ ३०६ ॥ अश्वमेध बहु यज्ञ किये पुनि पूजे द्विजन अपार । हय गज हेम धेनु
 पाटम्बर दीन्हें दान उदार ॥ ३०७ ॥ चरित अनेक किये रघुनायक अवधपुरी सुख दीन्हों ।
 जनकसुता बहु लाड लडावत निपट निकट सुख कीन्हों ॥ ३०८ ॥ जो न वसंत बहुतद्रुम फूलै
 जनकसुता अनुरागे । प्रेमप्रवाह प्रकट प्रकटायो होरी खेलनलागे ॥ ३०९ ॥ कबहुँक निकट देखि
 वर्षाकृत झूलत सुरँग हिंडोरे । रमकत झमकत जनकसुता सँग हावभाव चित चोरे ॥ ३१० ॥
 कबहुँक कमल सरोवर उपवन जनकसुता सँग लीन्हें । नाना जल बिहार बिहरतहैं सन्तजनन
 सुखदीन्हें ॥ ३११ ॥ कबहुँक रत्न महल चित्रसारी शरद निशा उजियारी । बैठे जनकसुता
 सँग विलसत मधुर केलि मनुहारी ॥ ३१२ ॥ कबहुँक अगरधूप नानाविधि लियसुगन्ध सुख
 कारी । कबहुँक निरतत देवटीलखि रीझतहैं सुखभारी ॥ ३१३ ॥ रामबिहार कहेउ नानाविधि
 वाल्मीकि मुनि गायो । वर्णत चरित विस्तार कोटिशत तऊ पार नहिं पायो ॥ ३१४ ॥ सुर
 समुद्रको बुन्द भई यह कवि वर्णन कह करिहै । कहत चरित रघुनाथसरस्वती बौरी मति
 अनुसरिहै ॥ ३१५ ॥ अपने धाम पठाय दिये तब पुरवासी सब लोग । जै जै श्रीराम कल्पतरु
 प्रकट अयोध्याभोग ॥ ३१६ ॥ दुष्ट नृपति जब बैठे भुवपर धरि भृगुपतिको रूप । क्षणमें भुवको
 भार उतारयो परशुराम द्विजभूप ॥ ३१७ ॥ व्यासरूप ह्वै वेद विस्तारे कीन्हें प्रकट पुराणन ।
 नानावाक्य धर्म थापनको तिमिरहरण भुवभारन ॥ ३१८ ॥ बुद्धरूप कलिधर्म प्रकाश्यो दया
 सबनको मूल । दूर कियो पाखण्डवाद हरि भक्तनको अनुकूल ॥ ३१९ ॥ कलिके आदि अन्त कृतयुगके
 है कलैंकी अवतार । मारि मलेच्छ धर्म फिर थाप्यो भयो जग जयजयकार ॥ ३२० ॥ कर्मवाद
 थापनको प्रकटे पृथ्वि गर्भ अवतार । सुधापान दीन्हों सुरगणको भयो जग यश विस्तार ॥ ३२१ ॥
 असुरनको व्यामोह कियो हरि धरो मोहनीरूप । अमृत पानकराय सुरनको कीन्हें चरित अनूप ॥ ३२२ ॥

तैसेही भुवभार उतारन हरिहलधर अवतार । कालिंदी आकर्ष कियो हरि मारे दैत्य अपार ॥
 ॥ ३२३ ॥ गज अरु ग्राह लडेउ जलभीतर तब हरि सुमिरण कीन्हों । छोंडिगरुड सुखधाम सांव-
 रो भक्तनको सुख दीन्हों ॥ ३२४ ॥ जब बहु असुर बडे पृथ्वीपर कियो अनर्थ विस्तार । सत्य
 सेन प्रगटे विश्वम्भर सत्य कियोहै अपार ॥ ३२५ ॥ निज वैकुण्ठ बसाय रमापति कियो रमाको
 हेत । विनती सुनि कमलाकी केशव कीन्हों सुख संकेत ॥ ३२६ ॥ ब्रह्मचर्य थापनके कारण
 धरो विभू अवतार । जहँ तहँ सुनिवर निज मर्यादा थापी अघट अपार ॥ ३२७ ॥ अजित रूपहै
 शैल धरो हरि जलनिधि मथवे काज । सुर अरु असुर चकित भये देखत किये भक्तके काज ॥
 ॥ ३२८ ॥ जब बलिराजा गये देवपुर लीन्हों स्वर्ग छुडाय । अदिती दुखित भई कश्यपसों
 विनती करी सुनाय ॥ ३२९ ॥ तब कश्यप सुनि कहेउ पयोव्रत विधिसों करो बनाय । ताकी
 कोखि जन्म हरि लीन्हों श्रीवामन सुखदाय ॥ ३३० ॥ भादों श्रवण द्वादशी शुभ दिन धरो विप्र
 हरिरूप । शिव विरंचि सनकादिक आये बन्दनको सुख भूप ॥ ३३१ ॥ यज्ञोपवीत विधोक्त
 कियो विधि सब सुर भिक्षा दीन्हों । वामनरूप चले हरि द्विजवर बलिकी मनसुधि कीन्हों ॥ ३३२ ॥
 दण्डकमण्डलु हाथ विराजत अरु ओढे मृगच्छा । धरि बटुरूप चले वामन जू अम्बुज नयन
 विशाला ॥ ३३३ ॥ सूरज कोटि प्रकाश अंगमें कटिमेखला विराजै । करी वेदध्वनि नृपद्वारे पै
 मनहुँ महाघनगाजै ॥ ३३४ ॥ सुनिधायो तबहीं बलिराजा आय चरण शिरनायो । विनती करी
 बहुत सुखमान्यो आज भयो मन भायो ॥ ३३५ ॥ चलिये विप्र यज्ञशालामें जहँ द्विजवर सब
 राजें । आये ब्रह्मसभामें वामन सूरज तेज विराजै ॥ ३३६ ॥ तब नृप कहेउ कछू द्विज माँगो
 रत्नभूमि मणिदान । हय गज हेम रत्न पाटम्बर देहों प्रगट प्रमान ॥ ३३७ ॥ तब बोले वामन यह
 वाणी सुन प्रह्लाद कुलभूप । बहुत प्रतिग्रह लेत विप्र जो जाय परत भवकूप ॥ ३३८ ॥
 तीन पैड वसुधा हम पावैं पर्णकुटी इक कारण । जब नृप भुव संकल्प कियो है लागे
 देह पसारन ॥ ३३९ ॥ एक पैडमें वसुधा नापी एक पैड सुरलोक । एक पैड दीजै बलि
 राजा तब हैहो विनशोक ॥ ३४० ॥ नापो देह हमारी द्विजवर सो संकल्पित कीन्हों । सुनि
 प्रसन्न वामन यों बोले तैं मोको वश कीन्हों ॥ ३४१ ॥ सदा द्वार तेरे ठाढोहै दरशन देहों तोहिं ।
 मायाकाल कबहुँ नहिं व्यापै सुमिरन करतैं मोहिं ॥ ३४२ ॥ सुतल लोकमें थिरकरि थाप्यो जहँ
 विभूति अति भारी । गहिकै गदा द्वारपर ठाढे वामन ब्रह्म सुरारी ॥ ३४३ ॥ स्वर्गलोक
 दीन्हों सुरपतिको पुनि थिरकर कर थाप्यो । निगम नेति कहि रटत निरन्तर देव शत्रु सब
 काप्यो ॥ ३४४ ॥ वामनरूप ब्रह्महरि प्रकटे जिनको यश जग गावै । शेष सहसमुख रटत निरन्तर
 सूर पार किमि पावै ॥ ३४५ ॥ पुनि बलिराजहिं स्वर्गलोकमें थापैंगे हरि राय । सर्व भौम
 अवतार धरैंगे श्रीवामन सुखदाय ॥ ३४६ ॥ पुनि विभुरूप एक हरि लेंगे सकल जगत कल्याण ।
 कपट खण्ड पाखण्ड असुरको थापे भक्त निदान ॥ ३४७ ॥ विष्वक्सेन रूप हरिलेंगे कीन्हों
 शिवको हेत । असुर मारि सब तुरत बिडारे दीन्हें रुद्र निकेत ॥ ३४८ ॥ धर्मसेतु है धर्म बढायो
 भुविको धारण कीन्हों । शेषरूप है धराशीश फिर सब जगको सुख दीन्हों ॥ ३४९ ॥ अन्त
 र्यामी पालन कारण निज सुधर्म धरि रूप । अन्नदान है सब जग पोष्यो किये काज सुर भूप ॥
 ॥ ३५० ॥ योगपन्थ पातंजलि भाप्यो सोउ क्षीण सब जान्यो । योगीश्वर वपुधरि हरि प्रकटे
 योग समाधि प्रमान्यो ॥ ३५१ ॥ क्रिया पंथ श्रुतिने जो भाप्यो सो सब असुर मिटायो । बृहद्बालु

हैंकै हरि प्रकटे क्षणमें फिरि प्रकटायो ॥ ३५२ ॥ यह अनेक अवतार कृष्णके को करिसकै
 बखानं । सोई सूरदासने वरणे जो कहे व्यास पुराण ॥ ३५३ ॥ अंशकला अवतार श्यामके कवि
 पै कहत न आवै । जहँ जहँ भीर परत भक्तनको तहँ तहँ वपु धरि धावै ॥ ३५४ ॥ मायाकला
 ईश चतुरानन चतुर्व्यूह धरि रूप । वायु वरुण अरु यम कुबेर शशि मृत्यु अग्नि सुर भूप ॥
 ॥ ३५५ ॥ रवि शशि भृगु मरीचि सुरगुरु अरु चार वेद वपु जान । जगको प्रकट करन परजापति
 प्रकटे कलानिधान ॥ ३५६ ॥ जो जो भूप भये भूमण्डल लोकपाल निजजान । निज महिमा
 हरि प्रकट करी है विधिके वचन प्रमान ॥ ३५७ ॥ सुर अरु असुर रची हरि रचना सों जग
 प्रगटहि कीन्हीं । क्रीडाकरी बहुत नानाविधि निगम बात दृढ़ चीन्हीं ॥ ३५८ ॥ यहि विधि
 होरी खेलत खेलत बहुत भाँति सुख पायो । धरि अवतार जगतमें नाना भक्तन चरित दिखायो ॥
 ॥ ३५९ ॥ अंशकला अवतार बहुत विधि राम कृष्ण अवतारी । सदा विहार करत ब्रज मण्डल
 नंदसदन सुखकारी ॥ ३६० ॥ नित्य अखण्ड अनूप अनागत अविगत अनघ अनन्त । जाको
 आदि कोऊ नहिँ जानत कोउ न पावत अन्त ॥ ३६१ ॥ जब हरिलीलाकी सुधि कीन्हीं प्रगट
 करन विस्तार । श्रीवृषभानु रूप है प्रकटे पुनि ब्रजराज उदार ॥ ३६२ ॥ विद्या ब्रह्म कही
 यशुमति सों जाकी कोखि उदार । सोरहकला चन्द्र जो प्रकटे दीन्हों तिमिर विदार ॥ ३६३ ॥
 पुनि वसुदेव देवकी कहियत पहिले हरिवर पायो । पूरण भाग्य आय हरि प्रकटे यदुकुल ताप
 नशायो ॥ ३६४ ॥ आठे बुद्ध रोहिणी आई शंख चक्र वपुधारो । कुण्डल लसत किरीट महाध्वनि
 वपु वसुदेव निहारो ॥ ३६५ ॥ अस्तुति करी बहुत नानाविधि रूपचतुर्भुज देख्यो । पीताम्बर
 अरु श्याम जलद वपु निरखि सफल दिन लेख्यो ॥ ३६६ ॥ तब हरि कहेउ जन्म तुम्हरे गृह
 तीन बार हम लीनो । पृथ्वीगर्भ देव ब्राह्मण जो कृष्णरूप रँग भीनो ॥ ३६७ ॥ माँगो सकल
 मनोरथ अपने मन वांछित फल पायो । शंख चक्र गदा पद्म चतुर्भुज अजन जन्म लै आयो ॥
 ॥ ३६८ ॥ यह भुवभार उतारन कारन हलधरके सँग लायो । क्रीडा करो लोक पावनकर करो
 भक्त मन भायो ॥ ३६९ ॥ प्राकृत रूप धरो हरि क्षणमें शिशुहै रोवन लागे । तब वसुदेव देवकी
 निरखत परम प्रेम रसपागे ॥ ३७० ॥ तब देवकी दीन है भाष्यो नृपको नाहिँ पतीजै ॥ अहो वसुदेव
 जाव लै गोकुल कह्यो हमारो कीजै ॥ ३७१ ॥ तबलै हरिपलना पौढायें पीताम्बर जु उढायो ।
 तब वसुदेव शीश धरि पलना भयो सबन मनभायो ॥ ३७२ ॥ गोकुल चले प्रेम आतुरहै खुलि
 गये कपट कपाट । सोये श्वान पहरुआ सोये सबै मुक्तभई बाट ॥ ३७३ ॥ तब वसुदेव लियो
 करपलना अपने शीश चढायो । रैन अँधेरी कछु नाहिँ सूझत अटकर अटकर आयो ॥ ३७४ ॥
 शेष सहस्रफण ऊपर छाये घनकी बूँद वचावें । आगे सिंह हुँकारत आवत निर्भय बाट जनावें ॥
 ॥ ३७५ ॥ यमुना अति जलपूर बहत है चरणकमल परशायो । मारग दीन्हों राम सिंधु ज्यों नन्दभ
 वन चलिआयो ॥ ३७६ ॥ पहुँचेआय महर मन्दिर में नेक न शंका कीन्हीं । बालक धरि लैकै
 सुरदेवी सुरति गवनकी कीन्हीं ॥ ३७७ ॥ लै वसुदेव तुरत घरआये काहु जिय नहिँजाने । जब
 वह रोवन लागी तब सब जागपरे अकुलाने ॥ ३७८ ॥ बालक भयो कह्यो नृपसों जब दौरि कंस
 तब आयो । करगहि खड्ग कह्यो देवकिसों बालक कहँ पहुँचायो ॥ ३७९ ॥ तब देवकी अधीन
 कह्यउ यह मैं नहिँ बालक जायो । यह कन्या मोहिँ बकस बीर तू कीजै मोमन भायो ॥ ३८० ॥
 कंस वंशको नाश करत है कहा समुझ रिसयानी । मोको भई अनाहद वाणी ताते डर नहिँ

सूरसागर-सारावली ।

(१४)

जानी ॥ ३८१ ॥ कन्या मांग लई तब राजा नेकु शंक नहिं आनी । पटकत शिला गई आकाशै
 कंस प्रतीति न मानी ॥ ३८२ ॥ भई अकाशवाणी सुरदेवी कंस यहीं अबआई । तेरो शत्रु प्रकट
 कहूँ ब्रज में काहु लख्यो नहिं जाई ॥ ३८३ ॥ जैसे मीन करत जलक्रीडा जलमें रहत समाई ।
 त्यों तुवकाल प्रकट इक कतहूँ लखि न सकत तेहि कोई ॥ ३८४ ॥ अन्तर्द्वान भई सुरदेवी
 कंस प्रतीति जो मानी । तब वसुदेव देवकीके गृह कंस गयो यह जानी ॥ ३८५ ॥ क्षम अपराध
 देवकी मेरो लिख्यो न मेख्यो जाई । मैं अपराध किये शिशु मारे करजोरे बिललाई ॥ ३८६ ॥
 पुनि गृहआय सेजपर सोयो नेकु नींद नहिं आवै । देश देशके दूतबुलाये सबहिन मतो सुनावै ॥
 ॥ ३८७ ॥ दीनहीन जो असुर चढत बलि करत सकल पुनि तैसो । बृहन्नहिं तन भार
 उतारेउ जलको माखनजैसो ॥ ३८८ ॥ भयो भोर यशुमति गृह आनंद मंगलचार बधाई ।
 जागी महंरि पुत्र सुख देख्यो आनंद उर न समाई ॥ ३८९ ॥ जैसे शशि प्रकटत प्राचीदिशि
 सकल कलाभरिपूर । यशुमतिकोख आय हरि प्रकटे असुर तिमिरकर दूर ॥ ३९० ॥ नन्दराय
 घर ढोटा जायो महर महामुख पायो । विप्र बुलाय वेदध्वनि कीन्हीं स्वस्ती वचन पढ़ायो ॥
 ॥ ३९१ ॥ जातकर्मकर पूजि पितर सुरपूजन विप्र करायो । दोइलख धेनुदई तेहि अवसर बहुतहि
 दानदिवायो ॥ ३९२ ॥ पर्वत सात तिलनको कीन्हों रत्ननओघमिलायो । मागध सूत और बन्दीजन
 ठौर ठौर यश गायो ॥ ३९३ ॥ बाजे बजत विचित्र भाँतिसों रघुउ घोष सब गाज । सुर सुमनन
 बरपावत गावत व्योम विमानन साज ॥ ३९४ ॥ बांधत बन्दनवार साथिये द्वारेध्वजा सोहाई ।
 कनक कलश प्रति पौर विराजत मंगलचार बधाई ॥ ३९५ ॥ सुरभी वृषभ सिंगारे बहुविधि हरदी
 तेल लगाई । सुवरण माल विचित्र धातुरंग अँग अँग चित्र बनाई ॥ ३९६ ॥ आये गोप भेंट लै लैकै
 भूषण वसन सोहाये । नानाविधि उपहार दूध दधि आगेधरि शिरनाथे ॥ ३९७ ॥ यशुमतिके गृह
 पुत्र प्रकटभयो सुनी सकल ब्रजनारी । मंगलसाज सँवार हाथलै घर घर मंगलकारी ॥ ३९८ ॥ अति
 आतुरहै चलीं झुण्डजुरि शिर सुमनन बरसावें । मानों रीझ मधुप धरणीको रस पराग दरशावें ॥
 ॥ ३९९ ॥ पहुँचीं जाय महर मन्दिरमें करत कुलाहल भारी । दरशनकरि यशुमति सुतको सब
 लेनलगीं बलिहारी ॥ ४०० ॥ नाचतगोप परस्पर सब मिलि छिरकतहैं नवनीत । दूध और दधि
 और हरदजल सींचतहैं करप्रीत ॥ ४०१ ॥ यशुमतिकोखिसराहि बलैया लेनलगीं ब्रजनार ।
 ऐसो सुत तेरे गृह प्रकटयो या ब्रजको शृंगार ॥ ४०२ ॥ यशुमति रानी देति बधाई भूषण रत्न
 अपार । फूली फिरत रोहिणी मइया नख शिखर शृंगार ॥ ४०३ ॥ देत अशीशचलीं ब्रजसुन्दरि
 जियउपज्यो सुखभारी । गृहपूजन सब कियो वेदविधि नंदराय सुखकारी ॥ ४०४ ॥ देशदेशते ढाढीआये
 मनवांछित फलपायो । को कहि सकै दशौंधी उनको भयो सबन मन भायो ॥ ४०५ ॥ तादिनते
 सगरे या ब्रजमें रमारूप दरशायो । निजकुल वृद्ध जानि इक ढाढी गोवर्धनते आयो ॥ ४०६ ॥ परम
 उदार महर ब्रजपति जू ढाढी निकट बुलायो । बाजत हुडुक मैजीरा नृपुन नानाभाँति नचायो ॥
 ॥ ४०७ ॥ झँगा पगा अरु पाग पिछौरी ढाढिनको पहिरायो । हरि दरियाई कंठलगाई परदरशात
 उठायो ॥ ४०८ ॥ बहुतदान दीन्हें उपनंदन रतन कनक मणि हीर । धरानन्द धन बहुतहि दीन्हों ज्यों
 बरपत घन नीर ॥ ४०९ ॥ कुण्डल कान कंठ माला दै ध्रुवनंद अति सुखपायो । सीधो बहुत सुर
 सुरानंद गाढाभरि पहुँचायो ॥ ४१० ॥ कर्माधर्मानन्दकहत हैं बहुतहि दान दिवायो । ब्रजरानी ढाढिन
 पहिराई मनवांछित फल पायो ॥ ४११ ॥ चले भवनको दै अशीश दोउ निर्भय कीरति गावै ।

जानि याँचैं ब्रजपति उदार अति याचक फिर न कहावै ॥ ४१२ ॥ नानाविधिके विविध खिलौना
 रत्नन अधिक अमोले । ताको लेनगये मथुराको आनक दुन्दुभि बोले ॥ ४१३ ॥ वेगजाव
 गोकुल तुम अबहीं सुनियतहै उतपात । सुनि ब्रजराज तुरत घरआये जियमें अति अकुलात ॥
 ॥ ४१४ ॥ प्रथम पूतना कंस पठाई अतिसुन्दर बपु धारचउ । घसिकै गरल लगाय उरोजन कपट
 न कोउ निहारचउ ॥ ४१५ ॥ लिये उठाय श्यामसुन्दरको थन गहिकै मुख लीन्हों । लीन्हें खैंचि प्राण
 विष पय युत देह विकल तब कीन्हों ॥ ४१६ ॥ छोडछोड कहि परी धरणिपर कर चरणन जु प-
 सार । योजन डेढ विटप बेली सब चूर चूर करडाल ॥ ४१७ ॥ ताको जननीकी गति दीन्हों परमकृपाल
 गुपाल । दीन्हों फूंक काठतन वाको मिलके सकल गुवाल ॥ ४१८ ॥ तबहीं नन्दरायजू आये
 कौतुक सुनि यह भारी । विस्मित भये देवने राख्यो बालक यह सुखकारी ॥ ४१९ ॥ विप्रबुलाय
 वेदध्वनि कीन्हों रक्षा बहुत कराई । आरति विविध उतार महरजू मंगल करत बधाई ॥ ४२० ॥
 एक दिना हरि लई करोटी सुनिहरषी नैदरानी । विप्रबुलाय स्वस्तिवाचन करि रोहिणि नैन सिरानी
 ॥ ४२१ ॥ नित मंगल नित होत कुलाहल नित नित बजत बधाई । भादों देव छट्टिको शुभ दिन
 प्रगटभये बलभाई ॥ ४२२ ॥ वर्ष दिवस पहिले ब्रजमण्डल शेष महा वपु लीन्हों । अपनो धाम
 जान प्रगटो भुव रूप प्रगट निज कीन्हों ॥ ४२३ ॥ कंसनृपति शकट बुलायो लेकर बीरा दीन्हों ।
 आय नन्दगृह द्वार नगरमें रूप शकटको कीन्हों ॥ ४२४ ॥ मारी लात श्याम पलनाते परचउ
 धरणि भहराय । जहँ जहँते दौरे ब्रजवासी श्यामहि लियो उठाय ॥ ४२५ ॥ बच्छपुच्छ लैदियो
 हाथपर मंगलगीत गवायो । यशुमति रानी कोखिसिरानी मोहन गोद खिलायो ॥ ४२६ ॥ इकदिन
 अस्तन पानकरावति यशुमति अति बडभागी । वदन पसारि विश्व दिखरायो क्षणइक मुरछा जागी
 ॥ ४२७ ॥ तृणावर्त विपरीति महाखल सो नृपराय पठायो । चक्रवातहैं सकल घोषमें रज धुंधरहैं
 छायो ॥ ४२८ ॥ चलयो उठाय गुपाल व्योममें तब हरि कंठ गहायो । पटक्यो शिला खरिकके
 आगे क्षण निरजीव करायो ॥ ४२९ ॥ गर्गराज सुनिराज महाऋषि सो वसुदेव पठायो । नामकरण
 ब्रजराज महरघर अति आनन्दितआयो ॥ ४३० ॥ नामकरण कीन्हों दोहुन को नारायण समभाषे ।
 तुम्हरेदुःख मिटावनकारण पूरणको अभिलाषे ॥ ४३१ ॥ राम कृष्ण अवतार मनोहर भक्तनके
 हितकाज । बहुतहि काज करैगे तुम्हरे सुनहु महर ब्रजराज ॥ ४३२ ॥ एकदिना पलना हरि पौढ़े
 नन्दमहरके द्वार । नैदरानी गृह कारज लागी नाहिंन लई सँभार ॥ ४३३ ॥ कंसनृपति इक असुर
 पठायो धरेउ कागको रूप । सम्मुख आय नयनदोउ जोरे देख्यो श्यामको रूप ॥ ४३४ ॥ कंठ
 चाप बहुबार फिरायो पटक्यो नृपके पास । एक याममें वचन कह्यो यह प्रकटभयो तुवनास
 ॥ ४३५ ॥ यह कहिकै तनु त्याग कियो उन कंसनृपतिके आगे । भयो उदास सुहात न कुछ ये
 क्षण सोवत क्षण जागे ॥ ४३६ ॥ एकदिना ब्रजराज महरजू और यशोदारानी । घुटवन चलत
 श्यामको देखत बोलत अमृतबानी ॥ ४३७ ॥ इतते नन्दमहर बोलतहैं उतते जननिबुलावत ।
 सुन्दरश्याम खिलौना कीन्हों हँसि हँसि मोद बढ़ावत ॥ ४३८ ॥ शशिको देख और हरिठानी कर
 मनुहार मनावत । मधु मेवा पकवान मिठाई विविध खिलौना लावत ॥ ४३९ ॥ कमलनैनको
 महर यशोदा जलप्रातिबिंब दिखावत । फेरतहाथ चन्द्र पकरनको नाहिंनहोत लखावत ॥ ४४० ॥
 बृद्धेबाबू दरशन आये लाल चन्द्रमणि दीन्हों । ताको देख और सब छांडी भोजनकी सुधि कीन्हों
 ॥ ४४१ ॥ औटयो दूध कपूर मिलायो प्यावत कनक कटोरे । पीवत देखि रोहिणी यशुमति

सूरसागर सारावली ।

(१६)

डारतहै तृण तोरे ॥ ४४२ ॥ कछु दिन भये संग दोउ बालक बल मोहन दोउ भाई । चोरी करत
 हरत दधि माखन लीला कहिय न जाई ॥ ४४३ ॥ सब ब्रजनारी उरहन आई ब्रजरानीके आगे ।
 मैं नाहिं दधिखायो याको शिशुहै रोवन लागे ॥ ४४४ ॥ एक दिना ब्रजपतिकी पौरी खेलतहरि
 ब्रजवाल । माटी खाय वदन दिखरायो चंचल नयन विशाल ॥ ४४५ ॥ सकल ब्रह्मांड उदरमें देख्यो
 ब्रज मंडल राताल । नन्द महर यशुदा रोहिणि पुनि धेनु सकल ब्रजगवाल ॥ ४४६ ॥ हृदय ज्ञान
 उपज्यो तब यशुमति पूरण ब्रह्म विशेषे । हरि उपजाई माया तब सब बहुरि पुत्र करि लेखे ॥
 ४४७ ॥ एकदिना दधि मथन करतही महर घोषकी रानी । हरि माँग्यो माखन नाहिं दीन्हों
 तब मनमें रिस ठानी ॥ ४४८ ॥ फोरे भांड दही आंगनमें फैल परेउ अति भारी । दौरी पकर
 देत नाहिं मोहन अति आतुर महतारी ॥ ४४९ ॥ जानी विकल बहुत जननीको हरि पकराई
 दीनी । बहुत दामलै बांधन लागी अँगुरी द्वै भई हीनी ॥ ४५० ॥ व्याकुल भई बँधत नाहिं मोहन
 दया श्यामको आई । ऊखल दाम बँधेहरि जाने गोपी देखन धाई ॥ ४५१ ॥ तौलौ बँधे देव
 दामोदर जौलौ यह कृत कीनी । देख दुखितहै सुत कुबेरके कृपा दृष्टि करि दीन्हों ॥ ४५२ ॥
 नारद मुनिको शाप पायके श्याम दई गति तत्पक्ष । निकसे बीच अटक ऊखलमें श्यामरहे अटका
 य ॥ ४५३ ॥ चरण परसि ते पुललिभये भुव परे वृक्ष भहराय । भयो शब्द आघात स्वर्ग लौ
 मुनि आये ब्रजराय ॥ ४५४ ॥ अस्तुति करि वे गये स्वर्गको अभय हाथ करि दीन्हों । बंधन छोरि
 नंद बालकको लै उछंग कर लीन्हों ॥ ४५५ ॥ यशुमतिजूसों लै महर जूतुम क्यों बाँध्यों
 दाम । गर्गकहेउ मोहै नारायण आये हैं बलश्याम ॥ ४५६ ॥ यशुमति माय धाय उर लीन्हों राई
 लौन उतारों । लेत बलाय रोहिणी नीके सुंदर रूप निहारो ॥ ४५७ ॥ कबहुँककर करताल बजा-
 वत नाना भांति नचावत । कबहुँक दधि माखनके कारण आछी आर मचावत ॥ ४५८ ॥ बड़े
 गोप उपनन्द बुलाये नंद महरके धाम । कीन्हें मंत्र गोंपसब मिलिकै जेहि विधि पूरण काम ४५९ ॥
 बहु उत्पात रहत हैं गोकुल नित प्रति कंस पठायों । अंत जाय कहँ वास करेंगे बालक देव बचा
 यो ॥ ४६० ॥ अब वृन्दावन जाय रहेंगे जहँ वीरुध तृण पानी । चले गोप अति ओप विराजै
 बोलत हो हो बानी ॥ ४६१ ॥ यमुना उतर आय वृन्दावन जहां सुखद दुम राजें । गोवर्द्धन वृन्दावन
 यमुना सघन कुञ्ज अति छाजें ॥ ४६२ ॥ वसे जाय आनंद उमँगसों गइयां सुखद चरावैं । आयो
 दुष्ट वकासुर जान्यो हरि चित बात धरावैं ॥ ४६३ ॥ करि विचार छिनमें हरि मारो सो बछरा
 वनआज । तापाछे जो वकासुर आयो घात कियो ब्रजराज ॥ ४६४ ॥ बच्छ चरावत वेणु बजाव-
 त गोप सखनके संग । सो देखत चतुरानन आये हरि लीला रसरंग ॥ ४६५ ॥ छाकैं खात खवा-
 वत ग्वालन सुन्दर यमुनातीर । ग्वाल मंडली मध्य विराजत हरि हलधर दोउ वीर ॥ ४६६ ॥ गाय
 गोप अरु बच्छ सबै विधि छिनहींमें हरिलीन्हों । सबको रूपभये हरिआपुन नेकविलम्ब न कीन्हों
 ॥ ४६७ ॥ जबहीं गर्वगयो चतुरानन अद्भुत चरितहिंदेख । परोधाय हरिपांथ जोरि कर नाथ कृपा
 करलेख ॥ ४६८ ॥ अस्तुतिकरी वेदविधि करिकै चतुरानन बहुभांति । अद्भुत चरित देख माधो
 को हँसत सकल किलकाति ॥ ४६९ ॥ गयेधाम अपने विधि सुखसों हरिआज्ञा सुखपाय । वर्ष
 दिवसलौं सर्वरूप हरि ब्रजवासिन सुखदाय ॥ ४७० ॥ धेनु चरावनचले श्यामघन ग्वालमंडलीजोई
 हलधरसंग छाकभरि काँवर करत कुलाहलशोर ॥ ४७१ ॥ क्रीडाकरत आप वृन्दावन धेनु समूह
 नचावत । गोवर्धन पर वेणु बजावत फूलनभेष सँवारत ॥ ४७२ ॥ कालीनाग नाथ हरिलाये

सुरभी ग्वालजिवाये । कनक कमलके बोझ शीशधरि मथुरा कंस पठाये ॥ ४७३ ॥ दावानलको
 पान कियो मुख गोपन रक्षा कीनी । वर्षा सुक्रतु देख वृन्दावन क्रीडाकी सुधि लीनी ॥ ४७४ ॥
 वेणु बजाय विलास कियोवन धौरी धेनु बुलावत । बरहापीड दाम गुञ्जामणि अद्भुत भेष बनावत ॥
 ४७५ ॥ प्रातकाल स्नान करनको यमुना गोपि सिधारी लैकै चीर कदम्ब चढे हरि बिनवत
 हैं ब्रजनारी ॥ ४७६ ॥ दै बरदान संग खेलनको शरद रैनि जब आई । रचिकै रास सबन सुख दीन्हों
 रजनी अधिक कराई ॥ ४७७ ॥ गोवर्धन धरि सब ब्रज राख्यो मधवा मान मिटायो । नारायण
 प्रकटे सब जाने जोइ गर्गमुनि गायो ॥ ४७८ ॥ धेनुक और प्रलम्ब सँहारे शंखचूड वध कीन्हों ।
 करिकै चरण परस प्रभु वनमें व्याल अभयपद दीन्हों ॥ ४७९ ॥ नानाविधि क्रीडा हरि कीन्हों
 ब्रजवासिन सुख पायो । सबहिन यह मांग्यो प्रिनती कर हरि वैकुण्ठ दिखायो ॥ ४८० ॥ अभयदान
 दीन्हों मधवाको नंदरायको राख्यो । वरुणलोकमें गये कृपाकरि विविध वचन उन भाख्यो ॥
 ४८१ ॥ यज्ञ करत ब्राह्मण मथुराके ओदन श्याम मैगायो । उन नहिं दियो नारिपै पठये तब उन
 सुनि सुख पायो ॥ ४८२ ॥ षट्स थार सँवार साजसों सबही हरिपै आई । कियो मनोरथ पूरण
 उनको निर्भय करि जु पठाई ॥ ४८३ ॥ व्योमासुरकेशी सब मारे अरु अरिष्ट वध कीनो ।
 क्रीडा बहुत करी गोकुलमें भगतनको सुख दीनों ॥ ४८४ ॥ नारद आय कहेउ नृपसों यह कौन
 नींद तू सोवे । तेरो शत्रु प्रकट गोकुलमें गुप्त न जानत कोवे ॥ ४८५ ॥ यह सब देव प्रकट भये
 ब्रजमें जहँ तहँ ठौरहि ठौर । उग्रसेन वसुदेव देवकी यादव जे सब और ॥ ४८६ ॥ नंदगोप वृषभान
 यशोदा सबहि गोप कुल जानों । करो उपाय बचो जो चाहो मेरो वचन प्रमानो ॥ ४८७ ॥ यह
 सुनि कंस सबनको बन्धन दीनोहै त्यहिकाल । श्रीवसुदेव देवकी निज पितु बन्धन दियो विशाल ॥
 ४८८ ॥ फिरि नारद गोकुल हो आये हरि चरणन शिरनाये । अस्तुति करी बहुत नानाविधि
 मधुरे बीन बजाये ॥ ४८९ ॥ हरि कछु इन उत्तर नहिं दीनो फिरगये अपने धाम । बल मोहन
 सब सखा वृन्द लै क्रीडत गोकुल ग्राम ॥ ४९० ॥ बल अक्रूर कंस यह भाष्यो सुन सुफलक सुत
 बात । राम कृष्णको लायो मधुपुर विलमकरो जनि जात ॥ ४९१ ॥ तब रथबैठ चले सुफलक
 सुत संध्या गोकुल आये । पैडे में हरिचरण धूरिलै अपने अंग लगाये ॥ ४९२ ॥ मिले नंद बलदेव
 रोहिणी और यशोदारानी । पूजा करि पधराय सदनमें भोजनकी विधि ठानी ॥ ४९३ ॥ भोजन
 करि अक्रूर जो बैठे सब वृत्तांत सुनाये । धनुषयज्ञ कीन्हों नृपजूने सबको वेग बुलाये ॥ ४९४ ॥
 चले महर ब्रजराज साज लै कौतुक देखन आज । राम कृष्ण दोउ आगे लैकै सकल घोष शिरताज ।
 ४९५ ॥ मारगमें कालिंदीके तट कीन्हों जल असनान । निज वैकुण्ठ दिखायो जलमें दीन्हों
 पूरण ज्ञान ॥ ४९६ ॥ करि वंदन हरिके चरणनको पुनि अक्रूर यह भाख्यो । तुम यदुकुल प्रकटे
 पुरुषोत्तम भक्तनको प्रण राख्यो ॥ ४९७ ॥ मथुरा आय रहे उपवनमें नंदराय सब गोप । रामकृष्णके
 चरण परसते अधिक मधुपुरी ओप ॥ ४९८ ॥ गये नगर देखनको मोहन बलदाऊ ले साथ ।
 पुर कुल वधू झरोखन झांकत निरख निरख सुसक्यात ॥ ४९९ ॥ मारगमें एक रजक सँहारयो सबहि
 वसन हरि लीन्हें । बालक मिल्यो सबहि पहिराये सबहिनको सुख दीन्हें ॥ ५०० ॥ आगे मिल्यो
 सुदामा माली फूल माल पहिराई । निर्भयदान दियो हरि तिनको अविचल भक्ति दढाई ॥ ५०१ ॥
 कुब्जा घिसि चन्दनलै आई मारग देखन आई । हरि माँग्यो उनलेखु समर्थो मन बाँछित फल
 पाई ॥ ५०२ ॥ दियो वरदान भवन आवनको तहांते चले कन्हआई । मथुरानगर देख मनमोहन

फूले हैं दोउभाई ॥ ५०३ ॥ रीझत नारि कहत मथुराकी आपुसमें दै सैन । कोमल गात कौनको
 ढोटा सुन्दर राजिव नैन ॥ ५०४ ॥ यह बालक सुकुमार सरस वपु असुर प्रबल अतिभारी । कैसेकै
 वाको मारेंगे शोचतहैं पुर नारी ॥ ५०५ ॥ उपवन आय कियो हरि व्याहृ नन्दराय सुख दीन्हों ।
 मधु मेवा पकवान मिठाई जो भायो सो लीन्हों ॥ ५०६ ॥ पौढेजाय दोउ शय्यापर सोवत आई
 निंद । स्वपनेमें मथुरा फिर देखी जागे बालगोविंद ॥ ५०७ ॥ भयो प्रात नृप फेर बुलायो धनुष
 यज्ञको देखन । मल्लयुद्ध नानाविध क्रीडा राजद्वारको पेखन ॥ ५०८ ॥ गये ब्रजराज द्वार भूप
 तिके बहु उपहार दिवाये । तब नृप कह्यो सकल गोपनसों भलीकरी तुम आये ॥ ५०९ ॥ बैठारे
 सब मंच ओपसों कौतुक देखन लागे । राम कृष्ण सँग ग्वाल मण्डली नगर देख अनुरागे ॥ ५१० ॥
 तोरेव धनुष टूककरिडारे दोउन आयुधकीने । तासु मारिकरि चूर पहरुआ परममोद रसभीने ॥
 ॥ ५११ ॥ मद गजराज द्वार पर ठाढ़ो हरिकहेउ नेक बचाय । उन नहिं मान्यो सन्मुख आयो
 पकरेउ पूछ फिराय ॥ ५१२ ॥ दियो पठाय श्याम निजपुरको मावत सहि गजराज । आगे
 चले सभामें पहुँचे जहँ नृप सकलसमाज ॥ ५१३ ॥ बडेबडे राजा सब बैठे अरु पुरवासी
 लोग । अपने अपने भाव सु देखत मिट्यो सकल मनशोग ॥ ५१४ ॥ मल्लन सबन मल्लसे
 दीखे नृपन लखे नृपराय । युवतिन सबै काम वपु देखे भेंटनको ललचाय ॥ ५१५ ॥
 गोपन सखाभाव करि देखे दुष्ट नृपति कृतदण्ड । पुत्रभाव वसुदेव देवकी देखे नित्य अखण्ड ॥
 ॥ ५१६ ॥ विदुष जनन विराट प्रभु दीखे अति मनमें सुखपायो । पूरण तत्त्व देख योगी जन
 हितसों ध्यान लगायो ॥ ५१७ ॥ यदुकुलके कुल दीपक प्रकटे सब यादव सुखदाई ।
 कंसदेखि निजकाल आपनो बहुतहि क्रोध रिसाई ॥ ५१८ ॥ जब उन कह्यो मल्लक्रीडा तुम
 करत गोपके संग । वृन्दावनमें हम सुनियत हैं क्रीडत हौ बहुरंग ॥ ५१९ ॥ अब तुम कंस
 नृपतिको दिखाओ मल्लयुद्ध करि नीके । कह्यो चाणूर मुष्टि सब मिलकै जानत हौ सब
 जीके ॥ ५२० ॥ तब हरि भिरे मल्ल क्रीडाकर बहु विधि दांव देखाये । वर्णन कियो प्रथम
 संक्षेपन अबहूँ वर्णन पाये ॥ ५२१ ॥ मुष्टिकसाथ लरे बलभाई धरेउ बृहदवपु दोउ । छिनही
 में हरि तुरत सँहारे अतिआनंदमनहोउ ॥ ५२२ ॥ औरमल्ल मारे शल तोशल बहुत गये सबभाज
 मल्लयुद्ध हरि करि गोपनसों लखि फूले ब्रजराज ॥ ५२३ ॥ तब नृपकंस बहुत बिललायो बारबार
 रिसयाई । बाँधो नन्द हरो गोपन धन कीन्हों कपट दुराई ॥ ५२४ ॥ फागुनबदि चौदशको
 शुभदिन अरु रविवार सुहायो । नखत उत्तरा आप विचारेउ कालकंसको आयो ॥ ५२५ ॥
 यह कहि कूदगये हरि ऊपर जहँ बैठे नृपराय । हरिको देखि खडग कर लीन्हों सन्मुख आयो
 धाय ॥ ५२६ ॥ तब हरिकेश पकरि अपने कर धरणी मांझ पछारो । ऊपर गिरे आपु तिहँ
 पुरको बोझ शीश पर डारो ॥ ५२७ ॥ कचगहि आपु बहुत वह खैच्यो हरि यमुनालों आये ।
 करि विश्राम सकल श्रम बीतयो जब यमुना जल न्हाये ॥ ५२८ ॥ बंधन छोर पिता माताके अस्तुति
 करि शिरनायो । तुम हमको पठये गोकुलमें याते लाड लड़ायो ॥ ५२९ ॥ यशुमति मात और
 ब्रजपति जू बहुतहि आनंद दीनो । याते टहल करन नहिं पायो कहत श्याम रंगभीनो ॥ ५३० ॥
 तब ब्रजराज महरपै आये बल मोहन दोउ भाई । तुम्हरी कृपा कंस मैं मारो कहँ लौं करों बड़ाई
 ॥ ५३१ ॥ रोहिणि यह बोली यशुमतिसों हम तुम्हरे सुखपायो । ज्यों तुम्हरो सुत त्यों मेरो सुत बहुतहि
 लाड लड़ायो ॥ ५३२ ॥ हिल मिल चले सकल ब्रजवासी नंदगाँव फिर आयो । सुबसबसी मथुराता

दिनते उग्रसेन बैठायो ५३३ ॥ राम कृष्ण घरआये जाने पुरवासिन सुखपायो । मंगलचार भये
 घर घरमें मोतिन चौक पुरायो ॥ ५३४ ॥ तब हरिमात पिता पै आये दोउ भाइन शिरनायो ।
 बन्धन छोर विनय बहु कीन्हें तुम हम बिन दुखपायो ॥ ५३५ ॥ फिर वसुदेव बसे अपने गृह
 परम रुचिर सुखधाम । राम कृष्णको लाड लडावत जानत नहिं दिन याम ॥ ५३६ ॥ गर्ग बुलाय
 वेदाविधि कीन्हों शुभ उपवीत करायो । विद्या पढ़न काज गुरु गृह दोउ पुरी अवन्ति पठायो ॥
 ॥ ५३७ ॥ राजनीति सुनि बहुत पढाई गुरु सेवा करवाये । सुरभी दुहत दोहनी माँगी बाँहपसार
 देवाये ॥ ५३८ ॥ गुरु दक्षिणा देन जब लागे गुरुपत्नी यह माँग्यो । बालक बह्योउ सिन्धुमें
 हमरो सो नितप्रति चितलाग्यो ॥ ५३९ ॥ यह सुनि श्याम राम दोऊ मिलि गये जलधिके बीच ।
 परपंचानन शंख तहँ लीन्हों मारि असुर अति नीच ॥ ५४० ॥ यमपुर जाय शंखध्वनि कीन्हों
 यमराजा चलिआयो । चरणधोय चरणोदक लीन्हों बालक दे शिरनायो ॥ ५४१ ॥ लै बालक
 गुरु आगे धरि कै राम कृष्ण सुखराशी । आज्ञालै मधुपुरी सिधारे परब्रह्म अविनाशी ॥ ५४२ ॥
 क्रीडा करत विविध मथुरामें अक्रूर भवन सिधारे । अस्तुति करी बहुत नानाविधि निर्भयकर शिर
 धारे ॥ ५४३ ॥ कुबिजाके घर आपु पधारे सबै मन्त्रोत्थ कीनो । ऊधोभक्त संगलेके अति आनंद
 भक्तन दीनो ॥ ५४४ ॥ उद्धव भक्त बुलाय संगले हरिकान्त यह भाख्यो । ब्रजवासी लोगनसों
 मैं तो अन्तर कछू न राख्यो ॥ ५४५ ॥ सुर गुरु शिष्य बुद्धिमें उत्तम यदुकुल कहत प्रमान । मन्त्री
 भृत्य सखा मो सेवक याते कहत सुजान ॥ ५४६ ॥ मोकूँ लाड लडायो उन जो कहँ लगि करें
 बडाई । सुनि ऊधो तुम समझत नाहिंन अब देखोगे जाई ॥ ५४७ ॥ बेग जाव ब्रज मों आज्ञाते
 ब्रजवासिन सुख देहौ । चरणरेणु शिरधरि गोपिनकी तुमहुं अभयपद लेहौ ॥ ५४८ ॥ गोपिन
 सों बिनती करि कहियो नितप्रति मन सुधि करियो । विरह व्यथा बाँटे जब तनुमें तब तब म्वाहिं
 चितधरियो ॥ ५४९ ॥ पाती लिखी आपकर मोहन ब्रजवासी सबलोग । मात यशोदा पिता
 नन्दजू बाढ्यो विरह वियोग ॥ ५५० ॥ धौरी धूमरि कारीकाजर मेन मजीठी गाय । ताको बहुत
 राखियो नीके उन पोष्यो पयप्याय ॥ ५५१ ॥ वनमें मित्र हमारे एक हैं हमहींसों है रूप । कमल
 नयन घनश्याम मनोहर सब गोधनको भूप ॥ ५५२ ॥ ताको पूजि बहुरि शिर नइयो अरु कीजो
 परणाम । उन हमरो ब्रजसबहि बचायो सब विधि पूरे काम ॥ ५५३ ॥ आज्ञालै ऊधो श्रीपतिकी
 चलेवेग नँदग्राम । पुष्करमाल उतार हृदयते दीनी सुन्दरश्याम ॥ ५५४ ॥ पीताम्बर अपनो पहि
 रायो श्रुति कुण्डल पहिराये । अपने रथ बैठाय प्रीतिसों उद्धव ब्रज पधराये ॥ ५५५ ॥ दिनमणि
 अस्तभये गये गोकुल नंदरायसो भेंटे । बल मोहन दोउ देख माधुरी परम विरहदुख भेंटे ॥ ५५६ ॥
 मिले नन्द बलराम कृष्ण दोउ हैं नीके यह भाख्यो । मारो कंस भली सब कीन्हीं यादवकुल सब
 राख्यो ॥ ५५७ ॥ पूजाकर भोजन करवायो उद्धव संत सरायो । सोवत निशा नेक नहिं पाये
 रामकृष्ण गुणगायो ॥ ५५८ ॥ यशुदा विकल बात पूछतिहै नयन न नीर प्रवाह । तन मनमें
 अतिही दुखबाढ्यो अति आतुर जुनुदाह ॥ ५५९ ॥ बातें करत शेष निशिआई उद्धव गये सनान
 सुमिरण कर फिर ब्रजमें आये गोपिन देखे आन ॥ ५६० ॥ उद्धव देखि सकल गोपिनने कीन्हों
 मन अनुमान । रथको देखि बहुत भ्रम कीन्हों धोआये फिर कान ॥ ५६१ ॥ तब एक सखी कहें
 सुनरी तू सुफलक सुत फिर आयो । प्राणगये लै पिंड देनको देह लेन मनभायो ॥ ५६२ ॥ इतने
 देख कृष्ण अनुचर मुख उद्धव यह सब जानी । उद्धव कियो प्रणाम सबनको विनयकियो

मृदुवानी ॥ ५६३ ॥ भलीकरी तुम आये उद्धव लाये हरिकी पाती । जादिनते हरिगोकुल छांडयो
 हमपर विरह बराती ॥ ५६४ ॥ इतनेमाझ मधुप यक देख्यो आय चरण लपटायो । ताको देख
 कहत उद्धवसों हरिगोकुल बिसरायो ॥ ५६५ ॥ रे रे मधुप कितवके बन्धू चरण परस जिन करि
 हौ । प्रियाअंक कुंकुम कर राते ताहीको अनुसरिहौ ॥ ५६६ ॥ अधर सुधारस सकृत पानदैकान्ह
 भये अति भोगी । विजय सखा को सखी कहतहै तासों रहत सँयोगी ॥ ५६७ ॥ तीनलोक नारीको
 कहियत जो दुर्लभ बलबीर । कमलाहू नित पांयपै लोटत हमतो हैं आभीर ॥ ५६८ ॥ पहिलेही
 इन हनी पूतना बाँधे बलिको दान । शूर्पणखा ताडका सँहारी श्याम सहज यह बान ॥ ५६९ ॥
 याकी कथा सुनी जिन श्रवणन बनबिहंग भये योगी ॥ मांगतभीख फिरत घर घरही सुजन कुटुम्ब
 वियोगी ॥ ५७० ॥ फिर हरि आय यशोदाके गृह रिंगन लीला करिहैं । मांग्यो चन्द्र आर जब कीन्हों
 उन बातन चितधरिहैं ॥ ५७१ ॥ बहुत दनुज संहार श्यामघन ब्रजकी रक्षा करिहैं । यमला अर्जुन
 विटप उपारे कालीको विष हरिहैं ॥ ५७२ ॥ वेणुबजाय रास वन कीन्हो अति आनंद दरशायो ।
 लीला कथत सहसमुख तोऊ अजहूँ पार न पायो ॥ ५७३ ॥ महाप्रलयके मेघ पठाये सुरपति
 कीन्हों कोप । छिनहीमाझ गोवर्धन धारो राखिलिये सब गोप ॥ ५७४ ॥ ऐसे बहुत चरित्र कान्हके
 वरणि कहत नहिँ आवै । उद्धव तुमनयनन नहिँ देखो ताते भेद न पावै ॥ ५७५ ॥ तव उद्धव कहेउ
 धन्य धन्य तुम धन्य धन्य ब्रजनार । तुम्हरे सुबस सदा हरि खेलो ब्रजमें करत विहार ॥ ५७६ ॥
 तुम्हरी चरण कमल रज कारण तपकीन्हों चतुरानन । रमाशेष पुनि किनहुँ न पायो सो देखियत
 वृन्दावन ॥ ५७७ ॥ गुल्म लतामें जन्ममांगि तब विधिसों गोद पसारी । उद्धव कहत सदा म्वहिँ
 दीजै चरणरेणु ब्रजनारी ॥ ५७८ ॥ एक रूप है रहे वृन्दावन गुल्मलता कर वास । वज्रनाभ उप-
 देश कियो जिन पूरण केल प्रकास ॥ ५७९ ॥ एक रूप उद्धव फिर आये हरिचरणन शिरनायो ।
 कह्यो वृत्तान्त गोप वनितनको विरह न जात कहायो ॥ ५८० ॥ म्वहिँ खोजत पटमास बीतिगये
 तबहुँ न आयो अंत । ब्रजवनितनके नैन प्राणबिच तुमहीं श्याम वसंत ॥ ५८१ ॥ छिन नहिँ
 दूर श्याम तुव उनसों मैं निश्चय यह कीनों । तुमरो रूप देखि गोकुलमें बाढ्यो नेह नबीनो ॥
 ५८२ ॥ तब हरि कह्यो सुनो उद्धव जू ब्रजवासी तन मोर । तिनको सपन कबहुँ नहिँ छाँडो
 सत्य कहतहौँ तोर ॥ ५८३ ॥ वृन्दावनमें धेनु चरावत गोपसखनके संग । वेणुबजावत मोद
 बढ़ावत क्रीडा कोटि अनंग ॥ ५८४ ॥ अरु गोपिनसों अंग सुअँगकरि नितप्रति करो विनोद । दुष्ट
 कंस मारन यह आयो सदा यशोदा गोद ॥ ५८५ ॥ कुंज कुंजमें क्रीडा करि करि गोपिनको
 सुख दैहौँ । गोप सखन सँग खेलत डोलौँ ब्रज तज अंत न जैहौँ ॥ ५८६ ॥ मारेउ दुष्ट बहुत जो
 भूपर धर्मकरो विस्तार । वसुधाभार उतारन कारन यदुकुल लिय अवतार ॥ ५८७ ॥ मित्र एक
 वन बसत हमारो सो नयनन भरि देख्यो । ताको पूजन नित प्रति करिहौँ सो तुम सुबुध विशे-
 ख्यो ॥ ५८८ ॥ नाना रत्न कंदरा कबहुँ छिन नहिँ मोहिँ भुलावे । क्रीडा करो नित्य
 कुंजनमें गोपिनको सुखभावे ॥ ५८९ ॥ ताही क्षण अक्रूर बुलाये बल मोहन यह भाख्यो ।
 तुम अब वेगि जाव हस्तिनपुर कमलनयन जिय दाख्यो ॥ ५९० ॥ तब अक्रूर बैठि हरिके रथ
 हस्तिनपुर जु सिधारे । कुंती मिली युधिष्ठिर अर्जुन भीम विदुर उर धारे ॥ ५९१ ॥ गांधारी दुर्योधन
 आदिक भीष्म कर्ण सब भेटे । बहुत दिनाके ताप सबनके सुफलक सुत सब मेटे ॥ ५९२ ॥
 तब यह कह्यउ नृपतिसों नीके बहुत भांति समुझायो । तब नृप कह्यो नहिँ मेरो बश मोह प्रबल

जियछायो ॥ ५९३ ॥ तब अक्रूर विचार कियो यह हरि इच्छा जियमानी । करि प्रणाम गये मधुपुर को जहां श्याम सुखदानी ॥ ५९४ ॥ समाचार सबही कहि दीनो बल मोहनहि सुनायो । सुन वसुदेव देवकी दोऊ बहुतहि दुख जिय पायो ॥ ५९५ ॥ अस्ती अरु प्राप्ती दोउपत्नी कंस रायकी कहियत । जरासंध पै जाय पुकारी महा क्रोध मन दहियत ॥ ५९६ ॥ तीन बीस अक्षौहिणिलै दल जरासंध तहँ आयो । बल मोहन छिनमांझ संहारे करि बिनचमू पठायो ॥ ५९७ ॥ सत्रह बार फेर फिर आयो हरि सब चमू संहारी । अबकै फेर दुष्ट बनि आयो हरि कछु बात विचारी ॥ ५९८ ॥ अंतरिक्षते द्वै रथ उपजे आयुध तुरंग समेत । तापर बैठ कृष्ण संकर्षण जीते हैं सब खेत ॥ ५९९ ॥ नारद जाय यवनसों भाष्यो राम कृष्ण दोउ वीर । तोहि न गनत वसतहँ मथुरा बडे बली रणधीर ॥ ६०० ॥ यह सुनि यवन तुरतही धायो जियमें अति अकुलाय । तीन कोटि भट यवन संगले मथुरा पहुँच्यो जाय ॥ ६०१ ॥ सुन बल मोहन बैठ रहसि में कीनो कछु विचार । मागध मगध देशते आयो साजे फौज अपार ॥ ६०२ ॥ विश्वकर्माको आज्ञा दीन्हों रची द्वारका आय । निशिको सोये सब मथुरा में जगे द्वारका जाय ॥ ६०३ ॥ हलधर हलमूसल करलीने सभी मलेच्छ संहारे । मारि फौज सबही मागधकी जरासंध उब्वारे ॥ ६०४ ॥ चले भाज दोउ भाइ उहांते जहँ सोवत मुचुकुन्द । वसन उढाय रहे छिपि आपन पूरण परमानन्द ॥ ६०५ ॥ मारी लात आय जब नृपको तब जाग्यो भहराय । निकसी अग्नि नैनते तासों भस्म भयो तेहि दाय ॥ ६०६ ॥ इतने मांझ आपु हरि आये दर्शन दीन्हों भूप । शंख चक्र गद पद्म चतुर्भुज सुंदर श्याम स्वरूप ॥ ६०७ ॥ तब पूछ्यो तुम कौन रूपहौ कौन देव अवतार । अबलों कहूँ देखे नाहीं मैं तुम अति हौ सुकुमार ॥ ६०८ ॥ तब हरि कह्यो जन्म मेरे बहु शेष न पावैं पार । भुवकी रज नभके सब तारे तितने हैं अवतार ॥ ६०९ ॥ अब कहिये द्वापर युग सुन नृप वासुदेव ममरूप । भूतल भार उतारन आयो यदुकुल सुखद स्वरूप ॥ ६१० ॥ तब नृप अस्तुति बहु विधि कीन्हों जन्मकर्म गुणगाय । तुमहीं ब्रह्म अखिल अविनाशी भक्तन सदा सहाय ॥ ६११ ॥ नव गुण नवलरूप पुरषोत्तम जै यदुकुल अवतार । जयजयजय वैकुण्ठ महानिधि कमल नयन सुखसार ॥ ६१२ ॥ वेद पुराण रटतयश जाको तऊ न पावत पार । मैं मुचुकुन्द नृपति कृतयुग को सोवत भए युगचार ॥ ६१३ ॥ अब मोको आज्ञा कछु दीजै जैसे चरणन पाऊं । सदाबसों निजलोक निरंतर जन्म कर्म गुणगाऊं ॥ ६१४ ॥ क्षत्री जन्म बहुत अवकीन्हों ताते मुक्ति न होय । विप्र जन्म धरि मुक्तिहोयगी करि तप साधन सोय ॥ ६१५ ॥ आज्ञा लैकै चलयो नृपति वहँ उत्तर दिशा विशाल । करि तप विप्र जन्म जब लीन्हों मित्र्यो जन्म जंजाल ॥ ६१६ ॥ तहांते चले श्याम अरु हलधर परबरषन गारि आये । पर्वत बहुत नमन करि पूजा यह बिनती करवाये ॥ ६१७ ॥ नितप्रति मोशिर मधवा बरसत लागत शीत अपार । अगणित पाप महादुख मेटो मांगत यही मुरार ॥ ६१८ ॥ इतने मांझ मगध चलि आयो उन जानी यह बात । पर्वत मांझ गये दोउ भइया उन देखे दृग जात ॥ ६१९ ॥ दीन्हों अग्नि लगाय चहुँघा उन जानी रिपु हान । राम कृष्ण दोउ कूद पधारे पुरी द्वारका जान ॥ ६२० ॥ भयो आनंद द्वारका में सब घर घर गीत गवाये । करि रिपु हानि समर सब जीत्यो रामकृष्ण घर आये ॥ ६२१ ॥ एक समय नारद मुनि आये नृपति भीष्मके गेह । पूजा करी बहुत नाना विधि नृपति जनाये नेह ॥ ६२२ ॥ लखि रुक्मिणी कह्यो मुनि नारद यह कमला अवतार ।

पूरण ब्रह्म प्रकट पुरुषोत्तम श्रीवसुदेव कुमार ॥ ६२३ ॥ उनके योग्य यही कन्या है सुनो देव
 महाराज । तब नृप कह्यउ करो निश्चय यह सफलहोय ममकाज ॥ ६२४ ॥ तब नारदमुनि गये
 द्वारका कृष्णचन्द्रके पास । विनती करी रुक्मिणीकी सब सुनि हरि भये हुलास ॥ ६२५ ॥ करो
 वेग कछु विलंब न कीजै नारद कहि यह बात । श्रवण सुनत कमलापतिको जिय तनु पुलकित
 सवगात ॥ ६२६ ॥ सुन नारद स्वहि नौद न आवे करिहौ बेग उपाय । यह कहि चले आपहरि
 रथचढ़ि शोभा कही न जाय ॥ ६२७ ॥ देश देशके नृपति जुरे सब भीष्म नृपतिके धाम । रुक्म
 कह्यउ शिशुपालहि देहौ नहीं कृष्णसों काम ॥ ६२८ ॥ यतने माझ आपु हरि आये सुनी नृपति
 सबवात । उपवनरहे जान जियमें यह मनमें अति अकुलात ॥ ६२९ ॥ पूजन करन चली देवी
 को सखी वृंद सवसंग । पूजा करि बोली यह कमला लोक लाज कृत भंग ॥ ६३० ॥ अटल शक्ति
 अविनाश अधिक बल एक अनादि अनूप । आदि अव्यक्त अंबिका पूरण अखिल लोक तव रूप
 ॥ ६३१ ॥ कृष्णचन्द्रके चरण कमल में सदा रहो अनुराग । येही पति नित होहिं हमारे जो पूरण
 मम भाग ॥ ६३२ ॥ तब उन कहेउ कृष्ण तुम्हरे पति है हैं अचल सुहाग । चली महावर पाय
 रुक्मिणी अति पूरण अनुराग ॥ ६३३ ॥ तब हरि आय बैठ रथनीके आय मिले बडभाग । कर गहि
 बांह लई रथनीके अति आतुर चले भाग ॥ ६३४ ॥ मानो नील मेघके सँगमें मिली दामिनी आय ।
 चले तुरत हरि पुरी द्वारका शंख चक्र धरि धाय ॥ ६३५ ॥ दुष्ट नृपति को मान मथन करि चले
 द्वारकानाथ । जरासंध शिशुपाल आदि नृप पाछे लागे साथ ॥ ६३६ ॥ रथपाछे मिलि शोभित
 यहि विधि सकल दुष्टकीखान । महासिंह निज भागलेत ज्यों पाछे दौरैं श्वान ॥ ६३७ ॥ हल
 धर आय दुष्टसब मारे असुर नृपति की भीर ! भाजि चले शिशुपाल जरासंध अति व्यापित तनुपीर
 ॥ ६३८ ॥ आये नाथ द्वारका नीके रच्यो मांडयो छाय । व्याह केलि विधि रची सकल सुख
 सौंज गनी नहिं जाय ॥ ६३९ ॥ ब्रह्मा रुद्र देव तहँ आये शुक नारद सनकादि । दर्शन करि
 मंगल सुखकै सब मेटी विरह जो आदि ॥ ६४० ॥ चैत्रमास पूनो को शुभदिन शुभनक्षत्र शुभवार
 व्याहि लई हरि देव रुक्मिणी बाढ्यो सुख जो अपार ॥ ६४१ ॥ यक सत्राजित यादव कहिये
 सूरजदेव उपास । दीन्हौ मणि आदित्य स्यमंतक कोटिक सूर्यप्रकाश ॥ ६४२ ॥ भार भार नित
 कनकदेतहै नृपति सुनी यह बात । तब उन मांगी इन नहिं दीनी बाढ्यो वैर अघात ॥ ६४३ ॥ एक
 दिवस मृगयाको निकस्यो कंठ महामणि लाय । तब उन सिंहमारि गहि लीन्हों ऋच्छ मिल्यो
 यकताय ॥ ६४४ ॥ जाम्बवान महबली उजागर सिंहमारि मणि लीन्हों । पर्वत गुफा बैठ अपने
 गृह जाय सुताको दीन्हों ॥ ६४५ ॥ चर्चा परी बहुत द्वारावति कृष्णचन्द्रकी बात । तब हरि गये
 शैलकंदरमें अति कोमल मृदुगात ॥ ६४६ ॥ दिनअट्टाइस युद्ध कियो जब ऋच्छ भयो बलभंग ।
 तब पगपरेउ बहुत अस्तुति करि जानि रामपदसंग ॥ ६४७ ॥ तब हरि कहेउ भक्त तू मेरो तोसों
 करि संग्राम । कीन्हें शुद्ध तत्त्व सब तनुके पूरण कीन्हें काम ॥ ६४८ ॥ जाम्बवती अरपी कन्या
 भरि मणि राखी समुहाय । करि हरि ध्यान गयो हरिपुरको जहां योगेश्वर जाय ॥ ६४९ ॥ लै
 स्यमंतमणि जाम्बवतीसह आये द्वारकानाथ । अति आनंद कुलाहल घर घर फूले अँग न समात ॥
 ॥ ६५० ॥ आश्विनसुदि नौमीको शुभदिन हरि आये निजधाम । तौलौ घर घर प्रति दुर्गाको पूजन
 कियो सब गाम ॥ ६५१ ॥ सत्राजित अपनी तनयाको दीन्हें त्रिभुवनराय । सतभामा जु नाम
 तेहि कहियत शोभा कही न जाय ॥ ६५२ ॥ कीन्हों व्याह परमआनंद सों सतभामा सुखरास ।

द्वारावती विराजत नित प्रति आनंद करत विलास ॥ ६५३ ॥ इन्द्रप्रस्थ हरि गये कृपाकरि
 पांडव कुलको तार । तहँ कालिन्दी वनमें व्याही अतिसुन्दरि सुकुमार ॥ ६५४ ॥ मित्राविंदा यक
 नृपति नन्दनी ताको माधव व्याये । सात बैल नाथनके कारण आप अयोध्या आये ॥ ६५५ ॥ सत्या
 व्याहि बहुत सुख कीन्हों मथ्यो नृपतिको मान । आये फेर द्वारका मोहन मंगलकेलि निधान ॥ ६५६ ॥
 भद्रा व्याहि आप जब आये द्वारावती अनन्द । तैसेही लक्ष्मणा विवाही पूरण परमानंद ॥ ६५७ ॥
 नरकासुरको मारि श्यामघन सोरह सहस त्रियलाये । एकहिलग्र सबनकर पकरेव एकमुहूर्त विवाये ॥
 ॥ ६५८ ॥ यह मुनि नारद अचरज पायो ब्रह्मलोकोते धाये । कृष्णचन्द्रके चरण परस करि बीणा
 मधुर बजाये ॥ ६५९ ॥ तब हरि रीझि कहेउ नारदसों कहौ कहाँते आये । तब उन कहेउ दरशको
 आयो बहुत रूपधरि व्याये ॥ ६६० ॥ यह कौतुक देखनके कारण मैं आयो जो देखावो । रूप
 अनंत आदि अविनाशी दरशन प्रेम बढ़ावो ॥ ६६१ ॥ तब हरि कहेउ जाव घर घर प्रति देखोगे
 सब ठौर । मैंही हौं सब थल परिपूरण मो बिन नाहिंन और ॥ ६६२ ॥ तब मुनि चले देख घर घर
 प्रति परम केलि सुख पायो । नाना क्रीडा करत निरंतर घरघर रूप दिखायो ॥ ६६३ ॥ कहूँ क्रीडत
 कहूँ दामबनावत कहूँ करत शृंगार । कहूँ बालकन बिलावत माधव खेलत परम उदार ॥ ६६४ ॥
 कहूँ चौपर खेलत युवतिन सँग पांच सात उच्चार । कहूँ मृगयाको चले अश्वचढ़ि श्रीबसुदेव कुमार
 ॥ ६६५ ॥ कहूँ कर लेकर शस्त्र सँवारत कहूँ कछु करत विचार । कहूँ कछु बात कहत सबहिन
 सों कहूँ ध्वनि वेद विचार । ६६६ ॥ कहूँ मिलि यज्ञकरत विप्रनसँग अति आनंद मुरार । नाना
 दानदेत हय गज भुव ऐसे परम उदार ॥ ६६७ ॥ कहूँ गोदान करत कहूँ देखे कहूँ कछु सुनत
 पुरान । कहूँ निरत सबदेख बारबधु कहूँ गंधर्व गुणगान ॥ ६६८ ॥ कहूँ जप करत सनातन निज वपु
 ब्रह्म करत कहूँ ध्यान । कहूँ उपदेश कहूँ जैवेको कहूँ दृढावतज्ञान ॥ ६६९ ॥ कहूँ भोजन नानारुचि
 माँगत षटरसके पकवान । आरोगत ब्रजराज सांवरो कहूँ करत जलपान ॥ ६७० ॥ कहूँ जागत
 दरशनदियो मुनिको करि पूजापरणाम । संध्या करत कहूँ त्रिभुवनपति स्नान करत कोउ धाम ॥
 ॥ ६७१ ॥ कहूँ पौढ़े कमलाके सँगमें परम रहस्य एकान्त । कहूँ व्रत करत कहूँ निगमनको ज्ञान
 कर्मको अंत ॥ ६७२ ॥ कतहूँ श्राद्धकरत पितरनको तर्पणकरि बहुभांति । कहूँ विप्रनको
 देत दक्षिणा कहूँ भोजनकी पांति ॥ ६७३ ॥ कहूँ सुगन्ध लगावत लैंकै कहूँ अश्व शृंगार । कहूँ
 गजरथ कहूँ बाजि रथन सजिं डोलतहैं गृह द्वार ॥ ६७४ ॥ कहूँ ऊधोसों ब्रजसुख क्रीडा परम प्रेम
 उच्चार । कहूँ पांडवकी कथा चलावत चिन्ता करत अपार ॥ ६७५ ॥ कहूँ मिलि विप्र कहत
 सबहिनसों बालक करन सगाई । कहूँ सुतव्याह कहूँ कन्याको देत दायजो राई ॥ ६७६ ॥ कहूँ
 गजराज बाजि शृंगारे तापर चढे जु आप । सँग बलभद्र चमू सब सँगलै चले असुर दल काँप ॥
 ॥ ६७७ ॥ कहूँ हस्तिनापुर देखनको मनमें करत विचार । कतहूँ अर्घ्य देत सूरजको कहूँ
 पूजत त्रिपुरार ॥ ६७८ ॥ कहूँ एक दुर्गादेवि जानिकै जोरि विप्र निज धाम । करत होम बहु
 भांति वेदध्वनि सबविधि पूरणकाम ॥ ६७९ ॥ प्रथमपुत्रको व्याह जानिकै पूजत कहूँ गणेश ।
 कहूँ ऋषिनके चरण धोयकै शिरपर धरत नरेश ॥ ६८० ॥ कहूँ व्याहकी केलि परमसुख
 निरखत मुनि सच्चुपायो । शेष सहससुख पार न पावैं कछु इक सूर जु गायो ॥ ६८१ ॥ फिर
 मुनि आय भवन कमलाके चरण कमल शिरनायो । मैं सब ठौर फिरेउ तुव देखन कतहूँ पार न
 पायो ॥ ६८२ ॥ जित तित देखों तुम परिपूरण आदि अनंत अखंड । लीला प्रगट देव

पुरुषोत्तम व्यापक कोटि ब्रह्मंड ॥ ६८३ ॥ शिव विरंचि सनकादि महामुनि शेष
 सुरेश दिनेश ॥ इन सबहिन मिलि पार न पायो द्वारावती नरेश ॥ ६८४ ॥ तुम्हरे-
 चरण कमलकी महिमा जानतहैं त्रिपुरारि । प्रकट गंग पावन चरणनते ताहि रहत शिरधारि ॥
 ॥ ६८५ ॥ पुनि गौतम घरणी जानतहैं नावक शबरीजान । उद्धव विदुर युधिष्ठिर अर्जुन अरु
 भीष्म सुर ज्ञान ॥ ६८६ ॥ हनुमान अरु भक्त विभीषण चरणकमल रज मांगी । सोई कृपा
 करो करुणानिधि मांगतहैं अनुरागी ॥ ६८७ ॥ यह कहिकै मुनि लोक सिधारे बीणबजाय
 रिझाय । ब्रह्मलोक पहुँचे छिनहीमें हरि आज्ञाको पाय ॥ ६८८ ॥ पहिलोपुत्र रुक्मिणी जायो
 प्रद्युम्न नाम धरायो । कामदेव प्रकटे हरिके गृह पहिले रुद्र जरायो ॥ ६८९ ॥ नारद जाय
 कह्यो शंवरसों तब रिपु वपु धरि आयो । वेग उपाय करो मारनको प्रगट द्वारका जायो ॥ ६९० ॥
 तब शंवर भयभीत द्वारका गयो तुरत त्यहि काल । हरिको चक्रदेख रखवारी व्याकुल भयो
 विहाल ॥ ६९१ ॥ तब नारदमुनि आय चक्रसों बात करन ठहरायो । इतने मांझ पुत्रलै भाज्यो
 निधिमें जाय दुरायो ॥ ६९२ ॥ एक मीनने भक्ष कियो तब हरि रखवारी कीनी । सोई मत्स्य
 पकरि मौंधुक्ने जाय असुरको दीनी ॥ ६९३ ॥ तब उन कह्यो पाकशालामें अबहीं यह पहुँ-
 चाओ । चीरचो उदर पुत्र तब निकस्यो उन जान्यो मम नाओ ॥ ६९४ ॥ नारद कह्यो यही तब
 पतिहै याकूं वेग बढ़ाय । जौलैं बडो होय तौलें यह असुरन मतिहि देखाय ॥ ६९५ ॥ सेवा कीनी
 बडेभये जब समरथ विपुल उदार । महाबली बलराम कृष्ण सुत कीन्हों असुर सँहार ॥ ६९६ ॥ मारि
 असुरको आय द्वारका कृष्णचरण शिरनायो । भीतर गये नये रुक्मिणिको सबहिन कंठ लगायो ॥ ६९७ ॥
 बर अरु बधू आय जब जाने रुक्मिणि करत बधाई । रति अरु काम प्रकट तादिनते कवि मिलि
 कीरति गाई ॥ ६९८ ॥ याविधि केलि करत द्वारावति पूरण परमानंद । महिमा सिंधु कहाँलग
 वरणै सूर जु कवि मति मंद ॥ ६९९ ॥ पुनि अनिरुद्ध भेद नारदके चित्ररेखा हरि लीन्हों । चारवर्ष
 अरु चारमासलौं उपाको सुखदीन्हों ॥ ७०० ॥ तब हरि जाय संग हलधर लै सब यादव दल जोर । सबै
 भुजाकरि दूर असुरकी चार हाथ दियछोर ॥ ७०१ ॥ आयें रुद्र पक्ष करि ताको युद्ध करन
 हरिसाथ । छिनमें जीति बधूसुत लैकै आय द्वारकानाथ ॥ ७०२ ॥ पुनि यक दिवस सुधर्मा
 बैठे यादव सभा अपार । उग्रसेन वसुदेव सात्यकी अरु अक्रूर उदार ॥ ७०३ ॥ इतने मांझ
 दूत यक आयो सबहिन कहि समुझायो । वासुदेव नृप आज्ञा करके मोको वेगि
 पठायो ॥ ७०४ ॥ वासुदेव यह कहत वेदमें प्रगट ब्रह्म अवतार । सोतौ मैहीं प्रगट
 भयो भुव यहि विधि बढ्यो अपार ॥ ७०५ ॥ क्षणमें जाय तुरत हरि मारचो दीन्हों
 मुक्ति कृपाल । फेर द्वारका तुरत पधारे गरुडचढ़े गोपाल ॥ ७०६ ॥ एक दुष्टने बहुत
 कियो तप सो रीझे त्रिपुरार । तब शिवने उन कृत्या दीन्हों बाढो क्रोध अपार ॥ ७०७ ॥
 कृत्याचली जहां द्वारावति हरिजानी यह बात । आज्ञाकरी चक्रको माधव छिन कृत्याकर
 घात ॥ ७०८ ॥ काशीजाय जराय छिनकमें गये द्वारकाफेर । अति आनन्द परम सुखसों सब
 दिन बीतत रसटेर ॥ ७०९ ॥ पुनि कुरुक्षेत्र गये यादवामिलि कियो तीर्थ अस्नान । यज्ञ होम करि
 पितर देवता विप्रनको बहु दान ॥ ७१० ॥ सूरज ग्रहण नृपन बहु जान्यो आय जुरी सब भीर ।
 दर्शन भयो सबनको हरिको मिथ्यो ताप तनु पीर ॥ ७११ ॥ भीष्म द्रोण अरु कर्ण युधिष्ठिर
 भीमार्जुन सहदेव । कुंती नकुल और गान्धारी कृपी विदुर सहदेव ॥ ७१२ ॥ दुर्योधन सब भ्रात

संगलै धृतराष्ट्रहि लै आयो । नारद गौतम वाल्मीकि मुनि हरि दर्शन हित धायो ॥ ७१३ ॥
 भारद्वाज मरीचि अंगिरा अत्रेमुनी अनंत । पुलह पुलस्त्य अगस्त्य कश्यप पुनि अरु सनकादिक
 संत ॥ ७१४ ॥ हरिको दर्शन करि सुख पायो पूजा बहु विधि कीन्हि । अति आनंद भये
 तन मनमें सौंज बहुत विधि दीन्हि ॥ ७१५ ॥ ब्रजवासी सब सखा संगके यशुमति अरु
 ब्रजराज । दर्शनपाय बहुत सुख पायो सफल भये सबकाज ॥ ७१६ ॥ यशुमति मात उछंग
 लगाये बल मोहनको आय । बालभाव जिय में सुधि आई अस्तन चले चुचाय ॥ ७१७ ॥ गोपि-
 न देखि कान्हकी शोभा बहुतहि मन सुखपायो । सघन निकुंज सुरत संगम मिलि मोहन कंठ
 लगायो ॥ ७१८ ॥ रुक्मिणि कहत कमल लोचन सों राधा हमैं देखायो । जाकी नित्य प्रशंसा
 तुम करि हम सबहिनकु सुनायो ॥ ७१९ ॥ तब वृषभानुसुता पगधारी रानिन मंडल मांझ ।
 मनो सरस इन्दीवर फूले तामधि फूली सांझ ॥ ७२० ॥ देख तेज वृषभानुसुताको सबै भई
 छबि हीन । अति आनन्द मोद मन मान्यो हमहि कृतारथ कीन ॥ ७२१ ॥ तब हरि कह्यो मोहिं
 राधा बिन पल क्षण कछु न सोहाय । सुनो रुक्मिणी कथा घोषकी मोपै कहिय न जाय ॥ ७२२ ॥
 एक दिना वनमें इन मोको अपना सुधा पिवायो । ताके बल गिरि गोवर्द्धन लै अपने हाथ उठायो ॥
 ७२३ ॥ अरु काली धेनुक दावानल प्रकट पूतना आई । इनकी कृपा सकल विघ्ननों
 छिनमें दिये नशाई ॥ ७२४ ॥ भांति भांति करि मोहिं लड़ायों सघन कुंजमें जाय । ताकी कथा
 कहों कह तुमसे मोपै कहिय न जाय ॥ ७२५ ॥ रास केलि करि क्रीडा कीन्हि होरी खेल खिला
 यो । मटुकि छुडाय लियो दधि बरसत तउ कछु मन नहि आयो ॥ ७२६ ॥ रत्नजटित पर्यंक
 द्वारका पौढत हैं सुखधाम । तोहू इनको ध्यान करतही बीतत है सब याम ॥ ७२७ ॥ इन बिन
 मोहिं कछु नहि भावै नन्दरायकी आन । सुनो रुक्मिणी लोचनमें ए बसी रहैं मम प्राण ॥ ७२८ ॥
 जागत सोवत अरु वन डोलत भोजन करत विहार । ध्यान करत नखशिख इनहींको बसि द्वारका
 मँझार ॥ ७२९ ॥ तब मिलिरंग बहुत भांतिनसों कीन्हें विपुल विहार । ब्रजजन चले सकल
 गोकुलको दीन्हें दान अपार ॥ ७३० ॥ चले द्वारका यदुकुल सब मिलि भयो कुलाहल भार ।
 पहुँचे आय द्वारका सन्मुख घर घर मंगलचार ॥ ७३१ ॥ कियो विचार यज्ञको राजा राजसूय
 जियजानि । कृष्णचन्द्रकी वेगि बुलाओ संग सकल पटरानि ॥ ७३२ ॥ आये इंद्रप्रस्थ सब
 यदुकुल महा महोत्सव मान । जुरे भूप बहु सकल देशके हरिदर्शन जिय जान ॥ ७३३ ॥ चारों
 भ्रात चारि दिशि जीतो भारत कही बखान । ठौर ठौरके नृप सब आये लै उपहार प्रमान ॥ ७३४ ॥
 बडो यज्ञ राजसूय रचायो जुरे विप्र बहु भारी । महाभाग्य राजा जु युधिष्ठिर जहँ माधव अधि-
 कारी ॥ ७३५ ॥ सबहिन कह्यो प्रथम पूजा अब कहो कौनकी कीजै । सबमें बडो कौन भूपति
 है जाहि अर्चना दीजै ॥ ७३६ ॥ तब सहदेव कह्यो सबहिनसों सुनो नृपति मनलाय । पूजा योग
 प्रकट पुरुषोत्तम कृष्णचन्द्र यदुराय ॥ ७३७ ॥ सबहिन कह्यो साधु यह वाणी सुर मुनि मनुज
 सराई । एक शिशुपाल दुष्ट नृप कहिये सुनतहि उख्यो रिसाई ॥ ७३८ ॥ गोकुल नंद अहीर
 गोप गृह पय पियके यह जीयो । दधि जु चुराय खाय वृन्दावन चरित विषम बहु कीयो ॥ ७३९ ॥
 मातुल मारि बहुत अघकीन्हें कहाँलों करों बडाई । वृन्दावन गोवर्धन कुंजन लूटी नारि पराई ॥
 ७४० ॥ वन वन गाय चरावत डोलत कांध कमरिया राजे । लकुटी हाथ गरे गुँजमाला अधर
 मुरलिका बाजै ॥ ७४१ ॥ ऐसे ख्याल करे इन बहु विधि कहत जु आवे लाज । वेद विदित सुर

काज विगारे वहँकाये ब्रजराज ॥ ७४२ ॥ यज्ञ करत विप्रन मथुरामें यांचे भीख न दीन्हीं ।
 अर्पण कियो नहीं देवनको पहिले इन मति कीन्हीं ॥ ७४३ ॥ माखन चोर चोर गोपिनको दूध जु
 दधि लै खायो । यमुना न्हात गोपकन्यनको लै पट कदम चढायो ॥ ७४४ ॥ काली हरिकी आज्ञा
 को लै यमुनामांझ बसायो । ताहि निकालदियो क्षणहीमें नेक सकोच न आयो ॥ ७४५ ॥ यक
 घृतना पयपान करावन प्रेम सहित चलिआई । ताहि लगाय हृदय लपटानो प्राण जो लियो चुराई
 ॥ ७४६ ॥ जन्महोत इन मात तात को तबहीं बन्धन दीन्हीं । यादव जात भाज जित तितको
 अनत जाय सुख कीन्हीं ॥ ७४७ ॥ वेणु बजाय रास इन कीन्हीं मधुप गोपकी नारी । परनारीको
 दोष कछूचित इन नहिं कीन्ह विचारी ॥ ७४८ ॥ दूध दहीके भाजन चाटे नेकहु लाज न आई ।
 माखन चोरि फोरि मथनीको पीवत छाँछ पराई ॥ ७४९ ॥ छांक खाय जूठन ग्वालिनको कछु
 मनमें नहिं मान्यो । परदाराकें संग आय निशि कुब्जासों सुख मान्यों ॥ ७५० ॥ बहुत प्रीति करि
 गोपन जाने बहुविधि लाड लढायो । ताको यत्न कछु नहिं मान्यों मथुरामें चलि आयो ॥ ७५१ ॥
 जरासन्ध इन बहुत बारही करि संग्राम पलायो । हमरे डर कर दोऊभाई नगर समुद्र बसायो ॥
 ७५२ ॥ कालयवनके आगे भाज्यो जाय गुफागहि लीन्हीं । लातमारि मुचुकुन्द जगायो नेकु दया
 नहिं कीन्हीं ॥ ७५३ ॥ बातें बहुत याहिकी लंपट सभा मांझ नहिं कहिये । जियमें समुझ आपने सन्मुख
 मुखते चुपकरि रहिये ॥ ७५४ ॥ अतिशयक्रोध भये पांडवसुत और नृपति हरिदास । राखे बरज
 सबनको माधव नेक न भये उदास ॥ ७५५ ॥ अतिहीभई अवज्ञा जानी चक्र सुदर्शन मान्यो ।
 करि निज भाव एक कुशतनमें क्षणक दुष्ट शिरभान्यो ॥ ७५६ ॥ परम कृपालु दयालु देवकी
 नन्दन पावननाम । दीन्हीं मुक्त दयाकरिके तब दियो लोक निजधाम ॥ ७५७ ॥ जयजयकार
 भयो वसुधापर राज युधिष्ठिर हरपे । अमृतस्नान कराय वेद विधि कनक कुसुम शिर वरपे ॥ ७५८ ॥
 दीन्हीं सभा बनाय पांडुकी मय मायागत अंत । ताको देख भ्रमे दुर्योधन महा मोह मतिमंत ॥ ७५९ ॥
 जलमें थलमति थलमें जलमति भई नृपतिको जान । अन्ध पुत्र लखि हैसे पवनसुत सुन जियमें
 रिसमान ॥ ७६० ॥ गयो भवन अकुलाय बहुत जिय क्रोधवंत अभिमानी । ताही दिनते पांडु
 पुत्रसों वैर विषम गति ठानी ॥ ७६१ ॥ सभा रची चौपर क्रीडा करि कपट कियो अति भारी ।
 जीत युधिष्ठिर भई सब जानी तउ मनमें अधिकारी ॥ ७६२ ॥ युवती धरी जान दुष्टन ने
 जव द्रौपदी बुलाई । हरिको सुमिरन करत पंथमें दुश्शासन गहिलाई ॥ ७६३ ॥ अहोनाथ
 ब्रजनाथ नाथनिज यदुकुलके निज नाथ । गोकुलनाथ नाथ सब जनके मो पति तुम्हरे हाथ ॥
 ७६४ ॥ ज्यों गजराज बचायो जलमें नेक विलंब न कीन्हीं । अपनो भक्त वचावन कारण विष
 अमृत करि दीन्हीं ॥ ७६५ ॥ शबरी गीध और पशु पक्षी सबकी रक्षा कीनी । अब तो सहाय
 करो तुम मेरी हैं पांवर मतिहीनी ॥ ७६६ ॥ चौपर खेलत भवन आपने हरि द्वारका मंझार ।
 पासे डार परम आतुर सों कीन्हें अनत उचार ॥ ७६७ ॥ चीर बढाय दियो बहु तेहिक्षण ऐंचत
 पार न पायो । भीष्म द्रोण अरु कर्ण युधिष्ठिर सब विस्मय मन लायो ॥ ७६८ ॥ रहेउ दुष्ट पाचि
 हार दुश्शासन कछु न कला चलाई । बैठो आय सभामें पाछे बार बार पछिताई ॥ ७६९ ॥ फिर
 द्रौपदी भवनमें आई श्रीहरि लज्जा राखी । वेद पुराण तन्त्र भारतमें कही बहुत विधि भाखी ॥
 ७७० ॥ पुनि वनवास दियो पांडवसुत हरि द्वारकामें जानी । अक्षय पात्र दिवायो रविपै बडे
 भक्त सुखदानी ॥ ७७१ ॥ दुर्वासा शापनको आये तिनकी कछु न चलाई । अक्षय कियो कमल

दल लोचन भक्तन भये सहाई ॥ ७७२ ॥ पांडव कुलके सहाय भये हरि जहँ तहँ संगहि डोले ।
 दुर्योधन सों कह्यो दूत है भक्त पक्ष दृढ़ बोले ॥ ७७३ ॥ पांच गांव पाण्डवको दीजै सुनों नृपति
 मम बात । और राज सब तुमही करिये निपट जगत विख्यात ॥ ७७४ ॥ प्राची और प्रतीचि
 उदीची और अवाची मान । इन्द्रप्रस्थ बीचमें दीजै और राज तुव जान ॥ ७७५ ॥ सुनिकै क्रोध
 भयो दुर्योधन सब पाण्डवको राज । तुमरो कुल सब नाश होयगो कहि जो चले ब्रजराज ॥ ७७६ ॥
 बहुत दुःख दीन्हों पाण्डवको अबलों में सहि लीन्हों । लाख भवन बैठार दुष्टने भोजनमें विष
 दीन्हों ॥ ७७७ ॥ वन वन फिरे अर्क तूलन ज्यों वास विराटहि कीन्हों । अन्तहि गुप्त रहे ता पुरमें भेद
 काहु नहिं दीन्हों ॥ ७७८ ॥ जुरे नृपति अक्षौन अठारह भयो युद्ध अतिभारी । रथ हांकत गोविंद अर्जुन
 को दीन्ह शस्त्र सब डारी ॥ ७७९ ॥ करी प्रतिज्ञा कहेउ भीष्म मुख पुनि पुनि देव मनाऊं जो तुम्हरे कर
 शर न गहाऊं गंगासुत न कहाऊं ॥ ७८० ॥ चढे प्रबल दल दोउ ओरके बिच अर्जुन रथ ठाढो । इत
 पारथ गांगेय बली उत जुरो युद्ध अति गाढो ॥ ७८१ ॥ दशदिन लरे बली गंगासुत श्याम प्रतिज्ञा
 जानी । सत्य वचन हरि कियो भक्तको निगम झूठकर बानी ॥ ७८२ ॥ धरि रथ चक्र श्याम निज
 करमें जबहि भीष्म पर डारो । शीतल भई चक्रकी ब्याला जब शिर तिलक निहारो ॥ ७८३ ॥
 धन्य धन्य कहि परे आय पग गुणनिधान गांगेव । तब हरि कहेउ विपुल बल तुम्हरो जीति
 लिये सब देव ॥ ७८४ ॥ तब उन कहेउ चरण आपनमें राख्यो निशिं दिन ध्यान । मोरि प्रतिज्ञा
 तुम राखी है भेटि वेदकी कान ॥ ७८५ ॥ डार शस्त्र शर शय्या सोये हरि चरणन चित लायो ।
 उत्तर दिशि रवि जान देह तजि वहां परमपद पायो ॥ ७८६ ॥ नृपति युधिष्ठिर राजतिलक
 दै मारि दुष्ट की भीर । द्रोण कर्ण अरु शल्य सुक्तकरि मेटी जगकी पीर ॥ ७८७ ॥ गोविंद आय
 द्वारका निज गृह अति आनन्द बढ़ायो । घर घर मंगल महा कुलाहल यदुकुल होत बढायो ॥
 ७८८ ॥ शल्य नृपति तपकिय पंचानन तापै यह वर पायो । दियो बनाय नगर गोपुरमें काहु न-
 जात लिवायो ॥ ७८९ ॥ आय द्वारका शोर कियो उन हरि हस्तिनापुर जाने । प्रद्युम्न लरे सप्त
 दश दोदिन रंचहार नहिं माने ॥ ७९० ॥ हरि अपसगुन जानि हस्तिनपुर बैठ तुरत रथ धाये ।
 बहुत देशको पावन करि करि सांझद्वारका आये ॥ ७९१ ॥ कीन्हों युद्ध आय शालवसों उन बहु
 माया कीन्हों । जलमें थल थलमें जल देख्यो श्याम दूरकर दीन्हों ॥ ७९२ ॥ माया दूर करी नैद-
 नन्दन चक्र दियो शिरडार । क्षणहीं मांझ दुष्टसंहारो भुवको भार उतार ॥ ७९३ ॥ जय जयकार
 करत देवांगन बरखत कुसुम अपार । कियो प्रवेश द्वारका मोहन घर घर मंगलचार ॥ ७९४ ॥
 राजसूय करवाय श्यामघन जरासंध मरवायो । दन्तवक्र महिपाल महाबल विदुरथ प्राण नशायो ॥
 ७९५ ॥ बालक मृतक देवकी मांगे सो छिनमें हरिलाये । दीन्हों दरश भक्त नृपबालिको तनुके
 ताप नशाये ॥ ७९६ ॥ बालक आय देवकी जाने अस्तन पान कराये । हरिको शेषपान करिके
 वे हरिके पद पहुँचाये ॥ ७९७ ॥ एकदिना यदुनाथ संग सब विप्र मण्डली लीन्हें । मिथिला चले
 जनक राजा पै दरश कृपाकरि दीन्हें ॥ ७९८ ॥ तहां वसत श्रुतदेव महामुनि सुनि दर्शनको
 धायो । तब उन कहेउ चलौ मेरे गृह हरि स्वीकार करायो ॥ ७९९ ॥ नृपति कहाउ मेरे गृह
 चलिथे करो कृतारथ मोय । ताहूके हरि आपु पधारे प्रकट धरे वपु दोय ॥ ८०० ॥ देख
 चरित्र विनोद लालके विस्मित भे द्विजराय । अद्भुत केलि कृपाकरि कीन्हों द्विजको ज्ञान
 ददाय ॥ ८०१ ॥ बहुत दिवसलों कृपाकरी हरि जनकराय सुख दीन्हों । बहुरि पधारे पुरी

द्वारका यदुकुलमें सुख कीन्हों ॥ ८०२ ॥ बहिन सुभद्रा व्याह विचारो हरि अर्जुन चित
 धारो । श्रीबलदेव कहाउ दुर्योधन नीको दुलह विचारो ॥ ८०३ ॥ हरिको भेद पायकै
 अर्जुन धरि दंडीको रूप । भिक्षाको निजभवन बुलायो श्रीबलभद्र अनूप ॥ ८०४ ॥ नयनन
 मिलत लई कर गहिकै फाल्गुन चले पराय । सुनि बलदेव क्रोध अति बाढ्यउ कृष्ण शान्त
 कियो आय ॥ ८०५ ॥ फेर बुलाय व्याह करि दीन्हों विजय बहुत सुखपायो । फिर आये
 हस्तिनपुर पारथ मधवा प्रस्थ वसायो ॥ ८०६ ॥ एकदिना यक विप्र भक्तमति हरिको सखा
 कहावे । अतिदारिद्र दुखित जब जाने तब पत्नी समुझावे ॥ ८०७ ॥ जाहु नाह तुम पुरी
 द्वारका कृष्णचन्द्रके पास । जिनके दरश परस करुणाते दुख दरिद्रको नास ॥ ८०८ ॥
 तंदुल मांग दौंचिके लाई सो दीन्हों उपहार । फाटेवसन बांधिकै द्विजवर अति दुर्बल तन
 हार ॥ ८०९ ॥ आये देव द्वारका हरिपै जाय चरण शिरनायो । हरि भेंटे भ्राताकी नाई
 पूजा विविध करायो ॥ ८१० ॥ अपने सुनि आसन बैठारे हँसि हँसि बृद्धत बात । कहो
 विप्र हम गये वन्तिका गुरुके सदन विख्यात ॥ ८११ ॥ वनमें वह वर्षा जब आई ताको सुधि
 करलेहों । गुरुआये आपुनको बोलन मंत्र थकायो मेहों ॥ ८१२ ॥ तादिनकी यह कथा
 तुम्हारी विसरत नाहिंन मोहिं । कीधौं कौन कार्यको आये सो पूछत हौं तोहिं ॥ ८१३ ॥
 कछु हमको उपहार पठायो भाभी तुम्हरे साथ । फाटे वसन सकुच अति लागत काढत नाहिंन
 हाथ ॥ ८१४ ॥ हरि अपने कर छोरि वसनको तंदुल लीन्हें हाथ । मुट्ठी एक प्रथम जब
 लीन्हें खान लगे यदुनाथ ॥ ८१५ ॥ द्वितीय मुष्टिका लेनलगे जब कमला गहि लियो हात ।
 दियो द्विजहि मधवाको वैभव बाढ्यो यश विख्यात ॥ ८१६ ॥ भोर भये उठि चले भवनको
 हरि कछु इन्हि न दीन्हों । ताको हर्ष शोक निज मनमें सुनिवर कछु न कीन्हों ॥ ८१७ ॥
 भली भई हरि दरशन पायो तनुको ताप नशायो । दुर्बल विप्र कुचील सुदामा ताको कंठ लगायो ॥
 ८१८ ॥ धन्य धन्य प्रभुकी प्रभुताई मोपै वरणि न जाई । शेष सहसमुख पार न पावत
 निगम नेति कहि गई ॥ ८१९ ॥ ऐसे कहत गये अपनेपुर सबहिं विलक्षण देख्यो । मणिमय महल
 फाटिक गोपुर लखि कनकभूमि अव रेख्यो ॥ ८२० ॥ पत्नी मिली परमसुख पायो कृष्णचन्द्र
 आराधे । मधवाको सुख भयो सुदामाहिं तऊ कछुक नहिं बाधे ॥ ८२१ ॥ नौलख धेनु दई
 राजानुग बहुतहिं दान देवायो ॥ कृष्णभक्तिविन विप्र शापते गिरगिटकी गति पायो ॥ ८२२ ॥
 ताको चरण परशिकै माधव दुःखित शाप छुटायो । कृपाकरी यदुनाथ महानिधि जिन वैकुंठ
 पठायो ॥ ८२३ ॥ बलदाऊ ब्रजमंडल आये ब्रजवासिनको भेंटे । बहुत दिननके विरहताप दुख
 मिलत क्षणकमें भेंटे ॥ ८२४ ॥ सघन निकुंज सुभग वृन्दावन कीन्हें विविध विहार । गोपिन
 संग रासरस खेले बाढ्यो श्रम सुकुमार ॥ ८२५ ॥ कालिन्दीको निकट बुलायो जलक्रीडाके
 काज । लियो आकरपि एक क्षणमें हरि अति समरथ यदुराज ॥ ८२६ ॥ विविध भांति क्रीडा
 हरि कीन्हों ब्रजवासिन सुख दीन्हों । द्वादश वन अवलोक मधुपुरी तीरथको चित कीन्हों ॥ ८२७ ॥
 शुभ कुरुक्षेत्र अयोध्या मिथिला प्राग त्रिवेनी न्हाये । पुनि शतरुद्र और चन्द्रभागा गंगाव्यास
 न्हाये ॥ ८२८ ॥ निमिपारन आये बलजू अव सकल विप्र शिरनायो । करी अवज्ञा कथा कहत
 द्विज अपने लोक पठायो ॥ ८२९ ॥ तब द्विज कहेउ कथा कहिके यह हमको सुख उपजायो ।
 हम कापै अव कथा सुनैगे बलदाऊ समझायो ॥ ८३० ॥ इनको पुत्र होय जो बालक ताको वेग

बिठावो । धरेउ हाथ शिर दीन्हीं विद्या नित प्रति कथा सुनावो ॥ ७३१ ॥ पुनि द्विज विनती
 करि यह भाष्यो असुर एक इहँ आवे । यज्ञ करतमें जानपरत वह आय रुधिर वर्षावे ॥ ८३२ ॥
 यह सुनिके बलदेव गुसाई हल मूसल लियो हाथ । लियो पकर हल नभ मण्डलते करमूशल
 सों घात ॥ ८३३ ॥ जयजयकार भयो सुरलोकन देव दुंदुभीबाजै । अस्तुति करत बहुतपूजा द्विज
 अति आनंद समाजै ॥ ८३४ ॥ विनती करी बहुत विप्रनने राम विप्र तुम मारेउ । तीरथ न्हाय
 शुद्ध तनको करि हरिद्विज वचन विचारेउ ॥ ८३५ ॥ वर्ष दिवसमें अरसठ तीरथ न्हाय करत
 घरआये । आय प्रभासु विप्र बहुजनको बहुतहि दान देवाये ॥ ८३६ ॥ पुन मिथिला यक दिवस
 पधारे हरि बलदेव गोसाई । गदा युद्ध दुर्योधन सिखयो नानाभेद बताई ॥ ८३७ ॥ पुनि द्वारका
 पधारे निजपुर अतिआनंद सुखबाढ्यो । प्रगट ब्रह्म नित वसत द्वारका कलह भूमिको काढ्यो ॥
 ॥ ८३८ ॥ दश दश पुत्र एक यक कन्या हरि सबके उपजाई । सुतके सुत नाती पतिनीकी महिमा
 कहिय न जाई ॥ ८३९ ॥ बडे बली प्रद्युम्न कहावत कृष्ण अंश अवतार । तिन सब जगजीत्यो
 तिहुँ लोकन बाढ्यो सुयश अपार ॥ ७४० ॥ अश्वमेध करवाय युधिष्ठिर कुलको दोष मिटायो ।
 करि दिग्विजय विजयको जगमें भक्त पक्ष करबायो ॥ ८४१ ॥ नानाविधि कीन्हीं हरि क्रीडा
 यदुकुल शाप दिवायो । जो ज्यहि लोक छोंडिके आयो ताको तहँ पहुँचायो ॥ ८४२ ॥ ऊधोको
 कहि ज्ञान आपनो निगमन तत्त्व बतायो । कही कथा दत्तात्रय सुनिकी गुरु चौबीश करायो ॥
 ॥ ८४३ ॥ कहि आचार भक्त विधभाषी हंसधर्म प्रकटायो । कही विभूति सिद्ध साधनता आश्रम
 चार कहायो ॥ ८४४ ॥ सांख्यतत्त्व गीताहरि कीन्हीं गुणके भेद करायो । ऐलगीत पुनि भिक्षुगीत
 कहि पूजा विधि दर्शायो ॥ ८४५ ॥ सदा वसत हरि पुरी द्वारका बहु विधि भोग विलासी ।
 आदि अनन्त अधट्ट अनुपम हैं अविगति अविनाशी ॥ ८४६ ॥ एकदिना यकविप्र द्वारका
 वसत सुखद निजधाम । वेदरूप तपरूप महामुनि कृष्ण विप्र यह नाम ॥ ८४७ ॥ बालक दश
 जु भये वाके जब भूमा लिये मैगाय । चितमें यह अनुरक्त विचारत हरि दर्शनकी चाय ॥ ८४८ ॥
 दश सुत भयो जानके ब्राह्मण करि पुकार हरिपास । तब हरि कहेउ देवकी गति यह करत काल
 जग नास ॥ ८४९ ॥ तब अर्जुन यह कहेउ मत्त ह्वै नृप नार्हिन भुवभार । मैं अर्जुन गांडिवधनु
 जाको काल लरों क्षणमार ॥ ८५० ॥ जब सुत भयो कहेउ ब्राह्मणते अर्जुन गये गृहताह । शर
 पंजर रोप्यो चहुँ दिशिते जहां पवन नहि जाह ॥ ८५१ ॥ तब सुत गयो देहको लैकै दर्शन भयो
 न ताय । अतिही क्रोध भयो ब्राह्मणको बहुत बक्यो बिलखाय ॥ ८५२ ॥ तब अर्जुन दूँढनको
 निकसे तीनलोक फिर आयो । कहूं न पायो सुत ब्राह्मणके तब मनमें अकुलायो ॥ ८५३ ॥
 कियो विचार प्रवेश अग्निको हरि आये समुझायो । लै निज संग चले पश्चिमको लोकालोक
 सोहायो ॥ ८५४ ॥ कनकभूमि अरु धामदेनको देखे परम सुहायो । बहुत निविड तम देख चक्र
 धरि धरेउ हाथ समुझायो ॥ ८५५ ॥ महाकालपुर तुरत पधारे हरिभूमाके पास । तुल्य अग्नि बर
 अग्नि समानी भूमा तेज प्रकाश ॥ ८५६ ॥ कृष्ण तेजको देख सकल सुर तन मन भयो हुलास ।
 अतिहीमन्द तेज भूमाको हरिके तेज प्रकाश ॥ ८५७ ॥ अतिआनन्द परस्पर बाढ्यो जब उन विनती
 कीन्हीं । भलीभई भुवभार उतारेउ मेरी फिर सुधि लीन्हीं ॥ ८५८ ॥ लै दशपुत्र द्वारका आये
 दीन्हें विप्र बुलाय । कीन्हों दुःख दूरि अर्जुनको महिमा प्रकट दिखाय ॥ ८५९ ॥ कीन्हीं केलि
 बहुत बल मोहन भुवको भार उतारेउ । प्रकट ब्रह्मराजत द्वारावति वेद पुराण विचारेउ ॥ ८६० ॥

एक दिना रुक्मिणि सों माधव करत बात सुखदाई । सुनु रुक्मिणि राधिका बिना मोहिं पल
 सम कल्प विहाई ॥ ८६१ ॥ कनकभूमि रचि खचित द्वारका कुंजनकी छबिनाहीं । गोवर्द्धन पर्वत
 के ऊपर बोलत मोर सुहाहीं ॥ ८६२ ॥ यमुनातीर भीर खग मृगकी मोहिं नितप्रति सुधि आवै ।
 वृन्दा विपिन राधिका मन्दिर नितप्रति लाडलडवै ॥ ८६३ ॥ राति दिवस रस खवत सुधामें
 कामधेनु दरशाई । लूट लूट दधिखात सखनसँग तैसो स्वाद न पाई ॥ ८६४ ॥ पटरस भोजन
 नानाविधिके करत महलके माहीं । छाकेखात ग्वालमंडलमें वैसो तो सुखनाहीं ॥ ८६५ ॥ जन्मभूमि
 देखनके कारण भेरो मन ललचावै।धौरी धेनु बुलावन कारण मधुरे वेनु बजावै ॥ ८६६ ॥ रास विलास
 विविध में कीन्हें संग राधिका लीन्हें । कीन्हें केलि विविध गोपिनसों सबहिनको सुख दीन्हें ॥
 ॥ ८६७ ॥ बल मोहन फिर ब्रजहि पधारे ऊधोको सँग लीने । दीन्हों बास चरणरज गोपिन गुल्मलता
 रस भीने ॥ ८६८ ॥ सदा विलास करत गोकुलमें धन धन यशुमति मात । ज्यों दीपकते दीपक कीन्हों
 भये द्वारकानाथ ॥ ८६९ ॥ नित प्रति मंगल रहत महरके नित प्रति बजत बधाई । नित प्रति मंगल
 कलश धरावत नित प्रति वेद पढ़ाई ॥ ८७० ॥ श्रीवृषभानु रायके आँगन नित प्रति बजत बधाई । नित
 प्रति मिल सुनि राजमण्डली मंगल घोष कराई ॥ ८७१ ॥ बाल केलि क्रीडत ब्रज आँगन यशुमतिको
 सुख दीन्हों । तरुण रूप धरि गोपिनके हित सबको चित हरि लीन्हों ॥ ८७२ ॥ चन्द्रावली गोपकी
 कन्या चन्द्रभाग गृहजाई । भई किशोर श्यामने देखी अद्भुत प्रीति बढ़ाई ॥ ८७३ ॥ तब ललिता
 पृच्छ्यो नीके कर केहि विधि श्याम मिलाई।अब न परत मोकू कल क्षणहूं जियमें अति अकुलाई ॥
 ॥ ८७४ ॥ तब उन कहेउ शीश गोरसले बेचनके मिस आओ । गोवर्द्धन पर गोबिंद खेलत निरख
 परम सुख पाओ ॥ ८७५ ॥ करि शृंगार चली चन्द्रावलि नख शिख भूषण साजै । ज्यों करनी
 गजराज विलोकत डूँढतहै अतिगाजै ॥ ८७६ ॥ गोवर्द्धनके शिखर चारुपर सखा वृन्द सँग लीन्हें ।
 गोपिन देख टेर हरि कीन्हों दान लेन मन कीन्हें ॥ ८७७ ॥ राखो घेरि सकल युवतिनको सखा
 वृन्दसों भाख्यो । आपु जाय पकरयो कोमल कर दधि अमृत रस चारख्यो ॥ ८७८ ॥ देहो दधि
 को दान नागरी गहर न लायो चित । तुमरे काज नित्य हम ठाढ़े अरपे अपनो वित्त ॥ ८७९ ॥
 वृन्दावनमें धेनु चरावत मांगत गोरस दान । नाना खेल सखनसँग खेलत तुम पायो नृपयान
 ॥ ८८० ॥ अरी ग्वालि मह मत्त वचनकी बोलत वचन विचार।अचलराज गोवर्द्धन भेरो वृन्दावन
 मंझार ॥ ८८१ ॥ जो तुम राजा आप कहावत वृन्दावनकी ठौर । लूट लूट दधिखात सबनको सब
 चोरनके मोर ॥ ८८२ ॥ चोरी करत भक्तके चितकी अरु दधि अरु नवनीत । सखा वृन्द सब
 मीत हमारे बडीराज रजनीत ॥ ८८३ ॥ जो तुम राजनीत सब जानत बहुत बनावत बात । जब
 तुम जन्म लियो मथुरामें आये आधीरात ॥ ८८४ ॥ सुनरी ग्वालि गँवार बातकी बोलत बिना
 विचार । कमल कोषमें वसत मधुप ज्यों त्यों भुव रहे मुरार ॥ ८८५ ॥ दूध दहीके नात बनावत
 बातें बहुत गोपाल । गढि गढि छोलत कहा रावरे लूटतहौ ब्रजवाल ॥ ८८६ ॥ जो प्रभु देहधरे
 नहिं भुवपर दीन अधम को तारे ॥ बढे असुर पुहुमी पर खल अति तिन्हें तुरतको मारे ॥ ८८७ ॥
 योग युक्तकर ध्यान लगावत योगसिद्ध कर ज्ञान । नेति नेति करि निगम बतावत ताहि होत निर-
 मान ॥ ८८८ ॥ योगसांख्य अरु ज्ञान भामिनी माया हृदय विनास । प्रेम भक्त मेरो यश गावे तेहि
 घट मेरो बास ॥ ८८९ ॥ सुखऊपर कह कहों लायके अन उत्तरको खोर । जब यशुमतिने ऊखल
 बाँधे हमही दीन्हें छोर ॥ ८९० ॥ बालक निपट अयान ग्वालिनी कछु सुधि जानि न जाय । लेकर

चीर कदमपर बैक्यो सबहिन हाहाखाय ॥ ८९१ ॥ बहुत भयेहौं ठीठ साँवरे सुखपर गारीदेत ।
 तुम्हरे डर हम डरपत नाहिंन कहा कँपावत बेत ॥ ८९२ ॥ श्याम सखनसों कहेउ टेरेदे घेरो सब
 अब जाय । बहुत ठीठ यह भई ग्वालिनी मडुकी लेहु छिडाय ॥ ८९३ ॥ जाय श्याम कंकणकर
 लीनो गहि हारावलि तोर । लूट लूट दधि खात साँवरो जहां सांकरी खोर ॥ ८९४ ॥ इन्द्रा
 वृन्दा और राधिका चन्द्रावलि सुकुमारि । विमल विमल दधि खात सबनको करत बहुत
 मनुहारि ॥ ८९५ ॥ गहि बहियां ले चले श्याम घन सघन कुंजके द्वार । पहिले
 सखी सबै रचिराखी कुसुमन सेज सँवार ॥ ८९६ ॥ नाना केलि सखिन सँग बिहरत
 नागर नंदकुमार । आलिंगन चुम्बन परिरंभन भेटत भरि अँकवार ॥ ८९७ ॥ श्रम
 जल बिंदु इन्दु आनन पर राजत अति सुकुमार ॥ मानो विविध भाव मिल बिलसत मगन
 सिंधुरससार ॥ ८९८ ॥ कंजरंघ्र अवलोकि सहचरी अपनो तन मन वारे । निरख निरख दंपति
 नेत्रन सुख तोर तोर तनडारे ॥ ८९९ ॥ यह अवलोकि देव गंधर्व मुनि बरसत कुसुम अपार ।
 जयजय करत बार नीराजन बोलत जय जयकार ॥ ९०० ॥ गोवर्द्धनकी सघन कंदरा कीनों
 रैनि निवास । भोर भये निजधाम चले दोउ अतिआनन्द बिलास ॥ ९०१ ॥ नन्दधामहरि
 बहुरि पधारे पौढरहे निज शैन । यशुमतिमात जगावत भोरहिं जागे अम्बुज नैन ॥ ९०२ ॥
 करी मुखारी और कलेऊ कीनो जल असनान । करि शृंगार चले दोउ भइया खेलनको सुखदान ॥
 ॥ ९०३ ॥ कहूँ खेलत मिल ग्वाल मंडली आँख मीचली खेल । चढ़ा चढ़ीको खेल सखनमें खेलत हैं
 रसरेल ॥ ९०४ ॥ कहूँ आमरू डार विटपकी खेलत सखन मँझार । कूद कूद धरणी सब धावत
 दाँवदेत किलकार ॥ ९०५ ॥ भोजन समय जान यशुमतिने लीने दुहुँन बुलाय ॥ बैठ आय
 यशुमति कि गोदमें आनंद उर न समाय ॥ ९०६ ॥ बहुविधिके पकवान बनाये परसत यशुमति
 माय । आरोगित बलमोहन दोऊ सुख देखत ब्रजराय ॥ ९०७ ॥ कबहुँ कवर खात मिरचनकी
 लागी दशन टकोर । भाज चले तब गहे रोहिणी लाई बहुत निहोर ॥ ९०८ ॥ भोजन करि नाना
 विधि दोऊ लीनों मठा सलोनों । अँचवन करि ब्रजराज पधारे बल मोहन सुख मानो ॥ ९०९ ॥
 ॥ ९१० ॥ राधासों मिलि अतिसुख उपज्यो उन पूछी इक बात । कहो जु आज रैन कहे सोये
 हम देखे तुम जात ॥ ९११ ॥ तब हरि कहेउ सुनो मृगनैनी गाय गई एक दौर । ताको लेन गयो
 गोवर्धन सोय रहेउ तेहि ठौर ॥ ९१२ ॥ कंद मूल फल दीने गोधन सो निशिको मैं खायो । भोर
 भये उठि तेरे आयो चरण कमल परसायो ॥ ९१३ ॥ निज प्रतिबिंब विलोकि राधिका हरिनख
 मंडलमाहँ । द्वितियरूप देखे अबलाको मान बढ्यो तनछाहँ ॥ ९१४ ॥ चली रिसाय कुंज मृग-
 नयनी जहँ अति करत गुंजार । बैठी जाय एकांत भवनमें जहां मानगृह चार ॥ ९१५ ॥ नन्द
 कुँवर विरहन राधाके विरह भये भरिपूर । बैठे जाय एकांत कुंजमें सखा कियो सब दूर ॥ ९१६ ॥
 ललिता बोल कही मृदुवाणी कृष्ण विमल दलनैन । बिन राधा मोहिं कल न परत है कहत मधुर
 मृदु बैन ॥ ९१७ ॥ बेगजाय परि पायँ राधिका बिनती करो सुनाय । दरशन देव सकल दुख
 मेटो तुम बिन रहेउ न जाय ॥ ९१८ ॥ तुम बिन खान पान नहिं भावत गोचारन शृंगार । रैन नींद
 नहिं परत निरंतर संभाषण व्यवहार ॥ ९१९ ॥ करि दंडवत चली ललिता जो गई राधिका गेह ।
 पायँन पर पर बहुत विनय कर सफल करनको नेह ॥ ९२० ॥ बेगि चलो वृषभानुनन्दनी

बोले नन्दकुमार । तुम विन पल छिन कल न परत है भोजन सुख व्यवहार ॥ ९२१ ॥ नव
 निकुंजमें मिलो श्यामसों भेंटो भरि अँकवार । कुसुम सेजपर करो केलि प्रिय गिरिधर परम
 उदार ॥ ९२२ ॥ तो विन पियहि कछू नहिं भावे तोसों पिय आधीन । तो विन श्याम रहत हैं
 ऐसे जैसे जल विन मीन ॥ ९२३ ॥ कहा सुभाव परचो सखि तेरो यह बिनवतहों तोह । मान
 करत गिरिधर परचो मानत नाहिंन मोह ॥ ९२४ ॥ करि शृंगार सकल ब्रज सुन्दरि नीलाम्बर
 तनुसाज । रैन अँघेरी कछू न दीखन नूपुर ध्वनि जिन बाज ॥ ९२५ ॥ कुबलय दल कुसुमन
 शय्या रचि पंथ निहारत तोर । सपन जाग अरु शयन सुमृत तुव वचन सत्यहै मोर ॥ ९२६ ॥
 सित अरु पीत यूथिका वेनी गूँथो विविध बनाय । रचो भाल निज तिलक मनोहर अंजन नयन
 सोहाय ॥ ९२७ ॥ तू छवि सिंधु विहर ब्रजनायक क्षुद्र नदी नहिं भावै । जबते नाम सुन्यो
 श्रवणन तुव रैन नहिं आवै ॥ ९२८ ॥ हरि राधा राधारत जपत मंत्र दुरदाम । विरह विराग
 महायोगी ज्यों बीतत हैं सब याम ॥ ९२९ ॥ कबहुँक किसलयसेज सँवारत तेरेही हित लाल ।
 कबहुँक अपने हाथ सँवारत गूँथत कुसुमन माल ॥ ९३० ॥ तुव बिनवट सकेंत सदन वन देखत
 लगत उदास । विरह अग्नि चहुँ दिशिमें धावत फूले दिखत पलास ॥ ९३१ ॥ सारस हंस मोर
 पारावत बोलत अमृतवान । बैठरहे दुरसदन सवन वन ध्वनि नहिं सुनियत कान ॥ ९३२ ॥
 कालिन्दी तट विमल कदमतर करत वदन तुव ध्यान । सुहृदय सखा त्यागि मनमोहन करत
 मधुर तुव गान ॥ ९३३ ॥ गुंजत श्रवणन मधुप सुनत हैं तुव श्रुति की सुधि आवै । कंचन बरन
 जात तेरो वपु पीताम्बर पहिरावै ॥ ९३४ ॥ सुनत कोकिला शब्द मधुरध्वनि कमल नयन
 अकुलात । तेरे बोल करत सुधि जियमें विरह मगन है जात ॥ ९३५ ॥ तुव नासापुट गात सुक्त
 फल अघर बिंब उनमान । गुंजाफल सबके शिर धारत प्रकटी मीन प्रमान ॥ ९३६ ॥ सिंधु
 सुतासुत तारिपु गमनी सुन मेरी तू बात । कामपिता बाहन भखको तनु क्यों न धरत निज गात ॥
 ॥ ९३७ ॥ अलि बाहन पति बाहन रिपुकी तपतबढ़ी तनुभारी । शैल सुतासुत तासुत अँगना
 सो तैं सबै विसारी ॥ ९३८ ॥ भृंग यूथ चतुरानन तनया ब्रह्मनाद सुरसंग । जलसुत बाहनसों जन
 धारत विषम लगत विषअंग ॥ ९३९ ॥ चतुराननसुत तासुत वा सुत उदित होन अब आयो ।
 मन्मथ मात तात सुत अथयो सो तो वृथागँवायो ॥ ९४० ॥ पंकज उर पंकजजिन केरे तेरो अटल
 सुहाग । सुरपति बाहन तासुत शिरपर मांग भरो अनुराग ॥ ९४१ ॥ कमल पुत्र तासुत कर
 राजत सोहरि निज कर लीन्हें । सप्त स्वरन उपजाय बजावत रटन राधिका लीन्हें ॥ ९४२ ॥ सुत
 प्रह्लाद तासु सुत ता पित भ्राता वृथा गँवायो ॥ संज्ञा सुत वपु सदृश बसन तन सो तन लागत
 छायो ॥ ९४३ ॥ सारँग ऊपर सारँग राजत सारँग शब्द सुनावै । सारँग देख सुने मृदुनैनी सारँग
 सुख दरशावै ॥ ९४४ ॥ सारँग रिपुकी बदन ओटदै कह बैठी है मौन । ब्रह्म सुता सारँगके
 धोखे करत सकलब्रज गौन ॥ ९४५ ॥ सारँगसुता देखि सारँगको तेरो अटल सुहाग । सारँग
 पति ता पति ता बाहन कीरत रट अनुराग ॥ ९४६ ॥ दधिसुत बाहन सुभग नासिका दधि
 सुत बाहन देख्यो । दधिसुत बाहन वचन सुनन तुव अंग अंग अवरेख्यो ॥ ९४७ ॥ शशिको
 भ्रात कहत ता बाहन कुन्द कुसुम ललचात । खंजन सदृश देख तुव अँखियां तन मनमें अकु-
 लात ॥ ९४८ ॥ मारुत सुरपति रिपु ता पतनी ता सुत बाहन बात । श्रवण सुनत अकुलात
 साँवरो कछुक कही नहिं जात ॥ ९४९ ॥ चतुरानन सुत ता सुत पत्नी ता सुतको जो दास ।

ता सुत बाहन पुत्र अंगधरि जलसुत करों प्रकास ॥ ९५० ॥ श्रीबलदेव रास जो कहिये तामें भान
 मिलाय । ताकी सुता कहत चतुरानन निगम सदा गुणगाय ॥ ९५१ ॥ सिंधु सुता तव भाग्य
 विलोकत मनमें रही लजाय । काम पिता माता गुरु ता वपु युवति कोट दरशाय ॥ ९५२ ॥ सातों
 रासमेल द्वादशमें ऐसे बीतत याम । द्वितिय रासमें मिलत सप्तमी सो जानत निज धाम ॥ ९५३ ॥
 शैलसुता धरि ता रिपु बांधत अंग अंग पिय आज । कोटि यत्न कर सींचत तोऊ मित्त नहीं ब्रजराज
 ॥ ९५४ ॥ बायस अजा शब्द मन मोहन रटत रहत दिन रैन । तारापतिके रिपु पर ठाढे देखत हैं
 हरि नैन ॥ ९५५ ॥ गंगासुत रिपु रिपु शिप मेरी सुनत नहीं सखि काह । नारायण सुत ता सुत ता सुत
 लगत विषम विष ताह ॥ ९५६ ॥ जलसुत बाहन देख वदन तुव ब्रह्मसुता अकुलानी । मंगल मात
 तासु पति बाहन राजत सदृश भुलानी ॥ ९५७ ॥ दक्षप्रजापतिकी तनयापति ता सुत नारगई ।
 सिंधुसुता सुत बाहनकी गति देखत विषम भई ॥ ९५८ ॥ अग्नितात तेहि तात अंगना त्यों उनमें
 तू राखी । बंधु कुसुम हुम ता रिपुको पति सारंग रिपुकर भाखी ॥ ९५९ ॥ पति पाताल लग्न
 तनधारन सो सुख भुजा विचारी ॥ प्रथम मथत जलनिधि जो प्रकट्यो सो लागत सबनारी ॥ ९६० ॥
 बंधु कुमुद पति पिता सुता जो तुव यश मधुरेगीवि । ब्रह्मसुता सुत पदरज परसत सारंग सुता
 देखावै ॥ ९६१ ॥ इन्द्र सुतापति भुजा लगन लखि जलसुत हृदय लगावै । इन्द्रसुता तनया
 पति को सुत ताके गुनै न पावै ॥ ९६२ ॥ धरत कमलमें कमल कमल कर मधुर वचन उच्चार ।
 कमलाबाहन गहत कमलसों कमलन करत विचार ॥ ९६३ ॥ कालिन्दी पति नैन तासु सुत लागत हैं
 सबलोग । इन्द्र मात तेहि तात सो सरधत प्रकट देखियत भोग ॥ ९६४ ॥ अंबुज मात तात
 पति ता रिपु ता पति काम बिगारे । ताते सुन तू भाननन्दनी मेरो वचन विचारे ॥ ९६५ ॥
 तीस भान द्वै मास सकल ऋतु सिंधुसुता सन जान । भूपन अंग लसत गुंजावालि और न कछू
 समान ॥ ९६६ ॥ इति दृष्टकूट सूचनिका सम्पूर्ण ॥ कबहुँक सेज रचत बेंदी कर हृदय होम घृत
 नैन । विप्र भोज बालन तुव देखियत अंगकूस नहिं चैन ॥ ९६७ ॥ अब तू बेग विचार वचन मम
 सुन वृषभानुकुमारि । मिलहौ बेग कमलदल लोचन सुन मेरी मनुहारि ॥ ९६८ ॥ गौर वरण हैजात
 सांवरो ध्यान करत तुव अंग । पुनि ललिता हरिके ढिग आई बैठे सांवलरंग ॥ ९६९ ॥ बेग चलो
 तुम श्याम मनोहर आपुकाज महुँ काज । लेहु मनाय प्राणप्यारीको प्रकट्यो कुंज समाज ॥
 ॥ ९७० ॥ ऋतु वसंत अब आय देखियत फूले कुसुम सुरंग । मानो मदन बसंत मिले दोउ
 खेलत हैं रसरंग ॥ ९७१ ॥ बेगि चलो अब पिया मनावन नेक विलम्ब न लाओ । मेरी कही बात
 नहिं मानत ताको ज्ञान दृढाओ ॥ ९७२ ॥ परी पांय अपराध क्षमावत सुनत मिलेगी धाय । सुनत
 वचन दूतिका बदनमें श्याम चले अकुलाय ॥ ९७३ ॥ जहँ बैठी वृषभानुनंदनी तहँ आये धरि मौन ।
 परेपांय हरि चरण परसकरि छिन अपराध सलौन ॥ ९७४ ॥ सुनि हरि वचन विलोकत शोभा मान ग
 यो सब छूट । मिले धाय अकुलाय श्यामघन प्रेम काम रस लूट ॥ ९७५ ॥ रच्यो श्रृंगार श्याम अपने
 कर नख शिख प्रिया बनायो । शीशफूल बेनी नकबेसर तिलकभाल करवायो ॥ ९७६ ॥ युगताटक
 चिबुक दशनावलि कर कंकण उरमाल । नूपुर पद कटि छुद्रघंटिका सब श्रृंगार रसाल ॥ ९७७ ॥
 सकल श्रृंगार करत वर्णनको कृपा यथामति मोर । होत विलम्ब मिलनके कारण ताते वर्णत
 थोर ॥ ९७८ ॥ चले धाय नवकुंज दोउ मिलि किसलय सेज विराजे । परिरंभण सुख रास हास
 मृदु सुरत केलि सुख साजे ॥ ९७९ ॥ नाना बंध विविध रस क्रीडा खेलत श्याम अपार । रस रस

तत्त्व भेद नहिं जानत दंपति अंग सँभार ॥ ९८० ॥ सुरत सरुद्र मगन दंपति रस झेलत अति
 सुखझेल । निरवधि रमन अपरमित अच्युत मनुज माय बहु खेल ॥ ९८१ ॥ नृपुर संचित
 किंकिनीकी ध्वनि सुनत मधुर किलकार । मदन सिंधु मधुमत्त मधुपगन फूले करत गुंजार ॥ ९८२ ॥
 मधुप यूथ मिलि सबन चन्द्रमा तडित लिये आकास । खंजन मीन बजावत गावत निरतत सुख
 सुविलास ॥ ९८३ ॥ जलद समूह खसत उडुगण गण पै समुद्रके बीच । मकर कपोल बोल मृदु
 कोकिल अमृत सुधारस सींच ॥ ९८४ ॥ मोहन बेल शृंगार विटपसों उरझी आनंदवेल । कंचन
 बेल तमालहि लपटी रसिकरंग भरिरेल ॥ ९८५ ॥ युगल कमलसों मिलत कमल युग युगल
 कमल ले संग । पांच कमल मध्य युगल कमल लखि मनसा भई अपंग ॥ ९८६ ॥ किरण कदम्ब
 मंजुका पूरण सौरभ उडत अवेश । अगर धूप सौरभ नाशा सुख बरषत परम सुदेश ॥ ९८७ ॥
 कुंतद कुमुद बंधूक मिलत पुनि मीन देख ललचात । ता पर चन्द्र देख संज्ञासुत तनमें बहुत
 डेरात ॥ ९८८ ॥ वरना भख करमें अवलोकत केश पास कृतबन्द । अधर समुद्र
 सदल जो सहसा ध्वनि उपजत सुखफन्द ॥ ९८९ ॥ मुदित मराल मिलत मधुकर
 सों खंजन मिलत कुंग । कीर कीर रणधीर मिलत सम रत रस लहर तरंग ॥ ९९० ॥ सुरत समुद्र
 कहत दम्पतिके निरवधि रमन अपार । भयो शेष मनमूढ कहनको राधा कृष्ण विहार ॥ ९९१ ॥
 शोभा अमित अपार अखण्डित आप आतमाराम । पूरण ब्रह्म प्रकट पुरुषोत्तम सब विधि पूरण
 काम ॥ ९९२ ॥ आदि सनातन एक अनूपम अविगति अल्प अहार । अँकार अदि वेद असुर हन
 निर्गुण सगुण अपार ॥ ९९३ ॥ चतुरानन पञ्चानन अरु पुन षट्आनन सम जान । सहसानन
 बहु आनन गावत पार न पाय बखान ॥ ९९४ ॥ सघन कुंजमें अमित केल लख तनु सुगन्धकी रेल ।
 मधुकर निकट आय पीवत रस सुखद सदारस झेल ॥ ९९५ ॥ मलिन भये रसमान सरोवर मुनि-
 जन मानस हंस । थकित विलोकि शारदा वर्णन करिबे बहुत प्रशंस ॥ ९९६ ॥ वृंदावन निज धाम परम
 रुचि वर्णन कियो बढाय । व्यास पुराण सघन कुञ्जनमें जब सनकादिक आय ॥ ९९७ ॥ धीर समीर
 बहत त्यहि कानन बोलत मधुकर मोर । प्रीतम प्रियावदन अवलोकत उठि उठि मिलत चकोर ॥
 ॥ ९९८ ॥ अमित एक उपमा अवलोकत जियमें परत विचार । नहिं प्रवेश अज शिव गणेश
 पुनि कितक बात संसार ॥ ९९९ ॥ सहस रूप बहुरूप रूप पुनि एकरूप पुनि दोय । कुमुद कली
 विकसित अम्बुज मिलि मधुकर भागी सोय ॥ १००० ॥ नलिन पराग मेघ माधुरि सों मुकुलित अम्ब
 कदम्ब । मुनि मन मधुप सदा रस लोभित सेवत अज शिव अम्ब ॥ १००१ ॥ गुरु प्रसाद होत यह
 दरशन सरसठ बरष प्रवीन । शिव विधान तप करेउ बहुत दिन तऊ पार नहिं लीन ॥ १००२ ॥ सुख
 पर्य्यंक अंक ध्रुव देखियत कुसुम कन्द दुम छाये । मधुर मल्लिका कुसमित कुञ्जन दम्पति लगत
 सोहाये ॥ १००३ ॥ गोवर्द्धन गिरि रत्न सिंहासन दम्पति रस सुखमान । निबिड कुञ्ज जहँ
 कोउ न आवत रस विलसत सुखखान ॥ १००४ ॥ निशा भोर कबहूँ नहिं जानत प्रेम मत्त अनुराग ।
 ललितादिक सींचत सुखनैनन जुर सहचरि बडभाग ॥ १००५ ॥ यह निकुञ्जको वर्णन करिदे वेद
 रहे पचिहार । नेति नेति कर कहेउ सहस विधि तऊ न पायो पार ॥ १००६ ॥ दरशन दियो कृपा
 करि मोहन वेग दियो वरदान । आगम कल्पपरमण तुव है श्रीमुख कही बखान ॥ १००७ ॥ सो
 श्रुतिरूप होय ब्रजमण्डल कीनो रास विहार । नवल कुञ्जमें अंश बाहु धरि कीन्हीं केलि अपार ॥
 ॥ १००८ ॥ पुनि ऋषि रूप राम वर पायो हरिसे प्रीतम पाय । चरण प्रसाद राधिका देवी उन

हरिकंठ लगाय ॥ १००९ ॥ वृन्दावन गोवर्धन कुञ्जन यमुना पुलिन सुदेश । नित प्रति करत
 विहार मधुररस श्यामा श्याम सुवेश ॥ १०१० ॥ निरखि निरखि सुख दम्पतिको यह कविकुल
 सब पचिहारे । भूषण खसे सुरत वश दोऊ केशन आपु सँवारे ॥ १०११ ॥ ललिता ललित
 बजाय रिझावत मधुर बीन कर लीने । जान प्रभात राग पञ्चम षट मालकोस रसभीने ॥ १०१२ ॥
 सुर हिंडोल मेघ मालव पुनि सारंग सुर नट जान । सुर सांवत भूपाली ईमन करत कान्हरो गान ॥
 ॥ १०१३ ॥ उछ अडानेके सुर सुनियत निपट नायकी लीन । करत विहार मधुर केदारो सकल
 सुरन सुख दीन ॥ १०१४ ॥ सोरठ गौड मलार सोहावन भैरव ललित बजायो । मधुर बिभास
 सुनत बेलावल दम्पति अति सुख पायो ॥ १०१५ ॥ देवगिरी देशाक देव पुनि गौरी श्री सुखरास
 जैत श्री अरु पूर्वी टोडी आसावरि सुखरास ॥ १०१६ ॥ रामकली गुनकली केतकी सुर सुघराई
 गाये । जैजैवन्ती जगत मोहनी सुरसों बीन बजाये ॥ १०१७ ॥ सूआ सरस मिलत प्रीतम सुख
 सिन्धुवीर रसमान्यो । जान प्रभात प्रभाती गायो भोर भयो दोउ जान्यो ॥ १०१८ ॥ जागे प्रात
 निपट अलसाने भूषण सब उलटाने । करत शृंगार परस्पर दोऊ अति आलस शिथिलाने ॥
 ॥ १०१९ ॥ जालरंघ्र है सहचरि देखत जन्म सफल करि लेखे । जान प्रभात उछंगन दम्पति लेत
 प्राण रसपेखे ॥ १०२० ॥ औटचो दूध कपूर मिलायो लै ललिता तहँ आई । पहिले श्यामाको
 अँचवायो पाछे पिवत कन्हवाई ॥ १०२१ ॥ करि शृंगार सघन कुञ्जनमें निशि दिन करत विहार ।
 नीराजन बहुविधि वारतहँ ललितादिक ब्रजनार ॥ १०२२ ॥ कबहुँक केलि करत यमुना जल सुन्दर
 शरद तडाग । कबहुँक मधुर माधुरी झूलत आनँद अति अनुराग ॥ १०२३ ॥ प्रथम वसन्त पञ्चमी
 शुभदिन मंगलचार बधाये । पञ्चानन जारचो मन्मथसो प्रकट भयो फिरि आये ॥ १०२४ ॥ यशुमति
 मात बधाई बाँटत फूली अँग न समाई । उबटि न्हावाय श्यामसुन्दरको आभूषण पहिराई ॥ १०२५ ॥
 घर घरते आई ब्रज सुन्दरि मंगल साज सँवारे । हेम कलश शिर पर धरि पूरण काम मन्त्र उपचा-
 रे ॥ १०२६ ॥ अबिर गुलाल अरगजा सोधी लीन्हों सौज बनाय । मनमें किये मनोरथ बहु विधि
 मिलवत सब मनभाय ॥ १०२७ ॥ भीर जानि सिंह पौर त्रियनकी यशुमति भवन दुराई । ढूँढ
 सकल त्रिय दौर मातको पकर बाँह ले आई ॥ १०२८ ॥ केसर चन्दन और अरगजा शीश महर
 के नाये । जो जो विधि उपजी जाके जिय सोइ सोइ भाँति कराये ॥ १०२९ ॥ फगुआ दियो महर
 मन भायो यशुमति परम उदार । पकर लिये घनश्याम मनोहर भेंटे भरि अँकवार ॥ १०३० ॥
 पहिली जान बसंत पंचमी यशुमति बहुत खिलाये । केसर चोवा और अरगजा श्याम अँग लपटा
 ये ॥ १०३१ ॥ ता पाछे गोपिनने छिरके कनक कलश भरिडारे । मानो शीश तमाल अमृत
 घन सरस सुधा निधरारे ॥ १०३२ ॥ चन्दन चोवा मथत हाथ कर नील जलद तनु अरप्यो ।
 मानो प्रकट करी अपने चित पियको प्राण समरप्यो ॥ १०३३ ॥ किये मनोरथ नाना विधिके
 मेवा बहु विधि लाई । सो हरिने स्वीकार कियो सब निरखि परम सुखपाई ॥ १०३४ ॥ सुबल
 सुबाहु तोक श्रीदामा सकल सखा जुरि आये । रत्न चौकमें खेल मचायो सरस वसन्त बधाये
 ॥ १०३५ ॥ करत परस्पर गोप ग्वाल मिलि क्रीडा अति मन भाई । सुरंग अवीर गुलाल
 उडावत रह्यो गगन सब छाई ॥ १०३६ ॥ फगुआ देन कह्यो मनभायो सबै गोपिका फूली । कंठ
 लगाय चली प्रीतमको अपने गृह अनुकूली ॥ १०३७ ॥ करत आरती विविध भाँतिसों यशुमति
 परम सुहाई । सखावृन्द सब चले यमुन तट खेलत कुँवर कन्हवाई ॥ १०३८ ॥ बैठे जाय सघन

कुंजनमें यमुनातीर गोपाल । सखी एक तहँ आय निकटही बोली वचन रसाल ॥ १०३९ ॥
 वृन्दावन फूलो नैदनंदन सघन कुंज बहु भांत । हरि प्रतीत मुकुलित द्रुम पल्लव मुखरित मधु
 कर पात ॥ १०४० ॥ ठौर ठौर झिझी ध्वनि सुनियत मधुर मेघ गुंजार । मानो मन्मथ मिलि
 कुसुमाकर फूले करत विहार ॥ १०४१ ॥ अपनो सब गुण तुम्हैं दिखावन स्मर वसन्त मिलि
 आयो । मधुर माधुरी मुकुलित पल्लव लागत परमसुहायो ॥ १०४२ ॥ गोवर्द्धनके शिखर
 सुभगपर फूले कुसुम पलास । सहज सुरत सुख देत संयोगिन विरहिन करत उदास ॥ १०४३ ॥
 पुहुप पराग परस मधुकर गन मत्त करत गुंजार । मनो कामि जन देख युवति जन विषयासक्ति
 अपार ॥ १०४४ ॥ वीथिन विपिन विलोकि विविध मन मण्डित कुसुमित कुंज । मनहुँ हेम
 मंडपिका मुखरित कल्पलता रस पुंज ॥ १०४५ ॥ वेगचलो वृन्दावन नायक राधा मारग
 जोवत । हिल मिल खेलो मन्मथ क्रीडा क्यों वसंत दिन खोवत ॥ १०४६ ॥
 सुनत वचन ललिताके मोहन तुरत चले उठिधाय । कियो वसंत खेल वृन्दावन
 अद्भुत फागु मचाय ॥ १०४७ ॥ लता लता बन बन कुंजनमें खेलत फिरत वसन्त । मनहुँ
 कमल मण्डलमें मधुकर विहरतहँ रसमन्त ॥ १०४८ ॥ उत श्यामा इत सखा मण्डली उत हरि
 इत ब्रजनार । मनो तामरस पारस खेलत मिलि मधुकर गुंजार ॥ १०४९ ॥ खेल वसंत बहुत
 सुख मान्यो हर्षे गोपी ग्वाल । बिहँसि गये ब्रजराज भवन सब चञ्चल नैन विशाल ॥ १०५० ॥
 होरीडांडी दिवस जानके अति फूले ब्रजराज । बैठे सिंहद्वारपै आपुन जुरिकै गोप समाज ॥ १०५१ ॥
 विप्र बुलाय वेदविधि करिकै होरीडांडी रोप । आनन्दे सब गोप मण्डली मन्मथ कियो
 प्रकोप ॥ १०५२ ॥ परिवा प्रथम दिवस होरीको नन्दराय गृहआई । सकल सोंज गोपीकर लेके
 खेलनको मनभाई ॥ १०५३ ॥ दुइज दुहुँ दिशिते होरीमचि सुरँग गुलाल उढायो । मनो अनुराग
 दुहुँनके अन्तर सवहिन प्रकट करायो ॥ १०५४ ॥ तीज तरुणि मिलि पकरे मोहन गहिकर
 अञ्जन दीनो । मत्त मधुप बैठयो अम्बुज पर मुखरत है सुरभीनों ॥ १०५५ ॥ चम्पक लता
 चौधदिन जान्यो मृगमद शीर लगायो । मनहुँ नील जलधरके ऊपर कृष्णागर लपटायो ॥ १०५६ ॥
 पाँचै प्रमदा परमप्रीति सों केसर छिडकी घोर । मनहुँ सुधानिधि वर्षत घनपर अमृत धार
 चहुँओर ॥ १०५७ ॥ छठि छरागनी गाय रिझावत अति नागर बलवीर । खेलत फाग संग
 गोपिनके गोपवृन्दकी भीर ॥ १०५८ ॥ सातें रिजि सुगन्ध सब सुन्दरि लेआई उपहार । बल
 मोहनको हँसत खेलावत रीझ भरत अँकवार ॥ १०५९ ॥ आठें अति आतुर अबला प्रिय चुम्ब-
 न दीन्हों गाल । नाना विधि शृंगार बनाये वेदा दीन्हों भाल ॥ १०६० ॥ नवमी नौसत साजि
 राधिका चन्द्रावलि ब्रजनार । हो हो करत पलाश कुसुम रँग बर्षतहँ जो अपार ॥ १०६१ ॥
 दशमी दशौ दिशा भई पूरित सुरँग अबीर गुलाल । मनु प्रीतम मिलिवेके कारण फूले नयन
 विशाल ॥ १०६२ ॥ एकादशी एक सखि आई डारयो सुभग अबीर । एक हाथ पीताम्बर पक-
 रयो छिरकत कुमकुम नीर ॥ १०६३ ॥ द्वादशी मची दुहुँदिशि होरी इत गोपी उत ग्वाल ॥
 इत नायक बल मोहन दोऊ उत राधा नवलाल ॥ १०६४ ॥ तेरस तरुणी सब मिलके यह
 कीन्हों कछुक उपाय । तोक सुबल मधु मंगल बोल्यो सबहिन मतो सुनाय ॥ १०६५ ॥ चौद
 शि चहुँ दिशा सों मिलिके गठ जोरो गहि भोर । मनमोहन पिय दूलह राजत दुलहिन राधा
 गोर ॥ १०६६ ॥ देखि कुहुँ कुसुमाकर फूल्यो मधुप करत गुंजार । चन्द्रावलि केसर ले आई छि


रके नन्दकुमार ॥ १०६७ ॥ शुक्लपक्ष परिवा पुरुषोत्तम क्रीडा करत अपार । हलधर संग सखा
 सब लीन्हें डोलत गृह गृह द्वार ॥ १०६८ ॥ द्वैज दाम कुसुमनकी गूंथी अपने हाथ सँवार ।
 दई पठाय भानुतनयाको पहिरत घोषकुमार ॥ १०६९ ॥ तीज तरुणि सब गावत आई नन्दराय
 दरबार । पकरे आय श्यामनट सुंदर भेंटत भरि अँकवार ॥ १०७० ॥ चौथ चहुँ दिशिते सब धाये
 सखा मंडली धाय । इतते आई कुँवर राधिका होरी अधिक मचाय ॥ १०७१ ॥ पंचमि पंच
 शब्द करि साजे सजि वादित्र अपार । रुंज मुरज ढफताल बाँसुरी झालरको झंकार ॥ १०७२ ॥
 बाजत बीन रबाब किन्नरी अमृत कुण्डली यंत्र । सुर सुर मण्डल जलतरंग मिल करत मोहनी
 मंत्र ॥ १०७३ ॥ विविध पखावज आवज संचित बिच बिच मधुर उपंग । सुर सहनाई सरस
 सारंगी उपजत तानतरंग ॥ १०७४ ॥ कंसताल कटताल वजावत शृंग मधुर मुहचंग । मधुर
 खंजरी पटह प्रणव मिल मुख पावत रतभंग ॥ १०७५ ॥ निपटन केरी श्रवणन धुनि सुनि धीर न
 रहे ब्रजवाल । मधुर नाद मुरलीको सुनके भेंटे श्याम तमाल ॥ १०७६ ॥ छठिको षटरस सरस
 बनायो हरि भोजन करवायो । नानाविधि पकवान बनायो जेवत अति सुख पायो ॥ १०७७ ॥
 सातें सखि मिलि बारी लाई आरोगे ब्रजराज । आठें दिशा सकल मिल ठाढो दूर करी सब लाज ॥
 १०७८ ॥ नवमी नवसत साजि राधिका हरिसों खेलत फाग । दशमी दशहु दिशा परिपूर्ण
 बाढयो अति अनुराग ॥ १०७९ ॥ एकादशी राधिका मोहन दोउ मिलि खेलनलाग । बैठजाय
 सघन कुंजनमें जहँ सहचरि बडभाग ॥ १०८० ॥ सघन कुंजमें डोल बनायो झूलत हैं पियप्यारी ।
 ललितादिक बीरी जो खवावत नानाभाँति सँवारी ॥ १०८१ ॥ अति सुगंध घसलाय अरगजा छिरकत
 साँवलगात । हरि बारी प्यारी हरि छिरकत शोभा वरणि न जात ॥ १०८२ ॥ द्वादश दिवस दुहूँ दिश
 माच्यो फागु सकल ब्रजमाँझ । आलिंगन सब देत श्यामको लखै न धुन्धरमाँझ ॥ १०८३ ॥ तेरस
 भामिनि पियो अधररस अति आनन्द अघाय । चहुँदिशिते गहिकै गठ जोरी कीन्हों सखियन आय
 ॥ १०८४ ॥ पून्यो सुखपायो ब्रजवासी होरी हर्ष लगाय । परमराग अनुराग प्रकटभयो अतिफूले
 ब्रजराय ॥ १०८५ ॥ यशुमतिमाय लाल अपनेको शुभ दिन डोल झुलायो । फगुवादियो सकल
 गोपिनको भयो सबन मनभायो ॥ १०८६ ॥ यमुनाजल क्रीडत ब्रजवासी संगलिये गोविंद । सिंहद्वार
 आरती उतारत यशुमति आनंदकंद ॥ १०८७ ॥ यहि विधि क्रीडत गोकुलमें हरि निज वृन्दावन
 धाम । मधुबन और कुमुदवन सुन्दर बहुलावन अभिराम ॥ १०८८ ॥ नन्दग्राम संकेत खिदरबन
 और काम बनधाम । लोहबन माठ बेलबन सुन्दर भद्रवृहद बन ग्राम ॥ १०८९ ॥ चौरासी ब्रजकोश
 निरन्तर खेलत हैं बलमोहन । सामवेद ऋग्वेद यजुर्में कहेउ चरित ब्रजमोहन ॥ १०९० ॥ व्यास
 पुराण प्रगट यह भाख्यो तंत्र ज्योतिषिन जान्यो । नारदसों हरि कहेउ कृपाकर अमृत वचन
 परमान्यो ॥ १०९१ ॥ सनकादिकसों कहेउ आपु हरि निज वैकुण्ठ मँझार । व्यासदेव शुकदेव
 महामुनि नृपसों कियो उचार ॥ १०९२ ॥ नारायण चतुरानन सों कहि नारद भेद बतायो । ताते सुनिके
 व्यास भागवत नृप शुकदेव जतायो ॥ १०९३ ॥ शेष कहेउ जो सांख्यायनसों सुनिके सनत्कुमार ।
 कहेउ बृहस्पति पुनि मैत्रेसों उद्धवकियो विचार ॥ १०९४ ॥ ऐसे विविध प्रमाण प्रकट बहु लीला
 करि ब्रजईश । सोई श्रीशुकदेव महामुनि प्रकटकही राधीश ॥ १०९५ ॥ वृन्दावनहरि यहि विधि
 क्रीडत सदा राधिकासंग । भोर निशा कबहुं जानतहैं सदा रहत यक रंग ॥ १०९६ ॥ सघनकुंजमें
 खेलत गिरिधर मथुराकी सुधिआई । राखे बरजि राधिकारानी अब न सकोगे जाई ॥ १०९७ ॥

(३८)

सूरसागर-सारावली ।

राखों कंठलगाय लालको पलक ओट नहिं करिहौं । युग कुच बीच भुजा दोउन मिल सदा प्रेमरँग
 भरिहौं ॥ १०९८ ॥ सदा एकरस एक अखंडित आदि अनादि अनूप । कोटिकल्प बीतत नहिं
 जानत विहरत युगल स्वरूप ॥ १०९९ ॥ संकर्षणके वदन अनलते उपजी अग्नि अपार । सकल
 ब्रह्मांड तुरत तेजसों मानो होरी दई पजार ॥ ११०० ॥ सकल तत्त्व ब्रह्मांड देवपुनि माया सब
 विधि काल । प्रकृति पुरुष श्रीपति नारायण सबहैं अंश गोपाल ॥ ११०१ ॥ कर्म योग पुनि
 ज्ञान उपासन सबही भ्रम भरमायो । श्रीवल्लभ गुरुतत्त्व सुनायो लीलाभेद बतायो ॥ ११०२ ॥
 तादिनते हरिलीलागाई एक लक्ष पद बन्द । ताको सार सूर सारावलि गावत अति आनन्द ११०३ ॥
 अथ श्रीनाथजीके वरदान ॥ तव बोले जगदीश जगतगुरु सुनो सूर मम गाथ । तू कृत मम यश जो गावै
 गो सदारहै मम साथ ॥ ११०४ ॥ खेलत यहि विधि हरि होरी हो होरी हो वेद विदित यह बात ।
 ॥ * ॥ धरि जिय नेम सूर सारावलि उत्तर दक्षिण काल । मन बांछित फल सबही पावैं मिटे जन्म
 जंजाल ॥ ११०५ ॥ सीखै सुनै पढ़ै मनराखै लिखै परम चितलाय । ताके संग रहतहौं निशि दिन आनंद
 जन्म विहाय ॥ ११०६ ॥ सरस समतसर लीलागावैं युगल चरण चितलावैं । गर्भबास बंदीखाने
 में सूर बहुरि नहिं आवैं ॥ ११०७ ॥

इति श्रीसूरदासजीकृत सम्मतसरलीला तथा सवालाखपदोंकासूचीपत्र समाप्त ॥



जाहिरात ।

श्रीमद्वाल्मीकीय रामायण ।

संस्कृत मूल तथा भाषाटीका सहित ।

पाण्डित ज्वालाप्रसाद मिश्र अनुवादित ।

यदि आप रामचरितामृत पान करनेकी इच्छा करते हैं, यदि आपके हृदयमें रघुराज की भक्तिका स्रोत बहता है यदि आदि कवि वाल्मीकिजीकी मनोहारिणी चमत्कारिणी कविताका स्वाद लेनेकी इच्छा है, यदि दशरथ कुमारकी लीला इस आर्यग्रंथके द्वारा जानने की इच्छा है, यदि आपको त्रेतायुगकी वाणी का स्वाद लेना है, तो इस सटीक रामायणके स्वाद लेनेसे न चूकिये, इसमें प्रत्येक श्लोककी टीका पूर्ण आशय भावार्थ शंका समाधान पद टिप्पणी आदि ऐसी रीतिसे लिखी हैं कि सर्व साधारणके ध्यानमें सब प्रकार आजावें पढ़नेसे पत्रे हाथमें लेकर छोड़नेको जी नहीं चाहता, भाषाकी शैली इस प्रकार रक्खी है कि, बराबर पाठ करनेसे प्रेमसागरहृदयमें उमड़ता चला आता है, मानो यह लीला नेत्रोंके सामने हो रही है ऐसा ध्यान बँध जाता है, बहुतकालसे महात्माओंको इसकी अभिलाषा थी, सो आपहीके निमित्त इस ग्रंथको बड़े टाईपमें चिकने मोटे कागजपर छापकर तयार किया है, मूल्यभी डाकव्यय समेत केवल २१ ही रुपये हैं ॥

वाल्मीकीय रामायण केवल भाषा ।

और भी सुभीता है—ऊपरके सब अलंकारों से युक्त सर्गके आदि अन्तके श्लोक लिखकर

शेष सब भाषा और श्लोकांक भी लगे हुए दो भागोंमें विलायती बड़िया सुन्दर सुनहरी अक्षरोंकी जिल्द बँधी है बहुत नहीं दश रुपये १० में घर बैठे पहुँचा देंगे ।

शुकसागर ।

काविवर लला शालिग्रामजी अनुवादित ।

लीजिये अब देर करनेका समय नहीं यदि आप कृष्णचरितामृत पान करने की इच्छा करते हो, यदि श्रीमद्भागवतका परम मनोहर अनुवाद और चारपदार्थ हस्तगत करना चाहते हो, यदि कृष्णचन्द्र आनंदकंद गोविन्द के मन भावन सुख उपजावन पवित्रचरित्र पाठ करने की उत्कण्ठा है, यदि अन्यभी महाभारतादि बड़े बड़े ग्रंथोंके आख्यान एकही पुस्तक में देखना चाहते हो; यदि चटपटे अनूठे प्रेमरस भरे भजन दोहा चौपाई सोरठा कवित्तादि की मिठाईके स्वाद की चाहना है, यदि प्रत्येक अध्यायके शंका समाधान की इच्छा है तो इस नवीन शुकसागर के लेने में देर न कीजिये, यह ग्रंथ अनेक विषयों के होने से बहुत बढ़ गया है, इस कारण अच्छे चिकने कागजपर बड़े टाईप के अक्षरों में दो भागों में छापकर तयार किया है देखो अक्षरभी इतने बड़े हैं कि वृद्धजनभी सुगमता से पढ़ सकेंगे, मूल्य इतने पर भी १०) रुपये और २॥=) डाकमहसूल रक्खा है वजनभी पक्का १० सेरका है केवल लागतका यह दाम है पुढा बड़िया विलायती कपडेका है.

रामरसायन-रामायण ।

लीजिये पाठको ! यह परमप्यारी रसिक-विहारीजीकी मनोहर काव्यरचना का बहुतही सुंदर ग्रंथ लीजिये; देखिये समग्र ग्रंथ परम रोचक दोहा, चौपाई, सोरठा, कवित्त, इत्यादि छन्दो-बद्ध में वर्णित है और सम्पूर्ण ग्रंथ रामकथासे विभूषित है. रामकथामृताभिलाषियोंको तो अत्यन्तही सौख्यप्रद है रामजन्म, रामविवाह, वनगमन, सीताहरण, रामरावणसंग्राम, राम-राज्य रामाश्वमेध इत्यादि कथायें अत्यन्त विस्तारपूर्वक वर्णित हैं काव्यानुरागियों ! यह नूतनकाव्य प्राचीनकाव्योंसे किसीप्रकार भावगंभीर, पदरुचिरतामें न्यून नहीं है इसके पदपदमें काव्यकी छटा चित्तको हर्षित करतीहै विशेष लिखनेकी आवश्यकता नहीं है. काव्यानुरागी इसके द्वारा शीघ्र रुचि पूर्ण करें डाकव्यय सहित ४ रु० ॥

भजनामृत - इसमें मंगल गौरी होली जय ध्वनि पद विनय आरती इत्यादि अनेकप्रकार के भजनहैं साधुओंके वास्ते अतिउत्तमहै की० १ रु० ८०-२ आ०

ब्रजबिहार-वृन्दावनवासी श्रीनारायण स्वामीजीकृत-जिसमें श्रीकृष्णचन्द्र आनंदकंद वृन्दावनबिहारी तथा श्रीवृषभानुनन्दिनीराधे महारानी की सम्पूर्ण लीलाओं का वर्णन सुन्दर अनेक प्रकारके भजन दोहे कवित्त और वार्तिक में अतिमधुरतासे किया गयाहै जिसके पढ़ने से श्रीकृष्णचरणानुरागियोंका मन प्रेम में एक दम मग्न होजाताहै इसमें अधिकतर वही लीला सम्मिलित की गई हैं कि जिनको आज कलके रासधारी लोग करते हैं अन्तमें अनुरागरसभी है स्थान २ पर चित्र भी सुन्दर लीलानुकूल लगाये गये हैं पुस्तककी रक्षाके निमित्त विलायती कपड़ेकी जिल्दभी बांधी गई है जिसपर सोनेके अक्षर भी लिखे गये हैं मूल्य प्रेमियोंके निमित्त चिकनेकागजका २ रु० डाक म०।) तथा रफ् कागजका १।। रु० डाक महसूल ।)

पुस्तक मिलनेका ठिकाना-

खेमराज श्रीकृष्णदास,

“श्रीवेङ्कटेश्वर” स्टीम् प्रेस--(बम्बई.)

श्रीराधाकृष्णचन्द्राय नमः ।



श्रीगणेशाय नमः ।

❀ अथ सूरसागर । ❀

प्रथम स्कन्ध ।

राग बिलावल ॥ चरण कमल बंदौ हरि राई । जाकी कृपा पंगु गिरि लंचै अंधेको सब कह्यु
दरशाई ॥ बहिरो सुनै मूक पुनि बोलै रंक चलै शिर छत्र धराई । सूरदास स्वामी करुणामय
बार बार बन्दौ तेहि पाई ॥ १ ॥ राग कान्हरा । भक्त अंग ॥ अविगत गति कह्यु कहत न आवे ।
ज्यों गूंगे मीठे फलको रस अंतर्गतही भावे ॥ परमस्वाद सबही जु निरंतर अमित तोष उपजावे ॥
मन वाणीको अगम अगोचर सो जानै जो पावे ॥ रूप रेख गुण जाति जुगति बिनु निरालम्ब मन
चकृत धावे । सब विधि अगम विचारहिं ताते सूर सगुण लीला पद गावे ॥ २ ॥ भक्तवत्सल अंग । राग मारू ॥

वासुदेवकी बड़ी बड़ाई ॥ जगत पिता जगदीश जगत गुरु अपुन भक्तकी सहत ढिठाई ॥ भृगु
को चरण राखि उर ऊपर बोले वचन सकल सुखदाई । शिव विरंचि मारनको धाए सो गति
काहू देव न पाई ॥ बिनु बदले उपकार करत हैं स्वारथ बिना करत मित्राई । रावण अरि को अनुज
विभीषण ताको मिले भरतकी नाई ॥ बकी कपट करि मारन आई सो हरिजू वैकुंठ पठाई । बिनु
दीनेही देत सूर प्रभु ऐसे हैं यदुनाथ गुसाई ॥ ३ ॥ राग धनाश्री ॥ करणी करुणासिंधुकी कछु
कहत न आवै । कपट हेतु परशे बकी जननी गति पावै ॥ वेद उपनिषद यश कहै निर्गुणाहिं
वतावै । सोइ सगुण होय नंदकी दावरी बँधावै ॥ उग्रसेनकी आपदा सुनि सुनि बिलखावै । कंस
मारि राजा कियो आपुन शिरनावै ॥ जरासंधकी बंदी काटी नृप कुल यश गावै । असमय वन
निगले पिता ताको शाप नशावै ॥ उधरे शोक समुद्र ते पांडव गृह लावै । जैसे गैया बच्छको
सुमिरत उठि धावै ॥ बरुण फांस ते ब्रजपतिहिं छिन माहिं छुडावै । दुखित गयंदहि जानिकै
आपुन उठि धावै ॥ कलिमें नामा प्रगटियो ताकी छानि छावै । सूरदासकी बीनती कोउ लै पहुँचावै
॥ ४ ॥ राग मारु । ऐसी कौन करी है और भक्त काजै ॥ जैसे धरैं जगदीश जिय माहिं लाजै ॥ हिरन
कश्यप बढ़यो उदय अरु अस्त लौं ग्रस्यो गहाद चित चरण लायो । भीरके परे ते धीर सब-
हिन तज्यो खंभते प्रगट कर जन छुडायो ॥ ग्रस्यो गज ग्राह लै चलयो पातालको कालके त्रास
मुख नाम आयो । छांडि सुखधाम अरु गरुडतजि सांवरो पवनके गवन ते अधिक धायो ॥ कोपि
कौरव गहे केश जब सभा में पांडुकी वधू यश नेकु गायो । लाजके साज में हुती ज्यों द्रौपदी
बढ्यो तनु चीर नहिं अंत पायो ॥ रोरके जोर ते शोर घरनी कियो चलयो द्विज द्वारका जाय ठा-
ढ्यो ॥ जोरि अंजलि मिले छोरि तंदुल लये इन्द्रके विभवते अधिक बाढ्यो ॥ शक्रको दान बिन मान
ग्वालिन कियो गह्यो गिरि पान यश जगत छायो । यहै जिय जानिकै अंध भव त्रास ते सूर कामी
कुटिल शरण आयो ॥ ५ ॥ राग रामकली । कान कियो जन हित जदुराई ॥ प्रथम कह्यो दै वचन
दयारत तेहि बस गाय चराई ॥ भक्त बछल बपु धरि नरकेहरि दनुज दहन उर डर सुरसाई । बालि
बल देखि अदित सुन कारन भियदु पलवतिहुँपुर फिरि आई ॥ एहि थर बनि ब्रीडा गज मोचन
और अनंत कथा श्रुति गाई । सूर दीन प्रभु प्रगट विरद सुनि अजहुँ दयाल पतित शिरनाई ॥ ६ ॥
जहां जहां सुमिरे हरि जेहि विधि तहां तैसे उठि धाये हो । दीनबंधु हरि भक्त कृपानिधि वेद पुराणनि
गाये हो ॥ सुत कुबेर के मत्त मगन भए विष रस नैना छाये हो । सुनि शरापते भये जमल तरु
तेहि हित आपु बँधाये हो ॥ वस्त्र कुचैल दीन द्विज देखत ताके तंदुल खाये हो । सम्पति दई बाकी
पत्नीको मन अभिलाष पुराये हो ॥ जब गज गह्यो ग्राह जल भीतर तब हरि नाम पुकारयो हो ।
गरुड छांडि आतुर है धाये सो तत्काल उबारयो हो ॥ कलानिधान सकल गुणसागर गुरु धौं
कहा पढाये हो ॥ तेहि उपकार मृतक सुत यांचे सो यमपुर ते ल्याये हो ॥ तुम मोसे अपराधी
माधव कितेक मुक्ति पठाये हो । सूरदास प्रभु भक्त बछल तुम पावन नाम कहाये हो ॥ ७ ॥
राग धनाश्री ॥ प्रभुको देखो एक सुभाई । अति गंभीर उदार उदाधि सरि जान शिरोमणि राई ॥
तिनका सों अपने जनको गुण मानत मेरु समान । सकुचि समुद्र गनत अपराधहि बूंद तुल्य
भगवान ॥ वदन प्रसन्न कमल ज्यों सन्मुख देखत हौं हो जैसे । विमुख भये अकृपिण निमिष
हुँ फिर चितयो तो तैसे ॥ भक्त विरह कातर करुणामय डोलत पाछे लागे । सूरदास

ऐसे स्वामीको देहि सु पीठ अभागे ॥ ८ ॥ राग नट ॥ हरि सों ठाकुर और न जन
को । जेहि जेहि विधि सेवक सुख पावे तेहि विधि राखत तिनको ॥ भूखे बहु भोजन जु उदर को
तृषा तोय पट तन को । लग्यो फिरत सुरभी ज्यों सुत सँग उचित गमन ग्रह वनको ॥ परम उदार
चतुर चिंतामणि कोटि कुबेर निधनको ॥ राखत हैं जनकी परतिज्ञा हाथ पसारत कणको ॥ संकट
परे तुरत उठि धावत परम सुभट निज प्रणको ॥ कोटिक करें एक नहिं मानै सूर महा कृतघनको ॥ ९ ॥
राग धनाश्री ॥ हरिसों मीत न देखौ कोई । अंतकाल सुमिरत तेहि अवसर आनि प्रतीक्षो होई ॥ ग्राह
गहे गजपति मुकरायो हाथ चक्रलै धायो । तजि वैकुण्ठ गरुड तजि श्री तजि निकट दासके आयो ॥
दुर्वासाको शाप निवारयो अंबरीष पति राखी । ब्रह्मलोक पर्यंत फिरयो तहैं देव मुनी जन
साखी ॥ लाखागृहते जरत पांडुसुत बुधि बल नाथ उबारि । सूरदास प्रभु अपने जनके नाना
त्रास निवारि ॥ १० ॥ राग धनाश्री ॥ राम भक्तवत्सल निज बानो । जाति गोत कुल नाम गनत नहिं रंक
होयकै रानो ॥ ब्रह्मादिक शिव कौन जात प्रभु हौं अजान नहिं जानो ॥ महता जहाँ तहाँ प्रभु नाहीं
सो द्वैता क्यों मानो ॥ प्रगट खंभ तै दर्ई दिखाई यद्यपि कुलको दानो । रघुकुल राघो कृष्ण सदाही
गोकुल कीनो थानो ॥ वरणि न जाय भजन की महिमा बारम्बार बखानो । ध्रुव रजपूत विदुर
दासी सुत कौन कौन अरगानो ॥ युग युग विरद यहै चलि आयो भक्तन हाथ बिकानो । राज-
सूय में चरण पखारे श्याम लये कर पानो ॥ रसना एक अनेक श्याम गुण कहँलौं करों बखानो ।
सूरदास प्रभुकी महिमा है साखी वेद पुरानो ॥ ११ ॥ राग विलावल ॥ काहूके कुल तन न विचारत ।
अविगत की गति कहि न परतुहै व्याध अजामिल तारत ॥ कौन धौं जाति अरु पांति विदुरकी ताहीके
प्रभु धारत । भोजन करत दुष्ट घर उनके राज मान भँग टारत ॥ ऐसे जन्म करमके ओछे ओछेही
अनुसारत । यहै सुभाव मूरके प्रभुको भक्त बछल प्रण पारत ॥ १२ ॥ राग सारंग ॥ गोविंद प्रीति
सबनकी मानत ॥ जेहि जेहि भाय करी जिन सेवा अंतर्गत की जानत ॥ शबरी कटुक बेर तजि मीठे
भाखि गोद भरि लाई । जूँठे की कछु शंक न मानी भक्ष किये सतभाई ॥ संतन भक्त मित्र हितकारी
श्याम विदुरके आये । अतिरस बाढो प्रीति निरंतर साग मगन है खाये ॥ कौरव काज चले ऋषि
शापन साग पत्रही अचाये । सूरदास करुणानिधान प्रभु युग युग भक्त बढाये ॥ १३ ॥ राग राम
कली ॥ शरण गयेको को न उबारयो । जब जब भीर परी संतन को चक्रसुदर्शन तहां सँभारयो ।
भयो प्रसाद जु अंबरीष को दुर्वासाको क्रोध निवारयो । ग्वालन हेतु धरयो गोवर्धन प्रगट इन्द्र
को गर्व प्रहारयो ॥ कृपाकरी प्रह्लाद भक्त को खंभ फारि उर नखन विदारयो । नरहरि रूप
धरयो करुणाकरि छिनक माहिं हरनाकुश मारयो । ग्राह असत गजको जल बूडत नामलेत वाको
दुख टारयो । सूरश्याम बिनु और करै को रंगभूमिमें कंस पछारयो ॥ १४ ॥ राग केदारा । जनकी
और कौन पत राखै । जाति पांति कुल कानि न मानत वेद पुराणनि साखै ॥ जेहिकुल राज द्वारका
कीनो सो कुल शापत नाश्यौ ॥ सोइ मुनि अंबरीष के कारण तीन भुवन भ्रमि त्रास्यौ ॥ जाको
चरणोदक शिव शिर धरयो तीन लोक हितकारी । तिन प्रभु पांडुसुतनके कारण निजकर चरण
पखारी ॥ बारह बरस वसुदेव देवकी कंस महा डर दीनों । तिन प्रभु प्रह्लादहिं सुमिरत ही नर-
हरि रूप जु कीनो ॥ जग जानत यदुनाथ जिते जन निज भुज श्रम सुख पायो । ऐसो को जो शरण
गये ते कहत मूर इतरायो ॥ १५ ॥ जब जब दीनन कठिन परी । जानतहौं करुणामय जनको तब
तब सुगम करी ॥ सभामँझार द्रौपदी आनी हरि सुदुशासन दुष्ट धरी । सुमिरत पटको कोट बढ्यो

तब दुख सागर उबरी ॥ ब्रह्मशापते गर्व उबारचो टेरत जरी जरी । तब तब रक्षा करी भगतपर जब
जब विपति परी ॥ विपतिकाल पंडव बँधुअनमें राख्यो श्याम ढरी । करि भोजन अवशेष यज्ञ प्रभु
त्रिभुवनभूख हरी ॥ पाय प्रसाद भक्तनपन राख्यो गजसों राखि धरी । महामोहमें परचो मूर प्रभु
काहे सुधि विसरी ॥ १६ ॥ राग रामकली ॥ और न काहुहि जनकी पीर । जब जब दीन
दुखी भयो तब तब करी कृपा बलवीर ॥ गज बल हीन विलोकि दशौ दिशि तब हरि
शरण परचो ॥ करुणासिंधु दयालु दरशदै सब संताप हरचो ॥ गोपी गाइ ग्वाल गो सुत
हित सात दिवस गिरि लीनो । मागध हन्यो मुक्त नृप कीने मृतक विप्र सुत दीनो ॥ श्री नृसिंह
वपु धरचो असुरहित भक्त वचन प्रति पारचो । सुमिरत नाम द्रुपदतनयाको पट अनेक
विस्तारचो ॥ मुनि मद मेंटि दास व्रत राख्यो अंबरीष हितकारी । लाषा गृहमें शत्रु सैनते
पांडव विपति निवारी ॥ वरुण फांस ब्रजपति मुकरायो दावानल दुख टारचो । घर आए वसुदेव
देवको कंस महाखल मारचो ॥ श्रीपति युग युग सुमिरनके वश देव विमल यश गावैं । अशरण
शरण मूर यांचतहै को जो सुरति करावैं ॥ १७ ॥ राग केदारा ॥ ठकुरायत गिरिधर जूकी सांची ॥
कौरव जीति युधिष्ठिर राजा कीरति तीन लोक में माची ॥ ब्रह्म रुद्र डर डरत कालके काल डरत
भुव भंग की आंची । रावण सों नृप जात न जान्यो माया विषम शीश धरि नाची ॥ गुरुसुत
आनि दये यमपुरते विप्र सुदामा कियो अयाची । दुःशासन कर वसन छुड़ावत सुमिरत नाम
द्रौपदी बांची ॥ हरि चरणारविंद तजि लागत अनत कहूं तिनकी मति कांची । मूरदास भगवंत
भजत जे तिनकी लीक चहुं युग खांची ॥ १८ ॥ भक्त महिमा । राग सारंग ॥ हरिके जन सबते
अधिकारी । ब्रह्मा महादेवते को बड तिनके सेवक भ्रमत भिखारी । याचक पै याचक कहा याचे सो
याचै सो रसना हारी । गणिकापूत सोभ नहिं पावत जिन कुल कोऊ नहीं पितारी ॥ तिनकी साष
देखि हरनाकुश रावण कुटुंब समेत भे ख्वारी । जन प्रह्लाद प्रतिज्ञा पाली विभीषण सु अजहुं
राजारी ॥ शिला तरी जल माहिं सेतु बँधि बलि वहि चरण अहल्या तारी । जे रघुनाथ शरण
तकि आये तिनकी सकल आपदा टारी ॥ जिन गोविंद अचल ध्रुव राख्यो रवि शशि दै प्रदक्षिणा
हारी । मूरदास भगवंत भजन बिनु धरनी जननि बोझ कत मारी ॥ १९ ॥ राग सारंग ॥ जापर दीना
नाथ ठरे । सोइ कुलीन बडो सुन्दर सोइ जिनपर कृपा करे ॥ राजा कौन बडो रावणते गर्वहि गर्व
गरे । रांकव कौन सुदामाहू ते आपु समान करे ॥ रूपव कौन अधिक सीताते जन्म वियोग भरे ।
अधिक कुरूप कौन कुबिजाते हरि पति पाइ वरे ॥ योगी कौन बडो शंकरते ताको काम छरै । कौन
विरक्त अधिक नारदसों निशि दिन भ्रमत फिरै ॥ अधम सुकौन अजामिलहूते यम तहँ जात डरै ।
मूरदास भगवंत भजन बिन फिर फिर जठर जरै ॥ २० ॥ जाको दीनानाथ निवाजै । भवसागरमें
कवहुं न झूके अभय निशाने बाजै ॥ विप्रसुदामाको निधि दीनी अरजुन रनमें गाजै ॥ लंकाराज
विभीषण राजै ध्रुव आकाश विराजै ॥ मारि कंस केशी मथुरामें मेत्थो सबै दिवाजै । उग्रसेन शिर
छत्र धरचो है दानव दुहुं दिशि भाजै ॥ अंबर गहत द्रौपदी राखी पलट अंधसुत लाजै । मूरदास
प्रभु महा भक्तिते जाति अजाति हि साजै ॥ २१ ॥ राग देवगंधार ॥ जाको मनमोहन अंग करै ।
ताको केश खसै नहिं शिरते जो जगबैर परै ॥ हिरनकशिपु परिहार थक्यो प्रल्हाद न नेकु डरै । अजहुं
लौ उत्तानपाद सुत राज्य करत न मरै ॥ राखी लाज द्रुपदतनयाकी कोपित चीर हरै । दुर्योधन
को मान भंग करि वसन प्रवाह भरै ॥ विप्र भक्त नृग अंध कूप दियो बलि पढि वेद छरै । दीन दया-

लु कृपालु कृपानिधि कापै कह्यो परै ॥ जो सुरपति कोप्यो ब्रज ऊपर कहिधौं कछु न सरे । राखे
 ब्रज जन नंदके लाला गिरिधर विरद धरै ॥ जाकी विरद है गर्वप्रहारी सो कैसे बिसरै । सूरदास
 भगवंत भजन करि शरण गहे उधरै ॥ २२ ॥ राग केदारा ॥ जाको हरि अंगीकार कियो । ताके
 कोटि विघ्न हरि हरिकै अभय प्रताप दियो ॥ दुर्वासा अंबरीष सतायो सो हरि शरण गयो । परतिज्ञा
 राखी मनमोहन फिरि तापै पठयो ॥ निकसि खंभते नाथ निरंतर अपनो राखि लियो । बहुत
 शासना दई प्रह्लादहिं ताहि निशंक कियो । मृतक भये सब सखा जिवाये विष जल जाइ पियो ।
 सूरदास प्रभु भक्तबच्छल हैं उपमा कौन कियो ॥ २३ ॥ राग विलावल ॥ कहा कमी जाके राम धनी ।
 मनसानाथ मनोरथ पूरण सुखनिधान जाको मौज घनी ॥ अर्थ धर्म अरु काम मोक्ष फल चार
 पदारथ देत छनो । इन्द्र समान जाके हैं सेवक मो वपुरेकी कहा गनी ॥ कहा कृपणकी माया
 कितनी करत फिरत अपनी अपनी । खाइ न सकै खरच नहिं जानै ज्यों भुअंग शिर रहत मनी ।
 आनंद मगन राम गुण गावै दुख संताप की काटि तनी ॥ सूर कहत जे भजत रामको तिनसों
 हरि सों सदा बनी ॥ २४ ॥ हरिजूके जनकी अति ठकुराई । महाराज ऋषिवर सुर नर मुनि देखत
 रहे लजाई ॥ निरभय राज ताहीकोदीनो लागनि मननि उछाहू । काम क्रोध मद लोभ मोह मिलि
 भये चोरते साहू ॥ दृढ विश्वास कियो सिंहासन तापर बैठयो भूप । हरि जस विमल छत्र शोभित
 शिर राजत परम अनुम ॥ हरिपद पंकज प्रजाप्रेम वश ताहीके रंगराते । मंत्री ज्ञान न अवसर पावै
 कहत न बनै सकाते ॥ अर्थ धर्म दोऊ रहे वहै दुरि काम मोक्ष शिर नायो । विनय विवेक विचित्र
 पौरिया समय न काहू पायो ॥ अष्टमहो निधि आगे ठाढी कर जोरे उर लीने । छरीदार वैगर विनोदी
 छिरकि वाहिये कीने ॥ कायर काल कछू नहिं वधापै या इस रीति हि जानै । सूरदास नर तौ जाने
 जो गुरु प्रसाद पहिचानै ॥ २५ ॥ माया वर्णन । राग केदारा ॥ विनती सुनो दीनकी चित्त दै कैसे तब गुण
 गावै । माया नटिनि लकुटि करलीने कोटिक नाच नचावै ॥ दर दर लोभ लागि लवै डोलति
 नाना स्वांग करावै । तुमसों कपट करावति प्रभु जू मेरी बुद्धि भ्रमावै ॥ मन अभिलाष तरंगनि
 करि करि मिथ्या निशा जगावै । सोवत स्वप्ने में ज्यों सम्पति त्यों दिखाय बौरावै ॥ महा मोहिनी
 मोह आत्मा मन करि अघहि लगावै । ज्यों दूती परवधू भोरिकै लै पर पुरुष दिखावै ॥ मेरे तो
 तुमहीं पति तुम गति तुम समान को पावै । सूरदास प्रभु तुमरी कृपा बिनु को माँ दुख बिसरावै ॥ २६ ॥
 राग सोरठ बिनै कासों कहाँ दीनबन्धो । जन्मकृत अकृत चकृत चित्त चरन सरन राखि दयासिंधो ॥
 द्विज पतित मतिहीन गनिका गुन लौलीन करत अघ खीन पूतना प्रहारे । सकृत निज हरि नाम
 निज लियो अवशि कर दूरि करि को कौ न तारे ॥ ध्रुव तेइ थापि थिर प्रह्लाद परतीत करि हिरन
 कश्यप उर नख बिदारे । मानि गज भरि भेंटि तनकी पीर दुपद कन्या धरन धीर लज्या निवारे ॥
 रावन मदअन्ध और नृप जरासंध किये निरबंध क्रोध वर तुल्यकारे त्रैलोक जस रह्यो यहै सब
 श्रुति कह्यो सोही मैं दृष्टि गह्यो शैलधारे ॥ अग्नित विक्रम शिव विरंचि भ्रमत भ्रम सकल मुनि जन
 अगम लोक पारे । सूर कल्याण प्रभु राखि सनमान अब देहि निज दान कलिमल ताप हारे ॥ २७ ॥
 विनती करत मरत हौं लाजानख सिखलौं मेरी यह देही है पापकी जहाज ॥ और पतित आवत
 न आखितर देखत अपनो साज । तीनों पन भरि और निबाह्यो तऊ न आयो बाज ॥ पाछे भयो
 न आगे हैहै सब पति तन सरताजौ नरकौ भज्यो नाम सुनि मेरो पीठिदई यमराजै ॥ अबलौं नान्हे
 रून्हे तारयो ते सब वृथा अकाजै । सांचे विरदुसूरके तारत लोकन लोक अवाजै ॥ २८ ॥ हरि तेरी

माया कौन विगोयो । सौ योजन मर्याद सिंधु की पल में राम विलोयो ॥ नारद मगन भये माया में
 ज्ञान बुद्धि बल खोयो । साठ पुत्र अरु द्वादश कन्या कंठ लगाये जोयो ॥ शंकर को चित हरयो
 कामिनी सेज छोडि भुव सोयो । जारि मोहनी आठ आठ कियो तब नख शिखते रोयो ॥
 सौ भैया राजा दुर्योधन पल में गरद समोयो । सूरज दास कांच अरु कंचन एकहि धगा परोयो ॥ २९ ॥
 राग सांग तुम्हरी माया महाबली जिन जग बश कीनो । नेकु चितै सुसुकाइ सबन को मन हरि
 लीनो । कछु कुल धर्म न जानई वाके रूप सकल जग राच्यो । बिनु देखे बिनहीं सुने ठगत न
 कोऊ बाच्यो ॥ सुनि याके उत्पातते शुक्र सनकादिक भागे । लोक लाज सब छुटि गई काम
 क्रोध मद जागे ॥ अकथ कथा याकी हरी कहि कहत न आई । छैलनके सँग यो फिरै जैसे तनु
 सँग छाई ॥ इहि विधि इन डहके सबै जल थल जिय जेते । चतुर शिरोमणि नंदके अरु कहा कहाँ
 केते ॥ पहिरे राती चूनरी शिर श्वेत उपरना सोहै कटि लहंगा लीलो बन्यो नीको जो देखि न मोहै ॥
 चोली चतुरानन ठग्यो अमर उपरना राते । अतरौटा अवलोकि कै सब असुर महा मद माते ॥
 योग युगति बिसरी सबै उठि धाए सँग लागे । नेक दृष्टि तहँ परि गई शिव शिर टोना लागे ॥
 बहुत कहां लैं वर्णियो पर पुरुष न उबरन पावैं । भरि सोवै सुखनींद में तहां जाइ जगावै ॥ एकनि
 को दर्शन ठगै एकनि सँग सोवै । एकनि लै मन्दिर चढै इक विराचि बिगोवै ॥ यहि लाजनि
 मरिष सदा सब कहत तुमारी । सूरश्याम यहि बरजिकै भेटहु कुल गारी ॥ ३० ॥ राग विहागरा ॥
 हरि तेरो भजन कियो न जाइ । कहा कहूं तेरी प्रबल माया देति लहर बहाइ ॥ जबै आऊं साधु
 संगति कछुक मन ठहराइ । ज्यों गयंद अन्हाइ सरिता बहुरि बहै सुभाइ ॥ वेष धरि धरि हरयो
 परधन साधु साधु कहाइ । जैसे नटुवा लोभ कारण करत स्वांग बनाइ ॥ करौं यतन न भजौं
 तुमको कछुक मन उपजाइ । सूर हरिकी प्रबल माया देति मोहिं लुभाई ॥ ३१ ॥ माधव जू मन
 माया बश कीनो । लाभ हानि कछु समुझत नाही ज्यों पतंग तनु दीनो ॥ गृह दीपक छन तेल
 तूल तिय सुत ज्वाला अति जोर । मैं मतिहीन मर्म नहिं जान्यौ परचों अधिक करि दौर ॥ विवश
 भयों नलिनीके शुक्र ज्यों बिन गुन मोहिं गह्यो । मैं अज्ञान कछु नहिं समुझों परदुख पुंज सद्यो
 बहुतक दिवस भए या जगमें भ्रमत फिरयो मतिहीन । सूरश्याम सुंदर जो सुमिरे क्यों होवै गत
 दीन ॥ ३२ ॥ अविद्या वर्णन । मलार ॥ माधव जू यह मेरी इक गाई । अब आजु ते आपु आगे लै आइए
 चराई ॥ है अति हरिहाई हटकत हूं बहुत अमारग जाती । फिरति वेद वन ऊख उखारति सब दिन
 अरु सब राती ॥ हितकै मिलै लेहु गोकुलपति अपने गोधन मांह । सुख सोऊं सुनि वचन
 तुम्हारे देहु कृपा करि बांह ॥ निधरक रहौं सूरके स्वामी जन्म न जाऊं फेरि । मैं ममता रुचि सों रघु-
 राई पहिले लेउँ निवेरि ॥ ३३ ॥ रागधनार्थी ॥ कितक दिन हरि सुमिरन बिनु खोये । परनिंदा
 रसनाके रसमें अपने पर तर बोये ॥ तेल लगाइ कियो रुचि मर्दन वस्त्रहि मलि मलि धोये ।
 तिलक बनाय चले स्वामी ह्वै विषयिन के मुख जोये ॥ काल बलीते सब जग कंपत ब्रह्मादिक हूं
 रोये । सूर अधम की कहाँ कौन गति उदर भरे परि सोये ॥ ३४ ॥ तृष्णा वर्णन । केदारा ॥ माधव जू
 नेकु हटकौ गाइ । निशि वासर यह भ्रमति इत उत अगह गही नहिं जाय ॥ क्षुधित बहुत अघात
 नाहीं निगम द्रुम दल खाइ । अष्ट दश घट नीर अचवे तृषा तउ न बुझाइ ॥ छहूं रस हूं धरत आगे
 बहै गंध सुहाय । और अहित अभक्ष भक्षति गिरा वरणि न जाय ॥ व्योम धर नद शैल कानन

१ रोयो । २ करौं । ३ मुलाइ ।

इते चरि न अघाइ। ढीठ निटुर न डरति काहू त्रिगुण है समुहाइ॥हरै न खल बल दनुज मानव सुरनि
 शीश चढ़ाइ। रचि विरंचि मुख भौह छबिलौ चलति चितहि चुराइ॥ नील खुर जाके अरुन लोचन
 श्वेत सींग सोहाइ। दिन चतुर्दश खेत खंदति सु यह कहा समाइ ॥ नारदादि शुकादि मुनि जन थके
 करत उपाइ। ताहि कहू कैसे कृपानिधि सकत सूर चराइ ॥ ३५ ॥ विनती अंग। राग केदारा ॥ बन्दौ
 चरण सरोज तुम्हारे। सुन्दर श्याम सकल दल लोचन ललित त्रिभंगी प्राणपति प्यारे ॥ जे पद
 पद्म सदा शिवके धन सिंधुसुता उरते नहि टारे। जे पद कमल तातरिस त्रासत मन वच क्रम प्रहलाद
 सँभारे। जे पद पद्म परसि जल पावन सुरसरि दरश कटत अघ भारे ॥ जे पद पद्म परसि
 ऋषिपत्नी बलि नृग व्याध पातेत बहु तारे। जे पद पद्म रमत वृन्दावन अहि शिर धारि अगणित
 रिपु मारे ॥ जे पद पद्म परसि ब्रज भामिनि सर्वस दै सुत सदन बिसारे ॥ जे पद पद्म रमत पंडव
 दल दूत भये सब काज सँवारे। सूरदास तेई पद पंकज त्रिविध ताप दुख हरन हमारे ॥ ३६ ॥
 ॥ धनाश्री ॥ हरि जू तुमते कहा न होई। रंक सुदामा कियो इन्द्र सम पांडव हित कौरव दल खोई ॥
 पतित अजामिल दासी कुबिजा तिनहुँके कलिमल सूब धोई। बोलै गूँग पंगु गिरि लंघै अरु आवै
 अंधा जग जोई ॥ बालक मृतक जिवाय दिये द्विज जो आये दरबारे रोई। सूरदास प्रभु इच्छा पूरण
 श्री गुपाल सुमिरत सब कोई ॥ ३७ ॥ राग सोरठ ॥ अबके राखिलेहु भगवान। हम अनाथ बैठे दुम
 डरिया पारधि सांधे बान ॥ जाके डर भाज्यो चाहत है ऊपर दुख्यो सचान। दुवौ भौंति दुख भयो
 आनि यह कौन उबारै प्रान ॥ सुमिरतहीं अति डस्यो पारधी कर छूटे संधान। सूरदास शर लग्यो
 सचानहि जय जय कृपानिधान ॥ ३८ ॥ राग बिहागरा ॥ हृदय की कबहुँ न जरन घटी। बिनु
 गोपाल बिथा या तनुकी कैसे जात कटी ॥ अपनी रुचि जितही तित खैंचति इन्द्रिय ग्राम गटी।
 हो तितहीं उठि चलति कपट लगि बांधै नयन पटी ॥ झूठो मन झूठी यह काया झूठी आर
 भटी। अरु झूठनि के वदन निहारत मारत फिरत लटी ॥ दिन दिन हीन छीन भइ काया दुख
 जंजाल जटी ॥ चिंता गई अरु भूख भुलानी नींद फिरत उचटी ॥ मगन भयो माया रस लम्पट
 समझत नाहिं हटी। तापर मूड चढ़ी नाचति है मीचति नीच नटी ॥ खैंचत स्वाद श्वान
 पातर ज्यों चातक रटत ठटी। सूर जलधि सिंचै करुणानिधि निज जन जरनि मिटी ॥ ३९ ॥
 ॥ राग केदारा ॥ अबके नाथ मोहिं उधारि। मग नहीं भव अम्बुनिधि में कृपासिंधु मुरारि ॥ नीर
 अति गंभीर माया लोभ लहरति रंग। लयै जाति अगाध जल में गहे ग्राह अनंग ॥ मीन इन्द्रिय
 अतिहि काटति मोट अघ शिर भार। पग न इत उत धरन पावत उराझि मोह सिवार ॥ काम
 क्रोध समेत तृष्णा पवन अति झकझोर। नाहिं चितवनदेत तिर्य सुत नाम नौका ओर ॥ थक्यो
 बीच बिहाल विह्वल सुनो करुणां मूल। श्याम भुज गहि काढि लीजै सूर ब्रज के कूल ॥ ४० ॥
 राग सारंग ॥ माधव जू मन हठि कठिन परचो। यद्यपि विद्यमान सब निरखत दुःख शरीर मरचो ॥
 बार बार निशि दिन अति आतुर फिरत दशो दिशि धाये। ज्यों शुक सेंवर फूल विलोकत जात नहीं
 विन खाये ॥ युग युग जन्म मरन अरु बिछुरन सब समुझत मति भेव। ज्यों दिनकर उलूक नहीं मानत
 परी आनि यह टेवा ॥ हौं कुचील मतिहीन सकलविधि तुम कृपालु जग जान। सूर मधुप निशि कमल

१ इत उत।

सूरसागर ।

(८)

कोश बश करो कृपा दिन भान ॥ ४१ ॥ राग धनाश्री ॥ आछो गात अकारथ गारचो । करी न प्रीति कमल लोचन सां जन्म जुवा ज्यों हारचो । निशि दिन विषय विलासनि विलसत फूटि गई तब चारचो । अव लाग्यो पछतान पाइ दुख दीन दर्ईको मारचो । कामी कुटिल कुर्चील कुदरशन कौन कृपा करि तारचो । ताते कहत दयालु देव मुनि काहे सूर बिसारचो ॥ ४२ ॥ राग सारंग ॥ माधव जू मन सब ही विधि पोच । अति उन्मत्त निरंकुश मयगज चिंता रहित अशोच । महा मूढ अज्ञान तिमिर में मग्न होत सुख मानि । तेली केर वृषभ ज्यों भरम्यों भजत न सारंग पानि । गींध्यो ढीठ हेम तस्कर ज्यों अति आतुर मतिमंद । लुब्धो स्वाद मीन आतुर ज्यों अवलोक्यो नहिं फंद ॥ ज्वाला प्रीति प्रगट सन्मुख हटि ज्यों पतंग तनु जारचो । विषय असक्त अमित अघ व्याकुल तब हम कछु न सँभारचो ॥ ज्यों कपि शीत हुताशन गुंजा सिमटि होत लवलीन । त्यों शठ वृथा तजत नहिं कबहूँ रहत विषय आधीन ॥ सँवर फूल सुरंग शुक निरखत मुदित होत खग भूप । परशत चाँच तूल उधरत मुख परत दुःख के कूप ॥ और कहां लौं कहाँ एक मुख या मनके कृत काज । सूर पतित तुम पतित उधारन गहो विरद की लाज ॥ ४३ ॥ मेरो मन मतिहीन गुसाँई । सब सुखनिधि पैद कमल छाँडि श्रम करत श्वान की नाई ॥ फिरत वृथा भाजन अवलोकत सूने सदन अज्ञान । तिहिं लालच कबहूँ कैसेहूँ तृप्ति न पावत प्रान ॥ जहँ जहँ जात तहीं भय त्रासत आस लकुटि पदत्रान । कौर कौर कारण कुबुद्धि जड़ किते सहत अपमान ॥ तुम सर्वज्ञ सकल विधि पूरण अखिल भुवन निजनाथ । तिन्हें छाँडि यह सूर महाशठ भ्रमत भ्रमनिके साथ ॥ ४४ ॥ राग गौरी ॥ करुणामय तेरी गति लखि न परै । धर्म अधर्म अधर्म धर्म करि अकरन करन करै ॥ जय अरु विजय कर्म कहा कीनो ब्रह्म शराप दिवायो । असुर योनि ता ऊपर दीनी धर्मउ छेद करायो ॥ पिता वचन खंडे सो पापी सो प्रह्लाद हिं कीनो । निकसे खंभ बीच ते नरहरि ताहि अभयपद दीनो ॥ दान धर्म बहु कियो भानुसुत सो तुव विमुख कहायो । वेद विरुद्ध सकल पंडवसुत सो तुम्हरो मन भायो ॥ यज्ञ करत वैरोचन को सुत वेद विमल विधि कर्मा । सो छालि बांधि पताल पठायो कौन कृपानिधि धर्मा ॥ द्विज कुल पतित अजामिल बिषयी गणिका नेह लगायो । सुत हित नाम लियो नारायण सो वैकुण्ठ पठायो । पतिव्रता जालंधर युवती सो पतिव्रत ते टारी । दुष्ट पुंश्चली अधम सु गणिका सुवा पढावत तारी ॥ मुक्त हेतु योगी श्रम कीनो असुर विरोधाहिं पावै । अविगत गति करुणामय तेरी सूर कहा कहि गावै ॥ ४५ ॥ राग सारंग ॥ अविगत गति जानी न परै । मन वच अगम अगाध अगोचर केहि विधि बुधि सँचरै ॥ अति प्रचंड पौरुष बल पाये केहरि भूख मरै । विन आशा विन उद्यम कीने अजगर उदर भरै ॥ रीते भरै भरे पुनि ढोरै चाहै फेरि भरै । कबहुँक तृण बूडै पानी में कबहूँ शिला तरै ॥ वागर ते सागर करि राखै चहुँ दिशि नीर भरै । पाहन बीच कमल विकसाही जलमें अग्निनि जरै ॥ राजा रंक रंक ते राजा ले शिर छत्र धरै । सूर पतित तरिजाइ तनक में जो प्रभु नेकु ढरै ॥ ४६ ॥ राग केदारा ॥ अपनी भक्ति देहु भगवान । कोटि लालच जो दिखावहुँ नाहिनै रुचि आन ॥ जरत ज्वाला गिरत गिरि ते सुकर काटत शीश । देखिसाहस सकुच मानत राखि सकत न ईश ॥ कामना करि कोपि कबहूँ करत कर पशु घात । सिंह शावक जात गृह तजि इन्द्र अधिक डरात ॥ जा दिना ते जन्म पायों यहै मेरी रीति । विषय विष हठि खात नहिं टरत करत अनीति ॥ थके किंकर यूथ यमके टारे टरत न नेक

नरक कूपनि जाइ यमपुर परचो बार अनेक । महा माचल मारिबेको सकुच नाहिन मोहिं ।
 परचो हौं प्रण किये द्वारे लाज प्रण की तोहिं ॥ नाहिनै काचो कृपानिधि करौं कहा रिसाइ । सूर
 तबहुं न द्वार छाँडै डारिहौं कठराइ ॥ ४७ ॥ राग धनाश्री ॥ जनके उपजत दुख किन काटत । जै-
 से प्रथम अपाठ के वृक्षनि खेतहर निरखि उपाटत ॥ जैसे मीन किलकिला दरशत ऐसे रहो
 प्रभु डाटत । पुनि पाछे अघसिंधु बढत है सूरखार किन पाटत ॥ ४८ ॥ राग कान्हरा ॥ कीजै प्रभु
 अपने बिरदकी लाज । महापतित कबहुं नहिं आयो नेकु तुम्हारे काज । माया सबल धाम धन
 वनिता बांध्यो हौं इहि साज । देखत सुनत सबै जानत हौं तऊ न आयो बाज ॥ कहियत पतित
 बहुत तुम तारे श्रवणनि सुनी अवाज । दई न जात खार उतराई चाहत चढ़न जहाज ॥ लीजै पार
 उतारि सूर को महाराज ब्रजराज । नई न करन कहत प्रभु तुम सों सदा गरीबनेवाज ॥ ४९ ॥
 राग विलावल ॥ महाप्रभु तुम्हैं बिरद की लाज । कृपानिधान दानि दामोदर सदा सँवारत काज ।
 जब गज ग्राह चरण धरि राख्यो तब तुम्हैं नाथ पुकारचो । तजिकै गरुड चल्यो अति आतुर
 पकरि चक्र कर मारचो ॥ निशि निशिही ऋषि लए सहस दश दुर्वासा पग धारचो । तत्कालहिं
 तब प्रगट भये हरि राजा जीव उबारचो । हरनाकुश प्रह्लाद भक्तको बहुत शासना जारचो ।
 रहि न सके नरसिंह रूप धरि गहि कर असुर पछारचो ॥ दुःशासन गहि केश द्रौपदी नगन करन
 को लाये ॥ सुमिरत ही तत्काल कृपानिधि वसन प्रवाह बढ़ाये ॥ मागधपति बहु जीति महीपति
 कछु जिय में गर्बाए । जीत्यो जरासंध रिपु मारचो बल करि भूप छुडाए ॥ महिमा अति
 अगाध करुणामय भक्त हेतु हितकारी । सूरदास पर करौ कृपा अब दरशन देहु मुरारी ॥ ५० ॥
 राग धनाश्री ॥ शरण आयेकी लाज उर धरिये । सध्यौ नहिं धर्म शील शुचि तप व्रत कछु कहा
 सुख लै तुम्हैं विनय करिये ॥ कछु चाहौं कहौं सोचि मनमें रहौं कर्म अपने जानि त्रास आवै । यहै
 निज सार आधार मेरे औह पतितपावन बिरद वेद गावै ॥ जन्मते एकटक लागि आशा रही
 विषय विष खात नहिं तृप्ति मानी । जो छिपा छरद करि सकल संतनि तजी तासु मति मूढ़ रस
 प्रीति ठानी ॥ पाप मारग जिते तेव कीने तिते बच्यो नहिं कोई जहँ सुरति मेरी । सूर अवगुण
 भरचो आइ द्वारे परचो तकी गोपाल अब शरण तेरी ॥ ५१ ॥ प्रभु मेरे गुण अवगुण
 न विचारो । कीजै लाज शरण आयेकी रविसुत त्रास निवारो ॥ योग यज्ञ जप तप नहिं कीयो
 वेद विमल नहिं भाष्यो । अति रस लुब्ध श्वान जूँठनि ज्यों कहूँ नहिं चित राख्यो ॥ जिहि जिहि
 योनि फिरचो संकटवश तिहि तिहि यहै कमायो । काम क्रोध मद लोभ ग्रसित भये विषय परम
 विष खायो ॥ जो गिरिपति मसि घोरि उदधि में लै सुरतरु निज हाथ । मम कृत दोष लिखैं
 बसुधा भर तऊ नहिं मित नाथ ॥ कामी कुटिल कुचील कुदरशन अपराधी मति हीन । तुम समान
 और नहिं दूजो जाहि भजौं है दीन ॥ अखिल अनंत दयालु दयानिधि अविनाशी सुखरास । भजन
 प्रताप नहिं मैं जान्यो परचो मोहकी फांस ॥ तुम सर्वज्ञ सबै विधि समरथ अशरण शरण मुरारि ।
 मोह समुद्र सूर बूडत है लीजै भुजा पसारि ॥ ५२ ॥ राग सारंग ॥ तुम हरि सांकरेके साथी ।
 सुनत पुकार परम आतुर है दौरि छुडायो हाथी ॥ गर्भ परीक्षित रक्षा कीनी वेद उपनिषद साखी ।
 बसन बढ़ाय द्रुपद तनयाके सभा माँझ पत राखी ॥ राज रवनि गाई व्याकुल है दै दै सुतको
 धीरक । मागध हति राजा सब छोरे ऐसे प्रभु परपीरक ॥ कपट स्वरूप धरचो जब कोकिल नृप
 प्रतीति करि मानी । कठिन परी तबहीं तुम प्रगटे रिपु हति सब सुखदानी ॥ ऐसे कहौं कहाँ लौं

सूरसागर ।

(१०)

गुण गण लिखत अंत नहिं पड़्यै । कृपासिंधु उनहीके लेखे मम लज्जा निर्वहिये ॥ सूर तुम्हारी
 ऐसी निवही सकटके तुम साथी । ज्यों जानो त्यों करों दीनकी बात सकल तुम हाथी ॥ ५३ ॥
 तुम बिनु सांकरे को काको । तुम बिनु दीनदयालु देवमणि नाम लेउँ धौं ताको ॥ गर्भ
 परीक्षित रक्षा कीनी हुतो नहीं वश ताको । मेटी पीर परम पुरुषोत्तम दुख भेटचो दोउ धांको ॥ हा
 करुणामय कुंजर टेरचो रह्यो नहीं बल जाको । लागि पुकार तुरत छुटकायो काटचो बंधन वाको ॥
 अंबरीषको शाप देन गयो बहुरि पठायो ताको । उलटी गाढ़ परी दुर्वासा दहत सुदर्शन जाको
 निधरक है पंडवसुत डोलैं हुतो नहीं डर काको । चारों वेद चतुर्मुख ब्रह्मा यश गावतहैं ताको ।
 छोरी बंदि विदा करि राजा राजा होइ कि रांको । जरासंधको जोर उधेरचो फारि कियो द्वै फांको ॥
 सभा मौझ द्रौपदी पति राखी पति जानै गुन जाको । बसन ओट करि कोट विश्वंभर परन न पायो
 झांको ॥ भीर परे भीषम प्रण राख्यो अर्जुनको रथ हाँको । रथते उतर चक्र कर लीनो भक्त
 बछल प्रण ताको ॥ गोपीनाथ सूरको स्वामी है समुद्र करुणाको । नरहरि हरि हरनाकुश मारचो
 काम परचो हो बांको ॥ ५४ ॥ राग कान्हरा ॥ तुम्हरी कृपा गुपाल गुसाई मैं अपने अज्ञान न
 जानत । उपजत दोष नयन नहिं सूझत रविकी किरनि उलूक न मानत ॥ सब सुखनिधि हरि
 नाम महातम पायोहैं नाहिन पहिंचानत । परम कुबुद्धि तुच्छ रस लोभी कौड़ी बदले मगरज
 छानत ॥ शिवको धन संतनको सर्वस महिमा वेद पुराण बखानत । इते मान यह सूर महाशठ
 हरि नग बदलि विषयखरि आनत ॥ ५५ ॥ राग विलावल ॥ अपुने जान मैं बहुत करी । कौन भांति
 हरि कृपा तुम्हारी सो स्वामी समुझी न परी ॥ दूरि गयो दर्शनके ताई व्यापक प्रभुता सब बिसरी ।
 मनसा वाचा कर्म अगोचर सो मूरति नहिं नैन धरी ॥ गुणबिनु गुणी स्वरूप रूप बिनु नाम लेत
 श्री श्याम हरी । कृपासिंधु अपराध अपरमित क्षमो सूरते सब बिगरी ॥ ५६ ॥ तुम गोपाल
 मोसों बहुत करी । नर देही दीनी सुमिरनको मो पापीते कछु न सरी ॥ गर्भवास अति त्रास अधो-
 मुख तहां न मेरी सुधि बिसरी । पावक जठर जरन नहिं दीनों कंचन सी मेरी देह धरी ॥ जगमें
 जन्म पाप बहु कीने आदि अंत लौं सब बिगरी । सूर पतित तुम पतित उधारन अपने बिरद
 कि लाज धरी ॥ ५७ ॥ राग धनाश्री ॥ माधवजू जो जनते बिगरी ॥ तउ कृपालु करुणामय केशव प्रभु नहिं
 जीय धरै ॥ जैसे जननि जठर अंतर्गत सुत अपराध करै । तउ पुनि जतन करै अरु पोषै निकसे
 अंक भरै ॥ यद्यपि मलय वृक्ष जड काटत कर कुठार पकरै । तउ सुभाव सुगंध सुशीतल रिपु
 तनु ताप हरै ॥ ज्यों हल गहि धर धरत कृपी बल वारि बीज बिथुरै । सहि सन्मुख त्यों शीत
 उष्णको सोई सुफल करै ॥ द्विज रसना जो दुखित होइ बहु तौ रिस कहाकरै । यद्यपि
 अंग विभंग होतहैं लै समीप सँचरै ॥ कारण करण दयालु दयानिधि निज भय दीन डरै ।
 इहि कलिकाल व्याल मुख ग्रासित सूर शरन उबरै ॥ ५८ ॥ राग कान्हरा ॥ दीनानाथ अब
 वार तुम्हारी । पतित उधारन बिरद जानिकै बिगरी लेहु सँवारी ॥ बालापन खेलतही खोयो
 युवा विषय रस माते । वृद्ध भये सुधि प्रगटी मोको दुखित पुकारत ताते ॥ सुतनि तज्यो तिय
 तज्यो ध्रात तजि तन त्वच भई जु न्यारी । श्रवण न सुनत चरण गति थाकी नैन भये जलधारी ॥
 पलित केश कफ कंठ विरोध्यों कल न परी दिन राती । माया मोह न छाडै तृष्णा ए दोऊ
 दुख दाती ॥ अब या व्यथा दूरि करिबेको और न समरथ कोई । सूरदास प्रभु करुणा सागर तुमते
 होइ सु होई ॥ ५९ ॥ राग आसावरी ॥ पतित पावन जानि शरन आयो । उदाधि संसार शुभ

नाम नौका तरन अटल स्थान निज निगम गायो ॥ व्याध अरु गीध गणिका अजामेल
 द्विज चरण गौतमनारि परश पायो । अंत औसर अर्थ नाम उच्चार करि सुनत गज ग्राहते तुम
 छुड़ायो ॥ अबल प्रह्लाद बलदैत्य सुखही बचत दास ध्रुव चरण चित शीश नायो । पांडुसुत
 विपत मोचन महादास लखि द्रौपदी चीर नाना बढ़ायो ॥ भक्तवत्सल कृपानाथ अशरण
 शरण भार भूतल हरन यश सुहायो । सूर प्रभु चरण चित चेत चेतन करत ब्रह्म शिव
 शुक आदि शेष गायो ॥ ६० ॥ राग आसावरी ॥ श्रीनाथ शारंगधर कृपाकर दीनपर डरत
 भव त्रासते राखिलीजै । नाहिं जप नाहिं तप नाहिं सुमिरन भक्ति शरण आयेनकी लाज
 कीजै ॥ जीव जलधर जिते भेष धरि धरि तिते रचे लघु दीर्घ बहु अचलभोर । सुशाल सुदूर
 हनत त्रिविध कर्मनि गनत मोहिं दंडत धर्म दूत हारे ॥ वृषभ केशी मल्ल धेनुक अरु
 पूतना रजक चाणूरसे दुष्ट तारे । अजामिल गणिक ते कहा मैं घट कियो तुम जु अब
 सूर चितते बिसारे ॥ ६१ ॥ कबहुँ नाहीं गहर कियो । सदा स्वभाव सुलभ
 सुमिर न वश भक्तनि अभय दियो ॥ गाय गोप गोपी हित कारण गिरि कर कमल लियो ॥ अघ
 अरिष्ट केशी कालीनथ दावानलहिं पियो ॥ कंस वंश वधि जरासंध हति गुरुसुत आनि दियो ।
 कर्पत सभा द्रुपदतनयाको अंबर अक्षय कियो ॥ सूर श्याम सर्वज्ञ कृपानिधि करुणा मृदुल
 हियो । काकी शरण जाउँ करुणामय नाहिन और बियो ॥ ६२ ॥ राग सारंग ॥ ताते तुमरो
 भरोसो आवै । दीनानाथ पतित पावन यश वेद उपनिषद गावै ॥ जो तुम कहौ कौन खल
 तारयो तौ हौं बोलों साखी । पुत्र हेतु हरिलोक गयो द्विज सक्यो न कोऊ राखी ॥ गणिका कियो
 कौन व्रत संयम शुक हित नाम पढ़ावै । मनसा करि सुमरयो गज बपुरो ग्राह परमगति पावै ॥
 बकी जु गई घोष में छल करि यशुदाकी गति दीनी । और कहत श्रुति वृषभ व्याधकी जैसी गति
 तुम कीनी ॥ द्रुपदसुताहि दुष्ट दुर्योधन सभा माहिं पकरावै । ऐसो कौन और करुणामय
 वसन प्रवाह बहावै ॥ दुखित जानिकै सुत कुबेरके तिहि लागि आप बैधावै । ऐसो को ठाकुर
 जन कारन दुख सहि भलो मनावै ॥ दुर्वासा दुर्योधन पठयो पंडव अहित विचारी । सुमिरत तीनों
 लोक अघाए न्हात भज्यो कुश डारी । देवराज मख भंग जानिकै बरस्यो ब्रजपर आई । मूर
 श्याम राखे सब निज कर गिरि लै भए सहाई ॥ ६३ ॥ राग धनाश्री ॥ दीनको दयालु सुन्यो अभय
 दान दाता । सांची बिरुदावलि तुम जगतके पितु माता ॥ व्याध गीध गणिका गज इहिमें को
 ज्ञाता । सुमिरत तुम तबहिं आये त्रिभुवन विख्याता ॥ केशी कंस दुष्ट मारि मुष्टिक कियो घाता ।
 अपने ध्रुव राज काज केतक यह बाता ॥ तीनलोक बिभव दियो तंदुलके खाता । सर्वसु प्रभु
 रीझि देत तुलसीके पाता ॥ गौतमकी नारि तारी नेकु परश लाता । और कुटिल तारि तारि काहे
 गर्वाता ॥ माँगत है सूर त्याग जिहि तन मन राता । अपुनी प्रभु भक्ति देहु जासों तुम नाता ॥ ६४ ॥
 राग मारू ॥ सो कहा जु मैं न कियो जो पै सोइ सोई चित धरि हौ । पतित पावन बिरद सांच
 कौन भांति करिहौ ॥ जब ते जग जन्म लियो जीव है कहायो । तबते छुट अवगुण इक नाम न कहि
 आयो ॥ साधुनिंदक स्वाद लंपट कपटी गुरु द्रोही । जितने अपराध जगत लागत सब मोही ॥
 गृह गृह गृह द्वार फिरयो तुमको प्रभु छाँडे । अंध अंध टेक चलै क्यों न परे गाँडे ॥ कमलनैन
 करुणामय सकल अंतर्दामी । बिनय कहा करै सूर कूर कुटिल कामी ॥ ६५ ॥ राग सारंग ॥
 कौन गति करिहौ मेरी नाथ । हौंतो कुटिल कुचील कुदरशन रहत विषयके साथ ॥ दिन बीतत

सूरसागर ।

(१२)

मायाके लालच कुल कुटुंब के हेत । सारी रैन नींद भरि सोवत जैसे पशू अचेत ॥ कागज धरनि
 करैं दुम लेखनि जल सायर मसि घोर । लिखैं गणेश जन्म भर मम कृत तऊ दोष नहिं ओर । गज
 गणिका अरु विप्र अजामिल अगनित अधम उधारे । अपथ चाल अपराध करे मैं तिनहुं ते
 अति भारे ॥ लिखि लिखि मम अपराध जन्मके चित्रगुप्त अकुलाये । भृगु ऋषि आदि
 सुनत चकृत भये यम सुनि शीश डुलाये ॥ परम पुनीत पवित्र कृपानिधि पावन नाम
 कहायो । सूर पतित जब सुन्यो बिरद यह तब धीरज मन आयो ॥ ६६ ॥ राग केदारा ॥ मेरी
 कौन गति ब्रजनाथ । भजन विमुख अरु शरण नाहीं फिरत विषयिन साथ ॥ हौं पतित अप-
 राध पूरण जरयो कर्म विकार । काम क्रोध रु लोभ चितवन नाथ तुम्हैं बिसार ॥ उचित अपनी कृपा
 करिहौ तबै तौ बनिजाइ । सोइ करहु जो चरण सेवै सूर जूठानि खाइ ॥ ६७ ॥ राग धनाश्री ॥ सोइ
 कछु कीजै दीनदयाल । जाते जन छिन चरण न छाडै करुणासागर भक्तरसाल ॥ इन्द्रिय
 अजित बुद्धि विषयारत मनकी दिन दिन उलटी चाल । काम क्रोध मद लोभ महाभय
 अहनिश नाथ भ्रमत बेहाल ॥ योग यज्ञ जप तप तीरथ व्रत इन में एको अंक न भाल । कहा
 कहूं किहि भौंति रिझाऊं हौं तुमको सुन्दर बंदलाल ॥ सुनि समरथ सर्वज्ञ कृपानिधि अशरण
 शरण हरण जग जाल । कृपानिधान मूरकी यह गति कासों कहै कृपण यहि काल ॥ ६८ ॥
 ॥ राग गूजरी ॥ कृपा अब कीजिए बलि जाउं । नाहिं मेरे और कोऊ बलि चरण कमल
 विनु ठाउं ॥ हौं असोच अकृत अपराधी सन्मुख होत लजाउं । तुम कृपालु करुणानिधि
 केशव अधम उधारन नाउं ॥ काके द्वार जाइहौं ठाढो देखत काहि सुहाउं । अशरण शरण नाम
 तुमरो हौं कामी कुटिल सुभाउं ॥ कलँकी और मलीन बहुत मैं सैंतैमेंत बिकाउं । सूर पतित
 पावन पद अंबुज क्यों सो परिहरि जाउं ॥ ६९ ॥ राग सारंग ॥ दीनदयालु पतित पावन प्रभु विरद
 भुलावत कैसो । कहा भयो गज गणिका तारी जो जन तारो ऐसो ॥ जो कबहुं नर जन्म पाइ नहिं
 नाम तुम्हारो लीनो । काम क्रोध मद लोभ मोह तजि अंत नहीं चित दीनो ॥ अकरम अबुध अज्ञान
 अवाग्या अनमार्ग अनरीति । जाको नाम लेत अव उपजै सो मैं करी अनीति ॥ इन्द्री रस वश
 भयो भ्रमत रह्यो जोइ कह्यो सो कीनो । नेम धर्म व्रत तप नहिं संयम साधु संग नहिं चीनो ॥
 दूरश मलीन दीन दुर्बल अति तिन कैसे दुख दामी । ऐसो सूरदास जन हरिको सब अधमनि
 में नामी ॥ ७० ॥ राग देवगंधार ॥ मोहिं प्रभु तुम सों होड परी । नाजानों करिहौ जु कहा तुम नागर
 नवल हरी ॥ हुतों जिती तितनी मति गई सो मैं सबै करी । पावहुगे कहूँ मोमहि तारनकों जिय जक
 पकरी । मैं जु रहो राजीवनैन दुरि पाप पहार दुरी ॥ पावहु मोहिं कहो तारन को गूढ गंभीर
 खरी । एक अधार साधु संगतिको रचि पचि कै सँचरी । ज्यों गज शुचि नहाइ निरमल करि पुनि रज
 शीश धरी ॥ मोको मुक्त विचारत हो प्रभु पृच्छत पहर घरी । श्रम ते तुम्हें पसीना ऐहै कति यह जकनि करी ॥
 सूरदास बिनती कहा बिनवै दोषनि देह भरी । अपनो बिरद सँभारहुगे तब यामें सब निबरी ॥
 ॥ ७१ ॥ राग धनाश्री ॥ नाथ सकौ तौ मोहि उधारो । पतितनि में विख्यात पतितहौं पावन
 नाम तुम्हारो ॥ बडे पतित पासंगहु नाहीं अजामिल कौन विचारो । भाजै नरक नाम सुनि
 मेरो यमनि दियो हठ तारो ॥ शुद्र पतित तुम तारि रमापति जिय जु करौ जिन गारो । सूर पतित
 को ठौर कहूं नहिं है हरि नाम सहारो ॥ ७२ ॥ तुम कब मोसों पतित उधारयो । काहे को
 प्रभु बिरद भुलावत बिन मसकत को तारयो ॥ गीध व्याध गज गौतम की तिय उनको कहा

निहोरो । गणिका तरी आपनी करनी नाम भयो प्रभु तोरो ॥ अजामील तो विप्र तुम्हारो हुतो
पुरातन दास । नेक चूक ते यह गति कीनी फिर वैकुण्ठहि बास ॥ पतित जानि तुम सब जन तारे
रह्यो न काहू खोट । तौ जानौं जो मोहिं तारिहौ सूर कूर कवि ठोट ॥ ७३ ॥ पतित पावन
हरि बिरद तुम्हारो कौने नाम धर्यो । हौंतौ दीन दुखित अति दुर्बल द्वारे रटत पर्यो ॥ चारि
पदारथ दण सुदामा तंदुल भेंट धर्यो । द्रुपदसुताकी तुम पति राखी अंबर दान कर्यो ॥ संदीपन
सुत तुम प्रभु दीने विद्या पाठ कर्यो । सूर कि बिरियां निठुर भये प्रभु मोते कछु न सर्यो ॥
॥ ७४ ॥ राग धनाश्री ॥ आजु हौं एक एक करि टरिहौं । कै हमहीं कै तुमहीं माधव अपुन भरोसे
लरिहौं ॥ हौं तो पतित सात पीढ़िनको पतितै है निस्तरिहौं । अब हौं उधरि नचन चाहत हौं
तुम्हैं बिरद बिनु करिहौं ॥ कत अपनी परतीत नशावत मैं पायों हरि हीरा । सूर पतित तवहीं
लैं उठिहैं जब हंसि देहौ बीरा ॥ ७५ ॥ राग नट ॥ कहावत ऐसे दानी । चारि पदारथ दये सुदामहिं
अरु गुरुको सुत आनी ॥ रावणके दश मस्तक छेदे शर गहि शारंग पानी । विभिषनको
तुम लंका दीनी पूर बली पहिचानी ॥ विप्र सुदामा कियो अयाची प्रीति पुरातन जानी । सूरदास
सों कहा निठुर भए नैनन हूकी हानी ॥ ७६ ॥ राग धनाश्री ॥ मोसों बात सकुच तजि कहिये । कत
कत ब्रीडत कोउ और बतावहु वाहीके है रहिये ॥ कैधौं तुम पावन प्रभु नाहीं कै कछु मोमै भोलो ।
तौहौं अपनी फेरि सुधारों वचन एक जो बोलो ॥ तीनों पनमें और निबाही इहै स्वांगको काछे ।
सूरदासको यहै बडो दुख परत सबनके पाछे ॥ ७७ ॥ राग सारंग ॥ प्रभुहौं बडी बेरको ठाढो । और पतित
तुम जैसे तारे तिनहीं में लिखि काढो ॥ युग युग यहै बिरद चलि आयो टेरि कहत हौं याते । मरियत
लाज पांच पतितन में होब कहौं घटकाते ॥ कै प्रभु हार मानिकै बैठहु कै करो बिरद सही ।
सूर पतित जो झूठ कहत है देखौ खोजि वही ॥ ७८ ॥ प्रभु हौं सब पतितन को टीको ।
और पतित सब दिवस चारिके हौं जन्मांतरहीको ॥ अधिक अजामिल गणिका तारी और पूत-
नाहीको । मोहिं छांड़ि तुम और उधारे मिटै शूल क्यों जीको ॥ कोउ न समरथ अव करिवेको
खैचि कहतहौं लीको । मरियत लाज सूर पतितनिमें हमहूँते को नीको ॥ ७९ ॥ हौंतौ
पतित शिरोमणि माधो । अजामील बातनहीं तार्यो सुन्यों जो मोते आधो ॥ कै प्रभु हार
मानिकै बैठहु कै अबहीं निस्तारौ । सूर पतितको और ठौर नहिं है हरि नाम सहारो ॥ ८० ॥
माधो जू और न मोते पापी । घातक कुटिल चवाई कपटी महा क्रूर संतापी ॥ लंपट धूत
पूत दमरीको विषय जाप को जापी ॥ भक्ष अभक्ष अपेय पान करि कवहुँन मनसा धापी ।
कामी विवश कामिनीके रस लोभ लालसा थापी । मन क्रम वचन दुसह सबहिन सों कटुक बचन
आलापी ॥ जेतिक अधम उधारे तुम प्रभु तिनकी गति मैं नापी । सागर सूर भर्यो विकार जल
पतित अजामिल वापी ॥ ८१ ॥ राग कान्हरा ॥ हरिहौं सब पतितन पतितेश । और न सर करिवेको
दूजो महामोह मम देश ॥ आंशाके सिंहासन बैअ्यो दंभ छत्र शिरतान्यो । अपयश अति नकीब
कहि टेर्यो सब शिर आय समान्यो ॥ मंत्री कामक्रोध निज दोऊ अपनी अपनी रीति । दुबिधा दुंद-
होत निशि बासर उपजावति विपरीति ॥ मोदी लोभ खवास मोहके द्वारपाल अहंकार । पाठ अहं
ममताहै मेरी मायाको अधिकार ॥ सेवक तृष्णा भ्रमत टहल हित लहत न छिन विश्राम । अनाचार
सेवक सों मिलिकै करत चवावन काम ॥ वाज मनोरथ गर्व मत्त गज असत कुमति रथ सूत । पाइक
मन बानैत अधीरज सदा दुष्ट मति दूत ॥ गढ़ तजि भये नरकपति मोसों दीने रहत किंवार । सेना

साथ बहुत भाँतिनकी कीने पाप अपार ॥ निंदा जग उपहास करत मग बंदीजन यश गावत ।
हठ अन्याय अधर्म सूर नित नौबत द्वार बजावत ॥ ८२ ॥ राग धनाश्री ॥ सांचो सो लिख हार कहावै ।
काया ग्राम मसाहत करिकै जमा बांधि ठहरावै । मन यह तो करि कैद अपनेमें ज्ञान जहतिया लावै
मांडि मांडि खरिहान क्रोधको पोता भजन भरावै ॥ बड़ा काट कसूर भर्म को फरद तलै
लै डारै । निश्चय एक असल पै राखै टारै न कबहुं टारै ॥ करि अवधारजा प्रेम प्रीतिको असल
तहां खतियावै । दूजी करद दूर करि है यत नैकत तामें आवै ॥ मुजमिल जोरै ध्यान कुछ का
हरिसों तहँ लै राखे । निर्भय रूपै लोभ छाँडि कै सोई वारिज राखे ॥ जमा खर्च नीके करि राखै
लेखा समुझि बतावै । सूर आप गुजरान मुहासिब लै जबाब पहुँचावै ॥ ८३ ॥ प्रभु जु
मैं ऐसो अमल कमायो । साविक जमा हुती जो जोरी मिनजालिक तल लायो ॥ वासिलबाकी
स्याहा मुजमिल सब अधर्म की बाकी । चित्रगुप्त होत मुस्तौफी शरण गहूं मैं काकी ॥ पांच
मुहरिँर साथ करि दीने तिनकी बडी विपरीत । जिम्मे उनके माँगै मोते यह तौ बडी अनीत ॥
पांच पचीस साथ अगवानी सब मिलि काज बिगारे । सुनी तगीरी मेरी बिसरि गई सुधि मो तजि
भये नियारे ॥ बड़ो तुम्हार बरामद हू को लिखि कीनो है साफ । सूरदासकी यहै बीनती दस्तक
कीजै माफ ॥ ८४ ॥ राग सारंग प्रभु हों सब पतितनको राजा । निंदा परमुख पूरि रह्यो जग
यह निसान तब बाजा ॥ तृष्णा देश रु सुभट मनोरथ इन्द्रिय खड्ग हमारे । मंत्री काम कुमति देवै
को क्रोध रहत प्रतिहारे ॥ गज अहंकार बढ्यो दिग विजयी लोभ छत्र करि शीश । फौज असत
संगतिकी मेरी ऐसो हों मैं ईश ॥ मोह मई बंदी गुण गावत मागध दोष अपार । सूर पापको गढ
दृढ़ कीनो मुहकमलाइ किंवार ॥ ८५ ॥ राग धनाश्री ॥ हरि हों सब पतितनको राव । को करि सकै
बरावरि मेरी सो तौ मोहिं बताव ॥ व्याघ गीघ अरु पतित पृतना तिनमें बढि जो और । तिनमें अजा-
मेल गणिकापति उनमें मैं शिरमौर ॥ जहँ तहँ सुनियत यहै बडाई मो समान नहिं आन । अब
रहे आजु कालिके राजा मैं तिनमें सुलतान ॥ अवलौं तौ तुम विरद बुलायो भई न मोसों भेंट ।
तजौं विरद कै मोहिं उधारो सूर गही कसि फेंट ॥ ८६ ॥ राग सारंग ॥ हरि हों सब पतितनको
नायक । को करि सकै बरावरि मेरी और नहीं कोउ लायक ॥ जैसो अजामेलको दीनो सो पाटौ
लिखि पाऊं । तो विश्वास होइ मन मेरे औरौ पतित बुलाऊं ॥ यह मारग चौगुनो चलाऊं तो पूरो
व्यापारी । वचन मानि लै चली गाँठि दै पाऊं सुख अति भारी ॥ पतित उधारन नाम सुन्यौ जब
शरन गही तकि दौर । अब कै तौ अपनी लै आयों बेर बहुर की और ॥ होडा होडी मनहि भावते
किये पाप भरि पेट । सबै पतित पाँइन तर डारौ इहै हमारी भेंट ॥ बहुत भरोसो जानि तुम्हारो
अघ कीनो भरि भाडो । लीजै वेगि निबेरि तुरंतहि सूर पतित को टाडो ॥ ८७ ॥ राग धनाश्री ॥
मोसों पतित न और गुसाँई । अवगुण मोते अजहुं न छूटत भली तजी अब तौई ॥ जन्म जन्म योही
भ्रमि आयो कपि गुंजा की नाँई ॥ परशत शीत जात नहिं क्यौंहू लैलै निकट बनाई ॥ मोह्यो जाइ
कनक कामिनि सों ममता मोह बढ़ाई । जिह्वा स्वाद मीन ज्यों उरझ्यो सूझत नहिं फंदाई ॥ सोवत
मुदित भयो स्वप्ने में पाई निधि जु पराई । जागि परचो कछु हाथ न आयो यह जगकी
प्रभुताई ॥ परशे नहिं चरण गिरिधरके बहुत करी अन्याई । सूर पतितको ठौर और नहिं
राखि लेहु शरणाई ॥ ८८ ॥ हरि हों महा पतित द्रोही अभिमानी । परमारथसों पीठि विषयरस
भाव भगति नहिं जानी ॥ निशि दिन दुखित मनोरथ करि करि पावत हूं तृष्णा न बुझानी । शिर

पर काल नीच नहीं चितवत आयु घटत ज्यों अँजुरी पानी ॥ विमुखनि सों रति जोरत दिन प्रति
साधुन सों न कहूं पहिचानी । तिहि बिनु रहत नहीं निशि बासर जिहि सब दिन रस विषय बखानी ।
माया मोह लोभ नहीं जाने ऐसो वृन्दावन रजधानी । नवल किशोर जलद तनु सुन्दर बिसरयो
सूर सकल सुखदानी ॥ ८९ ॥ माधव जू मोहिं काहेकी लाज । जन्म जन्म योहीं
भरमान्यो अभिमानी बे काज ॥ जल थल जीव जिते जग जीवन निरखत दुखित भये देव । गुण
अवगुणकी समझि न शंका परी आइ यह टेव ॥ सर्वस खाइ रह्यो घर बैज्यो करयो न कछु
विचारी । सूर श्वानके पालनहारे आवत है नित गारी ॥ ९० ॥ राग सारंग ॥ माधवजू सो अपरा-
धी हौं । जन्म पाइ कछु भलो न कीनो कहो सु क्यों निबहौं ॥ सबसों रीति कहत यमपुरकी
गज पिपीलिकालौं ॥ पाप पुण्यको फल दुख सुख है भोग करौ जुड़गों । मोको पंथ बताओ
सोई नरक कि स्वर्ग लहौं । काके बल हौं तरौं गुसाई कछु न भक्ति मो रहौं ॥ हँसि बोले जगदीश
जगत्पति बात तुम्हारी यों । करुणासिंधु कृपालु कृपानिधि भजो शरण को क्यों । बात सुने ते
बहुत हँसोगे चरण कमल की सौं । मेरी देह छुटत यम पठये जितक दूत घर में ॥ लैलै सब
हथियार आपुने सान धराये त्यों । जिनके दारुण दृश देखिके पतित करत म्यों म्यों ॥ दांत चबात
चले मधुपुरते धाम हमारे को । ढूँढि फिरे घर कोउ न बतावै श्वपच कोरिया लों ॥ रिस भरि
गए परम किंकर तब पकरयो छुटि न सकों । लै लै फिरे नगरमें घर घर जहां मृतक हौं हौं ॥ ता
रिसते मोहिं बहुतक मारयो कहैं लौं बराणि कहौं । हाय हाय मैं परयो पुकारयो राम नाम न बकौं ॥
ताल पखावज चले बजावत समधी सोभकों । सूरदासकी भली बनीहै गजी गई अरु पों ॥ ९१ ॥
राग कान्हरा थोरो जीवन बहुत न भारो । कियो न साधु समागम कबहुं लियो न नाम तुमारो ॥
अति उन्मत्त मोह माया वश नहीं कछु बात विचारो । करत उपाव न पूछत काहु गनत न
खाटो खारो ॥ इन्द्री स्वाद विवश निशि वासर आप अपुनपो हारयो । जल उनमत्त मीन ज्यों
बपुरो पाउं कुलहारो मारयो ॥ बांधी मोट पसारि त्रिविध गुण कहू न बीच उतारयो । देख्यो मूर
विचारि शीश परितब तुम शरण पुकारयो ॥ ९२ ॥ राग धनाश्री अब मैं नाच्यों बहुत गुपाल ।
काम क्रोध को पहिरि चोलना कंठ विषयकी माल ॥ महामोहको नेपुर बाजत निंदा शब्द रसाल ।
भरम भये मन भयो पखावज चलत कुसंगत चास प्रभु हारु नाद करत घट भीतर नाना विधि
दे ताल । मायाको कटि फेटा बांध्यो लोभ तिलमूँहें हमारी लाज ॥ कोटिक कला कांछि देखराई
जल थल सुधि नहीं काल । सूरदास की हेरे । तुम प्रताप न करो नैदलाल ॥ ९३ ॥
ऐसी करत अनेक जन्म गये मन संतोष न अंग बहुत अनेरे । धैर्य दुराशा लाग्यो सकल लोक
भरमायो ॥ सुनि सुनि स्वर्ग रसातल भूतल ॥ हमे न नन्द धायो । काम क्रोध मद लोभ अग्नि
ते काहु न जरत बुझायो ॥ सक चंदन वनिता वनोद सुख यह जर जरन बितायो । मैं अज्ञान
अकुलाइ अधिक लै जरत माझ घृत नायो । भ्रमि भ्रमि हौं हारयो हिय अपने देखि अनल जग
छायो । सूरदास प्रभु तुम्हारे कृपा बिनु कैसे जात नशायो ॥ ९४ ॥ वादिहि जनम
गयो सिराइ । हरि सुमिरन नहीं गुरुकी सेवा मधुबन बस्यो न जाइ ॥ अबकी बेर मनुष्य देह धरि
भजो न आन उपाइ । भटकत फिरयो श्वान की नाई नेक जुंठ के चाइ ॥ कबहुं न रिझये लाल
गिरिधरन विमल विमल यश गाइ ॥ प्रेम सहित पग बांधि घूँघरु सक्यों न अंग नचाइ ॥ श्री भाग-
वत सुन्यो नहीं श्रवणनि नेकहुं रुचि उपजाइ । अनन्य भक्ति नरहरि भक्तनिके कबहुं न धोए

पाइ ॥ कहा कहाँ जो अद्भुत है वह कैसे कहूँ बनाइ । भव अंभोधि नाम निज नौका सूरहिं
 लेउ चढाइ ॥ ९५ ॥ राग गौरी ॥ माधव जू तुम कत जिय बिसरयो । जानत सब अंतरकी
 करणी जो मैं कर्म करयो ॥ पतित समूह सबै तुम तारे हुते जु लोग भरयो । हौं उनसैं न्यारो
 करि डारयो इहि दुख जात मरयो ॥ फिरि फिरि योनि अनंतनि भरयो अब सुख
 शरण परयो । इहि अवसर कत बांह छुडावत इहि डर अधिक डरयो ॥ हौं पापी तुम
 पतित उधारन डारे हो कत देत । जो जानत यह सूर पतित नहिं तौ तारो निज हेत ॥ ९६ ॥
 राग केदारा ॥ जो पै तुमही विरद बिसरयो । तो कहो कहाँ जाउँ करुणामय कृपण कर्मको
 मारयो ॥ दीनदयालु पतितपावन यश वेद बखानत चारयो ॥ सुनियत कथा पुराणनि गणिका
 व्याध अजामिल तारयो ॥ राग द्वेष विधि अविधि अशुचि शुचि जिन प्रभु जितै सँभारयो ।
 कियो न कहूँ बिलम्ब कृपानिधि सादर सोच निवारयो ॥ अगणित गुण हरि नाम तुम्हारे अजा
 अपुनपौ धारयो । सूरदास प्रभु चितवत कोहे न करत करत श्रम हारयो ॥ ९७ ॥ राग सारंग ॥
 जैसे और बहुत खल तारे । चरण प्रताप भजन महिमा सुख को कहि सकै तिहारे ॥ दुःखित
 गीध दुष्ट मति गणिका नृगै कूप उधारे । विप्र बजाइ चलयो सुतके हित काटि महाअघ भारे ॥
 व्याध दुरद गौतमकी नारी कहो कौन ब्रत धारे । केशी कंस कुवाल्या मुष्टिक सब सुख धाम
 सिधारे ॥ उरजनिको विष बांटे लगायो यशुमतिकी गति पाई । रजक मल्ल चाणूर दवानल दुख
 भंजन सुखदाई ॥ नृप शिशुपाल महा पद पायो सर औसर नहिं जाने । अब बक तृणवर्त धेनुक
 इति गुण गहि दोष न माने ॥ पंडुवधू पटहीन सभामें कोटिन बसन पुजाए । विपति काल
 सुमिरत छिन भीतर तहीं तहीं उठि धाए ॥ गोप ग्वाल गोंसुत जल त्रासत गोवर्धन कर धारयो ।
 संतत दीन महा अपराधी कोहे सूर बिसरयो ॥ ९८ ॥ राग केदारा ॥ बहुरि की कृपाहु कहा
 कृपाल । विद्या मन जन दुखित जगतमें तुम प्रभु दीनदयाल ॥ जीबत यांचत कनकनि निर्धन
 दर दर रटत बिहाल । तनु छूटे ते धर्म नहीं कछु जौं दीजै मणिमाल ॥ कहा दाता जो द्रव्य न
 दीनहिं देखि दुखित कलिकाल । सूरश्यामको कहा निहरो चलत वेदकी चाल ॥ ९९ ॥
 कौन सुनै यह बात हमारी । समरथ और न देखों तुम बिनु कासों बिथा कहाँ बनवारी ॥
 तुम अवगत अनाथके स्वामी दीनदयालु निकुंज बिहारी । सदा सहाय करी दासनि को
 जो उर धरी सोई प्रतिपारी ॥ अब केहि शरण जाउँ यादवपति राखि लेहु बलि त्रास निवारी ।
 सूरदास चरणनिके बलि बालि कौन गुसाते कृपा बिसारी ॥ १०० ॥ राग कल्याण ॥ जैसे राखहु तै-
 सहि रहौ । जानत दुख सुख सब जनके दुखहि सुख करि कहा कहाँ ॥ कबहुँक भोजन लहौ
 कृपानिधि कबहुँ भूख सहौ । कबहुँक चढा तुरंग महागज कबहुँक भार बहौ ॥ कमलनयन
 घनश्याम मनोहर अनुचर भयो रहौ । सूरदास प्रभु भक्त कृपानिधि तुम्हरे चरण गहौ ॥ १०१ ॥
 राग धनाश्री ॥ कब लागि फिरि है दीन भयो । सुरत सरित भ्रम भँवर परयो तन मन परचत न
 लह्यो ॥ वात चक्र तृष्णा प्रकृति मिलि हौं तृण तुच्छ गहौ । उरइयो विवश कर्म तरु अंतर
 श्रम सुख शरण चरयो ॥ बिनती करत डरात कृपानिधि नहीं न परत रह्यो । सूर करन वर
 रच्यो जू निज कर सो कर नाहिं गह्यो ॥ १०२ ॥ तेऊ चाहत कृपा तुम्हारी । जेहिंके वश अनमिष
 अनेक गण अनुचर आज्ञाकारी ॥ बहत पवन भरमत दिनकर दिन फनपति शिर न डुलावै ।

दाहक गुण तजि सकत न पावक सिंधु न सलिल बहावै ॥ शिव विरंचि सुरपति समेत
 अब सेवत प्रभु पद चाये । जो कछु करन चहत सो कीजत करत है अति
 अकुलाये ॥ तुम अनादि अविगत अनंत गुण पूरण परमानंद । सूरदास पर कृपा करौ
 प्रभु श्रीवृन्दावन चन्द ॥ १०३ ॥ राग मलार ॥ तुम तजि कौन नृपति के जाऊं । काके द्वार जाय
 शिर नाऊं पर हथ कहाँ बिकाऊं ॥ ऐसो को दाताहै समरथ जाके दए अघाऊं । अंतकाल
 तुमरो सुमिरन गति अनत कहूं नहिं जाऊं ॥ रंक अयाची कियो सुदामा दियो अभयपद ठाऊं ।
 कामधेनु चिंतामणि दीनो कल्पवृक्ष तरु छाऊं ॥ भव समुद्र अति देखि भयानक मनमें अधिक
 डराऊं । कीजै कृपा सुमिरि अपनो प्रण सूरदास बलि जाऊं ॥ १०४ ॥ राग मारू ॥ मेरी तौ गति
 पति तुम अंतहि दुख पाऊं । हौं कहाइ तिहारौ अब कौनको कहाऊं । कामधेनु छाँडि कहा अजा जा
 दुहाऊं । हय गयंद उतरि कहा गर्दभ चढि धाऊं ॥ कंचन मणि खोलि डारि कांच गर बँधाऊं । कुं-
 कुमको तिलक मेढि काजर मुख लाऊं ॥ पाटंबर अंबर तजि गूदर पहिराऊं । अंबको फल
 छाँडि कहाँ सेवर को धाऊं ॥ सागरकी लहर छाँडि खार कत अन्हाऊं । सूर कूर आँधरो मैं द्वार
 परचो गाऊं ॥ १०५ ॥ राग आसावरी ॥ श्याम बलराम को सदा गाऊं । श्याम बलराम बिनु दूसरे
 देव को स्वप्न हू माहिं हृदय न लाऊं ॥ यहै जप यहै तप यम नियम व्रत यहै यहै मम प्रेमफल यहै
 पाऊं ॥ यहै मम ध्यान यह ज्ञान सुमिरन यहै सूर प्रभु देहु हौं यहै पाऊं ॥ १०६ ॥ राग देवगंधार ॥
 मेरी जिये सु असी बनी । छाँडि गुपाल और जो जाचौ तो लीजै जननी ॥ कहा कांचको संग्रह कीजै
 त्याग अमोल मनी । विषको मेरु कहाँलों कीजै अमृत एक कनी ॥ मन वच क्रम सतभाउ कहतहौं
 मेरे श्याम धनी । सूरदास प्रभु तुमरी भक्ति लागि तजी जाति अपनी ॥ १०७ ॥ मेरो मन अनत
 कहाँ सुख पावै । जैसे उडि जहाजको पक्षी फिर जहाज पर आवै ॥ कमल नैनको छाँडि महा-
 तम और देव को धावै । परमगंग को छाँडि पियासो दुर्मति कूप खनावै ॥ जिन मधुकर अंबुज रस
 चाख्यो क्यों करील फल खावै । सूरदास प्रभु कामधेनु तजि छेरी कौन दुहावै ॥ १०८ ॥ राग
 सारंग ॥ तुम्हारी भक्ति हमारे प्रान । छूटि गये कैसे जन जीवत ज्यों पानी बिन प्रान ॥ जैसे मगन
 नाद सुनि सारंग बधत अधिक तनु बान । ज्यों चितवे शशि ओर चकोरी देखतही सुखमान ॥ जैसे
 कमल होत परि फूलित देखत दर्शन भान । सूरदास प्रभु हरि गुण मीठे नित प्रति सुनियत कान
 ॥ १०९ ॥ राग धमाश्री ॥ जो हम भले बुरे तौ तेरे । तुम्हैं हमारी लाज बढाई बिनती सुन प्रभु मेरे ॥
 सब तजि तुम शरणागत आयो निज कर चरण गहरे । तुम प्रताप बल बढत न काहू निडर भये
 घर चरे ॥ और देव सब रंक भिखारी त्यागे बहुत अनेरे । सूरदास प्रभु तुमारी कृपाते
 पायो सुख जु घेनेरे ॥ ११० ॥ राग बिलावल ॥ हमे नैदंनदन मोल लिये । यमके फंद काटि
 मुकराए अभय अजात किये ॥ भाल तिलक श्रवणनि तुलसी दल मेढे अंक बिये । मूँडे मूड कंठ
 बनमाला मुद्रा चक्र दिये ॥ सब कोउ कहत गुलाम श्यामको सुनत सिरात हिये । सूरदास को
 ओर बडो सुख जूँठनि खाइ जिये ॥ १११ ॥ हरि हरि हरि हरि सुमिरन करौ । हरि चरणारविंद उर धरौ ।
 हरिकी कथा होइ जब जहाँ । गंगाहू चलि आवै तहाँ ॥ यमुना सिंधु सरस्वति आवै गोदावरी विलंब न
 लावै ॥ सर्व तीर्थको बासा तहाँ । सूर हरि कथा होवै जहाँ ॥ ११२ ॥ श्रीभागवत वर्णन निमित्त ॥ राग सारंग ॥ श्री
 मुख चारि श्लोक दिये ब्रह्मा को समुझाइ । ब्रह्मा नारदसों कहे नारद व्यास सुनाइ ॥ व्यास कहे शुकदेव
 सों द्वादश स्कंध बनाइ ॥ सूरदास सोई कहै पद भाषा करि गाइ ॥ ११३ ॥ व्याससों शुक उत्पत्ति राग बिलावल ॥

व्यास कह्यो जो शुक सों गाई । कहों सु सुनो संत चित लाई ॥ व्यास पुत्र हित बहुत तप कियो ।
 तब नारायण यह वर दियो ॥ है है पुत्र भक्त अतिज्ञानी । जाकी जग में चलै कहानी ॥ यह हृदय
 हरि कियो उपाई । नारद मुनि संशय उपजाई ॥ तब नारद गिरिजा पै गये । तिनसों यहि विधि
 पूछत भये ॥ मुंडमाल शिव ग्रीवा जैसे । मोसो वरणि सुनावो तैसे ॥ उमा कही मैं तो नहिं
 जानी । अरु शिवहू मोसों न बखानी ॥ नारद कह अब पूछहु जाई । बिनु पूछे नहिं देइ बताई ॥
 उमा जाइ शिवको शिरनाई । कह्यो सुनो बिनती सुरराई । मुंडमाल कैसे तब ग्रीवा । ताकी
 मोहिं बतावहु सींवा ॥ शिव तब बोले वचन रसाल । उमा आहि यह सुनि मुंडमाल ॥ जब जब
 जन्म तुम्हारो भयो । तब तब मुंडमाल मैं लयो ॥ उमा कह्यो शिव तुम अविनाशी । मैं तुम्हरे
 चरणनकी दासी ॥ मेरे हित इतनो दुख भरत । मोहिं अमर काहे नहिं करत ॥ तब शिव उमा
 गये ता ठौर । जहाँ नहीं द्वितिया कोउ और ॥ सहस नाम तहाँ तिन्हें सुनावो । जाते आप अमर पद
 पावो ॥ तहां हुतो इक शुकको अंग । तिन यह सुन्यो सकल परसंग ॥ ताको शिव मारनको धायो ।
 तिन उडि अपुनो आप बचायो ॥ उड़त उड़त शुक पहुँच्यो तहां । नारि व्यासकी बैठी जहाँ ॥ शिवहू
 ताके पाछे धाए । पै ताको मारन नहिं पाये ॥ व्यास नारि तबहीं मुख बायो । तब तनु ताजि मुख
 माहिं समायो ॥ द्वादश वर्ष गर्भ में रह्यो ॥ व्यास भागवत तब तिहि कह्यो ॥ बहुरो जब यदुपति
 समुझायो । तेरी माता बहु दुख पायो ॥ तू जेहि हित बाहर नहिं आवै । सो हमसों कहि क्यों न
 सुनावै ॥ प्रभु तुव माया मोहिं सतावत । ताते हौं बाहर नहिं आवत ॥ हरि कह्यो अब न व्यापि
 है माया । तब वह गर्भ छांडि जग आया ॥ माया मोह ताहि नहिं दह्यो । सुन्यो ज्ञान सो सुमिरन
 रह्यो ॥ जैसे शुकको व्यास पढायो । सूरदास तैसे कहि गायो ॥ ११४ ॥ श्रीभागवत वक्ता श्रोता
 प्रस्ताव वर्णन । राग विलावल ॥ व्यासदेव जब शुकहि पढायो । सुनिकै शुक सो हृदय बसायो ॥
 शुक सों नृपति परीक्षित सुन्यो । तिन पुनि भली भाँतिकै गुन्यो ॥ सूत शौनकनिसों पुनि कह्यो ।
 विदुर भैत्रेयसों पुनि लह्यो ॥ सुनि भागवत सबनि सुख पायो । सूरदास सो वरणि सुनायो ॥ ११५ ॥
 सूत संवाद राग विलावल ॥ सूत व्यास सों हरि गुण सुने । बहुरो तिन निज मनमें गुने ॥ बहुरो
 नैमिषारपै आयो । तहां ऋषिनको दर्शन पायो ॥ ऋषिन कह्यो हरि कथा सुनावहु । भली
 भाँति हरिको गुण गावहु ॥ प्रथम कह्यो तिन व्यास अवतार । सुनौ सूर सो अब चित धार ॥
 ॥ ११६ ॥ व्यास अवतार वर्णन राग विलावल हरि हरि हरि हरि सुमिरन करौ । हरि
 चरणारविन्द उर धरौ ॥ व्यास जन्म भयो जा परकार । कहौं सो कथा सुनौ चितधार ॥ सत्यवती
 मच्छोदरि नारी । गंगातट ठाढी सुकुमारी ॥ पराशर ऋषि तहां चलि आए । विवश होइ तिनके मद
 धाए । ऋषि कह्यो ताहि दान रति देहि । मैं वर दीन्यो तोहिं सुलेहि ॥ तू कुमारिका बहुरो होई ।
 तोको नाउँ धरै नहिं कोई ॥ मेरो कह्यो न जो तू करि है । देउँ शराप महादुख भरि है ॥ सत्यवती
 शाप भय मान । ऋषिको वचन कह्यो परिमान ॥ व्यासदेव ताके सुत भये । होत जन्म बहुरो
 बन गये ॥ योजनगंधा माता करी । मच्छ बास ताकी तब हरी ॥ देखो काम प्रताप अधिकाई ।
 वश कियो पराशर ऋषिराई ॥ प्रबल शत्रु आहै यह मार । याते सुनौ चलौ संभार ॥ या विधि
 भयो व्यास अवतार । सूर कह्यो भागवत अनुसार ११७ ॥ श्रीभागवत आदि तरण कारण राग विलावल ॥
 भयो भागवत चारि प्रकार । कहौं सुनो सो अब चितधार ॥ सतयुग लाख वर्षकी
 आई । त्रेता दश सहस्र कह गाई ॥ द्वापर सहस्र एक रहि गई । कलियुग शत संवत रहि गई ॥

सोऊ कहन सुनन को भाई । कलि मर्याद कही नहीं जाई ॥ ताते हरि करि व्यास अवतार । करी
 संहिता वेद विचार ॥ बहुरि पुराण अठारह गाए । पै तोऊ शांती नहीं पाए ॥ तब नारद तिनके
 ढिग आय । चारि श्लोक कहे समुझाय ॥ ए ब्रह्मासों कहे भगवान । ब्रह्मा मोसे कहे बखान ॥
 सोई अब मैं तुमसों भाषे । कहौ भागवत इहि हिय राषे ॥ श्रीभागवत सुनै जो कोई । ताको हरि
 पद प्रापति होई ॥ ऊंच नीच व्योरो न बडाई । ताकी साखी मैं सुनि पाई ॥ जैसे लोहा कंचन
 होई । व्यास भई मेरी गति सोई ॥ दासीसुत ते नारद भयो । दुःख दासपनको मिटि गयो ॥
 व्यासदेव तब करि हरि ध्यान । कियो भागवतको व्याख्यान ॥ सुनै भागवत जो चित लाई । सूर
 सुहरि भजि भव तरि जाई ॥ ११८ ॥ राग सारंग ॥ कह्यो शुक श्रीभागवत विचार । जाति पांति
 कोऊ पूछत नहीं श्रीपतिके दरबार ॥ श्रीभागवत सुनै जो हित करि तै सु भव जलधार । सूर
 सुमिरि गुण रटि निशि बासर राम नाम निज सार ॥ ११९ ॥ नाम माहात्म्य वर्णन ॥ राग कान्हरा ॥
 बडी है राम नामकी ओट । शरण गये प्रभु काढ़ि देत नहीं करत कृपाके कोट ॥ बैठत सभा सबै
 हरि जूकी कौन बडो को छोट । सूरदास पारसके परसे मिटत लोहके खोट ॥ १२० ॥ राग धनाश्री ॥
 सोई भलो जु रामहि गावै । श्वपच प्रसन्न होइ बड सैवक बिनु गुपाल द्विज जन्म न भावै ॥ वाद
 विवाद यज्ञ व्रत साधै कतहुं जाइ जन्म डहकावै । होइ अटल जगदीश भजन में सेवा तासु चारि
 फल पावै ॥ कहूं ठौर नहीं चरण कमल बिनु भृंगी ज्यों दशहूं दिशि धावै । सूरदास प्रभु संत
 समागम आनंद अभय निसान बजावै ॥ १२१ ॥ राग सारंग ॥ काहुके बैर कहा सरे । ताकी सर
 वरि कैरे सु झूठो जाहि गुपाल बडो कैरे ॥ शशि सन्मुख जो धूर उडावै उलटि तिसिके मुख परै ॥
 चिरिया कहा समुद्र उलीचै पवन कहा पर्वत टरे ॥ जाकी कृपा पतित होइ पावन पग परसत
 पाहन तैरे । सूर केशनहि टारि सकै कोउ दाँत पीसि जो जगत मरै ॥ १२२ ॥ राग केदारा ॥
 है हरि भजन को परमान । नीच पावै ऊंच पदवी बाजते नीशान ॥ भजनको परताप ऐसो
 जल तैरे पाषान । अजामिल अरु भील गणिका चढे जात बिमान ॥ चलत तारे सकल मंडल
 चलत शशि अरु भान ॥ भक्त ध्रुवको अटल पदवी रामके दीवान ॥ निगम जाको सुयश गावत सुनत
 संत सुजान । सूर हरिकी शरण आयो राखि ले भगवान ॥ १२३ ॥ भगवान विदुर गृहे भोजन
 करन वर्णन राग विलावल ॥ हरि हरि हरि सुमिरौ सब कोई । ऊंच नीच हरि गिनत न दोई ॥ विदुर गेह
 हरि भोजन पाये । कौरवपतिको मन नहीं ल्याये ॥ कहौ सुकथा सुनौ मन लाई । सूर श्याम
 भक्तनि मन आई ॥ १२४ ॥ भए पांडवनिके हरि दूत । गये जहां कौरव पति धूत ॥ उनसों जो
 हरि वचन सुनाये । सूर कहत जो सुनि चित लाए ॥ १२५ ॥ सुनि राजा दुयोधन हम
 तुमपै आये । पांडुसुवन जीवित मिले है कुशल पठाए ॥ क्षेम कुशल अरु दीनता दण्डवत सुनाए ।
 कर जोरे बिनती फरी दुर्बल सुखदाए ॥ पांच गांव पांचौ जना करि किरपा दीजै । ए तुमरे कुल
 वंशहैं हमरी सुनि लीजै ॥ उनकी हमसों दीनता कोउ कहि न सुनावो । पांडु सुतनि अरु
 द्रौपदीको मारि कढावो ॥ राजनीति जानो नहीं गो सुत चरवारें । पीवहु छाँछ अचाइकै कब
 कैरे वारे ॥ गई गाँउके बेटला मेरे आदि सहाई । इनकी हम लज्जा नहीं तुम राज बडाई ॥ भीषम
 द्रोण कर्ण सुनै कोउ मुखहु न बोलै । ए पांडव क्यों काढिए धरणी डगडोलै । हम कछु लेन न
 देन हैं ए बीर तुम्हारे । सूरदास प्रभु उठि चले कौरवसुत हारे ॥ १२६ ॥ उद्धव प्रति वचन
 राग धनाश्री ॥ उद्धव चलो विदुर के जाइयै । दुर्योधनके कौन काज जहां आदर भाव न पाइयै ॥ गुरु

सूरसागर ।

(२०)

मुख नहीं बडे अभिमानी कापै सेव कराइयै । टूटी छानि मेघ जल वरपै टूटे पलंग बिछाइयै ॥
 चरण धोइ चरणोदक लीनो त्रिया कहै प्रभु आइयै । सकुचति फिरति जु वदन छिपावै भोजन
 कहा मैगाइयै ॥ तुमतो तीनि लोकके ठाकुर तुमते कहा दुराइयै । हमतौ प्रेम प्रीतिके गाहक भाजी
 शाक चखाइयै ॥ हँसि हँसि खात कहत मुख महिमा प्रेम प्रीति अधिकाइयै । सूरदास प्रभु
 भक्तनके वश भक्तन प्रेम बढ़ाइयै ॥ १२७ ॥ हरि ठाढे रथ चढे दुवारे । तुम
 दारुक आगे ह्वै देखहु भक्त भवन किछौ । अनत सिधारे ॥ सुनि सुंदरि उठि उत्तर दीनो कौरव
 सुत कछु काज हँकारे । तहँ आये यदुपति कहियतहँ कमल नयन हरि हितू हमारे ॥ तिहिको
 मिलन गयो मेरो पति ते ठाकुरहँ प्रभू हमारे । सूर प्रभू सुनि संभ्रम धाए प्रेम मगन तन बसन
 बिसारे ॥ १२८ ॥ प्रभुजू तुमहौ अंतर्यामी । तुम लायक भोजन नहिँ गृह में अरु नाहीं गृह स्वामी ।
 हरि कह्यो साग पत्र जो मोहिँ प्रिय अमृत या सम नाहीं । बारंबार सराहि सूर प्रभु शाक
 विदुर घर खाहीं ॥ १२९ ॥ भगवान् दुर्योधन संवाद । राग सोरठ ॥ क्यों दासीसुतके पाँव धारे ।
 भीषम कर्ण द्रोण मंदिर तजि मम गृह तजे सुरारे ॥ सुनियत दीन हीन वृषली सुत जाति पाँतिते
 न्यारे ॥ तिनके जाइ कियो तुम भोजन यदुक्ंशी सब लाजानि मारे ॥ हरिजू कहँ सुनो दुर्योधन
 सोइ कृपण मम चरण बिसारे । वेई भक्त भागवत वेई राग द्वेष ते न्यारे ॥ सूरदास प्रभु नंदनंदन
 कहँ हम ग्वालन जुठिहारे ॥ १३० ॥ राग सारंग ॥ हमते विदुर कहाहै नीको । जाके रुचिसों
 भोजन कीनो सुनियत सुत दासीको ॥ द्वै विधि भोजन कीजै राजा बिपति परे कै प्रीती । तेरी
 प्रीति न मोहिँ आपदा यहै बडी विपरीती ॥ ऊँचे मंदिर कौन काजके कनक कलश जु चढ़ाये ।
 भक्त भवन में मैं जु बसतहौं यद्यपि तृण करि छाये । अंतर्यामी नाम हमारो हौं अंतरकी जानो ।
 तदपि सूर भक्तवच्छलहौं भक्तन हाथ बिकानो ॥ १३१ ॥ हरि तुम क्यों न हमारे आए ।
 षटरस व्यंजन छांडि रसोई साग विदुर घर खाये ॥ ताकी हुगिया में तुम बैठे कौन बडापन
 पायो । जाति पाँति कुलहूते न्यारो है दासीको जायो ॥ मैं तुहि कहौं अरे दुर्योधन सुन तू
 बात हमारी । विदुर हमारो प्राण पियारो तू विषया अधिकारी ॥ जाति पाँति हौं
 सबकी जानौं बाहिर छाक मैगायो । ग्वालनिके संग भोजन कीनो कुलके लाज लगायो ॥ जहँ
 अभिमान तहां मैं नाहीं यह भोजन विष लागे । सत्य पुरुष बैठे घटहीमें अभिमानीको त्यागे ॥
 जहँ जहँ भीर परे भक्तनको तहां तहां उठि धाऊँ । भक्तनके हों संग फिरत हों भक्तन हाथ
 बिकाऊँ ॥ भक्तवच्छल है विरद हमारो वेद स्मृती हूँ गाये । सूरदास प्रभु यह निज महिमा भक्त-
 न काज बढ़ाये ॥ १३२ ॥ द्रौपदी सहाय ॥ राग विलावल ॥ हरि हरि हरि सुमिरौ सब कोई । नारि
 पुरुष हरि गनत न दोई ॥ दुपदसुताकी राखी लाज । कौरवपतिको पारचो ताज ॥ कहौं सु
 कथा सुनौ चित लाई । सूरश्याम भक्तन वनिआई ॥ १३३ ॥ कौरव पांसा कपट बनाये ॥
 धर्मपुत्रको जुवा खिलाये ॥ तिन हारचो सब भूमि भंडारी । हारी बहुरि द्रौपदी नारी ॥ ताको पकरि
 सभामें लाये । दुःशासन करि बसन छुड़ाये ॥ तब वह हरिसों रोइ पुकारी । सूर राखि मम लाज
 मुरारी ॥ १३४ ॥ राग सारंग ॥ अब कछु नाहीं नाथ रह्यो । सकल सभामें बैठि दुशासन अम्बर
 आनि गह्यो ॥ हारचो सब भंडार भूमि अरु अब बनवास लयो । एकै चीर हुतौ मेरे पर सो इन
 हरन चह्यो ॥ हा जगदीश राखि यहि अवसर प्रगट पुकारि कह्यो । सूरदास उमंगे दोउ नयना
 बसन प्रवाह बह्यो ॥ १३५ ॥ राग विलावल ॥ जेती लाज गोपालहि मेरी ॥ तितनी नाहिँ बधू हौं जाकी

अंबर हरत सबन तन हेरी ॥ पति अति रोष मारि मन महियां भीषम दई वेद विधि टेरी । हा
 जगदीश द्वारका स्वामी भई अनाथ कहत हौं टेरी ॥ बसन प्रवाह बढ्यो जब जान्यो साधु साधु
 सबहुन मति फेरी । सूरदास स्वामी यश प्रगट्यो जानी जनम जनमकी चेरी ॥ १३६ ॥
 राग धनाश्री ॥ निबहो बाँह गहेकी लाज । द्रुपदसुता भाषत नंदनन्दन कठिन भई है आज ॥
 भीषम कर्ण द्रोण दुर्योधन बैठे सभा विराज । तिहि देखत मेरो पट काढत लीक लगी तुम
 काज ॥ खंभ फारि हिरनाकुश मारयो ध्रुव नृप धरयो निवाज ॥ जनकसुता हित हत्यो लंकप-
 ति बांधो साइर गाज ॥ गदूद सुर आतुर तनु पुलकित नैननि नीर समाज । दुखित द्रौपदी
 जानि प्राणपति आये खगपति त्याज ॥ पूरे चीर बहुरि तनु कृष्णा ताके भरे जहाज । काढि काढि
 थाक्यो दुःशासन हाथनि उपजी खाज ॥ विकल अमान कह्यो कौरवपति पारयो शिरको ताज । सूर
 प्रभु यह रीति सदाही भक्त हेतु महाराज ॥ १३७ ॥ राग विहागरा ॥ ठाढी कृष्ण कृष्ण यों बोले ॥
 जैसे कोई बिपति परे ते दूरि धरयो धन खोले ॥ पकरयो चीर दुष्ट दुःशासन बिलख बदन भइ
 डोलै । जैसे राहु नीच ढिग आये चंद्र किरन झक झोलै ॥ जाके मीत नन्दनन्दनसे ढकि लइ पीत
 पटोलै । सूरदास ताको डर काको हरि गिरिवरके ओलै ॥ १३८ ॥ राग धनाश्री ॥ तुमरी कृपा
 बिनु कौन उबारै । अर्जुन भीम युधिष्ठिर राजा सुमति नकुल बल भारै ॥ केश पकरि लायो
 दुःशासन राखौ लाज सुरारे । नाना बसन बढाइ दियो प्रभु बलि बलि नंददुलारे ॥ नग्न न
 होति चकित भयो राजा शीश धुनै करसों कर मारे । जापै कृपा करै करुणामय को ताकी दिशि
 सकै निहारे ॥ जो जो जन निश्चय करिसेवै हरि प्रभु अपनो विरद सँभारे । सूरदास प्रभु अपने जननको
 कबहुं उरते नेकु न टारै ॥ १३९ ॥ स्त वचन शौनकनि प्रति ॥ राग विलावल ॥ हरि हरि हरि हरि सुमिरन करो ।
 हरि चरणारविंद उर धरौ ॥ हरि पंडवको ज्यों दियो राज । अरु पुनि गयो राज्य ज्यों त्याज ॥
 बहुरो भयो परीक्षित राजा । तिनको शाप विप्र सुत साजा ॥ सुनि हरि कथा मुक्ति सो भयो ॥
 स्त शौनकनिसों सो कह्यो ॥ कहाँ सो कथा सुनो चित धारै । सूर कहै भागवत अनुसार ॥
 ॥ १४० ॥ भीष्मोपदेश युधिष्ठिर प्रति ॥ राग विलावल ॥ हरि हरि हरि हरि सुमिरन करौ । हरि चरणारविंद
 उर धरौ ॥ भारत युद्ध होइ जब बीता । भयो युधिष्ठिर अति भयभीता ॥ कुरु कुल हत्या मोते
 भई । धौं अब कैसे करिहै दई ॥ करौं तपस्या पाप निवारौं । राजछत्र नाहीं शिर धारौं ॥ लोगन
 तिहि बहुविधि समझायो । पै तिहि मन संतोष न आयो ॥ तब हरि कह्यो टेक परिहरौ । भीष्म
 पितामह कहै सुकरौ ॥ हरि पांडवरण भूमि सिधाए । भीषम देखि बहुत सुख पाए ॥ हरि कह्यो
 राज्य न करत धर्मसुत । कहत हते मैं भ्रात भ्रात सुत ॥ गुरुहत्या मोते ह्वे आई । कहौ सु छूटै
 कौन उपाई ॥ राजधर्म भीषम तब गायो । दान आपदा मोक्ष सुनायो ॥ पै नृपको संदेह न गयो ।
 तब भीषम नृप सों पुनि कह्यो ॥ धर्मपुत्र तू देखि विचार । कारन करनहार करतार ॥ नरके
 किए कछु नहिं होई । करता हरता आपु हि सोई ॥ ताको सुमिरि राज्य तुम करौ । अहंकार चित
 ते परिहरौ ॥ अहंकार किये लागत पाप । सूरश्याम भजि मिटै संताप ॥ १४१ ॥ राग धनाश्री ॥
 करी गोपालकी सब होई । जो अपनो पुरुषारथ मानत अति झूठोहै सोई ॥ साधन मंत्र यंत्र
 उद्यम बल यह सब डारहु धोई । जो कछु लिखि राखी नंदनंदन मेदि सकै नहिं कोई ॥ दुख सुख
 लाभ अलाभ समुझि तुम कतहिं मरत हौं रोई । सूरदास स्वामी करुणामय श्याम चरण मन
 पोई ॥ १४२ ॥ राग कान्हरा ॥ होत सुजो रघुनाथ ठटी । पचि पचि रहे सिद्ध साधक सुनि तऊ बढी

न घटी ॥ योगी योग धरत मन अपने औ शिर राखि जटी । ध्यान धरत महादेव अरु ब्रह्मा
तिनहुँ सों न छटी ॥ जपि तपि तपसी आराधन कर चारों वेद रटी । सूरदास भगवंत भजन बिनु
कर्म रेख न कटी ॥ १४३ ॥ राग सारंग ॥ भावी काहु सों न टै । कहाँ वह राहु कहाँ वह रवि
शशि आनि संयोग पै ॥ मुनि वशिष्ठ पंडित अतिज्ञानी रचि पचि लग्न धरै । तात मरन सिय
हरन राम बन वपु धरि विपति भैरै ॥ रावण जीति कोटि तेतीसों त्रिभुवन राज्य करै । मृत्यु बांधि
कूप में राखै भावीवश सुमरै ॥ अर्जुनके हरि हितू सारथी सोऊ वन निकरै । दुपदसुता
के राजसभा दुःशासन चीर हरै ॥ हरिश्चंद्रसो कौ जग दाता सो घर नीच भैरै । जो गृह छांडि
देश बहु धावै तऊ वह संग फिरै ॥ भावीके वश तीनि लोकहै सुर नर देह धरै । सूरदास
प्रभु रची सु हैहैं को करि सोच मरै ॥ १४४ ॥ राग कान्हड़ा ॥ ताते सेइए यदुराई । संपति विपति वि-
पति सों संपति देह धरेको यहै सुभाई ॥ तरुवर फूलै फलै परिहरै अपने कालहिं पाई । सरवर नीर
भैरै पुनि उमड़ै सूखे खेह उडाई ॥ द्वितीय चंद्र बाढ़त ही बाढै घटत घटत घटि जाई । सूरदास
संपदा आपदा जिनि कोऊ पतिआई ॥ १४५ ॥ मलार ॥ इहि विधि कहा घटैगो तेरो । नंदनंदन करि घर
को ठाकुर आपुन है रहु चरो ॥ कहा भयो जो संपति बाढी कियो बहुत घर घेरो । कहूँ हरि
कथा कहूँ हरि पूजा कहूँ संतनिको डेरो ॥ जो वनितासुत यूथ सकैलै है गै रथनि घनेरो ।
सब तजि सुमिरण सूर श्याम गुण यहै सांच मत मेरो ॥ १४६ ॥ भारत वर्णन राग
सारंग ॥ भक्तबछल श्रीयादवराई । भीषमकी परतिज्ञा राखी अपनो वचन फिराई ।
भारत माहि कथा यह विस्तृत कहत होय विस्तार । सूर भक्त वत्सलता वरणों सर्व कथाको
सार ॥ १४७ ॥ अर्जुन दुर्योधनको गवन कृष्ण गेह ॥ भक्त वत्सलता प्रगट करी । सत संकल्प वेदकी
आज्ञा जनके काज प्रभु दूरि धरी ॥ भारतादि दुर्योधन अर्जुन भेटन गए द्वारकापुरी । कमल
नैन बैठे सुखशय्या पारथ पाइ तरी ॥ प्रभु जागे अर्जुन तन चितयो कब आये तुम कुशल
धरी ॥ ता पाछे दुर्योधन भेटहि शिर दिशते मन गर्व धरी ॥ दुहुँ मनोरथ अपनो भाष्यो तब श्री
पति बातें उचरी । युद्ध न करौं शस्त्र नहिं पकरौं एक ओर सेना सिगरी ॥ हरि प्रभाव राजा नहिं
जान्यो कह्यो सेन मोहिं देहु हरी । अर्जुन कह्यो जानि शरणागत कृपा करौ ज्यों पूर्व करी । निज पुर
आइ राई भीषम सों कही जु बातें हरि उचरी । सूरदास भीषम परतिज्ञा शस्त्र लिवाऊं पैज करी १४८
दुर्योधन वचन भीष्म प्रति ॥ राग धनाश्री ॥ मैं तोहि पूछौं भूतलराई । सुनहु पितामह भीषम मम
गुरु कीजै कौन उपाई ॥ उत अर्जुन अरु भीम पंडुसुत दोउ करवार गहै गंभीर । इत भगदत्त
द्रोण धृतिश्रव तुम सेनापति धीर ॥ जे जे जात परत ते भूतल ज्यों ज्वालागत चीर । कौन सहाय
जानियत नाहिंन होत वीर निर्वीर ॥ जब तोसों समुझाय कही नृप तबतैं करी न कान । पावक कि-
रण दहत सबहीं दल तूल सुमेरु समान ॥ अवगत अविनाशी पुरुषोत्तम हांकत रथकी क्यान । अचरज
कहा पार्थ जो वेधे तीनलोक इक बान । तेरे काज करौं पुरुषारथ यथा जीव घट माहीं । यह न कहौं
हौरन चढि जीतौं मो मति नहिं अवगाही ॥ अजहूँ समुझि कह्यो करि मेरो कहत पसारै बाहँ ।
कहो ताहिको सरिवर पूजै प्रभु पारथ दोउ माहँ ॥ अबतो सूर शरण ताकि आयो सोइ रजायसु
दीजै । जिहिते रहै छत्रपन मेरो वहै मतौ कछु कीजै ॥ १४९ ॥ भीष्म प्रतिज्ञा ॥ राग मलार ॥

आज जो हरिहि न शस्त्र गहाऊं ॥ लाजौं हैं गंगा जननी को शंतनुसुत न कहाऊं ॥ स्यंदन खंड
 महारथ खंडो कपि ध्वज सहित दुलाऊं । इती न करौं शपथ मोहिं हरिकी क्षत्रिय गतिहि न पाऊं ॥
 पांडवदल सन्मुख है धाऊं सरिता रुधिर बहाऊं ॥ सूरदास रणभूमि विजय बिन जियत न पीठि
 दिखाऊं ॥ १५० ॥ राग मारू ॥ सुरसरि सुवन रणभूमि आये । बाणवर्षा लगे करन अति क्रोध है
 पार्थ औसान तब सबै भुलाये । कद्यो करि कोप प्रभु अब प्रतिज्ञा तजो नहीं तो मरत रण हम
 हराए । सूर प्रभु भक्तवत्सल बिरद आनि उर ताहि या विधि बचन कहि सुनाये ॥ १५१ ॥
 भगवत वचन अर्जुन प्रति ॥ राग विलावल ॥ हम भक्तनके भक्त हमारे । सुन अर्जुन परतिज्ञा मेरी यह व्रत
 टरत न टारे ॥ भक्तैकाज लाज जिय धरि कै पाँइ पयाँदै धाऊं । जहँ जहँ भीर पौर भक्तनको तहँ तहँ
 जाइ छुडाऊं ॥ जो मम भक्तसों बैर करत है सो निज बैरी मेरो । देखि विचारि भक्त हित कारण
 हांकतहों रथ तेरो ॥ जीते जीत भक्त अपनेकी हारे हारि बिचारों । सूरदास सुनि भक्त विरोधी
 चक्र सुदर्शन जारों ॥ १५२ ॥ राग सारंग ॥ गोविंद कोपि चक्र कर लीनो । छाँडि आपनो प्रण
 यादवपति जनको भायो कीनो ॥ रथते उतरि अवनि आतुर है चले चरण अति धाए । मनु
 शंकित भूभार उतारन चलत भए अकुलाए ॥ कछुक अंगते उडत पीतपट उन्नत बाहु विशाल ।
 स्वेद स्रोत तनु शोभा कन छबि घन वर्षत जनु लाल ॥ सूर सुभुजा समेत सुदर्शन देखि विरंचि
 भ्रम्यो । मानो आनि सृष्टि करिबेको अंबुज नाम भज्यो १५३ ॥ राग मलार ॥ मेरी प्रतिज्ञा रहै कि
 जाउ । इत पारथ कोप्यो है हम पर उत भीषम भटराउ ॥ रथते उतरि चक्र धरि कर प्रभु सुभट
 हि सन्मुख आए । ज्यों कंदर ते निकसि सिंह झुकि गज यूथनिपर धाये ॥ आइ निकट श्रीनाथ
 विचारी परी तिलक पर दीठि । शीतल भई चक्रकी ज्वाला हरि हँस दीनी पीठि ॥ जय जय जय
 चिंतामणि स्वामी शंतनुसुत यों भाखै । तुम बिनु ऐसो कौन दूसरो जो मेरो प्रण राखै ॥ साधु
 साधु सुरसरिसुवन तुम मैं प्रण लागि डराऊं । सूरजदास भक्त दोनों दिशि कापर चक्र चलाऊं ॥
 ॥ १५४ ॥ अर्जुन भीष्म संवाद । राग धनाश्री ॥ कहो पितु मोसों सोइ सतभाव । जाते दुर्योधन दल
 जीतों कहि विधि कवन उपाव ॥ जब लागि जी अंतर घट मेरे को सरिवर करि पावै । चिरंजीव
 जौलौं दुर्योधन जियत न पकरहि आवै ॥ कौरव छाँडि भूमिपर कैसे दूजो भूप कहावै । तो हम
 कछु न बसाई पार्थ जो श्रीपति तोहि जितावै ॥ अब मैं शरण तुम्हें ताकि आयो हमैं मंत्र कछु दीजै ।
 नातर कुटुंब सैन संहारि कर कौन काजको जीजै । द्रुपदकुमार होइ रथ आगे धनुष गहो तुम बाना
 ध्वजा बैठि हनुमत कलगाजै प्रभु हाँके रथ जान । केतिक जीव कृपण मम वपुरो तजै काल हू
 प्रान । सूर एकही बाण विडारे श्रीगोपालकी आन ॥ १५५ ॥ भीष्म देह त्याग । राग सारंग ॥ पारथ
 भीषमसों मति पाई । कियो सारथी शिखंडि आई ॥ भीषम ताहि देखि मुख फेरयो । पारथ युद्ध
 हेतु रथ प्रेरयो ॥ कियो युद्ध अतिही विकरार । लागी चलनि रुधिरकी धार ॥ भीषम शरशय्यापर
 परयो । पै दक्षिणायन लागि नहिं मरयो । हरि पांडव समेत तहँ आए ॥ सूरज प्रभु भीषम मनभाए १५६
 राग सारंग । हरिसों भीषम बिनय सुनाई । कृपा करी तुम यादवराई ॥ भारतमें मेरो प्रण राख्यो ।
 अपनो कियो दूरिकर नाख्यो ॥ तुम बिन प्रभु ऐसी को करै । जो भक्तनके वश अनुसरै ॥ तुम दर्शन
 सुर नर मुनि दुर्लभ । मोको भयो सो अतिही सुर्लभ ॥ दूर नहीं गोविंद वह काल । सूर कृपा
 कीजै गोपाल ॥ १५७ ॥ गोविंद अब न दूर वह काल । दीनानाथ देवकीनन्दन
 भक्तवत्सल गोपाल ॥ मैं भीषम तुम कृष्ण सारथी किये पीत पट लाल । बहुत सनाह समर शर

वेधे कनक बेल ज्यों ताल ॥ तुमरे चरणकमल मम मस्तक कत ताको शर जाल । सूरदास जन जानि आपनो देहु अभयकी माल ॥ १५८ ॥ राग मलार ॥ वा पट पीतकी फहरान । कर धरि चक्र चरणकी धावनि नहिं विसरति वह बान ॥ रथते उतारि अवनि आतुर है कच रजकी लपटान । मानो सिंह शैलते निकस्यो महामत्तगज जान ॥ जिन गुपाल मेरो प्रण राख्यो मेटि वेदकी कान । सोई सूर सहाय हमारे निकट भये हैं आन ॥ १५९ ॥ राग सारंग ॥ भीषम धरि हरिको उर ध्यान । देखत हरिके तजे परान ॥ तासु क्रिया करि सब गृह आए । राजा सिंहासन बैठाए ॥ हरि पुनि द्वारा वती सिधाये । सूरदास हरिको गुण गाये ॥ १६० ॥ अथ भगवानको द्वारका गमन ॥ राग विलावल ॥ धर्मपुत्रको दै हरि राज । निज पुर चलिबेको कियो साज ॥ तब कुन्ती बिनती उच्चारि । सुनौ कृपा करि कृष्ण मुरारी ॥ जब जब हमको विपदा परी । तब तब प्रभु सहाय तुम करी ॥ तुमते विमुख राज्य किहि कामासूर बिसारहु हमें न श्याम ॥ १६१ ॥ अथ कुन्तीकी विनय ॥ राग कान्हरा । प्रभु जू विपदा भली विचारी । धिक यह राज्य विमुख चरणनते कहति पंडुकी नारी ॥ लाक्षामंदिर कौरव विरच्यो तहँ राखे वनवारी । दुर्योधनकी सभा द्रौपदी अंबर दए उबारी ॥ अतिथि ऋषीश्वर शापन आए शोक भयो जिय भारी । स्वरूप शाकते तृप्त किए सब कठिन आपदा टारी ॥ परतिज्ञा प्रह्लादकि राखी श्री नरहरि वपुधारी । सोई सूर सहाय हमारे संतनको हितकारी ॥ १६२ ॥

अथ विदुरको उपदेश राजा धृतराष्ट्र गांधारी प्रति वन गमन राजा युधिष्ठिरको वैराग्य वर्णन ।

राग विलावल ॥ कुरुपति ज्यों वनगमन कियो धर्मसुवन विरक्त ज्यों भयो । वराणि सुनाऊँ ता अनुसार ॥ सूत कही जैसे परकार ॥ भारतादि कुरुपतिकी जथा । चली पांडवनकी जब कथा ॥ विदुर कह्यो मत करो अन्याई । देहु पांडवन राज्य बटाई ॥ कुरुपति कह्यो धान मम खाइ । पंडुसुतनकी करत सहाइ ॥ याको ह्याँते देहु निकारी । बहुरि न आवै मेरे द्वारी ॥ विदुर शस्त्र सब तहीं उतारी । चल्थो तीरथनि मुंड उचारी ॥ भारतके बीते पुनि आयो । लोगन सब वृत्तांत सुनायो ॥ तब पूँछो कुरुपति है कहाँ । कह्यो पंडुसुत मंदिर जहां ॥ राजा सेवा भलि विधि करत । दिन प्रति सुख संपति तहँ भरत ॥ विदुर कह्यो देखो हरिमाया । जिन इह सकल लोक भरमाया ॥ जिह हरि कृपा कर्यो सो छूट्यो । इन माया सब लोगनि लूट्यो ॥ इहिके पुत्र एकसौ भए । तिने बिसारि सुखी ए हुए ॥ अब मैं उनको ज्ञान सुनाऊँ । जिहिं तिहिं विधि वैराग्य उपाऊँ ॥ बहुरो धर्मपुत्र पै आयो । राजा देखि बहुत सुख पायो ॥ करि सन्मान कह्यो आ भाई । करी हमारी बहुत सहाई ॥ लाक्षागृहते जरत उबारे । अरु बालापनते प्रतिबारे ॥ कौन कौन तीरथ फिरि आए । विदुर सकल वृत्तांत सुनाए ॥ बहुरि कह्यो हरि सुधि कछु पाई । कह्यो न कछु रह्यो शिरनाई ॥ बहुरो कौरवपति ढिग आए । पूछे समाचार संतभाए ॥ कह्यो युधिष्ठिर सेवा करत । ताते बहुत अनंदित रहत ॥ कह्यो पुत्रसुधि आवत कबहीं । कह्यो भाविणके वश सबहीं ॥ विदुर कह्यो शत पुत्र तिहारे । पंडव सुतनि कलंक संहारे ॥ तिनके गृह तुम भोजन करत । अरु पुनि कहत सुखै हम धरत ॥ धिक तुम धिक या कहि वे ऊपर । जीवत रहिहो कौलों भूपर ॥ श्वान तुल्य है बुद्धि तुम्हारी । जूँठन काज सहत दुख भारी ॥ द्रौपदिके तुम बसन छिनाए । इन तुम राज बहुत दुख पाए ॥ इनके गृह रहि सुख तुम मानता ॥ अति निलज्जको लाज न आनता ॥ जीवन आश प्रबल तुम लेखी । साक्षात सो तुममें देखी । काल अग्नि सबही जग जारत । तुम कैसे जीवन न विचारत ॥ आयु तुम्हारी गई सिराइ । वन चलि भजो द्वारकागढ़ ॥ कुरुपति कह्यो अंध हम दोई । वनमें भजन कौन विधि होई ॥ विदुर कहै सेवामें

करिहैं । सेवा करत नेक नहिं टरिहैं॥अर्धनिशा ताको लैगयो।प्रात भए नृप विस्मय भयो॥बूड सुए
 कै कहूँ उठि गये । तिनके ताप नृपति बहु तए ॥ वहां जाइ कुरुपति बल योग । दियो छांडि तनुको
 संयोग ॥ गांधारी सहगामिनि कियो । बिदुरभक्त तीरथ मग लियो ॥ इहि अंतर नारद इहँ आयो।
 नृपको सब वृत्तांत सुनायो ॥ नृपके मन उपजो बैराग । भजो सूर प्रभु अब सब त्याग ॥१६३॥
 अथ हरि वियोग पांडवनको उत्तर गमन ॥ राग सारंग ॥ हरि हरि हरि हरि सुमिरन करो।हरि चरणारविन्द उर
 धरो॥हरि वियोग पांडव तजि राजागमन कियो परीक्षित राजा॥कहौ सुकथा सुनौ चितधार।सूर कह्यो
 भागवत अनुसार ॥१६४॥ राग विलावल॥राजासों अर्जुन शिरनाई । कह्यो सुनौ बिनती महाराई ॥
 बहुदिन भे हरिसुधि नहिं पाई । आज्ञा होइ तौ देखहुँ जाई ॥ यह कहि पारथ हरिपुर गए । सुन्यो
 सकल यादव क्षय भए ॥ अर्जुन सुनत नयन जलधार । परचो धरणि पर खाइ पछार । तब दारुक
 संदेश सुनायो । कह्यो हरिजू जो गीता गायो ॥ सो स्वरूप मम हृदये आन । रहियो सदा करत मम
 ध्यान ॥ तब अर्जुन मन धीरज धारि । चर्यो संग लैजे नर नारि॥तहँ भिछनि सों भई लराई । लूटे बिन
 सब श्याम सहाई ॥ अर्जुन बहुत दुखित तब भए । इह अपसगुन होत दिन नए ॥ रोवैं वृषभ
 तुरंग अरु नाग । श्याल दिवस निशि बोलैं काग ॥कैंपे भुव वर्षा नहिं होई । भए सोच चित
 यह नृप जोई ॥ इहि अंतर अर्जुन फिरि आयो । राजाके चरणन शिर नायो ॥ राजा ताको कंठ
 लगाई । कह्यो कुशल है यादवराई ॥ बल वसुदेव कुशल सब लोई । अर्जुन यह सुनि दीने रोइ ॥
 राजा कह्यो कहा भयो तोहिं । तू क्यों कहि न सुनावै मोहिं न॥काहू असत्कार तोहिं कियो । कै कहि
 दान न द्विजको दियो ॥ कै शरणागतको नहिं राख्यो । कै तुमसों काहू कटु भाख्यो ॥ कै हरिजू
 भए अन्तर्ध्यान । मोसों कहि तू प्रकट बखान ॥ तब अर्जुन नैनन जल डारि । राजासों किय
 वचन उचारि ॥ सूरज प्रभु बैकुंठ सिधारे । तेहि बिन को मम काज सँवारे ॥ १६५ ॥ राग धनाश्री ॥
 हरि बिनु को पुरवै मेरो स्वारथ । मुंडहि धुनत शीश कर मारत रुदन करत नृप पारथ । थाके हस्त
 चरणगति थाकी अरु थाक्यो पुरुषारथ । पांच बाण मोहि शंकर दीनैं तेऊ गए अकारथ ॥
 जाके संग सेतुबन्ध कीनो अरु जीत्यो महभारथ । गोपी हरी सूरके प्रभु बिन घटत न प्राण पदारथ
 ॥ १६६ ॥ राग विलावल । यह सुनि राजा रोइ पुकारे । भीमादिक रोये पुनि सारे । रोवत सुनि कुंती
 तहां आई । कह्यो कुशल हैं यादवराई ॥ अर्जुन कह्यो सबै लरि सुए । हरि बिनु सब अनाथ हम
 हुए ॥ कुंती प्राण तजे धरि ध्यान । जीवन मरन उतै भल जान । राज्य परीक्षित को नृप दीना । वज्रनाभ
 मथुरापति कीना । द्रुपदसुता समेत सब भाई । उत्तर दिशा गए हर्षाई ॥ योग पंथ करि उन तनु तजे ।
 सूर सबै ते हरिपद भजे ॥ १६७ ॥ अथ श्री भगवान् परीक्षित गर्भ रक्षा, जन्म वर्णन ॥ हरि हरि हरि
 हरि सुमिरन करौ । हरि चरणारविन्द उर धरौ ॥ हरि परीक्षितै गर्भ मैझार । राखि लियो निज कृपा
 आधार । कहौ सु कथा सुनौ चितलाई । जो हरि भजै रहै सुख पाई ॥ भारत युद्ध बितत जब भयो ।
 दुर्योधन अकेल तहँ रह्यो ॥ अश्वत्थामा तापै जाई । ऐसी भांति कह्यो समुझाई ॥ हमसों तुमसों बाल
 मिताई । हमसों कछु न भई मित्राई ॥ अब जो आज्ञा मोको होई । छांडि बिलंब करों अब सोई ॥
 राज्य गयेको दुःख न सोई । पांडव राज भयो जो होई ॥ उनके सुएहीय सुख होई । जो करि सकौ करौ
 अब सोई ॥ हरि सर्वज्ञ बात यह जान । पांडु सुतनि सों कह्यो बखान ॥ आज सरस्वति तट रहौ
 सोई । पै यह बात न जानै कोई ॥ पांडव हरिकी आज्ञा पाइ । तजि गृह रहे सरस्वति जाइ ॥ काहू सों
 यह कहि न सुनाई । वहां जाइ सब रैन बिताई । अश्वत्थामा तब इहां आए । द्रौपदीसुत तहां

सूरसागर ।

(२६)

सोवत पाए ॥ उनको शिर लै गयो उतारि । कह्यो दुर्योधन आयो मारि ॥ बिन देखे ताको सुख
 छयो । देखेते दूनो दुख भयो ॥ ए बालक तैं वृथा जु मारे । पुनि कुरूपति तजि प्राण सिधारे ॥
 अश्वत्थामा भय करि भग्यो । इहां लोग सब सोवत जग्यो । द्रौपदि देखि सुतन दुख पायो । अर्जुनसों
 यह वचन सुनायो ॥ अश्वत्थामा जब लागि मारों । तब लागि अन्न न सुखमें डारों ॥ हरि अर्जुन रथपर
 चढ़ि धाये । अश्वत्थामापै चलि आये ॥ अश्वत्थामा अस्त्र चलायो । अर्जुनहू ब्रह्मास्त्र पठायो ॥
 उन दोनों से भई लराई । तब अर्जुन दोउ लए बुलाई ॥ अश्वत्थामाको गहि लाए । द्रौपदि
 शीश मुठी मुकराए ॥ याके मारे हत्या होई । मृत्यो जिवत न देख्यो कोई ॥ अश्वत्थामा बहुरि
 खिसाई । ब्रह्मअस्त्रको दियो चलाई ॥ गर्भ परीक्षित जारन गयो । तब हरि ताहि जरन नहि दियो ॥
 रूप चतुर्भुज गर्भ मँझार । ताको तासों लियो उबार ॥ जन्म परीक्षित को जब भयो । कह्यो चतु-
 भुज अब कहैं गयो ॥ पुनि जब हरिको देखौं जोई । पाइ संतोष सुखी होउ सोई । राजा जन्म समय
 को देखि । मनमें पायो हर्ष विशेषि ॥ गर्भ परीक्षित रक्षा करी । सोई कथा सकल बिस्तरी ॥
 श्रीभगवान कृपा जिहि करै । सूर सो मारे काके मरै ॥ १६८ ॥ अय परीक्षित राजाको कलियुग दंड ।
 ऋषि शाप । राग सारंग ॥ हरि हरि भक्तनको शिरनाऊं । हरि हरि भक्तनके गुण गाऊं ॥ हरि हरि
 भक्त एक नहिं दोई । पै यह जानत बिरला कोई ॥ भक्त परीक्षित हरिको प्यारो । गर्भमाह होतो
 जब बारो ॥ ब्रह्म अस्त्रते ताहि बचायो । युग युग बिरद यहै चलि आयो ॥ बहुरि राज्य ताकहैं जब
 भयो । मिस दिग्विजय चहुं दिशि लयो ॥ सकल प्रजा सु धर्म रत देखे । ताके मन बहु हर्ष
 विशेषे ॥ कुरुक्षेत्रमें पुनि जब आयो । गाय वृषभ तहैं दुःखित पायो ॥ तासु वृषभके पग त्रय
 नाहीं । रोवत गाय देखके ताहीं ॥ वृषभ धर्म पृथ्वीसों गाइ । वृषभ कह्यो तासों या भाइ ॥ मेरे
 हेतु दुखी तू होत । कै अधर्म तुमपर अच्छोत ॥ गो कह्यो हरि बैकुंठ सिधारे । शम दम उनहीं
 संग पधारे ॥ तप संतोष दया अरु गयो । ज्ञान यमादिक सब लय भयो ॥ यज्ञ साधना कोऊ करै ।
 कोऊ धर्म न मनमें धरै ॥ अरु तुमको बिन पाँइन देखि । मोहिं होतहै दुःख विशेषि ॥ इह अंतर
 राजा शूद्र आयो । वृषभ गऊको पांव चलायो ॥ ताहि परीक्षित खड्ग उठाइ । बहुरो वचन कह्यो
 या भाइ ॥ तू को कौन देशहै तेरो । कै छल गह्यो राज्य सब मेरो ॥ या विधि नृपति परीक्षित
 कह्यो । पै वासों उत्तर नहिं लह्यो ॥ कह्यो वृषभसों को दुखदाई । तासु नाम मोहिं देहु बताई ॥
 इंद्र होइ ताहुको मारों । तुमरो यह संताप निवारों ॥ वृषभ कह्यो तुम ऐसेइ राव । पै मैं लेउं कौन
 का नाँव ॥ कोउ कह हरिइच्छा दुख होई । द्वितीया दुखदायक नहिं कोई ॥ कोउ कह कर्म
 दुःखके दाता । काहू दुख नहिं देत बिधाता ॥ कोउ कह शत्रु होत दुखदाई । सुतौ मैं न कीनी
 शत्राई ॥ काके नाम बताऊं तोको । दुख दायक अरिष्ट सम मोको ॥ लहत आपने दुख दातार ।
 तुमही देखौ करिय विचार ॥ तब विचारि करि राजा देख्यो । शूद्र नृपति कलियुग करि लेख्यो ॥ वृषभ
 धर्म अरु पृथ्वी गाइ । इनको भयो इहौ दुखदाइ ॥ ताहि कह्यो तुम बडा अधर्मी । तो समान
 नहिं और कुकर्मी ॥ क्षमा दया तप पग तैं काख्यो । छांडि देश मम यह कहि डाक्यो ॥ तिन कह्यो
 मोमें एक भलाई । तुमसों कहों सुनो चितलाई ॥ धर्म विचारत मनमें होई । मनसा पाप न
 लागत कोई ॥ राज तुम्हारो है सब ठौर । तुम बिनु नृपति न द्वितीया और ॥ जौन ठौर मोहिं आज्ञा
 होई । ताहि ठौर रहैं मैं जोई ॥ हो हरि विमुख रु वेश्या जहां । सुरापान वधिकन गृह तहां ॥
 जूवा खेलत जहां जुवारी । ए पांचों हैं ठौर तुमारी ॥ पांचों होई नृपति ए जहां । मोको ठौर बता

बहु तहां ॥ तब नृप याको कनक बतायो । कनक मुकुट लखि सो लपटायो ॥ इक दिन राव अखेटे
 गयो । ता बनमाँह पियासा भयो ॥ ऋषि शमीकके आश्रम आयो । ऋषि हरिपदको ध्यान
 लगायो ॥ राजा जल ता ऋषिनसों मांग्यो । ताको मन हरिपदसों लाग्यो ॥ राजाको उत्तर नहिं
 दियो । तब मनमाहिं क्रोध नृप कियो ॥ यह सब कलियुगको परभाव ॥ जो नृपके मन भयो कुठाव ॥
 ऋषिकी कपट समाधि विचारी । दियो भुजंग मृतक गर डारी ॥ ऋषि समाधि मँहँ त्यौहीं रह्यो ।
 शृंगीऋषि सों लरिकन कह्यो ॥ शृंगीऋषि तब कियो विचार । प्रजा दुःख कर नृपति गुहार ॥
 नृपति दुःख कहिये किंहि जाई दियो शाप तोहिं तक्षक खाई ॥ दैकरि शाप पितापै आयो । देख्यो सर्प
 पितागर नायो ॥ रोवन लाग्यो सु मृतक जान । रुदन करत छूट्यो ऋषि ध्यान । सुतसों कह्यो
 कहा भयो तोहिं । कहि न सुनावत निज दुख मोहिं ॥ शृंगीऋषि सब कहि समझायो । नृप
 भुजंग सो ग्रीवा नायो ॥ यह अपराध बडो उन कीनो । तक्षक डसन शाप मैं दीनो ॥ ऋषि कह्यो
 बहुत बुरो तुम कीनो । जो यह शाप नृपतिको दीनो ॥ तुव शरापते मरि है सोई । यह अपराध
 मोहिं सब होई ॥ सुख सोवत राज याके सब । दुख पैहैं सो सकल प्रजा अब ॥ ताकी रक्षा
 हरिजू करी । हरि अवज्ञा तुम अनुसरी ॥ इहां राजा भनमें पछताई । मैं यह कियो बडा अन्याई ॥
 जाके हृदय बुद्धि यह आवै । ताको फल सो भलो न पावै ॥ ऋषि शिष्यको भेज्यो समझाई ।
 नृपसों कह तुम ऐसे जाई ॥ मम सुत शाप दियो या भाई । सप्तम दिन तोहि तक्षक खाई ॥ शृंगी-
 ऋषि यह किय बिन जाने । होत कहा अबके पछताने । ताते तुम उपाव सो करो । जाते भव
 सागरको तरो ॥ नृप सुनि लाग्यो करन विचार । सप्तम दिन मरिबो निर्धार ॥ यज्ञ दान करि सुर
 पुर जैये । तहां जाइके सुख बहु लहिये ॥ बहुरि कह्यो सुरपुर कछु नाहिं । पुण्य क्षीण तिहिं ठौर
 गिराहिं ॥ ताते सुत कलत्र सब त्याग । गहों एक हरिपद अनुराग ॥ बहुरि कह्यो अब हो कहा त्याग ।
 खोयो जन्म विषय सुख लाग ॥ सूर न हरि पदसों चित लायो । इत उत देखत जन्म गँवायो ॥
 ॥ १६९ ॥ वैराग्य उपदेश परीक्षित मन प्रति । राग धनाश्री ॥ इत उत देखत जन्म गयो ॥ या माया झूठीके
 लालच दुहुँ दृग अंध भयो ॥ जन्म कष्टमें पाय दुखित भये अति दुख प्राण सह्यो ।
 वेत्तिभुवनपति बिसरि गए तुहि सुमिरत क्यों न रह्यो । श्रीभागवत सुनों नहिं श्रवणनि बीचहि भटक
 सुयो । मूरदास कहि सब जग पूज्यौ युग युग भक्त जियो ॥ १७० ॥ राग सारंग ॥ जन्म सिरानो
 अटके अटके । राज काज सुत पितुकी डोरी बिन विवेक फिरयो भटके ॥ कठिन जु ग्रंथि परी
 मायाकी तोरी जात न झटके । ना हरिभजन ना संत समागम रह्यो बीचही लटके । ज्यों बहु कला
 काच दिखरावै लोभ न छूटत नटके । मूरदास शोभा क्यों पावै पिय बिहीन धन मटके ॥
 ॥ १७१ ॥ जन्म सिरानो ऐसे ऐसे । कै घर घर भरत यदुपति बिन कै सोवत कै वैसे ॥
 कै कहूँ खान पान रसनादिक कै कहूँ बाद अनैसे । कै कहूँ रंक कहूँ ईश्वरता नट बाजीगर
 जैसे ॥ चेत्यो नहीं गयो टरि अवसर मीन बिना जल जैसे । यह गति भई मूरकी ऐसी श्याम
 मिलैं धौ कैसे ॥ १७२ ॥ राग देवगंधार ॥ विरथा जन्म लियो संसार । करी न कबहुँ भक्ति हरिकी
 मारि जननी भारि ॥ यज्ञ जप तप नाहिं कीनो अल्पमति विस्तारि । प्रगट ब्रह्म दुरचो नहीं तू देखि
 नैन पसारि ॥ प्रबल अविद्या ठग्यो सब जग जन्म जूवाहारि । मूर हरिको सुयश गावहु जाहि
 मिटि भव भारि ॥ १७३ ॥ राग सोरठ ॥ काया हरिके काम न आई ॥ भाव भक्ति जहँ हरियश
 सुनयत तहां जात अलसाई । लोभातर है काम मनोरथ तहां सुनत उठि धाई ॥ चरण कमल

सुंदर जहँ हरिको क्यों हू न जात नवाई ॥ जब लागि श्याम अंग नहिं परसत अंधहि ज्यों भरमाई ।
 सूरदास भगवंत भजन तजि विषय परम विष खाई ॥ राग धनाश्री ॥ १७४ ॥ सबै दिन गए विष
 यके हेत । तीनोंपन ऐसेही बीते केश भये शिर श्वेत ॥ आंखिनि अंध श्रवण नहिं सुनियत थाके
 चरण समेत । गंगाजल तजि पियत कूपजल हरिताजि पूजत प्रेत ॥ रामनाम बिन क्यों छूटोगे चंद
 ग्रहे ज्यों केत । सूरदास कछु खर्च नः लागत रामनाम मुख लेत ॥ १७५ ॥ राग सारंग ॥ जो तू
 राम नाम चित धरतौ । अबको जन्म आगलौं तेरो दोऊ जन्म सुधरतौ ॥ यमको त्रास सबै मिटि
 जातो भक्त नाम तेरो परतौ । तंडुल घृत सँवारि श्यामको संत परोसो करतौ ॥ हो तो नफा साधु
 की संगति मूल गांठ नहिं टरतौ । सूरदास वैकुंठ पंथमें कोउ न फेंट पकरतौ ॥ १७६ ॥ राग मलार ॥
 दोमें एकौतो न भई । ना हरि भजे न गृह सुख पावे वृथा विहाइ गई ॥ ठानी हुती और कछु मन
 में औरै आनि ठई । अबिगत गति कछु समुझि परत नहिं जो कछु करत दई ॥ सुत सनेह तिय
 सकल कुटुंब मिलि निशि दिन होत खई । पद नख चंद चकोर बिमुख मन खात अँगार मई ॥ विषय
 बिकार दावानल उपजी मोह बयार बई । भ्रमत भ्रमत बहुते दुख पायो अजहुँ न टेव गई ॥ कहा
 होत अबके पछताने होनी शिर बितई । सूरदास सेये न कृपानिधि जो सुख सकल मई ॥ १७७ ॥
 राग सारंग ॥ यह सब मेरिये कुमति । अपनेही अभिमान दोष दुख पावत हों मैं अति ॥ जैसे
 केहरि उल्लक कूपजल देखे आप परत । कूप परयो पुनि मर्म न जान्यो भई आय सुई गत ॥
 जों गज फटिक शिला में देखत दशनन जाइ अरत । जो तू सूर सुखहि चाहत है तौ क्यों विषय
 परत ॥ १७८ ॥ राग केदार ॥ झूठहि लागि जन्म गँवायो । भूल्यो कहां स्वप्नके सुखको हरिसों
 चित न लगायो ॥ कबहुँक बैद्यो रहसि रहसिकै ढोटा गोद खिलायो । कबहुँक फूलि सभामें
 बैद्यो मूँछनि ताव दिवायो ॥ टेढी चाल पाग शिर टेढी टेढे टेढे धायो । सूरदास प्रभु क्यों नहिं
 चेतत जब लागि काल न आयो ॥ १७९ ॥ राग केदार ॥ जगमें जीवतहीको नातो । मन बिछुरे तनु
 छार होइगो कोउ न बात पुछातो ॥ मैं मेरी कबहुँ नहिं कीजे कीजे पंच सुहातो । विषय असक्त
 रहत निशि वासर सुख सीरो दुख तातो ॥ साँच झूठ करि माया जोरी आपुन रूखो खातो । सूरदास
 कछु थिर नहिं रहई जो आयो सो जातो ॥ १८० ॥ राग धनाश्री ॥ कहा लाइ तैं हरि सों तोरा ।
 हरिसों तोरि कौनसों जोरी ॥ शिरपर धरि न चलेगो कोऊ अनेक जतन करि माया जोरी । राज
 पाट सिंहासन बैठे नील पदम हूं सों कहै थोरी ॥ मैं मेरी करि जन्म गँवावत जब लागि नहिं परत
 यमकी डोरी । धन जोवन अभिमान अल्प जल कहै कूर आपुनी बोरी ॥ हस्ती देखि बहुत मन
 गर्बित ता सूरखकी मति है थोरी । सूरदास भगवंत भजन बिनु चले खेलि फागुनकी होरी ॥ १८१ ॥
 बिचारतही लागे दिन जान । सजल देह कागज ते कोमल किहि बिधि राखे प्रान ॥ योग न यज्ञ
 ध्यान नहिं सेवा संत संग नहिं ज्ञान । जिह्वास्वाद इंद्रियन कारन आयु घटत दिन मान ॥ और
 उपाय नहींरें बोरे सुनि तू यह दे कान । सूरदास अब होत विगूचन भजिले शारंगपान ॥ १८२ ॥
 अब मैं जानी देह बुढानी । शीश पाउँ धर कछो न मानत तनुकी दशा सिरानी ॥ आन कहत आनै
 कहि आवत नाक नैन बहै पानी । मिटिगइ चर्मक दमक अँग अँगकी दृष्टि रु मतिजु हिरानी ॥
 नारी गारी बिन नहिं बोले पूत करे कलकानी । घरमें आदर कादर कोसों खीझत रैन बिहानी ॥
 नहिं रही कछु सुधि तन मनकी भई है बात पुरानी । सूरदास अब होत विगूचन भजिले
 शारंगपानी ॥ १८३ ॥ चित बुद्धिको संवाद । राग देवगंधार ॥ चकई री चलि चरण सरोवर

जहां न प्रेम वियोग । जहँ भ्रम निशा होत नहिँ कबहुँ वह सायर सुख जोग ॥
 जहां सनकसे मीन हंस शिव मुनिजन नख रवि प्रभा प्रकाश । प्रफुलित कमल निमिष
 नहिँ शशि डर गुंजत निगम सुवास ॥ जिहि सर सुभग मुक्ति मुक्ताफल सुकृत अमृत रस पीजै ।
 सो सर छाँडि कुबुद्धि विहंगम इहां कहा रहि कीजै ॥ लछमी सहित होत नित क्रीडा शोभित
 सूरजदास । अब न सुहात बिषय रस छीलर वा समुद्रकी आस ॥ १८४ ॥ राग देवगंधार ॥ चलि
 सखि तिहि सरोवर जिहि जाहि। जिहि सरोवर कमल कमलारवि बिना बिकसाहि ॥ हंस उज्ज्वल पंख
 निर्मल अंग मलि मलि न्हाहि । मुक्ति मुक्ता अंबुके फल तिन्हैं चुनि चुनि खाहि ॥ अतिहि मगन महा
 मधुररस रसन मध्य समाहिं । पद्म बास सुगंध शीतल लेत पाप नशाहिं ॥ सदा प्रफुलित रहै जल
 बिनु निमिष नहिँ कुम्हलाहि । देखि नीर जो छिल छिलो अति समुझि कछु मन माहिं ॥ सघन
 गुंजत बैठि उनपर भौर हैं बिरमाहिं । मूर क्यों नहिँ चलो उडि तहां बहुरि उडिबो नाहिं ॥ १८५ ॥
 राग रामकली ॥ भृंगी री भजि चरण कमल पद जहँ नहिँ निशिको त्रास । जहां बिधु भानु समान
 प्रभानख सो बारिज सुखरास ॥ जिहिं किंजल्क भक्ति नव लक्षण काम ज्ञान रस एक । निगम
 सनक शुक नारद शारद मुनिजन भृंग अनेक ॥ शिषि विरंचि खंजन मनरंजन छिन छिन करत
 प्रवेश । अखिल कोश तहां वसत सुकृत जन प्रगटत श्यामः दिनेश ॥ सुनु मधुकरी भरम तजि निर्भय
 राजिव रविकी आश ॥ सूरज प्रेमसिंधुमें प्रफुलित तहां चलि करे निवास ॥ १८६ ॥ मन बुद्धिको संवाद
 राग देवगंधार ॥ सुवा चलि ता बनको रस पीजै । जा बन राम नाम अमृतरस श्रवणपात्र भरि
 लीजै ॥ को तेरो पुत्र पिता तू काको घरनी घर को तेरो । काम कराल श्वानको भोजन तू कहै मेरो
 मेरो ॥ बडी वाराणसि मुक्तिक्षेत्र है चलि तोको दिखराऊं । मूरदास साधुनकी संगति बडो भाग्य जो
 पाऊँ ॥ १८७ ॥ अथ मन प्रबोध ॥ रे मन सुमारि हरि हरि हरि । शत यज्ञ नाहीं नाम सम परतीति करि
 करि करि ॥ हरिनाम हिरणाकुश बिसारचो उठचो बरि बरि बरि। प्रह्लाद हित जिन असुर मरचो ताहि
 डरि डरि डरि ॥ गज गृध्र गणिका व्याधके अध गये गरि गरि गरि। चरण अंबुज बुद्धि भाजन लेहु भरि भरि
 भरि ॥ द्रौपदीकी लाज कारण दाव परि परि परि। पंडुसुतके बिघ्न जेते गए टरि टरि टरि ॥ कर्ण दुर्योधन
 दुःशासन शकुनि अरि अरि अरि । सुतहित अजामिल नाम लीनो गयो तरि तरि तरि ॥ चारि फलके
 दानिहैं प्रभु रहे फरि फरि फरि । मूर श्रीगोपालके गुण हृदय धरि धरि धरि ॥ १८८ ॥ राग केदार ॥
 करि मन नंदनंदन ध्यान । सेवि चरण सरोज शीतल तजि विषय रस पान ॥ जानु जंघ त्रिभंग
 सुंदर कलित कंचन दंड । काछनी कटि पीत पट द्युति कमल केसर खंड ॥ जनु मराल प्रवाल
 छीना किंकिणी कल राव । नाभि हृदय रोमावली अलि चारु सहज सुभाव ॥ कंठ मुक्तामाल
 मलयज उर बनी वनमाल । सुरसरी शशि तीर मानो लता श्याम तमाल ॥ बाहु पाणि सरोज पल्लव
 धरे मृदु मुख वेणु । अति बिराजति वदन विधुपर सुरभि मंडित रेण ॥ अधर दशन कपोल नासा
 परम सुंदर नैन । चलत कुंडल गंड मंडल मनो निरतन मैन ॥ कुटिल कच भुव तिलक रेखा
 शीश शिखी शिखंड । मदन धनु मनो शर संधाने देखि घन कोदंड ॥ मूर श्रीगोपालकी छवि
 दृष्टि भरि भरि लेहीं । प्राणपतिकी निरख शोभा पलक परन न देहीं ॥ १८९ ॥ भजि
 मन नंद नंदन चरण । परम पंकज अति मनोहर सकल सुखके करण । सनक शंकर ध्यान ध्यावत
 निगम अवरन वरन । शेष शारद ऋषिसुनारद संत चिंतत चरण ॥ पद पराग प्रताप दुर्लभ रमालो
 हित करण । परशि गंगा भई पावन तिहूँ पुर घर घरन ॥ चित्त चिंतन करति जग अघहरत

तारन तरन । गये तारि ले नाम केते पतित हरि पुर घरन ॥ जासु पदरज परशि गौतम नारि गति
उद्धरण । तासु महिमा प्रगट केवट धोइ पग शिर धरण ॥ सोइ पद मकरंद पावन अरु नहीं सर
वरण । सूर भजि चरणारविंदनि मिटै न जनम मरण ॥ १९० ॥ रे मन समझि सोच
विचारि । भक्ति बिनु भगवंत दुर्लभ कहत निगम पुकारि ॥ द्वारि पासा साधु संगति केरि रसना
सारि । दांव अवके परचो पुरो कुमति पिछली हारि ॥ राखि सत्रह सुनि अठारह चोर पांचो मारी ।
डारिदैं तू तीन काने चतुर चौक निहारि ॥ काम क्रोध मद लोभ मोह्यो पग्यो
नागनि नारि । सूर श्रीगोविंद भजन बिनु चले दोउ कर झारि ॥ १९१ ॥
॥ राग सारंग ॥ हो मन रामनामको गाहक । चौरासीलख जिया योनि में भटकत फिरत अनाहक ।
भक्तन हाट बैठि तू स्थिर है हरि नग निर्मल लेहि । काम क्रोध मद लोभ मोह तू सकल दलाली
देहि । करि हियाव सो सो जलादि यह हरिके पुर लेजाहिं । घाट बाट कहूँ अटक होइ नहिं सब
कोउ देहि निबाहिं । और वनजमें नाहीं लाहा होत मूलमें हानि । सूरस्वामिको सौदो सांचो कहौ
हमारो मानि ॥ १९२ ॥ राग केदारा ॥ रे मन रामसों करि हेत । हरिभजन की वारि करिले
उबरे तेरो खेत ॥ मन सुआतनु पिंजरा तिहि माहिं राख्यो चेत । काल फिरत बिलारतन धरि अव
घरी तुम लेत ॥ सकल विषय विकार तजि तू तै सायर सेत । सूर भजि गोपाल गुणको गुरु
बताए देत ॥ १९३ ॥ राग कान्हरा ॥ मन वच क्रम मन गोविंद सुधि करि । शुचि रुचि सहज
समाधि साजि शठ दीनबंधु करुणामय उर धरि ॥ मिथ्यावाद विवाद छांडिदे काम क्रोध मद
लोभै परिहरि । चरण प्रताप आनि उर अंतर और सकल सुख या सुख तर हरि ॥ वेदन कह्यो स्मृतिहू
भाष्यो पावन पतित नाम निज नरहरि । जाको सुयश सुनत अरु गावत पाप वृन्द जैहैं भजि भर
हरि ॥ परमउदार श्याम घन सुंदर सुखदायक संतन हित कर हरि । दीनदयाल गोपाल गोपपति
गावत गुण आवत ढिग ढर हरि ॥ अति भयभीत निरख भवसागर घन ज्यों घेरि रह्यो घट
धर हरि । जब यमजाल पसार परैगो हरिविनु कौन करैगो घर हरि ॥ अजहूँ चेत मूढ चहुँ दिशिते
कालअग्नि उपजत झुकि झर हरि । सूर काल बलिव्याल ग्रसत है श्रीपति शरन परत क्यों न फर
हरि ॥ १९४ ॥ तिहारो कृष्ण कहत कहा जात । बिछुरे मिलन बहुरि कब हैहै ज्यों तरुवरके पात
शीत पित्त कफ कंठ विरोधे रसना टूटे बात । प्राण लए जम जाइ मूढमति देखत जननी तात ॥
छिन इक माहिं कोटि युग बीतत नरकी केतक बात । इह जग प्रीति सुवा सेमर ज्यों चाखत ही
उड़जात ॥ जबलगि यमको फंद परचो नहिं चरणन चित्त लगात ॥ कहत सूर वृथा यह देही
इतो कहा इतरात ॥ १९५ ॥ दिन दश लेहु गोविंद गाइ । छिन न चेतत चरण अंबुज वाद जीवन
जाइ ॥ द्वारि जवलों जरा रोग रु चलत इंद्री भाइ । आपुनो कल्याण करिले मानुषीतनु पाइ ॥ रूप
यौवन सकल मिथ्या देखि जिन गरवाइ । ऐसेही अभिमान आलस काल ग्रसिहै आइ ॥ कूप खनि
कत जाइरे नर जरत भवन बुझाइ । सूर हरिको भजन करिलै जन्म मरण नशाइ ॥ १९६ ॥
॥ राग धनाश्री ॥ मन तोसों केतिकही समुझाई । नंदनंदनके चरण कमल भजि तजि पखंड चतुराई ॥
सुख संपति दारा सुत हय गय झूठ सबै समुदाइ । क्षणभंगुर ए सबै श्याम बिनु अंत नाहिं सँग जाइ ॥
जन्मत मरत बहुते युग बीते अजहूँ लाज न आई । सूरदास भगवंत भजन बिनु जैहै जन्म गँवाई ॥
॥ १९७ ॥ राग मलार ॥ अब मन मान धौं राम दुहाई । मन वच क्रम हरिनाम हृदय धरि जो गुरु
वेद बताई । महाकष्ट दश मास गर्भवसि अधोमुख शीश रहाई । इतनी कठिन सही तू निकस्यो
अजहूँ न तू समुझाई ॥ मिटि गए राग द्वेष सब तिहिके जिन हरि प्रीति लगाई । सूरदास प्रभु

नामकी महिमा पतित परमगति पाई ॥ १९८ ॥ राग आसावरी ॥ बौरे मन रहन अटल कर
 जाना । धन दारा सुत बंधु कुटुंब कुल निरखि निरखि बौराना ॥ जीवन जन्म अल्प सपनोसो समुझि
 देखि मन माहीं । बादर छांह धूम घौराहर जैसे थिर न रहाही । जब लगि डोलत बोलत
 चितवत धन दारा हैं तेरे । निकसत हंस प्रेत कहि भजिहैं कोउ न आवै नेरे ॥ मूरख मुग्ध अज्ञान मूढ़-
 मति नाहीं कोऊ तेरो । जो कोऊ तेरो हितकारी सो कहे कटू सबेरो ॥ घरी एक सज्जन कुटुंब मिलि
 बैठे रुदन कराहीं । जैसे काग कागको सूये कां कां कहि उडि जाहीं ॥ कृमि पावक तेरो तन
 भखिहैं समुझि देखि मन माहीं । दीनदयालु मूर हरि भजिले यह औसर फिरि नाहीं ॥ १९९ ॥
 ॥ राग गौरी ॥ ते दिन बिसरि गये इहां आये । अति उन्मत्त मोह मद छाक्यो फिरत केश बगराए ।
 जिन दिवसनिते जननि जठरमें रहत बहुत दुख पाए । अति संकटमें भरत भटालौ मलमें मूड
 गडाए । बुध विवेक बल हीन छीन तन सबही हाथ पराए । तिहि न करत चित अधम अजहुँलौं
 जीवत जाके ज्याए ॥ कहिधों साथ कौन है तेरे खान पान पहुँचाए । मूर सुमृग ज्यों बाण सहत नित
 विषय व्याधके गाए ॥ २०० ॥ राग धनाश्री ॥ रे मन निपट निलज्ज अनीति । जियतकी कहि को चलावै
 मरत विषया प्रीति ॥ श्वान कुब्ज कुपंगु कानो श्रवण पुच्छवा हीन । भगन भाजन कंठ कृमि शिर का-
 मिनी आधीन ॥ निकट आयुध धरे बंधक करत तीक्ष्ण धार । अजानायक मग्न क्रीडत चढ़त बारंबार ॥
 दह छिन छिन होत छीनी दृष्टि देखत लोग ॥ मूर स्वामीसों विमुख ए सती केसे भोग २०१ ॥ राग गौरी ॥
 बौरे मन समुझि समुझि कछु चेत । इतनो जन्म अकारथ खोयो श्याम चिकुर भए श्वेत ॥ तबलगि
 सेवा कर निश्चय करि जब लगि हरवा खेत । मूरजदास भरम जिन भूलो करि विंधनासे हेत ॥ २०२ ॥
 राग धनाश्री ॥ रे शठ बिन गोविंद सुख नाहीं । तेरो दुःख दूर करिबेको ऋद्धि सिद्धि फिरि जाहीं ॥
 शिव विरंचि सनकादिक मुनिजन उनकी गति अवगाहीं । जगतपिता जगदीश शरण बिनु सुख
 तीनों पुर नाहीं ॥ और सकल मैं देखे झूठे बादरकी सी छाही । मूरदास भगवंत भजन बिनु दुख
 कबहुं नहिं जाहीं ॥ २०३ ॥ राग कान्हरा ॥ मन तोसों कोटिक बार कही । समुझ न चरणगहत
 गोविंदके उर अघ शूल सही ॥ सुमिरन ध्यान कथा हरि जूकी यह एको न भई । लोभी लंपट
 विषयनसों हित यह तेरी निबही ॥ छांडि कनकमणि रत्न अमोलक कांचकी किरच गही । ऐसो
 तू है चतुर विवेकी पय ताजि पियत मही ॥ ब्रह्मादिक रुद्रादिक रवि शशि देखे मूर
 सबही । मूरदास भगवंत भजन बिनु सुख तिहुँ लोक नहीं ॥ २०४ ॥ राग परज ॥ मनारे
 माधव सों कर प्रीति । काम क्रोध मद लोभ मोह तू छांडि सबै विपरीति ॥ भौंरा भोगी
 वन भ्रमै, मोद न मानै ताप । सब कुसुमनि मिलि रस करै, कमल बँधावे आप ॥ सुनि
 परमित पिय प्रेमकी, चातक चितवत पारि । घन आशा सब दुःख सहै, अंत न याचै वारि ॥ देखो
 करनी कमलकी, कीनो जलसों हेत । प्राण तज्यो प्रेम न तज्यो, मूरख्यो सरहि समेत ॥ दीपक पीर
 न जानई, पावक परत पतंग । तनुतो तिहि ज्वाला जरयो चित न भयो रस भंग ॥ मीन वियोग न
 सहिसकै, नीर न पूछै बात । देखि जु तू ताकी गतिहि, रति न घटै तन जात ॥ प्रीति परेवाकी गनो,
 चाहन चढत अकाश । तहँ चढि तीय जु देखिये, परत छांड उरश्वास ॥ सुमर सनेह कुरंगकी,
 श्रवन न राच्यो राग । धरि न सकत पग पछमनो, सरसन मुख उर लाग ॥ देखि जरनि जड़ नारि-
 की, जरत प्रेतके संग । चिता न चित फीको भयो, रची जु पियके रंग ॥ लोक वेद बरजत सबै
 नयन न देखत त्रास । चोर न जिय चोरी तजै, सरवस सहै बिनास ॥ सब रसको रस प्रेमहै, विषयी खेले

सार । तन मन धन यौवन खिसै, तऊ न मानै हार ॥ तैं जु रत्न पायो भलो, जान्यो साधु समाज ॥
 प्रेम कथा अनुदिन सुनी, तऊ न उपजी लाज ॥ सदा संघाती आपनों, जियको जीवन प्रान । सो तू
 विसरयो सहजही, हरि ईश्वर भगवान ॥ वेद पुराण स्मृति सबै, सुर नर सेवत जाहि । महामूढ
 अज्ञानमति, क्यों न सँभारत ताहि। खग मृग मीन पतंग लौं, मैं शोधे सब ठौर । जल थल जीव जिते
 तिते, कहाँ कहाँ लागि और ॥ प्रभु पूरण पावन सखा, प्राणनहंको नाथ । परम दयालु कृपालु प्रभु,
 जीवन जाके हाथ ॥ गर्भवास अति त्रासमें, जहां न एको अंग । सुनि शठ तेरो प्राणपति, तहां न
 छाँड्यो संग ॥ दिना राति पोषत रहै, ज्यों तंबोली पान । वा दुखते तोहिं काढकै, लै दीनो पयपा-
 न ॥ जिन जड़ते चेतन कियो, रचि गुण तत्त्व बिधान । चरण चिकुर कर नख दिए, नैन नासिका
 कान ॥ अशन वसन बहु विध दिये, औसर औसर आनि । मात पिता भय्या मिलै, नई रुचइ पहिचानि ।
 सजन कुटुंब परिजन बढै, सुत दारा धन धाम । महामूढ विषयी भयो, चित आकष्यों काम ॥
 खान पान परिधान रस, यौवन गयो बितीत । ज्यों विट परि परतीय वश, भोर भये भय भीत ॥
 जैसे सुखही मन बढ़यो, तैसे बढ़यो अनंग । धूम बढ़यो लोचन खस्यो, सखा न सूझ्यो संग ॥ जम
 जान्यो सब जग सुन्यो, वाढ्यो अयश अपार । बीच न काहू तब कियो, जब दूतनि काढ्यो बार ॥
 कह जानो कहँवा सुबो, ऐसे कुमति कुमीच । हरिसों हेतु बिसारिकै, सुख चाहत है नीच ॥ जो
 पै जिय लज्जा नहीं, कहा कहाँ सौ बार । एकहु अंक न हरि भजे, रे शठ सूर गँवार ॥ २०५ ॥
 राग कल्याण ॥ धोखेही धोखे डहकायो । समुझि न परी विषयरस गीधयो हरि हीरा घर मांह गँवायो ॥
 ज्यों कुरंग जल देखि अवनिको प्यास न गई चढ़ दिशि धायो । जन्म जन्म बहु कर्म किये हैं
 तिनमें आपुन आपु बँधायो ॥ ज्यों शुक सेमर सेव आश लागि निशि वासर हठ चित्त लगायो ॥
 रीतो परचो जबै फल चाख्यो उड़ि गयो तूल तावरो आयो ॥ ज्यों कपि डोरी बांध बाजिगर
 कनकनको चौहटे नचायो । सूरदास भगवंत भजन बिनु काल व्याललै आप डसायो ॥ २०६ ॥
 राग धनाश्री ॥ जन्म गँवायो उआवाई ॥ भजे न चरण कमल यदुपतिके रह्यो बिलोकत छाई ॥
 धन जोबन मद ऐंडो ऐंडो ताकत नारि पराई । लालच लुब्ध श्वान जूठनि ज्यों सोऊ हाथ न
 आई ॥ रंच कांच सुख लागि मूढमति कंचन राशि गँवाई ॥ सूरदास प्रभु छाँड़ि सुधारस विषय
 परम विष खाई ॥ २०७ ॥ भक्ति कव कहिहो जन्म सिरानो । बालापनमें खेलत खोयो तरुणापै
 गरबानो ॥ बहुत प्रपंच करै मायाको तऊनपेट अघानो । जतन जतन करि माया जोरै लैगये
 रंक न रानो ॥ सुत बित वनिता मोह लगायो झूठे भरम भुलानो । लोभ मोहमें चेत्यो नार्ही सुपने
 ज्यों डहकानो ॥ वृद्ध भये कफ कंठ निरोध्यो शिर धुनि धुनि पछतानो । सूरदास भगवंत
 भजन बिनु यमकै हाथ बिकानो ॥ २०८ ॥ मन रामनाम सुमिरन बिनु वाद जनम खोयो । रंचक
 सुख कारणते अंतकाल बिगोयो ॥ साधु संगति भक्ति बिना तन अकारथ जाई । ज्ञानी ज्यों हाथ झारि
 चलै झटकाई ॥ सुत दारा देह गेह संपति सुखदाई । इनमें कछु नाहिं तेरी काल अवधि आई ॥ काम
 क्रोध लोभ मोह मनमें तू जोयो ॥ गोविंद गुण चित बिसारि कौन नींद सोयो ॥ सूर कहै शुचि विचारि भ्रम
 भूल्यो अंधा । रामनामले तजिकरि और सकल धंधा ॥ २०९ ॥ राग कल्याण ॥ भक्ति बिनु बैल बिराने हैहो ।
 पाँउ चारि शिर शृंग गुंग मुख तब कैसे गुण गैहो ॥ चारि पहर दिन चरत फिरत वन तऊन पेट अचैहो ।
 दूटे कंध सुफूटी नाकनि कौलों धौ भुस खैहो ॥ लादत जोतत लकुट बाजिहै तब कहँ मूंड डुरैहो ।
 शीत घाम घन विपति बहुत विधि भार तरे मरिजैहो ॥ हरि संतनको कह्यो न मानत कियो

आपुनो पैहो । सूरदास भगवंत भजन बिनु मिथ्या जन्म गवैहो ॥ २१० ॥ राग सारंग ॥ छाँडि
 मन हरि बिमुखनको संग । जिनके संग कुबुद्धि उपजतिहै परत भजनमें भंग ॥ कहा होत पयपान
 कराये विष नहिं तजत भुजंग । कागहि कहा कपूर चुगायो श्वान न्हवाये गंग ॥ खरको कहा
 अरगजालेपन मर्कट भूषण अंग । गजको कहा न्हवाये सरिता बहुरि धरै खहि छंग ॥ पाहन
 पतित बाँस नहिं बेधत रीतो करत निखंग । सूरदास खल कारी कामरि चढत न दूजो रंग ॥ २११ ॥
 राग सोरठ ॥ रे मन जन्म अकारथ खोइस । हरिकी भक्ति कबहुं नहिं कीनी उदर भरचो पर सोइस ॥
 निशि दिन रहत फिरत मुँह बाँधे अहंकार करि जन्म बिगोइस । गोड पसार परचो दोउ
 नीके अबके कीये कहा होइस ॥ काल यमनिसों आनि बनेहै देखि देखि मुख रोइस ।
 सूरश्याम बिनु कौन छुडावै चले जाहु भाइ पोइस ॥ २१२ ॥ तबते गोविंद क्यों न सँभारे ।
 भूमि परेते सोवन लाग्यो महाकठिन दुखभारे ॥ अपने पिंड पोषिवे कारण कोटि सहस
 जिय मारे । इन पापिनते क्योंहुन उबरौगे दामनगीर तिहारे ॥ आप लोभ लालच के कारण
 कहूं न पाप तिहारे । सूरदास यम कंठ गहेते निकसत प्राण दुखारे ॥ २१३ ॥ राग धनाश्री ॥
 रे मन मूरख जन्म गँवायो । करि अभिमान विषय रस गीध्यो श्याम शरण नहिं आयो ॥
 यह संसार सुवा सँवर ज्यों सुंदर देखि लुभायो । चाखन लाग्यो रुई उडि गई हाथ कछू नहिं आयो ॥
 कहा होत अबके पछताये पहिले पाप कमायो । कहत सूर भगवंत भजन बिनु शिर धुनि धुनि
 पछतायो ॥ २१४ ॥ राग मारू ॥ औसर हारचो रे तैं हारचो । मानुष जन्म पाइनर बौरे हरिको
 भजन बिसारचो ॥ रुधिर बुंदते साजि कियो तन सुंदर रूप सवारचो । जठर अग्नि अंतर ऊरधमुख
 जिन दश मास उबारचो ॥ जबते जन्म लियो जंगभीतर तबते प्रभु प्रतिपारचो । अंध अचेत
 मूढ मतवारे सो प्रभु क्यों न सँभारचो ॥ पहिरि पितंबर करि आडंबर यह तनु ठाठ शृंगारचो । काम
 क्रोध मद लोभ त्रिया रति बहु विधि काज बिगारचो ॥ मरन बिसारि जीवन स्थिर जान्यो बहु
 उद्यम जिय धारचो । सुत दाराको मोह अजय विष हरि अमृतफल डारचो ॥ झूठ सांच करि माया
 जोरीरचि पचि भवन उसारचो । कालअवधि पूरण भई जादिन बिनहूँ त्यागि सिधारचो ॥ प्रेत प्रेत
 तेरो नाम परचो जब जेवरि बांधि निकारचो । जा सुतके हित बिमुख गोविंदते प्रथमहिं तिन मुख
 जारचो ॥ भाई बंधु कुटुंब सहोदर सब मिलि यहै बिचारचो । जैसे कर्म लहो फल तैसे तिनका
 तोरि उचारचो ॥ सतगुरुको उपदेश हृदय धरि जिन भ्रम सकल निवारचो । हरिभज बिलम्ब
 छाँडि सूरज प्रभु ऊंचे टेरि पुकारचो ॥ २१५ ॥ राग विलावल ॥ या विधि राजा करि विचार । राज
 साज सबहीको डार । जीरणपट कुपीन तनु धारि । चलयो सुरसरी तीर उधारि ॥ पुत्र कलत्र देखि
 सब रोवे । राजा तिनके ओर न जोवे ॥ राजा चलत चले सब लोग । दुखित भये सब नृपति
 बियोग ॥ नृपति सुरसरीके तट आये । कियो स्नान मृत्तिका लगाये ॥ करि संकल्प अन्नजल त्याग्यो ।
 केवल हरि पदसों अनुराग्यो ॥ अत्रि वसिष्ठादिक तहँ आये । नारदादि मुनि बहुरि सिधाये ॥
 कुश आसन दै तिनहि बैठायो । पुनि कह्यो तिनके पद शिरनायो ॥ धन्यभाग्य तुम दर्शन
 पायो । मम उधार कारण तुम आयो ॥ तुम देखत हरि सुमिरन होई । और प्रसंग चले
 नहिं कोई ॥ आज्ञा होइ करौ अब सोई । जाते मेरी शुद्धगति होई ॥ कोउ कह तीरथ सेवन करो ।
 कोउ कहै दान यज्ञ विस्तरो ॥ काहू कहै मंत्र जप करना । काहू कहू काहू कछु वरना ॥ राजा
 कह्यो सप्त दिन माहीं । हुति इहिको मोहिं सूझत नाहीं ॥ इहि अंतर शुकेदेव तहाँ आये । राजा

देखि तुरत उठि धाये ॥ करि दंडवत कुशासन दीनो । पुनि सन्मान ऋषिन सब कीनो ॥ शुकको
रूप कंठो नहि जाई । शुक हिय रह्यो कृष्णरस छाई ॥ शुककी महिमा शुकही जाने । सूरदास
कहि कहा बखानै ॥ २१६ ॥ हरिके जनकी अति ठकुराई । महाराज ऋषिराज राज-
हूँ देखत रहे रजाई ॥ निर्णय देश राज्य करि ताको लोगन मन उत्साह । काम क्रोध मद लोभ मोह
ए भये चोरते साह ॥ दृढ़ विश्वास कियो सिंहासन तापर बैठे भूप । हरियश विमल छत्र शिर ऊपर
राजत प्रेम अनूप ॥ हरिपदपंकज पियो प्रेमरस ताहीके रंगरातो । मंत्री ज्ञान न औसर पावै कहत
बात सकुचातो ॥ अर्थ काम दोऊ रहैं द्वारें धर्म मोक्ष शिरनावै । बैठि विवेक बिचित्र पौरिया समय
न कबहूँ पावै ॥ अष्ट महासिधि द्वारे ठाढ़ीं करजोरे डरलीने । छरीदार वैराग्य बिनोदी हिरकि बाहरे
कीने ॥ माया काल कछू नहिं व्यापै यह रस रीति जु जानी । सूरदास यह सकल समग्री गुरुप्रताप
पहिंचानी ॥ २१७ ॥ शुक नृप ओर कृपा करि देख्यो । धन्य भाग्य तिन अपनो
लेख्यो ॥ विनती करी चरण शिरनाई । सप्त दिवस सभ मेरी आई ॥ तऊ कुटुंबको मोह न जात ।
पुनि धनलोभ आइ लपटात ॥ जानि बूझि मैं होत अजाना उपजत नाहीं मनमों ज्ञान । अरु तनु छूटत
बहु दुख होई ॥ ताते सोचरहे नहिं कोई विना त्वचा सुमिरन क्यों होई ॥ आज्ञा होइ करों अब सोई ॥ शुक
कह्यो तन धन कुटुंब विहाई । हरिपद भजौ न और उपाई ॥ आयु भग्नघट जलसी छीजै । अह निश हरि
हरि सुमिरन कीजै ॥ नृप पद्मांग पूर्व इक भयो । सुतौ द्वेचरीमें तरिगयो ॥ तेरी सप्त दिवसहै आई ।
कहाँ भागवत सुन चित लाई ॥ सुनि हरि कथा धरौ हरि ध्यान । जग सब जानो स्वप्न समान ॥
या विधि जो हरिपद उर धरिहौ । निस्संदेह- सूर तब तरिहौ ॥ २१८ ॥ हरि यश कथा सुनौ
चित लाई । जो खड्गांग तरयो गुण गाई ॥ नृप खड्गांग भयो भुव माहीं । ताके सम द्वितिया जग
नाहीं ॥ इक दिन इन्द्र तासु घर आयो । राजा उठिकरि शीश नवायो ॥ धन मम गृह धन भाग्य
हमारो । जो तुम चरण कृपा करि धारो ॥ अब मोको जो आज्ञा होई । आयसु मान करौ सब सोई ॥
इन्द्र कह्यो मम करो सहाई । असुरनसों भइ मोहिं लराई ॥ इन्द्रपुरी खड्गांग सिंघाये । नाम सुनत
सो सकल पराये । सुरपतिसों नृप आज्ञा मांगी । उन कह्यो लेहु कछू वर मांगी ॥ नृपति कह्यो
कहो मेरी आय । वर लेहों पुनि शीश चढ़ाय ॥ दोइ मुहूरति आयु बताई । नृप बोल्यो तब शीश
नवाई ॥ तुरंत देहु मोहि घर पहुँचाय । तरो जाइ तहं हरिगुण गाय ॥ एक मुहूरतमें फिर आयो ।
एक मुहूरत हरिगुण गायो ॥ हरिगुण गाय परमपद लह्यो । सूर नृपति सुनि धीरज गह्यो ॥ २१९ ॥

इति श्रीमद्भागवते सूरसागरे कविवरश्रीसूरदासकृतप्रथमः स्कंधः समाप्तः ॥

अथ कविवर सूरदास कृत-

श्रीसूरसागर.

द्वितीयस्कन्ध ।

राग विलावल ॥ हरि हरि हरि सुमिरन करौ । हरिचरणारविंद उर धरौ ॥ शुकदेव हरिचरणन चित लाई । राजासों बोल्यो या भाई ॥ तुम कह्यो सप्तदिवस मम आय । कहो हरिकथा सुनौ चितलाय ॥ चिंता छांडि भजो यदुराई । सूर तरो हरिके गुण गाई ॥ १ ॥ राग सारंग ॥ जो सुख होत गोपालहि गाये । सो नहिं होत जप तपके कीने कोटिक तीरथ न्हाये ॥ दिये लेत नहिं चारि पदारथ चरण कमल चित लाये । तीनि लोक तृण सम करि लेखत नंदनंदन उर आये ॥ बंशीबट वृन्दावन यमुना तजि वैकुण्ठको जाये । सूरदास हरिको सुमिरन करि बहुरि न भव चलि आये ॥ २ ॥ राग केदारा ॥ सोइ रसना जो हरिगुण गावै । नैनकी छवि यहै चतुरता ज्यों मकरन्द मुकुन्दहि ध्यावै ॥ निर्मल चित्त तौ सोई सांचो कृष्ण बिना जिय और न भावै । श्रवणनिकी जु यहै अधिकाई सुनि रसकथा सुधारस प्यावै ॥ कर तेई जो श्यामहिं सेवैं चरणनि चलिं वृन्दावन जावै । सूरदास जैये बलि ताके जो हरिजुसे प्रीति बढ़ावै ॥ ३ ॥ राग सारंग ॥ जबते रसना राम कह्यो । मानो धर्म साधि सब बैठयो पढिबेमें धौं कहा रह्यो ॥ प्रगट प्रताप ज्ञान गुरु गमते दधिमथि घृत लै तज्यो ग्रह्यो । सारको सार सकल सुखको सुख हनुमान शिव जानि कह्यो ॥ नाम प्रतीत भई जा जनकी लै आनन्द दुःख दूरि दह्यो । सूरदास धन धन वे प्राणी जो हरिको व्रत लै निबह्यो ॥ ४ ॥ अनन्यभक्तिमहिमा राग सारंग ॥ गोविंदसो पति पाइ कहा मन अनत लगावै । गोपाल भजन बिनु सुख नहीं जो चहुँ दिश धावै ॥ पतिको व्रत जो धरै त्रिया सो शोभा पावै । आन पुरुषको नाम लेत तिय पतिहि लजावै ॥ गणिकाते उपजै सुपूत कौनको कहावै ॥ बसत सुरसरीतीर मंदमति कूप खनावै ॥ जैसे श्वान कुलालके पाछे उठि धावै । आन देव हरि तजि भजै सो जन्म गँवावै ॥ फलकी आशा चित्त धारि जो वृक्ष बढावै । महामूढ सो मूल तजि शाखा जल नावै ॥ सहज भजै नंदलालको सो सब शुचि पावै । सूरदास हरिनाम लिये दुख निकट न आवै ॥ ५ ॥ राग कान्हरा ॥ जाको मन लाग्यो नंद लालहिं ताहि और नहिं भावै हो । ज्यों गूंगो गुरखाइ अधिक रस सुख सवाद न बतावै हो ॥ जैसे सरिता मिलै सिंधुको बहुरि प्रवाह न आवै हो । ऐसे सूर कमल लोचनते चित नहिं अनत डुलावै हो ॥ ६ ॥ राग विहाग ॥ जो मन कबहुँक हरिको जांचै । आन प्रसंग उपासना छांडै मन वच क्रम अपने उर सांचै ॥ निशि दिन श्याम सुमिरि यश गावै कल्पन मेटि प्रेमरस पाचै । यह व्रत धरै लोकमें बिचरै सम करि गनै महामणि काचै ॥ शीत उष्ण सुख दुःख नहिं मानै हानि भये कछु शोच न राचै । जाइ समाइ सूर वा निधिमें बहुरि न उलटि जगतमें नाचै ॥ ७ ॥ राग सारंग ॥ कह्यो

शुक श्रीभागवत विचारि । हरिकी भक्ति विरद है युग युग आन धर्म दिन चारि ॥ चिंता तजौ परीक्षित
 राजा सुन सुख साखि हमारि । कमल नयनकी लीला गावत कटत अनेक बिकारि ॥ सतयुग सत-
 त्रेता तप कीनो द्वापर पूजा चारि । सूर भजन कलि केवल कीजै लज्जा कानि निवारि ॥ ८ ॥
 राग विलावल ॥ गोविन्द भजन करो इहि वारा । शंकर पार्वती उपदेशत तारक मंत्र लिख्यौ श्रुतिद्वारा ॥
 अश्वमेध यज्ञ जो कीजै गया बनारस अरु केदारा । रामनाम सरि तऊन पूजै जो तनु गारो जाइ हिवारा ॥
 सहसवार जो बेनी परसौ चन्द्रायण सौ वारा । सूरदास भगवंत भजन बिनु यमके दूत खरेहैं द्वारा ॥
 ॥ राग केदारा ॥ है हरि नामको आधार । और इहि कलिकाल नार्ही रह्यो विधि व्यवहार ॥ नारदादि
 शुकादि मुनि मिलि कियो बहुत विचार । सकल श्रुति दधि मथित काब्यो इतोई धृतसार ॥ दशो
 दिशते कर्म रोख्यो मीनको ज्यों जार । सूर हरिको सुयश गावत जाहि मिटे भव भार ॥ १० ॥
 ॥ अथ नाममहिमा ॥ राग विलावल ॥ हरि हरि हरि सुमिरो सब कोई । हरि हरि सुमिरत सब सुख होई ॥
 हरि समान द्वितीय नहिं कोई । हरि चरणनि राखो चित गोई ॥ श्रुति स्मृति सब देखो जोई । हरि सुमि-
 रत होई सो होई ॥ हरि हरि हरि सुमिरो सब कोई । बिन हरि सुमिरन मुक्ति न होई ॥ कोटि उपाय
 करै जो कोई । हरि हरि हरि सुमिरो सब कोई ॥ शत्रु मित्र हरि गिनत न दोई । जो सुमिरे ताकी
 गति होई ॥ हरि हरि हरि सुमिरो सब कोई । हरिके गुण गावत सब कोई ॥ राव रंक हरि
 गिनत न दोई । जो गावै ताकी गति होई ॥ हरि हरि हरि सुमिरयो जिन जहाँ । हरि
 तिहिं दरशन दीनो तहाँ ॥ हरि बिनु सुख नहिं इहाँ न वहाँ । हरि हरि हरि सुमिरो जहाँ तहाँ ।
 हरि हरि हरि सुमिरो दिन रात । नातर जन्म अकारथ जात । सौ बातनिकी एकौ बात ॥ सूर
 सुमिरि हरि हरि दिन रात ॥ ११ ॥ जन्म जन्म जब जब जिहिं जिहिं युग जहाँ जहाँ जन जाइ ।
 तहाँ तहाँ हरि चरणकमल रति जों दृढ़ होइ रहाइ ॥ श्रवण सुयश सारंग नाद विधि चातक विधि मुख
 नाम । नैन चकोर संत संतति शशि करि अर्चन अभिराम ॥ सुमति स्वरूप सचै सर घालो उर
 अंबुज अनुराग । नित प्रति अलि जिमि गुंज मनोहर आवत प्रेम पराग ॥ औरौ सकल सुकृत
 श्रीपति हित तन मन रहत सुप्रीति । नाक निरै सुख दुख न सूर प्रभु जिहिके भजन प्रतीति ॥
 ॥ १२ ॥ अथ हरिविमुख निंदा ॥ राग सारंग ॥ अचंभो इन लोगनिको आवे छांडे श्याम अमीरस फलको
 माया विष फल भावे ॥ निंदत मूढ़ मलय चन्दनको राख अंग लपटावै । मान सरोवर छांडि हंस
 तट काग सरोवर न्हावै ॥ पगतर जरत न जानै मूरख घर तजि घूर बुझावै । चौरासी लख
 योनि स्वांग धरि भ्रमि भ्रमि यमहिं हँसावै ॥ मृग तृष्णा आचार युक्ति जल ता सँग मन ललचावै ।
 कहंत जु सूरदास संतनि मिल हरियश काहे न गावै ॥ १३ ॥ भजन बिनु कूकर शूकर जैसो ।
 जैसे घर विलाव के मूसा रहत विषय बश तैसो ॥ बकी बल्लुआ अरु गीध गीधनी आइ जन्म
 लियो वैसो । उनहुँके यह सुत दाराहैं इन्हें भेद कहो कैसो ॥ जीव मारिके उदर भरत है तिनके
 लेखे ऐसो । सूरदास भगवंत भजन बिनु ज्योंव उंट खर जैसो ॥ १४ ॥ भजन बिनु जीवत जैसे प्रेत ।
 मलिन मंदमति डोलत घर घर उदर भरनके हेत ॥ सुख कटु वचन नित प्रति निन्दा सगुन
 सुयश सुखलेत । कबहुँ पाप करै पावत धन गांठि धूत तहाँ देत ॥ गुरु ब्राह्मण संतजन सज्जन
 जात न कबहुँ निकेत । सेवा नहिं भगवंत चरणकी भवन नीलको खेत ॥ कथा नहिं गुणगीत
 सुयश हरि साधत देव अचेत । ताकी कहा कहों मुनि सूरज बूडत कुटुंब समेत ॥ १५ ॥
 जिहितनु हरि भजबो न कियो । सो तनु शूकर श्वान मीन ज्यों इहि सुख कहा जियो ॥ जो जगदीश

ईश सबहुंको ताहि न चित्त दियो । प्रगट जानि यदुनाथ बिसरै आशामद जु पियो ॥ चारि पदा-
रथको प्रभु दाता तिनै न मिलौ हियो । सूरदास रसना वश अपने टेरि न नाम लियो ॥ १६ ॥
॥ अथ सत्संग महिमा ॥ राग केदारा ॥ जादिन संत पाहुने आवत । तीरथ कोटी स्नान करे फल जैसो
दरशन पावत ॥ नेह नयो दिन दिन प्रति उनको चरण कमल चित लावत । मन वच कर्म और
नहिं जानत सुमिरत औ सुमिरावत ॥ मिथ्याबाद उपाधि रहित है बिमल बिमलयश गावत । बंधन
कर्म कठिन जे पहिले सोऊ काटि बहावत ॥ संगति रहै साधुकी अनुदिन भव दुख दूरि नशावत ।
सूरदास या जन्म मरण ते तुरत परमगति पावत ॥ १७ ॥ अथ भक्ति साधन ॥ राग धनाश्री ॥ हरि
रसतो कबहुं जाइ लहियै । गये सोच आये नहिं आनंद ऐसो मारग गहिये ॥ कोमल वचन दीन
ता सबसों सदा अनंदित रहिये । बाद विवाद हर्ष आतुरता इतो दंड जिय सहियै ॥ ऐसी जो आवै
या मनमें यह सुख कहैं लौं कहिये । अष्ट सिद्धि नव निद्धि सूरप्रभु पहुँचे जो कछु चाहियै ॥ १८ ॥
॥ राग धनाश्री ॥ जौलौं मन कामना न छूटै । तौ कहा योग यज्ञ व्रत कीने बिनु कन तुस को कूटै ॥
कहा स्नान किये तीरथके अंगभस्म जटजूटै । कहा पुराणन पढ़ै जु अठारह ऊर्ध्व धूमके घूटै ॥
जग सोनाकी सकल बडाई इहिते कछु न खूटै । करनी और कहै कछु औरै मन दशहं दिश
लूटै ॥ काम क्रोध मद लोभ शत्रु हैं जो इतनो सुनि छूटै । सूरदास तबहीं तम नाशै ज्ञान अग्नि
झर फूटै ॥ १९ ॥ राग विलावल ॥ भक्तिपंथको जो अनुसरै । सुत कलत्र सो हित परिहरै ॥ अशन
बसन की चित्त न करै । विश्वंभर सम जगको भरै ॥ पंगु जाके द्वारे पर होई । ताको पोषत अह
निशि सोई ॥ जो प्रभुके शरणागत आवै । ताको प्रभु क्योंकरि विसरावै ॥ मात उदरमें रस पहुँ
चावत । बहुरि रुधिरते क्षीर बनावत ॥ अशन काज प्रभु वनफल करै । तृषा हेतु जल झरना झरै ॥
पात्र स्थान हाथ हरि दीने । बसन काज बलकल प्रभु कीने ॥ शय्या पृथ्वी करि विस्तार । गृह
गिरि कंदर करे अपार ॥ ताते चिंता सकल त्यागः । सूरश्याम पदकरि अनुराग ॥ २० ॥ भक्ति
पंथको जो अनुसरै । सो अष्टांग योगको करै ॥ यम नियमासन प्राणायाम । करि अभ्यास
होइ निष्काम ॥ प्रत्याहार धारना ध्यान । करै जु छाँडि बासना आन ॥ क्रम क्रम करिकै करै समा-
धि । सूरश्याम भजि मिटै उपाधि ॥ २१ ॥ राग धनाश्री ॥ सबै दिन एकैसे नहिं जात । सुमिरन
ध्यान कियो करि हरिको जबलगि तन कुशलात ॥ कबहुं कमला चपला पाके टेढ़े टेढ़े जात ।
कबहुँक मग मग धूरि टटोरत भोजन को बिलखात ॥ या देहीके गर्व बावरो तदपि फिरत
इतरात । बाद विवाद सबै दिन बीते खेलतही अरु खात ॥ हौं बड हौं बड बहुत कहावत सूधे कहत
न बात । योग न युक्ति ध्यान नहिं पूजा वृद्ध भये अकुलात ॥ बालापन खेलतही खोयो तरुणापन
अलसात । सूरदास औसरके बीते रहिहौ पुनि पछितात ॥ २२ ॥ राग सारंग ॥ गर्व गोविंदहि
भावत नाहिं । कैसी करी हिरण्यकशिपुसों प्रगट होइ छिनमाहिं ॥ जग जानी करतूत
कंसकी नरकासुर मारयो पलमाहिं । ब्रह्मा इन्द्रादिक पछताने गर्व धारि मनमाहिं ॥ यौवन रूप
राज धन धरती जान जलदकी छाहिं । सूरदास हरि भजो गर्व तजि बिमुख अगतिको जाय ॥ २३ ॥
राग कान्हारा ॥ विषया जात हर्ष्यो गात । ऐसे अंध जानि तैं मूरख जो परत्रिय लपटात ॥ बरजिरहे
सब कहे न मानत करि करि जतन उडात । परे अचानक त्यों रसलंपट तनु तजि यमपुर जात ॥
यहतौ सुनी व्यासके मुखें परदारा दुखदात ॥ रुधिर मेद मल मूत्र कठिन कुच उदर गंध
गंधात । तन धन यौवन ताहित खोवत नरककी पाछे बात ॥ जो नर भले चाहत तो सो तजि

सूर प्रभू गुण गात ॥ २४ ॥ अथ आत्मज्ञान ॥ राग नट ॥ जौलौं सतस्वरूप नहिं सूझत । तौलौं
 मृगमद नाभि विसारे फिरत सकल वन वृझत ॥ अपनोही मुख मलिन मंदमति देखत दर्पण माहिं ।
 ता कालिमा मेटवे कारण पचत पखारत छाहिं ॥ तेल तूल पावक पुट भरि धरिबनै न बिना
 प्रकाशत । कहत बनाइ दीपकी बतियां कैसे धौं तम नाशत ॥ सूरदास यह गति आये बिनु
 सब दिन गने अलेखे । कहा जाने दिनकरकी महिमा अंध नयन बिनु देखे ॥ २५ ॥ अपुनपो
 आपुनही बिसरयो । जैसे श्वान काँच मंदिरमें भ्रमि भ्रमि भूसि मरयो ॥ हरि सौरभ मृग नाभि बसत है
 द्रुम तृण संधि मरयो । ज्यों सपने में रंक भूप भयो तस करि अरि पकरयो ॥ ज्यों केहरि प्रतिबिंब
 देखिकै आपुन कूप परयो । ऐसे गज लखि स्फटिक शिला में दशननि जाइ अरयो ॥ मर्कट मुट्टि
 छाँडि नहिं दीनी घर घर द्वार फिरयो ॥ सूरदास नलनीको सुबटा कहि कौने जकरयो ॥ २६ ॥
 अथ विराट् रूप वर्णन राग केदारा ॥ नैननि निरखि श्यामस्वरूप । रह्यो घट घट व्यापि सोई
 ज्योतिरूप अनूप ॥ चरण सत पताल जाके शीश है आकाश । सूर चंद्र नक्षत्र पावक सर्व तासु
 प्रकाश ॥ २७ ॥ अथ आरती । हरिजूकी आरती बनी । अति विचित्र रचना रचि राखी परति न
 गिरा गनी ॥ कच्छप अध आसन अनूप अति डांडी शेष फनी । मही सराव सतसागर घृत बाती
 शैल घनी ॥ रवि शशि ज्योति जगत परिपूरण हरत तिमिर रजनी । उडत फूल उडगन नभ अंतर
 अंजन घटा घनी ॥ नारदादि सनकादि प्रजापति सुर नर असुर अनी । काल कर्म गुण अरुण
 अंत कछु प्रभुइच्छा रचनी ॥ यह प्रताप दीप सु निरंतर लोक सकल भजनी । जाके उदित नचत
 नाना विधि गति अपनी अपनी ॥ सूरदास सब प्रकृति धातुमय अति विचित्र सजनी ॥ २८ ॥
 अथ नृपविचार राग गूजरी ॥ श्रीगुरुके सुनि वचन नृप लाग्यो करन विचार । झूठे नाते
 जगतके सुत कलत्र परिवार ॥ चलत न कोऊ संग चलै मोरि रहैं मुख नार । आवत गाढे कामहरि
 देखो सूर विचार ॥ २९ ॥ राग गूजरी ॥ हरि बिनु कोऊ काम न आयो । यह माया झूठी प्रपंच
 लगि रतनसों जन्म गवायो ॥ कंचन कलश विचित्र चित्र करि रचि पचि भवन बनायो । तामें ते तिहि
 छिन हीं काढ़्यो पलभर रहनि न पायो ॥ हौं तेरेही संग जरांगी यह कहि त्रिया धूति धन खायो ॥
 चलत रही चित चोरि मोरि मुख एक न पग पहुँचायो ॥ बोलि बोलि सब बोलि मित्रजन लीनो
 सो जिहि भायो । परयो काज अंतको विरिया तिनिही आनि बैधायो ॥ आशा करि करि जननी
 जायो कोटिक लाड लडायो । तोरि लयो कटिहूँको डोरा तापर बदन जरायो ॥ पतित उधारन
 गणिका तारन सों मैं शठ विसरायो । लियो न नाम नेकहूँ धोखे सूरदास पछतायो ॥ ३० ॥
 राग देवगंधार ॥ सकल ताजि भजि मन चरण मुरारि । श्रुति स्मृति अरु मुनिजन भाषत हैं मैं हूँ कहत
 पुकारि ॥ जैसे स्वप्ने सोइ देखियत तैसे यह संसारि । जात बिलै है छिनक मात्रमें उधरत नैन
 किवारि ॥ बारैबार कहत मैं तोसों जन्म न जूवा हारि । पाछे भई सु भई सूरजन अजहूँ समुझि
 सँभारि ॥ ३१ ॥ राग गूजरी ॥ अजहूँ सावधान क्यों न होई । माया विषम भुजंगनिको विष
 उतरयो नहिं न तोई ॥ कृष्ण सुमंत्र जियावन मूरी जिनि जग मरत जिवायो । बारंबार निकट श्रवण
 नि है गुरुं गारुडी सुनायो ॥ भौतिक देह जीय अभिमानि देखत ही दुख लायो । कोउ कोउ उबरयो
 साधु संगति जिनि राम जीवन पायो ॥ जाग्यो मोह मयूर प्रति छूटे सुयश गीतके गाये । सूर मिटै
 अज्ञान मूछा ज्ञान मूलके खाये ॥ ३२ ॥ नृपको वचन गुरुदेव प्रति ॥ नमो नमो करुणा निधान ।
 चितवत कृपाकटाक्ष तुम्हारी मिटिगयो तम अज्ञान ॥ मोहनशाको लेश रह्यो नहिं भयो विवेक

विहान । आत्मरूप सकल घट द्रश्यो उदय कियो रवि ज्ञान ॥ मैं मेरी अब रही न मेरे छुट्यो
 देह अभिमान । भावै परो आजुही यह तनु भावै रहो अमान ॥ मेरे जिय अब यहै लालसा लीला
 श्रीभगवान । श्रवण करौ निशि बासर हित सों सूर तुम्हारी आन ॥ ३३ ॥ अथ शुकदेववचन राग सारंग ॥
 कह्यो शुक सुनो परीक्षितराव । ब्रह्म अंगोचर मन बाणीते अगम अनंत प्रभाव ॥ भक्तन हित
 अवतार धारि जो करि लीला संसार । कहौ ताहि जो सुनै चित्त दै सूर तैरै सो पार ॥ ३४ ॥
 अथ नारद ब्रह्मा संवाद रागविलावल ॥ नारद ब्रह्माको शिरनाई । कह्यो सुनो त्रिभुवन पति राई ॥ सकल
 सृष्टि यह तुमते होई । तुम सम द्वितिया और न कोई ॥ तुम हौ धरत कौनको ध्यान । यह तुम
 मोसो कहो बखान ॥ कह्यो कर्ता हर्ता भगवान । सदा करत मैं तिनको ध्यान ॥ नारदसों कह्यो
 विधि या भाई । सूर कह्यो त्योंहीं शुक गाई ॥ ३५ ॥ अथ चतुर्विंशति अवतार वर्णन ॥ राग धनाश्री ॥
 जो हरि करै सो होई कर्ता नाम हरी । ज्यों दर्पण प्रतिबिंब त्यों सब सृष्टि करी ॥ आदि निरंजन
 निराकार कोउ हुतो न दूसर । रचो सृष्टि विस्तार भई इच्छा इक औसर ॥ त्रिगुण तत्त्वते महातत्त्व
 महातत्त्वते अहंकार । मन इंद्रिय शब्दादि पंची ताते किये विस्तार ॥ शब्दादिकते पंचभूत सुन्दर
 प्रगटायें । पुनि सबको रचि अंड आपमें आप समायें ॥ तीनलोक निजदेहमें राखे करि विस्तार । आदि
 पुरुष सोई भयो जो प्रभु अगम अपार ॥ नाभिकमलते आदिपुरुष मोको प्रगटायो । खोजत युग
 गए बीति नालको अंत न पायो ॥ तिन मोसों आज्ञा करी रचि सब सृष्टि उपाई । स्थावर जंगम
 सुर असुर रचे सबै मैं आई ॥ मच्छ कच्छ बाराह बहुरि नरसिंह रूप धरि । वामन बहुरो परशुराम
 पुनि राम रूप करि ॥ वासुदेव सोई भयो बुध भयो पुनि सोई सोई । कल्की होईहै
 और न द्वितिया कोई ॥ ए दशहैं अवतार कहौ पुनि और चतुर्दश । भक्तबछल भगवान् धरे
 वपु भक्तनिके वश ॥ अज अविनाशी अमर प्रभु जन्मै मरै न सोई । नटवर कला करत
 सकल बूझै बिरला कोई ॥ सनकादिक पुनि व्यास बहुरि भए हंसरूपहरि । पुनि नारायण ऋषभदेव
 बहुरचो धन्वंतरि ॥ नारद दत्तात्रेय हरि यज्ञ पुरुष वपु धारि ॥ कपिल मोहनी पृथु हयग्रीव
 सुध्रुव उद्धारि ॥ भूमिरेणु कोऊ गनै और नक्षत्रन समुझावै । कह्यो चहे अवतार अंत सोऊ नहिं
 पावै ॥ सूर कहौ क्यों कहि सकै जन्म कर्म अवतार । कहै कछुक गुरुकृपाते श्रीभागवत अनुसार
 ॥ ३६ ॥ ब्रह्मा उत्पत्ति चतुःश्लोक प्रति राग विलावल ॥ ब्रह्मा यों नारदसों कह्यो । जब मैं नाभिक-
 मलते भयो ॥ खोजत नाल कितो युत गयो । तउ मैं कछू मरम ना लह्यो ॥ भई आकाश
 वाणी तिहिं बार । तू ए चारि श्लोक विचार ॥ इनैं विचारिते है है ज्ञान । ऐसी भाँति कह्यो
 भगवान ॥ ब्रह्मा जो नारदसों कही । व्यास सोई नारदसों लही ॥ व्यास कही मोसों विस्तार ।
 भयो भागवत या प्रकार ॥ सोई मैं अब तोसों भाखौं, तेरे हृदय न संशय राखों ॥ मूल भागवत
 को एइ चार सूर भली विधि इन्हैं विचार ॥ ३७ ॥ अथ चतुःश्लोकी श्रीमुखवाक्य । राग कान्हरा ॥
 पहिले होहिं हों तब एक । अमल अकल अज भेद विवर्जित सुनि विधि विमल विवेक ॥ सो
 हौं एक अनेक भाँति करि शोभित नाना भेष । ता पाछे इन गुणनि गाएते हौं रहिहौं अवशेष ॥
 झूठीहैं सांची सी लागति मम माया सो जानि । रवि शशि राहु संयोग बिना ज्यों लीजत है मन
 मानि । ज्यों गज स्फाटिक मध्य न्यारो बसि पंच प्रपंच बिभूत ॥ ऐसे मैं सबहुनतै न्यारो माणि
 ग्रंथित ज्यों मूत ॥ पहिले ज्ञान विज्ञान द्वितिया पद तृतीय भक्तिको भाव । सूरदास सोई समष्टि
 करि व्यष्टि दृष्टि मन लाव ॥ ३८ ॥

इति श्रीकविवरसूरदासकृते श्रीमद्भागवते सूरसागरे द्वितीयः स्कन्धः समाप्तः ॥

अथ कवि सूरदासकृत-

❀ श्री सूरसागर । ❀

तृतीय स्कन्ध ।

अथ शुकवचन ॥ राग विलावल ॥ हरि हरि हरि हरि सुमरन करौ । हरि चरणारविंद उर धरौ ॥ शुकदेव हरिचरणन चितलाई । राजासों बोल्यो या भाई ॥ कहौं हरि कथा सुन चित लाई । सूर तरौ हरिके गुण गाई ॥ १ ॥ उद्धव विदुर संवाद । कृष्णज्ञान संदेश मैत्रेय निकट वतावन राग विलावल ॥ जब हरिजू भए अंतर्ध्यान । कहि उद्धवसों तत्त्व ज्ञान ॥ कह्यो मैत्रेयसों समुझाई । यह तुम बिदुरहि कहियो जाई । बदिकाश्रम दोऊ मिलि आए । तीरथ करत गए अकुलाए ॥ उद्धव बिदुर तहां मिलि गए । दोऊ कृष्ण प्रेम वश भए ॥ उद्धव कह्यो हरिकह्यो जो ज्ञान । कहिहैं तुम्हें मैत्रेय आन ॥ यह कहि उद्धव आगे चले । बिदुर मैत्रेय बहुरो मिले ॥ जो कछु हरिसों सुनियो ज्ञान । कह्यो मैत्रेय ताहि बखान ॥ सोइ मोहि दियो व्यास सुनाई । कहों सो सूर सुनो चितलाई ॥ २ ॥ अथ बिदुर जन्म वर्णन ॥ बिदुर सुधर्मराइ अवतार । ज्यों भयो कहों सुनो चितधार ॥ मांडव्य ऋषि जब शूली दयो । तब सो काठ हरचो ह्वै गयो ॥ मांडव्य धर्मराजपै आयो । क्रोधवंत यह वचन सुनायो ॥ कौन पाप मैं ऐसो कियो । जाते मोकूं शूली दियो ॥ धर्मराज कह सुन ऋषिराई । क्षमा करौ तौ देउँ सुनाई ॥ बाल अवस्थामें तुम धाई । उदत भँभीरी पकरी जाई ॥ ताहि शूलपर शूली दियो । ताको बदलो तुमसों लियो ॥ ऋषि कहै बाल दशा अज्ञान । भयो पाप मोते बिन जान ॥ बालापनको लगत न पाप । ताते देउँ मैं तुम्हें शराप ॥ दासीसुत तूहैं है जाई । सूर बिदुर भयऊसो आई ॥ ३ ॥ अथ सनकादिकावतार ॥ ब्रह्मा ब्रह्मरूप उर धारि । मनसों प्रगट कियो सुत चारि ॥ सनक सनंदन सनतकुमारि । बहुरि सनातन नाम ए चारि ॥ ए चारों जब ब्रह्मा किये । हरिको ध्यान धरचो तिहिं हिये ॥ ब्रह्मा कह्यो सृष्टि विस्तारो । उन यह बचन हृदय नहिं धारो ॥ कह्यो यहै हम तुमसों चहैं । पांच वरसके नितही रहैं ॥ ब्रह्मासों यह वर तिहि पाई । हरि चरणन चित राख्यो लाई ॥ शुकदेव कह्यो जैसे प्रकार । सूर कहै ताही अनुसार ॥ ४ ॥ अथ रुद्र उत्पत्ति वर्णन । सनकादिकनि कह्यो नहिं मान्यो । ब्रह्मा क्रोध बहुत मन आन्यो ॥ तब इक पुरुष भौंहते भयो । होत समय तिहि रोवन ठयो ॥ ताको नाम रुद्र विधि राख्यो । ताको सृष्टि करन को भाख्यो ॥ तिन बहु सृष्टि तामसी करी । सो तामस करि मन अनुसरी ॥ ब्रह्मा मनसों भली न भाई । सूर सृष्टि तब अवर उपाई ॥ ५ ॥ अथ सप्तऋषि चार मनु उत्पत्ति वर्णन ॥ ब्रह्मा सुमिरन करि अभिराम । प्रगट किये ऋषि सप्त अभिराम ॥ भृगु मरीचि अंगिरा वसिष्ठा । अत्रि पुलह पुनि भयो पुलस्त्या ॥

पुनि दक्षादि प्रजापति भये । स्वयंभू आदि चार मनु जये ॥ इनत उपजी सृष्टि अपार । सूर
 कहां लौं करै विस्तार ॥ ६ ॥ अथ सूर असुर उत्पत्ति वर्णन ॥ राग विलावल ॥ ब्रह्मा ऋषि मरीचि
 निर्मायो । ऋषि मरीचि कश्यप उपजायो ॥ सूर अरु असुर कश्यपके पुत्र । भ्रात विमात आप में
 शत्रु ॥ सूर हरि भक्त असुर हरि द्रोही । सूर अति क्षमी असुर अति कोही ॥ उनमें नित उठि होइ
 लड़ाई । करै सुरन की कृष्ण सहाई ॥ तिन हित जो जो किये अवतार कहौं सूर भागवत अनुसार ॥
 अथ बाराह रूप वर्णन । राग विलावल ॥ ब्रह्माते स्वयंभू मनु भयो ॥ तासों सृष्टि करनको कह्यो ॥ तिन
 ब्रह्मासों कहो शिर नाई । सृष्टि करौं सुरहै किहि भाई ॥ ब्रह्मा हरिपद ध्यान लगायो ॥ तब हरि
 वपु बराह धरि आयो ॥ ह्वै बराह पृथ्वी जब लायो । सूरदास शुक त्योंहीं गायो ॥ ८ ॥ राग धनाश्री ॥
 हरि गुण कथा अपार पार नहिं पाइये ॥ हरि सेवत सुख होइ हरी गुण गाइये ॥ ब्रह्मपुत्र
 सनकादि गये बैकुण्ठ एक दिन । द्वारपाल जय विजय हुते बरज्यो । तिहिंको पुन ॥ शाप दियो
 तब क्रोध ह्वै असुर होउ संसार । हरि दर्शनको जात क्यों रोख्यो बिना विचार ॥ हरि तिनसों
 कह्यो आइ भली शिक्षा तुम दीनी । बरज्यो आवत तुम्हें असुर बुद्धी इन कीनी ॥ तिन्हें
 कह्यो संसारमें असुर होउ अब जाइ । तृतीयहि जन्म बिरुद्ध करि मोसों मिलिहो आइ ॥ कश्यप
 की दिति नारि । गर्भ ताके दोउ आइ । तिनके तेज प्रताप देवतनि बहु दुख पाए ॥ गर्भ माहिं
 शत वर्ष रहि प्रगट भये पुनि आइ । तिन दोउनको देखिकै सूर सब गप डराइ ॥ हिरण्याक्ष इक
 भयो हिरण्यकशिपु भयो दूजो । तिनके बलको इंद्र वरुण कोऊ नहिं पूजो ॥ हिरण्याक्ष तब पृथ्वी
 को ले राख्यो पाताल । ब्रह्मा बिनती करि कह्यो दीनबंधु गोपाल ॥ तुम बिन दुतिया और
 कौन जो असुर सँहारै । तुम बिन करुणासिंधु कौन पृथ्वी उद्धारै । तब हरि धरि बाराह वपु
 ल्याए पृथ्वी उठाइ । हिरण्याक्ष लेकर गदा तुरतहि पहुँच्यो आइ ॥ असुर कोप ह्वै कह्यो
 बहुत तुम असुर सँहारै । अब लेहौं वह दांव छाँडिहौं नहिं बिन मारे ॥ यह कहिकै मारी गदा
 हरिजू ताहि सँभारि । गदा युद्ध तासों कियो असुर न मानी हारि ॥ तब ब्रह्मा करि विनय कह्यो
 हरि ताहि सँहारयो । तुम तौ लीला करत सुरन मन परो धकारो ॥ मार्यो ताहि विचारि हरि
 सूर सुनि भयो हुलास । सूरदासके प्रभु बहुरि कियो बैकुण्ठ निवास ॥ ९ ॥ अथ कपिल देवमुनि अवतार
 वर्णन ॥ राग विलावल ॥ हरि हरि हरि हरि सुमरनि करौ ॥ हरिको ध्यान सदा हिय धरौ ॥ ज्यों भयो
 कपिलदेव अवतार । कहौं सो कथा सुनौ चित धार ॥ कर्दम पुत्र हेतु तप कियो । तासु नारि हूँ
 इक व्रत लियो ॥ हरिसों पुत्र हमारे होई । और जगत सुख हूँ पुनि होई ॥ नारायण तिनको
 वर दियो । मोसों और न कोई वियो ॥ मैं लेहौं तुम गृह अवतार । तप तजि करो भोग संसार ॥
 दुहुँ तब तीरथ माहिं न्हावयो । सुंदर रूप दुहुँ जन पायो ॥ भोग समयी जुरी अपार । विचरन लागे
 सुख संसार ॥ तिनके कपिलदेव सुत भये । परम भाग्य मानि तिहिं लये ॥ १० ॥ अथ कर्दम प्रसंग राग
 विलावल ॥ कर्दम कह्यो तिन्हें शिरनाई ॥ आज्ञा होइ करौं तप जाई ॥ अभय अछेद रूप मम जान ।
 जो सब घटहै एक समान ॥ मिथ्या तनुको मोह बिसारि । जाइ रह्यो भावै गृह दारि ॥ करत इंद्रिय
 निचेतन जोई ॥ मम स्वरूप जानो तुम सोई ॥ तनु अभिमान जाको नश जाई । सो नर रहै सदा सुख
 पाई ॥ जब मम रूप देह तजि जाई । तब सब इंद्री सक्त नशाई ॥ ताको जानि मग्न ह्वै रहै । देह
 अभिमान ताहि नहिं दहै ॥ और जो ऐसी जानै नाहीं । रहै सो सदा काल भय माहीं ॥ यह सुनि
 कर्दम वनहिं सिधाए । वहां जाय हरिपद चित लाए ॥ हरि स्वरूप सब घट पुनि जान्यो । ऊँख

माहिं ज्यों रस है सान्यों ॥ जोयो तिनि आतम रस सार । ऐसी विधि जान्यो निरधार ॥ य
 लखि गहि हरिपद अनुराग । मिथ्या तनुको कीनो त्याग ॥ तनुही त्यागिकै हरि पद पायो ।
 नृप सुनि हरि स्वरूप उर लायो ॥ ११ ॥ अथ देवहूति माताको प्रश्न कपिल मुनिसों ॥ इहाँ कपिल
 सो माता कहो । प्रभु मेरो अज्ञान तुम दहो ॥ आतमज्ञान देहु समझाई । जाते जन्म मरण दुख
 जाई ॥ कह्यो कपिल कहों तुमसों ज्ञान । मुक्त होइ नर ताको जान ॥ मुक्त विविधके लक्षण कहों ।
 तेरे सब संदेहै दहों ॥ मम सो रूप जो सब घट जान । मग्न रहे तजि उद्यम आन ॥ अरु सुख दुख
 कछ मन नहिं ल्यावै । माता सो नर मुक्त कहावै ॥ और जु मेरो रूप न जानै । कुटुंब हेत नित
 उद्यम ठानै ॥ जाको इहि विधि जन्म सिराई । सो नर मारिकै नरक सिधाई ॥ ज्ञानी संगति उपजै
 ज्ञान । अज्ञानी सँग हो अज्ञान ॥ ताते साधु संग नित करना । जाते मिटै जन्म अरु मरना ॥
 स्थावर जंगममें मोहिं जानै । दयाशील सबसों हित ठानै ॥ सत संतोष दृढ करै समाध ।
 माता ताको कहिये साध ॥ काम क्रोध लोभ परिहरै । द्वंद्व रहित उद्यम नहिं करै ॥ ऐसे
 लक्षण हैं जिहि माहीं । माता तिनको साधु कहाहीं ॥ जाको काम क्रोध नित व्यापै । अरु
 पुनि लोभ सदा संतापै ॥ ताहि असाधु कहत कवि सोई । साधु भेष धरि साधु न होई ॥
 संत सदा हरिके गुण गावैं । सुनि सुनि लोग भक्तिको पावैं ॥ भक्ति पाइ पावैं हरि लोक । तिन्हें न
 व्यापै हर्ष न शोक ॥ देवहूति कह भक्ति सु कहिये । जाते हरिपुरवासा लहिये ॥ १२ ॥ भक्ति प्रश्न ॥
 अरु सु भक्ति कीजै किहिं भाई ॥ सोऊ मोको देहु बताई ॥ माता भक्ति चारि परकार ।
 सत रज तम गुण सुधा सारा ॥ भक्ति एक पुनि बहुविधि होई । ज्यों जल रंग मिलि रंगसु होई ॥ भक्ति
 सात्विकी चाहत मुक्त । रजोगुणी धन कुटुंब अनुरक्त ॥ तमोगुणी चाहै या भाई । ममबैरी क्योंही
 मरजाई ॥ सुधा भक्ति मोक्ष को चाहे । मुक्तिहुंको नाहीं अवगाहै । मन क्रम वच मम सेवाकरै ॥
 मनते भव आशा परिहरै ॥ ऐसो भक्त सदा मोहिं प्यारो । इक छिन जाते रहों न न्यारो ॥ ताके मैं
 हित मम हित सोई ॥ जा सम मेरो और न कोई । त्रिविध भक्ति मेरे है जोई ॥ जो मांगे तिहि देहुं मैं
 सोई ॥ भक्त अनन्य कछु नहिं मांगै ॥ ताते मोहिं सकुच अति लागै ॥ ऐसो भक्त जानि है जोई ।
 जाके शत्रु मित्र नहिं दोई ॥ हरिमाया सब जग संतापै । ताको माया मोह न व्यापै ॥ १३ ॥
 हरि माया प्रश्न । कपिल कहो हरिको निजरूप ॥ अरु पुनि माया कौन स्वरूप ॥ देवहूति जब
 याविधि कह्यो । कपिलदेव सुनि अति सुख लह्यो ॥ कह्यो हरिके भय रवि शशि डरै । वायु वेग
 अतिशय नहिं करै ॥ अग्निनि रहै जाके भय माहीं । सो हरिमाया जा वश माहीं ॥ मायाको त्रिगु-
 णातम जानो । सत रज तम ताको गुण मानों ॥ तिन प्रथमे महत्त्व उपायो । ताते अहंकार प्रग-
 टायो ॥ अहंकार कियो तीन प्रकार । मनते ऋषि मन सात रु चार ॥ रजगुणते इंद्रिय विस्तारी । तम
 गुण ते तन्मात्रा सारी ॥ तिनते पांच तत्त्व प्रगटायो । इहि सबको इक खंड बनायो ॥ अंड सु जड़
 चेतन नहिं होई । तब हरिपद माया मन पोई ॥ ऐसी विधि बिनती अनुसारी । महाराज बिनु शक्ति
 तुम्हारी ॥ यह अंडा चेतन नहिं होई । करौ कृपा हरि चेतन सौई ॥ तातमें शक्ति आपुनी धरी । चक्ष्वा
 दिक इंद्रि विस्तारी ॥ चौदह लोक भये तामाहिं । ज्ञानी तिहि बैराट कहाहिं ॥ आदि पुरुष चैतन्य
 को कहत । जोहै तिहुं गुननते रहित ॥ जड़ स्वरूप सब माया जानो । ऐसो ज्ञान हृदयमें आनो ॥
 जबलगि है जियको अज्ञान । चेतनको सो सकै न जान ॥ सुत कलत्र को अपनो मानै । अहंति-
 नसों ममत्व बहु ठानै ॥ जो कोई सुख दुख सपने जोई । सत्य मानले तिनको सोई ॥ जब

जागै तब सत्त न मानै । ज्ञान भए त्योही जग जानै ॥ चेतन घट घट है या भाई । ज्यों घट घट रवि प्रभा लखाई ॥ घट उपजो बहुरो नशि जाई । रवि नित रहै एक ही भाई ॥ जा तनको है जन्म रु मरना । चेतन पुरुष अमर अज बरना ॥ ताको ऐसो जानै जोई । ताके तिनसों मोह न होई ॥ जबलौ ऐसो ज्ञान न होई । वर्ण धर्म को तजै न सोई ॥ संतनकी संगत नित करै । पापकर्म मनते परिहरै ॥ अरु भोजन सो इहि विधि करै । आधा उदर अन्नसों भरै ॥ आधेमें जलवायु समावै । तब तिहि आलस कबहुँ न आवै ॥ और जु परालब्ध सों आवै । ताहीको सुखसों बरतावै ॥ बहुतेको उद्यम परिहरै । निर्भय ठौर बसेरो करै ॥ तीरथहुमें जो भय होई । ताहुको तू परिहरै सोई ॥ बहुरो धरै हृदय महँ ध्यान । रूप चतुर्भुज श्याम सुजान ॥ प्रथमै चरण कमलको ध्यावै । तासु महातम मनमें ल्यावै ॥ गंगा परसि उनहिको भई । शिव शिवता इनहींसो लही ॥ लक्ष्मी इनको सदा पलोवै । बारंबार प्रीतिको जोवै । जंघनको कदली सम जानै । अथवा कनक थंभ सम मानै ॥ उर अरु ग्रीव बहुरि हिय धारै । तापर कौस्तुभमणिहि बिचारै ॥ भृगुलत्ता लक्ष्मी तहँ जानी । नाभि कमल चित धारै ध्यानी ॥ मुख मृदुहास देख सुख पावै तासों प्रेम सहित मन लावै ॥ नैन कमल दलसे अभियारे । दशत तिनै कटे दुख भारे ॥ नासा कीर परम अति सुंदर । दशत ताहि मिटे दुख द्वंदर ॥ कूप समान श्रौन दोउ जानै । मुखको ध्यान इसी विधि ठानै ॥ केसर तिलकरेख अति सोहै । ताके पटतर को जगको है ॥ मृगमद बिंदा तामें राजे । निखेत ताहि काम शत लाजै ॥ मोर मुकुट पीतांबर सोहै । जो देखे ताको मन मोहै । श्रवणनि कुंडल परम मनोहर । नख शिख ध्यान धरै यों उर धर ॥ क्रम क्रम करि यह ध्यान बढ़ावै । मन कहुँ जाय फेरि तहँ आवै ॥ ऐसे करत मगन होइ सोई ॥ बहुरो ध्यान सहजही होई ॥ चितवत चलत न चितते टरै ॥ सुत त्रिय धनकी सुधि बिसमरै ॥ तब आतम घट घट दशवै । मग्न होइ तन मन बिसरावै ॥ भूख प्यास ताके नहिं व्यापै । सुख दुख तमिको नहिं संतापै ॥ जीवनमुक्ति रहै या भाई । ज्यों जल कमल अलिप्त रहाई ॥ १४ ॥ देवहूतीप्रश्न सुगम उपाय राग विलावल ॥ देवहूति यह सुनि पुनि कछो । देह ममत्व ढेर मुहिं रख्यो ॥ कर्दम मोहन मनतें जाई । ताते कहिये सुगम उपाई ॥ कपिल कछो तोहिं भक्ति सुनाऊँ । अरु ताको बेवरो समझाऊँ ॥ मेरी भक्ति चतुर विधि करै । सुने सुने ते सब निस्तरै ॥ जो कोउ दूरि चलनको करै । क्रम क्रम करि डग डग पग धरै ॥ इक दिन सुबहां पहुँचे जाई ॥ त्यों मम भक्त मिलै मोहिं आई ॥ चलत पंथ कोउ थाक्यो होई । कहै दूरि डरि मरिहै सोई ॥ जो कोउ ताको निकट बतावै । धीरज धरि सु ठिकाने आवै ॥ तमोगुणी रिपु मरनो चाहै ॥ रजोगुणी धन कुटुंब अवगाहै ॥ भक्त सात्त्विकी सेवै संत । लखै तबै मूरति भगवंत ॥ मुक्ति मनोरथ मनमें ल्यावै । मम प्रसादते सो वह पावै । निर्गुण मुक्तिहुको नहिं चहै । मम दर्शनहीते सुख लहै ॥ ऐसो भक्त सुमुक्त कहावै ॥ सो बहुर्यो चलि भवनहिं आवै ॥ क्रम क्रम ही करि सब गति होई । मेरो भक्त नष्ट नहिं होई ॥ १५ ॥ हरिते बिमुखै होइ नर जोई । मरि कै नरक परत है सोई ॥ तहां जातना बहुविधि पावै । बहुरो चौरासीमें आवै ॥ चौरासी भ्रमि नरतन पावै । पुरष-वीर्य सों तिय उपजावै ॥ मिलि रज वीरज ऐसी होई । द्वितिय मास शिर धारै सोई ॥ तीजे मास हस्त पग होवै । मास चौथि कटि अँगुरी सोवै । प्राणवायु पुनि आय समावै ताको इत उत पवन चलावै । पंचम मास हाड बलपाव । छठे मास इन्द्री प्रगटावै ॥ सप्तम चेतनता लहै सोई । अष्टमास सम्पूरण होई ॥ नाचि शिर अरु ऊँचे पांई । जठर अग्नि को व्यापै ताई ॥ कष्ट बहुत सो पावै जहां । पूर्व जन्म

सुधि आवै तहां ॥ नवम मास पुनि विनती करौ महाराज यह दुख मम टर॥ द्याते जो मैं बाहर परै ।
 अहर्निश भक्ति तुम्हारी करौ ॥ अरु मोपै प्रभु किरपा कीजै । भक्ति अनन्य आपुनी दीजै ॥ अरु
 यह ज्ञान न चितते टरे । बार बार यों विनती करै ॥ दशम मास पुनि बाहर आवै । तब यह ज्ञान सक-
 ल विसरावै ॥ बालापन दुख बहुविधि पावै । जीभ बिना कहि कहा सुनावै ॥ कबहुं विष्टामें रहजाई
 कबहुं माखी लागै आई ॥ कबहुं जुवां देइ दुख भारी । तिनको सो नहिं सकै निवारी ॥ पुनि जब पष्ठ
 वर्षको होई । इत उत खेलन चाहत सोई ॥ माता पिता निवारै जबहीं । मनमें दुख पावै सो तबहीं ।
 माता पिता पुत्र तेहि जानै । वह उनसे तब नातो माना ॥ वरसैं दश व्यतीत जब होई । बहुरि किशोर
 होय पुनि सोई ॥ सुंदर नारी ताहि विवाहै । अशन वसन बहुविधि सो चाहै ॥ विना भाग
 सो कहैंते आवै । तब वह मनमें बहु दुख पावै ॥ पुनि लक्ष्मी हित उद्यम करै ॥ अरु जब उद्यम खा ।
 ली परै ॥ तब वह रहै बहु दुख पाई ॥ कहैं लौं कहों कह्यो नहिं जाई ॥ बहुरो ताहि बुढापो आवै ।
 इन्द्रीशक्ति सकल मिट जावै ॥ ज्ञान न सुनै आँखि नहिं सूझै । बात कहै सो कछु नहिं बूझै ॥ खैबेको
 जब नाहिंन पावै । तब बहु बिधि मनमें पछतावै ॥ पुनि दुख पाइ पाइ सो मरै । विनु हरि
 भक्ति नरकमें परै । नरक जाइ पुनि बहु दुख पावै । पुनि पुनि योंहीं आवै जावै ॥ तऊ नहिं हरि
 सुमिरण करै । ताते बार बार दुख भरै ॥ १६ ॥ भक्त महिमा ॥ भक्त सकामीहूँ जो होई । क्रम
 क्रम करिकै उधैर सोई ॥ शनै शनै विधि पावै जाई । ब्रह्म संग हरिपदहि समाई ॥ निष्कामी
 वैकुण्ठ सिधावै । जन्म मरन तिहि बहुरि न आवै ॥ त्रिविध भक्ति अब कहों सुनु सोई । जातै हरिपद
 प्रापति होई ॥ एक कर्मयोगको करै । वर्ण आश्रम धरि निस्तै ॥ अरु अधर्म कबहुं नहिं करै । ते नर
 याही विधि निस्तै ॥ एक भक्ति योग को करै । हरि सुमिरन पूजा विस्तै ॥ हरि पद पंकज प्रीति
 लगावै । क्रम क्रम करि हरि पदहि समावै । ते हरिपद को याविधि पावै ॥ क्रम क्रम करि हरिपदहि
 समावै ॥ एक ज्ञान योग विस्तै । ब्रह्म जानि सबसों हित करै ॥ कपिलदेव बहुरो यों कह्यो । हमें
 तुमैं संवाद जु भयो ॥ कलियुगमें यहि सुनिहै जोई । सो नर हरिपद प्रापति होई ॥ १७ ॥ देवहूति
 हरिपदप्राप्ति देवहूति ज्ञानको पाई । कपिलदेवको कह्यो शिरनाई ॥ आगे मैं तुमको सुत मान्यो ।
 अब मैं तुमको ईश्वर जान्यो ॥ तुम्हरी कृपा भयो सुनिहै ज्ञान । अब न व्यापिहै मोहिं अज्ञान ॥ पुनि
 वन जाइ दियो तनु त्याग । गहिकै हरिपदसों अनुराग ॥ कपिलदेव सांख्य जो गायो ।
 सो राजा मैं तुम्हें सुनायो ॥ याहि समझि जु रहै लवलाई । सूर बसै सो हरिपुर जाई ॥ १८ ॥

इति श्रीमद्भागवते सूरसागरे कविवरश्रीसूरदासकृते तृतीयस्कंधः समाप्तः ॥ ३ ॥



अथ कविवर सूरदास कृत-

श्रीसूरसागर.

चतुर्थस्कन्ध।

(राग विलावल) हरि हरि हरि हरि सुमिरन करों। हरिचणारविन्द उर धरों॥कहाँ अब दत्तात्रेय अवतार। राजा सुनौ ताहि चित धार ॥ अत्रि पुत्र हित बहु तप कियो। तासु नारिहूँ यह व्रत लियो॥तीनो देव तहां मिलिआयो। तिनसों ऋषि यह वचन सुनायो॥मैं तो एक पुरुषको ध्यायो। अरु एकहि सों मैं चित लायो ॥ अपने आवनको कहो कारण । तुम हौ सकल जगत निस्तारण॥कह्यो तुम एक पुरुष जे ध्यायो । ताको दरशन काहु पायो ॥ ताकी शक्ति पाइ हम करै। प्रतिपालो बहुरो संहरे॥हम तीनोंहैं जग करतार। मांग लेहु हमसों वर सार ॥ कह्यो बिनय मेरी सुनि लीजै । ज्ञानमान पुत्र मोहिं दीजै॥ विष्णुअंश दत्त अवतरे । रुद्र अंश दुर्वासा ठरे ॥ ब्रह्म अंश चंद्रमा भयो । अत्रि अनसूयाको सुख दयो ॥ यों भए दत्तात्रेय अवतार । सूर कह्यो भागवत अनुसार ॥ १ ॥ शुकदेव वचन ॥ हरि हरि हरि सुमिरन करों। हरि चणारविन्द उर धरों ॥ शुकदेव हरि चरणन चित लाई । राजासों बोल्यो या भाई ॥ कहौ हरिकथा सुनौ चित लाई । सूर तरचो हरिके गुण गाई ॥ २ ॥ यज्ञ पुरुष अवतार वर्णन ॥ दक्षके उपर्जा पुत्री सात । तिनमें सती नाम विख्यात ॥ महादेव को सो पुनि दई । यज्ञ दक्षकेमें सो सुई । तहां कियो हरि यज्ञ अवतार ॥ सूर कह्यो भागवत अनुसार ॥ ३ ॥ हरि हरि हरि हरि सुमिरन करौ । हरि चणारविन्द उर धरौ ॥ कहौ अब यज्ञ पुरुष अवतार । राजा सुनौ ताहि चित धार ॥ सती दक्षके पुत्री भई । दक्ष सुमहादेवको दई ॥ ब्रह्मा महादेव ऋषि सारे । एक दिन बैठे सभा मँझारे ॥ दक्ष प्रजापति हूँ तहां आए । करि सन्मान सबनि बैठाये ॥ काहु समाचार कछु पूछे । काहुसे बहुरो उन पूछे ॥ शिवकी लागी हरिपद तारी । ताते नहिं शिव आँख उधारी ॥ महादेव बैठे रहि गए । दक्ष देखिकै तिहि दुख तए ॥ महादेवको भाषत साधु । मैं तो देखो बहुत असाधु ॥ यज्ञ भाग ताको नहिं दीजै । मेरो कह्यो मान करि लीजै ॥ नन्दी हृदय भयो सुनि ताप । दियो ब्राह्मणनको तिन शाप ॥ श्रुति पढिकै तुम नहिं उद्धरि हौ । विद्या बेंचि जीविका करिहौ ॥ भृगु तब कोप होय तहँ कह्यो । तै शराप सबहुनको दियो ॥ महादेव हित जो तप करिहै । सोऊ भव जलते नहिं तरिहै ॥ दक्ष प्रजापति यज्ञ रचायो । महादेवको नहीं बुलायो ॥ सूर गंधर्व जे नेवति बुलाये । ते सब वधू सहित तहां आये ॥ सती सबनि तिन्ह आवत देखी । शिवसों बोली वचन विशेखी ॥ चलिए दक्ष-गेह हम जाहीं । यद्यपि हमें बुलायो नाही ॥ मोको तो यह अचरज आयो । उन हमको कैसे विसरायो ॥ गुरु पितु गृह बिनु बोले जैये । यहै नीति नाहीं सकुचैये ॥ शिव कह्यो तुम भली नीति

सुनाई । पै वह मानत है शत्रुताई ॥ वहां गये ते होइ अपमान । तौ यह भली बात नहिं जान ॥
 दुर्जन वचन सुनत दुख जैसो । बाणलगे दुख होय न तैसो ॥ मम सतराई हृदये आन । करि है तेरोऊ
 अपमान ॥ भये अपमान वहांतुं मरि है । जो मम वचन हृदय नहिं धरि है ॥ सती कह्यो मम भगनिनि सात ।
 सबै बोलाई है मात ॥ मोहूँको अब आज्ञा दीजै । महाराज अब बिलंब न कीजै ॥ बारंबार सती जब
 कह्यो । तब शिव अंतर्गत यों लह्यो ॥ सती सदा मम आज्ञाकारी । कहत जु या विधि बारंबारी ॥
 देखत है कछु होवनहारी । सो काहू पै जाइ न टारी ॥ गणन समेत सती तहँ गई । तासों दक्ष
 बात नहिं कही ॥ सती जानि अपनो अपमान । शिवको वचन कियो अनुमान ॥ कह्यो वहां अब
 गयो न जाई । बैठ गई शिर नीचे नाई ॥ शिव आहुतिकि बैर जब आई । विप्रन दक्ष पूछियो जाई ॥
 शिवनिन्दा कहि तिनसों भाष्यो । मैं तुमही पहिलेहि कहि राख्यो ॥ मेरो वचन
 मान करि लेहू । शिव निमित्त आहुति मत देहू ॥ तब है क्रोध सती तिहि कही ।
 तैं शिवकी महिमा नहिं लही । महादेव ईश्वर भगवान । शत्रु मित्र वहि एक समान ॥
 तैं अज्ञान जो करि शत्रुताई । उनकी महिमा तैं नहिं पाई ॥ पिता जानि तोको नहिं मारों ।
 अपनोही मैं आप संहारों ॥ योगधारणाकरि तनु त्यागो । शिवपद कमल माहिं अनुराग्यो ॥
 बहुरि हिमालय के अवतरि । समयांतर हर बहुरो बरी ॥ ह्यां शिवगणनि उपद्रव कियो । तब भृगुऋषि
 उपाय यह ठयो ॥ आहुति यज्ञकुंडमें डारि । कह्यो पुरुष उपजै बल भारि ॥ पुरुष कुंडते प्रगट
 जु भए । भृगुके निकट चले सब गए ॥ भृगु कह्यो करत यज्ञको नास । इनको ह्यांते देहु निकास ॥
 शिवके गण तिहि बहुतै मारे । ते गण शिवते जाइ पुकारे ॥ शिव है क्रोध इक जटा उपारी ।
 वीरभद्र उपज्यो बल भारी ॥ वीरभद्रको तहां पठायो । तासों इहि विधि कहि समुझायो ॥ दक्ष
 शिरकाटि कुंडमें डारि । आवौ बेगि न करौ अवारी ॥ वीरभद्र दक्षको मारयो । अरु भृगु ऋषिको
 केश उपारयो ॥ हाथ पाँय बहुतनके काटे । आइ नवायो शिवहिं ललाटे ॥ तब सुर ऋषि ब्रह्मापै
 जाय । दियो सकल वृत्तान्त सुनाय ॥ कह्यो ब्रह्मा शिवनिन्दा जहां । बुरो कियो तुम बैठे तहां ॥
 ब्रह्मा तिहिलै शिवपै आये । शिव प्रणाम करि ठिग बैठाये ॥ शिवको सबन कियो परमान । भोला-
 नाथ लियो सो मान ॥ ब्रह्मा शिवको वचन सुनायो । दक्ष तुम्हारो मर्म न पायो ॥ जैसो करयो सो
 तैसो पायो । अब वाको तुम फेरि जिवायो ॥ शिव कह्यो मेरे नहिं शत्रुताई ॥ सती मुई यह मनमें आई ॥
 अब जो तुमरी आज्ञा होई । छांडि विलंब कीजिए सोई । ब्रह्मा विष्णु रुद्र तहँ आए । भृगु ऋ-
 षिकेश आपुने पाए ॥ घायल सब नीके है गए । सुर ऋषि सबके भाए भए ॥ दक्ष शीश
 कुंडमें जरयो । ताके बदले अज शिर धरयो ॥ महादेव तेहि फेरि जिवायो ॥ दक्षजानि यह शीश
 नवायो ॥ विप्रन यज्ञ बहुरि विस्तारयो । वेद भली विधिसों उच्चारयो ॥ यज्ञपुरुष प्रसन्न जब
 भए । निकसि कुंडसे दर्शन दए ॥ सुंदर श्याम चतुर्भुज रूप । ग्रीवा कौस्तुभमाल अनूप ॥
 उठिके सबहुन माथो नायो । दक्ष बहुरि यह विनय सुनायो ॥ मैं अपमान रुद्रको कियो । तब
 मम यज्ञ सांग नहिं भयो ॥ अब मोहिं कृपा कीजिए सोई । फिर दुर्बुद्धि न ऐसी होई ॥ बहुरो
 भृगु ऋषि अस्तुति कीनी । महाराज मम बुधि भइ हीनी ॥ दियो क्रोध करि शिवहिं शराप ।
 करौ कृपा जु मिटै यह दाप ॥ पुनि शिव ब्रह्मा अस्तुति करी । यज्ञपुरुष वाणी उचारी ॥ दक्षतैं
 कियो शिवहिं अपमान । ताते भई यज्ञकी हान ॥ विष्णु रुद्र विधि एकहि रूप । इन्हें जान
 मत भिन्न स्वरूप ॥ जाते यह परगट भइ आई । ताको तू मनमाहिं धिआई ॥ यों कहि पुनि बैकुण्ठ

सिधारे । सूर गंधर्व गये पुनि सारे ॥ या विधि भयो यज्ञ अवतार । सूर कह्यो भागवत अनुसार ॥
 ॥ ४ ॥ अथसंक्षिप्त यज्ञपुरुष अवतार कथा ॥ राग मारू ॥ यज्ञ प्रभु प्रगट दरशन दिखायो ॥ विष्णु विधि
 रुद्र मम रूप ए तीनि हूं दक्षसों वचन यह कहि सुनायो ॥ दक्ष ऋषि मानि जब यज्ञ आरंभ
 कियो सबनको सहित पत्नी हैंकारयो । रुद्र अपमान कियो सती तब जिय दियो रुद्रके गणनि
 ताको संहारयो ॥ बहुरि विधि जाइ क्षमवाइ कै रुद्रको विष्णु विधि रुद्र तहां तुरत आये । यज्ञ
 आरंभ मिलि ऋषिन बहुरो कियो शीश अज राखिकै दक्ष जिवाये ॥ कुंडते प्रगट यज्ञपुरुष दरशन
 दयो श्यामसुंदर चतुर्भुज मुरारी । रूप प्रभु निरखि दंडवत सबहिनि कियो सूर ऋषि सवनि
 अस्तुति उचारी ॥ ५ ॥ पार्वती विवाह-वर्णन ॥ सती हिए धरि शिवको ध्यान । दक्ष यज्ञमें छाड्यो
 मान ॥ बहुरि हिमालयके शुभ धरी । नाम पार्वति है अवतरी । पार्वती बर प्रापत भई । तबहिं
 हिमाचल तासों कही ॥ तेरो कासों कीजै व्याह । तिन कह्यो मेरो पति शिव आह ॥ कह्यो
 हिमालय शिव प्रभु ईश । हमको उनसों कैसी रीस ॥ पार्वती शिव हित तप करयो ।
 तब शिव आइ तहां तिहि वरयो ॥ पार्वती विवाह व्यवहार । सूरकह्यो भागवत
 अनुसार ॥ ६ ॥ ध्रुव कथाराग विलावल ॥ स्वयंभू मनुके सुत भए दोई । तिनकी कथा कहौ सुन सोई ।
 उत्तानपाद इक नृप को नाम । द्वितिय प्रियव्रत अति अभिराम ॥ उत्तानपादके ध्रुव सुत भए । हरि
 जू ताको दरशन दए ॥ बहुरि दियो ताको अस्थान । जहां प्रदक्षिण दे शशि भान ॥ कहौ सुकथा
 सुनो चितधार । सूर कह्यो भागवत अनुसार ॥ ७ ॥ ध्रु वरदेन अवतार वर्णन ॥ राग विलावल ॥
 हरि हरि हरि हरि सुमरन करो । हरि चरणारविन्द उर धरो ॥ कहौ अब ध्रुव बर देन अवतार ।
 राजा सुनो ताहि चितधार ॥ उत्तानपाद पृथ्वीपति भयो । ताको यश तीनों पुर छयो ॥ नाम
 सुनीति बडी तिहि नारि । सुरुचि दूसरी ताकी नारि ॥ भयो सुरुचिते उत्तम बार । सुनीति नारिके
 ध्रुव कुमार ॥ राजा को सु सुरुचिसों नेह । बसै सुनीति दूसरी गेह ॥ इक दिन नृपति सुरुचि गृह
 आए । उत्तम कुँवर गोद बैठाए ॥ ध्रुव खेलत खेलत तहँ आए । गोद बैठिबेको पुनि धाए ॥ राजा
 त्रियडर गोद न लीनो । ध्रुव कुमार रोइ तब दीनो ॥ तबहि सुरुचि ध्रुवको समुझायो । तैं गोविंद
 चरण नहिं ध्यायो ॥ जो हरिको सुमिरन तू करतो । मेरे गर्भ जानि अवतरतो ॥ राजा तब तोहिं
 लेतो गोद । तबहिं गोदमें करतो मोद ॥ अजहूं तू हरिपद चित लाई । होहिं प्रसन्न तोहिं यदुराई ॥
 वचन सुरुचि बाण सम लागे । ध्रुव आयो मातापै भागे ॥ माता ताको रोदन देखि । दुख
 पायो मन माँह विशेषि ॥ कह्यो पुत्र तोको केहि मारयो । ध्रुव अति दुखित वचन उचार्यो ॥
 माता ताको कंठ लगायो । तब ध्रुव सब वृत्तांत सुनायो ॥ कह्यो सुत सुरुचि सत्य यह कह्यो । बिनु
 हरिभक्ति पुत्र मम भयो ॥ अजहूं जो हरिपद चित लैहो । सकल मनोरथ मनको पैहो ॥ जिन जिन हरि
 चरणन चितलाए । तिन तिन सकल मनोरथ पाए ॥ पितृ तुव ब्रह्मा तप कियो । हरि प्रसन्न है तिहि
 बर दियो ॥ तिहिको सर्व जगत विस्तार । जाकी नाहीं पारावार ॥ बहुरि स्वयंभू मनु तप कीनो ।
 ताहूको हरिजू वर दीनो ॥ ताको भयौ बहुत परिवार । नर पशु कीट गनत नहिं पार ॥ तू हू जो हरिहित
 तप करिहै । सकल मनोरथ तेरो पुरिहै ॥ ध्रुव एहि सुनि वनको उठि चले । पंथमाहिं तेहि नारद
 मिले ॥ देख्यो पांच बरसको बाल । वचन सुरुचि नहिं सक्यो सँभाल ॥ अब मैं हू याको दृढ़ देख्यो
 दृढ़विश्वास बहुरि उपदेशों ॥ ध्रुवसे कह्यो क्रोध परिहरौ । मैं जो कहौ सो चितमें धरौ ॥ मेरे संग
 राजापै आवौ । दे आवौ तोहि राज्य धन गावो ॥ भक्तिभावको जो तोहिं चाह । तोसों नहिं है
 है निवाह ॥ बहुतक तपसी पचि पचि मुए । पै तिहि हरि दरशन नहिं हुए ॥ मैं हरिभक्त नाम

मम नारद । मोसों कहो सु अपनो हारद ॥ राजा पास कहों सो जाई । लेहे मान नृपति सत
 भाई ॥ ध्रुव विचार तब मनमें कियो । सुमिरत नारद दर्शन दियो ॥ जब मैं भक्ति श्यामकी
 करिहों । नहि जानत जु कहा मैं पैहीं ॥ कह्यो सो नारद करो सहाई । करो भक्ति हरिकी चित
 लाई ॥ तुम नारायण भक्त कहावत । कहिको तुम मोहिं फिरावत ॥ तब नारद ध्रुवको दृढ़
 देखि । कह्यो देउँ मैं ज्ञान विशेषि ॥ मथुरा जाय सु सुमिरन करो । अरु हरिध्यान हृदयमें धरो ॥
 मथुरा जाइ सोई उन कियो । तब नारायण दर्शन दियो ॥ ध्रुव अस्तुति कीनी बहु भाई । तब हरि
 जू बोले सुसुकाई ॥ ध्रुव जो तेरी इच्छा होई । माँग लेहु मोसों अब सोई ॥ प्रभु मैं तुमरो दर्शन
 लह्यो । माँगनको पाछे कहा रह्यो ॥ हरि कह्यो राज्य हेतु तप कियो । ध्रुव प्रसन्न होइ मैं तोहिं
 दियो ॥ अरु तेरे हित कियो स्थान । देहि प्रदक्षिण जहँ शशि भान ॥ ग्रह नक्षत्र हूँ त्योंही
 फिरै । तू भव अटल न कबहूँ टरै ॥ अरु पुनि महाप्रलय जब होई । मुक्तिस्थान पाइहौ सोई ॥
 यह कहि हरि निज लोक सिधारे । ध्रुव निजपुरको पुनि पग धारे ॥ जब ध्रुव पुरके बाहर आये ।
 लोगन नृपको जाइ सुनाये ॥ उनके कहे न मनमें आई । तब नारद कह्यो नृपसों जाई ॥ ध्रुव
 आयो हरिसों वर पाई । राजा ताहि जाहि मिलि धाई ॥ नृप सुनि मन आनन्द बढ़ायो । अंतः-
 पुरमें जाइ सुनायो ॥ पुनि नृप कुटुंब सहित तहँ आये । नगर लोग सब सुनि उठि धाये ॥ ध्रुव
 राजाके चरणन परचो । राजा कंठ लगाइ हित करचो ॥ पुनि सु सुरुचिके चरणन परचो । तासों
 वचन ध्रुव उच्चरचो ॥ तुम उपदेश मैं हरिहि धियायो । यह उपकार न जात मिटायो ॥ पुनि
 माताके पाँइन परचो । माता ध्रुवको अंकम भरचो ॥ ध्रुव नृप सिंहासन बैठाए । नृपतप
 कारण बनहि सिधाये ॥ सप्तद्वीप राज्य ध्रुव कियो । शीतल भयो मातको हियो ॥
 यों भयो ध्रुव वर देन अवतार । सूर कह्यो भागवत अनुसार ॥ ८ ॥ राग आसावरी ॥ ध्रुव विमाता
 वचन सुनि रिसायो । दीनके बाल गोपाल करुणामई मातुसों सुनि तुरत शरन आयो ॥ बहुरि
 जब वन चलयो पंथ नारद मिल्यो कृष्ण निज धाम मथुरा बतायो । मुकुट शिर धरे बनमाल कौ
 स्तुभ गरे चतुर्भुज श्याम सुंदर धियायो ॥ भये अनुकूल हरि दियो तेहि तुरत वर जगत करि राज
 पद अटल पायो ॥ सूरके प्रभुकी शरन आयो जु नर करि जगत भोग वैकुण्ठ सिधायो ॥ ९ ॥
 पृथु अवतार वर्णन राग बिलावल ॥ धारि पृथु रूप हरि राज्य कियो । विष्णुकी भक्ति परमान जगमें
 करी प्रजाको सुख सकल भांति दियो ॥ वेन नृप भयो बलवंत जब पृथ्वी पर ऋषिनसों कह्यो
 जप तप निवारो । होइ तिहिको पतन शाप ताको दयो मारिकै ताहि जगदोष ढारचो ॥ भयो
 प्रगट आराज तब सब ऋषिन मंत्र करि वेनकी जांघको मथन कीनो । जांघके मथेते पुरुष
 परगट भयो श्याम तिहि भीलको राज्य दीनो ॥ बहुरि जब ऋषिन भुजदक्षिन मथ कियो
 लक्ष्मी सहित पृथु दर्श दीयो । पहिरि आभरन पुनि राज्य लागे करन आनि सब
 प्रजा दंडवत कीयो ॥ बहुरि बंदी जननि आय अस्तुति करी इन्द्र अरु वरुन तुम तल नाहीं ।
 कह्यो नृप विना प्राक्रम न स्तुति करौ विना किए मृद सुनि हर्ष जाहीं ॥ करो भगवानको यश
 सदा गुणीजन जो जगत सिंधुते पार तारैं । किये नरकी अस्तुति कौन कारज सैरै करै सु आपनो
 जन्म हारै ॥ कह्यो तिन तुम्हें हम मनुष जानत नहीं जगतपितु जगतहित देह धारचो ॥ करोगे काज जो
 कियो न काहू नृपति किए जस जाय हम दोष सारो ॥ बहुरि सब प्रजा मिलि आय नृपसों कह्यो
 विना आजीविका मरत सारी । नृप धनुष बाण धरि पृथ्वीपर कोप कियो तिन गरुड रूप बिनती

उचारी ॥ बेनके राज्यमें औषधी गिलगई होइहै सकल किरपा तुम्हारी। पर्वतनि जहां तहां रोकि मोकों
 लियो देहु करि कृपा एक दिशा टारी ॥ धनुषसों टारि पर्वत कियो एक दिश पृथ्वी सम करी
 प्रजा सब बसाई । सुर ऋषिन नृपति यों पृथ्वी दोहन करी आपुनी जीविका सबन पाई ॥
 बहुरि नृप यज्ञ निन्यानवे करी शतयज्ञको जबहि आरंभ कीनो । इन्द्र भय मान
 हय गहन सुतसों कह्यो सों न लै सक्यो तब आप लीनो ॥ नृपति सुतसों कह्यो जाइ
 हय ल्याव अब इंद्र तिहि देखि हय छांड दीनो । नृप कह्यो सुरनके हेतु मैं यज्ञ करत इन्द्रमम
 अथ किहि काज लीनो ॥ ऋषिन कह्यो तुव शतयज्ञ आरंभ लखि इन्द्रको राज्य हित कैप्यो हीयो ।
 नृप कह्यो इन्द्रपुरकी न इच्छा मुझे ऋषिन तब पूर्ण आहुती दीयो ॥ यज्ञ पुरुष कह्यो कुंडते निकसि
 यज्ञ पूर्ण भयो इन्द्र जिमि बर कछू मांगि लीजे । पृथु कह्यो नाथ मेरे न कछु शत्रुता अरु न कछु
 कामना भक्ति न दीजै ॥ यज्ञपुरुष गए वैकुण्ठ धामै जबै नौति नृप प्रजाको तब हँकारो । तिन्हैं
 संतोषि कह्यो देहु मांगै मुझे विष्णुकी भक्ति सब चित्त धारो ॥ सुनत यह बात सनकादि आए तहां
 मानदै कह्यो मोहि ज्ञान दीजै । कह्यो यह ज्ञान यह ध्यान सुमिरन यह निरखि हरि रूप मुख
 नाम लीजै ॥ पुनि कह्यो देहु आशीश मम प्रजाको सबै हरि भक्ति नित चित्त धारै । कृपा तुम करी
 मैं भेदको मन धरी नहीं कछु वस्तु ऐसी हमारे ॥ बहुरि सनकादि गए आपुने धामको नृपति
 सब लोग हरि भक्ति लाए । सूर प्रभु चरित अगनित न गने जाँय कछु यथा मति आपुने कहि सुनाए
 ॥ १० ॥ पुरंजन कथा वर्णन ॥ राग विलावल ॥ हरि हरि हरि हरि सुमिरन करों । हरि चरणारविन्द उर
 धरों ॥ कथा पुरंजन की अब कहौ । तेरे सब संदेह दहौ ॥ प्राचिनबहिं भूप इक भए । आयु प्रयंत यज्ञ
 तिहि ठये ॥ ताके मन उपजी गिल्यान । मैं कीनी बहु जियकी हानि ॥ यह मम दोष कवनविधि
 टरै । ऐसी भौति सोच मन करै ॥ इहि अंतर नारद तहँ आए । नृपसों यों कहि वचन सुनाए ॥
 मैं अबहीं सुरपुर ते आयो । मगमें अद्भुत चरित लखायो ॥ यज्ञमाहिं जो पशु तुम मारे । ते सब
 ठाढ़े शस्त्रनि धारे ॥ जोहतहैं ये पंथ तुम्हारो । अब तुम अपनो आप सँभारो ॥ नृप कह्यो मैं ऐसोई कियो ।
 यज्ञकाज मैं तिहि दुख दियो ॥ रसनाहीको कारज सारयो । मैं यों अपनो काज बिगारयो ॥ अब मैं यहै
 बिनय उच्चरौ । जो कछु आज्ञा होइ सो करौ ॥ कह्यो कहौ एक नृपकी कथा । उन जो कियो करो तुम
 तथा ॥ ताहि सुनौ तुम भली प्रकार । पुनि मनमें देखोजु विचार ॥ ता नृपको परमात्म मित्र । इक
 छिन रहै नहीं सो अत्र ॥ खान पान सो सब पहुँचावे । पै नृप तासों हित न लगावै ॥ नृप चौरासि लक्ष
 फिरि आयो । तब एहि पुर मानुष तनु पायो ॥ पुरको देखि परमसुख लह्यो । रानीसों मिलाप तहां
 भयो ॥ तिन पूँछ्यो तुम काकी अही । उन कह्यो मम सुमिरन नहिं रही ॥ पुनि कह्यो नाम
 कहा है तेरो । कह्यो न आवै नाम मोहिं मेरो ॥ तन पुरजाय पूरंजनि राव । कुमति तासु रानीको
 नाव ॥ आँख नाक मुख मूलद्वार । मूत्र शौच नव पुरको द्वार ॥ लिंग देह नृपको मिज गेह । दश
 इन्द्रिय दासीसों नेह ॥ कारण तन सुसैन स्थान । तहां अविद्या नारि प्रधान ॥ कामादिक पांचौ
 प्रतिहार । रहैं सदा ठाढ़े दरबार ॥ संतोषादि न आवै पावै । विषयी भोग आइ हरषावै ॥ जा द्वारे
 पर इच्छा होय । रानी सहित जाइ नृप सोइ ॥ तहां तहांको कौतुक देखि । मनमें पावै हर्षविशेष ॥
 इन्द्री दासी सेवा करै । तृप्ति न होइ बहुरि विस्तै ॥ यहि इन्द्रीको यहै सुभाइ । तृप्ति न होइ कि
 तोई खाइ ॥ निद्रावश जो कबहुं सोवै । मिलि अविद्यासों सुधि बुधि खोवै ॥ उनमत ज्यों सुख
 दुख नहिं जानै । जागै वहै रीति पुनि ठानै ॥ संत दरश कबहुं जो होई । जग सुख मिथ्या जानै

सोई ॥ पै कुबुद्धि ठहरान न देइ । राजाको अंकम भरिलेइ । राजा पुनि तब क्रीडा करै । छन
 भर हू अंतर नहिं धरै ॥ जब अखेट पर इच्छा होइ । तब रथ साजि चलै नृप सोइ ॥ जा द्वारे नृप
 इच्छा करै । ताही द्वार होइ निःसरै ॥ चक्ष्वादिक इन्द्री दर जानो । रूपादिक सब वनसम मानो ।
 मन मंत्री सो रथ हँकवैया । रथमें पुण्य पाप दोउ पहिया ॥ अश्व पांच ज्ञानेन्द्रिय पांच । विषय
 अखेटक नृप मनरांच ॥ राजा मंत्रीसों हित मानै । ताके दुख सुख दुख सुख जानै ॥ नरपति ब्रह्म
 अंश सुख रूप । मन मिलि परचो दुःखके रूप ॥ ज्ञानी संगति उपजै ज्ञान । अज्ञानी सँग होइ
 अज्ञान ॥ मंत्री कहै अखेट सो करै । विषय भोग जीवनि संहारै ॥ निशिभय रानी पै फिर आवै ।
 सोवतसो तिहि बात सुनावै ॥ आजु कहा उद्यम करि आए । कहै वृथा भ्रमि भ्रमि श्रम पाए ॥
 कालिह जाय अस उद्यम करौ । तेरे सब भंडारनि भरौ ॥ सब निशि याही भांति विहाई । दिन
 भये बहुर अखेटक जाई ॥ तहां जीव नाना संहारै । विषय भोग तिहिको हत करै ॥ विषय भोग
 कबहुं न अघाई । यों हीं नृप नित आवै जाई ॥ एक दिन नृप निज मंदिर आयो । रानीसों अह-
 निशि मन लायो ॥ ताके पुत्र सुता बहु भए । विषय बासना नाना रये ॥ कान लागिके अस कह्यो
 जाइ । जरा काल कन्या पुर आइ ॥ कह्यो प्रिया अब कीजै सोइ । देखे नृपति कहा धौं
 होइ ॥ देह शिथिल भई उच्यो न जाई । मानौ दीनो कोट गिराई ॥ कह्यो प्रिया अब कीजै सोइ ।
 देखो नृपति कहा धौं होइ ॥ पुनि ज्वर दौ दीनी पुर लाई । जरन लगे पुरलोग लोगाई ॥ कह्यो प्रिया
 अब कीजै सोइ । देखो नृपति काह धौं होइ ॥ पुनि ज्वर दीनी दौपुरलाई । जरन लगे सब लोग
 लोगाई ॥ मरन अवस्थाको तृप जानै । तौहू धरै न मनमें जानै ॥ मम कुटुंबकी कहा गति होई ।
 पुनि पुनि मूरख सोचै सोई ॥ कालभए तिहि पकर निकारचो । सखा प्राणपति तऊ न सँभारचो ॥
 रानीहीमें मन रहिगयो । मरि विदर्भकी कन्या भयो ॥ बहुरो तिन सतसंगति पाई । कहौं सु कथा
 सुनौं चित लाई ॥ मेघ ध्वजसों भयो विवाह । विष्णु भक्तिको तिहि उत्साह ॥ ता संगति नव सुत
 तिन जाये । श्रवणादिक मिलि हरि गुण गाये ॥ या विधि तिहि निज आयु बिताई । पूर्व पाप सब गए
 बिलाई ॥ मरण अवस्था जवनजिकाई । ईश सखाके मन यह आई । बहुत जन्म इन भ्रम भ्रम कीनो ।
 पै इन मोकों कबहुं न चीनो ॥ तब दयालु ह्वै दरशन दीनो । कबहुं मूढ तैं मोहिं न चीनो ॥ विषय
 भोगहीमें पगरह्यो । जान्यो मोहिं और कहुं गयो ॥ मैतो निकट सदाही रहौं । तेरे सकल दुख
 नको दहौं ॥ यह सुनिकै तिहि उपज्यो ज्ञान । पायो पुनि तिहि पद निर्वाण ॥ यह कहि नारद
 नृपसों कही । तेरीहू तैसी गति भई ॥ मै जु कहों सो देखि विचार । बिन हरि भजन नहीं निस्तार ।
 हरिकी कृपा मनुष्य तनु पावै मूरख विषय हेतु सुगँवावै ॥ तिन अंगनको सुनो विवेक ॥
 खरची लाख मिलै नहिं एक ॥ नैन दरश देखनको दिये । मूरख लखि परनारी जिए ॥ श्रवण
 कथा सुनिवेको दीने । मूरख परनिंदा हित कीने ॥ हाथ दए हरि पूजा हेत । तिहि कर मूरख पर
 धन लेत ॥ पग दए तीरथ जैवे काज । तिनसों चलि नित करत अकाज ॥ रसना हरि सुमिरन
 को करी । ताकर परनिन्दा उच्चरी ॥ यह सुनि नृप कीनो उनमान । मै सुई नृपति न दूसर आन ॥
 नारद जृ तुम कियो उपकार । डूबत मोहिं उतारचो पार ॥ नृपति पाइ पुनि आतमज्ञान ॥ राज्य
 छांडि करि गए उद्यान । यह लीला जो सुनै सुनावै ॥ सूर हरि कृपा ज्ञानको पावै । शुक ज्यों
 राजाको समझायो । मै हूँ ता अनुसार सुनायो ॥ ११ ॥ राग विलावल ॥ अपुनपो आपुनहींमें पायो ।
 शब्दहिं शब्द भयो उजियारो सतगुरु भेद बतायो ॥ ज्यों कुरंग नाभी कस्तूरी हूँ दूत

फिरत भुलायो । फिरि चेत्यो जब चेतन है करि आपुनही तनु छायो ॥ राजकुँआर
 कंठ मणि भूषण भ्रम भयो कहूँ गँवायो ॥ दियो बताइ और सत जन तब तनुको पाप न-
 शायो । सपने माहिं नारिको भ्रम भयो बालक कहूँ हिरायो । जागि लख्यो ज्यों की त्योहीं है ना
 कहूँ गयो न आयो । सूरदास समुझे की यह गति मनही मन सुसकायो । कहि न जाइ या सुख
 की महिमा ज्यों गूँगो गुर खायो ॥ १२ ॥

इति श्रीमद्भागते—सूरसागरे श्रीसूरदासकृते चतुर्थःस्कन्धः समाप्तः ।



अथ कविवर सूरदास कृत-

श्रीसूरसागर.


पंचमस्कंध ।

राग विलावल ॥ हरि हरि हरि हरि सुमिरन करो । हरि चरणारविंद उर धरो ॥ हरि चरण-
न शुकदेव शिरनाई । राजासों बोल्यो या भाई ॥ कहौं हरि कथा सुनौ चित धार । जाते तरो उद-
धि संसार ॥ ज्यों भयो ऋषभदेव अवतार । कहौं सुनो सो अब चितधार । शुक वरण्यो जैसे पर-
कार । सूर कह्यो ताही अनुसार ॥ १ ॥ ऋषभदेव अवतार वर्णन । राग विलावल । ब्रह्म स्वयंभू मनु
उपजायो । ताते जन्म प्रियव्रत पायो ॥ प्रियव्रतके अग्नीध्र भयो । नाभि जन्म ताही ते लयो ॥ नाभि
नृपति सुत हित जग कियो । यज्ञपुरुष तब दरशन दियो ॥ विप्रन अस्तुति वेद सुनाई । पुनि
कह्यो सुन त्रिभुवनके राई ॥ तुम सम पुत्र नाभिके होई । कह्यो मो सम जग और न कोई ॥ मैं हर्ता
कर्ता संसार । मैं लैहौं नृप गृह अवतार ॥ ऋषभदेव तब जन्मे आई । राजाके मन भये बधाई ॥ बहुरो
ऋषभ बड़े जब भए । नाभि राज्य दे वनको गए ॥ ऋषभ राज परजा सुख पायो ॥ यश ताको सब
जगमें छायो ॥ इन्द्र देखि ईर्षा मन लायो । करिकै क्रोध न जल बरषायो ॥ ऋषभदेव तबहीं यह जानि ।
कह्यो इन्द्र यह कहा मन आनि ॥ निजबल योग नीर बरषायो । प्रजा लोग अतिही सुख पायो । ऋषभ
राज मन सब उत्साह । कियो जयंतीसों पुनि व्याह ॥ तासों सुत निनानवे भए । भरतादिक सब हरि
रंग रए ॥ तिनमें नव नव खंड अधिकारी । नव योगेश्वर ब्रह्म विचारी । असी और इक द्विज व्रत लियो ॥
ऋषभ ज्ञान सबहिनको दियो ॥ दृष्टमान नाश सब होई । साक्षी व्यापक नशै न सोई ॥ ताहीसों
तुम चित्त लगावहु । ताको सेवि परमगति पावहु ॥ संत संग सेवो हरि चरना । ताते संत संग नित
करना ॥ बहुरो देकर भरतहिं राज । ऋषभ ममत्व देह को त्याज ॥ उनमतभै ज्यों विचरन लागे ।
अशन वसनकी सुरति तियागे ॥ कोउ खवावै तौ कछु खाहीं । नातरु बैठेई रहि जाहीं ॥ मूत्र
पुरीष अंग लपटावै । सुगंधवास दश योजन जावै ॥ अष्ट सिद्धि बहुरो तहँ आई । ऋषभदेव पै सुख
न लगाई ॥ राजा रहत हुतो तहां एक । भयो श्रावगी ऋषिको देख ॥ वेद पुराने तजि न अन्हवै ।
प्रजा सकलको यहै सिखावै ॥ अबहूँ श्रावग ऐसो करै । ताही को मारग अनुसरै ॥ अंतः क्रिया
रहित नहिं जानै । बाहर क्रिया देखि मन मानै ॥ वरण्यो ऋषभ देव अवतार । सूरदास भागवत
अनुसार ॥ २ ॥ जड भरत कथा वर्णन राग विलावल ॥ हरि हरि हरि हरि सुमिरन करो । हरि चर-
णारविन्द उर धरो ॥ ऋषभ देव जब बनको गए । नव सुत नवो खंड नृप भए ॥ भरत सुभरत
खंडको राव । करै सदाहि धर्म अरु न्याय ॥ पालै प्रजा सुतनकी नाई । पुरजन बसैं सदा सुख
पाई ॥ भरतहु दे पुत्रनको राज । गये बनको तज राजसमाज ॥ तहां करी नृप हरिकी सेवा ।
भए प्रसन्न देवन को देवा ॥ एक दिवस गंडकि तट जाई । करन लग्यो सुमिरन चित लाई ॥ गर्भ

वती हरिनी तहां आई । पानी सो पीवन नहिं पाई ॥ सुनी सिंह भय मान अवाजि । मारि फलांग
चली वह भाजि ॥ कूदत ताको तनु छुटि गयो । ताके छौना सुन्दर भयो ॥ भरत दया ता ऊपर
आई । ल्याये आश्रम ताहि लिवाई ॥ पोषे ताहि पुत्रकी नाई । खाइ आप तब ताहि खवाई ॥
सोवैं जब तब ताहि सोआवैं । तासों क्रीडत अति सुख पावैं ॥ सुमिरन भजन बिसरि सब गयो ।
एक दिन मृगछोना कहिं गयो ॥ ताके मोह भरत सब भयो । सब दिन विरह अग्नि अति तयो ॥
संध्या समय निकट नहिं आयो । ताके ढूँढन हित उठि धायो ॥ पग को चिह्न पृथ्वी पर देखि ।
कह्यो पृथ्वी जहां धन पग रेखि ॥ बहुरौ देख्यो शशिकी ओर । तामें देख्यो श्यामता कोर ॥ कहन
लगो मम सुत शशि गोद । तासेती शशि करत विनोद ॥ ढूँढत २ बहु श्रम पायो । पै मृगछोना
नहिं दरशायो ॥ मृगको ध्यान हृदय नहिं गयो । भरत देहतजिके मृग भयो ॥ पूरब जन्म ताहि
सुधि रही । आप आपसों तब यह कही ॥ मैं मृगछोनामैं चित दयो ॥ ताते मैं मृगछोना भयो ॥
अब काहूसे संग न करौं । हरि चरणारविन्द उर धरौं ॥ संग मृगनिहू को नहिं करै । हरै घासहू सो
नहिं चरै ॥ सुखे पात रु तिनके खाई । या विधि डारचौ जन्म बिताई ॥ मृग
तनुतजि ब्राह्मण तनु पायो । पूर्व जन्म तहां सुमिरन आयो ॥ मनमें यहै बात
ठहराई । होय असंग भजौं यदुराई ॥ पिता पढावै सो नहिं पढै । मनमें रामनाम नित
रहै ॥ पिता तासु कालबश भयो । भ्रातनिहू श्रम बहु विधि ठयो ॥ पै सो हरि हरिसुमिरतरहै । और
कछु विद्या नहिं गहै ॥ जड़ स्वरूपसो जहँ तहँ फिरै । अशन बसनकी सुधि नहिं धरै ॥ जैसो देहि
सु तैसो खाई । नहिं तो भूखोई रहि जाई ॥ कृषिरक्षक भाइन तब कीनो । उन तहां हरिचरणन
न चित दीनो ॥ तहँ हीं अन्न देहिं पहुँचाई । जो न देहिं भूखो रहिजाई ॥ भीलराव निज लोगनि
कह्यो । मैं कालीसो यह प्रण गह्यो ॥ तुव प्रसाद मम गृह सुत होई । नरबालि देहुँ भयो वर सोई ॥
तुम काहू धन दै लै आवहु । मेरे मनकी आश पुजावहु ॥ ते खोजत खोजत तहँ आए । जहां जड
भरत कृषी में छाए ॥ देख्यो भरत तरुण अति सुंदर । स्थूल शरीर रहित सब द्वंदर ॥ निज नृप पास
बांधि लै आए । नृप तेहि देखि बहुत सुख पाए ॥ बिप्रन कह्यो ताहि अन्हवावहु । याके अंग
सुगंध लगावहु ॥ तिहि देवी मंदिर लै गए । खड्ग रावके कर तिहिं दए ॥ जब राजा तिहिं मार न
लाग्यो । देवी काली मन धग धाग्यो ॥ हरि जन मारे हत्या होई । ज्यों नहिं मरै करौं अब सोई ॥
देवी निकसि रावकों मारचो । भरत साथ यह वचन उचारचो ॥ जाने बिना चूक यह भई । मैं
उनसों ऐसी नहिं कही ॥ बिप्रन वेद धर्म नहिं जान्यो । ताते उन ऐसो बलि ठान्यो ॥ यह सुनि
ह्वति भरत सिधायो । राजासों शुक्र कहि समुझायो ॥ नहीं त्रिलोकी ऐसो कोई । भक्तनको दुख
दैसकै जोई ॥ ज्यों शुक्र नृपको कहि समुझायो । सूरदास त्योंहीं करिगायो ॥ ३ ॥ जड भरतरहूगण
गोष्ठ वर्णन राग बिलावल ॥ हरि हरि हरि हरि सुमिरन करो । हरि चरणारविंद उर धरो ॥ नृपति रहूगणके
मन आई । सुनि ए ज्ञान कपिलसों जाई ॥ चढि सुख आसन नृपति सिधायो । तहां कहार एक दुख पायो ।
भरत पंथ पर देख्यो खरचो । वाके बदले ताको धरचो ॥ तिनसों भरत कछु ना कह्यो । सुख
आसन कांधे पर गह्यो ॥ भरत चले पथ जीवनिहार । चलै नहीं ज्यों चलै कहार ॥ नृपति कह्यो
मारग सम आहा ॥ चलत न क्यों तुम सूघो राह । कह्यो कहारनि हमैं न खोरि । नयो कहार चलत पग
झोरि ॥ कह्यो नृपति मोटो तू आहि । बहुत पंथ हू आयो नाहि ॥ तू जो टेढो टेढो चलत । मरिवेकी
नहिं भय हिय धरत ॥ ऐसी भांति नृपति बहु भाखी । सुनि जडभरत हृदयमें राखी ॥ मन मन

लाग्यो कर्म विचार । हर्ष शोक तनुको व्यवहार ॥ जैसो करै सो तैसो लहै । सदा आत्मा न्यारो
 रहै ॥ नृप कह्यो मैं उत्तर नहिं पायो । मेरो कह्यो न मनमें लायो ॥ नृप दिशि देखि भरत भुसु
 काये । बहुरो याविधि कहि समुझाए ॥ तुम कह्यो तैं है बहुत मोटायो । और बहुत मारग नहिं
 आयो ॥ टेढ़ो टेढ़ो क्यों तू जात । सुनौ नृपति मोसों यह बात ॥ जिय कर कर्म जन्म बहु पावै ।
 फिरत फिरत बहुते श्रम आवै ॥ अरु अजहूं न कर्म परिहरै । जाते इहिको फिरिबो टरै ।
 तनु स्थूल अरु दूबर होइ । परम आत्मको ए नहिं दोइ ॥ तनु मिथ्या क्षण भंगुर जानो । चेतनजीव
 सदा थिर मानो ॥ जीवको सुख दुख तनु संग होई । जोरविजोर तनके संग सोई ॥ देह अभिमानी
 जीवहिं जानै । ज्ञानी जीव अलिप्तकरि मानै ॥ तुम कह्यो मरिवेको तोहिं चाह । सब काहूको है
 यह राह ॥ कहा जानि तुम मोसों कह्यो । यह सुनि ऋषि स्वरूप नृप लह्यो ॥ तजि सुखपाल रह्यो
 गहि पाइ । मैं जान्यो तुम हो ऋषिराइ ॥ भृगु कै दुर्वासा तुम होहु । कपिल कै दत्त कहो तुम
 मोहु ॥ कबहूं सुर कबहूं नर होई । कबहूं राव रंक जिय सोई ॥ जीव कर्म करि बहु
 तनु पावै । अज्ञानी तिहि देखि भुलावै ॥ ज्ञानी सदा एक रस जानै । तनके भेद
 भेद नहिं मानै ॥ आत्म सदा अजन्म अविनासी । ताको देह मोह बड़ फासी ॥ ऋषभ पुत्र
 भरत मम नाम । राज्य छांडि लियो वन विश्राम । तहँ मृगछौनासों हित भयो । नर तनु तजिकै
 मृगतनु लह्यो ॥ अब मैं जन्म विप्रके पायो । सब तजि हरि चरणन चित लायो ॥ ताते ज्ञानी मोह न
 करै । तनु कुटुंबसों हित परिहरै ॥ जबलगि भजै न चरण मुरारी । तब लगि होइ न भवजल पारी ॥ भव
 जलमें नर बहु दुख लहै । पै बैराग तबहुं नहिं गहै ॥ सुत कलत्र दुर्वचन जु भाषै । तिन्हैं मोहवश
 मन नहिं राखै ॥ जो वै वचन और कोउ कहैं । तिनको सुनिकै सहि नहिं रहै ॥ पुत्र
 अन्याय करै बहु तेरे । पिता एक अवगुण नहिं हेरे ॥ और जु एक करै अन्याई । तिन
 बहु अवगुण देइ लगाई ॥ इक मन अरु ज्ञानेन्दी पांच । नरको सदा नचावैं नाच ॥ ज्यों मग चलत
 चोर धन हरै । त्यों एक सुकृत धनहीं परिहरै ॥ तस्कर ज्यों सुकृती धन लेही । अरु हरि भजन
 करन नहिं देही ॥ ज्ञानी इनसों संग न करै । तस्कर जानि दूरि परिहरै ॥ नृप यह सुनि भरतै शिरनाई
 बहुरि कह्यो या भांति सुनाई ॥ नर शरीर सुर ऊपर आहि । कहै ज्ञान कहिए कहैं ताहि ॥ ताते
 तुमको करत दंडौत । अरु सब नरहूँको परनौत ॥ शुक कह्यो सुन यह नृपति सुजान । लेहु ज्ञान
 तजि देह अभिमान ॥ जो यह लीला सुनै सुनावै । सोऊ ज्ञान भक्तिको पावै ॥ शुकदेव ज्यों
 दियो नृपति सुनाइ । सूरदास कह्यो याही भाइ ॥ ४ ॥

इति श्रीमद्भागवते सूरसागरे कविवरश्रीसूरदासकृते पंचमः स्कंधः समाप्तः ।



अथ कविवर सूरदास कृत-

श्रीसूरसागर.

षष्ठस्कन्ध ।

॥ राग बिलावल ॥ हरि हरि हरि हरि सुमिरन करो । आधे पल कहूँ जिन विस्मरो ॥ शुक हरिचरणन को शिर नाइ । राजासों बोल्यो या भाइ ॥ कहौं हरिकथा सुनौ चित लाइ । सूर तरचो हरिके गुण गाइ ॥ १ ॥ अजामिल उद्धार वर्णन । रागबिलावल ॥ हरि हरि हरि हरि सुमिरन करो ॥ हरिचरणारविंद उर धरो ॥ हरि हरि कहत अजामिल तरचो ॥ ताको यश सब जग बिस्तरचो ॥ कहौं शुक कथा सुनो चितलाइ । कहै सुनै सो नर तरि जाइ ॥ अजामिल विप्र कनौज निवासी । सो भयो वृषलीके गृहवासी ॥ जाति पाँति तिन सब बिसराई । भक्ष अभक्ष मिलै सो खाई ॥ ता वृषलीके दश सुत भए । पहिले पुत्र भूलि तिन गए ॥ लघु सुत नाम नारायण धरचो । तासों हेतु अधिक करि करचो ॥ काल अवधि जब पहुँची आई । तब यम दीने दूत पठाई नारायण सुत नाम उचारचो । यमदूतनि हरि गुणनि निवारचो ॥ दूतन कह्यो बडो यह पापी । इनतो पाप किए हैं धापी । विप्र जन्म इन जूबे हारचो । काहेते तुम हमें निवारचो । गुणनि कह्यो इन नाम उचारचो । नाम महातम तुम न बिचारचो ॥ जान अजान नाम जो लेई । हरि तिहि बैकुंठ वासा देई ॥ बिन जाने कोउ औषधि खाई । ताको रोग सकल नाशि जाई ज्यों ॥ त्यों हरि बिनु जाने कहै । सो सब अपने पापनि दहै ॥ अग्नि बिना जाने कोउ गहै । तातकालसो ताको दहै ॥ दोउ पुरुषको नाम एक होई । एक पुरुषको बोलै कोई ॥ दोऊ ताके ओर निहारै । हरि हूँ ऐसे भाव विचारै ॥ हांसीमें कोउ नाम उचारै । हरि जू ताको सत्य विचारै ॥ मैहूँ करि कोउ लहै जुनाम । हरि जू देहिं तिन्हें निज धाम ॥ जाबनके हरि शब्द सुनावै । ताबनते मृग जाहि परावै ॥ नाम सुनत यों पाप पराहीं । पापी हूँ बैकुंठ सिधाहीं ॥ यह सुनि दूत चले खिसिआई । कह्यो तिन्हि धर्म राजसों जाई ॥ अबलौं हम तुमहींको जानत ॥ तुमहीको दंडदाता मानत ॥ आज गह्यो हम पापी एक । तिन भय मानत हमको देख ॥ नारायण सुत हेत उचारचो । पुरुष चतुर्भुज हमें निवारचो ॥ उनसों हमरो कछु न बसायो । ताते तुमको आनि सुनायो ॥ औरो दंडदाता कोउ आहीं । हमसों क्यों न बतावै ताही ॥ धर्मराज करि हरिको ध्यान । निज दूतनसों कह्यो बखान ॥ नारायण सबके करतार । पालत अरु पुनि करत संहार ॥ ता सम द्वितिया और न कोई । जब चाहे पुनि साजै सोई ॥ ताको जब उन नाम उचारचो । तब हरि दूतन तुमैं निवारचो ॥ हरिके दूत जहां तहँ रहैं । हम तुम उनकी सुधि नहिँ लहैं ॥ जो जो मुख हरि नाम उचारै । हरि गन तिहिं तिहिं तुरत उधारै ॥ नाम महातम तुम नहिँ जानौ । नाम महातम सुनो बखानौ ॥ ज्यों त्यों कोउ हरि नाम ऊचरै । निश्चय करि सो तैरै पै तैरै ॥ जाके गृहमें हरि जन जाई । नाम कीर्तन करै सो गाई ॥

यद्यपि वै हरि नाउँ न लेहीं । तद्यपि तिहि हरि निज पद देहीं । कैसोइ पापी क्यों नहिं होई । राम नाम
 चित उचरै सोई ॥ तुमरो नहिं ता ठौर अधिकार । मैं तुमसों यह कही पुकार ॥ अजामेल हरिभक्तन देखि ।
 मनमें कीनो हर्ष विशेखि ॥ यमदूतनको इनहिं निवारयो । वा भयते मोहिं इन्हीं उबारयो ॥ तब मन
 माहिं आनि वैराग । पुत्र कलत्र मोह सब त्याग ॥ हरिपदसे उन ध्यान लगायो ॥ तातकाल वैकुण्ठ सिधायो ॥
 अंतकाल जो नाम उचरै । सो सब अपने पापन जाँरै ॥ ज्ञान विराग तुरत तिह होई ॥ मूर विष्णु पद पावै
 सोई ॥ श्री गुरुमहिमा वर्णन, बृहस्पति अनादरते विश्वरूप वृत्रासुर ब्राह्मण हत्या इन्द्र प्रति, पुनि गुरुकृपासे इन्द्रासन प्राप्ति ॥ राग
 विलावल ॥ हरि हरि हरि हरि सुमिरन करो ॥ हरि चरणारविंद उर धरो ॥ हरि गुरु एकरूप नृपजानि । तामें कछु
 संदेह न आनि ॥ गुरु प्रसन्न हरि प्रसन्न जोई ॥ गुरुके दुखित दुखित हरि होई ॥ कहौं सो कथा सुनो चित
 धारि । कहै सुनै सो तै भवपारि ॥ इन्द्र इक दिन निजसभा मँझारि । बैठयो हुतो सिंहासन डारि ॥
 सुर ऋषि सब गंधर्व तहां आए । पुनि कुबेरहू तहां सिधाए । सुरगुरुहू तेहि औसर आयो । इन्द्र उठि
 तिन्हें न शीश नवायो ॥ सुर गुरु लख्यो गर्व तिहिं भयो । तहँते फिर निज आश्रम गयो ॥ सुरपति
 तब लागे पछतान । मैं यह कहा कियो अज्ञान ॥ पुनि निज गुरु आश्रम चलिगयो । तिहि सुर
 गुरु दरशन नहिं दयो ॥ यह सुनि असुर इंद्र पुर आए । किए इंद्रसों युद्ध बनाये ॥ इंद्र सहित तब
 सब सुर भागे । आश्रम अपने सबहिन त्यागे ॥ पुनि सब सुर ब्रह्मापै जाई । कह्यो वृत्तांत सकल
 शिरनाई ॥ ब्रह्मा कह्यो बुरो तुम कियो । निज गुरुको आदर नहिं दियो ॥ अब तुम विश्व रूप गुरु
 करो । ता प्रसाद या दुखसों तरो ॥ सुरपति विश्वरूप पै जाइ । दोउ कर जोर कह्यो शिरनाई ॥ कृपा
 करो मम प्रोहित होहु । कियो बृहस्पति मोपर कोहु ॥ कह्यो पुरोहित होत न भलो । जात तेज तप
 जप नशि सकलो ॥ पै तुम विनती बहु विधि करी । ताते मैं मनमें यह धरी ॥ यह कहि इंद्रहि यज्ञ करायो ॥
 गयो राज्य अपना तिन पायो । असुरनि विश्वरूपसो कह्यो । भलो भाइ तू सुरगुरु भयो ॥ तुव
 ननसालमाहिं हम आहिं ॥ आहुति हमें देत क्यों नाहिं ॥ तिह निमित्त तिन्ह आहुति दई । सुर-
 पति बात जानि यह लई ॥ करिकै क्रोध तुरत तिहि मारयो । हत्याहेत न मंत्र विचारयो ॥ चारि
 अंश हत्याके किए । चारों अंश बाँटि पुनि दिए ॥ एक अंश धरतीको दियो । ऊसर माहिं अन्न
 नहिं भयो ॥ एक अंश वृक्षनको दीनो । गोंद होइ प्रकाश तिन कीनो ॥ एक अंश जलको पुनि
 दयो । हँकरि काई जलको छयो ॥ एक अंश सब नारिन पायो । तिनको हँ रजस्वला छायो ।
 त्वष्टा विश्वरूपको बाप । दुखित भयो सुनि सुत संताप ॥ तिन करि क्रोध इक जटा उपारी ।
 वृत्रासुर उपज्यो बल भारी ॥ सो सुरपतिको मारन धायो । सुरपतिहू ता सन्मुख आयो ॥
 जेतक शस्त्र किए प्रहार । सो करि लिए असुर आहार ॥ तब सुरपति मनमें भय मान । गयो तहां जहां
 श्रीभगवान ॥ नमस्कार करि विनय सुनाई । राखि राखि अशरन शरनाई ॥ कह्यो भगवान
 उपाय न आन । ऋषिदधीचि हाड़ लै दान ॥ ताको तुम निज वज्र बनाव । मरिहै असुर तिसीके
 घाव ॥ तब सुरपति ऋषिके ढिग जाई । करी विनय बहु शीश नवाई ॥ बहुरि कही अपनी सब
 कथा । हरि ज्यों कह्यो कह्यो पुनि तथा ॥ तिन कह्यो देह मोहि अति प्यारी । सुरपति हू यह देखि
 विचारी ॥ यह तनु क्योंहीं दियो न जावै । और देत कछु मन नहि आवै ॥ पै यह अंत न रहिहै
 भाई । परहित देहु तो होइ भलाई ॥ तनु देवे ते नाहिन भजों । योगधारना करि यह तजों ॥
 गड चटाइ मम त्वचा उपारो । हाड़नको तुम वज्र सँवारो ॥ सुरपति ऋषिकी आज्ञा
 पाई । लियो हाड़ कियो वज्र बनाई ॥ गो मुख अशुचि तबै ते भयो । ऋषिशुकदेव

नृपतिसो कह्यो । इंद्र आइ तब असुर प्रचारयो । कियो युद्ध पै असुरन मारयो ॥
 इन्द्र हाथते बज्र छिनाई । मारयो ऐरावतको जाई ॥ ऐरावत घायल जब भयो । तब वृत्रासुर
 को सुख भयो ॥ ऐरावत अमृतको ल्याए । भयो सुचेत इंद्र तब धाए ॥ वृत्रासुरको बज्र प्रहारयो ॥
 तिन तिरशूल इंद्रको मारयो । लगत त्रिशूल इंद्र मुरझायो ॥ करते अपनो वज्र गिरायो ॥ कह्यो
 असुर सुरपति संभारि । लैकर वज्र मोहि परिहारि ॥ जो मरिहौ तौ सुरपुर जैहौ । जीते जगत
 माहि यश लेहौ ॥ हारि जीति नहि जयके हाथ । कारण करता आपहि साथ ॥ हमें तुमें पुतरीके
 भाइ । देखत कौतुक विविध नचाइ ॥ तब सुरपति लै वज्र संहारयो । जैजै शब्द सुरन उच्चारयो ॥
 पै इंद्रहि संतोष न भयो । ब्राह्मणहत्यादुःखहि तयो ॥ सो हत्या तिहि लागी धाइ । छपो सुकमलना-
 लमें जाइ ॥ सुरगुरु जाइ तहांते ल्यायो । तासों हरि हित यज्ञ करायो ॥ यज्ञ किए हत्या गइ
 बिलाय । यों नृप बहुरि इंद्रपुर आइ ॥ नृप यह सुनि शुकसों पुनि कही । ज्ञान बुद्धि असुराहिको
 भई । शुक कह्यो सुनो परीक्षितराइ । देहुं तोहि वृत्तान्त सुनाइ ॥ चित्रकेतु पृथ्वीपतिराव । सुत
 हित भयो तासु हित चाव ॥ यद्यपि रानी बरीं अनेक । पै तिहिते सुत भयो न एक ॥ तागृह ऋषि
 अंगिरा सिधाये । अध्यासन दै तिन बैठाए ॥ ऋषिसों नृप निज व्यथा सुनाई । कह्यो मोहिं सो
 करो उपाई ॥ ऋषि कह्यो पुत्र न तेरे होई । होइ कहूँ तो दुखदै सोई ॥ नृप कह्यो एक बार सुत
 होई पाछे होनी होइ सो होई ॥ ऋषि ता नृपसों यज्ञ करायो । दै प्रसाद यह वचन सुनायो ॥
 जा रानीको तू यह दैहै । ता रानी सेती सुत हैहै ॥ तब रानीको सो नृप दियो । तिन प्रणाम करि
 भोजन कियो ॥ ऋषि प्रसादते सुत तिन जायो । सुत लडाइ दंपति सुख पायो ॥ विप्र याचकन
 दीनो दान । कियो उत्सव कहा करों बखान ॥ ता रानी सों नृप हित भयो । और तियनिको
 मन अति तयो ॥ तिन सबहिन करि मंत्र उपाई । नृपति कुँवरको जहर पिआई ॥ बहुत बेर भइ
 कुँवरन जाग्यो । दासीसों रानी तब भाष्यो । ल्याव कुँवरको वेगि जगाय । दूध प्यायके बहुरि
 सोआय ॥ दासी कुँवर जगावन आई । देख्यो कुँवर मृतककी नाई । दासी बालक मृतक
 निहारी ॥ परी धरणिपै खाइ पछारी ॥ रानी तब तहां धाई आई । सुत मृत देखि गिरी मुरछाई ।
 पुनि रानी जब सुरति सँभारी । रुदन करन लागी अति भारी ॥ रुदन सुनत राजा तहँ आयो ।
 देखि कुँवरको अति दुख पायो ॥ तबही मृच्छित हो नृप गिरे । कबहुँक सुतको अंकम भरे ॥
 ऋषि नारद अंगिरा तहँ आये । राजासों यह वचन सुनाये ॥ को तू को यह देखि विचार ।
 स्वप्न स्वरूप सकल संसार ॥ सोयो होय होय सत मानै । जो जागै सो मिथ्या जानै ॥ ताते
 वृथा मोह बिसारि । श्रीभगवान चरण उर धारि ॥ हम तुमसों पहिले ही कही । नृप सो बात
 आज भइ सही ॥ नृपको सुनि उपज्यो वैराग । बनको गयो राज सब त्याग ॥ बनमें जाइ तपस्या
 करी । मरि गंधर्व देह तिन धरी ॥ इक दिन सो कैलास सिधायो ॥ शिवको दर्शन तहां न
 पायो ॥ उमा नग्न देखी तिन जाई । दियो शाप ताहि या भाई ॥ तू अब असुर देह धरि जाई ।
 मेरो कह्यो वृथा नहि जाई ॥ उमाशाप ताको जब भयो । वृत्रासुरसों या बिधि भयो ॥ हरिकी
 भक्ति वृथा नहि जाई । जन्म जन्म सो प्रगटे आई ॥ ताते हरि गुरु सेवा कीजै । मेरो वचन
 मानि यह लीजै ॥ ज्यों शुक नृपसों कहि समुझायो । सूरदास त्योंही करिगायो ॥ ३ ॥ गुरुम
 हिमा ॥ राग सारंग ॥ गुरु बिनु ऐसी कौन करै । माला तिलक मनोहर बाना लै शिर छत्र धरै ॥ भव
 सागरसे बूडत राखै दीपक हाथ धरै । सूरश्याम, गुरु ऐसो समरथ छिनमें लै उधरै ॥ ४ ॥

इति श्रीमद्भागवते-सूरसागरे कविवरश्रीसूरदासकृते षष्ठस्कन्धः समाप्तः ॥ ६ ॥

अथ कविवर सूरदासकृत-

श्रीसूरसागर.

सप्तमस्कन्ध ।

श्रीनृसिंहरूप अवतार वर्णन ॥ राग विलावल ॥

हरि हरि हरि हरि सुमिरन करो । हरि चरणारविंद उर धरो ॥ हरि चरणन शुक्रदेव शिर नाई ।
 राजासों बोल्यो या भाई ॥ कहौं सुकथा सुनो चितलाई । सूर तरो हरिके गुणगाई ॥ १ ॥
 नरहरि नरहरि सुमिरन करो । नरहरि पद नित हृदय धरो ॥ नरहरि रूप धर्यो जो भाई ।
 कहौं सु कथा सुनो चितलाई ॥ हरि जब हिरण्याक्षको मार्यो । दशन अग्र पृथिवीको धार्यो ॥
 हिरण्यकशिपु दुःसह तप कियो । ब्रह्मा आइ दश तव दियो ॥ कछू तोहिं इच्छा जो होई । माँगिलेहि
 वरदेहुं अब सोई ॥ राति दिवस नभ धरणि न मरौं । अस्त्र शस्त्र परिहारन धरौं ॥ तेरी सृष्टि जहाँ
 लागि होई । मोको मारिसकैं नहिं कोई ॥ कछो ब्रह्मा ऐसेही होई । पुनि हरि चाहै करिहैं सोई ॥ यह कह
 ब्रह्मा निज पुर आए । हिरण्यकशिपु निज भौन सिधाए ॥ भुवन आइ त्रिभुवनपति भए । इंद्रवरुण
 सबही भजि गए ॥ ताके पुत्र भए प्रह्लाद । भयो असुर मुनि अति अह्लाद ॥ पांच बरषकी भई
 आइ । पंडामर्क लिए बुलाई ॥ तिनके सँग चटशाल पठायो । राम नामसों तिन चित लायो ॥
 पंडामर्क रहे पचिहाल । राजनीति कछो बारंवार ॥ कछो प्रह्लाद पढत में सार । कहां पढावत और
 जंजार ॥ जब पांडे इत उत कहि गए । बालक सब इकठैरे भए ॥ कछो यह ज्ञान
 कहां तुम पायो । नारदमाता गर्भ सुनायो ॥ सबनि कछो देहु हमैं सिखाइ । सबहुनकै मति ऐ
 सी आइ ॥ कछो सबनिसे तब समुझाई । सब तजि भजो चरण रघुराई ॥ रामहि राम पंडो
 रे भाई । रामहिं जहँ तहँ होत सहाई ॥ इहाँ कोऊ काहूको नाहिं । असंबंध मिलत जगमाहिं ॥
 काल अवधि जब पहुँचे आई । चलते बेर कोउ संग न जाई ॥ सदा संघाती श्रीयदुराई । भजि-
 ये ताहि सदा लवलाई ॥ हर्ता कर्ता आपै सोई । घट घट व्यापि रह्योहै जोई ॥ ताते द्वितिया और
 न कोई । ताके भजे सदा सुख होई ॥ दुर्लभ जन्म सुलभही पाई । हरि न भजै सो नरकहि जाई ॥ यह
 जिय जानि विषय परिहरो । राम नाम ही सदा उचरो ॥ शत संवत मनुष्यकी आई । आधी तो
 सोवत ही जाई ॥ कछु बालापनहीं में बीते । कछु विरधापन माहिं व्यतीते ॥ कछ नृप सेवा
 करत विहाई । कछुइक विषय भोगमें जाई ॥ ऐसेही जो जन्म सिराई । बिन हरि भजन नरकमें
 जाई ॥ बालपनो गए ज्वानी आवै । वृद्ध भये मूरख पछतावै ॥ तीनों पन पुनि ऐसहि जाई ।
 ताते अवहिं भजो यदुराई ॥ विषय भोग सब तनमें होई । बिनु नर जन्म भक्ति नहिं होई ॥ जाने
 करै सो पशुसम होई । ताते भक्ति करो सब कोई ॥ जब लागि काल न पहुँचे आई । हरिकी भक्ति
 करौ चितलाई ॥ हरि व्यापकहै सबसंसार । ताहि भजो ऐसी बिचार ॥ शिशु किशोर वृद्ध तनु

होई । सदा एक रस आतम सोई ॥ जानि ऐसो तनु मोहै त्यागो । हरि चरणारविंद अनुरागो ॥
 माटीमें जो कंचन परै । त्योही आतमतनु संचरै ॥ कंचनते जो माटी तजै । त्यो तनु मोह
 छांडि हरि भजै ॥ नर सेवाते जो सुख होई । क्षणभंगुर थिर रहै न सोई ॥ हरिकी भक्ति करो चित
 लाई । होइ परमसुख कबहुँ न जाई ॥ नीच ऊंच हरि गिनत न दोइ । यह जिय जानि भजो सब
 कोइ ॥ असुर होइ सुर भावै होई । जो हरि भजै पिआरो सोई ॥ रामहि राम कहो दिन रात ।
 नातर जन्म अकारथ जात ॥ सौ बातनकी एकै बात । सब तजि भजो द्वारकानाथ ॥ सब
 चेटियन ऐसी मन आई । रहे सबै हरिपद चित लाई ॥ हरि हरि नाम सदा उचारै । विद्या
 और न मनमें धारै ॥ तब षंडामर्का संक्याय । कछो असुरपतिसों पुनि
 जाय ॥ तब सुतको पढाय हम हारे । आप न पढै अरु और बिगारे । राम नाम नित रटिबोकरै ।
 राजनीति नहिं मनमें धरै ॥ ताते कछो तुमै हम आइ । करनी होय सों करो उपाइ ॥ इरनकशिपु
 तब सुतहि बुलायो । कछुक प्रीति कछु डर देखरायो ॥ बहुरो गोदमाहिं बैठारि । कछो कहा
 पढ्यो विद्यासारि ॥ सार वेद चारोंको जोई । छहों शास्त्र सार पुनि सोई ॥ सर्व पुराण माहिं जु सारा
 राम नाम मैं पढ्यो सँभार ॥ कछो याको लेजाइ उठाई । सुमिरत मम रिपुको चितलाई ॥
 मेरी ओर न कछु निहारो । याको पावक भीतर डारो ॥ जो ऐसे करते नहिं मरै । डारि देहु
 गज मैमत तेरो ॥ पर्वत से इहि देहु गिराई । मरै जौन विधि मारो जाई ॥ असुर चले तब कुँवर लिवाया ।
 हरि जू ताकी करै सहाय ॥ करै उपाउ सो वृथा जाइ । नृपकी आज्ञालियो उठाइ ॥ कुँवर रह्यो हरि
 पद चितलाई । असुरनि गिरिते दियो गिराई ॥ राखि लियो तिन त्रिभुवन राइ । तब गज मैमत
 आगे डार्यो ॥ राम नाम तब कुँवर उचार्यो । गज दोउ दंत टूटि धर परै । देख असुर यह अचर
 ज टुरै ॥ बहुरो नाग दयो लपटाइ । जिनके ज्वाला गिरि जरि जाइ ॥ हरिजू तहँहू करी सहाइ
 नाग रह्यो शिर नीचे नाइ ॥ पुनि पावकमें दियो गिराय । हरि जू ताकी कियो सहाय ॥ करै
 उपाइ सु वृथा जाइ । तब सब असुर रहे खिसियाइ ॥ कछो असुरपतिसों पुनि जाइ ।
 मरत नहीं यह कियो उपाइ ॥ हम तो बहुत भांति पचि हारे । यह तो रामहि राम उचारो ॥ नृपकछो मंत्र
 यंत्र कछु आहि । कै छल करत कछु तू आहि ॥ तोको कौन बचावत आइ । सो तू मोको देहि
 बताइ ॥ मंत्र यंत्र मेरे हरि नाम । घट घटमें जाकों विश्राम ॥ जहां तहां सोइ करत सहाइ । तासों
 तेरो कछु न बसाइ ॥ कछो कहाँ सो मोहिं बताइ । नातर तेरो जिय अब जाइ ॥ जो सब ठौर खंभहुं
 होइ । कछो प्रह्लाद आहि तू जोहि ॥ हिरण्यकशिपु क्रोध मन धार्यो । जाइ खंभको मुक्का
 मार्यो ॥ फटि तब खंभ भयो द्वै फारि ॥ निकसे हरि नर हरि वपुधारि ॥ निरखि असुर चकृत ह्वै गयो ।
 बहुरि गदालै सन्मुख भयो ॥ हरि तासों कियो युद्धबनाइ । तब सुर मनमें गये डराइ ॥ संध्या
 समय भयो जो आइ । हरिजू ताको पकर्यो धाई ॥ निज जांघन पर ताहि पछार्यो । नखन साथ
 तब उदर बिदार्यो ॥ जय जयकार दशोंदिश भयो । असुर प्राण तजि हरिपुर गयो ॥ ब्रह्मादिक
 सब रहे अरगाइ । क्रोध देखि कोउ निकट न जाइ ॥ बहुरो ब्रह्मा सुरन समेत । नरहरि जूके जाइ
 निकेत ॥ करि दंडवत विनय उचारि । तुम अनंत पराक्रम बनवारि ॥ तुमहीं करत नरक निस्तार । उ
 त्पति भरत करत संहार ॥ करो क्षमा कियो असुर संहार । गयो न क्रोध भरो सोभार । महादेव
 पुनि विनय उचारी । नमो नमो भक्तन भयहारी ॥ भक्त हेतु तुम असुर संहारो । श्री नर-
 हरि अव क्रोध निवारो ॥ क्रोध न गयो तब ऐसे कछो । क्षमो प्रलयको समय न भयो ॥

तौहं क्रोध न गयो विकारि । महादेव हू फिरे निहारि ॥ बहुरि इन्द्र अस्तुती उचारी । मुयो असुर
 र सुर भये सुखारी ॥ हैहै यज्ञ अब देवपुरारी । क्षमिए क्रोध सुरन सुखकारी ॥ पुनि
 लक्ष्मी यों विनय सुनाई । डरौं देखि यह रूप निवाई ॥ महाराज यह रूप दुरावहु । रूप
 चतुर्भुज मोहिं दिखावहु ॥ बरुन कुबेरादिक पुनि आए । करी विनय तिनहुं बहु भाए ॥ तौहूं
 क्रोध क्षमा नहिं भयो । तब सब मिलि प्रह्लादहिं कह्यो ॥ तुमरे हेतु हरि लियो अवतार । तुम
 अब जाइ करो मनुहार तब प्रह्लाद हरि निकट आइ । करि दंडवत परो गहि पाइ ॥ तब
 नरहरि जू ताहि उठाइ । है कृपालु बोल्यो या भाइ ॥ कहु जु मनोरथ तेरो होइ । छांडि विलंब करौं
 अब सोइ ॥ दीनानाथ दयालु मुरारी । मम हित तुम लीनो अवतारी ॥ असुर अशुचि है मेरी जात ।
 मोहिं सनाथ कियो तुम नाथ ॥ भक्त तुम्हारी इच्छा करै । ऐसो असुर कह्यो क्यों मरै ॥ भक्त-
 न हित तुम धारी देह । तरिहैं गाइ गाइ गुण एह ॥ जग प्रभुत्व प्रभु देखा जोई । सो बिन तुम क्षण
 भंगुर होई ॥ इन्द्रादिक जाते भय करचो । सो मम पिता मृतक होइ परचो ॥ साधु संग प्रभु मोको
 दीजै । तिहि संगत तुम भक्ति करीजै ॥ और न मेरी इच्छा कोइ । भक्ति अनन्य तुम्हारी होइ ॥ और
 जु मोपर कृपा करो । जो सब जीवनको उद्धरौ ॥ जो कहो कर्मभोग जब करिहैं । तब ए जीव सकल
 निस्तारि हैं ॥ मम कृत इनके बदले लेहु । इनके कर्म सकल मोहिं देहु ॥ मोको नरक माहि लै
 डारो । पै प्रभुजु इनको निस्तारो ॥ पुनि कह्यो जीव दुखित संसारा । उपजत बिनशत बारंबारा ॥
 बिना कृपानिस्तार न होई । करो कृपा मैं माँगत सोई ॥ प्रभु मैं देखि तुम्हैं सुख पावत । पै सुर देखि
 सकल डरपावत ॥ ताते महा भयानक रूप । अन्तर्ध्यान करो सुर भूष ॥ हरि कह्यो मोहिं बिरद
 कीलाज । करो मन्वन्तरलो तुम राज ॥ राजलक्ष्मी मद नहिं होइ । कुल इकीसले उधरे सोइ ॥ जो मम
 भक्त नरकमें जाइ ॥ होइ पवित्र ताहि परसाइ ॥ जा कुल माहि भक्त मम होइ । सप्त पुरुष लै उधरे
 सोइ ॥ पुनि प्रह्लाद राज बैठाए । सब असुरन मिलि शीश नवाए ॥ नरहरि देखि हर्ष मन कीनो ।
 अभयदान प्रह्लादहिं दीनो ॥ तब ब्रह्मा विनती अनुसारी । महाराज नरसिंह मुरारी ॥ सकल
 सुरनको कारज सरो । अंतर्ध्यान रूप अब करो ॥ तब नरहरि भे अंतर्ध्यान । राजासों शुक कह्यो
 बखान ॥ जो यह लीला सुनै सुनावै । सूरदास हरि भक्ति सुपावै ॥ २ ॥ राग रामकली ॥ पढ़ौ भैया
 कृष्ण गोविंद मुरारी । कहै प्रह्लाद सुनो रे बालक लीजै जन्म सुधारी ॥ को है हिरण्यकशिपु अभि
 मानी जोर सकै तुम मारि । राखनहार वहै कोउ औरै श्याम धरे भुज चारि ॥ कर्मरूप सुदेव
 नारायण नहिं दीजै सुबिसारि ॥ सूरदास ता हरिसे मीता कबहुं न आवैहारि ॥ ३ ॥ राग कान्हरा ॥ जो
 मेरे भक्तन्ह दुखदाई । सो मेरे इहि लोक बसै जिन त्रिभुवन छांडि अनत कहूँ जाई ॥ शिव विरं
 चि नारद मुनि देखत तिनहुं न मोको सुरति दिवाई । बालक अबल अजान रहै वह दिन दिन
 देत त्रास अधिकाई ॥ खंभ फारि गलगाजि मत्त बल क्रोधमान छवि बराणि न जाई ॥ नैन अरु-
 न बिकाल दशन अति नखसों हृदय विदारन आई ॥ कर जोरे प्रह्लादजू बिनवैं विनय सुनो अश-
 रन शरनाई ॥ अपनी रिसै बिसारि तात मम अपराधी सुपरमगति पाई ॥ दीनदयालु कृपानि-
 धि नरहरि अपनो जानि हृदय लियो लाई । सूरदास प्रभु पूरण ठाकुर कह्यो सुकहींन मैं
 नियराई ॥ ४ ॥ राग मारू ॥ ऐसी को सकै करि बिना मुरारी । कहत प्रह्लादके धारि नरसिंह वपु नि-
 कसि आए तुरित खंभ फारी ॥ हिरण्यकश्यपु निरखि रूप चकृत भयो बहुरि कर लै गदा असुर
 धायो । हरि गदायुद्ध तासों कियो भली विधि बहुरि संध्या समय होन आयो ॥ गहि असुर

धाइ पुनि जाइ निज जंचपर नखनिसों उदर डारयो विदारी । देखि यह सुरन वर्षा करी पुहु-
 पकी सिद्ध गंधर्व जय ध्वनि उचारी ॥ बहुरि बहु भाइ प्रह्लाद अस्तुति करी ताहि दै राज वैकुण्ठ
 सिधाए । भक्तके हेत हरि धरयो नरसिंह बपु सूर जन जानि यह शरन आए ॥ ५ ॥ राग धनाश्री ॥
 तब लगि हौं वैकुण्ठ न जैहौं । सुनु प्रह्लाद प्रतिज्ञा मेरी जब लगि तुम शिर छत्र न दैहौं ॥ मन बच
 क्रम जान जिय अपने जहां जहां जन तहांतहां ऐहौं ॥ निर्गुण सगुण होइ सब देख्यो तोसों भक्त
 कहूं नहिं पैहौं ॥ मो देखत मो दास दुखित भयो यह कलंक हौं कहां गवैहौं ॥ हृदय कठोर कुलि
 शते मेरो अब नहिं दीनदयालु कहैहौं ॥ गहि तनु हिरनकशिपुको चीरो फारि उदर तब रुधि-
 र नहैहौं ॥ इहि हत मिटै कहै सूरज प्रभु या कृत को फल तुरत चखैहौं ॥ ६ ॥ श्रीभगवान शिव
 सहाय वर्णन ॥ राग विलावल ॥ हरि हरि हरि हरि सुमिरन करो । हरि चरणाविन्द उर धरो ॥ हरि ज्यों शिव
 को करी सहाई ॥ कहौ सुकथा सुनो चितलाई ॥ एक समै सुर असुर प्रचारि ॥ लरे भये असुरन की हारि
 तिन ब्रह्माकै हित तप कीनो । ब्रह्मा प्रकटि दरश तब दीनो ॥ तब ब्रह्मासों कह्यो शिर नाइ । जै ह्वैहै
 हमरी किहि भाइ ॥ ब्रह्मा तब यह वचन उचारयो । मय माया मय कोट सँवारयो ॥ तामें बैठि
 सुरन जय करो । तुम उनके मारे नहिं मरो ॥ असुरन यह मय को समुझाई ॥ तब मय दीनो कोट बनाई ॥
 लोहतले मधरूपा लायो । ताके ऊपर कनक लगायो ॥ जहँ लै जाहि तहां वह जावै । त्रिपुर नाम सो
 कोट कहावै ॥ गढके बल असुरन जय पाई । लियो सुरनसों अमृत छिनाई ॥ सुर सब मिलि
 गए शिवशरनाई । शिव तब कीन्ही तिनैं सहाई ॥ पै शिव जाको मारत धाई ।
 अमृत पिआइ तिहिं लेहिं जिवाई ॥ तब शिव कीनो हरिको ध्यान । प्रगट भये तहां श्रीभगवान ॥
 शिव हरिसों सब कथा सुनाई । हरि कह्यो अब मैं करों सहाई ॥ सुंदर गऊरूप हरि कीनो । बछरा
 करि ब्रह्मा सँग लीनो ॥ अमृत कुंडमें पैठी जाय । कह्यो असुरन मारो या गाय ॥ एकनि कह्यो याहि
 मत मारो । याको सुंदर रूप निहारो ॥ कितक अमृत पीवै यहि भाई । हरि मति तिनकी फिर भर-
 माई ॥ हरि अमृत पिय गए अकास । असुर देखि यह भए उदास ॥ कह्यो इहिही हिरणाक्ष सुमारयो ।
 हिरण्यकशिपु इनहिं संहारयो ॥ यासों हमरो कछु न बसाई । यह कहि असुर रहे खिसियाई ॥
 शिव तब कीनो युद्ध अपार । पै असुरन नहिं मानी हार ॥ बाण एक हरि शिवको दियो । तासों
 सब असुरन क्षय कियो ॥ या विधि हरिजू करी सहाय । मैं सो तुमसों दई सुनाय ॥ जुक ज्यों
 नृपको कहि समुझायो । सूरदास जन त्योंही गायो ॥ ७ ॥ नारद उत्पत्ति कथा वर्णन । राग विलावल ॥
 हरि हरि हरि हरि सुमिरन करो । हरि चरणारविन्द उर धरो ॥ हरि भजि जैसो नारद भयो ।
 नारद व्यासदेवसों कह्यो ॥ कहौ सुकथा सुनो चित धार । नीच ऊंच हरिके इक सार ॥ गंधर्व
 ब्रह्मासभा मँझार । हँस्यो अप्सरा ओर निहार ॥ कह्यो ब्रह्मा दासी सुत होहि । सकुच न करी
 देखि तैं मोहिं ॥ भयो दासीसुत ब्राह्मण गेह । तुरत छाँडिकै गंधर्व देह ॥ ब्राह्मण गृह हरिके जन
 छाए । दासी दास सेवहित लाये ॥ हरि जन हरि चरचा जो करै । दासीसुत सो हृदय धरै ॥ सुनत
 सुनत उपज्यो बैराग । कह्यो जाउँ क्यों माता त्याग ॥ ताकी माता खाई कारे । सो मरगई शापकी
 मारे ॥ दासी सुत वन भीतर जाई । करी भक्ति हरिपद चित लाई ॥ ब्रह्मा पुत्र तनु तजि सो भयो ।
 नारद यों अपने मुख कह्यो ॥ हरिकी - भक्ति करै जो कोई । सुर नीच सो ऊंच सु होई ॥ ८ ॥
 इति श्रीभागवते सूरसागरे सूरदासकृते सप्तमस्कन्धः समाप्तः ॥ ७ ॥

अथ कविवर सूरदासकृत-

❀ श्रीसूरसागर । ❀

अष्टमस्कन्ध ।

गग विलावल ॥ चालि ॥ हरि हरि हरि हरि सुमिरन करो । हरि चरणारविन्द उर धरो ॥ हरि चरणन
 शुक्रदेव शिर नाई । राजासों बोल्यो या भाई ॥ कहो हरि कथा सुनो चितलाई । सूरदास हरि
 के गुण गाई ॥ १ ॥ गजमोचन अवतार । रागविलावल ॥ गज मोचन ज्यों भयो अवतार । कहौं सुनौ सो
 अब चित धार ॥ गंधर्व एक नदीमें जाइ । देवल ऋषिके पकरचो पाइ ॥ देवल कह्यो ग्राह तुम
 होहि । कह्यो गंधर्व दया करि मोहि ॥ जब गजेंद्रके पग तू गहि है । हरि जू ताको आनि छुडै है ॥
 भए स्पर्श देवतनु धरि है । मेरो कह्यो नहीं यह टरि है ॥ राजा इंद्रदुष्य कियो ध्यान । आयो
 अगस्त्य नहीं तिन जान ॥ दियो शाप गजेंद्र तू होहि । कह्यो नृप दया करो ऋषि मोहि ॥ कह्यो तुहि
 ग्राह आन जब धरि है । तू नारायण सुमिरन करि है ॥ याही विधि तेरी गति होई । भयो त्रिकूट
 पर्वत गज सोई ॥ कालहि पाइ ग्राह गज गह्यो । गज बल करि करिके थकि रह्यो ॥ सुत पत्नी
 हूं बलकरि रहे । छूट्यो नहीं ग्राहके गहे ॥ ते सब भूखे दुःखित भये । गजको मोह छाँडि उठि गए ॥
 तब गज हरिकी शरणहि आयो । सूरदास प्रभु ताहि छुटायो ॥ २ ॥ माधवजू गज
 ग्राह ते छुटायो । निगमनि हूं मन वचन अगोचर प्रगटि स्वरूप दिखायो ॥ शिव विरंचि सब देखत
 ठाढ़े बहुत दीन दुख पायो । बिन बदले उपकार करैको काहू कहत न आयो ॥ चितवत चितहीमें चिंता
 मणि चक्र लये कर धायो ॥ अति करुणा करि करुणामै हरि गरुडहिहूँ छुटकायो । सुनियत सुय
 श जु निज जन कारन कहूं न गहर लगायो ॥ ना जानों जु सूर इहि औसर कौन दोष बिसरायो ॥
 राग विलावल ॥ हरि कर चक्र धरे धर धावत ॥ गरुड समेत सकल सेनापति पाछे
 लागे आवत ॥ चलि ना सकत गरुड मन डरपत बुधि बल बलहि बढावत । मनो पवन वश पत्र
 पुरातन अपनो चरण चलावत ॥ को जानैं प्रभु कहां चलैहैं काहू कछु न जनावत ॥ अति व्याकुल
 गति देखि देवगण सोचि सकल दुख पावत ॥ गजहित धोवन जन मुकरावन वेद विमल यश गावत ।
 सूर समुझि समुझाव अनाथनि इहि विधि नाथ छुडावत ॥ ४ ॥ राग सारंग ॥ झाँई न मिट
 न पाई आए हरि आतुर है जब जान्यो गज ग्राह लये जात जलमें । यादवपति यदुनाथ
 खगपति साथ जन जान्यो विहबल तब छाँडि दयो थलमें ॥ नीरहूते न्यारो कीनो चक्रन चक्र
 शीश छीनो देवकीके नन्दलाल ऐंचि भुवतलमें । कहै सूरदास देखि नैननकी मिटी प्यास कृपा
 कीनो गोपीनाथ आइगए पलमें ॥ ५ ॥ राग विलावल ॥ अब हौं सब दिशि हेरि रह्यो । राखत
 कोउ न नाथ कृपानिधि अति बल ग्राह गह्यो ॥ सूर नर सब स्वारथके गाहक कत श्रम आन
 करै । उडगण उदित तिमिर नाहि नाशत बिन रविरूप धरे । इतनी बात सुनत करुणामय चक्र

गहे करधाए ॥ हत गज शत्रु सूरके स्वामी ताछिन सुख उपजाए ॥ ६ ॥ कूर्म अवतार समुद्रमथन अमृतादि निमित्त ॥ राग विलावल ॥ जैसे भयो कूर्म अवतार । कहौं सुनो सो अब चितधार ॥ नरहरि हिर प्यकशिपु जब मारयो । अरु प्रह्लाद राज्य बैठारयो ॥ ताको सुत वैरोचन भयो । ताके बहुरि पुत्र बलि हुयो ॥ बलि सुरपतिको बहु दुख दयो । तब सुरपति हरि शरणनि गयो ॥ हरिजू अपनी बिरद सँभारयो । सूरज प्रभु कूरमतनु धारयो ॥ ७ ॥ राग मारु ॥ सुरन हेतु हरि कच्छपरूप धारयो । मथन करि जलधि अमृत निकारयो ॥ चतुर्मुख त्रिदश तब बिनय हरिसों करी बलि असुर सों सुरनि दुःख पायो । दीनबंधु कृपाकरन अशरन शरन मंत्र यह तिनै निज सुख सुनायो ॥ बासुकी नेति अरु मंदराचल रई कमठमें आपनी पीठ धारयो । असुरसों हेतु करि करो सागर मथन तहांति अमृत को पुनि निकारयो ॥ रत्न चौदह बहुरि तहांति प्रगट होहिं असुरको सुरा तुम अमृत प्याऊं । जीतिहौ तब महा असुर बलबंतको मरैं नहिं देवता यों जिवाऊं । इन्द्र मिलि सुरन बलिपास गयो बहुरि उन कह्यो कहो किहि काज आयो । त्रिदश तब समुद्रके मथनकी बात जो हुती सो सकल कहिकै सुनायो ॥ बलि कह्यो विलंब अब नेकु नहिं कीजिए मंदराचल अचल चलो धाई । दोउ इक मंत्रकरि जाइ पहुँचे तहां कह्यो अब लीजिए इहि उँचाई ॥ मंदराचल उपारत भयो बहुत श्रम बहुरि लै चलनको जब उठायो । सुर असुर बहुत ता ठौरही मरिगए दुहूँको गर्व हरि यों न-शायो ॥ तब दुहूँ ध्यान भगवानको धरि कह्यो बिनु तुम्हारी कृपा गिरि न जाई । वाम करसों पकरि गरुड पर राखि हरि क्षीरके जलधितट धरयो जाई ॥ कह्यो भगवान अब बासुकी ल्याइए जाइ तिहि बासुकीसों सुनायो । मान भगवान आज्ञा सुआयो तहां नेति करि अचलको समुद्र पायो ॥ मंदराचल समुद्रमाहिं बूडन लग्यो तब बहुरि सबन अस्तुति सुनाई । कूर्म को रूप धरि धरि अचल पीठपर सुर असुर सकल मन भई बधाई ॥ पूँछको ताजि असुर दौरिके मुख गह्यो सुरन तब पूँछकी ओर लीनो । मथतभए छीन तब अस्तुति करी श्रीमहाराज निज शक्ति दीनी ॥ भयो हलाहल प्रकट प्रथमही मथत जब रुद्रको दयो तिहि कंठधारी । चन्द्रमा बहुरि जब मथत पायो प्रगट सोउ करि कृपा दीनो सुरारी ॥ कामनाधेनु तब सप्त ऋषिको दई लई उन बहुत आनन्द कीने । अप्सरा पारजातक धनुष अश्व गज श्वेत ए पांच सुरपतिहि दीने । शंख अरु कौस्तुभमणि लई आप हरि बहुरि पुनि लक्ष्मीदई दिखाई । परमसुन्दर मनो तडित है दर्शनीय कमलकी माल करलए आई ॥ सकल भूषन मनिनके बने सकल अंग अरु बसन अरुन सुंदर सुहाये । देखि सुर असुर सब दौरि लागे गहन कह्यो मैं बरवरो आप भाए । जो मुझे चहै मैं ताहि नाहीं चहौं असुरको राज थिर नाहिं देखों । तपसियन देखि कह्यो क्रोध इनमें बहुत ज्ञानियनिमें न आचार पेखौ ॥ सुरनको देखि कह्यो ए पराधीन सब देखि विधको कह्यो यह बुढायो । चिरंजीविनि देखि कह्यो न डराइ ए लोक तिहुँ माहिं कोउ चित न आयो ॥ बहुरि भगवानको निरखि सुंदर परम कह्यो इहिमाहिं है सबै भलाई । पै न इच्छा इनैहै काहू बस्तुकी अरु न ए देखिकै मोहिं लोभाई ॥ कबहुँ किये भक्ति हूँके नए रीझि हैं कबहुँके बैर ए रीझि जाहीं । और गुण चाहिये सो सकल हैं इनैहै डारि दई माल कहि गेर माहीं ॥ हरि कह्यो मम हृदय माहिं तुम रहो सदा सुरन मिलि देव दुन्दुभी बजाई । धन्य धनि कह्यो पुनि लक्ष्मी सो सकल सिद्ध गंधर्व जै ध्वनि सुनाई ॥ बहुरि धन्वांनि आयो समुद्र से निकसि सुरा अरु अमृत पुनि संग लायो । भयो आनंद सुर असुरको देखिकै असुर करि बलहि अमृत छिनायो ॥ सुरन भगवानसों आइ बिनती करी

असुर सब अमृत लै गए छिनाई । कह्यो भगवान चिंता न कछू मन धरो मैं करों अब तुम्हारी सहाई ॥ परस्पर असुर तब युद्ध लागे करन होय बलवन्त सोइ लै छिनाई । मोहिनी रूप धरि श्याम आए तहां देखि सुर असुर सबहीं लोभाई ॥ आइ असुरन कह्यो लेहु यह अमृत तुम सबन देहु बाँटि मेटो लराई ॥ हँसि कह्यो नहीं हम तुम कछू मित्रता बिना विश्वास बाँट्यो न जाई ॥ कह्यो तोहि बाँट पर हमें विश्वास है देहु तुम बाँट जो धर्म होई ॥ कह्यो सब सुर असुर मिलि कियो दधि मथन देउ सर्वबाँट है धर्म सोई ॥ कह्यो जो करो सो हमें परमान है असुर सुरपांति करि तब बिठाई । असुर दिश जिते सुसकाइ मोहे सकल सुरनको अमृत दीनो पिलाई ॥ राहु शशि सूर्यके बीचमें बैठिकै मोहनीसों अमृत मांगि लीनो । सूर्य शशि कह्यो जब असुर यह कृष्ण जू लै सुदर्शन सु द्वै टूक कीनो ॥ राहु शिर केतु धरको भयो तबहिंते सूर शशिको सदा दुखदाई । करत भगवान रक्षा शशिउ सूरकी होत है सुदर्शन तब सहाई ॥ करि अंतर्ध्यान तब मोहनीरूपको गरुड़ असवार है तहां आए । असुर चकृत भए कहां गइ नारि वह सुर असुर युद्ध हेतु दोउ धाए ॥ सुरनकी जीति भई असुर मारे बहुत जहां तहां गए सबही पराई । सूर प्रभु जिहि करे कृपा जीतै सुई बिनु कृपा जाइ उद्यम वृथाई ॥ ८ ॥ मोहिनी रूप । राग मारू ॥ हरि कृपा करै जीतै सोई । वाद अभिमान जिन करो कोई । पाइ सुधि मोहनीकी सदाशिव चले जाइ भगवानसों कहे सुनाई ॥ असुर अजितेंद्रिय देखि मोहित भये रूप सों मोहि दीजै दिखाई । हरि कह्यो ब्रह्म व्यापक निराकार सो निर्गुण तुम सगुणलै कहा करिहौ ॥ पुनि कह्यो बीनती मान लीजै प्रभु उमा देख्यो चहत कृपा धरिहो । हरि कह्यो तुमै दिखराइ हौं रूप वह करो विश्राम इक ठौर जाई । बैठि एकांत जोहन लग्यो पंथ शिव मोहनी रूप कब दै दिखाई ॥ होइ अंतर्ध्यान मोहनी रूप धरि जाइ बन माहिं दीनो देखाई । सूर शशि किधों चपला परमसुंदरी अंग भूषननि छवि कहि न जाई ॥ हाव अरु भावकरि चलत चितबत जैव कौन ऐसो जो मोहित न होई ॥ उमाको छाँड़ि अरु डारि मृगचर्मको जाइके निगट रह्यो रुद्र जोई ॥ रुद्रको देखि करि मोहनी लाज करि लियो अंतर रुद्र अधिक मोह्यो । उमा हूं देखि पुनि ताहि मोहित भई तासु सम रूप अपनो न जोह्यो ॥ रुद्र धीरज तज्यो जाइ ताको गह्यो सो चली आपको तब छडाई ॥ रुद्रको बीर्य छुटिकै परचो धरणि पर मोहनी रूप हरि लियो दुराई ॥ देखिकै उमाको रुद्र लज्जित भए कह्यो मैं कौन यह काम कीनो । इंद्रजीत कहावत हौं तो आपुको समुझि मनमाहिं है रह्यो खीनो । चतुर्भुज रूप हरि आइ दर्शन दियो कह्यो शिव शोच दीजै विहाई ॥ सम तुमारो नहीं दूसरो जगतमें कह्यो तुम रूप तब दियो दिखाई ॥ नारिके रूपको देखि मोहै न जो सो नहीं लोक तिहुं माहिं भावे । सूरस्वामी शरन रहित माया सदा को जगत जौन कपि ज्यों नचावै ॥ ९ ॥ राग विलावल ॥ असुर द्वै हुते बलवन्त भारी । सुंद उपसुंद स्वेच्छा विहारी ॥ भगवती तवै दीनी देखाई । देखि सुंदरी दोउ रहे लुभाई ॥ भगवती कह्यो तिनको सुनाई । युद्ध जीतै सु मुहि वरै आई ॥ तब दुहुं युद्ध कीनो तहांई । करि मुये तुरंतहि दोउ भाई ॥ देखिकै नारि मोहित जो होवै । आपुनो मूल या विधि मुखेवै ॥ शुक्र नृपति पास जेहि विधि सुनाई । सूर ज्यों ही तेहि भांति गाई ॥ १० ॥ वामन अवतार वर्णन ॥ राग विलावल ॥ जैसे भयो वामन अवतार । कहाँ सुनो सो अब चित धार ॥ हरि जब अमृत सुरन पियायो । तब बलि असुर बहुत दुख पायो ॥ शुक्र ताहि पुनि यज्ञ करायो । सुर जै राज्य त्रिलोकी पायो ॥ निन्यानवे यज्ञ पुनि किये । तब दुख भयो अदितिके हिये ॥ हरि हित उन पुनि बहुत पुकार्यो । सूरश्याम वामन वपु धार्यो ॥ ११ ॥ राग मलार ॥ द्वारे ठाढ़े हैं द्विज वामन । चारों वेद पढ़त सुख आगर अति सुगंध सुर गावन ॥ वाणी सुनि बलि पूछन लागे इहां विप्र करो आवन ।

चर्चित चन्दन नील कलेवर बरसति बुंदन सावन ॥ चरण धोइ चरणोदक लीनो मांगि देउँ मन
 भावन । तीन पैड वसुधा हौं चाहौं परण कुटीको छावन ॥ इतनो कहा विप्र तैं मांग्यो बहुत रत्न
 देउँ गावन । सूरदास प्रभु बोल छले बलि धर्यो पीठि पद पावन ॥ १२ ॥ राग मलार ॥ राजा इक
 पंडित पौरि तुमारी । चारों वेद पढे मुख आगर रहै वामन वपुधारी ॥ अपद दुपद पशुभाषा बूझै
 अविगत अल्प अहारी । नगर सकल नर नारी मोहे सूरज ज्योति बिसारी ॥ सुनि आनंद चले बलि
 राजा आहुति यज्ञ बिसारी । देखि स्वरूप सकल कृष्णाकृत कीनी चरण जुहारी ॥ चलिए विप्र
 जहां यज्ञवेदी बहुत कही मनुहारी । जो माँगो सोइ देहुं तुरतही हीरा रतन भँडारी ॥ रहु रहु
 राजा यों नहिं कहिये दूषण लागै भारी । हूँठ पैड दे वसुधा हमको तहां रचौ धर्मसारी ॥ शुक्र कह्यो
 सुन हौ बलिराजा भूमिको दान निवारी । ए तो विप्र न होवै राजा आए छलन मुरारी ॥ कहि
 धौं शुक्र कहां धौं कीजै आपुन भए भिखारी । सबही उदक दियो बलिराजा वामन देह पसारी ॥
 जैजैकार भयो भुव मापति तीन पैड भइ सारी ॥ आध पैड दै वसुधा राजा नातरि चल सतहारी ।
 अब सत क्यों हारों जगस्वामी नापो देह हमारी ॥ सूरदास बलि सर्वस दीनो पावो राज्य पतारी ॥
 ॥ १३ ॥ मत्स्यअवतार वर्णन ॥ राग मारू ॥ सुरनहेतु हरि मत्स्यरूप धार्यो । सदाही भक्त संकट
 निवार्यो ॥ चतुर्मुख कह्यो श्रुति चतुर शंखा अमुर लै गयो तबै परलै दिखायो । भक्तवच्छल
 कृपाकरन अशरन शरन मत्स्यको रूप तहां धारि आयो ॥ स्नान करि अंजली जल जबै नृप
 लियो मच्छको देखि कह्यो डार दीजै । मच्छ कह्योमैं गही आय तुमरी शरन करि कृपा
 अब मोहिं राखिलीजै ॥ नृप सुनत वचन चकृत प्रथम ह्वै रह्यो कह्यो मछ वचन किहि भांति भाख्यो
 पुनि कमंडलु धर्यो तहां सो बढिगयो कुंभ धरि बहुरि पुनि मांठ राख्यो ॥ पुनि धर्यो खाइ
 तालाबमें पुनि धर्यो नदीमें बहुरि तिहि डारि दीनो । बहुरि जब बढिगयो सिंधु तब लैगयो तहां हरि
 रूप तब चीन्हलीनो ॥ कह्यो करि विनय तुम ब्रह्म अनु अंतहौ मत्स्यको रूप किहि काज कीन्हो ॥
 वेद विधि चहत तुम प्रलय देखन कहत तुम दोऊ हेतु अवतार लीनो ॥
 कबहुँ बराह नरसिंह कबहुँ भयो कच्छको रूप लीनों ॥ कबहुँ भयो राम वासुदेव कबहुँ
 भयो ओर बहुरूप हित भक्त कीनो । सातवें दिवस दिखराय हों प्रलय तुहिं सप्तऋषि नावमें बैठि आवैं ।
 तोहिं बैठारिहैं नावमें हाथ गहि बहुरि हम ज्ञान तुहि कहि सुनावैं । सर्प इक आइहै बहुरि तुमरे निकट
 ताहिसों नाव मम शृंग बांधो । यहै कहि मत्स्य प्रभु भए अंतर्धान नृप तबै आपनों कर्म साधो ॥ सातवें
 दिवस आयो निकट जलाधि जब नृपति कह्यो अब कही नाव पावै । आइ गई नाउ तब ऋषिन तासों
 कह्यो आव हम नृपति तुमको बचावैं ॥ पुनि कह्यो मत्स्य हरि अब कहां पाइये ऋषिन कह्यो
 ध्यान जियमाहि धार्यो । मत्स्य अरु सर्प ता ठौर प्रगटित भएतबै तिनसों नृपति कहि उचार्यो ।
 ज्यों महाराज या जलधिते पार कियो भव जलधि हूं पार करो स्वामी । अहं ममता हमैं सदा लागी
 रहति मोह मद क्रोधयुत मंद कामी ॥ कर्म सुख हित करत होत तहां दुःख तब इतेपर मूढ़ नाही
 संभारत । करन कारन महाराजहैं आपही ध्यान प्रभु कौन मनमाहिं धारत ॥ बिनु तुमारी कृपा गति न-
 हीं नरनको जानि मोहिं आपनो कृपा कीजै । जन्म अरु मरनमें सदा दुःखित रहत देहु मोहिं ज्ञान जो
 सदा जीजै । मत्स्य भगवान कह्यो ज्ञान पुनि नृपतिसों भयो सुपुराण सब जगत जान्यो ॥ लेहु अब
 ज्ञान कह्यो आंखि अब मीचि तू मत्स्य जो कह्यो सो नृपति मान्यो ॥ आंखिको खोलि जब नृपति
 देख्यो बहुरि कह्यो हरि प्रलय माया दिखाई । कह्यो जो ज्ञान भगवान सो आनि नृपति उर
 निज आयु इहिविधि बिताई ॥ बहुरि शंखासुरे मारि वेद आनिदयो चतुर्मुख विविध अस्तुति सुनाई ॥
 सूरके प्रभुकी नित्य लीलाबनी सकै कहि कौन यह कछुक गाई ॥ १४ ॥

इति श्रीमद्भागवते—सूरसागरे कविवर श्रीसूरदासकृते अष्टमः स्कन्धः समाप्तः ॥ ८ ॥

अथ कविवर सूरदास कृत-

श्रीसूरसागर.

नवमस्कन्ध ।

राजा पुरूरवाको वैराग्य वर्णन । राग विलावल ॥ शुक्रदेव कह्यो सुनो हो राउ । नारी नागिनि एक स्वभाउ ॥ नागिनिके काटे विष होइ । नारी चितवत नर रहे भोइ ॥ नारीसों नर प्रीति लगावै । पै नारी तिहि मनहि न ल्यावै ॥ नारी संग प्रीति जो करै । नारी ताहि तुरत परिहरै ॥ नृपति एक पुरूरवा भयो । नारीसंग हेत तिन ठयो ॥ तासों उन कटु वचन सुनाए । पै ताके मन कछु न आए ॥ बहुरो तिहि उपज्यो वैराग । गयो उरवशीको सो त्याग ॥ हरिकी भक्ति करत गति पाई । कहों सुकथा सुनो चित लाई ॥ एकवार महाप्रलय भयो । नारायण आपे रहिगयो ॥ नारायण जलमें रहे सोई । जागि कह्यो बहुरो जग होई ॥ नाभिकमलते ब्रह्मा भयो ॥ तिन मनते मरीचिको ठयो ॥ पुनि मरीचि कश्यप उपजायो । कश्यपकी तिय सूरज जायो ॥ सूरजके वैवस्वत भयो । सुत हित सो वशिष्ठ पै गयो ॥ ताकी नारि सुता हित भाष्यो ॥ पुनि वशिष्ठ अपने मन राख्यो ॥ ऋषि नृपसों यज्ञ विधि करवाई ॥ इला सुता ताके गृह आई ॥ नृप कह्यो पुत्र हेतु यज्ञ कियो । पुत्री भई यह अचरज भयो ॥ ऋषि कह्यो रानी पुत्रीकही । मेरे मनमें सोई रही ॥ ताते पुत्री उपजी आइ । करिहै पुत्र ताहि हरि राइ ॥ हरि ता पुत्रीसों सुत करयो । नाम सुद्युम्न ताहि ऋषि धरयो ॥ एक दिवस सु अखेटक गयो । जाइ अंबि का बन तिय भयो ॥ बुधके आश्रम सो पुनि आयो । तासों गंधर्व व्याह करायो ॥ बहुरौ एक पुत्र तिन जायो । नाम पुरूरवा ताहि धरायो ॥ पुनि सुद्युम्न वशिष्ठसो कह्यो । अंबाबनमें तिय है गयो ॥ ऋषि शिवसो बहु विनती करी । तब शिव यह वाणी उच्यरी ॥ एक मास यह है नारि । द्वितीय मास पुरुष आकारि ॥ तब सुद्युम्न अपने गृह आयो । राज समाज माहिं सुख पायो ॥ तीनि पुत्र तिन और उपाए । दक्षिण राज करन सुपठाए ॥ दश सुत ताके उपजे और । भयो इक्ष्वाकु सबन शिरमौर ॥ सूरज वंशी सो कहवायो । रामचंद्र ताही कुल आयो ॥ सोम वंश पुरूरवासों भयो ॥ सकल देश नृप ताको दयो ॥ तिहि वंश लियो कृष्ण अवतार । असुर मारि कियो सुरन उद्धार ॥ कहिहौं कथा सुकरि विस्तार । पुरूरवा कथा सुनो चितधार ॥ पुरूरवा गेह उरवशी आई । मित्रवरुनते शापहिं पाई ॥ नृपति देखि तेहि मोहित भयो । तिन यह वचन नृपतिसों कह्यो ॥ विन रतिकाल नग्न नहिं होवहु । मम मेंढनि को कहूं न खोवहु ॥ तबलौं मैं तुमरो संग करौं । वचन भंग भयते परिहरौ ॥ नृपति कह्यो तुम कह्यो सु करिहौं । तुमरी आज्ञा मैं अनुसरिहौ ॥ तासों मिलि नृप बहु सुख माने । पष्ठ पुत्र तासों उतपाने ॥ सुरपुरसों गंधर्व पुनि आयो । उरवशी सों यह वचन सुनायो ॥ अब तुम इंद्रलोकको चलो । तुम बिनु सुरपुर लगत न भलो ॥ तिन उरवशी कह्यो या भाइ । छल बल करिसकौ तौ लैजाइ ॥ मम चलिबेको यहै उपाव । छल करि मेंढनि

नभ लै जाव ॥ गंधर्व मेढनि नभ लै धाए । सोवत नृप उरवशी जगाए ॥ मम मेढनिको लै गयो
 कोई । देखो तुम पुरुष तिहिं जोई ॥ अर्ध निशा नृप ताको धायो । पै मेढनिको कहूँ न पायो ॥
 इत उत देखि नृपति जबै आयो । तब उरवशी यह वचन सुनायो ॥ राजा वचन तुमारो टरयो ।
 ताते मैं तुमको परिहरयो ॥ यह कहिकै सो चली पराय । जैसे तडित अकासै जाय ॥ ताके विरह
 नृपति बहु तयो । नग्न नग्न ता पाछे धयो ॥ भ्रमत भ्रमत नृप बहु श्रम पायो ।
 बहुरो कुरुक्षेत्रमें आयो ॥ तहां उरवशी सखिन समेत । आइ गई सुस्नानके हेत ॥ पै उनको कोउ
 देखै नाहिं । उनको सकल लोक दरशाहिं ॥ उरवशीसों तिलोत्तमा कह्यो । कौन पुरुष तुम भुवमें
 लह्यो ॥ ताके देखनकी मोहिं चाह । कह्यो पुरुष वह ठाढो आह ॥ नृपको देखि सु विस्मय भई ।
 कह्यो विरह तोहिं नृप सुधि गई ॥ बहुत दुखित है तेरे नेह । एक बेर इहि दर्शन देह ॥ तिन माया
 आकर्षण करी । तब वह दृष्टि नृपतिकी परी ॥ राजा निरखि प्रफुल्लित भयो । मानो मृतक बहुरि
 जिय लह्यो ॥ उरवशी निकट नृपति चलि आयो । करि बिनती यह वचन सुनायो ॥ तैं मोको काहे
 बिसरायो । मैं तुम बिनु बहुतै दुख पायो ॥ तुम बिनु भूख नींद नाहिं आवै । पल पल युग सम
 मोहिं बिहावै ॥ मेरे गेह कृपा करि चलो । वाही विधि मोसों हिल मिलो ॥ कह्यो नेह हम कामसों आ-
 हि । बिना काम हमरे नाहिं चाहि ॥ हमसों सहस बरस हित धरै । हम तिहिको छिनमें परिहरै ॥ बिन
 अपराध पुरुष हम मारे । माथा मोह न मनमें धारे ॥ हमैं कहौ केतौ किन कोई । चाहैं करन करैं
 हम सोई ॥ नृप पुनि बिनती बहु विधि करी । तब उरवशी बात उच्चरी ॥ वर्ष सात बीते हौं ऐहाँ ।
 एक रात्रि तोको सुख देहौं ॥ वर्ष सप्त बीते सो आई । नरपतिसों मिलिरैन विताई ॥ प्रात होत चलिबे
 को चह्यो । तब राजा तासों यों कह्यो ॥ तू मोको छांडे कित जात । मोको तुम बिनु छिन न विहात ॥
 जब या भाति नृपति बहु कह्यो । तब उरवशी यह उत्तर दयो ॥ यह तो होनहार है नाहीं । सुरपुर
 छांडि रहौं भुव माहीं ॥ जो तुम मेरी इच्छा धरौ ॥ गंधर्वनीके हित तप करौ ॥ तप कीनेसे देहैं
 आग । ता सेती तुम कीजो जाग ॥ यज्ञ किये गंधर्वलोक सिधैं हो । तहां आइ मोको तुम पैहो ॥
 नृप यज्ञ करि ता लोक सिधायो । मिलि उरवशी बहुत सुख पायो ॥ जब या विधि बहु काल
 बितायो । तब वैराग्य नृपति मन आयो ॥ बहुत काल भोग में कीए । पै संतोष न आए हीए । श्री
 नारायणको बिसरायो । बिषय हेत सब जन्म गँवायो ॥ याविधि जब विरक्त नृप भयो । छांडि
 उरवशी वनको गतो ॥ वनमें जाइ तपस्या करी । विषय बासना सब परिहरी ॥ हरिपदसों नृप
 ध्यान लगायो । मिथ्या तनुको मोह भुलायो ॥ हरि व्यापक सब जगमें जान । हरि प्रसाद पायो
 निर्वाण ॥ ताते बुधि त्रियसे गति तजै । श्रीनारायणको नित भजै ॥ शुक जैसे नृपको समुझायो ।
 सूरदास त्योंही कहि गायो ॥ १ ॥ च्यवन ऋषि कथा वर्णन ॥ राग विलावल ॥ शुकदेव कह्यो सुनो हो
 राव । जैसो है हरिभक्त प्रभाव ॥ हरिको भजन करै जो कोई । जग सुख पाइ मुक्ति फल सोई ॥
 च्यवन ऋषीश्वर बहु तप कियो । ता सम और जगत नाहिं वियो ॥ बांमी ताको लियो छिपाई ।
 तासों ऋषि नाहिं दर्ई दिखाई ॥ ता आश्रम सरजात नृप गये । तहां जाइके डेरा दये ॥
 छांडि तहीं सब राज समाज । राजा गयो अखेटक काज ॥ नृप कन्या तहँ खेलन गई ।
 ऋषि दृग चमकत देखत भई ॥ पै तिहि ऋषि दृग जाने नाहिं । खेलत शूल दये
 तेहि माहिं ॥ रुधिर धार ऋषि आँखिन ढरी । नृपकन्या सु देखि तब डरी ॥ शूल व्यथा
 सब लोगन भई । राजा कह्यो कहा भई दर्ई ॥ तहँके बासी नृपति बुलाये । बूझो तब तिहि कह्यो

बुझाये ॥ च्यवन ऋषि आश्रम है इहां राई । करौ बीनती उनसों जाई ॥ नृप खोजत ऋषि आश्रम
 आयो । ऋषि दृग देखत बहुत डरायो ॥ कह्यो कियो किन ऐसों काज । कन्या कह्यो सुनौ
 महाराज ॥ मोतै बिन जाने यह भई । ऋषिके दृगनि शूल हौं दई ॥ नृप मनही मन बहु पछतायो ।
 ऋषिसों पुनि यह वचन सुनायो । महाराज तुम तो हौ साध । मम कन्याते भयो अपराध ॥ या
 कन्याको प्रभु तुम बरो । कष्ट शूल कृपा करि हरो ॥ लोग सकल नीको जब भयो । नृप कन्या
 दै गृहको गयो ॥ ऋषि समाधि हरि चरण लगाई । कन्या ऋषि हरि चरण लव लाई ॥ सुरपति
 ताके रूप लुभायो । बहुरि कुबेर तहां चलि आयो ॥ पै तिहिं दिशि तिन देख्यो नाहीं । गये
 खिस्याइ दोऊ मन माहीं ॥ चौदह वर्ष भये या भाई । तब ऋषि देख्यो शीश उठाई ॥ हाड चाम
 तनु पर रहि गये । कृपावत ऋषि तापर भये ॥ अशुनी सुत इहि अवसर आयो । करि प्रणाम
 यह वचन सुनायो ॥ जो कछु आज्ञा मोको होइ । छांड़ि बिलंब करौ अब सोइ ॥ कह्यो दृगनि को करौ
 उपाय । तुरत नेत्र तिन दिये बनाय ॥ कह्यो मैं यज्ञ भाग नहिं पावत । वैद्य जानि मोहिं सुर बहरावत ॥
 ऋषि कह्यो मैं करिहौं जहां जाग । दैहों तोहिं अवश करि भाग ॥ नृपकन्यासों ऋषि यों कह्यो ।
 तुहि ऊपर प्रसन्न मैं भयो ॥ यद्यपि कछु इच्छा नहिं मेरे । तदपि उपाय करौ हित तेरे ॥ दुड
 मिलि तीरथ माहिं अन्हाये । सुन्दर रूप दुहुं जन पाये ॥ दासी सहस प्रगट तहां भई । इन्द्रलोक
 रचना ऋषि ठई ॥ तियको सुख ऋषि बहु विधि दियो । तासु मनोरथ पूरण कियो ॥ तब सरजात
 रानीसों कही । जबते कन्या ऋषिको दई ॥ तब ते सुधि कुछ नाहीं पाई । बिनु प्रसंग तहां गयो
 न जाई ॥ यज्ञारंभ नृपति तहँ गयो । देखि ऋषाश्रम विस्मय भयो ॥ कह्यो यह विभव कहाँते
 आई । किन यह ऐसी बनत बनाई ॥ इहि अंतर नृप कन्या आई । पिता देखि
 मिलिबे को धाई ॥ नृप ताको आदर नहिं दियो । तैं यह कौन कर्म है कियो ॥
 वृद्ध ऋषीश्वरको कहा भयो । कुल कलंक तैं किहि मिलि लयो ॥ कह्यो योग बल
 ऋषि सब कीनो । मुहिं सुख सकल भांति करि दीनो ॥ नृप प्रसन्न हो ऋषि पै आए । यज्ञ प्रसंग
 कहिकै गृह लाए ॥ रानी सुता देखि सुख मान्यो । धन्य जन्म करि अपनो जान्यो ॥ च्यवन नृपति
 को यज्ञ करवायो । अश्विनी सुत हित भाग उठायो ॥ इन्द्र कोप है ऋषिसों कह्यो । ताहि भाग तुम
 काहे द्यो ॥ पुनि मारनको वज्र उठायो । पै ऋषिको मारन नहिं पायो ॥ इन्द्र हाथ ऊपर रहि
 गयो । तिन कह्यो दई कहा यह भयो ॥ कह्यो सुरन तुम ऋषिहिं सतायो । ताते कररहिं गयो
 उँचायो ॥ इन्द्र विनय ऋषि सों बहु करी । तब ऋषि कृपा ताहि पर धरी ॥ सुरपति कर जब नीचे
 आयो । अश्विनी सुत बलि सुरमें पायो ॥ ऐसो हरिको भक्त प्रभाव । बरनि कह्यो मैं तुमसों राव । हरि
 की भक्ति करै जो कोई । दुहुं लोकको सुख तेहि होई ॥ शुक ज्यों नृपसों कहि समुझायो । सूरदास
 योंही कहि गायो ॥ २ ॥ हलधर विवाह कथा वर्णन । राग भैरों ॥ द्वारावति पति रेवत
 राजा । तासम जग दुतिया न विराजा ॥ ता गृह जन्मरेवती लयो । ताको लै सुब्रह्मपुर गयो ॥ विधि तिहि
 आदर दै बैठायो । तब नृप मन में अति सुख पायो ॥ तहां देखि अप्सरा अखारा । नृप कछु नहीं
 वचन उच्चार ॥ जब अप्सरा नृत्य करि रही । तब राजा ब्रह्मासों कही ॥ मम पुत्री वर प्रापति आहि ।
 आज्ञा होइ देउँ तेहि व्याहि ॥ ब्रह्मा कह्यो सुनो नरनाह । ते नृप तो अब जगमें नाह । हल
 धरको तुम देहु विवाह । व्याह योग अब सोई आह ॥ रेवत व्याह कियो जग आइ । आप कियो तप
 तप बनमें जाइ ॥ हलधर व्याह भयो या भाइ । सूरदास जन दियो सुनाइ ॥ ३ ॥ राजा अंबरीषकी कथा ॥

॥ राग बिलावल ॥ हरि हरि हरि हरि सुमिरन करो । हरि चरणारविंद उर धरो ॥ हरि पद अंबरीष
चित लायो । ऋषि शरापते ताहि बचायो ॥ ऋषिको तापै फेरि पठायो । शुक नृपको यों कहि
समुझायो ॥ अंबरीष राजा हरिभक्त । रहै सदा हरिपद अनुरक्त ॥ श्रवण कीरतन सुमिरन करै । पद
सेवन अरचन उर धरै ॥ बंधन दासीपन सो करै । भक्तन शिष्यभाव अनुसरै ॥ काय निवेदन सदा
उचारै । प्रेम सहित नवधा विस्तारै ॥ नवमी नेम भली विधि करै । दशमीको संयम विस्तारै ॥
एकादशी करै निरहार । द्वादशी पोषै लै आहार ॥ पतिव्रता वा नृपकी नारी । अहनिशि नृपकी
आज्ञाकारी । इन्द्री सुखको दोऊ त्याग ॥ धरै सदा हरिपद अनुराग । ऐसी विधि हरि पूजै सदा ॥
हरि हित लावै सब संपदा ॥ राजकाज कछु मन नहि धरै । चक्र सुदर्शन रक्षा करै ॥ घटिका
दोइ द्वादशी जान । ऋषि आयो नृप कियो सन्मान ॥ कछो भोजन कीजै ऋषिराई । ऋषि कछो
आवतहौं मैं न्हाई ॥ यह कहिकै ऋषि गये अन्हान । काल बितायो करत अस्नान ॥ राजा कहै
कहा अब कीजै । द्विजन कछो चरणोदक लीजै ॥ राजा तब करि देख्यो ज्ञान । या विधि होइ न
ऋषि अपमान ॥ लै चरणोदक निज व्रत साध्यो । ऐसी विधि हरिको अवराध्यो ॥ इहि अंतर दुर्वासा
आए । अंबरीषसों वचन सुनाये । सुन राजा तेसे व्रत टरो । क्यों कर तेरे भोजन करों ॥
कछो नृपति सुनिये ऋषिराई । मैं व्रत हित यह करचो उपाई ॥ चरणोदक लै व्रत प्रतिपारचो ।
अबलौं अन्न न मुखमें डारचो ॥ ऋषि करि क्रोध इक जटा उपारी । सो कृत्या भइ ज्वाला भारी । जब
नृप ओर दृष्टि उन करी । चक्र सुदर्शन सो संहरी ॥ पुनि ऋषि हू को जारन लाग्यो । तब ऋषि
आपन जिय लै भाग्यो ॥ ब्रह्मा रुद्र लोकहू गयो । उनहुं ताहि अभय नहि दयो ॥ बहुरो ऋषि
बैकुंठ सिंघायो । करि प्रणाम यह वचन सुनायो ॥ मैं अपराध भक्तको कीनो । चक्र सुदर्शन अति
दुख दीनो ॥ और कहूं मैं ठौर न पायो । अशरण शरण जानिकै आयो ॥ महाराज अब रक्षा कीजै ।
मोको जरत राखि प्रभु लीजै ॥ हरि जू कछो सुनो ऋषिराई । मोपै तुहि राख्यो नहि जाई ॥
तैं अपराध भक्तको कीन । मैं निज भक्तनके आधीन ॥ ममहित भक्त सकल सुख तजैं ।
और सकल तजि मोको भजैं ॥ बिन मम चरण न उनके आशा । परम दयालु सदा मम आशा ॥
उनके मन नाहीं शत्राई । ताते कहौ उन्हीं पै जाई ॥ तुमको लेहैं वेइ बचाई । नाहीं या बिन और
उपाई ॥ इहां राजा अतिही दुख लयो । ऋषि मम द्वारे ते फिरि गयो ॥ ऋषि मग जोवत वर्ष
बितायो । पै भोजन तौहू न सिरायो ॥ अंबरीष पै तब ऋषि आयो । हाथ जोरि पुनि शीश
नवायो ॥ ऋषिहि देखि नृप कछो या भाई । लेहु सुदर्शन याहि बचाई ॥ ब्राह्मण हरि हरि
भक्त पियारो । ताते अब याको मति जारो ॥ चक्र सुदर्शन शीतल भयो । अभयदान दुर्वासा
लंघ्यो ॥ पुनि नृप तिहिं भोजन करवायो । ऋषि नृपसों यह वचन सुनायो ॥ मैं नहिं भक्त महातम
जान्यो । अबते भली भांति पहिचान्यो ॥ जो यह लीला सुनै सुनावै । सो हरि भक्ति पाइ सुख पावै ॥
शुक राजासों ज्यों समझायो । सूरदास त्योंही करि गायो ॥ ४ ॥ राग गूजरी ॥ फिरत फिरत बलहीन
भयो । कहा करों यहि त्रास कृपानिधि जप तपको अभिमान गयो ॥ धायो धर शरशैल विदिशि
दिशि तहां चक्रहू चाहि लयो । जासे शिव विरांचि सुरपति सब काहू नेक न शरन दयो ॥ भाज्यो फिरचो
लोक लोकनमें पुत्र पुरातन पवन हयो । सूरदास मुनि दीन जानि प्रभु तब निजजन सन्मुख पठ्यो
॥ ५ ॥ सौमरि ऋषि कथा वर्णन ॥ राग बिलावल ॥ शुकदेव कछो सुनोहो राव । जैसो है हरिभक्त प्रभाव ॥
हरिको भजन करै जो कोई । जग सुख पाइ मुक्ति लहे सोई ॥ सौमरि ऋषि यमुनातट गयो । तहां

मच्छ इक देखत भयो ॥ सहित कुटुंब सो क्रीडा करै ॥ अति उत्साह हृदयमें धरै ॥ ताहि देखिकै ऋषिमन आई । गृहआश्रम है अति सुखदाई ॥ तप तजिके गृह आश्रम करौ । कन्या एक नृपतिके बरौ ॥ कह्यो मान्धातासों जाइ । पुत्री एक देहु मोहिं राइ ॥ नृप कह्यो देखि वृद्ध ऋषि देह । हैं पचास पुत्री मम गेह ॥ अंतःपुर भीतर तुम जाउ । बरै तुम्हैं सो देहु विवाहु ॥ तब ऋषि मनमें करै विचार । वृद्ध पुरुषको बरै न नार ॥ तप बल कियो रूप अति सुन्दर । गयो सु तहाँ जहाँ नृप मन्दिर ॥ सब कन्या सौभरिको बरचो । ऋषि विवाह सवाहिनसों करचो ॥ ऋषि तिनके हित गेह बनाये ॥ तिनके भीतर बाग लगाये ॥ भोग समग्री भरे भंडार ॥ दासी दास गनत नहिं पार ॥ ऋषि नारी मिलि बहु सुख पाये । सहस पचास पुत्र उपजाये ॥ तिनके बहुत भई संतान । कहँलौ तिनको करौ बखान ॥ बहुत काल या भांति बितायो । पै ऋषि मन संतोष न आयो ॥ कह्यो विषयते तृप्ति न होय । केतो भोग करौ किन कोय ॥ या विधि जब उपज्यो बैराग । तब तप करि कीन्यौ तनु त्याग ॥ सब नारिन सहगामिनि कियो । हरिजू तिनको निज पद दियो ॥ ताते बुध हरि सेवाकरै । हरि चरणन नितही चित धरै ॥ शुक नृपसों ज्यों कहि समुझायो । सूरदास त्योंही कहि गायो ॥ ६ ॥ श्री गंगा भुवलोक आगमन कथा ॥ राग भैरों ॥ शुकदेव कह्यो सुनौ नरनाह । गंगा ज्यों आई जग मांह ॥ कहैं सु कथा सुनौ चित लाई । सुने सु भवतरि सुरपुर जाई ॥ शतमों यज्ञ सगर जब ठ्यों । इन्द्र अश्वको हरि लै गयौ ॥ कपिलाश्रम लै ताको राख्यो । सगर सुतन तब नृपको भाष्यो ॥ हम सब लोक माहिं फिरि आये । हयकै खोज कहूं नहिं पाये ॥ आज्ञा होइ जाहिं पाताल । जाहु तिन्हें भाष्यो भूपाल । तिनके खोदे सागर भये । कपिल आश्रम ते पुनि गये ॥ अश्व देखि कह्यो धावहु धावहु । भागि जाहि मति बिलम लगावहु ॥ कपिल कुलाहल सुनि अकुलायो ॥ कोप दृष्टि करि तिन्हें जरायो ॥ सगर नृपति जब यह सुधि पाई । अंशुमानको दियो पठाई ॥ तिन कपिल स्तुति बहु विधि कीनी । कपिल ताहि यह आज्ञा दीनी ॥ यज्ञ हेतु अश्व यह लेहु । भ्रात तुमारे भये जु खेहु ॥ सुरसरि जब भुव ऊपर आवै । उनको अपनो जल परसावै ॥ तबहीं उन सबकी गति होई । ता विन और उपाव न कोई ॥ अश्व लाइ यज्ञ पूरण कियो । अंशुमान राजा पुनि भयो ॥ अंशुमान पुनि राज बिहाई । गंगा हेतु कियो तप जाई ॥ याही विधि दिलीप तब कीनो । पै गंगा जू वर नहिं दीनो ॥ भागीरथ जब बहु तप कियो । तब गंगाजू दर्शन दियो ॥ कह्यो मनोरथ तेरो करौ । पै मैं जब अकासते परौ ॥ मोको कौन धारना करै । नृप कह्यो शंकर तुमको धरै ॥ तब नृप शिवकी सेवा कीनी । शिव प्रसन्न है आज्ञा दीनी ॥ गंगासों नृप जाइ सुनाई । तब गंगाजू भुवमें आई ॥ साठ सहस्र सगरके पुत्र । कीने सुरसरि तुरत पवित्र ॥ गंग प्रवाह माहिं जु अन्हाई । सो पवित्र है हरिपुर जाई ॥ गंगा इहिविधि भुव पर आई । नृप मैं तुमसों भाषि सुनाई ॥ शुक नृपसों ज्यों कहि समुझायो । सूरदास त्योंही कहि गायो ॥ ७ ॥ श्रीगंगा विष्णु पादोदककी स्तुति वर्णन ॥ राग विलावल ॥ हरिपद कमलको मकरंद । मलिन मति मन मधुप परिहरि विषय नीरस फंद ॥ परम शीतल जानि शंकर शिर धरचो तजि चंद । नाक सरवसु लैन चाहो सुरसरीको बिंद ॥ अमृतहृते अमल अति गुण स्रवति निधिआनंद । सूर तीनों लोक परस्यो सुर असुर जस छंद ॥ ८ ॥ राग भैरों ॥ जय जय जय माधव बेनी । जगहित प्रगट करी करुणामय अगतिनको गति देनी ॥ जानि कठिन काल कुटिल नृप संग सजी अघ सैनी । जनु ता लगि तरवार त्रिविक्रम धरि करि कोप उपैनी ॥ मेरु मूठि वर वारि पाल क्षिति बहुत वित्तकी लैनी । शोभित अंग तरंग त्रिसंगम धरी धार अति

पैनी ॥ दरशनहुं नाशे यम सैनिक जिमि नेह बालक सैनी । एक नाम लेत सब भाजै पीर सुभूमि
रसैनी ॥ जा जल युद्ध निरखि सन्मुख है सुन्दर सेना बैनी ॥ सूर परस्पर करत कुलाहल गर
सृगपहरावैनी ॥ ९ ॥ राग विलावल ॥ गंग तरंग बिलोकत नैन । अति पुनीत विष्णु पादोदक
महिमा निगम पढ़त गुन चैन ॥ परम पवित्र मुक्तिकी दाता भागीरथी भई वर दैन । द्वादश वर्ष सेये
निशि वासर तब शंकर भाषी है लैन ॥ त्रिभुवन हार सिंगार भगवती सलिल चराचर जाके ऐन ।
सूरजदास विधाताके तप प्रगट भई संतन सुख दैन ॥ १० ॥ परशुराम अवतार वर्णन । राग विलावल ॥
ज्यों भयो परशुराम अवतार । कहौं सु कथा सुनौ चितधार ॥ सहसबाहु रवि बंशी भयो । सरिता
तिर इक दिन सो गयो ॥ निज भुजबल तिन सरिता गही । बढि गयो जल तब रावण कही । नृप तुम
हमसों करी लराई कह्यो करौं मध्यान बिताई ॥ बहुरौ क्रोधवंत युध छयो ॥ सहसबाहु तब ताको गह्यो ॥
बहुरौ नृप करिकै मध्यान । दीनो ताको छांडि निदाना ॥ फिर नृप जमदग्नाश्रम आयो । कामधेनु बल
करि लै धायो ॥ परशुराम जब यह सुधि पाई । मारचो ताहि तुरंतहि धाई ॥ तासु सुतनि जमदग्निहि
मारचो । परशुराम रेणुका हँकारचो ॥ मारचो क्षत्री इकइस बार । यो भयो परशुराम अवतार ॥ शुक
नृपसों ज्यों कहि समुझायो । सूरदास त्योंही कहि गायो ॥ ११ ॥ राग धनाश्री ॥ परशुराम जमदग्नि
गह लीनो अवतार । माता ताकी यमुन जल लेन गई इक बार ॥ लागी तहां अबार तिहि ऋषि
करि क्रोध अपार । परशुरामसों यों कही माको वेगि संहार ॥ और सुतन तब कही पिता नहिं
कीजै ऐसी । क्रोधवंत ऋषि कह्यो करौ इनसों हूं वैसी ॥ परशुराम तिन सबनको मारचो खड्ग
प्रहार । ऋषि कह्यो होइ प्रसन्न वर मांगौं देऊं कुमार ॥ परशुराम तब कह्यो यहै वर देहु तात अब ।
जाने नाहिने सुए फेरिकै जीवैं ये सब ॥ ऋषि कह्यो यह वर दियो मैं इनको देहु उठाइ । परशुराम
उनको दियो सोवत मनो जगाइ ॥ परशुराम बन गए तहां दिन बहुत लगाये । सहसबाहु तिहि
समय जमदग्नि आश्रम आए ॥ कामधेनु जमदग्निकी लै गयो नृपति छिनाय । परशुरामसों
बोलिं ऋषि दियो वृत्तान्त सुनाय ॥ परशुराम सुनि पिता वचन ताको संहारचो ॥ कामधेनु दई
आनि वचन ऋषिको प्रतिपारचो । सहसबाहुके सुतन पुनि राखी घात लगाइ । परशुराम जब
बन गयो मारचो ऋषिको धाई ॥ ऋषिकी यह गति देखि रेणुका रोइ पुकारी ॥ परशुराम तुम
आइ लगत क्यों नहीं गोहारी ॥ यह सुनिकै आयो तुरत मारचो तिन्हें प्रचार । बहुरौ जिय धरि
क्रोध हति क्षत्री बीसिकबार ॥ जग अराज है गयो ऋषिन तब अति दुख पायो । लै पृथ्वीको
दान ताहि फिर बनाहिं पठायो ॥ बहुरि राज्य दियो क्षत्रियनि भयो ऋषिन आनंद । सूरदास पावत
हरष गावत गुण गोविंद ॥ १२ ॥ रामअवतार कारण ॥ राग विलावल ॥ हरि हरि हरि हरि सुमिरन करो ।
हरि चरणारविंद उर धरो ॥ जय अरु विजय पार्षद दोइ । बिप्र शराप असुर भये सोइ ॥ एक
बराह रूप धरि मारचो । एक नृसिंह रूप संहारचो ॥ रावण कुंभ कर्ण सोइ भये । राम जन्म
तिनके हित लए ॥ दशरथ नृपति अयोध्या राव । ताके गृह कियो आविर्भाव ॥ नृपसों ज्यों
शुकदेव सुनायो । सूरदास त्योंही कहि गायो ॥ १३ ॥ बालकांड श्रीरामजन्म वर्णन ॥ राग कान्हारा ॥
आजु दशरथके आँगन भीर । आए भुव भार उतारन कारन प्रगटे श्याम शरीर ॥ फूले फिरत
अयोध्या बासी गनत न त्यागत चीर । परिरम्भण हँसि देत परस्पर आनंद नैननि नीर ॥ त्रिदश
नृपति ऋषि व्योम विमाननि देखत रहे न धीर ॥ त्रिभुवन नाथ दयालु दरश दै हरी सबनकी
पीर ॥ देत दान राख्यो न भूप कछु महा बडे नग हीर । भये निहाल सूर सब याचक जे याचे

रघुवीर ॥ १४ ॥ अयोध्या बाजत आज बधाई । गर्भ मुच्यो कौशल्या माता रामचन्द्र
 निधि आई ॥ गावैं सखी परस्पर मंगल ऋषि अभिषेक कराई । भीर भई दशरथके आँगन साम
 वेद ध्वनि गाई ॥ पूछत ऋषिहि अयोध्याको पति कहि हो जन्म गुसाई । बुद्धवार नौमी तिथि
 नीकी चौदह भुवन बड़ाई ॥ चारि पुत्र दशरथ के उपजे तिहुं लोक ठकुराई । सदा सर्वदा राज
 रामको सूर दादि तहां पाई ॥ १५ ॥ रघुकुल प्रगटेहैं रघुवीर । देश देशते टीका
 आयो रतन कनक मनि हीर ॥ घर घर मंगल होत बधाई अति पुरबासिन भीर । आनंद
 मगन भये सब डोलत कछू न शोध शरीर ॥ मागध बंदी सूत लुटाए गउ गयंद हय चीर । देत
 अशीश सूर चिरजीयो रामचन्द्र रणवीर ॥ १६ ॥ शर क्रीडा वर्णन । राग विलावल ॥ करतल शोभित
 बान धनुहियां । खेलत फिरत कनक मय आँगन पहिरें लाल पनहियां ॥ दशरथ कौशल्याके
 आगे लसत सुमनकी छहियां । मानो चारि हंस सरवर ते बैठे आइ सदहियां ॥ रघुकुल कुसुद
 चंद चिंतामणि प्रगटे भूतल महियां । यहै देन आए रघुकुलको आनंद निधि सब गहियां ॥ ये
 सुख तीन लोकमें नाहीं जो पाए प्रभु पहियां । सूरदास हरि बोलि भगतको निरबाहत गहि बहियां ॥
 ॥ १७ ॥ राग विलावल ॥ धनुही बान लयेकर डोलत । चारों बीर संग इक सोहत वचन मनोहर बोलत
 लछिमन भरत शत्रुघन सुंदर राजिवलोचन राम । अति सुकुमार परम पुरुषारथ मुक्ति धर्म धन
 काम ॥ कटि पट पीत पिछौरी बांधे काग पच्छ धरि शीश । शर क्रीड़ा दिन देखत आवत नारद
 सुर तैतीस ॥ शिवमन शोच इन्द्रमन आनंद सुख दुख ब्रह्म समान ॥ दिति दुर्बल अति
 अदिति हृष्ट चित देखि सूर संधान ॥ १८ ॥ विश्वामित्र यज्ञ रक्षा ताडका वध सीतास्वयंवर । वन ।
 ॥ राग सारंग ॥ दशरथसों ऋषि आनि कह्यो । असुरनसों यज्ञ होन न पावत राम लछन तब संग
 दयो ॥ मारि ताडका यज्ञ करायो विश्वामित्र आनंद भयो । सीय स्वयंवर जानि सूर प्रभुको
 ऋषिलै ता ठौर गयो ॥ १९ ॥ सीतापति दर्शन ॥ राग विलावल ॥ देखनको मंदिर आनि चढ़ी । रघुपति
 प्रनचंद विलोकत मानो उदधि तरंग बढी ॥ पिय दर्शन प्यासी अति आतुर निशि बासर गुन
 आन रढ़ी । तजि कुलकानि पीय मुख निरखत शीश नाइ आशीश पढ़ी ॥ भई देह जो खेह करम-
 वश ज्यों तट गंगा अनल दढ़ी । सूरदास प्रभु दृष्टि सुधानिधि मानो फेर बनाइ गढ़ी ॥ २० ॥
 सीता मनोरथ पूरण ॥ राग सारंग ॥ चितै रघुनाथ बदनकी ओर । रघुपतिसों अब नेम हमारो बिधि सों
 करति निहोर ॥ यह अति दुसह पिनाक पिताप्रण राघव वयस किशोर । इहते परिघ धनुष चढै
 क्यों यह सखि संशय मोर ॥ सिय अंदेश जानि सूरज प्रभु लियो करजकी कोर । टूटत धनु
 नृप लुके जहां तहां ज्यों तारागण भोर ॥ २१ ॥ दशरथको जनकपुर आगमन रामजूके विवाहहेतु ॥
 महाराज दशरथ तहैं आये । ठाढे जाय जनक मंदिरमें मोतिन चौक पुराये ॥ विप्र लगे
 ध्वनि वेद उचारन युवतिन मंगल गाये । सुर गंधर्वगन कोटिक आए गगन विमानन छाये ॥ राम
 लक्ष्मण भरथ शत्रुघन व्याह निरखि सुखपाये । सूर भयो आनंद नृपतिमन दिवि दुंदुभी बजाए ॥
 ॥ २२ ॥ कंगना खेलन ॥ राग आसावरी ॥ कर कंपै कंगन नहिं छूटै । राम सुपरस मगन मय कौतुक
 निरखि सखी सुख लूटै ॥ गावत नारि गारि सब दैद तात भ्रातकी कौन चलावै । तब कर डोर
 छुटै रघुपति जू जो कौशल्या माइ बुलावै ॥ पूंगीफल युत जल निर्मल धरि आनी भरि कुंडी जु
 कनककी । खेलत जूप युगन युवतिनमें हारे रघुपति जीति जनककी ॥ घेरे निशान अजिर गृह
 मंगल विप्रवेद अभिषेक करायो । सूर अमित आनंद कुशल पुर सोई शुक्रदेव पुराणानि गायो ॥ २३ ॥

धनुर्भंग पाणिग्रहणलीला ॥ राग नट ॥ ललितगति राजत अति रघुवीर । नरपति सभा मध्य
 भये ठाढ़े युगल हैसत मतिधीर ॥ अलख अनंत अमित महिमाबल कटि कसि रख्यो तुनीर ।
 लघु धनु काकपक्ष शिर शोभित इक इक द्वै द्वै तीर ॥ भूषण विविध विशद अंबर युत सुन्दर
 श्याम शरीर । देखत मुदित चरण परसे सुर व्योम बिमानन भीर ॥ प्रमुदित जनक निरखि अंबुज
 मुख बिगत नयन मनपीर । तात कठिन प्रण मानि जानि जिय जनकसुता आधीर ॥ करुणा
 मय जब चाप लियो कर बाँधि सुदृढ़ कटि चीर । भुवभूत शीश नमित जु गर्वगत पावक संच्यो
 नीर ॥ डुलत महीधर भौ फनपति चल कूरम अति अकुलान । दिग्गज चलित खलित मुनि
 आसन इन्द्रादिक भयमान ॥ रवि मग तज्यो तरफिताके इत उत पथ गएकी आन ॥ शिव विरंचि
 व्याकुल भये ध्वनि सुनि जब तोरचो भगवान ॥ मनन शब्द प्रगटित अति अद्भुत अष्ट दिशा नभ
 पूर । श्रवण हीन सुनि भये अष्टकुल नाग बगारि भयचूर ॥ अष्ट श्रवण पूरित ब्रह्मा
 सुनि सदा सुभट बड भूर । मोहित सकल सयान जानि जिय महाप्रलयको पूर ॥
 पाणिग्रहण रघुवर वर कीनो जनकसुता सुख दीन । जय जय धुनि सुनि करत अमर गन नर नारी
 लवलीन ॥ दुष्टन दुष्ट संत संतनको नृप व्रत पूरण कीन ॥ रामचंद्र दशरथहिं बिदा करि सूरदास
 आधीन ॥ २४ ॥ जनक दशरथ रामजी सीता समेत विदा करण । राग सारंग ॥ दशरथ चले अवध आनन्दत ।
 जनकराइ बहु दाइज दै करि बार बार पद बंदत ॥ तनया जामातनिको समुदत नैन नीर भरि
 आए । सूरदास दशरथ आनन्दित चले निशान बजाए ॥ २५ ॥ मार्ग विषे परशुरामको रामजीसों मिलाप
 परस्पर विवाद ॥ परशुराम तेहि अवसर आयो । कठिन पिनाक कह्यो किन तोरचो क्रोध-
 वंत यह वचन सुनायो ॥ बिप्र जानि रघुवीर धीर दोउ हाथ जोरि शिर नायो । बहुत दिननको
 हुतो पुरातन हाथ छुअत उठि आयो ॥ तुम तौ द्विज कुल पूज्य हमारे हम तुम कौन लराई ।
 क्रोधवंत कछु सुन्यो नहीं लयो सायक धनुष चढ़ाई ॥ तबहूं रघुपति क्रोध न कीनो धनुष बान
 सँभारचो । सूरदास प्रभु रूप समुझि पुनि परशुराम पग धारचो ॥ २६ ॥ अवधपुरी प्रवेश । राग सारंग ॥
 अवधपुर आए दशरथ राइ । राम लक्ष्मण भरत शत्रुघन शोभित चारों भाइ ॥ घुरत निसान मृदंग
 शंख ध्वनि भरे झाँझ सहनाइ । उमँगें लोग नगरके निरखत अति सुख सबहानि पाइ ॥ कौशल्या
 आदिक महतारी आरति करति बनाइ । यह सुख निरखि मुदित सुर नर मुनि सूरदास बलि जाइ ।
 ॥ २७ ॥ दशरथ विचार रामजीको राज्य दे आप वन गमन, कैकेयी विनती, भरत राज ॥ महाराज दशरथ
 मन धारी । अवधपुरीको राज राम दै लीजै व्रत वनचारी ॥ यह सुनि बोली नारि कैकेयी
 अपनो वचन सँभारो । चौदह वर्ष रहैं वन राघव छत्र भरत शिर धारो ॥ यह सुनि नृपति भयो
 अतिव्याकुल कहत कछु नहिं आई । सूर रहे समुझाइ बहुत पै कैकेयि हठ नहिं जाई ॥ २८ ॥
 दशरथ कौशल्या विनय । राग कान्हरा ॥ महाराज दशरथ पुनि सोचत । हा रघुपति लछिमन वैदेही
 सुमिरि सुमिरि गुण रोवत ॥ त्रिय चरित्र मयमत्त न समुझत उठि पखाल मुख धोवत । महा
 विपरीत रीति कछु औरै बार बार मुख जोवत ॥ परम कुबुद्धि कह्यो नहिं समुझत राम लषन
 हैकरायो कौशल्या अति परम दीन है नैन नीर भरि आये । विह्वल तन मन चकित भई सुनि
 सो प्रतच्छ सुपिनाये । गदगद कंठ सूर कौशलपुर शोर सुनत दुख पाये ॥ २९ ॥ दशरथ पश्चात्ताप
 कैकेयी प्रति वचन ॥ फिरि फिरि नृपति चलावत बात । कहो सुमति कहा तोहिं पलटी
 प्राण जीवन कैसे बन जात ॥ हाहा राम लक्ष्मण अरु सीता फल भोजन जु डसावैं पात । है वियोग

शिर जटा धरै दुम चर्म भस्म सब गात ॥ बिन रथ रूढ़ दुसह दुख मारग बिन पदत्रान चलै दोउ
 भ्रात । एहि विधि सोच करत अतिही नृप जानकि ओर निरखि बिलखात ॥ इतनी सुनत सिमिटि
 सब आये प्रेम सहित धारे अश्रुपात । तादिन सूर शहर सब चकृत सब रस नेह तज्यो पितु
 मात ॥ ३० ॥ कैकेयी वचन राम प्रति । राग सारंग ॥ सकुचनि कहत नहीं महाराज । चौदह वर्ष तुम्हैं
 बन दीनो मम सुतको निज राज ॥ तब आयसु शिर धरि रघुनायक कौशल्या ढिग आए । शीश
 नाइ बन आज्ञा माँग्यो सूर सुनत दुख पाये ॥ ३१ ॥ राम जू प्रति दशरथ विलाप ॥
 रघुनाथ पियारे आजु रहो हो । चारि याम विश्राम हमारे छिन छिन मीठे वचन कहो हो ॥ वृथा
 होइ वर वचन हमारो री कैकयी जीव कलेश सहो हो । आतुर ह्वै अब छाँडि कुशल पुर प्राणजिवन
 कित चलन कहो हो ॥ बिछुरत प्राण पयान करैगो रहो आजु पुनि पंथ गहो हो । अब सूरज
 दिन दर्शन दुर्लभ कलपि कमल कर कंठ गहो हो ॥ ३२ ॥ राग गूजरी । श्रीराम जू वचन जानकी प्रति ॥
 तुम जानकी जनकपुर जाहु । कहां आनि हम संग भरमिहो बन दुख सिंधु अथाहु ॥ तजि
 वह जनकराज भूषण सुख कत तृण तलप विपिन फल खैहो । ग्रीषम कमल बदन कुम्हिलैहैं
 तजि सर निकट दूर कित न्हैहो ॥ जिन कछु वृथा सोच मन करिहौ मातु पिता सुख दैहो ।
 तुम फिर रहौ संग मैं तेरे जो बन बसि पछितैहौ ॥ होनी होइ कर्मकृत रेखा करिहौ तासु वचन
 निरबाहु । सूर सत्य जो पतिव्रत राखो तौ उठि संग चलौ जिन जाहु ॥ ३३ ॥ जानकी वचन
 श्रीराम जू प्रति राग केदारा ॥ ऐसी जिय जिनि धरो रघुराई । तुमसों तजि प्रभु मोसी दासी
 अनत न कहूं समाई ॥ तुमरो रूप अनूप भानु ज्यों जब नैननि भरि देखौ । ता छिन हृदय कमल
 परिफुलित जन्म सफल करि लेखौ ॥ तुमरे चरन कमल सुखसागर यह व्रत हौं प्रतिपलिहौ ।
 सूर सकल सुख छाँडि आपुनो वन विपदा संग चलि हौं ॥ ३४ ॥ श्रीराम वचन लक्ष्मण प्रति
 विदा करन हेतु राग गूजरी ॥ तुम लछमन निज पुरहि सिधारो । बिछुरन भेंट देहु लघु बंधु
 जियत न जैहै शूल तुम्हारो ॥ यह भावी कछु और काज है सु को जो याको मेटन हारो ॥ तुम मति
 करो अवज्ञा नृप की यह दूषण तो आगे भारो ॥ याको कहा परेखो हरषो मधु छीलर सरितापति
 खारो । सूर सुमित्रा अंक दीजियो कौशल्या परणाम हमारो ॥ ३५ ॥ लक्ष्मण संगलेन ॥ राग सारंग ॥
 लछमन नैन नीर भरि आयो । उत्तर कहत कछु नहिं आयो रह्यो चरण लपटायो ॥ अंतर्दामी
 प्रीति जानिकै लक्ष्मण लीनो साथ । सूरदास रघुनाथ चले बन पिता वचन धरि माथ ॥ ३६ ॥
 अहल्या तरन ॥ राग सारंग ॥ गंगा तट आए श्रीराम । तहां पषाण रूप पग परसे गौतम
 ऋषिकी वाम ॥ गई अकास देव तनु धरिकै अतिसुन्दर अभिराम । सूरदास प्रभु पतित उधारन
 विरद कितक यह काम ॥ ३७ ॥ लक्ष्मण केवट संवाद ॥ राग मारू ॥ रे भैया केवट ले उतराई ।
 रघुपति महाराज इत ठाढे तैं कित नाव दुराई ॥ अबहिं शिलाते भई देव गति जब पगु रेणु छुआई ।
 हौं कुटुंब काहे प्रतिपारौं वैसी यह ह्वै जाई ॥ जाके चरन रेणुकी महिमा सुनियतु अधिक बडाई ।
 सूरदास प्रभु अगनित महिमा वेद पुराननि गाई ॥ ३८ ॥ केवट विनया ॥ राग कान्हरा ॥ नवका
 नाहीं हौं लै आऊं । प्रगट प्रताप चरणको देखौ ताहि कहां लौ गाऊं ॥ कृपासिंधुपै केवट आयो
 कंपत करत जु बात । चरण परसि पापान उडत है मति मेरी उडि जात ॥ जो यह बधू होय काहु
 की दार स्वरूप धरे । छूटे देह जाइ सरिता तजि पगसों परस करे ॥ मेरी सकल जीविका यामें
 रघुपति मुक्ति न कीजै । सूरदास चढो प्रभु पाछे रेणु पखारन दीजै ॥ ३९ ॥ केवट वचन राम

प्रति । राग रामकली ॥ मेरी नवका जिन चढौ त्रिभुवन पति राई । मो देखत पाहन उडे मेरी काठ
 कि नाई ॥ मैं खेवीही पारको तुम उलटि मँगाई । मेरो जिय योहीं डरै मति होहि शिल्हाई ॥ मैं
 निर्बल मेरे बलनहीं जो और गढ़ाऊँ । मेरो कुटुंब माहीं लग्यो ऐसी कहाँ पाऊँ ॥ मैं निर्धन मेरे
 धन नहीं परिवार घनेरो । सेमर ढाक पलाश काटि बांधो तुम बेरो ॥ बार बार श्रीपति कहै केवट
 नहिं मानै । मन परतीति न आवै उडतीही जानै ॥ नियरेहीं जल थाह है चलो तुमैं
 बताऊँ । सूरदासकी बीनती नीके पहुँचाऊँ ॥ ४० ॥ पुरवासी वचन जानकी प्रति ॥
 सखीरी कौन तिहारी जात । राजिव नैन धनुष कर लीने वदन मनोहर गात ॥ लज्जित रही पुर
 बधू पूछे अंग अंग सुसक्यात । अति मृदु वचन पंथ बन विहरत सुनियत अद्भुत बात ॥ सुन्दर
 नैन कुँवर सुन्दर दोउ सूर किंरन कुम्हिलात । देखि मनोहर तीनों मूरति त्रिविध ताप तनु जात ॥
 ॥ ४१ ॥ सीतासैन, पति जतावन । राग धनाश्री ॥ कहि धौं सखी बटोही को हैं । अद्भुत बधू लिये संग
 डोलत देखत त्रिभुवन मोहैं ॥ परम सुशील सुलक्षण जौरी विधिकी रची न होई । काकी अब
 उपमा यह दीजै देह धरे धौं कोई ॥ इहिमें को पति त्रिया तुम्हारो पुरजन पूछे धाई । राजिवनैन
 मैनकी मूरति सैनन माहिं बताई ॥ गए सकल मिलि संग दूरि लों मन न फिरत पुरवास ।
 सूरदास स्वामीके बिछुरत भरि भरि लेत उसाँस ॥ ४२ ॥ दशरथ प्राणतजत श्रीरामहेतु ॥ तात
 वचन रघुनाथ जबै बन गौन कियो । मंत्री गयो फिरावन रथ लै रघुवर फेरि दियो ॥ भुंजा छुडाइ
 तोरि तृण ज्यों हित करि प्रभु निडुर हियो । सुरत साल ज्वाला उर अंतर ज्यों
 पावकहिं पियो ॥ यह सुनि तात तुरत तनु त्यागो बिछुरत तात वियो । इहि विधि बिकल
 सकल पुरवासी नाहीं चाहत जियो ॥ पशु पंछी तृण कण त्याग्यो अरु बालक पय न पियो ।
 सूरदास सियनाथ बोल हित पातिव्रता सुख जु कियो ॥ ४३ ॥ राजाको तेल घट स्थापनं, मंत्रीगमन
 भरत निकट ॥ राग सारंग ॥ राजा तेल द्रोनि में डारे । सात दिवस मारग में बीते देखे भरत पियारे ॥
 जाइ निकट हिय लाइ दोउ शिशु नैन उमँग जलधारे । कुशल क्षेम पूछत कौशल्या राजा कुशल
 तिहारे ॥ कुशल राम लछमन बैदेही ते हैं प्राण हमारे । कुशल क्षेम अबधके पुरजन दासि दास
 प्रतिहारे ॥ कुशल राम लछमन बैदेही तुम हित काज हैंकारे । सूर सुमंत ज्ञानि ज्ञानाद्भुत महिमा
 समय बिचारे ॥ ४४ ॥ कौशल्या विलाप, भरत आवन, मातापर अतिक्रोध ॥ राग गूजर ॥ रामहिं राखौ कोऊ
 जाई । जबलौं भरत अयोध्या आवै कहत कौशल्या माई ॥ पठवो दूत भरतको ह्यावन वचन
 कह्यो शिरनाई । दशरथ वचन राम वन गवने यह कहियो अरथाई ॥ आए भरत दीनह्वै बोले
 कहा कियो कैकयि माई । हम सेवक बा त्रिभुवनपतिके सिंहहि बलि कौवा क्यों खाई ॥ आजु
 अयोध्या जल नहिं अचवों ना मुख देखौ माई । सूरदास राघवके बिछुरे मरों भवन दौलाई ॥
 ॥ ४५ ॥ भरत शत्रुघ्न वचन माता प्रतिराग केदारा ॥ तैं कैकयी कुमंत्र कियो । अपने मुख करि काल
 हैंकारयो हठ करि नृप अपराध लियो ॥ श्रीपति चलत रह्यो कहि कैसे तेरो पाहन कठिन हियो ।
 हम अपराधिनके हित कारन तैं रामहिं वनवास दियो ॥ कौन काज यह राज हमारे इहि पावक
 परि कौन जियो । लोटत सूर धराणि दोउ बंधू मनो तपत विष विषय पियो ॥ ४६ ॥ राग सौरठ ॥
 राम कहाँ गएरी माता । सुनो भवन सिंहासन सुनो नाहीं दशरथ ताता ॥ धिगतेरो जन्म जिवन
 धृग तेरो कही कपट मुख बाता । सेवक राज साहिब बन पठये यह कब लिखी विधाता ॥ मुखार्विंद
 हम देखिं जीवते ज्यों चकोर शशिराता । सूरदास कौशल्यानंद बन कहा अयोध्या तेरो नाता ४७ ॥

॥ राग कान्होरा ॥ गुरु वशिष्ठ भरत समुझायो ॥ राजाको परलोक सँवारो युग युग यह चलि आयो ॥ चंदन अगर सुगंध और सब विधि करि चिता बनायो ॥ चले बिमान संग गुरु पुरजन तापर राज पुढायो ॥ दिन दश लौं जल कुंभ साजि शुचि दीपदान करवायो ॥ भस्म अंत तिल अंजलि दीनों देव बिमान चढायो ॥ जानि एकादश विप्र बुलायो भोजन बहुत करायो ॥ दीनो दान बहुत नाना बिधि इहि बिधि कर्म पुजायो ॥ सब करतूति कैकयीके शिर जिन अभिलाष उपायो ॥ इहि बिधि सूर अयो-ध्यावासी दिन दिन काल गँवायो ॥ ४८ ॥ भरत गवन रामजी निकट वन विषे परस्पर संवाद ॥ राग सारंग ॥ राम पै भरत चले अकुलाई ॥ मनही मन सोचत मारगमें दई फिरै क्यों राघवराई ॥ देखि दरश चरणन लपटानो गदगद कंठ न कछु कहि आई ॥ लीनो हृदय लगाइ सूर प्रभु पृच्छत भद्र भए क्यों भाई ॥ ४९ ॥ राम सीतामिलाप दशरथ परलोक श्रवण राग केदारा ॥ भरत मुख निरखि राम बिल-खाने ॥ मुंडित केश शीश बिहवल दोउ उमँगि कंठ लपटाने ॥ तात मरन सुनि श्रवण कृपानिधि धरणि परे मुरझाई ॥ मोह मगन लोचन जलधारा बिपति हृदय न समाई ॥ लोटति धरणि परी सुनि सीता समुझति नहिं समुझाई ॥ दारुण दुःख दया ज्यौं तृणवन नाहीं बुझति बुझाई ॥ दुर्लभ भयो दरश दशरथको भयो अपराध हमारे ॥ सूरदास स्वामी करुणामय नैन न जात उधारे ॥ ५० ॥ ॥ श्रीराम भरतसंवाद ॥ राग केदारा ॥ तुम बिमुख रघुनाथ कौन बिधि जीवन कहा वनै ॥ चरण सरोज बिना अवलोके को सुख धरणि गनै ॥ हठ करि रह्यो चरण नाहिं छाडे नाथ तजौ निठुराई ॥ परमदुखी कौशल्या जननी चलो सदन रघुराई ॥ चौदह वर्ष तातकी आज्ञा मोपै भेटि न जाई ॥ सूरस्वामी पावरी शीश धरि भरत चले विलखाई ॥ ५१ ॥ राम उपदेश भरत प्रति ॥ राग मारू ॥ बंधू करियो राज सँभारे ॥ राजनीति अरु गुरुकी सेवा गाइ विप्र प्रतिपारे ॥ कौशल्या कैकयी सुमित्रा दरशन सांझ सवारे ॥ गुरु वसिष्ठ अरु मिलि सुमंतसों परजा हेतु विचारे ॥ भरत गात शीतल ह्वै आयो नैन उमँगि जलधारे ॥ सूरदास प्रभु दई पौवरी अवधपुरी पग धारे ॥ ५२ ॥ भरत विदा करण ॥ राग सारंग ॥ राम यों भरत बहुत समुझायो ॥ कौशल्या कैकयी सुमित्राको पुनि पुनि शिर नायो ॥ गुरु वशिष्ठ अरु मिलि सुमंतसों अतिही प्रेम बढ़ायो ॥ बालक प्रतिपालक तुम दोऊ दशरथ लाड लढायो ॥ भरत शत्रुघन करि प्रणाम रघुवर हित कंठ लगायो ॥ गद्गद गिरा सजल अति लोचन हिय सनेह जल छायो ॥ कीजै यहै विचार परस्पर राजनीति समुझायो ॥ सेवा मात प्रजा प्रतिपालन यह युग युग चलिआयो ॥ चित्रकूटते चले तिही वन मन विश्राम न पायो ॥ सूरदास बलि गयो रामके निगम नेति जेहि गायो ॥ ५३ ॥ दंडकवनमें शूर्पणखाको नाकछेदन ॥ राग मारू ॥ दंडकवन आए रघुराई ॥ काम विवश व्याकुल उर अंतर राक्षसि इक तहां आई ॥ हँसि करि राम कह्यो सीतासों इहि लक्ष्मण के निकट पठाई ॥ भुकुटी कुटिल अरुण अति लोचन अग्निशिखा मुख कह्यो फिराई ॥ एं बौरी भई मदन विवश मेरे ध्यान चरण रघुराई ॥ विरह व्यथा तनु गई लाज छुटि बारबार अकुलाई ॥ रघुपति कह्यो निलज्ज निपट तू नारि राक्षसी ह्यति जाई ॥ सूरजु प्रभु पत्नीव्रत एकै कात्थो नाक गई खिसिआई ॥ ५४ ॥ खर दूषण वध मारीच रावणको वनमें आवन ॥ राग सारंग ॥ खर दूषण यह सुनि उठि धाए ॥ तिनके संग अनेक निशाचर रघुपति आश्रम आये ॥ श्री रघुनाथ लछन ते मारे कोउ एक गए पराए ॥ शूर्पणखा ये समाचार सब लंका जाय सुनाये ॥ दशकंधर मारीच निशाचर यह सुनिकै अकुलाये ॥ दंडकवन आये छलके हित सूर ठग्यो रघुराये ॥ ५५ ॥ मारीचवध सीताहरण मार्गमें गृध्रसों युद्ध ॥ राग केदारा ॥ सीता पुहुप बाटिका लाई ॥ नानाविधि

पांति पांति सुन्दर मनु कंचनकीहै लता बनाई ॥ बार बार शोकादिकके तरु प्रेम प्रीति सींचे रघुराई ॥
 अंकुर मूल भए सो पोषै कर्म भोगफल लागे आई ॥ मृग स्वरूप मारीच धरयो तब फेरि चलयो मारग
 जु दिखाई । श्रीरघुनाथ धनुष कर लीनो लागत बाण देवगति पाई ॥ टेरे लषण सुनि बिकल जानकी
 अति आतुर उठि धाई । रेखा खैची बार वधनकी हा रघुवीर कहाँहौ भाई ॥ रावण तुरत विभूति
 लगाए कहत हस्त भिक्षा दै माई । दीन जानि सुधि आनि भजनकी प्रेम प्रीति भिक्षा लै जाई ।
 हरि सीता लै चलयो डरत जिय मानो रंक महानिधि पाई ॥ सूर संग पछतात यहै कहि कर्मदशा
 मेटी नहीं जाई ॥ ५६ ॥ राम स्वरूप वर्णन ॥ मृग पाछे धावन समय ॥ राग सारंग ॥ राम धनुष अरु सायक
 साथे । सियहित मृग पाछे उठि धाए वसन बहुत ढिग बांधे ॥ नव घननील सरोज वरण बपु बिपुल
 बाहु क्षत्री गुन कांधे ॥ इन्दु बदन राजीव नैन वर शीश जटा शिवसम शिर बांधे ॥ पालत सृजत
 संहारत संतत अंड अनेक अवधि पल आधे ॥ सूर भजन महिमा दिखरावत इमि अति सुगम
 चरण अवराधे ॥ ५७ ॥ सीता छाया हरन रावण गिद्धसे युद्ध ॥ राग मारू ॥ इहि विधि बन बसे रघुराई ।
 डासिकै तृण भूमि सोवत द्रुमनिकै फल खाइ ॥ जगत जननी करी बारी मृगा चरि चरि जाइ ॥ कोपिकै
 प्रभु बान लीनो तबहिं धनुष चढाई ॥ जनक तनय धरि अग्निनिमें छाया रूप बनाई ॥ इह कोऊ
 नहीं भेद जानै बिना श्रीरघुराई ॥ कह्यो अनुजसों रहौ यहां तुम छांडि जिनि कहूँ जाइ । कनक मृग
 मारीच मारयो गिरयो लक्षण सुनाइ ॥ खोदि दई सुरेख सीता कह्यो सु कह्यो न जाइ ॥ तबहिं निशिचर
 कियो यह छल लियो सीय चुराई ॥ गिद्ध ताको देखि धायो लख्यो सूर बनाइ ॥ कटे पंख गिरयो असुर
 तब गयो लंका धाई ५८ ॥ अशोकवन में सीताको स्थापना ॥ राग सारंग ॥ वन अशोकमें जनकसुताको रावण राख्यो
 जाइ ॥ भूख रु प्यास नीद नहीं आवै गई बहुत मुरझाइ ॥ राखवारीको बहुत निशिचरी दीनी तुरत पठाई ॥
 सूरदास सीता तेहि निरखत मनही मन सकुचाइ ॥ ५९ ॥ राम विलाप सीता वियोग ॥ राग केदारा ॥
 रघुपति कहि प्रियनाम पुकारत ॥ हाथ धनुष लै मुक्त मृगहिं किये चकृत भये दिशि विदिश निहारत ॥
 निरखत सून भवन जड है रहे खन लोटत घर बपु न सँभारत ॥ हा सीता सीता कहि श्रीपति उमगि
 नयनजल भरि भरि ढारत ॥ लागि शेष उर बिलखि जगत गुरु अद्भुतगति नहीं परत बिचारत ॥
 चेतत चेतत सूर सीता हित मोह मेरु दुख टरत न टारत ॥ ६० ॥ सुनो अनुज इहिवन इतनानि मिलि
 जानकी प्रिया हरी । कछु इक अंगनिकी सहिदानी मेरी दृष्टि परी ॥ कटिकेहरि कोकिल वाणी
 अरु शशि मुख प्रभा धरी ॥ मृगमूसी नैननिकी शोभा जाति न गुप्त करी ॥ चंपक बरन चरन करि
 कमलनि दाडिम दशन लरी । गति मराल अरु बिब अधर छबि अहि अनूप कबरी ॥ अति
 करुणा रघुनाथ गुसाई युगभर जात घरी ॥ सूरदास प्रभु प्रिया प्रेम वश निज महिमा
 विसरी ॥ ६१ ॥ फिरत प्रभु पूछत बन द्रुम बेली । अहो बंधु काहू अवलोकी इहि
 मग बधू अकेली ॥ अहो विहंग अहो पन्नग नृप या कंदरके राई । अबकी बार मम बिपति मिटाओ
 जानकी देहु बताई ॥ चंपक पुहुप बरन तनु सुन्दर मनो चित्र अवरेखी । हो रघुनाथ निशाचर
 के संग चली जाति हौं देखी ॥ यह सुनि धावत धरनि चरनकी प्रतिमा खगी पंथ में पाई । नैन
 नीर रघुनाथ सानिकै शिव ज्यों गात चढाई ॥ कहूँ हियहार कहूँ कर कंकन कहूँ अंचर कहूँ
 चीरा । सूरदास बन बन अवलोकत बिलखि बदन रघुवीरा ॥ ६२ ॥ रामजीको गृध्रसों मिलाप
 सीताको समाचार श्रवण ॥ राग केदारा ॥ तुम लक्ष्मण या कुंज कुटीमें देखो नैन निहारि ।
 कोउ एक जीव नाम मम लैलै उठत पुकारि पुकारि ॥ इतनी कहत कंधते करगहि लीनो

धनुष सँभारि । कृपानिधान नाम हित धाए अपनी बिपति बिसारि ॥ अहो बिहंग कहो अपनो
 दुख पृच्छत तब जु सूरारि । किहि मतिमूढ बध्यो तनु तेरो किधौ बिछोही नारि ॥ श्रीरघुनाथ
 रमनि जगजननी जनक नरेश कुमारि । ताको हरण कियो दशकंधर हौं जो लग्यो गुहारि ॥ इतनी
 सुनि कृपालु कोमल प्रभु दियो धनुष कर झारि । मानो सूर प्रान ले रावन गयो देहको डारि ॥ ६३ ॥
 गिद्ध हरि पद प्राप्ति ॥ राग केदारा ॥ रघुपति निरखि गिद्ध शिर नायो । कहिकै बात सकल सीता
 की तनु तजि चरण कमल चित लायो ॥ श्रीरघुनाथ जानि जन अपनो अपने कर करि ताहि
 जरायो । सूरदास प्रभु दर्श परश करि हरिके लोक सिधायो ॥ ६४ ॥ शबरीको हरिपद प्राप्ति ॥
 शबरी आश्रम रघुवर आए । अर्घ्यासन दै प्रभु बैठाए ॥ खाटे तजि फल मीठे लाई । जूठे
 भये सु सहज सुनाई ॥ अंतर्यामी अति हित जानै । भोजन कीने स्वाद बखानै ॥ जात न काहूकी
 प्रभु जानत । भक्त भाव हरि युग युग मानत ॥ करि दंडवत भई बलिहारी । पुनि तनु तजि हरिलोक
 सिधारी ॥ सूर प्रभु करुणामय भये । निज कर करि तिल अंजलि दये ॥ ६५ ॥ किष्किंधा काण्ड ॥
 सुग्रीव आज्ञा हनुमान रामको मिलाप ॥ राग सारंग ॥ ऋध्यमूक पर्वत विख्याता । इक दिन अनुज सहित
 तहां आये सीतापति रघुनाथा ॥ कपि सुग्रीव बालिके भयते बस्यो हुतो तहँ आई । त्रासमानि
 तब पवनपुत्रको दीनो तुरत पठाई ॥ को यह वीर फिरै वन भीतर किहि कारण इहां आए । सूर
 प्रभुके निकट आइ कपि हाथ जोरि शिरनाए ॥ ६६ ॥ हनुमान राम संवाद । सुग्रीवको रामजीका दर्शन ॥ राग मारू ॥
 मिले हनु पूछी असि प्रभु बात । महा मधुर प्रियवाणी बोलत शाखामृग कौनै ते तात ॥ अंजनिकोसुत
 केसरिके कुल पवन गवन उपजायो गाता तुमको वीर नीरभरि लोचन मीन हीन जल ज्यों सुरझात ॥
 दशरथ कुल कोशलपुर वासी त्रियाहरी ताते अकुलात । ये गिरिपति कपिपति सुनियतहँ बालि
 त्रास कैसे दिन जात ॥ महादीन बलछीन बिकल अति पवनपूत देखत बिलखात । सूर सुनत सुग्रीव
 चले उठि चरण गहे पूछो कुशलात ॥ ६७ ॥ बालिवध सीता भूषण दर्शन सप्तताल भेद ॥ राग मारू ॥
 भाग्य बडे इहि मारग आये । गदगद कंठ शोकसों रोवत वारि बिलोचन छाए ।
 महावीर गंभीर वचन सुनि जाम्बवंत वचन समुझाए । बढी परस्पर प्रीति रीति तब
 भूषण सिया दिखाए ॥ सप्त ताल शर साधि बालि हति मन अभिलाष बढ़ाए । सूरदास प्रभु
 भुजनिके बलि बलि बिमल बिमल यश गाए ॥ ६८ ॥ सुग्रीव राज अंगद समाधान । राग सारंग ॥ राज दियो
 सुग्रीवको तिन हरि यश गायो । पुनि अंगदको बोलि ढिग या बिधि समुझायो ॥ होनिहार सोइ
 होति है नहिं जात मिटायो । सूरदास प्रभु चतुर मास ता ठौर बितायो ॥ ६९ ॥ पवनपुत्र अंगदादि
 मुद्रिका सहित सीता सुधि हित संपाति मिलाप । राग सारंग ॥ श्रीरघुपति सुग्रीव को निज निकट बुलायो ।
 लीजै सुधि अव सीयकी यह कहि समुझायो ॥ जाम्बवंत अंगद हनु उठि माथो नायो । हाथ
 मुद्रिका दई प्रभु संदेश सुनायो ॥ आए तीर समुद्रके कछु शोध न पायो । संपाती तहँ मिल्यो सूर
 यह वचन सुनायो ॥ ७० ॥ संपातीका सीता अवस्था वर्णन कपिन प्रति । राग सारंग ॥ बिछुरी मनो संगति
 हिरनी । चितवति रहति चकित चारों दिशि उपजी बिरह तनु जरनी ॥ तरुवर मूल अकेली ठाढी
 दुखित राम की घरनी । बसन कुचील चिहुर लपटाने देह पीतांबर बरनी ॥ लेत उसास नयन
 जल भरि भरि धुकि जु परी धरि धरिनी । सूर शोच जिय पोच निशाचर राम नाम की शरनी ॥ ७१ ॥
 सुंदर कांड । समुद्र तीर परस्पर मंत्र हनु बिदा, सुरसा मुख प्रवेश राग केदारा ॥ तब अंगद इक वचन कह्यो ।
 को तरि सिंधु सिया सुधिलावै किहिबल इतो लह्यो ॥ इतनो वचन श्रवन सुनि हरण्यो ईसि बोल्यो

जमुवंत । यादल मध्य प्रगट केशरि सुत जाहि नाम हनुमंत ॥ व्रह्म लाइ है सिय सुधि छिनमें
अरु आइ है तुरंत । उन प्रभाव त्रिभुवन को पायो वाके बलहिं न अंत ॥ जो मन करै एक बासर
में छिन आवै छिन जाइ । स्वर्ग पताल महागम ताको कहिये कहा बनाइ ॥ केतिक लंक
उपारि वामकर लै आवै उचकाइ । पवनपुत्र बलवंत वज्र तन काके होय समुदाइ ॥ लियो
बुलाय मुदित चित ह्वैके बच्छ तंबोलहिं लेहु । ल्यावहु जाइ जनकतनया सुधि रघुपतिको सुख
देहु ॥ पौरि पौरि प्रति फिरौ बिलोकत गिरि कंदर बन गेह । समय बिचारि मुद्रिका दीजो सुनौ मंत्र
सुत येह ॥ लयो तंबोल माथ धरि हनुमत कियो चतुर्गुण गात । चढि गिरि शिखर शब्द इक
उचरयो गगन उठयो आघात ॥ कंपत कमठ शेष बसुधा नभ रवि रथ भयो उतपात । मानो
पच्छ सुमेरहि लागे उडयो अकासहि जात ॥ चकृत सकल परस्पर वानर बीच करी किलकार ।
तहां इक अद्भुत देखि निशिचरी सुरसा मुख विस्तार ॥ पवनपुत्र मुख पैठि पधारे तहां लगी कछु
बार । सूरदास स्वामी प्रताप बल उतरयो जलनिधि पार ॥ ७२ ॥ हनुमत लंका दर्शन, सीता मिलाप
हित अशोकवन प्रवेशाराग धनाश्री ॥ लखि लोचन सोचे हनुमान । चहुँ दिशि लंक दुर्ग दानव दल
कैसे पाऊं जान ॥ सौ योजन बिस्तार कनक पुरि चकरी योजन बीस । मनो विश्वकर्माकर अपुने
रचि राखी गिरि शीश ॥ गरजत रहत मत्त गज चहुँ दिशि छत्र ध्वजा चहुँ दीस । भरमत भयो देखि
मारुतसुत दई महाबल ईश ॥ उडि हनुमंत गयो आकासहि पहुँच्यो नगर मँझारि । वन उपवन
गम अगम अगोचर मंदिर फिरयो निहारि ॥ भई पैज अब हीन हमारी जिय में करै
बिचारि । पटक पृच्छ माथो ध्वनि लोटै लखी नराधव नारि ॥ नाना रूप निशाचर
अद्भुत सदा करत मद पान । ठौर ठौर अभ्यास महामल नटपेषने पुरान ॥ जिय जिय
शोच करत मारुतसुत जियत न मेरे जान । कै वह भाजि समुद्रमें बूडी कै उन तज्यो पिरान ॥ कैसे
नाथ बदन दिखराऊं जो बिन देखे जाऊं । वानर बीर हँसैगे मोसों तैं बोरयो पितु नाऊं ॥ ते सब
तर्क बोलि हैं मोको तासों बहुत डराऊं ॥ भली रामको सिया मिलाई जीति कनकपुर गाउँ ॥ जब
मोहिं अंगद कुशल पूछिहै कहा कहौंगौ वाहि । या जीवनते मरन भलोहै मैं देख्यो अवगाहि ॥
मारौं आजु लंक लंकापति लै दिखराऊं ताहि । चौदहसहस्र अंतः पुर ते लेहैं राघव चाहि ॥ बहुरि
बीर जब गयो अवासहि जहां बसै दशकंध । कनक जटि मणि खंभ बनाए पूरण बास सुगंध ॥
श्वेत छत्र फहरात शीशपर मनो लच्छको बंध । दश सिर मुकुट विराजत मणिकृत भानु उदय दससंध ॥
चौदह सहस्र नागकन्या रति परयो सुरत मत अंध ॥ वीणानाद पखावज आवज और राजको भोग ।
पुहुप प्रयंक परी नव योबन मुख परिमल रस जोग ॥ जिय जिय गढै करै विश्वासहि जानै लंका लोग ।
इहि सुख सेज परीहै सीताराघव विपति बियोग ॥ बैठयो जाइ एक तरुवर पर जाकी शीतल
छाहि ॥ बहु निशाचरी मध्य जानकी मलिन बसन तनु माहिं ॥ पुनि आयो सीता जहां बैठी
बन अशोकके माहिं । चारहु ओर निशिचरी घेरे नर जेहि देखि डराहिं ॥ बारंबार बिसूरि
सूर दुख जपति नाम रघुनाह । मलिन अर्धपट देखि बदन पर चन्द्र गह्यो ज्याँ
राह ॥ ७३ ॥ आकाश वाणी हनुमति, सीय निश्चय, । राग मारु ॥ गयो कूदि हनुमंत जब सिंधुपारा ।
शेषके शीश लागै कमठ पीठिसों धस्यो गिरिवर सबै ता संभारा ॥ शोच लाग्यो करन यहै
धौं जानकी कै कोऊ और मोहिं नहिं चिन्हारा ॥ लंकगढ माहिं आकास मारग गयो चंडादिश वज्रलागे
किंवारा ॥ पौरि सब देखि आशोक बनमें गयो निरखि सीता छप्यो वृक्षडारा । सूर आकाश वाणी भई
तब तहां है यहै है यहै करि जुहारा ॥ ७४ ॥ निशिचरी रावण बडाई, सीताकी निंदा ॥ समुझि अब निरखि

जानकी मोहि । बड़ोभाग्य गुण अगम दशानन शिव वर दीनो तोहिं ॥ केतक राम कृपण ताकी
 पितुमातु घटाई कानि।तेरे पिता जनककी सीता कीरति कहैं बखानि ॥ बिधि संयोग टरत नहिं टारयो
 बन दुख देख्यो आनि । अब रावण घर विलसि सहज सुख कह्यो हमारे मानि ॥ इतनो वचन
 सुनत सिरधुनिकै बोली सिया रिसाइ । अहो दीठ मति मुग्ध निशिचरी सम्मुख बैठी आइ ॥ तब
 रावण को बदन देखिहैं दश शिर शोणितहाइ ॥ कै तन देउँ मध्य पावकके कै बिलसैं रघुराइ ॥
 जो पै पतिव्रता व्रत तेरे जीवत बिछुरी काइ ॥ तब किन मुई कहौ तुम मोसों भुजागही जब राइ ॥
 अब झुठो अभिमान करति सिय झुकति हमारे ताइ । सुखहीं रहसि मिलो रावणको अपने सहज
 सुभाइ ॥ जो तू रामहि दोष लगावै करौ प्राणके घात । तुमरो कुलको बेर न लागै होत भस्म संघात ॥
 उनके क्रोध जरै लंकापति तेरे हृदय समाई । तोपै सूर पतिव्रत सांचो जो देखौं रघुराइ ॥ ७५ ॥
 निशिचरी सीता सत प्रगट करन रावण निज उद्धार ज्ञान ॥ राग धनाश्री ॥ सुनो क्यों न कनकपुरीके राइ ।
 हौं बुधि बल छल करि पचि हारी लख्यो न शीश उचाइ । डोलै गगन सहित सुरपति अरु पुहुमि
 पलटि जगजाइ ॥ नशै धर्म मम वचन काय करि शंभु अचंभुकराइ । अचला चलै चलत पुनि थाकै
 चिरंजीव सो मरई । श्रीरघुनाथ प्रताप पतिव्रत सीता सत नहिं टरई ॥ ऐसी त्रिया हरित क्यों आई
 जाके यह सतभाइ । मन वचक्रम और नहिं दूजो तजि रघुनन्दनराइ ॥ इनके क्रोध भस्म है जैहो करहु
 न सीता चाउ । अब तुम काकी शरन उबारिहौं सोबल मोहिं बताउ ॥ जो सीता सतते बिचलै तौ
 श्रीपति काहि सँभारै । मोसे मुग्ध महापापीको कौन क्रोध करि तारै ॥ यह जननी वे प्रभु
 रघुनंदन हम सेवक प्रतिहार । सीताराम सूर संगम बिनु कौन उतारै पार ॥ ७६ ॥
 रावण लोभ दिखावन जानकी निरादर करन । राग मारु ॥ जनकसुता तू समुझि चित्त में निरखि
 मोहि तन हेरी । चौदह सहस किन्नरी जेती सब दासी हैं तेरी ॥ कहै तो जनक गेह दै पठवौं
 अर्ध लंकको राज । तोहिं देखि चतुरानन मोहे तू सुन्दरि शिरताज ॥ छाडि राम तपसीके मोहैं
 उठि आभूषण साजु । चौदह सहस तिया मैं तोको पटा बँधाऊँ आज ॥ कठिन वचन सुनि श्रवन
 जानकी सकी न वचन सहार । तृण अंतर दै दृष्टि तिरौछी दई नैन जलधार ॥ पापी जाउ जीभ
 गलि तेरी अजुगत बात बिचारी । सिंहको भक्ष शृगाल न पावै हौं समरथ की नारी ॥ चौदह
 सहस दुष्ट खर दूषण रघुपति एकहि बान । लक्ष्मण राम धनुष सन्मुख करि काके रहि हैं प्राण ॥
 तेरी अवधि कहत सब कोऊ ताते कहियत बात । बिन बिश्वास मारिहैं तोको आजु रैनिकै प्रात ॥
 मेरो हरन मरन है तेरो सो कुटुंब संतान । जरि है लंक कनकपुर तेरो उदित रघूकुल भान ॥
 यह राक्षसकी जाति हमारी मोह न उपजै गात । परत्रिय रमै धर्म कहां जानै डोलत मानुष
 खात ॥ मनमें डरी कानि जिनि तौरै मुहि अबला जिय जानि । नख शिख वसन संभारि सकुचि
 तनु कुच कपोल गहि पानि ॥ रे दशकंध अंध मति तेरी आयु तुलानी आनि । सूर राम को
 विरद गर्व हत डारैं शंभु भुज भानि ॥ ७७ ॥ त्रिजटाने सीताको समाधान किया । राग मारु ॥ त्रिजटा सीता
 पै चलि आई । मनमें सोच न कर तू माता यह कहिके समुझाई ॥ नल कूबरको शाप रावनहिं तोपर
 बल न वसाई । सूरदास मनु जरी सजीवन श्रीरघुनाथ पठाई ॥ ७८ ॥ त्रिजटा प्रति सीता मनोरथ वर्णन
 राग कान्हरा ॥ सो दिन त्रिजटी कहि कब है है । जादिन चरन कमल रघुपतिके हरपि जानकी
 हृदय लगै है ॥ कबहुँक लक्ष्मण पाइ सुमित्रा माइ माइ कहि मोहिं सुनै हौं कबहुँक कृपावंत कौशलया
 वधू वधू कहि मोहिं बुलै हैं ॥ जादिन राम रावणाहिं मारैं ईशाहिं दै दशशीश चटै हैं । तादिन जन्म

सफल करि जानो मेरे हृदयकी कालिम जैहै ॥ जा दिन कंचनपुर प्रभु ऐहैं विमल ध्वजा रथ पर
 फहरै हैं । तादिन सूर राम पर सीता सरबसु वारि बधाई दैहैं ॥ ७९ ॥ राग सारंग ॥ मैं रामके
 चरणन चित दीनो । मनसा वाचा और कर्मण। बहुरि मिलन को आगमन कीनो ॥ डुलै सुमेरु शेष
 शिर कंपै पश्चिम उदै करै बासर पति । सुनि त्रिजटी तौहु नहिं छोड़ौ मधुर मूर्ति रघुनाथ
 गात रति ॥ सीता करति विचार मनै मन आजु कालिह कोशलपति आवै ।
 सूरदास स्वामी करुणामय सो कृपालु मोहिं क्यों बिसरावै ॥ ८० ॥
 सीता प्रति त्रिजटी स्वप्न वर्णके हनू सिय दरश परस्पर संवाद मुद्रिका अर्पण ॥ राग धनाश्री ॥ सुन सीता सपनेकी
 बात । रामचंद्र लछमनमैं देखे ऐसी बिधि परभात ॥ कुसुमबिमान बैठि बैदेही देखी राघव पास । श्वे-
 तछत्र रघुनाथ शीशपर दिनकर किरण प्रकाश ॥ भयो पलायमान दानवकुल व्याकुलता इक
 त्रास । पंजरत ध्वजा पताक छत्र रथ मनिमैं कनक अवास ॥ रावन शीश पुहुमिपर लोटत
 मंदोदरि बिलखाइ । कुम्भकर्ण तनु खंग लगाई लंक बिभीषण पाइ ॥ प्रगट्यो आइ लंकदल
 कपिको फिरि रघुवीर दुहाई । यह सपनेको भाव सखीरीक्योंहूँ बिफल न जाई ॥ त्रिजटी वचन
 सुनत बैदेही अति दुख लेत उसांस । हाहा रामचन्द्र हा लछिमन हा कौशल्या सास ॥ त्रिभुवन
 नाथ नाह ज्यों पायो सुन्यो रहै बनबास । हा कैकयी सुमित्रा रानी कठिन निशाचर त्रास ॥ कौन
 पाप मैं पापिन कीनो प्रगट्योहै इहिवार ॥ धिग धिग जीवन है अब इहि तनु क्यों न होइ जरि छार ।
 द्वै अपराध मोहिं ये लागे मृगके हित दीने हथियार ॥ जान्यो नहीं निशाचरके छल नाची धनुष
 अकार । पंछी एक सुहृद जानतहो कर्यो निशाचर भंग । ताते बिरमि रह्यो रघुनंदन करि
 मनसा मन पंग ॥ इतनो कहत नैन उर फरके सगुन जनायो अंग । आज लहौं रघुनाथ
 सँदेशो मिटै बिरह दुखसंग ॥ तिहि छिन पवनपूत तहँ प्रगटेउ सिया अकेली जानि ।
 श्री दशरथकुमार दोउ बंधू धरे धनुष दोउ पानि ॥ प्रिया बियोग फिरत मारे मन
 परे सिंधु तट आनि । ता सुन्दरि हित मोहिं पठायो सकौन हौं पहिंचानि ॥ बारंबार निरखि
 तरुवर तन कर मीड़ति पछिताइ । देव जीव पशु पक्षी को तू नाम लेत रघुराइ ॥ बोलै नहीं रह्यो
 दुरि वानरें द्रुममें देह छुपाइ । कै अपराध ओढ अब मेरो कै तू देहि दिखाइ ॥ तरुवर त्यागि
 चपल शाखामृग सन्मुख बैठयो आइ । माता पुत्र जानि दै उत्तर कहु किहि बिधि बिलखाइ ॥
 किर्र नाग देवि सुरकन्या कासों हित उपजाई । कै तू जनककुमारि जानकी राम वियोगिनि
 आई ॥ राम नाम सुनि उत्तर दीनो पिता बंधु तू होहि । मैं सीता रावन हरि ल्यायो त्रास दिखाव-
 त मोहि ॥ अब मैं मरौं सिंधुमें बूडौं चित में आवै कोह । सुनो बच्छ जीवन धिग मेरो लक्ष्मण राम
 विछोह ॥ कुशल जानकीरु रघुनंदन कुशल लक्ष्मण भाई । तुम हित नाथ कठिन व्रत कीनो
 नहिं जल भोजन खाई ॥ मुरै न अंग कोऊ जो काटै निशि बासर सम जाई । तुम घट प्राण देखियत
 सीता बिना प्राण रघुराइ ॥ वानर वीर चहूँ दिशि धाएँ दूँदैं गिरि बनचारी । सुभट अनेक सबल
 दल साजे परे सिंधुके पारी ॥ उद्यम मेरो सफल भयो अब मैं देखो तुम आइ । अब रघुनाथ मिलाऊँ
 तुमको सुन्दरि सोग सिराइ ॥ यह सुनि सिय मन शंका उपजी रावन दूत बिचारि । छल करि आयो
 निश्वर कोऊ नाना रूपनि धारि ॥ श्रवण मूँदि अंचर मुख ढाँप्यो अरे निशाचर चोर । काहेको छल करि
 करि आवत धर्म बिनाशन मोर ॥ पावक परौं सिंधु महँ बूडौं नहिं मुख देखौं तोर । पीपी क्यों न पीठि दै
 मोको पाहन सरिस कठोर ॥ जियमें डरयो मोहिं मति शापै व्याकुल वचन कहंत । जो वर दियो सकल

देवन मोहिं नाउँ धरयो हनुमंत ॥ सुग्रीवको तारका मिलाई बध्यो बालि भयमंत । अंजनि
 कुँवर रामको पाइक ताके बल गर्जत ॥ लेहु मातु मुद्रिका निसानी दई प्रीति करि नाथ ।
 सावधान है शोक निवारो ओडहु दक्षिण हाथ ॥ खिन सुंदरी खिनही हनुमतसों कहति बिसूरि बिसूरि ।
 कहि मुद्रिकैं कहाँ तैं छाडे मेरे जीवनमूरि ॥ कहियो वच्छ सँदेशो इतनो जब हम एकत थाना सोवत
 काग छुयो तनु मेरो बाहिर कीनो बाना ॥ फोरयो नयन काग नहिं छाँड्यो सुरपतिके विदमान । अब
 वह कोप कहा रघुनन्दन दशशिर कंठ बिराना ॥ निकट बुलाइ बैठाइ निरखि मुख अंचर लेत बलाइ ।
 चिरजीयो सुकुमार पवनसुत गहति दीन है पाइ ॥ बहुत भुजनि बल होइ तुमारे ये अनृत फल
 खाहु । अवकी बेर सूर प्रभु मिलिहो बहुरि प्राण किनि जाहु ॥ ८१ ॥ हनुमत सीता समाधान ॥ राग मारू ॥
 जननी हौं अनुचर रघुपति को । मति माता करि क्रोध शरापै नहिं दानव धिग मति को ॥
 आज्ञा होइ देउँ कर सुंदरी कहाँ सँदेशो पतिको । मति हिय बिलख करो सिय रघुवर बाधि हैं कुल
 दैयत को ॥ कहौ तु लंक उखारि डारि देउँ जहां पिता संपति को । कहौ तु मारि सँहारि
 निशाचर रावण करौ अगति को ॥ सागर तीर भीर बनचरकी देखि कटक रघुपतिको । लै
 मिलइहौं अवहिं सूर प्रभु राम रोष डर अतिको ॥ ८२ ॥ राग मारू ॥ अनुचर रघुनाथ तेरे दरश
 काज आयो । पवनपूत कपि स्वरूप भक्तनमें गायो ॥ तपसी जहां तपन करै सोइ बनमें झाँक्यो ।
 जाकी तुम छांह बैठी सोई द्रुम में राख्यो ॥ आयसु जो होइ जननी सकल असुर मारौं । लंकेश्वर
 बाधि राम चरणन तर डारौं ॥ चढ़ि चलो जु पीठि मेरी अबहीं लै मिलाऊं । सूर श्रीरघुनाथ
 जूके लीला गुण गाऊं ॥ ८३ ॥ हनुमत निरखि सीता सँदेह मुद्रिका अपेंते प्रतीति । राग मारू ॥ तुम्हैं
 पहिंचानति नाहीं वीर । इहि नैननि कबहुं नहिं देख्यो रामचन्द्रके तीर ॥ लंका बसत
 दैत्य अरु दानव उनके अगम शरीर । तोहि देखि मेरो जिय डरपत नैननि आवत नीर ॥ जब कर
 काढ़ि अँगूठी दीनी तौ जिय उपजी धीर । सूरदास प्रभु लंका कारण आए सागर तीर ॥ ८४ ॥
 हनुका रामलक्ष्मणके समाचार कहना, अपनो पराक्रम वर्णन ॥ राग सारंग ॥ जननी हौं रघुनाथ पठायो । रामचन्द्र
 आयेकी तुमको देन बधाई आयो ॥ हौं हनुमंत कपट जिनि समझो बात कहत समझाई ॥ सुंदरी दूब
 धरीलै आगे तब प्रतीति जिय आई ॥ अति सुख पाइ उठाइ लई तब बार बार उर भेंटति ॥ ज्यों मलया
 गिरि पाइ आपनी जरनि हृदयकी भेटति ॥ लक्ष्मण पालागन करि पठयो हेतु बहुत करि माता ।
 दई अशीश तरनि सन्मुख है चिरजीयो दोउ भ्राता ॥ बिछुरनको संताप हमारो तुम दरशन
 ते काट्यो । ज्यों रवि तेज पाइ दशहं दिशि दोष कुहरको फाट्यो ॥ ठाढे बिनती करत पवनसुत
 अब जो आज्ञा पाऊं ॥ अपने देख चलेको यह सुख उनहुं जाइ सुनाऊं । कल्प समान एकछन
 राघव कर्म कर्म करि बितवत । ताते हौं अकुलात कृपानिधि है हैं पैंडो चितवत ॥ रावण हतिलै चलों
 साथही लंका धरौं अपठौं ॥ याते जिय अकुलात कृपानिधि करौं प्रतिज्ञा झूठी । यहां जो सब दशा हमारी
 सूर सों कहियो जाई ॥ विनती बहुत कहा कहाँ रघुपति जिहि बिधि देखौं पाई ॥ ८५ ॥ सीता आगमन
 प्रसन्न हनु धीरजदेन ॥ राग मलार ॥ वनचर कौन देशते आयो । कहैं वे राम कहाँ वे लक्ष्मण क्यों
 करि मुद्रा पायो ॥ हौं हनुमंत रामके सेवक तुव सुधि लेन पठायो । रावण मारि तुम्हैं लै जातो
 राम निदेश न पायो ॥ तुम मति डरियो मेरी मैया राम जोरि दल ल्यायो । सूरदास रावण कुल
 खोवन सोवत सिंह जगायो ॥ ८६ ॥ अन्यच राग सारंग ॥ कहौ कपि कैसे उतरयो पार । दुस्तर
 अति गंभीर वारिनिधि शतयोजन विस्तार ॥ इत उत क्रोध दैत्य कपि मारत महा अबुधि अधिकार ।

हाटकपुरी कठिन पथ वानर आये कौन अधार ॥ राम प्रताप सत्य सीताको यहै नाउँ कंधार ।
 विन अधार छनमें अवलंघ्यो आवत भई न बार ॥ पृष्ठभाग चढ़ि जनकनन्दिनी पौरुष देख हमार ।
 सूरदास लै जाउँ तहाँ जहँ रघुपति कंत तुम्हार ॥ ८७ ॥ हनु मिलापते सीता आनंद । राग मारू ॥
 हनुमत भली करी तुम आए । बार बार कहती बैदेही दुख संताप मिटाए ॥ श्रीरघुनाथ और
 लक्ष्मणके समाचार सब पाये । अब परतीति भई मन मेरे संग मुद्रिका लाये ॥ क्यों करि सिंधु पार
 तुम उतरे क्योंकरि लंका आये । सूरदास रघुनाथ जानि जिय तो बल इहाँ पठाए ॥ ८८ ॥
 सीताराम पराक्रम वर्णन उराहना समेत बेगि मिलाप हित । राग कान्हरा ॥ सुन कपि वे रघुनाथ नहीं । जिन
 रघुनाथ पिनाक पितान्यो तोरयो निमिष महीं ॥ जिन रघुनाथ फेरि भृगुपति गति डारी काटि तहीं ॥
 जिहि रघुनाथ हार खरदूषण हरे प्राण शरहीं कै रघुनाथ तज्यो प्रण अपनो योगिन दशा गही ॥ कै रघुना-
 थ दुखित कानन कै नृप भये रघुकुलहीं ॥ कै रघुनाथ अतुल राक्षस बल दशकंधर डरहीं ॥ छाँड़ी नारि
 बिचारि पवनसुत लंक बाग बसहीं ॥ किधौ कुचील कुरूप कुलक्षण तौ कंतहि न चही ॥ सूरदास
 स्वामीसों कहियो अब बिरमियो नहीं ॥ ८९ ॥ सीता निज दुःख वण्यों हनुमति ॥ राग मारू ॥ देखे यह गति
 जात सँदेशो कैसे कै जु कहौ । सुन कपि इन प्राणनको पहरो कबलों देति रहौ ॥ ये अति
 चपल चलयो चाहत हैं करत न कछु बिचार ॥ कहि धौ प्राण कहां लौं राखों रोकिरोकि मुख द्वार ।
 अपनी बात जनावति तुमसों सकुचतिहों हनुमंत ॥ नाहीं सूर सुन्यों दुख कबहुं प्रभु करुणामय कंत ॥ ९० ॥
 सीता विनय निज दुःख निवारण निमित्त श्रीराम प्रति ॥ राग मारू ॥ कहियो कपि रघुनाथ राज
 सों यह इक विनती मेरी । नाहीं सही परति यह मोपै दारुण आश निशाचर केरी ॥ यह जो अंध
 बीसहुँ लोचन छल बल करत आनि मुख हेरी । आइ शृगाल सिंह बलि माँगत यह मरजाद जात
 प्रभु तेरी ॥ जेहि भुज परशुराम बल करण्यो ते भुज क्यों न सँभारत फेरी । सूर सनेह जानि
 करुणामय लेहु छुडाइ जानकी चेरी ॥ ९१ ॥ सीता निज अपराध प्रगटन । राग मारू ॥ मैं परदेशिन
 नारि अकेली । विनु रघुनाथ और नहिं कोऊ मातु पिता न सहेली ॥ रावण भेष धरयो तपसीको
 कत मैं भिक्षा भेली । अति अज्ञान मूढ मति मेरी राम रेख पाइन मैं पेली ॥ बिरह ताप तनु अधिक
 जरावत जैसे दौ डुम बेली । सूरदास प्रभु बेगि मिलाओ प्राण जात है खेली ॥ ९२ ॥ हनुमत वचन
 राग मारू ॥ तू जननी जिय दुख जिन मानहि । रामचन्द्र नहिं दूरि कहं पुनि भूलिहु चितचिंता मति
 आनहि ॥ अबहिं लिवाइ जाउँ सब रिपु हति डरपत हौं आज्ञा अपमानहि । राख्यो सुफल सँवारि
 सान दै कैसे निफल करौ वा बानहि ॥ हैं केतेक यह तिमिर निशाचर उदित एक रघुकुल के
 भानहि । काटन दे दशशीस समर मुख अपनो कृत एऊ जो जानहि ॥ देखिं दरश शुभ नैन निकट
 निज रिपु को नाश सहित संतानहिं । सूर सत मोहिं इनहिं दिननिमें लै जु आइ हौं कृपानिधानहि
 ॥ ९३ ॥ अशोकवन भंग इन्द्रजाति हनुमत प्रति ब्रह्म शर बंधन । राग मारू ॥ हनुमत बल प्रगट भयो सीता
 जब पाई । जनकसुता चरण बंदि फूल्यो न समाई ॥ अगणित तरु फल सुगंध मधुर मिष्ट खाटे ।
 मनसा करि प्रभुहिं अर्पि भोजनको डाटे ॥ हुमन गहि उपाटि लिये दै दै किलकारी । दानवबिन
 प्राण भये देखि चरित भारी ॥ विह्वल मतिहीन गए जोरे सब हाथा । बानर बन विघ्न कियो
 त्रिभुवनके नाथा ॥ हैं निशंक अतिहि ढीठ बिडरै नहिं भाजै । मानो बन कदलि मध्य
 उनमत्त गज गाजै ॥ माने मठ कूप वाय सरवरको पानी । गौरी कंत पूजत जहां नव तन दल
 आनी ॥ कांप्यो सुनि असुर सैन शाखामृग जान्यो । मानो जल जीव सिमिटे जाल में समान्यो ॥

तरुवर तहँ इक उपारि हनुमतकर लीनो । किंकर कर पकरि बाण तीन खंड कीनो ॥ योजन विस्तार शिला पवनसुत उपाटी । किंकर करि लक्ष्मान अंतरिक्ष काटी ॥ आगर इक लोह जरित लीनो बलवंड । दुहू करनि असुर हयो भयो मानस पिंड ॥ दुर्धर परहस्त संग आई सैन भारी । पवनपूत दानव बल बाहर चल कारी ॥ रोम रोम हनुमंत लच्छ लच्छ बान । जहां तहां देखत कपि करत राम आन ॥ मंत्री सुत पांच सैन अक्षय कुंवर सूर । धीर सहित सबै हते झपटिकै लंगूर ॥ चतुरानन बल सँभारि मेघनाद आयो । मानो घन पावस में नगपति है छायो ॥ देख्यो जब दिव्य बान नागफांस आन्यो । छांड्यो तब सूर हनू ब्रह्म तेज मान्यो ॥ ९४ ॥ हनुमान रावण संवाद ब्रह्मेश्वर मुक्ति । राग मारू ॥ सीतापति सेवक तोहिं देखनको आयो । काके बल बैर तैं जु राम ते बढायो ॥ जे जे तुव सूर सुभट कीट सम न लेखों । तेरे दशकंध अंध प्राणनि बिनु देखों ॥ नख शिख ज्यों मीन जाल जड्यो अंग अंगा । अजहुं नाहिं शंक धरत बनचर मति भंगा ॥ जोई सोई मुखहि कहत मरण निज न जानै । जैसे नर सन्निपात हिये बुधि बखानै ॥ तब तू गयो सून भवन भस्म अंग पोते । करितो बिनु प्राण तोहिं लक्ष्मण जो होते ॥ पाछे तैं सीय हरी बिधि मर्याद राखी । जो पै दशकंध बली रेखा क्यों न नाखी ॥ अजहुं सिय सौंपि नतरु बीस भुजा भानै । रघुपति यह पैज करी भूतल धरि पानै ॥ ब्रह्म बाण कानि करी बल करि नहिं बांध्यो ॥ कैसे यह ताप मिटै रघुपति आराध्यो ॥ देखत कपि बाहुडंड तनु प्रस्वेद छूटै । जैजै रघुनाथ नाथ कहत बंध टूटै ॥ देखत बल दूर करयो मेघनाद गारो । आपुन भयो सकुचि सूर बंधन ते न्यारो ॥ ९५ ॥ हनुमान लंका जारन ॥ राग मारू ॥ मंत्रिनि नीको मंत्र विचारयो । राजन् कहो दूत काहुको कौन नृपतिहै मारयो ॥ इतनी कहत विभीषण बोल्यो बंधू पांड परौ । यह अनरीति सुनी नहिं श्रवणनि अब पै कहा करौ ॥ तेल तूल पावक वपु धरिकै देखत तुसै जरौ । अब मेरे जिय यहै बसीहै रघुपति काज करौ ॥ हरी विधाता बुद्धि सबनिकी अति आतुरहै धाये । सन अरु सूत चीर पाटंबर लै लंगूर बँधाये । बंधनि तोरि मोरि मुख असुरनि ज्वाला प्रगट करी । रघुपति चरण प्रताप सूरप्रभु लंका सकल जरौ ॥ ९६ ॥ आकाशवाणी, सीता कुशल ॥ राग धनाश्री ॥ सोचि जिय पवनपूत पछिताई । अगम अपार सिंधु दुस्तर तरि कहा कियो मैं आई ॥ सेवकको सेवापन इतनो आज्ञाकारी होई । या भय भीति देखि लंकामें सीय जरौ मति होई ॥ बिनु आज्ञा मैं भवन प्रजारे अपयश करिहै लोइ । वे रघुनाथ चतुर कहियत हैं अंतर्यामी सोइ ॥ इतनी कहत गगनवाणी भई हनू सोच कंत करिहै । चिरंजीव सीता तरुवर तर अटल न कबहुं टरिहै ॥ फिर अवलोकि सूर मुख लीजै भुवमें रौम न परिहै । जाके हिय अंतर रघुनंदन सो क्यों पावक जरिहै ॥ ९७ ॥ लंका दग्धि पुनः सिय दर्शन राग मारू ॥ लंका हनुमान सब जारी । रामकाज सीताकी सुधि लगि अंगद प्रीति विचारी ॥ जा रावणकी शक्ति तिहुंपुर कहूं न आज्ञा टारी । ता रावणके अछत अक्षय सुत पालक सृष्टि पछारी ॥ पूछ बुझाइ गये सागर तट है जहँ सीतावारी । करि दंडवत प्रेम पुलकित है सुनि राघवकी प्यारी ॥ तुमही तेज प्रताप रहीहै तुमरी यहै अटारी । सूरदास स्वामीके आगे जाइ कहौं मुख भारी ॥ ९८ ॥ रामचन्द्र प्रति सीता संदेश हनुमंत विदा ॥ राग सारंग ॥ मेरी केती बिनती करनी । पहिले करि परणाम पाँइ परि मणिरघुनाथ हाथलै धरनी ॥ मंदाकिनि तट फटिकशिला पर मुख मुख जोरि तिलककी करनी ॥ कहा कहाँ कपि कहत न आवै सुमिरत प्रीति होइ उर अरनी ॥ तुम हनुमंत पवित्र पवनसुत कहियो जाइ जोइ मैं वरनी । सूरदास प्रभु आनि मिलावहु सूरति

दुसह दुःख भय हरनी ॥९९॥ अंगदादि निकट हनुमानका पुनः आगमन सीता सुधि देन ॥ राग मारू ॥ हनुमान
 अंगदके आगे लंक कथा सब भाषी । अंगद कह्यो भली तुम कीनी हम सबकी पतिराखी ॥ हर्षवन्त है
 चले तहां ते मगमें बिलम न लाई । पहुँचे आइ निकट रघुवरके सुग्रीव आयो धाई ॥ सबन प्रणाम
 कियो रघुपति को अंगद वचन सुनायो । सूरदास प्रभु पदप्रताप करि हनु सिया सुधि ल्यायो ॥
 ॥ १०० ॥ सुग्रीवादि कृत हनुमान प्रशंसा ॥ राग मारू ॥ हनु तैं सबको काज सँवारयो । बार बार अंग
 यों भापै मेरो प्राण उबारयो ॥ तुरतहि गमन कियो सागर ते बीचहि बाग उजारयो । कियो मधुवनको
 चौर चहुँ दिशि माली जाइ पुकारयो ॥ धनि हनुमंत सुग्रीव कहतहै रावणको दल मारयो । सूर
 सुनत रघुनाथ भयो सुख काज आपनो सारयो ॥ १०१ ॥ श्रीरामचन्द्र हनुमान गोष्ठी । राग मारू ॥
 कहौ कपि जनकसुता कुशलात । आवागमन सुनावहु अपनो देहु हमैं सुख गात ॥ सुनो पिता
 जल अंतर है कै रोख्यो मग इक नारि । धर अंबर घन रूप निशाचरि गरजी बदन पसारि ॥ तब मैं
 डरपि कियो छोटी तनु पैख्यो उदर मंझारि । खरभर परी देव आनंदे जीत्यो पहिली रारि ॥ गिरि
 मैनाक उदधि में अद्भुत आगे रोख्यो जात । पवनपिताको मित्र न जानत धोखे मारी लात ॥ तबहीं
 और रह्यो सरितापति आगे योजन सात । तुव प्रतापपेलि दिशि पहुँच्यो कौन बढावै बात । लंका
 पौरि पौरि मैं ढूँढी अरु बन उपवन जाइ । तरुवर तर अवलोकि जानकी तब हौं रह्यो लुकाइ ॥
 रावण कह्यो सु कह्यो न जाई रह्यो क्रोध अति छाई । तबहीं अवध जानिकै राख्यो मंदोदरि
 समझाई ॥ तब हौं गयो सुफल बारी में देखी दृष्टि पसारि । असी सहस किंकर दल जिहिके
 दौरे मोहिं निहारि । तुम परताप देव छिन भीतर जुरत भई नहिं बार । तिनको मारि तुरंतहि कीनो
 मेघनादसों रार ॥ ब्रह्म फांस जब लई हाथ करि मैं चेत्यो कर जोरि । तज्यो कोप मर्यादा राखी
 बँध्यो आपही मोर ॥ रावणपै लग्यो सकल मिलि ज्यों लुब्धक पशु जाल । करुवो वचन श्रवण
 सुनि मेरो तब रिस गही भुवाल ॥ आपुनही सुदूर लै धायो करि लोचन बिकराल । चहुँदिशि
 सूर शोर करि धावै ज्यों केहरिहि सियाल ॥ १०२ ॥ राम वचन । राग मारू ॥ कैसे पुरी जरी कपिराय ।
 बडे दैत्य कैसे करि मारे ईश्वर तुमै बचाइ ॥ प्रगट कपाट बडे दीने हैं बहु जोधा रखवारे । तैंतिस
 कोटि देव वश कीने ते तुमसे क्यों हारे ॥ तीनिलोक डर जाके कंपै तुम हनुमान न पेखे । तुमरे
 क्रोध शाप सीताके दूरि जरत हम देखे ॥ हो जगदीश कहा कहौं तुमसों तुम बर तेज मुरारी ।
 सूरजुदास सुनो सब संतो अवगतिकी गति न्यारी १०३ ॥ सेना समेत सिन्धु तट राग पयान । राग मारू ॥ सीय
 सुधि सुनत रघुवीर धाये । चल्यो तब लक्ष्मण सुग्रीव अंगद हनु जाम्बवंत नील नल सबै आये ॥ भूमि
 अति डगमगी योगनी सुनि जगी सहसफन शेष सो शीश कांप्यो । कटक अगणित जुरचो लंक
 खरभर परचो सूरको तेज धर धूर टाप्यो ॥ जलधि तट आइरघुराइ ठाढे भए ऋच्छ कपि गरजि
 है ध्वनि सुनायो । सूर रघुराइ चितये हनुमान दिशि आइ तिन तुरतही शीश नायो ॥ १०४ ॥
 हनुमान निज शरीर बल कथन ॥ राग केदारा ॥ राघव जू कितक बात तजि चिंताकेतक रावण कुंभकर्ण दल
 सुनिहो देव अनन्त ॥ कहौ तु लंक लकुट ज्यों फेरो फेरि कहूं लै डारों कहौ ॥ तु पर्वत चापि चरणतर नीर
 खारमें गारो ॥ कहौ तो असुर लंगूर लपेटौं कहौ तु नखन बिदारौ ॥ कहौ तु शैल उपायि पेडते दै सुमेरु सो
 मारौ ॥ जेतक शैल सुमेरु धरणिमें भुजभरि आनिमिलाऊं । सप्त समुद्र देई छातीतर इतनक देह बढाऊं
 चली जाहु सेना सब मोपर धरो चरण रघुवीर ॥ मोहिं अशीश जगत् जननीकी तुव तनु वज्र शरीर
 जितक बोल बोले तुम आगे रामप्रताप तुमारे । सूरदास प्रभुकी सब साँची जनकी पैज पुकारे ॥

॥१०५॥ हनुमानका निज पराक्रम युद्ध निमित्त कथन ॥ राग मारू ॥ रावणसे गहि कोटिक मारों । जो तुम आज्ञा देहु कृपानिधि तो यह परहित सारों ॥ कहो तु जननि जानकी ल्याऊं कहो तो लंक उदारों । कहो तु अबहीं पैठि सुभट हति अनल सकल परजारों ॥ कहो तु सचिव सबंधु सकल अरि एकहि एक पछारों । कहो तु तुम प्रताप श्रीरघुवर उदधि पपाननि तारों ॥ कहो तु दशो शीश बीसों भुज काटि छिनकमें डारों । कहो तु ताको तृण गहाइकै जीवत पाँइन डारों ॥ कहो तु सेना चारि रचों कपि धरनी व्योम पतारों । शैल शिला द्रुम चरषि व्योम चढि शत्रु समूह सँहारों ॥ बार बार पद परसि कहतहैं हौं कबहुं नहिं हारों । सूरदास प्रभ तुमरे वचन लागि शिव वचननको डारों ॥ १०६ ॥ अन्यच्च ॥ राग मारू ॥ हौं हरिजूको आयसु पाऊं । अबहीं जाइ उपारि लंकगढ़ उदधि पार लैं आऊं ॥ अबहीं जंबूद्वीपइहांते लैं लंका पहुँचाऊं । सोखि समुद्र उतारों कपिदल छिनक विलंब न लाऊं ॥ अब आवैं रघुवीर जीति दल तौ हनुमंत कहाऊं । सूरदास शुभ पुरी अयोध्या राघव सुयश बसाऊं ॥ १०७ ॥ सिंधु सेतु निमित्त हनुमान विनय ॥ राग सारंग ॥ रघुपति बेगि जतन अब कीजै।वाधैं सिंधु सकल सैना मिलि आपुन आयसु दीजै॥तबलगि तुरत एकतौ बांधौं द्रुम पाषाणनि छाई । द्वितिय सिंधु सिय नैन नीरहै जबलौं मिलै न आई ॥ यह विनती हौं करौं कृपानिधि बार बार अकुलाई । सूर ज दास अकाल प्रलय प्रभु मेढो दरश दिखाई ॥१०८॥ सीता देन निमित्त विभीषण वचन रावण प्रति । राग मारू ॥ लंकपतीको अनुज शीश नायो । परम गंभीर रणधीर दशरथ तनय कोपि करि सिंधुके तीर आयो ॥ सियको लैं मिलो यह मतो है भलो कृपा करि मम वचन मानि लीजै । ईशको ईश करतार करुणामयी तासु पदकमल पर शीश दीजै ॥ कह्यो लंकेश दै शीशपग तासुके जाहि मत मूढ कायर डरानो । जानि अशरण शरण सूरके प्रभुको तुरंतहि जाइ द्वारे बुझानो ॥ १०९ ॥ रामचन्द्रसों विभीषण मिलाप । राग सारंग ॥ आइ विभीषण शीशनवायो । देखत ही रघुवीर धीर कहै लंकपती तिहि नाम बुलायो ॥ कह्यो सु बहुरि कह्यो नहिं रघुवर यहै बिरद चलि आयो । भक्तबछल करुणामय प्रभुको सूरदास यश गायो ॥ ११० ॥ सभामध्य श्रीरामचन्द्र वचन । राग मारू ॥ तब हौं नगर अयोध्या जैहौं । एक बात सुन निश्चय मेरी रावण राज्य विभीषण दैहौं ॥ कपिदल जोरि और सब सेना सागर सेतु बंधैहौं । काटि दशों शिर बीस भुजा तब दशरथ सुत जु कहैहौं ॥ छन इक माहिं लंक गढ तोरौं कंचन कोट ढहैहौं । सूरदास प्रभु कहत विभीषण रिपुहति सीतालैहौं ॥१११॥ सिय दे मिलन निमित्त मंदोदरी शिक्षा रावण प्रति ॥ राग मारू ॥ वे देखि आये राम राजा । जलके निकट आइ भये ठाढे दीसत विमल ध्वजा ॥ सोवत कहा चेतहो रावण मैं जु कहति कत खात दगा । कहति मंदोदरी सुनु पिय रावण मेरी बात अगा ॥ तृण दशनन लैं मिल दशकंधर कंठहिं मेलि पगा । सूरदास प्रभु रघुपति आये दहपट होइ लंका ॥ ११२ ॥ अन्यच्च । शरण परि मन वच कर्म विचारि । ऐसो कौन और त्रिभुवन में जो अब लेइ उबारि ॥ सुनि शिष कंत दंत तृण धरि कै स्यो परिवार सिधारो । परम पुनीत जानकी सँग लैं कुल कलंक किन टारो ॥ ये दशशीश चरण तर राखो मेढो सब अपराध । महाप्रभु कृपाकरन रघुनंदन रिस न गहैं पल आध ॥ तोरि धनुष मुख मोरि नृपनि को सीय स्वयंवर कीनो । छिन इकमें भृगुपति प्रताप बल करषि हृदय धरि लीनो ॥ लीला करत कनकमृग मारयो बध्यो बालि अभिमानी । सोइ दशरथ कुलचन्द अमित बल आए शारंगपानी ॥ जाके दल सुग्रीव सुमंत्री प्रबल यूथपति भारी । महासुभट रणजीत पवनसुत बडो वज्र वपुधारी ॥ करिहै लंक पंक छिन भीतर वज्र

शिला लै धावै । कुल कुटुंब परिवार सहित तुहिं बांधत बिलम न लावै ॥ अजहूं जिन बल
कर शंकरको मान वचन हित मेरो । जाइ मिलो कौशल नरेशको भ्रात विभीषण तेरो । कटक शोर
अति दूरि दशों दिश देखत बनचर भीर । सूर समुझि रघुवंश तिलक दोउ उतरे सागर तीर ११३ ॥
अन्यच्च ॥ काहे परतिरिया हरि आनी । यह सीता जू जनककी कन्या रमा अपुन रघु-
नंदन रानी ॥ रावण सुग्ध कर्मको हीनो जनकसुता तैं त्रिय करि मानी । जाके क्रोध भूमि जल
पटके कहा कहैगो सिंधुज पानी ॥ मूरख सुखहिं नीद नहिं आवै लेहैं लंक वीस भुज मानी । मूर
न मिटत भागकी रेखा अल्प मृत्यु तेरी आइ तुलानी ॥ ११४ ॥ अन्यच्च राग मारू ॥ तोहिं कौन
मति रावण आई । आजु काल्हि दिन चारि पांचमें लंका होति पराई ॥ लंका कोट देखि जिन
गर्वहि अरु समुद्र सी खाई । जाकी नारि सदा नव यौवन सो क्यों हरै पराई ॥ काके हित सीताप-
ति आये राम लक्षण दोउ भाई । मूरदास प्रभु लंका तोरैं फेरैं राम दुहाई ॥ ११५ ॥ मंदोदरी रावण
संवादाराग मारू ॥ आयो रघुनाथ बली सीख सुनो मेरी । सीता लै जाइ मिलो पति जु रहै
तेरी ॥ तैं जु बुरे कर्म किये सीता हरि ल्यायो । घर बैठे वैर कियो कोपि राम आयो ॥ चेतत
क्यों नाहिं मूढ एक बात मेरी । अजहूं सिंधु नाहिं बंध्यो लंका है तेरी ॥ सागरको पाजि बांधि
पार उतरि आवैं । सैना कछु अंत नहिं इतनो दल ल्यावैं ॥ देखि त्रिया करिकै बल कैसी दिखराऊं रीछ
कीश वश्य करौं रामहिं गहि ल्याऊं ॥ जानति हौं बलहिं बालिसों न छूटि पाई । तुम्हें कहा दोष दीजै
काल अवधि आई ॥ बलि जब बहु यज्ञ करे इन्द्र सुनि सुखायो । छल करि लई छीनि मही वामन
है धायो ॥ हिरणकशिपु अति प्रचंड ब्रह्मा वर पायो । नरसिंह रूप धरे छिन न विलम लायो ॥
पाहनसों बांधि सिंधु लंका गढ तोरैं । मूरदास मिलि विभीषण राम देहि फोरैं ॥ ११६ ॥
सेतुबंध आरंभ सिंधुमिलन ॥ राग धनाश्री ॥ रघुपति चन्द्र बिचार करचो । नातो मानि सगर सागरसों
कुश साथरे परचो ॥ तीनि यारम अरु बासर बीते सिंधु गुमान भरचो । कीन्यो कोप कुँवर कमला-
पति तब कर धनुष धरचो ॥ ब्रह्म भेष आयो अति व्याकुल देख्यो बान डरचो । द्रुम पषान प्रभु
बेगि मैगायो रचना सेतु करचो ॥ नल अरु नील सुत विश्वकर्माके छुवत पषान तरचो । मूरदास
स्वामी प्रतापते सब संताप हरचो ॥ ११७ ॥ सेतु बंधन ॥ राग मारू ॥ आपुन तरि तरि औरन तारत ।
असम अचेत पाषाण प्रगट पानी में बनचर डारत ॥ इहि बिधि उपलै सुतरु पात ज्यों यदपि
सेन अति भारत । बुडि न सकेतु सेतु रचना राचि राम प्रताप बिचारत ॥ जिहि जल तृण पशु वार
बुडि आपुन सँग औरन बोरत । तिहि जल गाजत महावीर सब तरत अंग नहिं मोरत ॥ रघुपति चरण
प्रताप प्रगट सूर व्योम बिमाननि गावत । मूरदास प्रभु सकल कलाबिधि सयर पैज बढावत ११८ ॥
(लंकाकाण्ड) रावण दूत ग्रहण, पहिरावनि दे विदाकरन । राग सारंग ॥ शुक सारन द्वै दूत पठाये । वानर वेष फिरत
सेनामें सुनत विभीषण तुरत बँधाये ॥ बीचहि मार परी अतिभारी राम लछन जब दरशन पाये ।
दीन दयालु बिहाल देखिकै छोरी भुजा कहाँते आये । हम लंकेश दूत प्रतिहारी समुद्र तीरको जात
अन्हाये । मूर कृपालु भये करुणामय आपुन हाथ दूत पहिराये ॥ ११९ ॥ राम सागर संवाद, रावण
दूत पुनः लंका गमन, युद्ध निमित्त कुंभकर्ण मंत्र । राग धनाश्री ॥ रघुपति जबै सिंधु तट आये । कुश साथरी
बैठि इक आसन बासर तीनि गँवाये ॥ सागर गर्व धरचो उर भीतर रघुपति नर करि
जान्यो । तब रघुवीर तीर अपने कर अग्नि बरण गहि तान्यो । तब जलधर खरभरो
त्रास गहि जंतु उठे अकुलाई । कह्यो न नाथ बाण मोहिं जारो शरण परचो हौं आई ॥

आज्ञा होइ एक छिन भीतर जल दश दिशि करि डारौं । अंतर मारग होइ सबनिको
इहि विधि पार उतारौं ॥ और मंत्र जो करै देवमणि बांधौ सेतु बिचार । दीन जानि धरि चाप बिहै-
सिकै दियो कंठते हार ॥ यहै मंत्र सबहिन मन आयो सेतु बंध प्रभु कीजै । सब दल उतरि होइ
पारंगत ज्यों न कोऊ इक छीजै ॥ यह सुनि दूत गयो लंकामहँ सुनत नगर अकुलानो । रामचन्द्र
प्रताप दशौं दिशि जल पर तरत पषानो ॥ दशशिर बोलि निकट बैठायो कहि धावन सतभाउ ।
उद्यम कहा होत लंकाको कौन कियो उपाउ ॥ जाम्बवंत अंगद बंधू मिलि कैसे इहि पुर ऐहैं । मो
देखत जानकी नैन भरि कैसे देखन पैहैं ॥ हौं सतभाउ कहत लंकापति जो जिय उत्तम मानो ।
सकल कहों व्याहार कटकको कपि उमहे सो मानो ॥ बार बार यों कहत सकत नहिं तो हति लै
हैं प्राण । मेरे जान कनकपुर फिरिहैं रामचन्द्रकी आन ॥ कुंभकर्ण हँसि कह्यो सभामें सुनौ
आदि उत्पात । एक दिवस हम ब्रह्मसभामें चलत सुनी यह बात ॥ कामअंध है सब कुटुंब धन
खोवै एकहि बार । सो अब सत्य होत एहि अवसर कौन जु मेटनहार ॥ और मंत्र कछु उर जिनि
आनो आजु सुकपि रण मांडहि । गहै बांह रघुपतिके सन्मुख हैकरि यह तनु छांडहि ॥ यह यश
जीति परमपद पावहु उर संशय सब खोई । सूर सकुचि जो शरन सँभारौ क्षत्री धर्म न होई ॥ १२० ॥
रघुपति सेतु उलघन ॥ राग धनाश्री ॥ सिंधु तट उतरत राम उदार । रोष विषम कीनो रघुनंदन सब
विपरीत बिचार ॥ सागर पर गिरि गिरि पर अंबर कपि घनके आकार । गरज किलक आघात
उठत मनु दामिनि पावक झार ॥ परत फिराई पयोनिधि भीतर सरिता उलटि बहाई । मनु रघु-
पति भयभीत सिंधु पत्नी प्योसार पठाई । बाला विरह दुसह सबहुनको जान्यो राजकुमार ।
बाण वृष्टि शोणित करि सरिता व्याहत लगी न बार ॥ श्रवणनि कनक कलश आभूषण मनि
मुक्ता गन हार । सेतुबंध करि तिलक कृपानिधि रघुपति उतरे पार ॥ १२१ ॥ मंदोदरी वचन ॥
राग धनाश्री ॥ देखि रे वह शारंगधर आयो । सायर तीर भीर वानरकी शिरपर छत्र बनायो ॥
शंख कुलाहल सुनियत लागे लीला सिंधु बँधायो । सोयो कहा लंक गढ़ भीतर अधिको
कोप दिखायो ॥ पद्मकोटि जाकी सेना सुनियत जंतु जु एक पठायो । सूरदास रघुनाथ बिमुख भये
तिहि केतक सुख पायो ॥ १२२ ॥ ॥ अन्यच्च ॥ राग मारू ॥ मेरे जान अजहूँ जानकी दीजै । लंकापति
पिय कहत पियासों यामें कछु न छीजै ॥ पाहन तारे सागर बाँध्यो तापर चरण न भीजै । वनचर
एक लंक तिहि जारी ताकी सरि क्यों लीजै ॥ चरण टेकि दोउ हाथ जोरिकै बिनती काहे न
कीजै । वे त्रिभुवनपति करै कृपा अति कुटुंब सहित सुख जीजै ॥ आवत देखि बाण रघुपतिके
तेरो मन न पतीजै । सूरदास प्रभु लंक जारिकै राज्य विभीषण दीजै ॥ १२३ ॥ मंदोदरी प्रति रावण गर्व
वचन ॥ कहा तू कहति त्रिया बार बारी । कोटि तेंतिस सूर सेव अहनिशि करत राम
अरु लक्ष्मण हैं कहा री ॥ मृत्युको बांधि मैं राखियो कूपमें देन आवत कहा डरत नारी ॥ कहत
मंदोदरी मेटि को सकै तेहि जो रची सूर प्रभु होनहारी ॥ १२४ ॥ रावणके पास अंगद दूतत्व ॥
लंकपति पास अंगद पठायो । सुन अरे अंध दशकंध लै सिया मिलि सेतु करि बंध रघुबीर आयो ॥
वह सुनत परिजरयो वचन नहिं मन धरयो कहा तैं राम ते मुहि डरायो । सूर असुर जीति मैं
सब कियो आपु वश सूर मम सुयश तिहुँलोक गायो ॥ १२५ ॥ रावण तबलों हैरण गाजत । जबलों
कर शारंगपानीके नाहीं बाण विराजत ॥ यम कुबेर इन्द्र हैं जानत रचि पचिके रथ साजत ॥
रघुपति रवि प्रकाश सो देखौ उड़गन ज्यों तोहि भाजत ॥ ज्यों सह गवन सुन्दरीके सँग बहु बाजन

हैं बाजत । तैसे सूर असुर आदिक सब सँग तेरे हैं लाजत ॥ १२६ ॥ रावण प्रति श्रीराम संदेश ॥
 जानिहौं बल तेरो रावण । पठवौं कुटुम सहित यम आगे नेक देहि धौं मोको आवन ॥ दारुण कीश
 सुभट वर सन्मुख लैहौं संग त्रिदश बल पावन ॥ अग्नि पुंज सित बाण धनुष धरि तोहिं असुर
 कुल सहित जरावन ॥ करिहौं नाम अचल पशुपतिको पूजा बिधि कौतुक देखरावन । असुर मुख
 छेदि सुपन्न नवफल ज्यों अरु शंकर दशशीश चढ़ावन ॥ देहौ राज्य विभीषण जनको लंकापुर
 रघु आन चलावन । सूरदास निस्तरिहैं इहि यश कृपन दीन जन नव यश गावन ॥ १२७ ॥
 रावण प्रति अंगद उत्तर ॥ मोको राम रजायसु नाहीं । नातर सुन दशकंध निशाचर प्रलय करौ छिन
 माहीं ॥ पलटि धरौं नवखंड पुहुमि पर जो बल भुजा सँभारौं । राखों मेलि भंडार सूर शशि नभ
 कागद ज्यों फारौं ॥ जारौं लंक छेदि दशमस्तक सुर संकोच निवारौं ॥ श्रीरघुनाथ प्रताप चरणते उर-
 ते भुजा उपारौं ॥ रे रे चपल स्वरूप ठीठ तू बोलत वचन अनेरो । चितवै कहा पान पल्लव पुट
 प्राण प्रहारौं तेरो ॥ गये सशंक युगल बंधू बन जान्यो असुर अहेरो ॥ तीनि लोक विख्यात विशद यश
 प्रलय नामहै मेरो ॥ रे रे अंध बीसहू लोचन परत्रियहरन बिकारी । सुने भवन गवन तैं कीनो
 शेष रेख नहिं टारी ॥ अजहूँ कह्यो सुनै जो मेरो आये निकट मुरारी । जनकसुता लै चलि पाँइनि
 पर श्रीरघुनाथ पियारी ॥ संकट परे जु शरण पुकारौं तौ क्षत्री न कहाऊँ । जन्महिते तापस
 आराध्यो कैसे हित उपजाऊँ ॥ अब तो सूर यहै बनिआई हरिको निज पद पाऊँ ॥ ये दशशीश ईश
 निर्मायल कैसे चरण छुआऊँ ॥ १२८ ॥ अंगद वचनाराग मारू ॥ सूरख रघुपति शत्रु कहावत । जाके
 नाम ध्यान सुमिरणते कोटि यज्ञ फल पावत ॥ नारदादि सनकादि महामुनि सुमिरत मन शुचि
 ध्यावत । अंबरीष प्रह्लाद भक्त बलि निगम नेति जिहि गावत ॥ जाकी घरनि हरी छल बल
 करि ताते बिलम न लावत । दश अरु आठ शंख बनचर लै लीला सिंधु बँधावत ॥ जाइ मिलौ
 कौशलनरेशको मन अभिलाष बढ़ावत । दै सीता लंकेश पाइ परि तब लंकेरा कहावत ॥ तू भूल्यो
 दश शीश बीस भुज मोहिं गुमान दिखावत । कंध उपारि डारि भूतलमें सूर सकल दुखपावत ॥
 ॥ १२९ ॥ रावण भेद उपजावन अंगद राम प्रशंसा । राग मारू ॥ रे कपि क्यों पितु वैर बिसार्यो । तो
 समतुल कन्या किन उपजी जो कुलशत्रु न मार्यो ॥ ऐसो सुभट नहीं इहि मंडल देख्यो बालि
 समान । तासों कियो वैर मैं हार्यो कीनी पैज प्रमान ॥ ताको वधन कियो इहि रघुपति तो
 देखत विदमान । ताकी शरण रह्यो क्यों भावै शब्द सुनौ दै कान ॥ रे दशकंध अंध मति मूरख
 क्यों भूल्यो इहि रूप । सूझत नहीं बीस हू लोचन पर्यो तिमिरके कूप ॥ धन्य पिता जापर
 परिफुलित राघव भुजा अनूप । वा प्रतापकी मधुर विलोकनि गहि वारौं सतरूप ॥ जो तुहि नाहिं
 बाँह बल पौरुष अर्ध राज देउँ लंक । मो समेत ये सकल निशाचरलरत न माने शंक ॥ जब रथ
 साजि चढौं रणसन्मुख जीयन आनो दंग । राघव सैन समेत सँहारौं करौं रुधिर मय अंग ॥ श्री
 रघुनाथ चरण व्रत उर धरि क्यों नहिं लागत पाइ । सबके ईश परम करुणामय सबहीको सुखदाइ ॥
 हौं जु कहत लै चलो जानकी छाँडि सबै दंभान । सन्मुख होइ सूरके स्वामी भक्तन कृपानिधान ॥
 ॥ १३० ॥ इन्द्रजीत युद्ध आज्ञा अंगद पाय रोपनाराग मारू ॥ लंकपती इन्द्रजीतको बुलायो । कह्यो
 तिहि जाहु रणभूमि दल साजिकै कहा भयो राम दल जोरि ल्यायो ॥ कोपि अंगद कह्यो धरो
 धर चरण में ताहि जो सकै कोऊ उठाई । तौ बिना युद्ध किये जाहि रघुबीर फिरि यह सुनत उठे
 जोधा रिसाई ॥ रहे पचिहारि नहिं पार कोऊ सक्यो उक्थो तब आप रावण खिसाई । कह्यो

अंगद कहा मम चरणको गहत चरण रघुवीर गहु क्यों न जाई ॥ सुनत यह सकुच कियो गवन
 निज भवनको बालिसुत हूँ वहां ते सिधायो । सूरके प्रभुको पाँइ परि यों कह्यो अंध दशकंधको
 काल आयो ॥ १३१ ॥ अंगद आवन रावण निकट ॥ बालिनन्दन आइ शीश नायो । अन्ध
 दशकंधको काल सूझत प्रभू मैं कई भेद बिधि कहि जनायो ॥ इन्द्रजित चढ्यो निज सैन सब साजिकै
 रावरी सैन हू साज कीजै । सूर प्रभु मारि दशकंध थपि बंधु तिहि जानकी छोरि यश गात लीजै
 ॥ १३२ ॥ श्रीरघुनाथ प्रति लक्ष्मण प्रतिज्ञा युद्ध निमित्त ॥ रघुपति जो न इन्द्रजित मारौ । तो न होउँ चरणनको
 चरो जो न प्रतिज्ञा पारौ ॥ जो दृढ़ बात जानिये प्रभुजू धर्मगये कहि बान निवारौ । शपथ राम
 परताप तिहारे खंड खंड करि डारौ ॥ कुम्भकर्ण दशशीश बीसभुज दानव दलहि बिडारौ । तबै सूर
 संधान सफल है रिपुको शीश उपारौ ॥ १३३ ॥ लक्ष्मणका सेना सहित युद्ध गवन ॥ लछन दल संग
 लये लंक घेरी । वसुमति पट्ट अरु अष्ट आकाश भये दिश विदिश कोउ नहिं जात हेरी ॥ ऋच्छ
 पलवंग किलकार लागे करन आन रघुनाथकी जाइ फेरी । पाट गये दूटि परी लूट सब नगर में
 सूर दरवान कह्यो जाइ टेरी ॥ १३४ ॥ मंदोदरी वचन रावण प्रति ॥ रावण उठि निरखि
 देखि आजु लंक घेरी । कोटि जतन करि रही नहिं सीख सुनी मेरी ॥ गहि गहात किलकात अन्ध
 कार आयो । रविको रथ सूझत नहिं धरनि गगन छायो ॥ तोरि पाट लूट परी भागे दरवाना ।
 लंकामें शोर परचो अजहूँ तैं न जाना ॥ फोरि फारि तोरि तारि गगन होत गाजै । सूरदास लंका
 पर चक्र शंख बाजै ॥ १३५ ॥ अन्यच्च ॥ लंका फिरि गई राम दुहाई । कहति मंदोदरि
 सुन पिआ रावण तैं कहा कुमति कमाई ॥ दश मस्तक मेरे बीस भुजा हैं सौ योजनकी खाई ।
 मेघनाद से पुत्र महाबल कुम्भकर्णसे भाई ॥ रहु रहु अबला बोल न बोलौ उनकी करत बडाई ।
 तीनि लोकेते पकरि मँगाऊँ वै तपसी दोउ भाई ॥ तुम्हैं मारि महारावण मारै देय विभीषण राई ।
 पवनको पूत महाबल जोधा पलमें लंक जराई ॥ जनकसुतापति हैं रघुवर से संग लक्ष्मण से
 भाई ॥ सूरदास प्रभुको यश प्रगट्यो देवनि बंदि छुडाई ॥ १३६ ॥ मेघनाद युद्ध नारद शिक्षा नाग फाँस
 मोचन । राग मारू ॥ मेघनाद ब्रह्मा वर पायो । आहुति अग्नि जिवाइ सँतोषी निकस्यो रथ बहु
 रतन बनायो ॥ आयुध धरे समेत कवच सजि गर्जि चढ्यो रण भूमिहि आयो । मनो मेघनाथक ऋतु
 पावस बाण वृष्टि करि सैन खपायो ॥ कीनो कोप कुँवर कोशलपति पंथ अकास सायकनि छायो ॥
 हँसि हँसि नागफाँस शर साधन बंधन बंधु समेत बँधायो ॥ नारदस्वामी कह्यो निकट है गरुडा-
 सन काहे बिसरायो । भयो तोष दशरथके सुतको सुनिको ज्ञान लखायो ॥ सुमिरन ध्यान
 जानिकै अपनो नाग फाँसते सैन छुडायो । सूर विमान चढे सुरपुर लौं आनँद अभय निसान
 बजायो ॥ १३७ ॥ कुम्भकर्ण रावण संवाद । राग मारू ॥ लंकपति अनुज सोवत जगायो । लंकपुर
 आइ रघुराइ डेरो दियो त्रिया जाकी सिया मैं ले आयो ॥ तैंबुरी बहुत कीनी कहा तोहिं कहाँ
 छाँडि यश जगत अपयश बढ़ायो । सूर अब डर न करि युद्ध को साज करि होइ है सोइ जो दर्ई
 भायो ॥ १३८ ॥ लक्ष्मण वचन खड्गधारण राग मारू ॥ लछन कह्यो करवार सँभारौ । कुम्भकर्ण
 अरु इन्द्रजीतको टूक टूक करि डारौ ॥ महाबली रावण जिहि बोलत पलमें शीश सँहारौ । सब
 राक्षस रघुवीर कृपाते एकहि बाण निवारौ ॥ हँसि हँसि कहत विभीषणसों प्रभु महाबली रण
 भारौ । सूर सुनत रावण उठि धायो क्रोध अनल तन धारौ ॥ १३९ ॥ रावण लक्ष्मण युद्ध, लक्ष्मण मूर्छा ॥
 राग मारू ॥ रावण चलयो गुमान भरचो । श्रीरघुनाथ अनाथ बंधु सो सन्मुख कहत खरचो ॥ कोप

धरो रघुवीर धीर तब लक्ष्मण पाँइ परचो । तेरे तेज प्रताप नाथ जू मैं कर धनुष
 धरचो । सारथि सहित असुर बहु मारे रावण क्रोध जरचो । इन्द्रजीत लीनी
 जब सेंथी देवन हहा करचो ॥ छूटी बिज्जु राशि वह मानों भूतल बंधु परचो । करुणा करत कुँवर
 कौशलपति नैनन नीर झरचो । सूरदास हनुमान दीन है अंजलि जोरि खरचो । आज्ञा देहु
 सजीवनि लाऊं गिरि उचाइ सिगरचो ॥ १४० ॥ श्रीराम करुणा ॥ राग मारू ॥ निरखि मुख राघव
 धरत न धीर । भये अरुण विकराल कमलदल लोचन मोचत नीर ॥ बारह बरस नींद है साधी
 ताते विकल शरीर । बोलत नहीं मौन कहा साधी बिपति बटावन बीर ॥ दशरथ मरन हरन सीता
 को रन वीरनकी भीर । दूजो सूर सुमित्रा सुतबिनु कौन धरावै धीर ॥ १४१ ॥ अन्यत्र ॥ अबहीं कौन
 को मुख हेरों । रिपुसैना समूह जल उमडे काहि संगलै फेरों ॥ दुख समुद्र जिहि वार पार नहीं तामें नाव
 चलाई । केवट थक्यो रह्यो अध बीचक कौन आपदा आई ॥ नाहिन भरत शत्रुघन सुन्दर जासों चित्त
 लगायो ॥ बीचहि भई औरकी औरै भयो शत्रुको भायो ॥ मैं निज प्राण तजौंगो सुन कपि तजिहैं जानकी
 सुनिकै । हैहै कहा बिभीषणकी गति यहै सोच जिय गुनिकै ॥ बार बार शिर लै लक्ष्मणको निरखि
 गोदपर राखैं । सूरदास प्रभु दीन वचन यों हनुमानसों भाखैं ॥ १४२ ॥ श्रीराम हनु प्रशंसा ॥
 कहां गयो मारुतपुत्र कुमार । है अनाथ रघुनाथ पुकारैं संकट मित्र हमार ॥ इतनी बिपति भरत
 सुनिपावै आवै दलहि सजृथ । करगहि धनुष जगतको जीतै कितक निशाचर यूथ ॥ नाहिन और
 वियो कोउ समरथ जाहि पठाऊं दूत । वह अबहीं पौरुष दिखरावै होइ पवनके पूत ॥ इतनो वचन
 श्रवण सुनि हरण्यो फूल्यो अंग न मात । लै लै चरण रेणु निज प्रभुकी रिपुके शोणित न्हात ॥
 हो परबल पुनीत केशरि सुत तुम हित बंधु हमारो ॥ जिह्वा रोम रोम प्रति नाहीं पौरुष गनो
 तुम्हारो ॥ जहां जहां जेहि काल सँभारे तहां तहां त्रास निवारै । सूर सहाय कियो बन बसिकै वन
 बिपदा दुख टारै ॥ १४३ ॥ राघव प्रति हनुमत वचन लक्षण मूर्छा उपाय ॥ रघुपति मन संदेह न कीजै ।
 मो देखत लक्ष्मण क्यों मरिहै मोको आज्ञा दीजै ॥ कहो तु सूरज उगत देहुं नहिं दिशि दिशि बाढ़ै
 ताम । कहो तु गन समेत असि खाऊं यमपुर जाइ न राम ॥ कहो तु कालहि खंड खंड करि टूक
 टूक करि काटों । कहो तु मृत्युहि मारि डारि कै खोदि पतालहिं पाटों ॥ कहो तु चन्दहि लै अकाशते
 लक्ष्मण मुखहि निचोरों । कहो तु पैठि सुधाके सागर जल समेत मैं घोरों । श्रीरघुवर मोसों जन जाके
 ताहि कहा सकराई । सूरदास मिथ्या नहिं भाषत मोहिं रघुनाथ दुहाई ॥ १४४ ॥ सजीवन निमित्त
 हनुमत गवन ॥ कह्यो तब हनुमतसों रघुराई । द्रोणागिरि पर आहि सजीवनि वैद सुषेन
 बताई ॥ तुरत जाइ लै आवौ ह्वांते विलंब न करि अब भाई ॥ सूरदास प्रभु वचन सुनत हनुमत
 चल्यो अतुराई ॥ १४५ ॥ हनु पर्वत लावन भरत मिलाप ॥ राग मारू ॥ दौनागिरि हनुमान सिधायो ।
 संजीवनिको भेद न पायो तब सब शैल उचायो ॥ चितै रह्यो तब भरत देखिकै अवधपुरी जब
 आयो । मनमें जानि उपद्रव भारी बाण अकास चलायो । राम राम यह कहत पवनसुत भरत
 निकट तब आयो । पृछ्यो सूर कौन है कहि तू हनुमत नाम सुनायो ॥ १४६ ॥ भरत कुशल प्रश्न पूछन
 हनु लक्ष्मण मूर्छा कथन, करुणामें सुमित्रा धैर्य ॥ कहो कपि रघुपतिको संदेश । कुशल बंधु लक्ष्मणबैदेही श्रीपति
 सकल नरेश । जिन पूछो तुम कुशल नाथकी सुनो भरत बलबीर ॥ विलख वदन दुख धरे सियाकोहैं
 जलनिधिके तीरा ॥ बनमें बसत निशाचर छल करि हरी सिया मम मात । ता कारन लक्ष्मण शर लाग्यो
 भये राम बिनु भ्रात ॥ इतनो वचन श्रवन सुनि सुनिकै सबनि पुहुमि तन जोयो । त्राहि त्राहि कहि

पुत्र पुत्र कहि लोटि सुमित्रा रोयो ॥ धन्य सुपुत्र पितापन राख्यो धन्य सुकुल जिहि लाज । सेवक
 धन्य अंतके अवसर आवै प्रभुके काज ॥ कत रघुनाथ सूरके कारण मोको लैन पठाये । थक्यो
 सुमध्य अर्ध निशि बीती को लक्ष्मणहि जियावै ॥ पुनि धरि धीर कह्यो धनि लक्ष्मण राम काज जो
 आवै।सूर जियै तौ जग यश पावै मारि सूरलोक सिधावै ॥१४७॥ धैर्य सहित सुमित्रा वचन राग मारू ॥ धनि
 जननी जो सुभटहि जावे।भीर परे रिपुको दल दलि मलि कौतुक करि दिखरावै ॥ कौशल्यासो कहति
 सुमित्रा जिनि स्वामिनि दुख पावै । लक्ष्मण जनि हौं भई सपूती राम काज जो आवै ॥ जीये तौ
 सुख विलसै जगमें कीरति लोगनि गावै । मरै तु मंडल भेदि भानु को सुरपुर जाइ बसावै ॥ लोह
 गहे लालच करि जियको औरौ सुभट लजावै । सूरदास प्रभु जीति शत्रुको कुशल क्षेम घर आवै ॥
 ॥ १४८ ॥ हनुमत भरत प्रति उत्तर ॥ राग मारू ॥ पवनपुत्र बोल्यो सतभाय । जाति सिराति राति बातनि
 हौं सुनो भरत चितलाय ॥ श्रीरघुनाथ सजीवन कारण मोको इहां पठायो । भयो अकाज अर्ध
 निशि बीती लक्ष्मण काज नशायो ॥ स्यों पर्वत शर बैठि पवनसुत हौं प्रभुपै पहुँचाऊं । सूरदास
 पांवरि मम शिरहै इहि बल भरत कहाऊं ॥ १४९ ॥ कौशल्या संदेश राम प्रति ॥ राग मारू ॥ सुनो कपि
 कौशल्याकी बात । इहि पुर जनि आवहु बिनु लछमन सुनो वच्छ रघुनाथ ॥ जिन तज्यो राज काज
 माता हित तुम चरननि चित मानै । कहा कहाँ कछु कहत ना आवै सज्जन होइ सुजानै ॥ लछमन
 सहित सकल सेनापति आनि राज पुर कीजै।नात रु सूर सुमित्रासुतपर वारि आपुन खो दीजै १५०॥
 विनती जाइ कहिये पवनसुत तुम रघुपतिके आगे।या पुर जिनि आवहु बिनु लक्ष्मण जननी लाज न
 लागे ॥ मारुतसुत संदेश हमारो सुमित्रा कहि समुझावै । सेवक जूझि परै रन बिग्रह ठाकुर तौ
 घर आवै ॥ जबते तुम गौने काननको भरत भोग सब छांडे । सूरदास प्रभु तुमरे दरश बिनु दुख
 समूह उर गाडे ॥ १५१ ॥ हनुमान सजीवन लावन, लक्ष्मण चेत होन ॥ राग सारंग ॥ हनुमान सजीवन ल्यायो ।
 महाराज रघुवीर धीरको हाथ जोरि शिर नायो ॥ पर्वत आनि धरयो सागर तट भरत संदेश
 सुनायो ॥ सूर सजीवन दै लक्ष्मणको मूर्छित फिरैं जगायो ॥ १५२ ॥ श्री राम वचन जय प्रतिज्ञा
 सहित । राग कान्हरा ॥ दूसरे कर बाण न लेहौं । सुन सुग्रीव प्रतिज्ञा मेरी एकहि बान असुर सब है
 हौं ॥ शिवपूजा जिहि भांति करीहै सोइ पद्धति परतक्ष दिखै हौं । दैत प्रहार पाय फल
 वर्जित शिरमाला कुल सहित चढैहौं ॥ मनो तूलगन परत अगिनि मुख जानि जडनि यमपंथ
 पठैहौं । करिहौं नहीं बिलंब कछु अब उठि रावण सन्मुख ह्वै धैहौं ॥ इमि दमि दुष्ट देव द्विजमोचन
 लंक विभीषण तुमको दैहौं । लक्ष्मण सिया समेत सूर कपि सब सुख सहित अयोध्या जैहौं ॥
 ॥ १५३ ॥ रावण कुल वध ॥ राग मारू ॥ आजु अति कोपे हैं रन राम । ब्रह्मादिक आरूढ बिमानन देखैं
 सूर संग्राम ॥ धन तन दिव्य कवच सजि करि अरु कर धारयो शारंग । शुचि करि सकल बान
 मूधे करि कटि तट कस्यो निपंग ॥ सुरपुरते आयो रथ सजिकै रघुपति भयो सवार । कांपी भूमि
 कहा अब ह्वैहै सुमिरत नाम मुरारि । क्षोभित सिंधु शेष शिर कंपित पवनगती भइ पंग । इन्द्र
 हंस्यो हर हंसि विलखान्यो जानि वचन भयो भंग ॥ धर अंबर दिशि विदिशि बढे अति सायक
 किरन समान । मानी महाप्रलयके कारन उदित उभय षटभान ॥ टूटत ध्वजा पताक छत्र
 रथ चाप चक्र शिर त्रान । जूझत सुभट जरत ज्यों दौ हुम बिनु शाखा बिनु पान ॥
 शोणित छिछ उछरि आकाशहि गज वाजिन शर लागी । मनो नगर रन तननि धरनिते
 उपजी है अति आगी ॥ उठि कबंध भहरात भीत ह्वै निकसत है जरि जागि । फिरत शृगाल सच्यो
 सो काटत चलत बिसरि लै भागि ॥ रघुपति रिस पावक प्रचंड अति सीता श्वास समीर । रावण
 कुल अरु कुम्भकर्ण वन सकल सुभट रणधीर ॥ भये भस्म कछु बार न लागी ज्यों ज्वाला पट

चीर । सूरदास प्रभु अपुने बाहुबल कियो निमिष मय कीर ॥ १५४ ॥ रघुपति अपुनो
 प्रण प्रतिपारचो । तोरचो कोपि प्रबल गढ़ रावण ठूक ठूक करि डारचो ॥ कहुँ भुज कहुँ धर कहुँ
 शिर लोटत मनो मंदय मतवारो । डरपत वरुण कुबेर इन्द्र यम महा सुभट तन भारो ॥ रघु मांस
 को पिंड प्राण लै गयो वाण अनियारो । जाके नव ग्रह परे पाटि तर कूपै काल उसारचो ॥ सो
 रावण रघुनाथ छिनकमें कियो गिद्धको चारो । शिर सँभारि लै गयो उमापति रघु रुधिरको गारो ॥
 छोरे और सकल सुखसागर बाँधि उदधि जल खारो ॥ सुर नर मुनि सब सुयश बखानत दुष्ट
 दशानन मारचो ॥ दियो विभीषण राज्य सूर प्रभु कियो सुरनि निस्तारचो । बंधु सहित जानकी
 संग लै अवधपुरी पग धारचो ॥ १५५ ॥ रावण मरण समय मंदोदरी आदि विलाप ॥ करुणा
 करति मंदोदरी रानी । चौदह सहस सुंदरी ऊभी उठै न कंत महा अभिमानी ॥ बार बार बरज्यो
 नहिं मानत जनकसुता तैं कत घर आनी । ये जगदीश ईश कमलापति सीता तिया तैं जु करि
 जानी ॥ लीन्हें गोद विभीषण रोवत कुल कलंक ऐसी मति ठानी । चोरी करी राजहू खोयो अल्प
 मृत्यु तेरी आइ तुलानी ॥ कुंभकर्ण समुझाइ रहे पचि दे सीता मिलि शारंगपानी । सूर सबनि
 को कह्यो न मान्यो त्यों खाई अपनी रजधानी ॥ १५६ ॥ आकाशसे अमृत वर्षा ॥ सुर
 पतिहि बोलि रघुवीर बोले । अमृतकी वृष्टि रणखेत ऊपर करो सुनत तिन अमिय भंडार खोले ॥
 उठे कपि भालु तत्काल जय जय करत असुर भये मुक्त रघुवर निहारे । सूर प्रभु अगम
 महिमा न कह्यु कहि परत सिद्ध गंधर्व जय जय पुकारे ॥ १५७ ॥ सीता मिलाप ॥ लक्ष्मण
 सीता देखी जाई । अति कृष दीन छीन तन प्रभु बिनु नैननि नीर बढाई ॥ जाम्बवंत सुग्रीव
 विभीषण करी दंडवत आई । आभूषण बहु मोल पटबंर पहिरो मात बनाई ॥ बिनु रघुनाथ मोहिं
 सब फीके आज्ञा मेटि न जाई । पुहुप बिमान बैठी बैदेही त्रिजटी तब गुहराई ॥ देखत दशराम
 मुख मोरचो सिया परी मुरछाई । सूरदास स्वामी तिहुँपुरके जग उपहास डराई ॥ १५८ ॥ परीक्षा
 हेतु सीता अग्नि प्रवेश । राग सोरठ ॥ लक्ष्मण रचो हुताशन भाई । यह सुनि हनुमान दुख पाये मोपै
 लख्यो न जाई ॥ आसन एक हुताशन बैठी मानो कुंदनकी अरुणाई । जैसे रवि इक पल घन
 भीतर बिनु मारुत दुरिजाई ॥ लै उछंग उत्संग हुताशन निष्कलंक रघुराई । लै विमान बैठारि
 जानकी कोटि बदन छबि छाई ॥ दशरथ कही देवहू भाषी व्योम विमान निकाई । सिया राम लै
 चले अवधको सूरदास बलि जाई ॥ १५९ ॥ कौशल्या शकुन विचार काग वचन । राग सारंग ॥ बैठी जन-
 नि करति शगुनैती । लक्ष्मण राम अब मिलैं मोको दोउ अमोलक मोती ॥ इतनी कहत सु काग
 उहाते हरीडार उडि बैठचो ॥ अंचल गांठ दई दुख भाज्यो सुख जो आनि उर पैच्यो । जौलों हों
 जीवन भर जीवों सदा नाम तुव जपिहों । दधि ओदन दोना करि देहों अरु माइनमें थ-
 पिहों ॥ अबके जो परचो करि पाऊं अरु देखौं भरि आखैं । सूरदास सोनेके पानी मढि
 हों चोंच अरु पाखैं ॥ १६० ॥ अंगद बसीठी रावण बध आदिःपर्यन्त लीला । राग मारू ॥ बालिनंदन बली
 बिकट वनचर महा द्वार रघुवीर को वीर आयो । और ते दौर दरवान दशशीशसों
 जाय शिरनाय यों कह सुनायो ॥ सुनि श्रवण दशवदन दशन अभिमान कर नैनकी सैन
 अंगद बुलायो । देखि लंकेश कपिभेश दर दर हँस्यो सुन्यो भट कटक को पार पायो ॥
 विविध आयुध धरे सुभट सेवत खरे छत्रकी छांह निर्भय जनायो । देव दानव महाराज रावण
 सभा कहन को मंत्र तहां कपि पठायो ॥ रंक रावण कहा टेक तेरो इतो दोउ कर जोरि बिनती
 बिचारो । परम अभिराम रघुनाथ के रोमपर बीस भुज शीश दश वारि डारो । झटकि हाटक मुकुट

पटकि भट भूमिसों झारि तरवारि तेरो शिर संहारों । जानकीनाथके हाथ तेरो मरण कहा
 मतिमंद तोहिं मध्य मारों ॥ पाक पावक करै वारि सुरगति भैरे पवन पावन करै द्वार मेरे ।
 गान नारद करै ज्ञान सुरगुरु कहै वेद ब्रह्मा पढै पौरि टैरे ॥ शेष बासुकि प्रभृति नाग गंधर्व गण
 सकल वसुजीति मैं करे चैरे । सुनि अरे शठ दशकंधको कौन भय राम तपसी दये आनि डेरे ॥
 तप बली सत्य तापस बली तप बिना वारि पर कौन पाषाण तारै । कौन ऐसो बली सुभट जननी
 जन्यो एकही बाण तकि वालि मारै ॥ परमगंभीर रणधीर दशरथ तनय शरण गये कोटि अवगुण
 विसारै । जाइ मिलि अंध दशकंध गहि दंत तृण तौ भलै मृत्यु मुखते उबारै ॥ कोपि करि वार
 गहि काल लंकाधिपति मूढ कहा रामको शीश नाऊं । शंभुकी सप्त सुनि कुकपि कायर कृपण
 श्वास आकाश वनचर उड़ाऊं ॥ होइ सन्मुख भिरों शंक नहिं मन धरों मारि सब कटक सागर
 बहाऊं । कोटि तेंतीस मम सेव निशि दिन करत कहा अब राम नरसों डराऊं ॥ परो भहराय भभक्त
 रिपु घायसों करि कदन रुधिर भैरों अघाऊं । सूर साजैं सबै देव दुंदुभि अबै एकते एक रण
 करि विताऊं ॥ १६१ ॥ बघो रावण सुन्यौ शीश तब शिव धुन्यो उमडि रण रंग रघुवीर आये । रुंड भक
 रुंड धुकि धकत धरणी पारै रुधिर सरिता नहीं पार पाये ॥ राम शर लागि मनु आगि गिरिपर जरी
 उछलि छिछिन शरनि भानु छाये ॥ मारि दशकंध पथ बंधुको सूर प्रभु राजीवनैन घर सिया
 ल्याए ॥ १६२ ॥ (उत्तर कांड) अयोध्या प्रशंसा ॥ राग मारू ॥ हमारो जन्मभूमि यह गाउँ । सुनहु
 सखा सुग्रीव विभीषण अवनि अयोध्या नाउँ ॥ देखत बन उपवन सरिता सर परम मनोहर ठाउँ ।
 अपनी प्रकृति लिये बोलतहौं सुरपुरमें न रहाऊं ॥ ह्यांकि वासी अवलोकत हौं आनंद उर न
 समाउँ । सूरदास जो विधि न सकोचे तो वैकुण्ठ न जाउँ ॥ १६३ ॥ राम आगमन श्रवण सुनि भरत रचना
 करन उत्सव प्रकाश । राग वसंत ॥ राघव आवति हैं अवधि आजु । रिपु जीते साधे देव काजु ॥ प्रभु कुशल
 बधू सीतासमेत । जस सकल देश आनंद देत ॥ कपि शोभित सकल अनेक संग । ज्यों पूरण शशि सागर
 तरंग ॥ सुग्रीव विभीषण जाम्बवंत । अंगद केदार सुखेन संत ॥ नल नील द्विविद केसरि गवछ । कपि कहे
 मुख्य और अनेक लछ ॥ जब कही पवनसुत विविध बात । तब उठी सभा सब हर्ष गात ॥ ज्यों
 पावस ऋतु घन प्रथम घोर । जल जीवक दादुर रटत मोर ॥ जब सुने भरत पुर निकट भूप ।
 तब रच्यौ नगर रचना अनूप ॥ प्रति प्रति गृह तोरण ध्वजा धूप । सजे सकल कलश अरु कदली
 जूप ॥ दधि हरद दूब फल फूल पान । कर कनकथार त्रिय करत गान ॥ सुनि भरे वेद ध्वनि शंख
 नाद । सुनि निरखि पुलक आनंद प्रसाद ॥ देखत प्रभुकी महिमा अपार । सब बिसरि गये मन
 बुधि बिकार ॥ जय जय दशरथ कुल कमल भान । जय कुमुद जननि शशि प्रजा प्रान ॥ जय दिव
 भूतल शोभा समान । जय जय जय सूर न शब्द आन ॥ १६४ ॥ श्रीराम वचन सुग्रीव प्रति भरत
 दरशावन परस्पर मिलाप । राग मारू ॥ देखो कपिराज भरत वे आये । मम पांवरी शीश पर जाके
 कर अँगुरी रघुनाथ बताए ॥ क्षीन शरीर बीरके बिछुरे राग भोग चितते बिसराए ॥
 लघु दीरघ तपसा अरु सेवा स्वामी धर्म सब जगहिं सिखाये । पुहुप विमान दूरिही छांडे चरण
 चपल प्रभु प्रण करिधाये । आनंद मगन सदन सुत कैकयी कनक दंड ज्यों गिरत उठाये । भेंटत
 आंसू परत पीठिपर गद्गद गिरा नैन जल छाए ॥ ऐसे मिली सुमित्रासुतको विरह अग्नि तनु
 जरत बुझाए ॥ यथायोग भेंटे पुरवासी शूल मिटी सुखसिंधु पठाए । सिया राम लक्ष्मण मुख
 निरखत सूरदासके नैन सिराए ॥ १६५ ॥ कौशल्या सुमित्रा आदि आरती मंगलाचार ॥ राग मारू ॥ अति

सुख कौशल्या उठि धाई । उदित वदन अरु सुदित सदनते आरति साजि सुमित्रा ल्याई ॥ ज्यों
 सुरभी बन वसति बच्छबिनु परवश पशुपनिकी बहराई । चली साँझ समुहाय स्रवत थन उमँगि
 मिलन जननी दोउ आई ॥ अमी वचन सुनि होत कुलाहल देवन दिव्य दुंदुभी बजाई । दधि फल
 दूब कनकके कोपर आरति युवति विचित्र बनाई ॥ वरण वरण पट पडत पाँवडे नैनानि सकल
 सुखद ही छाई । पुलकित रोम हर्ष गदगद सुर युवतिन मंगल गाथा गाई ॥ निज मन्दिरमें आनि
 तिलक दै द्विजन अशीश सुनाई । सिया सहित सुख लेहो ह्यां तुम सूरदास बलि जाई ॥ १६६ ॥
 श्रीराम राज्याभिषेक ॥ राग मारू ॥ मणि मय आसन आनि धरे । दधि मधु नीर कनकके कोपर
 आपुन भरत भरे ॥ प्रथम भरत बैठाई बंधुको यह कहि पाँइ परे । हौं पावन प्रभुचरण पखारों
 रुचि करि आप करे ॥ निजकर चरण पखारि प्रेम रस आनंद आँसु ढरे । ज्यों शीतल संताप
 सलिल दै शुद्धि समूह करे ॥ परसत पाणि चरण पावन दुख अँग अँग सकल हरे । सूर सहित
 आमोद चरण जल लेकर शीश धरे ॥ १६७ ॥ राग आसावरी ॥ राज समाज वर्णन ॥ बिनती केहि बिधि
 प्रभुहि सुनाऊं । महाराज रघुवीर धीरको समय न कबहूँ पाऊं ॥ याम रहत यामिनके बीते तिहि
 औसर उठि धाऊं । सकुच होत सुकुमार नौदसे कैसे प्रभुहि जगाऊं ॥ दिनकर किरण उदित
 ब्रह्मादिक रुद्रादिक इक ठाऊं । अगणित भीर अमर सुनिगनकी तिहिते ठौर न पाऊं ॥ उठतसभा
 दिन मध्य सियापति देखि भीर फिरि आऊं । न्हात खात सुख करत साहिबी कैसे कर अनसाऊं ॥
 रजनी मुख आवत गुण गावत नारद तुम्बर नाऊं । तुमहीं कहा कृपण हौं रघुपति किहिबिधि दुख
 समझाऊं ॥ एक उपाय करौं कमलापति कहो तो कहि समझाऊं । पतित उधारण सूर नाम प्रभु
 लिखि कागद पहुँचाऊं ॥ १६८ ॥ इन्द्र दुराचार, इन्द्र अहल्या प्रति गौतम शाप ॥ राग विलावल ॥ सुरपति
 गौतम नारि निहार । आतुर ह्वै गयो बिना बिचारा ॥ काग रूप करि ऋषि गृह आयो । अर्ध निशा तेहि
 बोल सुनायो ॥ गौतम लख्यो प्रात है भयो । न्हात काज सो सरिता गयो ॥ तब सुरपति मन माहि
 बिचारी । पतिव्रता है गौतम नारी ॥ गौतम रूप बिना जो जैये । ताके शाप अग्निसों दहिये ॥
 गौतम रूप धारि तहँ आयो । मूर्छित भयो अहिल्या पायो ॥ कह्यो अहिल्या तू को आहि । वेगि
 यहाँते बाहिर जाहि ॥ यहि अंतर गौतम ऋषि आयो । इन्द्र जानि यह बचन सुनायो ॥ तू इन्द्राणी
 तजि ह्यां आयो । मूरख तैं परत्रिय मन लायो ॥ इक भगकी तोहि इच्छा भई । भग सहस्र मै तो
 तन दई ॥ इन्द्र शरीर सहसतन भई । छप्यो सो कमल नालमें जई ॥ काल बहुत ता ठौर बितायो ।
 सुनि गुरु ऋषिन सहित तब आयो ॥ यज्ञकराइ प्रयाग न्हावायो । तौहूँ पूरव तनु नहिं पायो ॥ तब सब
 ऋषिन दई आशीश ॥ भगते नेत्र करो जगदीश ॥ भगअस्थान नेत्र तब भये । ऋषि इन्द्रहि लै सुरपुर
 गये ॥ परत्रिय मोह इन्द्र दुख पायो । सो नृप मै तोहि कहि समझायो ॥ परत्रिय नेह करै जो कोई ।
 जीवत नरक परत है सोई ॥ शुक नृपसों ज्यों कहि समझायो । सूरदास त्योंही कहि गायो ॥ १६९ ॥
 राजा नहुष राज्य प्राप्ति । इन्द्राणी चाह । ब्रह्म शापते सर्प देह पावन ॥ राग विलावल ॥ सुरपतिको शाप जब
 भयो । सो सुरपुर लज्जित नहिं पायो ॥ नहुष नृपतिपै ऋषि सब आई । कह्यो सुरराज करौ तुम
 जाई ॥ नहुष इन्द्र राज जब पायो । इन्द्राणीको देखि लुभायो ॥ कह्यो इन्द्राणी मोपै आवै । नृपसों
 ताको कहा बसावै ॥ सुरगुरुसों यह बात सुनाई । अवधि करन तिहि कहि समझाई ॥ शची
 नृपतिसों सोई भाषी । नृप सुनिकै हृदयमें राखी ॥ शची अग्निको तुरत पठायो । सुरपति दशादे-
 खि सो आयो ॥ इन्द्राणी सुनि व्याकुल भई । अवधि घरी व्यतीत ह्वै गई ॥ तब तिन ऐसी बुधि

उपजाई । इहि अंतर सो नहुष बुलाई ॥ कह्यो तुम अश्वमेध नहिं कियो । ऋषि आज्ञा तुम सुर-
 पति भयो ॥ विप्रन पर चढ़िकै जो आवहु । तो तुम मेरो दर्शन पावहु ॥ नृपति ऋषिन परहै असवार ।
 चलियो तुरत शचीके द्वार ॥ काम अंध कछु रहि न सँभार । दुर्वासा ऋषिको पग मार ॥ सर्प
 सर्प कहि बारंवार । तब ऋषि दीन्हो ताको डार ॥ कह्यो सर्प तैं भाष्यो मोहि । सर्प रूप तू ही
 नृप होहि ॥ जबै शाप ऋषिसों नृप पायो । तब ऋषि चरणन माथो नायो ॥ इह शराप मुक्ति ज्यों होइ ।
 ऋषि मोको अब भाषो सोइ ॥ कह्यो युधिष्ठिर देखै जोइ । तब उद्धार तेरो नृप होइ ॥ नृप ऐसो
 है पर त्रिय प्यार । मूर्ख करत सो बिना बिचार ॥ जो शुक्र नृपसों कहि समुझायो । सूरदास त्योंही
 कहि गायो ॥ १७० ॥ कच संजीवनी विद्या हेतु शुक्र गेह गवन, देवयानीलोभावन परस्पर शाप । राग भैरव ॥
 अविगति गति कछु समुझि न परै । जो कछु प्रभु चाहै सो करै ॥ जिवको किये कछु नहिं होइ । को-
 टि उपाय करो किन कोइ ॥ एक बार सुरपति मन आई । शुक्र असुरको लेत जिवाई ॥ मम गुरु
 हू विद्या पढि आवैं । मृतक सुरनको फेरि जिआवैं ॥ निज गुरुसों भाष्यो तिन जाई । शुक्र असुर
 को लेत जिवाई ॥ तुमहू यह विद्या सिखि आवहु । मृतक सुरनको तुमहु जिआवहु ॥ तब तिन
 कचको दियो पठाइ । कह्यो शुक्रको तिन शिर नाइ ॥ मैं आयो तुम पै शिर नाइ । तुम मुहिं विद्या
 देहु पठाइ ॥ शुक्र कह्यो तासों या भाई । देहौं विद्या तोहिं पढाई ॥ विद्या पढै करै गुरुसेव । सब
 विधि सुधरै ताके टेव ॥ शुक्रसुता देवयानी नाम । सब गुण पूर्ण रूप अभिराम ॥ सुरगुरु सुतको
 देखि लुभाई । देखै ताहि पुरुषकी नाई ॥ कितक काल व्यतीत जब भयो । गाइ चरावनको सो गयो ॥
 असुरनमिलि यह कियो विचार । सुरगुरु सुतको डारैं मारि ॥ जो यह संजीवनि पढि आई । तौ हम
 शत्रुनि देय जिआई ॥ यह विचार करि कचको मारयो । शुक्रसुता दिन पंथ निहारयो ॥ साँझ भये
 हू जब नहिं आयो । शुक्र पास तिन जाइ सुनायो ॥ शुक्र हृदयमें करी विचार । कह्यो असुरन
 वहि डारो मार ॥ सुता कह्यो तिहि फेरि जिआवहु । मेरे जियके सोच मिटावहु ॥ शुक्र ताहि
 पढि मंत्र जिवायो । भयो तासु तनयाको भायो ॥ पुनि हति मदिरा माहिं मिलाई । दिये दानव तिहि
 शुक्र पियाई ॥ तबते हत्यामदको लागी । यहै जानि सब देवन त्यागी ॥ शाप दिये ताको या
 भाई । जो तोहि पिंयै सु नरकहिं जाई ॥ कचबिनु शुक्रसुता दुख पायो । तब ऋषि तासों कहि समुझायो ॥
 मारयो कचको असुरन धाई । मदिरामें मुहि दियो पियाई ॥ ताहि जिवाऊं तौ मैं मरों । जो तुम
 कहो सु अब मैं करों ॥ कह्यो विनयकरि सुनि ऋषिराई । दोऊ जिवैं सो करो उपाई ॥ संजीवनि तब
 कचहिं पढाई । तासेती यों कह्यो समुझाई ॥ जब तुम निकरि उदरते आवहु । याविद्याकरि मोहिं
 जिआवहु ॥ उदर फारि तिहिं बाहर कियो । मृतक कच ऐसी विधि जियो ॥ सु जब उदरते बाहर
 आयो । संजीवनि पढि शुक्र जिवायो ॥ बहुत काल व्यतीत जब भयो । कच ऋषि ऋषि तन
 यासों कह्यो ॥ जो तुमरी मोहिं आज्ञा होई । तात मातको देखौं जोई ॥ ऋषितनया कह्यो मोहिं
 विवाहि । कच कह्यो तू गुरु भगनी आहि । तब तिन शाप दियो या भाई । विद्या पढी सु वृथा
 जाई ॥ कचहुं ताहि कह्यो या भाई । विप्र पुरुष तोहि मिले न आई ॥ यह कहि कच अपने गृह
 आयो । पिता पास वृत्तान्त सुनायो ॥ शुक्र नृपसों ज्यों कहि समुझायो । सूरदास त्योंही कहि
 गायो ॥ १७१ ॥ देवयानी कृप निपातन, राजा ययाति पाणिग्रहण, शुक्र शाप, राजपुत्र यौवन भोग, वैराग्य करि मोक्ष
 प्राप्ति । राग भैरव ॥ दानव वृषपर्वा बलभारी । नाम शरमिष्ठा तासु कुमारी ॥ ताहि देवयानीसों
 प्यार । रहे न तासों पल भरि न्यार ॥ एक बार ताके मन आई । न्हावन काज प्रयाग सिधाई ॥

तासँग दासी गई अपार । न्हान लगी सब कपडे डार ॥ दनुजसुता तिहि नहीं निहारी । आँधि-
यारी आई अति भारी ॥ बसन शुक्रतनयाके लीने । करत उतावलि परत न चीने ॥ शुक्रसुता
जब आई बाहर । बसन न पाए तिन तिहि ठाहर ॥ असुरसुताको पहिरे देखि । मनमें कीनो
क्रोध विशेखि ॥ कह्यो मम बसन नहीं तुव योग । तुम दानव हम तपसी लोग ॥ मम पितु
दियो राज नृप करत । तू मम बसन हरत नहीं डरत ॥ तिन कह्यो तुव पितु भिक्षा
खात । बहुरि कहति हमसों ये बात ॥ या बिधि कहि करि क्रोध अपार । दीनों ताहि कूपमें डार ॥
नृपति ययाति अचानक आयो । शुक्रसुताको दरशन पायो ॥ दियो तब बसन आपनो डारि ।
हाथ पकरिकै लियो निकारि ॥ बहुरो नृप निज गेह सिधायो । सुता शुक्रसों जाइ सुनायो ॥
शुक्र क्रोध करि नगर तियाग्यो । असुर नृपति सुनि ऋषि सँग लाग्यो ॥ जब बहुभाँति विनय नृप
करी । तब ऋषि यह वाणी उच्चरी ॥ मम कन्या प्रसन्न ज्यों होय । करो असुरपति अब तुम सोय ॥
शुक्रसुतासों कह्यो तिन आई । आज्ञा होइ करौ सु उपाई ॥ जो तुम कहौ करौ अब सोइ । तब
पुत्री मम दासी होइ ॥ दासीसहस ताहि सँग भई । नृप पुत्री दासी करिदई ॥ सो सब ताकी सेवा करै ।
दासी भाव हृदयमें धरै ॥ इकदिन शुक्रसुता मन आई । देखौ जाइ फूल फुलवाई ॥ लै दासी फुल-
वारी गई । पुहुपसेज रचि सोवत भई ॥ असुरसुता तेहि व्यजन डुलवै । सोवत सेज सु अति
सुख पावै ॥ तेहि अवसर ययाति नृप आयो । शुक्रसुता तेहि वचन सुनायो ॥ नृप मम पाणिग्रहण
तुम करो । शुक्र सकुच हृदय मति धरो ॥ कचको प्रथम दियो मैं शाप ॥ उनहूँ मोहि दियो करि दाप
ताको कोइ न सकै मिटाई । ताते व्याह करो तुम राई । नृप कह्यो कहो शुक्रसों जाइ । करिहौं जो
कहिहैं ऋषिराइ ॥ तब तिन कह्यो शुक्रसों जाइ । कियो व्याह ऋषि नृपति बुलाइ ॥
असुरसुता ताके सँग दई । दासी सहस तासु सँग भई ॥ दंपति भोग करत सुख पाए । शुक्रसुता
यो द्वै सुत जाए ॥ कह्यो शरमिष्ठा अवसर पाइ । रतिको दान देहु मोहि राइ ॥ नृप
ताहूसों कीनो भोग । तीन पुत्र भये बिधि संयोग ॥ शुक्रसुता तिहि पुत्रन
देखि । मनसों कीनो क्रोध विशेखि ॥ कह्यो शरमिष्ठा सुत कहाँ पायो । उन कह्यो ऋषि किरपा
ते जायो ॥ बहुरि कह्यो ऋषिको कह नाम । कह्यो स्वप्न देख्यो अभिराम ॥ पुनि पुत्रन सों
पूछ्यो जाई । पिता नाम मोहि कहो बुझाई ॥ बडे पुत्र भाष्यो पुनि ताहि । नृपति पिता ययाति
मम आहि ॥ सुनि नृपसों कियो युद्ध बनाई । बहुरि शुक्र सेती कह्यो जाई ॥ पाछे ते ययाति
हूँ आयो । ऋषि तासों यह वचन सुनायो ॥ तैं यौवन मदते यह कीनो । ताते शाप तोहिं मैं दीनो ॥
जरा अबहिं तोहिं व्यापै आइ । भयो वृद्ध तब कह्यो शिर नाइ ॥ ऋषि तुम तो शराप मोहिं दियो ।
पूरण काम नाहिं मैं कियो ॥ ताते जो मोहिं आज्ञा होइ । आयसु मानि करौ अब सोइ ॥ कह्यो
जरा तेरी सुत लेय । अपुनो तरुनापा तोहिं देय ॥ भोग मनोरथ तब तू पावै । मेरे वचन मृथा
नाहिं जावै ॥ बडे पुत्र यदुसों कह्यो आइ । उन कह्यो वृद्ध भयो नाहिं जाइ ॥ नृप कह्यो तोहि
राज नाहिं होई । वृद्धपनो लै राजा सोई ॥ औरनहूँ सों जब नृप भाख्यो । नृपति वचन काहूँ नाहिं
राख्यो ॥ लघु सुत नृपति बुढापो लयो । अपुनो तरुनापो तेहि दयो ॥ वर्ष सहस भोग नृप
कियो । पै संतोष न आयो हियो ॥ कह्यो विषय ते तृप्ति न होई । भोग करौ कैसो किनकोई ॥
तब तरुनापा सुतको दीनो । वृद्धपनो अपनो फिरि लीनो ॥ बनमें करी तपस्या जाइ । रह्यो
हरिचरणनसों चित लाइ ॥ या बिधि नृपति कृतारथ भयो । सो राजा मैं तुमसों कह्यो ॥ शुक्र
ज्यों नृपको कहि समुझायो । सूरदास त्योंही कहि गायो ॥ १७२ ॥

इति श्रीमद्भागवते-सूरसागरे कविवर श्री सूरदासकृते नवमः स्कन्धः समाप्तः ॥ ९ ॥

अथ कविवर सूरदासकृत-

श्रीसूरसागर.

दशमस्कन्ध ।

राग सारंग ॥ व्यास कह्यो शुकदेवसों, श्रीभागवत बखान । द्वादशस्कन्ध परम सुभग, प्रेम भक्तिकी खान ॥ नवस्कन्ध नृप सों कही, श्रीशुकदेव सुजान । सूर कहत अब दशमको, उरमें धरि हरि ध्यान ॥ १ ॥ राग विलासल ॥ हरि हरि हरि हरि सुमिरन करौ । हरि चणारविंद उर धरौ ॥ जय अरु विजय पार्षद दोई । विप्रनशाप असुर भये सोई ॥ दोइ जन्म ज्यों हरि उद्धारि । सो शुक तुमसों कहि उच्चारि ॥ दंतवक्र शिशुपाल जो भये । वासुदेव होइ सो पुनि हए ॥ औरौ लीला बहु विस्तार कीन्हें जीवन ज्यों निस्तार ॥ सो अब तुमसों सकल बखानों ॥ प्रेम सहित सुनि हृदये आनौं ॥ जो यह कथा सुनै चित लाई । सो भव तरि बैकुण्ठहि जाई ॥ जैसे शुकनृपको समझायो । सूरदास त्योही ॥ कहि गायो ॥ २ ॥ भगवान जन्म लीला ॥ राग सारंग ॥ बालविनोद भावती लीला अति पुनीत मुनि भाखीहो । सावधान है सुनहु परीक्षित सकलदेव मुनि साखीहो ॥ १ ॥ कालिंदीके कूल बसत एक मधुपुरी नगर रसाला हो । कालनेमि उग्रसेन वंश कुल उपजे कंस भुवाला हो ॥ २ ॥ आदिब्रह्म जननी सुर देवी नामदेवकी बाला हो । दई विवाहि कंस वसुदेवको अघभंजन उरमाला हो ॥ ३ ॥ हय गज रत्न हेम पाटंबर आनंद मंगलचारा हो । समदत भई अनाहद वाणी कंसकान झनकारा हो ॥ ४ ॥ याके गर्भ अवतरें जे सुत करिहै प्राण प्रहारा हो । रथते उतरि केश गहि राजा कियो खड्ग पटतारा हो ॥ ५ ॥ तब वसुदेव दीनहैं भाष्यो पुरुष न त्रियवध करई हो ॥ मैं सुनी कान मंद विधि वाणी ताते संच न परई हो ॥ ६ ॥ आगे वृक्ष फरै जो विषफल वृक्षहि बिन किन सरई हो । ताहि मारि तोहि और विवाहों अग्रसोच क्यों मरई हो ॥ ७ ॥ बालक काज धर्म जनि छाँडौ राय न ऐसी कीजै हो । तुम मानी वसुदेव देवकी जीयदान इन दीजै हो ॥ ८ ॥ कीन्हो यज्ञ होत है निःफल वेद भंग नहि कीजै हो । याके गर्भ अवतरें जे सुत सावधान है लीजै हो ॥ ९ ॥ वाचाबंध कंस करि छाँड्यो तब वसुदेव पतीजे हो । मानौ मृगी चरत गहि वनमें नैन नीर उर भीजे हो ॥ १० ॥ प्रथम पुत्र देवकी जु जायो लै वसुदेव दिखायो हो । बालक देखि कंस हँसि दीन्हें सब अपराध क्षमायो हो ॥ कंस कहा लरिकारि कीन्ही कहि नारद समझायो हो । जाको भरम करतहो राजा मति पहिले सो आयो हो ॥ ११ ॥ यह सुनि कंस पुत्र फिरि मार्यो येहि विधि सबनि संहारो हो । तब देवकी भई तनु व्याकुल कहँ ले प्राणप्रहारो हो ॥ १२ ॥ कंस वंशको नाश करतहै कहाँलै जीव उबारौ हो । इह दुख कहा मेटिहै श्रीपति अरु हौं काहि पुकारौ हो ॥ १३ ॥ धेनुरूप धरि पुहुमि पुकारी शिव विरंचिके द्वारा हो । सब मिलि गये जहां पुरुषोत्तम सोवत अगम अपारा हो ॥ १४ ॥ क्षीर समुद्र मध्यते यों कहि दीरघ वचन उचारा हो ॥ उधरौ धराणि असुर कुल-

मारौ धरि नरतनु अवतारा हो ॥ १५ ॥ छूँछी मसक पवन पानी ज्यों तैसोइ जन्म विकारी हो ।
 पाखंड धर्म करतहैं पाँवर नाहिन चलत तुम्हारी हो ॥ १६ ॥ मारग छाँडि कुमारगसों रत
 बुधि विपरीति बिचारी हो । अमृत छाँडि विषय विष अचवत देत अधमपति गारी हो ॥ १७ ॥ सुर
 नर नाग तथा पशु पंछी सबको आयसु दीन्हों हो । गोकुल जन्म लेहु मेरे सँग जो चाहत सुख
 कीन्हों हो ॥ १८ ॥ दैवैकोष अकर्ख रोहिणी आपुन अंश जो लीन्हों हो । जेहि माया विरंचि शिव
 मोह्यो वोहि वाणि करि चीन्हो हो ॥ १९ ॥ अपनेहि गेह मधुपुरी आवन देवकि प्राणअधारा हो ।
 असुर मारि सुरसाध बढावन ब्रजजन सुखदातारा हो ॥ २० ॥ हरिके गर्भवास जननीको बदन उजारो
 लाग्यो हो । मानहु शरदचंद्रमा प्रगट्यो शोच तिमिर तनु भाग्यो हो ॥ २१ ॥ तेहि खन कंस आनि
 भयो ठाढो देखि महातम जाग्यो हो । अबकी बार अरी आयोहै आपु अपनपो त्याग्यो हो ॥ २२ ॥
 दिन दश गए देवकी अपनो वदन बिलोकन लागी हो । कंसकाल जिय जानि गर्भमें अति आनंद
 सभागी हो ॥ २३ ॥ सुर नर देव वंदना आये सोवत ते उठि जागी हो । अविनाशीको आगम
 जानी सकल देव अनुरागी हो ॥ २४ ॥ कछु दिन गए गर्भको आगम उर देवकी
 जनायो हो । कासों कहौ सखी कोउ नहीं चाहत गर्भ दुरायो हो ॥ २५ ॥
 बुध रोहिणी अष्टमी संगम वसुदेव निकट बुलायो हो । सकल लोकनायक सुखदायक अजन
 जन्म धरि आयो हो ॥ २६ ॥ माथे मुकुट सुभग पीतांबर उर शोभित भृगुरेखा हो । शंख चक्र भुज
 चारि बिराजत अति प्रताप शिशुभेषा हो ॥ २७ ॥ जननी निरखि भई तनु व्याकुल यह न चरित
 कहूँ देखा हो । बैठी सकुच निकट पति बोले दुहुँन पुत्र मुख पेखा हो ॥ २८ ॥ सुनि देवै एक आन
 जन्मकी तोसों कथा चलाऊँ हो ॥ तुम माँग्यो मैं दियो नाथ हौ तुमसों बालक पाऊँ हो ॥ २९ ॥
 शिव सनकादि आदि ब्रह्मादिक योग जापहू न आऊँ हो ॥ भक्तबछल वानो है मेरो बिरदहि कहा
 लजाऊँ हो ॥ ३० ॥ यह कहि माया मोह अरुझायो शिशुहै रोवन लागे हो । अहो वसुदेव जाहु लै गो
 कुल तुमहो परम सभागे हो ॥ ३१ ॥ घनदामिनि धरणीमिलि गरजै महाकठिन दुखभारे हो । आगे
 जाउँ यमुन जल बूडों पाछे सिंह दहारे हो ॥ ३२ ॥ लै वसुदेव धँसे दह सामुहि तिहुँलोक उजियारे हो ।
 जानु जंघ कटि ग्रीव नासिका वसुदेव मनहि बिचारे हो ॥ ३३ ॥ चरणपसारि परसि कालिंदी तरवा
 नीरते आगे हो । शेष सहस्रफन ऊपर छायो लै गोकुलको भागे हो ॥ ३४ ॥ पहुँचे जाइ महर
 मंदिरमें मनहि न शंका कीनी हो । देखी परी योगमाया वसुदेव गोद करि लीनी हो ॥ ३५ ॥ तुरत
 वेग मधुपुरी पहुँचे सकल प्रगट पुर कीनी हो । देवै गर्भ भईहै कन्या राइन बात पतीनी हो ॥ ३६ ॥
 यह सुनि कंस खड्गलै धायो तब देवै आधीनी हो । यह कन्या जु बकसु बंधुमोहिं दासी जान करिदीनी हो
 ॥ ३७ ॥ कूर कंस अघवंश न समुझै नवै नहीं रिसि कीनी हो । ना जानी होई छल कीन्हे आविगति
 गति को चीन्ही हो ॥ ३८ ॥ पटकत शिला गई आकाशहि दोउ भुज चरण लगाई हो ॥ गगन गई
 बोली सुरदेवी कंस मृत्यु नियराई हो ॥ ३९ ॥ जैसे मीन जालमाँ कूदत गनै न आपु लखाई हो ॥
 तैसे कंस काल ठूक्योहै ब्रजमें यादवराई हो ॥ ४० ॥ जैसे ब्यालवेग को ठूकै बेग पखारी ताकै हो ।
 जैसे सिंह आपु मुख निरखै परै कूपमें दाके हो ॥ ४१ ॥ तैसेहि कंस परम अभिमानी भूल्यो राज
 सभाके हो । गतिकी गति पतिकी पति तेरी हाथ मीजु है ताके हो ॥ ४२ ॥ यह सुनि कंस देवकी
 आगे रह्यो चरण शिरनाई हो । बहु अपराध करी शिशु मारे लिख्यो न मेख्यो जाई हो ॥ ४३ ॥ काके
 शत्रु जन्म लीनोहै बृहद्दु मतो बुलाई हो । चारि पहर सुख सेज परे निशिनेक नींद नहि आई हो ॥ ४४ ॥

देश देशके दूत बुलावहु कासों है छल कैसे हो । अविगत अजर अजीत अमरता करताको बल जैसे हो ॥ ४५ ॥ दिनही दिन सो पुरुष होतहै बढत असुर बल जैसे हो । बृझतमहि तृणभार बुझायो पवली कार्पन नैसो हो ॥ ४६ ॥ जागी महारि पुत्र मुख देख्यौ आनंद तूर बजायो हो ॥ कंचन कलश होम द्विज पूजा चंदन भवन लिपायो हो ॥ ४७ ॥ वरण वरण रंग ग्वाल बने मिलि गोपिन मंगल गायो हो ॥ बहुविधि व्योम कुसुम सूर वर्षत फूलन मंडप छायो हो ॥ ४८ ॥ आनंद भरे करत कौतूहल प्रेममगन नर नारी हो । अभय निभय नीसान बजावत देत महारिको गारी हो ॥ ४९ ॥ नाचत महर सुदित मन कीन्है ग्वाल बजावत तारी हो । सूरदास प्रभु गोकुल प्रगटे मथुरा गर्वप्रहारी हो । ॥ ५० ॥ अथ प्रथम लीला मथुराते गोकुल आए । राग विलावल ॥ हरिमुख देखिये वसुदेव । कोटिकाम स्वरूप सुंदर कोउ न जानत भेव ॥ चारि भुजा जाके चारि आयुध निरखि लैकर ताउ । जोपै मन परतीत आवै बाबा नंद घर लैजाउ ॥ श्वान सूते पहरुआ सब नींद उपजी गेह । निशि अँधेरी बीजु चमकै सघन वरपै मेह ॥ झरे ताला पहरु पौढे खुलिये वज्रकेंवार । बाँदिवेरी सबै छूटी कहौ कौन विचार ॥ सिंह आगे शेष पाछे यमुना भई भरपूर ॥ नासिका बहु नीर आए पार पहिलो दूर ॥ कृष्णने हुंकार छोड्यो यमुना मान्योहेत । चरण परसत थाह दीन्हों वसुदेव उतरे सेत ॥ देत अंमर और कंमर फूली अँग न समाइ । भिक्षुक भाट सब द्वार ठाढे देखै यशोमति आइ ॥ नंदसों मनुहार करिहौ सुनि न लेहु वसुदेव । सूर सुतही जानि अपनो कृष्णको करि सेव ॥ १॥ २॥ ३॥ ४॥ राग केदारी ॥ हो पिय सो उपाय कछु कीजै । जेहि तेहि बिधि दुराय इह बालक राखि कंससों लीजै ॥ मनसा वाचा कहत कर्मना नृपतिहि नहीं पतीजै । बुधि बल छल कल कैसेहूँ करिकै काटि अनत लैदीजै ॥ नाहिन यतनो भाग सो यह रस नित लोचन पट पीजै । सुनहु सूर ऐसे सुतको मुख निरखि निरखि जग जीजै ॥ ५ ॥ राग केदारा ॥ सुन देवकीको हितु हमारे । असुर कंस अपवंश बिनाशन शिरपर बैठैहैं रखवारे ॥ ऐसो को समरथ त्रिभुवनमें जो यह बालक नेक उबारै । खड्ग धरे आयो तो देखत अपने कर क्षणमाह पछारे ॥ यह सुनतहि अकुलाइ गिरीधर नैन नीर भरिभरि दोउ डारे । दुखित देखि वसुदेव देवकी प्रगट भये धरि कै भुज चारे ॥ बोलत उठे प्रतिज्ञा प्रभु यह मति उबरै तब मोहिं मारे । अति दुखमें सुख दै पितु मातहि सूरको प्रभु नन्दभवन सिधारे ॥ ६ ॥ भादोंभरकी राति अँधियारी । द्वारकपाट कोटभट रोके दशहुँदिशि कंस भयं भारी ॥ गर्जत मेघ महा डर लागत बीच बढी यमुना जल कारी । तबते इहै शोच जिय मेरे क्यों दुरिहै शशिवदन उज्यारी ॥ कतपिय बोल बचन करिराखी वरु ताहीदिन जीवनमारी । कहि जाको ऐसो सुत बिछुरै सो कैसे जीवै महतारी ॥ करि न बिलाप देवकीसों कहि दीनदयालु भक्त भयहारी । छुटिगयो निबिड तबहि गए गोकुल सूर सुमति दै बिपति निवारी ॥ ७ ॥ राग धनाश्री ॥ अँधियारी भादोंकी राति । बालकको वसुदेव देवकी पठै पठै पछिताति ॥ बीच नदी घन गर्जत वर्षत दामिनि कौंधत जाति । बैठत उठत सेज सोवरिमें कंस डरनि अकुलाति ॥ गोकुल बाजत सुनी बधाई लोगन हेरि सिहाति । सूरदास आनंद नंदके देत कनक नगदाति ॥ ८ ॥ विहागरो ॥ देवकी मन मन चकृत भई । देखहु आइ पुत्र मुख काहेन ऐसी कहूँ देखि नदई ॥ शिरपर मुकुट पीत उपरेना भृगुपद उर भुजचारि करे । पूरबकथा सुनाइ कही हरि तुम माँग्यो वह वेषधरे । छूट निगड सो आये पहरु द्वारेको कपाट उचारयो । तुरत मोहिं गोकुल जावहु ले यह कहति शिशुभेष धरयो ॥ वसुदेव तबहि उठे यह सुनतहि हर्षवंत नन्दभवन गये ॥ बालक धरयो लाई सुरदेवी आइ सूर मधुपुरी भये ॥ ९ ॥ राग विलावल ॥ आनंदे आनंद बढ्यो अतिदेवन

दइ दुंदुभी बजाई सुनि मथुरा प्रगटे यादवपति ॥ विद्याधर किन्नरी कंठधर उपजावत अनुराग
 अमित अति । गावत गगन धरणि ध्वनि सुनियत गर्जत घन तेहि काल जतनजति ॥ वर्षत सुमन
 सुदेश सूर सुरजयजयकार करत मानत रति ॥ शिव विरंचि इंद्रादि सनक मुनि फूले सुख न समात
 मुदितमति ॥ १० ॥ कमलनयन शशिवदन मनोहर देखिए होपति अति विचित्रगति । श्याम सुभगतनु
 पीतवसन दुति उर वाने सोहै अद्भुत अति ॥ नख मणि मुकुट प्रभा अति उदित चितै चकृत उनमान नया
 वति । अति प्रकाश निशि बिमल तिमिर छुटि कलमलि मलि पतिहि जगावति ॥ दर्शन सुखी दुखी अति
 शोचत पटसुत शोक सुरति उर आवति । सूरदास प्रभु लेहु पुराकृत भुजके चिह्न दुरावति ॥ ११ ॥
 गोकुल प्रगटभए हरि आई । अमर उधारन असुर सँहारन अंतर्यामी त्रिभुवनराई ॥ माथेपर धरि
 वसुदेव ल्याए नंदमहर घरगे पहुँचाई ॥ जागी महारि पुत्रमुख देखत पुलक अंग उरमें न समाई ।
 गद्गद कंठ बोल नहिँ आवै हर्षवत ह्वै नंद बुलाई ॥ आवहु कंत देव परसन भए पुत्र भयो मुख
 देखौ धाई । दौरि नंद गए सुतमुख देख्यो सो शोभा सुख बराणि न जाइ ॥ सूरदास पहिले यह माँग्यो
 दूध पिआवन यशुमति माइ ॥ १२ ॥ जागी महारि पुत्रमुख देख्यो आनंद तूर बजाइ । कंचन कलश
 हेम द्विजपूजा चंदन भवन लिषाइ ॥ दिनदशहीते वर्षे कुसुमनि फूलन गोकुल छाइ । नंद कहै
 इच्छा सब पूजा मनवांछित फल पाइ ॥ आनंदभरे करत कौतूहल उदित मुदित नर नारी । निर्भय
 भए निशान बजावत देत निशंके गारी ॥ नाचत महर मुदित मन कीनो प्वाल बजावत तारी । सूरदास
 प्रभु गोकुल प्रगटे मथुरा कंस प्रहारी ॥ १३ ॥ नंदराइके नवनिधि आई । माथे मुकुट श्रवण
 मणि कुंडल पीतवसन भुजचारु सुहाई ॥ बाजत ताल मृदंग यंत्रगति चरचि अरगजा अंग चढाई ।
 अक्षत दूब लिए शिरबंदत घर घर बंदनवार बधाई ॥ छिरकत हरद दही हिय हर्षत गिरत अंक
 भरि लेत उठाई । सूरदास सब मिलत परस्पर दान देत नहिँ नंद अचाई ॥ १४ ॥ आजु वन कोऊ
 जिनि जाइ । सबै गाइ और बछरा समेत सब आनहु चित्र बनाइ ॥ ढोटा है रे भयो महारिके कहत
 सुनाइ सुनाइ । सबहिँ घोषमें भयो कोलाहल आनंद उर न समाइ ॥ कतहौ गहर करत
 रे भैया वेगि चलो उठि धाई । अपने अपने मनको चीत्यौ नैननि देखौ आइ ॥ एक
 फिरत दधि दूब बँधावत एक रहत गहि पाइ । एक परस्पर करत बधाई एक उठत हँसि गाइ ॥
 तरुण किशोर वृद्ध अरु बालक बैठ चौगुने चाइ । सूरदास सब प्रेम मगन भए गनत न राजा राइ ॥
 ॥ १५ ॥ राग रामकली ॥ हौं एक बात नई सुनि आई । महारि यशोदा ढोटा जायो घर घर होत
 बधाई ॥ द्वारे भीर गोप गोपिनके महिमा वरणि न जाई । अति आनंद होत गोकुलमें रत्न भूमि सब
 छाई ॥ नाचत तरुण वृद्ध अरु बालक गोरस कीच मचाई । सूरदास स्वामी सुखसागर सुन्दर श्याम
 कन्हाई ॥ हौं सखी नई चाह एक पाई । ऐसे दिनन नंदके सुनियत उपजे पूत कन्हाई ॥ बाजत
 पवन निशान पंचविधि रंज सुरज सहनाई । महर महारि ब्रज हाट लुटावत आनंद उर न समाई ॥
 चलौ सखी हमहुं मिलि जैये वेगि करौ अतुराई । कोउ भूषण पहिरयो कोउ पहरति कोउ वैसेहि
 उठि धाई ॥ कंचन थार दूब दधि रोचन गावत चली बधाई । भौंति भौंति बनि चली युवति गण यह उपमा
 मोपै नहिँ आई ॥ अमर बिमान चढे सुर देखत जयध्वनि शब्द सुनाई । सूरदास प्रभु भक्त हेतु हित
 दुष्टनके दुखदाई ॥ १६ ॥ राग गूजरी ॥ सखी री काहेको गहरु लगावति । सुतको जन्म यशोदाके गृह
 तालगि तुमहिँ बुलावति ॥ कनकथार भरि लै दधि रोचन वेगि चलौ मिलि गावति । साँचहु सुत
 भयो नंदनायकके हौं नाहिँन बौरावति ॥ आनंद उर अंचल न सँभारति शीश सुमन वरषावति ।

सूरदास शोभा तेहि अवसर जहाँ तहाँते आवति ॥ १७ ॥ राग आसावरी ॥ ब्रज भयो महरके पूत
 जब यह बात सुनी । सुनि आनंदे सब लोग गोकुल गनक गुनी ॥ अति पूरब पूरे पुण्यरूपी कुल
 अटल धुनी । ग्रहलग्न नक्षत्र बल शोधि कीनी वेद ध्वनी ॥ सुनि धाई सबै ब्रजनारि सहज शृंगार
 किए । तनु पहिरे नौतन चीर काजर नैन दिये ॥ कसि कंचुकि तिलक लिलार शोभित हार हिये ।
 करकंकन कंचनथार मंगलसाज लिये ॥ शुभ श्रवणनि तरल बनाइ वेनी शिथल गुही । सुर वर्षत
 सुमन सुदेश मानौ मेघ फुही ॥ मुखमंडित रौरी रँग मँदुर माँग छुही ॥ ते अपने अपने मिलि
 निकसी भाँति भली ॥ मनु लाल मननकी पाँति पिंजर चूरि चली । गुण गावाहिं मंगल गीत मिलि
 दश पाँच अली । मनु भोर भए रवि देखि फूली कमलकली ॥ पिय पहिले पहुँची जाइ अति
 आनंद भरी । लई भीतर भवन बुलाय सबै शिशुपाइ परी ॥ एक वदन उधारि निहार देहि अशीश
 खरी । चिरजिवो यशोदानंद पूरणकामकरी ॥ धनि धनि दिन धनि राति धनि यह पहर घरी । धन धन्य
 महरिकी कूख भाग सुहाग भरी ॥ जिन जायो ऐसो पूत सब सुखफलनि फरी । थाप्यो थिर परिवार मनकी
 शूल हरी ॥ सुनि ग्वालनि गाइ बहोरि बालक बोलि लये । गुहि गुंजा घसि वनधातु अंगनि चित्र
 ठये ॥ शिर दधि माखनके माट गावत गीत नये । कर झाँझ मृदंग बजाइ सब नंद भवन गये ॥ मिलि
 नाचत करत कलोल छिरकत हरद दही । मानो वर्षत भादों मास नदी घृत दूध बही ॥ जाको जहाँ जहाँ
 चित जाइ कौतुक तहीं तहीं ॥ सब आनंद मगन गुवाल काहू वदत नहीं ॥ एक धाय नंदपै जाइ पुनि पुनि
 पायँ परै । एक आपुन आपुहि माहिँ हँसि हँसि अंक भरै ॥ एक अंबर उतारत अंगदेत न शंक करै ।
 इक दधि अक्षत अरु दूब सबनके शीश धरै ॥ तब न्हाइ नंदभए ठाढे अरु कुश हाथ लिये । घसि
 चन्दन चारु मँगाइ विघ्न तिलक किए ॥ नान्दीमुख पित्र पुजाइ अंतर शोच हरे । गुरुजन द्विजन
 पहिराइ सबनिके पाँइ परे ॥ गैयां गनी न जाहि तरुणि सब बच्छबढी । ते चराहिँ यमुनके कच्छ दूने
 दूध चढी ॥ सुर तौबे रूपे पीठि सोने शृंग मढीते दीनी द्विजन अनेक हरषि अशीश पढी ॥ तब अपने
 मित्र सुबंधु हँसि हँसि बोलि लिए । मथि मृगमद मलय कपूर सबनके तिलक किए । उर मणिमाला
 पहिराय सबन विचित्र ठए ॥ दान मान परधान पूरणकाम किए ॥ वरमागध बंदी सूत आँगन भवन
 भरे । ते बोले लैलै नाम क्रीडत विवश परे ॥ जिन यांच्यो जोइ दीन रस नंदराय ठरे । मानो वर्षत मास
 अपाढ दादुर मोर रेरे ॥ तब अंमर और मँगाइ सारी सुरंग घनी । ते दीनी वधुन बोलाइ जैसी जाहि
 बनी । ते बहुरी अति आनंद निज गृह गोप घनी ॥ ते निकसीं देत अशीश रुचि अपनी अपनी ।
 घर घर भेरि मृदंग पटह निशान बजे ॥ वारन बंदनवार अरु ध्वज कलश सजे ॥ तादिनते वे लोग सुख
 संपति नतजे । कहि सूर सबनकी यह गति जे हरिचरण भजे ॥ १८ ॥ राग धनाश्री ॥ आजु नंदके
 द्वारे भीर । एक आवत एक जात बिदा होइ एक ठाढे मंदिरके तीर ॥ कोउ केसर कोउ तिलक
 बनावत कोउ पहिरत कंचुकी चीरा ॥ एकनको दै दान समर्पित एकनको पहिरावत चीरा ॥ एकनको भूषण-
 पाटम्बर एकनको जो देत नग हीर । एकनको पुहुपनकी माला एकनको चंदन घसि वीरा ॥ एकनको
 तुलसीकी माला एकनको राखत दै धीर । सूरश्याम घनश्याम सनेही धन्य यशोदा पुण्य शरीर ॥ १९ ॥
 गौरी ॥ गोपी गावाहिं मंगलचार बधायो ब्रजराजको ॥ अब भयउ अमर सब काज बधायो ब्रजरा-
 जको ॥ रानी जायोहै मोहनपूत बधायो ब्रजराजको । बहुत नारि सुभाग सुंदरि और घोषकुमारि ।
 सजन प्रीतम नाउ लैलै देहिं परस्पर गारि ॥ आनंद स्तुति अतिशय भयो घर घर नृत्य
 कामहि ठाउँ । नंदद्वारे भेट लैलै उमझोहै गोकुल गाउँ ॥ साथि ये बनाइकै देहिं द्वारे सात सीक

बनाय । नवकिशोरी मुदितहै है गहति यशुदाजीके पाँय ॥ चौके चंदन लीपिकै आरति धरी सँजोइ ।
 कहत घोषकुमारि ऐसो आनंद जो नितहोइ ॥ करि करि अलंकृत गोपिका पहिरे सुभूषण चीर ।
 गाइ बच्छ सँवारि ल्याये ग्वालनकी भै भीर ॥ मुदित मंगल सहित लीला करहि गोपी ग्वाल ।
 हरद अक्षत दूब दधि लै तिलक करहिं ब्रजबाल ॥ एक हेरी देहि गावहिं एक भेटहिं धाइ । एक एक
 न गनै काहु इक खेलावत गाइ ॥ एक विरध किशोर बालक एक यौवन योग । कृष्ण जन्म सुप्रेमसागर
 क्रीडत सब ब्रजलोग ॥ प्रभु मुकुंदके हेतु नवतनु होहि घोष विलास । देखि ब्रजकी संपदाके फूलेहैं
 सूरदास ॥ २० ॥ आजु बधायो नंदराइके गोपी गावहिं मंगलचार ॥ आई मंगल कलश साजिकै
 ता ऊपर फलडार । अक्षत रोचन दूब लै चलीं बहु बिधि फल भरे थार ॥ घरन घरनते गावत चलीं
 ब्रजवधूझुंड अपार ॥ चलीं सब मिलि महरके घर देखन नंदकुमार । देखि मोहन आश पूरी सबै देति
 अशीश । नंदमहरके लाडिले तुम जिऔ कोटि बरीश ॥ उरमें लैहैं नंदरायके गोप सखन मिलि
 हार । मागध बंदी जन अति क्रीडत बोलत जैजैकार ॥ महरि दान जु बहुत दीनो अरु दियो नंदराइ ।
 ऐसो सुख देखौ सखी जन सूरदास बलि जाइ ॥ २१ ॥ धनि धनि नंद यशोमति धनि जग पावनिरे ।
 धनि हरिलियो अवतार सुधनि दिन आवन रे । दक्षयें मास भयो पूत पुनीत सुहावन रे । शंख
 चक्र गदापद्म चतुर्भुज भावन रे ॥ बनि बनि ब्रजसुंदरि चलीं सुगाइ बधावन रे । कनकथार रोचन
 दधि तिलक बनावन रे ॥ नंद घरहिं चलि गाइ महरि जहां पावन रे । पाँइनि परि सब वधू महरि बैठाव
 न रे ॥ यशुमति धनि यह कोखि जहां रहे बावन रे । भले सुदिन भयो पूत अमर अज रावन रे ॥ युग युग
 जीवहु कान्ह सबनि मनभावन रे । गोकुल हाट बजार करत जु लुटावन रे ॥ घर घर बजै बधाव नगर हरि
 आवन रे ॥ अमर नगर उत्साह अप्सरा गावन रे ॥ ब्रह्म लियो अवतार दुष्टके दावन रे । दान सबै जो देत वर्षि
 जनु सावन रे ॥ मागध मूत भाट धन लेत जु रावन रे । चोवा चंदन अबीर गली छिरकावन रे ॥ ब्रह्मादिक
 सनकादिक गगन भरावन रे । कश्यप ऋषि सुर तात सुलगन गनावन रे ॥ तीनि भुवन आनंद कंसहि
 डरावन रे । सूरदास प्रभु जन्मे भक्त हुलसावन रे ॥ २२ ॥ राग कल्याण ॥ शोभासिंधु न अंत रही री ।
 नंदभवन भरिपूर उमंग चली ब्रजकी बीथिनि फिरति बही री ॥ देखी जाइ आजु गोकुलमें घर घर
 बेचत फिरति दही री । कहाँलगि कहैं बनाइ बहुत बिधि कहत न मुख सहसहु निबही री ॥ यशुमति
 उदर अगाध उदधिते उपजी ऐसी सबन कही री । सूरश्याम प्रभु इन्द्र नील मणि ब्रजबनिता
 उरलाइ गुहरी ॥ २३ ॥ राग काफी ॥ आजु निशान बाजै नंद महरिके । आनंद मगन नर गोकुल
 शहरके । आनंदभरी यशोदा उमंगि अंग न समाति आनंदित भई गोपी गावति चहरके ॥ दूब
 दधि रोचन कनकथार लैलै चलीं मानों इंद्रबधू जुरि पांतिनि बहरके । आनंदित भए ग्वाल बाल
 करत विनोद ख्याल भुजभरि धरि अंकमदै वरहरिके ॥ आनंदमगन धेनु थन सबै पय फेनु
 उमंग्यो यमुनजल उछलै लहरके । अंकुरित तरु पात उकठि रहे जे गात वनवेली प्रफुलित कलिन
 कहरके । आनंदित विप्रसुत मागध याचक गण उमंगे अशीश देत तरह तरह हरिके ॥ आनंदमगन
 सब अमर गगन छाए पुहुप बिमान चढ़े पहर पहरके । सूरदास प्रभु आइ गोकुल प्रगट भए संतन
 भयो हरष दुष्टजन मनदहरके ॥ २४ ॥ माई आजु हो बधायो बाजै नंदगोपराइके । यदुकुल यादव
 जन्मेहैं आइके ॥ आनंदित गोपी ग्वाल नाचें करदेदै ताल अति अहलाद भयो यशुमति माइके । शिर
 पर दूब धरि बैठे नंद सभा मधि द्विजनको गाइ दीनी बहुत मँगाइके । कनकमाट मँगाइ हरद दही
 मिलाय छिरकैं परस्पर छलबल धाइके ॥ आठैं कृष्णपक्ष भादौ महरके दधिकादौ मोतिन बँधायो

वार महलमें जाइकै ॥ ढाढी और ढाढिनि गावै हरिके ठाढे बजावै हरपि अशीश देत मस्तक नवाइकै ।
 जोई जोई मांग्यो जिनि सोई सोई पायो तिनि दीजै सूरदास दर्श भक्तन बुलाइकै ॥ २५ ॥ राग जैतश्री ॥
 आजु बधाई नंदके माई । सुन्दर नंद महरके मंदिर । प्रगट्यो पूत सकल सुखकंदर ॥ यशुमति
 ढोंटा ब्रजकी शोभा । देखि सखी कछु औरै लोभा ॥ लक्ष्मीसी जहां मालिनबोलै ।
 बंदन माला बांधत डोलै ॥ द्वार बुहारत फिरत अष्टसिधि । कौरन सथिया चींतत नवनिधि ॥ गृह
 गृहते गोपी गावतीं जब । रंगीली गलिनबिच भीर भई तब ॥ सोवरनथाल रही हाथन लसि ।
 कमलन चढि आए मानो शशि ॥ उमंगे प्रेमनदी छवि पावै । नंद नंद सागरको धावै ॥ कंचन कलश
 जगमगे नग को भागे सकल अमंगल जगके ॥ डोलत ग्वाल मानो रणजीते । भये सबहि के मनके
 चीते ॥ अति आनंद नंद रस भीने । पर्वत सात रत्नके दीने ॥ कामधेनुते नेक नवीने । द्वैलख
 धेनु द्विजनको दीने ॥ नंदद्वार जे याचन आए । बहुरो फिरि याचक न कहाए ॥ घरके ठाकुरके
 सुत जायो । सूरदास तब सब सुख पायो ॥ २६ ॥ राग विलावल ॥ आज गृहनंद महरिके बधाई ।
 प्रात समय मोहन मुख निरखत कोटि चंद्र छविपाई ॥ मिलि ब्रजनारी मंगल गावत नंदभवन में आई ।
 देति अशीश जियो यशुदासुत कोटि वर्ष कुँवरकन्हई ॥ अति आनंद बढ्यो गोकुलमें उपमा कही
 न जाई । सूरदास धनि नंदघरनिहै देखत नैन सिराई ॥ २७ ॥ राग जैजैवती ॥ माई आजु तो बधाई
 बाजै मंदिर महरके । फूले फिरैं गोपी ग्वाल ठहर ठहरके ॥ फूली धेनु फूले धाम फूली गोपी अंग
 अंग । फूले फिरि तरुवर आनंद लहरके ॥ फूले बंदीजन द्वारे फूले फूले बंदनेवार । फूले जहां जोइ
 सोइ गोकुल शहरके ॥ फूले फिरैं यादव कुल आनंद समूल मूल । अँकुरित पुण्य फूले पिछले पहरके ॥
 उमंगे यमुनाजल प्रफुलित कुंज पुंज । गर्जत कारे भारे यूथ जल धरके ॥ नृत्यत मदन फूले फूली
 रति अंग अंग ॥ मनके मनोज फूले हलधर हरिके । फूले द्विज संत वेद मिटिगयो कंस खेद ॥
 गावत बधाई सूर भीतर बहरके ॥ फूलीहै यशोदा रानी सुत जायो शारंग पानी भूपति उदार
 फूल भार फरे घरके ॥ २८ ॥ जैतश्री ॥ नंदजू मेरे मन आनंद भयो हैं गोवर्धनते आये । तुमरे
 पुत्र भयो मैं सुनिकै अतिआतुर उठिधायो ॥ बंदीजन अरु भिक्षुक सुनि सुनि दूरि दूरिते आयो । इक
 पहिलेही आशा लागे बहुत दिननके छाये ॥ तें पहिरे कंचन मणि भूषण नानावसन अनूप । मोहि
 मिले मारगमें आवत मानों जात कहूके भूप ॥ तुमतौ परम उदार नंदजू जिन जो मांग्यो सो दीनो
 ऐसो और कौन त्रिभुवनमें तुम सरि साको कीनो ॥ कोटि देहु तौ रुचि नहिं मानों बिन देखे नहिं जैहों
 नंदराय सुनि बिनती मेरी तबहिं विदाभले हैहों ॥ दीजै मोहि कृपा करी सोई जो हों आयो मांगन । यशु-
 मति सुत अपने पाँइन जब खेलत आवै आंगन ॥ जब तुम मदन मोहन करि टेरो इहि सुनिकै घरजाऊं ।
 हों तो तेरो घरको ठाढ़ी सूरदास मेरो नाऊं ॥ २९ ॥ मैं घरको ढाढ़ी हों तिहारो को मोसर करै आन ।
 सोई लैहों जो मो मनभावै नंदमहरकी आन ॥ धन्य नंद धनि धन्य यशोदा धनि धनि जायो पूत ।
 धन्य भूमि ब्रजवासी धनि धनि आनंद करत अकूत ॥ घर घर होत अनंद बधाई जहाँ तहाँ मागध
 सूत । मणि माणिक पाटंबर देते लेत न बनत बहुत ॥ हय गय सबन भंडार दिये सब फेरिभरेसेभाति ।
 जबहिं देत तबहीं फिरि देखत संपति घर न समाति ॥ ते मोहि मिले जात घर अपनेमें वृद्धी
 तब जाति । हँसि हँसि दौरि मिले अंकम भरि हम तुम एकै ज्ञाति ॥ संपति देहु लेहु नहिं एकौ अन्न
 वस्त्र केहि काज । जोहों तुमसों मांगन आयो सो लेहों नंदराज ॥ अपने सुतको वदन देखावहु
 बडे महर शिरताज । तुम साहब मैं ढाढ़ी तेरो प्रभु मेरे ब्रजराज ॥ चन्द्रवदन दरशन संपति दै सो

मैं लै पुरजाउँ । सो संपति सनकादिक दुर्लभ सो है तुमरे ठाउँ ॥ जाको नेति नेति श्रुति गावत तेउ
 कमलपद धाऊँहौं तेरो जन्म जन्मको ढाढी सूरदास कहि गाऊँ ॥ ३० ॥ राग केदारो ॥ नंद उदौ सुनि
 आयोहो वृषभानुको जगा । देवको बडो महर देत न लावै गहर लालकी बधाई पाऊँ लालको झगा ॥
 प्रफुलित हैकै आन दीनहै यशोदा रानी झीनीए झगुली तामें कंचनको तगा । नाचै फूल्यो
 आँगनाइ सूर बखशीश पाइ माथेकै चढाई लीनो लालको वगा ॥ ३१ ॥ राग धनाश्री ॥ यशोमति
 लटकति पाँइ परै । तेरो भलो मनाइहौं झगरी न तूमति मनहि डरै ॥ दीन्हों हार सबै कर कंकण
 मोतिन थार भरै । सूरदास स्वामी प्रगटेहैं अवसर पाइ झगरै ॥ नंद जु दुःख गयो सुख
 आयो सबन्हको दियो पुत्र फल मानौ । तुमरो पुत्र प्राण सबहिनको भवन चतुर्दश जानौ ॥ हौं तो
 तुम्हारो घरको ढाढी नावसेन सजपाउँ । गृह गोवर्धन वास हमारो घर तंजि अनत न जाउँ । ढाढिनि
 मेरी नाचै गावै हौंही ठाढो बजावौं ॥ हमरो चींत्यो भयो तुम्हारे जो मांगों सो पावौं । अब तुम मोको
 करो अयाची जो ग्रह गेह बिसारैं ॥ द्वारे रहैं देहु एक मंदिर श्यामस्वरूप निहारैं । हँसि ढाढिनि ढाढी
 सों बोली अब तू वरणि बधाई । ऐसो दियो न देहै सूर कोउ यशोमति हौं पहिराई ॥ ३२ ॥ ढाढिनि
 दान मानकी भाई । नंद उदार भए पहिरावत बहुत भलै बनिआई ॥ जब जब जन्म धरौं ढाढीको
 जन्म कर्म गुण गाऊँ । अर्थ धर्म कामना मुक्तफल चार पदारथ पाऊँ ॥ लै ढाढिनि
 कंचनमणि मुक्ता नाना वसन अनूप । हीरा रतन पाटंबर हमको दीन्हें ब्रजके भूप ॥
 अब तो भली भई नारायण दरशे नैन निरखि निधि पाई । जहां तहां बंदनवार बिराजत घर
 घर बजत बधाई ॥ जो याच्यो सोई तिन पायो तुमरि बई बिदाई ॥ भक्ति देहु पालने झुलावों
 सूरदास बलिजाई ॥ ३३ ॥ छठीव्यवहार ॥ ६ ॥ राग सारंग ॥ गौरि गणेश बिनऊँ हो देवी शारद तोहि ॥
 गाऊँ हरिजीको साहेलो मन और आवै मोहि । बधावो हरिको मन रहिबो रानी जायोहै मोहन पूत ॥
 घर आँगन बाहेर सब मांगे ठाढे मागध सूत । आठ मास चंदन पियोहो नवए पियो कपूर ॥ दशयें-
 मास मोहनभए मेरे आँगन री बाजै धतूर । हर्षी पार परोसिनि भए हरष नगरके लोग ॥ हर्षी सखी
 सहेलरी सब आनंद भयो सुखयोग ॥ बाजन बाजे गहगहे मिलि बाजै शारद भेरी ॥ मालिनि बांधै तोरन
 मेरे आँगन री रोपै आछेकरी । आने गढ़ि सोना ढोलना पढिलाये चतुर सुनार ॥ बिच बिच हीरा
 लगे नंदलाल गरेको हार । यशुमति भाग सुहागिनी जिन जायो हरिसों पूत । करहु ललनकी
 आरती री अरु दधिकौंदौ सूत । नाउनि बोलहु नवरंगी लै आवहु महावर वेग ॥ लाखटका अरु
 झूमकसारी देहु दाईको नेग । अगर चंदनको पालनो गढई गुर ढार सुढार ॥ लै आयो गढि ढोलनी
 विश्वकर्मा सो सुतधार । धन्य सो दिन धन्य सो घरी धन्य सो जोतिक जाग ॥ धन्य धन्य मथुरापुरी हो
 धनि धनि महरिको भाग ॥ धनि धनि मातु देवकी धनि धनि वसुदेव सुजान ॥ धनि धनि
 भादौ अष्टमी धनि जन्म लियो जब कान्ह । काढहु कोरे कापर हो अरु काढौ घीकी मौन ॥
 जाति पाँति पहिरायकै सब समदि छतीसौ पौन । काजर रोरी आनोरी मिलि करौ छठीको
 जार ॥ एपनकीसी पूतरी सब सखियन कियोहै शृंगार । क्रीट सुकुट शोभाबनी शुभअंग
 बनी वनमाल ॥ सूरदास प्रभु गोकुल जनमे मोहन मदन गोपाल ॥ ३४ ॥ राग काफ़ी ॥
 अति परम सुंदर पालनागढि ल्याव रे बढैया । शीतल चंदन कटाउ धरि खरादि रंग
 लगाउ विविध चौकी बनाउ रंग रेशम लगाउ हीरा मोती लाल मढैया ॥ विश्वकर्मा सुढार रच्या
 है काम सुनार मणि गणि लागे अपार नंदमहर सुत काज अढैया । आनि धरचो नंदद्वार अतिही

सुंदर सुदार ब्रजबधू देखैं बारबार शोभा नहिं बारबार धनि धनि धन्यहै गढैया ॥ पालनो आन्यो
 सबहि अति मनमान्यो नीको सो दिन धराइ सखिन मंगल गवाय रंगमहलमें पौड्योहै
 कन्हैया ॥ सूरदास प्रभुकी मैया यशुमति नंदरानी जोई माँगत सोई लेत बधैया ॥ ३५ ॥ राग
 जयतंश्री ॥ ब्रजको जीवन नंदलाल । असुर निकंदन भक्तपाल ॥ कनकरतन मणि पालनौ अति गढ्यो
 काम सुतहार । विविध खेलौना भाँति भाँतिके गजमुक्ता बहुधार । सुभग पालने झूलैं हो नंदलाल ।
 मात पिता सुकृत फल जगपाल । जननि उबटि अन्हवायकै अतिक्रमसों लीनों गोद । पौढाये पट
 पालने शिशु निरखि जननि मनमोद ॥ अतिकोमल दिन सातके अधर चरण कर लाल । सूरश्याम
 छवि अरुणता निरखि हरषि ब्रजवाल ॥ ३६ ॥ राग धनाश्री ॥ यशोदा हरि पालने झुलावै । हल
 रावै दुलराइ मल्हावै जोइ सोई कछु गावै ॥ मेरे लालको आउ निदरिया काहे न आनि सुवावै ।
 तू काहे न वेगीसी आवै तोको कान्ह बुलावै ॥ कबहुँ पलक हरि मूँदिलेतहैं कबहुँ अधर फरकावै ।
 सोवत जानि मौन है है रही कर करि सैन वतावै ॥ इहि अंतर अकुलाइ उठे हरि यशुमति
 मधुरै गावै । जो सुख सूर अमर मुनि दुर्लभ सो नंदभामिनि पावै ॥ ३७ ॥ राग गौरी ॥ हालरो
 हलरावै माता । बलि बलि जाउँ घोष सुखदाता ॥ यशुमति अपनो पुण्य बिचारै । बारबार शिशु
 वदन निहारै ॥ अँग फरकाय अलप मुसकानो । या छवि पर उपमाको जानो ॥ हलरावति गावति
 कहि प्यारे । बालदशाके कौतुक भारे । महारि निरखि सुख हिय हुलसानी ॥ सूरदास प्रभु शारंगपानी ॥
 ॥ राग धनाश्री ॥ कन्हैया हालरुरे । गढि गुढिरयायो बढई बलि हालरुरे ॥ धरनि पर डिलाइ
 एक लख माँगै घढई बलि हालरुरे । दुइ लख बाबा नंदजी देहीं ॥ काहेको तेरो पालना बलि हाल
 रुरे ॥ कहिलागी डारे । रतन जडितको पालना बलि हालरुरे ॥ रसम लागी डोरा ॥ कबहुँक झूलै पाल-
 ना बलि हालरुरे । कबहुँक नंदजीकी गोद झूलैं सखी झुलावहीं बलि हालरुरे ॥ सूरदास बलि जाहीं
 ॥ ३८ ॥ अय पूतनावध ॥ आजु हौं राजकाज करि आऊँ । बेगि सँहारौं सकल घोष शिशु जो मुख
 आयसु पाऊँ ॥ तौ मोहन मृच्छन वशीकरन पढ़ि अमित देह बढाऊँ । अंगसुभग सजिकै मधु मूरति
 नयननि माहँ समाऊँ ॥ घसिकै गरल चढ़ाइ उरोजनि लै रुचिसों पयप्याऊँ । सूरदास प्रभु जीवत
 ल्याऊँ तौ पूतना कहाऊँ ॥ ३९ ॥ विहागरो ॥ कंसराय जिय शोच परी । कहाकरौं काको ब्रज
 पठऊँ विधना कहा करी ॥ बारंवार विचारत मनमें भूप नींद बिसरी । मूर बुलाइ पूतनासों
 कह्यो करु न विलंब घरी ॥ ४० ॥ राग धनाश्री ॥ रूप मोहनी धरि ब्रज आई । अद्भुत साजि शृंगार
 मनोहर असुर कंसदै पान पठाई ॥ कुच त्रिषबाँटि लगाइ कपटकरि बालघातिनी परम सुहाई । बैठी
 हुती यशोदामंदिर दुलरावति सुत श्याम कन्हवाई । प्रगटभई तहां आइ पूतना प्रेरितकाल अवधि
 नियराई ॥ आवतपीठा बैठन दीनो कुशलवृद्धि अति निकट बुलाई ॥ पौढाये हरि सुभगपालने
 नंदघरनि कछु काज सिधाई । बालक लियो उछंग दुष्टमति हर्षितअस्तनपान कराई ॥ वदन निहारि
 प्राण हरिलीनो परी राक्षसी योजनताई । सूरज दै जननीगति ताको कृपाकरी निजधाम पठाई ॥ ४१ ॥
 प्रथम कंस पूतना पठाई । नंदघरनि जहँ सुतलिण बैठी चलि तेहि धामहि आई ॥ अति मोहनी
 रूप धरि लीनो देखत सबहीके मन भाई । यशुमतिरही देखि वाको मुख काकी बधू कौनयों आई ।
 नंदसुवन तबहीं पहिचानी असुर घरनि असुरनकी जाई ॥ आपुन वज्र समान भए हरि
 माता दुखित भई भरपाई । अहो महारि पालागन मेरो हों तुम्हरो सुत देखन आई । यह कहि गोद
 लियो अपनेतव त्रिभुवनपति मनमन सुसकाई । मुख चूँव्यो गहि कंठ लगाए बिप लपटयो अस्तन मुख

लाई ॥ पयसँग प्राण ऐंचि हरि लीन्हें योजन एक परी मुरझाई । त्राहि त्राहि कहि ब्रजजन धाए अति
 बालक क्यों बच्यो कन्हाई । अति आनंद सहित सुत पायो हृदये माँझ रहे लपटाई ॥ करवर
 टरी बडी मेरेकी घर घर आनंद करत बधाई । सूरश्याम पूतना पछारी यह सुनि जिय डरप्यो नृपराई
 ॥ ४२ ॥ राग सारंग ॥ कपटकरि ब्रजहि पूतना आई । रूप स्वरूप विषम स्तन लाए राजा कंस
 पठाई ॥ मुख चूँबत अरु नैन निहारत राखत कंठ लगाई । भाग्य बडे तुमरे नंदरानी जिनके कुँवर
 कन्हाई ॥ करगहि क्षीर पियावत अपनो जानत केशव राई । बाहर होइकै असुर पुकारी अब बलि
 लेहु छोडाई ॥ गई मुच्छाईपरी धरनीपर मानों भुवंगम खाई । सूरदास प्रभु तुमरी लीला भक्तन गाई
 सुनाई ॥ ४३ ॥ राग धनाश्री ॥ देखो यह विपरीत भई । अद्भुत रूप नारि करि आई कपट हेतु क्यों सहे
 दई ॥ कान्है लै यशुमतिकोरातें रुचिकरि कंठ लगाई । तब वह देह धरी योजनलौं श्याम रहे
 लपटाई ॥ बडे भाग्यहैं नंदमहरके बडभागिन नंदरानी । सूर श्याम उर ऊपर वारे यह सब घर घर
 जानी ॥ ४४ ॥ विहागरी ॥ नेक गोपालै मोको दै री ॥ देखों कमलवदन नीके करि ता पाछे तू
 कनियाँ लै री ॥ अति कोमल कर चरण सरोरुह अधर दशन नासा सोहैरी । लटकन शीश कंठमणि
 भ्राजत मन्मथ कोटि वारने गैरी ॥ वासर निशा विचास्तहौं सखि यह सुख कबहुं न पायो मैं री ।
 निगमन धन सनकादिक सर्वसु भाग्य बडे पायो तैं है री ॥ जाको रूप जगतके लोचन कोटि चंद्र रवि
 लाजत भैरी ॥ सूरदास बलिजाइ यशोदा गोपिन प्राण पूतना बैरी ॥ ४५ ॥ राग जैतश्री ॥ कन्हैया हाल
 रोहाल रोई । हौं बारी तेरे इंदु वदनपर अति छबि अलसनि रोई ॥ कमलनयनको कपट किये माई
 इहि ब्रज आवै जोई । पालागों विधि ताहि वकीजौं तू तिह तुरत बिगोई ॥ सुन देवता बडे जगपावन
 तू पतिया कुल कोई ॥ पय पूजिहौं बेगि यह बालक करिदैं मोहि बडोई । द्वितियेके शाशिलौं बाँटैं
 शिशु देखै जननि जसोई । यह सुख सूरदासके नयनन दिन दिन दूनो होई ॥ ४६ ॥ राग कान्हरी ॥
 पालने श्याम हलावति जननी । अति अनुराग परस्पर गावत प्रफुलित मगन सुदित नंद घरनी ॥
 उमँगि उमँगि प्रभु भुजा पसारत हरष यशोमति अंकम भरनी । सूरदास प्रभु सुदित यशोदा पूरण
 भई पुरातन करनी ॥ ४७ ॥ राग विलावल ॥ गोपाल माई पालने झुलाए । सुर सुनि कोटि देव तेतीसों
 देखन कौतुक अंमर छाए ॥ जाको अंत न ब्रह्मा जानत शिव सनकादि न पाए । सो अब देखो नंद
 यशोदा हरषि हरषि हलराये ॥ हुलसत हुलसि करत किलकारी मन अभिलाख बढाए ॥ सूरश्याम
 भक्तन हितकारन नाना वेष बनाए ॥ ४८ ॥ सिद्धर बाँभन करम कसाई कह्यो कंससों वचन सुनाई । प्रभु
 मैं तुम्हरो आज्ञाकारी । नंदसुवनको आवों मारी ॥ कंस कह्यो तुमते इह होई । तुरत जाहु कर
 विलंब न कोई ॥ शिरधर नंदभवन चलि आयो । यशोदा उठिकै माथो नायो ॥ करो रसोई मैं चलि
 जावो । तुम्हरे हेतु यमुनजल ल्यावो ॥ इह कहि यशुदा यमुना गई । सिद्धर कही भली इह भई ।
 उन अपने मनमारन ठानो । हरिजी ताको तबही जानो ॥ ब्राह्मण मारे नहीं भलाई । अंग याको
 मैं देउँ नशाई ॥ जबहीं ब्राह्मण हरिढिग आयो । हाथ पकर हरि ताहि गिरायो ॥ गोड
 चाप लै जीभ मरोरी । दधि ढरकायो भाजन फोरी ॥ राख्यो कछु तेहि मुख लपटाई ॥
 आपु रहे पलनापर आई ॥ रोवन लागे कृष्ण विनानी । यशुमति आइगई लै पानी ॥ रोवत
 देखि कह्यो अकुलाई ॥ कहा करयो तैं विप्र अन्याई ॥ ब्राह्मणके मुख बात न आवै ।
 जीभ होइ तौ कहि समझावै ॥ ब्राह्मणको घरबाहर कीन्हों । गोद उठाइ कृष्ण को लीन्हों ॥ पुरवासी
 सब देखन आए । सूरदास हरिके गुण गाए ॥ ४९ ॥ सुन्यो कंस पूतना मारी । शोच भयो ताके जिय

भारी ॥ कागासुरको निकट बुलायो । तासों कहि सब वचन सुनायो ॥ मम आयसु तुम माथे धरौ । छल बल करि मम कारज करौ ॥ इह सुनिकै तिन्ह माथो नायो । सूर तुरत ब्रजको उठिघायो ॥ ५० ॥ अथ कागासुरको आवचो ॥ राग सारंग ॥ कागरूप एक दनुज धरचो । नृप आयसु लैकर माथे पर हर्षवंत उर गर्व भरचो ॥ कितिक बात प्रभु तुम आयसु लै यह जानो मो जात मरचो । इतनी कहि गोकुल उठि आयो आइ नंदघर छाजरह्यो ॥ पलना पर पौढ़े हरि देखे तुरत आइ नैननिसों अरचो । कंठ चापि बहु बार फिरायो गहि पटक्यो नृपपास परचो ॥ तुरत कंस पृच्छन तेहि लाग्यो क्यों आयो नहिं काज सरचो । बीत्यो जाम ज्वाब जब आयो सुनहु कंस तेरो आयु सरचो ॥ धरि अवतार महाबल कोऊ एकहि कर मेरो गर्व हरचो । सूरदास प्रभु कंसनिकंदन भक्तहेतु अवतार धरचो ॥ ५१ ॥ राग विलावल ॥ मथुरापति जिय अतिहि डेरान्यौ । सभामाँझ असुरनिके आगे बार बार शिर धुनि पछितान्यौ । ब्रज भीतर उपज्यो मेरो रिपु मैं जानी यह बात । दिनही दिन बहु बढ़त जातुहै मोको करिहै घात ॥ दनुजसुता पूतना पठाई छिनकहि माँझ सँहारी । घीच मरोरि कागसुर दीनो मेरे ढिग फटकरी ॥ अबहींति यह हाल करतुहै दिन दिन होत प्रकाश । सेनापतिन सुनाइ बात यह नृपमन भयो उदास ॥ ऐसो कौन मारिहै ताको मोहिं कहै सो आय । वाको मारि अपनपौ राखै सूर ब्रजहि सो जाइ ॥ ५२ ॥ अथ शकटासुरको कंस आज्ञा माँगन । गौड मलार ॥ नृपति बात यह सवनि सुनायो । मुहांचही सेनापति कीनो शकटासुर मन गर्व बढ़ायो ॥ दोउ कर जोरि भयो तब ठाढो प्रभु आयसु मैं पाऊं । ह्यांते जाइ तुरतही मारों कहौ तो जीवत ल्याऊं ॥ यह सुनि नृपति हर्ष मन कीनो तुरतहि वीरा दीनों । बारंबार सूर कहि ताको आपु प्रशंसा कीनो ॥ ५३ ॥ गौड मलार ॥ पान लै चलयो नृप आन कीन्हों । गयो शिरनाइकै गर्वही बढ़ाइकै शकटको रूपधरि असुर लीन्हों ॥ सुनत घहरानि ब्रजलोग चकृतभए कहा आघात ध्वनि करतु आवै । देखि आकाश चहुँपास दशहूँ दिशा डरे नर नारि तनुमुधि भुलावै ॥ आपु गयो तहीं जहँ प्रभु रहे पालने करगहे चरण अंगुठ चचोरहि । किलकि किलकि हँसत बाल शोभा लसत जानि तिहि कसत रिपु आयौ भोरहि । नेक फटक्यो लात शब्द भयो आघात गिरचो भहरात शकटा संहारचो ॥ सूर प्रभु नंदलाल दनुज मारचो ख्याल मेटि जंजाल ब्रजजन उबारचो ॥ राग विभास ॥ देखो सखी अद्भुत रूप अतूथ । एक अंबुज मध्य देखियत बीस उदाधि सुत यूथ ॥ एकशुकहै जलचर उभय अर्क अनूप । पंच विराजे एकहि ढिग बहु सखि कौन स्वरूप ॥ शिशुतामैं शोभा भई करो अर्थ विचारी । सूर श्रीगोपालकी छवि राखिय उरधारी ॥ ५४ ॥ राग विलावल ॥ कर पग गहि अँगुठा मुख मेलत । प्रभु पौढ़े पालने अकेले हरपिरे अपने रँग खेलत ॥ शिव शोचत विधि बुद्धि विचारत वटबाढ्यो सागर जल झेलत । बिडरि चले घन प्रलय जानिकै दिगपति दिग दंतौन सकेलत ॥ मुनि मन भीत भए भव कंपित शेष सकुचि सहसौ फन पेलत । उन ब्रजवासिन बात न जानी समुझे सूर शकट पगु पेलत ॥ ५५ ॥ चरणगहे अँगुठा मुख मेलत । नंदघरनि गावति हलरावति पलना पर किलकत हरि खेलत ॥ जो चरणारविंद श्रीभूषण उरते नेकु न टारति ॥ देखो धौकार सु चरणनमें मुखमेलत करि आरति । जा चरणारविंदके रसको सुर नर करत विवाद ॥ यह रस है मोको दुर्लभता ताते लेत सवाद । उछलत सिंधु धराधर कांप्यो कमठपीठ अकुलाइ । शेष सहस्रफन डोलन लाग्यो हरि पीवत जब पाइ ॥ बढ्यो वृक्षवर सुर अकुलाने गगनभयो उत्पात । महाप्रलयके मेघ उठे करि जहाँतहाँ आघात ॥ करुणा करी

छाँडि पगु दीनो जानि सुरन मन संस ॥ सरदास प्रभु असुर निकंदन दुष्टनके उर गंस ॥५६॥ राग
विहाग ॥ यशोदा मदनगुपाल सुवाँवै । देखि स्वप्न गति त्रिभुवन कंज्यो ईश विरंचि भ्रमावै ॥ असित
अरुण सित आलस लोचन उभै पलक पर आवै । जनु रवि गति संकुचित कमल युग निशि अलि
उडन न पावै ॥ चौकि चौकि शिशुदशा प्रगटकरि छबि मनमें नहि आवै । जानौ निशिपति धरि करि
अमृत श्रुतिभंडार भरावै ॥ श्वास उदर उर सति यों मानो दुग्धसिंधु छबि पावै । नाभि सरोज
प्रगट पद्मासन उतारि नाल पछितावै ॥ कर शिर तर करि श्याम मनोहर अलक अधिकसों भावै ।
सूरदास मानौ पन्नगपति प्रभु ऊपर फन छावै ॥५७॥ राग विलावल ॥ अजिर प्रभा तेहि श्यामको पलका
पौटाए । आपु चली गृहकाजको तहाँ नंद बुलाए ॥ निरखि हरषि मुख चूमिकै मंदिर पग धारी । आतुर
नंद आए तहाँ जहँ ब्रह्म सुरारी ॥ हँसे तात मुख हेरिकै कर पग चतुराई । किलकि झटकि उलटे परे
देवन सुनि पाई ॥ सो छबि नंद निहारिकै तहाँ महरि बुलाई ॥ निरखि चरित गोपालके सूरज बलि-
जाई ॥५८॥ राग कली ॥ हरषे नंद टेरेत महरि । आइ सुत मुख देखि आतुर डारिदै दूधि टहरि ॥ मथति
दूधि यशुमति मथानी ध्वनि रही घर गहरि । श्रवन सुनति न महरि वातें जहाँ तहाँ गई चहरि ॥ यह
सुनत तब मातु धाई गिरे जाने झहरि । हँसत नंदमुख देखि धीरज तब कश्यो ज्यों ठहरि ॥ श्याम उलटे
परे देखे बढी शोभा लहरि । सूर प्रभु कर सेज टेकत कबहुँ टेकत टहरि ॥५९॥ महरि
मुदित उलटाइकै मुख चूबन लागी । चिरु जीवो मेरो लाडिलो मैं भई सभागी ॥ एकपाख त्रयमासके
मेरो भयो कन्हआई । पटक रानि उलटे परे मैं करौं बधाई ॥ नंद घरनि आनंदभरी बोली ब्रजनारी । यह
सुख सुनि आई सबै सूरज बलिहारी ॥६०॥ यह सुख सुनि आई ब्रजनारी । देखनकों धाई बनवारी ॥
कोइ युवती आई कोइ आवति । कोउ उठि चलति सुनत सुख पावति ॥ घर घर होत अनंद बधाई
सूरदास प्रभुकी बलिजाई ॥६१॥ राग कली ॥ जननी देखि छबि बलिजाति ॥ जैसे निधनी धनहि
पाइ हरप दिन अरु राति ॥ बाललीला निरखि हरखि धनि धनि धनि ब्रजनारी ॥ निरखि जननी वंदन
किलकत त्रिदश पति दैतारि ॥ धन्य नंद धनि धन्य गोपी धन्य ब्रजके वास । धन्य धरनी करन पावन
जन्म सूरदास ॥६२॥ राग विलावल ॥ यशुमति भाग सुहागिनी हरिको सुत जानै । मुख मुख जोरि
बतावई शिशुताई ठानै ॥ मो निधनीके धन रहै किलकत मनमोहन ॥ बलिहारी छबिपर भई ऐसी
विधि जावना ॥ लटकत बेसरि जननिकी इकटक चख लावै ॥ पकरत वदन उठाइके मनही मन भावै ॥
महरि मुदित हित उर भरे यह कहि मैं वारी । नंदसुवनके चरित पर सूरज बलिहारी ॥६३॥ राग अ-
सावारी ॥ गोद लिये हरिको नंदरानी अस्तन पान करावतिहै । बार बार रोहिणिको कहि कहि
पलिका अजिर मँगावतिहै ॥ प्रातसमय रवि किरण कौवरी सो कहि सुतहि बतावतिहै । आउ
धाम मेरे श्यामलाल आँगन बालकलिको गावतिहै ॥ रुचिर सेज लै गई मोहनको भुजा उछंगि सुवा
वतिहै ॥ सूरदास प्रभु सोई कन्हैया लहरावतिमलहरावतिहै ॥६४॥ राग विलावल ॥ नंदघरनि
आनंदभरी सुत श्याम खिलावै । कबहुँ घुटुरुवानि चलहिंगे कहि बिधिहि मनावै ॥ कबहुँ
दंतुली द्वे दूधकी देखों इननैननि ॥ कबहुँ कमल मुख बोलिहैं सुनिहैं इन बैननि ॥ चूमति कर पग अधर
पान लटकति लटचूमति । कहा वरणि सूरज कहै कहा पावै सोमति ॥६५॥ राग विलावल ॥ मेरो
नान्हारिया गोपाल वेगि बडो किनि होहि । इहि मुख मधुरे बयनहँसि कबहुँ जननि कहोगे मोहि ॥
यह लालसा अधिक दिन दिनप्रति कबहुँ ईश करौ ॥ मो देखत कबहुँ हँसि माधव पगु द्वे धरनि धरौ हल
घर सहित फिरै जब आँगन चरण सब्द सुख पाऊं ॥ छिन छिन क्षुधित जात पयकारन हौं हठि

निकट बुलाऊं । आगम निगम नेति करि गायो शिव उनमान न पायो । सूरदास बालक रस लीला
मन अभिलाष बढ़ायो ॥ ६६ ॥ अथ सप्तम अध्याय तृणार्वत वध गोडा तोरन ॥ राग विलावल ॥ यशुमति मन
अभिलाष करै । कब मेरोलाल घुटुरुवन रँगै कब धरनी पग द्वैक धरै । कब द्वै दंत दूधके देखौं
कब तुतरे सुख बैन झरौ ॥ कब नंदहि कहि बाबा बोलै कब जननी कहि मोहि ररै ॥ कब मेरो अचरा गहि
मोहन जोइ सोइ कहि मोसों झगरै ॥ कब धौं तनक तनक कछु खैहै अपने करसों मुखहि भरै ॥ कब हँसि
बात कहेंगे मोहिसों छवि पेखत दुख दूरि करै । श्याम अकेले आँगन छाडे आपु गई कछु काज
घरै । एहि अंतर अंधवाइ उठी इक गरजत गगन सहित घहरै ॥ सूरदास ब्रज लोग सुनत ध्वनि
जो जहाँ तहाँ सब अतिहि डरै ॥ ६७ ॥ राग सृष्टी ॥ अति विपरीत तृणार्वत आयो । बात चक्र
मिस ब्रजके ऊपरि नंद पँवरिके भीतर धायो ॥ पौढे श्याम अकेले आँगन लेत उच्चौ आकाश चढायो ।
अंधधुंध भयो सब गोकुल जो जहाँ रह्यो सो तहाँ छपायो ॥ यशुमति आइ धाइ जो देखै श्याम श्याम
करि शोर उठायो । धावहु नंद गोहारी लागौ किनि तेरो सुत अधवाइ उडायो ॥ इहि अंतर आकाश
ते आवत पर्वतसम कहि सबनि बतायो । मारचो असुर शिलासों पटक्यो आप चढे ता ऊपर
भायो । दौरे नंद यशोदा दौरी तुरतहि लै हित कंठ लगायो । सूरदास यह कहत यशोदा ना जानौं
विधिनहि कह भायो ॥ ६८ ॥ राग विलावल ॥ शोभित सुभग नंदजूकी रानी ॥ अति आनंद आँगनमें ठाढी
गोदलिये सुत शारंगपानी ॥ तृणार्वतकी सुरति आनि जिय पठ्यो असुर कंस अभिमानी ॥ गरु भये महिमें
बैठाए सहि न परै जननी अकुलानी ॥ आपुन गई सदनही दौरी काहू एक काज लपटानी ॥ वोडरु महा
भयावन आयो गोकुल सबै प्रलयकै जानी ॥ महादुष्ट लै उड्यो गोपालहि चलयो अकाश कृष्ण
यह ठानी । चापि ग्रीव हरि प्राण हरे दग करत प्रवाह चलयो अधिकानी ॥ पाहन शिला निरखि हरि
डारचो ऊपर खेलत श्याम बिनानी । देति अभूषण वारि वारि सब मूरज पियत बारि सब पानी ।
॥ ६९ ॥ राग धनाश्री ॥ उबरचो श्याम महारि बडभागी ॥ बहुत दूरिते आइ परचो धर देखहुँ मैं कहूँ चोट न
लागी ॥ रोगलेउँ बलिजाउँ कन्हैया यह कहि कंठ लगाई ॥ तुमहींहो ब्रजके जीवन धन देखत नैन
सिराई । भली नहीं तेरी प्रकृति यशोदा छाँडि अकेलो जाति ॥ गृहको काज इनहुते प्यारो नेकहु
नहीं डेराति । भली भई अबकै हरि वाच्यो अबहुँ सुरति सम्हारि । मूरदास खिझि कहति ग्वालिनी
मनमें महारि बिचारि ॥ ७० ॥ राग विलावल ॥ अब हौं श्याम बलिजाउँ हरी । निशि दिन रहति
विलोकति हरिमुख छाँडि सकति नहिँ एक घरी ॥ हौं अपने गोपाल लडैहौं भौन चाउ सब रहौं धरी ।
पाए कहा खेलावनको सुख मैं दुखिया दुख कोटि भरी ॥ जा सुखको शिव गौरि मनाई त्रिय व्रत
नेम करी । मूर श्याम पाए पैदेमें मैं निधि राँक परी ॥ ७१ ॥ राग धनाश्री ॥ हरि किलकत यशु-
दाकी कनियां । निरखि निरखि सुख हँसति श्यामसों मो निधनीके धनियां ॥ अति कोमल तनु
श्यामको बार बार पछितात ॥ कैसे बच्यो जाउँ बलि तेरी तृणार्वतके घाताना जानौं धौं कौन पुण्यते
को करिलेत सहाइ ॥ वैसो काम पूतना कीनो इहि ऐसो करि आइ । माता दुखित जानि हरि
विहँसे नान्ही दँतुली दिखाइ । मूरदास प्रभु माता चितते दुख डारचो बिसराइ ॥ ७२ ॥ सुत मुख
देखि यशोदा फूली । हर्षित देखि दूधकी दँतिया प्रेममगन तनुकी सुधि भूली ॥ बाहिरते तब नंद
बुलाए देखौं धौ सुंदर सुखदाइ । तनक तनकसी दूधकी दंतियाँ देखौं नैन सुफल करौं
आइ । आनंद सहित महर तब आए सुख चितवत दोउ नैन अघाइ । मूरश्याम
किलकत द्विज देख्यो मानो कमल पर बीज जमाइ ॥ ७३ ॥ रागनी श्रीहठी ॥ जननी

बलिजाय हालरु हालरो गोपाल । दधिहि विलोइ सदमाखन राख्यो मिश्री सानि चढावै
 नैदलाल ॥ कंचनके खंभ मयारि मरुवाडांडी खचि हीरा बिच लाल प्रबाल । रेशम बुनाइ नव
 रतन लाइ पालनो लटकन बहुत पिरोजालाल ॥ मोतिन झालरि नानाभाँति खिलौना रचे विश्व-
 कर्मासुतिहार । देखि देखि किलकत दैतिया दो राजत क्रीडत विविध विहार । कठुला कंठ वज्रके
 हरिनख राजै मसबिंदुका मृगमद भाल ॥ देखत देत अशीशत्रजजन नर नारी चिरजीवो यशोदा तेरो
 बाल । सुर नर सुनि कौतूहल फूले झूलत देखत नंदकुमार ॥ हरषत सुमन अपार वर्षत नभ
 ध्वनि छायो जैजैकार ॥ ७४ ॥ अथ अष्टम अध्यायनामकर्म । राग विलावल ॥ महर भवन ऋषिराज गए ।
 चरणघोइ चरणोदक लीनो अरघ आसन करि हेत दए ॥ धन्य आजु बडभाग्य हमारे ऋषि आए
 अतिकृपाकरी ॥ हमकहँ धनि धनि नंद यशोदा धनि यह ब्रज जहां प्रगट हरी । आदि अनादि
 रूप रेखा नहिं इनते प्रभु नहिं और बियो ॥ देवकी उदर अवतार लेनकह्यो दूध पीवन तब
 माँगिलियो । बालक करि इनको जिनि जानौ कंसको वध एकरिहैं ॥ सुर देह धरि सुरन उधारन
 भूमिभार ए हरिहैं ॥ ७५ ॥ धन्य यशोदा भाग्य तुम्हारो जिनि ऐसो सुतजायो । जाके दरशपर-
 स सुख तन मन कुलको तिमिर नशायो ॥ विप्र सुजन चारण बंदीजन सकल नंद गृह आए ।
 नौतम सुभग हरद दूब दधि हर्षित शीश बँधाए ॥ गर्ग निरूप कहैं सब लक्षण अविगतिहैं अविनासी
 सूरदास सुनतै यश हरिके आनंदे ब्रजवासी ॥ ७६ ॥ अनप्राशनलीला ॥ कान्ह कुँवरकी करहु अनप्राशनी
 कछु दिन घटि षटमास गए । नंदमहर यह सुनि पुलकित जिय हरि अनप्राशन योग भए ॥
 विप्र बुलाइ नाम लै बूझ्यो राशि शोधि इक दिनहि धरौ । आछो दिन सुनि महर यशोदा सखिन
 बोलि शुभ गान करौ ॥ युवति महरिको गारी गावति और महरको नाम लियो । ब्रज घर घर आनंद
 बढ्यो अति प्रेमपुलक न समात हियो ॥ जाको नेति नेति श्रुति गावत ध्यावत शिव सुनि ध्यान धरे
 सूरदास तिनको ब्रज युवती झकझोरति उर अंक भरे ॥ ७७ ॥ राग सारंग ॥ आजु कान्ह करिहैं
 अनप्राशन ! मणिकंचनके थार भराए भाँति भाँतिके वासन ॥ नंदघरानि सब वधू बुलाई जे सब अपनीजा
 ति। कोउ जिवनार करति कोउ घृत पक षटरसके बहुभाँति ॥ बहुत प्रकार किये सब व्यंजन अनेक
 वरन मिष्टान । अति उज्ज्वल कोमल सुठि सुंदर महरि देखि मनमान ॥ यशुमति नंदहि बोलि कह्यो
 तब महर बुलाइ बहु जाति । आप गए नंद सकल महर घर लै आये सब ज्ञाति ॥ आदर करि
 बैठाइ सबनिको भीतर गये नंदराइ । यशुमति उवटि न्हावाइ कान्हको पटभूषण पहिराइ ॥ तन
 झंगुली शिरलाल चौतनी करचूरा दुहुँ पाइ । बारबार मुख निरखि यशोदा पुनि पुनि लेत बला
 इ ॥ घरी जानि सुत मुख जुठरावन नंद बैठे लै गोदा महर बोलि बैठारि मंडली आनंद करत विनोद ॥
 कंचनथार लै खीर धरी भरि तापर घृत मधु नाइ । नंद लैलै हरिमुख जुठरावत नारि उठी सब
 गाइ ॥ षटरसके परकार जहांलंगि लैलै अधर छुवावत । विश्वंभर जगदीश जगतगुरु परसत मुख
 करुवावत ॥ तनक तनक जल अधर पोंछिकै यशुमति पै पहुँचाए । हर्षवंत युवती सब लैलै मुख
 चूमति उर लाए ॥ महर गोप सबही मिलि बैठे पनवारे परसाए । भोजन करत अधिक रुचि उपजी
 जो जेहिके मन भाए ॥ इहिविधि सुख विलसत ब्रजवासी धनि गोकुल नर नारी । नंदसुवनकी या
 छबि ऊपर सूरदास बलिहारी ॥ ७८ ॥ राग सारंग ॥ हरिको मुख माई मोहिं अनुदिन अति भावै ।
 चितवत चित नैननिकी मति सबगति बिसरावै ॥ ललना लैलै उछंग अधिक लोभ सो लागे ।
 निरखति निंदति निमेष करत ओट आगे ॥ शोभित शुभ कपोल अधर अल्प अल्प दशना ।

किलकि बैन कहत मोहन मृदु रसना ॥ नासिका लोचन विशाल संतत सुखकारी । सूरदास धन्य
 भाग्य देखत ब्रजनारी ॥ ७९ ॥ लालन तेरे मुखपरहो वारी । बालगोपाल लगौ इन नैननि रोगु
 बलाइ तुम्हारी ॥ लटलटकनि मोहन मिस बिंदुका तिलक भाल सुखकारी । मनहुं कमल अलि
 सावक पंगति उठत मधुप छवि भरी ॥ लोचन ललित कपोलनि काजर छवि उपजत अधिकारी ।
 मुखमें मुख औरै रुचिवाढ़ति हँसत दैद किलकारी ॥ अल्प दशन कलबल करि बोलनि विधि नहिं
 परत विचारी । निकसति ज्योति अधरनिके विचहै मानौ विधुमें बीजु उज्यारी ॥ सुंदरताको पार
 न पावति रूपदेखि महतारी । सूरसिंधुकी बूंद भई मिलि मति गति दृष्टिहमारी ॥ ८० ॥ राग धनाश्री ॥
 लाल तेरे मुख ऊपर वारी ॥ बलि कैसे मेरे नैननि लागै लेउँ बलाइ तिहारी ॥ सुंदरताको पार न
 आवति रूप देखि महतारी । उरअंतर आनंद बढ़ावत हँसत देत किलकारी ॥ अल्पदशन तोत-
 रावत बोलत छवि चितहु न जात विचारी । सूर सिंधुकी बूंदभई मिलि मनसा मगन हमारी ।
 ॥ ८१ ॥ राग जैतश्री ॥ लालन हौं वारी तेरे या मुख ऊपर । माई मेरिहि डीठि न लागै ताते मसि
 बिंदा दयो भूपर ॥ सर्वसु मैं पहिलेही दीनी नान्हीं नान्हीं दँतुली दूपर । अब कह करौं
 निछावरि सूर यशोमति अपने लालन ऊपर ॥ ८२ ॥ लाला हौं वारी तेरे मुखपर ।
 कुटिल अलक मोहन मन बिहँसत भुकुटी विकट नैननिपर । दमकति द्वैद्वै
 दँतुलिया बिहँसति मानौ सीपिज वरु कियो वारिजपर ॥ लघु लघु शिर लट धूँधरवारी
 लटक २ रह्यो लिलार पर ॥ यह उपमा कहि काँपै आवै कलुक कहाँ सकुचतिहौं हियपर ॥ नूतनचंद्र
 रेखमाधि राजति सुरगुरु शुक्र उदोत परस्पर ॥ लोचन लोल कपोल ललित अति नासिकको
 मुक्तारद छंदपर । सूर कहा न्यौछावरि करिये अपने लाल ललित लर ऊपर ॥ ८३ ॥ अथ वरसगांठि-
 लीला ॥ राग विलावल ॥ आजु भोर तमचरकी रोल । गोकुलमें आनंद होतहै मंगल ध्वनि महराने
 टोल ॥ फूले फिरत नंद अति सुख भयो हर्षि मँगावत फूल तमोल ॥ फूली फिरत यशोदा घर घर
 उबटि कान्ह अन्हवाइ अमोल ॥ तनक वदन दोउ तनक तनक कर तनक चरन पोंछत पट झोल ॥
 कान्हगले सोहै कंठमाला अंग अभूषण अँगुरिन गोल ॥ शिर चौतनी दिठौना दीनै आँखि आजि
 पहिराइनि चोल ॥ श्याम करत मातासों झगरो अटपटात कलबल कर बोल ॥ दोउ कपोल गहिकै
 मुख चुंबति वर्षदिवस कहि करत कलोल । सूर श्याम ब्रजजन मन मोहन वरषगांठिको डोरा
 खोल ॥ ८४ ॥ राग धनाश्री ॥ अलि मेरे लालनकी आजु वरषगांठि सब सबनि बोलावो । शुभकरि
 मंगल गान करावो । चंदन आंगन सबनलिपावो । मोतिअनको तुम चौक पुरावो ॥ उमँग अंगनि
 आनंद तूर बजावो । मेरे कहे तुम विप्र बुलावो ॥ शुभ घरि एक आनि धरावो ॥ वागे वीरे बनि
 ठनि बनावो ॥ आभूषण पहिरावो । अक्षत दूव बधावो ॥ लालनकी वर्षगांठि जुरावो । इहै मोहि नैनन
 लाहो देखावो ॥ पंचरंग सारी मँगावो । बंधुजन सब पहिरावो ॥ नचैं सब उमँगि अंग बढावो । नंद
 रानी सब ग्वाल बुलावो ॥ इहै रीति कहि कहि सुनावो । वेगिकरौ किनि विलंब लगावो । यशुमति
 तब नंद बोलावो ॥ लाल लिए कनियां देखरावो ॥ लग्नकी घरी तुरत अव आवो । मैतो अन्ह-
 वाय बनावो ॥ अति सुख भयो वर गांठि जुरावो । सूरश्याम मुख छविहि निहारति । तनमन धन
 युवती जन वारति ॥ ८५ ॥ राग आसावरी ॥ उमँगनि उमँगीहै ब्रजनारी कान्हकी वरषगांठि वरष
 वरपनि । गावहि मंगलगान नीके सुर नीकी तान आनंद हरपनि ॥ कंचनमणि जटित थार दधिरोचन
 फूल डार देखन चली नंदकुमार मिलिवेकी तर्सनि ॥ सूरदास प्रभुकी वरषगांठि जोरति यह छविपर

तन तोरति अरस परसनि ॥ ८६ ॥ श्रीकृष्णजीको कनछेदन लीला राग धनाश्री ॥ कान्ह कुँवरको
 कनछेदनोहै हाथ सुहारी भेली गुरकी । बिधि विहँसत हरि हँसत हेरि हरि यशुमतिके
 धकधुकी उरकी ॥ रोचन भरि लै देत सीकसों श्रवण निकट अतिही चतुरकी ॥ कंचनके
 द्वै दुर मैगाइलिये कहै कहा छेदन आतुरकी । लोचन भरि भरि दोउ माताके कनछे-
 दन देखत जिय मुरकी ॥ रोवत देखि जननि अकुलानी लियो तुरत नौवाको झरकी ।
 हँसत नंदयुवती सब बिहँसी झमकि चली सब भीतर दुरकी ॥ सूरदास नंद करत बधाई
 अतिआनंद बाला ब्रज पुरकी ॥ जबहि भयो कनछेदन हरिको । सुरवनिता सब कहत
 परस्पर ब्रजवासी दासी समसरि को ॥ गोपी मगन भई सब गावति हलरावत सुत महर महरि को ॥
 जो सुख सुनिजन ध्यान न पावत सो सुख नंद करत सब घरको ॥ मणि मुक्ता गण करत न्यवछावरि
 तुरत देत बिलम नहिं घरिको । सूर नंद ब्रजजन पहिरावत उमँगि चलयो सुखसिंधु लहरको ॥
 ॥ ८७ ॥ अथ घुटुरवनिचलियो ॥ खेलत नंद आंगन गोविंद । निरखि निरखि यशुमति सुख पावति
 वदन मनोहर चंद ॥ कटि किंकिनी कंठ मणिकी द्युति लट मुकुता भरि भाल । परम सुदेश
 कंठ केहरि नख बिच बिच वज्र प्रवाल ॥ कर पहुँचियौ पांयन पैजनी सुरतन रंजित रजपीत ।
 घुटुरुनि चलत अजिर में विहरत मुखमंडित नवनीत ॥ सूर विचित्र कान्हकी बानक वाणी कहत
 नहीं बनिआवै । बालदशा अवलोकि सकल मुनि योग बिरति विसरावै ॥ ८८ ॥ राग आसावरी ॥ घुटुर-
 वन चलत श्याम मणि आंगन मात पिता दोउ देखत री ॥ कबहुँक किलकिलात मुख हेरत कबहुँ
 जननि सुखपेखत री ॥ लटकन लटकत ललित भालपर काजरबिंदु भ्रुव ऊपर री । यह शोभा नैननि
 भरि देखैं नहिं उपमा तिहुँ भूपर री । कबहुँक दौरि घुटुरुवन लटकत गिरत परत फिरि
 धावति री । इतते नंद बुलाइ लेतहैं उतते जननि बुलावत री ॥ दंपति होड करत आपसमें श्याम
 खिलौना कीनो री ॥ सूरदास प्रभु ब्रह्म सनातन सुत हित करि दोउ लीनो री ॥ ८९ ॥ राग सारंग ॥
 निरखि छबि फूलतहै ब्रजराज । उत यशुदा इत आपु परस्पर आडे रहे कर पाज ॥ किंकिनि कटि
 मध्य प्रसारित भुज उभय मिलत फुनि लाज । झुमित लरत अलि सैन सरोज पर मन मकरंदके
 काज ॥ अर्धगिरा मृदु स्रवत सुधा जनु पिवत श्रुति निपट आज । सूरदास प्रभु सुत रति २ करि
 लैलै ऊपर भ्राज ॥ ९० ॥ राग विलावल ॥ शोभित कर नवनीत लिये ॥ घुटुरुन चलत रेणु तनुमंडित
 मुख दधिलेप किये ॥ चारु कपोल लोल लोचन गोरोचन तिलक किये ॥ लट
 लटकनि मनो मत्त मधुप गन मादक मदहि पिये ॥ कटुला कंठ वज्र केहरि नख राजतरुचिर हिये ।
 धन्य सूर एको पल या सुख का शत कल्प जिये ॥ ९१ ॥ राग ललित ॥ माई विहरत गोपाललाल
 मणिमय रच्यो अंगना परिरांगना घुटुरवनि डोलै । निरखि निरखि अपनो प्रतिविंब हँसत किल
 कत पाछे फिर फिर चितै मैया मैया बोलै ॥ ज्यों ज्यों अलिगण सहित विमल जल धाइ रहे कुटिल अल-
 क वहनकी छबि अवनी प्रति लोलै ॥ सूरदास छबि निहारि थकित रहे सब घोषनारि तन मन धन
 देति वारि वारि ओलै ॥ ९२ ॥ राग विलावल ॥ बाल विनोद खरो जिय भावत । मुख प्रतिविंब पकरिबे
 कारन हुलासि घुटुरुवनि धावत ॥ छिनक माँझ त्रिभुवनकी लीला शिशुता माहँ दुरावत ॥ शब्दएक
 बोल्यो चाहतहैं प्रगट वचन नहिं आवत ॥ कमलनैन माखन माँगतहैं ग्वालनि सैन बतावत ॥ सूर
 श्याम सु सनेह मनोहर यशुमति प्रीति बढावत ॥ ९३ ॥ राग सारंग ॥ बलिजाऊँ श्याम मनोहर नैन । अब
 चितवत मोहन करि अँखियन मधुप देत मनौँ सैन ॥ कुंचित अलक तिलक गोरोचन शशिपूर ह-

रपे ऐन ॥ कबहुँक खेलत जात घुटुरुवन उपजावत सुख चैन ॥ कबहुँक रोवत हँसतहैं बलिगई बोलत
 मधुरे बैन ॥ कबहुँक ठाढे होत टेकि कर चलि न सकत इत गैन ॥ देखत वदन करौ न्योछावरि
 तात मात सुखदैन ॥ सूर बाललीलाके ऊपर वारौ कोटिक मैन ॥ ९४ ॥ कान्हरो ॥ आँगन चलत
 घुटुरुवन धाए । नीलजलद तनु श्याममुख निरखि जननि दोउ निकट बुलाए ॥ बंधुक सुमन अरुण
 पदपंकज अंकुश राम चिह्न बसिआए ॥ नूपुर कलरव मनो सुतहँशनि रचे नीठ दै बाँह वसाए ॥
 कटि किंकिनि वरहार ग्रीवदर रुचिर बाहु भूषण पहिराए । उर श्रीवक्ष मनोहर केहरि नखनमें मध्य
 मणिगण बहु लाए ॥ सुभग चिबुक द्विज अधर नासिका श्रवण कपोल मोहिं सुठि भाए ॥ भुव
 सुंदर करुणारस पूरन लोचन मनहु युगल जलजाए ॥ भाल विशाल ललित लटकन मणि बालदशाके
 चिकुर सुहाए ॥ मानो गुरु शनि कुज आगे करि शशिहि मिलन तमके गणभाए ॥ उपमा एक
 अभूत भई तब जब जननी पट पीत उढाए ॥ नील जलद पर उडगन निरखत तजि सुभाउ मनौ
 तडित छपाए ॥ अंग अंग प्रति मार निकरि मिलि छवि समूह लैलै जनु छाए ॥ सूरदास
 सो क्योंकरि वरणै जो छवि निगम नेति करि गाए ॥ ९५ ॥ धनाश्री ॥ हौं बलि जाउँ
 छबीले लालकी ॥ धूसरि धूरि घुटुरुवन रंगनि बोलन वचन रसालकी ॥ छिटकिरहीं चहुँदिशि जु
 लटुरियां लटकन लटकत भालकी ॥ मोतिन सहित नासिका नथुनी कंठ कमलदल मालकी ॥ कछुक
 हाथ कछू मुखमाखन चितवनि नैन विशालकी ॥ सूर सु प्रभुके प्रेम मगन भई ढिग न तजति
 ब्रजबालकी ॥ ९६ ॥ कान्हरो ॥ सादर सहित विलोकि श्याममुख नंदरूपलिये कनियाँ ॥ सुंदर श्याम
 सरोज नील तनु अँग अँग सकल सुभग सुखदनियाँ ॥ अरुण तरनि नखज्योति जगमगति झुनझुन
 करत पाई पैजनियाँ ॥ कनकरतन मणि जटित रचित कटि किंकिनि कलित पीतपट
 तनियाँ ॥ पहुँची करनि पदिक उर हरिनख कटुला कंठ मंजु गजमनियाँ ॥ रुचिर चिबुक द्विज
 अधर नासिका अतिसुंदर राजत सौवनियाँ ॥ कुटिल भ्रुकुटि सुखकी निधि आनन कपोलकी छवि
 नउ पनियाँ ॥ भाल तिलक मसि बिंदु विराजत शोभित शीश लाल चौतनियाँ ॥ मनमोहन तुतरी
 बोलन मुनि मन हरत सु हँसि मुसकनियाँ ॥ बाल स्वभाउ विलोकि विलोचन चोरत चितहि चारु
 चितवनियाँ ॥ निरखति ब्रज युवती सब ठाढी नंदसुवन छवि चंद्र वदनियाँ ॥ सूरदास प्रभु निरखि
 मगनभए प्रेमविवश कछु सुधि न अपनियाँ ॥ ९७ ॥ कान्हरो ॥ बोलि लिए यशुमति यदुनंदहि ॥ पीत
 झँगुलियाकी छवि छाजति विद्युलता सोहति मनौ कंदहि ॥ वाजापति अग्रज अंवाते अरजथान सुत
 मालागंदहि ॥ मनौ सुरग्रहते सुररिपु कन्या सौते आवति दुरिसंदहि ॥ आरि करत कर चपल
 करतुतो नंदनारि आनन छुवै मंदहि । मनो भुजंग अरि परमलालची फिर फिर फिर चाटत सुभग
 सुचंदहि ॥ गुंगी बातनि यों अनुरागति भँवर गुंजरत कमलमौ बंदहि । सूरदास प्रभु सुतप किये
 बडे भाग्य यशोदा अरु नंदहि ॥ ९८ ॥ राग धनाश्री ॥ कहाँलौं वरनौ सुंदरताइ ॥ खेलत कुँवर कनक
 आँगनमें नैन निरखि छवि छाइ ॥ कुलहि लसत शिर श्याम सुभग अति बहुविधि सुरंग बनाइ ।
 मानो नवघन ऊपर राजत मघवा धनुष चढाइ ॥ अति सुदेश मृद हरत चिकुर मन मोहन मुख वगराइ ।
 मानो प्रगट कंज पर मंजुल अलि अबली फिरि आइ ॥ नील श्वेत परपीत लालमणि लटकनि
 भालरु नाइ ॥ शनि गुरु असुर देवगुरु मिलि मनौ भौम सहित समुदाइ ॥ दूधदंत दुति कहि न
 जाति अति अद्भुत एक उपमाइ ॥ किलकत हँसत दुरत प्रगटत मनौ वनमें विद्युछपाइ ॥
 खंडित वचन देत पूरन सुख अरुप जल्प जलपाइ ॥ घुटुरुन चलत रेणु तनु
 मंडित सूरदास बलिजाइ ॥ ९९ ॥ नटनारायण ॥ हरिजूकी बालछवि कहाँ वरनि ।

सकल सुखकी सौंव कोटि मनोज शोभा हरनि ॥ भुज भुजंग सरोजनयननि वदन विधु
जित लरनि ॥ रहे विवरन सलिल नभ उपमा अपर दुति उरनि ॥ मंजु मेचक मृदुल तनु
अनुहरत भूषण भरनि ॥ मनहुँ सुभग शृंगार शिंशु तरु फरचौ अद्भुत फरनि । चलत पद प्रति
बिंब मणि आँगन घुटुरुवन करनि ॥ जलजसंपुट सुभग छवि भरि लेत उर जनु धरनि । पुण्यफल
अनुभवति सुतहि विलोकिकै नंदघरनि ॥ सूर प्रभुकी बसी उर किलकनि ललित लरख-
रनि ॥ १०० ॥ राग धनाश्री ॥ किलकत कान्ह घुटुरुवनि आवत । मणिमय कनक नंदके आँगन मुख
प्रतिबिंब पकरवेहि धावत ॥ कबहुँ निरखि हरि आप छाँहको करसों पकरनको चित चाहत । किलकि
हँसत राजत द्वै दतियां पुनि पुनि तिहि अवगाहत ॥ कनक भूमि पर कर पग छाया यह उपमा एक
राजत । कर कर प्रति पद प्रति मणि वसुधा कमल बैठकी साजत ॥ बालदशासुख निरखि यशोदा पुनि
पुनि नंद बुलावत । अचरा तर लै टाकि सूरके प्रभुको जननी दूध पियावत ॥ १०१ ॥ राग विलावल । नंद
धाम खेलत हरि डोलत । यशुमति करत रसोई भीतर आपुन किलकत बोलत ॥ टेरि उठी यशुमति
मोहनको आवहुँ घुटुरुवन धाए । बैन सुनत माता पहिचानी चलै घुटुरुवनि पाए ॥ लै उठाय अंचल
गाहि पोछे धूर भरी सब देह । सूरज प्रभु यशुमति रज झारति कहां भरी यह खेह ॥ २ ॥ अथ पाँयन
चलन समय ॥ सुहो विलावल ॥ धनि यशुमति बडभागिनी लिये श्याम खिलवै । तनक तनक भुज पकरिकै
ठाढो होन सिखावै ॥ लरखरात गिरि परतहैं चलि घुटुरुवनि धावै । पुनि क्रमक्रम भुजटैकिकै पग
द्रैक चलावै ॥ अपने पाँयन कबहिलौ मो देखत धावै । सूरदास यशुमति यह विधि सौंज मनावै
॥ ३ ॥ कान्हरो ॥ हरिको विमल यश गावत गोपंगना । मणिमय आँगन नंदरायके बाल गोपाल तहां
करैं रंगना ॥ गिरि गिरि परत घुटुरुवनि टेकत खेलतहैं दोउ छगन मंगना । धूसरि धूरि धौत तनु
मंडित मानु यशोदा लेत उछंगना ॥ वसुधा त्रयपद करत न आलस भयो कठिन परचौ
देहरी उलंघना । सूरदास प्रभु ब्रजवधू निरखत रुचिर हार हिण सोहतु बंधना ॥ ४ ॥ सुहो विलावल ॥
चलन चहत पाँइन गोपाल । लै लगाइ अँगुरी नंदरानी मोहन मूरति श्याम तमाल ॥ डगमगात
गिरि परत पाँइनि पर भुज भ्राजत नंदलाल । जनो श्रीधरत श्रीधर अधोमुख धुकत धरनि मानौ
नमिनाल ॥ धूरि धौति तनु नैननि अंजन चलत लटपटी चाल । चरणरुणित नूपुर ध्वनि मानो सर
विहरतहैं बाल मराल ॥ लट लटकनि शिर चारु चषोडा सुठि शोभा सोहै शिशु भाल । सूरदास
ऐसो सुख निरखत जो जीजै जगमें बहुकाल ॥ ५ ॥ विलावल ॥ सिखवत चलन यशोदा मैया । अरवराइ
कर पाणि गहावत डगमगाइ धरणी धरै पैया ॥ कबहुँक सुंदर बदन विलोकति उर आनंद भरि लेत
बलैया । कबहुँक बलिको टेरि बुलावति इहि अंगन खेलो दोउ भैया ॥ कबहुँक कुलदेवता मना
वत चिरजीवै मेरो बाल कन्हैया । सूरदास प्रभु सब सुखदायक अति प्रताप बालक नंदैया ॥ ६ ॥
सुहो विलावल ॥ मणिमय आँगन नंदके खेलत दोउ भैया । गौर श्याम जोरी बनी बलराम कन्हैया ॥ लटकन
ललित लटुरियाँ मसि बिंदु गोरोचन । हरि नख उर अति राजहि संतनि दुखमोचन ॥ संग संग
यशुमति रोहिणी हितकारनि मैया । चुटकी देहि नचावहि सुत जानि नन्हैया ॥ नील पीत पट ओढनी
देखत जिय भावैं । बालविनोद अनंदसों सूरज जन गावै ॥ ७ ॥ राग धनाश्री ॥ आँगन खेलैं नंदके
नंदा । यदुकुल कुमुद सुखद चारु चंदा ॥ संग संग बलमोहन सोहैं । शिशुभूषण सबको मन मोहैं ॥
तनुधुति मोरचंद्र जिमि झलकै । उमँगि उमँगि अँग अँग छवि छलकै ॥ कटि किंकिनि पग नूपुर बाजै
पंकज पाणि पहुँचिया राजै ॥ कटुला कंठ बघनहां नीके । नयन सरोज मयन सरसीके ॥ लटकन

ललित ललाट लटूरी । दमकत द्वैद्वै दँतुरियाहूरी । सुनिमन हरत मंजु मसिबिंदा । ललित वदन बल बाल गोविंदा ॥ कुलही चित्र विचित्र झगूली । निरखि यशोदा रोहिणिफूली ॥ गहि मणिखंभ डिभ डग डोलैं । कलबल वचन तोतेरे बोलैं ॥ निरखत छवि झाँकत प्रतिबिंबै । देत परमसुख पितु अरु अंबै ॥ ब्रजजन देखत हिय हुलसाने । सूरश्याम महिमा को जाने ॥ ८ ॥ राग नटनारायण ॥ बलिगई बालरूप सुरारि । पाँयपैजन रुनु झुन नचावति नंदनारि ॥ कबहुं हरिको लाइ अंगुरी चलन सिखावति ग्वारि । कबहुं हिरदै लगाइ हितकरि लेति अंचल डारि ॥ कबहुं हरिको चितै चूमति कबहुं गावति गारि । कबहुं लै पाछे दुरावति ह्यां नहीं बनवारि ॥ कबहुं अंग भूषण बनावति राई लोन उतारि । सूर सुर नर सबै मोहे निरखि यह अनुहारि ॥ ९ ॥ विलावल ॥ भावत हरिको बाल विनोद । श्याम राम मुख निरखि प्रमोदित रोहिणि जननि यशोद ॥ आँगन पंकराग तनु शोभित चले नूपुर ध्वनि सुनि मन मोद । परमसनेह बढ़ावत मातनि रवाकिर हरि बैठत गोद ॥ अति श्रीचपल सकल सुखदायक निशिदिन रहत केलिरस श्रोद । सूरश्याम अंबुज दल लोचन फिरि चितवत ब्रजवनिता कोद ॥ बालविनोद आँगनकी डोलनि । मणिमय भूमि नंदके आलय बलि बलि जाउँ तोतरी बोलनि ॥ कटुला कंठ रुचिर केहरि नख वज्रमोल बहुलाल अमोलनि । बदनसरोज तिलक गोरोचन लट लटकन मधु पंकति लोलनि ॥ लौनी कर आनन परसतहैं कछुक खाइ कछु लग्यो कपोलनि । कहि जन सूर कहाँलौं वरणौं धन्य नंद जीवन युग तोलनि ॥ ११० ॥ राग विलावल ॥ गहे अंगुरिया तातकी नंद चलन सिखावत । अरवराइ गिरिपरतहैं करटेकि उठावत ॥ बारबार बकि श्यामसों कछु बोल बकावत । दुहुंघा द्वै दँतुली भई अति सुखछवि पावत ॥ कबहुं कान्ह कर छाँडि नंदपग द्वै करि गावत ॥ कबहुं धराणिपर बैठिकै मनमें कछु गावत ॥ कबहुं उलटि चलैं धामको घुटुरुन करि धावत । सूरश्याम मुख देखि महरमन हर्ष बढ़ावत ॥ ११ ॥ धनाश्री ॥ कान्ह चलत पग द्वै धरनी ॥ जो मनमें अभिलाप करतही सो देखत नंदधरनी ॥ रुनुक झुनुक नूपुर बाजत पग यह अतिहै मन हरनी । बैठजात पुनि उठत तुरतही सो छवि जाइ न बरनी ॥ ब्रजयुवती सब देखि थकित भई सुंदरताकी सरनी । चिरजीवो यशुदाको नंदन सूरदासको तरनी ॥ १२ ॥ राग विलावल ॥ चलत श्याम घन राजति पैजन पग पग चारु मनोहर । डगमगात डोलत आँगनमें निरखि विनोद मोहे सुर सुनि नर ॥ अरु मन मुदित यशोदा जननी पाछे फिरत गहे अंगुरी कर । मनो धेनु तृण छाँडि बच्छहित प्रेम पुलकि चित स्रवत पयोधर ॥ कुंडल लोल कपोल विराजत लटकन ललित लटुरिया भूपर । सूर श्याम सुंदर बिलोकनि रहत बालगोपाल नंदधर ॥ १३ ॥ राग गौरी ॥ भीतरते बाहरलौं आवत-घर आँगन अति चलत सुगम भयो देहरीमें अटकावत ॥ गिरि गिरि परत जात नहीं उलंघी अति श्रम होत न धावत । अटुठपैर वसुधा सब कीन्ही धाम अवाधि बिरमावत ॥ मनहीमन बलवीर कहतहैं ऐसे रंग बनावत । सूरदास प्रभु अगणित महिमा भक्तनके मन भावत ॥ १४ ॥ राग धनाश्री ॥ चलत देखि यशुमति सुख पावै । ठुमुकु ठुमुकु धरनी धर रेंगत जननी देखिं दिखावै ॥ देहरीलौं चालि जात बहुरि फिरि फिरि इतहीको आवै । गिरि गिरि परत बनत नहीं नाँवत सुर सुनि शोच करावै ॥ कोटि ब्रह्मांड करत छिन भीतर हरत विलंब न लावै । ताको लिए नंदकी रानी नानारूप खिलावै ॥ तब यशुमति कर टेकि श्यामको क्रमक्रमकै उतरावै । सूरदास प्रभु देखिं देखि सुर नर सुनि मन बुद्धि झुलावै ॥ १५ ॥ राग भैरव ॥ सो बल कहाँ गयो भगवान । जिहि बल मीनरूप जल थाह्यो लियो निगम हति असुर पुरान ॥ जेहि बल कमठपीठ पर गिरिधर सजलसिंधु नाथि

कियो विमान ॥ जिहिवल रूप वराह दशनपर राखी पुहुमी पुहुप समान ॥ जेहि बल हिरणकशिपु
 तनु फारयो भए भक्तको कृपानिधान ॥ जेहि बल बलि बंधन करि पठयो त्रैपद वसुधा करी प्रमान ।
 जेहि बल विप्र तिलकदै थापे रक्षा आपु करी विदमान ॥ जेहि बल रावणके शिर काटे कियो
 विभीषण नृपति समान ॥ जेहि बल जाम्बवंत मद भेटयो जेहि बल ध्रुवबिनती सुनि कान ।
 सूरदास अब धाम देहरी चढ़ि न सकत हरि खरेई अयान ॥ १६ ॥ आसावरी ॥ देखो अद्भुत
 अविगतिकी गति कैसो रूप धर्योहै हो ॥ तीन लोक जाके उदर भवन सो सूपके कोन परयो है हो ॥
 जाके नालरुद्र ब्रह्मादिक सकल योग व्रत साधैं हो ॥ तिनको नालछीनि ब्रजयुवती बाँटि तगासों बाँधैं हो
 जाके मुख सनकादिक तप कियो सकल चतुरई ठानीहो । सो मुख चूमति महारि यशोदा दूध लार
 लपटानी हो ॥ जिन काननि गजसंकट सुनिकै गरुडासन बिसरावै हो ॥ तिन कानन हैं निकट
 यशोदा हलरावै (दुलरावै) गुन गावै हो । विश्वभरण पोषण सब समरथ माखनकाज अरे है हो ॥
 रूप विराट रोम प्रति कोटि सुपलना माँझ परेहैं हो ॥ जिन्हहि भुजा प्रहलाद उबारयो हिरणकशिपु
 तनु फारे हो ॥ सो भुज पकरि कहत ब्रज युवती ठाढी होहु ललारे हो ॥ जाको ध्यान धरें सुर मुनि जन
 शंभु समाधि न टारी हो ॥ सो ठाकुरहै सूरदासको गोकुल गोप विहारी हो ॥ १७ ॥ आसावरी ॥ आनंद प्रेम
 उमंगी यशोदा लालरी खिलावै ॥ शिव सनकादि शुकादि ब्रह्मादिक खोजत अंत न पावै ॥ गोद लिए हैंसिकै
 हलरावत तोतरे बोल बोलवै ॥ दैकर ताल बजावति गावति राग अनूपम रहावै । कबहुँ करपल्लव
 आनि गहावति आँगन माँझ रिझावै । मोहिलियो सुरव्योम विमानन रवि नहि रथहि चलावै ॥ कबहुँ
 कहिलकै किलकै जननी मन सुखसिंधु बढावै । मोहिरही ब्रजकी युवती सब सूरदास यश गावै ॥ १८ ॥
 राग कान्हरो ॥ हरिहित मेरो माधैया । देहरी चढत परत गिरि गिरि कर पल्लव जो गहत है री मैया । भक्ति
 हेतु यशुदाके आये चरण धरणिपर धारैया । जिनहि चरण छलिबो बलिराजा नखप्रसेद गंगा जो
 बहैया ॥ जिहि स्वरूप मोहे ब्रह्मादिक कोटि भानु शशि उगैया ॥ सूरदास प्रभु इन चरणनकी मैं बालि मैं ब
 लिजैया ॥ १९ ॥ राग सृहो ॥ आँगन श्याम नचावहि यशोमति नंदरानी ॥ तारी दैद गावही मधुरी मृदुवानी ॥
 पाँयन नूपुर बाजई कटि किंकिनी कूजै ॥ नन्ही नन्ही एडिअन अरुणता फलबिंबन पूजै ॥ यशुमति गान
 सुनै श्रवण तव आपुन गावै ॥ तारी बजावत देखहि पुनि तारी बजावै ॥ केहरि नख उरपर सुठि शोभा
 कारी । मानौ श्याम घन मध्यमें नौ शशि उजियारी ॥ गभुआरे शिर केशहैं ते बधू सँवारे । लटकन
 लटकै भालपर विधु मधि गण तारे ॥ कटुला कंठ चिबुक तरे मुख हैंसनि विराजै । खंजन मीन
 शुक आनिकै मानौ परे दुरावै ॥ यशुमति सुतहि नचावई छवि देखत जियते । सूरदास प्रभु श्यामके
 सुख दरत न हियते ॥ २० ॥ राग विलावल ॥ त्यों त्यों नाचोरी मनमोहन धाम मधुर सुर होई । तौसियै
 किंकिनि हरि पग नेपुर रसहि मिले सुर दोई ॥ कंचनको कटुला मनमोहत तिन बघनहा बिचपोई ।
 निरखि निरखि सुख नंद सुवनको सुर मन आनंद होई ॥ देखत बनै कहत नहि आवै उपमा
 को नहि कोई । सुर भवनको तिमिर नशायो निरखत जननि यशोई ॥ २१ ॥ राग आसावरी ॥ जबते
 मैं खेलत देखो आँगन री यशुदाको पूत री । तबते गृहसों नाहिन नातौ दूत्यो जैसो काचो सूत री ॥
 अतिविशाल वारिजदल लोचन राजति काजर रेख री । इच्छासौं मकरंद लेत मनो अलि गोकुलके
 वेषरी ॥ श्रवणन नहि उपकंठ रहतहै अरु बोलत तुतरात री । उमंगे प्रेम नैन मगनहैंकै कापै रोके
 जात री ॥ दमकत दोउ दूधकी दतियाँ जग मग जग मग होत री । मानौ सुंदरता मांदिरमें रूप-
 तनकी ज्योति री ॥ सूरदास देखौ सुंदर मुख आनंद उर न समाई री ॥ मानौ कुमुद कामना पूरण पूरण इं-
 दुहि पाइ री ॥ २२ ॥ अद्भुत एक चितयो हौं सजनी नंदमहरके आँगन री ॥ सो मैं निरखि अपनपो खोयो

गई मथनियां मागन री ॥ बालदशा मुखकमल विलोकत कछु जननीसों बोलै री ॥ प्रगटत हैंसत
 दंतिया मानौ सीप दुरेदल ओलै री ॥ सुंदरभाल तिलक गोरोचन मिलि मसिबिंदुक लाग्यै री ॥ मनो
 मकरंद अचै रुचिके अलि सावक सोई न जाग्यौ री ॥ कुंडललोल कपोलन झलकत मनो दर्पणमें
 झाई री ॥ रही विलोकि बिचारि चारु छवि परमिति काहु न पाई री ॥ मंजुल तारनकी चपलाई चितु
 चतुरानन करपै री ॥ मनो शरासन समर धरे कर भौह चढे शरवरपै री ॥ जलाधि थाकित जनौ काग
 कपोत ज्यों कुलन कबहुं आयो री ॥ ना जानौ केहि अंग मगन मन चाहि रह्यो नहिं पायो री ॥ कहां
 लागि कहौ बनाइ वरणि जितनी छवि निरखत हारी री ॥ सूरश्यामके एक रोमपर देहु प्राण बलि
 हारी री ॥ २३ ॥ राग धनाश्री ॥ यशोदा तेरो चिरजीवहु गोपाल ॥ बेगि बढोबल सहित वृद्धलठ
 महार मनोहर बाल ॥ उपजि परचो इह कोख कर्मवश मुँदी सीप ज्यों लाल ॥ या गोकुलके
 प्राणजीवन वैरिनके उर शाल ॥ सूर कितो मन सुख पावतहै देखे श्याम तमाल ॥ रुजि आराति लागो
 मेरी अँखियन रोग दोष जंजाल ॥ २४ ॥ संग असावरी ॥ आजु गई हौं नंदभवनमें कहा कहौ ग्रहचै
 नु री ॥ बहुअंग चतुरंग छलमो कोटिक दुहियतु धेनु री ॥ घूमिरहे जित तित दधि मथना सुनत मेघ
 ध्वनि लाजै री ॥ वरणों कहा सदनकी शोभा वैकुण्ठहूते राजै री ॥ बोलिलई नववधू जानिके खेलत जहाँ
 कन्हई री ॥ मुख देखत मोहनीसी लागत रूप न वरण्यो जाई री ॥ लटकन लटाके रहे भू ऊपर पँचरंग
 मणिगण पोहै री ॥ मनहु गुरु शनि शुक्र एक होइ लाल भाल पर सोहै री ॥ गोरोचनको तिलक
 निकटही काजर बिंदुकु लाग्यौ री ॥ मानहु कमल गुनपीयरग रस निशि अलिमुत सोइ जाग्यौ री ॥
 विधु आनन पर दीर्घ लोचन नासा लटकत मोती री ॥ मानौ सोम संग करिलीनो जानि आपनो
 गोती री ॥ सीपजमाल श्याम उर सोहै बिच बचना छवि पावै री ॥ मानौ द्वैजशशि नखत सहितहै उपमा
 कहत न आवै री ॥ वरणो कहा अंग अंग शोभा भाव धरौ जलराशी री ॥ बाल लाल गोपाल
 हि वर्णत कविकुल करिहै हांसी री ॥ शोभासिंधु अगाधबोध बुधउपमा नाहिन और री ॥ रूपदेखि तनु
 थकित रहीहो मनौ भेइभरेकौ चोर री ॥ जो मेरी अँखियां रसना होती कहती रूप बनाइ री ॥ चिरजीवो
 यशुदाको नंदन सूरदास बलिजाइ री ॥ २५ ॥ बलभद्रवचन ॥ राग बिलावल ॥ कलबलते हरि हारपरे ॥
 नवरंग विमल जलद पर मानौ द्वै शशि आनि अरे ॥ तब गिरि कमठ सुरासुर सर्पहि धरत न मनमें
 नेक डेर ॥ तिन भुज भूषण भार परत कर गोपिनके आधार धरे ॥ चंद्रवदन मानौ मथि काढ्यो
 विहँसनि मनहु प्रकाशकरै ॥ सूरश्याम दधि भाजन भीतर निरखत मुख मुखते न टरै ॥ २६ ॥
 मथत दधि मथनी टेकरह्यौ ॥ आरि करत मटुकी गहि मोहन वासुकि शंभु डर्यो ॥ मंदर तरत सिंधु
 पुनि कांपत फिरि जनि मथन करै ॥ प्रलय होत जनि गहो मथानी प्रभु मर्याद टरै ॥ सुर अरि सुर
 ठाढे सब चितवै नैनानि नीर ढरै ॥ सूरदास प्रभु मुग्ध यशोदा मुख दाधिबिंदु गिरै ॥ २७ ॥
 जब दधिरिपु हरि हाथलियो खगपति अरिडर लै शंकत बासर पति आनंद कियो ॥ बिधि शिर
 धुनि सकुचत शिव सोचत गरलादिक कैसे जात पियो ॥ अति अनुराग संग कमलातान
 प्रफुलित अंगन अमित हियो ॥ एकन दुख एकन सुख उपजत को ऐसो न विनोद कियो ॥
 सूरदास प्रभु तुमरे महतहि एक एकते होत बियो ॥ २८ ॥ राग धनाश्री ॥ जब मोहनकर गही
 मथानी ॥ परसतवार दधि माटनेत चित उदधि शैल वासुकि भय मानी ॥ कबहुँक अहुठ परग
 करि वसुधा कबहुँक देहरी उलंघि न जानी ॥ कबहुँक सुर मुनि ध्यान न पावत कबहुँ खिला
 वति नंदकी रानी ॥ कबहुँक अपर खिरनही भावत कबहुँ मेखली उदर समानी ॥ कबहुँक
 आर करत माखन की कबहुँक भेष दिखाइ बिनानी ॥ कबहुँक अखिल उदर नहिं तर्पित कबहुँक
 दल माखन रुचि मानी ॥ सूरदास प्रभुकी यह लीला परत न महिमा शेष बखानी ॥ २९ ॥ राग बिलावल
 नंदजूके वारे कन्हैया छांडिदे मथनियाँ ॥ बार बार कहै मात यशोमति रनियाँ ॥ नेक रहौ माखन देउ

मेरे प्राण धनियां । आरि जिनि करौ बलिजाउहौ निधनीके धनियां ॥ सुर नर जाको ध्यान धरैं गावैं
मुनि जनियां ॥ ताको नैदरानी मुख चुंबतिहै लिए कनियां।सहसानन गुणगाने गनत नहीं बनियां।
सूरश्याम देखि सब भूली गोप धनियां ॥ १३० ॥ यशुमति दधि मथन करति बैठी वरधाम अजिर
ठाढे हरि हँसत नान्हीसी दतिआन छबिछाजै ॥ चितवत चित लेइ चोराई शोभा बरणि न जाई मुनि
नके मनहरनको मनमोहनि दलसाजै ॥ जननि कहति नाचौ तुम देहौ नवनीत मोहन रुनुकु झुनुकु
चलत पांइन चायन नृपुर बाजै । गावत गुण सूरदास यश बाढ्यो भुव अकाश नाचत त्रैलोक
नाथ माखनकेकाजै ॥ १३१ ॥ प्रात समय दधि मथत यशोदा अति मुख कमलनयन गुणगावति ॥
अतिहि मधुरगति कंठ सुघर अति नंदसुवन चित हितहि करावति ॥ नीलवसन तनु सजल जलद
मानौ दामिनि विविभुजदंड चलावति । चंद्रवदन लट लटकि छबीली मनहुँ अमृतरस राहु चुरावति ॥
गोरस मथत नाद इक उपजत किंकिनि धुनि मुनि श्रवण रमावति । सूरश्याम अचराधरे ठाढे काम
कसौटी कसिदेखरावति ॥ ३२ ॥ ललित ॥ छोटी छोटी गुडियां अंगुरियां छोटी छबीली नख ज्योति
मोती मानौ कंजदलनपर ॥ ललित आंगन खेलै डुमुकु डुमुकु डोलै झुनुक झुनुक बाजै पैजनी
मृदुमुखर । किंकिनी कलित कटि हाटक रतन जटित मृदु कर कमल पहुचिया रुचिर वर ॥ पियरी
पिछौरी झीनी और उपमा भीनी बालक दामिनि मानौ ओढे वारो वारिधर ॥ उरबघनहा कंठकटुला
झडूले वार बेनी लटकन मस बिंदु मुनि मनहर ॥ अंजन रंजित नयना चितवानि चितचोरैमुखशोभा
परवारौं अमित असमसर । चुटुकी वजावति नचावति नंद घरनि बालकेलि गावत मल्हावति
प्रेम सुघर ॥ किलकि किलकि हँसै द्वैद्वै दँतुरिया लसैं सूरदास मनवसै तोतरे वचनवर ॥ ३३ ॥
राग विलावल ॥ माधव तनकसे वदन तनकसे चरन भुज तनकसे करन पर तनक माखन ॥ तनकसीबातजो
कहत तनकसे तनक रिझि रहे तनक सुधन ॥ तनक कपोल तनकसी दंतुलिया तनक अधर अरु
तनक हँसन पर हरत हो मन । तनकहि तनक जो सूर निकट आवै तनक कृपाकरि दीजै तनक शर
नन ॥ माधव तनक चरन अरु तनक तनक भुज तनक बदन बोलै तनकसे बोल । तनक कपोल तन
कसी दँतिया तनक हँसन पर लेतहौ मन मोल ॥ तनक करनपर तनक माखन लिये देखत
तनक जाके सकल भुअन । तनक सुनै सुयश पावत परमगति तनक कहत तासों नंदसुवन ॥
तनक रीझ पर देत सकल तन तनक चितै चितवन चितके हरन ॥ तनकहि तनक तनक करि आवै
सूर तनक तनक दीजै तनक शरन ॥ ३४ ॥ राग कान्हरो ॥ गोद खिलावति कान्हसुनो बडभागिनिहो
नैदरानी ॥ आनँदकी निधि मुख लालको ताहि निरखि निशिवासर सोतो छबि क्योंहुँ नजाति
बखानी ॥ गुणअपार बहु विस्तार कहि न परत निगमागमबानी । सूरदास प्रभुको लिये यशुमति
गोदखिलावति चितै मुसुक्यानी ॥ ३५ ॥ राग गौरी ॥ मेरे माई श्याम मनोहर जीवनि ॥ निरखि नयन
भूलेते वदन छबि मधुर हँसनि पैपीवनि । कुंतल कुटिल मकर कुंडल ध्रुव नैनविलोकनि बंक ।
सिंधुसुधाते निकसि नयो शशि राजत मनौ मृगअंक ॥ शोभित सुमन मयूर चंद्रिका नीलनलिन
तनुश्याम । मानहुनक्षत्र समेत इंद्र धनु सुभग मेघ अभिराम ॥ परमकुशलकोविद लीलानट मुसुकनि
मन हरिलेत । कृपा कटाक्ष कमल कर फेरत सूर जननि सुखदेत ॥ ३६ ॥ राग आसावरी ॥ वेद कमल
मुख परसत जननी अंक लिये सुतरति करि श्याम । परमसुभग जु अरुन कोमल रुचि आनंदित
मनु पूरणकाम ॥ आलंबितजु पृष्ठ बल सुंदर परस्पर चितवत हरि राम । झाँकि उझकि हँसत
दोऊ सुत प्रेम मगन भई इकटक जाम ॥ देखिस्वरूप न रही कछू सुधि दूरी तबहिं कंठते दाम ।
सूरदास प्रभु शिशुलीला रस आवहु नंद देखि सुखधाम ॥ ३७ ॥ राग गौरी ॥ शोभा मेरे श्यामहिपै

सोहै । बलि बलि जाउँ छबीले मुखकी या पटतरको को है ॥ या बानक उपमा दीबेको सुकबिक हाटक टोहै । देखत अंग थके मनमें शशि कोटि मदन छवि मोहै ॥ शशिंगण गारि कियो विधि आनन बंकमौह मिलि जोहै । सूर श्याम सुंदरता निरखत मुनिजनको मन मोहै ॥ ३८ ॥ राग विलावल ॥ बाल गोपाल खेलौ मेरे तात । बलि बलि जाउँ मुखारविंदकी अमी वचन बोलत तुतरात ॥ उनींदे नयन विशालकी शोभा कहत न बनि आवै कछु बात । दूर खरे सब सखा बुलावत नयन मीडि उठि आए प्रभात ॥ दुहुँकर माठ गह्यो नंदनंदन छिटकि बूंद दधि परत अघात ॥ । मानहुं गजमुक्ता मर्कत पर शोभित सुभग साँवरे गात ॥ जननी प्रति माँगत मनमोहन दे माखन रोटी उठि प्रात । लोटंत पुहुमि सूर सुंदर घन चारि पदारथ जाके हाथ ॥ ३९ ॥ पालने झुलो मेरे लाल पियारे ॥ सुसकनिकी हौं बलि बलि करौं तिल तिल हठ न करहुजे दुलारे । काजर हाथ भरो जिनि मोहन हैं नैन अतिही रतनारे । शिर कुलही पहिराय पैजनी तहाँ जाहु जहाँ नंदववा रे ॥ यह विनोद देखत धरणीधर मात पिता बलभद्र ददा रे ॥ सूर नर मुनि कौतूहल भूले देखत सूर श्याम हैं कारे ॥ ४० ॥ क्रीडत प्रात समय दोउ बीर ॥ माखन माँगत बात न मानत झकत यशोदा जननी तीर ॥ जननी मध्य सन्मुख संकर्षण ऐंचत कान्ह स्वस्योतनु चीर ॥ मनो सरस्वती संग उभै द्विज राम कृष्ण अरु नील कंठीर ॥ सूरश्याम गही कुबरी कर मुक्ता मांग गही बलवीर । ताहन भखुलीनो अप अपनो मानहु लेत निवैरनि सीरा ॥ ४१ ॥ गोपाल राइ दधि मांगत अरु रोटी । माखन सहित देहि मेरि जननी सुपक समंगल मोटी ॥ कतहो आरि करत मेरे मोहन कहत तुम आँगन लोटी । जो माँगहु सो देहुं मनोहर यहै बात तेरी खोटी ॥ प्रातकाल उठि देहुं कलेऊ वदन चुपरि अरु चोटी । सूरदासको ठाकुर ठाढो हाथ लकुट लिये छोटी ॥ ४२ ॥ हरिकर राजत माखन रोटी । मनौ वारिज शनि वैरु जानि जिय गह्यो सुधा शिशु घोटी ॥ मनौ वराह भूधर सहपति धरी दशननकी कोठी । शनि शिशु मेलि मुख अंबुज भीतर उपजी उपमा मोठी ॥ नग्न गात सुसक्यात तात ढिग निरत करत गहि चोटी । सूरज प्रभुकी इहैं जु जूठनि लालन ललित लपेटी ॥ ४३ ॥ दोउ भैया भैयापै माँगत दे माँ माखन रोटी । सुनी भावती एक बात सुतनकी झूठेहि धामके काम अगोटी ॥ बलजू गह्यो नासिका मोती कान्हकुँवर गही दृढ़ कर चोटी । मानहु हंस मोर भख लीने कविजन कहै उपमा कछु छोटी ॥ यह छवि देखत महरि अनंदित महर हैं सत लोटि लोटी ॥ सूरदास प्रभु मुदित यशोदा भाग बडे करमनिकी मोटी ॥ ४४ ॥ राग आसावरी ॥ तनिक दैरी माइ । माखन तनक दैरी माइ ॥ तनिक करपर तनिक रोटी मांगत चरन चलाइ ॥ कनक भूपर रतनकी रेखा नेक पकरचो धाइ । कंपी आगिरि शेष शक्यो उदधि चलो अकुलाइ ॥ जा मुखको ब्रह्मादिक लोचैं सो मांगत ललचाइ । ईशके वेग दरशदीजै ब्रज बालक लेत बलाइ ॥ माखन मांगत श्याम सुंदर देत पग पटकाइ ॥ तनक मुखकी तनक बतियां मांगत हैं तोतराइ ॥ मेरे मनको तनिक मोहन लागु मोहि बलाइ ॥ श्याम सुंदर गिरिधरनि ऊपर सूर बलि बलि जाइ ॥ ४५ ॥ राग विलावल ॥ नेकरहौ माख नद्यो तुमको । ठाढी मथति जननि दधि आतुर लवनी नंद सुअनको ॥ मैं बलि जाउँ श्याम घन सुंदर भूख लगी तुम भारी । बात कहूँकी बृझति श्यामहि फेर करत महतारी ॥ कहत बात हरि कछु न समुझत झूठेहि देत हुंकारी । सूरदास प्रभुके गुण गावत तुरतहि बिसरि गई नंदनारी ॥ ४६ ॥ बातनहीं सुत लाइ लियो । तबलों मथि दधि जननी यशोदा माखन करि हरि हाथ दियो ॥ लैलै अघर परसकरि जेवत देखत फूल्यो गात हियो । आपुहि खात प्रशंसत आपुहि माखन

रोटी बहुत प्रियो ॥ जो प्रभु शिव सनकादिक दुर्लभ सुतहित वशकरि नंदप्रियो । यह सुख निरखत
सूरज प्रभुको धन्य धन्य फल सुफल जियो ॥ ४७ ॥ अथ बालवेष वर्णन ॥ वरनों बालवेष मुरारि । थकित
जित कित अमर मुनिगण नंदलाल निहारि ॥ केश शिर बिन पवनके चहुँ दिशा छिटके झारि । शीश
पर धरे जटा मानौ रूप कियो त्रिपुरारि ॥ तिलक ललित ललाट केशर बिंदु शोभा कारि । रेखा
अरुन ज्योति तिय लोचन रह्यो जनु रिपु जारि ॥ कंठ कटुला नीलमणि अंभोजमाल सँवारि ।
गरल गिरि बकपाल उर अहि भाय भए मदनारि ॥ कुटिल हरिनख हिये हरिके हरष निरखति नारि ।
ईश जनु रजनीश राख्यो भालहूते उतारि ॥ सदन रज तन श्याम शोभित सुभग इहि अनुहारि ।
मनहुँ अंग विभूति राजत शंभुसो मधुहारि ॥ त्रिदशपति पति अशनको अति जननिसों करै आरि ।
सूरदास विरंचि जाको जपत निज मुख चारि ॥ ४८ ॥ सखीरि नंदनंदन देखु । धूरि धूसरि जटाजु टली
हरि किए हरभेषु ॥ नीलपाट परोइ मणिगण फणिग धोखे जाइ । खुनखुना करि हँसत मोहन नचत
डौरु बजाइ ॥ जलजमाल गोपाल पहिरे कहौ कहाँ बनाइ । मुंडमाला मनोहर गर ऐसी शोभा पाइ ॥
स्वातिसुत माला बिराजत श्यामतन यो भाइ । मनौ गंगा गौरि डरहरि लिए कंठ लगाइ ॥ केहरीके
नखहि निरखत रही नारि बिचारि । बालशशि मनौ भालते लै उर धरयो त्रिपुरारि ॥ देखि अंग अनंग
डरयो नंदसुतको जान । सूरदासके हृदय बसिरहयो श्याम शिवको ध्यान ॥ ४९ ॥ राग नटनारायण ॥
विहरत विविध बालक संगडगर डग डोलत मगनि मग धूरि धूसर अंग ॥ ललित गति पग फरत पैजनि
परस्पर किलकानि । मानहु मधुर मराल शावक सुभग बैन बिहानि ॥ ललित श्रीगोपाल लोचन श्याम
शोभा दून मनौ मयंकहि अंक दीन्ही सिंहकाके सून ॥ दूर दमकत श्रवण शोभा जलज युग डहडहत ।
मनहुँ वासव बलि पठाए जीव कवि कछु कहत ॥ कबहुँ द्वारे दौरि आवत कबहुँ नंदनिकेत । सूर प्र-
भुको गहत ग्वालिनि चारु चुंबन हेत ॥ ५० ॥ राग विलावल ॥ देखो मैं दधिसुतमें दधि जाता एक अचंभो
देखि सखी री रिपुमें रिपु जु समात ॥ दधिपर कीर कीरपर पंकज पंकजके द्वै पाता यह शोभा देखत पशु
पालक फूले अंग न समात ॥ सुंदर बदन विलोकि श्यामको नंद निरखि मुसकात । ऐसो ध्यान धरै जो
हरिको सूरदास बलिजात ॥ ५१ ॥ राग धनाश्री ॥ दधिसुत जामें नंददुवारा निरखि नैन अरुइयो मनमोहन
रतन देहु कर बारंबार ॥ दीरघ मोल कह्यो व्यापारी रहे ठगेसे कौतुक हार । कर ऊपर लै राखिरहे
हरि देत न मुक्ता परम सुधार ॥ गोकुलनाथ वए यशुमतिके आँगन भीतर भवन भँझार । शाखापत्र
भए जलभेलत फूलत फरत न लागी बार ॥ जानत नहीं मर्म सुर नर मुनि ब्रह्मादिक नहि परत
बिचार । सूरदास प्रभुकी यह लीला ब्रजवनिता गुहि पहिरे हार ॥ ५२ ॥ कजरीको पय पिअहु लाल
तेरी चोटी बढै । सब लरिकनमें सुन सुंदर सुत तो श्री अधिक चढै ॥ जैसे देखि और ब्रजबालक
त्यो बलवैस बढै । कंस केशि बक वैरिनके उर अनुदिन अनल उठै ॥ यह सुनिकै हरि पविन लागे
त्यो त्यों लियो लटै । अचवन पै तातो जब लाग्यो रोवत जीभ उठै ॥ पुनि पीवतही कच टकटोवे
झुठे जनानि रढै । सूर निरखि मुख हँसत यशोदा सो सुख उर न कढै ॥ ५३ ॥ रामकली ॥ यशोदा
कबहि बढैगी चोटी । किती बार मोहिं दूध पिवत भई यह अजहूँ हैं छोटी ॥ तू जो कहति बलकी
बेनी ज्यों है लौबी मोटी । काढत गुहत न्दवावत ओछत नागिनि सी भवै लोटी ॥ काचो दूध पि-
वावत पचिपचि देत न माखन रोटी । सूर श्याम चिर जीवौ दोउ भैया हरि हलधरकी जोटी ॥ ५४ ॥
देवगंधार ॥ कहन लगे मोहन मैया मैया । पितानंदसों बाबा बाबा अरु हलधरसों भैया ॥ ऊँचे
चाढ़ि चाढ़ि कहत यशोदा लैलै नाम कन्हैया । दूर कहूं जिन जाहु ललारे मारैगी काहुकी गैया ॥

गोपी ग्वाल करत कौतूहल घर घर लेत बधैया । मणि खंभन प्रतिबिंब विलोकत पुनि नवनीत
 कुँवर हरि पइया ॥ नंद यशोदाजिके उरते इह छवि अनत न जइआ ॥ सूरदास प्रभु तुमरे दरशको
 चरणनकी बलि गइआ ॥ ५५ ॥ राग सारंग ॥ मैया मोहिं बडो करिबे री । दूध दही घृत माखन मेवा जो
 मांगों सो दे री ॥ कछु हवस राखै जिन मेरी जोइ जोइ मोहिं रुचै री ॥ रंगभूमिमें कंस पछारों
 कहाँ कहाँ लौं मैं री । सूरदास स्वामीकी लीला मथुरा राखौ जो री ॥ सुंदर श्याम हँसत
 जननीसों नंदववाकी सौं री ॥ ५६ ॥ राग रामकली ॥ हरि अपने आगे कछु गावत । तनक
 तनक चरणनसों नाचत मनही मनहि रिझावत ॥ बाहँ उँचाइ काजरी धौरी गैयन टेरि बुलावत ।
 कबहुँक बाबा नंद बुलावत कबहुँक घरमें आवत ॥ माखन तनक आपने कर लै तनक बदनमें
 नावत । कबहुँ चितै प्रतिबिंब खंभमें लवनी लिए खावावत ॥ दुरि देखत यशुमति यह लीला हर्ष
 अनंद बढावत । सूर श्यामके बालचरित नितही नित देखत भावत ॥ ५७ ॥ राग विलावल ॥ आजु सखी
 हौं प्रात समय दधि मथन उठी अकुलाइ । भरि भाजन मणिखंभ निकट धरि नेत लियो करजाइ ॥
 सुनत शब्द तेहि छिन समीप में महारि हँसि आए धाइ । मोहे बालविनोद मोदकरि नयनन नृत्य
 देखाइ ॥ चितवनि चलनि हरयो चित चंचल चितैरही चितलाइ । पुलकित तब प्रतिबिंब देखि
 करि सबही एक सुभाइ ॥ माखन पिंड विभाग दुहुँकर आपत मुँह मुसुकाइ । सूरदास प्रभुता
 सुतके सुख सकै न हृदय समाइ ॥ ५८ ॥ बलि बलि जाउँ मधुर सुर गावहु । अबकी बार मेरे
 कुँवर कन्हैया नंदहि नाचि देखावहु ॥ तारी देहु आपने करकी परम प्रीति उपजावहु । आनयंत्र
 ध्वनि सुनि डरपत कत मो भुज कंठ लगावहु ॥ जिन शंका जियकरो लाल मेरे काहेको भरमावहु ।
 बाहँ उँचाइ कालिकी नाई धौरी धेनु बुलावहु ॥ नाचहु नेकु जाउँ बलि तेरी मेरी साधं पुरावहु ।
 रत्न जटित किंकिणि पग नृपुर् अपने रंग वजावहु ॥ कनक खंभ प्रतिबिंबत शिशु इक लौनी ताहि
 खवावहु । सूर श्याम मेरे उरते कहुं टारेनेक न भावहु ॥ ५९ ॥ राग सारंग ॥ कान्ह बलिजाउँ ऐसी
 आरि न कीजै । जोइ जोइ भावै सोइ सोइ लीजै ॥ कहत यशोदा रानी । को खिझवै शारंगपानी ॥
 मेरे जो लाल खिजावै । सो अपनो कियो भलो पावै ॥ तिहि देहों देश निकारो । ताको ब्रज नाहिं
 नगारो ॥ अति रिसही ते तनु छीजै । सुठि कोमल अंग पसीजै ॥ बर्जत बर्जत बिरुझाने । करि
 क्रोध मनहि अकुलाने ॥ धरत धरणि धर लोटे । माताको चीर नखोटे ॥ अंग आभूषण सब तोरे ।
 लवनी दधि भाजन फोरे ॥ देखि तप्त जल तरसै । यशुदाके चरणन परसै ॥ महारि बाँह गहि आने ।
 तब तेल उबटने साने ॥ तब गिरत परत उठि भागे । कहुं नेक निकट नहिं लागे ॥ तब नंदघरनि
 चुचकारे । आवहु बलि जाउँ तुम्हारे ॥ नहिं आवहु तो भले लाल । पुनि जानहुगे मदन
 गोपाल ॥ तुम मेरी रिस नहिं जानौ । मोको नहिं तुम पहिचानौ ॥ मैं आजु तुम्हें
 गहि बांधौ । हाहा करि करि अनुराधौ ॥ बाबा नंद उतहिते आए । कौने हरि अतिहि
 खिझाए ॥ मुख चूमि हरखि लै आए । यशुमतिपै पहुँचाए ॥ मोहन कत खिझत अयानी ।
 लिये लाइ हिये नंदरानी ॥ क्योंहुं जतन जतन करि पाए । तब उबटन तेल लगाए ॥
 तातो जल आनि समोयो । अन्हवाइ दियो मुख धोयो ॥ अति सरस वसन तन पोछे । लैकै मुख
 कमल अँगोछे ॥ अंजन दोउ दृग भरि दीनों ॥ भुव चारु चखोडा कीनों ॥ अँग आभूषण जे बनाए ।
 लालहि क्रम क्रम ले पहिराए ॥ ऐसी रिस न करो मेरे कान्हा । अब खाहु कुँवर कछु नान्हा ॥ तुतरात
 कहयो काहै री । जो मोहिं भावै सो दे री ॥ जोइ जोइ भावे मेरे प्यारे सोइ सोइ देहों जु लला रे ॥ कह्योहै

सिरावन सीरा॥कछु हठ न करौ बलवीरा॥सद दधि माखन दै आनी॥तापर मधु मिश्री सानी॥खोवामें
मधुर मिठाई । सो देखत अतिरुचि पाई ॥ कछु बलदाऊको दीजै॥अरु दूध अधावट पीजै ॥ सब हेरि
धरी है साढी । लै उपर उपरते काढी ॥ अति प्योसरसरिस बनाई॥तेहि सोंठ मिरच रुचिताई॥दूध बरा
दही बोरी । सो खात अमृत इक कोरी ॥ सुठि सरस जलेबी बोरी । जेहि जेवत रुचि नहिं थोरी॥अरु
खुरमा सरस सँवारे । ते परसि धरैहैं न्यारे॥संकरपालेसद पागेते जेवत परमसभागे॥सेव लाडू रुचि
रसवारे । जे मुख मेलत सुकुमारे ॥ सुतिलाडू हैं सुठि मीठे ॥ वै खात न कबहुँ उबैठे॥ खीर लाडू लै
गए नाएते करि बहु जतन बनाए॥गोझा बहु पूरन पूरे । भरि भरि कपूररस चूरे ॥ अरु तैसिय गाल
मसूरी । जो खातहि मुख दुख दूरी ॥ अरु है समि सरस सँवारी । अति खात परम सुखकारी । पापर
वरण नहिं जाही । जेहि देखत अतिसुख पाही॥मालपुवा मधुसाने । ते तुरत तपत करि आने॥सुंदर
अतिसरस अँदरसे । ते घृत मधु दधि मिलि सरसे ॥ घेवर अति चिरत चभोरे । लै खांड उपर तर
बोरे ॥ माधुरि अति सरस सजूरी । सद परसि धरी घृतपूरी ॥ जब पूरी सुनी हरि हरण्यो । तब भोजन
पर मन करण्यो ॥ सुनि तुरत यशोदा ल्याई । अति रुचि समेत हरि खाई ॥ बलदाऊको टेरि
बुलाए । यह सुनि हलधर तहां आए॥षटरस परकार सँगाए ॥ जे वरणि यशोदा गाए ॥ मनमोहन
हलधर वीरा । जेवत रुचिराख्यो सीरा॥शीतलजल लियो मँगई । भरि झारी यशुमति ल्याई॥अच-
वत तब नयन जुडाने । दोऊ हरषि हरषि मुसकाने ॥ हँसि जननी चुरु भरवाए । तब कछु कछु मुख
पखराए ॥ तब बीरी तनक मुख नाए । अति लाल अधर है आए ॥ तब सूरदास बलिहारी ॥
माँगत कछु जूँठनि थारी ॥ हरि तनक तनक कछु खाये॥जूँठनि सब भक्तनि पाए॥१६०॥राग धनाश्री॥
पाहुनी करिदै तनक मद्यो । हौं लागी गृहकाज रसोंई यशुमति बिनय कद्यो ॥ आरि करै मनमो-
हन मेरो अंचल आनि गद्यो । व्याकुल मथति मथनियां रीती दधि भैं ढरकि रह्यो ॥ माखन जात
जानि नँदरानी सखिन संहारि कद्यो । सूर श्याम मुख निरखि मगन भई दुहुनि सकोच सद्यो ॥
॥ ६१॥ आसावरी ॥ यशुमति जबहि कद्यो अन्हवावन रोइगए हरि लोटत री । लेत उबटनो लै आगे दधि
कहि लालहि चोटत पोटत री ॥ मैं बलिजाउँ न्हाउ जिनि मोहन कत रोवत बिनकाजै री । पाछे
धरि राखौ छपाइकै उबटन तेल समाजै री ॥ महारि बहुत बिनती करि राखति मानत नहीं कन्हईरी ।
सूरश्याम अतिही बिरुझाने सुर मुनि अंत न पाई री ॥ ६२ ॥ अथ चंद्रप्रस्ताव ॥ कान्हरो ॥ ठाढी
अजिर यशोदा अपने हरिहि लिये चंद्र देखरावत । रोवत कत बलिजाउँ तुम्हारी देखौ धौं भरि
नयल जुडावत ॥ चितैरहे तब आपुन शशितन अपने कर लै लै जु बतावत । मीठो लगत किधौं
यह खाटो देखत अति सुंदर मनभावत॥मनमनही हरि बुद्धि करतहैं माताको कहि ताहि मँगावत ।
लागी भूख चंदमै खैहौं देहु देहु रिसकरि बिरुझावत ॥ यशुमति कहत कहा मैं कीनौ रोवत
मोहन अति दुखपावत॥सूर श्यामके यशुदा बोधति गगन चिरैयां उडत लखावत॥६३॥ राग कान्हरो ॥
किहिविधि करि कान्है समुझैहौं । मैही भूलिचंद्र दिखरायो ताहि कहत मोहि दै मैं खैहौं ॥अनहोनी
कहुँ होत कन्हैया देखी सुनी न बात । यह तौ आहि खिलौना सवको खान कहत तेहि तात ॥ यहै
देत लवनी नित मोको छिन छिन साँझ सवारे । बार बार तुम माखन माँगत देउ कहाँते प्यारे ॥
देखतरहौ खिलौना चंदा आरि न करौ कन्हई ॥ सूर श्याम लियो महारि यशोदा नंदहि कहत बु-
झाई ॥६४॥ राग धनाश्री ॥आछे मेरे लालहौ ऐसीआरि न कीजै॥मधु मेवा पकवान मिठाई जोइ भवै
सोइ लीजै ॥ सद माखन घृत दद्यो सजाये अरु मीठो पय पीजै । पालागों हठ अधिक करो जिनि

अति रिसमें तनु छीजै ॥ आन बतावत आन दिखावत बालक तौ न पतीजै । खिझ खिझ कान्ह
 खसत कनियति सुसुकि सुसुकि मन खीजै ॥ जलपुट आनि धरयो आँगनमें मोहननेक तौ लीजै ।
 सूर श्याम हठि चंदहि माँगै चंद कहँते दीजे ॥ ६५ ॥ राग कान्हरो ॥ बार बार यशुमति सुत बोधति
 आउ चंद तोहिं लाल बुलावै । मधु मेवा पकवान मिठाई आपु न खेहै तोहिं खवावै ॥ हाथहि पर तोहिं
 लीने खेलै नहिं धरणी बैठवै । जलभाजन करलै जु उठावति याहीमें तू तनुधरि आवै ॥
 जलपुट आनि धरणि पर राख्यो गहि आन्यो वह चन्द्र दिखावै । सूरदास प्रभु हँसि सुसु-
 काने बार बार दोऊ कर नावै ॥ ६६ ॥ राग रामकली ॥ मेरो माई ऐसो हठी बालगोविंदा ॥ अपने कर गहि
 गगन बतावत खेलनको माँगै चंदा ॥ वासनकै जल धरयो यशोदा हरिको आनि दिखावै । रुदन करत
 हूँटै नहिं पावत धरणि चन्द कैसे आवै ॥ दूध दही पकवान मिठाई जु कछु माँगु मेरे छौना । भौरा
 चकई लाल पाटको लेंडुवा माँगु खिलौना ॥ दैत्यदलन गुजदंत उपारन कंसकेश धरि फंदा ।
 सूर दास बलिजाइ यशोमति सुखके सागर दुखके खंदा ॥ ६७ ॥ लहौं री मा चंदा चहौंगो । कहा
 करौं जलपुट भीतरको बाहर ओकि गहौंगो ॥ इहतौ झलमलात झकझोरत कैसेकै जु लहौंगो ।
 वहतो निपट निकटही देखत वरज्योहौं न रहौंगो ॥ तुमरो प्रेम प्रगट मैं जान्यो वौराए न बहौंगो ।
 सूर श्याम कहै करगहि ल्याऊं शशि तनु दाप दहौंगो ॥ ६८ ॥ राग धनाश्री ॥ लाल यह चंदा लेलैहो ।
 कमलनयन बलिजाइ यशोदा नीचे नेक चितैहो ॥ जा कारण सुन सुत सुंदर वर कीन्हो इतीअनैहो ।
 सोइ सुधाकर देखि दमोदर या भाजनमें हैहो ॥ नभते निकट आनि राख्योहै जलपुट जतननजो
 गैहो । लै अपने कर काढ़ि दमोदर जो भावै सो कैहो ॥ गगनमँडलते गहि आन्यो है पंछी एक पठै
 हौ । सूरदास प्रभु इती बातको कत मेरो लाल हठैहो ॥ ६९ ॥ राग विहागते ॥ तुम सुख देखि डरतु शशि
 भारी । कर करिके हरि हेरयो चाहत भाजि पताल गयो अपहारी ॥ वह शशितो कैसेहु नहिं आवत यह
 ऐसी कछु बुद्धि बिचारी । वदन देखि विधु विधि सकात मन नैन कंज कुंडल उजियारी ॥ सुनहु श्याम
 तुमको शशि डरपत है कहत ए शरन तुम्हारी । सूर श्याम विरुझाने सोए लिए लगाइ छतियाँ
 महतारी ॥ ७० ॥ राग केदारो ॥ यशुमति लै पलिका पौढावति । मेरो आजु अतिही विरुझानो यह कहि कहि
 मधुरे सुर गावति ॥ पौढिगई पुनि हरये करिकै अंगमोरि तब हारे जमुहाने । करसों ठोंकि सुतहि दुलरा-
 वति चटपटाइ बैठे अतुराने ॥ पौढौ लाल कथा एक कहिहौं अतिमीठी श्रवणनको प्यारी । यह सुनि
 सूरश्याम मनहरपे पौढिगए हँसि देत हुँकारी ॥ ७१ ॥ सुन सुत एक कथा कहौं प्यारी । कमलन-
 यन मनआनंद उपज्यो चतुर शिरोमणि देत हुँकारी ॥ नगर एक रमणीक अयोध्या बडे महल जहँ
 अगम अटारी । बहुत गली पुर बीच विराजत भाँति भाँति सब हाट बजारी ॥ तहाँ नृपति दशरथ रघुवंशी
 जाके नारि तीन सुखकारी । कौशल्याकैकयी सुमित्रा तिनके जन्म भए सुत चारी ॥ चारि पुत्र राजाके
 प्रगटे तिनमें एक राम व्रतधारी । जनक धनुष व्रत देखि जानकी त्रिभुवनके सब नृपति हुँकारी ॥
 राजपुत्र दोउ ऋषि लै आए सुनि जनक व्रत तहाँ पगधारी । धनुषतोरि मुखमोरि नृपनको जनक
 सुता तिनकी वरनारी ॥ पग अँगुठा जब पीर नृपतिके तब कैकयी मुखमेलि निवारी । वचन माँ-
 गि नृपसों तब लीनो रघुपतिके अभिषेक सँवारी ॥ तात वचन सुनि तज्यो राज्य तिन भ्राता सहित
 घरनि वनचारी । उनके जात पिता तनुत्याग्यो अतिव्याकुल करि जीव बिसारी ॥ चित्रकूट गए
 भरत मिलन जब पगपाँवरी देकरी कृपारी । युवती हेतु कनकमृग मारी राजिवलोचन गर्वप्रहारी ॥
 रावण हरण करयो सीताको सुनि करुणामय नैद बिसारी । सूर श्याम कर उठे चापको लछिमन देहु

जननि भ्रमभारी ॥७२॥ राग विहागरो ॥ नंदनंदन तुम सुनहु कहानी । पहिली कथा पुरातन सुन सुत
जननी पास मुखवानी ॥ रामचंद्र राजा दशरथसुन जनकमुताताके गृहदानी । कहि पंचतत्त्व अरु
पंचवटी वन छाँडि चले रजधानी ॥ तहां वसत सीता हरलीनो रजनीचर अभिमानी । लछिमन
धनुष देहु करि उठि हरि यशुमति सूर डरानी ॥७३॥ राग केदारी ॥ यशुमति मनमें यहै विचारति । झझ
कि उम्हो सोवत हरि अबहीं कछु पढ़ि पढ़ि तनु दोष निवारति ॥ खेलतमें कहुँ डीठि लगाई लैलै
राई लोनु उतारति । सांझहिने मेरो बिरहज्ञान्यो चंदहि देखे करी अतिआरति ॥ बार बार कुलेदेव
मनावति दोउ कर जोरि शिरहि ले धारति । सूरदास यशुमति नंदरानी निरखि वदन त्रयताप विसार
ति ॥७४॥ नहिन जगाइ सकति सुनि सोवावत सजनी । अपने जान अजहुँ कान्ह मानत हैं रजनी ॥
जब जब हौं निकट जाति रहति लागी लोभा । तनुको गति विसरिजाति निरखत मुखशोभा ॥ व
चननिको बहुत करति साजति जिय ठाढी । नैननि बिचार परति देखत रुचि बाढी ॥ इहिविधि
वदनारविंद यशुमति मनभावै । सूरदास सुखकी राशि कहत न बनिआवै ॥७५॥ राग विलावल ॥ जागिये
ब्रजराज कुँवर कमल कुसुम फूले । कुमुद वृंद सकुचत भए भृंगलता भूले ॥ तमचुर खग
रौर सुनहु बोलत वनराई ॥ रौभनि गौ खिरकनमें वछराहिन धाई । विधु मलीन रविप्रकाश गावत
नर नारी । भूर श्याम प्रात उठौ अंबुज करधारी ॥७६॥ राग रामकली ॥ प्रात समय उठि सोवत
हरिको वदन उचारयो नंद । रही न सकत देखनको आतुर नैन निशाके द्वंद ॥ स्वच्छ सेजमें
ते मुख निकसत गयो तिमिर मिटि मंद । मानौं मथि सुरसिंधु फेन फटि दरश दिखाई चंद ॥
धायो चतुर चक्रोर सूर सुनि सब सखि सखा सुछंद ॥ रही न सुधि शरीर धीरमति पिबत किरन
मकरंद ॥७७॥ भोरभए निरखत हरिको मुख प्रमुदित यशुमति हरषित नंद । दिनकर किरन
नलिन ज्यों विकसत उर उपजत आनंद ॥ वदन उचारि निहारत जननी जागहु बलिगइ आनंद
कंद । मानहु मथत सुर सिंधु फेनफटि दई देखाई पूरन चंद ॥ जाको यश ब्रह्मादिक मुनिजन नेति
नेति गावत श्रुति छंद । सो गोपाल ब्रजके सुनि सूरज प्रगटे पूरण परमानंद ॥७८॥ ललित ॥ जा
गिये गुपाल लाल आनंदनिधि नंदबाल यशुमति कहै बार बार भोर भयो प्यारे । नैन कमलसे
विशाल प्रीति वापिका मराल मदन ललित वदन ऊपर कोटि वारिडारे । उगत अरुन विगत
शर्वरी शशांक किरनहीन दीन दीपक मलीन छीन दुति समूह तारे ॥ मनहु ज्ञान घनप्रकाश बीते सब
भवविलास आस त्रास तिमिर तोष तरनि तेज जारे । बोलत खग सुखर निकर मधुर है प्रतीति
सुनहु परम प्राण जीवन धन मेरे तुम बारे । मनौ वेद बंदी सुनि सूत वृंद मागधगण बिरद वदत
जैजैजैत कैटभारे ॥ विकसत कमलावलीय चलि प्रफंद चंचरीक गुंजत कल कोमल ध्वनि त्यागि
कंज न्यारे । मानौ वैरागपाइ सकल कुलग्रह विहाइ प्रेमवंत फिरत भृत्य गुनत गुन तिहारे ॥ सुनत
वचन प्रियरसाल जागे अतिशय दयाल भागे जंजाल विपुल दुख कदम टारे ॥ त्यागे भ्रमफंद द्वंद
निरखिके सुखारविंद सूरदास अति अनंद मेटे मद भारे ॥७९॥ प्रातभयो जागो गोपाल ।
नवल सुंदरी आई बोलत तुमहि सबै ब्रजबाल ॥ प्रगटो भानु मंद उडुपति भयो फूले तरुन तमाल ।
दरशनको ठाढी ब्रजवनिता ल्याई कुसुम गुंज वनमाल ॥ मुखहि धोइ सुंदर बलिहारी करहु कलेऊ
मोहन लाल । सूरदास प्रभु आनंदके निधि अंबुजलोचन नयन विशाल ॥८०॥ ललित ॥ जागो
जागोहो गोपाल । नाहिन इतो सोइये सुनु सुत प्रातसमय शुचिकाल ॥ दिन विकसत मनौ कमलको-
शप्रति छवि ज्यों मधुपनके माल । फिरि फिरि निरखि निरखि छिन छिन छिन सब गोपनुके बाल ॥ तौ

तुमहीं आपुन उठि देखौ निद्रा नैन विशाल । ज्यों तुम मुहिं न पत्याहु सूर प्रभु सुंदर श्याम तमाल
 ॥८१॥ राग भैरव ॥ उठौ नंदकुमार भयो भितुसार जगावत नंदकी रानी । झारिकै जल बदन पखारौ
 कहि कहि शारंगपानी ॥ माखन रोटी अरु मधु मेवा जो भावे सो लेउ आनी । सूर श्याम मुख निर-
 खि यशोदा मनही मनहि सिहानी ॥ ८२ ॥ राग विलावल ॥ नंदके लाल उठे जब सोइ ।
 निरखि मुखारविंदकी शोभा कहि काके मन धीरज होइ ॥ सुनि मन हरन हरन युव-
 तीके रतिमनि जाइ सब खोइ । ईषदहास दशन द्युति दामिनि मनि गनि ओपि धरे
 जनु पोइ ॥ नागर नवल कुँवर वर सुंदर मारग जात लेत मनगोइ । सूर श्याम मनहरण मनोहर
 गोकुल वसि मोहे सब लोइ ॥ ८३ ॥ अथ कलेवाभोजनसमय ॥ राग भैरव ॥ उठिये श्याम कलेऊ कीजै ।
 मन मोहन मुख निरखत जीजै ॥ खारिक दाख खोपरा खीरा । केरा आम ऊखरस सीरा ॥ श्रीफल
 मधुर चिरौंजी आनी । सफरी चिरुआ अरुन खुबानी ॥ घेवर फेनी खौर सुहारी । खोवा सहित खाहु
 बलिहारी ॥ रचि पिराक लाडू दधि आनों । तुमको भावत पुरी सधानों ॥ तब तमोर रुचि तुमहिं
 खवावों । सूरदास पनवारो पावों ॥ ८४ ॥ कमलनयन हरि करौ कलेवा । माखन रोटी सब जम्भ्यो
 दधि भाँति भाँतिके मेवा ॥ चारक दाख चिरौंजी किसिमिस मिश्री उज्ज्वल गरी बदाम । सफरी सेव
 छुहारे पिस्ता जे तरबूजा नाम ॥ अरु मेवा बहु भाँति भाँतिहैं षटरसके मिष्ठान । सूरदास प्रभु करत
 कलेऊ रीझै श्याम सुजान ॥ ८५ ॥ अथ खेलन समय ॥ राग रामकली ॥ खेलत श्याम ग्वालन संग । सुबल
 हलधर अरु सुदामा करत नानारंग ॥ हाथ तारीदेत भाजत सबै करि करि होइ । बरजै हलधर श्याम
 तुम जिनि चोट लगिहैं गोइ ॥ तब कह्यो मैं दौरि जानत बहुतबल मो गात । मेरी जोरीहैं सुदामा हाथ
 मारे जात ॥ बोलि तबै उठे श्रीसुदामा जाहु तारी मारि आगे हरि पाछे सुदामा धरचो श्याम हँकारि ॥
 जानिकै मैं रह्यो ठाढ़ो छुवत कहा जु मोहि । सूर हरि खीझत सखासों मनहिं कीनो कोहि ॥ ८६ ॥
 ॥ राग गौरी ॥ सखा कहतहैं श्याम खिसाने । आपुहि आपु ललकिभये ठाढ़े अब तुम कहा रिसाने ॥
 बीचहि बोलि उठे हलधर तब इनके माय न बापाहारि जीति कछु नेक न जानत लरिकन लावत पाप ॥
 आपुन हारि सखासों झगरत यह कहि दिये पठाई । सूर श्याम उठिचले रोइकै जननी पूँछति धाई ॥
 ॥ ८७ ॥ मैया मोहिं दाऊ बहुत खिझायो । मोसों कहत मोलको लीनो तू यशुमति कब जायो ॥
 कहा कहौं एहि रिसके मारे खेलन हौं नहिं जातु । पुनि पुनि कहत कौन है माता कोहै तुमरोतातु ॥
 गोरेनंद यशोदा गोरी तुम कत श्याम शरीर । चुटुकी दैदे हँसत ग्वाल सब सिसै देत बल वीर ॥ तू
 मोहीको मारन सीखी दाउहि कबहुँ न खीझै । मोहनको मुख रिस समेत लखि यशुमति सुनि सुनि
 रीझै ॥ सुनहु कान्ह बलभद्र चबाई जनमतहीको धूत ॥ सूर श्याम मो गोधनकी सौं हौं माता तू पूत ८८ ॥
 ॥ राग नट ॥ मोहन मान मनायो मेरो । मैं बलिहारी नंदनंदनकी नेक इतै हँसि हेरौ ॥ कारो कहि
 कहि मोहिं खिझावत बरजत खरो अनेरो । आनंद विमल शशिते तनु सुंदर कहाँ कहै बलि चरो ॥
 न्यारो जो पै हूँ हँकलै अपनो न्यारी गइयां तेरो । मेरो सुत सरदार सबनको इहुते कान्है ही मेरो ॥
 बनमें जाइ करौ कौतूहल इह अपनोहैं खेरो । सूरदास द्वारे गावतहैं विमल विमल यश तेरो ॥ ८९ ॥
 राग गौरी ॥ खेलन अब मेरी जात बलैया ॥ जबहिं मोहिं देखत लरिकन संग तबहिं खिझत बल मैया ॥
 मोसों कहत तात वसुदेवको देवकी तेरी मैया । मोल लियो कछु दे वसुदेव को करि करि जतन
 बढ़ैया ॥ अब बाबा कहि कहत नंद सौं यशुमतिको कहै मैया । ऐसेही कहि सब मोहिं खिझावत
 तब उठि चलो खिसैया ॥ पाछे नंद सुनतहैं ठाढ़े हँसत हँसत उर लैया । सूर नंद बलि रामहि धिर-
 यो सुनि मनहरण कन्हैया ॥ ९० ॥ राग रामकली ॥ खेलन चलिये बाल गोविंद । सखा प्रिय द्वारे बुला

वत घोष बालक वृन्द ॥ तृपितहै सब दरश कारन चतुर चातकदास । बरषि छबि नव वारि धरही
 हरहु लोचन प्यास ॥ बिनय वचन सुने कृपानिधि चले मनोहर चाल । ललित लघु लघु चरन
 कर उर बाहु नयन विशाल ॥ अजिरपद प्रतिबिंब राजत चलत उपमा पुंज । प्रतिचरण मानहु
 हेमवसुधा देत आसन कंज ॥ सूर प्रभुकी निरखि शोभा रहे सूर अवलोकि । शरद चंद चकोर मानों
 रहे थकित विलोकि ॥ ९१ ॥ राग धनाश्री ॥ खेलनको हरि दूरिगयो । संग संग धावत डोलत हैं कहाँ
 धौं बहुत अवेर भयो ॥ पलकओट भावत नहिं मोको कहाकहाँ तोको बात । नंदहि तात तात
 कह बोलत मोहिं कहतहैं मात ॥ इतनी कहत श्यामघन आए ग्वाल सखा सब चीन्हें । दौरिजाइ
 उरलाइ सूर प्रभु हरषि यशोदा लीन्हें ॥ ९२ ॥ विहागरो ॥ खेलन दूरि जात कित कान्हा । आजु सुन्यो
 बन हाऊ आयो तुम नहिं जानत नान्हा ॥ इक लरिका अबहीं भजिआयो बोलि बुझावहु ताहि ।
 कान तोर वह लेत सबनके लरिका जानत जाहि ॥ चलहु वेग सबेरे जैये भजि
 अपने अपने धाम । सूरदास यह बात सुनतही बोलि लिए बलराम ॥ ९३ ॥ जैतश्री ॥ दूरिखेलनजनि
 जाहु लला वन मेरे हाऊ आयोहैं । तब हँसि बोले कान्हारि मैया इनको किनहि पठायोहैं । अब डरप-
 त सुनि सुनि ये बातें कहत हँसत बलदाऊ । सतरसातलं शेष सनरहे तबकी सुरत भुलाऊ ॥ चारिवेद
 लगयो शंखासुर जलमें रहे लुकाऊ । मीनरूप धरिकै जब मारचो तबहि रहे कहाँ हाऊ ॥ मथि
 समुद्र सूर असुरनके हित मंदर जलधि धसाऊ । कमठरूप धरि धरनि पीठपर सुखपायो सहिराऊ ॥
 जब हिरणाक्ष युद्ध अभिलाष्यो मनमें अति गरवाऊ । धरिवाराहरूप रिपुमारचो ले क्षितिदंत अगाऊ ॥
 बिकटरूप अवतार धरचो जब सो प्रहलादहि नाऊ । धरि नरसिंह जब असुर विदारचो तहां न देख्यो
 हाऊ ॥ वामनरूप धरचो बलि छलिकै तीनपरगवसुधाऊ । श्रमजल ब्रह्म कमंडलु राख्यो दरशचरण
 परसाऊ ॥ मारचो सुनि बिनही अपराधहि कामधेनु लेआऊ । इकइस बार निछत्र जब कीनी तहां
 न देखेहाऊ ॥ शूर्पणखा तारका मारी हिमकुल सहित सोबहाऊ । सिंधुसेतु बांध्यो पषाणसों तहाँ
 न देखेहाऊ ॥ राम रूप रावन जब मारचो दशशिर बीस भुजाऊ । लंकजराय छार जबकीनी त
 हाँ न देखे हाऊ ॥ नृपति भीमसों युद्ध परस्पर तहाँ वह भाव बताऊ । तुरतचीरद्वै टूककियो धरि ऐसे
 त्रिभुवन राऊ ॥ यमुना के तट धेनु चरावत तहाँ सघनबन झाऊ ॥ पैठिपताल व्यालगहिनाथ्यो तहाँ
 न देखे हाऊ ॥ माटीके मिस वदन बिगारचो जब जननी डरपाऊं । मुखभीतर त्रैलोक दिखा
 यो तबउ प्रतीत न आऊ ॥ भक्तहेतु अवतार धरे सब असुरन मारि बहाऊ । सूरदास प्रभुकी यह
 लीला निगम नेति नितगाऊ ॥ ९४ ॥ रामकली ॥ यशुमति कान्हहि यहै सिखावति । सुनहु श्यामअब
 बडे भए तुम अस्तन पान छुडावति ॥ ब्रजलरिका तोहिं पीवत देखें हँसत लाज नहिं आवति ।
 जैहैं विगारि दांतहैं आछे ताते कहि समुझावति ॥ अजहुँ छाँडि कब्यो करि मेरो ऐसी बात न भावति ।
 सूर श्याम यह सुनि मुसिकाने अंचल मुखहि लुकावति ॥ ९५ ॥ नंद बुलावतहैं गोपाल । आवहु
 वेगि बलैया लेहौं सुंदर नैन विशाल ॥ परस्यो थार धरचो मग चितवत वेगि चलौ तुम लालाभात
 सिरात तात दुखपावत क्योंचलौ ततकाल ॥ हौं बलिजाऊं नान्हे पाइनि की दौरि दिखावहु
 बाल । छाँडिदेहु तुम ललित अटपटी यहगति मंद मराल ॥ सो राजा जो आगमदौरै सूर सुभौन
 उताल । जो जैहैं वलदेव पहिलेही तौ हँसिहैं सब ग्वाल ॥ ९६ ॥ राग सारंग ॥ जैवत कान्ह नंद इक ठौर ।
 कछक खात लपटात दुहुँकर बालकहै अतिभोरे ॥ बडो कौर मेलत मुख भीतर मिरिच दशन

सूरसागर ।

(१२८)

टकटौरे । तीक्ष्णलगी नयन भरि आए रोवत बाहर दौरे ॥ फूँकति वदन रोहिणी ठाढी लिये
 लगाइ अकोरे । सूर श्याम को मधुर कौरदै कीन्हे तात निहोरे ॥ ९७ ॥ रागनट ॥ हरिके बालचारित्र
 अनुपानिरखिरही ब्रजनारी एकटक अंग अंग प्रतिरूप ॥ बिथुरी अलकै रहीवदनपर बिनही विपिन
 सुभाइ । देखिं खंजन चंदके वश मधुप करत सहाइ ॥ सुलछ लोचन चारु नासा परमरुचिर बनाइ ।
 युगल खंजन लरत अवनित बीच कियो बनाइ ॥ अरुण अधरनि दशन भाई कहौ उपमा थोरि ।
 नीलपट बिच मोतिमानौ धरे चंदन वोरि ॥ सुभगबाल मुकुंदकी छवि वरणिकापै जाइ । भृकुटि
 पर मसि बिंदु सोहै सकै सूर न गाइ ॥ ९८ ॥ राग कान्हरो ॥ सांझभई घर आवहु प्यारे । दौरत कहाँ
 चोट लगिहै कहुँ पुनि खेलौगे होत सकारे ॥ आपुहि जाइ बाँह गहि ल्याई खेह रही लपटाई ।
 धूरि झारि तातो जल ल्याई तेल परसि अन्हवाई ॥ सरसवसन तनु पोंछि श्यामको भीतर गई
 लिवाइ । सूर श्याम कछु करौ वियारू पुनि राख्यो पौढाइ ॥ ९९ ॥ राग बिहागरो ॥ कमल नयन कछु
 करौ वियारी । लुचुई लपसी सब जलेवा सोई जेवहु जो लगै पियारी ॥ घेवर मालपुवा सुतिलाडू सबरस
 जूरी सरस सवारी । दूध बरा उत्तम दधिवाटी दालमसरीकी रुचिन्यारी ॥ आछोदूध औटि धौरीको
 ल्याई है रोहिणि महतारी ॥ सूरदास बलराम श्याम दोउ जेवै हैं जननि जाहि बलिहारी ॥ २०० ॥ बिहागरो
 बलमोहन दोउ करत वियारी । प्रेम सहित दोउ सुतनि जिमावति रोहिणि अरु यशुमति महतारी ॥
 दोउ भैया मिलि खात एकसँगरतनजटित कंचनकी थारी । आलससों कर कौर उठावत नैननि
 नींद झमकि रही भारी ॥ दोउमाता निरखत आलससों छवि परतन मन डारति वारी ॥ बारबार जमुहात
 सूर प्रभु इह उपमा कवि कहै कहारी ॥ १ ॥ राग केदारो ॥ कीजै पयपान ललारे ल्याई है दूध यशुमति भैया ॥
 कनक कटोरा भरिलीजै यह पीजै अतिमुख-दीजै कन्हैया ॥ आछो मैं औढ्यो सुठि नीको अरु मिठाई
 रुचिकरि अचवत क्यों न नन्हैया ॥ बहुत जतन करि करि राख्यो ब्रजराज लडैते तुम कारण बल भैया ॥
 फूँकि फूँकि जननी पय प्यावति मुख पावति आनंद उर न समैया ॥ सूरदास प्रभु पय पीवत बलराम
 श्याम दोऊ जननी लेत बलैया ॥ २ ॥ बल मोहन दोऊ अलसाने । कछुक खाइ दूधले अचयौ
 मुखजँभात जननी जिय जाने ॥ उठहु लाल कहि मुख पखरायो तुमकोलै पौढाऊँ ॥ तुम सोवहु मैं तुमहि
 सुवाऊँ कछु मधुरे रसु गाऊँ ॥ तुरत जाय पौढे दोनों भैया सोवत आई नींद ॥ सूरदास यशुमति मुखपावति
 पौढे बालगोविंद ॥ ३ ॥ माखन बाल गोपालहि भावै । भूखेछिनुन रहत मनमोहन ताहि बंदौ जो गह-
 रु लगावै ॥ आनि मथानी दह्यो विलोये जौलगि लालनउठन न पावै ॥ जागतही उठि रारि करत अति
 नाहिं मानै जो इंदु मनवावै ॥ हौं यह जानति वानि श्यामकी अँखियां मीचैं वदन चलावै । नंदसुवनकी
 लागै बलैया यह जूठनि कछु सूरज पावै ॥ ४ ॥ राग विलावल भोर भयो मेरे लाडिले जागौ कुँवर कन्हारैस
 खाद्वार ठाढे सबै खेलौ यदुराई ॥ मोको मुख देखरावहु त्रयताप निवारहु । तुव मुखचंद्रचकोरैननमधु
 पानकरावहु ॥ तव हरि पट मुख दूरिकै भक्तन मुखकारी ॥ हँसत उठे प्रभु सेजते सूरज बलिहारी ॥ ५ ॥
 राग विलावल ॥ भोरभयो जागौ नंदनंदन ॥ संग सखा ठाढे जगवंदन ॥ सूरभी पयहित बच्छपियावै ॥ पंछी तरुत
 जि दुहुँदिश धावै ॥ अरुन गगन तमचुरनि पुकारे । शिथिल धनुकरति पति गहि डारे ॥ निशि निघटी
 रवि रथ रुचि साजी । चंद मलिन चकई रति राजी ॥ कुमुदिनि सकुची वारिज फूले । गुंजत फिरत
 अलीगन झूले ॥ दरशन देहु मुदित नर नारी । सूरज प्रभु दिन देव मुरारी ॥ ६ ॥ राग नट ॥ खेलत
 श्याम अपने रंग । नंदलाल निहारि शोभा निरखि थकित अनंग ॥ चरणकी छवि निरखि डरप्यो
 अरुन गगन छपाइ । जनु रंभाकी सबै छवि निदरि लई छडाइ ॥ युगल जंघनिखंभ रंभा नहिन

सम सरि ताहि । कटि निरखि केहरि लजाने रहे वन घन चाहि ॥ हृदय हरि नख अति विराजति
छबि न वरनी जाइ । मनौ बालक वारिधर नव चंद्र लई छपाइ ॥ मुकुतमाल विशाल उरपर कछु कहौ
उपमाइ ॥ मनौ तारा गगन पृष्ठित गगन रह्यो छपाइ ॥ अघर अरुन अनूप नासा निरखि जन सुखदाइ ।
मनौ शुक्रफल बिंब कारन लेन बैठो आइ । कुटिल अलक बिना विपिनके मनौ आलि शशि जाल ।
सूर प्रभुकी ललित शोभा निरखिरही ब्रजबाला ॥ ७ ॥ राग सारंग ॥ न्हात नंद सुधिकरी श्यामकी ल्यावहु
बोलि कान्ह बलराम । खेलत कान्ह वार बडि लागी ब्रज भीतर काहुके धाम ॥ मेरे संग आइ
दोउ बैठै उन बिनु भोजन कौन काम । यशुमति सुनत चली आतुरहै ब्रज घर घर टेरत लै नाम ॥
आजु अवेर भई कहूँ खेलत बोलि लेहु हरिको कोउ वाम । ढूँढिफिरी नहिं पावत हरिको अति
अकुलानी आवत धाम ॥ बारबार पछिताति यशोदा वासर बीतिगए युग याम । सूर श्यामको कहूँ
न पावत देखे बहु बालक इक ठाम ॥ ८ ॥ राग सारंग ॥ कोउ माई बोलि लेहु गोपालहि । मैं अपनेको
पंथ निहारति खेलत बेर भई नँदलालहि ॥ हेरत बेर बडी भई मोकहुँ नहिं पावत घनश्याम तमा-
लहि । सिध जेवन सिरात नँद बैठे ल्यावहु बोलि कान्ह ततकालहि ॥ भोजन करहिं नंद संग मिलि
कै भूखलगी हैहै मेरे बालहि । सूर श्याम मग जोवति यशोदा आइगए सुनि वचन रसालहि ॥ ९ ॥ राग
नटनारायण ॥ हरिको टेरतहै नँदरानी । बहुत अबार कतहुँ खेलत भइ कहां रहे मेरे शारंगपानी ॥ सुनतहि
टेर दौरि तहाँ आए कबके निकसे लाल । जेवत नहीं नंद जू तुम बिनु बेगि चलो गोपाला ॥ श्यामहि
ल्याई महारि यशोदा तुरतहि पाँइपखारे । सूरदास प्रभु संग नंदके बैठेहैं दोउ बारे ॥ १० ॥ राग सारंग ॥
जेवत श्याम नंदकी कनियाँ । कछुक खात कछु धरणि गिरावत छबि निरखत नँदरनियाँ ॥ बरी
बरा बेसन बहु भाँतिन व्यंजन विविध अनगनियाँ । डारत खात लेत अपने कर रुचि मानत दधि
दनियाँ ॥ मिश्री दधि माखन मिश्रित करि मुख नावत छबि धनियाँ । आपुन खात नंदमुख नावत
सो सुख कहत न बनियाँ ॥ जो रस नंद यशोदा बिलसत सो नहिं तिहूँ भुवनियाँ । भोजन करि नंद
अचवन कियो माँगत सूर जुठनियाँ ॥ ११ ॥ राग कान्हरो ॥ बोलि लेहु हलधर भैयाको । मेरे आगे खेल
करौ कछु नैननि सुख दीजै भैयाको ॥ मैं मूँदौ हरि आँखि तुम्हारी बालक रहे लुकाई । हरषि श्याम
सब सखा बुलाए खेलो आँखि मुँदाई ॥ हलधर कहै आँखि को मुँदे हरि कह्यो जननी यशोदा । सूर
श्याम लिय जननी खेलावति हर्ष सहित मन मोदा ॥ १२ ॥ राग गौरी ॥ हरि तब आपनि आँखि मुँदाई
सखा सहित बलराम छपाने जहाँ तहाँ गए भगाई ॥ कान लागि कहेउ जननी यशोदा वा घरमें बल-
राम । बलदाऊको आवन देहौ श्रीदामासों है काम ॥ दौरि दौरि बालक सब आवत छुवत महारिके
गाता सब आए रहे सुबल श्रीदामा हारे अबके ताता ॥ शोर पारि हरि सुबलहि धाए गह्यो श्रीदामा जाइ ।
दैद सोंहैं नंद बबाकी जननीपै लै आइ ॥ हाँसि हाँसि तारी देत सखा सब भए श्रीदामा चोर । सूरदा-
स हाँसि कहति यशोदा जीत्योहै सुत मोर ॥ १३ ॥ राग केदारो ॥ चलौ लाल कछु करौ बियारी । रुचि
नाहीं काहु पर मेरे तू कहि भोजन करयो कहा री ॥ बेसन मिलै उरस मैदासों अति कोमल पूरी है
भारी । जेवहु श्याम मोहिं सुख दीजै ताते करी तुमहिं पियारी ॥ निबुवा चूरन आँब सँधानो और
करौदनकी रुचि न्यारी । बार बार तू कहति यशोदा कहि ल्याए रोहिणि महतारी ॥ जननी सुनत
तुरत लै आई तनक तनक धरि कंचन थारी । सूर श्याम कछु कछु लै खायो जल अचयो अरु
वदन पखारी ॥ १४ ॥ पौढि लाल मैं रचि सेज बिछाई । अति उज्ज्वल है सेज तुम्हारी सोबत
सुखदाई ॥ खेलत तुम निशि अधिक गई सुत नैननि नींद झमाई । वदन जँभात अंग ऐँडावत जननी

पलोटत पाँई ॥ मधुरे सुर गावत केदारो सुनत श्याम चितलाई । सूर श्याम प्रभु
 नंदसुवनको नींद गई तब आई ॥ १५ ॥ राग सारंग ॥ खेलन जाहु बाल सब टेरत ।
 यह सुनि कान्ह भए अति आतुर द्वारे तन फिरि हेरत ॥ बार बार हरि मातहि कहि कहि मेरी चौगान
 कहाँ है । दधि मथनीके पाछे देखो लै मैं घरी तहाँ है ॥ लै चौगान बटाकर आगे प्रभु आए जब बाहर ।
 सूर श्याम पूँछत सब ग्वालन खेलौगे केहि ठाहर ॥ १६ ॥ खेलत बनै घोष निकास । सुनहु
 श्याम तुम चतुर शिरोमणि इहाँ है घरपास ॥ कान्ह हलधर वीर दोऊ भुजाबल अतिजोर । सुबल
 श्रीदामा और सुदामा वै भए इक और ॥ और सखा बटाइ लीन्हें गोप बालक वृंद । चले ब्रजकी
 खोरि खेलन अति उमँग नंदनंद ॥ बटा धरणी डार दोनों लेचले ढरकाइ । आपु अपनी घात
 निरखत खेल जम्हो बनाइ ॥ सखा जीतत श्याम जाने तब करी कछु पेल । सूरदास तब कहत सुदामा
 कौन ऐसो खेल ॥ १७ ॥ खेलतमें को काको गोसैया । हरि हारे जीते श्रीदामा वरबसही कत करत
 रिसैया ॥ जाति पाँति हमते कछु नाहिन वसत तुम्हारी छहियाँ । अति अधिकार जनावत याते
 अधिक तुम्हारेहैं कछु गइयाँ ॥ रुहठि करै तासों को खेलै रहे पौढि जहां तहां सब गैयाँ । सूरदास
 प्रभु खेलोई चाहत दौव दबो करि नंद दोहैयाँ ॥ १८ ॥ राग कान्हरो ॥ आवहु कान्ह साँझकी बिरियाँ ।
 गाइन माँझ भएहौ ठाढ़े कहत जननि यह बड़ी कुवेरियाँ ॥ लरिकारि कहुँ नेकन छाँडत सोइ रहो
 सुथरी सेजरियाँ । आए हरि यह बात सुनतही धाइ लिये यशुमति महतरियाँ ॥ लै पौढी आँगनही
 सुतको छिटाके रही आछी उजियरियाँ । सूरदास कछु कहत कहतही वशकरि लिए आइ नंदरियाँ ॥
 ॥ १९ ॥ आँगनमें हरि सोइ गयो री । दोउजननी मिलिकै हरुये करि सेज सहित तब भवन लियो
 री ॥ नेकनहीं घरमें बैठतहै खेलहिके अब रंग रए री । इहिविधि श्याम कबहुँ नहिँ सोए बहुत नंदके
 वशहि भए री ॥ कहत रोहिणी सोवन देहु न खेलत दौरत हारि गए री । सूरदास प्रभुको मुख निरखत
 यह छवि नित नित होत नए री ॥ २० ॥ अथ ब्राह्मणको प्रस्ताव ॥ राग धनाश्री ॥ महरानेते पाँडे आयो । ब्रज
 घर घर बृझत नंदरावर पुत्र भयो सुनिकै उठि धायो ॥ पहुँच्यो आइ नंदके द्वारे यशुमति देखि अनंद
 बढ़ायो ॥ पाय धोइ भीतर बैठायो भोजनको निज भवन लिपायो ॥ जो भावै सो भोजन कीजै विप्र मनहि
 अति हर्ष बढ़ायो । बड़ी वयस विधि भयो दाहिनो धनि यशुमति ऐसो सुत जायो ॥ धेनु दुहाइ दूध
 लैआई पाँडे रुचिकै खीर चढ़ायो । घृत मिष्टान खीर मिश्रित करि परसि कृष्ण हित ध्यान लगायो ॥
 नैन उधारि विप्र जो देखै खात कन्हैया देखन पायो । देखो आइ यशोदा सुत कृत सिद्ध पाक
 इहि आइ जुठायो ॥ महारि बिनय दोऊ कर जोरे घृत मिष्टान पय बहुत मँगायो । सूर श्याम कत
 करत अचगरी बारबार ब्राह्मणहि खिझायो ॥ २१ ॥ रामकली ॥ पाँडे नहिँ भोग लगावन पावै । करि
 करि पाक जवै अर्पतहै तबहिँ तबहिँ छै आवै ॥ इच्छा करि मैं ब्राह्मण न्योत्प्यौ तू गोपाल खिझावै ।
 वह अपने ठाकुरहि जेवावत तू ऐसे उठि धावै ॥ जननी दोष देहु जनि मोको करि विधान बहु
 ध्यावै । नैन मूँदि कर जोरि नामलै बारहि बार बुलावै ॥ कह अंतर क्यों होइ भक्तको जो मेरे मन
 भावै । सूरदास बलिहौं ताकी जो जन्म पाइ यश गावै ॥ २२ ॥ राग विलावल ॥ सफल जन्म प्रभु आजु
 भयो । धनि गोकुल धनि नंद यशोदा जाके हरि अवतार लयो ॥ प्रगट भयो अब पुण्य सुकृत फल
 दीनबंधु मोहिं दरश दियो । बारबार नंदके आँगन लोटत द्विज आनंद भयो ॥ मैं अपराध कियो
 बिन जाने को जानै केहि भेष जयो । सूरदास प्रभु भक्त हेत वश यशुमति हित अवतार लयो ॥ २३ ॥
 राग धनाश्री ॥ अहो नाथ जेई जेई तेरे शरण आए तेई तेई भए पावन । महापतित कुलतारन एक नाम

अघ जारन कारन दुख विसरावन ॥ मोते को हो अनाथ दरशनते भयो सनाथ देखत नैन जुडावन।
 भक्त हेत देह धरण पुहुमीको भार हरण जन्म जन्म जन मुक्तावन ॥ अशरन शरन दीनबंधु यशु-
 मति सुखकारन देह धरावन । हितके चितकी मानत सबके जियकी जानत सूरदास प्रभु मनभावना ॥
 ॥ २४ ॥ राग विलावल ॥ मया करिये कृपाल प्रतिपाल संसार उदधि जंजालते पारपारं । काहुके ब्रह्मा काहु
 के महेश काहुके गणेश प्रभु मेरे तौ तुमहि आधारं ॥ दीनदयालु कृपाकरि मोकों यह कहि कहि लोटत
 बार बारं । सूरश्याम अंतर्यामी स्वामीहो जगतके कहा कहौ करो निरवारं ॥ २५ ॥ अथ माटीकोमसंग ॥
 राग विलावल ॥ खेलत श्याम पौरिके बाहर ब्रज लरिका सोहत सँग जोरी । तैसेइ आपु
 तैसेइ लरिका सब अति अज्ञ सबनिमति थोरी ॥ गावत हांक देत किलकारत दुरि देखत नंद-
 रानी । अति पुलकित गद गद मृदुवानी मन मन महारि सिहानी ॥ माटी लै मुख मेलि दई
 हरि तबहिं यशोदा जानी । साँटी लिये दौरि भुज पकरे श्याम लँगरई ठानी ॥
 लरिकनको तुम सब दिन झुठवत मोसों कहा कहोगे । मैया मैं माटी नहिं खाई मुख देखै निबहो
 गे ॥ वदन उचारि देखायो त्रिभुवन वन वन नदी सुमेर । नभ शशि रवि मुख भीतरहै सब सागर
 धरनी फेर ॥ यह देखत जननी जिय व्याकुल बालक मुखका आहि । नैन उचारि वदन हरि मूँघो
 माता मन अवगाहि ॥ झूठेहि लोग लगावत मोको माटी मोहिं न सुहावै । सूरदास तब कहति यशोदा
 ब्रजलोगन इह भावै ॥ २६ ॥ राग धनाश्री ॥ मोहन काहेन उगिलो माटी । बार बार अनरुचि उपजावत
 महारि हाथ लिये साँटी । महतारीको कह्यो न मानत कपट चतुरई ठाटी । वदन पसारि दिखाइ
 आपनो नाटककी परिपाटी ॥ बडी बार भई लोचन उघरे भ्रम यामनकी फाटी । सूरदास नंदरानी
 भ्रमित भई कहत न मीठी खाटी ॥ २७ ॥ रामकली ॥ मो देखत यशुमति तेरे ढोटा अवहीं माटी खाई।
 इह सुनिकै रिस करि उठि धाई बांह पकरि लै आई ॥ इक करसों भुज गहि गाढे करि इक करलीने
 साँटी । मारतिहौं तोहिं अबहि कन्हैया वेग न उगलो माटी ॥ ब्रज लरिका सब तेरे आगे झूठी कहत
 बनाई । मेरे कहे नहीं तू मानत दिखरावो मुख वाई ॥ अखिल ब्रह्मांड खंडकी महिमा देखरायो मुख
 माही । सिंधु सुमेरु नदी वन पर्वत चकृत भई मनमाही ॥ करते साँटि गिरत नहिं जानी भुजा छाँडि
 अकुलानी । सूर कहै यशुमति मुख मूँदहु बलि गइ शारंगपानी ॥ २८ ॥ राग सारंग ॥ नंदहि कहति
 यशोदा रानी । माटीके मिस मुख देखरायो तिहुँलोक रजधानी ॥ स्वर्ग पताल धरनि वन पर्वत वदन
 माँझ रहे आनी । नदी सुमेरु देखि चकृत भई याकी अकथ कहानी ॥ चितै रहे तब नंद युवति
 मुख मन मन करत विनानी । सूरदास तब कहति यशोदा गर्ग कही यहवानी ॥ २९ ॥ राग विलावल ॥
 कहत नंद यशुमति सुनु बौरी । नाजनिये कहा तैं देख्यो मेरे कान्ह हिलावति खौरी ॥ पाँच वर्षको
 मेरो कन्हैया अचरज तेरी बात । वेही काज साँटि लै धावति ता पाछे बिललात ॥ कुशल रहैं
 बलराम श्याम दोउ खेलत खात अन्हात । सूर श्यामको कहा लगावति बालक कोमल गाता ॥ ३० ॥
 राग विलावल ॥ देखौ रे यशुमति बौरानी । घर घर हाथ दियावत डोलत गोद लिये गोपाल विनानी ॥
 जानत नाहिं जगतगुरु माधो यहि आये आपदा नशानी । जाको नाव शक्ति पुनि ताकी ताही
 देत मंत्र पढि पानी ॥ अखिल ब्रह्मांड उदर गति जाकी जाकी ज्योति जल थलहि समानी । सूर सकल
 साँची मोहिं लागत जो कछु कही मुख गर्ग कहानी ॥ ३१ ॥ राग धनाश्री ॥ गोपालराइहो चरनन्हि हौ काटी।
 हम अबला रिस बाँचि न जानी बहुत लागि गइ साँटी ॥ वारों करजु कठिन अति कोमल जरहु
 नयन निज डाटी । मधु मेवा पकवान छाँड़िकै काहे खात लाल तुम माटी ॥ सिंगरोई दूध पियो

मेरे मोहन बलहि न देवहु बाँटी । सूरदास नंद लेहु दोहनी दुहहु लालकी नाटी ॥ ३२ ॥
 ॥ अथ माखनचोरी प्रथम ॥ गारी ॥ मैयारी मोहिं माखन भाँवै । मधु मेवा पकवान मिठाई
 मोहिं नहीं रुचि आवै ॥ ब्रज युवती इक पाछे ठाढ़ी सुनति श्यामकी बात । मन
 मन कहति कबहुँ मेरे घर देखों माखन खात ॥ बैठे जाइ मथनियाँके ढिग मैं तब रही छिपानी ।
 सूरदास प्रभु अंत्यामी ग्वालिन मनहिंकी जानी ॥ ३३ ॥ गौरी ॥ गए श्याम तिहि ग्वालिनिके घर ।
 देख्यो जाइ द्वार नहिं कोई इत उत चितै चले घरभीतर ॥ हरि आवत गोपी तब जान्यो आपुन
 रही छिपाई । सुने सदन मथनियाँ के ढिग बैठिरे अरगाई ॥ माखन भरी कमोरी देखी लैलै लागे
 खान । चितै रहत मणिखंभ छाँहतन तासों करत सयान ॥ प्रथम आजु मैं चोरी आयो भल्यो बन्योहै
 संगु । आपुनखात प्रतिविंब खवावत गिरत कहत का रंगु ॥ जो चाहो सब देउँ कमोरी अति मीठो
 कत डारत । तुमहि देखि मैं अति सुखपायो तुम जिय कहा बिचारत ॥ सुनि सुनि बातें श्यामसु-
 दरकी उमँगि हँसी ब्रजनारि । सूरदास प्रभु निरखि ग्वालिन मुख तब भाजि चले मुरारि ॥ ३४ ॥
 फूली फिरति ग्वालिन मनमेरी । पूछति सखी परस्पर बातें पायो परचो कछु कहै तैरी ॥ पुलकित रोम
 रोम गद गद मुख वाणी कहत न आवै । ऐसे कहा आहि सो सखीरी मोको क्यों न सुनावै ॥ तनु
 न्यारो जो एक हमारो हम तुम एकै रूप । सूरदास कहै ग्वालिन सखीसों देख्यो रूप अनूप ॥
 ॥ राग गूजरी ॥ आजु सखी मणि खंभ निकट हरि जहाँ गोरसको गोरी । निज प्रतिबिंब सिखावत ज्यों
 शिशु प्रगट करै जिनि चोरी ॥ आध विभाग आजुते हम तुम भली बनीहैं जोरी । माखन खाहु
 कितहि डारतहौ छाँड़ि देहु मति भोरी ॥ हिसा न लेहु सबै चाहतहौ इहै बात है थोरी ॥ मीठो अधिक
 परम रुचि लागै देहों काढ़ि कमोरी ॥ प्रेम उमँगि धीरज न रह्यो तब प्रगट हँसी मुख मोरी । सूरदास
 प्रभु सकुचि निरखि मुख भजे कुंज गहि खोरी ॥ ३५ ॥ राग बिलावल । प्रथम करी हरि माखन चोरी ।
 ग्वालिन मन इच्छा करि पूरण आपु भजे हरि ब्रजकी खोरी ॥ मनमें इहै बिचार करत हरि ब्रज
 घर घर सब गाऊँ । गोकुल जन्म लियो सुखकारण सबकर माखन खाऊँ ॥ बाल रूप
 यशुमति मोहिं जानै गोपिन मिलि सुख भोगू । सूरदास प्रभु कहत प्रेमसों घेरोरे ब्रज लोगू ॥
 ॥ ३६ ॥ राग रामकली ॥ करत हरि ग्वालन संग विचार । चोरी माखन खाहु सब मिलि करौ बालबिहार ॥
 यह सुनत सब सखाहर्षे भली कही कन्हारै । हँसत परस्पर देत तारी सौँह करि नंदराई ॥ कहाँ
 तुम यह बुद्धि पाई श्याम चतुर सुजान । सूर प्रभु मिलि ग्वाल बालक करतहैं अनुमान ॥ ३७ ॥
 राग गौरी ॥ सखा सहित गए माखन चोरी देख्यो श्याम गवाक्ष पंथहै गोपी एक मथति दधि भोरी ॥
 हेरि मथानी धरी माटते माखन हों उतरात । आपुनगई कमोरी माँगन हरि पाई हूवात ॥
 पैठे सखनसहित घरसूने माखन दधि सब खाई । छूछीछाँड़ि मटुकिया दधिकी हँसि सब बाहिर
 आई ॥ आइ गई कर लिये मटुकिया घरते निकरे ग्वाल । माखन कर दधि मुख लपटानो देखि
 रही नंदलाल ॥ काहे आजु ब्रज बालक संगलै माखन कर दधि मुख लपटानो । देखत ते उठि भजे
 सखा एक इहि घर आइ पिछानो ॥ भुज गहि लियो कान्ह इक बालक निकरे ब्रजकी खोरि ।
 सूरदास प्रभु ठगिरही ग्वालिन मनु हरि लियो अजोरि ॥ ३८ ॥ राग गौरी ॥ चकित भई ग्वालिनितन
 हेर्यो । माखन छाँड़ि गई मथि वैसहि तबते कियो अबेरयो ॥ देख्यो जाइ मटुकिया रीती मैं राख्यो
 कहुँ हेरी । चकृत भई ग्वालिन मन अपने ढूँढति घर फिरि फेरी ॥ देखति पुनि पुनि घरके बासन
 मनहरि लियो गोपाल । सूरदास रसभरी ग्वालिनी जानै हरिके ख्याल ॥ ३९ ॥ राग बिलावल ब्रज घर

घर प्रगटी यह बात । दधि माखन चोरीकै लैहरि ग्वाल सखा सँग खात ॥ ब्रजवनिता यह सुनि मन
 हर्षी सदन हमारे आवैं । माखन खात अचानक पावैं भुज भरि उरहि छुवावैं ॥ मनही मन अभिलाष
 करत सब हृदय करत यह ध्यान । सूरदास प्रभुको घरते लै देहौ माखन खान ॥ ४० ॥ राग सारंग ॥
 गोपालहि माखन खानदै । सुनुरी सखी कोऊ जिनि बोलै वदन दही लपटानदै ॥ गहिबहियाँ हौं लैकै
 जैहों नयनन तपति बुझानदै । वापै जाई चौगुनौ लेहौं मो यशुमति लौं जानदै ॥ तुम जानति हरि
 कछु न जानत सुनत मनोहर कानदै । सूरदास प्रभु तुम्हरे मिलन को राखेंगी तन मन प्रानदै ॥
 ॥ ४१ ॥ राग कान्हरो ॥ चली ब्रज घर घरनि यह बात । नंदसुत सँग सखालीने चोरि माखन खात ॥
 कोऊ कहति मेरे भवन भीतर अबहि पैठे धाई । कोऊ कहति मुहि देखि द्वारे गयउ ताहि पराई ॥
 कोऊ कहति केहि भाँति हरिको देखों अपने धाम । हेरि माखन देई आछो खाहि जितनो श्याम ॥
 कोऊ कहति मैं देखिपाऊं भरि धरौं अँकवारि । कोऊ कहति मैं बाँधिराखौं को सकै निरवारि ॥
 सूर प्रभुके मिलन कारन करत बुद्धि विचार । जोरि कर बिधिको मनावति पुरुष नंद कुमार ॥
 ॥ ४२ ॥ राग कान्हरो ॥ ग्वालनि घर गये जानि साँझकी अँधेरी । मंदिरमें गए समाई श्यामल तनु ल-
 खि न जाइ देह गेह रूप कहौ को कहै निवेरी ॥ दीपक गृह दान करचो भुजा चारि प्रगट धरचो
 देखत भई चकृत ग्वालित उतको हेरी । श्याम हृदय अति विशाल माखन दधि धिंदु जाल मनमो-
 ह्यो नंदलाल बलहि बूझेरी ॥ युवती अति भई विहाल भुज भरिदै अंकमाल सूरज प्रभु अति कृपाल
 डारचो मन फेरी । करसों कर लै लगाइ महारि पैगई लिवाय आनंद उरमें न समाय बातैह अनेरी ॥
 ॥ ४३ ॥ राग कल्याण ॥ यशुमति घौं देखि आनि आगेहै ले पिछानि बहियाँ गहिराई कुँवर और को कि
 तेरो । अबलौं मैं करी कानि सही दूध दही हानि अजहं जिय जानि मानि कान्हहै अनेरो ॥ दीपक मैं
 धरचो बारि देखत भुज भये चारि हारी हौं धरति करति दिन दिनको झेरो । दिखियत नहि भवन
 माँझ तैसोई तनु तैसिये साँझ छलसों कछु करतु फिरतु महारिको जठेरो ॥ गोरस तनु छीटरही
 शोभा नहि जात कही मानौं जल यमुन बिंब उडगन पथुफेरो । उरहनो दिन देउ काहि काहे तू इत
 नो रिसाइ नहि ब्रजवास सासु ऐसी बिधि मेरो ॥ गोपी निरखति सुमार यशुमतिको है कुमार
 भूली भ्रम रूप मानौ आनि कोऊ हेरो । मनमन विहँसत गोपाल भक्तपाल दुष्टशाल जानै को सूरदास
 चरित कान्ह केरो ॥ ४४ ॥ राग गौरी ॥ देखि फिरे हरि ग्वालि दुवारो तब इक बुद्धि रची अपने मन भीतर
 साँझ परे पिछवारे ॥ सुने भवन कहूं कोऊ नहि मनौ याहीको राजू । भांडे धरतु उधारतु मँदतु
 दधि माखनके काजू ॥ रैन जमाइ धरचो सो गोरस परचो श्यामके हाथालैलै खात अकेले आपुन
 सखा नहीं कोऊ साथ ॥ आहट सुनि युवती घर आई देख्यो नंदकुमार । सूर श्याम मंदिर अँधियारे
 निरखत बारंबार ॥ ४५ ॥ अँधियारे घर श्याम रहेदुरि । अबहीं मैं देख्यो नंदनंदन चरित भयो
 मनही मन झुरि ॥ पुनि पुनि चकृत होति अपने जी कैसी है यह बात । मटुकी के ढिग बैठि रहे हरि करै
 आपनी घात ॥ सकल जीउ जल थलके स्वामी चींटी दई उपाइ । सूरदास प्रभु देखि ग्वालिनी भुज
 पकरे तब आइ ॥ ४६ ॥ श्याम कहा चाहतसे डोलत । बूझेहूते वदन दुरावत सूधे
 बोल न बोलत ॥ सुने निपट अँध्यारे मंदिर दधि भाजन में हाथ । अबकहि कहा बनैहौ
 उत्तर कोऊ नाहिन साथ ॥ मैं जान्यो यह घर अपना है या धोखे मैं आयो । देखतुहौं गोरसमें चींटी
 काढनको कर नायो ॥ सुनि मृदु वचन निरखि मुख शोभा ग्वालनि सुरि सुसुकानी ।
 सूरश्याम तुमहौ रतिनागर बात तिहारी जानी ॥ ४७ ॥ राग सारंग ॥ यशोदा कहाँ लौं कीजै

कानि । दिनप्रति कैसे सही परतिहैं दूध दही की हानि ॥ अपने या बालकक्री करनी जो तुम देखो
आनि । गोरसखाइ ढूँढ़ि सब बासन भली करी यह वानि ॥ मैं अपने मंदिरके कोने माखनराख्यो
जानि । सोई जाइ तुम्हारे लरिका लीनोहै पहिचानि ॥ बूझीग्वालिनि घरमें आयो नेकुन शंकामानी ।
सूरश्याम तब उतर बनायो चींटी काढतु पानी ॥ ४८ ॥ राग गौरी ॥ आप गए हरए सुने घर । सखा
सबहिं बांहरही छांडे देख्यो दधि माखन हरि भीतर ॥ तुरत मथ्यो दधि माखनपायो लैलै खात
धरत अधरनिपर । सैनहुदै सब सखा बुलाए तिनहि देत भरि भरि अपने कर ॥ छिटकिरही दधि
बूँद हृदय पर इत उत चितवत करि मनमें डर । उठत ओटते लेत सबनि लै पुनिलै खात
देत ग्वालिनि वर ॥ अंतर भई ग्वालि यह देखति मगन भई अति उर आनंद भरि । सूरश्याम मुख
निरखि थकित भई कहत न वनै रही मनमें धरि ॥ ४९ ॥ राग धनाश्री ॥ गोपाल दुरेहैं माखन खात-
देखि सखी शोभाजु बनी है श्याम मनोहर गात ॥ उठि अवलोकि ओट ठाढ़े है जिहि बिधि है लखि
लेत । चकृत वदन चहूँ दिशि चितवतहैं और सखनको देत ॥ सुंदर कर आनन समीप अति
राजत इहि आकार । मनौ सरोज विधु बैर वंचि करि लिये मिलत उपहार ॥ गिरिगिरि परत
वदनके ऊपर द्वै दधिसुतके विंदु । मानहु सुभग सुधाकन वरषत विजमौ आगम इंदु ॥ बाल विनोद
विलोकि सूर प्रभु शिथिल भई ब्रजनारि । फुरै न वचन वरजिवे कारन रही बिचारि बिचारि ॥ ५० ॥
राग सारंग ॥ ग्वालिनि जो घर देखे आइ । माखन खाइ चुराइ श्याम तब आपुन रह्यो छपाइ ॥ ठाढी भई
मथनियोंके ढिग रीती परी कमोरी । अवहीं गई आई इन पाँइनि लै गयो को करि चोरी ॥
भीतर गई तहां हरि पाए श्याम रहे गहि पाई । सूरदास प्रभु ग्वालिनि आगे अपनो नाम
सुनाई ॥ ५१ ॥ राग गौरी ॥ जो तुम सुनहु यशोदा गोरी । नंदनंदन मेरे मंदिरमें आजु करन गए
चोरी ॥ हौं भई आनि अचानक ठाढी कह्यो भवनमें को री । रहे छपाइ सकुचि रंचक है भई
सहजमति भोरी ॥ जबगहि बाँह कुलाहल कीनो तब गहि चरण निहोरी । लागे लै नैनन
भरि आंसू तब मैं कान न तोरी ॥ मोहिं भयो माखनको संशय रीती देखि कमोरी । सूर
दास प्रभु देत दिनहुँ दिन ऐसी लरिकस लेरी ॥ ५२ ॥ राग सारंग ॥ जानि जु पाए हौ हरि नीके । चोरि
चोरि दधि माखन मेरो नितप्रति गीधिरहे या छींके ॥ रोक्यो भवन द्वार ब्रज सुंदरि तूपुर मृदि
अचानक हीके । अब कैसे जैयतु अपने बल भाजन दूध दही मेरो पीके ॥ सूर श्याम प्रभु भले
परे फँद देउ न जान भाव ते जीकै । भरि गंडूक छिरकदै नैननि गिरिधर भाजि चले दै की कै ॥
॥ ५३ ॥ राग रामकली ॥ माखन चोर री मैं पायो । मैं जु कही सखीहोतुकहाहै भाजन लगत झुँझायो ॥ जौ
चाहौ तौ जान क्यों पैपै बहुत दिननु है खायो । बार बार हौं ढूँकालागी मेरी घात न आयो ॥ नोई नेत
की कौं चमोटी घूँघट में डरवायो । विहँसत निकसिरही दोदैतियाँ तबलै कंठ लगायो ॥ मेरे लाल
को मारिसकैं को रोहिनि गहि हलरायो । सूरदास प्रभु बालकलीला विमल विमल यश गायो ॥
॥ ५४ ॥ राग नट ॥ देखि ग्वालिनि यमुना जात । आपु ता घर गए पूँछत कौनहै कहि बात ॥ जाइ
देखे भवन महियां ग्वाल बालक दोइ । भीर देखत अति डेराने दुहूँ दीनो रोइ ॥ ग्वालके काँधे चढ़े
तब लिए छींके उतारि । दह्यो माखन खात सब मिलि दूध दीनों डारि ॥ वच्छ लै सब जोरि दीने
गए वन समुदाइ । छिरकि लरिकनु दहीसों भरि ग्वाल दीने चलाइ ॥ देखी आवत सखी घरको
सखा गए सब दौरि । आनि देखे श्याम घरमें भई ठाढी पौरि ॥ प्रेम अंतर रिस भरयो मुख
युवति बूझति बात । चितै मुखतन सुधि विसारी कियो उर नख घात ॥ अतिहिरिसवश भई
ग्वालिनि गेह देह विसारि । सूर प्रभु भुजगहे ल्याई महरिसों अनुहारि ॥ ५५ ॥ राग गौरी ॥ महरि

तुम मानौ मेरी बात । ढूँढि ढूँढि गोरस सब घरको हरयो तुम्हारे तात ॥ और काटि सकिे ते लीनो
 ग्वाल कंधा दै लात । असंभाषु बोलन आई है ढीठ ग्वालिनी प्रात ॥ चाखतनहीं दूध धोरीको तेरे
 कैसे खात । औरो कहति कछु सकुचतिहौं कहादिखाऊं गात ॥ ऐसो तौ मेरो नहिं अचगरो कहा
 बनावति बात । चितवत चकित ओट भए ठाढे यशुदा तन सुसुकात ॥ हैं गण बडे सूरके
 प्रभुके ह्यालरिकाहै जात ॥ ५६ ॥ राग गौरी ॥ साँवरेहि बरजति क्यों जु नहीं । कहा करौं दिन
 प्रतिकी बातें नाहिन परत सही ॥ माखन खात दूध लै डारत लेपत देह दही । तापोछे घरहुके लरिकनु
 भाजत छिरकि मही ॥ जो कछु घरहिं दुराय दूर लै जानत ताहि तही ॥ सुनहु महारि तेरे या सुत सों हम
 पचिहारि रही ॥ चोर अधिक चतुराई सीखी जाइ न कथा कही । तापर सूर बछरुवनि ढीलत वन
 वन फिरत बही ॥ ५७ ॥ राग कान्हरो ॥ अब ये झुठेहु बोलत लोग । पांच वर्ष अरु कछुक दिननिको
 कब भयो चोरी योग ॥ इहि मिस देखन आवति ग्वालनि मुँह फाटे युग वारी । अनदेखेको दोष
 लगावति दई देइगो टारी ॥ कैसे करियाकी भुजा पहुँची कौन वेग ह्यां आयो । ऊखल ऊपर आनि पीठ
 धरि तापर सखा चढायो ॥ जो न पत्याहु चलो सँग यशुमति देखौ नयन निहारि । सूरदास प्रभु
 नेकु न बरजो मनमें महारि बिचारि ॥ ५८ ॥ मेरों गुपाल तनकसों कहा करि जानै दधिकी चोरी ।
 हाथ नचावति आवति ग्वालनि जीभुन करही थोरी ॥ कब सीके चढ़ि माखन खायो कब दाधि
 मटुकी फोरी । अँगुरिन करि कबहुँ नहि चाखतु घरही भरी कमोरी ॥ इतनी सुनत घोषकी नारी
 विहँसि चलीं मुख मोरी । सूरदास यशुदा को नंदन जो कछु करै सु थोरी ॥ ५९ ॥ राग कान्हरो ॥ इनु
 अँखियनु आगेते मोहन एकौ पल जिनि होहिं निन्यारे । हौं बलिगई दरश देखे बिनु तलफतहैं नैननि
 के तारे ॥ आनो सखा बुलाय आपने यहि आँगन खैलौ मेरे बारे । निरखति रहौं फाणिककी माणि ज्यों
 सुंदर श्याम विनोद तिहारे ॥ मधु मेवा पकवान मिठाई खाटे मीठे व्यंजन खारे । सूरदास प्रभु जो मन
 इच्छा सोइ सोइ माँगिलेहु मेरे प्यारे ॥ ६० ॥ राग नटनारायण ॥ मेरे लाडिले हो जननिकहत जानि जाहु कहुं
 तेरेहि काजै गुपाल सुनहु लाडिले लाल राखेहैं भाजन भरि सुरस छहूं ॥ काहेको परायें जाइ करत
 इतने उपाइ दूध दधी घृत माखन तहूं । करति कछु न कानि बकतिहैं कटु बानि निपट निलज बैन
 बिलखहूं ॥ ब्रजकी ढीठी ग्वारी हाटकी बेचनहारी सकुच न देति गारी झगरि कहुं । कहाँलौं करौं
 रिस बकत धौं इही कृश इही मिस सूर श्याम बदन चहूं ॥ ६१ ॥ राग धनाश्री ॥ चोरी करत कान्ह धरि
 पाये । निशिवासर मोहिं बहुत संतायो अब हरि हाथहि आये ॥ माखन दाधि मेरो सब खायो बहुत
 अचगरी कीन्ही । अबतौ आइ परेहौ ललना तुम्हें भले मैं चीन्ही ॥ दोउ भुज पकरि कछो कित
 जैहो माखन लेउ मँगाइ । तेरीसों मैं नेकु न चाख्यो सखा गये सब खाइ ॥ मुख तन चितै
 बिहँसिहँसि दीनो रिस तब गई बुझाइ । लियो उर लाइ ग्वालिनी हरिको सूरदास बलिजाइ ॥
 ॥ ६२ ॥ राग धनाश्री ॥ मथति ग्वालि हरि देखी जाइ । गये हुते माखन की चोरी देखत छबि
 रहे नयन लगाइ ॥ डोलत तनु शिर अंचलु उघरयो बेनी पीठि डोलत इहि भाइ ।
 बदन इंदु पयपान करनको मनहुँ उरग उठि लागत धाइ ॥ निरखी श्याम अंग पुनि
 शोभा भुज भरि धरि लीनो उर लाइ । चितै रही युवती हरिको मुख नयन सैन दै चितहि चुराइ ॥ तन
 मन धन गति मति बिसराई मुख दीनो कछु माखन खाइ । सूरदास प्रभु रसिक शिरोमणि तुम्हरी
 लीला लोकहै गाइ ॥ ६३ ॥ राग ललित ॥ देख्यो हरि मथति ग्वालि दाधि भेदसों ठाढी ॥ यौवन मदमाती इत-
 राती बेनी दुरत कटिपर छबि बाढी ॥ दिन थोरी भोरी अति कोरी देखतही जु श्याम भये चाढी ।

कर्पतिहै दुहुँकरन मथानी शोभाराशि भुजा गहि गाढी ॥ इत उत अंग सुरति झकझोरति अँगिया
 बनी कुचनसो माढी । सूरदास प्रभु रीझि थकित भए मनहु काम साँचे भरि काढी ॥ ६४ ॥
 राग विलावल ॥ गए श्याम तेहि ग्वालिनिके घर । देखी जाइ मथति दधि ठाढी आपु लगे खेलन द्वारे
 पराफिरि चितई हरि दृष्टि परिगए बोलि लिए हरुखे सुने घर । लिये लगाइ कठिन कुचके बिच गाढ़े
 चापि रही अपने कर ॥ उमँगि अंग अँगिया उर दरकी सुधि बिसरी तनकी तिहि औसर । तब भये
 श्याम वरष द्वादशके रिझैलई युवती वा छविपर ॥ मन हरि लयो तनकसे हँगये देखिरही शिशु
 रूप मनोहर । माखन लै मुख धरति श्यामके सूरज प्रभु रति पति नागर वर ॥ ६५ ॥ ग्वालिनि उर-
 हनके मिस आइ । नंदनंदन तनु मनु हरिलीनो बिन देखे क्षण रह्यो न जाइ ॥ सुनहु महरि अपने
 सुतके गुण कहा कहौं किहि भाँति बनाइ । चोली फारि हार गहि तोरयो इन बातन कहौ कौन
 बडाइ ॥ माखन खाइ खवावत ग्वालन जो उबरयो सो दियो लुटाइ । सुनहु सूर चोरी सहलीनी
 अब कैसे सहजात ढिठाइ ॥ ६६ ॥ राग सारंग ॥ झुंठहि मोहिं लगावति ग्वारि । खेलतमें मोहिं बोलि लियोहै
 दोउ भुज भरि दीनी अँकवारि ॥ मेरे कर अपने कुच धारति आपुहि चोली फारि । माखन आपुहि मोहि
 खवायो मैं कव दीन्हों ठारि ॥ कहा जाने मेरो वारो भरो झुकी महरि दैदैं सुख गारि । सूर श्याम ग्वालिनि
 मन मोह्यो चितै रही इकटकहि निहारि ॥ ६७ ॥ राग गौरी ॥ कबहिं करन गये माखन चोरी । जानति हौं जु
 कटाक्ष तिहारे कमलनयन मेरोइ तनकसो री ॥ दैदैं दगा बुलाइ भवनमें भेटति भुज भरि उरज कटो-
 री । उर नखचिह्न दिखावति डोलति कान्ह चतुर भए तू अति भोरी ॥ मो घर आवति उरहनके मिस
 चितै रहति ज्यों चन्द्रचकोरी । सूर सनेह जात नहिं हटक्यो नैननि प्रीति जाति नहिं तोरी ॥ ६८ ॥
 ॥ राग गौरी ॥ कहा कहौं हरिके गुण तोसों । सुनहु महरि अबही मेरे घर जे रँग कीने मोसों ॥ मैं दधि
 मथति आपने मंदिर गए तहाँ इहि भाँति । मोसों कह्यो वात सुनु मेरी मैं सुनिकैं मुसकाति ॥ बाँह
 पकरि चोली गहि फारी भरि लीनी अँकवारि । कहत न बनै सकुचकी बाँतें देखौ हृदय उबारी ॥
 माखन खाइ निदरि नीकी विधि इह तेरे सुतकी घात । सूरदास प्रभु तेरे आगे सकुच तनक हँ जात
 ॥ ६९ ॥ राग गौडमलार ॥ ग्वालिनी श्याम तनु देखरी आपु तन देखिये । भीति जब हाई तब चित्र
 अबे रेखिये ॥ कहाँ मेरो कुँवरहै पाँचही वरषको रोइ अजहूँ पयपान माँगै । कहाँ तू ठीठ योवन मद
 सुंदरी फिरति अठिलाति गोपाल आगे ॥ कहाँ मेरो कान्हकी तनकसी आँगुरी बडे बड़े नखनिके
 चिह्न तेरे । मष्ट करु हँसैगो लोगु अँकवार भुज कहाँ पाए तैं श्याम मेरे ॥ टगटगै मुख झुकी नयनहुं
 नागरी उरहनो देत रुचि अधिक बाढी । सुनहु सूर सर्वसुहरचौ साँवरे अन उत्तर महरि ढिग
 देति ठाढी ॥ ७० ॥ राग गौरी ॥ कतहो कान्ह काहूके जात । ये सब बढी गर्व गोरसके मुख सम्हारि बो-
 लति नहिं बात ॥ जोइ जोइ रुचै सोइ सोइ तब मोपै माँगिलहु किन तात । ज्यों ज्यों वचन सुन्यो मुख
 अमृत त्यों त्यों सुख पावत सब गात ॥ कैसी टेव परी इन गोपिन उरहनके मिस आवति प्रात ।
 सूर सकति हठि दोष लगावति घरहुको माखन नहिं खात ॥ ७१ ॥ राग विलावल ॥ कान्हको ग्वालिनि
 दोष लगावत चोर । तनक दधि माखनके कारण कबै गयो तेरी ओर ॥ तुमतो धन योवनकी माती
 निलज भई उठि आवत भोर । लालकुँवर मेरो कछू न जानै तूहै तरुणि किशोर ॥ कापर नयन
 चढाये डोलति या ब्रजमें तिनका सो तोर । सूरदास यशुदा अनखानी इह जीवन धन मोर ॥ ७२ ॥
 ॥ राग देवगंधार ॥ कान्हहि वरजति क्यों न नंदरानी । एक गाँवके बसत कहाँलौ करैं नंदकी कानी ॥ तुम
 जो कहतहो मेरो कन्हैया गंगाकोसो पानी । बाहर तरुण किशोर बैस वर वाट वाटको दानी ॥

वचन बिचित्र कमल दल लोचन कहत सरस वरवानी । अचरज महारि तुम्हारे आगे आवै जीभ तुत-
 रानी ॥ कहाँ मेरो कान्ह कहाँ तुम ग्वाल्लिनि इह विपरीति न जानी । आवत सूर उरहनेके
 मिसु देखि कुँवर मुसुकानी ॥ ७३ ॥ राग धनाश्री ॥ माखन माँगत हैं यशुमतिसों । माता
 सुनत तुरत लै आई देति खवाइ मगन मन रतिसों ॥ मैया मैं अपने कर लेहौं धरिदे मेरे हाथ ।
 माखन खात चले उठि खेलन सखा जुरे सब साथ ॥ मथुरा जात ग्वाल्लिनी देखी चरचि लई हरि
 आई । सूर श्याम ता घरके पाछे बैठिरहे अरगाइ ॥ ७४ ॥ राग धनाश्री ॥ मथुरा जातहों बैचन दधियो ।
 मेरे घरको द्वार सखीरी तबलौं देखति रहियो ॥ दधि माखन द्वै माठ अछूते सौंपतिहौं तुहि सहियो ।
 और तौ डर नाही या ब्रजमें नंदसुवन सखि आवत लहियो ॥ ये शुभ वचन निकट हैं मोहन सुनिकरि
 उर सब गहियो । सूर पौरिलौ गई न ग्वाल्लिनि कूदिपरचो दैधहियो ॥ ७५ ॥ राग नट ॥ देख्यो जाइ श्याम
 घरभीतर । अबहीं निकसि कहति भई सो फिर आई पुनि तुम्हरे डर ॥ सखा साथके चमकि गए
 सब गह्यो श्याम कर धाई । औरनि जानि जान मैं दीन्ह्यो तुम कहं जाहु पराई ॥ बहुत अचगरी
 करत फिरतहौ मैं पाए करि घात । बाँह पकरि लैचली महारिपै करत रहत उतपात ॥ देखौ महारि
 आपने सुतको कबहूँ नाहिं पत्याति । बैठे श्याम आपने भवनहि चितै चितै पछिताति ॥ बाँह पकरि
 तू ल्याई काको अति बेशरम गवाँरि । सूर श्याम मेरे आगे खेलत यौवन मद मतवारि ॥ ७६ ॥
 राग सारंग ॥ यशुदा तू जो कहतिही मोसों । दिनप्रति देन उरहनो आवति कहा तिहारो कोसों ॥ यहै
 उरहनो सत्य करनको गोविंदहि गहिल्याई । देखन चली यशोदा सुतको द्वैगए सुता पराई ॥ तेरे
 हृदय नैक मति नाही वदन पेखि पहिचान्हैं । सुनरी सखी कहति डोलतिहै या कन्या सौ कान्हैं ॥
 तैं जो नाम कान्ह मेरेको सूघो है करि पायो । मूरदास स्वामी यह देखौं तुरत त्रिया द्वै आयो ॥ ७७ ॥
 राग गौरी ॥ रही ग्वाल्लि हरिको मुख चाहि । कैसे चरित किये हरि अबहीं बार बार सुमिरति
 करताहि ॥ बाँह पकरि घरते लैआई कहा चरित कीन्हें हैं श्याम । जात न बने कहत नाहिं आवै कहत
 महारि तू ऐसी वाम ॥ जानी बात तिहारी सबकी यशुमति कह्यो इहांते जाहि । मूरदास प्रभुके गुण
 ऐसे बुद्धि करी तब जीती ताहि ॥ ७८ ॥ राग गौरी ॥ श्याम गए ग्वाल्लिनि घर सूने । माखन खाइ डारि सब
 गोरस बासन फोरि सोरु हठि दूनो ॥ बडो माट इक बहुत दिननिको तासु किये दशटूक । सोवत लरिक-
 न छिरकि महीसो हँसत चले दै कूक ॥ आइ गई ग्वाल्लिनि तिहि औसर निकसत हरि धरि पायो देखत
 घर बासन सब फूटे दही दूध ढरकायो ॥ दोउ भुज धरि गाढ़े करिलीन्हें गई महारिके आगे । मूरदास
 अब बसै कौन ह्यां पति रहिहै ब्रजत्यागे ॥ ७९ ॥ राग बिलावल ॥ ऐसो हाल कियो घर घरको हौं लै आई तुम
 पास पकरिकै । फोरे सब बासन घरके दधि माखन खायो जो उबरचो सो डारचो रिस करिकै ॥ लरिका
 छिरकि महीसों देखो उपज्यो पूत सपूत महारिके । बडो माट घर धरचो युगनिको सोउ टूक पांच
 दश करिके ॥ पारि सपाट चले तब पाये हौं ल्याई तुम पास पकरिकै । मूरदास प्रभु को यों राखो
 ज्यों राखिये गज मदको जकरिकै ॥ ८० ॥ राग कान्हरो ॥ करत कान्ह ब्रज घरनि अचगरी खीझति महारि
 कान्हसों पुनि पुनि उरहन लै आवतिहैं सिगरी ॥ बड़े बापके पूत कहावत हम वै वास बसत इक
 नगरी । नंदहुते ये बड़े कहैं फेरि बसैं ये ब्रजनगरी ॥ जननीके खीझत हरि रोये झूठेहि मोहिं
 लगावत धगरी । मूरश्याम मुख पोंछि यशोदा कहति सबै युवती हैं लँगरी ॥ ८१ ॥ राग सारंग ॥ नितही
 नित सब आवति उठि भोरे । मेरे बारेहि दोष लगावत ग्वाल्लिन यौवन जोर ॥ दूध दही माखनके कारण
 कब गयो तेरी ओर । धनमाती इतराती डोलति सकुचति नाहिं करै अति शोर ॥ मेरो कन्हैया कहाँ

तनक सों तू है कुचन कठोर । तेरे मनको इहाँ कौन है पायो आजु कटकको छोर ॥ कापर नयन
 चलावति आवति जाति नहीं ब्रजतिनका तोर । सुनहु सूर ग्वालिनिकी बातें बसत कान्ह जीवन
 धन मोर ॥ ८२ ॥ राग नट ॥ मेरो माई कौनको दधि चोरै । मेरे बहुत दर्दको दीनो लोग पियतहैं औरै ॥
 कहा भयो तेरे भवन गये जो पियो तनकु लै भोरै । ता ऊपर काहे गरजतिहौ मनो आई चढ़ि घोरै ॥
 माखन खाइ मह्यो सब डारयो बहुरौ भाजन फोरै । सूरदास ये रसिक ग्वालिनी नेह नवल सँग जोरै
 ॥ ८३ ॥ राग रामकली ॥ अपनो गाउँ लेहु नँदरानी । बड़े बापकी बेटी ताते पूतहि भले पढ़ावति
 वानी ॥ सखा भीर लै पैठत घरमें आपु खाइ तौ सहिये । मैं जब चली साधुहे पकरन तबके गुण
 कह कहिये ॥ भाजिगये दुरि देखत कतहूँ मैं घर पौढ़ी आई । हरे हरे बेनी गहि पाछे बांधी पाटी
 लाई ॥ सुनु मैया याके गुण मोसों इन मोहिं लियो बुलाई । दधिमें परी सेतिकी चींटी मोपै सबै
 कढाई ॥ टहल करत याके घरकी मैं इह पति सँग मिलि सोई । सूर वचन सुनि हँसी यशोदा
 ग्वालि रही मुख गोई ॥ ८४ ॥ राग सारंग ॥ महरी तुम ब्रज चाहति कछु और ॥ बात एक मैं कही कि
 नाहीं आपु लगावति झोर । जहां वसे पति नहीं आपनी तजन कह्यो सो ठौर ॥ सुतके भए बधाई
 पाई लोगन देखति हौर । कान्ह पठाइ देति घर लूटन कहत करौ या गौर ॥ ब्रज
 घर समुझि लेहु महारि जू हहा करति कर जोरी । सूर सुनत ग्वालिनिकी बातें रहि यशुमति मुख
 मोरी ॥ ८५ ॥ लोगन कहति झुकति तू बौरी । दधि माखन गांठी दै राखत करति फिरत सुत
 चोरी ॥ जाके घरकी हानि होत नित सो नहिं आन कहै री । जाति पांतिके लोग न देखत और बसैह
 नेरी ॥ घर घर कान्ह खान को डोलत अतिहि कृपण तू हैरी । सूर श्यामको जब जोइ भावै सोइ
 तबहीं तू दैरी ॥ ८६ ॥ राग मलार ॥ महारि तैं बड़ी कृपणहै माई । दूध दही बिधिको है दीनो सुत डर
 धरति छिपाई ॥ बालक बहुत नाहिं री तेरे एकै कुँवर कन्हई । सोऊ तो घरही घर डोलत माखन
 खात चुराई ॥ वृद्ध बैस पूरे पुण्यनिते तैं बहुतै निधि पाई । ताहुके खेबे पियवेको कहा करति चतु-
 राई ॥ सुनहु न वचन चतुर नागरिके यशुमति नंद सुनाई । सूर श्यामको चोरीके मिस देखनको री
 आई ॥ ८७ ॥ राग नट ॥ अनत सुत गोरसको कत जात । घर सुरभी नव लाख दुधारी और गनी
 नहिं जात ॥ नितप्रति सबै उरहनेके मिस आवति हैं उठि प्रात । अनसमुझे अपराध लगावति
 विकट बनावति बात ॥ अतिहि निशंक विवादति सन्मुख सुनि मोहिं नंद रिसात । मोसों कृपण
 कहत तेरे गृह ढोटाऊ न अघात ॥ करि मनुहारि उठाय गोदलै सुतको वरजति मात । सूर श्याम
 नित सुनत उरहनो दुख पावत तेरो तात ॥ ८८ ॥ राग विलावल ॥ भाजिगये मेरे भाजन फोरी । लरिका
 सहस एक सँग लीने नाचत फिरत सांकरी खोरी ॥ माखन खाइ जगाइ बालकन्ह बनचर सहित बछ-
 रुवा छोरी । सकुच न करत फागुसी खेलत गारी देत हँसत मुख मोरी ॥ बात कहाँ तेरे ढोंटाकी
 सब ब्रज बांध्यो प्रेमकी डोरी । टोनासी पढि नावत शिर पर जो भावत सो लेत अजोरी ॥ आपु
 खाइ तौ सब हम मानैं औरन देत सिकहरो तोरी । सूर सुतहि देखो नँदरानी अब तोरत चोली
 बंद जोरी ॥ ८९ ॥ राग नट ॥ श्याम सब भाजन फोरि पराने । हांक देत पैठतहैं पैला नेकुन मनहि
 डेराने ॥ सीके तोरि मारि लरिकनको माखन दधि सब खाई । भवन मंच्यो दधिकौंदौ लरिकन
 रोवत पाये जाई ॥ सुनहु २ सबहिनके लरिका तेरोसों कहूँ नाहीं । हाटन बाटन गलिनि कहूँ कोउ
 चलत नहीं डरुपाहीं ॥ ऋतु आयेको खेल कन्हैया सब दिन खेलत फाग । रोकि रहत गहि गलीसां-
 करी टेढ़ी बांधत पाग ॥ बारते सुत ये ढँग लाये मनहीं मनहिं सिहात । सुनहु सूर ग्वालिनिकी बातें

सकुचि महरि पछितात ॥९०॥ राग सारंग ॥ कन्हैया तू नाहिं मोहिं डेरात । पटरस धरे छाँडि कत पर
घर चोरी करि करि खात ॥ बकति बकति तोसों पचिहारी नेकहु लाज न आई । ब्रज परगन शिर
दार महरि तू ताकी करत नन्हई ॥ पूत सपूत भयो कुल मेरो अब मैं जानी बात ॥ सूरश्याम अबलौं
तोहिं बकस्यो तेरी जानी घात ॥ ९१ ॥ राग गौरी ॥ सुनरी ग्वारी कहाँ एक बात । मेरी सौं तुम
याहि मारियो जबहीं पावो घात ॥ अब मैं याहि जकरि बांधौंगी बहुतै मोहिं खिझाई । साटिन्ह मारि
करौं पहुनाई चितवत वदन कन्हई ॥ अजहूं मानु कह्यो सुनु मेरो घर घर तू जनि जाही । सूर
श्याम कह्यो कबहुं न जैहौं माता मुख तन चाही ॥ ९२ ॥ राग विलावल ॥ तेरे लाल मेरो माखन खायो ।
दुपहर दिवस जानि घर मूनो ढूँढि ढूँढोरि आपही आयो ॥ खोल किंवार सून मंदिरमें दूध दही
सब माखन खवायो । सीके काढि खाट चढि मोहन कछु खायो कछु लै ढरकायो ॥ दिन प्रति हानि होत
गोरसकी यह ढोटा कौनै ढँग लायो । सूरदास कहती ब्रजनारी पूत अनोखो जायो ॥ ९३ ॥
राग रामकली ॥ माखन खात पराये घरको । नितप्रति सहस मथानी मथिये मेघ शब्द दधि माठ घमरको ॥
कितने अहीर जियतहैं मेरे गृह दधि लै मथि बेचतहैं मही महरको । नव लख धेनु दुहतहैं नितप्रति
बडो भाग्यहै नंद महरको ॥ ताके पूत कहावतहौ जी चोरी करत उधारत फरको । सूरश्याम कितनो
तुम खैहौ दधि माखन मेरे जहाँ तहाँ ढरको ॥ ९४ ॥ मैया मैं नाहीं दधि खायो । ख्याल परे ये
सखा सबै मिलि मेरे मुख लपटायो ॥ देखि तुहीं सीके पर भाजन ऊँचे घर लटकायो । तुहीं निरखि
नान्हें कर अपने मैं कैसे करि पायो ॥ मुख दधि पोंछि कहत नंदनंदन दोना पीठ दुरायो । डारि
साट मुसुकाइ तबहिं गहि सुतको कंठ लगायो ॥ बालविनोद मोद मन मोह्यो भक्त प्रताप देखायो ।
सूरदास प्रभु यशुमतिके सुख शिव विरंचि बौरायो ॥ ९५ ॥ यशुमति तेरो बारो नन्हो
अतिहि अचगरो । दूध दही माखन लै डारि देत सगरो ॥ भोरहि उठि नितप्रति मोसों करतहै झगरो ।
ग्वाल बाल संग सब लिये घेरि रहैं बगरो ॥ हम तुम हैं सब बैस एक के को काते अगरो । लियो दियो
सोई कछु डारि देहु झगरो ॥ सूरश्याम तेरो गुननिमें अति नगरो । चोली अरु हार तोरि कियो
झगरो ॥ ९६ ॥ देखो माई या बालककी बात । वन उपवन सरिता सब मोहे देखत श्यामल गात ॥
मार्ग चलत अनीत करत हरि हठिकै माखन खात । पीतांबर वै शिरते ओढत अंचल दै मुसुकात ॥
तेरी सौं कहा कहाँ यशोदा उरहन देत लजात । जब हरि आवत तेरे आगे सकुचि तन कहै जात ॥ कौन
गुण कहाँ श्यामके नेक न काहु डरात । सूरश्याम मुख निरखि यशोदा कहति कहा इह बात ॥
॥ ९७ ॥ राग नट ॥ नंद घरनि सुत भलो पढ़ायो । ब्रजकी बीथिन पुरनि घरनि घर बाट घाट सब शोर
मचायो ॥ लरिकन मारि भजत काहुके काहुको दधि दूध लुटायो । काहुके घर करत बडाई मैज्यों
त्यो करि पकरन पायो ॥ अबतौ इन्हैं जकरि बांधौंगी इहि सब तुम्हरो गाउँ भडायो । सूरश्याम
भुज गहि नंदरानी बहुरि कान्ह अपने ढिग आयो ॥ ९८ ॥ राग विलावल ॥ सुनि सुनि री तू महरि यशोदा
तैं सुत बडो लडायो । काके नहीं अनोखो ढोंटा केहि न कठिन करि जायो ॥ मैं हूं अपने औसर पै
ते बहुत दिननमें पायो । यहि ढोंटा लै ग्वाल भवनमें कछु बिगरयो कछु खायो ॥ तैं तो ग्वाल
पकरि भुज याकी वदन दही लपटायो । सूरदास ग्वालनि अति रूठी बरबस कान्ह बँधायो ॥
॥ ९९ ॥ अथ नवम अध्याय हरि दाँवर बँधाए ॥ राग गौरी ॥ ऐसी रिसमें जो धरि पाऊं । कैसे
हाल करौं धरि हरिके तुमको प्रगट देखाऊं ॥ सटिया लिये हाथ नंदरानी थरथरात रिस गात । मारे
बिना आजु जो छाँडों लागै मेरे तात ॥ यहि अंतर ग्वालनि इक औरै धरे बाँह हरि ल्यावति ।

भली महारि सूर्यो सुत जायो चोली हार बतावति ॥ रिसमें रिस अतिही उपजाई जानि जननि अभि
लाष । सूर श्याम भुज गहे यशोदा अब बाँधौं कहि माष ॥ ३०० ॥ राग सोरठ ॥ यशुमति रिस करि करि
रजु करपै । सुत हित क्रोध देखि माताके मनही मन हरि हरपै ॥ उफनत क्षीर जननि करि व्याकुल
इहि विधि भुजा छुड़ायो । भाजन फोरि दही सब डारयो माखन मुँह लपटायो ॥ लै आई जेवरी
अब बाँधौं गरब जानि न बैँधायो । आंगुर द्वै घटि होत सबनि सों पुनि पुनि और मैँगायो ॥ नारद शाप
भये यमलाज्जुन इनको अब जो उधारौं ॥ सूरदास प्रभु कहत भक्त हित युग युग मैं तनु धारौं ॥ ३०१ ॥
राग विलावल ॥ यशोदा हरि गहि राजत करपै गावत गोविंद चरित मनोहर प्रेम पुलकि चित वरपै ॥ उफनत
क्षीर शरीर तन व्याकुल तवहीं भुजा छुड़ायो । भाजन फोरि दही सब डारेव लवनी मुख लपटायो ॥
लैकर दाँवरि यशोदा दौरी बैँधन कृष्ण ना पायो । द्वै द्वै अंगुर घटै जेवरी ताते अधबुध आयो ॥
नारद शाप भये यमलाज्जुन तिन हित आपु बैँधायो । सूरदास बलिजाइ यशोदा साँचे देवल
आयो ॥ ३०२ ॥ राग धनाश्री ॥ देखि सखी यशुमति बौरानी । घर घर डोलति लेत दामरी बांह गहे हरिकी
विततानी ॥ जानति नहीं जगत्पति माधव जिनते सब आपदा नशानी । जाके नाम सकति पुनि
ताकी ताहि देखि बाँधत नंदरानी ॥ अखिल ब्रह्मांड उदर में जाके जिनकी ज्योति जलथलहु समानी ।
मुख जम्हात त्रिभुवन देखरायो अचरज कथा न जात बखानी ॥ ब्रह्मादिक सनकादि शुकादिक
भ्रमत रहत इनहु नहि जानी । सूरदास मोहिं ऐसी लागत जो कछु कही गर्गमुनि बानी ॥ ३०३ ॥
राग रामकली ॥ यशोदा ये तो कहा रिसानी । कहा भयो जो अपने सुतपै महि टरिपरी मथानी ॥ रोस
रोस सँभरै दृग तेरे कीरति पयलए पानी । मनहु शरदके कमल कोशपर मधुकर मीन सकानी ॥
भ्रम जलकण किंचित निरखि वदन पर यह छवि कहत मन मानी । मानौं चंद्र नव उमँगि सुधा
भुव ऊपर वरषा ठानी ॥ गृह गृह गोकुल दई दाँवरी बाँधति भुज नंदरानी । आपु बैँधावत भक्तन
छोरत वदन विदित श्रम पानी ॥ गुण लघु चरचि करति श्रम जितनो निरखि वदन मुसुकानी ।
शिथिल अंग सब देखि सूर प्रभु शोभा सिंधु तिरानी ॥ ३०४ ॥ राग सारंग ॥ बाँधौं आजु कौन तोहि छोरै ।
बहुत लैगई कीनी मोसों भुज गहिरजु ऊखलसों जौरै ॥ जननी अति रिस जानि बैँधायो चितै वदन
लोचन जल डोरै । यह सुनि ब्रज युवती उठि धाई कहत कान्ह अब क्यों नहि चोरै ॥ ऊखलसों
गहि बाँधि यशोदा मारनको साँटी कर तोरै । साँटी पेखि ग्वालनि पछितानी विकल भई जहँ जहँ
मुख मोरै ॥ सुनहु महारि ऐसी न बूझिये सुत बाँधत माखन दधि थोरै । सूर श्यामको बहुत सतायो
चूक परी हमते यह भोरै ॥ ३०५ ॥ राग आसावरी ॥ जाहु चली अपने अपने घर । तुमहीं सब मिलि ढीठ
करायो अब आई बैँधन छोरन वर ॥ मोहिं अपने बाबाकी सौहै कान्है अब न प्रत्याऊं । भवन जाहु
अपने अपने सब लागतिहों मैं पाऊं ॥ मोको जिनि बरजो युवती कोउ देखौं हरिके रूयाल ।
सूर श्यामसों कहति यशोदा बडे नंदके लाल ॥ ३०६ ॥ राग सोरठ ॥ यशोदा तेरो मुख हरि जोवै कमल
नयन हरि हिचिकिनि रोवै बैँधन छोरि जु सोवै ॥ जो तेरो सुत खरोई अचगरो तऊ
कोखिको जायो । कहा भयो जो घरके ढोंटा चोरी माखन खायो ॥ कोरी मटुकी दही जमायो जापन
पूजन पायो । तेहि घर देव पितर काहेको जा घर कान्है रुवायो ॥ जाकर नाम लेत भ्रम छूटै कर्म
फंद सब काटै । सो हरिप्रेम जेवरी बाँध्यो जननि साँट लै डाटै ॥ दुखितजानि दोउ सुत कुबेरके ता
हित आपु बैँधायो । सूरदास प्रभु भक्तहेतुही देह धारि तहाँ आयो ॥ ३०७ ॥ राग विहागरी ॥ देखो माई कान्ह
हिलकियन रोवै । तनक मुख माखन लपटान्यो डरनिते अँसुअन धोवै ॥ माखन लागि उलूखल

बाँधो सकल लोग ब्रज जोवै । निरखि कुहूपि उन बालकनिकी दिशि लाजन अँखियन धोवै ॥
 ग्वाल कहै धनि जननि हमारी सुकरसुरभी नित नोवै । बरबसही बैठारि गोदमें धारै वदन निचोवै ॥
 ग्वालनि कहै या गोरस कारण कत सुतकी पति खोवै । आनि देहि हम अपने घरते चाहति जित-
 कु यशोवै ॥ जब जब बंधन छोरयो चाहत सूर कहै यह कोवै । मन माधो तनु चित गोरसमें इहि
 बिधि महरि बिलोवै ॥ ८ ॥ राग सारंग ॥ माई नेकहुँ नहिं दरद करति हिलकिनि हरि रोवै । बज्रहूते कठिन
 हियो तेरोहै यशोवै ॥ पालना पौढाइ जिनहि विकट वाउ काटै । उलटे भुज बांधि तिनहि लकुट
 लिये डाँटै ॥ नेकहू न थकित पानि निर्दयी अहीरी । अहो नंदरानी सीख कौनपै लहीरी ॥ जाको
 शिव सनकादिक सदा रहत लोभा । सूरदास प्रभुको मुख निरखि देखि शोभा ॥ ९ ॥ राग विहागरे ॥
 कुँवर जल लोचन भरि भरि लेत । बालक वदन विलोकि यशोदा कत रिस करत अचेत ॥ छोरि
 कमरते दुसह दाँवरी डारि कठिन कर बेत । कहि तोको कैसे आवतुहै शिशु पर तामस एत ॥ सु-
 ख आँसू माखनके कनिका निरखि नैन सुख देत । मानो शशि स्रवत सुधानिधि मोती उडुगण अव-
 लि समेत ॥ सरबसु तौ न्यवछावरि कीजै सूर श्यामके हेत । ना जानों केहि हेतु प्रगट भये इहि ब्रज
 नंदनिकेत ॥ ३१० ॥ राग केदारो ॥ हरिके वदन तन धौं चाही । तनक दधि कारण यशोदा एतो कहा रिसाही ॥
 लकुटके डर डरत जैसे सजल शोभित डोल । नील नीरज दृग लसै मनो वोसकन
 कृत लोल ॥ बात वशसु मृणाल जैसे प्रात पंकज कोस । नमित मुख पर अधर सूचित
 सकुचमें कछु रोस ॥ केतिक गोरस हानि जाको करतिहौ अपमान । सूर ऐसे वदन
 ऊपर वारिये धन प्रान ॥ ११ ॥ राग केदारो ॥ मुख छबि देखिहो नंद घरनि । शरद निशिके
 अश्रु अगणित इंदु आभा हरनि ॥ ललित श्रीगोपाल लोचन लोल आँसू ढरनि । मनहुँ वारिज बिलखि
 विभ्रम परे परवश परनि ॥ कनक मणिमय मकर कुंडल ज्योति जगमगं करनि । मित्र लोचन
 मनहुँ आए तरल गति दोउ तरनि ॥ कुटिल कुंतल मधुप मिलि मानौ कियो चाहत लरनि । वदन
 क्रांति अनूप शोभा सकै सूर न वरनि ॥ १२ ॥ राग केदारो ॥ हरि मुख देखिहो नंदनारि । महरि ऐसे सुभग
 सुतसों इतो कोह निवारि ॥ जलज मंजुल लोल लोचन शरद चितवनि दीन । मनहुँ खेलत हैं
 परस्पर मकरध्वज द्वै मीन ॥ ललित कण संयुत कपोलनि ललित कज्जल अंक । मनहुँ राजत
 रजनि पूरण कला अति अकलंक ॥ बेगि बंधन छोरि तन मन वारिलै हिय लाइ । नवल श्याम
 किशोर ऊपर सूर जन बलिजाइ ॥ १३ ॥ राग विहागरे ॥ कहौ तौ माखन ल्याऊं घरते । जा कारण तू
 छोरति नाहिन लकुट न डारति करते ॥ महरि सुनहु ऐसी न बूझिये सकुचि गयो मुख डरते ।
 मनहुँ कमल दधिसुत समपोतकि फूलत नाहिन सरते ॥ ऊखल लाइ भुजा धरि बाँधे मोहन
 मूरति वरते । सूर श्याम लोचन जल वरषत जनु मुक्ता हिमकरते ॥ १४ ॥ राग कल्याण ॥ कहन लगी
 अब बढि बढि बात । ढोटा मेरो तुमहिं बँधायो तन कहि माखन खात ॥ अब मोहिं माखन देति मँगाए
 मेरे घर कछु नाहीं । उरहन करि करि साँझ सवारे तुमहिं बँधायो याही ॥ रिसहीमें मोको गहिदीनो
 अब लागी पछितान । सूरदास हँसि कहत यशोदा बूझौ सबको ज्ञान ॥ १५ ॥ राग धनाश्री ॥ कहा भयो
 जो घरके लरिका चोरी माखन खायो । अहो यशोदा कत त्रासतिहो इहै कोखको जायो ॥ बालक
 जौन अयान न जानै केतिक दक्षो लुटायो । तेरो सखी कहा खायो गोरस गोकुल अंत न पायो ॥
 हाहा लकुट त्रास देखरावत आपन पाश बँधायो । रोदन करत दोउ नयन रचेहैं मनहु कमल तन
 छायो ॥ पौढिरहे धरणी पर तिरछे बिलखि वदन कर जाहु । सूरदास प्रभु रसिक शिरोमणि

हँसिकै कंठ लगाहु ॥ १६ ॥ सुचित दै चितै तनै तन ओर । सकुचत शीत भीत ज्यों
जलरुह तुव कर लकुट निरखि सखि घोर ॥ आनन ललित श्रवण जल शोभित अरुण
चपल लोचनकी कोर । डारत मनौ गंडूक सुधा भरि विधुमंडल ज्यों उभै चकोर ॥
सुभग मृणाल युगल भुज ऊपर बाँधे ऊखल दाम कठोर । मनौ भुवंग भीतरते बाँबी पर उरझिरही
केचुरि गरजोरा ॥ लघु अपराध देखि बहु शोचति निर्दयी हृदय वज्र सम तोर । सूर कहा सुतपर इतनी
रिस कहि इतनै कछु माखन चोरा ॥ १७ ॥ राग विलावल ॥ यशुदा देखि सुतकी ओर । बाल वैस रिसालपर
रिस इती कहाके पोर ॥ बार बार निहारि तव तन निमिष दधि मुख चोर । तरनि किरनिके परशि
मानौ कुमुदि विधु मति भोर ॥ त्रासते अति चपल गोलक सजल शोभित छोर । मीन मानौ वेधि
वंशी करत जल झकझोर ॥ नंदनंदन जगतबंदन करत आंसु कोर । सूरदास सुमहरि मुख हित
निरखि नंदकिशोर ॥ १८ ॥ राग धनाश्री ॥ चितै धौ कमल नयनकी ओर । कोटि चंद वारों या मुख
छवि येहैं शाहके चोरा ॥ उज्ज्वल अरुण असित देखतिहै दुहुं नैनकी कोर । मानौ सुधा पानके कारण
बैठे निकट चकोर ॥ कतहि रिसात यशोदा इन्हसों कौन ज्ञानहै तोर । सूर श्याम बालक मन
मोहन नाहिन तरुण किशोर ॥ १९ ॥ राग सारंग ॥ कवके बाँधे ऊखल दाम । कमल नयन बाहिर करि
राखे तू बैठी मुखधाम ॥ हौं निर्दयी दया कछु नार्ही लागि गई गृह कामादेखि क्षुधा ते मुख कुंभिलानो
अति कोमल तनु श्याम ॥ छोरहु बेगि बडी बिरियां भई बीतगये युग याम । तेरे त्रास निकट
नहिं आवत बोलि सकत नहिं राम ॥ जेहि कारण भुज आप बँधाये वचन कियो ऋषि ताम । ता दिनते
यह प्रगट सूर प्रभु दामोदर सो नाम ॥ २० ॥ राग गौरी ॥ वारों हो वे कर जिन हरिको वदन छुवोरी ॥ वारों
वह रसना जिन बोल्यो तुकारी ॥ ऐसी निर्मोही भई यशुदा न तोसों निरमोही देख्यो गोपाल लाल
आयो क्यों न हाथ पसारी ॥ कुलिशते कठिन वाह चितैरी छतियां अजहं द्रवति ज्यों देखत उर मुरारी ॥
कितिक गोरस हानि जाको तू तोरति कानि डारयो तुहिं सूर श्यामके रोम रोम पर वारी ॥ २१ ॥
राग सोरठ ॥ यशोदा तेरो भलो हियोहै माई । कमल नयन माखनके कारण बाँधे ऊखल लाई ॥ जो
संपदा देव मुनि दुर्लभ सपनेहु देइ न देखाई ॥ याहीते तू गर्व भुलानी घर बैठे निधि पाई ॥ सुत काहूको
रोवत देखति दौरि लेत हिय लाई । अब अपने घरके लरिकासों इती कहा जडताई ॥ बारंवार सजल
लोचन भरि चितवत कुँवर कन्हई । कहा करों बलि जाउँ छोरती तेरी सौह दिवाई ॥ जो मूरति जल
थलमो व्यापक निगम न खोजत पाई । सो मूरति तू अपने आँगन चुटकी दै नचाई ॥ सूरपालक
सब असुरसँहारक त्रिभुवन जाहि डराई । सूरदास प्रभुकी यह लीला निगम नेति नित गाई ॥ २२ ॥
राग केदारी ॥ देखरी नंदनंदन ओर ॥ त्रासते तनु तृपित भो हरि तकत आनन तोर ॥ बारंवार डरात तोको
वरन वदनही थोर । मुकुर मुख दोउ नैन डारत क्षणहि क्षण छवि छोर ॥ सजल चपल कानीन
पलक अरुण ऐसे डोरासरस अंबुज भँवर भीतर भ्रमतहै जनु भोरा ॥ लकुटकै डरि देखि जैसे भये शोणि-
तवोर । उर लै लगाइ बहाइ रिस जिय तजहु प्रकृति कठोर ॥ कछुक करुणा करि यशोदा करति
निपट निहोर । सूर श्याम विलोकि यशुमति कहति माखनचोरा ॥ २३ ॥ राग धनाश्री ॥ तबते बाँधे ऊखल
आनि । बालमुकुंदको कत तरसावति अति अंग कोमल जानि ॥ प्रातकालते बाँधे मोहन तरनि
चढै मध्यानि । कुम्हिलानो मुख इंदुदिखावति देखौ धौ नंदरानि ॥ तेरे त्रासते कोऊ न छोरत अब छोरहु
तुम आनि । कमल नयन बाँधेई छोडे तू बैठी मन मानि ॥ यशुमतिके मन सुखके कारण आपु
बँधावत पानि । यमलाज्जुनकी मुक्ति करनको सूर श्याम इह ठानि ॥ २४ ॥ राग नट ॥ कान्हसों

आवत क्यों बीरसात । लै लै लकुट कठिन अपने कर परशति कोमल गाता॥देखि जु आंसू गिरत
 नैनते शोभितहैं ढरिजात । सुक्ता मनौ चुवत खंग खंजन चोचि पुठी न समात ॥ उरनि डोल डोल-
 तहैं इहि विधि निराखि सुभुव सुनि बात । मानहुँ सूर सकेत शरासन उडिबेको अकुलात ॥ २५ ॥
 राग रामकली ॥ यशोदा यह न बूझिको कामाकमल नयनकी भुजा देखि धौं तैं बांधेहैं दाम ॥ पूतहुते
 प्रीतम नहिं कोऊ कुलदीपक मणि धाम । हरि पर वारि डारु सब तन मन धन गोरस अरु ग्राम ॥
 दिखियत कमल वदन कुँभिलानो तू निमोही बाम । तू बैठी मंदिर सुख छाहैं सुत दुख पावत घाम ॥
 अति सुकुमार मनोहर सूरति ताहि करत तुम ताम । एई हैं सब ब्रजके जीवन सुख पावत लिए
 नाम ॥ इह सुनि ग्वालि जगतके बोहित पतितपावन है नाम । सूरदास प्रभु भक्तनके वश हैं जगतके
 विश्राम ॥ २६ ॥ राग धनाश्री ॥ ऐसी रिस तोकों नँदरानी । भली बुद्धि तेरे जिय उपजी बडी बैस ॥
 भई सयानी ॥ ढोंटा एक भए कैसेहुँ करि कौन कौन कर वर विधि भानी । कर्म करि अवलौ
 उबरयो ताको मारि पितर दै पानी ॥ को निर्दयी रहै तेरे घरको तेरे ॥ बैठे आनी ॥ सुनहु सूर कहि
 कहि पचिहारी युवती चली घरहि बिरुझानी ॥ २७ ॥ राग सारंग ॥ हलधरसों कहि ग्वालि सुनायो ।
 प्रातहिते तुमरो लबुभैया यशुमति ऊखल बाँधि लगायो ॥ काहूके लरिकहि हरि मारयो भोरहि आनि
 तिनाहि गोहरायो ॥ तबहींते बांधे हरि बैठे सो हम तुमको आनि जनायो ॥ हम बरजी बरजो नहिं मानत
 सुनतहि बल आतुर हैं धायो ॥ सूर श्याम बाँधे ऊखल गहि माता डरत न अतिहि त्रसायो ॥ २८ ॥ राग सारंग ॥
 यह सुनिकै हलधर तहैं धाए ॥ देखि श्याम ऊखल सों बांधे तबहीं दोउ लोचन भरि आए ॥ मैं बरज्यों कै बार
 कन्हैया भली करी दोउ हाथ बँधाए ॥ अजहुँ छोड़ोंगे लँगार ॥ दोउ कर जोरि जननिपै आए ॥ श्यामहिं
 छोरि मोहिं बरु बांधो निकसत सगुन भले नहिं पाए ॥ मेरे प्राण जीवनधन कान्हा तिनको भुज मोहिं
 बँधे देखाए ॥ मातासों कह करौं ढिठाई शेष रूप कहि नाम सुनाए । सूरदास तब कहत यशोदा
 दोउ भैया तुम इकमत भाए ॥ २९ ॥ राग सारंग ॥ एतौ कियो कहा रिस भैया । कौन काज धन दूध
 दही यह शोभ करायो कन्हैया ॥ आये सिखावन सबे पशये स्यानी ग्वालि बोरैया । दिन दिन देन
 उरहो आवैं ठुँकि ठुँकि करत लरैया ॥ सूरदास सुंदरहि लगाने वह बलभद्र औ भैया ॥ ३० ॥
 राग केदारो ॥ काहेको कलहु नाथ्यो दारुण दाँवरि बाँध्यो कठिन लकुट लै त्रास्यो भरो भैया । नहिं
 कसकत मन निरखि कोमल तन तनक दधि काज भली री तू भैया ॥ हाँ तौ न भयो घर देखतो
 तेरी यो अरि फोरतो बासन सब जानत बलैया । सूरदास सहित हरि लोचन आये ऐं भरि बलहूको
 बल जाको सोई री कन्हैया ॥ ३१ ॥ राग विलावल ॥ काहेको यशोदा भैया त्रास्योहैं बारो कन्हैया मोहन
 भरो भैया कितनो दधि पियतौ । हाँतो न भयो घर साँटी दीनी सर सर बाँध्यो कर जेवरी नीके
 कैसे देखि जियतौ ॥ गोपालतौ सबनि प्यारो ताकों तैं कीनो प्रहारो जाकोहैं मोको गारो अजुगुत
 कियतौ । ठाढो बांधे बलवीर नैनौसे ढरतु नीर हरिजूते प्यारो तोको दूध दही धियतौ ॥ सूरदास
 गिरिधरन धरनीधर हलधर यह छबि सदाई रहौ मेरे जियतौ ॥ ३२ ॥ राग सोरठ ॥ यशोदा तोहिं बाँधे क्यों
 आयो । कसको नहिं नेकु तनु तेरो यह कहि काहि खिझायो ॥ शिव विरंचि महिमा नहिं जानत
 सो गाइनसँग धायो । ताते तू पहिचानति नहिं कौन पुण्यते पायो ॥ इतनी कहत रसिकमणि तबहीं
 रोष सहित बल धायो । जननी छाँडि और जो होती करत आपनो भायो ॥ कहा भयो जो घरके
 लरिका चोरी माखन खायो । अपने कर सब बंधन खोले प्रेम सहित उर लायो ॥ सरस वचन
 मनोहर कहि कहि अनुज झूल विसरायो । सूरदास प्रभु भक्तनके हित निजकर आप बँधायो ॥ ३३ ॥

राग सोरठ ॥ काहेको हरि इतनौ त्रास्यो । सुनु री मैया मेरो भैया कितनो गोरस नाश्यो ॥ जब रजुसों कर
 गाढो बाँधे छर छर मारी साटी । सुने घर बाबानंद नाहीं ऐसो करि हरि डाटी ॥ और न कछु देखै
 तन श्यामहि ताको करौ निपातु । तू जो करै बात सोइ साँची कहा करौ तोहि मातु ॥
 गाढे वदत बात सब हलधर माखन प्यारो तोही । ब्रज प्यारो जाको मोहिं गारो छोरति काहे न
 ओही ॥ काको ब्रज माखन दधि केहिको बाँधे जकरि कन्हार्इ । सुनत सूर हलधरकी बातें जननी
 सैन बताई ॥ ३४ ॥ राग सारंग ॥ सुनहु बात मेरी बलराम । करन देहु इनकी मोहिं सेवा चोरी प्रग-
 टत नाम ॥ तुमहीं कहौ कमी काहेकी नव निधि मेरे धाम । मैं बरजति सुत जाहु कहूं जनि कहि
 हारी निशि याम ॥ तुमहुँ मोहिं अपराध लगायो माखन प्यारो श्याम । सुनु मैया तुहि छाँडि
 कहौं किहि को राखै मेरो ताम ॥ तेरी सौं उरहनो लै आवति झूठहि ब्रजकी वाम । सूर श्याम अतिही
 अकुलाने कंबुक्के बाँधे दाम ॥ ३५ ॥ कहा करौं हरि बहुत खिझाई । सहि न सकी रिसही रिस भरि
 गई बहुतै ठीठ कन्हार्इ ॥ भरोने कह्यो नेकु नहि मानत करत आपनी टेक । भोर होत उरहन लै आ-
 वत ब्रजकी वधू अनेक ॥ फिरत जहाँ तेहैं ड्रंढ मचावत घर न रहत क्षण एक । सूर श्याम त्रिभुवन
 को करता यशुमति कहति जनेक ॥ ३६ ॥ राग गौरी ॥ निरखि श्याम हलधर मुसुकाने । को बाँधै
 को छोरै इनको यह महिमा येई पै जाने ॥ उत्पति प्रलय करतहैं येई शेष सहसमुख सुयश बखानै ।
 यमलाज्जुन तोरि उधारन कारन करन करत मन मानै ॥ असुर सँहारन भक्तहि तारन पावन पतित
 कहावत बाने । सूरदास प्रभु भावभक्तके अति हित यशुमति हाथ विकाने ॥ ३७ ॥ हरि चितये
 यमलाज्जुन तन । अबहीं आजु इन्हें उझारौं । येहैं मेरेई जन ॥ इनके हेतु भुजन बँधवाई अब विलंब नहिं
 लाऊं । परशकरौं तनु तरुहि गिराऊं मुनिवर शिष्य मिटाऊं ॥ ये सुकुमार बहुत दुख पायो सुत कुबेरके
 तारौं । सूरदास प्रभु कहत मनहि मन करबान्धन निवारौं ॥ ३८ ॥ राग रामकली ॥ यशोदा ऊखल बाँधे
 श्याम । मनमोहन बाहिरही छोडे आपु गद्दी गृह काम ॥ दूधो मथति मुखते कछु वकरति गारी दैदै
 नाम । घर घर डोलत माखन चोरत पटरस । मेरे धाम ॥ ब्रजके लरिकन्ह मारि भजतुहै जाहु तुमहु
 बलराम । सूर श्याम ऊखलसों बाँधे निरखति ब्रजकी वाम ॥ ३९ ॥ राग गूजरी ॥ यशोदा कान्हरते दधि
 प्यारो । डारिदेहु कर मथत मथानी तरसत नंददुलारो ॥ दूध दही माखन वारौं सब जाहि करति
 तू गारो । कुँभिलाने मुख चंद देखि छवि बँकाहे न नैन निहारो ॥ ब्रह्म सनक शिव ध्यान न पावत सो
 ब्रज गैयन चारो । सूर श्याम पर बलि बल्लि जैये जीवन प्राण हमारो ॥ ४० ॥ राग धनाश्री ॥
 यशुमति केहि यह सीख दई । सुतहि बाँधि तू मथत मथानी ऐसी निठुर भई ॥ हरै
 बोल युवतिनिको लीनो सुन सब तरुणी नछुं । लरिकहि त्रास दिखावत रहिये कत मुरझाय
 गई ॥ मेरे प्राण जीवनधन माधव बाँधे बेरने भई । सूर श्याम कहूं त्रास दिखावत तुम कहा कहत
 दई ॥ ४१ ॥ राग धनाश्री ॥ तबहिं श्याम इर्ष्य बुद्धि उपाई । युवती गई घरनि सब अपने गृह कारज
 जननी अटकाई ॥ आपुन गये यमलाज्जुनके तरु परशत पात उठे झहराई । दिये गिराय धरणि दोऊ
 तरु तब द्वे कुबेर सुत प्रगटे आई ॥ दोउ कार जोरि करत दोउ अस्तुति चारि भुजा तिन्हें प्रगट
 देखाई । सूर धन्य ब्रज जन्म लियो हरि धामणीकी आपदा नशाई ॥ ४२ ॥ राग बिलावल ॥ धनि गोविंद
 धनि गोकुल आये । धनि धनि नंद धन्य निश्चिवासर धनि यशुमति जिन श्रीधर जाये ॥ धनि धनि बाल
 केलि यमुना धनि धनि वन सुरभी वृंद चराये । धनि यह समौ धन्य ब्रजवासी धनि धनि वेणु मधुर
 धनि गाये ॥ धनि धनि अनख उरहनो धनि धनि धनि माखन धनि मोहन खाए । धन्य सूर ऊखल

तरु गोविंद हमहिं हेत धनि भुजा बँधाए ॥ ४३ ॥ राग सारंग ॥ धन्य धन्य ऋषि शाप हमारे । आदि
 अनादि निगम नहिं जानत ते हरि प्रकट देह ब्रज धारे ॥ धन्य नंद धनि मातु यशोदा धनि आँगन
 में खेलनवारे । धन्य श्याम धनि दाम बँधाए धनि ऊखल धनि माखनप्यारे ॥ दीनबंधु करुणानिधि
 हनु प्रभु राखि लेहु हम शरण तिहारे।सूर श्यामके चरण शीश धरि अस्तुति करि निज धाम सिधारे ॥
 ॥ ४४ ॥ राग विलावल ॥ यह जिय जानि गोपाल बँधाये।शाप दुग्ध द्वै सुत कुबेरके आनि भये तरु युगल सुहा
 ये ॥ व्याज रुदन लोचन जल ढारत ऊखल दाम सहित चलि आये । विटप भंजि यमलाज्जुन तारे
 करि अस्तुति गोविंद रिझाये ॥ तुम बिनु कौन दीन खलु तारै निर्गुण सगुण रूप धरि आये । सूरदास
 श्याम गुण गावत हर्षवत निज पुरी सिधाये ॥ ४५ ॥ राग रामकली ॥ तरु दोउ धरणि परे भहराइ । जर
 सहित अरराइकै आघात शब्द सुनाइ ॥ भए चकृत लोग सब ब्रजके रहे सकुचि डराइ । कोऊ रहे
 अकाश देखत कोऊ रहे शिरनाइ ॥ धरिकलौं जकिरहे जहां तहां देह गति बिसराइ । निरखि यशुमति
 अजिर देखै बँधे नहिं कन्हाइ ॥ वृक्ष दोउ महि परे देखे महारि कीन्ह पुकार । अबहिं आँगन छोडि आई
 चप्यो तरुके डार ॥ मैं अभागिनि बांधि राखे नंद प्राणअधार । शोर सुनि नंद दौरि आये विकल गोपी
 ग्वार ॥ देखि तरु सब अति डराने हैं बडे विस्तार । गिरे कैसे बडो अचरज नेकु नहीं बयार ॥ दुहुं तरु
 बिच श्याम बैठे रहे ऊखल लागि । भुजा छोरि उठाय लीने महारि हैं बडे भागि ॥ निरखि युवती अंग
 हरिके चोट जनि कहूँ लागि । कबहुँ बांधति कबहुँ मारति महारि बडी अभागि ॥ नयन जल भरि
 ढारि यशुमति सुतहि कंठ लगाइ । जरहु रिस जिन तुमहिं बांध्यो लागै मोहिं बलाइ ॥ नंद मोहिं
 कहा कहेंगे देखि तरु दोउ आइ । मैं मरौं तुम कुशल रहौ दोऊ श्याम हलधर भाइ ॥ आइ घर
 जो नंद देखे तरु गिरे दोउ भारि । बांधि राखति सुतहि मेरे देत महारिहि गारि ॥ तात कहि तब
 श्याम दौरे महर लियो अंकवारी । कैसे उबरे कृष्ण तरुते सूरले बलिहारी ॥ ४६ ॥ राग नट ॥
 मेरे मोहन हौं तुमपर वारी । कंठ लगाइ लिये मुख चूमत सुंदर श्याम विहारी ॥ काहेको दाम
 ऊखलसों बांध्यो है कैसी महतारी । अतिहि उतंग वयारि न लागत क्यों टूटे दोऊ तरु भारी ॥
 बारंबार बिचारि यशोदा यह लीला अवतारी । सूरदास स्वामीकी महिमा कापर जात बिचारी ॥
 ॥ ४७ ॥ राग सारंग ॥ अब घर काहुँके जिनि जाहु । तुम्हरे आजु कमी काहेकी कत तुम अनतहि
 खाहु ॥ बरै जेवरी जिन तुम बांधे बरै हाथ भहराई । नंद मोहिं अतिही त्रासतहैं बांधे कुँवर
 कन्हाइ ॥ रोग जाउ अपने हलधरकी छोरतहै तब श्याम । सूरदास प्रभु खात फिरो जिनि माखन
 दधि तुव धाम ॥ ४८ ॥ ब्रजयुवती श्यामहि उर लावति । बारम्बार निरखि कोमल तनु कर जोरति
 बिधिको जुमनावति ॥ कैसे बचे अगम तरुके तर मुख चुंबति यह कहि पछितावति । उरहनों लै
 आवति जेहि कारण सो मुख फल पूरण करि पावति ॥ सुनहु महारि इनको तुम बांधति भुज गहि
 बंधन चिह्न दिखावति । सूरदास प्रभु अति रति नागर गोपी हरषि हृदय लपटावति ॥ ४९ ॥
 अथ यमलाज्जुनउद्धारन दूसरी लीला ॥ राग विलावल ॥ ग्वालि उरहनो भोरहि ल्याई । यशुमति कहाँ
 गयो तेरो कन्हाइ ॥ माखन मथि भरि धरी कमोरी । अबहीं मोहनलै गयो चोरी ॥ भलो कर्म तैं
 सुतहि पढायो । बारेहीते भूँड चढायो ॥ यह सुनतहि यशुमति रिस मानी । कहाँ गयो कहि सारंग-
 पानी ॥ खेलतते औचक हरि आये । जननी बांह पकरि बैठाये ॥ मुखदेखत यशुमति पहिचानों ।
 माखन वदन कहा लपटानों ॥ फिरिदेखे तौ ग्वालिनि पाछे । माता मुख चितवत नहिं आछे ॥
 चोरीके सब भाव बताये । माता सँटिया द्वैक लगाये ॥ माखन खान जात परचरको । बधत तोहिं

नेकु नहिं घरको ॥ बाँह गहे हूँदति फिरै डोरी । बाँधौं तोहिं सकै को छोरी ॥ बाँधि पची
 डोरी नहिं पूरे । बार बार खीझत रिस झूरे ॥ घर घरते जेवारि लैआई । मिसही मिस देखनको
 धाई ॥ चकित भई देखै ढिग ठाढी । मनौ चितेरे लिखि लिखि काढी ॥ यशुमति जोरि जोरि रजु
 बाँधै । आँशुर द्वेद्वे जेवारि साँधै ॥ जब जानी जननी अकुलानी । आपु बँधायो सारंगपानी ॥ भक्त हेत
 दावरी बँधआई । यमला अर्जुनकी सुधि आई ॥ माता हेतु जनहिं सुखकारी । जानि बँधायो
 श्रीवनवारी ॥ मुख जँभात त्रिभुवन दिखरायो । चकित कियो तुरतहि बिसरायो ॥ बाँधि श्याम
 बाहर लैआई । गोरस घर घर खात चुराई ॥ ऊखलसों गहि बाँधि कन्हआई । नितहि उरहनो सह्यो
 न जाई ॥ इक कहि जाति एक फिरि आवै । रैन दिना तू मोहिं खिझावै ॥ माखन दधि तेरे घर
 नाहीं । धाम भरो चोरी करि खाहीं ॥ नवलख धेनु दुहत घर मेरे । केते ग्वाल रहत घर घेरे ॥ मथत
 नंद घर सहस मथानी ॥ ताके सुत चोरीकी बानी ॥ मोसों कहति आनि जब नारी ॥ बोलि जातु नहिं लाज-
 न मारी ॥ नंद महरकी करै नन्हआई ॥ वृद्ध बैस सुत भयो कन्हआई ॥ तुम्हरे गुण सब नीके जानै । नित बरजौं
 कबहुं नहिं मानै ॥ कोउ छोरै जनि ठीठ कन्हआई ॥ बाँधे भुज दोउ ऊखल लाई ॥ भवन काजको गइ नँदरानी ।
 आंगन छांडे श्याम बिनानी ॥ उरहन देन ग्वाल जे आई ॥ तिन्हें यशोदा दियो बहराई ॥ चलीं सबै मिलि
 सोचति मनमें । श्यामहि गहि बाँधेहैं क्षनमें ॥ हँसत बात इक कही कि नाहीं । ऊखलसों बाँध्यो सुत
 बाहीं ॥ कहा कहाँ वा छबिको माई । बाँबी पर अहि करत लराई ॥ कान्ह वदन अतिही कुँभिलान्यो ।
 मानौं कमलहि हिम तरसान्यो ॥ डरते दीरघ नैन चपल अति । वदन सुधारस मीन करति गति ॥
 यह सुनि और युवति सब आई । यशुमति बाँधे कहत कन्हआई ॥ भली बुद्धि तेरे जिय उपजी । ज्यों
 ज्यों दिनी भई त्यों निपजी ॥ छोरहु श्याम करहु मन लाहो । अति निर्दयी भई तू काहो ॥ देखो श्याम
 ओर नँदरानी । सकुचि रह्यो मुख सारंगपानी ॥ बाहिर बाँधि सुतहि बैठारी । मथत दही माखन
 तोहिं प्यारो ॥ छांडि देहु बहि जाइ मथानी । सौँह दिवावति छोरहु आनी ॥ हांसी करन सबै तुम
 आई । अब छोरहुं नहिं कुँवर कन्हआई ॥ तुमहीं मिलि रसवाद बढायो । उरहन दैदैं मूँड पिरायो ॥
 सबहिन गोधन सौँह दिवाई । चितैरहे मुख कुँवर कन्हआई ॥ कब तुमको मैं बोलि बुलाई । केहि
 कारण तुम धाई आई ॥ इह सुनि बहुरि चली मुरझाई । कहा करौं बलिजाउँ कन्हआई ॥ मूरखको
 कोइ कहा सिखावै । याकी मति कछु कहत न आवै ॥ नारि गई फिरि भवन आतुरी । नंद घरनि
 अब भई चातुरी ॥ ओछी बुद्धि यशोदा कीनी ॥ याकी जाति अबै हम चीन्ही ॥ इहै कहत अपने घर आई ।
 मानैं नहीं कितौ समझाई ॥ मथत यशोदा दही मथानी । तवाहिं कान्ह ऐसी मति ठानी ॥ भक्त
 बछल हरि अंतर्ध्यामी । सुत कुबेरके ये दोउ नामी ॥ यहि अवतार कह्यो इन तारण । इनको दुख
 अब करौं निवारण ॥ जो जेहि ढंग तिहि ढंग सब लायो ॥ यमलार्जुन पै प्रभु तब आयो ॥ वृक्ष बीच
 ऊखल लै अटक्यो । आगे निकसि नेक गहि झटक्यो ॥ अरररात दोउ वृक्ष गिरे घर । अति
 आघात भयो ब्रज ऊपर ॥ भए चकृत ब्रजके सब वासी । यहि अंतर दोउ कुँवर प्रकासी ॥ शंख
 चक्र कर शारंगधारी । भक्त हेतु प्रगटे वनवारी ॥ देखि दरश मन हरष बढायो । तुमहिं बिना प्रभु
 कौन सहायो ॥ धनि ब्रज कृष्ण जहां वपुधारी । धनि यशुमति ब्रह्महि अवतारी ॥ धन्य नंद धनि
 धनि गोपाला । धन्य धन्य गोकुलकी बाला ॥ धन्य गाइ धनि द्रुम वन चारन । धनि यमुना हरि
 करत विहारन ॥ धन्य उरहनो प्रातहि ल्याई । धनि माखन चोरत यदुराई ॥ धन्य सुजन ऊखल
 गढि ल्याये । धन्य दाम भुज कृष्ण बँधाये ॥ गदगद कंठ वचन मुख भारी । शरण राखिलेहु गर्व

प्रहारी ॥ बार बार चरणन परै धाई । कृपा करी भक्तन सुखदाई ॥ साधु साधु कहि श्रीमुख बानी ।
 विदाभये इहि भाँति बखानी ॥ यमलार्जुन प्रभु तारि पठाये । नंद द्वार दोउ वृक्ष गिराये ॥ निरखि
 यशोदा आंगन आई । दुहं वृक्ष बिच बचे कन्हआई ॥ दौरिपरे ब्रजके नर नारी । नंदद्वार कछु
 होत गोहारी ॥ देखे आई वृक्ष दोउ डारे । ये गुण यशुमति आहिं तुम्हारे ॥ तुरत छोरि ऊखलते
 ल्यायो । देखत जननि नैन भरि आयो ॥ वज्रदेह हरिकी है माई । जहां तहां बिधि होत सहाई ॥
 प्रथम पूतना मारन आई । पयपीवत वह तहां नशाई ॥ तृणावर्त लैगयो उड़ाई । आपुहि गिरचो
 शिलापर आई ॥ कागासुर आवत नहिं जान्यो । सुनी कहत ज्यों लेइ परान्यो ॥ शकटासुर पलना
 ढिग आयो । को जाने केहि ताहि गिरायो ॥ खेलत में केशीको मारचो । घींच मरोरि वहि धरनि
 पछारचो ॥ ग्वालनके सँग गये गो चारन । तहां वकासुर लाग्यो मारन ॥ कौन कौन करि वक हरि
 टारचो । यशुमति बांधि अजिर लै डारचो ॥ बहुतै उबरचो आजु कन्हआई । ऊपर वृक्ष गिरो भहराई ॥
 कहा कहौ कहत न बनिआवै । तुरत आय हरि कौन बचावै ॥ सबहिन पेलि करत मनभाई । पुण्य
 नंदके बच्यो कन्हआई ॥ मुख चूमति लै लै उर लाए । युवतिन करे आपु मनभाए ॥
 लै जननी सुत कंठ लगावति । चोरीकी बातें समुझावति ॥ मैं रिसही रिस करत लालसों । भुज
 बाँधे मन हँसति ख्यालसों ॥ मेरे जो तुम करत अचगरी । उरहन को ठाढ़ी रहैं सगरी ॥ बार बार तन
 देखति माई । गिरत वृक्ष कहुँ चोट न आई ॥ कहत श्याम मैं अतिहि डेरान्यो । ऊखल तर मैं
 रह्यो छिपान्यो ॥ बात सुतहि वृक्षत नंदरानी । कान्ह कहै मुख उरकी वानी ॥ हरिके चरित कथा
 नहिं जानै । यशुमति अति बालक करि मानै ॥ अखिल ब्रह्मांड जीवके दाता । माखनको बाँधतिहै
 माता ॥ गुण अपार अविगति अविनाशी ॥ सो प्रभु घर घर घोष विलासी ॥ ऊखल बँध्यो हेतु भक्तनके ।
 येइ माता येइ पिता जगतके ॥ यमलार्जुनको मोक्ष कराये । पुत्र हेतु यशुदा गृह आये ॥ ऐसे हरि जनके
 सुखकारी । प्रगटे रूप चतुर्भुज धारी ॥ जो जेहि भाव भजै प्रभु तैसे । प्रेम वश्य हरि मिलहीं जैसे ॥
 सूरदास यह लीला गावै । कहत सुनत सबके मन भावै ॥ जो हरि चरित ध्यान उर राखै । आनंद सदा
 दुरित दुख नाखै ॥ ३५० ॥ राग मलार ॥ निगम स्वरूप देखि गोकुल हरि जाको दूरि दरश देवनको सो
 बाँध्यो यशोदा ऊखल धरि ॥ चुटकिन दै दै ग्वाल नचावत नाचत कान्ह बाल लीला धरि ।
 जेहि डर भ्रमत पवन रवि शशि जल सो क्यों डरै लकुटियाके डरि ॥ क्षीर समुद्र शैल संतत जेहि
 माँगत दूध पतोखी दै भरि । सूरदास गुणके गाहक हरि रसना गाइ गये अनेक तरी ॥ ५१ ॥ राग सोरठा ॥
 जाको ब्रह्मा अंत न पावै । तापै नंदकी नारि यशोदा घरकी टहल करावै ॥ शेष सनक नारद गणेश
 मुनि जाको गुण नित गावै । निशि वासर खोजत पचिहारे मनशा ध्यान न आवै ॥ धन्य धन्य गोकुल
 धनि वनिता वर निरखति श्याम बँधावै । सूरदास प्रभु प्रेमहिके वश संतन दरश दिखावै ॥ ५२ ॥
 राग विलावल ॥ गोविंद तेरोइ स्वरूप निगम नेति नेति गावै । भक्तके वश श्याम सुंदर देह धरे आवै ॥ योगी
 जन ध्यान धरत सपनेहु नहिं पावै । नंद घरनि बांधि बांधि कपि ज्यों नाच नचावै ॥ गोपी जन प्रेम
 आतुर तिनको सुख दीनो । अपने अपने रस विलास काहु नहिं चीनो ॥ श्रुति स्मृति सब पुरान
 कहत मुनि बिचारी । सूरदास प्रेम कथा सबहीते न्यारी ॥ ५३ ॥ राग सारंग ॥ भूखो भयो आजु
 मेरो बारो । भोरहि ग्वालानि उरहनो ल्याई उहि यह कियो पसारो ॥ पहिले रोहिणिसों
 कहि राख्यो तुरत करहु जेवनार । ग्वाल बाल सब बोलि लिये मिलि बैठे नंदकुमार ॥
 भोजन बेगि ल्याउ कछु मैया भूख लगी मोहिं भारी । आजु सवारे कछु नहिं खायो सुनत हँसी

महतारी ॥ रोहिणि चितै रही यशुमति तन शिर धुनि धुनि पछितानी । परसहु बेगि बेर कत लावत भूखे सारंगपानी ॥ बहु व्यंजन बहु भांति रसोंई षटरसके परकार । सूर श्याम हलधर दोउ भैया और सखा सब ग्वार ॥ ५४ ॥ राग सारंग ॥ नंदभवनमें कान्ह अरोगै । यशोदा ल्याई षटरस भोगै ॥ आसन दै चौकी आगे धरि । यमुना जल राख्यो झारी भरि ॥ कनक थारमें हाथ धुवाए । सत्रहसै तहँ भोजन आए ॥ लै लै धरति सवनके आगे । मातु परोसै जो हरि मांगे ॥ खीर खांड घृत लावज लाडू । ऐसे होई न अमृत खांडू ॥ और लेहु कछु सुत ब्रजराजा । लुचई लपसी घेवर खाजा ॥ पेठा पाक जलेबी पेरा । गोंद पाग तिनगरी गिदोरा ॥ गोंझा इलाइची पाग अभिरती । सीरो साजो लै ब्रजपती ॥ छोलि धरे खरबूजा केरा । शीतल वायु करत अति घेरा ॥ खारिक दाख अरु गरी चिरारी । पींड बदाम लेत बनवारी ॥ बेसन पुरी सुखपुरी लीजै । आछे दूध कमल मुख पीजै ॥ मैया मोहिं और किन प्यावै । घौरीको पय मोकों भावै ॥ बेला भरि हलधर को दीनो । पीवत पय बल अस्तुति कीनो ॥ ग्वाल सखा सबहीं पै अँचयो । नीके ओटि यशोदा रचयो ॥ दोना मेलि धेरै खजुवा । हौंस होइ तौ ल्याऊं पूवा ॥ मीठे अति कोमलहैं नीके । ताते तुरत चभोरे घीके ॥ फेनी सेव अँदरसे प्यावे । लै आऊँ जेवहु मेरे वारे ॥ हलधर कही ल्याउ री मैया । मोके दे नहिं लेत कन्हैया ॥ यशुमति हरष भरी लै परसति । जेवतहँ अपनी रुचिसों अति ॥ कान्ह मांगि शीतल जल लीयो । भोजन बीच नीर लै पीयो ॥ मातु पसाइ रोहिणी लाई । घृत सुगंध सुंदर दै ताई ॥ नीलावति चाँवर दिवि दुर्लभ । मात परोस्यो माता सुर्लभ ॥ मूंग ममूर उरद चना दारी । कनक वरण धरि फटक पछारी ॥ रोटी बाटी पोरी झोरी । एक कोरी एक घीव चभोरी ॥ गायो घृत भरि धरी कचेरी । कछु खायो कछु फेटो छोरी ॥ मीठे तेल चनाकी भाजी । एक मकूनी दै मोहि साजी ॥ मीठे चरपरे उज्ज्वल कौरा । हौंस होइ तो ल्याऊँ औरा ॥ मुगौरा पकोरा पनौए पतोरा । एक कोरे भीजे गुर बोरा ॥ पापर बरी फुलारि मिथौरी । कूर बरी कचरी पिठौरी ॥ बहुत मिरिचि दै किये निमोना । बेसनके दश बसिक दोना ॥ बनकोरा पि डि साचीचीडी । खीप पिंडारू कोमल भौंडी ॥ चौलाई लालहा अरु पोई । मध्य मेलि निबुआनि निचोई ॥ रुचितल जान लोनिका फांगी । कठी कृपालु दूसरे मांगी ॥ सरसों मेथी सोवा पालक । बथुवा रांधि लियो जु उतालक ॥ हींग हर्दि मृच छौंके तेले । अदरख और आँवरे मेले ॥ सालन सकल कपूर सुवासित । स्वाद लेत सुंदर हरि आसित ॥ आँब आदि दे सबै सँधाने । सब चाखे गोवर्द्धनराने ॥ कान्ह कहै हौं मातु अघानो । अब मोकों शीतल जल आनो ॥ अचवन ले तब धोये कर मुख । शेष न बरने भोजनको सुख ॥ उज्ज्वल पान कपूर कस्तूरी । आरोगत मुखकी छवि हूरी ॥ चंदन अंग सखनके चरच्यो । यशुमतिको मुखका नहिं परच्यो ॥ मांगिजूठ सूर जु लै लीनों । बांटे प्रसाद सवनको दीनों ॥ जन्म जन्म बाढ्यो जूठनिकों । चैरो नंद महरके घरको ॥ ५५ ॥ राग कान्हरो ॥ मोहिं कहति युवती सब चोर । खेलत रहौं कतहुंमैं बाहिर चितै रहति सब मेरीओर बोलिलेति भीतर घर अपने मुख चूमति भरिलेति अँकोर । माखन हेरि देति अपने कर कछु कहि विधिसों करति निहोर ॥ जहां मोहिं देखति तहाँ टेरति मैं नहिं जात दोहाई तोर । सूर श्याम हँसि कंठ लगायो वै तरुणी कहां बालक मोर ॥ ५६ ॥ राग केदारो ॥ यशुमति कहति कान्हसों मेरे अपने ही आंगन तुम खेलौ । बोलि लेहु सब सखा संगके मेरो कह्यो कबहुं जनि पेलौ ॥ ब्रजबनिता सब चोर कहति तोहिं लाज न सकुच जातु मन मेरो । आज मोहिं बलराम कहत है हूठेहि नाम लेतह

तेरो ॥ जब मोहिं रिस लागति तब त्रासति बांधति जैसे चरो । सूर हँसति ग्वालनि दै तारी चोर
नाम कैसेहु सुत फेरो ॥६७॥ अथ धेनु दुहनसीखनसमै ॥ अध्याय एकादश ॥ राग विलावल ॥ धेनु दुहत हरि देखत
ग्वालनि । आपुन बैठिगए तिनके सँग सिखवहु मोहिं कहत गोपालनि ॥ कालिह तुम्हें गोदोहन
सिखवैं दुही सबै अब गाई । भोर दुहो जे नंद दोहाई उनसों कहत सुनाई ॥ बडो भयो अब दुहत
रहौंगो अपनी धेनु निवेरी । सूरदास प्रभु कहत सौह दै मुहिं लीजौ तुम टेरी ॥६८॥ राग कान्हरो ॥ मैं
दुहिहौं मोहिं दुहन सिखावहु । कैसे धार दूधकी बाजत सोइ सोइ विधि तुम मोहि बतावहु ॥ कैसे
दुहत दोहनी घुटुवन कैसे बछरा । थनहि लगावहु कैसे लै नोई पग बाँधत कैसे ले या पग अटकावहु ॥
निपट भई अब साँझ कन्हैया गाइन पै कहूँ चोट लगावहु । सूर श्यामसों कहत ग्वाल सब धेनु दु-
हन प्रातहि उठि आवहु ॥६९॥ राग सारंग ॥ महर महरिके मन इह आई । गोकुल बहुत उपद्रव दिन प्रति
बसिये वृंदावन अब जाई ॥ सब गोपन मिलि शकटा साजी सबहिनके मनमें इह भाई । सूर यमुन
तट डेरा देई पांच बरसके कुँअर कन्हवाई ॥७०॥ राग विलावल ॥ जागहु हो तुम नंदकुमार । हौं वलिजाउँ
मुखारविंदकी गोसुत मेलो खरिक संभार ॥ इतनो कहा सोये मन मोहन और वार तुम उठत
सवार। बारहि बार जगावति माता अंबुज नयन भयो भितुसार ॥ दधि मथिकै माखन बहु दीनों
सकल ग्वाल ठाढ़े दरबार । उठिकै मोहन वदन देखावहु सूरदासके प्राणअधार ॥७१॥ राग विलावल ॥
जागहु हो ब्रजराज हरी । लै मुरली आँगन द्वै देखौ दिनमणि उदित भयो द्वै घरी ॥ गो सुत गूढ
बाँधन सब लागे गोदोहनकी जुन टरी । निटुरवचन कहि सुतहि जगावति जननि यशोदा पास खरी ॥
भोर भयो दधि मथन होतु सब ग्वाल सखाकी हांक परी । सूरदास प्रभु दरशन कारण नीद छुड़ाई
चरण धरी ॥ ७२ ॥ राग विलावल ॥ जागहु लाल ग्वाल सब टेरेत । कबहुँ पीताम्बर डारि वदन पर
कबहुँ उधारि जननि तन हेरत ॥ सोवतमें जागत मन मोहन । बात सुनत सबकी अब टेरेत ॥
बारबार जगावति माता लोचन खोलि पलक पुनि घेरत ॥ पुनि कहि उठी यशोदा मैया उठहु कान्ह
रविकिराणि उजेरत । सूर श्याम हँसि चितै मात मुख पट कर लै पुनि पुनि मुख फेरत ॥ ७३ ॥
॥ राग सूहा विलावल ॥ जननी जगावति उठौ कन्हवाई । प्रगटचो तरणि किरणि गण छाई ॥ आवहु चंद्रवदन
देखराई । बार बार जननी बलिजाई ॥ सखा द्वार सब तुमहिं बुलावत । तुम कारण हम धाए
आवत ॥ सूर श्याम उठि दरशन दीनो । माता देखि मुदित मन कीनो ॥ ७४ ॥ राग रामकली ॥ दाऊजू कहि
श्याम पुकारचो । नीलाम्बर पट ऐंचि लियो हरि मनो बादरते चंद उतारचो ॥ हँसत हँसत
दोउ बाहर आये माता लै जल बदन पखारचो । दतवनि लै दुहुँ करी मुखारी नैननिको
आलस जु बिसारचो ॥ माखन खाहु दुहुन कर दीन्ह्यो तुरत मथ्यो मीठो अति भारचो । सूर
दास प्रभु खात परस्पर माता अंतर हेत बिचारचो ॥ ७५ ॥ राग विलावल ॥ जागहु जागहु नंदकुमार । रवि
बहु चढे रैनि सब निघटी उघरे सकलकिवार ॥ वारि वारि जल पियति यशोदा उठु मेरे प्राण अधा-
र । घर घर गोपी दह्यो बिलोवहिं कर कंकन झनकार ॥ साँझ दुहुन तुम कह्यो गाइको ताते होत
अबार । सूरदास प्रभु उठे सुनतही लीला अगम अपार ॥ ७६ ॥ तनक कनककी दोहनी दैद री
मैया । तात दुहन सीखन कह्यो मोहिं धौरी गैया ॥ अटपेट आसन बैठिकै गोथन कर लीनो ।
धार अनतही देखिकै ब्रजपति हँसि दीनो ॥ घर घरते आई सबै देखन ब्रजनारी । चितै चोरि चित
हारिलियो हँसि गोप विहारी विप्र बोलि आसन दियो करि वेद उचारी । सूर श्याम सुरभी दुही
संतन हितकारी ॥ ७७ ॥ अथ वत्सासुरवध ॥ राग नटनारायनी ॥ चले बछरु चरावन ग्वाल । वृंदावन सब छाडि

कै लैगये जहँ धन ताल ॥ परम सुंदर भूमि देखत हँसत मनहि बढाइ । आपु लगे तहां खेलन बच्छ
 दिये बगराइ ॥ जानिकै हलधर गये तहँ बाल बछरा पास । रोहिणी नंदनहि देखत हरष भए हुलास ॥
 ताल रस बलराम चारुयो मन भयो आनंद । गोपसुत सब टेरी लीने सुधि भई नंदनंद ॥ कछो बछरा
 हांकि ल्यावहु चलहु जहां कन्हाइ । तालरसके पानते अति मत्त भये बलराइ ॥ तहां छल करि
 दनुज धायो घरे बछरा भेपि । फिरत दूँढत श्यामको अति प्रबल बलको देखि ॥ सबै बछरनि
 घेरि ल्याए बहु न घेरयो जाइ । दाऊ कहि बालकनि टेरेयो वृषभ सुत न धराइ ॥ कछो मन इहि अब
 हिं मारौ उठे बलहि सँभारि टेरेलिये सब ग्वाल बालक गये आपु प्रचारि ॥ आगे है इतको विदारयो
 पूछ हाथ लगाइ । पकरिकै भुजसों फिरायो तालके तर आइ ॥ असुर लै तरु सों पछारयो गिरयो तरु
 झहराइ । तालसों तरु ताल लाग्यो उच्चो बन घहराइ ॥ बछ असुरको मारि हलधर चले सबनि लिवाइ ।
 सूर प्रभुको वीर जाकी तिहुं भुवन बडाइ ॥ ६८ ॥ राग देवगंधार ॥ बछरा चारन चले गोपाल ।
 सुबल सुदामा अरु श्रीदामा संग लिए सब ग्वाल ॥ दनुज एक तहाँ आइ पहुँचेउ घरे वत्सको
 रूप । हरि हलधर दिशि चितइ कब तुम जानतहो इह वीर ॥ कहेव आहि दानौ इहि मारौ घोर
 बत्स शरीर । तब हरि सींग गह्यो यक करसों यक करसों गहे पाइ ॥ थोरे कहि बलसों
 छिन भीतर दीनो ताहि गिराइ । गिरत धरनि पर प्राण गए चितवत फिरि नहिं आयो श्वास ॥
 सूरदास ग्वालन संग मिलि हरि लागे करन विलास ॥ ६९ ॥ अथ बकासुर वध ॥ राग सारंग ॥ बन
 बन फिरत चरावत धेनु । श्याम हलधर संग है बहु गोप बालक सेनु ॥ तृषित भई सब जानि मोहन
 सखा न टेरेत वेनु । बोलि ल्यावो सुरभि गण सब चलौ यमुन जल देन ॥
 सुनतही सब हांकि ल्याए गाइ करी इकठेन । हेरी देदे ग्वाल बालक कियो यमुन तट गेन ॥ बकासुर
 रचि रूपमाया रह्यो छल करि आइ । चाँचु यक पुहुमी लगाई इक अकास समाइ ॥ आगे बालक
 जातहैं ते पाछे आए धाइ । श्यामसों सब कहन लागे आगे एक बलाइ ॥ नितहि आवत सुरभि लीने
 ग्वाल गोसुत संग । कबहुँ नहिं इहि भांति देख्यो आजको सो रंग ॥ मनहिं मन तब कृष्ण जान्यो
 इह बका असुर विहंग । चाँच फारि विदारि डारौं पलकमें करौं भंग ॥ निदरि चले गुपाल आगे
 बकासुरके पास । सखा सब मिलि कहन लागे तुम न जियके आस ॥ अजहुँ नाहिं डरात मोहन बचे
 कितने गास । तब कछो हरि चलहु सब मिलि मारि करहिं विनास ॥ चले सब मिलि जाइ देख्यो
 अगम तन विकरार । इत धरणि उत व्योमके विच गुहाके आकार ॥ पैठि वदनु विदारि डार्यो
 अति भए विस्तार । मरत असुर चिकार पारयो मारयो नंदकुमार ॥ सुनत ध्वनि सब ग्वाल डरपे
 अव न उवरे श्याम । हमहिं बरजत गयो देखो किये ऐसे काम ॥ देखि ग्वालन विकलता तब
 कहि उठे बलराम । बका वदन विदारि डारयो अबहिं आवत श्याम ॥ सखा हरि तब टेरीलीने
 सबै आवहु धाइ । चाँच फारि बका संहार्यो तुमहु करौ सहाइ ॥ निकट आए गोप बालक देखि
 हरि सुख पाइ । सूर प्रभुके चरित अगणित नेति निगमन गाइ ॥ ७० ॥ ब्रजमें को उपज्यौ है यह
 भैया । संग सखा सब कहत परस्पर इनको गुण अगमैया ॥ जबते ब्रज अवतार धर्यो इन कोउ
 नहिं घात करैया । किती बात यह बका विदारयो धनि यशुमति जिन जैया ॥ तृणावर्त पूतना
 पछारी तब अति रहे नन्हैया । सूरदास प्रभुकी लीला यह हम कत जिय पछितैया ॥ ७१ ॥
 राग धनाश्री ॥ बका विदारि चले ब्रजको हरि । सखा संग आनंद करत सब अंग अंग बन धातु चित्र
 करि ॥ बनमाला पहिरावत श्यामहि वार वार अँकवारि भरत धरि । कंस निपात करोगे तुमहीं हम

जानी यह बात सही परि ॥ पुनि पुनि कहत धन्य नंद यशुमति जिन इनको जन्मौ सो धन्य धरि ।
 कहत इहै सब जात सूर प्रभु आनंद आंसू भरित लोचन भरि ॥७२॥ राग कान्हरो ॥ ब्रज बालक सब जाइ
 तुरतही महर महरिके पाँइ परे । ऐसो पूत जनौ जग तुमहीं धन्य कोष जहँ श्याम धरे ॥ गाइ लिवाइ
 गए वृंदावन चरत चली यमुना तट हेरि । असुर एक खगहूप रह्यो धरि बैठो तीर बाइ मुख घेरि ॥
 चोंच एक पुहुमी करि राखी एकरह्यो तौ गगन लगाई । हरि हम बरजत पहलेहि धायो वदन चीरि
 पलमाहिं गिराई ॥ सुनत नंद यशुमति चकृत चित सुन चकृत नर नारी । सूरदास प्रभु मन हरि लीनो
 तब जननी भरि लई अंकवारी ॥ ७३ ॥ अथ द्वादशमो अध्याय ॥ १२ ॥ अघासुरख धनाश्री ॥ नंदसुत ला-
 डिले हौ सब ब्रज जीवन प्रान । बारबार माता कहै जागौ श्याम सुजान ॥ यशुमति लेति बलाइ भोर भयो
 उठौ कन्हवाई । संग लिये सब सखा द्वारे ठाठे बल भाई ॥ सुंदर वदन देखाइये हरौ नैननको तापु ।
 नैन कमल मुख धोइये कछु करौ कलेऊ आपु ॥ माखन रोटी लेहु सद्यदधि रैनि जमायो । पट
 रसके मिष्टान्न सोई जेवहु रुचि आयो ॥ मोपै लीजै मांगिकै जोइ जोइ भावै तोहिं । संग जेवहि बल
 राम तुम रुचि उपजावहु मोहिं ॥ तब हँसि चितए श्याम सेजते वदन उधारयो । मानहु पयनिधि
 मथत फेन फटि चंद उजारयो ॥ सखा सुनत देखन चले मानहुं नैन चकोर । युगल कमल मानौ
 इंदु पर बैठ रहे अति भोर ॥ तब उठि आए कान्ह मातु जल वदन पखारयो । बोलि उठे बलराम
 श्याम कत उठयो सवारयो ॥ दाऊजू कहि हँसि मिले बाहँ गहि बैठाइ । माखन रोटी सद्यदही हो
 जेवत रुचि उपजाइ ॥ जल अचयो मुख धोइ उठे बल मोहन भाई । गाइ लई सब घेरि चले वन
 कुँवर कन्हवाई ॥ टेरे सुनत बलरामकी आए बालक धाइलै आए सब घेरिकै घरते बछरा गाइ ॥ सखन्ह
 कान्हसों कही आजु वृंदावन जैये । यमुना तट तृण बहुत सुरभि गण तहां चरैये ॥ ग्वाल गाइ सब
 लै गए वृंदावन समुहाइ । अतिहि सघन वन देखिकै हरपि उठे सब गाइ ॥ कोउ टेरत कोउ हांकि
 सुरभि गण जोरि चलावत । कोउ कोउ हेरी देत परस्पर श्याम सिखावत ॥ अंतर्दामी कहत जीय
 सब हमहिं सिखावत ढेरी । श्याम कहत अबके गई पुनि धौली जहु फेरी ॥ कोउ मुरली कोउ वेणु
 शब्द श्रुंगीको पूरे । कृष्ण कियो मन ध्यान असुर इकु वस्यो अधूरे ॥ बालक बछरा राखिहौ एक
 बार लै जाऊ । कछुक जनाऊ अपनपौ हो अबलौ रहो सुभाऊ ॥ असुर कुलहि संहारि धरणि को भार
 उतारों । कपटरूप रचि रह्यो दनुज यहि तुरत पछारों । गिरि समान धरि अगम तन बैठो बदन
 पसारि । मुख भीतर बन घन नदी माया छल करि भारि ॥ पैठिगए मुख ग्वाल धेनु बछरा संग लीने ।
 देखि महाबन भूमि हरे तन द्रुम कृत कीने ॥ कहनलगे सब आपुसमें सुरभी चरी अघाई । मानहु
 पर्वत कंदरा मुख सब गये समाई ॥ मुख सब गए समाय असुर तब चोंच सकेरयो । अंधकार
 होय गयो मनहुं निशि बादर घेरयो ॥ अतिहि उठे अकुलाइकै ग्वाल बच्छ सबगाइ ॥ त्राहि त्राहि कहि
 कहि उठे परे कहाँ हम आइ ॥ धरि धरि कहि कान्ह असुर यह कंदर नाहीं ॥ अनजानत सब परे अघा
 मुख भीतर माहीं ॥ जिय त्याग्यौ यह सुनतही अव को सकै उबारि । वातें दूनी देह धरी तब
 असुरन सबयो सँभारि ॥ शब्द करयो आघात अघासुर टेरे पुकारयो । रह्यो अघर दोउ
 चापि बुद्धि बल सुरति बिसार्यौ ॥ ब्रह्मद्वार फिरि फूटिकै निकसे गोकुलराइ । बाहिर आवहु
 निकसिकै मै करि लियो सहाइ ॥ बालक बछरा धेनु सब मन अतिहि सकाने । अंधकार मिटिगये
 देखि जहां तहां अतुराने ॥ आये बाहर निकसिकै मन सब कियो हुलास । हम अज्ञान कत
 डरतहँ कान्ह हमारे पास ॥ धन्य कान्ह धनि नंद धन्य यशुमति महतारी । धन्य लियो अवतारकोखि
 धनि जियहि दै तारी ॥ गिरि समान तन अगम अति पन्नगकी अनुहारी । हम देखत पल

एकमें मारचो दनुज प्रचारी ॥ हरि हँसि बोले बैन संग जौ तुम नहिं होते । तुम सब किए
 सहाय भयो तब कारज मोते ॥ हमहुँ तुमहुँ मिलि बैठिकै वन भोजन करिये जाइ ॥ बंशीबट भोजन बहुत
 यशुमति दियो पठाइ ॥ ग्वाल परमसुख पाइ कोटि सुख करत प्रशंसा ॥ कहा बहुत जो भए सपूत तौ
 एकै वंसा ॥ चढि विमान सुर देखहीं गगन रहे भरि छाई । जै जै ध्वनि नभ करतहैं हरषि पुहुप
 वरपाई ॥ ब्रह्म सुनी यह बात अमर घर घरनि कहानी । गोकुल लीनौ जनम कौन यह मैं नहिं जानी ॥
 देखौं इनकी खोज लै शोच परचो मनमाहँ ॥ सूर श्याम ग्वालन लिये चले बंशीबटकी छाहँ ॥ ७४ ॥ ६ ॥
 अथ तेरह अध्याय ब्रह्मा वत्स बालक हरन ॥ राग धनाश्री ॥ हरष भये नंदलाल बैठि तरुछाँहकी । ग्वाल
 बाल संग करत कोलाहल छाँहकी ॥ बंशीबट अति सुखद और द्रुम पास चहुँ है । सखा लिए तहां
 गए धेनु वन चरति कहूँ है ॥ बैठि गए सुखपाइकै ग्वाल बाल लिये साथ । अति आनंद
 पुलकित हिये गावत हैं गुणगाथ ॥ १ ॥ अहिर लिये मधु छाक तुरत वृंदावन आए । व्यंजन
 सहस प्रकार यशोदा बनहि पठाए ॥ श्याम कही वन चलतही मातासां समुझाई । उतने वै
 आए सबै देखतही सुखपाइ ॥ २ ॥ कान्ह देखि मधु छाक पुलकि अँग अँग बढ़ायो ।
 हरि हँसि बोले तव प्रेमसों जननि पठायो ॥ नीके पहुँचे आनि कै भलो बनो संयोग ।
 बार बार कहि सबनको आजु करौ सुखभोग ॥ ३ ॥ वन भोजन बिधि करत कमलके
 पात मँगाये । तोरे पात पलाश सरस दोना बहु ल्याये ॥ भांति भांति भोजन धरे दधिलवनी मिष्टान ।
 वनफल लये मँगाइकै लागे भोजन खान ॥ ४ ॥ वन भोजन हरि करत संग मिलि सुबल सुदामा ।
 श्याम कुँवर परसन्न महर सुत अरु श्रीदामा । श्याम सबै मिलि खातहैं लै लै कौर छुँडाई । औरन
 देत बुलाइके डहकि आपु सुख नाइ ॥ ५ ॥ ब्रह्मा देखि बिचार सृष्टि कोइ नई चलाई । मुहिं पठयो
 जिहि सौं पि ताहि कहिहों का जाई ॥ देखौं धौं यह कौन है बाल वत्स हरिलेउँ । ब्रह्मलोक लै जाउँगो
 यह बुधि करि दुख देउँ ॥ ६ ॥ अंतर्यामी नाथ तुरत बिधि मनकी जानी । बालक दै दिये पठै धेनु
 वन कहूँ हिरानी ॥ जहां तहां वन ढूँढिकै फिरि आये हरि पास । श्याम सखन बैठारि करि आपुन
 गये उदास ॥ ७ ॥ हरि लै बालक वत्स ब्रह्मलोकहि पहुँचाये ॥ फिरि आवै जो कान्ह कहूँ कोउ नाहिन
 पाये ॥ प्रभु तबहीं जानो यहौ बिधि लैगयो चुराई । जो जेहि रँग जेहि रूपको बालक वच्छ बनाइ ॥
 ॥ ८ ॥ ताते कीन्है और ब्रह्म हृद नाल उपायो । अपनो करि तेहि जानि कियो ताको मन भायो ॥
 उद्धारन मारन समर्थ मन हरि कीनो ज्ञान । अनजाने बिधि यह करी नये रचे भगवान् ॥ ९ ॥ उहै वृद्धि
 उहै प्रकृति वहै पौरुष तन सबके । उहै नाउ उहि भाउ धेनु बछरा मिलि रक्के ॥ श्याम कह्यो सब सख-
 नको ल्यावहु गोधन फेरि । संध्याको आगम भयो ब्रज तन हांको घेरि ॥ १० ॥ सुनत ग्वाल ले धेनु चले
 ब्रज वृंदावन तो कान्हहि बालक जानि डरें सब ग्वाल मनहिते ॥ मध्य किये लै श्याम को सखा भये चहुँ-
 पास । बच्छ धेनु आगे किये आवत करत विलास ॥ ११ ॥ बाजत वेणु विषाण सबै अपने रँग गावत ।
 मुरली ध्वनि गौ रंभ चलत पग धूरि उडावत ॥ मोरमुकुट शिर सोहई वनमाला पट पीत । गोरज
 सुखपर सोहई मनहु चंद्रकण शीत ॥ १२ ॥ देखि हरषि ब्रजनारि श्यामपर तन मन वारति । इकटक
 रूप निहारि रही भेटति चित आरति ॥ कहा कहै छबि आजुकी मुख मंडित खुर धूरि । मानहु
 पूरन चंद्रमा कुहू रह्यो आपूरि ॥ १३ ॥ गोकुल पहुँचे जाइ गये बालक अपने घर ।
 गोसुत अरु नर नारि मिली अतिहेत लाइ गर ॥ प्रेम सहित वे मिलतहैं जेउ सुत जायो आजु ।
 यशुमति मिलि सुतसों कहति रैनि करत केहि काजु ॥ १४ ॥ मैं घर आवन कहाँ सखा संग कोउ

नाहिं आवै । देखत बन अति अगम डरौं वै मोहि डरपावै ॥ बार बार उर लाइकै लइ बलाइ
 पछिताइ । कालिहि ते वेई सबै लयावहिं गाइ चराइ ॥ १५ ॥ यह सुनिकै हरि हँसे कालि मेरि जाइ
 बलैया । भूख लगी मोहिं बहुत तुरतही दै कछु मैया ॥ माखन दीयो हाथकै यह तबलो तुम खाहु ।
 तातो जल है घामको तनक तेलसों न्हाहु ॥ १६ ॥ तब यशुमति गहि बाँह तुरत हरि लै अन्हवाए ।
 रोहिणि करि जिवनार श्याम बलराम बुलाए ॥ जेवत अति रुचि पावहीं परसति माताहेत । जेय
 उठे अँचवन लियो दुहुँ कर बारा देत ॥ १७ ॥ श्याम उनींदे जानि मात रचि सेज बिछायो । तापर
 पौढे लाल अतिहि मन हरष बढ़ायो ॥ अघ मर्दन बिधि गर्व हत करत न लागी बार । सूरदास
 प्रभुके चरित पावत कोउ न पार ॥ १८ ॥ राग ललित ॥ हौं नाहिन जगाइ सकति सुनु सुवात सजनी री ।
 अपने जान अजहुँ कान्ह मानतहैं रजनी री ॥ १९ ॥ जब जब हौं निकट जाति रहति लागि लोभा । तनकी
 गति बिसरि जाति निरखत मुख शोभा ॥ २० ॥ वचननिकौ बहुत करति शोचति जिय ठाढ़ी । नैननि
 सुविचार करति देखत रुचि बाढ़ी ॥ २१ ॥ यहि बिधि वदनारविंद यशुमति जिय भावै । सूरदास सुख
 की राशि कापै वरणि आवै ॥ २२ ॥ राग विलावल ॥ नंदमहरके भावते जागो मेरे बारे । प्रात भयो
 उठि देखिये रवि किरणि उज्यारे ॥ ग्वाल बाल सब टेराई गैया बनचारन । लाल उठौ मुख धोइये
 लागी वदन उधारन ॥ सुखते पटु न्यारो कियो माता कर अपने । देखि वदन चकृत भई सोतुककी
 सपने ॥ कहा कहाँ वह रूपकी को वरणि बतावै । सूर सु हरिके गुण अपार नंद सुवन कहावै ॥
 २३ ॥ राग ललित ॥ उठे नंदलाल सुनत जननीकी बानी । आलस भरे नैन दोउ सकल
 शोभाकी खानी ॥ गोपीजन विथकित है चितवत सब ठाढ़ी । नैनकर चकोर चंद्र वदन
 प्रीति बाढ़ी ॥ माता जलझारी लै कमलमुख पखार्यौ । नैन नीर परसि करत आलसही
 बिसार्यौ ॥ सखा द्वार ठाढ़े सब टेस्तहैं बनको । यमुना तट चलौ कान्ह चारन गोधनको ॥ सखा
 सहित जेवहु मै भोजन कछु कीनो । सूर श्याम हलधर सब सखा बोलि लीनो ॥ २४ ॥ राग विलावल ॥
 दोउ भैया जेवत माँ आगे । पुनि पुनि लै दधि खात कन्हई और जननि पै माँगे ॥ अति मीठो दधि
 आजु जमायो बलदाऊ तुम लेहु । देखौं धौं दधि स्वाद आपु लै ता पाछे मोहिं देहु ॥ बल मोहन
 दोऊ जेवत रुचिसों सुख लूटति नंदरानी । सूर श्याम अब कहत अघाने अँचवन माँगत पानी ॥
 २५ ॥ राग रामकली ॥ द्वारे टेस्तहैं सब ग्वाल कन्हैया आवहु बार भई । आवहु बेगि बिलम जनि लावहु
 गैयाँ दूरि गई ॥ इह सुनतहि दोऊ उठि धाए कछु अँचयो कछु नाहीं । कितिक दूरि सुरभी तुम
 छांडी वनतो पहुँची आहीं ॥ ग्वाल कह्यो कछु पहुँची हैहैं कछु मिलिहैं मगमाहीं ॥ सूर श्याम बल मोहन
 भैया गैयन पृच्छत जाहीं ॥ २६ ॥ राग विलावल ॥ वन पहुँचत सुरभी लई जाई । जैहौ कहां सख-
 नको टेस्त हलधर संग कन्हई ॥ जेवत परखलियो नहिं हमको तुम अति करी चडाई । अब
 हम जैहैं दूरि चरावन तुम सँग रहै बलाई ॥ यह सुनि ग्वाल धाइ तहां आए श्यामहि अंकम लाई ।
 सखा कहत यह नंद सुवनसों तुम सबके सुखदाई ॥ आज चलौ वृंदावन जैए गैया चरै अघाई ।
 सूरदास प्रभु सुनि हरषित भए घरते छाक मँगाई ॥ २७ ॥ राग विलावल ॥ चले सब वृंदावन समुहाइ ।
 नंदसुवन सब ग्वालन टेस्त लावहु गाइ फिराई ॥ अति आतुर है फिरे सखा सब जहाँ
 तहां आये धाइ । बृझत बात ग्वाल केहि कारण बोले कुँवर कन्हाइ ॥ सुरभी वृंद तहीं को हाँकी
 औरन लेहु बोलाइ । सूर श्याम यह कही सबनिसों आप चले अतुराई ॥ २८ ॥ राग धनाश्री ॥ गैयन घेरि
 सखा सब ल्याए । देख्यो कान्ह जात वृंदावन याते मम अति हरष बढ़ाए ॥ आपुसमें सब करत

कुलाहल घौरी धूमरि धेनु बोलाए।सुरभी हाँकि देत सब जहाँ तहाँ टेरि हेरि सुर गाए॥पहुँचे आइ विपि-
न घन वृंदा देखत हुम दुख सबनि गवाँए।सूर श्याम गए अघा मारि जब तादिन ते यहि बन अब आए॥
८४॥राग नटनारायणी॥चरावत वृंदावन हरि धेनु।ग्वाल सखा सब संग लगाए खेलतहैं करि चैनु॥कोउ
गावत कोउ सुरलि बजावत कोउ विषान कोउ बेनु।कोउ निर्तत कोउ उघटि तार दै छुरि ब्रजबालक
सेनु ॥त्रिविध पवन जहँ बहत निशिदिन सुभग कुंज घन एनु।सूर श्याम निज धाम बिसारत आवत
यह सुख लेनु॥८५॥राग धनाश्री॥ वृंदावनमोको अति भावत।सुनहु सखा तुम सुबल श्रीदामा ब्रजते
बन गऊ चारन आवत ॥ कामधेनु सुरतरु सुख जितने सभा सहित बैकुंठ बोलावत।यह वृंदावन
यह यमुना तट ये सुरभी अति सुखद चरावत ॥ पुनि पुनि कहत श्याम श्रीमुखते तुम मेरे मन
अतिहि सुहावत।सूरदास सुनि ग्वाल चकृत भये यह लीला हरि प्रगट देखावत॥८६॥ राग विलावल॥
ग्वाल सखा कर जोरि कहतहैं हमहिं श्याम तुम जिनि बिसरावहु।जहां जहां तुम देह धरतहौ तहां
तहां जनि चरन छडावहु ॥ ब्रजते तुमहिं कहं नहिं टारों इहै पाइ मैहूं ब्रज आवत।यह सुख नाहीं
भुवन चतुर्दश यह ब्रज यह अवतार बतावत ॥अवर गोप जे बहुरि चले घर तिनसों कहि सुखछाक
मैगावत।सूरदास प्रभु गुप्त बात सब ग्वालमसों कहि कहि सुख पावत ॥८७॥ राग विलावल॥ कन्है
या हेरिदे सुभग सांवरे गातकी मैं शोभा कहतउ जाउँ।मोरपंख शिर मुकुटकी मुख मटकनिकी बलि
जाउँ ॥ कुंडल लोल कपोलनि झाँई बिहँसनि चितहि चुरावै।दशन दमक मोतिन्ह लर ग्रीवा शोभा
कहत न आवै ॥ उरपर पदिक कुसुम बनमाला अँग धुक धुकी बिराजै।चित्रित बाहु पौंचिआ पौंचे
हाथ सुरलिका छाजै॥कटि पट पीत मेखला मुकुलित पाइन नृधरुसोहै।आस पास बर ग्वालमंडली
देखत त्रिभुवन मोहै ॥ सब मिलि आनंद प्रेम बढावत गावत गुण गोपाल।यह सुख देखत श्याम
संगको सूरदास सब ग्वाल ॥ ८८ ॥ कान्ह कांधे कामरि लकुट लिए कर घेरैहो।वृंदावनमें गऊ चरावे
घौरी धूमरि टेरैहो ॥ लिये लिवाइ ग्वाल बुलाय जहाँ तहाँ वन वन हेरैहो॥सूरदास प्रभु सकल लोक
पति पीतांबर कर फेरैहो॥८९॥सोई हरि कांधे कामरी काछे किये नागे पाइन गाइनकी टहल करतहैं।
त्रिभुवनपति दिनपति नारी नरपति पंछिनपति रवि शशि जेहि उरतहैं॥शिव विरंचि ध्यान धरत भक्त
त्रिविध ताप हरत तेहि तब उधरतहैं।सूरदास प्रभुके गुण निगम नेति नेति गावत तेई वन विहर
तहैं ॥ ३९० ॥ राग नट ॥ छाक लेन जे ग्वाल पठाए।तिनसों बृझति महरि यशोदा छाँडि कन्हैयहि
आए ॥ हमहिं पठाय दिये नंदनंदन भूखे अति अकुलाए।धेनु चरावतहैं वृंदावन हम यहि कारण
आए ॥ यह कहि ग्वाल गए अपने गृह वनकी खबरि सुनाए।सूर श्याम बलराम प्रातही अध-
जैवत उठि धाए ॥ ९१ ॥ राग सारंग ॥ और ग्वाल सब गृह आए गोपालहि बेर भई।अतिहि अबेरभई
लालनको अजहुँन छाक मैगाई ॥ तबहीते भोजन करि राख्यो उत्तम दूध जँमाई।ना जानौ
कान्ह कौन वन चारत अतिहि अबेर लगाई ॥ राज्य करैं वै धेनु तुम्हारी नंदाहि कहत सुनाई।
पंचकी भीख सूर बल मोहन कहति यशोदा माई ॥९२॥राग सारंग॥जोरति छाक प्रेमसों मैया।ग्वालन
बोलि लए अध जैवत उठि दौरे दोउ भैया॥तबहीते भोजन नहिं कीनो चाहत दियो पठाई।भूखे भए आजु
दोउ भैया आपहि बोलि मैगाई ॥ सद माखन साजो दधि मीठो मधु मेवा पकवान।सूर श्यामको
छाक पठावति कहति ग्वारिसों जान ॥९३॥ राग सारंग॥ घरहीकी यक ग्वारि बोलाई।छाक समग्री
सबै जोरि कै वाके करदैं तुरत पठाई ॥ कह्यो ताहि वृंदावन जैये तू जानति सब प्रकृति कन्हई।
प्रेम सहित लै चली छाक वह कहाँ वे हैं भूखे दोउ भाई ॥ तुरत जाइ वृंदावन पहुँची ग्वाल बाल कहुँ

कोउ न बताई । सूर श्याम को टेरति डोलति कतहौं लाल छाँक मैं ल्याई ॥ ९४ ॥ राग टोडी ॥ आजु
 कौनै धौं बन चरावत गाइ कहां भई अबेर । बैठे कहां सुधि लेंउँ कौन बिधि ग्वारि करत
 अवसेर ॥ वृंदावन दै आदि सकल बन ढूँढचो जहां गायनकी टेर । सूरदास प्रभु रसिक
 शिरोमणि कैसे दुरत दुराये कहौ धौं डुंगरनकी ओट सुमेर ॥ ९५ ॥ छाक लिये शिर श्याम
 बुलावति । ढूँढति फिरति ग्वारिनीके करि कहूं भेद नहिं पावति ॥ टेर सुनत काहूको श्रवणनि
 तहीं तुरत उठि धावति । पावति नहीं श्याम बलरामहि व्याकुल है पछितावति ॥ वृंदावन
 फिरि फिरि देखतिहै बोलि उठे तहाँ ग्वाल । सूर श्याम बलराम इहाँहैं छाक लेहु किन लाल ॥ ९६ ॥
 ॥ राग कान्हरो ॥ फिरत बन वन वृंदावन बंशीबट संकेत बट नट नागर कटिकाछे खौरि केसरिकी
 किये । पीत वसन चंदन तिलक मोर मुकुट कुंडल श्याम घन यह छबि लिये ॥ तनु त्रिभंग सुगंध
 अंग निरखि लज्जत रति अनंग ग्वाल बाल लिये संग प्रमुदित सब हिये । सूर श्याम अति सुजान
 मुरली ध्वनि करत गान ब्रजजन मनको सुख दिये ॥ ९७ ॥ हरिको टेरति फिरति गुआरिआई लेहु तुम
 छाक आपनी बालक बल बनवारी ॥ आजु कलेऊ करत बन्यो नहिं गैयन सँग उठिधाए । तुम कारण
 वन छाँक यशोदा मेरेहि हाथ पठाए ॥ यह बानी जब सुनी कन्हैया दौरिगए तेहि काजू । सूर श्याम
 कह्यो नीके आई भूख बहुतही आजू ॥ ९८ ॥ बहुत फिरि तुमकाज कन्हआई । टेरि टेरि मैं भई बावरी
 दोउ भैया तुम रहे लुकाई ॥ जे सब ग्वाल गए ब्रज घरको तिनसों कहि तुम छाक मँगाई । लवनी दधि
 मिष्टान्न जोरि कै यशुमति मेरे हाथ पठाई ॥ ऐसी भूखमाँझ तू ल्याई तेरी केहिविधि करौं बडाई ।
 सूर श्याम सब सखन पुकारत आवहु क्यों न छाँक है आई ॥ ९९ ॥ राग सारंग ॥ गिरिपर चढि गिरि
 वर घर टेरे । अहो सुबल श्रीदामा भैया ल्यावहु गाइ खरिक्के नेरे ॥ आई छाँक अवार भई है
 नैसुकु घैया पिअहुँ सबेरे । सूरदास प्रभु बैठि शिलनि पर भोजन करै ग्वाल चहुँ फेरे ॥ १०० ॥
 राग नट ॥ बिहारी लाल आवहु आई छाँक । भई अबार गाइ बहुरावहु उलटावहु दै हांक ॥ अर्जुन
 भोज अरु सुबल श्रीदामा मधु मंगल इक ताक । मिलि बैठे सब जेवन लागे बहुत बन्यो कहि
 पाक ॥ अपनी पत्रावलि सब देखत जहां तहां फेनी पिराक । सूरदास प्रभु खात ग्वालसँग ब्रह्म
 लोक यह धाक ॥ १ ॥ राग सारंग ॥ आई छाँक बुलाए श्याम । यह सुनि सखा सबै जुरि आए
 सुबल सुदामा अरु श्रीदाम ॥ कमलपत्र दोना पलाशके सब आगे धारि परसत जात । ग्वाल
 मंडली मध्य श्यामघन सब मिलि भोजन रुचि करि खात ॥ ऐसी भूखमाँझ इह भोजन पठै दियो
 करि यशुमति मात । सूर श्याम अपनो नहिं जेवत ग्वालन करते लैलै खात ॥ २ ॥ सखन संग हरि
 जेवत छाँक । प्रेम सहित भैया दै पठए सबै बनाएहैं एकताक ॥ सुबल सुदामा श्रीदामा सँग सब मिलि
 भोजन रुचिसों खात । ग्वालन करते कौर छुडावत मुखलै मेलि सराहत जात ॥ जो सुख कान्ह
 करत वृंदावन सो सुख नहीं लोकहुं सात । सूर श्याम भक्तनवश ऐसे ब्रजहि कहावतहैं नंद तात ॥
 ॥ ३ ॥ ग्वाल मंडलीमें बैठे हैं मोहन बडकी छहियाँ दुपहरीकी बिरियां संगलीने । एक मथत
 दोहनी दूध एक बँटावत फल चबैने ॥ एक निकर हरि झगरि लेत ऐस बनि आपनी कमरके
 आसन कीने । जेवतहैं अरु गावत कान्ह सारंगीकी तान लेत सखनिके मध्य बिराजत छाँक लेत कर
 छीने । सूरदास प्रभुको मुख निरखत सुर रीझि हेरैं सुमननि वरषत सभानी ॥ ४ ॥ ग्वालन करते कौर
 छँडावत । जूठो लेत सबनके मुखको अपने मुखलै नावत ॥ षटरसके पकवान धरे सब तामें
 नहिं रुचि पावत । हाहा करि करि माँगि लेतहै कहत मोहिं अति भावत ॥ यह महिमा एई पै

जानें जाते आप बैधावत । सूर श्याम स्वपने नहिं दरशत मुनिजन ध्यान लगावत ॥ ५ ॥ ब्रजवासी
 पट्टर कोउ नाहिं । ब्रह्म सनक शिव ध्यान न पावत इनकी जूठनि लैलैखाहिं ॥ धन्य नंद धनि जननि
 यशोदा धन्य जहां अवतार कन्हाई । धन्य धन्य बृंदावनके तरु जहां विहरत त्रिभुवनके राई ॥
 हलधर कह्यो छौं जैवत संग मीठो लगत सराहत जाई । सूरदास प्रभु विश्वंभर हैं ते ग्वालनके
 कौर अचाई ॥ ६ ॥ राग सारंग ॥ शीतल छहियां श्याम बैठे जानि भोजनकी बेरिआ । वाम भुजा सखा
 अंश पर दीने लीने दक्षिण कर द्रुमडरिआ ॥ चलिये जू नैक गाइनि घेरौ जु बलरामसों कहत बोलि
 लेहु आपने बोरिआ । सूरदास प्रभु बैठे कदम तर गइयाको दूध निकरिया ॥ ७ ॥ राग नटनारायण ॥
 बिधि मनहीमन शोच परचो । गोकुलकी रचना सब देखत अति जिय मांह डरचो ॥ मैं विरंचि विरच्यो
 जग मेरो यह कहि गर्व बढायो । ब्रज नर नारि ग्वाल बालक कहि कौने ठाट रचायो ॥ बृंदावन वट
 सघन वृक्ष तर मोहन सबै बोलये । सखा संग मिलि करि भोजी बिधि बिधि मन भरम उपाये ॥
 धेनु रही वनमें भूली द्वै बालक भ्रम तन पाये । याते श्याम अतिहि अतुराने तुरत तहां उठि धाये ॥
 बालक बच्छ हरे चतुरानन ब्रह्मलोक पहुँचाये ॥ सूरदास प्रभु गर्व विनाशन नव कृत फेरि बनाये ॥
 ॥ ८ ॥ राग सारंग ॥ जैवत छौं गाइ बिसराई । सखा श्रीदामा कहत सबनिसों छौं कहिमें तुम रहे भुलाई धेनु
 नहीं देखियत कहूं नियरे भोजनहीमें सांझ लगाई । सुरभी काज जहाँ तहाँ उठि धाये आपु तहां उठि
 चले कन्हाई ॥ ल्याये ग्वाल घेरि गो गोसुत देखि श्याम मन हरष बढाई । सूरदास प्रभु कहत चलौ
 घर वनमें आजु अवार कराई ॥ ९ ॥ राग गौरी ॥ ब्रजहि चलौ आई अब सांझ । सुरभी सबै लेहु आगे
 करि रैनि होइ पुनि वनही मांझ ॥ भली कही यह बात कन्हाई अतिहि सघन आरण्य उजारि । गैयां
 हांकि चलाई ब्रजको और ग्वाल सब लिए पुकारि ॥ निकसि गए बनते सब बाहिर अति आनंद भए
 सब ग्वाल । सूरदास प्रभु मुरलि बजावत ब्रज आवत नटवर गोपाल ॥ १० ॥ राग कल्याण ॥ सुंदर श्याम
 सुंदर वर लीला सुंदर बोलत वचन रसाल । सुंदर चारु कपोल विराजत सुंदर उरज बनी बनमाल ॥
 सुंदर चरण सुंदर है नख मनि सुंदर है कुंडल मकराल । सुंदर मोहन नैन चपल किए
 सुंदर ग्रीवा बाहु विशाल ॥ सुंदर मुरली मधुर बजावत सुंदर हैं मोहन गोपाल । सूरदास
 जोरी अति राजति ब्रजको आवत सुंदर चाल ॥ ११ ॥ सुंदर श्याम सखा सब सुंदर
 सुंदर भेष धरे गोपाल । सुंदर पथ सुंदर गत आवनि सुंदर मुरली शब्द रसाल ॥ सुंदर
 लोग सकल ब्रज सुंदर सुंदर हलधर सुंदर चाल । सुंदर बदन विलोकनि सुंदर सुंदर गुण
 सुंदर वन माल ॥ सुंदर गोप गाइ अति सुंदर सुंदर गुण सब करत विचार । सूर श्यामसँग सब सुख
 सुंदर सुंदर भक्तहेत अवतार ॥ राग विलावल ॥ सुंदर ढोटा कौनको सुंदर मृदुबानी । कहि समुझायो
 ग्वालिनी जायो नंदरानी ॥ सुन्दरता मूरति देखके घन घटा लजानी । सुंदर नैन निहार लियो कमल
 नको पानी ॥ सुन्दरता तिहुँलोककी ब्रजपुरमें आनी । सूरदास यशुमति भई सुंदरता रजधानी ॥
 ॥ १२ ॥ राग गौरी ॥ देखि सखी बनते जु बने ब्रज आवत हैं नंदनंदन । शिखंडी शीश मुख मुरलि
 बजावत बन्यो तिलक उर चंदन ॥ कुटिल अलक मुख चंचल लोचन निरखत अति आनंदन ॥
 कमल मध्य मानौ द्वै खग खंजन बैधे आइ उडि फंदन । अरुण अधर छवि दशन विराजति जब
 गावत कल मंदन । मुक्ता मनौ लालमणिमें पुट धरे मुरकि बरबंदन । गोप भेष गोकुल गोचारत हैं
 प्रभु असुर निकंदन । सूरदास प्रभु सुयश बखानत नेति नेति श्रुति छंदन ॥ १३ ॥ मेरे नैन निरखि सुख
 पावत । संध्या समै गोप गोधन संग बनते बनेलाल ब्रज आवत ॥ बलि बालि जाउँ मुखारविंदकी मंद

मंद गति धावत । नटवर रूप अनूप छबीलो सबहीके मन भावत ॥ गुंजा उर बनमाल मुकुट शिर
 वेणु रसाल बजावत । कोटि किरण मणिमुख परकाशत उडपति कोटि लजावत ॥ चंदन खौर काछनी
 की छबि सबके मनहिं चुरावत ॥ सूर श्याम नागर नारिनको वासर बिरह नशावत १४ ॥ राग केदारो ॥ शोभा
 कहत कहै नहिं आवै । अचवत अति आदर लोचन पुट मन न रूपको पावै ॥ सजल मेघ घनश्याम
 सुभगवपु टाडित वसन उरमाल । शिखी शिखिर तनु धातु विराजति सुमन सुगंध प्रवाल ॥ कछुक कुटि
 लको विपिन सघन शिर गोरज मंडित केश । शोभित मनौ अंबुज परागस राजत अली सुदेश ॥
 कुंडल किरिन कपोल कुटिल छबि नैन कमलदल मीन । प्रति प्रति अंग अंग कोटिक छबि सुनु सखि
 परम प्रवीन ॥ अधर मधुर मुसुकानि मनोहर कोटि मदन मनहीन । सूरदास जहां दृष्टि परतहै होत
 तहीं लवलीन ॥ १५ ॥ बहुरि बाल वत्स हरन ॥ राग धनाश्री ॥ ब्रजकी लीला देखि ज्ञानु विधिको भयो भारी ।
 त्रिभुवन नायक आनि भयो गोकुल अवतारी ॥ खेलत ग्वालन संग रंग आनंद मुरारी । शोभित संग
 ब्रजबाल लाल गोवर्धनधारी ॥ घर घरते छाकै चलीं मान सरोवर तीर । नारायण भोजन करै बाल
 क संग अहीर ॥ १६ ॥ व्यंजन सकल मैगाइ सखनिके आगे राखे । खाटे मीठे स्वाद सबै रस लैलै
 चाखे । रुचिसों जैवत ग्वाल सब लैलै आपुन खात ॥ भोजनको सब स्वादलै कहत परस्पर बात ॥
 ॥ १७ ॥ देखत गणगंधर्व सकल सुरपुरके बासी । आपुसमें वै कहत हँसत एई अविनासी ॥ देखि
 सबै अचरजु भए कहौ ब्रह्मसों जाइ । जाको अविनाशी कहत सो ग्वालनसंग खाइ ॥
 ॥ १८ ॥ इह सुनि ब्रह्मा चलयो तुरत बृंदावन आयो । देखि सरोवर सलिल कमल तिहि
 मध्य सुहायो ॥ परम सुभग यमुना बहै तहां बहै त्रिविध समीर । पुहुपलता द्रुम देखिकै
 चकृत भयो मतिधीर ॥ १९ ॥ अतिरमणीक कदंबछाँह रुचि परम सुहाई । राजत मोहन मध्य अवलि
 बालक छबिपाई ॥ प्रेम मगन है परसपर भोजन करत गुपाल । ल्यावहु गोसुत घेरिकै प्रभु पठए द्वै
 ग्वाल ॥ २० ॥ बन उपवन सब ढूँढि सखा हरिपै फिरि आए । बछरा भए अदृष्ट कहुं खोजत नहिं पाए
 सबै सखा बैठे रहौ मै देखौं धौं जाइ ॥ बच्छ हरन जिय जानि प्रभु आपु गए बहराइ ॥ २१ ॥ जब गोविंद गए
 दूरि बालकन हरयो विधाता । लैहौं तुरत मैगाइ आपु हैहें जगत्राता ॥ ब्रह्मलोक ब्रह्मा गयो बालक बच्छा
 संग । प्रभुकी लीला गम नहीं कियो गर्व अति अंग ॥ २२ ॥ तब चिंतामणि चितै चित्त इकबुद्धि बिचारी ।
 बालक बच्छ बनाइ रचे वेदी उनिहारी ॥ करत कुलाहल सब गए ब्रज घर अपने धाइ । अति आदर
 करि करि लिये अपनी अपनी माइ ॥ २३ ॥ ब्रह्मा कियो बिचार जाय ब्रज गोकुल देख्यो । करिहैं शोक
 संताप जाइ पितु मातहि देख्यो ॥ आए तहां विधना चले घर घर देखौं आइ । संध्या समै होत कौतूहल
 जहां तहां दुहिये गाइ ॥ २४ ॥ यह गोकुल किधौं और किधौं हौं ही भ्रम भूल्यो । यह अविनाशी
 होइ ज्ञान मेरे भ्रम झूल्यो ॥ अंतर्यामी जानि धौं हरौ बच्छ लै आइ । जगत पिता मै संभ्रम्यो गएलोक
 फिरि धाय ॥ २५ ॥ देख्यो जाइ जगाइ बाल गोसुत जहां राखे । बिधि मन चक्रितभये बहुरि
 ब्रजको अभिलाखे ॥ छिन भूतल छिन लोकमें छिन आवे छिन जाइ । ऐसेहि करत
 वर्षादिन बीतो थकित भये विधि पाइ ॥ २६ ॥ तब हरि प्रगत्यो जानि ज्ञान चितमें
 जब आयो । धृग धृग मेरी बुद्धि कृष्णसों वैर बढ़ायो ॥ लै गोसुत गोपाल शिशु शरन गयो है साधु ।
 चारिहु मुख अस्तुति करत प्रभु क्षमौ मोहिं अपराधु ॥ २७ ॥ अन जानत यह करी मै तुमसों बरि
 आई । ये मेरे अपराध क्षमहु त्रिभुवनके राई ॥ ज्यों बालक अपराध शत जननी लेति सँभारी । शरन
 गए राखत सदा अवगुण सकल बिसारी ॥ २८ ॥ जोरे उदित खद्योत ताहि क्यों तिमिर नशावै ।

दीपक बहुत प्रकाश तरनिसम क्यों कहवावै ॥ मैं ब्रह्मा इकलोकको ज्यों गूलरि बिचजीव । प्रभु तुमरे
 इक रोम प्रति कोटि ब्रह्म अरु शीव ॥ २९ ॥ मिथ्या यह संसार और मिथ्या यह माया ।
 मिथ्या है यह देह कहौ क्यों हरि विसराया ॥ तुम जाने बिन जीव सब उत्पति प्रलय समाहिं ।
 शरण मोहिं प्रभु राखिये चरण कमलकी छाहिं ॥ ४३० ॥ करहु मोहिं ब्रजरेणु देहु वृंदावन बासा ।
 माँगौ यहै प्रसाद और नहिं मेरे आशा ॥ जोई भावै सो करहु तुम लता सलिल द्रुम गेहु ।
 ग्वालगाइको भृत्य करौ मनौसत्य व्रत एहु ॥ ३१ ॥ जो दर्शन नरनाग अमर सुरपतिहुं न पायो ।
 खोजत युग गए बीति अंत मोहूं न दिखायो ॥ यह ब्रज पारस नित्यहै मैं अब समुझो आइ ।
 वृंदावन रजहै रहौ मोहिं नहिं लोक सुहाइ ॥ ३२ ॥ माँगत बारंबार शेष ग्वालनिको पाऊं । आप
 लियो कछु जानि भक्ष करि उदर जियाऊं ॥ अब मेरे निज ध्यान यह रहिहौं जूठनि खाइ । और
 विधाता कीजिये मैं नहिं छाँड़ौ पाइ ॥ ३३ ॥ तब प्रभु बोले आपु बचन मेरो अब मानो । और
 काहि विधि करों तुमहिंते कौन सयानो ॥ तुम ज्ञाता हो कर्म धर्मके तुमते सब संसार । मेरी माया
 अति अगम कोऊ न पावै पार ॥ ३४ ॥ श्रीमुख वाणी कहत विलंब अब नेक न लावहु । ब्रज
 परिकर्मा करहु देहको पाप नशावहु ॥ तुरत जाहु कही लोकको यहि विधि करि मनुहार । ब्रह्मा
 करि अस्तुति चले हरि दीनो उरहार ॥ ३५ ॥ धनि बछरा धनि बालहि जिनिहीते दर्शन पायो ।
 डर मेरो गयो धन्य कृष्ण माला पहिरायो ॥ धनि यशुमति जिन वश किए अविनाशी अवतारी ।
 धनि गोपी जिनके सदन माखन खात मुरारी ॥ ३६ ॥ धनि गोपी धनि ग्वाल धन्य ये ब्रजके वासी ।
 धन्य यशोदानंद भक्ति वश किये अविनाशी ॥ धनि गोसुत धनि गाइये कृष्ण चराये आपु ।
 धनि कालिंदी मधुपुरी जा दर्शन नाशे पापु ॥ ३७ ॥ मथुरा आदि अनादि देह धरि आपन आए ।
 धनि देवै वसुदेव पुत्र तुम मांगे पाए ॥ चारि वदन मैं कहा कहौ सहसानन नहिं जान । गाइ चरावत
 ग्वाल संग करत नंदकी आन ॥ ३८ ॥ योगीजन अवराधि फिरत जिहि ध्यान लगाए । ते ब्रजबा-
 सिन संग फिरत अति प्रेम बढाए ॥ वृंदावन ब्रजको महतु कापै बरण्यो जाइ । चतुरानन पग
 परशिकै लोक गयो सुख पाइ ॥ ३९ ॥ हरि लीनों अवतार कहत शारद नहिं पावै । सतगुरुकृपा
 प्रसाद कछुक ताते कहि आवै ॥ सूरदास कैसे कहै महापतित अवतार । शेष सहस मुख जपतहै
 सोऊ न पावै पार ॥ ४० ॥ राग सारंग ॥ कछो गोपाल चरतहैं गोसुत हम सब बैठि कलेऊ कीजै ॥ शीतल छांह
 वृक्षकी सुंदर निर्मल यमुनाको जल पीजै ॥ भोजन करत सखा इक बोल्यो बछरू कतहूं दूरिगये ।
 यदुपति कछो घेरि हौं आनों तुम जेवहु निश्चित भए ॥ चतुरानन बछरा लै गोए फिरि माधौ आए
 वहि ठाऊं । बालक बच्छ हरे लोकेश्वर बार बार टेरत ले नाऊं ॥ जान्यों छल ब्रह्मा मन मोहन गोपी
 गाइ बहुत दुख पैहैं । ताजिहैं प्राण सबै मिलि सुतको निश्चय गृह जो आजुन जैहैं ॥ वाही भाँति बरन
 बपुवैसहि शिशु सब रचे नंदसुत आन । आगे बच्छ पाछे ब्रज बालक करत चले मधुरे सुरगान ॥ पूरव
 प्रीति अधिक ताहूते करती ब्रजवनिता अरु धेनु । सूरज प्रभु अच्युत ब्रज मंगल घरही घर
 लागे सुख देनु ॥ ४१ ॥ राग कान्हरो ॥ आज बने बनते ब्रज आवत । नानारंग सुमनकी माला नंद नंदन
 उर पर छवि पावत ॥ संग गोप गोधन संग लीने नाना गति कौतुक उपजावत । कोउ गावत
 कोउ नृत्य करत कोउ उघटत कोऊ ताल बजावत ॥ राँभत गाइ बच्छ हित सुधि करि प्रेम उमँगि थन
 दूध चुवावत । यशुमति बोली उठि हरषित है कान्हों धेनु चराये आवत ॥ इतनी कहत आइगये मोहन
 जननी दौरि हिये लै लावत । सूर श्यामके कृत यशुमतिसों ग्वाल बाल कहि प्रगट सुनावत ॥ ४२ ॥

गोविंद चलत देखियतु नीके । मध्य गुपाल मंडली विराजति कांधे धरि लिएसीके ॥ बछरा बृंद
 धेरि आगे करि जन जन शृंग बजाए । जानौं बन कमल सरोवर तजिकै मधुप उनींदे आए ॥
 बृंदावन प्रवेश अघ मारचो बालक यशुमति तेरो । सूरदास प्रभु सुनति यशोदा चितै वदन प्रभुकेरो ॥
 ॥ ४३ ॥ राग बिलावल ॥ आजु यशोदा जाइ कन्हैया महादुष्ट इकु मारचो । पन्नग रूप गिले शिशु
 गोसुत यहि सब साथ उबारचो ॥ गिरि कंदरा समान भयो बड जब अघ वदन पसारचो । निदरि
 गुपाल बैठि मुख भीतर खंड खंड करि डारचो ॥ याके वल हम वदत न काहू सकल भुवन तृण
 चारचो । जीते सबै असुर हम आगे यह कह उनहि निहारचौ ॥ हरषि गए सब कहत महरिसौ अबहि
 अघासुर मारचो । सूरदास प्रभुकी यह लीला को को भुलएन पारचौ ॥ ४४ ॥ यशुमति सुनि सुनि
 चकित भई । मै बरजति बन जात कन्हैया कां धौं करै दर्ई ॥ कहाँ कहाँते उबरचो मोहन नेकन
 तऊ डरात । आप जे कहीं तनकसों बातैं सुनहु बनहु में घात ॥ मेरो कह्यो सुनो जो श्रवणन कहति
 यशोदा खीझति । सूर श्याम कह्यो बनहि न जैहों यह कहि मन मन रीझति ॥ ४५ ॥ राग गौरी ॥
 मैया बहुत बुरो बलदाऊ । कहन लगे बन बडो तमाशो सब मौंडा मिलि आऊ ॥ मोहूको
 चुचकार गए लै जहाँ सघन बन झाऊ । भागि चले कहि गयो वहाँते काटि खाइहै हाऊ ॥
 हौंह डरप्यो कांपौ पुकारौ दाऊ कोउ नहिं धीर धराऊ । थरस गयो नहिं भाग सकौं वै भागे जात
 अगाऊ ॥ मोसों कहत मोलको लीनो आपु कहावत साहु । सूरदास बल बडे चवाई तैसे मिले सखाहु
 ॥ ४६ ॥ राग नट ॥ हरिकी लीला कहत न आवै । कोटि ब्रह्मांड छनकमें नाशै छिनहीमें उपजावै ॥
 बालक बच्छ ब्रह्म हरिलै गयो ताको गर्व नवावै । ऐसो पुरुषार्थ सुन यशुमति खीझति फिरि
 पछितावै ॥ शिव सनकादि अंत नहिं पावै भक्त बछल कहवावै । सूरदास प्रभु गोकुलमें सो घर
 घर गाइ चरावै ॥ ४७ ॥ राग सारंग ॥ ब्रह्मा बालक बच्छ हरे । आदि अंत प्रभु अंतर्धामी मनसाते जो
 करे ॥ सोई रूप वै बालक गोसुत गोकुल जाइ परे । एक वरष निशिवासर रहि सँग काहुन जानि
 परे ॥ त्रास भयो अपराध आपु लखि अस्तुति करत खरे । सूरदास स्वामी मनमोहन तामें मन न
 धरे ॥ ४८ ॥ राग नट ॥ तब हरि हरचो विधिको गर्व । बच्छ बालक लै गयो धरि तुरत कीन्हों सर्व ॥ ब्रह्म
 लोक चुराइ राख्यो चरित देखन आपु । बच्छ बालक देखिकै मन करत पश्चात्तापु ॥ तब गयो बिधि
 लोक अपने दृष्टिकै फिरि आइ जानि जिय अवतार पूरण परचो पाँयनि धाइ ॥ बहुत मै अपराध कीनो
 क्षमा कीजै नाथ जानि यह मै नहीं कीन्हीं जोरि कर रह्यो माथ ॥ बच्छ बालक आनि सन्मुख शरण
 शरण पुकारि । सूर प्रभुके चरण गहि कहि निकट राखु मुरारि ॥ ४९ ॥ राग धनाश्री ॥ ब्रज व्यवहार
 निरखिकै नैननि ब्रह्माको अभिमान गयो । गोपी ग्वाल फिरत सँग चारत हों हूं क्यों न भयो ॥ व्यंजन
 वर करवर पर राखत ओदन मधुर दयो । आपन खात खवावत औरन कवन विनोद ठयो ॥ सखा
 संग पयपान करावत अपनो हाथ लयो । शंकर ध्यान धरत युग बीते इह रस तऊन दयो ॥ अहो
 भाग अहो भाग नंदसुत तपको पुंज लियो । लीला सुभग सूरकी ब्रजमें सब कोउ गाइ जियो ॥
 ॥ ५० ॥ राग जयतश्री ॥ वदत विरंचि विशेष सुकृत ब्रजवासिनके । श्रीहरि जिनके भेष सुकृत ब्रजबा-
 सिनके ॥ ज्योतिरूप जगनाथ जगत् गुरु जगत् पिता जगदीश । योग यज्ञ जप तप में दुर्लभ गइ-
 यां गोकुल ईश ॥ इक इक रोम बिराट कोटि तन कोटि कोटि ब्रह्मांड । सो लीन्यो अवछंग यशोदा
 अपने भरि भुजदंड ॥ जाके उदर लोक त्रय जल थल पंचतत्त्व चौखानि । सो
 बालक द्वै झूलत पलना यशुमति भवनहि आनि ॥ क्षिति मिति त्रिपद करी करुनामै बलि छलि

दिथो पत्तार । देहरि उलँघि सकत नहिं सो अब खेलत नंददुआर ॥ अनुदिन सुरतरु पंचसुधारस
 चिंतामणि सुरधेनु । सो तजि यशुमतिको पै पीवत भक्तनको सुखदेनु ॥ रवि शशि कोटिकला
 अवलोकत त्रिविध ताप क्षय जाइ । सो अंजन कर लै सुत कहि चहुँ औजति यशुमति माइ ॥
 दाता भुक्ता हरता करता विश्वंभर जग जानि । ताहि लाहि माखनकी चोरी बांधे यशुमति रानि ॥ वेद
 वेदांत उपनिषद अरु पै सो भख भुक्ता नाहिं । गोपी ग्वालनिके मंडल में सो हँसि जूँठनि खाहिं ॥
 कमलानायक त्रिभुवनदायक दुख सुख जिनके हाथ । कांधे कमरिआ कांख लकुटिया बिहरत बन
 बछ साथ ॥ बकी बकासुर शकट तृणवर्त अघ प्रलंब विष भासा । केशी कंसको वह गति दीनी राखे
 चरन निवास ॥ भक्तवच्छल अखिल अंतर्दामी रहे सकल भरपूर । मारग रोकि रह्यो द्वारे परि
 पतित शिरोमणि सूर ॥ ५१ ॥ राग गूढमलार ॥ आदि सनातन हरि अविनासी । सदा निरंतर घट घट वासी ॥
 पूरण ब्रह्म पुराण बखानै । चतुरानन शिव अंत नजानै ॥ गुणगण अगम निगम नहिं पावै । ताहि यशो-
 दा गोद खिलवै ॥ एक निरंतर ध्यावै ध्यानी । पुरुष पुरातन है निर्वाणी ॥ जप तप संयम ध्यानन आवै ।
 सोई नंदके आंगन धावै ॥ लोचन श्रवणन रसना नासा । ना पद पानि न गुन परगासा ॥ विश्वंभर निज
 नाम कहावै । घर घर गोरस जाय चुरावै ॥ शुक्र श्वारदसे करत बिचारा । नारदसे पावाहिं नहिं पारा ॥ अवर
 बरन सुर तीनहि धारै । गोपिनिको सो वदन निहारै ॥ जरामरनते रहित अमाया । मात पिता
 सुत बंधु न जाया ॥ ज्ञान रूप हृदयमें बोलै । सो नंद महरके आंगन डोलै ॥ जल धर अनिल अनल
 न भछायो । पंच तत्त्व मिलि जगत उपायो ॥ काल डरै जाके डर भारी । सो ऊखल बांध्यो महतारी ॥
 माया प्रगट सकल जग मोहै । कारन करन करै सो सोहै ॥ ब्रह्मादिक जेहि ध्यान न पावै । सो गो-
 कुलमें गाइ चरावै ॥ अच्युत रहै आद्य जलशाई । परमानंद परम सुखदाई ॥ लोकरचै राखै प्रतिपारै ।
 सो ग्वालन संग लीला धारै ॥ गुण अतीत अविगत न जनवै । यश अपार श्रुति पार न
 पावै ॥ जाकी महिमा कहत न आवै । सो गोपिन संग रासरमावै ॥ जाकी महिमा लखै
 न कोई । निर्गुण सगुण धरै वपु सोई ॥ चौदह भुवन पलकमें टारै । सो बनवीथिन कुँटी
 सँवारै ॥ चरण कमल नित रमा पलवै । चाहत नेक नैन भरि जोवै ॥ अगम अगोचर लीला
 धारी । सो राधावश कुंजबिहारी ॥ भाग बडे उन सब ब्रजवासी । जिनके संग रमे अविनासी ॥ जो रस
 ब्रह्मादिक नहिं पावै । सो रस गोकुल गली बहावै ॥ सूर सुयश कहि कहा बखानै । गोविंदकी गति
 गोविंद जानै ॥ ५२ ॥ राग मलार ॥ बिनवै चतुरानन कहि भोरै ॥ तुव प्रताप जान्यो नहिं प्रभुजु करि
 अस्तुति कर जोरै ॥ अपराधी मतिहीन नाथ हौं चूक परी निज धारै । हम कृत दोषु क्षमौ करुणा
 मय ज्यों भूपरसत ओरै ॥ युग युग विरदइहै चलि आयो सत्य कहतु अब होरै । सूरदास प्रभु
 पछिलै लेखें अब न बनै मुख मोरै ॥ ५३ ॥ राग सारंग ॥ माधव मोहिं करौ वृंदावन रेनु । जिन चरण
 न डोलत नंदनंदन दिन प्रति चारत धेनु ॥ कहा भयोहै देव देह धरि अरु ऊंचो पद पायो
 ऐनु । सब जीवनलै उदर मांझ प्रभु महाप्रलय जल करत है सैनु ॥ हमते धन्य सदा वै तृण द्रुम
 बालक बच्छ वृषान रु वैन । सूर श्याम जिनके संग डोलत हँसि बोलत मथि पियतहैं फैन ॥ ५४ ॥
 राग सारंग ॥ ऐसे बसिए ब्रजकी बीथिनि । ग्वालनके पनवारे चुनि चुनि उदर भरेए सीथिनि ॥ पैडेके
 सब बृक्ष बिराजत छाया परम पुनीतनि । कुंज कुंज प्रति लोटि लोटि रति रज लागै रंगरीतनि ॥
 निशि दिन निराखि यशोदानंदनु अरु यमुनाजलती तनि । परसत सूर होत तन पावन दरशन
 करत अतीतनि ॥ ५५ ॥ धनि यह वृंदावनकी रेनु । नंदकिशोर चराई गैया सुखहि बजाई बेनु ॥

मदन मोहनको ध्यान धरै जो अति सुखपावत चैनु । चलत कहा मन बसत पुरातन जहां
 लैन नहि दैनु ॥ इहां रहौ जहां जूठनि पावै ब्रजवासीके एनु । सूरदास ह्यांकी सरवरि नहि करुप-
 वृक्ष सुरधेनु ॥ ६६ ॥ राग गौरी ॥ अघामारि आए नंदलाल । ब्रज युवती सुनिकै उठि धाई घर घर कहत
 फिरत सब ग्वाल ॥ निरखत वदन चकित भई सुंदरि मनही मन इह करि अनुमान । कहति पर-
 स्पर सत्य बात यह कौन करै इनकी सर आन ॥ एई हैं रतिपतिके मोहन एई हैं हमरे पति प्रान ।
 सूर श्याम जननी मन मोहत बार बार माँगत कछु खान ॥ ६७ ॥ माँगि लेहु जो भावै प्यारे । बहुत
 भाँति मेवा सब मेरे षटरसके परकार हैं न्यारे ॥ सबै जोरि राखति हित तुम्हरे मैं जानति तुव वानि ।
 तुरतमथो माखन दधि आछो खाहु देइ सो आनि ॥ माखन दधि मोहिं लागत प्यारो और न
 भावै मोहि । सूर जननि माखन दधि दीनो खात हँसतु मुख जोहि ॥ ६८ ॥ चकई भौरा खेलनसमै ॥ विलावल ॥
 दे भैया भँवरा चकडोरी । जाइ लेहु आरेपर राखो काल्हि मोल ले राखै को री ॥ लै आये हँसि श्याम
 तुरतही देखिरहे रँगरँग बहु डोरी । भैया बिना और को राखै बार बार हरि करत निहोरी ॥ बोलि
 लिए सब सखा संगके खेलत श्याम नंदकी पोरी । तैसेइ हरि तैसेइ सब बालक कर भँवरा चकरीनिकी
 जोरी ॥ देखति जननि यशोदा यह छबि विहँसत बारबार मुख मोरी । सूरदास प्रभु हँसि हँसि
 खेलत ब्रजवनिता तृण डारत तोरी ॥ ६९ ॥ राग कान्हरी ॥ मेरे हियरे माँझ लागै मनमोहन लैगयो
 मन चोरी । अबहीं इहि मारगह्वै निकसे छबि निरखत तृण तोरी ॥ मोर मुकुट श्रवणन मणि
 कुंडल उर बनमाला पीत पिछोरी । दशन चमक अधरन अरुणाई देखत परी ठगोरी ॥ ब्रज
 लरिकन संग खेलत डोलत हाथ लिए फेरत चकडोरी । सूर श्याम चितवत गए मोतन तन मन
 लिए अजोरी ॥ ७० ॥ राग टोडी ॥ तबते मोरो जिव न रहि सकत । जित देखौ तितही वह मूरति नैननिमें नित
 लग्योई रहत ॥ ग्वाल बाल सब संग लगाए खेलतमें करि भाव चलत । उरझि परचो मेरो मनु
 तबते कर झटकत चकडोरी हलत ॥ अब मैं कहा करौं मेरि सजनी सुरति होत तब मदन दहत ।
 सूर श्याम मेरो चित हरिलीन्हौं सकुच छाँडि अब तोहिं सों कहत ॥ ७१ ॥ श्रीराधाकृष्णजीका प्रथम मि
 लाप । राग टोडी ॥ खेलन हरि निकसे ब्रजखोरी । कटि कछनी पीतांबर ओढे हाथ लिए भौरा
 चकडोरी ॥ मोर मुकुट कुंडल श्रवणन वर दशन दमक दामिनि छबि थोरी । गए श्याम रवि
 तनयाके तट अंग लसति चंदनकी खोरी ॥ औचकही देखी तहां राधा नयन विशाल भाल दिए
 रोरी । नील बसन फरिया कटि पहिरे बेनी पीठि रुचिर झकझोरी ॥ संग लरिकिनी चलि इत
 आवति दिन थोरी अति छबि जन गोरी । सूर श्याम देखतहीं रीझे नैन नैन मिलि परी ठगोरी ॥
 ॥ ७२ ॥ राग टोडी ॥ बूझत श्याम कौन तू गोरी । कहाँ रहति काकीहै बेटी देखी नहीं कहूं ब्रज
 खोरी ॥ काहेको हम ब्रजतन आवति खेलति रहति आपनी पौरी । सुनति रहति श्रवणनि नंद ढोटा
 करत रहत माखन दधि चोरी ॥ तुम्हरो कहा चोरि हम लेहैं खेलन चलौ संग मिलि जोरी । सूरदास
 प्रभु रसिक शिरोमणि बातन भुरइ राधिका भोरी ॥ ७३ ॥ राग धनाश्री ॥ प्रथम सनेह दुहुँन मन
 जान्यो । सैन सैन कीनी सब बातें गुप्त प्रीति शिशुता प्रगटान्यो ॥ खेलन कबहुँ
 हमारे आवहु नंद सदन ब्रज गाँव । द्वारे आइ टेरि मोहिं लीजो कान्ह है मेरो नाउं ॥
 जो कहिये घर दूरि तुम्हारो बोलत सुनिये टेरा तुमहि सौँह वृषभानु बबाकी प्रात साँझ एक फेर ॥
 सूधी निपट देखियत तुमकौं ताते करियत साथ । सूर श्याम नागर उत नागरि राधा दोउ मिलि
 गाथ ॥ ७४ ॥ राग नट ॥ सैननि नागरी समझाई । खरिक आवहु दोहनीलै यहै मिस छल पाइ ॥ गाइ

गनती करन जैहैं मोहिं लै नँदराइ । बोलि वचन प्रमाण कीने दुहुँन आतुरताइ ॥ कनक वदन
 सुंदर सुंदरि सकुचि मुख मुसुकाइ । श्याम प्यारी नैन राचे अति विशाल चलाइ ॥ गुप्तप्रीति जु प्रगट
 कीन्ह्यो हृदय दुहुँन छिपाइ । सूर प्रभुके वचन सुनि सुनि रही कुँवर लजाइ ॥ ६५ ॥ राग सारंग ॥ गइ वृष-
 भानुसुता अपने घर। संग सखी सों कहति चली यह को जैहैं खेलन इनके दुरा। बडी बेर भइ यमुना
 आए खीझति हैहैं मैया । वचन कहति मुख हृदय प्रेम मुख मन हरि लियो कन्हैया ॥ माता कही
 कहां हुती प्यारी कहां अवार लगाई । सूरदास तब कहति राधिका खरिक देखि मैं आई ॥ ६६ ॥
 ॥ राग रामकली ॥ नागरि मनहिं गई अरुझाइ । अति विरह तनु भई व्याकुल घर न नेक सुहाइ ॥ श्याम
 सुंदर मदनमोहन मोहनी सी लाइ । चित्त चंचल कुँवर राधा खान पान भलाइ ॥ कबहुं बिलपति
 कबहुं बिहंसति सकुचि बहुरि लजाइ ॥ मात पितुको त्रास मानति मन बिना भई वाइ ॥ जननि सों
 दोहनी माँगति बेगि दे री माइ । सूर प्रभुको खरिक मिलिहौं गए मोहिं बोलाइ ॥ ६७ ॥ राग धनाश्री ॥
 मोहिं दोहनी दे री मैया । खरिक मोहिं अबहीं है आई अहिर दुहुत अपनी सब गैया ॥ ग्वाल दुहत
 तब गाइ हमारी जब अपनी दुहिलेत । खरिक मोहिं लगिहैं खरिकामें तू आवै जानि हेत ॥ शोचति
 चली कुँवर घरहीते खरिका गइ समुहाइ ॥ कब देखौं वह मोहन मूरति जिन मन लियो चुराइ ॥ देखो
 जाइ तहाँ हरि नहीं चकृत भई सुकुमारि । कबहुं इत कबहुं उत डोलत लागी प्रीति खुम्हारि ॥ नंद
 लिए आवत हरि देखे तब पायो विश्राम ॥ सूरदास प्रभु अंतर्दामी कीन्ह्यो पूरण काम ॥ ६८ ॥ नंद गये
 खरिकै हरि लीन्हे । देखी तहां राधिका ठाढी श्याम बुलाइ लई तहँ चीन्हे ॥ महर कह्यो खेलहु तुम
 दोऊ दूरि कहुं जानि जैहौ । गनती करत ग्वाल गैयनकी मुहिं नियरे तुम रहियो ॥ सुनु बेटी वृषभानु
 महरकी कान्हहि लिये खिलाइ । सूर श्यामको देखे रहिहौं मारै जानि कोउ गाइ ॥ ६९ ॥
 राग नट ॥ नंद बवाकी बात सुनौ हरि । मोहिं छाँड़िके कबहुं जाहुगे ल्याऊंगी तुमको धरि ॥ भली
 भई तुम्हैं सौपिगये मोहिं जान न देहौं तुमको । बाँहें तुम्हारी नेकु न छडिहौं महरि खीझिहैं हमको ॥
 मेरी बाँहें छाँड़िदे राधा करत उपर फट बाँतैं । सूर श्याम नागर नागरिसों करत प्रेमकी घातैं ॥ ७० ॥
 राग नट ॥ नीवी ललित गही यदुराई । जवाहिं सरोज धरो श्रीफलपर तब यशुमति गइ आई ॥ तत्क्ष
 ण रुदन करत मनमोहन मनमें बुधि उपजाई ॥ देखो ढीठ देति नहिं माता राखो गेंद चुराई ॥ काहेको
 झकझोरत नोखे चलहु न देउ बताई ॥ देखि विनोद बाल सुतको तब महरि चली सुसिकाई ॥ सूरदा-
 सके प्रभुकी लीला को जानै इहि भाई ॥ ७१ ॥ राग धनाश्री ॥ बातनमें लइ राधा लाइ ॥ चलहु जैये विपि-
 न वृंदा कहत श्याम बुझाइ ॥ जब जहां तन भेष धारौं तहां तुम हित जाइ । नेकहू नहिं करौं
 अंतर निगम भेद न पाइ ॥ तुव परशि तन ताप मेटौं काम द्रंढ बहाइ । चतुर नागरि हँसि रही
 सुनि चंद्र वदन नवाइ ॥ मदनमोहन भाव जान्यो गगन मेघ छिपाइ । श्याम श्यामा गुप्त लीला सूर
 क्यों कहै गाइ ॥ ७२ ॥ अथ मुख विलास ॥ राग गौडमलार ॥ गगन गरजि घहराइ जुरी घटा कारी । पौन
 झकझोर चपला चमकि चहुं ओर सुवन तन चितै नंद डरत भारी ॥ कह्यो वृषभानुकी कुँवरिसों
 बोलिकै राधिका कान्ह घर लिये जारी ॥ दोऊ घर जाहु संग नभ भयो श्याम रंग कुँवर गह्यो वृषभान
 वारी ॥ गये वन घन ओर नवल नंदनंदकिशोर नवल राधा नए कुंज भारी । अंग पुलकित भए
 मदन तिनतन जए सूर प्रभु श्याम श्यामाविहारी ॥ ७३ ॥ राग कामोद ॥ नयो नेहु नयो गेहु नयो रस
 नवल कुँवर वृषभानु किशोरी । नयो पीतांबर नई चूनरी नई नई वृंदनि भीजति गोरी ॥ नए कुंज
 अति पुंज नए द्रुम सुभग यमुन जल पवन हिलोरी । सूरदास प्रभु नवलरस विलसत नवल राधिका
 यौवन मोरी ॥ ७४ ॥ राग कान्हरो ॥ नवल गुपाल नबेली राधा नये प्रेमरस पागो ॥ नव तरुवन बिहार

दोऊ क्रीडत आपु आपु अनुरागे ॥ शोभित शिथिल वसन मनमोहन सुखवत सुखके वागे । मानहुँ
 बुझी मदनकी ज्वाला बहुरि प्रजा नर लागे ॥ कबहुँक बैठि अंश भुज धरिकै पीक कपोलनि दागे । अति
 रसराशि छुटावत लूटत लालच लगे सभागे ॥ मानहुँ सूर कल्पद्रुमकी निधि लै उतरी फल आगे । नहिं
 छूटति रति रुचिर भामिनी ता सुखमें दोउ पागे ॥ ७५ ॥ राग मलार ॥ उतारतहै कंठनिते हार । हरिहरमि
 लत होतहै अंतर यह मन कियो बिचार ॥ भुजावाम पर कर छबि लागति उपमा अंत न पार ।
 मनहु कमल दल कमल मध्यते यह अद्भुत आकार ॥ चुंबत अंग परस्पर जनु युग चंद करत
 हितवार । रसन दशन भरि चापि चतुर अति करत रंग विस्तार ॥ गुणसागर अरु रससागर
 निधि मानत सुख व्यवहार । सूर श्याम श्यामा नवसर मिलि रीझि नंदकुमार ॥ ७६ ॥ राग कान्हरो ॥
 नवल किशोर नवल नागरिया । अपनी भुजा श्याम भुज ऊपर श्याम भजा अपने उर धरिया ॥
 क्रीडा करत तमाल तरुन तर श्यामा श्याम उमैंगि रस भरिया । यों लपटाइ रहे उर उर ज्यों मर-
 कत मणि कंचनमें जरिया ॥ उपमा काहि देउँ को लायक मन्मथ कोटि वारने करिया । सूरदास
 बलि बलि जोरी पर नंदकुँवर वृषभानु दुलरिया ॥ ७७ ॥ राग गौरी ॥ आजु नंदनंदन रंग भरे । विवि
 लोचन सुविशाल दोउनके चितवत चित्त हरे ॥ भामिनि मिले परम सुख पायो मंगल प्रथम करे ।
 करसों करज करयो कंचन ज्यों अंबुज उरोज धरे ॥ आलिंगन दै अधर पान कर खंजन खंज लरें ।
 हठ करि मान कियो नव भामिनि तब गहि पाई परे ॥ लैगए पुलिन मध्य कालिंदी रस वश अनैंग अरे ।
 पुहुप मंजरी मुक्तनमाला अँग अनुराग भरे ॥ सुरति नाद मुख बेनु सुधा सुनि तपि अनतप जो
 टरे । रचना सूर रची बृंदावन आनंद काज करे ॥ ७८ ॥ राग नट ॥ हरि हैंसि भामिनि उर लाइ । सुरतिवत
 गुपाल रीझे जानि अति सुखदाइ ॥ हरषि प्यारी अँक भरि पिय रही कंठ लगाइ । हाव भाव कटाक्ष
 लोचन कला कोक सुभाइ ॥ देखि बाला अतिहि कोमल मुख निरखि मुसुकाइ । सूर प्रभु रति
 पतिके नायक राधिका समुझाइ ॥ ७९ ॥ गौड़ मलार ॥ नवल सुनि नवल पिया नयो नयो दरश विवि
 तन मलमले प्राणपति पीयको अधर धरयो री । प्रीतिकी रीति प्राण चंचल करत निराखि नागरिनैन
 चिबुक सो मोरी ॥ तब कामकेलि कमनीय चंदप चकोर चातक स्वाति बूंदपरचोरी । सुनि सूरदास
 रस राशि रस बरसिकै चली जनु हरति ले कूहूस गोरी ४८० गहगवन ॥ राग गौरी ॥ तुरत गए नंदन सदन
 कन्हवाई । अंकम दै राधा घर पठई बादर जहँ तहँ दिए उड़ाई ॥ प्यारीकी सारी आपुन लै पीतांबर राधा
 उर लाई । जो देखै यशुमति हरि ओढे मन यह कहति कहा धौं पाई ॥ जननी नैन जबहिं लखिलीने
 तबहिं श्याम इक बुद्धि उपाई । सूरदास सुतसों यशुमति कहै पीत उठनियां कहाँ गँवाई ॥ ८१ ॥
 राग सारंग ॥ पीत उठनियां कहाँ बिसारी । यहतौ लाल ढिगनिकी औरै है काहूकी सारी ॥ हौं गोधन
 लैगयो यमुन तट तहां हुती पनिहारी । भीर भई सुरभी सब बिडरीं मुरली भली सँभारी ॥ हौं
 लैगयो और काहूकी सो लैगई हमारी । सूरदास प्रभु भली बनाई बलि यशुमति महतारी ॥ ८२ ॥
 राग धनाश्री ॥ मैया री मैं जानन वाको । पीत उठनियां जो मेरी लैगई लै आनौ धरि ताको ॥ हरिकी
 माया कोउ न जानै आँखि धूरिसी दीनी । लाल ढिगनिकी सारी ताको पीत उठनियां कीनी ॥
 पीतांबर लै जननि दिखायो लै आन्यो तेहि पास । सूर मनहि मन कहति यशोदा तरुनि पढा-
 वत गास ॥ ८३ ॥ श्यामहि देखि महरि मुसुकानी । पीतांबर काके घर बिसरयो लाल ढिगनकी
 सारी आनी ॥ ओढनी आनि दिखाई मोको तरुनिनकी सिखई बुधि ठानी । घर घर लै मेरो सुत
 भुरवति ऐसी सबै दिननकी जानी ॥ हरि अंतर्दामी रतिनागर जानि लई जननी पहिचानी ।

सूर निरखि मुख सकुचि भगाने या लीलाकी यहै सयानी ॥ ८४ ॥ राग कल्याण ॥ सुंदरि गई गृह
 समुहाइ । दोहनी कर दूध लीन्हे जननि टेरि बुलाइ ॥ प्रेम प्रीति निचोल हरिको कहूं धरयो जु छि-
 पाइ । औरकी औरै कहति कछु माता मनहि डराइ ॥ कुँवरिको कहूं डीठि लागी निरखिकै पछिताइ ।
 सूर तब वृषभानु घरनी राधिका उर लाइ ॥ ८५ ॥ जननी कहति कहा भयो प्यारी । अबहीं खरि-
 क गई तू नीके आवतही भई कौन बिथारि ॥ एक बिटिनियां सँग मेरे थी कारे खाई ताहि तहारी ।
 मों देखत वह परी धरणि गिरि मैं डरपी अपने जिय भारी ॥ श्याम वरण एक ढोटा आयो यह नाहि
 जानत रहत कहौरी । कहत सुनो वह नंदको बारो कछु पढिकै वह तुरतहि झारी ॥ मेरो मन
 भरिगयो त्रासते अब नीको मोहिं लागतु मारी । सूरदास अति चतुर राधिका यह कहि समुझाई
 महतारी ॥ ८६ ॥ गौडमलार ॥ कुँवरिसों कहति वृषभानु घरनी । नेक नाहि घर रहति तोहिं कितनो
 कहति रिसनि मुहिं दहति वन भई हरनी ॥ लरिकिनी सबनि घर तोसी नहीं कोऊ निडर चलत
 नभ चितै जो तकै धरनी । बडी करवर टरी सांपसों उबरी बातकै कहत तोहिं लगति जरनी ॥
 लिखी भेटै कौनु कर्ता करै जौन सोई है होनहारी करनी । सुता लई उरलाइ तन निरखि पछि-
 ताइ डरानि गई कुँभिलाइ सूर वरनी ॥ ८७ ॥ महर वृषभानुके यह कुमारी । देवधामी करत द्वार द्वारे
 परत पुत्र द्वै तीसरी यहै वारी ॥ भई वरष सातकी शुभ घरी जातकी प्यारी दुहुँ भ्रातकी बची भारी ।
 कुँवरि दई अन्हवाइ गई तन मुरझाइ वसन पहिराइ कछु कहति खारी ॥ जाहि जनि खरिक तन
 खेलि अपने सदन यह सुनत हँसति मन श्याम नारी । सूर प्रभु ध्यान धरि हरषि आनंद भरि गाँव
 घर खेलिहौं कहति करी ॥ ८८ ॥ श्री राधिकाजीको यशोदा गृह गवन ॥ राग आसावरी ॥ खेलनके मिस कुँवरि
 राधिका नंदमहरके आई हो । सकुच सहित मधुरे करि बोली घरहौ कुँवर कन्हई हो ॥ सुनत
 श्याम कोकिल सम बाणी निकसें अति अतुराई हो । मातासों कछु करत कलह हरि सो
 डारयो बिसराई हो ॥ मैया री तू इनको चीन्हति बारंवार बताई हो । यमुना तीर काल्हि मैं
 भूल्यौ बांह पकरि लै आई हो ॥ आवति यहां तोहिं सकुचतिहै मैं दै सौंह बुलाई हो ।
 सूर श्याम ऐसे गुण आगर नागर बहुत रिझाई हो ॥ ८९ ॥ को जानै हरिकी चतुराई ।
 नयन सैन संभाषण कीनो प्यारीकी उर तपनि बुझाई ॥ मनहीं मन दोउ रीझि मगन
 भए अति आनंद उरमें न समाई । कर पल्लव हरि भाव बतावत एक प्राण द्वै देह बनाई ॥
 जननी हृदय प्रेम उपजायो कहति कान्हसों लेहु बुलाई । सूर श्याम गहि बाहँ राधिका ल्याए महरि
 निकट बैठाई ॥ ९० ॥ राग सूही ॥ देखि महरि मनही जु सिहानी । बोलि लई बूझति नंदरानी कुँवर
 कहति मधुरे मधुवानी ॥ ब्रजमें तोहिं कहूं नाहि देखी कौन गाउँ है तेरो । भली करी कान्हहि गहि
 ल्याई भूल्यो तो सुत मेरो ॥ नयन विशाल बदन अति सुंदर देखत नीकी छोटी । सूर महरि
 सवितासों विनवाति भली श्यामकी जोटी ॥ ९१ ॥ राग नट ॥ नामु कहा है तेरो प्यारी । बेटी कौन
 महरकी है तू कहि सु कौन तेरी महतारी ॥ धन्य कोख जिन तुमको राख्यो धन्य घरी जिहि तू
 अवतारी । धन्य पिता माता धनि तेरो छबि निरखति हरिकी महतारी ॥ मैं बेटी वृषभानु महरकी
 मैया तुमको जानति । यमुना तट बहु बार मिलन भयो तुम नाहिन पहिंचानति ॥ ऐसी कहि वाको
 मैं जानति वै तो बडी छिनारि । महर वडो लंगर सब दिनको हँसत देति मुख गारि ॥ राधा बोलि
 उठी बाबा कछु तुमसों ढीठयो कीनी । ऐसे समरथ कब मैं देखे हँसि प्यारी उर लीनी ॥ महरि
 कुँवरिसों यह करि भाषति आउ करौं तेरि चोटी । सूरदास हरषी नंदरानी कहति महरि हम जोटी ॥
 ॥ ९२ ॥ राग गौरी यशुमति राधा कुँवरि सँवारति । बडे बार श्रीवंत शीशके प्रेम सहित लै लै निर-

वारति ॥ माँग पारि बेनीहि सँवारति गूँथी सुंदर भांति । गोरे भाल बिंदु चंदन मनौ इंदु प्रात रवि
 क्रांति ॥ सारी चीर नई फरिया लै अपने हाथ बनाइ । अंचलसों मुख पाँछि अंग सब आपुहि लै पहि-
 राइ ॥ तिल चाँवरी बतासे मेवा दियो कुँवरिके गोद । सूर श्याम राधा तन चितवत यशुमति मन मन
 मोद ॥ ९३ ॥ अथ श्याम राधा खेलन समया ॥ राग कल्याण ॥ खेलो जाइ श्याम सँग राधा । यह सुनि कुँवरि हरष मन
 कीनों मिटी जु अंतर बाधा ॥ जननी निरखि चकित भई ठाढी दंपति रूप अगाधा । देखत भाव दुहुँनको
 सोई जो चित करि अवराधा ॥ सँग खेलत दोउ झगरन लागे शोभा बढी अबाधा । मनहु तडित घन
 इंदु तरनिहै बाल करत रस साधा ॥ निरखत बिधि भ्रम भूलि परचो तब मन मन करत समाधा ।
 सूरदास प्रभु और रच्यो विधि शोच भयो तन दाधा ॥ ९४ ॥ राग केदारो ॥ विधिके आन विधिको
 शोचु । निरखि छबि वृषभानु तनया सकल मम कृत पोचु ॥ रामा गौरी उर्वशी रति इंदिरा विभव
 समेति । तुल्यादि दिनमणि कहा सारंग नाहि उपमा देति ॥ चरण निरखि निहारि नख
 छबि अजित देखैं तोकि । चित्त गुण महिमा न जानत धीर राखति रोकि ॥ सूर आन विरंचि
 विरचे भक्त निज अवतार । अबलके बल सबल देखि अधीन सकल शृंगार ॥ ९५ ॥ राधा गृहगवन
 ॥ राग नट ॥ राधे महारिसों कहि चली । आनि खेलौ रहसि प्यारी श्याम तुम हिलमिली ॥
 बोलि उठे गुपाल राधा सकुच जिय कत करति । मैं बुलाऊं नहीं आवति जननि को कत डरति ॥
 मैया यशोदा देखि तोको करति कितनो छोहु । सुनत हरिकी बात प्यारी रही मुख तन जोहु ॥
 हँसि चली वृषभानु तनया भई बहुत अबार । सूर प्रभु चितते टरत नहिं गई घरके द्वार ॥ ९६ ॥
 राग बिहागरो ॥ बूझति जननी कहां हुती प्यारी । किन तेरे भाल तिलक रचि कीनों किहि कच गूँदि माँग
 शिर पारी ॥ खेलत रही नंदके आंगन यशुमति कही कुँवरि ह्यां आ री । तिल चावरी गोद करि दीनी
 फरिया दई फारि नव सारी ॥ मेरो नाउँ बूझि बाबाको तेरो बूझि दई हँसि गारी । मोतन चितै चितै
 टोटा तन कछु सवितासों गोद पसारी ॥ यह सुनिकै वृषभानु मुदित चित हँसि हँसि बूझति बात दु-
 लारी । सूर सुनत रससिंधु बढ्यो अति दंपति मनमें यहै विचारी ॥ ९७ ॥ राग गौरी ॥ मेरे आगे महारि
 यशोदा मैया री तोहिं गारी दीन्ही । वाकी बात सबै मैं जानति वै जैसी तैसी मैं चीन्ही ॥ तोको कहि
 पुनि कह्यो बबाको बडो धूर्त वृषभानु । तब मैं कह्यो ठग्यो कब तुमको हँसि लागी लपटान ॥ भली
 कही तैं मेरी बेटी लयो आपनो दाउ । जो मुहि कह्यो सबै उनके गुण हँसि हँसि कहत सुभाउ ॥ फेरि
 फेरि बूझति राधासों सुनत हँसत सब नारि । सूरदास वृषभानु घरनि यशुमति को गावति गारि ॥ ९८ ॥
 राग गौरी । कहत कान्ह जननी समुझाई । जहाँ तहाँ डारे रहत खिलौना राधा जनि लै जाइ चुराई ॥ साँझ
 सवारे आवन लागी चितै रहति मुरली तन आइ । इनहीमें मेरो प्राण वसतुहै तेरे भाए नेकु न
 माइ ॥ राखि छपाइ कह्यो करि मेरो बलदाऊको जनि पति आइ । सूरदास यह कहति यशोदा को
 लैहै मुहि लगो बलाइ ॥ ९९ ॥ राग आसावरी ॥ मेरे लालके प्राण खिलौना ऐसो को लै जैहै री । नेक
 सुनन जो पैहाँ ताको सो कैसे ब्रज रहै री ॥ बिन देखे तू कहा करैगी सो कैसे प्रगटै है री । अजहुँ राखि
 उठाइ री मैया मांगिते कहा दैहै री ॥ आवतही लै जैहै राधा पुनि पाछे पछितैहै री । सूरदास तब कहत
 यशोदा बहुरि श्याम बिरुझैहै री ॥ १०० ॥ राग नट ॥ सैतति महारि खिलौना हरिके । जानति टेउ आपने
 सुतकी रोवतिहै पुनि लरिकै ॥ धरि चौगान वेन मुरली धरि अरु भौरा चकडोरी । प्रेम सहित धरि
 धरि लै राखति जे सब मेरे कोरी ॥ श्रवणनि सुनत अधिक रुचि लागति हरिकी बतियां भोरी । सूर
 श्यामसों कहति यशोदा दूध पियहु बलि तोरी ॥ १०१ ॥ आजु सवारे धेनु दुही मैं वहै दूध मोहिं प्यावै री ।

सुन मैया मैतो पय पीवों मोहिं अधिक रुचि आवै री ॥ और धेनुको दूध न पीवों जो करि कोटि
 बनावै री । जननी कहति दूध धौरीको मोको सौंह करावै री ॥ तुमते मोहिं और को प्यारो बारंबार
 मनावै री । सूर श्यामको पय धौरीको माता हितसों ल्यावै री ॥ २ ॥ आछो दूध पियो मेरे तात ।
 तातो लगत वदन नहिं परशत फूँकि देतहै मात ॥ ओटि धरयो अबहीं मनमोहन तुम्हरे हेत
 बनाइ । तुम पीवो मैं नयनन देखों मेरे कुँवर कन्हाइ ॥ दूध अकेली धौरीको है तनको अति
 हितकारी । सूर श्याम पय पीवन लागे अति तातो दियो डारी ॥ ३ ॥ राग बिहागरो ॥ देखत पय पीवत
 बलराम । तातो लगत डारि तुम दीनों दावानल पीवत नहिं ताम ॥ कबहुं रहत मौन धरि जलमें
 कबहुं फिरत बंधावत दाम । कबहुं अघासुर वदन समाने कबहुं अँध्यारे जात न धाम । कबहुं करत बसुधा
 सब त्रयपद कबहुं देहरि उलंघी न जाइ । पट दश सहस गोपिका विलसत वृंदावन रस रास रमाइ ॥
 इहै जानि अवतार धरत ब्रज सुर नर मुनि यह भेद न पाई । राजा छोरि बंदिते ल्याए तिहुँलोकमें
 विदित बडाई ॥ युग युग ब्रज अवतार लेत प्रभु अखिल लोक ब्रह्मांडके नाथ । यई गोप यह
 ग्वाल इहै सुख यह लीला कहूँ तजत न साथ ॥ एई कान्ह इहै वृंदावन यहै यमुना यहै कुंज
 बिहार । यहै बिहार करत निशिबासर येईहैं जनके प्रतिपार ॥ येईहैं श्रीपति बहु नायक एई हैं कर्ता
 संसार । रोम रोम प्रति अंड कोटि रवि मुख चूमाति यशुमति कहि बार ॥ एई कंसकै बेर संहारयो
 ब्रह्म धरयो कृष्ण अवतार । माखन खात चुराइ घरनते बहुत बार भए नंदकुमार ॥ आदि अंत कोऊ
 नहिं जानतु हरता करता सबके सार । सूरदास प्रभु बाल अवस्था तरुण वृद्धको करै निवार ॥ ४ ॥
 राग केदारो ॥ बलि बलि चरित गोकुलराइ । दावानलको पान कीन्हो पीवत दूध रिसाइ ॥ पूतना हठि
 प्राण लीन्हें आपुन उर लपटाइ । कहति जननी दूध डारत खिझत कछु अनखाइ ॥ धरयो गिरि
 वर दोहनी कर धरत बाँह पिराइ । शकट भंजन मथन कुच युग कठिन लागत पाइ ॥ तृणावर्त
 अक्राशते पटकयो शिलापर जाइ । डरत लाल हिंडोरे झूलत हरेदेत झुलाइ ॥ बकासुरकी चोंच
 फारे सबै दिष्ट देखाइ । कीर पिंजरा गहत मोहन अँगुरी लेत भगाइ ॥ बिना दीपक सदन महियां
 तहां धरत न पाइ । अघासुर मुख पैठि निकसे बाल बच्छ छड़ाइ ॥ लिख्यो कौरे नाग काजर ताहि
 देखि डराइ । नृतत कालीनाग फन प्रति सुहृथ ताल बजाइ ॥ यमलार्जुन तोरि तारे हृदय प्रेम
 बडाइ । झटकि पात पलाश पल्लव देह देत दिखाइ ॥ हरे बालक वत्स नवकृत हेत दौरी माइ ।
 चरत धेनु न मिली तिनको आप दौरे धाइ ॥ वृषभ गंजन मथन केशी हने पूँछ फिराइ ।
 भजत सखा समेत मोहन देखि व्याई गाइ ॥ गोपनारी संग मोहन कियो रास बनाइ । कहति
 जननी व्याहको तब रहत बदन दुराइ ॥ कहा वरणों कोटि रसना हिये बुधि उपजाइ । सूरके
 प्रभु रसिक हरि पर अंग अंग विहाइ ॥ ५ ॥ अथ गौचारन ॥ राग रामकली ॥ आज मैं गाइ चरावन
 जैहों । वृंदावनके भाँति भाँति फल अपने कर मैं खैहों ॥ ऐसी अबहिं कहो जनि बारे देखौ
 अपनी भाँति । तनक तनक पाँइ चलिहौ कैसे आवत हैंहै राति ॥ प्रात जात गैयाँ लै
 चारन घर आवतहैं सांझ । तुम्हरो कमल वदन कुम्हिलहैं रंगत घामहिं मांझ ॥ तेरी
 सौ मोहिं घासु न लागत भूख नहीं कछु नेक । सूरदास प्रभु कछो न मानत परे आपनी टेक ॥
 ॥ ६ ॥ मैया हों गाय चरावन जैहों । तू कहि महर नंदबाबासों बडो भयो न डरैहों ॥
 तेरे हेत मात मनसुख अरु हलधर संगहि रहैं । बंशीवट तर गाइनके संग खेलत अति सुख
 पैहों ॥ ओदन भोजन दै दधि कांवरि भूख लगै ते खैहों । सूरदास मैं साथ सौंह दै जो यमुना जल
 न्हैहों ॥ ७ ॥ चले सब गाइ चरावन ग्वाल । हेरी टेर सुनत लरिकनकी दौरि गए नंदलाल ॥
 फिरि इत उत हैं देखै यशुमति दृष्टि न परे कन्हाइ । जान्यो जात ग्वाल संग दौरयो टेरति

यशुमति धाइ ॥ जात चल्थो गैयनके पाछे बलदाऊ कहि टेरत । पाछे आवत जननी देखी फिरि
 फिरि इतको हेरत ॥ बल देख्यो मोहनको आवत सखा किए सब ठाढ़े । पहुँची आइ यशोदा
 रिससों दोउ भुजु पकरे गाढ़े ॥ हलधर कह्यो जानदे मो सँग आवहि आज सवारे । सूरदास बलसों
 कहै यशुमति देखे रहियो प्यारे ॥ ८ ॥ राग विलावल ॥ खेलत श्याम चले ग्वालनसँग । यशुमति
 कहति इहै घर आई देखौ हरि कीने जेजेरँग ॥ प्रातहिते लागे एही ढँग अपनी टेक परचोहै ।
 देखौ जाइ आजु वनको सुख कहा परोसि घरचोहै ॥ माखन रोटी अरु शीतल जल यशुमति दियो
 पठाइ । सूर नंद हँसि कहत महरिसों आवत कान्ह चराइ ॥ ९ ॥ राग सारंग ॥ हरि जूको ग्वालनि
 भोजन ल्याई । वृंदा विपिन विशद यमुना तट शुचि ज्यों नार बनाई ॥ सानि सानि दधि भातु लियो
 कर सुहृद सबनि कर देत । मध्य गुपाल मंडली मोहन छाँक बांटिके लेत ॥ देवलोक देखत सब
 कौतुक बाल केलि अनुरागी । गावत सुनत सुनत सुख करि मनौ सूर दुरित दुख भागी ॥ १० ॥
 राग सारंग ॥ वृंदावन देख नंदनंदन अतिहि परम सुख पायो । जहाँ जहाँ बाल गाइ सँग डोलत
 तहँ तहँ आपुन धायो ॥ बलदाऊ मोको जित छाँडो संग तुम्हारे ऐहाँ ॥ कैसेहुँ आज यशोदा
 छाँड्यो कलिह न आवन पैहाँ ॥ सोवत मोकों हेरिलेइगे बाबानंद दुहाई । सूर श्याम बिनतीकरै
 बलसों सखन समेत सुनाई ॥ ११ ॥ अथ धेनुकवध । राग मैख ॥ सखा कहन लागे हरिसों तब । चलौ
 तालवनको जैये अब ॥ ता वनमें फल बहुत सुहाए । वैसे हम कबहुँ नहिं खाए ॥ असुर
 धेनुक तहाँहैं रखवारी । चलौ कहैं हँसि बलि बनवारी ॥ विहँसत हरि सँग चले गुआला ।
 नाचत गावत गुण गोपाला ॥ सोयो हुतो असुर तरु छाया । सुनत शोर तरुते उठि धाया ॥
 हलधरको देखे तिन आवत । ये दोउ बलकर जोर चलावत ॥ पकरि बाहँ बलभद्र
 फिरायो । मारि ताहि तरु माहिं गिरायो ॥ और बहुत ताको परिवारो । हरि हलधर
 तिन सबको मारो ॥ ग्वालन वनफल रुचि सों खाए । बहुरौ वृंदावनहि सिधाए ॥ हरि
 हलधर छबि वरणि न जाई । सूरदास इह लीला गाई ॥ १२ ॥ राग गौरी ॥ बनते आवत धेनु चराये । संध्या
 समय सांवरे मुखपर गोपद रज लपटाये ॥ बरह मुकुट के निकट लसति लट मधुप बने रुचि पाये ।
 विलसत सुधा जलद आनन पर उडत न जात उड़ाये ॥ विधि बाहन भक्षनकी माला राजत उर
 पहिराये ॥ इक वपु रही नाहिं बड़े छोटे ग्वाल बने इक दाये । सूरदास मिलि लीला प्रभुकी जीवत
 जन यश गाए ॥ १३ ॥ आजु हरि धेनु चराये आवत । मोर मुकुट वनमाल विराजत
 पीतांबर फहरावत ॥ जिहि जिहि भांति ग्वाल सब बोलत सुनि श्रवणन मन राखत ।
 आपुन टेरिलेत नान्हे सुर हरषत मुख पुनि भाषत ॥ देखत नंद यशोदा रोहिणि अरु देखत ब्रज
 लोग । सूर श्याम गाइन सँग आये मैया लीनो रोग ॥ १४ ॥ यशुमति दौरि लए हरि कनियाँ ।
 आजु गयो मेरो गाइचरावन हौं बलिगई निछनियाँ ॥ मो कारण कछु आन्योहै बलि बनफल तोरि
 कन्हैया । तुमहि मिले मैं अति सुख पायो मेरे कुँवर कन्हैया ॥ कछुक खाहु जो भावै मोहन
 देरी माखन रोटी । सूरदास प्रभु जीवहु युग युग हरि हलधरकी जोटी ॥ १५ ॥ राग सारंग ॥ मैं अपनी
 सब गाइ चरैहौं । प्रात होत बलके सँग जैहौं तेरे कहे न भुरैहौं ॥ ग्वाल बाल लै गाइन भीतर नेकहु
 नहिं डर लागत । आजु न सोवों नंद दुहाई रैन रहोंगो जागत ॥ और ग्वाल सब गाइ चरैहैं मैं घर
 बैठौ रहौं । सूर श्याम अब सोइ रहौ तुम प्रात जान मैंदैहौं ॥ १६ ॥ राग केदारो ॥ बहुतै दुख हरि सोइ
 गयोरी । सांझहिते लाग्यो यहि बातहि क्रम क्रमते मन बोधि लयोरी ॥ एक दिवस गयो गाइ
 चरावन ग्वालन साथ सवारे । अबतौ सोइ रह्योहै कहिकै प्रातहि कहा बिचारी ॥ यहतौ सब बलरामहि
 लागे सँग लग्यो लिवाइ । सूर नंद यह कहत महरिसों आवन दे फिरि धाइ ॥ १७ ॥ राग विलावल ॥ करहु

कलेऊ कान्ह पियारे । माखन रोटी दियो हाथ पर बलि बलि जाउँ हौं खाहु लला रे ॥ टेरत ग्वाल
 द्वाके ठाढे आए तबके होत सवारे । खेलहु जाइ ब्रजहिके भीतर-दूरि कहुं जनि जैयहु प्यारे ॥ टेरि
 उठे बलराम श्यामको आवहु धाइ धेनु बन चारो ॥ सूर श्याम कर जोरि मातसों गाइ चरावन कहत हमारे ॥
 ॥ १८ ॥ राग विलावल ॥ मैया री मोहि दाऊ टेरत । मोकों वन फल तोरि देतहैं आपुन गैयन घेरत ॥
 और ग्वाल सँग कबहुं न जैहौं वे सब मोहिं खिझावत । मैं अपने दाऊ सँग जैहौं बन देखत सुख
 पावत ॥ आगेदे पुनि ल्यावत घरको तू मुहि जान न देति । सूरश्याम कहै यशुमति मैया हाहा
 करि करि केति ॥ १९ ॥ राग सारंग ॥ बोलि लियो बलरामहि यशुमति ॥ आवहु लाल सुनहु हरिके गुण
 कालिहिते लँगरचौं करत अति ॥ श्यामहि जानदेहु मेरे सँग तू काहे डरपावति । मैं अपने
 ढिगते नहिं टारे जियहि प्रतीति न आवति ॥ हँसी महरि बलकी बातें सुनि बलिहारी या सुखकी ।
 जाहु लिवाय सूरके प्रभुको कहत वीरके रुखकी ॥ २० ॥ राग नट ॥ अति आनंद भयो हरि धाए । टेरत
 ग्वाल बाल सब आवहु मैया मोहिं पठाए ॥ उतते सखा हँसत सब आवत चलहु कान्ह बन देखहु ।
 वनमाला तुमको पहिरावाहिं धातु चित्रतन रेखहु ॥ गाइ लेइ सब घेरि घरनते महर गोपके बालक ।
 सूर श्याम चले गाइ चरावन कंस उरहिके शालक ॥ २१ ॥ राग सारंग ॥ चरावत वृंदावन हरि गाइ ।
 सखा लिए सँग सुबल श्रीदामा डोलतहैं सुख पाइ ॥ क्रीडा करत जहां तहां सब मिलि आनंद
 बढ़ाइ बढ़ाइ । बगरि गई गैयां वन वीथिनि देखी अति बहुताइ ॥ कोउ गए ग्वाल गाइ बन घेरन कोउ
 गए वछरु लिवाइ । आपुहि रहे अकेले वनमें कहुं हलधर रहे जाइ ॥ बंशीवट शीतल यमुनातट
 अतिहि परम सुखदाइ । सूर श्याम तब बैठि विचारत सखा कहां बिरमाइ ॥ २२ ॥ बार बार
 हरि कहत मनहि मन अवहि रहे सँग चारत धेनु । ग्वाल बाल कोउ कतहुं न देख्यो टेरत नाँउ
 लेत दै सैनु ॥ आलस गात जानि मनमोहन बैठे छाँह करत सुख चैनु । अकनि रहत कहुं सुनत
 नहीं कछु नहिं गौ रंभन बालक बैनु ॥ तृषावंत सुरभी बालक गण कालीदह अचयो जलजाइ ।
 निकसि आइ सब तट ठाढे भए बैठि गए जहाँ तहाँ अकुलाइ ॥ बन घन ढूँढि श्याम तहाँ आए
 गोसुत ग्वाल रहे मुरझाइ । मनमहँ ध्यान करतही जान्यो काली उरग रह्यो ह्यां आइ ॥ गरुड
 त्रास करि आइ रह्यो दुरि अंतर्धामी सबके नाथ । अमृत दृष्टि भरि चितै सूरप्रभु बोलि उठे
 गावत हरि गाथ ॥ २३ ॥ आवहु आवहु कान्ह जू पाई है सब धेनु । कुंज कुंजमें देखि रहे तृण
 चरति परम सुख चैन ॥ दुमन चढे सब सखा पुकारत मधुर सुनावहु बैन । जनि धापहु बलि
 चरन मनोहर कठिन कंठ मन ऐन ॥ बार बार ब्रज कौन उवारै पियो कालीदह फैन ।
 सूर श्याम संतनहित कारन प्रगट भये सुख दैन ॥ २४ ॥ राग सारंग ॥ पाई पाई है मैया कुंज वृंदमें टाली ।
 अबके अपनी हटकि चरावहु जैहै हटकी घाली ॥ आवहु वेगि सकल दुहुं दिशिते कत डोलत
 अकुलाने । सुनि मृदु वचन देखि उन्नत कर हरषि सवै समुहाने ॥ तुम तौ फिरत अनतहीं ढूँढत ये
 वन फिरति अकेली । ह्वांकी गाइ कौन पर लैहौ सघन बहुत दुम बेली ॥ सूरदास प्रभु मधुर
 वचन कहि राखत सबहि बुलाए । नृत्य करत आनंद गौ चारत सवै कृष्णपै आए ॥ २५ ॥ राग रामकली ॥
 ताते तरकि कछो वनमाली । पशु तन चपल स्वरूप न जानत डोलत चाली चाली ॥ धरि तन
 सगुण त्रिपद पूरण प्रभु आपु कमल प्रतिपाली । यद्यपि वृषभ सुता पति तजिकै फिरति कुमति
 की घाली ॥ अति श्रम भयो सकल बन ढूँढत बन बेली दौ जाली । सूरदास संतन जनहरि हित
 इहि अब सबते टाली ॥ २६ ॥ नट नारायणी ॥ मोहिं बन छाँडि आए सब ग्वाल । कहाँते कहाँ आइ

निकसे करे कैसे ख्याल ॥ सुरछि काहे गिरे धरणी कहा यह जंजाल । मैं यहां जो आइ देखो परे
 सब बेहाल ॥ आनि अँचयो जल यमुनको तबहि गए अकुलाइ । निकसिकै जब कूल आए गिरि
 परे सब आइ ॥ प्राण बिनु हम सब भयेते तुमहि दियो जिवाइ । सूरके प्रभु तुम जहां तहैं हमहि
 लेत बचाइ ॥ २७ ॥ राग गौरी ॥ बलदाऊ कहि श्याम पुकारयो । आवहु बेगि चलौ घर जैयै बनहिमें
 पुनि होत अँध्यारो ॥ ल्याए बोलि सखा हलधरको हँसे श्याम मुख चाही । बडी बेर भई तुमहि
 कन्हैया गाइन लेहु निवाही ॥ हेरी देत चले सब बनते गोधन दिए चलाई । सूरदास प्रभु राम
 श्याम दोउ ब्रजजनके सुखदाई ॥ २८ ॥ वृंदावन प्रवेश शोभा । राग गौरी ॥ वै मुरलीकी ढेर सुनावत ।
 वृंदावन बसि वासर सब निशि आगम जानि चले ब्रज आवत ॥ सुबल सुदामा अरु श्रीदामा संग
 सखा मध्य मोहन छवि पावत । सुरभी गण सब ले आगे करि कोउ ढेरत कोउ बेणु बजावत ॥
 केकी पच्छ मुकुट शिर भ्राजित गौरी राग मिले रस गावत । सूरश्यामके ललित वदन पर गोरज
 छवि कहूँ चंद छपावत ॥ २९ ॥ हरि आवत गाइनके पाछे । मोर मुकुट मकराकृत कुंडल
 नयन विशाल कमलते आछे ॥ मुरली अघर धरन सीखतहैं बनमाला पीतांबर काछे ।
 ग्वाल बाल सब वरण बरणके कोटि मदनकी छवि कियो पाछे ॥ पहुँचे आइ श्याम ब्रजपुरमें घरहि
 चले मोहन बल आछे । सूरदास प्रभु दोउ जननी मिलि लेति बलाइ बोलि मुख वाछे ५३० ॥ राग कल्याण ॥
 आनँदसाहित सबै घर आए । धन्य यशोदा तेरो बारो हमें सब मरत जिवाए ॥ नर वपु धरे देव
 यह कोऊ आइ लियो अवतार । गोकुल ग्वाल गाइ गोसुतके एई राखनहार ॥ पय पीवत पूतना
 निपाती तृणावर्त इहि भांत । वृषभासुर वत्सासुर मारयो रामकृष्ण दोउ भ्रात ॥ जबते जन्म
 लियो ब्रज भीतर तबते इहै उपाइ । सूर श्यामके बल प्रतापते बन बन चारत गाइ ॥ ३१ ॥
 तुम कत गाइ चरावन जात । पिता तुम्हारे नंद महरसों जाके यशुमति सीहै मात ॥ खेलत रहौ
 आपने घरमें माखन दधि भावै तब खात । अमृत वचन कहौ मुख अपने रोम रोम पुलकित सब
 गात ॥ अब काहुँके जाहु कहूँ जनि आवतिहै युवती इतरात । सूर श्याम मेरे नैनन आगे रहो
 काहे कहूँ जातहौ तात ॥ ३२ ॥ भैया हौं न चरैहौं गाइ । सिंगरे ग्वाल घिरावत मोसों मेरे पाँइ
 पिराँइ ॥ जौ न पत्याहि पूछ बलदाउहि अपनी सौंह दिवाइ । यह सुनि सुनि यशुमति ग्वालनिको
 गारी देत रिसाइ ॥ मैं पठवत अपने लरिकाको आवै मन वहराइ । सूर श्याम मेरो अति बालक
 मारत ताहिरि गाइ ॥ ३३ ॥ बल मोहन बनते दोउ आए । जननि यशोदा मात रोहिणी हरषि
 दुहुँनि दोउ कंठ लगाए ॥ काहे आजु अबार लगाई काहे कमल वदन कुँभिलाए । भूखे भए
 आजु दोउ भैया प्रात कलेऊ करन न पाए ॥ देखहु जाइ कहा जैवन कियो यशुमति रोहिणि तुरत
 पठाई । मैं अन्हवाए देति दुहुँनको तुम भीतर अति करौ चँडाई ॥ लकुट लियो मुरली कर
 लीन्हें हलधर दियो बिषान । नीलांबर पीतांबर लीन्हें सैति धरति करि प्रान ॥ मुकुट उतारि
 धरयो मंदिर लै पोंछतिहै अंग धात । अरु बनमाल उतारति गरते सूर श्यामकी मात ॥ ३४ ॥
 अंगअभूषण जननि उतारति । दुलरी ग्रीव माल मोतिनकी केउर लै भुज श्याम निहारति ॥ भुद्रा-
 वली उतारति कटिते सैति धरति मनहीमन वारति । रोहिणि भोजन करहु चँडाई बारबार
 कहि कहि करि आरति ॥ भूखे भए श्याम हलधर ए यह कहि अंतरप्रेम विचारति । सूरदास प्रभु
 मात यशोदा पट लै दुहुँनि अंगरज झारति ॥ ३५ ॥ ए दोऊ मेरे गाइ चरैया ।
 मोल बिसाहि लये मैं तुमको तब दोउ रहे नन्हैया ॥ तुमसों टहल करावति निशि दिन और न टह-

ल करैया । यह सुनि श्याम हँसे कहि दाऊ झूठहि कहतिहै मैया ॥ जानि परत नहिँ साँच झुठाई
धेनुचरावत रहे झुरैया । सूरदास प्रभु कहति यशोदा मैं चेरी कहि लेति बलैया ॥ ३६ ॥ राग कल्याण ॥ यह
कहि जननि दुँहुनि उर लावति । सुमनसुत अंग परसि तरनि जल बलि बलि गई कहि कहि अन्हवा
वति ॥ सरस बसन तनु पोछि गई लै पटरसके जेवनार जेवावति । शीतल जल कपूर रस रचयो
झारी कनक लए अँचवावति ॥ भरचो चरु मुख धोय तुरतही पीरेपान बीरी मुख नावति । सूर श्याम
मुख जानि मुदितमन सेज्यापर संग लै पौढावति ॥ ३७ ॥ राग विहागरो ॥ सोवत नींद आइ गई श्यामहि ।
महरि उठी पौढाइ दुँहुनको आपु लगी गृहकामहि ॥ वरजतिहै घरके सब लोगनि हरुये लैलै नामहि ।
गाढे बोल न पावत कोऊ डर मोहन बलरामहि ॥ शिव सनकादि अंत नहिँ पावत ध्यावतहैं निशि
जामहि । सूरदास प्रभु ब्रह्म सनातन सो सोवत नंदधामहि ॥ देखत नंद कान्ह अति सोवत ।
भूखे भए आजु बन भीतर यह कहि कहि मुख जोवत ॥ कह्यो नहीं मानत काहुको आप हठी दोउ
बीर । बार बार तनु पोछत करसों अतिहि प्रेमकी पीर ॥ सेज मँगाइ लई तहां अपनी जहां
श्याम बलराम । सूरदास प्रभुके ढिग सोये सँग पौढी नंदवाम ॥ ३८ ॥ जागि
उठे तब कुँवर कन्हई । मैया कहां गई मो ढिगते सँग सोवत जान्यो बलभाई ॥ जागे नंद
यशोदा जागी बोलि लिए हरि पास । सोवत झिंझिक उठयो काहेते दीपक दियो प्रकाश ॥ सपने
कूदि परचो यमुनादह काहु दियो गिराई । सूर श्यामसों कहति यशोदा जिनिहो लाल डराई ॥
॥ ३९ ॥ राग गौरी ॥ मैं वरजौं यमुनातट जात । सुधि रहिगई न्हातकी तेरे जिनि डरपो मेरे तात ॥
नंद उठाइ लियो कोराकरि अपने सँग पौढाइ । वृंदावनमें फिरत जहाँ तहँ केहि कारण तू जाइ ॥
अब जिनि जैहौ गाइ चरावन कहांको रहत बलाइ ॥ सूर श्याम दंपति बिच सोए नींद गई तब आइ ॥
॥ ४० ॥ राग कल्याण ॥ सपनो सुनि जननी अकुलानी ॥ दंपति बात कहत आपुसमें सोअति शार-
गपानी ॥ या ब्रजको जीवनि यह ढोंटा कह देख्यो यहि आजु ॥ गाइ चरावन जान न
दीजै याको है कह काजु ॥ गृह संपति द्वै तनक ढोंटौ ना इनहीं लों मुख भोग । सूर श्याम
बन जात चरावन हँसी करत सब लोग ॥ ४१ ॥ राग भैरवी ॥ यहि अंतर भितुसार भयो । तारागण
सब गगन छपाने अरुन उदित अँधकार गयो ॥ जागी महरि काज गृह लागी निशिको सब दुख
भूलि गयो । प्रातस्नान करन यमुनाको नंदहि तुरत उठाइ दयो ॥ मथनिहारि सब ग्वालि बोलाई
भोर भयो उठि मथो दह्यो । सूर नंद घरनी आपुनहू मथति मथानी नेति गह्यो ॥ ४२ ॥ अथ कंस
कमलके फूल मँगाए, कालीदमन लीला अध्याय षोडश ॥ राग विलावल ॥ नारदसों नृप करत बिचार । ब्रजमें ये
दोउ कोउ अवतार ॥ नंदसुवन बलराम कन्हई । इनकी गति मैं कछू न पाई ॥ वृणा-
वर्तसों दूत पठाए । ता पाछे कागासुर धाए ॥ बकी पठाइ दई पहिलेही । ऐसेनको बलु
वैसेहि लेही ॥ उनते कछू भयो नहिँ काजा । यह सुनि सुनि मोहिँ आवति लाजा ॥ अब सुनि तुम
इक बुद्धि बिचारहु । सूर श्याम बलरामहि मारहु ॥ ४३ ॥ नारद ऋषि नृपसों यह भाषत । वैहँ काल
तुम्हारे प्रगटे काहेते तुम उनको राखत ॥ काली उरग रह्यो यमुनामें तहँते कमल मँगावहु । दूत
पठाय देहु ब्रजऊपर नंदहि अति डरपावहु ॥ यह सुनिकै ब्रज लोग डरेंगे वोउ सुनिहैं यह बात ।
पुहुप लेन जैहँ नंद ढोंटा उरग करै तहां घात ॥ यह सुनि कंस बहुत सुख पायो भली कही इह मोहिँ ।
सूरदास प्रभुको सुनि जानत ध्यान करत मन एहि ॥ ४४ ॥ राग मूहो ॥ कंस बुलाइ दूत एक लीन्हो ।

कालीदहके फूल मँगाए पत्र लिखाइ ताहि कर दीन्हो ॥ यह कहियो ब्रज जाइ नंदसों कंसराज
 अतिकाज मँगाए । तुरत पठाइ दियेही बनिहै भली भांति कहि कहि समुझाए ॥ यह अंतर्दामी
 जानी जिय आपु रहे बन ग्वाल पठाए । सूर श्याम ब्रजजन सुखदायक कंस काल जिय हरष बढ़ाए ॥
 ॥४५॥ राग रामकली ॥ खेलन चले नंदकुमार। दूत आवत जानि ब्रजमें आपु दीन्हों टार ॥ नंद यमुना
 न्हाइ आए महारि ठाढी द्वार । नृपति दूत पठाइ दीन्हों चलयो ब्रज अहंकार ॥ महर पैठत
 सदन भीतर छौं क बाई धार । सूर नंद कहत महरिसों आजु कहा बिचार ॥४६॥ राग सृगो ॥ यह सुनि
 कंस मुदितमन कीन्हों । दूतहि प्रगट कही यह बाणी पत्र लिखाइ नंदको दीन्हों ॥
 कालीदहके कमल मँगावहु तुरत देखि यह पाती । जैसे कालिह कमल ह्यां पहुँचैं तू कहियो यहि
 भांती ॥ यह सुनि दूत तुरतही धायो तब पहुँच्यो ब्रज जाइ । सूर नंद कर पाती दीन्हों दूतकह्यो
 समुझाइ ॥४७॥ राग सृगो ॥ पाती बांचत नंद डेराने । कालीदहके फूल मँगाए सुनी सबनि ब्रजलोग
 घराने ॥ जो मोको नहिं फूल पठावहु तौ ब्रज करौं उजारी। महर गोप उपनंद न राखों सबहिन डारों
 मारी ॥ पुहुप देहु तौ बनै तुम्हारी नातरु गए बिलाइ। सूर श्याम बल मोहन तेरे माँगौं उनहिं धराइ ॥४८॥
 ॥ राग विलावल नंद सुनत सुरझाइ गए। पाती बांची सुनी दूत मुख यह बाणी सुनि चकित भए ॥ बल मोहन
 खटकत वाके मन आजु कही यह बात । कालीदहके फूल कहौ धौं को आनै पछितात ॥ और गोप
 सब नंद बुलाए कहत सुनौ यह बात । सुनहुँ सूर नृप ढंग यह आयो बल मोहन पर घात ॥४९॥
 राग जैतश्री ॥ आपु चढै ब्रजऊपर काली । कहां निकसि जैए को राखैं नंद कहत बेहाली ॥ मोहिं नहीं
 जियको डर नेकहु दोउ सुतको डरपाऊं । गाउँ तजौं कहूँ जाउँ निकसि लै इनहीं काज पराऊं ॥
 अब उबार नहिं दीखत कतहुं शरण राखि को लेइ । सूर श्यामको ब्रजति माता बाहिर जान न देइ ।
 ॥५०॥ राग आसावरी ॥ नंदघरनि ब्रजनारि बिचारति । ब्रजहि बसत सब जनम सिराने ऐसे कंस
 करी नहिं आरति ॥ कालीदहके फूल मँगावत को आनै धौं जाई । ब्रजवासी नातरु सब मारौं बांधौं
 बलन कन्हाई ॥ यह कहतहि दोउ नैन ढराने नंद घरनि दुखपाइ । सूर श्याम चितवत मातामुख
 बूझत बात बनाइ ॥५१॥ बूझहु जाइ तातसों बात । मैं बलिजाउँ मुखारबिंदकी तुमही काज
 कंस अकुलात ॥ आए श्याम नंदपै धाएँ जान्यो मात पिता अकुलात । अबहीं दूरि करौं दुख
 इनको कंसहिं पठै देउँ जलजात ॥ मोसों कहौ बात बाबा यह बहुत करत तुम सोच बिचार । कहा
 कहौ तुमसों मेरे प्यारे कंस करत कछु तुमको झार ॥ जबते जनम भयो हरि तेरो कितने करवर टरे
 कन्हाई । सूर श्याम कुलदेवि तोको जहां तहां करि लिए सहाई ॥५२॥ राग विलावल ॥ तुमहिं
 कहत जो करै सहाई । सो देवता संगही मेरे ब्रजते अनत कहूँ नहिं जाई ॥ वह देवता कंस
 मारैगो केश धरे धरणी घिसि आई । वह देवता मनाबहु सब मिलि तुरत कमल जो देइ पठाई ॥
 बाबा नंद झखत केहि कारण यह कहि माया मोह अरुझाई । सूरदास प्रभु मात पिताको
 तुरतहि दुख डारयो बिसराई ॥५३॥ राग नट ॥ खेलन चले कुँवर कन्हाई । कहत घोष निकास जैए
 तहां खेलें धाड़ ॥ गेंदखेलत बहुत बनिहै आनो कोई जाइ । घरही गए सखा श्रीदामा गेंद तुरतही
 ल्याइ ॥ अपने कर लै श्याम देख्यो अतिहि हरष बढ़ाइ । सूरके प्रभु सखा लीन्हें करत खेल बनाइ ॥
 ॥५४॥ खेलत श्याम सखालिये संग । इक मारत इक रोकत गेंदहि इक भागत करि नाना रंग ॥
 मारु परस्पर करत आपुमें अति आनंद भए मनमार्हि । खेलतहीमें श्याम सबनिको यमुनातटको
 लीन्हें जाहिं ॥ मारि भजत जो जाहि ताहि सो मारत लेत आपनो दाव । सूर श्यामके

गुणको जाने कहत और कछु और उपाव ॥ ५५ ॥ राग गौरी ॥ लैगए टारि यमुनतट ग्वालनि। आपुन
 जात कमलके काजहि सखा लिए सँग ख्यालनि ॥ जोरी मारि भजत उतहीको जात यमुनके तीर।
 इक धावत पाछे उनहीके पावत नहीं अधीर ॥ रोंगटि करत तुम खेलतहीमें परी कहा यह बानि ।
 सूर श्यामसों कहत ग्वाल सब तुमहि भले करि जानि ॥ ५६ ॥ श्याम सखाको गेंद चलाई ।
 श्रीदामा सुरि अंग वचायो गेंद परचो कालीदह जाई ॥ धाइ गह्यो तब फेंट श्यामकी देहु न मेरो
 गेंद मैगाई । और सखा जिनि मोको जानो मोसों जिनि तुम करौ ढिठाई ॥ जानि बूझि तुम गेंद
 गिरायो अब दीन्हैही बनै कन्हाई। सूर सखा सब हँसत परस्पर भली करी हरि गेंद गिराई ॥ ५७ ॥ राग सोरठा ॥
 फेंट छाँडि देहु मेरी श्रीदामा । काहेको तुम रारि बढावत तनक बातके कामा ॥ मेरो गेंद लेहु ता
 बदले बाँह गहतकत धाइ । छोटी बडो न जानत काहू करत बराबरि आइ ॥ हम काहेके तुमहि
 बराबरि बडे नंदके पूत । सूर श्याम दीन्हैही बनिहै बहुत कहावत धूत ॥ राग कल्याण ॥ तोसों कहा
 धुताई करिहौं । जहाँ करी तहँ देखी नाहीं कहा तोसों मैं लरिहौं ॥ मुँह सँभारि तू बोलत नाहीं
 कहत बराबरि बात । पावहुगे अपनो कियो अवहीं रिसन कँपावत गात ॥ सुनहु श्याम
 तुमहुं सरि नाहीं ऐसे गये बिलाइ । हमसों सतर होत सूरजप्रभु कमल देहु अब जाइ ॥
 ॥ ५८ ॥ हमहीं पर सतरात कन्हाई । प्रथमहि कमल कंसको दीजै डारहु हमहि मराई ॥
 साँच कहों मैं तुमहि श्रीदामा कमलकाज मैं आयो । कहा कंस बपुरो केहि लायक जाको मोहि
 डरायो ॥ अघा बका केशी शकटासुर तृणा शिला पर डारयो । बकी कपटकरि प्यावन आई ताको
 तुरत पछारयो ॥ कालीदह जल छुवत मेरे सब सोइ काली धरि ल्याऊँ । सूरदास प्रभु देहधरेको
 गुण प्रगटों एहि ठाऊँ ॥ ५९ ॥ राग सोरठ ॥ रिसकरि लीन्हों फेंट छँडाई । सखा सबै देखतहैं ठाढे
 आपुन चढ़े कदमपर धाई ॥ तारी दैदैं हँसत सबै मिलि श्याम गए तुम भाजि डराई । रोवत चले
 श्रीदामा घरको यशुमति आगे कैहों जाई ॥ सखा सखा कहि श्याम पुकारयो गेंद आपनो लेहु-
 न आई। सूर श्याम पीतांबर काछे कूदि परे दहमें भर्राई ॥ ६० ॥ राग गौरी ॥ हाइ हाइ करि सखनि
 पुकारयो । गेंदकाज यह करी श्रीदामा नंदमहरको ढोंटा मारयो ॥ यशुमति चली रसोंई भीतर
 तबहिं ग्वालि इक छींकी । ठठाकि रही द्वारेपर ठाढी बात नहीं कछु नीकी ॥ आइ अजिर निकसी नंद
 रानी बहुरो दोष मिटाइ । मंजारी आगे दै निकसी पुनि फिरि आँगन आइ ॥ व्याकुल भई निकसि
 गई बाहिर कहाँ धौं गयो कन्हाई । बाँयो काग दहिनो खर झूकर व्याकुल घर फिरि आई ॥ खन भी-
 तर खन बाहिर आवति खन आँगन इहि भांति। सूर श्यामको ढेरत जननी नेक नहीं मन शांति ।
 ॥ ६१ ॥ देखे नंद चले घर आवत । पैठत पौरि छींक भई बाई रोइ दाहिने धाह सुनावत ॥ फटकत
 श्रवन श्वान द्वारे पर गगरी करत लराई । माथे पर दै काग उडानो कुशगुन बहुतक पाई ॥ आए
 नंद घरहि मनमारे व्याकुल देखी नारी । सूर नंद युवतीसों बूझत विन छवि वदन निहारी ॥ ६२ ॥
 राग नटा ॥ नंद घरनिसों बूझत बात । वदन झुराय गयो क्यों तेरो कहाँ गयो बल मोहन तात ॥
 भीतर चली रसोंई कारण छींक परी तब आँगन आई । पुनि आगे ह्वै गई मंजारी और बहुत कुश-
 गुन मैं पाई ॥ मोहि भए कुशगुन घर पैठत आजु कहा यह समझि न जाई । सूर श्याम गए
 आजु कहाँ धौं बार बार बूझत नंदराई ॥ ६३ ॥ महरि महर मन गए जनाइ । खन भीतर
 खन आँगन ठाढे खन बाहर देखतहैं जाइ ॥ यहि अंतर सब सखा पुकारत रोवत आए ब्रजको
 धाइ। आतुर गए नंद घरहीको महरि महरसों बात सुनाइ ॥ चकित भई दोउ बूझन लागे कहौ

बात हमको समझाई । मूर श्याम खेलतहि कदमचढि कूदिपरे कालीदह जाई ॥ ६४ ॥ राग सौरा ॥
 सपनो प्रगट कियो कन्हाई । सोवतही निशि आज डराने हमसों यह कहि बात सुनाई ॥ धर-
 णिपरी मुरझाई यशोदा नंद गए यमुनातट धाइ । बालक सब नंदहि संग धाए ब्रज घर जहँ तहँ
 शोर मचाइ ॥ त्राहि त्राहि करि नंद पुकारत देखत ठौर गिरे भहराइ । लोटत धरणि परत जलभीतर मूर
 श्याम दुख दियो बुढ़ाइ ॥ ६५ ॥ राग गौरी ॥ ब्रजबासी यह सुनि सब आये । कहाँ परचो गिरि कुँवर कन्हाई
 बालक ले सो ठौर दिखाये ॥ मूनो गोकुल कियो श्याम तुम यह कहि लोग उठे सब रोइ । नंद
 गिरत सबहिन धरि राख्यो पोछत वदन नीर लै धोइ ॥ ब्रजबासी तब कहत नंदसों मरणभयो
 सबहीको आइ । मूर श्याम बिनुको बसिहै ब्रज धृग जीवन तिहुँ भुवन कहाइ ॥ ६६ ॥ महारि
 पुकारति कुँवर कन्हाई । माखन धरचो तिहारेहि कारण आजु कहाँ अवसर लगाई ॥ अति कोमल
 तुम्हरे मुखलायक तुम जेवहु मेरे नैन जुडाइ । धौरी दूध औटि है राख्यो अपने कर दुहि गए बनाइ ॥
 बरजति ग्वारि यशोदाकों सब यह कहि कहि नीके यदुराइ । मूर श्याम सुत विरह मातके यह वियोग
 बरण्यो नहि जाइ ॥ ६७ ॥ राग गौरी ॥ माखन खाहु लाल मेरे आई । खेलत आजु अवसर लगाई ॥
 बैठहु आइ संग दोउ भाई । तुम जेवहु मैया बलि जाई ॥ सद माखन अति हित मैं राख्यो । आजु
 नहीं नेकहु तैं चारख्यो ॥ प्रातहिते मैं दियो जगाइ । दंतवानि करि जु गए दोउ भाइ ॥ मैं बैठी तुव
 पंथ निहारों । आवहु तुम पर तनु मनु वारों ॥ ब्रज युवती सब सुनि ए बानी । रोवत धरणि परी
 अकुलानी ॥ शोकासिंधु बैठी नंदरानी । सुधि बुधि तनकी सबै भुलानी ॥ मूर श्याम लीला यह कीन्हो
 सुखके हेत जननि दुख दीन्हो ॥ ६८ ॥ राग नट ॥ चौकिपरी तनकी सुधि आई । आज कहा ब्रज
 शोर मचायो तब जान्यो दह गिरो कन्हाई ॥ पुत्र पुत्र कहिकै उठि दौरी व्याकुल यमुना तीरहि धाई । ब्रज
 वनिता सब संगहि लागीं आइ गए बल अग्रज भाई ॥ जननी व्याकुल देखि प्रबोधत धीरज करि नीके
 यदुराइ । मूर श्यामको नेक नहीं डर जिनि तू रोवै यशुमति माई ॥ ६९ ॥ राग विलावल ॥ ब्रजवासी सब उठे
 पुकारी ॥ जल भीतर कहा करत मुरारी ॥ संकटमें तुम करत सहाय ॥ अब क्यों नहीं बचावत आय ॥ माता
 पिता अतिहि दुख पावतारोइ रोइ सब कृष्ण बुलावत ॥ हलधर कहत सुनहु ब्रजवासी ॥ वै अंतर्गामी
 आविनासी ॥ मूरदास प्रभु आनंदरासी । रमासहित जलहीके वासी ॥ ७० ॥ राग मूहो । अति कोमल
 तनु धर्यो कन्हाई गए तहाँ जहाँ काली सोवत उरगनारि देखत अकुलाई ॥ कह्यो कौनको बालकहै तू
 बार बार कहि भाग न जाई ॥ छिनकहिमें जरि भस्म होयगो जब देखे उठि जागि जँभाइ ॥ उरगनारिकी
 बाणी सुनिकै आप हँसे मनमें सुसकाइ ॥ मोकों कंस पठायो देखन तू याको अब देहि जगाइ ॥ कहा कंस
 दिखरावत इनको एक फूंकहीमें जरिजाय ॥ पुनि पुनि कहत सूरके प्रभुको तू अब काहे न जाइ पराइ ७१
 राग गुंड मलार ॥ कहा डर करौं यहि फनीको बावरी ॥ कह्यो मेरो मानि छाँडि अपनी बानि अबहीं परीहै
 जानि टेक सब रावरी ॥ तोहि देखि मोहि मया अतिही भई कौनको सुवन तू कहाँ आयो । मरौ
 वह कंस निर्वैशै वाको होइ कह्यो यह कंस तोकों पठायो ॥ कंसको मारिहौ धरणि निरवारिहौ अमर
 उद्धारिहौ उरग घरनी । मूर प्रभुके वचन सुनत उरगनि कह्यो जाहि अब क्यों न मति भई मरनी ॥
 ॥ ७२ ॥ राग मारू ॥ झिरकिकै नारि दै गारि गिरिधारि तब पूछ पर लात दै अहि जगायो । उच्चै
 अकुलाई डरपाइ खगराइको देखि बालक गर्व अति बढ़ायो ॥ पूछ राखी चाँपि रिसनि काली
 काँपि देखै सब साँपि ओसान भूले । पूछ लीन्हों झटकि धरनिसों गहि पठकि फूँ कह्यो लटक
 करि क्रोध फूले ॥ करत फनघात विषजात अतुरात अति नीर जरिजात नहि गात परसै ।

(१७४)

सूरसागर ।

सूरके प्रभु श्याम लोकाभिराम विन जानि अहिराज विषज्वाल परसै ॥ ७३ ॥
 ॥ राग नटा ॥ इनको लै ब्रजलोग दिखाऊं । कमल भार इनहीपै लादौं इनको आपु जनाऊं ॥ मात पिता
 अतिही दुख पावत दरशन दै मन हरष कराऊं । कमल पठाइ देऊं नृपराजहि कालि कछो
 ब्रजऊपर धाऊं ॥ मन मन करत विचार श्याम यह अब कालीको दाँव दिखाऊं । सूरदास प्रभुकी यह
 बाणी ब्रजवासिनको दुख विसराऊं ॥ ७४ ॥ राग कान्हरो ॥ उरगनारि सब कहत परस्पर देखहु या
 बालककी बात । विषज्वाला जलं जरत यमुनको याके तन लागत नहिं तात ॥ यह कछु यंत्र
 मंत्र है जानत अतिही सुंदर कोमलगात । यह अहिराज महाविषज्वाला कितने करत सहसफन
 घाता ॥ छुअत नहीं तनु याको विष कहूँ अबलौं बच्चो पुण्य पितु मात । सूर श्याम सों दाँव बतायो
 कालीअंग लपेटत जात ॥ ७५ ॥ राग विलावल ॥ उरग लियो हरिको लपटाइ । गर्व वचन कहि कहि मुख
 भाषत मोकों नहिं जानत अहिराइ ॥ लियो लपेटि चरणते शिखलौं अति यहि मोसों करी ढिठाई ।
 चांपी पृष्ठ लुकावत अपनी युवतिनको नहिं सकत दिखाई ॥ प्रभु अंतर्दामी सब जानत अब
 डारों यह सकुच मिटाइ ॥ सूरदास प्रभु तनु विस्तारयो काली विकल भयो तब जाइ ॥ ७६ ॥ राग कान्हरो ॥
 जबहिं श्याम तनु अति विस्तारयो । पट पटात टूटत अँग जान्यो शरण शरण अहिराज पुकारयो ॥
 यह बाणी सुनतहि करुणामय तबहिं गए सकुचाई ॥ इहै वचन सुनि दुपदसुता मुख दीन्हों बसन बढ़ाई ॥
 इहै वचन गजराज सुनायो गरुड छांडि तहां धायो ॥ इहै वचन सुनि लाखागृहमें पांडव जरत वचाये ॥
 यह बाणी सहिजात न प्रभुसों ऐसे परमकृपाल ॥ सूरदास प्रभु अंगसकोरयो व्याकुल देख्यो व्याल ॥
 ॥ ७७ ॥ राग गौरी ॥ नाथत व्याल विलंब न कीन्हों । पगसों चांपि घींच बल तोरयो फोरि नाक करसों
 गहि लीन्हों ॥ कूदिचढे ताके माथेपर काली करत विचार । श्रवणन सुनी रही यह बाणी ब्रजहै
 है अवतार ॥ तेइ अवतरे आइ गोकुल में मैं जानी यह बात । अस्तुति करन लग्यो सहसोंफन धन्य
 धन्य जगतात ॥ बार बार कहि शरण पुकारयो राखि राखि गोपाल । सूरदास प्रभु कहत सकुचि
 गए शरण कहत तब व्याल ॥ ७८ ॥ राग विलावल ॥ देखि दरश मन हरष भयो । पूरण ब्रह्म सनातन
 तुमहीं ब्रज कृष्णा अवतार लयो ॥ श्रीमुख कछो अजौं लौं तुम नहिं जानो ब्रह्म अवतार । और कौन
 जो तुमसो बाँचे सहसफननिकी द्वार ॥ अनजानत अपराध किये बहु राखि शरण मोहिं लेहु ।
 सूरदास प्रभु धनि मेरे फन चरण कमल जहां देहु ॥ ७९ ॥ राग गौरी ॥ अब कीन्हों प्रभु मोहिं सनाथ ।
 कोटि कोटि कीटहु सम नहिं दरशन दिये जगतके नाथ ॥ अशरन शरन कहावतहौ तुम कहत
 सुनी भक्तनि मुखवात । ये अपराध क्षमा सब कीजै धृग मेरी बुधि कहत डरात ॥ दीनवचन सुनि
 कालीमुखते चरण धरे फन फन प्रति आप । सूर श्याम देख्यो अहि व्याकुल मुख दीनो मेटे त्रय
 ताप ॥ ८० ॥ यशुमति टेरति कुँवर कन्हैया । आगे देखि कहति बलरामहिं कहां रह्यौ तुमभैया ॥
 मेरे भैया आवत अबहीं तोहि दिखाऊं भैया । धीरज करहु नेक तुम देखहु यह सुनि लेति
 बलैया ॥ पुनि यह कहति मोहिं परबोधत धरणि गिरी मुरझैया । सूर विना सुत भइ अति व्याकुल
 मेरो बाल नन्हैया ॥ ८१ ॥ राग सारंग ॥ भरोसो कान्हको है मोहिं । सुन यशुदा कालीके भयते तू जिनि व्या-
 कुल होहि ॥ पहिले घृतना कपटकै आई स्तननिविषया पोहि । वह वैसी ज्यों प्रबल द्वै दिनके बालक मारि
 दिखावत तोहि ॥ अघा बका धेनुक तृणावर्त केसीको बल देख्यो जोहि । सात दिवस गोवर्धन
 राख्यो इंद्र गयो द्रुपु छोहि ॥ सुनि सुनि कथा नंदनंदनकी मन आयो अवरोहि । सूरदास प्रभु जो
 कहिये कछु सो आवै सब सोहि ॥ ८२ ॥ राग सारंग ॥ यमुना तोहि बह्यो क्यों भावै । तोमें कृष्णहेलुवा

खेले सो सुरत्यो नहिं आवै ॥ तेरे नीर शुची जल जो हैं खार पनार कहावै । हरि वियोग कोउ
 पाँउ न देहै को तट बेणु बजावै ॥ भरि भादैं जो राति अष्टमी सो दिन क्यों न जनावै । सूरदास
 के ऐसे ठाकुर कमलफूल लै आवै ॥ ८३ ॥ ब्रजवासी सब भए बिहाल । कान्ह कान्ह कहि कहि
 टेरतहैं व्याकुल गोपी ग्वाल ॥ अब को बसै जाइ ब्रज हरि विनु धृगजीवन नर नारी । तुमबिनु यह
 गतिभई सबनिकी कहां गए बनवारी ॥ प्रातहिते जल भीतर पैठे होन लग्यो युगयाम । कमल
 लिये सूरज प्रभु आवत सबसों कहि बलराम ॥ ८४ ॥ राग नट ॥ आवत उरग नाथे श्याम । नंद
 यशोदा गोपी गोपनि कहतहैं बलराम ॥ मोर मुकुट विशाल लोचन श्रवन कुंडल लोल । कटि
 पीतांबर भेष नटवर निरत फन प्रति डोल ॥ देव दिवि दुंदुभि बजावत सुमन गन वरषाइ । सूरश्याम
 विलोकि ब्रजजन मात पिता सुख पाइ ॥ ८५ ॥ राग नट ॥ मात पिता मन हरष बढ़ायो । मोर मुकुट
 पीतांबर काछे देख्यो अतिहि निकट जब आयो ॥ देव व्योम दुंदुभी बजावत गावत फनपर निरत श्याम ।
 ब्रजवासी सब मरत जिवाए हरषि उठीं सब वाम ॥ शोक सिंधु बहिगयो तुरतही सुखको सिंधु
 बढ़ायो । सूरदास प्रभु कंसनिकंदन कमल उरग पर ल्यायो ॥ ८६ ॥ राग कान्हरी ॥ फन फन प्रति
 निरत नंदनंदन । जल भीतर युगयाम रहे कहुँ मिट्यो नहीं तनु चंदन ॥ उहै काछनी कटिपीतां-
 बर शीश मुकुट अति सोहता मनो गिरि ऊपर मोर अनंदित देखत ब्रजजन मोहत ॥ अमर थके अमर
 ललना सँग जयजयध्वनि तिहुँलोका । सूरश्याम काली पर निरत आवत ब्रजकी बोका ॥ ८७ ॥ राग सोरठा ॥
 गोपालराइ निरत फन प्रति ऐसे । मनो गिरिवर पर बादर देखत मोर अनंदत जैसे ॥ डोलत मुकुट
 शीशपर हरिके कुंडल मंडित गंडापीत वसन दामिनि तनुघनपर तापर सुर कोदंडा ॥ उरगनारि आगे सब
 ठाढी मुख मुख अस्तुतिगावैं । सूरश्याम अपराध क्षमहु अब हम माँग्यो पति पावैं ॥ ८८ ॥ बहुत कृपा एहि
 करी गुसाई ॥ इतनी कृपा करी नहिं काहू जितने लिये राखि शरनाई ॥ कृपाकरी प्रह्लाद भक्तको दुपदसुता
 पति राखी । ग्राह मुखते गजराज छुडायो वेद पुराणन भाषी ॥ जो कछु कृपा करी कालीको सो काहू
 नहिं कीन्हों । कोटि ब्रह्मांड रोमप्रति अंगनि ते पग फन प्रति दीन्हों ॥ धरणि शीशधरि शेष गर्ब करि
 भार अधिक संभारचो । पूरण कृपा करी सूरजप्रभु पग फन फन प्रतिधारचो ॥ ८९ ॥ राग सोरठा ॥ ठाढे
 देखतहैं ब्रजवासी । कर जोरे अहिनारि विनयकरै कहत धन्य अविनासी ॥ जे पद कमल रमा उर
 राखति परसि सुरसरी आई । जे पद कमल शंभुकी संपति फन प्रति धरे कन्हारै ॥
 जे पद परसि शिलाउद्गारी पांडवगृह फिरि आए । जे पद कमल भजन महिमाते
 जनप्रह्लाद बैचाए ॥ जे पद ब्रज युवातिन सुखदायक तिहुँ भुवन धरे बावन । सूरश्याम ते पद
 फन फन प्रति निरत अहि कियो पावन ॥ ९० ॥ ऐसी कृपा करी नहिं काहू । खंभ प्रगटि प्रह्लाद
 बैचायो ऐसी कृपा न ताहू ॥ ऐसी कृपा करी नहिं गजको पाई पायदे धाए । ऐसी कृपा तबहुँ
 नहिं कीन्हों नृप बंदते छुडाए ॥ ऐसी कृपा करी नहिं तब तिय नगनसमय पति राखी । ऐसी
 कृपा करी नहिं भीषम परतिज्ञा सतभाषी ॥ पूरण कृपानंद यशुमतिको सो पूरण एहि पायो । सूर
 दास प्रभु धन्य कंस जिन तुमसों कमल मँगायो ॥ ९१ ॥ राग कान्हरी ॥ सुनहु कृपानिधि जैसी कृपा
 तुम या काली पै कीन्हो । इती बडाई कबहुँ नकैसो नहिं काहूको दीन्हों ॥ जिन पदकमल सुकृत
 जलपरस्यो अजहुँ धरे शिवशीशते पद प्रगट धरे फन फन प्रति धन्य कृपा जगदीश ॥ एक अंडको
 भार बहतहैं गर्व धरचो जिय शेष । येही भार अधिक सह्यो अपने शिर अमित अंडमय भेष ॥ सुर
 नर असुर कीट पशु पंछी सब सेवक प्रभु तेरे । सूरश्याम अपराध क्षमहु अब या अपने

जनकेरे ॥ ९२ ॥ चरणकमलबंदों जगदीश जे गोधनके संग धाए । जे पदकमल धूरि लपटानो कर
 गहिकै गोपी उर लाए ॥ जे पदकमल युधिष्ठिर पूजे राजसूय पै चलिआए । जे पदकमल पितामह
 भीषम भारत में देखनपाये ॥ जे पदकमल शंभु चतुरानन हृदयकमल अंतर राखे । जे पदकमल
 रमाउर भूषण वेद भागवत सुनि भाखे । जे पदकमल लोकपावन त्रय बलिराजाके पीठ
 धरे ॥ ते पद कमल सूरके स्वामी कालीफनपर निरत करे ॥ ९३ ॥ गिरिधर ब्रजधर मुरलीधर
 धरनीधर पीतांबर धर मुकुट धर गोप धर उरगधर । शंखधर सारंगधर चक्रधर गदाधर
 रस धरे अधर सुधाधर ॥ कंबुकंठधर कौस्तुभमणिधर बनमाला धर कालीफनप्रति
 चरणधर । सूरदासके प्रभु जगतधर भक्तधर दुष्टकंसकेश धर ॥ ९४ ॥ गरुड त्रासते जो
 ह्यां आयो।तौ प्रभु चरण कमल फन फन प्रति अपने शीश धरायो ॥ धनि ऋषि शाप दियो खंग
 पतिकों ह्यां तब रह्यो छपाइ । प्रभुवाहन डर भाजि बैच्यो अहि नातर लेतो खाइ ॥ यह सुनि कृपा
 करी नंदनंदन चरणचिह्न प्रगटाए । सूरदास प्रभु अभय ताहि करि उरग द्वीप पहुँचाए ॥ ९५ ॥
 अतिबल करि करि काली हारयो । लपट गयो सब अंग अंग प्रति निर्विष कियो सकल अल
 झारयो ॥ निरत पद पटकत फन फन प्रति बमत रुधिर नहिं जात सँभारयो । अति बलहीन
 छीन भए तेहिछन देखियतहै ज्वाला समडारयो ॥ तियविनती करुणा उपजी जिय राख्यो श्याम
 नहीं तेहि मारयो । सूरदास प्रभु प्राणदान कियो पठ्यो सिंधु वहांते टारयो ॥ ९६ ॥ खेलत खेलत
 जाइ कदम चढि झप यमुनाजल लीनो । सोवत काली जाइ जगायो फिरि भारत हरि कीनो ॥ उठि
 युवती करजोरि विनति करि श्याम दान हम दीजै । दूटत फन फाटत तनु देही दुहुँ
 दिशि कान्ह निहोरो लीजै ॥ तब अहि छाँडि दियो करुणामय मोहन मदन मुरारी । सागरवास दियो
 कालीको सूरदास बलिहारी ॥ ९७ ॥ राग कल्याण ॥ जय जय ध्वनि अमरन नभ कीन्हों ॥ धन्य धन्य जगदीश
 गुसाईं अपनो करि अहि लीन्हों ॥ अभय कियो फन चिह्न चरण धरि जानि आपनो दास । जलते
 काढ़ि कृपाकरि पठ्यो मेढि गरुडको त्रास ॥ अस्तुति करत अमरगण बहुरे गए आपने लोक । सूर
 श्याम मिलि मात पिताको दूरिकियो तनुशोक ॥ ९८ ॥ राग कान्हरो ॥ लीन्हों जननी कंठ लगाइ ॥ अंग पुल
 कित रोम गदगद सुखद अंशु बहाइ ॥ मैं तुमहिं बरजति रहैं हरि यमुनतट जिनि जाइ ॥ कह्यो मेरो कियो
 कान्ह नहिं गये खेलन धाइ ॥ कंस कमल मँगाइ पठए तात गएउ डराइ । मैं कह्यो निशिस्वप्नतोसों
 प्रगट भई सो आइ ॥ ग्वालसँग मिलि गेंद खेलत आए यमुनातीर ॥ काहू लै मोहिं डारि दीन्हों कालिया
 दह नीर ॥ यह कही तब उरग मोसों किनि पठायो तोहिं । मैं कही नृपकंस पठ्यो कमलकारण मोहिं ॥
 यह सुनत डर कमल दीन्हों मोहिं लियो पीठ चढाइ । सूर यह कहि जननि बोधी देखो तुमही
 आइ ॥ ९९ ॥ राग गौरी ॥ ब्रजवासिनसों कहत कन्हई । यमुनातीर आजु सुख कीजै यह मेरे मन
 आई ॥ गोपन सुनि अति हर्ष बढ़ायो सुखपायो नँदराई । घर घरते पकवान मँगायो ग्वालन
 दिये पठाई ॥ दधि माखन पटरसके भोजन तुरतहि ल्याए जाई । मात पिता गोपी ग्वालनको
 सूरज प्रभु सुखदाई ॥ ६०० ॥ तुरत कमल अब देहु पठाइ । सुनहु तात अब बिलम न कीजै
 कंसचढ़ै ब्रज ऊपर आइ ॥ कमल मँगाइ लिये तट ऊपर कोटि कमल तब दिये पठाइ । बहुत
 विनय करि पाती पठई नृप लीजै सब पुहुप गनाइ ॥ तैसी मोकों आज्ञा दीजै बहुत धरे जल मांझ
 सजाइ । सूरदास नृप तुव प्रतापते काली आप गयो पहुँचाइ ॥ १ ॥ राग सारंग ॥ सहस शकट भरि
 कमल चलाए । अपनी समसरि और गोप जे तिनको साथ पठाए ॥ और बहुत कांवरि माखन

दधि अहिरनकाधि जोरी । बहुत बिनती मेरी कहियो और धरे जल जामल तोरी ॥ नृपके हाथ
 पत्र यह दीजो श्याम कमल लै आयो । कोटिकमल आपुन नृप मांगे तीनि कोटिहै पायो ॥ नृपति
 हमहिं अपनो करि जानों तुम लायक हम नाहीं । सूरदास कहियो नृप आगे तुमहिं छोंडि कहां
 जाहीं ॥ २ ॥ राग गंड ॥ कमलके भार दधिभार माखनभार लिये सबग्वार नृपद्वार आए । तुरतही
 टारि गनिकारि शकटनिजोरि भये ठाढे पौरि तब सुनाए ॥ सुनत यह बात अतुरात औ डरात
 महलते निकसि नृप आपु आए । देखि दरबार सब ग्वार नाहिं कहूँपार कमलके भार शकटनि
 सजाए ॥ अतिही चकृत भयो ज्ञान हरि हरि लयो सोच मनमें ठयो कहा कीन्हों । गोप शिरमोर
 नृप ओर करजोरिकै पुहुपके काज प्रभु पत्र दीन्हों ॥ यह कह्यो नंद नृप बंद अहि इंद्रपै गयो मेरो
 नंदन तुव नाम लीन्हों । उठ्यो अकुलाइ डरपाइ तुरतहि धाइ गयो पहुँचाइ तट आइ दीन्हों ॥
 यह कह्यो श्याम बलराम लीजो नाम राजको काम यह हमहिं कीन्हों । और सब गोप आवत
 जात नृप बात कहत सूर मोहिं नहीं चीन्हों ॥ ३ ॥ राग विलावल ॥ ग्वालन हरिकी बात चलाई । यह
 सुनि कंस गयो अकुलाई ॥ तब मनही मन करत बिचार । यह कोउ भयो नहीं अवतार ॥ यासों
 मेरो नहीं उबार । मोहिं मारत मारै परिवार ॥ दैत्यगण ते बहुरि न आए । कालीते ये क्यों
 बचि आए ॥ ताही पर धरि कमल लदाए । सहस शकट भरि व्याल पठाए ॥ एक
 व्याल मैं उनहिं बताए । कोटि व्याल मम सदन चलाए ॥ ग्वालन देखि मनहिं रिस काँपै ।
 पुनि मनमें यह अटकर नापै ॥ आपहि आप नृपहिं तनु त्याग्यो । सूर देखि कमलन उठि भाग्यो ॥
 ॥ ४ ॥ राग नट ॥ भीतर लए गोप बुलाइ । हृदय दुख मुख हलभली करि ब्रजहि दिए पठाइ ॥
 नंदको शिरोपाव दीन्हों गोप सब पहिराइ । यह कह्यो बलराम श्यामहिं देखिहों दोउ भाइ ॥ अतिहि
 पुरुषारथ करे उन कमल उनहिं ल्याइ । सूरप्रभुको देखिहों मैं एक दिवस बुलाइ ॥ ५ ॥ कमल
 शकटनि भरे व्याल मानो । श्यामके वचन सुनि मनहिं मन रख्यो गुनि काठ ज्यों गयो घुनि तन
 भुलानो ॥ भयो बेहाल नंदलालके ख्याल यह उरगते बाँचि फिरि ब्रजहि आयो । कह्यो दावानलहि
 देखौं तेरे बलहि भस्मकरि ब्रजप्रलहि कहि पठायो ॥ चलयो रिसपाइ अतुराइ तब धाइके ब्रजलोग
 वनसहित मैं जारि आऊँ । नृपतिके ले पान मन कियो अभिमान करत अनुमान चहुँपास धाऊँ ॥
 वृंदावन आदि ब्रजआदि गोकुल आदि आदि बुन्यादि सब अहिर जारौं । चलयो मगजात कहि बात
 इतरात अति सूरप्रभु सहित संहारि डारौं ॥ ६ ॥ राग गंड मलार ॥ कमल पहुँचाइ सब गोप आए।गए
 यमुनातीर भई अतिहीभीर देखि नंद तीर तुरतही बोलाए ॥ दियो शिरोपाव नृपराउने महरको
 आप पहरावनी सब दिखाए । अतिहि सुखपाइकै लियो शिरनाइकै हरष नंदराइकै मन बढाए ॥
 श्याम बलरामको नाम जब हम लियो सुनत सुखकियो उन कमल ल्याइ । सूर नंदसुवन दोऊ
 एक दिवस देखिहों पुहुप लिए सुख पाए इनि बोलाए ॥ ७ ॥ राग धनाश्री ॥ यह सुनि नंद बहुत सुखें
 पाये । कमल पठाइ दये नृपलीन्हे देखनको दुहुँ सुतन बुलाये ॥ सेवा बहुत मानि है लीन्हीं ब्रजनारिन
 मन हरष बढाये । बड़ीबात भई कमल पठाए आनहु आपुन जलते ल्याये ॥ आनंद करत यमुना
 तट ब्रजजन खेलत खातहि दिवस बिहाए । एकं सुख श्याम बचे कालीते यकसुख कंसहि कमल
 चलाए ॥ हँसत कान्ह बलराम सुनत यह हमको देखन नृपति मँगाए । सूरदास प्रभु मात पिता
 हित कमल कोटिहै ब्रजहि बचाए ॥ ८ ॥ अथ कालीलीला दूसरी । राग धनाश्री ॥ नारद कही समुझाइ
 कंस नृपराजको । तब पठ्यो ब्रज दूत पुहुप एक काजको ॥ ९ ॥ तब पठ्यो ब्रजदूत

सुनी नारद मुखबानी । बार बार ऋषिकाज कंस मुख अस्तुति गानी ॥ धन्य धन्य
 सुनिराज तुम भलो मंत्र दियो मोहि । दूत चलायो तुरतही अवहि जाहि ब्रज जोहि ॥ २ ॥
 इह कहियो तू जाइ कमल नृप कोटि मँगायो । पत्र दियो लिखि हाथ कछो बहुभांति जनायो ॥
 कालि कमल नहि आवई तौ तुमको नहि चैन । शिरनवाइ करजोरिकै चलयो दूत सुनि बैन ॥ ३ ॥
 तुरत पठायो दूत नंद घरही में आयो । कमल फूलके भार कंसनृप वेगि मँगायो ॥ कालिह न पहुँचै
 आइकै तब बसियो ब्रजलोग । गोकुलमें जे सुखकिये ते करि देहौं सोग ॥ ४ ॥ जो न पठावहु पुहुप
 कहौगे तैसी मोको । यह जानहु गोपन समेत धरिल्याऊँतोको ॥ बल मोहन तेरे दोउनको पकरि मँगाऊँ
 कालि । पुहुप वेगि पठए वने जोरे बसौ ब्रजपालि ॥ ५ ॥ यह सुनि नंद डराय अतिहि मन मन अकु-
 लानो । यह कारज क्यों होइ काल अपनो करि जानो ॥ और महर सब बोलिलै कैसी करै उपाइ ।
 कालि प्रात ब्रज मारिहै बांधि सवनि लैजाइ ॥ ६ ॥ बल मोहनको नाउँ धरयो कहि पकरि मँगावन ।
 जाते अति भयो सोच लगत सुनि मोहिं डरावन ॥ यह सुनि शिरनाये सबन सुखहि न आवैबात ।
 बार बार नंद कहतहैं यह लरिकन परघात ॥ ७ ॥ की बालकनि भगाइ जाहिलै आन दैपर ।
 वरु हमको लैजाइ श्याम बलराम बचै घर ॥ महरि सबै ब्रजनारिओं कहि छूत कौन उपाइ ।
 जनमहिते करवरटरी अवके नहीं बचाउ ॥ ८ ॥ कोउ कहै दैहैं दाम नृपति जितनो धन चाहै ।
 कोउ कहै जैये शरन सबै मिलि बुधि अवगाहै ॥ यही सोच सब पगिरहे कहूँ नहीं निरवार । ब्रज
 भीतर नंदभवनमें घर घर इहै विचार ॥ ९ ॥ अंतर्दामी जानि नंदसों बूझत बात । कहा करतहो
 सोच कहौ कछु मोसों तात ॥ कहा कहौं मेरे लाडिले कहत बडो संताप । मथुरापतिके जी कछू
 तुमपर उपज्यो पाप ॥ १० ॥ कालीदहके पुहुप मांगि पठये हमसों उनि । तबते मोजिय सोच
 जवाहिं ते बात बरी सुनि ॥ जो नहिं पठवहुं कालिही तौ गोकुल देउँ लगाइ । मो समेत दोउ बंधु
 तुम कालिहि लेइ बँधाइ ॥ ११ ॥ यह कहि पठयो कंस तबहिं ते सोच परयो मोहिं । प्रथम पूतना
 आइ बहुत दुख दये जो गई तोहिं ॥ तृणावर्तके घात ते बहुत बच्यो दुखपाइ । शकटा केशीते
 बच्यो अब को करै सहाइ ॥ १२ ॥ अघा उदरते बच्यो बहुत दुख सह्यो कन्हारै ।
 बकारह्यो मुखबाइ तहां भयो धर्म सहाइ ॥ इतने करवर हैं टरे देवनकिये सहाइ । तबते
 अब गाढीपरी मोको कछु न सुहाइ ॥ १३ ॥ बाबा तुमहीं कहत कौन धौं तोहिं उबारै । सोइ
 ब्रजदेवता प्रगट कंसगहि केश पछारै ॥ यह जवहीं हरिसों सुनी नंदमनहि पतिआइ । गगन गिरत
 जो संगरह्यो सो करि लेइ सहाइ ॥ १४ ॥ नंदहि यह सुमुझाइ कान्ह उठि खेलन धाए । जहां ब्रज
 बालक बहुत तुरत तहां आपुन आए ॥ गोपसुतनिसों यह कह्यो खेलैं गेंद मँगाइ । श्रीदामा इहं
 सुनतही घरते लाये जाइ ॥ १५ ॥ सखा परस्पर मारकरैं कोउ कानि न मानै । कौन बडो को
 छोट भेद भेदा नहि जानै ॥ खेलत यमुना तट गए आपुहि ल्याए टारि । श्रीदामाके हाथते लै गेंद
 दयो दहडारि ॥ १६ ॥ श्रीदामा गहि फेंट कछो हम तुम एक जोटा । कहा भये जो नंद बडे तुम
 तिनके ढोटा ॥ खेलतमें कहा छोट बड हमहुं महरके पूत । गेंद दियेही पै वनै छांडिदेहु मद धूत ॥
 ॥ १७ ॥ तुमसों धूत्यो कहाँ करौ धूत्यो नहिं देख्यो । प्रथम पूतना मारि काग शकटासुर पेख्यो ॥
 तृणावर्त पटक्यो शिला अघा बका संहारि । तुम तादिन संगही रहे अब धूतन कहत सँभारि ॥
 ॥ १८ ॥ टेढे कहा बतात कंसको कमल देहु अब । कालिहि पठएमांगि पुहुप अब लै देहौ जब ॥
 बहुत अचगरी जिनकरौ अजहूँ तजौ झवारि । पकरि कंस लैजाइगो कालिहि परै खँभारि ॥ १९ ॥

कमल पठाऊँ कोटि कंसको दोष निवारौं । तुम देखत पुनि जाऊँ कंस जीवत धरिमारौं ॥
 फेट लियो तब झटकिकै चढे कदम पर आइ । सखा हँसत ठाढे सबै मोहन गए पराइ ॥ ६२० ॥
 श्रीदामा चले रोइ जाइ कैहौं नंद आगे । गेंद लेहु तुम आइ मोहिं डरपावन लागे ॥ यह कहि कूद
 सलिल कीन्हे नटवर साज । कोमलतनु धरिकै गए जहाँ सोवत अहिराज ॥ २१ ॥ यहि अंतर नंदघ-
 रनि कह्यौ हरि भूखे हैंहैं । खेलत ते अब आइ भूखकहि मोहिं सुनैहैं ॥ अतिआतुर भीतर चलि
 जेवन कारन आप । छीक सुनत कुशगुण कह्यो कहा भयो यह पाप ॥ २२ ॥ अजिर चली पछितात
 छींकको दोष निवारण । मंजारी गई काटि तबहिं निकसतही वारण ॥ जननी जिय व्याकुल भई
 कान्ह अवेर लगाई । कुशगुण आजु बहुत भए कुशल रहैं दोउ भाई ॥ २३ ॥ श्याम
 परे दह कूदि मात जिय गया जनाई । आतुर आए नंद घरहि बृझत दोउ भाई ॥ नंदघरनि सों
 यह कहत मोको लगत उदास । एहि अंतर हरि कहाँ गए जहाँ कालीको वास ॥ २४ ॥
 देख्यो पन्नग जाइ अतिहि निर्भय भयो सोवत । बैठि तहाँ अहिनारि डरी बालकको जोवत ॥ भागि
 भागि सुत कौनको अतिकोमल तेरो गात । एक फूकको नहीं तू विषज्वाला अति तात ॥ २५ ॥ तब
 हरि कह्यो प्रचारि नारि पति देइ जगाइ । आयो देखन बाहि कंस मोहिं दियो पठाइ ॥ कंसकोटि
 जरि जाहिगे विषकी एक फुकार । कहा कर मेरी जाहि तू अति बालक सुकुमार ॥ २६ ॥ यहि
 अंतर सब सखा जाइ ब्रजनंद सुनायो । हमसँग खेलत श्याम जाय जलमाँझ धसायो ॥ बूडि गयो
 उबरयो नहीं ताबातहिं बडि बेर । कूदि परचौ चढि कदमते खबरि न करौ सबेर ॥ २७ ॥ त्राहि
 त्राहि करि नंद सुनत दौरे यमुना तट । यशुमति सुनि यह बात चली रोवत तोरति लट ॥ ब्रज
 वासी नर नारि सब गिरत परत चले धाइ । बूझ्यो कान्ह सबनि सुनी अति व्याकुल सुरझाइ ॥
 ॥ २८ ॥ जहँ तहँ परी पुकार कान्ह बिन भए उदासी । कौन काहिसों कहै अतिहि व्याकुल
 ब्रजवासी ॥ नंद यशोदा अतिविकल परत यमुनमें धाइ । और गोप उपनंद मिलि बांह पकरि लै
 आइ ॥ २९ ॥ धेनु फिरत बिललात बच्छथन कोउ न लगावै । नंद यशोदा कहत कान्ह बिन कौन
 चरावै ॥ यह सुनि ब्रजवासी सबै परे धरणि अकुलाइ । हाइ हाइ करि कहत सब कान्ह रह्यो कहाँ
 जाइ ॥ ६३० ॥ नंदपुकारत रोइ बुढापा मोको छाधो । कछु दिन मोह लगाइ जाइ जल भीतर माधो ॥
 यह कहिकै धरणी गिरत जनु तरु काटि गिराइ । नंदघरनि तब देखकै कान्हहि टेरि बुलाइ ॥ ३१ ॥
 निदुरभए सुत आजु तातकी छोह न आवति । यह कहिकै अकुलाइ जलहि भीतर को धावति ॥
 परत धाइ यमुना सलिल गहि आनति ब्रजनारि । नेकरहौ सब मरहिंगी कोहै जीवनहारि ॥ ३२ ॥
 श्याम गयो जल बूडि वृथा जगजीवन गनको । शिरफोरति गिरिजाति अभूषण तोरति अँगको ॥
 सुरछि परी तनु सुधिगई प्राण रह्यो कहुँ जाइ । हलधर आए धाइकै जननि गई सुरछाइ ॥ ३३ ॥
 नाकभूँदि जल सींचि जननि जननी कहि टेरचौ । बार बार झकझोरि नैक हलधर तन हेरचौ ॥
 कहत उठी बलरामसों बनहि तज्यो लघुभ्रात । कान्ह तुमहिं बिन रहत नहिं तुमसों क्यों रहिजात ॥
 ॥ ३४ ॥ अब तुमहुं जिनि जाहु सखा यकदेहु पठाई । कान्हहि ल्यावै जाइ आजु अवसेर कराई ॥
 छोक पठाऊँ जोरिकै मगन सोक सरमांझ । प्रात कछु खायो नहीं भूखे हैंगई सांझ ॥ ३५ ॥ कबहुं
 कहति बनगए कबहुं कहि घरहि बतावति । कहाँ खेलतहौ लाल टेरि यह कहति बुलावति ॥
 जागि परी दुख मोहते रोवत देखे लोग । तब जान्यो हरि दह गिरयो उपज्यो बहुरि बियोग ॥ ३६ ॥
 धृग धृग नंदहि कह्यो और कितने दिन जीहौ । मरत नहीं मोहिं मारि बहुरि ब्रजवासिहौ कीहौ ॥ ऐसे

दुखसों मरन सुख मन करि देखहु ज्ञान । व्याकुल धरणी गिरि परे नंदभए बिनप्रान ॥ ३७ ॥
 हरिको अग्रजबंधु तुरतही पिता जगायो । माताको परबोधि दुहुनि धीरज धरवायो ॥ मोहिं
 दोहाई नंदकी अवहीं आवत श्याम । नाथि नाग लै आइहैं तब कहियो बलराम ॥ ३८ ॥ हलधर
 कह्यो सुनाइ नंद यशुमति ब्रजवासी । वृथा मरत केहि काज मरै क्यों वह अविनाशी ॥ आदिपुरुष
 मैं कहतहों गयो कमलके काज । गिरिधरको डर करतहौ वह देवन शिरताज ॥ ३९ ॥ वह अवि-
 नाशी आहि करौ धीरज अपने मन । काली छेदै नाक लिये आवत निरत फन ॥ कंसहि कमलपठा
 इहै काली पठवै द्रीप । एक घरी धीरज धरौ बैठो सब तरुनीप ॥ ४० ॥ वहां नागिनिसों कहत
 श्याम अहि क्यों न जगावै । बालक बालक करति कहा पति क्यों न उठावै ॥ कहा कंस कहा
 उरग यह अवहिं दिखाऊं तोहिं । दै जगाइ मैं कहतहों तू नहिं जानति मोहिं ॥ ४१ ॥ छोटे मुंह
 बड़ी बात कहत अवहीं मरिजैहै । जो चितवै करि क्रोध अरे इतनहि जरि जैहै ॥ छोह लगति तोहिं देखि
 मोहिं काको बालक आहि । खगपतिसों सरवर करी तू बपुरो को आहि ॥ ४२ ॥ बपुरा मोसों कहति
 तोहिं बपुरी करिडारों । एक लातसों चापि खसम तेरेको मारों ॥ सोवत काहु न मारिए चलिआई
 यह बात । खगपतिको मैंहीं कियो कहति कहा तू बात ॥ ४३ ॥ तुमहिं विधाता भए और कत्ता
 कोउ नाहीं । अहि मारोगे आप तनकसे तनकसी वार्हीं ॥ कहा करों कहत न बने
 अतिकोमल सुकुमार । देती अवहिं जगाइकै जरि बरि होतो छार ॥ ४४ ॥ तू धौं देहि जगाइ तोह
 दोषन कछु नाहीं । परी कहा तोहि द्वारि पाप अपने जरि जाहीं ॥ हमको बालक
 कहतिहै आप बडेकी नारि । वादति है बिनकाजही वृथा वढावति रारि ॥ ४५ ॥
 तूहीन लेहि जगाइ बहुत जो करत ढिठाई । पुनि मरिहै पछिताइ मात पित तेरे भाई ॥ अजहुं
 कह्यो करि जाहि घर मरि लेहै सुख कौन । पांच वरपकै सातको आगे तोको होन ॥ ४६ ॥
 झिरकि नारि दै गारि आपु अहि जाय जगायो । पगसों चापी पृंछ सबै अवसान भुलायो ॥ चरण
 मसकि धरणी दली उरग गयो अकुलाइ । कालीमनमें तब कही यह आयो खगराइ ॥ ४७ ॥
 देख्यो नयन उचारि तहां बालक इकठाढो । विषधर झटकी पृंछ फटकि सहसौफन काढो ॥ बार
 बार फनघातकै विषज्वालाकी झार । सहसौ फन फन फूंकै नैक न तनहि लगाय ॥ ४८ ॥ तब
 काली मन कहत पृंछ चापी एहि पगसों । अतिहि उठो अकुलाइ डरयो बाहन हरि खगसों ॥ यह
 बालक धौं कौनकौ कीन्हों युद्ध अघाइ । दाँव घाव बहुतै कियो मरत नहीं यदुराइ ॥ ४९ ॥ पुनि
 देखै हरि ओर पृंछ चापी इहि मेरी । मन मन करत विचार लेउँ याको मैं घेरी ॥ दाउँ परयो अहि
 जानिकै लियो अंग लपटाइ । काली तब गर्वितभयो प्रभु दियो दाउ बताइ ॥ ५० ॥ कहति उरगकी
 नारि गर्व अतिही करि आयो । आ इत पहुँचो बाल कालवश पगहि चलायो ॥ अहिनारिनसों
 यह कही मोहिं सम सरि कोउ नाहि । एक फूंक विष ज्वालाके जल डोंगर जरिजाहिं ॥ ५१ ॥
 गर्व वचन प्रभु सुनत तुरतही तनु विस्तारयो । हाइ हाइ करि उरग बार बारही पुकारयो ॥ शरन
 शरन अव मरतहों मैं नहिं जान्यो तोहिं । चटचटात अंग फूटही राखु राखु प्रभु मोहिं ॥ ५२ ॥
 श्रवन शरन ध्वनि सुनत लियो प्रभु तनु सकुचाइ । क्षमहु मोहि अपराध नजाने करी ढिठाइ ॥
 ब्रजै कृष्ण अवतारहो मैं जानी प्रभु आजु । बहुत किये फन घात मैं वदन दुरावत लाजु ॥ ५३ ॥
 रघ्यो जानि यहि ठौर गरुडको त्रास गोसाँई । बहुत कृपा मोहिं करी दरश दीन्हों जग साँई ॥ नाक
 जोरि फनपर चढे कृपाकरी सुरराइ ॥ फन फन प्रति प्रति चरण धरि निरत हरष बढाइ ॥ ५४ ॥

धन्य कृष्ण धनि उरग जानि जा कृपा करी हरि । धन्य धन्य दिन आजु दरशते पाप गए जरि ॥
 धन्य कंस धनि कमल ये धन्य कृष्ण अवतार । बड़ी कृपा उरगहि करी फनप्रति चरण बिहार ॥५५॥
 शेष करत जिय गर्व अंडको भार शीशधरि । ब्रह्म मुकुंद अनंत नाम को सकै पारकरि ॥ फन फन
 प्रति अति भार भरि अमित अंडमें गात । उरगनारि कर जोरिकै कहत कृष्णसों बात ॥ ५६ ॥
 देखत ब्रज नर नारि नंद यशुदा समेत सब । संकर्षणसों कहत सुनहु सुत कान्ह नहीं अब ॥ एहि
 अंतर जल कमल बिच उठो कछू अकुलाइ । रोवतते बरजे सबै मोहन अग्रज भाइ ॥ ५७ ॥ आवत
 हैं वे श्याम पुहुप काली शिरलीन्हें । मात पिता ब्रज दुखित जानि हरि दरशन दीन्हें ॥ निरत का-
 ली फननिपर देवदुंदुभी बजाइ । नटवर बधु काछे रहे सब देख्यो वह भाइ ॥ ५८ ॥ आवत देखे श्याम
 हरष कीन्हों ब्रजवासी । शोकरसिंधु बहिगयो सुखैको सिंधु प्रकाशी ॥ जलबूडत नवका मिलै ज्यों
 तनु होत अनंद । त्यों ब्रजजन हुलसे सबै आवत हैं नंदनंद ॥ ५९ ॥ सुत देखत पित मात रोम
 गदगद पुलकित भयो । उर उपज्यो आनंद प्रेमजल लोचन दुहुँ अयो ॥ देव दुंदुभी बजावहीं फन
 प्रति निरत श्याम । ब्रजवासी सब कहत हैं धन्य धन्य बलराम ॥ ६० ॥ उरगनारि कर जोरि करति
 अस्तुति मुख ठाढी गोपीजन अवलोकि रूप वह अति रति बाढी ॥ सुरअंबर ललना सहित जय ध्वनि
 मुख मुख गाइ । बड़ी कृपा एहि उरगको ऐसी काहु न पाइ ॥ ६१ ॥ कृपा करी प्रह्लाद खंभ वै प्रगट
 भए तब । कृपा करी गजराज गरुड तजि धाइ गये जब ॥ दुपदसुताको करी कृपा वसन समुद्र बढाइ ।
 नंदयशोदहि जो कृपा सोई कृपा एहि पाइ ॥ ६२ ॥ तब काली करजोरि कछो प्रभु गरुड त्रासहै मोहिं ।
 अब करिहै ते दंडवत नैन भरि देखैगे तोहिं ॥ चरण चिह्न दरशन करत गहि रहै तेरे पाइ ।
 उरग द्वीपको करि बिदा कछो करौ सुख जाइ ॥ ६३ ॥ प्रभु याने कियो कहा चरण जे फन फन
 परसे । रमा हृदय जे वसत सुरसरी शिव शिर हरसे ॥ जन्म जन्म पावन भयो फन पदचिह्न धराइ ।
 पाँइ परचो उरगिनि सहित चलयो द्वीप समुहाइ ॥ ६४ ॥ काली पठयो द्वीप सुरनि सुरलोक
 पठाए । आपुन आए निकसि कमल सब तटहि धराए ॥ जलते आए श्याम तब मिले सखा सब
 धाइ । मात पिता दोउ धाइकै लीनो कंठ लगाइ ॥ ६५ ॥ फेरि जन्म भयो कान्ह कहत लोचन भरि
 आए । जहां तहां ब्रज गोपनारि आतुर है धाए ॥ अंकम भरि भरि मिलत हैं मनो निधनी धन पाइ ।
 मिली धाइ रोहिणि जननि चूमति लेति बलाइ ॥ ६६ ॥ सखा दौरिकै मिले गये हरि हमपर रिसकरि ।
 धनि माता धनि पिता धन्य सो दिन जेहि अवतरि ॥ तुम ब्रजजीवनि प्राणहौ यह सुनि हैंसे गोपाल ।
 कूदिपरे चढि कदमते तुम खेलत ए ख्याल ॥ ६७ ॥ काली ल्याए नाथि कमल ताही पर ल्याए ।
 जैसी कहि गए श्याम प्रगट सो हमहिं दिखाए ॥ कंस मरचो निश्चय भई हम जानी ब्रजराज ।
 सिंहिनिको छौना भलो कहा बडो गजराज ॥ ६८ ॥ हरि हलधर तब मिले हैंसे मनही मन दोऊ ।
 बंधुमिलत सब कहत भेद नहिं जानै कोऊ ॥ मात पिता ब्रजलोगसों हरषि कछो नंदलाल । आजु
 रहौ बसि सब इहां मेटहु दुख जंजाल ॥ ६९ ॥ सुनि सबहिन सुख कियो आजु रहिए यमुनातट ।
 शीतल सलिल सुगंध पवन सुख तरु बंसीवट ॥ नंदघरते मिष्टान्न बहु षटरस लिए मँगाइ । महर
 गोप उपनंद जे सबको दियो बँटाइ ॥ ७० ॥ दुख कीन्हों सब दूरि तुरत सुख दियो कन्हवाई । हर्ष भयो
 ब्रजलोग कंसको डर बिसराई ॥ कमलकाज ब्रजमारतो कितने लेइ गनाई । नृप गजको अब डर
 कहां प्रगट्यो सिंह कन्हवाई ॥ ७१ ॥ नंद कछो करि गर्व कंसको कमल पठावहु । और कमल जल
 धाहु कमल कोटिकदै आवहु ॥ यह कहियो मेरी कही कमल पठाये कोटि । कोटि द्वैक जलहा

धरे यह विनती इक छोटि ॥ ७२ ॥ अपने सम जो गोप कमल तिन साथ चलाए । मन सबके
 आनंद कान्ह जलते बचि आए ॥ खेलत खात अन्हातही बासर गयो विहाइ । सूर श्याम ब्रजलोगको
 जहाँ तहाँ सुखदाइ ॥ ७३ ॥ राग सोरठ ॥ तुम जाहु बालक छाँडि यमुना स्वामिमेरो जागिहै । अंग कारो
 मुख विकारो दृष्टि परे तोहि लागिहै ॥ तुम केरि बालक युवा खेले केरि दौरत दूरियां । लेहु
 बालक हीरा पदारथ जागिहै मेरो स्वामियां ॥ ना मैं नागिन युवाकर खेले न वारे दुरत दुराइयां ।
 कंसकारण गेद खेले कमल कारण आइयां ॥ तब धाइ धायो जाइ जगायो मानौ छूटी हस्तियां ।
 सहसफल फुंकार छाँडे जाइ काली नाथियां ॥ जब कान्ह काली लेचले तब नागिन बिनवै देवहो ।
 अबके चेरी अहिवात दीजै करहि तुमरे सेवहो ॥ तब लादि पंकज बाहिर काढ्यो भयो ब्रज मन
 भावना । मथुरानगरी कृष्णराजा सूर तिनहि बधावना ॥ ७४ ॥ राग देवगंधार ॥ काली विष गंजन
 दह आए । देखि मृतक बछ बालक सब लै कटाक्ष जिवाए ॥ बहु उतपात होत गोकुलमें सविता
 रहौ भुलाइ । वडी बेरभई अजहुँ न आए गृहकृत कछु न सुहाइ ॥ नंदादिक सब गोप गोपि मिलि
 चले सकल बन धाई । दूरी जाइ उरग लपटाने प्राण तजत अकुलाई ॥ अतिगंभीर धीर
 निज जानत संकर्षणको भाइ । वश कियो नाग सूरदास प्रभु अतिआनंद न समाइ ॥
 ॥ ७५ ॥ राग कान्हरो ॥ सवै ब्रजहै यमुनाके तीर । कालीनागके फनपर निर्तत संकर्षणको बीर ॥ लाग
 मान थेई थेई करि उचटत ताल मृदंग गंभीर । प्रेम मगन गावत गण गंधर्व व्योम विमानन धीर ॥
 उरग नारि आगे भई ठाढ़ी नैननि ठारति नीर । हमको दान देइ पति छाँड़हु सुंदर श्याम शरीर ॥
 आए निकसि पहिरि मणि भूषण पीतवसन कटि चीर । सूर श्यामको भुजभरि भेंटत अंकमदेत
 अहीर ॥ ७६ ॥ सप्तदशोऽध्याय ॥ दावानलके पानकी लीला ॥ राग कान्हरो ॥ दावानल ब्रजजनपर धायो । गोकुल
 ब्रज वृंदावन तृण द्रुम चाहतहै चहुँपास जरायो ॥ घेरत आवत दशहुँ दिशाते अति कीने तनुकोध ।
 नरनारी सब देखि चकितभये दावा लग्यो चहुँ कोध ॥ बहुतौ असुर घात किये आवत धावत पवन
 समाज । सूरदास ब्रजलोग कहत इह उठ्यो दवा अति आजु ॥ ७७ ॥ आइगई दव अतिहि निकटही ।
 यह जानत अब ब्रज न बांचिहै कहत सवै चलिये जलतही ॥ करि बिचार उठि चलन चहतहै जो
 देखें चहुँ पास । चकृत भए नर नारि जहाँ तहाँ भरि भरि लेत उसाँस ॥ झरझरात भररात लपट अति
 देखिअत नहीं उबार । देखत सूर अग्नि अधिकानी नभलौ पहुँची झार ॥ ७८ ॥ दशहुँ दिशाते बरत
 दवानल आवतहै ब्रजजनपर धायो । ज्वालाउठी अकाश बराबरि घात आपने करि सब पायो ॥
 बीरा लै आयो सनमुखते आदरकरि नृपकंस पठायो । जारि करौ परलय क्षणभीतर ब्रज बपुरो
 केतिक कहवायो ॥ धरणि अकाश भयो परिपूरण नेक नहीं कहूँ संधि बचायो । सूर श्याम बलरामहि
 मारन गर्व सहित आतुर है आयो ॥ ७९ ॥ ब्रजके लोग उठे अकुलाइ । ज्वाला देखि अकाश बराबरि
 दशहुँ दिशाकहुँ पारु न पाइ ॥ झरहरात बनपात गिरत तरु धरणी तराकि तडाकि सुनाइ । जल बरषत
 गिरिवर तर बाचे अब कैसे गिरि होतु सहाइ ॥ लटक जात जरिजरि द्रुम बेली पटकत वांस
 कांस कुशताल । उचटत फर अंगार गगनलौ सूर निरखि ब्रजजन बेहाल ॥ ८० ॥ नंदधरनि यह
 कहति पुकारै । कोउ बरषत कोउ अग्नि जरावत दई परचोहै खोज हमारे ॥ तब गिरिवर कर
 धरचो कन्हैया अब न बांचिहै मारत जारे । जेवन करन चली जब भीतर छींक परी
 तिय आजु सवारे ॥ ताको फल तुरतहि एक पायो सो उबरचो भए धर्म सहारे ।
 अब सबको संहार होतहै छींक किये एक काज विचारे ॥ कैसेहु ए बालक दोउ उबरे पुनि पुनि

सोचति परी खँभारे । सूर श्याम यह कहत जननिसों रहि री माँ धीरज उरधारे ॥८१॥ राग गौड़ ॥
 भहरात झहरात दवानल आयो । घेरि चहुँ ओर करिशोर अंदोर बन धरणि आकाश चहुँपास
 छायो ॥ बरत बन बाँस थरहरत कुश कांस जरि उडतहैं बांस अतिप्रबल धायो । झपटि झपटत
 लपट पटक फूल फूटत फटि चटक लट लटक दुमन वायो ॥ अति अग्नि झार भार धुंधार करि
 उचटि अंगार झंझार छायो । बरत बन पात भहरात झहरात अरराततरु महा धरणी गिरायो ॥
 भए बेहाल सब ग्वाल ब्रजबाल तब शरन गोपाल कहिकै पुकारयो । तृणा केशी शकट बकी
 बका अघासुर वामकर गिरिराखि ज्यों उबारयो ॥ नेक धीरज करौ जियहि कोऊ जिनि डरौ कहा
 यह सुरो लोचन मुदायो । सुठी भरि लियो सब नाइ सुखही दयो मूरप्रभु पियो दावानलजन
 बचायो ॥८२॥ राग कान्हरो ॥ अबकै राखि लेउ गोपाला दशहूँ दिशाते दुसह दवागिनि उपजीहैं यहिकाल ॥
 पटकत बांस कास कुश चटकत लटकत ताल तमाल । उचटत अति अंगार फूटत फर झप
 टत लपट कराल ॥ धूम धूँधि बाढी धर अंमर चमकत विच बिच जाल । हरिण बराह मोर
 चातक पिक जरत जीव बेहाल ॥ जिनि जिय डरहु नयन मुँदहु सब हँसिबोले गोपाल । सूर
 अनल सब वदन समानी अभयकरे ब्रजबाल ॥८३॥ राग गंड ॥ दावानल अचयो ब्रजराज ब्रजजन जरत
 बचायो । धरणि आकाशलौ ज्वाल माला प्रबल घेरि चहुँ पास ब्रजवास आयो ॥ भये बेहाल
 सब देखि नंदलाल तब हँसतही ख्याल तत्काल कीन्हों । सबनि मुँदे नयन ताहि चितये सैन तृपा
 ज्यों नीर दव अचै लीन्हों ॥ लखो अव नैनभरि बुझिगई अग्निझरि चितै नर नारि आनंद भारी ॥ मूर प्रभु
 सुख दियो दवानल पीलियो कहत सब ग्वाल धनि धनि सुरारी ॥८४॥ राग विहागरोचकित देखि यह कहि नर
 नारी ॥ धरणि अकास बराबरि ज्वाला झपटत लपट करारी ॥ नहिं वरष्यो नहिं छिरक्यो काहू कहुँ धौ गयो
 विलाइ ॥ अति आघात करत वनभीतर कैसे गयो बुझाइ ॥ तृणकी आगि बरतही बुझिगई हँसि हँसि कहत
 गुपाला सुनहु सूर वह करनि कहनि यह ऐसे प्रभुके ख्याल ॥८५॥ राग विलावल ॥ जाके सदा सहाइ कन्हई
 ताहि कहो काको डर भाई ॥ वन घर जहां तहां सँग डोलैं । खेलत खात सबनिसों बोलैं ॥ जाको
 ध्यान न पावैं योगी । सो ब्रजमें माखनको भोगी ॥ जाकी माया त्रिभुवन छावैं । सो यशुमतिके प्रेम
 बधावैं ॥ सुनिजन जाको ध्यान न पावैं । ब्रजजन लैलै नाम बुलावैं ॥ सूर ताहि सुर अंमर देखैं ।
 जीवन जन्म ब्रजहिको लेखैं ॥८६॥ राग कान्हरो ॥ ब्रजवनिता सब कहति परस्पर नंदमहरको सुत बड
 वीर । देखहु धौं पुरुषारथ इनको अति कोमल तनुश्याम शरीर ॥ गयो पताल उरग गहि आन्यो
 ल्यायो तापर कमल लदाइ । कमलकाज नृप ब्रज मारतहौ कोटि जलज तेहि दिये पठाइ ॥ दावा-
 गिनि नभ धरणि बराबरि दशहूँ दिशते लीनो घेरि । नयन मुँदाइ कहा तेहि कीन्हों कहुँ नहीं
 जो देखै हेरि ॥ ए उत्पात मिटत इनहीपै कंस कहा बपुरोहैं छार । सूर श्याम अवतार बडो ब्रज
 येईहैं करता संसार ॥८७॥ राग सोरठ ॥ अति सुंदर नंद महर डिठोना । निरखि निरखि ब्रजनारि कहति
 सब ये जानत कछु टोना ॥ कपटरूपकी त्रिया निपाती तबहिं रहे अतिछौना । द्वारशिलापर पटक
 तृणाको है आयो अब पौना ॥ अघा बकासुर तबहिं सँहारयो प्रथम कियो बन गौना । सूर प्रगट
 गिरि धरयो वामकर मैं जानति बलिवौना ॥८८॥ राग मारू ॥ दावते जरत ब्रजजन उबारो पैठि जल गयो
 गहि उरग आन्यो नाथि प्रगट फन फननि प्रति चरण धारे ॥ देखैं सुनि लोक सुरलोक शिवलो-
 कके नंद यशुमति हेतु वश सुरारी । जहां तहां करत अस्तुति मुखनि देव नर धन्य शब्द तिहुँ जय भुवन
 धारी ॥ सुखकियो यमुनतट एक बासर रैन प्रातही ब्रज गये गोप नारी । सूरप्रभु श्याम बलराम नंद

धाम गयो मात पित ब्रजजनहि सुखदकारी ॥८९॥ राग रामकली॥ हरि ब्रज जनके दुख बिसरावन। कहा
 कंस करि कमल मैगाये कहा दवानल दावन॥ जल कब गिरे उरग कब नाथ्यो नहि जानत ब्रज लोग ।
 कहाँ वसे यकरैनि दिवस भरि कवहि भयो यह सोग॥ यह जानत हम ऐसेहि ब्रजमें वैसहि करत बिहार।
 सूर श्याम जननीसों मांगत माखन वारंवार ६९० अष्टादश अध्याय॥ प्रलंबवधाभिखी॥ एक दिवस प्रलंब दानव
 को लीन्हों कंस बुलाई। कह्यो जाइ मारो नंददोटा देहों बहुत बडाई॥ तेहि कहिकै आयो ब्रज भीतर करत
 बडो उतपात। नर नारी देखत सब डरपे कीन्हो हृदय संताप॥ हरि ताको दै सैन बुलायो मोपै काहेन
 आवत । तब वह दोऊ हाथ उठाये आयो हरि देखि धावत ॥ हरि दोउ हाथ पकरिकै ताके दियो दूरि
 फटकारी। गिरो धराणि पर अति विहवल होइ रह्यो न देह सँभारी॥ बहुरो उच्चो सँभारि असुर वह धायो
 निज मुख बाई। देखि भयानक रूप असुरको सुर नर गए डराई॥ चहुँघा फेरि असुर धरि पटक्यो शब्द
 उच्चो आघात । चौकि परचो कंसासुर सुनिकै भीतर चल्यो हहरात ॥ पुहुप वृष्टि करि देवन मिलि
 आनंद मोद बढाइ। ब्रजजन नंद यशोदा हरपित सूर सुमंगल गाइ ॥९१॥ राग सारंग॥ यशुमति बूझति फि-
 रति गोपालहि । सांझ कि बिरियां भई सखीरी में डरपति जंजालहि॥ जबते तृणावर्त ब्रज आयो तबते
 मोहिं जिय शंक । नैननि ओट होत पल एकौ में मन मरति अदंक॥ इहि अंतर बालक सब आये नंदहि
 करत गुहारी । सूर श्यामको आइ कौन धौं लेगयो कांधे डारी ॥ ९२ ॥ राग कान्हरो ॥ आजु कन्हैया
 बहुत बच्यो री । खेलत रह्यो घोपके बाहर कोउ आयो शिशुरूपरच्यो री ॥ मिलि गयो मनहि सखा
 की नाई ले चढाइ हरि कंध सच्यो री । धर्म सहाय होत है जहँत है श्रमकरि पूरब पुण्य बच्यो री ॥
 गगन उडाइ गयो ले श्यामहि आइ धराणि पर आपु दच्यो री । सूर श्याम अबकै बचिआये ब्रज घर
 घर सब सुखहि मच्यो री ॥ ९३ ॥ बडे भाग्य है महर महरकी । लै गयो पीठि चढाइ असुर इक
 कहा कहौं उबरनि या हरिकी ॥ नंदघरनि कुलदेव मनावति तुमहि लाज सुत घरी पहरकी । जहाँ
 तहाँ तुमहि सहाय सदा हौं जीविनि है यह श्याम शहरकी ॥ हरष भए नंद करत बधाई दानदेत
 कहा कहौं महरकी । पंच शब्द ध्वनि वाजत नाचत गावत मंगलचार चहरकी ॥ अंकम भरि भरि
 लेत श्यामको ब्रजनर नारि अतिहि मन हरपी । सूर श्याम संतन सुखदायक दुष्टनके उरशालक
 करपी ॥ ९४ ॥ राग सारंग ॥ खेलन दूरि जात कत प्यारे । जबते जन्म भयो है तेरो तबहीते इहि भांति
 ललारे ॥ कोउ आवति युवती मिस करिकै कोउ लै जात बतासकलारे । अवलगि बचे कृपा देवनकी
 बहुत गए मरि शत्रु तुम्हारे ॥ हाहा करति पाँइ तेरे लागति अब जानि जाहु दूरि भेरे प्यारे । सुनहु सूर
 यशुमति सुत बोधति बिधिके चरित सबै हैं न्यारे ॥ ९५ ॥ उन्नीसवां अध्याय॥ कल्याण कबकी टेरति कुँवर
 कन्हवाई । बालसखा सब टेरत ठाढे अरु अग्रज बलभाई ॥ दाऊजू तुम ह्यां नहि आवत करो मुखारी आई।
 माता दुहुँनि दतौनी करदैं जलझारी भरि ल्याई ॥ उत्तमबिधिसों सुख पखरायो वोदे बसन अँगोछि।
 दोउ भैया कछु करौ कलेऊ लई बलाइ कर पोंछि ॥ सद माखन दधि तुरत जमायो मधुमेवा
 मिष्टान । सूर श्याम बलराम संग मिलि रुचिकरि लागे खान ॥ ९६ ॥ राग नट ॥ चले वन धेनु
 चरावन कान्ह । गोपबालक कछु सयाने नंदके सुत नान्ह ॥ हर्षसों यशुमति पठाए श्याम मन
 आनंद । गाइ गोसुत गोप बालक मध्य श्रीनंदनंद ॥ सखा हरिको यह सिखावत छाँडि जिनि कहूं
 जाहु ॥ सघन वृंदावन अगम अति जाइ कहूं भुलाहु ॥ सूरके प्रभु हैं सत मनमें सुनतही यह बात ।
 मैं कहूं नहि संग छाडौं बनहि बहुत डेरात ॥ ९७ ॥ राग धनाश्री ॥ हेरी देत चले सब बालक । आनंद
 सहित जात हरि खेलत संग मिले पशुपालक ॥ कोउ गावत कोउ वेणु बजावत कोउ नाचत कोउ

धावत । किलकत कान्ह देखि यह कौतुक हरषि सखा उर लावत ॥ भली करी तुम मोको ल्याए
 मैया हरषि पठाए । गोधन वृंदलिये ब्रजबालक यमुनातट पहुँचाए ॥ चरति धेनु अपने अपने
 रँग अतिहि सघन वन चारो । सूर संग मिलि गाइ चरावत यशुमतिको सुत बारो ॥९८॥ देवगंधारा॥
 हुमचढि काहे न टेरौ कान्हा गइयां दूरिगई । धाई जात सबनके आगे जे वृषभान दई ॥ धेरे न चिरत
 तुम बिनु माधवजू मिलत नहीं बगदई । बिडरत फिरत सकल वनमहियां एकइ एक भई ॥
 छाँडि खेल सब दूरि जातहैं बोलौ जो सके थोक कई । सूरदास प्रभु प्रेम समुझिकै मुरली सुनत सब
 आइ गई ॥ ९९ ॥ राग मारू ॥ कहि कहि बोलत धौरी कारी । देखो धन्य भाग्य गाइनके प्रीतिकरत
 बनवारी ॥ मोटीभई चरत वृंदावन नंदकुँवरकी पाली । काहेन दूध देहिं ब्रजपोषन हस्तकमलके
 लाली ॥ बैन श्रवण सुनि गोवर्धनते तृणदीन्हों धरि चाली । तबहीं बेगि आइ सूरको प्रभुपैतै क्यों
 भजै जे पाली ॥ १०० ॥ राग कल्याण ॥ जब सब गाइ भई एक ठाई ग्वालन घरको घेरि चलाई ॥ मारग
 में तब उपजी आग । दशहू दिशा जरत सब लाग ॥ ग्वाल डरपि हरि शरणै आये । सूर राखि अब
 त्रिभुवन राये ॥ १०१ ॥ राग गौरी ॥ साँवरो मनमोहन माईदेख सखी बनते ब्रज आवत सुंदर नंदकुमार कन्हा
 ई ॥ मोरपंख शिर सुकुट बिराजत मुखमुरली सुर सुभग सोहाई । कुंडल लोल कपोलनिकी छबि
 मधुरी बोलनि बराणि न जाई ॥ लोचन ललित ललाट भ्रुकुटि बिच ताकि तिलककी रेख बनाई ।
 मानौ मर्याद उलंघि अधिक बल उमँगिचली अति सुंदरताई ॥ कुंचितकेश सुदेश बदनपर मानौ
 मधुपनि माल फिरिआई । मंदमंद मुसुकात मनौ घन दामिनि दुरि दुरि देत दिखाई ॥ शोभित
 सूर निकट नासाके अनुपम अधरनिकी अरुनाई । मानौ शुक सुरंग बिलोकि बिंबफल चाखन
 कारन चोंच चलाई ॥ २ ॥ देखौ री नंदनंदन आवत । वृंदावनते धेनु वृंदमें बेनु अधर धरे गावत ॥
 तनु घनश्याम कमलदल लोचन अंग अंग छबि पावत । सुरभी कारी गोरी धूमरी धौरी लैलै नाम
 बुलावत ॥ संग बाल गोपाल संग सब शोभित मिलि कर पत्र बजावत । सूरदास मुख निरखतही
 सुख गोपी प्रेम बढ़ावत ॥ ३ ॥ रजनीमुख बनते बने आवत भावत मंद गयंदकी लटकनि ।
 बालकवृंद विनोद हँसावत करतल लकुट धेनुकी हटकनि ॥ विकसत गोपी मनो कुमुद सर रूप
 सुधा लोचन पुट घटकनि । पूरणकला उदित मनौ उडुपति तेहि छिन विरहव्यथाकी चटकनि ॥
 लज्जितमन्मथ निरखि विमलछबि रसिकरंग भौहनकी मटकनि । मोहनलाल छबीलो गिरिधर
 सूरदास बालि नागर नटकनि ॥ ४ ॥ गौचारन ॥ राग विलावल ॥ जागिए गोपाललाल प्रगटभई हंसमाल
 मिटचो अंधकाल उठौ जननी मुख दिखाई । मुकुलित भए कमलजाल कुमुदवृंद वन बिहाल
 भेटहु जंजाल त्रिविध ताप तन नशाई ॥ ठाढे सब सखा द्वार कहत नंदके कुमार टेरेतहैं बार बार
 आइये कन्हाई । गैयनि भई बडी बार भरिभरि पै थननि भार बछरागन करै पुकार तुम बिनु यदु-
 राई ॥ ताते यह अटकपरी दुहुँनकाज सौह करी उठि आवहु क्या न हरी बोलत बलभाई । मुखते
 पट झटकि डारि चंद्रवदन दे उधारि यशुमति बलिहारि वारिजलोचन सुखदाई ॥ धेनुदुहन चले
 धाइ रोहिणी तब लै बुलाइ दोहनी मुहिं दै मँगाइ तबहीं लै आई बछरा थन दियो लगाइ दुहत बैठिकै
 कन्हाइ हँसत नंदराइ तहां मात दोउ आई ॥ दोहनि कहुं दूधधार सिखवत नंद बार बार यह छबि
 नहिं बार पार नंद घर बधाई । तब हलधर कह्यो सुनाइ गाइन बन चलौ लिवाइ मेवा लीनो मँगाइ
 विविधरस मिठाई ॥ जेंवत वलराम श्याम संतनके सुखदधाम धेनुकाज नहिं विश्राम यशुदाजल
 ल्याई । श्याम राम मुख पखारि ग्वालबाल लिये हँकारि यमुनातट मनविचारि गाइन हँकराई ॥ शृंग

(१८६)

सुरसागर ।

वेणु नादकरत मुरली मुख अधर धरत जननी मनहरत ग्वाल गावत सुरसाई ।
 वृंदावन तुरतजाइ धेनु चरति तृण अचाइ श्याम हरषपाइ निराखि सूरज बलि जाई ॥
 ॥ ५ ॥ मुरलीस्तुति ॥ राग सारंग ॥ जब हरि मुरली अधर धरत । खग मोहे मृगयूथ भुलाने
 निराखि मदन छवि छरत । पशु मोहे सुरभीहु थकीं तृणदंतहि टेक रहत ॥ शुक सनकादि
 सकल मन मोहे ध्यानिय ध्यान वहत । सूरजदास भाग्य हैं तिनके जो या सुखहि
 लहत ॥ ६ ॥ राग विहागरो ॥ कहौ कहा अंगनकी सुधि बिसरि गई। श्याम अधर मृदु सुनत मुरलिका
 चकृत नारि भई ॥ जो जैसे सो तैसे रहि गई सुख दुख क्यो न जाइ । लिखी चित्रसी सूर सो रहि गई
 एकटक पल बिसराइ ॥ ७ ॥ राग मलार ॥ सुनत वन मुरली ध्वनिकी बाजन । पपीहा गुंज कोकिल
 वन कुंजत अरु मोरनके गाजन ॥ यही शब्द सुनि अत गोकुलमें मोहन रूप विराजन । सूरदास प्रभु
 मिली राधिका अंग अंग करि साजन ॥ ८ ॥ राग मारू ॥ मेरे साँवरे जब मुरली अधर धरी ।
 सुनि ध्वनि सिद्ध समाधि तरी ॥ सुनि थके देव बिमान । सुखधू चित्र समान ॥ गृह नक्षत्र
 तजत न रास । याहीवधे ध्वनिपास ॥ सुनि आनंद उमंगिभरे । जल थलके अंचल टरे ॥
 चराचर गति विपरीति । सुनि वेनु कल्पित गीति ॥ झरना झरत पाषाण । गंधर्व मोहे कलगान ॥
 सुनि खग मृग मौन धरे । फल तृण सुधि बिसरे ॥ सुनि धेनु अति थकित रहे। तृण दंतहु नहीं गहे ॥
 बछरा न पीवै क्षीर । पंछी न मनमें धीरा। दुम बेली चपल भए । सुनि पल्लव प्रगटि नए ॥ जे विटप
 चंचल पात । ते निकटको अकुलात ॥ अंकुलित जे पुलकित गात । अनुराग नैन चुचात ॥
 सुनि चंचल पवन थके। सरिताजल चलि न सके ॥ सुनि ध्वनि चलीं ब्रजनारि । सुत देह गेह बिसारि ॥
 सुनि थकित भयो समीर । उलटो बह्यो यमुनानीर ॥ मनमोहन मदनगोपाल । तनश्याम नयन
 विशाल ॥ नव नील तनु घनश्याम । नव पीत पट अभिराम ॥ नव मुकुट नव घनदाम । लावण्यता
 कोटिक काम ॥ मनमोहन रूप धरयो । तव कामको गर्व हरयो ॥ मेरे मदन मोहन लाल । संग नागरी
 ब्रजवाला ॥ नवकुंज यमुनाकूल देखत सूरदास जन फूल ॥ ९ ॥ राग पृथ्वी ॥ तरु तमाल तरे त्रिभंगी तरुण
 कान्ह कुँवर ठाढे हैं साँवरे बरन । मोर मुकुट पीतांबर वनमाल विराजित देखत ब्रजजन मनहरन ॥
 सखा अंशपर भुज दीन्हें लीन्हें मुरली अधर मधुरतान विश्वंभरन । सूर श्याम कमलनयन कौन कौ-
 न कीन्हें वशविलोकनि श्रीगोवर्धनधरन ॥ १० ॥ राग विलावल ॥ श्याम हृदय वर मोतिन माला ॥ विथकित
 भई निराखि ब्रजवाला ॥ श्रवण थके सुनि वचन रसाला । नैन थके दर्शन नंदलाला ॥ कंबुकंठ भुज
 नैन विशाला ॥ करके उर कंचन नग जाला ॥ पल्लव हस्त मुद्रिका भ्राजै ॥ कौस्तुभमणि हृदयस्थल छाजै ॥
 रोमावली वरणि नहिं जाई । नाभिस्थलकी सुंदरताई ॥ कटि किंकिणी चंद्रमणि संयुत । पीतांबर
 कटितट छवि अद्भुत ॥ युगल जंचकी पटतर कोहै । तरुनी मन धीरजको जोहै ॥ जान जानुकी
 छवि न सँभारै । नारि निकर मन बुद्धि विचारै ॥ रत्न जटित कंचनकल नेपुर । मंदमंद गति चलत
 मधुर सुर ॥ युगल कमल पद नखमणि आभा । संतनि मन संतत यह लाभा ॥ जो जेहि अंग सो
 तहां भुलानी । सूरश्याम गति काहु न जानी ॥ ११ ॥ अध्याय २० ॥ राग गैरी ॥ नंदनंदन मुख देख्यो माई ।
 अंग अंग छवि मनहु उये रवि शशि अरु समर लजाई ॥ खंजन मीन कुरंग भृंग वारिजपर अति
 रुचिपाई । श्रुतिमंडल कुंडल विवि मकर सु विलसत सदन सदाई ॥ कंठ कपोत कीर विद्रुम पर
 दारिम कननि चुनाई । दुइ सारंग वाहन पर मुरली आई देत दोहाई ॥ मोहे थिर चर विटप बिहंगम
 व्योम बिमान थकाई । कुसमंजुलि बरषत सुर ऊपर सूरदास बलिजाई ॥ १२ ॥ राग केदारो ॥ देखि री

देखि आनंदकंद । चित चातक प्रेमघन लोचन चकोरको चंद ॥ चलित कुंडल गंड मंडल
झलक ललित कपोल । सुधासर जनु मकर क्रीडत इंदु दह दह डोल ॥ सुभग कर आनन समापै
मुरलिका एहि भाइ । मनोइनै अंभोज भाजन लेत सुधा भराइ ॥ श्यामदेह दुकूल युति छबिलसत
तुलसीमाल । ताडित घन संयोग मानो सेनिकाशुकजाल ॥ अलक अबिरल चारु हास विलास
भुकुटी भंग । सूर हरिकी निरखि शोभा भई मनसा पंग ॥ १३ ॥ राग मलार ॥ देखौ माई सुंदरताको
सागर । बुधि विवेक बल पार न पावत मगन होत मन नागरा ॥ तनु अति श्याम अगाध अंबुनिधि
कटिपट पीत तरंग । चितवत चलत अधिक रुचि उपजत भँवर परत सब अंग ॥ नैन मीन मक-
राकृत कुंडल भुजबल सुभग भुजंग मुकुतमाल मिलि मानो सुरसरि द्वैसरिता लिये संग ॥ मोर
मुकुट मणिनग आभूषण कटिकिंकिनि नखचंद्रामनु अडोल वारिधिमें बिंबित राका उडुगणवृंद ॥
वदन चंद्र मंडलकी शोभा अवलोकनि सुखदेत । जनु जलनिधि मथि प्रकट कियो शशिश्री अरु
सुधासमेत ॥ देखि स्वरूप सकल गोपीजन रही बिचारि बिचारि । तदपि सूर तरिसकी न शोभा रही
प्रेम पविहारि ॥ १४ ॥ राग भैरवी ॥ जैसी जैसी बातें करै कहत न आवै री ॥ श्यामसुंदर अति मन मन भावै री ॥
मदनमोहन मृदुबैन बजावै री । तान तरंग रसरसिक रिझावै री ॥ जंगम थावर करै थावर चलावै री ।
लहरि भुजंग तजि सन मुख आवै री ॥ व्योमजन अति गति फूल वरषावै री । कामिनि जो धीरज धैरे
सोको जो कहावै री ॥ नंदलाल ललना लालच ललचावै री । सूरदास प्रेम हरि हिये न समावै री ॥
॥ १५ ॥ राग कयाण ॥ बने विशाल हरि लोचन लोल । चितै चितै हरि चारु विलोकनि मानहुँ माँगत
हैं मन ओल ॥ अधर अनूप नासिका सुंदर कुंडल ललित सुदेश कपोल । मुख मुसकात महाछबि
लागत श्रवण सुनत सुठि मीठे बोल ॥ चितवत रहत चकोर चंद्र ज्यों नेक न पलक लगावत डोल ।
सूरदास प्रभुके वश ऐसे दासी सकल भई बिनु मोल ॥ १६ ॥ राग धनाश्री ॥ ब्रज युवती हरिचरण मनावै ।
जे पद कमल महामुनि दुर्लभ ते सपनेहु न पावै ॥ तनु त्रिभंग युग जानु एक पग ठाढे एक
दरशायो । अंकुश कुलिश वज्र ध्वज परगट तरुणी मन भरमायो ॥ वह छबि देखि रही एकटकही
यह मन करति बिचार । सूरदास मनौ अरुण कमल पर सुखमय करत विहार ॥ १७ ॥ राग विलावल ॥
देखि सखी हरि अंग अनूप । जानु युगल युग जंघ बिराजत को वरणै यह रूप ॥ लकुट लपेटि लटक
भए ठाढे एक चरण धर धारे । मनहुं नीलमणि खंभकाम रचि एक लपेटि सुधारो ॥ कबहुँ लकुटते जानू
हरिलै अपने सहज चलावत ॥ सूरदास मानहु करभाकर बारंवार डोलावत ॥ १८ ॥ राग नटनारायण ॥ कटितटि
पीत वसन सुदेष । मनहुं नवघन दामिनी तजि रही सहज सुवेष ॥ कनक मणि मेखला राजत सुभग
श्यामल अंग । मनो हंस रिसाल पंगति नारि बालक संग ॥ सुभग कटि काछनी राजत जलज केसरि
खंड । सूर प्रभु अंग निरखि माधुरि मदन तनु परचो दंड ॥ १९ ॥ राग नट ॥ तरुणी निरखि हरि प्रति
अंग । कोउ निरखि नख इंदु भूली कोउ चरण युगरंग ॥ कोऊ निरखि वपु रही थकि कोऊ निरखि
युगजानु । कोउ निरखि युग जंघ शोभा करति मन अनुमानु ॥ कोऊ निरखि कटि पीत कछनी मेखला
रुचिकारि । कोऊ निरखि हृद नाभिकी छबि डारि तनमन वारि ॥ रुचिर रोमावली हरि
की चारु उदर सुदेष । मनो अलिसेनी विराजत बनै एकहि भेष । रही एकटक नारि ठाढी करत
बुद्धिविचार । सूर आगम कियो नभते यमुन सूक्षमधार ॥ २० ॥ राजत रोम राजिव रेष ।
नील घन मनो धूमधारा रही सूक्षमशेष । निरखि सुंदर हृदयपर भृगुपद परम सलेष । मनहुं
शोभित अभ्रअंतर शंभु भूषण भेष ॥ मुक्तमाल नक्षत्र गणसम अर्धचंद्र विशेष ॥ सलज उज्ज्वल

सूरसागर ।

(१८८)

जलद मलयज प्रबल बलनि अलेश ॥ केकी कच सुरचापकी छवि दशन तडित सपेध । सूर
 प्रभु अवलोकि आतुर तजे नैन निमेष ॥ २१ ॥ राग गौरी ॥ हरि प्रति अंग नागरि निरखि । दृष्टि
 रोमावली पर रहि बनत नाहिन परखि ॥ कोऊ कहत यह काम श्रेणी कोऊ कहति नहिं योगाकोऊ
 कहति अलि बाल पंगति जुरे एक संयोग ॥ कोऊ कहति अहि काम पठयो डसै जिनि यह काहु ।
 श्याम रोमावलीकी छवि सूर नहीं निबाहु ॥ २२ ॥ राग आसावरी ॥ चतुर नारि सब कहति बिचारि ।
 रोमावली अनूप विराजति यमुनाकी अनुहारि ॥ उर कलिंदते धँसि जलधारा उदर धराणि पर
 वाह । जातिचली अति ते जलधारा नाभि हृदय अवगाह ॥ भुजादंड तट सुभग घटा घन बन
 माला तरुकुल । मोतिनमाल दुहुंघा मानो फेन लहरि रसफूल ॥ सूर श्याम रोमावलीकी छवि देखति
 करति विचारि । बुद्धि रचति तरि सकति न शोभा प्रेम विवश ब्रजनारि ॥ २३ ॥ राग कल्याण ॥ रोमावली
 रेख अतिराजत । सुक्षम शेष धूमकी धारा नवघन ऊपर ब्राजत ॥ भृगुपद रेख श्याम उर सजनी
 कहा कहाँ ज्यों छाजता मनहु मेघ भीतर शशिकी द्युतिकोटि काम तनु लाजत ॥ मुकतामाल नंदनंदन
 उर अर्ध सुधा घट कांति । तनु श्रीखंड मेघ उज्ज्वल अति देखि महाबल भांति ॥ वरही मुकुट इंद्रधनु
 मानहु तडित दशनछवि लाजत । यकटकरही विलोकि सूरप्रभु तनुकीहै कह हाजत ॥ २४ ॥ राग सारंग ॥
 मुख छवि कहाँ कहाँ लागि माई । मनो कंज परकाश प्रातही रवि शशि दोऊ जात छपाई ॥ अधरविब नासा
 ऊपर मनौं शुक चाखनको चोंचचलाई । बिकसत बदन दशन अति चमकनि दामिनि द्युति दुरदेत
 देखाई ॥ शोभित श्रीकुंडलकी डोलन मकराकृत अति श्रीबनाई । निशिदिन रटत सूरके स्वामी ब्रजव-
 निता देहें विसराई ॥ २५ ॥ राग कदगो ॥ सखीरी सुंदरता कोरंग । छिनछिनमांह परत छवि औरै कमल नयनके
 अंग ॥ परमितकरि राख्यो चाहतिहै तुमहु लागि डोलतहै संग । चलत निमेष विशेष जानियत भूलि
 भई मतिभंग ॥ श्याम शुभगके ऊपर वारों आली कोटि अनंग । सूरदास कछु कहत न आवै गिरा भई
 गतिपंग ॥ २६ ॥ राग विहागरो ॥ श्यामभुजाकी सुंदरताई । बडे विशाल जानुलों परसत एक उपमा मन
 आई ॥ मनो भुजंग गगनते उतरत अधमुख रघो झुलाई । चंदनखौरि अनूपम राजत सो छवि कही
 न जाई ॥ रत्नजटित पहुँची कर राजत अँगुरी सुंदरभारी ॥ सूर मनो फनि शिरमणि शोभित फनफनकी
 छवि न्यारी ॥ २७ ॥ राग वनाश्री ॥ गोपी तजि लाज संग श्यामरंगभूली ॥ पूरण मुखचंद्र देखि नैन कमल फूली ॥
 कीधौं नवजलद स्वाति चातक मन लाये । किधौं नारिवृंद सीप हृदय हर्ष पाये ॥ रवि छवि कुंडल निहा-
 रि पंकज विगसाने । किधौं चक्रवाक निरखि अतिही रतिमाने ॥ कीधौं मृगयूथ जुरे मुरली ध्वनि
 रीझे ॥ सूर श्याम मुख कुंडल छविके रस भीजे ॥ २८ ॥ राग सोरठ ॥ बडो निठुर बिधना यह देख्यो ।
 जबते आजु नंदनंदन छवि बारबार करि पेख्यो ॥ नख अँगुरी पग जानु जंघ कटि राचि कीन्हों निर्मान ।
 हृदयबाहु कर हस्त अंग अँग मुख सुंदर अतिबान ॥ अधर दशन रसना रस वाणी श्रवण नयन अरु
 भाल । सूर रोमप्रति लोचन देतो देखत बनै गोपाल ॥ २९ ॥ राग गजरी ॥ श्याम अंग युवती निरखि भुलानी ।
 कोउ निरखति कुंडलकी आभा यतनेहि माझ विकानी ॥ ललित कपोल निरखि कोउ अटकी शिथि-
 ल भई ज्यों पानी । देह गेहकी सुधि नहिं काहू हरषनको पछितानी ॥ कोउ निरखति रही ललित
 नासिका यह काहू नहिं जानी । कोउ निरखति अधरनकी शोभा फुरत नहीं मुख बानी ॥ कोउ च
 कृतभई दशन चमकपर चकचौंधी अकुलानी । कोउ निरखति द्युति चिबुक चारुकी सूर तरुनि
 विततानी ॥ ३० ॥ राग नट ॥ श्यामकर मुरली अतिही विराजत । परसत अधर सुधारस प्रगटत मधुर
 मधुर सूर बाजत ॥ लटकत मुकुट भौंह छवि मटकत नैन सैन अति छाजत ॥ ग्रीवनवाइ अटकि बंस

पर कोटिमदन छवि लाजत ॥ लोल कपोल झलक कुंडलकी यह उपमा कछु लागत । मानहुँ
मकर सुधारस क्रीडत आप आप अनुरागत । वृंदावन विहरत नंदनंदन ग्वालसखा सँग सोहत ।
सूरदास प्रभुकी छवि-निरखत सुर नर मुनि सब मोहत ॥ ३१ ॥ राग धनाश्री ॥ तबलगि सबै सयान
रही। जबलगि नवलकिशोरी मुरली वदन समीर बही ॥ तबहींलों अभिमान चातुरी पतिव्रत कुलहि
चही । जबलगि श्रवण रंघ्र मग मिलिकै नार्हीं इहै बही । तबलगि तरुनी तरल चंचलता बुधि बल
सकुचि रही। सूरदास जबलगि वंद ध्वनि सुनि नाहिन बनत कही ॥ ३२ ॥ राग गौरी ॥ ब्रजललना देखति गिरि-
धरको । एक एक अंग अंग पर रीझी अरुझी मुरलीधरको। मनो चित्रक्रीसी लिखि काढी सुधि नार्हीं
मन घरको । लोकलाज कुलकानि भुलानी लुब्धी श्यामसुंदरको ॥ कोउ रिसाइ कोउ कहै जाइ
कछु डरीन काहू डरको । सूरदास प्रभुसों मनमान्यो जन्म जन्म परतरको ॥ ३३ ॥ राग सारंग ॥
वंसी वन कान्ह बजावत । आइ सुनो श्रवणनि मधुरे सुर राग रागिनी ल्यावत ॥ सुरश्रुति तान
बँधान अमित अति सप्तअंतीत अनागत आवत । जनु युग जुरि वरवेष सजलमधि बदनपयोधि
अमृत उपजावत ॥ मनो गोहनी भेष धरे धर मुरली मोहन मुख मधु प्यावत । सुर नर मुनि वश
किये रागरस अधर सुधारस मदन जगावत ॥ महामनोहर नाथ सूर थिर चर मोहे मिलि मरम न पा-
वत । मानहु मूक मिठाईके गुन कहि न सकत मुख शीश डोलावत ॥ ३४ ॥ राग केदारो ॥ वंसी वनराज
आज आई रण जीति । मेढतिहै अपने बल सबहिनकी रीति ॥ बिडरे गजग्रथ शीलसैन लाज
भाजी । धूधट पट कवच कहो छूटे मान ताजी ॥ किनहुँ पति गेह तजे किनहुँ तन प्रान । किनहुन
सुख शरण पायो सुनत सुयश कान ॥ कोऊ पद परसिगए अपने अपने देश । कोऊ वरि रंक
भए हुते जे नरेश ॥ देत मदन मारुत मिलि दशौ दिशि दोहाई । सूर श्याम श्रीगोपाल वंसीवश
माई ॥ ३५ ॥ राग सारंग ॥ जबते वंसी श्रवणपरी । तबहींते मन और भयो सखि मोतन सुधि बिसरी ॥
हौं अपने अभिमान रूप योवनके गर्वभरी । नेक न कह्यो कियो सुनि सजनी वादिहि आपु ढरी ॥
बिन देखे अव श्याम मनोहर युगभरि जात घरी । सूरदास सुनु आरज पंथते कछू न चाडटरी ॥
मुरली ध्वनि श्रवन सुनि भवन रहौ नहिंपरौऐसी को चतुरनारि धीरज मन धरौ। खग मृग तरु सुर
नर मुनि शिवसमाधि ढरै। अपनी गति तजी पौन सरिताउन टरै। मोहनके मनको को अपने वश करै।
सूरदास सप्तसुरन सिंधु सुधा भरै ॥ ३६ ॥ राग कान्हरो ॥ माई री मुरली अति गर्व काहू वदति नार्हीं आजु।
हरिको मुख कमल देख पायो सुखराजु। बैठति कर पीठ ढीठ अधरछत्र छाही । चमर चिकुर राजत
तहां सुंदर सभामार्हीं ॥ यमुनाके जलहि नार्हीं जलधि जान देति । सुरपुरते सुर विमान भुवि
बुलाइ लेति ॥ स्थावर चर जंगम जहँ करति जीति अजीति। वेदकी बिधि मेढि चलति आपनेही रीति ॥
वंशीवश सकल सूर सुर नर मुनि नाग । श्रीपतिहुँ श्रीबिसारी एही अनुराग ॥ ३७ ॥ राग गौरी ॥ मुरली
मोहे कुँवर कन्हाई । अचवति अधर सुधावश कीन्ही अब हम कहा करै कहि माई ॥ सर्वसु हरयो
धरयो कबहुँ औसरहू न देति अचाई । गाजति बाजति चढी दुहूँ कर अपने शब्द न सुनत पराई ॥
जिहि तन अनल दह्यो कुल अपनो तासों कैसे होत भलाई । अब कहि मर कौन बिधि कीजै वन
की व्याधि मांझ घर आई ॥ ३८ ॥ राग मलार ॥ मुरली तऊ गुपालहि भावति । सुन री सखी यदपि
नंदनंदन नाना भांति नचावति ॥ राखत एक पाँइ ठाढ़े करि अति अधिकार जनावति । कोमल अंग
आपु आज्ञागुरु कटिटेढ़ी ह्वै आवति ॥ अति आधीन सुजान कनौडे गिरिधर नारि नवावति । आपुन
पौढि अधर सेज्यापर करपल्लवसन पदपलटावति ॥ भ्रुकुटी कुटिल कोप नासा पुट हमपर कोप कुपावति ॥

सूरप्रसन्न जानि एको छिन अधर सुशीश डोलावति॥३९॥ श्याम तुम्हारी मदन मुरलिका नकसी
 जग मोह्यो। जे सबही जीव जंतु जल थलके नाद स्वाद सब पोह्यो॥ जे तीरथ तप करे तरनिसुत पन
 गहि पीठि न दीन्ही। ता तीरथ तपके फल लैकै श्याम सुहागनि कीन्हीं ॥ धरणी धरि गोवर्धन
 राख्यो कोमल प्राण अघार। अब हरि लटकि रहत है टेढे तनक मुरलिके भार ॥ निदरि हमहि
 अधरन रस पीवत पठै दूतिका माई। सूर श्याम निकुंजते प्रगटी बपुरि सौति भई आई ॥७४०॥ सखी
 री मुरली लीजै चोर। जिन गोपाल कीन्हें अपने वश प्रीति सबनिकी तौर ॥ छिन एक चोरि फेरि
 वसुतासुर धरत न कबहुं छोरे। कबहुं कर कबहुं अधरनपर कबहुं कटिमें खोसत जोर ॥
 नाजानों कछु मेलि मोहनी राखी अंग अंभोर। सूरदास प्रभुको मन सजनी बँध्यो
 रागके डोर ॥ ४१ ॥ राग केदारी ॥ मुरली अधर सजी बल वीर। नादप्रति वनिताविमोही डर
 बिसारे चीर ॥ खग नैन मूँदि समाधि धरि ज्यों करत सुनि तपधीर। डोलति नहीं दुमलता विथकी
 मंद गंध समीर ॥ मृग धेनु तृण तजिरहे ठाढे बच्छतजि मुख क्षीर। सूर मुरली नाद सुनि थकि रह-
 त यमुनानीरा ॥ ४२ ॥ राग मलार ॥ जब मोहन मुरली अधर धरी। गृहव्यवहार थके आरजपथ चलत
 नसंकरी ॥ पदरिपु पट अटक्यों आतुरज्यों उलटत पलट मरी। शिवसुत बाहन आइ मिलेहैं मनचित
 बुद्धि हरी ॥ दुरि गए कीर कपोत मधुप पिक सारंग सुधि बिसरी ॥ उडपति विद्रुम बिंब खिसान्यो
 दामिनि अधिक डरी। निरखे श्याम पतंगसुतातट आनँद उमँगि भरी ॥ सूरदास प्रभु प्रीति परस्पर
 प्रेम प्रवाह परी ॥ ४३ ॥ अध्याय २ गोपीकावचन ॥ राग सारंग ॥ हम न भई वृंदावन रेनु। जिन चरणन डोलत नँद
 नंदन नित प्रति चारत धेनु ॥ हमते धन्य परम एहुम वन बालक बच्छ अरु धेनु। सूरसकल
 खेलत हैंसि बोलत ग्वालन संग मथि पीवत फेनु ॥ ४४ ॥ राग केदारी ॥ कहाभयो यादेव जनमते ऊँचे
 पद कह्यो ऐन। सबजीवनको इहै एक फल छिनक मीन जल करते सैन ॥ अधर मधुर पीवत
 मोहनको सवै कलंक नशाइ। अतिकठोर मणिका इनहीमें छेदि विशाल बनाइ ॥ अंतर बिन सो सदा
 देखतहै निज कुल वंश विहाइ। लिख्यो बिन अंक नहीं कछु करनी निरखत ताहि जो
 नयन लगाइ। सूरदास प्रभु बलपरसन नित कामावलि अधिकाइ ॥ ४५ ॥ राग सारंग ॥ ऐसो गुपाल
 निरखि तन मन धन वारों। नवल किशोर मधुर मूरति शोभा उर धारों ॥ अरुन तरुन कमलनैन
 मुरली कर राजै। ब्रजजन मन हरन वेन मधुर मधुर बाजै ॥ ललित त्रिभंग सोतन बनमाला सोहै।
 अति सुदेश कुसुमपाग उपमाको कोहै ॥ चरणरुनित नेपुर कटि किंकिणीकल कूजै ॥ मकराकृत
 कुंडल छवि सूर कौन पूजै ॥ ४६ ॥ सुंदर मुखकी बलि बलि जाउँ। लावनिनिधि गुणनिधि
 शोभानिधि निरखि निरखि जीवत सब गाउँ ॥ अंग अंग प्रति अमित माधुरी प्रगटित रस रुचि
 ठाउँठाउँ ॥ तामें मृदु मुसुकानि मनोहर न्याय कहत कवि मोहन नाउँ ॥ नैन सैन दैदौ जब हेरत
 तापर हों बिनमोल बिकाउँ। सूरदास प्रभु मदन मोहन छवि यह शोभा उपमा नहि पाउँ ॥
 ॥ ४७ ॥ राग सखी ॥ मैं बलिजाउँ श्याम मुख छविपर। बलि बलि जाउँ कुटिल कच बिथुरी बलि
 बलिजाउँ भुकुटि लिलाटतर ॥ बलिबलि जाउँ चारु अवलोकनि बलिहारी कुंडलकी। बलिबलि जाउँ
 नासिका सुललित बलिहारी वा छबिकी ॥ बलि बलि जाउँ अरुन अधरनकी विद्रुम बिंब लजावन।
 मैं बलिजाउँ दशन चमकनकी वारों तडित नसावन ॥ मैं बलिजाउँ ललित ठोड़ीपर बलमोति-
 नकी माल। सूर निरखि तन मन बलिहारों बलि बलि यशुमति लाल ॥ ४८ ॥ राग कान्हरो ॥ अलकन
 की छवि अलिकुल गावत। खंजन मीन मृगज लज्जितभए नैन नचावनि गतिहि न पावति ॥

मुख मुसकानि आनि उर अंतर अंबुज बुधि उपजावत । सकुचत अरु विगसित वा छबिपर अनुदिन
 जनम गवांवत ॥ पूरण नहीं सुभग श्यामलको यद्यपि जलधर ध्यावत । वसन समान होत नहीं
 हाटक अग्निज्ञापदे आवत ॥ सुकतादाम बिलोकि विलखि करि अवलि बलाक बनावत । सूरदास
 प्रभु ललित त्रिभंगी मनमथ मनहि लजावत ॥ ४९ ॥ राग मारू ॥ निगमते अगम हरि कृपा न्यारी।
 प्रीतिवश श्यामकी राइकी रंक कोऊ पुरुषकी नारि नहीं भेदकारी ॥ प्रीतिवश देवकीगर्भ लीन्हो वास
 प्रीतिके हेत ब्रज भेष कीन्हो । प्रीतिके हेतु यशुमति दियो पयपान प्रीतिके हेतु अवतार लीन्हो ॥
 प्रीतिके हेतु वनधेनु चारत कान्ह प्रीतिके हेतु नंदसुवन नामा । सूर प्रभुको प्रीतिके हेतु पाइए
 प्रीतिके हेतु दोउ श्याम श्यामा ॥ ७५० ॥ प्रीतिके वश्य एहैं सुरारी । प्रीतिके वश्य नटवर भेषधारचो
 प्रीतिवश करज गिरिराज धारी ॥ प्रीतिके वश्य ब्रजभए माखनचोर प्रीतिके वश्य दाँवरि बंधाई । प्रीतिके
 वश्य गोपी रवन प्रियानाम प्रीतिके वश्य तरु जमलमोक्षदाई ॥ प्रीतिवश नंदबंधन वरुण सदनगये
 प्रीतिके वश्य वनधाम कामी ॥ प्रीतिके वश्य प्रभु सूर त्रिभुवन विदित प्रीतिवश सदा राधिका स्वामी ॥
 ॥ रागधनाश्री ॥ दैदरी मैया दोहनी दुहिहौ मैं गैया । माखनखाये बलभयो करि नंददुहैया ॥ कजरी धुमरी
 सेंदुरी धौरी मेरी गैया । दुहिल्याऊं मैं तुरतही तू करिदैं घैया ॥ ग्वालनकी सरि दुहतहौं बूझहु
 बलभैया । सूर निरखि जननी हँसी तब लेति बलैया ॥ ५१ ॥ राग सारंग ॥ बाबा मोको दुहन सिखायो ।
 तेरे मन परतीति न आवै दुहत अँगुरियन भाव बतायो ॥ अँगुरीभाव देखि जननी तब हँसिकै
 श्यामहि कंठ लगायो । आठवर्षको कुँवरकन्हैया इतनी बुद्धि कहाँति पायो ॥ माताले दोहनी कर
 दीन्हौं जब हरि हँसत दुहनको धायो । सूर श्यामको दुहत देखि तब जननी मन अति हर्ष बढायो ॥
 राग धनाश्री ॥ जननी मथति दधि गोदुहत कन्हवाई । सखा परस्पर कहत श्यामसों हमहूँ ते तुम करत चँडाई ॥
 दुहन देहु कछु दिन अरु मोको तब करिहौ मोसम सरि आई । जबलौं एक दुहौंगे तबलौं चारि दुहौं
 तौ नंद दोहाई ॥ झूठहि करत दुहाई प्रातहि देखाहिंगे तुम्हरी अधिकाई । सूर श्याम कह्यो कालि
 दुहेंगे हमहूँ तुम मिलि होड लगाई ॥ ५२ ॥ राधायशोदाके आई राग विलावल ॥ उठी प्रातही राधिका दोहनी
 करल्याइ । महारि सुतासों तब कह्यो कहां चली अतुराइ ॥ खरिक दुहावन जाति हौं तुम्हरी सेवकाइ ।
 तुम ठकुराइन घर रहौ मोहिं चेरी पाइ ॥ रीती देखी दोहनी कत खीझत धाइ । कालि गई अबसे
 रकै ह्यां उठी रिसाइ ॥ गाइगई सब प्याइकै प्रातहि नहीं आइताकारण मैं जातिहौं अतिकरत चँडाइ ॥
 यह कहि जननी सों चली ब्रजको समुहाइ । सूर श्याम गृह द्वारही गौ करत दुहाइ ॥ ५३ ॥ राग विलावल ॥
 सुता महर वृषभानुकी नंद सदनहि आई । गृहद्वारेही अजिरमें गो दुहत कन्हवाई ॥ श्याम चितै मुख
 राधिका मनहर्ष बढाई । राधा हरिमुख देखिकै तनु सुरति भुलाई ॥ महारि देखि कीरति सुता
 तेहि लियो बुलाई । दंपतिको मुख देखिकै सूरज बलिजाई ॥ ५४ ॥ आजु राधिका भोरही यशुमति
 के आई । महारि मुदित हँसि यों कह्यो मथि भान दोहाई ॥ आयसु लै ठाढ़ी भई करनेत सुहाई ।
 रीतो माट बिलोवहीं चित जहां कन्हवाई ॥ उनके मनकी कह कहौं ज्यों दृष्टि लगाई । लेई आनो एक वृष-
 भसो गैया बिसराई ॥ नैननिमें यशुमति लखी दुहुँकी चतुराई । सूरदास दंपति दशा वरणी नहीं
 जाई ॥ ५५ ॥ महारि कह्योरी लाडिली केहि मथन सिखायो । कहां मथानी कहां माटहैं चित कहां
 लगायो ॥ अपने घर योंहीं मथै कहि प्रगट देखायो । की मेरे घर आइकै ह्यां सब बिसरायो ॥
 मथन नहीं मोहिं आवही तुम सौंह दिवायो । तेहि कारणमैं आइकै तुव बोल रखायो ॥ तब नंद
 वरनी मथि दह्यो यहि भांति बतायो । सूर निरखि मुख श्यामको तहां ध्यान लगायो ॥ ५६ ॥

राग सूर ॥ दुहत श्याम गैयां विसराई । नोआलै पगबांधि वृषभके दोहनी मांगत कुँवर कन्हई ॥
 ग्वाल एक दोहनी लै दीनी दुहौ श्याम अति करौ चंडाई । हँसत परस्पर तारी दैद आबु कहा तुम
 रहे भुलाई ॥ कहत सखा हरि सुनत नहीं सो प्यारीसों रहे चित अरुझाई । सूर श्याम राधा तन
 चितवत बडेचतुरकी गई चतुराई ॥ ५७ ॥ राग रामकली ॥ राधाएढंग हैं रीतेरेवैसे हाल मथत दधि कीन्हें
 हरिमनो लिखे चितेरे ॥ तेरो मुख देखत शशि लाजै और कह्यो क्यों बाचै । नैना तेरे जलज जितेहैं
 खंजनते अति नाचै ॥ चपलाते चमकत अति प्यारी कहा करौगी श्यामहि । सुनहु सूर ऐसेहि
 दिन खोवति काज नहीं कुछ तेरे धामहि ॥ ५८ ॥ राग गूजरी ॥ मेरो कह्यो नाहिन सुनति । तबहीत
 एकटक रहीहै कहा मनधौं गुनति ॥ अबही ते तू करति एढंग तोहिहै हौन ।
 श्यामको तू ऐसे ठगिलियै कछु न जाने जौन ॥ सुताहै वृषभानुकी री बडो उनको नाउ ।
 सूरप्रभु नंदनंदन निरखत जननि कहति सुभाउ ॥ ५९ ॥ राग म्हा ॥ प्रगटी प्रीति न रही छपाई । परी
 दृष्टि वृषभानु सुताकी दोऊ अरुझे निरवारि नजाई ॥ बछरा छोरि खरिकको दीनों आपु कान्ह
 तनु सुधि विसराई । नोवत वृषभ निकसि गैयां गई हँसत सखा कहा दुहत कन्हई ॥ चारौ नैन
 भए एकठाहर मनहीमन दोहुँ रुचि उपजाई । सूरदास स्वामी रतिनागर नागरि देखि गई नगराई ॥
 ॥ ७६० ॥ चितैबो छांडिदेरी राधा । हिलिमिलि खेलि श्यामसुंदरसों करति कामको बाधा ॥
 की बैठी रहि भवन आपने काहेको बनिआवै । मृगनयनी हरिको मनमोहति जब तू देखि दुहवै ॥
 कवहुँक करते गिरति दोहनी कवहुँक विसरत नोई । कवहुँक वृषभ दुहतहै मोहन जाजानों
 का होई ॥ कौन मंत्र जानति तू प्यारी पडि डारति हरिगात । सूर श्यामको धेनु दुहनदे कहति
 यशोदामात ॥ ६१ ॥ राग धनाश्री ॥ धेनु दुहनदे मेरे श्यामहि । जो आवै तौ सहजरूपसों बनि आवति
 बेकामहि ॥ सूधे आइ श्यामसंग खेलो बोलो बैठो यामहि धामहि ॥ ऐसेो ढंग मोहिं नहिं भावै लेउ न ताके
 नामहि ॥ घर अपने तू जाहि राधिका कहति महरि मन तामहि । सूर आइ तू करति अचगरी को
 बकही निशि यामहि ॥ ६२ ॥ राग जैतश्री ॥ बारबार तू जिनि ह्यां आवै । मैं कहा करौ सुखहि नहिं
 वरजति घरते मोहिं बोलवै ॥ मोसों कहत तोहिं बिनु देखे रहत न मेरो प्रान । छोहलगति मोको
 सुनि वाणी महरि तुम्हारी आन ॥ मुँह पावति तबहीं लौं आवति औरै लावति मोहिं । सूर समुझि
 यशुमति उरलाई हँसति कहतिहौं तोहिं ॥ ६३ ॥ राग गौरी ॥ हँसत कह्यो मैं तोसों प्यारी ॥ मनमें कछु
 विलगु जिनि मानहु मैं तेरी महतारी ॥ बहुतै दिवस आज तू आई राधा मेरे धाम । महरि बडी
 मैं सुघरि सुनीहै कछु सिखयो गृहकाम ॥ मेया जब मोहिं टहल कहत कछु खीझत बाबा वृषभान ।
 सूर महरिसों कहति राधिका मानो अतिहि अजान ॥ ६४ ॥ राग रामकली ॥ दूध दोहनी लैरी मैया ॥ दाऊ
 टेरत सुनि मैं तबलों करि विधि घैया ॥ मुरली मुकुट पीतांबरदैं मोहिं लै आई महतारी । मुकुट
 धरयो शिर कटि पीतांबर मुरली करलियो धारी ॥ राधा राधा कहि मुरलीमें खरिकहि लई बुलाई ।
 सूरदास प्रभु चतुर शिरोमणि ऐसी बुद्धि उपाई ॥ ६५ ॥ कुँवरि कह्यो मैं जाति महरिघर । प्रातहि आई
 खरिक दुहावन कहति दोहनी लैकर ॥ तब खरिकहि कोऊ ग्वाल गये नाहिं तिन कारण ब्रजआई ।
 जो देखो तौ अजिरहि बैठे गया दुहुत कन्हई ॥ तनक दोहनी तनक दुहत मोहिं देखि अधिक रुचि
 लागी ॥ तनक राधिका तनक सूरप्रभु देखि महरि अनुरागी ॥ ६६ ॥ राग गूजरी ॥ जाघर प्यारी आवत रहियो ॥
 महरि हमारी बात चलावति मिलन हमारो कहियो ॥ एक दिवसमैं गई यमुनातट तहां उन देखी आई ॥
 मोको देखि बहुत सुख पायो मिलि अंकम लपटाई ॥ यह सुनिकै चली कुँवरि राधिका मोको भई

अवार । सूरदास प्रभु मन हरिलीन्हों मोहन नंदकुमार ॥ ६७ ॥ राग गृजरी ॥ सैनै दे प्यारी लई बोलाई । खेल-
नको मिस करिकै निकसे खरि कहि गए कन्हैया ॥ यशुमतिको कहि प्यारी निकसी घरको नाउँ सुनाइ ।
कनक दोहनी लिये तहां आई जहां हलधरको भाइ ॥ तहां मिलीं सब संग सहेली कुँवरि कहां
तू आई । मातहि धेनु दुहावन आई अहिरनहीं तहां पाई ॥ तबहि गई मैं ब्रज उतावली ल्याई ग्वाल
बुलाई । सूर श्याम दुहि देन कह्यो सुनि राधागई सुसकाइ ॥ ६८ ॥ राग धनाश्री ॥ धेनु दुहन जब श्याम
बोलाई । श्रवन सुनत तहां गई राधिका मनहरिलियो कन्हैया ॥ सखी संगकी कहति परस्पर कह
यह प्रीति लगाई । यह वृषभानु पुरा ये ब्रजमें कहा दुहावन आई ॥ मुख देखत हरिको चकृत भई
तनुकी सुधि विसराई । सूरदास प्रभुके रसवश भई काम करी कठिनाई ॥ ६९ ॥ गाउँवसत एते
दिवसनिमें आजु श्याम मैं देखे । जे दिन गए बिना ब्रजनाथहि तेई वृथा करि लेखे ॥ कहिये जो कछु
होइ सयानी कहिबेको अनुमानै । सुंदर श्याम निकाईको सुख नैनाईपै जानै ॥ तबते रूप ठगोरी
लागी युग समान पल बितवति । तजि कुललाज सूरके प्रभुको फिरि फिरि मुखतन चितवति ॥
॥ ७० ॥ राग देवगंधार ॥ मोहन करते दोहनि लीनी गोपद बछरा जोरे । हाथ धेनु थन बदन त्रियातनु
छीर छाछि छल छोरे ॥ आनन रही ललितपय छोटे छाजति छबि तृण तोरे । मनहुँ निकसि निक-
लंक कलानिधि दुग्ध सिंधके बोरें ॥ दै घूँघट पट वोट नील हँसि कुँवरि मुदित मुख मोरे । मनहुँ
शरद शशिको मिलि दामिनि घेरिलियो घन घोरे ॥ यहिविधि रहसति बिलसति दंपति हेतु हिये
नहिं थोरे । सूर उमँगि आनंद सुधानिधि मनो बिलावल फोरे ॥ ७१ ॥ राग रामकली ॥ हरिसों धेनु दुहावत
प्यारी । करति मनोरथ पूरण मन वृषभानु महरकी बारी ॥ दूधधार मुख पर छबि लागति सो
उपमा अतिभारी । मानो चंद कलंकहि धोवत जहां तहां बूंद सुधारी ॥ हावभाव रस मगन ह्वै दोऊ
छबि निरखति ललिता री । गौदोहन सुखकरत सूर प्रभु तीनिहु भुवन कहां री ॥ ७२ ॥ राग मूहो ॥
तुमपै कौन दुहावै गया । लिहे रहत कर कनकदोहनी बैठतहो अधपैया ॥ अति रस कामाकि
प्रीति जानिकै आवत खरकदुहैया । इत चितवत उत धार चलावत एहि सिखयो है मैया ॥ गुप्त
प्रीति तासों कर मोहन जोहैं तेरी दैया । सूरदास प्रभु झगरो सीख्यो जोधर खसम गुसैया ॥ ७३ ॥
राग धनाश्री ॥ करिरो न्यारी हरि आपन गैया । नहिंन बसात लाल कछु तुमसों सबै ग्वाल इकठैया ॥ नहिंन
अधिक तेरे बाबाके नहिं तुम हमरे नाथ गुसैया । हम तुम जाति पांतिके एकै कहा भयो अधिकी
द्वैगैया ॥ जादिनते सबरे गोपनमें तादिनते करत लँगैया । मानीहार सूरके प्रभु सों बहुरि
न करिहो नंददुहैया ॥ ७४ ॥ राग मूहो ॥ धेनु दुहत अतिही रतिबाढी । एकधर दोहनी पहुँचावत
एकधर जहां प्यारी ठाढी ॥ मोहन करते धार चलत पय मोहनी मुख अतिही छविगाढी ।
मनो जलधर जलधार वृष्टिलघु पुनि पुनि प्रेमचंदपर बाढी ॥ सखी संगकी निरखति यह
छबि भई व्याकुल मन्मथकी डाढी । सूरदास प्रभुके वश भई सब भवनकाजते भई उचाढी ॥ ७५ ॥
॥ राग बिलावल ॥ दुहिदीनी राधाकी गैया । दोहनी नहींदेत करते हरि हाहाकरति परतिहै पैया ॥ ज्यों
ज्यों प्यारी हाहा बोलति त्यों त्यों हँसत कन्हैया । बहुरि करौ प्यारी तुम हाहा देहौं नंददुहैया ॥
तब दीनी प्यारी कर दोहनी हाहा बहुरि करैया । सूरश्याम रस हावभाव करि दीनी कुँवर पठैया ॥
॥ ७६ ॥ चलन चाहति पग चलै न घरको । छांडत बनत नहीं कैसेहू मोहन सुंदरवरको ॥ अंतर
नेक कहूं नहिं कबहूँ सकुचितहौं पुरनरको । कछुदिन जैसे तैसे खोऊँ दूरि करौ पुनि डरको ॥ मन
में यह बिचार करि सुंदरि चली आपने पुरको । सूरदास प्रभु कह्यो जाहु घर घात करयो नख

उरको ॥ राग मलार ॥ सुरि सुरि चितवति नंदगली । डग न परत ब्रजनाथसाथ बिनु विरह व्यथा
मचली ॥ बार बार मोहन मुख कारण आवत फिरि जु अली । चली पीठि दै दृष्टि फिरावति अंग
अंग आनंद रली ॥ सूरदास प्रभु पास दुहायो श्रीवृषभानु लली ॥ ७७ ॥ राग विलावल ॥ शिर दोहनी
चली लै प्यारी । फिरि चितवत हरि हँसे निरखि मुख मोहन मोहनी डारी ॥ व्याकुल भई गई
सखियनलौं ब्रजको गए कन्हवाई । और अहिर सब कहाँ तुम्हारे हरिसों धेनु दुहाई ॥ यह सुनिकै
चकृत भई प्यारी धरणि परी मुरझाई । सूरदास तब सखियन उर भरि लीनी कुँवरि उठाई ॥ ७८ ॥
क्यों री कुँवरि गिरी मुरझाई यह बाणी कहि सखियन आगे मोको कारे खाई ॥ चली लिवाइ सुता वृषभा-
नुहि घरहीतन समुहाई डारिदियो भरि दूध दोहनियां अबहीं नीके आई ॥ यह कारो सुत नंदमहरको
सब हम फूंक लगाई । सूर सखिन मुख सुनि यह बाणी तब यह बात सुनाई ७९ सारंग ॥ मोहिलई नैननि
की सैन । श्रवन सुनत सुधिबुधि बिसरी सब हो लुब्धी मोहनमुख बैन ॥ आवत हुते कुमार खरिकते
तब अनुमान कियो सखि मै न । निरखत अंग अधिक रुचि उपजी नखशिख सुंदरताको ऐन ॥
मृदु सुसकान हरचौ मनको मनि तबते तिल न रहत चित चैन । सूर श्याम यह वचन सुनायो मेरी धेनु
कही दुहि दैन ॥ ७८० ॥ राग धनाश्री ॥ सखियन मिलि राधा घर लाई । देखहु महारि सुता अप-
नीको कहूं यहि कारे खाई । हम आगे आवति यह पाछे धरणि परी भहराई । शिरते गई दोहनी
ठरि कै आपु रही मुरझाई ॥ श्याम भुअंग डस्यो हम देखत ल्यावहु गुणी बुलाई । रोवत जननि
कंठ लपटानी सूर श्याम गुनराई ॥ ८१ ॥ राग सारंग ॥ प्रात गई नीके उठि घरते । मैं बरजी कहाँ
जाति री प्यारी तब खीझी रिस झरते ॥ शीतल अंग खेदसों बूडी सोच परचो मन डरते ॥ अतिहि
हठीली कछो न मानति करति आपने बरते ॥ औरै दशा भई क्षण भीतर बोली गुणी नगरते ।
सूर गारुडी गुणकरि थाके मंत्र न लागत थरते ॥ ८२ ॥ राग नटनारायण ॥ चले सब गारुडी पछिताइ । नेकहु
नहिं मंत्र लागत समुझि काहु न जाइ ॥ बात बूझत संग सखियन कहौ हमहि बुझाइ । कहा
कहि राधा सुनायो तुम सबनिसों आइ ॥ महाविषधर श्याम अहिवर देखि सबही धाइ । फूंक ज्वा-
ला हमहुं लागी कुँवरि उर परी खाइ ॥ गिरी धरनी मुरछि तबहीं लई तुरत उठाइ । सूर प्रभुको बे-
गि ल्यावहु बडो गारुडिराइ ॥ ८३ ॥ राग आसावरी ॥ नंदसुवन गारुडी बोलावहु । कछो हमारो
सुनत न कोऊ तुरत जाहु ब्रज अब लै आवहु ॥ ऐसे गुनी नहीं त्रिभुवन कहूं हम जानत
हैं नीके । आय जाय तौ तुरत जियावहि नेक छुवतही उठिहै जीके ॥ देखौ धौ यह बात हमारी एक
हि मंत्र जियावै । नंदमहरको सुत सूरजप्रभु जो कैसेहुं करि ह्यालौं आवै ॥ ८४ ॥ राग आसावरी ॥ डसी री
माई श्याम भुअंगम कारे । मोहन मुख सुसकानि मनहुं विष जाते मरे सो मारे ॥ फुरै न मंत्र यंत्र
दइ नाहीं चले गुणी गुण डारै । प्रेम प्रीति विष हिरदै लागी डारतहै तनु जारै ॥ निर्विष होत नहीं कै
सेहु करि बहुत गुणी पचि हारे । सूर श्याम गारुडी बिना को सो शिर गाडू टारै ॥ ८५ ॥ राग धनाश्री ॥
वेगि चलो पिय कुँवर कन्हवाई । जा कारण तुम यह वन सेयो सो त्रिय मदनभुअंगम खाई ॥
नैन शिथिल शीतल नासापुट अंग तपति कछु सुधि न रहाई । सकसकात तनु भीजि पसीना
उलटि पलटि तन तोरि जँभाई ॥ विन देखे मूरतिको जित तित उठि दौरी जिनि जहां बताई ।
ताहि कछु उपचार न लागत कर मीजै सहचरि पछिताई ॥ बार बार बूझतिहै ऐसे कमल नयनकी
सुंदरताई । जोपै सूर जिवायो चाहत तौ ताको अब देहु देखाई ॥ ८६ ॥ राग नट ॥ सुनत तुम्हारी
बातें मोहन बुझचलै दोऊ नैन । छुटिगई लोकलाज आतुरता रहि न सकति चित चैन ॥ उर कांप्यो

तनु पुलकि पसीज्यो बिसरिगई मुख बैन । ठाढीहै जैसे तैसे धुकि परी धरणि तिहि ऐन ॥ कोउ शिरगहि कोउ कमल कुंकुमा कोउ धाई जल लैन । ताहि कछु उपचार न लागै डसी कठिन अहि मैन ॥ हों पठई एक सखी सयानी अब बोली दै सैन । सूर श्याम राधिका मिले बिनु कहा लागे दुखदैन ॥ ८७ ॥ राग केदारो ॥ भरि भरि लेत लोचन नीर । तुम बिना ब्रजनाथ सुंदरि विरह खेद अधीर ॥ कमल उरपर धरत छिनु छिनु छिरकि चंदन चीर । जालमग शशि किरिन रोकित मलय मंद समीर ॥ हों जु तुम्हरे पास पठई देखि मनसिज भीर । सूरदास सुजान श्रीपति मिलि हरहु तनु पीर ॥ ८८ ॥ राग सारंग ॥ तनु विष रघोहै बहु छहरि । नंदसुअन अति गारुडी कहतहैं पठवै धौं महरि ॥ गए अवसान भीर नहिं भावै भावै नहिं चहरि । ल्यावो गुणी जाइ गोविंदको बाढीहै अति लहरि ॥ देखी उरही बिचही खाई मातीहै जहरि । सूर श्याम विषहर कहूँ खाई यह कहि चली डहरि ॥ ८९ ॥ राग सुघराई ॥ वृषभानुकी घरनी यशोमति पुकारयो । पठै सुतकाज मैं कहतिहों लाजतजि पाँइ परिकै महरि करति आरयो ॥ प्रात खरि कहि गई आय विह्वल भई राधिका कुँअरि कहूँ डस्यो कारो । सुनी यह बात मैं आइ अतुरात ह्यां गारुडी बडोहै सुत तुम्हारो ॥ यह बडो धर्म नंदघरनि तुम पाइहौ नेक कोहे न सुतको हँकारो । सूर सुनि महरि यह कहिउठी सहजही कहा तुम कहति मेरो अतिहि बारो ॥ ९० ॥ कान्हहि पठै महरि कहति पाँइन परि । आनु कहूँ कोरे काहु खाईहै काम कुँवरि ॥ सब दिन आवै जाइ जहां तहां फेरि फिरि । अबहीं खरि कहि गई आईहै जिय बिसरि ॥ निशिके उनींदे नैनां तैसे रहे टरि टरि ॥ किधौं कहूँ प्यारीको तटकी लागी नजरि । तेरो सुत गारुडी सुत्योहै बातरी महरि । सूरदास प्रभु देखे जैहै री गरल झरि ॥ ९१ ॥ राग आसावरी ॥ यंत्र मंत्र कहाकरि जाने मेरो । यह तुम जाइ गुणिनको बूझहु बिन कारण कत करत हो झेरो ॥ आठ बरषको कुँवर कन्हआई कहा कहत तुम ताहि । किन बहकाइ दर्दहै तुमको ताहि पकरि लै जाहि ॥ मैतो चकृतभई हों सुनिकै अति अचरज यह बात । सूर श्याम गारुडी कहाँको कहआई बित तात ॥ ९२ ॥ राग ढोडी ॥ महरि गारुडी कुँवर कन्हआई । एक बिटिनियां कारे खाई ताको श्याम तुरतही ज्याई । बोलिलेहु अपने ढोटाको तुम कहिकै नेक देहु पठाई । कुँवरि राधिका प्रात खरि कहि गई तहां कहूँ धौं कारे खाई । यह सुनि महरि मनहि सुसकानी अबहि रही मेरे गृह आई । सूर श्याम राधहि कछु कारण यशुमति समुझि रही अरगाई ॥ ९३ ॥ राग आसावरी ॥ तब हरिको टेरति नंदरानी । भली भई सुत भयो गारुडी आजु सुनी श्रवणन यह बानी ॥ जननी टेर सुनत हरि आए कहा कहति री मैया । कीरति महरि बुलावन आई जाहु न कुँवर कन्हैया ॥ कहूँ राधिका कारे खाई जाहु न आवहु झारी । यंत्र मंत्र कछु जानतहौ तुम सूर श्याम बनवारी ॥ ९४ ॥ राग गूजरी ॥ मैया एक मंत्र मोहिं आवै । विषहर खाइ मरै जो कोऊ मोसों मरन न पावै ॥ एक दिवस राधा सँग आई खरि बिटिनियां और । तहां ताहि विषहरने खाई गिरी धरणि वहि ठौर ॥ यह वाणी वृषभानु घरनि कहि यशुमति तब पतिआई । सूर श्याम मेरो बडो गारुडी राधा ज्यावहु जाई ॥ ९५ ॥ ॥ राग सुघराई ॥ यशोमति कह्यो सुत जाहु कन्हआई । कुँवरि जिवाये अतिहि भलाई ॥ आजुहि मेरे गृह खेलन आई । जात कहूँ कोरे तेहि खाई ॥ कीरति महरि लिवावन आई । जाहु न श्याम करहु अतुराई ॥ सूर श्यामको चली लिवाई । गई वृषभानु पुरहि समुहाई ॥ ९६ ॥ राग देवगंधार ॥ हरि गारुडी तहां तब आए । यह बानी वृषभानु सुता सुनि मन मन मन अति हर्ष बढाए ॥ धन्य धन्य आपुनको कीन्हों अतिहि गई मुरझाइ । तनु पुलकित रोमांच प्रगट भए आनंद अंशुबहाइ ॥ विह्वल देखि जननि

(१९६)

सूरसागर ।

भई व्याकुल अंग विष गए समाइ । सूर श्याम प्यारी दोउ जानत अंतरगतिकी भाइ १७॥ रागरामकली ॥
 रोवति महारि फिरति बिततानी । बार बार लै कंठ लगावति अतिहि शिथिल भई पानी ॥ नंद
 सुवन के पाँइ परी लै दौरि महारि तब आइ । व्याकुल भई लाडिली मेरी मोहन देहु जिवाइ ॥ कछु
 पढिपढ़ि करि अंग परसकरि विष अपनो लियो झारि । सूरदास प्रभु बडे गारुडी शिरपर गाड़
 डारि ॥ १८ ॥ लोचन दियो कुँवरि उधारि । कुँवरि देख्यो नंदको तब सकुचि अंग
 सँभारि ॥ बात बूझति जननिसों री कहाँ है यह आजु । मरतते तू बची प्यारी करति है कहा
 लाजु ॥ तब कहति तोहिँ कारे खाई कछु न रही सुधि गात । सूर प्रभु तोहिँ ज्याइ लीन्ही
 की कुँवरिसों नात ॥ १९ ॥ राग सांग ॥ बडो मंत्र कियो कुँवर कन्हई । बार बार लै कंठ
 लगायो मुख चूम्यो दियो घरहि पठाई ॥ धन्य कोखि वह महारि यशोमति जहां अव-
 तरचो यह सुत आइ । ऐसो चरित तुरतही कीन्हों कुँवरि हमारी मरी जिवाइ ॥ मनही मन अनु-
 मान कियो यह विधना जोरी भली बनाइ । सूरदास प्रभु बडे गारुडी ब्रज घर घर यह घेर चलाइ ॥
 ॥ ८०० ॥ राग सुधराई ॥ भले भलेहो भले कान्ह विषही उतारो ॥ आजुते गारुडी नाव प्रगट्यो तिहारो ॥
 जननि कहति मेरो सुत बारौ युवती कहति हम तन धौं निहारौ ॥ अब कौनि करै सांझ सबारो ॥ जान्यो
 ब्रज वसत कठिन ऐसो कारो सुतवारो ॥ युवती कहति हम तन धौं निहारो । अब कौनि करै सांझ
 सबारो ॥ जान्यो ब्रज वसत कठिन ऐसो कारो । यह निजु मंत्र जनि जियते विसारो ॥ बहुरि कारो
 कहु करैगो पसारो । सूरदास प्रभु सबहिन प्यारो ॥ ताहीको डसत जाको हियो है उज्यारो ॥ १ ॥
 राग रामकली ॥ नीके विषहि उतारचो श्याम । बडे गारुडी अब हम जाने संगहि रहत सुकाम ॥ ऐसो
 मंत्र कहाँ तुम पायो बहुत कियो यह काम । मरी आनि राधिका जिवाई टेरत एकहि नाम ॥ हम
 समझी यह बात तुम्हारी जाहु आपने धाम । सूर श्याम मनमोहन नागर हैंसि वश कीन्हों वाम ॥ २ ॥
 हैंसि वश कीन्हों घोषकुमारी । बिबश भई तनुकी सुधि बिसरी मन हरिलियो सुरारी ॥ गए श्याम
 ब्रज धाम आपने युवती मदनशर मारी । लहरि उतारि राधिका शिरते दई तरुनिनपै डारि ॥
 करत विचार सुंदरी सब मिलि अब सेवहु त्रिपुरारी । मांगहु इहै देहु पति हमको सूर शरन बनवारी ॥
 ॥ ३ ॥ अध्याय ॥ १२ ॥ चीरहरनलीला ॥ राग जयतश्री ॥ भवन रवन सबहै विसरायो ॥ नंदनंदन जबते मन हरि
 लियो कहति वृथा यह जनम गँवायो । जप तप व्रत संयम साधनते प्रगट होत पाषाण । जैसेहि
 मिले श्याम सुंदर वर सोइ कीजै नहिँ आन ॥ इहै मंत्र दृढ कह्यो सबन मिलि याते होइ सु होई वृथा
 जन्म जगमें जिनि खोवहु इहां अपनो नहिँ कोई ॥ तब परतीति सबनिके आई कीन्हों दृढ विश्वास ।
 सूर श्याम सुंदर पति पावैं इहै हमारे आश ॥ ४ ॥ राग आसावरी ॥ गौरीपति पूजति ब्रजनारि । नेम
 धर्मसों रहति क्रिया युत बहुत करति मनुहारि ॥ इहै कहति पति देह उमापति गिरिधर नंद कुमार ।
 शरनराखिलेवहु शिवशंकर तनहि नशावतमार ॥ कमल पुहुपमा तूल पत्र फल नाना सुमन सुवास ।
 महादेव पूजति मन वच क्रम करि सूर श्यामकी आंस ॥ ५ ॥ राग रामकली ॥ शिवसों विनय करति
 कुमारि । जोरि कर मुख करति अस्तुति बडे प्रभु त्रिपुरारि ॥ शीत भीत न करत सुंदरि कृश भई
 सुकुमारि । छहौ ऋतु तप करति नीके गृहको नेह विंसारि ॥ ध्यानधरि करजोरि लोचन मूँदि
 एक एक याम । विनय अंचल छोरि रविसों करति है सब वाम ॥ हमहिँ होहु कृपालु दिनमणि
 तुम विदित संसार । काम अति तनु दहत दीजै सूर श्याम भर्तार ॥ ६ ॥ राग नटनारायण ॥ रविसों
 विनय करति कर जोरैं । प्रभु अंतर्दामी यह जानी हम कारण जप तप जल खोरैं ॥ प्रगट भए

प्रभु जलही भीतर देखि सबनको प्रेम । मीडत पीठि सबनिकी पाछे पूरण कीन्हे नेम ॥ फिरि
 देखै तो कुँवर कन्हाई रुचिसों मीजत पीठि । सूर निरखि सकुचीं ब्रज युवती परी श्यामतनु डीठि ॥
 ॥ ७ ॥ राग देवगंधार ॥ अति तप देखि कृपा हरि कीन्हों । तनुकी जरनि दूरिभई सबकी मिलि
 तरुणिन सुख दीन्हों ॥ नवलकिशोर ध्यान युवती मन ऊँहै प्रगट दिखायो । सकुचि गई अँग बसन
 सँभारति भयो सबनि मनभायो ॥ मन मन कहति भयो तप पूरण आनंद उर न समाई । सूरदास
 प्रभु लाज न आवति युवतिन माँझ कन्हाई ॥ ८ ॥ राग सारंग ॥ हँसत श्याम ब्रजघरको भागे । लोग
 नको यह कहति सुनावति मोहन करन लँगरई लागे ॥ हम अस्नान करत जलभीतर आपुन मीजत
 पीठि कन्हाई । कहा भयो जो नंदमहरसुत हमसों करत अधिक ढीठाई ॥ लरिकई तबहींलों नीकी
 चारि वरष की पांच । सूर जाइ कहिहैं यशुमति सों श्याम करत ए नाच ॥ ९ ॥ प्रेम विवश सब
 ग्वालि भई उरहन दैन चलीं यशुमतिको मनमोहनके रूप रई ॥ पुलकि अंग अँगिया उर दरकी हार
 तोरि कर आपु लई । अंचल चीर घात नख उर करि यहि मिष करि नँदसदन गई ॥ यशोमति
 माई कहा सुत सिखयो हमको जैसे हाल कियो । चोली फारि हार गहि तोरयो देखो उर नखघात
 दियो ॥ आंचर चीर अभूषण तोरे घेरि धरत उठि भागि गयो । सूर महारि मन कहति श्याम
 धौं ऐसे लायक कबहिं भयो ॥ ८१० ॥ राग गौरी ॥ महारि श्यामको बरजति काहि न । ऐसे हाल किये
 हरि हमको भई कहूं जग आहिन ॥ और वात एक सुनहुं श्यामकी अतिहि भएहैं ढीठ । वसन बिना
 अस्नान करति हम आपुन मीजत पीठ ॥ आपु कहति मेरो सुत वारो हियो उचारि दिखायो ।
 सुनतहु लाज कहतहु न आवै तुमको कहा लजायो ॥ यह बाणी युवतिन मुख सुनिकै हँसि बोली
 नँदरानी । सूर श्याम तुम लायक नाहीं बात तुम्हारी जानी ॥ ११ ॥ राग गौरी ॥ बात कहौ सो लहे
 वहै री । बिना भीति तुम चित्र लिखतिहौ सो कैसे निबहै री ॥ तुम चाहतहौ गगन तुरैया मांगे कैसे
 पावहु । आवतही मैं तुम लखि लीन्ही कहि मोहिं कहा सुनावहु ॥ चोरीरही छिनारो अब भई जान्यो
 ज्ञान तुम्हारो । औरै गोप सुतन नहि देखौ सूर श्याम है बारो ॥ १२ ॥ राग मलार ॥ ग्वालनि घरहीकी
 बाढी । निशि दिन देखत अपनही आँगन ठाढी ॥ कबहिं गुपाल कंचुकी फारी कब मैं ऐसे योग ।
 अबहीं संग खेलन सीखे यह जानत सब लोग ॥ नितही झगरतहैं मनमोहन मूरति देखि प्रेमरस
 चाखी । सूरदास प्रभु अटक न मानत ग्वाल सबहैं साखी ॥ १३ ॥ राग गौरी ॥ यहि अंतरं हरि आइ
 गए । मोर मुकुट पीतांबर काछे अतिकोमल छवि अंग भए ॥ जननि बुलाइ बाँह गहि लीन्ही
 देखहु री मदमाती । इनहीको अपराध लगावति कहा फिरत इतराती ॥ सुनिहैं लोग मष्ट अबहुं
 करि तुमहि कहाँकी लाज । सूर श्याम मेरो माखन भोगी तुम आवति बे काज ॥ १४ ॥ राग केदारो ॥ अबहीं
 देखे नवल किशोर । घर आवतही तनक भये हैं ऐसे तनके चोर ॥ कछु दिन करि दधि माखन चोरी
 अब चोरत मन मोर । विवश भई तनु सुधि न सँभारति कहत बात भई मोर ॥ यह बाणी कहतही
 लजानी समुझि भई जिय ओर । सूर श्याम मुख निरखि चली घर आनंद लोचन लोर ॥ १५ ॥
 राग नटनारायण ॥ ब्रज घर गई गोपकुमारि । नेकहुं कहूं मन न लागत कामधाम बिसारि ॥ मात पितको
 डर न मानत सुनत नाहिन गारि । हठ करति विरुझाति तब जिय जननि जानत वारि ॥ प्रातही उठि
 चलीं सब मिलि यमुनातट सुकुमारि । सूर प्रभु ब्रत देखि इनको नहिन परत सँभारि ॥ १६ ॥
 राग गौरी ॥ यमुनातट देखे नंदनंदन । मोर मुकुट मकराकृत कुंडल पीत वसन मनुचंदन ॥ लोचन तृप्त
 भए दर्शनते उरकी तपति बुझानी । प्रेममगन तब भई सुंदरी उर गद गद सुखवानी ॥ कमल

नयन तटपर हैं ठाढ़े सकुचहिं मिलि ब्रजनारी । सूरदास प्रभु अंतर्दामी ब्रजपूरण पगधारी ॥ १७ ॥
 राग नट ॥ बनत नहीं यमुनाको ऐवो ॥ सुंदर श्याम घाटपर ठाढ़े कहौ कौन बिधिजैवो ॥ कैसे बसन उतारि
 धरैं हम कैसे जलहि समैवो । नंदनंदन हमको देखैगे कैसे करि जो अन्हैवो ॥ चोली चीर हार लै
 भाजत सो कैसे करि पैवो । अंकम भरि भरि लेत सूर प्रभु कालि न एहिपथ ऐवो ॥ राग रामकली ॥
 कैसे बनै यमुना अस्नानानंदको सुत तीर बैठो बडो चतुर सुजाना ॥ हार तोरै चीर फारै नयन चलै चुरा-
 इ । कालि धोखे कान्ह मेरी पीठि मीजै आइ ॥ कहति युवती बात सुनि सब थकित भई ब्रजनारी । सूर
 प्रभुको ध्यान धर मन रविहि बांह पसारि ॥ १८ ॥ राग गूजरी ॥ अति तप करति घोषकुमारि ।
 कृष्णपति हम तुरत पावैं कामआतुर नारि ॥ नैनमूंदति दरश कारण श्रवण शब्द विचारि । भुजा
 जोरति अंक भरि हरि ध्यान उर अँकवारि ॥ शरद ग्रीष्म डरति नार्हीं करति तपु तनुगारि ।
 सूर प्रभु सर्वज्ञ स्वामी देखि रीझे भारि ॥ १९ ॥ राग धनाश्री ॥ ब्रजवनिता रविको करजोरैं । शीत भीत
 नार्हीं करति छहौं ऋतु त्रिविधकाल यमुनाजल खोरैं ॥ गौरीपति पूजति तप साधति करति रहति
 नित नेमू । भोग रहित निशि जागि चतुर्दशि यशुमति सुतके प्रेमू ॥ हमको देहु कृष्णपति
 ईश्वर और नहीं मन आन । मनसा बाचा कर्मणा हमरे सूर श्यामको ध्यान ॥ ८२० ॥ नीके तप
 कियो तनुगारि । आपु देखत कदमपर चढ़ि मानि लई मुरारि ॥ वर्षभरि व्रतनेम संयम श्रम कियो
 मोहिंकाज । कैसेहु मोहिं भजै कोऊ मोहिं बिरदकी लाज ॥ धन्य व्रत इन कियो पूरण शीततपनि
 निवारि । कामआतुर भजैं मोकों नवतरुनि ब्रजनारि ॥ कृपानाथ कृपालु मय तब जानि जनकी पीर ।
 सूरप्रभु अनुमान कीन्हों हरों इनको चीरा ॥ २१ राग विलावल ॥ बसन हरे सब कदम चढाये । सोरह सहस गोप
 कन्यनके अंग अभूषन सहित चोराये ॥ अति विस्तार नीपतरु तामें लैलै जहां तहां लपटाये । मणि आ-
 भरन डार डारन प्रति देखत छवि मनही अटकाए ॥ नीलांबर पाटंबर सारी श्वेत पीत चूनरी अरु
 नाए । सूरश्याम युवतिन व्रत पूरणकोकल कदमडार फललाए ॥ २२ ॥ राग भुगही ॥ आपु कदम चढ़ि देखत
 श्याम । बसन अभूषन सब हरि लीन्हे विनावसन जलभीतर बाम ॥ मूंदत नयन ध्यान धरि हरि
 को अंतर्दामी लीन्हों जान । बारबार सवितासों मांगैं हम पावैं पति सुंदरश्याम ॥ जलते निकसि
 आइ तट देख्यो भूषण चीर तहां कछु नार्हि । इत उत हेरि चकृतभई सुंदरि सकुचिगई फिरि जलही
 माहि ॥ नाभिं प्रयंत नीरमें ठाढ़ीं थरथर अंग कैपति सुकुमारि । को लैगयो बसन आभूषण सूरश्याम
 उर प्रीति विचारि ॥ २३ ॥ आवहु निकसि घोषकुमारि । कदमपरते दरश दीन्हों गिरिधरन बनवारि ॥
 नैन भरि व्रतफलहि देख्यो फरचोहै द्रुमडार । व्रत तुम्हारो भयो पूरण कह्यो नंद कुमार ॥
 सलिलते सब निकसि आवहु वृथा सहत तुषार । देतहौं किन लेउ मोसों चीर चोली हार ॥ बाँहें
 टेकि विनयकरौं मोहि कहत बारंवार । सूरप्रभु कह्यो मेरे आगे आनि करहु शृंगार ॥ २४ ॥
 राग रामकली ॥ ग्वालिन अपनो चीर लै री ॥ जलते निकसि निकसि तट द्वौ कर जोरि शीश दै री ॥ कतहै
 शीत सहति ब्रजसुंदरि व्रतपूरण भै री । मेरे कहे आइ पहिरौ पट कृशतनु हेम जरै री ॥ हौं अंतर्दामी
 जानत सब अति यह पैज करै री । करिहौं पूरणकाम तुम्हारो शरद रास टेरी ॥ संतत सूर स्वभाव
 हमारो कत भय काम डरी । कवनेहुं भाव भजै कोऊ हमको तिन तनु ताप हरै री ॥ २५ ॥ हमारो
 अंबर देहु मुरारी । लै सब चीर कदम चढ़ि बैठे हम जल मांझ उचारी ॥ तुमतौ कहावत हौं नंदनंदन
 हम वृषभानु दुलारी । तुम्हरो तौ अंबर जवहीं दैहौं जलते निकसि होहु सब न्यारी ॥ तटपर बिना
 बसन क्यों आवैं लाज लगतिहै भारी । चोली हार तुमहिंको दीन्हों चीर हमहिं देहु डारी ॥ तुम

याही बात अचंभव भाषत नांगी आवहु नारी । सूर श्याम कछु छोह करौ नूशीत गई तन मारी ॥
 ॥ २६ ॥ राग आसावरी ॥ हाहा करति घोषकुमारि । शीतते तन कँपत थर थर वसन देहु मुरारि ॥ मनहि
 मन अतिही भयो सुख देखिकै गिरिधारि । जो पुरुष स्त्री अंग देखै कहत दोषहै भारि ॥ निकनहिं तुम
 छोह आवत गई हिम सब मारि ॥ सूर प्रभु अतिही निठुरहो नंदसुत बनवारि ॥ २७ ॥ राग विलावल ॥ लाज
 ओट यह दूरि करौ । जोइ मैं कहौ करौ तुम सोई सकुच बापुरेहि कहा करौ ॥ जलते तीर आइ
 कर जोरहु मैं देखौं तुम विनयकरौ । पूरण ब्रत अब भयो तुम्हारो गुरुजन शंका दूरि करौ ॥ अब
 अंतर मोसों जिन राखौ बार बार हठ वृथा करौ । सूर श्याम कह चीर देतहौं मो आगे शृंगार करौ ॥
 ॥ २८ ॥ जलते निकसि तीर सब आवहु । जैसे सवितासों कर जोरें तैसेहि जोरि देखावहु ॥ नव
 वाला हम तरुन कान्ह तुम कैसे अंग दिखावैं । जलहीमें सब बाँह टेकि कै देखहु श्याम रिझावैं ॥ ऐसे
 नहिं रीझौ मैं तुमको तटही बाँह उठावहु । सूरदास प्रभु कहत हार चोली वस्त्र तब पावहु ॥ २९ ॥
 राग विलावल ॥ हमारो देहु मनोहर चीर । कांपत शीत तनहि अति व्यापत हिम सम यमुनानीर ॥ मान
 हिंगी उपकार रावरो करो कृपा बलबीर । अतिही दुखित प्राण वपु परसत प्रबल प्रचंड समीर ॥
 हम दासी तुम नाथ हमारे विनवाति जलमें ठाढी ॥ मानहुं बिकसि कुमोदिनि शशिसों अधिक प्रीति
 उर बाढी ॥ जो तुम हमें नाथ कै जान्यो यह मांगे हम देहु । जलते निकसि आइ बाहेर ह्वै वसन आपने लेहु ॥
 कर धरि शीश गई हरि सन्मुख मनमें करि आनंद ॥ कृपालु सूरज प्रभु अंबर दीने परमानंद ८३० ॥
 राग जैतश्री ॥ तरुनी निकसि निकसि तट आई । पुनि पुनि कहत लेहु पट भूषण युवती श्याम बुलाई ॥ जलते
 निकसि भई सब ठाढी कर अँग ऊपर दीन्हे । वसन देहु आभूषन राखहु हाहा पुनि पुनि कीन्हे ॥
 ऐसे कहावतावतिहौं मोहिं बाहें उठाय निहारो । करसों कहा अँग उर मूंदौ मेरे कहे उवारौ ॥
 सूर श्याम सोई हम करिहै जोइ जोइ तुम सब कैहौ ॥ लेहैं दाउँ कबहुँ हम तुमसों बहुरि कहां तुम जैहौ ॥
 ॥ ३१ ॥ रागरामकली ॥ ललना तुम ऐसे लाड़ लड़ाए । लैकर चीर कदमपर बैठे किहिं ऐसे ढंग लाए ॥
 हाहा करति कंचुकी मांगति अंबर दिए मन भाए । कीनी प्रीति प्रगट मिलिबेकी अँखियन शर्म
 गनाए ॥ दुख अरु हाँसी सुनहु सखी री कान्ह अचानक आए । सूरदासके प्रभुको मिलनो अब
 कैसे दुरत दुराए ॥ ३२ ॥ राग नट ॥ सोरहसहस घोषकुमारि । देखि सबको श्याम रीझे रंही भुजा पसारि ।
 बोलि लीन्हों कदमके तर इहां आवहु नारि । प्रगट भए तहां सबनिको हरि काम द्वंद्व निवारि ॥
 बसन भूषन सबन पहिरे हरषभै सुकुमारि । सूरप्रभु गुण भलेहैं ऐसे तुम बनवारि ॥
 ॥ ३३ ॥ दृढव्रत कियो मेरे हेत । धन्य धन्य कहि नंदनंदन जाहु सबै निकेत ॥
 करौ पूरण काम तुम्हरो शरद रास रमाइ । हरषभई यह सुनत गोपी रहीं शीश नवाइ ॥ सबनिको
 अँग परस कीन्हो ब्रत कियो तनु गारि । सूर प्रभु सुख दियो मिलिकै ब्रज चलीं सुकुमारि ॥ ३४ ॥
 ॥ राग सही ॥ ब्रत पूरण कियो नंदकुमार । युवतिनके भेटे जंजारा ॥ जप तप करि अब तन जिनि गारो ।
 तुम घरनी मैं भर्ता तुम्हारो ॥ अंतर शोच दूरि करि डारहु । मेरो कह्यो सत्य उर धारहु ॥ शरद रास
 तुम आश पुरावहु । अंकम भरि सबको उर लावहु ॥ यह सुनि सब मन हर्ष बढ़ायो । मन मन कह्यो
 कृष्ण पति पायो ॥ जाहु सबै घर घोषकुमारी । शरदरास देहौं सुख भारी ॥ सूर श्याम प्रगटे गिरिधारि ॥
 आनंद सहित गई घर नारी ॥ ३५ ॥ राग आसावरी ॥ शिवशंकर हमको फल दीन्हों । पुहुप पान नाना
 रसमेवा पटरस अर्पण लैलै कीन्हों ॥ पाँइ घरी युवती सब यह कहि धन्य धन्य त्रिपुरारी । तुरतहि फल
 पूरन हम पायो नंदसुवन गिरिधारी ॥ विनय करति सविता तुमसरि को पय अंजलि कर जोरि ।

सूर श्याम पति तुमते पायो यह कहि घरहि बहोरि ॥ ३६ ॥ अथ वत्सरनलीला दूसरी ॥ राग सूही ॥
 नैदंनंदन वर गिरिधर धारी । देखत रीझी घोषकुमारी ॥ मोर मुकुट पीतांबर काछे । आवत देखे
 गाइन पाछे ॥ कोटि इंदुछवि वदन बिराजै । निरखि अंग प्रति मन्मथ लाजै ॥ रवि शत छवि
 कुंडल नहिं तुलै । दशन दमक धुति दामिनि भूलै ॥ नैन कमल मृगशावक मोहै । शुकनासा
 पटतरको कोहै ॥ अधर बिंब फल पटतर नाहीं । विद्रुम अरु बंधूक लजाहीं ॥ देखत रीझि रही
 ब्रजनारी । देह गेहकी सुरति विसारी ॥ यह मनमें अनुमान कियो तब । जप तप संयम प्रेम करौं
 अब ॥ बारबार सविताहि मनावति । नैदंनंदन पति देहु सुनावति ॥ नेम धर्म तप साधन कीजै ।
 शिवसों मांगि कृष्णपति दीजै ॥ वरष दिवसको नेम लियो सब । रुद्रहि सेवहु मन वच क्रम अब ॥
 दृढविश्वास व्रतहिको कीन्हों । गौरीपति पूजन मन दीन्हों ॥ षट दश सहस जुरीं सुकुमारी ।
 व्रतसाधत नीके तनु गारी ॥ प्रात उठे यमुनाजल खोरे । शीत उष्ण कहुँ अंग न मोरे ॥ पतिके हेत
 नेम तप साधैं । शंकरसों यह कहि अवराधैं ॥ कमल पत्र मातूल चढावैं । नयन सूँदि यह ध्यान लगावैं ॥
 हमको पति दीजै गिरिधारी । बडे देव तुमहौ त्रिपुरारी ॥ और कछु नाहिं तुमसों मांगों ।
 कृष्णहेतु यह कहि पालागों । ऐसेहि करत बहुत दिन बीते । प्रभु अंतर्दामी मन चीते ॥ एकदिवस
 आपुन आए तहां । नवतरुनी अस्नान करत जहां ॥ बसन धरे जलतीर उतारी । आपुन जल पैठीं
 सुकुमारी ॥ कृष्णहेतु अस्नान करैं जहां । सबके पाछे आपु नहैं तहां । मीजत पीठि प्रेम अतिबाढ़ी ।
 चकृत भई युवती सब ठाढ़ी ॥ देखे नैदंनंदन गिरिधारी । व्रतफल प्रगट भये बनवारी ॥ सकुचि अंग
 जलपैठि लुकावैं । बार बार हरि अंकम लावैं ॥ लाज नहीं आवतिहै तुमको । देखत बसन
 बिना सब हमको ॥ हँसत चले तब नंदकुमार । लोगन सुनवति करत पुकार ॥ हार चीर लै चले
 पराई । हांक दियो कहि नंददोहाई ॥ डारि बसन भूषन तब भागे । श्याम करन अब ढीठो लागे ॥
 भाजे कहां चलौगे मोहन । पाछे आइ गई तुव गोहन ॥ तनुकी सुधि सँभार कछु नाहीं । बसन
 अभूषण पहिरत जाहीं ॥ चीरफटे कंचुकि बँदछूटे । लेत न बनत हारहैं टूटे ॥ प्रेम सहित मुख
 खीझत जाहीं । झूठहि बार बार पछिताहीं ॥ गई सबै तिय नंद महर घर । यशुमति पास गई सब
 दरदर ॥ देखहु महर श्यामके ए गुन । जैसे हाल करै सबके उन ॥ चोली चीर हार देखरायो ।
 आपुन भांगि इनहिको आयो ॥ यमुनातट कोउ जान न पावै । संग सखा लिये पाछे धावै ॥
 तुम सुतको वरजहु नंदरानी । गिरिधर करत नहीं भली वानी ॥ लाज लगति एक बात सुनावति ।
 अंचल छोरि हियों दिखरावति ॥ यह देखत हँसि उठी यशोदा । कछु रिसि कछु मनमें करि
 मोदा ॥ आइगए तेहि समय कन्हाई । बाहँगही लै तुरत देखाई ॥ तनक तनक कर तनक
 अँगुरिया । तुम यौवन भरि नवल बहुरिया ॥ जाहु घरहि तुमको मैं चीन्ही । तुम्हरी जाति जानि
 मैं लीन्हीं ॥ तुम चाहति सो ह्यां नापैहौ । और बहुत ब्रजभीतर लैहौ ॥ बारबार कहि कहा सुनावति ।
 इन बातन कछु जान न आवति ॥ देखहु री ए भावकन्हाई । कहां गई तबकी तरुनाई ॥ महरि तुमहिं
 कछु दोषन नाहीं । हमको देखि देखिं मुसकाहीं ॥ इनके गुण कैसे कोउ जानै । औरै करत और
 धरि ठानै ॥ देन उरहनो तुमकों आई । नीकी पहिरावनि हम पाई ॥ चलीं सबै युवती घर घरको ।
 मनमें ध्यान करतिहैं हरिको ॥ वरष दिवस तप पूरण कीन्हें । नंद सुवनको तन मन दीन्हें ॥ प्रातहोत
 यमुना फिर आई । प्रथम रहे चढि कदम कन्हाई ॥ तीर आइ युवती भई ठाढ़ी । उर अंतर हरिसों रति
 बाढी ॥ कह्यो चलो यमुनाजल खोरैं । अंगन आभूषण सब छोरैं ॥ चोली छोरैं हार उतारैं । करसों शिथिल

केशनिरवारैं ॥ इत उत चितवत लोग निहारैं । कह्यो बसन अब चीर उतारैं ॥ बसन अभूषण धरचौ
 उतारी । जल भीतर सब गई कुमारी ॥ माघ शीतको भीत न मानैं । षट्कृतुको गुण समकरि जानैं ॥
 बारबार बूडैं जलमाहीं । नेकहु जलकों डरपति नाहीं ॥ प्रातहुते यक याम नहाहीं । नेम धर्मही
 में दिन जाहीं ॥ इतनो कष्ट करैं सुकुमारी । पतिके हेतु गोवर्द्धनधारी ॥ अतितप करति देखि गोपाला ।
 मनमें कह्यो धन्य ब्रजबाला ॥ हरि अंतर्यामी सब जानैं । छिन छिनकी यह सेवा मानैं ॥ व्रतफल
 इनहिं प्रगट देखरावों । बसन हरो लै कदम चढ़ावों ॥ तनु साधैं तप कियो कुमारी । भजी
 मोहिं कामातुर नारी ॥ सोरह सहस गोप सुकुमारी । सबके बसन हरे बनवारी ॥ हरत बसन
 कछु बार न लागी । जलभीतर युवती सब नागी ॥ भूषन बसन सबै हरि ल्याये । कदम डार जहँ तहँ
 लटकये ॥ ऐसो नीप वृक्ष बिस्तारा । चीर हार धौं कित कहँ डारा ॥ सबै समाने तनु प्रति डारा ॥ यह
 लीला रची नंदकुमारा ॥ हार चीर मानों तरु फूल्यो । निरखि श्याम आपुन अनुकूल्यो ॥ नेमसहित
 युवती सब न्हाई । मन मन सविता बिनय सुनाई ॥ भूदहिं नैन ध्यान उर धारे । नंदनंदन पति होंय
 हमारे ॥ रवि करि बिनय शिवहि मन दीन्हों । हृदय भाव अवलोकन कीन्हों ॥ त्रिपुरसदन त्रिपुरारि
 त्रिलोचन । गौरीपति पशुपति अघमोचन ॥ गरल अंशन अहि भूषन धारी । जटा धरन गंगा शिर
 प्यारी ॥ करति बिनय यह मांगति तुमसों । करहु कृपा हंसिकै आपुनसों ॥ हम पावैं सुत यशुमतिको
 पति ॥ इहै देहु करि कृपा देव रति ॥ नित्यनेम करि चलीं कुमारी । एक याम तनको हिम जारी ॥ ब्रजल
 लना कह्यो नीर जडाई । अति आतुरहैं तटको धाई ॥ जलते निकसि तरुनि सब आई । चीर
 अभूषन तहां न पाई ॥ सकुचि गई जलभीतर धाई । देखि हंसत तरु चढे कन्हाई ॥ बार बार युवती पछि-
 ताई । सबके बसन अभूषन नाई ॥ ऐसो कौन सबै लै भाग्यो । लेतहु ताहि बिलम नहिं लाग्यो ॥
 माघ तुषार युवति अकुलाहीं । ह्यां कहुँ नंदसुवन तौ नाहीं ॥ हम जानी यह वात वनाई । अंबर
 हरि लै गए कन्हाई ॥ हौ कहुँ श्याम बिनय सुनि लीजै । अंबर देहु कृपाकरि जीजै ॥ थर थर अंग
 कैपति सुकुमारी । देखि श्याम नहिं सकै सँभारी ॥ एहि अंतर प्रभु वचन सुनाए । व्रतको फल
 दरशन सब पाए ॥ कहा कहति मोसों ब्रजबाला । माघशीत कत होत बिहाला ॥ अंबर जहां बताऊं
 तुमको । तौ तुम कहा देहुगी हमको ॥ तन मन अर्पन तुमको कीन्हो । जो कछु हतो सो तुमहीं
 दीन्हों ॥ और कहा लैहो जू हमसों । हम मांगतहैं अंबर तुमसों ॥ यह सुनि हंसै दयालु मुरारी ।
 मेरो कह्यो करो सुकुमारी ॥ जलते निकसि सबै तट आवहु । तबहिं भले अंबर तुम पावहु ॥ भुजा प-
 सारि दीन है भाषहु ॥ दोउ कर जोरि जोरि तुम राखहु ॥ सुनहु श्याम इक बात हमारी ॥ नगन कहुँ देखिये
 न नारी ॥ यह मति आपु कहाँ धौं पाई ॥ आजु सुनी यह वात नवाई ॥ ऐसी साधमनहिं में राखहु ।
 यह बाणी सुखते जनि भाषहु ॥ हम तरुनी तुम तरुण कन्हाई ॥ बिना बसन क्यों दिहिं देखाई ॥ पुरुष
 जाति तुम यह का जानौं । हाहा यह भुखमें जनि आनौं । तौ तुम बैठिरहौ जलही सब । बसन अभू-
 पन नहिं चाहति अब ॥ तबहिं देहुँ जल बाहिर आवहु । बाहँ उठाइ अंग देखरावहु ॥ कतहो शीत
 सहति सुकुमारी । सकुच देहु जलहीमें डारी ॥ फरचो कदम व्रत फरनि तुम्हारो । अब कहा लज्जा
 करति हमारो ॥ लेहु न आइ आपुने व्रतको । मैं जानत या व्रतके धनको ॥ नीके व्रत कीन्हों तनु
 गारी । व्रत ल्यायो धरि मैं गिरिधारी ॥ तुम मनकामन पूरण करि हौं । राससंग रचि रति सुख भरिहौं ॥
 यह सुनिकै मन हर्ष बढ़ायो । व्रतको पूरण फल हम पायो ॥ छांडहु तुम यह टेक कन्हाई । नीर माहँ
 बहु गई जडाई ॥ अभूषण सब आपुहि लेहु ॥ चीर कृपाकै हमको देहु ॥ हाहा लागे पाई तुम्हारे ॥ पाप

(२०२)

सूरसागर ।

होतहै जाड न मोरे ॥ आजुहिते हम दासि तुम्हारिकैसे अंग देखावैं उचारी ॥ अंग देखायहि अंबर पैहौ ।
 नातरु वैसेहि दिवस गँवैहौ ॥ मेरे कहे निकसि सब आवहु । थोरेहि हमको भलो मनावहु ॥ मुहां
 चही तरुनी सुसुकानी ॥ यह आपुन थोरी करि जानी ॥ जोइ जोइ कहो सो तुमको सोहै । आजु तुम्हारे
 पटतर कोहै ॥ हमरी पति सब तुम्हरे हाथ । तुमहि कहौ ऐसी ब्रजनाथा ॥ तप तनु गारि कियो जेहि
 कारण सो फल लग्यो नीपतरु डारन ॥ आवहु निकसि लेहु पट भूषन । यह लागै हमको सब दूषन ॥
 अब अंतर कत राखत हमसों । बारंवार कहतहौं तुमसों ॥ गोपिन मिले यह बात बिचारी । अब तौ
 टेक परे बनवारी ॥ चलहु न जाइ चीर अवलेहू । लाज छांडि उनको सुख देहू ॥ जलते निकसि
 तीर सब आई । बारंवार हरि हर्ष बुलाई ॥ बैठिगई तरुणी सकुचानी । देहु श्याम हम अतिहि
 लजानी ॥ छांडिदेहु यह बात सयानी । वैसेहि करौ कही जो बानी ॥ कर कुच अंग ढाँकि भई ठाढी ।
 वदन नवाइ लाज अति वाढी ॥ देहु श्याम अंबर अब डारी । हाहा दासी सबै तुम्हारी ॥ ऐसे नहीं
 वसन तुम पावहु । बाँहें उठाइ अंग देखरावहु ॥ कह्यो मानि युवतिनि करजोरे । पुनि पुनि युवती
 करति निहारे ॥ धन्य धन्य कहि श्री गोपाला । निहचै व्रत कीन्हों ब्रजबाला ॥ आवहु निकट लेहु
 सब अंबर । चोली हार सुरंग पटंबर ॥ निकट गई सुनिकै यह बानी । तरुनी नग्न अंग अकुलानी ॥
 भूषन बसन सवनको दीन्हों । तियके हेतु कृपा हरि कीन्हों ॥ चीर अभूषन पहिरे नारी । कह्यो
 ताहि ऐसे बनवारी ॥ तव हँसि बोले कृष्ण मुरारी । मैं पति तुम मेरी सब प्यारी ॥ तुमहि हेतु यह
 वपु ब्रज धार्यो ॥ तुम कारण वैकुंठ विसार्यो ॥ अब व्रतकरि तुम तनुहि न गारौ । मैं तुमते कहूँ होत न
 न्यारो । मोहिं कारण तुम अति तप साध्यो । मन मनकै मोको अवराध्यो ॥ जाहु सदन अब
 सब ब्रजबाला । अंग परसि मेटे जंजाला ॥ युवतिन बिदा दई गिरिधारी । गई घरनि सब घोषकुमारी ॥
 वस्त्रहरनलीला प्रभु कीन्हों ॥ ब्रजतरुणी व्रतको फल दीन्हों ॥ यह लीला श्रवणनि सुनि भावै । औरनि
 सिखवै आपुन गावै ॥ सूर श्याम जनके सुखदाई । दृढ़ताईमें प्रगट कन्हवाई ॥ ३७ ॥ अथ पनघटको
 मस्ताव ॥ राग अढानो ॥ हौं गईही यमुनजल लेन माई हो सांवेरेसे मोही ॥ सुरंग केसरि खौरि कुसुमकी दाम
 अभिराम कंठ कनककी दुलरी झलकत पीतांबरकी खोही ॥ नान्ही नान्ही बूंदनमें ठाढोरी बजावै गावै
 मलारकी मीठी तान मैं तो लालाकी छवि नेकहु न जोही । सूर श्याम मुरि सुसुकानि छबीरी अँखि-
 यनमें रही तव न जानोहो कोही ॥ ३८ ॥ चटकीलो पट लपटानो कटि बंसीवट यमुनाके तट
 नागरनट । मुकुट लटकि अरु भुकुटी मटक देखौ कुंडलकी चटकसों अटक परी दृगनि लपट ॥
 आछी चरणनि कंचन लकुट ठटकीली बनमाल करटेके द्रुमडार टेढे ठाढे नैदलाल छवि छाई घट
 घट । सूरदास प्रभुकी बानक देखे गोपी ग्वाल टारे न टरत निपट आवै सौंधेकी लपट ॥
 ॥ ३९ ॥ राग सुधराई ॥ बजावै मुरलीकी तान सुनावै यहिबिधि कान्ह रिझावै । नटवर वेष बनाये चटक
 सों ठाढो रहै यमुनाके तीर नित नव मृग निकट बोलावै ॥ ऐसो को जो जाइ यमुनते जल भरि ल्यावै ।
 मोरमुकुट कुंडल बनमाला पीतांबर फहरावै ॥ एक अंग शोभा अवलोकत लोचन जल भरि आवै ॥
 सूर श्यामके अंग अंगप्रति कोटि काम छवि छावै ॥ ४० ॥ राग पूरवी ॥ पनघट रोकेहि रहत कन्हवाई ।
 यमुनाजल कोउ भरन न पावत देखतही फिरिजाई ॥ तबहिं श्याम इक बुद्धि उपाई आपुन रहे
 छुपाई । तब ठाढे जे सखा संगके तिनको लिये बोलाइ ॥ बैठारे ग्वालनको द्रुमतर आपुन फिरि फिरि
 देखत । बडी बार भई कोऊ न आई सूर श्याम मन लेखत ॥ ४१ ॥ राग देवगंधारा ॥ युवति इक आवत देखी
 श्याम । द्रुमके ओट रहे हरि आपुन यमुनातट गई वाम ॥ जल हलोरि गागरि भरि नागरि जवही

शीश उठायो ॥ घरको चली जाइ ता पाछे शिरते घट ढरकायो ॥ चतुर ग्वालि कर गह्यो श्याम
 को कनक लकुटिआ पाई । औरनिसों करि रहे अचगरी मोसों लगत कन्हाई ॥ गागारि लै हँसिदेत
 ग्वालि कर रीतो घट नहिं लैहों । सूर श्याम ह्यां आनि देहु भरि तबहिं लकुट कर दैहों ॥ ४२ ॥
 राग कल्याण ॥ लकुट करकी हों तब देहों घट मेरो जब भरिदैहों । कहा भयो जो नंद बडे वृषभानु
 आन हमहूँ तुमसी हैं समसरि मिलि करिकैहौ ॥ एक गाँव एक ठाँवको वास एक तुम
 कैहौ क्यों मैं सैहों । सूर श्याम मैं तुम न डरैहों जवाबको जवाब दैहों ॥ ४३ ॥ घट भरिदेहु लकुट तब
 दैहों । हमहूँ बडे महरकी बेटी तुमको नहीं डरैहों । मेरी कनक लकुटिआ दैरी मैं भरिदैहों नीर ।
 बिसरि गई सुधि तादिनकी तोहि हरे सबनके चीर ॥ यह वाणी सुनि ग्वारि विवशभई तनुकी सुधि
 बिसराइ । सूर लकुट कर गिरत न जानी श्याम ठगौरी लाइ ॥ ४४ ॥ राग हमीर ॥ घटभरि दियो
 श्याम उठाइ । नेक तनुकी सुधि न ताको चली ब्रज समुहाइ ॥ श्याम सुंदर नयन भीतर रहे आनि
 समाइ । जहां जहां भरि दृष्टि देखौ तहां तहां कन्हाइ ॥ उतहिते एक सखी आई कहति कहा
 भुलाइ । सूर अबहीं हँसत आई चली कहा गँवाइ ॥ ४५ ॥ राग टोडी ॥ अबहिं गई जल भरन अकेली
 अरी हो श्याम मोहनी घाली री । नंदनंदन मेरी दृष्टि परे आली फिरि चितवन उर शाली री ॥
 कहा री कहौ कछु कहत न बनि आवै लगी मरमकी भाली री ॥ सूरदास प्रभु मन हरि लीन्हों विवश
 भई हों कासों कहौ आली री ॥ ४६ ॥ राग धनाश्री ॥ सुनत बात यह सखी अतुरानी ताहि बाँहें गहि घर
 पहुँचाई आपु चली यमुनाके पानी ॥ देखे आइ तहां हरि नहिं चितवनि जहां तहां विततानी ।
 जलभरि ठठकत चली घरहि तन बार बार हरिको पछितानी ॥ ग्वालनि बिकल देखि प्रभु प्रगटे
 हर्ष भयो तन तपति बुझानी । सूर श्याम अंकम भरि लीन्ही गोपी अंतरगतिकी जानी ॥ ४७ ॥
 राग आसारवा ॥ मिलि हरि सुख दियो तेहि बाल । तपति मिटिगई प्रेम छाकी भई रस बेहाल ॥ मगनहो
 डग धरति नागारि भवन गई भुलाइ । जलभरन ब्रजनारि आवति देखि ताहि बोलाइ ॥
 जाति कितहै डगर छाँडे कह्यो इतको आइ । सूर प्रभुके रंग राची चितै रही चितलाइ ॥ ४८ ॥
 राग धनाश्री ॥ काहू तोहिं ठगौरी लाई । बूझति सखी सुनति नहिं नेकहु तुही किधौं ठग मूरी खाई ॥
 चौकिपरी सपने जनु जागी तब बाणी कहि सखिन सुनाई । श्याम बरन एक मिल्यो ढोंटीना
 तेहि मोको मोहनी लगाई ॥ मैं जलभरे इतहिको आवति आनि अचानक अंकम लाई ॥ सूर
 ग्वारि सखियनके आगे बात कहै सब लाज गँवाई ॥ ४९ ॥ राग टोडी ॥ आवतही यमुना भरे पानी ।
 श्याम वरन काहूको ढोंटीं निरखि वदन घरगई भुलानी ॥ उन मोतनमें उन तन चितयो तब
 हीते उन हाथ विकानी । उर धकधकी टकटकी लागी तनु व्याकुल मुख फुरत न बानी ॥ कह्यो
 मोहन मोहनी तू कोहै या ब्रजमें नहिं मैं पहिचानी । सूरदास प्रभु मोहन देखत जनु वारिध जल
 बूँद हेरानी ॥ ५० ॥ नेक न मनते टरत कन्हाई । यक ऐसेहि छकि रही श्यामरस तापर इह
 इहि बात सुनाई ॥ वाको सावधान करि पठयो चली आपु जलको अतुराई । मोरं मुकुट पीतांबर
 काछे देख्यो कुँवर नंदको जाई ॥ कुंडल झलकत ललित कपोलनि सुंदर नैन विशाल सुहाई ।
 कह्यो सूर प्रभु ए ढँग सीखे ठगत फिरत हो नारि पराई ॥ ५१ ॥ कहा ठग्यो तुम्हरो ठगि लीन्हों ।
 क्यों नहिं ठग्यो और कहा ठगिहौ औरहिके ठग तुमको चीन्हों ॥ कहो नाउ धरि कहा ठगायो
 सुनि राखै यह बात ॥ ठगके लक्षण मोहिं बतावहु कैसे ठगके घात ॥ ठगके लक्षण हमसों सुनि ए मृदु सुस-
 कनि मन चोरतानैन सैन दे चलत सूर प्रभु अंग त्रिभंग करि मोरत ॥ ५२ ॥ राग मूही ॥ अतिहिं करत

तुम श्याम अचगरी । काहुकी छीनतहौ गेंडुरी काहुकी फोरतहौ गगरी ॥ भरनदेहु यमुनाजल
 हमको दूरिकरौ वातैं ए लँगरी । पैडे चलन न पावै कोऊ रोकि रहत लरकन लै डगरी ॥ घाट बाट सब
 देखत आवत युवती डरन मरतिहै सिगरी । सूर श्याम तेहि गारी दीनो जो कोउ आवै तुमरी बगरी ५३ ॥
 राग रामकली ॥ नीके देहु न मेरी गिंडुरी । लैजैहौ धरि यशुमति आगे आवहु री सब मिलि एक झुंडरी ॥
 काहु नहीं डरात कन्हई बाट घाट तुम करत अचगरी । यमुना दह गेंडुरी फटकारी फोरी
 सब शिरकी अस गगरी ॥ भली करी यह कुँवर कन्हई आजु मेटिहौ तुम्हरी लँगरी । चली सूर
 यशुमतिके आगे उरहन लै तरुनी ब्रज संगरी ॥ ५४ ॥ आनि न देहु ढोटौना ढीठ गेंडुरी पराई । तेरे
 कोऊ कहा करैगो धौं लरिहै हमसों भौजाई ॥ मेरे संगकी और गई ते जल भरि भरि घरते फिर
 आई । सूर श्याम गेंडुरी दीजै न तौ यशुमतिसों कैहौं जाई ॥ ५५ ॥ राग धनाश्री ॥ आपुन चढे कदम
 पर धाई । वदन सकोरि भौंह मोरतहैं हांक देत करि नंद दोहाई ॥ जाइ कहौ मैयाके आगे लेहु
 सवै मिलि मोहिं वँधाई । मोको जुरि मारन जब आई तब दीनी गेंडुरि फटिकाई ॥
 ऐसे करि मोको तुम पायो मनौ इनकी मैं करौं चेराई । सूर श्याम वे दिन बिसराए
 जब बांधे तुम ऊखल लाई ॥ ५६ ॥ राग आसावरी ॥ इहँई रहौ तौ बढौ कन्हई । आपु गई
 यशुमतिहि सुनावन दैगई श्यामहि नंद दोहाई ॥ महरि मथति दधि सदन आपने एहि
 अंतर युवती सब आई । चितै रही युवतिनको आवत कहां आवतिहैं भीर लगाई ॥ मैं जानति
 तुमको हरि खिझई ताते सब उरहन लै धाई । सूरदास रस भरी ग्वालिनी ऐसो ढीठ कियो सुत
 माई ॥ ५७ ॥ राग विलावल ॥ सुनहु महरि तेरो लाडिलो अति करत अचगरी । यमुन भरन जल हम गई तहां
 रोकत डगरी ॥ शिरते नीर ढराइ देत फोरी सब गगरी । गेंडुरि दई फटकारिकै हरि करतहै लँगरी ॥
 नित प्रति ऐसैई ढंग करै हमसों कहै अगरी । अब बसबास गहीं बनै यहि तुव ब्रजनगरी ॥ आपु गयो चढि
 कदमही चितवत रहि सिगरी । सूर श्याम ऐसैही सदा हमसों करै झगरी ॥ ५८ ॥ राग रामकली ॥ सुतको
 वरजि राखहु महरि । डगर चलन न देत काहुहि फोरि डारत ढहरि ॥ श्यामके गुण कछु न जानति जाति
 हमसों गहरि । इहै लालच गाइ दशलिष बसतहै ब्रज थहरि ॥ यमुनतट हरि देखेठाढे डरनि आवै
 वहरि । सूर श्यामहि नेक बरजौ करतहै अति चहरि ॥ ५९ ॥ तुमसों कहति सकुचति महरि । श्यामके
 गुण नहीं जानति जाति हमसों गहरि ॥ नेकहूं नहिं सुनति श्रवणनि करति है हम चहरि । जल भरन को-
 उ नहीं पावति रोकि राखत डहरि ॥ अति अचगरी करत मोहन फटकि गेंडुरी दहरि । सूर प्रभुको
 कहा सिखयो रिसनि युवती झहरि ॥ ६० ॥ राग धनाश्री ॥ कहा करौं मोसों कहौ तुमहीं । जो पाऊँ तौ
 तुमहि देखाऊँ हाहा करिहौ अबहीं ॥ तुभूं गुण जानतिहौ हरिके ऊखल बांधे जबहीं । सँटिया लै मारन
 जब लागी तब बरज्यो मोहिं सबहीं ॥ लरिकाईतें करत अचगरी मैं जाने गुण तबहीं । सूर हाल कैसे
 करिहौं घरि आवै धौं हरि अबहीं ॥ ६१ ॥ राग सांग ॥ मैं जानतिहौं ढीठ कन्हैया । आवन तौ घर
 देहु श्यामको जैसी करौं सजैया ॥ मोसों करत ढिठाई मोहन मैं वाकी हौं मैया । और न काहुको वह
 मानै कछु सकुचत बल भैया ॥ अब जो जाउँ कहां तेहि पावों कासों देइ धरैया । सूर श्याम दिन
 दिन लंगर भयो दूरि करै लँगरैया ॥ ६२ ॥ राग सूही ॥ युवति बोधि सब घरहि पठाई । यह अपराध
 मोहिं बकसौ री इहै कहतिहौ मेरी माई ॥ इतते चली घरनि सब गोपी उतते आवत कुँवर कन्हई ॥
 बीचहि भेंट भई युवतिन हरि नैनन जोरत गए लजाई ॥ जाहु कान्ह महतारी टेरति बहुत बडाई
 करि हम आई । सूर श्याम मुख निरखि निरखि हँसि मैं कैहौं जननी समुझाई ॥ ६३ ॥ राग नट ॥ सकुचत

गए घरको श्याम । द्वारहीते निरखि देख्यो जननी लांगी काम ॥ इहै बाणी कहति मुखते कहाँ
 गयो कन्हाई । आप ठाढे जननि पाछे सुनतहै चित लाई ॥ जल भरन युवती न पावैं घाट रोकत जाइ ।
 सूर सबके फोरि गागरी श्याम गयो पराइ ॥ ६४ ॥ राग नटनारायण ॥ यशुमति यह कहिकै रिस पाव
 ति । रोहिणि करति रसोई भीतर कहि कहि तिनहि सुनावति ॥ गारी देत बहू बेटिनिको वै धाई ह्यां
 आवति । हाहा करति सबनिसों मैही कैसेहु खूंट छँडावति ॥ जाति पातिसों कहा अचगरी यह कहि
 सुतहि धिरावति । सूर श्यामको सिखवत हारी मारेहु लाज न आवति ॥ ६५ ॥ राग सारंग ॥
 तू मोहींको मारन जानति । उनके चरित कहा कोउ जानै उनहि कही तू मानति ॥
 कदमतीरते मोहिं बुलायो गढ़ि गढ़ि बातैं बानति । मटकत गिरी गागरी शिरते अब ऐसी
 बुधि ठानति ॥ फिरि चितई तू कहाँ रह्यो कहि मैं नहिं तोको जानति । सूर सुतहि
 देखतही रिसगइ मुख चूमति उर आनति ॥ ६६ ॥ राग गौरी ॥ झूठहि सुतहि लगावति
 खोरि । मैं जानति उनके ढँग नीके बातैं मिलवति जोरि ॥ वे यौवन मदकी सब माती कहाँ मेरो
 तनक कन्हाई । आपुहि फोरि गागरी शिरते उरहन लीन्हे आई ॥ तू उनके ढिग जाति कितहि है वै पापि
 नि सब सारि । सूर श्याम अब कह्यो मानि तू हैं सब ढीठ गुवारि ॥ ६७ ॥ राग मोहन ॥ मोहन बाल
 गोबिंदा माई मेरो कहा जानै बोलि । उरहन लै युवती सब आवति झूठी बतियाँ जोरि ॥ कोऊ
 कहति गेंडुरि मेरि लीन्ही कोऊ कहति गगरी गयो फोरी । कोऊ चोली हार बतावति कान्हा तेरा
 भोरी ॥ अब आवै जो उरहन लैकै तौ पठऊँ मुँहमेरी । सूर कहाँ मेरो तनक कन्हाई आपुन यौवन
 जोरी ॥ ६८ ॥ राग कान्हरो ॥ ब्रज घर घर यह बात चलावत । यशुमतिको सुत करत अचगरी यमुना
 जल कोउ भरन न पावत ॥ श्याम बरन नटवर वपु काछे मुरली राग मलार बजावत । कुं-
 डल छबि रवि किरनहूँते द्युति मुकुट इंद्र धनुते शोभावत ॥ मानत काहुन करत अचगरी गागरी
 धरि जल भुँई ढरकावत । सूर श्यामको मात पिता दोउ ऐसे ढँग आपुनहि पढावत ॥ ६९ ॥ राग गौरी ॥
 करत अचगरी नंदमहरको । सखा लिये यमुनातट बैठो निबहत नहिं सब लोग डहरको ॥ कोऊ
 खिझो कोऊ कितने बरजो युवतिनके मन ध्यान । मन क्रम वचन श्यामसुंदरते और न जानति आन ॥
 इह लीला सब श्याम करतहैं ब्रज युवतिनके हेत । सूर भजे जेहि भाव कृष्णको ताको सोइ फल देत ॥
 यमुनाजल कोउ भरन न पावै । आपुन बैठे कदम डार चढ़ि गारी दैदैं सबनि बोलवै ॥ काहूकी गगरी
 गहि फोरत काहू शिरते नीर ढरवै । काहूसों करि प्रीति मिलतुहै नैनसैन दे चितहि चुरावै ॥ बरबसही
 अँकवारि भरत धरि काहूसों अपनो मन लावै । सूर श्याम अति करत अचगरी कैसेहु काहू हाथ
 न आवै ॥ ७० ॥ राग धनाश्री ॥ ब्रजगँवैडे कोउ चलन न पावत । ग्वाल सखा सँग लीने डोलत दैदैं हाँक जहां
 तहां धावत ॥ काहूकी गेंडुरी फटकारत काहूकी गगरी ढरकावत ॥ काहूको गारीदै भाजत काहूको
 उठि अंकम लावत ॥ काहू नहिं मानत ब्रजभीतर नंदमहरको कुँवर कहावत । सूर श्याम नटवर वपु
 काछे यमुनाके तट मुरली बजावत ॥ ७१ ॥ राग ढोडी ॥ गोकुलके गँवैडे एक सांवरो सो ढोंटा माई अँखियनके
 पैँडे पैँठि जीके पैँडे परचोहै । कल न परत छन गृह भयो सम बन तन मन धन प्राण सबस हरचोहै ॥
 भवन न भावै माई आंगन न रह्यो जाइ करै हाइ हाइ देखौ जैसे हाल करचोहै । सूरदास प्रभु नीके
 गावत मधुर सुर मानहु मुरलीमें पियूषरस भरचोहै ॥ ७२ ॥ राग नट ॥ राधा सखियन लई
 बोलाइ । चलहु यमुनाजलहि जैये चलीं सब सुखपाइ ॥ सबनि एक एक कलश लीन्हों तुरत
 पहुँची जाइ । तहां देख्यो श्याम सुंदर कुँवरि मन हरषाइ ॥ नंदनंदन देखि रीझे चितैरहे चितलाइ ।

सूर प्रभुकी प्रिया राधा भरत जल मुसुकाइ ॥७३॥ राग गूजरी ॥ घरहि चली यमुना जल भरि कै ।
 सखिन बीच नागरी विराजति भई प्रीति उर हरि कै ॥ मंद मंद गति चलत अधिक छबि अंचल
 रह्यो फहरि कै । मोहन मोको मोहनी लगाई संगहि चले डगरि कै ॥ बेनीकी छबि कहत न आवै रही
 नितंबनि ठरि कै । सूर श्याम प्यारीके बश भए रोम रोम रस भरि कै ॥७४॥ राग जयत श्री ॥ गागरि नागारि
 जल भरि घर लीन्हें आवै ॥ सखियन बीच भरचो घट शिरपर तापरनैन चलावै ॥ दुलति ग्रीव लटकति
 नकवेसरि मंद मंद गति आवै । भुकुटी धनुष कटाक्षबाण मनो पुनि पुनि हरिहि लगावै ॥ जाको
 निरखि अनंग अनंगत ताहि अनंग बढावै ॥ सूर श्याम प्यारी छबि निरखत आपुहि धन्य कहावै ॥७५॥
 गागरि नागारि लिये पनिघटते चली घरहि आवै । ग्रीवा डोलत लोचन लोलत हरिके चितहि
 चुरावै ॥ ठठकति चलै मटक मुँह मोरे बंकट भौंह चलावै । मनहु काम सैना अँग शोभा अंचल
 ध्वज फहरावै ॥ गति गयंद कुच कुंभ किंकिनी मनहुँ घंट झहनावै । मोतिनहार जलाजल मानौ
 सुमीदंत झलकावै ॥ मानहु चंद महावत मुखपर अंकुश बेसरि लावै । रोमावली सूँडि तिरनीलौं
 नाभि सरोवर आवै ॥ पग जेहरिजंजीरनिजकरचो यह उपमा कछु पावै । घटजल झलकि
 कपोलनि किनुका मानों मदहि चुवावै ॥ बेनी डोलति दुहुँ नितंबपर मानहुँ पूंछ हलावै । गज
 शिरदार सूरको स्वामी देखि देखि सुख पावै ॥७६॥ सखियन बीच नागरी आवै । छबि निरखत रीझे
 नंद नंदन प्यारी मनहि रिझावै ॥ कबहुँक आगे कबहुँक पाछे नानाभाव बतावै । राधा यह अनुमान
 कियो हरि मेरे चितहि चोरावै ॥ आगे जाइ कनक लकुटलै पंथ सँवारि बतावै । निरखत
 छाँह जहाँ प्यारीकी तहाँलै छाँह छुवावै ॥ छबि निरखत तनु वारत अपनो नागर जियहि जनावै ।
 अपने शिर पीतांबर वारत ऐसे रुचि उपजावै ॥ ओढि ओढनियां चलत देखावत यहि मिस
 निकटहि आवै । सूर श्याम ऐसे भावनिसों राधा मनहि रिझावै ॥७७॥ राग सारंग ॥ लग लागन नहिं
 पावत श्याम । तब एक भाव कियो कछु ऐसो प्यारी तनु उपजायो काम ॥ तब मिसकरि निकट
 आइ मुख हेरचो पीतांबर डारचो शिर वारि । यह छल करि मन हरचो कन्हई कामविवश कीन्ही
 सुकुमारि ॥ पुलकित अंग अँगिया दरकानी उर आनंद अंचल फहरात । गागरि ताकि कांकरी मारै
 उचटि उचटि लागत प्रियगात ॥ मोहन मन मोहनी लगाई सखिनसंग पहुँची घरजाइ । सूरदास
 प्रभुसों मन अटक्यो देह गेहकी सुधि विसराइ ॥७८॥ राग नट ॥ ज्वालिनि चली यमुन बहोरि । वाहि
 सब मिलि कहत आवहु कछु कहति निहोरि ॥ ज्वाव देति न हमहि नागारि रही वदन निहोरि ।
 ठगिरही मन कहा सोचति काहू लियो कछु चोरि ॥ भुजाधरि करि कछो चलहि
 न आवै अबहीं खोरि । सूर प्रभुके चरित सखियन कहत लोचन ढोरि ॥७९॥ राग मलार ॥ मेरी गैल
 नछोडै सांवरो मैं क्योंकरि पनघट जाउँरी । यहि सकुचनि डरपतिरहों मोहिं धरै न कोउ नाउँरी ॥
 जित देखों तितदीखे री रसिया नंदकुमार री । इत उत नैन चुराइकै मोहिं पलकन करत जुहार री ॥
 लकुट लिये आगे चलैहो पंथ सँवारत जाइ री । मोहिं निहोरो लाईकै वह फिरि चितवै मुसुका-
 इ री ॥ सौ कंचुकि अंचरा उचै मेरो हियरा तकि ललचाइ री । यमुनाजल भरि गागरि लै जब शिर
 चलत उचाइ री ॥ गागरि मारै कांकरी साँ लागे मेरे गात री । गैल माँझ ठाढो रहे मोहिं खुबटै
 आवत जात री ॥ हौं सकुचनि बोलों नहीं लोकलाजकी शंक री । मो तन छैवै हरि चलै वह छवि
 भरतुहै अंक री ॥ निकट आइ मुख निरखिके सकुचे बहुरि निहार री । अब ढँग ओढी ओढनी
 पीतांबर मोपै वारि री ॥ जब कहूँ लग लागे नहीं तब वाको जिव अकुलाइ री । तब हठि मेरी छाँहसों

वह राखैं छाँह छुआइरी ॥ को जानै कित होत है री घर गुरुजनकी शोर री । मेरो जिव गाँठी बंध्यो पीतांबरकी छोर री ॥ अबलों सकुच अटकरही अब प्रगट करौं अनुराग री । हिलिमिलिकै संग खेलिहौं मानि आपनो भाग री ॥ घर घर ब्रजवासी सबै कोउ किन करै पुका री । गुप्तप्रीति परगट करौं कुलकी कानि निवारि री ॥ जबलगि मन मिलयो नहीं तब नची चौपके नाच री ॥ सूर श्याम संगही रहौं सब करौं मनोरथ सांच री ॥ ८० ॥ राग कान्हरो ॥ मोहन बिन मन ना रहै कहा कहौं माई री । कोटि भाँति करि करि रही समुझाई री ॥ लोकलाज कौन काज मनमें नहि आई री । हृदयते टरति नाहिन ऐसी मोहनी लाई री ॥ सुंदर वर त्रिभंगी नवरंगी सुखदाई री । सूरदास प्रभु बिन मोसों नेक रह्यौ ना जाई री ॥ ८१ ॥ राग सूसी ॥ नंदको नंदन सांवरो मेरो चितचोरे जाइ री । रूप अनूप दिखायइकै वह औचक गयो आइ री ॥ मोरमुकुट श्रवण कुंडल ओढनी फहराइ री । अधरनि पर मुरली धरे मधुर तान बजाइ री ॥ चंदनकी खौरि किए नटवर कछि काछनी बनाइ री । सूरदास प्रभु बैठे यमुनातट पूरण ब्रह्म कन्हाइ री ॥ ८२ ॥ राग गौरी ॥ परचो तबते ठग मूरि ठगौरी । देख्यो मैं यमुना तट बैठो ढोटा यशुमतिको री ॥ अति सांवरो भरचो सो साँचै की न्है चंदन खोरी ॥ मनमथ कोटि कोटि गहि वारौं ओढे पीत पिछोरी ॥ दुलरी कंठ नयन रतनारे मो मन चितै हरचो री । बिकट भ्रुकुटिकी ओर कोरते मनमथबाण धरचो री ॥ दमकत दशन कनककुंडल मुख मुरली गावत गौरी । श्रवणन सुनत देह गति भूली भई बिकल मति बौरी ॥ नहि कल परत बिनादरशनते नयननि लगी ठगौरी । सूर श्याम चित टरत न नेकहु निशि दिन रहत लगौरी ॥ ८३ ॥ राग कल्याण ॥ युवति इक यमुनाजलको आइ ॥ निरखत अंग अंग प्रति शोभा रीझे कुँवर कन्हाइ ॥ गोरे वरन चूनरी सारी अलकै मुख बगराइ । करनि चरिचरी चुरी बिराजति करकंकन झलकाइ ॥ सहज शृंगार उठत यौवनतन बिधिसों हाथ बनाइ । सूर श्याम आये ढिग आपुन घटभरि चलि झमकाइ ॥ ८४ ॥ राग गौरी ॥ ग्वारि घट शिर धरि चली झमकाइ । श्याम अचानक लट गही कहि अति कहा चली अतुराइ ॥ मोहनकर त्रिय सुखकी अलकै यह उपमा अधिकाइ । मनहु सुधा शशि राहु चोरावत धरचौ ताहि हरिआइ ॥ कुच परसो अंकम भरिलीनी दुहुँ मन हरष बढाइ । सूर श्याम मानो अमृत घटनिको देखतहै कर लाइ ॥ ८५ ॥ छाँडि देहु मेरी लट मोहन । कुच परसत पुनि पुनि सकुचत नहि कत आई तजि गोहन ॥ युवती आनि देखिहैं कोऊ कहन बंक भरि भौहन । बारबार कह बीर दोहाई तुम मानत नहि सोहन ॥ यतनेहीको सौँह दिवावत मैं आयो मुख जोहना ॥ सूर श्याम नागरि वश कीन्ही विवश चली धरि कोहन ॥ ८६ ॥ राग धनाश्री ॥ चली भवन मन हरि हरिलीन्हों । पग द्वै जाति ठठकि फिरि हेरति जिय यह कहति कहा हरि कीन्हों ॥ मारग गई भूलि जेहि आई आवतकै नहि पावत चीन्हों । रिसकरि खीझि सुभग लट झटकाति श्याम भुजनि छटकायसु दीन्हों ॥ प्रेमसिंधु में मगनभई त्रिय हरिके रंग भई अति लीन्हों ॥ सूरदास प्रभुसों चित अटक्यो आवत नहि इत उतहि पतीन्हो ॥ ८७ ॥ राग गौरी ॥ घर गुरुजनकी सुधि जब आई । तब मारग सूझ्यो नैननि कछु जिय अपने तिय गई लजाई ॥ पहुँची आय सदन ज्यों त्यों करि नेक नहीं चित टरत कन्हाई । सखी संगकी बूझन लागीं यमुनातट अति झेर लगाई ॥ औरै दशा भई कछु तेरी कहति नहीं हमसों समुझाई । कहा कहौं कहत न बनिआवै सूर श्याम मोहनी लगाई ॥ ८८ ॥ राग सोरठ ॥ कैसे जलभरन मैं जाउँ । गैल मेरी परचो सखीरी कान्ह जाको नाउँ ॥ घरते निकसत बनत नाहीं लोकलाज लजाउँ । तन इहाँ मन जाइ अटक्यो

नंदनंदन ठाउँ ॥ जो रहौ घर बैठिकै तौ रह्यो नाहिं न जाइ । सखि तैसी देहु तुमहीं करौ कहा
 उपाइ ॥ जात बाहिर बनत नाहीं घर न नेकु सुहाइ । मोहनी मोहन लगाई कहति सखिन सुनाइ ॥
 लाज अरु मरजाद जीलों करतिहौ यह सोच । जाहि बिन तन प्राण छंडि कौन बुधि यह पोच ॥
 ॥८९॥मनाहि यह परतीति आई दूरि करि हो दोच । मूर प्रभु हिलिभिलि रहोंगी लाज डारों मोच ॥
 राग गौरी ॥ सुनहु सखी री वा यमुनातट । हौं जल भरति अकेली पनघट गही श्याम मेरी लट ॥ लै
 गागरि शिर मारग डगरी इन पहिरे पीरे पट । देखत रूप अधिक रुचि उपजी काछ बनी किंकिनी
 रट ॥ फूल एक ग्वालनिके ज्यों रन जीते फिरै महाभट । मूर लरचो गोपाल अलिंगन सफल किये
 कंचनघट ॥ ९० ॥ राग आसावरी ॥ कहा कहों सखि कहत बनै नाहिं नंदनंदन मेरो मन जो हरचो ।
 मात पिता पति बंधु सकुच तजि मगनभई नाहिं सिंधु तरचो ॥ अरुन अधर युग नयन रुचिर
 रुचि मदन मुदित मन संग लरचो । देखि दशा कुलकानि लाज सब सहज सुभाउ रह्यो सु धरचो ॥
 आनंद कंद चंद मुख निशि दिन अवलोकत यह अमल परचो । मूरदास प्रभुसों मेरी गति जनु
 लुब्धक कर मीन तरचो ॥ ९१ ॥ राग नट ॥ मेरो हरि नागरसों मन मानो । मन मोह्यो सुंदर ब्रजनायक
 भली भई सब जग जानो ॥ बिसरी देह गेह सुधि बिसरी बिसरि गई कुलकी कानो । मूर आश
 पूजै या मनकी तब भावै भोजन पानो ॥ ९२ ॥ राग काफ़ी ॥ मोही सांवरे सजनी मोहिं गृह बन कछु
 न सुहाइ । यमुन भरन जल मैं गई तहां श्याम मोहनी लाइ ॥ ओढे पीरी पावरी हो पहिरे लाल
 निचोल । भौहैं काट कटीलियां मोहिं मोल लई बिन मोल ॥ मोर मुकुट शिर बिराजई हो अधर
 धरे सुखबैन । हरिकी मूरति माधुरी ताते लागिरहे दोउ नैन ॥ मदनमूरतिके वशभये अब भलो
 बुरो कहै कोई । मूरदास प्रभुको मिलि करि मन एकै तनु तन दोई ॥ ९३ ॥ राग रामकली ॥ मेरे जिय
 ऐसी आन बनी । बिन गोपाल और नाहिं जानो सुनि मोसों सजनी ॥ कहा काँच संग्रहके कीने
 हरि जो अमोल मनी । विष सुमेर कछु काज न आवै अमृत एक कनी ॥ मन वच क्रम मोहिं और
 न भावे अब मेरे श्याम धनी । मूरदास स्वामीके कारण तजी जाति अपनी ॥ ९४ ॥ राग गूजरी ॥
 अब दृढकरी धरी यह बानि । कहा कीजै सो नफा जेहि हो जियकी हानि ॥ लोकलज्जा काँच
 किरिचक श्याम कंचन खानि । कौन लीजै कौन तजिए सखि तुमहि कहो जानि ॥ मोहिं तो नाहिं
 और मूझत बिना मृदु मुसकानि । रंग कापे होत न्यारो हरद चूनो सानि ॥ इहै
 करिहौं और तजिहौं परी ऐसी बानि । मूर प्रभु पति बरत राखै भेटिकै कुलकानि ॥ ९५ ॥
 अध्याय ॥ २३ ॥ लीला यज्ञपत्नी ॥ राग विलावल ॥ एक दिन हरि हलधर संग ग्वालन । गये बन
 भीतर गोधन चारन ॥ सकल ग्वाल मिलि हरिपै आए । भूख लगी कहि वचन सुनाए ॥ हरि
 कह्यो यज्ञकरत तहां ब्राह्मण । जाहु उनहि ढिग भोजन मांगन ॥ ग्वाल तुरत तिनके ढिग आए ।
 हरि हलधरके वचन सुनाए ॥ भोजनदेहु भए वै भूखे । यह सुनिके द्वैगए वै रुखे ॥ यज्ञहेतु हम
 करी रसोई । ग्वालन पहले देहिं न सोई ॥ ग्वाल सकल हरिपै चलिआए । हरिसों तिनके वचन सुनाए ॥
 हरि हलधरसों हंसि कह्यो बानी । अविगतिकी गति उन नाहिं जानी ॥ तब ग्वालनसों कह्यो बुझाई ।
 त्रियन पास तुम माँगहु जाई ॥ उनके तन दृढभक्ति हमारी । मानि लेहि वै बात तुम्हारी ॥ ग्वाल
 बाल त्रियनपै आए ॥ हाथजोरिकै शीश नवाये ॥ हरि भोजन माँग्योहै तुमसों ॥ आज्ञा देहु कहैं सो
 उनसों ॥ तिन धनि भाग्य आपनो जान्यो । जीवनजन्म सफल करि मान्यो ॥ भोजन बहु प्रकार तिन्ह
 दीन्हों । काहु अपने शिर धरि लीन्हों ॥ ग्वालन संग तुरत वै धाई । मन अपने में हर्ष बढ़ाई ॥

काहू पुरुष निवारयो आइ । कहां जात है री अतुराइ ॥ तिन तो कह्यो न कीन्हो काने । तनु तजि
 चली विरह अकुलाने ॥ धन्य धन्य वै प्रेम सभागे । मिली जाइ सबहिनते आगे ॥ तब हरि तिनसों कहि
 समुझाइ । सुनौ त्रिया तुम काहे आइ ॥ नारी पतिव्रत माँन जोई । चारि पदारथ पावै सोई ॥ त्रियन
 कह्यो जग झूठ सगाई । हमतौ हैं तुमरे शरनाई ॥ प्रभु पतिव्रत तुम करौ सदाई । तुमको इहै धर्म
 सुखदाई ॥ प्रभु आज्ञालै घरको आई । पुरुष करत तिनकी जु बडाई ॥ धनि धनि तुम हरि दरशन
 पायो । हम पढि गुनकै सब बिसरायो ॥ ब्रह्मादिक खोजत नित जिन्हको । साक्षात तुम देख्यो
 तिन्हको ॥ वै हैं सकल जगतके स्वामी । और सभनके अंतर्धामी ॥ अब हम चरण शरणही आए ।
 तब हरि उनके दोष क्षमाए ॥ ग्वालन मिलि हरि भोजन कीन्हों । भाव तियनको धरिहरि लीन्हो ॥
 भक्तभावसों जो हरि ध्यावै । सो नर नारि अभै पद पावै ॥ इह लीला सुनि गावै जोई । हरिकी
 भक्ति सूर तेहि होई ॥ ९६ ॥ यज्ञपत्नी वचन ॥ राग विलावल ॥ जानदे जानदे पियहाँ गोपाल बोलाई ।
 औरै प्रीति प्राणके लालच नाहिन परत दुराई ॥ राखौ रोकि बाँधि दृढबंधन कैसेहुँ करै जु त्रास ।
 वह हठ अब कैसे छूटतहै जब लगिहै उर सास ॥ सांची कहाँ मन बच क्रम करि अपने मनकी
 बात । देह छाँडि मिलहि अबहीं छिन तोहि कैसी कुशलात ॥ औसर गए बहुरि सुनि सूरज कहा
 कीजैगी देह । बिछुरति सहति बिरहके झूललि झूठे सवै सनेह ॥ ९७ ॥ राग सारंग ॥ देखनदै पिय मदन
 गोपालहि । हाहा हो पिय पा लागतिहों जाइ सुनौ बन बेनु रसालहि ॥ लकुट लिये काहेको त्रासत पति विन
 मति बिरहनि बैहालहि । अति आतुर आरोधि अतिक दुख तोहि कहा डर तिन यम कालहि ॥ मन तौ
 पिय पहिलेही पहुँच्यो प्राण तहीं चाहत चित चालहि । कहि तू अपने स्वारथ सुखको रोकि कहा क
 रिहै खल खालहि ॥ लेहु सँभारि सुखेह देहकी को राखै इतने जंजालहि । सूर सकल सखियनते आगे
 अबहीं मूढ मिलति नँदलालहि ॥ ९८ ॥ राग सारंग ॥ देखनदे वृंदावन चंदहि । हाहा कंत मानि विनती यह कुल
 अभिमान छाँडि मति मंदहि ॥ कहि क्यों भूलि धरत जिय औरै जानत नहि पाँवन नंदनंदहि । दरशन
 पाइ आइहों अबहीं करन सकल तेरे दुखदंदहि ॥ शठ समुझै यह समुझात नाहि न खोलत नहीं कपटके
 फंदहि । देह छोडि प्राणनि भई प्रापति सूर सुप्रभु आनंद निधि कंदहि ॥ ९९ ॥ राग कल्याण ॥ रति बाढी
 गोपालसों । हाहा हरिलौं जान देहु प्रभु पद परसतिहों भालसों ॥ संगकी सखी श्याम सन्मुख
 भई मोहि परी पशुपालसों । परवशदेह नेह अंतर्गति क्यों मिलौं नयन विशालसों ॥ शठ हठ
 करि तूही पछितैहै इहै भेट तोहि बालसों । सूरदास गोपी तनु तजिकै तनमें भई नंद
 लालसों ॥ १०० ॥ राग सारंग ॥ पिय जनि रोकहु अब जानदै । हौं हरि विरह जरे जाचतिहों इतनी बात
 मोहि दान दै ॥ बैन सुनौ विहरत बन देखौ इह सुख हृदय सिरान दै । पुनि जो रुचै सोई तू की
 जै साँच कहतिहों आन दै ॥ जो कछु कपट किए याचतिहों सुनिहि कथा हित कान दे । मन क्रम
 वचन सूर अपनो प्रण राखोंगी तन मन प्रानदे ॥ १ ॥ राग विलावल ॥ हरि देखनकी साध भरी ।
 जान न दई श्याम सुंदरपै सुनु सोई तैं पोच करी ॥ कुल अभिमान हटकि हठि राख्यो तैं जियमें
 कछु और धरी । यज्ञ पुरुष तजि करत यज्ञ बिधि तामें कहि कछु चाडसरी ॥ कहाँलगि समुझाऊं
 सूरज सुनि जाति मिलनकी औधि टरी । लेहु सँभारि देहु पिय अपनी विन प्रमाणन सब सौज धरी ॥ २ ॥
 हरिहि मिलत काहै को फेरी । देखौं बदन जाइ श्रीपतिको जानदेहु हौं हैहों चेरी ॥ पालागौं छाँडहु
 अब अंचल बार बार विनती करौं तेरी । तिरछो करम भयो पूरबको प्रीतम भयो पाँइकी बेरी ॥ इहलै
 देहु मारु शिर अपने जासों कहत कंत तुम मेरी । सूरदास सो गई अगमने सब सखियनसों हरि

मुख हेरी ॥ ३ ॥ जानदै श्यामसुंदरलौं आजु । सुनिहो कंत लोकलाजते विगतरुहै सब काजु ॥
 राखो रोंकि पाँइ वंधनके रोकौ अरु जलनाजु ॥ हौं तो तुरतै मिलौंगी हरिको तू घर बैठे गाजु ॥ चितवत
 हुती झरोखे ठाढी किये मिलनको साजु । सूरदास तजु त्यागि छिनकमें तज्यो कंतको
 राजु ॥ ४ ॥ अध्याय २४ ॥ गोवर्धनपूजा ॥ विलावल ॥ नंदमहरसां कहति यशोदा सुरपतिकी
 पूजा विसराई । जाकी कृपा वसत ब्रज भीतर जाकी दीनी भई बडाई ॥ जाकी कृपा
 दूध दहि पूरन सहस मथानी मथति सदाई । जाकी कृपा अन्न धन मेरे जाकी कृपा नवौ निधि
 आई ॥ जिनकी कृपा पुत्र भयो मेरे कुशलरहौ बलराम कन्हई । सूर नंदसां कहति यशोदा दिन
 आए अव करहु चडाई ॥ ५ ॥ राग गौरी ॥ एहैं हैं कुलदेव हमारे । काहू नहीं और हम जानति गोधनहैं
 ब्रजके रखवारे ॥ दीपमालिकाके दिन पाँचेक गोपन कहौ बुलाई । बलि सामग्री करैं चडाई अव
 हीं कहो सुनाई ॥ लई बुलाइ महरि महरानी सुनतहि आई धाई । नंदघरनि तब कहति सखिनसां
 कतहैं रही भुलाई ॥ भूली कहा कहौ सो हमसां कहति कहा डरपाई । सूरदास सुरपतिकी पूजा
 तुम सबही विसराई ॥ ६ ॥ चौंकि परीं सब गोकुल नारि । भली कही सबही सुंघि भूली तुमहि
 करी सुधि भारि ॥ कह्यो महरिसां करौ चडाई हम अपने घर जाति । तुमहूं करौ भोग सामग्री
 कुलदेवता अमाति ॥ यशुमति कह्यो अकेली हौं मैं तुमहुं संग सुहि दीजौ । सूर हँसति ब्रजनारि
 महरिसां एहैं साँचु पतीजौ ॥ ७ ॥ राग कल्याण ॥ कही मोहिं भली कीनी महरि । राजकाजहि रहत
 डोलत लोभहीकी लहरि ॥ क्षमा कीजौ मोहिं हौं प्रभु तुमहिं गयो भुलाई । ग्वालनसां कहि तुरत
 पठयो ल्याउ महरि बुलाई ॥ नंद कह्यो उपनंद ब्रजके अरु महर वृषभान । अवहिं जाइ बुलाई आनौ
 करत दिन अनुमान ॥ आइगए दिन अवहिं नेरे करत मन इह ज्ञान । सूर नंद विनय करत कर जोरि
 सुरपति ध्यान ॥ ८ ॥ राग विलावल ॥ नंदमहर उपनंद बुलाए । आदर करि बैठनको दीनो महर महर
 मिलि शीश नवाए ॥ मनहीं मन सब सोच करतहैं कंस नृपति कछु मांगि पठाए । राज अंशधन जो कछु
 उनको विनुमांगे सो हम दै आए ॥ बूझत महर बात नंद महरहि कौन काज हम सबनि बुलाए ।
 सूर नंद यह कहि गोपनसां सुरपति पूजाके दिन आए ॥ ९ ॥ हँसत गोप कहि नंदमहरसां भली
 भई यह बात सुनाई । हमहिं सबनि तुम बोलि पठाए अपने जिय सब गए डराई ॥ काहेको डरपे
 हम बोलत हँसत कहत बातें नंदराई । बडो सँदेह कियो हम तुमको ब्रजवासी हम तुम सब भाई ॥
 करो विचार इन्द्र पूजाको जो चाहो सो लेहु मैगाई । वरप दिवसको दिवस हमारो घर घर नेवज करौ
 चँडाई ॥ अन्नकूट विधि करत लोग सब नेम सहित करि पकवान्ह । महरि जोरि कर विनय
 इन्द्रसां सूर अमर करि कीजै कान्ह ॥ १० ॥ गावत मंगलचार महर घर । यशुमति भोजन करति
 चँडाई नेवज करि करि धरति श्याम डर ॥ देखे रहौ न छुवै कन्हैया कह जानै वह देवकाजपर ।
 और नहीं कुलदेव हमारे कै गोधन कै वै सुरपतिवर ॥ करति विनय करजोरि यशोदा कान्हहि
 कृपा करौ करुणाकर । और देव तुम सरि कोउ नाहीं सूर करौ सेवा चरणनतर ॥ ११ ॥ राग सृष्टी ॥
 बाजति नंद अवास बधाई । बैठे खेलत द्वार आपने सात वरषके कुँवर कन्हई ॥ बैठे नंद सहित
 वृषभानुहि और गोप बैठे सब आई । थापे देत घरनके द्वारे गावति मंगल नारि सुहाई ॥ पूजा करत
 इन्द्रकी जानी आए श्याम तहां अतुराई । बूझत बार बार हरि नंदहिं कौन देवकी करत पुजाई ॥
 इन्द्र बडे कुल देव हमारे उनते सब यह होत वडाई । सूर श्याम तुमरे हित कारण यह पूजा हम करत
 सदाई ॥ १२ ॥ राग आसावरी ॥ नंद कह्यो घर जाहु कन्हई । ऐसेमें तुम जैहो जिनि कहुं अहो महरि

सुत लेहु बुलाई ॥ सोइ रहौ हमरे पलिका पर कहति महरि हरिसों समुझाई । वरष दिवसको
 महा महोत्सव को आवै को कौन सुनाई ॥ और महर ढिग श्याम बैठिकै कीनो एक विचार
 बनाई । सपने आजु मिल्यो मोकों इक बडो पुरुष अवतार जनाई ॥ कहन लग्यो मोसों ए बातें
 पूजत हौ तुम काहि मनाई । गिरि गोवर्धन देवनकोमणि सेवहु ताको भोग चढाई ॥ भोजन करै
 सबनिके आगे कहत श्याम यह मन उपजाई । सूरदास गोपन आगे यह लीला कहि कहि प्रगट
 सुनाई ॥ १३ ॥ राग धनाश्री ॥ सुनी ग्वाल यह कहत कन्हवाई । सुरपतिकी पूजाको मेटत गोवर्धनकी
 करत बढाई ॥ फैलि गई यह बात घरनि घर हरि कह जाने देव पुजाई । हलधर कहत सुनौ
 ब्रजबासी यह महिमा तुम काहु न पाई ॥ कोउ कोउ कहत करौ अब ऐसोइ कोउ यह कहत कहै
 को भाई । सूरदास कोउ सुनि सुख पावत कोउ बरजत सुरपतिहि डराई ॥ १४ ॥ मेरो कह्यो
 सत्यकै जानौ । जो चाहौ ब्रजकी कुशलाई तौ गोवर्धन मानौ ॥ दूध दही तुम कितनो लैहो
 गोसुत बढे अनेक । कहा पूजि सुरपतिको पावै छांड़ि देहु यह टेक ॥ मुँह मांगे फल जो तुम
 पावहु तौ तुम मानहु मोहिं । सूरदास प्रभु कहत ग्वालसों सत्य वचन कहि दोहि ॥ १५ ॥ छांड़ि
 देहु सुरपतिकी पूजा । कान्ह कह्यो गिरि गोवर्धनते और देव नहिं दूजा ॥ गोपनि सत्य मानि यह
 लीनी बडे देव गिरिराजा । मोहिं छांड़ि पर्वत पूजतहैं गर्व कियो सुरराजा ॥ पर्वत सहित धोइ
 ब्रजदारौं देउँ समुद्र बहाई । मेरी बलि औरहि लै पर्वत इनको करौं सजाई ॥ राखौ नहीं इन्हें
 भूतलमें गोकुल देउँ बुडाई । सूरदास प्रभु जाके रक्षक संगहि संग रहाई ॥ १६ ॥ राग विलावल ॥
 गोकुलको कुल देवता श्रीगिरिधर लाल । कमल नयन घन साँवरो वपु बाहु विशाल ॥ हलधर
 ठाढे कहतहैं हरिजूके ख्याल । करता हरता आपुही आपुही प्रतिपाल ॥ वेगि करौ मेरो कह्यो
 पकवान रसाल । वह मधवा बलि लेतुहैं नित करि करि गाल ॥ गिरि गोवर्धन पूजिये जीवन
 गोपाल । जाके दीने बाढहींगैया गण जाल ॥ सब मिलि भोजन करतहैं जहँ तहँ प
 शुपाल । मूर सुरहि डरपत रहै जिय जिय प्रतिबाल ॥ १७ ॥ राग सारंग ॥ तात गोवर्धन
 पूजहु जाय । मधु मेवा पकवान मिठाई व्यंजन बहुत बनाय ॥ यहि पर्वत तृण ललित मनोहर
 सदा चरै सुख गाय । कान्ह कह्यो सोइ कीजिये जैसे मधवा जाइ रिसाय ॥ भरि भरि शकट चले गिरि
 सन्मुख अपने अपने चाय । सूरदास प्रभु अपवश भोगी धरि स्वरूप हरिराय ॥ १८ ॥ राग विलावल ॥ ब्रज
 घर घर अति होत कोलाहल । ग्वाल फिरत उमंगे जहां तहां सब अति आनंद भरे जु उमाहल ॥
 मिलत परस्पर अंकम दैदैं शकटनि भोजन साजत । दधि लावनी मधु माट धरतलै राम श्याम
 संग राजत ॥ मंदिरते लै धरत अजिरपर षटरसकी जिवनार । डालन भरि अरु कलश नए भरि
 जोरतहैं परकार ॥ सहस शकट मिष्टान्न अन्न बहु नंद महर घरहीको । सूर चले सबलै घर घरते
 संग सुवन नंदजीको ॥ राग नट ॥ अति आनंद ब्रजबासीलोग । भाँति भाँति पकवान शकटभरि
 लैलै चले छहौं रस भोग ॥ तीनि लोकको ठाकुर संगहि तासों कहत सखा हम योग । आवत जात
 डगर नहिं पावत गोवर्धन पूजा संयोग ॥ कोउ पहुँचे कोउ रंगत मगमें कोउ घरमें ते निकसे
 नाहिं । कोउ पहुँचाइ शकट घर आवत कोउ घरते भोजन लैजाहि ॥ मारगमें कोउ नितंत आवत
 कोउ गावत अपने रस माहि । सूर श्यामको यशुमति टेरति बहुत भीरहै हरि न भुलाहि ॥ १९ ॥
 ॥ राग कान्हरो ॥ शकट साजि सब ग्वाल चले गिरि गोवर्धन पूजाके काज । घर घरते मिष्टान्न चले लै
 भाँति भाँति बहु बाजन बाज ॥ अति आनंद भरे गुण गावत उमडे फिरत अहीर । पैडो नाहिं पावत

तहां कोऊ ब्रजवासिनकी भीर ॥ एक चले आवत ब्रजतनको एक ब्रजते बनकाज । सूरदास
 तहां श्याम सबनिको देखियतहै शिरताज ॥ १२० ॥ राग नटनारायण ॥ चलीं घर घरनिते ब्रजनारि । मनौ
 इंद्रवधून पंगति शोभा लागति भारि ॥ पहिरि सारि सुरंग पंचरंग षटदश करि शृंगारि । वहै इच्छा
 सबनिके मन श्यामरूप निहारि ॥ ललिता चंद्रावली सहित राधा संग कीरति महतारि । चले
 पूजा करन गिरिकी सूर सँग नर नारि ॥ २१ ॥ बहुत जुरे ब्रजवासी लोग । सुरपति पूजा मेदि
 गोवर्धन कीनो यह संयोग ॥ योजन बीस एक अरु अगरो डेरा इहि अनुमान । ब्रजवासी नर नारि
 अंत नहि मानो सिंधु समान ॥ इक आवत ब्रजते इतहीकौ इक इतते ब्रजजात । नंदलिये तब ग्वाल
 सूर प्रभु आइ गए तहां प्रात ॥ २२ ॥ राग आसावरी ॥ नंद करत गिरिकी पूजा बिधि । भोजन सब लै
 धरे छहौं रस कान्ह संग अष्टौ सिधि ॥ लैलै आवत ग्वाल घरनिते भोजन बहुत प्रकार । व्यंजन देखि
 बहुत सुख पावत तुरत करौं जिवनार ॥ जो हरि कहत करत सोइ सोइ बिधि पूजाकी बहु भांति ।
 माखन दधिपै तक्र धरत लै जोरि जोरि सब पांति ॥ को बरनै नाना बिधि व्यंजन जे वनए नंदनारी ॥
 सूर श्यामकी लीला अद्भुत वरणै सुखचारी ॥ २३ ॥ राग नटनारायण ॥ विप्र बुलाइ लिये नंदराइ ।
 प्रथमारंभ यज्ञको कीनो उठे देद ध्वनि गाइ ॥ गोवर्धन शिर तिलक बंदियो मेदि इंद्र ठकुराइ ।
 अन्नकूट ऐसो रचि राख्यो गिरिकी उपमापाइ ॥ भांति भांति व्यंजन परसाए कापै वरण्यो जाइ ।
 सूर श्यामको कहत ग्वाल गिरि जेवहीं कहौ बुझाइ ॥ २४ ॥ राग विलावल ॥ इंद्रसोच करि मनहि आपने
 चकृत पुनि पुनि बुद्धि विचारत । कहा करत देखौं इनको मैं कौन बिलंबु लागत पुनि मारत ॥ अब
 ए करै आपने मन सुख मोको वनै सम्हारै । तबलौं रहौं पूजि निवरै ये बचिहैं बैर हमारे ॥ इतनो
 सुख इनके कर रहै दुख है बहुत अगाध । सूरदास सुरपतिकी वाणी झूठी मनकी साध ॥ २५ ॥
 ॥ राग गौरी ॥ चढ़ि विमान सुरगण नभ देखत । लाल करत श्याम नवतन यह फिरि फिरि गिरि गोवर्धन
 पेखत ॥ थकित भए सब जहां तहां मुनिजन ठौर ठौर नर नारि । चितै रहे सब श्याम बदन तन
 गति मति सुरति विसारि ॥ पूजा मेदि इंद्रकी पूजत गिरि गोवर्धनराज । सूरदास सुरपति गर्वितभयो
 मैं दैवन शिरताज ॥ २६ ॥ राग केदारो ॥ कहत कान्ह नंद बाबा आवहु । भोजन परसि धरे सब आगे
 प्रेम सहित गिरिराज मनावहु ॥ और नंद उपनंद बुलाए कब्यो सबनिसों भोग लगावहु । सपने
 मैं देखौ यहि मूरति यहै रूप धरि ध्यान मनावहु ॥ इक मन इक चित करि अर्पन करौ प्रगट देव
 तुम दरशन पावहु ॥ सूर श्याम कहि प्रगट सबनिसों अपने कर लै लै जु जिमावहु ॥ २७ ॥ बिनती करत
 सकल अहीर । सकल भरि भरि ग्वाल लै लै सिखर डारत क्षीर ॥ चलयौ वहि चहुं पासते पय सुरसरी
 जल टारि । वसन भूपन लै चढ़ाए भीर अति नर नारि । मूदि लोचन भोग अप्यौ प्रेमसों रुचि
 भारि ॥ सबनि देखी प्रगट मूरति सहसभुजा पसारि ॥ रुचि सहित गिरि सबनि आगे करनि लैलै खाइ
 नंदसुत महिमा अगोचर सूर क्यों कहै गाइ ॥ २८ ॥ राग नट ॥ गिरिवर श्यामकी अनुहारि । करत
 भोजन अति अधिकई भुजासहस पसारि ॥ नंदको कर गहे ठाढ़े यहै गिरिको रूप । सखी ललिता
 राधिकासों कहति देखि स्वरूप ॥ यहै कुंडल यहै माला यहै पीत पिछौरि । शिखर शोभा श्यामकी
 छवि श्याम छवि गिरि जोरि ॥ नारि बदरौला रही वृषभानु घर रखवारि । तहांति उहि भोग अपैउ
 लियो भुजा पसारि ॥ राधिका छवि देखि भूली श्याम निरखी ताहि । सूर प्रभु वशभई प्यारी कोर
 लोचन चाहि ॥ २९ ॥ धनाश्री ॥ देखहु री हरि भोजन खात ॥ सहसभुजाधरि उत जेवतहैं इतहि कहत
 गोपनिसों बात ॥ ललिता कहत देखिहौ राधा जो तेरे मन बात समाइ ॥ धन्य धन्य सब गोकुलवासी

संग रहत त्रिभुवनके राइ ॥ जेवत देखि नंद सुख पायो अति आनंद गोकुल नर नारी । सूरदास
स्वामी सुखसागर गुण आगर नागर दै तारी ॥ ३० ॥ राग गौरी ॥ इह लीला सब करत कन्हारै ॥ उत जेवत
गिरि गोवर्धन संग इत राधासों प्रीति लगाई ॥ इत गोपनसों कहत जिमावहु उत आपुहि जेवत मन
लाई । आगे धरे छवौ रस व्यंजन बदरौलाको लियो मँगारै ॥ अमर विमान चढे सुख देखत जय
ध्वनि करि सुमननि बरपाई । सूर श्याम सबके सुखदाता भक्तहेतु अवतार सदाई ॥ ३१ ॥ गोप-
निसों यह कहत कन्हारै । जो मैं कहत रह्यो भयो सोई सपनंतरकी प्रगट बताई ॥ जो मांग्यो
चाहौ सो मागौ पावहुने जो जा मन आई । कहत नंद सब तुमही दीनों मांगतहौं हरिकी कुशला
ई ॥ करजोरे नंद आगे ठाढे गोवर्धनकी करत बडाई । ऐसे देव कहूं नहिं देखे सहसभुजा धरि खात
मिठाई ॥ सदा तुम्हारी सेवा करिहौं और देव नहिं करौं पुजाई । सूर श्यामको नीके राखहु
कहत महर ये हलधर भाई ॥ ३२ ॥ अहने अपने टोल कहत ब्रजबासी आई । भावभक्ति ले चलौ
सुरपतिको आसी आई ॥ शरदकाल ऋतु जानि दीपमालिका बनाई । गोपनके उनमाद फिरत
उदमदे कन्हारै ॥ घर घर थापे दीजिये घर घर मंगलचार । सात वर्षको सांवरो खेलत
नंददुआर ॥ १ ॥ २ ॥ बैठि नंद उपनंद बोलि वृषभानु पठाए । सुरपति पूजा देखि जानि तहां गोविंद
आए ॥ बार बार हाहाकरहि कहि बाबा यह बात । घर घर भोजन होतहै कौन देवकी जात ॥
३ ॥ श्याम तुम्हारी कुशल जानि एक मंत्र उपैहौं । षट्स भोजन साजि भोग सुरपतिको
दैहौं ॥ नंद कह्यो चुचुकारिके जाइ दमोदर सोई । वर्षदिवसको दिवसहै महामहोत्सव होई ॥ ४ ॥
हरि बोले सब गोप मंत्र बहुरचो फिरि कीनो । एक पुरुष मोहि आइ आजु सपनो निशि दीनो ॥
सब देवनको देवता गिरि गोवर्धनराजु । ताहि भोगु किनि दीजिये सुरपतिको कह काजु ॥ ५ ॥
बाढैं गोसुत गाइ दूध दधिको कहा लेखो । यह परचा विद्यमान नैन अपने किन देखो ॥ तो देखत
बलि खाइगो मुँहमाँगे फलदेइ ॥ गोप कुशल जो चाहिए गिरि गोवर्धन सेइ ॥ ६ ॥ दिवस देवारीके प्रातही
सब मिलि पूजन जाइ ॥ नंद प्रतीति न मानहु अब तुम देखत बलि खाइ ॥ गोपन करचो विचार शकट
प्रति सबही साजे । बहुबिधिके पकवान जहां तहांवाजन वाजे ॥ ७ ॥ एक बाटते उबटि चले एक नदी
सुरभीर । एक न पैडो पावहीं उमैंडे फिरहिं अहीर ॥ इक घरते उठि चले एक घरको फिरि जाहिं ।
गावत गुण गोपालके ग्वाल उमगे न समाहिं ॥ ८ ॥ गोपनको सागर भयो गिरि भयो मंदरचार ।
रत्नभई सब गोपिका श्याम बिलोवनहार ॥ बज चौरासी कोश परे गोपनके डेरा । लावैं चौवन
कोश आजु ब्रजवासिन घेरा ॥ ९ ॥ सबहीके मन सावँलो देखौ सबनि मझारि । कौतुक देखन
देवता आए लोक बिसारि ॥ लीने विप्र बुलाइ यज्ञ आरंभ न कीनो । सुरपति पूजा मेटि भोग गोव-
र्धन दीनो ॥ १० ॥ प्रथम दूध अन्हवाइ वहुँरि गंगा जल डारे । बडो देवता जानि कान्हको मतौ
बिचारे ॥ जैसे बने गिरिराजजू तैसो अनको कोट । मगन भए पूजा करैं नर नारी बड छोट ॥ ११ ॥
सहसभुजा उरधरे करै भोजन अधिकाई । नख शिखलों पर्यंत मनी दूसरो कन्हारै ॥
ललता कहै तेरे हियन समाई । गहे अंगुरिया तातकी ढोंटा भोजन खाइ ॥ १२ ॥ पीत दुमाल्यो
श्वेत कंठ मोतिनकी माला । भूषण भुजा अनूप झलमलति नैन विशाला ॥ श्यामकी शोभा
गिरि बन्यो गिरिकी शोभा श्याम । जैसे पर्वत भातुको संग भैया बलराम ॥ १३ ॥
जैसिय कनकपुरी जु दिव्य रतननिसों छाई । बलि दीनी परभात छाँह पूरब चलि आई ॥ चहुँ ओर
चक्रा धरे चंदहि पटतर सोई । ठौर ठौर वेदी रची बहु बिधि पूजा होई ॥ १४ ॥ जहाँ तहाँ दधि धरचो

कहों कहा उज्ज्वलताई । उदधि शिखर हैरह्यो भातमें देह छपाई ॥ बदरौला वृषभानुके एक विलोवन हारि ताकी बलि वहि देवता लीन्ही भुजा पसारि ॥ १५ ॥ लै सब भोजन अरपि अरपि गोपन कर जोरे । अगणित कीने स्वाद दास बरणे कछु थोरे ॥ यहि बिधि पूजा पूजिकै गोविंद पूछो जाई । कान्ह कह्यो हंसि सूरसों लीला सरस बनाई ॥ १६ ॥ राग गौरी ॥ श्याम कहत पूजा गिरि मानी । जो तुम भक्ति भावसों अप्यो देवराज सब जानी ॥ तुम देखत भोजन सब कीनो अब तुम मोहि पत्याने । बडो देव गिरिराज गोवर्धन इनै रहौ तुम माने ॥ सेवा भली करी तुम मेरी देव कही यह बानी । सूर नंदमुख चूमत हरिको यह पूजा तुम ठानी ॥ ३३ ॥ और कछु मांगो नंद हमसों । जो मांगौ सो देउं तुरतही यहै कहत गोपनसों ॥ बल मोहन दोऊ सुत तेरे कुशल सदा ये रहि हैं । इनको कछु करत तुम रहियो जब जोई ये कहि हैं ॥ सेवा बहुत करी तुम मेरी अब तुम सब घर जाहू । भोग प्रसाद लेहु तुम मेरो गोप सबै मिलि खाहू ॥ सपनो मैहीं कछु श्यामसों करहु हमारी पूजा । सुरपति कौन बापुरो मोते और देव नहिं दूजा ॥ इंद्र आइ बरषै जो ब्रज पर तुम जिनि जाहु डराई । सुनहु सूर सुत कान्ह तुम्हारो कहि हैं मोहि सुनाई ॥ ३४ ॥ राग सारंग ॥ भली करी पूजा तुम मेरी । बहुत भाव करि भोजन अप्यो इह सब मानिलई मैं तेरी ॥ सहस्रभुजा धरि भोजन कीनों तुम देखत विदमान । मोहि जानतहै कुँवर कन्हैया यही नहीं कोउ आन ॥ पूजा सबकी मानि मैं लीनी जाहु घरनि ब्रजलोग । सूर श्याम अपने कर लीने बाँटत झूठनि भोग ॥ ३५ ॥ राग विलावल ॥ विनती करत नंद करजोरे पूजा कह हम जानैं नाथ । हम हैं जीव सदा मायाके दरश दियो हम किए सनाथ ॥ महापतित मैं तुम पावन प्रभु शरण तुम्हारी आयौ तात । तुमसे देव और नहिं दूजो कोटि ब्रह्मांडरोम प्रति गात ॥ तुम दाता अरु तुमहि भोक्ता हरता करता तुमहीं सारा ॥ सूर कहा हम भोग लगायो तुमहीं भुलै दियो संसार ॥ ३६ ॥ यह पूजा मोहि कान्ह बताई । भूल्यो फिरत द्वार देवनिके त्रिभुवनपति तुमको बिसराई ॥ आपुहि कृपाकरी स्वप्नंतर श्यामहि दरश दियो तुम आई । ऐसे प्रभु कृपालु करुणामय बालककी अति करी बड़ाई ॥ गिरि पाँयनलै हरिको पारत हलधरको पाँयन लै नाई । सूर श्याम बलराम तुम्हारे इनको कृपा करौ गिरिराई ॥ ३७ ॥ ग्वाल कहत धनि धन्य कन्हैया बडो देवता प्रगट बतायो यह कहि कहि सब लेत बलैया ॥ धन्य धन्य गिरिराजनकी मणि तुम सम आन न दूजा ॥ तुम लायक कछ नाहिं हमारे को जानै तुम पूजा ॥ गोप सबै मिलि कहत श्यामसों जो कछु कह्यो सो कीनो । सूर श्याम कहि कहि यह वाणी देव मानि सुखलीनो ॥ ३८ ॥ राग गौडमलार ॥ गोपनंद उपनंद वृषभानु आए । विनय सब करत गिरिराजसों जोरि कर गए तनु पाप तुव दरशपाए ॥ देवता बडो तुम प्रगट दरशन दियो प्रकट भोजन कियो सबनि देख्यो ॥ प्रकट वाणी कही राज गिरि तुम सही और नहिं तिहुँ भुवन कहूँ पेख्यो ॥ हंसत हरिमनहिमन तकत गिरिराज तन देव परसन भए करो काजा ॥ सूर प्रभु प्रगट लीला कही सबनिसों चले घर घरनि अपने समाजा ॥ ३९ ॥ देखि थकित गण गंधर्व सुर मुनि ॥ धन्य नंदको सुकृत पुरातन धन्य कही कहि जैजै धुनि ॥ धन्य धन्य गोवर्धन पर्वत करत प्रशंसा सुर मुनि पुनि पुनि ॥ आपुहि खात कहतहै गिरिको यह महिमा देखी न कहूं सुनि ॥ यहै कहत अपने लोकनि गए धनि ब्रजवासी वशकीनों उनि ॥ सूर श्याम धनि धनि ब्रजबिहारी धन्य धन्य सब कहतहैं गुनि गुनि ॥ १४० ॥ राग नट नारायणी ॥ चले ब्रज घरनिको नर नारि । इंद्रकी पूजा मिटाई तिलक गिरिको सारि ॥ पुलक अंग न समात उरमें महर महरि समाज । अब बड़े हम देव पाए गिरि गोवर्धन राज ॥ इन्हिते ब्रज चैन रहिहै मांगि भोजन खात । यहै घेरा चलत ब्रजजन सबनि मुख यह बात ॥ सबै सदनन आइ पहुँचे करत केलि विलास ।

सूर प्रभु यह करी लीला इंद्र रिस परकास ॥ ४१ ॥ अध्याय ॥ २५ ॥ इंद्रविचार राग सारंग ॥ ब्रजके वासिन
 मो बिसरायो । भली करी बलि मेरी जो कछु सो लै सब पर्वतहि जिमायो ॥ मोसों गर्वकियो लघु
 प्राणी नाजानिये कहा मन आयो । त्रिदशकोटि अमरनको नायक जानि बूझि इन मोहिं भुलायो ॥
 अब गोपन भूतल नहिं राखौं मेरी बलि मोको न चढायो । सुनहु सूर मेरे मारत धौं पर्वत कैसे
 होत सहायो ॥ ४२ ॥ राग सोरठ ॥ प्रथमहि देउ गिरिहि बहाइ । बज्रघातनि करौं चूरन देउ धराणि
 मिलाइ ॥ मेरी इन महिमा न जानी प्रगट देउ दिखाइ । जलबराषि ब्रज धोइ डारौं लोग देउ बहाइ ॥
 खात खेलत रहे नीके करि उपाधि बनाइ ॥ बरष दिवस मोहिं देत पूजा दई सोऊ मिटाइ ॥ रिस
 सहित सुरराज लीन्हें प्रबल मेघ बुलाइ । सूर सुरपति कहत पुनि पुनि परौ ब्रजपर धाइ ॥ ४३ ॥
 राग मेघमलार ॥ सुनत मेघ वर्तक साजि सैन लै आए । जलवर्त वारिवर्त पवनवर्त बज्रवर्त आगिवर्तक
 जलद संग ल्याए ॥ घहरात तरतरात गररात हहरात पररात झहरात माथ नाए । कौन ऐसो काज
 बोले हम सुरराज प्रलयके साज हमको बुलाए ॥ बरष दिन संयोग देत मोकों भोग क्षुद्रमति ब्रज
 लोग गर्व कीनो । मोहिं गए बिसराइ पूज्यो गिरिवर जाइ परौ ब्रजपर धाइ आयसु यह दीनो ॥
 कितक ब्रजके लोग रिस करत किहिं योग गिरि लियो भोगफल तुरत पैहैं । सूर सुरपति सुन्यो
 बयो जैसो लुन्यो प्रभु कहा गुन्यो गिरिसहित वैहैं ॥ ४४ ॥ राग मलार ॥ बिनती सुनहु देवमघवापति ।
 कितिक बात गोकुल ब्रजवासी बारवार रिस करत जाहि अति ॥ आपुन बैठि देखियो कौतुक
 बहुते आयसु दीनो । छिनमें बरषि प्रलयजल पाटौं खोजु रहै नहिं चीनो ॥ महाप्रलय हमरे जल
 बरषै गगन रहे भरिछाड़ । अक्षयवृक्ष बट बढतु निरंतर कहा ब्रज गोकुल गाइ ॥ चले मेघ
 माथे कर धरिकै मनमें क्रोध बढाइ । उमडत चले इंद्रके पायक सूर गगन रहे छाड़ ॥ ४५ ॥
 राग गौडमलार ॥ मेघदल प्रबल ब्रजलोग देखैं । चकित जहां तहां भए निरखि बादर नए ग्वाल गोपाल
 डारि गगन पेखैं ॥ ऐसे बादर सजल करत अति महाबल चलत घहरात करि अंधकाल । चकृत भए
 नंदसब महर चकृत भए चकृत नर नारि हरि करत ख्याला ॥ घटा घनघोर घहरात अररात दररात
 सररात ब्रजलोग डरपोतडित आघात तररात उतपात सुनि नर नारिं सकुचि तनु प्राण अरपै ॥ कहां
 चाहत हौ न भई न कबहुं जौन कबहुं आंगन भौन बिकल डोलै ॥ मेदि पूजा इंद्र नंदसुत गोविंद सूर प्रभु
 करै आनंद कलोलै ॥ ४६ ॥ सैनसाजि ब्रजपर चढि धावहि । प्रथम बहाइ देउ गोवर्धन ता पाछे ब्रज खोदि
 बहावहि ॥ अहिरन करी अवज्ञा प्रभुकी सो फल उन कहैं तुरत देखावहि । इंद्रहि पेलि करी गिरि पूजा
 सलिल बराषि ब्रजनाउँ मिटावहि ॥ बल समेत निशि वासर बरषहु गोकुल बोरि पताल पठावहि । सूरदास
 सुरपति आज्ञा यह भूतल कतहुं रहन न प्रावहि ॥ ४७ ॥ राग मेघमलार ॥ बादर घुमडि उमडि आए ब्रज
 पर वर्षत कोरे धूमेरे घटा अतिही जल । चपला अति चमचमाति ब्रजजन सब डर डरात टेरेत
 शिझू पिता मात ब्रज गलबल ॥ गर्जत ध्वनि प्रलयकाल गोकुल भयो अंधकार चकृत भए ग्वाल
 बाल घहरत नभ करत चहल । पूजामेदि गोपाल इंद्र करत इहै हाल सूर श्याम राखहु अब गिरिवर
 बल ॥ ४८ ॥ राग गौडमलार ॥ गिरिपर बरषन आए बादर । मेघवर्त जलवर्त सैन साजि आये लैलै आदर ॥
 सलिल अखंड धार धर टूटत कियो इंद्र मन सादर । मेघ परस्पर यहै कहतहैं धोइ करहु गिरि
 खादर ॥ देखि देखि डरपत ब्रजवासी अतिहि भए मन कादर । यहै कहत ब्रज कौन उबारै सुरपति
 किए निरादर ॥ सूर श्याम देखे गिरि अपने मेघानि कीनो दादर । देव आपनो नहीं सँभारत
 करत इंद्रसों ठादर ॥ ४९ ॥ राग मलार ॥ गए बितताइ ब्रज नरनारि । धरत सैतत धाम बासन नाहिं

सुरति सम्हारि ॥ पूजि आए गिरि गोवर्धन देति पुरुषनि गारि । आपनो कुलदेव सुरपति धरयो
 ताहि विसारि ॥ दियो फल यह गिरिगोवर्धन लेहु गोदपसारि । सूर कौन सम्हारि लैहै चढ़यो इंद्र
 प्रचारि ॥ १५० ॥ राग सोरठ ॥ ब्रजके लोग फिरत बितताने । गैयनि लैवन ग्वाल गए ते धाए आवत
 ब्रजहि पराने ॥ कोऊ चितवत नभतन चकृत है कोउ गिरि परत धरनि अकुलाने । कोऊ लै
 ओट रहत वृक्षनकी अंधधुंध दिशि विदिशि भुलाने ॥ कोउ पहुँचे जैसे तैसे गृह कोउ दूँदत गृह
 नाहि पहिचाने । सूरदास गोवर्धन पूजा कीने कर फल लेहु बिहाने ॥ १५१ ॥ राग नट ॥ तरपत नभ
 डरपत ब्रज लोग । सुरपतिकी पूजा विसराई लै दीनो पर्वत को भोग ॥ नंदसुवन यह बुधि उप
 जाई कौन देव कह्यो पर्वत योग । सूरदास गिरि बडो देवता प्रगट होइ ऐसे संयोग ॥ १५२ ॥ ब्रज नरना
 रि नंद यशुमति सों कहत श्याम एकाज करे । कुलदेवता हमारे सुरपति तिनको सब मिलि मेटि धेरो ॥
 इंद्रहि मेटि गोवर्धन थाप्यो उनकी पूजा कहा सरे । सैंतत फिरत जहाँ तहाँ बासन लरिकनु लैलै
 गोदभरे ॥ को करि लेइ सहाइ हमारे प्रलयकालके मेघ अरे । सूरदास प्रभु कहत नारि नर क्यों
 सुरपति पूजा विसरे ॥ १५३ ॥ राग विलावल ॥ राखिलेहु गोकुलके नायक । भीजत ग्वाल गाइ गोसुत
 सब विषम बूंद लागत जनु सायक ॥ बरपत मुसलधार सैनापति महामेघ मघवाके पायक । तुम
 बिनु एसो कौन नंदसुत यह दुख दुसह मिटावन लायक ॥ अघ मरदन वक्वदन विदारन
 वकी विनाशन सब सुखदायक । सूरदास प्रभु ताकी यहगति जाके तुमसे सदा
 सहायक ॥ १५४ ॥ अध्याय ॥ २६ ॥ तथा ॥ २७ ॥ मलार ॥ शरण राखि लेहो नंदताता । घटा
 आई गरजि युवती गई मन लरजि बीजु चमकति तरजि डरत गाता ॥ और कोऊ नहीं
 तुम त्रिभुवनधनी जहँ तहँ विकल हैके कही तुमहि नाता । सूर प्रभु सुनि हँसत प्रीति उरमें बसत
 इंद्रको कसत हरि जगत धाता ॥ १५५ ॥ राग विलावल ॥ राखिलेहु अब नंदकिशोर ॥ तुम जु इंद्रकी मेटी
 पूजा बरपतहै अति जोर ॥ ब्रजवासी तुम तन चितवतहै ज्योंकरि चंद्र चकोर । जनि जिय डरो
 नैन जनि मूँदौ धरिहौं नखकी कोर ॥ करि अभिमान इंद्र झर लायो करत घटा घनघोर । सूर श्या
 म कहि तुमको राखौ बूंद न आवै छोर ॥ १५६ ॥ राग मलार ॥ माधवजू कांपत डरत हियो । दामिनि
 चाप बूंद सायक मनौ है योधा लै संग ॥ है गयो सरस समीर दुहुँ दिशि धनुष धुजा बहु रंग ।
 शोभित सुभट प्रचारि पैजकरि भिरत न मोरत अंग ॥ कहत तुम्हारे कियो नंदनंदन सुरपतिको
 व्रत भंग । बरपत प्रलय मेघ धर अंबर डरपत गोकुल गाउँ । समरथ नाथ शरणहौं तुमबिनु
 और कौनपै जाउँ ॥ जो तुम अनल व्याल मुख राखे श्रीपति सुहृद सुभाई । हमरे तौ तुमहीं
 चिंतामणि सब बिधि दाइ उपाई ॥ जनि डर करहु सबै मिलि आवहु या पर्वतकी छाहँ । वर्षत
 में गोपाल बुलाए अभय किये दै बाहँ ॥ एक हाथ गोवर्धन राख्यो सात दिवस बलबीर । सूरदास
 प्रभु ब्रजवासिनके ए हरता सब पीर ॥ १५७ ॥ माधव मेघ घेरि कितौ आए । घरको गाय बहोरो
 मोहन ग्वालन टेर सुनाए ॥ कारी घटा सधूम देखियति अति गति पवन चलायो । चारों दिशा
 चितै किन देखौ दामिनि कौंधा लायो ॥ अति घन श्याम सुदेश सूर प्रभु करगहि शैल उठायो ।
 राखे सुखी सकल ब्रजवासी इंद्रको कोप नवायो ॥ १५८ ॥ आजु ब्रज महाघटा घन घेरो । अब
 ब्रजराख कान्ह इहि औसर सब चितवत मुख तेरो ॥ कोटि छ्यानवे मेघ बुलाए आनि कियो ब्रज
 डेरो । मूसल धार टूटै चहुँ दिशते हैगयो दिवस अँधेरो ॥ इतनी कहत यशोदा नंदन गोवर्धन
 तनहेरो । कियो उपाइ गिरिवर धरिबेको महिते पकरि उखेरो ॥ सात दिवस जल वर्षि सिराने हारि

मानि सुख फेरो । श्रीपति कियो सहाय सूर प्रभु बूंद न आवत नेरो ॥ ६९ ॥ राग मेघमलार ॥ गगनमेघ
घहरात थहरात गात । चपला चमचमाति चमकि नभ भहरात राखिले क्यों न ब्रजनंद तात ॥ सुनत
करुणाबैन उठे हरि चले ऐन नैनकी सैन गिरि तन निहारयो । सबनि धीरज दियो उचकि मंदर
लियो कह्यो गिरिराज तुमको उबारयो ॥ करजके अग्र भुजवाम गिरिवर धरो नाम गिरिधर परयो
भक्तकाजै । सूर प्रभु कहत ब्रजवासिनसों राखि तुम लिए गिरिराज राजै ॥ ९६० ॥ राग गौरी । श्याम
लियो गिरिराज उठाई । धरि धीर हरि कहत सबनिसों गिरि गोवर्धन कियो सहाई ॥ नंद गोप
ग्वालनके आगे देव कह्यो यह प्रगट सुनाई । काहेको व्याकुल भए डोलत रक्षा करी देवता आई ॥
सत्यवचन गिरिदेव कहतह कान्ह लेइ मुहि कर उचकाई । सूरदास नारी नर ब्रजके कहत धन्य तुम
कुवैर कन्हाई ॥ ६१ ॥ राग मलार ॥ वामकर घटे क्यों गिरिराज गोपी गाइ ग्वाल गोसुत सब दुःख बिसारयो
सुखकरत समाज ॥ आनंद करत सकल गिरिवर तर दुख डारयो सबही बिसराइ । चकृत भए देखत
यह लीला सबै परत हरि चरणन धाइ ॥ गिरिवर टेकि रहे बायें कर दक्षिण कर लियो सखनि उठाइ ।
कान्ह कहत ऐसो गोवर्धन देख्यो कैसो कियो सहाइ ॥ गोप बाल नंदादिक जहँलौ नंदसुवन लिए
निकट बुलाइ । सूरदास प्रभु कहत सबनिसों तुमहूँ मिलि टेकौ गिरि आई ॥ ६२ ॥ गिरि जनि गिरे
श्यामके करते । करत बिचार सबै ब्रजवासी भय उपजत अति डरते ॥ लैलै लकुट ग्वाल सब धाए
करत सहाय उठेहैं तुरते । यह अति प्रबल श्याम अतिकोमल रवकि रवकि उर परते ॥ सप्त दिवस
कर पर गिरि धारयो वर्षा बरषि हारयो अंमरते गोपी ग्वाल नंद सुत राख्यो बरषत मेघधार जलधरते ॥
यमलार्जुन दोउ सुत कुबेरके तेउ उखारे जरते । सूरदास प्रभु इंद्रगवन कियो ब्रज राख्योहै वरते ॥ ६३ ॥
राग मलार ॥ नीके धरौ नंदनंदन बलवीर गिरि जनि परै टैर नखते तब कौन सहैगो भीर ॥ चहुँदिश
पवन झकोरत घोरत मेघघटा गंभीर । उनै उनै बरषतु गिरि ऊपर धार अखंडित नीर ॥ अंध
धुंध अंबरते गिरिपर मानौ परत वज्रके तीर । चमकि चमकि चपला चकचौंधति श्याम कहत
मनधीर ॥ कर जोरत कुलदेव मनावत ब्रजके गोप अहीर । पय पकवान बिहान पूजिहैं लै दधि मधु घृत
खीर ॥ गोपी ग्वाल गाइ गोसुत सब रहैं सुख सहित शरीर । सूर श्याम गिरि धरयो वामकर मेघ भए
अति सीर ॥ ६४ ॥ गिरिवर नीके धरयो कन्हैया । देखतरहो टरे जनि नखते भुजा तनकसी भैया ॥
जब जब गाढ परत ब्रजलोगन तब करि लेत सहैया । जननि यशोदा कर लै चांपति अतिश्रम
होति रि दैया ॥ देखत प्रगट धरयो गोवर्धन चकित भए नंदरैया । पिता देखि व्याकुल मनमोहन
तब एक बुद्धि उपजैया ॥ आवहु तात गेहहु गोवर्धन गोपनसंग लिवैया । जहां तहां सबहुन गिरि
टेक्यो कान्हहि बोतदिवैया ॥ श्याम कहत सब नंद गोपसों भलो करयो उचकैया । सूरदास प्रभु अंत-
र्यामी नंदहि हरष वढैया ॥ ६५ ॥ गिरिवर धरयो सखा सब करते । सब मिलि ग्वाल लकुटियनि
टेको अपने भुजके वरते ॥ सात दिवस मूसल जल धारा वरषतुहै निशि दिन अंबरते । अंतरिक्ष जलजात
कहाँ ये क्रोध सहित फिरि बरषत झरते ॥ गाइ गोप नंदादिक राख्यो बृथा बूंद सब नेकु न थरते । सूर
गोपाल राखि गिरिवरतर गोकुल नर नारी ब्रज घरते ॥ ६६ ॥ बरषत मेघवर्त ब्रज ऊपर । मूसल
धार सलिल बरषतु हैं बूंद न आवत भूपर ॥ चपला चमकि चमकि चकचौंधति करति शब्द आघात ।
अंधाधुंध पवन वर्तक घन करत फिरत उत्पात ॥ निशि सम गगन भयो आच्छादित बरषि बरषि झर
इंदु । ब्रजवासी सुख चैन करतहैं कर गिरिवर गोविंद ॥ मेघ बरषि जल सबै बढाने विविगुण गए
सिराइ । वैसोई गिरिवर वैसोई ब्रजवासी दूनो हरष बढाइ ॥ सात दिवस जल बरषि निशा दिन ब्रज

घर घर आनंद । सूरदास ब्रज राखिलियो धरि गिरिवर कर नंदनंद ॥ ६७ ॥ बादर ब्रजपर आनि
 अरे । तवते वाम करज पर राख्यो बहुरि फेरि धुमे ॥ सात दिवस मूसल जलधारा सायर समुद्र
 भरे । नहिं परवाह नंदके ढोंहि पुरतवेतु धरे ॥ लियो उठाइ कोपिकै गिरिवर सकल शरन उवरे ।
 सूरदास बलि बलि चरणनकी सुरपति पाई परे ॥ ६८ ॥ वरपि वरपि ब्रजतन घन हेरत । मेघवर्त अपनी
 सेनाको खीझतहै फिरि टेरत ॥ कहा वरपि अबलौं तुम कीनो राखत जलहि छपाइ । मूसलधार
 वरपि जल पाटौ सात दिवस भए आइ ॥ रिस करि करि गर्जत नभ वर्षत चाहत ब्रजहि बहाइ ।
 सूर श्याम गिरि गोवर्धन धरि ब्रजजनको सुखदाइ ॥ ६९ ॥ वरपि वरपि हरे सब बादर ।
 ब्रजके लोगन धोइ बहावहु इंद्र हमहि कहि आदर ॥ कहा जाइ कैहैं प्रभु आगे करिहैं
 बहुत निआदर । हम वर्षत पर्वत जल सोखत ब्रजवासी सब सादर ॥ पुनि रिस
 करत प्रलयजल वरषत कहत भए सब कादर । सूर गाइ गोसुत सब राख्यो गिरि-
 वर धरि ब्रजनागर ॥ ७० ॥ राग धनाश्री ॥ कहा होत जल महाप्रलयको । राख्यो सैंति सैंति जेहि कारज
 बचत नहीं कहूँ मनको ॥ भुवपर एक बूंद नहिं पहुँची निझरि गए सब मेह । बासर सात अखंडित
 धारा वरषत हारै देह ॥ वरुन भयो बिननीर सबनिको नाम रह्योहै बादर । सूर चले फिरि अमर
 राज पर ब्रजते भए निरदर ॥ ७१ ॥ राग मल्लार ॥ मघवनि हारि मानि सुख फेरो । नीके गोप बडे गोवर्धन जव
 नीके ब्रजहेरो ॥ नीके गाइ बच्छ सब नीके नीके बालगोपाल । नीको बन वैसी ये यमुना मन मन भयो
 विहाल ॥ गोकुल ब्रज बूदावन मारग नेक नहीं जलधार । सूरदास प्रभु अगणित महिमा कहा भयो
 जलसार ॥ ७२ ॥ राग नटनारायण ॥ मघवन जाइ कहि पुकारी । दीनहै सुरराज आगे अस्त्र दीने डारी ॥
 सात दिन भरि वरपि ब्रजपर गई नेक न झार । अखंड धारा सलिल निझरो मिटी नहीं लगार ॥
 धरणि नेकु न बूंद पहुँच्यो हरपे ब्रज नर नारि । सूर मेघन इंद्र आगे करत यहै गुहारि ॥ ७३ ॥ राग गौरी ॥
 तुम वरपे ब्रज कुशल परचो । तुम वरषत जल महा प्रलयको यह कहि मन मन सोच परचो ॥
 एक घरी जाके वरपेते गगन आच्छादित होई । ते मघवा बिह्वल मो आगे बात कहतहैं रोई ॥ सात
 दिवस जल वरपि सिराने ताते भए निरास । सूरदास सुरपति शंकित भयो सुरन बुलायो पास ॥
 ॥ ७४ ॥ अमरराज सब अमर बुलाए । आज्ञा सुनत सकल घर घरते आए कछु बिलंब ना लाए ॥
 कौन काज सुरराज हमारे हमको आयमु होई । देखौ मेघवर्तकनिकी गति ब्रजते आए रोई ॥
 गोवर्धनकी करी पुजाई सुहि डारचो विसराइ । मेघवर्त जलवर्त पठाए आवहु ब्रजहि बहाइ ॥ धार
 अखंडित वरपि सात दिन ब्रज पहुँची नहिं बूंद । सुरनि कही गोकुल प्रगटे हैं पूरण ब्रह्ममुकुंद ॥
 मोसों क्यों न कही तुम तवहीं गोकुलमें ब्रजराज । सूरदास प्रभु कृपा करहिंगे शरन चलौ दिवराज ॥
 ॥ ७५ ॥ राग सोरठ ॥ शरण गए जो होइ सुहोई । वे करता वेईहैं हरता अब न रहौं सुख गोई ॥ ब्रज अवतार
 कह्यो है श्रीमुख तेई करत बिहार । पूरण ब्रह्म सनातन वेई मैं भूल्यो संसार ॥ उनके आगे चाहौं
 पूजा ज्यों माणि दीप प्रकाश । रविआगे खद्योत उज्यारी चंदन संग कुवास ॥ कोटि इंद्र छिनहीमें राचैं
 छिनमें करैं बिनाश ॥ सूर रच्यो उनहीको सुरपति मैं भूल्यो तिहि आश ॥ ७६ ॥ राग सारंग ॥ प्रगट भए ब्रज
 त्रिभुवन राइ । युग गुण बीति त्रिगुण बुधि व्यापी शरन चलौ सुरपति अकुलाइ ॥ सपनेको धनु जागि
 परे ज्यों त्यों जानी अपनी ठकुराइ । कहत चलयो यह कहा कियो मैं जगतपितासों करी ठिठाइ ॥
 शिव विरंचि रचि इंद्र वरुण यम लिए अमर गण संग लगाइ । बार बार शिर धुनत जातु मग कैहौं
 कहा वदन दिखराइ ॥ वेहैं परम कृपालु महाप्रभु रहौं शीश चरणनतर नाइ । सूरदास प्रभु पिता

मात मैं ओछी बुद्धि करी लरिकाइ ७७॥ इंद्र शरणचले ॥ राग कान्हरो ॥ सुरगण संहित इंद्र ब्रज आवत ।
 धवल वरन ऐरापति देख्यो उतरि गगनते धरणि धँसावत ॥ अमरा शिव रवि शशि चतुरानन हय
 गय वसह हंस मृग जावत । धर्मराज बनराज अनल दिव शारद नारद शिवसुत भावत ॥ मेंढा मढी
 मगरगुडारो मोर आधु मनवाह गनावत । ब्रजके लोग देखि डरपे मन हरि आगे कहि कहि जु सुना
 वत ॥ सात दिवस जल वरषि सिरान्यो आवत चलयो ब्रजहि अत्रावत । घेरा करत जहां तहां ठाढे
 ब्रजवासिनको नहीं बचावत ॥ दूरहिते बाहनसों उतरयो देवन सहित चलयो शिर नावत ।
 आइ परचो चरणनतर आतुर सूरदास प्रभु शीश उठावत ॥ ७८ ॥ सुरपति चरण परचो गहि
 धाइ । युग गुण धोइ शेषगुण जान्यो शरणहि राखिलेहु शरनाइ ॥ तुम विसरे तुमरी मायामें तुम
 बिनु नाहीं और सहाइ । शरन शरन पुनि पुनि कहि कहि मोहिं राखि राखि त्रिभुवनके राइ ॥
 मोते चूकपरी बिनुजाने मैं कीने अपराध बनाइ । तुम माता तुमही जगदाता तुम भ्राता अपराध
 क्षमाइ ॥ जो बालक जननीसे बिरुझै माता ताको लेइ मनाइ । ऐसेहि मोहिं करौ करुणामय सूर
 श्याम ज्यों सुतहित माइ ७९॥ राग विलावल ॥ व्याकुल देखि इन्द्रको श्रीपति उभय भुजा करि लियो उठाइ ।
 अभय निभय कर माथे दीनो श्रीमुख वचन कह्यो मुसिस्याइ ॥ कहाभयो जु चढे ब्रज ऊपर मैं तुरतहि
 करि लियो सहाइ । हमको जानि नहीं तुम कीनों बिन जाने यह करी ढिठाइ ॥ अब अपने जिय
 सोच करौ जिनि यह मेरी दीनी ठकुराइ । सूर श्याम गिरिधर सब लायक इंद्रहि कह्यो
 करो सुखजाइ ॥ ८० ॥ राग नट ॥ सुरगण करत अस्तुति मुखनि । दरशते तनुताप खोयो मेदि
 अघके दुखनि ॥ अंग पुलकित रोम गदगद कहत बाणी मुखनि । वामभुज कर टेकि राख्यो करज
 लघुके नखनि ॥ प्रेमके बश तुमहि कीन्हों ग्वाल बालक सखनि । योगि जन बन तप न जापन नहीं
 पावत मखनि ॥ धन्य नंद धनि मातु यशोमति चलत जाके रुखनि । सूर प्रभु महिमा अगोचर
 जाति कापै लखनि ॥ ८१ ॥ राग भैरव ॥ जय माधव गोविंद मुकुंद हरि । कृपासिंधु कल्याण कंसअरि ॥
 प्रणतपाल केशव कमलापति । कृष्णकमल लोचन अनन्यगति ॥ श्रीरामचन्द्र राजीवनैन वर ।
 शरण साधु श्रीपति सारंगधर ॥ बनमाली बिट्टल बामन बल । बासुदेव बासी ब्रजभूतल ॥ खरदूषण
 त्रिशिरा शिरखंडन । चरण चिह्न दंडक भुअमंडन ॥ बकी बदन बक बदन बिदारन । बरुन बिषाद नंद
 निस्तारन ॥ ऋषि मख तृणा तारकातारन । बनवसि तात वचन प्रतिपालन ॥ कालीदमन केशिकरपातन ।
 अघ अरिष्ट धेनुक अनुघातन ॥ रघुपति प्रबल पिनाक बिभंजन । जगहित जनक सुता मनुवंजन ॥
 गोकुलपति गिरिधर गुणसागर । गोपीरमन राशिरतिनागर ॥ करुणामय कपिकुल हितकारी । बालिविरो-
 ध कपट मृगहारी ॥ गुप्त गोपकन्या व्रतपूरन । दुष्टन दुख भक्तन दुखचूरन ॥ रावण कुंभकर्ण
 शिरछेदन । तरुवर सात एक शर बेधन ॥ शंखचूड़ चाणूर संहारन । शक्र कहै मोहि रक्षाकारन ॥
 उत्तरकृपा गीध हितकारी । दरशन दे शबरी उद्धारी ॥ जे पद सदा शंभुहितकारी । जे पद परसि सुरसरी
 गारी ॥ जे पद रमा हृदय नहिं टारी । जे पद तिहूँ भुवन प्रतिपारी ॥ जे पद अहिफन फन प्रति धारी ।
 जे पद बृंदावनहि बिहारी ॥ जे पद शकटासुर संहारी । जे पद पांडव गृह पगुधारी ॥ जे पद रज गौतम
 तिय तारी । जे पद भक्तनके सुखकारी ॥ सूरदास सुर याचत ते पद । करहु कृपा अपने जनपर
 सद ८२ ॥ राग आसावरी ॥ अस्तुति करि सुर घरनि चलोयहै कहत सब जात परस्पर सुकृत हमारे प्रगट
 फले ॥ शिव विरंचि सुरपति कहँ भाषत पूरण ब्रह्महि प्रगट मिले । धन्य धन्य यह दिवस आजुको
 जातहै मारग करत मिले ॥ पहुँचे जाइ आपुने लोकनि अमर नारि सब हरष भरे । सूर श्यामकी

लीला सुनि सुनि अतिहित मंगल गानकरे ॥८३॥ राग मलार ॥ दिखियत दोउ घन उनए । उत घन वासव
 भक्ति वश्य इत नर इक रोष भए ॥ उत सुरचाप कला प्रचंड इत तडित पीत पट श्याम नए ।
 उत सेनापति वरषि मुसलसम इत प्रभु अभिय दृष्टि चितए ॥ युगल बीच गिरिराज बिराजत कर
 जु उठाइ लए । मनौ विवि मरकत बीच महा नग चतुर नारि बनए ॥ लुटत शक्रके शीश
 चरण तर युग गुण गत समए । मानहु कनकपुरी पतिके शिर रघुपति फेरि दए ॥ भए प्रसन्न
 सकल सुरपुरको प्रसुदित फेरि गए । सूरदास गिरिधर करुणामय इंद्र थापि पठए ॥८४॥ देखौ
 भाई बदरनिकी वरियाई । मदनगोपाल धरचो गिरिवर कर इंद्र ढीठ झरलाई ॥ जाके राज सदासुख
 कीनों तासों कौन बडाई । सेवकु करै स्वामिसों सरवर इनिवातनि पति जाई ॥ इंद्र ढीठ बलि खाइ
 हमारी देखौ अकल गमाई । सूरदास तेहिको काको डर जिहि वन सिंह कन्हवाई ॥८५॥ राग सोरठ ॥
 जहां तहां तुम हमहि उबारयो । ग्वाल सखा सब कहत श्यामसों धनि यशुमति अवतारयो ॥ तृणा-
 वर्त्त ब्रजपर चढिआयो लाग्यो देन उडाइ । अति शिशुतामें ताहि संहारयो परचो शिलापर आइ ॥
 फलजनवै बालक संग खेलत केशी आयो साथवाहि मारि तुम हमहि उबारयो ऐसे त्रिभुवननाथ ॥
 कागासुर शटकासुर मारचो पय पीवत दनुनासी । अघा असुरते हमहि निकास्यो बकावदन धरि फारी ॥
 काली दह जल अचैगए मरि तब तुम लिये जिवायासूर श्याम सुरपतिते राखे देतो सबनि बहाइ ॥८६॥
 हमको नंदनंदनको गारो । इंद्रकोप ब्रज बहोजातहै गिरिधर सकल उबारो ॥ राम कृष्ण बल वदत न-
 काहु निडर चरावत चारो । विगै सबै हमरे शिर ऊपर बलको वीर रखवारो ॥ तबहीं हमहि
 मरोसो आयो केशी तृणावर्त जब मारचो । सूरदास प्रभु रंगभूमिमें हरि जीत्यौ नृप हारचो ॥
 ॥८७॥ राग मलार ॥ तुम सुरपतिको मान हरचो । वरपत गुंड डंडधर धारा छिन छिन एकमें प्रलय
 करचो ॥ ऐरावत आरूढ अग्रघन लघुता जानि जु रोषभरचो । देखे दीन दुखित नंदादिक लीला
 गिरिवर कर जु धरचो ॥ सूरदास करुणामय माधव ब्रज सुख उनको गरब हरचो ॥८८॥ राग बिलावल ॥
 ब्रज युवती ब्रजजन ब्रजवासी कहत श्यामसर कौन करै । ब्रज मारत ब्रजनाथहि आगे बत्रायुध मन-
 क्रोध करै ॥ बलसमेत वरष्यो ब्रजऊपर बल मोहनकी सुधि न करै । हारि मानि हहरचो हरि चरणनि
 हरषि हिये अब हेतु करै ॥ गरजि गरजि घहरात गुसांकरि गिरिवारो यह पै जु करै । सूरदास गिरिधर
 करुणामय तुम विनु को प्रभु क्षमा करै ॥८९॥ राग भैरवमलार ॥ श्याम गिरिराज क्यों धरचो करसों । अतिहि
 बिस्तार अतिभार तुम बार अति वाम भुज टेकि लघु जात करसों ॥ कहत सब ग्वाल धनि धन्य नंद
 लाल ब्रज धन्य गोपाल बल कितिक करसों ॥ धन्य यशुमति मात जिनि जन्यो तुम तात बोरि माखन
 खात बाँधे करसों ॥ कान्ह हंसिकै कह्यो तुम सबन गिरि गह्यो रह्यो हो ब्रज बह्यो लकुट करसों ।
 सुर प्रभुके चरित कहा बल गिरि धरत चरणरज लेत सुरराज करसों ॥९०॥ राग मलार ॥ हाहा रे हठीले हरि
 अपनी जननीको कहचो करि इंद्र वरषि गयो अब गिरिवर धरि । सात दिवस कीनी छाँह नेकु न
 पिरानी बाहँ अति कठिन कुटु राख्यो रे छतनि करि । सुनिकै यशोदा धाइ निकट गोपाल करौ रे सबै
 सहाय नैन रहे जलभरि ॥ कुलके देव मनाए देवेको द्विज बुलाये दियो जाहि जोई भायो इंद्रकोप जियो रे
 कन्हैया प्यारो जाके राज सुखकरि । सूरदास प्रभु गिरिधरको कौतुक देखि कामधेनु आयो धायो
 इंद्र अपडर डरि ॥ ९१ ॥ राग सोरठ ॥ जब करते गिरि धरचो उतारि । श्याम कह्यो बहुरो गिरि पूजहु
 ब्रज जन लिए उबारि ॥ यह सुनतहि मन हर्ष बढ़ायो कियो पकवानु सँवारि । बहु मिष्टान्न बहुत
 विधि भोजन बहु व्यंजन अनुहारि ॥ परसि धरो गोवर्धन आगे जेवत अति रुचि भारि । सुर श्याम

गिरिधर वर मांगत रविसों घोषकुमारि ॥९२॥ राग कान्हरो ॥ घरघरते ब्रज युवती आवति । दधि
अक्षत रोचन धरि थारनि हरषि श्याम शिर तिलक बनावति ॥ वारंवार निरखि छवि अंग अंग
श्याम रूप उरमाहँ दुरावति ॥ नंद सुवन गिरि धरचौ वामकर यह कहिकै मनहरष बढावति ॥ जेहि
पूजाति सब जन्म गँवायो सो कैसेहुं पग छुवन न पावति । सूर श्याम गिरिधरन मांगि वरु कर जोरति
कहि बिधिहि मनावति ॥ ९३ ॥ राग सोरठा ॥ नीके धरणि धरचो गोपाला प्रलयवन जल वरषि सुरपति
परचो चरण बिहाल ॥ करत अस्तुति नारि नर ब्रज नंद अरु सब ग्वाल । जहां तहां सहाय हमको
होतहँ नंदलाल ॥ जाहि पूजत डरत मनमें ताहि देख्यो दीन । त्रिदशपति सब सुरको नायक सो
भयो आधीन । देखि छबि अति नंदसुतकी नारि तन मन वारि।सूर प्रभु करते गुवर्धन धरचो धरणि
उताँरि ॥ ९४ राग नट ॥ करते धरचो धरणी धरनि । देखि ब्रजजन थकित है रहे रूप रतिपति हर
नि ॥ लेत बेर न धरत जान्यो कहत ब्रज नर धरनि । तन ललित भुज अतिहि कोमल कियो बल
बहु करनि ॥ मोर सुकुट विशाल लोचन श्रवण कुंडल वरनि । बन जलद सुर चापकी छबि अमल
स्वजन तरनि ॥ वरषि निकरे मेघ पाइक बहुत कीने अरनि । सूर सुरपति हारि मानी तब परचो
दुहुँ चरनि ॥ ९५ ॥ राग विलावल ॥ धरनि धरनि ब्रज होत बधाई । सात वरषके कुँवर कन्हैया गिरिवर
धरि जीस्यो सुरराई ॥ गर्व सहित आयो ब्रज बोरन यह कहि मेरी भक्ति घटाई । सात दिवस जल
वरषि सिराने तब आयो पाँइन तर धाई ॥ कहाँ कहाँ संकट नाहि मेटत नर नारी सब करत बडाई ।
सूरश्याम अबकै ब्रज राख्यो ग्वाल करत सब नंद दोहाई ॥ ९६ ॥ राग नट ॥ क्यों राख्यो गोवर्धन श्यामा
अति ऊँचो बिस्तार अतिहि बहु लीनो उचकि करज भुज बाम ॥ यह आघात महाप्रलय जल डर
आवत सुख लेतहि नाम । नीके राखि लियो ब्रज सिंगरो ताको तुमहि पठायो धाम ॥ ब्रज अवतार
लियो जबते तुम यहै करत निशि बासर याम । सूर श्याम बन घन हम कारण बहुत करत श्रम नाहि
विश्राम ॥ ९७ ॥ राखि लियो ब्रज नंदकिशोर । आयो इंद्र गर्व करि चढिकै सात दिवस वरषत
भयो भोर ॥ वाम भजा गोवर्धन राख्यो अति कोमल नखहीकी कोर । गोपी ग्वाल गाइ ब्रज राख्यो
नेकु न आई बूढ़ झकोर ॥ अमरापति चरणन लै परचो जब बीते युग गुनको जोर । सूर श्याम करु-
णा कै ताको पठै दियो घर मानि निहोर ॥ ९८ ॥ राग मलार ॥ मेरो मोहन जल प्रवाह क्यों
टारचो । बूझत सुदित यशोदा जननी इंद्र कोप करि हारचो ॥ मेघवर्त जल वरषि निशा
दिन नेकु न नैन उचारचो । बार बार यह कहति कान्हसों कैसे गिरि नख धारचो ॥
सुरपति आनि गिरचो गहि पाँइन ताको शरन उबारचो । सूर श्याम जनके सुखदाता
करते धरणि उतारचो ॥ ९९ ॥ राग सोरठ ॥ मेरे साँवरे मैं बलिजाऊँ भुजनकी । क्यों गिरि सबल
धरचो कोमल कर बूझतिहैं गति तनकी ॥ इंद्र कोप आयो ब्रज ऊपर बहुत पैज करि हारे । ठाढे
गोप कहत भैयाहो तैं हम भले उबारे ॥ थार तमोर दूध दधि रोचन हरषि यशोदा ल्याई । करै शिर
तिलक चरण रजवंदित मनहु रंक निधि पाई ॥ चरणन परत कमल ब्रजसुंदरि हरषि हरषि सुसु
काई । फिरि फिरि दरशकरति एही मिस प्रेम न प्रीति अघाई ॥ गोपी गाइ ग्वाल गोसुत सब बार बार
अकुलाहीं । निरखि निरखि सुंदर मुख शोभा प्रेम तृषा न बुझाहीं ॥ सूरदास सुरपति शंकित है
सुर न लिये सँग आयो । तुम जु अनंत अखिल अविनाशी काहू मरम न पायो ॥ १०० ॥ राग सोरठा ॥
गिरिवर कैसे लियो उठाई । कोमल कर चांपति यशुदा यह कहि लेत बलाई ॥ महाप्रलय जल
तापर राख्यो एक गोवर्धन भारी । नेक नहीं हाल्यो नखपरते मेरो सुत अहंकारी ॥ कंचनथार
दूब दधि रोचन सजि तमोर लै आई । हरपति तिलक करति सुख निरखति भुजभरि कंठ लगाई ॥

रिसकरिकें सुरपति चढि आयो देतो ब्रजहि बंहाई । मूर श्यामसों कहति यशोदा गिरि
 धर बडो कन्हवाई ॥१॥ धरणी धर क्यों राख्यो दिन सात । अतिहि कोमल भुजा तुम्हारी चांपति
 यशुमति मात ॥ ऊंचो अति विस्तार भार बहु यह कहि कहि पछितात । वह अघात तेरे तनक
 तनक कर कैसे राख्यो तात ॥ मुख चूमति हरि कंठ लगावति देखि हैसे बल भ्रात । मूर श्यामको
 केतिक बात यह जननी जोरति नात ॥ २ ॥ राग कान्हरो ॥ जननी चांपति भुजा श्यामकी
 ठाढे देखि हँसत बलराम । चौदह भुवन उदरमें जाके गिरिवरधरयो बहुत यह काम ॥ कोटि ब्रह्मांड
 रोम रोमनि प्रति जहां तहां निशि वासर घाम । जोइ आवति सोइ देखि चकृतहैं कहत करे हरि
 कैसे काम ॥ नाभिकमल ब्रह्मा प्रगटायें देखि जलार्णव तज्यो विश्राम । आवत जात बीचही भट
 क्यों दुखित भयो खोजत निज धाम ॥ तिनसों कहत सकल ब्रजवासी कैसे कर राख्यो
 गिरि श्याम । सूरदास प्रभु त्रिभुवन नायक फिरि फिरि जन्म लेत नंदधाम ॥३॥ राग गौरी ॥ मात पिता
 इनके नहि कोई । आपुहि करता आपुहि हरता त्रिभुवन गए रहतहैं जोई ॥ कितिक बार अवतार लियो
 ब्रज एहैं ऐसे वोई । जल थल कीट ब्रह्मके व्यापक और न इनसरि होई ॥ बसुधा भार उतारन कारन
 आपु रहत तनु गोई । मूर श्याम माता हितकरि भोजन मांगत रोई ॥४॥ अथ गोवर्धनकी दूसरी लीला ॥
 ॥ राग विलावल ॥ नंदहि कहति यशोदा रानी ॥ सुरपति पूजा तुमहि भुलानी ॥ यह नहि भली तुम्हारी बानी ।
 मैं गृहकाज रहौं लपटानी ॥ लोभहि लोभ रहेहौं सानी । देवकाजकी सुधि बिसरानी ॥ महारि कहति
 पुनि पुनि यह बानी । पूजाके दिन पहुँचे आनी ॥ सूरदास यशुमतिकी बानी । नंदहि खीझि खीझि
 पछितानी ॥ १ ॥ नंद कह्यो सुधि भली देवाई । मैंतौ राजकाज मनलाई ॥ नित प्राति करत
 इहै अधमाई । कुल देवता सुरति बिसराई ॥ कंस दर्द इह लोक बडाई । गाउँदशक शिरदार कहाई ॥
 जलधि बूंद ज्यों जलहि समाई । माया जहँकी तहां बिलाई ॥ सूरदास यह कहि नंदराई । चरण
 तुम्हारे सदा सहाई ॥ २ ॥ कहत महारि तब ऐसी बानी । इंद्रहि की दीनी रजधानी ॥ कंस करत
 तुम्हरी अति कानी । यह प्रभुकीहैं आशिष बानी ॥ गोपन बहुत बडाई मानी । जहां तहां यह
 चलति कहानी ॥ तुम घर मथिये सहस मथानी । ग्वालनि रहत सदा बिततानी ॥ तृण उपजत उन्हीं
 के पानी । ऐसे प्रभुकी सुरति भुलानी ॥ मूर नंद मनमें तब आनी । सत्य कहत तुम देव कहानी ॥३॥
 महर लियो इक ग्वाल बुलाइ । गोपनंद उपनंद बुलाइ ॥ अरु आनो वृषभानु लवाइ । तुरत जाहु तुम
 करहु चँडाइ ॥ यह सुनि ग्वाल गए तहँ धाई । नंद महरकी कही सुनाई ॥ नेक करहु अब जिनि
 बिलमाई । मोहिं कह्यो सब देहु पठाई ॥ यह सुनिकै सब चले अतुराई । मन मन सोच करत
 पछिताई ॥ कंसकाज जिय माँझ डराई । राज अंश धन दियो चलाई ॥ मूर नंदगृह पहुँचे आई । आदर
 करि बैठे नंदराई ॥४॥ गोप सबै उपनंद बोलाए । कौन काजको हम हँकराए ॥ सुनतेही हम आतुर
 आए । कंस कछु कहि मांगि पठाए ॥ इहै जानि अति आतुर आए । सब मिलि कह्यो बहुत डरपा-
 ए ॥ कालिहि राज अंश दै आए । ग्वाल कहत तुरतहि उठि धाए ॥ महर कह्यो हम तुम डरवाए ।
 हँसि हँसि कहत अनंद बढाये ॥ हम तुमको सुखकाज मँगाए । बारवार यह कहि दुख पाए ॥ मूर इंद्र
 पूजा बिसराये । यह सुनतहि शिर सबनि नवाए ॥ ५ ॥ पूजा सुनत बहुत सुख कीन्हों । भली करो
 हमको सुधि दीन्हों ॥ यह बाणी सबहिन सुख लीन्हो । बडे देव सब दिनको चीन्हो ॥ इतहीते
 ब्रजवास बसीनो । हम सब अहिर जाति मतिहीनो ॥ पूजाकी विधि करत सबै मिलि । जेहि जेहि
 भांति सदा जैसी चलि ॥ विदा माँगि नंदसों गृह आए । घरनि घरनि यह बात चलाए ॥ सूरदास

गोपनकी बानी । ब्रज नर नारि सबन यह जानी ॥ ६ ॥ नंदघरनि ब्रजबधू बोलाई । यह सुनिकै
 तुरताहि सब आई ॥ कौन काज हम महरि हँकारी । तुम नहि जानत यौवन भारी ॥
 विहँसि कहति कहा देतहौ गारी । सुरपति पूजा करो सवारी ॥ देखैं हम सब सुरति बिसारी ।
 औरो हमहि बूझिए गारी ॥ यह सुनि हरपित भइ नंदनारी । सखियन वचन कह्यो जब प्यारी ॥ सूर
 इंद्र पूजा अनुसारी । तुरत करौ सब भोग सँवारी ॥ ७ ॥ घरनि चली सब कहि यशुमतिसों ।
 देव मनावति वचन बिनतिसों ॥ तुम बिन और नहीं हम जानै । मुख मुख अस्तुति करत बखानै ॥
 जहां तहां ब्रजमंगल गाने । बाजत ढोल मृदंग निसाने ॥ बहुत भांति सब करे पकवानै । नेवज करि
 धरि सांझ बिहानै । छुवत नहीं देवकाज सकानै । देवभोगको रहत डेरानै ॥ सूरदास हम
 सुरपति जानै । और कौन ऐसो जेहि मानै ॥ ८ ॥ नंदमहर घर होत बधाई । करत सबे बिधिदेव
 पुजाई ॥ नेवज करत यशोदा आतुर । अष्टौ सिद्धि घरहि अति चातुर ॥ मैदा उज्ज्वल करिकै छान्यो ।
 बेसन दारि चनक करि वान्यो ॥ घृत मिष्टान्न सबे परिपूरन । मिश्रित करत पागको चूरन ॥ कटुवा
 करत मिठाई घृत पक । रोहिणि करत अन्नभोजन तक ॥ संग और ब्रजनारी लागी । भोजन करतहैं
 बडी सभागी । महरि करत ऊपर तरकारी । जोरत सब बिधि न्यारी न्यारी ॥ सूरदास जो मांगत
 जबहीं । भीतरते ले देतहैं तबहीं ॥ ९ ॥ महरि सबे नेवज लै सैतति । श्याम छुवै कहूँ ताकी डरपति
 कान्हहि कहति यहां जनि आवै । लरकनको यह देव डरावै ॥ श्याम रहे आंगनहि डराई । मन मन हँसत
 मात सुखदाई ॥ मैया री मोहिं देव देखैहै । इतनो भोजन सब वह खैहै ॥ यह सुनि खीझतिहै नंदरानी ।
 बार बार सुतसों विरुझानी ॥ ऐसी बात न कहौ कन्हआई । तू कत करत श्याम लँगराई ॥ कर जोरति
 अपराध छमावति । बालकको यह दोष मिटावति ॥ सूरदास प्रभुको नहि जानै । हँसत चले मनमें
 न रिसानै ॥ १० ॥ युवती कहति कान्ह रिसपायो । जान देहु सुरकाज बतायो ॥ बालक आइ छुवै
 कहूँ भोजन । उनकी पूजा जानै को जन ॥ यह कहि कहि देवता मनावति । भोग सामग्री धरत
 उठावति ॥ उनकी कृपा गऊगण घेरे । उनकी कृपा धाम धन मेरे ॥ उनकी कृपा पुत्र फल पायो ।
 देखहु श्यामहि खीझि पठायो ॥ सूरदास प्रभु अंतर्दामी । ब्रह्मा कीट आदिके स्वामी ॥ ११ ॥
 नंद निकट तब गए कन्हआई । सुनत बात तहैं इंद्र पुजाई ॥ महर नंद उपनंद तहाँ सब । बोलिलिए
 वृषभानु महर तब ॥ दीपमालिका रचि रचि साजत । पुहुपमाल मंडली बिराजत ॥ बरष सातके
 कुँवर कन्हआई । खेलत मन आनंद बढाई ॥ घर घर देति युवति जन हाथा ॥ पूजा देखि हँसत ब्रजनाथा ॥
 मो आगे सुरपतिकी पूजा । मोते और देव को दूजा ॥ शत शत इंद्र रोमप्रति लोमनि ।
 शतलोमनि मेरे इक रोमनि ॥ सूर श्याम ए मनसों बातैं । लीनो भोग बहुत दिन जातैं ॥ १२ ॥ सुर
 पति पूजा जानि कन्हआई । बार बार बूझत नंदराई ॥ कौन देवकी करत पुजाई । सो मोसों तुम
 कहौ बुझाई ॥ महर कह्यो तब कान्ह सुनाई ॥ सुरपति सब देवनके राई ॥ तुमरे हित मैं करत पुजाई । जाते
 तुम रहो कुशल कन्हआई ॥ सूर नंद कहि भेद बताई । भीर बहुत घर जाहु सिखाई ॥ १३ ॥ जाहु घर
 हि बलिहारी तेरी । सेज जाइ सोवो तुम मेरी ॥ मैं आवतहौं तुम्हरे पाछे । भवन जाहु तुम मेरे
 बाछे ॥ गोपन लीन्हें कान्ह बुलाई । मंत्र कहौं एक मनहि समाई ॥ आजु एक सपने कोउ आयो ।
 शंखचतुर्भुज चारि बतायो ॥ मोसों यह कहि कहि समझायो ॥ यह पूजा तुम किनहि सिखायो ॥ सूर श्याम
 कहि प्रगट सुनायो ॥ गिरि गोवर्धन देव बतायो ॥ १४ ॥ यह तब कहन लगे दिवराई । इंद्रहि पूजे कौन
 बडाई ॥ कोटि इंद्र हम छिनमें मारैं छिनहीमें फिरि कोटि सँवारैं ॥ जाके पूजे फल तुम पावहुता देवहि

तुम भोग लगावहु ॥ तुम आगे वह भोजन खैहै । मुँह माँग्यो फल तुमको दैहै ॥ ऐसो देव प्रगट गोवर्ध-
 न । जाके पूजे वाँटे गोधन ॥ समुझि परी कैसी यह बानी । ग्वाल कही यह अकथ कहानी ॥ सूर
 श्याम यह सपनो पायो । भोजन कौन देवही खायो ॥ १५ ॥ मानहु कह्यो सत्य यह बानी । जो चाहौ
 ब्रजकी रजधानी ॥ जो तुम मुहँ माँग्यो फल पावहु । तौ तुम अपने करन जेँवावहु ॥ भोजन सब खैहैं
 मुहँ माँगे । पूजत सुरपति तिनके आगे ॥ मेरी कही सत्य करि मानहु । गोवर्धनकी पूजा ठानहु । सूर श्याम
 कहि कहि समुझायो । नंद गोप सबके मन आयो ॥ १६ ॥ सुरपति पूजा भेटि धराई । गोवर्धनकी
 करत पुजाई । पाँच दिनालैं करी मिठाई । नंदमहरघरकी ठकुराई ॥ जाके घरनी महरि यशोदा । अष्ट
 सिद्धि नव निधि चहुँ कोदा ॥ घृतपक बहुत भाँति पकवाना । व्यंजन बहु को करै वखाना ॥ भोग
 अन्न बहु भार सजायो । अपने कुल सब अहिर बोलायो ॥ सहस शकट भरि भरत मिठाई । गोव-
 र्धनकी प्रथम पुजाई । सूर श्याम यह पूजा ठानी । गिरिगोवर्धनकी रजधानी ॥ १७ ॥ ब्रज घर
 घर सब भोजन साजत । सबके द्वार बधाई बाजत ॥ शकट जोरि लै चले देवबलिगोकुल ब्रजवासी
 सब हिलि मिलि ॥ दधि लवनी मधु साजि मिठाई ॥ कहँल गि कहौँ सबै बहुताई ॥ घर घरते पकवान
 चलाए । निकसि गाँवके जैँडे आये ॥ ब्रजवासी तहाँ जुरे अपारा । सिंधुसमान पार ना वारा ॥ पैडे
 चलन नहीं कोउ पावत । शकटभरे सब भोजन आवत ॥ सहस शकट चले नंद महरके । और
 शकट कितने घर घरके ॥ सूरदास प्रभु महिमा सागर । गोकुल प्रगटेहैं हरिनागर ॥ १८ ॥ इक आ-
 वत घरते चले धाई । एक जात फिर घर समुहाई ॥ इक टेरत इक दौरे आवत । एक गिरावत
 एक उठावत ॥ एक कहत आवहु रे भाई । बैल देतहै शकट गिराई ॥ कौन काहिको कहै सँभारै ।
 जहाँ तहाँ सब लोग पुकारै ॥ कोउ गावत कोउ निरत आँवै । श्याम सखासंग खेलत धावै ॥
 सूरदास प्रभु सबके नायक । जो मन करै सो करिबे लायक ॥ १९ ॥ सजि शृंगार चलीं ब्रजनारी ।
 युवतिन भीर भई अति भारी ॥ जगमगात अंगनि प्रति गहनो । सबके भाव दरश हरि लहनो ॥ यहि
 मिस देखनको सब आई । देखत एकटक रूप कन्हाई ॥ वै नहीं जानत देवपुजाई । केवल श्याम-
 हिसों लव लाई ॥ कोमल जाति कहां को बोलत । नंदसुवन ते चित नहीं डोलत ॥ सूर भजै हरि जो जेहि
 भाउ । मिलत ताहि प्रभु तेहि सुभाउ ॥ २० ॥ गोपनंद उपनंद गए तहँ । गिरि गोवर्धन बडे देव
 जहँ ॥ शिखर देखित बरीझे मन मन । ग्वाल कहत आजुहि अचरज बन ॥ अति ऊँचो गिरिराज
 विराजत । कोटि मदन निरखत छवि लाजत ॥ पहुँचे शकटनि भरि भरि भोजन । कोउ आए
 कोउ नहिँ कहूँ खोजन ॥ तिनके काज अहीर पठाए । बिलम करहु जिनि तुरत धवाए ॥ आवत
 मारग पाये तिनको । आतुर करि बोले नंद जिनको ॥ तुरत लिवाइ तिनहि तहाँ आए । महर
 मनहि अति हरप बढाए ॥ सूरदास प्रभु तहँ अधिकारी । बृझतहैं पूजा परकारी ॥ २१ ॥ आइ
 जुरे सब ब्रजके वासी । डेरा परचो कोश चौरासी ॥ एक फिरत कहूँ ठौर न पावै । एतेपर आनंद बढावै ॥
 कोउ काहूसों बैर न ताकै । बैठत मन जहां भावत जाकै ॥ खेलत हँसत करै कौतूहल । जुरे लोग
 तहँ तहाँ अकूहल ॥ नंद कह्यो सब भोग मँगावहु । अपने कर सब लैलै आवहु ॥ भोग बहुत
 वृषभानुहिँ घरको । को करि बरनै अतिहि बहरको ॥ सूर श्याम जो आयसु दीन्हों । विप्र बुलाइ
 नंद तब लीन्हों ॥ २२ ॥ तुरत तहाँ सब विप्र बोलाए । यज्ञारंभ तहाँ करवाए ॥ सामवेद द्वि-
 गान करत तहाँ । देखत सुर विथके अमरन जहाँ ॥ सुरपति पूजा तबहिँ मिठाई । गिरि गोवर्ध
 तिलक चढ़ाई ॥ कान्ह कह्यो गिरि दूध अन्हावहु । बडे देवता इनहि मनावहु ॥ गोवर्ध

दूधहि अन्हवाए । देवराज कहँ माथ नवाए ॥ नये देवता कान्ह पुजावत । नर नारी सब
 देखन आवत ॥ सूर श्याम गोबर्धन थाप्यो । इंद्र देखि रिसकरि तनु कांप्यो ॥ २३ ॥ देखि इंद्र मन
 गर्व बढ़ायो । ब्रजलोगन सब मोहिं बिसरायो ॥ अहिरजाति ओछी मति कीन्ही । अपनी ज्ञाति प्रगट
 करि दीन्ही ॥ पूजत गिरिहि कहा मन आई । गिरि समेत ब्रज देखँ बहाई ॥ देखौं धौं कितनों सुख पैहैं ।
 मेरे मारत काहि मनैहैं ॥ पर्वत तब इनको क्यों राखत । बारंवार कहै इह भाषत ॥ पूजत गिरि
 अति प्रेम बढ़ाए । सपनेको सुख लेत मनाए ॥ सूरदास सुरपतिकी बानी । ब्रज बोरौं प्रयलके पानी ॥
 ॥ २४ ॥ श्याम कह्यो तब भोजन लावहु । गिरि आगे सब आनि धरावहु ॥ सुनत नंद तहँ ग्वाला
 बोलाए । भोगसामग्री सबै मँगाए ॥ पटरसके बहुभांति मिठाई । अन्नभोग अतिही बहुताई ॥
 व्यंजन बहुतभांति पहुँचाए । दधि लवनी मधु माट धराए ॥ दही बरा बहुते परसाए । चंद्रहि सम
 पटतर तेहि पाए ॥ अन्नकूट जैसो गोबर्धन । अरु पकवान धरे चहुँकोदन ॥ परसत भोजन प्रात
 हि ते सब । रवि माथेते ढरकि गयो अब ॥ गोषन कह्यो श्याम ह्याँ आवहु । भोग धरयो सब गिरिहि
 जेमावहु ॥ सूर श्याम आपुनही भोगी । आपुहि माया आपुहि योगी ॥ २५ ॥ कान्ह कह्यो नंद भोग
 लगावहु । गोपमहर उपनंद बोलावहु ॥ नैन मूँदि कर जोरि मनावहु । प्रेमसहित देवहिन चढावहु ॥
 मनमें नेक खुटक जनि राखहु । दीन बचन सुखते तुम भाषहु ॥ ऐसीबिधि गिरि परसन हैहै । सहस
 भुजा धरि भोजन खैहै ॥ सूरदास प्रभु आपु पुजावत ॥ यह महिमा कैसे कोउ पावत ॥ २६ ॥ श्याम कही
 सोई सब मानी । पूजाकी बिधि हम अब जानी ॥ नैन मूँदि कर जोरि बोलायो । भावभक्तिसों भोग
 लगायो ॥ बडे देव गिरिराज सबनके । भोजन करहु कृपाकरि हिनके ॥ सहस भुजा धरि दरशन दीन्हों ।
 जैजै ध्वनि नभ देवन कीन्हों ॥ भोजन करत सबनके आगे । सुर नर मुनि सब देखन लागे ॥ देखि
 थकित ब्रजकी सब बाला । देखत नंद गोष सब ग्वाला ॥ सूर श्याम जनके सुखदाई । सहस भुजा
 धरि भोजन खाई ॥ २७ ॥ जेवत देव नंद सुख पायो ॥ कान्ह देवता प्रगट देखायो ॥ ब्रजवासी गिरि जेवत
 देख्यो ॥ जीवन जन्म सफल करि लेख्यो ॥ ललिता कहति राधिका आगे ॥ जेवत कान्ह नंदकर लागे ॥ मैं
 जानी हरिकी चतुराई । सुरपति मेदि आपु बलिखाई ॥ उत जेवत इत बातन लागे । कहत श्याम
 गिरि जेवन लागे ॥ मैं जो बात कही सो आई । सहसभुजा धरि भोजन खाई ॥ और देव इनकी सरि
 नाहीं । इत बोधत उत भोजन खाहीं ॥ सूरदास प्रभुकी यह लीला । सदा करत ब्रजमें यह क्रीला
 ॥ २८ ॥ यह छबि देखि राधिका भूली । बात कहत सखियनसों फूली ॥ आपुहि देव आपुही
 पुजेरी । आपुहि भोजन जेवत देखी ॥ ~~सूर तुमसों जेवत है भारी । एक वृषभानु बिलोवन हारी ॥~~
 नाम ~~तुमसों~~ सब तुमहि बतावैं ॥ ~~गिरिराज की बाल लई भुजा पसारी ॥~~ उत गिरि संग खात बलिसारी ।
 बढै सुख ॥ ~~गिरि रसनायक ॥~~ सूरदास प्रभु जेवनहारी । गिरि बपुरेसों को अधिकारी ॥ २९ ॥ इतहि
 मटुरि आपन संग ठाढ़े । भोजन करत अधिक रुचि बाढ़े ॥ गिरितन शोभा श्याम बिराजै ।
 गोश्यामहि छबि गिरिवरकी छाजै ॥ गिरिवर उर पीतांबर डारे । मोतिनकी उर माला भारे ॥ अँग
 भूषण श्रवणन पणिकुंडल । मोरमुकुट शिर अलकहै झुंडल ॥ छबि निरखत सब घोषकुमारी ।
 गोबर्धन छबि श्याम अनुहारी ॥ सूर श्याम लीला रसनायक । जन्म जन्म भक्तन सुखदायक ॥ ३० ॥
 भोजन करत देवभए परसन । माँगहु नंद तुम्हारे जो मन ॥ भली करी तुम मेरी पूजा । सेवक
 तुमते और न दूजा ॥ जो माँगौ सोई फल मैं दैहौं । जहां भाव ताहींपै रहौं ॥ मैं सेवावश भयो तुम्हारे ।
 जोइ फल चाहो लेहु सवारे ॥ यह सुनि चकृतभए नर नारी । भोजन कियो प्रथमही भारी ॥

अब देखी मुख बात कहन है । ऐसे देव कहां त्रिभुवन है ॥ कान्ह कछो कछु मांगहु इनसों । गिरिदेवता
 देत परसनसों ॥ सूर श्याम देवता आप है । ब्रजजन के त्रयताप हरत है ॥ ३१ ॥ नंद कछो कहां मांगौ स्वामी ।
 तुम जानत सब अन्यामी ॥ अष्ट सिद्धि नव निधि तुम दीनो । कृपासिंधु तुमरोई कीनो ॥ कुशल
 रहैं बलराम कन्हई । हम इहि कारण करें पुजाई ॥ देवनकी मणि गिरिवर तुम हो । जहैं तहैं
 व्यापक पूरन समहो ॥ तुम हरता तुम करता सबके । देखि थकित नर नारि नगरके ॥ बडो देवता
 श्याम बतायो । प्रगट भए सब भोजन खायो ॥ सूर श्यामके जोइ मन आवै । सोइ सोइ नानारूप
 बनावै ॥ ३२ ॥ मांगिलेहु कछु और पदारथ । सेवा सब भई अब स्वारथ ॥ फल मांग्यो बलराम
 कन्हई । ये द्वै रहैं कुशल जु सदाई ॥ इनहीते हम तुमको जान्यो । तब तुम गिरि गोवर्धन
 मान्यो ॥ करत वृथा इंद्र पुजाई । मेरी दीनी है ठकुराई ॥ कान्ह तुम्हारे मोको जाने । इनको
 रहौ तुम सब माने ॥ इंद्र आइ चढिहै ब्रज ऊपर । यह कहिहै नहिं राखों भूपरानिक कछु नहिं वासों
 हैहै । श्याम उठाइ मोहि कर लेहै ॥ सूर श्याम गिरिवरकी बानी । ब्रजजन सुनत सत्य करि मानी
 ॥ ३३ ॥ कौतुक देखत सूर नर भूले । रोम रोम गद गद सब फूले ॥ सूर विमान सुमनन बरषाए ।
 जयध्वनि शब्द देव नर गाए ॥ देव कछो ब्रजवासिनसों तब । पूजा भली करी मेरी सब ॥ जाहु
 सब मिलि सदन करौ सुख । श्याम कछो गिरि गोवर्धन सुख ॥ ग्वाल करत अस्तुति सब ठाढ़े भाव
 प्रेम सबके चित बाढे ॥ भवन जाहु कहि श्रीसुखवानी । भोजन शेष श्याम कर आनी ॥ बाँटि
 प्रसाद सबनिको दीन्हो । ब्रजनारी नर आनंद कीन्हो ॥ सूर श्याम गोपन सुखकारी । चलौ कछो
 ब्रजको नर नारी ॥ ३४ ॥ दोउ कर जोरि भए सब ठाढ़े । धन्य धन्य भक्तनके चाढे ॥ तुम भोक्ता
 तुमही प्रभुदाता । अखिल ब्रह्मांड लोकके ज्ञाता ॥ तुमको भोजन कौन करावे । हितके वश तुमको
 कोउ पावै ॥ तुम लायक हमरे कछु नाहीं । सुनत श्याम ठाढ़े सुसकाहीं ॥ ललितासखी देवता चीन्हो ।
 चंद्रावली राधिकहि दीन्हो ॥ देव बडो इह कुँवर कन्हई । कृपाजानि हरि ताहि चिन्हई ॥ सूर श्या-
 म कहि प्रगट सुनाई । भये तृप्त भोजन दिवराई ॥ ३५ ॥ परसत चरण चलत सब घरको । जात
 चले सब घोष शहरको ॥ सुख समेत मग जात चले सब । दूनी भीर भई तबते अब ॥ कोउ आगे
 कोउ पाछे आवता । मारगमें कहैं ठौर न पावता ॥ प्रथमहि गयो डगर तिन पायो । पाछेके लोगन पछितायो ॥
 घर पहुँचे अनहीं नहीं कोई । मारगमें अटके सब लोई ॥ डेरो परचो कोस चौरासी । इतने लोग जुरे ब्रज
 वासी ॥ पैडे चलन नहीं कोउ पावत । कितक दूरि ब्रज पहुँछत आवत ॥ सूर श्याम गुण सागर नागर ।
 उत्तम लीला करी उजागर ॥ ३६ ॥ कोउ पहुँचे प्रेम । बिलम के बुद्धत गए घर दहतक जाहीं ॥
 काहूके मन कछु दुख नाहीं । अरस परस हँसि हँसि लपटाहा ॥ ३७ ॥ तिनहि तहां आए आए ।
 निकट आनि लोगन नियगये ॥ भीर भई बहु खोरि जहाँ तहैं । जैसे नदी मिलत सिंगर ॥ ३८ ॥ नर
 नारी सरिता सब आगर । सिंधु मनीं इह घोष उजागर ॥ मथनहार हरि रतनकुमारी । चंद्रवदबढ़ावै ॥
 सुकुमारी ॥ सूर श्याम आए नंदशाला । पहुँचे घरनि आइ नरवाला ॥ ३९ ॥ बडो देवता क्लोग
 पुजायो । ग्वाल गोप हँसि अंग मिलायो ॥ कान्ह धन्य धनि यशुमति जायो । ब्रज धनि धनि तुमते
 कहवायो ॥ धन्य नंद जिन तुम सुत पायो । धनि धनि देव प्रगट दरशायो ॥ पूजामेदि इंद्र गिरि पूज्यो ।
 परसन हमहि सदा प्रभु हूज्यो ॥ कहा इंद्र वपुरा केहि लायक । गिरि देवता सबहिके नायक ॥ सूरदास
 प्रभुके गुण ऐसे । भक्तन वश दुष्टनको नैसे ॥ ४० ॥ हरि सबके मन यह उपजाई । सुरपति निंदत गिरिहि
 बडाई ॥ वर्ष वर्ष प्रति इंद्र पुजाई । कबहुँ परसन भयो न आई ॥ पूजत रहौ अविर्था सुरपति ।

सब सुख यह वाणी घर निंदति ॥ बड़ो देव यह गिरि गोवर्धन । इहै कहत गोकुल ब्रज पुरजन ॥
 तहाँ दूत इक इंद्र पठायो । ब्रजकौतुक देखन वह आयो ॥ घर घर कहत बात नर नारी । दूत सुन्यो
 सो श्रवण पसारी ॥ मानत गिरि निंदत सुरपतिको ॥ हंसत दूत ब्रजजन गई मतिको ॥ सूर सुनत
 इतनी रिस पाये । उठि तुरतहि सुरलोकहि आये ॥ ३९ ॥ ब्रह्म दई जाको ठकुराई । त्रिदशकोटि
 देवनके राई ॥ गिरि पूज्यो तिनिही बिसराई । जाति बुद्धि इनके मन आई ॥ शिव विरंचि जाको कहै
 लायक । जाके भैं मधवा से पायक ॥ यह कहतहि आए सुरलोकहि । पहुँचे जाइ इंद्रके ओकहि ॥
 दूतन ऐसिय जाइ सुनाई । बैठे जहाँ सुरनके राई ॥ करजोरे सन्मुख भे आई । प्रीति उठे
 ब्रजकी कुशलाई ॥ दूतन ब्रजकी बात सुनाई । तुमहि भेटि पूज्यो गिरिजाई ॥ तुमहि निदरि
 गिरिवरहि बडाई । इह सुनतहि रहे देह कँपाई ॥ सूर श्याम इह बुद्धि उपाई । ज्यों जानै ब्रजमें
 यदुराई ॥ ४० ॥ ग्वालन मोसों करी ठिठाई । मोको अपनी जाति देखाई ॥ तेंतिसकोटि सुरनको
 राई ॥ तिहुं भुवन भरि चलत बडाई ॥ साहबसों जो करै धुताई । ताको नाहि कोऊ पति आई ॥ इनि
 अपनी परतीति घटाई । मेरे बैर बाँचिहैं भाई ॥ नई रीति इन अबाहि चलाई । काहु इनहि दियो
 बहिकाई ॥ ऐसी मति इन अबकै पाई । काकै शरन रहैगे जाई ॥ इन दीनो मोको बिसराई । नंद
 आपनी प्रकृति गँवाई ॥ जानी बात बुढाई आई । अहिर जाति कोई न पत्न्याई ॥ मात पिता नहिं
 मानै भाई । जानि बुद्धि इन करी धिंगाई ॥ मेरी बलि पर्वतहि चढाई । गिरिवर सहितै ब्रज बहाई ॥
 सूरदास सुरपति रिस पाई । कीडीतनु ज्यों पांख उपाई ॥ ४१ ॥ मोको निंदि पर्वतहि वंदत ।
 चारों कपट पंछि ज्यों फंदत ॥ मरन काल ऐसी बुधि होई । कछू करत कछुवै वह जोई ॥ खेलत
 खात रहे ब्रजभीतर । नान्हे लोग तनक धन ईतर ॥ समय समय बरषों प्रतिपालौं । इनकी बुद्धि
 इनको अब चालौं ॥ मेरे मारत कौन राखिहै । अहिरनके मन इहै काषिहै ॥ जो मन जाके सोइ फल
 पावै । नीब लगाइ आंब क्यों खावै ॥ विषके वृक्ष विषहि फल फलिहै । तामें दाख कहौ क्यों
 मिलिहै ॥ अग्निवर्त देखै करनावै । कहा करै तेहि अग्नि जरावै ॥ सूरदास इह सब कोउ जानै । जो
 जाको सो ताको मानै ॥ ४२ ॥ पर्वत पहिले खोदि बहाऊं । ब्रजजन मारि पताल पठाऊं ॥ फूलि
 फूलि जेहि पूजा कीन्हों । नेक न राखौं ताको चीन्हों ॥ नंद गोप नैनन यह देखै । बडे देवताको
 सुख पेखै ॥ निंदत मोहिं करी गिरि पूजा । जासों कहत और नहिं दूजा ॥ गर्व करत गोवर्धन
 गिरिको । पर्वत माहं आइ वह किरको ॥ डोंगरिको बल उनाहिं बताऊं । ता पाछे ब्रज खोदि
 बहाऊं ॥ राखौं सदां काहु सब मरै ॥ सूर तुमसों मरण जोजि निवारौं ॥ को जानै कहै गिरि कहै गोकुल ।
 भुवपर सब तुमहि बतावै ॥ सूरदास इह इंद्र प्रतिज्ञा । ब्रजवासिन सब करी अवज्ञा ॥ ४३ ॥
 सुरप सुहाव किंया आतेभारी । फरकत अघर नैन रतनारी ॥ भृतनि बोलाये दैद गारी । मेघनि
 मटुनि तुरत हैकारी ॥ एक कहत धाए सौचारी । अति डरपे तनुकी सुधि हारी ॥ मेघवर्त जलवर्त
 गेलावहु । सैन साजि तुरतहि लै आवहु ॥ कापर क्रोध कियो अमरापति । महाप्रलय जिय जानि
 डरे अति ॥ मेघनसों यह बात सुनाई । तुरत चलौ बोले सुरराई ॥ सैन सहित बोलाए तुमको । रिस
 करि तुरत पठाए हमको ॥ बेगि चलौ कछु बिलम न लावहु । हमहि कछो अबहीं लै आवहु ॥
 मेघवर्त सब सैन्य बोलाए । महाप्रलयके जे सब आए ॥ कछु हषे कछु मनाहि स
 काने । प्रलय आहि की हमहिं रिसाने ॥ चूकपरी हमते कछु नाहीं । यह कहि कहि सब आतुर
 जाहीं ॥ मेघवर्त जलवर्त वारिवर्त । अनिलवर्त वज्रवर्त प्रवर्त ॥ बोलत चले आपनी बानी ।

प्रभु सन्मुख सब पहुँचे आनी ॥ गर्जि गर्जि घहरातहि आए । देव देव कहि माथ नवाए ॥ सूरदास
 डरपत सब जलधर । हमपर क्रोध किधौ काहू पर ॥ ४४ ॥ चितवतही सब गए झुराई । सकुचि
 कझो कापर रिसपाई ॥ क्षमाकरहु आयसु हम पावैं । जापर कहौ ताहिपर धावैं ॥ सैनसहित
 प्रभु हमहि बोलाए । आज्ञा सुनत तुरत उठिघाए ॥ ऐसो कवन जाहि प्रभु कोपे । जीवनाम सब तुम्ह-
 रेइ रोपे ॥ सूर कहौ यह मेघन बानी । यह सुनि सुनि रिस कछुक बुझानी ॥ ४५ ॥ मेघनिसों
 बोले सुरराई । अहिरन मोसों करी ठिठाई ॥ मेरी दीन्ही करत बडाई । जानिबूझि मोहिं दियो
 भुलाई ॥ सदा करत मेरी सेवकाई । अब सेवत पर्वत कहैं जाई ॥ इहीकाज तुमको हँकराये ।
 भली करी सैना लिये आए ॥ गाइ गोप ब्रज सबै बहावहु । पहिले पर्वत दौदि ढहावहु ॥ जब यह
 सुनी इंद्रकी बानी । मेघन मन तब धीरज आनी ॥ सूरदास यह सुनि घन तमके । कापर क्रोध
 करत प्रभु जमके ॥ ४६ ॥ रिसलायक तापर रिस कीजै । यहि रिसते प्रभु देही छीजै ॥ तुम प्रभु
 हमसे सेवक जाके । ऐसो कवन रहै तुम ताके ॥ छिनहीमें ब्रज धोइ बहावैं । डूंगरको कहि नाउँ
 न पावैं ॥ आपु क्षमा करिये देवराई । हम करिहैं उनकी पहुनाई ॥ यह सुनिकै हरपित चित
 कीन्हों । आदर सहित पान कर दीन्हों ॥ प्रथमहि देहु पहार बहाई । मेरी बलि वोही सब खाई ॥
 सूर इंद्र मेघनि समझावत । हरपि चले घन आदर पावत ॥ ४७ ॥ आयसुपाइ तुरतही धाये ।
 अपनी सैना सबनि बोलाये ॥ कझो सबनि ब्रज ऊपर धावहु । घटाघोर करि गगन छपावहु ॥ मेघ
 वर्त जलवर्तक आगे । और मेघ सब पाछे लागे ॥ गरजि उठे ब्रज ऊपर जाइ । शब्दकियो आघात
 सुनाइ ॥ ब्रजके लोग डरे अतिभारी । आजु घटा देखतिहैं कारी ॥ देखत देखत अति अधिकायो ।
 नेकहिमें रवि गगन छपायो ॥ ऐसे मेघ कबहुँ नहिं देखे । अतिकारे काजर अवरेखे ॥ सुनहुसूर
 ए मेघ डरावन । ब्रजवासी सब कहत भयावन ॥ ४८ ॥ गरजि गरजि ब्रज घेरत आवैं । तरपि
 तरपि चपला चमकावैं ॥ नर नारी सब देखत ठाढे । ये बादर परलयके काढे ॥ दरदरात घहरात प्रबल
 अति । गोपी ग्वाल भए औरै गति ॥ कहा होन अबही यह चाहत । जहाँ तहाँ लोग इहै अवगाहत ॥
 खन भीतर खन बाहिर आवत ॥ गगन देखि धीरज विसरावत ॥ सूर श्याम यह करी पुजाई । ताते सुरपति
 चढ्यो रिसाई ॥ ४९ ॥ फिरत लोग जहँतहँ वितताने । कोहै अपने कौन बिराने ॥ ग्वाल गए जे धेनु
 चरावन । तिनहि परचो वनमाझ परावन ॥ गाइ बच्छकोऊन सँभारै । जियकी सबको परी खँभारै ॥ भागे
 आवत ब्रजही तनको । विपति परी अति वन ग्वालनको ॥ अंध धुंध मग कहूं न सूझै । ब्रजभीतर
 ब्रजहीको बूझै ॥ जैसे तैसे ब्रज पहिचानत । अष्ट पड़ाए । बिलम के ~~उपनयन~~ ॥ खो ~~पि~~ फिर आपने
 घरको । कहा भयो भैया घोष शहरको ॥ रोवत डोलैं घरहि न पोवा ॥ तिनहि तहाँ ओ ~~प~~ ~~व~~ ॥
 सूर श्याम सुरपति विसरायो । गिरिके पूजे यह फल पायो ॥ ५० ॥ यमुनाजलहि गई जाँ नारी ॥ ५१ ॥ ~~सि~~
 शिर गागरि भारी ॥ देखो मैं बालक कत छाँड्यो । एक कहत अंगन दधि माँड्यो ॥ एक ~~क~~ ~~लोग~~
 मारग नहिं पावति । एक सामुहे बोलि बतावति ॥ ब्रजवासी सब अति अकुलाने । कालिहि पूज्यो
 फल्यो बिहाने । कहाँ रहे अब कुँवरकन्हाई । गिरि गोवर्धन लोहिं बोलाई ॥ जे वन सहसभुजा धरि आवैं । अब
 द्वेषुज हमको देखरावैं ॥ यह देवता खातही लोके । पाछे पुनि तुम कौन कहौके ॥ सूर श्याम सपनों प्रग
 टायो । घरके देव सबनि विसरायो ॥ ५१ ॥ गर्जत घन अतिही घहरावत । कान्ह सुनत आनंद
 बढावत ॥ कौतुक देखत ब्रजलोगनके । निकट रहत संगहि सँग जनके ॥ एक सैतत घरके सब
 वासन । लीने फिरत घरहिके पासन ॥ एक कहत जिनकी नहिं आसा । देखत सबै दुष्टके नाशा ॥

सूर श्याम जानत ए गासा । कहां पाणि कहां करै हुतासा ॥ ५२ ॥ मेघवर्त मेघनि समुझावत ।
 बार बार गिरितनहि बतावत ॥ पर्वत पर बरषहु तुम जाई । इहै कही हमको सुरराई ॥ ऐसे देहु
 पहार बहाइ । नाउ रहै नहि ठौर जनाइ ॥ सुरपतिकी बलि ये सब खाई । ताके फल पावै गिरि
 राई ॥ जेवत कालि अधिक रुचिपाई । सलिल देहु जेहि तृषा बुझाई ॥ दिनाचारि रहते जग ऊपर ।
 अब न रहन पावहु या भूपर ॥ सूर मेघ सुरपतिहि पठाये । ब्रजके लोगन तुमहि बहाये ॥ ५३ ॥
 वर्षतहैं घन गिरिके ऊपर । देखि देखि ब्रजलोग करत डर ॥ ब्रजवासी सब कान्ह बतावत । महा
 प्रलय जल गिरिहि ढहावत ॥ झरहरात झारत झर लावत । गिरिहि धोइ ब्रज ऊपर आवत ॥ बिकल
 देखि गोकुलके बासी । दरशदियो सबको अबिनाशी ॥ अबिनाशीको दरशन पाये । तब सब मन
 परतीति बढाये ॥ नंद यशोदा सुतहित जानै । और सबै सुख अस्तुतिगानै ॥ वर्षत गिरि झरपत ब्रज
 ऊपर । सो जल जैह तैह पूरन भूपर ॥ सूरदास प्रभु राखि लेहु अब । जैसे राखे अघा वदन तब ॥ ५४ ॥
 राखिलेहु अब नंदकुमार । गोसुत गाइ फिरत बिकरार ॥ वर्षत बूंद लगै जनु सायक । राखि लेहु अब
 गोकुलनायक ॥ तुमबिनु कौन सहाय हमारे । नंदसुवन अब शरण तुम्हारे ॥ शरण शरण जब
 ब्रजजन बोले । धीरवचन देदै दुख मोले ॥ यह बोले हैंसि कृष्ण मुरारी ॥ गिरि कर घर राखौ नर नारी ॥
 सूर श्याम चितए गिरिवर तन । बिकल देखिकै गोसुत ब्रजजन ॥ ५५ ॥ गोवर्धन लीन्हो उचकाई ।
 देखि बिकल नर नारि कन्हाई ॥ अपने सुख ब्रजजन वितताये । बूंद कयुक ब्रजपर वरपाये ॥
 वै डरपत आपुन हरषत मन । राखेरहैं जहाँ तहाँ ब्रजजन ॥ घरिक देखि मनही सुख दीन्हों ।
 वामभुजा धरि गिरिवर लीन्हों ॥ सूर श्याम गिरिकर गहि राख्यो । धीर धीर सबसों कहि भाख्यो ॥
 ॥ ५६ ॥ श्यामधरचो गिरि गोवर्धन कर । राखिलिए ब्रजके नारी नर ॥ गोकुल ब्रज राख्यो सब
 घर घर । आनंद करत सबै ताही तर ॥ बरषत मुसलधार मघवावर । बूंद न आवत नेकहु भूपर ॥
 धार अखंडित बरषत झरझर ॥ कहत मेघ धौं बहु ब्रज गिरिवर ॥ सलिल प्रलयको ढूढत तरतर ।
 बाजत शब्द नीरको धरधर ॥ वै जानत जलजातहैं दरदर । बीचहि जरत जात जल अंवर ॥ सूरदास
 प्रभु कान्ह गर्वहर । बरषत कहत गयो गिरिको जर ॥ ५७ ॥ बोलि लिए सब ग्वाल कन्हाई ।
 टेकहु गिरि गोवर्धनराई ॥ आज सबै मिलि होहु सहाई । हंसतदेखि बलराम कन्हाई ॥ लकुट लिए
 कर टेकत जाई । कहत परस्पर लेहु उठाई ॥ बरषत इंद्र महाझर लाई । अतिजल देखि सखा
 डरपाई ॥ नंदनंदन बिन को गिरिधारे । ऐसे बल बिन कौन सँभारे ॥ नखते गिरै कौन गिरि राखै ।
 बारबार कहि सखे यह भाये ॥ सूर तुमसो रूप कर लीन्हों । वर्षत मेघ चकृत मन कीन्हों ॥
 ॥ ५८ ॥ सब तुमहि बतावैं । मि बादर । इंद्र पठाए करि हम आदर ॥ अब देखत कछु होत निरा
 दर । सुखा बरषि घन भए मन कादर ॥ खीजत कहत मेघ सबहिनसों । बरषि कहा कीन्हो
 मडारि सा ॥ महाप्रलयको जल कहैं राखत । डारिदेहु ब्रजपर कहा ताकत ॥ क्रोध सहित फिरि
 गोवर्धन लागे । ब्रजवासी आनंद अनुरागे ॥ ग्वाल कहत तुम धन्य कन्हैया । वामभुजा गिरि लिए
 उठैया ॥ सूर श्याम तुम सरि कोउ नाहीं । वर्षत घन गिरि देखि खिसाहीं ॥ ५९ ॥ प्रलयमेघ आए
 लै वाने । आपुसहीमें सबै रिसाने ॥ सात दिवस जल बरषि बुढाने । चकृत भए तन सुरति भुलाने ॥ फिरि
 देखत जल कहां टराने । झुरिझुरि सब बादर बितताने ॥ बूंद नहीं घन नेक बचाने । जलद अपुनको धृग
 करि माने ॥ फिरि सब चले अतिहि बिकलाने । मनमें हार मानि सकुचाने ॥ सूर श्याम गोवर्धन राने ।
 मूरख सुरपति अजहुँ न जाने ॥ ६० ॥ मेघ चले मुख फेरि अमरपुर । करी पुकार जाइ आगे सुर ॥

भ्रमते दृष्टि गये सबके उर । जलवितु भए सबै घन धुंवर । की मारौ कै शरण उबारौ । हममें कहा
 रह्यो अवगारौ । जहँ तहँ वादर रोवत बोले । अम अपने प्रभु आगे खोले ॥ सात दिवस नहिं मिटी
 लगाए । वरघ्यो सलिल अखंडित धार ॥ महाप्रलय जल नेक न उबरयो । ब्रजवासी नीके अब नि
 डर्यो ॥ वैसोहि गिरि वैसोहि ब्रजवासी निक बंद नाहिं धराणि प्रगासी ॥ सूर सुनत सुरपती उदासी । देखहु ए
 आए जलरासी ॥ ६१ ॥ चकृत भयो ब्रज चाह सुनाई । पुनि पुनि वृक्षत मेघ बुलाई । कहां गयो जल
 प्रलयकालको । कहा कहाँ सब तन वेहालको ॥ कहा करै अपनों बल कीन्हों । व्याकुल रोइ रोइ
 तब दीन्हों ॥ दंड एक वरपै मनलाई । पूरण होत गगनलों आइ ॥ पर्वतमें है कोउ अवतार । सुरप-
 ति मन यह करत विचार ॥ सूर इंद्र सुरगण हैकराये । आज्ञा सुनत तुरत उठि आये ॥ ६२ ॥
 सुरपति आगे भए सब ठाढ़े । चिंता सबहिनके मन बाढ़े ॥ कौन काज सुरराज बोलाए । सकुच
 सहित पूछतसे आए ॥ कहा कहाँ कछु कहत न आवै । मघवनकी गति सुरन बतावै ॥ ब्रजवासिन
 मोको बिसरायो । भोजन लै सब गिरिहि चढायो ॥ मोको भेटि पर्वतहि थाप्यो । तब मैं थरथराय
 रिस काप्यो ॥ सूरदास यह सुरन सुनाई । या कारज तुम लिए बोलाई ॥ ६३ ॥ सुरन कही सुरपतिके
 आगे । सन्मुख कहत सकुच हम लागे ॥ सकुचत कत सो बात सुनावहु । नीके करि
 मोको सहसावहु ॥ नीके भांति सुनी सुराई । ब्रजमें ब्रह्म प्रगट भए आई ॥ तुम जानत जब धराणि
 पुकारी । पापहि पाप भई अति भारी ॥ पौढे सेज शेष संग श्री प्यारी । ते ब्रज भीतरहैं धनुधारी ॥
 ब्रह्मकथा कहि आदि पसारी । तिनसों हम कीनी अधिकारी ॥ सूरदास प्रभु गिरि कर धारी । यह सुनि
 इंद्र डर्यो मन भारी ॥ ६४ ॥ यह मोको तबही न सुनाई । मैं बहुतै कीन्ही अधमाई ॥ पूरन ब्रह्म
 रहे ब्रज आई । काहुतौ मोहिं सुधि न दिवाई ॥ सुरनि कही नहिं करी भलाई । आजु कद्यो जब
 महत गंवाई ॥ यह सुनि अमर गए सरमाई ॥ सुनहु राज हम जानि न पाई ॥ अब सुनि ए आपुन मनला-
 ई । ब्रजहि चलो नहिं और उपाई ॥ वै हैं कृपासिंधु करुणाकर । क्षमा करहिंगे श्रीसुंदरवर ॥ और
 कछु मनमें जिनि आनहु । हम जो कहैं सत्य करि मानहु ॥ सूर सुरन यह बात सुनाई । सुरपति
 शरण चले अकुलाई ॥ ६५ ॥ जब जान्यो ब्रज देव सुरारी । उतरि गई तब गर्व खुमारी ॥ व्याकुल
 भयो डर्यो जिय भारी ॥ अनजानत कीन्ही अधिकारी ॥ बैठि रहेते नहिं बनि आवै ॥ ऐसो को जो मोहिं
 बचावै ॥ बार बार यह कहि पछितावै ॥ जाउँ शरण बल मनहि धरावै ॥ जाइ परों चरणन शिर धारों ।
 की मारों की मोहि उधारों ॥ अमरन कद्यो करौ असवारी ॥ ऐरावतको लेहु हैकारी ॥ सूर शरण सुरपति
 चले धाइलिये अमरगण संग लगाइ ॥ ६६ ॥ कुरुप्रताप । बिलम कुरुप्रताप ब्रजालटपपर पग धराणि
 धरत गज ॥ कोटि इंद्र जाके रोमनि रज । ब्रज अवतार लियो माया तिनहि तहां आसी पर
 आए । श्वेतवरन ऐरापति लाए ॥ ब्रज वासी सब देखन पाए । चकृत भए मन सीबाने २१ ॥
 कहत सुनी लोगन मुख बातायेई हैं सुरपति सुरज्ञाता ॥ देखि सैन ब्रजलोग सकात । यह बड़ावै ॥
 कीन्हे कछु घात ॥ सूर श्यामको जाइ सुनायो ॥ सुरपति सैन साज ब्रज आए ॥ ६७ ॥ निकट जानि त्यागेग
 वाहनको । सकुचत चले कृष्ण सन्मुखको । कछु आनंद कछुक मनमें दुखाहर्ष विपाद तक्यो हरि
 सन्मुख ॥ परचो धाइ चरणन शिरनाइ । कृपासिंधु राखहु शरणाइ ॥ किए अपराध बहुत बिन जाने ।
 प्रभु उठाइ लिए कछु सुसकाने ॥ श्रीमुख कद्यो उठहु सुरराजा । बदन उठाइ सकत नहिं लाजा ॥ ये दिन
 वृथा गए बिनकाजा । तुमको नहिं जान्यो ब्रजराजा ॥ सूर श्याम लीन्हे उरलाइ ॥ अशरन शरन निगम
 यह गाइ ॥ ६८ ॥ हैसि हैसि कहत कृष्ण मुखवानी । हम नाहिन रिस तुमपर आनी ॥ तुम कत

अति शंका जिय जानी । भली करी ब्रजराख्यो पानी ॥ यह सुनि इंद्र अतिहि सकुचान्यो । ब्रज
 अवतार नहीं मैं जान्यो ॥ राखि राखि त्रिभुवनके नाथा । नहीं मोते कोउ अवर अनाथा ॥ फिरि
 फिरि चरण धरत लै माथा । क्षमाकरहु राखहु मोहिं साथा ॥ रवि आगे खद्योत प्रकाशा ।
 मणि आगे ज्यों दीपक नाथा ॥ कोटि इंद्र रचि कोटि विनाथा । मोहिं गरीबकी केतिक आशा ॥
 दीन वचन सुनि भवके बासा । क्षमाभयो जल परे हुतासा ॥ अमरपति चरणन तर लोटत ।
 रही नहीं मनमें कहूँ खोटत ॥ उभय भुजा करि लियो उठाइ । सुरपति शीश अभय कर नाइ ॥
 हँसिदीन्ही प्रभु लोक बडाई । श्रीमुख कह्यो करौ सुखजाई ॥ धन्य धन्य जनके सुखदाई । जय
 जय ध्वनि देवन सुख गाई ॥ शिव विरंचि चतुरानन नारद । गौरी सुत दोऊ सँग शारद ॥ रवि शशि
 वरुण अनल यमराजा । आजु भए सब पूरन काजा ॥ अशरन शरन सदा तुव वानो ॥ यह लीला प्रभु
 तुमही जानो ॥ मातासों सुत करै दिठाई । माता फिरि ताको सुखदाई ॥ ज्यों धरणी हल खोदि
 विनाशै । सन्मुख सतगुण फलहि प्रकाशै ॥ कर कुठार लै तरुहि गिरावै । वह कटि वह छाया छावै ॥ जैसे
 दशन जीभ दलिजाइ । तब कासों सो करै रिसाइ ॥ धनि ब्रज धनि गोकुल बृंदावन । धनि यमुना
 धनि लता कुंज घन ॥ धन्य नंद धनि जननि यशोदा ॥ बालकलि हरिके रस मोदा ॥ अस्तुति सुनि मनहर्ष
 बढायो ॥ साधु साधु कहि सुरनि सुनायो ॥ तुमहि जाइ जब मोहि जगायो ॥ तुम्हरेहि काज देह धरि आयो ॥
 तुमै राख असुरन संहारौ । तनु धरि धरणीभार उतारौ ॥ आवत जात बहुत श्रम पायो । जाहु
 भवन करि कृपा पढायो ॥ कर शिर धरि धरि चले देवगन । पहुँचे अमरलोक आनंद मन ॥
 यह लीला सुर घरनि सुनाई । गाइ उठी सुरनारि बधाई ॥ अमरलोक आनंद भए सब । हर्ष सहित
 आए सुरपति जब ॥ सूरदास सुरपति अति हरष्यो । जैजै ध्वनि सुमननि ब्रज वरष्यो ॥ ६९ ॥ हरि करते
 गिरिराज उतारयो । सात दिवस जल प्रलय सँभारयो ॥ ग्वाल कहत कैसे गिरि धारयो ॥ कैसे सुरपति
 गर्व निवारयो ॥ वज्रायुध जल वर्षि सिराने । परयो चरण तब प्रभुकरि जाने ॥ हम सँग सदा
 रहतहैं ऐसे । यह करतूति करत तुम कैसे ॥ हम हिलिमिलि तुम गाइ चरावत । नंद यशोदा
 सुवन कहावत ॥ देखिरही सब घोष कुमारी । कोटि काम छबिपर बलिहारी ॥ कर जोरत रवि
 गोद पसारे । गिरिवरपति प्रभु होहिं हमारे ॥ ऐसो गिरि गोवर्द्धन भारी । कब लीन्हों कब धरयो
 उतारी ॥ तनक तनक भुज तनक कन्हाई । यह कहि उठी यशोदा माई ॥ कैसे पर्वत लियो उच
 काई । भुज चापति चूमति बलिजाई ॥ बारंबार निरखि पछिताई । हँसत देखि ठाढे बल भाई ॥ इनकी
 महिमा काहुँ स पाई । गिरिवर सूर तुमसों गुण जाई ॥ एक एक रोम कोटि ब्रह्मंडा । रवि शशि
 धरणी सब तुमहि बतावै ॥ ब्रज जन्म लियो कै बारा । जहाँ तहाँ जल थल अवतारा ॥ प्रगट होत
 भूत भुक्ता राजा ॥ ब्रह्म कीट सम सबके राजा ॥ जहँ जहँ गाढ परै तहँ आवै । गरुड छाँडि तब
 मटुलि धावै ॥ ब्रजहीमें नित करत विहार । सहज स्वभाव भक्त हितकार ॥
 गेह लीला इनको अति भावै । देह धरत पुनि पुनि प्रगटवै ॥ नेक तजत नाहिं ब्रज नर
 नारी । इनके सुख गिरि धरत मुरारी ॥ गर्ववत सुरपति चढि आयो । वाम करज गिरि टेकि दिखायो ॥
 ऐसेहैं प्रभु गर्वप्रहारी । सुख चूमति यशुमति महतारी ॥ यह लीला जो नितप्रति गावै । आपुन
 सिखै औरनि सिखरावै ॥ सुनै सीख पढि मनमें राखै । प्रेम सहित सुखते पुनि भाखै ॥ भक्ति
 मुक्तिकी केतिक आसा । सदा रहत हरि तिनके पासा ॥ चतुरानन जाको रस मानै । शेषसहस
 मुख जाहि बखानै ॥ आदि अंत कोऊ नाहिं पावै । जाको निगम नेति नित गावै ॥ सूरदास

प्रभु सबके स्वामी । शरन राखि मोहि अंतर्यामी ॥ ७० ॥ राग सोरठ ॥ तेरे भुजन बहुत बल होइ
 कन्हैया । बार बार भुज देखि तनकसे कहति यशोदा मैया ॥ श्याम कहत नहि भुजा पिरानी ग्वालन
 कियो सहैया । लकुटन टेकि सबन मिलि राख्यो अरु बाबा नंदरैया ॥ मोसों क्यों रहतो गोबर्धन अति
 ह बडो वह भारी । सूर श्याम यह कहि परबोधो देखि चकृत महतारी ॥ ७१ ॥ राग देवगंधार ॥ सबै मिलि
 पूजौ हरि की बहियाँ । जो नहि लेत उठाइ गोबर्धनको बांचत ब्रज महियाँ ॥ कोमल कर गिरि धरयो
 घोष पर शरद कमलकी छहियाँ । सुरदास प्रभु तुमरे दरशको आनंद होत ब्रज महियाँ ॥ १ ॥ अध्याय
 ॥ २८ ॥ अथ नंदको वरुण लेगये ॥ राग विलावल ॥ उत्तम शुक्ल एकादशि आई । भक्ति मुक्ति दायक सुखदाई ॥
 निराहार जलपान विवर्जित । पाप न रहत धर्मफल अर्चित ॥ नारायण हित ध्यान लगायो । और
 नहीं कहूँ मन विरमायो ॥ बासर ध्यान करत सब वीत्यो । निशि जागरण करन मन चीत्यो ॥
 पाटंबर दिवि मंदिर छायो । शालिग्राम तहां बैठायो ॥ धूप दीप नैवेद्य चढ़ायो । पुहुप मंडली
 तापर छायो ॥ प्रेम सहित करि भोग लगायो । आरतिकरि तब माथो नायो ॥ सादर सहित करी
 नंद पूजा । तुम तजि देव और नहि दूजा ॥ तृतीय पहर जब रैनि गमाई । नंदमहरिसों कही बुझाई ॥
 दंड एक द्वादशी सकारै । पारनकी बिधि करौ सवारै ॥ यह कहि नंद गए यमुनातट । लै घोती
 बिधि कीनो कर्म पट ॥ झारी भरि यमुना जल लीनो । बाहिर जाइ देहकृत कीनो ॥ लै माटी कर
 चरन पखारी । अति उत्तम सो करी मुखारी ॥ अँचवन लै पैठे नंद पानी । जल बाजत दूतन तब
 जानी ॥ वरुन पास लाए ततकालहि । नंदहि बाँधि लै गये पतालहि ॥ जान्यो वरुण कृष्णते तातहि ।
 मनहीं मन हर्षित इहि बातहि ॥ भीतर लै राखे नंद नीके । अंतरपुर महलन रानीके ॥ रानी सबन
 नंदको देख्यो । धन्य जन्म अपनो करि लेख्यो ॥ जिनके सुत त्रैलोक्य गुसाई । सुर नर मुनि सबके हैं
 साई ॥ वरुण कही मन हर्ष बढ़ाए । बडी बात भई नंदहि ल्याए ॥ अंतर्यामी जानत बाता । अब
 आवत है हैं जगत्राता ॥ जाको ब्रह्मा अंत न पायो । ताको मुनि जन ध्यान लगायो ॥ जाको नेति
 निगम गावत हैं ॥ ताको मुनिवर जन ध्यावत हैं ॥ जाको ध्यान धरैं शिव योगी । ताको सेवत सुरपति
 भोगी ॥ सो प्रभु हैं जल थल सब व्यापक । जो हैं कंस दर्पको दापक ॥ गुण अतीत अविगत अबि
 नाशी । सो ब्रजमें खेलत सुखरासी ॥ धनि मेरे भूत नंदहि ल्याए । करुणामय अब आवन धाए ॥
 महरि कही तब सब ग्वालिनको । बडी वार भइ नंदमहरको ॥ गए ग्वाल तब नंद बोलावन ।
 देख्यो जाइ यमुन जलपावन ॥ जहँ तहँ ग्वाल ढूँढि घर आए । घोती अरु झारी वै लाए ॥ मन मन शोच
 करैं अकु लाए । कहि यशुदासों नंद न पाए ॥ ~~दोष दीप~~ । बिलमें कहे । सुनत महरि मुख गयो सुखाई ॥
 निशा अकेले आजु सिधाए ॥ काहूँ धौं जलचर धरि खाए ॥ यह कहि यशु । तिनहि तहां आख्यो बरजत
 कत रैन सिधारयो ॥ ब्रजजन लोग सबै उठि धाए । यमुनाके तट नंद न पाए ॥ ~~वन~~ ~~यनि~~ ~~ढूँढत~~ ॥ ~~तारैं~~ ।
 नंद नंद कहि लोग पुकारैं ॥ खेलतते हरि हलधर आए । रोवत मात देखि दुखपाए ॥ कत दवावै ॥
 यशुदा मैया । पृछत जननीसों दोउ मैया ॥ कहत श्याम जनि रोवहु माता । अबहीं आवत है ग
 ताता ॥ मोसों कहि गए अबहीं आवन । रोवै मति मैं जात बोलावन ॥ सबके अंतर्यामी हैं हरि ।
 लैगयो बाँधि वरुन नंदहि धरि ॥ यह कारज मैं वाको दीनों । वाके दूतन नंदन चीनों ॥ वरुन लो
 क तबहीं प्रभु आए । सुनत वरुन आतुर है धाए ॥ आनंद कियो देखि हरिको मुख । कोटि जन्मके
 गए सबै दुख ॥ धन्य भाग्य मेरे बडे आजु । चरण कमल दरशन सुखकाजु ॥ पाटंबर पाँवडे डसा
 ए । महलन बंदनवार बंधाए ॥ रत्न खचित सिंहासन धारयो । तिहिपर कृष्णहि लै बैठारयो ॥

अपने कर प्रभु चरण पखारे । जे कमला उरते नहिं टारे ॥ जे पद परसि सुरसरी आई । तिहूं लोक है विदित बडाई ॥ ते पद बरुन हाथ लै धोए । जन्म जन्मके पातक खोए ॥ कृपासिंधु अब शरन तुम्हारी । इहि कारण अपराध बिचारी ॥ आपु चले हरि नंदहि देखन । बैठे नंद राजवर भेषन ॥ नृपराणी सब आगे ठाढ़ी । मुख मुख ते सब अस्तुति काढ़ी ॥ पौड़न परी कृष्णके रानी । धन्य जन्म सबहिन कहि मानी ॥ धन्य नंद धनि धन्य यशोदा । धनि धनि तुमैं खिलावति गोदा ॥ धनि ब्रज धनि गोकुलकी नारी । पूरन ब्रह्म तहां बपु धारी ॥ शेष सहस मुख वरनि न जाई । सहज रूप को करै बडाई ॥ देखि नंद तब करत बिचारा । यह कोउ आहि बडो अवतारा ॥ नंद मनहि अति हर्ष बढ़ायो । कृपासिंधु मेरे गृह आयो ॥ बरुनहि दीनी लोक बडाई । तुम हौ एहि पतालके राई ॥ कहा देत मोहिं लोक बडाई । बृंदावन रज करौ सदाई ॥ बरुन थाप नंदहिलै आए । महर गोप सब देखन धाए ॥ नंदहि बूझत हैं सब बाता । हम अति दुखित भए सब गाता ॥ एकादशी काल्हि मैं की नों । निशि जागरन नेम यह लीनों ॥ तीन पहर निशि जागि गँवाई । तब लीनी मैं महारि बुलाई ॥ एकदंड द्वादशी सुनाई । ता कारण मैं करी चँडाई ॥ एकदंड द्वादशि कैयो पल । रैन अछत मैं गयो यमुनजल ॥ गयो यमुन कटिलौं भीतर भरि । बरुनदूत लै गयो मोहिं धरि ॥ तहँते जाइ कृष्ण मोहिं ल्यायो । हम कोउ बडे पुरुष है पायो ॥ इनकी महिमा कोउ न जानै । बरुन कोटि मुख कहै बखानै ॥ रानिन सहित परचो चरणनतर । बंदनवार बँधे महलनि घर ॥ मेरो कछो सत्यकै मानों । इनको नर देही जिनि जानों ॥ यशुमति सुनि चकृत इह बानी । कहत कहा यह अकथ कहानी ॥ ब्रज नर नारि सुनत जे गाथा । इनते हम सब भए सनाथा ॥ मया मोह करि सबै भुलाए । नंदहि वरुन लोकते ल्याए ॥ नंद एकादशि वरणि सुनाई । कहत सुनत सबके मनभाई ॥ जो या पदको सुनै सुनावै । एकादशिब्रतको फल पावै ॥ यह प्रताप नंदहि दिखराई । सूरदास प्रभु गोकुलराई ॥ १ ॥ राग कान्हरो ॥ नंदहि कहति यशोदा रानी । मोहिं बरजत निशि गए यमुनतट पैठे जाइ अकेले पानी ॥ अब तो कुशल परी पुण्यनिते द्विजन करौ बहुदान । बोलिलेहु वाजन बजावहु देहु मिठाई पान ॥ गावति मंगल नारि बधाई बाजत नंददुआर । सुनहु सूर यह कहति यशोदा नंद बचे इहिवार ॥ २ ॥ राग विलावल ॥ कहत नंद यशुमति सुनि बात । अब अपने जिय सोचु करति कत जाके त्रिभुवनपतिसों तात ॥ गर्ग सुनाइ कही जो बाणी सोई प्रगट होतिहै जात । इनते नहीं और कोउ समरथ एईहैं सबहीके तात ॥ मायारूप मोहिनी लगाइ डरि भूले सबै जे गाथ । सूर श्याम खेलत ते आए माखनदै माँ सुष ॥ ३ ॥ राग सौराष्ट्र ॥ सूर तुमसों माँ माखन ल्याइ । मैं मथिकै अबहीं धरि राख्यो तुम्हरे । सब तुमहि बतावैं इहि ॥ माँगिलेहु एही विधि मोसे मो आगे तुम खाहू । बाहेर जिन कबहुं खेले सुखड़ाठि लंगगा काहु ॥ तनक तनक कछु खाहु लाल मेरे ज्यों बढि आवै देहा ॥ सूर श्याम अब होहु मटुहि त्वरिनके मुखखेह ॥ ४ ॥ अथ दानलीला ॥ राग विलावल ॥ भक्तनके सुखदायक श्याम । इस्त्री पुरुष गेही कछु नाम ॥ संकटमें जिनि जहां पुकारे । तहां प्रगटि तिनको उद्धारे ॥ सुख भीतर जिमि सुमिरन कीन्हों । तिनको दरश तहां हरि दीन्हों ॥ दुख सुख में जो हरिको ध्यावै । तिनको नेक न हरि बिसरावै ॥ चितदै भजै कौनहु भाउ । ताको तैसो त्रिभुवन राउ ॥ कामातुर गोपी हरि ध्यायो । मन वच कर्महिसों मन लायो । पटक्रतु तप कीनों तनुगारी । होहिं हमारे पति गिरिधारी ॥ अंतर्दामी जानत सबकी । प्रीति पुरातनशाली तबकी ॥ वसन हरे गोपिन सुख दीनो । नाना विधि कौतुकरस कीनो ॥ युवतिनके इह ध्यान सदाई । नेक न अंतर होइ कन्हाई । घाट

बाट यमुनातट रोकै । मारग चलत जहाँ तहँ टोकै ॥ काहूकी गागरि धरि फेरै । काहूसों हँसि
 बदन सकोरै ॥ काहूको अंकम भरि भेटै । कामव्यथा तरुणिके भेटै ॥ ब्रह्मा कीट आदिके स्वामी ।
 प्रभुहैं निरलोभी निहकामी ॥ भाववश्य संगही संग डोलैं । खेलैं हँसैं तिनहिसों बोलैं ॥ ब्रजयुवती नहिं
 नेक विसारैं ॥ भवनकाज चित हरिसों धारैं ॥ गोरस लैं निकसीं ब्रजबाला ॥ तहाँ तिनि देखे मदन गोपाला ॥
 अँग अँग सजि शृंगार वर कामिनि । चलीं मनहु यूथनि जुरि दामिनि ॥ कटि किंकिनि नूपुर बिछि-
 या धुनि । मनहु मदनके गजघंटा सुनि ॥ जाति माट मटुकी शिरधारिकै । सुख सुख गान करति
 गुण हरिकै ॥ चंद्रवदनि तनु अति सुकुमारी । अपने मन सब कृष्ण पियारी ॥ देखि सबनि रीझे
 बनवारी । तब मनमें इक बुद्धिविचारी ॥ अब दधि दान रचौं इक लीला । युवातिन संग करौं रस
 लीला ॥ सूर श्याम संग सखन बोलायो । यह लीला कहि सुख उपजायो ॥ ५ ॥ राग जयतश्री ॥
 सुनत हँसी सुख होहि दान दहीको लाग्यो । निशिदिन मथुरा दधि बेचैं श्याम दान अब मांग्यो ॥ प्रात
 होत उठि कान्ह टेरि सब सखनि बोलाए । तेइ तेइ लीने साथ मिले जे प्रकृति बनाए ॥ डगरि गए
 अनजानही गह्यो जाइ वन घाट । पेडपेड तरुके लगे ठाटि ठगनको ठाट ॥ ६ ॥ इहाँ ग्वाल
 बनि बनि जुरीं सब सखी सहेली । शिरनि लिए दधि दूध सबै यौवन अलबेली ॥ हँसत परस्पर
 आपुमें चली जाहिं जिय भोर । तबहि आनि घातहि परी छेकिलिए चहुँओर ॥
 ॥ ७ ॥ देखि अचानक भीर भईं सब चकृत किशोरी । ज्यों नृगशावक यूथ मध्य बागुरि चहुँओरी ॥
 शंकितहैं ठाढ़ी भईं हाथ पाँव नहिं डोल । मनहुँ चित्रकीसी लिखीं सुखहि न आवैं बोल ॥ ८ ॥
 तब उठि बोले ग्वाल डरहु जिनि कान्ह दुहाई । ठग तस्कर कोउ नाहिं दान यदुपति सुखदाई ॥
 आवत निशि दिनही रहौ श्यामराज भय नाहीं । जो कछु लागै दानको तुम घाटि देहु तेहि माहीं ॥ ९ ॥
 तब हँसि बोली ग्वाल नाम जब कान्ह सुनायो ॥ चोरी भरचो न पेट आनि अब दान लगायो ॥ तब
 उलटी पलटी फवी जब शिशुरहे कन्हाई ॥ अब ओहि कछु धोखे करौतौ छिनकमाहँ पति जाई ॥ १० ॥ तब
 उठि बोले कान्ह रही तुम पोच सदाई । महरि महर सुखपाइ शंकतजि करहु ढिठाई ॥ अब वह
 धोखो मेटिकै छाँडिदेहु अभिमान । करि लेखो अब दानको दियहि पाइहौ जान ॥ ११ ॥ तब
 हँसि बोली ग्वाल डरनि तुम तजी ढिठाई । बहुतै नंदनि काज भयो तुव तप अधिकारि ॥ कालिहि
 घर घर डोलते खाते दही चुराइ । राति कछु सपनों भयो प्रात भई ठकुराइ ॥ १२ ॥ भली कही
 नाहिं ग्वाल वातको भेद न पायो । पिता रचित धन धाम पुत्रके काजहि आयो ॥ तुमसे प्रजा
 बसाइकै राखेहैं इह पाइ । ते तुम हम सरवस दीए । बलमें कछु रूँटे चतराइ ॥ १३ ॥ तब झुकि
 बोली ग्वाल वात किन कहौं सम्हारै । ऐसो को बहिगयो प्रजाहैं वसन्तिनुहि तेहो आरै ॥ उपक-
 सके वसैं वास इक ठाउँ देखौ धौं घर जाइकै हम तजैं तुम्हारो गाउँ ॥ १४ ॥ गाउँ हमारो ॥ ॥
 वसिहौ केहि केरे । तीन लोकमें कौन जीव नाहिन बश भेरे ॥ कंसहि को गनती गनै जाके ॥
 कहाहु ॥ दिये दान पै धाँचिहो नातरु नहीं निबाहु ॥ १५ ॥ छोटे सुँह बडी बात कहौ किनि औ
 सँभारे । तीनि लोक अरु कंस कवहिं बश भए तुम्हारे ॥ यह बाणी तिनसों कहो जो कोउ
 होइ अजान । ऐसे होहु जु रावरे हम जानाति परवान ॥ १६ ॥ लेखो जैह भूलि कहूँकी बात चला-
 वत । झूठी मिलवत आनि सुनत हमको नाहिं भावत ॥ हमसों लीजै दानके दाम सबै परखाइ ।
 थैली मांगि पठाइए पीतांबर फटिजाइ ॥ १७ ॥ काहेको सतरात बात मै सांची भाषत । झूठी
 सब तुम ग्वारि बात मेरी गहि नाखत ॥ कह्यो मानि लेखो करौ देहु हमारो दान । सौँह बबा मोहि

नंदकी ऐसे देऊँ न जान ॥ १८ ॥ नंद दोहाई देत कहा तुम कंस दोहाई । काहेको अठिलात
 कान्ह छौँडौ लरिकार्ई । पहिली परिपाटी चलौ नहीं चलौ क्यों आजु । नृपति जानि जो पावै
 पुनिपै होइ अकाजु ॥ १९ ॥ लरिका मोको कहति नाहि देखी लरिकार्ई । पय पीवत संहारि पूतना
 स्वर्ग पठाई ॥ अघाबका शकटा तृणा केशी मुखकर नाई । गिरि गोवर्धन कर धरयो यह मेरी लरि-
 कार्ई ॥ २० ॥ सब भली तुम करी हमैं अब कहत कहा हो । ऐसी बात करतहौ मोहन तैसी सोइ
 लहाहो ॥ हँसी पलक द्वै चारिकी बीतन लागे याम । बनमें राखी रेकिकै नारि पराई श्याम ॥ २१ ॥
 हँसी करतहौ तुमहि भली गइ मति ब्रजनारी । तुम हमको हम तुमहि दई बिन काजहि
 गारी ॥ बात कहौ कछु जानिकै वृथा बढावत शोर । सदा जाहु चोरटी भई आजु परी फँग मोर ॥
 ॥ २२ ॥ माँगि लेहु दधि देहि दानको नाउँ मिटावहु । देत दुहाई नंदराइकी दान न सदा लगाव
 हु ॥ हमहि कहतहौ चोरटी आपु भयेहौ साहु । चोरी करत बडे भए मही छाक लै खाहु ॥ २३ ॥
 दही लेतहौ छीनि दान अंगनिको लैहौ । लैहौ रूपहि दान दान यौवनपै कैहौ ॥ तुम सब कंचन
 भार लै मेरे मारग जाहु । मही दही दिखरावहु कैसे होत निबाहु ॥ २४ ॥ जाहु भलेहो कान्ह दान अँग
 अँग को मांगत । हमरो यौवन रूप आखि इनके गड़ि लागत ॥ सबै चली झहराइकै मटुकी शीश उठा-
 इ । रिसकरि कसि कटि पीतपट ग्वारि गही हरि धाइ ॥ २५ ॥ मटुकी लई छिड़ाइ हार चोली बंद
 तोरयो । भुजभरि धरि अँकवारि बांह गहिकै झकझोरयो ॥ माखन दधि लियो छीनिकै कह्यो
 ग्वाल सब खाहु । मुख झगरति आनंद उर धिरवतहै घर जाहु ॥ २६ ॥ देखो हरिको काम झटकि
 चोली बंद तोरयो । हमको भरि अँकवारि बांह धरि धरि झकझोरयो ॥ यशुमतिषों कहिये चलौ
 अब प्रगटी तरुनाइ । दधि माखन सब छीनिलै ग्वालनि दए खवाइ ॥ २७ ॥ जाइ कहौ जू भली
 बात मैयाके आगे । तुमको जोवन रूप दान देती नहि मांगे ॥ तुम जो कैहौ जाइकै जननी नहीं पत्याइ ।
 सूर सुनहु री ग्वालिनी आवहुगी पछिताइ ॥ २८ ॥ राग काफी ॥ ऐसो दान न मांगिये जो हमपै
 दियो न जाइ । वनमें पाइ अकेली युवातिनि मारग रोकत धाइ ॥ घाट बाट अवघट यमुना तट
 बातैं कहत बनाइ । कोऊ ऐसा दान लेतहै कौनै सिखै पठाइ ॥ हम नाहि जानति तुम यों नहि रहौ गारी
 खाइ । जो रस चाहौ सो रस नहि गोरस पियहु अघाइ ॥ औरनसों लै लीजिये गिरिधर तब हम देहि
 बोलाइ ॥ सूर श्याम कत करत अचगरी हमसों कुँवर कन्हाइ ॥ २९ ॥ राग नट ॥ दान लेहु देहु जान काहेको
 कान्ह देतहौ गारी । जो कोऊ कह्यो करैरी हठि याही मारग आवै ब्रजनारी ॥ भली करी दधि
 माखन खायो चोली हार तोरि सब दगि । जोवन दान कहूं कोउ मांगत यह सुनि लाजन मारी ॥
 होत अउ सी सुनै नहि । सूर तुमसों दान लेतहै मारी । हमहि तुमहि कैसोई झगरो सूर सुजान
 हम सब तुमहि बतावैं ॥ भिख ॥ भोरहिते कान्ह करत मोसों झगरो । औरन छाडि परे हठ
 सुख दिनप्रति कलह करत गहि डगरो ॥ अन वोहनी तनक नहि देहौ ऐसेहि छीनि लेहु
 मटुकि सगरो । सब कोऊ जात मधुपुरी बेचन कौनै दियो दिखावहु कगरो ॥ अंचल ऐंचि ऐंचि राखतहौ
 जान अब देहु होतहै दगरो । मुख चूमति हँसि कंठलगावति आपुहि कहति न लाल अचगरो ॥
 सूर सनेह ग्वारि मन अटक्यो छांडहु दियो परत नहि पगरो । परम मगन है रही चितै मुख सबहीते
 भाग याहीको अगरो ॥ ३१ ॥ राग कान्हरो ॥ दान लेहौ सब अंगनिको । अति मद गलित तालफलते
 गुरु इनि युग उरज उत्तंगनिको ॥ खंजन कंज मीन मृगशावक भँवर जबर भुवभंगनिको ।
 कुंदकली बंधूक विंबफल बर ताटक तरंगनिको ॥ कोकिल कीर कपोत किसलता हाटक हंस

फनिगनिको । सूरदास प्रभु हँसि वश कीन्हों नायक कोटि अनंगनिको ॥ ३२ ॥ राग काफ़ी ॥
 कान्ह भलेहो भलेहो । अंगदान हमसों तुम मांगत उलटी रीति चलेहो ॥ कौन दोष कीन्हों
 माखन छीनों काहेको तुम औरहि भाव मिलेहो । दान लेहु कछु और कहतहो कौन प्रकृतिही
 लेहो ॥ हारै तोरचो चीरहि फारचो बोलत बोल हठीलेहो । ऐसो हाल हमारो कीन्हों जातहुती दहि
 लेहो ॥ हम हैं तुम्हारे गाउँकी कछु याते ऐंड गहि लेहो । सूरदास प्रभु और भए अब तुम नहिं होहु
 पहिलेहो ॥ ३३ ॥ राग पूरबी ॥ तू मोसों दान माँगि किनु लैहो नंदके लाला । ऐसी बातनि झगरो ठानों हो
 मूरख तेरो कौन हवाला ॥ नंदमहरकी कानि करतहैं छाँडिदेहु ऐसो ख्याला । सूरदास प्रभु मन
 हरिलीन्हों हँसतही ग्वारिनि भई बिहाला ॥ ३४ ॥ राग गूजरी ॥ सूधे दान काहे न लेत । और
 अटपटी छाँडि नंदसुत रहहु कँपावत बेत ॥ वृंदावनकी बीथिनि तकि तकि रहत गुमान
 समेत । इनि बातनि पति पावत मोहन जानत होहु अचेत ॥ अबलनि रविकर वकि
 पकरतहो मारग चलन न देत । सोई तुम कछु कहि न जनावत कहा तुम्हारे हेत ॥ आजु न जान देहुं री
 ग्वालिनि बहुत दिननिको नेत । सूरदास प्रभु कुंजभवन चालि जोर उरनि नख देत ॥ ३५ ॥
 राग कान्हरो ॥ जोबनदान लेउँगो तुमसों । जाके बल तुम वदति न काहुहि कहा दुरावति हमसों ॥ ऐसो
 धन तुम लिए फिरतिहौ दानदेत सतराति । अतिहि गर्वते कब्यो न मोसों नितप्रति आवति जाति ॥
 कंचन कलश महारसभारे हमहूँ तनक चखावहु । सूर सुनहु करि भार मरति कंत हमहि न मोल
 दिवावहु ॥ ३६ ॥ कहा कहत तू नंदठिठौना । सखी सुनहु री बातें जैसी करत अतिहि अचभौना ॥
 वदन सकोरत भौंह मरोरत नैननिमें कछु टोना ॥ जोबनदान कहा धों मांगत भई कहूँ नहिं होना ॥
 हम कहैं बात सुनहु मनमोहन कालि रहे तुम छौना । सूर श्याम गारी कहा दीजै इह बुद्धिहै घर
 खोना ॥ ३७ ॥ राग पूरबी ॥ ऐसे जिन बोलहु नंदलाला । छाँडिदेहु अचरा मेरो नीके जानत औरसी
 बाला ॥ बार बार मैं तुमहि कहतिहौं परिहै बहुरि जंजाला । जोबनरूप देखि ललचाने अबहींते
 ए ख्याला ॥ तरुणाई तनु आवनदीजै कित जिय होत बिहाला । सूरश्याम उरते कर टारहु टूटै
 मोतिनमाला ॥ ३८ ॥ राग सुवराई ॥ कहागति प्रकृति परीहो कान्ह तुम्हारी धरत कहा कत
 राखत घेरे । जे बतियां तुम हँसि हँसि भापत इहै चलै चहुँ फेरे ॥ अब सुनिहै इह बात आजुकी
 बनमें कान्ह युवति सब नेरे । सकुचतिहै घर घर घेराको नेक लाज नहिं तेरे ॥ अतिहि अबेर भई
 घर छाँडि चितै हँसत मुखतन हरि हैरे । सूरदास प्रभु झुकत कहा हौ चरीहै कहुकरे ॥ ३९ ॥
 राग टोडी ॥ कहा कहतु तुमसों मैं ग्वारिनि । दाददेहो । बिलम कछु घर अतिकत होत ग्वारिनि ॥
 कबहुँ बात नहीं घर खोवति कबहुँ उठतिहै गारिनि । लीन्हें फिरीत निनहिं तहो आँखिनिजा-
 रनि ॥ पेलाकरति देति नहिं नीके तुमहो वडी बंजारनि । सूरदास ऐसो बुद्धिहै ॥ ४० ॥
 पसारनि ॥ ४० ॥ पुरिआं कान्हरो ॥ कान अब नारि गह्योहै जानि । मांगत दान दहीको अबलौं राखै ॥
 अवैर ठानि ॥ औरनिसों तुम कहा लियो है सो सब हमहि देखावहु आनी । मांगतहैं दधि सोर
 देहैं कहत कहा यह बानी ॥ छाँडि देहु अचरा फटि जैहै तुमको हम नीके पहिचानी । सूर श्याम
 तुम रति पति नागर नागरि अतिहि सयानी ॥ ४१ ॥ राग कान्हरो ॥ लेहौं दान अंग अंगनको ।
 गोरे भाल लाल सेंदुरछवि मुक्ता वर शिर सुभग मंगको ॥ नकबेसरि खुटिला तरिवनको गरहमेल
 कुच युग उतंगको । कंठ सिरी दुलरी तिलरी उर माणिक मोती हार रंगको ॥ बहु
 नग लगे जरावकी अँगिया भुजा बहूटनी वलय संगको । कटि किंकिणिको दान

जु लैहौं तिन रीझत मन अनंगको । जे हरि पगज करचो गाढे मनो मंद मंद गति यह मतंगको ।
 जोवन रूप अंग पाटवर सुनहु सूर सब यह प्रसंगको ॥ ४२ ॥ राग डोढी ॥ अरी यह ढीठ कान्ह बोलि
 न जानै बरवस झगरो ठानै । जो भावत सोइ सोइ कहि डारत ऐसो निधरक नहिं कहूं देख्यो रूप
 जोवन अनुमानै ॥ अंग अंगके दान लेत नहिं घरकेको पहिचानै । हम दधि बेचन जातिहैं मथुरा
 मारग रोकि रहत गहि अंचल कंसकी आन न मानै ॥ ऐसी बात सँभारि कहौ हरि हम तुमको
 पहिचानै । सूर श्याम जो हमसों मांगत सो पैहौ कहूं और त्रियनपै ये बातें गढि बानै ॥ ४३ ॥
 ॥ राग मलार ॥ तोहिं कमरी लकुटिया भूलि गई पीत वसन दुहुँ करन बलासी ॥ गोकुलकी गाइनि चैबो
 छोडि दीन्हौं कीन्हौं नवलबधू संग नवल नेह आयो परम बिलासी ॥ गोरस चोराइ खाइ वदन
 दुराइ राखै मन न धरत वृंदावन को मवासी । सूर श्याम तोहिं घर घर सब जानै इहां कोहै तिहारी
 दासी ॥ ४४ ॥ वै बातें भूलिगई नंदमहरके सुवन करत हौ अचगरी । बन बन धेनु चरावत फिरत
 निशि बासर धावत बैन बजावत दानी भए गहि डगरी ॥ बनमें पराई नारि रोकि राखी बनवारी
 जान नहीं देत ह्यां कौन ऐसी लंगरी । मांगत योवनदान भलेहौ जू भले कान्ह मानत कंस आन
 को बसिहै ब्रजनगरी । कबहुं गहत दधि मटुकी अचानक कबहुं गहतहो अचानक गगरी ॥ सूर श्याम
 जहँतहाँ खिझावत जो मनभावत दूरि करौ लंगर सगरी ॥ ४५ ॥ राग पूरबी ॥ तुम कबते भयेहो जू
 दानी । मटुकी फोरि हार गहि तोरचो इन बातन पहिचानी ॥ नंदमहरकी कान करति
 हौ नातर करती मेहमानी । भूलिगए सुधि ता दिनकी जब बांधे यशोदारानी ॥ अबलौं सही तुम्हारी
 ढीठो तुम यह कहत डरानी । सूर श्याम कछु करत न बनिहै नृप पावै कहूं जानी ॥ ४६ ॥
 दधि मटुकी हरि छीनिलई । हार तोरि चोली बंद तोरचो जोवनकै बल ढीठ भई ॥
 ज्यों ही ज्यों हम सूधे बोलत त्यों त्यों अतिही सतरगई । बाद करति अबहीं रोवहुगी बार बार
 कहि दर्ई दर्ई ॥ अंश परायो देहु न नीके मांगतही सब करत खई । सूर सुनहुँ मैं कहत अज
 हुँ लौं प्रीति करहु जो भई सो भई ॥ ४७ ॥ राग काफी ॥ कन्हैया हार हमारो देहु । दधि लवनी
 घृत जो कछु चाहौ सो तुम ऐसेहि लेहु ॥ कहा करैं दधि दूध तिहारो मोसों नाहीं काम ।
 जोवनरूप दुराइ धरचोहै ताको लेति न नाम ॥ नीके मन है मांगत तुमसों बैर नहीं उर
 नाखति । सूर सुनहु री ग्वारि अयानी अंतर हमसों राखति ॥ ४८ ॥ राग गौरी ॥ हमको लाज न तुमहि
 कन्हई । जो हम एहि मारग सब आई तौ तुम हमसों करत ढिठाई ॥ हाहा करति पाँइ तुम लाग-
 ति रींती मटुकी देहु मैगाई । काँखे सूर तुमसों हृदय लोच्यो घरते हम छोकतहु न आई ॥ उतही
 जातहि सब तुमहि बतावैं ॥ जिन गइताहं फिराई । सूर श्याम अधमई हमहि सब लागै तुमहि भलाई ॥
 ॥ ४९ ॥ राग गौरी ॥ भरुहाये लागतहौं । कनक कलश रस मोहिं चखावहु जो मैं तुमसों मागतहौं ॥
 मटुकी तुम रहे कन्हई उठीं सबै झिझिकारि । लेहु अशीश सबनके सुखते कतहि दिवावत गारि ॥
 देहु हार दधि मटुकी बात कहन नहिं जानत । कैहैं जाइ यशोदासों प्रभु सूर अचगरी ठानत ॥
 ॥ ५० ॥ हार तोरि बिथराइ दियो । मैया पै तुम कहन चली कत दधि माखन सब छोनि लियो ॥
 रिसकरि धाइ कंचुकी फारी अब तो मेरो नाउँ भयो । कालि नहीं एहि मारग पैहौ ऐसो मोसों बैर
 ठयो ॥ भलीबात घरजाहु आजु तुम मांगत जोवन दान नयो । सूरदास सुखही रिस युवतिन उर
 उर अंतर काम जयो ॥ ५१ ॥ राग नट ॥ मोहिं तोहिं जानिबी नंदनदन जब वृंदावनते गोकुल जैबो ।
 सुखिन कहति छीनिलै मेरी मटुकिया गारी दैबो ॥ मुहँ मोरिबो बाउ अधिकाई सो लैबो । एक गाँउ

सूरसागर ।

(२३८)

एकहि सँग वसिये कैसे री यहि मग ऐबो ॥ युवतिनको मुख देखि रहतहौ ललचाने कैसे पैबो ।
 कैसे हार तोरि मेरो डारयो विसरत नहिं रिसकर धैवो ॥ सुन री सखी ढीठ नँदनंदन चलो सबै यशो-
 मतिसों हम लखिबो । सूर श्याम दधि माखन लीन्हों हार न देहौ बैर समुझि कहिबो ॥ ५२ ॥ राग सारंग ॥
 तैं कत तोरयो हार नौसरिको । मोती बगरि रहे सब बनमें गयो कानको तरिको ॥ ए अवगुण जु करत
 गोकुलमें तिलक दिये केसरिको ॥ ढीठ गुवाल दहीके माते वोढनहार कमरिको ॥ जाइ पुकारैं यशुमति
 आगे कहत जो मोहन लरिको । सूरज श्याम जानि चतुराई जेहि अभ्यास महु वरिको ॥ ५३ ॥
 राग बिलावल ॥ सुनहु श्याम हम अव चलीं यशोमतिके आगे । तौ वदियो हमको अबहीं तमको धरि
 माँगे ॥ इक इक करी विथराइकै मोतिन लर तोरयो । यह सुनि सुनि सुसकाइकै हरि भौंह
 सकोरयो ॥ चलीं महरिपै सुंदरी उरहनलै हरिको । अबहीं बोलि बैधाए लंगर यह लरिको ॥ गई नंद
 घरको सबै यशुमति जहां भीतर । देखि महरिको कहि उठीं सुत कीन्हों ईतर ॥ मारग
 चलन न पाइए री हरिके आगे । सूरदास प्रभु त्रासते ब्रजतजि हम भागे ॥ ५४ ॥ अपने री कुँवर
 कन्हारि सों माई तू कहति काहि न । आनकी आन कहत नित हमसों उनके मनकी कछु जानति
 नाहिंन ॥ बहुत बचति ब्रजराजकी कानि न हँसति कहा ह्यांते जाहि न । ऐसो भयो कुल
 कौन तिहारे यौवन दान लियो मोपै चाहिन ॥ अति उत्पात कहाँलौ कीजै पीपरको बन दाहि न ।
 आनकी आन कहत नित हमसों उनके मनकी कछु जानत नाहिन ॥ काहु बिलोकनि बानि सिखायो
 में अब पहिचानति ताहि न । बूझिधौं देखि ह्यां कौन सयानी हरि मेरो मन चुरवायो का पहिचाहि न ॥
 जाइ न मिलो सूरके प्रभुको अरुझनसों अरुझाहि न ॥ ५५ ॥ राग सुवडाई ॥ यशुमति तेरो बारो अतिहि
 अचगरो । दूध दही माखन लै डारि दियो सगरो ॥ भोर होत नित प्रति करैहै झगरो । ग्वाल बाल
 संग लये जाइ गहै डगरो ॥ हम तुम एक सम कौन काते अगरो । लियो दियो कछु सोऊ डारि देहु
 कगरो ॥ सूरदास प्रभु सब गुणनि अगरो । और कहूं जाइरहै छांडि ब्रज बगरो ॥ ५६ ॥ राग मूही ॥ मैं तुम्हरे
 मनकी सब जानी । आपु सबै इतरातिहै दोषन हेत श्यामको आनी ॥ मेरो हरि कहैं दशहि बरषको
 तुम्हरी यौवन मद उदमादी । लाज नहीं आवति इन लगरिनि कैसे धौं कहि आवति बानी ॥
 आपुहि हार तोरि चोली बँध उर नखवात बनाइ निशानी । कहाँ कान्हकी तनक अँगुरियां यह
 कहि बार बार पछितानी ॥ देखहु जाइ और काहुको हरिपर सबै रहत मँडरानी । सूरदास प्रभु
 मेरो नान्हो तुम तरुणी डोलति अठिलानी ॥ ५७ ॥ राग जयतथी ॥ जब दधि बेचन जाहिं तब मारग रोंकि
 रहै ॥ ग्वालनि देखति धाड़री अंचल आइ गहै ॥ ~~कान्हो~~ ~~पिलमन~~ ~~नखु~~ ~~गारि~~ ऐसी क्यों दई ॥ एक ठौर बस
 वास सुनहु ऐसी नहिं कीजै ॥ सुत वैसो तुमहूँ तो खीझति कार ॥ ~~तिनहि तहौ~~ ~~आवति~~ अनतही
 बहुरि सुनो नहिं नाउँ ॥ ५८ ॥ कहाकहति डरपाइ कछु मेरो घटि जैहै । तुम्हरे ~~पद~~ ॥ ~~तुम्हरे~~ बात
 झठी को सैहै ॥ यौवन दिन द्वै सबहिको तुम ऐसी इतराति । झूठहि कान्हहि दोषदै तुमहावै ॥
 जाति ॥ ५९ ॥ हम यह झूठी कही औरसों बूझि न देखौ । हमसों माँगत दान करहि कौडिनको ल
 मटुकी डारै शीशते मर्कट लेइ बुलाइ । महाढीठ मानै नहीं सखन सहित दधि खाइ ॥ ६० ॥ ग्वारि
 ढीठि गँवारि कान्ह मेरो अति भरो । तेरे गोरस बहुत भयो री मेरे थोरो ॥ बोलत लाज नहीं तुम
 हिं सवही भई गँवारी । ऐसी कैसे हरि करै कतहि बढावति रारी ॥ ६१ ॥ अहो यशोदा महरि
 पूतकी मानी पीवै । हमहिं कहाहै होत बहुत दिन मोहन जीवै ॥ सुतके कर्म न जानई करै आपनी
 टेक । दश गैयन करि कोउ अधिक अहिर जाति सब एक ॥ ६२ ॥ कहा गैयनकी चली का

अब चली जातिकी । चकृत भई मैं तुमहि कहत अनमिलत बातकी ॥ जैसी मोसों कहतिहौ को सुनिकै पतिआइ । कौन प्रकृति तुमको परी मोहि कहौ समझाइ ॥ ६३ ॥ अहो यशोदा बात का लिकी सुनी कि नाहीं । बंशीबटकी छाहां गही हरि मेरी बाहीं । हौं सकुचनि बोली नहीं बहु सखियनकी भीर । गहि बहियां मोहि लै चले हंससुताके तीर ॥ ६४ ॥ ये री मदमत ग्वालि फिरति जोवन मदमाती । गोरस बेचन हारि गूजरी अति इतराती ॥ अनमिलती बातें कहति सुनिपैहैं तेरो नाहैं । कह मोहन कह तू रहै कबहि गही तेरी बाँह ॥ ६५ ॥ सांची सब मैं कहति झूठ नाहैं कहिहौं तुमसों । सुतकी राखति कानि बिलग मानतिहौ हमसों ॥ कुंजनमें क्रीडा करै मनु वाहीको राज । कंस सकुच नाहि मानई रहत भयो शिरताज ॥ ६६ ॥ ऐसी बातें कहति मनहुँ हरि बरष तीसको । दुसह सद्यो नाहि जाइ नेक डर करहु ईशको ॥ धनि धनि तुम यह कहतिहो मोको आवै लाज । माखन मांगत रोइकै तेहि दोष देत बिन काज ॥ ६७ ॥ हरि जानतहैं मंत्र यंत्र सीखो कहुँ टोना । बनमें तरुण कन्हाई घरहि आवत है छोना ॥ एक दिवस किन देखहु अंतर रहौ छपाई । दशकोहैं धौ बीसकोनैननि देखौ जाइ ॥ ६८ ॥ जाहु चली घर आपनेनैननि भरि हम देख्योहैं । तीस बीस दश बरष एक दिन सब लेख्योहैं ॥ डीठि लगावति कान्हको जैरैं बैरैं वै आंखि । धौंगरी धौंग चाचरि करै मोहि बुलावति साखि ॥ ६९ ॥ धौंग तुम्हारो पूत धौंगरी हमको कीन्हीं । सुतको हटकति नाहि कोटि इक गारी दीन्हीं ॥ महतारी सुत दोउ बने वे मग रोकत जाइ । इनहि कहन दुख आइये ये सबको उठति रिसाइ ॥ ७० ॥ कहा करौं तुम बात कहुँकी कहुँ लगावति । तरुणिन इहै सोहात मोहि कैसे यह भावति ॥ बहुत उरहनो मोहि दियो अब ऐसो जनि देहु । तुम तरुणी हरि तरुण नाहि मन अपने गणिलेहु ॥ ७१ ॥ निरउत्तर भई ग्वालि बहुरि कह कछु न आयो । मन उपज्यो कछु लाज गुप्त हरिसों चित लायो ॥ लीला ललित गोपालकी कहत सुनत सुखदाइ । दान चरित सुख देखिकै सूरदास बलिजाइ ॥ ७२ ॥ १०३६ ॥ राग रामकली ॥ नंद नंदन इक बुद्धि उपाई । जे जे सखा प्रकृतिके जाने ते सब लए बोलाई ॥ सुबल सुदामा श्रीदामा मिलि और महर सुत आए । जो कछु मंत्र हृदय हरि कीन्हीं ग्वालन प्रगट सुनाए ॥ ब्रजयुवती नित प्रति दधि बेचन बनि बनि मथुरा जाति । राधा चंद्रावलि ललितादिक बहु तरुणी यक भांति ॥ कालिंदी तट कालि प्रातही द्रुम चढि रहौ लुकाइ । गोरस लै जबहीं सब आवैं मारग रोकहु जाइ ॥ भली बुद्धि इह रची कन्हाई सखनि कछो सुख पाई । सूरदास प्रभु प्रीति हृदयकी सब मन गए जनाई ॥ ७३ ॥ प्रातहि सगि गोप कम्पाधि । सूर तुमसों गगन जे तहाँ यह सुनी बनवारि ॥ प्रथमही उठि सखा आये नैं सब तुमहि बतावैं । छिक कन्हाई कछो बारंबारा ग्वाल टेर सुनत यशोदा कुँवर दियो जगाइ । रहे सखा मान सौध उठ तब अकुलाइ ॥ मुकुट शिर कटि किस पीतांबर सुरली लीन्हीं हाथ । सूर मडुलि कालिंदी तट गए सखा लीने साथ ॥ ७४ ॥ राग रामकली ॥ भली करी उठि प्रातहि आए । जे जानत सब ग्वारि उठी जब तब तुम मोहि बोलाए ॥ अब आवति हैहैं दधि लीन्हें घर घर ते ब्रजनारी । हँसे सबै कर तारी दैदैं आनंद कौतुक भारी ॥ प्रकृति प्रकृति अपने ढिग राखे संगी पांच हजार । और पठाइ दिये सूरज प्रभु जे जे अतिहि कुमार ॥ ७५ ॥ राग बिलावल ॥ हँसत सखनि यह कहत कन्हाई । जाइ चढौ तुम सघन द्रुमनि पर जहँ तहँ रहौ छिपाई ॥ तबलौ बैठिरहौ सुहँ मूंदे जब जानहु अब आई । कूदिपरोगे द्रुमनि द्रुमनि ते दैदैं नंद दोहाई ॥ चकित होहि जैसे युवती गण रनि जाहि अकुलाई । बेनु विषान सुरकि ध्वनि कीजो शंख शब्द घहनाई ॥ नितप्रति जाति

Dr. Urmila Sharma Collection, Varanasi

तुम दान मारे जाति ॥ कालिंदी तट श्याम बैठे हमहिं दियो पठाइ । यह कह्यो हरि दान माँगहु
 जाति नितहि चुराइ ॥ तुम सुता वृषभानुकी वै बडे नंदकुमार । सूर प्रभुको नाहिं जानति दान
 हाट बजार ॥ ८५ ॥ राग कान्हरो ॥ यह सुनि हैंसी सकल ब्रजनारी । आनि सुनहु री बात नई इक
 सिखयेहँ महतारी ॥ दधि माखन खेबेको चाहत मांगि लेहु हम पास । सूखे बात कहौ
 सुखपावैं बांधन कहत अकास ॥ अब समझी हम बात तुम्हारी पढे एक चटशार । सुनहु सूर
 यह बात कहौ जिनि जानति नंदकुमार ॥ ८६ ॥ राग धनाश्री ॥ बात कहति ग्वालनि इतराति । हम
 जानी अब बात तुम्हारी सूखे नहिं बतराति ॥ इहै बडो दुख गाँव बासको चीन्हे कोउ न सकात ।
 हरि मांगतहैं दान आपनो कहत मांगि किन खात ॥ हाट बाट सब हमहिं उगाहत अपनो दान
 जगात । सूरदासको लेखो दीजै कोउ न कहै पुनि बात ॥ ८७ ॥ राग कान्हरो ॥ कौन कान्हको तुम
 कहा मांगत । नीके करि सबको हम जानति बातें कहत अनागत ॥ छाँडिदेहु हमको जनि
 रोकहु वृथा बढावति रारि । जैहै बात दूरिलौं ऐसी परिहै बहुरि खँभारि ॥ आजुहि दान पहिरि द्यां
 आए कहां दिखावहु छाप । सूर श्याम वैसेहि चलौ ज्यों चलत तुम्हारो बाप ॥ ८८ ॥ राग कान्हरो ॥
 कान्ह कहत दधिदान न दैहौ । लेहौ छानि दूध दधि माखन देखतही तुम रहौ ॥ सब दिनको भरि
 लेहु आजुही तब छाँडौ मैं तुमको । उघटतिहै तुम मात पितालौं नहिं जानो तुम हमको ॥ हम
 जानतिहैं तुमको मोहन लैलै गोद खिलाए । सूर श्याम अब भए जगाती वै दिन
 सब बिसराए ॥ ८९ ॥ अजहूँ मांगिलेहु दधि देहौ । दूध दही माखन जो चाहो सहज खाहु सुख
 पैहौ ॥ तुम दानी ह्वै आए हमपर यह हमको नहिं भावत । करौ तहीं लै निबहै जोई जाते सब-
 सुख पावत ॥ हमको जान देहु दधि बेचन पुनि कोउ नाहिन लैहै । गोरसलेत प्रातही सब कोउ
 सूर धरयो पुनि रहै ॥ ९० ॥ राग कान्हरो ॥ दान दिये विन जान न पैहौ । जब देहौं ढराइ सब गोरस
 तबहिं दान तुम दैहौ ॥ तुमसों बहुत लेनहै मोको यह लै ताहि सुनावहु । चोरी आवति बेचि
 जाति सब पुनि गोरस बहुरो कहैं पावहु ॥ मांगत छाप कहा दिखराऊं को नहिं हमको जानत ।
 सूर श्याम तब कह्यो ग्वारिसों तुम मोको क्यों मानत ॥ ९१ ॥ राग रामकली ॥ कहा हमहिं रिसकरत
 कन्हारै । इह रिस जाइ करौ मथुरापर जहां है कंस बसाई ॥ हम अब कहा जाइ गुहरावैं बसत
 तुम्हारे गाउँ । ऐसे हाल करत लोगनके कौन रहै यहि ठाउँ ॥ अपने घरके तुम राजा हौ सबको
 राजा कंस । सूर श्याम हम देखत ठाढे अब सीखे ए गंस ॥ ९२ ॥ राग देवगंधारी ॥ कापर दान पहिरि
 तुम आए । सूरहु जु मिलि जन सूर तुमसों गुणजोरोकन पंथ पठाए ॥ सखासंग लीन्हे जु सेंति
 के फिर सब तुमहिं बतावैं ॥ नहिं राज कंसको जान्यो बाट रोकते फिरत पराए ॥ लीन्हे
 छींटा सबही लै कुंजनि अरुझाए । सूरदास प्रभुके गुण ऐसे दधिके
 मटुलि तुम ढरकाए ॥ ९३ ॥ राग मूही ॥ जाइ सब कंसहि गुहरावहु । दधि माखन घृत
 छेडाए आजुहि मोहि हजूर बोलावहु ॥ ऐसे को कह मोहि बतावति पल भीतर गहिमारौ ।
 मथुरापतिहि सुनोगी तुमही जब वाके धरि केश पछारौ ॥ बार बार दिन हमहिं बतावत अपनो
 दिन न बिचारो । सूर इंद्र ब्रज तबहिं बहावत तब गिरि राखि उबारो ॥ ९४ ॥ राग गूजरी ॥ गिरि
 वर धरयो आपने घरको । ताहीके बल तुम दान लेतहौ रोंकि रहतहौ हमको ॥ अपनेही मुख
 बडे कहावत हमहू जानति तुमको ॥ यह जानति पुनि गाइ चरावत नितप्रति जातहौ बनको ॥
 मोर मुकुट मुरली पीतांबर देखो आ ॥ अब बनको । सूरदास कांधे कामरिहू जानति हाथ

लकुट कंचनको ॥ ९५ ॥ राग विलावल ॥ यह कमरी कमरी करि जानति । जाके जितनी बुद्धि हृदय
 में सो तितनी अनुमानति ॥ या कमरीके एक रोमपर बारों चौर नील पाटंबर ॥ सो कमरी तुम निंदति
 गोपी जो तीनिलोक आडंबर ॥ कमरीके बल असुर संहारे कमरिहिते सब भोग । जाति
 पाति कमरी सब मेरी सूर सबहि यह योग ॥ ९६ ॥ राग विलावल ॥ धनि धनि यह कामरिहो मोहन
 श्यामलालकी ॥ इहै ओढि जात बनहि इहै सेज करतहौं तुम मेह बृंद निरवारन इहै छांह घामकी ॥ इहै
 लठि गुन करतहै पुनि शिशिर शीत इहै हरति गहनेलै धरति ओट कोट वामकी । इहै जाति इहै पाति
 परिपाटी यह सिखति सूरदास प्रभुके यह सब विशरामकी ॥ ९७ ॥ अब तुम सांची बात कही ।
 एतेपर युवतिनको रोकत मांगत दान दही ॥ जो हम तुमहि कह्यो चाहतही सो श्रीमुख प्रगटायो ।
 नीके जाति उधारि आपनी युवतिन भले हँसायो ॥ तुम कमरीके ओढनहारे पीतांबर नहिं छाजत ।
 सूरदास कारे तनु ऊपर कारी कमरी भ्राजत ॥ ९८ ॥ मोसों बात सुनहु ब्रजनारि । एक उप-
 खान चलत त्रिभुवनमें तुमसों आजु उधारि ॥ कबहूँ बालक सुँह न दीजिये सुँह न दीजिये नारि ।
 जोइ मनकरै सोइ करिडारै मूँड चढतहै भारि ॥ बात कहत अठिलात जाति सब हँसत देति कर
 तारि । सूर कहा ए हमको जानै छाछिहि बेचन हारि ॥ ९९ ॥ यह जानति तुम नंदमहरसुत ।
 धेनु दुहत तुमको हम देखति जबहि जात खरिकहि उत ॥ चोरी करत रहौ पुनि जानति घर घर
 दूँढत भडि । मारगरोकि भये अब दानी वैढंग कबते छडि ॥ और सुनहु यशुमति जब बांधे तब
 हम कियो सहाइ । सूरदास प्रभु यह जानति हम तुम ब्रज रहत कन्हाइ ॥ १०० ॥ राग आसावरी ॥ को
 माता को पिता हमारे । कब जनमत हमको तुम देख्यो हँसी लगत सुनि बात तुम्हारे ॥ कब माख
 न चोरी करिखायो कब बांधे महतारी । दुहत कौनकी गैया चारत बात कही यह भारी ॥
 तुम जानति मोहिं नंद दुटौना नंद कहाँ ते आए । मैं पूरन अविगति अविनाशी
 माया सबनि भुलाए ॥ यह सुनि ग्वालि सबै सुसकानी ऐसेउ गुणहौ जानत । सूर श्याम
 जो निदरयो सबही मात पिता नहिं मानत ॥ १ ॥ राग सोगढ ॥ तुमको नंदमहर भरुहाए ।
 माता गर्भ नहीं तुम उपजे तौ कहौ कहाँते आए ॥ घर घर माखन नहीं चुरायो ऊखल नहीं बैधाए ।
 हाहाकरि यशुमतिके आगे तुमको हमहि छुड़ाये ॥ ग्वालनि संग संग वृंदावन तुम नहिं गाइ
 चगाये । सूर श्याम दशमास गर्भधरि जननि नहीं तुम जाये ॥ २ ॥ राग दोडी ॥ भक्तहेतु
 अवतार धरयो । कर्म धर्मके वश मैं नाहीं योग जग्य मनमें न करयो ॥ दीनगुहारि सुनौ श्रवणनि
 भारि गर्व वचन सुनि हृदयजरो । भाव अधीन रहौ सपना ॥ ३ ॥ ब्रह्मकोटि
 आदिलौ व्यापक सबको सुखदै दुखहि हरौ । सूर श्याम तब कही प्रगटहौ ॥ ३ ॥ राग धनाश्री ॥ कान्ह कहाँकी बात चलावत । स्वर्ग पताल एक करि राखी युवाते ॥
 कहा बतावत ॥ जो लायक तौ अपने घरको बनभीतर डरपावत । कहा दान गोरसको हँह
 न लेहु देखावत ॥ रीती जान देहु घर हमको यतनेही सुखपावत । सूर श्याम माखन दधि लीज
 युवतिन कत अरुझावत ॥ ४ ॥ माखन दधि कह करौ तुम्हारे । मैं मनमें अनुमान करौ नित
 मोसों कैहै बनिज पसारो ॥ काहेको तुम मोहिं कहतहौ जीवन धन ताको करि गारो । अब कैसे
 घर जान पाइहौ मोको यह समझाइ सिधारौ ॥ सूर बनिज तुम करत सदाई लेखो करिहौं आजु
 तिहारो ॥ राग मृदवी ॥ ऐसी कहौ बनिजको अटकी । सुख स्थिर हेरि तरुनि सुसकानी नैन सैन
 दै दै सब मटकी ॥ हमहू कह्यो दान दधिको कहा जूँच बेडुवर कन्हाइ । अबलौं कहा मौन

धरि बैठे तबहीं नहीं सुनाई ॥ हैंसि वृषभानुसुता तव बोली कहा बनिज हम पासासूर श्यामः लेखो
 करि लीजै जाहिं सबै ब्रजबास ॥ ५ ॥ राग विलावल ॥ कहौ तुमहि हमको कहा वृझति लैले नाम सुना
 बहु तुमहीं मोसों काहे अरुझति ॥ तुम जानति मैहूँ कछु जानत जो जो माल तुम्हारे । डारिदेहु
 जापर जो लागै मारग चलौ हमारे ॥ इतनेहीको सोर लगायो अब समुझी यह बात । सूर श्यामके
 वचन सुनहु री कछु समुझतिहौ घात ॥ ६ ॥ इन्हिं धौ वृझौ यह लेखो । कहा कहैगे
 श्रवणनि सुनिये चरित नेक तुम देखो ॥ मन मन हरपभई सब युवती सुख ये बात चलावति ।
 ज्यों ज्यों श्याम कहत मृदुबानी त्यों त्यों अति सुख पावति ॥ कोउ काहुको भेद
 न जानत लोग सकुच उर मानत । सूरदास प्रभु अंतर्यामी अंतर्गतिकी जानत ॥ ७ ॥
 कहौ कान्ह कह गथलै हमसों । जा कारण युवती सब अटकीं सो वृझतहैं तुमसों ॥ लौंग नारियर
 दाख सुपारी कहा लादे हम आवैं । हींग मिरच पीपरि अजवाइनि ये सब बनिज कहावैं ॥ कूट
 काइपर सोंठि चिरैता कटजीरा कहूँ देखत । आलमजीठ लाख सेंदुर कहूँ ऐसेहि बुधि अवरोखत ॥
 बाइबिरंग बहेरा हरै कहूँ बैल गोंद व्यापारी । सूर श्याम लरिकई भूली जोबन भए सुरारी ॥ ८ ॥
 ॥ राग मही ॥ कवन बनिज कहि मोहिं सुनावति ॥ तुम्हरो गथ लादो गयंदपर हींग मिरच पीपरि कहा गाव
 ति ॥ अपनो बनिज दुरावतहौ कत नाउँ लियो यतनोही । कहा दुरावतिहौ मो आगे सब जानत
 तुव गोही ॥ बहुत मोलको बाबा तुम्हारो कैसे दुरत दुराए । सुनहु सूर कछु मोल लेहिंगे कछु इक
 दान भराए ॥ ९ ॥ राग डोडी ॥ अधिको दान मेटि यह ठान्यो । सुनहु श्याम अति चतुर भएहौ आजु
 तुमहि हम जान्यो ॥ जो कछु दूध दह्यौ हम देती लैखाते तुम ग्वाल । सोऊ खोइ हाथते बैठे हैंस
 ति कहति ब्रजबाल । यह सुनि श्याम सबनि करते दधि मटकी लई छँडाई । आपन खाइ सखन
 को दीन्हों अति मन हरप बढाई ॥ कछु खायो कछु भुँइ ढरकायो चितै रही ब्रजनारि । सूर श्याम
 वन भीतर युवती नए ढंग करत सुरारि ॥ १० ॥ राग रामकली ॥ प्यारी पीतांबर उर झटक्यो । हरि तोरी मो
 तिनकी माला कछु गर कछु कर लटक्यो ॥ ढीठो करन श्याम तुम लागे जाइ गही कटि फेट । आपु
 श्याम रिस करि अंकमभरि भई प्रेमकी भेट ॥ युवतिन घेरि लियो हरिको तब भरि भरि धरि
 अँकवारि । सखा परस्पर देखत ठाढे हैंसत देन किलकारि ॥ हाँक दियो करि नंद दोहाई आइ
 गए सब ग्वाल । सूर श्यामको जानत नहिं ढीठभई हैं बाल ॥ ११ ॥ राग भैख ॥ हम भई ढीठ
 भले तुम्ह ग्वाल । दीन्हों ज्वाब दईको चैहो देखौरी यह कहा जंजाल ॥ वनभीतर युवतिनको रोंक-
 त हम खोटी तुम्हरे ये हाल । सूर तुमसों ज्वावतहै बडे सुधर्मा धर्महिपाल ॥ साखि सखाकी
 ऐसि तब तुमहि बतावें ॥ जानत भुआल । आयैहैं चढि रिसकरि हमपर सूर हमहि जानत बेहा
 ल ॥ १२ ॥ राग विलावल ॥ जानी बात तुम्हारी सबकी । लरिकईके ख्याल तजौ अब गई बात वह त-
 महुनि मारग रोंकत रहे यमुनको तेहि धोखेहौ आये । पावहुगे पुनि कियो आपनो युवतिन हा-
 से लगाये ॥ जो सुनिहैं यह बात मात पितु तब हमसे कहा कहैं । सूर श्याम मोतिन लर तोरी
 कौन ज्वाव हम देहैं ॥ १३ ॥ राग विलावल नट ॥ आपुन भई सबै अब भोरी । तुम हरिको
 पीतांबर झटक्यो उन तुम्हरी मोतिन लर तोरी ॥ मांगत दान ज्वाब नहिं देती ऐसी
 तुम जोबनकी जोरी । डरनाहिं मानति नंदनंदनको करति आनि झकझोराझोरी ॥ यक
 तुम नारि गँवारि भलीहौ गिखन में इनकी सरि कोरी । सूर सुनहु लेहैं छँडाइ सब
 अबहिं फिरौंगी दौरी दौरी ॥ १४ ॥ राग विलावल ॥ कहा बडाई इनकी सरि मैं । नंद यशोदाके प्रतिपाले

जानति नीके करिमें ॥ तुम्हरे कहे सबन डर मान्यो हरिहि गई अति डरिमें । बसुदेव डारि
 गतिही भागे आयेहैं शुभघरिमें । अंग अंगको दान कहतहैं सुनत उठी रिस जरिमें । तब पीतां-
 वर झटकि लियो मैं सूर श्यामको धरिमें ॥ १५ ॥ राग गौरी ॥ याते तुमको ढीठ कही । श्यामहि
 तुम भई झिरकन हारी एतेपर पुनि हारि नही ॥ तबते हमहिं देतहौ गारी हमको दाहति आपु-
 दही । बनिज करति हमसों झगरतिहौ कहा कहैं हम बहुत सही ॥ समुझि परी अब कछु जिय
 जान्यो तातेहौ सब मौन रही । सूर श्याम ब्रज ऊपर दानी यहि मारग अब तुम निबही ॥ १६ ॥
 ॥ राग कल्याण ॥ तुम देखत रहौ हम जैहैं । गोरस बेंचि मधुपुरीते पुनि येही मारग ऐहैं ॥ ऐसेही बैठे
 सब रहौ बोले जवाब न देहैं । धरि लेहैं यशुमतिपै हरिको तब धौ कैसे कहैं ॥ काहेको मोतिनलर
 तोरी हम पीतांबर लेहैं । सूर श्याम इतरात इते पर घर बैठे तब रहैं ॥ १७ ॥ मेरे हठ क्यों निबहन
 पैहौ । अब तो रोकि सबनिको राख्यो कैसे करि तुम जैहौ । दान लेउंगो भरि दिन दिनको लेखो
 करि सब देहौ । सौह करतहौ नंदबवाकी मैं कैहौ तब जैहौ ॥ आवत जात रहत येही पथ मोसों
 बैर बैठेहौ । सुनहु सूर हमसों हठ मांडति कौन नफा करि लैहौ ॥ १८ ॥ राग कान्हरो ॥ कौन बात यह
 कहत कन्हई । समुझति नहीं कहा तुम मांगत डरपावत करि नंद दोहाई ॥ डरपावहु तिनको जे
 डरपहिं तुमते घटि हम नाहीं । मारगछाँडि देहु मनमोहन दधि बेचन हम जाहीं ॥ भलीकरी
 मोतिनलर तोरी यशुमतिसों हम लैहैं । सूरदास प्रभु इहौ वनत नहिं इतनो धन कहा पैहैं ॥ १९ ॥
 एक हार मोहिं कहा देखावति । नखशिखते अंग अंगनिहारहु ए सब कतहि दुरावति ॥ मोतिन
 माल जराइको टीको कर्णफूल नकबेसर । कंठसिरी दुलरी तिलरीको और हार एक नवसर ॥
 सुभग हमेल कनक अँगिया नग नगन जरितकी चौकी । बाहुढाड कर कंकन बाजूबंद येते पर
 तौकी ॥ छुद्रघंटिका पग नूपुर जेहरि बिछिया सब लेखौ । सहज अंग शोभा सब न्यारी कहत सूर
 ये देखौ ॥ २० ॥ राग जैतथी ॥ यादूमें कछु बांट तुम्हारो । अचरज आइ सुनहु री माई भूषण देखि
 न सकत हमारो ॥ कहो ढिठाई हिएने आपुन की यशुमति की नंद । घाटधरचो तुम इहै जानिकै
 करत ठगनके छंद ॥ जितनो पहिरि आपु हम आई घरहै याते दूनो । सूर श्याम हौ बहुत लोभाने
 बन देख्यो धौ सूनो ॥ २१ ॥ राग गौरी ॥ बाँट कहा अब सबै हमारो । जवलों दान नहीं हम पायो
 तबलों कैसे होत तिहारो ॥ आभूषणकी कौन चलावत कंचनघट काहे न उधारो । मदनदूत मोहिं
 बात सुनाई इनमें भरचो महारस भारो ॥ एक ओर यह अंग अभूषण सब एक ओर यह दान
 विचारो । सुनहु सूर कहा बाट करैं हम दान देहु ॥ २२ ॥ राग कल्याण ॥ श्याम
 भए ऐसे रसनागर । दिन द्वै घाट रोकि यमुनाको युवतिनमें तुम तिनिहैं तेहो आपाकामरि
 हाथ लकुटिया गाइ चरावन जाते । दही भातकी छाक मंगावत ग्वालन संगे मिलै खौ ॥ २३ ॥ राग
 तुम कर नवलासी लीने पीतांबर कटि सोहत । सूर श्याम अब नवल भए तुम नवल नारि
 मोहत ॥ २३ ॥ राग गौरी ॥ दान देतकी झगरो करिहौ । प्रथमहि यह जंजाल मिटावहु ता पाछे तुम
 हमहि निदरिहौ ॥ कहत कहा निदरेसेहौ तुम सहज कहति हम बात । आदि बुन्यादि सबै हम
 जानति काहेको सतरात ॥ रिस करि करि मटुकी शिर धरि धरि डगरि चलीं सब ग्वालनि ।
 सूर श्याम अंचल गहि झरकी जैहौ कहा बजारिनि ॥ २४ ॥ राग कल्याण ॥ अब तुमको मैं जान न देहौ । दान
 लेउं कौडी कौडी करि बैर आपनो लैहौ ॥ गोरस खाइ बच्यो इहै डारचो मटुकी डारी फोरि । दैद
 गारि नारि झकझोरी चोलीके बँद तोरि ॥ हँसत सूर बोलै गौरी दैद वनमें रोकी नारि । सुनत

लोग घरते आवहिंगे सकिहौ नहीं सम्हारि ॥ घरके लोगनि कहा डरावत कंसहि आनि बुलाइ ।
 सूर सबै युवतिनके देखत पूजा करौ बनाइ ॥ २५ ॥ राग गौरी ॥ जो तुमहीहौ सबके राजा ॥ तो बैठौ सिंहासन
 चढिकै चमर छत्र शिर भ्राजा ॥ मोर मुकुट मुरली पीतांबर छाँडिदेहु नटवरको साजा । बेनु बिषान
 शृंग क्यों पूरत बाजै नौबति बाजा ॥ यह जो सुनि हमहु सुखपावै संगकरै कछु काजा । सूर श्याम ऐसी
 बातें सुनि हमको आवति लाजा ॥ २६ ॥ राग कल्याण ॥ तुम्हारे चित रजधानी नीकी । मेरे दास
 दासनि के चरे तिनको लागति फीकी ॥ ऐसी कहि मोहि कहा सुनावति तुमको इहै अगाध । कंस
 मारि शिर छत्र धरावौ कहा तुच्छ यह साध ॥ तबहीं लौ यह संग तिहारो जवलनि जीवत कंस ।
 सूर श्यामके मुख यह सुनि तब मन मन कीन्हों संस ॥ २७ ॥ राग जैतश्री ॥ भली करी हरि माखन
 खायो । इहौ मानि लीनी अपने शिर उबरो सो ढरकायो ॥ राखी रही दुराइ कमोरी सो लै प्रगट
 देखायो । यह लीजै कछु और मँगावै दान सुनत रिसपायो ॥ दानदिये बिनु जान न पैहौ कब मैं दान
 छुटायो । सूर श्याम दृठ परे हमारे कहो न कहा लदायो ॥ २८ ॥ राग धनश्री ॥ लेहौ दान इनको तुमसों ।
 मत्त गयंद हंस हमसोंहैं कहा दुरावति तुमसों ॥ केहरि कनक कलश अमृतके कैसे दुरै दुरावति । विद्रुम
 हेम वज्रके किनुका नाहिन हमहि सुनावति ॥ खग कपोत कोकिला कीर खंजनहुं शुक मृगजान
 ति ॥ मणि कंचनके चित्र जरहैं एतेपर नहि मानति । सायक चाप तुरय बनिजतिहौ लिये सबै
 तुम जाहु ॥ चंदन चमर सुगंध जहाँ तहैं कैसे होत निबाहु ॥ यह बनिजति वृषभानु सुता तुम ह-
 मसों बैर बढ़ावति । सुनहु सूर एतेपर कहतिहै हम धौं कहा लदावति ॥ २९ ॥ राग सौरठ ॥ यह सुनि
 चकृत भई ब्रजबाला । तरुणी सब आपुसमें वृझति कहा कहत गोपाला । कहां तुरंग कहां गज के-
 हरि कहां हंस सरोवर सुनिये । कंचनकलश गढाये कब हम देखे धौं यह गुनिये ॥ कोकिल कीर
 कपोत बननमें मृग खंजन शुक संग । तिनको दान लेतहै हमसों देखहु इनको रंग ॥ चंदन चौर सु-
 गंध बतावत कहां हमारे पास । सूरदास जो ऐसे दानी देखिलेहु चहुँ पास ॥ ३० ॥ राग गुनकरी ॥ भू-
 लिरहे तुम कहाँ कन्हाई । तिनको नाउ लेत हम आगे जो सपने कहूँ दृष्टि न आई ॥ हैवर गैवर सिं-
 ह हंसबर खग मृग कहैंहैं हम लीन्हें । सायक धनुष चक्र सुनि चकृत चमर न देखे चीन्हें ॥ चंद-
 न और सुगंध कहतहौ कंचन कलश बतावहु । सूर श्याम ये सब जो हैंहैं तबहिं दान तुम पावहु ॥
 ॥ ३१ ॥ राग गूजरी ॥ इतने सबै तुम्हारे पास । निरखि न देखहु अंग अंग अब चतुराईके गांस ॥ तुर-
 तही निरुवारि डारहु करति कहत अवेर । तुम कहो कछु हमहुं बोलैं घरहि जाहु सबेर । कनक तुम
 परतक्ष देखहु सजे नवसत अंग । सूर तुमसों रूप जोबन धरयो एकहि संग ॥ ३२ ॥ राग विलावला ॥ प्र-
 गटकौ सब तुमहि बतावैं चिकुर चमर घँघटहै बरबर भुवसारंग देखावैं ॥ बाण कटाक्ष नयन खंजन
 मृग झुल्ला शुक उपमांउ । तरिवनचक्र अधर विद्रुम छवि दशन वज्र कनठांउ ॥ ग्रीव कपोत को-
 मट्टि बाणी कुच घट कनक सुभाउ । जोबन मद रसअमृत भरेहैं रूप रंग झलकाउ ॥ अंग सुगंध
 ऐसन पाटंबर गनि गनि तुमहि सुनाउ । कटि केहरि गयंदगति शोभा हंससहित यकताउँ । फेरकिये
 कैसे निबहतहै घरहिगए कहा पाउँ ॥ सुनहु सूर यह बनिज तुम्हारे फिरि फिरि तुमहि मनाउँ ॥ ३३ ॥
 राग नट ॥ माँगत ऐसे दान कन्हाई अब समुझी हम बात तुम्हारी प्रगट भई कछु धौं तरुनाई ॥ यहि लाल-
 च अँकवारि भरतहौ हार तोरि चोली झटकाई अपनी ओर देखि धौं लीजै ता पाछे करियै बरिआई ॥
 मखा लिये तुम घेरत पुनि पुनि बन ॥ सूर सब नारि पराई ॥ सूर श्याम ऐसी न बूझियै इनि बातनि मर्यादा
 आई ॥ ३४ ॥ राग नट ॥ हमपर रिस ॥ जनारि ॥ बात सूधे हम बतावत आपु उठत पुकारि ॥ कबहुँ

मर्यादा घटावति कबहुँ देहै गारि । प्रातते झगरो पसारो दानदेहु निवारि ॥ बडे घरकी बहू बेटी करति
 वृथा झवारि।सूर अपनो अंश पावै जाहिंघर झखमारी॥३५॥राग सारंग॥तुमहि उलटि हमपर सतराने॥
 जो कुछ हमको कहन बूझिए सो तुम कहि आगे अतुराने ॥ यह चतुराई कहा पढी हरि थोरे दिन
 अति भये सयाने । तुमको लाज होतकी हमको बात परै जो कहुँ महराने ॥ऐसो दान और पै मांगहु
 जो हमसों कहौ छविछाने । सूरदास प्रभु जानदेहु अब बहुरि कहौगे कालि बिहाने ॥ ३६ ॥
 श्यामहि बोलि लियो ढिग प्यारी । ऐसी बात प्रगट कहुँ कहिये सखनि मांझ कत लाजन मारी ॥
 एक ऐसेहि उपहास करत सब तापर तुम यह बात पसारी । जातिपातिके लोग हैंसिहंगे प्रगट
 जानिहै श्याम भतारी ॥ लाजन मारतहौ कत हमको हाहा करति जाति बलिहारी । सूर श्याम
 सर्वज्ञ कहावत मात पितासों द्यावत गारी ॥ ३७ ॥ जबहि ग्वारि यह बात सुनाई । सखा सबनि
 तवहीं लखि लीन्हों सदा श्यामके प्रकृत सुभाई॥सुनहुँ प्यारि इक बात सुनावों जो तुम्हरे मन आवै।
 तुम प्रति अंग अंगकी शोभा देखत हरि सुख पावै ॥ तुम नागरी नवल नागर वै दोऊ मिलि करौ
 विहार।सूर श्याम श्यामा तुम एकै कहा हैंसिहै संसार॥३८॥राग नट॥नंदसुवन यह बात कहावत।आपुन
 जोवन दान लेतहै तापर जोइ सोइ सखनि सिखावत ॥ वै दिन भूलिगए हरि तुमको चोरी माखन
 खाते । खीझतही भरिनयन लेतहै डरडरात भजि जाते ॥ यशुमति जब ऊखलसों बांधति हमही
 छोरति जाइ । सूर श्याम अब बडे भयेहौ जोवनदान सुहाइ॥३९॥राग ढोडी॥लरिकईकी बात चला-
 वति । कैसी भई कहा हम जानै नेकहु सुधि नहिं आवति॥कब माखन चोरी करि खायो कब बांधे
 धौं भैया । भले बुरेको मात पिता तन हरपतही दिन जैया ॥ अपनी बात खबरि करि देखहु न्हात
 यमुनके तीर । सूर श्याम तब कहत सबनिके कदम चढाए चीर॥४०॥राग गूजरी॥सबैरही जलमांझ
 उधारी । बार बार हाहाकरि थार्कीं में तट लिये हैंकारी ॥आई निकसि बसन विनुतरुनी बहुत करी
 मनुहारी । कैसे हास भए तब सबके सो तुम सुरति बिसारी ॥ हमहि कहति दधि दूध चुराये अरु
 बांधे महतारी । सूर श्यामके भेद वचन सुनि हैंसि सकुचीं ब्रज नारी ॥४१॥ कहा भए अति ढीठ
 कन्हाई ।ऐसी बात कहत सकुचत नहिं कहा धौं अपनी लाज गँवाई॥जाहु चले लोगनिके आगे झूठी
 बाणी कहत सुनाई।तुम हैंसि कहत ग्वाल सुनिके सब घर घर कैहें जाई ॥बहुत होहुगे दशहि बरसके
 बात कहतहौ वनै बनाई।सूर श्याम यशुमतिके आगे इहै बात सब कैहें जाई४२॥राग हमीर॥झूठी बात कहा
 मैं जानौं ।जो हमको जैसेही भजेरी ताको तैसेहि मानौं ।तुम पति कियो मोहिको मनदै मैंहौं अंतर्दामी॥
 योगीको योगी है दरशौं कामीको है कामी ॥ हमको तुम झूठे करिजानति तौ काहे तप कीन्हों ।
 सुनहु सूर अब निठुर भई कत दान जात नहिं दीन्हों॥४३॥ राग गौरी॥दान सुनत रिस होइ कन्हाई ।
 और कहौ सो सब सहि लेहैं जो कुछ भली बुराई ॥ महतारी तुम्हरीके वै गुण उरहन देत प्रसाई ।
 तुम नीके ढँग सीखें वनमें रोकत नारि पराई ॥ आव न जाव न पावत कोऊ तुम मगमें आवै न
 सूर श्याम हमको विरमावत खीझत बहिनी माई॥४४॥ काहेको तुम झेर लगावति। दान देहु घर जा
 बँचि दधि तुमहींको यह भावति ॥ प्रीति करौ मोसों तुम काहेन बनिज करति ब्रजगाउँ । आवहु
 जाहु सबै यहि मारग लेत हमारो नाउँ॥लेखो करौ तुमहि अपने मन जोइ देहो सोइ लेहौं।सूर सुभाइ
 चलहुगी जब तुम पुनिधौं मैं कह कैहों॥४५॥ राग कान्हरो॥सुनहु आइ हरिके गुण माई । हम भई बनि-
 जारिनि आपुन दानि भए कुँवर कन्हाई ॥ कहा बनिज लै आई है हम ताको मांगत दान । कालि-
 हिके ढँग पुनि आएहैं नहिं जानत कुछ आन ॥ तुम गवई बे

इनिके । सूर श्याम सुंदर बहु नायक सुखदायक सबहिनके ॥ ४६ ॥ राग ढोडी ॥ काहेको हमसों हरि
 लागत । बातहि कछु खोल रस नहीं को जानै कहा मांगत ॥ कहा स्वभाउ परचो अबहींते इनि
 बातन कछु पावत । निपट हमारे ख्याल परे हरि बनमें नितहि खिझावत ॥ पैडो देहु बहुत अब
 कीनों सुनत हँसहिगे लोग । सूर हमहि मारग जिनि रोकहु घरते लीजे वोग ॥ ४७ ॥ राग मूही ॥ अब
 लों इहै करचो तुम लेखो । मोको ऐसी बुद्धि बतावत करकंकण दर्पण लै देखो ॥ आपुहि चतुरि
 आपुही सब कछु हमको करति गवाँर । औगहै लेत फिरो इनके घर ठाढे हैं हैं द्वार ॥ घाट छाडि
 जैहौ तबलैहौ ज्वाब नृपति कहा देहों । जादिनते यहि मारग आवति तादिनते भरिलेहों ॥ इनि
 की बुद्धि दान हम पहिरो काहेन घर घर जैहौ । सूर श्याम तब कहत सखिनसों जान कौन बिधि
 पैहौ ॥ ४८ ॥ राग ढोडी ॥ भली भई नृप मान्यो तुमहु । लेखो करै जाइ कंसहिपै चले संग तुम हमहु ॥
 अबलों हम जानीही घरही पहिरचोहै तुमदान । कालि कछो हो दान लेनको नंदमहरकी आन ॥
 तो तुम कंस पठाएहैं ह्यां अब जानी यह बात । सूर श्याम सुनि सुनि यह बाणी भौह मोरि मुसकात ॥
 ॥ ४९ ॥ राग आसावरी ॥ कहा हँसत मोरतहो भौह । सोई कछो मनहि कहि आई तुमहि नंदकी सौह ॥
 और सौह तुमको गोधनकी सौह माइ यशुमतिकी । सौह तुमहि बलदाऊकीहै कहो
 बात वा मनकी ॥ बार बार तुम भौह सकोरचो कहा आपु हँसि रीझे । सूर श्याम
 हम पर सुख पायो की मनही मन खीझो ॥ ५० ॥ राग रामकली ॥ हँसत सखनसों कहत कन्हाई । मैयाकी
 बाबाकी दाऊजीकी सौह दिवाई ॥ कहति कहा काहे हँसि हेरचो काहे भौह सकोरचो । यह अचरज
 देखौ तुम इनिको कब हम वदन मरोरचो ॥ ऐसी बातनि सौह दिवावति अधिक हँसी मोहि आवत ।
 सूर श्याम कहि श्रीदामासों तुम काहेन समुझावत ॥ ५१ ॥ राग धनाश्री ॥ श्रीदामा गोपिन समुझावत ।
 हँसत श्यामके तुम कहा जान्यो काहे सौह दिवावत ॥ तुमहुं हँसो आपने संग मिलि हम नहि सौह
 दिवावैं । तरुणिनकी यह प्रकृति अनैसी थोरेहि बात खिसावैं ॥ नान्हे लोगनि सौह दिवावहु वै
 दानी प्रभु सबके । सूर श्यामको दान देहु री मांगत ठाढे कबके ॥ ५२ ॥ राग जैतश्री ॥ हम जानति वै कुँवर
 कन्हाई । प्रभु तुम्हरे सुख आजु सुनी हम तुम जानत प्रभुताई ॥ प्रभुता नहीं होति इनि बातनि
 मही दहीके दान । वैठाकुर तुम सेवक उनके जान्यो सबको ज्ञान ॥ दधिखायो भोतिन लर तोरचो
 घृत माखन सोउ लीजै । सूरदास प्रभु अपने सदका घरहि जान हम दीजै ॥ ५३ ॥ तुम घर जाहु
 दानको देहै । जेहि बीरादै मोहि पठायो सो मोसों कहा लैहै ॥ तुम गृह जाइ बैठि सुखकरिहौ नृप गारी
 को खैहै । अबहीं बोलि पठावैं गोरी तासन्मुखको जैहै ॥ जान कहै तुमको तुम जैहौ बिधिना
 कैसे सैहै । सूर मोहि अटक्योहै नृपवर तुमबिनु कौन छँडैहै ॥ ५४ ॥ नृपको नाँउ लेततेहि सुख
 जेहि मुख निंदा कालि करी । आपुन तौ राजनिके राजा आजु कहा सुधि मनहि परी ॥ भले श्याम
 मंडी तुम कीनी कहा कंसको नाउँलियो । जब हम सौह दिवावन लागीं तबहि कंस पररोषकियो ॥
 जाको निंदि बाँदियै सो पुनि वह ताको निंदे । सूर सुनी वह बात कालिकी तब जानी इनिकंस डैरै ॥
 ॥ ५५ ॥ राग आसावरी ॥ कहा कहति कछु जानि न पायो । कब कंसहि धौं हम कर जोरचो कब वाको हम
 माथ नवायो ॥ कबहुं सौह करत देख्यो मोहि लेत कबहुं सुखनाऊं । निपटहि ग्वारि गँवारि भई तुम
 बसति हमारे गाऊं ॥ कहा कंस केतने लायकको जाको मोहि देखावति । सुनहु सूर यहि नृपके हमहैं
 यह तुम्हरे मन आवति ॥ ५६ ॥ राग ढोडी ॥ कौन नृपति जाके तुमहौ । ताको नाउँ सुनावहु हमको
 यह सुनिके अति पावभौ ॥ यह संसल ॥ चौदह भरि कंसहिते नहिं दूजो । सो नृप कहा रहत

सुनि पावैं तब ताहीको पूजो ॥ कहा नाउँ केहि गाँउ बसतहै ताहीके द्वैराहिए । सूरदास प्रभु कहै
 बनेगी झूठे हमहि निदरिए ॥ ५७ ॥ मोसों सुनहु नृपतिको नाउँ । तिहु भुवन भरि
 गम्यहै जाको नर नारी सब गाउँ ॥ गण गंधर्व वश्य वाहीके अवर नहीं सरिताहि ॥ उनकी अस्तुति
 करौ कहाँलगी मैं सकुचतहाँ जाहि ॥ तिनहीको पठयो मैं आयो दियो दानको वीरा । सूर रूप जो-
 वन धन सुनिकै देखत भयो अधीरा ॥ ५८ ॥ राग गौरी ॥ पाई जाति तुम्हारे नृपकी जैसे तुम तैसे
 वोऊ हैं । कहाँ रहे दुरिजाइ आजु लौं एई ढंग गुणके सोऊ हैं ॥ यह अनुमान कियो मनमें हम एक
 हि दिन जनमें दोऊ हैं । चोरी अपमारग बटपारयो इनि पटतरके नहीं कोऊ हैं ॥ श्याम बनी अब
 जोरी नीकी सुनहु सखी मानत तोऊ हैं । सूर श्याम जितने रंग काछत युवती जन मनके गोऊ हैं
 ॥ ५९ ॥ ठगति फिरति ठगिनी तुम नारी । जोइ आवति सोइ सोइ कहडारति जाति जनावति दै
 दै गारी ॥ फँसिहारिनि बटपारिनि हम भई आपुन भए सुधर्मा भारी । फँदाफाँसि कमानबानसों
 काहु डारत देख्यो मारी ॥ जाके मन जैसौई बरतै सुखवानी कहिदेत उधारी । सुनहु सूर प्रभु नीके जान्यो
 ब्रज युवती तुम सब बटपारी ॥ ६० ॥ राग सूसी ॥ अपने नृपको इहै सुनायो । ब्रजनारी बटपारिनि हैं
 सब चुगली आपुहि जाइ लगायो ॥ राजा बडे बात यह समझी तुमको हमपर धौंस पठायो ॥ फँसि हा-
 रिनि कैसे तुव जानी हम कहूँ नाहिंन प्रगट देखायो ॥ ब्रजबनिता फँसिहारी जो सब महतारी काहे न
 गनायो ॥ फँदा फाँसि धनुष विष लाहू सूर श्याम नहीं हमहि बतायो ॥ ६१ ॥ राग भैरवी ॥ फँदा फाँसि बताव
 हु जो । अंगनि धरे छपाइ जहां जो प्रगट करौ सब दीहौं तौ ॥ प्रथमहि शीश मोहिनी डारति
 ऐसे ताहि करत बशहौं । विषलाहू दरशावति ले पुनि देह दशा पुनि बिसरति ज्यों ॥ ता पाछे
 फँदा गर डारति एहि भांतिनि करि मारतिहौं । सुनहु सूर ऐसे गुण तुम्हरे मोसों कहा उचारतिहौं ॥ ६२ ॥
 प्रगट करौ यह बात कन्हाई । बान कमान कहाँ केहि मारयो काके गर हम फाँसि लगाई ॥ काके
 शिर पट्टि मंत्र दियो हम कहाँ हमारे पाशदिनाई । मिलवत कहाँ कहाँकी बातें हँसत कहति अति
 गइ सकुचाई ॥ तब मानैं सब हमहुँ बतावहु कहो नहीं जोनंद दोहाई । सूर श्याम तब कह्यो सुनहुगी
 एक एक करि देउँ बताई ॥ ६३ ॥ राग रागिनी ॥ मोसों कहा दुरावति नारी । नयनशयन दै चितहि
 चुरावति इहै मंत्र टोना शिरडारी ॥ भौंह धनुष अंजन गुन बान कटाक्षनि डारति मारि । तरिवन
 श्रवन फाँसि गर डारति कैसेहुँ नहीं सकत निरवारि ॥ पीन उरोज मुख नैन चखावति इह विष
 मोदक जातन झारि । घालति छुरी प्रेमकी बानी सूरदासको सकै सँभारि ॥ ६४ ॥ राग टोडी ॥
 अपनोगुण औरनि शिरडारत । मोहन जोहन मंत्र यंत्र टोना सब तुमपर वारत ॥ तनुत्रिमंग अंग
 अंगमरोरनि भौंह बंक करि हेरत । मुरली अधर बजाइ मधुर सुरतरुनी मृगबन घेरत ॥ नटवर भेष
 पीतांबर काछे छैलभए तुम डोलत । सूर श्याम रावरे ढंगए अवरनिको ढंगबोलत ॥ ६५ ॥ जानी
 बात मौन धरि रहिए । इहै जानि हमपर चढि आए जो भावै सो कहिए ॥ हम नहीं बिलग तु
 मान्यो तुमजनि कछु मन आनो । देखहु एक दोइ जानि भाषहु चारि देखि दुइगानो ॥ दोबल दो
 सबै मोहीको उन पठयो मैं आयो । सूर रूप जोवनकी चुगली नैननि जाइ सुनायो ॥ ६६ ॥
 राग विलावली ॥ तब रिसकरिकै मोहिं बोलायो । लोचन दूत तुमहिं इहि मारग देखत जाइ सुनायो ॥ सोइ
 सब महलनते सुनि बानी जोवन महलनि आयो । अपने कर वीरा मोहिं दीन्हों तुरत मोहिं पहि-
 रायो ॥ वैद्योहै सिंहासन चढिकै चतुराई उपजायो । मनतहै आज्ञाकारी भूत तिनको तुमहि
 लगायो ॥ तिनको नाम अनंग नृपतिवर सुनहु बात ॥ ६७ ॥ सूर श्याम मुखवात सुनत य

युवतिन तनु बिसरायो॥६७॥ राग सखी॥ ब्रज युवती सुनि मगन भई । यह बानी सुनि नंदसुवन मुख
 मन व्याकुल तन शुधीगई ॥ को हम कहाँ रहति कहाँ आई युवतिनके यह सोच परचो । लागी
 काम नृपतिकी सांटी जोवन रूपहि आनि अरचो ॥ तृषितभई तरुणी अनंगडर सकुचि रूप जोब
 नहिं दियो । सूर श्याम अब शरन तुम्हारे हृदय सबनि यह ध्यान कियो ॥ ६८ ॥ राग जयतश्री ॥ मन यह
 कहति देह बिसरायो । यह धन तुमहीको सचि राख्यो तेहि लीजै सुखपायो ॥ जोवनरूप नहीं तुम
 लायक तुमको देत लजाति । ज्यों बारिध आगे जल किनिका बिनय करति एहि भांति ॥ अमृत
 रस आगे मधुरंचक मनहिं करत अनुमान । सूर श्याम शोभाकी सीवा को पटतर को आन ॥ ६९ ॥
 अंतर्थाभी जानिलई । मनमें मिले सबनि सुख दीन्हों तब तनुकी कछु सुरति भई ॥
 तब जान्यो बनमें हम ठाढी तनु निरख्यो मन सकुचि गई । कहति परस्पर आपुसमें सब कहा रही
 हम काहि रई ॥ श्याम बिना ये चरित करै को यह कहिकै तनु सौंपदई । सूरदास प्रभु अंतर्थाभी
 गुप्तहि जोवनदान लई ॥ ७० ॥ राग रामकली ॥ यह कहि उठे नंदकुमार । कहा ठगीसी रही बाला परचो
 कौन बिचार ॥ दानको कछु कियो लेखो रही जहां तहां सोचि । प्रगट करि हमको सुनावहु मेदि
 जिहिदै दौचि ॥ बहुरि यहि मग जाहु आवहु राति सांझ संकार । सूर ऐसो कौन जो पुनि तुमहि रोक-
 नहार ॥ ७१ ॥ राग गूजरी ॥ हमहिं और सो रोकै कौनारोकनहारो नंदमहर सुत कान्ह नाम जाकोहै तौन ॥
 जाके बलहै काम नृपतिको ठगत फिरत युवतिनको जौन । टोना डारि देत शिर ऊपर आपु रहत ठाढो
 है मौन ॥ सुनहु श्याम ऐसी न बूझिए बानि परी तुमको यह कौन । सूरदास प्रभु कृपाकरहु अब कै
 सेहु जाहि आपने भौन ॥ ७२ ॥ राग सखी ॥ दान मानि घरको सब जाहु । लेखो मैं कहुँ कहुँ जानतहाँ
 तुम समझे सब होत निबाहु ॥ पछिलो देहु निवारि आजु सब पुनि दीजो जब जानौ कालि । अब मैं
 कहत भलीहैं तुमसों जो तुम मोको मानौ ग्वालि ॥ वृंदावन तुम आवत डरपति मैं देहैं तुमको
 पहुँचाइ । सुनहु सूर त्रिभुवन बश जाके सो प्रभु युवतिनके वशआइ ॥ ७३ ॥ को जानै हरि
 चरित तुम्हारे । जब हूं दान नहीं तुम पायो मन हरिलिये हमारे ॥ लेखो करि लीजै मनमोहन दूधदह्यो
 कछु खाहु । सदमाखन तुम्हरेहि सुख लायक लीजै दान उगाहु ॥ तुम खैहौ माखन दधि मोहन हम सब
 देखि देखि सुख पावैं । सूर श्याम तुम अब दधि दानी कहि कहि प्रगट सुनावैं ॥ ७४ ॥ राग गुंडा ॥ कान्ह
 माखन खाहु हम सब देखैं । सद्य दधि दूध ल्याई अवाटि अवाहिं हम खाहु तुम सफल करि जन्म
 लेखैं ॥ सखा सब बोलि बैठारि हरि मंडली वनहिंके पात दोना लगाये । देत दधि परसि ब्रजनारि
 जेवत कान्ह ग्वाल सँग बैठि अति रुचि बढाये ॥ धन्यदधि धन्य माखन धन्य गोपिका धन्य राधा वश्यहै
 मुरारी । सूर प्रभुके चरित देखि सुरगन थकित कृष्ण संग सुख करति घोषनारी ॥ ७५ ॥ राग जैतश्री ॥
 माखन दधि हरि खात ग्वाल सँग । पातनिके दोना सबके कर लेत पतोखनि मुख मेलत रँग ॥
 मटुकिनेते लैलै परसतिहैं हर्ष भरी ब्रजनारि । यह सुख तिहूं भुवन कहुँ नहिं दधि जेवत बनवारि ॥
 गोपी धन्य कहति आपुनको धन्य दूध दधि माखन । जाको कान्ह लेत मुख मेलत कियोसबनि
 संभाषन ॥ जो हम साध करति अपने मन सो सुख पायो नीके । सूर श्याम पर तन मन वारति
 आनंद जी सबहीके ॥ ७६ ॥ राग देवगंधार ॥ गोपिका अति आनंदभरी । माखन दधि हरिखात प्रेमसों
 निरखति नारि खरी ॥ कर लैलै मुख परस करावत उपमा बढी सुभाइ । मानहु कंज मिलतहूं
 शिको लिये सुधा करौ करआइ ॥ कारण शिव ध्यान लगवत शेष सहसमुख गावत । सोई सूर
 गट ब्रजभीतर राधा मनहि चुरावत ॥ राग रामकली ॥ राधासों माखन हरि माँगत । औरनिकी

मटुकीको खायो तुम्हरो कैसो लागत ॥ लै आई वृषभानुसुता हँसि सदलोनी है मेरो । लै दीन्हों अपने
कर हरिमुख खात अल्प हँसि हेरो ॥ सबहिनते मीठो दधिहै यह मधुरे कछो सुनाइ । सूरदास प्रभु
सुख उपजायो ब्रजललना मनभाइ ७८ राग रामकलीमेरे दधिको हरि स्वाद न पायो । जानत इन गुजरिनिको
सोहै लयो छिडाइ मिलि ग्वालनि खायो । धौरी धेनु दुहाइ छानि पय मधुर आंचमें अवटि सिरायो ॥
नई दोहनी पोंछ पखारी धरि निर्धुम खीरनि पर तायो । तामें मिलि मिश्रित मिश्रीकरि दै कपूर
पुट जावन नायो ॥ सुभग ढकनियां टांपि बांधि पट जतन राखि छीके समदायो ॥ हौं तुमः कारण
लै आई गृह मारगमें न कहूं दरशायो । सूरदास प्रभु रसिक शिरोमणि कियो कान्ह ग्वालनि मन
भायो ॥ ७९ ॥ राग नट ॥ गोपिन हेतु माखन खात । प्रेमके वश नंदनंदन नेक नहीं अघात ॥ सबै
मटुकी भरी वैसेहि प्रेम नहीं सिरात । भाव हृदये जान मोहन खात माखन जात ॥ एकनिकर दधि
दूध लीने एकनि करि दधि जाता । सूर प्रभुको निरखि गोपी मनही मनहि सिहात ॥ ८० ॥ राग विहागरो ॥
गोपी कहति धन्य हम नारि । धन्य दूध धनि दधि धनि माखन हम परसति जैवत गिरिधारि ॥ धन्य
घोष धनि निशि धनि वह धनि धनि गोकुल प्रगटे बनवारि । धन्य सुकृत पाछिलो धन्य धनि धन्य
नंद यशुमति महतारि ॥ धनि धनि ग्वाल धन्य बृंदावन धन्य भूमि यह अति सुखकारि । धन्य
दान धनि कान्ह भँगैया धन्य सूर तृण द्रुम बन डारि ॥ ८१ ॥ राग नट ॥ गण गंधर्व देखि सिहात ।
धन्य ब्रजललनानि करते ब्रह्म माखन खात ॥ नहीं रेख न रूप नहिं तनु बरन नहिं अनुहारि । मात
पितु दोऊ न जाके हरत मरत न जारि ॥ आपु करता आपु हरता आपु त्रिभुवन नाथ । आपही सब
घटके व्यापी निगम गावत गाथ ॥ अंगप्रति प्रति रोम जाके कोटि कोटि ब्रह्मंडा कीट ब्रह्म प्रयंत जल
थल इनहिते यह मंड ॥ विश्व विश्वंभरन एई ग्वालसंग बिलास । सोई प्रभु दधि दान मांगत धन्य
सूरदास ॥ ८२ ॥ राग रामकली ॥ कंसहेतु हरि जन्म लियो । पापहि पाप धरा भई भारी तब हम सबनि
पुकारकियो ॥ शेषशैल जहँ रमा संग मिलि तहां अकाश भई यह बानी । असुरमारि भुवभार उतारौ
गोकुल प्रगटौ आनी ॥ गर्भदेवकीके तनु धरिहौं यशुमतिको पय पीहौं । पूरव तप बहु कियो
कष्टकरि इनिको बहुत ऋनीहौं ॥ यह बानी कहि सूर सुरनको अब कृष्णा अवतार । कछो सबनि ब्रज ज-
न्म लेहु सँग हमरे करहु बिहार ८३ राग गौरी ॥ ब्रह्म जिनिहि यह आयसु दीन्हों । तिनतिन संग जन्म लियो
ब्रजमें सखी सखां करि परगट कीन्हों ॥ गोपी ग्वाल कान्ह दोइ नहिं ये कहु नेक नन्योर । जहां जहां
अवतार धरत हरि ये नहिं नेक विसारे ॥ एकै देह बिहार करि राखे गोपी ग्वाल मुरारि यह सुख देखि सूरके
प्रभु को थकित अमर सँग नारि ॥ ८४ ॥ राग गौरी ॥ अमरनारि अस्तुति करै भारी ॥ एकनिमिष ब्रजवासिन
को सुख नहिं तिहुं भुवन विचारी ॥ धन्य कान्ह नटवर बपु काछे धन्य गोपिका नारी । एक एकते गुण
रूप उजागरि श्याम भावती प्यारी ॥ परसति ग्वारि ग्वार सब जैवत मध्य कृष्ण सुखकारी ।
सूर श्याम दधि दानी कहि कहि आनंद घोषकुमारी ॥ ८५ ॥ ॥ राग विलावल ॥ धन्य कृष्ण अवतार
ब्रह्म लियो । रेखन रूप प्रगट दर्शन दियो ॥ जल थलमें कोउ और नहीं वियो । दुष्टन बधि संत
निको सुख दियो ॥ १ ॥ जो प्रभु नरदेही नहिं धरते । दैव गर्भ नहीं अवतरते ॥ कंसशोक कैसे उर
रते । मात पिता दुरित क्यों हरते ॥ २ ॥ जो प्रभु ब्रजभीतर नहिं आवैं । नंद यशोदा क्यों सुख पावैं ॥
पूरवतप कैसे प्रगटावैं । वेदवचन कैसे ठहरावैं ॥ ३ ॥ जो प्रभु भू धरैं नहिं बालक । कैसे होइ पूतना
बालक ॥ अँगुठा पिवत शकट संहारक । तृणा अकाश बेरि डारक ॥ ४ ॥ जो प्रभु ब्रजमाख

न न चोरावै । क्यों गोपिनको आपु जनावै ॥ भुजा उलूखल नहीं बँधावै । जमलामोक्ष कौन विधि पावै ॥ ५ ॥ सो प्रभु दधिदानी कहवावै । गोपिनको मारग अटकावै ॥ करिलेखो कै दान सुनावै । आपुन खीझै उनहिं खिझावै ॥ ६ ॥ ब्रजवासी जो धन्य कहावै । जहां श्याम दधि दान लगावै ॥ मांगि खात आनंद बढ़ावै । युवतिनसों कहि कहि परुसावै ॥ ७ ॥ तेई हरि नटवर वपु काछे । मोर मुकुट पीतांबर आछे ॥ ग्वालसखा ठाढे सब पाछे ॥ सूर श्याम गोपिन सुख साछे ॥ ८ ॥ ८६ ॥ राग मही ॥ यह महिमा येईपै जानै । योग यज्ञ तप ध्यान न आवत सो दधि दान लेत सुखमानै ॥ खात परस्पर ग्वालन मिलिकै मीठो कहि कहि आपु बखाने । विश्वभर जगदीश कहावत ते दधि दोना माँझ अघाने ॥ आपुहि हरता आपुहि करता आपु बनावत आपुहि भाने । ऐसे सूरदासके स्वामी ते गोपिनके हाथ बिकाने ॥ ८७ ॥ राग रामकली ॥ धनि बडभागिनी ब्रजनारि । खात लै दधि दूध माखन प्रगट जहां मुरारि ॥ नहीं जानत भेद जाको ब्रह्मा अरु त्रिपुरारि । शुक सनक मुनि येउ न जानत निगम गावत चारि ॥ देखि सुख ब्रजनारि हरिसँग अमर रहे भुलाइ । सूर प्रभुके चरित अगनित बरनि कापै जाइ ॥ ८८ ॥ राग विलावल ॥ ब्रजवनिता यह कहति श्यामसों माखन दूध दह्यो अरु ल्यावो मटुकि निते हम देहिं खाहु तुम देखि देखि नैननि सुखपावै ॥ मोरस बहुत हमारे घर घर दान पाछिलो लेहु । खायो जौन दान आजुहिको मांगतहै सब देहु ॥ सबै लेहु राखहु जिनि बाकी पुनि न पाइहो मांगे । आजुहि लेहु सबै भरिदैहैं कहति तुम्हारे आगे ॥ कह्यो श्याम अब भई हमारी मनहि भई परतीति । जब चैहैं तब मांगि लेहिंगे हमहिं तुम्हैं भइ प्रीति ॥ बेचहु जाइ दूध दही निधरक घाट बाट डर नाहीं । सूर श्याम बश भई ग्वारिनी जात बनत घर नाहीं ॥ ८९ ॥ राग ढोढी ॥ सुनहु सखी मोहन कहा कीन्हों । एक एकसों कहति बात यह दान लियो की मन हरि लीन्हों ॥ यहतौ नाहिं बदी हम उनसों बूझहु धौं यह बात । चकृतभई बिचार करत यह बिसरि गई सुधि गात ॥ उमचि जाति तबहीं सब सकुचति बहुरि मगन है जाति । सूर श्यामसों कहौं कहा यह कहत न बनत लजाति ॥ ९० ॥ राग धनाश्री ॥ श्याम सुनहु एक बात हमारी । दीठो बहुत कियो हम तुमसों सो बकसो हरि चूक हमारी ॥ मुख जो कही कटुक सब बानी हृदय हमारे नाहीं । हँसि हँसि कहति खिझावति तुमको अति आनंद मनमाहीं ॥ दधि माखनको दान और जो जानो सबै तुम्हारो । सूर श्याम तुमको सब दीनों जीवनप्राण हमारो ॥ ९१ ॥ नंदकुमार कहा यह कीन्हों । बूझति तुमहि कहौं धौं हमसों दान लियो की मन हरिलीन्हों ॥ कछु दुराव नहीं हम राख्यो निकट तुम्हारे आई । येते पर तुमही अब जानौं करनी भली बुराई ॥ जो जासों अंतर नहिं राखै सो क्यों अंतर राखै । सूर श्याम तुम अंतर्यामी वेद उपनिषद भाषै ॥ ९२ ॥ राग ढोढी ॥ सुनहु बात युवती इक मेरी । तुमते दूर होत नहिं कतहूँ तुम राखौ मोहिं घेरी ॥ तुम कारण बैकुंठ तजतहों जनमलेत ब्रजआई । वृंदावन राधा सँग गोपी यह नहिं बिसरयो जाई ॥ तुम अंतर अंतर कहा भाषति एक प्राण द्वै देह । क्यों राधा ब्रज बसे बिसरयो सुमिरि पुरातन नेह ॥ अब घर जाहु दान मैं पायो लेखो कियो न जाइ । सूर श्याम हँसि हँसि युवतिनसों ऐसी कहत बनाइ ॥ ९३ ॥ राग नया ॥ घर तनु मनहिं बिना नाहिं जात । आपु हँसि हँसि कहतहौ जू चतुरईकी बात ॥ तनहि परहै मनहि राजा जोइ करै सोइ होइ । कहौ घर हम जाहिं कैसे मनधरयो तुम गोइ ॥ नयन श्रवन बिचार सुधि बुधि रहे मनहि लुभाइ । जाहि अबही तनहि लै घर परत ॥ पहिन पाइ ॥ प्रीतिकरि दुविधा करी कत तुमहि जानौ नाथ । सूरके प्रभु दीजिये मन जाई घर रहति फा ॥ ९४ ॥ राग कान्हरो ॥ मन भीतरहै वास हमारो । हमको

लेकर तुमहि छपायो कहा कहति यह दोष तुम्हारे ॥ अजहुँ कहौ रहैं हम अनतहि तुम अपनो
 मन लेहु । अब पछितानी लोकलाज डर हमहि छाँडि तैं देहु ॥ घटती होइ जाहिते अपनी ताको
 कीजै त्याग । धोखे कियो वास मनभीतर अब समझे भइ जाग ॥ मन दीन्हो मोको तब लीन्हों
 मन लैहो मैं जाउ। मूर श्याम ऐसी जनि कहिये हम यह कही सुभाउ ॥ ९५ ॥ तुमहि बिना मन धृक अरु
 धृक घर । तुमहि बिना धृक धृक माता पितु धृक धृक कुलकानि लाजडर ॥ धृक सुत पति धृक जीवन
 जगको धृक तुमबिन संसार ॥ धृक सो दिवस पहर घटिका पल धृक धृक यह कहि नंदकुमार ॥
 धृक धृक श्रवण कथा विनु हरिके धृक लोचन विनरूप । मूरदास प्रभु तुम विनु घर यौबन भीत
 रके कूप ॥ ९६ ॥ अथ दानलीला ॥ राग राजीहरीली ॥ सुनि तमचुरको शोर घोषकी बागरी । नवशत साजि
 शृंगार चली बननागरी ॥ १ ॥ नवशत साजि शृंगार अंग पाटवर सोहै । एकते एक बिचित्र रूप त्रिभुव
 न मन मोहै ॥ इंदा विंदा राधिका श्यामा कामा नारि । ललिता अरु चंद्रावली सखिनमध्य सुकु-
 मारि ॥ २ ॥ कोउ दूध कोउ दह्यो मद्यो लैचली सयानी । कोउ मटुकी कोउ माट भरी नवनीत म-
 थानी ॥ गृह गृहते सब सुंदरी जुरि यमुनातट जाइ । सबनि हरष मनमें कियो उठीं श्यामशुण गा
 इ ॥ ३ ॥ यह सुनि नंदकमार सैन दै सखा बोलाए। मन हरषित भए आपु जाइ सब ग्वाल जगाए ॥
 यह कहिकै तब साँवरे राखे हुमनि चढ़ाइ । और सखा कछु संगलै रोकि रहे मगजाइ ॥ ४ ॥ एक
 सखी अवलोकतही सब सखी वोलाई । यहि वनमें इकबार लूटि हम लई कन्हवाई ॥ तनक फेर फि-
 रि आइए अपने सुखहि विलास । यह झगरो सुनि होइगो गोकुलमें उपहास ॥ ५ ॥ उलटि चलीं
 तब सखी तहां कोउ जान न पावै । रोकि रहे सब सखा और बातनि बिरमावै ॥ सुबल सखा तब
 यह कह्यो तुम ग्वालनि हरियोग । कैसे बाते दुरतिहै तुम उनके संयोग ॥ ६ ॥ किनहु शृंग कोउ
 वेनु किनहु वनपत्र वजाये । छाँडि छाँडि हुमडार कूदि धरनी धँसिधाये ॥ सखिनमध्य इत
 राधिका सखामध्य बलबीर । झगरो ठान्यो दानको कालिंदीके तीर ॥ कहत नंदलाडिलो ॥ ७ ॥ दै नारिन
 दधिदान कान्ह ठाढे वृंदावन । और सखा हरि संग बच्छ चारत अरु गोधन ॥ वै बडे नंदके लाडिले
 तुम वृषभानुकुमारि। दह्यो बह्यो कै कारने कतहि बढावति रारि ॥ कहत ब्रजनागरी ॥ ८ ॥ सूखे गोरस
 मांगि कछु लै हमपै खाहू । ऐसे ढीठ गँवार कान्ह बरजत नहिं काहू ॥ एहि मग गोरस लै सबै दिन प्रति
 आवहि जाहि । हमहि छाप देखरावहु दान चहत केहि पाहि ॥ कहत नंदलाडिले ॥ ९ ॥ इते मान सतरात
 ग्वारि हम जान न देहैं। अनउत्तर कहा कहति तुमहि वश कान्ह भयेहैं ॥ अब तुम ऐसी जनि करौ या वृंदा-
 वन बीच । पुहुमि माहँ ढरकाइहैं मचिहै गोरस कीच ॥ कहत ब्रजनागरी ॥ १० ॥ कान्ह
 अचगरचो देत लेहु सब आँगनवारी । कापहि माँगत दान भए कबते अधिकारी ॥ मात
 पिता जैसे चलैं तैसे चलिये आपु । कठिन कंस मथुरा बसैं कोकहि लेइ संतापु ॥
 कहत नंदलाडिले ॥ ११ ॥ कहै न जाइ उतालें जहां भूपाल तिहारो । हो वृंदावन चंद्र कहा
 कोउ करै हमारो ॥ शेष सहसफन नाथि ज्यों सुरपति करे निरंस । अग्नि पान किये साँवरे केतिक
 वपुरो कंस ॥ कहत ब्रजनागरी ॥ १२ ॥ जाके तुम सुकुमार ताहि हम नीके जाने । जो पूछौ सति भाउ
 आदि अद्यावलिभानै ॥ बातनि बडे न हूजिये सुनहु श्याम उतपाति ॥ गर्भसाटि यशुदा लियो तब
 तुम आए राति ॥ कहत नंदलाडिले ॥ १३ ॥ अरी ग्वारि मैमंत वचन बोलत जो अनेरो । कब हरि बालक
 भए गर्भ कब लियो बसेरो ॥ प्रबल असुर पुहुमी बडे विधि कीन्हे गे ॥ कलकोस अलिभोर
 त्यों तुम भुरचो गोपाल ॥ कहत ब्रजनागरी ॥ १४ ॥ तुम भए प्रभु नंद कहतहै तुमसों ढोंढा । दधि

ओदनके काज देहधरि आए छोटा ॥ गढि गढि मिलवत लाडिले भली नहीं यह श्यामाया धोखे
 जिनि भूलहू हम समरथकी बाम ॥ कहत नंद लाडिले ॥ १५ ॥ तुम समरथकी वाम कहा काहूको
 करिहौ । चोरी जाती बेचि दान सब दिनको भरिहौ ॥ जो प्रभु देह न धै दीन खल कौन उधरै ।
 कंसकेश को गहै विघ्न ब्रजको को टारै ॥ १६ ॥ कहा निगम कहि ध्यावतो कहा मुनीजन धरते
 ध्यान । दरशपरस बिन नाम गुन को पावै पद निर्वाण ॥ कहत ब्रजनागरी ॥ जो पै दरशन परस
 नाम गुण केलि कन्हई । तुम निर्भयपद हेत वेदबिधि इहै बताई ॥ योग युक्ति तप ध्यावही तिन गति
 कौन दयाल । जलतरंग ज्यों मीनगति विधे कर्मके जाल ॥ कहत नंदलाडिले ॥ १७ ॥ जटाभस्म
 तनुदेहै वृथा करि कर्म बँधावै । पुहुमि दाहिनी देहि गुफा बसि मोहिं न पावै ॥ ताजि अभिमान जो गा
 वही गदगदसुरहि प्रकाश । तासु मगनहो ग्वालिनी ता घट मेरो बास ॥ कहत ब्रजनागरी ॥ १८ ॥
 जुपै चाहि लै श्याम करत उपहास घनेरो । हम अहीरि गृह नारि लोक लज्जाके जेरो ॥ ता दिन
 हम भई बावरी दियो कंठते हारातबते घर घेरा चलयो श्याम तुम्हारो जार ॥ कहत नंदलाडिले ॥ १९ ॥
 सखा सबनि मिलि कछो ग्वारि एक बात सुनावै । तो तनु ज्योति सुभाउ रूप उपमा को पावै ॥
 गुप्त प्रीति बिधना करी रसिक साँवरेयोग । यह बिचार सुनि ग्वारिनी न्याउ हँसैगो लोग ॥ कहत
 ब्रजनागरी ॥ २० ॥ ऐसी बातें कान्ह कहत हमसों काहेते । चोरी खाते छाँछि नयन भरिलेत गहेते ॥ देत
 उरहनो रावरे बछरा दावरि जोरि । जननी ऊखल बांधती हमही देती छोरि ॥ कहत नंदलाडिले ॥ २१ ॥
 बालकरूप अजान कहा काहु पहिचानै ॥ अन उत्तर कोउ कहै भली अनभली न मानै ॥ ॥ यह दिन सुमिरौ
 आपनो न्हानि यमुनके पानि । सब मिलि मो हाहा करी वस्त्र हरयो मैं जानि ॥ कहत ब्रज
 नागरी ॥ २२ ॥ बहुत भएहौ ठीठ देत सुख ऊपर गारी । जेहि छाजै तेहि केहो ॥ हाँ कोउ दासि
 तुम्हारी ॥ तुमसों अब दधिकारने कौन बढ़ावै रारि । काहेको इतरातहो रेकि पराई रारि ॥ कहत
 नंदलाडिले ॥ २३ ॥ लियो उपरना छीनि दूरि डारनि अटकायो । दियो सखनि दाधि बाँटि माट
 पुहुमी ढरकायो ॥ फेंट पीतपट साँवरे कर पलाशके पात । हँसत परस्पर ग्वाल सब विमल विमल
 दधिखाता ॥ कहत ब्रजनागरी ॥ २४ ॥ कान्ह वहोरि न देहु दही काहेको माते । बसिये एकहि
 गाउँ कानि राखतिहै ताते ॥ तब न कछु बनिआइहै जब विरुझै सब नारि । करि लरिकनिके बर करत
 यह पुनि धरिहैं लाड उतारि ॥ कहत नंदलाडिले ॥ २५ ॥ गहि अंचल झकझोरि तोरि हारावलि डारी ।
 मटुकी लई उतारि मोरि भुज कंचुकि फारी ॥ लैलै ठाढे ग्वार सब दोना एक एक हाथाखात जात दधि
 दूध लै हँसत मिलै इक साथ ॥ कहत ब्रजनागरी ॥ २६ ॥ झीनी कामरि काज कान्ह ऐसी नहिं कीजै ।
 काच पोत गिर जाइ नंदघर गथौ न पूजै ॥ बिनही लीने आपियैं सो कामरिको तोला लाख सुंदरिया
 जाइगी कान्ह तुम्हारो मोला ॥ कहत नंदलाडिले ॥ २७ ॥ शिव विरंचि सनकादि आदितिनहं नहिं जानी ॥
 शेष सहस्रफन थक्यो निगमकीरति न बखानी ॥ तेरी सों सुनि ग्वालिनी इहै मेरे मन
 माह । भुवन चतुर्दश देखिए वा कामरि की छाँह । शेष न पायो अंत पुहुमि जाकी फनवारी ॥
 पवन बुहारत द्वार सदा शंकर कुतवारी ॥ धर्मराज जाकी पबरि सनकादिक प्रतिहार । मेघ छचान
 वै कोटि सब जल ढोवहिं प्रतिबारा ॥ कहत ब्रजनागरी ॥ २८ ॥ जिनहि इतो परताप गाइ सो कतहि
 चरावै ॥ परदाराके जाइ आपु कत लज्जापावै ॥ घरके बाढे रावरे बातैं कहत बनाइ । ग्वारनिपै लै
 खातहैं जूठी छाक छिनाइ ॥ कहत गंजलाडिले ॥ २९ ॥ धेनु रूप मम देहकरत कौतूहल न्यारे । गोकुल
 स विलास जानि को सकै हमारे ॥ धी फाकन्ह ग्वारिनी जित तित अमृत बेलि ॥ तिहुँलोकमें गाइये

मेरे रसकीकेलि ॥ कहत ब्रजनागरी ॥ ३० ॥ अबलौं कीन्ही कानि कान्ह अब तुमसों लरिहैं । अघर
नयन रसकोपि विराचि अनउत्तर करिहैं ॥ मो आगे को छोहरा जीत्यो चाहै मोहिं । काके बल इत
रातहौं देहुं न नख भरि तोहिं ॥ कहत नंदलाडिले ॥ ३१ ॥ चितै वदन सुसकाइ हाथ दधि पूरन दोना ।
इत सुंदरी विचित्र उतहि घनश्याम सलोना ॥ अतितामस तोहि ग्वालनी मैं सब जानत आदि ।
खोटी करनी जाहि मेरेकी सोई करे उपादि ॥ कहत ब्रजनागरी ॥ ३२ ॥ तोहि न छांडौं कान्ह दान
तुमको नहिं देहौं । बिना कहे ब्रजलोग कहा काहु पतिऐहौं ॥ लाज नहीं तुम आवई
बोलत जब सतराइ । कहूं कंस सुनि पाइहै गहत फिरहुगे पाइ ॥ कहत नंदलाडिले ॥ ३३ ॥
सुनत हैसे नंदलाल ग्वारि जिय तामस मान्यो । सींच्यो अमृतबैन कोष कर्षत नहिं जान्यो ॥
कहां बसतिहौं बावरी सुनहुन सुग्ध गँवारि । ब्रजवासी कहा जानिही तामसको व्यवहारि ॥ कहत
ब्रजनागरी ॥ ३४ ॥ जननी जन परिहरयो तात कुलधर्म नशायो । गोपराइके गेह पुत्र ह्वै नाम
धरायो ॥ इतनेते इतनो कियो खाटी छांछि पिवाइ । तुमहि दोष नहिं लाडिले वोछो गुण क्यों
जाइ ॥ कहत नंदलाडिले ॥ ३५ ॥ अबिगति अगम अपार आदि नहिं अबिनासी । परमपुरुष
अवतार माया जिनकीहै दासी ॥ तुमहि मिले ओछेभए कहा रही करि मौन । तुम्हरे आगे न्या-
वहै दुइमें ओछो कौन ॥ कहत ब्रजनागरी ॥ ३६ ॥ हमहि ओछाई भई जबहि तुमको प्रतिपाले ।
तुम पूरे सब भांति मात पितु संकट घाले ॥ कहा चलत उपरावटे अजहूं खिसी न गात । कंस
सौह दै पूछिये जिन पटकेहैं सात ॥ कहत नंदलाडिले ॥ ३७ ॥ कंसकेश निग्रहौं पुहुमिको भार
उतारौं । उग्ररै न शिरछत्र चमर अपने कर ढारौं ॥ मथुरा सुरनि बसाइहौं असुर करौं यमहाथ ।
दनुज वदन बिदावली सांचो त्रिभुवननाथ ॥ कहत ब्रजनागरी ॥ ३८ ॥ तब न कंस निग्रहौं पुहु-
मिको भार उतारयो । चोरीजायो मातु गोद गोकुल पग धारयो ॥ अब बहुते बातें कहौ दही दूध
के मात । जो ऐसे बलवंतहौं मथुरा काहे न जात ॥ कहत नंदलाडिले ॥ ३९ ॥ जो जैहौं मधुपुरी
बहुरि गोकुल नहिं ऐहौं । यह अपनो परताप नंद यशुमतिहि सुनैहौं ॥ वचनलागि मैं है कियो
यशुमतिको पयपान । मोहि ग्वार जनि जानहु ग्वारिनि सुनहु निदान ॥ कहत ब्रजनागरी ॥ ४० ॥
हम ग्वाली तुम तरनि रूप रस रवि शशि मोहै । तीनलोक परताप छत्र सिंहासन सोहै ॥ गयो
गवँ गति ग्वालनी देखि चरित तेहि काल । हम अहीर ढीगे दई तुम जैजै मदनगोपाल ॥ और
दिननते आजु दहो हम ऊखा ल्याई । देखत ज्योति बिलास दई मुख वचन डिठाई ॥ कान्ह
बिलग जिन मानहु राखहु पिछलो नेहु । दही दूधकी को गनै कछु हमहु पैते लेहु ॥ धन्य नंदको
गेह धन्य गोकुल जहँ आये । धनि गोपनकी नारि जहां तुम रोकन धाये ॥ धनि धनि
झगरो आजुको इह मुख नाहिन पार । नंदनंदन पर कीजिये तन मन धन बलिहार ॥
तब लै दधि आगे धरयो कान्ह लीजे जो भावे । खाइ जाइ मंजार काज एकौ नहिं
आवे ॥ हम अनखी या बातको लेत दानको नाउँ । सहज भाव रहो लाडिले बसत एकही
गाउँ । कहत नंदलाडिले ॥ ४१ ॥ अभरन दियो मँगाइ कियो गोपिन मन भायो । हिलि
मिलि बढ्यो सनेह आपु कर माट उठायो ॥ नंदनंदन छवि देखिकै गोपिन वारो प्रान । कुंज
केलि मनमें बसी गायो सूर सुजान ॥ ४२ ॥ ११६० ॥ राग विलावल ॥ जबहिं कान्ह यह बात सुनाई ।
ब्रजयुवती अति गई सुरझाई ॥ कंस सँहारन मथुरा जैहौं । हँस्यो फिर ब्रजको नहिं ऐहौं ॥ देव
गर्भवास हौं लीन्हौं । तुमको गोकुल दर्शन दीन्हौं ॥ ४३ ॥ बेनिदा अति तप कीन्हौं । मोसों पु-

मांगि तब लीन्हों ॥ मोसों दूजो और न कोई । हरता करता मैंही सोई ॥ तुमसों सुत पयपान
 कराऊं । यह तुमसों मैं माँगे पाऊं ॥ मोसों सुत तुमको मैं दैहों । मथुरा जनमि गोकुलहि ऐहों ॥
 नंद यशोदा बचन बँधायो । ता कारण देही धरि आयो ॥ यह बाणी सुनि ग्वारि झुरानी । मीन भये
 मानो विन पानी ॥ इहै कथा तब गर्ग सुनाई । सोई आपु कहत री माई ॥ नरदेही करि मोहि
 न जानो । ब्रह्मरूप करि मोको मानो ॥ षोडश वर्ष मिले सुख करिहों । मथुराजाइ
 देव उद्धरिहों ॥ केशगहे अरिकंस पछरिहों । असुर कठोर यमुन लै डरिहों ॥ रंगभूमि करि
 मछन मारों । प्रबल कुवलियादंत उपारों ॥ सुनहु नारि हरिमुखकी बानी । यह सुनि सुनि तरुणी
 बिकलानी ॥ तन मन धन इनपर सब वारहु । जोबनदान देहु रिसि टारहु । षोडशवर्ष गए धौं
 जैहै । ब्रजते जाइ मधुपुरी रहै ॥ राजा उग्रसेनको करिहें । कनकदंड आपुन कर धरिहें ॥ मात
 पिता वसुदेवदेवकी । यशुमति धाइ कहतिहैं इनकी ॥ अब तिनके बंधन मोचहिंगे । दरशबिना पुनि
 हम लोचहिंगे ॥ मथुरा नारिनके सुख दैहें ॥ तब घट प्राण कहौ क्यों रहैं ॥ कहत हँसी यह बात
 अयानी । जानतिहौ तुम कछुक सयानी ॥ जोबन दान लेहिंगे तुमसों । चतुरायो मिलवतिहै हम
 सों ॥ इनके गांस कहा री जानौ । इतनी कही एक जनि मानौ ॥ जो चाहै सो दीजै इनको । ज्यों विन
 देखे रहत न जिनको ॥ आपु आपु यह बात बिचारै । नारि नारि मन धीर न धारै ॥ आगे घर
 दूध दधि माखन । प्रथमहि यह कीजै संभाषन ॥ बड़े चतुर तुम अहो कन्हारै । भरुनि सबनि
 कहि इहै सुनाई ॥ जानी बात तुम्हारे मनकी । दूरि न कीजै यह रिस तनकी ॥ बनि धरचो
 दधि माखन आगे । लेहु सबै अब विनही माँगे ॥ तुम रिस करत देखि सुख पावें । धृति बारहि बार
 खिझावें ॥ तनु जोबन धन अर्पन कीन्हों । मन दै मन हरिको सुख दीन्हों ॥ सुभग पात दोना
 लिए हाथनि । बैठे सखा श्याम एक साथनि ॥ मोहन खात खवावत नारी । माँगिले दधि गिरिवर
 धारी ॥ आपुहि धन्य कहति ब्रजनारी । रुचिकरि माँगि खात बनवारी ॥ और खाउ मोहन
 दधिदानी । यह कहि कहि तरुणी सुसुकानी ॥ सुखदीनो हरि अंतर्दामी । ब्रज युवतिनके
 पूरनकामी ॥ देखत रूप थकित ब्रजनारी । देह गेहकी शुद्धि बिसारी ॥ सूर श्याम सबके सुखका-
 री । कह्यो जाहु घर घोषकुमारी ॥ ६१ ॥ राग रामकली ॥ युवती ब्रज घर जान बिचारति । कबहुँक म-
 टुकी लेत शीशपर कबहुँ धरणि फिर धारति ॥ देखत श्याम सखा सब देखत चितैरही ब्रजनारि ।
 रीती मटुकिनिमें कछु नाहीं सकुचति मनहि बिचारि ॥ तब हँसि बोले श्याम जाहु घर तुमको भई
 अबार । सकुचति दान पाछिले को तुम मैं करिहौ निर्बार ॥ यह कहिकै हरि ब्रजहि सिधारे युव-
 तिन दान मनाई । सूर श्याम नागर नारिनके चितलै गए चुराई ॥ ६२ ॥ राग विलावल । अलहीआ ॥
 रीती मटुकी शीश लै चली घोषकुमारी । एक एककी सुधि नहीं को कैसी नारी ॥ बनहीमें बेंचति
 फिरै घरकी सुधि डारी । लोकलाज कुलकानकी मर्यादा टारी ॥ लेहु लेहु दधि कहति है वनशोर
 पसारी । द्रुम सब घर करि जानही तिनको दैगारी ॥ दूध दह्यो नहिं लेहु री कहै कहि पचिहारी ।
 कहति सूर घर कोउ नहीं कहां गई दर्ईमारी ॥ ६३ ॥ राग धोडी ॥ या घरमें कोउहै गी नाहीं । बार बार
 बूझति वृक्षनको गोरस लैहौ कि नाहीं ॥ आपुहि कहति लेहु नाहीं दधि और द्रुमन तर जाती ।
 मिलति परस्पर विवश देखि तेहि कहति कहा इतराती ॥ ताको कहति आपु सुधि नाहीं सो पुनि
 जानत नाहीं । सूर श्याम रसभरी ॥ जेपिका बनमें यों वितताही ॥ ६४ ॥ रीती मटुकी शीशधरै । बनकी
 चरकी सुरति न काहु लेहु दहीति फौफन्दत फिरै ॥ कबहुँक जाति कुज भीतरको तहाँ

श्यामकी सुरति करै । चौंकि परति कछु तनु सुधि आवति जहां तहँ सखि सुनति रै ॥
 तब यह कहति कहौ मैं इनिसों भ्रमि भ्रमि बनमें वृथा मरै । सूर श्यामके रस पुनि
 छाकति वैसेही ढंग बहुरि ढरै ॥ ६५ ॥ राग नट ॥ तरुणी श्यामरस मतवारि । प्रथम जोवन रस चढायो
 अतिहि भई खुमारि ॥ दूध नहिं दधि नहीं भाखन नहीं रीतो माट । महारस अंग अंग पूरण कहां
 घर कहां बाट ॥ मातु पितु गुरुजन कहांको कौन पति को नारि । सूर प्रभुके प्रेम पूरण छकि रहीं
 ब्रजनारि ॥ ६६ ॥ राग रामकली ॥ गोरस लेहु री कोउ आइ।हुमनिसों यह कहति डोलति कौन लेइ बुलाइ ॥
 कबहुँ यमुनातीरको सब जातिहै अकुलाइ । कबहुँ बंसीवट निकट जुरि होति ठाढी धाइ ॥ लेहु
 गोरसदान मोहन कहां रहे छपाइ । डरनि तुम्हारे जाति नहिं लेत दह्यो छिडाइ ॥ मांगिलीजै दान
 अपनो कहतिहै समुझाइ । आइहौ पुनि रिस करत हरि दह्यो देतः बहाइ ॥ एक एकहि
 बात बूझत कहां गए कन्हाइ । सूर प्रभुके रंग राची जीव गयो भरमाइ ॥ ६७ ॥ राग जैतश्री ॥ बैठिगई
 मटुकी सब धारिकै । यह जानत अबहीहै आवत ग्वाल सखा सँग हरिकै ॥ अंचलसों दधिमाट
 दुरावति दृष्टिगई तहां परिकै । सबनि मटुकिया रीती देखी तरुनी गई भभरिगै ॥ कहि कहि उठीं
 जहां तहँ सब मिलि गोरस गयो कहुँ ढरिगै । कोउ कोउ कहै श्याम ढरकायो जानदेहु री जरिगै ॥
 यहि मारग कोऊ जिनि आवहु रिसकरि चली डगरिगै । सूर सुरति तनुकी कछु आई उतरत
 काम लहरिगै ॥ ६८ ॥ राग नट ॥ चकृतभई घोषकुमारि । हम नहीं घर गई तबते रहा बिचारि
 बिचारि ॥ घराते हम प्रात आई सकुचि वदन निहारि । कछु हँसति कछु डरति गुरुजन देतिहै
 हैं गारि ॥ जो ई सो भई हम कह रही इतनी नारि । सखासंग मिलि खाइदधि तबही गए बन
 वारि ॥ इहांलौं वात जानति यह अचंभो भारि । इहै जानति सूरके प्रभु गए शिर कछु डारि ॥
 ॥ ६९ ॥ राग धनाश्री ॥ श्याम बिना यह कौन करै । चितवतही मोहनी लगावत नेक हँसनिपर मनहि
 हरै ॥ रोकिरह्यो प्रातहि गहि मारग लेखो करि दधि दान लियो । तनुकी सुधि तबहीते भूली
 कछु पढिकै शिर नाइदियो ॥ मनके करति मनोरथ पूरण चतुरनारि एहिभांति कहै । सूर श्याम
 मन हरचो हमारो तेहिबिनु कहु कैसे निबहै ॥ ७० ॥ मन हरिसों तनु घरहि चलावति । ज्यों
 गजमत्त जाल अंकुशकर चर गुरुजन सुधि आवति ॥ हरिरसरूप इहै मद आवत डरडारचो जु
 महावत । गेह नेह बंधन पग तोरचो प्रेम सरोवर धावत ॥ रोमावली मूँड विविकुच मनो कुंभस्थल
 छविपावत । सूर श्याम केहरि सुनिके जोवन गज दर्प नवावत ॥ ७१ ॥ युवतीगई घर नेक न भावत ।
 मात पिता गुरुजन पूछत कछु औरै और बतावत ॥ गारीदेति सुनति नहिं नेकहु श्रवन शब्द हरि
 पूरे । नैननही देखत काहुको जो कहु होहि अधूरे ॥ वचन कहति हरिहीके गुनको उतही चरण
 चलावै । सूर श्याम बिन और न भावै कोउ जितनो समुझावै ॥ ७२ ॥ सोरठ ॥ लोक सकुच
 कुलकानि तजी । से नदी सिंधुको धावै तैसे श्यामभजी ॥ मात पिता बहु त्रास दिखायो नेक
 न डरी लजी । हारिनि बैठे नहिं लागाति बहुतै बुद्धि सजी ॥ मानत नहीं लोक मर्यादा हरिके
 रंग मजी । सूर श्याम को मिली चूने हरदी ज्यों रंग रजी ॥ ७३ ॥ बारवार जननी समुझावति ।
 काहेको तुम जहँ तहँ डोलति हमको अतिहि लजावति ॥ अपने कुलकी खबरि करौ धौ सकुच
 नहीं जिय आवति । दधि बेचहु घर सूधे आवहु काहे झेर लगावति ॥ यह सुनिकै मन
 हर्ष बढायो तब इक बुद्धि बनावति । सुनिमैया दधि माट ढरगुह्योहि डर बात न आवति ॥ जान
 देहि कितनो दधि डाँयो ऐसे तब न सुनावति ॥ सुनहु सु बेचिखात डरानी माता उरलै लावति ॥

॥७४॥ राग सारंग ॥ नेक नहीं घरमों मन लागत । पिता मात गुरुजन परबोधत नीके वचन बाणसम
लागत ॥ तिनको धृग धृग कहति मनहि मन इनको बनै भलेही त्यागत । श्यामविमुख नर नारि
वृथा सब कैसे मन इनिसों अनुरागत ॥ इनको बदन प्रात दरशै जिनि बार बार बिधिसों यह
मांगत । यह तनु सूर श्यामको अप्यों नेक टरत नहिं सोवत जागत ॥ ७५ ॥ राग धनाश्री ॥ पलक ओट
नहिं होत कन्हाई । घर गुरुजन बहुतै बिधि त्रासत लाज करावत लाज न आई ॥ नयन जहां
दरशन हरि अटके श्रवण थके सुनि वचन सोहाई । रसना और नहीं कछु भाषत श्याम श्याम
रट इहै लगाई ॥ चित चंचल संगहि सँग डोलत लोकलाज मर्याद मिटाई । मन हरि लियो सूर प्रभु
तबहीं तनु बपुरेकी कहा बसाई ॥ ७६ ॥ राग विलावल ॥ चली प्रातही गोपिका मटुकिनलै गोरसानयन
श्रवन मनचित बुधि ये नहिं काहूके बश ॥ तनु लीन्हें डोलत फिरै रसना अटक्यो जस । गोरस
नाम न आवई कोऊ लैहै हरिरस ॥ जीव परचो या ख्यालमें अरु गए दशादश । बझे जाइ खग
बृंद ज्यों प्रिय छवि लटकनि लस ॥ छांडि देहु डरात नहिं कीन्हो पावै तस । सूर श्याम प्रभु भौंह
की मोरनि फांसी गस ॥ ७७ ॥ राग कान्हरो ॥ दधिबेचत ब्रज गलिन फिरै । गोरसलेन बोलावत कोऊ
ताकी सुधि नेकहु न करै ॥ उनकी बात सुनत नहिं श्रवणनि कहति कहा ये घर न जरै । दूधदह्यो
ह्यां लेत न कोऊ प्रातहिते शिरलिये रै ॥ बोलि उठति पुनि लेहु गोपालहि घर घर लोक
लाज निदरै । सूर श्यामको रूप महारस जाके बल काहू न डरै ॥ ७८ ॥ गोरसको निजनाम भुलायो ।
लेहु लेहु कोऊ गोपालहि गलिन गलिन यह शोर लगायो ॥ कोऊ कहै श्याम कृष्ण कहै कोऊ
आजु दरश नहीं हम पायो । जाके सुधि तनकी कछु आवति लेहु दही कहि तिहि सुनायो ॥
एक कहि उठत दान मांगत हरि कहू भई की तुमहि चलायो । सुनहु सूर तरुणी जवनमद तापर
श्याम महारस पायो ॥ ७९ ॥ ग्वालनि फिरति बेहालहिसों । दधि मटुकी शिर लीन्हें डोलति रसना
रटति गोपालहिसों ॥ गेह नेह सुधि देह बिसारे जीव परचो हरि ख्यालहिसों । श्याम धाम निज बास
रच्यो रचि रहित भई जंजालहिसों ॥ छलकत तक्र उफनि अँग आवत नहिं जानति तेहि कालहिसों ।
सूरदास चित ठौर नहीं कहूँ मन लाग्यो नंदलालहिसों ॥ ८० ॥ राग मलार ॥ कोऊ माई लैहै री गोपालहि ।
दधिको नाम श्याम सुंदररस बिसरि गई ब्रजबालहि ॥ मटुकी शीश फिरति ब्रज बीथिन बोलत बचन
रसालहि । उफनत तक्र चहुँ दिश चितवति चित लाग्यो नंदलालहि ॥ हँसति रिसाति बोलावति
बरजति देखहु उलटी चालहि ॥ सूर श्याम बिनु और न भावै या बिरहनि बेहालहि ॥ ८१ ॥
राग गौड मलार ॥ ग्वालनि प्रगट्यो पूरन नेहु । दधिभाजन शिरपर धरे कहति गुपालहि लेहु ॥ बन
बीथिन निजपुर गली जहीं तहीं हरिनाउँ । समुझाई समुझत नहीं सिखदै बिथक्यो गाउँ ॥
कौन सुनै काके श्रवण काकी सुरति सकोच । कौन निडर डर आपको को उन्म को पोच ॥
प्रेम पिये बर बारुनी बलकत बल न सँभार । पग डगमग जित तित धरति मुकुलित अकल
लिलार ॥ मंदिरमें दीपक दिये बाहेर लखे न कोइ ॥ तिन्हें प्रेम परगट भएगु कौनपै होइ ॥
लज्जा तरल तरंगिनी गुरुजन गहै री धार । दुहुँ कूल तरुनी मिली तिहि तरंग न लागी बार ॥
बिधिभाजन ओछो रच्यो शोभा सिंधुअपार । उलटि मगनतामें भई तब कौन नैकासनि हार ॥
जैसे सरिता सिंधुमें मिली जु कूल बिदारि । नाम मिट्यो सलिलै भई तब कौन निबै बारि ॥
चित आकर्ष्यो नंदसुत मुरली मध्वाजजाइ । जिहि लज्जा जग लज्जियो सो लज्जा आई लजाइ ॥ प्रेम
मगन ग्वालनि भई सूर सुप्रभुके सति फौकबैन मुख नासिका ज्यों केंचुलि तजै भुजंग ॥ ८२ ॥

(२५८)

सूरसागर ।

राग सुवर्ग ॥ छोटी मटुकीया मधुर चाल ले चलौरी गोरस बेंचन रसाल । हरबराइ उठि आइ प्रातते
 विधुरी अलक अरु वसन मरगजै तैसीये सोहति कुँभिलानी माल ॥ गेहनेह सुधि नेक न आवति
 मोहिरही तजि भव जंजाल । औरै कहति और कहि आवति मनमोहनके परी ख्याल ॥ जोइ जोइ
 बृझतहै री कहा यामें कहति फिरति कोऊ लेहु गोपाल । सूरदास प्रभुके रस वश भई चतुर
 ग्वालिनी तनु मनु गति बेहाल ॥ ८३ ॥ राग कान्हरो ॥ दधि मटुकी शिरधरे ग्वालिनी कान्ह कान्ह
 करती डोलै । विवशभई तनु न सँभारै री गोरस सुधि बिसरि गई आपु बिकानी बिनु मोलै ॥
 जोइ जोइ पृच्छत यामें है री कहा लेहु लेहु करति फिरति डोल डोलै ॥ सूरदास प्रभुके रस वश
 भई ग्वालिनी विरहा वशतनुगति भयो डोलै ॥ ८४ ॥ राग धनाश्री ॥ बेचतिही दधि ब्रजकी खोरि ।
 शिरको भार सुरति महि आवति श्याम श्याम टेस्त भई भोरि ॥ घर घर फिरति गोपालहि बेंचति
 मगनभई मन ग्वारि किशोरि । सुंदर वदन निहारन कारन अंतर लगी सुरतिकी डोरि ॥ ठाढी
 भई विथकि मारगमें माँझ हाट मटुकी सो फोरि । सूरदास प्रभु रसिक शिरोमणि चित चिंता
 मणि लियो अजोरि ॥ ८५ ॥ राग विलावल ॥ नर नारी सब बृझत जाई । दही मही मटुकी शिर लीन्हें
 बोलतिहो गोपाल सुनाई ॥ हमहि कहो तुम करति कहा यह फिरति प्रातहीते हो आई ।
 गृह द्वारा कहुँ की नाहीं पिता मात पति बंधु न माई ॥ इतते उत उतते इत आवति बिधि
 मर्यादा सबै मिताई । सूर श्याम मन हरयो तुम्हारो हम जानी इह बात बनाई ॥ ८६ ॥ राग धनाश्री ॥
 कहति नंदवर मोहिं बतावहु । द्वारहि माँझ बात इह कहती है कहा मोहिं दिखावहु ॥ याही गाँव
 किधौ औरै कहुँ जहां महरको गेहु । बहुत दूरिते मैं आईहौं कहि काहे न यश लेहु ॥ अतिही
 संभ्रम भई ग्वालिनी द्वारेही पर ठाढी । सूरदास स्वामीसों अटकी प्रीति प्रगट अतिबाढी ॥ ८७ ॥
 राग गुंडमलार ॥ १ ॥ रारिनि नंदद्वार नंद गृह वृझै । इतहिते जाति उत उतहिते फिरै इत निकटहै जाति
 नहिं नेक सुझै ॥ भई बेहाल ब्रजवाल नंदलाल हित अपि तन मन सबै तिन्हें दीन्हों । लोकलज्जा तजी
 लाज देखत लजी श्यामको भजी कछु डर न कीन्हों ॥ भूलिगयो दधि नाम कहति लेहौ श्याम
 नहीं सुधि धाम कहु है कि नाहीं । सूर प्रभुको मिली भेंट भली अनभली चून हरदी रंग देह छाही ॥
 ॥ ८८ ॥ राग रामकली ॥ तब एक सखी प्रीतम कहति । प्रेम ऐसो प्रगट कीन्हों धीर काहेन गहति ॥ ब्रज
 घरनि उपहास जहँ तहँ समुझि मन किनु रहति । बात मेरी सुनत नाहिन कतहि निंदा सहति ॥ मातु
 पितु गुरु जननि जान्यो भली खोई महति । सूर प्रभुको ध्यान चितधरि अतिहि काहे वहति ॥ ८९ ॥
 राग धनाश्री ॥ आपु कहावति बडी सयानी ॥ तब तू कहति सबनिसों हँसि हँसि अब तू प्रगटहि भई दिवानी ॥
 कहाँगई चतुराई तेरी अतिही काहे भई अयानी । गुप्तप्रीति परगट तैं कीन्ही सुनति कछु घर घरकी
 बानी ॥ एकहि बेर तजी मर्यादा मात पिता गुरुजनहि भुलानी । सुनहु सूर ऐसी न बूझिए शीश
 धरे मटुकी वितता ॥ ९० ॥ राग नटा ॥ सुनु री ग्वारि सुगुध गवॉरि ॥ श्यामसों हित भले कीन्हों राखिसकै
 उबारि ॥ ओछी बुँ तैं करी सजनी लाज दीन्ही डारि । लाज आवति मोहिं सुनि री तोहिं कहत
 गँवारि ॥ कृष्णधन वृषा प्रगट कीजै दियो ताहि उधारि । अजहुँ काहेन समुझि देखति कद्यो सुनो री
 नारि ॥ जवाब नाहिन आवई मुख कहतिहौ जो पुकारि । सूर प्रभुको पाइकै यह ज्ञान हृदय बिचारि ॥
 ॥ ९१ ॥ राग कान्हरो ॥ कहुँ कैहै की मौनहि रहिहै ॥ कहा कहतिहौं तोसौं तबकी ताको जवाब कछु मोहि देहै ॥
 सुनिहै मात पिता लज्जनि मुख यह लीला उनि सबै जनैहै ॥ प्रातहि हो जाई दधिबेंचन घरही आजु जैहै
 कि न जैहै ॥ मेरो कह्यो मानिहै नाहीं ऐसेही भ्रमि भ्रमि द्योस ॥ बेनिदुखतौ खोलि सुनौ तेरीबानी भलीबुरी

कैसी घर कैहै ॥ गुप्तप्रीति काहे न करी हरिसों प्रगट किए कछु नफा बढैहै । सूर श्यामसों प्रीति निरंतर लाजकिए अंतर कछु हैहै ॥ ९२ ॥ कहा कहति तू मोहि री माई । नैदनंदन मन हरि लियो मेरो तबते-मोको कछु न सोहाई ॥ अबलौं नहि जानति मैं कोही कवते तू मेरे ढिग आई । कह । ह कहां मात पिताहैं कहां सजन गुरुजन को भाई ॥ कैसी लाज कानिहै कैसी कहा कहति हैहै रिस हाई । अबतौ सूर भजी नैदलालहि की लघुता की होउ वडाई ॥ राग धनाश्री ॥ बार बार मोहि कहा सुनावति । नेकहु टरत नहीं हृदयते अनेक भांति मनको समुझावति ॥ दो बल कहा देति मोहि सजनी तूतो बडी सुजान । अपनीसी मैं बहुतै कीन्ही रहति न तेरी आनालोचन और न देखत काहू और सुनत नहि कान । सूर श्यामको बेगि मिलावहु कहति रहत घट प्रान ॥ ९३ ॥ सबै हिरानी हरि मुख हेरे । घूँघट ओट पटओट करे सखि हाथों हाथन मेरे ॥ को है लाज कौनको डरहै कहा कहैं भयो तेरे । को अब सुनै श्रवनहै काके निपट निगमके टेरे ॥ मेरे नैननहो नैननकी जोपै जानत फेरे । सूरदास है चेरी कीनी मन मनसिजके चेरे ॥ ९४ ॥ राग नट ॥ मेरे कहमें कोऊ नाहीं । कहा कहों कछु कहि नहि आवै एकहु नहीं डराहीं ॥ नयन ए हरि दर्शनलोभी श्रवण शब्द रसाल । प्रथमही मन गयो तनु ताजि तब भई बेहाल ॥ इन्द्रियन पर भूप मनहै सबनि लिये बुलाइ । सूर प्रभुको मिले सब ए मोहि करि गये बाइ ॥ ९५ ॥ राग गौरी ॥ कहा करौं मन हाथ नहीं । तू मोसों यह कहत अली री अपना चित मोहि देत नहीं ॥ नयन रूप अटके नहि आवत श्रवन रहे सुनि बात तही । अंद्रीधाइ मिली सब उनको तनुमें जीव रह्यो सँगही ॥ मेरे हाथ नहीं ये कोऊ घटलीन्हें इक रही ही । सूरश्याम संगते कहुँ टरत न आनि देहि जौ मोहि तुही ॥ ९६ ॥ राग सारंग ॥ बिकानी हरिमुख की सुसकानी । परवशभई फिरति सँग निशिदिन सहजपरी यह वानि ॥ नैननि निरखि बसीठी कीनन मनु मिलियो पय पानि । गहि रतिनाथ लाज निज पुरते हरिको सौंपी आनि ॥ सुनि सखि सुखी नैदनंदनकी दासी सब जग जानि । जोइ जोइ कहत करत सोईकृत आयसु माथे मानि ॥ गई जाहि अभिमान मोह मद पति परजन पहिचानि । सूर सिंधु सरिता मिलि जैसे मनसा बूँद हिरानि ॥ ९७ ॥ अबतो प्रगट भई जग जानी । वा मोहनसों प्रीति निरंतर क्यों बरहैगी छपानी ॥ कहा करौं सुंदर मूरति इनि नयननि मांझ समानी । निकसत नहीं बहुत पचिहारी रोम रोम अरुझानी ॥ अब कैसे निरवारि जातिहै मिली दूध ज्यों पानी । सूरदास प्रभु अंतर्यामी उर अंतरकी मानी ॥ ९८ ॥ कहा करैगो कोऊ मेरो । हौं अपने पतिव्रतहि न टरिहौं जग उपहास करौ बहुतेरो ॥ कोउ किनलै पाछे मुख मोरै कोऊ कहै श्रवन सुनाइ न टेरो । हौं मति कुशल नाहिनै काची हरिसँग छांडि भिरो भवफेरो ॥ अबतौ जी ऐसी बनिआई श्यामधाम मैं करा बसेरो । तेहिरँग सूररँगयो मिलिकै मन होइ न श्वेत अरुन फिरि पेरो ॥ ९९ ॥ राग धनाश्री ॥ माई री गोविंदासों प्रीति कृत तबहीं काहेन हट की री । यहतौ अब बात फैलि गई बई बीज वटकी री ॥ घर घर नित इहै घेर बानस घटघटकी । मैंतो यह सबै सही लोकलाज पटकी ॥ मदके हस्ती समान फिरति प्रेम लटकी ॥ रंगलत में चूकि जाति होति कला नटकी । जल रजु मिलि गांठिपरी रसना हरि रटकी ॥ छोरेते हीं छुटति कइकबेर झटकी ॥ मेटे क्योंहू न मिटति छाप परी टटकी । सूरदास प्रभुकी छबि हिरदै में अटकी ॥ १०० ॥ राग आसावरी ॥ मैं अपना मन हरिसों जोरयो । हरिसों जोरि सबनिसों तोरयो ॥ नाच कछयो तब घूँघुट छोरयो लोकलाज सगळटक पिछोरयो ॥ आगे पाछे नीके हेरयो । मांझबाट मटुकी शिर फोरयो ॥ कहि कहि कासों पति फकिदोरयो । कहा भयो कोऊ मुख मोरयो ॥ सूरदास प्रभुसों

चित जोरयो । लोकवेद तिनुकासों तोरयो ॥ १ ॥ सखीरी श्यामसों मन मान्यो । नीके करि
 चित कमलनैनसों घालि एकठो सान्यो ॥ लोकलाज उपहास न मान्यो न्योति अपनेही आन्यो ।
 या गोबिंदचंदके कारन बैर सबनिसों ठान्यो ॥ अब क्यों जाति निबेरि सखी री मिलो एक पय पान्यो ॥
 सूरदास प्रभु मेरी जीवनि है पहिली पहिचान्यो ॥ २ ॥ नंदलालसों मेरो मन मान्यो कहा करैगो
 कोई री । मैं तो चरणकमल लपटानी जो भावै सो होई री ॥ बाप रिसाइ माइ घर मारे हैंसे विरानो
 लोग री । अब तौ श्यामहिसों रति बाढी बिधिना रच्यो संयोग री ॥ जाति महति पति जाइ न मेरी
 अरु परलोक नशाई री । गिरिधर वर मैं नेक न छाँडौ मिली निशान बजाइ री ॥ बहुरि कबहिं यह तनु
 धरि पैहौ कहा पुनि श्रीवनवारी री । सूरदास स्वामीके ऊपर यह तनु डारौ वारी री ॥ ३ ॥ राग सारंग ॥
 करनदै लोगनको उपहास । मन क्रम वचन नंदनंदनको नैक न छाँडौ पास ॥ सब या ब्रजके लोग
 चिकनियां मेरे भाए घास । अबतो इहैवसी री माई नहिं मानौंगी त्रास ॥ कैसे रह्यो पैर री सजनी
 एकगाँवको वास । श्याम मिलनकी प्रीति सखी री जानत सूरजदास ॥ ४ ॥ राग रामकली ॥ एक गाउँको
 वास धीरज कैसेकै धरौ । लोचन मधुप अटक नहिं मानत यद्यपि जतन करौ ॥ वे येहि मग
 नितप्रति आवतहैं हों दधि लै निकरौ । पुलकित रोम रोम गद गद सुर आनंद उमंगिभरौ ॥ पल
 अंतर चलिजत कलपवर विरहा अनल जरौ । सूर सकुच कुलकानि कहाललि आरजपंथहि
 डरौ ॥ ५ ॥ मेरो मन हरि चितवनि अरुझानो । फेरत कमलद्वारहै निकसे करत शृंगार भुलानो ॥
 अरुन अधर दानानि छुति राजति मोहन सुरि सुसकानों । उदधितनया सुत पांति कमलके
 बंदन भुरके झानों ॥ सुभग कपोल लोल मणिकुंडल इह उपमा केहि वानों ।
 उभयअंक आँख पान अमीरस मीन प्रसत बिधि भानों । यह रस मगन रहति निशि
 वासर हारि जीति नहिं जानों । सूरदास चितभंग होत क्यों जो जेहिरूप समानो ॥ ६ ॥ राग रामकली ॥
 हों संग साँवरेके नैहों । होनी होइ सो होवै अबहीं यश अपयश काहु न डरैहों ॥ कहा रिसाइ करै
 कोउ मेरो कछु जी कहै प्राण तेहि दैहों । दैहों त्यागि राखिहों यह व्रत हरि रति बीज बहुरि कब
 बैहों ॥ का यह सूर अजिर अवनी तनु तजि अगास पिय भवन समैहों । का यह ब्रजवापी कीडा
 जल भजि नंदनंद सबै सुख लैहों ॥ ७ ॥ राग धनाश्री ॥ तैं मेरे हित कहत सही री । यह मोको सुधि भली दिवाई
 तनु विसरे मैं बहुत बही री ॥ जवते दान लियो हरि हमसों हँसि हँसि री कछु बात कही री । काके घर
 काके पित माता काके तनुकी सुरति रही री ॥ अब समुझति कछु तेरी बाणी आई हों लइ दही मही री ।
 सुनहु सूर प्रातहिते आई यह कहि कहि जिय लाज गही री ॥ ८ ॥ सुन री सखी बात एक मेरी ।
 तोसों धरौ दुराइ कहीं केहि तू जानहि सब चितकी मेरी ॥ मैं गोरस लै जाति अकेली कालि
 कान्ह बहियाँ गहि मिमेरी । हारसहित अचरा गहो गाढे एक कर गह्यो मटुकिया मेरी ॥ तब मैं क-
 ह्यो खीझि हरि छाँड़ि टूटैगी मोतिन लर मेरी । सूर श्याम ऐसे मोहि रिझई कहा कहति तू मोसों
 मेरी ॥ ९ ॥ तऊ न गोरस छाँडि द्यो । चहुँ फल भवन गह्यो सारंगरिपु वाजि धरा अथयो ॥
 अमी वचन रुचि रच्यो कपटहठि झगरो फेरि ठ्यो । कुमुदिन प्रफुलितहों जिय सकुची लै मृगचंद
 जयो ॥ जानि निशाचरि शिर रूप बिलोकत नवलकिशोर भयो । तबते सूर नेक नहिं छूटत मन अप-
 नाइ लयो ॥ १० ॥ राहु नट ॥ सखी वह गई हरिपै धाइ । तुरतही हरि मिलो ताको प्रगट कही सुनाइ ।
 नारि एक अति परम दूरि वरन कापै जाइ । प्रातते शिर धरे मर्यादी नंदगृह भरमाइ । लेहु लेहु
 गोपाल कोऊ दह्यो गई भुलाइ । सूर प्रभु कहुँ मिलें ताको बलिद्वार करि चतुराइ ॥ ११ ॥ राग कान्हरो ॥

नंदग्रामको मार्ग बूझै है कोऊ दधि बेचनहारी । सुनहु न श्याम कठिन तनुगारै विधुबदनी अरु हाटं
 कठारी ॥ अब याको सुर ताहि विरंचै जाहि विरंचि शीशपग धारी । कमल कुरंग चलत बरुना
 भष राख्यो निकट निषंग सँवारी ॥ गति मराल शावक ता पाछे जावक मुक्ता चुनत बिसारी ।
 सूरदास प्रभु कहत वनै नहिं सुख संपति वृषभानु दुलारी ॥ १२ ॥ राग बिलावल ॥ शिर मटुकी मुखमौन
 गही ॥ भ्रमि भ्रमि विवशभई नवगवालिन नवल कान्हके रस उमही ॥ तनुकी सुधि आवति जब मनही
 तबहि कहति को लेत दही । द्वारे आइ नंदके बोलति कान्ह लेहु किन सरस मही ॥ इत उत
 है आवति फिरि इहँई महारि तहाँ लगि द्वार रही । अवर बोलावत ताहि न हेरत बोलति आनि
 नंद दरही ॥ अंग अंग यशुमति तेहि चरची कहा करति यह ग्वारि वही । सुनहु सूर यह ग्वारि
 भ्रमानी कबकी एही ढंग रही ॥ १३ ॥ राग रामकली ॥ कबकी मह्यो लिये शिर डोलै ॥
 झूठेही इत उत फिरि आवै इहां आनि पै बोलै ॥ मुँहसों भरी मथनियां तेरी तोहिं रटत
 भई सांझ । जानतिहौ गोरसको लेवो याही बाखरि मांझ ॥ इत धौं आइ बात सुनि मेरी
 कहे बिलग जिनि माने । तेरे घरमें तूही सयानी और बेचि नहिं जाने ॥ भ्रमतहि भ्रमत भ्रमिगई
 गवालिन बिकलभई बेहाल । सूरदास प्रभु अंतर्याधी आइ मिले गोपाल ॥ १४ ॥ भयो मन
 माधवकी अवसेर । मौनधरे सुख चितवति ठाढी ज्वाब न आवै फेर ॥ तब अकुल है चली उठि
 बनको बोले सुनत न टेर । विरह विवश चहुंधा भरमतिहै श्याम कहा कियो झेर ॥ अंभुं बेगि मिलो
 नंदनंदन दान करो निरबेर । सूर श्याम अंकम भरिलीन्ही द्वारि कियो दुख ढेर ॥ १५ ॥ राग बिलावल ॥ सांची
 प्रीति जानि हरि आए । पूरन नेह प्रगट दरशाए ॥ लई उठाइ अंक भरि प्यारी । भ्रमि भ्रम श्रम कीन्हीं
 तनु भारी ॥ मुख मुख जोरि अलिंगन दीन्हों ॥ बार बार भुज भरि भरि लीन्हों ॥ वृंदावन धनकुंज लतातर
 श्यामा श्याम नवल नबला बर ॥ मनमोहन मोहनी सुखकारी । कोककला गुण प्रगटे भारी ॥
 छूटे बंद अलक शिर छूटे । मोतिनहार टूटि सुख लूटे ॥ सूर श्याम बिपरीत बढाई कनागरि सकुचि
 रही लपटाइ ॥ १६ ॥ राग रामकली ॥ यह कहि मौन साध्यो ग्वारि । श्याम रस घट पूर उछलित बहुरि
 धरयो सँभारि ॥ वैसेही ढंग बहुरि आई देह दशाबिसारि । लेहु री कोऊ नंदनंदन कहै पुकारि
 पुकारि ॥ सखीसों तब कहति तूरी को कहांकी नारि । नंदके गृह जाउँ कित है जहाँ है बनवारि ॥
 देखि वाको चकृत भई सखि बिकल भ्रम गई मारि । सूर श्यामहि कहि सुनाऊं गए शिर कहा डारि
 ॥ १७ ॥ राग नट ॥ श्यामा श्याम करत बिहार । कुंजगृह रचि कुसुम शैया छबि बरानि को पार ॥
 सुरति सुख करि अंग आलस सकुचि बसन सँभारि । परस पद भुज कंठ दीन्हे बैठेहैं बरनारि ॥
 पीत कंचन बरन भामिनि श्याम तनु अनुहारि । सूर घन अरु दामिनी मिलि प्रगट सुख
 बिस्तारि ॥ १८ ॥ राग कान्हरो ॥ राधा वसन श्याम तनु चीन्ही । सारंग बदन बिलस बिलोचन हरि
 सारंग जानि रति कीन्ही ॥ सारंग बचन कहत सारंगसों सारंगरिषु दै राखति इम्नी । सारंगपानि
 कहत रिषु सारंग सारंग कहा कहति लियो छीनी ॥ सुधापान कर कुचनीकी बिधि रह्यो शेष फिरि
 मुद्रा दीन्ही । सूर सुदेश आहि रतिनागर भुज आकर्षि बान कर लीन्ही ॥ १९ ॥ तुमसों कहा
 कहाँ सुंदरघन । या ब्रजमें उपहास चलतहै सुनि सुनि श्रवन रहति मनही मन ॥ जा दिन सबनि
 बछरु नोई करि मो दुहिदई धेनु बंसीबन । तुम गही बाँह सुभाइ आपनेहों चितई हैंसि
 नेक बदनतन ॥ ता दिनते घर मीन जित तित करत चवाउ सकल गोपीधन । सूर श्यामसों
 पांच पारिहौं यह पतिबरत सुनहु नंद ॥ २० ॥ राग मैरवा ॥ कहा कहाँ सुंदर घन तुमसों । घेरा इहै

(२६२)

सूरसागर ।

चलावत घरघर श्रवण सुनत जिय खुनसों ॥ भैनी मात पिता बंधव गुरु गुरुजन यह कहैं मोसों ।
 राधा कान्ह एक संग विलसत मनहींमन अपसोसों ॥ कबहुँक कहों सबनि परित्यागों बूझतिहों अब
 गोसों । सूर श्याम दरशन विन पाये नयन देत मोहिं दोसों ॥ २१ ॥ राग रामकली ॥ बात यह तुमसों
 कहत लजाउँ । सुनि न जात घर घरको घेरा काहु मुख न समाउँ ॥ नर नारी सब इहै चलावत
 राधा मोहन एक । मात पिता सुनि सुनि अति त्रासत मैं एकै वे अनेक ॥ आपु जबहि द्रोहहै निक-
 सत देखत सबै सुगात । निंदति तुमहि सुनावति मोको सुनत न नेक सोहात ॥ धृग नर धृग नारी
 धृगजीवन तुमहि विमुख धृग देहा ॥ सूर श्याम यह कोऊ न जानत तनु है जरी खेह ॥ २२ ॥ राग गूजरी श्याम
 यह तुमसों क्यों न कहों । जहाँ तहाँ घरघरको घेरा कौनी भांति सहों ॥ पिता कोपि करवाल लेत
 कर बंधु बधनको धावै । मात कहै कन्या कुलको दुख जनि कोऊ जग जावै ॥ बिनती एक करौ
 कर जेरे यहि बीथिनि जिनि आवैये जन सब आपुनको जानत ते जय जन्म न पावै ॥ मन क्रम वचन
 कहतिहों सांची मैं मन तुमहि लगायो । सूरदास प्रभु अंतर्दामी क्यों न करहु मनभायो ॥ २३ ॥
 राग रामकली ॥ हँसि बोले गिरिधर रसवानी । गुरुजन खिझत कतहि रिस पावति काहेको पछितानी ॥
 देहधरेको धर्म इहै सजन कुटुंब गृहप्रानी । कहन देहु कहि कहा करैगे अपनी सुरति हिरानी ॥
 लोकलाज काँको छाँडति ब्रजही बसे भुलानी । सूरदास घट है द्वै करि मन ये भेद नहीं कछुजानी ॥
 ॥ २४ ॥ राग जातश्री ॥ ब्रजवसि काके बोल सहों । तुम बिन श्याम और नहीं जानों सकुचनि तुमहि
 कहों ॥ कुलकानि कहा लौं करिहों तुमको कहाँ लहों । धृग माता धृग पिता विमुख तुव भावै
 तहाँ वहाँ ॥ कोई करै कहै कछु कोऊ हरष न शोक गहों । सूर श्याम तुमको बिनु देखे तन मन जीव
 दहों ॥ २५ ॥ जहि बसे आपुहि विसरायो । प्रकृति पुरुष एकै करि जानहु बातनि भेद करायो ॥
 जल थल जहाँ हो तुम बिनु नहीं भेद उपनिषद गायो । द्वै तनु जीव एक हम तुम दोऊ सुख
 कारण उपजायो ॥ ब्रह्मरूप द्वितिया नहीं कोई तब मन त्रिया जनायो । सूर श्याम सुख देखि अल
 पहँसि आनंद पुनि बढ़ायो ॥ २६ ॥ राग रामकली ॥ तब नागरी मन हरष भई । नेह पुरातन जानि
 श्यामको अति आनंदमई ॥ प्रकृति पुरुष नारी मैं वेपति काहे भूलि गई । को माता को पिता बंधु
 को यहतो भेटनहीं ॥ जन्म जन्म युग युग यह लीला प्यारी जानि लई । सूरदास प्रभुकी
 यह महिमा यात विवश भई ॥ २७ ॥ राग सूही ॥ सुनहु श्याम मेरी इक बिनती । तुम हरता
 तुम करता प्रभुजू मात पिता कौने गनती ॥ गैवर भेति चढावत रासभ प्रभुता मेटि
 करत दिनती । बल्लों करी लोक मर्यादा मानहु थोरहि दिनती ॥ बहुरि बहुरि ब्रज
 जन्म लेतहों इह लीला जानी किनती । सूर श्याम चरणनि ते मोको राखत रहै कहा मिनती ॥
 ॥ २८ ॥ राग धनाश्री ॥ देह धरेको यह फल प्यारी । लोकलाज कुलकानि मानिये डरिये बंधु पिता
 महतारी ॥ श्रीमुख कह्यो जाहु घर सुंदरि बडे महर वृषभानुदुलारी । तुम अवसर करत सब है
 जाहु बेगि देहै पुनि गारी ॥ हमहुं जाहिं ब्रज तुमहु जाहु अब गेह नेह क्यों दीजै डारी । सूरदास
 प्रभु कहत प्रियासह नहिं मोते तुम न्यारी ॥ २९ ॥ राग धनाश्री ॥ देह धरेको कारण सोई । लोक
 लाज कुलकानि न भजिये जाते भलो कहै सब कोई ॥ मात पिताके डरको माने माने सजन कुटुंब
 सब लोई । तात मात मोहुको भावत तनुधरिकै मायावश होई ॥ सुनि वृषभानु सुता मेरी बानी
 प्रीति पुरातन राखी गोई । सूर श्याम नागरिहि सुनावत मैं तुमका नहीं हो दोई ॥ ३० ॥ राग सारंग ॥
 अब कैसे दूजै हाथे विकारुं । मन मधुकर कीन्हो वा द्विज कल निज ठाऊं ॥ जो जानो

औरै कोई करता तऊ न मन पछिताऊं । जो जाको सोई सो जाने अवतारन नर नाऊं ॥ जब परती-
 ति होइ या युगकी परमिति छुटत डेराऊं । सूरदास प्रभुसिंधु शरण तजि नदी शरन कत
 जाऊं ॥ ३१ ॥ राग विलावल ॥ घर पठई प्यारी अंकमभरि । कर अपने मुख परसि त्रियाके प्रेमसहित
 दोऊ भुज धरिधरि ॥ सँग सुख लूटि हरषभई हृदय चली भवन भामिनि गजगति ढरि । अंग
 मरगजी पटोरी राजति छबि निरखत रीझत ठाढे हरि ॥ बेनी डुलति नितंबनि पर दोउ छीन
 लंक पर वारों केहरि । फिरि चितयो तब प्यारी पियतन दुहूँ मनै आनंद हरष करि ॥ राधाहरि
 आधा आधा तनु एके द्वै ब्रजमें ह्वै अवतरि । सूर श्याम रस भरी उमँग अँग वह छवि देखिरह्यो रतिपति
 डरि ॥ ३२ ॥ राग विलावल ॥ घरहि जाति मन हरष बढ़ाये । दुख डारचो सुख अंग भारभरि चली लूहि
 सो पाये ॥ भौंह सकोरति चलति मंदगति नेक वदन सुसुकाए । तहँ एक सखी मिली राधाको
 कहति भयो मनभाए ॥ कुंजभवन हरि संग विलसि रस मनके सुफल कराए । सूर सुगंध
 चुनावन हारे कैसे दुरत दुराए ॥ ३३ ॥ राग जयतश्री ॥ कहा फूली आवत री राधा । मानहुँ मिली अंक
 भरि माधव प्रगटत प्रेम अगाधा ॥ भुकुटी धनुष नैन सरसाधे वदन बिकास अगाधा । चंचल
 चपल चारु अवलोकनि काम नचावति ताधा ॥ जेहि रस शिव सनकादि मगल भए शंभु
 रहत दिन साधा । सो रस दिये सूर प्रभु तोको शिवा न लहति अराधा ॥ ३४ ॥ राग सोरठ ॥
 राधेसों रस बरनि न जाई । जा रसको सुर भान शीश दियो सो तैं पियो अकुलाई ॥
 पचिहारे सब बाल कमलमुख चंद्रवदन ठहराई । अजहुँ कमंध फिरत तेहि लालच सुंदरि सैन
 बुझाई ॥ मोहन ते रसरूप आगरी कटति न जानि निकाई । सूरदास पपिहाके मुख कैसे सिंधु
 समाई ॥ ३५ ॥ राग नट्यामोसों कहा दुरावति राधा । कहाँ मिली नंदनंदनको जिन पुरयो मनको साधा ॥
 व्याकुलभई फिरतही अबहीं कामव्यथा तनुबाधा ॥ पुलकित रोम रोम गदगद अब अँग अँग रूप अ-
 गाधा ॥ नहिं पावत जोरस योगीजन तब तप करत समाधा ॥ सुनहु सूर तेहि रस परिपूरन दूरि
 कियो तनुदाधा ॥ ३६ ॥ राग आसावरी ॥ कहा कहति तू भईबावरी ॥ तू हँसि कहति सुनै कोउ औरै कहा
 कीन्हों चाहति उपाव री ॥ सो तो सांच मानि यह लैहै हमहि तुमहि बाते सुभावरी । मेरी प्रकृति
 भलै करि जानति मैं तोसों करिहौं दुराव री ॥ ऐसी कैसे होइ सखी री घर पुनि भरो है बचाव री ।
 सूर कहति राधा सखी आगे चकितभई सुनि कथा राव री ॥ ३७ ॥ राग सारंग ॥ श्याम कौन कारेकी
 गोरे । कहा रहत काके वै ढोंटा बृद्ध तरुण की वोहैं भोरे ॥ यहँ रहत कि औखगाउं कहुँ मैं देखे
 नाहिन कहुँ उनको । कहै नहीं समझाइबात इह मोहि लगावति हौ तुम जिनको । कहा रहौ मैं वै धौं
 कहाँके तुम मिलवतिहौ काहे ऐसी । सुनहु सूर मोसी भोरीको जोरि जोरिलावतिहौ कैसी ॥
 ॥ ३८ ॥ जाहु चली मैं जानी तोको । आजुहि पढि लीन्हीं चतुराई कहा दुराति मोको ॥ एही
 ब्रज तुम हम नंदनंदनहुँ दूरि कतहुँ नहिं जैहैं । भोरे फंद कबहुँ तौ परिहौ मुजरा सबहीं दैहैं ॥ उनहि
 मिले वितपन्न भई अब वै दिन गए भुलाइ । सूर श्याम सँगते उठि आई मोसों बूझति दुराइ ॥ ३९ ॥
 राग सोरठ ॥ हँसत कहत कीधों सतभावतेरी सों मैं कछु न समझति कहा कह्यो । हिं बहुरि सुनाउ ॥
 मेरी शपथ तोहिं री सजनी कबहुँ कछु पायो यहि भाउ । देख्यो नयन सुन्यो कहुँ श्रवणनि झूठे
 कहति फिरतिहौं दाउ ॥ यह कहती औरै जो कोऊ तासों मैं करती अपडाउ । सूरदास यह मोहि
 लगावति सपनेहु जासों नहिं दरशाउ ॥ ४० ॥ राग धनाश्री ॥ राधे तेरो वदन बिजुजत नीको । जब तू
 इतउत बंक बिलोकति होतें निशापति फीको ॥ भुकुटी धनुष नैन शर साधे शिर केसरिको टीको ।

मनु बूँधटपट मैं दुरि बैठो पारधिपति रतिहीको॥गति मैं मंत नाग ज्यों नागारि करे कहतिहौ लीको॥
 सूरदास प्रभु विविध भांति करि मन रिझयो हरिपीको॥४१॥ राग विहागरो॥राजति राधे अलकभलीरी॥
 मुक्तामांग तिलक पन गनि शिर सुत सेमत भषलेन चलीरी॥ कुमकुम आड स्रवत श्रमजलमिलिं
 मधु पीवत छविछीट चलीरी । चारु उरोज ऊपर यों राजत अरुझे अलिकुल कमल कलीरी ॥
 रोमावली त्रिवली उर परशत वंशबद्ध नट काम बलीरी॥ प्रीति सोहाग भुजा शिरमंडन जघन सघन
 विपरीत कदलीरी॥जावक चरण पंचशरसायक समरजीति लै शरन चलीरी । सूरदास प्रभुको
 सुखदीन्हो नख शिख राधे सुखनि फलीरी४२॥रामकली॥सजनी कत यह बात दुरैहौ॥ऐसी मोहिं कहै
 जिनि कबहुं झूठे पर दुख पैहौ॥तोते पीतम और कौनहै जाके आगे कहौ । मोको उचठा एक छपैहो
 बहुरि नाउँ नहीं लैहौ ॥ यह परतीति नहीं जिय तेरे सो कहा तोहि चुरैहौ । सूरश्याम घौं कहाँ
 रहतहै काहेको तहां जैहौ ॥ ४३ ॥ राग धनाश्री॥चतुर सखी मन जानि लई । मोसों तौ दुराव यह की-
 न्हों याके जिय कछु त्रास भई ॥ तव यह कह्यो हँसत री तोसों जिनि मनमें कछु आनै । मानी बात
 कहां वै कहां तू हमहूँ उनहि न जानै ॥ अबै तनक तू भई सयानी हम आगेकी बारी । सूरश्याम
 ब्रजमें नहि देखे हँसत कह्यो घर जारी ॥४४॥ राग विलावलं ॥ सकुच सहित घरको गई वृषभानु
 दुलारी । महौ देखि तासों कह्यो कहै रही री प्यारी ॥ घर तोहि नैक न देखऊँ मेरी महतारी॥ डो
 लत लाज न भावई अजहूँ है बारी ॥ पिता आजु रिसकरतहै दैद कहै गारी । सुता बडे वृषभानु
 की कुलखोव गारी ॥ बंधव मारन कहतहै तेरे ढगकारी । सूरश्याम संग फिरतिहै जोबन मतवारी
 ॥ ४५ ॥ राग डमलारा॥कहा री कहति तू मातु मोसों॥ ऐसे बहिगईको श्याम संग फिरै जो वृथा रिस
 करति कहा कौं तोसों ॥ कही कौने बात बोलिये तेहि मात मेरे आगे कहै ताहि देखो । तात रिस
 करत भ्राता को मारिहौं भीति विन चित्र तुम करति रेखो ॥ तुमहु रिस करति कछु कहा मोहिं
 मारिहो धन्य ॥ हेतु भ्रात मात अरुनही । ऐसे लायक नंदमहरको सुत भयो तिनहि मोहि कहति
 प्रभु सूर सुनही ॥४६॥ राग गूजरी ॥ काहेको परघर छिन छिन जाति । गृहमें डाटि देति शिखजननी
 नाहिन नेक डरा ॥ राधा कान्ह कान्ह राधा ब्रज ह्वैरह्यो अतिहि लजाति । अब गोकुलको जैवो
 छाँडौ अपयशहूँ न अचाति ॥ तू वृषभानु वडेकी बेटी उनके जाति न पांति । सूर सुता समुझा
 वति जननी सकुच नहि सुसकाति ॥ ४७ ॥ राग कान्हरो ॥ खेलनको मैं जाउँ नहीं । और लरिकनी
 घर घर खेलति मोहीको पै कहति तुही ॥ उनके मात पिता नहि कोई खेलति डोलति जही
 तही । तोसी महारी बहि जाई न मैं रहै तुमही विनही ॥ कबहुं मोको कछु लगावति कबहुं
 कहति जिन जाहु तही । सूरदास बातें अनखोही नाहिन मोपै जात सही ॥ ४८ ॥ राग सारंग ॥ मनही
 मन रीझति महारी । कहा भई जो बाढि तनकगई अवहीं तौ मेरीहै बारी ॥ झूठेही वह बात
 उड़ीहै राधा काहु कहत नर नारी । रिसकी बात सुताके सुखकी सुनत हँसी मनही
 मन भारी ॥ अहाँ नहीं कछु इहि जान्यो खेलत देखि लगावै गारी । सूरदास जननी उर
 लावति सुखचूमा ॥ पोछति रिसटारी॥४९॥राग मृहा ॥ सुता लये जननी समुझावति । संग बिटि
 निअनके मिलि खे ॥ श्याम साथ सुनि सुनि रिस पावति ॥ जाते निंदाहोइ आपनी जाते कुलको
 गारी आवति । सुहा लाडिले कहति यह तासों तोको याते रिस करि धावति ॥ अब समुझी मैं
 बात सबनकी झूठेही यह बात उठावति । सूरदास सुनि सुनि यह बातें राधा मन अतिहरष बढा
 वति ॥ ५० ॥ राग मृहा ॥ राधा विनयकरति मनहीं मन सुनहु श्याम अंतरके यामी । मात पिता कुल

कानिहि मानत तुमहि न जानतहैं जग स्वामी॥ तुम्हरो नाम लेत सकुचतहैं ऐसे ठौर रहीहों आनी ।
 गुरु परिजनकी कानि मानियो बारंबार कही मुख बानी ॥ कैसे संग रहों बिमुखनके यह कहि कहि
 नागरी पछितानी । सूरदास प्रभुको हृदय धरि गृहजन देखि देखि सुसकानी॥५१॥ राग धनाश्री ॥ जब
 प्यारी मन ध्यान धरयो । पुलकित उर रोमांच प्रगट भए अंचर टरि मुख उघरि परयो ॥ जननी
 निरखि रही ता छबिको कहन चहैं कछु कहि नहिं आवैं ॥ चकृतभई अंग अंग बिलोकत दुख सुख
 दोऊ मन उपजावै॥ पुनि मन कहति सुता काहूकी कीधौं यह मेरीहै जाई । राधा हरिके रंगहि राची
 जननी रही जिये भरमाई ॥ तब जानी मेरी यह बेटी जिय अपने तब ज्ञान कियो । सूरदास प्रभु
 प्यारीकी छबि देखि चहति कछु शीख दियो ॥ ५२ ॥ राग सोरठ ॥ राधा दधिसुत क्यों न दुरावति ।
 हौंजू कहति वृषभानुनांदिनी काहेको तू जीव सतावति॥ जलसुत दुखी दुखीहै मधुकर द्वै पंछी दुख
 पावत॥ सारंग दुखी होत सारंग बिनु तोहि दया नहिं आवत॥ सारंग रिपुका नेक ओट कहि ज्यों सारंग
 सुखपावत ॥ सूरदास सारंग केहि कारण सारंग कुलहि लजावत ॥ ५३ ॥ राग विहागरो॥ मेरी सिख श्रवन
 काहे न करति । अजहूं भोरी भई रहैं कहति तोसों डरति ॥ शशि निरखि मुख चलत नाहिं नयन
 निरखि कुंरंग । कमल खंजन मीन मधुकर होतहैं चितभंग ॥ देखि नासा कीर लज्जित अधर दशन
 निहारि । बिंब अरु बंधूप बिदुम दामिनी डर भारि ॥ उर निरखि चक्रवाक बिथके कहि निरखि बन
 राज । चाल देखि मराल भूले चलत तब गजराज ॥ अंग अंग अवलोकि शोभा मन भ देखि बिचा-
 रि॥ सूर मुख पट देति काहेन वरप दश युग भारि॥ ५४ ॥ राग सूहा विलावला॥ अब राधा तू भई सयानी ।
 मेरी शीख मानि हृदय धरि जहाँ तहां डोलति बुद्धि अयानी ॥ भई लाजकी सीमा तूमें सुनि यह
 बात कुँवरि सुसकानी । हँसति कहा मैं कहति भली तोहिं सुनत नहीं लोगनकी बानी॥ आजुहिते कहुँ
 जान न दैहौं मा तेरी कछु अकथ कहानी । सूर श्याम के संग न जैहों जा कारण तू तोहिं सुगानी ॥
 ॥ ५५ ॥ राग टोडी ॥ भलीबात बाबा आवनदे । कान्ह लगाइ देति मोहिं गारी ऐसे बह भए कबते वे॥
 कालि मोहिं मारगमें रोकी जातरही सखियनसँग दधि लै ॥ कहन लगे मेरो देहु खिलौना ता दि-
 नलै भागी चुराइकै ॥ छठि आठैं मोहिं कान्ह कुँवरसों तिनको कहति प्रीतिसँचै । सूर जननि
 सुनि सुनि यह बानी पुनि पुनि मुख निरखति बिहँसतिहै ॥ ५६ ॥ राग गौरी ॥ बड़ी भई नहिं गई लरि
 काई । बरेहीके ढंग आजुलों सदा आपनी टेक चलाई ॥ अबहीं मचलि जागी तब पुनि कैसे
 मोसों जाति बुझाई । मानी हारि न हरि मन अपने बोलिलई हँसिके दुलराई । कंठ लगाइ लई
 अति हितसों पुनि पुनि कहि मेरी रिसहाई । सूरदास अति चतुर राधिका राखि नहिं नीके चतुराई॥
 ॥ ५७ ॥ राग गुंडमळार॥ श्यामनग जानि हिरदै चुरायो । चतुरबर नागरी महामणि लखलियो प्रियसखी
 संग नाहिंन जनायो॥ कृपिनि ज्यों धरति धन ऐसे डिठ कियो मन जननि सुनि बान हँसिकंठ लायो ।
 गांसदियो डारि कछो कुँवरि मेरी बारि सूर प्रभु नाम झूठे डरायो ॥ ५८ ॥ राग कल्याण ॥ सखियन इहै
 बिचार परचो । राधा कान्ह एक भए दोऊ हमसों गोप करचो ॥ वृंदाबनते अकल आई अति जिय
 हरष बढ़ाये । और भाव अंग छबि और श्याम मिले मनभाये ॥ तब वह सखी कहति मैं बूझी
 मोतन फिरि हँसि हेरचो । जबहिं कही सखि मिले तोहिं हरि तब रिस करि मुख फेरचो ॥ और
 बात चलावन लागी मैं वाको पहिचानी । सूर श्यामके मिलत आजही ऐसी भनी सयानी ॥ ५९ ॥
 राग सोरठ॥ सुनहु सखी राधाकी बातें । मोसों कहति श्यामहैं कैसे ऐसी मिलई घातें ॥ की गोरे की कारे
 रंग हरि की जोवनकी भोरे । की यहि गाउँ बसत की अनतहि दिनानि बहुत कीधोरे ॥ की तू कहति
 बात हँसि मोसों की बूझति सतिभाऊ । सपनेहूँ उनको नहिं देखे वाके सुनहु पाऊ ॥ मोसों कही

कौन तोसी प्रिय तोसों बात दुरैहों । सूर कही राधा मो आगे कैसे मुख दरशैहों ॥ ६० ॥ राग गौरी ॥
 वह निधरक मैं सकुचि गई । तब यह कह्यो जाहि घर राधा मैं झूठी तैं सांच भई ॥ त्योंरी भौहन
 मोतन चितवै नैकरहों तो करै खई । कामभंडार लूटि नीके करि निदरिगई मैं चकृतभई ॥
 घरधौं जाइ कहा अब कैहै अब कछु अवै बुद्धि नई । सूर श्याम अंग संग रंग राची मनमानो
 मुख लूटि लई ॥ ६१ ॥ राग विलावल ॥ सुनि सुनि बात सखी सुसकानी । अबहीं जाइ प्रगट करि दैहैं
 कहा रहै यह बात छपानी ॥ औरनिसों दुराव जो करती तौ हम कहती भली सयानी । दाई आगे
 पेट दुरावति वाकी बुद्धि आज मैं जानी ॥ हमजातहि वह उघरि परैगी दूध दूध पा-
 नीसों पानी । सूरदास अब करति चतुरई हमहि दुरावति बातन ठानी ॥ ६२ ॥ राग रामकली ॥ अपनो
 भेद तुम्हें नहि कैहै । देखहु जाइ चरित तुम वाके जैसे गाल बजैहै ॥ बडे गुरूकी बुद्धि पढी वह
 काहूको न पत्यैहै । एकौ बात मानिहै नाहीं सबकी सौहैं खैहै ॥ मैं नीके करि बूझि रहीहों अब बूझै
 रिस पैहै सुनहु सूर रस छकी राधिका बातन बैर बढैहै ॥ ६३ ॥ राग विलावल ॥ कहा बैर हमसों वह करिहै ।
 वाकी जाति भले करि पाई हमको कहा निदरिहै ॥ कैहै कहा चोरटी हमसों बातें बात उघरिहै । दू-
 रिकरौ लँगराई वाकी मेरेफंग जो परिहै ॥ हमसों बैर किये कहा पैहै काज कहा पुनि सरिहै । सूर-
 दास मटुकी शिलीन्हें बहुरि वेसही रहिहै ॥ ६४ ॥ चलहु सखी जैये राधा घर । बूझै बात कहाधौं
 कैहै निधरकहै कीधौं मनमें डर ॥ कीधौं हमहि देखि भजि जैहै की उठि हमको मिलिहै । कीधौं
 बात उघारि कह्यो की मनहीमन गिलिहै ॥ कीधौं हँसिबोलै की रिसकरि कीधौं सहज सुभाई ।
 कीधौं सूर श्याम रसमाती जोबन गर्व बढाई ॥ ६५ ॥ युवती जुरि राधा ढिग आई । लखिलीनी
 तब चतुर नागर ये मोपर सबहैं रिसहाई ॥ आदरनहीं कियो काहूको मनमें एक बुद्धि उपजाई ।
 मौनगह्यो नहिं बोलति तिनसों बैठिरही करिकै चतुराई ॥ आपुहि बैठिगई ढिग सिगरी जब जानी
 यह तौ चतुराई । सूरदास वे सखी सयानी और कहंकी बात चलाई ॥ ६६ ॥ राग जैतश्री ॥ चतुर
 चतुरकी भेंट भई । प्रीतौ निठुर मौनहै बैठी इन सबहिन लखि ताहि लई ॥ मुहाचही युवतिन तब
 कीन्हीं देखौ उलटीरीति भई । कहा हमारो मन यह राखै अरु हमही पर सतरगई ॥ बूझहु याहि
 खूट धरिकै तू कहा आजु यह मौन लई । सुनहु सूर हमसों कहा परदा हम करिदीन्ही साटसई ॥
 ॥ ६७ ॥ राग गंड ॥ अधिका मौनव्रत किन सधायो । धन्य ऐसो गुरू कानके लागतही मंत्रदै आजुही
 वह लखायो ॥ काज कछु और प्रातहि कछु औरही अबहि कछु और हैगईप्यारी । सुनत यह
 बातें दौरिआई सबै तौहि देखत भई चकृत भारी ॥ अब कहो बात या मौनको फल कहा सुनि
 जु लीजै कछु हमहु मानै । एकही संग भई सबै जोबन नई अब होहु गुरु हम तुमहि मानै ॥ देहि
 उपदेश हमहुं धरैं मैं । सब मंत्र जब लियो तब हम न बोली । सूर प्रभुकी नारि राधिका नागरी
 चरचि लीन्हो मोहिं करति ढोली ॥ ६८ ॥ राग मारु ॥ की गुरु कहौ कि मौनै छांडौ । हमहिं मूरख वदति
 आपुण्डंग सदति पाई । अब मदति हठ कतहिमाडौ ॥ एकही संगहम तुमसदारहतह आजुही चटक तू भई
 न्यारी । भेद हमसों लियो और कोऊ वियो कहा धौं कहैं कहा देहि गारी ॥ कहा तोही भयो तेरी प्रकृति
 कौनैहरी रीति यह नशैही चलायो । सूर सुनि नागरी गुणनकी आगरी निठुरईसो बात कहिसुनायो ॥
 ॥ ६९ ॥ राग गौरी ॥ तुम प्रीतम की बैरानि मेरी । वासों कहति मिली जो मारग यह मोसों अति कही अ-
 नेरी ॥ कहति कहा श्याम हि मिलिआई मैं चकि रही सौह मोहिं तेरी । मेरे अँग छबि और कहति कछु
 युवती सुनत रही मुख री ॥ मैं जिनको सपनेहून देखे तिनकी बात कहत फिरि फेरी । सूरदास गुणभरी

राधिका महिमा को जानै यहि केरी ७० ॥ राग कल्याण ॥ तुमसों कछु दुरावहै मेरो । कहां कान्ह कहां मैं सुनि
 सजनी ब्रज घर घर यह चलतहै घेरो ॥ और कहत सब मोहि न व्यापै तुमहुं कहौ यह बानी । आदर
 नहीं कियो याहीते तुमपर अतिहि रिसानी ॥ हमतौ नहीं कछो कछु तोसों ताही पर रिस करती ।
 सूर तबहिं हमसों जो कहती तेरी घां ह्वै लरती ॥ ७१ ॥ राग रामकली ॥ सखी तू राधहि दोष लगावति ।
 तैरी श्याम कहां ए देखे बातन बैर बढ़ावति ॥ हम आगे झूठी नहिं कैहै सखियन सैन बतावति ।
 ऐसीबात अरी सुख तेरे कैसी धौं कहि आवति ॥ भेदहि भेद कहतिहै बातें ऐसे मनहि जनावति ।
 सूर श्यामतैं देखे नहिं कीधौं हमहि दुरावति ॥ ७२ ॥ राग नटनारायण ॥ काको काको सुख माई बात-
 नको गहिये । पांचकी सात लगायो झूठी झूठीकै बनायो सांची जो तनक होइ तौलों सब सहिये ॥
 बातनि गहौ अकास सुनत न आवै सांस बोलि तौ कछु न आवै ताते मौन गहिये । ऐसे कहै नर
 नारि बिना भीति चित्र कारि काहेको देखे मैं कान्ह कहा कहौ सहिये ॥ घर घर इहै घेर वृथा मोसों
 करै बैर यह सुनि श्रवणनि हृदय सहि दहिये । सूरदास वरु उपहास सहौईसुर मेरे नंदसुवन
 मिलैं तोपै कहा चाहिये ॥ ७३ ॥ राग गुंडमलार ॥ दुरत नहिं नेह अरु सुगंध चोरी । कहा कोऊ कहै तू
 सुनति काहे न रहै तनहि कत दहै सुनि सीख मोरी ॥ लोगतोहि कहत हैं पाप को गहदहै कहाधौं लह-
 तहैं सुनहु भोरी । खरि कहू नहिं मिलै कहै कह अनभले करनदै गिले तू दिननि थोरी ॥ नंदको
 सुवन अरु सुता वृषभानुकी हंसत सब कहै चिरजीवै जोरी । सूर प्रभु कहां तू कहूँवे अपने भव-
 नमें लखी तोहि तोसी न वोरी ॥ ७४ ॥ राग विलावल ॥ कैसेहैं नंदसुवन कन्हाई । देखे नहीं । यनभरि कबहुं
 ब्रजमें रहत सदाई ॥ सकुचतिहौं एकबात कहत तोहिं सो नहिं जात सुनाई । कैसेहैं मोहिं देखावहु
 उनको यह मेरे मन आई ॥ अतिही सुंदर कहियत हैं वैमोकों देहि बताई । सूरदास राधाकी बाणी
 सुनत सखी भरमाई ॥ ७५ ॥ राग धनाश्री ॥ सुनहु सखी राधाकी बानी । ब्रजवसिहरि देखे नहिं कबहुं लोग
 कहत कछु अद्भुतबानी ॥ ये अब कहति देखावहु हरिको देखहुरी यह अकथ बानी । जो हम
 सुनत रही सो नहिं अब ऐसेहि यह बात बहानी ॥ ज्वाब न देत बनै काहूसों मन काहु न मानी ।
 सूर सबै तरुणी सुखचाहत चतुर चतुरई ठानी ॥ ७६ ॥ राग विलावल ॥ सुनि राधे तेहि श्याम देखावौ जहां
 तहां ब्रजगलिन फिरतहै जवहीं वे यहि मारग आवैं ॥ जवहीं हम उनको देखेंगी तहां तोहिं बोलैहैं ।
 उनहुंके लालसा बहुत यह तो देखे सुख पैहैं ॥ दरशनते धीरज जबरैहै तब महिम तोहिं पतैहैं ।
 तुमको देखि श्याम सुंदर घन मुरली मधुर बजैहैं । तनु त्रिभंग करि अंग अंग मोक्षना भाउ जनैहैं ।
 सूरदास प्रभु नवल कान्हवर पीतांबर फहरैहैं ॥ ७७ ॥ राग गुंडमलार ॥ नंदनंदन दर्शन जब पैहो ।
 एक द्वै तीन तजि चारि बानी पांच छहनिदरि तबहिं सातै भुलैहो ॥ आठहें साठि परिहै नवहु
 दशदिशा भूलिहो ग्यारहो रुद्रजैसे । बारहौ कला ते तपनि तपते मिटत तेरहौ रतनसुख छबिन
 तैसे ॥ निपुन चौदह वरन पंद्रहौ सुभग अति वरष षोडश सतर होन रहै । उम्मत अठारहो भेद
 उनईस नहिं बीसहू विसौ तै सुखहि पैहै ॥ नैनभरि देखि जीवन सफल करि लेखि ब्रजहि में र-
 हति तैं नहीं जाने । सूरप्रभु चतुर तुमहुं महाचतुरहो जैसे तुम तैसे वोऊ सयानो ॥ ७८ ॥ राग दशमधारा ॥ मन
 मन हंसति राधिका गोरी । ऐसे श्याम रहत ब्रजभीतर बूझति है भैभोरी ॥ तुम उनको कहुं नहिं
 देखैहैं की सुनी कहतिहो बात । चतुराई नीके गहि राखी कहत सखी मुसिकान्त ॥ कबहुंतौ काहु
 फंग परिहौ तबहीं लीजौ चीन्हि । सूरदास को पीतांबर वेसरि लीजो मेरी छीन्हि ॥ ७९ ॥ राग नट ॥ यह
 सुनि हंसि चलीं ब्रजनारि । अतिहि आई गर्वकीन्हें गई घर झखमारि ॥ कबहुं तौ हम देखिहैं

(२६८)

सूरसागर ।

एक संग राधा कान्हा भेद हमसों कियो राधा निठुर भई निदान्ह ॥ बीस बिरियां चोरकी तौ कबहुँ
 मिलिहै साहु । सूर सब दिन चोरको कहूँ होतहै निरबाहु ॥ ८० ॥ राग कान्हरो ॥ भेदलियो चाहति
 राधासों । बैठिरहौ अपने घर चुपके काम कहा काहु बाधासों ॥ यह मन दूर धरौ अपनो लै अति
 बरबोलि गई कह कीन्हों । कैसे निर्भय रही सबनिसों भेद न काहुहि दीन्हों ॥ वह कैसे फँग परै
 तुम्हारे वाके घात न जानों । सूर सवै तुम बडी सयानी मोहिं नहीं तुम मानों ॥ ८१ ॥ राग विलावल ॥
 फेरि पाइ देखो मैं धरिहौ । सुनु रीसखी प्रतिज्ञा मेरी तेरी दिन तासों लरिहौ ॥ हमको निदरि रहीहै
 राधा रिसनि रही मैं जरिहौ । तब मेरे मन धीरज ऐहै चोरी करत पकरिहौ ॥ राति दिवस मोहिं
 चैन नहीं अब उनको देखत फिरिहौ । सूरदास स्वामीके आगे नीके ताहि निदरिहौ ॥ ८२ ॥
 राग नटनारायण ॥ गोपी इहै करति चवाउ । देखौ धौ चतुराई वाकी हमहिं कियो दुराउ ॥
 लरिकईते करत ए ढंग तवै रहै सतिभाउ । अब करति चतुराई जाने श्याम पढाये दाउ ॥ कहाँ लौं
 करिहै अचगरी सबै ए उपजाउ । आजु बाची मौन धरि जो सदा होत बचाउ ॥ दिवस चारिकभोर
 पारहु रहौ एक सुभई । सूर कालिहि प्रगट ह्वै करनदै अपडाउ ॥ ८३ ॥ राग सूहा विलावल ॥ कहा कह
 ति तू बात असोना । तुम इह कहति सबै वह जानति हम सबते वह बडी सयानी ॥ सात बरष
 ते ये ढंग सीखे तुम तौ यह आजुहि है जानी । वाके छंद भेद को जानै मीन कबहि धौ पीवत पानी ॥
 हरिके चरित खै उहि सीखे दोऊ हैं वे बारहवानी । कालि गई वाके घर सब मिलि कैसी बुद्धि मौन
 की ठानी ॥ कीकी कही नेकु नहि बोली फिरि आइ तब हमहि खिसानी । सूर श्याम संगतिकी महिमा
 काहुको नेकहु ॥ पत्न्यानी ॥ ८४ ॥ राग मारू ॥ तबहि राधा सखियनपै आई । आवत देखि सबनि मुख
 सुंदो जहां तहां रही अरगाई ॥ मुख देखत सब सकुचि गई यह कहाँ अचानक आई । करति रहौं
 चुगुली हम यायेरी तरुनी गई लजाई ॥ अति आदर करि बैठक दीन्हों कछो कहाँ तुम आई ।
 कहा आजु सुर्छा करी हमारी सूर श्याम सुखदाई ॥ ८५ ॥ राग धनाश्री ॥ मैं कह आजु निवैरी आई ।
 बहुते आदर करि सबै मिलि पहुनेकी करिये पहुनाई ॥ कैसी बात कहति तू राधा बैठनको नहिं
 कहिये । तुम आते अपने घरते ह्यौं हमहुँ मौन धरि रहिये ॥ जानिलई वृषभाउ सुता हँसि कछो
 तरक तुम कीन्हों । सूरदास ता दिनको बदलो दाउँ आपनो लीन्हों ॥ ८६ ॥ राग धनाश्री ॥ दाउँ घाउ
 तुमहीं सब जानति । सदा मानि तुमको हम आई अवहूँ तैसे मानति ॥ तुम वह बात गांस करि राख्यो
 हमको गई भुलाई ॥ दिन कछो नहीं मैं जानों मानि लई सति भाई ॥ चोर सबनि चोरी करि जानो
 ज्ञानी मन सब जान ॥ सूरदास गोपिनकी बाणी राधा सुनि सुसकानी ॥ ८७ ॥ सखी तुम बात कही यह
 सांची । जाके हृदय मोन कहै मुखते तौन कैसे हरिको न कहि लीक खांची ॥ हरषि ब्रजनारि भरि लेत
 अँकवारि सब कहाँ । तू कहा इह बात जानें । हम हँसति कहति तू रिस कहा गहतरी नागरी रा-
 धिका बिलगु मानै । तुमहि उलटी कहौ तुमहि पलटी कहौ तुमहि रिस करति मैं कछु न जानौ । सूर
 प्रभुको नाम मोहिं तुमही कछो श्रवन यह सुन्यो तुम कछु मानो ॥ ८८ ॥ अथ ग्रीष्मलीला ॥ सखिन सहित यमुना
 विहार ॥ डोडी ॥ पुनि कहि यों अब न्हान चलौगी । तब अपनो मन भायो कीजो जब मोको हरि संग
 मिलोगी ॥ उहै बात नमैं गहि राखी मैं जानति कबहुँ न बिसरौगी । बडी बार मोको भई आए
 न्हान चलतकी बहो लरोगी ॥ गहि गहि बांह सबनि करि ठाढी कैसेहू घरते निसरौगी । सूर राधिका
 कहति सखिनसों बहो आइ घरकाज करौगी ॥ ८९ ॥ राग मारू ॥ राधिका संग मिलि गोपनारी । चलीं
 हिलिमिलि सबै रहा । विहँसति तरुनि परस्पर कौतूहल करत भारी ॥ मध्य ब्रजनागरी रूप रस

आगरी घोष उजागरी श्याम प्यारी । जुरीं ब्रजसुंदरी दशनछवि कुंदरी काम तनु दुंदरी करण
 हारी ॥ अंग अंग सुभग अति चलति गजगति कृष्णसों एकमति यमुनजाहीं । कोऊ निकसि
 जाति कोऊ ठठकि ठाढी रहति कोऊ कहति संग मिलि चलहु नाहीं ॥ युवती आनंद भरी भई
 जुरिकै खरी नहीं छरहरी उठि बैस थोरी । सूर प्रभु सुनि श्रवन तहां कीन्हों गवन तरुणि मन रवन
 सब ब्रजकिशोरी ॥ ९० ॥ राग नटनारायण ॥ गई ब्रजनारी यमुनातीर देखिलहरि तरंग हरषी रहत
 नहिं मनधीर ॥ संग राजति कुँवर राधा भई शोभा भीर । स्नानको वे भई आतुर सुभग जल गंभीर ॥
 कोऊ गई जल पैठि तरुनी और ठाढी तीर । तिनहि लई बोलाइ राधा करति सुख तनकीर ॥
 एक एकहि धरति भुजभरि एक छिरकति नीर । सूर राधा हँसति बाढी बढी छवि तन चीर ॥ ९१ ॥
 राग जयतश्री ॥ राधा जल बिहरत सखियन संग । ग्रीवप्रयंत नीरमें ठाढी छिरकत जल अपने
 अपने रंग ॥ मुखपर नीर परस्पर डारति शोभा अतिहि अनूप बढी तब । मनहु चंद्र गन सुधा
 गई खनि डारतहै आनंद भरे सब ॥ आई निकसि जानु कटिलों सब अँजुरिनते जल डारत । मनहुँ
 सूर कनकवल्ली जुरि अमृत पवन मिस झारत ॥ ९२ ॥ राग नट ॥ यमुनाजल बिहरत ब्रजनारी । तट
 ठाढे देखत नंदनंदन मधुर मुरलि करधारी ॥ मोरमुकुट श्रवणन मणिकुंडल जलजमाई उर भ्राजत ।
 सुंदर सुभग श्याम तनु नव घन बिच बगपांति विराजत । उर बनमाल सुभग बभ्रुभांतिनु श्वेत
 लाल सित पीत । मनोँ सूर सरितटि बैठे शुक बरनत बरन जिभीत । पीतांबर कटि मै ह्रस्वावलि बाजत
 परम रसाल । सूरदास मनोँ कनक भूमि ढिग बोलत रुचिर मराल ॥ ९३ ॥ राग विहागरो ॥
 नटवर भेष काछे श्याम । पद कमल नख इंदु सोभा ध्यान पूरण काम ॥ जानु जल सुघटनि कर
 भा नाहिं रंभा तूल । पीतपट काछनी मानहुँ जलजकेसर झूल ॥ कनक छुद्रावत पंगति नाभि
 कटिके भीर । मनहुँ हंस रसाल पंगति रहेहैं हृद तीर ॥ झलक रोमावली शोभा ग्रीव मोतिन हार ।
 मनहु गंगा बीच यमुना चली मिलि त्रिय धारा ॥ बाहुदण्ड विशाल तट दोउ अंग चंदन रेनु । तीर तरु
 वनमालकी छवि ब्रजयुवति सुखदेनु । चिबुक पर अधरनि दशनद्युति विंबुबीज जलाइ ।
 नासिका शुक नयन खंजन कहत कबि सरमाइ ॥ श्रवण कुंडल कोटि राँच छवि भुकुटि
 कामको दंड । सूर प्रभुहै नीपके तर शीशधरे श्रीखंड ॥ ९४ ॥ राग पूरवी ॥ उपमा धीरज तज्यो
 निरखि छवि । कोटि मदन अपनो बल हारयो कुंडल किरानि बीच जो छप्यो रवि । खंजन कंज म-
 धुप विधु तडिघन दिनकर रहत कहंवे दबि । हरिपटतर दै हमहि लजावत स्मरुच नहीं आवत
 खोट कवि ॥ अरुन अधर दशननि दुति निरखत बिद्रुम शिखर लजाने सब । सुश्याम आछे वपु
 काछे पटतर मेटि बिराने अब ॥ ९५ ॥ राग गौरी ॥ उपमा हरि तन देखि लजाने कोऊ जलमें कोऊ
 वनमें रहे दुरि कोऊ गगन समाने ॥ मुख निरखत शशिगयो अंबरको तडित दान छवि हेरो ।
 मीन कमल करचरन नयन डर जलमों कियो बसेरो ॥ भुजादेखि अहिराज लजाने विवरनि पैठे
 धाइ । कटिनिरखत केहरि डर मान्यो बन बनरहे दुराइ ॥ गारीदेहि कविनके वपु श्रीअंगपटतर
 देत । सूरदास हमको विरमावत नाउँ हमारो लेत ॥ ९६ ॥ राग सारंग ॥ ऐसे गोपाल निरखि तिल तिल
 तनु वारौ । नवकिशोर मधुरमूरति शोभा उर धारौ ॥ अरुण तरुण कंज नयन मुरली कर राजै ।
 ब्रजजन मन हरन वेन मधुर मधुर वाजै । ललितबर त्रिभंग सु तन बनमाला मोहै । अति सुदेश
 कुसुम पाग उपमाको कोहै ॥ चरण रुनित नूपुर कटि किंकिनि कलकूजै । मकलकृत कुंडल छवि
 सूर कौन पूजै ॥ ९७ ॥ राग कान्हरो ॥ बनि मोतिनकी माल मनोहर । शोभित श्याम सुभग उर ऊपर

सुरसागर ।

(२७०)

मनो गिरिते सुरसरी धसीधर ॥ तट भुजदंड भौर भृगु रेखा चंदन चित्रित रंगनि सुंदर । मणिकी
 किरणि मीन कुंडल छवि मनो मकर मिलन आवत त्यागे सर । ता ऊपर रोमावलि राजत मणिवर
 तीखन ज्योति सितावर । संतहि ध्यान स्नान करत नित कर्मकीच धोवत नीकेकर ॥ यज्ञोपवीत
 विचित्र सूर सुनि मध्यधार धारा जो वानीवर । शंख चक्र गदा पद्म पानि मनो कमल कूलहं-
 सनि कीन्हें घर ९८ ॥ राग नटनारायण ॥ राधे निरखि भूली अंग । नंदनंदन रूप परगति मति भई तनुपंग ॥
 इत सकुच अति सखिनको उत होत अपनी हानि । ज्ञानकरि अनुमान कीन्हों अबहि लैहै जानि
 चतुर सखियन परखि लीन्ही समुझि भई गैवारिसबै मिलि इत न्हान लागीं ताहि दियो बिसारि ॥
 नागरी मुख श्याम निरखत कबहुँ सखियन हेरि । सूर राधा लखति नाहीं इन दई अबटेरि ॥ ९९ ॥
 राग कान्हरो ॥ जब जान्यो ये न्हाति सबै ॥ हरि प्रति अंग अंगकी शोभा अखियन मगहै लेउ अबै ॥ कमल
 कोशमें आनि दुरावो बहुरि दरश धौं होइ कबै । यह मन करि युवातिन तनु हेरति सकुचतिहै
 पुनि नहीं फबै ॥ कबहुँक कहै तजौ मर्यादा इनिसों मैं करि गोप तबौ ॥ सूर श्याम तबहीं मन मानै संगहि
 रैहौ जाइ जबै ॥ राग गौरी ॥ चित राधारतिनागर ओरानयन वदन छवि यों उपजत मानों शशि अनुराग
 चकोर ॥ सारस सर अचवनको मानहु फिरत मधुप युग जोर ॥ पान करत त्रिय तन मानत पलक न देत
 अकोर ॥ लि मनोरथ मानि सकल ज्यों रजनि गए पुनि भोर । सूर परस्पर प्रीति निरंतर दंपतिहै
 चितचोर ॥ राग कल्याण ॥ यह कछु भोरेहि भाइ भई । निरखत वदन नंदनंदनको अब रहती सो गई ॥
 हिरदै जामि अंकुर जरि सप्त पतार गई ॥ सो दुम पसरि शिखर अंबरलों सब जग छाइ लई ॥ वचन
 सुजंत्र मुकुल भवलोकिनि गुननिधि पुहुप मई । परस परम अनुराग सींचि सुख लगी प्रमोद जई ॥
 मनके सकल मनोरथ पूरण सेमर भार नई । सूरदास फल गिरिधर नागर मिलि रस रीतिढई ॥ १०० ॥
 राग रामकली ॥ चितवन रोकेहूँ न रहीं । श्याम सुंदर सिंधु सन्मुख सरित उमंगि बही ॥ प्रेम सलिल प्रवा-
 ह भँवरनि मिलि कबहुँ न थाह लही । लोभ लहरि कटाक्ष घूँघट पट करार ढही ॥ थके पल पथ
 नाव धीरज परत नहिंन गही । हिलि मिलि सूर स्वभाव श्यामहि फेरीहूँ न चही ॥ जैतथी ॥ देखी हरि
 राधा उत अटकी । चितैरही एकटक हरिही तन ना जाइये कौन अंग लटकी ॥ कालिहमें कैसे
 निदरतिही मेरे चित वह टरति न खटकी । न्हातरही कैसे सँग मिलिकै चित चंचल विरहाकी
 चटकी ॥ बात कत तुलसी मुख मेलै नयन शयनदै मुँह मटकी । सूर श्यामके रूप भुलानी राधाके
 चित सुधि न चटकी ॥ ११ ॥ राग विलावल ॥ चितै रही राधा हरिको सुखाभ्रकुटी बिकट विशाल नयन युग
 देखत मनहिं भयै रतिपति दुख ॥ उतहि श्याम एक टक प्यारी छवि अंग अंग अवलोकत । रीझि
 रहे उत हरि इत राधा अरस परस दोउ नोकत ॥ सखिन कछो वृषभातु सुतासों देखे कुँवर कन्हई ।
 सूर श्याम एई हैं जमैं जिनकी होति बड़ाई ॥ २ ॥ राग रामकली ॥ हमहि कछो हो श्याम देखावहु ।
 देखहु दरश नयन नारि नीके पुनि पुनि दरशन पावहु ॥ बहुत लालसा करत रही तुम वे तुम
 कारण आए । पूरी साध मिली तुम उनको याते हमहि बोलाये ॥ नीके सगुण आजु ह्यां आई भयो
 तुम्हारो काज । सुनहु सूर हमको कछु दैहौ तुमहि मिले ब्रजराज ॥ ३ ॥ राधा कछो आजु इन
 जानी । बारबार मैं हरि तन चितई तबहीं ये सुसकानी ॥ कालि कछो मैं इन सों वैसे अबतो बात न
 ठानी । इहि चतुरई परी मोही पर मन मन अतिहि लजानी ॥ मेरी बात गई इनि आगे अबहिं करति
 विनपानी । सूरदास प्रभु कहा कहाँ मैं तू अब हाथ बिकानी ॥ ४ ॥ राग विलावल ॥ मैं अतिही यह पोच
 करी । ये मेरी मर्यादा लैहैं ता दिन इनिसों बहुत लरी ॥ सुंदर श्याम कमलदल लोचन तुम अब

होहु सहाइ । ऐसी कहौं बात इन आगे मेरी पति जिन जाइ ॥ तब यक बुद्धि रची मनही मन अति
 आनंद हुलास । सूर श्याम राधा आधातन कीन्हों बुद्धि प्रकाश ॥ ५ ॥ राग गूजरी ॥ राधा चलन
 भवनही जाहि । कबहीकी हम यमुना आई कहहीं अरु पछिताहि ॥ कियो दरशन श्यामको
 तुम चलोगी की नाहि । बहुरि मिलिहो चीन्हि राखहु कहति सब मुसकाहि ॥ हम चली घर तुमहुं
 आवहु सोच भयो मन माहि । सूर राधा सहित गोपीं चलीं ब्रज समुहाहि ॥ ६ ॥ राग विलावल ॥ कहि
 राधा हरि कैसेहैं । तेरे मन भाये की नाहीं की सुंदरकी नैसेहैं ॥ की पुनि हमहि दुराव करोगी की कैहौ
 वै जैसे हैं । की हम तुमसों कहत रही ज्यों सांच कहौ की तैसेहैं ॥ नटवर भेष काछनी काछे अंगनि
 रतिपति सैसेहैं । सूर श्याम तुम नीके देखे हम जानति हरि ऐसेहैं ॥ ७ ॥ राधा मनमें इहै
 विचारति । ये सब मेरे ख्याल परीहैं अबहीं बातनलै निरुबारति ॥ मोहते ये चतुर कहावति ये मनही
 मन मोको नारति । ऐसे वचन कहौंगी इनको चतुराई इनकी मैं झारति ॥ जाके नंद नंदन
 शिर समरथ बार बार तनु मन धन बारति ॥ सूर श्यामके गर्व राधिका सूधे काहू तन न निहा
 रति ॥ ८ ॥ राग मूही ॥ राधा हरिके गर्व गहीली । मंद मंद गति मत्त मतंग ज्यों अंग अंग सुख पुंज
 भरीली ॥ पग द्वै चलति ठटकि रहै ठाढी मौन धरे हरिके रसगीली । धरनी नख चरननि कुरवारति
 सौतिन भाग सुहाग डहीली ॥ नेक नहीं पियते कहुं बिछुरति ताते नाहिन काम दहीली । सूर सखी
 बूझै यह कैहों आजु भई इह भेद पहीली ॥ ९ ॥ राग आसावरी ॥ क्यों राधा फिरि मौन गहोरी । जैसे
 नउआ अंध झँवर खर तैसेहि तैं यह मौन कह्यो री ॥ बात नहीं मुखते कहि आवति की रो मन श्याम
 हरचो री । जानि नहीं पहिचानि न कबहुं देखतही चित तिनहि ठरचोरी ॥ साँची बात कहौं तुम
 हमसों कहा सोच सो जियहि परचोरी । सूर श्याम तन देखि रही कहा लोचन इकटक ते न
 ठरचोरी ॥ १० ॥ राग धनाश्री ॥ कहा कहति तुम बात अलेखे । मोसों कहति श्याम तुम देखे तुम नीके
 करिदेखे। कैसो बरन भेषहै कैसो कैसे अंग त्रिभंग । मों आगे वह भेद कहौ धौकैसेहैं। नुरंग। मैं देखे
 की नाहीं देखे तुम तो बार हजार। सूर श्याम द्वै अखियन देखति जाको वार न पार ॥ ११ ॥ राग कान्हरो ॥ हम
 देखे यहि भौति कन्हाई। शीश श्रीखंड अलक विथुरे मुख श्रवणनि कुंडल चारु सोहा। कुटिल भुकुटि
 लोचन अनियारे सुभग नासिका राजत । अरुन अधर दशनावलिकी द्युति दाडम वन तन लाजत ॥
 ग्रीवहार मुक्ता वनमाला बाहुदंड गजशुंड । रोमावली सुभग बगपंगति जात नाभि मंदय शुंड ॥ कटि
 पट पीत मेखला कंचन सुभग जंघ युग जाना चरन कमल नखचंद्र नहीं सम ऐसे सूर सुजान ॥ १२ ॥
 राग विलावल ॥ बनेहैं विशाल कमल दल नैन । ताहुमें अति चारु बिलोकनि गूढ भाव सूचत सखि
 सैन ॥ वदन सरोज निकट कुंचित कच मनहु मधुप आए मधुलैन । तिलक तरनि शशि कहत कछुक हँसि
 बोलत मधुर मनोहर बैन ॥ मदन नृपतिको देश महामद बुधि बल बसि न सकत सूर चैन । सूरदास
 प्रभु दूत दिनहि दिन पठवत चरित चुनौती दैन ॥ १३ ॥ राग देवगन्धार ॥ मोहन बदन लिलोकत अखियन
 उपजत है अनुराग । तरनि ताप तलफत चकोरगति पिवत पियूष पराग ॥ लोचन नलिन नये राज
 त रति पूरण मधुकर भाग । मानहु अलि आनंद मिले मकरंद पिवत रतिपाग ॥ विरिभाग भुकुटी
 पर कुमकुम चंदनबिन्दु विभाग । चातक सोम शक्र धनु घनमें निरखत मनु बैरा ॥ कुंचित केश
 मयूर चंद्रिका मंडल सुमन सुपाग । मानहु मदन धनुष शर लीन्हें वरपतहै वन पाग ॥ अधरबिंब
 बिहँसान मनोहर मोहन मुरली राग । मानहु सुधा पयोधि घेरि घन ब्रजपर बरुन लाग ॥ कुंडल
 मकर कपोलनि झलकत श्रम सीकरके दाग । मानहु मीन मकर मिलि कीर्ति शोभित शरद

तड़ागानासा तिलक प्रसून पदविपर चिबुक चारु चित खाग । दाडिम दशन मंदगति मुसकनि
 मोहत सुर नर नाग ॥ श्रीगोपाल रस रूप भरीहै सूर सनेह सोहाग । ऐसी शोभा सिंधु विलोकत
 इन अखियनके भाग ॥ १४ ॥ राग धनाश्री ॥ हम देखे यहि भांति गोपाल । छंद कपट कछु जानति
 नाहीं सुधी हैं ब्रजकी सब बाला ॥ झूठीकी सांची नहिं भापैं सांची झूठी कबहुँ न होइ । सांचीकी झूठी
 करिडारैं यह सोई जानैं धनि जोइ ॥ इतननिमें दुराव कछु नाहीं भेदाभेद विचार । सूरदासते
 झूठी मिलवै तनुकी गति जानै करतार ॥ १५ ॥ राग आसावरी ॥ झूठी बात न होति भलाई । चोर जुआर
 संग वरु करिये झूठेको नहिं कोउ पतिआई ॥ सांचीकी झूठी करिडारैं पंचनमें मर्यादा जाई ।
 बोलि उठी एक सखी बीचही तैं कह जानैं लाज बडाई । यामें कछु नफाहै उनको जाते मन ऐसी
 ये भाई ॥ सूर स्वभाउ परचो ऐसोई को जानैरी बुद्धि पराई ॥ १६ ॥ राग धनाश्री ॥ ऐसे हम देखे नंदनंदन । श्याम
 सुभग तनु पीत वसन जनु मनहु जलद पर तडित सुछंदन ॥ मंदमंद सुरली मुख गरजनि
 सुधावृष्टि वरषत आनंदन । विविध सुमन बनमाला उर मनु सुरपति धनुष नहीं येहि छंदन ॥ मुक्ता
 वली मनहुँ बगपंगति सुभग अंग चरचित छवि चंदन । सूर नीप तरवर तर ठाढे प्रभू सुर नर मुनि
 बंदन ॥ १७ ॥ राग देवगंधार ॥ तुमको कैसे श्याम लगे । न्हातरही जलमें सब तरुनी तब तुअ नैना कहां
 खगे ॥ अंग अंग अवलोकन कीन्हों कौन अंग पर रहे पगे । भूल्यो स्नान ज्ञान तनु
 भूली नंदसुख उतते न डगे ॥ जानति नहीं कहूँ नहिं देखे मिलिगई ऐसे मनहि सगे । सूर
 श्याम ऐसे तैं खे मैं जानति दुख दूर भगे ॥ १८ ॥ राग गौरी ॥ तुम देखे मैं नहीं पत्न्यानी । मैं जान
 मेरी गति समीही इहै सांच अपने मन आनी ॥ जो तुम अंग अंग अवलोक्यो धन्य धन्य सुख
 अस्तुति गानी ॥ मैं तौ अंग अंग अवलोकति दोऊ नयन भये भर पानी ॥ कुंडल झलक कपोलनि
 आभा इतनहिं माँझ विकानी । एकटकरही नैन दोउ रूखे सूर श्यामको नहिं पहिंचानी ॥ १९ ॥
 राग नट ॥ मेरी अखियां अजान भई । एक अंग अवलोकत हरिके औरै अंग रई ॥ ये भूली ज्यों चोर भरे
 घर नौनिधि ना लई । फेरत पलटत भोर भए कछु लई न छांडिदई ॥ पहिलेहि रति करिकै
 आरति करि ता रई । सूर सकति हठि दोष लगावति पल पल पीर नई ॥ २० ॥ राग सारंग ॥
 विधातहि चूक री मैं जानी । आजु गोविंदहि देखि देखि हौं इहै समुझि पछितानी ॥ रचि पचि
 सोचि सँवारि सब अँग चतुर चतुरई ठानी । दृष्टि न दई रोमरोमनि प्रति इतनहि कला नशानी ॥
 कहाकरोँ अति उतै नयना उमँगि चलत पग पानी । सूर सुमेर समाइ कहां धौं बुधिवासना
 पुरानी ॥ २१ ॥ राग धनाश्री ॥ द्वै लोचन तुम्हरे द्वै मेरे । तुम प्रतिअंग बिलोकन कीन्हो मैं भई मगन
 एक अँग हरे ॥ अपना अपनो भाग्य सखी री तुम तनमय मैं कहूँ न नेरे । जो बुनिये सोई पुनि
 लुनिये और नहीं त्रिभुवन भट भरे ॥ श्यामरूप अवगाहि सिंधुते पार होत चढि डोगन केरे ।
 सूरदास तैसे ए लोचन कृपा जहाज बिनाको पेरे ॥ २२ ॥ राग आसावरी ॥ पावै कौन लिखे बिन भाल ।
 काहूको पटरस यहि भावत कोऊ भोजन कहूँ फिरत विहाल ॥ तुम देख्यो हरि अंग माधुरी मैं
 नहिं देख्यो कौन रूपपाल । जैसे रंक तनक धन पाए ताहि महा वह होत निहाल ॥ तुमहि मोहि इतनो
 अंतरहै धन्य धन्य ब्रजकी तुम बाल । सूरदास प्रभुकी तुम संगनि तुमहि मिले यह दरश गोपाल ॥
 २३ ॥ राग कल्याण ॥ सुनहु सखी राधाकी बानी । हमको धन्य कहति आपुन धृग यह निर्मल अति
 जानी ॥ आपुन कहै भई हरिधनको हमहि कहति धनवंत । यह पूरण हम निपट अधूरी हम
 असंत यह संत । धृग धृग हम धृग बुद्धि हमारी धन्य राधिका नारि । सूर श्यामको एहि

पहिचानी हम भई अंत गँवारि ॥२४॥ राग गुंडमलार ॥ धन्य राधा धन्य बुद्धि हेरी । धन्य माता धन्य
 पिता धन्य भगति तुव धृग हमहि नहीं सम दासी तेरी ॥ धन्य तुव ज्ञान धन्य ध्यान धनि
 परमान नहीं जानति आन ब्रह्मरूपी । धन्य अनुराग धनि भाग धनि सौभाग धन्य जो
 वनरूप अति अनूपी ॥ हम बिमुख तुम सुमुख कृष्ण प्यारी सदा निगम सुखसहस अस्तुति
 बखाने । सूर श्यामा श्याम नवल जोरी अटल तुमहिं बिन कान्ह धीरज न आने ॥ २५ ॥
 राग विहागरो ॥ जैसे कहै श्याम हैं तैसे । कृष्णरूप अवलोकनको सखि नयन होहिं जो ऐसे ॥
 तैं जो कहति लोचन भरि आये श्याम कियो तेहि ठौर । पुण्यस्थली जानि विराजे बात न
 हियहै और ॥ तेरे नयन वास हरि कीन्हों राधा आधा जानि । सूर श्याम नटवर वपु काछे
 निकसे वहि मग आनि ॥ २६ ॥ राग कान्हरो ॥ अचानक आइगए तहाँ श्याम । कृष्णकथा सब
 कहत परस्पर राधासंग मिली ब्रजवाम ॥ मुरली अघर धरे नटवर वपु कटि कछनी पर वारों काम ।
 सुभग मोर चंद्रिका शीश पर आइ गए पूरण सुख धाम ॥ तरुतमाल तरुतरुन कन्हई दूर करन
 युवतिन तनु ताम । सूर श्याम बंशी ध्वनि पूरत श्रीराधा राधा लै नाम ॥ २७ ॥ राग सूही विशावल ॥ थकित
 भई राधा ब्रजनारि । जो मन ध्यान करति अवलोकन ते अंतर्यामी बनवारि ॥ रत्नजटित पग
 सुभग पाँवरी नृपुरध्वनि कल परम रसाला मानहु चरणकमलदल लोभी निकटोहैं बै बाल मराला ॥
 युगलजंघ मरकतमणिशोभा विपरीति भांति सँवारे कटिकाछनी कनक छुद्रावलि परि नंददुलारे ॥
 हृदय विशाल माल मोतिनबिच कौस्तुभमणि अतिभ्राजता मानहु नभ निर्मल ताराग न तामधि चंद्र
 विराजता दुहुँकर मुरलि अघर परसाये मोहन राग बजावत ॥ चमकत दशन मटक न सापुट लटक
 नयन मुख गावत ॥ कुंडल झलक कपोलनि मानहु मीनसुधा सर क्रीडत । भुकुटी धनुष नैन खंजन
 मानों उडत नहीं मन ब्रीडत ॥ देखिरूप ब्रजनारि थकित भई क्रीट सुकुट शिर मोहत । ऐसे सूर
 श्याम शोभानिधि गोपी जन मन मोहत ॥ २८ ॥ राग कल्याण ॥ जबते निरखे चारु कपोल । तबते
 लोकलाज सुधि बिसरी दै राखे मनबोल ॥ निकसे आनि अचानक तिरछे पहिरे नल निचोलारतन
 जटित शिर सुकुट विराजत मणिमय कुंडल लोल ॥ कहा करौ वारिज मुख ऊर बिथके पट पद
 जोल । सूर श्याम करिये उत्कर्षा बश कीन्ही बिनमोल ॥ २९ ॥ राग पूरवी ॥ चारु चितै नि चंचल डोल ।
 कही न जाति मनमें अति भावति कछु जो एक उपजत गति गोल ॥ मुरली मर वजावत गावत
 चलत करजु अरु कुंडल लोल । सब छबि मिलि प्रतिबिंब विराजत इंद्रनील मणि मुकुर कपोल ॥
 कुंचित केश सुगंध सुबसु मनु उडिआए मधुपनके टोल । सूर सुभग नासिका मोहर अनुमानत
 अनुराग अमोल ॥ ३० ॥ राग गौरी ॥ नंदनंदन बृंदावन चंद । यदुकुल नभ तिथि द्वितीय देवकी प्रगटे त्रिभु
 वन बंद ॥ जठर कुहूते बहिर वारिनिधि दिशिमधुपुरी सुछंद । बसुदेव शंभु शीश धरि आने
 गोकुल आनंदकंद ॥ ब्रजप्राची राका तिथि यशुमति शरद सरस ऋतुनंद । उमान सकल शाखा
 संकर्षण तम दनुकुल योनिकंद ॥ गोपीजन तेहि धरति चकोर गति निरखि भटि पल द्रंद । सूर
 सुदेश कला षोडश पर पूरन परमानंद ॥ ३१ ॥ राग गौरी ॥ देखि सखी हरिको मुख चारु । मनहु
 छिडाइलिये नंदनंदन वा शशिको सत सारु ॥ रूप तिलक कच कुटिल किरनि छबि कुंडल कल
 पिस्तारु । पत्रावलि परिवेष सुमन सरि मिल्यो मनहु उडदारु ॥ नयनचकोर हिंग सूर मुनि पिव-
 त न पावत पारु । अब अंबर ऐसो लागत है जैसो झूठो थारु ॥ ३२ ॥ राग कान्हरो ॥ देखि री हरिके
 चंचल तारे । कमल मीनको कहा एती छबि खंजनहू न जात अनुहारे ॥ वै सखि निराखि नमित

(२७४)

सूर सागर ।

मुरली पर कर मुख नयन एक भए वारे । मनो सरोज विधु वैर विरंचि करि करत नाद बाहन चुचु-
 कारे ॥ उपमा एक अनूपम उपजत कुंचित अलक मनोहर भारे । बिडरत बिड्ढाकि जानि रथते मृग
 जनु सशंकि शाशि लंगर सारे । हरि प्रति अंग विलोकि मानि रुचि ब्रज वनितानि प्राण धनवारे ।
 सूरश्याम मुख निरखि मगन भई यह बिचारि चित अनत न टारे ॥ ३३ ॥ राग सोमठ ॥ हरि मुख निरख-
 त नैन भुलाने । ये मधुकर रुचि पंकज लोभी ताहीते न उड़ाने ॥ कुंडल मकर कपोलनक ढिग
 जनु रवि रैनि विहाने । ध्रुव सुंदर नैननि गति निरखत खंजन मीन लजाने ॥ अरुण अधर ध्वज
 कोटि बज्रद्युति शशिगन रूप समाने । कुंचित अलक सिली मुख मानो लै मकरंद निदाने ॥ तिलक
 ललाट कंठ मुकुतावलि भूषन मय मनि साने । सूरदास स्वामी अंग नागर ते गुणजात न जाने ॥
 ॥ ३४ ॥ राग केदारो ॥ देखिरी नवल नंद किशोर । लकुटसौं लपटाइ ठाढे युवति जन मन चोर ॥ चारु
 लोचन हंसि बिलोकनि देखिकै चितभोर । मोहनी मोहन लगावत लटकि मुकुट झकोर ॥ श्रवण
 ध्वनि सुरनाद मोहत करत हिरदे कोर । सूर अंग त्रिभंग सुंदर छवि निरखि तृण तोर ॥ ३५ ॥
 ॥ राग कान्हरो ॥ व्रजवनिता देखति नंदनंदन । नवधन नील वरन ताऊपर खौर कियो तनु चंदन ॥ कन-
 कवरन कटि धौत पिछौरी उर भ्राजत वनमाली । निर्मल गगन श्वेत बादर पर मनो दामिनी जाला ।
 मुक्तामाल विपुल वग पंगति उडत एक भई जोति । सूर श्याम छवि निरखति युवती हरष परस्पर
 होति ॥ ३६ ॥ राग सूही ॥ प्रातसमय आवत हरि राजत । रत्नजटित कुंडल सखि श्रवणनि तिनकी
 किरननि सुरतन लाजत ॥ सातै राशि मेलि द्वादशमें कटि मेखला अलंकृत साजत ।
 पृथ्वी मथि पिता सो लैकर मुख समीप मुरली ध्वनि बाजत ॥ जलधि तात तेहि
 नाम कंठके किनके पंख मुकुट शिरभ्राजत । सूरदास कहै सुनहु गूढ हरि भक्तनि भजत
 अभक्तनि भाजत ॥ ३७ ॥ राग नट ॥ हरि तन मोहिनी माई । अंग अंग अनंग शत शत
 वरनि नहि जाई ॥ कोऊ निरखि शिर मुकुटकी छवि सुरति बिसराई । कोऊ निरखि विथुरी
 अलक मुख अधिक सुखदाई ॥ कोऊ निरखि रही भालचंदन एकचित लाई । कोऊ निरखि विथुरी
 भुङ्कुटिपर नैन ठाढ़ाई ॥ कोऊ निरखि रही चारुलोचन निमिष भरमाई । सूर प्रभुकी निरखिशोभा
 कहत नहि आई ॥ ३८ ॥ राग सारंग ॥ हरिमुख किधौं मोहनीमाई । अवलोकत अघात नहि भरे नैना
 ठगे ठगोरी लाई । कुंडल किरनि निकट भूलोचन आरति मीन दृग सम चपलाई । श्रवनरंघ्र नहि
 निपुन दास जनु काम कुवैनी कलित बनाई ॥ छाजत रदन रदन छंदकी छवि मंदमाधुरी गिरा
 सुहाई । जया कुसुम दल मनहु कमलपर तडिजुथ कोश कोकिला गाई ॥ सबविधि वशीकरनकी
 चाकी बलितबलावत अनुज बलझाई । सूरदास प्रभु वदन विलोकत जकित थकित चित अनत
 न जाई ॥ ३९ ॥ राग गुंडमलार ॥ श्याममुखराशि रसरशि भारी । रूपकी राशि गुणराशि यौवन
 राशि थकितभई निरखि नवतरुनी नारी ॥ शीलकीराशि जसरशि आनंदराशि नीलनव
 जलद छवि वरनकारी । दयाकी राशि विद्याराशि बलराशि निर्दयराशि दनुजकुल प्रहारी ॥
 चतुर्दश राशि छलराशि कलराशिहरि भजै जेहि हेतु तेहि देनहारी । सूरप्रभु श्याम सुखधाम पूरण
 काम लसति कटि पीत मुखमुरलिधारी ॥ राग विहागरो ॥ सुंदर बोलत आवत बैन । ना जानौ तेहि
 समय सखीरी सब न श्रवन कि नैन ॥ रोम रोम में शब्द सुरतिकी नख शिख ज्यों चखऐन । येते
 मान बनी चंचलता सुनी न समझी सैन ॥ तबताकि जाकि ह्वैरही चित्रसी पल न लगतचितचैन ।
 सुनहु सूर यह सांचकी संध्रम सपन किधौं दिन रैन ॥ ४० ॥ राग मलार ॥ नैना माई भूले अनत न

जात । देखिसखी शोभा जो बनीहै माधवके सुसकात ॥ दाडिम दशन निकट नासा शुक चोंच
चलाइ न खात । मनो रतिनाथ हाथ भुकुटी धनु ता अवलोकि डरात ॥ वदन प्रभा मुख चंचल
लोचन आनंद उर न समात । मानहुँ भौह युवारथ जोते शशि न चलत मृगमाता ॥ कुंचित केश मधुर
ध्वनि मुरली मूरदास मुरसात । मनहुँ कमलपर कोकिल कूजत अलिगण उपर उडात ॥ ४१ ॥
राग कान्हरो ॥ श्याम कमलपद नखकी शोभा । जे नख चंद्र इंद्रशिरपरसे शिव विरंचि मन लोभा ॥ जे
नखचंद्र सनक मुनि ध्यावत नहिं पावत भरमाही । ते नखचंद्र प्रगट ब्रज युवती निरखि निरखि
हरषाही ॥ जे नखचंद्र फनीन्द्र हृदयते एकौ निमिष न टारत । जे नखचंद्र महामुनिनारद पलक न
कहू बिसारत ॥ जे नखचंद्र भजन खलनाखत रमा हृदय जेहि परसत ॥ मूर श्याम नखचंद्र विमल छवि
गोपी जनमिलि द्रशत ॥ ४२ ॥ राग आसावरी ॥ श्याम हृदय जलमुतकी माला अतिहि अनूपम छाजै री ।
मनहु बलाक पांति नवधनपर यह उपमा कछु भ्राजै री ॥ पीत हरित सित अरुण माल बन राजत
हृदय विशाल री ॥ मानहु इंद्रधनुष नभमंडल प्रगटभयो तिहिकालरी ॥ भृगुपद चिह्न उरस्थल प्रगटे
कौस्तुभमणि ढिग द्रशत री । बैठे मनु षटवधू एक सँग अर्धनिशा मिलि हरषत री ॥ भुजाविशाल
श्यामसुंदरकी चंदनखौरि चढाए री । मूरसुभग अँग अँगकी सोभा ब्रजललना ललचाए री ॥ ४३ ॥
राग मलार ॥ निरखि सखि सुंदरताकी सीव । अधर अनूप मुरलिका राजति लटकि रहनि अधग्रीव ॥
मंद मंद मूर पूरत मोहन रागमलार बजावत । कबहुँक रीझि मुरलिपर गिरिधर आपुहि रसभरि
गावत ॥ हर्षत लखत दशनावलि पंगति ब्रजवनिता मनमोहत । मर्कत मणि पुट बिचमुकुताहल
बदन धरे मनु सोहत ॥ मुख विकसत शोभा एक आवत मनोराजीव प्रकाश । मूर अरुण आग
मन देखिकै प्रफुलित भए हुलास ॥ ४४ ॥ राग टोडी ॥ गोपीजन हरिबदन निहारति । कुंचित अलक विथुरि
रहे भुवपर तापर तन मन वारति ॥ वदन सुधा सरसीरुह लोचन भुकुटी दोउरखवारी । मनोमधुप
मधुपानहि आवत देखि डरत जियभारी ॥ एक एक अलक लटकि लोचन पर गिह उपमा एक
आवत । मनहु पन्नगिनि उतरि गगनते दलपर फन परसावत ॥ मुरली अधर धरे मूलपूरत मंद मंद
सुरगावत । मूर श्याम नागर नारिनके चंचल चितहि चोरावत ॥ ४५ ॥ राग मूही विलचल ॥ देखि सखी
यह सुंदरताई । चपलनैन बिच चारुनासिका यकटक नैन रही तहांलाई ॥ करति बिचार परस्पर
युवती उपमा आनति बुद्धि बनाई । मानहु खंजन बिच शुक बैठो यह कहिकै मर जात लजाई ॥
कछु एक तिलक प्रसूनकी आभा मन मधुकर जहां रह्यो लुभाई । मूर श्याम नासिका मनोहर
यह सुंदरता उन कहां पाई ॥ ४६ ॥ राग रामकली ॥ मनोहरहै नैननकी भांति । मानहुँ दूरि करत बल
अपने शरद कमलकी कांति ॥ इंदीवर राजीव कसेसे जीते सब गुण जाति । अतिआनंद सप्रौढा
ताते विकसत दिन अरु राति ॥ खंजरीट मृग मीन विचारति उपमाको अकुलाति । चंचल चारु
चपल अवलोकनि चितहि न एक समाति ॥ जबलगि परत निमेष अंतरा युग समान पल जात ।
मूरदास वह रसिक राधिका निमिष पर अति अनखात ॥ ४७ ॥ आजु सखी देखे श्याम नए री ।
निकसे आनि अचानक अबहीं इत फिरि फिरि चितए री ॥ मैं तबते पछिताति इहै तनु नैनन बहुत
भए री । जो बिधिना इतनी जानतहै कत दृग दोइ दये री ॥ सबदै लेउ लाख लोचनकहे जो कोउ
करत नये री । हरिप्रतिअंग विलोकनको मन मैं पनकै पठए री ॥ अपने चोप बहुत कह पइये
येहरिसंग गये री ॥ थकेचरण सुनि मूर मनो गुण मदन बाण विधये री ॥ ४८ ॥ राग गूजरी ॥ देखि री
हरिके चंचलनैन । खंजन मीन मृगज चपलाई नहिं पटतर एकसैन ॥ राजिव ल इंदी वरसतदल

कमलकुसेसै जातिनिशि मुद्रित प्रातहि ए बिगसत ए बिगसत दिन राति॥अरुण श्वेत सित झलक
 पलक प्रति को वरणै उपमाइ।मनो सरस्वति गंगा यमुना मिलि आगम कीन्हों आइ ॥ अवलोकनि
 जल धार तेज अति तहां न मन ठहरात । सूर श्याम लोचन अपार छवि उपमा सुनि शरमात४९॥
 राग सोरठा॥देखु सखी मोहन मन चोरत । नैन कटाक्ष विलोकन मधुरी सुभग भुकुटी विवि मोरत ॥
 चंदनखौरि ललाट श्यामके निरखत अति सुखदाई । मानहुं अर्धचंद्र तट अहिनी सुधा चोरावन
 आई ॥ मलयज भाल भुकुटी रेखाकी कटि उपमा एक ल्यावत । मनो एक संग गंग यमुन नभ
 तिरछी धार बहावत ॥ भुकुटी चारु निरखि ब्रजसुंदरि यह मन करति विचार । सूरदास प्रभु शोभा-
 सागर कोउ न पावत पार ॥५०॥ राग रामकली॥देखि री देखि कुंडललोला चारु श्रवणनि ग्रहित कीन्हों
 झलक ललित कपोल ॥ वदन मंडलसुधा सरवर निरखि मन भयो भोर । मकर क्रीडत गुप्त परगट
 रूप जल झकझोर ॥ नैन मीन भुवंगिनी भुअ नासिका थलबीच । सरस मृगमद तिलक
 शोभा लसतिहै गलकीच ॥ मुख विकास सरोज मानहु युवति लोचन भुंग ॥ बिथुरी अलकै
 परी मानहुं प्रेमलहरि तरंग ॥ श्याम तुम छवि असृत पूरण रच्यो काम तडाग । सूर
 प्रभुकी निरखि शोभा ब्रज तरुणि बडभाग ॥ ५१ ॥ राग धनाश्री ॥ हरिमुख निरखति नागरि
 नारि । कमलनयनके कमल वदनपर बारिज बारिज बारि ॥ सुमति सुंदरी परस प्रियारस
 लंपट माडी आरि । हारि जोहारि जो करत बसीठी प्रथमहि प्रथम चिन्हारि ॥ राखत ओट कोटि
 यतननिकरि झांपति अँचल झवारि । खंजन मनहु उडनको आतुर सकत न पंख पसारि ॥ देखि
 स्वरूप श्यामसुंदरको रही न पलकसँभारिदेखहु सूर अधिक सूरति तिन अजहुं न मानी हारि५२॥
 हरिमुख किधों मोहनी माई । बोलत बचन मंत्रसों लागत गति मति जाति भुलाई ॥ कुटिल
 अलक राजत भुव ऊपर जहां तहां रहे बगराई । श्याम फांसि मन कष्यो हमरो अब समुझी चतुराई॥
 कुंडल ललित पोलनि झलकत इनकी गति मै पाई । सूर श्याम युवती मन मोहन ये सँग करत
 सहाई ॥५३॥ राग नट ॥ निरखति रूप नागरि नारि । मुकुट पर मन अटक लटक्यो जात नहिं निरु
 आरि ॥ श्याम तन की झलक आभा चंद्रिका झलकाइबार बार विलोकि थकि रही नयनही ठहराई ॥
 श्याम मर्कटमणि महानग शिखिनि निर्तत मोर । देखि जलधर हर्ष उरपर नहीं आनंद थोर ॥ कोउ
 कहति सुरचाप माथी गगन भयो प्रकास । थकित ब्रजललना जहां तहँ हरष कबहुं उदास ॥ निरखि
 जो जेहि अंग राखी तहीं रही भुलाई । सूर प्रभु गुणराशि शोभा रसिक जन सुखदाइ ॥ ५४ ॥
 राग विहागरो ॥ देखि री देखि शोभाराशि । काम पटतर कहा दीजै रमा जिनकी दासि ॥ मुकुट शिर
 श्रीखंड सोहै निरखि रही ब्रजनारि । कोटि सुर कोदंड आभा छिरकि डारै वारि ॥ केश कुंचित
 बिथुरि भुवपर बीच शोभा भाल । मनहुं चंद्रहि अब लजान्यो राहु घेरो जाल ॥ चारु कुंडल
 सुभग श्रवणनि को सके उपमाइ । कोटि कोटि कला तरनि छवि देखि तनु भरमाइ ॥ सुभग मुख
 पर चारु लोचन नासिका यहि भाँति । मनो खंजन बीच शुक मिलि बैठहैं एक पाँति ॥
 सुभग नासा तर अघरछवि रसभरे अरुनाइ । मनो बिब निहारि शुक भुव धनुष देखि डेराइ ॥
 हँसत दशननि चमकताई वज्रकन रुचिपाँति । दामिनी दारिम नहीं सम कियो मन अति भ्रांति ॥
 चिबुक पर चितवत चोरावत नवलनंद किशोर । सूर प्रभुकी निरखि शोभा भई तरुनी भोर ॥
 ॥ ५५ ॥ राग सोरठ ॥ तन मन नारि डारत वारि । श्याम शोभासिंधु जान्यो अंग अंग निहारि॥पचि
 रही मन ज्ञान करि करि लहति नाहिन तीर । श्याम तन जलराशि पूरण महा गुण गंभीरा॥पीतपट

फहरानि मानो लहरि उठत अपार। निरखि छबि थकि तीर बैठी कहूं वार न पार। चलत अंग त्रिभंग
 करिकै भौहभाव चलाइ। मनो विच विच भौर डोलत चित परत भरमाइ ॥ श्रवण कुंडल मकर
 मानो नैन मीन विशाल। सलिल झलकनि रूप आभा देख री नंदलाल ॥ बाहुदंडभुजंग मानो
 जलधि मध्य बिहार। मुक्तामाला मनो सुरसरि है चली द्वयधार ॥ अंग अंग भूषण विराजत
 कनक मुकुट प्रभास। उदधि मथि नग प्रगट कीन्हो श्रीसुधापरगास ॥ चकृत भई तिय निरखि
 शोभा देहगति बिसराइ। सूर प्रभु छबिराशि नागर जानि जानि न जाइ ॥ ५६ ॥ राग सारंग ॥ बैठी
 कहा मदन मोहनको सुंदर बदन विलोकि। जा कारण धूधट पट अब लौं अखियां राखी रोकि ॥
 फबि रहे मोरचंद्रिका साथे छबिकी उठत तरंग। मनहुं अमरपति धनुष विराजत नवजलधरके
 संग ॥ रुचिर चारु कमनीय भाल कुंकुमको तिलक दिये। मानहुं अखिल भुवनकी शोभा
 राजत उदय किये ॥ मणिमय जडित लोल कुंडलकी आभा झलकत गंड। मनहुं कमल
 ऊपर दिनकरकी पसरी किरनि प्रचंड ॥ भुकुटी कुटिल निकट नैननके चपल होत यहि
 भाँति। मनहुं तामरस पारस खेलत बालभृंगकी पाँति ॥ कोमल श्याम कुटिल अल-
 कावालि ललितकपोलन तीर। मानहुं सुभग शरद इंदु ऊपर मधुपनिकी अर्ति भीर ॥
 अरुण अधर नासिका निकाई बढत परस्पर होड। सूर सो मनसा भई पांगुरी निरखि
 डगमगे गोड ॥ ५७ ॥ राग केदारो ॥ करि मन नंदनंदन ध्यान। सेइ चरण सरोज शीतल तजि विषै
 रस पान ॥ जानु जंघ त्रिभंग सुंदर कलित कंचन दंड। काछिनी कटि पीत पटुडुति कमलकेसर
 खंड ॥ मनु मराल प्रबाल छौना किंकिनी कलराउ। नाभिहृदय रोमावली अलि चले सैन सुभाउ ॥
 कंठ मुक्तामाल मलयज उर बने बनमाल। सुरसरीके तीर मानो लता श्याम तमाल ॥
 बाहु पानि सरोज पल्लव गहे मुख मृदु बेनु। अति विराजत बदन विधुपर सुरभि रंजित रेनु ॥
 अरुण अधर कपोल नासा परमसुंदर नैन। चलित कुंडल गंडमंडल मनहु निर्दोष नैन ॥ कुटिल
 कच भूतिलक रेखा शीशशिखिनि श्रीखंड। मनु मदन धनु शर संधाने देखि न कोदंड ॥ सूर
 श्रीगोपालकी छबि दृष्टि भरि भरि लेत। प्राणपतिकी निरखि शोभा पलक परन न देत ॥ ५८ ॥
 राग नटनारायण ॥ सजनी निरखि हरिको रूप। मनसि वचसि बिचारि देखो अंग अंग अनूप ॥ कुटि-
 ल केश सुदेश अलिगन वदन शरद सरोज। मकर कुंडल किंकिनी छबि दुरति फेरति मनोज ॥
 अरुण अधर कपोल नासा सुभग ईषद हास। दशनकी द्युति तडित नव शशिभुक् मदन बिलास ॥
 अंग अंग अनंग जीते रुचिर उर बनमाल। सूर शोभा हृदय पूरण देत सुख गोपल ॥ ५९ ॥ राग नट ॥
 नैननि ध्यान नंदकुमार। शीश मुकुट श्रीखंड भ्राजित नहीं उपमा पार ॥ कुटिल केश सुदेश राजत
 मनहुं मधुकर जाल। रुचिर केसरि तिलक दीन्हो परमशोभा भाल ॥ भुकुटि बंकट चारु लोचन
 रही युवती देखि। मनो खंजन चाप डरि डरि उडत नहिं तेहि पेखि ॥ मकर कुंडल गंड झलमल
 निरखि लज्जित काम। नासिकाछबि कीर लज्जित कवि न बरनत नाम ॥ अधर बिडुम दशन
 दाडिम चिबुकैह चितचोर। सूर प्रभु मुखचंद्र पूरण नारि नैन चकोर ॥ १४०० ॥ राग केदारो ॥ हमारे
 श्याम लालहो। नैन विशालहो मोही तेरी चालहो ॥ मोरमुकुट डोलनि मुख मुरली कल मंद। मनो
 तमाल शिखा शिखि नाचत आनंद ॥ मकराकृत कुंडल छबि राजत लोल कपोल। ईषद अधर
 मुसुकिन बिच मधुर २ बोल ॥ चपल चितवनि मनोहर राजत भुवभंग। धनुष बाण डारिके
 बशहोत कोटि अनंग ॥ बदनसुधाको सरोवर कुटिल अलक वारि। ब्रज युवती मृगिनी रचि तिनके

फल पारि ॥ पीतांबर छवि निरखत दामिनि द्युति लजाइ । चमकि चमकि सावन मनो
 धनमें दुरिजाइ ॥ चरण कमल अवलंबित राजित वनमाल । प्रफुलित है है लता मनो चढी
 तरु तमाल ॥ सूरदास वा छविपै वारौ तन मन प्राण। गिरिधर पिय देखि देखि कहा करौ अनुमान ॥ १ ॥
 राग सारंग ॥ देखि सखी सुंदर वनश्याम। सुंदर मुकुट कुटिल कच सुंदर सुंदर भाल तिलक छवि धाम ॥ सुंदर
 भुव सुंदर अति लोचन सुंदर अवलोकनि विश्राम । अतिसुंदर कुंडल श्रवणनिवर सुंदर झलक
 नि रीझत काम ॥ सुंदर चारु नासिका सुंदर सुंदर मुरली अधर उपाम । सुंदर दशन चिबुक अति
 सुंदर सुंदर हृदय विराजत दाम ॥ सुंदर भुजा पीत कटि सुंदर सुंदर कनक मेखला झाम । सुंदर
 जंघ जानु पद सुंदर सूर उधारन नाम ॥ २ ॥ राग धनाश्री ॥ देखि देखि री नंदकुलके उधारी। मात पितु
 दुरित उद्धरन ब्रजउद्धरन धरनि उद्धरन शिर मुकुटधारी ॥ पतित उद्धरन अपने भक्त
 उद्धरन दीनउद्धरन कुंडलनि धारी । जगत उद्धरन तिहुँ लोकके उद्धरन बलिहि उद्धरन पग पीठ
 धारी ॥ पूतना उद्धरन दनुज कुलउद्धरन तृणा उद्धरन मुख मुरलिधारी । शकट उद्धरन केशी
 प्रबल उद्धरन बका उद्धरन अरुण अधर धारी ॥ अघा उद्धरन गाइ ग्वालके उद्धरन वृषभ उद्ध
 रन वनमाल धारी । बच्छ उद्धरन ब्रह्मा उद्धरन येइ प्रभुयज्ञके पति यज्ञोपवीत धारी ॥ काली उद्धरन
 फन फन सहित उद्धरन दवा उद्धरन अंग मलयधारी। ग्राह उद्धरन गजराज उद्धरन ये शिला उद्धरन
 कटि पीत धारी ॥ यदुकुल उद्धरन द्रौपदी उद्धरन रुक्मिणी उद्धरन कर लकुट धारी । सिंधु उद्धरन
 सीता प्यारी उद्धरन जै विजय के उद्धरन धनुष धारी ॥ त्रास उद्धरन प्रहलादके उद्धरन प्रबल नर
 सिंह अवतार धारी । हिरणकश्यपके उद्धरन हिरण्याक्षके उद्धरन वेद उद्धरन बल भुजा धारी ॥
 धरम उद्धरन यह कर्म उद्धरन प्रभु सुभग कटि किंकिनी पीत धारी । सूर उद्धरन सुरलोकके
 उद्धरन हरि कंस उद्धरन एई मुरारी ॥ ३ ॥ नंद नंदन मुख देख्यो नीके । अंग अंग प्रति कोटि
 माधुरी निरखि हत सुख जीके । सुभग श्रवण कुंडलकी आभा झलक कपोलनि पीके ॥ दह दह
 अमृत मकर क्रीडन मनौ यह उपमा कछु हीके । और अंगकी सुधि नहि जानै कर कहतिहौं लीके
 सूरदास प्रभु नटव ॥ काछे रहत है रतिपति वीके ॥ ४ ॥ राग रामकली ॥ देखि री देखि कुंडल झलक ।
 नैन द्वे छवि धरौ कैसे लगत तापर पलक ॥ लसत चारुकपोल दुहुँ बिच सजल लोचन चार । मुख
 सुधा सरमीन मानै मकर संग विहार ॥ कुटिल अलक सुभाइ हरिके भुवनि परे रहे आइ । मनो
 मन्मथ फाँदि फंदवि मीन विवि तटल्याइ ॥ चपल लोचन चपल कुंडल चपल भुकुटीबंक । सखा
 व्याकुल देखि अपर लेत वनत नशंक ॥ सूर प्रभु नंदसुवनकी छवि बरनि कापै जाइ । निरखि
 गोपी निकरि विथकी विधिहि अति रिसपाइ ॥ ५ ॥ राग जयतश्री ॥ विधिना अतिही
 पोच कियो री । कहा बिगार कियो हम वाको ब्रज काहे अवतार दियो री ॥ यह तौ मन अपने
 जानत हौं येते पर क्यों निठुर हियो री । रोम रोम लोचन एकटक करि युवतिन प्रति काहे न
 ठ्योरी ॥ अँखियाँ द्वे छविकी चमकनि वह हम तौ चाहति सबै पियो री । सुनि सजनी यह
 करनी अपनी अपनेही शिर मानि लियो री ॥ हम तौ पाप कियो भुगतै को पुण्य प्रगट
 क्यों निठुर हियो री । सूरदास प्रभु रूप सुधानिधि पुट थोरो विधि नहीं वियोरी ॥ ६ ॥ राग धनाश्री ॥
 सुन री सखी बचन एक मोसों । रोम रोम प्रति लोचन चाहति द्वे सावितहैं तोसों ॥ मैं
 विधना सों कहाँ कछु नहि नितप्रति निमको कोसों । यों जो नीके दोऊ रहते निरखत
 रहती होसों ॥ एक एक अंग अंग छवि धरती मैं जो कहती तासों । सूर कहा तू कहति

अयानी काम परयो सब जोसों ॥ ७ ॥ राग कान्हरो ॥ कहा काहूको दोष लगावै । निमिषौ
 कहा कहति कहो बिधिसों कहा नैननि पछितावै ॥ श्याम हितू कैसे करि जानति औरौ
 निठुर कहावे । क्षणमें और और अँग शोभा जो ए देखन पावे ॥ जवहीं एकटक करि
 अवलोकत तबहीं वै झलकावै । सूर श्यामके चरित लखै को एई बैर बढावै ॥ ८ ॥ राग नट ॥ लहनी
 करम के पाछे । दियो आपनों लहै सोई मिले नहिं पाछे ॥ प्रगटहीहैं श्याम ठाढे कौन अंग केहि
 रूप । लह्यो काहू कहो मोसों श्याम है ठगभूप ॥ प्रेम जावक धनी हरिसे नैन पुट कह लेहि ।
 अमृत सिंधु हिलोरि पूरण कृपा दर्शन देहि ॥ पाइए सोई सखीरी लिखो जितनो भाल । सूर उत
 कछु कमी नाहीं छबि समुद्र गोपाल ॥ ९ ॥ राग सूही विलावल ॥ देख सखी अधरनकी लाली । मणि
 मरकतते सुभग कलेवर ऐसेहैं बनमाली ॥ मनो प्रातकी घटा साँवरी तापर अरुन प्रकाश ।
 ज्यों दामिनि बिच चमकि रहतहै फहरत पीत सवास ॥ कीधौं तरुन तमाल बेलि चढि युग
 फल बिंब सु पाक्यो । नासा कीर आय मनो बैठो लेत बनत नहिं ताक्यो ॥ हँसत दशन एक शोभा
 उपजत उपमा यदपि लजाइ । मनो नीलमणि पुट मुकुतागन बंदन भरि बगराइ ॥ किधौं वज्रकन
 लाल नगनि खचि तापर बिडुम पांति । किधौं सुभग बंधूप कुसुमपर झलकत जलकन कांति ॥
 किधौं अरुण अंबुज बिच वैठी सुंदरताई आई । सूर अरुण अधरनकी शोभा वर्णत बरनि न जाई ॥ १० ॥
 राग धनाश्री ॥ श्यामरूप देखनकी साध मेरी माई । कितनो पचिहारि रही देत नाहिं दिखाई ॥ मन तौ नि-
 रखत सु अंगमें रही भुलाई । मोसों यह भेद कहौ कैसे वहि पाई ॥ आपुन अंग अंग बिधो मोको
 बिसराई । बार बार कहत इहै तू क्यों नहिं आई ॥ अबहुं लै जात साध वाहि बोले लाई ।
 सूर श्याम छबि अगाध निरखत भरमाई ॥ ११ ॥ राग विलावल ॥ सुनहु सखी मैं बूझति तुमको काहू
 हरिको देखेहै । कैसो तन कैसो रंग देखियत कैसी बिधि करि भेषहैं ॥ कैसो मुकुट कुटिल कच
 कैसे सुभग भाल भुव नीकेहैं । कैसे नैन नासिका कैसी श्रवणनि कुंडल पीकेहैं ॥ कैसे अधर दशन
 दुति कैसी चिबुक चारु चित चोरतहैं । कैसे निरखि हँसत काहू तन कैसे बदन सकोरत हैं ॥
 कैसो उरमाला है शोभित कैसी भुजा बिराजतहैं । कैसे कर पहुँची हैं कैसी कैसी अँगुरिआ राजत
 हैं ॥ कैसी रोमावली श्यामके नाभि चारु कटि सुनियतहैं ॥ कैसी कनक मेखला कैसी कछनी यह
 मन गुनियतहैं ॥ कैसे जंघ जानु कैसे दोड कैसे वदन खजानतिहैं । सूर श्याम अँग अंगकी शोभा
 देखेकी अनुमानतिहैं ॥ १२ ॥ राग रामकली ॥ ऐसे सुने नंद कुमार । नख निरखि शशि कोटि
 वारत चरण कमल अपार ॥ जानु जंघ निहारि रंभा करनि डारत वारि । काछतो पर प्राण वारत
 देखि शोभाभारि ॥ कटि निरखि तनु सिंह वारत किंकिनी जु मराल । नाभि पर हृद आपु वारत
 रोमावली अलिमाल ॥ हृदय मुकुतामाल निरखत वारि अवलि वलाक । करज कर पर कमल वारत
 चलति जहां तहां साक ॥ भुजा पर वर नाग वारत गये भागि पताल । ग्रीवकी उपमा नहीं कहूँ
 लखति परम रसाल ॥ चिबुकपर चित वारि हारत अधर अंबुज लाल । बंधूक विडुम बिंब वारत ते
 भये बेहाल ॥ बचन सुनि कोकिलावारत दशन दामिनि कांति । नासिकापर कीर वारत चारु
 लोचन भांति ॥ कंज खंजन मीन मृग शावकनि डारति वार । भ्रुकुटि पर सुर चाप वारत तरनि
 कुंडल हारि ॥ अलक पर वारत अँधारी तिलक भाल सुदेश । सूर प्रभु शिर मुकुटधारे धरे नटवर
 भेष ॥ १३ ॥ राग सारंग ॥ ऐसी बिधि नंदलाल कहत सुने माई रीदेखे जो नैन रोम रोम प्रति सुभा-
 ई री ॥ बिधिने द्वै नैन रचे अंग ठानि ठान्यो । लोचन नहिं बहुत दिये जानिकै भुलान्यो ॥ चतुरता

प्रवीनता विधाताको जानै । अब कैसे लगत हमहि बातें न अयाने ॥ त्रिभुवन पति तरुन कान्ह नट-
वर बपुकाछे । हमको द्वै नैन दिये तेऊ नहि आछे ॥ ऐसो विधिको विवेक कहौ कहा
वाको । सूर कबहुं पाऊं जो कर अपने ताको ॥ १४ ॥ राग नट ॥ मुखपर चंद्र डारौ वारि ।
कुटिल कच पर भौर वारौ भौह पर धनु वारि ॥ भालकेसरि तिलक छबिपर
मदन शत शर वारि ॥ मनु चली वहि सुधा धारा निरखि मनघौ वारि ॥ नैन खंज-
न मृग मीन वारौ कमलके कुलवारि ॥ मनौ सुरसति यमुन गंगा उपमा डारौ वारि ॥ निरखि कुंडल
तरुनि वारौ कूप श्रवननि वारि ॥ झलक ललिता कपोल छबिपर मुकुर शत शत वारि ॥ नासिकापर
कीर वारौ अधर विद्रुम वारि ॥ दशन एकन वज्र वारौ बीज दाडिम वारि ॥ चिबुकपर चित वित्त
वारौ प्राण डारौ वारि । सूर हरिकी अंग शोभा कौ सकै निरवारि ॥ १५ ॥ राग सोरठ ॥ श्याम उर सुधादह
मानौ । मलय चंदन लेप कीन्हें बरन यह जानौ ॥ मलय तनु मिलि लसति शोभा महांजल गंभीर ।
निरखि लोचन भ्रमत पुनि रधरत नहि मन धीर ॥ उरज भँवरी भँवर मानौ मीन मणिकी कांति । भृगुच-
रण हृदय चिह्न ये सब जीव जल बहुभांति ॥ श्यामबाहु विशाल केसरि खौरि बिबिधि बनाइ । सहज
निकसे मगर मानौ कूल खेलत आइ ॥ सुभग रोमावली की छबि चली दहते धार । सूर प्रभुकी
निरखि शोभा युवति बारंवार ॥ १६ ॥ मनु मधुकर पद कमल लुभान्यो । चित्त चकोर चंद्र नख
अटक्यो एकटक पल न भुलान्यो ॥ बिनही कहे गये उठि मोते जात नहीं मैं जान्यो । अब देखो
तनमें वे नाहीं कहा जियहि धौं आन्यो ॥ तबते फेरि तके नहि मो तन नखचरणनहित मान्यो ॥
सूरदास वे आपु स्वारथी परवेदन नहि जान्यो ॥ १७ ॥ राग मारू ॥ श्याम सखि नीके देखे नाहीं । चित-
वतही लोचन भरिआए बार बार पछिताहीं ॥ कैसेहु करि एकटक राखति नैकहिमें अकुलाहीं ।
निमिष मनो छबि पर रखवारे ताते अतिहि डराहीं ॥ कहा करै इनको कहा दोष न इन अपनीसी
कीन्हें । सूर श्याम छबि पर मन अटक्यो ॥ उन सब शोभा कीन्हें ॥ १८ ॥ राग गौरी ॥ मन लुब्धो
हरिरूप निहारि । जांदिन श्याम अचानक आयो तबते मोहिं बिसारि ॥ इंद्रिन संग लगाइ गयो
ह्रां डेरा निकसे झारि । ऐसे हाल करत री कोऊ रही अकेली नारि ॥ फेरि न मेरी उहि सुधि लीन्हें
आपु करत दुख झारि । सूर श्यामको उरहनों दैहौं पठवत काहे न मारि ॥ १९ ॥ अथ अनुरागसमयके
पद ॥ रामकली ॥ पुनि कहतिहैं व्रजनारि । धन्य बड भागिनी राधा तेरे वश गिरिधारि ॥ धन्य
नंदकुमार धनि तुमधन्य तेरी प्रीति । धन्य तुम दोउ नवलजोरी कोक कलानि जीति ॥ हम बिमुख
तुम कृष्णसंगिनि भ्रूण एक द्वै देह । एक मन एक बुधि एकचित दुहुनि एक सनेह ॥ एक छिनु बिन
तुमहि देखे श्याम धरत न धीर । मुरलिमें तुव नाम पुनि पुनि कहतहैं बलबीर ॥ श्याममणि मैं परखि
लीन्हों महाचतुर सुजान । सूर प्रभुके प्रेमही वश कौन तोसरि आन ॥ २० ॥ राग विहागरो ॥ राधा परम
निर्मल नारि । कहतिहैं मन कर्मना करि हृदय दुविधा टारि ॥ श्यामकी एक तूही जान्यो दुराचरनो
और । जैसे घट पूरण न डोलै अध सुलौ डगडौर ॥ धनी धन कबहुं न प्रगटै धरै धनहि छिपाइ ।
तैं महानग श्याम पायो प्रगटि कैसे जाइ ॥ कहतिहैं यह बात तोसों प्रगट करिहैं नाहिं । सूर सखी
सुजान राधा परस्पर मुसकाहिं ॥ २१ ॥ राग गौरी ॥ श्यामको तैंहीं हैं पहिचाने । सांची प्रीति जानि
मनमोहन तेरेहि हाथ बिकाने ॥ हम अपराध कियो कहि तुमसों हमही कुलटी नारि । तुमसों उनसों
बीच नहीं कछु तुम दोऊ बरनारि ॥ धन्य सुहाग भाग है तेरी धनि बडभागी श्याम । सूरदास
प्रभुसे पति जाके तोसी जाके वाम ॥ २२ ॥ राग सोरठ ॥ राधा श्यामकी प्यारी । कृष्णपति सर्वदा

तेरे तू सदा नारी ॥ सुनत बाणी सखी मुखकी जिय भयो अनुराग । प्रेम गदगद रोम पुलकित
समुझि अपने भाग ॥ प्रीति परगट कियो चाहै वचन बोलि न जाइ । नंदनंदन कामनायक रहे
नैननि छाइ ॥ हृदयते कहूँ टरत नाहीं कियो निहचल वास । सूर प्रभु रस भरी राधा दुरत नाहिं
प्रकाश ॥ २३ ॥ राग जयतथी ॥ सुनि सजनी मेरी एक बात । तुम तौ अतिही करति बडाई मन मेरो सर-
मात ॥ मोसों हँसति श्याम तुम एकै यह सुनिकै मरमात । एक अंगको पार न पावति चकित होइ
भरमात ॥ वह मूरति द्वै नयन हमारे लिखी नहीं करमात । सूर रोम प्रति लोचन देतो बिधिना पर
तर मात ॥ २४ ॥ राग कल्याण ॥ जो बिधना अपवश करि पाऊं । तौ सखि कह्यो होइ कछु तेरो अपनी
साध पुराऊं ॥ लोचन रोम रोम प्रति माँगौ पुनि पुनि त्रास दिखाऊं । यकटक रहैं पलक नहिं लागैं
पड़ति नई चलाऊं ॥ कहा करौं छबि राशि श्याम घन लोचन द्वै नहिं ठाऊं । येते पर ये निमिष
सूर सुनि यह दुख काहि सुनाऊं ॥ २५ ॥ राग विलावल ॥ कहा करौं बिधि हाथ नहीं । वह सुख यह तनु
दशा हमारी नैननिको रिस मरत महीं ॥ अंग अंग कीनी बिधि वन ये द्वै नैना देखति जबही । ऐसो
कौन ताहि धरि आनै कहा करौं खीझति मनही ॥ बडो सुजान चतुरई नीकी जगत पिता कहियत
सबही । सूर श्याम अवतार जानि ब्रज लोचन बहुत न दिये हमही ॥ २६ ॥ अब समुझी यह निटु-
र बिधाता । ऐसेहि जगतपिता कहवावत ऐसे घातकरै सो दाता ॥ कैसो ज्ञान चतुरई कैसी कौन बिबे
क कहाँको ज्ञाता । जैसो दुख हमको एहि दीन्हों तैसे याको होत निपाता ॥ द्वै लोचन तनुमें करि
दीन्हों याहीते जान्यो पितुमाता । सूर श्यामछबिते अघात नहिं बार बार आवत अकुलाता ॥
॥ २७ ॥ राग सूही विलावल ॥ द्वै लोचन साबित नहिं तेउ । बिनु देखे कल परत नहीं छन येते पर कीन्हें यह
टेउ ॥ बार बार छबि देख्योइ चाहत साथी निमिष मिलेहैं येउ । तेतो ओट करत छिनही छिन देख-
तही भरिआवत दोउ ॥ कैसे मैं उनको पहिचानों नैन बिना लखिये क्यों भेउ । ये तौ निमिष परत
भरि आवत निटुर बिधाता दीन्हें येउ ॥ कहा भई जो मिली श्यामसों तू जान्यो जानै सबकोउ ।
सूर श्यामको नाम श्रवन सुनि दर्शन नीके देत न वोउ ॥ २८ ॥ राग सूही ॥ श्यामहि मैं कैसे पहि-
चानौं ॥ क्रम क्रम करि एक अंग निहारति पलकओट ताको नहिं जानौं ॥ पुनि लोचन ठहराइ निहा-
रति निमिष मेटि वह छबि अनुमानौं । औरै भाव और कछु शोभा कहौ सखी कैसे उरआनौं ॥
छिन छिन अंग अंग छबि अगणित पुनि देखौं फिरिकै हठ ठानों । सूरदास स्वामीकी महिमा कैसे
रसना एक बखानों ॥ २९ ॥ राग सारंग ॥ श्यामसों काहेकी पहिचानि । निमिष निमिष वह रूप
न वह छबि रति कीजै जेहि जानि ॥ यकटक रहत निरंतर निशि दिन मनमति सोचित सानि ।
एकौ पल शोभा की सीवा सकत न उरमहैं आनि ॥ समुझि न परे प्रगटही निरखत आनंदकी
निधि खानि । सखी यह बिरह संयोग की समरस दुख सुख लाभ कि हानि ॥ मिटति न घृतते
होम अग्निरुचि सूर सुलोचनि बानि । इत लोभी उत रूप परमनिधि कोउ न रहत मिति मानि ॥
॥ ३० ॥ राग रामकली ॥ कहा करौं नीके करि हरिको रूप रेख नहिं पावति । संगहि संग फिरति निशिवा-
सर नैननिमेष न लावति ॥ बैधी दृष्टि यों डोर गुडी बश पाछे लागी धावति । निकट भये मेरी ए
छाया मोको दुख उपजावति ॥ नख शिख निरखि निहारयोइ चाहति मनमूरति अति भावति ।
जानों नहीं कहाँते निजछबि अंग अंगमें आवति ॥ अपनी देह आपुको बैरिनि दुरत न दुरी दुरावति ।
सूर श्यामसों प्रीति निरंतर अंतर मोहिं करावति ॥ ३१ ॥ राग वनाथी ॥ जो देखों तो प्रीति करौं री ॥ संगहि रहौं
फिरौं निशिबासर चितते नेक नहीं बिसरौं री ॥ कैसे दुरति दुराये मेरे उन बिन धीरज नहीं धरौं री ॥

जाउँ तहीं जहँ रहैं श्यामघन निरखत यकटक ते न टरौं री । सुनि री सखी दशा यह मेरी सो कहि धौं
 अब कहा मरौं री । सूर श्याम लोचन भरि देखौं कैसे इतनी साध मरौं री ॥ ३२ ॥ राग विलावल ॥ हरि
 दरशनकी साध मुई । उडिये उडी फिरति नैननि सँग फर फूटै ज्यों आकरुई ॥ जानों नहीं
 कहाँते आवति वह मूरति मनमाहँ उई । विन देखेकी यथा बिरहनी अति जुर जरति न जाति छुई ॥
 कछु वै कहत कछु कहि आवत प्रेमपुलाकि श्रमस्वेदचुई । सूखति सूर धान अंकुरसी बिनु बरषा
 ज्यों मूल तुई ॥ ३३ ॥ राग धनाश्री ॥ सुन री सखी दशा यह मेरी ॥ जबते मिले श्याम घन सुंदर संगहि
 फिरति भई जनु चेरी ॥ नीके दरश देत नहीं मोकों अंगनप्रति अनंगकी टेरी । चपलाते
 अतिही चंचलता दशन चमक चकचौंधि घनेरी ॥ चमकत अंग पीतपट चमकत चमकति
 माला मोतिनकेरी । सूर समुझि विधिनाकी करनी अतिरिस करति सौह मुँह तेरी ॥ ३४ ॥ राग मारू ॥
 आजुके दिनको सखी अति नहीं जो लाख लोचन अंग अंग होते । पूरति साध मेरे हृदय माँझ
 देखत सबै छवि श्याम कोते ॥ चित्त लोभी नैन द्वार अतिही सूक्ष्म कहा वह सिंधु छविहै अगाधा ।
 रोम जितने अंग नैन होते संग रूप लेती निदरि कहति राधा ॥ श्रवण सुनि सुनि दहै रूप कैसे
 लहै नैन कछु गहै रसनान ताके । देखि कोउ रहै कोउ सुनि रहै जीभ बिन सो कहै कहा नहीं नैन
 जाके ॥ अंग बिनुहै सबै नहीं एकौ फवे सुनत देखत जवै कहन लोरे । कहैं रसना सुनत श्रवन
 देखत नैन सूर सब भेद गुनि मनाहिँ तोरे ॥ ३५ ॥ राग धनाश्री ॥ इनहुँमें घटिताई कीन्हीं । रसना
 श्रवण नैनके होते की रसनाहीको नहीं दीन्हीं ॥ बैर कियो विधना हमको रचि याकी जाति अबै
 हम चीन्हीं ॥ निठुर निर्दयी याते और न श्याम बैर हमसों है लीन्हीं ॥ या रसहीमें मगन राधिका चतुर सखी
 तबहीं लखि भीनी । सूर श्यामके रंगहि राची टरत नहीं जलते ज्यों मीन्हीं ॥ ३६ ॥ राग सोरठ ॥ धन्य
 धन्य बडभागिनि राधा । नीके भजी नंदनंदनको मेटि भवन जन बाधा ॥ नवल श्याम नवला तुमहुँ
 हो दोउ तुम रूप अगाधा । मैं जानी यह बात हृदयकी रही नहीं कछु साधा ॥ संगहि रहति सदा
 पियप्यारी क्रीडत करति उपाधा । कोककला वितपन्न भई हौ कान्हूरूपतनु आधा ॥ प्रेम उमँगि तेरे
 मुख प्रगट्यो अरस परस अवलाधा ॥ सूरदास प्रभु मिले कृपाकरि गये दुरति दुखदाधा ॥ ३७ ॥ राग धनाश्री ॥
 कहि राधिका बात अब सांची ॥ तुम अब प्रगत कही मो आगे श्याम प्रेमरस मांची ॥ तुमको कहाँ मिले
 नंद नंदन जव उनके रंगरांची । खरिक मिले की गोरस बेचत की बिपहरते वांची ॥ कहे बनै छाडो
 चतुराई बात नहीं यह काची । सूरदास राधिका सयानी रूपराशि रस खाची ॥ ३८ ॥ राग गौरी ॥
 कव री मिले श्याम भाहिँ जानो । तेरी सौ कहि कहत सखी री अबहुँ नहिँ पहिचानों ॥ खरिक मिले की
 गोरस बेचत की अबहीं की कालि । नैननि अंतर होत न कवहुँ कहति कहा री आलि ॥ एको पल
 हरि होत न न्यारे नीके देखे नाहीं । सूरदास प्रभु टरत न टारे नैननि सदा बसाहीं ॥ ३९ ॥
 राग विलावल ॥ श्याम मिले मोहिँ ऐसे माई । मैं जलको यमुनातट आई ॥ औचक आये तहां कन्हाई
 देखतही मोहनी लगाई ॥ तबहीते तनु सुरति गँवाई । मूधे मारगगई भुलाई ॥ विन देखे कल परे न माई
 सूर श्याम मोहनी लगाई ॥ ४० ॥ तबहीते हरि हाथ विकानी । देहगेह सुधि सबै भुलानी ॥ अंग शि-
 थिल भइ जैसे पानी । ज्यों त्यों करि गृह पहुँची आनी ॥ बोले तहाँ अचानक बानी ।
 दूरे देखे श्याम विनांनी ॥ कहा कहाँ सुनि सखी सयानी । सूर श्याम ऐसी मति ठानी ॥ ४१ ॥
 राग धनाश्री ॥ जा दिनते हरि दृष्टि परे री । ता दिनते इन मेरे नैननि दुख सुख सब बिसरे री ॥ मोहन
 अंग गोपाललालके प्रेम पियूष भरे री । धसै उहां मुसुकानि बाहुलै रचि रुचि भवन करै री ॥

पठवतिहौं मन तिनहि मनावन निशि दिन रहत अरे री । ज्यों ज्यों मान करति उलटावत त्यों
 त्यों होत खरे री ॥ पचि हारी समझाइ सोचि पचि पुनि पुनि पाँइ परे री । सो सुख सूर कहांलों
 बरणौं यकटकते न टरे री ॥ राग सारंग ॥ जबते प्रीति श्यामसों कीन्हों । तादिनते मेरे इन नैननि
 नेकहु नौद न लीन्हों ॥ सदा रहैं मन चाक चढ्यौ सो और न कछु सोहाइ । करत उपाइ बहुत मिलि
 बेको इहै विचारत जाइ ॥ सूर सकल लागत ऐसी यह सो दुख कासों कहिये । ज्यों अचेत बालककी
 बेदन अपनेही तन सहिये ॥ ४२ ॥ राग अडानो ॥ को जानै हरि कहा कियो री । मन समझति सुख
 कहत न आवै कछु एक रस लोचन जु पियो री ॥ ठाढी हुती अकेली आँगन आनि अचानक द्रश
 दियो री । सुधि बुधि कछु न रही तेहि अवसर मेरो मन कियों पलटि लयो री ॥ ता सुख हेतु दहत
 दुख दारुण छिन छिन जरति जुडात हियो री । सूर सकल आनत उर अंतर उपमाको पावति न
 वियोरी ॥ ४३ ॥ राग सारंग ॥ मेरे हरि अँगनाहै जु गए री । निकसे आइ अचानक सजनी इत फिरि फिरि
 चितये री ॥ अति दुखमें पछिताति यहै कहि नैनन बहुत ठये री । जो बिधि इहै कियो चाहत हो द्वै मुहि
 कत वदए री ॥ सब दै लेउ लाख लोचन सखी ज्यों कोऊ जडत नए री । थाके सूर पथिक मग मानो मदन
 व्याध बिधए री ॥ ४४ ॥ राग कान्हरो ॥ पीतांबरकी शोभा सखी री मोपै कही न जाइ । सागरसुतापति आशुघ
 मानो वनरिषु रिषुमै देति दिखाइ ॥ जाअरि पवन तहि महि सुव स्वामी आभा कुंडल कोटि दिखाई ।
 छायापति तनु बदन बिराजत बंधु अधरनए लजाई ॥ नाकी नाय कुवाहनकी गति मुरली सुधु
 नि बजाई । सूरदास प्रभु हरि सुत बाहन तासुत हरिलै सरह बनाई ॥ ४५ ॥ राग सारंग ॥ टरति न टारे इह छवि
 मनमें चुभी । श्याम सुसघन पीत वर दामिनि चातक अँखियाहो जाइ तुभी ॥ है जलधारहार
 मुकुता मनो बक पंगति कुमुद माल सुभी । गिरा गंभीर गरज मनु सुनि सखी खानि के श्रवन
 देखुभी ॥ मोहन बानीहौं ठगी रही इकटकहौं जु उभी । सूरदास मोहन मुख निरखत उपजी
 सकल तनकाम गुंभी ॥ ४६ ॥ राग विलावल ॥ नंदके लाल हरचो मन मोराहौं बैठी पोवति मोतिअनलर कां-
 कर डारि चले सखि भोर ॥ बंकविलोकनि चाल छवीली रसिक शिरोमणि नंद किशोर ।
 कहि काको मन रहत श्रवण सुनि सरस मधुर मुरलीकी घोर । इंदु गोविंदु बदनको कारन
 चितवति नैन बिहंग चकोर । सूरदास प्रभुके जु मिलनको कुच श्रीफलहो करति अकोर ॥
 ४७ ॥ राग अडानो ॥ मेरो मन गोपाल हरचो री । चितवतही उर पैठि नैनमन ना जानों धौं कहा
 करचो री ॥ मात पिता पति बंधु सजन जन सखिआँगन सब भवन भरचो री । लोक वेद
 प्रतिहार पहरुआ तिनहुँपै राख्यो न परचो री ॥ धर्म धीर कुलकानि कुंची कर तेहि तारोंदैं दूरि
 धरचो री । पलक कपाट कठिन उर अंतर इतेहु जतन कछु वै न सरचो री ॥ बुधि विवेक बल सहित
 सच्यो पचि सुघन अटल कबहुं न टरचो री । लियो चुराइ चितै चित सजनी सूर सो मोतन जात
 जरचो री ॥ ४८ ॥ राग अडानो ॥ मेरो मन तबतेन फिरचो री । गयो जु संग श्याम सुंदरके तहाते कबहुं
 न टरचो री ॥ जोबरूप गर्वधन सचि सचि हों उरमें जु धरचो री । कहांकहौं कुलशील सकुच सचि
 सरवस हाथ परचो री ॥ बिनु देखे मुख मनु हरिको यह निशिदिन रहत अरचो री । सूरदास या वृथा
 लाजते कछुअ न काज सरचो री ॥ ४९ ॥ राग सारंग ॥ यह सब मैही पोच करी । श्यामरूप निरखत
 नैननि भरि भौहनि फंद परी ॥ वै किशोर कमनीय मुगध मै लुबुधतहं न डरी । अब छबि गई
 समाइ हियेमें टारतहू न टरी ॥ अति सुख दुख संभ्रम व्याकुलता विधु मुख सनमुख री । बुधि विवे-
 क बल वचन विवशहै आनंद उमँगि भरी ॥ यद्यपि शूल सहत सुनि सूर सु अंगहउदै न अरी ।

तदपि मुख मुरलिका विलोकति उलटि अनंग जरी ॥ ५० ॥ राग आसावरी ॥ सखी री ना जानौ
 तबहीते मोको श्याम कहा धौं कीन्हो री । मेरे दृष्टि परे जादिनते ज्ञान जान हरि लीन्हो री ॥ द्वारे आइ
 गए औचकही मैं आंगनही ठाढी री । मनमोहन मुख देखि रही तब कामव्यथा तनु बाढी री ॥ नैन
 सैन दैदैं हरि मोतन कछु एक बात बतायो री । पीतांबर उपरैना करगहि अपने शीश फिरायो री ॥
 लोकलाज गुरुजनकी शंका कहत न आवै बानी री । सूर श्याम मेरे आँगन आए जात बहुत पछिता
 नी री ॥ ५१ ॥ सो गेठ ॥ मन हरिलीन्हों कुँवर कन्हाई । जबते श्याम द्वारहैं निकसे तब तेरी मोहिं घर
 न सुहाई ॥ मेरे हित आइ भये हरि ठाढे मोते कछु न भई री माई । तबहीते व्याकुल भइ डोलति
 बैरी भए मातपितु भाई ॥ मो देखत शिरपाग सँवारी हँसि चितये छवि कही न जाई । सूर श्यामगिरि
 घर बर नागर मेरो मन लगए चोराई ॥ ५२ ॥ राग धनाश्री ॥ प्रेमसहित हरि तेरे आये । कछु सेवा तैं करी कि
 नाहीं कीधौं वैसेहि उनहि पठाये ॥ काहेते हरि पाग सँवारी क्यों पीतांबर शीश फिराये । गुप्त भाव तो
 सों कछु कीन्हों घर आए काहे विसराये ॥ अतिही चतुर कहावत राधा बातनहीं हरि क्यों
 भुराये । सूर श्यामको वश करि लेती काहेको रहते पछताये ॥ ५३ ॥ गुरुजनमें बैठी आये हरि
 बँदी सँवारन मिस पाइलागी । चतुर नायकहु पाग मसकी मनहीमन रीझे गुप्तभेद प्रीति तन जागी ॥
 हस्तकमल हरि हेरि हृदय धरे भागिन उत आप कंठलागी । सूरदास अति चतुर नागरी पिय
 अति नागर दुहुँ कह्यो मनमें सुहाग भागी ॥ ५४ ॥ श्याम अचानक आइ गयेरी । मैं बैठी गुरु-
 जन विच सजनी देखतही मेरे नैन नयेरी ॥ तब इक बुद्धि करी मैं ऐसी बँदीसों कर परस कियो
 री । आपु हँसे उत पाग मसकी हरि अंतर्यामी जानि लियो री ॥ लैकर कमल अधर परसायो देखि
 हरषि पुनि हृदय धरयो री । चरण छुँवै दोउ नैन लगाये मैं अपने भुज अंक भरयो री ॥ ठाढे
 रहे द्वार अति हित करि तबहीते मन चोरि गयोरी । सूरदास कछु दोष न मेरो उत गुरुजन इत
 हेतु नयो री ॥ ५५ ॥ करत मोहिं कछुवै तौ न बनी । हरि आए चितवतहीरही सखी जैसे चित्र धनी ॥
 अति आनंद हरष आसन उर कमल कुटी अपनी । न्योछावर अंचलकी फहरनि अर्धनैन जल
 धार घनी ॥ गुरुजन लाज कछु न सकी कहि सुनि मन बुधि सजनी । हृदय उमँगि कुच कलश प्र-
 गट भये टूटी तरकि तनी ॥ अब उपजति अति लाज मनहि मन समुझति निज करनी । सूरदास
 मेरी जडमति मंगल प्रभु मांझ गुनी ॥ ५६ ॥ सेवा मानि लई हरि तेरी । अब काहे पछिताति
 राधिका श्याम जात करि फेरी ॥ गुरुजनमें भावहि की पूजा और कहौ कछु टेरी । मोहन अति
 सुखपाय गये री चाहति हौं कहमेरी ॥ तेरे वशभए कुँवर कन्हाई करति कहा अवसेरी । सूर श्याम
 तुमको अति चाहत तुमप्यारी हरि केरी ॥ ५७ ॥ राग आसावरी ॥ राधा भाव कियो यह नीको तुम बँदी
 उन पाग छुआई । ऐसे भेद कहा कोउ जानै तुमही जानौ गुप्त दुराई ॥ तुम जुहार उनको जब कीन्हों तुम
 को उनहु जुहार कियो । एकै प्राण देह द्वै कीन्हें तुम वै एकै नहीं वियो ॥ तुम पग परसि नैन पर
 राख्यो उनि करकमलनि हृदय धरयो । सूर श्याम हृदय तुम राखे तुम उनको लै कंठभरयो ॥ ५८ ॥
 राग विहागरी ॥ अरी माई एक गाँवके बसत एक बार हरि कीन्ही पहिचानि । निशिदिन रहै दरशकी आशा
 मिले अचानक आनि ॥ भाग्य दशा आँगनही आये सुंदर सरबस जानि । नीके करि देखनहुँ न पाए
 वहिनजाइ कुलकानि । कल न परत हरि दरशन विन री मोहिं परी यह बानि । सूरदास बिकानी री
 हौं नंदसुवनके पानि ॥ ५९ ॥ कहा करौं गुरुजन डर मान्यो । आए श्याम कौनहित करिकै मैं
 अपराधिनि कछु न जान्यो ॥ ठाढे श्याम रहे मेरे आँगन तबते मन उन हाथ बिकान्यो । चूकपरी

मोको सबही अंग कहा करौं गई भूलि सयान्यो ॥ वे उतहीको गये हरष मन मेरी करनी समुझि
अयान्यो । सूर श्याम संग मन उठि लाग्यो मोपर बारंबार रिसान्यो ॥ ६० ॥ राग सारंग ॥
अचानक आये री हरि मेरे चितै तब हौरही छवि निहारि । कुंडल लोल कपोल रहे कच श्रमजल
सों कर कंजसों टारि ॥ गुरुजन बिच मैं आंगन ठाढी अतिहित दरशन दियो मया करि । सूरदास
स्वामी अंतर्दामी वै हँसि चितये सुख करि ॥ ६१ ॥ राग गौरी ॥ मैं अपनेकुलकानि डरानीकैसे श्याम
अचानक आये मैं सेवा नहिं जानी ॥ उहै चूक जिय जानि सखी सुनि मन लै गए चुराइ । तनते
जात नहीं मैं जान्यो लियो श्याम अपनाइ ॥ ऐसे ढंग फिरत हरि घर घर भूलि कियो अपराध ॥ सूर श्याम
मन देहि न मेरो पुनि करिहौं अनुराध ॥ ६२ ॥ राग काफ़ी ॥ मोही सांवरे सजनी तबते गृह मोको न सोहाई
द्वार अचानकहै गये री सुंदर बदन दिखाई ॥ ओढे पीरी पामरी पहिरे लाल निचोल । भौहैं कांठ
कटीलियां सखि वश कीन्ही बिनमोल ॥ मोर सुकुट शिर सोहई अरु अधर धरे मुखबैन ॥ मोहन मूरति
हृदय बसै छवि लागि रही दोउनैन ॥ श्याम रूपमें मन गीधो भलो बुरो कहौ कोई । सूरदास प्रभु
संग गयो मन मनो उनहीं को होई ॥ ६३ ॥ मोहन बिनु मन न रहै कहा करौं माई री । वाटिभांति करि
करि रही समुझाई री ॥ लोकलाज कौनकाज मानत यदुराई री ॥ हृदयते टरत नाहिं मुख सुंदरताई री ॥
ऐसेहैं त्रिभंगी नवरंगी सुखदाई री । सूर श्याम बिन न रहौं ऐसी बनिआई री ॥ ६४ ॥ मेरो मन न रहै
कान्ह बिना नैन तपै माई । नवकिंशोर श्याम बरन मोहनी लगाई ॥ बनकी धातु चित्रित तनु मोर
चंद्र सोहै । बनमाला लुब्ध भँवर सुर नर मुनि मोहै ॥ नटवर वपु भेष ललित कट किंकिनि राजै ।
मणि कुंडल मकराकृत तरुन तिलक भ्राजै ॥ कुटिलकेश अति सुदेश गोरज लपटानी । तडित
बसन कुंद दरशन देखिहौं भुलानी ॥ अरुन श्वेत कुंभ वज्र खचित पदिक शोभा । मणिकौस्तुभ कंठ
लसत चितवत चित लोभा ॥ अधर सधर मधुर बोल मुरली कलगावै । भुवविलास मंद हास गोपिन्ह
जिय भावै ॥ कमलनैन चितके चैन निरखि मन वारों । प्रेम अंश अरुझि रहो उरते नाहिं
टारों ॥ गोप भेष धरि सखी री संग संग डोलौं । तन मन अनुराग भरी मोहन संग बोलौं ॥
नवकिंशोर चितके चोर पलकओट न करिहौं । सुभग चरन कमलअरुन अपने उर धरिहौं ॥
असन वसन शयन भवन हरिबिनु न सुहाइ । बिनु देखे कल न पौर कहाकरौं माइ ॥ यशोमति
सुत सुन्दर तनु निरखि हो लोभानी । हरिदरशन अमल परचो लाजन लजानी ॥ रूपराशि
सुख बिलास देखत बनि आवै । सूर प्रभु रूपकी सीवा उपमा नहिं पावै ॥ ६५ ॥ राग गौरी ॥ मनमेरो
हरि साथ गयो री । द्वारे आय श्याम घन सजनी हँसि मोतनते संग लयो री ॥ ऐसे मिल्यो
जाइ मोको तजि मानहुँ उनही षोषि जयो री । सेवा चूक परी जो मोते मन उनको धौं कहा कियो
री ॥ मोको देखि रिसात हते यह तेरे जिय कछु गर्व भयो री । सूर श्याम छवि अंग भुलानो
मन वच कर्म मोहिं छाँडि दयो री ॥ ६६ ॥ राग रामकली ॥ मैं मन बहुत भांति समुझायो । कहा
करौं दरशनमें अटक्यो बहुरि नहीं घटआयो ॥ इन नैननके भेद रूपरस उरमें आनि दुरायो । वर-
जतही बेकाज सु पत ज्यों पलट्यो जोन सिधायो ॥ लोक वेद कुल निदरि निडरहै करत आपनो
भायो । मुख छवि निरखि बाँधि निशि खग ज्यों हठि अपुनपो बँधायो ॥ हरिको दोष कहा
कहि दीजै यह अपने बल धायो । अति विपरीति भई सुनि सूर प्रभु मुरझयो वदन जगायो ॥ ६७ ॥
॥ ६७ ॥ राग विलावल ॥ मनहि बिना कहा करौं सही री । घर तजिकै कोऊ रहत पराये मैं तबहीते

(२८६)

सूरसागर ।

फिरत बही री ॥ आइ अचानकही लगए हरि बार बारमें हटक रही री । मेरो कद्यो सुनत काहेको
 लगए हरि हरिके उतही री ॥ ऐसी करत कहूँरी कोऊ कहाकरौँ मैंहारि रही री । सूरश्यामको यह
 न बूझिये ढीठ कियो मनकोउ नहीं री ॥ ६८ ॥ राग दोड़ी ॥ माखनकी चोरी तैं सीखे करन लगे अब
 चितहकी चोरी । जाके दृष्टिपरे नंदनंदन सोउ फिरति गोहन डोरी डोरी ॥ लोकलाज
 कुलकानि मेटि करि वन वन डोलति नवलकिशोरी । सूरदास प्रभु रसिक शिरोमणि जवते देखे
 निगम वानि भई भोरी ॥ ६९ ॥ राग आसावरी ॥ क्यों सुरझाऊँ री नंदलालसों अरुझि रह्यो मन मेरो ।
 मोहन सूरति कहूँ नैक न विसरति कहि कहि हारि रही कैसेहु करत न फेरो ॥ बहुत यतन
 घेरि घेरि राखति फेरि फेरि लरत सुनत नहीं टेरो । सूरदास प्रभुके सँग रसवश भई डोलत
 निशि वासर कहूँ निरखत पायो न डेरो ॥ ७० ॥ राग विलावल ॥ मैं अपनो मन हरत न जान्यो । कब
 धौंगयो सँग हरिके वह कीधौँ पंथ भुलान्यो ॥ कीधौँ श्याम हटकिहैं राख्यो कीधौँ आपुर तान्यो ।
 काहेते सुधि करी न मेरी मोपर कहा रिसान्यो ॥ जवहीते हरि ह्यां ह्वै निकरे बैरतबहि ते ठान्यो ।
 सूर श्याम साँ चलन कद्यो मोहिं कद्यो नहीं तव मान्यो ॥ ७१ ॥ राग गूजरी ॥ श्याम करतहैं मनकी
 चोरी । कैसे मिलत आनि पहिलेही कहि कहि बतियां भोरी ॥ लोकलाजकी कानि गमाई फिरत
 गुडीवरा डोरी । ऐसेढंग श्याम अब सीखे चोर भयो चितकोरी ॥ माखनकी चोरी सहिलीन्है बात
 रही वह थोरी । सूर श्याम भए निडर तबहिंते गोरस लेत अजोरी ॥ ७२ ॥ राग दोड़ी ॥ सुनहु सखी
 हरि करत न नीकी । आपस्वारथीहैं मन मोहन पीर नहीं औरनकी ॥ वेतो निठुर सदा मैं जानति
 बात कहत मनहीकी । कैसे उनहिं वहां करि पाऊँ रिसमेटौँ सब जीकी ॥ चितवत
 नहीं मोहिं सपनेहूँको जानै उनहीकी ॥ ऐसे मिले सुरके प्रभुको मनहुँ मोललै बीकी ॥ ७३ ॥ राग आसावरी ॥
 माई री कृष्ण नाम जबते श्रवण सुन्यो री तवते भूली री भवन बावरीसी भई री । भरि भरि आवै
 नैन चित न रहत चैन बैननिहू सुध्यौ भूली मनकी दशा सब औरै ह्वै गई री ॥ को माता कौन पिता
 कौन भैनी कौन भ्राता कौन प्रान कौन ज्ञान कौन ध्यान मदन हई री । सूर श्याम जबते परे री मेरे
 दृष्टि वाम काम धाम निशियाम लोकलाज कुलकानि नई री ॥ ७४ ॥ राग रामकली ॥ राधातैं हरिके रँगराची ।
 तोते चतुर और नहीं कोऊ बात कहों मैं सांची ॥ तैं उनको मन नहीं चुरायो ऐसीहै तूकाची ।
 हरि तेरोमन अवहिं चुरायो प्रथम तुहीहै नाची ॥ तुम अरु श्याम एकहौ दोऊ बाकी नहीं वाची । सूर
 श्याम तेरेवश राधा कहति लीकमैं खांची ॥ ७५ ॥ राग जैतश्री ॥ तू काहेको करति सयानी । श्याम
 भए वश पहिले तेरे तब तू उनके हाथ बिकानी ॥ बाकी नहीं रही नेकहु अब मिली दूध ज्यों
 पानी । नंदनंदन गिरिधर बहुनायक तू तिनकी पटरानी ॥ तोसी कौन बडिभागिनि राधा यह
 नीके करि जानी । सूर श्याम सँग हिलिमिलि खेलो अजहुँ रहति बौरानी ॥ ७६ ॥ राग सोरठ ॥ मन
 हरि लीन्हों कुँवर कन्हाई । तबहीते मैं भई बौरानी कहा करों री माई ॥ कुटिल अलक भीतर अरु-
 झाने अब निरुवारि न जाई । नैन कटाक्ष चारु अवलोकनि मोतन गये बसाई ॥ निलजभई कुल-
 कानि गँवाई कहा ठगो री लाई । बारंबार कहति मैं तोको तेरे हिये न आई ॥ अपनी सी बुधि मेरी
 जानति उतनी मैं कहाँपाई । सूर श्याम ऐसी गति कीन्हों देह दशा बिसराई ॥ ७७ ॥ राग रामकली ॥
 राधा हरि अनुराग भरी । गदगद मुख बाणी परकाशत देह दशा बिसरी ॥ कहति इहै मन हरि
 हरि लग्ये एही परनिपरी । लोक सकुच शंका लहिं मानति श्यामहिरंग ठरी ॥ सखी सखीसों
 कहति बावरी येहि हमको निदरी । सूर श्याम सँग सदा रहतिहै बूझहु न करी ॥ ७८ ॥ राग सूही विलावल ॥

तुम जानति राधाहै छोटी । चतुराइ अंग अंग भरीहै पूरण ज्ञान न बुद्धिकी मोटी ॥ हमसों सदा
 दुरावति सोइहि बात कैहै मुख चोटी पोटी । कबहुँ श्यामते नेक न बिछुरति किये रहति हमसों हठ
 ओटी ॥ नंदनंदन याहीके वश हैं विवश देखि वेंदी छबि चोटी । सूरदास प्रभु वै अति खोटे यह उनहीते
 अतिही खोटी ॥ ७९ ॥ राग विलावल ॥ सखी कहति नू बात गवारी । याकी सरि कैसे कोउ है जाके वश हैं
 श्रीवनवारी ॥ ब्रजभीतर इह रूप आगरी ब्रतलीन्हों दृढगिरिवर धारी । प्रीति गुप्तहीकीहै नीकी यापर
 मैं रीझीहों भारी ॥ सांची कहौं नेह ऐसोई पाछे मोको दीजो गारी ॥ सूरदास राधा जो खोटी तौ देखो
 यह कृष्ण पियारी ॥ ८० ॥ राग गूजरी ॥ सुनहु सखी राधासरि कोहै । जे हरिहैं रतिपति मनमोहन
 याको मुख सो जोहै ॥ जैसे श्याम नारि यह तैसी सुंदरजोरी सोहै । इह द्वादश वेऊ दशद्वैके ब्रज
 युवतिन मनमोहै । मैं इनको घटि बढि नाहिं जानति भेद करै सो कोहै । सूर श्याम नागर इह-
 नागरि एक प्राणतनुद्वैहै ॥ ८१ ॥ राग गूजरी ॥ सुनि सजनी ए ऐसे लागत । एक प्राण युग तन सुख
 कारण एकौ निमिष न त्यागत ॥ बिछुरत नहीं संगते दोऊ बैठे सोवत जागत । पूरवनेह आजु
 यह नाहीं मोसों सुनहु अनागत ॥ मेरी कही सांचि तुम जानो कीजे आगत स्वागत । सूर श्याम
 राधावर ऐसे प्रीतिहिते अनुरागत ॥ ८२ ॥ राग जैतश्री ॥ सखी सखीसों धन्य कहै । इनको हम ऐसे
 नाहिं जाने ब्रजभीतर ए गुप्त रहै ॥ धन्य धन्य तेरी मति साँची हम इनको कछु और कहै । राधा
 कान्ह एकहैं दोऊ तो इतनो उपहास सहै । वै दोऊ एक दूसरी तू है तोहूको सखि श्याम चहै ।
 सूर श्याम धनि अरु राधा धनि तुहूँ धन्य हम वृथा वहै ॥ ८३ ॥ राग धनाश्री ॥ धन्य धन्य यह तेरी
 बानी । तैं नीके हरिको पहिचानें अब हम तुमको जानी ॥ राधा आधा देह श्यामकी तू उनकी
 बिचवानी । राधाहुते अधिक श्यामसों तेरी प्रीति पुरानी ॥ जो हरिकी संगिनि तू नाहीं आदि ने
 हक्यों मानी । सूरदास प्रभु रसिक शिरोमणि यह रस कथा बखानी ॥ ८४ ॥ राग पूरवी ॥ हे माई
 राधा मोहन सहज सनेही । सहज रूप गुण सहज लाडिली एक प्राण द्वै देही ॥ सहज माधुरी अंग
 अंगप्रति सहज सदावन ग्रेही । सूर श्याम श्यामा दोऊ सहजहि सहज प्रीति करि लेही ॥ ८५ ॥
 राग आसावरी ॥ राधा नंदनंदन अनुरागी । भव चिंता हिरदै नहिं एको श्याम रंग रस पागी ॥ हरद
 चून रंग पय पानी ज्यों दुविधा दुहुँकी भागी । तनमन प्राण समर्पण कीन्हों अंग अंग रतिखागी ॥
 ब्रजवनिता अवलोकन करि करि प्रेम विवश तनत्यागी । सूरदास प्रभुसों चितलाग्यो सोवत ते मनु-
 जागी ॥ राग मारू ॥ गोपी श्यामरंग राची । देह गेह सुधि बिसारी बढी प्रीति सांची ॥ दुविधा उर दूरि
 भई गई मति वह काची । राधाते आपु विवश भई उधरि गई नाची ॥ हरितजि जो और भजे पुहुमि
 लोक खांची । मात पिता लोक भीत वाकी नहिं बाची ॥ सकुच जबहिं आवै उर बारंवार झाँची ।
 सूरश्याम पद पराग ताहीमें माची ॥ ८६ ॥ राग मारू ॥ श्याम जल सुजल जल ब्रजनारि खोरे ।
 नदी माला जुजल तट भुजा अति सबल धार रोमावली यमुन भोरै ॥ नयन ठहरात नहिं
 बहत अति तेजसी तहां गयो चित्त धीरज सँभारै । मन गयो तही आपुन रही निकट जल
 एक एक अंग छबि सुधि बिचारै । करति स्नान सब प्रेम बुडकी देहि समुझि जिय होइ भजि-
 तीर आवै । सूर प्रभु श्याम जलराशि ब्रजवासीन करति अनुमान नहिं पारपावै ॥ ८७ ॥
 ॥ राग विलावल ॥ श्यामरंग राची ब्रजनारी । और रंग सब दीन्ही डारी ॥ कुसुमरंग गुरुजन
 पितुमाता । हरितरंग मैनी अरु भ्राता ॥ दिनाचारी में सब मिटि जैहैं । श्यामरंग
 अजरायल रहैं ॥ उज्ज्वलरंग गोपिका नारी । श्यामरंग गिरिवरके धारी ॥ श्यामहि में सबरंग वसेरो ।

प्रगट बताइ देउ कहि झेरो ॥ अरुणश्चेत सित सुंदर तारे । पीतरंग पीतांबर धारे ॥ नानारंग श्याम
 गुणकारी । सूरश्याम रंग घोषकुमारी ॥ ८८ ॥ राग विहागरो ॥ श्यामसलोनेरूपमें अरी मन अरचो ।
 ऐसेहैं लटक्यों तहां ते फिरि नहिं मटक्यो बहुत जतन मैं करचो ॥ ज्यों ज्यों खँचति त्यों त्यों
 मगनहोत ऐसी धरनि धरचो । मोसों वैर करत उनकी ह्वां देख्यो जाइ ढरचो ॥ ज्यों शिवछत दरशन
 रविपाये जेही गरनि गरचो । सूरदास प्रभुरूपथक्यो मन कुंजल पंक परचो ॥ ८९ ॥ राग देसाप ॥ निशि
 दिना इनि नैननिको री नंदलालकी लागीरहै लालसाई । मुरलीरसतानभरी श्रवनन री जबतेरी परी
 कैसेहू टरति नहीं हृदयते विहारी यदुराई ॥ कहाकहाँ तोसों यह सजनी मनमेरो लैगयो चोराई ॥
 सूरश्यामको नाम धरौ पुनि धरचो न जाइ सुधि न रहै तनुमाई ॥ ९० ॥ देख सेखी मेरोमन न रहै
 श्यामबिना । अतिहि चतुर जान जाननि मनि वह छवि परमैं भईलीना ॥ अपनी दशा कहाँमैं
 कासों बन बन डोलति रैनदिना । मनतो चोरि लियो पहिलेही झुरिझुरिहैं रही छीना ॥ वै मोहन
 मनहरत सहजही हरिलै ताको करत हीना । सूरदास प्रभु रसिक रसीले बहुनायकहैं नाउँजीना ॥
 ॥ ९१ ॥ राग सारंग ॥ नैननि नीदौ गई री निशिदिन पल पल छतियां लाग्यो रहै धरको । उत मोहन
 मुख मुरली सुनत सुधयो न रही इत घेरा धरको ॥ ननदी तौन दिये बिनुगारी नैकहू रहति सासु
 सपनेहू में आनि गोउति काननिमें लए रहै मेरे पाँइनको खरको । निकसनहूँ ना पाइये री कासों दुख
 कहिये देखहू न पाइये री सूरदास प्रभुके तन मेरो ज्यों ऐसो भयो जैसो हाथ पाथर तरको ॥ ९२ ॥
 राग सुवराई ॥ मोहन मुरली बजाइहैं रिझाई । तिनही मोही री हों मोही री सांझ सभै देखे कन्हई ॥ आनि
 निकसे मेरे आँगनहैं तवते चितवत यह पीर भई री । काकी देह गेह सुधि काके हेहरि कैसे मैं
 ही री ॥ तेरे कहे कहसिहों बानी मैं हरिहाथ बिकानी तवते यकटक जोइरही री । मिलत नहीं
 नहिं संगते त्यागत कहाकरौ बूझो तोही री ॥ सूर श्याम तवते नहिं आये मन जबते हरिलीन्हों
 वैतौ ऐसेहैं द्रोही री ॥ राग अढानो ॥ ९३ ॥ ब्रजकी खोरि ठाढो साँवरो ढोटौना तबहों मोही री हों मोही री ।
 जबते मैं देखे श्यामसुंदर री चलि न सकत पगदइहै काम नृप द्रोही री ॥ कोलै आइ कौने चरन
 चलाइ कौने बहियां गही सोधों कोही री । सूरदास प्रभु देखे सुधि रही नहिं अति विदेह भई अब मैं
 बूझति तोही री ॥ राग सुथराई ॥ आंखिन में बसै जियरे में बसै हियरे में बसत निशि दिन प्या
 रो । मनमें बसै तनमें बसै रसनामें बसै अंग अंग में बसत नंदवारो ॥ सुधिमें बसै बुधिहूमें बसै
 उरजनमें बसत पिय प्रेम दुलारो । सूर श्याम वनहूँ मैं बसत घरहूँ मैं बसत संगज्यों जलरंगन
 होत न्यारो ॥ ९४ ॥ राग सोरठ ॥ नंदनंदन बिन कल न परै । अति अनुराग भरी युवती सब जहां श्या-
 म तहां चित्त ठरै ॥ भवन गई मन तहाँ न लागै गुरु गुरुजन अति त्रास करै । वै कछु कहैं करैं
 कछु औरै सासु ननंद तिनपर झहरै ॥ इहै तुमहि पितु मात सिखायो बोल करति नहिं रिसन जरै ।
 सूरदास प्रभुसे चित अरुझ्यो यह समुझो जिय ज्ञान धरौ ॥ ९५ ॥ राग जैतश्री ॥ सासु ननंद घर त्रास देखावै ।
 तुम कुलवधू लाज नहिं आवति बार बार यह कहि समुझावै ॥ कबही गई न्हान तुम यमुना यह
 कहि कहि रिसपावै । राधाको तुम संग करतिहौ ब्रज उपहास उडावै ॥ वेहैं बडे महरकी बेटी तौ ऐ-
 सी कहवावै । सुनहुं सूर यह उनही फावै ऐसी कहति डरावै ॥ ९६ ॥ राग सारंग ॥ हम अहीर ब्रजबा-
 सी लोग । ऐसे चलौ हँसै नहिं कोऊ घरमें बैठि करो सुख भोग ॥ दही मही लवनी धृत बेंचो सबै
 करौ अपने उतयोग । शिरपर कंस मधुपुरी बैठो छिनकहिमें करि डारौ सोग ॥ फूँकि फूँकि धरणी
 पग धारौ अब लागी तुम करन अयोग । सुनहु सूर अब जानोगी तब जब देखै राधा संयोग ॥ ९७ ॥

राग धनाश्री ॥ तुम कुलवधू निलज जिमि हैहो । यह करनी उन्हींको छाजै उनके संग न जै
हो ॥ राधा कान्ह कथा ब्रज घर घर ऐसे जनि कहवैहो ॥ यह करनी उर नई चलाई तुम जनि
हमहिं हैसैहो । तुमहो बडे महरकी बेटी कुल जिननाम धरैहो । सूरश्याम राधाकी महिमा इहै
जानि सरमैहो ॥ ९८ ॥ राग डोही ॥ यह सुनिकै हैसि मौनरही री । ब्रज उपहास कान्ह राधाको यह
महिमा जानी उनही री ॥ जैसी बुद्धि हृदयहै इनके तैसी ये मुख बात कही री । रविके तेज उलूक
न जानै तरनि सदा पूरन नभही री ॥ विषको कीट विपहि रुचिमानै जानै कहा सुधारसही री । सूर-
दास तिलतेल सुवादी स्वाद कहा जानै घृतही री ॥ ९९ ॥ राग सोरठ ॥ अहीर जाति गोधनको मानै नैदंनंदन
सुर नर मुनि वंदन तिनकी महिमा क्यों ये जानै ॥ धनि राधा उपहास धन्य यह सदा श्यामके गुणगा-
ने । परम पुनीत हृदय अति निर्मल बार बार बाजही बखानै ॥ श्यामकामकी पूरनहारी ताको
कुलटी करि पहिचानै ॥ सूरदास ऐसे लोगनको नाउँ न लीजै होत बिहानै ॥ १०० ॥ राग बिहांगरो ॥ बिधिना
संगति मोहिं यह दीनी । इनिको नाम प्रात नहिं लीजै कहा निठुरही कीनी ॥ मन मोहन गोहन
बिन अबलौ मानो बीते युगचारि । विमुखनमेंते कबधौ छूटौ कब मिलि हौ बनवारि ॥ एक एक दिन
विहात कैसेहूँ अबतौ रह्यो न जाइ । सूर श्याम दरशन बिन पाये बार बार अकुलाइ ॥ १ ॥ विमु-
खजननिको संग न कीजै । इनके विमुख वचन सुनि श्रवननि दिन दिन देही छीजै ॥ मोको नेक
नहीं ये भावत परवशको कहा कीजै । धृगजीवन ऐसो बहु दिनको श्याम भजन पल जीजै ॥ धृग ये
घर धृग ये गुरुजनको इनमें नहीं वसीजै । सूरदास प्रभु अंतर्दामी इहै जानि मन लीजै ॥ २ ॥ राग नदा ॥
राधा श्याम रंग रंगी । रोमनिरोमनि भिंदि गयो सब अँग अँग पगी ॥ प्रीतिदै मन लैगए हरि नंद
नंदन आप । श्यामरस उनमत्त नागरि दुरत नहिं परताप ॥ चली यमुना जाति मारग हृदय
इहै बिचार । सूर प्रभुको दरश पावै निगम अगम अपार ॥ ३ ॥ राग धनाश्री ॥ चितको चोर अबहिं जो
पाऊं । हृदय कपाट लगाइ जतनकरि अपनेमनहि मनाऊं ॥ जबहिं निशंक होति गुरुजनते तेहि
औसर जो आवै । भुजनि धरौ भरि सुदृढ मनोहर बहुत दिननिको फलपावै ॥ लैराखौ कुच बीच
चापि करि प्रतिदिनको तनुताप बिसारौ । सूरदास नैदंनंदनको गृह गृह डोलनिको श्रमटारौ ॥
॥ ४ ॥ राग बिलावल ॥ इतते राधा जाति यमुनतट उतते हरि आवत घरको । कछिकाछिनी भेष नट-
वरको बीच मिली मुरलीधरको ॥ चितैरही मुख इंदु मनोहर वाछबिपर वारति तनको । दूरिहुतें
देखतही जाने प्राणनाथ सुंदर धनको ॥ रोम पुलकि गदगद बाणी कहि कहाजात चोरे मनको ।
सूरदास प्रभु चोरी सीखे माखनते चितवित धनको ॥ ५ ॥ इह न होइ जैसे माखन चोरी । तब वह
मुख पहिचानि मानि मुख देती जान हानि हुती थोरी ॥ उन दिननि सुकुँवार हते हरि हौ जानत
अपनो मन भोरी । ब्रजबासि बास बडेके ढोटा गोरसकारण कानि न तोरी ॥ अब भए कुशल किशोर
नंदसुत हौ भई सजग समान किशोरी । जात कहा बलि बाँह छडाए मूसेमन संपति सब मोरी ।
नखशिखलौं चितचोर सकल अँग चीन्हें पर कत करत मरोरी । एक सुनी सूर हरयो मेरो सर्वस
अरु उलटी डोलों सँगडोरी ॥ ६ ॥ राग गौरी ॥ भुजा पकरि ठाढे हरि कीन्हें । बाँह मरोरि जाहुगे कैसे
मैं तुमको नीके करि चीन्हें ॥ माखनचोरी करत रहे तुम अबतो भए मनुचोर । सुनत रही
मन चोरतहैं हरि प्रगट लियो मन मोर ॥ ऐसे ढीठ भए तुम डोलत निदरे ब्रजकी नारि । सूर श्याम
मोहू निदरौगे देत प्रेमकी गारि ॥ ७ ॥ राग सारंग ॥ बहु बलुकितकुजानौ यदुराइ । तुम जो तरकिमो
अबलापै तौ चलेहौ भुजा छडाइ ॥ कहिअतहो अति चतुर सकल अँग आवत बहुत

उपाइ । तौ जानो जो अबके एढंगकोसकै देते जाइ ॥ सूरदास स्वामी श्रीपतिको भावत
 अंतर भाइ।सहि न सके रति वचन उलटि हैंसि लीनी कंठ लगाइ ॥ ८ ॥ राग ईमन ॥ मैं तुमरे गुण
 जाने श्याम । औरनको मन चोर रहेहौ मेरो मन चोरे किहि काम ॥ वै डरपति तुमको धौं काहे
 मोको जानत वैसी वाम । मैं तुमको अबहीं बांधौंगी मोहिं बूझि जैहो तब धाम ॥ मनलो हौं पहुनाई
 करिहौं राखौ अटकियोस अरु याम । सूर श्याम यह कौन भलाई चोर रह्यो तहां तुम्हरो नाम ॥ ९ ॥
 ॥ राग कल्याण ॥ ब्रजमें ढीठ भए तुम डोलत । अब तो श्याम परे फँग मेरे सूखे काहे न बोलत ॥
 मनदीजै मर्यादा जैहै रहत चतुरई कीन्हें । दुखकरि देहु कि सुखकरि दीजै अबतौ बनिहै दीन्हें ॥
 ऐसे ढंग तुम करत कन्हई जीति रहे ब्रजगाउँ । सूर आजु बहुतै दुख पाये मन कारण पछिताउँ ॥
 ॥ १० ॥ राग गुंडमलार ॥ सुन री कुलकी कानि ललनसों मैं झगरो मांडौंगी । मेरे इनके कोउ बीच परौ जिनि
 अधर दशन खांडौंगी ॥ चतुर नाइकसों काम परचोहै कैसे है छांडौंगी । सूरदास प्रभु नंद नंदनको
 रसलै डांडौंगी ॥ ११ ॥ राग कान्हरो ॥ चोरीके फल तुमहि दिखाऊं । कंचनखंभ डोर कंचनकी देखो तुमहिं
 बंधाऊं ॥ खंडों एक अंग कछु तुमरो चोरी नाउँ मिटाऊं । जो चाहौ सोई सब लैहों यह कहि
 डांड मैगाऊं ॥ बीच करन जो आवै कोऊं ताको सौंह दिवाऊं । सूर श्याम चोरनके राजा
 बहुरि कहां मैं पाऊं ॥ १२ ॥ राग गंधारी ॥ रहि री लाज नहिं काज आज हरि पाये पकरन चोरी।मूसि
 मूसि ले गए मन माखन जो मेरे धन होरी ॥ बांधौं कंचनखंभ कलेवर उमै भुजा दृढ डोरी । चापों
 कठिन कुलिश कुच अंतर सके कौन धौं छोरी ॥ खंडों अधर भूलि रस गोरस हरै न काहूको री ।
 दंडौ काम डंड परघरको नाउँ न लेइ बहोरी ॥ तब कुलकानि आनि भई तिरछी क्षमि अपराध
 किशोरी । शिव पर पानि धराइ सूरडर सकुचि मोचि शिर डोरी ॥ १३ ॥ राग विहागरो ॥ बीच कियो कुल
 लजा आई । सुनि नागरि बकसी यह मोको सन्मुख आए धाई ॥ चूकपरी हरिते मैं जानी मनले
 गए चुराइ । ठाढे रहे सकुचि तो आगे राख्यो वदन दुराइ ॥ तुम हो बडे महरकी बेटी काहे गई
 भुलाइ । सूर श्यामहैं चोर तुम्हारे छाँडि देहु डरपाइ ॥ १४ ॥ राग गौरी ॥ कुलकी लाज अकाज कियो ।
 तुम विन श्याम सोहात नहीं कछु कहा करौं अति जरत हियो ॥ आपु गुनकरि राखी मोको मैं
 आयसु शिरमानि लियो । देह गेह सुधि रहत बिसारे तुम ते हितु नहिं और बियो ॥ अब मोको
 चरणनि तर राखो हैंसि नंदनंदन अंग छियो । सूर श्याम श्रीमुखकी वाणी तुमपै प्यारी
 वसत जियो ॥ १५ ॥ राग जैतश्री ॥ मात पिता अति त्रास दिखावत । भ्राता मारन मोहिं धिरावै
 देखे मोहिं न भावत ॥ जननी कहति बडेकी बेटी तोकों लाज न आवत । पिता कहै
 कैसी कुल उपजी मनही मन रिस पावत ॥ भैनी देखि देति मोहिं गारी काहे कुलहि लजावति ।
 सूरदास प्रभुसों यह कहि कहि अपनी विपति जनावति ॥ १६ ॥ राग विहागरो ॥ सुंदर श्याम कमलदल
 लोचन । विमुख जननको संगतिको दुख कबधौं करिहौ मोचन ॥ भवन मोहिं भाटीसों लागत
 मरति सोचही सोचन । ऐसी गति मेरी तुम आगे करत कहा जिय दोचन ॥ धृग वै मात पिता
 धृग भ्राता देत रहत मोहिं खोचन । सूर श्याम मन तुमहि लुभानो हरद चून रँग रोचन ॥ १७ ॥
 राग रामकली ॥ कुलकी कानि कहाँलौं करिहौं । तुम आगे मैं कहौं न साँची अब काहू नहिं डरिहौं ॥ लोग
 कुटुंब जगके जे कहियत पेला सवाहि निदरिहौं । अब यह दुख सहि जात न मापै बिमुख वचन
 सुनि मरिहौं ॥ आपु सुखी तो सब सब नीकेहैं उनके सुख कहा सरिहौं । सूरदास प्रभु चतुरशि-
 रोमणि अब कैहौं कछु लरिहौं ॥ १८ ॥ राग कान्हरो ॥ प्राणनाथहौ मेरी सुरति क्यों न करौ।मैं जु दुख

पावतिहौं अपने तन मन मेरी सुरति करौं । दीनदयालु कृपा करौ मोको कामद्वंद्व दुख और
 बिरह हरौ ॥ तुम बहुवरनि रवनमें जानति याहीके धोखेमोसों काहेको लरौ । सूरदास स्वामी तुमहो
 अंतर्यामी मनसा वाचा ध्यान तुमसों धरौ ॥ १९॥ रागकान्हरो ॥ हो या मायाही लागी तुम कत तो-
 रत । मेरो ज्यो तिहारे चरननिही लाग्यो धीरज क्यों रहै रावरे मुख मोरत ॥ को लै बनाइ बातें
 मिलवति तुम आगे सो किनआइ मोसों अब जोरत । सूर श्याम पिय मेरे तौ तुमही जिय तुम
 बिनु देखे मेरो हियो कोरत ॥ २० ॥ राग विलावल ॥ सुनहु श्याम मेरी एक बात । हरिप्यारीके मुखतन
 चितवत मनही मनहु सिहात ॥ कहाकहति वृषभानु नंदिनी बृझतहै मुसुकात । कनकबरन
 सुंदरी राधिका कटि कृश कोमलगात ॥ तुमही मेरे प्राण जीवनधन अहो चंद्र तुअ भ्रात । सुनहु
 सूर जो कहति रही तुम कहो न कहा लजात ॥ २१ ॥ राग गुंड ॥ नागरी श्यामसों कहत बानी ।
 सुनहु गिरिधर नवल शीशश्रीखंडधर जयति सूर नागरस सहस बानी ॥ रुद्रपति छुद्रपति लोकपति
 वोक्पति धरनिपति गगनपति अगम बानी । अखिल ब्रह्मांडपति तिहुंभुवनाधिपति नीरपति
 पवनपति अगम बानी ॥ सिंहके शरन जंबुक त्रास करै जब कृष्ण राधा एक जग बताही । सूर प्रभु
 श्याम तुव नाम करुणाधाम करौ मनकाम सुनि दीनबाबी ॥ २२ ॥ राग गुंडमलार ॥ बिहँसि राधा कृष्णअंक
 लीनी ॥ अधरसों अधर जुरि नैनसों नैन मिलि हृदै सों हृदय लागि हरष कीन्ही ॥ कंठ भुज जोरि नारि
 उछंगलीन्ही भवन दुखटारि सुख दियो भारी ॥ हरषि बोले श्याम कुंज बन घन धाम तहां हम तुम संग
 मिलैप्यारी ॥ जाहु गृह परमधन हमहु जैहैं सदन आइ कहूँ पास मोहि सैन दैहौ । सूर यह भावदै
 तुरतही गमन करि कुंजगृह सदन तुम जाइ रहौ ॥ २३ ॥ राग गुंडमलार ॥ यह सुनत नागरी माथ नायो ।
 श्यामरसवश भरे मदन जियमें डरे सुंदरी बातको भेद पायो । खरे ब्रज यमुन बिच दुहुँनि मन अति
 सकुच और कछु बनै नहिं बुद्धि ठानी । तबहि ब्रजनारि आवत देखि यमुनाते एकब्रजहिते जु राधा
 लजानी ॥ श्याम हँसिकै चले तुरत ग्वालनि मिले कहां सब रहे कहि हांक दीन्हें । भाव यह करि
 गए सूर प्रभु गुननए नागरी रसिक जिय जानि लीन्हें ॥ २४ ॥ राग टोडी ॥ राधा हरिके भावहि जान्यो ।
 इहै बात कैहौं इन आगे मनही मन अनुमान्यो ॥ उन देखी राधा मग ठाढी श्याम पठाए टारि ।
 बृझतही कछु बुद्धि रचैगी बडी चतुर यह नारि ॥ इत वृषभानुसुता मन सोचति मोहि देखि
 हरिसंग । सूर अबहिं बातनि करि धरिहै जानति इनके रंग ॥ २५ ॥ राग गुंडमलार ॥ चतुर वर नागरी
 बुद्धि ठानी । अबहिं मोहिं बूझिहै इनहिं कैहौं कहा श्याम सँग आजु मोहिं प्रगटजानी ॥ भावकरि
 गए हरि ग्वाल बृझत रहे जानि जियलई अति चतुर रासी । यह रचौ बुद्धि एक कहा एकहैं
 मोहिं मेरे मन सबै घोषवासी ॥ इतहुंकी उतहुंकी सबै जुरि एकठी कहति राधा कहां जाति हैरी । सूरप्रभु
 को अबहिं देखे हमतेरे ढिग कहां गए तिनहिं पछिताति है री ॥ २६ ॥ राग गूजरी ॥ कान्ह कहा बृझत
 हैं तुमको । ह्वांहीते लखि लीन्ही तबहीं कहां दुरावति हमको ॥ मनलैगए चुराइ तुम्हारे सो अपनो
 तुम पायो । अपनो काज सारि तुम लीन्हें हम देखतहि पठायो ॥ सदा चतुरई फबती नाही
 अतिही निझरि रहीहौं । सूर श्यामघौं कहां रहतहै यह कहि कहि युतहीहौं ॥ २७ ॥ राग अलहिया ॥
 कहति रही तब राधिका जब हरिसंग पेखो । बेसारि लीज्यो छीनिकै मुख तन कहा देखो ॥ देहो
 बेसारि की नहीं की लोहिं छडाइ । चतुराई प्रगटी अबै ऐसीहौ माइ ॥ बारबार नागरि हँसे तरुनी
 वेहानी । ऐसेहि बेसारि लेहुगी सब भई अयानी ॥ हम मूरख तुम चतुरहौ कछु लाज न आवै । सूर
 श्याम सँग नहीं रही अब कहा दुरावै ॥ २८ ॥ राग सोरठ ॥ इहै कहन मोको तुम आई । इतते ये

उतते तुम सब मिलि काहे ऐसी धाई ॥ बेसरि एक लेहुँगी को को पीतांबर न देखावहु । बेसरि अरु
 पीतांबर लै तब घर घर जाइ सुनावहु ॥ तारी एक बजत की दोऊ इतनोइ ज्ञान बिचारो । सुनहु
 सूर ए बेसरि लेहैं जानो ज्ञान तुम्हारो ॥ २९ ॥ राग जैयतश्री ॥ सुनि राधा तोसों हम हारी । तेरे चरित
 नहीं कोइ जानैं वशकीन्हों गिरिधारी ॥ अबहीं कान्ह टारि करि पठए धनि तेरी महतारी । अंग
 अंग रचि कपट चतुरई बिधिना आपु सँवारी ॥ अबहीं प्रगट दुहुँनि हम देख्यो जानति दै मो गारी ।
 सूर श्यामके यह बुधि नहीं जितनीहि तो घारी ॥ ३० ॥ राग विलावल ॥ श्याम भले अरु तुमहुँ भली हौ ।
 बेसरि छीनतिहौ बेकाजहि जाहु न घरहि चली हो ॥ कैसे दौरि परी मेरे पर मानहुँ संग मिली हो ।
 और भई सब वनकी बेली आपुन कमल कली हो ॥ तब कहती गहि बाँह दुहुँनकी जो तुम चतुर
 अली हो । सूरदास राधा गुण आगरि नागरि नारि छली हो ॥ ३१ ॥ अलहिया राग विलावल ॥ अब हमसों
 साँची कहो वृषभानु दुलारी । कछु तो तोसों कहतहैं ठाढे गिरिधारी ॥ हाहा हमसों सोइ कहो दैहौ जिनि
 गारी । हमको देखतही गए उत ग्वाल हँकारी ॥ भेदकरै जो लाडिली तोहि सौँह हमारी । तू ठाढी
 काहे रही मग मेरी प्यारी ॥ सहज होइ तू कहि अबै उरते रिस टारी । सूर श्यामकी भावती कहै कहौ
 कहा री ॥ ३२ ॥ राग मूही ॥ मैं यमुना तन जात सही री । ब्रजते आवत देखि सखिनको इन कारण
 ह्यां परखि रही री ॥ उतते आइ गए हरि तिरछे मैं तुमही तन चितै रही री । बूझन लगे कान्ह ग्वालन
 को तुमतो देखे उनहि नहीं री ॥ कछु उनसों बोली नहिं सन्मुख नाहिं तहां कछु बैन कही री । सूर
 श्याम गए ग्वालनि टेरत ना जानौं तुम कहा गही री ॥ ३३ ॥ राग टोडी ॥ तुम मेरी बेसरिको धाई सकुचि
 गई सुनि सुनि यह बानी तरुनिन राधा भले लजाई ॥ यह तौ बात लगति कछु साँची हमपर न्याइ
 रिसाई । टेरत कान्ह गए ग्वालनको श्रवन परी ध्वनि आइ ॥ बेसरि नाउ लेत सरमानी तब राधा
 झहरानी । सूरदास ब्रजनारि मनहि मन यह गुनि गुनि पछितानी ॥ ३४ ॥ राग गूजरी ॥ राधा तू अति-
 हीहि भोरी । झूठेही लोग उठावत घर घर हम जान्यो अति तोरी ॥ कंठ लगाइ लई रिस छाँडौ चूक
 परी हम चोरी । तुम निर्मल गंगाजलहूते दुरत नहीं वह चोरी ॥ घर जैहौ की यमुना जैहौ हम
 आवैं सँग गोरी । सूरदास प्रभुप्यारी भुरी राधा चतुर दिननकी थोरी ॥ ३५ ॥ राग आसावरी ॥ अहो सखी
 तुम ऐसी हौ । अबलौं तुम कुलटी करि जानति मोको री सब तैसी हो ॥ अपने मन जैसी तैसेई सब
 मोहु जनावत तैसी हो । जोरी भली बनैगी हरिसों छाह निहारो कैसी हो ॥ अबलागी मोको दुँलरावन
 प्रेमकरति टरि वैसी हौ । सुनहु सूर तुमरे छिन छिन मति बडी प्रेमकी गैसी हौ ॥ ३६ ॥ राग टोडी ॥ हँसति
 नारि सब घरहि चली । हम जानी राधाहै खोटी हम खोटी राधिका भली ॥ इतते युवति जाति यमुना
 जे तिनको मगमें परखिरही । श्याम कहूँते आइ कटे ह्यां चले गए उत हेरतही ॥ इतनी तबहि नहीं
 यह जानी झूठेही सब आनि गही ॥ सूरश्याम अपने रँग आये हम वाको नहिं भली कही ॥ ३७ ॥ राग विलावल ॥
 राधा श्याम सनेहिनी हरि राधा नेही । राधा हरिके तन वसे हरि राधा देही ॥ राधा हरिके नैनमें
 हरि राधा नैननि । कुंजभवन रति युद्धके जोरति बल नैननि ॥ और न काहूको रुचै घर घर गए
 दोऊ । मात पिता सतिभाइसों यह जानै न कोऊ । कैसे हूँ करि करि दिन गयो निशि कटत न
 क्योंहूँ । दोऊ रस विरह मगन भए निशि भई अगोंहूँ ॥ विरह सरोवर बूडई अंधकार सिवार ।
 सुधि अवलंबन टेकही कहूँ वार न पार ॥ तमचुर टेरि पुकारई बूडे जिनि कोई ॥ सूर प्रात नवका
 मिल्यो आनन्द मन दोई ॥ ३८ ॥ ॥ राग धनाश्री ॥ मन मृग बेधयो मोहन नैन बानसों । गूढ भावकी सैन
 अचानक तकि ताक्यो भुकुटी कमानसों ॥ प्रथम नाद बल घेरि निकट लै मुरली सतक सूर बंधान

सों । पाछे बंक चितै मधुरै हँसि घात किये उलटे सुठान सों । सूर सुमार बिथा या तनुकी घटत नहीं
 औषधी आनसों । हैहै सुख तबहीं उरअंतर आलिंगन गिरिधर सुजानसों ॥ ३९ ॥ राग विलावल ॥ कान्ह
 उठे अति प्रातही तलवेली लागी । प्रिया प्रेमके रस भरे रति अंतर खागी ॥ श्याम उठत अवलो-
 किकै जननी तब जागी । सुन्दर वदन विलोकिकै अंग अंग अनुरागी ॥ माता पूँछति सुअनको
 बलि गई मेरे बारे । कहा आजु अचरज कियो तुम उठे सवारे ॥ झारी जल दैतवन दियो छवि
 परत न वारचो । उत्तम जललै प्रेमसों सुत बदन पखारचो ॥ करी मुखारी अतुरई नागरि रस छाके ।
 सूर श्याम ऐसी दशा त्रिभुवन वश जाके ॥ ४० ॥ राग विलावल ॥ उत वृषभानुसुता उठी वह भाव
 विचारै । रैनि बिहानी कठिनसों मन्मथ बल भारे ॥ ग्रीव सुतसरी तोरिकै अचरासों बाँधयो । इहै
 बहानो करि लियो हरि मन अनुराध्यो ॥ जननी उठी अकुलाइके क्यों राधा जागी । कहाँ चली
 उठि भोरही सोवै न सभागी ॥ अब जननी सोऊं नहीं रवि किरनि प्रकाशी । तूहु उठे काहे नहीं
 जागे ब्रजवासी ॥ आपु उठी आँगन गई फिरि घरही आई । कबधौं मिलि हैं श्यामको पल रह्यो
 न जाई ॥ फिरि फिरि अजिरहि भवनही तलवेली लागी ॥ सूर श्यामके रसभरी राधा अनुरागी ॥
 ॥ ४१ ॥ राग गुंडमलार ॥ सुतासों कहति वृषभानु घरनी । कहा तू राधिका भोरते फिरति है
 तेरी गति मोपै नहि जाति बरनी ॥ तोरि मोतीसरी तब गुन करि धरचो कहूँ एहि मिसि सकुचि
 रही मुख न बोलै । मनहु खंजन चपल चन्द फंदा परचो उडत नहि बनत इत उताहि डोलै ॥
 कहा तेरी प्रकृति परी धौं लाडिली अबहिते कहा तू जाहिगी री । सूर कहै जननि बोलै नहीं
 आज तू परुसि धरिहौ खाइगी री ॥ ४२ ॥ राग नट ॥ जननी पुनि पुनि ग्रीव निहारै । देखो नहीं
 सुनसरी माला सो जिनि कतहुं डारै ॥ बोलै नहीं बात यह सुनि रही मनलागी मुस
 कान । अबही मोकों खीझि पठैहै बनिहै काको जान ॥ भली बुद्धि मेरे चित आई कृष्ण प्रीतिहै
 साँची । सूरदास राधिका नागरी नागरके रँग राँची ॥ ४३ ॥ राग सोरठ ॥ जननी अतिहि भई रिप
 हाई । बार बार कहै कुँवरि राधिका मोतिसरी कहाँ गमाई ॥ बूझैते तोहि ज्वाब न आवै कहा
 रही अरगाई । चौसर हार अमोल गरेको देहु न मेरी माई ॥ कालिहिते रीतो गर तेरो डारि कहूँ
 तू आई । सुनहु सूर माता रिस देखत राधा हँसति डेरार्ई ॥ ४४ ॥ राग विलावल ॥ सुन री मैया कालही
 मोतिसरी गँवाई । सखिन मिले यमुनागई धौं उनहि चुराई ॥ कीधौं जलहीमें गई यह सुधि नहि
 मेरे । तबते मैं पछितातिहौं कहति न डर तेरे ॥ पलक नहीं निशि कहूँ लगी मोहिं शपथ री तेरी ।
 येहि डरते मैं आजुही अति उठी सबेरी ॥ महारि सुनत चकृत भई मुख ज्वाब न आवै । सूर
 राधिका गुनभरी कोउ पार न पावै ॥ ४५ ॥ राग गुंडमलार ॥ क्रोध करि सुतासों कहति माता । तोहिं
 बरजत मैं री अचगरी रिसपरी गर्व गंजन नामहै विधाता ॥ तेरो दोष नहीं भ्रमती तू जहीं तहीं
 नदी डोंगर बन बन पात पाता । मात पित लोककी कानि मानै नहीं निलज भई रहति नहीं लाज
 गाता ॥ भली नहि उन करी शीश तोको धरी जगतमें सुता तू महर ताता । बात सुनिहै श्रवण भई
 बिनही भवन सूर डारै मारि आजु भ्राता ॥ ४६ ॥ राग धनाश्री ॥ जाहु तहीं मोतिसरी गमाई । तबहीं तौ
 घर पैठन पैहौ अब ऐसे ढँग आई ॥ जो बरजो आपुन सोइ सोइ करै देखो री गुन माई । एक एक नग
 सत सत दामनिके लाख टका दै ल्याई । जाके हाथ परचोसो दैहै घर बैठे निधि पाई । सूर सुन-
 त री कुँवरि राधिका तोको नहीं भलाई ॥ ४७ ॥ राग दोढी ॥ भरि भरि नैन लेतिहै माता । मुखते
 कछु आवै नहि बाता ॥ रीतो ग्रीव निहारत जबही । हियो उमँगि आवतहै तबही ॥ मोतिसरी ते

सुरसागर ।

(२९४)

मुख परम विराजै । मानों शशि पारसविच भ्राजै ॥ मोतिसरी माला कहां गँवाई । जीव बिना
 करिहै वह भाई ॥ जाधों देखि कहूँ धौँ पावै । सूर जोरि कर विधिहि मनावै ॥ ४८ ॥ राग गुंडमलार ॥ कहां
 वह मोतिसरी जो गँवाई री । बाबासों और लेहों मँगवाई री ॥ वै कहा करैगी सेति राखै री । तादिना
 तूहीधौँ कितिक भाषै री ॥ नैन भरिलेति कह और नाहीं री ॥ छोर मोतिसरीको मोहिं रिसा
 हि री ॥ संदूकन भरि धरे ते न खोलै री । कहा मोसों खीझ बोलै री ॥ सुता वृषभानुकी हरष मनही री ।
 सूर प्रभु सैन दै बोले वनही री ॥ ४९ ॥ राग गौरी ॥ सुनि राधा अब तोहि न पत्यैहौं । और हार चौकी
 हमेल अब तेरे कंठ न नैहौं ॥ लाख टकाकी हानि करी तैं सो अब तोसों लैहौं । हार बिना ल्याये
 लरिहौं री घरनहिं पैठन दैहौं ॥ जब देखों श्रीवहै मोतिसरी तबहीं तो संच पैहौं । नातर सूर
 जनमभरि तेरो नाउँ नहीं मुख लैहौं ॥ ५० ॥ राग कल्याण ॥ सुनि री राधा अतिलडवौ री
 यमुनगई जब संग को नहीं । वृद्धति नहीं जाइ अपनिनको न्हातरही जब जोन जोनही ॥
 काको नाउँ धरौं तो आगे ललिता चंद्रावली नहीं नहीं । बहुत रहीं संग सखी सहेली कहौं
 कहा मैं सैन सैनही ॥ देखौं जाइ यमुनतटहीमें जहां धरिकैं मैं न्हात रही ही । सूर जाइ बूझौ धौँ वाको
 ब्रजयुवती एक देखिरही ही ॥ ५१ ॥ राग कल्याण ॥ जैहै कहा मोतिसरी मेरी । अब सुधि भई लई वाहीने
 हँसत चली वृषभानु किशोरी ॥ अबही मैं लीन्हें आवतिहौं मेरो संग आवै जिनि कोरी । देखोधौं
 कहं करिहौं वाको बडे लोग सीखतहै चोरी ॥ मोको आजु अवेर लागिहै दूँदूँगी ब्रज घर घर
 खोरी । सूर चली निधरकहै सबसों चतुर राधिका बातन भोरी ॥ ५२ ॥ नंद सुअन बार बार
 रवनीपंथ जोहै री । लोचन हरि करि चकोर राधा मुख चंद और देखत नहिं तिमिर भार मनही मन
 मोहै री ॥ नैना दोउ भृंगरूप वदन कमल शरदरूप तरनिको प्रकाश मिलन बिना चपल डोलै री ।
 लोचन मृग सुभग जोर राग रूप भएभोर भौह धनुष शर कटाक्ष सुरति व्याध तोलै री ॥ कीधौं
 एक बच्छ चारु प्यारी मुख रूप सार श्याम देखि रीझे मन इहै सांच मानी ॥ सूर श्याम सुखदधाम
 राधाहै जाहि नाम आतुर पियजानि गवन प्यारी अतुरानी ॥ ५३ ॥ राग देवगंधार ॥ श्याम अति राधा विरहभ
 रे कबहुँ सदन कबहुँ आँगनही कबहुँ पौरि खरे ॥ जननी आतुर करति रसोई देखि देखि हरिजात ।
 कहा अवेर करति तू अब री भूखलगी अतिमात ॥ मैं बलिजाउँ श्यामघन सुंदर अब बैठौ तुम
 आई । सूर सखा संग सबै बोलावहु हलधर नहीं बताई ॥ ५४ ॥ राग विलावल ॥ महारि कह्यो नंदला-
 डिले संग सखा बोलावहु । कौं कलेऊ आइकै हलधरहु बोलावहु ॥ हलधर लयो बोलाइकै मोहन
 करि आदर । दाऊजी चलिजेंइये यह कहि मनसादर ॥ कान्ह जाइ तुम जेवहु मोको रुचिनाहीं ।
 सखा संग हरि लैगए बैठे एकठाहीं ॥ पटरस व्यंजन को गनै बहुभांति रसोई । सरस कनिक
 वेसन मिलै रुचि रोटी पोई ॥ प्रेमसहित परुसन लगी हलधरकी माता । ग्वाल सखा सब जोरिकै
 बैठे नंदताता ॥ सखा सबै जेवन लगे हरि आयसु दीन्हों । सूरदास प्रभु आपहु कर जोरहि लीन्हों ॥
 ॥ ५५ ॥ राग आसावरी ॥ नंदमहर घरके पिछवारे राधा आइ बतानीहो । मनौ आँबदल मोर देखिकै कुह
 कि कोकिला बानीहो ॥ झूठेहिनामलेत ललिताको काहे जाहु परानीहो । वृंदावन मग जाति
 अकेली शिरलिये दही मथानीहो ॥ मैं बैठी परखति ह्यौं रैहों श्याम तबहिते जानीहो । कोक कला
 गुणआगरि नागरि सूर चतुरई ठानीहो ॥ ५६ ॥ राग रामकली ॥ श्यामसखा जेवतही छाँडे। करको कौर डारि
 पनवारे नागरि सूर आपु चले अतिचाँडे ॥ चकृतभई देखत जननीदोउ चकृत भए सब ग्वाल ।
 अति आतुर तुम चले कहाँहो हमहि कह्यो गोपाल ॥ अबही एक सखा यह कहि गयो गाइ रही

बन व्याइ । सुनहु सूर मैं जेवन बैठो वह सुधि गई भुलाइ ॥५७॥ राग ललित ॥ धौरी मेरी गाइ बियानी ।
 सखन कह्यो तुम जेवहु बैठे श्याम चतुरई ठानी ॥ गाइ नहीं ह्वं बछरा नहीं वहैं है राधा रानी । सखा
 हँसत मनही मन कहि कहि ऐसे गुणनि निधानी ॥ जननी भेद नहीं कछु जानै बार बार अकुलानी ।
 सूर श्याम भूखो उठि धायो मरै न गाइ बियानी ॥५८॥ राग कल्याण ॥ सैनदै नारि गई बनधामको ।
 तबहिं करकौर दियो डारि नहिं रहिसकै ग्वाल जेवत तजे मोहिं गई श्यामको ॥ चले अकुलाइ
 बनधाइ व्यानी गाय देखिहो जाइ मनहरष कीन्हो ॥ प्रिया निरखति पंथ मिलै कब हरिकंत गये यहिं
 अंतर हँसि अंक लीन्हो ॥ अतिहि सुखपाइ अतुराइ मिले धाइ दोऊ मनो अति रंक नव निधिपाई ।
 सूर प्रभुकी प्रिया राधिका अति नवल नवल नंदलालके मनहि भाई ॥ ५९ ॥ राग धनाश्री ॥ पिछ-
 वारे ह्वै बोलि सुनायो । कमलनयन हरि करत कलेऊ करनाहिन आतन लायो ॥ गाइ एक वन
 व्याइ रहीहै येहि मिस आतुर उठिधायो । बेनु न कियो लकुट नहिं लीन्हो हरबराइ कोऊ सखन
 बोलायो ॥ चौकि परे चकृत ह्वै जित कित सत्य आहिकी सपन भयो ज्ञायो । फूले फिरत शंक ना
 मानत मानहु सुधा किरनि छवि छायो ॥ मिलि बैठे संकेत लतातर कियो सबै जितनो मन भायो ।
 सूरदास सुंदरी सयानी उलटि अंक गिरिधर पर नायो ॥ ६० ॥ राग देवगंधार ॥ दोउ राजत रति रण
 धीर । महासुभट प्रगटे भूतल वृषभानु सुता बलबीर ॥ भौहैं धनुष चढाइ परस्पर सजे कवच
 तनुचीर । गुण संधान निमेष घटत नहिं छुटे कटाक्षनितीर ॥ नखनेजा आकृत उरलागे नेक न
 मानत पीर । मुरलीधरनि डारि आयुधलै गहे सुभुज भटभीर ॥ प्रेम समुद्र छाँडि मर्यादा
 उमँगि मिले तजि तीर । करत विहार दुहूँ दिशते मानो साँचत सुधा शरीर ॥ अति बल जोवन
 धाइ रुचिर रचि वदन मिलि श्रमनीर । सूरदास स्वामी अरु प्यारी विहरत कुंज कुटीर ॥ ६१ ॥
 राग कान्हरो ॥ नवल निकुंज नवल नवला मिलि नवल निकेतनि रुचिर बनायो । विलसत विपिन विलास
 विविधवर वारिजबदन विकच सनुपाये । लागत चंद्र मयूष सुतौ तनु लताभवन रंघनि मग आये ॥
 मनहुँ मदन वल्लीपरहिमकर साँचत सुधाधार सत नाये ॥ सुनि सुनि सूचति श्रवन सुंदरी मौन
 किये मोदति मन लाये । सूरसखी राधा माधौ मिलि क्रीडतहै रतिपतिहि लजाये ॥ ६२ ॥ राग कल्याण ॥
 हरषि पिय प्रेम तिय अंक लीन्हो । पिये बिन वसनकरि उलटि धरि भुजनभरि सुरति रति पूर प्रति
 निबल कीन्हो ॥ आपने कर नखनि अलक कुरवारही कबहुँ बाँधे अतिहिलगत लोभा ॥ कबहुँ मुख मोरि
 चुंबन देत हरष ह्वै अधर भरि दशन वह उनहि शोभा ॥ बहुरि उपज्यो काम राधिका पति श्याम
 मगन रस ताम नहिं तनु सँभारै । सूर प्रभु नवल नवला नवल कुंजगृह अन्त नहिं लहत दोउ रति
 विहारै ॥ ६३ ॥ राग नदा ॥ नागर श्याम नागरी नारि । सुरति रति रणजीत दोऊ अंग मन्मथ धारि ॥ श्याम
 तनु वन नील मानो ताडित तन सुकुमारि । मानो मर्कत कनक संयुत खच्यो काम सँवारि ॥
 कोक गुन करि कुशल श्यामा उत कुशल नन्दलाल । सूर श्याम अनंग नायक विवश कीन्हो बाल ॥
 ॥ ६४ ॥ राग मलार ॥ उल्हारी आयो शीतल बूँद पवन पुरवाई । बाढे डुम सघन बन दोउहो चहुँ
 ओर घटा छाई ॥ अनमने भए कन्हाई भीजत देखि राधिका माधव कारी कामरि ओढाई ॥ अति
 दरेरकी झरेर टपकत सब अँबराई ॥ कांपत तनु त्रियाको पिय हँसिकै ग्रीवा लगाई । भए एक ठौर
 सूर श्याम श्यामा भरि कोर अरस परस रीझत उपरै नहीं मैं समाई ॥ ६५ ॥ राग मलार ॥ दीजै कान्ह
 काँधेहूको कंमर । नान्ही नान्ही बूँदन वरषन लागौ भीजत कुसुंभी अंबर ॥ बार बार अकुलाइ
 राधिका देखि मेघ आडंबर । हँसि हँसि रीझि बैठि रहे दोऊ ओढि सुभग पीताम्बर ॥ शिव सनका-

सूरसागर ।

(२९६)

दिक् नारद शारद अंत न पावैं तुम्बर । सूर श्याम गति लखि न परत कछुखात ग्वालन ताजि
 संमर ॥ ६६ ॥ राग गौरी ॥ सुरति अंत बैठे बनवारी । प्यारी नैन जुरत नहिं सन्मुख सकुचि हँसत
 गिरिधारी ॥ बसन सँभारि तन लेत गये दोऊ आनंद उर न समाइ । चितवत दुरि दुरि नैन लजौही
 सो छवि बरनि न जाइ ॥ नागरि अंग मरगजी सारी कान्ह मरगजे अंग । सूरज प्रभु प्यारी बश
 कीन्हीं हाव भाव रति रंग ॥ ६७ ॥ राग सारंग ॥ श्याम नागरी छविपर । प्यारी एक अंग पर अटकी
 यह गति भई परस्पर ॥ देह दशाकी सुधि नहिं काहु नैन नैन मिलि अटके । इन्दीवर राजीव
 कमल पर युग खंजन जनु लटके ॥ चकृत भए तनुकी सुधि आई वनही में भई राति । सूर
 श्याम श्यामा बिहार करि सो छविकी एक भाँति ॥ ६८ ॥ राग आसावरी ॥ कान्ह कछो वनरैनि न
 कीजै सुनहु राधिका प्यारी हो । अति हितसों उरलाइ कछो अब भवन आपने जारी हो ॥ मात
 पिता जिय जान न कोई गुप्त प्रीति रस भारी हो । करते कौर डारि मैं आयो देखत दोउ
 महतारी हो ॥ तुम जो प्यारी मोही लागत चन्द्र चकोर कहारी हो । सूरदास स्वामी इन बातन
 नागरि रिझई भारी हो ॥ ६९ ॥ राग कल्याण ॥ प्यारी उठि पियके उर लागी । आलस अंग लटकि
 लट आई देखि श्याम बडभागी ॥ सुरति मोन निशि बीती मानों हँसनि प्रात भयो जागी ।
 अति सुख कंठ लगाइ लई हरि अरस परस अनुरागी ॥ नवतनमें घनबेली दामिनि
 सहज मँटि मिलि पागी । सूरदास प्रभुको अंकभरि कामदंष्ट्र तनु त्यागी ॥ ७० ॥
 ॥ राग गौरी ॥ कहा करौं पग चलत न घरको । नैन विमुख जन देखे जात न लुब्धे अरुन
 अधरको ॥ श्रवण कहत वे वचन सुनै नहिं रिस पावत मो परको । मन अटक्यो
 रस मधुर हँसनि पर डरत न काहु डरको ॥ इंद्री अंग अंग अरुझानी श्यामरंग नटवरको । सुनहु
 सूर प्रभु रही अकेली कहा करौं सुंदर वरको ॥ ७१ ॥ श्याम आपनी चितवनि बरजो अरु सुखकी
 सुसकानी । तुम्हरे तनक सहजके कारन सहियत सरवस हानी ॥ इजै बिजै दोऊ आपुसमें निरये
 विधना आनि । विद्यमान सबही इन देखत बशकरेबकी बानि ॥ आपुनही उहकाय अपुनपो
 कहियत कहा बखानि । सूर सुगंध गँवाइ गाँठिको रही बौरई मानि ॥ ७२ ॥ राग बिहागरो ॥ अतिहित श्याम
 बोले बैन । तुम बदन देखे बिना ये तृप्तहोत न नैन ॥ पलक नहिं चितते टरति तुम प्राणवल्लभ नारि ।
 सुनति श्रवननि वचन अमृत हरष अंतर भारि ॥ मात पित अवसेर करिहै गवन कीजे गेह । सूर
 प्रभु प्रिय त्रिया आगे प्रगटि पूरन नेह ॥ ७३ ॥ श्याम प्रगट कीन्हों अनुराग । अति आनंद मनहि
 मन नागरि बढ़ति आपने भाग ॥ सुंदरघन उत ब्रजहि सिधारे इतहि गमन करि नारि । दंपति
 नैन रहे दोउ भरि भरि गये सुरति रति सारि ॥ जननी मन अवसेर करतिही हरि पहुँचे तेहि
 काल । सूर श्यामको मात अंकभरि कहति जाउँ बलिलाल ॥ ७४ ॥ मैं बलि जाऊँ कन्हैयाकी ।
 करते कौर डारि उठिवायो व्यात सुनी वनगैयाकी ॥ धौरी गाइ आपनी जानी उपजी प्रीति
 लवैयाकी । तातो जल समोइ पग धोवति श्याम देखि हित मैयाकी ॥ जो अनुराग यशोदाके उर
 सुखकी कहति नन्हैयाकी । यह सुख सूर और कहूँ नहिं सौँह करत बलमैयाकी ॥ ७५ ॥ राग ईमन ॥
 कान्ह प्यारे वारने जाऊँ श्याम सुंदर मुरति पर । छबिसों छबीली लटकि वदनपर । चंद्रिकाकी
 लटकनि अतिहि बिराजत मुरली सुभग धरेकर । सुंदरनैन विशाल भौंह सुरचाप मनो तिलक बिरा-
 जित ललित भालपर । सूर श्याम मेरो अतिवानक बन्यो बनमाला अतिही उर राजत कटि तट
 सोहत पीतांबर ॥ ७६ ॥ राग बिहागरो ॥ वइ तो मेरी गाइ न होई । सुन मैया मैं वृथा भरम्यो बन

जो देखों नैनन भरि जोई॥ वृंदावन वृंढयो यमुनातट देख्यो बन डोंगरी मंझारी। सखा संग कोउ नहीं अकेलो कांघे कामरि कर लकुटधारी ॥ वहतौ धेनु और काहूकी युवती एकं मिली धौं कौन । सूर संग मेरे वह आई मोको उहि पहुँचायो भौन ॥ ७७ ॥ राग रामकली ॥ राधा अतिही चतुर प्रवीन । कृष्णको सुख दे चली हंसि हंसगति कटिछीन ॥ हारके मिस इहां आई श्याम मणिके काज । भयो सब पूरण मनोरथ मिले श्रीब्रजराज ॥ गौंठि आँचर छोरिकै मोतसरी लीन्ही हाथ । सखी आवत देखि राधा लई ताको साथ ॥ युवति बूझति कहाँ नागरि निशि गई एक याम । सूर व्योरो कहि सुनायो मैं गई तेहि काम ॥ ७८ ॥ राग कान्हरो ॥ ऐसी री निधरक तू राधा । ब्रज घर घर बन बन डोली तू नहीं कियो कहुँ बाधा ॥ मोको संग बोलि तू लेती करनी करी अगाधा । प्रातहिते तू अब आवतिहै रैनियाम लग आधा ॥ पायो हार किधौं पुनि नहीं देखौ री मोहिं साधा ॥ आँचर हेरि ग्रीव देखरायो दामन मोल उपाधा ॥ मन मन कहति बात यह मिलवति गई श्याम अब राधा ॥ सूर सखी लखि लीनी ताको यह तोहै कछु दुविदाधा ॥ ७९ ॥ राग धनाश्री ॥ कहि राधा किन हार चोरायो । ब्रज युवतिनि सबहिन मैं जानति घर घर लैलै नाम बतायो ॥ श्यामा कामा चतुरा नवला प्रमुदा सुमदा नारि ॥ सुखमा शीला अवधा नंदा वृंदा यमुना सारि ॥ कमला तारा विमला चंदा चंद्रावालि सुकुमारि । अमला अवला कंजा सुकुता हीरा नीला प्यारि ॥ सुमना बहुला चंपा जुहि ला ज्ञाना भाना भाउ । प्रेमा दामा रूपा हंसा रंगा हरषा जाउ ॥ दर्वा रंभा कृष्णा ध्याना मैना नैना रूप । रत्ना कुमुदा मोहा करुना ललना लोभा नृपा ॥ इतनिनमें कहि कौने लीन्हो ताको नाउ बताउ । सूर श्याम हैं चोर तिहारे मैं जानति सब दाँउ ॥ ८० ॥ शंकराभरन ॥ सुरति रति मानि आइ पिय पै तैं गजगति गामिनी । मरगजे हार बिथुरै बार देखियत आइ गई एक याम यामिनी ॥ औरै शोभा सोहाई अंग अंग अरसाय बोलतिहै कहा अलसामिनी । सूरदास छबि निरखति रही रसबश है री धनि धनि धनि तू भामिनी ॥ ८१ ॥ राग कान्हरो ॥ उरधारी लटै छूटी आननपर भीजी फुल्लेलनसों आली हरि संग केलि । सोधे अरगजी अरु मरगजी सारी केसरि खोरि बिराजित कहुँ कहुँ कुचनि पर दरकी अँगिया घन बेलि ॥ आलसहैं भरे नैन बैन अटपटात जात ऐंडात जम्हात गात अंग मोरि बहियां झेलि । सूरज प्रभु प्यारी प्यारे संग करि रस बिलास अरस परस दोउ अंको मेलि ॥ ८२ ॥ राग ललित ॥ आइ तू डगमगात ऐंडात जँभावति रंगमगी रंग मगी रंग भरिके । चंद उदै मुख देखतहौं कर दर्पन प्रतिबिंब निहारि धौं पीक लीक नैननि छवि परके ॥ बिथुरे अलक सुथरे मुख ऊपर अति आनंद उर हरिके । सुखकेलि करिकै सूरज प्रभु रसिकराइ रस वश कीन्ही बनाइ नवला नवल रीझे मन ढरिकै ॥ ८३ ॥ राग बिलावल ॥ सुनि री राधा अबहि नई । बातें कहा बनावति मोसों हमहूँ ते तुम चतुरभई ॥ कहाँ ग्वालि कहँ हार तुम्हारो कहाँ तहां तू आजु गई । मनहीं जानि लेहु मैं जान्यो जाको रंग तू सदा रई ॥ तेरे गुण परगट करिहौं मैं ऐसी रीति कहुँ न भई । सूर श्याम जबते संग कीन्हों तबहीते मैं जानि लई ॥ ८४ ॥ राग बिलावल ॥ इन बातन कछु पावति री । बिन देखे लोगनसों सुनि सुनि कोहे बैर बढावत री ॥ मोको जहां अकेली देखति तबही ये उपजावत री । ब्रज युवतिनकी संगति त्यागो पुनि पुनि क्रोध करावत री ॥ कैसी बुद्धि तुम्हारी सबकी ऐसी ए तुमको भावत री । सूर शीशतृणदै बूझतिहौ सांच कहत की बनावत री ॥ ८५ ॥ राग गुंडमलार ॥ करति अवसेर वृषभानुनारी । प्रातते गई वासर गयो बीति एक याम निशिगई धौं कहाँ वारी ॥ हार के त्रासमैं कुँवरि त्रासी बहुत तेही डरन अजहुँ नहिं सदन आई कहाँ मैं जाउँ कहा धौं रही रूसिकै

सूरसागर ।

(२९८)

सखिनसों कहति कही मिली माई ॥ हार बहिजाइ अतिगई अकुलाइकै सुताके नाउँ इक उहै मेरे ।
 सूर यह बात जो सुनै अबहीं महर कहेंगे मोहिं ये ढंग तेरे ॥ ८६ ॥ राग सौरभ ॥ राधा उर डरात गृह
 आई । देखतही कीरति महतारी हरषि कुँवरि उर लाई ॥ धीरज भयो सुता माता जिय दूरि गयो
 तनु सोच । मेरीको मैं काहे त्रासी कहा कियो यह पोच ॥ लै री मैया हार मोतसरी जा कारण
 मोहिं त्रासी । सूर राधिकाके गुण ऐसे मिली आई अविनाशी ॥ ८७ ॥ राग विहागरी ॥ परमचतुर
 वृषभानु दुलारी । यह मति रची कृष्णमिलिवेको परमपुनीत महा री । उत सुखदियो नंदनंदनको
 इतहि हरष महतारी । हारइतो उपकार करायो कबहुँ न उरते टारी ॥ जे शिव सनक सनातन
 दुर्लभ ते वश कियो सुरारी । सूरदास प्रभु कृपा अगोचर निगमनहुँ ते न्यारी ॥ ८८ ॥ राग भैरव ॥
 श्याम भए वश नागरिके । नैन कटाक्ष बंक अवलोकनि रीझे घोष उजागरके ॥ चित मधुकर
 रस कमल कोशको प्यारी वदन सुधागरिके । लोकलाज संपुटनहि छूटत फिरि फिरि आवत
 वागरिके ॥ मिलन प्रकाश मनावत मन मन कहा कहौ अनुरागरिको । सूर श्याम वश वम भएहैं
 धनि ऐसी बडभागरिको ॥ ८९ ॥ राग आसावरी ॥ श्याम भए वृषभानु सुतावश और नहीं कछु भावै हो । जो
 प्रभु तिहुँ भुवनको नायक सुरमुनि अंत न पावै हो ॥ जाको शिव ध्यावत निशि वासर सहसानन जेहि
 गावै हो । सो हरि राधा वदन चंदको नैनचकोर त्रसवै हो ॥ जाको देखि अनंग अनागत नागरि छबि
 भरमावै हो ॥ सूर श्याम श्यामावश ऐसे ज्यों सँग छाह डुलावै हो ॥ ९० ॥ राग जैतश्री ॥ कबहुँ श्याम यमुनतट
 जात । कबहुँ कदम चढत मग देखत मन राधा विन अति अकुलात । कबहुँ जात वन कुंज धामको देखि
 रहत कछु नहीं सुहाता तब आवत वृषभानुपुराको अति अनुराग भरे नंदतात ॥ प्यारी हृदय प्रग-
 टही जानति तब मन माझ सिहात । सूरदास प्रभु नागरिके उर नागर श्यामल गात ॥ ९१ ॥
 राग गृजरी ॥ राधा श्याम श्याम राधारंग । पियप्यारीको हृदय राखत प्यारी रहति सदा हरिके सँग ॥ ना-
 गरि नैन चकोर वदन शशि पिय मधुकर अंबुज सुंदरि सुख । चाहत अरस परस ऐसे करि हरि
 नागर नागरि नागर सुख ॥ सुख दुख सोचि रहत मनही मन तब जानत तनको यह कारन । सुन
 हुँ सूर कुलकानि जीय दुखं दोऊ फल दोउ करत बिचारना ॥ ९२ ॥ राग सूही विलावल ॥ यमुना चली राधिका
 गोरी । युवति वृंद बिच चतुरनागरी देखे नंद सुअन तेहि खोरी ॥ व्याकुल दशा जानि मोहनकी
 मनही मन डरपी उन ओरी । चतुर काम फंग परे कन्हई अब धौं इनहि बुझावै को री ॥ इत सखि-
 यनसों बात बनावति अति ह्वैगई तनकसी भोरी । सूर उतहि हरि भाव बतावत धीर धरौ मिलिहै
 दोउ जोरी ॥ ९३ ॥ राग जयतश्री तब राधा इक भाव बतावति । सुख मुसकाइ सकुचि पुनि लीन्हो
 सहज चली अलकै निरुवारति ॥ एक सखी आवत जल लीन्हें तासों कहति सुनावति । टेरि कछो
 घर मेरे जैहो मैं यमुनाते आवति ॥ तब सुखपाइ चले हरि घरको हरि प्यारीहि मनावत । सूरज
 प्रभु वितपन्न कोकगुन ताते हरि हरि ध्यावत ॥ ९४ ॥ राग धनाश्री ॥ श्यामको भाव दैगई राधा । नारि
 नागरि न काहू लख्यो कोऊ नहीं कान्ह कछु करत है बहुत अनुराधा ॥ चितै हरि वदन याको हँसत मैं
 लखी वेउ तहिं गए कछु हरष किये । भाव तौ भावके सींग नहीं सने ये महा चतुर चतुरई लिये ॥
 आजुही रैन दोउ संग ये मिलहिंगे हरे कहि परसपर मनहि मन जानी । सूर ब्रजनागरी नारि
 नागरिन सँग फिरि ब्रज तुरत लै यमुन पानी ॥ ९५ ॥ राग टोडी ॥ भाव दियो आवैंगे श्याम । अंग अंग आ
 भूषन साजति राजति अपने धाम ॥ रतिरण जानि अनंग नृपतिसों आप नृपति राजति बल जोरति ।
 अति सुगंध मर्दन अँग अँग ठनि वनि वनि भूषन भेषति ॥ वीरा हार चीर चोली छबि सैना सजि शृंगार ।

पान वचन सल्लाह कवच दै जोरो सूर अपार ॥९६॥ राग कान्हरो ॥ प्यारी अंग शृंगार कियो विनी रची
 सुभग कर अपने टीका भाल दियो ॥ मोतियन मांग सँवारि प्रथमही केसरि आड सँवारि । लोच-
 न आँजि श्रवण तरवन छबि को कवि कहै निवारि ॥ नासा नथ अतिही छबि राजत बीरा अधरनि
 रंग । नवसत साजि चीर चोली बनि सूर मिलनि हरि संग ॥९७॥ राग कल्याण ॥ नागरि नागर पंथ नि-
 हारै । उदै बालि शशि अस्तभयो अब जिय जिय इहै बिचारे ॥ कीधौ अवहीं आवत हैहैं की आवन
 नहिँ पैहैं । मात पिताकी त्रास उताहि इत मेरे घरहि डरैहैं ॥ अंग शृंगार श्यामहित कीन्हें वृथा
 होन ये चाहत । सूर श्याम आवैं की नाहीं मन मन इह अवगाहत ॥ ९८ ॥ राग कान्हरो ॥ श्यामा
 निशिमें सरस बनी री । मृगारिषु लंक तासु रिषु गज ता ऊपर मधु केलि ठनी री । कीर कपोत मधुप
 पिक तुंबर रिषु सत रेख बनी री । उडुपति विंब घरे अति शोभा मुख बाला जोरिचिनी री ॥ कनक
 खंभ रचि नवसत साजे जलधर भख जब श्रवन सुनी री । करगहि सत्र सात परिसारंग दंपतिहीकी
 सुरति ठनी री ॥ उमापतिहि रिषुको ललचानी वनरिषु तनमें अधिक जरी री । सूरदास प्रभु मिलो
 राधिका तन मन शीतल रोमभरी री ॥ राग बिहागरो ॥ राधा रचि रचि सेज सँवारति । तापर सुमन
 सुगंध बिछावति बारंबार निहारति ॥ भवन गवन करिहैं हरि मेरे हरष दुखहि निरुवारति । आवैं
 कबहुँ अचानकही जो सुभग पाँवडे डारति ॥ यह अभिलाषहि में हरि प्रगटे पुरुष भवन सकु-
 चानी । वह मुख श्रीराधा माधोको सूर उरहि यह जानी ॥ ९९ ॥ रति अति उपजायो पियप्यारी
 मन एक । सूरदास स्वामी स्वामिनि मिलि कोक कलानि अनेक ॥ कहा कहौं मुख कहाँ न जाइ।
 वह अभिलाष श्यामकी आवनि दुहुँ उर आनँद उर न समाइ ॥ द्वादशकान्ह द्वादशी आपुन वह
 निशि वै हरि राधा योग । वह रसकी झझकनि वह महिमा वह मुसकनि वैसो संयोग । वै हित बोल
 परस्पर दोऊ ठटकत कहत प्रेम पहिचानि । सूर श्याम कर वाम भुजाधरि उछंगलई वह मुख
 पहिचानि ॥ १०० ॥ राग कान्हरो ॥ श्याम सकुच प्यारी उर जानी । उछंगि लेई वाम भुज भारकै बार
 बार कहि बानी ॥ निरखति सकुच बदन हरिप्यारी प्रेमसहित दोऊ ज्ञानी । करत कहा पिय अति
 उताइली मैं कहूँ जात परानी ॥ कुटिल कटाक्ष बंक करि भुकुटी आनन मुरि मुसकानी । सूर श्याम गि-
 रिधर रतिनागर नागरि राधारानी ॥ १ ॥ नागरि नागर करत बिहार । कामनृपति सैना दुहुँ
 अंगनि शोभा वार न पार ॥ अधर अधर नैननि नैननि भुव भाल कियो इकठौर । मन इंदीबर कमल
 कसेसे चारि भँवर रंग और ॥ बंदन भाल बिहँसनि दोऊ अरस परस वरनारि । मनो बिच चंद
 चकोर परस्पर कमल अरुन रविधारि ॥ २ ॥ राग गुंडमलार ॥ श्यामा श्याम परम कुश-
 ल जोरी । मनो नव जलद पर दामिनिकी कला सहज गति मेदि श्रुति भई भोरी ॥ अलक बिथुरी
 श्याम मुख पर रहे मनो बल राहु शशिं घेरि लीन्हों । चितै मुख चारु चुंबन करति सकुच
 तजि दशन छत अधर पिय मगन दीन्हों ॥ परत श्रम बूँद टप टपकि आनन बाल भई बेहाल
 रति मोह भारी । बिधुपर सुदंत विध्वंत अमृत चुवत सूर विपरीत रति पीडि नारी ॥ ३ ॥
 राग कुरंग ॥ कुंजके निकट कुंज सुरति निरसि सों सेजराजत मुख गात । छूटिगई
 तनकी चोली दरकि तरकि गये चारो याम रजनी विहानी भोर रे भोर प्रात ॥ आ
 लससों उठि बैठे अरस परस दोउ दंपति अति मन मन मुसकात । सूर आस पूरी श्यामा श्याम
 बनी जोरी निशिरस सुधि आये नैन नैननिजात ॥ ४ ॥ राग ललित ॥ राजत दोउ रतिरंग भरे ।
 सहज प्रीति विपरीति निशा सब आलस सेज परे ॥ अति रणवीर परस्पर दोऊ नेकहु कोउ
 न मुरे । अंग अंग बल अपने अरिनिसों रति संग्राम लरे ॥ मगन मुरछि रहे खेत सेज पर इत

उत कोउ न परै । सूर श्याम श्यामा रति रणते एक पग पल न टरे ॥ ६॥ राग विभास ॥ श्यामा
 श्याम सेज उठि बैठे अरस परस दोउ करत बिहार । उन उनकी पहिरी मोतिनकी माला उन
 उनको पहिरियो नवसरिहार ॥ लटपट पेंच सँवारति प्यारी अलक सँवारत नंदकुमार । सूरदास
 प्रभु नागरि नागर विपरीत भूपण करत शृंगार ॥ ६ ॥ राग ललित ॥ करि शृंगार दोऊ अलसाने ।
 प्रथम बोल तमचुर सुनि हरपे पुनि पौढे दोऊ लपटाने ॥ रति रण युद्ध याम त्रय नीके सेज परे
 उठि पुनि मुरझाने । मानों शूर खेत सम लरिकै गिरे उठत फिरि गिरे लजानै ॥ ७ ॥ राग ललित ॥
 बोल तमचुर चारों यामको गजर मारयो पौन भयो शीतल तमतमता गई । प्राची अरु
 नानी धानि किरिन उज्यारी नभ छाई उडगन चंद्रमा मलिनता लई ॥ मुकुले कमल वच्छ बंधन
 विछोहि ग्वाल चरै चली गाइ द्विज पैंती करको दई ॥ सूरदास राधिका सरसबानी बोलि कहै जागो
 प्राणप्यारे जू सवारेकी समै भई ॥ ८ ॥ राग विभास ॥ चिरई चुहचुहानी चंदकी ज्योति परानी
 रजनी बिहाभी प्राची पियरी प्रवानकी । तारिका दुरानी तम घटे चुरबोलै श्रवण भनक परी ललितके
 तानकी ॥ भृंग मिले भारजा विछुरी जोरी कोक मिले उतरी पनच अब कामके कमानकी । अथ-
 वत आये गृह बहुरि उवत भान उठौ प्राणनाथ महा जान माणि जानकी ॥ ब्रज घर घर इहै
 करत चवाव लोग बार बार कहनि करनि पग आनकी । सूरदास प्रभु नंदसुवन सिधारो धाम सुनत
 उठनि छवि कृपाके निधानकी ॥ ९ ॥ राग विलावल ॥ जागिये प्राणपति रैनि बीती । चंद्रकी द्युतिगई
 पैहै पीरीभई सकुच नाहीं दई अतिहि भीती ॥ मात पितु बंधु गुरुजन अबहिं जानिहैं लखै जिनि
 कहूं यह लाज भारी । सखिन आगे नहीं नहीं सब दिन कही मोहि घेरे रहति सबै नारी ॥ उठे
 मुमुकाइ अकुलाइ अतुराईकै निकसि गए श्याम ब्रजनारि जान्यो । सूर प्रभु नंदनंदन दरश दै
 गये निरखि यकटक रही पल भुलान्यो ॥ १० ॥ राग विलावल प्रगट दरश दै गए कन्हई । राधा गृहते
 निकसत देखे यह उनकी मन साध पुराई ॥ शीश मुकुट मोतिन उरमाला पीतांबर पट सहज
 फिराई । श्याम बरन तन निरखि भुलानी अंग अंग छवि कह्यो न जाई ॥ करति सोच राधा
 मन अपने आलस भरे गये हरि माई । सूर श्याम निशि नेक न सोये इहै कहति पुनि पुनि
 पछिताई ॥ ११ ॥ राग विलावल ॥ श्याम गये देखै जिनि कोई । सखियनसों निबहन पुनि
 पैहाँ इनि आगे राखौ रसगोई ॥ देखै आइ द्वारकै नागरि जहाँ तहाँ ब्रजनारी । सकुचि गई
 युवतिनके देखत दुखकीन्ही जिय भारी ॥ मन चिंता अतिही उपजायो बारबार पछितानी । सूर
 श्यामसों प्रीति गुनही आजु सवनि इन जानी ॥ १२ ॥ राग विलावल ॥ बार बार राधा पछितानी ।
 निकसे श्याम सदन मेरेते इन अटकरि पहिचानी ॥ नितही नित बूझति ये मोसों मैं इन पर सत-
 राति । अबतौ हरि प्रगटही देखे पुनि पुनि कहति लजाति ॥ यक ऐसेहि झकझोरति मोको पायो
 नीको दोउ । सूर आजु कहि भांति दुराऊं सोचति करति उपाउ ॥ १३ ॥ सोच परयो मन राधिका
 कछु कहत न आवै । कछु हरपे कछु दुख करै मन मौज बढावै ॥ निशि रस रंगहिमें पगी तनुसुधि
 बिसरावै । कबहुं विचारति निडुर है सखि ज्वाब न आवै ॥ अबहीं मोको बूझहै युवती चतुरावै ॥
 तिन सन्मुख कैहो कहा प्रभु सूर मनावै ॥ १४ ॥ राग नटनारायण ॥ कबहुं मगन हरिके नेह । श्याम संग
 निशि सुरतिको सुख भूलि अपनी देह ॥ जबहिं आवति सुधि सखिनकी रहति अति सरमाइ । तब
 करति हरि ध्यान हिरदै चरण कमल मनाइ ॥ होइ ज्यों परबोध उनको मेरी पति जिन जाइ । निदरि
 निदरि सबको रहीहू आजुलौं यहि भाइ । अबहिं सब जुरि आइहैं ह्यां तुम बिना न उपाइ । सूर प्रभु

ऐसी करौ कछु बहुरि न जाहु लजाइ ॥१५॥ राग टोडी ॥ ज्वाब कहा मैं देहौं उनको । की आवति अबहीं
की छिनकहि चोर कहैगी मोको ॥ कैसे हूं पति रहै विधाता अब यह करौ सँभारि । घेरहि रहति
दुराज कबलों ऐसी नागरि नारि । नैना भए चकोर रहत हैं मुख शशि पूरण श्याम । सुनहु सूर
यह दशा हमारी ये ब्रजकी सब बामा ॥१६॥ राग जैतश्री ॥ ये सब भेरेहि खोज परी । मैतौ श्याम मिली नहिं
नीके आजु रही निशि संग हरी ॥ युवती हैं सब दई सँवारी घर बनहू में रहति भरी । कैसे धौं यह
साध मिटैगी कहाँ मिलै जो एक घरी ॥ प्रगट करै तो बनति नहीं कछु लोक सकुच कुल लजा
मरी । ते परगट अबहीं इन देखे सूरज प्रभु ब्रजराज हरी ॥१७॥ राग धनाश्री ॥ तब नागरि मन हरष
बढायो । परम कुशल राधा हरि प्यारी हृदय बुद्धि उपजायो ॥ अब आवैं कैसेहु अँग बूझै ज्वाब
मनहि ठहरायो । अति आनंद पुलक तनु कीन्ही सोच मोच बिसरायो ॥ प्रगट गए जैसे नंदनंदन
उहै ध्यान उपजायो । सूरदास प्रभु रूप बखानो इनको जो दरशायो ॥१८॥ राग ललित ॥ राधा
हरिके गर्व भरी । सखियनको आगम जब जान्यो बैठी रही खरी ॥ उत ब्रजनारि संग जुरिकै वै
हँसति करति परिहास । चलौ न जाइ देखिये री वै राधाको जु अबास ॥ कैसे वदन शृंगार
कौन बिधि अंगदशा भइ कैसी । सूर श्याम संग निशि रस कीये निधरक ह्वै वैसी ॥
॥१९॥ राग जैतश्री ॥ सुनो सखी राधाके मनकी यह करनी सखियन नहिं जान्यो । जब हम
जाति चली यमुनाको तबही मैं वाको पहिचान्यो ॥ तबहि सैन दे श्याम बुलायो गृह
आवन को भाउ । उनके गुण धौंको नहिं जानत चतुर शिरोमणि राउ ॥ सुनहु सखी अंतर नहिं
कीजिय मूढ परै अपनेही । सूरश्याम मुख हमहि दुरावति आजु मिले सपनेही ॥ २० ॥ राग सारंग ॥
तुम जो कहति राधिका भोरी । आजु रही अब कहा दुराई कौन दिननकी थोरी ॥ जे छोटी तेई
हैं खोटी साजति माजति जोरी । बेदी भाल नयन नित आंजति निरखि रहति तनु गोरी ॥ चम-
कति चलै बदन मटकावै ऐसी जोबन जोरी । सूर सखी तेहि कहति अयानी मन मोहनहिं ठगो री ॥
२१ ॥ राग रामकली ॥ राधाको मैं तबहीं जानी । अपने कर जे मांग सँवारै रचि रचि बेनी बानी ॥ मुख
भरि पान मुकुर लै देखति तिनसों कहति अयानी । लोचन आंजि सुधारति काजर छाँह निरखि
मुसुकानी ॥ बार बार उरजनि अवलोकति उनते कौन सयानी । सूरदास जैसीहैं तैसी मैं वाको पहि-
चानी ॥२२॥ राग गुंडमलार ॥ राधिका सदन ब्रजनारि आई । रही मुख मुँदिकै बचन बोले नहीं नैनकी
सैन दै दै बुलाई ॥ इनि तबहिं लखि लई रचिति हैं चतुरई बुद्धि रचिकै अबहिं और कैहै । चोर चोरी
करै आपने जंघ बल प्रगट कैहै तुमहिं नहिं पतये है ॥ भौह देखो निरखि ज्वाब देहै कौन तुमहुँ में रा-
खति गर्व बोलि देखौ । सूर प्रभु संगते अति निधरक भई नैन मुख ओर तुम नहीं पेखौ ॥ २३ ॥
राग सही ॥ आजु कहा मुख मुँदि रही री । सुनति नहीं हो कुँवरि राधिका कापर रिसकरि मौन गही
री ॥ हमको यह काहे न सुनावति हम हैं तेरी संग सखी री । यह कहि कहि मुसकात परस्पर चतुर
नारि यह तबहिं लखी री ॥ कीधौं ध्यान करति देवनिको कीधौं ऐसी प्रकृति परी री । सूर जबहिं
आवति हम तेरे तब तब ऐसी धरनि धरी री ॥ २४ ॥ राग बिलावल ॥ बार बार युवती सब राधासों
भाखै । तुम दुराव करतीहौ हम तुमसों राखै ॥ इतनो सोच परचो कहा मुख ज्वाब न आवै । हमतो हैं
तेरी सखी सो कहि न सुनावै ॥ कछु दिनते तेरी दशा तनु रहति भुलाये ॥ निदुर भई कापर इतो कह
सूर सुभाये ॥२५॥ राग गुंडमलार ॥ राधिका कहति ये करति हांसी । रहति मुख मुख हेरि नैनकी सैन
दै कहति मोको कृष्ण उपासी ॥ सुनहुँ री सखी मैं कहा तुम सों कहाँ कहा बूझति मोहिं कहति

राधा । आजुही प्रात इक चरित देख्यो नयो तबहि ते मोहिं यह भई बाधा ॥ कहौ जो एक करि
 देखती नैन भरि भोरते भोर है रही माई । सूर प्रभु श्याम की श्यामता मेघकी यहै जिय सोच
 कछु नहिं सोहाई ॥ २६ ॥ राग रामकली ॥ कर घरकी घर सैर सखी री । की सृक सीपजकी बगपंगति की
 मयूरकी पीड पखी री ॥ की सुरचाप किधौ बनमाला तडित किधौ पटु पीत । किधौ
 मंदगरजनि जलधरकी पगनूपुर रवनीत ॥ की जलधरकी श्याम सुभग तनु इहै भोरते सोचति ।
 सूर श्याम रसभरी राधिका उमैंगि उमैंगि रसमोचति ॥ २७ ॥ राग रामकली ॥ आजु सखी अरुणोदय
 मेरे नैनन धोख भयो । की हरि आजु पंथ यहि गौने की धौं श्याम जलद उनयो । की बगपंगति
 भांति उरपरकी मुकुतामाल बहुमोल । की धौं मोर मुदित नाचत की वरहि मुकुटकी डोल ॥ की
 घनघोर गंभीर प्रात उठि की ग्वालनकी टेरनि । की दामिनि कौंधति चहुँदिश की सुभग पीतपट
 फेरनि ॥ की बनमाल लाल उरराजत की सुरपति धनु चारु । सूरदास प्रभु रस भरि उमैंगी राधा
 कहति विचार ॥ २८ ॥ राग विलावल ॥ सुनहु सखी राधा कहनावति । हम देख्यो सोई इन देखे ऐसेहि दोष
 लगावति ॥ यह पुनीत हमही अपराधिनि तनु अपराध बढावत । श्यामाश्याम सबके सुखदायक ताते
 कहि मनभावत ॥ इतनेहि रहौ और जिनि भोषहु अजहूं लाज न आवत । सूर श्याम राधा जो
 एके तऊ नहीं कहि आवत ॥ २९ ॥ राग सूही विलावल ॥ राधाको कछु और सुभाउ । हम देखति हरिको
 ओगहि अंग यह निरखति सतिभाउ ॥ यह है बिन कलंककी सांची हम कलंकमें सानी । हम हरिकी
 दासी सम नाहीं यह हरिकी पटरानी ॥ याकी स्तुति हम कहा करीहैं रसना एक न आवै । सूर श्याम
 कोई नहिं जाने भजन प्रताप बतावै ॥ ३० ॥ राग गुंडमालर ॥ राधिका हृदयते दोष टारौ । नंदके लाल
 देखे प्रात काल ते मेघ नहिं श्याम तनु छवि विचारौ ॥ इंद्रधनु नहीं वन दाम बहु सुमनके बगपांति
 नहीं वर मोतीमाला । शिखी वह नहीं शिरमुकुट श्रीखंड पछ तडित नहिं पीत पट छवि रसाला ॥
 मंद गर्जनि नहीं चरण नृपुत्र शब्द भोरही आजु हरिगवन कीन्हों । सूर प्रभु भामिनी भवन करि
 गवन मनरवन दुखके दवन जानिलीन्हों ॥ ३१ ॥ भोरजे गये तेई श्याम बैरी ॥ धोखो मोहिं भयो तब लखे
 नहिं एक करि नीलवनमेघ छवि चीन्ह तनु लै री ॥ शिखीकी भांति शिरपीड डोलत सुभग चापते
 अधिक नव मालशोभा ॥ सांवरी घटा बगपांतिते रुचिर मोतिबर दाम उर देखि लोभा ॥ तडितते पीतपटु
 कीच मकराजई गरज नहिं प्रातही ग्वाल बोले । सूर प्रभु सखी यह बात सांची कही पवनबशमेघ
 ज्यों अंग डोले ॥ ३२ ॥ राग कल्याण ॥ धन्यहो धन्य तुम घोषनारी । मोहिं धोखो गयो दरश तुमको भयो
 तुमहि मोहिं देखो री बीच भारी ॥ जा दिना संग मैं गई स्नानको यमुनके तीर देखे कन्हवाई ॥ पीड
 श्रीखंड शिर भेष नटवर कछे अंग इक छटा मैंही भुलाई ॥ एकदोष आइ ठाढ़े भए द्वार हरि आज
 द्वारहैं गए मेरो ॥ सूर प्रभु तादिना तुमहि कहि दियो मोहिं आज मैं लखे सोउ कहे तेरे ॥ ३३ ॥ राग आसावरी ॥
 तुम कैसे दरशन पावति री । कैसे श्याम अंग अवलोकति क्यों नैननको ठहरावत री ॥ कैसे रूप
 हृदय राखतिहौ वै तो अति झलकावत री । मोको जहां मिलत हैं माई तहैं तहैं अति भरमा-
 वत री ॥ मैं कबहुं नीके नहिं देखे कहा कहाँ कहत न आवत री । सूर श्याम कैसे तुम देखति मोहिं
 दरश नहिं द्यावत री ॥ ३४ ॥ राग आसावरी ॥ धन्य धन्य वृषभानुकुमारी । धनि माता धनि पिता धन्य
 तुम धनि तोसी उपजाई री ॥ धन्य दिवस धनि निशा तबहिंकी धन्य घरी धनि याम । धन्य
 कान्ह तेरे वश जेहैं धनि कीन्हें वश श्याम ॥ धनि मति धनि गति धनि तेरो हित धन्य भक्ति
 धनि भाउ । सूर श्याम पति धन्य नारि तू धनि धनि एक सुभाउ ॥ ३५ ॥ राग जैतश्री ॥ तोहिं श्याम

हम कहाँ देखावें । तुमते न्यारे रहत कबहुँ वै नैक नहीं बिसरावें ॥ एक जीव देही द्वै राची
यह कहि कहि जु सुनावैं । उनकी पटतर तुमको दीजै तुम पटतर वे पावैं ॥ अमृत कहा अमृत
गुण प्रगटे सो हम कहा बतावैं । सूरदास गूँगेको गुर ज्यों बूझति कहा बुझावैं ॥ ३६ ॥ राग टोडी ॥
सुनि राधा यह कहा बिचारै । वे तेरे रँग तू उनके रँग अपनो सुख काहे न निहारै ॥ जो देखै तौ
छाँह आपनी श्याम हृदय ह्यां छाया।ऐसी दशा नंदनंदनकी तुम दोउ निर्मल काया ॥ नीलांबर श्या-
मलतनुकी छबि तुअछबि पीत सुवास।वन भीतर दामिनी प्रकाशत दामिनि घन चहुँपास।सुन री सखी
बिलछ कहैं तोसों चाहति हरिको रूपा।सूर सुनहु तुम दोउ समजोरी एक एक रूप अनूप ॥ ३७ ॥
राग धनाश्री ॥ सुनि ललिता चंद्रावलि बात । मोसों श्याम नेह मानत है तुमसों कहति लजात ॥ तुमतौ
सदा रहति हरि सँगही भेद कहो यह मोहि । हाहा करति पाँइहों लागति शपथ है मेरी तोहि ॥
काहेको इतरात सखीरी तोते प्यारी कौन । सूर श्याम तेरे बश ऐसे ज्यों पर्वतवश पौन ॥
॥ ३८ ॥ राग नट ॥ पिय तेरे वश योंरी माई । ज्यों संगही सँग छाँह देह बश प्रेम कद्यो नहि जाई ॥
ज्यों चकोर वश शरद चंद्रके चक्रवाक बश भान । जैसे मधुकर कमलकोश बश त्यों बश श्याम
सुजान ॥ ज्यों चातक बश स्वाति बूँदके तनके बश ज्यों जीय । सूरदास प्रभु अतिवश तेरे
समझि देखि धौं हीय ॥ ३९ ॥ राग धनाश्री ॥ तू री छाँह किये हरि राखति । अपने मन तू जानति नीके
सुख मोसों यह भाषति ॥ अतिवश रहत कान्ह री तोको मुकुर हाथलै देखो । तैसी ये मन
मोहनकी गति उहै भाव मन लेखो ॥ तुम हौ वाम अंग दक्षिण वै ऐसे करि एक देह । सूर मीन
मधुकर चकोरको इतने नहीं सनेह ॥ ४० ॥ राग देसाष ॥ नंदनंदन बश तेरे री । सुनि राधिका परम
बडभागिनि अनुरागिनि हरिकेरे री ॥ जा दिनते तोहि खरिक मिले हरि धेनु दुहावन आई री ।
ता दिनते बश भये कन्हआई कहा ठगो री लाई री ॥ अब तू कहति कहा मो आगे बातन
मोहिं मुलावै री । सूरदास ललिताकी बाणी सुनि सुनि हरष बढावै री ॥ ४१ ॥ राग टोडी ॥
ललिता मुख सुनि सुनि वै बानी । मैं ऐसी जियमें यह आनी ॥ और नहीं मोसरि कोउ ब्रजकी ।
हौ राधा आधा अँग हरिकी ॥ अपनेही बश पियको करिहौं । कहूं जात देखौं तब लरिहौं ॥ घर घर
सबै गई ब्रजनारी । यहि अंतर आये गिरिधारी ॥ हरि अंतर्यामी अविनाशी । जानि राधिका गर्व
उदासी ॥ सूर श्याम राधा तन हेरचो । नागरि देखतही मुख फेरचो ॥ ४२ ॥ राग सारंग ॥ बरज्यो नहि
मानत उझकत फिरत हौ कान्ह घर घर । तुम मिषही मिष देखत फिरत युवतिनके बदन कौ
न कौनके घर ॥ कोउ अपने घर काम काज जैसे तैसे तुम आवत हौ दर दर । सूरदास प्रभु
अतिहि अचगरी देत डोलत नेक नहीं जियमें डर ॥ ४३ ॥ राग विलावल ॥ यह जान्यो जिय राधिका
द्वारे हरि लागे । गर्व कियो जिय प्रेम को ऐसे अनुरागे ॥ बैठि रही अभिमानसों यह ठौर न पायो
हृदय श्याम सुखधाममें अभिमान बसायो । राधा के यह जानिकै आपुन पछिताहीं । जहां गर्व
अभिमान है तहां गोविंद नाहीं ॥ तहां नेकहुँ नहि रहै नहीं दरशन दीन्हों । सूर श्याम अंतर भये जब
गर्वाहि चीन्हों ॥ ४४ ॥ राग धनाश्री ॥ राधा चकित भई मनमाहीं । अबहीं श्याम द्वार द्वै झाँके ह्यां आये
क्यों नाहीं ॥ आपुन आइ तहां जो देखे मिले न नंदकुमार । आवत है फिरि गये श्याम घन अति
ही भयो बिचार ॥ सूनै भवन अकेली मैही नीके उझकि निहारचो । मोते चूक परी मैं जानी ताते
मोहिं बिसारचो ॥ एक अभिमान हृदय करि बैठी एते पर झहरानी । सूरदास प्रभु गये द्वारको
तब व्याकुल पछितानी ॥ ४५ ॥ राग सारंग ॥ मैं अपने जिय गर्व कियो । वै अंतर्यामी सब जानत देख

सूरसागर ।

(३०४)

तही उन चरच लियो ॥ कासों कहौं मिलवै अब को नैक न धीरज धरत हियो । वै तो निदुर भये
या बुधिते अहंकार फल इहै दियो ॥ तब आपुन को निदुर करावति प्रीति सुमरि भरिलेत हियो । सूर
श्याम प्रभु वे बहुनायक मोसी उनके कोटि त्रियो ॥ ४६ ॥ राग विहागरो ॥ श्याम बिरह बन मांझ
हेरानी । संगी गये संग सब तजिकै आपुन भई देवानी ॥ श्याम धाम मैं गर्वहि राखति दुराचारि
नी जानी । ताते त्यागि गये आपुहि सब अंग २ रति मानी ॥ अहंकार लंपट अपकाजी संग न
रह्यो निदानी । सूर श्याम बिन नागरि राधा नागर चित्त भुलानी ॥ ४७ ॥ राग विहागरो ॥ महाविरह बन
मांझ परी । चकृत भई ज्यों चित्र पूतरी हरि मारग विसरी ॥ संगवटपार गर्व जब देख्यो साथी
छोंडि पराने । श्याम सहज अंग अंग माधुरी तहां वै जाइ लुकाने ॥ यह बन मांझ
अकेली व्याकुल संपति गर्व छँडाये । सूर श्याम सुधि टरत न उरते यह मनो जीव बचाये ॥ ४८ ॥
राग मारु ॥ विरहवन मिलन सुधि त्रास भारी । नैन जल नदी पर्वत उरज येइ मनो सुभग बेनी भई अहि
नि कारी ॥ नैन मृग श्रवन वन कूप जहां तहां मिले भ्रम गली सघन नाहि पार पावै । सिंह
कटि व्याघ्र अंग अंग भूषन मनो दुसह भये भार अतिही डरावै ॥ शरनकरि अत्रडारि डरलहत
कोउ नहीं अंग सुख श्याम बिन भये ऐसे । सूर प्रभु नाम करुनाधाम जाउ क्यों कृपा मारग
बहुरि मिलै कैसे ॥ ४९ ॥ राग टोडी ॥ राधा भवन सखी मिलि आई । अति व्याकुल सुधि बुधि कछु
नाहीं देहदशा बिसराई । बांह गही तेहि बूझन लागी कहा भयो री माई । ऐसी विवश भई तुम
काहे कहो न हमहि सुनाई । कालिहि और बरन तोहि देखी आजु गई सुरझाई । सूर श्याम देखे
की बहुरो उनहि ठगो री लाई ॥ ५० ॥ राग हमीर ॥ श्याम नाम चकृत भई श्रवन सुनत जागी ॥
आये हरि यह कहि कहि सखिन कंठ लागी ॥ मोते यह चूक परी मैं बडी अभागी ॥ अबकै अपराध
अमहु गये मोहिं त्यागी ॥ चरण कमल शरन देहु बार बार मांगी । सूरदास प्रभुके वश राधा अनु-
रागी ॥ ५१ ॥ राग विहागरो ॥ सखी रही राधा मुख हेरी । चकृत भई कछु कहत न आवै करन लगी
अवसेरी ॥ बार बार जल परसि वदनसों वचन सुनावत टेरी । आजु भई कैसी गति तेरी बजमें
चतुर निवेरी ॥ तब जान्यो यहतौ चंद्रावालि लाज सहित मुख फेरी । सूर तबहिं सुधि भई आपनी
मेटी मोह अंधेरी ॥ ५२ ॥ राग जैतथी ॥ कहा भयो तू आजु अयानी । अतिही चतुर प्रवीन राधिका
सखियनमें तू बडी सयानी ॥ कहिधौं वात हृदय की मोसों ऐसी तू काहे विततानी । सुखमलीन
तनुकी गति और बूझति बारबार सो बानी ॥ कहा दुराव करौं री तोसों मैं तो हरिके हाथ बिकानी ॥
सूर श्याम मोको परत्यागी जा कारण मैं भई देवानी ॥ ५३ ॥ अब मैं तोसों कहा दुराऊं । अपनी
कथा श्यामकी करनी तो आगे कहि प्रगट सुनाऊं ॥ मैं बैठीही भवन आपने आपुन द्वार दियो
दरशाऊं । जानि लई मेरे जियकी उन गर्व प्रहारन उनको नाऊं । तबहीति व्याकुल भई डोलति चित
न रहै कितनो समुझाऊं । सुनहु सूर गृह वन भयो मोको अब कैसे हरि दर्शन पाऊं ॥ ५४ ॥
राग नटनारायण ॥ सखी मिलि करौ कछु उपाउ । मार मारन चढ्यो बिरहिनि निदरि पायो दांड ॥ हुताशन
धुजजात उन्नत बह्यो हरिदिशवाउ । कुसुमसर रिपुनंद बाहन हरषि हरषित गाउ ॥ वारि भव सुत
तासु भावरि अब न करिहौं काउ । बार अबकी प्राण प्रीतम बिजै सखी मिलाउ ॥ ऋतुविचारि
जु मान कीजै सोउ वहि किन जाउ । सूर सखी सुभाउ रहौं संग शिरोमणि राउ ॥ ५५ ॥ राग नट ॥
मिलवहु पार्थ मित्रहि आनि । जलजसुताके सुतकी रुचि करे भई हितकी हानि ॥
दधिसुतासुत अवलि उरपर इंद्र आयुध जानि । गिरिसुता पति तिलक करकस हनत

सायक तानि ॥ पिनाकी पति सुत तासु बाहन भषक भष विषयानि । शाखावृग रिपु
 बसन मलयज हित हुताशनवानि ॥ धर्मसुतके अरि सुभावहि तजत धरि शिरपानि ।
 सूरदास विचित्र बिरहिनि चूक मन मन मानि ॥ ५६ ॥ राग ढोडी ॥ सुनि सजनी यह करनी तेरी ।
 हमसों भेद करै हित उनसों ऐसे गुन उनके री ॥ आजुहिते ऐसे ढँग आयें अबहीं तो दिन है री ।
 ऐसे टूटि परी उन ऊपर तुमही कीन्हों वैरी ॥ अजहूँ कह्यो मानिहै मेरे कीधों नहीं करै री ॥ सूर
 श्याम सों मानु करै किन काहे वृथा मरै री ॥ ५७ ॥ राग सोरठ ॥ तैहीं उनको मूँड चढायो । भवन
 विपिन संगही संग डोलै ऐसेहि भेद लखायो ॥ पुरुषभँवर दिनचारि आपने अपनो चाउ सरायो ।
 नंदनंदन बहु खनि खनवै इहै जानि बिसरायो ॥ अपनी बात आपने करैहै हमको तब न सुनायो ।
 सुनहु सूर बिन मान कहौ किन अपनो पिय अपनायो ॥ ५८ ॥ राग कान्हरो ॥ रैनमो जागत बिहानी
 मोहनसों मैं मान कियो ताते भई अधिक तनुतपति । सेज सुगंध तलप लागत पावकहुँ दाह
 सखी री त्रिविध पवन उडपति ॥ ऐसी कै व्यापी हौ मन्मथ मेरो जी जानै माई श्याम श्याम कहि
 रैन जपति । वेगि मिलाउ सूरके प्रभुको भूलिभिमान करौ कबहुँ नहिं मदनबानते कंपति ॥ ५९ ॥
 राग धनाश्री ॥ मान बिना नहिं प्रीति रहै री ॥ धाइ मिलेकी गति तेरीसी प्रगट देखि मोहिं कहा कहै री । अपनो
 चाउ सारि उन लीन्हों तू काहे अब वृथा बहै री । बैठि रहे काहे नहिं दृढहै फिरि काहे न तू मान
 गहै री ॥ अपनो पेट दियो तैं उनको नाकबुध्यत्रिय सबै कहै री । सूर श्याम ऐसेहैं माई उनको बिनु
 अभिमान लहै री ॥ ६० ॥ राग मलार ॥ सजौ क्यों मान मन न मेरे हाथ । पियकी सुरति करि उमँगि
 भरत । मोसों मानत वाम श्याम गुण गुण अभिलाष करत ॥ जो मोकानि न मानि आनि जुवरत
 तिन बिन नुसरत । अपमानतहुँ सुदित मृदयश अपयशहू न डरत ॥ रिसमें रस बिषुदै चिरचत
 नंदलाल हठि प्राणहरत । भ्रममें तो रिस करत न रसवश मोहिंसों उलटि सरत । स्वारथ सब इंद्री
 समहूँ पर बिरहा धीर धरत । सूरदास घरकी फूटैडी कैसे धीर धरत ॥ ६१ ॥ राग कान्हरो ॥ चारि चारि
 दिन सबै सुहागिनि री है चुकी मैं स्वरूप अपनी । कोउ अपने जिय मान करै माईहो मोहितौ छुटति
 अति कपनी ॥ मेरो कह्यो करि मान हृदय धरि छांडि देहु अति तपनी । सूर श्याम तबही मानैगे
 तबहिं करैगे जपनी ॥ ६२ ॥ हमारी सुरति बिसारी बनवारी हम सरबस दैद हारी । सखीपैवै न
 भये अपने सपनेहु वै सुरारी गिरिधारी ॥ वे मोहन मधुकर समान अन बोली मनलावत री ।
 धावत हम व्याकुल विरह व्यापि दिन प्रति नीरज नैना ढारि ढारी ॥ हम तन
 मन दै हाथ बिकानी वै अति निठुर रहत हैं सुरारी । सूरदास प्रभु सुनहु सखी बहुखनि खन पिय
 हम यक व्रतधारि मदन अग्नि तनु जरि जारी ॥ ६३ ॥ राग गौरी ॥ मैं अपनीसी बहुत करी री । मो
 सों कहा कहति तू माई मनके संग मैं बहुत लडी री । राखौ अटक उतहिको धावै उनको वैसियों
 परन परी री ॥ मोसों बैर करै रति उनसों मोको छांडी द्वार खडी री ॥ अजहूँ मान करौ मन पाऊँ
 यह कहि इत उत चितै डरी री । सुनहु सूर पांच मत एकै मोमैं मैही रही परी री ॥ ६४ ॥ राग गौरी ॥
 मन जिनि सुनै बात यह माई । करै लग्यो होइगो कितहुँ कहि दैहै को जाई ॥ ऐसे डरति रहति हैं
 वाको चुगुली जाइ करै गो । उनसों कहि फिरि ह्यां आवैगो मोसों आनि लरैगो । पंच संग लीन्हें
 वह डोलत कोऊ मोहिं न मानै । सूर श्याम कोउ उनहिं सिखायो वै इतनो कह जानै ॥ ६५ ॥ राग ईमन ॥
 मेरो मन कहिवे कोहै । जबहीं ते हरि दरशन कीन्हें नैन भेद कियो जोहै ॥ इंद्री सहित चित्त हू
 लैगयो रही अकेली हमही । येते पर तुम मान करावत तौ मनदेहु न तुमही ॥ मोको दोवल देति

कहाहौ तुम तौ सबै अयानी । सूर श्यामको बेगि मिलावहु हारि आपनी मानी ॥६६॥ राग रामकली॥
 सारंग सारंग धरहि मिलावहु । सारंग विनय करत सारंग सों सारंग दुख बिसरावहु ॥ सारंग
 समय दहत अति सारंग सारंग तिनहि दिखावहु । सारंगपति सारंगधर जैहै सारंग जाइ मनावहु ॥
 सारंग चरण सुभग कर सारंग सारंग नाम बोलावहु । सूरदास सारंग उपकारिनि सारंग मरत जिवा
 वहु ॥ ६७ ॥ राग विहागरो ॥ मोते यह अपराध परचो।आये श्याम द्वार भये ठाढे मैं अपने जिय गर्व
 धरचो ॥ जानि बूझि मैं यह कृत कीन्हों सो मेरेही शीश परचो । मन अपने ढँगहीमें मोसों बारंबार
 लरचो ॥ मैं अति विमुख रहे ये सन्मुख नीके उनहिं ठरचो । सूरदास मन आपु स्वारथी अपनो
 काज करचो ॥ ६८ ॥ राग सोरठ ॥ मन जो कह्यो करै रीमाई । तेरी कही बात सब होती मिलौ उनहिं
 को धाई ॥ निलज भई तनु सुधि बिसराई गुरुजन करत लराई । इत कुलकानि उतहि हरिको
 रस मनतो अति अपुडाई ॥ आप स्वारथी सबै देखियत है मोकों दुखदाई । सूरदास प्रभु चित अपनो
 करि तनकहिं गयो रिसाई ॥ ६९ ॥ राग देशाख ॥ मैं अबहीं करौं मान पै मन थिर न रहै । कोटि यतन करि
 करि पचिहारी मोहिं बिसारि गये को उनसों जु कहै ॥ मोको निदरि मिल्योहै हरिको येतेपर तनु मदन
 दहै । सूर श्याम सँग नेक न त्यागत सोवत जाँगत वरु अपमान सहै ॥ ७० ॥ मनहि कह्यो करि मान पै
 कह्यो न करै । बारवार हरिसों गुहरावत मोहिं मैगावत पुनि पुनि आनि लै ॥ घटदूमें इंद्री बश ताके
 लै निकस्यो मोहिं कौन डरै । सुनि सजनी मैं रही अकेली बिरह दहेली इत गुरुजन झहरै ॥
 अब विनु मिले बनत नहिं आली निशि दिन पल पल रह्यो न परै । सूर श्याम बहु खनिखन जो
 भलेही रहैं वे चित यह नहिं धरै ॥ ७१ ॥ राग विलावल ॥ भूलि नहीं अब मान करौ री । जाते होइ
 अकाज आपनो काहे बृथा मरौं री ॥ ऐसे तनमें गर्व न राखौं चिंतामणि बिसरौं री । ऐसी बात कहै
 जो कोऊ ताके संग लरौं री ॥ आरजपंथ चले कहा सरिहै श्यामहि संग फिरौं री ॥ सूरश्याम जो
 आप स्वारथी दरशन नैन भरौं री ॥ ७२ ॥ राग आसावरी ॥ चूक परी मोते मैं जानी मिलै श्याम बक
 साऊं री । हाहाकरि दशननि तृण धरि धरि लोचन जलनि ढराऊं री ॥ चरण गहाँ गाढे करि करसों
 पुनि पुनि शीश छुवाऊं री । मुख चितवौं फिरि धरणिं निहारौं ऐसी रुचि उपजाऊं री ॥ मिलौं धाइ
 अकुलाइ भुजनि भरि उरकी तपति जनाऊं री । सूर श्याम अपराध क्षमहु अब यह कहि कहि जु
 सुनाऊं री ॥ ७३ ॥ राग गैरी ॥ माई मेरो मन पियसों यों लग्यो ज्यों सँग लागी छांह । मेरो मन पियके
 जीव बसतहै पियको जीव मोमें नाँह ॥ ज्यों चकोर चंदाको निरखै इत उत दृष्टि न जाहि । सूर श्याम
 विनु छिन छिन युग सम क्यों करि रैन विहाहि ॥ ७४ ॥ राग जैतश्री ॥ उनको यह अपराध नहीं । वै
 आवतहैं नीके मेरे मैही गर्व कियो तनही ॥ मेरे गर्वते सह्यो कछू नहीं एक भई तनु दशानही ।
 मुख मिटि गयो हिये दुख पूरन अवै होइ नहीं विनही ॥ अब जो दरश देहिं कैसेहु फिरतरहौं
 सँगही सँगही । सूरदास प्रभुको हियरेते अंतर करौं नहीं छिनही ॥ ७५ ॥ राग विलावल ॥ अबकै जो
 पियपाऊं तो हृदय माँझ दुराऊं । हरिको दरशन पाऊं आभूषण अंग बनाऊं ॥ ऐसो को जो आनि
 मिलवै ताहि निहाल कराऊं । जो पाऊं तौ मंगल गाऊं मोतिनचौक पुराऊं ॥ रसकरि नाचों गाऊं
 बजाऊं चंदन भवन लिपाऊं । जो मोहन वश मेरे होवहिं हीरालाल लुटाऊं ॥ मणि माणिक न्यव-
 छावरि करिहौं सो दिन सुदिन कहाऊं । केतकि करनवेलि चम्पेली फूलन सेज बिछाऊं ॥ तापर
 पियको पौढाऊं मैं अचरा वायु डुलाऊं । चंदन अगर कपूर अरगजा प्रभुके खौरि बनाऊं ॥ जो
 विधना कबहुं यह करतो कामको काम पुराऊं । सूर श्याम विन देखे सजनी कैसे मन अपनाऊं ॥ ७६ ॥

॥ राग सांकारण ॥ अरी मोहिं पिउ भावै को ऐसी जो आनि मिलवै । चौदह विद्या प्रवीन अतिही सुंदर नवीन बहुनायक कौन मनावै ॥ नैक दृष्टि भरि चितवै मो बिरहिनिको माई काम द्वंद्व बिरह तपनि तनुते बुझावै । सूरदास प्रभु मोको करहि कृपा अब नितप्रति बिरह जरावै ॥ ७७ ॥ राग विलावल ॥ धीरज करि री नागरी अब श्यामहि ल्याऊं । अति व्याकुल जिनि होहि री सुख अबहि कराऊं ॥ देखि दशा सहि नहिं सकी मनही अकुलानी । मैं राधाकी प्रियसखी यह कहि पछितानी ॥ झरि झरि पियरी भईहै यह तौ सुकुमारी । ऐसी चूक परी है मोपे कहा करौ गिरिधारी ॥ प्यारी को मुख धोइकै पटपोंछि सँवारयो । तरक बात बहुतै कही कछु सुधि न सँभारयो ॥ सावधान करिकै गई ल्याऊं गिरिधरको । सूर तहाँ आतुर गई पाये हरि वरको ॥ ७८ ॥ रागदोडी ॥ ललिता मुख चितवत मुसुकाने । आपु हँसी पिय मुख अवलोकत दुहुनि मनहिं मन जाने ॥ अति आतुर धाई कहाँ आई कहि वदन झुराये । वृझत है पुनि पुनि नैदनंदन चितवत नैन चुराये ॥ तब बोली वह चतुर नागरी अचरज कथा सुनाऊं । सूर श्याम जो चलौ तुरतही नैननि जाइ दिखाऊं ॥ ७९ ॥ राग सारंग ॥ अद्भुत एक अनूपम बाग । युगल कमल पर गज क्रीडतहै तापर सिंह करत अनुराग ॥ हरि पर सखर सरपर गिरिवर गिरिपर फूले कंज पराग । रुचिर कपोत बसे ता ऊपर ता ऊपर अमृत फल लाग ॥ फल पर पुहुप पुहुप पर पल्लव तापर शुक्र पिक मृग मद काग । खंजन धनुष चंद्रमा ऊपर ता ऊपर इक मणिधर नाग ॥ अंग अंग प्रति और और छबि उपमा ताको करत न त्याग ॥ सूरदास प्रभु पिवहु सुधारस मानों अधरानिके बडभाग ८० राग रामकली ॥ पद्मनिसा रंग एक मझारि । आपहि सारंग नाम कहावै सारंग बरनी वारि ॥ तामें एक छबीलो सारंग अर्ध सारंग उनहारि । अर्ध सारंग परि सकलई सारंग अधसारंग बिचारि ॥ तामहि सारंग सुत शोभित है ठाढी सारंग संभारि ॥ सूरदास प्रभु तुमहू सारंग बनी छबीली नारि ॥ ८१ ॥ राग रामकली ॥ बिराजत अंग अंग इति बात । अपने कर करिधरे बिधाता षट खग नव जल जात ॥ द्वै पतंग शशि बीस एक फनि चारि विविध रंग धात ॥ द्वै पिक बिंब बतीस बज्रकन एक जलज पर थात ॥ इक सायक इक चाप चपल अति चिबुक में चित्त बिकात ॥ दुइ मृणाल मातुल ऊभे द्वै कदली खंभ बिन पात ॥ इक केहरि इक हंस गुप्त रहै तिनहि लग्यो यह गात । सूरदास प्रभु तुम्हरे मिलनको अति आतुर अकुलात ॥ ८२ ॥ राग सारंग ॥ आजु मैं देखी एक वाम नई सी । ठाढी हुती अंगना द्वारे बिधनारची कीधौं मदन मई सी ॥ हम तन चितै सकुच अंचल दै वारिज वदन परि वारि वई सी । मानौ द्वै ढंग चले हैं दृगनिलै ललित वलित हरि मनहि नई सी ॥ जनु पावस ते निकसि दामिनी नैक दमकि दुरि वोट लई सी । भोजन भवन कछू नहिं भावत पलकन मानो करत खई सी ॥ यह सूरति कबहुं नहिं देखी मेरी अँखियन कछु भूल भई सी । सूरदास प्रभु तुम्हरे मिलनको मन मोहन मोहनी अचई सी ॥ ८३ ॥ राग सारंग ॥ वरणों श्रीवृषभानु कुमारी । चितदैं सुनहु श्याम सुंदर छबि रतिनहीं अनुहारी ॥ प्रथमहि सुभग श्याम बेनी की शोभा कही बिचारी । मानों फनिग रह्यो पीवन को शशि मुख सुधा निहारी ॥ कहिये कहा शीश सेंदुरको कितौ रही पचिहारी । मानों अरुन किरनि दिनकरकी पसरी तिमिर विदारी ॥ झुकुटी बिकट निकट नैननिके राजत अति वरनारि । मनहुं मदन जगजीति जेर करि राख्यो धनुष उतारि ॥ ताबिच बनी आड केसरिकी दीन्ही सखिन सँवारि । मानों बंदि इंदु मंडलमें रूपसुधाकी पारि ॥ चपल नैन नासा बिच शोभा अधर सुरंग सुठार । मनो मध्य खंजन शुक्र बैद्यो लुबध्या बिंब बिचार ॥

तरिवन सधर अधर नकवेसरि चिबुक चारि रुचिकारी । कंठसरी दुलरी तिलरी पर नहिं उपमा कहूँ
 चारी ॥ सुरंग गुलाब माल कुच मण्डल निरखत तन मन वारि । मानों दिशिनिर्धूम अग्निके तप
 बैठी त्रिपुरारि । जो मेरो कृत मानहु मोहन करिल्याऊं मनुहारि । सूर रसिक तबहीपै बदिहौं मुरली
 सकौ न सँभारि ॥ ८४ ॥ राग मलार ॥ लाल उनि सुनी मनोहर वंसी । नहिं संभार अजहुँ युवतिन बल
 मदन भुवंगम डंसी ॥ कैसे ल्याऊं संगीत सरोवर मगन भई गति हंसी । अँकेउटारिचलहु आपुनपै
 मेलि भौंह दृढ फंसी ॥ वृंदावनकी माल कलेवर लता माधुरी गंसी । सूरदास प्रभु सब सुख दाता
 लै भुज बीच प्रशंसी ॥ ८५ ॥ राग धनाश्री ॥ मनसिज माधवे मानिनिहि मारिहै । त्रोटि परलव अरत परमौ
 अनिरखिनिमुखको तारिहै ॥ किसलय कुसुम कुंतसम सायक पायक पवन विचारिहै । द्रुम वल्ली
 यह दीप युग बनी जनति अनल त्रिय जारिहै ॥ भँवर जु एक चकृत चमरकर भरि बंडुष खग
 डारिहै ॥ पुनि पुनि वाज साजि सुनि सुंदरि त्रसित तिनहिं देखे मारिहै ॥ बिरह विभूति बढी
 वनितावपु शीश जटा बनवारिहै । मुखशशि शेषरह्यो सिते मानों भई तभौं उनहारिहै ॥ जो न इते
 पर चलहु कृपानिधि तो वह निज करसारिहै । सूरदास प्रभु रसिक शिरोमणि तुम तजि काहि पुका-
 रिहै ॥ ८६ ॥ राग सारंग ॥ शिव न अवध सुंदरी वधेभजिना मुकुता मांग अनंग गगनहिमें नवसत साजे अर्थ
 श्यामवन । भाल तिलक उडुपति न होय इह कबरी ग्रथित अहिपात न सहसफन । नहिं विभूति
 दधिसुत न कंठ जड इह मृगमद चंदन चरचित तन ॥ नहिं गज चर्मसे असित कंचुकी देखि बिचारि
 कहाँ नंदीगन । सूर सुहरि अब मिलहु कृपाकरि वरवश सरम करत दृढ हमसन ॥ ८७ ॥ राग सारंग ॥ नेक कुंज
 कृपाकरि आइये । अति रिस कृप द्वैरही किशोरी करि मनुहारि मनाइये ॥ कर कपोल अंतर नहिं
 पावत अति उसाँस तन ताइये । छूटे चिहुर वदन कुँभिलानो सुहृथ सँवारि बनाइये ॥ इतनो कहा गांठि
 को लागत जो बातनि यश पाइये । छूठेहि आदर देत सयाने इहै सूरज सगाइये ॥ ८८ ॥ राग धनाश्री प्रियमुख
 देखो श्याम निहारि । कहि न जाइ आननकी शोभा रही बिचारि बिचारि ॥ क्षीरोदक धूँघट हातो
 करि सन्मुख दियो उधारि । मानो सुधाकर दुग्ध सिंधुते कढ्यो कलंक पखारि ॥ मुक्तामांग शीश
 पर शोभित राजत डुहि आकारि । मानों उडगन जानि नवल शशि आये करन जुहारि ॥ भाल लाल
 सेंदूर बिंदु पर मृगमद दियो सुधारि । मनो बंधूक कुसुम ऊपर अलिबैठो पंख पसारि ॥ चंचलनैन
 चहुँदिश चितवत युगखंजन अनुहारि । मनहुँ परस्पर करत लराई कीर बचाई रारि ॥ बेसरिके
 मुकुतामें झाँई बरन विराजित चारि । मानो सुरगुरु शुक्र भौम शनि चमकत चंद्र मझारि ॥
 अंधर बिंब दशननकी शोभा दुति दामिनि चमकारि । चिबुक बिंदु बिच दियो बिधाता रूपसीव
 सब निरुवारि ॥ ज्योति पुंज पटतर देवेको दीजे कहा अनुहारि । जनु युग भानु दुहूँ दिशिउगए
 तम दुरिगयो पतारि ॥ लाल सुमाल हार हीरावलि सखियन गुही सुठारि । मनहु धुई निर्धूम
 अग्नि पर तप बैठे त्रिपुरारि ॥ सन्मुख दृष्टि परे मन मोहन लजित भई सुकुमारि । लीन्ही उमँगि
 उठाइ अंक भरि सूरदास बलिहारि ॥ ८९ ॥ राग नवा ॥ भुज भरि लई हृदय लाय । बिरह व्याकुल देखि वाला
 नयन दोउ भरि आय ॥ रैनि बासर बीचहीमें दोउ गए मुरुझाइ । मनो वृक्ष तमाल बेली कनक
 सुधा सिचाइ ॥ हरष डहडह मुसुकि फूले प्रेमफलनि लगाइ । काम मुरछनि बेलि तरुकी तुरतही
 विसराइ ॥ देखि ललिता मिलनि वह आनंद नहीं समाइ । सूरके प्रभु श्याम श्यामा त्रिविध ताप
 नशाइ ॥ ९० ॥ राग रामकली ॥ ललिता प्रेमविवश भई भारी । वह चितवनि वह मिलनि परस्पर अति शोभा
 वरनारी ॥ एकटक अंग अंग अवलोकति उत वश भए बिहारी । वह आतुर छबि लेति देत वै

इकते इक अधिकारी ॥ ललिता संग सखिन शोभा सखि देख्यो छबि पियप्यारी । सुनहुँ सूर जो
 अग्नि होम घृत ताहुते यह न्यारी ॥ ९१ ॥ राग धनाश्री ॥ देखिं सखी राधा अकुलानी ॥ ऐसे अंग अंग छबि
 लूटत मिलेहु श्यामको नहीं पत्न्यानी ॥ जैसे तृषावंत जल अचवत वहतौ पुनि ठहरात । यह आतुर
 छबि लै उरधारति नेक नहीं त्रिपितात । जो चकोर इकटक निशि चितवत याकी सरि सोड
 नार्ही । ज्यों घृत होम वह्निकी महिमा सूर प्रगट या मार्ही ॥ ९२ ॥ राग केदारो ॥ यद्यपि राधिका हरि संग ।
 हावभाव कटाक्ष लोचन करत नानारंग ॥ हृदय व्याकुल धीर नहीं वदन कमल विलास । तृपामें
 जल नाम सुनि ज्यों अधिक अधिकहि प्यास ॥ श्यामरूप अपार इत उत लोभ पुट विस्तार ।
 सूर मिलत नहिं लहत कोऊ दुहुँनि बल अधिकार ॥ ९३ ॥ राग केदारो ॥ राधेहि मिलेहु प्रतीत न आवति ।
 यद्यपि नाथ बिधु बदन विलोकति दरशनको सुख पावति ॥ भरि भरि लोचन रूप परमनिधि उरमें
 आनि दुरावति । बिरह बिकल मति दृष्टि दुहुँदिशि सचि सरधा ज्यों धावति ॥ चितवत चकित
 रहति चित अंतर नैन निमेष न लावति । सपनो अहि कि सत्य ईश इह बुद्धि वितर्क बनावति ॥
 कवहुँकरत बिचार कौनहो को हरि केहि यह भावति । सूर प्रेमकी बात अटपटी मनतरंग उपजा
 वति ॥ ९४ ॥ राग रामकली ॥ देखहु अनदेखेसे लागत । यद्यपि करत रंग भरे एकहि इकटक रहे निमिष
 नहिं त्यागत ॥ इत रुचि दृष्टि मनोज महासुख उत शोभा गुण अमित अनागत । बाढ्यो वैर कर्ण
 अर्जुन ज्यों दुइ महँ एक भूलिं नहिं भागत ॥ उत सन्मुख सों सावधान सजि इत सनाह अँग
 अंग अनुरागत । ऐसे सूर सुभट ए लोचन अधिकौ अधिक श्याम सुख मांगत ॥ ९५ ॥ राग कान्हरो ॥
 देखियत दोउ अहंकार परे । उत हरि रूप नैन याके इत मानहु सुभट अरे ॥ रुचिर सुदृष्टि
 मनोज महासुख इन इत एक करै । उन उत भूषण भेद विविध रचिं अंग अंग धनुष धरे ॥ ए
 अति रति रण रोष न मानत निमिष निषंग झरे । बाहु व्यथहि न वदत पुलक रुह सब अंग सरस
 चरे ॥ वै श्री ए अनुराग सूर सजि छिनु २ बढत खरे । मानहु उमँगि चर्यो चाहतहै सागर सुधाभरे
 ॥ ९६ ॥ राग विहागरो ॥ नखशिखते अंग अंग रूप छबि देखि देखि नैना न अघाने । निशिं अरु दिन यक
 टकही राखे पलक लगाइ न जाने ॥ छबितरंग अगनिनि सरिताए जलनिधि लोचन तृप्ति न माने ।
 सूरदास प्रभुकी शोभाको अति लालिची रहे ललचाने ॥ ९७ ॥ राग विभास ॥ ललिता संग सखिनको लीन्हें ।
 दंपति सुख देखत अति भावत एकटक लोचन दीन्हें ॥ प्यारी श्याम अंगकी शोभा निदरे देख्योई
 चाहति । उत नागर नागरि नैननिको निदरि रूप अवगाहति ॥ उत उदार शोभाकी सींवा इत
 लोभहि नहिं पार । सूर श्याम अँग अँगकी शोभा निरखत बारंबार ॥ ९८ ॥ राग गुंडमलार ॥ निदरि अंग
 छबि लेति राधा । यह कहति कितिक शोभा करैगे श्याम भेटिहौं आज मन सबै साधा ॥ उतहि
 हरि रूपकी राशि नहिं पार कहूँ दुहुँनि मन परस्पर होड कीन्हें । इतहि लुब्ध वै उतहि उदार
 चित्त दुहुँ नवल अंत नहीं परत चीन्हें ॥ जुरे रणवीर ज्यों एकते एक सरस मुरत कोउ नहीं दोउ
 रूप भारी । सूर स्वामी स्वामिनी राधिका सरस निरस कोउ नहीं लखि लई नारी ॥ ९९ ॥ राग मारू ॥ रुंधे
 रति संग्राम खेत नीके । एकते एक रणवीर जोधा प्रबल मुरत नहिं नेक अति सबल जीके ॥ भौं
 ह कोदंड शर नैन जोधानुकी काम छूटनि मानो कटाक्षनि निहारै । हँसनि दुज चमक करिवर
 नि लौहेन झलक नखन छत घात नेजा सँभारै ॥ पीतपट डारि कंचुकी मोचित करनि कवच सन्ना
 हए छुटे तनते । भुजा भुज धरत मनो द्विद शृङ्गिन लरत उर उरनि भिरे दोउ जुरे मनते ॥
 लटक लपटानि मानो सुभट लरि परे खेत रति सेज चुंबितान कीन्हें । सूर प्रभु रसिक

प्रिय राधिका रसकिनी कोक गुन सहित सुख लूटि लीन्हों ॥१७००॥ राग नट ॥ किशोरी अंग
 अंग भेटी श्यामहि । कृष्णतमाल तरल भुज शाखा लटकि मिली जैसे दामहि ॥ अचरज एक
 लता गिरि उपजै सोउ दीने करुणामहि । कछुक श्यामता साँवल गिरिकी छायो कनक अगामहि ॥
 गिरिवर धरन सुरति रतिनायक रति जीते संग्रामहि । सूर कहै ये उभय सुभट बिच क्यों जु बसै
 रिपु कामहि ॥ राग नट ॥ रसना युगलरस निधि बोलि । कनक बेलि तमाल अरुझी सुभुज बंधन
 खोलि ॥ भृंग यूथ सुधा किरनि मनो घनमें आवत जात । सुरसरी पर तरनि तनया उमँगि तट न
 समात ॥ कोक नद पर तरनि ताँडव मीन खंजन संग । करति लाज शिखर मिलि युगम संगम रंग ॥
 जलद ते तारा गिरत मनो परत पय निधि माहिं । युग भुजंग प्रसन्न मुख है कनक घट लपटाहि ॥
 कनक संपुट कोकिला ख बिवश है दे दान । विकच कंज अनारलगि अवर लसि करत पयपान ॥
 दामिनी थिर घन घटाचर कबहुँ है एहि भांति । कबहुँ दिन उद्योत कबहुँ होत अतिकुहुराति ॥
 सिंह मध्य सनाह मणि गण सरससर के तीर । कमल मनो बिननाल उलटै कछुक तीक्ष्ण नीर ॥
 हंस सारस शिखर चढि दोउ करत नाना नाद । मकर निजपद निकट बिहरत मिलन अति अह
 लाद ॥ प्रेम हित करि क्षीरसागर भई मनसा एक । श्याम मणिके अंग चंदन अमीके अभिषेक ॥
 सूरदास सखी सभा मिलि करत बुद्धि बिचार । समय शोभा लागि रही मनो सूमको संसार ॥
 राग रामकली ॥ शोभा सुभग आनन वोर । त्रासते तनु त्रासित तिरछे चितै देत अकोर ॥ निरखि सन्मुख
 कियो चाहत बदन बिधुकी जोर । तुला बिचलो केश तौले गरुअ आनन गोर ॥ दशपति रुचि
 मुदित मनसिज चपल दृग दृग कोर । कोस क्रीडत मीन मानों नीर नीरज भोर ॥ श्यामसुंदर
 नैन युग वर झलक कज्जल कोर । सुधा सर संकेत मानो कूप दानव वोर ॥ श्रवण मणि ताटक
 मंजुल कुटिल कुंतल छोर । मकर संकट कामवापी अलक फंदनि डोर ॥ चिकुर अध नव मोति
 मंडल तरल लट तृण तोर । जनु विध्वंसित व्याल बालक अमीकी झक झोर । श्रमस्वेद सीक-
 र गुंड मंडित रूप अंबुज कोर । उमँगि ईषद यो श्रम तज्यो पीयूष कुंभ हिलोर ॥ हँसत दशननि
 चमक बिज्जुल लसित कठिन कठोर । मुदित मधुपर बिंदगन मकरंद मध्य न थोर ॥ निरखि
 शोभा समर लजित इंदु भयो भ्रम भोर । सूर धन्य सुवन किशोरी धन्य नंद किशोर ॥ राग विलावल ॥
 धन्य कान्ह धनि राधा गोरी । धनि वहभाग सुहाग धन्य वह धन्य नवल नवला नव
 जोरी ॥ धन्य यह मिलनि धन्य यह बैठनि धन्य अनुराग नहीं रुचि थोरी । धनि यह अरस परस
 छबि लूटनि महाचतुर मुख भोरे भोरी ॥ प्यारी अंग अंग अवलोकति पिय अव-
 लोकत लगत ठगोरी । सूरदास प्रभु रीझि थकित भए नागरि पर डारत तृण तोरी ॥
 ॥ राग धनाश्री ॥ नागरि छबि पर रीझत श्याम । कबहुँक वारतहैं पीतांबर कबहुँक वारत मुकुतादाम ॥
 कबहुँक वारतहैं कर मुरली कबहुँक वारत मोहन नाम । निरखिरूप मुख अंत लहत नहीं तनु
 मनु वारत पूरणकाम ॥ वारंवार सिहात सूर प्रभु देखि देखि राधासी वाम । इनको पलकओट नहीं
 करिहों मन इह कहत वासरहु याम ॥ राग विलावल ॥ श्याम निरखि प्यारी अंग अंग । सकुचि रहत मुखतन
 नहीं चितवत जेहि बश रहत अनंत अनंग ॥ चपल नैन दीर्घ अनियारे हाव भाव नाना मतिभंग ।
 वारों मीन कोटि अंबुज गण खंजन वारत कोटि कुरंग ॥ लोचन नहीं ठहरात श्यामके कबहुँ अंग
 नैना मुख रंग । सूरदास प्रभु यों प्यारी बश ज्यों बशडोर फिरत सँग चंग ॥ राग दोड़ी ॥ श्याम भए राधा
 बश ऐसे । चातक स्वाति चकोर रहत ज्यों चक्रवाक रवि जैसे ॥ नाद कुरंग मीन जलकी गति

ज्यों तनुके बश छाया । यकटक नैन अंग छवि पोहै थकित भए पतिजाया ॥ उठे उठत बैठे बैठ-
तहैं चले चलत सुधि नार्हीं । सूरदास बड़भागिनि राधा समुझि मनहि मुसुकाहीं ॥ राग आसावरी ॥
निरखि श्याम प्यारी अंग शोभा मन अभिलाष बढावतहै । प्रिया अभूषण मांगत पुनि पुनि अपने
अंग बनावतहै ॥ कुंडल तट तरिवनलै साजत नासा बेसरि धारतहै । बेदी भाल मांग शिर पारत
बेनी गूँथि सँवारतहै ॥ प्यारी नैननिको अंजन लै अपने लोचन अंजतहै । पीतांबर वोढनी शीश दे
राधाको मन रंजतहै ॥ कंचुकि भुजनि भरत उर धारत कण्ठ हमेल भ्रजावतहै । सूर श्याम लालच त्रिय
तनुपर करि शृंगार सुख पावतहै ॥ राग नट ॥ श्यामा श्याम छविकी साध । मुकुट मंडल पीतपट छवि
देखि रूप अगाध ॥ प्रिया हाहा करति पुनि पुनि देहु प्रीतम मोहि । अंग अंग सँवारि भूषण रहति वह
छवि जोहि ॥ काछि कछनी पीत पटु कटि किंकिनी अतिशोभ । हृदय वनमाला बनावत
देखि छवि मनलोभ ॥ श्रवण कुंडल धारि शोभा शीश रचि श्रीखंड । सूर श्याम सुहागिनी
रुचि कनक कर लै दंड ॥ राग रागिनी कर्णाटकी ॥ श्रीगोपाललालजी बंसी नेक मैं पाऊं । हो मंदन गुपाल
तुम्हारी मुरली मैं नेकु बजाऊं ॥ टेक ॥ मुरली बजाऊं रिझाऊं गिरिधर गाऊं न आज सुनाऊं
तेइ तेइ तान तुमसी गीत गावत जेइ कर्णाटी गौरी मैं गाय सुनाऊं ॥ हो० ॥ तहांलुगि गान गाऊं
मोहन जहां लुगि सात सुरन मैं पाऊं । सुरन विमान थकित करि राखों कालिंदी स्थिर
नीर बहाऊं ॥ हो० ॥ बेनी शीशफूल पहिरो हरि मैं शिर मुकुट बनाऊं । तुम वृषभानु सुता है
बैठो मैं नंदलाल कहाऊं ॥ हो० ॥ तिहारो आभूषण मैं पहिरौं अपनो तुम्हैं पहिराऊं । तुम मानिनिको
मान करि बैठो मैं गहि चरण मनाऊं ॥ हो० ॥ सूरदास प्रभु तुम्हरे दरशको भक्ति भाव
नीके करि पाऊं । कीजै कृपा अनेक अनुचर पर अनुपम लीला गाऊं ॥ हो० ॥
॥ राग नट ॥ तिहारी लाल मुरली नेक बजाऊं । जो जिय होत प्रीति कहिबेकी सो धरि
अधर सुनाऊं ॥ जैसी तान तुम्हारे मुखकी तैसिय मधुर उपाऊं । जैसे फिरत रंघ मगु कँगुरी
तैसे मैंहुँ फिराऊं ॥ जैसे आपु अधर धरि फूंकत मैं अधरनि परसाऊं । हाहाकरति पाय हौं लागति
बांस बैसुरिया पाऊं ॥ सारंग नट पूरवी मिलैकै राग अनूपम गाऊं । तुम्हरे भूषण मोको दीजै
अपने तुमहि बनाऊं ॥ तुम बैठो दृढ मान साजिकै मैं गहि चरण मनाऊं । तुम्हराधेहो माधोई
माधो ऐसी प्रीति जनाऊं ॥ यह अभिलाष बहुत मेरे जिय नैननि इहै देखाऊं । सूर श्याम गिरि
धरन छबीले भुजभरि कंठ लगाऊं ॥ राग नट ॥ हरिजी मुरली तुम्हैं सुनाऊं । तुम सुरपुर वो प्राण
नाथ प्रभु हौं अँगुरियन चलाऊं ॥ मधुरे सुर गति राग रागिनी भलीतान उपजाऊं । जेहि जेहि
भांति रिझहु नंदनंदन तेहि तेहि भांति रिझाऊं ॥ अंश बाहु धरि करि विक्रम ज्यों ते मनु सुखहो
पाऊं । सूरदास अटक्यो मन चलै न पगु मन अभिलाष बढाऊं ॥ राग नट ॥ प्यारी कर बांसुरी लई ।
सन्मुख होइ तुम सुनहु रसिक पिय ललित त्रिभंग भई ॥ उठत राग रागिनी तरंगन छिनु छिनु
उपजि नई । आलबाल नंदलाल श्रवनवर जनु मोहनी वई ॥ नमित सुधाकर बदन अमित छवि
मनमोहन चितई । मानहुँ मत्त चकोर मेचक मृग तनु सुधि विसरि गई ॥ कटि पीतांबर छाइ नाह
को छल बलकै रिझई । सूर सखी हँसि कमल नैन कह राधे अंक दई ॥ राग गूजरी ॥ मुरली लई
करते छीनि । ता समय छवि कही जाति न चतुर नारि नवीनि । कहति पुनि पुनि श्याम आगे
मोहिं देउ सिखाइ । मुरलीपर मुख जोरि दोऊ अरस परस बजाइ ॥ कृष्ण पूरत नाद उछरत
प्यारी रिसकरि गात । बार बारहि अधर धरि धरि बजत नहिं अकुलात ॥ प्रिया भूषण श्याम

सूरसागर ।

(३१२)

पहिरत श्याम भूषण नारि । सूर प्रभु करि मानु बैठे त्रिय करति मनुहारि ॥ राग विलावल ॥ कहति
 नागरी श्यामसों तजौ मानु हठीली । हमते चूक कहा परी त्रिय गर्व गहीली ॥ हँसतहिमें तुम
 रिस कियो कहा प्रकृति तुम्हारी । बार बार कर धरतिहै कहि कहि सुकुमारी ॥ बृथा मान नहिं
 कीजिये शिर चरणन धरति । आनन आनन जोरिकै पिय मुखहि निहारति ॥ निठुर भईहै
 लाडिली कबके हम ठाढे । तुम हम पर रिसि करतहौ हम हैं तुव चाढे ॥ श्याम कियो हठ जानिकै
 इक चरित बनाऊं । सुनहु सूर प्यारी हृदय रस विरह उपाऊं ॥ राग विलावल ॥ लाल निठुर है बैठि
 रहे । प्यारी हाहा करति न मानत पुनि पुनि चरण गहे ॥ नहिं बोलत नहिं चितवत मुखतन धरणी
 नखन करोवत । आपु हँसति पुनि पुनि उर लागत चकित होत मुख जोवत ॥ कहा करत
 ए बोलत नाहीं पिय यह खेल मिटावहु । सूर श्याम मुख कोटि चंद्रछवि हँसिकै मोहिं
 देखावहु ॥ राग धनाश्री ॥ नागरि हँसति हृदय डर भारी । कबहुँ अंक भरि लेति उरज बिच कबहुँ कर-
 ति मनुहारी ॥ मान करत नीके नहिं लागै दूर करौ यह ख्याल । नेक नहीं चितवत राधा तन
 निठुर भए नँदलाल ॥ शीश धरति चरणनि लै पुनि पुनि त्रियको रूप निहारत । सूरदास प्रभु
 मान धरचो हठ धरणी नखन विदारत ॥ राग गुंडा ॥ निरखि त्रियरूप पिय चकित भारी । किधौ वै पुरु-
 ष मैं नारिकी वै नारि मैहिंहौं पुरुष तनु सुधि बिसारी ॥ आप तन चितै शिर मुकुट कुंडल श्रव-
 न अधर मुरली माल बन बिराजै । उतहि प्रियरूप शिर मांग बेनी सुभग भाल बेदी बिंद महा छाजै ॥
 नागरी हठ तजौ कृपाकरि मोहिं भजौ परी कह चूक सो कहौ प्यारी । सूर प्रभु नागरी रस विरह
 मगन भई देखि छवि हँसत गिरिराजधारी ॥ राग धनाश्री ॥ निरखत पिय प्यारी अंग अंग विरह शोभा ।
 कबहुँ पियचरण परति कबहुँ भुज अंक भरति कबहुँ जिय डरति वचन सुनिबकी लोभा ॥ कबहुँ
 कहति पियसों पिय कबहुँ कहति प्यारी हो हाहा करि पाँइ परति विकल भई बाला । कबहुँ उठति
 कबहुँ बैठ पाछे है रहति कबहुँ आगे है वदन हेरि परी विरह ज्वाला ॥ काहे तुम कियो मान
 बोले विन जात प्रान दंपति है संग दशा ऐसी उपजाई । रीझे प्रिय सूर श्याम अंकम भरि लई
 वाम विरह द्रंद्र मेटि हरष हृदय उपजाई ॥ राग धनाश्री ॥ प्रिया पिय लीन्ही अंकम लाइ । खेलतमें
 तुम विरह बढायो गई कहा बितताइ ॥ तुमही कह्यो मान करिबेको आपुहि बुद्धि उपाइ । काहे
 विवश भई विन कारण ऐसी गई डराइ ॥ सुन प्यारी हम भाव बतायो अंतर गए जनाइ । बारंबार
 अलिगन दीन्हो अवाहिं रही मुरझाइ ॥ सींची कनकलता सूरज प्रभु अमृत वचन सुनाइ । अति
 सुखदै दुखको बिसरायो राधारवन कन्हाइ ॥ राग गुंडमलार ॥ श्याम तनु पिया भूषण बिराजै । कनक-
 माणि मुकुट कुंडल श्रवन वनमाल अधर मुरली धरे नारि छाजै ॥ निरखि छवि परस्पर रीझे दोउ
 नारि वर गयो तजि विरह उर प्रेम पागे । सूरप्रभु नागरी हँसति मन मन रसति बसत मन श्यामके
 बडे भागे ॥ राग नट ॥ नागरि भूषण श्याम बनावत । श्रीनागर नागरि अंग शोभा कियो निरखि मन
 भावत ॥ श्यामा कनक लकुट कर लीन्हे पीतांबर उर धारे । उत गिरिधर नीलांबर सारी धूँघट
 वोट निहारे ॥ वचन परस्पर कोकिल वाणी श्याम नारि पति राधा । सूर स्वरूप नारि पति काछे
 पति नारी तनु साधा ॥ राग नट ॥ नीके श्याम मान तुम धारचो । तुम बैठे दृढ़मान ठानि मैं देख्यो
 मान तुम्हारो ॥ यह मन साध बहुतही मेरे तुम बिनु कौन निवारै । नागरि पियतन अपनी शोभा
 बारहि बार निहारै ॥ बेनी मांग भाल बेदी छवि नैननि अंजन रंग । सूर निरखि पिय धूँघट की छवि
 पुलक नमावति अंग ॥ राग धनाश्री ॥ कुंजवन गमन दंपति बिचारै । नारिको वेशकरि नारिको मनहि हरि

मुकुर लै भावती छबि निहारै ॥ भामिनी अंग वह निरखि नटवर भेष हँसतही हँसत सब चारो
 डारे ॥ सहज अपनो रूप धरो मन भावती और भूषण तुरत अंगधारे । त्रियाको रूप धरि संगी छि-
 कुँवरि जात ब्रज खोरि नहिं लखत कोऊ । सूर स्वामी स्वामिनी बने एकसे कोउ न पटत मेरे
 परस दोऊ ॥ राग गौरी ॥ नैदंनदन त्रिय छबि तनु काछे । मनो गोरी साँवरी नारि दोउ जात सहज भ
 आछे ॥ श्याम अंग कुसुंभी नई सारी फलगुंजाकी भांति । इत नागरी नीलांबर पहिरे जनु दामिनि
 घन कांति ॥ आतुर चले जात बनधामहि अतिमन हरष बढाए । सूर श्याम वा छबिको नागरि
 निरखति नैन चुराए ॥ राग कान्हरो ॥ मनही मन रीझतिहै राधा बार बार पिय रूप निहारै । निरखि
 भाल बेंदी सेंदुरकी वा छबि पर तन मन धन वारै ॥ यह मन कहति सखी जिन देखे बूझे पर कहा
 कैहौ । तिहूँ भुवन शोभा सुखकी निधि कैसे उनहि दुरैहौ ॥ पग जेहरि बिछिनकी झमकनि
 चलत परस्पर बाजत । सर श्याम श्यामा सुख जोरी मणि कंचन छबि लाजत ॥ राग कल्याण ॥
 श्यामा श्याम कुंजवन आवत । भुज भुज कंठ परस्पर दीन्हें यह छबि उनहीं पावत ॥ इतते चंद्रा-
 वली जात ब्रज उतते ए दोउ आए । दूरिहिते चितवत उनही तन इकटक नैन लगाए ॥ एक
 राधिका दूसरि कोहै थाको नहिं पहिचानौ । ब्रज वृषभानु पुरा युवतिनको इक इक करि मै जानौ ॥
 यह आई कहुँ और गाँवते छबि साँवरी सलोनी । सूर आजु इह नई बतानी एकै अंग न विलोनी ॥
 ॥ राग सोरठ ॥ राधा सकुचि श्याम मुख हेरति । चंद्रावली देखिके आवति ब्रजहीको पिय फेरति ॥ जाहु
 जाहु सुखते कहि भाषति करते कर नहिं छूटति । उतहि सखी आवत सकुचानी इतहि श्याम सुख
 लूटति ॥ दुख सुख हरष कछु नहिं जानति श्याम महारस माती । सूर उतहि चंद्रावलि इकटक उनहीके
 रँग राती ॥ राग गौरी ॥ यह वृषभानु सुता वह कोहै । याकी सरि युवती कोउ नाहीं यह त्रिभुवन मनमो-
 है ॥ अतिआतुर देखनको आवति निकट जाइ पहिचानो । ब्रजमें रहति किधौ कहुँ और बूझेते
 तब जानो ॥ यह मोहनी कहाँते आई परम सलोनी नारि । सूर श्याम देखत मुसुकानी करी चतुरई
 भारि ॥ राग गौरी ॥ इनते निधरक और न कोइ । कैसी बुद्धि रचीहै नोखी देखी सुनी न होइ ॥ इह
 राधासों हाथ विधाता बुद्धि चतुरई ठानी । कैसे श्याम चुराइ चली लै अपने भूषण ठानी ॥
 और कहा इति को पहिचाने मोपै लखे न जात । सूर श्याम चंद्रावलि जाने मनहीं मन मुसुकात ॥
 राग कान्हरो ॥ सकुच छाँडि अब इनहि जनाऊं । एतौ चले आपने काजहि मै काहे न समझाऊं ॥
 मनहीं मनमें जीति जाहिगे जानि बूझि निदराऊं । यह चतुरई काछिके आए सो अब प्रकट देखा-
 ऊं ॥ बडे गुणज्ञ कहावत दोऊ इनको लाज लजाऊं । सूर श्याम राधाकी करनी महिमा प्रगट
 सुनाऊं ॥ राग सारंग ॥ कहिराधा ये को है री । अति सुंदरि साँवरी सलोनी त्रिभुवन जन मन मोहै री ॥ और
 नारि इनकी सरि नाहीं कहौ न हम तन जोहै री । काकी सुता बधू है काकी काकी युवती धौ है री ॥
 जैसी तुम तैसी हैं एक भली बनी तुम सोहै री । सुनहु सूर अति चतुर राधिका एई चतुर नीकी
 गौहै री ॥ राग ईमन ॥ मथुरा ते ये आई है । कछु सम्बन्ध हमारी इनसों ताते इनहि बुलाई है ॥ लालि-
 ता संग गई दधि बेचन उनही इनहि चिन्हाई है । उहै सनेह जानि री सजनी भवन आजु हम आई
 है ॥ तबहीकी पहिचान हमारी ऐसी सहज सुभाई है । सूर मोहि देखन इहां आवत आपु संग
 उठि धाई है ॥ राग सोरठ ॥ इनको ब्रजही क्यों न बुलावहु । की वृषभानु पुराकी गोकुल निकटहि
 आनि बसावहु ॥ वोऊ नवल नवल तुमहूँ हौ मोहन को दोउ भावहु । मोको देखि कियो अति घूँघट
 काहे न लाज छुडावहु ॥ यह अचरज देख्यो नहिं कबहुँ युवतिहि युवाति दुरावहु । सूर सखी

पहिस्तों पुनि पुनि कहति जु हमहि मिलावहु ॥ राग हमीर ॥ सांवेरे तनु कुसुंभी सारी सोहत है नीकी
 नागरी नो रतिपति सँवारि बनी खनी जीकी री ॥ राधाते अतिहि सरस श्याम देखि पावै री ।
 रिस किट नारि और नारि मन चुरावै री ॥ घूँघट पट बदन ठाकि काहे इन राख्यो री । चितवहु
 भा तन ॥ मारि चंद्रावलि भाष्यो री ॥ आपुहि पट दूरि कियो तरुणी बदन देखै री । मनही मन सफल
 जानि जीवन जग लेखै री ॥ नैन नैन जोरति नहिं भावसों लजाने री । सूर श्याम नागरी मुख चित-
 वत मुसुकाने री ॥ राग विहागरी ॥ मथुरा में बसवास हमारो । राधाते उपकार भयो यह दुर्लभ दर्शन
 भयो तुम्हारो ॥ बार बार कर गहि गहि निरखत घूँघट वोट करो किन न्यारो । कबहुँ कर
 परसत कपोल छुइ चुटाके लेत ह्यां हमहिं निहारो ॥ कछु मैं हूँ पहिचानति तुमको तुमहि मिलाऊँ
 नंददुलारो । काहेको तुम सकुचति हो जी कहौ काह है नाम तुम्हारो ॥ ऐसी सखी मिली तोहिं
 राधा तौ हमको काहे न विसारो । सूरदास दंपति मन जान्यो यासे कैसे होत उबारो ॥ राग रामकली ॥
 राधा सखी मिली मन भाई । जबते इनसों नेह लगायो बहुत भई चतुराई ॥ और भई इतने तुमको
 सखी गृहजनसों निडुराई । काहूके मनमें नहिं आनति हमहुँ सबन बिसराई ॥ तुम हो कुशल
 कुशल हैं एऊ आपु स्वारथी माई । सूर परस्पर दंपति आतुर चतुर सखी लखि पाई ॥ राग रामकली ॥ इह
 सखि अबलौं कहां दुराई । राति दिवस हम कबहुँ न देखी अब जु कहाँते आई ॥
 त्रिभुवनकी शोभा सब गुणनिधि है विधि एक उपाई । विद्यमान वृषभानु
 नंदिनी सहचरि सब सुखदाई ॥ अपने मन ताकि ताकि तनु तोलति विय जन सुंदर
 ताई । दूसर रूपकी राशि राधिका कहौ कौन प्रभुताई ॥ राचिरही रस सुरति
 सूर दोउ निरखी नैन निकाई । चीन्हें हो चले जाहु कुंज गृह छांडि देहु चतुराई ॥ राग रामकली ॥ ऐसी
 कुँवरि कहां तुम पाई । राधाहुँते नख शिख सुंदरि अबलों कहां दुराई ॥ काकी नारि कौनकी
 बेटी कौन गाउँते आई । देखी सुनी न ब्रज वृंदावन सुधि बुधि रहति पराई ॥ धन्य सुहाग भाग
 याको यह युवतिनके मनभाई । सूरदास प्रभु हरषि मिले हँसि ले उर कंठ लगाई ॥ राग गुंडमलार ॥ नंद
 नंदन हँसे नागरी मुख चितै हरषि चंद्रावलि कंठ लगाई । वामभुज खनि दक्षिण भुजा सखी
 पर चले वन धाम सुख कहि न जाई ॥ मनो विवदामिनी बीच नव घन सुभग देखि छबि कामरति
 सहित लाजै । किधौ कंचनलता बिच तमाल तरु भामिनी बिच गिरिधर विराजै । गए गृह कुंज अलि
 गुंज सुमनन पुंज देखि आनंदभरे सूर स्वामी । राधिका खन युवती खन मन हरन निरखि छबि होत मन
 काम कामी ॥ राजी बैराठी ॥ वसेरी हेली नयननिमें षटइंदु । नंदनंदन वृषभानु नंदिनी सखी सहित
 शोभित जगवंदु । द्वादशही पतंग शशि सौ बीस पट फणि चौबीस धातु चतुरंग छंदु ॥ द्वादशही
 पकु बिंब सौ बानवै वज्रकन पट कमलनि सुसिख्यात मंडु ॥ द्वादशही मृणाल कदली खंभ द्वादश द्वाद-
 शते मातु लैहि गिनंदु । द्वादशही सायक द्वादश चाप चपलई खग व्याली समाधुरी फंदु । चौबि-
 सही चतुष्पद शोभा अति कीनी मानौ चलत चुवतकर भामकरंदु ॥ नील गौर दामिनि बिच
 पीत घन षोडश राजत अनूपम छबि श्रीगोकुल चंद । साठि जलजही अरु द्वादश सरवर अंगही
 अंग सर सरस कंदु । सूर श्यामपर तनु मनुहिवारते ललिता इति देखि भयो आनंदु ॥ राग केदारो ॥ कुंज
 सुहावनो भवन बनि ठनि बैठे राधा वरन । वरन वरन कुसुम प्रफुल्लित शशिकी किरनि जगमगात
 तैसोई बहै त्रिविध पवन ॥ आलिंगन पिकमंगल गावत ध्वनि सुनि सुनि मनहि भावत देखत
 दम्पति विवश अयन । सूरदास प्रभु पिय प्यारी दोउ राजत साजत सखी वारति रति पति

शयन ॥ राग विलावल ॥ सँग शोभित वृषभातु किशोरी । सारंग नैन बैन बर सारंग सारंग बदन कहै चो
 कोरी ॥ सारंग अधर सधर कर सारंग सारंग जति सारंग मति भोरी । सारंग दशन बसन छि-
 सारंग सारंग बसन पीतपट डोरी ॥ सारंग चरन पीठपर सारंग कनक खंभ अहि मनहुँ च मेरे
 सारंग बरन पीठि पर सारंग सारंग गति सारंग कटि थोरी ॥ सारंग पुलिन रजनी रुचि सारंग
 सारंग अंग सुभग भुज जोरी । बिहरत सचन कुंज सखि निरखति सूर श्याम घन दामिनि गोरी ॥
 ॥ राग विलावल ॥ कुंज भवन राधा मन मोहन । रति विलास करि मगन भए अति निरखत नैन लजोहन ॥
 त्रियतनुको दुख दूरि कियो पिय दैद अपनी सोहन । बार बार भुज धरि अंकम भरि मिलि बैठे
 दोउ मोहन ॥ पीतांबर पटसों मुख पोंछत हरषि परस्पर जोहन । सूर श्याम श्यामा मन रिझवत पीन
 कुचनि टकटोहन ॥ राग विहागरो ॥ बनहि धाम सुख रैनि विहाई । तैसिय नवल राधिका नागरि तैसेइ
 नवल कन्हई ॥ जैसोइ पुलिन पवित्र यमुनको तैसोइ मंद सुगंध । जैसोइ कंठ कोकिला कुहुकनि
 तैसोइ सुख सम्बंध ॥ रति बिहार करि पिय अरु प्यारी प्रात चले ब्रजधाम । सूरदास दोउ बांहां
 जोरी राजत श्यामा श्याम ॥ राग ललित ॥ नवल निकुंज नवल रस दोउ राजत हैं रंग भीने । कुसुमनि
 सेज भोर उठि आवत आलसयुत अंशनि भुज दीने ॥ अरुन नैन कुच रेख बिराजत श्रम जल
 वसन पलटि तनु लीने । सूरज प्रभु पिय प्यारी को सुख निरखत सखिन सहित ललिता दृगदीने
 ॥ राग कान्हरो ॥ बरन बरन बादर मनहरन उदय करन ब्रजधाम ते निकसत ऐसे दोउ लागे । श्याम
 घटा मध्य मानो दामिनि भामिनि राजति लाजति दुरिजाति कबहुँ प्रगट होत हारी तामें अरुन
 भए नैन सो सबै निशिके जागे ॥ मोर मुकुट पीतवसन इंद्रधनुष बीच बीच मंद मंद गरजि बोलनि
 पिय रंग अनुरागे । सूरदास प्रभु पियप्यारीकी छबि गावत पावत कवि उपमा जे तेउ बडभागे
 राग अडानो ॥ बांहांजोरी निकसे कुंजते प्रात रीझि रीझि कहैं बात । कुंडल झलमलात झलकत विवि
 गात चकचौंधीसी लागति मेरे इन नैननि आली रपटत पग नहिं ठहरात ॥ राधा मोहन बने घन
 चपला ज्यों चमकि चमकि मेरी पुतरीनमें समात । सूरदास प्रभुके वै वचन सुनहु मधुर मधुर अब
 मोहिं भूली री पांच और सात ॥ राग विलावल ॥ नवलकिशोर किशोरी बांहांजोरी आवत हैं रति रंग अनुरागे ।
 कबहुँ चरन गति डगाति लगत छबि नैन बैन अलसात जम्हात ऐंड़ात गति आनंद निशा सुख जागे ॥
 बानक देखत रीझि रही हैं चंदन बंदन माल बिना गुन अंजन पीक पलट लागे । सूरदास प्रभु
 प्यारी राजत आवत भ्राजत बने हैं मरगजे बागे ॥ राग सारंग ॥ अरुझि रहे मुकुताहल निरवारत सोहत घूँघर
 वारे बार । रतिमानी सँग नैद नंदनके छूटे बंद कंचुकी टूटे हार ॥ निशिके जागे दोउ नैना ठरकि रहे
 चलति जोवन मदभार । सूर श्यामसग इह सुख देखत रीझे बारंबार ॥ राग विलावल ॥ नवल श्याम नवला
 श्रीश्यामा ॥ दोउ राजत बांहांजोरी चलेजात ब्रजधामा ॥ या छबिकी उपमा देवेको त्रिभुवन नहिं अभिरामा
 दामिनि घन पटतर दीवेको सकुचत कवि लिये नामा ॥ सुधा शरीर परस्पर दोउ सुखदायक दिन जामा ॥
 सूरदास प्रभु नागर नागरि जीते रतिपति कामा ॥ राग ललित ॥ दोउ बनते ब्रजधाम गये । रतिसंग्राम जीति
 पिय प्यारी भूषण सजति नए ॥ वै ब्रजगये आपु अपने गृह चितते कोउ न टारत । मन वाचा कर्मना
 एक दोउ एकौ पल न बिसारत ॥ जैसे मीन नीर नहिं त्यागत ए खंडित ए पूरन ॥ सूर श्याम श्यामा दोउ
 देखो इत उत कोऊन अधूरन ॥ राग धनाश्री ॥ बहुरि फिरि राधा सजति शृंगार । मानहु काम हार पहिराव-
 ति अंग रणजीते सुरति अपार ॥ कटि तट सुभटनि देत रसन पट भुज भूषण उरहार । करकंकन
 काजर नकचेसरि दीन्हों तिलक लिलार ॥ बीरा बिहँसि देत अधरनिको सन्मुख सहे प्रहार । सूर

पहिरतो मुखे जु विमुख भए बांधति कायरवारा ॥ राग कान्हरो ॥ आज अति राधा नारि बनी । प्रति प्रति
 नागरी ननंग जाते रसवश त्रैलोक्य धनी ॥ शोभित केश विचित्र भांति द्युति शिखि शिखंड हरनी । रची
 रिस कि भाग रागनिधि कामधाम सरनी ॥ अलक तिलक राजत अकलंकित मृगमद अंक बनी । खुभी
 नजरानुपूलदुति यों मनो दुर्द्धर गति रजनी ॥ भौंह कमान समान बान मनो हैं युग नैन अनी ।
 नासा तिलक प्रमून बिबाधर अमल कमल बदनी ॥ चिबुक मध्य मेचक रुचि राजति बिंद
 कुंद रदनी । कंबु कंठ बिधि लोक विलोकत सुंदरि एक गनी ॥ बाँह मृणाल लाल कर पछव
 मद गज गति गवनी । पतिमन मणि कंचन संपुट कुच रोम राजितटनी ॥ नाभि भँवर त्रिवली
 तरंग गति पुलिन तुलिन ठटनी । कृष्णकटि पृथु नितंब किंकिनि युत कदलिवंभ जवनी ॥
 रचि आभरण शृंगार अंग सजि रति पति ज्यों सजनी । जीते सूर श्याम गुण कारण सुख न मुरचो
 लजनी ॥ राग विलावल ॥ नंदनंदन वश कीन्हें राधा भवन गए चित नैक न लागत । श्यामा श्याम रूपमं-
 दिर सुख अंतरते सो नैक न त्यागत ॥ जा कारण बैकुंठ बिसारत निज अस्थल मनमें नहिं भावत ।
 राधा कान्हदेह धरि पुनि पुनि या सुखको वृंदावन आवत ॥ बिछुरन मिलन बिरह सुख नवतन
 दिन दिन प्रीति प्रकाशत । सूर श्याम श्यामा विलास रस निगम नेति नित भाषत ॥ ॥ राग टोडी ॥
 निगम नेति नेति गावत हैं जाको । राधा वश कीन्हें हैं ताको ॥ निशि बनधाम संग रहे दोऊ ।
 एकै सँग नैक टरें न कोऊ ॥ प्रात गए घर घर रस पागे । अरस परस दोऊ अनुरागे ॥ अपनी
 अपनी दशा बिचारैं । भाग बडे कहि बारंबारैं ॥ प्यारी फेरि अभूषण साजति । बैठी रंगमहलमें
 राजति ॥ ज्यों चकोर चंद्राको आतुर । त्यों नागरि वश गिरिधर चातुर ॥ आये उझाकि झरोखे
 झाँक्यो । करत शृंगार सुंदरी ताक्यो ॥ जालरंध्र मग नैन लगायो । सूर श्याम मनको फल पायो ॥
 राग टोडी ॥ आधो सुख नीलावरसों ढाँकि विथुरी अलकैं सोहैं ॥ एकदिशा मनो मकर चाँदिनी एक दिशा
 सघन बीजरी ऐसे हरि मन मोहैं ॥ कबहुँ कर पल्लवनसों केश निरुवारति पाछे लै डारति निकसत शशि
 संपूरण सन्मुख जब जोहैं । सूरदास प्रभु यह छवि न्यारे दुरि देखत हैं त्रिभुवनमें उपमा सो कोहैं ॥
 ॥ राग टोडी ॥ एक कर दर्पण एक कर अचरा कजराहि सँवारति ललना मुख कालिमदूरि करति हैं
 उलटि भँवर फिरि कमल परत । शीशफूल अतिराजत नगनि जडयो ताकी उपमा कहे शेष शीश
 मणि मनो वरत ॥ करनफूल करननिहि सँवारति अलकैं निरवारति वंदन बिंदु ललाट करत ।
 सूर श्याम दुरि देखत दर्पणको मुख यकटकते पलकहु न टरत ॥ राग गुंडमलार ॥ करति शृंगार वृष-
 भानु वारी । रहे यकटक जाल रंध्र मग हेरि कैं श्याम मन भावती परमप्यारी ॥ कबहुँ बेनी
 रचति फूलसों मिलै कच कबहुँ रचि मांग मोती सँवारै । कबहुँ राखति शीशफूल लटकाइके
 कबहुँ वंदन बिंदु भाल भारै ॥ कबहुँ केसरि आड रचति दर्पण हेरि कबहुँ भ्रूनिरखि रिसकरि
 सकोरै । निरखि अपनो रूप आपुही विवश भई सूर परछाँहको नैन जोरै ॥ राग टोडी ॥ इह सुंदरी
 कहाँते आई । बार बार प्रतिबिंब निहारति नागरि मन मन रही लुभाई ॥ करते मुकुर दूरि
 नहिं डारति हृदय माँझ कछु रिस उपजाई । देखै कहूं नैन भरि याको नागर सुंदर कुँवर कन्हाई ॥
 मेरी कहा चलै या आगे यह धौं आजु अरसते आई । सूरदास याको या ब्रजमें ऐसी को
 वैरनि जो ल्याई ॥ राग हमीरा ॥ मुकुर छाँह निरखि देहकी दशा गँवाइ । बोली धौं कौने की आपुनही
 गमन कियो ऐसी को वैरनि है या ब्रजमें माइ ॥ विथकी अंग अंग निरखि बारबार है पराखि ललिता
 चंद्रावलि कह इतनी छविपाइ । मनमें कछु कहन चहै देखतही ठडुकिर है सूर श्याम निरखत द्युति

तनु सुधि बिसराइ ॥ राग विलावल ॥ कहति छाँहसों नागरी कोहैं तू माई । मिली नहीं ब्रजगाँवमें री कूँ
 कहाँते आई ॥ नाम कहाँ है सुंदरी कहि सोंह दिवाई । कहौ न मेरे साधु है मुख बचन सुनाई ॥ विच्छि-
 हमहुँ तुम सरबरी तुव छबि अधिकारै । और संग नहिं कोउ लई यह कहि डरपाई ॥ ज मेरे
 हों यह नहिं सुनी ह्याँकी अवमाई । अभरन लेत छिडाइकैं ब्रज ढीठ कन्हाई ॥ सदन जाहुँ
 कहे पटु अंग छपाई । सूर श्याम जो देखिहै करिहै बरिआई ॥ राग धनाश्री ॥ मैं उनके गुण नीके
 जानति । सदन जाहुँ मर्यादा जैहै कब्यो न काहे मानति ॥ अपनी दशा कहौ तो आगे जैसी बिपति
 बनाइ । मथुरा चली जाति दधि बेचन घेरि लई इन आइ ॥ गोरस लियो अभूषण छीन्यो तुम
 एक हम अनेक । सूर श्याम जो देखन पैहै करिहै अपनी टेक ॥ राग विलावल ॥ तेरे हित को
 कहतिहों मानो जिनि मानो । तू आई है आजुही उनको का जानो ॥ ऐसो ढीठ नहीं कहूँ त्रिभुवनमें
 माई । नारि पराई देखिकैं हँसि लेत बोलाई ॥ सो अपने सहजहि मिलै उनके गुण ऐसे ।
 भूषण लेत मँगाहके औरौ गुण नैसे ॥ काहुँको नहिं डरपही मथुरापाति धरकै ।
 मनको भायो करत है कबहुँ नहिं हरकै ॥ तुम सुंदरि काकी वधू घर जाहुँ सवारी ।
 सूर श्याम सुनि सुनि हँसैं मनही मन भारी ॥ राग मारू ॥ नागरी चरित पिय चकित भारी ।
 अंगकी छबि निरखि प्रथमही बिबस है प्रतिबिंब निरखत देह सुधि बिसारी ॥ एक राधा दूसरी
 वाहि जानि जिय नागरी पास आवत लजाही । नैन ठहराइ ठहराइ पुनि पुनि रहै कहै नहिं कछु
 हरषत डराही ॥ पुनि उठत जागि देखै मुकुरनारि कर ललचात अंकभरि लैन लोरै । सूर प्रभु
 भावतीके सदा रस भरे नैन भरि भरि प्रिया रूप चोरै ॥ राग गुंडमबार ॥ धन्य हरि नैन धनि रूपराधा ।
 धन्य वह मुकुर धनि धन्य प्रतिबिंब मुख धन्य दंपति रहति भेष आधा ॥ धन्य शृंगार धनि धन्य निर-
 खनि श्याम धन्य छबि लूटि लूटत मुरारी । सूर प्रभु चतुर चतुरी नवल नागरी रहै प्रतिबिंब पर
 नैन जोरी ॥ राग केदारो ॥ श्यामा जू आपनो रूप देखि रीझि रीझि नेकहुँ दर्पण दूरि न करति । अपनी
 छबि जु निहारति अपनों तन मन वारति बिबस है प्रतिबिंब के पाँइन परति ॥ कबहुँ श्यामकी
 सकुच मानति यह जिय अनुमानति यासों जिनि प्रीति करै एही डर डरति । सूरदास प्रभु प्यारी
 की छबि निरखत न्यारे है दृष्टि न इत उत टरति ॥ राग आसावरी ॥ नाम काह सुंदरी तुम्हारो क्यों मो
 सो नहिं बोलति हौ । हँसै हँसति चितए चितवति तुम तनु डोलै तनु डोलति हौ ॥ परमचतुर मैं
 जानति तुमको मोपर भौह मरोरति हौ । लटकति सुभग नासिका बेसरि पुनि पुनि वदन सकोरति
 हौ ॥ अरुन अधर चित हरन चिबुक अति दामिनि दशन लजावति हौ । ऐसे वचन मुखकी माधुरी
 काहे न हमहि सुनावति हौ ॥ कहौ बचन काकी तुम घरनी काके मनको चोरति हौ । सुनहुँ सूर
 सहजहि कीधौँ रिस मोसों लोचन जोरति हौ ॥ राग सोरठ ॥ कछु रिस कछु नागरि जिय धरकी । यह
 तो जोबन रूप गद्दली शंका मानति हरकी ॥ यह विपरीत होनहै चाहत ब्रज यह आयसु मानी ॥ यह
 तौ गुणनि उजागरि नागरि वैतो चतुर बिनानी ॥ कर दर्पण प्रतिबिंब निहारति चकित भई मुकुमारी ।
 सूर श्याम अंग निरखत वा छबि मग नागरि भोरी भारी ॥ राग विलावल ॥ सुता बिबस वृषभानुकी देखी गि-
 रिधारी । लोचन यकटक दैरही प्रतिबिंब निहारी ॥ अपनी छबि पर आपनो तन मन धन वारै ।
 बार बार हाहा करै त्रिय नाम न सारै ॥ बूझति ताको कौन तू कोहै री प्यारी । मैं देखी तौ आजु
 ही सुंदरि गुणभारी ॥ त्रिभुवन में कोऊ नहीं तेरी उपमा री । यह कहि मुख मन सोचई । भई
 सौति हमारी ॥ दृष्टि परै जिनि श्यामके तबही बश हैहै । सोच करै पछिताति है संगही

रहे ॥ ऐसी सुंदरि नारिको जवहीं वै पैहै । दोउ भुज भरि अँकवारि कै हँसि
 पहिरि लगेहै ॥ यह वैरिनि मोको भई घौ कहँते आई । मोतन यकटक हेरई मैं रही लजाई ॥ श्यामहि
 नागरी रिस लेइगी मैं जानी माई । देखि दशा यह वामकी प्रतिबिंब भुलाई ॥ इकटक नैन टैरि
 रिस किं बिकी अधिकाई । पिय हरपे आनंद भैर शोभा यह पाई ॥ कबहुँ चलत त्रिय पासको फिरि
 रहत लुभाई । सूरश्याम तृणतोरही मन मन मुसुकाई ॥ राग विहागरो ॥ नागरि रही मुकुर निहारि ।
 आनि औचक नैन सँदे कमल कर गिरिधारि ॥ चौंकि चकृत भई मनमें श्यामको जिय जानि ।
 मैं डरतिही अवहिं जाको मिले ताको आनि ॥ तबहिं तनुकी सुरति आई लख्यो तनु प्रतिछाहिं ।
 सकुचि मनही मन दुरावति परस्पर मुसुकाहिं ॥ समुझि चितमें कहति सखिअनि विपुल लैलै
 नाम । सूर प्रभु उर शीश परसे बीच बेनी श्याम ॥ राग विहागरो ॥ मूँदिरहे पिय प्यारी लोचन । अति
 हित बेनी उर परसाए वेष्टित भुजा अमोचन ॥ कंचनमणि सुमेर अँग दोऊ शोभा कही न जाइ ।
 मनो पन्नगी निकसि ताविच रही हाटक गिरि लपटाइ ॥ चपल नैन दीरघ अति सुंदर खंजनते
 अधिकाई । अति आतुर भषकारण धाई धरती फनन समाई ॥ मन हरषति मुख खिझति सखिन
 कहि चतुर चतुरई भाव । सूर श्याम मनकामनकै फल लूटतहै एहि दाव ॥ राग रामकली ॥ करत मन
 काम फल लूटि दोऊ । रहे दोउ नैन पिय सँदि कोमल करनि बरनि नहिं सकत वह उपमा कोऊ ॥
 हृदय भरि वाम सुखधाम मोहन काम मनो घन दामिनि झकोर लीन्हें ॥ महाआनंद सुखासिंधु
 उछलत दोऊ सूर प्रभु नागरी तुरत चीन्हें ॥ राग कान्हरो ॥ बैठी रही कुँवर राधा हरि अँखिया मूँदी
 आइ । अतिहि विशाल चपल अनियारे नहिं पिय पानि समाइ ॥ खन खोलत खन ढांकत नागरि
 मुख रिस मन मुसुकाइ । ज्यों मणि धर मणि छांडि बहुरि फिरि फन तर धरत छपाइ ॥ श्याम
 अंगुरिअनि अंतर राजत आतुर दुरि दर्शाइ । मानो मरकतमणि पिंजरनिमें विवि खंजन अकु-
 लाइ ॥ कर कपोल बिच सुभग तरौना शोभा बंठी सुभाइ । मनो सरोज द्वै मिलत सुधानिधि
 विवि रवि संग सहाइ ॥ अपने पानि पकरि मोहनके करधारि लिए छिड़ाइ । कमल चकोर
 चंचरि जनु द्वै शशि दिनकर जुरति सगाइ ॥ उपमा काहि देउँ को लायक देखी बहुत बनाइ ।
 सूरदास प्रभु दंपति देखत रतिसों काम लजाइ ॥ राग गुंडमलार ॥ श्याम भुज वाम गहि सन्मुख
 आने । भले जु भले मैं सखी धोखे रही रहे लोचन सँदि अति कर पिराने ॥ दौरि पैठे भवन कहि
 कबहिं कीन्हों गवन नारि मन खन तुमहौ कन्हाई । सूर प्रभु हरपि प्यारी अंक भरिलई मुकुरकी
 कथा तब कहि सुनाई ॥ राग गूजरी ॥ नागरि यह सुनिकै मुसकानी । को जानै पिय महिमा तुम्हरी
 नैननि चितै लजानी ॥ मैं बैठी प्रतिबिंब विलोकति अपने सहज सुहाइ । आपुन कहा
 अचानक आये तुवगति लखी न जाइ ॥ इक सुंदर दूजे अति नागर तीजे कोक प्रवीन । सूरदास
 प्रभु अबहीं तौ तुम यशुमति सुवन नवीन ॥ राग विलावल ॥ हँसत चले तब कुँवर कन्हाई । मनके
 करे मनोरथ पूरण राधाके सुखदाई ॥ उत हरपत हरि भवन सिधारे नागरि हरष बढ़ाई । जब
 आवत सुधि मुकुर विलोकनि तब तब रहति लजाई ॥ यहि अंतर सखियन सँग लीन्हें चंद्रावलि
 तहँ आई । सूर तुरत राधिका सबनिको आदर करि बैठाई ॥ राग रामकली ॥ अति आदरसों बैठक
 दीन्हों मेरे गृह चंद्रावलि आई अतिही आनंद कीन्हों ॥ श्याम संग सुख प्रगट्यो चाहति पुनि धीर-
 ज धरि राखति । जोइ जोइ कहति वचन गदगदसों बार बार मुख भाषति ॥ सखी संगकी कहति
 राधिका आजु कहा तैं पायो । सुनहु सूर इतने आदरसों कबहुँ नहीं बोलायो ॥ राग आसावरी ॥ हम

नतही प्रति आवैं सुनहु राधिका गोरी हो । ऐसो आदर कवहुँ न कीन्हों मेरी अलकसत्तरी
 ॥ काहे आजु हरष जिय उपज्यो कहा विभव तुम पायो हो । कीधौं आजु मिले नंदनंदन छि-
 लहु दुख बिसरायो हो ॥ उमंग्यो प्रेम रहत नहिं रोके सखियन कहति सुनावैं हो । सूर श्यामे मेरे
 भवन पधारे यह कहि कहि मन भावैं हो ॥ राग विहागरो ॥ आये श्याम अबहिं मेरे गेह । कही जाति न
 सखी मोपै मिले जौन सनेह ॥ करति अंग शृंगार बैठी मुकुर लीन्हें हाथ । आइ पाछे भए ठाढे
 चतुर बर ब्रजनाथ ॥ भाव इक मैं कियो भोरे ताहि कहत लजाउँ । निरखि अपनी छाँहको त्रिय
 और आनि डराउँ ॥ जालरंध्रनि रहे ठाढे निरखि कौतुक श्याम । नैन औचक आनि मूँदे सुनहु
 हरिके काम ॥ देतिहौं उरहनों तुमको भये डोलत चोर । सूर प्रभु आये अचानक भवन बैठी
 भोर ॥ राग विलावल ॥ श्याम संग सुख लूटति हौ । सुनि राधे रीझे हरि तोको अब उनते तुम छूटति
 हौ ॥ भली भई हरिके रस पागी वै तुमसों रति मानतहैं । आवत जात रहत घर तेरे अंतरही पहि-
 चानत हैं ॥ तुम अति चतुर चतुर वे तुमते रूप गुणनि दोउ नीके हो । सूरदास स्वामी स्वामिनि
 दोउ परमभावते जीके हो ॥ राग अडानो ॥ भलेही मेरे लालन आये री आजु मैं फूली अंग न समाई।
 गाऊँ बजाऊँ रस प्रेम भरि नाचौं तन मन धन न्यवछापर करि डारों एहि बिधि करति बधाई । धनि
 धनि भाग धनि धनि री सुहाग धनि अनुराग धनि धन्य कन्हई ॥ धनि धनि रैन धनि धनि दिन
 जैसो आजु धनि घरी धनि पल धनि धनि धनि माई । धनि गेह धनि देह धनि री शृंगार वह धनि
 प्रतिबिंब धनि रही मैं भुलाई ॥ धनि धनि सूर प्रभु धनि अवलोकनि धनि नैन मूँदे कर धनि धनि पिय
 सुखदाई ॥ राग ईमन ॥ बनि बनि आवत हैं लाल भाग वडेरो मेरे । दरश देखन को अति सुख उपजत और
 सन्मुख जब हेरे ॥ तब मैं हँसति जब मंद मुसुकात वै आनंद मानि पिय आवत नेरी । सूरदास प्रभुकी
 सुरतिहै महा रसाल टरति नसाँझ सबेरे ॥ राग ईमन ॥ श्याम अचानक आए री । पाछेते लोचन दोउ मूँदे मोको
 हृदय लगाए री ॥ लहनो ताको जाके आवैं मैं बडभागिनि पाए री । यह उपकार तुम्हारो सजनी रूसे
 कान्ह मिलाए री ॥ ल्याइ तुरत जादिन तू हरिको मैं अपराध क्षमाए री । सूरदास प्रभु नैननि
 लागे भावत नहिं बिसराए री ॥ अथ नैननि समथके पद ॥ राग टोडी ॥ हरि अनुराग भरी ब्रजनारी ।
 लोक सकुच कुलकानि बिसारी ॥ सासु ननंद हारी दैगारी । सुनत नहीं कोउ कहत कहारी ॥ सुत पति
 नेह जगत इह जान्यो । ब्रज युवती तिनकासों मान्यो ॥ काचो सूत तोरि सो डारयो । उरग कंचुकी फिरि न
 निहारयो ॥ ज्यों जलधार फिरि पुनि नाहीं ॥ जैसे नदी समुद्र समाही ॥ जैसे सुभट खेत चढि धावै ॥ जैसे सती
 बहुरि नहिं आवैं ॥ ऐसे भजी नंदनंदनको । सकुची नहिं त्यागत गृह जनको । सूरज प्रभु सब
 घोषकुमारी । ज्यों गज पंक न सकैं निवारी ॥ राग सोरठ ॥ एहि अंतर तेही खोरिही नंद नंदन आए ।
 सखिन सहित ब्रजनागरी पल बिनु टकलाए ॥ मोर मुकुट शिरसोहई श्रवणनि वर कुंडल । ललित
 कपोलनि झलमले सुंदर अति निर्मल ॥ तरुनिगई चकचौंधिकै नहिं नैन थिराही ॥ सूर श्याम
 छवि : निरखिकै युवती भरमाही ॥ राग सोरठ ॥ देखो श्याम अचानक जात । ब्रजकी खोरि
 अकेले निकसे पीतांबर कटिपर फहरात ॥ लटकत मुकुट मटक भौंहनिकी चटकत चलत मंद
 मुसुकात । पगट्टै जात बहुरि फिरि हेरत नैन सैन देके नंदतात ॥ निरखत नारि निकर विथकित
 भए दुख सुख व्याकुल झुलति सिहात । सूर श्याम अंग अंग माधुरी चमकि चमकि चकचौंधत
 गात ॥ राग सोरठ ॥ सघन कल्पतरु तर मन मोहन । दक्षिण चरन चरन पर दीन्हें तनु त्रिभंग मृदु
 जोहन ॥ मणिमय जडित मनोहर कुंडल शिखी चंद्रिका शीश रही फवि । मृगमद तिलक अलक

सुरसागर ।

(३२०)

बुहियारी उर वनमाल कहीं जो वै छवि ॥ तनु घन श्याम पीत पट शोभित हृदय पदिककी हँसि
 दिपरी दुति । वन तनु धात विचित्र विराजित वंशी अधरनि धरे ललित गति ॥ करज मुद्रिकी
 कर विकन छवि कटि किंकिणि नृपु पग भ्राजत । नख शिख कांति विलोकि सखी री शशि
 औ भौन मगन तनुलाजत ॥ नखशिख रूप अनूप विलोकति नटवर भेष धरे जु ललित अति ।
 रूपराशि यशुमतिको ढोंटा वरणि सकै नहिं सुर अलपमति ॥ राग सोरठ ॥ लोचन हरत अंबुज मान
 चकित मन्मथ शरन चाहत धनुष तजि निज बान ॥ चिकुर कोमल कुटिल राजत रुचिर
 विमल कपोल । नील नलिन सुगंध ज्यों रस थकित मधुकर लोल । श्याम उर पर
 परमसुंदर सजल मोतिन हार । मनो मर्कत शैलते बहिचली सुरसरि धार ॥ सूर कटि
 पट पीत राजत सुभग छवि नैदलाल । मनो कनकलता अवलि बिच तरल विटप तमाल ॥
 ॥ राग रामकली ॥ मोहन माई री हठ करि मनहि हरत । अंग अंग प्रति और और गति अतिही छवि
 जु धरत ॥ सुंदर सुभग श्याम कर दोऊ तिनसों मुरली अधर धरत । राजत ललित नील कर
 पल्लव उभै उरग मनो सुभट लरत ॥ कुंडल मुकुट भाल भुव लोचन मनो शरद शशि उदै करत ।
 सुरदास प्रभु तनु अवलोकत नैन थके इत उत न टरत ॥ राग रामकली मन तो हरिही हाथ बिकानो ।
 निकस्यो मान गुमान सहित वह मैं यह होत न जानो ॥ नैननि साँटि करी मिलि नैननि उनहींसों
 रुचि मानो । बहुत जतन करि हौं पचिहारी इतको नहीं फिरानो । सहज सुभाइ ठगोरी दारी
 शीश फिरत अरगानो ॥ सुरदास प्रभु रसवश गोपी बिसरि गयो तनुमानो ॥ राग सोरठ ॥ मनतो गये
 नैन हैं मेरे । अब इनसों वहि भेद कियो कछु एउ भए हरिके चेरे ॥ तनिक सहाय रहेहैं मोको
 येऊ दिन मिलि घेरे । क्रम क्रम गए कह्यो नहिं काहू श्याम संग अरुझे रे ॥ ज्यों दीवाल गिले पर
 कारक डारतही युग डेरे । सूर लटक लागे अँग छवि पर निठुर न जात उखेरे ॥ राग विहागरो ॥
 सजनी मनहिं अकाज कियो । आपुन जाइ भेद करि हमसों इन्द्रिन्ह बोलि लियो ॥ मैं उनकी कर
 नी नहिं जानी मोसों वैर कियो ॥ जैसे करि अनाथ मोहिं त्यागी ज्यों त्यों मानि लियो ॥ अब
 देखौ उनकी निठुराई सो गुनि मरति हियो । सुरदास ए नैन रहेहैं तिनहुं कियो वियो ॥ राग विहागरो ॥
 मेरे जिय इहई सोच परयो । मनके ढंग सुनोरी सजनी जैसे मोहिं निदरयो ॥ आपुन गयो पंच सँग
 लीन्हें प्रथमहि इहै करयो । मोसों वैर प्रीति करि हरिसों ऐसी लरनि लरयो ॥ ज्यों त्यों नैन रहे
 लपटाने तिनहुं भेद भरयो । सुनहु सूर अपनाइ इनहुंको अबलौं रह्यो डरयो ॥ राग गौरी ॥ मन बिगारयो
 ए नैन विगारे । ऐसो निठुर भयो देखौ री तब ए मोते टरत न टारे ॥ इन्द्री लई नैन अब लीन्हें
 श्यामहि गोंधे भारे । ए सब कहौ कौनहैं मेरे खानाजाद विचारे ॥ इतनेते इतनेमें कीन्हें कैसे आजु
 बिसारे । सुनहु सूर जे आप स्वार्थी ते आपुनही मारे ॥ राग गौरी ॥ आपु स्वार्थीकी गति नाहीं । वि-
 धिना ह्यां काहे अवतारे युवती गुनि पछिताहीं ॥ जनमें संग संग प्रतिपाले संगहि बड़े भए ॥ जब उनको
 आसरो कियो जिय तबहीं छोडि गए ॥ ऐसहैं ए स्वामिकारजी तिनको मानत श्याम । सुनहु सूर अब
 परगट कहिये ऐसे उनके काम ॥ राग कान्हरो ॥ हमते गए उनहुते खोवैं ॥ हाति खेदि देहिं वै हम तन हम उन
 तन नहिं जोवैं ॥ जैसी दशा हमारी कीन्हें तैसे उनहि विगोवैं । भटके फिरे द्वार द्वारनि सब हम देखे वै
 रोवैं ॥ आवहु इहै मतों री करिए निधरक वै सुख सोवैं । सूर श्यामको मिले जाइकै कैसे उनको धोवैं ॥
 राग धनाश्री ॥ मनके भेद नैन गए माईलुब्धे जाइ श्यामसुन्दर रस करी न कछु भलाई ॥ जबहीं श्याम
 अचानक आए इकटक रहे लगाइ । लोक सकुच मर्यादा कुलकी छिनहींमें बिसराइ ॥ व्याकुल

भवन वन जहँ तहँ तूल आक उधराइ । देह नहीं अपनीसी लागति यहहै मनो पराइ ।
 सखी मनके ढँग ऐसे ऐसी बुद्धि उपाइ । सूर श्याम लोचन वश कीने रूप ठगोरी लाइ ॥ राग ॥
 न मेरे हाथ रहे । देखत दरश श्यामसुंदरको जलकी ढरनि बहे ॥ वह नीचेको धावत भातुर
 ऐसेहि नैन भए। वहतौ जाइ समात उंदधिमें ए प्रतिअंग रए ॥ वह अगाध कहूँ वार न पार न एउ शोभा
 नहीं पार । लोचन मिले त्रिवेनीहैंकै सूर समुद्र अपार ॥ राग विहागरो ॥ मन ते ए अति ढीठ भए । वेतो
 आइ बोलते कबहुं एजु गए सुगए ॥ ज्यों भुवंग काचरी बिसारत फिरि नहीं ताहि निहारत । तैसेहि
 जाइ मिले इकटक हैं डरत लाज निवारत ॥ इंद्रिन सहित मिल्यो मन तबहीं नैन रहे मोहिं शालत ।
 सूर श्याम संगही संग डोलत औरनिके घर घालत ॥ राग सोरठ ॥ लोचन गए निदरिके मोकों । तोहूको
 क्यापी री माई कहा कहतिहैं मोकों ॥ मैं आई दुख कहन आपनी तेरे दुख अधिकारी । जैसे दीन दी-
 नसों याचै वृथाहोइ श्रम भारी ॥ मन अपनो वश कैसेहुँ कीजै याहीते सचुपावै । सूरदास इंद्रिन
 समेत अरु लोचन अबहिं मँगावै ॥ राग गौरी ॥ नैना नीके उमहि रहे । मन जब गयो नहीं मैं जान्यो
 ए दोउ निदरि गहे ॥ एतौ भए भावते हरिके सदा रहत इन माहीं । कर मीडति शिर धुनति नारि
 सब यह कहि कहि पछिताही ॥ सूरखके ज्यों बुद्धि पाछिली हमहूँ करि दियो आगे । अबतौ मिले
 सूरके प्रभुको पावतिहौ अब मांगे ॥ राग पूवी ॥ नैना नहीं आवैंतुव पास । कैसेहुँ करि निकसे छाति
 अतिही भए उदास ॥ अपने स्वारथके सब कोई मैं जानी यह बात । यह शोभा सुख लूटि पाइकै
 अब वै काहि पत्यात ॥ षटरस भोजन त्यागि कहौको हूखी रोटी खात । सूर श्याम रसरूप माधुरी
 एतेपर न अघात ॥ राग जैतश्री ॥ नैन परे रस श्याम सुधामें । शिव सनकादि ब्रह्म नारद मुनि ए लुब्धेहैं
 जामें ॥ ऐसो रस विलास नानाबिधि खात खवावत डारत । सुनहु सखी वैसी निधितजिकै क्यों
 वै तुमहि निहारत ॥ जिनि वह सुधापान मुख कीन्हों ते कैसे कटु देखत । त्यों ए नैन भए गवीले
 अब काहे हम लेखत ॥ काहेको अपसोचमरतिहौ नैन तुम्हारे नाहीं । मिले जाइ सूरजके प्रभुको इत
 उत कहूं न जाहीं ॥ राग भैरवा ॥ नैन परे हरि पाछे री ॥ मिले अतिहि अतुराइ श्यामको रीझे नटवर काछे री ॥
 निमिष नहीं लागत इकटकही निशिबासर नहीं जानत री । निरखत अंग अंगकी शोभा ताही पर
 रुचि मानत री ॥ नैन परे परवश री माई उनको इनि वश कीन्हे री । सूरज प्रभु सेवा करि रिझए
 उन अपने करि लीन्हे री ॥ राग कल्याण ॥ नैना हरि अंगरूप लुब्धे री माई । लोक लाज कुलकी मर्या-
 दा बिसराई ॥ जैसे चंदा चकोर मृगीनाद जैसे । कंचुरि ज्यों त्यागि फनिग फिरत नहीं तैसे ॥
 जैसे सरिताप्रवाह सागरको धावै । कोऊ श्रम कोटि करै तहां फिरि न आवै ॥ तनुकी गति पंगुकि
 ए सोचति ब्रजनारी । तैसेई मिले जाइ सूरजप्रभु ढारी ॥ राग कल्याण ॥ लोचन भए श्याम वश कहा
 करौं माई री । जितही वै चलत तितहि आपु जात धाई री ॥ मुसुकनि दै मोललिए किए प्रगटचेरी ।
 जोइ जोइ वै कहत करत रहत सदा नेरी ॥ उनकी परतीत श्याम मानत नहीं अजहूँ । अलकनि
 रजुबांधि धरे भाजै जिनि कबहुं ॥ मन लै इन उनहि दयो रहत सदा संगही । सूर श्याम रूप राशि
 रीझे वा रँगही ॥ राग विहागरो ॥ नैना भए बजाइ गुलाम । मन बेच्यो लै वस्तु हमारी सुनहु सखी ए काम ॥
 प्रथम भेद करि आयो आपुन माँगि पठायो श्याम । बेचि दिये निधरक हरि लीन्हें मृदुमुसुकनि
 दै दाम ॥ यह वाणी जहँ तहँ परकाशी मोल लिएको नाम । सुनहु सूर यह दोष कौनको यह तुम
 कहौं न वाम ॥ राग मारू ॥ कियो वह भेद मन और नाहीं । पहिलेही जाइ हरिसों कियो भेद
 वहि और वे काज कासों बताही ॥ दूसरे आइकै इन्द्रियनि लै गयो ऐसे अपदाँवसब इनहि

कीन्हें । मैं कह्यो नैन मोको संग देहिगे इन्हहुँ लै जाइ हरि हाथ दीन्हें ॥ जो कहूँ कछु सो मरूँ हँसि
 सों करि रहैं इहाँ कछु श्यामको दोष नाहीं । सूर प्रभु नैन लै मोल अपवश किए आपु बैठे रक्खि
 तिनहिआहीं ॥ राग विलावल ॥ कहा भए जो ऐसे लोचन मेरे तो कछु काज नहीं । मैं तो व्याकुल भई
 पुकारतिवै सँग लै जु गए मनहीं ॥ त्रिभुवनमें अति नाम जगायो फिरत श्याम सँगही सँगही ।
 अपने सुखको कहा चाहिये बहुरि न आए मोतनही ॥ सो सुपूत परिवार चलावै एतौ लोभी धृग
 इनही । एते पर ए सूर कहावत लाज नहीं ऐसे जनही ॥ राग कान्हरो ॥ इन बातन कहूँ होत बडाइ ।
 लूटतहैं छविराशि श्यामकी मनो परी निधि पाइ ॥ थोरेहीमें उघरि परेंगे अतिहि चले इतराइ ।
 डारत खात देत नहिं काहु वोछे घर निधि आइ ॥ यह संपतिहै तिहुँ भुवनकी सबै इनहि अपनाइ ।
 धोखे रहत सूरके स्वामी काहु नहीं जनाइ ॥ राग विलावला ॥ नैन परे हैं बहु लूटनिमें मैं नोखे निधिपाए ।
 छोह लगत वह समुझिकै इन हमहिं जिवाए ॥ इनके नेक दया नहीं हम पर रिस पावैं ।
 श्याम अक्षयनिधि पाइकै तउ कृपण कहावैं ॥ ऐसे लोभी ए भए तब इनहि न जान्यो ।
 संगहि संग सदा रहैं अतिहित करि मान्यो ॥ जैसी हमको इन करी यह करै न कोई । सूर अनल
 कर जो गहै डाढे पुनि सोई ॥ राग कान्हरो ॥ नैन आपने घरके री । लूटन देहु श्याम अँग शोभा जो हम
 पर वै तरकै री ॥ यह जानी नीके कर सजनी नहीं हमारे डरके री ॥ वै जानत हम सरि को त्रिभुव-
 न ऐसे रहत निधरके री ॥ ऐसी रिस आवत है उन पर करैं उनहि घर घरके री । सूर श्यामके
 गर्व भुलाने वै उनपर हैं ढरके री ॥ राग गौरी ॥ नैना कह्यो न मानैं मेरो । मो बरजत बरजत उठि धाए
 बहुरि कियो नहिं फेरो ॥ निकसे जल प्रवाहकी नाई पाछे फिरि न निहारयो । भव जंजाल तोरि
 तरुवनके पल्लव हृदय विदारयो ॥ तबहींते यह दशा हमारी जब एऊ गए त्यागि । सूरदास प्रभु
 सों वे लुब्धे ऐसे बडे सभागि ॥ राग टोडी ॥ इन नैननि मोहि बहुत सतायो । अबलौं कानिकरी मैं
 सजनी बहुतै मूँड चढायो ॥ निदरे रहत गहे रिस मोसों मोहीं दोष लगायो । लूटत आपुन श्री
 अँग शोभा मनो निधनि धन पायो ॥ निशहू दिन ए करत अचगरी मनहि कहा धौं आयो । सुनहु
 सूर इनको प्रतिपालत आलस नैक न आयो ॥ राग रामकली ॥ लोचन भए श्यामके चरे । एते पर
 सुख पावत कोटिक मो तन फेरि न हेरे ॥ हाहा करत परत हरि चरणन ऐसे बश्य भए उनही ॥ उन
 को वदन विलोकत निशि दिन मेरो कह्यो न सुनही ॥ ललित त्रिभंगी छवि पर अटके फटके मो
 सों तोरि । सूरदास यह मेरी कीन्ही आपुन हरिसों जोरि ॥ राग धनाश्री ॥ हरि छवि देखि नैन ललचाने ।
 इक टक रहे चकोर चंद ज्यों निमिष बिसरि ठहराने ॥ मेरो कह्यो सुनत नहिं श्रवनन लोक
 लाज न लजाने । गये अकुलाइ धाइ मो देखत नेकहु नहीं सकाने ॥ जैसे सुभट जात रण सन्मुख
 लडत न कबहुँ पराने । सूरदास ऐसी इन कीनी श्याम रंग लपटाने ॥ राग गुंडमलार ॥ नैन तो कहेमें नहीं
 मेरे । बारहिं बार कहि हटकि राखति निकसि गये हरि संग नहिं रहे घेरे ॥ ज्यों व्याध फंदते छूटत
 खग उडि चलत तहां फिरि तकत नहिं त्रासमाने । जाइ वन दुमनिमें दुरत योंही गये श्याम तनु
 रूप बनमें समाने ॥ पालि इतने किए आज उनके भए मोल करिलए अब श्याम उनको । सूर
 यह कहति ब्रजनारि व्याकुल प्रेममें नैन लैगये पछितात मनको ॥ राग जैतश्री ॥ नैना हाथ न मेरे
 आली । इत है गये ठगोरी लावत सुंदर कमल नैन बनमाली ॥ वे पाछे ए आगे धाये मैं बरजत
 बरजत पचिहारी । मेरे तन है फेरि न चितए आतुरता वह कहौ कहा री ॥ जैसे बरत भवन ताजि
 भजिए तैसेहि गये फेरि नहिं हेरयो । सूर श्याम रस रसे रसीले पय पानीको करै निबेरयो ॥ राग रामकली ॥

म रंग रंगे रंगीले नैन । धोए छुटत नहीं यह कैसेहु मिलैं पधिलिहै मैं ॥ औचकही
गन है निकसे दै गये नैननि सैन । नख शिख अंग अंगकी शोभा पारखि
उजत शत मैं ॥ ए गीधे नहीं टरत वहाते मोसों लैन न दैन । सूरज प्रभुके संग संग डोलत
नेकहु करत न चैन ॥ राग ईमन ॥ नैन भए हरिहीके री । जबते गए फेरि नहीं चितए ऐसे गुन इनही
के री ॥ और सुनौ उनके गुण सजनी सोऊ तुमहि सुनाऊं री । मोसों कहत तुहं नहीं आवि सुनत
अचंभो पाऊं री ॥ मन भयो ठीठ इनहिके कीन्है ऐसे लोनहरामी री । सूरदास प्रभु इनहिं पत्याने
आखिर बडे निकामी री ॥ राग विलावल ॥ नैन लुब्धे रूपको अपने सुख माई । अपराधी अपस्वारथी
मोको बिसराई ॥ मन इंद्री तहांई गए कीन्ही अधमाई । मिले धाइ अकुलाइकै मैं करतिलराई ॥ अति
हि करी उन अपतई हरिसों समताई । वै इनसों सुखपाइकै अति करत बडाई ॥ अब वै भरुहाने
फिरैं कहूँ डरत न माई । सूरज प्रभु सुहं पाइकै भए ठीठ वजाई ॥ राग सारंग ॥ ठीठ भए एडोलत हैं ।
मौन रहत मोपर रिसपाई हरिसों खेलत बोलतहैं ॥ कहा कहाँ निडुराई उनकी सपनेहुँ ह्याँ नहीं
आवतहैं । लुब्धे जाइ श्याम सुंदरको उनहीके गुण गावत हैं ॥ जैसे उन मोको परतेजी कबहुँ
फिरि न निहारतहैं । सूर भलेको भलो होइगो वेतो पंथ बिगारतहैं ॥ राग विलावल ॥ सुन सजनी तू भई
अयानी । या कलियुगकी बात सुनाऊं मैं तोहि जानति बड़ी सयानी ॥ जो तुम करौ भलाई को-
टिक सो नहीं मानै कोई । जे अनभले बडाई ताकी मानै जोई सोई ॥ प्रगट देहि कहूँ दूरि
बताऊं हमहुँ श्यामको ध्यावैं । सुनहु सूर सब व्याकुल डोलैं नैन तुरत फल पावैं ॥ राग विलावल ॥ नैन
करैं सुख हम दुख पावैं । ऐसो को परवेद न जानै जासों कहि जु जनावैं ॥ ताते मौन भलो
सबहीते कहिकै मान गँवावै ॥ लोचन मन इन्दी हरिको भजि तजि हमको रिस पावैं ॥ वैतौ गए आपने
करते वृथा जीव भरमावैं । सूर श्यामहैं चतुर शिरोमणि तिनसों भेद सुनावैं ॥ राग धनाश्री ॥ इन नैननि
की कथा सुनावैं । इनको गुण अवगुन हरि आगे तिन लै भेद जनावैं ॥ इनसों तुम परतीत बडा-
वत ए हैं अपने काजी । स्वारथ मानि लेत रति करिकै बोलत हांजी हांजी ॥ ए गुण नहीं मानत
काहूको अपने सुख भरिलेत । सूरज प्रभु ए ऐसेहैं सब फिरि पाछे दुख देत ॥ राग सारंग ॥ ये नैन यों
आहिं हमारे । इतनेते इतने हम कीन्हें बारेते प्रतिपारे ॥ धोवति पुनि अंचल लै पोछति आंजति
इनहि बनाई । बडे भए तबलों न मानि यह जहां तहां चलत भगाई ॥ ऐसे सेवक कहां पाइ
हौं इहै कहैं हरि आगे । ए अब ठीठ भये ह्याँ डोलत इनहिं बने परित्यागे ॥ सूर श्याम तुम त्रिभुवन
नायक दुखदायक तुम नाहीं ॥ ज्यों त्यों करि यह हमहि मिलावहु इहै कहत बलि जाहीं ॥ राग सही ॥
नैननिको अब नहीं पत्याउँ ॥ बहुरयो उनको बोलतिहौं तुम हाइ हाइ लीजै नहीं नाउँ ॥ अब उनको मैं
नाहिं बसाऊं मेरे उनको नाहीं ठाउँ ॥ व्याकुल भई डोलिहौं ऐसेहि वे जहँ रहैं तहां नहीं जाउँ ॥ खाइ खवाइ
बडे जब कीन्हें बसे जाइ अब औरहि गाउँ । अपनो कियो फलहि पावैंगे मैं काहे उनको पछिताउँ ।
जैसे लोन हमारो मान्यो कहा कहाँ कहि काहि सुनाउँ । सूरदास मैं इन बिन रहैं कृपा करैं उनको
शरमाउँ ॥ राग सही ॥ सतरहोति काहेको माई । आए नैन धाइकै लीजै आवत अब ह्याँ वै बेहाई ॥ जिनि
अपनो घर डर परित्याग्यो तौ उनि वहां कछू निधि पाई । परेजाइ वा रूप लूटिमें जानतिहौं
उनकी चतुराई ॥ बिनकारण तुम शोर लगावति वृथाहोति कापर रिसयाई । सूर श्याम मुख मधुर
हँसनि पर बिबस भए वै तन बिसराई ॥ राग बिहागरो ॥ लोचन आइ कहां ह्याँ पावैं ॥ कुंडल झलक कपोलनि
रीझे श्याम पठाए उनहीं आवैं ॥ जिनि पायो अमृत घट पूरण छिनु छिनु खात अघात । ते

सूरसागर ।

(३२४)

तुम्हें फिरकै रुचि मानै कहति अचंभव बात ॥ रसलंपट वै भए रहतहैं ब्रज घर घर यह वै हँसि
 हमहूँको अपराध लगावहिँ एक भई देवानी ॥ लूटहिँ ए इंद्री मन मिलिकै त्रिभुवन नाम हमारो ॥
 कहा फिर रहत कहा हम यह काहे न विचारो ॥ राग धनाश्री ॥ नैननते यह भई बड़ाई घर घर इहै चक्कि
 चलायो हमसों भेट न माई ॥ कहाँ श्याम मिलि बैठी कबहुं कहनावति ब्रज ऐसी । लूटहिँ ए
 उपहास हमारो यह तौ बात अनैसी ॥ एई घर घर कहत फिरतहैं कहा करै पचिहारी । सूर श्याम
 यह सुनत हँसतहैं नैन किये अधिकारी ॥ राग सारंग ॥ नैन भए अधिकारी जाइ । यह तुम बात सुनी
 सखि नहिँ मन आए गए भेद बताइ ॥ जब आवैं कबहुं ढिग मेरे तब तब इहै कहतहैं आइ ॥ हमहीं लै
 मिलयो हम देखत श्यामरूपमें गए समाइ ॥ अब वोरु पछितात बात कहि ॥ उनहुंको वै भए बलाइ ।
 अपनो कियो तुरत फल पायो जैसी मन कीन्ही अधमाइ ॥ इंद्री मन अब नैनन पाछे ऐसे उत
 वश किए कन्हाइ । सूरदास लोचनकी महिमा कहा कहैं कछु कही न जाइ ॥ राग रामकली ॥ जबत
 हरि अधिकार कियो । तबहीते चतुरई प्रकाशी नैनन अतिहि कियो ॥ इंद्रिनपर मन नृपति
 कहावत नैनन इहै डरात । कोहेको मैं इनहि मिलाए जानि बूझि पछितात ॥ अब सुधि करन
 हमारी लागे उनकी प्रभुता देखि ॥ हियो भरत कहि इनहि ढराऊं वे इकटक रहे पेखि ॥ अब मानीहैं दोष
 आपनी हमहीं बेच्यो आइ । सूरदास प्रभुके अधिकारी एई भए बजाइ ॥ राग विलावल ॥ यद्यपि नैन
 भरत ढरि जात । इकटक नैक नहिँ कहूँ टारत तृप्ति न होत अघात ॥ अपनेही सुख
 भरत निशादिन यद्यपि पूरणगात । लैलै भरत आपने भीतर औरहि नहिँ पत्यात ॥ जोइ
 लीजै सोईहै अपनो जैसे चोर भगात । सुनहु सूर ऐसे लोभी धनि इनको पितु अरु मात ॥
 ॥ राग सोरठ ॥ नैना अतिही लोभ भरे । संगहि संग रहत वै जहँ तहँ बैठत चलत खरे ॥
 काहुको परतीति न मानत जानत सबहिन चोर । लूटत रूप अखुट दामको श्याम वश्यो भोर ॥
 बडे भाग मानी यह जानी कृपिण न इनते और । ऐसी निधि मैं नाउँ न कीन्हों कह लैहै कह
 ठौर ॥ आपन लेहिँ औरहुं देते यश लेते संसार । सूरदास प्रभु इनहि पत्याने को कहै बारहि
 बार ॥ राग कान्हरो ॥ ऐसे आपस्वारथी नैन । अपनोई पेट भरतहैं निशि दिन और न लैन न दैन ॥ वस्तु
 अपार परचो वोछे कर ए जानत घट जैहै । को इनसों समुझाइ कहै यह दीन्हेही अधिकैहै ॥ सदा
 नहिँ रहो अधिकारी नाउँ राखि जो लेते । सूर श्याम सुख लूटै आपुन औरनिहूको देते ॥
 ॥ राग विलावल ॥ जे लोभी ते देहिँ कहा री ऐसे नैन नहिँ मैं जाने जैसे निठुर महारि ॥ मन अपनो
 कबहुं वरु हैहै ए नहिँ होहिँ हमारे । जबते गए नंदनंदन ढिग तबते फिर न निहारे ॥ कोटि करौं
 वै हमहिँ न मानै गीधे रूप अगाध । सूर श्याम जो कबहुं त्रासैं रहै हमारी साध ॥ राग नट ॥ नैना
 भये घरके चोर । लेत नहिँ कछु बने इनसों देखि छवि भए भोर ॥ नहिँ त्यागत नहिँ भागत रूप
 जाग प्रकाश । अलक डोरनि बांधि राखे तजौ उनकी आश ॥ मैं बहुत करि बरजि हारी निदरि
 निकसे हेरि । सूर श्याम बैधाइ राखे अंगके छवि घेरि ॥ राग विलावल ॥ भली करी उन श्याम
 बधौए । बरज्यो नहिँ करयो उन मेरो अति आतुर उठि धाए ॥ अल्पचोर बहुमाल
 लुभाने संगी सबन धराए । निदरि गए तैसो फल पायो अब वै भए पराए ॥
 हमसों इन अति करी ढिठाई जो करि कोटि बुझाए । सूर गए हरि रूप चुरावन उन अप-
 वश करि पाए ॥ राग विहागरो ॥ लोचन चोर बांधे श्याम । जातही उन तुरत पकरे कुटिल अलकानि
 दाम ॥ सुभग ललित कपोल आभा गीधे दाम अपार । और अंग छवि लोग जागे अब नहिँ

॥ संग गए वै सबै अटके लटके अंग अनूप । एक एकहि नहीं जानत मारे शोभा कृच ॥
 ॥ हां सो तहां डारयो नेक तनु सुधि नाहि । सूर गुरुजन डरहि मानत इहै कहि पछिताहि ॥
 ॥ राग जैतश्री ॥ लोचन भए पखेरू माइ । लुब्धे श्याम रूप चाराको अलक फंद परे जाइ । मोर
 मुकुट टाटी मानो यह बैठनि ललित त्रिभंग । चितवनि ललित लकुट लासाल कांपै
 अलक तरंग ॥ दौरि गहनि मुख मृदु मुसुकावनि लोभ पीजरा डारे । सूरदास मन व्याध हमारो
 गृह बनते जु बिसारे ॥ राग छंदमलार ॥ कपट कन दरश खग नैन मेरे । चुनत निरखनि तुरत आपुही
 उडि मिले परचो चारा पेट मंत्र केरे ॥ निरखि सुंदर वदन मोहनी शिर परि रहे एकटक निरखि
 डरत नाहीं । लाज कुलकनि बन फेरि आवत कबहुं रहत नाहि नेकहु उतहि जाहीं ॥ मृदु हंसनि
 व्याध पढि मंत्र बोलनि मधुर श्रवन ध्वनि सुनत इत कौन आवै । सूर प्रभु श्याम छवि धामही
 में रहै गेह बन नाम मनते भुलावै ॥ राग मारु ॥ नैन खग श्याम नीके पठाए । किए वश कपट कन
 मंत्र के डारिकै लए अपनाइ मनो इन पठाए ॥ बेगिधे उनहिंसों रूप रस पान करि नेकहु डरत नाहि
 चीन्हि लीन्हें । गये हमको त्यागि बहुरि कबहुं न फिरे केचुरी उरग ज्यों छाँडि दीन्हें ॥ एक ह्वै
 गए हरदी चून रंग ज्यों कौन पै जात निरुवारि माई । सूर प्रभु कृपामय कियो उन वास रुचि निज
 देह बन सघन सुधि भुलाई ॥ राग बिहागरो ॥ नैना ऐसे हैं विश्वासी । आप काज कौन हमको तजि
 तबते भए निरासी ॥ प्रतिपालन करि बड़े कराये जानि आपनो अंग । निमिष निमिष में धोवति
 आंजति सिखए भावत रंग ॥ हम जान्यो हमको ये हैं ऐसे गए पराई । सुनहु सूर वरजतही
 वरजत चरे भए बजाइ ॥ राग जैतश्री ॥ नैना भए प्रगटही चरे । ताको कछु उपकार न
 मानत हम ए किए बडे रे ॥ जो वरजो यह बात भली नाहि हंसत न नेक लजात । फूले फिरत
 सुनावत सबको एते पर न डरात ॥ इहौ कही हमको जिनि छाँडौ तुम बिनु तनु बेहाल । तमके
 उठे यह बात सुनतही गीधे गुण गोपाल ॥ मुकुट लटक भौहनकी मटकनि कुंडल झलक कपोल ।
 सूर श्याम मृदु मुसुकनि ऊपर लोचन लीन्हें मोला ॥ राग सोरठ ॥ लोचन भृंग भए री मेरे । लोकलाज
 बन घन वेली तजि आतुरह्वै जुग डेरे ॥ श्यामरूप रस बारिज लोचन तहां जाइ लुब्धे रे । लपटे
 लटकि पराग बिलोकनि संपुट लोभ परे रे ॥ हंसनि प्रकाश विभास देखिकै निकसत पुनि तहां
 बैठत । सूर श्याम अंबुज कर चरणनि जहँ तहँ भ्रमि भ्रमि पैठत ॥ राग रामकली ॥ लोचन भृंगको
 सरसपागे । श्याम कमलपदसों अनुरागे ॥ सकुचकानि बनवेली त्यागी । चले उड़ाइ सुरति रति
 पागी ॥ मुक्तिपराग रसहि इन चाख्यो । नव सुख फूल रसहि इनि नाख्यो ॥ इनते लोभी और
 न कोई । जो पटतर दीजै कहि सोई ॥ गए तबहिते फेरि न आए । सूर श्याम बेगहि अटकाए ॥
 राग सारंग ॥ नैना पंकज पंग खचे । मोहन मदन श्याम मुख निरखत भुवाविलास रचे ॥ बोलनि हंसनि
 विराजमान अति श्रुति अवतंस सचे । जनु पिनाककी आशलागि शशि सारंग शरन बचे ॥ चंदचकोर
 चातक ज्यों जलधर हर रिपु हरषि नचे । पुहुपवास लै मधुप शैलवन धनु करि भवन रचे ॥
 परमप्रीतिके कुंड महागज काढत बहुत पचे । सूरदास प्रभु तुम्हरे दरशको सुनि जन मानि मचे ॥
 ॥ राग सारंग ॥ नैना बीधे दोऊ मेरे । मानौ परे गयंद पंक महि महासबल बल केरे ॥ निकसत नहीं अधिक
 बल कीने जतन न बने घनेरे । श्याम सुंदरके दरश परसमें इत उत फिरत न फेरे ॥ लंपट
 लवनि अटक नाहि मानति चंचल चपल अरेरे । सूरदास प्रभु निगम अगम सुनि सुनि सुमिरत
 बहुतेरे ॥ राग धनाश्री ॥ मेरे नैन कुरंग भए । जोबन बनते निकसि चले ए सुरली नाद ए ॥ रूप व्याध

सूरसागर ।

(३२६)

कुल डुति ज्वाला किंकिनि चंटा घोष । व्याकुलहै एकहि टक देखत गुरुजन तजि सै हैंसि
 भौह क्रमान नैन शर साधनि मारनि चितवनि चार । ठौर रहै नहिं टरत सूर वै मंद हैंसनि शक्ति
 ॥ राग गमकली ॥ नैन भए वश मोहनते ॥ ज्यों कुरंग वश होत नादके टरत नहीं ता गोहनते ॥ ज्यों मधुंशि
 वश व मलकोशके ज्यों वश चंद चकोर तैसेहि ए वश भये श्यामके गुडी वश्य ज्यों डोरा ॥ ज्यों वश
 स्वाति बूंदके चातक ज्यों वश जलके मीन ॥ सूरज प्रभुके वश्य भए ए छिनु छिनु प्रति जु नवीन ॥ राग टोडी ॥
 ऐसे वश्यन काहुहि कोडा जैसे वश नंदनंदनको ए नैना मेरे दोउ ॥ चंद्र चकोर नहीं सरि इनकी एको पल
 न बिसारत । नाद कुरंग कहा पटतर इन व्याध तुरतही मारत ॥ ए वश भए सदा सुख लूटत चतुर
 चतुरई कीन्हों । सूरदास प्रभु त्रिभुवनके पति ते इन वश करि लीन्हों ॥ राग जैतश्री ॥ ए नैना अप
 स्वारथके । और इनहि पटतर क्यों दीजै वे हैं सब परमारथके ॥ बिना दोष हमको पतित्यागो
 सुख कारण भए चरे । मिले धाइ बरज्यो नहिं मान्यों तके न दायि न डेरे ॥ इनको भलो होइगो
 कैसे नैक न सेवा मानी । सूर श्याम इनपर कहा रीझे इनकी गति नहिं जानी ॥ राग मूही ॥ नैना
 लोनहरामी ए । चोर दुंद बटपार अन्याई अपमारगी कहावैं जे ॥ निलज निर्दयी निशंक पातकी
 जैसे आप स्वारथी तजिकै । वारेते प्रतिपालि बढाए बडे भए गए तब तजिकै ॥ हमको निदरि करत
 सुख हरिसंग वै उनि लीन्हो हित करिकै ॥ मिले जाइ सूरजके प्रभुको जैसे मिलत नीर अरुपै ॥ राग जैतश्री ॥
 नैन मिले हरिको ढरि भारी । जैसे नीर नीर मिलि एकै कौन सके ताको निरुवारी ॥ वात चक्र
 ज्यों तृणहिं उडतलै देह संग ज्यों छांह । पवन वश्य ज्यों उडत पताका ए तैसे छबि मांह ।
 मन पाछे ए आगे धावत इंझी इनहि लजाने । सूर श्याम जैसे इन जाने त्यों काहु
 नहिं जाने ॥ राग नट ॥ लोचन भए अतिही ठीठ । रहतहैं हरि संग निशि दिन अतिहि नवल
 अहीठ ॥ वदत काहु नहीं निधरक निदरि मोहिं न गनत । बार बार बुझाइ हारी भौह मोपर
 तनत ॥ ज्यों सुभट रण देखि टरत न लरत खेत प्रचारि । सूर छबि सन्मुखहि धावत निमिष
 अत्र निडारि ॥ राग बिलावल ॥ सुभट भए डोलत ए नैन । सन्मुख भिरत मुरत नहिं पाछे शोभा
 शूर डरैन ॥ आपुन लोभ अत्रलै धावत पलक कवच नहिं अंग । हाव भाव रस लरत कटाक्षनि
 धुकुटी धनुष अपंग ॥ महावीर ए उत अंग अंग बल रूप सैन पर धावत । सुनहु सूर ए
 लोचन मेरे यकटक पलक न लावत ॥ राग जैतश्री ॥ सेवा इनकी वृथा करी । ऐसे भए दुखदायक
 हमको एही सोच मरी ॥ घूँवट ओट महलमें राखति पलक कपाट दिष्ट । ए जोइ कहैं करैं हम
 सोई नाहिन भेद दिए ॥ अब पाई इनकी लँगराई रहते पेट समाने । सुनहु सूर लोचन बटपारी
 गुण जोइ सोइ प्रगटाने ॥ राग गौरी ॥ नैना हैं री ए वटपारी । कपट नेह करि करि इन हमसों गुरुजनते
 करी न्यारी ॥ श्याम दरश लाडू करि दीन्हो प्रेम ठगोरी लाइ । मुख परसाइ हैंसन मधुरता
 डोलत संग लगाइ ॥ मन इनसों मिलि भेद बतायो विरह फाँस गरे डारी । कुललज्जा संपदा
 हमारी लूटि लई इन सारी ॥ मोह विपिनमें पडी कहरतिहों नेह जीव नहिं जात । सूरदास गुण
 सुमिरि सुमिरि वे अंतर गति पछितात ॥ राग बिहागरो ॥ तिनको श्याम पत्याने सुनियत । ह्वाँउ जाइ
 अकाज करैगो गुण गुनि गुनि शिर धुनियत ॥ विवश भई तनुकी सुधि नाहीं विरह फाँस गयो
 डारि । लगनि गांठिबैठी नहिं छूटति मगन मूरछा भारि ॥ प्रेमजीव निसरत नहिं कैसेहु
 अंतर अंतर जानति । सूरदास प्रभु क्यों सुधि पावे बार बार गुण गावति ॥ राग सारंग ॥ रोम रोम हैं
 नैन गए री । ज्यों जलधर पर्वत पर बरषत बूंद बूंद हैं झरनि दए री ॥ ज्यों मधुकर रस

मानकरि माते ताजे उन मत्तभये री । ज्यों कांचुरी भुअंगम तजही फिरि न तके जुग
 ॥ ऐसी दशा भई री इनकी श्यामरूप में मगन रह री । सूरदास प्रभु अगणित शोभा ना जानो
 अंग छए री ॥ राग सारंग ॥ नैन निरखि अजहू न फिरि री ॥ हरिमुख कमल कोशरस लोभी मनहु धुप
 धु माति गिरे री ॥ पलकनि झूल सलाकसहीहै निशि वासर दोउ रहत अरे री । मानहु बिच गए
 चलि कारे तजि कचुरी भये निरे री ॥ ज्यों सरिता पर्वतकी खोरी प्रेम पुलक श्रमस्वेद झरे री ।
 बूंद बूंद है मिले सूर प्रभु ना जानो केहि घाट तरे री ॥ राग सारंग ॥ नैन गए सु फिरि नहि फेरि यद्यपि घेरि घेरि
 मैं राखति रहे नहीं पचिहारी टेरी ॥ कहा कहौ सपनेहुं नहि आवत वश्यभए हरिहीके जाई ॥ मोति कहा
 चूक उनि जानी जाते निपट गए बिसराई ॥ छिनहुकी पहिचानि न मानी उनको हम प्रतिपाले प्रेम ।
 हमारे वैसेइ उन त्याग्यो हमहैं वोहि नेम । मात पिता संगहि प्रतिपाले संगही संग रहै
 नारायण ॥ सुनहु सूर ए बालसँघाती प्रेम बिसारि मिले दरिश्याम ॥ राग नटा ॥ नैननि देखिवेकी ठौरि ॥ नंद
 गोपकुमार सुंदर किए चंदन खोरी ॥ शीशपिंड शिखंड भ्राजत नखशिखा छबि औरा ॥ सुभग गावनि
 मृदुबजावनि बैन सुललित गौरा ॥ कुटिल कच मृगमद तिलक छबि वचन मंत्र ठगौरा ॥ सूर प्रभु नट रूप
 नागर निरखि लोचन वोर ॥ राग मलार ॥ तबते नैन रहे यकटकही ॥ जबते श्याम त्रिभंगललित गति जात भई
 इन तकही ॥ सुरली धरे अरुन अधरनि परकुंडल झलक कपोल ॥ निरखत यकटक पलक झुलानो मानो
 विकाने मोल ॥ हमको वै काहे न बिसारैं अपनी सुधि उन नाहिं । सूर श्याम छबि सिंधु समाने वृथा
 तरुनि पछिताहिं ॥ राग मलार ॥ नैना नैननि माँझ समाने । टारे न टरत एक मिलि मधुकर सुरसमत्त
 अरुझाने ॥ मन गति पंगु भई सुधि बिसरी प्रेम पराग लुभाने । मिले परस्पर खंजन मानों
 झगरत निरखि लजाने ॥ मन वच क्रम पलवोट न भावत छिनु युग वरस समाने । सूर श्याम के वश्य
 भए ए जेहि बीतै सो जाने ॥ राग गौरी ॥ मेरे माई लोभी नैन भए । कहा करौं ए कह्यो नमाने बरज-
 तही जो गए ॥ रहत न घूँघटवोट भवनमें पलक कपाट दए । लए फँदाइ विहंगम मानो मदन
 व्याध विधए ॥ नहिं परमिति मुख इंदु सुधानिधि सोभा नितहि नए । सूर श्याम तनु पीत वसन
 छबि अंग अनंग जितए ॥ राग विहागरो ॥ नैना लोभहिं लोभ भरे । जैसे चोर भरे घरहीमें बैठत उठत
 खरे ॥ अंग अंग शोभा अपार निधि लेत न सोच परे । जोइ देखै सोइ सोइ निर्मोलै करलै
 तहीं धरे ॥ त्यों लुब्धे ए टरत न टारे लोक लाज न डरे । सूर कछु उनिहाथ न आयो लोभ जाग
 पकरे ॥ राग सोरठ ॥ नैना वोछे चोर सखीरी । श्याम रूप निधि नोखे पाई देखत गए भरी री ॥ अंग
 अंग छबि चित्त चलायो सो कछु रहति परी री । कहा लोहिं कह तजौ विवश भए तैसिय करनि
 करी री ॥ पुनि पुनि जाइ एक एक लेते आतुर धरणि धरी री । भोरे भए भोरसों ह्वैगयो धरे
 जगार परी री ॥ जो कोउ काज करै बिन बूझे पेलि महत्त हरी री । सूर श्याम वश परे जाइकै ज्यों
 मोहिं तजी खरी री ॥ राग मलार ॥ नैना मारेहु पर मारत । राखी छबि दुराइ हृदयमें तिनको हिय
 भरि डारत ॥ आपुन गए लभी कीन्ही अब उनहि इहांते टारत । वरवशही लै जान कहतहैं पैज
 आपनी सारत ॥ ऐसे खोज परयो यह लेहैं आवत जानत हारत । उनके गुण कैसे कहि आवै सूर
 पयारहि झारत ॥ राग मलार ॥ नैना खोज परेहैं ऐसे । नैक रही हरि मूरति हृदय डाह मरतहैं जैसे ॥
 मनतौ गयो इंद्रियन लैकै बुधि मति ज्ञान समेत । जिनकी आशसदा हम राखैं तिन्ह दुख दीन्हो
 जेत ॥ आपुन गए कौन सो चालै करत ढिठाई और । नैक रही छबि दुति हिरदैमें ताहि
 लगावत ठौर ॥ गए रहे आए एहि कारज भरि डारतहैं ताहि । सूरदास नैननिकी महिमा कोहै

कहिये काहि ॥ राग सारंग ॥ नैनो यहि ढंग परे कहा करौं माई । आए फिरि कौन काज कबहि मै हँसि
 ई ॥ अबलौं इह आश रही मिलिहैं ये आई । भौवरिसी पारि फिरि नारि ज्यों पराई ॥ आवतहैं
 लेन दिसे दुखदाई । मारेको मारतहैं बडे लोग भाई ॥ अतिही ए करत फिरत दिनही ठिठाई ।
 दास प्रभु आगे चलौ कहैं जाई ॥ राग गौरी ॥ यह तो नैननिही जु कियो । सर्वस जो कछु रह्यो हमारे
 सो है धरिहि दियो ॥ बुधि बिबेक कुलकानि गँवाई इंद्रिन कियो वियो । आपुन जाइ बहुरि आयो
 यह चाहत रूप लियो ॥ अब लाग्यो जिय घात करनको ऐसो निरुर हियो । सुनहु सूर प्रतिपालको
 गुण वैरइ मानि लियो ॥ राग नट ॥ मेरे नैन चकोर भुलाने । अहनिशि रहत पलक सुधि विसरे रूप
 सुधा न अघाने ॥ पल घटिका घरी याम दिनहि दिन युग ही युग बरजाने । स्वाद परचो निमिषौ
 नहि त्यागत ताही माझ समाने ॥ हरि मुख विधु पीवत ए व्याकुल नेकहुं नहीं थकाने । पतित्यागो
 निरखि ललित तनु अंग अंग अरुझाने ॥ राग सारंग ॥ हरि मुख विधु मेरी आँखियां चकोरी । राख रह-
 ति बोट पट जतननि तऊ न मानत कितक निहोरी ॥ बरबसही इन गही मूढता प्रीत जाय चंचल
 सों जोरी । बिबश भए चाहत उड़िलागन अटकत नेक अंजनकी डोरी ॥ बरबसही इन गही चपलता
 करत फिरत हमहुंसों चोरी । सूरदास प्रभु मोहन नागर बरपि सुधारस सिंधु झकोरी ॥ राग विहागरो ॥
 लोचन लालच ते न डरे । हरि सारंगसों सारंग गीधे दधिसुत काज जरे ॥ ज्यों मधुकर वश
 परे केतकी नहि ह्यांति निकरे । ज्यों लोभी लोभहि नहि छांडत ए अति उमंगि भरे ॥ सन्मुख
 रहत सहत दुख दारुण मृग ज्यों नहीं डरे । वह धोखे यह जानत है सब हित चित सदा करे ॥ ज्यों
 पग फिर फिर परत प्रेमवश जीवत मुरछि मेरे । जैसे मीन अहार लोभते लीलत परे गरे ॥ ऐसेहि
 ए लुब्धे हरि छवि पर जीवत रहत भिरे ॥ सूरसुभट ज्यों रण नहि छांडत जबलौं धरनि गिरे ॥ राग नट ॥
 मेरे नैनानि कोउ समझावै री । अपनो घर तुम छांडे डोलत मेरे ह्यां लै आवै री ॥ इहै वृद्धि देखौ
 नीके करि जहां जात कछु पावै री । वृथा फिरत नटके गुण देखत नानारूप बनावै री ॥ देखतके सब सांचे
 लागत ताहि छुवन नहि पावै री ॥ भूर श्याम अंग अंग माधुरी शत शत मदन लजावै री ॥ राग नट ॥ हरि
 छवि अंग नटके ख्यालानेन देखत प्रगट सबकोउ कनक मुकुता लाल ॥ छिनकमें मिटिजात सों पुनि
 और करत बिचार । त्योंही ए छवि और औरै रचत चरित अपार ॥ लहै तब जो हाथ आवै दृष्टि नहि
 ठहरात । वृथा भूले रहत लोचन इनहि कहै कोइ वात ॥ रहत निशिदिन संग हरिके हरष नहीं समात ॥ सूर
 जब जब मिले हमको महा बिह्वल गात ॥ राग कान्हरो ॥ भई गई ए नैनन जानत । फिरि फिरि जात लहत नहि
 शोभा हारेहुं हारि न मानत ॥ बृद्धहु जाइ रहत निशि बासर नैक रूप पहिचानत । सुनहु सखी सतरात
 इतेपर हमपर भौहैं तानत ॥ झूठे कहत श्याम अंग सुंदर बातें गढि गढि बानत । सुनहु सूर छवि अति
 अगाधगति निगम नेति जेहि गावत ॥ राग विहागरो ॥ श्याम छवि लोचन भटकि परे ॥ अतिहि भए वेहाल
 सखी री निशिदिन रहत खरे ॥ हमते गए लूटिलेवको उनहि परचो अब सोच । अपनो कह्यो तुरत फल
 पायो राखति घूँघट बोट ॥ इकटक रहत पराए वश भए दुख सुख समुझि न जाइ । सूर कहौ ऐसो
 को त्रिभुवन आवै सिंधु थहाइ ॥ राग नट ॥ नैन भये वोहितके काग । उडि उडि जात पार नहि पावे
 फिरि आवत नहि लाग ॥ ऐसी दशा भई री इनकी अब लागे पछिताना ॥ मो बरजत बरजत उठि धाये
 नहि पायो अनुमाना ॥ वह समुद्र वोछे वासन ए धरे कहा सुखराशि ॥ सुनहु सूर ए चतुर कहावत वह छवि
 महा प्रकाशि ॥ राग गौरी ॥ हारि जीत नैनो नहि जानत । धाए जात तहींको फिरि फिरि वै कितनो
 अपमानत ॥ परे रहत द्वारे शोभाके वोई गुण गुणि गानत । हरषत रहत सबनिको निदरै नेकहु

न आवत ॥ अबतो रहत निषसई कीन्हें यद्यपि रूप न जानत । दुख सुख विरह संयोग सकत
 सूरदास यह गावत ॥ राग रामकली ॥ नैना मानपमान सह्यो । अति अकुलाइ मिले री ब्रजत
 आपे कोटि कह्यो ॥ जाकी बानि परी सखी जैसी तेही टेक रह्यो । ज्यों मर्कट मूठी नहिं कण्डत
 मलनी सुवा गह्यो ॥ जैसे नीर प्रवाह समुद्रहि बह्यो सुबह्यो सुबह्यो । सूरदास-इनि तैसिय कीन्हों
 फिरि मोतन न चह्यो ॥ राग सोरठ ॥ यह नैननिकी टेव परी । जैसे लुबधति कमलकोशमें भ्रमराकी
 भ्रमरी ॥ ज्यों चातक स्वातिहि रटलावै तैसिय धरनि धरी । निमिष नहीं मिलवत पल एकी आपु
 दशा बिसरी ॥ जैसे नारि भजे पर पुरुषहि ताके रंगदरी । लोक वेद आरजपथकी सुविमारगहू
 न डरी ॥ जलेंतकंचुकी त्यागि वोहि मारग अहि घरनी न फिरी । सूरदास तैसेहि ए लोचन कीधों
 धर्मग विहागरो ॥ नैना गये न फिरे री माई । ज्यों मर्यादा जाति सुपतकी बहुरचो फेरि
 जाई ॥ जैसे बाला दशा बितावै फिरे नहीं तरुनाई । ज्यों जल टरत फिरत नहिं पाछे आगेहि आगे
 जाई ॥ ज्यों कुलवधू बाहिरी परिकै कुलमें फिरि न समाई । तैसी दशा भई इनहुंकी सूर श्याम शर-
 नाई ॥ राग बूही ॥ जबते नैन गये मोहिं त्यागि इंद्री गई गयो तनुते मन उनहिं बिना अवसेरी लागि ॥
 वे निर्दयी मोह मेरे जिय कहा करौं मैं भई बेहाल । गुरुजन तेउ इहां इनि त्यागी मेरे बाटे परचो
 जंजाल ॥ इतकी भई न उतकी संजनी भ्रमत भ्रमत मैं भई अनाथ । सूर श्यामको मिले जाइ सब
 दर्शन करि वे भये सनाथ ॥ राग विलावला ॥ नैना मेरे मिलि चलै इंद्री मन संगामोको व्याकुल छाडिकै
 आपुन करै रंग ॥ अपनो यह कबहुं न करै अधमनिके कामाजनम गमायो साथही अब भई निकाम ॥
 धृग जन ऐसे जगत में यह कहि कहि पछिताति । धर्म हृदय जिनके नहीं धृग धृग तिनकी जाति ॥
 मनसा वाचा कर्मना मोहिं गए बिसारि ॥ सूर सुमिरि गुन नैनके बिलपति ब्रजनारि ॥ राग विलावला ॥ नैननिसों
 झगरो करिहौं री । कहा भयो जो श्याम संगहै बांह पकरि सन्मुख लरिहौं री ॥ जनमहिते प्रति-
 पालि बडे किए दिनदिनको लेखो करिहौं री ॥ रूप लूटि कीन्हों तुम काहे अपने बाटेको धरिहौं री ॥
 एक मात पितु भवन एक रहै मैं काहे उनको डरिहौं री । सूर अंश जो नहीं देहिगे उनके रंग मैं
 हूं ढरिहौं री ॥ राग आसावरी ॥ मोहते वे ढीठ कहावत । जबहीं लौं मैं मौन धरेहौं तबलौं वे कामना पुरा-
 वत ॥ मैं उनको पहिलेहि करि राख्यो वे मोको काहे बिसरावत । आप काज को उनहिं चले मिल
 बाट देत रोई अब आवत ॥ बहुते कानि करी मैं सजनी अब देखो मर्याद घटावत । जो जैसो
 तैसो त्यों चलिए हरि आगे गढि बात बनावत ॥ मिले रहैं नहिं उनको चाहति मेरो लेखो क्यों न
 बुझावत । सूर श्याम सँग गर्व बढायो उनहीके बल वैर बढावत ॥ राग धनाश्री ॥ नैना न रहैं री मेरे अटकै ।
 कछु पढि दिये सखी एहि ढोंटा घूँघरवारी लटकै ॥ कज्जल कुलुफ मेलि मंदिरमें पलक संदूक
 पट अटके । निगम नेति कुललाज टूटि सब मन गयंइके उटके ॥ मोहनलाल करो बश अपने हो
 निमेषके मटके । पुर नर नारि न सुरपुर तुरतै सूर लगाए नटके ॥ राग काफी ॥ नैना अटके रूपमें पल
 रहत बिसारे । निशिवासर नहिं संग तजैं भरि भरि जल ढारे ॥ अरुन अधर द्युति चमकही चपला
 चकचौधनि । कुटिल अलक छवि धुंधरे सुमनासुत शोधनि ॥ चंपकलीसी नासिकारंग श्यामहि
 लीन्हें । नैनविशाल समुद्रसों कुंडल श्रुति दीन्हें ॥ तहँ ए रहे भुलाइकै कछु समुझि न जाई । सूर
 श्याम वे वश किए मोहनी लगाई ॥ राग जैतश्री ॥ लोचन भूलि रहे तहां जाई । अंग अंग छवि निरखिं
 माधुरी इकटक पल बिसराई ॥ अति लोभी अचवत अघातहैं तापर पुनि ललचात । देत नहीं
 काहूको नेकहु आपुहि डारत खात ॥ ओछे हाथ परी अपारनिधि काहू काम न आवै । सूर सबै

सुरसागर ।

(३३०)

इनही क्यों सौंघ्यो यह कहि कहि पछितावै ॥ राग धनाश्री ॥ नैनन यह कुटेव पकरी । लूट के हैंसि
 रूप रागुनहीं निशि दिन पहर घरी ॥ प्रथमहि इन इह नोखे पाई गए अतिहि इतराई । किंकि
 अचानक वडभागीहैं पूरण दरशन पाइ ॥ लोभी बडे कृपण को इनसरि कृपा भई यह न्यारेत्ति
 मूरश्याप्रि उनको भए भोरे हमको निठुर मुरारी ॥ राग भौरी ॥ सुन सजनी मोसों इक बात ॥
 भाग बिना कछु नहीं पाइए तू काहे पुनि पुनि पछितात ॥ नैनन बहुत करी री सेवा
 पल पल घरी पहर दिन राति । मन वच क्रम दृढता इनकी है धन्य धन्य इनकी है
 जाति ॥ कैसे मिले श्याम इनको ढरि जैसे सुतके हितको मात । मूरदास प्रभु कृपासिंधु
 वे सहज बडे हैं त्रिभुवन तात ॥ राग भैरव ॥ नैन श्याम सुख लूटत हैं । इहै परश्रुत, मोको
 नहिं भावै हमते काहे छूटत हैं ॥ महाअक्षय निधि पाइ अचानक आपुहि सवै चुरावत पतित्यागो
 हैं ताते यह कहियत श्याम इनहि भरुहावत हैं ॥ यह संपदा कहौ क्यों पचिहैं बाल संघातों जा-
 नत हैं । मूरदास जो देते कछु इक कहौ कहा अनुमानत हैं ॥ राग रामकली ॥ सजनी मोते नैन गए । अब
 लौं आश रही आवनकी हारिके अंग छए ॥ जबते कमल वदन उन दरश्यो दिन दिन और भए ।
 मिले जाइ हरदी चूने ज्यों एकहिरंग रए ॥ मोको तजि भए आपु स्वारथी वा रस मत्त भए ।
 मूर श्यामके रूप समाने मानो बूंद तए ॥ राग बिहागरो ॥ नैन गए री अति अकुलाता ज्यों धावत जल नीचे
 मारग कहूं नहीं ठहरात ॥ कहा कहौ ऐसी आतुरता पवन वश्य ज्यों पात । ज्यों आए ऋतु
 राज सखी री हुमन तेज झहरात ॥ आइ बसी ऐसी जिय उनके में व्याकुल पछितात । मूरदास
 कैसेहुं न बहुरे गीधे श्यामल गाता ॥ राग रामकली ॥ लोभी नैन हैं ये मेरे । उतहि श्याम उदार मनके रूप
 निधि टेरे ॥ जातही उन लूटि खाई तृषा जैसे नीर । क्षुधामें ज्यों मिलत भोजन होत जैसे धीरावै
 भए री निठुर मोको अब परी यह जान । अष्ट सिद्धि नव निद्धि हरितजि लेहि ह्यां कह आन ॥
 आपने सुखके भए वे हैं जो युग अनुमान । मूर प्रभु करि लियो आदर बडे परम सुजान ॥
 राग आसावरी ॥ नैननते हरि आप स्वारथी आज बात यह जानी री । ए उनको वे इनको चाहत मिले
 दूध अरु पानी री ॥ सुनियत परम उदार श्याम घन रूप राशि उन माही री । कीजै कहा कृपणकी
 संपति नैन नहीं जु पत्याही री ॥ विलसत डारत रूप सुधानिधि उनकी कछु न चलावै री । सुनहु
 मूर हम स्वाति बूंदलौं रटलागी नहिं पावै री ॥ राग सारंग ॥ जाते परचो श्याम घन नाउं । इनते निठुर
 और नहिं कोई कवि गावत उपमाउं ॥ चातकके रट नेह सदा वह ऋतु अनऋतु नहिं हारत । रस
 ना ताहूसों नहिं लावत पीवै पीव पुकारत ॥ वै बरषत डोंगर वन धरणी सरिता कूप तडाग ।
 मूरदास चातक सुख जैसे बूंद नहीं कहूं लागा ॥ राग मलार ॥ श्याम घन ऐसे हैं री माई । हमको दरश न
 हीं सपनेहुं धरे रहत निठुराई ॥ पटऋतु व्रत तनु गारि कियो क्यों चातक ज्यों रट लाई । उनमें है
 चित सदा हमारो नैक नहीं विसराई ॥ इंद्री मन लूटत लोचन मिलि इनको वै सुखदाई । मूर
 स्वाति चातककी करनी ऐसे हमहिं कन्हाई ॥ राग सारंग ॥ नैनन हरिको निठुर कराए । चुगली करी
 जाइ उन आगे हम ते वे उचटाए ॥ इहै कह्यो हम उनहि बोलावत वे नाहिन ह्यां आवत । आरज
 पंथ लोककी शंका तुम तन आवत पावत ॥ यह सुनिकै उन हमहि विसारी राखत
 नैन न साथ । सेवावश करिकै लूटत हैं बात आपने हाथ ॥ संगहि रहत फिरत नहिं कतहुं आपु
 स्वारथी नीके । सुनहु मूर वे एउ तैसेइ बडे कुटिल हैं जीके ॥ कपटी नैननते कोउ नाहीं ॥ घरको
 भेद औरके आगे क्यों कहिवेको जाहीं ॥ आप गए निधरक हैं हमते बरजि बरजि पचिहारी । मनका-

भयो परिपूरण ढरि रीझे गिरिधारी ॥ इनहि बिना वे उनहि बिना ए अंतर नहीं भाव्य ।
 स यह युगकी महिमा कुटिल तुरत फल पावत ॥ राग विलावल ॥ कहा भए जो आप स्वरथी
 न न अपनी निंछ कराई । जो यह सुनत कहत सोइ धृग धृग तुरतहि ऐसी भई बडाईव कहा
 चाहिए अपने सुखको इनतो सखी इहै भलाई । अजहूँ जाइ कहै कोउ उनसो काहेको
 तुम लाज गँवाई ॥ अचरज कथा कहतिहौं सजनी ऐसी इह तुमसों चतुराई । सुनहु सूर भजि
 उबरेहैं तिनको तुम अब चाहति माई ॥ राग विहागरो ॥ सजनी नैना गए भगाइ । अरवातीको नीरवे
 डी कैसे फिरिहैं धाइ ॥ वरत भवन जैसे तदियतहै निकसे त्यों अकुलाइ । सोउ अपने नहिं
 पशिये ॥ निसान बजाइ ॥ राग विलावल ॥ मोहन वदन विलोकि थकितभए माईरी ए लोचन मेरे ।
 मिल जाइ अकुलाइ अगमने कहा भयो जो घूँघट घेरे ॥ लोकलाज कुलकानि छाँडि करि वरवश
 चपल चपरि भए चेरे । काहेको वादिहि बकति बावरी मानत कौन मते अब तेरे ॥ ललित त्रिभंगी
 तनु छबि अटके नाहिंन फिरत कितौऊ फेरे ॥ सूर श्याम सन्मुख रति मानत गए मग बिसरि जाहिं
 नहिं डेरे ॥ राग रामकली ॥ थकितभए मोहन सुख नैन । घूँघट वाटे न मानत कैसेहु बरजत बरजत कीन्हो
 गौन ॥ निदरि गई मर्यादा कुलकी अपनो भायो कीन्हो । मिले जाइ हरि आतुर ह्वै कै लूटि सुधारस
 लीन्हो ॥ अब तू बकति वादिरी माई कह्यो मानि रहि मौन । सुनहु सूर अपनो सुख तजिकै
 हमहिं चलावै कौन ॥ राग देवगंधार ॥ मेरे इन नैनन इते करे । मोहन वदन चकोर चंद्र ज्यों यकटक
 ते न टरे ॥ प्रमुदित मणि अवलोकि उरग ज्यों अति आनंद भरे । निधिहि पाइ इतराइ नीच
 ज्यों त्यों हमको निदरे ॥ मृदु मुसुकनि मनो ठग लड आमिषि गति मति सुध विसरे । फेरि लगे
 अँग अँग सो हरिके समुझि न सुधि पकरे ॥ ज्यों अटके गोचर घूँघट पट शिशु ज्यों अरानि अरे ।
 धरे न धीर अनमने रुदनबल सो हठकरनिपरे । रही ताडि खिझिलाइ लकुट लै एकहु डर न डरे ।
 सूरदास गथ खोटो काहे पारखि दोष धरे ॥ राग जैतश्री ॥ नैनन दशा करी यह मेरी ।
 आपुन भए जाइ हरिचेरे मोहिं करत हैं चेरी ॥ जूठो खइए मीठे कारण आपुहि
 खात लडावत । और जाइ सो कौन न फेको देख न तौ नहिं पावत ॥ काज होइ तौ
 इहौ कीजिए वृथा फिरै को पाछे । सूरदास प्रभु जब जब देखत नटसवाँग सो काछे ॥
 ॥ राग विलावल ॥ को इनकी परतीति बखाने । नैना धौं काहेते अटके कौन अंग ढरकाने ॥ उनके गुण
 वारेहिते सजनी मैं नीके करि जाने । चेरे भए जाइए तिनके कैसे उनहि पत्याने ॥ छिन छिनमें
 औरै गति जिनकी ऐसे आप सयाने । सूर श्याम अपने गुण शोभा को नहिं वश करि आने ॥
 ॥ राग रामकली ॥ नैननि कठिन बानि पकरी गिरिधर । लाल रसिक बिन देखे रहत न एक घरी ॥ आव
 तही यमुनाजल लीन्हें सखी सहज डगरी । वे उलटे मग मोहिं देखके हौं उलटी उत लै
 गगरी ॥ वह सूरति तबते इन बलकरि लै उरमाँझ धरी । ते क्यों तृप्ति होत अब रंचक जिनि
 पाई सिगरी ॥ जग उपहास लोकलज्जा तजि रहे एक जकरी । सूर पुलक अँग अँग प्रेमभरि
 श्याम संग तकरी ॥ राग रामकली ॥ नैननि बानि परी नहिं नीकी । फिरत सदा हरि पाछे पाछे
 कहा लगनि उन जीकी ॥ लोकलाज कुलकी मर्यादा अतिही लागति फीकी । जो बीतति मोकोरी
 सजनी कहौं काहि यह हीकी ॥ अपने मन उन भली करीहै मोहि रहे हैं वीकी । सूरदास
 ए जाइ लुभाने मृदु मुसुकनि हरि पीकी ॥ राग धनाश्री ॥ ऐसे निठुर नहीं जग कोई ॥ जैसे निठुर

भँके डोलतहैं मेरे नैना दोई ॥ निठुर रहत ज्यों शशि चक्रोरको वै उन बिन अकुलाहीं । हँसि
 रहत दीपक पतंग उड़ि ज्यों जरि वरि मरि जाहीं ॥ निठुर रहत जैसे जल मीनहि तैसिय । किंकि
 हमारी । सूरदास धृग धृग तिनकोहैं जिनके नहीं पीर परारी ॥ राग धनाश्री ॥ नैना मानैं नहिं मेरो बरज्यो
 इनके पल्ले सखी री मेरो बाहर रहै न घरज्यों ॥ यद्यपि जतन किये राखतिही तदपि न मानत हरज्यो ॥
 परवश भई गुडी ज्यों डोलति परचो पराए करज्यों ॥ देखे बिना चटपटी लागति कछू सँड
 पटि परज्यों । को बकि मेरे सखीरी मेरे सूरश्याम के थरज्यों ॥ राग नटनारायण ॥ नैना कछो मानत
 नाहिं । आपने हठ जहां भावत तहांको ए जाहिं ॥ लोकलज्जा वेदमारग तजत नहीं डराहिं ।
 श्याम रसमें रहत पूरण पुलक अंगन माहिं ॥ पियहिके गुण गुणत उरमें दरश ॥ इपर कीजहिं ।
 वदत हमको नेक नाहीं मराहिं जो पछिताहिं ॥ धरनि मन बिच धरी ऐसी कर्मना कैं पतित्यागो
 लगि सुख निरखत तब लगि सुख सुंदरताकी खानि ॥ ए गीधे बीधे न रहत सखि तजी सबनिकी
 कानि । सादर श्रीमुखचंद्र विलोकत ज्यों चक्रोर रति मानि ॥ अतिहि अधीर नीर भरि आवत
 सहत न दरशन हानि । कांजे कहा बांधि करि सौंपी सूर श्यामके पानि ॥ राग जैतश्री ॥ नैनन ऐसी बानि
 परी । लुब्धे श्याम चरणपंकजको मोको तजी खरी ॥ घूँघटओट किए राखतिही अपनीसी जु
 करी । गए पेलि ताको नहिं मान्यों देखौ ज्यों निदरी ॥ गए सु गए फेरि नहिं बहुरे का धौं जियहि
 धरी । सुनहु सूर मेरे प्रतिपाले ते वश किए हरी ॥ राग सारंग ॥ नैनन हौं समुझाइ रही । मानत नहीं
 कछो काहूको कठिन कुटेव गही ॥ अनजानतही चितै वदनछवि सन्मुख झूल सही । तनु बिसरयो
 कुलकानि गवाई जगउपहास सही ॥ एते पर संतोष न मानत मर्यादा न गही । तनु बिसरयो
 वपुश्याम सिंधुमें कहुं न थाहलही ॥ रोम रोम सुंदरता निरखत आनंद उँमगि ढही । सूरदास इन
 लोभिनके सँग वन वन फिरति बही ॥ राग रामकली ॥ नैना कछो न मानैं मेरो । हारि मानिकै रही मौन
 है निकट सुनत नहिं टेरो ॥ ऐसे भए मनो नहिं मेरे जबहिं श्याम मुख हेरो । मैं पछिताति जबहिं
 सुधि आवति ज्यों दीन्हों मोहिं डेरो ॥ एतेपर कबहुं जब आवत झरपत लरत घनेरो । मोहूं
 वरवश उतहि चलावत दूत भयो उन केरो ॥ लोक वेद कुलकानि न मानै अतिही रहत अनेरो ।
 सूर श्याम धौं कहा ठगोरी लाइ कियो धरि चेरो ॥ राग कल्याण ॥ कबहुं कबहुं आवत ए मोहिं लेन माई री ।
 आवतही इहै कहत श्याम तोहिं बोलाई री ॥ नेकहुं न रहत विरमि जात तहां धाई री । मानो
 पहँचान नहीं ऐसे विसराई री ॥ उनको सुख देत मोहिं बहिवेको पाई री ॥ सूर श्याम
 सँगही सँग निशिबासर जाई री ॥ राग विहागरो ॥ मेरे नैननही सब दोष । बिनही काज और को सर्जनी
 कतकीजै मन रोष ॥ यद्यपि हौं अपने जिय जानति अरु वरजै सब घोष ॥ तद्यपि वा यशुमतिके सुत
 बिन कहुं न सुख संतोष ॥ कहि पचिहारि रही निशि वासर और कंठ करि सोष । सूरदास अब क्यों
 विसरतुहै मधुरिपुको परितोष ॥ राग सोरठ ॥ मेरे नैना दोष भरे । नंदनंदन सुंदर वर नागर
 देखत तिनहिं खरे ॥ पलक कपाट तोरिकै निकसे घूँघट वोट न मानत । हाहाकरि पाँइन परि-
 हारी नैकहु जो पहँचानत ॥ ऐसे भए रहत ए मोपर जैसे लोग बटाउ । सोऊ तौ बूझते बोलत
 इनमें इह निठुराउ ॥ ए मेरे अब होहिं नहीं सखि हरि छवि बिगारि परे । सुनहु सूर ऐसेउ जन जग-
 में करता करनि करे ॥ राग रामकली ॥ नैना मोको नहीं पत्याहिं । जे लुब्धे हरिरूप माधुरी और
 गनत ए नाहिं ॥ जिनि दुहि धेनु औटि पय चारुयो ते मुखपरसैं छाक । ज्यों मधुकर मधुकमल

तजि रुचि मानतहै आका॥ जे षटरस मुख भोग करतहैं ते कैसे खरि खात । सूर सुनहु लोचन
सतजि हमसों क्यों त्रिपिताता॥ राग देवगंधार ॥ मेरे नैननही सब खोरि । श्यामवदन छबि निरखि
अटके बहुरे नहीं बहोरि॥ जो मैं कोटि जतन करि राखति घूँघट वोट अगोरि॥ ज्यों उड़ि मैलि अधिक
खग छिनमें पलक पिंजरन तोरि॥ बुधि विवेक बल वचन चातुरी पहिलेहि लई अजोरि॥ अति आधीन
भई सँग डोलति ज्यों गुड्डीवश डोरि ॥ अबधौ कौन हेतु हरि हमसों बहुरि हँसत मुख मोरि ।
मनहु सूर दोउ सिंधु सुधाभरि उमँगि चले मिति फोरि ॥ राग गौरी ॥ यह सब नैननहीको लागे ।
अपनेही घर भेद करो इन बरजतही उठि भागे ॥ ज्यों बालक जननी सों अरक्षत भोजनको कछु
मँगे ॥ ~~जेलत~~ अतिही हठ ठानत इकटक पलक न त्यागे ॥ कहत देहु हरि रूप माधुरी रोवत
सूर श्याम घौ कहा चखायो रूपमाधुरी पागे॥ राग धनाश्री॥ लोचन टेक परे शिशु जैसे ।
मागत हैं हरि रूप माधुरी खोज परेहैं नैसे ॥ बारंबार चलावत उतही रहन न पाऊं तैसे । जात
चले आपुनही अबलौं राखे जैसे तैसे ॥ कोटि यतन कहि कहि परबोधति कछो न मानहि कैसे ।
सूर कहूं ठग सूरि खाई व्याकुल डोलत ऐसे ॥ राग जैतश्री ॥ इन नैननकी टेव न जाइ । कहा करौं
बरजतही चंचल पर मुख लागत धाइ ॥ बाट घाट जहाँ मिलत मनोहर तहां मुख चलत छपाइ ।
गीधे हेम चोर ज्यों आतुर वह छबि लेत चुराइ ॥ मनहु मधुप मधुकारण लोभी हरिमुखपंकज
पाइ । घूँघट पटबश जलहि भीन ज्यों अधिक उठत अकुलाइ॥ निलजभए कुलकानि न मानत तिन
सों कहा बसाइ । सूर श्याम सुंदर मुखरा बिन देखे रह्यो न जाइ ॥ राग सोरठ॥ जाके जैसी टेव परी री।
सो तौ टै जीवके पाछे जो जो धरनि धरी री ॥ जैसे चोर तजै नाहिं चोरी बरजेहु वहै करै री । बर-
ज्यो जाइ हानि पुनि पावत कतही बकत मरी री ॥ यद्यपि व्याध वधै मृग प्रगटहि मृगिनी रहै
खरी री । ताहु नादवश्य ज्यों दीन्हों शंका नहीं करी री ॥ यद्यपि मैं समुझावति पुनि पुनि यह कहि
कहि जु लरी री । सूर श्याम दर्शनते इकटक टरत न निमिष घरी री ॥ राग सारंग ॥ ए नैना मेरे ढीठ
भए री । घूँघट ओट रहत नहिं रोके हरिमुख देखन लोभ गए री ॥ जो मैं कोटि जतन करि
राखे पलक कपाटनि मूँदि लए री । उतरे उमँगि चले दोउ हठकरि करौं कहा मैं जान दए री ॥
अतिहि चपल बरज्यो नहिं मानत देखि वदन तन फेरि नए री । सूर श्याम सुन्दर रस अटके
मानहुं लोभी उहड़ छए री ॥ राग नट ॥ नैना ढीठ अतिही भए । लाज लकुट दिखाइ त्रासी नैकहुं
न नए ॥ तोरि पलक कपाट घूँघट वोट भेटि गए । मिले हरिको जाइ आतुर जेहैं गुणनि मए ॥
मुकुट कुंडल पीतपट कटि ललित भेष ठए । जाइ लुब्धे निरखि वह छबि सूर नंद जए ॥ राग
विलावल ॥ नैना झगरत आइकै मोसों री माई । खूँट धरतहैं धाइकै चलि श्याम दुहाई ॥ मैं
चकृत हूँ ठगिरहौं कछु कहत न आवै । आपुन जाइ मिले रहें अब मोहिं बोलावै ॥ गए
दर्श जो देहिं वे तहां अपनी छाया । और कछु वह है महीं री उनकी माया ॥ कपटिनके
ढंग ए सखी लोचन हरि कैसे । सूर भली जोरी बनी जैसेको तैसे ॥ राग सूही ॥ नैननको
मत सुनहु सयानी । निशि दिन तपत सिरात न कबहुं यद्यपि उमँगि चलै पानी ॥ हों उप-
चार अमित उर आनति खल भई लोक लाज कुलकानी । कछु न सोहाइ दहति दर्शन दव
वारिजबदन मंद मुसुकानी ॥ रूप लकुट अभिमान निडर हूँ जग उपहास न सुनत लजानी । बुधि
विवेक बल वचन चातुरी मनहुं उलटि उनमाँझ समानी ॥ आरजपथ गुरु ज्ञान गुप्त करि विकल
भई तनुदशा हिरानी । याचत सूर श्याम अंजनको वह किशोर छबि जीवहि तानी ॥ राग सारंग ॥

सूरसागर ।

(३३४)

नैन न भलो मतो ठहरायो । जबहीं मैं बरजति हरि सँगते तबहीं तब ठहरायो ॥ जरत है हँसि
 एते पर निशि दिन छिनु बिनु जनम गँवायो । ऐसी बुद्धि करन अब लागे मोको बहुत सता ।
 कहा करौ मैं हारि धरी जिय कोटि जतन समुझायो । लुब्धे हेमचोरकी नाई फिरि फिरि उतारि
 धायो ॥ मोसों कहत भेद कछु नाहीं अपनोइ उदर भरायो । सूरदास ऐसे कपटिनको बिधिन ॥
 हाथ धँडायो ॥ राग विहागरो ॥ मेरे नैना अटक परे । सुंदर श्याम अंगकी सोभा निरखत भटकि परे ॥
 मोरमुकुट लट घँघरवारे तामें लटाकि परे । कुंडलतरनि किरनि ते उज्ज्वल चमकनि चटाकि परे ॥
 चपल नैना मृग मीन कुंज जित अलि ज्यों लुब्धि परे । सूर श्याम मृदु हँसनि लोभाने हमते दूर
 परे ॥ राग विहागरो ॥ नैनन साधै ये रही । निरखत बदन नंदनंदनको भूलि न तृप्ति इति ॥
 उनकी रुचि कारण परमिति तौ न लही मगन होत अब श्याम सिंधुमें कतहुँ न थाह पतित्यागो ॥
 रोम सुंदरतु निरखत आनंद उमंगि बही । दुख सुख सूर बिचार एक करि कुलमर्याद ढहा ॥
 ॥ राग नट ॥ नैनन साध रही सिराइ । यद्यपि निशि दिन संगहि डोलत तद्यपि नहीं अघाइ ॥ पलक
 नहिं कहूँ नेक लागत रहत इकटक हेरि । तऊ कहूँ त्रिपितात नाहीं रूप रसकी ढेरि ॥ ज्यों
 आगिनि घृत तृप्ति नाहीं तृषा नहीं बुझाई । सूर प्रभु अति रूप दानी नैन लोभ न जाइ ॥ राग कल्याण ॥
 श्याम अंग निरखत नैन कहूँ अघात नाहीं । एकहि टक रहे जोरि पल पल नहिं सकत तोरि जैसे
 चंदा चकोर तैसी इन पाहीं ॥ छवि तरंग सरितागण लोचन ए सागर जनु प्रेम धार लोभ गहन
 नीके अवगाही । सूरदास एते पर तृप्ति नहीं मानत ए इनकी सोइ दशा सखी वरणी नहिं जाही
 ॥ राग विहागरो ॥ लोचन सपनेके भ्रम भूले । जो छवि निरखत सो पुनि नाहीं भरम हिंडोरे झूले ॥ इक
 टक रहत तृप्ति नहिं कबहुँ एते पर हैं फूले । निदरे रहत मोहिं नहिं मानत कहत कौन हम तूले ॥
 मोते गए कुम्हीके जरलौं ऐसे वे निरमूले । सूर श्याम जलराशि परे अब रूप रंग अनुकूले ॥ राग गौरी ॥
 मेरे नैना ई अति दीठ । मैं कुलकानि किये राखतिही ये हठि होत बसीठ ॥ यद्यपि वे उत कुशल
 समर बल ए इत अतिबल हीठ । तदपि निदरि पटजात पलक छिदि जूझत देत न पीठ । अंजन त्रास
 तजत तम कत तकि तानुत दरशन डीठि । हारेहु नहिं हटत अमित बल वदन पयोधि पईठि ॥
 आतुर अडत अरुद्धि अँग अँग अनुरागनमितिमननीठि । सूर श्याम सुंदर रस अटके नहिं जा
 नत कटु मीठि ॥ राग विलावल ॥ नहीं दीठ नैननते और । कितनो मैं बरजति समुझावति उलटि कर
 त हैं झौर ॥ मोसों लरत भिरत हरि सन्मुख महा सुभट ज्यों धावत । भौह धनुषशर सरस
 कटाक्षन मारु करत नहिं आवत ॥ मानत नहीं हारि जों हारत अपने मन नहिं टूटत । सूर श्याम
 अँग अँगकी शोभा लोभ सैन सों लूटत ॥ राग विहागरो ॥ लोचन लालची भारी । इनके लए लाज
 या तनकी सबै श्याम सों हारी ॥ बरजत मात पिता पति बंधव अरु आवै कुलगारी । तदपि
 रहत नंदनंदन बिन कठिन प्रकृति हस्ति धारी ॥ नख शिख सुभग श्याम सुंदरके अंग अंग सुख
 कारी । सूर श्याम को जो न भजै सो कौन कुमति है नारी ॥ राग कल्याण ॥ अतिरस लंपट नैन भए ।
 चाख्यो रूप सुधारस हरिको लुब्धे उतहि गए ॥ ज्यों व्यभिचारि भवन नहिं भावत औरहि पुरुष
 रई । आवत कबहुँ होत अति व्याकुल जैसे गेवन नई ॥ फिरि उतहीको धावत जैसे छुटत धनुष
 ते तीर । जुमे जाय हरि रूप वोपमें सुंदर श्याम शरीर ॥ ऐसे रहत उतहिको आतुर मोसों
 रहत उदास । सूर श्यामके मन वच क्रम भए रीझे रूप प्रकाश ॥ राग सही ॥ ए नैना अति चपल
 चोर । सरवस मृसि देत माधवको सुधि बुधि सुख न विवेक न मोर ॥ अनजानत कल बैन श्रवण

चेतै रहत उत उनकी वोर । मोहन मुख मुसुकाइ चले मानों भेद भयो यह लायो अंकोर ॥
 दोष कहा कहि दीजै जो कीजै सो इनको थोर । सूर संग सोवत न परी सुधि पायो मरम
 यागन भोर ॥ राग गौरी ॥ नैन करत घरहीकी चोरी । चोरन गए श्याम अँग शोभा उत शिरपरी
 गोरी ॥ अपवश करि इनको हरि लीन्हें मोतन फेरि पठाए । जो कछु रही संपदा मेरे सुधि
 बुधि चोर लिवाए ॥ ए धाए आए निघरकसों लैगए संग लगाइ । सूर श्याम ऐसे हैं माई उलटी
 चाल चलाइ ॥ राग सारंग ॥ नैनन प्राण चोरि लै दीने । समुझत नहीं बहुत समुझाए अति उत
 कंठ नवीने ॥ अति हौ चतुर चातुरी जानत सकल कला जु प्रवीने । लोभ लिये परवश
 भइ ~~सुख~~ ललत जु वंसी भीने ॥ कहा कहाँ कहिबे नहीं लायक मते रहत भर
 पु बँधाइ पुंजि लै सौपी हरिस रतिके लीने । ज्यों डेरे वश गुंडी देखि
 यत डोलत संग अधीने । सूरदास प्रभु रूपसिंधुमें मिले सलिल गुण कीने ॥ राग नट ॥ ये लोचन
 लालची भए री । सारंगरिपुके रहत न रोंके हरिस्वरूप निधए री ॥ काजर कुलफ मेलि मैं राखे पलक
 कपाट दए री । मिलि मनदूत पैजकरि निकसे बहुरि श्यामपै दौरि गए री ॥ है आधीन पंचते न्यारे
 कुललजा न नए री । सूर श्याम सुंदर रस अटके मानों उहई छए री ॥ राग विहागरो ॥ लोचन लोभ-
 हिमें ये रहत । फिरैं अपने काजहीको धीर नहीं गहत ॥ देखि मृषनि कुरंग धावत तृति नहीं होत ।
 ए लहत ना हृदय धावत तऊ नाहिंन वोत ॥ हठी लोभी लालची इनते नहीं कोउ और । सूर ऐसे
 कुटिलको छबि श्याम दीन्हों ठौर ॥ राग रामकली ॥ लोचन मानत नाहिंन बोल । ऐसे रहत श्यामके
 आगे मनुदै लीन्हें मोल ॥ इत आवत है जात देखाई ज्यों भवैरा चकडोर । उतते सूत्र न टारत
 कतहूं मोसों मानत कोर ॥ नीके रहे सदा मेरे वश जाइ भए ह्वां जोर । मोहन शिर मोहनी लगाई
 जब चितए उनि वोर ॥ अब मिलि गए श्याम मनमाने निशि वासर इक ठौर । सूर श्यामके चोर
 कहावत राखेहैं करिगौर ॥ राग रामकली ॥ नैना उनही देखे जीवत । सुंदर वदन तडाग रूप जल निर-
 खनि पुटभरि पीवत ॥ राखे रहत और नाहिं पावै उन मानी परतीति । सूर श्याम इनसों सुख
 मानत देखे इनकी प्रीति ॥ राग गूजरी ॥ नैना नाहिंन कछू विचारत । सन्मुख समर करत मोहनसों
 यद्यपि हैं हठिहारत ॥ अवलोकत अलसात नवल छबि अमित तोष अतिआरत । तमकि तमकि
 तरकत मृगपति ज्यों घूँचट पटहि विदारत ॥ बुधि बल कुल अभिमान रोष रस जोवत भवहि
 निवारत । निदेर विरह समूह श्याम अँग पेखिपलक नाहिं पारत ॥ श्रमित सुभट सकुचत साहस
 करि पुनि पुनि सुखहि सम्हारत । सूर स्वरूप मगन झुकि व्याकुल टरत न इकटक टारत ॥
 ॥ राग विहागरो ॥ श्याम रंग नैना राचे री । सारंग रिपुते निकसि निलज भए अब परगट है नाचे री ॥ मुरली
 नाद मृदंग मृदंगी अघर बजावन हार । गायन घर घर घेर चलावत लोभ नचावन हार ॥ चंचलता
 नृत्यनि कटाक्षरस भाव बतावत नीके । सूरदास ए ठे गिरिधर मनमाने उनहीके ॥
 ॥ राग रामकली ॥ नाचत नैन नचावत लोभ । यह करनी इन नई चलाई मेदि सकुच कुल क्षोभ ॥ घूँचट
 घट त्याग्यो इन मन क्रम नाचहि पर मनमान्यो । घर घर घेरि मृदंग शब्दकरि निलज काछनी
 वान्यो ॥ इंद्री मन समाज गायन ए ताल धरे रहैं पाँसे । सूर प्रेम भावनि सों रीझे श्याम चतुर
 वर आछे ॥ राग वनाश्री ॥ नैनन सिखवत हारि परी । कमलनैन मुख बिनु अवलोके रहत न
 एक घरी ॥ हों कुलकानि मानि सुनि सजनी घूँचट ओट करी । वे अकुलाइ मिले हरि ले मन
 लैतनहूकी बुद्धि हरी ॥ तबते अंग अंग छबि नैरखत सो चितते नटरी । सूर श्याम मिलि लोक

वेदकी मर्यादा निदरी ॥ राग बिलावल ॥ इन नैननसों री सखी मैं मानी हारि । सोट सकुच नहिं हैंसि
 बहुवारनि मारि ॥ डरत नहीं फिरि फिरि औरै हरि दरशन काज । आपु गए मोहं कहैं किं
 मिलि ब्रजराज ॥ घूँघट घरमें नहिं रहै कहि रही बुझाइ । पलक कपाट विदारिकै उठि
 पराइ ॥ तबते मौनभई रहौ देखत ए रंग । सूरज प्रभु जहँ जहँ रहै तहँ तहँ ए संग ॥ राग गूजरी ।
 नैना बहुत भांति हटके । बुधि बल छल उपाइ करि थाकी नेक नहीं मटके ॥ इत चितवत
 उतही फिरि लागत रहत नहीं अटके । देखतही उडि गए हाथते भए बटा नटके ॥ एकहिपरनि
 परे खग ज्यों हरि रूपमांझ लटके । मिले जाइ हरदी चूना त्यों फिरि न सूर फटके ॥ राग जैतश्री ॥
 बहुत भांजे नैना समुझाए । लंपट तदपि सकोच न मानत यद्यपि घूँघट पट अटकि परे ॥ निरखि
 नवल इतराहिं जाहिं मिलि विविखंजन अंजन जनुपाए । श्याम कुँवरके कमल वदन पतित्यागो
 मधुकर है धाए ॥ घूँघट वोट तजी सरिता ज्यों श्यामसिंधुके सन्मुख धाए । सूरश्याम मिलनपर
 पलकनसों बिनमोलहि हठि भए पराए ॥ राग सोरठ ॥ नटके बटा भए ए नैन । देखतिहौं पुनि जात
 कहाँधौं पलक रहत नहिं ऐन ॥ स्वांगीसे ए भए रहतहैं छिनही छिन ए और । ऐसे जात रहत नहिं
 रोके हैहूते अति दौर ॥ गए सु गए गए अबआए जात लगी नहिं बार । सूर श्याम सुंदरता चाहत
 जिनको वारनपार ॥ राग विहागरो ॥ मोते नैन गए री ऐसे । देखे वधिक पिंजरते खग छूटि भजत
 है जैसे ॥ सकुच फांसि में फँसे रहत हैं ते धौं तोरैं कैसे । मैं भूली यहि लाज भरोसे राखतिही ए
 वैसे ॥ श्यामरूप वनमांझ समाने मोपै रहैं अनैसे । सूर मिले हरिको आतुर है ज्यों सुरभी सुत
 तैसे ॥ राग जैतश्री ॥ लोचनभए पराए जाइ । सन्मुख रहत डरत नहिं कबहूँ सदा करत सिवकाइ ॥
 हाँ तौ भए गुलाम रहतहैं मोसों करत ढिठाइ । देखत रहति चरित इनके सब हरिहि कहौंगी
 जाइ ॥ जिनको मैं प्रतिपालि बडे किए ते तुम वशकरि पाइ । सूर श्यामसों यह करि लेहौं अपने
 बल पकराइ ॥ राग डोडी ॥ अब मैंहूँ यहि टेक परी । राखों अटक जान नहिं पावें क्यों मोको निदरी ॥
 मौन भई मैं रही आजुलौं अपनोइ मन समुझाऊं । एक मिले नैनही डागारि देखति इनहु भगाऊं ॥
 सुन री सखी मिले ए कबके इनहीको यह भेद । सूरदास नहिं जानी अबलौं वृथा करति
 तनुखेदा ॥ राग धनाश्री ॥ नैना भए पराए चरे । नंदलालके रंग गए रँगि अब नाहिन वशमेरे ॥
 यद्यपि जतन किए जुगवतिही श्यामलशोभा घेरे । तउ मिलि गए दूध पानी ज्यों निबरत
 नहीं निबरे ॥ कुल अंकुश आरजपथ तजिकै लाज सकुच दिये डेरे । सूरश्यामके रूप भुलाने कैसहुँ
 फिरत न फेरे ॥ राग रामकली ॥ जाकी जैसी वानि परी री । कोऊ कोटि करै नहिं छूटै जो जेहि धरनि
 धरी री ॥ वारेहीते इनके एढंग चंचल चपल अनेरे । वरजतही वरजत उठि दौरे भए श्यामके चरे ॥
 ये उपजे वोछे नक्षत्रके लंपट भए बजाइ । सूरकहा तिनकी संगति जे रहैं पराए जाइ ॥ राग आसावरी ॥
 नैननको री इहै सुहाइ । लुब्धे जाश्नरूप मोहनको चरे भए बजाइ ॥ फूले फिरत गिनत नहिं काहू
 आनंद उर न समात । इहै बात कहि दुवन सुनावति नेकहु नहीं लजात ॥ निशि दिन करि
 सेवा प्रतिपाले बडे भए जब आइ । तब अपको ये छांडि भगाने देखो सूर सुभाइ ॥ राग कान्हरो ॥
 देखत हरिको रूप नैना हारे री पै हारि न मरत । भए भटक बलहीन क्षीन तनु तउ अपनी जै
 जानत ॥ दुरत न पटुकी वोट प्रगट है बीच फाटक नहिं आनत । छुटि गये कुटिल कटाक्ष अलक
 मनो दूटि गए गुण तानत ॥ भाल तिलक भुव चाप आपलै सोइ संधान संधानत । मन क्रम
 वचन समेत सूर प्रभु नहिं अपवल पहिंचानत ॥ राग बरदा ॥ हारि जीति दोऊ सम इनको लाभ हानि

कहियत है लोभ सदा जियमें जिनके ॥ ऐसी परनि परी री जाके लाज कहा है है तिनके ।
 भाम रूपमें भूले कहा वश्य इन नैननि के ॥ ऐसे लोगनको सब मानत जिनकी घर घर हैं
 क । लुब्धे जाइ सूरके प्रभुको सुनत रही श्रवणनि झनके ॥ अय अँखियाँ समयके पद ॥ राग धनाश्री ॥
 अँखियनके इहई देव परी । कहा करौ बारिज मुख ऊपर लागति ज्यों भ्रमरी ॥ चितवति रहति
 चकोर चंद्र ज्यों बिसरति नहिंन घरी । यद्यपि हटकि हटकि राखतिहौं तद्यपि होति खरी ॥ गडि
 जुरही वा रूप जलाधि में प्रेम पिषूष भरी । सूर तहां नग अंग परसरस लूटति निधि सिगरी ॥ राग धनाश्री ॥
 अँखियां निरखि श्याम मुख भूली । चकित भई मृदु हँसनि चमक पर इंदु कुमुद ज्यों फूली ॥
 कूल ललित धर्म नामकुल मानत नाहिंन एको । ऐसे हैं ये भर्जी श्यामको बरजत सुनति न
 ॥ हरिके अंग माधुरी तनुकी दशा बिसारी । सूर श्याम मोहनी लगाई कछु पढिकै
 रार डारी ॥ राग जैतश्री ॥ अँखियां हरिके हाथ बिकानी । मृदु मुसुकानि मोल इन लीन्हों यह सुनि
 सुनि पछितानी ॥ कैसे रहत रहीं मेरे वश अब कछु औरै भांति । अब वै लाज मरति मोहिं देखत
 बैठी मिलि हरि पांति ॥ स्वपनेकीसी मिलनि करत हैं कब आवति कब जाति । सूर मिलीं ढरि
 नंदनंदन को अनत नहीं पतियाति ॥ राग विहागरो ॥ अँखियनि ऐसी धरनि धरी । नंदनंदन देखे
 सचुपावै मोसों रहति डरी ॥ कबहुं रहति निरखि मुख शोभा कबहुं देह सुधि नाहीं । कबहुं
 कहति कौन हरि को मैं यो तन मय है जाहीं ॥ अँखियाँ ऐसेहि भर्जी श्यामको नहीं रह्यो
 कछु भेद । सूर श्यामके परम भावती पलक न होत विछेद ॥ राग रामकली ॥ अँखिअन श्याम अपनी
 करी । जैसेही उन मुँह लगाई तैसेही ए ढरी ॥ इनकि ए हरि हाथ अपने दूरि हमते परी । रहति वासर
 रौनि इकटक छाँह घाम खरी ॥ लोकलजा निकास निदरी नहीं काहुहि डरी । ए महा अति चतुर
 नागरि चतुर नागर हरी ॥ रहती डोलति संग लागी डटति ज्यों नहिं टरी । सूर जब हम हटकि
 हटकति बहुत हमपर लरी ॥ राग विहागरो ॥ अँखिअनि तबते वैर धरयो ॥ जब हम हटकति हरि दरशन
 को सो रिसनहिं बिसरयो ॥ तबहींते उन हमहिं भुलाई गई उतहिको धाइ । अबतौ तरकि तरकि
 ऐंठति हैं लेनी लेति बनाइ ॥ भई जाइ वे श्याम सुहागिनि बडभागिनि कहवावैं । सूरदास वैसी
 प्रभुता ताजि हमपै अब वे आवैं ॥ राग जैतश्री ॥ धन्य धन्य अँखियाँ बडभागिनि । जिन बिन श्याम
 रहत नहिं नेकहु कीन्हीं बने सुहागिनि ॥ जिनको नहीं अंगते टारत निशि दिन दरशन पावैं ।
 तिनकी सरि कहि कैसे कोई जे हरिके मनभावैं ॥ हमहींते ए भई उजागरि अब हम पर रिसमाने ।
 सूर श्याम अति विवश भए हैं कैसे रहत लुभाने ॥ राग विलावल ॥ ए अँखियां बडभागिनी जिन रीझे
 श्याम । अँगते नेक न टारहीं वासर अरु याम ॥ ए कैसी हैं लोभिनी छबि धरति चुराइ । और न
 ऐसी करिसकै मर्यादा जाइ ॥ यह पहिले मनही करी अब तो पछिताति । उनके गुण गुणि गुणि
 झुरै याहू न पत्याति ॥ इंद्रिवश न्यारी परी मुख लूटति आंखि । सूरदास जे सँग रहैं तेऊ मरैं झांखि ।
 राग विलावल ॥ अँखिअनि तेरी श्यामको प्यारी नहिं और । जिनको हरि अंग अंगमें करि दीन्हों ठौर ।
 जो मुख पूरण इन लह्यो कहा जानै और । अम्बुज हरि मुख जारको दोउ भौरी जोर ॥ यह अंतर
 श्रवणन परी सुरलीकी शोर । सूर चकित भई सुंदरी सिब निरुगोर ॥ राग विहागरो ॥ अँखिअनकी
 सुधि भूलि गई । श्याम अधर मृदु सुनत सुरलिका नकृत नारि भई ॥ जो तैसे तैसेहि रहिगई मुख
 दुख कह्यो न जाइ । लिखी चित्रकीसी सब है गह्वै इकटक पल बिसराइ ॥ काहू सुधि काहू सुधि
 नाहीं सहज सुरलिका गान । भवन रवनकी सँजन रही तनु सुनत शब्द वह कान ॥ अँखिअनते

मुरली अति प्यारी वह वैरनि यह सौति। सूर परस्पर कहत गोपिका यह उपजी उदभौति॥ राग ^{हैंसि}
 अधररस मुरली लूटन लागी। जा रसको षट्कृत तनु गारयो सो रस पिवत सभागी ॥ कह ^{कि}
 कहैं ते इह आई कौने याहि बुलाई। चकृत कहा भई ब्रजवासिनि यह तौ भली न आई ॥ सो ^{शि}
 धान क्यों होत नहीं तुम उपजी बुरी बलाई। सूरदास प्रभु हमपर याको कीन्हों सौति बजाइ ॥
 राग सारंग ॥ आवतही याके ये ढंग। मनमोहन बश भए तुरतही द्वैगए अंग त्रिभंग ॥ मैं जानी यह
 टोना जानति करिहै नाना रंग। देखो चरित भजै हरि कैसे या मुरलीके संग ॥ बातनमें कह
 ध्वनि उगजावति सुरते तान तरंग। सूरदाससे दूर सदनमें पैठो बडो भुजंग ॥ अध्याय २९ वंशी ध्वनि
 मुरगोपीमोहन ॥ रासलीलापंचाध्यायी ॥ राग टोडी ॥ मुरली सुनत भई सब बैरी। मानहुँ ^{पिरे}
 ठगोरी ॥ जो जैसे सो तैसे सोरी। तनु व्याकुल सब भई किशोरी ॥ कोउ धरणी कोउ ^{गो} पतित्यागो
 कोउ कर करते वासन डारै ॥ कोउ मनही मन बुद्धि बिचारै। कोउ बालक नहीं गोद सँभारै ॥
 घर घर तरुनी सब बिततानी। मन मन कहति कौन यह बानी ॥ छुटि सब लाज गई कुलकानी।
 सुत पति आरजपंथ भुलानी ॥ लैलै नाम सबनिको टेरै। मुरली ध्वनि घरहीके नेरै ॥ कोउ जैवत
 पतिहीतन हैरै। कोउ दधिमें जावन पय फेरै ॥ कोउ उठि चली जैसही तैसे। फिर आवहिं घरहीमें
 पैसे ॥ घर पाछे मुरली ध्वनि ऐसे। आँगनगए नहीं वह जैसे ॥ गृह गुरुजन तिनहुँ सुधि नाहीं।
 कोउ कतहुँ कोउ कतहुँ जाहीं ॥ कोउ निरखत कोउ काहू माहीं। मुरछयो मदन तरुणि सब
 डाहीं ॥ व्याकुल भई सबै ब्रजनारी। मुरली सों बोली गिरिधारी ॥ चलीं सबै जहँ तहँ सुकुमारी।
 उपजी प्रीति हृदय हरिभारी ॥ मुरली श्याम अनूप बजाई। विधि मर्यादा सबनि भुलाई ॥
 निशि वनको युवती सब धाई। उलटे अंग अभूषण ठाई ॥ कोउ चलि चरणहार लपटाई। काहू
 चौकी भुजनि बनाई ॥ अँगिया कटि लहँगा उरलाई। यह शोभा वरणी नहीं जाई ॥ कोउ उठि चली
 जातिहै कोउ। कोउ मग गई मिली मग कोउ ॥ सूरदास प्रभु कुंजबिहारी। शरदरास रसरीति
 विचारी ॥ राग गुंडमलार ॥ शरदनिशि देखि हरि हरष पायो। विपिन वृंदावन सुभग फूले सुमनरास रुचि
 श्यामके मनहि आयो ॥ परम उज्ज्वलैरनि छिटकि रही भूमि पर सद्यफल तरुन प्रति लटकन
 लागे। तैसोई परम रमणीक यमुना पुलिन त्रिविध बहै पवन आनंद जागे ॥ राधिका रवन वन
 भवन सुख देखिकै अधर धरि वेनु सुरललित बजाई। नाम लैलै सकल गोपकन्यानके सबनके
 श्रवन वह ध्वनि सुनाई ॥ सुनत उपज्यो मैन परत काहुन चैन शब्द सुनि श्रवन भई विकल
 भारी। सूर प्रभु ध्यान धरिकै चलीं उठि सबै भवन जन नेह तजि घोषनारी ॥ ७९ ॥ राग विहागरो ॥
 सुनहु हरि मुरली मधुर बजाई। मोहै सुर नर नाग निरंतर ब्रजवनिता मिलि धाई ॥ यमुना
 नीर प्रवाह थकित भयो पवन रह्यो मुरझाई। खग मृग मीन अधीन भए सब अपनी
 गति बिसराई ॥ दुमवल्ली अनुराग धूलकतनु शशि थक्यो निशि न घटाई। सूर श्याम वृंदावन
 बिहरत चलहु सखी सुधिपाई ॥ ८० ॥ राग विहागरो ॥ मुरली सुनत उपजी वाइ। श्यामसों
 अतिभाव बाढो चलीं सब अकुलाई ॥ गुरुजननसों भेद काहू कह्यो नहीं उचारि।
 अर्ध रैनि चलीं घरनिते गृथ गृथनि नारि ॥ नंदनंदन तरुनि बोलीं शरद निशिके
 हेत। रुचि सहित वनको चलीं वै सूर भई अर्चो ॥ ८१ ॥ राग गुंडमलार ॥ सुनत मुरली भवन डरन
 मना आजु पूरण करें नंदनंदन सबनि वन बुलाई। जानि लायक भजी तरुनि सुत पति तजी।

ब्रजलहरी लजीं अति प्रेम धाई ॥ तज्यो कुलधर्म गोधन भवन जन तजे पर्गी रस कृष्ण बिन
 सम भावै । सूर प्रभुसों प्रेम सत्य करिकै कियो मन गयो तहां इनको बुलावै ॥ ८२ ॥ राग सोरठ ॥
 लीं मधुर बजायो श्याम । मन हरि लियो भवन नाहै भावै व्याकुल ब्रजकी वाम ॥ भोजन
 षणकी सुधि नाहीं तनुकी नहीं सँभार । गृह गुरुलाज सुतसों तोरयो डरीं नहीं व्यवहार ॥ करत
 शृंगार विवश भई सुंदरि अंगनि गई भुलाई । सूर श्याम बन बेणु बजावत चितहित रास रमाई ॥
 राग गुंडमलार ॥ करत शृंगार युवती भुलाई । अंग सुधि नहीं उलटे वसन धारहीं एक एकानि कछु
 सुरति नाहीं ॥ नैन अंजन अधर अंजहीं हरषसों श्रवण ताटक उलटे सँवारैं । सूर प्रभु मुख
 ललित बेणु ॥ बन सुनत चलीं बेहाल अंचल न धारैं ॥ ८३ ॥ राग नट ॥ हरि मुख सुनत बैस रसाला
 ॥ ८३ ॥ भागि ॥ भई बाला चलीं जहँ गोपाल ॥ पय दुहावन चलीं कोऊ रह्यो धीरज नाहैं । एक
 ॥ ८३ ॥ जावनको शिरावत जाहिं ॥ एक उफनतही चलीं उठि धरयो नहीं उतारि । एक जेवन
 करत त्याग्यो चढे चूल्है दारि ॥ एक भोजन करि संपुरन गई वैसहि त्यागि । सूर प्रभुके पास
 तुरतहि मन गयो उठि भागि ॥ ८४ ॥ राग रामकली ॥ मन गयो चित्त श्यामसों लाग्यो । नानाविधि जेवन करि
 परस्यो पुरुष जेवाँवत त्याग्यो ॥ इक पय प्यावत चलि तजि बालक छोह नहीं तब कीन्हों ।
 चली धाइ अकुलाइ सकुच तजि बोलि वेनु ध्वनि लीन्हों ॥ इक पति सेवा करत चली उठि
 व्याकुल तनु सुधि नाहीं । सूर निदरि बिधिकी मर्यादा निशि वनको सब जाहीं ॥ ८५ ॥ राग जैतश्री ॥
 जबहीं वन सुरली श्रवण परी । चकृत भई गोपकन्या सब कामधाम बिसरी ॥ कुल मर्याद
 वेदकी आज्ञा नेकहु नहीं डरीं । श्याम सिंधु सरिता ललनागन जलकी ढरनि ढरीं ॥ अंग
 मर्दन करिवेको लागीं उबटन तेल धरी । जो जेहि भांति चली सो तैसेइ निशि नवकुंज खरी ॥
 सुत पति नेह भवन जन शंका लजा नहीं करी । सूरदास प्रभु मन हरि लीन्हों नागर नवल हरी ॥ ८६ ॥
 राग केदारो ॥ सुनि सुरली शब्द ब्रजनारि । करति अंग शृंगार भूली काम गयो तनु मारि ॥ चरण
 सों गहि हार बांध्यो नैन देखति नाहिं । कंचुकी कटि साजि लहँगा धरति हृदय माहिं ॥ चतुरता
 हरि चोरि लीन्हों भई भोरी बाल । सूर प्रभु रति काम मोहन रास रुचि नैदलाल ॥ ८७ ॥ राग रामकली ॥
 ब्रजयुवतिन मन हरयो कन्हवाई । रास रंग रस रुचि मन आन्यो निशि बन नारि बुलाई ॥ तब तनु
 गारि बहुत श्रम कीन्हों सो फल पूरण दैन । बेणु नाद रस विवश कराई सुनि ध्वनि कीन्हों गौन ॥
 जाको मन हरि लियो श्याम घन ताहि सँभारै कौन । सूरदास ज्यों नारि कंठ मिलि करै सुभावै
 जौन ॥ ८८ ॥ राग धनाश्री ॥ चली वन बेणु सुनत जब धाइ । मात पिता बंधव इक त्रासत जाति
 कहां अकुलाइ ॥ सकुच नहीं शंकाहू नाहीं रैनि कहां तुम जाति । जननी कहति दई की घाली
 काहेको इतराति ॥ मानति नहीं और रिस पावति निकसी नातो तोरि । जैसे जल प्रवाह भादों
 को सो को सकै बहोरि ॥ ज्यों केंचुरी भुवंगम त्यागत मात पिता यों त्यागे । सूर श्यामके हाथ
 विकानी अलि अंबुज अनुरागे ॥ ८९ ॥ राग गुंडमलार ॥ सुनल सुरली अलि न धीर धरिकै । चलीं पित
 मात अपमान करिकै ॥ लरत निकसीं सबै तोरि फरिषै । भई आतुर वदन दरश हरिकै ॥
 जाहि जो भजै सो ताहि रातै । कोऊ कछु कहै सब निजसँ बातै ॥ ता विना ताहि कछु नहीं भावै ।
 और तो जोरि कोटिक दिखावै ॥ प्रीति कथा वह प्रीसंहि जानै । और करि कोटि बातैं बखानै ॥
 ज्यों सलिल सिंधु बिनु कहुँ न जाई । सूर वैसी दक्षि इनहुँ पाई ॥ ९० ॥ राग मूही विलावल ॥ घर घर
 ते निकसीं ब्रजबाला । लैलै नाम युवति जन्म उनके सुरलीमें सुनि सुनि ततकाला ॥ इक मारग

इक घरते निकरी इक निकसत इक भई बेहाल । इक नाहीं भवननि ते निकरी तिनपै आप
 कृपालु ॥ यह महिमा ओई पै जानै कविसों कहा बरणि यह जाइ । सूर श्याम रस रास रीति
 बिन देखे आवै क्यों गाइ ॥९१॥ राग मलार ॥ रासरस रीति नहिं बरणि आवै । कहाँ वैसी बुद्धि
 वह मन लहाँ कहाँ इह चित्त जिय भ्रम भुलावै ॥ जो कहाँ कौन मानै निगम अगम जो कृपा बि
 नहीं या रसहि पावै । भावसों भजै बिन भावमें ए नहीं भावही माहँ भाव यह बसावै ॥ यहै निज मंत्र
 यह ज्ञान यह ध्यान है दरश दंपति भजन सार गाऊँ । इहै मांग्यो बार बार प्रभु सूरके नैन द्रौ रहैं नर
 देह पाऊँ ॥९२॥ राग केदारो ॥ मुरली ध्वनि करी बलवीर । शरदनिशिको इंदु पूरण देखि यमुनानीर ॥
 सुनत सो ध्वनि भई व्याकुल सकल घोषकुमारि । अंग अभरण उलटि साजी रही ॥ ९३ ॥ राग मलार ॥
 गई सोरहसहस हरिपै छांडि सुत पति नेह । एक राखी एकको पति सो गँडित्यागो ॥
 देह ॥ दियो तिन तिय आन मधुरै चितै लोचन कारे । सूर भजि गोविन्द यो जग मोह बधेन
 तोर ॥ ९३ ॥ राग सारंग ॥ सुनो शुक कह्यो परीक्षित राव । गोपिन परम कंत हरि जान्यो
 लख्यो न ब्रह्मप्रभाव ॥ गुणमें ध्यान कीन्ह निर्गुण पद पायो तिन केहि भाइ । मेरे जिय सन्देह
 बढ्यो यह सुनिवर देहु नशाइ ॥ शुक कह्यो कुटिलभाव मन राखे सुक्तभयो शिशुपाल । गोपी
 हरिकी प्रिया सुक्ति लहै कहा अचरज भूपाल ॥ काम क्रोधमें नेह सुहृदता काहू बिधि कहै
 कोई । धरैं ध्यान हरिको जे दृढकरि सूर सो हरिसों होई ॥९४॥ राग गुंडमलार ॥ सुनत बन बेतु ध्वनि चली
 नारी । लोक लज्जा निदरि भवन तजि सुन्दरी मिलीं बनजाइके बनबिहारी ॥ दरशके लहत मन
 हरष सबको भयो परसकी साध अति करति भारी । इहै मन वच कर्म तज्यो सुत पति धर्म मेदि
 भ्रम धर्म सहिलाज गारी ॥ भजै जेहि भाव जो मिलै हरि ताहि त्यों भेदभेदा नहीं पुरुष नारी । सूर
 प्रभु श्याम ब्रजबाम आतुरकाम मिलीं बनधाम गिरिराज धारी ॥ ९५ ॥ राग मूही बिलावल ॥ देखि
 श्याम मन हरष बढ़ायो । तैसिय शरद चांदनी निर्मल तैसोइ रासरंग उपजायो ॥ तैसिय कनकवरन
 सब सुंदरि यह शोभा पर मन ललचायो ॥ तैसी हंस सुता पवित्र तट तैसेइ कल्पवृक्ष सुख दायो ।
 करौ मनोरथ पूरण सबके इहि अंतर इक खेद उपायो । सूर श्याम रचि कपट चतुरई युवतिनके
 मन यह भरमायो ॥ ९६ ॥ राग विहागरो ॥ निशि काहे वनको उठि धाई । हँसि हँसि श्याम कहत
 हैं सुन्दरि की तुम ब्रजमारगहि भुलाई ॥ गई रही दधिवेचन मथुरा तहां आजु अवसेर
 लगाई । अति भ्रम भयो विपिन क्यों आई मारग वह कहि सबनि बताई ॥ जाहु जाहु घर तुरत
 युवाति जन खिझत गुरूजन कहि डरवाई । की गोकुलते गमन कियो तुम इन बातन है नहीं
 भलाई ॥ यह सुनिकै ब्रजवाम कहत भई कहा करत गिरिधर चतुराई । सूर नाम लै लै जन जनके
 मुरली बारंबार लगाई ॥९७॥ राग विहागरो ॥ यह जिनि कहौ घोष कुमारि । हम चतुरई नहीं कीन्हीं
 तुम चतुर सब ग्वारि ॥ कहाँ हम केन तुम रही ब्रज कहाँ मुरली नाद । करतिहौ परिहास हमसों
 तजौ यह रस वाद ॥ बडेकी तुम बहु बे नामलें क्यों जाइ । ऐसेही निशि दौरि आई हमहि दोष
 लगाइ ॥ भली यह तुम करी नाहीं अघ घर फिरि जाहु । सूर प्रभु क्यों निडरि आई नहीं
 तुम्हरे नाहु ॥ ९८ ॥ राग जैतश्री ॥ मात पिता तुम्हरे धौ नाहीं । बारंबार कमलदललोचन
 यह कहि कहि पछिताहीं ॥ उनके लाज नहीं वन तुमको आवन दीन्हीं राति । सब
 सुंदरी सबै नव यौवन निहुर अहिरकी जाति ॥ की तुम कहि आई की ऐसेहि कीन्हीं
 कैसी रीति । सूर तुमहि यह नाहीं बूझी बडी करी चित्तिपरीति ॥ ९९ ॥ राग रामकली ॥ अब तुम

हमारी मानो । बनमें आइ रैनि सुख देख्यो इहै लख्यो सुख जानो ॥ अब ऐसी कीजो जिनि जानति हौ मन तुमहुं । यह ध्वनि सुनै कहूं जो कोऊ तुमहिं लाज अरु हमहुं ॥ हमतौ आज तुत सरमाने सुरली टेरि बजायो । जैसो कियो लख्यो फल तैसो हमही दोषन आयो ॥ अब तुम भवन जाहु पति पूजहु परमेश्वरकी नाहीं । सूर श्याम युवतिनसों कहि कहि सब अपराध क्षमाहीं ॥ ७०० ॥ राग सही विलावल ॥ यह युवतिनको धर्म न होई । धृग सों नारि पुरुष जो त्यागै धृग सो पति जो त्यागै जोई ॥ पतिको धर्म रहै प्रतिपाले युवती सेवाहीको धर्म । युवती सेवा तऊ न त्यागै जो पति कोटि करै अप कर्म ॥ बनमें रैनि वास नहिं कीजै देख्यो बन वृंदावन आई । विविध सुमन शीतल कर्क भोगे ल त्रिविध समीर परसि सुखदाई ॥ घरहीं में तुम धर्म सदाही सुत पाति दुखित लीनहु ॥ सूर श्याम यह कहि परबोधत सेवा करहु जाइ घरनाहु ॥ १ ॥ राग विहागरो ॥ यह विध वेद मारग सुनो । कपट तजि पति करौ पूजा कहा तुम जिय गुनौ ॥ कंत मानहु भव तरौगी और नहिंन उपाइ । ताहि तजि क्यों विपिन आई कहा पायो आइ ॥ विरध अरु बिन भागहूको पति तजो पति होइ । जऊ मूरख होइ रोगी तजै नाहीं जोइ ॥ इहै मैं पुनि कहत तुमसों जगतमें यह सार । सूर पति सेवा बिना क्यों तरौगी संसार ॥ २ ॥ राग विहागरो ॥ कहा भयो जो हमपै आई कुलकी रीति गमाई । हमहुंको विधिको डरभारी अजहुं जाहु चंडाई ॥ तजि भरतार और जो भजिए सो कुलीन नहिं होई । मरे नरक जीवत या जगमें भलो कहै नहिं कोई ॥ हम जो कहत सबै तुम जानत तुमहुं चतुर सुजान । सुनहु सूर घर जाहु हमौ घर जैहैं होत विहान ॥ ३ ॥ राग विलावल ॥ निठुर वचन सुनि श्यामके युवती बिकलानी । चकृत भई सब सुनिरहीं नहिं आवै बानी ॥ मनो तुषार कमल न परयो ऐसे कुंभिलानी । मनो महानिधि पाइकै खोये पछितानी ॥ ऐसी हैगई तनुदशा पियकी सुनि वानी । सूर विरह व्याकुल भई बूडी बिनपानी ॥ ४ ॥ राग मारु ॥ श्याम उर प्रीति सुख कपट वानी । युवति व्याकुल भई धरणि सब गिरि गई आश गई टूटि नहिं भेद जानी ॥ हँसत नँद लाल मन मन करत ख्यालए भई वेहाल ब्रजबाल भारी । रुदन जल नदी सम बहिचल्यो उरज बिच मनो गिरी फोरि सरिता पनारी ॥ अंग थकि पथिक नहिं चलत कोऊ पंथ नावरसभाव हरी नहीं आनै । सूर प्रभु निठुर करि कहा है रहेहौ उनहिं बिन औरको खेइजानै ॥ ५ ॥ राग जैतश्री ॥ निठुर वचन जिनि बोलहु श्याम । आश निराश करौ जिनि हमरी व्याकुल वचन कहति हैं वाम ॥ अंतर कपट दूरि करि डारौ हमतनु कृपा निहारो । कृपासिंधु तुमको सब गावत अपनो नाम सँभारो ॥ हमको शरण और नहिं सूझै कापै हम अब जाहिं । सूरदास प्रभु निज दासनिको चूक कहा पछिताहिं ॥ ६ ॥ राग गौरी ॥ तुम पावत हम घोष न जाहिं कहा जाइ लेहैं ब्रजमें हम यह दरशन त्रिभुवनमें नाहिं ॥ तुमहुंते ब्रजहिं कोउ नहिं कोटि कहौ नाहिं मानै । काके पिता मात हैं काके काहू हम नहिं जानै ॥ काके फ्रत सुत मोह कौनको घर है कहां पठावत कैसो धर्म पापहै कैसो आश निराश करावत ॥ हम जलन केवल तुमहीको और धृथा संसार । सूरश्याम निठुराई तजिए तजिय वचन बिनसार ॥ ७ ॥ राग जैतश्री ॥ तुमहौ अंतर्यामि कन्हई । निठुर भए कत रहत इतेपर तुम नहिं जानत पीर पराज ॥ पुनि पुनि कहत जाहु ब्रजसुंदरि दूरि करौ पिय यह चतुराई । आपुहि कही करौ पति सेयस्ता सेवाको हैं हम आई ॥ जो तुम कहौ तुमहिं सब छाजै कहा कहैं हम प्रभुहि सुनाई । साहिं सूर इहँई तनु त्यागै हमपै घोष गयो नहिं जाई ॥ ८ ॥ राग विहागरो ॥ कैसे हमको ब्रजहिं पठावत । मनतौ रह्यो चरण लपटानो जो एतनी यह

देह चलावत ॥ अटके नैन माधुरी सुसकनि अमृत वचन श्रवणनको भावत । इंद्रि सबै मन
 पाछे कहो धर्म कहि कहा बतावत ॥ इनको करी आपनो लायक तौ क्यों हम नार्हीं जिय भा
 सूर सैनदै सरवस लूट्यो मुरली लै लै नाम बुलावत ॥ ९ ॥ राग कान्हरो ॥ भवन नहीं अब जाहिं कन्हार
 सुजन बंधुते भई बाहिरी अब कैसे वे करत बडाई । जो कबहुं वे लेहिं कृपाकरि धृग वै धृग
 हम नारि । तुम बिछुरत जीवन धृग राखैं कहौं न आपु बिचारि ॥ धृग वह लाज विमुखकी
 संगति धनि जीवन तुम हेत । धृग माता धृग पिता गेह धृग धृग सुत पतिको चेत ॥ हम चाहति
 मृदु हँसनि माधुरी जाते उपज्यो काम । सूर श्याम अधरन रस सींचहु जरति विरह सब वाम ॥
 ॥ १० ॥ राग कान्हरो ॥ सुनहु श्याम अब करहु चतुरई क्यों तुम वेणु बजाइ बुलाई ॥ विधि मर्याद
 लोककी लज्जा सबै त्यागि हम धाई आई ॥ अब तुमको ऐसी न बूझिये आश निराश्यागो ॥
 साई । सोइ कुलीन सोई बडभागिनि जो तुव सन्मुख रहैं सदाई ॥ ते धनि पुरुष नारि पान
 तेई पंकज चरण रहैं दृढताई । सूरदास कहि कहा बखानै यह निशि यह अँग सुंदरताई ॥ ११ ॥ राग रामकली ॥
 बिनती सुनिये श्यामसुजान । अतिही मुख अपमान कीन्हों दृढ न इनते आन ॥ अब करौ दुख दूरि
 इनको भजौ तजि अभिमानाविरह द्रंद्र निवारि डारो अधररस दै पान । मनहि मन यह सुखकरत हरि
 भए कृपानिधान । सूर निश्चय भजी मोकों नहीं जानति आन ॥ १२ ॥ राग विलावल ॥ मोहिं बिना ए और न
 जानै ॥ विधि मर्याद लोककी लज्जा तृणहूते घटिमानै । इन मोको नीके पहिचान्यो कपट नहीं उरराख्यो ।
 साधु साधु पुनि पुनि हरपित है मनहीं मन यह भाख्यो । पुनि हँसि क्यो निठुरता धरि कै क्यों त्याग्यो
 गृहधर्म । सूर श्याम मुख कपट हृदय रति युवतिनके अति भर्म ॥ १३ ॥ राग गुंडमलार ॥ तजौ नैद
 लाल अति निठुरई गहि रहे कहा पुनि पुनि कहत धर्म हमको । एकही ढँग रहे वचन सब कटु
 कहे वृथा युवतिन दहे मेटि प्रनको ॥ विमुख तुमते रहै तिनहि हम क्यों गहैं तहाँ कह लहैं दुख
 देहिं भारी । कहा सुत पति कहा मात पित कुल कहा कहा संसार वन वन बिहारी ॥ हमहिं समझाइ
 यह कहो मूरख नारि कहो तुम कहाँ नहिं भर्म जानैं । सुनहु प्रभु सूर तुम भले की वे भले सत्य
 करि कहौ हम अबहिं मानैं ॥ १४ ॥ राग रामकली ॥ तुमहि विमुख धृग धृग नर नारि । हमतौ यह जानति
 तुव महिमा को सुनि ए गिरिधारि ॥ सांची प्रीति करी हम तुतसों अंतर्यामी जानो ॥ गृह जनकी
 नहिं पीर हमारे वृथा धर्म हमठानो ॥ पाप पुण्य दोऊ परित्यागे अब जो होइ सुहोई आश निराश
 सूरके स्वामी ऐसी करै न कोई ॥ १५ ॥ राग जैतश्री ॥ आश जिनि तोरहु श्याम हमारी । बैन नाद
 ध्वनि सुनि उठि धाई प्रगटत नाम मुरारी ॥ क्यों तुम निठुर नाम प्रगटायो काहे विरद भुलाने ।
 दीन आजु हमते कोउ नार्हीं जानि श्याम मुसुकाने ॥ अपने भुजदंडन कर गहिए विरह सलिल
 में भासी । बार बार कुलधर्म बतावत ऐसे तुम अबिनासी ॥ प्रीति वचन नवका करि राख्यो अंकम
 भरि बैठावहु । सूर श्याम तुम बिनु गह्ये नार्हीं युवतिन पार लगावहु ॥ १६ ॥ राग नयाचितदै सुनहु अंबुज
 नैन । कृपणके गथ भयो हमको सरस स्मृत बैन ॥ हम गुणी नवबाल रिझवति तुम तरुण
 धनराशि । कैसेहुं सुखदान दीजै विरह दाइ नाशि । करहु यह यश प्रगट त्रिभुवन निठुर कोठी
 खेलि । कृपा चितवनि भुज उठावहु प्रेमवचननि बोलि ॥ दीनवाणी श्रवण सुनि सुनि द्रष्ट परम
 कृपाल । सूर एकहु अँग न काची धन्य धनि ठबाल ॥ १७ ॥ राग विहागरो ॥ हरि सुनि दीन वचन
 रसाल । विरह व्याकुल देखि बाला भरे नैन विशोक ॥ चारु आनन लोरधारा वरणि कापै जाइ ।
 मनहुं सुधातडाग उछले प्रेम प्रगटि देखाइ ॥ चंद्रमुखापरि निडरि बैठे सुभग जोर चकोर । पियत

ब्रजल भरि भरि सुधा शशि गिरत तापर भौर ॥ हरष वाणी कहत पुनि पुनि धन्य धनि
 सम तल । सूर प्रभु करि कृपा जोह्यो सदय भए गोपाल ॥ १८ ॥ राग विहागरो ॥ श्याम हँसि बोले
 की शो डारि । बारंबार बिनय कर जोरत कटिपट गोद पसारि ॥ तुम सन्मुख मैं विमुख तुम्हारो मैं
 कबहुँक तुम साध । धन्य धन्य कहि कहि युवतिनको आप करत अनुराध ॥ मोको भजी एक चित
 कियो भारि लोक कुलकानि सुत पति नेह तोरि तिनकासों मोही निजकरि जानि ॥ जाके हाथ पेट
 आति तो फल लह्यो कुमारि । सूर कृपा पूरण सों बोले गिरिगोवर्धन धारि ॥ १९ ॥ राग मूही बिलावली ॥
 एवमुच्यत । म यह श्रीमुखबानी । धन्य धन्य दृढ नेम तुम्हारो बिन दामन मो हाथ बिकानी ॥ निर्दय
 न उलहाहा । विशेषे तुम अपने जिय नेक न आनी । भजी निसंक आय तुम मोको गुरुजनकी
 भोगे होनी ॥ सिंह रहै जंबुक शरणागत देखी सुनी न अकथ कहानी । सूर श्याम अंकम भरि
 लौन्हीं विरह आग्नि झर तुरत बुझानी ॥ २० ॥ राग मारु ॥ कियो जेहि काज तप घोषनारी देउँ फल
 हौं तुरत लेहु तुम अब घरी हरष चित करहु दुख देहु डारी ॥ रासरस रचौ मिलि संग बिलसहु
 सबै बिहँसि हरि कह्यो यों निगमबानी । हँसत मुख मुख निरखि वचन अमृत बरषि प्रिया रस भरे
 सारंगपानी ॥ ब्रजयुवती चहुँ पास मध्य सुंदर श्याम राधिका वाम अति छवि बिराजै । सूर
 नव जलद तनु सुभग श्यामलकांति इंद्रबधु पांति बिच अधिक छाजै ॥ २१ ॥ राग नट ॥ हरि मुख
 देखि भूले नैन । हृदय हरषित प्रेम गद्गद मुख न आवत बैन ॥ काम आतुर भजी गोपी हरि
 मिलें तेहि भाइ । प्रेम वश्य कृपालु केशव जानि लेत सुभाइ ॥ परस्पर मिलि हँसत रहसत हरषि
 करत विलास । उमंगि आनंद सिंधु उछल्यो श्यामके अभिलाष ॥ मिलति इक इक भुजनि भरि
 भरि रास रुचि जिय आनि । तेहि समय मुख श्याम श्यामा सूर क्यों कहै गानि ॥ २२ ॥ राग विहागरो ॥
 रास रुचि जबहि श्याम मन आनी । करहु श्रृंगार सँवारि सुंदरी हँसत कहत हरि बानी ॥ जो देखे
 अँग उलटे भूषण तब तरुनिन मुसुकानी ॥ बार बार पिय देखि देखि मुख पुनि पुनि युवति लजानी ॥
 नवसतसाजि भई सब ठाढी को छबि सकै बखानी ॥ वह छबि निरखि आधार भई तनु कामनारि
 बिततानी ॥ कुच भुज परसि करी मनइच्छा कछु तनु तृषा बुझानी । सुनहु सूर रसरस नायका
 सुंदरि राधा रानी ॥ २३ ॥ राग सोरठ ॥ अंचल चंचल श्याम गह्यो । लै गए सुभग पुलिन यमुनाके
 अँग अँग भेष लह्यो ॥ कल्पतरोवर तर बंसीबट राधा रति गृहधाम । तहां रास रस रंग उपायो
 संग शोभति ब्रजवाम ॥ मध्य श्याम घन तडित भामिनी अतिराजत शुभ जोरी । सूरदास प्रभु
 नवल छबीले नवल छबीली गोरी ॥ २४ ॥ राग टोडी ॥ जहां श्याम घन रास उपायो । कुमकुम जल
 मुख वृष्टि रमायो ॥ धरणीरज कपूर मय भारी ॥ विविध सुमन छवि न्यारी न्यारी ॥ युवतीभुरि मंडली
 बिराजै ॥ बिच बिच कान्ह तरुनि बिच भ्राजै ॥ अनुपम लीला प्रगट देखायो । गोपिनको कीयो मन
 भायो ॥ बिच श्रीश्याम नारि बिच गोरी । कनकखंभ मर्कट खचि घेरी ॥ शोभा सिंधु हिलोर
 हिलोरी । सूर कहा मति वरणै थोरी ॥ २५ ॥ राग गुंडमल ॥ रास मंडल बने श्याम श्यामा ।
 नारि दोहूँ पास गिरिधर बने दुहुँनि बिच सहस शशि वीस द्वादश उपमा ॥ मुकुटकी छबि
 निरखि कहा उपमा कहौ नैन जानत नहीं देह जौ ॥ सुभग तवमेघ ता बीच चपला चमक
 निरखि नृत्यत मोर हरष मानै ॥ करति आनंद पियसंग लक्ष्मी पुंज बढत रसरंग छिन छिनहि योरै ॥ सूर
 प्रभु रास रस नागरी मध्य दोउ परस्पर नारि पति मनहि चोरै ॥ २६ ॥ परस्पर श्याम
 ब्रजवाम सोहै । शीशश्रीखंड कुंडल जाडित ॥ श्रवण निरखि छबि श्याम मन तरुणि मोहै ॥

नासिका ललित बेसरि बनी अघर तट सुभग ताटक छवि कहि न जाई । धरणि पग पटक
 झटकि भौंहनि मटक मन तहां रीझे कन्हारै ॥ तब चलत हरि मटक रही युवती भन
 लटक लटकन खटक छवि बिचारै । कहति प्रभु सूर बहुरौ चलौ बैसही हमहु वैसे चने
 निहारै ॥ २७ ॥ निरखि ब्रजनारि छवि श्याम लाजै । विविध बनी रची मांग पाटी सुभग
 बेंदीबिंदु इंदु लाजै ॥ श्रवण ताटक लोचन चारु नासिका हंस खंजन कीर कोटि लाजै वै धृग
 विद्रुम दशन नहीं छवि दामिनी सुभग बेसरि निरखि काम लाजै ॥ चिबुक तर कंठ विमुखकी
 मोतीन छवि कुच उंचनि हेम गिरि अतिहि लाजै । सुरकी स्वामिनी नारि ब्रजभामिनी चाहति
 पिय प्रेम भीमा सुलाजै ॥ २८ ॥ राग विहागरो ॥ बनी ब्रजनारि शोभा भारि । पग रह सव वाम ॥
 लहंगा अंग पचरंग सारि ॥ किंकिणी कटि कुनित कंकन करचुरी झनकार । हृदय चांगि मयारि
 बैठी सुभग मोतिनहार ॥ कंठश्री दुलरी विराजत चिबुक श्यामल बिंद । सुभग बेंदी ललित नासा
 रीझिरहे नंदनंद ॥ श्रवणपर ताटककी छवि गोर ललित कपोल । सूर प्रभु वश अति भएहैं
 निरखि लोचनलोल ॥ २९ ॥ राग जैतश्री ॥ सूर गण चढि विमान नभ देखत । ललना सहित सुमन
 गण वरषत जन्म धन्य ब्रजहीको लेखत ॥ धनि ब्रजलोग धन्य ब्रजबाला विहरत रास गोपाल ।
 धनि बंसीवट धनि यमुनातट धनि धनि लता तमाल ॥ सबते धन्य धन्य वृंदावन जहाँ कृष्णको
 वास । धनि धनि सूरदासके स्वामी अद्भुत राच्यो रास ॥ ३० ॥ राग विलावल ॥ नैन सफल अब भए
 हमारे । देवलोक नीसान बजाए वरषत सुमन सुधारे ॥ जैजैधनि किन्नर मुनि गावत निरखत योग
 विसारे । शिव शारद नारद यह भाषत धनि धनि नंददुलारे ॥ सुरललना पतिगति बिसराए रही
 निहारि निहारि । जात न बनै देखि सुख हरिको आई लोक बिसारि ॥ यह छवि तिहुं भुवनकहुं नहीं
 जो वृंदावन धाम । सुंदर त्रयगुण रसकी सीवां सूर राधिका श्याम ॥ ३१ ॥ राग आसावरी ॥ हमको
 विधि ब्रज वधू न कीन्हैं कहा अमरपुर वास भए । बार बार पछितात यहै कहि सुख
 हो तो हरि संग रए ॥ कहा जन्म जो नहीं हमारो फिरि फिरि ब्रज अवतार भलो ।
 वृंदावन दुम लता हूजिए कर तासों माँगिए चलो ॥ यह वांछना होइ क्यों पूरण दासी
 है वरु ब्रज रहिए । सूरदास प्रभु अंतर्दामी तिनहि बिना कासों कहिए ॥ ३२ ॥ राग विहागरो ॥ धन्य नंद यशु-
 दाके नंदन । धनि श्रीखंड पिंड शिर लटकनि धनि कुंडल धनि मृगमद चंदन ॥ धनि राधिका
 धन्य सुंदरता धनि मोहनकी जोरी । ज्यों घनमध्य दामिनीकी छवि यह उपमा कहैं थोरी ॥ धनि
 मंडली जुरी गोपिनकी ताविच नंदकुमार । राधा श्याम सब गोपकुमारी क्रीडत रास बिहार ॥
 षट दश सहस गोपकीनारी षट दश सहस गुपाल । काहुसों कहुं अंतर नहीं करत परस्पर
 ख्याल ॥ धनि ब्रजवास आश यर पूरण कैसे होति हमारी । सूर अमर ललना गण अमर विथकी
 लोक बिसारी ॥ ३३ ॥ राग मलार ॥ मानाहाई घन घन अंतर दामिनि । घन दामिनि दामिनि घन अंतर
 शोभित हरि ब्रज भामिनि ॥ यमुना पुच्छेन मल्लिका मनोहर शरद सुहाई यामिनि । सुंदर शशि
 गुण रूप राग निधि अंग अंग अभिरामिनी ॥ रच्यो रास मिलि रसिकराइ सों सुदित भई ब्रज
 भामिनि । रूपनिधान श्यामसुंदर घन आनंद भूषण विश्रामिनि ॥ खंजन मीन मराल हरन छवि भान
 भेद गजगामिनि । को गति गुनही सूर श्याम सूर काम विमोह्यो कामिनि ॥ ३४ ॥ राग मलार ॥ देखो
 माई रूप सरोवर साज्यो । ब्रजवनिता वरवारि चंद्र में श्री ब्रजराज विराज्यो ॥ लोचन जलज
 मधुप अलकावालि कुंडल मीन सलोल । कुच चंद्रिका विलोकि बदन बिधु बिछरि रहे अन

ब्रजल ॥ मुक्तामाल बाल बग पंगति करत कुलाहल कूल । सारस हंस मध्य शुक सैना वैजयंति
 सम तूल ॥ पुरइनि कपिश निचोल विविध रंग विहंसत सचु उपजावै । सूर श्याम आनंद कंद
 की शोभा कहत न आवै ॥ ३५ ॥ राग सही ॥ तरुतमाल गोपाल लाल वनमाल गिरिधर हृदय विशाल
 कबहुँक गोधन सँगलै बालक कबहुँ फिरत सँग सखा ग्वाल । धनि ब्रजनायक सबगुण लायक
 कियो महारि पोषी प्रतिपाल । कबहुँक बनिकै रहे जु बनए गोरस दान लेत तत्काल ॥ पैठि
 आल न अति काली फन प्रति नृत्यत विविध ताल । धन भूषण धन मुकुट जरयो नग हीरा चूनी
 एकन नृत्यत ॥ सूर प्रभुता धरे राजै सँग सँग बनिता जालाकुंडल लोल कपोल विराजत दान चमक
 न जाहेला । छैलैग कान्हरो ॥ भाल तिलक शोभित शिर केसरि नैन विविधि बने । कटि कछनी चंदन खौ-
 निक भागे हरेन घन सुंदर ऐसे नटनागरके जैए री वारने ॥ त्रिभंगी है नृत्य करत ब्रज युवतिन मंडली
 बिच दुहुँ दुहुँ बिच श्याम घने । मोरमुकुट शीश धरे राजतहै सूर प्रभु निरखि निरखि अमरन भजै
 जैजैध्वनि भनै ॥ ३७ ॥ राग धनाश्री ॥ रास मंडल मध्य श्याम राधा । मनो घनबीच दामिनी कोंधति सुभग
 एकहै रूप द्वैनाहि बाधा ॥ नायका अष्ट अष्टहु दिशा सोहहीं बनी चहुँपास सब गोप कन्या ।
 मिले सब संग नहिं लखति कोउ परस्पर बने षटदशसहस कृष्ण सैन्या ॥ सजे शृंगार नवसात जग
 मग रह्यो अंगभूषण रैन बनी तैसी । सूर प्रभु नवल गिरिधर नवल राधिका नवल ब्रजसुता मंडली
 जैसी ॥ ३८ ॥ राग भैरव ॥ युवति अंग छबि निरखत श्याम । नंदकुमार श्रीअंगमाधुरी अवलोकति ब्रजवाम ॥
 परी दृष्टि कुच उचनि पियाकी वह मुख कह्यो न जाई । अँगिया नील मांडनी राती निरखत नैन
 चुराई ॥ वै निरखति पिय उर भुजकी छबि पहुँचनि पहुँची भ्राजति । करपल्लवन मुद्रिका सोहत ता
 छबिपर मन लाजति ॥ बंदन बिंद निरखि हरि रीझे शशिपर बालविभास । नंदलाल ब्रजबाल कि
 छबि क्यों बरणै सूरजदास ॥ ३९ ॥ राग गौरी ॥ श्यामतनु राजत पीतपिछैरी । उर बनमाल काछनी
 काछे कटिकिंकिनि छबि रोरी ॥ बेनी सुभग नितंबनि डोलत मंदगामिनी नारी । सूथन जघन
 बांधि नारा बँद तिरनी पर छबि भारी ॥ नखनिरंग जावककी शोभा देखत पिय मन भावत । सूर
 दास प्रभु तनु त्रिभंग है युवतिन मनहिरिझावत ॥ ४० ॥ राग सारंग ॥ नीलांबर पहिरे तनु भामिनि जनु
 घनमें दमकतहै दामिनि । शेष महेश लोकेश शुकादिक नारदादि मुनिकी है स्वामिनि ॥ शशि
 मुखतिलक दियो मृगमदको खुटिला खुभी जरायज री । नासा तिल प्रसून बेसरि छबि मोतियन
 माँग सुहागभरी ॥ अति सुदेश मृदु चिकुर हरत चित गुंथे सुमन रसालहि । कबरी अति कमनीय
 सुभग शिर राजति गौरी बालहि ॥ सगरी कनक रत्न मुक्तामणि लटकनि चितहि चुरावै । मानो
 कोटि कोटि शत मोहनी पाँइनि आनि लगावै ॥ काम कमान समान भौह दोउ चंचल नैन सरोजै ।
 अलिगंजन अंजन दै रेखा बरषत बाण मनोजै ॥ कंबुकंठ नाना मणिभूषण उर मुक्ताकी माल ।
 कनक किंकिणी नूपुर कलरव कुंजत बालमराल ॥ चौकी हैमचंद्र मणिलागी हीरारतन जराय
 खची । भुवन चतुर्दशकी सुंदरता राधेके मुखमनहुँ रची ॥ सजल मेघ घन साँवल सुंदर वाम अंग
 अति सोहै । रूप अनूप मनोहर मोहे ता उपमा कहि सोहै ॥ सहज माधुरी अंग अंग प्रति सुवश
 किए ब्रजनाथ घनी । अखिललोक लोकेश बिलोक्य सब लोकन महि एक गनी ॥ कबहुँक हरि
 सँग नृत्यति श्यामा श्रमकनबूँद बिराजतयो । मारहु अधर सुधाके कारण शशि दूजो सुकताह
 तयो ॥ रमा उमा अरु शची अरुंधति दिन प्रति देखन आवैं । निरखि कुसुम सुरगण हैं वर्षत प्रेम
 मुदित यश गावैं ॥ रूप राशि सुखराशि राधिराशील महागुणराशी । कृष्णचरणते पावहि श्यामा

जे तुव चरण उपासी ॥ जगनायक जगदीश पियारी जगतजननि जगरानी । नित विह
 गोपाल लाल संग वृन्दावन रजधानी ॥ अगतनिको गति भक्तनकी पति श्रीराधापद मंगलदानी ।
 अशरण शरनी भव भय हरनी वेद पुराण बखानी ॥ रसना एक नहीं शत कोटिक शोभा अमित
 अपारी । कृष्णभक्ति दीजे श्रीराधे सूरदास बलिहारी ॥ ४१ ॥ राग बिहागरो ॥ नृत्यत श्याम नाना रंग ।
 मुकुट लटकनि भुकुटि मटकन धरे नटवर अंग ॥ चलत गति कटि रुनित किंकिनि घँघरू
 झनकार । मनो हंस रसाल बानी अरस परस बिहार ॥ लसति कर पहुँची सो पुंजय सुद्रिका मुखकी
 ज्योति ॥ भावसों भुज फिरत जबहीं तबहिं शोभा होति ॥ कबहुँ नृत्यत नारि गतिपर कबहुँ चाहति
 आयु । सूरके प्रभु रसिक की मणि रच्यो रास प्रतापु ॥ ४२ ॥ राग बिहागरो ॥ गति सुधंग रह सब वाम ॥
 हाव भाव नैन सैन दैद रिझवति गिरिधारी ॥ पग पग पटाके भुजनि लटकावति निधि मयार
 अनूप । चंचल चलत झूमि ये अंचल अद्भुत है वह रूप ॥ दुरिनिरखत अँगरूप परस्पर दोउ
 मनहि मन रिझवत । हँसि हँसि वदन वचन रस प्रगटत स्वेद अंग जलभीजत ॥ बेनी छूटि लटै
 बगरानी मुकुट लटकि लटकानो । फूल खसत शिरते भए न्यारे सुभग स्वातिसुत मानो ॥
 गान करति नागारि रीझे पिय लीन्हीं अंक मलाई । रसवश है लपटाइरहे दोउ सूरसखी बलिजाइ ॥
 ४३ ॥ राग गौरी ॥ नृत्यत अंग अभूषण बाजत । गति सुधंग सों भाव देखावत इकते इक अति राजत ॥
 कहत न बने रह्यो रस ऐसो वर्णत वरणि न जाइ । जैसे बने श्याम तैसी ये गोपी अतिही छवि
 अधिकाइ ॥ कंकन चुरी किंकिनी नूपुर पग पैजनि बिछिया शोभित । अद्भुत ध्वनि उपजत इन
 मिलिकै भ्रमि २ इत उत जोवत ॥ सुनि सुनि श्रवण रीझि मनही मन राधा रास रसज्ञा ।
 सूर श्याम सबके सुखदायक लायक गुणनि गुणज्ञा ॥ ४४ ॥ राग केदारो ॥ उघटत श्याम नृत्यत नारि ।
 धरे अधर उपंग उपजै लेत है गिरिधारि ॥ ताल मुरज रबाव बीना किन्नरी रस सार । शब्द संग
 मृदंग मिलवत सुघर नंदकुमार ॥ नागरी सब गुणनि आगारि मिलि चलति पिय संग । कबहुँ गावति
 कबहुँ नृत्यत कबहुँ उघटति रंग ॥ मंडली गोपाल गोपी अंग अँग अनुहारि । सूरप्रभु धनि नवल
 भामिनि दामिनी छविडारि ॥ ४५ ॥ राग बिहागरो ॥ नृत्यत हैं दोउ श्यामा श्याम । अंग मगन
 पियते प्यारी अति निरखि चकित ब्रजवाम ॥ तिरपलेति चपलासी चमकति झमकति भूषण
 अंग । या छवि पर उपमा कहूँ नाहीं निरखत विवश अनंग ॥ श्री राधिका सकल गुणपूरण
 जाके श्याम अधीन । संगते होत नहीं कहूँ न्यारी भए रहति अतिलीन ॥ रस समुद्र मानों उछ-
 लत भयो सुंदरताकी खानि । सूरदास प्रभु रीझि थकित भये कहत न कछू बखानि ॥ ४६ ॥ राग कल्याण ॥
 कबहुँ पिय हरपि हृदय लगावै ॥ कबहुँ लै लै तान नागरी सुघर प्रति सुघर नंद सुवनको मन
 रिझावै ॥ कबहुँ चुंबन देति आकारें जिय लेति करति विन चेत सब हेतु अपने । मिलति भुज
 कंठदै रहति अँग लटकिकै जात दुरि दूरि है झझकि सपने ॥ लेति गहि कुचनि बिच देत
 अधरनि अमृत एक कर चिबुक इक्षु शीश धारै । सूर प्रभुकी स्वामिनी श्याम अति
 सन्मुख है निरखि मुख नैन इकटक निहारै ॥ ४७ ॥ राग आसावरी ॥ जो सुखश्याम करत बृन्दावन सो
 सुख तिहुँपुर नाहीं हो । हमको कहा मिल मुरज उनकी यह कहि कहि अकुलाहीं हो ॥ सुनहु
 प्रिया श्रीसत्य कहतहों मोते और न कोई हो । नंदकुमार रास रस सुख बिन बृन्दावन नाहिं होई हो ॥
 हरता करता को प्रभु मैही वह सुख मोते न्यारो होत ॥ सूर धन्य राधावर गिरिधर धनि सुख नंद
 दुलारो हो ॥ ४८ ॥ राग बिहागरो ॥ रसवश श्याम की बी नारि । अधर रस अचवत परस्पर संग सब

ब्रजनारि ॥ काम आतुर भर्जी बाला सबनि पुरई आश । एक इक ब्रजनारि इक इक आप करयो
 प्रकाश ॥ कबहुँ नृत्यत कबहुँ गावत कबहुँ कोकविलास । सूरके प्रभु आश नायक करत सुख
 दुख नाश ॥ ४९ ॥ राग कल्याण ॥ हरषि मुरली श्याम नाद कीन्हों । करषि मन तिहुँ भुवन सुनि थकि
 रह्यो पवन शशिहि भूल्यो गवन ज्ञान लीन्हों ॥ तारकागण लजे बुद्धि मन मन सजे तबहि तनु सुधि
 तजे शब्द लाग्यो । नाग नर सुनि थके नभ धरणि तनतके शारदा स्वामि शिव ध्यान जाग्यो ॥ ध्यान
 अह टरयो शेष आसन चलयो गई बैकुंठ ध्वनि मगन स्वामी ! कहत श्रीप्रियासों राधिका रवन
 एकनप्रभु श्यामके दरशकामी ॥ ५० ॥ राग विहागरो ॥ मुरली ध्वनि बैकुंठ गई । नारायण कमला
 न जाहाही । छै रुचि हृदयभई ॥ सुनहुँ प्रिया यह बाणी अद्भुत वृंदावन हरि देख्यो । धन्य
 भोगे हे मुख कहि कहि जीवन ब्रजको लेख्यो । रास विलास करत नंदनंदन सो हमते अति
 दूरि । धनि बन धाम धन्य ब्रज धरनी उडि लागे ज्यों धूरि ॥ यह सुख तिहुँ भुवनमें नाहीं जो हरि
 संग पल एक । सूर निरखि नारायण इकटक भूले नैन निमेक ॥ ५१ ॥ राग कल्याण ॥ जब हरि मुरली
 नाद प्रकाश्यो । जंगम जंडे थावर चर कीन्हें पाहन जलज विकाश्यो ॥ स्वर्ग पताल दशौ दिशि
 पूरण ध्वनि आच्छादित कीन्हों । निशिवर कल्प समान बढ़ाई गोपिनको सुख दीन्हों ॥
 मैमतभए जीव जल थलके तनुकी सुधि न सँभार । सूर श्याम मुखबैन मधुर सुनि
 उलटे सब व्यवहार ॥ ५२ ॥ राग पूरवी ॥ मुरली गति विपरीति कराई । तिहुँभुवन भरि नाद समानो
 राधा रवन बजाई ॥ बछरा थन नाहीं मुख परसत चरत नहीं तृण धेनु । यमुना उलटी धार चली
 बहि पवन थकित सुनि बेनु ॥ बिह्वल भए नहीं सुधि काहू सुर गंधर्व नर नारि । सूरदास सब
 चकित जहां तहां ब्रजयुवतिन सुखकारि ॥ ५३ ॥ राग केदारो ॥ मुरली सुनत अचल चले । थके
 चर जल झरत पाहन बिफल वृक्षन फले ॥ पय स्रवत गोधननि थनते प्रेम पुलकित गात । झुरे द्रुम
 अंकुरित पल्लव चिटप चंचलपात ॥ सुनत खग मृग मौन साध्यो चित्रकी अनुहारि । धरणि उमै-
 गि न माति धरमें यती योग बिसारि ॥ ग्वाल गृह गृह सहज सोवत उहै सहज सुभाइ । सूर प्रभु
 रसरासके हित सुखद रैन बढाइ ॥ ५४ ॥ राग केदारो ॥ रास रस मुरलीहीते जान्यों । श्याम अधर पर बैठि
 नाद कियो मारग चंद्र हिरान्यो ॥ धरणि जीव जल थलके मोहे नभमंडल सुर थाके । तृण हुंम
 सलिल पवन गति भूले श्रवण शब्द परचो जाके ॥ बच्यो नहीं पाताल रसातल कितिक उदैलौं
 भान । नारद शारद शिव यह भाषत कछु तनु रह्यो न सयान ॥ यह अपार रस रास उपायो
 सुन्यो न देख्यो नैन । नारायण ध्वनि सुनि ललचाने श्याम अधर सुनि बैन ॥ कहत रंमासों
 सुनि सुनि प्यारी विहरत है वन श्याम । सूर कहाँ हमको वैसो सुख जो विलसति ब्रजवाम ॥ ५५ ॥
 जीती जीती है रनवंसी । मधुकर सूत वदत बंदी पिक मागध मदन प्रशंसी ॥ मथ्यो मान बल
 दर्प महीपति युवति यूथ गहि आने । ध्वनिको खंड ब्रह्मंड भेद करि सुर सन्मुख शर ताने ॥
 ब्रह्मादिक शिव सनक सनंदन बोलत जै जै बाने । राधापति रविस अपनो है पुनि ता हाथ बिकाने ॥
 खग मृग मीन सुमार किए सब जड जंगम जित भेष छाजत छत मद मोह कवच कटि तज-
 त न नैन निमेष ॥ अपनी अपनी ठकुराइनिकी कादनि है भुवरेख । बैठी पीठ पानि गर्जति है
 देति सबनि अवशेष । रविको रथले दियो सोमको पृथ्वी कला समेत । रच्यो यज्ञ रसरास राजसुं
 वृंदाविपिन निकेत ॥ दान मान परधान प्रेमरस वध्यो माधुरी हेत । अधिकारी गोपाल तहां
 है सूर सबनि सुख देत ॥ ५६ ॥ अथ श्रीकृष्णविवाह वर्णन ॥ राग सारंग ॥ जाको व्यास वर्णत रास । है गंधर्व वि-

बाह चितदै सुनौ विविध विलास ॥ कियो प्रथम कुमारी यह व्रत धर्यो हृदय निवास । नंदसुत
 पति देव देवी पूजै मनकी आस ॥ दियो तब परसाद सबको भयो सबन हुलास । मंत्र नयना तरु-
 न वर तर यमुना जल हरिपास ॥ धर्यो लग्न जो शरद निशिकी सुधि करी गुरु रास । मोर मुकुट
 समीर मानों कनक कंकन रास ॥ वेणुध्वनि सुनि श्रवण सायक कमल वदन प्रकास । रूप प्रति प्रति
 रूप कीन्हें भए अंश निवास ॥ अधर निधि वेधीर करिकै करत आनन हास । फिरत भाँवरि वक्ष्य
 भूषण अग्नि मानो भास ॥ सुरनारि कौतुक लागि आई छाँड़ि सुत पति पास । जिय परी ॥
 कौन छोरै निकट ननैद न सास ॥ निरखि श्रुति मति कुसुम अंजलि वरषि प्रसून अकास ॥ लेत ॥
 रासको रत्न रसिक सूरजदास ॥ ६७ ॥ राग सही ॥ यह व्रत हियधरि देवी पूजी है क ॥
 न दूजी ॥ दौजै नंदसुवन पति मेरे । जोपै होइ अनुग्रह तेरे ॥ वरष दिनन भरि तप ते ॥
 करि अनुग्रह देवी वर दियो ॥ राग छंद ॥ करि अनुग्रह वर जो दीन्हों वरष युवतिन तप कियो । त्रैलोक
 भूषण पुरुष सुंदर रूप गुण नाहिंन वियो ॥ इत उबटि खौरि शृंगारि सखिअन कुँवरि चोरी
 आनियो । जाहित कियो व्रत नेम संयम सो घरी बिधि वानियो ॥ १ ॥ मोर मुकुट रचि मोर बनायो
 माथेपर धरि हरि वरु आयो ॥ तनु श्यामल पटपीत दुकूले । देखत घन दामिनि मन भूले ॥
 ॥ राग छंद ॥ दामिनी घन कोटि वारों जब निहारों वह छबी । कुंडल विराजत गंडमंडल नहीं शोभा
 शाशि रवी ॥ और कौन समान त्रिभुवन सकल गुण जेहि माहिआं । मनो मोर नाचत संग डोलत
 मुकुटकी परछाहिआं ॥ २ ॥ गोपीजन सब नेवते आई । मुरली ध्वनि ते पठइ बुलाई ॥ बहु
 बिधि आनंद मंगल गाए । नवफूलनके मंडप छाए ॥ राग छंद ॥ छाये जु फूलन कुंज मंडप प्रीति ग्रंथि
 हिए परी । अति रुचिर रूप प्रवीण राधिका निकट वृंदा शुभ घरी ॥ गाए जु गीत पुनीत बहु
 बिधि वेद रवि सुंदर ध्वनी । नंदसुत वृषभानुतनया रासमें जोरी बनी ॥ ३ ॥ मिलि मनदै सुख
 आसन वैसे । चितवनि वार किए सब तैसे ॥ तापरि पाणिग्रहण बिधि कीन्ही । तब मंडल भरि
 भाँवरि दीन्ही ॥ राग छंद ॥ देत भाँवरि कुंज मंडप पुलिन में वेदी रची । बैठे जु श्यामा श्याम वर
 त्रैलोककी शोभा खची ॥ उत कोकिला गण करै कोलाहल इत सकल ब्रजनारियां । आई जुनि
 वती दुहूँ दिशि मनो देति आनंद गारियां ॥ ४ ॥ भए जो मन्मथ सैन्य बराती । हुमफूले वन
 अन वन भांती ॥ सुरबंदीजन सब यश गाए ॥ मधवा जे मृदंग बजाए ॥ राग छंद ॥ बाजहिं जे बाजन सकल
 नभ सुर पुहुप अंजलि वरषहीं । थकि रहे व्योम विमान मुनिगन जैजै शब्द करि हर्षहीं ॥ सूरदा
 सहि भयो आनंद पूजी मनकी साधा ॥ श्रीलाल गिरिधर नवल दुलहै दुलहनि श्रीराधा राग विहागरे ॥
 प्रथम व्याह बिधिहै रह्यो कंकन चार बिचारि । रचि रचि पचि पचि गूँथि बनायो नवल निपुन ब्रजना
 रि ॥ नहिं छूटै मोहन डोरनाहो ॥ बडेहोवहु तब छोरियो हो ये गोकुल के राइ । की कर जोरि करौ
 बिनती के छुवौ श्रीराधाजीके पाँड़ो ॥ न होइ गिरिको धरिवो हो सुनहु कुँवर गोपीनाथ । आपुनको
 तुम बडे कहावत कांपन लागेहैं दोउ हड्डा ॥ बहुरि सिमिटि ब्रजसुंदरी मिलि दीन्ही गांठि बनाइ ।
 छोरहु वेगि कि आनहु अपनी यशुमति माझ रोलाइ ॥ सहज सिथिल पल्लवते हरिजू लीन्हों छोरि सवारी ।
 किलकि उठीं सब सखी श्यामकी अब तुम छोरौ सुकुमारि ॥ पचिहारी कैसेहु नहिं छूटत बैधी प्रेमकी
 डोरि । देखि सखी यह रीति दुहुँनकी मुदित हँसो मुख मोरि ॥ अब जिनि करहु सहाय सखी री
 छोडहु सकल सयान । दुलहनि छोरि दुलहको कंकन की बोलि बवा वृषभान ॥ कमल कमल
 करि वरनिहो पानि पिय गोपाल । अब कवि कुल ॥ अंचेसे लोग रोमकटीले नाल ॥ लीला रास

गोपाल लालकी जो रस रसिक बखान । सदा रहो इह अविचल जोरी बलि बलि सूर समान ५८॥
 ॥ राग सारंग ॥ कान्ह तुम्हारी माइ महाबल सब जग अपवश कीन्हो हो । नेक चितै मुसुकाइकै उनि
 सबको मन हरि लीन्हो हो ॥ कछु कुल धर्म न जानिए वाके रूप सबै रँग राचे हो । बिन देखे
 समझे सुने जग ठगत न कोऊ बाचे हो ॥ पहिरे राती कंचुकी शिर श्वेत उपरना सोहै हो । कटिनीलो
 लहंगा कस्यो सो को जो निरखि न मोहेहो ॥ बोली चतुरानन ठगे सब अमर उपरना राते हो । अत
 नार अवलोकिकै सब असुर महामद माते हो ॥ एकनि दिन दरशन ठगे निशि एकनलै सँग सौवै हो ।
 एकनलै मंदिर चढै राचि एकनि बिरचि विगोवै हो ॥ अकथ कथा वाकी सबै कछु कहौ तो कहिय
 न जाहीहो । छै-रके सँग यो फिरे जैसे तनु सँग छाहीं हो ॥ सुनि ताकी सब अपतई रुक सनका-
 दिक भागे हो । नेक दृष्टि पथ परि गई शंकर शिर टोना लागे हो ॥ योग युक्ति बिसरी सबै उर
 काम क्रोध मद जागे हो । लोकलाज सब छांडिकै उठि धाइ चले सँग नांगेहो ॥ और कहा लागि
 वर्णिये परपुरुष न उवरन पावैहो । जो सोवत अतिनींदमें हो तहांऊ जाइ जगावैहो ॥ यहिबिधि
 इह डहकै सबै भरि जल थलहु जीव जेतैहो । चतुर शिरोमणि श्याम सुन्यो कनि कहौ कहाँ लागि
 केतेहो ॥ यहि लाजन मरिए सदा हरि जब सब कक्षित माय तुम्हारी हो । सूरदास प्रभु वरजिकै
 किनि भेटहु कुलकी गारी हो ॥ ५९ ॥ राग काफी ॥ सनकादिक नारद मुनि शिव विरंचि जान । देव दुंदुभी
 भृदंग बाजे वर निसान ॥ वारने तोरन बँधाए हरि कीन्हो उछाह । ब्रजकी सब रीति भई बरसाने
 व्याह ॥ डोरन कर छोरनको आई सकल धाइ । फूली फिरै सहचरी आनंद उर न समाइ ॥ गजवर
 गति आवनि पग धरनि धरत पाँव । लटकत शिर सेहरो मनो शिखिश्री खंड सुभाव ॥ शोभित
 सँग नारि अंग सबै छबि विराज । गज रथ वाजी बनाइ चव्वर छत्र साज ॥ दुलहिनि वृष-
 भानु सुता अंग अंग भ्राज । सूरदास प्रभु दुलह देखो श्रीब्रजराज ॥ ६० ॥ राग सारंग ॥ दुलह
 देखोंगी जाइ उतरे संकेत बट केहि मिस देखन पाऊं । फूल गूथि मालालै मालिनि
 है जाऊं । नंदनंदन प्यारेको बिरिआ करि लाऊं । तमोलिनि है जाउँ निरखि नैनन सुख देउँ । अपने
 गोपाल लालके मैं वागे रचि लेउँ ॥ बजाजिनि है जाउँ निरखि नैनन सुख देउँ । वृंदाबन
 चंदको मैं भूषण गढि लेउँ ॥ सुनारिनि है जाउँ निरखि नैननि सुख देउँ । चंदन अरगजा सूर के
 सर धरि लेउँ ॥ गंधिनि है जाउँ निरखि नैनन सुख देउँ ॥ ६१ ॥ राग विहागरी ॥ वृषभानुनंदिनी अति छबि
 बनी । श्रीवृंदाबन चंद राधा निर्मल चांदनी ॥ श्याम अलक बिच मोती दुति मंगा ॥ मानहु झल
 मलित शीश गंगा । श्रवण ताटक सोहै चिकुरकी कांति । उलटि चलयो है राहु चक्रकी भांति ॥
 गोरे लिलाट सोहै सेंदुरको बिंद । शशिकी उपमा देत कवि कोहै निंद ॥ चपल उनींदे नैन
 लागत सोहाये । नासिका चंपकलीको द्वै अलिधाये ॥ वदन मंजुवत अंजन गयो दूर । कलंक
 रहित शशि पुनि कला पुरि ॥ गिरि ते लता भई यह हम सुनि कंचन लताते द्वै गिरि भए पुनि ॥
 कंचन से तनु सोहै नीलांबरसारी । कुहुनिसामध्य जनु दासिनि उजियारी ॥ नख शिख शोभा
 मोपै वराणि न जाई । तुमसी तुमही राधा श्याम मनभाई ॥ यह छबि सूरदास सारहै बानी । नंद
 नंदनराजा राधिका देरानी ॥ ६२ ॥ राग देवगंधार ॥ दोऊ रजत श्यामा श्यामा । ब्रजयुवती मंडली बिराजत
 देखति सुरगन वाम ॥ धन्य धन्य वृंदाबनको सुख सुरपुर कौने कामाधनि वृषभानु सुता धनि मोहन
 धनि गोपिनको नाम ॥ इनकी को दासी सरि है धन्य शरदकी याम । कैसेहु सूर जनम ब्रज
 पावै यह सुख नहिं तिहुं धाम ॥ ६३ ॥ राग कोशी ॥ विराजत मोहनमंडलरास । श्यामा सुधा सरोवर

मानो क्रीडत विविध विलास ॥ ब्रजयुवती सत यूथ मंडली मिलि कर परस करे । सुज मृणाल
 भूषण तोरण युत कंचन खंभ खरे ॥ मृदुपद न्यास मंद मलयानिल विगलत शीश निचोल ।
 नील पीत सित अरुन ध्वजा चल सीर समीर झकोल ॥ विपुल पुलक कंचुकि बँद छूटे हृदय
 अनंद भए । कुच युग चक्रवाक अवनी तजि अंतर रैनिए । दशन कुंद दाडिम द्युति दामिनि
 प्रगटत ज्यों दुरिजात । अधर विंव मधु अमी जलदकन प्रीतम वदन समात ॥ गिरत कुसुम
 कुवरी केशनते टूटतहै उरहार । शरद जलद मानो मंद किरन कन कहुं कहुं जलधार ॥ प्रपुष्पवत्
 वदन सरोज सुंदरी अति रस रंग रंगे । पुहुकर पुंडरीक पूरन मानों खंजन केलि खगे ।
 पृथु नितंब करभीर कमल पद नखमणि चंद्र अनूप । मानहु लुब्ध भयो वारिज दल इंदु किए
 दशरूप ॥ श्रुति कुंडल धर गिरत न जानति अति आनंद भरी । चरण परसते चलत चहुं दिशि
 मानहुं मीन करी ॥ चरणरुनित नृपूरकटि किंकिनि करतलतालरसाल । तरनीतनय समेत
 सहज सुख सुख रति मधुर मराल ॥ बाजत ताल मृदंग बांसुरी उपजति तान तरंग ।
 निकट विटप मानो द्विज कुल कूजत वय बल बढै अनंग ॥ सकलविनोद सहित सुरललना
 मोहे सुर नर नाग । विथकित उडपति बिंद विराजत श्रीगोपाल अनुराग ॥ याचत दास
 आश चरणनकी अपनी शरन वसाव । मन अभिलाष श्रवण यश पूरित सूरहि सुधा
 पिआव ॥ ६४ ॥ राग मृही ॥ रासरसिक गोपाललाल ब्रजबाल संग विहरत वृंदावना सतसुरन सुरली बाजत
 गाजत भ्राजत राजत अधरनि ध्वनि सुनि मोहे सुर नर गंधर्व गन ॥ तरुण कान्ह तरु तमालके
 तट तरुणि गोपिका यूथ निकट पट पीतांबर नीलांबर तन तन ॥ नृत्य करत उघटत संगति पद
 ताथेई थेई ता कहत सूर प्रभु निरखि परस्पर रीझत मन मन ॥ ६५ ॥ राग विहागरो ॥ आजु निशि शोभित
 शरद सुहाई । शीतल मंद सुगंध पवन बहै रोम रोम सुखदाई ॥ यमुना पुलिन पुनीत परमरुचि राचि
 मंडली बनाई । राधा वाम अंग पर कर धरि मध्यहि कुँवर कन्हाई ॥ कुंडल संग ताटक एक
 भए युगल कपोलनि झाई । एक उरग मानो गिरि ऊपर द्वै शशि उदय कराई ॥ चारि चकोर परे
 मनो फंदा चलतहैं चंचलताई । उडुपतिगति जति रह्यो निरखि लजि सूरदास बलि जाई ॥ ६६ ॥
 ॥ राग केदारो ॥ आजु हरि ऐसे रास रच्यो । श्रवण सुन्यो न कहुं अवलोक्यो यह सुख अबलौं कहाँ
 सच्यो ॥ प्रथमहि सचे समाज साज सुर सबै मोहे कोउ न बच्यो । एकहि बार थकित थिर चर कियो
 को जानै को कबहि नच्यो ॥ गत गुण मंद अभिमान अधिक रुचि लैं लोचन मन तहँ खच्यो ।
 शिव नारद शारदा कहत यों हम इतने दिन वादि पच्यो ॥ निरखि नैन रसरीति रजनि रुचि
 काम कटक फिरि कलह मच्यो । सूर धनुष धीरज न धर्यो तब उलटि अनंग तच्यो ॥
 ॥ ६७ ॥ आजु हरि अद्भुत रास रूपायो । एकहि सुर सब मोहित कीन्हें सुरलीनाद सुनायो ॥
 अचल चले चल थकित भए सब मुज्जिन ध्यान भुलायो । चंचल पवन थक्यो नहि डोलत
 यमुना उलटि बहायो ॥ थकित भयो चंद्रमा सहित मृग सुधा समुद्र बढायो ॥ सूर श्याम गोपिन सुख
 दायक लायक दरश दिखायो ॥ राग सोरठ ॥ मोहन यह सुख कहा धर्यो । जो सुख रास रैन उपजा
 यो त्रिभुवन मनहि हर्यो ॥ सुरली शब्द सुनै ऐसे को जो व्रतते नटरच्यो । बचे न कोउ मोहित
 सब कीन्हें प्रेम उद्योत कर्यो ॥ उलटि काम जनु काम प्रकाश्यो अद्भुत रूप धर्यो । सूरदास
 शिव नारद शारद कहत न कह्यो पर्यो ॥ ६८ ॥ राग विहागरो ॥ आजु निशि रास रंग हरि कीन्हों ।
 ब्रज बनिता विच श्याममंडली मिलि सबको सुख कीन्हों ॥ सुरललना सुरसहित विमोहे रच्यो

मधुर सुरगान ॥ नृत्य करत उघटत नानाविधि सुनि सुनि बिसरयो ध्यान । सुरली सुनत भए
 सब व्याकुल नभ धरनी पाताल ॥ सूर श्यामका को न किए वश रचि रसरास रसाल ॥ ६९ ॥ राग केदारी ॥
 बनावत रासमंडल प्यारो । सुकुटकी लटक झलक कुंडली निरतत नंददुलारो ॥ उर वनमाल सोहै
 सुंदर वर गोपिनके संग गावै । लेत उपज नागर नागरि संग बिच बिच तान सुनावै ॥ बंसी
 वट तट रास रच्यो है सब गोपिन सुखकारो । सूरदास प्रभु तिहारे मिलनको भक्तन प्राण अघारो ॥
 ७० ॥ राग बिहागरो ॥ दुलह दुलहिनि श्यामा श्याम । कोककला वितपन्न परस्पर देखत लज्जित
 काम ॥ जा फलको ब्रजनारि कियो ब्रत सो फल पूरण पायो । मनकामना भयो
 परिपूरण सबहित मानि मनायो ॥ राग रागिनी प्रगट देखायो गायो जो जेहि रूप ।
 सप्त सुरनके भेद बतावति नागरि रूप अनूप ॥ अतिहि सुघर पियको मन मोह्यो
 अपवश करति रिझावति । सूर श्याम मोहन मूरतिको बार बार उरलावति ॥ ७१ ॥ राग रामकली ॥
 श्यामा श्याम रिझावति भारी । मन मन कहति और नहिं मोसी पियको कोऊ प्यारी ॥ ध्रुवा
 छंद ध्रुपद यश हरिको हरिही गाय सुनावति । आपु न रीझि कंतको रिझवति यह जिय गर्व
 बढावति ॥ नृत्यति उघटति गति संगीत पद सुनत कोकिला लाजति । सूर श्याम नागर अरु
 नागरि ललना सुलप मंडली राजति ॥ ७२ ॥ राग रामकली ॥ रिझवति पियहि बारंबार निरखि नैन लजात
 हरिके नहीं शोभापर ॥ चलि सुलप गज हंस मोहति कोक कला प्रवीन । हँसि परस्पर तान
 गावति करति पियहि अधीन ॥ सुनत वनमृग होत व्याकुल रहत चकृत आइ । सूर प्रभु वश
 किए नागरि महाजाननि राइ ॥ ७३ ॥ प्यारी श्याम लई उर लाई । उरज उरसों परस को सुख
 वरणि कापै जाई ॥ कनक छबि तन मलय लेपन निरखि भामिन अंग । नासिका शुभ वास
 लैलै पुलक श्याम अनंग ॥ देत चुंवन लेत सुखको मानि पूरण भाग । सूर प्रभु वश किए नागरि
 वदति धन्य सुहाग ॥ ७४ ॥ राग बिहागरो ॥ रीझे परस्पर वरनारि । कंठ भुज भुज धरे दोऊ सकत नहिं निर-
 वारि ॥ गौर श्याम कपोल सुललित अघर अमृत सार । परस्पर दोउ पियरु प्यारी रीझि लेत
 उगार ॥ प्राण इक द्वै देह कीन्हें भक्त प्रीति प्रकास । सूर स्वामी स्वामिनी मिलि करत रंग
 विलास ॥ ७५ ॥ गावत श्याम श्यामा रंग । सुघर गति नागरि अलापति सुर धरति पिय संग ॥
 तान गावति कोकिला मनो नाद अलि मिलि देत । मोर संग चकोर डोलत आप अपने हेत ॥
 भामिनी अंग जोन्ह मानो जलद श्यामलगात । परस्पर दोउ करत क्रीडा मनहि मनहि सिहात ।
 कुचनि बिच कच परमशोभा निरखि हँसत गोपाल ॥ सूर कंचन गिरि बिचनि मनो रह्यो है
 अंधकाल ॥ ७६ ॥ मोहन मोहनी रस भरे । भौंह मोरनि नैन फेरनि तहाँ ते नहिं टरे । अंग निरखि
 अनंग लज्जित सकै नहिं ठहराइ । एककी कहाचलै शत शत कोटि रहत लजाइ ॥ इते पर हस्तकनि
 गति छबि नृत्य भेद अपार । उडत अंचल प्रगटि कुच दोउ कनकघट रससार ॥ दरकि कंचुकि
 तरकि माला रही धरणी जाइ । सूर प्रभु करि निरखि करुण तुरत लई उचाइ ॥ ७७ ॥ राग जैतश्री ॥
 प्रेमसहित माला कर लीन्ही । प्यारी हृदय रहत यह जा ॥ भुवपर नहीं पतीन्ही ॥ पीतवसन लै
 श्रमजल पोंछत पुनिलै कंठ लगाइ । चरणन कर परसत अपने कहत अतिहि श्रम पाइ ॥ कुच
 श्रम देखि पवन मुखहीके फूँकि झुरावत अंग । सूरदास प्रभु भौंह निहारत चलत त्रियाके रंग ॥
 ७८ ॥ राग भैरव ॥ हाहाहो पिय नृत्य करो । जैसे करि मैं तुमहि रिझाई त्यों मेरो मन तुमहु हरो ॥
 तुम जैसे श्रम वायु करतहो तैसे मैंहुँ डुलावोंगीर मैं श्रम देखि तुम्हारे अंगको भुजभरि कंठ लगा

बोंगी ॥ मैं हारी त्योंही तुम हारो चरण चापि श्रम मेटोंगी । सूर श्याम ज्यों उछगि लई मोहिं
 यों मैं हूं हंसि भेटोंगी ॥७९॥ राग रामकली ॥ नृत्यत श्याम श्यामा हेत । मुकुट लटकनि भुकुटि
 मटकनि नारि मन सुखदेत ॥ कबहुं चलत सुधंग गतिसों कबहुं उघटत बैन । लोल कुंडल गंड
 मंडल चपल नैननि सैन ॥ श्यामकी छेबी देखि नागरि रहि इकटक जोहि । सूर प्रभु उरलाइ
 लीन्हों प्रेमगुण करि पोहि ॥ ८० ॥ राग मलारकमोद ॥ अरुझि कुंडल लटबेसरिसों पीतपट वनमाल
 बीचि आनि उरझैहैं दोउ जन । प्राणनसों प्राण नैन नैननसों अटकि रहे चटकीली छवि देखि
 लपटात श्याम घन ॥ होडाहोडी नृत्य करै रीझि रीझि अंक भरै ताता थेई थेई उघटतहैं हरषि
 मन । मृदुदास प्रभु प्यारी मंडली युवती भोरी नारिको अंचल लैलै पोंछतहैं श्रमके कन ॥ ८१ ॥
 ॥ राग अडानो ॥ मोहनलाल संग ललनायों सोहैं ज्यों तरुतमालके ढिग सुभग सुमन जरदको । वदन
 कांति अनूप भांति नहिं सँभारति नीलांबर गगन मैं नवघन बिच प्रगटचो शशि मनो
 शरदको ॥ मुक्ता लड तारागन प्रतिबिंबित बेसरिको चूने मिलि रंग जैसे होत हरदको ।
 सूरदास प्रभु मोहन गोहनकी छवि बाढी भेटति दुख निरखि नैन नैनके दरदको ॥ ८२ ॥ राग पुरबी ॥
 नंदनंदन सुघराई मोहन बंशी बजाई । सरिंगमा पधनिसा संसत सुरनि गाइ । अति अनगात
 संगीत सुघर और तान मिलाइ । सुर ध्याय ताल ध्याय नृत्य ध्याय निपुनराय मृदंग बजाइ ॥
 सूर प्रभु नवल बाल सकल कला गुण प्रवीण अरस परस रीझि रिझाइ ॥ ८३ ॥ राग विहागंग ॥ पियके
 संग खेलत अधिक श्रम भयो आउरि ह्यांको बयारि । अपनो अंचल लै सुखऊरी रुचिर वदन
 श्रमकनके वारि ॥ नृत्यत उलटि गए अँग भूषन विथुरी अलक बाँधौ सँवारि । सूर रची रचना
 वृंदावन ब्रजयुवतिन सुखको वनवारि ॥ ८४ ॥ राग केदारो ॥ प्यारी देखि विह्वल गात । नंदनंदन
 देखि रीझे अंक भरि लपटात ॥ कबहुं लेहि उछंग बाला कहि परस्पर बात । प्रेम
 रस करि भरे दोऊ नैन मिलि मुसुकात ॥ रास रस कामना पूरन रैन नहिं बिहात । सूर
 प्रभु सँग ब्रज तरुणि मिलि करत सुखन सिहात ॥ ८५ ॥ राग कल्याण ॥ रच्यो रास रंग श्याम सबही
 सुख दीन्हों । मुरली सुर करि प्रकाश खग मृग सुनि रस उदास युवतिन तजि गेह वास बनहि
 गवन कीन्हों । मोहे सुर सुरनाग सुनि जन गन भए जाग शिव शारद नारदादि चकृत भए
 ज्ञानी । अमरगन अमरनारि आई लोकनि बिसारि ओक लोक त्यागि कहति धन्य धन्य बानी ॥
 थकित भयो गति समीर चंद्रमा भयो अधीर तारागन लज्जित भए मारग नहिं पावै । उलटि यमु-
 न बहति धार बिपरीत सबही बिचार सूरजप्रभु संग नारि कौतुक उपजावै ॥ ८६ ॥ राग टोडी ॥ नंद-
 कुमार रासरस कीनों । ब्रजतरुनिनि मिलिकै सुख दीनों ॥ अद्भुत कौतुक प्रगट दिखायो । कियो
 श्याम सबहिन मन भायो ॥ लेख गोपी बिच मिले गोपाल । मणिकंचन सोहति शुभमाल ॥
 राधा मोहनमध्य विराजै । त्रिभुवन श्री शोभा ये भ्राजै ॥ रास रंग रस राख्यो भारी । हाव भाव ना
 ना गति भारी ॥ रूप गुणनि करि परम उजागरि । नृत्यत अंग थकित भई नागरि ॥ उमँगि श्याम
 श्यामा उर लाई । बारंवार कह्यो श्रम पाई ॥ कंठ कंठ भुज दोऊ जेरे । घन दामिनि छूटति नहिं छोरे ॥
 सूर श्याम युवतिन सुखदाई । युवतिनके मन पूर्व बढाई ॥ ८७ ॥ राग गृही ॥ तब नागरि अति गर्व
 बढायो । मो समान त्रिय और नहिं कोउ गिरिधर मैही वश करि पायो ॥ जोइ जोइ कहति करत
 सोइ सोई पिय मेरे हित यह रास उपायो । सुन्दर चतुर और नहिं मोसी देह धरे को भाव जना-
 यो ॥ कबहुं बैठि जाति हरि कर धरि कबहुं कहति मैं अति श्रम पायो । सूर श्याम गहि

कंठ रही त्रिय कंध चढौ यह वचन सुनायो ॥ ८८ ॥ राग बिलावल ॥ कहै भामिनी कंतसों मोहिं कंध चढाहु ।
 नृत्यकरत अतिश्रम भयो ता श्रमहि मिटावहु ॥ धरणी धरत बनै नहीं पग अतिहि पिराने । त्रिया
 वचन सुनि गर्वके पिय मन मुसुकाने ॥ मैं अविगत अज अकल हौं यह मर्म न पायो । भाव
 वश्य सब पै रहौं निगमनि यह गायो ॥ एक देह द्वै प्रान हैं दुविधा नहिं यामें । गर्व कियो नर देह
 ते मैं रहौं न तामें ॥ सूरज प्रभु अंतर भए संगते तजि नारी । जहां तहां ठाढी रहौं सब घोष
 उगारि ॥ ८९ ॥ अध्याय ॥ ३० ॥ अथ श्रीकृष्णअंतर्धानलीला ॥ राग रामकली ॥ गर्व भयो ब्रजनारि को
 तबहीं हरि जाना । राधाप्यारी संग लिए भये अंतर्धाना ॥ गोपिन हरि देख्यो नहीं तब गई अकु-
 लाई । चकित होइ पूछनलगीं कहां गए कन्हवाई ॥ कोउ मर्म जानै नहीं व्याकुल सब वाला ।
 सूर श्याम ढूँढत फिरैं जित तित ब्रजबाला ॥ ९० ॥ राग विहागरो ॥ तब हरि भए अंतर्धान । जब कियो
 मन गर्व प्यारी कौन मोसी आन ॥ अति थकित भई चलत मोहन चलि न मोपै जाइ । कंठ भुज
 गहि रही यह कहि लेहु जबहि चढाइ ॥ गए संग बिसारि रिसमें विरस कीन्हों बाल । सूर प्रभु
 दुरि चरित देखत तुरत भई बेहाल ॥ ९१ ॥ राग टोडी ॥ श्याम गए युवती संग त्यागि । चकित भई
 तरुणिन संग जागि ॥ प्यारी संग लगाइ बिहारी । कुंजलता तर कतहुं डारी ॥ संग नहीं तहैं
 गिरिवर धारी । दशहुदिशा तन दृष्टि पसारी ॥ परी मुरुछि धरनी सुकुमारी । कामवैर लीन्हों
 शरमारी ॥ त्राहि त्राहि कहि कहूँ बनवारी । भई व्याकुल तनुदशा बिसारी ॥ नैन सलिल भीजी
 सब सारी । सूरसंग तजि गए सुरारी ॥ ९२ ॥ अध्याय ॥ ३१ ॥ तथा ॥ ३२ ॥ गोपी विरह ॥ राग विहागरो ॥
 व्याकुल भई घोष कुमारि । श्यामतजि संगते कहाँ गए यह कहति ब्रजनारि ॥ दशौदिश नभ द्रुम
 न देखति चकित भई बेहाल । राधिका नहिं तहाँ देखी कह्यो वाके ख्याल ॥ कछुक दुख कछु
 हरष कीन्हों कुंज लेगई श्याम । सूर प्रभुसंग मही देखो करे ऐसे काम ॥ ९३ ॥ राग घनाश्री ॥ विकल
 ब्रजनाथ वियोगन नारि । हाहा नाथ अनाथ करौ जिन टेरति बाँह पसारि ॥ हरिजूके लाड गर्व जो
 तनु सखी सकी न वचन सँभारि । जनिअतहै अपराध हमारे नहिं कछु दोष सुरारि ॥ ढूँढति वाट घाटं
 वन घन तन मुरछि नैन जलधारि । सूरदास अभिमान देहको बैठी सरवस हारि ॥ ९४ ॥ राग नट ॥
 बायें कर द्रुम टेके ठाढी । बिछोरे मदन गुपाल रसिक मोहिं विरह व्यथा तनु बाढी ॥ लोचन सजल
 वचन नहिं आवै श्वास लेति अतिगाढी । नंदलाल ऐसी हमसों करी जलते मीन धरिकाढी ॥ तब
 कित लाड लडाइ लडइते वेनी कुसुम गुहिगाढी । सूर श्याम प्रभु तुमरे दरशाबिनु अब न चलत
 दृग आढी ॥ ९५ ॥ राग सारंग ॥ अकेली भूलि परी वन माँह । कोऊ वायु वही कतहुंकी छूटिगई
 पियबाँह ॥ जहँ जहँ जाउँ तहां डर लागत डगर न पावत नाँह । सूरदास प्रभु तुमरे दरशाबिनु वेइक-
 दम वै छाँह ॥ ९६ ॥ राग विहागरो ॥ वन कुंजन चली ब्रजनारि । सदा राधा करति दुविधा देति रसकी
 गारि ॥ संगही लगई हरिको सुख करति वनधाम ॥ कहां जहँ ढूँढि लैहैं महारसकी वाम ॥
 चरण चिह्ननि चली देखति राधिका पगनाहिं । सूर प्रभु पूर परसि गोपी हरषिमन मुसुकाहिं ॥ ९७ ॥
 राग कान्हरो ॥ हँसि हँसि युवती कहति परस्पर प्यारीको र लाइ गएरी । श्याम काम तनु आतुरताई
 ऐसे वामा वश्यभए री ॥ पुनि देखति राधिका चिह्न प्रग पियपग चिह्न न पावै । की पियको प्यारी
 उर लीन्हों यह कहि भ्रम उपजावै ॥ वै गिरिधर उरधरि क्यों लेहीं वै गिरिधर उर लीन्हों । सूर भई
 आतुर ब्रजनारी पियप्यारी पग चीन्हों ॥ ९८ ॥ राग बिलावल ॥ जो देखे द्रुमके तरे मुरछी सुकुमारी ।
 चकित भई सब सुंदरी यहतौ राधानारी ॥ याही को खोजति सबै यह रही कहां री । धाइ परी सब

सुंदरी जो जहां तहां री ॥ तनकी तनकहु सुधि नहीं व्याकुल भई बाला । यहतौ अति बेहाल है
 कहां गए गोपाला ॥ बारबार बूझति सबै नहिं बोलति बानी । सूर श्याम काहे तजी कहि सब
 पछितानी ॥ ९९ ॥ राग सारंग ॥ रावे कत निकुंज ठाढी रोवति । इंदु ज्योति मुखारबिंदकी चकित चहुँ दिशि
 जोवति ॥ हुमशाखा अवलंब बेलि गहि नखसों भूमि खनोवति । मुकुलित कच तन घनकि ओट है
 अँसुवनि चीर निचोवति ॥ सूरदास प्रभु तजी गर्वते भये प्रेम गति गोवति ॥ १८०० ॥ राग भरवा ॥ क्यों
 राधा नहिं बोलतिहै । काहे धरणि परी व्याकुल है काहे नैन न खोलतिहै ॥ कनकबेलि सी बूझ
 सुरझानी क्यों बनमांझ अकेलीहै । कहां गए मनमोहन तजिकै काहे बिरह दहेलीहै ॥ श्याम नाम
 श्रवणनि ध्वनि सुनिकै सखियन कंठ लगावतिहै । सूर श्याम आए यह कहि कहि ऐसे मन
 हरपावतिहै ॥ १ ॥ राग विहागरो ॥ कहां रहे अब लौं तुम श्याम । नैन उचारि निहारि रही तहां जो देखै
 ब्रजवाम ॥ लागी करन विलाप सवनसों श्याम गए मोहिं त्यागि । तुमको नहीं मिले नैदनंदन
 बूझतिहै तब जागि ॥ निरखि बदन वृषभानु कुँवरिको मनो सुधा बिन चंद । राधा बिरह देखि
 बिरहानी यह गति बिन नैदनंद ॥ या वनमें कैसे तुम आई श्याम संगहै नाहीं । कछु जानति कहां
 गए कन्हाई तहाँ तोहिं लै जाहीं ॥ मैं हठ कियो वृथा री माई जिय उपज्यो अभिमान । सूर श्याम
 ऊपर मोहिं आनी है गए अंतर्धान ॥ २ ॥ राग विहागरो ॥ मैं अपने मन गर्व बढ़ायो । इहै कह्यो पिय
 कंध चढौंगी तब मैं भेद न पायो ॥ यह वाणी सुनि हँसे कंठभरि भुजनि उछंगि लई । तब मैं कह्यो
 कौनहै मोसी अंतर जानि लई ॥ कहाँ गए गिरिधर मोको तजि ह्याँ कैसे मैं आई । सूर श्याम अंतर
 भए मोते अपनी बूक सुनाई ॥ ३ ॥ राग विहागरो ॥ रुदन करति वृषभानुकुमारी । बार बार सखियन
 उर लावति कहां गए गिरिधारी ॥ कबहुं गिरति धरणि पर व्याकुल देखि दशा ब्रजनारी । भरि
 अँकवारि धरति मुख पोंछति देति नैन जल ढारी ॥ त्रिया पुरुषसों भाव करतिहै जाने निठुर
 मुरारी । सूर श्याम कुलधर्म आपनो लये रहत बनवारी ॥ ४ ॥ राग गौरी ॥ नैदनंदन उनको हम जानति ।
 ग्वालन संग रहत जे माई यह कहि कहि गुण गानति ॥ बन बन धेनु चरावत वासर त्रिया बधत
 डर नाहीं ॥ देखि दशा वृषभानुसुताकी ब्रजतरुणी पछिताहीं ॥ कहा भयो त्रिय जो हठ कीन्हों
 यह न बूझिए श्यामहि । सूरदास प्रभु मिलहु कृपाकरि दूरि करहु मन तामहिं ॥ ५ ॥ राग कल्याण ॥ राधिका
 सों कह्यो धीरमन धरि री । मिलेंगे श्याम व्याकुल दशा जिनि करै हरष जिय करौ दुख दूरि करि री ॥
 आपु जहँ तहँ गई बिरह सब पगिरई कुँवरि सों कहि गई श्याम ल्यावै । फिरति बन बन विकल सहस
 सोरह सकल ब्रह्मपूरन अकल नहीं पावै ॥ कहां गए यह कहति सबै मग जोवही कामतनु दहति
 ब्रजनारि भारी । सूर प्रभु श्याम दुरि चरित देखहिं सकल गर्व अंतर हृदय हेत नारी ॥ ६ ॥ राग विलावल ॥
 श्याम सवनिको देखहीं वै देखे नहीं । जहां तहां व्याकुल फिरैं तनु धीरज नाहीं ॥ कोउ
 बंशीवटको चली कोउ वन घन जोई । देखि भूमि वह रासकी जहँ तहँ पगछाहीं ॥ सदा हठीली
 लाडिली कहि कहि पछिताहीं । नैन सजल जल ढारिकै व्याकुल मनमाहीं ॥ एक एक है ढूँढहीं
 तरुनी विकलाहीं । सूरज प्रभु कहूँ नहिं मिले ढूँढति हुम पाहीं ॥ ७ ॥ राग रामकली ॥ कहि धौं री बन
 बेलि कहूँ तुम देखेहै नैदनंदन । बूझहु धौं मालती कहूँ तैं पाएहैं तनुचंदन ॥ कहि धौं कुंद कदम
 बकुल वट चंपक लता तमाल । कहि धौं कमल कहां कमलापति सुंदर नैन विशाल ॥ श्याम
 श्याम कहि कहति फिरति यह ध्वनि वृंदावन छाये री ॥ गर्व जानि पिय अंतरहै रहे सो मैं
 वृथा बढ़ायो री । अब बिन देखे कल न परत छिन । सूर सुंदर गुण गायो री । मृग मृगनी हुम

बन सारस खग काहू नहीं बतायो री॥सुरली अधरमुधारस लै तरु रहे यमुनके तीराकहि तुलसी तुम
 सब जानतिहौ कहँ घनश्याम शरीरा॥कहि धौ मृगी मयाकरि हमसों कहि धौ मधुप मराल । सूरदास
 प्रभुके तुम संगी हौ कहाँ परम दयाल ॥ ८ ॥ कहूँ न देख्यो री मधुवनमें माधौ । कहाँ धौ-
 मृग गमन कीन्हों कहाँ धौ बिलमि रहे नैन भरत दर्शनकी साधौ ॥ जबते बिछुरे श्याम तबते
 रह्यो न जाइ सुनौ सखी मेरोइ अपराधौ । सूरदास प्रभु बिनु कैसे जीवहि माई घटत घटत घटि
 मेरे प्राण आधौ ॥ ९ ॥ राग आसावरी ॥ कहूँ न पाऊँ री सब ढूँढि वन घनश्यामसुंदर परवारों तन
 मन । ननन चटपटी मेरे तबते लागी रहति कहाँ प्राणप्यारो निर्धनको धन ॥ चंपक जाइ
 गुलाब बकुल फूले तरु प्रति बूझति कहूँ देखे नैदनंदन । सूरदास प्रभु रास रसिक बिनु रास
 रसिकिनी बिरह विकल करि भईहैं मगन ॥ १० ॥ राग काफी ॥ कोऊ कहूँ देखे री नैदलाल । साँवरो
 सलोना ढोंटा नैन विशाल ॥ मोर मुकुट बनमाल रसाल । पीतांबर सोहै मोहै मन गोपाल ॥ निशि
 वनगई जहाँ सबै ब्रजबाल । अंतर्धान भए रचि ख्याल ॥ द्रुम द्रुम ढूँढत भईबेहाल । सूर
 श्याम बिनु बिरह जंजाल ॥ ११ ॥ राग सारंग ॥ तुम कहूँ देखे श्याम बिसासी नैक मुरलिका बजाइ बाँसकी
 लैगए प्राणनिकासी ॥ कबहुँक आगे कबहुँक पाछे पग पग भरत उसासी ॥ सूर श्यामके दर्शन कारण नि-
 कसी चंद्रकलासी ॥ १२ ॥ राग सारंग ॥ मोहन मोहन कहि कहि टेरै कान्ह हवौ यहि वन मेरे कहि
 यत हौ तुम अंतर्धामी पूरण कामी सब करे ॥ ढूँढतिहै द्रुम वेली बाला भई वेहाल करति अव-
 सेरें । सूरदास प्रभु रास विहारी श्रीवनवारी वृथा करत काहे झेरें ॥ १३ ॥ राग अडानो ॥ कहो कान्ह
 ए बातें हैं तिहारी बनवारी सुखही में भए न्यारे । इक सँग एक समीप रहतहैं तिन तजि कहाँ
 सिधारे ॥ अब करि कृपा मिलौ करुणामय कहियतहो सुखकरे । सूर श्याम अपराध क्षमहु
 अब समझी चूक हमारे ॥ १४ ॥ राग परागी ॥ केहि मारग मैं जाउँ सखी री मारग मुहि बिसरचो ॥ ना जानौ
 कित हैं गए मोहिं जात न जानि परचो ॥ अपनो पिय ढूँढति फिरौ री मोहिं मिलबेको चाव ।
 कांटो लाग्यो प्रेमको पिय यह पायो दाव ॥ बन डोंगरे ढूँढति फिरी घरमारग तजि गाउँ । बूझों
 द्रुम प्रति खख राय कोउ कहै न पियको नाउँ ॥ चकित भई चितवत फिरी व्याकुल अतिहि
 अनाथ । अबकै जो कैसेहुँ मिलौ तौ पलक न तजिहौ साथ ॥ हृदय माहँ पिय घर करौ री नैनन बैठक
 देउँ । सूरदास प्रभु सँग मिलौ बहुरि रास रस लेउँ ॥ १५ ॥ राग श्रीराग ॥ कान्ह प्यारो कहूँ पायो री श्याम
 श्याम कहि कहति फिरति यह ध्वनि वृन्दावन छायो री ॥ गर्व जानि पिय अंतर है रहे सौ मैं वृथा
 बढ़ायो री । अब बिनु देखे कल न परत छिन श्यामसुंदर गुण रायो री ॥ मृग मृगिनी द्रुम वन सारस
 खग काहू नहीं बतायो री ॥ सूरदास प्रभु मिलहु कृपाकरि युवातिन टेरि सुनायो री ॥ १६ ॥ राग विहागरो ॥
 हो कान्ह मैं तुम्हें चाहौं तुम काहे ना आवो ॥ तुम धन तुम तन तुम मन भावो ॥ कियो चाहौं अरस परस
 करौ नहिं माना । सुन्यो चाहौं श्रवण मधुर मुरलीकी ताना ॥ कुंज कुंज जपति फिरी तेरे गुण
 नकी माला । सूरदास प्रभु वेगि मिलौ मोहिं मोहन नैदलाल ॥ १७ ॥ राग काफी ॥ सखी मोहिं
 मोहन लाल मिलवै । ज्यों चकोर चंदाको इकटक भृंगी ध्यान लगावै ॥ बिनु देखे मोहिं कल
 न परै री यह कहि सबन सुनावै । बिन कारण मैं मान कियो री अपनेहि मन दुखपावै ॥ हाहा करि
 करि पाँइन परि परि हरि हरि टेर लगावै । सूर श्याम बिनु कोटि करौ जो और नहीं जिय आवै ॥
 ॥ १८ ॥ राग आसावरी ॥ हौं तौ ढूँढि फिरि आई री माई री सिंगरो वृन्दावन कहूँ नहीं पाए री नैदनंदन ॥ अन-
 तहि रहे जाइ कौन धौ राखे छपाई मोको न कइ सुहाइ कहाँ जाइ रहे कामकंदन ॥ मोहिंते परी री चूक

अंतर भए हैं जाते तुमसों कहति बातें मैंहीं कियो द्रंदन । सूरदास प्रभु बिनु भईहैं
 बिकल आली कहां रहे बनमाली सुर नर सुनि जन बंदन ॥ १९ ॥ राग बिलावल ॥ मिलहु
 श्याम मोहि चूक परी । तेहि अंतर तनुकी सुधि नाही रसना रट लागी न टरी ॥
 धरणि परी व्याकुल भई बोलति लोचन धारा अंसु झरी । कबहुँ मगन कबहुँ सुधि आवति शरन
 शरन कहि बिरह जरी ॥ कृष्ण कृष्ण करि टेरि उठति है युगसम बीतत पलक घरी । सूर निर-
 खि ब्रजनारि दशा यह चकित भई जहँ तहां खरी ॥ २० ॥ देखि दशा सुकुमारिकी युवती म-
 धाई । तरु तमाल बूझति फिरैं कहि कहि सुरझाई ॥ नंदनंदन देखे कहूँ मुरली कर धारी । कुंडल
 मुकुट विराजई तनु कुंडल भारी ॥ लोचन चारु बिलास हैं नासा अति लोनी । अरुण अधर दशना-
 वली छवि वरुण कोनी ॥ विंव पँवारे लाजहीं दामिनि छुति थोरी । ऐसे हरि हमको कहौ कहूँ
 देखेहौं री ॥ अंग अंग छवि कहा कहै देखे बनि आवै सुर सुगुणै खाइ अख क्यों स्वाद बतावै ॥ २१ ॥
 ॥ राग बिलावल ॥ अति व्याकुल भई गोपिका ढूँढति गिरिधारी । बूझति है बन बेलिसों देखे बनवारी ॥
 जाहीजूही सेवती करना कनिआरी । बेलि चमेली मालती बूझति द्रुमडारी ॥ खूझा मरुआ कुंद
 सों कहै गोद पसारी । बकुल बहुलि बट फंदमपै ठाढी ब्रजनारी ॥ बार २ हाहा करैं कहूँ हौ
 गिरिधारी । सूर श्यामको नाम लै लोचन जल डारी ॥ २२ ॥ कहूँ न पावैं श्यामको
 बूझत बन बेली । सवै भई व्याकुल फिरैं तन मदन दहेली ॥ मृगनारीसों बूझहीं बूझैं सुकुमारी ।
 कमल सरोवर बूझहीं विरहा तनु भारी ॥ कनक बेलिसी सुंदरी द्रुमके तर डारी । मानों दामिनि
 धरणि परी की सुधा पनारी ॥ इत उतते फिरि आवहीं जहँ राधा प्यारी । सूर श्याम अजहूँ नहीं
 करि मिलत कृपा री ॥ २३ ॥ राग विहागरे ॥ करतिहैं हरि चरित्र ब्रजनारि । देखि अतिही बिकल
 राधा इहै बुद्धि बिचारि ॥ एक भई गोपालको वपु एक भई बनवारि । एक भई गिरिधरन समरथ
 एक भई दैत्यारि ॥ एक भई वे धेनु बछरा एक भई नंदलाल । एक भई जमला उधारन इक त्रिभंग
 रसाल ॥ एक भई छवि राशि मोहन कहत राधा नारि । एक कहति उठि मिलहु भुजभरि सूर
 प्रभु री प्यारि ॥ २४ ॥ राग जैतश्री ॥ सुनत ध्वनि श्रवण उठी अकुलाइ । जो देखै नंदनंदनहीवै सखियन
 भेष बनाइ ॥ कहा कपट करि मोहिं देखावति कहां श्याम सुखदाइ । कृष्ण कृष्ण शरणागत कहि
 कै बहुरि गिरी भहराइ ॥ पुनि दौरी जहँ तहँ ब्रजवाला बन द्रुम शोर लगाइ । सूरदास प्रभु अंत-
 र्यामी बिरहिनि लेहु जिवाइ ॥ २५ ॥ राग कान्हरो ॥ कृपासिंधु हरि क्षमा करौ हो । अनजाने मन गर्व
 बढ़ायो सो अपने जिनि हृदय धरौ हो ॥ सोरह सहस पीर तन एकै राधा जिव सब देह ।
 ऐसी दशा देखि करुणामै प्रगट्यो हृदय सनेह ॥ गर्व हत्यो तनु बिरह प्रकाश्यो प्यारी
 व्याकुल जानि । सुनहु सूर अब दर्शन दीजै चूक लई इनि मानि ॥ २६ ॥ राग केदारो ॥ अहो तुम
 आनि मिलौ नंदलाल । दुर्बल मलिन फिरत हम बन बन तुम बिनु मदनगोपाल ॥ द्रुम
 बेली पृच्छति सब उझकति देखति ताल तमाल । खेलत रास रंग भरि छाँड़ी ले जु गये एकबाल ॥
 सूरदास सब गोपी पछिली क्रीड़ा करति रसाल । गोपी वृंदमध्य जगजीवन प्रगट भए तेहिकाल ॥
 ॥ २७ ॥ हरिविनु लागतहै बन सूनो । ढूँढति फिरति सकल ब्रजयुवती दहत काम दुखदूनो । तजि
 सुत पति सुनि श्रवणनिधाई मुरलिनादमृदु कीनों ॥ व्यापत मकर मीन अति आतुर मनहुँ मीन
 जल हीनो । चितवति चकित दिशान दिश हेरति मनमोहन हरलीनो । द्रुम बेली पूछे सब सुंदरि
 नवल जात कहूँ चीनो ॥ कदली बोट निचोरत अंचल अधर सुधारस पीनो । सूर श्याम प्रियप्रेम

उमँगि रस हैसि आलिंगन दीन्हों ॥ २८ ॥ राग बिहागरो ॥ राधे भूलिरही अनुराग । तरु तरु रुदन करत
 मुरझानी ढूँढि फिरी बनबाग ॥ कुँवरि असित श्रीखंड अहित भ्रम चरण शिलीमुख लाग । बाणी मधुर
 जानि पिक बोलत कदम करारत काग ॥ कर पल्लव किसलय कुसुमाकर जानि असित भए कीर ।
 राका चंद्र चकोर जानकै पिवत नैनको नीर ॥ व्याकुल दशा देख जगजीवन प्रगट भए तेहि काल ।
 सूर श्याम हित प्रेम अंकुर उर लाइ लई भुज बाल ॥ २९ ॥ राग कल्याण ॥ न्याय तजी श्यामा गो-
 पाल । थोरी कृपा बहुत करि मानी पांवर बुधि ब्रजबाल ॥ मैं कछु कपट सबनसों कीन्हों अपयशते
 न डरोना । हम एकही संग एकहि मत सबकोउ नहिं बिलगानी ॥ हम चातक घन नैदन्दन
 बरषन लागे हित कीन्हों । तुबडी प्रबल पवन सम सजनी प्रेमबीच दुख दीनो ॥ जानि दीन दुखी
 सब सुखके निधि मोहन बेनु बजायो । सूर श्याम तब दरश परश करि मिलि संताप नशायो ॥
 ॥ ३० ॥ राग कान्हरो ॥ प्रगट भए नैदन्दन आई प्यारी निरखि विरह अति व्याकुल करते लई उठाई ॥
 उभय भुजा भरि अंकम दीन्हों राखी कंठ लगाइ । प्राणहुते प्यारी तुम मेरे यह कहि दुख बिसराइ ॥
 हैसत भए अंतर हम तुमसों सहज खेल उपजाइ । धरणी मुरझि परी तुम काहे कहाँ गई चतुराइ ॥
 राधा सकुचि रही मन जान्यो कह्यो न कछु सुनाइ । सूरदास प्रभु मिलि सुख दीन्हों दुख डारयो
 बिसराइ ॥ ३१ ॥ राग कान्हरो ॥ नैदन्दन उर लाइ लई । नागरि प्रेम प्रगट तनु व्याकुल तब करुणा हरि
 हृदय भई । देखि नारि तरुतर मुरझानी देहदशा सब भूलि गई । प्रिया जानि अंकम भरि लीन्हीं
 कहि कहि ऐसी काम हई ॥ वदन बिलोकि कंठ उठिलागी कनकवेलि आनंद जई । सूर श्याम फल
 कृपादृष्टि भए अतिहि भए आनंद मई ॥ अध्याय ३३ ॥ श्रीकृष्णमिले गोपिनको फेर रास लीला व जलक्रीडा ॥
 राग सही ॥ अंतर ते हरि प्रगट भए । रहत प्रेमके वश्य कन्हाई युवातिनको मिलि हर्ष दए ॥ वैसहि
 सुख सबको फिरि दीन्हों उहै भाव सब मानिलियो । वह जानति हरिसंग तबहिते उहै बुद्धि सब
 उहै हियो ॥ उहै रासमंडल रस जानति बिच गोपी बिच श्याम धनी ॥ सूर श्याम श्यामा मधि नायक उहै
 परस्पर प्रीति बनी ॥ ३२ ॥ राग सारंग ॥ बहुरि श्याम सुख रास कियो । भुज भुज जोरि जुरी ब्रजबाला
 वैसेही रस उमँगि हियो ॥ वैसहि मुरलीनाद प्रकाश्यो वैसहि सुर नर वश्य भए । वैसे उडुगण
 सहित निशापति वैसेहि मारग भूलि गए ॥ वैसेहि दशा भई यमुनाकी वैसेहि गति जति पवन थक्यो ।
 वैसेहि नृत्य तरंग बढायो वैसेहि बहुरो काम जक्यो ॥ उहै निशा वैसेहि मन युवती वैसेही हरि सबनि
 भजे ॥ सूर श्याम वैसेहि मनमोहन वैसेहि प्यारी निरखि लजे ॥ ३३ ॥ राग बिहागरो ॥ श्यामछबि निरखत नागरि
 नारि । प्यारी छबि निरखत मनमोहन सकत न नैन पसारि ॥ पिय सकुचत नहिं दृष्टि मिलावत सन्मुख
 होत लजात । श्रीराधिका निडरि अवलोकत अतिहि हृदय हरपात ॥ अरस परस मोहनि मोहन
 मिलि संग गोपी गोपाल । सूरदास प्रभु सब गुण लायक दुश्मनके उर शाल ॥ ३४ ॥ रची रस
 रास श्याम सुजान । प्रथम मुरली नाद करि हरि हरयो सबको ज्ञान ॥ सबनि उलटी रीति कीन्हों
 देव सुर नर आदि । ब्रजबधू मन काम पूरण कियो पुरुष अनादि ॥ सहज सुखनिशि ग्वाल सोवत
 सो रची षटमास । हेतु युवती सुख बढोवन कियो पूरण आस ॥ मेटि अंतर्धानको दुख उहै राख्यो
 भाउ । सूर प्रभु महिमा अगोचर निगम अंत न पाउ ॥ ३५ ॥ राग नट ॥ मोहन रच्यो अद्भुत रास । संग
 मिलि वृषभानु तनया गोपिका चहुँ पास ॥ एकही सुर सकल मोहे मुरलि सुधाप्रकाश । जलहु
 थलके जीव थकिरहे मुनिन मनहि उदास ॥ थकित भए समीर सुनिकै यमुना उलटी धार ।
 सूर प्रभु ब्रजवाम मिलि मन निशा करत बिहारा ॥ ३६ ॥ बिहरत रासरंग गोपाल । नवल श्यामहि संग

शोभित नवल सब ब्रजवाल ॥ शरद निशि अति नवल उज्ज्वल नवलता वनधाम । परम निर्मल
 पुलिन यमुना कल्पतरु विश्राम ॥ कोश द्वादश रासपरमिति रच्यो नंदकुमार । सूर प्रभु सुख
 दियो निशि रमि कामकौतुक हार ॥ ३७ ॥ राग मलार ॥ रास रम श्रमि भई ब्रजवाल निशि सुख दै यमुना
 तटलै गए भोर भयो तेहि काल ॥ मन कामना भए परि पूरण रही न एकौ साध । षोडससहस नारि संग
 मोहन कीन्हों सुख आगाध ॥ यमुना जल विहरत नंदनंदन संग मिली सुकुमार । सूर धन्य धरनी वृंदा
 वन रवितनया सुखकारि ॥ ३८ ॥ राग गुंडमलार ॥ संग ब्रजनारि हरि रास कीन्हों । सबन की आश परन की
 श्यामले त्रियनि पियहेत सुख मानि लीन्हों ॥ भेटि कुलकानि मर्याद विधि वेदकी त्यागि गृहनह सुनि
 बैनवाई । फवी जैजै करी मनहि सब जे धरी शंक काहुन करी आप माई ॥ ज्यों महामत्त गजयूथ कर
 नीलिए कूल सरकोरि डर कही मानैं । सूर प्रभु नंद सुत निदरि निशि रस करयो नाग नरलोक
 सूर सबै जानैं ॥ ३९ ॥ अथ जलक्रीडा ॥ राग गुंडमलार ॥ रैन रस रास सुख करत बीती । भोर भए गए
 पावन यमुनके सलिल न्हात सुख करत अति बढी प्रीती ॥ एक-इक मिलति हैंसि एक हरि संग
 रसि एक जल मध्य इक तीर ठाढी । एक इक डरति एक इक भरि कै चलति एक सुख लरति
 अति नेह बाढी ॥ काहु नहि डरति जल थलहु क्रीडा करति हरति मन निडरि ज्यों कंत नारी ।
 सूर प्रभु श्याम श्यामा संग गोपिका मिठी तनुसाध भई मगन भारी ॥ ४० ॥ राग गौरी ॥ यमुनजल
 क्रीडत हैं नंदनंदन । गोपीवृंद मनोहर चहुँ दिश मध्य अरिष्ट निकंदन ॥ पकरे पाणि परस्पर छिर
 कत शिथिल सलिल भुजचंदन । मानों युवति पूजि अहिपतिको लग्यो अंक दै वंदन ॥ कुच भरि
 कुटिल सुदेश अंबुकनि चुवति अग्रगति मंदन । मानहु भरि गंडूष कमलते डारत अलि आनं-
 दन ॥ भुजभरि अंक अगाध चलत लै ज्यों लुब्धक खग फंदन । सूरदास प्रभु सुयश बखा-
 नत नेति नेति श्रुति छंदन ॥ ४१ ॥ राग कान्हरो ॥ विहरत हैं यमुनाजल श्याम । राजत हैं दोउ बांहां
 जोरी दंपति अरु ब्रजवाम ॥ कोउ ठाढी जल जानु जंघलों कोउ कटि हिरदै श्रीव । यह सुख ब
 रणि सकै ऐसो को सुंदरताकी सीव ॥ श्याम अंग चंदनकी आभा नागरि केसरि अंग । मल-
 यज पंक कुमकुमा मिलिकै जल यमुना इक रंग ॥ निशि श्रम मिथ्यो मिथ्यो तनु आलस परसि य-
 मुन भई पावन । सूर श्याम जल मध्य युवति गन जन जनके मनभावन ॥ ४२ ॥ जलक्रीडा
 सुख अति उपजायो । रास रंग मनते नहि धूलत उहै भेद मन आयो ॥ युवती कर करजोरि
 मंडली श्याम नागरी बीच । चंदन अंग कुमकुमा छूटत जलमिलि तट भई कीच ॥ जो सुख श्याम
 करत युवती संग सो सुख तिहुँ पुर नहि । सूर श्याम देखत नारिनको रीझि रीझि लपटाहीं ॥ ४३ ॥
 ॥ राग विलावल ॥ विहरत नारि हंसत नंदनंदन । निर्मल देह छूटि तनु चंदन ॥ अति शोभा त्रिभुवन
 जन वंदन । पावत नहि गावत अति छंदन ॥ कंचन पीठ नारि अति शोभा । वे उनको वे उनको
 लोभा ॥ कबहुँ अंकभरि चलत अगाधहि ॥ अरस परस भेटत मन साधहि ॥ कोउ भाजै कोउ
 पाछे धावै । युवतिनसों कहि ताहि मँगावै ॥ ताको गहि अथाह जल डारैं । मुख व्याकुलता रूप
 निहारैं ॥ कंठ लगाइ लेत पुनि ताही । देत अलिंगन रीझत जाही ॥ सूर श्याम ब्रजयुतिन भोगी ।
 जाको ध्यावत शिव मुनि योगी ॥ ४४ ॥ राग ढोडी ॥ ऐसे श्याम वश्य राधाके । नाम लेत पावन आधाके ॥
 प्यारी श्याम अंजली डारै । वा छबिको चितलाइ निहारै ॥ मनो जलद जलडारत डारै । मन
 मनही तन मन धन वारै ॥ निरखि रूप नहि धीर सम्हारै । सूर श्यामके अंकम धारै ॥ ४५ ॥
 राग ललित ॥ राधे छिरकति छींट छबीली । कुच कुमकुम कंचुकि बँद टूटे लटक रही लटगीली ॥ बंदन

शिर ताटक गंड पर रतन जटित मणिलीली । गति गयंद मृगराज सुकटिपर शोभित किंकिणी
 ढीली ॥ मच्यो खेल यमुना जल अंतर प्रेम सुदित रस झीली । नंदसुवन भुज ग्रीव विराजत भाग
 सुहाग भरीली ॥ वर्षत सुमन देवगण हर्षित दुंदुभि सरस बजीली । सूर श्याम श्यामा रस क्रीडत
 यमुन तरंग थकीली ॥ ४६ ॥ राग रामकली ॥ श्याम श्यामा सुभग यमुना जल निर्भ्रम करत बिहार ।
 पीत कमल इंदीवर पर मनो भोरहि भए निहार ॥ श्रीराधा अंजुज कर भरि भरि छिरकत बारंवार ।
 कुचकुलता मकरंद झरत मनु हालत पवन संचार ॥ अतसीकुसुम कलेवर बूँदै प्रति बिंबत
 निरधार । ज्याति त्रकाश सुघनमें खोलत स्वाति सुवन आकार ॥ धाड़ धरे वृषभानु सुता
 हरि मोहे सकल शृंगार । विद्रुम जलद सूर मनो विधु मिलि स्रवत सुधाकी धारा ॥ ४७ ॥ राग रामकली ॥
 यमुनजल गिरिधर करत बिहार । इत उत गोपवधू मिलि छिरकत हस्तकमल सुखसार ॥ काहुकी
 कंचुकी छूटी काहुके बिथुरे हैं बार । काहु खुभी काहु नकबेसरि काहुके टूटे हैं हार ॥ सूरदास
 कहँलौं बरणौं मैं लीला अगम अपार ॥ ४८ ॥ रीझे श्याम नागरी रूपतैसी ये लट बगरीं ऊपर स्रवत नीर
 अनूप । स्रवत जल कुच परत धारा नहीं उपमा पार । मनो उगलत राहु अमृत कनक गिरिपर धार ॥
 उरज परसत श्याम सुंदर नागरी सरमाइ । सूर प्रभु तनकाम व्याकुल गए मननि जनाइ ॥ ४९ ॥
 राग सारंग ॥ देख री उमँग्यो सुख आज । जल बिहार बिनोद सुखरुचि रतनको है साज ॥ भीजे पट
 लपटयो सुभग उर रही केसर जयन । अरस परस स्वभाव मानो जगे निशिके नयन ॥ कछुक कुं-
 चित केश माई सरस शोभा भयो । सुभग राजत कामदुमको मनो अंकुर नयो ॥ युवति गण सब
 यूथ जितकित भरत अंचल नीर । सूर सुभग गोपाल तन ब्रज सुखद श्याम शरीर ॥ ५० ॥
 ॥ राग रामकली ॥ श्यामा श्याम अंकम भरी । उरज उर परसाइ भुज भुज जोरि गाढे धरी ॥ तुरत मन
 सुख मानि लीन्हों नारि तेहि रँग ठरी । परस्पर दोउ करत क्रीडा राधिका नव हरी ॥ ऐसही सुख
 दियो मोहन सबै आनंद भरी । करति रंग हिलोर यमुना प्रेम आनंद झरी ॥ रास निशि श्रम दूरि
 कीन्हों धन्य धनि यह धरी । सूर प्रभु तट निकसि आए नारि संग सब खरी ॥ ५१ ॥ राग गूजरी ॥
 ठाढ़े श्याम यमुना तीर । धन्य पुलिन पवित्र पावन जहां गिरिधर धीर ॥ युवति बनि बनि गई
 ठाढी और पहिरे चीर । राधिका सुख श्याम दायक कनक बरन शरीर ॥ लाल चोली नील डँडि
 आ संग युवतिन भीर । सूर प्रभु छबि निरखि रीझे मगन भयो मन कीर ॥ ५२ ॥ राग नट ॥
 ललकत श्याम मन ललचात । कहत हैं घर जाहु सुंदरि मुख न आवत बात ॥ षट सहस्र दश गो-
 पकन्या रैनि भोगी रास । एक छिन भई कोउ न न्यारी सबनि पुरई आस ॥ बिहँसि सब घर घर पठाई
 ब्रजगई ब्रजवाल । सूर प्रभु नंदधाम पहुँचे लख्यो काहु न ख्याल ॥ ५३ ॥ राग विलावल ॥ ब्रजवासी सब
 सोवत पाए । नंदसुवन मति ऐसी ठानी घरलोगन उन जाइ जगाए ॥ उठे प्रात गाथा मुखभाषत आतुर
 रैनि बिहानी । ऐंडत अंग जम्हात वदनभरि कहत सबै यह बानी ॥ जो जैसे सो तैसे लागे अपने अपने
 काज । सूर श्यामके चरित अगोचर राखी कुलकी लाज ॥ ५४ ॥ राग जैतश्री ॥ ब्रज युवती रस रास
 पली । कियो श्याम सबको मनभायो निशि रतिरंग जगी ॥ पूरण ब्रह्म अकल अविनाशी सबनि
 संग सुख दीन्हों । जिनती नारि भेष भए तितने भेद न काहु चीन्हों ॥ वह सुख टरत न काहु
 मनते पतिहित साध पुराई । सूर श्याम दूलह सब दुलहिनि निशि भांवारि दै आई ॥ ५५ ॥ राग सोरठा ॥
 साध नहीं युवतिन मन राखी । मनबांछित सबन फल पायो वेद उपनिषद साखी ॥ भुजभरि मिलि
 कठिन कुच चापे अधर सुधारस चाखी । हावभाव नैनन सैनन दै वचन रचन मुख भाषी ॥ शुक्र

भागवत प्रगट करि गायो कछु न दुविधा राखी । सूरदास ब्रजनारि संग हरि बाँकी रही न
 कोऊ काखी ॥ ५६ ॥ राग कान्हरो ॥ धनि शुक्र मुनि भागवत बखान्यो । गुरुकी कृपा भई जब पूरण तब
 रसना कहि गान्यो ॥ धन्य श्याम वृन्दावनको सुख संत मयाते जान्यो । जो रस रास रंग हरि कीन्हें
 वेद नहीं ठहरान्यो ॥ सुर नर मुनि मोहित सब कीन्हें शिवहि समाधि अलान्यो । सूरदास तहां
 नैन बसाए और न कहूँ पतयान्यो ॥ ५७ ॥ राग धनाश्री ॥ शरद सोहाई आई राति । दह दिशि फूलि रही
 बन जाति ॥ देखिं श्याम मन अति सुख भयो ॥ शशिगो मंडित यमुना कूल । बरषद सुखिनी
 सदा फल फूल ॥ त्रिविध पवन दुखदवनहै ॥ श्रीराधा खन बजायो बैन । सुनि ध्वनि गोपिन उप-
 ज्यो मैन ॥ जहां तहांते उठि चली ॥ चलत न काहुहि कियो जनाव । हरि प्यारीसों बाढ्यो भाव ॥
 रास रसिक गुण गाइहो ॥ १ ॥ घर डर बिसरयो बढ्यो उछाह । मन चीते हरि पायो नाह ॥
 ब्रजनायक लायक सुने ॥ दूध पूतकी छांडी आश । गोधन भरता करे निराश ॥ साँचि हित हरिसों
 कियो ॥ खान पान तनुकी न सँभार । हिलग छँडाई गृह व्यवहार ॥ सुधि बुधि मोहन
 हरि लई ॥ अंजन मंजन अँगन शृंगार । पट भूषण छूटे शिर बार ॥ रास रसिक गुण गाइहो
 ॥ २ ॥ एक दुहावतते उठि चली । एक सिरावत मग महुँ मिली ॥ उतसहकंठा
 हरिसों बढी ॥ उफनत दूध न धरयो उतारि । सीझी थूली चूल्हे दारि ॥ पुरुष तात
 ज्यों जेवतहुते ॥ पय प्यावत बालक धरि चली । पतिसेवा तजि करी न भली ॥ धरयो रह्यो
 जेवन जिते ॥ तेल उबटना त्याग्यो दूरि । भागन पाई जीवन सूरि ॥ रासरसिक गुण गाइहो ॥ ३ ॥
 अंजतही इक नैन विसारयो । कटि कंचुकि लहँगा उर धारयो ॥ हार लपेटयो चरणनसों ॥ श्रवण
 न पहिरे उलटे तार ॥ तिरनी पर चौकी शृंगार ॥ चतुर चतुरता हरिलई ॥ जाको मन जहां अटके
 जाइ ॥ ता वनिताको कछु न सोहाई । कठिन प्रीतिको फंदहै ॥ श्यामहि सूचत मुरलीनाद ।
 सुनि धुनि छूटे विषै सवाद ॥ रासरसिक गुण गाइहो ॥ ४ ॥ एक मात पित रोकी आनि । सही
 न हरि दरशनकी हानि ॥ सबहीको अपमानकै ॥ जाको मनमोहन हरि लियो । ताको काहु कछु ना
 कियो ॥ ज्यों पतिसों त्रिय रतिकरै ॥ जैसे सरिता सिंधुहि भजै । कोटिक गिरि भेदत नहीं लजै ॥
 तैसी गति तिनकी भई ॥ इक जे घरते निकसी नहीं । हरि करुणा करि आये तहीं ॥ रासरसिक गुण
 गाइहो ॥ ५ ॥ निरस कबौं न कहैं रसरीति । रसिकहि लीला रसपर प्रीति ॥ यह मत शुक्रमुख जानिवो ॥
 ब्रजवनिता पहुँची पियपास । चितवत चंचल भुकुटिबिलास ॥ हँसि बूझी हरि मान दै ॥ कैसे आई
 मारग माझ । कुलकी नारि न निकसै सांझ ॥ कहा कहैं तुम योगहो ॥ ब्रजकी कुशल कहौ बड-
 भाग । क्यों तुम छाँडे सुवन सोहाग ॥ रासरसिक गुण गाइहो ॥ ६ ॥ अजहं फिंरि अपने घर जाहु ।
 परमेश्वर करि मानों नाहु ॥ बनमें निशि बसिए नहीं ॥ श्रीवृन्दावन तुम देख्यो आइ । सुखद कुमो-
 दिनि प्रफुलित जाइ । यमुनाजल सीकर घनो ॥ घरमहँ युवती धर्महि फवै । ताबिन सुतपति दुःखित
 सबै ॥ यह विधना रचना रची ॥ भरताकी सेवा सतसार । कपट तजै छूटे संसार ॥ रासरसिक
 गुण गाइहो ॥ ७ ॥ विरध अभागी जो पति होई । मूरख रोगी तजै न जोई ॥ पतित बिलक्षक छाँडि-
 ए ॥ तजि भरता रहि जा रहि लीन । ऐसी नारि न होइ कुलीन ॥ यश विहीन नरकहि परै ॥ बहुत
 कहा समुझाऊँ आज । हमहुँ कछु करिवे गृहकाज ॥ हमतेको अति जानतहै ॥ श्रीमुख वचन सुनत
 बिलखाइ । व्याकुल धरणि परी मुरझाइ ॥ रासरसिक गुण गाइहो ॥ ८ ॥ दारुण चिंता बढी न थोर ।
 क्रूरवचन कहे नंदकिशोर ॥ और शरन सूझै नहीं ठौर ॥ रुदन करत नदी बढी गँभीर । हरि

करि आनहि जानै पीर । कुच थंभन अवलंबहै ॥ तुम्हरी रही बहुत पिय आश । बिन अराध
न करहु निराश ॥ कैतौ रुखाई छाँडिये ॥ निटुर वचन जिनि बोलहु नाथ । निजदासी जिनि करहु
अनाथ ॥ रासरसिक गुण गाइहो ॥ ९ ॥ मुख देखत मुख पावत नैन । श्रवण सिरात
सुनत मृदु बैन ॥ सैन नहीं सरवस हरयो ॥ मंदहँसनि उपजायो काम । अघरसुधा ध्वनि
करि विश्राम ॥ वरषि सींचि विरहानला ॥ मुरली सुनतै भई सवाई । तबते और
आनखें मोड़ाइ ॥ कहौ घोष हम जाहिं क्यों ॥ सजन बंधु को करिहौ कानि । तुम बिछुरत पिय
आतमहानि ॥ रास रसिक गुण गाइहो ॥ १० ॥ बेनु बजाइ बुलाई नारि । सहि आई कुल सबकी
गारि ॥ मन मधुकर लंपट भयो ॥ सोऊ सुंदरि चतुर सुजान । आरज पंथ सुनै तजि गान ॥ तिन
देखत पुरुष उँ लजै ॥ बहुत कहा वरणों यह रूप । और न त्रिभुवन शरण अनूप ॥ बलिहारी या
राति की ॥ सुन मोहन बिनती दै कान । अपयश होइ किये अपमान ॥ रास रसिक गुण गाइहो ॥
॥ ११ ॥ तुम हमको उपदेश्यो धर्म । ताको कछु न पायो मर्म ॥ हम अबला मतिहीन हैं ॥ दुख
दाता सुत पति गृह बंधु । तुम्हरी कृपा बिनु सब जग अंधु ॥ तुमते प्रीतम औरको ॥ तुमसों प्रीति
करहिं जे धीर । तिनहि न लोक वेदकी पीर ॥ पाप पुण्य तिनके नहीं ॥ आशापाश बैधी हम बाल ।
तुमहि विमुख हैहैं बेहाल ॥ रास रसिक गुण गाइहो ॥ १२ ॥ विरद तुम्हारो दीनदयाल । कर
सों कर धरि करि प्रतिपाल ॥ भुजदंडनि खंडहु व्यथा ॥ जैसे गुणी देखावै कला । कृपण कबहुँ नहिं
मानै भला ॥ सदय हृदय हमपर करौ ॥ ब्रजकी लाज बडाई तोहि । करहु कृपा करुणा करि जोहि ॥
तुमहिं हमारे गति सदा ॥ दीन वचन जब युवतिन कहे । सुनत वचन लोचन जल बहे ॥ रास रसि
क गुण गाइहो ॥ १३ ॥ हँसि बोले हरि बोली बोडि । करजोरे प्रभुता सब छोडि ॥ हौं असाध तुम
साध हौ ॥ मो कारण तुम भई निशंक । लोक वेद बपुरा को रंक ॥ सिंह शरन जंबुक बसै ॥ बिन दम
कनहौं लीन्हो मोल । करत निरादर भई न लोल ॥ आवहु हिलिमिलि खेलिये ॥ ब्रजयुवतिन
घेरे ब्रजराज । मनहुँ निशाकर किरन समाज ॥ रास रसिक गुण गाइहो ॥ १४ ॥ हरि मुख देख
त भूले नैन । उर उमँगै कछु कहत न बैन ॥ श्यामहि गावत काम वश ॥ हँसत हँसावत करि परि-
हास । मनमें कहत करै अबरास ॥ अंचल गहि चंचल चल्यो ॥ ल्यायो कोमल पुलिन मैझार ।
नख शिख भूषण अंग सँवारा ॥ पट भूषण युवतिन सजे ॥ कुच परसत पुजई सब साधा ॥ राससागर मनो
मदन अगाध ॥ रासरसिक गुण गाइहो ॥ १५ ॥ रसमें विरस जु अन्तर्धान । गोपिनके उपजै
अभिमान ॥ बिरह कथामें कौन मुख ॥ द्वादश कोश रास परमान । ताको कैसे होत बखान ॥ आस
पास यमुना हिली ॥ तामें मान सरोवर ताल । कमल विमल जल परम रसाल ॥ सेवहिं खग मृग
सुखभरे ॥ निकट कल्पतरु बंशीबटा । श्रीराधा रति कुंजनि अटा ॥ रास रसिक गुण गाइहो ॥
॥ १६ ॥ नव कुमकुम रज वरषत जहां । उडत कपूर धूरि तहैं तहां ॥ और फूल फल को
गनै ॥ तहां घनश्याम रास रस रच्यो । मर्कतमणि कंचनसों खच्यो ॥ अद्भुत कौतुक प्रगट
कियो ॥ मंडल जोरि युवति जहां बनी । दुहुँ दुहुँ बीच श्याम घन धनी । शोभा कहत न
आवई ॥ घूँघट मुकुट विराजत शीस । शोभित शशि मनो सहस बतीस ॥ रास रसिक गुण गाइहो ॥
॥ १७ ॥ मणि कुंडल ताटक बिलोल । बिहँसत लज्जित ललित कपोल ॥ अलक तिलक बेसरि
बनी ॥ कंठशिरी गजमोतिन हार । चंचरि चुरि किंकिणि झनकार ॥ चौकी चमकति उरलगी ॥
कौस्तुभमणि राजति रुचिपोति । दशन दमक दामिनि ते ज्योति ॥ सरस अघर पल्लव बने ॥ चिबुक

मध्य श्यामल रुचि बिंद । देखि सवनि रीझे गोविंद ॥ रास रसिक गुण गाइहो ॥ १८ ॥ सचन
 विमान गगन भरि रहे । कौतुक देखन अमर उमहे ॥ नैन सुफल सबके भए ॥ बाजे देवलोक नीसा
 न । वरपत सुमन करत सुर गान ॥ मुनि किन्नर जय जय ध्वनि करै ॥ युवतिन बिसरे पति गति गेह ।
 प्रेममगन सब सहित सनेह ॥ यह सुख हमको हो कहां ॥ सुंदरता सब सुखकी खानि । रसना एक
 न परत बखानि ॥ रास रसिक गुण गाइहो ॥ १९ ॥ नील कंचुकी मांडनिलास । भुजनि नवै आभू-
 षण माल ॥ पीत पिछौरी श्यामतनु ॥ अँगुरिन सुंदरी पहुँची पानि । कछि कटि कछिनी किंकिनी
 वानि ॥ उर नितंब वेनी तुरै ॥ नाराचंदन सूथन जंचन । पाँयन नूपुर बाजत सचन ॥ नखन महा
 वर खुलिरह्यो ॥ श्रीराधा मोहन मंडल माँझ । मनहु विराजत चंदा साँझ ॥ रास रसिक गुण
 गाइहो ॥ २० ॥ पग पटकत लटकत लट बाहु । मटकत भौहन हस्त उछाहु ॥ अंचल चंचल
 झूमका ॥ दुरि दुरि देखत नैनन सैन । सुखकी हँसी कहत मृदु बैन ॥ मंडित गंड प्रस्वे-
 दकण ॥ चौरी डोरी विंगलित केश । झूमत लटकत मुकुट सुदेश ॥ फूल खसत शिरतेघने ॥
 कृष्णवधू पावन यश गाइ । रीझत मोहन कंठ लगाइ ॥ रास रसिक गुण गाइहो ॥ २१ ॥ बाजत
 भूषण ताल मृदंग । अंग दिखावत सरस सुधंग ॥ रंग रह्यो न कह्यो परै ॥ नूपुर किंकिनि कंक
 णचुरी । उपजत मिश्रित ध्वनि माधुरी । सुनत सिराने श्रवण मन ॥ मुरली मुरज खाब उपंग । उघटत
 शब्द विहारी संग । नागरि सब गुण आगरी ॥ गोपीमंडल मंडित श्याम । कनक नीलमणि जनु
 अभिराम ॥ रास रसिक गुण गाइहो ॥ २२ ॥ तिरपलेति सुंदर भामिनी । मनहु विराजत घनदा-
 मिनी । या छविकी उपमानहीं ॥ राधाकी गति परत न लखी । रससागरकी सींवा नखी ॥ बलिहारी
 वा रूपकी ॥ लेति सुघर औघरगति तान । दै चुंबन आकर्षति प्राण ॥ भेंटति मेटति दुख सबै ॥
 राखति पियहि कुचन बिच आनि । दै अधरामृत शिरपर पानि ॥ रास रसिक गुण गाइहो ॥ २३ ॥
 हरपित वेणु बजायो छैल । चंद्रहि बिसरी नभकी गैल ॥ तारागण मनमें लज्यो ॥ मुरली
 ध्वनि वैकुंठहि गई । नारायण सुनि प्रीति जु भई ॥ कहत वचन कमला सुनौ ॥ श्रीकुंजबिहा-
 री विहरत देखि । जीवन जन्म सफलकरि लेखि ॥ इहसुख तिहुँपुरहै कहां ॥ श्रीवृंदावन हमते दूरि ।
 कैसे धौं उडिलागै धूरि ॥ रासरसिक गुणगाइहो ॥ २४ ॥ कोलाहल ध्वनि दहदिशजाति । कल्पस
 मान भई सुखराति ॥ जीवजंतु मैमतसबै ॥ उलटि बह्यो यमुनाको नीर । बालक बच्छ न पीवै
 क्षीर ॥ राधारमन ठगे सबै ॥ गिरिवर तरुवर पुलकित गात । गोधन थनते दूध चुचात ॥ मुनि
 खग मृग मुनि व्रत धरचौ ॥ महिफूली भूल्यो गति पौन । सोवत ग्वाल तजत नहिं भौन । रास
 रसिक गुण गाइहो ॥ २५ ॥ राग रागिनी मूरतिवंत । दूलह दुलंहिनि सरस वसंत ॥ कोक कला
 संगीत गुर ॥ सतसुरनकी जाति अनेक । नीके मिलवति राधा एक ॥ मनमोह्यो पियको सुघर ॥
 छंद ध्रुवनिके भेद अपार । नाचति कुँवरि मिले झपतार ॥ कह्योसबै संगीतमें ॥ पिकनि रिझावति
 सुन्दर सुपद । सरस स्वरूप ध्वनि उघटत सुखद ॥ रास रसिक गुण गाइहो ॥ २६ ॥ चलति सु मोहति
 गति गज हंस । हँसत परस्पर गावत गंस ॥ तान मान मृगमथनके ॥ गौरीचंदन चरचित बाहु ॥ लेत
 सुवास पुलक तनु नाहु । दै चुंबन हरि सुख लियो ॥ श्यामल गौर कपोल सुचारु । रीझि परस्पर
 लेत उगारु ॥ एक प्राण द्वै देहहैं ॥ नाचत गावत गुणकी खानि । श्रमित भए टेकत पिय पानि ॥
 रास रसिक गुण गाइहो ॥ २७ ॥ पिक गावत अलिनादहि देत । मोर चकोर फिरत संग हेत ॥
 सचन सुमनहारहैं मनो ॥ कच कुच बिंदरसे हँसि श्याम । चलत भौह नैनन अभिराम ॥ अंगन

कोटि अनंग छवि * हस्तक भेद ललित गति लई । अंचल उडत अधिक छवि भई ॥ कुच विगलित
मालागिरी * हरि करुणाकरि लई उठाइ ॥ पोंछत श्रमजल कंठलगाइ ॥ रास रसिक गुण गाइहो ॥ २८ ॥
तिनहि लिवाइ यमुनजल गए ॥ पुलिन पुनीत निकुंजनि ठए ॥ अंगश्रमिन् सबके भए * जैसे
मदगज कूल विदारि । तैसे सँग लै खेली नारि ॥ शंक न काहुकी करी * मेटी वेद लोक कुल मेंडि ।
निकसि कुँवरि खेल्यो करि पोंडि ॥ फबी सबै जो मन धरी * जल थल क्रीडत ब्रीडत वही ॥ तिन
आलीन परत न कही ॥ रास रसिक गुण गाइहो ॥ २९ ॥ कह्यो भागवत शुक अनुराग ।
कैसे समुझै बिन बडभांग ॥ श्रीगुरु सकल कृपाकरी * सूर आश करि वरण्यो रास ॥ चाहतहौं वृंदावन
बासो ॥ श्रीराधा वर इतनी करकृपा * निशि दिन श्याम सेऊं मैं तोहिं । इहै कृपा करि दीजै मोहिं ॥
नवनिकुंज सुख पुंज मैं * हरि बंसी हरि दासी जहां । हरि करुणा करि राखहु तहां ॥ नित विहार
आभार है * कहत सुनत बाढत रस रीति । बक्ता श्रोता हरि पद प्रीति ॥ रास रसिक गुण गाइहो ॥
३० ॥ १८ ६६ ॥ राग धनाश्री ॥ मैं कैसे रस रासहि गाऊं । श्री राधिका श्यामकी प्यारी तुव बिन
कृपा बास ब्रजपाऊं । अन्य देव सपनेहु न जानौं दंपति को शिरनाऊं । भजन प्रताप
शरन महिमाते गुरुकी कृपा दिखाऊं ॥ नवनिकुंज बिन धाम निकट इक आनंदकुटी रचाऊं ।
सूर कहा बिनती करि बिनवै जन्म जन्म यह ध्याऊं ॥ ६७ ॥ राग विलावल ॥ ॥ तुमही मोको ढीठ कियो ।
नैन सदा चरणनतर राखे सुख देखत नहिं गनत वियो ॥ प्रभु तुम मेरी सकुच मिटाई जोइ सोइ
माँगत पेलि । मांगों चरण शरण वृंदावन जहां करत नित केलि ॥ यह वाणी भजनकी श्रवण
बिन सुनत बहुत शरमाऊं । श्रीवृषभाजुसुता पति सेऊं सूर जगत भरमाऊं ॥ ६८ ॥ राग विहागरी ॥
रासरस लीला गाइ सुनाऊं । यह यश कहै सुनै सुख श्रवणन तिन चरणन शिरनाऊं ॥ कहा कहौं
बक्ता श्रोता फल इक रसना क्यों गाऊं । अष्टसिद्धि नवनिधि सुख संपति लघुता करि दरशाऊं ॥
जो परतीति होइ हृदय में जगमाया धृग देखै ॥ हरिजन दरश हरिहि सम पूजै अंतर कपट न भेषै ॥
धनि धनि बक्ता तेहि धनि श्रोता श्याम निकट है ताके । सूर धन्य तिनके पितु माता भाव भजन है
जाके ॥ ६९ ॥ राग विलावल ॥ वृंदावन हरि रास उपायो । देखि शरद निशि रुचि उपजायो ॥ अद्भुत
मुरली नाद सुनायो । युवति सुनत तनु दशा गँवायो ॥ मिलि धाई मनको फल पायो । जंगम चले
जु चलनि थिरायो ॥ उलटी यमुना धार बहायो । सुनि धुनि चंचल पवन थकायो ॥ सूर नर
मुनिको ध्यान भुलायो ॥ चंद्रगगन मारग बिसरायो ॥ रूपदेखि मन काम लजायो ॥ रसमें अंतर विरस
जनायो ॥ युवतिनके तनु विरह बढायो । बहुरि मिले हित अति उपजायो ॥ हाव भाव करि सबन
रिझायो । कल्प रैनि रस हित उपजायो ॥ प्रातसमय यमुनातट आयो । नारिनके निशि श्रमहि
मिटायो ॥ युवतिन प्रति प्रति रूप बनायो । शिव नारद शारद यह गायो ॥ ध्यान टरयो चित त-
हां लगायो । राधावर निज नाम कहायो ॥ सूरदास कछु कहिके गायो । रमाकंत जासुको ध्या-
यो । सो सुख नंद सुवन ब्रज आयो ॥ ६० ॥ गोपी पदरज महिमा बिधि भृगुसों कही । बरष
सहस्रन कियो तप मैं ताऊ न लही ॥ इह सुनके भृगु कह्यो नारद आदिक हरि भक्ता । माँगे
तिनकी चरण रेणु तोहिं यह जुगुता ॥ सो निज गोपी चरण रज वांछितहौ तुम देव । मेरे मन
संशय भयो कहौ कृपा करि भेव ॥ ब्रजसुंदरि नहिं नारि ऋचा श्रुतिकी सब आहिं । मैं अरु शिव
पुनि लक्ष्मी तिनसम कोऊ नाहिं ॥ अद्भुत है तिनकी कथा कहौं सो मैं अब गाइताहि सुनै जो प्रीतिकै
सो हरिपदहि समाइ ॥ प्राकृत लै भए पुरुष जगत सब प्राकृत समाइ ॥ रहै एक वैकुण्ठ लोक जहां त्रि-

भुवन राइ ॥ अक्षर अच्युत निर्विकार है निरंकार है जोई । आदि अंत नहिं जानिअत आदि अंत
 प्रभु सोई ॥ श्रुति बिनती करि कह्यो सर्व तुमही हौं देवा । दूरि निरंतर तुमहिं हौ तुम
 निज जानत भेवा ॥ या बिधि बहुत अस्तुति करी तब भइ गिरा अकाश । मांगो बर
 मनभाक्ते पुरवो सो तुम आस । श्रुतिन कह्यो करजोरि सने आनंद देह तुम ।
 जो नारायण आदि रूप तुम्हरी सो लखी हम ॥ निर्गुण रहित जो निज स्वरूप लख्यो न ताको
 भेव । मन बाणी ते अगम अगोचर देखरावहु सो देव ॥ बृंदावन निजधाम कृपाकरि तहां देख्यो
 सब दिन जहां वसंत कल्पवृक्षनसों छायो ॥ कुंज अद्भुत रमणीक तहां बैसि सुभग रहां छाइ ।
 गिरि गोबर्धन धातमें झरना झरत सुभाइ ॥ कालिंदीजल अमृत प्रफुलित कमल सुहाइ । नगन
 जटित दोऊ कूल हंस सारस तहैं छाइ ॥ क्रीडत श्याम किशोर तहां लिये गोपिका साथ । निरखि
 सो छबि श्रुति थकित भए तब बोले यदुनाथ ॥ जो मन इच्छा होइ कहो सो मोहिं प्रगट कर ।
 पूरण करों सो काम देउँ तुमको मैं यह बर ॥ श्रुतिन कह्यो है गोपिका केलि करैं तुम संग । एवम-
 स्तु निज मुख कह्यो पूरण परमानंद ॥ कल्पसार सतब्रह्मा जब सब सृष्टि उपावै । अरु तेहि
 लोग न वर्ण आश्रमके धर्म चलावै ॥ बहुरि अधर्मी होहिं नृप जग अधर्म बढि जाइ । तब बिधि
 पृथ्वी सुर सकल करैं विनय मोहिं आइ ॥ मथुरामंडल भरतखंड निजधाम हमारो । धरौं तहां मैं
 गोप भेष सो पंथ निहारौ ॥ तब तुम होइकै गोपिका करिहो मोसों नेह । करौं केलि तुमसों सदा
 सत्य बचन मम येह ॥ श्रुति सुनिकै हरिबचन भाग्य अपनी बहुमानी । चितवन लागे समय
 दिवस सो जात न जानी ॥ भारभयो जब पृथ्वीपर तब हरि लियो अवतार । वेद ऋचा होइ गोपिका
 हरिसों कियो विहार ॥ जो कोइ भरता भाव हृदय धरि हरिपद ध्यावै । नारि पुरुष कोउ होइ
 श्रुति ऋचा गति सो पावै ॥ तिनके पद रज जो कोई बृंदावन भूमाहिं । परसै सोऊ गोपिका
 गति पावे संशय नाहिं ॥ भृगु ताते मैं चरण रेणु गोपिनकी चाहत । श्रुति मति बारंवार हृदय
 अपने अवगाहत ॥ यह महिमा रज गोपिकाकी जब बिधि दई सुनाइ । तब भृगु आदिक ऋषि
 सकल रहे हरिपद चितलाइ ॥ सर्वशास्त्रको सार इतिहास सर्व जो । सर्व पुराणको सार युत श्रुति
 नको ॥ बंदनरज बिधि सबै कह्यो बिधि दियो ऋषिन्ह बताइ । व्यास त्रिपद वामनपुराण कह्यो
 सूर सोइ अब गाइ ॥ ६१ ॥ राग गूजरी ॥ श्यामा श्यामके उर वसी । रैन नृत्यत रिझै पियमन तडित
 ते छबि लसी ॥ श्यामता रस मगन डोलत सब त्रियन में जसी । कोककलाप्रवीन सुंदरि कंठ
 गुण कर कसी ॥ करत सदन श्रृंगार बैठी अंग अंग प्रति रसी । सूर प्रभु आए अचानक देखि
 तिनको हँसी ॥ ६२ ॥ राग रामकली ॥ पिय निरखत प्यारी हँसि दीन्हों । रीझे श्याम अंग अंग निरखत
 हँसि नागरि उरलीन्हों ॥ आलिंगन दै अधर दशन खंडि करगहि चिबुक उठावत ।
 नासासों नासा लै जोरत नैन नैन परसावत ॥ यहि अंतर प्यारी उर निरख्यो झझकि भई
 तब न्यारी । सूर श्याम मोको दिखरावत उर ल्याए धरि प्यारी ॥ ६३ ॥ अथ राधाको मान ॥
 राग दोडी ॥ अब जानी पिय बात तुम्हारी । मोसों तुम मुँहकी मिलवतहौं भावतिहै वह प्यारी ॥
 राखे रहत हृदय पर जाको धन्य भाग्यहैं ताके । ऐसी कहौ लखी नहिं अबलौं वश्य भएहौ याके ॥
 भली करी यह बात जनाई प्रगट देखाई मोहिं । सूर श्याम यह प्राणपियारी उरमें राखी पोहिं ॥
 राग धनाश्री ॥ ६४ ॥ सुनत श्याम चकृत भए वानी । प्यारी पिय मुख देखि कछुक हँसि कछुक हृदय
 रिस मानी ॥ नागरि हँसति हँसी उर छाया तापर अति झहरानी । अधर कंप रिस भौंह मरोरचो मनही

मन गहरानी॥ इकटक चितै रही प्रतिबिंबहि सौति शाल जिय जानी । सूरदास प्रभु तुम बडभागी
 वडभागिनि जेहि आनी ॥ ६५ ॥ प्यारी सांच कहतिकी हाँसी । काहेको इतनो रिस पावति कत तुम
 होहु उदासी ॥ पुनि पुनि कहति कहा तवहींते कहा ठगी सी ठाढी । इकटक चितै रही हिरदै तन
 मनो चित्र लिखि काढी ॥ समुझी नहीं कहा मन आई मदन त्रसै तुम आगे । सूर श्याम भए काम
 आतुरे भुजा गहन पिय लागे ॥ ६६ ॥ मोहिं छुवौ जिनि दूरि रहौजू । जाको हृदय लगाइ लई है
 उतरी लाँह गहौजू ॥ तुम सर्वज्ञ और सब मूरख सो रानी अरु दासी । मैं देखति हृदय वह बैठी हम
 तुमको भई हासात बाँह गहत कछु शरम न आवत सुख पावत मनमाहीं । सुनहु सूर मोतनको
 इकटक चितवति डरपति नाहीं ॥ ६७ ॥ राग विलावल ॥ कहा भई धनि बावरी कहि तुमहिं सुनाऊं ।
 तुमते को है भावती को हृदय बसाऊं ॥ तुमहिं श्रवण तुम नैनहो तुम प्राण अधारा । वृथा क्रोध
 त्रिय क्यों करौ कहि बारंबारा ॥ भुजगहि ताहि बतावहू जो हृदय बतावति । सूरज प्रभु कहै
 नागरी तुमते को भावति ॥ ६८ ॥ राग नट ॥ माधो नाहिंन डरति जो हृदय बसति । ऐसी ढीठ मेरे
 जानि तुमहिं कीन्ही है कान्ह मोसों सन्मुख देखति न त्रसति ॥ झुकेते झुकति भाल झुकुटी कुटिल
 किये हूखीहै रहत हँसेते हँसति । तबहीते इकटक चितवत और सिसकत हों डरते इत उत न धसति ॥
 जाही सौ लगत नैन ताही खगत बैन नख शिखलों सब गात ग्रसति । जाके रंग राचे
 हरि सोईहै अंतर संग काँचकी करोतीके जल ज्यों लसति ॥ बिहाँसि बोले गोपाल सुनि री ब्रजकी
 बाल उछंग लेत कत धरणि खसति । अपनी छाया निहारि काहेको करति आरि कामकी कसोटी
 सूर कर्षते कसति ॥ ६९ ॥ राग कान्हरो ॥ काहेको हो बात बनावत । अब तुमको पिय मैं पत्याति
 हों छाँह आपनी धरणि बतावत ॥ वा देखत हमको तुम मिलिहौ काहेको ताको अनखावत । जैहै कहूं
 निकसि हिरदैते जानि बूझि तेहि क्यों उचटावत ॥ जो वह कहै करो तुम सोई कहा मोहिं पुनि
 पुनि समुझावत । सूर श्याम नागर वह नागरि भले भले जू मोहिं खिझावत ॥ ७० ॥
 ॥ राग गुंडमलार ॥ वृथा हठ दूरि किनि करौ प्यारी । कहा रिस करति ह्याँछाँह अपनी देखि उरको
 उनहीं रिस जरति भारी ॥ तुमहिं धन रहति मन नैनमें तुम बसति कनक सो कसिलेहु कहा बैठी ॥
 चतुराई कहाँगई बुद्धि कैसी भई चूक समुझे बिना भौह ऐंठी ॥ यह सुनत रिसभरी रही नहीं तहाँ
 खरी ओटहै झरि हरी मानकीन्हों । जाहु मन मन कह्यो मैं बहुत सुख लह्यो सौति देखराइ मोहिं सूर
 दीन्हों ॥ ७१ ॥ राग कल्याण ॥ कियो अतिमान वृषभानुधारी । देखि प्रतिबिंब पिय हृदयनारी ॥
 कहा ह्याँ करत लैजाहु प्यारी । मनहिमन देत अति ताहि गारी ॥ सुनत यह वचन पिय विरह बाढो ।
 कियो अति नागरी मान गाढो ॥ कामतनु दहत नहीं धीरधारे । कबहुँ बैठत उठत बारबारै । सूर
 अतिभए व्याकुल मुरारी । नैन भरिलेत जलदेत ढारी ॥ ७२ ॥ राग विहागरो ॥ मानकरचो त्रिय बिन
 अपराधहि । तनुदाहति बिनकाज आपनो कहत डरत जिय वादहि ॥ कहारही मुख मूँदि भामिनी
 मोहिं चूक कछु नाहीं । झझकि रही क्यों चतुर नागरी देखि आपनी छाहीं ॥ अजहं दूरि करौ रिस
 उरते हृदये ज्ञान बिचारौ । सूर श्याम कहि कहि पचिहारे हठ कीन्हों जिय भारौ ॥ ७३ ॥ राग सोरठा ॥
 काम श्याम तनु चटप कियो । मनो धरचो नागरि जिय गाढौ सूरख्यो कमल हियो ॥ व्याकुल
 भए चले वृंदावन मिली दूतिका आनि । बारबार हरि वदन निहारति सकै न दुख पहिचानि ॥
 कैसी दशा आजु मैं देखति कहो न मोहिं सुनाइ । सूर श्याम देखे तुम व्याकुल आए कहा गँवाइ ॥
 ॥ ७४ ॥ राग गौरी ॥ व्याकुल बचन कहत हैं श्याम । वृथा नागरी मान बढायो जोर कियो तनु काम ॥

यह कहतहि लोचन भरि आए पायो विरह सहाइ। चाहत कछो भेद ता आगे वाणी कही न जाइ ॥
 और सखी तेहि अंतर आई व्याकुल देखि सुरारी । सूर श्याम मुख देखि चकित भई क्यों तनुरहे
 विसारी ॥ ७५ ॥ राग विहागरी ॥ कहति दूतिका सखिन बुझाइ । आजु राधिका मान करचो है
 श्याम गए कुंभिलाइ ॥ करसों कर धरि लाल लई गहि सखिन सहित बनधाम । सुखदै कछो लिए
 आवतिहों संग विलसियों बाम ॥ मो आगेकी महारि बिटनियां कहा करै वह मान । सुनहु सूर प्रभु
 कितकि बात यह करै न पूरण काम ॥ ७६ ॥ राग भैरव ॥ श्याम कुंज बैठारि गई ॥ चतुर दूतिका
 सखिन लीन्हें आतुरताई जानि लई ॥ मनहीं मन इक रचि चतुराई इहै कहों ना बाति नई । अवहीं
 लै आवतिहों ताको इहै भई कछु बहुत दुई ॥ करि आई हरिसों परतिज्ञा कहा कहै वृषभानु जई ।
 सूर श्याम शों मान करचो है आजुहि ऐसी कहा भई ॥ ७७ ॥ राग नट ॥ सखिन संग लै तहां
 गई । दूतिका मुख निरखि राधा जानि हृदय लई ॥ अति चतुर वृषभानुतनया सहज बोलि लई ।
 सहज वचन प्रकाश कीन्हों कहा कृपा भई ॥ तुरतही यह कहि सुनायो श्याम बोले ताहि । सूर
 प्रभु बन बोलि पठई तोहिं कारण मोहिं ॥ ७८ ॥ राग टोडी ॥ काहेको वन श्याम बोलाई । याही
 ते तुम धाई आई ॥ कहा कहों तोको री भाई । तुमहुं भली अरु भले कन्हाई ॥ अब इक
 नई मिली है आई । ताहीको अब लेहि बुलाई ॥ ताको राखी हृदय दुराई । तोको
 ह्वानि टारि पठाई ॥ सूर श्याम ऐसे गुण राई । उनकी महिमा कही न जाई ॥ ७९ ॥
 राग धनाश्री ॥ आजु कछु घर कलह भयो री । वही आजु अनमनी बत्यानी यह कहि
 मान ठयो री ॥ मोसों कछुक कछो नहिं मोहन सहज पठाई लेन । कहा पुकार परी
 हरि आगे चलो न देखो नैन ॥ तेरो नाम लेत हरि आगे कहत सुनाइ । सूर सुनहु काको का-
 को गथ तै धौं लियो छंडाई ॥ ८० ॥ राग मूही ॥ वृन्दावन हरि बैठे धाम । काहेको गथ हरचो
 सबनको कहि अपनो कियो कुनाम ॥ डारि देहु कह लियो परायो मेरो कछो मानि री वाम ।
 तबहीं ते उन शोर लगायो तोकों बोली है यहि काम ॥ चलहु तुरत जिनि झेर लगावहु अबहीं
 आइ करौ विश्राम । सूर श्याम तेरी घां झगरत तू काहे तिनसों करै ताम ॥ ८१ ॥ राग जैतश्री ॥ यह
 कछु नोखी बात सुनावति । काको गथ धौं मैं लीन्हों है बार बार बन मोहिं बोलावति ॥ मेरी घां
 हरि लरत कौनसों इतीमया मोहिं कीन्हों । जैसे है हरि तेरे भाई मैं नीके करि चीन्हों ॥ की बैठो
 की भवन जाहुकी मैं उनपै नहिं जाउँ । सूरदास प्रभुको री सजनी जन्म न लेहों नाउँ ॥ ८२ ॥
 राग गौरी ॥ मैं कहा तोहिं मनावन आई । प्रगट लिए सबको ब्रज बैठी कहा करति अधिकाई ॥ जाइ
 करौ ह्वानि सबनिको मोपर कृत सुतरानी । श्यामलरत तबहीते उनसों तिन पर अतिहि रिसा-
 नी ॥ बार बार तू कहा कहतिरी ब्रज काको मैं लीन्हों । सूरदास राधा सहचरिसों ज्वाब निदरिकै
 दीन्हों ॥ ८३ ॥ राग सोरठा ॥ तैं कछु नहिं काहुको लीन्हों । प्रगट कहों तबहीं मानोंगी ज्वाब निदरि । मोहिं
 दीन्हों ॥ तब वदिहों ऐसेहि ह्वानि कैहै जहँ बैठे सब बैरी । मेरे कहे बहुत रिस पावति संपति सबकी
 लैरी ॥ इक इक करि सब तोहिं दिखाऊँ कहि आवहु बनजाइ । की दीजौ की पुनि सब लीजौ सूर
 श्याम पै आइ ॥ ८४ ॥ राग मूही ॥ जिन जिन जाइ श्याम के आगे तेरी चुगली बहुत करी । बार बार
 जिन सों हरि खीझे तेरी घां है महुं लरी ॥ श्याम भेद करि मोहिं पठाई तू मोहीं पर खीझ परी ।
 जाइ करो रिस वैरनि आगे जाके जाके गथहि हरी ॥ धरति अकाश बनहु के आए देखत तिनको
 अतिहि डरी ॥ सूर श्याम विनु न्याव चुकै क्यों तिन पर तू अतिही झगरी ॥ ८५ ॥ राग धनाश्री ॥ ते जन पुकारे

हरिपै जाइ । जिनकी यह सब सौज राधिका तैं तेरे तनु लई छँडाइ।इंदु कहै हो बदन बिगोयो अल-
 कन अलि समुदाइ । नैननि मृग वचनन पिक लूटे बिलपत हरिहि सुनाइ ॥ कमल केरि केहरि क
 पोत गज कनक कदलि दुखपाई । विद्रुम कुंद भुजंग संग मिलि शरण गए अकुलाइ ॥ अति अनीति
 जिय जानि सूर प्रभु पठई मोहिं रिसाई बोलिहै ब्रजनारि वेगि चलि अब उत्तर दे आइ ८६ ॥ राग कल्याण ॥
 चलराधे हरि रसिक बुलाई । कमलनयन कछु मर्म कह्यो नहिं मोहन वदन करन पुट आई ॥
 अंग अंग सर्वसु हरन लगी री रचि बिरंचि तुव वनक बनाई । अब जो पुकार करत तेरे तनु जितनी
 वनकी शोभ चुराई तननि उरग नव तरनि तरौना तिलकभाल शशिकी ससकाई । भुकुटी शर धनु
 सांधि वचन वर सुरपुर परिहै मदन दोहाई ॥ दाडिमवज्र पंगति पंकज दल दामिनि घन दुति रदन
 दोहाई। कंबुकपोत कंठ निशिवासर बाहुबली कटि कंज लताई ॥ उरभय भेष शेष अंबर जनुमानो छवि
 कटि मृगराज सुहाई । हंस पुकार करत सूरज प्रभु दीनबंधु हौं लेन पठाई ॥ ८७ ॥ राग कान्हरो ॥
 मान करौ तुम और सवाई । कोटि करौ एकै पुनि हैहौ तुम अरु वे मनमोहन माई ॥ मोहनसों
 सुनि नाम श्रवणही मगन भई सुकुमारी । मान गयो रिसगई तुरतही लज्जित भई मन भारी ॥
 धाइ मिली दूतिका कंठसों धन्य धन्य कहि बाजी । सूर श्याम बनधाम जानिकै दरशनको
 अतुरानी ॥ ८८ ॥ राग विलावल ॥ हंसिकै कह्यो दूतिका आगे श्यामहि सुखदैरी तू जाई करि अस्नान
 अधूषण अंगभरि मैं आवति तो पाछे धाई ॥ यह सुनि हर्ष भई अतिही सखि गई तहां जहँ
 श्याम । अति व्याकुल तनुकी सुधि नाहीं विह्वल कीन्हों काम ॥ की वनमें की घरही बैठे की वासर
 की याम । सूर श्याम रसना रट लागी राधा राधा नाम ॥ ८९ ॥ राग रामकली ॥ श्याम नारिके विरह
 भरे । कबहुँक बैठत कुंज दुमनतर कबहुँक रहत खरे ॥ कबहुँक तनुकी सुरति बिसारत कबहुँक तनु
 सुधि आवत । तब नागरिके गुणहि बिचारत तेइ गुण गुनि गुनि गावत ॥ कहूँ सुकुट कहूँ सुरलि
 रही गिरि कहूँ कटि पीत पिछौरी । सूर श्याम ऐसी गति भीतर आई दूतिका दौरी ॥ ९० ॥
 ॥ राग विलावल ॥ श्याम भुजागहि दूतिका कहि आतुर बानी । काहेको कदरात हौं मैं राधा आनी ॥
 विरह दूरि करि डारिए सुख करौ कन्हाई । त्रिया नाम श्रवणनि सुन्यो चितए अकुलाई ॥ मिले दूति
 कहि अंक दै लोचन भरि आए। प्यारी प्यारी बोलिकै युवती उरलाए ॥ तब बोली हंसि दूतिका पिय
 आवति नारी ॥ सूर श्याम सुनि बोल वै हरषै बनवारी ॥ ९१ ॥ राग गूजरी ॥ धीर धरौ प्यारी अब आवति । मैं
 जुगई परतिज्ञा करिकै सो कहिबात जनावति ॥ मनचिंता अब दूरि करौजू कहौ न कह मोहिं देहौ ।
 बनि आवति वृषभानुनंदिनी भुजभरि अंकम लेहौ ॥ यह सुंदरता और नहीं कहूँ बडभागी सो पावै ।
 सूर श्याम दूतिका वचन सुनि करयुग काम मनावै ॥ ९२ ॥ राग जैतथी ॥ यह सुनिकै मन श्याम
 सिहात । पुलकित अंग रहै नहिं धीरज पुनि पुनि पंथ निहारत जात ॥ कुंजभवन कुसुमनकी
 सेज्या अपने हाथ निवारत पात । जे द्रुम लता लटाकि तनु लागत ते ऊंचे धरि पुलकित गात ॥
 प्यारी अंग अति कोमल जानत सेजकली चुनि डारत ॥ सूर श्याम रीझत मनहीं मन सुधिकरि छबिहि
 निहारत ॥ ९३ ॥ राग कल्याण ॥ दूतिका हंसति हरि चरित हैरै । कबहुँ कर अपने रचत सुमन
 न सेज कबहुँ मग निरखि कहूँ भयो झेरै ॥ काम आतुर भरे कबहुँ बैठत खरे कबहुँ आगे जाइ रहत
 ठाढे ॥ चतुर सखि देखि पुनि राधिका पै गई झेर क्यों करति धनकंत चाढे ॥ सुनत प्यारी हँसी पियाके
 मनबसी रूप गुण कर यशी प्रेमरासी । सूर प्रभु नाम सुनि मदन तन बल भयो अंग प्रति
 छवि उपर रमा दासी ॥ ९४ ॥ राग धनाश्री ॥ धनि वृषभानुसुता बडभागिनि । कहा निहारति अंग

अंग छवि धन्य श्याम अनुरागिनि ॥ और त्रिया नख शिख शृंगार साजि तेरे सहज न पूरे । रति
 रभा उखसी रमासी तोहि निरखि मन डूरे ॥ ए सब कंत सुहागिनि नार्ही तूहै कंतहि प्यारी ।
 सूर धन्य तेरी सुंदरता तोसी और न नारी ॥ ९५ ॥ सहज रूपकी राशि नागरी भूषण अधिक
 विराजै । सुख सौरभ संमिलित सुधानाधि कनकलता पर छाजै ॥ वदनाबिंद धार मिलि-शोभित
 धूमिल नील अगाध । मनहुँ बाल रवि रस समीर शंकित तिमिर कूट है आध ॥ माणिक मध्य
 पास चहुँ मोती पंगति झलक सिंदूर । रंग्यो जनु तम तट तारागण उगत घेरयो ~~सुभाष~~ की
 मन्मथरथ चक्र की तरिवन रवि रथरचित साज । श्रवण कूपकी रहट घंटिकी राजत सुभग समाज ॥
 नाशानथ मुक्ता बिम्बाधर प्रतिबिंबित अस मूच । वींध्यो कनक पासि शुक सुंदर करि कबीज
 गहि चूंच ॥ कहँ लगि कहौ भूषणन भूषित अंग अंगके रूप । सूर सकल शोभा श्रीपतिके राजिबनै-
 न अनूप ॥ ९६ ॥ राग कान्हो ॥ विराजत राधा रूप निधान । सुंदरताको पुंज प्रगटही को पटतर
 त्रिय आन ॥ सिंदुर शीश मांग मुक्तावलि कचकबनी अवि नान । मनहुँ चंद्र मुख कोपि
 हन्यो रिपु राहु विषम बलवान ॥ तरल तिलक ताटक गंडपर झलकत कल विय कान । मानहु
 शशि सहायकरिवेको रण विरचे द्वै भान ॥ दीरघनैन नासिका वेसरि अरुण अधर छाबिबान । खंजन
 शुक नहिं बिंब समितको लज्जित भए अर्जान ॥ को कहि सकै उरोजन की छवि कंचन मेरु
 लजान । श्रीफल सकुचि रहे दुरिकानन सिखरहिबो विहरान ॥ रोमावलि त्रिवली छवि छाजत जनु
 कीन्ही यह ठान । कृप कटि सबल डंड बंधन मनो विधि दीन्हों बंधान ॥ अंग अंग आभूषण की
 छवि कापै होइ बखान । मूरदास प्रभु रसिक शिरोमणि विलसहु श्याम सुजान ॥ ९७ ॥ राग सारंग ॥
 राजत तेरे बदन शशी री । किरनि कटाक्षबाण बर सांधे भौंह कलंक कमान कसी री ॥ पीन पयोधर
 सघन उन्नत अति तापर रोमावली लसी री । चक्रबाक खग चंचु पुटीते मनु सैवल मंजीर खसी री ॥
 ज्यों नाभी सर एक नाल नव कनक कमल विवि रहे बसी री । सूरज श्रीगोपाल पियारी मेरी अध
 तम धरा धसी री ॥ ९८ ॥ राग गूजरी ॥ सुनि राधे तेरे अंगन ऊपर सुंदरता न बची ॥ लोक चतुर्दश नीरस लागत
 तू रसरास रची ॥ नखशिख विशिख कुसुमकी सेना को तुम अवधि रची । सहज माधुरी रोमन
 वर्षत रतिरणकीचमची ॥ तोसी नारि श्यामसे नायक बिधि बेकाज पची । सूर सुमेरु कूटकी
 सरवर क्यों पूजै घुँघची ॥ ९९ ॥ राग नट ॥ राधे देखि तेरो रूप । पठईहौं हरि शंकि मनु दल सज्यो मनसिज
 भूप ॥ चाल गज शृंगला नृपुर नीवि नव रुचि ढाल । किंकिनी घंटा घोष माधो भये भै बेहाल ॥
 कंचुकी भूषण कवच सजि अति कुच कसे रणबीर । अंचलध्वजा अवलोकि नार्ही धरत पिय मन
 धीर ॥ भौहैं चाप चढाई कीन्हों तिलक शर संधान । नैनकी तकि देखि गिरिधर तज्योहै मदमान ॥
 चमर चिकुर सुदेश घुँघट छत्र शोभित छाँह । ज्यों कह्यो त्योंही मिलाऊँ दै दयालुहि बाँह ॥
 राधिका अति चतुर सुंदरि सुनि सु बचन बिलास । सूर रुचि मनसा जनाई प्रगटि मुख मृदुहास ॥
 ॥ १०० ॥ राग कल्याण ॥ आजु अंजन दियो राधिका नैनको । मीन गणहीन मृगलाजित खंजन चकित
 अधिक चंचल सरस श्याम मुखदैनको ॥ लसति दाडिम दशन भौंह मन्मथ फंद स्वरूपलट लटक
 रही रहत नहिं चैनको । कसनि कंचुकि बंद उर मुकुतमाल मुख निरखि उडराज ताजि गयो सूर ऐनको ॥
 रुनित नृपुर चरण क्षुद्रकटि घंटिका कनक तनु गौर छवि उमंगि उपरैनको । सूर सुनि सून उठि
 नवल गिरिधर सेज चलीहै गजगति मनो मदनगढ लैनको ॥ १ ॥ राग टोडी ॥ रसिक शिरमौर
 ठौरि लगावत गावत राधा राधा नाम । कुंजभवन बैठे मनमोहन अलिगोहन सोहन बोलत मुख

तेरोई गुणग्राम ॥ श्रवण सुनत प्यारी पुलकित भई प्रफुलित तन मन रोम रोम सुखराशि वाम ।
 सूरदास प्रभु गिरिवर धरको चली मिलन गजराज गामिनी झनक रुनुक वनधाम ॥ २ ॥
 ॥ राग देवगंधार ॥ चलौ किन मानिनि कुंज कुटीर । तुव बिन कुंवर कोटि बनितातज सहत वदनकी
 पीर ॥ गद्गद सुर पुलकित विरहानल नैन विलोकत नीर । कासि कासि वृषभातु नंदिनी बिल-
 पत बिपिन अधीर । बंसी विशिख माल व्यालावलि पंचानन पिक कीर । मलयज गरल हुताशन मारुत
 शाखामग रिपवीर ॥ हियमें हरषि प्रेम अति आतुर चतुर चलहु पियतीरा सुनि भयभीतवज्रके पिंजर सूर
 सुरति रणधीरा ॥ शान्त कल्याण नवेली सुनिनवल पियनबनि कुंज है री ॥ भावते लालसों भावती केलिकारि
 भावती भावतो रसिक रसलै री । त्यागि अभिमान गुणरूप सौभाग रति मानिनी मनुहारि भैन
 सुख दै री ॥ एक ब्रजवास आवत जात देखियत आपनी जाति पति पेडको घेरी । ललित उदार
 हित पीर करि कीर मति धीर तनु मेटि मन्मथको भै री । कलाचौंसठि संगीत शृंगार रस कोक
 विधि बंद प्रगट भेदसे सै री । सुरति सागर साज स्रवत जस रसलाज अंग अनुकूल रतिराज रण
 जैरी ॥ कामशर कनक कुच प्रगट भृंगी चिह्न दागि मेलै कंत आपनो कै री ॥ जासु आलाप
 सुनि दारुसे पल्लवै पुहुप मधुधार करभार भरनै री । सुरलिका गान तुवनाम मधुराधुनी सुवा गुण
 सिंधु नहिं गनत निज मेरी । हीन जलमीन ज्यों दरश बिन कमल लै प्राण प्रीतम नहीं धीरज धरै
 री ॥ प्रीतिकी रीति गति होति है री हरषि निरखि रति करि चिबुक अशानि डै री ॥ अधर मधुलोभ पंथान
 चितवत चकित कमल गुल्लालदल तल रचै री ॥ अरुण शीतल मृदुपातदल सरि करत सेज
 चढि दल मही चरण के बैरी । तुव कामकेलि कमनीय कामिनि वृंद चंद चकोर चातक स्वाति
 तै री ॥ सूर सुनि श्रवणतजि भवन करि गवन मन रवन तनु तबहि कहैं सगति गै री ॥ ४ ॥
 राग कान्हरो ॥ मनो गिरिवरते आवति गंगा । राजति अति रमणीक राधिका यहि बिधि अधिक अनू-
 पम अंगा ॥ गौर गात द्युति बिमल बारि बिधि कटितट त्रिबली तरल तरंगा । रोम राजि मनो
 यमुन मिली अध भँवर परत मानो भुवभंगा ॥ भुजबल पुलिन पास मिलि बैठे चारुचक्रवै उरुज
 उतंगा । मनो मुख मृदुल पाणि पंकेरुह गुरुगति मनहुं मराल बिहंगा ॥ माणि गण भूषण रुचिर
 तीरवर मध्यधार मोतिन मैं मंगा । सूरदास मनो चली सुरसरी श्रीगोपाल सागर सुख संग ॥
 ॥ ५ ॥ राग सूही ॥ नाहिन नैन लगे निशि यहि डर । जबते जाइ कह्यो हँसि हरिसों समर सोच उनके
 जिय धर धर ॥ भौंह कमान तिलक भलुका करि रुचि सुदेश श्रीमंत सुरंग सर । वलय ताटकं
 चक्र नख नेजा दामिनिसे चमकत रद असि बर । गज उरोज वरबाजि बिलोचन बंकट विशद
 विशाल मनोहर ॥ लाल ढाल अंचल चंचल गति चमर चिकुर राजत ता ऊपर । अंग अंग सज
 सुभट सहायक बने बिबिध भूषण बानेवर ॥ कामिनि आजुहि आनि रहैगी काम कटक लै कुंज
 झंडातर । चरन रुनित नूपुर रणतूरा सुनत श्रवण कांपहि गे थर थर ॥ तब जानवी किशोर जो
 र रुपि रहौ जीति करि खेत सबै पर । ऐंचि करौ जो कहौ किशोरी वै जो भीत है रहे बैठि
 घर ॥ यहै मतो मुख मुख जोरहौ तही करहु पार लै पकारि पियहि कर । सहचारि चतुरातुर लै
 आई बाँह बोलदैकरि कहत वह छर । रोष सुरत तन मिली अंकम भरि लैलटकी दै
 दंत पियाधर ॥ जुरत सुरत संग्राम मच्यो छबि छूटि छूटि कच टूटि हार लर । अति सनेह दुहुँ
 बिसरि देह भिरि भैन मल्ल सुरझाई गिरिधर ॥ बिबिध बिलास कोश वश कीने राधा नारि नंदनंदन वर ।
 निगमन नेति कह्यो निर्गुण सों कह गुणाधि बरणिहै सूर नर ॥ ६ ॥ राग टोडी ॥ फूलनको महल

फूलनकी सेज्या फूले कुंजविहारी फूली राधाप्यारी । फूले वै दंपति नवल मगन फूले फूले करै केलि
 न्यारी न्यारी ॥ फूली लता वेलि विविध सुमन गण फूले आनन दोउहैं सुखकारी । सूरदास प्रभु
 प्यारी पर वारत फूले फूल चंपकवेलि निवारी ॥ ७ ॥ राग धनाश्री ॥ आज रंग फूले कुँवर कन्हाई ।
 कबहुँक अधर दशन भरि खंडित चाखत सुधा मिठाई ॥ कबहुँक कुचकर परसि कठिनअति तहां
 वदन परसावत सुख निरखति सकुचति । सुकुमारी मनहीमन अति भावत ॥ तब प्यारी सुख गहि
 कर टारति नेक लाज नहि आवत । सूरदास प्रभु कामशिरोमणि कोककला देखरावत ॥ ८ ॥
 राग विहागरी ॥ देखे सात कमल इकठौर । तिनको अति आदर देवेको यथ मितेन द्वार ॥ मिलत
 मिले फिर चलत न बिछुरत अवलोकत यह चाल । न्यारे भए बिराजतहैं सब अपने सहज
 सनाल ॥ हरि तम श्याम निशा निशिनायक प्रगटहोत हँसिबोले । चिबुक उठाय कह्यो अब देखो
 अजहुँ रहति अनबोले । इतनी जतन किए नंदनंदन तब वह निदुर मनाई । भरिके अंक सूरके
 स्वामी पर्यंकपरि ह्वां आई ॥ ९ ॥ राग केदारो ॥ पियको भावति राधा नारि । उलटि चुंबन देति
 रसिकन सकुच दीन्हीं डारि ॥ परस्पर दोउ भरे श्रमजल फूँकि फूक झुरात । मनो वृद्धि अनंग ज्वाला
 प्रगट करतलजात ॥ बहुरि उठे सँभारि भटज्यों अंग अनंग सँभारि । सूर प्रभु वन धाम विहरत
 बने दोउ वरनारि ॥ १० ॥ राग रामकली ॥ विहरत वन दोउ मन इक करे । एक भाव इक भए लप-
 टिकै उर उर जोरि धरे ॥ मनो सुभट रणएक संग झुरि करिवर नहीं डरे । अधर दशन छत नख
 छत उर पर घायन फरहि परे ॥ यह सुख यह उपमा पटतरको रति संग्राम लरे । सूर सखी निरखत
 अंतर भई रति पति काजसरे ॥ ११ ॥ आजु अति शोभित हो घनश्याम । मानहुँ हैं जीते नंदनंदन
 मनसिज सों संग्राम ॥ मुकुलित कच न समात मुकुटमें रोष अरुण दोउ नैन । श्रम
 सूचत मानो आलस गति बोलत बनत न बैन । नखछतशोणित प्रस्वेद गातते चंदन गयो
 कछु छूटि । मदन सुभट केसर सुदेश मनु लगे कवच पट फूटि ॥ दशन अंक पर प्रगट पीक
 मनो सन्मुख सहै प्रहार । सूरदास प्रभु परम सूर मैं जाने नंदकुमार ॥ १२ ॥ राग कल्याण ॥ सकुचि मन
 परस्पर बसन लीन्हें । प्यारी पिया निष्ठुन कोकगुन कलामें उनि धनाहि कंत अबल कीन्हे ॥
 स्वेदकन गंड मंडलनि नासानि तट पिय निरखि पीत पट पोंछि डारयो । निरखि प्यारी पोंछि वै
 सही पियवदन कछु सकुच कछु हरषि कै निहारयो ॥ नागरी डरन पिय पीत पट उर धरे बहुरि
 जिनि आपनी छाँह देपै । सूर प्रभु स्वामिनी अंग छवि दामिनी झलक प्रतिबिंब परमान भेष ॥
 ॥ १३ ॥ राग रामकली ॥ सँग राजति वृषभानुकुमारी । कुंज सदन कुसुमनि सेज्यापर दंपति
 शोभा भारी ॥ आलस भरे मगन रस दोउ अंग अंग प्रति जोहत । मनहुँ गौर श्या-
 मकै शशि उत्तम बैठे सन्मुख सोहत ॥ कुंजभवन राधा मनमोहन चहुँ पास
 ब्रजनारी । सूर रही लोचन इकटक करि डारति तन मन वारी ॥ १४ ॥ राग नट ॥ इकटक रही
 नारि निहार । कुंज घर श्रीश्याम श्यामा बैठे करत बिहार ॥ नैन सैन कटाक्ष सों मिलि करत
 रंग विलास । नहीं शोभा पार पावति वचन मुख सुख हास ॥ तरुणि श्रीवृषभानुतनया तरुण
 नंदकुमार । सूर सो क्यों बरणि गावै रूपरस सुखसार ॥ १५ ॥ राग धनाश्री ॥ चितै राधा रति नागर
 ओर । नैन वदन छवि यों उपजत मनो शशि अनुराग चकोर ॥ सार सरस अचवनको मानो
 तृपित मधुप युग जोर । पान करत कहूँ तृप्ति न मानत पलक न देत अकोर ॥ लिये मनोरथ मानि
 परस्पर जानि गई भयो भोर । सूर श्याम श्यामा आपुसमें करत रहत चितचोर ॥ १६ ॥ राग विलावल ॥

देखो शोभासिंधु समाति । श्यामा श्याम सकल निशिरसवश जागे होत प्रभात ॥ लै पाहन सुत
 कर सन्मुखदै निरखि निरखि मुसुकात । अचरज सुभग वेद जलजातक कलक नील मणिगात ॥
 उदित जराउ हार पंचति यो रवि शशि किरनि तहां से दुरात । चंचल खग वसु अष्टकंजदल शोभा
 वरणि न जात ॥ चारि कीर पर पारस विद्रुम आनि अलीगण खात । सुखकी राशि युगल मुख
 ऊपर सूरदास बलिजात ॥ १७ ॥ राग रामकली ॥ देख सखी पंच कमल द्वे शंभु । एक कमल ब्रज
 ऊपर राजत निरखत नैन अचंभु ॥ एक कमल प्यारी कर लीन्हें कमल सु कोमल अंग । युगल
 कमल सत कमल निरखत भीति न कबहुं भंग ॥ षट जु कमल मुख सन्मुख चितवत बहुविधि रंगत
 रंग । तिनमें तीनि सोमवंशी वश तीनि शाप मुख चंचल ॥ जेइ कमल सनकादिक दुर्लभ जिनहीं
 निकसी गंग । तेई कमल सूर नित चितवत निपट निरंतर संग ॥ १८ ॥ राग नट ॥ देख सखि चारि चंद्र
 इक जोर । निरखति बैठि नितांबिनि पिय सँग सार सुताकी ओर ॥ द्वे शशि श्याम नवल घन
 सुंदर द्वे कीन्हें बिधि गोर । तिनके मध्य चारि शुक राजत द्वे फल आठ चकोर ॥ शशि सुरंग
 परवाल कुंद कलि अरुझि रह्यो मनमोर । सूरदास प्रभु अति रतिनागर बलि बलि युगलकिशोर ॥
 ॥ १९ ॥ राग नट ॥ देखरी प्रगट द्वादश मीन । षट इंदु द्वादशतरणि शोभित विमल उडुगण तीन ॥
 षटअष्ट अम्बुज कीर षटमुख कोकिला सुर एक । दश दोइ विद्रुम दामिनी षट तीनि व्याल विशेष ॥
 त्रिवलि षट श्रीफल विराजत परस्पर बर नारि । ब्रज कुँवरि गिरिधर कुँवरपर सूर जन
 बलिहारी ॥ २० ॥ राग नट ॥ दंपति कुंज द्वार खरे । शिथिल अंग मरगजे अंबर अतिही रूप भरे ॥
 सुरतही सब रैनि बीती कोक पूरण रंग । जलद दामिनि संग सोहत भरे आलस अंग ॥ चकृत द्वे
 ब्रजनारि निरखत मनो चंद्र चकोर ॥ सूर प्रभु वृषभानुतनया बिलासि रति पति जोर ॥ २१ ॥ राग ललित ॥
 सघन कुंजते उठे भोरही श्यामा श्याम खरे । जलद नबीन मिली मानो दामिनि वरषि निशाउ सरे ॥
 शिथिल वसन तनु नील पीत द्युति आलस युत पहिरे । श्रमजल बूंद कहूं कहूं उडुगण बदरन
 वरन करे ॥ भूषण बिबिध भाँति मडवारी रति रस उमँगि भरे । काजर अधर तमोर नैन रंग अँग अँग
 झलक परे ॥ प्रेमप्रवाह चली मनो सरिता दूटी माल गरे । शोभा अमित विलोकि सूर प्रभु
 क्यों सुखजात तरे ॥ २२ ॥ राग विलावल ॥ राजत दोउ निकुंज खरे । श्यामा नवल किशोर पिय नव
 रंग अति अनुराग भरे ॥ अति सुकुमारि सुभग चंपक तनु भूषण भृंग अरे । मर्कत कमल शरीर
 सुभग हरि रति जिय वेष करे ॥ चंचित चार कमलदल मानो पियके दशन समाति । मुख मयंक
 मधु पियत करत कसि ललना तऊ न अघाति ॥ लाजत मदन दुराई मधुन मृदु मुसकनि मन
 हरिलेत । छूटी अलक भुअंगनि कुचतट पैठी त्रिबलि निकेत ॥ रिस रुचि रंग विरहके मुखलौं
 आने सोम समेति । प्रेम पियूष पूरि पोंछति पिय इत उत जानन देति ॥ वदन उधारि निहा
 रि निकट करि पियके आनि धरे । बिष शंका नख रहत मुदित मनो मनसिज ताप हरे ॥ युगल
 किशोर चरण रज वंदौं सूरज शरण समाहि । गावत सुनत श्रवण सुखकारी विषदुरीत दुरिजाहि ॥
 ॥ २३ ॥ राग नटा ॥ जो सुख श्याम प्रिया सँग कीन्हों । सो युवतिन अपनोहि करि लीन्हों ॥ दुविधा
 हृदय कछु नहिं राख्यो । अति आनंद वचन मुख भाष्यो ॥ इहै कहति तब की अब नीके ।
 सकुचि हँसी नागरि सँग पीके । नैनकोर पिय हृदय निहारयो । उन पहिलेहि पीतांबर धारयो ॥
 सूरदास इह लीला गावै । हरिपद शरण अक्षै फल पावै ॥ २४ ॥ राग नटा ॥ धनि ब्रजसुंदरी धनि श्याम ।
 धन्य धन्य वृषभानुतनया राधिका जेहि नाम ॥ गेह गेहनि गई तरुणी श्याम गए नंदधाम ॥

भवन गई वृषभानुतनया कोक कला सुयाम ॥ करत मनकामना पूरण एक निशि सब वाम ।
 सूर प्रभु जा सदन जात न सोइ करत तनु ताम ॥ २५ ॥ अथ खंडिता समय ॥ राग विलावल ॥ नाना रंग उप-
 जावत श्याम । कोउ रीझति कोउ खीझति वाम ॥ काहूके निशि वसत बनाई । काहू मुख छै
 आवत जाई ॥ बहुनायक है विलसत आप । जाको शिव नहीं पावहिं जाप ॥ ताको ब्रजनारी
 पति जानै । कोउ आदर कोऊ अपमानै ॥ काहूसों कहि आवत सांझ । रहत और नागरि
 घर मांझ ॥ कबहुँ रैन सब संग विहात । सुनहु सूर ऐसे नंदतात ॥ २६ ॥ राग विलावल ॥
 अब युवतिन सो प्रगटे श्याम । अरस परस सबहिन यह ~~जाति न रीनु~~ सबहिनके
 धाम ॥ जादिन जाके भवन न आवत ~~सुख मनमें~~ यह करति बिचार । आजु गए और
 हि काहूको रिसपावति कहि बडे लवार ॥ यह लीला हरिके मनभावति खंडित वचन कहत
 सुख होत ॥ सांझ बोलै जात सूर प्रभु ताके आवत होत उदोत ॥ २७ ॥ राग रामकली ॥ ठाढे नंद
 द्वार गोपाल । बोलि लीन्हें देखि ललिता सैनदै ततकाल ॥ हँसत गए हरि गेह ताके कोउ न
 जानत और । मिली हरिके लाइ उरभरि चापि कुचन कठोर ॥ कह्यो मेरे धाम कबहुँ क्यों न
 आवत श्याम । सूर प्रभु कहि आजु नागरि आइ हैं हम जाम ॥ २८ ॥ राग विलावल ॥ ललिता को
 सुख दै गए श्याम । आज बसैगे रैन तुम्हारे प्राण पियारी हौ तुम वाम ॥ यह कहिकै अनतहि
 पगधारे बहुनायक के भेद अपार । सांझ समय आवन कहि आए सौह बहुत करि नंदकुमार ।
 वह बैठी मारग हरि जोवति इक इक पल बीतत इक याम । सूर श्याम आवनकी आशा सेज सँवा-
 री व्याकुल काम ॥ २९ ॥ राग गौरी ॥ सांझहि ते हरि पंथ निहारै । ललिता रुचि करि धाम आपने
 सुमन सुगंधनि सेज सँवारै ॥ कबहुँक होत वार ने ठाढी कबहुँक गनति गगनके तारे । कबहुँक
 आइ गली मग जोवत अजहुँ न आए श्याम पियारे ॥ वै बहुनायक अनत लुभाने और वामके
 धाम सिधारे । सूर श्याम बिनु विलपति बाला तमचुर शब्द जहँ तहां पुकारे ॥ ३० ॥ ललिता
 तमचुर टेर सुन्यो ॥ वै बहुनायक अनत लोभाने नहीं आए जिय कहा सुन्यो ॥ बिन कारण दै आश
 गए पिय बार बार तिय शीश धुन्यो । सेज सँवारि पंथ निशि जोवत अस्त आनि भयो चंद पुन्यो ।
 तब बैठी मनमारि आपनो कछु रिस कछु मन सोचि परचो । सूर श्याम याते नहीं आए मात
 पिताको त्रास धरचो ॥ ३१ ॥ राग जैतश्री ॥ सोचपरचो नागरि मन माहीं । की काहूके अनत लोभाने
 की पितुमात त्रास मनमाहीं ॥ वै निशि वसे महल शीलाके सुख सब रैन गँवाई । उठे अकुलाइ
 भोर भयो जान्यो तब नागरि सुधि आई ॥ सहज चले गोपीसों कहिकै जिय सकुचे अति भारी ।
 सूर श्याम ललिता गृह आए चितै रही मुँह प्यारी ॥ ३२ ॥ राग ललित ॥ प्यारी चितै रही मुख पियको ।
 अंजन अधर कपोलनि वंदन लाग्यो काहू त्रियको ॥ तुरत उठी दर्पण कर लीन्हें देखो वंदन
 सुधारो । अपनो मुख उठि प्रात देखिकै तब तुम कहूँ सिधारो ॥ काजर वदन अधर कपोलन
 सकुचे देखि कन्हारै । सूर श्याम नागरि मुख जोवत वचन कह्यो नहीं जाई ॥ ३३ ॥ शीलाके
 घरते ललितके आए ॥ राग आसावरी ॥ दर्पण लै प्यारी मुख आगे कहति पिया छवि हेरोजू । मेरी
 सौं हाहा कहि पुनि पुनि उत काहे मुख फेरोजू ॥ सकुचत कहा बोलके साँचे मेरे गृहतौ आएजू ॥
 रैन नहीं तौ अब जु कृपा भई धनि जिनि स्वांग करायोजू ॥ मेरी कही विलग जिनि मानो मैं तुव
 करत बडाईजू । सूर श्याम सन्मुख नहीं चितवत रहे धरणि शिरनाईजू ॥ ३४ ॥ राग ललित ॥ क्योंमो
 हन दर्पण नहीं देखत । क्योंधरणीपग नखन करोवत क्यों हम तन नहीं पेखत ॥ क्यों ठाढे बैठत क्यों

नाहीं कहा परी हम चूक । पीतांबर गहि कह्यो बैठिए रहे कहाहै सूक ॥ उघरि गयो उरते उपरैना
 नखछत बिन गुणमाल । सूर देखि लटपटी पागपर जावककी छबिलाल ॥ ३५ ॥ राग ईमन ॥ ऐसी
 कहौ रंगीले लाल । जावकसों कहाँ पाग रंगाई रंगरेजिनमिलि है को बाल ॥ वंदन रंग कपोलन
 दीन्हों अघर अरुणभए श्याम रसाल । जिनि तुम्हरे मन इच्छा पुरई धनि धनि पिय धनि धनि वह
 बाल ॥ माला कहाँ मिली बिन गुनकी उरछत देखिभई बेहाल । सूर श्याम छबि सब बिराजी इहै
 देखि मोको जंजाल ॥ ३६ ॥ राग गुंडमलार ॥ काहेते सकुचत पिय दृष्टि नहीं तुम जोवत मोहन रूप
 विहारी । ~~निकरि लखन~~ तब सोवत घूमति आँखि तिहारी ॥ नैन जगे पल लगे जातहैं पौढत
 तल्प हमारी । विविध कुसुम रचना रचि पल्लव भूषने हाथ सवारी ॥ कहत सूर उर तप्यो भोर
 भयो हम बैठी रखवारी ॥ ३७ ॥ राग विलावल ॥ ज्वाब नहीं पिय आवई क्यों कहाँ ठगाह्ये । मैं तबहीं
 की बकतिहौं कछु आजु भुलाने ॥ हाँ नाहीं नहि कहतहौ मेरीसों काहे । आए क्यों चकृतभए
 मोको रिसि दाहे ॥ कहाँ रहे कासों बन्यो तहाँई पगधारो । सूर श्याम गुणरावरे हिरदै न बिसारो ॥
 ॥ ३८ ॥ राग विलावल ॥ काहेको कहि गए आइहैं काहे झूठी सोंहैं खाए । ऐसे मैं जाने नहि तुमको
 जे गुणकरि तुम प्रगट देखाए ॥ भलीकरी दरशन हरि दीन्हें जन्म जन्मके ताप नशाए । तब चितए
 हरि नेक त्रियातन इतनेहि सब अपराध क्षमाए ॥ सूरदास सुंदरी सयानी हैंसि लीन्हें पिय अंकम
 लाए ॥ ३९ ॥ राग विलावल ॥ नैनकोर हरि हेरिकै प्यारी वश कीन्हों । भाव कह्यो आधीनको ललिता
 लखि लीन्ही ॥ तुरतगयो रिस दूरिहैं हैंसि कंठ लगाए । भलीकरी मनभावते ऐसेहु मैं पाए ॥
 भवनगई गहिबांहलै निशिजाने । अंग शिथिल निशि जागे श्रम भयो मनहीमन ज्ञाने ॥ अंग सुगंध
 मर्दनकियो तुरतहि अन्हवाये । अपनेकर अँग पोंछिकै मन साध पुराए ॥ चीर अभूषण अंगदै बैठे
 गिरिधारी रुचिभोजन पियको दियो सूरज बलिहारी ॥ ४० ॥ राग कल्याण ॥ कियो मन काम नहि
 रही बाकी । प्रिया रिस दूरिकै दियो रसपूरिकै अनंगबलदूरिकै गोपजाकी । नंदसुत लाडिले प्रेमके
 चांडिले सोहदै कहतहैं नारि आगे । तुम परमभावती प्राणहूँ ते खरी सुख नहीं लहत मैं तुमहि
 त्यागे ॥ तुमहिधन तन तुमहि तुमहि मनही बसै और त्रिय नहीं मो मनहि भावै । सूर प्रभु चतुर
 वर चतुर नागरिनके चतुरई वचन कहि मन चुरावै ॥ ४१ ॥ राग भैरव ॥ इहै भाव सब युवातिनसों ।
 ऐसे वचन कहत सब आगे भूलि रहति मनमोहनसों । बिनदेखे रिसभाव बढावत मिलिआई
 दै सोंहनिसों । सुख देखत दुख रहत नहीं तनु चितवत मुरि दोउ भौहनसों ॥ और त्रिया
 अँग चिह्न बिराजत रिस मनहीं मन छोहनसों । सूर श्याम सब गोप कुमारी टरति नहीं कहूँ गोहन
 सों ॥ ४२ ॥ राग विलावल ॥ ललिताको सुख दै चले अपने निजधाम । बीचमिली चंद्रावलि उन
 देखे श्याम ॥ मोर मुकुट कछनी कछे नटवर गोपाल । रही बदन तनु हेरिकै अतिहित ब्रजबाल ॥
 गली साँकरी कोउ नहीं आतुर मिलि धाई । कहाँ कहाँ पिय रहतहौ हमको बिसराई ॥ श्याम
 कह्यो हैंसि वाम सों तुम्हरे निशिवास । सूर हृदयकी कल्पना सुनि भई हुलास ॥ ४३ ॥ राग आसावरी ।
 श्याम वामको सुख दै बोले रैनि तुम्हारे आऊंगो । मात पिता जिय त्रास धरत हौं तऊ आइ सुख
 पाऊंगो ॥ तुव मिलबेकी साध भुजा भरि उरसों कुच परसाऊंगो । नैन बिशाल भाल उर बैठे ते
 तुव हाथ कहाऊंगो ॥ तव तनु परसि काम दुख मेटाँ जीवन सफल कराऊंगो । सुनहु सूर अधरन
 रस अँचवो दुहुँ मन तृषा बुझाऊंगो ॥ ४४ ॥ राग गूजरी ॥ सुनि सुनि बचन नारि मुसुकानी।
 गई सदन अति है उतावली आनंद सहित लजानी ॥ फूली फिरति कहति नहि काहू मीन मिल्यो

जनु पानी बारंवार श्याम रति रसकी कहीं प्रगट करि वानी ॥ वासर कल्प समान न बीतत कैसे
हुँ रैन तुलानी । सूर देखि गति गत पतंगकी अवधि जानि हरषानी ॥४५॥ राग कल्याण ॥ राधिका
गेह हरि देह वासी । और त्रिय घरन घर तनु प्रकासी ॥ ब्रह्मपूरण एक द्वितीय नहिं कोऊ । राधिका
सबै हरि सबै कोऊ ॥ दीपसैं दीप जैसे उजारी । तैसेही ब्रह्म घर घर बिहारी ॥ खंडिता वचन
हित यह उपाई । कबहुँ कहुँ जात कहुँ नहिं कन्हाई ॥ जन्मको सफल हरि इहै पावै । नारि रस वचन
श्रवण न सुनावै ॥ सूर प्रभु अनतही गमन कीन्हों । तहां नहिं गए जहां वचन दीन्हों ॥ ४६ ॥
राग डोढी ॥ श्याम गए सुख सुखमाके धाम देखत हर्ष भई मनवाम ॥ आतुर चारु गए समाई । प्यारी
प्रेम उठी झहराई ॥ श्याम भामिनी परम उत्तम कोककलारस करत विचार ॥ बोलत पिय
नहिं आवारी पास । गद्गद वानी कहति उदास ॥ धाइ जाइ पति अंकम लाइ । हाहा कहि लेत
बलाइ ॥ अति आतुर पतिके नति काम । कहा प्रकृति पाई यह वाम ॥ बाँह गहत कीन्हों धन
मान । तब हरिकीन्हें एक सयान ॥ तब प्यारी चरणन शिरधारी । काम व्यथा जान्यो सुकुमारी ॥
अल्प हँसी मुख हेरि लजानी । सूरज प्रभु त्रिय मनकी जानी ॥ ४७ ॥ राग गुंडलार ॥ श्याम कर
भामिनी मुख सँवारयो । बसन तनु दूरि करि भबल भुज अंकभरि कामरिस वाम परि निदरि
धारयो । अधर दशनन भरे कठिन कुच उरलरे परे सुख सेज मन मुरछि दोऊ । मनो कुंभिलाइ
रहे मन से मल्लदोउ कोक परवीन घटि नहीं कोऊ । अंग विह्वल भए नैन नैनन नए लजित
रति अंत त्रिय कंत भारी । सूर धनि धन्य सुखमा नारि वश श्याम याम युग भई पतिते
नन्यारी ॥ ४८ ॥ राग विहागरे ॥ चंद्रावली श्याम मग जोवति । कबहुँ सेज करझारि सँवारति कबहुँ
मलयरज भोवति ॥ कबहुँ नैन अलसात जानिकै जल लै लै पुनि धोवति । कबहुँ भवन कबहुँ
आँगन है ऐसे रैन बिगोवति ॥ कबहुँक विरह जरति अति व्याकुल आकुलता मनमो अति ।
सूर श्याम बहु रवन रवन पिय यह कहि तब गुण तोवति ॥ ४९ ॥ राग ललित ॥ ऐसेहि ऐसेहि रैन
विहानी । चंद्रमलीन चिरैया बोली सुनी कागकी वानी ॥ वे लुब्धे अनतहिं काहुँके मनकी आश
भुलानी ॥ कपटी कुटिल कूर कहा जानै श्यामनाम जिय आनी ॥ कोकिल श्याम श्याम अलि देखो
श्याम रंगहै पानी ॥ श्याम जलद अहि श्याम कहावत सूर श्याम सों बानी ॥ ५० ॥ राग गुंडमलार ॥ वाम संग
श्याम त्रययाम जागे । कोक विद्या निपुण सकल गुण मेष पुन सुरति संग्राम जुरि नहीं भागे ॥ अंग
आलस भरे नैन निद्रा ठरे नेक सेज्यापरे निशा बीती । सूर प्रभु नंदसुत चले अकुलाइके गए ता
धाम रसकाम जीती ॥ ५१ ॥ राग विभास ॥ चंद्रावलि धाम श्याम भोर भए आएजू । इत रिस करि
रही वाम रैन जागी चारि याम देख्यो जो द्वार कान्ह ठाढे सुखदायेजू ॥ मंदिरते रही निहारि
मनही मन देत गारि ऐसे कपटी कठोर आए निशि बीते । रिस नहीं सखि सँभारि बैठि चली नारि
ठाढे गिरिधारि निरखि छवि नख शिखहीते ॥ बिनु गुनवनी हृदय माल ता बिच नख छत रसाल
लोचन दोउ दरशिलाल जैसी रिस गाढी ॥ जावक रंग लग्यो भाल वदन भुज पर विशाल पीक पलक
अधर झलक वाम प्रीति गाढी ॥ क्यों आए कौन काज नाना करि अंग साजे उलटे आभूषण
शृंगार निरखतहौ जाने । ताहीके जाहु श्याम जाके निशि बसे धाम मेरे गृह कहा काम सूर
दास गाने ॥ ५२ ॥ राग विलावल ॥ तहीं जाहु जहिं रैन बसे हो । काहेको दाहन हो आए अंग अंग
देखति चिह्न जैसे हो अरगजे अंग मरगजी माला वसन सुगंध भरेसे हो । काजर अधर कपोलन
वदन लोचन अरुन धरेसे हो ॥ पलकनि पीक मुकुर लै देखो एकोन हौ अनैसे हों । सूरदास प्रभु

पीडेब लैगठ नागरि अंक भरेसे हो ॥५३॥ राग सारंग ॥ तहँई जाहु जहँ रैन रहे बसि । कैतव कत
 दामिनि पद प्रगटत आए मारन दुअन बान कसि ॥ सिथिल सरोज रोर सुठि शोभित शीशहुते
 कछु पागरही घसि । जावक रस मनौ संबर अरिगण पिया मनाई पदललाट घसि ॥ बिन
 गुणमाल मराल तरनिगति मगन चालपद परत रहत खसि । चंदन चरचित कुच उर
 उपटित मनु नवघनमें उदित दोउ शशि ॥ सखियन समाचार लिखि पठए तन कागज
 नखलेखनि रुधिर मसि ॥ सूरदास प्रभु श्रीगोपालहै मानौ जागत भई निशा नशि ॥५४॥
 ॥ राग बिलावल ॥ तहँई जाहु जहां निशा बसेहो । जानतहो पिय चतुर शिरोमणि नागरि
 जागर रास रहेहो ॥ घूमतहो मनो प्रिया बिनि नब विलास श्रमसे जडसेहो । काजर
 अधरनि प्रगट देखियत हो नागवेलि रंग नि आग चहो ॥ श्याम उरस्थल पर रेखा मनहुँ गगन शशि
 उदित दिसेहो । लटपटी पाग महाबरके रंग मान आँख पर शीश घसेहो ॥ विगलित वसन मरगजी
 माला पीठ वलयके चिह्न लसेहो ॥ सूरदास प्रभु प्रिय चन सुनि नागर नगधर नैक हँसेहो ॥५५॥ तहँ
 ई जाहु जहँ रैन हुते । काहे दुराव करत मनमो रसखन चिह्न नहि अंग जुते विनही गुन उरहार
 बिराजत परम हियलाइ सुते । विधुनर नलक अटपटे भूषण काम कुटिल कुच बीच
 गुते ॥ दशन दाग नखरेखबनीहै भामिनि भवन भले भुगुते । सूर सुदेश अधर मधु फीके लोचन
 अलस उनीदहुते ॥५६॥ तहँई जाहु जहां रैन गँवाई । काहेको मुँह परसन आए जानति हौं चतुराई ॥
 वाके गुण मनते नहिं टारत बोलत नाहीं बैन । याछबिपर मैं तन मन वारों पीक विराजित
 नैन ॥ भली करी यह दरश दिखायो ताते नैन सिराने । सूर श्याम निशिको सुख लूँचौ हमको
 मया विहाने ॥५७॥ राग सुग्राई ॥ आए लाल ललित भेष किए । पीक कपोल अधर पर काजर जावक
 दिए ॥ चंदन खौरि मेदि अब आए कुमकुम रंग हिए । पीतांबर तहां डारि कौनको नीलांबरहि
 लिए ॥ लालीहै पीरी लै आए देखत पुलकि शिए ॥ सूरदास प्रभु नवल रसीले वोऊ नवल त्रिए ॥५८॥
 ॥ राग सही ॥ जागे होजू रावरे है नैना क्यों न खोलौ । भये त्रियाके वश निशि जागे सरवस भोर भए
 उठि आए भूले कहा डोलौ ॥ चंदन मिटाए तनु अतिही अलसात नागरीकी पीक लागी तो
 कपोलो । पीतांबर भूलि आए प्यारी जीको पटु ल्याए भोर भए उठे सूर किए आए दोलो ॥५९॥
 ॥ राग बिलावल ॥ पीतांबर पट कहा भयो । नीलांबर ओढेहो आए अति दुहुँ डहो नयो ॥ तैसोइ अंग
 वसन रंग तैसोइ कहा कहौ यह शोभा । तैसिय बनी मरगजीकेसर ता त्रियके मनलोभा ॥
 एते पर क्यों बोलत नाहीं कहा खोइसे आए । सूर श्याम यह अब मैं जानी नागरि चित्त चुराए ॥
 ॥६०॥ राग भैरव ॥ हाहाहो पिय बात कहौ । आप कछू जिय तरक गहत होतौ तुम मोसों मैं न गहो ॥ कहा
 चूक हमको पिय लागै रूसि रहेहौ काहेजू । तबहींते वैसेहि हो ठाढे मोतनको नहिं चाहेजू ॥ अब
 हमको अपराध क्षमैंगे कृपा करौ मुख बोलोजू ॥ सूर श्याम अब तजो निठुरई गांठि हृदयकी खोलोजू ॥
 ६१ ॥ राग बिलावल ॥ रूखेहो पिय रूखेहो । उत्तरको उत्तर न देतहौ देखतही न कछूखेहो ॥ वह
 चितवनि न होइ नैननकी वचननहुँ ते उतहूषेहो । वह मुखकमल विकास नहीं रति सायक
 शिरहि विदूषेहो ॥ की छुटि गई संपदा करते की ठग ठगे कछूषेहो । मेरेहु जान सूर प्रभु सांचे
 मदन चोर मिलि मुषेहो ॥६२॥ मदनचोर सों जानि मुषायो । अपनी लाली खोइ पीककी लाली
 पलकनि पायो ॥ ह्योते गए चतुरई लीन्हें सो सब उनहि छपायो ॥ आलस अबल जम्हात अंग ऐंडात
 गात दर्शायो । कंचन खाय कांच लै आये विदतो भलो फवायो । सूर कहूँ घर पर मन
 नाहीं जैसे हाल करायो ॥६३॥ राग काफी ॥ लाल उनीदे नयना आलस भरि आए । अरुझि काम

की बेलि सों कौने विरमाए ॥ सिथिल पाग दस्तारकी जावक रँग भीने । पाँइपरे अपवश करे तब
 सरवस दीने ॥ लाली मेरे लालकी सबही तन ढाले । लाली ले लालनगए आए मुख पीले ॥ बिन गुन
 माल हिये लसै पिय प्रीति निसानी । सखी रसाल हमको दई तुम देहु बिरानी ॥ पग डगमग इत
 को धरौ उतको दृग धाए । अभ्यंतर अंतर बसे पिय मोमन भाए ॥ उलटि तहां पग धारिए जासों
 मनमान्यो । छपदकंज तजि बेलिसों लटि प्रेम नजान्यो ॥ तबहँसि बोले श्यामजी तुमते को प्यारी ।
 तुम बिनु कल मोको नहीं अतिही सुखकारी ॥ वचन चतुरई छांडिदेहु कहा पढि आए । सूर श्याम
 गुणराशि हौ नीके प्रगटाए ॥ ६४ ॥ राग सुवराई ॥ आए लाल गुमिनी जागेस भारीनाल कलेवर कोमल ऊ-
 पर रगडि गए कुच जे कठोरा ॥ निशिवसि रहे नानि ^{मन} गह ह्यां उठि आए भोर । सूरदास प्रभु वचन
 बनावत अब चोरत मनमोर ॥ ६५ ॥ आए लाल धाई भेष किए । पीक कपोल अधर पर काजर
 जावक भालै दिए ॥ चंदन खौरि मेटि उकहा प्रकुटिमकुम रंग हिए । पीतांबर कहाँ डारि कौनको
 नीलांबरहि लिए ॥ लालीदे पियरी लैआए ॥ चेत पुलकि जिए । सूरदास प्रभु नवल रसीले वोऊ
 नवल त्रिए ॥ ६६ ॥ मैं जानी जिय जहँ रति स मन तुम आएहौ ललना जब चिरिआं चुहचुहा
 नी ॥ मुखकी बात कहा कहाँ ठानी बात नहीं पहिचाने ॥ येते पर अँखियां रससानी अरु पगिया
 लपटानी ॥ भालै जावकरंग बनानी अधरें अंजन प्रगट जानी ॥ बिन गुण बनी माल सब अंगन उलटे
 सकल निसानी ॥ सूरदास प्रभु गुन निधानी अंतर गतिकी मैं सब जानी ॥ धनि त्रिय तुमको जो सुखदानी
 संगम जागत रैनि विहानी ॥ ६७ ॥ राग विभासा ॥ मैं जानी पियबात तुम्हारी ॥ भोर भए मेरे गृह आए ऐसे
 भोरे भारी ॥ ह्यां आए मुख परसन मेरो हृदय दरति नहि प्यारी । कपट चतुरई दूर करौजू
 अपयश लेत रु गारी ॥ कहा सांच मैं खोवत करते झूठे कहा फवावति । सूर श्याम नागर
 नागारि वह हम तुम्हरे मन आवति ॥ ६८ ॥ राग काफ़ी ॥ रैनि रीझे की बात कहौ ।
 काहेको सकुचत मनमोहन ठाढे क्यों न रहौ ॥ पीतांबर कहा भयो तुम्हारो कीधौं लियोगहौ ।
 नीलांबर पहरावन पाई सन्मुख क्यों न चहौ ॥ तब हँसि चले श्याम मंदिर तन कछु जिय लाज
 गहो । सूर श्याम ह्याँई अब रहिए अति पुनीत तुमहो ॥ ६९ ॥ राग बिलावला ॥ तुम रीझेकी उनहि रिझा
 ए । हाहा यह पिय प्रगट सुनाऊं कोटिक सौह दिवाए ॥ जावक भाल चिह्न मैं जान्यो हठकरि
 पाँय लगाए । नैनन पीक मया उनि कीन्ही अंजन अधर लगाए ॥ बिनु गुन माल मिली कहँ तुम
 को कंकन पीठि देखावहु । सूर श्याम हमतौ यों जानति तुमहु कहि न सुनावहु ॥ ७० ॥ माधव
 नीकी बिधिसों आए । नखरेखा उर मंडित मानो द्वितिया चंद उगाए ॥ बिगलित बसन पाग
 डोलतिहै केहरि चाल चलापे । सर्वसु आनि जु रहे सूर प्रभु उत मेरे मन भाए ॥ पाउँ धारिए वाम
 धाम जहँ चारों याम गँवाए ॥ ७१ ॥ राग बिलावला ॥ आजु हरि पायोहै मुँह माँग्यो ॥ जबते तुमसों बिचारयो
 मनसिज दैसिलवारयो त्याग्यो ॥ कहँ जावक कहँ बने तमोर रँग कहँ अंग सेंदुर दाग्यो ।
 मानौ इन छूटे घायलको जहां तहां शोणित लाग्यो ॥ नख मानो चंद्र बाण साजिकै झझकारत
 उर आग्यो । सूरदास माननि रण जीत्यो समर संग डारि रण भाग्यो ॥ ७२ ॥ आजु हरि रैनि उनींदे
 आए ॥ अंजन अधर ललाट महाउर नैन तमोर खवाए । बिनु गुनमाल विराजत उर पर चंदन
 खौरि लगाए । मगन देह शिरपाग लटपटी जावक रँग रंगाए । हृदय सुभग नख रेख विराजत
 कंकन पीठि बनाए । सूरदास प्रभु इहै अचंभव तीन तिलक कहाँ पाए ॥ ७३ ॥ आजु हरि आल-
 सरंग भरे । कबहुँक बाँह जोरि ऐंडावत बहुत जम्हात खरे ॥ बैठोगे की पांव धारिए देखत नैन

सिराने । साँझ आय इक दरशन दीन्हों की अब होत बिहाने ॥ कबके द्वार भए पिय ठाढे भोरे
बडे कन्हई । सूर श्याम ह्रां सुरति करत वह ह्रां तुम झेर लगाई ॥ ७४ ॥ सौंह करनको भोरही
तुम मेरे आए । रैन करत सुख अनतही ताके मन भाए ॥ अँग अँग भूषण औरसे माँगे कहूँ पाए ।
देखि थकित यह रूपको लोचन अरुनाए । मान कियो वोहि मानिनी धनि पाइ पराए ॥ यह
चतुराई कहँ पढी उनहीं समुझाए । सूरदास प्रभु सांचिले उपमा कविगाए ॥ ७५ ॥ राग गौरी ॥ तुमको
कमलनैन कवि गावत । वदन कमल उपमा यह सांची ता गुनको प्रगटावत ॥ सुंदर कर कमलनकी
शोभा चरण कमल कहत नैन कहै अँग कहि कहा बखानो इतनेहिको गुण गावत ॥ श्याम नाम अद्भुत
यह बाण बिनना बोलुनत सुख पावत । सूरदास कह्यो इमलू सँगाती जानी जाति जनावत ॥ ७६ ॥
छीही ॥ मैदं परावत कमलनैन । कमलचरण बिहारे कमल वदन छबि अरज सुनावत मधुर बैन ॥
नरिने गट रति रविहि जनावत हुलसत आँखें दारो रह्यो ॥ निशिदै द्वार कपाट सदलवधु मधु-
पति प्यावत परमचैन ॥ मिलेहु माँझ उदास आँखें वसत सदा जल एक ऐन । सूर कपट
फल तबहिं पाइहौ अपनी अरप जब देहै भैरव ॥ राग भैरव ॥ धीर धरहु फल पावहुगे ।
अपनेही पियके सुख चाँडे कबहुँ तौ वश अंतर ॥ हमसों कहत औरकी औरै इन बातन मन
भावहुगे । कबहुँ राधिका मान करैगी अंतर विरह जनावहुगे ॥ तब चरित्र हमहीं देखैंगी जैसे
नाच नचावहुगे । सूर श्याम अति चतुर कहावत चतुराई बिसरावहुगे ॥ ७८ ॥ राग देवगंधार ॥ यह
कहि प्यारी भवन गई । रीझे श्याम देखि वा छबि पर रिस सुख सुंदरई ॥ द्वारकपाट दियो गाँढे
करि कर आपने बनाई । नेक नहीं कहूँ संधि बचाई पौढि रही तब जाई ॥ यहि अंतर हरि अंत-
र्यामी जो कछु करे सु होई । जहां नारि सुख मूँदि पौढि रही तहां संग रहे सोई ॥ जो देखे ह्रां
संग विराजत चली त्रिया झहराई । एक श्याम आँगनही देखे इक गृह रहे समाई ॥ उतको वै अति
बिनय करतहैं इक अंकम भरिलीनी । सूर श्याम मनहरन कहावहु मनहरिके वश कीनी ॥ ७९ ॥
राग कल्याण ॥ तब नागरि रिस भूलि गई । पुलकि अंक अँगिया उर दरकी अँग अनंग जई ॥
अंकम भरि पिय प्यारी लीन्हों निशि सुख वासरि दीन्हों । मान छँडाइ हुलास बढायो सुफल मनो
रथ कीन्हों ॥ तब निजधाम श्याम पगधारे तहां सहचरी आई । सूरज प्रभु रसभरी नागरी देखि
रही मनलाई ॥ ८० ॥ राग आसावरी ॥ चंद्रावली हरषसों बैठी तहां सहचरी आई हो । औरै वदन और
अँग शोभा देखि रही चखलाई हो ॥ कहा आज अति हरषित बैठी कहा लूटिसी पाई हो । क्यों अँग
शिथिल मरगजी सारी यह छबि कही न जाई हो ॥ मोसों कहा दुराव करतिहै कहा रही शिरनाई हो ।
मैं जानी तोहिं मिले सूर प्रभु यशुमति कुँवर कन्हई हो ॥ ८१ ॥ राग आसावरी ॥ चंद्रावली करति चतुराई
सुनत बचन सुख मूँदि रही । जवाब नहीं कछु देत सखी क्यों हॉं नार्हीं कछु बैन कही ॥ गूँगे गुरकी
दशा भई है पूरण श्याम सोहाग सही । आये श्याम सदन सुखभारी दुखानिवारि आनंद करी ।
वहै ध्यान हरिके अनुरागी वह लीला चितते न टरी ॥ तब बोली मोसों कछु बूझति कहा कहाँ मुख
बनै नहीं । सूर श्याम युवती मनमोहन तिनको गुण नहिं परत कही ॥ ८२ ॥ राग बिलावल ॥ हाहा
कहि चंद्रावालि मोसों हरिके गुण मैहूँ सुनि लेउँ । श्रवणन मग सुनि हृदय प्रकाशो पुनि पुनि उत्तर
देउँ ॥ की तोहिं मिले तीर यमुनाके की तोहिं मिले भवनही माँझ । कहाँ तोहिं मेरे गृह आए
मानो अस्त होत रवि साँझ ॥ कहूँ वामके धाम बसे निशि भोर सदन गए मेरे आई ।
सूर श्याम जो चरित उपायो कहन चहौँ मुख कह्यो न जाई ॥ ८३ ॥ राग गौरी ॥ अब तो कहे बनैगी

माई । कहा श्याम अचरज सो कीन्हों कहत कह्यो नहिं जाई ॥ कैसे लाल अनतते आए कैसे तेरे गेह । कैसे मान कियो क्यों मिटिगए कैसे बढ्यो सनेह ॥ तब गद्गद वाणी मुख प्रगटी सुन सजनीदै काना।सूरज प्रभुके चरित सुनाऊँ जैसे बिसरयो माना॥८४॥ राग विलावल॥ प्रातसमै मेरे मोहन आए कुंचित केश कमल मुख ऊपर हृदय रहो वन अलिकुल छाए॥ डगमग चाल परत न सूधे पग इहि बिधि तौ मेरे मन भाए । कहुँ कहुँ पीक कहुँ काजर कहुँ नखरेखा अति बनत सुहाए ॥ सो तन बीच निरखि मुसुकाने छोरि पीतपट अंक दुराए॥ सूर श्याम माधव बलि बलि अब श्याम जानि हों पाए॥८५॥ राग गौरी॥ मैं हरि सों हो मान कियो री॥ आवत देखि ~~अनन्य नित्य नित्य~~ कृपाट दियो री॥ अपनेही कर संकर सारी संधि संधि सियो ~~हैं लाल मुखो तो सेज समूरति कांफ्यो~~ ~~वर कोमलियो री॥~~ जब झुकि चली भवनते बाहर तब हटि लोट लिखे ~~कहा कहाँ कछु कहत न अनाम वचन~~ वियो री ॥ बिसरि गई सब रोष हरष ~~लाल मुख मदन जियो री । सूरदास प्रभु आनख~~ नागर छलि मुख अमृत पियो री ॥८६॥ राग प्रकृति ॥ तबहींते भयो हरष हियो री । वैसे आइ चरित ए कीन्हें सदन पैठि मन चोरि लियो री । अंचल मु छवि शेष देखिकै रिस उपजी जियभारी । क्रोध गयो उर आनंद उपज्यो सुख तनु दशा बिसरि ~~अनुपम~~ चरित कौनको आवैं जे कीने गिरिधारी । सूर श्याम रतिपतिके नायक सब लायक बनवारी ॥ ८७ ॥ राग भैरव ॥ नंदनंदन सुखदायक हैं । नैन सैनदै हरत नारि मन काम कामतन दायक हैं ॥ कबहुँ रैन बसत काहूके कबहुँ भोर उठि आवत हैं । सुनहु सूर जेइ जेइ मनभावत तेइ तेइ रँग उपजावत हैं ॥ ८८ ॥ राग विलावल ॥ अनतहिरैन रहै कहुँ श्याम । भोर भए आए निज धाम ॥ नागरि सहज रही मनमाहीं । नंदसुवन निशि अनत न जाहीं॥ महरसदनकी मेरे गेहाहृदय है त्रिय इहै सनेह ॥ आये श्याम रही मुख हेरि । मन मन करन लगी अवसेरि ॥ रतिरस चिह्न नारिके वानि । सूर हँसे राधा पहिचानि ॥ ८९ ॥ राग रामकली॥ आज बने पिय रूप अगाध । परउपकाज हेतु तनु धारयो पुरवत सब मन साध ॥ धर्म नीति यह कहा पढी जू हमहुं बात सुनावहु । कहाँ कहाँ काको सुख दीनों काहेन प्रगट बतावहु ॥ धनि उपकार करत डोलतहौ आज बात यह जानी॥ सूर श्याम गिरिधर गुण नागर अंग निरखि पहिचानी॥ ९० ॥ राग गूजरी ॥ पिय छवि निरखि हँसति त्रियभारी॥ कहां महाउर पाग रँगई यह शोभा इक न्यारी ॥ अरुणनयन अलसात देखियत पलक पीक लपटानो । अधर दशन छत बंदन राजत बंधुकपुर अलिमानो ॥ हृदय रुचिर मोतिनकी माला नखरेखा तेहि तीराबिनु गुणमाल सूरके स्वामी कुंकुम श्यामशरीर ॥ ९१ ॥ राग विलावल॥ धन्य आजु यह दरशदियो । धन्य धन्य जासों अनुरागे तब जानी नहिं और वियो॥ भले श्याम वह भली भावती भले भली मिल भली करी । यह मेरे जिय अतिहि अचंभित तौ बिछुरत क्यों एक घरी ॥ जाहु तहीं सुख दीनो मोको वै सुनिकै रिस पावैंगी । सूर श्याम अतिचतुर कहावत बहुरो मनन मिलावैंगी ॥ ९२ ॥ क्यों आये उठि भोर इहां । काहेको इतनो शरमाने रैनिरहे फिर जाहु तहां ॥ हमको कहा इती गरुआई उनही क्यों न सम्हारोजू । उनआए ह्यां नाहीं जा न्यो अजहुं लौं पगधारौ जू ॥ हमहुं बोलि वहाँई लीजो डर उनको हमहुंकोहै । सूर श्याम तिनहीं सुख दीजै जो विलसैं संग तुमको लै ॥ ९३ ॥ राग रामकली ॥ उनहीको मन राखे काम । ह्यां तुम आए हौजू नाहीं बात सुनतहौ नाहीं श्याम ॥ देखो अंग अंग प्रतिशोभा मैंतो भूलीहौं यहिरूप । धनि पिय बने बनी वेऊ हैं इक इक रूप अनूप ॥ सो छवि मोहिं देखावन आए मायाकरी बहुत हरिआजु । सूरदास प्रभु रसिक शिरोमणि वह उरसिकनी बन्यो समाजु ॥ ९४ ॥ राग विलावल ॥ रसिकरसिकई जानिपरी । नैननते अब न्यारे दूजै तबहींते अति रिसनि मरी । तुम जोबन अरु सो नवजोबनि

येते पर सब गुणनि भरी । लाजनहीं मेरे गृह आवत जाहु जाहु करि त्रिय झहरी ॥ अंजन अधर
 कपोलन बंदन पीक पलक छबि देखि डरी । सूर श्याम रति चिह्न देखावन मेरे आए भले जु हरी ॥
 ॥ ९५ ॥ राग धनाश्री ॥ श्याम त्रिया सन्मुख नहिं जोवत । कबहुँ नैनकी कोर निहारत कबहुँ वदन
 पुनि गोवत ॥ मन मन हँसत त्रसत तनु परगट सुनत भावती बात । खंडित वचन सुनत प्यारी
 के पुलक होत सब गात ॥ इह सुख सूरदास कछु जानै प्रभु अपनेको भाव । श्रीराधा रिस
 करति निरखि मुख सो छबि पर ललचाव ॥ ९६ ॥ पियको सुख प्यारी नहिं जानै । जोइ आवत
 सोइ सोइ कह्यो रति जाहु जाहु तुम मानै । काहेको मोहिं डाहन आए रैनदेत सुख वाको । भली
 जेबेकी बिनना बँ जो जाको सो ताको । च ~~कह्यो~~ ^{विह} ~~प्रिय अंग~~ ^{१७} ~~कुमकुम शेष लिए ह्यां आए ।~~
 छीही ॥ मैंदण तुमहिं बड़ाई औरनको श ^{राग विलावल ॥ औरनको छबि कहु देखावत।}
^{गए ॥} ~~तुमहोका भावत मनमोहन हम देखत रिस~~ ^{पानधर} ~~पो~~ ^{रहो} भइ बडी प्रतिष्ठा जावक भालू लगाए ।
 याको अरथ नहीं कोउ जानत मारत सबन लजाए ^{विष} ~~निधरक~~ हम अति सकुचतहैं दर्पणलै मुखदे
 खो । सूर श्याम क्यों बोलत नाहीं क्यों हम तन ^{खो} ~~रिखत~~ ^{१८} ~~राग गौरी ॥ श्याम हँसे प्यारी मुख हेरो।~~
 रिसहि उठी झहराय कह्यो यह बश कीन्हों ~~सुंदर~~ ^{जय} हँसो पिय ताही आगे मैं रीझी अति भारी।
 ऐसे हँसि हँसि ताहि रिझावहु देउ कहा अब गारो ॥ होत अबार गमन अब कीजै धरणी कहा निहारत।
 सूर श्याम मनकी मैं जानी ताके गुणहि बिचारत ॥ ९९ ॥ राग देवगंधार ॥ मैं जानी पिय मनकी बात ।
 धरनी पग नख कहा करोवत अब सीखे ए घात ॥ तुम जानत जिय हमहि सयाने अरु सब लोग
 अयाने । रैन वसत कहुँ भोर हमारे आवत नहीं लजाने ॥ यह चतुरई पढी ताहीपै सो गुण हमते
 न्यारो । धनि धनि सूरदासके स्वामी काहेः हम न बिसारो ॥ २०० ॥ मैं जाने होजू ललना तहीं
 न सिधारिए जहाँनयो नेहरा । सुँहकी हल भलई मोहूसों करन आए जिय की जासों ताहीं सों
 तुम बिन सूनो वाको गेहरा ॥ निशिके सुखकी कहे देत अधर नैना उर नख लागे छबि देहरा ।
 वेगि सँवारे पाँइ धारिए सूरके स्वामी नतर भीजैगो पियरो पट आवतहै पिय मेहरा ॥ १ ॥ राग मलार ॥
 ठाढे रहो आँगनही हो पिय जौलौं मेह न नख शिख भीजौ । परन देहु बडी बडी बूँदै तुम चीर
 उतारि और वस्त्र पहिरौ तब गेह देहरी पांव दीजौ ॥ कहिए बात रैनिकी सांची ता पीछे सोहैं की
 जो । सूर श्याम तुमहौ बहु नायक देह सुधारि मोहिं छीजौ ॥ २ ॥ मोहूसों निदुरई ठानी मोहन
 प्यारे काहेको आवन कह्यो सांचे । प्रीतिके वचन बाचे विरह अनल आंचे अपने गरजको तुम
 एक पाँइ नाचे ॥ भलेहोजू जाने लाल अरगजे भीने माल केसरि तिलक भाल मैन मंत्र काचे।
 निशिचिह्न चीन्हें सूर श्याम रति भीने ताहीके सिधारो पिय जाके रंग राचे ॥ ३ ॥ राग मालकौशिका ॥ तुम
 जिनि सकुचो प्यारे लाल मेरे जो त्रिय सों रति मानी ताहीके रहो अब । मैं इतनेहीमें भलो मानौ प्रीत-
 म जो मेरे आँगन पाँव धारे आपन जब ॥ नैन तृप्त भए दरश देखतही श्रवण तृप्त भए वचन सुने
 तव । सूरदास प्रभु चरण छुए कहति रोम रोम पुलकित अंग भए सब ॥ ४ ॥ राग कान्हरो ॥
 नैन चपलता कहाँ गँवाई । मोसों कहा दुरावत नागर नागरि रैन जगाई ॥ ताहीके रँग अरुण
 भएहैं धनि यह सुंदरताई । मनो अरुण अंबुज पर बैठे मत्त भृंग रस आई ॥ उडि न सकत ऐसे
 मतवारे लागत पलक जँभाई । सुनहु सूर यह अंग माधुरी आलस भरे कन्हाई ॥ ५ ॥ राग विलावल ॥
 नैनकी चंचलता कहा कीन्हें भीने रंग कौनकेहो श्याम हमहूसों कहत दुरावत । औरनि-
 को वदन देखिबेको नेम लियो ताके पलकनि राखे भार भरे नए आवत ॥ पुहुप गंध लोभ

मैंवर उडि न सकत फिरि बैठत जा समीप रतिमानी संग लिए आवत रतिकीरति गावत ।
 सूरदास प्रभु प्यारे प्यारी रसवस कीन्हें मुखकी हमहि बनावत ॥ ६ ॥ राग कान्हरो ॥ जाके रस रैनि
 आजु जागे हो लाल जाई । जावक तिलक भाल दीयो है नंदलाल बिनु गुन बनी माल
 कहत अनोखी अरु बातनि बनाई ॥ अधर अंजन दाग मिट्योहैं-पीक पराग और मिटी
 बंदनकी ललाई । अंग अंग शिथिल भएहौ प्रेम सूरके स्वामी मिटि गई चंचलताई ॥
 ॥ ७ ॥ रंग भरि आएहौ मेरे ललना बातें कहतहौ अटपटी । अतिः अलसात जम्हातहौ प्यारे
 पिय प्रगट त्रिया प्रताप छूटत नहिंन अंतरकी गटी ॥ यह चहुँसई ~~चपकिई कहैं~~ पाई श्याम
 वाके प्रेमकी गटि पढेहौ पटी । सूरदास प्रभु ~~लाल गुन~~ बहुनायक तन मन नैन ~~अरु कोमल~~ ॥
 ॥ राग ईमन ॥ डोलत महल महल इहैं टहल हम जेहिहैं हम बहु नाइक पीये । आयें ~~हम~~ वचन
 ठाठकरख लिये सकसकी धकधकी हिये ~~लाल~~ धाम ~~अरु~~ पागकी बांधनि छुटी लटपटे पंच ~~अट~~
 पटे दिये । सूरदास प्रभुहौ बहुनायक मेरे पावकुरि बैठो जु बैठो भली किये ॥ ९ ॥ महल महल
 अब डोलतहौ । इहैं कामते धाम बिसारयो ~~अत~~ पुहि न बोलतहौ ॥ बहुनायककी आजु मैं जानी
 कहा चतुरई तोलतहौ । निशि रस कियो भोरपु ~~तुम~~ के शिथिल अंग पुनि डोलतहौ ॥ टटके
 चिह्न पाछिले न्यारे धकधकात उर जोलतहौ ॥ जाहु चले गुन प्रगट सूर प्रभु कहा चतुरई छोलत
 हौ ॥ १० ॥ अँग अँग रंग भरे आए हौ । रंगभरी पाग भाल रँग शोभा रंग रंग नैन पगाए हौ ॥ रँग
 कपोल रँग पलकनि शोभा अधरन श्याम रँगए हौ । नख छत रंग चारु उर रेखा रति रँग रैनि
 जगाए हौ ॥ कंकण वलय पीठि गड़ि लागे उरपर छाप बनाए हौ । सूर श्याम वामा रँग पागे अनु
 रागे मन भाए हौ ॥ ११ ॥ राग विलावल ॥ बारबार मैं कहतिहौं पिय तहाँ सिधारो । आएहौ मन हर-
 नको हरि नाम तुम्हारो ॥ भली बनी छवि आजुकी क्यों लेत जम्हाई । रैनि आज सोए नहीं रतिकाम
 जगाई ॥ वह रति तुम रतिनाथहौ हम कैसे भावै । सूर श्यामते बहु गुणी जे तुमहिं रिझावै ॥ १२ ॥
 राग सोरठा ॥ सकुचत श्याम कहइ बृदुबानी । किनि देख्यो किनि कही बात यह मोहुजूर कहै
 आनी ॥ याते वचन बोलि नहिं आवत रिस पावत हौ भारी । जोरि कहति बातें तुम आगे खोटी
 ब्रजकी नारी ॥ तुमहूँते ऐसीको प्यारी सौंह करो जो मानों । सुनहु सूर जो बृझति मोको मैं काहुन पहि-
 चानों ॥ १३ ॥ राग विलावल ॥ को पति आइ तुम्हारी सौंहनि । वा तियको अनुराग देखियत प्रगट
 रावरी भौंहनि ॥ तुलसीको कहा नीम प्रगट कियो मोहीते करि वोहनि । प्रात आइ मनु पोषन
 लागे आए घालन खोहनि ॥ मुँहहींकी हमसाँ मिलवत जिय वसत जहाँ मनमोहनि । सूर सुवस
 घर छाँडि हमारो क्यों रति म्लानत खोहनि ॥ १४ ॥ राग भैरव ॥ बिन बोले पिय रहिएजू । नहिं
 कही कहै कहा ताको अब ऐसे जिनि दहिएजू ॥ मौन रहौ तौ कछू गँवावहु इन बातन कछु लहि
 एजू । सौंह कहा करिहौ सुनि पावहिं सन्मुख है धौं कहिएजू ॥ एतेपर कहा वादन लागे कैसे
 रिस मन सहिएजू । सूरदास प्रभु रसिक शिरोमणि रसिकहि सब गुण चहिएजू ॥ १५ ॥ राग विलावल ॥
 आइ गई ब्रजनारी तहाँ । सौंह करत पिय प्यारी आगे आनंद विरह महा ॥ प्यारी हँसि देखी
 सखियनको अंतर रिसहै भारी । नैन सैन दै अंग देखावति पिय शोभा अधिकारी ॥ श्याम रहे
 मुख मुँदि सकुचिकै युवति परस्पर हैरै । सूरदास प्रभु अँग अनूप छवि कहँ पायो केहि करै ॥ १६ ॥
 तब नागरी कहति सखियन साँ एतेपर क्यों सौंह करै । दरशन प्रात देत है हमको निशि औरन
 के चित्त हरै ॥ तुमहीं देखि लेहु अँगवानक एतेपर क्यों सही परै । कृपा करै अब तहीं सिधारै मो

आगे ते अब जु टरै ॥ यह छबि देखि सनाथ भई मैं अब ताहीपर जाइ ढरै । सूर श्याम रिस देखि चले डरि कहौ सखी अब ह्यां न फिरैं ॥ १७ ॥ राग विहागरो ॥ श्याम गए त्रिय मान कियो ॥ देखो मोहिं दोष तुम देती उन ऐसे मन चोरि लियो ॥ जाहु सदन तुमहुं सब अपने मैं बैठी हौं धाम । जानदेहु अब ह्यां जनि आवै ऐसेनको कहा काम ॥ अनतहि वसत अनतही डोलत आवत किरिन प्रकास । सुनहु सूर पुनि तौ कहि आवै तनगि गए ता पास ॥ १८ ॥ अथ राधाजूको मान ॥ राग विलावल ॥ यह कहि कै त्रिय धाम गई । रिसनि भरी नख शिख लौं प्यारी जोवन गर्व मई ॥ सखी चली गृह देखि दशा यह हृद करि बैठी जाइ न बोलत नही मान करि हरिसों हरि अंतर रहे आइ ॥ यहि अंतर जावै बिनना बजहां श्याम घर द्वारे । प्रिया कहे उरि बैठी रही है रिस करि क्रोध तुम्हारे ॥ तुम छीही ॥ मैदं पहा झहरानी कहा करी चतुराई ॥ तू सूर ए बात चकित पिय अलिहि गए सुरझाई ॥ राग विहागरो ॥ बहुरि नागरी मान कियो ॥ केदारो ॥ भरी ठारि दिए दोउ अतितनु तिरह हियो ॥ देखतही देखत भए व्याकुल त्रिय कारण अकुल ॥ वं गुन करत होत अब काचे कहियत परम सयाने ॥ यह सुनिकै दूती हरि पठई देखि जाय सखत मान । सूर श्याम यह कहतहि पठई तुरत तजहि जेहि मान ॥ २० ॥ राग केदारो ॥ दूती हरि पठाई ॥ और मुख कछु बातन आवै तहां बैठी जाइ ॥ प्रिया मन परवाह नाहीं कोटि आवै जाहिं । सौति शाल सलाइ बैठी डुलति इत उत नाहिं ॥ भीति बिन कह चित्र रखै रही दूती हेरि । सूर प्रभु आतुर पठाई करत मन अवसेरि ॥ २१ ॥ राग कान्हरो ॥ दूती मन अवसेर करै । श्याम मनावन मोहिं पठाई यह कतहुं चितवै न टरै ॥ तब कहि उठी मान अति कीन्हों बहुत करी हरि कहौ करौ । ऐसे बिनवै नहीं जाति हैं अब कबहुं जनि उनहिं ठरौ ॥ मैं आवति यमुनातट ते ब्रज सखी एक यह बात कही । सुनहु सूर मैं रहि न सकी गृह कही श्यामकी प्रकृति सही ॥ २२ ॥ राग विहागरो ॥ अब द्वारेते टरत न श्याम । अब पर घर की सौंह करत है भूलि करौ नाहिं ऐसे काम ॥ अब तू मान तजै जिनि उनसों इहै कहन आई तेरे धाम । अब समुझी औरों समुझ्यो वै हम जब कहैं करैं तब ताम ॥ अब मोको यह जानि परी है काहुके न बसे कहूँ याम । सूरदास दूती की वाणी सुनति धरति मनही मन वाम ॥ २३ ॥ राग सही ॥ जब दूती यह वचन कह्यो । तब जाने हरि द्वारे ठाढे उर उमँग्यो रिस नहीं रह्यो ॥ काहेको हरिद्वार खरहैं किन राखे कहि जीभ गरै । मौन गहैं मैही कहि आवौं तू काहेको रिसनि जरै ॥ चतुर दूतिका जानि लई जिय अब बोली गयो मान सबै । सूर श्यामपै आतुर आई कहत आनकी आन फबै ॥ २४ ॥ राग केदारो ॥ काहि मनाऊं श्यामलाल बाल जोरैं नाहिं डीठा मुखहुं जो बोलै तौ ममहीकी लहिये ऐसी तिहारी अहीठि ॥ अपनीसी बहुत कही सुनि सुनि उन सबै सही वाहू की बूँद ताको कहाकरै बसीठि । सूरदासके पिय प्यारी आपुहीं जाइ मनाय लीजै जैसी बयारि बहै तैसी ओढिए जू पीठि ॥ २५ ॥ ललन तुम्हारी प्यारी आजु मनायो न मानति । बूझि न परति जानि का बैठी कियो जु इत रिस तुमही लै कोटि अवगुण गानति ॥ भरि भरि अँखियन नीर लेति पैढा रति नाहीं अतिरिस कँपति अधर फरकि करि भ्रुकुटी तानति । सूरदास प्रभु रसिक शिरोमणि आपुन चलिए तौ भली वानति ॥ २६ ॥ राग पूखी ॥ हौं कैसेके ल्याऊँ जो मरम पाऊँ श्याम वाकी मान मानो गढ वै भयो । तनु कंचन गिरि प्रगट कियो तामें बसनकोटि रच्यो अंचल ज्योढी ओट दियो ॥ वचन पौरिआबोल न खोलै मुख पौरि भूँदि रह्यो ॥ मोहन भौंह कमान नैना रिसके बान ताते जाइ न निकट गयो ॥ सामदाम दण्ड भेद सबैं मैं करि देख्यो सूरदास प्रभु चतुर कहावत

आपुन चलिए जो तुमहं पै जाय लयो ॥ २७ ॥ राग नट ॥ विहरत मानसरसकुमारि । कैसेहूँ निकसत
 नहीं हो रही करि मनुहारि ॥ मौन पारि अपार रचि अवगाह अंश जु वारि । मन गह्यो वै विडरत
 नाहीं थकित प्रगट पुकारि ॥ सूर श्याम सरोज लोचन दुलन जन जलचारि । ग्राह ग्राहक प्राण
 चाहक करत तहाँ डर डारि ॥ चिकुर सइबर निकरि अरुझति सकति नहीं निरुवारि ।
 नील अंचल पत्र पद्मिनि उरज जलज निहारि ॥ रच्योरचि रुचि मान मानिनि मनमराल सुरारि ।
 सूर आपुन आनिए गहि बाँह नारि निकारि ॥ २८ ॥ राग विहागरो ॥ यह सुनि श्याम विरह भरे । कहूँ
 मुकुट कहूँ कटि पीतांबर सुरछि धरणि परे ॥ युवति भरि अंकुशनि नहि होंहैं कष्ट गिरिधारि ।
 आपुही चलि बाँह गहिए अंक लीजै नहि लाल लाल लाल व्याकुल होत काहे धरै धर को भयाम ।
 सूर प्रभु तुम बडे लागर विवश कीन्ह काम ॥ २९ ॥ राग कंकली ॥ श्यामहि धीरज दै शुभ वचन
 वाणी इहै प्रकाशत मुखमें व्याकुल लालि धारि ॥ बारंवार नैन दोउ ढारत परे भद्र
 जंजाल । धरणि रहे सुरझाइ विलोकि प्रभु कहौ बेहाल ॥ बैठी आइ अनमनी हैकै
 बारबार पछितानी । सूर श्याम मिलिकै चेत देहिन जो तुम बडी सयानी ॥ ३० ॥
 तुही प्रिया भावती नाहिन आन । निशचय तुम मन मन करत मनोहर रसवश केलि
 निदान ॥ ध्यान विलास दरश संध्रम मिलि मानत मानिनि मान । अनुनय करत वि-
 वश बोलतहैं दै परिरंभण दान ॥ प्रथम समागम ते नानाबिधि चरित तिहारे गान । सूर श्याम कह
 वर अंतर सुनि सुयश आपने कान ॥ ३१ ॥ राग सारंग ॥ श्यामा तू अति श्यामहि भावै । बैठत उठत
 चलत गउचारत तेरिय लीला गावै । पीतै पीत वसन भूषण सजि पीत धात अँगलावै । चंद्रानन
 सुनि मोर चन्द्रिका माथे मुकुट बनावै ॥ अति अनुराग सैन संध्रम मिलि संग परमसुख पावै । बिछु
 रत तोहि कासि राधा कहि कुंज कुंज प्रति धावै ॥ तेरो चित्र लिखै अरु निरखै बासर विरह गावै ।
 सूरदास रसरसी रसिकसों अंतर क्योंकरि आवै ॥ ३२ ॥ राग विहागरो ॥ मन मन पछितायो रहि
 जैहै । सुनि सुंदरि यह समो गएते पुनि न शूल सहिजैहै ॥ मानहु मीन मँजीठ प्रेम रँग तैसेही गहि
 जैहै । काम हर्ष हरै हरि अंमर देखतही बहि जैहै ॥ इते भेदकी बात सखी री कत कोऊ कहि जैहै ।
 भरत भवन खनि कूप सूर त्यों मदन अगिनि दहि जैहै ॥ ३३ ॥ राग केदारो ॥ तेई नैन
 सुहावनेहो नेक न भावत न्यारे री । पलक ओट प्राण जाते तेरे री ध्यान चकोर चंदा मेरे नैन चित
 वनि पर चरे री ॥ कमल कुरंग जु मधुप उपमा नहि आवै चंचल रहत चितेरे री । सूरदास प्रभुकी
 तुहि जीवनि कतहि करत त्रिय झेरे री ॥ ३४ ॥ राग आसावरी ॥ वनत नहीं राधे मानु किए । नंद
 लाल आरतकै पठई सौंह करतिहौ शीश छुए ॥ जाके पद कमलाकर लीने मन वच क्रम चित उन्हें
 दिये । ता प्रभुकी पठईहौ आइ तू जु गर्वकी मोट लिये ॥ हरि मुख कमल सच्यो रस सजनी
 अति आनंद पीयूष पिये । सूरदास सकल सुख हरि सँग कृपा विमुख कै काल जिए ॥
 ३५ ॥ राग सारंग ॥ जब जब सुरति करत तब तब डब डबाइ दोउ लोचन उमँगि भरत ॥
 जैसे मीन कमलदलको चले अधिक अरत । पलक कपाट न होत तबहींते निकसि परत ।
 अंसु परत ढरि ढरि उर ऊपर मुक्ता मनहुँ झरत । सहजगिरा बोलत न बनत हित हेरि हरत । राधा
 नैन चकोर बिना मुख मानहु चंद्र जरत । सूर श्याम तुम्हरे दरशन बिन नाहिन धीर धरत ॥
 ३६ ॥ राग सारंग ॥ चितै चलि ठुठुकि रहत । तव पद चिह्न परसि रस वश भए आधे वचन
 कहत ॥ किसलय कुसुम पराग अंबपै फेन अहत । कंटक जनु भू कठिन जानियत कष्ट लहत ॥

कमल कोश कोमल विभाग अनुराग बहत । सूरदास सुंदर अति शीतल मृदु वै उन सहत ॥ ३७ ॥
 हरि तोहि बारंवार सम्हारै । कहि कहि नाम सकल युवतिनके कहूं नहीं रुचि जेहि उर
 धारै ॥ कबहुँक आँखि मूँदिकरि चाहत चित धरि ठौरतिहारे । तब प्रसिद्ध लीला वन विहरत
 अब नहिं तुमहि बिसारे ॥ जो जाको जैसो करि जानै सो तैसे हित मानै । उलटी रीति तुम्हारी
 सुनिकै सब अचरज करि जानै । क्यों पतियाँ पठवै नहिं उनको बाँचि समुझि सुख पावै ॥
 सूर श्याम है कुंजधाममें अनत न मन विरमावै ॥ ३८ ॥ राधे हरि तेरो नाम बिचारै । तुम्हरेइ
 गुण ग्रंथित करि माला रस मकरसों छापै ॥ लोचन मूँदि ध्यान धरि दृढ करि नेक न पलक उधा-
 रै । अँबु बिना ब्रति रूप माधुरी उरते नहीं ॥ ~~कह्यो जेनेम तुम्हारो पियके कह जिय निठुर~~
 छीही ॥ मैदं पर्याम मनकाम पुरावहु उठि ~~गए ॥~~ ~~हूँ हमारे ॥~~ ३९ ॥ राग विलावल ॥ चले राधे हरि
 चली रे । उठि चलि वेगि गहरकत लावति ~~प्यारो रहौरी~~ डोली री ॥ तनु जोबन ऐसे झालि जैहै
 जनु फागुनकी होरी । भीजि बिनशि जाई क्षण भँझ्यो कागज की चोली री ॥ तोपर कृपा
 भई मोहनकी छाँडि सबै चो छोली री । सूरदास ~~रखत~~ मिलिबेको ताते तू निमोली री ॥ ४० ॥
 राग केदारे ॥ जाके दरशनको जग तरसत तानिदर ~~ए नैक~~ दै री ॥ जाकी सुरलीकी ध्वनि सुर मुनि मोहे
 तातन नेक चितै री ॥ शिव विरंचि जाको पार न पावत सो तो तेरे चरणन परसतु है री । सूरदास
 वश तीनि लोक जाके है सो तो वश माई री तू मुख ध्वनि सुनाइ मोहिं लै री ॥ ४१ ॥ राग भूपाली ॥
 तुव को है री कौन पठाई तेरी को मानै । तू जु कहति श्याम कौनसे देखे न सुने को पहिचानै ॥ और
 कहति कहि नेम लियो ह्यां को वैसी वै जानै । सूरदास प्रभु रसिक बडे तोको पठई अति स्यानै ॥
 ४२ ॥ राग सारंग ॥ अति हठ न कीजै री सुनि ग्वारि । हौं जु कहति तू सुन याते शठ सैर न एको
 दायि ॥ एक समय मोतियनके धोखे हंस चुनतहै ज्वारि । कीजै कहा काम अपनेको जीति मानि
 होइ मनोरथ भाँडतिहौं मान सखी री तनको काज सँवारि । कामी कान्ह कुँवरके उपर सरवस
 दीजै वारि ॥ यह जोबन वर्षाकी नदी ज्यों बोरति कतहि करारि । सूरदास प्रभु अंत मिलहुगी ए
 कनिहिन चारि ॥ ४३ ॥ राग रामकली ॥ कहा तुम इतनेहीको गर्वानी । जोबन रूप दिवस दशहीको
 छ्याँ अँजुरीको पानी ॥ करि कछु ज्ञान अभिमान जानदे है अब कौन मति ठानी । तन धन
 जानि याम युग छाया भूलति कहा अयानी ॥ नवसे नदी चलत मर्यादा सुधी सिंधु समानी । सूर
 इतर ऊपरके बरषे थोरेहि जल इतरानी ॥ ४४ ॥ राग उरिया ॥ तू चलि प्यारी री एतो हठ छाँडि मानि री ॥
 परम विचित्र गुण रूप आगरी अतिहि चतुर त्रिय भारी री ॥ मदन मोहन तन मदन दहतहै तेरी
 धनकी पीरन न्यारी । सूरदास प्रभु विरह विकल हैं नेक न निरखि निहारी री ॥ ४५ ॥ राग विहगरो ॥ वादि
 नै ~~रुति~~ काहेको तू कत आई मेरे घर । वे अति चतुर कहा कहिये जिनि तोसी भूरख लैन पठाई तनु
~~मर्यादा~~ वचनन शर ॥ उतकी इत इतकी उत मिलवति समुझति नाहिन प्रीति रीतिकोही तू कोहै
 गिरिवर धर ॥ सूरदास प्रभु आनि मिलेंगे छैहें पग अपने कर ॥ ४६ ॥ ज्यों ज्यों मैं निहारे करौं त्यों
 त्यों यों बोलति है री अनोखी ~~रूप~~ ~~हारी~~ ॥ बहियां गहत सतराति कौनपर मगधरी उँगरी कौन
 पै होत पीरी कारी ॥ कौन करत ~~रूप~~ ~~तोसी~~ और न त्रिय आन हठ दूरि करि धरि मेरे कहे आरी ।
~~मगधरी~~ प्रभु तेरो पथ जोवत ~~वनि~~ ~~नोहिं~~ रट लागी मदन दहत तनुभारी ॥ ४७ ॥ राग मलार ॥
 अलौ तो गँवारि अहीरि । तोसों ~~प्यारै~~ नंदनंदन हँसि कह्यो इतनेहीको तू कबकी अन उत्तर
 बोलति कह्यो नहीं न मान ~~हसत~~ ~~हँसि~~ हँसि हँसि देत सुनि सुनि करत कानि इक

टकहि ग्यारिनि जु रही री । कहा कहौ हरिसों अब तोसी को सुँहलगाइ वारि फेरि डारौं तोहि पियके
 एक रोम परही री । सूरदास प्रभुको कहा कहि बरणौं एती कबहुं काहुकी न सही री ॥ ४८ ॥ राग
 नट ॥ एकतौ लालन लाडनि लडाइ दूजे यौवन बावरी । उनके गरव जिनि भूलि रहै री हमसों
 करि लीन्हें सुख अनेक दिन दिन दिन चारि होत अधिक चाव री ॥ मेरो कह्यो तू मानि री माई
 सब त्रियानको इहै सुभाव री । मैं जु कहति करि सूर श्याम सों हिलिमिलि रहिए उठत बैसको इहै
 दाँव री ॥ ४९ ॥ राग कान्हरो ॥ रहि री मानिनि मान न कीजै यह जोवन अँजरीको जलहै ज्यों गोपाल
 माँगे त्यों दीजै ॥ छिनु छिनु घटति बढति नहि रजनी ज्यों ज्यों कह्यो पियको छीजै ॥ पूरव पुण्य
 सुकृत फल तेरो काहेन रूप नैन भूमि सीधे लालन करि तरे पाँइनकी ऐसे विर को भरो दिन
 जीजै । सूर सजीवन सुफल जगतकी वैरी बांधि किंकरि लीजै ॥ ५० ॥ सुन वचन
 सुजान । कहिधौं कौन काज सरिहै री लालन बाँझ भेमान ॥ जिनके चरण रमा नित लाँसत
 सब गुण रूपनिधान । तिनके मुखके वचन नोहर सो तू करति न कान ॥ परम चतुर सुंदर
 सुखकारी तोसी त्रिया न आन । कीजै कहा चतुर्षु संपति बिना भोग बिनदान ॥ ऐसी व्यथा
 होत निशि हरिको जिनि हठ करौ विहान ॥ तुम कहत औरके काढे सूर मदनके बान ॥
 ॥ ५१ ॥ राग रामकली ॥ आज हठि बैठी मान किए । महाक्रोध रस अंशतपत मिलि मनु विष
 विषम पिये ॥ अधमुख रहति विरह व्याकुल सिख सूरि मंत्र नहि मानै । भूक न तजै सुनि जाति
 ज्यों सुधि आए तनु जानै ॥ एक लीक बसुधा पर काढी नभतन गोद पसारी । जनु वोहित तजिकै
 परनको दधि ज्यों अवनि निहारी ॥ ज्यों अति दीन सुखी सबही अँग कतहुं शांति न पावै । त्यों
 विन पियहि त्रिया प्रातहिते एकै बात मनावै ॥ कबहुं क धुकति धरनि श्रम जल भरि महा शरद र-
 विसास । इकटक भई चित्र पूतरि ज्यों जीवनकी नहि आश ॥ तब उपचार कियो मैं करकस
 लै रस पारयो कान । मुरछा जगी नहीं मुख बोली लै बैठी फिरि मान ॥ हौं तौ शच्छतायो रहि
 जतननि जीकी व्यथा न पाई । बूझहु लाल नवल नागर तुम ए कैसे न बताई ॥
 शिव आकार दिखायो कछु इक भाव दोष रस नाहीं । सूरदास प्रभु रमि
 शिरोमणि लै मेली पगछाहीं ॥ ५२ ॥ राग देवगंधार ॥ प्रिया पिय नाहि मनायो मान ।
 श्रीमुख वचन मधुर मृदुवाणी मादक कठिन कुलिशहूते जाने ॥ शोभित सहित सुगंध श्याम
 कच कलकपोल अरुझाने । मनहु विध्वंसज ग्रस्यो कलानिधि तजत नहीं विनदाने । बालभाव
 अनुसरति भरति दृग अग्र अंशुकन आनै । जनु खंजरीट युगल जठरातुर लेत सुभष अकुलानै ॥
 गोरगात लसत जो असितपट और प्रगट पहिचानै । नैन निकट ताटंककी शोभा मंडल कबिन
 बखानै । मानो मन्मथ फंद त्रासते फिरत कुरंग सकानै ॥ नासापुटानि सकोचति लोचति निर-
 ध्रुकुटि धनु तानै । जनु शुक निकट निपट शर साये षटपट सुभट पराने ॥ जनु खद्योत चमक
 चलि शंकित निशि तिमिर हिराने । यह सुनिकै अकुलाइ चले हरि कृत अपराध क्षमानै ॥ सूरदास
 प्रभु मिले परस्पर मानिनि मिलि मुसकाने ॥ ५३ ॥ राग धनाश्रय ॥ प्रिया पिय नाहि मनायो मोहन री सकुच
 समेति चली उठि आतुर वनकी गैल गही । बिधिमुख निरुर दूर मुख करि नोचन पुनि विधुवदन
 चही ॥ दूरशत परसत रूप आज निज भूमिनख लेखि दृष्ट पछहुप सुरंग सारंग रिपु ओट पन
 तब चतुर लही ॥ पानि सुपरसत शीश परस्पर मृदुकर अनु भू कोठण तोरयो गुनजात जितेगुन

काढति रेख मही । सूर श्याम बहुरो मिलि विलसहु जाति अवधि अबही ॥ ५४ ॥ राग सांग ॥ चली वन
 मान मनायो मानि । अंचल ओट पुहुप दिखरायो घरयो शीशपर पानि ॥ शचितन चितै नैन
 दोउ सुंदे मुखमहँ अंगुरी आनि । यह तौ चरित गुप्तकी बातें मुसकाने जियजानि ॥ रेखा तीनि
 भूमि पर खाँची तृणतोरयो करतानि । सूरदास प्रभु रसिक शिरोमणि विलसहु श्याम सुजानि ॥
 ॥ ५५ ॥ राग गुंडा ॥ सैनदै कछो वनधाम चलिष श्याम इहै करिकाम अबआनि मिलिहौं । भावही कछो
 मन भाव दृढराखिवो दे मुख तुमहिँ संग रंग रलिहैं ॥ जानि पिय अतिहि आतुर नारि आतुरी गई
 वन तीर तज्जलहि हँता । सूर प्रभु प्रभु भव कंजवन तहाँ गए सजत रतिसेज जे निगम नेती ॥
 ॥ ५६ ॥ राग बिनेता बहार ॥ श्यामवन धाम मगव कछो नैन गच्छि सेज अनुमान जिय जिय करत
 छीही ॥ मैदंप्तर कबहुँ सोवै ॥ एक छिन गए ॥ घरी घरी इक याम सम यौम नयन हुते होत
 मीरो । मनहिँ मन साध पुरवत अंग भाव चारो रहौ भुज धनि हृदयमिले प्यारी ॥ कछु
 आवैं साँझ सोच अति जिय माँझ नैन खगलत हैं रहे दोऊ । सूर प्रभु भाभिनी वदन
 पूरण चन्द्र रस परस मनहिँ अकुलात वोऊ ॥ निखत न राग नटनारायणी ॥ दूती संग हारिके रही ।
 श्याम अति आधीन हैकै जाहु तोसों कर्नदर प्योगे आनि मिलाइ मोको परम प्यारी नारि ।
 देखि हरि तनुकाम व्याकुल चली मनहिँ बिचारि ॥ गई तहँ जहँ करति राधा अंग अंग
 शृंगार । सूरके प्रभु नवल गिरिधर संग जानि विहार ॥ ५८ ॥ राग बिहागरो ॥
 राधा सखी देखि हरषानी । आतुर श्याम पठाई याको अंतर्गतिकी ज्ञानी ॥ वह शोभा निरखत अंग
 अँगकी रही निहारि निहारि । चकित देखि नागरि मुख वाको तुरत शृंगार निसारि ॥ ताहि
 कछो सुख दै चलि हरिको मैं आवति हौं पाछे । वैसहि फिरी सूरके प्रभुपै जहां कुंज गृह काछे ॥
 ॥ ५९ ॥ राग केदारौ ॥ दूती देखि आतुर श्याम । कुंजगृह ते निकसि धाए काम कीन्हों ताम ॥ बोलि
 सेह मनोरथ मारी अन्य तुव बड़भाग । अबहिँ आवति बनी बाला किए मन अनुराग ॥ कहा वरणौं
 अंग शोभा नैनन देखों आज । सूर प्रभु नेक घरौ धीरज करौ पूरण काज ॥ ६० ॥ राग ईमन ॥ बड़े
 नक्षत्रके मोटे हौ । ऐसी त्रिया और को पावै बने परस्पर जोटे हौ ॥ वैसिय नारि सुंदरी छोटी तैसेइ
 कुंभ बलि छोटे हौ । पूरवपुण्य सुकृत फल की वह आपु गुननकरि घोटे हौ ॥ परम सुशील सुल-
 क्षण नारी तुमहिँ त्रिभंगी खोटे हौ । सूर श्याम उनके मन तुमहीं तुम बहुनायक कोटे हौ ॥
 ॥ ६१ ॥ राग काफ़ी ॥ सुनिहो मोहन तेरी प्राण प्रियाको वरणौ नंदकुमार । जो तुम आदि अंत भेरो
 गुण मानहु यह उपकार ॥ चंद्रमुखी भौहैं कलंक बिच चंदन तिलक लिलार । मनु बेनी भुवंगिनि
 के परसत सवत सुधाकी धार ॥ नैन मीन सरवर आननमें चंचल करत बिहार । मानों कर्णफूल
 नैनको रक्कत बारंबार ॥ बेसारि बनी सुभग नाशा पर सुक्ता परम सुठार । मनो तिल फूल
 मधुर बिबाधर दुहुँ बिच बूँद तुषार ॥ सुठि सुठान ठोढी अति सुंदर सुंदरताको सार । चितवत
 हुअत सुधासस मानों रहि गई बूँद मैझार ॥ कंठशिरी उर पदिक विराजत गजमोतिन को हार ।
 दहिनावर्त्त देत मनो ध्रुवको मिलि नक्षत्रकी मार ॥ कुच युग कुंभ गुंडिरोमावालि नाभि सु हृदय
 अकार । जनु जल सोखि लयो रूप ता जोबन गज मतवार ॥ रत्न जटित गजरा बाजूबंद शो-
 चण प्रन अपार । फूँदा सुभ निभे फूले मनो मदन विटपकी डार । छीन लंक छट
 अकिणि ध्वनि बाजत अति सुख ॥ मौर बाँधि बैठो जनु दूलह मन्मथ आसत तार ।
 युगल जंघ जेहारि जरावत ॥ सत सत राजहंस गति चलति किछे अतिनि

तनकसे कैसे भुजन फिरायो । पलकहि माँझ सबनके देखत मारयो धरणि गिरायो ॥ अबलौ हम
 तुमको नहि जान्यो तुमहि जगत प्रतिपालक । सूरदास प्रभु असुर निकंदन ब्रज जनके दुख दाल
 क॥६९॥ राग कल्याण ॥ आवत मोहन धेनुचराए । मोर मुकुट शिर उर वनमाला हाथ लकुट गोरज लप-
 टाए ॥ कटि कछनी किंकिणि ध्वनि बाजत चरण चलत नूपुर खराए । ग्वाल मंडली मध्य श्याम
 घन पीतवसन दामिनिहि लजाए ॥ गोपसखा आवत गुण गावत मध्य श्याम हलधर छबिछाए ।
 सूरदास प्रभु असुर संहारचो ब्रज आवत मन हर्ष बढाए ॥७०॥ ये गोरेणु रंजित आवतहैं मोहन लाल ।
 श्याम सुभग तनु तडित वसन बग पंगति मुक्तहार वनमाल ॥ गोपद रज मुखपर छबि लागति
 कुंडलनैन विशाल । बल मोहन वनते बने आवत लीने गैयाजाल ॥ ग्वालमंडली मध्य विराजत बाजत
 वेणुरसाल । सूर श्याम वनते ब्रज आए जननि लिए अंकमाल ॥७१॥ राग कान्हरो ॥ तेरो माई गोपाल
 रणशूरे । जिहैं जहैं भिरत प्रचारि पैजकरि तहीं परतहैं पूरे ॥ वृषभरूप दानव इक आयो सो क्षणमाँह
 संहारचो । पाँवपकरि भुजसों गहिवाको भूतलमाँह पछारचो ॥ कहत ग्वाल यशुमति धनि मैया
 बडो पूत तैं जाथै । यह कोउ आदि पुरुष अवतारी भाग्यहमारे आयो ॥ चरण कमलपै बंदित रहिये
 अनुदिन सेवा की जावारंवार सूर कहै प्रभुकी शरपि बलैया लीजै ॥७२॥ राग सोरठा ॥ यशुमति बार बार
 पछितानी । सुनि करतूत वृषभासुरकी जब ग्वाल कहीं मुखवानी ॥ गैयन भीतर आइसमान्यो कान्हहि
 मारन ताक्यो । मैं नहिं काहुको कछु घाल्यो पुण्यनि करवर नाक्यो ॥ सुन यशुमतिमैया
 कत खीझत हरिके भाए ख्याल । पर्वत तूल देह धरिकै पलकमें कियो विहाल ॥ तुम्हरी रक्षाको
 यह नहिं यह ब्रजके रखवार ॥ सूरदास मनमोह्यो सबको मोहन नंदकुमार ॥७३॥ राग सांग ॥ हमहि डर
 कौनको री मैया । डोलत फिरत सकल वृंदावन जाके मीत कन्हैया ॥ जब जग गाढ परतिहैं हमको
 तहैं करिलेत सहैया । चिरजीवहु यशुमति सुत तेरो हरि हलधर दोउ भैया ॥ इनते बडे और
 नहिं कोऊ इहि सब देत बडैया । सूर श्याम सन्मुख जे आए ते सब स्वर्ग चलैया ॥७४॥ राग कान्हरो ॥
 हंसि जननी सों बात कहत हरि देख्यो मैं वृंदावन नीके । अति रमणीक भूमि हुमवेली कुंज सघन
 निरखत सुखजीके ॥ यमुनाके तट धेनु चराई कहत मात मनवीके । भूखमिटी वनफलके खाए प्यास
 यमुनजल पीके ॥ सुनति यशोदा सुतकी बातैं अति आनंद मगन तबहीके । सूरदास प्रभु विश्वभरन
 ए चोर भए ब्रजतन कदहीके ॥७५॥ गोविंद गोकुलकी जीवनि मेरे । जाहि लगाइ रही तन मन धन
 दुख भूलत मुख हेरे ॥ जाके गर्व बढ्यो नहिं सुरपति रह्यो सात दिन घेरे । ब्रज हित नाथ गोवर्धन
 धारे सुभग भुजननख नेरे ॥ जाके यश ऋषि गर्ग बखान्यो कहत निगम निज टेरे । सोइ अब सूर
 सहित संकर्षण पाए जतन घनेरे ॥७६॥ अध्याय ॥ ३७ ॥ अथ केशीवध ॥ राग मारू ॥ असुरपति अतिही
 गर्वधरचो । सभामाँझ बैठो गर्जतहैं बोलत रोष भरचो ॥ महामहा जे सुभट दैत्यबल बैठे
 सब उमराउ । तिहँभुवन भरि गमिहैं मेरो मो सन्मुख को आउ ॥ मो समान सेवक नहिं मेरे जाहि
 कहौं कछ दाव । काहि कहौं को ऐसो लायकहै ताते मोहिं पछिताव ॥ नृपतिराइ आयसु दै मोको ऐसो
 कवन विचार । तुम अपने चित सोचत जाको असुरनके सरदार ॥ जो
 करि क्रोध जाहि तन ताकों तिनकोहैं संहार । मथुरापति यह सुनि हरषित भयो मनहि
 धन्यो अतिभार ॥ श्वेतछत्र फहरात शीशपर ध्वज पताक बहुबान । ऐसो को जो मोहिं न जानत
 तिहँ भुवन मेरी आन ॥ असुर वंशजे महाबली सब कहौं काहि हौं जान । तनकतनकसे महर
 दिटोना करि आवै बिन प्रान ॥ यह कहि कंस चितै केशीतन कह्यो जाइ करि काज । तृणावर्त
 शकटा अरु पूतना उनके कृत सुनि लाज ॥ तोते कछु द्वैहैं यों जानत धरि आनै ज्यों बाज । छलकै

बलकै मारु तुरतही लै आवहु अब आज ॥ अतिगर्वित है कछो असुरभट कितिक बात यह आ-
हि । कहमारौ जीवत धरिलावौ एक पलकमें ताहि ॥ आज्ञापाइ असुर तब धायो मनमें यह अव
गाहि । देखौ जाइ कौन वह ऐसे कंस डरतहै जाहि ॥ मायाचरित करि गोपपुत्र भयो ब्रजसन्मुख
गयो धाइ । बल मोहन ग्वालन बालक संग खेलत देखे जाइ ॥ धाइ मिल्यो कोउ रूप निशाचर
हलधर सैन बताइ । मन मोहन मनमें मुमुकाने खेलत फलनि जनाइ ॥ द्वै बालक बैठारि सया-
ने खेल रच्यो ब्रजखोरि । और सखा सब जुरि जुरि ठाढ़े आपु दनुज संगजोरि ॥ फलको नाम बु-
झावन लागे हरि कहि दियो अमोरि । कंधचढ़े जिमि सिंह महाबल तुरतहि घाँच मरोरि ॥ तब के-
शी है बरवपु काछ्यो लैगयो पीठि चढाइ । उतरि परे हरि ता ऊपर ते कीन्हों युद्ध अघाइ ॥ दाउँ
घाउ सब भाँति करतहै तब हरि बुद्धि उपाइ । एक हाथ मुख भीतर नायो पकरिकेश धरि जाइ ॥
चहुँघा फेरि असुर गहि पटक्यो शब्द उठ्यो आघात । चौकि परचो कंसासुर सुनिकै मातर
चल्यो परात ॥ यह कोइ नहीं भलो ब्रजजनभ्यो याते बहुत डरात । जान्यो कंस असुर गहि पटक्यो
नंदमहरके तात ॥ और सखा रोवत सब धाए आइ गई नर नारि । ग्वालरूपमें खेलत हरिके
लैगयो कांधे डारि ॥ धाए नंद यशोदा धाई नितप्रति कहा गुहारि । नाजानिये आहिघौ को यह
कपट रूप वपुधारि ॥ यशुमति तब अकुलाइ परी गिरि तनुकी सुधि न रहाइ । नंद पुकारत आरत
व्याकुल टेरत फिरत कन्हाइ ॥ दैत्य संहारि कृष्ण तहां आए ब्रजजन मरत जिवाइ । दौरि नंद उर
लाय लियो सुत मिली यशोदामाइ ॥ खेलत रह्यो संग मिलि मेरे लैं उड़िगयो अकास । आपुनही
गिरि परचो धरणिपर मैं उबरचो तेहि पास ॥ उर डरात जिय बात कहत उहि आएहैं करिनाश ।
सूर श्याम घर यशुमति लैगई ब्रजजन मनहि हुलास ॥ ७७ ॥ अथ भौमासुर वध ॥ राग विलावल ॥ हरि ग्वालन
मिलि खेलन लागे वनमें आँखिमिचाइ । शिशु होइ भौमासुर तहाँ आयो काहु जान न पाइ ॥
ग्वालरूप होइ खेलन लाग्यो ग्वालनको लैजाइ चुराइ । धौरे दुहाइ कंदरा भीतर जानी बात कन्हाइ ॥
गुदी चाँपिकै ताहि निपात्यो परचो धरणि सुरछाइ । सूर ग्वालन मिलि हरिगृह आए देव
दुंदुभी बजाइ ॥ ७८ ॥ राग कान्हरो ॥ कहति यशोदाबात सयानी । भावी नहीं मिटै काहुकी
कर्ताकी गति काहु न जानी ॥ जन्म भयो जबते ब्रज हरिको कहा कियो करि करि रखवानी । कहाँ
कहाँते श्याम न उबरचो कहि राख्यो ता अवसर आनी ॥ केशी शकट अरु वृषभ पूतना तृणावर्त
की चलति कहानी । को मेरे पछिताइ मेरे अब अनजानत सब करी अयानी ॥ लै बलाइ छाती
सों लाए श्याम राम हरषति नँदरानी । भूँखे भए प्रात अधखातहि ताते आजु बहुत पछितानी ॥
रोहिणि तुरत न्हवाइ दुहुँनको भोजनको माता अतुरानी । ल्याई परसि दुहुँनकी थारी जेवत
बल मोहन रुचि मानी ॥ माँगि लियो शीतल जल अँचयो मुख धोयो चरणन लै पानी । वीरा
खात देखि दोउ वीरा दोउ जननी मुख देखि सिहानी ॥ रत्न जटित पलका पर पौढे वरणि
न जाइ कृष्ण रजधानी । सूरदास कछु जूँठनि मांगत तब पाऊँ कहि दीजै बानी ॥ ७९ ॥ राग
विलावल ॥ नित्यधाम वृन्दावन श्याम । नित्य रूप राधा ब्रजबाम ॥ नित्य रास जल नित्य
विहार । नित्य मान खंडिता भिसार ॥ ब्रह्मरूप एई करतार । करन हरन त्रिभुवन संसार ॥ नित्य
कुंज सुख नित्य हिंडोर । नित्यहि त्रिविध समीर झकोर ॥ सदा वसंत रहत जहँ बास । सदा हर्ष
जहँ नहीं उदास ॥ कोकिल कीर सदा तहँ रोर । सदा रूप मन्मथ चित चोर ॥ विविध सुमन वन
फूले डार । उन्मत मधुकर भ्रमत अपार ॥ नव पल्लव बन शोभा एक । विहरत हरि संग सखी
अनेक ॥ कुहू कुहू कोकिला सुनाइ । सुनि सुनि नारि भई हरषाइ ॥ बार बार सो हरिहि सुनावति ।

ऋतुवसंत आयो समुझावति ॥ फागुचरित रस साध हमारे । खेलहिं सबमिलि संग तुम्हारे ॥
 सुनि सुनि सुर श्याम मुसकाने ॥ ऋतुवसंत आयो हरपाने ॥ ८० ॥ वसंत लीला ॥ राग वसंत ॥ राधे जु आज वरणो
 वसंत ॥ मनहुँ मदन विनोद विहरत नागरी नवकंत ॥ मिलत सन्मुख पाटल पटल भरत मान जुहीबेलि
 प्रथम समाज कारण मेदिनी कुच गुही ॥ केतकी कुच कलश कंचन गरे कंचुकि कसी । मालती
 मद चलित लोचन निरखि मृदु मुख हँसी ॥ विरह व्याकुल मेदिनी कुल भई वदन विकास । पवन
 परिमल सहचरी पिक ज्ञान हृदय हुलास ॥ उत सखा चंपक चतुर अति कुंद मनौ तनमाला मधुप मणि
 माला मनोहर सुर श्रीगोपाल ॥ ८१ ॥ राग वसंत ॥ ऐसो पत्र पठायो ऋतुवसंत ॥ तजहु मान मानिनि तुरंत ॥
 कागज नवदल अंबुज पातादेति कलम मसि भवै सुगात ॥ लेखनि काम बाणके चाप ॥ लिखि अनंग
 कसि दीनी छाप ॥ मलयाचलन पठयो बिचारि ॥ वाचल पिक सब नेहु नारि ॥ सूरदास क्यों होई
 आन ॥ भजि हरि गोपी तजी सयान ॥ ८२ ॥ बेगि चलहु पिय चतुर सयानी ।
 समय वसंत विपिन रथ हय गज मदन सुभट नृप फौज पलानी ॥ चहुँ दिशि चांदनी चमू चली
 मनहु प्रशंसित पिक वर वानी ॥ बोलत हँसत चपल वन्दीजन मनहुँ धवला सोइ धूर उडानी ॥ सोलह
 कला छपाकरकी छवि शोभित छत्र शीश शिरदानी ॥ धीर समीर रटत बन अलिगण मनहु कामकर सुरलि
 सुठानी ॥ कुसुम शरासन बान विराजत मनहु मानगढ अनु अनुभानी । सूरदास प्रभुकी वेई गति करहु
 सहाय राधिका रानी ॥ ८३ ॥ राग वसंत ॥ देख्यो श्री वृंदावन कमल नयन ॥ मनु आयो है मदन गुण गुदर
 दयन ॥ १ ॥ भए नवहुम सुमन अनेक रंग । प्रति लसित लता संकुलित संग ॥ करधरे धनुष
 कटि कसि निखंग । मनौ बने सुभट सजि कवच अंग ॥ २ ॥ जहां बान सुमति वहै मलय बात ।
 अति राजत रुचिर बिलोल पात ॥ धपि धाय धरत मन तुरै गात । गति तेज वसन बाने उडात
 ॥ ३ ॥ कोकिल कुंजलहै हँस मोर । रथ शैल शिला पदचर चकोर ॥ वर ध्वज पताक तरतार केरि ।
 निर्झरनिसान डफ भँवर भेरि ॥ ४ ॥ सूरदास इमि वदत बाल । करिकाम कृपण शिवक्रोध काल ॥
 हँसि चितय चारु लोचन विशाल । तेहि अपने करि थपिए गोपाल ॥ ५ ॥ राग वसंत ॥ राजत तेरे
 वदन शशि री । किरनि कटाक्ष बाण बरसाधे भौंह कलंक कमान कसी री ॥ पीन पयोधर सघन
 उन्नत अति तापर रोमावली लसी री । चक्रवाक खग चोंच पुटीते मनुसे निवल मंजीर खसी री ॥
 ज्यों नाभी सर एकनाल नव कनक कमल विवि रहे बसी री । सूरज श्रीगोपाल पियारी मेरु न
 अधतम धरा धसी री ॥ ८४ ॥ कोकिल बोली वन वन फूले मधुप गुंजारन लागे । सुनि भयो भोर रोर
 बंदिन को मदन महीपति जागे ॥ तिन दूने अंकुर हुम पल्लव जे पहिले दव दागे । मानहु रति पति
 रीझि याचकन बरन बरन दए बागे ॥ नई प्रीति नई लता पुहुप नए नए नयन रस पागे । नए
 नेह नवनागरि हरपति सूर सुरंग अनुरागे ॥ ८५ ॥ देख्यो श्री वृंदावन खेलहि गोपाल । सब बनि ठनि
 आई ब्रजकी बाल ॥ नववल्ली सुंदर नव तमाल । नव कमल महा नव नव रसाल ॥ अपने कर
 सुंदर रचित माल । अवलंबित नागर नंदलाल ॥ नवकेसरि नव अरगजा घोरि । छिरकति नागरि
 कहां नवकिशोरि ॥ नवगोप वधू राजही संग । गजमोतिन सुंदर लसित मंग ॥ गोपीन ग्वाल सुंदर
 सुदेष । छिरकत सुगंध भये ललित भेष ॥ नंदन नंदके भुवविलास । आनंदित गावत सूरदास ॥ ८६ ॥
 दिय देख्यो बन छवि निहारि । बार बार यह कहति नारि ॥ नव पल्लव बहु सुमन रंग । हुम बेली
 तनु भयो अनंग ॥ भँवरा भँवरी भ्रमत संगाय सुन करति नाना तरंग ॥ त्रिविध पवन मनहर पदयन ।
 सदा बहत न विहरत चयन ॥ सूरज प्रभु करि तुरंग नयन ॥ चले नारि मन सुखद मयन ॥ ८७ ॥ आयो पिय
 आयो ऋतुवसंत ॥ दंपति मन सुख विरहिनि न अंत ॥ फागु खिलावहु संग कंत । हाहा करि करि तृण

गहै दंत ॥ तुरत गए हरिलै मनाय । हरषि मिले उर कंठ लाय । दुख डारयो तुरतहि भुलाय । सो सुख
 दुहुँके उर न माया ॥ ऋतुवसंत आगमन जानि । नारिन राखो मानवानि ॥ सूरदास प्रभु मिले आनि ।
 रसरायो रतिरंग ठानि ॥ ८८ ॥ आयो जान्यो हरि ऋतु वसंत । ललना सुख दीन्हों तुरंग ॥ फूले बरन
 सुमन पलास । ऋतुनायक सुखको विलास ॥ संगनारि चहुँ आस पास । सुरली अमृत करत
 भास ॥ श्यामा श्याम विलास एक । सुखदायक गोपी अनेक ॥ तजत नहीं काहू छनेक । अलक
 निरंजन विविध भेक ॥ फागुरंग रस करत श्याम । युवतिन पूरन करन काम ॥ वासरहू सुख देत
 याम । सूर श्याम बहु कंत वाम ॥ ८९ ॥ देखत नव ब्रजनाथ आजु अति उपजतु है अनुरागमानहु
 मदन वसंत मिलै दोउ खेलत फूले फाग ॥ झाँझि झालरिनि झरिनिसान डफ भँवर भेरि गुँजार ।
 मानहु मदन मंडली रचिपुर बीथिनि विपिन विहार ॥ द्रुम गण मध्य पलाश मंजरी मुदित अग्नि
 की नाई । अपने अपने भेरनि मानो उनि होरी हरषि लगाई ॥ केकी काग कपोत और खग
 करत कुलाहल भारी ॥ मानहुँ लैलै नाउ परस्पर देत दिवावत गारी ॥ कुंज कुंज प्रति कोकिल कूजति
 अति रस बिमल बढी । मानो कुलवधू निलजभय गृह गृह गावति अटनि चढी ॥ प्रफुलित लता
 जहाँ जहँ देखत तहाँ तहाँ अलि जात । मानहु सबहिँमें अवलोकत परसत गणिका गात ॥
 लीन्हें पुहुप पराग पवनकर क्रीडत चहुँ दिशिधाइ । रस अनरस संयोग बिरहिनी भरि छाँडति
 मनभाइ ॥ बहुविधि सुमन अनेक रंगछबि उत्तम भाँति धरे । मानो रतिनाथ हाथसों सबही
 लैलै रंगभरे ॥ और कहाँलि कहौ कृपानिधि वृंदाविपिन विराज । सूरदास प्रभु सब सुख क्रीडत
 श्याम तुम्हारे राज ॥ ९० ॥ सुंदर वर संग ललनाहो बिहरत वसंत समय ऋतु आइ । सकल शृंगार
 बनाइ ब्रजसुंदरि कमलनयनपै लाइ ॥ सरित शीतल बहत मंदगति रवि उत्तर दिशि आयो ।
 अति रसभरी कोकिला बोली विरहिनि विरह जगायो ॥ द्वादश वन रतनारे देखियत चहुँ दिशि टेसू
 फूले । मौरै अँबुवा अरु द्रुम बेली मधुकर परिमल भूले ॥ इत श्रीराधा उत श्रीगिरिधर इत गोपी
 उत ग्वालाखेलत फागु रसिक ब्रजवनिता सुंदर श्यामतमाला ॥ खावासाखि जवारा कुमकुमा छिरकत
 भरि केसरि पिचकारी ॥ उडत गुलाल अबीर जोरतहँ विदिशदीप उजियारी ॥ ताल पखावज बीन बाँसुरी
 डफ गावत गीत सुहाए ॥ रसिक गोपाल नवल ब्रजवनिता निकसि चौहटे आये ॥ झूमि झूमि झूमक सब
 गावति बोलति मधुरी बानी । देति परस्पर गारि मुदितमन तरुनी बाल सयानी ॥ सुरपुर नर पुर
 नाग लोकपुर सबही अति सुखपायो । प्रथम वसंत पंचमी लीला सूरदास यशगायो ॥ ९१ ॥ सुंदरवर
 संग ललना विहरी वसंत सरस ऋतुआई । लैलै छरी कुँवरि राधिका कमलनयन परधाई ॥ द्वादश
 वन रतनारे देखियत चहुँ दिशि टेसू फूले । मौरै अँबुवा अरु द्रुम बेली मधुकर परिमल भूले ॥
 सरिता शीतल बहत मंदगति रवि उत्तरादिशि आयो । प्रेम उमँगि कोकिला बोली विरहिनि विरह
 जगायो ॥ ताल मृदंग बीन बाँसुरि डफ गावत मधुरी बानी । देत परस्पर गारि मुदितहँ तरुणी बाल
 सयानी ॥ सुरपुर नरपुर नागलोक जल थल क्रीडारस पावै । प्रथम वसंत पंचमी बाला सूरदास
 गुण गावै ॥ ९२ ॥ खेलत नवलकिशोर किशोरी । नंदनंदन वृषभानु सुता चित लेत परस्पर चोरी ॥
 औरौ सखी जाल बिन शोभित सकल ललित तनु गावति होरी । तिनकी नख शोभा देखतही
 तरनि नाथहुकी मति भोरी ॥ एक गोपाल अबीर लिए कर इक चंदन एक कुमकुमा रोरी ।
 उपरा उपर छिरकि रस सर भारि बहु कुल क्रीडा परमिति फोरी ॥ देति अशीश सकल ब्रज युवती
 युग युग अविचार जोरी । सूरदास उपमा नहिँ सूचत जो कछु कहो सु थोरी ॥ ९३ ॥ राग श्रीहळी ॥ तेरे

आवेंगे हरि आजु खेलन फागु री । सगुन सँदेशो हो सुन्यो तेरे आँगन बोलै कागु री॥मदनमोहन
तेरे वश माई सुनि राधे बडभागु री । बाजत ताल मृदंग झाँझ डफ का सोहै उठि जागु री ॥ चोवा
चंदन और कुमकुमा केसरि लै पैयां लागु री । सूरदास प्रभु तुम्हरे दरशको श्रीराधा अचल सुहा
गु री॥९४॥हो आजु नंदलालसों खेलोंगी सखी होरी । ललिता बिशाखा अंगना लिपावो चौक पुरावो
तुम रोरी ॥ मलयज मृगमद केसरि लै मथि मथि भरो कमोरी । नवसत साजि शृंगार करौ सब
भरि भरिलेहु गुलालहि झोरी ॥ ज्यों उडुमणमें इंदु बिराजत सहेलिन मध्य राधिका गोरी ।
इक गोरी इक साँवरी होइक चंचल इक भोरी ॥ वरजति सखी बरज्यो नहिं मानै लै पिचकारी
दौरी । उन रंगलै पिय ऊपर डारचो पियहो रंगमें बोरी ॥ ब्रह्मा इंद्र देवगण गंधर्व बरषे बहुत
वाटिका खोरी । सूरदास प्रभु तुम्हरे मिलनको चिरजीवो राधावर जोरी॥९५॥राग मालकौशिक ॥नागर
रसिक अहि रसिक नागरी । बलि बलि जाउँ देखि अब दंपति प्रमुदित लीला प्रथम फाग री ॥
राधा दधि मथन करति अपने गृह प्रबल धरि सुकर पाग री । तब हरि उठि आए औचानक
उससि शशी चन्द्रारित गागरी । लै उसाँस अंजरि भारिलीनो विदुरति दधि जु अनूपम आगरी ॥
अति उमगित श्याम घन छिरके मनु बग फँति बिछुरि गई मागरी ॥ मोहन मुसकि गही दौरत
में छूटि तनी छंदरहित घाघरी । जनु दामिनि बादरते बिमुख वपु तरपित तक्षण लई तलाग री ॥
आनंदित परम दंपति ऐसे पटने परस परत दाग री । सूरदास प्रभु रसिक शिरोमणि काबरणौ
ब्रज युवति भाग री॥९६॥राज्ञी बंगाली॥श्रीमदनमोहन जू मति डारौ केसरि पिचकारी । दधिही मथन
जाहुँ यमुनाजल हो मोहन तुम कुंज विहारी ॥ मर्म न गुरुजन पुरजन जानै नहिं या वृंदावनकी
नारी । सासु रिसाय लरै मेरी ननदी देखैं रँग देहिं मोहिं गारी ॥ सुरली माहिं बजावत गावत
बंगाली अधर चुवत अमृत बनवारी । मुदित पियत संतन सुखकारी पूरब खचित तेहि गिरिधारी ॥
मृदु मुसुकानि युवति मन मोहत हो हरि माखन चोर मुरारी । सूरदास प्रभु दोउ चिरजीवो श्रीब्रज-
नाथ वृषभानु दुलारी ॥९७॥ राग धमार ॥ ठाढी देखी नंद दुआरेहो सुंदरि एक दह्यो । बाढीहो प्रीति
ललना गिरिधरसों गुरुजन सबहिन बिसरि दिये ॥ नयनन कजल नासिका बेसरि मौक्तिक मोर
अति राज्य । ढार सुढार बन्यो जाको मोती रहत अधर मुख छाज्य ॥ कटि लहँगा पहुँची बंध
आँगिया फुँदना बहु विधि सोहै । रतन जराव जरी जाको जेहरि हंसचाल मृग मोहै ॥ कंचन क-
लश भराए यमुनजल मोतियन चौक पुराये । मनहु कछौना हंसन कैसे चुगन सरोवर आए ॥
तुमतौ कहावतहो नंदनंदन सारंग बुद्धिहै थोरी । सूरदास प्रभु नंदके लालको बनीहो छबीली जोरी
॥९८॥ राग कान्हरो ॥ हरिसंग खेलत हैं सब फाग । यहि मिस करत प्रगट गोपी उर अंतरको अनु-
राग ॥ सारी पहिरि सुरंग कसि कंचुकी काजर दैद नैन । बनि बनि निकसि निकसि भई ठाढी
सुनि माधोके बैन ॥ डफ वाँसुरी रुंज अरु महुअरि बाजत ताल मृदंग । अति आनंद मनोहर
वाणी गावत उठत तरंग ॥ एक कोध गोविंद ग्वाल सब एक कोध ब्रजनारि । छाँडि सकुच सब
सब देति परस्पर अपनी भाई गारि ॥ मिलि दश पांच अली बलि कृष्णहि गहि लावति उचका-

१ मालकौशिकरागः-इयामांगः पीतवासा मधुरिपुगलजो वंशवाद्यस्त्रिभंगी रत्नानां कंठमालो विरचिततिलकः कुंकुमैर्भाल-
मध्ये ॥ रागोयं मालकौशी प्रचरति शिशिरे कंठदेशे जनानां प्रायः सूर्योदयादौ स्वरनिचयविदां तुष्टये भूपतीनाम् ।

२ बंगाल्याभाति यस्या अलिकपटलके शीतरश्मिनितांतं भर्तुः संततिहंत्री मलयजर्चितं सर्वदेहे प्रलेपम् ॥ शुक्लं वासो
दधत्या तरुणतनुमदालस्यमत्तेभगत्या युष्माकं सा मुदेस्ताद्युवजनहृदयानन्दकर्ता कटाक्षः ।

३ वज्रज्योतिसमानसुंदरदा रत्नान्विते कुंडले बाह्योमौक्तिकरत्नारहृदयस्तकुंडले कर्णयोः ॥ नानापुष्पसुवासवासिततनुः
पीतांशुकैरावृतः संगीतेन विचक्षणो दिविषदां संमोहनः कानरः ॥रागः कानरः ।

य । भरि अरगजा अबीर कनक घट देति शीशते नाय ॥ छिरकति सखी कुमकुमा केसरि
 भुरकति बंदन धूरि । शोभित हैं मनो शरद समय घन आएहैं जल पूरि ॥ दर्शहु दिशा भयो पारि
 पूरण सूर सुरंग प्रमोद।सुरवनिता कौतूहल भूलीं निरखति श्याम विनोद॥९९ राग आसावरी॥यमुनाकेतट
 खेलति हरि सँग राधा सहित सब गोपी हो । नंदको लाल गोवर्धन धारी तिनके नख मणि
 ओपी हो ॥ चलहु सखी जैये तहां छिन जियरा न रहाय हो । वेणु शब्द मन हरिलियो
 नाना राग बजाइ हो ॥ सजल जलद तनु पीतांबर छबि करमुख मुरली धारी हो ।
 लटपटी पाग बने मनमोहन ललना रही निहारि हो ॥ नैन सैनसों नैन मिले करसों कर भुजा
 ठये हरि ग्रीवा हो । मध्यनायक गोपाल विराजत सुंदरताकी सींवा हो ॥ करत केलि कौतूहल
 माधव मधुरी वाणी गावै हो । पूरणचंद्र शरदकी रजनी संतन सुख उपजावै हो ॥ सकल शृंगार
 कियो ब्रजवनिता नख शिख लोभलटानी हो । लोक वेद कुल धर्म केतकी नेक न मानित कानी
 हो ॥ बलि जाउँ बलके वीर त्रिभंगी गोपिनके सुखदाई हो । सकल व्यथा जु हरी यातनुकी हरि
 हँसि कंठ लगाई हो । माधव नारि नारि माधवकी छिरकत चोवा चंदन हो ॥ एसो खेल मच्यो
 उपरापरि नंदनंदन जगबंदन हो । ब्रह्मा इंद्र देव गण अथर्व सबै एक रस वरपै हो । सूरदास गोपी
 बडभागिन हरि सुख क्रीडा करपै हो॥२४००॥राग गौरी॥मानो ब्रजते करनी चली मदमाती हो । गिरिधर
 गजपै जाइ ग्वारि मदमातीहो॥कुल अंकुश मानै नहीं मदमातीहो॥शंका बढे तुराइ ग्वारि मदमाती हो ॥
 अंगगाई यमुना नदी मदमातीहो । करति तरुनि जलकेलि ग्वारि मदमाती हो ॥ चहुँ दिशते मिलि
 छिरकही मदमाती हो । सुंड दंड गज पोल ग्वारि मदमाती हो । वृंदाबन वीथिनि
 फिरै मदमाती हो ॥ संग मदन गजपालि ग्वारि मदमाती हो । कबहुँ नैन कर दै
 मिलै मदमाती हो ॥ तैसीये गजगति चाल ग्वारि मदमाती हो । नागबेलि चलती फिरै मद
 माती हो ॥ मोदक मांझ कपूर ग्वारि मदमाती हो ॥ सुगंध पुढे श्रवणन चुवै मदमाती हो । मंडित
 मांग सिंदूर ग्वारि मदमाती हो ॥ केसरि लाई सानिकै मदमाती हो । घुँघरू घंट घुमाइ ग्वालि मद-
 माती हो ॥ ऊपर कुच युग घंटसो मदमाती हो । मुक्तामाल तुराइ ग्वालि मदमाती हो ॥ अंग अंग
 छिरकै श्यामको मदमाती हो । कुमकुम चंदन गारि ग्वारि मदमाती हो ॥ सूरदास प्रभु क्रीडहीं
 मदमाती हो । सँग गोकुलकी नारि ग्वारि मदमाती हो॥१॥राग काफी॥खेलत अति रसमसे रँगभीने हो ।
 अति रसकेलि विशाल लाल रँगभीने हो ॥ जागत सब निशिगत भई रँगभीने हो । भले कान्ह भले
 आए प्रातकाल रँगभीने हो । बोलत बोल प्रतीतिके रँग भीने हो ॥ सुंदर श्यामल गात लाल रँग
 भीने हो । अति लोहित दृगरँगमगे रँग भीने हो ॥ मानों भोर भए जलज्जत लाल रँग भीने हो । पिये
 अधर मधुपान मत्त रँग भीने हो ॥ कहत कहूँकी कहूँ बात लाल रँग भीने हो । केश शिथिल वरवेश
 सिथिल रँगभीने हो ॥ शशि मुख सिथिल जँभात लाल रँगभीने हो ॥ चाल सिथिल भुवभाल सिथिल रँग
 भीने हो ॥ अंग अंग अलसात लाल रँग भीने हो । सकुचतहो कत लाडिले रँग भीने हो ॥
 दुरत न उर नख गात लाल रँग भीने हो । सूरदास प्रभु नंद किशोर रँग भीने हो । बहुनायक विख्यात

१ श्यामांगी मुकुरं करेण दधती हारं गले मौक्तिकं ताटकान्वितकर्णकंकणकरा दिव्यांबरैः संयुता ॥ रंभाया घनकाननेपु
 रमती त्वध्यापयंती शुक्रमासावर्यपि किन्नैरपि सुरैर्गीता निशाते दिवि ॥ राज्ञी आसावरी ।

वीणाहाटककंकणे च दधती पद्माक्षिपद्मानना वस्त्रं कैरवपद्मकोमलसमं शास्त्रे परं पंडिता ॥ मालश्री सखिसंयुता त्रिभुवने
 गीतार्थपुंसां प्रिया भूपालीसहिता प्रियाय करुणामाकुर्वती श्रीहृष्टी ।

लाल रँगभी नेहो ॥ १ ॥ राग गौरी ॥ गोकुल सकल ग्वालिनो हो घर-घर खेलैं फागु मनोरा झूमकरो । तिन में श्रीराधा लाडिलीहो जिनको अधिक सुहाग मनोरा झूमकरो ॥ १ ॥ झुंडनि मिलि गावति चलीं हो झूमक नंददुवार मनोरा झूमकरो । आजु परब हँसि खेलो हो मिलि संग नंदकुमार मनोरा झूमकरो ॥ २ ॥ रसिकराइ सुंदर बरहो श्रीराधा जिन प्राण मनोरा झूमकरो । मोहन दश दिखावहू हो डरहु तो नंदकी आन मनोरा झूमकरो ॥ ३ ॥ प्रगट प्रीति गोकुल भईहो अब कैसे करत दुराव मनोरा झूमकरो । हम न दश बिन जीवहीं हो कोउ कछु करहु उपाव मनोरा झूमकरो ॥ ४ ॥ यशुमति सुत चित चुभि रहीहो वह तुमहीं सुसुकान मनोरा झूमकरो । अब न अनत रुचि उपजैहो सहजपरी यह बानि मनोरा झूमकरो ॥ ५ ॥ दुरत श्याम धरि पाएहो राधा धाय भरी अँकवारि मनोरा झूमकरो । कनक कलशं केशरि भरीहो लै धाईं ब्रजनारि मनोरा झूमकरो ॥ ६ ॥ भरहु भरहु सखि श्यामही हो पीत पिछौरी पाग मनोरा झूमकरो । देह गेह सुधि बिसरी हो नंदन दन अनुराग मनोरा झूमकरो ॥ ७ ॥ छूटे केश कंचुक बंदहो टूटे मोतिन माल मनोरा झूमकरो ॥ ८ ॥ चोवा चंदन अरगजा हो उडत अबीर गुलाल मनोरा झूमकरो ॥ ८ ॥ करकट ताल बजावहीं हो छिरकत सब ब्रजनारि मनोरा झूमकरो । हँसिहँसि हरि पर डारहीं हो अरुन नयन फुलवारि मनोरा झूमकरो ॥ ९ ॥ सुर नर मुनि कौतुक भूलेहो आनंद बरषै फूल मनोरा झूमकरो । गगन विमान न छायोहो झेहनसुझे नाहिन सुर मनोरा झूमकरो ॥ १० ॥ सूर गोपाल कृपा बिनुहो यह रस लहै न कोइ मनोरा झूमकरो । श्रीवृषभानु किशोरी हो श्याम मगन मन होइ मनोरा झूमकरो ॥ ११ ॥ राग सारंग ॥ आली री नंदनंदन वृषभानु कुँवरिसों बाढ्यो अधिक सनेह । दोऊ दिशिपै आनंद वरषत ज्यों भादोंको मेह ॥ सब सखियाँ मिलि गईं महारिपै मोहन माँगो देहु । दिना चारि होरीके औसर बहु रि आपनो लेहु ॥ झुकि झुकि परतिहै कुँवरि राधिका देति परस्पर गारि । अब कहा दुरे साँवरे टोटा फगुवा देहु हमारि ॥ हँसि हँसि कहति यशोदा रानी गारी मति कोउ देहु । सूरजदास श्याम के बदले जो चाहो सो लेहु ॥ ११ ॥ राग टोडी ॥ या गोकुल के चौहटे रंग भीजी ग्वालिन । हरि संग खेले फाग नैन सलोनरी रंग राची ग्वालिन ॥ डरति न गुरुजन लाज नैन सलौने री रंग राची ग्वालिन । दुंदुभिबाजै गहगहे रंगभीजी ग्वालिन ॥ नगर नगर कोलाहल होई नैन सलोन री रंगराची ग्वालिन । उमझो मानुष घोषयाँ रंग भीजी ग्वालिन ॥ भवन रह्यो नहिं कोइ नैन सलोन री रंगराची ग्वालिन । डफ बाँसुरी सुहावनी रंग भीजी ग्वालिन ॥ ताल मृदंग उपंग नैन सलोन रंगराची ग्वालिन । झाँझ झालरी किन्नरी रंग भीजी ग्वालिन ॥ आउ झवर मुहचंग नैन सलोन री रंगराची ग्वालिन । उतहि संग सब ग्वाल लिए रंग भीजी ग्वालिन ॥ सुंदर नंदकुमार नैन सलोन री रंगराची ग्वालिन । उत श्यामा नव योवना रंग भीजी ग्वालिन ॥ अंबुज लोचन चारु नैन सलोन री रंगराची ग्वालिन । टेसूके कुसुम निचोड़कै रंगभीजी ग्वालिन ॥ भैं परस्पर आनि नैन सलोन री रंगराची ग्वालिन । चोवा चंदन अरगजा रंगभीजी ग्वालिन ॥ कुमकुम चंदन सानि नैन सलोन री रंगराची ग्वालिन । रत्न जाटित पिचकारियाँ रंगभीजी ग्वालिन ॥ करलिए गोकुलनाथ नैन सलोन री रंगराची ग्वालिन । छिरकहिं मृगमद कुमकुमा रंगभीजी ग्वालिन ॥ जो राधेके साथ नैन सलोन री रंगराची ग्वालिन । सुरंगपीतपट रंग रह्यो रंगभीजी ग्वालिन ॥ सुभग साँवरे अंग नैन सलोन री रंगराची ग्वालिन । नीलवसन भामिनिबनी रंगभीजी ग्वालिन ॥ कंचुकी कुसुम सुरंग नैन सलोन री रंगराची ग्वालिन । अरुणनूतपल्लवधरे

रँगभीजी ग्वालनि ॥ कूजित कोकिल हंस नैन सलोन री रँगराची ग्वालनि । नृत्य करत
 अलि कुल मिले रँगभीजी ग्वालनि ॥ अति आनंद अधीर नैन सलोन री रँगराची ग्वालनि ॥
 चढि विमान सुर देखहीं रँगभीजी ग्वालनि । देहदशा बिसराइ नैन सलोन री रँगराची ग्वालनि ॥
 राधारसिक रसज्ञहो रँगभीजी ग्वालनि । सूरदास बलि जाइ नैन सलोन री रँगराची ग्वालनि
 ॥ ५ ॥ राग गौरी ॥ खेलत हो हो हो हो होरी अतिसुख प्रीति प्रगट भई उत हरि इतहि राधिका
 गोरी । हो हो हो हो होरी बाजत ताल मृदंग झाँझ डफ बिच बिच बाँसुरी ध्वनि थोरी ॥ १ ॥
 गावत दैद गारि परस्पर उत हरि इत वृषभानु किशोरी । मृगमद साखजवाद कुमकुमा केसरि
 मिलै मिलै मथि चोरी ॥ २ ॥ गोपी ग्वाल गुलाल उडावत मत्त फिरै रतिपति मनो घौरी ।
 भरति रंग रति नागरि राजति मानहु उमँगि बिलावल फोरी ॥ ३ ॥ छुटिगई लोकलान कुलशंका
 गनत न गुरु गोपिनको कोरी । जैसे अपनेमें रमतेमें चोर भोर निरखत निशि चोरी ॥ ४ ॥
 उन पटपीत किए रँग राते इन कंचुकी पीत रँग बोरी । रही न मन मर्याद अधिक रुचि सहचरी
 सकति गाँठि गहि जोरी ॥ ५ ॥ वरणि न जाइ वचन रचना रचि बहु छवि झक झारा झक झोरी ।
 सूरदास शारदा सरलमति सो अवलोकि भूमि भई झोरी ॥ ६ ॥ ६ ॥ राग गूजर ॥ ब्रजकी बीथिन
 बीथिन डोलत । मदन गोपाल सखा सँग लीने हो हो हो लै बोलत ॥ ताल मृदंग बीन डफ बाँसुरी
 बाजत गावत गीत । पहिरे वसन अनेक बरन तनु नील अरुन सित पीत ॥ सुनि सब नारि
 निकसि ठाढी भई अपने अपने द्वार । नवसत साजे प्रफुलित आनन जनु कुमुदिनी कुमार ॥
 चपल नैन अति चतुर चारु तुम जनु फुलवारी लाई । देखतही नंदनंद परमसुख मिलत मधुप
 लौं धाई ॥ राखत गहि भुज बल चहुँदिशि जुरि अति रिस मुँह अकुलात । मानहु कमल कोश
 अलि अंतर भँवर भ्रमत वन प्रात ॥ छाँडति भरि भायो अपनो करि राजत अंग विभाग । मानहु उडि
 वचलेहैं अलि कुल आश्रित अंग पराग ॥ अंतर कछु न रह्यो तेहि अवसर अति आनंद प्रमाद ।
 मानहु प्रेम समुद्र सूर सुख लै उपटित मर्याद ॥ ७ ॥ ऊँचोसो गोकुल नगर जहँ हरि खेलत होरी ।
 चल सखी देखन जाहि पिया अपनेकी चोरी ॥ बाजत ताल मृदंग और किन्नरकी जोरी । गावति
 दै दै गारि परस्पर भाभिनि भोरी ॥ बूका सुरंग अबीर उडावत भरि भरि झोरी । इत गोपिनको
 झुंड उतहि हरि हलधर जोरी ॥ नवल छबीले लाल तनी चोलीकी तोरी । राधाचलीं रिसाइ ढीठ
 सों खेलै को री ॥ खेलतमें कैसो मन सुनहु वृषभानु किशोरी । सूर सखी उर लाइ हँसति भुजगहि
 झकझोरी ॥ ८ ॥ राग पूवी ॥ ऐसीको खेलैं तोसों होरी । बार बार पिचकारी मारत तापर बाँह मरोरी ॥
 नंदबाबाकी गरु चरावो हमसों करो बरजोरी । छाक छीनि खातहैं ग्वालनकी करतरहे माखन
 दधि चोरी ॥ चोवा चंदन और अरगजा अबिर लिए भरि झोरी । उडत गुलाल लाल भए बादर
 केसरि भरीहैं कमोरी ॥ श्रीबृंदावनकी कुंजगलिनमें गावो मुरली राधा गोरी । सूरदास प्रभु
 तुम्हरे दरशको चिरजीवो यह जोरी ॥ ९ ॥ राग सारंग ॥ निकसि कुँवर खेलन चले रँग हो हो होरी ॥ मोहन
 नंदकुमार लाल रँग हो हो होरी ॥ कंचन माट भराइकै रँग हो हो होरी । सोंधेभरी कमोरी लाल रँग
 हो हो होरी ॥ झाँझ ताल सुरमंडरे रँग हो हो होरी । बाजत मधुर मृदंग लाल रँग हो हो होरी ॥ तिनमें
 परम सुहावनी रँग हो हो होरी । महुवरि बाँसुरी चंग लाल रँग हो हो होरी ॥ खेलत रंगीले लाल जूरँग
 हो हो होरी ॥ गण वृषभानुकी पौरि लाल रँग हो हो होरी ॥ जे ब्रजहुती किशोरी लाल रँग हो हो होरी ।
 ते सब आई दौरि लाल रँग हो हो होरी । सखियन सुख देखनकारने रँग हो हो होरी । गाँठि दुहुनकी जोरि

लाल रँग हो हो होरी ॥ जोपै फगुवा दियो न जाय रँग हो हो होरी । श्रीराधाजूके लागो पाँइ लाल रँग हो हो होरी ॥ यह सुख सबके मनवसो रँग हो हो होरी । सूरदास बलि जाइ लाल रँग हो हो होरी ॥ १० ॥ राग सारंग ॥ करलिए डफहि बजावे हो हो सनाक खेलार होरीकी । संग सखा सब बनि बनि आवत छवि मोहन हलधर जोरीकी ॥ १ ॥ ताल मृदंग बजावत गावत भावत ध्वनि मुरली थोरीकी । लाल गुलाल सभूह उडावत फेंटकसे अबीर झोरीकी ॥ खेलत फाग करत कौतूहल मत्तफि रे मन्मथ धौरीकी । बरन बरन शिरपाग चौतनी कछिकटि छवि चंदन खौरीकी ॥ २ ॥ उतहि सुनति वृषभानु सुता लये तरुनी बोलि सब दिन थोरीकी । नीलांबर कंचुकी सुरंगतनु अति राजति राधा गोरीकी ॥ मनो दामिनि घन मध्य रहति दुरि प्रगट हँसनि चितवनि भोरीकी । नखशिख सजि शृंगार ब्रज युवती तनडडिया कुसुमी वोरीकी ॥ ३ ॥ पानभरे मुख चमकत चौका भालदिये बंदी रोरीकी । कनक कलश कोटिक भरि लीन्हें भरिफूले रँग रँग धोरीकी ॥ युवति वृंद ब्रजनारि संगलै जाइ गहनि ब्रजकी खोरीकी । घरघरते धुनि सुनि उठि धाई जे गुरुजन पुरजन चोरीकी ॥ ४ ॥ लहान लै भरि भरि पिचकारी नानारंग सुमन तोरीकी ॥ कोउ मारति कोउ दाँउ निहारति अरस परस दौरा दौरीकी ॥ उतहि तखा कर जेरी लीन्हें गारी देहि सकुच तोरीकी । इतहि सखी कर बाँस लिए बिच मारु मची झोरा झोरीकी ॥ ५ ॥ पाछे ते ललता चंद्रावलि हरि पकरे भुजभरि कौरीकी । ब्रजयुवती देखतहीं धाई जहाँ तहाँ सब चहुँ ओरीकी ॥ इक पट पीतांबर गहि झटकयो एक मुरलि लई कर मोरीकी । इक मुखसों मुख जोरि रहति इक अंक भरति रति पति ओरीकी ॥ ६ ॥ तब तुम चीरहरे यमुनातट सुधि बिसरे माखन चोरीकी । अब हम दाँव आपनो लेहैं पाँयपरो राधा गोरीकी ॥ अपने अपने मन मुख कारण सब मिलि झकझोरा झोरीकी । नीलांबर पीतांबर सों लै गाँठिदई कसिकै डोरीकी ॥ ७ ॥ कनक कलश केशरि भरि ल्याई डारिदियो हरिपर डोरीकी । अति आनंद भरी ब्रजयुवती गावति गीत सबै होरीकी ॥ अमर विमान चढे सुख देखत पुहुपवृष्टि जैध्वनि रोरीकी । सूरदाससो क्योंकर वरणै छवि मोहन राधा जोरीकी ॥ ८ ॥ ११ ॥ राग रगिनी श्रीहठी ॥ हरि सँग खेलन फागु चली चोवा चंदन अगर अरगजा छिरकति नगर गली ॥ राती पीरी अँगिया पहिरे नउतम झूमक सारी । मुखतमोर नैनन भरिकाजर देह भावती गारी ॥ ऋतुवसंत रति आगमनायक यौवन भार भरी । देखनरूप मदन मोहनको नंददुआर खरी ॥ कहि न जाइ गोकुलकी महिमा घर घर गोकुल माहीं । सूरदास सो क्योंकरि वरणै जो सुख तिहुँ पर नाहीं ॥ १२ ॥ राग गौरी ॥ ठाढो हो ब्रजखोरी ढोटा कौनको । लटिहि लकुट त्रिभंगी एकपद मनो मन्मथ गौनको । मोर मुकुट कछनी कसे री पीतांबर कटि शोभ । नैन चलावै फेरि कै री निरखि होत मनलोभ ॥ भौंहमरोरे मटकिकै री यमुना रोकत घाट । चितै मंद मुसुकाय कै री जियकरि लेय उचाट ॥ हँसत दशन चमकायकै री चकचौंधीसी होति । बगपंगति नवजलद मेरी उरमाला गजमोति ॥ कर पिचकारी रत्न जरतरी ताकि ताकि छिरकत अंग । टेसूके कुसुम निचोय कैरी अरु केसरिको रंग ॥ फेंट गुलाल भराइ कैरी डारत नैनन ताकि । एते पर मन हरत हैरी कहा कहौं गति वाकि ॥ पुनि हाहा करि मिलतु है री अरु नाना रंग बनाय । नंदसुवन के रूपपर री जन सूरदास बलिजाय १३ राग श्रीहठी ॥ साँवरो ढोटा कोहै री माई जाके वारिजनैन विशाला ॥

१. श्यामोबाहुचतुष्टयेन सहितः पीतांबरस्तार्क्ष्यगः शार्ङ्गयोविदधातिवाणसहितं शंखचक्रंगदाम् ॥ वामांगेरमणीयुतः प्रियतमः श्रीविष्णुवत्सर्वदा सारंगो मधवान्वितैः सुरगणैः संस्तूयमानो नरैः ॥ १ ॥ राग सारंग ॥

अधर धरे मुख मुरली बजावत गावत श्रीरागरसाल ॥ मंद मंद मुसकानि सरोज मुख शोभा वरणी
 नैं जाइ । बाँकी भौहैं तिरछी चितवनि चितवत लियो चुराइ ॥ अति लोने सोनेसे कुंडल कौने रचे
 हो सँवारि । मनो काम किल फंद बनाए फंदहैं मीन ब्रजनारि ॥ शिर पगिया वीरा मुख सोहैं सरस
 रसीले बोल । अति आधीन भई ब्रजवनिता वश कीने बिनमोल ॥ कहा करौं देखे बिनु सजनी
 कल न परै पलपान । ग्वालन संग रंग भरचो भावत गावत आछी तान ॥ ताते और कौन हितु
 मेरे सखिचलि नेकुदिखाया मदनमोहन जूकी चरण रेणु पर सूरदास बलि जाय ॥ १४ राग नटनायण ॥
 खेलत श्याम फाग ग्वालन संग । एक गावत एक नाचत एक करत बहु रंग ॥ बीन मुरज उपंग मुरली
 झांझ झालरि ताल । पढत होरी बोलि गारी निरखिकै ब्रजबाल ॥ कनककलशन घोरि केसरि करलिये
 ब्रजनारि । जबहिं आवत देखि तरुनिन भजत दै किलकारि ॥ दुरि रही इक खोरि ललिता उत
 ते आवत श्याम । धरे भरि अँकवारि औचक धाय आय ब्रजवाम ॥ बहुत ढीठो दै रहेहैं जानवी
 अब आजु । राधिका दुरि हँसति ठाढी निरखि पिय मुख लाजु ॥ लियो काहु मुरली करते कोउ गह्यो
 पटपीत । गूथि बेनी मांग पारे लोचन आजि अनीति ॥ गए करते झटकि मोहन नारि
 सब पछिताति । शीश ध्वनि कर मीजा बोलति भली कैलाए भांति ॥ दाँव हम नाहैं लेन पायो वसन
 लेती लाल । सूर प्रभु कहां जाउगे अब हमपरी यह ख्याल ॥ १५ ॥ राग कांफी ॥ मोहन गए आजु तुम जाहु
 दाँव हम लेहिंगीहो । लालन हमहिं करे जे हाल उहै फल देहिंगीहो ॥ आजुहि दाँव आपनो लेती भले
 गएहो भागि । हाहा करते पाँइन परते लेहु पीतांबर मांगि ॥ बेनी छोरत हँसत सखा सँग कहत
 लेहु पट जाइ । सौह करतहो नंदबबाकी अपनी विदति कराइ ॥ जो मैं लेहुँ पीतांबर अबहीं कहा
 देहुँगे मोहिं । इत उत युवती चितवन लागीं रही परस्पर जोहि ॥ एक सखा हरि त्रिया रूपकरि
 पठै दियो तिन पास । गयो तहां मिलि संग त्रियनके हँसति देखि पटवास ॥ मोहि देहु राखौ
 दुरायके श्यामहि जिनि ले देहु । लियो दुराय गोद में राख्यो दाँव आपनो लेहु ॥ पीतांबर जिनि
 देहु श्यामको यह कहि चमक्यो ग्वाल । सूर श्याम पट फेरत करसों चकित निरखि ब्रजबाल ॥ १६ ॥
 चकित भई हरिकी चतुराई हमहिं छली इन कुँवर कन्हाई ॥ कहा ठगोरी देखत लाई । धिरवतिहै कहि
 भली बनाई ॥ एक सखी हलधर वपु काछयो । चली नीलपट ओढे आछयो ॥ श्याम मिलन ताको तहां
 आए । अग्रजकानि चले अतुराए ॥ मिले साँकरी ब्रजकी खोरी । ढूँकीरहीं जहाँ तहँ गेरी ॥ गह्यो धाइ
 भुज दोउ लपटानी । दौरि परीं सब सखी सयानी ॥ निरखि निरखि तरुनी मुसकानी । एक निलज
 इकरही लजानी ॥ कहारही करि सँकोच दिवानी । अब इनकी जिनि राखौ कानी ॥ गारि नारि
 सब देहिं सुहानी । नंदमहरलों जाति बखानी ॥ सूर श्याम उतरचो मुखवानी । गई लिवाइ जहाँ
 राधारानी ॥ १७ ॥ राग धनाश्रीमलार ॥ छैल छबीले मोहना जाके घुँघवारे केशरी । मोरमुकुट कुंडल
 लखे करि लीन्हों नटवर भेषरी ॥ राखे भौह मरोरिकैरी सुंदरनेन विशाल । निरखि हँसनि मुसकानि
 कीरी अतिहिं भई वेहाल ॥ कीर लजावनि नासिका अधरबिंबते लाल । दशन चमक दामिनिहु
 तेरी श्याम हृदय वनमाल ॥ चिबुक चित्तके हरनहैरी राजत ललित कपोल । मारग गहि ठाढो
 रहैरी अरु बोलत मीठे बोल ॥ चंदन खौरि विराजैरी श्यामलभुजा सुचार । ग्वालसखा सब सँग
 लिएरी वह करत गुलालन मार ॥ इक भाजत इक भरत हैरी कुसुमवरन रंग घोरि । सौंधेकी
 चमकी भलीरी खेलत ब्रजकी खोरि ॥ सुनत चलीं सब धाइकैरी वे देखन नंदकुमार । फाग साँझसी
 द्वैरहीरी उडि उडि गगन अपार ॥ मिलि तरुनी जहाँ जाइकैरी जहाँ विरहत फागु गोपाल ।
 सूर श्याम मुख देखिकैरी बिसरचो तनु तेहि काल ॥ १८ ॥ राग गैरी ॥ घर घरते सुनि गोपी हरिमुख

देखन आई । निरखि श्याम ब्रजनारि हरषि सब निकट बुलाई ॥ सुनति नारि सुसकाय वांस
लीन्हें करधाई । ग्वालन जेरी हाथ गारिदै त्रियन सोहाई ॥ शिलानामः ग्वालिनी अचानक गहे
कन्हाई । सखिन बोलावति टेरे दौरि आवहु री माई ॥ एक सुनत गई धाइ बीस तीसक तहाँ
आई । टूटिपरीं चहुँपास घेरि लीन्हों बलभाई ॥ इक पट लीन्हों छीनि मुरलिआ लई छिडाई ।
लोचन काजर आँजि भाँति सो गारीगाई ॥ जबहिं श्याम अकुलात गहति गाढे उर लाई ॥
चंद्रावलिसों कह्यो गूँथि कच सौह दिवाई ॥ हाहाकारिए लाल कुँवरिके पाँय छुआई । यह सुख
देखत नैन सूरजन बलि बलि जाई ॥ १९ ॥ राग काफ़ी ॥ ललना प्रगट भए गुण आजु त्रिभंगी लाल
ऐसे होजू । रोकत घाट बाट गृह बनहुं निबहति नहिं कोउ नारि । भली नहीं यह करत
साँवरे हम देहें अब गारि ॥ फागुन में तो लखत न कोऊ फवति अचगरी भारि । दिनदशगण दिना
दश और लेहु साध सब सारि ॥ पिचकारी मोको जिन छिरको झरकि उठी सुसकाइ ।
सासु ननद मोको घर वैरिनि तिनहि कह्यो कहाजाइ ॥ हाहाकरि कहि नंददोहाई कहा
परी यहबानि चो तासों भिरहु तुमहि मों लायक इह हेरनि सुसकानि ॥ अनलायक हमहें
की तुमहौ कहौ न बात उचारि । तुमहुं नवल नवल हमहुं हैं बड़ी चतुरहो ग्वारि ॥ यह कहि श्याम
हँसे बाला हँसी मनही मन दोउ जानी । सूरदास प्रभु गुणन भरे हो भरन देहु अब पानी ॥
॥ २० ॥ राग काफ़ी ॥ अरी माई मेरो मन हरि लियो नंदके दुटोना । चितवनमें वाके कछु टोना ॥ निर-
खत सुंदर अंग सलोना । ऐसी छबि कहूं भई न होना ॥ कालिहरहे यमुना तट जौना । देख्यो
खोरि सांकरी तौना ॥ बोलत नहीं रहत वह मौना । दधिलै छीनि खात रझ्यो दौना ॥ घर घर
माखन चोरत जौना । वाटन घावन देत है घौना ॥ खेलत फाग ग्वाल संग छौना । मुरली बजाय
बिसरावत भौना ॥ मो देखत अबहीं कियो गौना । नटवर अंग सुभसजे सजौना ॥ त्रिभुवनमें
वश कियो न कौना । सूरनंद सुत मदन लजौना ॥ २१ ॥ माई री मोहन मूरति साँवरो नंदनंदन
जेहि नावरो । अबहिं गए मेरे द्वारहैं रहत कहत ब्रजगाँवरो ॥ मैं यमुना जल भरि घर आवति
मोहिं करि लागो तावरो । ग्वालसखा संग लीन्हें डोलत करत आपनो भावरो ॥ यशुमतिको सुत म-
हर दुटौना खेलत फागु सुहागरो । सूर श्याम मुरली ध्वनि सुन री चित न रहत कहूं ठाँवरो ॥ २२ ॥
अरी माई साँवरो सलोनो अति नंद कुँवर री । चंदनकी खौरि भाल भौह हैं जबरै री ॥ कुंतल
कुटिल छबि राजत झवरै री । लोचन चपल तारे रुचिर भवरै री ॥ मकरकुंडल गंड झलमल करै
री ॥ मनहु सुकुर बिच रवि छबि वरै री ॥ नासिका परम लोनी बिबाधर तरै री । तहां धरै मुरली
सों नाना रंग झरे री ॥ यमुनाके तीर ग्वाल संगहि विहरै री । अबहीं मैं देखि आई बंसीवट तरै री ॥
पिचकारी करलिए धाइ अंग धरै री नैनन अबीर मौर काहूसों न डरै री ॥ वातन हरत मन रांगहैं ढरै
री । सूरजको प्रभु आली चितते न टरै री ॥ २३ ॥ नंदनंदन आली मोहि कीन्हीं बावरी । कहा करौं
चित क्योंहुं रहत न ठाँव री ॥ विहरत हरि जहां तहां तुहु आव री । निशिहुं वासर आली मोको
उहई चाव री ॥ यमुना जल भरन जाइ इहै करि दाँव री । गुरुजन पुरजनसों और न उपाव री ॥
काफ़ी रागिनी मुख गावै मुरली बजाइ री । ध्वनि सुनि तनु भूली अतिही सुहाइ री ॥ चंदन कपूर चूरि
फेटन भराइ री । सोंधे भरि पिचकारी मारत है धाइ री ॥ आतुर ह्वै चलि री और जाइ किनि जाइ री ।
चित न रहत ठौर और न सोहाइ री ॥ मिलि प्रभु सूरजको सकुच गँवाइ री । लाजडारि
गारि खाइ कुल बिसराइ री ॥ २४ ॥ राग कल्याण ॥ खेलत हरि ग्वालसंग फागु रंग भारि । एक मारत एक नारत

एक भाजत एक गाजत एक धावत एक पावत एक आवत मारि ॥ एक हर्षत एक लरखत
 एककरत घातहिको लोचन गुलाल डारि सोंधे ढरकावै । एकफिरत संग संग एकएक न्यारे २
 विहरत टरत दाँव दीबेको वै ज्यों नहिं पावै ॥ एकगावत एकभावत एकनाचत एकराचत एककरत
 मृदंग गति जति उपजावै । एकवीणा एककिन्नर एकमुरली एकउपंग एकतुंमर एक
 रबाब भांति सौ दुरावै ॥ एक पटह एक गोमुख एक आवझ एक झालरी एक अमृत कुंडली
 एक एक डफ एक करधारे । सूरज प्रभु बल मोहन संग सखा बहु गोहन खेलत वृषभानु पौरि
 लिए जात टारे ॥ २५ ॥ राग सावैरी ॥ सुनतही वृषभानु सुता युवती सब बोलाई । आए बलराम
 श्याम आए तजि काम वाम धामते आतुरसात नव बनाई ॥ हरषत सब ग्वाल बाल अरस परस
 करत ख्याल एक मारत एक भाजत राजत वह जोरी । उतते निकसी कुमारी संग लिए विपुल नारि
 कोउ कोउ नव योवन भरि कोउ कोउ दिन थोरी ॥ इत उत मुख दरश भए पिय पूरण कर्म किया
 मानो शशि उदय भयो आनंदित चकोरी । उतजेरी धरे ग्वाल बाँसन इत परी मार यह
 छबि नहिं वार पार सोर झोर झोरी ॥ उत होरी पढत ग्वाल इत गारी गावति ए नंद नहिं जाए तु
 म महरि गुणनभारी । कुलटी उनते कोहै नंदादिक मनसोहै बाबा वृषभानुकी वै सूर सुनहु प्यारी ॥
 ॥ २६ ॥ राग काफ़ी ॥ श्रीराधा मोहन रंग भरेहो खेल मच्यो ब्रजखोरी । नागरि संग नारि गण सोहैं
 श्याम ग्वाल सँग जोरी ॥ हरिलिए हाथ कनक पिचकारी सुरंग कुमकुमा घोरी । उतहि माट
 कंचन रँग भरिलै आई तिरिया जोरी ॥ आतुरहैं धाई उत नागरि इत बिचले सब ग्वाल ।
 घेरि लई गहि खोरि साँकरी पकरे मदन गोपाल ॥ गह्यो धाइ चंद्रावलि हँसिकै कह्यो भलेहो
 लाल । जिनि बलकरौ रहौ नेक ठाढे जुरि आई ब्रजबाल ॥ आई हँसति कहति हरिएई बहुत
 करतहैं गाल । क्यों जू खबरि कहौ यह कीन्ही करत परस्पर ख्याल ॥ काहु तुरत आइ मुख
 चूम्यो करसों छुयो कपोल । कोउ काजर कोउ वदन माडती हर्षहिं करहिं कलोल ॥ कोउ मुरली
 लै लगी बजावन मनभावन मुखहेरि । किनहूँ लियो छोरि पट कटिते वारति तनपर फेरि ॥
 श्रवणनलागि कहति कोउ बातें बसन हरे तेइ आपु । कालि कह्यो करिहौ कहा मेरो प्रगट भयो सो
 पापु ॥ कोउ नयनन सों नयन जोरिकै कहति न मोतन चाहौ । अबहीं तुम अकुलात कहाहौ जानहु
 मे मनलाहौ ॥ घेरि रही सरघाकी नाहीं करति सबै मनलाह । इक बूझति इक चिबुक उठावति
 वशपाए हरिनाह ॥ पीतांबर मुरली लई तबहीं युवती स्वांग बनाइ । देखत सखा द्वारि
 भए ठाढे निरखत श्याम लजाइ ॥ नखछत छाप बनाय पठाए जानि मानि गुण येहु । सूर
 श्याम हमको जिनि बिसरौ चिह्न इहै तुम लेहु ॥ २७ ॥ राग गुंडमलार ॥ खेलत रंग रह्यो एक ओर
 ब्रजसुंदरि एक ओर मोहन । बरन बरन ग्वालबने महर नंद गोप जने एक गावत एक नृत्यत एक
 रहत गोहन ॥ बजावत मृदंग ताल अरस परस करै विहार शोभाको बरनी पार एक एक दै सोहन ।
 कनक लकुट करन लिए धाए सब हरषि हिए एक ब्रजललना सूरज प्रभु मन मन मिलि भौहन ॥
 ॥ २८ ॥ राग सारंग ॥ हो हो हो हो होरी करत फिरत ब्रजखोरी । मोहन हलधर जोरी सुवननंद कोरी ॥ ग्वाल
 सखा सँग ठोरी लिए अबीर कर झौरी ॥ मारि भजत जेहि जोरी दावैलेत सोदौ री । एक गावति है
 धमारि एक एकन देति गोरि गारी । दई सबन लाज डारि बाल पुरुष तोरी ॥ सोंधे अरगजा कीच
 मची जहां तहां गालि नोरी । बीच एक एक ऊंच नीच करत रंग झोरी ॥ एक उघटत एक
 नृत्यत एक तान लै तोरी । उपजाइ एक दै करताल हरषि गावति है गोरी ॥ सूरदास प्रभुको मुख

निरखि हरषि होरी । सुरललना सुरनसहित विथकति भई बौरी ॥ २९ ॥ रागनंदन ॥ वृंदावन परम सोहावनो राघे खेलै फागुवारे कन्हैया । मोहन बैसिया बजवैभला नदी यमुनाके तीर वारे कन्हैया ॥ श्रवण सुनत सब धावैही झोरिन भरे अबीर वारे कन्हैया । उर मोतिनकी माला री पहिरे रातुल चीर वारे कन्हैया ॥ ब्रजवधू सब सुंदरि श्रवणन झनकै बीर वारे कन्हैया । चोवा चंदन अरगजा छिरकै सकल शरीर वारे कन्हैया ॥ एकतो राधा सुंदरी दुसरे परी अबीर वारे कन्हैया । सांकरि खोरि या ब्रजकी हो भई चोवाकीही लवारे कन्हैया ॥ वृंदावनके कुंजन भई दोउ दिश भीरवारे कन्हैया ॥ यही बिधि होरी खेलही गावै निशि दिन सूर वारे कन्हैया ॥ ३० ॥ राग धमारी ॥ प्यारी नंदनंदन वृषभानु कुँवरि सों खेलत रंग रह्यो । उडत गुलाल कुमकुमा मानो अंबर आली छाइ रह्यो ॥ अलि सुत युग वरण्यो बंकट छबि जलसुत अधर लह्यो । खंजन मीन मुक्ताहल राजत मनो रनिरथ खैचि रह्यो ॥ हाँसि मुसकात सहज स्वारथको रमनिहि रूप थह्यो । दारौ दरनि अरुन अति शोभा मनु शशि ग्रहण गह्यो ॥ गोपी ग्वाल सिमटि सब सुंदरि सज्यो शृंगार नह्यो । वरषत कंचन नीर कुल्लुजल मनो घनगरज रह्यो ॥ सखिश्यामा श्याम सबै सुखदाई सुखसागर सगरो । सूरदास प्रभु मिल्यो हो कृपाकरि जिन्हि हृदये बिसरो ॥ ३१ ॥ राग सारंग ॥ हो हो होरी खेलै रंग सों ब्रजराज कुँवर वृषभानु पौरी । सुनि मुरली डफ ताल वेणु चढि अटा अटारी दौरि दौरि ॥ जो प्यारी न्यारी छबि सों देखति जलधरको छबि अपार । घनघटा अटा मंद छटकै दै उदित चंद्र वादर विदार ॥ सों प्यारेकी हितु हतीते झकझारो खेटक झक झाँकवार । भौहैं मंद भेद भाव हरषै वरषै रंग अपार ॥ इक प्यारी चंदन घसि छिरकै एक लिए लाल गुलाल । इक प्यारी केसरि छिरकति है भनत सूर चलि गति मराल ॥ ३२ ॥ राग विलावल ॥ खेलत मोहन फागु भरे रंग ॥ डोलत सखा समूह लिए सँग ॥ १ ॥ नंदरायसों विनती कीनी । श्याम एककी आज्ञा लीनी ॥ अगणित तब पिचकारी गढाये । कंचन रतन बबापै पाये ॥ २ ॥ मन सहसक केसरि लैदीनो । अमित सुगंध अरगजा लीनो ॥ गोपिन बैठि औंसेरकीनो । गाइ चरावनको सँग दीनो ॥ ३ ॥ तब अनंत सखा गन साजे । सकल सँवारि संग लिए बाजे ॥ घर घर ध्वजा पताका वानी । तोरन वारन वासर ठानी ॥ ४ ॥ अरन पचासक अबीर सवारे । बीथिन छिरकि तहां विस्तारे ॥ मोहन चरन धरत तहँ आवै ॥ द्वारे जुरि युवती मिलि गावै ॥ निराखि भरनको सब मिलि धावै । मोहन इतते सखा सिखावै ॥ नाहिं गात वस्तर नहिं राखे ॥ भरि नीके करि मुख कछु भाषे ॥ ५ ॥ बैठे जहां गोप सब राजै ॥ आवत देखि सबै उठि भाजै ॥ मोहनपै कोउ जान न पावै ॥ महा मत्त गजवरज्यो धावै ॥ ७ ॥ सब मिलि बोलत होहो होरी । छिरकत चंदन बंदन रौरी ॥ एक घोस गोपी जुरि आय । घरही में घेरे हरि जाय ॥ ८ ॥ इक भीतर इक रही दुआरे । एकजाइ लागी पिछवारे ॥ एक इहां चहुँ दिशिते घेरे । एक पैठि मंदिर में हेरे ॥ ९ ॥ एक लिएकर कमल विराजै । परसै किरणि कोटि शशि भ्राजै ॥ एकलिए शिरसौंघे गागारि । फेंट अबीर भरे बहु नागारि ॥ १० ॥ सारी सुभग काछ सब दिये । पाटंबर गाती सब हिये ॥ एकन जाइ दुरे हरि पाये । सैन देइ राधिका बताये ॥ ११ ॥ करति कुलाहल हरि गहि लाई । फूली ज्यों निधनी धन पाई ॥ एक गहे कर दोऊ हरिके । हलधर देखि उतहिको सरके ॥ १२ ॥ केसरि अरु गुलाल सुखलायो । पूरनचंद्र उदयकरि आयो ॥ पीत अरुण रंगनाये शिरते । चली घातु मानो सांवर गिरिते ॥ १३ ॥ एक भरे पिचकारी ताके । दैत श्रवणमें नंदललाके ॥ ब्रजजन सकल सुधारस पीते । ऐसी भाँति

पहर दुइ बीते ॥ १४ ॥ देखी निकट राधिका प्यारी । तब हरिलीला और बिचारी ॥ तब हरि जाइ
 दुरे उपवनमें । लगी नायका कुंज सदनमें ॥ १५ ॥ करत कुलाहल ब्रजकी नारी । देखत चढे कदंब
 विहारी ॥ कबहुँक मुरली मधुर बजावैं । श्रवण सुनत जितही तित धावैं ॥ १६ ॥ जब
 हरि जानि निकटही आए । डरते तब हरि रहे लुकाए ॥ कुंज कुंज कोकिल ज्यों टैं । श्रवणनाद
 भृंगी त्यों हेरैं ॥ १७ ॥ कबहुँ फिरि आपुसमें खेलति । सकल सुगंध परस्पर मेलति ॥ झुके
 वचन कहती बिनपाये । कहति कछू राधिका लगाए ॥ १८ ॥ करनि लाज वरवनु भे जैसे । जाइ
 डोलति वन वनमें तैसे ॥ तब हरि भेष धरयो युवतीको । सुंदर परम भावतो जीको ॥
 ॥ १९ ॥ सारी कंचुकि केसरि टीको । करि शृंगार सब फूलनहीको ॥ कर राजति
 गेंदुक नोलासी । छूटी दामिनिसी ईषदहासी ॥ २० ॥ सकल भूमि वन शोभा पाइ ।
 सुंदरता उमंगी न समाइ ॥ ता शोभा ब्रजनारी सोही । रही ठगीसी रूप विमोही ॥ २१ ॥ एक कहति
 हरि कैसे बैना । एक कहति वैसेई बैना ॥ बूझति एक कौनकी नारी । बिधिकी सृष्टि नहीं
 तू न्यारी ॥ २२ ॥ तब हरि कहत सुनहु ब्रजबाला । बोलति हँसि हँसि वचन बाला ॥ हम तुम
 मिलि खेलहि सब जानति । राधा आली मोहि पहिचानति ॥ २३ ॥ हाँहूँ संग तिहोर खेली जानति होहूँ
 जान सहेली ॥ अबहीं कीरति महारि पठाई । राधा इकली खेलन आई ॥ २४ ॥ अब एक बात
 कहौ हो जीकी । हौँ जानति हौँ हरिही पीकी ॥ सघन विपिन ऐसे कहाँ पावहु । सब मिलि एक
 संग जिनि धावहु ॥ २५ ॥ सुनहु शोर कत रहिहै नेरे । कोटि करौ पावहु नहिँ हेरे ॥ हैहै
 न्यारी न्यारी डोलहु । तनक मूँदि कर मुख जिनि बोलहु ॥ २६ ॥ जाइ अचानकही गहि ल्यावहु ।
 सखी एक ज्यों त्यों करि पावहु ॥ राधाको भुज गहिकै लीनी । ऐसे सबको द्वैद्वै कीनी ॥ २७ ॥
 मौन किए प्रवेश कियो वनमें । हरिको रूप राखि निज मनमें ॥ और सखी खोजति सब कुंजनि ।
 राधा हरि विहरत सुख पुंजनि ॥ २८ ॥ राधा आवति देखि अकेली । तब फिरि बहुरि सब
 बैठि सकेली ॥ तब बूझति वृषभानु दुलारी । सखी संगकी कहाँ बिसारी ॥ २९ ॥ अति गह्व-
 रमें जाइ परी हम । सूर्यन सूझत भयो निशातम ॥ ताठाहरतेहों भई न्यारी ॥ फिरि आई डरपी
 हों भारी ॥ ३० ॥ पुहुप वाटिका हो फिरि आई । मुकुट पीठिते हो इतआई ॥ ता ठाहर जो ठाढे पावहि ।
 चलौ जाइ धाइ गहि लावहि ॥ ३१ ॥ नारी बात सुनतही धाई घेरिलिए कोकिल सुरगाई ॥ जाहु कहाँ
 व अकेले पाये । सकल सुगंध शीशते नाये ॥ ३२ ॥ एकरूप माधुरी निहारहि । एक कटाक्ष नयनशर
 मारहि ॥ एक सुमन लै ग्रंथितमाला । शोभित सुंदर हृदय विशाला ॥ ३३ ॥ खेलत आए पुलिन
 सुहाए । बैठे तहँ मंडली बनाए ॥ मोहन नव शशि मध्य विराजै । देखि मूर कोटिक छवि
 छाजै ॥ ३४ ॥ राग काफी ॥ खेलत फागु कुँवर गिरिधारी । अग्रजअनुज सुबाहु श्रीदामा ग्वाल बाल
 सब सखा अनुसारी ॥ इत नागरि निकसीं घर घरते दै आगे वृषभानु दुलारी । नवसत साजि
 ब्रजराज द्वार मिलि प्रफुलित वदन भीर भई भारी ॥ दुंदुभि ढोल पखावज बाजत डफ मुरली
 रुचिकारी । मारत बाँस लिए उन्नत कर भाजत गोप प्रियनिसों हारी ॥ एक गोप एक
 गोपी कर गहि मिलिगए हलधरसों भुजचारी । मिटि गई लाज सम्हार न कुच पट बहुत
 सुगंध पियो शिरदारी ॥ बाँह उँचाइ कहतहो हो हो लै लै नाम देत प्रभु गारी ।

इतहि राधिका निकसि यूथते सन्मुख पिय छाँडत पिचकारी ॥ इक गोपी गोपाल पकरि कर चली
 आपने मेर उसारी । आँजति आँखि मनावति फगुवा हँसति हँसावति दै कर तारी ॥ सूर विमान
 नभ कौतुक भूले कोटि मनोज जाइ बलिहारी । सूरदास आनंदसिंधुमें मगन भए ब्रजके नर
 नारी ॥ ३५ ॥ राग काफी ॥ नंदनंदन वृषभानु किशोरी राधा मोहन खेलत होरी । श्रीवृंदावन अतिहि उजा
 गर बरन बरन नवदंपति भोरी ॥ एकन करहै अंगर कुमकुमा एकनकर केसरि लै घोरी ॥ एक अर्थ सों
 भांव दिखावति नाचति तरुनि बाल वृध भोरी ॥ श्यामा उतहि सकल ब्रजवनिता इतहि श्याम रस
 रूप लह्योरी । कंचनकी पिचकारी छूटति छिरकति ज्यों सनुपवै गोरी ॥ अतिहि ग्वाल दधि गोरस
 माते गारी देत कहौ न करोरी । करत दुहाई नंदराइकी लै जु गयो कलबल छल जोरी ॥ झुंडनि
 जोरि रही चंद्रावलि गोकुलमें कछु खेल मच्योरी । सूरदास प्रभु फगुवा दीजै चिरजीवौ राधा बर
 जोरी ॥ ३६ ॥ राग श्रीहठी ॥ श्यामा परवश परी हो विकाय मोहनके खेलत रसरह्यो हो । खेलन चले करत
 अति तरकै मारत पीक पराइ । पेलि चली गौवन मदमाती अधर सुधारस प्याइ ॥ इत लिए
 कनक लकुटिय नागारि उत जेरी धरेग्वार । इत है रंग रंगीली राधा उत है श्रीनंदकुमार ॥ १ ॥
 खेलत में रिस नाकरि नागारि श्यामहि लागी चोट । मोहन है अति माधुरी मूरति राखिये अंचल
 वोट ॥ मारि डगै जब फिरि चली सुंदरि बेनी तुरे सु अंग । मनहु चंदके वदनसुधाको उडि उडि
 लगत भुअंग ॥ २ ॥ रुज मुरज डफ झाँझ झालरी थंन पखावज तार । मदन भेरि अरु राइ
 गिरी गिरि सुर मंडल झनकार ॥ एक जु आई आन गाँवते सुंदर परम सुजान । यह ढोटा धौ
 आहि कौनको मारत मनसिज वान ॥ ३ ॥ यमुनाकूल मूल वंसीवट गावत गोप धमारि । लैलै
 नाम गाउँ बरसानो देत दिवावत गारि ॥ खेलिफागु मिलिकै मनमोहन फगुवा दियो भँगाय । हरषि
 त भई सकल ब्रजवनिता सूरदास बलिजाइ ॥ ४ ॥ ३७ ॥ राग नटनारायण ॥ हो हो हो हो लै लै बोलै गोरस
 केरी माते डोलै ॥ ब्रजके लरिकनि सँग लिए डोलै । घर घर केरी फरके खोलै ॥ गोपी ग्वाल मिले
 इक सारी । बचत नहीं बिन दीने गारी ॥ आनि अचानक अँखियाँ मीचै । चंदन बंदन ऊपर सींचै ॥
 जो कोइ जाइ रहे घर वैसी । करि वरि आइ तहांऊँ पैसी ॥ हाथन लिए कनक पिचकारी ।
 तकिंतकि छिरकत मोहन प्यारी ॥ कुमकुम कीच मची अति भारी । उडत अबीरन रंगी
 अटारी ॥ अति आनंद भरे सब गावै । नाना गति कौतुक उपजावै ॥ मोहन गहि
 आने मिलिधाय । फगुवा हमको देहु भँगाय ॥ भागत कुसुम हार उर टूटे । पीतांबर
 गोहन दै छूटे ॥ शोभा सिंधु बढ्यो अतिभारी । छबि पर कोटि काम बलिहारी ॥
 सूरदास प्रभु करिरस होरी ॥ वरणौ कहाँलगि मोमति थोरी ॥ ३८ ॥ राग श्रीहठी ॥ नागारि राधा पै मोहन
 लेआयहो । लोचन आँजि भाल बेंदीके पुनि पुनि पाँइ परायहो ॥ बेनी गूँथि माँग शिरपारचो वधू वधू
 कहि गाइहो । प्यारी हँसति देखि मोहन मुख युवती बने बनाइहो ॥ श्याम अंग कुसुमी नई सारी
 अपने कर पहिरायहो । कोउ भुज गहत कहति कछु कोऊ कोउ गहि चिबुक उठाइहो ॥ कोउ कपोल
 छुवै कहति लाल अति कोउ मुखमुखहि मिलाइहो । एक अधर गहि सुभग अँगुरिअन बोलत नहीं
 कन्हाइहो ॥ नीलांबर गहि खूंट चूनरी हँसि हँसि गाँठि जुराइहो ॥ युवती हँसति देति करतारी भयो श्या
 म मन भायहो ॥ कनक कलश अरगजा घोरिकै हरिके शिर ढरकायहो । श्रीवृंदावन अद्भुत होरी कहत
 कही नहि जाइहो ॥ नंदसुनत हँसि महरि पठाई यशुमति धाई आइहो ॥ पटमें बाँध्यो श्याम छुडायो सूर
 दास बलिजायहो ॥ ३९ ॥ राग विलावल ॥ सोधेकी उठत झकोर मोहन रंगभरे ॥ चोवा चंदन अगर कुमकुमे सोधे

१ आलितं यस्य वक्षः प्रमदशुभवनं कुंकुमोद्धतरंगैरास्ते मोलौ किरीटं मणिगुणरचिते कुंडले कर्णयोः स्तः ॥ गौरांगः
 शुद्धवासाः कमलकरतले तालतूर्य्यं दिवाद्यं धृष्टवीथीति युष्मान् मुरजभवरवः पातु वेलाबलोयम् ॥ राग विलावल ।

माठभरे ॥ रतन जडित पिचकारी करगहे बालखरे । भरि पिचकारी प्रेमसों डारी सो मेरे प्राणहरे ॥
 सब सखियन मिलि मारग रोख्यो जब मोहन पकरे । अंजन आँजि दियो आँखिनमें सो हाहा/करि
 उबरे ॥ फगुवा बहुत मँगाइ साँवरे करजोरे अरज करो धनि धनि भाग सूर प्रभु ताके जाके सँग विहरे ॥ ४० ॥
 राग राज्ञीटोडी ग्वाल हँसे मुख हेरि कै अति बने कन्हारै ॥ हलधरको लिए टेरी आजु अति बने कन्हारै ॥ होहो
 करि करि कहति है अति बने कन्हारै ॥ रहे चहुँघा हेरि आजु अति बने कन्हारै ॥ ऐसेहि चालिए
 नंदपै अति बने कन्हारै ॥ बलकी सौँह दिवाइ आजु अति बने कन्हारै ॥ भुजा गहे तहां लैगई अति
 बने कन्हारै ॥ वह छवि वरनी न जाइ आजु अति बने कन्हारै ॥ इत युवती मन हरति है अति बने
 कन्हारै ॥ उतहि चले कै भोर आजु अति बने कन्हारै ॥ और सखी आई तहां अति बने कन्हारै ॥
 करि करि नयन चकोर आजु अति बने कन्हारै ॥ महरहँसे छवि देखिकै अति बने कन्हारै ॥ सुनि
 जननी तहां आय आजु अति बने कन्हारै ॥ हँसि लीन्हों उरलाइ कै अति बने कन्हारै ॥ बानँद उर
 न समाय आजु अति बने कन्हारै ॥ कछुक खिझी कछु हँसि कछो अति बने कन्हारै ॥ किन यह
 कीन्हों हाल आजु अति बने कन्हारै ॥ लेति बैलैया वारिकै अति बने कन्हारै ॥ ए पेसिय ब्रजबाल
 आजु अति बने कन्हारै ॥ रंगरंग पहिरावनि दई अति बने कन्हारै ॥ युवतिन महर बुलाय
 आजु अति बने कन्हारै ॥ यह सुख प्रभुको देखिकै अति बने कन्हारै ॥ सूरदास बलि
 जाइ आजु अति बने कन्हारै ॥ ४१ ॥ राग कल्याण ॥ ब्रजराज लडैतो गायहो मनमोहन जाको
 नाउँ । खेलत फाग सुहावनी रंग भीजि रह्यो सबगाउँ ॥ ताल पखावज बाजहीहो : डफ
 सहनारै भरे । श्रवण सुनति सब सुंदरी वै झुंडन आयहो घेरे ॥ इतहि गोप सब राजहीं हो उत
 सब गोकुल नारि । अति मीठी मन भावती हो वै देहिं परस्पर गारि ॥ चोबा चंदन छिरकहीं हो
 उडत अबीर गुलाल । मुदित परस्पर खेलही हो हो हो हो लै बोलत ग्वाल ॥ सब गोपिन मिलि
 हलधर पकरे छाँडे पाँइ लगाइ । दाँऊ आजु भले बने जू आए आँखि अँजाइ ॥ बहुरि सिमटि
 ब्रजसुंदरी मिलि पकरे गोकुलनाथ । नव कुमकुम मुख माँडिकै रचि बेनी गूँथी हो साथ ॥ तब
 नंदरानी बीच कियो बहु मेवा दिये मँगाय । पटभूषण पहिराइ सबनको निराखि सूर बलि जाय ॥
 ॥ ४२ ॥ राग गौरी ॥ ग्वालनि जोबन गर्व गहेली । राधे के सँग कदम सहेली ॥ १ ॥ कुमकुम उबटि कनक
 तनु गोरी । अंग सुगंध चढाय किशोरी ॥ दक्षिण चीर तिपा को लहँगा । पहिरि विविध पट मोलन
 महँगा ॥ २ ॥ कुँवरी कुसुम मांग मोतिअन मनु । केसरि आड लिलाट भुकुटि धनु ॥ कज्जल रेख
 नैन अनिआरे । खंजन मीन मधुप मृग हारे ॥ ३ ॥ श्रवणन कुंडल रवि सम ज्योती । नकबेसरि
 लटकै गजमोती ॥ दशन अनार अधर बिंब जानो । चिबुक चारु मूँद्यो मधु मानो ॥ ४ ॥
 कंठ कपोत मुक्तावलि हार । जनु युग गिरि बिच सुरसरी धार ॥ कुच चकवाँ मुख शाशि भ्रम भूलो ।
 बैठे विधुरि दुहुँ अनुकूले ॥ ५ ॥ करकंकण चूरो गजदंती । नख माणि माणिक मेटति दंती ॥
 नाभि हृदय तनु हाटक बरनी । कटि मृगराज नितंबिनि तरनी ॥ ६ ॥ कदली जंघ चरण कल
 नूपुर । गवन मराल करत धरणी पर ॥ भूषण अंग सजे सत नौरी ॥ गावति फागु नंदकी पौरी ॥ ७ ॥

१ वीणा वामकराग्रकेण दधती तालौ तथा दक्षिणे मुक्ताहारललाटमध्यतिलकं नेत्रालये कज्जलम् ॥ लेपं चंदनकर्दमेन
 रचितं चित्रावरं नूपुरौ तांबूलं करमोहिनीच मनसष्टोडी च मुक्तावली ॥ राग राज्ञी टोडी ।

२ मुक्तारत्नसुवर्णवज्ररचिते सिंहासने संस्थितेश्छत्रं शोभितमस्तके परिजनैः संवीज्यते चामरैः ॥ तांबूलं वदने सुगंधितवपुः
 कंठेषु मुक्तावली कल्याणो विशदांशुकः कमलदकल्याणदो भूमुजाम् ॥ राग कल्याण ।

सुनि सुंदर वर बाहिर आए । हलधर ग्वाल गोपाल बोलाए ॥ इकतन ग्वाल एकतन
 नारी । खेल मच्यो ब्रजके बिच भारी ॥ ८ ॥ कुमकुम चंदन अरगजा घोरी । हाथन पिचकारी
 लै दौरी ॥ गोपी गोप भए झकझोरे । अंचल गाँठि परस्पर जोरे ॥ ९ ॥ उडत गुलाल अरुण भए
 अंबर । कुमकुम कीच मची धरणी पर ॥ चंग मृदंग बाँसुरी बाजै । पकरत एक एक भरि
 भ्राजै ॥ १० ॥ राधा मिलि इक मंत्र उपायो । हलधर अपनी भीर बुलायो ॥ कानलागि श्यामहि समु-
 झायो । संकर्षण गहि श्यामहि ल्यायो ॥ ११ ॥ हरि जूके हाथ गहे चंद्रावलि । कज्जल लै आई सं-
 झावलि ॥ ललिता लोचन आँजन लागी । चंद्रावलि मुरली लै भागी ॥ १२ ॥ इक लै लावाति हृद-
 य कपोलनि । इक लै पोंछति ललित पटोलनि ॥ इक अवलंबन इक अवलोकित । चुंबन दान
 देति इक दंपति ॥ १३ ॥ मगन भई अणु वषु न सँभारति । लालन भुज अपने उर धारति ॥ गुरुजन संत
 सबै मिलि देखे । तिनहुँको तरुणी तृण वर लेखे ॥ १४ ॥ एक कहै पियको मुख माडौ ।
 एक कहै फगुवा लै छाँडौ । वाम लियो पटपीत छुडाई ॥ राधा राखति कृष्ण बडाई ॥
 ॥ १५ ॥ सिमरै सखा छोडावन आए । उन लियो ढेल न मोहन पाए ॥ बाँसन मार मची कल
 आडे । ग्वाल टिकै पग एक न छाँडे ॥ १६ ॥ बल कियो बीच ग्वाल समुझाए । मोहन मेवा
 मोल मँगाए ॥ फगुवा लै लालन छिटकाए । हँसत गोपाल ग्वाल तहँ आए ॥ १७ ॥ तब मोहन
 हलधर पकराए । करहु तरुनि अपने मनभाए ॥ नाक नयन मुख कज्जल लायो । केसरि कलश
 हलधर शिरनायो ॥ १८ ॥ बहुत भरे बलराम सबन गहि । धौलागिरि मानो धातु चली बहि ॥
 न्हान चले यमुनाके कूल । गोपी गोप भए अनुकूल ॥ १९ ॥ जो रस बाढ्यो खेलत होरी ।
 शारदका वरणै मति भोरी ॥ सूरदास सो कैसे गावै । लीलासिंधु पार नहिँ पावै ॥ २० ॥ ॥ १२३ ॥ राग गौरी ॥
 गारी होरी देत दिवावत । ब्रजमें फिरत गोपिकन गावत ॥ दूध दहीके माते डोलै । काहेन हो हो हो
 हो बोलै । बगलनमें दाबे पिचकारी । बाँधत फेटै पाग सँवारी । रुकि गए बाटनि नारे
 पैडे । नवकेसरिके माट उलैडे । छज्जनते छूटति पिचकारी । रँगि गई वाखारि महल अटारी ॥
 नानारंग गए रँगि बागे । बलदाऊ इत उत ह्वै भागे ॥ न्हान चले यमुनाके तीर । मन मोहन हल-
 धर दोउ वीर ॥ सूरदास प्रभु सब सुखदायक ॥ दुर्लभ रूप देखिबे लायक ॥ ४४ ॥ रागिनी श्रीहठी ॥ ऋतु
 वसंतके आगमहि मिलि झूमकहो । सुखसदन मदनको जोर मिलि झूमकहो ॥ १ ॥ कोकिल वचन सोहा-
 वनो मिलि झूमकहो । हित गावत चातक मोर मिलि झूमकहो ॥ वृंदावन तरु माल मिलि झूमकहो ।
 सब फूलि रही बनराय मिलि झूमकहो ॥ २ ॥ जहाँ नेवारी सेवती मिलि झूमकहो । बहु पाडर विपुल
 गँभीर मिलि झूमकहो ॥ खूझो मरवो मोगरो मिलि झूमकहो । कुल केतकी करनि करील
 मिलि झूमकहो ॥ ३ ॥ वेलि चमेली माधवी मिलि झूमकहो । मृदु मंजुल बकुल तमाल मिलि झूम
 कहो ॥ नववल्ली रस विलसही मिलि झूमकहो । मनो मुदित मधुपकी माल मिलि झूमकहो ॥ ४ ॥
 ताल पखावज बाजही मिलि झूमकहो । बिच डफ मुरलीकी घोर मिलि झूमकहो ॥ चलहु तहां आली
 जाइए मिलि झूमकहो । जहाँ खेलत नंद किशोर मिलि झूमकहो ॥ ५ ॥ यूथनि यूथनि सुंदरी मिलि
 झूमकहो । जिनि जोवत लजत अनंग मिलि झूमकहो ॥ चोवा चंदन अरगजा मिलि झूमकहो ।
 मथिलै निकसी एक संग मिलि झूमकहो ॥ ६ ॥ प्रति अंग भूषण साजिकै मिलि झूमकहो ।
 लिये कनक कलश भरि रंग मिलि झूमकहो ॥ जाइ परस्पर छिरकहीं मिलि झूम

कहो ॥ ७ ॥ इतते गईं ब्रज सुंदरी मिलि झूमकहो । उतते मोहन नवलन अहीर मिलि
 झूमकहो ॥ बाँस धरे जेरी धरी मिलि झूमकहो । बिच मार मची भई भीर मिलि
 झूमकहो ॥ ८ ॥ एक सखी निकसि झुंडते मिलि झूमकहो । तिनि पकरि लई हरि हाथ
 मिलि झूमकहो ॥ बहुरि उठीं दशवीस मिलि झूमकहो । धरिलिये आय ब्रजनाथ मिलि झूमक
 हो ॥ ९ ॥ इक पट पीतांबर गह्यो मिलि झूमकहो । इक मुरली लई छिडाय मिलि झूमकहो ॥
 एक मुख माँडहि कुमकुमा मिलि झूमकहो । एक गारी दै उठी गाइ मिलि झूमकहो ॥ १० ॥
 प्यारी कर काजर लियो मिलि झूमकहो । हँसि आँजति पियकी आँखि मिलि झूमकहो ॥ यहि
 बिधि हरिको घेरि रहीं मिलि झूमकहो । ज्यों घेरिरही मधुमाखि मिलि झूमकहो ॥ ११ ॥ अब
 तो घात भलीबनी मिलि झूमकहो । तब चीर हरे जलभीतर मिलि झूमकहो । सोपरी हँसा हम
 सारि हैं मिलि झूमकहो । सुनि लेहु ललन बलवीर मिलि झूमकहो ॥ १२ ॥ अब हज तुमहि न
 गाइहैं मिलि झूमकहो । मुसकात कहा यदुराय मिलि झूमकहो ॥ की हमसों हाहाकरौ
 मिलि झूमकहो । की परहु कुँवरिके पाँइ मिलि झूमकहो ॥ १३ ॥ बंकविलोकनि मन
 हरो मिलि झूमकहो । ठगि तुमहि रही ब्रजबाल मिलि झूमकहो ॥ फगुवा बहुत मँगाय दियो
 मिलि झूमकहो । मधुमेवा मधुर रसाल मिलि झूमकहो ॥ १४ ॥ कहि मोहन ब्रजसुंदरी मिलि झूमकहो ।
 तब धाय धरे बल घेरि मिलि झूमकहो ॥ शंक सकुच सब छाँडिकै मिलि झूमकहो । चहुँपास रही
 मुख हेरि मिलि झूमकहो ॥ १५ ॥ कनक कलश भरि कुमकुमा मिलि झूमकहो । धरि डारि दिये
 शिर आनि मिलि झूमकहो ॥ चंदन बंदन अरगजा मिलि झूमकहो । सब छिरकति करति न कानि
 मिलि झूमकहो ॥ १६ ॥ खेलि फागु अनुराग बढ्यो मिलि झूमकहो । फिरि चले यमुनजल न्हान
 मिलि झूमकहो ॥ द्वितीया बैठि सिंहासने मिलि झूमकहो । दोउ देत रत्न मणिदान मिलि
 झूमकहो ॥ १७ ॥ यहि बिधि हरिसँग खेलहीं मिलि झूमकहो । गण गोकुलनारि अनंत
 मिलि झूमकहो ॥ सूर सबनको मुख दियो मिलि झूमकहो । राम रसिक राधिका कंत मिलि
 झूमकहो ॥ १८ ॥ ४५ ॥ रागिनी काफी मनमोहनललनामनहरयो ॥ गृहगृहते सुंदरि चलीं देखन ब्रजराज
 कुमार । देखिवदन विथकित भई बैठी हैं सिंहदुआर ॥ डिमिडिमी पटहढोल डफ बीणा मृदंग उपंग
 चंग तार । गावत प्रीति सहित श्रीदामा बाढ्यो है रंग अपार ॥ १ ॥ इत राधिका सहित
 चंद्रावलि ललिता घोष अपार । उत मोहन हलधर दोउ भैया खेल मच्यो दरबार ॥ रत्नजटित पि-
 चकारी करलिये छिरकति घोषकुमारि । मदनमोहन पिय रसमातेहैं कछुअन अंग सँभारि ॥ २ ॥
 मोहनप्यारी सैनदै हलधर पकराए जाय। आपुन हँसत पीतपट मुखदै आएहो आँखि अँजाय ॥ बहुरि
 सिमिटि ब्रजसुंदरी मनमोहन पकरे जाय। अधरपान रस करति पियारी मुरली लई छिडाय ॥ ३ ॥ परिवा
 सिमिटि सकल ब्रजबासी चले यमुनजल न्हाना। वारि कुँवरिपर पट नँदरानी देति विप्रन बहुदान ॥
 द्वितीयपाट सिंहासन बैठे चमरछत्र शिर डार। सूरज प्रभु पर सकल देवता वरषत सुमन अपार ॥ ४ ॥ ४६ ॥
 राग श्रीहठी ॥ श्यामसंग खेलन चली श्यामा सब सखियनको जोरि । चंदन अगर कुमकुमा केसरि
 बहुकंचन घट घोरि ॥ खेलत मोहन रंग भरे हो लाल प्यारो सुंदर सब सुखराशि ॥ १ ॥ फूलनके
 गेंदुक नवला सजि कनक लकुटिया हाथ । जाय गही ब्रजखोरि राधिका कोटिक युवती साथ ॥
 उतते हरि आए जब खेलत हो हो होरी संग । कानपरी सुनि नहि बहूबाजत ताल मृदंग ॥ २ ॥
 पहिले सुधि पाई नहीं तब घिरे सांकरी खोरि । अब हलधर उलटहु काहे तुम धावहु ग्वाल

जोरि ॥ धरत भरत भाजत राजत गेंदुक नवला सन मार । रसन बसन छूटत न सँभार टूटत है उरहार ॥ ३ ॥ जब मोहन न्यारे करि पाए पकरे चहुँदिशघेरि । बोलहु नू अब आनि छुडावै बल भैयाको टेरे ॥ आजु हमारे वश परेहो जेहौ कहाँ छिडाइ । की बल छूटहु आपने की यशुमति माय बोलाइ ॥ ४ ॥ एक गहे कर एक फेंट गहि पीतांबर लियो छिडाय । राधा हँसति दूरि भइ ठाढी सखियन देति सिखाय ॥ एक श्रवणमें कहि कछु भाजति एक भरति अँकवारि । एक निहारति रूप माधुरी एक अपुनपो वारि ॥ ५ ॥ एक चिबुक गहि बदन उठावति हमतन लाल निहारि । एक नैनकी सैन मिलावति एक उठति दै गारि ॥ आई झूमि सकल ब्रजवनिता हरि देखी चहुँ ओर । राधा दृष्टि परे बिनु मोहन तलफत नैन चकोर ॥ ६ ॥ हरि तब अपने करवरसों घूँघट पट कीनो दूरि । हँसत प्रकाश भयो चहुँ दिशिते सुधा किरनि भरि पूरि ॥ आँखि दिखावतहौ जु कहाँ तुम करिहौ कहा रिसाय । हम अपनो भायो करि लेहैं छुवहु कुँवरिके पाय ॥ ७ ॥ तब तुम अंबर हरे हमारे कीन्हें कौन उपाय । अब तौ दाउँ परचो धरि पाए छाँडहिं तुमाहिं न गाय ॥ मुखकी कहति सनै झूठी मनहीं मन बहुत सनेहु । कूटि करैगे बलभैया अब हमहि छाँडि किनि देहु ॥ ८ ॥ तुम जो फगुवा दैहो कहा चलि बोलहु सांचे बोल । की हमसों हाहा करिए की देहु श्रीदामा ओल ॥ हँसि हँसि कहत सहत सबहीकी आभूषण अब लेहु । नासाको मुक्ता अरु मुरली पीतांबर मेरो देहु ॥ ९ ॥ एक बनाइ देति बीरी कर वल्लभ छुवति कपोल । धन्य धन्य बडभाग सबहिंके वश कीने बिनुमोल ॥ उडत गुलाल अबीर कुमकुमा छबिछाई जनु सांझ । नाहीं दृष्टि परत राधा मुख चंद्र नीलांबर मांझ ॥ १० ॥ खेलि फाग अनुराग बढ्यो घर मची अरगजा कीच । ब्रजवनिता कुमुदिनी कुसुमगण हरि शशि राजत बीच ॥ अष्टसिद्धि नवनिधि ब्रज बीथिनि डोलति घर घर द्वार । सदा वसंत वसत वृंदावन लता लटकि द्रुम डार ॥ ११ ॥ देखि देखि शोभा सुख संपति यह जिय करति विचारि । ब्रजवनिता हम किन न भई यों कहति सकल सुरनारि ॥ फाग खेलि अनुराग बढायो सबके मन आनंद । चले यमुन अस्नान करनको सखा सखी नँदनंद ॥ १२ ॥ दुष्टन दुख संतन सुखकारण ब्रजलीला अवतार । जय जय ध्वनि सुमन न सुर वर्षत निरखत श्याम बिहार ॥ युगल किशोर चरण रज माँगो गाऊँ सरस धमार । श्रीराधा गिरिवरधर ऊपर सूरदास बलिहार ॥ १३ ॥ ४७ ॥ राग नन्दनारायण ॥ खेलत फाग कहत हो होरी । उत नागरी समाज विराजति इत मोहन हलधरकी जोरी ॥ १ ॥ बाजत ताल मृदंग झाँझ डफ रुंज मुरुंज बाँसुरी ध्वनि थोरी । श्रवण सुनाइ गारिदै गावति ऊंची तान लेति प्रिय गोरी ॥ कोटि मदन दुरि गयो देखि छवि तेउ मोहे जिन्हहूँ मति भोरी । मोहन नँदनंदन रस विथकित कोहू दृष्टि जात नहिं मोरी ॥ २ ॥ कुमकुम रंग भरी पिचकारी उत्तम छिरकति नवल किशोरी । यहि बिधि उभंगि चलयो रंग जहँ तहँ मनु अनुराग सरोवर फोरी ॥ कतहुँक मिलि दश बीसक धावति लेति छिंटाइ मुरलि झकझोरी । जाइ श्रीदामा लै आवत तब दैमानिनि बहुभाँति पटोरी ॥ ३ ॥ भरिकर आन अबीर उडावत गोविंद निकट जाय दुरि चोरी । मनहु प्रचंड पवन वश पंकज गगन धूरि शोभित चहुँ ओरी ॥ कनककलश कुमकुम भरि लीन्हों कस्तूरी मिलिकै घसि घोरी । खेल परस्पर कीच मची घर अधिक सुरंग भई ब्रजखोरी ॥ ४ ॥ ग्वाल बाल सब संग मुदित मन जाय यमुनजल न्हाइ हिलोरी । नए वसन आभूषण पहिरत औरन देत पीतांबर छोरी ॥ द्विज समाज समेत करत द्विज तिलक दूब दाधि रोचन रोरी । सूर श्याम विप्रन बंदीजन देत रतन कंचनकी वोरी ॥ ५ ॥ ४८ ॥

राग सारंग ॥ बनी रूप रंग रस राधिका ताते अधिक बने ब्रजनाथ हो । ललिता अरु चंद्रावली
मिलबन्यो छबीलो साथ हो ॥ ताल पखावज बाजही सँग डफ मुरलीकी घोर हो । नंदद्वार औसर
रच्यो दोऊ राजत नवल किशोर हो ॥ एककोंध ब्रजसुंदरी एककोंध ग्वाल गोबिंदहो । सरस परस्पर
गावहीं दैनारि गारि बहु वृंदहो ॥ आवहु री हम दुरिरहैं बलभद्र कृष्णगहि देहिहो । लोचन उनके आँजहीं
अधरनको रस लेहिहो ॥ शीलानाम ग्वालिनी तेहि गहे कृष्ण धपि धाइहो । उपरैना मुरलीलाई
सुख निरखि हरषि सुसकाइहो ॥ गहे कृष्ण अचानक राधिका रही कंठ भुजलाइहो । मनके सब
सुख भोगए जब परसे यादवरायहो ॥ दई कोटि कलश भरि वारुनी बहुत मिठाई पानहो । राधा
माधव रस रह्यो सब चले यमुनजल न्हात ॥ द्वितीया सकल समाज सो पट बैठे आनंद कंद
होदान देति ब्रजसुंदरी नगभूषण नवनिधि नंदहो ॥ बनबीथिनि भरी पुर गली उमँग्यो रंग अपारहो ।
सूर सुनभ सूर थकि रहे निरखत प्राण आधारहो ॥ ४९ ॥ राग सारंग ॥ करत यदुनाथ जलधि जैल कोलि ।
अबलनकर लिए अंबुज अमृत किए दिये नव नव सुख खेलि । जो राजत तिहिकाल लाल
ललनारसाल रसरंग मानहु न्हात मदन वधु सजनी गज गजनी गज संग ॥ स्रवत सलिल
शिव विदित अलकमिव राहु वदन विधुमत । मनहुँ मनुकरि भोजन सो अलि जु पिक बरु रस
बमत ॥ ध्वनिन करत सिंधुउतरन धरत तरंग रह्यो ठहिराइ ॥ पूजे कृष्णउजागर सागर वैरागर पहिराइ ॥
भवन गवन यों नंदसुवन तब निकसि चढे रथ कूल । निरखत वरपत कुसुम त्रिदशजन सूर
सुमति मनफूल ॥ ५० ॥ राग राजी बसंती ॥ यदुपति जलक्रीडत युवतिन सँग । सागर सकुचत तजीत-
रंग ॥ षोडससहस्रदशअष्ट नारि । तिनमें अति शोभित श्रीमुरारि ॥ उडुगण समेत शशिसिंधवारि ।
मनु पुनि आयो चितहित बिचारि ॥ मृगमद मलयज केसरि कपूर । कुमकुमा कलित छत अगर
चूर ॥ जलताकि परस्पर छपत दूर । मनु धनुष निपुण संग्राम शूर ॥ चलत चारु कलवलय
चीर । अरु जलद वृंद छतभित समीर ॥ वदन निकट कच चुवत नीर । मनु मधुप निकर प्यावत
न धीर ॥ जहँ नारदादि मुनि करत गान । जग पूरित हरि यश सूर वितान । सूर सुमन सुघन वर्षत
विमान । जै सूर प्रभू सब सुखनिधान ॥ ५१ ॥ राग सारंग ॥ रवितनयाको सलिल गंभीर आवहुरे मिलि
न्हाइये । यहँ अति श्रम गँवाइ देहुको पुनि अपने घर जाइये ॥ भीजे गात जातहीं नवतन
जो जसुदापै जाइये । लै सबहीको स्वाद मनोहर मीठो हो सो खाइये ॥ ए भूषण ए वसन
मनोहर सादर सूरहि दिखाइये । हरि जानत हौ ब्रजवेगि बिदाहैं विमुख जाइ चिताइये ॥
॥ ५२ ॥ राग कल्याण ॥ यमुनातैं हो बहुत रिझायो । अपनी सौह दिए नंददोहाइ ऐसो सुख मैं
कबहुँ न पायो ॥ मिले मातु पितु बंधु सजन सब सखन संग वन विहरन आयो । अज अनंत
भगवंत धरणिधर सुवस कियो प्रिय गान सुनायो ॥ हों भयो प्रन्नन प्रेम हित तेरे कलिमल हरे
जु यह जल न्हायो ॥ अब जिय सकुच कछू मति राखहु माँगि सूर अपने मन भायो ॥ ५३ ॥ राग बिलावल ॥
श्यामा श्याम खेलत दोउ होरी । फागु मच्यो अति ब्रजकी खोरी ॥ १ ॥ इतहि बनी वृषभानु
किशोरी । सँग ललिता चंद्रावलि जोरी ॥ ब्रजयुवती सँग राजति भोरी । बनि शृंगार श्रीराधा
गोरी ॥ २ ॥ उतहि श्याम हलधर दोउ जोरी । वारौ कोटिकाम छबि थोरी ॥ ग्वाल अबीरनकी
लिए झोरी । सुरंग गुलाल अरगजा रोरी ॥ ३ ॥ गावति सबै मधुर सूर गोरी । तानलेति दैदैं

१ मालाकंकणकुंडलैः कनकजैराभूषिता प्रायशः सम्यग्दाडिमबीजदंतरुचिभिः संपर्द्धमाना भृशम् ॥ ईषद्वास्यमुखी कठोर-
कुचका रक्तांबरं विभ्रती वासंती वरलोललोचनचललोलानना वर्तते ॥ राज्ञी वासंती ।

२ नेत्रे कज्जलरंजितेऽतिललिते नासाग्रमुक्ताफलं भाले भाति सुकुंकुमस्य तिलकं गौरांगचित्रांबरम् ॥ वेणीचंपककैतकी-
सुकुसुमैः सार्द्धं करे वीटिकां नानासौरभगंधिताखिलवपुर्वेलावली योषिता ॥ राग बिलावल ।

झक झोरी ॥ राधा सहित चंद्रावालि दौरी । औचक लीनी पीत पिछौरी ॥ ४ ॥ देखतही लेगइ
 अजोरी । डारिगई शिर श्याम ठगोरी ॥ ग्वाल देत होरीकी गारी । वैर कियो हमसों तुम भारी ॥ ५ ॥
 हंसति परस्पर यौवनवोरी । लै आई हरि पीत पिछोरी ॥ घात करति मन मुरलीको री । अधरन
 ते नहिं टारत जोरी ॥ ६ ॥ भली करी सब हम तुम सो री । सावधान अब होहु कद्यो री ॥ श्याम
 चितै राधा मुख ओरी । नैन चकोर चंद्र दरश्यो री ॥ ७ ॥ पियको प्रिय मोहनी
 लगाय । इहि अंतर गोपी हंसि धाय ॥ गद्यो हरषि भुज ललिता धाय । गई श्यामकी सब
 चतुराय ॥ ८ ॥ मनमाने सब करति बडाय । राधा मोहन गाँठि जुराय ॥ करत सबै रुचिकी
 पहुनाय । नंदमहरको गारी गाय ॥ ९ ॥ फगुवा हमको देहु दिवाय । पचरँगसारी बहुत मँगाय ॥
 लीन्ही जो जाके मन आय । तुरत सबै युवती पहिराय ॥ १० ॥ खेलत फागु रह्यो रस भारी । बृद्ध
 किशोरि बाल अरु नारी ॥ अति श्रम जानि गए जलतीरा ॥ ग्वाल ग्वालि हलधर हरि वीरा ॥ ११ ॥ परम
 पुनीत यमुनजल रासी । क्रीड़त जहां ब्रह्म अविनासी ॥ धन्य धन्य सब ब्रजके वासी । विहरतहैं
 हरि संग करि हाँपि ॥ १२ ॥ जलक्रीडा तरुणिन मिलि कीनो । ब्रज नर नारिनको सुख दीनो ॥ करि
 अस्नान चले ब्रजधाम । करे सबनके पूरण काम ॥ १३ ॥ जो सुख नंद यशोदा पायो । सो सुख
 नहिं प्रगट बतायो ॥ सुखनितन यह साँझ बिचारै । कैसे हरि संग हमहु विहारै ॥ १४ ॥ धन्य
 धन्य ए ब्रजकी वाला । धन्य धन्य गोकुलके ग्वाला ॥ सूर श्याम जनके सुखदायक ।
 भुव प्रगटे हरि हलधर भायक ॥ १५ ॥ ५४ ॥ राग गौरी ॥ कछु दिन ब्रज औरो रहो हरि होरी है ।
 अब जिनि मथुरा जाहु अहो हरि होरी है ॥ १ ॥ सब सुखको फल फागु अहो हरि होरी है ॥ प्रगट
 करौ यह जानिकै हरि होरी है । अंतरको अनुराग अहो हरि होरी है ॥ २ ॥ गनहु द्वैज दिन शो-
 धिकै हरि होरी है । भूपति हैहै काम अहो हरि होरी है ॥ शशि रेखा शिर तिलक है हरि होरी है ॥
 सबकोऊ करै प्रणाम अहो हरि होरी है ॥ ३ ॥ कनक सिंहानस बैठिहैं हरि होरी है ॥ युवतिन के उर
 आनि अहो हरि होरी है ॥ घँघट आत पतानि अहो हरि होरी है ॥ ४ ॥ तीज तिहुं दिश प्रगट है हरि
 होरी है ॥ अपनी आनन रेख अहो हरि होरी है ॥ सुनि पग मग डफ डिमि डिमी हरि होरी है ॥ सोइ करि
 हैं सब देश अहो हरि होरी है ॥ ५ ॥ चौथि चहुं दिश जानिहैं हरि होरी है । यह अपनी इक रीति अहो
 हरि होरी है ॥ मैं जो कहो पिय निलज अहो हरि होरी है । छाँडि सकुच कुलनीति अहो हरि होरी है ॥ ६ ॥
 पाँचै परमिति परिहरै हरि होरी है । चली सकल इकचाल अहो हरि होरी है ॥ नारि गुरुष सादर
 करै हरि होरी है ॥ वचन प्रीति प्रतिपालि अहो हरि होरी है ॥ ७ ॥ छठि छरागरसरागिनी हरि होरी है ।
 ताल तान बंधान अहो हरि होरी है ॥ चटुल चारु रतिनाथके हरि होरी है ॥ सीखत होइ औधान अहो
 हरि होरी है ॥ ८ ॥ सुनि बातें सब सजग होइ हरि होरी है । सबन मतो मत एक अहो हरि
 होरी है ॥ नृप जो कहो सब कोऊ करै हरि होरी है । को राखि है विवेक अहो हरि होरी है ॥ ९ ॥
 आठैं सुनि सब साजि भए हरि होरी है । राजाकी रुचि जानि अहो हरि होरी है ॥ करहु क्रिया तै-
 सी सबै हरि होरी है । आयसु माथे मानि अहो हरि होरी है ॥ १० ॥ नौमी नवसत साजिकै हरि
 होरी है । उर सुगंध उपहार अहो हरि होरी है ॥ मनहु चली है मायकै हरि होरी है ।
 मनसिज भवन जोहार अहो हरि होरी है ॥ ११ ॥ दशै दशै दिशि शोधिकै हरि
 होरी है । बोलेहो नारायण अहो हरि होरी है ॥ काज करहु रुचि आपनी हरि होरी है । आवहु काज
 सिराय अहो हरि होरी है ॥ १२ ॥ सुनि आयसु एकादशी हरि होरी है । बोले सब शिरनाइ अहो

हरि होरी है ॥ गजजीतहु बल आपने हरि होरी है । ज्ञान वैराग छँडाय अहो हरि होरी है ॥ १३ ॥
देखि भले सुभट आपने हरि होरी है । दियो द्वादश द्योत बिचारि अहो हरि होरी है ॥ करहु क्रिया
तैसी सबै हरि होरी है । होइ निशंक नर नारि अहो हरि होरी है ॥ १४ ॥ ढोल भेरि डफ बाँसुरी
हरि होरी है । बाजैं पटह निशान अहो हरि होरी है ॥ मिलहु लोकपति छाँडिकै हरि होरी है ।
नहिँ उबारिबो निदान अहो हरि होरी है ॥ १५ ॥ रथ औचक बरात साजैं हरि होरी है । खरन भए
असवार अहो हरि होरी है ॥ धूरि धातु रंग घट भरे हरि होरी है । धरे यंत्र हथियार अहो हरि होरी
है ॥ १६ ॥ जहां तहां सैन्याचली हरि होरी है । मुक्तकाछ शिरकेश अहो हरि होरी है ॥ आपौ
पर समुझै नहीं हरि होरी है । राजा रंक अवेश अहो हरि होरी है ॥ १७ ॥ जे कबहुं देखे नहीं हरि
होरी है । कबहुं सुनी न कान अहो हरि होरी है ॥ तिन्ह कुलनारि निडरभई हरि होरी है ।
लागे लोग परान अहो हरि होरी है ॥ १८ ॥ भस्मभैर अंजन करै हरि होरी है । छिरकै चंदन वारि
अहो हरि होरी है ॥ मर्यादा राखैं नहिँ हरि होरी है । कटिपट लेहिँ उतारि अहो हरि होरी है ॥
॥ १९ ॥ जहां सुनिहिँ तप संयमी हरि होरी है । धर्म धीर आचार अहो हरि होरी है ॥ छेकहिँ तहीं
निशंक होइ हरि होरी है । पकरहिँ तोरि किवार अहो हरि होरी है ॥ २० ॥ शठ पंडित वेश्यावधु
हरि होरी है । सबै भये एक सारि अहो हरि होरी है ॥ तेसि चौदसि दिवस द्वे हरि होरी है ।
जनु जीते जगझारि अहो हरि होरी है ॥ २१ ॥ पून्यो प्रगटी प्राणपति हरि होरी है । दुरे मिले पा-
लागि अहो हरि होरी है ॥ जहां तहां होरी जै हरि होरी है । मनहुं मवासे आगि अहो हरि होरी है
॥ २२ ॥ सब नाचहिँ गावहिँ सबै हरि होरी है । सबै उडावहिँ छार अहो हरि होरी है ॥ साधु
असाधु न समुझहिँ हरि होरी है । बोलहिँ वचन विकार अहो हरि होरी है ॥ २३ ॥ अति अनीति
मितिदेखि कै हरि होरी है । परिवा प्रगटी आनि अहो होरी है ॥ विमल बसन तनु साजहीं
हरि होरी है । मर्यादाकी कानि अहो हरि होरी है ॥ २४ ॥ आवतही आदर करै हरि होरी है ।
हंसि जोरहिँ उठि हाथ अहो हरि होरी है ॥ बरन धर्म मिति राखहीं हरि होरी है । कृपाकरौ रतिनाथ
अहो हरि होरी है ॥ २५ ॥ सुनि विनती ऋतुराजकी हरि होरी है । प्रभु समुझे मनमाहँ अहो हरि
होरी है ॥ जाय धर्म अपने रहो हरि होरी है । बसो हमारे बाँह अहो हरि होरी है ॥ २६ ॥ और
कहां लौं बरनिहै हरि होरी है । मनसिज के गुणग्राम अहो हरि होरी
है ॥ सुनहु श्याम या मासमें हरि होरी है । कियो जु कारण काम अहो हरि होरी है ॥ २७ ॥
सुर रसिक मणि राधिका हरि होरी है । कहि गिरिधरसों बात अहो हरि होरी है ॥ श्याम कृपा
करि ब्रजरहौ हरि होरी है । वरजति मधुवन जात अहो हरि होरी है ॥ २८ ॥ ५३ ॥
॥ राग जयजयवन्ती ॥ माई फूले फूले हो फूलत श्रीराधे कृष्ण झूलत सत्सरसही फूलडोल । फूले
फूले फूल जोरत फूले निमिषनहीं मोरत संतन हितही फूल डोल ॥ १ ॥ फूल स्फटिक खँभ रचित
कंचनहीं फूल खचित सरस रही फूल डोल । पटुली नवरतन पचित हीरालाल मोती जटित
संतन हितही फूल डोल ॥ २ ॥ मरुवा मयारि सुठि ढरिरोल प्रवाल पिरोजा झूमका चहुँ
ओल सरस रसही फूल डोल । डाँडी हेम हीने चारु गोल चुनी नहीं फूल लगे लोल संतन
हितकी फूल डोल ॥ ३ ॥ फूले श्रीवृंदावन अनुकूल सघनलता सब फूले फूल सरस रसही फूल
डोल ॥ फूले श्रीयमुनाकूल विविध तरंगरंग फूले फूल संतन हितही फूल डोल ॥ ४ ॥ फूले हीन
चंपक चारु चमेली फूले मलयज लवंगलता बेलि सरस रसही फूल डोल । फूले बेल निवारी फूल

एलि फूले मरुवो मोगरो सेवती फूल वेलि संतन हितही फूल डोल ॥ ५ ॥ तहाँ हीन अंबा
मोरहै फूले जहाँ निबुवा सदाफल फूले सरस रस फूल डोल । तहाँ कमल केंवरो फूले जहाँ केत-
की कनेर फूले संतन हितही फूल डोल ॥ ६ ॥ फूली माधवी मालती रेलि फूलेही मधुप करत हैं केलि
सरसरसही फूल डोल । फूले फलेहैं आनंद बेलि फूले पिवत सुमन रस पेलि संतन हितही फूल
डोल ॥ ७ ॥ फूलनके सोंधेवार मानो मधुप छबि अपार सरस रसही फूल डोल । फूलनहीके हिऐहैं
हार सुरसरी मानो धरेही धार संतन हितही फूल डोल ॥ ८ ॥ माथे मुकुटहै रचित फूल फलन
कीहै बेनी शीश फूल सरस रसही फूल डोल । फूलनहीकेहैं बेंदी भाल फूलनके सब नख शिख
शृंगार संतन हितही फूल डोल ॥ ९ ॥ फूलेहैं हो धेनु धाम सब ग्वाल बाल फूलेहैं हो नंदजूके
लाल सरस रसही फूल डोल । फूली गोपी हीन तरुन वृद्धबाल फूली करतिहैं नाना बिधि ख्याल
संतन हितही फूल डोल ॥ १० ॥ फूली रोहिणी यशोमति रानी फूलीहैं देवि हरिही रजधानी सरस
रसही फूल डोल । फूलेहैं नंद संकर्षण सुखमानी फूल गोकुलही प्राणी संतन हितही फूल डोल ॥
॥ ११ ॥ फूलेही बजावैं डफ ताल मृदंग बजै सुहवरी मुहचंग सरस रसही फूल डोल ॥
फूले बजावैं बाँसुरी सुरसंग बजावैं अमृत फुडेली उपंग संतन हितही फूल डोल ॥ १२ ॥ फूले
बजावैं किन्नरी यंत्र तार गति सुर मंडल झनकार सरस रससही फूल डोल । फूले बजावत गिरि
गिरी गार मदन भेरि घहराइ अपार संतन हितही फूल डोल ॥ १३ ॥ फूलेहि न बजावैं रुंज मुरुंज
फूलेबजावैं झांझ झालरी पुंज सरस रसही फूल डोल । फूले सुर बजावैं दुंदुभी घोर गुंज कूंजत मोर
मराल कोकिल कुंज संतन हितही फूल डोल ॥ १४ ॥ देखि डोल ब्रजजन सब फूले गोपी झुला-
वति गिरिधर झूले सरस रसही फूल डोल । फूलेहो मुदित मनोहर फूले रसिकनि रसिक शिरोमणि
फूले संतन हितही फूल डोल ॥ १५ ॥ फूली हरषि परस्पर गावैं हो होरी बोलति मीठे बोल बोलवैं
सरस रस फूल डोल । फूली प्रमुदित मनोहर भावैं कमलनयनको लाड लडावैं संतनहितही फूल
डोल ॥ १६ ॥ फूली चोवा चंदन बंदन रोरो केसरि मृगमद मथि मथि घेरी सरस रसही फूल डोल ।
फूली छिरकति नवलकिशोरी अबीर गुलाल भरें सब झोरी संतन हितही फूल डोल ॥ १७ ॥
फूली नाचति वृद्ध बाल यौवन भोरी फूले ग्वाल ग्वालनि यूथ यूथनि जोरी सरस रसही फूल
डोल । फूले करत कुलाहल तिहुँपुर खोरी फूलेहैं नरनारि किशोरी संतन हितही फूल डोल ॥ १८ ॥
फूले फगुवा मँगाय दियो रसराख्यो पट भूषण पहिराय रह्यो नहीं काष्यो सरस दिशही फूल डोल ।
फूलेहैं हरि हंसि हंसि अमृत भाष्यो फूलेहो जो जैसे तैसे सबको मनराख्यो संतन हितही फूल डोल
॥ १९ ॥ फूलेहिन नारद करतहो गान फूलेहैं ऋषि मुनि शिव धरत ध्यान सरसरसही फूल डोल ॥
फूलेहो बीणा बजावत हरि यश बखान मारचो कंस उग्रसेनकी फिरे आन संतन हितही
फूल डोल ॥ २० ॥ फूलेहि न कहत हरि मुनि कह्यो जाय तुरतही मोहिं तुम लेहु बोलाय सरस
रसही फूल डोल । फूलयोहिन जघानोमें असुर आय नदी यमुनामैही देहु बहाय संतन हितही
फूल डोल ॥ २१ ॥ फूलहिं न उग्रसेन शिरछत्र धराय फूले मथुरा नरनारि आनंद देहु बढाय
सरस रसही फूल डोल । फूले हि न पितु मातु मिल्यो म्यतवधाय दुसह दुख बिसराउ
सुख देहु जाय संतनहितही फूल डोल ॥ २२ ॥ फूलेहि नमुनि मुनि ज्ञान हरषाय

सकल भूमि ब्रजरत्न छाये सरसरसही फूल डोल । फूले हैं त्रिदशपति सुर शची सहिताय
 नभचटि बिमान फूले सुमन वरषाय संतन हितही फूल डोल ॥ २३ ॥ फूलेहि न हरषत
 हो ऋषिराय फूले बिदाभये मुनि बैकुंठ सिधाय सरस रसही फूल डोल । फूले हरषि हरषि हरिको
 यशगाय फूले पूछत सुर मुनि कछु कह्यो न जाय संतन हितही फूल डोल ॥ २४ ॥ फूल्योहि न पढै
 पढावै सुनै सुनावै वासि बैकुंठ परमपदपावै संतन हितही फूल डोल । सूरदास प्रभु कैसे करि गावै
 लीलासिंधु पार नहि पावै संतन हितही फूल डोल ॥ २५ ॥ राग राज्ञी रामगिरी ॥ हरि पिय तुम जिनि चलन
 कहो । यह जिनि मोहि सुनावहु बलिजाउँ जिनि जिय गहनि गहो ॥ जब चलिहो तबही कहियो
 अब जिनि उरहि दहौ । औरहु जन्म प्राण मिलतहैं पुनि तुम मिलत नहौ । जानि एई जिय तानि मन सुख
 अबकी बेर रहौ । यह सुनि सूरदासको लालच कबहुं जिनि उमहो ॥ २६ ॥ राग कल्याण श्रीगोकुलनाथ
 विराजत डोल । संग लिए वृषभानु नंदिनी पहिरे नील निचोला । कंचन खचित लाल मणि मोती हीरा
 जटित अमोल । झुलवाहि यूथ मिले ब्रज सुंदरि हरषति करति कलोल ॥ खेलति हँसति परस्पर गाव-
 ति होहो बोलति मीठे बोला । सूरदास स्वामी पियप्यारी झुलतहैं झक झोल ॥ २७ ॥ राग कल्याण ॥ श्रीझुलत
 नंदनंदन डोल । कनक खंभ जराय पटुली लगे रतन अमोल ॥ सुभग सरल सुदेश डाँडी रची
 विधना गोल । मनो सुरपति सुरसभाते पढै दियो हिंडोली । बहिं झंपति तबहिं कंपति विहँसि लगति
 डरोल । त्रिदशपति सजि चटि बिमानन निरखि दै ई ओल ॥ थके मुख कछु कहि न आवै
 सकल मख कृत झोल । सखी नवसत साजि लीन्हें कहत मधुरे बोल ॥ थक्यो रतिपति देखि
 यह छवि इंद्र भयो भ्रम भोल । सूर यह मुख गोप गोपी पियत अमृत कलोल ॥ २८ ॥ राग गौरी ॥ डोलत
 देखि ब्रजवासी फूलें । गोपी झुलावैं गोविंद झूलें ॥ नंदनंदन गोकुल में सोहैं ॥ मुरली मनोहर मन्मथ
 मोहैं ॥ कमल नयनको लाड लडावैं । प्रसुदित गात मनोहर गावैं ॥ रसिक शिरोमणि आनंद सागर ।
 सूरदास मन मोहन नागर ॥ २९ ॥ इति फागु क्रीडा समाप्ता । अध्याय ॥ ३८ ॥ अथ अकूर प्रस्ताव कथा वर्णन ॥ राग
 विलावल ॥ फागु रंग करि हरि रसराख्यो । रह्यो न मन युवतिनके काख्यो ॥ सखा संग सबको सुख
 दीनो । नर नारी मन हरि हरि लीनो ॥ जो जेहिभाव ताहि हरि तैसे । हितको हित कंटकको नैसे ॥
 महारि नंद पितु मातु कहाए । तिनहीके हित तनु धरि आए ॥ युग युग यह अवतार धरत हरि ।
 हरता करता विश्व रहे भरि ॥ धरणी पाप भार भई भारी । सुरन लिए सँग जाइ पुकारी ॥ त्राहि
 त्राहि श्रीपति दैत्यारी । राखि लेहु मोहिं शरन उवारी ॥ राजंस रीति सुरन कहि भाषी । भए
 चंद्र सुरज तहां साखी ॥ क्षीरसिंधु अहि शयन सुरारी । प्रभु श्रवणन तहाँ परी गुहारी ॥ तब
 जान्यो कमलाके कंता । दनुज भार पुहुमीमें मंता ॥ सिंधु मध्य वाणी परकाशी । भुव अवतार
 कह्यो अविनाशी ॥ मथुरा जन्म गोकुलहि आये । मात पिता सुत हेतु कहाए ॥ नारद कहि यह
 कथा सुनाई । ब्रज लोगन सुख दियो कन्हाई ॥ नंद यशोदा बालक जान्यो । गोपी कामरूप
 करि मान्यो ॥ प्रथम पिवत पय बकी विनाशी । तुरत सुनत नृप भए उदासी ॥ यहि अंतर
 बहु दनुज संहारे । यहि अंतर लीला बहुधारे ॥ को माया कहि सकै तुम्हारे । बाल तरुन
 सुख न्यारे न्यारे ॥ धन्य धन्य ए ब्रजके वासी । वश कीन्हें जिनि ब्रह्म उदासी ॥
 अकल कला निगमहु ते न्यारे ॥ तिन युवती बन बननि बिहारे ॥ आज्ञाईहै मोहिं प्रभु दीन्हों ।
 यह अवतार जबहि भुव लीन्हों ॥ दैत्य दहन सुरके सुखकारी । अब मारो प्रभु कंस प्रचारी ॥ यह
 सुनि हँसे सुरनके नाथा । जब नारद गाई यह गाथा ॥ श्रीमुख कह्यो जाइ समुझावहु । नृप आयसु

१ धत्तेऽश्यामलकंचुचकयुगलंमुक्तावलीमंशुकं शोणाभंवरकंकणानिकरयोः पादद्वयेनूपुरौ । चंद्रास्यामदविह्वलासकरुणां भाषां
 भृशं भाषती सैषा रामगिरी दिनांतसमये रामेण गीता पुरा ॥ रामगिरी ।

करि मोहि बोलावहु ॥ अंजलजोरि राज्य मुनि हरषे । कृपावचन तिनसों हरि वरषे ॥ तुरत चले नारद नृपवासा । इहै बुद्धि मन करत प्रकासा ॥ संकर्षण हृदय प्रगटार्ह । जो वाणी ऋषिगाइ सुनाई ॥ आदिपुरुष अज्ञात विचारी । शेषरूप हरिके सुखकारी ॥ हरिअंतर्यामी जगताता । अनुज हेतु जग मानत नाता ॥ इहै वचन हलधर कहि भाष्यो । मुनि मुनि श्रवण हृदय हरि राख्यो ॥ तुम जन्मे भुवभार उतारन । तुमहो अखिललोकके तारन ॥ तुम संसार सारके सारा । जल थल जहाँ तहाँ विस्तारा ॥ तव हँसि कह्यो भ्रातसों वानी । जो तुम कहत बात मैं जानी ॥ कंसनि-कंदन नाम कहाऊँ । केशगहौं पुहुमी घिसटाऊँ ॥ यहि अंतर मुनि गए नृपवासा । मनमारे सुख करे उदासा ॥ हरषि कंस मुनि निकट बोलाए । आदर कर आसन बैठाए ॥ कैसो सुख क्यों ऋषिमनमारे । कह चिंता जिय बढी तुम्हारे ॥ नारद कह्यो सुनो हो राउ । कहा बैठे कछु करहु उपाउ ॥ त्रिभुवनमें तुम सरि लो ऐसो । देख्यो नंद सुवन ब्रज जैसो ॥ करत कहा रजधानी ऐसी । यह तुमको उपजी कछु जैसी ॥ दिन दिन भयो प्रबल वह भारी । हम सब हितकी कहैं तुम्हारी ॥ तब गर्वित नृप बोले वानी । कहा बात नारद तुम गानी ॥ कोटिदुज मोसरि मो पासा ॥ जिनको देखि तरणितनु त्रासा ॥ कोटि कोटि तिनके संगयोधा । को जीवै तिनके तनु क्रोधा ॥ मल्लनके गुण कहा बखानो । जिनके देखत काल डरानो ॥ कोटि धनुर्द्धर संतत हारे । बचै कौन तिनके जु हँकारे ॥ एक कुवलिया त्रि-भुवनगामी । ऐसे और कितिकहैं नामी ॥ ग्वालसुतनकी कहा चलावहु । यह वाणी कहि कहा सुना-वहु ॥ प्रजालोग ब्रजके सब मेरे । सेवा करत सदा रहैं नेरे ॥ ताते सकुचतहौं उन काजा । बालक सुनत होइ जिय लाजा ॥ भली करी यह बात सुनाई । सहज बुलाइ लेउँ दोउ भाई ॥ और सुनहु नारद मुनि मोसों । श्रवणन लागि कहौं कछु गोसों । केतिक बात बलराम कन्हई । मोदेखत अति काल डेराई ॥ आजु कालि अब उनाहिं बोलाऊँ । कहि पठऊँ ब्रज सहित मैगाऊँ ॥ और प्रजा ब्रज आनि बसाऊँ । अपने जियकी खुटक मिटाऊँ ॥ तिनपर क्रोध कहामैं पाऊँ । रंगभूमि गजचरण रुँदाऊँ ॥ मेरे सम सरिको वह नाहीं । यह सुनिकै नारद सुसकाहीं ॥ सत्य वचन नृप कहत पुकारे । अब जाने उनि तौ तुम मारे ॥ यह कहि मुनि वैकुंठ सिधारे । त्रिभुवन में को बलहि तुम्हारे ॥ कंसपरचो मन इहै विचारा । रामकृष्ण वध इहै खँवारा ॥ दनुज हृदय हरि इहै उपायो । नारद कही सुनत जिय आयो ॥ अब मारौं नहिं गहर लगाऊँ । मथुरा जहाँ तहाँ बलछाऊँ ॥ धकधकात जिय बहुरि सँभारै । क्यों मारौं सो बुद्धि विचारै ॥ सूरज प्रभु अविगति अविनाशी । कंसकाल यह बुद्धि प्रकाशी ॥ ६९ ॥ राग कान्हरो ॥ अहो नृप द्वै अरि प्रगट भएवसे नंद गृह गोकुल थानक दियो सुदिन नगए ॥ तुमहूँ को दुख बहुत जनमको रथ मारग आरोए । तादिनते शिशु सप्त देवकी तेरेही कर सोए ॥ जो परिराज काज सुख चाहै वेगि बोलाइ नलीजै । हारि जीति दोउनकी बिधि यह जैसे होइ सोइ कीजै ॥ ऐसी कहि वैकुंठ सिधारे कष्ट निसाविकराय । सूर श्याम कृतकी वे इच्छा मुनि मन इहै उपाय ॥ ७० ॥ राग सोरठ ॥ नृपति मन इहै विचार परो । क्यों मारौं दोउ नंद ढोटोना ऐसी अरानि अरो ॥ कवहुँक कहत आपु उठि धावों यहै विचार करौ । सात दिवसमें वधी पूतना यह गुनि मनाहिं डरो ॥ पुनि साहस जिय जिय करि गवों ताको काल सरो । सूर श्याम बलराम हृदयते नेक नहीं विसरो ॥ ७१ ॥ राग सारंग ॥ मथुराके निकट चरति हैं गाई । दुष्टकंस भय करत मनहि मन ज्यों ज्यों सुनै कृष्ण प्रभुताई ॥ शीश धुनै नृप रिसन मनै मन बहुत उपाइ करै । घर बैठेहि दशन अधरन धरि चंपै श्वास भरे ॥ जानो असुर बाढिवो गोकुल ज्यों जन दीप पतंग परै । समुझै वचन कहे जे देवी अरु पहिले आकास परै ॥ नारद गिरा सम्हारी पुनि पुनि शिर धुनि आपु सारै । कालरूप देवकी नंदन

प्रगट भयो वसुधाके माहीं। कासों कहौं सूर अंतरकी सुफलकसुतको वचन सुकही ॥६२॥ राग सौरठ ॥
 महर ढोटीना शालि रहे। जन्महिते अपडाव करत हैं गुणि गुणि हृदय कहै ॥ दनुजसुता पहिले
 संहारी पयपीवत दिन सात। गयो प्रतिज्ञा करि कागासुर आइ गिरयो मुख छात ॥ तृणा शकट
 छिनमें संहारे केशी हतो प्रचारि। जे जे गए बहुरि नहि देखे सवहिन डारे मारि ॥ ज्यों त्यों करि
 इन दुहुँन सँहारौं बात नहीं कछु और। सूर नृपति अति सोच परो जिय यहै करत मनदौरा ॥६३॥
 ॥ राग रामकली ॥ नंदसुत सहज बुलाइ पठाऊं। श्याम राम अतिसुंदर कहियत देखन काज मँगाऊं ॥
 जैहै कौन प्रेमकरि ल्यावै भेद न जानै कोइ। महर महारि साँ हितकरि ल्यावै महाचतुर जो होइ ॥
 इहि अंतर अक्रूर बुलायो अति आतुर महाराज। सूर चलौ मनसोच बढायो कौनहै ऐसो काज ॥६४॥
 राग घनाश्री ॥ अति आतुर नृप मोहि बोलायो। कौन काज ऐसो अटक्यो है मन मन सोच बढायो ॥ आ-
 तुर जाइ पँवरि भयो ठाढो कहो पँवरिआ जाइ। सुनत बुलाइ महलई लीनो सुफलकसुत गयो
 घाइ ॥ कछु डर कछु जिय धीरज धारै गयो नृपतिके पास। सूर सोच मुख देखि डेरा-
 नो ऊरध लेत उसाँस ॥६५॥ राग मारू ॥ सोच मुख देखि अक्रूर भरमें। माथकरनाइ करजोरि दोऊ
 रहे बोलि लीन्हों निकट वचन नरमे ॥ आपुही कंस तहां दूसरो कोउ नहीं त्रास अक्रूर
 जिय कहा कहै। नृपति जिय सोच जान्यो हृदय आपु कहत कछु नहीं धौं प्राण लैहै ॥
 निकट बैठारि सब बात तेई कही गए जे भाषि नारद सवारै। सूर सुत नंदके हृदय शालत सदा
 मंत्र यह उनहि अब बनै मारै ॥६६॥ सुनो अक्रूर यह बात सांची करौ आजु मोहिं भोरते चेत नाहीं।
 श्याम बलराम यह नाम सुनि ताम मोहिं काहुं पठावहुगे जाइ तिनहि पाहीं ॥ प्रीति करि नंदसाँ
 सहज बातें कहै तुरत लै आइ दुहुं नृपति बोलें। देखिबेकी साध बहुत सुनि गुण बिपुल अतिहि
 सुंदर सुने दोउ अमोले ॥ कमल जबते उरग पीठि ल्याए सुने वैहैं बकशीश अब उनहि दैहैं।
 सूर प्रभु श्याम बलरामको डर नहीं वचन इनके सुनत हरषपैहैं ॥६७॥ राग सौरठ ॥ यह वाणी कहि कंस
 सुनाइ। तब अक्रूर हिए भयो धीरज डरडारयो बिसराइ ॥ मन मन कहत कहा चित बैठी सुनि
 सुनि वैसी बानी। अपनो काल आपुही बोल्यो इनकी मीचु तुलानी ॥ हरषि वचन अक्रूर कहे
 तब तुरत काज यह कीजै। सूर जाहि आयसु करि पाऊं भोर पठै तेहि दीजै ॥६८॥ राग विलावल ॥ तब
 अक्रूर कहत नृप आगे धन्य धन्य नारद सुनि ज्ञानी। बडे शत्रु ब्रजमें दोउ हमको सुनहु देव नीकी
 चित आनी ॥ महाराज तुम सरि को ऐसो जाते जगत यह चलत कहानी। अब नहि बचै क्रोध नृप कीन्हों
 जैहै छनकि तवा ज्यों पानी ॥ यह सुनि हर्ष भयो गर्वानो जबहि कही अक्रूर सयानी। कालि बुलाइ
 सूर दोउ मारौं बार बार यह भाषत बानी ॥६९॥ इहै मंत्र अक्रूरसाँ नृप रैनि बिचारी। प्रात नंदसुत
 मारिहौं यह कह्यो प्रचारी ॥ करि बिचार युग यामलौं मंदिरहि पधारे। कह्यो जाहु अक्रूरसाँ भए
 आलस भारे ॥ तुरत जाइ पलका परचो पलकनि झपकानो। श्याम राम स्वपने खडे तहां देखि
 डरानो ॥ अति कठोर दोउ कालसे भरम्यो अति झझक्यो। जागि परचो तहँ कोउ नहीं जियही
 जिय सुसक्यो ॥ चौंकि परचो सँग नारिके रानी सब जागीं। उठीं सबै अकुलाइकै तब बूझन
 लागीं ॥ महाराज झझके कहा सपने कह शंके। सूर अतिहि व्याकुल भए घर घर उर दंके ॥७०॥
 ॥ कंस स्वप्न भ्रमः ॥ महाराज क्यों आजुही स्वप्ने झझकाने। पौढे जबहीं आनिकै देखे बिलखाने ॥
 कहा सोच ऐसो परचो ऐसे भूमीको। काकी सुधि मनमें रही कहिय अपजीको ॥ रानी सब व्याकुल
 भई कछु भेद न पावैं। तब आपुन सहजहि कह्यो वह नहीं जनावैं ॥ सावधान करि पौरिआ प्रति

हार जगायो । सूर त्रास बल श्यामके नहिं पलक लगायो ॥७१॥ नंदस्वप्नः भ्रमः ॥ राग विलावल ॥ उत नंदहि
 स्वप्नो भयो हरि कहूं हिराने । बल मोहन कोउ लै गयो सुनिकै बिलखाने ॥ ग्वाल बाल रोवत
 कहैं हरितौ कहूं नाहीं । संगहि सँग खेलत रहे यह कहि पछिताहीं ॥ दूत एक सँग लै गयो बल राम
 कन्हाई । कहा ठगौरीसी करी मोहनी लगाई ॥ वाहीके दोउ है गए हम देखत ठाढ़े । सूरज
 प्रभु वै निठुरहैं अतिही गए गाढ़े ॥७२॥ राग सोरठा ॥ व्याकुल नंद सुनतहैं बानी धरणी मुरछिपरे अति
 व्याकुल विवश यशोदा रानी ॥ व्याकुल गोप ग्वाल सब व्याकुल व्याकुल ब्रजकी नारी ॥ व्याकुल सखा
 श्याम बलके जे व्याकुल अति जियभारी ॥ धरणी परत उठत पुनि धावत इहि अंतर नंदजागे ।
 धकधकात उर नयन स्रवत जल सुत अँग परसन लागे ॥ सुसुकत सुनि यशुमति अतुराई कहा म-
 हर भ्रम पायो । सूर नंदघरनीके आगे यह भ्रम नहीं सुनायो ॥७३॥ कंसकथावदत ॥ राग कल्याण ॥ एक
 याम नृपके निशि युगवत भई भारी । आपुनहुं जाग्यो संग जागीं सब नारी ॥ कबहुं उठत बैठत
 पुनि कबहुं सेज सोवै । कबहुं अजिर ठाढ़ेहैं ऐसे निशि खोवै ॥ बारबार जोतिकसों घरी वृद्धि आवै ।
 एक जाइ पहुँचै नहीं और एक पठावै ॥ जोतिक जिय त्रास परचो कहा प्रात करिहै ॥ सूर क्रोध भयो
 नृपति काके शिर परिहै ॥७४॥ व्याकुल टूटे निकटि वृद्धि घरी वाकी । एक एक छिन याम याम
 ऐसी गति ताकी ॥ को जैहैं ब्रजको मन कहैं कहि पठाऊं । जासों कहि नंदसुवन आजुही मँगाऊं ॥
 अब नहिं राखौं उठाइ वैरी नहिं नान्हों । मारौं गजपै रूढ़ाई मनहि यह अनुमान्हो ॥ पठऊं तौ
 अक्रूरहिको ऐसी नहिं कोऊ । सूर जाइ गोकुलते ल्यावै ढिग दोऊ ॥७५॥ राग विलावल ॥ अरुणोदय उठि
 प्रातही अक्रूर बोलाए । आपु कह्यो प्रतिहारसों इकसनि शतधाये ॥ सोवत जाइ जगायकै
 चलिए नृप पासा । उहै मंत्र मन जानिकै उठि चले उदासा ॥ नृपति द्वारही पै खरो देखत शिर
 नायो । कहि खवासको सैनदै शिरपाँव मँगायो ॥ अपने कर करिकै दियो सुफलकसुत लीन्हों ।
 लै आवहु सुत नंदके यह आयसु दीन्हों ॥ मुख अक्रूर हर्षित भयो हृदय विलखानो । असुरत्रास
 अति जिय परचो कह कहै सयानो ॥ तुरतहि रथ पलनाइकै अक्रूरहि दीन्हों । आयसु शिरपर
 मानिकै आतुरहैं लीन्हों ॥ विलम करौ जिनि नेकहुं अबहीं ब्रजजाहू । सूर काजकरि आवहु जिनि
 रैन वसाहू ॥७६॥ राग विलावल ॥ कंस नृपति अक्रूर बोलायो । बैठि एकांत मंत्र दृढ कीन्हों राम
 कृष्ण दोउ बंधु मँगायो ॥ कहूं मल्ल कहूं गजदै राखे कहूं धनुष कहूं वीर । नंदमहरको बालक मेरे कर्षत
 रहत शरीर ॥ उनहि बुलाइ बीचही मारौं नगर न आवन पावैं । सूर सुनत अक्रूर कहत नृप मन
 मन मौज बढावैं ॥७७॥ राग कल्याण ॥ तुम विन मेरे हितू न कोऊ । सुन अक्रूर पुरत नृप भाषित
 नंदमहर सुत ल्यावहुं दोऊ ॥ सुनि रुचि वचन रोम हरषित गात प्रेमपुलकि मुख कछू न बोल्यो । यह
 आयसु पूरव सुकृत वश सौं काहूपै जाहि न तौल्यो ॥ मौन देखि परिहँसि नृप भीनो मनहुं सिंह
 गो आय तुलानो । वहि क्रम बिनु द्वैसुत अहीर के रे कातर कत मन शंकानो ॥ आयसु पाइ सुष्ठ
 रथ कर गहि अनुपम तुरंग साजि धृत जोह्यो । सूर श्यामकी मिलनि सुरति करि मनुनिरधन
 धन पाइ विमोह्यो ॥७८॥ अक्रूर वचन कंससों राग विलावल ॥ सुनहु देव इक बात जनाऊं । आयसु भयो
 तुरत लै आवहु ताते फिरिहि सुनाऊं ॥ बल मोहन बनजात प्रातही जो उनको नहिं पाऊं । रैहों
 आजु नंद गृह वसिकै कालि प्रात लै आऊं ॥ यह कहि चल्यो नृपतिहू मान्यो सुफलक सुत रथ
 हाँवयो । सूरदास प्रभु ध्यान हृदय धरि गोकुल तनको ताक्यो ॥७९॥ अक्रूर गोकुल गमन ॥ राग दोड़ी ॥
 सुफलक सुत मन परचो विचार । कंस निर्वश होइ हत्यार ॥ डगर माँझ रथ कीन्हों ठाढ़ो ॥ सोच परचो

मन मन अति गाढो ॥ मंत्रकियो निशि मेरे साथ । मोहिं लेन पठयो ब्रजनाथ ॥ गज मुष्टिक चाणूर
 निहारयो । व्याकुल नयन नीर दोउ ढारयो ॥ अति बालक बलराम कन्हारै कहा करों नहिं कछू
 वसाई । कैसे आनि देउँ मैं जाई । मो देखत मारैं दोउभारै ॥ मारै मोहिं बंदि लै बोलै आगेको रथ नेक
 न ठेलै ॥ सूरदास प्रभु अंतर्दामी । सुफलकसुत मन पूरणकामी ॥ ८० ॥ राग कल्याण ॥ सुफलकसुत हृद
 य ध्यान कीन्हो अविनाशी । हरन करन समर्थ वै सब घटके वासी ॥ धन्य धन्य कंसहि कहि मो
 हिं जिनि पठायो । मेरो करि काज मीच आपुको बोलायो ॥ यह गुणि रथ हांकि दियो नगर परचो
 पाछे । कछु सकुचत कछु हरषत चलयो स्वांग काछे ॥ बहुरि सोच परचो दरश दक्षिण मृगमाला ।
 हरण्यो अकूर सूर मिलिहो गोपाला ॥ ८१ ॥ अकूर शकुन परीक्षा ॥ राग टोडी ॥ दक्षिण दरश देखि मृगमाला ।
 अति आनंद भयो तेहि काला ॥ बहु दिनके मेढो जंजाला । यहि बन मिलिहो मोहिं गोपाला ॥ श्याम
 जलद तनु अंग रसाला । ता दरशनते होउ निहाला ॥ बहुदिनके मेढो जंजाला । मुख शशिनैन चकोर
 बिहाला ॥ तनु त्रिभंग सुंदर नंदलाला । विविध सुमन हृदय शुभमाला ॥ सारसद्वेते नैन विशाला । निहचै
 भयो कंसको काला ॥ सूरज प्रभु त्रिभुवनप्रतिपाला ॥ ८२ ॥ राग आसावरी ॥ दहिने देख मृगन
 की मालहि । मनो इन शकुन अबहीं यहि बन इन भुजभरि मेंढोगो गोपालहि ॥ निरखि तनु त्रि
 भंग पुलक सकल अंग अंकुर धरनि जिमि पाँय पावस मालहि । परिहों पाँयन जाय भेंटिहैं अंक-
 मलाइ मूलते जमी ज्यों वेली चढति तमालहि ॥ परस्परमानंद सींचिकै कामना कंद करिहैं प्रगट
 प्रीति प्रेम प्रवालहि ॥ वचन रचन हास सुमन सुख निवास करहि फलीहै फल अमोघ रसालहि ॥ स्फुरित
 शुभ सुबाहु लोचन मन उछाहु फूलिकै सुकृत फल फली तेहि कालहि ॥ निगम कहत नीत शिव न
 सकत चेति सूर सुहृदय लगाइ लैहों ता दयालहि ॥ ८३ ॥ राग कान्हरो ॥ आजु वै चरण देखिहों
 जाय । जे पद कमल प्रिया श्रीउरसे नेक न सके भुलाइ ॥ जे पद कमल सकल मुनि दुर्लभ मैं देखों
 सतिभाव । जेपद कमल पितामह ध्यावत गावत नारद जाव ॥ जेपद कमल सुरसरी परसे तिहूँ भुवन
 यश छाव । सूर श्याम पद कमल परसिहों मन अति बढचो उराव ॥ ८४ ॥ आजु जाइ देखिहों वै
 चरण । शीतल सुभग सकल सुखदाता दुसह दवन दुखहरण ॥ अंकुश कुलिश कमल ध्वज चिह्नित
 अरुण कंजके रंग । गड चारत बनजाइ पाइहों गोप सखनके संग ॥ जाको ध्यान धरत मुनि नारद
 शिव विरंचि अरु ईश । तेई चरण प्रगट करि परसों इन कर अपने शीश ॥ देखि स्वरूप रहि न
 सकिहों रथते धैहों धरधाइ । सूरदास प्रभु उभय भुजा धरि हंसि भेंटिहैं उठाइ ॥ ८५ ॥ राग नदा ॥ जब शिर
 चरण धरिहों जाइ । कृपा करि मोहिं टेकि लैहैं करन हृदय लगाइ ॥ कुशल अंग पुलकित
 वचन गदगद मनहि मन सुखपाइ । प्रेम घट उच्छलित हैहैं नैन अंश बहाइ ॥ कुशल बृझत कहि न
 सकिहों बार बार सुनाइ । सूर प्रभु गुण ध्यान अटक्यो गयो पंथ भुलाइ ॥ ८६ ॥ राग विलावल ॥ मथुराते
 गोकुल नहिं पहुँचे सुफलकसुतको सांझ भई । हरि अनुराग देह सुधि बिसरी रथ वाहनकी
 सुरति गई ॥ कहाँ जात किन मोहिं पठायो कोहों मैं यहि सोच परचो । दशहूँ दिशा श्याम पारि
 पूरण हृदय हरष आनंद भरचो ॥ हरि अंतर्दामी यह जानी भक्तवच्छल बानो जिनको । सूर मिले
 जो भाव भक्तके गहर नहीं कीन्हों तिनको ॥ ८७ ॥ राग कल्याण ॥ वृंदावन ग्वालन सँग गैयन हरि चारै ।
 अपने जनहेत काज ब्रजको पग धारै ॥ यमुनाकरि पार गाय श्याम देत हेरी । हलधर सँग सखा
 लए सुरभी गण घेरी ॥ धेनु दुहुन सखन कह्यो आपु दुहन लागे । वृंदावन गोकुल बिच यमुनाके
 आगे ॥ भक्त हेतु श्रीगोपाल यह सुख उपजायो । सूरज प्रभु को दरशन सुफलकसुत पायो ॥ ८८ ॥

॥ राग कल्याण ॥ सुफलक सुत हरि दरशन पायो । रहि न सक्यो रथ पर सुख व्याकुल भयो उहै मन भायो ॥
 भूपर दौरि निकट हरि आयो चरणन चित्त लगायो । पुलक अंग लोचन जलधारा श्रीगृह शिर
 परसायो । कृपासिंधु करि कृपा मिले हँसि लियो भक्त उर लाइ । सूरदास यह सुखसो जानै
 कहाँ कहा मैं गाइ ॥ ८९ ॥ राग गुंडमलार ॥ हरषि अक्रूर हरि हृदय लगायो । मिले तेहि भाव जो
 भाव चितवनि चित्त भक्त वत्सल नाम तो कहायो ॥ कुशल बूझत प्रसन्न वचन अमृत रस श्रवण
 सुनि पुलक अंग अंग कीन्हों । चितै आनन चारु बुद्धि उर विस्तार दनुज अब दलों यह ज्वाब
 दीन्हों ॥ भेदही भेद सब दई वाणी कही तुरत बोले हेतु इहै वाके । सूर संग श्याम बलराम अक्रूर
 सह निपट अति प्रेमके पंथ थाके ॥ ९० ॥ राग विलावल ॥ श्याम इहै कहिकै उठे नृप हमैं बोलाये ।
 अतिहि कृपा हमपर करी जो कालि मैगाए ॥ संग सखा यह सुनतही चकृत मन कीन्हों । कहा
 कहत हरि सुनतहों लोचन भरि लीन्हों ॥ श्याम सखन सुख हेरि कै तब करी सयानी । कालि चलौ
 नृप देखिए शंका जिय आनी ॥ हर्ष भए हरि यह कहे मन मन दुख भारी । सूर संग अक्रूर के हरि ब्रज
 पग धारी ॥ ९१ ॥ राग रामकली ॥ अति कोमल बलराम कन्हई ॥ दुहुनि गोद अक्रूर लिए हँसि
 सुमनहुते हरुवाई ॥ ग्वाल संग रथ लीन्हों ॥ पहुँचे ब्रजकी खोरी । देखत गोकुल लोग जहाँतहैं
 नंद उठे सुनि शोरी ॥ निशि सपनेको तृषित भए अति सुन्यो कंसको दूत । सूर नारि नर देखन धाए
 घर घर शोर अकूत ॥ ९२ ॥ राग गुंडमलार ॥ कंस नृप अक्रूर ब्रज पठाए । गए आगे लेन नंद उपनंद
 मिलि श्याम बलराम उन हृदय लाए ॥ उतरि सदन मिल्यो देखि हरष्यो हियो सोच मन यह भयो
 कहाँ आयो । राजके काजको नाम अक्रूर यह किधौं कर लेनको नृप पठायो । कुशल तेहि बूझि
 लै गए ब्रज निजधाम श्याम बलराम मिलि गए वाको ॥ चरण पखराइ कै सुभग आसन दियो
 विविध भोजन तुरत दियो ताको ॥ कियो अक्रूर भोजन दुहुँन संग लै नर नारि ब्रज लोग सबै देखै ।
 मनो आए संग देखि ऐसे रंग मनहि मन परस्पर करत मैषे ॥ सारि जेवनार अचवनकै भए शुद्ध
 दियो तंमोर नंद हर्ष आगे । सेज बैठारि अक्रूरसों जोरि कर कृपा करी तब कहन लागे ॥ श्याम
 बलरामको कंस बोले हेतसों नंदलै सुतन हम पास आवैं । सूर प्रभु दरशकी साध अतिही करत आ-
 जुही कह्यो जिनि गहरु लावैं ॥ ९३ ॥ राग कान्हरो ॥ सुन्यो ब्रज लोग कहत यह बात । चकृत भए नारि
 नर ठाढे पांच न आवै सात ॥ चकित नंद यशुमति भई चकृत मनहीं मन अकुलात । दैदैं सैन
 श्याम बलरामहि सबै बुलावत जात ॥ पारब्रह्म अविगति अविनाशी माया रहित अतीत । मनो
 नहीं पहिचानि कहुंकी करत सबै मनभीत । बोलत नहीं नेक चितवत नहि सुफलक सुतसों पागे ।
 सूर हमहि नृपहित करि बोले इहै कहत ता आगे ॥ ९४ ॥ राग विहागरो ॥ व्याकुल भए ब्रजके लोग ।
 श्याम मन नहि नेक आनत ब्रह्म पूरण योग ॥ कौन माता पिता कोहै कौन पति को नारि । हँसत
 दोउ अक्रूरके सँग नवल नेह बिसारि ॥ कोउ कहति यह कहाँ आयो क्रूर याको नाम । सूर प्रभु लै
 प्रात जैहै और संग बलराम ॥ ९५ ॥ गोपिका विरह अवस्था वर्णन ॥ चलन चलन श्याम कहत कोउ लेन आयो ।
 नंदभवन भनक सुनी कंस कहि पठायो ॥ ब्रजकी नारि गृह बिसारि व्याकुल उठिधाई । समाचार
 बूझनको आतुर ह्वै आई ॥ प्रीति जानि हेतु मानि बिलखि वदन ढाढी । मानहु वै अति विचित्र
 चित्र लिखित काढी ॥ ऐसी गति ठौर ठौर कहत न बनि आवै । सूर श्याम विछुरे दुख विरह काहि
 भावै ॥ ९६ ॥ राग कान्हरो ॥ चलत जानि चितवत ब्रज युवती मानहु लिखी चितेरे । जहाँ सु तहाँ
 यकटक मग जोवत फिरत न लोचन कोरे ॥ बिसरि गई गति भाँति देहकी सुनत न श्रवणन टरे ॥

मिलि जु गये मनोपय पानी है निबरत नहीं निवेरे ॥ लागे संग मतंग मत्तज्यों धिरत
न कैसेहु घेरे । सूर प्रेम अंकुर आशा जिय दे नहिं इत उत हेरे ॥ ९७ ॥ राग सारंग ॥
सब सुरझानी री चलिबेकी सुनत भनक । गोपी ग्वाल नैन जल ढारत गोकुल द्वैरह्यो
मूँदचनक ॥ यह अक्रूर कहति आयो दाहन लाग्यो देह दनक । सूरदास स्वामीके बिछुरत घट
नहिं रहैं प्राण तनक ॥ ९८ ॥ राग रामकली ॥ अनलते विरह अग्नि अति ताती । माधो चलन कहत
मधुवनको सुने तपै अतिछाती ॥ न्याइहि नागरि नारि विरहवश जरत दिया ज्यों बाती । जे जरि
मेरे प्रगट पावक परि ते त्रिय अधिक सुहाती ॥ ढारति नीर नयन भरि भरि सब व्याकुलता मद
माती । सूर व्यथा सोई पै जानै श्याम सुभग रँगराती ॥ ९९ ॥ राग आसावरी ॥ श्याम गए सखि प्राण
रहेंगे । अरसपरस ज्यों बातें कहियत तैसेहि बहुरि कहेंगे ॥ इंदुवदन खग नैन हमारे जानति और
चहेंगे। वासर निशि कहुँ होत न न्यारे बिछुरन हृदय सहेंगे ॥ एक कहौ तुम आगे वाणी श्यामिन जाहि
रहेंगे। सूरदास प्रभु यशुमति को तजि मथुरा कहा लहेंगे ॥ १०० ॥ राग मलार ॥ हरि मोसों गौनकी
कथा कही । मन गह्वर मोहिं उतर न आयो हौं सुनि सोचरही ॥ सुनि सखि सत्यभावकी बातें
विरह वेलि उलही ॥ करवत चिह्न कहै हरि हमकों ते अज होत सही ॥ आजु सखी सपने में देख्यो
सागर पालि ढही । सूरदास प्रभु तुम्हरो गवन सुनि जल ज्यों जाति बही ॥ १०१ ॥ राग मारू ॥ बहुत दुख
पैयतुहै यह बात । तुम जु सुनतहौ माधो मधुवन सुफलकसुत संग जात ॥ मनसिज व्यथा दहति दावा-
नल उपजीहै या गात । सूधौ कहौ तब कैसे जीहै निज चलिहौं उठि प्रात ॥ जो पै यह कियो
चाहतहै मीचु विरह शरघात ॥ सूर श्याम तौ तब कत राखी गिरिकर लै दिनसात ॥ १०२ ॥ अक्रूर वचन ॥ राग राम
कली ॥ देख अक्रूर नरनारि बिलख्यो । धनुर्भजन यज्ञहेत बोले इनहि और डर नहीं सबन कहि संतो-
ख्यो ॥ महारि व्याकुल दौरि पाँइ गहि लैपरी नंद उपनंद संग जाहु लैकै । राजको अंश लिखि लेउ दूनो
देउं मैं कहा करौ सुत दुहुनि देकै ॥ कहति ब्रजनारि नैनन नीर ढारिकै इननको काज मथुरा कहा
है । सूर नृप कूर अक्रूर कूर भयो धनुष देखन कहत कपटी महाहै ॥ ३ ॥ यशोदा विनय अक्रूर प्रति
राग सारंग ॥ मेरे कमलनयन प्राणते प्यारे । इनको कौन मधुपुरी बैठत राम कृष्ण दोऊ जन वारे ॥
यशुदा कहै सुनहु सुफलकसुत मैं पयपान जतन करि पारे । ए कहा जानहिं सभा राजकी ए गुरु
जन विप्रौ न जुहारे ॥ मथुरा असुर समूह वसतहैं करकृपाण योधा हथियारे । सूरदास स्वामी ए ल-
रिका इन कब देखे मल्ल अखारे ४ ब्रजवासिनके सरवस श्यामारे अक्रूर कूर बडवारे जीको जी मोहन
बलराम ॥ अपनो लाग लेहु लेखो करि जे कछु राज अंशका दाम । और महरलें संग सिधारे नगर
कहा लरिकनको काम ॥ संतत साध परम उपकारी सुनियत बडो तुम्हारो नाम ॥ ५ ॥ यशोदा
वचन सखी प्रति ॥ राग मलार ॥ सखी री हौं गोपालहि लागी । कैसे जियें वदन बिन देखे अनुदिन खिन
अनुरागी ॥ गोकुल कान्ह कमल दल लोचन हरि सबहिनके प्राण । कौन न्याव अक्रूर कहतहै
कहै मथुरा लै जान ॥ ६ ॥ तुम अक्रूर बडेके ढोटा अति कुलीन मतिधीर । बैठत सभा बडे राजनके
जानतहो परपीर ॥ लीजै लागु यहांते अपनो जो कछु राजको अंश । नगर बोलि ग्वालनके
लरिका कहा करैगो कंस ॥ मेरे तो राम धन माई माधोई सब अंग । बहुरि सूर हौं कापै मांगों पैठि
पराए संग ॥ ७ ॥ राग रामकली ॥ मेरो माई निधनीको धन माधो । बारंबार निरखि सुख मानत तजत नहीं
पल आधो ॥ छिन छिन परसत अंग मिलावत प्रेम प्रगटहै लाधौ । निशि दिन सुचंद्र चकोरकी
छबि जनु मिटै न दरशकी साधौ ॥ करिहै कहा अक्रूर हमारो दैहै प्राण अगाधो । सूर श्याम

घनहों नहिं पठऊं अबहिं कंस किन बांधौ ॥८॥ राग सारंग ॥ मनहु प्रीति अति भई पात री । अनुज
 सहित चले राम हमारे कमलनैन देखौ मिलि न जात री ॥ अरस परस कछु समुझत नाही या
 ब्रजपोच भलौकी बात री । कंचन काँच कपूर कपट खरी हीरा सम कैसे पोति बिकात री ॥ वे
 दोउ हंस मानसरवरके छील रे क्षुद्र मलीन कैसे न्हात री । सूर श्याम मुक्ताफल भोगी कोरति
 करत ज्वारिकन खात री ॥९॥ राग सौरभ ॥ नहिं कोई श्यामहि राखै जाइ । सुफलकसुत वैरी भयो मोको
 कहति यशोदा माई ॥ मदनगुपाल बिना घर आँगन गोकुल काहि सुहाइ । गोपी रही ठगीसी
 छाडी कहा ठगो री लाइ ॥ सुंदर श्याम राम भरि लोचन बिन देखे दोउ भाइ । सूर तिनहि लै
 चले मधुपुरी हृदय शूल बढाइ ॥१०॥ राग सौरभ ॥ यशोदा बारबार यों भाषै । है ब्रजमें हितू हमारे
 चलत गोपालहि राखै ॥ कहा काज मेरे छगन मगनको नृप मधुपुरी बुलाये । सुफलकसुत मेरे प्राण
 हतनको कालरूप है आयो ॥ वरु ए गोधन हरौ कंस सब मोहिं बंदि लै मेलो । इतनेही सुख
 कमलनैन मेरी अँखियन आगे खेलो ॥ वासर वदन विलोकत जीवों निशि निज अंकम लाऊं ॥
 तेहि बिछुरत जो जीवों कर्मवश तौ हैंसि काहि बोलाऊं ॥ कमलनैन गुण टेस्त टेस्तही अघर
 वदन कुम्हिलानी ॥ सूर कहाँ लगि प्रगट जन्महुं दुखित नंदजूकी रानी ॥ यशोदावचन श्रीकृष्णप्रति सौरभ ॥
 गोपालराइ केहि अवलंबौ प्राण । निटुर वान कठोर कुलिशसे कहत मधुपुरी जान ॥ क्रूर नाम
 गति क्रूर क्रूर मति काहेको गोकुल आयो । कुटिल कंस नृप वैरजानिकै हरिको लेन पठायो ॥ जिहि
 मुख तात कहत ब्रजपतिसों मोहिं कहतहै माइ । तिहि मुख चलन सुनत जीवतिहौं
 विधिसों कहा बसाइ ॥ को कर कमल मथानी धरिहै को माखन अरि खैहै । वर्षत मेघ
 बहुरि ब्रजऊपर को गिरिवर करलै है ॥ हों बलि बलि इन चरणकमलकी इहँई रहौ
 कन्हाई । सूरदास अवलोकि यशोदा धरणि परी सुरझाई ॥१२॥ मोहन इतनो मोहिं चित धरिये । जन-
 नी दुखित जानिकै कबहूँ मथुरागमन न करिये ॥ यह अक्रूर क्रूर कृत रचिकै तुमहिं लेन है आयो ।
 तिरछे भए कर्म कृत पहिले विधि यह ठाट बनायो ॥ बारवार जननी कहि मोसों माखन माँगत
 जौन । सूर तिनहिं लेबेको आए करिहौ सुनो भौन ॥१३॥ राग सही ॥ सुफलक सुतके संगते कहूँ हरि होत
 न न्यारे ॥ बार बार जननी कहै मोहिं न तज्यो दुलारे ॥ कहा ठगो री यहि करी मेरे बालक मोह्यो ।
 हाहा करि करि मरतिहौं मोतन नहिं जोह्यो ॥ नंद कह्यो परबोधिकै सँग मै लै जैहौं । धनुषयज्ञ
 देखराइकै तुरतहि लै ऐहौं ॥ घर घर गोपनसों कह्यो कर भार जुरावहु । सूर नृपतिके द्वार को
 उठि प्रात चलावहु ॥१४॥ नंदवचनयशोदाप्रति ॥ राग मलार ॥ भरोसो कान्हकोहै मोहिं सुन यशोदा कंस भयते
 तू जानि व्याकुल होहि ॥ पहिले पूतना कपट करि आई स्तननि विष पोहि । वैसी ज्यों प्रबल दुदिनके बाल
 कमारि देखावत तोहि ॥ अघ बक धेनु तृणावर्त केशी को बल देख्यो जोहि । सातदिवस गोवर्धन राख्यो
 इंद्र गयो द्रुपछोहि ॥ सुनि सुनि कथा नंदनंदनकी मन आयो अवरोहि । सूरदास प्रभु जो कहिए क-
 छ सो आवै सब सोहि ॥१५॥ राग विहागरो ॥ यशुमति अतिही भई बेहाल । सुफलकसुत यह तुमहि ब्रूझि
 ए हरतहौ मेरो बाल ॥ ए दोउ भैया ब्रजकी जीवन कहति रोहिणी रोई । धरणी गिरति दुरति
 अति व्याकुल कहि राखत नहिं कोई ॥ निटुर भए जबते यह आयो घरहु आवत नाहि । सूर कहा
 नृप पास तुम्हारो हम तुम बिनु मरिजाहि ॥१६॥ राग सौरभ ॥ कन्हैया मेरी छोह बिसारी । क्यों बलराम
 कहत तू नाहीं मैं तुम्हरी महतारी ॥ तब हलधर जननी परबोधत मिथ्या यह संसारी । ज्यों
 सावनकी बेलि प्रफुलिकै फूलतिहै दिनचारी ॥ हम बालक तुमको कहा सिखवैं कहूं तुमहि ते जात ।

सूर हृदय धीरज अवधारौ काहेको बिलखात॥१७॥राग सोरठ॥यह सुनि गिरी धरणि झुकि माता॥कहा
 अक्रूर ठगो री लाई लिए जात दोउ भ्राता ॥ विरध समय की हरत लकुटिया पाप पुण्य डर नाही ।
 कछू नफा तुमको है यामें सो शोधोमन माहीं ॥ नाम सुनत अक्रूर तुम्हारो क्रूर भए हो आइ ॥
 सूर नंद घरनी अति व्याकुल ऐसेहि रैन विहाइ ॥१८॥गोपिकावचन परस्पर रामकली॥सुनेहैं श्याम मधु
 पुरी जात । सकुचति कहि न सकति काहू सों गुप्त हृदयकी बात ॥ शंकित वचन
 अनागत कोऊ कहि जु गई अधरात । नंद न परै घटै नहिं रजनी कब उठि देखौ
 प्रात ॥ नंदनंदन तो ऐसे लागे ज्यों जल पुरइन पात । सूर श्याम संगते बिछुरत हैं कब ऐ
 हैं कुशलात॥१९॥राग सारंग॥ सुने नंदलाल मधुपुरी जात । सकुचति कहि न सकति काहू सों गुप्त
 हृदय की बात ॥ सकृत् वचन अनागत सखी री कोऊ कहि जु गयो अधरात । रजनी घटै न सूर
 प्रकाशे कब उठि देखौ प्रात॥उर धकधकी तबहिंते लागी अगम जनायो सीरे गाता॥सूरदास स्वामी-
 के चलिबे ज्यों यंत्री बिनु यंत्र सकात२०॥प्रभात कथा वदत ॥ सखा वचन ॥ राग भैरव॥भोर भयो ब्रजलोग-
 नको । ग्वाल सखा सखि व्याकुल सुनिकै श्याम चलतहैं मधुवनको॥सुफलकसुत स्यंदन पलनावत
 देखैं तहां बलमोहनको । यह सुनि घर घरते उठि धाई नंदसुवन मुख जोवनको॥रोरि परी गोकुलमें
 जहैं तहैं गाइ फिरत पय दोहनको॥सूर वरवस कर भार सजाइत महरचलत हरि गोहनको२१॥राग रामकली
 चलनको कहियतहै री आजु । अबहीं गई श्रवण सुनि आई करत गमनको साजु॥कोउ एक कंस कपट
 कर पठयो कछु सँदेश दै हाथ । सोलै चलयो हमारी जीवननिधिको अपने साथ॥अब यहि झूल न जाति
 समुझि सहि रही हिए करि लाज । धीरज अवधि आशदै जननिहि जात चले ब्रजराज॥करिये विनती
 कमलनयन सों सूर समो पहिचान । कौने कर्म भयो दुखदारुण रहत न मेरो कान२२॥चलत हरि धृग
 जु रहत ए प्रान । कहां वह सुख अबसहौं दुसह दुख उर करि कुलिश समान ॥कहां वह कंठ श्याम
 सुंदर भुज करति अधर रस पान । अचवत नयन चकोर सुधा विधुदेखहु मुख छबि आन॥जाको जग
 उपहास कियो तब छाँड्यो सब अभिमान । सूर सु निधि हमतेहैं बिछुरत कठिनहै करमनिदान ॥२३॥राग
 कल्याण॥हौं साँवरे के संग जैहौं॥होनी होइ सु होइ उभै लै हठ यश अपयश कहूं नडरैहौं॥कहा रिसाइ
 करैगो कोऊ जो रोकि है प्राण ताहि दैहौं । देहौं छाँडि राखिहौं यह व्रत हरि हितु बीजु बहुरिको
 बैहौं॥करिहौं सूर अजर अवनी तन मिलि अकास पिय भौन समैहौं । बायबीज वापी जलक्रीडा तेज
 मुकुर मुख सव सुख लेहौं॥२४॥यहि अंतर एक सखी आइ हरिके गवनको संदेश वदति ॥ राग कल्याण॥श्याम चल-
 न चहत कह्यो सखी एक आई॥बलमोहन रथ बैठे सुफलकसुत चढन चहत यह सुनि चकित भई विरहदौं
 लगाई॥धुकि धुकि सब धरणि परीं ज्वाला झरलतागिरीं मनो तुरत जलद वृषि सुरति नीर परसी ।
 धाई सब नंद द्वार बैठे रथ दोउ कुमार यशुमति लोटति भुवपर निठुर रूप दरसी॥कौन पिता कौन माता
 आपु ब्रह्म जगधाता राख्यो नहीं कछू नाता नेक माहीं । आतुर अक्रूर चढे रसना हरि नाम
 रटे सूरज प्रभु कोमल तनु देखि चैन नाही ॥२५॥गोपीवचन मोहनप्रति ॥ राग सारंग ॥ विनती एक सुनौ
 श्रीश्याम । चलन न देत चलो चाहत मन चलन कहौ सो सुनि ए श्याम । तुम सर्वज्ञ सकल घट
 व्यापक जीवन पद सबके विश्राम । संतत रहत कहत ढीठोदै करते सब सोवत सुखधाम ॥
 बाहर सरल प्रीति गोपिनको लिए रहत लै लै गुणग्राम । सूरदास प्रभु सकल सुखदाता तिनते
 न्यारे न ग्राम॥२६॥राग सारंग॥बिनु परवहि उपराग आजु हरि तुमहै चलन कह्यो । को जानै उहि राहु
 रमापाति कतहै शोधलह्यो॥वैतकिचुनित नीच नैनन मिलि अंजन रूप रह्यो । विरह संधि बलपाइ

मेनअति है तिय वदन गह्यो ॥ दुसह दशन मनो धरत श्रमित अति परसे परकत न सह्यो ।
 देखो देव अमृत अंतरते ऊपर जात बह्यो ॥ अब यह शशि ऐसो लागत ज्यों बिन माखनहि
 मह्यो । सूर सकल गुणपति दर्शन बिनु सुखछबि अधिक दह्यो ॥ २७ ॥ राग धनाश्री ॥ मिलि किन जाहु
 बटाऊ नाते । नंद यशोदाके तुम बालक बिनती करतिहैं ताते ॥ तुम्हरी प्रीति हमारी सेवा गनियत
 नाहिन काते । रूप देखि तुम कहा भुलाने मीत भए वनयाते ॥ तुम बिछुरत घनश्याम मनोहर
 हम अबला सरघाते । कहा करौं जु सनेह न छूटे रूप ज्योति गई ताते ॥ जब उठि दान माँगते
 हँसिकै संग गात लपटाते । सूरदास प्रभु कौन प्रबलरिषु बीच परयो धौं जाते ॥ २८ ॥ हरिकी प्रीति
 उरमाहिं करकै । आय क्रूर लैचले श्यामको हितनाहीं कोउ हरिकै ॥ कंचनको रथ आगे कीन्हों
 हरिहि चढाए वरकै । सूरदास प्रभु सुखके दाता गोकुल चले उजरकै ॥ २९ ॥ राग सारंग ॥ सब ब्रजकी शोभा
 श्याम । हरिके चलत भई हम ऐसी मनहु कुसुम निरमायल दाम ॥ देखियतहौ तुम क्रूर विषमके-
 से सुनियतहौ अक्रूरहि नाम । विचरतिहौ न आन गृह गृहको ते शिशु लायक नृपको कह काम ॥ ३० ॥
 यशोदा विलाप राग विलावल ॥ गोपालहि राखहु मधुवन जात । लाजगए कुछ काज न सरिहै बिछुरत नंदके
 तात ॥ रथ आरूढ होत बलि गई होइ अयो परभात ॥ सूरदास प्रभु बोलि न आयो प्रेमपुलकि
 सब गात ॥ ३१ ॥ मोहन नेक बदन तन हेरो । राखो मोहिं नात जननीको मदन गुपाल लाल सुख फेरो ।
 पाछे चढो विमान मनोहर बहुरो यदुपति होत अँधेरो । बिछुरत भेंट देहु ठाढे ह्वै निरखो घोष
 जन्मको खेरो ॥ माधो सखा श्याम इन कहि कहि अपने गाइ ग्वाल सब घेरो । गए न प्राण सूर ता
 औसर नंद जतन करि रहै घनेरो ॥ ३२ ॥ अथ श्रीकृष्णमथुरांगमनेहेतु अक्रूर साथ ॥ राग सोरठा ॥ जबहीं रथ अक्रूर चढे ।
 तब रसना हरि नाम भाषिकै लोचन नीर बढे ॥ महारि पुत्र कहि शोर लगायो तरु ज्यों धरनि
 लुटाइ । देखति नारि चित्रसी ठाढी चितए कुँवर कन्हाइ ॥ इतनेहिमें सुख दियो सबनको मिलि
 हैं अवधि बताइ । तनक हँसे मनदै युवतिनको निटुर ठगोरी लाइ । बोलत नहीं रहीं सब ठाढी श्याम ठगी
 ब्रजनारी । सूर तुरत मधुवन पगधारे धरणीके हितकारी ॥ ३३ ॥ राग विहागरो ॥ चलत हरि फिरि चितये ब्रज
 पास । इतनेहि धीरज दियो सबनको अवधि गए दै आश । नंदहि कह्यो तुरत तुम आवहु ग्वाल सखा
 लै साथ । माखन मधु मिष्टान्न महर लै दियो अक्रूरके हाथ ॥ आतुर रथ हाँक्यो मधुवनको ब्रजजन
 भए अनाथ । सूरदास प्रभु कंस निकंदन देवन करनि सनाथ ॥ ३४ ॥ राग नयी ॥ रही जहां सो तहां सब
 ठाढी । हरिके चलत देखिअत ऐसी मनहुं चित्र लिखि काढी ॥ सूखेवदन स्रवत नैननते जल
 धारा उरबाढी । कंधनि बाँहधरे चितवति द्रुम मनहु वेलि दवडाढी ॥ नीरस करि छाँडी सुफलक
 सुत जैसे दूध बिन साढी । सूरदास अक्रूर कृपाते सही विपति तनु गाढी ॥ ३५ ॥ राग सारंग ॥ चलतहु
 फेरि न चितए लाल । रथ बैठे दूरते देखे अंबुज नैन विशाल ॥ मीडत हाथ सकल गोकुल जन
 विरह विकल बेहाल । लोचन पूरि रहीं जल महियाँ दृष्टि परी जो काल ॥ सूरदास प्रभु
 फिरिकै चितयो अंबुज बैन रसाल ॥ ३६ ॥ राग विलावल ॥ बिछुरे श्रीब्रजराज आजु तौ नैननते परतीति गई ।
 उठि न गई हरिसंग तबहि ते ह्वै न गई सखी श्याममई ॥ रूपरसिक लालची कहावत सो करनी कुछ
 वै न भई । साँचे क्रूर कुटिल ए लोचन व्यथा मीन छबि छीनि लई ॥ अब काहे जल मोचत
 सोचत समौगए ते शूलनए ॥ सूरदास याहीते जडभये इन पलकनही दगादए ॥ ३७ ॥ सखी वचन परस्पर ॥
 राग धनाश्री ॥ केतिक द्वारि गयो रथमाई । नंदनंदनके चलत सखीहे तिनको मिलन न पाई ॥ एक दिवसहों
 द्वार नंदके नहीं रहति बिनु आई । आजु विधाता मति मेरी गई भौनकाज बिरमाई ॥

जब हरि ऐसो ख्याल करत है काहु न बात चलाई । ब्रजही वसतबिमुख भई हरिसों शूल न उरते जाई॥सूरदास प्रभु बिनु ब्रज ऐसो एको पल न सोहाई॥३८॥ राग मलार॥सखी री वह देखौ रथजात। कमल-नैन काँधे पर न्यारो पीत बसन फहरात ॥ लई जाइ जब ओट अटनकी चीरन रहत कृषगात । छत्र पत्र ध्वज कनकदलमानो ऊपर पवन विहात ॥ मधु छुडाइ सुफलकसुतलैगए ज्यों माछी भयहीन । सूरदास प्रभु बिनु देखियत है सकल बिरह आधीन ॥३९॥ राग सारंग ॥ पाछेही चितवत मेरे लोचन आगे परत न पाँइ । मनलै चली माधुरी सुरति कहा करौ ब्रजजाइ ॥ पवन न भई पताका अंबर भई न रथके अंग । धूरि न भई चरण लपटाती जाती वहँलौ संग ॥ ठाढी कहा करौ मेरी सजनी जिहि बिधि मिलहि गोपाल । सूरदास प्रभु पठै मधुपुरी सुरझिपरी ब्रजवाल ॥ ४० ॥ राग नट ॥ तब न बिचारी री यह बात । चलत न फेंट गही मोहनकी अब ठाढी पछितात॥निरखि निरखि मुख रही मौनहै थकित भई पलपात । जब रथ भयो अदृष्ट अगोचर लोचन अति अकुलात । सबै अजान भई वहि औसर धिगहि यशोमति मात । सूरदास स्वामीके बिछुरे कौडी भरि न बिकात॥४१॥ राग सारंग॥अब वै बातें ईझ्याँ रही॥मोहन मुख मुसकाइ चलत कछु काहु नहीं कही॥सखी सुलाज वश समुझि परस्पर सन्मुख सबै सही॥अब वै शालतिहैं उरमहियाँ कैसेहु कढति नहीं ॥ त्यों ज्यों सलिल करनको सजनी काहेको धिरति वही । हरि चुंबक जहां मिलहि सूर प्रभु मो लैजाउँ तही॥४२॥ राग नट॥मेरी वज्रकी छाती बिदरि करि नहीं जाति । हरिहि चलत चित वत मग ठाढी पछिताति ॥ बिद्यमान बिरह शूल उर में जु समाति । आवनकी आश लागि अब धिही पत्याति ॥ प्रेमकथा प्रगट भई शरद रासराति । प्राणनाथ बिछुरे सखी जीवतन लजाति ॥ एकै पै सुरति रही वदन कमल कांति । ज्यों ठग निधिहि हरत की रंचक गुरदै केहु भाँति । इमि फिरि मुसकानि सूर मनसागई माति॥चितवनि मन मादक भई जागत अकुलाति॥४३॥ राग गौरी ॥ आजु रैनि नहीं नौद परी । जागत गनत गगनके तारे रसनारटत गोविंद हरी ॥ वह चितवन वह रथकी बैठन जब अक्रूरकी बाँह गही॥चितवत रही ठगी सी ठाढी कह न सकति कछु काम दही॥इतने मान व्याकुल भई सजनी आरज पंथ हुते विडरी । सूरदास प्रभु जहाँ सिधारे कितिक दूरि मथुरा नगरी ॥ ४४ ॥ राग सारंग ॥ हरि बिछुरत फाटयो न हियो । भयो कठोर वज्रते भारी रहिकै पापी कहा कियो ॥ घोरि हलाहल सुन री सजनी औसर तेहि न पियो । मन सुधि गई सँभारति नाहि-न पूरो दाँव अक्रूर दियो ॥ कछु न सुहाइ गई सुधि तबते भवन काज को नेम लियो । निशि दिन रटत सूरके प्रभु बिनु मरिबो तऊ न जात जियो॥४५॥ राग अडानो॥सुंदर वदन री सुखसदन श्याम को निरखि नैन मन थाक्यो । वारक इन बीथिनहै निकसे मैं दूरि झरोखनि झाँक्यो ॥ उन कछु नेक चतुरई कीनी गेंद उछारि गगन मिस ताक्यो । वारों लाज भई मोको वैरनि मैं गँवारि मुख ढाक्यो ॥ कछु करिगए तनक चितवनिमें याते रहत प्रेम मद छाक्यो । सूरदास प्रभु सर्वसु लै गए हँसत हँसत रथ हाँक्यो ॥ ४६ ॥ राग सारंग॥अरी मोहिं भवन भयानक लागे माई श्याम बिना देखहि जाइ काहि लोचन भरि नंद महरके अँगना ॥ लै जु गए अक्रूर ताहिको ब्रजके प्राणधना॥कौन सहाय करैं घर अपने मेटै बिधिन घना ॥ काहि उठाइ गोद करि लीजै करि करि मन मगना । सूरदास मोहन दरशन बिनु सुख संपति सपना ॥ ४७ ॥ राग मलार ॥ सब कोउ कहत गोपाल दोहाई॥गोरस बेचन गई बबाकी सो हों मथुराते आई॥जबते कछो कंससों मनमोहन जीवत मृतक करि लेखो । जागत सोवत आश देवनकी कृष्ण कला सब देखो ॥ करत ओघ प्रजा लोगै सब नृपतिके शंक न मानी ।

ठकुराई तकियो गिरिधरकी सूरदास जनजानी ॥४८॥ यशोदा विलाप ॥ राग धनाश्री॥है कोइ ऐसी भांति
देखावै।किंकिणि शब्द चलत ध्वनि रुनु झुनु ठुमक२गृह आवै॥कछुक विलाप वदनकी शोभा अरुण
कोटि गति पावै । कंचन मुकुट कंठ मुक्तावलि मोरपंखछबि छावै । धूसर धूरि अंग सँगलीने ग्वाल
बाल सँगलावै।सूरदास प्रभु कहति यशोदा भाग्य बडेते पावै॥४९॥राग सोरठा॥मनौहो ऐसेही मरिजैहौं ।
इहि आँगन गोपाल लालको कबहुँक कनियां लैहौं॥कब वह मुखबहुरौं देखौंगी कब वैसो सचुपैहौं ।
कब मोपै माखन माँगैगे कब रोटी धरि दैहौं ॥ मिलन आश तनु प्राण रहतहैं दिन दश मारग
चैहौं।जो न सूर कान्ह आइ है तौ जाइ यमुन धँसि लैहौं॥५०॥अध्याय ॥ ३९ ॥ तथा ॥ ४० ॥ अक्रूर दर्शन
प्राप्त हेतु तथा श्रीकृष्ण स्तुतिवर्णन ॥ राग गुंडमलार ॥ मनही मन अक्रूर सोच भारी । जननी दुःखित करि
इनहि मैं लै चल्यो भई व्याकुल सबै घोषनारी॥अतिहि ए बालहैं भोजन नवनीतिके जानि तिन्हें लीन्हें
जात दनुज थासा । कुवलियामल्ल मुष्टिक चाणूरसे कियो मैं कर्म यह अति उदासा ॥ फेरि ले जाउँ
ब्रज श्याम बलरामको कंसलै मोहि तब जीवमारै । सूर पूरण ब्रह्म निगम नाहीं गम्य तिनहि अक्रूर
मन यह बिचारै ॥५१॥इहै सोच अक्रूर परचो । लिए जात इनको मैं मथुरा कंसहि महाडरचो ॥ धृग मो-
को धृग मेरी करनी तबहीं क्यों न मरचो ॥ मैं देखौं इनको अब हतिहै अति व्याकुल हहरचो । यहि
अंतर यमुना तट आए स्नान दान कियो । खरचो । सूरदास प्रभु अंतर्यामी भक्त संदेह हरचो ॥
॥५२॥राग धनाश्री ॥ सुफलकसुत दुख दूरि करचो । यमुना तीर कियो रथठाढो आपुहि प्रगट हरचो॥
तिनहि कह्यो तुम स्नान करौ ह्यां हमहिं कलेऊ देहु । भूख लगी भोजन करिहैं हम नेम सारि तुम
लेहु । तबलौं नंद गोप सब आवैं संग मिले सब जैहैं ॥ सूरदास प्रभु कहतहैं पुनि पुनि तब अति
ही सुख पैहैं॥५३॥राग गुंडमलार॥सुनत अक्रूर यह बात हरषे । श्याम बलरामको तुरत भोजन दियो
आपु स्नानको नीर परषे ॥ गए कटिनीरलौं नित्य संकल्प करि करत स्नान इकभाव देख्यो ।
जैसोई श्याम बलराम श्रीस्यन्दन चढे वहाँ छबि कुँवर सर मांझ पेख्यो ॥ चकृत मनभए कंबहुँ
तीर पुनि जल निरखि घोष अक्रूर जिय भयो भारी । सूर प्रभु चरितमें थकित अतिही भयो
तहां दरशे नित स्थल विहारी॥५४॥राग कान्हरो॥कमल पर वज्र धरति उर लाइ।राजतिरमा कुंभरस
अंतर पति निज स्थल जलसाइ ॥ वैनतेइ संपुट सनकादिक चतुरानन जय विजय सखाइ । औस-
र बाग विशारद हाहा जित गुण गाइ ॥ कनक दंड सारंग विविध रव कीरति निगम सिद्ध सुर
धाइ । तिनके चरण सरोज सूर अब किए गुरु कृपा सहाइ ॥ ५५ ॥राग धनाश्री ॥ हरष अक्रूर हृदय
नमाइ । नेम भूल्यो ध्यान श्याम बलरामको हृदय आनंद मुख कहि न जाइ ॥ ब्रह्म पूरण अकल
कलाते रहित ए हरता करता समर्थ और नाहीं । कहा बपुरो कंस मिथ्यो तब मन संस करत है
जीको । करतहै गंग निर्वेशजाहीं ॥ हांकि रथ चढि चल्यो विलम अब कहा प्रभु गयो संदेह अक्रूर
जीको नंद उपनंद सँग ग्वाल बहुभारलै आइ सदनहि मिले सूर पीको ॥५६॥ अक्रूर श्रीकृष्ण स्तुति ॥
राग कल्याण॥बार बार श्याम राम अक्रूरहि गानै । अबहीं तुम हरष भए तबहीं मन मारि रहे चले
जात रथहि वात बूझत हैं वानैं ॥ कहौ नहीं सांची सो हमसों जिनि गोपकरौ सुनिकै अक्रूर बिमल
स्तुति मानै । सूरज प्रभु गुण अथाह धन्य धन्य श्रीप्रियानाह निगमनको अगाध सहसानन
नहिं जानै ॥ ५७ ॥ राग विलावल ॥ बारबार मोसों कहा बूझत तुमहौ पूरण ब्रह्म गुसाँई ॥ तुम हर्ता
तुम कर्ता एकै तुमहौ अखिल भुवनके साँई॥कहामल्ल चाणूर कुवलिया अब जिय त्रास नहीं तिन नैको ।
सूरदास प्रभु कंस निपातहु गहरु न कीजै अब वैसेनको ॥५८ ॥ राग धनाश्री ॥ बूझतहैं अक्रूर

हि श्याम । तरनि किरनि महलनि पर झाई इहै मधुपुरी नाम ॥ श्रवणन सुनत रहत जाको नित सो
 दरशन भए नैन । कंचनकोट कंगूरनकी छबि मानहु बैठे मैन ॥ उपवन बन्यो चहुँवा पुरके अतिही
 मोको भावता।सूर श्याम बलरामहि पुनि पुनि करपल्लवानि देखावत॥६९॥ श्रीकृष्ण वचन अकूर प्रति ॥ राग
 कल्याण॥बार बार बलरामको मधुपुरी बतावत ॥ छजे महलन देखिकै मन हरष बढ़ावत ॥ जन्म थान
 जिय जानिकै ताते सुख पावता।वन उपवन छाये सघन रथ चढे जनावत ॥ नगर शोर अकनत सुनत
 अति रुचि उपजावत।सुनत शब्द घरियारके नृप द्वार बजावत॥बरन बरन मंदिर बने लोचन ठहरावत।
 सूरज प्रभु अकूरसों कहि देखि सुनावत॥६०॥अकूरवचन श्रीकृष्णप्रति ॥ राग कल्याण॥श्रीमथुरा ऐसी आजु
 बनी।देखहु हरि जैसे पति आगम सजति शृंगार धनी ॥ मानहु कोटि कसी कटि किंकिणि उपवन वसन
 सुरंग । भूषण भवन विचित्र देखियत शोभित सुंदर अंग॥सुनत श्रवण घरियार घोर ध्वनि पाँयन
 नृपुर बाजत । अति संभ्रम अंचल चंचलगति धामन ध्वजा विराजत ॥ ऊंच अटनपर छत्रनकी
 छबि शीशन मानों फूली।कनक कलश कुच प्रगट देखियत आनंद कंचुकि भूली॥विद्रुम फटिक पची
 परदा छबि लालरंघकी रेख । मनहुँ तुम्हारे दरशन कारण भूले नैन निमेष ॥ चितदै अवलो-
 कहु नंदनंदन पुरी परमरुचि रूप । सूरदास प्रभु कंस मारिकै होहु यहांके भूप ॥६१॥ मथुरा हर-
 पित आजु भई । ज्यों युवतीपति आवत सुनिकै पुलकित अंग मई ॥ नवसत साजि शृंगार बनी
 सुंदरि आतुरपंथ निहारति । उडत ध्वजा तनु सुरति बिसारे अंचल नहीं सँभारति ॥ उरज प्रगट मह-
 लनपर कलसा लखति पास बनसारी।ऊंचे अटनि छाजकी शोभा शीश उँचाइ निहारी ॥ जालरंघ
 इकटक मग जोवति किंकिणि कंचन दुर्ग । वेनी लसति कहौ छबि ऐसी महलन चित्रे उर्ग ।
 बाजत नगर बाजने जहँ तहँ और बजत घरिआर । सूर श्याम बनिता ज्यों चंचल पगनृपुर झनका-
 र ॥ ६२ ॥ राग गुंडमलार ॥ नगरके पास जब श्याम आए । देखि रथ चढे बलराम अरु श्यामको गए
 अकूर तिन लै आए॥कंसके दूत जहां तहांति देखिकै गए नृप पास आतुर सुनाए । उठयो झिझकारि कर
 ढाल खड़्गहि लिए रंगरण भूमिके महल बैठयो ॥ कुवलिया मछ मुष्टिक चाणूरसो होहु तुम सजग
 कहि सबन ऐठयो । एक पठवत एक कहत है आइकै एक सों कहत धौं कहाँ आए । सूर प्रभु शहर
 पैठार पहुँचे आइ धनुषके पास जोधा रखाए॥६३॥पुरनारि श्रीकृष्णशोभा परस्पर वदति॥राग धनाश्री ॥ मथु
 रा पुरमें शोर परचो । गर्जत कंस वंश सब साजे मुखको नीर हरचो ॥ पीरो भयो फेफरी अधरन
 हृदय अतिहि डरचो । नंदमहरके सुत दोउ सुनिकै नारिन हर्ष भरचो ॥ इंदु वदन नव जलद सुभग
 तनु दोउ खग नैन कह्यो।सूर श्याम देखत पुर नारी उर उर प्रेम भरचो॥६४॥राग रामकली॥रथपर देखि
 हरि बलराम । निराखि कोमल चारु मूरति हृदय मुकुता दाम ॥ मुकुट कुंडल पीतपट छबि अनुज
 भ्राता श्याम । रोहिणी सुत एक कुंडल गौरतनु सुखधाम ॥ जननि कैसे धरचो धीरज कहाति सब
 पुरवाम । बोलि पठये कंस इनको करै धौं कहा काम ॥ जोरि कर बिधिसों मनावति अशीशै दै
 नाम । न्हात बार न खसै इनको कुशल पहुँचै धाम ॥ कंसको निर्वंश ह्वै है करत इन पर ताम ।
 सूर प्रभु नंद सुवन दोउ हंस बाल उपाम॥६५॥राग कल्याण॥देख री आजु नैन भरि हरिजूके रथकी शोभा।
 योग यज्ञ जप तप तीरथव्रत कीजतहै जेहि लोभा ॥ चारु चक्र मणि खचित मनोहर चंचल चमर
 पताका ॥ श्वेत छत्र मनो शशि प्राची दिशि उदय कियो निशि राका ॥ घन तन श्याम सुदेश
 पीत पट शीश मुकुट उर माला । जनु दामिनि घन रवि तारागण प्रगट एकही काला ॥ उपजत
 छबि कर अधर शंख मिलि सुनियत शब्द प्रशंसा । मानहु अरुण कमल मंडल में कूजत हैं

कलहंसा । मदन गोपाल देखियत हैं सब अब दुख शोक बिसारी । पैठे हैं सुफलकसुत गोकुल लेन जो इहाँ सिधारी ॥ आनंदित चित जनानि तात हित कृष्ण मिलन जिय भाए । सूरदास यदुकुल हित कारण अब माधो मधुपुरी आए ॥६६॥ राग मलार। वे देखो आवत हैं ब्रजते बने वनमाली। घन तन श्याम सुदेह पीतपट सुंदर नैन विशाली ॥ जिनि पहिले पलना पौढे पय पीवत पूतना दाली । अघ बक बच्छ अरिष्ट केशी मथि जलते काढयो काली ॥ जिन हति शकट प्रलंब तृणा वृत इंद्र प्रतिज्ञा टाली । एते पर नहिं तजत अघोड़ी कपटी कंस कुचाली ॥ अब विधु वदन विलोकि सुलोचन श्रवण सुनतही आली। धन्य सु गोकुल नारि सूर प्रभु प्रकट प्रीति प्रतिपाली ॥६७॥ राग भैरव एई माधो जिन मधु मारे री । जन्मतही गोकुल सुखदीन्हों नंददुलार बहुत सारे री ॥ केशी तृणावर्त वृषभासुर हती पूतना जब वारे री । इंद्रकोप वर्षत गिरि धारयो महाप्रबल ब्रजके टारे री ॥ बल समेत शृपकंस बोलाए रचे रंग अति भारे री । सूर अशीश देति सब सुंदरि जीवहिं अपनी माँ प्यारे री ॥६८॥ राग विहागरी भए सखि नैन सनाथ हमारे । मदनगोपाल देखतही सजनी सब दुख शोक बिसारे ॥ पठे हैं सुफलकसुत गोकुल लेन जो इहाँ सिधारे । मल्लयुद्ध प्रति कंस कुटिल मति छल करि इहाँ हँकारे ॥ सुष्टिक अरु चाणूर शैल्युद्ध सुनियत हैं अतिभारे । कोमल कमल समान देखियत ये यशुमतिके वारे । है यह जीति विधाता इनकी करहु सहाय सवारे । सूरदास चिरजीवहु युग युग दुष्ट दलै दोउ नंददुलारे ॥६९॥ अथ दूसरी लीला अकूरकी। राग मारु। यमुना तट आइ अकूर अन्हाए श्याम बलरामको रूप जलमें निरखि बहुरि रथ देखि आचरज पाए ॥ किधौ यह प्रतिबिंब जलमें देखत किधौ निजरूप दोउ हैं सुहाए । चकृत होइ नीरमें बहुरि बुडकी दई सहित सुता सिंधु तहां दरशपाए ॥ दोउ करजोरि करि विनय बहुविधि करी लियो जब रूप तब प्रभु दुहाई । निकसि कै नीरते तीर आयो बहुरि ताहि ढिगबोलि बोले कन्हवाई ॥ कहा तुम और देखत हुते तात तुम कह्यो सब जगत तुमहीं भुलायो । गति तुम्हारी न जानै कोऊ तुम बिना राख प्रभु राख मैं शरण आयो ॥ हरि कह्यो चलौ मथुरापुरी देखिए सहित अकूर पुनि तहां आए । सूर प्रभु कियो विश्राम सब निशि तहां बोधि अकूर निजघर पठाए ॥७०॥ अध्याय ४१ ॥ श्रीकृष्ण मथुरापुर आगमन हेतु ॥ राग भैरव ॥ भोरभयो जागे नंदलाल । नंदराइ निरखत मुख हरषे पुनि आए सब ग्वाल ॥ देखि पुरी अति परम मनोहर कंचनकोट विशाल । कहन लगे सब सूर प्रभु सों होहु इहाँ भूपाल ॥७१॥ राग परज ॥ हरि बल शोभित यों अनुहार । शशि अरु सूर उदैभए मानों दोऊ एकहि बारा ॥ ग्वाल बाल सँग करत कौतूहल गवनपुरी मंझार । नगर नारि सुनि देखन धाई रतिपति गेहबिसार ॥ उलटि अंग आभूषण साजत रही न देह सँभार ॥ सूरदास प्रभु दरश देखिके भई चकृत बिचार ॥७२॥ राग धनाश्री ॥ वैदेखो आवत दोऊ जन । गौर श्याम नट नील पीत पट जनु दामिनी मिलीघन ॥ लोचन बंक विशाल चितै कै रहत तब हो सबके मन ॥ कुंडल श्रवण कनक माणि भूषित जडित लाल अतिलोल मीन तन ॥ वंदन चित्रविचित्र अंग शिर कुसुम सुवास धरे नंदनंदन । बलि बलि जाउँ चलहि जेहि मारग संग लगाइ लेत मधुकर गन ॥ धन्य सु भूमि जहां पगधारे जीतहि गेरिषु आजु रंगरन । सूरदास वै नगर नारि सब लेत बलाइ वारि अंचल सन ॥७३॥ अथ रजकवध हेतु । राग रामकली ॥ नृपति रजक अंबर नृप धोवत । देखे श्याम राम दोउ आवत गर्व सहित तिन जोवत ॥ आपुसहीमें कहत हँसत हैं प्रभु हृदय यह शालत । तनक तनकसे ग्वाल छोहरन कंस अबहिं वधि घालत ॥ तृणावर्त प्रभु आहि हमारो इनहीं मारयो ताहि । बहुत अचगरी यहि करि राखी प्रथम मारि हैं याहि ॥ जाको नाम श्याम सोइ खोटो तैसेइ

हैं दोउ वीर । सूर नंद बितु पुत्र कहाए ऐसे जाए हीर ॥७४॥ राग विलावल ॥ अंतर्दामी जानिकै सब ग्वाल
 बोलाए । परखि लिए पाछेनको तेऊ सब आए ॥ सखा वृंद लै तहां गए बृझन तेहि लागे । नृपति
 पास हम जाहिंगे अंबर कछु माँगे ॥ हँसे श्याम मुख हेरि कै धोवत गरवानो । मारत मारत सातके
 दोउ हाथ पिरानो ॥ अबहीं देहैं आइकै कछु हम लै रहैं । पहिरावन जो पाइहैं सो तुमहूँ देहैं ॥
 की पहिलेही लेहुगे हम इहै बिचारे । देहु बहुत गुण मानिहैं आधीन तुम्हारे ॥ मार मार कहि गारि
 दै धृग गाइ चरैया । कंसपासहै आइए कामरी वोढैया ॥ बहुरि अरसते आनिकै तब अंबर लीजो ।
 अरस नामहै महलको जहां राजा बैठे । गारी दैदैं सब उठे भुज निजकर ऐठे ॥ पहिरावनको
 जुरि चले पैहो मल्लनसों । सूर अजाके भोग ए सुनिलेहु नमोसों ॥७५॥ राग विलावल ॥ हम माँगतहैं सहज
 सों तुम अति रिसकीन्हों ॥ कहा करैं तो जाहिंगे जो तुम हमहि न दीन्हों ॥ रिस करियत क्यों सहज हो
 भुज देखत ऐसे । करि आए नट स्वांगसे मोको तुम वैसे ॥ हमहि नृपति सों नातहै ताते
 हम माँगे । बसन देहु हमको सबै कहैं नृपके आगे ॥ नृप आगे लौं जाहुगे बीचहि मरिजैहौ । नेक
 जीवनकी आशहै ताहु बिन हैहौ ॥ नृप काहेको मारिहै तुमहीं अब मारत । गहर करत हमको
 कहा मुख कहा निहारत ॥ सूर दुहुँनमें मारिहों अति करि अचगरी । वसत तहां बुधि तैसिये वह
 गोकुल नगरी ॥७६॥ राग विलावल ॥ श्याम गह्वो भुज सहजही क्यों मारत हमको । कंस नृपतिकी सौंहहै
 पुनि पुनि कही तुमको ॥ पहुँचा करसों गहिरहे जिय संकट मेल्यो । डारि दियो ताहि शिलापर
 बालक ज्यों खेल्यो ॥ तुरत गयो उड़ि स्वर्गको ऐसे गोपाला । जन्म मरनते रहि गयो वह कियो
 निहाला ॥ रजक भजे सब देखिकै नृप जाइ पुकारचो । सूर छोहरन नंदके नृपसेठिहि मारचो ७७ राग गौरी ॥
 यह सुनिकै नृप त्रास भरचो । सबन सुनाइ कही यहवाणी इह नंदनंद कह्यो ॥ मारो श्याम राम
 दोउ भाई गोकुल देउ बहाइ । आगे दैकै रजक मरायो स्वर्गहि देहु पठाइ ॥ दिन दिन
 इनकी करौं बडाई अहिर गए इतराइ । तौ मैं जो वाही सों कहिकै उनकी खाल कटाइ ।
 सूर कंस इह करत प्रतिज्ञा त्रिभुवननाथ कहाए ॥ ७८ ॥ राग विलावल ॥ रजक मारि हरि
 प्रथमही नृप वसन लुटाए । रंग रंग बहु भाँतिके गोपन पहिराए ॥ आए नगर
 लगारको सब बने बनाए ॥ इकटकर रही निहारिकै तरुणिन मनभाए ॥ जैसी जाके कल्पना तैसेहि
 दोउ आए । सूर नगर नर-नारिके मन चित्त चोराए ॥७९॥ एइ वसुदेवके दोउ ढोटा गौर श्याम नट
 नील पीत पट कलहंसनके जोटा ॥ कुंडल एक काम श्रुति जाके श्रीरोहिणिको अंश । उर
 वनमाल देवकीको सुत जाहि डरतहैं कंस ॥ लै राखे ब्रज सखा नंद गृह बालक भेष दुराइ । सम
 बल बैस विराट मैनेसे प्रगट भएहैं आई ॥ केशी अघ पूतना निपाती लीला गुणनि अगाध ।
 सूर श्याम खलहरन करन मुख अभयकरन सुरसाध ॥८०॥ राग रामकली ॥ येइ कहियत वसुदेव कुमार ।
 कंसत्रास मनमात पठाए कीन्हें नंददुलार ॥ प्रथम पूतना इनहि निपाती काग मरत उठि भाँज्यो ।
 शकटा तृणा इनहि संहारचो काली इनहि निवाज्यो ॥ अघा बका संहारन एइ असुर संहारन आए ।
 सूरज प्रभु हित हेतु भावकै यशुमति बाल कहाए ॥८१॥ राग नट ॥ वैहैं रोहिणीसुत राम । गौर अंग सुरंग
 लोचन प्रलय कैसे ताम ॥ एक कुंडल श्रवणधारी दोत दरशीग्राम । नील अंबर अंगधारी श्याम
 पूरणकाम ॥ महा जे खल तिनहुँ ते अति तरतहै एक नाम । ब्रह्म पूरण सकल स्वामी रहे ब्रजनि
 शिधामा ॥ ताल बन इन बच्छ मारचो ब्रह्म पूरणकाम । सूर प्रभु आकरषि ताते संकर्षणहै नाम ॥८२॥
 राग रामकली ॥ एहैं देवकीसुत श्याम । मुकुट शिर शुभ श्रवण कुंडल करत पूरणकाम ॥ महा जे खल

तिनहुँते अति तरतहैं इक नाम ॥ ब्रह्मपूरण सकल स्वामी रहे ब्रज वसिधाम ॥ नंद पितु माता यशोदा
 बाँधे ऊखल दाम । लकुट लैलै त्रास कीन्हैं करचो इन परताम ॥ ताहि मान्यो हेतु करि इन हँसति
 ब्रजकी वाम । सूर धनि नंद धन्य यशुमति धन्य गोकुल ग्राम ॥ ८३ ॥ अध्याय ॥ ४२ ॥ हरि धनुष
 भूमि आगमन कूबरी उद्धार ॥ राग मारु ॥ धनुषशाला चले नंदलाला । सखा लिए संग प्रभु रंग नाना
 करत देव नर कोउ न लखहि करत व्याला ॥ नृपतिके रजकसों भेंट मगमें भई कह्यो दे वसन हम
 पहर जाहीं । वसन ए नृपतिके जासुके प्रजा तुम ए वचन कहत मन डरत नाहीं ॥ एकही मुष्टिका
 प्राण ताके गए लए सब वसन कछु सखन दीन्हें । आइ दरजी गयो बोलि ताको लयो सुभग अंग
 सजत उन विनय कीन्हें ॥ यों सुदामा कह्यो गेह भ्रम अति निकट कृपाकरि तहां हरिचरणधारी ।
 धोइ पद कमल सों अहार आगेधरी भक्ततासु सब काज सारी ॥ लिए चंदन बहुरि आनि कुबिजा
 मिली श्याम अंग लेप कीयो बनाई । रीझि तेहि रूप दियो अंग सुधो कियो वचन शुभ मानि
 निज गृह पठाई ॥ पुनि गए तहां जहां धनुष बोले सुभट हौस मन जिनि करौ बन
 विहारी । सूर प्रभु छुअत धनु टूटि धरणी परचो शोर सुनि कंस भयो भ्रमत भारी ॥ ८४ ॥
 दूसरी लीला धनुषयज्ञकी विस्तार वदत ॥ राग गुंडमलार ॥ श्याम बलराम गए धनुषशाला । लियो रथते उत-
 रि रजक मारचो जहां कंदराते निकसि सिंह बाला ॥ नंद उपनंद संग सखा एक थल राखि दोऊ
 बने आवैंहि वीर जोटा । असुर सैना खडे देखिकै वे डरे धनुष चहुँ पास रिपु घुटा घोटा ॥ घेरि ली
 न्हें श्याम बलरामको तहां बोलि सब उठे हरि धनुष तोरौ । सूर तुमको सुनै भुजनि बलचंड अति
 हँसत हरि करचो यह वैर जोरौ ॥ ८५ ॥ राग विहागरो ॥ हमको नृप यहि हेतु बोलाए ॥ कहां धनुष कहैं
 हम अति बालक कहि आश्चर्य सुनाए ॥ ठाढे शूर वीर अवलोकत तिनसों कहौ न तोरैं । हमसों
 कहौ खेल कछु खेलैं यह कहि कहि मुख मोरैं ॥ कंस एक तहां असुर पठायो इहै कहत वह आयो । बने
 धनुष तोरे अब तुमको पाछे निकट बोलायो ॥ बालक देखि गहन भुज लाग्यो ताहि तुरतही मारचो ।
 तोरि कोदंड मारि सब योधा तब बल भुजा निहारचो ॥ जाके अस्त्र तिनहितेहि मारचो चले सामुही
 खौरी । सूर सु कुबरी चंदन लीन्हें मिली श्यामको दौरी ॥ ८६ ॥ राग धनाश्री ॥ प्रभु तुमको चंदन मैं ल्याई ॥
 गह्यो श्याम कर कर अपनेसों लिए सदनको आई ॥ धूप दीप नैवेद्य साजिकै मंगल करे विचारी ।
 चरण पखारि लियो चरणोदक धनि धनि कहि दैत्यारी ॥ मेरो जनम कल्पना ऐसी चंदन परसौं
 अंग । सूर श्याम जनके सुखदायक बधे भाव रजु रंग ॥ ८७ ॥ राग गुंडमलार ॥ कुबरी नारि सुंदरी कीन्ही ।
 भावमें वास विन भाव नहि पाइए जानि हृदय हेतु मानि लीन्ही ॥ ग्रीव कर परसि पग पीठि तापर
 दियो उर्वशी रूप पटतरहि दीन्ही । चित्त वाके इहै श्याम पति मिलैं मोहिं तुरत सोई भई नहि
 जात चीन्ही ॥ ताहि अपनी करी चले आगे हरी गए जहां कुवलिया मल्ल द्वारचो । बीच माली
 मिल्यो दौरि चरणन परचो पुहुपमाला श्याम कंठ धारचो ॥ कुशल प्रसन्ननि कहे तुरत मन का
 म लहि भक्तवत्सल नाम भक्त गावैं । ताहि सुखदै चले पौरिही है खरे सूर गजपालसों कहि सुना
 वैं ॥ ८८ ॥ अध्याय ॥ ४३ ॥ कुवलियाहस्ती वा मुष्टिक चाणूर वध ॥ राग कान्हरो ॥ सुनहु महावत बात हमारी । बार बार
 संकर्षण भाषत लेत नहीं ह्याति गज टारी ॥ मेरे कह्यो मानि रे मूरख गज समेत तेहि डारौं मारी ।
 द्वारे खडे रहेहैं कबके जिनि रे गर्व करै जिय भारी ॥ न्यारो करि गयंद तू अजहूँ जान देहिका अंकुश मारी ।
 सूरदास प्रभु दुष्टनिकंदन धरणी भार उतारनकारी ॥ ८९ ॥ राग गुंडमलार ॥ बार बार संकर्षण भाषत बारन
 वनि वारन करि न्यारो । वारन छाँडि देत किन हमको तू जानत मतंग मतवारो ॥ बाहर खडे बात
 सुन मेरी त्रिभुवनपति जिनि जानै वारो । वादिहि मरिजैहै पलभीतर कहे देत नहि दोष हमारो ॥

बात सुनत रिस भरयो महावत तुमहि कहा इतनो रे गारो । वादत बड़े शूरकी नाई अबहिं लेतहाँ
 प्राणतुम्हारो॥वारनहीं करौ वारन सहित फटकहाँ बावरेबात कहि मुख सँभारो॥वादि मरिजाइगो वारन
 हिं छोडि दे वदत बलराम तोहिं बारबारौ ॥ बात मेरी मान गर्व बोलै कहा काल किनि देखि इतरात
 कोरोवाम कर गहि शूंडि डारिहौं अमरपुर हांकदै तुरत गजको हँकारे ॥ बाजसों दूटि गजराज हां
 कत परचो मनो गिरि चरण धरि लपकि लीन्हें । वारि बांधे वीर चहुँधा देखतही वज्र सम थाप बल
 कुंभ दीन्हों॥कूक पारचो लपकि घीच मज डरयो मनु गंडमधिरंध्र झरवो सुखानो॥क्रोध गजपालके
 ठटकि हाथी रह्यो देत अंकुश मसकि कहा सकानो । बहुरि तातो कियो डारि तिनपर दियो आय लपटे
 सुतहु नंद केरोसूर प्रभु श्याम बलराम दोउ इतै उत बीचकरि नाग इत उतहि टेरे९०॥राग गुंडमलार॥
 क्रोध गजराज गजपाल कीन्हों । गरजि घुमरात मद मार गंडनि स्रवत पवन ते वेग तेहि समै ची-
 न्हों ॥ चक्र सों भ्रमत चकृत भए देखि सब चहुँधा देखिए नंद टोटा । चमकि गए वीर सब
 चका चौंधी लगी चितै डरपे असुर घटा घोटा ॥ नील अंबर धौल बरन बलराम बनि पीत अंबर श्याम
 अंग शोभा॥सूर प्रभु चरित पुर नारि देखति खडे महल पर आशिषा देत लोभा॥९१॥कहत हलधर
 कह्यो मानि मेरो । अखिल ब्रह्मण्ड के नाथ हैं ह्यौ खरे मज मारि जीव अब लेहुँ तेरो॥यह सुनत रिस
 भरयो दौरिखेको परचो सूडि झटकत पटाकि कूक पारचो । घात मन करत लै डारि हौं दुहुँनि
 पर दियो गज पेलि आपुन हँकारचो ॥ लपकि लीन्हों धाइ दबकि उर रहे दोउ भ्रम भयो गजहि
 कहाँ गए वैधौं॥अरचो दे दशन धरनी कटे बीर दोउ कहत अवही याहि मारि कैधौं॥खेलि हैं संग दै
 हाँक ठाढ़े भए श्याम पाछे राम भये आगे॥उतहि वै पूछ गहि जात ए शूंडिछै फिरत गज पास चहुँ
 हँसन लागे॥नारि महलन खरीं सबै अतिही डरीं नंदके नंद गज दोउ खिलवौ॥सूर प्रभु श्याम बलराम
 देखति तृषित बचै इक बेर बिधि सों मनावै॥९२॥खेलत गज सँग कुँवर श्याम बलराम दोउ॥क्रोध द्विरद
 व्याकुल अति इनको रिस नेक नहीं चकृत भए योधा तहँ देखत सब कोउ ॥ श्याम झटकि पूछ
 लेत हलधर कर शूंडिदेत महल महल नारि चरित देखत यह भारी । ऐसे आतुर गोपाल चपल नै-
 न मुखरसाल लिए करन लकुट लाल मनो नृत्यकारी । सुरगण व्याकुल विमान मन मन यह करत
 ज्ञान बोलत यह वचन अजहुँ मारचो नहि हाथी । सूरज प्रभु श्याम राम अखिल लोकके विश्राम
 सुर पूरन काम करन नाम लेत साथी ॥ ९३ ॥ राग सोरठ ॥ तब रिस कियो महावत भारी । जो
 नहिं आजु मारिहौं इनको कंस डारिहै मारी ॥ अंकुश राखि कुंभ पर करघ्यो हलधर उठे हँकारी ।
 धायो पवनहुते अति आतुर धरणी दंत खँभारी ॥ तब हरि पूछ गह्यो दक्षिण कर कबुक ओर शिरवारी॥
 पटक्यो भूमि फेरि नहिं मटक्यो लीन्हें दंत उपारी ॥ दुहुँ कर द्विरद दशन, इक इक छबिसों निरखति
 पुर नरनारी॥सूरदास प्रभु सुर सुखदायक मारचो नाग पछारी९४॥दूसरी लीला हस्तीविधा॥राग मारू॥नवल
 नंदनंदन रंगद्वार आए । ताडितसे पीतपट काछनी कसे कटि खौर चंदन किये मुख सुहाए ॥
 निरख्यो रूप जिन भयो सोइ सोइ मगन मातु पितुको पुत्र भाव आयो । ब्रह्मपूरण मुनिन परम
 सुंदर त्रियन कालके रूप सुभटन जनायो ॥ मातुलको देखि हरि कह्यो यों विहँसि करि पंथते टारि
 गजको महावत । दियो फटकार उन धारि अभिमान मन शूंडते दौरि गह्यो ताहि आवत ॥ दंत
 युग विवि युगचरन भीतर निकसि युग करन पूँछको गह्यो जाई । महाकरि सिंह भेंटत महाउरगको
 महाबल गरुड ज्यों गहत धाई ॥ कबहुँ लैजात उत इतै ल्यावत कबहुँ भ्रमत व्याकुल भयो मतुल
 भारी । गयंद ज्यों गेंदको पटाकि हरि भूमिसों दंत दोउ लये निजकर उपारी ॥ भभकिकै दंतते

रुधिर धारा चली छीट छबि बसनपर भई भारी । केसरि चीर पर अबीर मानों परचो खेलत फागु
 डारचो खिलारी ॥ मातुल तजि प्राणसों गयो निर्वाणको सिद्ध गंधर्व जैजै उचारै ॥ देखि लीला ललि-
 त सूरके प्रभुकी नारि नर सकल तनप्राण वारै ॥ ९५ ॥ राग नट्य ॥ नवल नंदनंदन रंगभूमि आए ।
 संग बलराम अभिराम शशि मूर ज्यों निरखि अपने छबिसों सोहाए ॥ द्वार गजराज देखि पीतपट कटि
 कसत मंद मृदु हँसत अति लसत भारी । कछु न कहि परति तब जबहि फिरि हेरिकै छबीली
 पति आसवारी । गर्वको गिरि मनो चलत पाँइन तैसे कुवल्या प्रबल रिस सहित धायो ॥
 बालक मूस ज्यों पूंछ धरि खेलिए तैसे हरि हाथ हाथी गिरायो । गहि पटकि पुहुमि पर नेक नहीं
 मटकियो दंत मनु मृणालसे ऐंचि लीन्हें ॥ कंध धरि चले दोऊ वीर नीके बने निरखि पुरजन धन
 प्राण वारि दीन्हें । शैलसे मल्लवै धाइ आए शरन कोऊ भूले लागे तब गोड पर थरथराने ॥ कंसके
 प्राण भयभीत पिंजरा जैसे नव विहंगम तैसे मरत फरफराने । मधुपुरीकी युवति सब कहति अति
 रति भरी देखौ री देखौ अंग अंगकी लोनाई । सुनत श्रवणन रही देखौ री तेई सही मधुर मूरति
 सुरतिपति न पाई । धन्यराधा केलि वृंदावन कुंज है सभागी ॥ सबै देखौ है लीधौ माई हम अभागी ॥
 धन्य ब्रजबाल नंदलाल गिरिधरनको स्निध्य निरखति रहति प्रेम पागी । अबलसों अबल
 भए सबलसों सबल भए ललितसों ललित तनु प्रकाशी ॥ सूर प्रभु ज्ञान करि ध्यान करि जिन
 जैसी लई मानि मात पितु दुख दूरि डारे विनाशी ॥ ९६ ॥ राग विलावल ॥ देखौ री आवत वै दोऊ । मणि
 कंचनकी राशि ललित अति यह उपमा नहिं कोऊ ॥ किधौ प्रात मानसरोवर ते उडि आए दोउ
 हंस । इनको कपट करै मथुरापति तौ है है निर्वस ॥ जिनके सुने करत पुरुषार्थ तेई हैं की और । मूर
 निरखि यह रूप माधुरी नारि करत मन डौरा ॥ ९७ ॥ राग कान्हरो ॥ सजनी येई हैं गोपाल गुसाई । नंदमहरके
 टोटा जिनकी सुनियत बहुत बडाई ॥ नैनन रूप निरखि देखौ बडभाग परम निधि पाई । चंद्र चकोर
 भेष चातकलौं अवलोको मनलाई ॥ सुंदर श्याम सुदेश पीतपट भुज चंदन चरचित कीन्हें । नटवर
 भेष धरे मनमोहन गज युग दशन कंध धरि लीन्हें ॥ नृपुर चारु चरण कटि किंकिणि वनमाला उर
 पर सोहै । कर कंकण मणि कंठ मनोहर सोको युवति जौन मनमोहै ॥ परमरुचिर मणि कंठ किरन
 गनि कुंडल मुकुट प्रभा न्यारी । विधुमुख मृदु मुसकानि अमृत सम सकल लोक लोचन प्यारी ॥
 सत्य शील संपन्न सु मूरति सुर नर मुनि भक्तन भाए । मूरदास प्रभु दुष्ट बिनाशन गोकुलते मथुरा
 आए ॥ ९८ ॥ राग विलावल ॥ एई सुत नंद अहीरको मारचो रजक वसन सब लूटे संग सखा बलवीरके ॥
 कांधे धरि दोऊ जन आए दंत कुवलिया धीरके । पशुपति मंडल मध्य मनो मणि क्षीरधि नीरधि
 नीरके ॥ उडि आए तजि हंस मात मनो मानसरोवर तीरके । मूरदास प्रभु ताप निवारण हरन संत
 दुख पीरके ॥ ९९ ॥ राग कल्याण ॥ हँसत हँसत श्याम प्रबल कुवल्या मारचो । तुरत दांत लिए
 उपारि कंध पर चले धारि निरखत नर नारि मुदित चकृत गज संहारचो ॥ अतिही कोमल अजान
 सुनत नृपति जिय सकान तनु बिनु जनु भयो प्राण मल्लनिपै आए । देखतही शंकि गए काल
 गुण विहाल भए कंस डरन घेरि लिए दोउ मन मुसुकाए ॥ असुर वरी चहूँ पास जिनके वश भुव
 अकाश मल्लनपै आए न करि गांस नास जियको विचारै । सब कहत भिरहु श्याम सुनत रहत
 सदा नाम हारि जीति घरहीकी कौन काहि मारै ॥ हंसि बोले श्याम राम कहा सुनत रहे नाम
 खेलनको हमहिं काम बालक सँग डोलै । मूर नंदके कुमार यहै राजस विचार कहा कहत बार
 बार प्रभु ऐसे बोले ॥ २६० ॥ रंगभूमि आए अति नंदसुवन वारे । निरखति ब्रजनारि नेह उरते

न बिसारे ॥ देखो री मुष्टिक चाणूरन इनि हकारे । कैसे ये बचैनाथ साँस ऊरध डारे ॥ रजक धनुष जोधा हति दंतगज उपारे । निर्दय इह कंस इनहिं चाहतहै मारे ॥ कहां मल्ल कहां अतिहि कोमल ए भारे ॥ कैसी जननी कठोर कीन्हें जिन न्यारे । बार बार इहै कहति भरि भरि दोउ तारे । सूरज प्रभु बल मोहन उरते नहिं टारे ॥ १ ॥ राग गुंडमलार ॥ बोलि लीन्हों कंस मल्ल चाणूरको कहारे करत क्यों बिलम कीन्हों । वंश निर्वंश करि डारिहों छिनकमें गारि दैदै ताहि त्रास दीन्हों ॥ शत्रुनान्हों जानि रहे अबलौं बैठि जन आपनेको मारिडारौं । द्विरदको दंत उपठाय तुम लेतहैं उहै बल आजु काहेन सँभारौं ॥ भली नहिं करी तुम राखि राख्यो उनहि इहै कहि तुरत वाको पठायो । कछु क्रोध कछु त्रास कछु सोच कछु शोक करें साहस रंगभूमि आयो ॥ परस्पर कहि सबन नृपति त्रास्यो मोहिं सुनहु रे वीर अबलो न मान्यो की मारौ । की मारिडारियो दुहुँनिको होइ सो होइ यह कहत रान्यो ॥ निरखि दोउ वीर तनु डरे मनहि महान इहै बुधि करै ज्यों नीश कीजै । लखति पुरनारि प्रभु सूर दोउ मारिहै कहति है नृपतिपै सुयश लीजै ॥ २ ॥ राग धनाश्री ॥ कहति पुर नर नारि यह मन हमारे । रजक मारयो धनुष तोरि द्वै खंड करे हत्यो गुजराज त्यों इन हु मारे ॥ तृषित अति नारि सबै मल्ल ज्यों ज्यों कहै लखनहिं श्याम हम संग काहे । परस्पर मत करत मारिडारौं इनहिं लखत ए चरित दुहुँ निमिष न चाहै ॥ कहा हैहै दई होन चाहति कहा अबहि मारत दुहुँन हमहि आगे । सूर करजोरि अंचल छोरि बिनवै वचै ए आजु बिधि इहै मांगे ॥ ३ ॥ राग कल्याण ॥ देखो री मल्ल इनहिं मारनको लोरें । अतिही सुंदर कुमार यशुमति रोहिणि वार बिलखति यह कहति सबै लोचन जलढोरें ॥ कैसेहुं ए वचै आजु पठए धौं कौन काज निठुर हियो वाम ताको लोभही पठाए । एतो वालक अजान देखौ उनके सयान कहा कियो ज्ञान इहां काहेको आए ॥ कहा मल्ल मुष्टिकसे चाणूर शिला भंजन कहत भुजा गहि पटकन नंद सुवन हरषैं । नगर नारि व्याकुल जिय जानत प्रभु सूर श्याम गर्व हतन नाम ध्यान करि करि वै हरषैं ॥ ४ ॥ श्रीकृष्ण वचन मल्लप्रति ॥ राग गुंडमलार ॥ सुनौं हो वीर मुष्टिक चाणूर सबै हमहि नृप पास नहिं जान दैहौ । घेरि राखे हमहिं नहिं बूझे तुमहिं जगत में कहा उपहास लैहौ ॥ सबै कैहैं इहै भली मति तुम यहै नंदके कुँवर दोउ मल्ल मारे । इहै यश लेहुगे जान नहिं देहुंगे खोजही परे अब तुम हमारे ॥ हम नहीं कहैं तुम मनहिं जो यह वसी कहतहौं कहा तौ करै तैसी ॥ सूर हम तन निरखि देखिए आपुको बात तुम मनहो यह वसी नैसी ॥ ५ ॥ राग तोडी ॥ जबही श्याम कही यह बानी । यह सुनिकै युवती बिलखानी ॥ मल्लन करयो हमहिं तुम देखो । अपनो बल अपनो तनु पेषो ॥ चितए मल्ल नंद सुत क्रोधा । काल रूप वज्रांगी जोधा ॥ भुजा ऐंठि रज अंग चढायो । गांस धरे हरि ऊपर आयो ॥ श्याम सहज पीताम्बर बांधि हलधर निरखत लोचन आधो ॥ तब चाणूर कृष्णपर धायो । भुजभुज जोरि अंग बलपायो ॥ प्रथम भए कोमल तन ताको ॥ शिथिल रूप मनमें लस वाको ॥ तब चाणूर गर्व मन लीन्हों । दुर्गप्रहार कृष्णपर कीन्हों ॥ फूलहुते अति श्रम करि मान्यो ॥ तेहि अपने जिय मारयो जान्यो ॥ हरष्यो मल्ल मारि भयो न्यारी । कहनलग्यो मुख अहिर बिचारी ॥ हँसत श्याम जब देखत ठाढ़े । सोच परयो तब प्राणनि गाढ़े ॥ फिरि कहि कहि हरि मल्ल हुकारयो । मनो कँदरते सिंह पुकारयो ॥ हांक सुनत सब कोउ भुलान्यो ॥ थरथराइ चाणूर सकान्यो ॥ सूर श्याम महिमा तब जान्यो । निहचै मीचु आपनो आन्यो ॥ ६ ॥ राग धनाश्री ॥ भिरयो चाणूर सों नंदसुत बाँधिकटि पीत पट फेंट रण रंग राजै ॥ द्विरद दंत कर कलित अरु भेष नटवर ललित मल्ल उर सल्लि तल ताल बाजै ॥ पीन भुजलीन जे

लक्षि रंजित हृदय नीलघन शीत तनु तुंग छाती । देखि रही भेष अति प्रेम नर नारि सब वदति
तजि भीर रति रीति राती॥मत्त मातंग बल अंग दंभोलि दल काछनी लाल गजमाल सोहै । कमल
दलनैन मृदुबैन बंदित वदन देखिसुरलोक नरलोक मोहै ॥ बाहुसों बाहु उर जानुसों जानुकी चरणन सों
चरण धरि प्रगट पेलैं।धमकदै घूँवरनि भीरभय बंधुजन सुभट पद पाणिधरि धरनि मेलैं॥चित्तसों चित्त
मनबंधु मनबंधुसों दृष्टिसों दृष्टि धरि शिर चपैया । जानि रिपुहानि तजिकानि यदुराजकी बबकि
उठि फूलि वसुदेवैया ॥०॥ऐसेही राम अभिराम सुरशेष वपुगहि वसुष्टिक महामल्ल मारयो । तोरि
निज जनक उरकेशगहि कंसनर सूर हरि मंचते दुष्ट डारयो ॥७॥ राग भैरौ ॥ श्याम बलराम रंगभूमि
आए । बली लखौ रूप सुंदर परम देखियो प्रबल बल जानि मनमें सकाए ॥ कह्यो गजकुवलिया
हयो भयो गर्व तुम जानि परिहै भिरत सँग हमारे । कालसों भिरैं हम कौन तुम बापुरे पै हृदय
धर्म रहियो विचारे श्याम चाणूर बलिबीर मुष्टिकभिर शीशसोंशीश भुज भुज मिलावैं । वे उनै गहत
वे दौरि उनको गहत करत बल छल नहीं दांव पावैं ॥ धरि पछारयो दोउ बीर दुहुँन मल्लको हराषि
कह्यो सुर ए नंद दोहाई।सूर प्रभु परस लहिलह्यो निर्वाण तेहि सुरन आकास जैजैत यह ध्वनि सुनाई
॥८॥राग गुंडमलार ॥गह्यो कर श्याम भुजमत्त अपने धाइ झटकि लीन्हों तुरत पटक धरनी। भटक अति
शब्दभयो खुटक नृपके हिण अटक प्राणन परयो चटक करनी ॥ लटकि निखन लग्यो
मटक सब भूलिगयो हटक हँकै गयो गटक शिलसो रह्यो मीचु जागी॥मृष्टकौ गद मरदिके चाणूर
चुरुकुट करयो कंसको नुकंप भयो उई रंगभूमि अनुरागरागी । मल्ल जेजे रहे सब मारे तुरत असुर
जोधा सबै तेउ संहारे॥धाइ दूतन कह्यो मल्लकोउ नहिं रहे सूर बलराम हरि सब पछारे ॥९॥ अध्याय
॥ ४४॥ कंसवध उग्रसेन राजहेतु ॥ राग कल्याण॥ मारे सब मल नंदके कुमार दोऊ । कोट सबन भूलिगए
हांकदेत चकृत भए लपकिलपकि हए तुरत उबरयो नहिं कोऊ ॥ जोधा चितवतहि मरे हहरि हहरि
धरनि परे ज्वाला ज्यों जरे डरे सबभए बिनप्राना । तारागन लिपितहोत जैसे दिन प्रकाश यह सुनि
नृप भए निराश रह्यो नहिं ज्ञाना ॥ गलबल सब नगर परयो प्रगटे यदुवंशी । द्वारपाल इहै कही
जोधाकोउ बचे नाहिं कांधे गजदंत धरे सूर ब्रह्म अंशी ॥१०॥राग गुंडमलार॥ नंदके नंद सब मल्लमारे ।
निदरि पौरिया जायनृपपै पुकारे ॥ सुनत ठाढो भयो हांक तिनको दयो दनुज कुल दहन तातन
निहारे । सुभट बोले सबै आईहै पुनि कबै मारिडारे सबै मल्ल मेरे । अचगरी करि रहे बचन
एई कहे डर नहीं करत सुत अहिर केरे ॥ रंग महलनि खरयो कहा रे तुम करयो ढाल कर खड्ग
तहांति चलावै । जिवत अब जाहुगे बहुरि करिहौ राज नहीं जानत सूर कहि सुनावै॥११॥राग धनाश्री॥
भले रे नंदकेछोहरा डर नहीं कहा जो मल्लमारे बिचारे । बारही बारदै हांकये गए कहां
आपने सम असुरते हँकारे ॥ पौरि गाढौ करौ द्वार बीरनि कहे आप दल कारि मुख
उदय गारिदैकै । बहुरि घर जाहुगे धेनु दुहि खाहुगे जानदेहौं तुमहिं प्राणलैकै ॥ कोऊ नहीं रे
वहांलौ दयावत कहा पग द्वैक धरणि हरि सन्मुख आए । चकृत हँकै गयो मीच दरशन भयो
कहारे मीच यह कहि सुनाए ॥ श्याम बलरामको नाम लैलै कहत मीच आई लेन तुमहिं बाजै ।
सूर प्रभु देखि नृप क्रोध पुरी घरी कस्यो कटिपीतपट देव राजै ॥१२॥राग मारु॥ कंध दंत धरि डोलत
रंगभूमि बलहार । उज्ज्वल साँवल वपु शोभित अंग फिरत फिर ॥ द्वारे पैठत कुंजर मारयो डु-
लाय धरनी डारयो । मुष्टिक चाणूर शिल्पसौ शील संहारयो ॥ जिहिं ज्यों जीय रूप बिचारयो
तैसोई रूप धारयो । देवकी वसुदेव जीयको संताप निवारयो ॥ मल्लसुभट परे भगार कृष्णको

परिसाने । देखि यह पराक्रम तब कंस जिय बिलखाने ॥ दुःखदलन अभय दान करै करन दाने ।
जो जिहि जबहि कहैं सबै गोवर्धन राने ॥ कंस सुनि अचेत भयो बजनलगे बाजा । कहि अशीश
गगन उठे सिद्ध सुर समाजा ॥ सुभट रहे देखतही रोके दरवाजा । सूर नंदनंदन गए जहाँ कंस
राजा ॥ १३ ॥ राग मारू ॥ नवल नंदनंदन रंगभूमि राजै श्यामतन पीतपट मनो घनमें तडित मोरके
पंख माथे विराजै ॥ श्रवण कुंडल झलक मनो चपला चमकि हग अरुण कमल दलसे विशाला
मौह सुंदर धनुष बाण सम शिर तिलक केश कुंचित शोभित भृंगमाला ॥ हृदय वनमाल नूपुर
चरणलोल चलत गजचाल अतिबुद्धि विराजै । हंस मानो मानसर अरुन अंबुज सुथल निरखि
आनंद करि हरषि गाजै ॥ कुवलिया मारि चाणूर मुष्टिक पटकि वीर दोऊ कंध गजदंत धारै ।
ढाल तरवारि आगे धरी रहिगई महलको पंथ खोजत न पावत ॥ लातके लगत शिरते गयो मुकुट
गिरि केश धरि लेचले हरषि सावत । चारिभुज धारि तेहि चारु दर्शन दियो चारि आयुध चहुँ
हाथ लीन्हें ॥ असुर तजि प्राण निर्वाण पदको गयो विमलगति भई प्रभुरूप चीन्हें । देखि यह
पुहुप वर्षाकरी सुरन मिलि सिद्ध गंधर्व जैधुनि सुनाई ॥ सूर प्रभु अंगम महिमान कछु कहि परत
सुरनकी गति तुरत असुर पाई ॥ १४ ॥ राग मारू ॥ देखि नृप तमकि हरि चमकि तहांई गए दमकि लीन्हों
गिरहबाज जैसे । धमकि मारचो घाउ गुमकि हृदय रह्यो झमकि गहिकेश लै चले ऐसे ॥ ठेलि
हलधर दियो झेलि तब हरि लियो महलके तरे धरणी गिरायो । अमर जय ध्वनि भई धाक
त्रिभुवन भई कंस मारचो निदरि देवरायो ॥ धन्य वाणी गगन धरणि पाताल धनि धन्यहो धन्य
वसुदेव ताता । धन्य अवतार सुर धरनि उपकारको सूर प्रभु धन्य बलराम भ्राता ॥ १५ ॥
राग विलावल ॥ जयजय ध्वनि तिहुँलोक भई । मारचो कंस धरणि उद्धारचो ओक ओक आनंद मई ॥
रजक मारिकै दंड बिभंज्यो खेल करत गज प्राण लियो । मल्ल पछारि असुर संहारे
तुरत सबनि सुरलोक दियो ॥ पुर नर नारीको सुख दीन्हों जो जैसो फल सोई लह्यो ॥
सूर धन्य यदुवंश उजागर धन्य धन्य ध्वनि घुमरि रह्यो ॥ १६ ॥ राग गुंडमलार ॥ हरष नर नारि
मथुरा पुरीके । सोच सबको गयो दनुज कुल सब हयो तिहुँभुवन जै जयो हरष कूबरी के ॥
निदरि मारचो कंस प्रगट देखत सबै अतिहि दिन अल्पके नंद भए ढोटा । नैन दोऊ ब्रह्मसे परम
सोभातसे भक्तको जैसे शुभहंस जोटा ॥ देवदुंदुभी बजी अमर आनंद भए पुहुप गण वरषही चैन
जान्यो ॥ सूर वसुदेव सुत रोहिणी नंद धनि धनि मिल्यो भुव भार अखिल जान्यो ॥ १७ ॥ राग रामकली ॥
निदरि तुरत मारचो कंस देवनाथा । निदरि मारचो असुर पूतना आदिते धरणि पावन करी भई
सनाथा ॥ लोक लोकन विदित कथा तुरतही गई करन स्तुतिहि जहां तहां आए । देवदुंदुभी
पुहुप वृष्टि जै ध्वनि करै दुष्ट यह मारि सुर पुर पठाए ॥ केश गहि करषि यमुना धार डारिदै सु-
न्यो नृपनारि पति । कृष्ण मारचो । भई ब्याकुल सबै हेतु रोवन लगीं मरनको तुरत जोहत बि-
चारचो ॥ गए तहां श्याम बलराम बोधी सबै कहति तब नारि तुम करी नैसी । नृप सुनहु वाम इह
काम ऐसोई रह्यो जानि । यह बात क्यों कहति ऐसी ॥ मरति काहे कहा तुमहिको यह भई जानि
अज्ञान तुम होति काहे । सूर नृपनारि हरि वचन मान्यो सत्य हरष है श्याम मुख सबनि चाहे ॥ १८ ॥
॥ राग कल्याण ॥ रानिन परबोधि श्याम महलद्वारे आए । कालनेमि वंश उग्रसेन सुनत धाए ॥ झुकि
चरणन परचो आइ त्राहि त्राहि नाथा । बहुतै अपराध परे छिनहुमें सनाथा ॥ महाराज कहि श्रीमुख
लियो उरलाई । हमको अपराध क्षमहुँ करी हम ढिठाई ॥ तबहीं सिंहासन पाँउ उग्रसेन धारे । छत्र

शिर धराइ चमर अपने करदारे ॥ ठाढे आधीन भए देव देव भापै । अपने जनको प्रसाद सारी
 शिर राखै ॥ मोकों प्रभु इती कहा विश्वंभर स्वामी । घट घटकी जानतहो तुम अंतर्धामी ॥
 तौ नृप कहत कहा तुमको यह केती। सेवा तुम जेती करी पुनि देहौ तेती ॥ रजक धनुष गज मछन
 कंस मारि काजा। सूरज प्रभु कीन्हों तब उग्रसेन राजा ॥ १९ ॥ राग विलावल ॥ उग्रसेनको दियो हरि राज ।
 आनंद मगन सकल पुरवासी चमर दुरावत श्रीब्रजराज ॥ जहाँ तहाँ ते यादव आए डरे डरे जे गए
 पराइ । मागध सूर करत सब अस्तुति जै जै श्री यादवराइ ॥ युग युग विरद इहै चलि आयो
 भए बलिके द्वारे प्रतिहार । सूरदास प्रभु अज अविनाशी भक्तन हेतु लेत अवतार ॥ २० ॥ राग विलावल ॥
 मथुरा लोगनि बात सुनी यह उग्रसेनको राज दियो । सिंहासन बैठारि कृपाकरि आपु हाथसों
 चमर लियो ॥ मात पिताको संकट हरिहैं देवन जै ध्वनि शब्द कियो । रानी सबै मरत ते राखीं उनते
 प्रभु नहिँ और वियो ॥ अवहीं सुनि वसुदेव देवकी हरषित ह्वै दुहुनि हियो । सूरदास
 प्रभु आइ मधुपुरी दरशनते पुरलोग जियो २१ राग रामकली ॥ मथुराके लोगन सुखपाए । नटवर भेष काछनी
 काछे नंदनंदन सँग अक्रूर के आए ॥ प्रथमहि रजकमारि अपनेकर गोपवृंद पहिराए । तोरि धनुष
 लीला नटनगर तब गजखेल खिलाए ॥ रंभूभि मुष्टिक चाणूर हति भुजबल तार बजाए । नगरनारि
 देहिं गारि कंसको अजगुत युद्ध बनाए ॥ वरषहिं सुमन अकाश महाध्वनि देव दुंदुभी बजाए ।
 चढि चढि अमर विमान परमसुख कौतुक अंमर छाए ॥ कंस मारि सुरराज काज करि उग्रसेन
 शिरनाए । मात पिता बंदिते छोरिहैं सूर सुयश गुणगाए ॥ २२ ॥ राग रामकली ॥ मथुरा घर घरनि यह बात ।
 रजक धनुष गज मछमारे तनकसे नंदतात ॥ धन्य माता पिता धनि वह धन्य धनि वह राति ।
 जब लियो अवतार धरणी धनि धन्य धनि सो भाति ॥ हंसकेसे जोट दोऊ असुर कियो निपात । सूर
 जोधा सबै मारे कहा जानत घात २३ ॥ अध्याय ॥ ४५ ॥ वसुदेवदर्शन कुबिजा ग्रह आगमन नंदविदा गुरुपुत्र हेतु ॥
 सुन्यो वसुदेव दोउ नंदसुवन आए । त्रियासों कहत कछु सुनति हैं री नारि रातिहू सुपन कछु
 ऐसे पाए ॥ गए अक्रूर तिहि नृपति माँगे बोलि तुरत आए आनि कंस मारे । कहा पिय कहत
 सुनिहै बात पौरिया जाय कैहै रहौ मष्ट धारे ॥ दिये लोचन ढारि नारि पति परस्पर कहा हम
 पाप करि जन्म लीन्हों । सात देखत बधे एक ब्रज दुरि बच्यो इते पर बाँधि हम पंगु कीन्हों ॥ मारि
 डारै कहा बंदिको जीवनधृग मीच हमको नहीं मनन भूल्यो । मरै वह कंस निर्वस विधना करै सूर
 क्योंहुं होइ निर्मूल्यो ॥ २४ ॥ राग जैतथी ॥ इहै कहत वसुदेव त्रिया जिनि रोवहु हो । भाग्य विवश सुख
 दुःख सकल जग जोवहु हो ॥ जलदीन्हें कर आनि कहत सुख धोवहु नारी । कहियतहै गोपाल हरन
 दुख गर्वप्रहारी ॥ कबहुं प्रगट वै होइंगे कृष्ण तुम्हारे तात । आजु कालिह हरि आइहैं यह सपनेकी
 बात ॥ अब जिनि होहि अधीर कंस यम आइ तुलानों । देखत जाइ बिलाइ झार तिनका करि
 जानो ॥ ऐसो सपनो मोहिं भयो त्रिया सत्यकरि मानि । त्रिभुवनपति तेरे सुवनहैं तोहिं मिलैंगे
 आनि ॥ यहि अंतर हरि कह्यो मात पितु कहां हमारे । तहां लै गए अक्रूर श्याम बलराम पधारे ॥
 बज्र शिला द्वारे दियो दरशन ते गयौ छूटि । सहज कपाट उघरि गए ताला कूंची टूटि ॥ जो देखे
 वसुदेव कुँवर दोउ काके ढोटा ए आए । दरश दियो तेहि प्रेम प्रथम जो दरश दिखाए ॥ घाई
 मिले पितु मातको यह कहि मैं निजुतात । मधुरे दोउ रोवन लगे जिनि सुनि कंस डरात ॥ तुरत
 बंदिते छोरि कह्यो मैं कंसहि मारचो । योधा सुभट संहारि मछ कुवल्या पछारचो ॥ जिय
 अपने जिनि डरकरौ मैं सुत तुम पितु मात । दुख बिसरौ अब सुख करौ अब काहे

पछतात ॥ निहचै जननी जानि कंठधरि रोवन लागी । तब बोले बलराम मातु तुमते
 को भागी ॥ बारबार देवै कहे कबहुं गोद खिलाए नाहिं । द्वादश बरस कहाँ रहे मात पिता बलि
 जाहिं ॥ पुनि पुनि बोधत कृष्ण लिखौ नहिं मेटै कोई । जोइ जोइ मनकी साध कहौ मैं करिहौं
 सोई ॥ जे दिन गए सु ते गए अब सुख लूटहु मात । तात नृपति रानी जननि जाके मोसों तात ॥
 जो मन इच्छा होइ तुरत देओ मैं करिहौं । गगन धरणि पाताल जात कतहुं नहिं डरिहौं ॥ मात
 हृदयकी जब कही तब मन बढ्यो आनंद । महर सुवन मैं तौ नहीं मैं वसुदेवकोनंद ॥ राजकरौ दिन
 बहुत जानिको कहैं अब तुमको । अष्टसिद्धि नवनिद्ध देहुं मथुरा घर घरको ॥ रमा सेवकिनी देखैं
 करि करजोरैं दिन याम । अब जननी दुख जिनि करौ करौ जु पूरन काम ॥ धनि यदुवंशी श्याम चहुं
 युग चलत बडाई । शेष रूप मैं राम कहत नहिं बात बनाई ॥ सूरज प्रभु दनु कुल दहन हरन करन
 संसार । ते पाए सुत तुमहिं करि करौ जु सुख विस्तार ॥ २५ ॥ राग देवगंधार ॥ मेरे माथे रीखो चरन ।
 दीनदयालु कंस दुखभंजन उग्रसेन दुखहरन ॥ परम मुदित वसुदेव देवकी गई पाइन परन । मेरो
 दोषं मेटि करुणा करि लैचल गोकुल धरन ॥ ते जन पार भए मनमोहन जे आए तुव शरन ।
 आए सूरदासके जीवन भवजल नवका तरन ॥ २६ ॥ राग रामकली ॥ तब वसुदेव हरषित गात श्याम रामहि
 कंठ लाए हरषि देवै मात । अमर देव दुंदुभि शब्द भयो जैजैकार ॥ दुष्टदलि सुख दियो संतन
 ए वसुदेवकुमार । दुखगयो वहि हरष पूरन नगरके नर नारि ॥ भयो पूरव फल संपूरन लह्यो सुत
 दैतारितुरत विप्रन बोलि पठए धेनु कोटि भँगाइ ॥ सूरके प्रभु ब्रह्म पूरण पाइ हरषे राइ ॥ २७ ॥ राग काफी ॥
 आजुहो निसान बाजै वसुदेव राइकै । मथुराके नर नारि उठे सुखपाइकै ॥ अमर विमान सब कहैं
 हरषाइकै । फूले मात पिता दोऊ आनंद बढाइकै ॥ कंसको भँडार सब देत हैं लुटाइकै । धेनु जे
 संकल्प राखी लई ते गनाइकै ॥ तबि रूपे सोने सजि राखी वै बनाइकै । तिलक विप्रन बंदि दई वै
 दिवाइकै । मागध मंगन जन लेत मनभाइकै ॥ अष्टसिद्धि नवनिधि आगे ठाढी आइकै ।
 सब पुर नारि आई मंगलन गाइकै ॥ अंबर भूषण पटै दई पहिराइकै । अखिल भुवन जन कामना
 पुराइकै । पुरजन धनुं देत हैं लुटाइकै ॥ सूर जन दीन द्वारे ठाढो भयो आइकै । कछू कृपाकरि
 दीजै मोहकौं दिवाइकै ॥ २८ ॥ यज्ञ उपवीत उत्सवा ॥ राग विलावल ॥ बिसरचौ कुल व्यवहार बिचार । हरि हलधर
 को दियो जनेऊ करि पटरस जेवनार ॥ जाके श्वास उसाँस लेतमें प्रगट भए श्रुति चार । तिन
 गायत्री सुने गर्गसों प्रभु गति अगम अपार ॥ बिधिसों धेनु दई बहु विप्रन सहित सर्व लंकार ।
 यदुकुल भयो परम कौतूहल जहां तहां गावत नर नार ॥ मातदेवकी परम मुदित है
 देत निछावर बारंबार । सूरदासकी इहै अशीश है चिरंजीवो दोउ नंदकुमार ॥ २९ ॥ राग धनाश्री ॥ आजु
 परम दिन मंगलकारी । लोक लोकको टीको आयो मुदित सकल नर नारी ॥ शिव
 सुरेश शेष औरहु को गनै चतुरानन करथारी । हरकर पाट बंध नेवछावरि करत रतन
 पटसारी ॥ बाजत ढोल निशान शंख ख होत कुलाहल भारी । अपने अपने लोक चले सब सूरदास
 बलिहारी ॥ ३० ॥ राग विलावल ॥ जब यदुपति कुल कंसहि मारयो । तिहुं भुवन भयो शोर पसारयो ॥
 तुरत माचते धरनि गिरायो । ऐसेहि मारत बिलम न लायो ॥ केश गहे पुहुमी घिसटायो । डारि
 यमुनके बीच बहायो ॥ जा कंसहि तिहुं भुवन डराई । ताको मारयो हलधर भाई ॥ जाके धनुष
 टँकोरत हाथा । आसन छाँडि भजे सुरनाथा ॥ मारत ताहि बिलंब न कीन्हों । उग्रसेनको राजस
 दीन्हों ॥ जैही जै वसुदेव कुमारा । जै हो जै तुम नंद दुलारा ॥ सुर देवी देवै धनि मैया । धन्य

यशोमति त्रिभुवनपति धैया ॥ धन्य अकूर मधुपुरी लाए । सुर अंमर जै जै ध्वनि गाए ॥ दनुज
 वंश निरवंश कराए । धरनी शिरते भार गँवाए ॥ मात पिता बंदिते छोराए । यह बाणी सुरलो-
 कनि गाए ॥ जो जैसे तैसे तेहि भाए । सूरज प्रभु सबको सुखदाए ॥ ३१ ॥ राग धनाश्री ॥ मथुरा दिन दिन
 अधिक विराजै । तेज प्रताप राइ केशोको तीनिलोक पर गाजै ॥ कोटिक तीरथ पग पग जाके
 मधु विश्रात विराजै । करि अस्नान प्रात यमुनाको जियत मरत भै भाजै ॥ श्रीविट्ठल विपुल विनोद
 विहारन ब्रजको बसिबो छाजै । सूरदास सेवक उन्हींको कहत सुनत गिरिराजै ॥ ३२ ॥ कंस मारि सुर
 कारज किए । माता पिता वंदिते छोराए दुख बिसरयो आनंद हिए ॥ उग्रसेनको धाइ मिले हरि
 अभय अचल करि राज्य दियो । असुर वंश निरवंश छिनकमें ऐसो नहिं कोउ और वियो ॥ मिली
 कूबरी चंदन लैकै ऐसेहि हरिको नाम लियो । सुनहु सूर नृप पास जाति है बीच सुकृति अति दरश
 दियो ॥ ३३ ॥ राग रामकली ॥ कूबरी पूरब तपकरि राख्यो । आए श्याम भवन ताहीके नृपति महल
 सब नाख्यो ॥ प्रथमहि धनुष तोरि आवत हैं बीच मिली यह धाइ । तेहि अनुराग वश्य भए ताके
 सो हित कह्यो न जाइ ॥ देवकाज करि आवन कहिगए दीन्हों रूप अपार । कृपा दृष्टि चितवतही
 श्रीभई निगम न पावत पार ॥ हमते दूरे दीनिके पाछे ऐसे दानिदयाल । सूर सुरन करि काज तुर-
 तहीं आवत तहां गोपाल ॥ ३४ ॥ कियो सुरकाज गृह चले ताके । पुरुष अरु नारिको भेद भेदा
 नहीं कुलिन अकुलीन आवतहौ काके ॥ दास दासी श्याम भजनते हूजिए रमा सम भई सो
 कृष्ण दासी । मिली वह सूर प्रभु प्रेमचंदन चरचिकै मनो कियो तप कोटि कासी ॥ ३५ ॥ राग रामकली ॥
 भक्त वछल श्रीयादवराई । गेह कूबरीके पगधारे जाति पाँति बिसराई ॥ पूरब भाग
 मानि तिन अपने चरण गही उठि धाई । सुरति रही नहिं गेह देहकी आनंद
 उर न समाई ॥ प्रभु गहि बाँह पास बैठारी सो सुख कह्यो न जाइ । सूरदास प्रभु सदा भक्तवश रंक न
 गनहि न राइ ॥ ३६ ॥ राग नट ॥ कुबिजा सदन आए श्याम । कृपा करि हरि गए प्रथमहि भई
 अनूपम वाम ॥ प्रीतिके वश दीनबंधु सु भक्तवत्सल नाम । मिली मारग मलय लैकरि भए पूरण
 काम ॥ उर्वशी पटतरहि नाहीं रमाके मनताम । सूर प्रभु महिमा अगोचर बसे दासी घाम ॥ ३७ ॥
 राग धनाश्री ॥ कुबिजा हरिकी दासी आहिजैसे आपु भाजि गोकुलरहे तैसे राखी ताहि ॥ रूप रतन दुराइ हो
 राख्यो जैसे नली कपूर । जैसे छाप अमोल रतन भरि कह जानै जो क्रूर ॥ वैसेहि रही कूबरीदासी अविना-
 शी की आहि । सूरदास प्रभु कंस मारिकै लई आनि तिहि चाहि ॥ ३८ ॥ मथुराके नर नारि कहै कहा
 मिली कुबिजा चंदनलै कहा श्याम तेहि कृपा चहै ॥ कहा तपस्या करि यह राख्यो जहां तहां पुर
 इहै चहै । कछु नहिं कहि आवत हरि देखी इहै कह्यो प्रभु हेत वहै । तबहिं कृपाकरि सुंदरि कीन्ही
 यह महिमा मोहिं कहत न आवै । सूरदास भाग कूबरीको कौन ताहि को पटतर पावै ॥ ३९ ॥
 कुबिजासी भागिनिको नारी । कंसहि चंदन लिए जातही बीच मिले ताको दै तारी ॥ हरि करि
 कृपा करी पटरानी कुबिज मिटायो डारि । इहई बात मधुपुरी जहँ तहँ दासी कहत डरत जिय
 भारि ॥ कुबिजा कहत न भूल्यो कोऊ ताहि उठत दै दै सब गारि । सुनहु सूर रानी सुनि पावै त्रास
 होत जिन मारै डारि ॥ ४० ॥ राग धनाश्री ॥ कुबिजा तौ बडभागी है । करुणाकरि हरि जाहि निवाजी आपु रहे
 तहँ राजी है ॥ पूरब तप फल बिलसन लागी मनके भाव पुरावति है । मथुरा नर नारिन मुख
 बानी रह्यो जहँ तहँ जै जै है ॥ दैत्य बिनाशी तुम तहां आए यह लीला जानै पै वै । सूरदास प्रभु
 भावहिहके वश मिलत कृपाकै अति सुख देवै ॥ ४१ ॥ श्रीवसुदेव वचन राजा प्रति ॥ राग रामकली ॥ हरिकी कृपा

जापर होइ । ताहि कछु यह बहुत नहिँ हृदय देखो जोइ ॥ कहा संशय करत याको कृतिकहै यह
 वात । असुर सैन्य संहारि डारे भक्तजनसों नात ॥ हरन करन समरथ येईहैं कहौ बारंवार । सूर हरि
 की कृपाते खल तरिगए संसार ॥ ४२ ॥ कंसवधलीला दूसरी ॥ राग विलावल ॥ कृष्ण कृपा सबहीते न्यारी ॥ को-
 टि करै तप नहीं मुरारी ॥ भाव भजन कुबिजा भई प्यारी । दनुज भाव बिनु मारे डारी ॥ प्रथमहि
 रजक मारि पुर आए । धनुषयज्ञ कहैं कंस बोलाए ॥ तोरि कोदंड वीर सब मोरे । हित कुबिजाके धाम
 सिधारे ॥ रूपराशि निधि ताको दीन्हों । आवन कह्यो गमन तब कीन्हों ॥ तहां कुवलिया
 राख्यो द्वारे । जात श्याम बलराम बिचारे ॥ माली मिल्यो माल शुचि लैकै । लीन्हों कंठ श्याम अति
 रुचिकै ॥ मनकामना तुरत फल पायो । कोटि कोटि मुख अस्तुति गायो ॥ आतुर गयो कुवलिया
 पासा । सूरज चंद्र धरणि परगासा ॥ बालक देखि महावत हरष्यो ॥ कान्हू घूंछ धरि तुछकरि परष्यो ॥
 कौतुक करि मतंग तब मारयो । गहि पटक्यो तनु नेक न टारयो ॥ दुहुँन एक इक दंत प्यारयो ।
 जहाँ मल्ल तहँको पग धारयो ॥ देखत रूप त्रास जिय आन्यो । मन मन काल आपनो जा-
 न्यो ॥ तब कोमल द्रशे यदुराई ॥ तुरत गए आगे सब धाई ॥ मारे मल्ल एक नहिँ उबरयो ।
 पटक धरणि नृप श्रवणन घुमरयो ॥ क्रोध सहित तक कंस प्रचारयो । ताहि प्रगाटि तुरतहिँ तेहि
 मारयो ॥ अमर नाग नर कहि कहि भाखै सदा आपने जनको राखै ॥ राजा उग्रसेन कहवाए । मात
 पिता बंदिते छोडाए ॥ इतने काज किए हरि नीके । कुबिजा प्रेम बँधे हरि हीके ॥ आतुर हरि ताके
 गृह आए । रानिन बोधि महल नहिँ भाए ॥ चितवत मंदिर भए अवासा । महल महल लाग्यो
 मणि पासा ॥ जबहिँ सुने कुबिजा हरि आए । पाटम्बर पाँवडे डसाये ॥ कुबिजा ते भई राजकु-
 मारी । रूप कहाँ कहौ कृष्ण पियारी ॥ टेढी जे हरि सूधी कीन्हों । लक्षण अंग अंग प्रति
 दीन्हों ॥ राजा हरि कुबिजा पटरानी । मथुरा घर घर सबही जानी ॥ गोप सखा यह सुनत न
 माने । त्रासहिमें सब रहत सकाने ॥ मारयो कंस सुनत सब शंके । बलमोहन आए नहिँ दंके ॥ ब्रजते
 चले भए षट यामा ॥ ब्याकुल महरि होति लैनामा ॥ प्रजा जानि मन मन डरपाहीं । कैसे बल मोहन
 ब्रज जाहीं ॥ यहि अंतर हरि आए तहँई । नंद गोप सब राखे जहँई ॥ नृप उद्धव अक्रूरहि लीन्हों ।
 तहां गवन प्रभु सूरज कीन्हों ॥ ४३ ॥ राग विलावल ॥ यदुवंशीकुल उदित कियो । कंस मारि पुहुमी उद्दारी
 सुरन कियो निर्भय सु हियो ॥ घर घर नगर अनंद बधाई मनवांछित फल सबनि लहो । निगड तोरि
 मिलि मात पिताको हरष अनल करि दुखहि दहो ॥ उग्रसेन मथुरा करि राजा ऐसे प्रभु रक्षक
 जनको । कहूँ जनमें कहूँ कियो पान पय राखि लेत भक्तन पनको ॥ आपुन गए नंद जहँ बासा
 हलधर अग्रज संग लिए । सूर मिले नंद हरषवंत है ब्रज चलि हैं अति हरष हिए ॥ ४४ ॥
 अरस परस सब ग्वाल कहैं । जब मारयो हरि रजक आवतही मन जान्यो हम नहिँ निबहैं ॥
 वैसो धनुष तोरि सब योधा तिन मारत नहिँ विलम करयो । मल्ल मतंग तिहुँपुर गामी
 छिनकहि में सो धरणि परयो ॥ वैसे मल्लनि दाँव बिसारे मारि कंस निरबंश कियो ।
 सुनहु सूर ये हैं अवतारी इनते प्रभु नहिँ और वियो ॥ ४५ ॥ नंद गोप सब सखा निहारत
 यशुमति सुतको भावनही । उग्रसेन वसुदेव उपंगसुत सुफलकसुत वैसे संगही ॥ जबहिँ
 मन न्यारो हरि कीन्हों गोपन मन इह व्यापि गई । बोलि उठे यहि अंतर मधुरे निठुर
 ज्योति जो ब्रह्ममई ॥ अति प्रतिपाल कियो तुम हमरो सुनत नंद जिय झझकि रहे । सूरदास
 प्रभुकी लीला यह वसुदेवसों मोसों वचन कहे ॥ ४६ ॥ राग विलावल ॥ काहि कहत प्रतिपाल

कियो । मोसों कहत होहि जिनि ऐसी नैन ढरत नहिं भरत हियो ॥ शंकितनंद निरसबानी सुनि
 विलम करत कहा क्यों न चलैं । कंसमारि रजधानी दीन्ही ब्रजते बहुरौ आनि मिलैं ॥ मनहीं
 मन ऐसी उपजावत वै उत ब्रह्म ब्रह्म दरशी । सूर पिताको मात कौनके रहत सबनमें वै परशी ॥ ४७॥
 तब बोले हरि नंदसों मधुरे करि बानी । गर्गवचन तुमसों कही नहिं निहचै जानी ॥ मैं आयो
 संसारमें भुवभार उतारन । तिनको तुम धनि धन्यहौ कीन्हों प्रतिपारन ॥ मात पिता मेरे नहीं
 तुमते अरु कोऊ । एक बेर ब्रजलोगको मिलिहौ सुनौ सोऊ ॥ मिलन हिलन दिनचारिको तुम
 तो सब जानौ । मोको तुम अति सुखदियो सो कहा बखानौ ॥ मथुरा नर नारी सुनै व्याकुल
 ब्रजवासी ॥ सूर मधुपुरी आइकै ये भए अविनासी ॥ ४८ ॥ राग ढोढी ॥ निठुर वचन जिनि कहौ कन्हाई ।
 अतिही दुसह सह्यो नहिंजाई ॥ तुम हँसिकै बोलत ए बानी । मेरे नयन भरत है पानी ॥ अब ए
 बोल कबहुँ जिनि बोलौ । तुरत चलौ ब्रज आँगन डोलौ ॥ पंथ निहारत यशुमति द्वैहै । तुमबिन
 मोको देखि सुखैहै ॥ तब हलधर नंदहि समुझावत । कछु करि काज तुरत ब्रज आवत ॥ जननि
 अकेली व्याकुल है है । तुमहिं गए कछु धीरज लैहै ॥ बहुत कियो प्रतिपाल हमारो । जाइ कहाँ
 उरध्यान तुम्हारो ॥ व्याकुल होन जननि जिनि पावै । बार बार कहि कहि समुझावै ॥ व्याकुल
 नंद सुनत ए बानी । डसि मानौ नागिनी पुरानी ॥ व्याकुल सखा गोप भए व्याकुल । अंतकदशा
 भयो भय आकुल ॥ सूर श्याम मुख निरखत ठाढे ॥ मानौ चितेरे लिखि सब काढे ॥ ४९ ॥ राग सोरठ ॥
 गोपालराइ हौं न चरण तजि जैहौं । तुमहिं छाँडि मधुवन मेरे मोहन कहा जाइ ब्रज लैहौं ॥ कैहौं
 कहा जाइ यशुमतिसों जब सन्मुख उठि ऐहैं । प्रातसमय दधि मथत छाँडिकै काहि कलेऊ दैहैं ॥
 बारहवर्ष दयो हम ठाढो यह प्रताप बिनुजाने । अब तुम प्रगट भए वसुदेव सुत गर्गवचन परमाने ॥
 कत हम लागि महारिषु मारे कत आपदा बिनासी । डारि न दियो कमल करते गिरि दबि मरते
 ब्रजवासी ॥ बासर संग सखा सब लीन्हें टेरि न धेनु चरैहौ । क्यों रहिहैं मेरे प्राण दरश बिनु
 जब संध्या नहिं ऐहौ ॥ अब तुम राज्य करौ कोटिक युग मातपिता सुख दैहौ । कबहुँक तात
 तात मेरे मोहन या मुख मोसों कैहौ ॥ ऊरध श्वास चरण गति थाक्यो नैनन नीर न रहाइ । सूरनंद
 बिछुरेकी वेदन मोपै कहिय न जाइ ॥ ५० ॥ राग विलावल ॥ वेगिब्रजको फिरिये नंदराइ ॥ हमहिं तुमहिं सुत
 तातको नातो और परचो है आइ ॥ बहुत कियो प्रतिपाल हमारो सो नहिं जीते जाइ ॥ जहां रहै तहँ
 तहाँ तुम्हारे डारो जिनि बिसराइ ॥ माया मोह मिलन अरु बिछुरन ऐसेही जगजाइ ॥ सूर श्यामके निठुर
 वचन सुनि रहे नयन जल छाइ ॥ ५१ ॥ राग नट्य ॥ यह सुनि भए व्याकुल नंद । निठुर बाणी कही जब
 हरि परि गए दुखफंद ॥ निरखि सुख सुख रहे चकृत सखा अरु सब गोप । चरित ए अक्रूर कीन्हें
 करत मन मन कोप ॥ धाइ चरणन परे हरिके चलहु ब्रजको श्याम । कंस असुर समेत मारे सुर-
 नके करि काम ॥ मोचि बंदन राजदीनों हर्ष भए वसुदेव । सूर यशुमति बिनु तुम्हारे कौन ज्ञानै
 देव ॥ ५२ ॥ राग सोरठ ॥ नंद विदा है घोष सिधारौ । बिछुरन मिलन रच्यो बिधि ऐसो यह संकोच
 निवारौ ॥ कहियो जाइ यशोदा आगे नैन नीर जिनि डारौ । सेवा करी जानि सुत अपने कियो
 प्रतिपाल हमारौ ॥ हमैं तुम्हें कछु अंतर नाहीं तुम जिय ज्ञान बिचारौ । सूरदास प्रभु यह बिन-
 तीहै उर जिनि प्रीति बिसारौ ॥ ५३ ॥ राग सोरठ ॥ मेरे मोहन तुमहिं बिना नहिं जैहौं । महारि
 दौरि आगे जब ऐहै कहा ताहि मैं कैहौं ॥ माखन मथि राख्यो द्वैहै तुम हेतु चलौ मेरे वारे ।
 निठुर भए मधुपुरी आइकै काहे असुरन मारे ॥ सुख पायो वसुदेव देवकी अरु सुख सुरन

दियो । यहै कहत नँदगोप सखा सब विदरन चाहत हियो ॥ तब माया जडता उपजाई ऐसो
 प्रभु यदुराई । सूर नंद परबोधि पठावत निठुर ठगोरी लाई ॥५४॥ राग नट ॥ नंदहि कहत हरि ब्रज
 जाहु । कितिक मथुरा ब्रजहि अंतर जिय कहा पछिताहु ॥ कहा ब्याकुल होत अतिहीं दूरिहुं
 कहूँ जात । निठुर उरमें ज्ञान बरत्यो मानि लीन्हों बात ॥ नंद भए कर जोरि ठाढे तुम कहे
 ब्रज जाउसूर मुख यह कहत वाणी चित नहीं कहूँ ठाउ ॥५५॥ राग विलावल ॥ तुम मेरी प्रभुता बहुत
 करी । परम गँवार ग्वाल पशुपालक नीच दशालै उच्च धरी ॥ रोग दोष संताप जनमके प्रगट-
 तही तुम सबै हरी । अष्ट महासिधि और नवो निधि करजोरे मेरे द्वार खरी ॥ तीनिलोक अरु
 भुवन चतुर्दश वेद पुराणनसही परी । सूरदास प्रभु अपने जनको देत परमसुख घरी घरी ॥
 ॥५६॥ राग रामकली ॥ उठे कहि माधौ इतनी बात । जेते मान सेवा तुम कीन्हीं बदलो दयो न जाता ॥ पुत्र
 हेतु प्रतिपाल कियो तुम जैसे जननी तात । गोकुल वसत खवावत खेलत दिवस न जान्यो जात ॥
 होहु बिदा घरजाहु गुसाई माने रहियो नात । ठाढो थक्यो उतर नहिँ आवै लोचन जल न समात ॥
 भए बलहीन खीन तनुकंपित ज्यों बयारि वशपात । धकधकात मन बहुत सूर उठि चले नंद पछिता-
 त ॥५७॥ राग नट ॥ फिरिकरि नंदन उत्तर दीन्हों । रोमरोम भरिगयो वचन सुनि मनहुँ चित्र लिखि
 कीन्हीं ॥ यहतो परंपरा चलि आई सुख दुख लाभ अरु हानि । हम पर बबा मया करि रहियो सुत
 अपनो जिय जानि ॥ को जलपै काके पल लागे निरखि वदन शिरनायो । दुखसमूह हृदय परि
 पूरण चलत कंठ भरि आयो ॥ अध अध पद भुव भई कोटि गिरि जौलगि गोकुल पैठो । सूरदा-
 स अस कठिन कुलिशहुते अजहुँ रहत तनु बैठो ॥५८॥ राग धनाश्री ॥ चले नंद ब्रजको समुहाइ । गोप
 सखा हरि बोधि पठाए सबै चले अकुलाइ ॥ काहू सुधि न रही तबकी कछु लटपटात परे पाँइ ।
 गोकुल जात फिरत पुनि मधुवन मन पुनि उतहि चलाइ ॥ विरह सिंधुमें परे चेत बिनु ऐसेहि चले
 बहाइ । सूर श्याम बलराम छाँडिकै ब्रज आये नियराइ ॥५९॥ राग भैरव ॥ बार बार मग जोवति माता व्याकुल
 बिन मोहन बल भ्राता ॥ आवत देखि गोप नंद साथी । विवि बालक बिनु भई अनाथा ॥ धाई धेनु
 बच्छा ज्यों ऐसे । माखन बिना रहैं धौं कैसे ॥ ब्रजनारी हरषित सब धाई । महारि जहाँ तहँ आतुर
 आई ॥ हरषित मात रोहिणी धाई । उर भरि हलधर लेहुँ कन्हवाई ॥ देखे नंद गोप सब देखे । बल
 मोहनको तहां न पेखे ॥ आतुर मिलन काज ब्रजनारी । सूर मधुपुरी रहे मुरारी ॥६०॥ अथ नंद ब्रजआगमन
 यशोदा वचन नंद प्रति ॥ राग सोरठ ॥ नंदहि आवत देखि यशोदा आगे लैन गई । अति आतुर गति कान्ह
 लैनको मनआनंद भई ॥ कहां नवनीत चोर छाँड़े मेरे देखत नारि नई । तेहि खन घोष सरोवर
 मानो पुरइनि हेम मई ॥ गर्ग कथा तब कहि जु सुनाई सो अब प्रगट भई । सूर मोहिं फिरि फिरि
 आवत गहि झगरत नेतरई ॥६१॥ राग कल्याण ॥ श्याम राम मथुरा तजि नंद ब्रजहि आए । बार बार महारि
 कहति जनम धृग कहाए ॥ कहं कहति सुनी नहीं दशरथकी करनी । यह सुनि नंद व्याकुल है
 परे मुरछि धरनी ॥ टेरी टेरी पुहुमी परति व्याकुल ब्रजनारी । मूरज प्रभु कौन दोष हमको
 जु बिसारी ॥६२॥ राग सारंग ॥ उलटि पग कैसे दीन्हों नंद । छाँड़े कहाँ उभय सुत मोहन धृगजीवन मति
 मंद ॥ कै तुम धन यौवन मदमाते कै तुम छूटे बंद । सुफलकसुत वैरी भयो हमको लै गयो
 आनंदकंद ॥ राम कृष्ण बिन कैसे जीजै कठिन प्रीतिके फंद । सूरदास प्रभु भई अभागिनि तुम बिनु
 गोकुलचंद ॥६३॥ राग मलार ॥ दोउ ढोटा गोकुलनायक मेरे । काहे नंद छाँडि तुम आए प्राणजीवन सब केरे ॥
 तिनके जात बहुत दुखपायो रौर परी यहि खेरे । गोसुत गाइ फिरतहँ दहादिश बने चरित्र न थोरे ॥

प्रीति न करी राम दशरथकी प्राण तजे बिन हेरे।सूरनंदसों कहति यशोदा प्रबल पाप सब मेरो॥६४॥
 राग बिहागरो॥यह गति करत नहिं छाजी । हरि बिन विकल भयो न गया परि कुल कुठार जननी कत
 लाजी॥राम कृष्ण तजि गोकुल आए छतियां क्षोभरही क्यों साजी । कहा अकाज भयो दशरथकों
 लइ जु गयो अपनी जग बाजी ॥ बातेंपै रहि रहति कहनको सब जग जात कालकी खाजी । सूर
 यशोदा कहति सु धृग मति जो गिरिधरन विमुखहै भाजी ॥ ६५ ॥ राग सोरठ ॥ यशोदा कान्ह कान्हकै
 बूझै।फूटि न गई तिहारी चारोंकैसे मारग सूझै॥इक तनु जरोजात बिन देखे अब तुम दीने फूकायह छति-
 यों मेरे कुँवर कान्ह बिनु फटि न गएद्वै टूक ॥ धृग तुम धृगवै चरण अहोपति अधबोलत उठि धाए ।
 सूर श्याम बिछुरनकी हमपै देन बधाई आए ॥ ६६ ॥ नंद हरि तुमसों कहा कृह्यो । सुनि सुनि निठुर
 वचन मोहनके क्यों करि हृदय रह्यो ॥ छाँडि सनेह चले मंदिर कत दौरि न चरन गह्यो । फाटि
 न गई वज्रकी छाती कत यहि शूल सह्यो ॥ सुरति करत मोहनकी बातें नैनन नीर बह्यो । सुधि न
 रही अति गलित गात भयो जनु डसिगयो अह्यो ॥ कृष्ण छाँडि गोकुल कत आए चाखन दूध
 दह्यो । तजे न प्राण सूर दशरथलौं हुतौ जन्म निबह्यो ॥६७॥ मेरो अति प्यारो नंदनंद । आए
 कहाँ छाँडि तुम उनको पोचकरी मतिमंद ॥ बल मोहन दोउ पीड नयनकी निरखतही आनंद ।
 सरवर घोष कुमोदिनि ब्रजजन श्याम वदन बिनचंद ॥ काहे न पाँइ परे वसुदेवके घालि पाग
 गरे फंद।सूरदास प्रभु अबके पठवहु सकल लोक सुनिवंद॥६८॥अथ नंदवचन यशोदाप्रति ॥ राग रामकली॥
 तब तू मारिबोई करति । रिसनि आगे कहि जो आवत अबलै भाँडे भरति ॥ रोसकै कर दाँवरी
 लै फिरति घर घर धरति । कठिन हिय करि तब जो बाँध्यो अब बृथा करि मरति ॥ नृपति कंस
 बुलाइ पठयो बहुतकै जिय डरति।इह कछु विपरीत मो मन माँझ देखी परति ॥ होनहारी होइहै सोइ
 अब यहां कत अरति।सूर तब किन फेरि राखे पाइ अब केहि परति ॥ ६९ ॥ यशोदा वचन नंदप्रति
 राग अडानो ॥ कहा ल्यायो तजि प्राणजीवनधन । रामकृष्ण कहि सुरछि परी घर यशोदा देखत लो-
 गन ॥ विद्यमान हरि वचन श्रवण सुनि कैसे गए न प्राण छूटि तन । सुनि यह कथा दशरथकी
 तऊ नहिं लाज भई तेरे मन॥मंद हीन अति भयो नंदअति होत कहा पिछताने छिन छिन । सूर
 नंद फिरि जाहु मधुपुरी ल्यावहु सुत करि कोटि जतन॥७०॥समूहब्रजलोग वचन ॥राग केदारो ॥ कहो नंद
 कहाँ छाँडे कुमार । कैसे प्राण रहे सुत बिछुरत पृछैं गोपी ग्वार ॥ करुणा करै यशोदा माता नैन
 न नीर बहै असरार । चितवत नंद ठगेसे ठाढे मानो हारयो हेम जुआरा॥सुरली नहिं सुनिअत ब्रजमें
 सुर नर सुनि नहिं करतहै वारा।सूरदास प्रभुके बिछुरेते कोऊ नहीं झाँकते द्वार ॥ ७१ ॥ अथ ग्वालवचन
 राग नट ॥ ग्वालन कही कही ऐसी जाइ । भए हरि मधुपुरी राजा बड़े वंश कहाइ ॥ सूत मागध वदत
 विरदहि वरणि वसुधौ सात । राजभूषण अंग भ्राजत अहीर कहत लजात ॥ मात पितु
 वसुदेव देवै नंद यशुमाति नाहिं । यह सुनत जल नैन ढारत मींजि कर पछिताहिं ॥
 मिली कुबिजा मलै लैकै सो भई अरधंग । सूर प्रभु वशभए ताके करत नानारंग ॥ ७२ ॥
 अथ गोपीवचन कुबिजाप्रति परस्पर तरक वदत राग गौरी ॥ कुबिजा मिली कहौ यह बात । मात पिता वसुदेव
 देवकी मन दुख मुख हरपात ॥ सुंदरि भई अंगपरसतहीं करी सुहागिनि भारी । नृपति कान्ह
 कुबिजा पटरानी हँसति कहति ब्रजनारी ॥ सौतिशाल उरमें अतिशाल्यो नखशिख लौं भहरानी ।
 सूरदास प्रभु ऐसेई भाई कहति परस्पर बानी॥७३॥रागकल्याण ॥कुबिजाको नाम सुनत विरह अनल
 जूडी । रिसन नारि झहरि उठी क्रोध मध्य बूडी ॥ आवनकी आश मिटी ऊरध सब श्वासा ।

कुबिजा नृप दासी हम सबकरी निरासा॥लोचन जलधार अगम विरहनदी बाढी । सूर श्याम गुण सुमिरत बैठी कोउ ठाढी ॥७४॥ राग धनाश्री॥ कुबिजा श्याम सुहागिनि कीन्ही । रूप अपार जाति नहिं चीन्ही ॥ आपु भए पति वह अरधंगी । गोपिन नाव धरयो नवरंगी ॥ वै बहु खन नगरकी सोऊतैसोइ संग बन्यो अब दोऊ॥ एक एकते गुणन उजागर । वह नागरि वै तौ अतिनागर॥ वह जोइ कहत श्याम सोइ मानत । निशि दिन वाके गुणहिं बखानत॥ जानि अनोखी मनहिं चोरावै । सूर प्रभु अब नहिं ब्रज आवै॥७५॥ राग रामकली॥ कुबिजा नई पाई जाइ । नवल आपुन बनी नवेली नगर रही खेलाइ ॥ दास दासी भाव मिलिगयो प्रेमते भए एक । निठुर ह्वै सखी गए हमते जानि साह अनेक ॥ लेन जब अकूर आयो तुरत लाग्यो कान । नई कुबिजा उन सुनाई सूर प्रभु मन मान ॥७६॥ राग धनाश्री ॥ कैसे री यह हरि करिहैं राधाको तजिहैं मनमोहन कहाँ कंस दासी धरिहैं ॥ कहा कहति वह भई रानी वै राजा भए जाइ वहां । मथुरा बसत लखत नहिं कोऊ को आयो को रहत कहाँ ॥ लाज बेंचि कूबरी बिसाही संग न छाँडत एक घरी । सूर ताहि परतीति नकाहू मनसि हात यह करनि करी॥७७॥ कुबिजा नहिं तुम देखीहै । दधिबेचन जब जाति मधुपुरी में नीके करि पेखी है ॥ महल निकट मालीकी बेटी देखत जेहि न नारि हँसै । कोटि बार पीतरि ज्यों डाहौ कोटिबार जो कहा कसै ॥ सुनि यह ताहि सुंदरी कीन्ही आपु भए ताको राजी । सूर मिलै मन जाहि जाहिसों ताको कहा करै काजी ॥७८॥ कोटि करो तनु प्रकृति न जाइ । ए अहीर वह दासी पुरकी विधिना जोरी भली मिलाइ ॥ ऐसेनको मुख न लीजै कहा करौ कहि आवत मोहिं । श्यामहि दोष किधौ कुबिजाको इहै कहौ मैं बूझति तोहिं ॥ श्यामहि कहा दोष कुबिजाको चेरी चपल नगर उपहास । टेढी टेकि चलत पंग धरणी यह जानै दुख सूरजदास ॥७९॥ राग नट॥ हरिही करी कुबिजा ठीठ । टहल करती महल महलनि अब संग बैठी पीठ ॥ नेकही मुँहपाइ भूली अति गई इतराइ । जात आवत नहीं कोऊ इहै कहै पठाइ ॥ वे दिना गए भूलि तोको दिवस दशकी बात । सूर प्रभु दासी लोभाने ब्रज वधू अनखात॥८०॥ राग नट ॥ देखो कूबरीके काम । अब कहावत पाटरानी बड़े राजा श्याम ॥ कहत नहिं कोऊ उनहि दासी वै नहीं गोपाल । वै कहावत राजकन्या वै भए भूपाल॥ पुरुष केरी सबै सोहै कूबरी केहि काज। सूर प्रभुकी कहा कहिए बेंचि खाई लाज ॥ ८१ ॥ यह सुनि हमहि आवति लाज । जाय मथुरा कंस मारयो कूबरीके काज ॥ लोग पुरमें बसत ऐसेइ सबन इहै सोहात । कबहुँ कोऊ कहत नाहीं श्याम आगे वात ॥ कहा चेरी नारि कीन्ही कहा आपुन होत । तुम बड़े यदुवंश राजा मिले दासी गोत ॥ अजहुँ कहै सुनाइ कोई करै कुबिजा द्वारि । सूर डाहनि मरत गोपी कूबरीके झूरि ॥ ८२ ॥ राग विलावल॥ कंस वधयो कुबिजा के काज । और नारि हमको न मिली कहुँ कहा गँवाई लाज ॥ जैसे काग हंसकी संपति लहसुन संग कपूर । जैसे कंचन कांच बराबरि गेरू काम सिंदूर ॥ भोजन साथ शूद्र ब्राह्मणके तैसोइ उनको साथ । सुनहु सूर हरि गाइ चरैयाँ तौ भए कुबिजा नाथ॥८३॥ राग गौरी ॥ भामिनि कुबिजासों रँगराते । राजकुमारि नारि जो पवते तौ कबहि न अंग समाते ॥ रीझे जाइ तनक चंदन लै मधुवन मारग जाते । ताकी कहा बडाई कीजै ऐसे रूप लुभाते ॥ ए अहीर वह कंसकी दासी जोरी करी विधाते । ब्रजवनिता त्यागी सूरज प्रभु बूझी उनकी बाते॥८४॥ राग आसावरी॥ वै कहा जानै पीर पराई। सुंदर श्याम कमल-दल लोचन हरि हलधरके भाई ॥ मुख सुरली शिर मोर पखौआ बन बन धेनु चराई । जे यमुना जलरंग रंगे हैं ते ब्रजहुँ नहिं तजत कराई ॥ उहँई भूले देखि कूबरी हम सब गए बिसराइ । सूर

चातकी बूँद भई हो हेरत हेरत रही हिंसाइ ८५॥ राग जैतश्री॥ सखी री काके मीत अहीरा काहेको भरि भरि
 ढारति हौ इन नैन राहके नीर ॥ आपुन पियत पियावत दुहि दुहि इन घेनुनके क्षीर । निशिवासर
 छिन नहिं विसरत है जो यमुनाके तीर ॥ मेरे हियरे दौ लागति है जारत तनुकी चीर । सूरदास प्रभु
 दुखित जानिकै छाँडि गए बे पीरा ॥ ८६॥ अथ श्यामरंगको तरक वदति राग मलार ॥ सखी री श्याम सबै इक
 सार । मीठे वचन सुहाये बोलत अंतर जारनहार ॥ भवै कुरंग काग अरु कोकिल कपटिनकी
 चटसार । कमल नयन मधुपुरी सिधारे मिटि गयो मंगलचार ॥ सुनहु सखी री दोष न काहू जो
 विधि लिखो लिलार । यह करतूति इन्हैकी नाई पूख विविध विचार ॥ उमँगौ घटा नाषि आवै पाव-
 सप्रेम की प्रीति अपारा सूरदास सरिता सर पोषत चातक करत पुकार ८७॥ राग मलार ॥ सखी री श्याम
 कहा हितु जानै कोऊ प्रीति करै कैसे हूँ वे अपनो गुण ठानै ॥ देखो या जलधरकी करनी वरषत पौष आ-
 नै ॥ सूरदास सरवस जो दीजै कारो कृतहि न मानै ॥ ८८॥ राग सारंग ॥ तिनहि न पतीजै री जे कृतही न माने
 ज्यों भवरा रस चाखि चाहिकै तहां जाइ जहां नवतन जाने ॥ कोयल काग पालि कहा कीन्हों मिले
 कुलहि जब भए सयाने । सोई घात भई नंदमहरकी मधुवनते जो आने ॥ तबतो प्रेम विचार न की-
 न्हों होत कहा अवके पछिताने । सूरदास जे मनके खोटे अवसर परे जाहिं पहिचाने ॥ ८९॥ राग धनाश्री ॥
 तबते मिटे सब आनंद । या ब्रजके सब भाग संपदा लैजु गए नंदनंद ॥ विह्वल भई यशोदा डोल-
 त दुखित नंद उपनंद । धेनु नहीं पय स्रवति रुचिर मुख चरति नाहिं तृण कंद ॥ विषम वियोग
 दहत उर सजनी बाढिरहे दुखदंद । शीतल कौन करै री माई नाहिं इहां हरिचंद ॥ रथ चढि चले गहे
 नहिं काऊ चाहिरही मतिमंद ॥ सूरदास अब कौन छोडावै परे विरहके फंद ॥ ९०॥ राग कान्हरो ॥ अब वह
 सुरति होत कत राजनि । दिनदश रहे प्रीति करि स्वारथ हित रहे अपने काजनि ॥ सबै अजान
 भए सुनि सुरली अधिक कपटकी बाजनि । अब मन थक्यो सिंधुके खग ज्यों फिरि फिरि शरन
 जहाजनि ॥ वह नातो तादिनते टूट्यो सुफलकसुत मग भाजनि । गोपीनाथ कहाइ सूर प्रभु मार-
 तहौ कत लाजनि ॥ ९१॥ राग गौरी ॥ ब्रज री मनो अनाथ कियो । सुन री सखी यशोदानंदन सुख संदेह
 दियो ॥ तब हम कृपा श्यामसुंदरकी कर गिरि टेकि लियो । अरु प्रति गाइ वच्छ ग्वालनको जल
 कालिंदि पियो ॥ यह सब दोष हमहिं लागत है बिछुरन फट्यो न हियो । सूरदास प्रभु नंदनंदन बिनु
 कारण कौन जियो ॥ ९२॥ राग केदारो ॥ अब तो हैं हम निपट अनाथ । जैसे मधु तोरेकी माखी त्यों हम
 बिनु ब्रजनाथ ॥ अधर अमृतकी पीर सुई हम बालदशाते जोरि । सो छिडाय सुफलक सुत लैगयो
 अनायासही तोरि ॥ जौलगि पानि पलक मीडत रही तौ लगि चलि गए दूरि । करि निरंध नि-
 बहै दै माई आँखिन रथ पद धूरि ॥ हम निशिदिन करि कृपणकी संपति कियो न कबहूँ भोग ।
 सूर विधाता लिखि राखी वह कुबिजाके मुख जोग ॥ ९३॥ अथ नंद यशोदा वचन परस्पर ॥ राग रामकली ॥
 इक दिन नंद चलाई बात । कहत सुनत गुण राम कृष्णके ह्वे आयो परभात ॥ वैसेहि भोर भयो
 यशुमतिको लोचन जल न समात । सुमिरि सनेह विहारि उर अंतर ढरि आवत ढरिजात ॥ यद्यपि
 वै वसुदेव देवकी हैं निज जननी तात । वार एक मिलि जाहु सूर प्रभु धाइहूनके नात ॥ ९४॥ राग गौरी
 चूक परी हरिकी सिवकाई । यह अपराध कहाँलौं कहिए कहि कहि नंदमहर पछिताई ॥ कोमल चरण
 कमल कंटक कुश हम उनपै बनगाइ चराई । रंचक दधिके काज यशोदा बाँधे कान्ह उलूखल
 लाई ॥ इंद्र कोप जानि ब्रज राखे वरुन फांस मान मेरी निठुराई । सूर अजहुँ नातो मानत है
 प्रेमसहित करै नंद दोहाई ॥ ९५॥ राग सोरठ ॥ हरिकी एकौ बात न जानी । कहौ कंत कहा

तज्यो श्यामको अतिहि बिकल पृच्छति नंदरानी ॥ अब ब्रज सूनो भयो गिरिधर बिनु गोकुल मणि
 बिलगानी । दशरथ प्राण तज्यो छिन भीतर बिछुरत शारंगपानी ॥ ठाढी रही ठगोरी डारी बोलत
 गदगद बानी । सूरदास प्रभु गोकुल ताजि गए मथुराही मनमानी ॥ ९६ ॥ राग सारंग ॥ लै आवहु
 गोकुल गोपालहि । पाँइन परिकै बहु बिनती करि बलि छलि वाह रसालहि ॥ अबकी बार नेक देख-
 रावहु यहि ब्रज नंद आपने लालहि । गाइन गनत ग्वाल गोसुत सँग सिखवत वेणु रसालहि ॥ यद्यपि
 महाराज सुख संपति कौन गिने मोती मणि लालहि । तदपि सूर वे छिन न तजतहैं वा धुँधुचीकी
 मालहि ॥ ९७ ॥ राग सोरठा ॥ सराहों तेरो नंद हियो । मोहनसों सुत छाँडि मधुपुरी गोकुल आनि जियो ॥
 कहा कहौ मेरे लाल लडैते जब तू बिदा कियो । जीवन प्राण हमारे ब्रजको वसुदेव छीनि लियो ॥
 कह्यो पुकारि पार पचिहारी बरजत गमन कियो । सूरदास प्रभु श्यामलाल धन ले परहाथ दियो ॥
 ॥ ९८ ॥ राग विलावल ॥ यद्यपि मन समझावत लोग । शूल होत नवनीत देखि मेरे मोहनके मुख योग ॥
 निशिबासर छतियाँ लै लाऊं बालक लीला गाऊं । वैसे भाग बहुरि फिरि हैहैं मोहन मोद
 खवाऊं ॥ जा कारण मुनि ध्यान धरैं शिव अंग विभूति लगावै । सो बालकलीला धरि गोकुल
 ऊखल साथ बँधावै ॥ विदरत नहीं ब्रजको हृदय हरि बियोग क्यों सहिए । सूरदास प्रभु कमल-
 नैन बिनु कौने बिधि ब्रज रहिए ॥ ९९ ॥ राग कान्हरो ॥ नंदब्रज लीजै ठोंकि बजाइ देहु बिदा मिलि जाहिं
 मधुपुरी जहँ गोकुलके राइ । नैनन पंथ गयो क्यों सूझ्यो उलटि दियो जब पाइ ॥ रघुपति
 दशरथ सुनीहै पर मरिबे गुण गाइ ॥ भूमि मशान विदित ए गोकुल मनहु धाइ धाइ खाइ । सूरदास
 प्रभु पास जाहिं हम देखैं रूप अघाइ ॥ १०० ॥ राग सोरठा ॥ माईहौं किन संग गई । हो ए दिन जानतही
 बूडी लोगनकी सिखई ॥ मोको वैरी भए कुटुंब सब फेरि २ ब्रज गाडी । जो हौं कैसेहु जान पावती
 तौ कत आवत छाँडी ॥ अबहौं जाइ यमुनजल बहिहौं कहा करौं मोहिं राखी । सूरदास वा भाइ
 फिरतहौं ज्यों मधु तोरे माखी ॥ १०१ ॥ राग मलार ॥ हौं तौ माई मथुराही पै जैहौं । दासी है वसुदेव राइकी
 दरशन देखत रहौं ॥ राखि राखि एते दिवस मोहिं कहा कियो तुम नीको । सोऊ तौ अक्रूर
 गए लै तनक खिलौना जीको ॥ मोहिं देखिकै लोग हँसंगे अरु किन कान्ह हँसै । सूर अशीश जाइ
 देहौं जिनि न्हातहु बार खसै ॥ १०२ ॥ राग सारंग ॥ पंथी इतनी कहियो बात । तुम बिनु इहां कुँवर वर मेरे
 होत जिते उतपात ॥ बकी अघासुर टरत न टारे बालक बनहिं न जात । ब्रजपिंजरी रुंधि मानों राखे
 निकसनको अकुलात ॥ गोपी गाइ सकल लघु दीरघ पीत वरण कृश गात । परम अनाथ देखियत
 तुम बिनु केहि अवलंबिये प्रात ॥ कान्ह कान्ह कै टेरत तबधौं अब कैसे जिय मानत । यह व्यवहार
 आजुलौं है ब्रज कपट नाट छल ठानत ॥ दशहू दिशिते उदित होतहै दावानलके कोट । आँखिन मूँदि
 रहत सन्मुखहै नाम कवचदै ओट ॥ ए सब दुष्ट हते अरिजेते भए एकहौं पेट । सत्वर सूर सहाइ
 करौ अब समझि पुरातन हेत ॥ १०३ ॥ राग सारंग ॥ कहियो श्यामसों समझाइवह नातो नहिं मानत मोहन
 मनौ तुम्हारी धाइ ॥ एकबार माखनके काजे राखे मैं अटकाइ । वाको बिलग मानों जिनि मोह-
 न लागत मोहिं बलाइ ॥ बारहिबार इहै लवलागी गहे पथिकके पाँइ । सूरदास या जननीको जिय
 राखौ वदन देखाइ ॥ १०४ ॥ राग विलावल ॥ यद्यपि मन समझावत लोग । शूल होत नवनीत
 देखि मेरे मोहनके मुखयोग ॥ प्रातकाल उठि माखन रोटी को बिनमांगे देहै । अब उहि मेरे कुं-
 वर कान्हको छिन छिन अंकम लैहै ॥ कहियो पथिक जाइ घर आवहु रामकृष्ण दोउ भैया ।
 सूर श्याम कत होत दुखारी जिनके मोसी भैया ॥ १०५ ॥ राग रामकली ॥ मेरो कहा करत हैहै । कहियहु

जाइ वेगि पठवहिं गृह गाइनिको द्वैहै ॥ दीजै छाँडि नगर वारी सब प्रथम बोरि प्रतिपारो । हमहुं
जिय समुझैं नहिं कोऊ तुम तहि हितु हमारो ॥ आजुहि आजु काल्हि काल्हिहि करि भलो जगत
यश लीन्हों । आजहुं काल्हि कियो चाहत हो राज्य अटल करि दीन्हों ॥ परदा सूर बहुत दिन
चलती दुहुंहुनि फबती लूटि।अंतहु कान्ह आयहौ गोकुल जन्म जन्मकी बूटि॥६॥संदेशो देवकीसों
कहियो । हौं तौ धाइ तुम्हारे सुतकी मया करति रहियो ॥ यद्यपि देव तुम जानत उनकी तऊ
मोहिं कहि आवैं । प्रातहि उठत तुम्हारे कान्हको माखन रोटी भावै ॥ तेल उबटनो अरु तातो
जल ताहि देखि भजिजाते । जोइ जोइ माँगत सोइ सोइ देती क्रम क्रम करि करि न्हाते॥सूर पथिक
सुनि मोहिं रैन दिन बढ्यो रहत उर सोच । मेरो अलक लडैतो मोहन हैहै करत सँकोच ॥ ७ ॥
राग सोरठ ॥ मेरो कान्ह कमलदल लोचन । अबकी बेर बहुरि फिरि आवहु कहाँलगे जिय सोचन॥यह
लालसा होत जिय मेरे बैठी देखत रहैं । गाइचरावन कान्हकुँवरसों भूलि न कबहुं कैहों ॥ करत
अन्याय न बरजौं कबहुं अरु माखनकी चोरी । अपने जियत नैन भरि देखौं हरि हलधरकी जोरी॥
एक बेर हैजाहु इहाँलौं अनत कहूँके उत्तर।चारिहु दिक्षस आनि सुखदीजै सूर पढुनई सूतर ॥ ८ ॥
अथ पंथीवाक्य देवकी प्रति ॥ राग आसावरी॥हौं हूँगोकुलहीते आई । देवकी माई पाँइ लागति हौं यशुमति
इहां पठाई ॥ तुमसों महारि जुहार कद्यो है कहहु तौ तुमहि सुनाऊं । बारक बहुरि तुम्हारे
सुतको कैसेहुं दरश न पाँऊं ॥ तुम जननी जग विदित सूर प्रभु हौं हरिको हितधाइ ।
जो पठवहु तौ पाहुन नाते आवहि वदन दिखाइ ॥ ९ ॥ राग सारंग ॥ जो पारि राखतहौ पहिंचानि । तौ
अबकै वह मोहन मूरति मोहिं देखावहु आनि ॥ तुम रानी वसुदेव गेहनी हौं गँवारि ब्रजवासी ।
पठै देहु मेरो लाड लडै तौ वारो ऐसी हाँसी ॥ भली करी कंसादिक मारे सब सुरकाज किये ।
अब इन गैयन कौन चरावै भरि भरि लेत हियो॥खान पान परिधान राजसुख जो कोउ कोटि लडावै।
तदपि सूर मेरे बारे कन्हैया माखनही सच्चुपावै ॥१०॥ राग सोरठ ॥ मेरे कुँवर कान्ह बिनु सब कछु
वैसेहि धरयो रहै । को उठि प्रात होत लै माखन कोकर नेत गहै ॥ सुने भवन यशोदा सुतके गुनि
गुनि शूल सहै । दिन उठि घेरतही घर ग्वारिनि उरहन कोउ न कहै ॥ जो ब्रजमें आनंद हो तो
सुनिमन साहु न गहै।सूरदास स्वामी बिनु गोकुल कौडीहू न लहै॥११॥अथ गोपीविरह अवस्था परस्पर-
वर्णन॥राग सारंग॥चलत गुपालके चले।यह प्रीतमसों प्रीति निरंतरहै ना अरधपले॥धीरज पहिल करी च-
लिवेकी जैसी करत भले । धीर चलत मेरे नैनन देखे तिहिछिन अंश हले ॥ अंश चलत मेरी
वलयन देखे भए अंग शिथले । मनचलि रह्यो हुतौ पहिलेही सबै चले विमले ॥ एक न चलै अब
प्राण सूर प्रभु असलेउ सालसले॥१२॥राग मलार॥लोग सब कहत सयानी बातें।सुनतहि सुगम कहत न-
हि आवत बोलि जाइ नहिं तातें॥पहिले अग्नि सुनत चंदनसी सती बहुत उमहै । समाचार ताते अरु
सीरे पाछे जाइ लहै ॥ कहत फिरत संग्राम सुगम अति कुसुमलता करिवार । सूरदास शिरदेत शूरमा
सोइ जानै व्यवहार ॥१३॥ बातनि सब कोइ जिय समुझावै । किहि विधि मिलनि मिलै वै
माधौ सो विधि कोउ न बतावै ॥ यद्यपि जतन अनेक राचि विधि सारि अशन बिरमावै । तदपि हठी
हमारे नैनन और न देखो भावै ॥ वासर निशा प्राणवल्लभ तजि रसना और न गावै । सूरदास प्रभु
प्रेमहि लगिकै कहिये जो कहि आवैं॥१४॥राग नट॥सब मिलि करहु कछु उपाव।मार मारन चढेउ वि-
रहिनि करहु लीनो चाव ॥ हुताशन ध्वज उमँगि उन्नत चलेउ हरि दिशवाउ । कुसुम शर रिपुनंद
वाहन हरापि हरापित गाउ ॥ वारि भव सुत तात नावारि अब न करिहौं काउ । बार अबकी प्राण

प्यारी विजय सखा मिलाउ ॥ रुचि बिचारन मान कीजै सोई किन वहि जाउ । सूर प्रभुकी शरण
 रहिहौ सकल त्रिभुवन राउ ॥ १५ ॥ राग सारंग ॥ करिगए थोरे दिनकी प्रीति । कहां वह प्रीति कहां यह
 बिछुरन कहां मधुवनकी रीति ॥ अबकी बेर मिलो मनमोहन बहुत भई विपरीति । कैसे प्राण रहत
 दर्शन बिन मनहुँ गए युगबीति ॥ कृपा करहु गिरिधर हम ऊपर प्रेम रह्यो तनु जीति । सूरदास प्रभु
 तुम्हरे मिलन बिना भई भुसपरकी भीति ॥ १६ ॥ राग धनाश्री ॥ प्रीति करि दीनी गरे छुरी । जैसे अधिक
 चुगाइ कपटकन पीछे करत बुरी ॥ मुरली अधर चंप कर कापा मोर मुकुट लट वारिबंक बिलोकनि
 लगी लोभ सम सकति न पंख पसारि ॥ तलफत छाँडि गए मधुवनको बहुरि न कीनी
 सारा ॥ सूर श्याम सुख संग कल्पतरु उलटि न बैठी डार ॥ १७ ॥ राग मलार ॥ देखि माधौकी मित्राई ।
 आई उघरि कनक कलईसी दै निज गए दगाई ॥ हम जानै हरि हितू हमारे उनके चित्त ठगाई ॥ छाँडी
 सुरति सब ब्रजकुलकी निठुर लोग भए माई ॥ प्रेम निबाहि कहा वै जानै साँचे अतिही राई ॥ सूरदास
 विरहिनी विकलमति करमीजे पछिताई ॥ १८ ॥ एकहि बेर दई सब टेरी ॥ तब कंत डोरि लगाइ
 चोरि मनु मुरली अधर धरि टेरी ॥ बाट घाट बीथी ब्रज घर बन संग लगाए फेरी । तिनकी यह करि
 गए पलकमें पारि बिरहदुख बेरी ॥ जो परि झतुर सुजान कहावत कैही समझियो मेरी ।
 बहुरि न सूर पाइहौ हमसी बिनदामनकी चेरी ॥ १९ ॥ राग नट ॥ अबतौ ऐसेई दिन मेरे । कहा करौं
 सखि दोष न काहू हरिहित लोनन फेरे ॥ मृगमद मलय कपूर कुमकुमा ए सब संतत चेरे ।
 मादप वन शशि कुसुम सकोमल तेउ देखियत जु करे रे ॥ बन बन बसत मोर चातक पिक
 आपुन दिए बसेरे । अब सोइ बकत जाहि जोइ भावै बरजे रहत न मेरे ॥ जे हुम साँचि साँचि
 अपने कर कियो बढाय बढेरे । तिन सुनि सूर किसल गिरि वर भए आनि नैन मग घेरे ॥ २० ॥
 ॥ राग सारंग ॥ बिनु गोपाल बैरिनि भई कुंजौ जे वै लता लगत तनु शीतल अब भई विषम अनलकी पुंजै ॥
 वृथा बहुत यमुनातट खगरो वृथा कमलफूलनि अलि गुंजै । पवन पानि घनसारि सुमन दै दधिसुत
 किरिनि भानु भै भुंजै ॥ ए ऊधो कहियो माधोसों मदन मारि कीन्हीं हम लुंजै । सूरदास प्रभु तुम्ह-
 रे दरशको मग जोवत अँखियन भई भुंजै ॥ २१ ॥ राग कान्हरो ॥ करकपोल भुज धरि जंघापर लेखति
 माई नखनकी रेखनि । सोचति बिचार करति वैसी भाँति धरति ध्यान मदन मुख भेजनि ॥ नैन
 नीर भरि भरि जु लेत है गोपी धृग दिन जात अलेखनि । कमलनैन माधो मधुपुरी सिधारे जाके
 गुणन जाने सहसफन शेषनी ॥ अवधि छुडाइ सुनी री सजनी क्यों जीवहि निशि दामिनि देखनि ।
 सूरदास प्रभु चटक गए ज्यों नाना विधि नाचत नट पेखनि ॥ २२ ॥ राग कान्हरो ॥ सोचति राधा लिखति
 नखनमें वचन न कहत कंठ जलतास । छतिपर कमल कमल पर कदली पंकज कियो प्रकाश ॥
 तापर अलि सारंग पर सारंग प्रति सारंग रिपुलै कियो वास ॥ तहां अरिर्षथ पिता युग उदितवारि-
 ज विविध रंग भजो अभास ॥ सारंग मुखते परत अंगु ढरि मना शिव पूजति तपति विनास । सूरदास
 प्रभु हरि विहारिषु दाहत अंग दिखावत वास ॥ २३ ॥ राग नट ॥ मैं सब लिखिशोभा जु बनाई । सजल जलद
 तन वसन कनक रुचि उर बहुदाम रुड़ाई ॥ उन्नतकंध कटि स्त्रीन विशद भुज अंग अंग प्रति मुखदाई ।
 सुभग कपोल नासिका नैन छबि अलक लिहित धृतपाई ॥ जानाति हीय हलोल लेख करि ऐसेहि दिन
 विरमाई ॥ सूरदास मृदु वचन श्रवणको अति आतुर अकुलाई ॥ २४ ॥ राग गौरी ॥ सुरति करि वहाँकी बात
 रोइ दियो पंथी ॥ एकु देखि मारगमें राधा बोलि लियो ॥ कहिहौं तिर कहांते आयो हम जु प्रणाम कियो ॥
 पालागों मंदिर पगु धारौ सुनि दुख यान त्रियो गदगद कंठ हि यो भरि आयो वचन कह्यो न दियो ॥
 सूर श्याम अभिराम ध्यान मन भर भर लेत हियो ॥ २५ ॥ राग मलार ॥ कहियो पथिक जाइ हरिसों मेरो मन

अटको नैननके लेखे । इहै दोष देंदै झगरतहै तब निरखत मुख लगी क्योंन मेखे ॥ कैतो मोहिं
 बताय दबकियो लगी पलक जडजाके पेखे । ते अब अब इनपै भरि चाहत बिधि जो लिखे दरशन
 मुख रेखे ॥ यहिविधि अनुदिन जुरति जतनकरि गनत गए अँगुरिन अबसेखे । सूरदास सुनि इनि
 झगरनिते नहिं चित घटत वदन बिन देखे ॥ २६ ॥ राग इमन ॥ नाथ अनाथनकी सुधि लीजै । गोपी गाह
 ग्वाल गोसुत सब दीन मलीन दिनहि दिन छीजै नैन सजल धारा बाढ़ी अति बूडत ब्रज किन
 करगहि लीजै ॥ इतनी बिनती सुनहु हमारी वारकहु पतियाँ लिखि दीजै ॥ चरणकमल दरशन
 नवनौका करुणासिंधु जगत यश लीजै ॥ सूरदास प्रभु आश मिलनकी एकबार आवन ब्रज कीजै ॥ २७ ॥
 ॥ राग सारंग ॥ दिशि अति कालिंदी अतिकारी । अहो पथिक कहियौ उन हरिसों भई विरहज्वरजारी ॥
 मन पर्यकते परी धरणिधुकि तरंग तलफ नित भारी । तट वारू उपचार चूरजल परी प्रसेद पनारी ॥
 बिगलित कीच कुच कास कुलिन पर पंकज काजल सारी । मनमें भ्रमरते भ्रमत फिरतहै दिशिदि-
 शि दीन दुखारी ॥ निशिदिन चकई बादि बकतहै प्रेममनोहर हारी । सूरदास प्रभु जोई यमुनगति
 सोइ गति भई हमारी ॥ २८ ॥ परेखो कौन बोलको कीजै । ना हरि जाति न पाँति हमारी कहा मानि दुख
 लीजै ॥ नाहिन मोर चंद्रिका माथे नाहिन हर वनमाल । नहिं शोभित पुहुपनके भूषण सुंदर
 श्यामतमाल ॥ नंद नंदन गोपीजन वल्लभ अब नहीं कान्ह कहावत । वासुदेव यादव कुलदीपक
 बंदीजन बर भावत ॥ बिसरयो मुख नातो गोकुलको और हमारे अंग । सूर श्याम वह गई
 सगाई वा मुरलीके संग ॥ २९ ॥ बटाऊ होहिं न काके मति । संगरहत शिरमेलि ठगौ री हरत अचानक
 चीत ॥ मोहे नैन रूप दरशनके श्रवण मुरलिका गीत । देखतही हरिले जु सिधारे बाँधि पछोरी
 पीत ॥ याहीते झुकति इहै मग चितवति सुख जु भए विपरीत । सूरदास वरु भली पिंगला आशा
 तजि परतीत ॥ ३० ॥ राग मलार ॥ कहा परदेशी को पतियारो । पीछेही पछिताहि मिलहुगे प्रीति बढाइ
 सिधारो ॥ ज्यों मृगनाद नादके बींधे लाग्यो बान बिसारो । प्रीतिके लिए प्राण वश
 कीनो हरि तुम यहै बिचारो ॥ बलि अरु बालि सुपनखा बापुरी हरिते कहाँ
 दुरायो । सूरदास प्रभु जानि भलेहौ भरयो भरायो डरायो ॥ ३१ ॥ राग मलार ॥ कहा परदेशीको
 पतिआरो । प्रीति बढाय चले मधुवनको बिछुरि दियो दुखभारो ॥ ज्यों जलहीन मीन तरफत
 ऐसे विकल प्राण हमारो । सूरदास प्रभुके दरशन बिनु ज्यों बिनु दीपक भौन अधियारो ॥ ३२ ॥
 राग आसावरी ॥ सखी री हरिको दोष जानि देहु । ताते मन इतनो दुख पावत मेरोई कपट सनेहु ॥
 विद्यमान अपने इन नैननि सूनो देखति गेहु । तदपि सखी ब्रजनाथ बिना उर फटि न होत बड वेहु ॥
 कहि कहि कथा पुरातन सजनी अब जिन अंतहि लेहु । सूरदास तन योगकरौंगी ज्यों फिरि फागु
 न मेहु ॥ ३३ ॥ राग मलार ॥ अब कछु औरहि चाल चाली । मदनगोपाल बिना या तनुकी सबै बातवदली ॥
 गृह कंदरा समान सेज भई चाहि सिंहू थली । शीतल चंद्र सुतौ सखि कहियत तिनहुं अधिक
 जली ॥ मृगमद मलय कपूर कुमकुमा सींचति आनि अली । एकन फुरत विरह ज्वरते कछु लाग
 ति नाहिं भली ॥ वह ऋतु अमृत लता सुनि सूरज अब विषफलनि फली । हरि विधु मुख नहिं नहिं
 नै फूलति मनसा कुसुद कली ॥ ३४ ॥ राग सारंग ॥ इहिवैरिया बनते ब्रज आवते । दूरहिते वह बैन अधर धरि
 वारंवार बजावते ॥ कबहुँक काहुँ भाँति चतुर चित अति ऊंचे सुरगावते ॥ कबहुँक लैलै नाम मनोहर
 धवरी धेनु बुलावते ॥ इहि विधि वचन सुनाय श्याम घन मुरछे मदन जगावते ॥ आगम सुख उपचार
 विरह ज्वर वासर ताप नशावते ॥ रुचि रुचि प्रेम पियासे नैनन क्रम क्रम बलहिं बढावते । सूरदास

स्वामी तिहि अवसर पुनि पुनि प्रगट करावते ॥ ३५ ॥ राग सारंग ॥ नहिं बिसरति वह रति ब्रजनाथ । हौं
 जु रही इठि रूठि मौन धरि सुखही में खेलत इक साथ ॥ पचिहारे में मनायो न मानौं आपुन चरण छुए
 हरि हाथ । तब रिस धरि सोई उत मुख करि झुकि झाँक्यो उपरैना माथ ॥ रह्यो न परे सुप्रेम आतुर अति
 जानी रजनी जात अकाथ । सूर श्यामहौं ठगी महा निशि पढि जु सुनाए प्रातके गाथ ॥ ३६ ॥
 राग बिलावल ॥ माधौ इतने जतन तब काहेको किए । अपने जान जानि नँदनंदन अनेक भयनसों
 राखि लिए ॥ अघ बक वृषभ वच्छ बधनते व्याकुल जीति दावानलहि पिए ॥ इंद्र मान भेटि
 गिरि करधारि छिन छिन प्रति आनंद हिए ॥ हरि बिछुरत की पीर न जानी वचन मानि हम
 वादि जिए । सूरदास अब वा लालन बिन कहा न सहत ए कठिन हिए ॥ ३७ ॥ राग गौरी ॥ यह कुमया
 जो तबहीं करते । तौ कत इन ये जिवत आजु लौं या गोकुलके लोग उबरते ॥ केशी तृणावर्त वृषभा-
 सुर कहौ कौनके मोरे मरते । भूम प्रलंब व्याल दावानल हरि बिन वरहि निघहनि वरते ॥
 शंखचूड बक बकी अघासुर पति वरुन कौनते डरते । सूर श्याम तौ घोष कहातौ जो तुम
 इती निठुराई धरते ॥ ३८ ॥ राग मलार ॥ हरि हम तब काहेको राखी । जब सुरपति ब्रज बोरन
 लीनो दियो क्यों न गिरि नाखी ॥ अबलौं हमझी जगमें चलती नई पुरानी साखी । सो
 क्यों झूठो होय सखी री गर्ग कथा सो भाषी ॥ तौ हमको होती कत यह गति निशिदिन
 वर्षत आषी । सूरदास यों भई फिरत ज्यों मधु दूहेकी भाषी ॥ ३९ ॥ हरि जूवै सुख बहुरि कहाँ ।
 यदपि नैन निरखत वह मूरति फिरि मन जात तहां ॥ मुख मुरली शिर मोरपंख बने उर बुँधुचनि
 को हारु । आगे धेनु रेनु तनु मंडित चितवति तिरछी चारु ॥ राति दिवस अँग अँग अपने हित हँसि
 मिलि खेलत खात ॥ सूर देखि वा प्रभुता उनकी कही न आवै बात ॥ ४० ॥ राग सारंग ॥ मधुवन तुम क्यों
 रहत हरी । विरह वियोग श्याम सुंदरके ठाढी क्यों न जरी ॥ तुमहौं निलज न लज्जा तुमको फिर
 शिर पुहुप धरी । सुसा सियार अरु वनके पखेरू धृग धृग सबन करी ॥ कौनकाज ठाढी रही वनमें
 काहे न उकठ परी । कपट हेतु कियो हरि हमसे खोटे होहि खरी ॥ गोविंदगुण उरते नहिं बिसरत
 रचि रचि कुसुम भरी । बिन देखे वा नँदनंदनको फिरि फिरि फिरि न फिरी ॥ जब वे मोहन वेणु
 बजावत शाखाटेक खरी । मोहे थावरु जड जंगम मुनि गन ध्यान तरी ॥ बिछुरत हियो बलि
 मोहनके केउ न कल्याण करी । सुख संपति बिछुरी मोहनकी फल फूलनसों करी ॥ नैननते
 बिछुरे नँदनंदन चितते नहीं तरी । सूरदास प्रभु विरह दवानल नखशिखलों पसरी ॥ ४१ ॥ राग केदारो ॥
 जो सखी नाहिंनै ब्रजश्याम । वर्षत होत पल सम अब सुयुग वरयाम ॥ उहै गोकुल लोग वेई
 उहै यमुनाठाम । उहै गृह जिहि सकल संपति वनभयो सोइ धाम ॥ उहै रति पति अछत मुरा-
 रिहि लेन सकतो नाम । सूर प्रभु बिनु अब कलेवर दहन लागे काम ॥ ४२ ॥ राग जैतश्री ॥ हरि न मिले
 न माई री जनम ऐसेही लागो जान । चितवत मग दिवस निशा जात युग समान ॥ चातक पिक
 वचन सखी सुनि न परतकान । चंदन अरु चंद किरति मानो अनेक भान ॥ भूषण तनु पोत
 तज्यो रन आतुर त्रान । भीषमलौ सहत मदन अर्जुनके बान ॥ सोषति तनुसेज सूर चले न चपल
 प्रान । दक्षिण रवि अवाधि अटक इतनी जिय आन ॥ ४३ ॥ राग सारंग ॥ अब योहीं लागे दिन जान ।
 सुमिरत प्रीति लाज लागतिहै उर भयो कुलिश समान ॥ लोचन रहत वदन बिनु देखे वचन सुने
 बिनु कान । हृदय रहत हरि पान परस बिन बिन छिदितन मनसिज बान ॥ मानो सखी रहे नहिं
 मेरे वै पहिले तनु प्रान । बिधि समेत रचि चले नंदसुत विरह व्यथादै आन ॥ बिधि बछ हरे और

पुनि कीन्हें वैसेई वेत विषान । सूरदास ऐसी एकछु यह समुझतहैं अनुमान ॥ ४४ ॥ राग धनाश्री ॥ ऐसो
 कोऊ नाहिने सजनी जो मोहनै मिलावै । बारक बहुरि नंदनंदनको यहाँलौं लै आवै ॥ पौड़न
 पर विनती करि मेरी यह सब दशा सुनावै । निशि निकुंज निशि केलि परमरुचि रासरंगकी सुर-
 ति करावै ॥ और कौनहुं बातकी सकुच न सब बिधिकी उपजावै । पुनि पुनि सूर इहैकरि हरिसों लो-
 चन जरत बुझावै ॥ ४५ ॥ राग केदारो ॥ बहुरचो देखिबो वहिभाँति ॥ अशन बाँटत खात बैठे बालकनकी पाँति
 एकदिन नवनीत चोरत हों रही दुरिजाइ । निरखि मम छाया भजे मैं दौरि पकरे धाइ ॥ पौछि कर
 मुख लिए कनियां तब गई रिसि भागि । वह सुरति जिय जाति नाहीं रहो छाती लागि ॥ जिनि
 घरनि वह मुख विलोक्यो ते लगत अब खान ॥ सूर बिन ब्रजनाथ देखे रहत पापी प्रान ॥ ४६ ॥ राग रामकली ॥
 मरियत देखिवेकी हौसनि । जिनि सतकल्प पलक वर जाते अब सु रही दुख मौसनि ॥ पलकभरेकी
 ओट न सहती अब लागे दिनजान ॥ इतनेहु पर बिन साखन घर घट निकसत नाहिं प्रान ॥ यदपि मोहिं
 बहुतै समुझावत सकुचन लीजतु मानि । अंतर हेर जरत बिन देखे कौन बुझावै आनि । कुबिजा
 पै आवन क्यों पावतु अब तो परि है जानि ॥ लीन बडी यहऊकी सब बात पाछिली ते सब गानि ।
 आए सूर दिना द्वै तौ कहा तौ मानिबो समोसो ॥ कोटि बेर जल औटि सिरावै तऊ कहापति लौसो ॥ ४७
 ॥ राग सारंग ॥ जिय हिय हौसे बिच जे रही ॥ सुन री सखी श्याम सुंदर हाँसि बहुरि न बाँह गही ॥ अब वह
 दिवस बहुरि कब हैहै ऐसे जानि संगही । कहां कान्ह कहां री अब हम कौन बयारि बही ॥ कासों कहों
 कहत नाहिं आवै कहत परै न कही ॥ जो कछु हुती हमारे हरिके हरिके संग निबही ॥ अपने कहतहि
 हलुकी लागै गोविंद गुणनदही । सूरदास काटे तरुवर ज्यों ठाढी रटत रही ॥ ४८ ॥ राग जैतश्री ॥ कहा लौं
 मानों अपनी चूक । बिन गोपाल सखी री यह छतियां हैं न गई द्वै टूक ॥ तन मन धन यौवन ऐसे
 भए भुअंगमको फूक । हृदय जरतहै दावानल ज्यों कठिन विरहकी हुक ॥ जाकी मणि शिरते हरि
 लीनी कहा कहत अति मूक । सूरदास ब्रजवास बसी हम मनो दाहिनो सूक ॥ ४९ ॥ राग मलार ॥
 भलो ब्रज भयो धरणिते स्वर्ग । तब इन पर गिरि अब गिरि पर ए प्रीति कियौ यह दुर्ग ॥ सुरवासुर
 छलबोलवारी गढ अत्र अवधि मिति खुटी । प्रिय पति विरह मदन गढ घेरयो एकौ अलग न टूटी ॥
 नैन तडाग श्रवण मूरति मठ यंत्र सकत वरवानी । रास केलि घन पौरिकोट मनु देखि अमर रज-
 धानी ॥ गोरंभन गोपाल गरजनिघन धूमि दुंदुभिन रौकी । कंटक रोम कँगूरानि प्रति मनो अपनी
 अपनी चौकी ॥ चढत त्रिभंगी सौंज साजि सत धसत नहीं पल आखी ॥ देखहु सूर सनेह श्यामको गग-
 नमंडल हम राखी ॥ ५० ॥ सखी री हरि बिनु हरि दुख भारी । सिंहको सुत हर भूषण ग्रसि सोइ गति
 भई हमारी ॥ शिखर बंधु अरि क्यों न निपारत पुहुप धनुषकै विशेष । चक्षुश्रवा उर हार ग्रसी
 ज्यों छिन द्वितिया वपुरेप ॥ घटमू अशन समै सुत आनन अमी गलित जैसे मेत । जलधर व्यो-
 म अंबुकन मुंचत नैन होड वदि लेत ॥ द्विजपति प्रभु मिलि आनि मिलावहु हरिसुत आरति
 जानि । जैसे हरि कर बंध प्रगट भए हरी आरती मानि ॥ पट आनन बाहन काननमें घन रजनी
 तहैं वासी । सूरदास प्रभु चतुर शिरोमणि सुनि चातक पिक त्रासी ॥ ५१ ॥ राग सोरठ ॥ कहा दिन
 ऐसेही जैहैं । सुन साखि मदनगोपाल अब किन ग्वालन संग रहैं ॥ कबहुं जात पुलिन यमुनाके
 बहुबिहार बिधि खेलत । सुरत होत सुरभी संग आवत बहुत कठिन करि झेलत ॥ मृदु मुसुकानि
 आनि राखो पिय चलत कह्योहै आवन । सूर सो दिन कबहुं तौ हैहै मुरली शब्द सुनावन ॥
 ॥ ५२ ॥ राग मलार ॥ श्याम सिधारे कौने देश ॥ तिनको कठिन करे जो सखी री जिनको पिय परदेश ॥ उन

ऊधो कछु भली न कीन्ही कौन तजनको बैस । छिन बिनु प्रान रहत नहिं हरिविन निशिदिन
अधिक अँदेस ॥ अतिहि निठुर पतियां नहिं पठई काहु हाथ सँदेश । सूरदास प्रभु यह उपजतहै
धरिए योगिनिवेस ॥ ५३ ॥ राग मलार ॥ गोपालहि पावौं धौं केहि देश ॥ शृंगी मुद्रा कनक खपर करिहौं
योगिन भेष ॥ कंथा पहिरि विभूति लगाऊं जटा बँधाऊं केश । हरि कारण गोरखहि जगाऊं
जैसे स्वांग महेश ॥ तन मन जारों भस्म चढाऊं बिरहिन गुरु उपदेश । सूर श्याम बिनु हमहैं
ऐसी जैसे मणि बिन शेष ॥ ५४ ॥ राग केदारो ॥ फिरि ब्रज आइए गोपाल । नंद नृपति कुमार कहिहैं अब
न कहिहैं ग्वाल ॥ मुरलिका सुर सप्त दिशि दिशि चले निसान बजाइ । दिग्विजयको युवति
मंडल भूप परिहैं पाइ ॥ सुरभीसेन सु सखा भट सँग उठैगी खुर रैनु । आवत पत्र मयूर चंद्रिका ल-
सतिहैं रवि ऐनु ॥ सदस पति मधुकरनि करवर मदन आयसु पाइ । द्रुम लता बन कुसुम बानकु
वसन कुटी बनाइ ॥ सकल खग गण पैक पायक पँवरिया प्रतिहार । समै सुख गोविंद ब्रजकौ कहत सूर
बिचार ॥ ५५ ॥ राग जैतश्री ॥ फिरिकै वसो गोकुलनाथा ॥ अब न तुमहिं जगाय पठवैं गोधननके साथ ॥ बरजै
न माखन खात कबहूँ दह्यो देत लुढाय । अब न देहिं उराहनो यशुमतिहि आगे जाइ ॥ दौरि दामन
देहिंगी लकुटी यशोदा पानि । चोरी न देहिं उचारिकै अवगुण न कहिहैं आनि ॥ कहिहैं न चर-
णन देन जावक गुहन बेनी फूल । कहिहैं न करन शृंगार कवहीं वसन यमुना कूल ॥ करिहैं
न कबहीं मान हम हठि हैं न माँगत दान । कहिहैं न मृदु मुरली बजावन करन तुमसों गान ॥
देहु दरशन नंदनंदन मिलनहुंकी आश ॥ सूर हरिके रूप कारन मरत लोचन प्यास ॥ ५६ ॥ राग जैतश्री ॥
हरिसों प्रीतम क्यों बिसराहि । मिलन द्वार मन बसत चंद्रपर चितचकोर पछिताहि ॥ जलमें
रहहि जलहि ते उपजहि जलही बिन कुँभिलाहि । जल तजि हंस जुगै सुक्ताफल मीन कहा उ-
डिजाहि ॥ सोइ गोकुल गोवर्धन सोई सोइ किन करहि अब छाहि । प्रगट न प्रीति करै परदेशी
सुख केहि देश समाहि ॥ धरणी दुखित देखि बादर अति वर्षाकृत बरषाहि । सूरदास प्रभु
तुम्हरे मिलन बिन दुख क्यों हृदय समाहि ॥ ५७ ॥ बारक जाइबो मिलि माधो । को जानै
तनु छूटि जाइगो शूल रहै जिय साधो ॥ पहुनेहु नंद बबाके आवहु देखि लेंउ पल आधो । मिलेही
में विपरीति करी बिधि होत दरशको बाधो ॥ सो सुख शिव सनकादि न पावत सो सुख
गोपिन लाधो ॥ सूरदास राधा विलपतिहैं हरिको रूप अगाधो ॥ ५८ ॥ अथ नैनप्रस्थांबुपद ॥ राग मलार ॥
बारक नैनहुं मिलि जाहु । कमलनैन घनश्याम राधिकहि परसत जो न पत्याहु ॥ जानतहौ
कर कमल विरोधी बरन बिरोधी बाहु । शशिमुख शत्रु पयोधर गिरि अति तहाँ तुम
क्यों वसमाहु ॥ गज गति मंद मराल विरोधी हेम सुरुचि रिपु दाहु । जंच कदलि कटि सिंह विरोधी
न्याय निरखि सकुचाहु ॥ चीन्हलहे चितचोरि सकलअँग एकै सुपत न शाहु । तदपि सूर उनकी
रुचि राखहु कत अधिकै बडराहु ॥ ५९ ॥ राग सारंग ॥ नैननको मत सुनो सयानी । निशिदिन
तपति सिरात न कबहुं यद्यपि उमँगि चलत पटरानी ॥ हों उपचार अमित आनत उर खल भयो
लोक लाज कुलकानी । कछु न सोहाइ दही दरशन दौ वारिज वदन मंद सुसकानी ॥ रूप लकुट अभि-
मान मनहु उलटी उन माँझ समानी । आरज पथ गुरु ज्ञान कुपित कुरि सूरज विकल समानी ॥
॥ ६० ॥ राग मलार ॥ सखी इन नैनन ते घन हारे । बिनही ऋतु बरषत निशिवासर सदा मलिन दोउ
तारे ॥ ऊरध श्वास समीर तेज अति सुख अनेक द्रुम डारे । दिशन सदन करि वसे वचन खग दुख
पावसके मारे ॥ डुरि डुरि बूँद परत कंचुकि पर मिलि अंजन सों कोरे । मानों परमकुटी शिव
कीन्हीं विवि मूरति धरि न्यारे ॥ सुमिरि सुमिरि गर्जत जल छाँडत अंशु सलिलके धारे ।

बूडत ब्रजहि सूरको राखै विनि गिरिवर घर प्यारे॥६१॥नैना सावन भादौ जीते । इनही विषे आनि
 राखे मनो समुदनिहूं जलरीते ॥ वै झरलाय दिनाहैं उघरत ए भूलि न मारग देत । वै वर्षत सबके
 सुख कारण ए नैदनंदन हेत ॥ वै परिमान पुजै दह मानत ए दिन धारन तोरत । यह विपरीति
 होति देखति हो बिना अवधि जग बोरत ॥ मेरे जीव ऐसी आवत भइ चतुराननकी मांझ ।
 सूर बिन मिले प्रलय जानिबो इनहीं दिवसनि सांझ ॥ ६२ ॥ निशि दिन वरषतु नैन हमारे । सदा
 रहत वर्षाऋतु हमपर जबते श्याम सिधारे ॥ नैन अंजन न रहत निशि वासर कर कपोल भए
 कोरे ॥ कंचुकि पट सूखत नहिं कबहूँ उर बिच बहत पनारे । ऐसे सलिल सबै भई काया पल न
 जात रिसटारे । सूरदास प्रभु गोकुल बूडत काहेन लेत उबारो॥६३॥ राग सारंग॥नैनन नाचौहैं झराऊंचे
 चढि टेरत अति आतुर सुरकहि गिरिधर गिरिधर ॥ फिरति सदन दरशनके काजे ज्यों झष सूखे
 सराकौन कौनकी दशा कहौं सुन सब ब्रज तिनते पर ॥ निशि दिन कलमलात सुन सजनी शिरपर
 गाजत मदन अर । सूरदास प्रभु रही मौनहैं कहि न सकति भैनके भर ॥ ६४ ॥
 अति रस लंपट भेरे नैन । तृति न मानत पिवत कमल मुख सुंदरता मधु वैन ॥ दिन अरु रैन
 दृष्टि रसना रस निमिष न मानत चैन । शोभा सिंधु समाइ कहाँलौं हृदय सांकरे ऐन ॥ अब यह
 विरह अजीरण हूँकै वमिलाग्यो दुख दैन । सूर वैद ब्रजनाथ मधुपुरी काहि पठाऊँ लैन॥६५॥ राग केदारो॥
 हरि दरशनको तरसत अँखियां । झांकति झपति झरोखा बैठी कर मीडत ज्यों मखियां ॥ बिछुरी
 वदन सुधानिधि रिसते लगत नहीं पलखियां । इकटक चितवति उडिन सकति जनु थकित भई
 लखि सखियाँ ॥ बार बार शिर धुनति बिसूरति विरह ग्राह जनु भखियाँ । सूर स्वरूप मिले ते
 जीवहि काढि किनारे नखियाँ॥६६॥ राग सारंग॥लोचन व्याकुल दोऊ दीन । कैसे रहैं दरश बिन देखे
 विधु चकोर ज्यों लीन ॥ विवरन भए खंज जो दाधे वारिज ज्यों जल हीन । श्याम सिंधु सों बिछु-
 रिपेरहैं तरफरात ज्यों मीन ॥ ६७ ॥ ज्यों रतिराज बिमुख भृंगीको छिनु छिनु वाणी हीन । सूरदास
 प्रभु बिनु गोपालहि कत विधनै एई कीन ॥ महा दुखित दोउ भेरे नैन । जादिनते हरि चले मधु-
 पुरी नेकु न कबहूँ कीनो सैन ॥ भरे रहत अति नीर न निघटत जानत नहिं दिन रैन । महादुखित
 अतिही भ्रम माते बिन देखे पावत नहिं चैन ॥ जो कबहूँ पलकौ नहिं खोलत चाहन चाहत मूरति
 भैन । छाँडत छिनमें ए जो शरीरहि गहिकै व्यथा जात हरि लैन ॥ रसना इहई नेम लियो है और
 नहिं भाषों मुख वैन । सूरदास प्रभु जबते बिछुरे तबते सब लागे दुख दैन॥६८॥ अँखियाँ करतिहैं
 अति आर । सुंदर श्याम पाहुनेके मिसि मिल न जाहु दिनचार ॥ बाँहथकी वायसहि उडावत
 कब देखों उनहार । मैतौ श्याम श्याम कै टेरति कालिंदीके करार ॥ कमल वदन ऊपर दुइ खंजन
 मानो बूडत वारा । सूरदास प्रभु तुम्हरे दरश बिनु सकैं न पंख पसारा॥६९॥ राग धनाश्री॥लोचन लालच
 ते न टरै । हरि मुख ए रंग संग विधे दाधौ फिरैं जैरौ । ज्यों मधुकर रुचि रच्यो केतकी कंटक कोटि औरै ।
 तैसोई लोभ तजत नहिं लोभी फिरि फिरि फिरी फिरौ । मग ज्यों सहत सहज सरदारन सन्मुख ते
 न टरै । जानत आहि हते तनु त्यागत तापर हितहि करै । समुझि न परै कवन सच पावत जीवत जाइ
 मरै । सूर सुभट हठ छाँडत नहिं काटो शीश लरै॥७०॥ राग सारंग॥लोचन चातक जीवो नहिं चाहत ।
 अवध गए पावसकी आशा क्रम क्रम करि निरवाहत ॥ सरिता सिंधु अनेक अबर सखी विलसत
 पति सजन सनेह । ए सब जल यदुनाथ जलद बिनु अधिक दहत है देह ॥ जबलगी नहिं वरषत
 ब्रज ऊपर नौघन श्याम शरीर । तौ इह तृषा जाय क्यों सूरज आनि वोसके नीरा॥७१॥ राग मलार॥नैनन

नैननकी सुधि लीजै । गोपी गाइ ग्वाल गोसुत सब दीन मलीन दिनहि दिन छीजै ॥
 नैन सजल जलधार बढे अति बडत ब्रजकिन करगहि लीजै । इतनी बिनती सुनहु
 हमारी वारकहु पतिआं लिखि दीजै ॥ चरणकमल दरशन नव नौका करुणासिंधु जगत यश
 लीजै । सूरदास प्रभु आश मिलनकी एकवार आवन ब्रज कीजै ॥७२॥ राग केदारो ॥ मेरे नयना विर-
 हकी बेलि बई । सींचत नीर नैनके सजनी मूल पताल गई ॥ बिकसत लता सुभाइ आपने छाया
 सघन भई । अब कैसे निरुवारौ सजनी सब तन पसरि छई ॥ को जानै काहूके जियकी छिन छिन
 होत नई । सूरदास स्वामीके बिछुरे लागे प्रेम झई ॥७३॥ राग देवगंधार ॥ ब्रज बसि काके बोल सहैं ।
 इह लोभी नैननके काजे परवश भई जो रहैं ॥ बिसरि लाज गई सुधि नहि तनुकी अबधौ कहा
 कहौ । मेरे जियमें ऐसी आवत यमुना जाइ बहौ ॥ एक बन ढूँढि सकल बन ढूँढ्यो कबहुँ न श्याम
 लहौ । सूरदास प्रभु तुम्हरे दरशको इह दुख अधिक सहैं ॥७४॥ राग केदारो ॥ नैना अब लागे
 पछितान । बिछुरत उमँगि नीर भरि आई अब न कछू अवसान ॥ तब मिलि मिलि कत प्रीति
 बढावत अब सो भई विषवान ॥ तबतौ प्रीति करी उत्तर होइ समुझी कछु न अजान । अब इह
 काम दहत निशि वासर नाहीं मेरे मान ॥ भयो बिदेश मधुपुरी हमको क्योंहुँ होत न जान ॥
 अति चटपटी देखि वे चाहत अब लागी अकुलान । सूरदास प्रभु दीन दुखित ए लै न गए संग प्राना
 ॥७५॥ राग आसावरी ॥ हो तादिन कजरा मैं देहों । जादिन नंदनंदनके नैनन अपने नैन मिलैहों ॥
 सुन री सखी इहै जिय मेरे भूलिन और चितैहों । अब हठ सूर इहै व्रत मेरो कौंकिरषै मारिजैहों ॥७६॥
 ॥ राग मलार ॥ उपमा नैनन एक रही । कविजन कहत कहत सब आए सुधि करि नाहिं कही ॥ कहि
 चकोर बिधु मुख बिन जीवत भँवर नहीं उडिजात । हरि मुख कमल कोश बिछुरेते ढोले कत
 ढहरात ॥ अघा अधिक व्याधहै आये मृगसम क्यों न पलात । भाजि जाहि बन सघन श्याम मैं
 जहां न कोऊ घात ॥ खंजन मनरंजन न होहिं ए कबहीं नहीं अकुलात । पंख पसारि नहो छिन
 चपला गति हरि समीप मुकलात ॥ प्रेम न होहि कौन बिधि कहिए झूठेही तनु आडत ।
 सूरदास मीनता कछू एक जल भरि कबहुँ न छाँडत ॥७७॥ राग गौरी ॥ कहा इन नैननको अपराध ।
 रसना रटत सुनत यश श्रवण इतनी अगम अगाध ॥ भोजन किये बिनु भूख क्यों भाजै बिनखाए
 सब स्वाध । इकटक रहत छुटत नाहिं कबहुँ हरि देखनकी साध ॥ ये दृग दुखी बिना वह मूरति
 कहो कहा अब कीजै । एक बेर ब्रज आनि कृपाकरि सूर सो दरशन दीजै ॥७८॥ राग मलार ॥ चित-
 वतही मधुवन तन जात । नैनानि नींद परति नाहिं सजनी सुनि सुनि बात मन अकुलात ॥
 अब ए भवन देखिअत सूनो धाइ धाइ हमको ब्रजखात । कवन प्रतीति करै मोहनकी
 जोहि छाँडे निज जननी तात ॥ अनुदिन नैन तपत दरशनको हरदि समान देखिअत
 गात । सूरदास स्वामीके बिछुरे ऐसे भए हमारे धात ॥७९॥ राग मलार ॥ देख सखी उतहै वह गाउँ । जहां
 बसत नंदलाल हमारे मोहन मथुरा नाउँ ॥ कालिंदीके कूल रहतहैं परम मनोहर ठाउँ । जो
 तनुपंख होइ सुन सजनी आजु अबहिं उडिजाउँहो नो होउ होउ सो अबहीं यहि ब्रज अन्न न खाउँ ॥
 सूरदास नंदनंदनसों रति लोगन कहा डराउँ ॥८०॥ राग गौरी ॥ मथुराके द्रुम देखिअत न्यारे । वहां श्याम
 हमारे प्रीतम चितवत लोचन हारे ॥ कितिक बीच संदेहु दुर्लभ सुनियत टेर पुकारे । तुव गुण
 सुमिरि सुमिरि हम मोहन मदन बान उर मारे । तुम बिन श्याम सबै सुख भूलो गृह बन भए हमारे ।
 सूरदास प्रभु तुम्हरे दरश बिनु रैनि गनत गए तारे ॥८१॥ स्वप्न दर्शन वर्णन ॥ राग केदारो ॥ जबते बिछुरे

कुंजविहारी । नींद न परै घटै नहिं रजनी व्यथा विरह ज्वर भारी ॥ हौं उठि सखी आँगनहै आई
जगमगि रही जियारी। श्रवणशब्द सुहाइ न सखी री यमचातक द्रुमडारी ॥ उरते सखी दूरि करु हारहि
कंकन धरहु उतारी। सूरदास प्रभु विनु अतिव्याकुल करि वह जतन जुहारी ॥ ८२ ॥ राग नट ॥ सुपनहुमें
देखिये जो नैननि नींद परै । विरहिनि ब्रजनाथ बिन कहि कौन उपाइ करै ॥ चंदमंद समीर शीत-
ल सेज सदा जरै । कहा करौं कौनी भाँति मरौं मन धीरज न धरै ॥ बहुत उपाइ करै विरहिनि
कछु नचाव सैरौ। सूर शीतल कृष्ण बिन कहौ कौन ताप हरौ ॥ ८३ ॥ राग सारंग ॥ इतनी दूरि गोपालही कबहुं
न मिलि आई । कहिए कहा दोषदीजै किहि अपनीही जडताई ॥ सोवत महा मनो सुपने सखि
अवधि निधन निधि पाई । गनतहि आनि अचानक कोकिल उपवन बोलि जगाई ॥ जो जागों तो
कहा उठि देखों विकल भई अधिकाई । किसलै कुसुम नव नूत दशहु दिशि मधुकर मदन दोहाई ॥
बिछुरत तनु नाम ज्यों हठि तिहि छिन गई नहीं सगुमाई । समुझि न परी सूर दोहेदिन हरि हँसि
कंठ लगाई ॥ ८४ ॥ राग धनाश्री ॥ तबहीं जै इह हेति कहा । जहाँ वै श्याम मदन मूरति चल मोहिं लवाइ
तहां ॥ कुटिल अलक मकराकृत कुंडल सुंदर नैन विशाल । अरुन अधर नासिका मनोहर तिलक
तरनि शशिभाल ॥ दशन ज्योति दामिनि ज्यों दमकति बोलत वचन रसाल । उर बिचित्र वनमाल
बनी जनु कंचन लता तमाल ॥ घन तन पीत वसन शोभित अति अलिके बलै पराग ॥ विपुल बहु
अति कृत परिरंभन मनहुं बसे द्रुमनाग । सोवतिही सुपने महि सोचति सत्य जानि जिय
जागी । सूरदास प्रभु प्रगट मिलनको चातक ज्यों लवलागी ॥ ८५ ॥ राग मलार ॥ सुपने हरि आएहो
किलकी । नींद जो सौति भई रिपु हमको सहि न सकी रति तिलकी ॥ जो जागों
तो कोऊ नाहीं रोके रहति न हिलकी । तब फिरि जरनि भई नख शिखते दिआबात
जनु मिलकी । पहिली दशा पलटि लीनीहै त्वचा त्वचकि तनु पिलकी । अब
कैसे सहिजात हमारी भई सूर गति सिलकी ॥ ८६ ॥ राग कान्हरो ॥ मैं जान्यो री आए हैं हरि चौंकि परेते
पछितानी । इते मान तन तलफत वहिते जैसे मीन तट बिन पानी ॥ सखी सुदेह ते जरति विरह
ज्वर तनु पुनि पुनि नहिं प्रकृत्यो आनी । कहा करौं अपथि भई मिलि बढी व्यथा दुख दुहरानी ॥
पठवो पथिक सब समाचार लिखि बिपति विरह वपु अकुलानी । सूरदास प्रभु तुम्हरे दरश बिना कैसे
घटत कठिन कानी ॥ ८७ ॥ राग मलार ॥ ज्यों जागो तो कोऊ नाहीं अंत लगी पछितान । हौं जानौं साँ-
चे मिले माथौ भूलो यहि अभिमान ॥ नींद माहिं सुरझाई रहिहो प्रथम पंच संधान । अब उर अंतर
मेरी माई सपने छुटी छलिवान ॥ सूर सकत जैसे लछिमन तन विह्वल होइ सुरझान । ल्याउ
सजीवन मूरि श्यामको तौ रहिहैं ए प्रान ॥ ८८ ॥ राग कल्याण ॥ हरि बिछुरन निशि नींद गई री । वन
प्रिय विरह शिली मुख मधुपति वचननिहौं अकुलाई री ॥ वह जु हुती प्रतिमा समीपकी सुख
संपति दुरंत जई री । ताते भर हरि सुन री सजनी सेज सलिल दगनीर मई री ॥ अबऊ
अधार जु प्राण रहत हैं इनिवशाहिन मिलि कठिन ठई री । सूरदास प्रभु सुधा-
रस बिना भई सकल तनु विरह रई री ॥ ८९ ॥ राग केदारो ॥ बहुचो भूलि न आँखि
लगी । सुपनेहुके सुख न सहिसकी नींद जगाइ भगी ॥ बहुत प्रकार निमेष लगाए छूटि नहीं
शठगी । जनु हीरा हरि लिए हाथते ढोल बजाइ ठगी ॥ कर मीडति पछिताति बिचारति इहि बिधि
निशा जगी । वह मूरति वह सुख दिखरावै सोई सूर सगी ॥ ९० ॥ राग धनाश्री ॥ अब सखी नींदौ तो गई ।
भागी जिय अपमान जानि जनु सकुचनि ओट लई ॥ अति रिस अहनिशि कंत किए वश

आगम अटक दई । सुपनेहु संयोग सहति नाहिं सहचरी सौति भई ॥ कहतहि पोच सोच मनहीं
मन करत न बनति खई । सूरदास तनु तजै भले बनै बिधि विपरीति ठई ॥९१॥ राग नट ॥ पियकी बात
सुनहि किन प्यारी । जो कछु भयो सो कहिहौं तुमसन होहु सखिनते न्यारी ॥ तव वियोग शोक तौ
उपज्यो काम देह तनु जारी । भेषज अधर सुधाहै तुमपै चलिदै व्यथा निवारी ॥ कठिन परे जु
कुशल रिपु पूछै मनकी कहा बिचारी ॥ सूरदास प्रभु हृदय है तेरे मानहु सार पुछारी ॥९२॥ राग मलार ॥
हमको सुपनेहु में सोच । जादिनते बिछुरे नंदन इह तां दिनते पोच ॥ मनो गोपाल आए मेरे गृह
हैंसि करि भुजा गही । कहा करौं वैरिनि भई निद्रा निमिष न और रही ॥ ज्यों चकई प्रतिविंब
देखिके आनंदे पिय जानि ॥ मूर पवन मिलि निठुर विधाता चपल कियो जल आनि ॥९३॥ राग विहागरो ॥
हरि बिनु वैरिन नींद बडी । हो अपराधिनि चतुर विधाता काहे को बनाइ गडी ॥ तन मन धन
यौवन सुख संपति विरहा अनल दडी ॥ नंदनंदनको रूप निहारत अहनिशि अटा चडी ॥ जेहि गोपाल
मेरे वश होते सो विद्या न पढी ॥ मूरदास प्रभु हरि न मिलैं तौ घरते भली मडी ॥९०॥ राग मलार ॥ सुनहु
सखी ते धन्य नारी ॥ जो अपने प्राणवल्लभकी सपनेहु देखति है अनुहारि ॥ कहा करौं चलत श्यामके
पहिलेहि नींद गई दिन चारिदेखि सखी कछु कहत न आवै झींखि रही अपमानन मारि ॥ जादिनते
नैनन अंतर भयो अनुदिन अति बाढति है वारि । मनहुँ मूर दोउ सुभग सरोवर उमंगि चले मर्यादा
डारि ॥९५॥ राग मलार ॥ हमको जागत रैन विहानी ॥ कमलनैन जगजीवनके सखी गावत अकथ कहानी ॥
विरह अथाह होत निशि हमको बिनु हरि समुद समानी । क्यों करि पावहि विरहिन पारहि बिन
केवट अगवानी ॥ उदित सूर चकई मिलाप निशि अलि जो मिलै अरविंदहि । सूर हमें दिन रात
दुसह दुख कहा कहैं गोविंदहि ॥ ९६ ॥ मोको माई यमुना जल होइ रही । कैसे मिलौ श्याम-
सुंदरको वैरिनि बीच बही ॥ केतिक बिच मथुरा औ गोकुल आवत हरि जो नही । हम अबला
कछु मर्म न जान्यो चलत न फेंट गही ॥ अब पछितात प्राण दुख पावत जात न बात कही । सूर-
दास प्रभु सुमिरि सुमिरि गुण दिन दिन शूल सही ॥९७॥ राग धनाश्री ॥ नैन सलोने श्याम हरि कब आवहि
गे । वै जो देखत राते राते फूलन फूलेडार । हरि बिन फूल झरी सी लागत झरि झरि परत अंगार ।
फूल बिनन ना जाउ सखी री हरिबिन कैसे फूल । सुन री सखी मोहिं राम दोहाई लागत फूल त्रि-
शूल ॥ जबते पनिघट जाउँ सखी री वा यमुनाके तीर । भरि भरि यमुना उमडि चलत है इन नैननके
नीर ॥ इन नैननके नीर सखी री सेज भई घरनाव । चाहतहौं ताहीपै चढिके हरिजीके ढिग
जाव ॥ लाल पियारे प्राण हमारे रहे अधर पर आइ । सूरदास प्रभु कुंजविहारी मिलत नहीं
क्यों धाइ ॥९८॥ राग मलार ॥ बहुरो गोपाल मिले सुख नेह कीजै । नैनन मग निरखि वदन शोभा रस
पीजै ॥ मदनमोहन हृदय उर आसन दीजै । परै न पलक आँखिनके देखि देखि जीजै ॥ मान
छाँडि प्रेम भजन आपनो करि लीजै ॥ मूर सोई सुभग नारी जासों मन भीजै ॥९९॥ राग केदारो ॥ सखी री
हरि आवैं केहि हेत । वै राजा तुम ग्वालं बुलावत इहै परेखो लेत ॥ अब शिर छत्र कनक राजत है
मोरपंख नाहिं भावत । सुनि ब्रजराज पीठिदै बैठत यदुकुल विरद बुलावत ॥ द्वारपाल अति पौर विरा-
जत दासी सहस अपार । गोकुल गाइ दुहत दुख गोयो सूर भए एवार ॥२८००॥ राग मलार ॥ चलत न
माधौकी गहि बाहैं । बार बार पछिताति सबहिते इहै शूल मनमाहैं । घर बन कछु न सुहाइ रैन दिन
मनहुँ मृगी दो दाहै । मिटति न तपनि बिना घनश्यामहि कोटि घनी छन छाहै ॥ बिलपति
अति पछिताति मनहि मन चंद्र गहे जनु राहै । सूरदास प्रभु दूर सिधारे दुख

कहिए केहि पाहै ॥ १ ॥ राग सारंग ॥ मनकी मनही माँह रही । जब हरि रथ चढि चले मधुपुरी
 सब अज्ञान भई ॥ मति बुधि हरी परी धरणी पर अति बेहाल खरी । अंकुश अलक कुटिल
 भए आशा ताते अवधि वरी ॥ ज्यों विनु मणि अहि सूक फिरतहै यों बिधि बिधि विपरीत धरी ।
 मनतो रह्यो पंथ सूरज प्रभु माटी रही धरी ॥ २ ॥ मेरो मन वैसै सुरति करै । मृदु सुसुकानि
 नेक अवलोकनि हृदयेते न टरै ॥ जब गोपालगोधन संग आवत सुरली अधर धरै । सुखके रेणु
 झारि अंचल सों यशुमति अंग भरै ॥ संझा समय घोषकी डोलन वह सुधि क्यों बिसरै । सूर-
 दास प्रभु दरशन कारण नैनन नीर टरै ॥ ३ ॥ राग आसावरी ॥ जाको मन लाग्यो नंदलालहि ताहि
 और क्यों भावै होजैसे मीन दूधमें डारै जल विनु सच नहिं पावै हो ॥ अति सुकुमार डोलत अंगनही
 परि काहू न जनावै हो । जैसे सरिता मिलै सिंधुको उलटि प्रवाह न आवै हो ॥ ऐसे सूर कमल लोच-
 न विनु मग नहिं अनत लगावै हो ॥ ४ ॥ राग सारंग ॥ कहाँ लौं रखिए मन बिरमाई । इकटक शिव
 धरे नैन लागत श्यामसुता सुत धन आई ॥ हर बाहन दिव बास सहोदरतिहि मति उदित सुरछि
 सुहि जाई । गिरिजापति रिपु नख शिख व्यापत वंश सुधा पिय कथा सुनाई ॥ विरहिनि विरह
 आपु वश कीन्हें लेउ कमल जिमि पाइ छुआई । वेगि मिलौ सूरके स्वामी उदाधितनया पति
 मिलिहै आई ॥ ५ ॥ राग मारू ॥ कमलनैन अपने गुनन मन हमारो बाध्यो लागत तो जानो नहिं विषम
 बाण साध्यो ॥ कठिन पीर बाँध्यो शरीर मारि गयो माई । लागत तो जानो नहिं अवसहो न जाई ॥
 मंत्र तंत्र जेतिक करौ तउ पीर न ताई । है कोउ उपचार करै कठिन दरद माई ॥ कैसेहुँ नंदलाल
 पावों नेक भिलौं धाई ॥ सूरदास प्रेम फंद तोरों नहिं जाई ॥ ६ ॥ राग सोरठा ॥ हरि हमसों करी रीमाई मीन
 जलकी प्रीति । इतनी दूर दयालु माधौ गई अवधि व्यतीति ॥ तलफिकै उन प्राण दीनों प्रेमकी
 परतीति । नीर निकट न पीर जानी व्यर्थ गयो वषु बीति ॥ चलत मोहन कहो हमसों आइहै
 रिपु जीति । सूर वा ब्रजनाथके जिय सबै उलटी रीति ॥ ७ ॥ राग धनाश्री ॥ मति कोई प्रीतिके फंग पैं ।
 सादर संत देखि मन मानौ पेखै प्राण हरै ॥ या पतंग कहा कर्म कीन्हों जीवको त्याग करै ।
 अपने मरबेते न डरतहै पावक पैठि जरै ॥ भौ करत नहीं ताहि निपाते केतिक प्रेम धरै । शारंग
 सुनत नाद रस मोह्यो मरिबेते न डरै ॥ जैसे चकोर चंद्रको चाहत जल बिन मीन मरै । सूर
 प्रभुसों ऐसे करि मिलिए तौ कहौ कान सरै ॥ ८ ॥ राग सारंग ॥ प्रीति करि काहू सुख न लह्यो ॥ प्रीति पतंग
 करी दीपकसों आपै प्राण दह्यो ॥ अलिसुत प्रीति करी जलसुतसों संपति हाथ गह्यो । शारंग
 प्रीति करी जो नादसों सन्मुख बान सह्यो ॥ हम जो प्रीति करी माधौसों चलत न कछू कह्यो ।
 सूरदास प्रभु विनु दुख दूनो नैनन नीर बह्यो ॥ ९ ॥ राग मलार ॥ प्रीति तौ मरनऊ न बिचारै ॥ प्रीति
 पतंग ज्योति पावक ज्यों जरत न आपु सँभारै ॥ प्रीति कुरंग नाद स्वर मोहित बधिक निकट है मारै ।
 प्रीति परेवा उडत गगनते गिरत न आपु सँभारै ॥ सावन मास पपीहा बोलत पिय पिय करि जो
 पुकारै । सूरदास प्रभु दरशन कारन ऐसी भाँति बिचारै ॥ १० ॥ जिन कोउ काहूके वश
 होहि । ज्यों चकई दिनकर वश डोलति मोहिं फिरावत मोहिं ॥ हमतौ रीझि लटूभई लालन
 महाप्रेम तिय जानि । बंध अवंध अमति निशिवासर को सरझावति आनि ॥ उरझे संग अंग अंग
 प्रति विरह बेलिकी नाई । मुकुलित कुसुम नयन निद्रा ताजि रूप सुधा सियराई ॥ अति आधीन
 हीन मति व्याकुल कहा लों कहों बनाइ ऐसी प्रीति करी रचना पर सूरदास बलिजाइ ॥ ११ ॥ राग नट ॥
 दिनही दिन को सहै बियोग । यह शरीर नाहिन मेरो सखी इहै विरह ज्वर योग ॥ राचि सक

कुसुम सुगंध सेज साजि बसन कुमकुमा बोरि । नलनी दलनि दूरि करि उनते कंचुकि के बँद छोरि ॥
 बन बन जाइ मोर चातक पिक मधुवन टेरि सुनाई ॥ उचित चंद चंदन चढ़ाई उर त्रिविध समीर बहा
 ई ॥ रटि मुख नाम श्याम सुंदरको तोहिं सुनाइ सुनाई ॥ तो देखत तनु होमि मदन मुख मिलौ माध-
 वहि जाई ॥ सूरदास स्वामी कृपालु भए जानि युवति रस रीति । तिहि छिन प्रगट भए मनमो-
 हन सुमिरि पुरातन प्रीति ॥ १२ ॥ राग धनाश्री ॥ बहुरि न कबहुँ सखो मिलैं हरि । कमलनयन के कारण
 सजनी अपनो सो जतन रही बहुतै करि ॥ जेइ जेइ पथिक जात मधुवन तन तिनहुँ सों व्यथा
 कहति पाँइनि परि । काहु न प्रगट करी यदुपतिसों दुसह दुरासा गई अवधि ढरि ॥ धीर न धर-
 ति प्रेम व्याकुल चित लेत उसौंस नीर लोचन भरि । सूरदास तनु थकित भई अब कृष्ण विरह-
 सों पर न सकति मरि ॥ १३ ॥ पावस समय वर्णन ॥ राग मलार ॥ ब्रजते पावस पै न टरी ॥ शिशिर वसंत शरद
 गत सजनी बीती औधि करी ॥ उनै उनै घन वरषत चष उर सरिता सालिल भरी । कुमकुम कज्ज-
 ल कीच बहै जनु कुचयुग पारि परी ॥ ताहूमें प्रगट विषम ग्रीषम ऋतु इतयो ताप मरी । सूरदास
 प्रभु कुमुद चंद्र बिनु विरहा तरनि जरी ॥ १४ ॥ अब वर्षाको आगम आयो । ऐसे निदुर भयो
 नंदनंदन संदेशा न पठायो ॥ बादर घोर उठे चहुँ दिशि जलधर गरजि सुनायो । एकै झूल रही
 मेरे जिय बहुरि नहीं ब्रजछायो ॥ दादुर मोर पपीहा बोलत कोकिल शब्द सुनायो । सूरदासके
 प्रभुसों कहियो नैनन है झरलायो ॥ १५ ॥ माई री ए मेघ गाजैं । मनहुँ काम कोपि चढो कोला-
 हल कटक बढ्यो बरहा पिक चातक जै जै निसान बाजैं ॥ बरन बरन बादर बनाए तब जगत-
 बिराजै । दामिनि करवार करनि कंपत सब गात उरनि जलधर समेत सैन इंद्र धनुष साजै ॥
 ऐसे अभिलाष धीर विगत विरत ते न लाजै । अबलनि अकेली करि अपने कुलनी-
 ति बिसरी अवधि संग सकल सूर भहराइ भाजै ॥ १६ ॥ ब्रजपर बदरा आए गाजन ।
 मधुवनको पठए सुन सजनी फौजमदन लग्यो साजन ॥ ग्रीवारंघ्र नैन चातकजल पिक मुखबाजे
 बाजन । चहुँदिशि ते तनु विरहा घेरो अब कैसे पावतु भाजन ॥ कहियत हुते श्याम परपीरक आए
 शंकरके काजन । सूरदास श्रीपतिकी महिमा मथुरा लागे राजन ॥ १७ ॥ देखियत चहुँदिशि ते
 घनघेरो । मानोमत्त मदनके हथियन बलकरि बंधन तोरो ॥ श्याम सुभगतनु चुअत गंड मद वरषत
 थोरे थोरे । रुकत न पौन महावतहुँ पुरत न अंकुशमोरे ॥ बल बेनी बल निकसि नयन जल कुच
 कंचुकि बंद बोरे । मानों निकसि बगपाँति दांत उर अवधि सरोवर फोरे ॥ तबतेहि समै आनि
 ऐरापति ब्रजपतिसों करजोरे । अब सुनि सूर कान्हके हरि बिन गरत गात जैसे बोरे ॥ १८ ॥ ब्रजपर
 सजि पावस दल आयो । धुरवा धुंधि बढी दशहुँ दिशि गर्जि निसान बजायो ॥ चातक मोर इतर
 पै दागन करत अवाजैं कोयल । श्याम घटा गज अशन वाजि रथ चित बगपाँति सजोयल ॥
 दामिनि कर करवार बूँद शर इहि बिधि साजे सैन ॥ निधरक भयो चरयो ब्रज आवत अग्र फौज
 पति मैन ॥ हम अबला जानिकैं तुम बल कहौ कौन बिधि कीजै । सूर श्याम अबके इहि औसर
 आनि राखि ब्रज लीजै ॥ १९ ॥ सखी री पावस सैन पलान्यो । पायो बीच इन्द्र अभिमानी हरि बिन
 गोकुल जान्यो ॥ दशहुँ दिशासों धूम देखियत कंपति है अति देह । मनहु चलत चतुरंग चमून-
 भ बाढी है खुर खेह ॥ बोलत मोर शैल डुम चढि चढि बग जु उडत तरु डारैं । मनु सहना फह-
 राइ फिरावत भाजन कहत पुकारैं ॥ गर्जत गगन गयंद गुंजरत अरु दादुर किलकार । सूरदास
 प्रभु अपने ब्रजकी काहेन करत सँभार ॥ २० ॥ बदरिआ वधन बिरहिनी आई । मारुत मोर करत

चातक पिक अरु नग शिखर सुहाई ॥ नदिया सुचर संदेश क्यों पठऊ बाट तृणनहू छाये।इक हम
दीन हती कान्हर बिनु औ इन गरजि सुनाए । सुनो घोष वैर तकि हमसों इंद्र निसान बजाए ।
सूरदास प्रभु मिलहु कृपा करि होति हमारे धार ॥ २१ ॥ वरु ए बदराऊ वर्षन आए । अपनी अवधि
जानि नंदनंदन गरजि गगन घन छाए ॥ कहियतहै सुरलोक वसत सखी सेवक सदा पराए ।
चातक पिककी पीर जानिकै तेउ तहांते धाए ॥ तृणकिए हरित हरषि वेली मिलि दादुर मृतक
जिवाए । साजे निवड निडत न सिचि सजि पंछिनहू मन भाए ॥ समुझत नहीं चूक सखी अप-
नी बहुतै दिन हरि लाए । सूरदास प्रभु रसिक शिरोमणि मधुवन वसि बिसराए ॥ २२ ॥ बहुरि हरि
आवहिंगे किहि काम । ऋतु वसंत अरु ग्रीष्म बीते अब बादर भए श्याम ॥ तारे गनत गनत के सज-
नी बीते चारौ याम । औरौ कथा सबै बिसराई लेत तुम्हारो नाम ॥ छिन अंतर छिन द्वारे ठाढी अरु
सूखतिहै घमि । सूर श्याम तादिनते बिछुरे अस्ति रही कै चाम ॥ २३ ॥ किधौ घन गर्जत नहि उन देशनि ।
किधौ हरि हरषि इंद्र हठि बरजे कैधौ दादुर खाए शेषनि ॥ किधौ उहि देशन गवन गम छांडे
घरनिन बूंद प्रवेशनि । चातक मोर कोकिला उहिवन बधिकन बधे विशेषनि ॥ किधौ उहि देश
बालनहि झूलति गावति सखिन सु देशनि । सूरदास प्रभु पथिक न चलहि कासों कहौ संदेशनि ॥
॥ २४ ॥ देखो माई श्याम सुरति अब आवै । दादुर मोर कोकिला बोलै पावस अगम जनावै ॥
देखि घटा घनचाप दामिनी मदन शृंगार वनावै । विरहनि देखि अनाथ नाथ बिन चढि चढि
ब्रजपर आवै ॥ कासों कहौ जाइ कोइ हरिपै यह वसुदेव सुनावै । सूरदास प्रभु मिलहु कृपाकरि
ब्रजवनिता सच पावै ॥ २५ ॥ तुम्हारो गोकुलहो ब्रजनाथ । घेरयोहै अरि चतुरंगिनि लै मन्मथ
सेना साथ ॥ गर्जत अतिगंभीर गिरा मन मैगल मत्त अपार । धुरवा धूरि उडत रथपायक घोर-
नकी खुरतार । चपला चमचमाति आयुध बग पंगति ध्वजा अकार । परत निसाननि घाव त-
मकि धनु तरपत जिहि जिहि वार । मारै मार करत भट दादुर पहिरे बहु बरन सनाह । औरै
कवच उघरे देखियत मनो विरहनि घाली आह ॥ करै तौ गात अंग चातक पिक कहत भाजि
जिनि जाहु । उरनि उरनि वै परत आनि वे जोधा परम उछाहु ॥ भयो अहंकार सुभार सूरि वास
कति रही उर शालि । हम कत हाथ परे नाहीं गहि रहि न ढाल संभालि ॥ अति घायल धीरज
दुवाहिआ तेज दुर्जन दालि । टूक टूक है सुभट मनोरथ आने झोली घालि ॥ निशि वासरकै विग्रह
आयो अति संकेतहि घाउ । कापै करौ पुकार नाथ अब नार्हिन तुम बिनु ठाँउ ॥ नंदकुमार श्याम
घन सुंदर कमलनैन सुखधाम । पठवहु बेगि गोहार लगावन सूरदास जिहि नाम ॥ २६ ॥ ऐसे में
न सुधयो करै अति निठुराई धरै उनै उनै घटा देखौ पावसकी आईहै । चहुँ दिशि घोर मोर लागी
है मदन रोर पिककी पुकार उर अरसी लगाईहै ॥ दामिनिकी दमकनि बूंदनिकी झमकनि सेजकी
तलफ कैसे जीजियत माईहै । लागेहैं बिसारे वान श्याम बिनु युग याम घायल ज्यों घूमै मनो विष-
हर खाईहै ॥ मिटै न जियको झूल जातहै यौवन फूल घरी घरी पल पल विरह सताईहै । जग-
तके प्रभु बिनु कल न परे छिनु ऐसे पापी पिय तोहिं पीर न पराईहै ॥ २७ ॥ ऐसो जो पावस
ऋतु प्रथम सुरति करि माधोजू आवहि । बरन बरन अनेक जलधर अति मनोहर भेष । तिहि समय
सखी गगन शोभा सबहिं ते सु विशेष ॥ उडत खग वेग वृंद राजत रटत चातक मोर । बहु बिधि बिधि
रुचि बढ़ावत दामिनी घनघोर ॥ धरनि तृण तनु रोम-पुलकित पिय समागम जानि । दुमनि
वरखली वियोगिनि मिलतिहै पहिंचानि ॥ हंस शुक पिक सारिका अलि गुंज नानानाद ।

सुदित मंडल भेक भेकी निगत विहंग विषाद॥कुटज कुसुद कदंब कोविद कनक आरि सुकंज । के-
 तकी करवील वेलउ विमल बहुविधि मंत॥सघनदल किलकाल अंकृत सुमन सुकृत सुवास । निकट
 नैन निहारि माधो मन मिलनकी आस॥मनुज मृग पशु पक्षि परमित और अमित जु नाम । सुमिरि
 देश विदेश परिहारि सकल आवहिं धाम ॥ यहै अवधि उपाउ सोचति कहु न पैर बिचार । कौन
 हित ब्रजवास बिसरयो नीक नंदकुमार ॥ परम सुहृद सुजान सुंदर ललित गति मृदु हास ।
 बैनवर बहु विधिबजावन गोप शिशु चहुँपास ॥ चारु कुंडल लोल लसित सु कमल विमल विशाल ।
 सुदिन कब जब देखवी वन बहुत बाल विशाल ॥ बार बारस विरहनी अति विरह व्याकुल
 होति । बात वेग विलौल ज्यों अलि दीन दीपक ज्योति ॥ सुनि सँदेस हम हृदय सूरदास करि पर
 तीति।दरश दै दुख दूरि कीजै प्रेमकी यह रीति ॥२८॥राग मलार॥आजु वनश्यामकी अनुहारि । उनइ
 आए सौँवरेते सजनी देखि रूपकी आरि॥इंद्रधनुष मानो पीत वसन छवि दामिनि दशम बिचारि ।
 जनु बगपांति माल मोतिनकी चितवत हितहि निहारि ॥ गर्जत गगन गिरो गोविंदामिसु सुनत
 नयन भरे वारि।सूरदास गुण सुमिरि श्यामके विकल भई ब्रजनारि ॥२९॥कैसेकै भरिहैं री दिन साव-
 नके।हरित भूमि भरे सलिल सरोवर मिटे मग मोहन आवनके॥दादुर शोर मोर चातक पिक निशाहि
 निशासुर पावनके । अब घन घुमडि उमडि दामिनि रूप मदन धनुष धरि धावनके ॥ पहिरि
 कुसुमासारी कंचुकी तनु झुंडनि झुंडनि गावनके । सूरदास प्रभु दुसह घटत क्यों शोक निगुण
 शिररावनके॥३०॥राग केदारो॥हरिसुत पावक प्रगट भयो री।मारुतसुत बंधौप्रति प्रोहित ता प्रति पालन
 छाँडि गयो री॥हरसुत वाहन अशन सनेही सो लागत अँग अनल मयो री।मृगमद स्वाद मोद नाहिं
 भावत दधिसुत भानसभान भयो री ॥ बारिजसुत प्रतिक्रोध कियो सखी मेदि दकार सकार लयो री ।
 सूरदास बिनु सिंधुसुतापति कोपि समर कर चाप लयो री॥३१॥राग मलार॥ऐसे बादर तादिन आये
 जा दिन श्याम गोवर्धन धारयो।गरजि गरजि वन वर्षन लागे मनो सुरपति निज वैर सँभारयो॥सबै
 संयोग जुरीहैं सजनी हठिकरि घोष उजारयो।अब कोसात दिवस राखैगो दूरि गयो ब्रजको रखवा-
 रयो॥जब बलराम हुते या ब्रजमें काहु देव न ऐसो डारयो । अब यह भूमि भयानक लागै
 विधिना बहुरि कंस अवतारयो ॥ अब इह सुरति करै को हमारी या ब्रज कोऊ नाहिं
 हमारयो । सूरदास अतिबिकल बिरहिनी गोपिन पिछलो प्रेम सँभारयो ॥ ३२ ॥ जो पै नंदसुवन
 ब्रज होते । तो पै नृप पावस सुनि बिनती कहत न डरती सोते ॥ अब हम अबल जानिकै
 सखी री हैं गैरवरथ जोते । हमपर गरजि गरजि पठवत लेत न सकल सवोते ॥ सूरदास प्रभु
 शैलधरन बिनु कहा सबै अब तोते ॥ ३३ ॥ इहां नाहिन नंदकुमार । इहै जानि अजान मधवा करी
 गोकुलआर ॥ नैन जलद निमेष दामिनि आँसु वर्षत धार । दरश रवि शशि दुत्यो धीरज श्वास
 पवन अकार ॥ उरज गिरिभै भरन भारी अगम काम अपार । गरजि बिकल वियोग बाणी हरति
 अवधि अघार ॥ पथिक मथुरा जाइ हरि सो बात कहैं बिचार । शत्रुसेन सुधाम घेरयो सूर लगहु
 गुहार ॥ ३४ ॥ मानो माई सबन इहै है भावत।अब वहि देश नंदनंदन कहैं कोउ न समो जनावत ॥ धरत
 न बनै नवपत्र फूल फल पिक वसंत नाहिं गावत । सुदित न सरसरोज अलि गुंजत पवन पराग
 उडावत ॥ पावस विविध बरन वर बादर उड़िनहिं अंबर छावत । चातक मोर चकोर शोर करि
 दामिनि रूप दुरावत ॥ हमपर सकल कोपकरि सजनी हठिकरि बलहि बढावत । सूर श्याम
 परपीर न जानत कत सर्वज्ञ कहावत॥३५॥सखी कोई नई बात सुनि आई । इह ब्रजभूमि सकल सुर

संपति सो मदन मिलिक करिपाई ॥ घनदामिनि बगपाँति मनोवै वरपै तडित सुहाई । बोलत
 वगनिकेत गरजै अति मानो फिरत दोहाई ॥ गोकुल मोर चकोर मधुप शुक्र सुमन समीर सोहाई ।
 चाहत वास कियो वृंदावन बिधिसौं कछु न बसाई ॥ सकत न जानत लागत सूनो कोउ हुते बल
 वीर कन्हाई।सूरदास गिरिधर बिन गोकुल कौन कौन करिहै ठकुराई॥३६॥बहुरि बन बोलन लागे
 मोर । करसंभार नंदनंदनकी सुनि बादरको घोर ॥ जिनको पिय परदेश सिधारो सो तियपरी
 निठोर । मोहि बहुत दुख हरि बिछुरेको रहत विरहको जोर ॥ चातक पिक चकोर पपीहा ए
 सबही मिलिचोरासूरदास प्रभु वेगि न मिलहु जनम परतहै वोर॥३७॥यहि वन मोर नहीं ए कामबान।
 विरह खेद धनु पुहुप भृंग गुन करिल तरैया रिपुसमान ॥ लयो घेरि मनो मृग चहुँ दिशिते अचूक
 अहेरी नाहिं अजान । पुहुपसेन घन रचित युगल तनु क्रीडत कैसो वन निधान ॥ महाभुदित मन
 मदन प्रेम्हरस उमँगि भरे मै मै न जान । इहि अवस्था मिले सूरदास प्रभु बदरचो नानागदै
 जीवनदान॥३८॥आजु वन मोरन गायो आइजबते श्रवण सुन्यो सुन सखी री तबते रह्यो न जाइ॥
 ब्रजते बिछुरे सुरलि मनोहर मनहुँ व्याल गयो खाइ । औषध बैद गरूरियो हरि नाहिं मानै मंत्र
 दोहाइ॥चातक पिक दुखदेत रैन दिन पियपियवचन सोहाइ।सूरदास प्रभु तौपै है जीवहि जौ मिलिहै
 हरि आइ॥३९॥शिखिन शिखर चढि टेरे सुनायो । विरहिनि सावधानहै रहियो सजि पावस दल
 आयो ॥ नव बादल वानैत पवन ताजी चढि चुटकि दिखायो । चमकत बीजु शैलकर मंडित गरजि
 निसान बजायो ॥ दादुर मोर चातक पिकके गण सब मिलि मारु गायो । मदन सुभट करबाण
 पंचलै ब्रजतन सन्मुख धायो ॥ जानि विदेश नंदको नंदन अबलन त्रास दिखायो।सूर श्याम पहिले
 गुण सुमिरिहि प्राण जात बिरमायो ॥ ४० ॥ हमारे माई मोरवा वैर परे । घन गर्जत बरज्यो नाहिं
 मानत त्यों त्यों रटत खरे ॥ करि करि पंख प्रगट हरि इनको लैलै शीश धरे । ताही ते मोहन
 विरहिनि को एऊ ढीठ करे ॥ को जानै काहेते सजनी हमसों रहत अरे । सूरदास परदेश बसे हरि
 ए वनते न टरे॥४१॥कोउ जाइ वरजौ बोलत मोरनि । टेरेनि विरह छिनुन रह्यो परे सुनि दुख होत
 करोरनि ॥ रटत पपीहा छिनु न रहाई होत विरहकी रोरनि । चमकत चपल चहुँ दिशि दामिनि
 अंबर घनकी घोरनि ॥ वर्षत बूँद बाण से लागत विरहाशरके जोरनि । चंद्र किरन नैनन भरि
 पीवत नाहिंन तृप्ति चकोरनि ॥ मन्मथ पीर अधिक तनु कंपित ज्यों मृग केहरि कोरनि । सूर
 दास तोही पर बचिवो मिलि हौ नंद किशोरनि॥४२॥राग सारंग॥अहो रे विहंगम बनवासी । तेरे बोल
 तरजनी बाढत श्रवन सुनत नींदउ नासी ॥ कहा कहाँ कोउ मानत नाहीं इक चंदन औ चंद परासी ।
 सूरदास प्रभु ज्यों न मिलेंगे लेहौं करवत कासी ॥ ४३ ॥ शारंग श्यामहि सुरति कराइ।पौढेहोहिं जहां
 नंद नंदन ऊँचे टेरे सुनाइ ॥ गये श्रीषम पावस ऋतु आई सब काहू चितचाइ । तुम विनु ब्रजवासी
 ऐसे जीवैं ज्यों करिया बिननाइ ॥ तुम्हरो कह्यो मानिहैं मोहन चरण पकरि लैआइ । अबकी बेर
 सूरके प्रभुको नैनन आनि देखाइ ॥ ४४ ॥ राग मलार ॥ सखी री चातक मोहिं जिआवत । जैसेहिरैनि
 रटति हौं पिय पिय तैसेही वह पुनि पुनि गावत ॥ अतिहिसुकंठ दाहु प्रीतमको तारुजीभ मनलावत ।
 आपु न पीवव सुधारस सजनी विरहिनि बोलि पिआवत ॥ जो ए पंछि सहाय न होते प्राण बहुत
 दुख पावत । जीवन सफल सूर ताहीको काज पराए आवत ॥ ४५ ॥ राग सारंग॥चातकन होइ कोउ
 विरहिनि नारि।अजहूँ पिय पिय रजनि सुरति करि झूठेहि माँगत वारि ॥ अति कृषगात देखि साखि
 याको अहनिशिवाणी रटत पुकारि । देखौ प्रीति बापुँ पशुकी आन जनम मानत नाहिं हारि ॥

अब पति बिनु ऐसो लागत यह ज्यों सरवर शोभित बिनवारि । त्योंही सूर जानिए गोपी जो न
 कृपा करि मिलहु मुरारि॥४६॥ राग आसावरी॥ अब मेरी को बोलै साखि । कैसे हरिके संग सिधारे अब-
 लौं यह तनु राखि ॥ प्राण उदान फिरत ब्रज बिथिनि अवलोकनि अभिलाषि । रूप रंग रस
 रास परानो बचन न आवै भाषि ॥ सूर सजीवनि मूरि मुकुंदहि लै आईही आँखि । अब सोइ अंज-
 न देति मुरांचि करि जिहि जीजै मुख चाखि॥४७॥ राग मलार॥ बहुत दिन जीवो पपीहा प्यारो । वासर रैन
 नावलै बोलत भयो विरह ज्वर कारो॥ आपु दुखित परदुखित जानि जिय चातक नाउँ तुम्हारो देखो
 सकल बिचारि सखी जिय बिछुरनको दुख न्यारो ॥ जाहि लगै सोई पै जानै प्रेम बाण अनियारो ।
 सूरदास प्रभु स्वाति बूँद लागि तज्यो सिंधु करि खारो॥४८॥ हौं तौ मोहनके बिरहजरी रे तू कत जारत रे पापी
 तू पांखि पपीहा पिउ पिउ पिउ अधराति पुकारत॥ सब जग सुखी दुखी तू जल बिनु तऊ न तनुकी विथहि
 बिचारत । कहा कठिन करतूति न समुझत कहा मृतक अबलनि शर मारत ॥ तू शठ बकत सत्तावत काहु
 होत उहै अपने उर आरत । सूर श्याम बिनु ब्रज पर बोलत हठि अगिलेऊ जनम बिगारत ॥४९॥ राग नट॥
 जो तू नेकहूँ उडि जाहि । कहा निशिवासर बकत बन विरहिनी तनु चाहि ॥ बिधिहि वचन सुदेश
 बाणी इहां रिझवत काहि । पति बिमुख पिक पुरुष वसुलौ एतौ कहा रिसाहि ॥ नाहिनै सुख
 सुनत समुझत बिकल विरह व्यथाहि । राखि यहु तन वा अवधिलौं मदन मुख जिनि खाहि ॥
 तहूँ तो तनु दग्ध रक्खलखि फिरि कहा समुहाहि॥ करि कृपा ब्रज सूर प्रभु बिनु मौनि मोहिं बिसाहि॥५०॥
 ॥ राग सारंग ॥ कोकिल हरिको बोल सुनाउ । मधुवनते उपठारि श्यामको इहि ब्रज लै करि आउ ॥
 जाजस कारण देत सयाने तन मन धन सब साजु । सुयश बिकात बचनके बदले क्यों न बिसाहत
 आजु ॥ कीजै कछु उपकार परायो यहै सयानो काज । सूरदास पुनि कहा यह औसर वन वसंत
 ऋतुराज ॥५१॥ सुन री सखी समुझि शिख मेरी । जहां बसत यदुनाथ जगतमणि वारक तहँ
 आउ दै फेरी ॥ तू कोकिला कुलीन कुशल मति जानत व्यथा बिरहिनी केरी । उपवन वैसि बोलि
 वरवानी वचन सुनाय हमहि करि चेरी ॥ कहियो प्रगट सुनाय श्यामसौं अबला आनि अनंगरिषु
 चेरी । तोसी नहीं और उपकारिनि यह बसुधा सब बुधि करि हेरी ॥ प्राणनके बदले न पाइयत सेंटि
 विकाय सुयशकी देरी । ब्रजले आउ सूरके प्रभुको गाउँगी कलकीरति तेरी ॥५२॥ राग मलार॥
 अब इह वरषो बीति गई । जिनि सोचहु सुखमान सयानी भली ऋतु शरद भई ॥ प्रफुलित सरज
 सरोवर सुंदर नवबिधि नलनि नई । उदित चारु चंद्रिका अवर उर अंतर अमृत मई ॥ घटी घटा
 सब अभिन मोह मद तमिता तेज हई । सरिता संयम स्वच्छ सलिल जल फाटी काम कई ॥ हे
 शारधा सँदेश सूर सुनि करुणा कहि पठई । यह सुनि सखी सयानी आई हरि रति
 अवधि दई ॥५३॥ राग मारू॥ शरद समैहू श्याम न आए । को जानै काहेते सजनी कहुँ विरहिन बिर-
 माए ॥ अमल अकास कास कुसुमिन क्षिति लक्षण स्वाति जनाए । सर सरिता सागर जल उज्ज्वल
 अलिकुल कमल मुहाए ॥ अहि मयंक मकरंद कंद हति दाहक गरल जिवाए । त्रिय सब रंग संग
 मिलि सुंदरि रचि सचि सींच सिराए ॥ सूनी सेज तुषार जमत चिरहास चंदन बाए । अबलहि आश
 सूर मिलिबेकी भए ब्रजनाथ पराए॥५४॥ अथ चंद्र प्रति तरकवदति ॥ राग कान्हरो॥ छूटि गई शशि शीतल-
 ताई । मनु मोहि जारि भसम कियो चाहत साजत मनो कलंक तनु काई ॥ याहीते श्याम
 अकास देखिये मानो धूम रह्यो लपटाई । ता ऊपर दौदैत किरनि उर उडुगण कउनै
 चढि इत आई ॥ राहु केतु दोउ जोरि एक करि कहि इहि समै जरावहि पाई । असे ते न पाचि

जात पापमें कहत सूर विरहिनि दुखदाई॥५५॥ राग केदारो॥ यह शशि शीतल काहेते कहियत । मीनकेत
 अंबुज आनंदित ताते ताहित लहियत ॥ विरहिनि अरु कमलनि त्रासत कहूँ अपकारी रथनाहि
 यत । सूरदास प्रभु मधुवन गौने तो इतनो दुखसहियत ॥५६॥ करधनु लिए चंद्रहि मारि । तब तोपै
 कछु वै न सिरैहै जब अतिज्वर जैहै तनुजारि ॥ सूरदास जाइ मंदिरचढि शशिसन्मुख दर्पण
 विस्तारि । ऐसी भाँति बुलाइ मुकुर महि अति बल खंड खंड करिडारि ॥ सोई अवाधि निकट
 आईहै चलतैही जो दई मुरारि । सूरसो बिनय करति हिमकरसों अब तू उधो छाँड़ि दिनचारि ॥५७॥
 ॥ राग सारंग ॥ हरको तिलक हरि बिनु दहत । वै कहियत उडुराज अमृतमै तजि स्वभाव मोहि बहनि
 बहत ॥ कत रथ थकित बयो जु पश्चिम दिशि ग्राह ग्रसित जैसे ग्रहन ग्रहत । छयो न छीन होत
 सुन सजनी भूमि भवनरिषु कहा बसत ॥ जाको ध्यान धरतिहौं दधिसुत मणि महेश जैसे रहनि
 रहत । सूरदास प्रभु तुम्हरे मिलन बिना प्राणतजति यह नाहिनै सहत ॥५८॥ राग मारु ॥ या बिन होब
 कहा यह सूनो । लै किन प्रगट कियो प्राचीदिशि विरहिनि को दुख दूनो ॥ सब निरदै सुर असुर शैल
 सखि सायर सर्प समेत । काहु न कृपाकरी इतननिमें त्रियतन बन दौ देत ॥ धन्य कहूँ वर्षा रवि
 तमचुर अरु कमलनको हेतु । युग युग जीवै जर बापुरी मिलै राहु अरु केतु ॥ चितै चंद्र तन
 सुरति श्यामकी बिकलभई ब्रजवाल । सूरदास अजहं इहि औसर काहे न मिलत गुपाल ॥५९॥ दूरि न
 करहि बीनको धरिबो । रथ थाक्यो मानो मृग मोहे नाहिन कहूँ चंद्रको टरिबो । जामें बीती सोई
 जानै कठिन सु प्रेम पाशको परबो प्राणनाथ संगहुते बिछुरे रहत न नैन नीरको झरिबो ॥ चंदन चरचि
 तनु दहत मलयानिल श्रवण विरहानल जरिबो । सूर सु कमलनैनके बिछुरे झूठो सब जतन-
 निको करिबो ॥६०॥ राग केदारो ॥ विधु वैरी शिरपर वसै निशिदिन परई । हरि सुर भान सुभट बिना यहि-
 को वश करई ॥ गगन शिखर उतरै चढै गर्वै जिय धरई । किरिनि सकति भुज भरिहैन उरते न
 निकरई ॥ उडु परिवार पिशुन सभा अपयशहि न डरई । सोई परपंच करे सखी अबला ज्यों बरई ॥
 घटै बढै यहि पापते कालिमा न टरई ॥ सूर दुष्ट समुझावही त्यों त्यों जिय खरई ॥६१॥ राग मलार ॥ कोऊ
 बरजो री या चंद्रहि । अतिही क्रोध करत हम ऊपर कुसुदिनि कुल आनंदहि ॥ कहा कहां वर्षारवि
 तमचर कमलबलाहक करे । चलत न चपल रहत थिरकै रथ विरहिनि के तनुजारे ॥ नंदित शैल
 उदाधि पन्नगको श्रीपति कमठ कठोरहि । देति अशीश जरा देवीको राहु केतु किनि जोरहि ।
 ज्यों जलहीन मीन तनु तलफति ऐसी गति ब्रजवालहि । सूरदास प्रभु आनि मिलावहु मोहन
 मदनगुपालहि ॥६२॥ अब हरि कौनसों रति जोरी । काके भए कौनके ह्वै बंधे कौनकी डोरी ॥ त्रेता
 युग इक पत्नी व्रत किए सोऊ बिलपति छोरी । शूर्पनखा वन व्याहन आई नाक निपाति बहोरी ॥
 पय पीवत जिन हती प्रूतना श्रुति मर्यादा फोरी । बहुतै प्रीति बढाइ महारिसों बहुरौ नाचितयो
 उन ओरी ॥ आरजपंथ छिंदाय गोपिकन अपने स्वारथ भोरी । सूरदास करि काज आपनो
 गुढी डोरि ज्यों तोरी ॥६३॥ अब या तनुहि कहो कहा कीजै । सुन री सखी श्याम सुंदर बिन बाँटि
 विषम विष पीजै ॥ कै गिरिए गिरि चढि सुनि सजनी कै शीश शंकरहि दीजै । कै दहिए दारुण दावानल
 जाइ यमुन धासि लीजै ॥ दुसह वियोग विरह माधोको दिनही दिनही छीजै । सूर श्याम प्रीतम
 बिनु राधे सोचि सोचि जिय जीजै ॥६४॥ राग भोपाली ॥ हमहि कहा सखी तनके जतनकी अब या यशहि
 मनोहर लीजै । सकल त्रास सुख याही वपुलों छाँड़ि दियेते कछु न छीजै ॥ कुसुमित सेज
 कुसुम सर सस्वर हरिके प्राण प्राणपति जीजै । विरह थाह ब्रजनाथ सबनदै निधरक सकल

मनोरथ कीजै ॥ सबन कहत मन रीस रिसाए नहिंन बसाय प्राण तजि दीजै । सूर सु पतिसों
चरचि चतुरई तुम यह जाइ बधाई लांजै ॥६५॥ राग केदारो ॥ जियहि क्यों कमलानि कादों हीन ॥ जिनसों
प्रीति हुती री सुन सखी तिनहुँ बिछुरि दुख दीन ॥ सागर कूल मीन तरफतहैं हुलसि होत जल
दीन । श्याम वारि विधि लई विरद तजि हम जु मरति लवलीन ॥ शशि चंदन अरु अंभ छाँडि
गुण वपु जु दहत मिलि तीन ॥ सूरदास प्रभु मौन सबै ब्रज बिन यंत्री बिन वीन ॥६६॥ राग सारंग ॥ वैसी शारंग
करहि लिये । शारंग कहत सुनत वे शारंग शारंग मनहि दिये ॥ शारंग पथिक बैठि वह शारंग शारंग
बिकल हिये । शारंग धुकि शारंग परे शारंग शारंग क्रोध किए ॥ शारंगहै भुज करहि विराजत
शारंग रूप किए । सूरदास मिलहीं वे शारंग तौ परि सुफल जिये ॥६७॥ राग मलार ॥ सो सुनियतहै री द्वै
माह । इतने महि सब तात समझिवी चतुर शिरोमणि नाह ॥ आवन कह्यो बहुत दिन लाए करी
पाछिली गाह । हमहिं छाँडि कुबिजा मन बाँध्यो कौन वेदकी राह ॥ एते पर संतोष न मानत
परे हमारे डाह । सूरदास प्रभु पुरो दीजै दिन दश मानी साह ॥६८॥ राग सारंग ॥ ऐसो सुनियत है द्वै साव-
न । उहै शूल फिरि फिरि शालत जिय श्याम कह्यो हो आवन ॥ तब कत प्रीति करी अब त्या-
गी अपनो कीनो पावन । यह सुख सखी निकसि तजि जइये जहाँ सुनीए नावन ॥ एकहि बेर तजी
मधुकर ज्यों लागे नेह बढावन । सूर सुरति क्यों होति हमारी लागी नीकी भावन ॥६९॥ राग कान्हरो ॥
कहिंको पिय पियहि रटतहो पियको प्रेम तेरो प्राण हरैगो । काहेको लेति नयन जल
भरि भरि नयन भरेते कैसे शूल टरेगो ॥ काहेको श्वास उसाँस लेतिहौ वैरी बिरहको दवा जरै
गो ॥ छाल सुगंध सेंज पुहुपावलि हारु छुए ते हियहारु जरैगो ॥ वदन दुराइ बैठि मंदिरमें बहुरि
निशापति उदय करैगो । सूरसखी अपने इन्ह नैननि चंद्र चितै जिनि चंद्र जरैगो ॥७०॥ राग सारंग ॥ अब
हरि हमको माई री मिलत नाहिंन नेकु । नित उठि जाइ प्रातलै बनसँग आगे पाछे चलिन सकति
सखी डग एक ॥ बाँहा जोटी कुसुम चुनत दोउ द्रुमतन मेरे उर लागि एक दिन नख एक । रसन
दशन धरि भरि लिए लोचन तोरन लखि सुधर बरषे एक ॥ लावत हृदय खोंचि पुरतपट फरहु
रि लेत परिजन रेक । अब कोउ सोहै वसु सूर प्रभु कौन अधिक जिहि परिनेका ॥७१॥ राग मलार ॥ हो
कछु बोलति नाहीं लाजनि । एक दाँई मारि मरिवो पै मरिवो नंदनंदनके काजनि ॥ तजि ब्रजबाल
आपनो गोकुल अब भाए सुखराजनि । कागज लिखि पतियां नहिं पठवत पायो जियको माजनि ॥
जे गृह देखि परमसुख होतो बिन गोपाल भए भाजन । कासों कहौ सुनै कोई दुख द्वरि
श्यामसों साजन ॥ कारी घटा देखि धुरवा जनु विरह लयो करता जनु । सूरदास नागर बिन अब
यह कौन सहै शिर गाजनु ॥७२॥ राग गौरी ॥ बहुदिन ऐसोई हतो री । है जाते मेरे आँगनमें मोहन
चरन चलि ऐसो री ॥ बालदशाकी प्रीति निरंतर परी रहतही ठोरी । राधा राधा नंदनंदन मुख लागि
रहो तिहि सोरी ॥ वेणु पाणि गहि मोको सिखावत मोहन गावन गौरी । सूरदास श्याम शारंग
तजि बहु सुख बहुरि न भोरी ॥७३॥ राग सारंग ॥ गौरिपूत रिपु तासुत आए प्रीतम ताहि ननारे । शिव
विरंचि जाके दोउ बाहन तिन हरे प्राण हमारे ॥ मोहिं वरजत उठि गमन कियो उठे स्वादे लुबध
रसाल । कुंती नंद तात मुख जोवत अरु वारत अतिचाल ॥ उगवै सूर छुटैबै बंधन तौ विरहिनि
रति मानै । इहि विधि मिले सूरके स्वामी भक्त होइ सो जानै ॥७४॥ राग गौरी ॥ माधो जू दरशनकी
औसेरि । लै जु गए मनसंग आपने बहुरि न दीन्हों फेरि ॥ तुम्हरे भवन नहीं भावै मनु जनु राखै वै टेरि ।
कमलन यो हम हरी हेम अति कासों कहैं दुख टेरि ॥ तुम बिछुरे सुख कबहुँ न पायो सब

जग देखति हेरि । सूरदास सब नातो ब्रजको आए नंद निवेरि ॥ ऋतु वसंत कोकिल कत कूजहि मदन संकली खेरि ॥ ७५ ॥ राग आसावरी ॥ सखी री विरहा यह बिपरीत । विरहिनी वासु क्यों करै पावसकाल प्रतीत ॥ नित नवला नवसत साजिकै अरु वह भावक राखी । ना जानौ नृपति प्राणपति कहाँ हैं रुचि आँखी ॥ सूरदास गोपालकी सब अवधि गई व्यतीत । बहुरि कब देखिबो मुख तुम्हारे यह नीत ॥ ७६ ॥ राग विलावल ॥ तोऊ तौ गोपाल आहिं गोकुल बासी । ऐसी बातें बहुतै कहि लोग करत हैं हाँसी ॥ मथि मथि सिंधु सुरन कर पोषी शंभु भए विष्णुआसी । इमि हति कंस राज औरै दयो चाहिलई इक दासी ॥ बिसरो सूर विरह दुख अपनो अब चली चाल औरासी ॥ ऐसे विहंग प्रीति निधि देखे प्रगट न परखी खासी ॥ ७७ ॥ राग सारंग ॥ उन ब्रजदेव नेकु चितु करते । कछु जिए आश रहति विधिवश जो बहुरहु फिरि २ मिलते ॥ कहा कहिए हरि सब जानत हैं या तनुकी गति ऐसी । सूरदास प्रभुताहि सुरुचि मिलि नातरु हम गरवैसी ॥ ७८ ॥ राग विलावल ॥ श्याम चितौदरे मधु बनियाँ ॥ अपने हाथ पोहि पहिरावत कान्ह कनकके मनियाँ ॥ बहुरि गोकुल काहेको आवत भावत नवजोवनियाँ । सूरदास प्रभु वाके वशपरि अब हरि भए चिकनियाँ ॥ ७९ ॥ देखो री धौँ लोग चतुर मधुवनको ॥ वादत नहीं गोविंद विमोहै गुणजानौ माधौको ॥ जब हरि गमन करौ मधुवनको छाँडो हेतु सबनको । सूरदास प्रभु बेगि मिलावो गोविंद प्यारो निज प्राणनिको ॥ ८० ॥ राग धमरा ॥ कहो री जो कहिवेकी होई ॥ प्राणनाथ बिछुरेकी वेदन और न जानै कोई ॥ ज्यों २ अधर सुधारस लैलै मगन रही मुख जोई । जो रस शिव सनकादिक दुर्लभ सोरस बैठी खोई ॥ कहा करौ कछु कहत न आवै सुखसपना भयो सोई । हमसों कठिन भए कमलापति काहि सुनावो रोई ॥ विरह व्यथा अंतरकी वेदन सो जाने जेहि होई । सूरदास सुख मूरि मनोहर लैजो गयो मन मोई ॥ ८१ ॥ राग सानुता ॥ बिछुरे री मेरे वालसँघांती । निकसि न जात प्राण ए पापी फाटत नाहिं वज्रकी छाती ॥ हों अपराधिन दही मथतिहि भरियोबन मदमाती ॥ जाहों जानति हरिको चलिबो लाज छाँडि सँगजाती ॥ ढरकत नीर नैनभरि सुंदर कछु न सोहात दिवस अरु राती । सूरदास प्रभु दर्शन कारन सब सखिअन मिलि लिखी जो पाती ॥ ८२ ॥ राग मलार ॥ हरि परदेश बहुत दिन लाए । कारी घटा देखि बादरकी नैननीर भरि आए ॥ वीरबटाऊ पंथी हो तुम कौन देशते आए । इह पाती हमरी लै दीजो जहां साँवरे छापे ॥ दादुर मोर पपीहा बोलत सोवत मदन जगाए । सूरदास गोकुलते बिछुरे आपुन भए पराए ॥ ८३ ॥ हमारे हिरदै कुलसे जीत्यौ । फटत न सखी अजहुँ उहि आशा वरष दिवस पारि बीत्यौ ॥ हमहूँ समुझि परी नीकेकरि यहै असित तनु रीत्यो । बहुरि न जीवन मरन सों साझो करी मधुपकी प्रीत्यो ॥ अबतौ बात घरी पहरन सखी ज्यों उदवसकी भीत्यो । सूर श्याम दासी मुख सोवहु भयो उभयमन चीत्यो ॥ ८४ ॥ राग सारंग ॥ एकदिवस कुंजन मैं माई । नाना कुसुम लैलै अपने कर दिए मोहिं वह सुरति न जाई ॥ इतनेमें घन गर्जि वृष्टिकरि तनु भीज्यो मो भई जुडाई । कंपत देवि उठाइ पीतपट लैकरुणामैं कंठ लगाई ॥ कहँ वह प्रीति रीति मोहनकी कहाँ अबधौँ एते निठुराई । अब बलवीर सूर प्रभु सखी री मधुवन बसि सब रति बिसराई ॥ ८५ ॥ राग कान्हरो ॥ हों जानो मोको सखी माधो हितुहै कियो । अति आदर आतुर अलि ज्यों मिलि मुख मकरंद पियो ॥ वरु वह भली पूतना जाको पय सँग प्राण गयो । मनु मधु अचै निपट सूने तन यह दुख अधिक दयो ॥ देखि अचेत अमृत अवलोकनि चले जु सींचि हियो । सूरदास प्रभु वा आधार ते अबलौँ परत जियो ॥ ८६ ॥ राग सारंग ॥ या गतिकी माई को जानै । पंकज

सों पंकज गहि सींचे ए कबहुं न निदानै ॥ शिविनृप अरु सनकादिक कपि मुनिराई पर रति
 रंगमानै । करिहारी वह लोभ निसोए जु रहत इकतातानै ॥ बपु बिचारि अवगनि इनि इनते भाव
 कुचित यह ठानै । सूरदास प्रभु शिशु लीलामै नावी रैन जु वानै ॥ ८७ ॥ नाहिनै ब्रजनंद
 कुमार । परमचतुर सुंदर सुजान सखी या तनुको प्रतिहार ॥ रूप लकुट लिएही रहते आलि अनु-
 दिन नैननि द्वार । तादिनते डर भौन भयो सखी शिवरिषुको संचार ॥ दुख आवन कछु अटक न
 मानत सूनो देखि अगार । अंशु उसाँस जात अंतरते करत न कछु बिचार ॥ निशानिमेष कपाट
 लगे बिन शशि मूषत सतसारा । सूर प्राणलटि लाज न छाँडत सुमिरि अवध आधार ॥ ८८ ॥ राग मलार ॥
 ऐसे जो हरि आवहिंगे । निरखि निरखि वह मदन मनोहर नैन बहुत सुख पावहिंगे ॥ तैसिए
 श्याम घटा घनघोरनि बिच बगपाँति दिखावहिंगे । तैसेइ मोर पिक करत कुलाहल हरषि हिं-
 डोलना गावहिंगे ॥ तैसी ए दमकति दामिनी अरु सुरली मलार बजावहिंगे । अबके चलते
 जानि सूर प्रभु सब पहिले उठि धावहिंगे ॥ ८९ ॥ राग रामकली ॥ ब्रज कहा खोरी छत अरु अछत एकरख
 अंतर मिटत नहीं कोई करहु कोरी ॥ बालकही अभिलाषनि लीला चकृत भई कुललाज न छोरी ।
 विरुध विवेक गोपरस परि करि विरहसिंधु मारत ते वोरी ॥ यद्यपि हो त्रयलोकके ईश्वर परसि
 दृष्टि चितवति न बहोरी । सूरदास प्रभु प्रीति रीति कतते तुम सब अब रहे तोरी ॥ ९० ॥ राग सारंग ॥
 हरि मोको हरि भषु कहि जु गयो । हरि दरशत हरि मुदित हरि ब्रज हरि जु लयो ॥ हरिरिषु तारिषु
 पतिको सुत हरि बिनु प्रजरि दहे । हरिको तात परस उर अंतर हरि बिन अधिक वहे ॥ हरि
 तनया सुधि तहाँ वदति है हरि अभिमानन ढायो । अब हरि दवन दिवा कुबिजाको सूरदास मन
 भायो ॥ ९१ ॥ राग सारंग ॥ हरि बिनु कौन सों कहिए मनसिज व्यथा जराति अरनिलों उर अंतर दहिए ॥
 कानन भवन रैन अरु वासर कहूं न सच लहिए । मूके भये यज्ञके पशुलों कोलों दुख सहिए ॥
 कबहुँक उपजै जियमें ऐसी जाइ यमुन बहिए । सूरदास प्रभु कमलनैन बिन कैसे ब्रज रहिए ॥
 ॥ ९२ ॥ राग मारु ॥ किते दिन हरि देखे बिन बीते एकौ फुरत न श्याम सुंदर बिन बिरह सबै सुख जीते ॥
 मदन गोपाल बैठि कंचनरथ चिते किए तनुरीते । सुफलकसुत लैगए दगादै प्राणनहींके प्रीते ॥
 बहुरि कृपालु घोष कब आवहिं मोहन राम समीते । सूरदास प्रभु बहुरि कृपाकरि मिलहु सुदामा
 मीते ॥ ९३ ॥ राग सारंग ॥ कान्हधौं हमसों कहा कह्यो । निकस्यो वचन सुनाइ सखी री नाहिन परतु सख्यो ।
 मैं मतिहीन मर्म नहीं जान्यो भूली मथत मख्यो । अब कहा करों घोष वसि सजनी दूत दूरि
 निबख्यो ॥ सबै अजान भई तेहि औसर काहु रथ न गख्यो । सूरदास प्रभु वृथा लाज करि दुसह वियोग
 सख्यो ॥ ९४ ॥ राग नटा ॥ ग्वालिननी छाँडि देखि रहु खरचो तेरे विरह विरहिनी व्याकुल भवन काज बिसरचो ।
 करं पल्लव उडुपति रथ खैंच्यो मृगपति वैर करचो । पंखी पति सबही सकुचाने चातक अनग भरचो ।
 शारंग सुर सुनि भयो वियोगी हिमकर गर्व टरचो । सूरदास सायर सुतहित पति देखत मदन
 हरचो ॥ ९५ ॥ राग सारंग ॥ विरह भरचो घर अंगन कौने । दिन दिन बाढत जात सखी री ज्यों कुरखेतके
 डारे सोने ॥ तब वह दुख दीनो जब बाँधे ताहुको फल जानि । निजकृत चूक समुझि मनहीं मन
 लेत परस्पर मानि ॥ हम अबला अति दीन हीन मति तुमही सब हो विधियोग । सूर वदन देखतही
 अहुँठै या शरीरको रोग ॥ ९६ ॥ राग मलार ॥ जोपै कोउ माधो सों कहै । तो यह व्यथा सुनत नंदनंदन
 कत मधुपुरी रहै ॥ पहिलेही सब दशा बतावै पुनिकर चरण गहै । यह प्रतीति मेरे चित अंतर
 सुनत न प्रेम सहै ॥ यहै सँदेश मूरके प्रभुको को कहि यशहि लहै । अबकी बेर दयालु दरश दै

यह दुख आनि दहै ॥९७॥ राग सारंग ॥ माधो छांडिबे पहिचानि । तबते विरह कुटिल या गोकुल कीनो
 है बिजु खानि ॥ तनु गिरि जानि आनि अवनी डर इहि उड भीत रहे । गमन कान्ह क्षण क्षण तु
 काम शशि किरनि कुदर गहो ॥ रेणु अंजन जल नैन द्वार है रह्यो हृदय भरि पूरि । निकसत नाही
 पापरतन ज्यों गयो श्याम संग दूरि ॥ तुमसों बात और अलि भाषे उलटि ध्यान वपु जीत्यो । द्वै
 नृप लरत जाइ इंद्रिगत कहो सूरको नीत्यो ॥९८॥ राग नया ॥ मेरे मन इतनी शूल रही वैवतियां छतियां
 लिखि राखी जे नंदलाल कही ॥ एक दिवस मेरे गृह आए हौंहीं मथत दही । रति मांगत मैं मान
 कियो सखी सो हरि गुसा गही ॥ सोचति अति पछिताति राधिका सुछित धरणि ढही । सूरदास
 प्रभुके बिछरे ते व्यथान जात सही ॥९९॥ राग मलार ॥ हरि इते दिन लाए । आवन कहि गए अजहुं
 न आए ॥ चलत चितै मुसुकायके मृदु वचन सुनाये । तेई टैंग मोदक भए न धीरज हरि तन छूछ
 करि छिटकीये ॥ मोहन यदुनाथके गुण जानि न पाए ॥ मनहु सूर धनश्याम सुंदर बहुरि न चरण दिखाए ॥
 ॥१००॥ यह दुख कौन सों कहों ॥ जोइ बीतति सोइ कहति सयानी नित सब शूल सहों ॥ जे मुख
 श्याम संग सबकीने गहि राखे इहि गात । ते अब भए शीत या तनुको शाखा ज्यों द्रुम पात ॥
 जो हुती निकट मिलनकी आशा सोतो हूरि भई । यथा योग ज्यों होत रोगिया कुपथी करत
 नई ॥ यह तनु त्यागि मिलन यों बनि है गंगासागर संग । अब सुन सूर ध्यान ऐसो है श्याम
 राम इक रंग ॥११॥ राग सारंग ॥ हम शरघात ब्रजनाथ सुधानिधि राखे बहुत जतन करि सचि सचि ।
 मन मुख भरि भरि नैन ऐन है उरगति कमल कोशलों खचि खचि ॥ सुभग सुमन सब अंग
 अमृतमय तहां तहां राखति चित रचि रचि । मोहन मदन स्वरूप सुयशरस करत सु गुप्त
 प्रेमरस पचि पाचि ॥ सूर सुदास पियूष लागि रस पठयो नृपति तेउ गए बचि बचि । अब सोई
 मधु हरयो सुफलकसुत दुसह दाह जो उठत तन तचि तचि ॥ २ ॥ जबते नंदलाल चले काहू
 मुरली न बजाई । उन बिना जिय कठिन पीर निकसिहू न जाई । वृंदावनमें भूली काहू सारंगौ न
 गाई ॥ गोपिन कठिन हिये तरकि हूं न जाई । सूरदास प्रभुकी लीला ऊधो कछु पाई ॥ ३ ॥ राग सारंग ॥
 माई वै दिना ये देह अछत बिधना जो आनै री । श्याम सुंदर रंग रंग युवति वृंद ठानै री ॥ यद्यपि
 अक्रूर मूल परमगति पढ़ावै री । प्राणनाथ कमलनैन बांसुरी बजावै री ॥ सोई कहा कहों कहत कठिन
 कहै कौन मानै री । सूरसो नंद प्रेम पीर विरही मिले जानै ॥ ४ ॥ सबकोउ कहत सयानी
 बातें । समझि न परत बूझि नहिं आवत कही जात नहीं तातें ॥ पहिले जानि अग्नि चंदनसी सती
 बहुत उमहै । समाचार ताते औ सीरे आगे जाय लहै ॥ कहत फिरत संग्राम सुगम अति
 कुसुममाल करवार । सूरदास शिरदेत शूरमा सोइ जाने व्यवहार ॥ ५ ॥ राग गूजरी ॥ कुंवरिको
 वैरागी वैराग । पलटति वसन करति निशि चोरी वपु विलसुत भई जाग ॥ बेसरि वेह भूँदि मृगमद
 मथि नख उर धुकधुकी खेद कीनी । चलत चरण चित गयो गलित झिर स्वेद सलिल भैभीनी ॥
 छूटी भुजबल फूटी बल्य कर छटि लरफटी कंचुकी छीनी । मनहुं प्रेमकी परनि परेवा याही से
 पढि लीनी ॥ अवलोकत इहि भौंति रमापति जानौं अहिमणि छीनी । सूरदास प्रभु कही न जाइ
 कछु हौं जानी मति हीनी ॥ ६ ॥ राग मलार ॥ हरिको भारग दिन प्रति जोवति । चितवाति रहति चकोर
 चंद्र ज्यों सुमिरि सुमिरि गुण रोवति ॥ पतिआं पठवत मसि नहिं खंडित लिखि लिखि मानहु धो-
 वति । भूषण दिन निशि नौंद हिरानी एकौ पलनहिं सोवति ॥ सूरदास प्रभु तुम्हरे दरश बिजु
 वृथा जनम सुख खोवति ॥ ७ ॥ राग विलावल ॥ अंतार्यामी कुंवर कन्हारै गुरु गृह पढत हुते जहाँ विद्या

तहां ब्रजकी सुधि आई ॥ गुरुसों कह्यो जोरि कर दोऊ दक्षिणा कहौ सो देउँ मँगाई । गुरुपत्नी
 कह्यो पुत्र हमारो मृतक भयो सो देहु जिवई ॥ आनि दिए गुरुसुत यमपुरते तब गुरुदेव
 अशीश सुनाई । सूरदास प्रभु आइ मधुपुरी ऊधो को ब्रज दियो पठाई ॥ ८ ॥ अध्याय ॥
 ॥४६॥ उद्धवब्रजआगमन हेतु ॥ राग नट ॥ यदुपति जानि उद्धव रीति । जिहिं प्रगट निज सखा कहियत
 करत भाव अनीति । विरहदुख जहां नाहीं जामत नहीं उपजै प्रेम । रेख न मन रूप वरन जाके
 यहि घरचो वह नेम ॥ त्रिगुणतनु करि लखत हमको ब्रह्मानत और । बिना गुण क्यों पुहुमि उधरै
 यह करत मन डौर ॥ विरहरसके मंत्र कहिए क्यों चलै संसार । कछु कहत यह एक प्रगटत
 अतिभरचो अहंकार ॥ प्रेमभजन न नेकु याके जाइ क्यों समुझाइ । सूर प्रभु मन इहै आनी
 ब्रजहि देउँ पठाइ ॥ ९ ॥ राग नट ॥ इह अद्योत दरशीरंग । सदा मिलि एकसाथ बैठत चलत बोलत संग ॥
 बात कहत न बनत यासों निठुर योगी जंग । प्रेम सुनि बिपरीत भाषत होत है रसभंग ॥ सदा ब्रज-
 को ध्यान मेरे रासरंग तरंग ॥ सूर वह रस कहौ कासों मिल्यो सखा भुरंग ॥ राग नट ॥ संग मिलि कहौ का-
 सों बात । यह तो कथत योगकी बातें जा में रस जरिजात ॥ कहत कहा पितु मात कौनको पुरुष
 नारि कहा नात । कहा यशोदासीहै मैया कहा नंद सम तात ॥ कहा ब्रज भानुसुता सँगको सुख
 यह वासर वह प्रात । सखी सखा सुख नहीं त्रिभुवनमें नहि बैकुंठ सुहात ॥ वै बातें कहिए केहि
 आगे यह गुनि हरि पछितात ॥ सूरदास प्रभु ब्रजमहिमा कहि लिखी वदत बलभ्रात ॥ १० ॥ राग धनाश्री ॥
 कहां सुख ब्रजको सो संसार । कहां सुखद बंसीवट यमुना यह मन सदा बिचार ॥ कहां वनधाम
 कहां राधा सँग कहां संग ब्रजवाम । कहां रसरास बीच अंतर सुख कहां नारि तनु ताम ॥ कहां लता
 तरु तरु प्रति झूलनि कुंजरबन धाम ॥ कहां विरह सुख बिनु गोपिन सँग सूर श्याम ममकाम ॥ सखा
 हमको मिले ऊधो वचनन मारत ताम ॥ भावभजन बिना नाहीं सुख कहां प्रेम अरु योग । काग
 हैंसहि संग जैसो कहां दुख कहां भोग । जगतमें यह संग देखो वचन प्रति कहै ब्रह्म । सूर ब्रजकी
 कथा सो कहै यह करै जो दंभ ॥ ११ ॥ राग कान्हरो ॥ हंस कागको संग भयो ॥ कहां गोकुल कहां गोप गोपिका
 बिधि यह संग दयो ॥ जैसे कंचन कांच संग ज्यों चंदन संग कुगंधि । जैसे खरी कपूर दोऊ एक
 सम यह भई ऐसी संधि ॥ जलबिनु मीन रहत कहुँ न्यारे यह सो रीति चलावत । जब ब्रजकी
 बातें यहि कहियत तबहि तबहि उचटावत ॥ याको ज्ञान थापि ब्रजपठऊँ और न याहि उपाव ।
 सुनहु सूर याको बन पठऊँ यहै बनैगो दाव ॥ १२ ॥ राग धनाश्री ॥ याहि और कछु नहीं उपाइ मेरो प्रगट
 कह्यो नहि वदिहै ब्रजही देउँ पठाइ ॥ गुप्तप्रीति युवातिनकी कहिकै याको करौं महंत ।
 गोपिनको परबोधन कारण जैहै सुनत तुरंत ॥ अति अभिमान करेगो मनमें योगिनकी इह भाँति ।
 सूर श्याम यह निहचै करिकै बैठत है मिलि पाँति ॥ १३ ॥ जबहीं यह कहौंगो वाहि ॥ मोहि पठवत गोपिकनपै
 हरष है ताहि ॥ योगको अभिमान करिहै ब्रजहि जैहै धाइ । कहैगो मोहि श्याम मानत करौं यह चतु-
 राइ ॥ आइ गए तेहि समय ऊधो सखा कहि लियो बोलि । कंध धरि भुज भए ठाढे करत वचननि
 ठोलि ॥ बार बार उसाँस डारत कहत ब्रजकी बात । सूर प्रभुके वचन सुनि सुनि उपँगसुत
 सुसकात ॥ १४ ॥ राग धनाश्री ॥ हरि गोकुलकी प्रीति चलाई ॥ सुनहु उपँगसुत मोहि न बिसरत ब्रजवासी
 सुखदाई ॥ यह चित होत जाउँ मैं अबहीं यहां नहीं मन लागत । गोपी ग्वाल गाइ बन चारण अति
 दुख पायो त्यागत ॥ कहा माखनरोटी कहां यशुमति जेवहु कहि कहि प्रेम । सूर श्यामके वचन
 हैंसत सुनि थापत अपनो नेम ॥ १५ ॥ राग रामकली ॥ यदुपति लखो तेहि सुसकात । कहत हम मन रहे

जोइ सोई भई यह बात ॥ वचन परकट करन कारण प्रेमकथा चलाइ । सुनहु ऊधो मोहिं ब्रजकी सुधि नहीं विसराइ ॥ रैनि सोवत दिवस जागत नहींहै मन आन । नंद यशुमति नारि नर ब्रज तहाँ मेरो प्राण । कहत हरि सुनि उषंगसुत यह कहतहाँ रसरीति । सूर चितते टरत नहीं राधिकाकी प्रीति ॥ १६ ॥ सखा सुन एक मेरी बात । वह लतागृह संग गोपिन सुध करत पछितात ॥ विधि लिखी नहीं टरत कैसेहु यह कहत अकुलात । हाँसि उषंगसुत बचन बोले कहा हरि पछितात ॥ सदा हित यह रहत नहीं सकल मिथ्या जात । सूर प्रभु यह सुनहु मोसों एकही सों नात ॥ १७ ॥ जब ऊधो यह बात कही । तब यदुपति अतिही सुख पायो मानी प्रगट सही ॥ श्रीमुख कह्यो जाहु तुम ब्रजको मिलो जाइ ब्रजलोग । मोबिन बिरह भरी ब्रजबाला जाइ सुनावहु योग ॥ प्रेम मिटाइ ज्ञान पर बोधहु तुमहो पूरण ज्ञानी । सूर उषंगसुत मन हरषाने यह महिमा इन जानी ॥ १८ ॥ राग गौरी ॥ ऊधो तुम यह निहचै जानो । मन वच क्रम मैं तुमहिं पठावत ब्रजको तुरत पलानो ॥ पूरण ब्रह्म अलख अविनाशी ताके तुमहो ज्ञाता ॥ रेख न रूप जाति कुल नहीं जाके नहीं बिनु माता ॥ यह मत दै गोपिनको आवहु विरह न मनमें भाषति ॥ सूर तुरत तुम जाय कहौ यह ब्रह्म बिना नहीं आसति ॥ १९ ॥ राग सांग ॥ ऊधो तुम वेगही ब्रज जाहु । सुरति संदेश सुनाइ भेटो वल्लभनि को दाहु ॥ काम पावक तुलित मनमें विरह श्वास समीर । भस्म नाहिन होन पावत लोचन नके नीर ॥ आजुलौं इहि भाँतिहै वा कछुक श्वास शरीर । एते पर बिना समाधानहि क्यों धरै त्रियधीर ॥ बार बार कहा कहौं तुमसों सखा साधु प्रवीन । सूर सुमति विचारिए जिहि जियै जल बिनु मीन ॥ २० ॥ राग धनाश्री ॥ ऊधो ब्रजको गमन करो । हमहिं बिना विरहिनी गोपिका तिनके दुखहि हरो ॥ योग ज्ञान परबोधि सबनको ज्यों सुख पावे नारि । पूरण ब्रह्म अलख परचै करि मोहिं बिसरै डारि ॥ सखा प्रवीन हमारे तुमहौ तुमते नहीं महंत । सूर श्याम कारण यह पठवत है आवैंगे संत ॥ २१ ॥ राग नट ॥ ऊधो मन अभिमान बढ़ायो । यदुपति योग जानि जिय सांचो नयन अकाश चढायो ॥ नारिन पै मोको पठवत हैं कहत सिखावन योग । मन ही मन अपकरत प्रशंसा यह मिथ्या सुख भोग ॥ आयसु मानि लियो शिर ऊपर प्रभु आज्ञा परमान । सूरदास प्रभु गोकुल पठवत मैं क्यों कहौं कि आन ॥ २२ ॥ राग कान्हरो ॥ तुम पठवत गोकुलको जैहौ । जो मानिहैं ब्रह्मकी बातें तौ उनसों मैं कैहौं ॥ गदगद वचन कहत मन प्रफुलित बार बार समुझैहौं । आजुइ नहीं करौं तुव कारज कौनकाज पुनि लैहौं ॥ यह मिथ्या संसार सदाई यह कहि कै उठि ऐहौं । सूर दिना द्वै ब्रजजन सुखदै आइ चरण पुनि गैहौं ॥ २३ ॥ राग केदारो ॥ सुन सखा हित प्राण मेरे नाहिनै सम तोहिं । कैसेहुं करि उरुगण कीजो ब्रजबधुनते मोहिं ॥ त्याजि ये मैं रतन दीन्हों वृथा गोपकुमारि । सालोक्य सामीप्य नासारोपिता भुजचारि ॥ अंगरही साजो चितासों संधि नहीं तनु ज्ञान । सोई तुम उपदेशहु जो लहैं पद निर्बान ॥ जौन अबकै कृत करैं तो होइहौं ऋण दास । सूर गाइ चराइहौं है फेरि बासि ब्रजवास ॥ २४ ॥ राग विहागरो ॥ तुरत ब्रज जाहु उषंगसुत आजु । ज्ञान बुझाइ खबरि दै आवहु एक पंथ द्वै काजु ॥ जबते मधुबनको हम आए फेरि गयो नहीं कोई । युवातिन पै ताहीको पठवै जो तुम लायक होई ॥ एक प्रवीन अरु सखा हमारे जानी तुम सरि कौन । सोइ कीजो जैसे ब्रजबाला साधन सीखै पौन ॥ श्रीमुख श्याम कहत यह बाणी ऊधो सुनत सिहात । आयसु मानि सूरप्रभु जैहौं नारि मानि हैं बात ॥ २५ ॥ राग गौरी ॥ ऊधो ब्रज जिनि गहरु लगावहु । तुम ब्रजनारि जानि मन सकुचत कहिधौं योग सुनावहु ॥ बाणी कहत समुझि वै लेहैं

कही हमारी मानो । विरहदाह यह सुनत बूझि है मानहु अनलहि पानौ ॥ अवहीं जाहु विकल सब
 गोपी योग वचन कहिपोषौ । सूर नंद बाबा जननी यशोमतिको बेगिजाइ संतोषौ ॥२६॥ राग सोरठ ॥ हल-
 धर कहत प्रीति यशुमतिकी । कहा रोहिणी ए तन पावै वह बोलन वह हितकी ॥ एक दिवस हरि
 खेलत मोसँग झगरो कीन्हों पेलि । मोको दौरि गोदकरि लीनो इनहि दियो करठेलि ॥ नंद बाबा
 तब कान्ह गोदकरि खीझन लागे मोको ॥ सूर श्याम नान्हो तेरो भैया छोह न आवत तोको ॥ २७ ॥
 राग रामकली ॥ यशोमति करती मोको हेत । सुनत ऊधो कहत बनत न नैन भरि भरि लेत ॥ दुहुँको कुशला-
 त कहियो तुमहिं भूलत नाहिं । श्याम हलधर सुत तुम्हारे और कौन कहाहिं ॥ आइ तुमको धाइ
 मिलिहैं कछुक कारज और । सूर हमको तुमहिं बिन सुख नहीं है कहूँ ठौर ॥ २८ ॥ राग विहागरो ॥ श्याम
 कर पत्री लिखी बनाइ । नंदबाबासों बिनती करी करजोरि यशोदामाइ ॥ गोप ग्वाल सखन
 गहि मिलि मिलि कंठ लगाइ । और ब्रजनर नारि जेहैं तिनहि प्रीति जनाइ ॥ गोपिकनि लिखि योग
 पठयो भाउ जान न जाइ । सूर प्रभु मन और यह कहि प्रेम लेत दृढाइ ॥ २९ ॥ उपंगसुत हाथदर्द
 हरिपाती । यह कहियो यशुमति मैयासों नहिं बिसरत दिनराती ॥ कहत कहाँ सुदेव देवकी तुमको
 हमहैं जाए । कंस त्रास शिशु अतिहि जानिकै ब्रजमें राखि दुराए ॥ कहै बनाइ कोटि कोउ बातें
 कहि बलराम कन्हाई ॥ सूरकाज कारिकै कछु दिनमें बहुरि मिलेंगे आई ॥ ३० ॥ राग विलावल ॥ ऊधो इतनो
 कहियो जाइ । हम आवैंगे दोउ भैया मैया जिनि अकुलाइ ॥ याको विलग बहुत हम मान्यो जब
 कहि पठयो धाइ ॥ वह गुण हमको कहा बिसरिहैं बडे किये पय प्याइ ॥ और जु मिल्यो नंद बाबासों
 तब कहियो समझाइ । तौलों दुखी होन नहिं पावैं धवरी धूमरि प्याइ ॥ यद्यपि यहाँ अनेक भैंति
 सुख तदपि रह्यो ना जाइ । सूरदास देखो ब्रजवासिन तबहीं हियो सिराइ ॥ ३१ ॥ राग आसावरी ॥ ऊधो
 जननी मेरी को मिलिहौ अरु कुशलात कहोगे । बाबा नंदहि पालागन कहि पुनि पुनि चरण
 गहोगे ॥ जादिनते मधुबन हम आए शोध न तुमही लीनो हो । दैदैं सौंह कहोगे हित करि कहा
 निठुरई कीन्हों हो ॥ यह कहियो बलराम श्याम अब आवैंगे दोउ भाई हो । सूर कर्मकी रेख मिटै
 नहिं यहै कह्यो यदुराई हो ॥ ३२ ॥ राग केदारो ॥ बिधना इहै लिख्यो संयोग । जो कहाते मधुपुरी आए तज्यो
 माखन भोग ॥ कहाँ वै ब्रजके सखा सब कहाँ वै मथुरा लोग । देवकीवसुदेवसुत सुनि जननि
 कहै सोग ॥ रोहिणी माता कृपा करि उछँग लेती रोग । सूर प्रभु मुख यह वचन कहि लिखि
 पठायो योग ॥ ३३ ॥ राग गौरी ॥ पाती लिखि ऊधो कर दीन्ही ॥ नंद यशुदहि हेतु कहि दीजौ हँसि उपंग
 सुत लीन्ही ॥ सुख वचनन कहि हेतु जनायो तुमहौ हितु हमारे । बालक जानि पठै नृप डरते
 तुम प्रतिपालन हारे ॥ कुबिजा सुन्यो जात ब्रज ऊधो महलइ लियो झेलाले । हाथन पाति लिखी
 राधाको गोपिन सहित बडाई ॥ मोको तुम अपराध लगावत कृपा भई अन्यास । झुकत कहा
 मोपर ब्रजनारी सुनहु न सूरजदास ॥ ३४ ॥ राग मलार ॥ हमपर काहेको झुकत ब्रजनारी ॥ साझे भाग नहीं
 काहूको हरिकी कृपा निनारी ॥ कुबिजा लिखो संदेश सबनको अरु कीनी मनुहारी । हैंतौ दासी
 कंसराइकी देखो हृदय विचारी ॥ फलन माँझ ज्यों करुई तोमरी रहत घुरेपर डारी । अवतौ
 हाथ परी यंत्रीके बाजत राग दुलारी ॥ ३५ ॥ राग गौरी ॥ ऊधो ब्रजहि जाहु पालागौ ॥ यह पाती राधाकर
 दीजौ यह मैं तुमसों माँगौ ॥ गारी देहि प्रात उठि मोको सुनत रहत यह बानी । राजाभये जाइ
 नंदनंदन मिली कूबरी रानी ॥ मोपर रिस पावत काहेको बरजि श्याम नहिं राख्यो । लरिकईते
 बाँधति यशुमति कहा जु माखन चाख्यो ॥ रजुलै सबै हजूर होति तुम सहित सुता वृषभान ।

सूर श्याम बहुरो ब्रज जैहैं ऐसे भए अजान ॥ ३६ ॥ राग घनाश्री ॥ ऊधो यह राधासों कहियो । जैसी
 कृपा श्याम मोहिं कीन्ही आपु करत सोइ रहियो ॥ मोपर रिस पावत वे कारण मैंहौ तुम्हरी दासी ॥ तुमहीं
 मनमें गुणिधौ देखो बिन तप पायो कासी ॥ कहां श्यामकी तुम अर्धगिनि मैं तुम सरकी नाहीं ॥ सूरज
 प्रभु को यह न बूझिए क्यों न वहाँलौं जाहीं ॥ ३७ ॥ राग सारंग ॥ ऊधो जाइ कहियो राधिकाही तुम इतनी
 सी बात । आवन दिए कहो काहेको फिर पाछे पछितात ॥ अब दुखमानि कहाधौं करिहौ हाथ
 रहैगी गारी ॥ हमैं तुम्हैं अंतरहैं जेतो जानतहैं बनवारी ॥ एतो मधुप सबैरस भोगी जहीं जहीं रस नीको ।
 जो रस खाइ स्वाद करि छाँडे सो रस लागत फीको ॥ एक कुँवर हरि हरचो हमारो जगतमांझ
 यश लीनो । ताको कहा निहोरो हमको मैत्रिभंग करि दीनो ॥ तुम सब नारि गँवारि अही री कहा
 चातुरी जानों । राखि न सकी आपुवशकै तब अब काहे दुख मानों ॥ सूरदास प्रभुकी ए बातैं ब्रह्म
 लखै नहिं पारै । जाके चरण पाइकै कमला गति आपनी बिसारै ॥ ३८ ॥ राग केदारो ॥ सुनियत ऊधो
 लये सँदेशो तुम गोकुलको जात । पाछे करि गोपिनसों कहियो एक हमारी बात ॥ मात पिताको नेह
 समुझिकै श्याम मधुपुरी आए । नाहिन कान्ह तुम्हारे प्रीतम ना यशुमतिके जाए ॥ देखो बूझि
 आपने जियमें तुम माधो कौने सुख दीने । ए जालक तुम मत्त ग्वालनी सबै मुंड करि लीने ॥ तनक
 दही माखनके कारण यशुदा त्रास दिखावै । तुम हँसि सब बाँधनको दौरी काहु दया न आवै ॥
 जो वृषभानुसुता उन कीनी सो सब तुम जिय जानों । ताही लाज तज्यो ब्रजमोहन अब काहे दुख
 मानों ॥ सूरदास प्रभु सुनि सुनि बातैं रहे श्याम शिरनाए । इत कुबिजा उत प्रेम गोपिका कहत
 न कछु बाने आए ॥ ३९ ॥ राग विहागरो ॥ ऊधो जात ब्रजहि सुने देवकी वसुदेव सुनिकै हृदय हेत
 गुने ॥ आपसे पाती लिखी कहि धन्य यशुमति नंद । सुत हमारो पालि पठ्यो अति दियो आनंद ॥
 आइकै मिलि जात कबहुँ न श्याम अरु बलराम । इहौ कहति पठाइ देहैं तबहि तनु बिनवाम ॥ बाल
 सुख सब तुमहिं लूट्यो मोहिं मिले कुमार । सूर यह उपकार तुमते कहत बारंबार ॥ ४० ॥ राग विलावल ॥
 तब ऊधो हरि निकट बुलायो । लिखि पाती दोउ हाथ दर्ई तेहि ए मुख वचन सुनायो ॥ ब्रजवासी
 जावत नारि नर जल थल द्रुम वन पात । जो जेहिबिधि तासों तैसेही मिलि अरस परस कुश-
 लाता ॥ जो सुख श्याम तुमहिते पावत सो त्रिभुवन कहुँ नाहिं । सूरदास प्रभुदै सौह आपनी समुझत
 हौं कै नाहिं ॥ ४१ ॥ राग सारंग ॥ पहिले प्रणाम नंदराइसों । ता पीछे मेरो पालागन कहियो यशुमति
 माइसों । बार एक तुम बरसानेलों जाइ सबै सुधि लीजौ । कहि वृषभानु महरसों मेरो समाचार
 सब दीजौ ॥ श्रीदामा आदि सकल ग्वालनको मेरेहित भेटिबो । सुख संदेश सुनाइ सबनको दिन
 दिनको दुख भेटिबो ॥ मित्र एक मन वसत हमारे ताहि मिलै सुख पाइहौ । करि करि समाधान
 नीकी बिधि मोहिको माथो नाइहो ॥ डरियहु जिनि तुम सघन कुंजमें हैं तहँके तरु भारी ॥
 वृंदावन मति रहति निरंतर कबहुँ न होत निनारी ॥ ऊधो सों समुझाइ प्रगट करि अपने मनकी
 वीती ॥ सूरदास स्वामीसों छलसों कही सकल ब्रज प्रीती ॥ ४२ ॥ कही हरि ऊधो सों ब्रज प्रीति । बोलै
 चले योग गोपिनको तहां करन विपरीति ॥ तुरत अंक भरि रथहि चढायो बिनय कह्यो करि ताहि ।
 विरहा जाल भेटि गोपिनको आवहु काज निबाहि ॥ लै रज चरण शीश बंदन करि ब्रज रहों दिन द्वैका
 सूरज प्रभु श्रीमुख कहि पठवत तुम बिनु रहों नैक ॥ ४३ ॥ राग गौरी ॥ गहर जनि लावहु गोकुल जाइ
 तुमहिं विना व्याकुल हम द्वै हैं यदुपति करी चतुराइ ॥ अपनोई रथ तुरत मँगायो दियो तुरत
 पलनाइ । अपने अंग आभूषण करि करि आपुनही पहिराइ ॥ अपनो मुकुट पीतांबर अपनो देत

सबै सुख पाये । सूर श्याम तदपि उपंगसुत भृगुपद एक बचाये॥४४॥ राग विलावल॥ ऊधो चले श्याम आयसु सुनि ब्रज नारिनको योग कह्यो । हरिके मन यह प्रेम लहैगो वहतो जिय अभिमान गह्यो ॥ आतुर चलयो हर्ष मन कीन्हें कृष्ण महंत करि पठै दियो । स्यंदन उहै श्याम सब भूषण जानि परै नंदसुवन वियो ॥ युवती कहा ज्ञान समुझैगी गर्ग वचन मन कहत चलयो । सूर ज्ञानको मान बढ़ाये मधुवनके मारगहि मिल्यो॥४५॥ राग विलावल॥ जबहि चले ऊधो मधुवनते गोपिन मनहि जनाइ गई। वार वार भौरा लगै कानन कछ दुख कछु हिय हर्ष भई॥ जहँ तहँ काग उडावन लागीं हरि आवत उडि जाहि नहीं। समाचार कहि जबहि सुनावत उडि बैठत सुनि अनत कह्यो॥ सखीपरस्पर यह कह बातें आजु श्यामकै आवत हैं । किधौ सूर कोई ब्रज पठ्यो आजु खबरिकै पावत हैं॥४६॥ आजु कोउ नौकी बात सुनावै । कै मधुवनते नंद लाडिले कै व दूत कोउ आवै ॥ भौरा इक चहुँ दिशिते उडि उडि कान लाग कछु गावै। उत्तम भाषा ऊंचे चढि चढि अंग अंग सगुनावै ॥ सूरदास कोऊ ब्रज ऐ-सो जो ब्रजनाथ मिलायै॥४७॥ राग धनाश्री॥ तू तो उडहि नहीं रे कागा। जो गोपाल गोकुलको आवै तो हँहै बडि भाग ॥ दधि ओदन भरि दोनो दैहौं अरु अंचलकी पाग । मिलिहौं हृदय सिराइ श्रवण सुनि मेटि विरहके दाग ॥ जैसे मात पिता नाहि जानत अंतरको अनुराग । सूरदास प्रभु करै कृपा तब जबते देह सुहाग॥४८॥ राग कल्याण॥ मथुराते निकसि परे गैल मांझ आइ उहै मुकुट पीतांबर श्याम रूप काछे । भृगुपद एक वंचित उर और अंग आछे ॥ ज्ञानको अभिमान किए मोको हरि पठ्यो । मेरोई भजन थापि माया सुख झुठयो ॥ मधुवनते चलयो तबहि गोकुल नियरान्यो । देखत ब्रजलो-ग श्याम आयो अनुमान्यो॥ राधा सों कहति नारि काग सगुन टेरो । मिलि हैं तोहि श्याम आजु भयो वचन मेरो ॥ वैसोइ रथ देखति सब कहति हरष बानी । सूरज प्रभुसे लागत तरुनी सुसकानी ॥ ४९ ॥ अध्याय॥ ४७ ॥ भैरवगीत ॥ राग विलावल॥ राधेहि सखी बतावत री । वैसोइ रथ लखौं सेतमें को उतहीते आवत री॥ चढि आयो अकूर जाहिपर स्यंदन ब्रज तन धावत री । वैसोइ ध्वजा पताका वैसोइ घर घर सबन सुनावत री॥ कोउ कहै श्याम कहति को ऐहै ब्रजतरुनी हरषा-वत री । सूरश्याम जेहि मग पगधारे तेहि मारग दरशावत री ॥ ५० ॥ सारंग ॥ हैं कोउ वैसीही अनुहारि । मधुवन तनते आवत सखी री देखहु नैन निहारि ॥ माथे मोर मुकुट कटि किंकिणि पीतवसन रुचि चारि। सूरदास प्रभु बिन सब ऐसी जैसे मीन बिन वारि॥ ५१ ॥ राग कल्याण॥ वैसोइ रथ वैसोइ कोउ आव-त उतहीते। झुरि झुरि सब मरति विरह गोपीजनकीते ॥ देखो री मुकुट झलक कुंडलकी ओभा । वैसोई पटपीत अंग सुंदर अतिशोभा ॥ आए री नंदसुवन राधा हरषानी । सूर मरत मीन तुरत मिले अगम पानी॥ ५२ ॥ राग नया॥ देखत हरष भई ब्रजनारी । वै निहचै आए बनवारी॥ जो जैसे सोतैसे धाई । घर घर लोगन सुने कन्हाई ॥ रथहीतन सब निरखन लागे । सपनेको सुख लूटत आगे ॥ कृपाकरी आए गोपाल । गोपिन जानी विरह विहाल ॥ ज्योंही ज्यों रथ आतुर आवै । त्योंही त्योंही पट फहरावै । सूर भई सुख व्याकुल नारी। प्रेमविवश आनंद उर भारी ॥ ५३ ॥ राग विलावल ॥ घर घर इहै शब्द परचो। सुनत यशुमति धाई निकसी हर्षितहि यो भरचो॥ नंद हर्षित चले आगे सखा हर्षत अंग । झुंड झुंडन नारि हर्षत चली उदधि तरंग॥ गाइ हर्षत पय स्रवत थन हुंकरत गउ बाल । उमँगि अंगन मात कोऊ विरध तरुन अरु बाल ॥ कोउ कहत बलराम नाहीं श्याम रथपर एक । कोउ कहति प्रभु सूर दोऊ रचित बात अनेक॥ ५४ ॥ राग विलावल॥ सुने ब्रजलोग आवत श्यामा। जहां तहांते सबै धाई सुनत दुर्लभ नाम । मानो मृगी वन जरति व्याकुल तुरत वरष्यो नीर ॥ वचन गदगद प्रेम व्याकुल

धरत नहिं मनधीर ॥ एक एक पल युग सबनको मिलनको अतुरात । सूर तरुनी मिलि परस्पर
 भई हर्षितगात ॥ ५५ ॥ राग धनाश्री ॥ नंदगोप हर्षितहै गए लेन आगे । आवत बलराम श्याम सुनत दौरि
 चली वाम मुकुट झलक पीतांबर मन मन अनुरागे ॥ निहचै आए गोपाल आनंदित भई बाल
 मित्रो बिरह जंजाल जोवत तेहिकाल । गदगद तनु पुलक भयो बिरहाको शूल गयो कृष्णदरश
 आतुर अति प्रेमके वेहाल ॥ रथ ज्योंज्यों निकट भयो मुकुट पीत बसन नयो मनमें कछु सोच
 भयो श्याम किधौं कोउ । सूरज प्रभु आवतहैं हलधरको नहीं लखत झंखति कहति तो होते संग
 बीर दोउ ॥ ५६ ॥ राग आसावरी ॥ आजु कोइ श्यामकी अनुहारी ॥ आवत उत उमंगे सुनि सबही देखिरूपकी
 वारी ॥ इंद्रधनुषसे उर वनमाला चितवत चित्त है । मनो हलधर अग्रज गोहनके श्रवणन शब्द परैं ॥
 गई चली निकट न देखे मोहन प्राणकिए बलिहारी । सूर सकल गुण सुमिरि श्यामके बिकल
 भई ब्रजनाम्नी ॥ ५७ ॥ राग विलावल ॥ कोउ माई आवत है तनु श्याम । वैसे पट वैसे रथ बैठनि वै भूषण वै
 दाम ॥ जो जैसे तैसे उठि धाई छाँडि सकल गृह काम । पुलक रोम गद्गद तेहि छिन शोभित अंग
 अभिराम । इतने बीच आइगए ऊधो रहीं ठगी सब वाम ॥ ज्यों निधि पाइ गँवाइ हाथते भई
 व्याकुल तनुताम ॥ सूरदास प्रभु कत आवत हैं वसु कूबरी धाम ॥ ५८ ॥ उमंगि ब्रज देखनको सब धाए ।
 एकहि एक परस्पर बृझति जनु मोहन दूलह आए ॥ सोई ध्वजा पताका सोई जा रथ चढि ता
 दिवस सिधाए । श्रुति कुंडल अरु पीत बसन स्रक वैसे सोई साज बनाए ॥ जाइ निकट पहिचान्यो
 ऊधो नयन जलज जलछाए ॥ सूरज श्याम मिटी दरशन आशा नूतन बिरह जगाए ॥ ५९ ॥ जबहिं कहो
 ए श्याम नहीं । परी सुरछि धरणी ब्रजबाला जो जहां रही सुतहीं ॥ सपनेकी रजधानी है गई जो
 जागी कछु नहीं । बारबार रथ वोर निहारहिं श्याम बिना अकुलाहीं ॥ कहा आय करिहैं ब्रज
 मोहन मिली कूबरी नारी । सूर कहत सब ऊधो आए गई श्याम शरमारी ॥ ६० ॥ राग रामकली ॥ तरुणी
 गई सब बिलखाइ । जबहिं आए सुने ऊधो अतिहि गई झुराइ ॥ परी व्याकुल जहाँ यशुमति गई
 तहाँ सब धाइ । नीर नयनन बहत धारा लई पोछि उठाइ ॥ एक भई अब चलों मारग सखा पठयो
 श्याम । सुनो हरि कुशलात ल्यायो महरि सों कहैं वाम ॥ जबहिं लौं रथ निकट आयो तबहुं ते
 परतीति । वह मुकुट कुंडल पीतांबर सूर प्रभु अंगरीति ॥ ६१ ॥ राग विलावल ॥ भली भई हरि सुरति
 करी । उठौ महरि कुशलात बृझिये आनंद उमंगि भरी ॥ भुजा गहे गोपी परबोधत मानहुं
 सुफल घरी । पाती लिखि कछु श्याम पठायो यह सुनि मनहिं ठरी ॥ निकट उपंगसुत आइ
 तुलाने मानों रूप हरी । सूर श्यामको सखा इहै री श्रवणन सुनी परी ॥ ६२ ॥ राग धनाश्री ॥ निरखति
 ऊधो सुख पायो । सुंदर सुजल सुवंश देखियत याते श्याम पठायो ॥ नीके हरि संदेश कहैगो
 श्रवण सुनत सुख पैहै । यह जानति हरि तुरत आय हैं एकहि हृदय सिरै है ॥ घेरि लिए रथ
 पास चहुँघा नंद गोप ब्रजनारी । महर लिवाय गए निज मंदिर हरपित लियो उतारी ॥ अरघ देत
 भीतर तेहि लीन्हों धनि धनि दिन कहि आजु । धनि धनि सूर उपंगसुत आए मुदित कहत ब्रजराजु
 ॥ ६३ ॥ अथ नंदवचन उद्धवप्रति राग मलार ॥ कबहिं सुधि करत गोपाल हमारी । पृच्छत नंद पिता ऊधो
 सों अरु यशुदा महतारी ॥ बहुतै चूकपरी अनजानत कहा अबके पछिताने । वासुदेव घर भीतर आए मैं
 अहीरकै जाने ॥ पहिले गर्ग कछो हुतो हमसों संग देत गयो भूली । सूरदास स्वामीके बिछुरे राति दिवस
 मै शूली ॥ ६४ ॥ अथ उद्धव वचन राग सारंग ॥ कछो कान्ह सुनु यशुमति मैया ॥ आवाहिंगे दिन चारि पाँचमें
 हम हलधर दोउ मैया ॥ सुरली बेत विषाण देखिये श्रृंगी बेर सवेरौ । लैजनिजाइ चुराइ राधिका कछुक

खिलौना मेरो ॥ जादिनते तुम्हसों बिछुरे हम कोउ न कहत कन्हैया । भोरहि नाहि कलेऊ कीनो सांझ
 न पयपीयो नाघैया ॥ कहत न बन्यो सँदेशो मोपै जननि जितो दुख पायो । अब हमसों वसुदेव देवकी
 कहत आपनो जायो ॥ कहिए कहा नंदबाबासों बहुत निटुर मन कीनों । सूर हमहि पहुँचाइ
 मधुपुरी बहुरो शोध न लीनों ॥ ६५ ॥ पुनः नंदवचन ॥ राग सारंग ॥ हमते कछु सेवा न भई धोखे धोखे रहे
 धोखही जाने नाहि त्रिलोक मई ॥ चरणपकरि करि विनती करिबो सब अपराध क्षमा कीबे ।
 ऐसो भाग होइगो कबहुँ श्याम गोदमें लीबे ॥ कहै नंद आगे ऊधोके एकबेर दरशन दीबे । सूरदास
 स्वामी मिलि अबकै सबै दोष गत कीबे ॥ ६६ ॥ अथ सखावचन ॥ राग विलावल ॥ भली बात सुनियत है आज ।
 कोऊ कमलनयन पठ्यो है तन बनाए अपनो सो साज ॥ पूँछत सखा कहौ कैसे हैं अब नाहीं
 कछु करते लाज । कंसमारि वसुदेव गृह आए उग्रसेनको दीन्हों राज ॥ राजा भए ज्ञानही भयो
 सुख सुरभी सँग बन गोप समाज ॥ अब सुन सूर करै को कौतुक ब्रजमें नाहि बसत ब्रजराज ॥ ६७ ॥
 ॥ अथ ब्रज नर नारीवाक्य ॥ राग सारंग ॥ वैसोइ रथ वैसोइ सब साज । मानहुँ बहुरि बिचारि कछु मन
 सुफलकसुत आयो ब्रज आज ॥ पहिलेइ गमन गयो लै हरिको परम सुमति राथो रतिराज ।
 अजहुँ कहा कीयो चाहत है याते अधिक कंसको काज ॥ व्याध जो मृगन बधत सुन सजनी सो
 शर काढि संग नहिं लेत । यह अक्रूर कठिनकीना इहिं ये इतनो दुख देत ॥ ऐसे बचन बहुत
 बिधि कहि कहि लोचन भरि सींचत उरगात । सूरदास प्रभु अवधि जानिकै चलीं सबै पूँछन कुश-
 लात ॥ ६८ ॥ राग रामकली ॥ ब्रज घर घर सब होत बधाए । कंचन कलश दूब दधि रोचन महारि महर वृंदावन
 आए ॥ मिलि ब्रजनारि तिलक शिर कीनो करि प्रदक्षिणा पास । पूँछत कुशल नारि नर हरषत
 आए सब ब्रजवास ॥ सकसकात तन धकधकात उर अकबकात सब ठाढे । सूर उपंगसुत बोलत
 नाहीं अतिहिरदै है गाढे ॥ ६९ ॥ सखीवचन गोपीप्रति ॥ राग धनाश्री ॥ आजु ब्रज कोऊ आयो है कैधौ बहुरि
 अक्रूर क्रूर है जियत जानि उठि धायो है ॥ मैं देख्यो ताको रथ ठाढो तुम सखी शोधन पायो है ।
 कैकरि कृपा दुखित जानिकै हरिसंदेश पठायो है ॥ चलीं मिलि सिमिटि सखी पूँछनको ऊधो दरश
 दिखायो है । तब पहिंचानि सबै प्रभुको भृत कमल जोरि शिरनायो है ॥ हरि हैं कुशल कुशल है तुमहुं
 कुशल लोग जेहि भायो है । है वह नगर कुशल सूरज प्रभु करि सुदृष्टि जहां छायो है ॥ ७० ॥
 ॥ राग धनाश्री ॥ देख्यो नंद द्वार रथ ठाढो । बहुरि सखी सुफलकसुत आयो परचो सँदेह
 जिय गाढो ॥ प्राण हमारे तबहिं गयो लै अब किहि कारण आयो । मैं जानी यह बात
 सत्यकै कृपाकरन उठि धायो ॥ इतने अंतर आनि उपंगसुत तिहि क्षण दरशन दीन्हों ।
 तब पहिंचानि जानि प्रभुको भृत परम सुचित मन कीन्हों ॥ तब परणाम कियो अति रुचिसों अरु
 सबही करजोरे । सुनियत हुते तैसई देखे सुंदर सुमति सु भोरे ॥ तुम्हरो दरशन पाइ आपनो
 जन्म सुफल करि मान्यो । सूर सु ऊधो मिलत भए सुख ज्यों ज्यों खग पायो पान्यो ॥ ७१ ॥ राग धनाश्री ॥
 बोलक इनहुँको सुनि लीजै । कैसी उठनि उठै धौं ऊधो तैसे उत्तर कीजै ॥ यामें कछु खरचियतु
 नाहीं अपनो मतो न दीजै । कहि री सखी भागिए किहि डर चलहु जाइ मुख छीजै ॥ द्वै करि जोरि
 भई सन्मुख ठाढी बचन कहो त्यों जीजै । सूर सुमति सोई दीजै हरि वदन सुधारस पीजै ॥ ७२ ॥
 राग नट ॥ ऊधो कहो हरि कुशलात । कहो आवन किधौ नाहीं बोलिए
 सुख बात ॥ एक छिन युग जात हमको बिन सुने हरि प्रीति । आइ आपै कृपाकीनी अब कहो
 कछु नीति ॥ तब उपंगसुत सबनि बोले सुनो श्रीमुख योग । सूर सुनि सब दौरि आई हटक

दीनो लोग ॥७३॥ अथ उद्धववचन ॥ राग सारंग ॥ गोपी सुनहु हरि कुशलाता कंस नृपको मारि छोरचो आप
 नो पितु मात ॥ बहुत विधि व्यवहार करि दियो उग्रसेनहि राज । नगर लोग सुखी वसतहैं भए
 सुरनके काज ॥ वे इह पाती लिखी अरु सुख कछो कछू संदेश । सूर निर्गुण ब्रह्म धरिकैं तजहु
 सकल अंदेश ॥ ७४ ॥ राग केदारो ॥ गोपी सुनहु हरि संदेशागण संग अक्रूर मधुवन हत्यो कंस नरेश ॥ रज-
 क मारचो वसन पहिरे धनुष तोरे जाइ । कुवल्या चाणूर मुष्टिक दई धरणि गिराइ ॥ मात पितुके
 वंदि छोरे वासुदेव कुमार । राज्य दीन्हों उग्रसेनहि चमर निज करठार ॥ कछो तुमको ब्रह्म ध्यावो
 छाँडि विषै विकार ॥ सूर पाती दई लिखि मोहिं पढौ गोपकुमार ॥ ७५ ॥ अथ पाती वचन अवस्था ॥ राग सारंग ॥
 पाती मधुवनहीते आई । सुंदर श्याम कान्ह लिखि पठई आइ सुनो री माई ॥ अपने अपने गृह
 ते दौरीं लै पाती उरलाई । नैनन निरखि निमेष न खंडित प्रेम व्यथा न बुझाई ॥ कहा करौं सुनो
 यह गोकुल हरि बिन कछु न सोहाई । सूरदास प्रभु कौन चूकते श्याम सुरति बिसराई ॥ ७६ ॥
 निरखत अंक श्याम सुंदरके बार बार लावत लै छाती । लोचन जल कागज मसि मिलि करि ह्वै गई
 श्याम श्याम जूकी पाती ॥ गोकुल वसत नंदनंदनके कबहुँ बयारि न लागी ताती । अरु हम उती
 कहा कहैं ऊधो जब सुनि वेणु नाद सँग जाती ॥ प्रभु कै लाड वदति नहिं काहु निशि दिन रसिक
 रास रस राती । प्राणनाथ तुम कबहुँ मिलहुगे सूरदास प्रभु बाल सँघाती ॥ ७७ ॥ पाती मधुवनते
 आई । ऊधो हरिके परमसनेही ताके हाथ पठाई ॥ कोउ पृच्छत फिरि फिरि ऊधोको आपुन लिखी
 कन्हाई । बहुरो दई फेरि ऊधोको तब उन बाँचि सुनाई ॥ मनमें ध्यान हमारो राखो सूरदास सुख-
 दाई ॥ ७८ ॥ राग मारु ॥ लिखि आई ब्रजनाथकी छाप । ऊधो बाँधे फिरत शीश पर देखे आवैं ताप ॥ उलटी
 रीति नंदनंदनकी घरि घरि भयो संताप । कहियो जाइ योग आराधै अविगत अकथ अमाप ॥
 हरि आगे कुविजा अधिकारिनि को जीवै इहि दाप । सूर संदेश सुनावन लागे कहौं कौन यह पाप ॥
 ७९ ॥ राग मलार ॥ कोउ ब्रज बाँचत नहिंन पाती । कत लिखि लिखि पठवत नंदनंदन कठिन विरहकी
 कांती ॥ नैन सजल कागज अति कोमल कर अँगुरी अतिताती । परसै जरै विलोके भीजै दुहूँ भाँति
 दुख भाती ॥ क्यों ए वचन सु अंक सूर सुनि विरह मदन शर घाती । सुख मृदु वचन बिना
 सींचे अब जिवहि प्रेम रस माती ॥ काहेको लिखि पठवत कागर । मदनगोपाल प्रगट दर्शन बिनु
 क्यों राखहि मन नागर ॥ ऊधो योग कहा लै कीबो बिनु जल सूखो सागर ॥ कहिधौं मधुप
 संदेश सुचितदै मधुवन श्याम उजागर । सूर श्याम बिनु क्यों मन राखौं तन योवनके आगर ॥ ८० ॥
 ॥ राग धनाश्री ॥ ऊधो कहा करैं लै पाती । जबनहिं देख्यो गुपाल लालको विरह जरावत छाती ॥ जान-
 तिहौं तुम मानति नहिं तुमहूँ श्याम सँघाती । निमिष निमिष मो बिसरत नहिं शरद सुहाई
 राती ॥ यह पाती लै जाहु मधुपुरी जहां वसैं श्याम सुजाती । मनजु हमारे उहाँलैगए काम
 कठिन शरघाती ॥ सूरदास प्रभु कहा चलतहै कोटिक बात सुहाती । एकबेर सुख बहुरि दिखावहु
 रहैं चरण रजराती ॥ ८१ ॥ राग मलार ॥ संदेशन मधुवन कूपभरे । अपने तौ पठवत नंदनंदन
 हमरे फिरि न फिरे ॥ जेइ जेइ पथिक हुते ब्रजपुरके बहुरि न शोध करे । कै वह श्याम सिखाय
 प्रबोधे कै वह बीच बरे ॥ कागज गरे मेघ मसि खूटी शरदौलागि जरे । सेवक सूर लिखैते आधो
 पलक कपाट खरे ॥ ८२ ॥ राग मलार ॥ आए नंदनंदनके भेव । गोकुल माझ योग विस्तारचो भली
 तुम्हारी जेव ॥ जब वृंदावन रास रच्यो हरि तबहिं कहा तुम हेव । अब यह ज्ञान सिखावन आए
 भस्म अघारी सेवा ॥ अबलनको लै सो व्रत ठान्यो जो योगनिको योग । सूरदास ए सुनत न जीवहि

आतुर विरह वियोग॥८३॥ राग सारंग॥ यहि अतर मधुकर इक आयो॥ निज स्वभाव अनुसार निकट होइ
 सुंदर शब्द सुनायो । पूछन लागीं ताहि गोपिका कुबिजा तोहिं पठायो । कीधौं सूर श्याम
 सुंदरको हमैं सँदेशो ल्यायो॥८४॥ राग मलार ॥ मधुकर कहा यहां निर्गुणगावहि । ए प्रिय कथा नगरनारि-
 नसों कहहि जहाँ कछु पावहि ॥ जिनि परसहि अब चरन हमारे बिरहताप उपजावहि । सुंदर मधु
 आनन अनुरागी नैनन आनि मिलावहि ॥ जानति मर्म नंद नंदनको और प्रसंग चलावहि । हम नाहिं न
 कमलासी भोरी करि चातुरी मनावहिं ॥ अति बिचित्र लरिकाकी नाई गुरदेखाइ बौरावहिं । ज्यों
 अलि कि तब सुमन रसलै तजि जाइ बहुरि नहिं आवहि ॥ नागर रति पति सूरदास प्रभु किहि बिधि
 आनि मिलावहि॥८५॥ राग बिलावल॥ मधुप तुम कहौ कहाँते आए हो ॥ जानतिहौं अनुमान आपने तुम
 यदुनाथ पठायो हो॥ वैसहि वरन बसन तनु वैसे वै भूषण सजिलाए हो॥ लै सरवसु सँग श्याम सिधारे अब
 कापर पहिराए हो॥ अहो मधुप एकै मन सबको सुतौ उहाँ लै छाए हो । अब यह कौन सयान भिहुरि ब्रज
 जाकारण उठि आए हो ॥ मधुवनकी मानिनी मनोहर तहीं जाहु जहाँ भाए हो । सूर जहाँलौं श्याम
 गातहौं जानि भले करि पाये हो॥८६॥ राग गौरी॥ मधुकर जो हरि कहौ सो कहिए । तब हम अब इन
 हींकी दासी मौन गहे क्यों रहिए ॥ जो तुम योग सिखावुन आए निर्गुण क्यों करि गहिए । जो
 कछु लिखो सोइ माथेपर आनि परे सब सहिए ॥ सुंदर रूप लाल गिरिधरको बिनु देखे क्यों
 लहिए । सूरदास प्रभु समुझी एकै रस अब कैसे निरवहिए ॥८७॥ ऊँचो वचन राग धनाश्री॥ सुनहु गोपी
 हरिको संदेश । करि समाधि अंतर्गति ध्यावहु यह उनको उपदेश ॥ वै अविगति अविनाशी पूरण
 सब घट रह्यो समाइ । निर्गुण ज्ञान बिनु मुक्ति नहीं है वेद पुराणन गाइ ॥ सगुण रूप तजि निर्गुण
 ध्यावो इक चित इक मनलाइ । यह उपाव करि विरह तरी तुम मिलै ब्रह्म तब आइ ॥ दुसह
 सँदेश सुनत माधोको गोपीजन बिलखानी । सूर विरहकी कौन चलावै बूडत मन बिन पानी॥८८॥
 ॥ गोपीवचन ॥ राग मलार॥ मधुकर हमही क्यों समुझावत । बारंबार ज्ञान गीता ब्रज अबलानि आगे
 गावत॥ नंदनंदन बिनु कपट कथाए कत कहि रुचि उपजावत । सक चंदन जो अंग शुदारत
 कहि कैसे सुखपावत ॥ देखि विचारतही जिय अपने नागरहो जु कहावत । सब सुमनन पर
 फिरी निरख करि काहेको कमल बँधावत ॥ चरणकमल कर नयन कमल कर नयन कमल वर
 भावत॥ सूरदास मनु अलि अनुरागी केहि बिधिहो बहरावत॥८९॥ राग मलार॥ रहुरहु मधुकर मधु मतवारे
 कौन काज या निर्गुणसों चिरजीवहु कान्ह हमारे ॥ लोटत पीत पराग कीचमें नीचन अंग
 सम्हारो । बारंबार सरक मदिराकी अपसर रटत उधारे ॥ दुम बेली हमहूँ जानतहौं जिनके हो
 अलि प्यारे । एक बास लैकै बिरमावत जेते आवत कारे ॥ सुंदर वदन कमलदल लोचन यशु-
 मति नंद दुलारे । तन मन सूर आर्पि रही श्यामहि कापै लेहि उधारे॥९०॥ मधुकर कौन देशते आए ।
 ब्रजवाते अक्रूर गए लै मोहन ताते भए पराए ॥ जानी सखा श्याम सुंदरकै अवधि बन्धन उठि
 धाए । अंग विभाग नंद नंदनके यहि स्वामितहैं पाए ॥ आसन ध्यान वाइ आराधन अलिमन
 चित तुम ताए । अतिबिचित्र सुबुद्धि सुलक्षण गुंजयोग मतिगाए ॥ मुद्रा भस्म विषान त्वचा
 मृग ब्रज युवतिन मनभाए । अतसी कुसुम वरन सुरली मुख सूरज प्रभु किन ल्याए ॥९१॥ मधुकर
 काके मीत भए । त्यागे फिरत सकल कुसुमावलि मालति भोरै लए ॥ छिनुके बिछुरे कमल
 रतिमानी केतकि कत बिधए । छाँडि न नेहु नहिं जान्यो लै गुण प्रगट नए ॥ नूतन कदम
 तमाल बकुल वट परसत जनम गए । भुज भरि मिलनि उडत उदासहै गत स्वारथ

समए ॥ भटकत फिरत पात द्रुम बेलिन कुसुम करंज भए ॥ सूर विमुख पद अंबुज छाँडे विषैनि विष
 वर छए ॥ ९२ ॥ राग जैतश्री ॥ मधुकर काके मीत भए । दिवस चारि करि प्रीति सगाई रसलै अनत
 गए ॥ डहकत फिरत आपने स्वारथ पाखंड अग्र दए ॥ चाडसरै पहिंचानत नाहिंन प्रीतम करत
 नए । सुंडउ बाँटि मेलि वाराए मन हरि हरि जु लए । सूरदास प्रभु दूत धर्म दिग दुखके बीज बए ॥
 ॥ ९३ ॥ राग सारंग ॥ मधुकर हम न होहिं वै बेली । जिनभजि तजि तुम फिरत और रँग करत कुसुमरस
 केली ॥ वारैते वर वारि बढी है अरु पोषी पिय पानि । बिनु पिय परस प्रात उठि फूलत होति सदा
 हित हानि ॥ ए वेली विरहा वृंदावन उरझी श्याम तमाल । पुहुपवास रस रसिक हमारे विलसत
 मधुप गोपाल ॥ योग समीर धीर नहिं डोलत रूप डार दिगलागी । सूर परागनि तजति हिण्णते
 श्रीगुपाल अनुरागी ॥ ९४ ॥ मधुकर कहाँ पढी यह रीति । लोक वेद श्रुतिपंथ रहित सब कथा
 कहाति विथरीति ॥ जन्मभूमि ब्रज सखी राधिका कहि अपराधतजी । अतिकुलीन गुणरूप अमित
 सुख दासी जाइ भजी ॥ योग समाधि वेद गुण मारग क्यों समुझै जु गँवारि । जो पै गुण अतीत
 व्यापकहै तोहिं कहाहै प्यारि ॥ रहि अलि ढीठ कपट स्वारथ हित तजि बहुवचन विशेषि । मन क्रम
 बचन बचति यहि नाते सूर श्याम तन देखि ॥ ९५ ॥ राग मलार ॥ मधुकर काहेको गोकुल आए । हम वै-
 सीही सच अपनेमें दूने विरह जगाए ॥ हम जानतिहैं जिनहि पठाए श्याम सँदेशो ल्याए । जन्म
 जन्मके दूत तिरोवन को नहिं लार लगाए ॥ कहा करहि कहा जाहि सखी री हरि बिनु कछु न सो-
 हाए । जन्म सुफल सूर तिनको जो काज पराए धाए ॥ ९६ ॥ राग मलार ॥ आए माई दुर्ग श्यामके संगी ।
 जे पहिले रँग रँग श्यामरँग तिनहीकी बुधिरंगी ॥ हमरी उनकीसी मिलवतहौ ताते भए विहंगी ।
 सूधी कहै सवन समुझावत ते साँचे सरबंगी ॥ औरनको सरवसु लै मारत आपुन भए अंबंगी ।
 सूर सु नाम शिलीमुख जे पीवैं घन कवच उपंगी ॥ ९७ ॥ सखी वाक्य परस्पर ॥ राग मलार ॥ है कोऊ मधुवन
 ते आयो । सुनो सुमति सब सखी सयानी हितकरि कान्ह पठायो ॥ जा मोहन बिछुरन ते गोकुल
 इतै दिवस दुख पायो । सो इहि कमलनैन करुणामय हृदही माँझ बतायो ॥ जो जहुँ योगी जतन
 करतहै नेकहु ध्यान न आयो । सो यह परमउदार मधुप ब्रज बीथिन माँझ बहायो ॥ अतिकृपालु
 आतुर अबलनिको व्यापक अंग गहायो । समुझि सूर सुख होत श्रवण सुनि नेति जु निगमन गायो ॥
 ॥ ९८ ॥ राग सारंग ॥ परी पुकार द्वार गृह गृहते सुनहु सखी इक योगी आयो । पवन सधावन भवन छो-
 डावन नवल रिसाल गोपाल पठायो ॥ आश अवध परम ऊरध जो तिनहि कहा हित ल्यायो । कनक
 वेलि कामिनि ब्रजबाला योग अग्नि देवकों धायो ॥ भवभय हरन असुर मारन हित काल मधुपुरी
 आयो ॥ ब्रजमें यादव एकौ नहिं काहेको उलटो सुयश हरायो ॥ सुथल श्याम धाम में बैठो मृत
 अधिकार जनायो । सूर विसारि प्रीति साँवरे भली चतुरता जगत हँसायो ॥ ९९ ॥ राग सारंग ॥ देव आए
 ऊधो मत नीको । आयो री मिलि सुनहु सयानी लिए सुयशको टीको ॥ तजन कहत अंबर आभूषण
 गेह नेह सुतहीको । अंग भस्म करि शीश जटाधरि सिखवत निर्गुण फीको ॥ मेरे जान इहै युवाति-
 नको देत फिरत दुख पीको । ता शरापते भए श्याम तन तउ न गहत डर जीको ॥ जाकी प्रकृति
 परी जिय जैसी सोच न भली बुरीको ॥ जो लागि सूर व्याल डसि भाजै सुख नहिं होत अमीको ॥ १०० ॥
 ॥ राग नट ॥ ऊधो तनक सुयश हरिको श्रवणन सुनि । कंचन काँच कपूर करररस सम दुख सुख गुण
 औगुन ॥ नाम उनको सुनि गृह कुटुंब तजि जाइ वसत परकानन ॥ परमहंस विहंग देखतहि आवत भिक्षा
 माँगन ॥ बालकपनको राउ संहारयो लोकलाज डर डारी । शूदनखाकी नाक निवारयो त्रिय वश

भए मुरारी॥बलिसों बाँधि पताल पठायो कीन्हें यज्ञनि आई । सूर प्रीति जानी ते हरिकी कथा तजी नहिं जाई॥ १ ॥ राग सौरभ ॥ ऊधो श्याम सखा तुम साँचे । की करि लियो स्वांग बीचहिते वैसेहि लागत काँचे॥जैसी कही हमहिं आवतही औरन कहि पछिताते । अपनो पति तजि और बतावत मोहिं मानि कछु खाते॥तुरत गमन कीजै मधुवनको इहां कहा यह ल्याए॥सूर सुनत गोपिनकी वाणी ऊधो शीश नवाए ॥ २ ॥ राग नट ॥ ऊधो बेगि मधुवन जाहु । हम विरहिनी नारि हरि बिनु कौन करै निवाहु ॥ तहीं दीजै मुरपैरना नफो तुम कछु खाहु॥जो नहीं ब्रजमें बिकानो नगर नारी साहु ॥ सूर वै सब सुनत लैहै जिय कहा पछिताहु॥ ३ ॥ राग धनाश्री॥ऊधो और कछू कहिबेको । मनमानै सोऊ कहि डारौ पालागैं हम सुनि सहिबेको ॥ यह उपदेश आजुलौं ऐसो कान न सुन्यो न देख्यो । निरपत पटे कटुक अतिजीरन चाहत मम उर लेख्यो ॥ निशिदिन बसत नेकहु न निकसत हृदय मनोहर ऐन । याको इहां ठौर नाहिंन है लै राखों जहां चैन ॥ ब्रजवासी गोपाल उपासी हमसों बातें छाँडि । सूर योग धन राखु मधुपुरी कुबिजा के घर गाडि॥ ४ ॥ राग नटा॥जाहु जाहु ऊधो जाने हौ पहिचानेहो । जैसे हरि तैसे तुम सेवक कपट चतु रई साने हो ॥ निर्गुण ज्ञान कहा तुम पायो कौने सिखै ब्रज आने हो । यह उपदेश देहु लै कुबिजहि जाके रूप लुभाने हो ॥ कहां लगि कहौ योगकी बातें बाँचत नैन पिराने हो । सूरदास प्रभु हम पर खोटी तुमतौ बारहवाने हो ॥ ५ ॥ राग गौरी॥ऊधो जाहु तुमहिं हम जाने । श्याम तुमहिं ह्याँको नहिं पठए तुमहौ बीच भुलाने ॥ ब्रजनारिनसों योग कहतहौ बात कहत न लजाने । बडे लोगन विवेक तुम्हारे ऐसे भए अयाने ॥ हमसों कही लई हम सहिकै जिय गुणि लेहु सयाने । कहा बबला कहा दिशा दिगंबर मष्टकरौ पहिचाने ॥ साँच कहौ तुमको अपनी सों बूझति बात निदाने । सूर श्याम जब तुमहिं पठायो तब नेकहु मुसकाने ॥ ६ ॥ राग गौरी ॥ कहति कहा ऊधोसों तुम बैरी । जाको सुनत रहे हरिके ढिग श्याम सखा यह सौरी ॥ कहा कहति री मैं पत्याति नहिं सुनि तुही कहा बनावति । हमको योग सिखावन आए यह तेरे मन आवति ॥ करनी भली भलेई जाने कुटिल कपटकी धानी । हरिको सिखाव नहीं री माई इह मन निहचै जानी॥कहां शाशिमुखरस कहाँ योग घर इतने अंतर भाषता॥सूर सबै तुम भई बावरी याकी पति कहा राखत॥ ७ ॥ राग कान्हरो॥ऐसेही जन धूत कहावत॥मोको एक अचंभो आवत यामें वै कछु पावत॥वचन कठोर कहत कहि दाहत अपनो महत गवाँवत । ऐसिउ प्रकृति परी कान्हको युवतिन ज्ञान बतावत ॥ आपुन निलज रहत नख शिखलौं एतेपर पुनि गावत । सूर करत परशंसा अपनी हारेहु जीति कहावत ॥ ८ ॥ राग मलार ॥ ऐसे जन बेशरम कहावत । सोच बिचार कहूँ इनके नहिं कहि डारत जो आवत ॥ अहिके गुण इनमें परिपूरण यामें कछू न पावत । लघुता लहृत महति करियो हँसि नारिन योग बतावत॥ब्रजमें हीन भए अब जैहै अनतहु ऐसेहि गावत ॥ ९ ॥ राग कान्हरो॥ प्रकृति जो जाके अंग परी । श्वान पूँछको कोटिक लागे सूधी कहूँ न करी ॥ जैसे सुभक्ष नहीं भक्ष छाँडै जन्मत जौन घरी । धोए रंग जात नहिं कैसेहु ज्यों कारी कमरी ॥ ज्यों अहि डसत उदर नहिं पूरत ऐसी धरनि धरी॥सूर होइ सो होइ सोच नहिं तैसेहैं एऊ री॥ १० ॥ राग सारंग॥ऊधो होहु आगे ते न्यारे । तुमहि देखि तन अधिक जरतहैं अरु नैननके तारे ॥ अपनो योग सैति धरि राखो यहां देत कत डारे । सो को जानत अपने मुखहै मीठे ते फल खारे ॥ हमरे गिरिधरके जु नाम गुण वसे कान्ह उरवारे॥सूरदास हम सबै एक मत ए सब खोटे करो॥ ११ ॥ राग कल्याण॥जाहु जाहु आगेते ऊधो पति राखति हौं तेरी । काहेको अब रोष दियावत देखति आँखि बरत है मेरी ॥ तुम जो

कहतहौ संत हैं गोविंद कहियत है कुबिजा उन घेरी । दोऊ मिले तैसेई तैसे वह अहीर वै कंसकी
 चेरी ॥ तुम सारिखे बसिष्ठ पठाए कहिए कहा बुद्धि उन केरी । सूर श्याम वह सुधि बिसराई गा-
 वत हैं ग्वालन सँगहेरी ॥१२॥ राग सारंग ॥ समुझि न परत तुम्हारी ऊधो । ज्यों त्रिदोष उपजे जक ला-
 गत बोलति बचन न सुधो ॥ आपुनको उपचार करौ कछु तब औरन शिष देहु । बडो रोग उप-
 ज्यो है तुमको भौन सवारे लेहु ॥ वहां भेषज नाना विधिको अरु मधुरिपुसे हैं वैद । हम कातर
 डरपत अपने शिर यह कलंक है कैद ॥ साँची बात छाँडि कत झूठी कहौ कौन विधि सुनही । सूर-
 दास मुकुताहल भोगी हंसज्वारिको चुनही ॥१३॥ राग सौराठा ॥ हम अलि गोकुल नाथ अराध्यो । मन
 बच क्रम हरिसों धरि पतिव्रत प्रेम योग तप साध्यो ॥ मात पिता हित प्रीति निगम पँथ तजि
 दुख सुख भ्रमनाख्यो । मानापमान परम परितोषन सुस्थल थिति मन राख्यो ॥ सकु-
 चासन कुल शील करषि करि जगत बंध कर बंदन । मौन उपबाद पवन आरोधन हित
 क्रम काम निकंदन ॥ गुरुजन कानि अग्नि चहुँ दिशि नभ तरनि ताप बिनु देखे । पिवत
 धूम उपहास जहाँ तहँ अपयश श्रवण अलेखे ॥ सहज समाधि बिसारि वषु करी निरखि निमेष
 न लागत । परमज्योति प्रति अंग माधुरी धरत इहै निशि जागत ॥ त्रिकुटी संग भ्रूभंग तराटक नैन
 नैन लागि लागे । हँसनि प्रकाश सुमुख कुंडल मिलि चंद्र सूर अनुरागे ॥ सुरली अघर श्रवण ध्वनि सो
 सुनि शब्द नहद करि कानै । वरषत रसरुचि बचन संग सुख पद आनंद समानै ॥ मंत्र दियो
 मनजात भजन लागि ज्ञान ध्यान हरिहीको । सूर कहौ गुरु कौन करै अलि कौन सुनै मत फीको ॥१४॥
 ॥ राग धनाश्री ॥ ऊधो हम आजु भई बडभागी । जिन अँखियन तुम श्याम बिलोके ते अँखियाँ हम
 लागी ॥ जैसे सुमन बास लै आवत पवन मधुप अनुरागी । अति आनंद होतहै तैसे अंग अंग
 सुखरागी । ज्यों दर्पणमें दरशन देखत दृष्टि परमरुचि लागी ॥ तैसे सूर मिले हरि हमको बिरह
 व्यथा तनु त्यागी ॥१५॥ राग सारंग ॥ विलग जिनि मानी हमारी बाता डरपत वचन कठोर कहत मति बिनु
 पानी उडिजात ॥ जो कोउ कहै जरै कछु अपने फिरि पाछे पछितात । जो प्रसाद तुम पावत ऊधो
 कृष्णनाम लै खात ॥ मन जो तिहारोहरि चरणन तर चलत रहत दिनघाता । सूर श्यामते योग अधिकहै
 कासों कहि आवै यह बाता ॥१६॥ राग सारंग ॥ अलिहौ कैसे करि कहौ हरिके रूपके रसहि । अपने तनमें
 भेद बहुत विधि रसना न जानै इन नैनके दसहि । बार बार पछताति इहै कहि कहाकरौ जो विधि
 नवसहि ॥ बिनुवाणी ए उमँगि सजल होइ सुमिरि सुमिरि वा सर्गुण यशहि ॥ जे देखत ते वचन रहितहैं
 जिनहि वचन दरशन देसहि ॥ सूर सकल अंगनकी इहगति क्यों समुझावै छपद पेसहि ॥१७॥ राग सारंग ॥
 सुको जेहि नाहिन सचुपायो बल गोपालके राज । ऊधो इहै सम्पदा हरिकी आवै सबके काज ॥
 धनुष तोरि गजमारि मछ मथि किए निडर यदुवंश । इन औरन अमरन सुख दीनो करषि केश
 शिरकंस ॥ कुबिजहि रूपदियो यदुनंदन मालीको हित काम । उग्रसेन वसुदेव देवकी आने अपने
 धाम ॥ दीनदयालु दयानिधि मोहन है हमरे इह आसा ॥ सूर श्याम हरिहैं जु कृपाकरि इन नैननकी
 प्यासा ॥१८॥ राग धनाश्री ॥ मधुकर कहिए काहि सुनाऊँ हरि विछुरत हम किते सहेहैं जिते विरहके घाउ ॥
 वरु माधो मधुवनही रहते कत यशुदाके आए । कत प्रभु गोपवेष ब्रज धरिकै कत ए सुख उप
 जाए ॥ कत गिरिधरचो इंद्र मद मेढ्यो कत बन रास बनाए । अब कहा निडुर भए अबलनिको
 लिखि लिखि योग पठाए ॥ तुम परवीन सबै जानतहो ताते इह कहि आई ॥ अपनी को चालै
 सुनि सूरज पिता जननि बिसराई ॥१९॥ उद्धव वचन ॥ राग धनाश्री ॥ जानि करि बावरी जिनि होहु । तत्त्व

भजै ऐसी है जैहौ ज्यों पारस परसे लोह ॥ मेरो बचन सत्य करि मानहु छाँडो सबको मोह ॥ जो
 लगि सब पानी कीचु परी तौ लगि अस्तुति द्रोह ॥ अरे मधुप बातें ए ऐसी क्यों कहि आवत तोहि ।
 सूर सु बस्तुहि छाँडि अभागे हमहि बतावत खोहि ॥ २० ॥ राग सारंग ॥ कहिबे जीय न कछु श-
 क राखो । लावा मेलि दए हैं तुमको बकत रहो दिन आखो ॥ जाकी बात कहो तुम हमसों सो धौं
 कहौ को काँधी । तेरो कहो सो पवन भूस भयो वहो जात ज्यों आंधी ॥ कत श्रम करत सुनत को
 इहां है होत जो बनको रोयो । सूर इते पर समुझत नहि निपट दई को खोयो ॥ २१ ॥ राग सारंग ॥
 मधुकर भली सुमति मति खोई । हाँसी होन लगी है ब्रजमें योगहि राखहु गोई ॥ आतम ब्रह्म
 लखावत डोलत घट घट व्यापक जोई । चापे काख फिरत निर्गुण गुण इहां गाहक नहि कोई ॥
 प्रेम कथा सोई पै जानै जामें बीती होई । अति रस एतो कहा कोई जानै बूझि देखावै ओई ॥ बडो
 दूत तू बडी उमरको बडिब बुद्धि बडोई । सूरदास पुरो दै षटपद कहत फिरतहो सोई ॥ २२ ॥ राग धनाश्री ॥
 मधुप कहि जानत नहि न बात । फूँकि फूँकि हियरो सु लगावत उठि किन इहांते जाता ॥ जेहि उर बसत
 यशोदा नंदन तेहि निर्गुण क्यों समात ॥ कत डोलत भटकत पुहुपनको पान करत किन पात ॥ यद्य-
 पि बहु बेली बन बिहरत बसत जाइ जलजात ॥ सूरदास अब मिलवन आए मौन किए कुशलात ॥ २३ ॥
 मधुकर छाँड अटपटी बातें । फिरि फिरि बार बार सोइ शिखवत हम दुख पावत जातें ॥ हम
 दिन देत अशीश प्रात उठि बार खसोमत न्हातें । तुम निशि दिन उर अंतर सोचत ब्रज युवति-
 नकी घातें ॥ पुनि पुनि तुमहि कहत कत आवै कछुक सकुचहै नातें । सूरदास श्याम रंग राचे फिरि
 न चहै रंग रातें ॥ २४ ॥ राग मलार ॥ क्यों मन मानत है इन बातन । पाये जानि सकल सुनि मधुकर जे
 गुण साँवरे गातन ॥ प्रथम प्रेम निशिहू न तजत अब सकुचतहैं जल जातनि । निरस जानि
 निकट नहि आवत देखि पुराने पातनि ॥ सुनियत कथा कान कोकिलकी कपट रंगकी रातनि ।
 निशि दिन श्रम सेवा कराइ उठि अंत मिले पित मातनि ॥ तब ब्रज वसत वेणु ख ध्वनि करि
 वन बोली अधरातनि ॥ अति रति लोभ तजत नहि इक क्षण पठै सकत नहि प्रातनि ॥ बालि जीति
 जिन बलि बंधन किये लुब्धक कैसी हातनि । को पतियाइ सुधौ कहि सूरज संकर्षणके भ्रातनि ॥
 ॥ २५ ॥ राग सारंग ॥ उलटी रीति तिहारी ऊधो सुनै सु ऐसी को है । अल्प वयस अबला अहीरि शठ
 तिनहि योग कत सोहै ॥ कचखुवि आँधरि काजर कानी नकटी पहिरै बेसारि । मुडली पटिया
 पारि सँवारै कोढी लावै केसारि ॥ बहिरी पतिसों बातें करै तौतै सोई उत्तर पावै । सोगति होइ
 सबै ताकी जो ग्वारिनि योग सिखावै ॥ सिखई कहत श्यामकी बतियां तुमको नहि दोष ।
 राजकाज तुमते न सरैगो काया अपनी पोषु ॥ जाते भूलि सबै मारगमें इहां आनि कहा कहते ।
 भली भई सुधि रही सूर तौ मोह धारमें बहते ॥ २६ ॥ राग सारंग ॥ राखो सब इह योग
 अटपटो उधो पाँइ परौ । कहाँ रसरति कहाँ तनु शोधन सुनि सुनि लाज मरौ ॥ चंदन छाँडि
 विभूति बतावत यह दुख क्यों न जरौ । नासा कर गहि योग सिखावत बेसरि कहाँ धरौ ॥ सर्गुण
 रूप रहत उर अंतर निर्गुण कहा करौ । निशि दिन रटना रत श्याम गुण का करि योग मरौ ॥
 मुद्रा न्यास अंग अंग भूषण पतिव्रतते न टरौ ॥ सूरदास याही व्रत मेरे हरि मिलि नहि बिछुरौ ॥ २७ ॥
 राग सारंग ॥ मधुकर हम अयान मति भोरी । जानें तेइ योगकी बातें जेहैं नवल किशोरी ॥ कंचनको
 मृग कवने देख्यो किन बांध्यो गहि डोरी । बिनही भीत चित्र किन कीनो किन नभ हठ करि घा-
 ल्यो झोरी ॥ कहिधौ मधुप वारि मथि माखन काढि जो भरो कमोरी । कहो कौन पै कढो जाइ

कन बहुत सरास पछोरी ॥ सबते ऊंचो ज्ञान तुम्हारो हम अहीरि मति थोरी । सूरज कृष्णचंद्रको
 चाहत अँखियां तृपित चकोरी ॥ २८ ॥ अथ नेत्र अवस्थावर्णन ॥ राग धनाश्री ॥ अँखियां हरि दरशनकी भूखी ।
 अब कैसे रहति श्याम रंग राती ए बातें सुनि रूखी ॥ अवाधि गनत इकटक मग जोवत तब ए इत्थों
 नहिं झूखी । इते मान इहियोग सँदेशन सुनि अकुलानी दूखी ॥ सूर सकत हठ नाव चलावत ए
 सरिता हैं सूखी । वारक वह मुख आनि देखावहु दुहिपै पिवत पतूखी ॥ २९ ॥ राग धनाश्री ॥ अँखियां हरि
 दरशनकी प्यासी । देख्यो चाहत कमलनैनको निशिदिन रहत उदासी ॥ आए ऊधो फिरि गए
 आँगन डारि गए गर फाँसी । केसरिको तिलक मोतिनकी माला बूँदावनको बासी ॥ काहूके मनकी
 कोउ न जानत लोगनके मनहाँसी । सूरदास प्रभु तुम्हरे दरशको जाइ करवट ल्यों कासी ॥ ३० ॥
 राग धनाश्री ॥ नैनन उहै रूप जो देख्यो । तौ ऊधो यह जीवन जगको साँचहु सफल करि लेख्यो ॥
 लोचन चपल चारु खंजन मन रंजन हृदय हमारे । सुरंग कमल मीन मनोहर श्वेत अरुन अरुकारे ।
 रत्न जडित कुंडल श्रवणन वर गंड कपोलानि झाँई । मनु दिनकर प्रतिबिंब मुकुरमहँ दूँढत यह
 छवि पाई ॥ सुरली अघर विकट भौहैं करि ठाढी होनि त्रिभंग । मुक्तमाल उर नील शिखरते धसी
 धरणि जनु गंग ॥ और वैस को कहै वरणि सब अंग अंग केसरि खौर । देखे बनै कहत रसना सों
 सूर विलोकत और ॥ ३१ ॥ राग धनाश्री ॥ नैनन नंदनंदन ध्यान । तहाँलै उपदेश दीजै जहां निर्गुण ज्ञान ॥
 पानि पल्लव रेख गनि गुनि अवाधि विविध विधान । एते पर कहि कटुक वचनन हते जैसे प्रान ॥
 चंद्रकोटि प्रकाश मुख अवतंस कोटिक भान । कोटि मन्मथ वारि छविपर निराखि दीजत
 दान ॥ भुकुटी कोटि कोदंड रुचि अवलोकननि संधान । कोटि वारिज वक्र नयन कटाक्ष
 कोटिक वान । मणि कंठहार उदार उर अतिशय बन्यो निर्मान । शंख चक्र गदाधरे कर
 पदुम सुधा निधान ॥ श्याम तनु पटपीतकी छवि करै कौन बखान । मनहु नृत्यत नील
 घनमें तडित देती मान । रासरसिक गुपाल मिलि मधु अघर करती पान । सूर ऐसे श्याम
 बिनको यहाँ रक्षक आन ॥ ३२ ॥ राग गूजरी ॥ ऊधो इन नैनन नेम लियो । नंदनंदन सों पतिव्रत राख्यो
 नाहिंन दरश वियो ॥ चंद्र चकोर चित्त चातक जलधर सों बधो हियो । ऐसेहि इन नैनन गोपाल-
 हि इकटक प्रेम दियो ॥ आयो पुहुप ज्ञानले ए दृग मधुपन रुचि न कियो । हरिमुख कमल
 अमीरस सूरज चाहत उहै पियो ॥ ३३ ॥ राग कान्हो ॥ ऊधो जू नैनन यह व्रत लीन्हों । स्वाति बिना ऊपर
 सब भरियत ग्रीव रंध्र मत कीन्हों ॥ सुरली गरज तात मुकुतातन मेघ ध्यान जल हीनो ।
 वरुण प्राण जाहिं ऐसेही बयन होय क्यों हीनों ॥ तुम आए लै योग शिखावन सुनत महादुख
 दीन्हों । कैसे सूर अगोचर लहिए निगम न पावत चीन्हों ॥ ३४ ॥ राग सारंग ॥ जबते सुंदरवदन निहारयो ।
 तादिनते मधुकर मन अँध्यो बहुत करी निकरै न निकारयो ॥ मात पिता पति बंधु सजन
 जन तिनहूँको कहियो शिरधारयो । रही न लोकलाज मुख निरखत दुसह क्रोध फीटो करि
 डारयो ॥ द्वैवो होइ सु होइ कर्मवश अब जीको सब सोच निवारयो । दासी सूरदास परमानंद
 भलो पोच अपनो न विचारयो ॥ ३५ ॥ हरिमुख निरख निमेष बिसारे । तादिनते ए भए दिगंबर
 इन नैननके तारे ॥ तजी सीख सब सास ससुरकी लाज जनेऊ जारे । घर धँधुट छाँडौ बन वीथि-
 नि अहनिशि रहत उधारे ॥ सहज समाधि रूपरस इकटक करत न टकते टारे । ताके बीच
 विघ्न करिवेको मातु पिता पचिहारे ॥ कहत सुनत समुझत मन महिआँ ऊधो वचन तुम्हारे ।
 सूरदास ए हटकन मानत लोचन हठी हमारे ॥ ३६ ॥ राग केदारो ॥ नैनन निपट कठिन व्रत ठानी । जा

दिनते बिछुरे नँदनंदन तादिनते नहिनेक सिरानी । पलक न लावत रहत ध्यान धरि बारंवार
 दुरावत पानी । लाल गोपाल मिले ऊधो मैं कर्महीन कछु ओ नहिंजानी । समुझि समुझि उन
 हार श्यामकी अतिसुंदर वर शारंगपानी । सूरदास ए मोहि रहे अति हरि मूरति मनमाँझ
 समानी ॥ ३७ ॥ राग सारंग ॥ ऊधो क्यों राखों ए नैननि । सुमिरि सुमिरि गुण अधिक तपतहैं सुनत तुम्हारे
 वैननि ॥ ए जु मनोहर वदन इंदुके शारद कुसुद चकोर । परम तृषारत सजल श्यामघन तनके
 चातकमोर ॥ मधु मराल युगपदपंकजके गति विलास जलमीन । चक्रवाक द्युति मन दिनकरके
 मृग मुरली आधीन ॥ सकल लोक सुनो लागत है बिन देखे वहरूप । सूरदास प्रभु नँदनंदनके
 नखशिख अंग अनूप ॥ ३८ ॥ राग धनाश्री ॥ और सकल अंगनते ऊधो अँखियाँ बहुत दुखारी । अधिक
 पिराति सिराति न कबहुँ अनेक जतन करि हारी ॥ चितवत मग सुनि मेष न मिलवत विरह
 बिकल भई भारी । भरिगई विरह वाइ माधोके इकटक रहत उचारी ॥ अलि आली गुरुज्ञान शलाका
 क्यों सहि सकति तुम्हारी । सूर सु अंजन अँजि रूप रस आरति हरौ हमारी ॥ ३९ ॥ राग रामकली ॥
 ऊधो इन नैनन अंजन देहु । आनहु क्यों न श्यामरंग काजर जासों छुरचो सनेहु ॥ तपति
 रहति निशि बासर मधुकर नहिं सुहात बन गेहु । जैसे मीन मरत जल बिछुरत कहा कहाँ
 दुख एहु ॥ सब बिधि वानि ठानि करि राख्यो खरी कपूरको रेहु । वारक श्याम मिलावहु सूर
 सुनि क्यों न सुयश यश लेहु ॥ ४० ॥ राग मलार ॥ नैना नाहिं नैये रहत । यदपि मधुप तुम नंद नँदनको
 निपटहि निकट कहत ॥ हृदय माँझ जो हरिहि बतावत सीखो नाहिं गहत । अधपरही संदेश अव-
 धिको उलटे उलटि गहत ॥ परी जु प्रकृति प्रगट दूरशनकी देखोइ रूप चहत । सूरदास प्रभु
 बिन अवलोके सुख कोई न लहत ॥ ४१ ॥ पूरनता ए नैन पुरे । तुम सुनि कहत श्रवण हाहिं समुझत
 दुख अति मरत बिसुरे ॥ ए अलि चपल मोद रस लंपट कटु संदेश कथत कत कूरे । कहाँ
 सुनि ध्यान कहाँ ब्रज वासिन कैसे जात कुलिश करचूरे ॥ हरि अंतर्दामी सब वृद्धत बुद्धि
 बिचार सु वचन समूरे । वे हरि रत्न रूप सागरके क्यों पाइए खनावत धूरे ॥ देखि बिचारि
 प्रगट सरिता सर शीतल सजल स्वाद रुचि रूरे । सूर स्वाति की बूँद लगी जिय चातक चित
 लागत सब झूरे ॥ ४२ ॥ राग मलार ॥ ऊधो अँखियाँ अति अनुरागी । इक टक मग जोवति अरु रोवति भूले
 हु पलकन लागी ॥ बिन पावस पावसकृतु आई देखतहैं विदमान । अबधौं कहा कियो चाहतहैं छाँ-
 डहु निर्गुण ज्ञान ॥ सुनि प्रिय सखा श्यामसुंदरके जानतु सकल सुभाइ । जैसे मिले सूरके स्वा-
 मी तैसी करहु उपाइ ॥ ४३ ॥ राग बिहागरो ॥ मधुकर सुनो लोचन बात । रोकि राखी अंग अंगन तऊ उडि
 उडि जात ॥ जो कपोत वियोग व्याकुल जाति है तजि धाम । जात योहग फिरि न आवत
 बिना दरशन श्याम ॥ भूँदि नैन कपाट पटदै उभै घूँघट ओट । स्वाति स्तुत ज्यों जातिकी तहुँ
 निकसि मणि नग फोट ॥ श्रवण सुनि यश रहत हरिको मन रहत हरिको ध्यान । रहति रसना नाम
 रटि रटि कंठ करि गुण गान ॥ कछुक दियो सुहाग इनको तो सबै ए लेत । सूरदास प्रभु बिना
 देखे नैन चैन न देत ॥ ४४ ॥ राग सारंग ॥ मधुकर ए नैना पै हारे । निरखि निरखि मग कमल
 नयनके प्रेम मगन भए भारे । तादिनते नौदौ पुनि नाशी चौंकि परति अधिकारे ॥ सपने तुरिए जागत
 पुनि वोई वसत जो हृदय हमारे यह निर्गुण लै ताहि बतावो जो जानै याकी सारै ॥ सूरदास गोपाल
 छाँडिकै चूसे टेटा खारे ॥ ४५ ॥ राग धनाश्री ॥ अँखियाँ अबलागीं पछितान । जब मोहन उठि चले मधुपुरी
 तब क्यों दीनो जाना ॥ पंथ न चलै संदेश न आवै धीरज धैरे न प्रान ॥ जादिनके बिछुरे नँदनंदन अँग
 अँग लागे बान । ऊधो अब तुम जाइ सुनावहु आवहि शारंगपानि । सूरदास चातक भई गोपी

अंतरगतिकी जानि॥४६॥राग जैतश्री॥ कमलनैन कान्हरकी शोभा नैननि ते न टरै । ऊधो आए योग
 सिखावनको जंजाल करै॥जब मोहन गाइनलै आवत ग्वालन संग धरै । बलदाऊ अरु संग सखा
 मिलि कहो कैसे बिसरै ॥ वंसीवट यमुनातट ठाढे मुरली अधर धरै । सुख समूह विनोद जे की-
 न्ह को तेहि धरनि धरै॥ ब्रजवासी भये उदासी को संताप हरै । सूरदासके प्रभु बिनु ऊधो को-
 तनु तत हरै ॥ ४७ ॥ राग नट ॥ सुंदर श्यामके संग आँखि ॥ प्रथम ऊधो आनिदै हम सगुन
 डारै नाखि ॥ द्वै तीन सप्त अनंग तजे श्रुति स्मृति कही जु भाषि । हृदय विद्या ज्ञान धरम
 सु लोचननि अभिलाष ॥ जहां जहांकी केलि पियहरि सोई सर चकई
 पाँखि । हारि हरि अहेरि या हरि रही झुकि झखि झाँखि ॥ कमल कुमुदनि इंदु
 उडुगन मिलन सूरज साखि । राति ज्यों अकूर दिन अलि मदन दह मधु माषि ॥४८॥ राग मलार ॥
 सखी री मथुरा में द्वै हंस । वै अकूर ए ऊधो सजनी जानत नीके ग्रंस ॥ ए दोउ नीर खीर निरवारत
 इनहि वधायो कंस । इनके कुल ऐसी चलि आई सदा उजागर वंस ॥ अब इन कृपा करी ब्रज आए
 जानि आपनो अंस । सूर सु ज्ञान सुनावत अबलनि सुनत होत मतिभ्रंस ॥४९॥राग सांग ॥ मानो
 दोउ एकहि मतै भए । ऊधो अरु अकूर अधिक मति ब्रज आखेट ठए ॥ वचन पासि विधए मृग
 माधो उन रथ नाइ लए । इन हिय हेरि मृगी सब गोपी सायक ज्ञान हए॥योग अग्निकी दवा देखियत
 चहुँ दिश लाइ दए ॥ ५० ॥ मानो भरे दोउ एकहि साँचे । नख शिख कमलनयनकी शोभा एकै
 भृगुपद बाँचे ॥ दारुजात कैसे गुण इनमें ऊपर अंतर श्याम । हमको है गजदंत प्रचारित वचन
 कहत नहिँ काम ॥ एई सब असित देह धरे जेते ऐसेई सब जानि । सूर एकते एक आगरे वा
 मथुराकी खानि ॥ ५१ ॥ सबै खोटे मधुवनके लोग । जिनके संग श्याम सुंदर सखी सीखे सब अप
 योग ॥ आए हैं कहियत ब्रज ऊधो युवतिनको लै योग । आसन ध्यान नैन मूँदे सखि कैसे कटै
 वियोग । हम अहीरि इतनी का जानै कुबिजासों संयोग । सूर सु वैद कहा लै कीजै कहे न जानै
 रोग॥५२॥ राग नट॥ मधुवनके लोगन को पतिआइ । सुख औरै अंतर्गति औरै पतियाँ लिखि पठवत
 जो बनाइ ॥ ज्यों कोइ लखत काग जिवाए भक्ष अभक्ष खवाइ । कुहुकुहानि सुनि ऋतु बसंतकी अंत
 मिले कुल अमने जाइ ॥ ज्यों मधुकर अंबुज रस चारुयो बहुरि न बूझी बातें आइ । सूर जहाँ
 लगि श्यामगातहै तिनसे कतकीजे सगाइ ॥५३॥ माई री मधुवनकी यह रीति । निरखि जानि तजत
 छिन भीतर नवल कुसुम रस प्रीति ॥ तिनहुँके संगिनको कैसे चित आवति परतीति । हमहिँ
 छाँडि विरमहिँ कुबिजा संग आए न रिपुरण जीति ॥ जिनि पतियाहु मधुर सुनि बातें लागे
 करन समीति । सूरदास श्यामसंग ऐसो ज्यों भुसपरकी भीति ॥५४॥ राग मलार ॥ मधुवनके सब कृत
 ज्ञ धर्मीले । अति उदार परहित डोलतहैं बोलत वचन सुशीले ॥ प्रथम आइ गोकुल सुफलकसुत
 लै मधुरिपुहि सिधारे । उहां कंस इहां हम दीननिको दूनो काज सँवारे ॥ हरिको सिखै सिखावन
 हमको अब ऊधो पगधारे । उहां दासी रतिकी कीरतिकै इहां योग विस्तारे ॥ अब तेहि विरह
 समुद्र सबै हम बूढ़ी चहत नहीं । लीला सगुन नावही सुनु अलि तेहि अवलंब रही ॥ अब निर्गुण
 हि गहैं युवतीजन पारहि कहो गईको । सूर अकूर छपदके मनमें नाहिन त्रास दर्ईको ॥ ५५ ॥
 ॥ राग धनाश्री ॥ अब नीके कै समुझि परी । जिनि लगि हुती बहुत उर आशा सोऊ बातनि वरी॥वै
 सुफलक सुत ए सखी ऊधो मिली एक परिपाटी । उनतौ वह कीन्ही तब हमसों ए रतन छँडाइ
 गहावत माटी ॥ ऊपर मृदु भीतरसे कुलिशसम देखतके अति भोरे । जोइ जोइ आवत वा मधु-

राते एक डार केसे तोरे ॥ यह सखी मैं पहिले कहि राखी असित न अपने होहीं । मूर काटि
 जो माथो दीजै चलत आपनी गोहीं ॥ ५६ ॥ ऊधो प्रेम रहित योग निरस काहेको गायो ।
 हम अबलनिको निठुर वचन कहे कहा पायो ॥ जिन नैनन कमलनैन मोहन मुख हेरयो ।
 मूँदनते नैन कहत कौन ज्ञान तेरयो ॥ तामें सुनि मधुकर हम कहा लेन जाहीं । जामें प्रिय प्राण
 नाथ नंदनँदन नाहीं ॥ जिनके तुम सखा साधु बात कहो तिनकी । जीवत कहि प्रेम कथा दासी
 हम उनकी ॥ अविनाशी निर्गुण मत कहा आनि भाख्यो । मूरदास जीवन प्रभु कान्ह कहा
 राख्यो ॥ ५७ ॥ राग सारंग ॥ जिनि चालहि अलि बात पराई । नहिं कोउ सुनै न समुझत ब्रजमें नई कीरति
 सब जात हिराई ॥ जाने समाचार सुखपाए मिलि कुलकी आरति बिसराई । भले ठौर वसि भली
 भई मति भले ठौर पहिंचानि कराई ॥ मीठी कथा कटुकसी लागति उपजतहैं उपदेश खराई ।
 उलटे न्याउ मूरके प्रभुके बहेजात माँगत उतराई ॥ ५८ ॥ राग धनाश्री ॥ ऊधो योग सिखावन आए अब
 कैसे धीरज धरौं । जोरि जोरि चित जोरि जुरीनो जोरी जोरिन जानौं ॥ पहिलो योग कहा भयो
 ऊधो अब यह योग दृढानो ॥ उन हरि हमसों प्रीति करी जो जैसे मीन अरु पानी । तलफि
 तलफि जिय निकसन लागे पापी पीर न जानी ॥ निशिवासर मोहिं पलक न लगै कोटि जतन करि
 हारी । ज्यों भुवंग तजि गयो केंचुली सो गति भई हमारी ॥ एकदिवस हरि अपने हाथन करन
 फूल पहिराए । ते मोहन माटीके मुद्रा मधुकर हाथ पठाए ॥ बेनी सुभगगुही कर अपने हाथन चरण
 जाबक दीनो । कहा कहौं वा श्यामसुंदरसों निपट कठिन मन कीनो ॥ तुम जो बसत हौ
 मथुरा नगरी हम जो बसत या गाँव । ऊधो हरिसों यों जाइ कहियो प्राण तजहिं या ठाँव ॥
 प्रीतम प्यारे प्राण हमारे रहें अधरपर आइ । मूरदास हरिजीके आगे कौन कहै दुखजाइ ॥ ५९ ॥ जैतश्री ॥
 ऊधो योग सिखावन आए । शृंगी भस्म अधारी मुद्रा दै यदुनाथ पठाए ॥ जो पै योग लिखो
 गोपिनको कत रसरस खिलाए । तवहीं क्यों न ज्ञान उपदेशो अधर सुधारस प्याए ॥ मुरली शब्द
 सुनत बनगवनी पति सुत गृह बिसराए । मूरदास सँग छाँड स्वामिको हमहिं भले पछिताए ॥
 ॥ ६० ॥ राग धनाश्री ॥ बहुत दिन गए ऊधो चरणकमल बिनु देखे । दर्शनहीन दुखित दिनही दिन छिन
 छिन विपति विशेषे ॥ रजनीमें अति प्रेम पीर बन गृह मन धैर न धीराबासर मग जोवत उर सरिता भए
 नैनके नीर ॥ जौलौं रही आश सोइ गानगति घटि रही श्वास । अति वियोग बिरहिन तनु तजि है
 कहि सो मूरज दास ॥ ६१ ॥ ऊधो वचन ॥ राग धनाश्री ॥ ज्ञान बिना कहूँ वै सुख नाहीं । घट घट व्यापक दारु
 अग्नि ज्यों सदा बसै उर माहीं ॥ निर्गुण छाँडि सगुणको दौरति सोचि कहौ किहि वार्हीं । तत्क
 भजौ ज्यों निकट न छूटै त्यों तनुके सँग छाहीं ॥ तिनके कहो कौन जस पायो जे अबलौं अवगार्हीं ।
 मूरदास ऐसे कर लागत ज्यों कृषि कीन्हें पाहीं ॥ ६२ ॥ राग सोरठा ॥ ऊधो प्यारे कही सो बहुरि न कहिए ।
 जो तुम हमें जिवायो चाहत अनबोले होइ रहिए ॥ प्राणहमारे घात होत हैं तुमरे भावैं हाँसी ।
 या जीवनते मरन भलो है करवट लेवो कासी ॥ पूरबप्रीति सँभारि हमारे तुमको कहन पठायो ।
 हमतौ जरिबरी भस्म भए तुम आनि मसान जगायो ॥ कै हरि हमको आनि मिलावहु कै ले
 चलिए साथे । मूर श्याम बिन प्राण तजत हैं बनै तुम्हारे माथे ॥ ६३ ॥ राग धनाश्री ॥ रे मधुकर कहा
 सिखावन आयो । एतौ नैन रूप रस राचे कह्यो न करत परायो ॥ योग युक्ति हम कछुव न जानैं
 ना कछु ब्रह्मज्ञानो । नवकिशोर मोहन मृदुमूरति तासों मन उरझानो ॥ भली करी तुम आए ऊधो
 देखो दशा बिचारी । दाइ उपाइ मिलाइ मूर प्रभु आरति हरहु हमारी ॥ ६४ ॥ राग कल्याण ॥ मधुकर कहा

कियो अव चाहत । ए सब भई चित्रकी पुतरी सून शरीरहि डाहत ॥ हमसों तोसों वैर कहा अलि
 श्याम अजा भयो राहत । झारि झरि मनतो तू लै गयो बहुरि पयारहि गाहत ॥ अबतौ है मारुत
 को गहिवो का सस मूकी लैहै । सूरज जो उन हमहिं हते तू अपनो कीयो पैहै ॥६५॥ राग केदारो ॥ ऊधो
 तुम अपनो जतन करौ । हितकी कहत कु हितकी लागत इहां बेकाज अरौ ॥ जाइ करौ उपचार
 आपनो हौं जु देत सिख नीकी । कछु वै कहत कछु कहि नहिं आवत ध्वनि देखत नहिं नीकी ॥ साधु
 होइ ताहि उत्तरदीजै तुमसों मानी हारि । यह जिय जानि नंदनंदन तुम इहां पठाए ठारि ॥ मथुरा
 गहौ बेगि इन पाँइन उपज्योहै तनुरोग । सूर सुवैद बेगि ढोहो किन भए मरनके योग ॥६६॥ राग नय ॥
 कह्यो तुम्हारो लागत काहे । कोटिक जतन कहौ जो ऊधो हम नवहकिहैं वाहे ॥ काहेको अपने
 जीमें री तू सतलै मनलाहे । यह भ्रमतौ अवहीं भजि जैहै ज्यों पयारके गाहे ॥ काशकि लोगनलै
 सिखयो जे समझे या माहे । सूर श्याम विहरत ब्रज भीतर जीजतु है सुखचाहे ॥६७॥ सारंग ॥ आप
 देखि पर देखि रे मधुकर तव औरन सिख देह । बीतैगी तबहीं जानोगे महाकठिनहै नेह ॥ मन जु
 तुम्हारे हरिचरणनहै तन लै गोकुल आयो । नंदनंदनके संगके बिछुरे कहि कौने सच पायो ॥
 गोकुल रहौ जाहु जाने मथुरा झूठो माया मोहु ॥ गोपी कहैं सूर सुन ऊधो हमसे तुमहू होहु ॥६८॥
 तू अलि कहा परचो कहि पैडै ब्रज तू श्याम अजा भयो हमको इहऊ बचत न बैडै ॥ यह उपदेश
 सेतहू भाए जो चढि कहौ वरैडे । राजति जतन यशोदा नंदहि हृदय माँझ सब मैडे ॥ छाँडि
 राजमारग यह लीला कैसे चलहि कुपैडोया आदर पर अजहूं बैठो टरत न सूर पलैडे ॥६९॥ राग सारंग ॥
 घरहीके बाढेहो रावरे नाहिन मीत वियोग वशपरे अनव्योगे अलिबावरे । अधरसुधा सुरलीकी
 पोषे योग जहर कत प्यावे रे ॥ अबला कही योग हम जानैं ज्यों जल सूखे नावरे ॥ वरु मरिजाइ
 चरै नहिं तिनका सिंहको इहै सुभाइ रे ॥ जानत सूरदास कंठहरियो तजि अनत न ठाँवरे ॥७०॥ राग सारंग ॥
 तुम अलि कासों कहत बनाई । बिनु समझे हम फिरि बृझतिहैं वारक बहुरौ गाई ॥ किहिधौं गमन
 कीन्हों स्यंदनचढि सुफलकसुतके संग ॥ किहि विधि रजक लिए नानापट पहिरे अपने अंग ॥ किहि
 हति चाप निदरि गज निजबल किहि बल मल्ल मथिजाने । उग्रसेन वसुदेव देवकी किहिबनिगडते
 आने । तू कार्कीहै करत प्रशंसा कौने घोष पठायो ॥ किहि मातुल हति कियो जगत यश कौन
 मधुपुरी छायो ॥ माथे मोर मुकुट उरगुंजा सुखसुरली कलबाजै । सूरदास यशुदानंद नंदन गो-
 कुल कान्ह विराजै ॥७१॥ राग सारंग ॥ हमको हरिकी कथा सुनाउ । ए आपनी ज्ञानगाथा अलि मथुराही
 जैजाडू ॥ वै नर नारि नीके समुझेंगी तेरो वचन बनाउ । पालागौं ऐसी इन बातनि उन्हीं जाइ
 रिझाउ ॥ जो शुचि सखी श्याम सुंदरको अरु जियअति सतिभाउ । तो बारक आतुर इन नैनन वह
 सुख आनि देखाउ ॥ जो कोउ कोटि करै कैसेहू विधि विद्या व्यौसाउ । तो सुन सूर मीनके जलबिनु
 नाहिंन और उपाउ ॥७२॥ राग भोपाली ॥ ऊधो हरि बिनु ब्रज रिपु बहुरि जिये । जे हमरे देखत नंदन-
 दन हति हति हुते सो दूरि किये ॥ निशिको रूप बकी बनि आवत अति भयकरत सु कंप हिए ।
 तापहते तनु प्राण हमारे रविहू छिनक छँडाइ लिए ॥ उर ऊंचे उसाँस तृणावर्त तिहि सुख सकल
 उंडाइ दिए ॥ कोटिक काली समकालिंदी परसत सलिल न जात पिए ॥ बन बकरूप अघासुर
 समघर कतहू तौन चितै सकिए ॥ कैसें कठिन कर्म कैसें बिन काको सूर शरन तकिए ॥७३॥
 राग सोरठ ॥ ऊधो तुम ब्रजकी दशा विचारो । ता पाछे यह सिद्धि आपनी योगकथा विस्तारो ॥
 जाकारण तुम पठए माधो सो सोचो जियमाहीं । कितोक बीच बिरह परमारथ जानत

हौ किधौ नाहीं ॥ तुम परवीन चतुर कहियतहौ संतन निकट रहतहौ । जल बूडत अवलंब
 फेनको फिरि फिरि कहा गहतहौ ॥ वह सुसकानि मनोहर चितवन कैसे उरते टारौ । योग युक्ति
 अरु मुक्ति परमनिधि वा मुरलीपै वारौ ॥ जिहि उर कमलनैन जु वसतहैं तिहि निर्गुण क्यों आवै ।
 सूरदास सो भजन वहाऊं जाहि दूसरो भावै ॥७४॥ राग आसावरी ॥ ऊधो कहांकी प्रीति हमारे ।
 अजहूँ रहत तन हरिके सिधारे ॥ छिदि छिदि जात विरह शर मारे । पुरि पुरि आवत अवधि
 बिचारे ॥ फटत न हृदय सँदेश तुम्हारे । कुलिशते कठिन धुकत दोउ तारे ॥ वर्षत नैन महा
 जलधारे । उर पाषाण विदरत न विदारे ॥ जीवन बरन दोउ दुखभारे । कहियत सूर लाज पतिहारे ।
 ॥७५॥ राग सारंग ॥ ऊधो इतनो मोहिं सतावत । कारी घटा देखि बादरकी दामिनि चमकि डरावत ॥ हेम
 सुतापतिको रिपु व्यापै दधिसुत रथ न चलावत ॥ अंबूखंडन शब्दसुनतही चितचकृत उठि धावत ॥
 कंचनपुरपति को जो भ्राता ते सब बलहि न आवत । शंभूसुतको जा वाहनहै कुहकै असल सला-
 वत ॥ यद्यपि भूषण अंग बनावत सोइ भुजंग होइ धावत । सूरदास विरहिन अतिव्याकुल खगपति
 चढि किन आवत ॥७६॥ राग धनाश्री ॥ हमको तुमबिन सबै सतावत । लखौ न मधुप चतुर माधोसों
 तुमहूँ सखा कहावत ॥ ताको तनु हरि हरयो दीनसों कुल सर्वागत दीनी । सोइ मारत करि वार पार
 करि हमको कानन कीनी ॥ सिंधुते काढि शंभुकर सौँप्यो गुनहगारकी नाई । सो शशि प्रगट
 प्रधान कामको चहुँदिशि देत दोहाई ॥ अमरनाथ अपराध क्षमाकरि तबहिं भोग मुकरायो । प्रात
 इंद्र कोपित जलधरलै ब्रजमंडल पर छायो ॥ पृंछ पृंछ सरदार सखनके इहि बिधि दई बडाई । तिन
 अतिबोल झोल तनु डारयो अनल भँवरकी नाई । पंछ छोरि अलिसूझ पंछधरि तिनहुँ कोपि
 जनायो । पत्यो जो रेख ललाट और सुख भेंटि दुकार बनायो । कौन कौनको बिनय कीजिए कहि
 जेतिक कहि आई । सूर श्याम अपने या ब्रजकी इहिविधि कान कटाई ॥७७॥ राग नट ॥ ऊधो यहु हित
 लागत काहे । निशिदिन नैन तपत दरशनको तुम जु कहत हृदयमाहे ॥ पलक न परत चहुँदिशि चित-
 वत विरहानलके दाहे ॥ इतनी आरति काहे न मिलही जो पर श्याम इहां है । पालागौं ऐसेही रहन
 दे अवधि आशजल थाहे । जिनि बोरहि निर्गुण समुद्रमें पुनि पाई बिन चाहै ॥ उपजि परी जासों
 तिहि अंग अंग सो अंग बन निबाहै ॥ सूर कहा लै करै पपीहा एते सर सरिताहै ॥७८॥ राग मलार ॥ ह्यां तुम
 कहत कौनकी बातैं । सुन ऊधो हम समुझत नाहीं फिरि बूझतिहैं तातैं ॥ को नृप भयो कंस किन मा-
 रयो को वसुदेव सुत आहि ॥ ह्यां यशुदासुत परममनोहर जीजतुहै मुख चाहि ॥ नितप्रति जात धेनु वनचा-
 रन गोप सखनके संग । वासरगत रजनी मुख आवत करत नैन गति पंग ॥ को अविनाशी ॥
 अगोचर को बिधि वेद अपार । सूर वृथा बकवाद करत कत इहिव्रज नंदकृष्ण ॥ ७९ ॥ ऊधो
 हरि काहेके अंतर्यामी । अजहूँ न आइ मिले इहि औसर अवधि बतावत लामी ॥ कीन्ही प्रीति पुहुप
 शूंडाकी अपने काजके कामी ॥ तिनको कौन परेखो कीजै जे हैं गरुडके गामी ॥ आई उधरि प्रीति
 कलईसी जैसी खाटी आमी । सूर इते पर खूनसनि मरियत ऊधो पीवत मामी ॥ ८० ॥ मधुकर
 वह जानी तुम साँची । पूरणब्रह्म तुम्हारो ठाकुर आगे माया नाची ॥ यह इहि गाउँ न समुझत
 कोऊ कैसो निर्गुण होत । गोकुल बाट परे नंदनंदन उहै तुम्हारो पोत ॥ को यशुमति
 ऊखलसों बाँध्यो को दधि माखन चोरे । कै ए दोऊ रूख हमारे यमलाअर्जुन तोरे ॥ को लै
 बसन चढ्यो तरु शाखा मुरली मन औ करषै । कै रसरास रच्यो वृंदावन हरषि सुमन सूर वरषै ॥
 ज्यों डाक्यों तब कत बिन बूडे काहेको जीभ पिरावत । तब जु सूर प्रभु गये क्रूरलै अब क्यों

नैन सिरावत ॥८१॥ कान्हरो ॥ निर्गुण कौन देशको वासी । मधुकर कहि समुझाइ सौह दै बूझति सांचत
 हाँसी ॥ कोहै जनक कौनहै जननी कौन नारि को दासी । कैसो बरन भेषहै कैसो केहि रसमें आभिला-
 सी ॥ पावैगो पुनि कियो आपनो जोर करैगो गासी । सुनत मौन है रह्यो बावरो सूर सबै मति नाशी ॥
 ॥८२॥ राग कल्याण ॥ ऊधो हमै हरि कत बिसराए । एक दिवस वृंदावन भीतर करकरि पत्र डसाए ॥ सुमि-
 रि सुमिरि गुण गाउँ श्यामके नैन सजल है आए । पलकको बिछुरे किते दिन बीते प्रीतम भए
 पराए ॥ शीतल पंथ जोवाति हम निशिदिन कित विरहिनि विरमाए । सूरदास प्रभु तुम्हरे मिलन
 बिना मदनकी ताप सताए ॥ ८३ ॥ अथ गोपी कुबिजा प्रति तरकवदति ॥ राग धनाश्री ॥ ऊधो अब चित
 भए कठोर । पूरब प्रीति बिसारी गिरिधर नौतन राचे ओर ॥ जन्म जन्मकी दासी तुम्हरी नागर
 नंदकिशोर । प्रीतिके बाण लगाए मधुकर निकरि गए दोउ ओर ॥ जब हरि मधुवनको जु
 सिधारे धीरज धरत न ढोर । सूरदास चातक भई गोपी कहाँ गए चित चोर ॥ ८४ ॥ राग मलार ॥
 ऊधो हमहि न जान्यो श्यामहि । सेवा करत करी कछु औरै गई जाति कुल नामहि ॥ तन मन
 चोरि प्रीति जो जोरत कौन भलाई तामहि । ते कहा जाँन पीर पराई लुब्धक अपने कामहि ॥
 अंतहु सूर सोई पै प्रकटै होइ प्रकृति जो जामहि । नागरि नारि रतिकेरति नागर रचे कुबिजा वा
 महि ॥ ८५ ॥ राग गौरी ॥ मधुकर उनकी बात हम जानी । कोऊ हुती कंसकी दासी कृपाकरी भई रानी ॥
 कुबिजा नाउँ मधुपुरी बैठी लै सुवास मन मानी । कुटिल कुचील जन्मकी टेढी सुंदर करि घर
 आनी ॥ अब वह नवल बधू है बैठी ब्रजकी कहत कहानी । सूर श्याम अब कैसे पैये जासों मिली
 सयानी ॥ ८६ ॥ राग मलार ॥ वरु उन कुबिजा भलो कियो । सुनि सुनि समाचार ए मधुकर अधिक जुडा-
 त हियो ॥ जाको हरि मन हरचो रूप करि हरचो सु पुनि न दियो । तिन अपनो मन हरत न जान्यो
 हँसि हँसि लोग जियो ॥ सूर तनक चंदन चढाय उर श्री सर्वस जु पियो । और सकल नागरि नारिन
 को दासी दाँव लियो ॥ ८७ ॥ राग केदारो ॥ ऊधो अब कछु कहत न आवै । शिरपर सौति हमारे कुबिजा
 चामके दाम चलावै ॥ उन कछु मंत्र करचो चंदनमें ताते श्यामहि भावै । आपनही रँग रची साँवरी
 शुक ज्यों बैठि पढावै ॥ दासी हुती असुर दैयतकी अब कुलबधू कहावै । त्यों नटनी कर लिए लकु-
 टिया कपि ज्यों नाच नचावै ॥ टूट्यो नातो या गोकुलको लिखि लिखि योग पढावै । सूरदास प्रभु
 हमहि निदरि दाधेपर लोन लगावै ॥ ८८ ॥ राग कान्हरो ॥ सुनि सुनि ऊधो आवत हाँसी । कहाँ वै ब्रह्मा-
 दिकके ठाकुर कहाँ कंसकी दासी ॥ इंद्रादिककी कौन चलावै शंकर करत खवासी । निगम आदि
 उल्लूक जाके शेष शीशके वासी ॥ जाके कमला रहत निरंतर कौन गनै कुबिजासी । सूरदास प्रभु
 दृढकरि बच्ये झाँझिका पासी ॥ ८९ ॥ राग मलार ॥ तबते बहुरि दरशनहि दीन्हों । ऊधो हरि मथुरा
 कुबिजाघर इहै नेम व्रत लान्हों ॥ चारिमास वर्षाके लीन्हें सुनिहु रहत इकठोर । दासी धाम पवित्र
 जानिकै नहि देखत उठि और ॥ ब्रजबासी सब ग्वाल कहतहैं कत ब्रज छाँडि गए । सूर सगुनई
 जात मधुपुरी निर्गुण नाम भए ॥ ९० ॥ राग जैतश्री ॥ कुबरीको न्याउरी जासों गोविंद बोलै । जिनसों
 कृपाकरी नंदनंदन सो काहेन ऐंडी डोलै ॥ कारो कारो कुटिल अति कान्हर अंतर ग्रंथि न खोलै ।
 हम बौरी बकवाद करतहैं वृथा आरति यह जो लै ॥ प्रीति पुरातन पौरी उनसों नेह कसौटी तोलै ।
 सूर श्याम उपहास चलयो ब्रज आप आपने टोलै ॥ ९१ ॥ काम गँवारी सोच परचो । रूपहीन कुल
 हीन कूबरी तासों मन जो ढरचो ॥ उनको सदा स्वभाव सलिलको खेरनी खंड झरचो । सकुचो
 नहीं जानि ऊँचो तनु उमँगति भन पसरचो ॥ फेरे फिरत असुर दासीके जनु जडमांड भरचो ।

सूरदास गोपाल रसिकमणि अकरन करन करचो ॥९२॥ राग मलार ॥ काहेको गोपीनाथ कहावत । जुपै मधुप हरि हितु हमारे काहेन गोकुल आवत ॥ सुपनेकी पहिंचानि जीयमहिं हमहिं कलंक लगावत । जो परि कृष्ण कूबरिहि रीझे तो सोई किन नाम धरावत ॥ ज्यों गजराज काजके औसर औरै दशन देखावत । ऐसे हम कहिबे सुनबेको सूर अनत बिरमावत ॥ ९३ ॥ कहिअत कुबिजा कृष्ण नेवाजी । छुवत अटपटी चाल गई मिटि नवसत कंचुकी साजी ॥ मिली जाइ आगे दरवाजे चंदन देत ठगी करि बाजी । बाँधो सुरति सुहाग सबनको हरि मिलि प्रीति उपराजी ॥ सुफल भयो पछिलो तप कीन्हों देखि स्वरूप कामरति भाजी । जगतके प्रभु वश किए सूर सुनि सबहि सुहागिनिके शिर गाजी ॥ ९४ ॥ राग सारंग ॥ ऊधो जाके माथे भागु । अबलन योग सिखावन आए चेरिहि चपरि सोहागु ॥ आए बचन योगकी बेली काटि प्रेमकी बाग । कुबिजहि करि आए पटरानी हमहिं देत बैराग ॥ लौंडीकी डौंडी बाजी जग बढ्यो श्याम अनुराग । कुबिजा कमलनैन मिलि खेलत बारहमासी फाग ॥ मिल्यो सोहायो साथ श्यामको कहाँ हंस कहाँ काग । सूरदास प्रभु ऊँख छाँडिके चतुर चचेरत आग ॥ ९५ ॥ राग गौरी ॥ ऊधो जु जाइ कहौ दूरि कै दसी ॥ नागर नर जीव बिचारे करत हैं सब हाँसी ॥ हेम कांच हंस काग खरि कपूर जैसो । कुबिजा अरु कमलनैन संग बन्यो ऐसो ॥ जातिहीन कुलबिहीन कुबिजा कान्ह दोऊजो ऐसिनके संग लागै सूर तैसो सोऊ ॥ ९६ ॥ राग मलार ॥ ऊधो कहा हमारी चूकवै गुण अवगुण सुनि सुनि हरिके हृदय उठतिहै कूकावैही काज छाँडि गए मधुवन हम घटि कहा करी ॥ तन मन धन आतमा निवेदन सोड न चितहि धरी ॥ रीझे जाइ सुंदरी कुबिजहि यहि दुख आवै हाँसी । यद्यपि कूर कुरूप कुंदरस तद्यपि हम ब्रजवासी ॥ एते ऊपर प्राणरहतहैं घाट कहहु कहाकहिए । पूरब कर्मलिखे विधि अक्षर सूर सबै सो सहिए ॥ ९७ ॥ मलार ॥ अलि हमहिं कान्हको इहै परेखो आवै । तब वह प्रीति चरण जावक शिर अब कुबिजा मनभावै ॥ तब कत पाणि धरो गोवर्धन कत ब्रजपतिहि छँडवै । अब वह रूप अनूप कृपाकरि नैनन क्यों न देखावै ॥ तब कत बैन अघर धरि मोहन लैलै नाम बुलावै । अरु कत लाड लडाइ राग रस हँसि हँसि कंठ लगावै ॥ जेहि मुख संग समीप राति दिन तेहि क्यों योग सिखावै ॥ जेहि मुख अमृत पिऊ रसनाभरि तेहि क्यों विषहि पिआवै ॥ करमीडति पछिताति मनहिं मन क्रम क्रम करि समुझावै । सोइ सुनि सूरदास अब विरहिनि यहि दुख दुख अति पावै ॥ ९८ ॥ राग सोरठा ॥ मेरे जिय इहै परेखो आवै । सरवस लूटि हमारो लीनो राज कूबरी पावै ॥ तापर एक सुनो री अजगुत लिखि लिखि योग पठावै । सूर कुटिल कुबिजाके हितको निर्गुण वेद सुनावै ॥ ९९ ॥ राग मलार ॥ ऊधो आवै इहै परेखो । जब बारे तब वैसी मिथ्या की बडे भए इहै देखो ॥ योग यज्ञ तप नेम दान व्रत इहै करत तब जात । क्यों तब वैसी कुशलसों कठिन मोहकी बात ॥ करि निज प्रगट कपट पिक कीरति अपने काज लागि धीर । काज सरे दुखगए कहाँधौं का वायसकी पीर ॥ जहँ जहँ रहहु राज्य करौ तहँ तहँ लेहु कोटिको भार । इहै अशीश सूर प्रभु सों कहि न्हात खिसै जिन वार ॥ ३१० ॥ राग मलार ॥ हरि ब्रज कवहिं कह्योहो आवन । बेगि सुवचन सुनाइ मधुपजी मोहिं व्यथा विसरावन ॥ हौं यह बात कहा जानों प्रभु जात मधुपुरी छावन । पछिली चूक समुझि उर अंतर अब लागी पछितावन ॥ सब निशि सूर सेज भई वैरनि शशि सीखो तनुतावन । अब यह कर कच अंगनि ऊपर दशहू दिशि घन सावन ॥ ११ ॥ राग सारंग ॥ तुम्हारी प्रीति किधौं तरवारि । दृष्टिधार धरि हती जु पहिले घायल सब ब्रजनारि ॥ गिरी सुमार खेत वृंदावन रणमानी मनहारि । विह्वलविकल सभा रति छिन छिन वदन सुधानाधि वारि ॥ अब यह

कृपा योग लिखि पठए मनसिज करी गुहारि । कछु इक शेष वच्योहै सूर प्रभु सोउ जिनि डारहु
 मारि ॥२॥ राग सारंग॥ कहौ तो जो कहिबेकी होई। प्राणनाथ बिछुरेकी वेदन जानत नार्हिन कोई॥ जो हम
 अधर सुधारस लैलै रही मदन गति भोई । कहा कहाँ कछु कहत न आवै तन मन रही समोई ॥
 विरह व्यथा वेदन उर अंतर जामें बीतै जानै सोई । सूरदास शिव सनकादिक लोभा सो हम बैठे
 खोई ॥३॥ नट॥ ऊधो तुम ब्रजमें पैठ करी । लै आएहौ नफा जानिकै सबै बस्तु अकरी ॥ हम अहीर
 माखन मथि बेचैं सबन टेक पकरी । इह निर्गुण निर्मोलकी गठरी अब किन करत घरी॥ यह व्यापार
 वहां जो समातो हुती बडी नगरी । सूरदास गाहक नहिं कोऊ दिखिअत गरे परी ॥४॥ राग धनाश्री ॥
 ऊधो योग ठगौ री ब्रज न विकै है । सूरके पातनके बदले को मुक्ताहल दैहै । यह व्यापार तुम्हारो
 ऊधो ऐसेहि धरयो रहि जैहै । जिन पै ते लै आए ऊधो तिनहिके पेट समैहै ॥ दाख दाडिम कत
 कटुक निबौरी को अपने मुख खैहै । गुणकरि मोहिं सूर साँवरेको निर्गुणही निबैहै ॥५॥ राग सारंग ॥
 मीठी बातनमें कहा लीजै । जोपै वै हरि होहिं हमारे करन कहै सोइ कीजै ॥ जिन मोहन अपने
 कर कानन कर्णफूल पहिराए । तिन मोहन माटीके मुद्रा मधुकर हाथ पठाए ॥ एकदिवस वेनी
 वृंदावन रचि पचि विविध बनाई । ते अब कहत जटा माथेपर बदलो नाम कन्हई ॥ लाइ सुगंध
 बनाइ अभूषण अरु कीनी अर्धंग । सोवै अब कहि कहि पठवतहैं भस्म चढावन अंग ॥ कहा
 करौ दूरि नंदनंदन तुम जो मधुप मधुपाती । सूर न होइ श्यामके मुखको जाहु न जारहु छाती ॥६॥
 ॥ राग सारंग ॥ ऊधो भूलि भले भटके । कहत कही कछु बात लडैते तुम ताही अटके ॥ देखों सकल
 सयान तिहारो लीने छरि फटके । तुमहिं दियो बहराइ इते को वे कुबिजासों अटके ॥ लीजो योग
 सँभारि आपनो जाहु तहीं तटके । सूर श्याम तजि कोउ न लैहै या योगहि कटुके ॥७॥ राग नट ॥ ऊधो
 तुमहौ निकटके वासी । यह निर्गुण लै ताहि सुनावहु जे मुडिया बसैं कासी ॥ मुरली अधर
 सकल अंग सुंदर रूप सिंधुकी रासी । योगकटारे लिए फिरतहौ ब्रजवासिनकी फाँसी ॥ राज-
 कुमार भले हम जानै घरमें कंसकी दासी । सूरदास यदुकुलहि लजावत ब्रजमें होतहै हाँसी ॥ ८ ॥
 ॥ राग सारंग ॥ ऊधो तुम जो निकटके वासी । यह परमारथ वृद्धि कहौ किन नाम बडोकी कासी ॥
 योग ज्ञान ध्यान अवराधन साधन मुक्ति उदासी । नाम प्रकार कहा रुचि मानहि जो गोपाल
 उपासी ॥ परमारथी जहां लौं जेते विरहिनिके दुखदाई । सूरदास प्रभु रंग प्रेमरंग प्रीति योग
 सगाई ॥९॥ राग मलार॥ मधुप विराने लोग बटाऊ । दिनदशरहे आपने स्फूर्ण तजि गए मिलै न काऊ ॥
 नैरह दूरि हमको सिधि पठई आयो योग अगाऊ । हमको योग भोग कुबिजाको उहिकुल यहै
 सुभाऊ ॥ जो जो योग नंदनंदनको कीजै कौन उपाऊ । सूर श्यामको सर्वसु दीन्हों प्राण रहै की
 जाऊ ॥१०॥ दिन दिन प्रीति देखिअत थोरी । सुनहु मधुप मधुवन वसि मधुरिपु कुल
 मर्यादा छोरी ॥ गोकुलके मणि त्रिभुवन नायक दासीसों रति जोरी । तापर लिखि लिखि योग
 पठावत विसरी माखन चोरी ॥ काको मान परेखो कीजै बँधी प्रेमकी डोरी । सूरदास विरहिनि
 बिरहा जरि भई साँवरी गोरी ॥११॥ राग आसावरी ॥ जादिनते गोपाल चले । तादिनते ऊधो या ब्रजके
 सब सुभाइ बदले ॥ घटे अहार बिहार हर्ष हितु सुख शोभा गुणगान । उतल तेज सब रहित
 सकल विधि आरति असम समान ॥ बाढी निशा वलय आभूषण उर कंचुकी उसाँस । नैनन जल
 अंजन अंचलप्रति आवत अवधिकी आस ॥ अब यह दशा प्रगटके तनुकी कहवी जाइ सुनाइ ।
 सूरदास प्रभुसों कीवो जिहि वेगि मिलहि अब आइ ॥१२॥ राग गौरी॥ हमारी ऊधो पीर न हरिबिन जाइ ।

जो सोऊं तौ मोहिं हरि मिलैं ऊधो जागौ देइ अतिदाइ ॥ कमलनैन मधुपुरी सिधारे हमहुँ न संग
 लगाइ । अब यह व्यथा कौन बिधि भरिहैं कोऊ देइ बताइ ॥ उदमद यौवन आनि ठाठिकै कैसे
 रोको जाइ।सूरदास स्वामीके मिलिबे तनुकी तपत बुझाइ ॥ १३॥ राग मलार।गोपालहि वारेहीकी टेवा
 जानति नहीं कहाँते सीखे चोरीके छल छेव ॥ तब कछु दूध दह्यो ले खाते करिरहती हौं कानि ।
 कैसे सही परत अब मोपै मनमाणिकही हानि ॥ ऊधो नैदनंदनसाँ कहियो राजनीति समुझाइ ।
 राजहुभए तजत नहिं लोभहि गुप्त नहीं यदुराइ ॥ बुद्धि विवेक अरु वचन चातुरी पहिले लई चुराई।
 सूरदास प्रभुके गुण ऐसे कासों कहिए जाई ॥ १४॥ राग सांग ॥ बिसरत क्यों गिरिधरकी बातैं । अवधि
 आश लागि रह्यो मधुप मन तजि न गयो घट तातैं ॥ हरिके विरह छीनभई ऊधो दोउ दुखपरे
 सँघाते । तन रिपु काम चित्त रिपु लीला ज्ञानगम्य नहिं याते ॥ श्रवण सुन्यो चाहत गुण हरिको जेवै
 कथा पुराते । लोचन रूप ध्यान धरयो निशिदिन कहो घटै को काते ॥ ज्यों नृप प्राणगए सुत
 अपने बिरचि रह्यो जो जाते । सूर सुमति तोही पै उपजै हरि आवैं मथुराते ॥ १५ ॥ राग मलार।ऊधो
 कुलिश भई यह छाती । मेरे मन रसिक लग्यो नैदलालहि झपत रहत दिन राती ॥ तजि ब्रज
 लोग पिता अरु जननी कंठ लाइ गए काती । ऐसे निठुर भए हरि हमको कबहुँ न पठई पाती ॥
 पिय पिय कहत रहै जिय मेरो होइ चातककी जाती । सूरदास प्रभु प्राणहि राखहु होइ करि बूँद
 सेवाती ॥ १६ ॥ राग गौरी ॥ हम तौ कान्हकेलिकी भूँखी । कहा करौं ले निर्गुण तुम्हरो विरहिनि विरह
 विटूखी ॥ कहिए कहा इहै नहिं जानत कहो योगही योग । पालागौं तुमसे अपने पुर वसत बापुरे
 लोग ॥ चंदन अभरन चीर चारु वरु नेकु आपु तनु कीजै ॥ दंड कमंडलु भस्म अधारी तौ युवतिन
 कहूँ दीजै । ईहै देखि दृष्टि धौं गोपिन क्यों धौं दृढ व्रत पायो । सूरदास यदुनाथ मधुपको प्रेमहि
 पढन पठायो ॥ १७ ॥ राग गौरी ॥ तुमहिं मधुप गोपाल दुहाई।कबहुँक श्याम करत इहाँको मन कैधौं
 चित सुध्यो बिसराई ॥ हम अहीरि मतिहीन बावरी हटकतहू हाठि करहिं मिताई । उइ नागर
 मथुरा निमोही अँग अँग भरे कपट चतुराई ॥ साँची कहहु देख श्रवणन सुख छाँडहु छिआ कुटि-
 ल दुचिताई । सूरदास प्रभु बिरद लाज धरि मेटहु इहाँके लोग हँसाई ॥ १८ ॥ उद्धव वचन ॥ राग विहागरो॥
 गोपी सुनहु हरि संदेश । कह्यो पूरण ब्रह्म ध्यावो त्रिगुण मिथ्या भेश ॥ मैं कहौं सो सत्य मानहु त्रिगुण
 डारौ नाष । पंचत्रिय गुण सकल देही जगत ऐसो भाष ॥ ज्ञान बिनु नर मुक्ति नाहीं यह विषै संसार ।
 रूप रेख न नाम कुल गुण बरण अवर न सारा।मात पितु कोउ नाहिं नारी जगत मिथ्या लाइ । सूर सुख
 दुख नाहिं जाके भजो ताको जाइ॥ १९ राग सांग॥ऐसी बात कहौ जिनि ऊधो।नैदनंदनकी कान्हा नैन
 तो आवत आखर मुखते सूधो ॥ बात नहीं उडि जाहि और ज्यों त्यों हम जानौं काँची । मन
 क्रम वचन विशुद्ध एकमत कमलनैन रंगराची ॥ सो कछु जतन करौ पालागौं मिटै हृदयको
 शूल । मुरली धरे आनि दिखरावो बाढे प्रीति दुकूल ॥ इनही बातन भए श्याम तनु अजहुँ मिला-
 वतहो गढि छोलि।सूर वचन सुनि रह्यो ठग्योसो बहुरि न आयो बोलि ॥ २० ॥ राग सारंग॥ फिरि फिरि
 कहा बनावत बातैं । प्रातकाल उठि देखत ऊधो घर घर माखन खातैं॥जिनकी बात कहतहौ हमसाँ
 सोहैं हमसाँ दूरि । इहाँ न निकट यशोदा नंदन प्राण सजीवन सूरि ॥ बालक संग लिए दधि चोरत
 खात खवावत डोलत।सूर शीशनीच्यो क्यों नावत अब काहे नहिं बोलत॥ २१॥ राग सांग॥ फिरि फिरि
 कहा सिखावत मौन । वचन दुसह लागत अलि तेरे ज्यों पजरे पर लौन ॥ सींगी मुद्रा भस्म
 अधारी अरु आराधन पौन । हम अबला अहीर शठ मधुकर धरि जानहिं कहि कौन ॥ यह मत

जाइ तिनहिं तुम सिखवहु जिनही यह मत सोहत । सूर आजलौं सुनी न देखी पोत पूतरी पोहत ॥
 ॥२२॥ केदारो ॥ रहि रहि देख्यो तेरो ज्ञान । सुफलकसुत सर्वसुरस लैगयो तू करन आयो ज्ञान ॥ वृथा
 कत अपलोकलावत कहत यह उपदेश । उपपिकीतर होहु जानिन कहत बैन वलेस ॥ योगमत
 अति विशद कीरति होहि वाँछित काम । सदा तनु प्रताप भरेहैं वै पुरुष तुम धाम ॥ हम चरत कंज
 सुवास लै लै जीवति ऐसी रीति । कहत तिनसन धूम घोटहु नाहिं चाहत प्रीति ॥ अजहुं नाहिं न
 कहि सिरानो यह कथाको छेवा ॥ सूर धोखो तनकहै हम देखि लीन्ही सेव ॥२३॥ राग धनाश्री ॥ ऊधोजी
 हमहि न योग सिखैए । जेहि उपदेश मिलै हरि हमको सो व्रत नेम बतैए ॥ मुक्ति रहो घर बैठि
 आपने निर्गुण सुनत दुख पैए । जिहि शिर केश कुसुम भरि गूदे तेहि कैसे भसम चढैए ॥ जानि
 जानि सब मगन भएहैं आपुन आपु लखैए । सूरदास प्रभु सुनहु नवोनिधि बहुरि कि या ब्रज
 अइए ॥२४॥ राग मलार ॥ हम तो तबहीं ते योग लियो ॥ जबहीं ते मधुकर मधुवनको मोहन गवन कियो ॥
 रहित सनेह सरोरुह सबतन श्रीखंड भस्म चढाए । पहिरि मेखला चीर चिरातन पुनि पुनि फेरि
 सिआए ॥ श्रुति ताटक नैन मुद्रावालि औधि अधार अधारी । दरशन भिक्षा माँगत डोलत
 लोचन पत्र पसारी ॥ बाँधो वेणु कंठ शृंगी फिप्र सुमिरि सुमिरि गुण गावता ॥ कर वा बैल उर उर
 तन सुनत श्रान दुख धावत ॥ गोरख शब्द पुकारत आरत रस रसना अनुराग ॥ योग भुगति भूलेहु
 भावनहिं भरी विरह वैराग ॥ भूलीभई फिरति भ्रम श्रमके वन बीथिन दिन राति । वारक
 आवत कुटुंब यात्रा है सोऊ न सोहाति ॥ परम गुरु रतिनाथ हाथ शिर दियो प्रेम उपदेश । चतुर
 चेटकी मथुरानाथसों कहियो जाइ आदेश ॥ भोगीको देखहु या ब्रजमें योग देन जेहि आए । देखी
 सिद्धि तिहारे सिद्धकी जिनि तुम इहां पठाए ॥ सूर सुमति प्रभु तुमहिं लखायो हमरे सोई ध्यान ।
 अलि चलि औरै ठौर देखावहु अपनो फोकट ज्ञान ॥२५॥ राग मलार ॥ ऊधो करि रहीं हम योग । कहा
 एतौ बाद ठानै देखि गोपी भोग ॥ शीश सेली केश मुद्रा कनक बीरी बीर । विरह भस्म चढाइ
 बैठी सहज कंथा चीर ॥ हृदय सींगी टेर मुरली नैन खप्पर हाथ । चाहते हरि दरश भिक्षा दई
 दीनानाथ ॥ योगकी गति युक्ति हमपै सूर देखो जोइ । कहत हमको करन योग सो योग कैसो
 होइ ॥२६॥ ऊधो योग तबहिं ते जान्यो । जादिन ते सुफलकसुतके संगरथ ब्रजनाथ पलान्यो ॥ तादि-
 न ते सब छोह मोह गयो सुत पितु हेतु भुलान्यो । तजिमाया संसार तर्क जिय ब्रज बनिता व्रत
 ठान्यो ॥ नैन मूँदि मुख मौनरही धरि तनु तपतेज सुखान्यो । नंदनंदन मुरली मुखपर धरि उहै
 नैन आन्यो ॥ सोइ रूप योगी जेहि भूले जो तुम योग बखान्यो । ब्रह्म उपाधि मुए ध्यान कर-
 तही अंत उन्नै ॥ पश्चिन्नान्यो ॥ कहौ सुयोग कहाँलै कीजै निर्गुणही नहिं जान्यो । सूर उहै निज
 रूप श्यामको है मनमाहँ समान्यो ॥२७॥ सारंग ॥ ए अलि कहा योगमें नीको । तजि रसरीति नंदनंदनको
 सिखवत निर्गुण फीको ॥ देखति सुनति नाहिं कछु श्रवणानि ज्योति ज्योति करि धावति । सुंदर श्याम
 कृपालु दयानिधि कैसे हो विसरावति ॥ सुनि रसाल मुरलीकी सुर ध्वनि सुर सुनि कौतुक भूले । अपनो
 भुजा ग्रीव पर मेलो गोपिनके मन फूले ॥ लोककानि कुलके भ्रम छाँडे प्रभु संग घर बन खेली । अब
 तुम सूर सिखावन आए योग जहरकी बेली ॥२८॥ गौरी ॥ ऊधो योग कहत हो कहा योग किये । श्याम
 सुंदर कमलनयन वसो मेरे जिये ॥ योग युगति साधिकै जे तप योगिनि योग सिरायो । ताहुको
 फल सगुण मूरती प्रगटहि दरशन पायो ॥ मकराकृत कुंडल छवि राजित लोल कपोलै । मोर
 मुकुट पीत वसन बाँसुरी करबोलै ॥ ऐसे प्रभु गुणनिधान दरश देखि जीजै । राम श्याम निधि

पिथूष नयनन भरि पीजै॥जाको अयन जल भे तेहि अनल कैसे भावै । सूरज प्रभु गुणनिधान निर्गु-
 ण क्यों गावै॥२९॥राग मलार॥मधुकर श्याम हमारे ईश । तिनको ध्यान धरै निशिवासर औरहि नवै
 न शीश ॥ योगिन जाइ योग उपदेशहु जिनके मन दश बीस । एकै चित एकै वह मूरति पलन लगे
 दिन तीस ॥ काहेको निर्गुण ज्ञान गनत हो जित तित डारत खीस । सूर हृदय में वसत निरंतर
 त्रिभुवन पति जगदीस॥३०॥राग सोरठा॥योगकी गति सुनत मेरे अंग आगि बई । सुलगि सुलगि हम
 जरतिही तुम आनि फूँकि दई ॥ भोग कुबिजा कूबरी सँग कौन बुद्धि भई । सिंह भष तजि चरत
 तिनका सुनी बात नई ॥ ध्यान धरत न टरत मूरति त्रिविध ताप तई । सूर हरिकी कृपा जापर सकल
 सिद्धिमई ॥३१॥राग मलार॥मधुकर रह्यो योगलौ नातौ । कतहिबकत बेकाम काजबिन होहि न ह्यांते
 हातौ ॥ जब मिलि मिलि मधुपान कियोहौ तब तू कहिधौ कहातौ । अब आयो निर्गुण उपदेश
 नसों नहिं हमहिं सुहातो ॥ काचेगुण ज्यों तनुले वैधौ लै वारिजको तातो । मेरेजानि गह्यो चाहतहौं
 फेरिकि भैगलमातो ॥ यह लैदेहु सूरके प्रभुको आयो योग जहातो । जब चहिहै तब माँगिपैठहै
 जो कोउ आवत जातो॥३२॥राग सारंग॥ऊधो योग किधौ यह हाँसी । कीनी प्रीति हमारे ब्रजसों दई
 प्रेमकी फाँसी ॥ तुमहो बडे योगके पालक संगलिपु कुबिजासी । सूरदास सोईपै जानै जाउर
 लागै गौंसी॥३३॥राग मारू॥योग विधि मधुबन सिखिअहिजाइ।मन बच क्रम शपथ सुनि ऊधो संगहि
 चलौ लिवाइ ॥ सब आसन रेचक अरु पूरक कुंभक सीखेपाइ । बिन गुरुनिकट संदेशन कैसे
 यह औगाह्यो जाइ ॥ हम जो करत देखिहैं कुबिजाहि तेई करब उपाइ । श्रद्धा सहित ध्यान एकाहि
 सँग कहत जाउ यदुराइ ॥ सूर सु प्रभुकी जापर रुचिहै सो हम करिहैं आइ । आज्ञा भंग करै हम
 क्योंकर जो पतिव्रत न नशाइ ॥ ३४ ॥ धनाश्री ॥ योग संदेशो ब्रजमें लावत । थाके चरण तुम्हारे ऊधो
 बार बारके धावत ॥ सुनिहै कथा कौन निर्गुणकी रचि पचि बात बनावत । सगुन सुमेर प्रगट
 देखियत तुम तृणकी ओट दुरावत ॥ हम जानत परपंच श्यामके बात नहीं बौरावत । देखी सुनी
 न अबलगि कबहुं जल मथि माखन आवत ॥ योगी योग अपार सिंधुमें ढूँढेहुं नहिं पावत । इहां
 हरि प्रगट प्रेम यशुमतिके ऊखल आप बँधावत ॥ तुम चुपकरिरहौ ज्ञान ढाकि राखो कतहो
 विरह बढ़ावत । नंदकुमार कमलदल लोचन कहि को जाहि न भावत ॥ काहेको विपरीत बात कहि
 सबके प्राण गँवावत । सोहं सकित सूर अबलनिको जिहि निगम नेति यश गावत ॥ ३५ ॥ अथ मन
 अवस्थावर्णन ॥ राग मलार ॥ मधुकर कहि कैसे मन मानै । जिनके एक अनन्य व्रत सूझै क्यों दूजो
 उर आनै ॥ यहुतौ योग स्वाद अलि ऐसो पायसुधा खरिसानै । कैसे धौ यह बात पतिव्रत मति
 शठ पुरुष बिरानै ॥ जैसे मृगिन ताकि अधिक दृग कर कोदंड गहि तानै ॥ हिंस्रमा स्फीषत तन
 मन सुख शिर अपराध न आनै ॥ बडे बिचित्र कुबिजाके रँगरंगे हम निर्गुण लाखै ठानै ॥ सूर श्याम
 निर्गुण रति मानी मधुप प्राण जिनि छानै ॥ ३६ ॥ राग मलार ॥ कहाँलौ राखैं हिय मनधीर । सुनहु मधुप
 अपने इन नैनन अनदेखे बलबीर ॥ घर आँगन न सुहात रैन दिन बिसरे भोजन नीरादाहत देह चंद्र चं-
 दनहै अरु वह मलय समीर ॥ पुनि पुनि उहै सुरति आवाति चित चितवत यमुनातीर । सूरदास कैसे
 बिसरतहै सुंदर श्याम शरीर ॥ ३७ ॥ राग केदारो ॥ बिनहरि क्यों राखैं मनधीर । एकबेर हरि दरश देखा-
 वहु सुंदर श्याम शरीर ॥ तुम जो दयालु दयानिधि कहियत जानतहो परपीर । बिछुरे प्राण
 नाथ ब्रज अबहीं कत हम कत यदुवीर ॥ मत अपयश आनहु शिर अपने कठिन मदनकी पीर । सूरदास
 प्रभु मिलन कहत हैं रवितनयाके तीर ॥ ३८ ॥ राग नट ॥ मेरो मन अनत कहा सचुपावै । जैसे उडि जहा

जको पंछी उडि जहाज पर आवै॥जिहि मधुकर अमृत रस चाख्यो क्यों करीलफल भावै॥सूरदास प्रभु
 कामधेनु तजि छेरी कौन दुहावै॥३९॥राग सारंग॥ मनतो मथुराही जो रह्यो । तबको गयो बहुरि नहि
 आयो गहे गुपाल गह्यो ॥ राख्यो रूप चुराइ निरंतर सों हरि शोधु लह्यो । आए और मिलावन ऊधो
 मनदै लेहु मरचो ॥ निर्गुण साटि गुपालहि माँगत क्यों दुख जात सह्यो । यह तनु यहि आधार
 आजुलगि ऐसही निबह्यो ॥ सोई लेत छुडाइ सूर अब चाहत हृदय दह्यो ॥ ४० ॥ राग सारंग ॥ कहा
 भयो हरि मथुरा गये । अब अलि हरि कैसे सुखपावत तनुदोउ भाँति भए ॥ इहां अटक अति
 प्रेम पुरातन वहां अति नेह नए । उहां सुनियत नृप भेष इहां दिन देखिअत वेणु लए ॥ कहा हाथ
 परचो शठ अक्रूरके यह ठग ठाटठए । अब क्यों कान्ह रहत गोकुल बिन योगनके सिखए ॥ राजा
 राज्य करौ गृह अपने माथे छत्र दए । चिरंजीव रहौ सूर नंदसुत जीजत सुख चितए ॥ ४१ ॥ अपनीसी
 कठिन करत मन निशिदिन । कहि कहि कथा मधुप समुझावत तदपि न रहत नंद नंदनबिन ॥
 श्रवणसँदेश नयन वरपत जल मुख बतियां कछु और चलावत । अनेकभाँति चित धरति निडु-
 रता सबतजि सुरति उहै जिय आवत ॥ कोटिस्वर्ग सम सुखउ न मानत हरि समीप समता नहि
 पावत । थकित सिंधु नौकाके खग ज्यों फिरि फिरि फेरि वहै गुणगावत ॥ जेजे बात विचारत
 अंतर तेइ तेइ अधिक अनल उर दाहर्त । सूरदास परिहरि न सकत तन वारक बहुरि मिले है
 चाहत ॥ ४२ ॥ मधुकर ह्यां नाहिन मन मेरो गयो जु संग नंदनंदनके बहुरि न कीन्हौ फेरो ॥ उन नैनन
 सुसकानि मोललै कियो परायो चरो । जाके हाथ परचो ताहीको बिसरचो वास बसेरो । को सीखै
 ता बिनु सुन सूरज योगजकाहू केरो । मंदो परचो सिखाउ अनतलै यहि निर्गुण मत तेरो ॥ ४३ ॥
 मुक्तिआनि मंदेमो मेली । समुझि सगुन लै चले न ऊधो यह तुमपै सब पुजी अकेली ॥ कै लैजाहु
 अनतही बेचो कै लैराख जहाँ विषवेली । याहि लागि को मरै हमारे वृंदावन चरणनसों ढेली ॥ घरे
 शीश घर घर डोलतहौ एकै मति सब भई सहेली । सूरदास गिरिधरन छबीलो जिनकी भुजा कंठ
 गहि खेली ॥ ४४ ॥ ऊधो मनतौ एकै आहि । लै हरिसंग सिधारे ऊधो योग सिखावत काहि ॥ सुनि
 शठनीति प्रसून रस लंपट अवलनिको घाँचाहि । अब काहेको लोन लगावत विरह अनलके दाहि ॥
 परमारथ उपचार कहतहो विरह व्यथाहै जाहि । जाको राजरोग कफ बाढत दह्यो खवावत ताहि ॥
 अवलगि अवधि अलंबन करि करि राख्यो मनहि सवाहि ॥ सूरदास या निर्गुण सिंधुहि कौन सकै अव-
 गाहि ॥ ४५ ॥ ऊधो मन न भए दशबीसा एक हुतोसो गयो श्यामसँग को अबराधे ईश ॥ इंद्री सिथिल भई
 जे शोबिन ज्यों देही बिन शीश । आशा लगी रहत तनु श्वासा जीजो कोटि वरीस ॥ तुमतौ सखा श्याम
 सुंदरकं सखे जो भूके ईश ॥ सूरदास वा रसकी महिमा जो पूँछै जगदीश ॥ ४६ ॥ ऊधो जो मन होत
 वियो । तो तुम्हरे निर्गुण को दीजै सो विधना न दियो ॥ एक जु हुतो मदन मोहनकी सो छबि छीनि
 लयो ॥ अब वा रूपराशि बिनु मधुकर कैसे परतु जियो । जो तुम कह्यो सोई शिर ऊपर सूर श्याम
 पठ्यो । नाहिन मीन जीवत जल बाहर जो घृत मैं सजियो ॥ ४७ ॥ ऊधो यह मन और न होई ।
 पहिलेही चढि रह्यो श्यामरंग छूटत नहि देख्यो घोई ॥ कै तुम बचन बडे अलि हमसों सोई कह
 जो मूल । करतकेलि वृंदावन कुंजन वा यमुनाके कूल ॥ योग हमहिं ऐसो लागत ज्यों तो चंपेको
 फूल । अब क्यों मिटत हाथकीरेखें कहौ कौन विधि कीजै । सूर श्याम मुख आनि देखावहु जेहि
 देखे दिन जीजै ॥ ४८ ॥ मधुकर मो मन अधिक कठोर । विगासि न गए कुंभ काचे जौ बिछुरत नंद
 किशोर ॥ प्रेम बनिज कीन्हौ हुतो नेह नफा जियजानि । ऊधो अब उलटी भई प्राण पूजि मैं हानि ॥

जो हम प्रीति रीति नहीं जानति तौ ब्रजराज तजी । हमरे प्रेम नेमकी ऊधो मिलि रसरीति लजी ॥
 हमते भली जलचरी बपुरी अपनो नेम निबाह्यो ॥ जलते बिछुरि तुरत तनु त्याग्यो तउ कुल जलको
 चाह्यो ॥ अचरज एक भयो सुन ऊधो जल बिन मीन रह्यो । सूरदास प्रभु अवधि आश लगि मन
 विश्वास गह्यो ॥ ४९ ॥ राग मलार ॥ मधुकर ए मन बिगारि परे । समुझत नहीं ज्ञानगीताको हरि मुसु-
 कानि अरे ॥ हरिपद कमल बिसारत नाहिंन शीतल उर सचरे । योग गंभीर अंध कूपनसों ताहि जु
 देखि डरो ॥ बालमुकुंद रूप रसराते ताते वक्र परे । सुधे न होहिं श्वान पूछ ज्यों कोटिक वैद मरे ॥ हरि
 अनुराग सुहाग भरि अमीके गागर रे । सूरदास प्रभु ऐसी रहनदे कान्ह वियोग भरे ॥ ५० ॥
 इहि उर माखन चोर गडे । अब कैसे निकसत सुनु ऊधो तिरछे है जो अडे ॥ यदपि अहीर
 यशोदानंदन कैसे जात छडे । वहां यादवपति प्रभु कहियत है हमें न लगत बडे ॥ को वसुदेव
 देवकीनंदन को जानै को बूझै । सूर नंद नंदनको देखति और न कोई सूझै ॥ ५१ ॥ राग केदारो ॥
 मनमें रह्यो नाहिंन ठौर । श्रीनंदनंदन अछत कैसे आनिये उर और ॥ चलत चितवत द्योस जागत
 सपने सोवत राति । हृदयते वह मदन मूरति छिन न इत उत जाति ॥ कहत कथा अनेक ऊधो
 लोग लोभ दिखाइ । कहाकरौ मन प्रेमपूरण घट न सिंधु समाइ ॥ श्यामगात सरीज आनन ललित
 गति मृदुहास । सूर इनके दरशको बल मरत लोचन प्यास ॥ ५२ ॥ राग सारंग ॥ मधुकर श्याम
 हमारे चोर । मन हरिलियो तनक चितवनिमें चपल नैनकी कोर ॥ पकरे हुते और उर
 अंतर प्रेम प्रीतिके जोर । गए छँडाइ तोरि सब बंधन दैगये हँसनि अकोर ॥ औझकि
 परी रैनि सो वीती दूत मिल्यो मोहिं भोर । सूरदास प्रभु सर्वसु लूख्यो नागर नवल किशोर ॥ ५३ ॥
 अली अब ब्रजनाथ कछू करौ । जा कारण ये देहधरी है तिहिके लेखे परौ ॥ प्रथमहि अर्पिदियो
 हम सर्वसु ए बिरहिनि योही जरौ ॥ कोटि मुक्तवारौ सुसकनि पर योग बापुरों सरो ॥ सूर सगुन
 बाँटि दियो गोकुलमें अब निर्गुणको वोसरो ॥ ताकी छटा छार कंठहरिया जो ब्रजजानों दूसरो ॥
 ॥ ५४ ॥ ऊधो भलीकरी गोपाल । आपुनपै हरि आवत नाहीं विरमि रहे यहि काल ॥ चंदन
 चंदहुते तब शीतल कोकिल शब्द रसाल । अब समीर पावक सम लागत सब ब्रज उलटी
 चाल ॥ हार चीर कंकन कंटक भए तरनि तिलक भए भाल । सेज सिंधु ग्रह तिमिर कंदरा सर्प
 सुमन भए माल ॥ हमतो न्याय इतौ दुखपावैं ब्रजवसि गोपी ग्वाल । सूरदास स्वामी सुखसागर
 भोगी भँवर मृणाल ॥ ५५ ॥ मलार ॥ हमको इती कहा गोपाल । नंदकुमार कमलदल लोचन सुंदर बाहु
 विशाल ॥ इक ऐसीही विरहरही लटि बिन घनश्याम तमाल । तापर अलि पठएहैं सिखबत
 अबलन उलटी चाल ॥ लोचन मूँदि ध्यान चित चितवनि धरि आसन मृगछाल । नौ छि जाइ जरे
 पर चूनो दूनो दुख तिहि काल ॥ डारि न दिए कमल करते गिरि दंबि रहती ब्रजबाल । सूर श्याम
 अब यह न बूझिए बिछुरि करी बेहाल ॥ ५६ ॥ जब वह सुरति होतिहै बात । सुनो मधुप
 या बेदनकी रति मन जानै कै गात ॥ रहत नहीं अंतर अति राखे कहत नहीं कहिजात । भई रीति
 हठि उरग छछूँदरि छाँडै बनै न खात ॥ एकहि भाँति सदा या ब्रजमें बीततहै दिन रात । सूरदास
 प्रभुके मिलि बिछुरन समुझि समुझि पछितात ॥ ५७ ॥ सारंग ॥ यह बात हमारी कौन सुनै । जिन चाह्यो
 हरि रूप सुरति करि भूलि अंगारनि को चुनै ॥ इहां सेवनको ठौर न देखति ताते सुनि मनमें गुनै ।
 कैमुक बिरह बयार पैनकी बैठे ठानै को धुनै ॥ तब उन भाँतिन लाड लडाए अब बूझिए न
 यह उनै । बालि छाँडिकै सूर हमारे अब नरवाई को लुनै ॥ ५८ ॥ ऊधो कहिए काहि सुनाइ ।

हरि बिछुरे हम जिती सहतहैं तिते बिरहके घाइ ॥ वरु माधो मधुबनहीं रहते कत यशुमतिके आए । कत प्रभु गोपवेष ब्रज धार्यो कत ए सुख उपजाए ॥ कत गिरि धरयो इंद्र प्रण मेख्यो कत वनराशि बनाए । अब कह निठुर भए अबलनिपर लिखि लिखि योग पठाए ॥ तुम परबीन सबै जानतहौ ताते यह कहि आई । आपन कौन चलावै सूर जिन मात पिता बिसराई ॥ ५९ ॥ राग नट ॥ ऊधो बात कही नहि जाइ । मदनगोपाल लालके बिछुरे प्राण रहे सुरझाई ॥ जब स्यंदन चढि गमन कियो हरि फिरि चितए गोपाल । तबहीं परम कृतज्ञ सबै सुठि संग लगी ब्रजबाल ॥ अब यह और सृष्टि बिरहनकी बकत वाइ बौरानी । तिनसों कहाहोत फिरि उत्तर तुमहो पूरण ज्ञानी ॥ अब सो साधन घटका कीजै को उपजै परतीति । सूरदास कछु वरणि न आवै कठिन बिरहकी रीति ॥ ६० ॥ राग सारंग ॥ मधुकर जो तू हितू हमारो । पिवहि नरे यह वदन सुधारस छाँडि योग जलखारो ॥ सुन शठ नीति सुरभि पय दायक क्यों वलेति हल भारो । जे भय भीत होहि शृंग देखे क्यों व छुवाहि अहि कारो ॥ निजकृत समुझि वेणु दशनन हति धाम सजत नहि हारो । ताबल अछत निशा पंकज भ्रम दल कपाट नहि टारो ॥ रे अलि चपल मूढ रस लंपट कतहि बकत बेकाज । सूर श्याम छवि क्यों बिछुरति है नख शिख अंग विराज ॥ ६१ ॥ राग विलावल ॥ तुम्हारी प्रीति ऊधो पूरब जनमकी अब जु भए मेरे तनहुके गरजी । बहुत दिनन विरमि रहे हौ संगते बिछोहि हमहि गए बरजी ॥ जादिनते तुम प्रीति करीही घटति न बढ़ति तूलि लेहु नरजी । सूरदास प्रभु तुम्हरे मिलन बिना तनु भयो व्योत विरह भयो दरजी ॥ ६२ ॥ राग सारंग ॥ हमहि बोल बोले की परतीति । सुनु ऊधो हम नाहिन जानत तुम्हरे गाँवकी रीति । हमरे प्रीतम तुम जो लैगये आवन कद्यो रिपु जीति । तुम्हारी बोलनि कौन पतीजै ज्यों भुसपरकी भीति ॥ आवन अवाधि बदी हरि हमसों सोऊ दिन गए बीति । सूरदास प्रभु मिलहु कृपाकरि सुमिरि पुरातन प्रीति ॥ ६३ ॥ राग सारंग ॥ ऊधो जो तुम हमहि सुनायो । सो हम निपट कठिनई हठ करि या मनको समुझायो ॥ युक्ति जतन जीति योग अंगहू गहि अपथ पंथलै आयो । भटकि भ्रम्यो वोहित के खंग ज्यों पुनि पुनि हरि जीपै आयो ॥ हमको सबै अहित लागत है तुम अतिहितहि जनायो । सर सरिता जल होम किएते कहा अग्नि सत्तुपायो ॥ अब सोई उपाउ उपदेशो जिहि जिय जाइ जिवायो । वारक मिले सूरके स्वामी कीजहु अपनो भायो ॥ ६४ ॥ राग मलार ॥ ऊधो हरि कहिये प्रतिपालक । जे रिपु तुम पहिले हति छाँडे बहुरि भए मम शालक ॥ अब बक बकी तृणावर्त केशी ए सब मिलि ब्रज घेरत । सुनो जानि नंदनंदन बिनु वैर आपनो फेरत ॥ अरु अपने परिहास मेटनको इन्द्र रद्यो करि घात ॥ सूर सहाय करै को रही छिनककी बात ॥ ६५ ॥ राग कल्याण ॥ ऊधो तुम जानत गुप्त हि यारी । सबकाहुक मजकी बूझो बांधो मूढ फिरो ढिग वारी ॥ पीत ध्वजा उनकी मन रंजन लाल ध्वजा कुबिजा विविचारी । यशकी ध्वजा श्वेत ब्रजबाँधे अपयशकी ऊधो पै कारी ॥ वैतो प्रेम पुंज मनरंजन हमतो शीश योग व्रतधारी । सूर शपथ मिथ्या लैगराई ए बातें ऊधो की प्यारी ॥ ६६ ॥ राग मलार ॥ श्याम अब न हमारे । मथुरागए पलटिसे लीन्हें माधो मधुप तुम्हारे ॥ अब मोहि आवत पतु पछतावो कैसे वै गुण जात बिसारे । कपटी कुटिल काग अरु कोकिल अंत भए छडि न्यारे ॥ करि करि मोह मगन ब्रजवासी प्रेम प्रतीति प्राण धन वारे । सूर श्यामको कौन पतयैह कुटिलगात तनु कारे ॥ ६७ ॥ अथ श्यामरंग तर्क वदति ॥ राग धनाश्री ॥ मधुकर कहा कोरेकी न्याति । ज्यों जल मीन कमल मधुपनको छिन नहि प्रीति खटाति ॥ कोकिल

कपट कुटिल वायस छालि फिरि नहिं वह बन जाति । तैसेही रसकेलि रस अचयो बैठि एकही पाँति ॥ सुत हित योग यज्ञव्रत कीजतु बहुविधि नीकी भाँति । देखहु अहि मन मोह मयातजि ज्यों जननी जनि खाति ॥ तिनको क्यों मन विषयमें कीजै अवगुणलौं सुखसाति । तैसे सूर सुने यदुनंदन बजी एकरस ताँति ॥ ६८ ॥ राग घनाश्री ॥ श्याम सखी कोरेहु में कोरे । तिनसों प्रीति कहाकहि कीजै मारग छाँडि सिधारे ॥ लोक चतुर्दश विभव कहतहै पटुहि पत्र जल न्यारे । सरवर त्यागि विहंग उडे ज्यों फिरि पाछे नं निहारे ॥ तब चितचोर भोर ब्रजवासिन प्रेम नेम व्रत टारे । लै सर वसनहि मिले सूरप्रभु कहिअत कुलट बिचारे ॥ ६९ ॥ राग नट ॥ ऐसे नंदराइके वारे । इतनिन जनि पतियाहु सखी री जितनेहैं तनुकोरे ॥ खेलत रंग संग वृंदावन निमिष न होत निनारे । पहिले सुख दारुणभए हमको देइ जग ए दुखभारे ॥ उर ऊपर भीजत सारंग रिपु नैन नीर बहु ढारै । सूरदास प्रभु बेगि मिलहुं किम टरत नहीं गुण टारै ॥ ७० ॥ राग सारंग ॥ मधुकर यह कोरेकी रीति । मनदे हरत परायो सरबस करे कपटकी प्रीति ॥ ज्यों षटपद अंबुजके दलमें वसत निशारतिमानि । दिनकर उए अनत उडिबैठे फिरि न करत पहिचानि ॥ भवन भुजंग पिटारे पाल्यो ज्यों जननी जियतात । कुल करतूति जाति नहिं कबहुँ सहज सु डसि भजिजात ॥ कोकिल काग कुरंग श्याम घन हमहिं न देखे भावै । सूरदास अनुहारि श्यामकी छिनु छिनु सुरति करावै ॥ ७१ ॥ राग मलार ॥ मधुकर देखि श्यामतनु तेरो । या मुखकी सुनि मीठी बातैं डरपतुहै मनमेरो ॥ कतए चरण छुअत रसलंपट बरजतही बेकाज । परसत गात स्रवत कुच कुंकुम यहउ करी कछुलाज ॥ बुधि विवेक बल वचन चातुरी सरबस चितै चुरायो । ऐसो धौं उन कहा बिचारो जालगि तू ब्रजआयो ॥ अब कहि कहि आशा गवतहो हम आगे ए गीत । सूर इते परि द्वार कहाहै जो परि त्रिगुण अतीत ॥ ७२ ॥ राग मलार ॥ मधुप तुम दिखियतहो अतिकारे । कालिंदीतट पार बसतहो सुनियत श्याम सखारे ॥ मधुकर चिकुर भुअंग कोकिला अवधि नहीं दिन टारे । वै अपने मुखहीके राते जियत उहै उनिहारे ॥ कपटी कुटिल निठुर निमोँही दुखदै दूरि सिधारे । बारक बहुरि कबहुँ आवहुगे नैननि साधनि वारे ॥ उनकी सुनै सु आपु बिगोवै चितचोरत बटपारे । सूरदास प्रभु क्यों मनमानै सेवक करत ननारे ॥ ७३ ॥ सारंग ॥ भूलतहौ कत मीठी बातनि । एतो अलि उनहीके संगी चंचल चित्त साँवरे गातनि ॥ वै मुरली ध्वनि जगमन मोहत इनकी गुंज सुमन मधुपातनि । ए षटपद वै द्वैपद चतुर्भुज काहुँ भाँति भेदनहिं भ्रातनि ॥ वै नव निशि मानिनि गृहवासी ए अब शतानिशि नवजल जातनि । वै उठि प्रात अनत मन रंजत ए उडिकरत अनत रसरातनि ॥ स्वारथी निपुण सुहा रस भोगी जिनि पतिआहु बिरह दुख दातनि । वै माधव ए मधुप सूर कहि कहि नहिं नाहन कोउ घटि घातनि ॥ ७४ ॥ राग मलार ॥ बिलग मतिमानो ऊधो प्यारे न वह मथुरा काजरकी उबरी जे आवैं ते कोरे ॥ तुम कोरे सुफलकसुत कोरे कोरे मधुप भवारे । तिनहुँमाझ अधिक छबि उपजत कमलनैन मणिपारे । मानो नीलमाँटमें बोरे लै यमुना जु पखारे । तागुण श्याम भई कालिंदी सूर श्याम गुण न्यारे ॥ ७५ ॥ ऊधो तुम सब साथी भोरे । मेरे कहे बिलगु मानहुगे कोटि कुटिल लै जोरे ॥ वै अक्रूर कूर कृत जिनके रीते भोरे भोरे गहि ढोरे । आपुन श्याम श्याम अंतर मन श्यामकाममें बोरे ॥ तुम मधुकर निर्गुण निजनीकेदेखे फटकि पछोरे । सूरदास कारणके संगी कहा पाइयत गोरे ॥ ७६ ॥ राग भोपाली ॥ ऊधो हम दूबरी वियोग । प्रीतम हुते सोउ गए मधुवन रहे बटाऊ लोग ॥ जो तुम बूझो व्यथा हमारी कहे बनै तुम आगे । देह बिहार शृंगार न भावै मन तरसै

हरि काजै ॥ कारीघटा देखि अँधियारी सारंग शब्द न भावै । दिवसरैनि मोहिं बिरह सतावै कब गोपाल
 घर आवै । सूरदास स्वामी मनमोहन अब करि गए अनाथ । मन क्रम बचन वहाँई बसतहैं जहाँ
 बसत यदुनाथ ॥ ७७ ॥ राग सोरठा ॥ ऊधो यह हरि कहा करयो । राजकाज चित दियो साँवरे गोकुल क्यों
 बिसरयो ॥ कत गिरिधरयो इंद्र मद भेटयो कत वै सुख उपजाए । अब कह निदुर
 भए अबलनि पर लिखि लिखि योग पठाये ॥ परमप्रबीन सकल विधि सुंदर ताते
 यह कहि आवत । हमरी कहा चलै सुन सूरज मात पिता बिसरावत ॥ ७८ ॥ राग नट ॥ यदपि मैं
 बहुतै यतन करे । तदपि मधुप हरि प्रिया जानिकै काहु न प्राण हरे ॥ सौरभ युत सुमनन
 लै निजकर संतत सेज धरे । सन्मुख सहति दरश शशि सजनी तिहिहुँ न अंग जरे ॥
 मधुकर मोर कोकिला चातक सुनि सुनि श्रवण भरे । सादर ह्वै निरखति रतिपति दृग नेक
 न पलक प्रे ॥ निशिदिन रटत नंदनंदनको उरते छिन न टरे । अति आतुर गुणसहित चमू सजि
 अंगन सरस चिरे ॥ जानत नहीं कौन गुण यहितन जाते सब बिडरे । सूरदास सकुचन श्रीपतिकी
 सुभटन बल विसरे ॥ ७९ ॥ राग केदारो ॥ जिहि दिन तजी ब्रजकी भीरा कहो ए अलि लेखि तुमसों सखा सुंदर
 धीर ॥ काम नृप शशि नेव अबलनि दूत दुर्ग समीर । सजै सेना बिपुल बादर बंदत बंदीकीर ॥
 लता लघु जनु कुसुम कर सर कली कोटि तुणौर । बरुनबान बसंत करलै बधतहै आमीर ॥ मध्य
 द्रुमहै फूल मानो कवच कंचन चीर ॥ करि कुंभ कुंजर बिटप भारी चमर चारु मयीर । चमू चंचल
 चंचल नाहिंन रहीहै पुर तीर ॥ समर मारुहु कीटकी रट सहत त्रिय आधीर । जन्म
 जातक व्याध व्यापक कहो कासों पीर ॥ सूर रसिक शिरोमणिहि विन जलत यमुना नीर ॥ ८० ॥
 राग कान्हरो ॥ हरि बिछुरनकी शूल न जाई । बलि बलि जाउं सुखाविंदकी वह मूरति चित रही समाई ॥
 एक समय वृंदावन महियां गहि अंचल मेरी लांज छिडाई । कबहुँक रहसि देत आलिंगन कबहुँक
 दौरि बहोरत गाई ॥ वै दिन ऊधो बिसरत नाहीं अंबर हरे यमुनतट जाई । सूरदास स्वामी गुण
 सागर सुमिरि सुमिरि राधे पछिताई ॥ ८१ ॥ राग नट ॥ मोहन माँग्यो अपनो रूप । यह ब्रज बसत
 अचै तुम बैठी ताबिन उहाँ निरूप ॥ मेरोमन मेरो अलि लोचन लै जु गये धुपि धूप । हमसों
 बदलो लेन उठिधाए मनो धारिकर सूप ॥ अपनो काज सँवार सूर सुनि हमहिं बतावत कूप ।
 लेवा देइ धराधर मैं है कौन रंक को भूप ॥ ८२ ॥ राग सारंग ॥ पठवत योग कछु जिय लाजन । तब
 ज्यों जतन तंत्र मृग मोहत अब कपटरूपकी बाजन ॥ जिय गहि लई कूरके सिखए मोह होत
 कहँ राजन । सब सुधि परी बचन कन ढोए ढके रहो । सुखभाजन ॥ यह नृपनीति रह्यो कौनेहु
 युग नैह ॥ जसु आनन । ताहू तजी सुरति नहिं आवति दुखपाए जन माजन ॥ करि दासी
 दुलहिनि भयो दूलह फिल ब्याहके साजन । सूर बडे भुव भूप कंस हते वा कुबिजाके काजन ॥ ८३ ॥
 ॥ राग मलार ॥ संदेशानि विरह व्यथा क्यों जाति । जबते दृष्टिपरी वह मूरति कमल वदनकी कांति ॥
 अबतो जिय ऐसी बनिआई कहो कोउ केहु भाँति । जोइ वह कहै सोई सो सुनो सखी युगवर
 रैनि विहाति ॥ जौलौं न भेटौं भुजभरि हरिको उर कंचुकी न सोहाति । सूरदास प्रभु कमलनयन
 बिनु तलफति अरु अकुलाति ॥ ८४ ॥ राग मलार ॥ संदेशानि क्यों निघटति दिन राति । कबहुँक श्याम
 कमलदल लोचन कब मिलिहैं उहि भाँति ॥ खंजरीट मृग मीन सबै मिलि उपमाको अकुलाति ।
 बार बार मैं वरजति ग्वालनि अपने मारग जाति ॥ सहस भाँति अर्पितकी रन सब एकौ चित न
 समात । सूरदास प्रभु संतताहितते कहे सुनत नहिं बात ॥ ८५ ॥ गोपालहि लै आवहु मनाइ । अबकी

बेर कैसेहु करि ऊधो करि छल बल गहिपाइ ॥ दीजो उनहि सु सारि उरहनो संधि संधि समुझाइ ।
 जिनिहि छाँडि बटिआ महँ आए ते बिकल भए यदुराइ ॥ तुमसों कहा कहोंहों मधुकर बातें बहुत
 बनाइ । बहियां पकरि सूरके प्रभुकी नंदकी सौह दिवाइ ॥ ८६ ॥ केदारो ॥ ऊधो श्याम इहां लै आवहु ।
 ब्रजजन चातक मरत पियासे स्वाति बूँद बरषावहु ॥ इहाँते जाहु बिलंब करहु जिनि हमरी दशा
 जनावहु । घोषसरोज भए हैं संपुट होइ दिनमणि बिगसावहु ॥ जो ऊधो हरि इहां न आवहिं तौ
 हमैं वहाँ बुलावहु । सूरदास प्रभु हमहिं मिलावहु तब तिहुँ पुर यश पावहु ॥ ८७ ॥ कहहु
 कहा हमते बिगरी । कौने न्याइ योग लिखि पठए हम सेवा कछु ऐ न करी ॥ पाखंड प्रीति करी नंद
 नंदन अवधि अघार हुतीसो टरी ॥ मुद्रा जटा ऊधो लै आए ब्रजबनिता पहिरो सगरी ॥ जाति स्वभाउ
 मिटै नहिं सजनी अंतत उबरी कुबरी । सूरदास प्रभु वेगि मिलहु किनि नातर प्राण जात निकरी ॥
 ॥ ८८ ॥ केदारो ॥ बिरही कहालौं आपु सँभारै । जबते गंग परी हरि पगते बहिवो नहीं निवारै ॥ नैननते
 बिछुरी भौहैं भ्रम शशि अजहूँ तनु गारे । रोमते बिछुरी कमल कंठ भए सिंधुभए जरि छारे ॥
 बैनते बिछुरी बिधि अवधि भई वेदहिको निरवारे । सूरदास जाके सब अंग बिछुरे केहि विद्या
 उपचारे ॥ ८९ ॥ राग मलार ॥ बहुत दिन गए माई हरि दरशन बिनु देखे । गनतहि गनत गई सुनि सजनी
 कर अँगुरिनकी रेखे ॥ अब इहि बिरह अंगर जो करी हम बिसरी नैन निमेषै । होड परति सुनि
 सूरदास जानि पारहु उनहीके लेखे ॥ ९० ॥ राग धनाश्री ॥ ऊधो भली भई अब आए । बिधि कुलाल कीने
 काचे घट ते तुम आनि पकाए ॥ रंगदीनो हो काम श्याम लै अँग अँग चित्र बनाए । याते गरे
 न नैन मेह ते अवधि अटापर छाए ॥ ब्रजकरि अंबा योगईधन सम सुरति आगि सुलगाए ॥
 फूंक उसाँस बिरह पर जारनि संग ध्यान दर शशि अराए ॥ भरे सँपूरण कलश प्रेम जल छुअन
 न काहु पाए । राजकाजते गए सूर प्रभु नंदनंदन करलाए ॥ ९१ ॥ राग मलार ॥ ऊधो भली करी इहां आए ।
 तुम देखे जनु माधो देखे दुख त्रय ताप नशाए ॥ नंद यशोदाको नातो न छूटत वेद पुराणन गाए ।
 हम अहीरि तू अहीर लाख दश का भयो निर्गुण गाए ॥ तब यहि घोष खेलावहु खेलहु ऊखल भुजा
 बैधाए । सूरदास प्रभु इहै शूल जिअ बहुरि न दरशन देखाए ॥ ९२ ॥ मधुकर कहि मधुवनकी
 रीति । राजाहैं यदुनाथ तिहारे कहा चलावत नीति ॥ निशिलों करत दाह दिनकर ज्यों हुतो
 सदा शशिशीति । पूरव पवन कहो नहिं मानत गयो सहज वषु जीति ॥ कंसकाज कुबिजाके
 मारयो भई निरंतर प्रीति । सूर विरह ब्रज भलो न लागत जहीं व्याहु तहीं गीति ॥ ९३ ॥ राग केदारो ॥
 हरि बिनु नाहिन परत रहो । उत गिरि दुर्गम इतहि दव दारुण क्यों दुख जात सहो ॥ पद
 विरह धूम पावक जरि बरि वाउ बहो । हरि नागरि फिरि फूंक प्रजारनि पलकनि दहो ॥
 यद्यपि घृत लै आयो ऊधो योग सँदेश कहो । तद्यपि भस्म न होत सूर सुनि चलत गुपाल
 चहो ॥ ९४ ॥ राग मलार ॥ माधोजी नेक देखाई देहु । जो यातनमें ताके बदले जो चाहो सो लेहु ॥ भूली फिरत
 ठगीसी तबते बिनु बलमति गुण गेहु । जबते इन अपराधी नयनन वरजत कियो सनेहु ॥ कहियो
 जाइ मधुप पालागौं विरह कियो तनु गेह । रहत आश सुनि सूर दरशके निशिदिन इहै सँदेहु ॥ ९५ ॥
 गौरी ॥ यहि ब्रज होइहै कब हरिको आवन । नीकेकै वचन सुनाउ मधुप मोहिं विरह व्यथा बिसरावन ॥
 हों इहबात कहा जानों प्रभु जात मधुपुरी छावन । अपनी चूक मानि उर अंतर अब लागी दुखपावन ॥
 अहनिशि सूरज घरी भईहो तनु श्वासै शशि तावन । या ब्रज करषि अग्नि उर ऊपर रहो दुसह घन
 सावन ॥ ९६ ॥ राग ॥ ऊधो जो हरि आवैं तो प्राणरहै । आवत जात उलटि फिरि बैठत जीवत औधि गहै ॥

जब उइ दामन उखल बाँधे वदन नवाइ रहे। चुभि जु रही नवनीत चोर छबि क्यों भूलति ज्ञानकहै॥
 तिनसों ऐसी क्यों कहि आवति जो कुल त्रास सहै । सूर श्याम गुणरसनिधि तजिकै क्यों घाटि नीर
 बहै॥९७॥ उद्धववचन॥ राग नट॥ जबलगि ज्ञान हृदय नहिं आवै। तौ लगि कोटि जतन करै कोऊ बिन विवेक
 नहिं पावै ॥ बिना विचार सबै सुपनेसों मैं देख्यों सो जोई । नाना दारु बसैं ज्यों पावक प्रगट मथेते
 होई ॥ तुम इक कहत सकल घटै व्यापक अरु सबहीते नीरे । नख शिखलौं तनु जरत निशा-
 दिन निकसि करत किन सीरे ॥ बातैं कहत सबै सांचीसी मुँहमें लेहो तुरसी । सूर सो औषध हम-
 हिं बतावत ज्यों पितज्वर पर गुरसी ॥९८॥ गोपीवचन॥ राग सारंग ॥ तुम जो कहत हरि हृदय रहत हैं ।
 कैसे होइ प्रतीत मधुप सुनि ए इतनी जु सुनतहैं ॥ बासर रैन कठिन बिरहागिन अंतर प्राण दहत
 हैं । प्रजरि प्रजरि मनु निकसि धूम अति नैनन नीर बहतहैं ॥ कठिन अवज्ञा होत देह दुख मर्यादा
 न गहतहैं । कहे व क्यों मानै मन सूरज ए बातैं जु कहतहैं॥९९॥ राग सारंग॥ जोपै हृदय माँझ हरी ।
 तोपै इती अवज्ञा उनपै कैसे सही परी ॥ तब दावानल दहन न पायो अब यहि बिरह जरी । उरते
 निकसि नंद नंदन हम शीतल क्यों न करी॥ दिनप्रति इंद्रनैन जल बरषत घटत न एक घरी॥ अतिही
 शीत भीत भीजत तनु गिरि कर क्यों न धरी ॥ कर कंकन दर्पण लै देखो इहि अति अनख
 मरी । क्यों जीवहिं सुयोग सुनि सूरज बिराहेनि बिरह भरी॥३२००॥ राग सारंग॥ तुम घटही मो श्याम
 बताए । लीजै सँभारि सकल सुख अपने रास रंग जे पाए ॥ जो समदृष्टि आदि निर्गुण पद तौ कत
 चित्त चोराए । मोहन वदन बिलोकि मानि रुचि हँसि हरि कंठ लगाए ॥ हम मतिहीन अजान अरुप
 मति तुम अनभौ पद ल्याए । सूरदास तेहि बनिज कवन गुण मूलहु माँझ गवाँए ॥ १ ॥ राग
 सारंग॥ इनि बातनके मारे मरियत । निर्गुण ज्ञान मधुपलै आए बिनि गोपाल कैसे निशि तरियत ॥
 सबै अटपटी कहेर मधुकर सुनि देखी मधुवनकी रीति । कौन हाल हमरे ब्रजबनितन जानत नहीं
 बिरहकी रीति ॥ बुझी अगिनि बहुरौ सुलगाई अंतर्गति बिरहानल जारत । सूरदास स्वामी
 सुखसागर मिलि काहेन तनु ताप निवारत ॥ २ ॥ राग नट ॥ बातैं कहत बनाइ बनाइ । रंचक
 बिरह हुते यह गोकुल मधुकर भेटयो आइ ॥ कमलनैनकी मोहन लीला रहति रहीं गुण गाइ ।
 वोछी पूँजी हरे ज्यों तस्कर रंक मरै पछिताइ ॥ भली करी हमको लै आए पठये योग सिखाइ ।
 सूरदास स्वामी यह घाली निर्गुण कथा सुनाइ ॥ ३ ॥ राग केदारो ॥ ऐसो योग न हमपै होई ।
 सुनिकै वचन तुम्हारो ऊधो नैना आवत रोई ॥ कुटिल कुंतल मुकुट कुंडल रही छबि छबि
 ॥ सूर प्रभु बिन प्राण रहै नहिं कोटि करै किन कोई ॥ ४ ॥ राग सारंग ॥ मधुकर कह्यो संदेश
 सिधारो । नेत्रोपदेश सहजही योगी सुधारि रह्यो ब्रजसारो ॥ जाको ध्यान धरत गौरी
 पति योग युक्ति करिहारो । सो हरि बसत सदा हृदयमें नेक दरत नहिं टारो ॥ इह उपदेश आपनो
 ऊधो राखो ढाँप सवारो । सूर श्याम जानत भले जियकी जो निज हितू हमारो ॥ ५ ॥ राग सारंग ॥
 ऊधो हमैं कहा समुझावहु । पशु पंछी सुरभी ब्रजकी सब देखि श्रवण सुनि आवहु ॥ तृण न चरत
 गो पिवत न सुतपै ढूँढत बन बन डोलैं । अलि कोकिल दे आदि बिहंगम भीत भयानक बोलैं ॥
 यमुनाभई श्याम श्याम बिनु अंध छीन जे रोगी । तरुवर पत्र बसन न सँभारत बिरह वृक्ष भए
 योगी ॥ गोकुलके सब लोग दुखितहैं नीर बिना ज्यों मीन । सूरदास प्रभु प्राण न छूटत अवधि
 आशमें लीन ॥ ६ ॥ राग नट ॥ ऊधो अवधि आशगई । योगकी गति सुनत मेरे अंग आगि बई॥ धरत
 हृदय न दरत मूरति तिहूँताप तई । हम सुलगि सुलगि उठतही तुम फूँकि आनि दई ॥ सिंह गज

तजि चरत तृणते सुनत बात नई । अब भोग कुबिजा सुंदरीसों कौन बुद्धि दई ॥ नैन नीर प्रवाह सरिता ज्वाल जाल छई । सूर प्रभुकी कृपा जाको सकल सिद्धि भई ॥ ७ ॥ हमसों उनसों कौन सगाई । हम अहीर अबला ब्रजबासी वै यदुपति यदुराई ॥ कहा भयो जु भए नंदनंदन अब इह पदवी पाई । सकुच न आवत घोष बसतकी तजि ब्रजगण पराई ॥ ऐसे भए वहां यादवपति गए गोप बिसराई । सूरदास यह ब्रजको नातो भूलि गए बल भाई ॥ ८ ॥ राग सोरठ ॥ हरि निर्मोहियासों प्रीति कीनी काहेन दुख होई । कपटकी करि प्रीति कपटी लै गयो मन गोई ॥ सींचिआ मजीठ जैसो निकट काटी पोई । हमारे मनकी सोई जानै जामें बीती होई ॥ काल वदन ते राखिलीन्ही इंद्रगर्वजे खोई । सूर गोपिन ऊधो आगे डहकि दीन्हों रोई ॥ ९ ॥ ऊधो तुम यह मत लै आए । इक हम जरै खिझावन आए मानो सिखै पठाए ॥ तुम उनके वे नाथ तुम्हारे प्राण एक इक सारे । मित्रके मित्र सजन के सज्जन ताते कहत पुकारे ॥ रे सुन मूढ जरत अबलिनको परदुख तू नहिंजाने । निपट गँवार होइ जो मूरख सो तेरी बातें मानै ॥ हम रुचिकरी सूरके प्रभुसों दूजो मनन सुहाइ । उलटि जाहि अपने पुरमाहीं वादिहि करत लराई ॥ १० ॥ मारू ॥ हरि मुख देखही परतीति । जो तुम कोटि भांति परबोधो योग ध्यानकी रीति ॥ नहिंनै कछु सयान ज्ञानमें इह नीके हम जानै । कहो कहा कहिए वा प्रभुसों कैसे मनमें आनै ॥ इहै मन एक एक वह मूरति भृंगी कीट समानै । सूर शपथदै ऊधो पूंछो इहि ब्रज कौन सयानै ॥ ११ ॥ ऊधो बात तिहारी को सुनै । हरिपदपंकज जमन मधुकर गह्वो मन बिनबात कछु न बनै । योग युक्तिको बडो विस्तारहै ऐसे ठौर नहिं अपने । ब्रजवासिनको इतनो हियोहै कृष्णलेत संकोच बने ॥ तहां जाउ जहां बैठे योगी इहां कामरस रहौ धनै । हम अहीर कृष्णमदमाती सुखसों क्यों मित्रपनै ॥ जो तुम जानत तत्त्व कृपाला मौन रहौ तुम घर अपने । घर घर फिरत लेव लेव नाहीं बस्तुको मोल हनै । भूख न प्यास नोंदगई हरिबिनु पति सुत गृहकी कौन तनै ॥ माया और छूटगए यमुना अधिक कहालौं योग बनै । सो हरि प्राण प्रणत बल्लभ मोहनलीला है अकनै । आवत है कछु कह्यो सूरप्रभु नहिंतौ रहौ तुम मौन बनै ॥ १२ ॥ राग मलार ॥ बातनको परतीति करै । को अब कमलनयन मूरति तजि निर्गुण ध्यान धरै ॥ जो मत वेद कहत युगबीते रूप देख बिन जाने । सो मति मूढ कहत अबलनिसों नहिं सो हृदय समानै ॥ जो रस काज देव मुनि चितत ध्यान पलक नहिं आवत । सोइ रस सूर गाइ ग्वालन संग मुरली लैकर गावता ॥ १३ ॥ राग सारंग ॥ नहिं हम निर्गुण पहिंचानि । मन मन सार स्वरूप सिंधुमें आपनो हम सानि ॥ यद्यपि अग्नि उपदेशत ऊधो पूरण ज्ञान बखानि । चित चुभिरही मदन मोहनकी जीवन ना प्रभुसुकानि ॥ जुरयो सनेह नंदनंदनसों तजि परमिति कुलकानि । छूटत सहज न सूर प्रभु दुख सुखहि लाभ करिहानि ॥ १४ ॥ ऊधो जाइ बहुरि सुनि आवहु कहा कह्यो है नंदकुमार । इह न होइ उपदेश श्यामको कहत लगावन छार ॥ निर्गुण ज्योति कहा उनपाई सिखवत बारबार । कालिहि करत हुते हमरे अंग अपने हाथ शृंगार ॥ व्याकुलभई गोपालहि बिछुरे गयो गुन ज्ञानसंभार । ताते जो भावै सो बकतहौ नाहिन दोष तुम्हार ॥ विरह सहनको हम सरजी है पाहन हृदय हमार । सूरदास अंतर्गति मोहन जीवन प्राण अधार ॥ १५ ॥ अलि तुम योग बिसरि जानि जाहु । बांधो गाँठि छूटि परिहै कहं बहुरि वहां पछिताहु ॥ ऐसी बस्तु अनूपम मधुकर मन जिनि जानहु और । ब्रजवनि-ताके नाहिं कामको है तुम्हरे पै ठौर ॥ जो हितु करि पठए मनमोहन सो

हम तुमको दीन्यो । सूरदास ज्यों विप्र नारि पर करहि बंदना कीन्यो ॥ १६ ॥ ज्ञान योग अब
 लीन अहीरिसों कहत न आवै लाज । ऊधो सखा श्यामके कहियत पठए-होवे काज ॥ जा लायक
 जो वात होइ सो तैसिये तासों कहिये । बिना नाद संगीत सुधानिधि मूढहि कहा सुनइये ॥ हम
 जानी जु विचार पठाए सखा अंग परवीन । सुखैदहैं मोहन कहि बतियां करत योग आधीन ॥
 मुरली अधर मोरके पाखें जिन इह मूरति देखि । सोव कहा जानै निर्गुणको सोहै भीति चित्र
 अवरेखि ॥ पालागौं तुम बडे सयाने अनबोलेही रहियो । सिखये योग सूरके प्रभुको उनहींसों
 फिर कहियो ॥ १७ ॥ राग धनाश्री ॥ ऊधो काहेको भक्त कहावत । जोपै योग लिखि पठयो हमको तुमहु
 न भस्म चढावत ॥ सींगी मुद्रा भस्म अधारी हमहीको कहा सिखावत । कुविजा अधिक श्यामकी
 प्यारी ताहि नहीं पहिरावत ॥ यहतौ हमको तबहिं न सिखयो जबते गाइ चरावत । सूरदास प्रभुको
 कहियो अब लिखि लिखि कहा पठावत ॥ १८ ॥ नट ॥ ऊधो न विरहिनि न हम तुम दास । कहत सुनत
 घट प्राण रहतहैं हरि तजि भजहु अकास ॥ विरही मीन मरै जल बिछुरे छाँडि जीवनकी आस ।
 दासभाव नहिं तजत पपीहा बरुसहि रहत पियास ॥ पंकज परम कमलमें बिहरत विधि कियो
 नीर निरास । राजिव रविको दोष न मानत शशिसों सहज उदास ॥ प्रगट प्रीति दशरथ प्रति
 पाली प्रीतमको वनवास । सूर श्याम सों पतिव्रत कीन्हों छाँडि जगत उपहास ॥ १९ ॥ ऊधो
 बिनती सुनो इक मेरी । तबके बिछुरि गए नंदनंदन कामके दली घेरी ॥ देखो हृदय बिचारि
 तुमहिं अब प्रीति रीति सब केरी । जहां जाकी निधि तहां सब सौंपै ज्यों मृगनाद अहेरी ॥ वै द-
 शमास रतन रस वसतेशशि बिन रैन अँधेरी । सूरदास स्वामी कब आवैं बास करन ब्रजफेरी ॥ २० ॥
 ॥ राग सारंग ॥ मधुकर कहा प्रवीन सयाने । जानत तीनि लोककी महिमा अबलनि काज अयाने ॥
 जे कच कनक कटोरा भरि भरि मेलत तेल फुल्लेल । तिन केशनको भस्म चढावत टेसु कैसे
 खेल ॥ जिन केशन सबरोगहि सुंदर अपने हाथ बिनाइ । तिनको जटा कहा नीकीहैं कहु कैसे
 कहि आइ ॥ जिन श्रवणन ताटक खुभी औ करनफूल खुटिलाऊ । तिन श्रवणन कश्मीरी
 मुद्रा लै लै चित्र झुलाऊ ॥ भालतिलक अंजन चख नासा बेसरि नथमें फूली । ते सब तजि आलि
 कहत मलनमुख उज्ज्वल भस्म खुली ॥ जिहि मुख गीत सुभाषित गावत कहति परस्पर गास ।
 ता मुख मौन गहे क्यों जीजै छूटत ऊरध श्वास ॥ कंठ सुमाल हार मुक्ताके हीरा रत्न अपार । ताहु
 कंठ बाँधिवे कारण सींगी योग शृंगार ॥ कंचुकि छीन छीन पटसारी चंदन सरस सुछंद । अब
 कथा एकै अति गुदरी क्यों उपजी मतिमंद ॥ ऊधो ऊधो सब पालागैं देखो ज्ञान तुम्हारे । सूर
 सुप्रभु ~~उज्ज्वल~~ देखिहैं चिरजीवै कान्ह हमारो ॥ २१ ॥ हमतो दुहुँ भाँति फल पायो । जो गोपाल
 मिलैं तौ नीका नाता जगत यश गायो ॥ कहा हम या गोकुलकी गोपी वरणहीन घटि जाति ।
 कहैं वै श्रीकमलाके वल्लभ मिलि बैठी इकपांति । निगम ज्ञान मुनि ध्यान अगोचर सो भए घोष
 निवासी । ता ऊपर अब कहौ देखिघौ मुक्ति कौनकी दासी ॥ योग कथा ऊधो पालागौं नाकहु
 बारंबार । सूर श्याम तजि और भजै जो ताकी जननी छार ॥ २२ ॥ राग मारू ॥ मोहिं अलि दुहुँ भाँति
 फल होति । तब रस अधर लेत जो मुरली अब भइ कुविजा सौति ॥ तुम जो योग मत सिखवन
 आए भस्म चढावन अंग । इन विरहिनि मैं कहूं तू देखी सुमन गुहाए मंग ॥ कानन
 मुद्रा पहिरि मेखला धरैं जटा योग अधारी । इहां तरल तरिवना काके अरु तन सुखकी सारी ॥
 परम वियोगानि रटत रैन दिन धरि मनमोहन ध्यान । तुमतौ चलौ बेगि मधुवनको जहाँ योगको ज्ञाना ॥

निशिदिन जीजतु है या ब्रजमें देखि मनोहर रूप । सूर योग लै घर घर डोलौ लेहु लेहु ज्यों सूप ॥
 ॥२३॥ राग नट ॥ जोपै अलि मथुराहु लै जाहु ॥ आरति हरौ श्रवण नैननकी मेटहु उरके दाहु ॥ बुधि बल वचन
 जहाज बांह गहि बिरह सिंधु अवगाहु ॥ पार लगावहु मधुरिपुके तट चंद्र तज्यो जनु राहु ॥ देखहु जाइ
 रूप कुवजाको सहि न सकत यहु घाहु ॥ जीवन जनम सफल करि लेखहि सूर सबन उत्साहु ॥ २४ ॥
 लै चल ऊधो अपने देश । मदनगोपाल मिलन मन उमझो कौन बसै इह यदपि सुदेश ॥ वह
 मूरति मेरे हृदय बसत है मुरली अघर पुट कुंतल केश । कुंडल लोल तिलक मृगमद रचि गावत
 नृत्यत नटवर वेश ॥ कहा करौं मोपै रहो न जाई छिन सब सुखदायक बसत विदेश । सूरज श्याम
 मिलन कब है दूरि गमन ब्रजनाथ नरेश ॥ २५ ॥ राग विहागरो ॥ ऊधो लै चलु रे लै चलु रे । जहां बसै
 सुंदर श्याम बिहारी लै चलु रे तहां लै चलु रे ॥ आवन आवन कहि गए ऊधो करि गए हमसों छलु रे । हृदय
 की प्रीति श्यामजी जानत केतिक दूरि गोकुल रे ॥ आपन जाइ मधुपुरी छाए वहां रहे हिलि-
 मिलि रे । सूरदास स्वामीके बिछुरे नैन नीर परवलु रे ॥ २६ ॥ राग सारंग ॥ गुप्त मतेकी बात कहौ जनि
 काहूके आगे । कै हम जानैं कै तुम ऊधो इतनी पावहि मांगे ॥ एक बेर खेलत वृंदावन कंटक चुभि
 गयो पांइ । कंटकसों कंटक लै काढ्यो अपने हाथ सुभाइ ॥ एकदिवस विहरत बन भीतर मैं
 जु सुनाई भूख । पाके फल वै देखि मनोहर चढे कृपाकरि रूख ॥ ऐसी प्रीति हमारी उनकी बसते
 गोकुल बास । सूरदास प्रभु सब बिसराई मधुवन कियो निवास ॥ २७ ॥ राग मलार ॥ ऊधो कत ए बातें
 चाली । कछु मीठी कछु मधुरी हरिकी वै अंतर सब शाली ॥ तब ए वेली सींचि श्याम घन
 अपनी करि प्रतिपाली । अब ए वेली सूखत हरि बिनु छाँडि गए बनमाली ॥ जबहीं कृपाहुती
 यदुपतिकी रहासि रंग रसरास सुखाली । सूरदास प्रभु तब न मुई हम जिवहि बिरहकी जाली ॥ २८ ॥
 ॥ राग नट ॥ ऊधो इहै बिचार गहो । कै तन गए भलो मानै मन कै हरि ब्रज आइ रहौ ॥ कानन देह
 विरह दौ लागी इंद्री जीव जरै । बृझि श्याम घन प्रेम कमल मुख मुरली वृंद परै ॥ चरण सरोवर
 माहिं मीन मन रहत एक रस रीति । तुम निर्गुण वश तामें डारत सूर कौन यह नीति ॥ २९ ॥ ऊधो
 हम लायक शिख दीजै । यह उपदेश अग्रिते तातो कहो कौन बिधि लीजै ॥ तुमहीं कहो इहां
 इतनन महि सीखनहारी को है । योगी यती रहित मायाते तिनहीं यह मत सोहै । कहा सुनत
 बिपरीति लोकमहि यह सब कोई कैहै ॥ देख्यो धौं अपने मन सबकोइ तुमहीं दूषण दैहै । सक
 चंदन बनिता विनोदरस क्यों विभूति वपु माजै । सूरदास शोभा क्यों पावत आंखि आंधरी आँजै ॥
 ॥ ३० ॥ राग धनाश्री ॥ ऊधो हम लायक हमसों कहो । बात बिचारि सोहाती कहिए ॥ अपम
 बोलै है रहो ॥ भली कहै तुमको अतिशोभा अरु सबही पाइलहो । यह बिचारि बृझि तुमको
 कंधज्वसुरभिनहो ॥ एते पर पुनि पुनि शिखवतहौ योगरत्न दृढकरि गहो । सूर कहै अलि पुरो
 दीजै निपटहि वातनि मति वहो ॥ ३१ ॥ सारंग ॥ कबहुं वै ऊधो बात कहो । तजहु सोच मिलिहैं नंदनंदन
 हितकरि दुखनि दहो ॥ तुम हरि समाधानको पठए हमसों कहन संदेश । अधिक आनि आरत
 उपजाई कहि निर्गुण उपदेश ॥ इक अति निकट रहत अरु निजयुत जानत सकल उपाई । सोइ
 करहु जिहि पावहि दरशन छाँडहु अगम सुभाई ॥ हम किंकरी कमललोचनकी वशकीनी मृदुहास ।
 सूरदास अब क्यों बिसरतहै नख शिख अंग विलास ॥ ३२ ॥ राग मलार ॥ सब जल तजे प्रेमके नाते ।
 चातक स्वाति बूंद नहिं छाँडत प्रगट पुकारत ताते ॥ समुझत मीन नीरकी बातें तजत प्राण
 हाठिहारत । जानि कुरंग प्रेम नहिं त्यागत यद्यपि व्याध शरमारत ॥ निमिष चकोर नैन नहिं

लागत शशि जावत युग बीते । ज्योति पतंग देखि वधु जारत भए न प्रेम घट रीते ॥ कहि अलि क्यों
 विसरति वै बातें सँग जो करि ब्रजराजै । कैसे सूर श्याम हमैं छाँडैं एक देहके काजै ॥ ३३ ॥ ऊधो
 जो हरि हितु तुम्हारे । तौ तुम कहियो जाइ कृपाकरि ए दुख सबै हमारे ॥ तनु तरुवर उर श्वास
 पवनमें विरह दवा अति जारे । नहिं सिरात नहिं जात छारहैं सुलगि सुलगि भए कारे ॥ यद्यपि
 प्रेम उमँगि जल सींचे वरष वरषि घनहारे । जो सींचे यहि भाँति जतन करि तौ एते प्रतिपारे ॥
 कीर कपोत कोकिला चातक बधिक वियोग बिडारे । क्यों जीवै यहि भाँति सूर प्रभु ब्रजके लोग
 बिचारे ॥ ३४ ॥ राग धनाश्री ॥ हमैं तो इतनोहीसों काजु ॥ कैसेहं अलि कमलनैनको ब्रज लै
 आवहु आजु ॥ और अनेक उपाव तुम्हारे सकल करहु सुख राजु । कैसेहैं निबहत अबलनपै
 कठिन योगके साजु ॥ नख शिख सुभग श्यामघन तनको दरशनहरति विथाजु । सूरदास मत रहत
 कौन विधि वदन विलोकनि बाजु ॥ ३५ ॥ अब हरि कौनके रस गीधे । सकत नहीं निरवारि ऊधो
 शशि बदरी ज्यों बीधे ॥ वरतहीन नवल डुलाई तजी सकल कुलकानि । अंधकरि छाँडी मए
 गहिल वान फून लकुट विनपानि ॥ जतन घुरि निर्गुणभए सब नरकी अभिलाष बिना चरणसरोज
 देखै ॥ ३६ ॥ राग कान्हरो ॥ हरि ठाकुर लोगन सों मधुकर कहो काहेकी प्रीति । ज्यों कीजै तो होइ जल
 धर रविकी ऐसी रीति ॥ जैसे मीन कमल चातकही ऐसे दिन गए बीति । तरफत जरत पुकारत
 निशिदिन नहिंन कछु इहां नीति ॥ मन हठ परचो कमंध जोधालैं हारेहु नहिं जीति । रुकत न प्रेम
 समुद्र सूर बल वारूहीकी भीति ॥ ३७ ॥ राग सारंग ॥ को गोपाल कहाँके वासी कासों हैं पहि-
 चानि । तुम संदेश कौनके पठये कहत कौनके आनि ॥ अपनी चोप मधुप उडि बैठत
 भोर भले रसजानि । पुनि वह बेलि बढो कै सूखो ताहि कहा हितहानि । प्रथम बैन
 मनहरचो अहिरनको राग रागिनी ठानि । पुनि वह बधिक विश्वासघाती हनत विषम शरतानि ॥
 पय प्यावत पूतना बिनाशी छले जु बलिसे दानि । शूषनखा ताडका निपाती सूरदास यह
 बानि ॥ ३८ ॥ राग मलार ॥ मधुकर कौन मनायो मानै । अविनाशी हरि अंग तुम्हारे कहा प्रीतिरस
 जानै ॥ सिखवहु जाइ समाधि योग रस जे सब लोग सयाने । हम अपने ब्रज ऐसेहि रहिहैं विरह
 वाइ बौराने ॥ जागत सोवत स्वप्न दिवस निशि रहि हैं रूप परवाने । बारक बाल किशोरी लीला
 शोभा समुद्र समानै ॥ जिनके तन मन प्राण सूर सुनि मुख मुसकानि बिकानै । परी जू पयनिधि
 अल्प बूँद जल सुपुनि कौन पहिचानै ॥ ३९ ॥ राग सारंग ॥ हरिसुत सुत हरिके तनु आहि । इहां को
 कौनकी बुझाई ध्यान सुमिरौं को काहि ॥ को मुख ममतारस युवतीको को जिनि कंस हतै ।
 हमरे तौ गोपी आधिपति बनिता औरनतै ॥ मोरज रंघ रूप रुचिकारी चितै चितै हरिहोत ।
 कबहुँक करनी समेतिले नैंक न मानकै सोत ॥ तारिपु समै संग शिशु लीन्हें पय आवत तनु घोष ।
 सूरदास स्वामी मनमोहन कत उपजावत दोष ॥ ४० ॥ अब हरि और भए माई इतनी दूरि ।
 मधुकर हाथ सँदेशो पठयो चतुर चातुरी धूरि ॥ रूपराशि सो सबै गुण परमिति श्याम सजीवन
 मूरि । तिनसों कहत मनहिमन समुझहु हैं सबही भरि पूरि ॥ इक सुनि सूर ऐसेहि या तनको रही
 विरह झक झूरि । तापर छपद कियो चाहत है कोइलाहूते धूरि ॥ ४१ ॥ राग कान्हरो ॥ कहा जान
 कोऊ परपीर । नैदंनंदनके बिछुरे सखी री जैसी सही शरीर ॥ कहि कहि कथा मधुप समुझावत
 मनराखहु धरि धीर । नैन मीन कैसे सचपावत बिन दरशन हरि नीर ॥ योग समाधि कहा हम जानै
 ब्रजवासिनी अहीर । सोइ कीजै जो मिलै सूर प्रभु भव ऋतु रंगनितीर ॥ ४२ ॥ हम त्रिय मृतक

जीवत शशिसाखी । तुम अलि रवि हित कमल विशेषी हरे बिकल मधुमाखी ॥ मुरली अधर सुधा
 ध्वनि मुनि मुख संच्यो श्रवण दुआर । मधुहारी अक्रूर वधिक मुख अवधि लगाई छार ॥ मन-
 को बिरह नैन कहा जानै श्रुति मत तुही सुनावै । सूर भस्म अँग लगी कुटिलता तरु योगै गुण-
 गावै ॥ ४३ ॥ राग रामकली ॥ हमारी सुरति लेत नहिं माधो । तुम अलि सब स्वारथके गाहक नेह
 न जानत आधो ॥ निशिलों मरत कोश अभ्यंतर जो हित कहो सु थोरी । भ्रमत भोर मुख ओर
 सुमनसँग कमल देत नहिं कोरी ॥ राकारास मास ऋतु जेती रजनि प्रीति नहिं थाही । वैस संधि
 मुख तजी सूर हरि गए मधुपुरी माही ॥ ४४ ॥ राग धनाश्री ॥ कैसे जीवैं ऊधो हरि परदेश रहे । गरजि
 गरजि घन बरषन लागे नदियां नार बहे ॥ कहि पठवो मधुपुरी सखी री मेरेहो तौ चरण
 गहे । बासर गए निहारत मारग चातक रैनि डहे ॥ कासों कहाँ तपत मन निशिदिन को इह
 पीर लहै । हमहुं किन लै जाहि सूर प्रभु को ब्रज दुखाहि सहे ॥ ४५ ॥ हरि हम कहे को योग
 बिसारी । प्रेम तरंग बूडत ब्रजबासी तरत श्याम सोइ हारी ॥ रिपु माधव पिक वचन सुधाकर मरुत
 मंदगति भारी । सहि न सकत अति बिरह त्रास तनु आगि सलाकनि जारी ॥ ज्यों जल थाके मीन
 कहा करै तेउ हरि मेलि अडारी । बिजय अधोमुख लेन सूर प्रभु कहियहुं विपति हमारी ॥
 ॥ ४६ ॥ जो पै इहै हुती उनके मन । तो तब कमलनयन हम कारण कहा किये ब्रज
 एते जतन ॥ विष जल व्याल वरुन वर्षानल अनेक अशुभ हति राखे । संतत संग रहत काहु मिस
 निठुर वचन नहिं भाषे ॥ उन विपदनि कुंचित जो करते कछुअन जीव सराहती । बिधि
 बश नाउँ बहुरि फिरि मिलती एतो विलंब कत सहती ॥ कहिये कहा जो सब जानतहैं या तनुकी
 गति ऐसी । सूरदास प्रभु हित सुचित्त कै बेगि प्रगट की वो तैसी ॥ ४७ ॥ मोहनसों मुख
 बनत न मोरे । जिन नैनन मुखचंद्र विलोक्यो जात तरणि नहिं जोरे ॥ मुनि मन मंडन योग कर्म
 ऋतु मंदिर भार सहत कहि कोरे । बनत नहीं द्वै कमलके बंधन कुंजर क्यों वरहत बिनु तोरे ॥
 लीलांबुज तनु लील बसन मणि चितयो न जात धूमके भोरे । सूरदास जे कमलके बिरही चंप-
 कवन लागत चित थोरे ॥ ४८ ॥ राग सोरठ ॥ बिलग हम मानैं ऊधो काको।तरसत रहे वसुदेव देवकी नहिं
 हितु मात पिताको ॥ काको मात पिता को काको दूध पियो हरि जाको । नंद यशोदा लाड लडा-
 यो नाहिंन भयो हरि ताको ॥ कहिबो जाइ बनाइ बात यह को हितहै अबलाको । सूरदास प्रभु
 प्रीति है कासों कुटिल नीच कुबिजाको ॥ ४९ ॥ उघरि आये कान्ह कपटकी खानि।सरवस हरो बजाय
 बाँसुरी अब छाँडे पहिचानि ॥ जिन पय पियत पूतना मारी दालत करी न हानि । बलि छलि बाँधि
 पताल पठाये नेक न कीनी कानि ॥ जैसे बधिक अधिक मृग बिधवत राग रागिनी छानि । अवध
 आश परतीति ओटदै हनत बिषम शरतानि ॥ जैसे नाट सरुट रतन उर तै तुम ऊधो अति जानी ।
 सूरदास प्रभुके जिय भावै आयसु माथे मानी ॥ ५० ॥ सारंग ॥ जीवन मुख देखेको नीको । दश परश दिन
 रीति पाइअत श्याम पिआरे पीको ॥ सुनो योग कहि काम हमारे जहां ज्यान है जीको । नैन मूँदिकै
 मृतक देखि वर मधुप ध्यान पोथीको ॥ आछे सुंदर श्याम हमारे और जगत सब फीको । खाटी
 मही कहा रुचि मानो सूर खवैया घीको ॥ ५१ ॥ मधुकर को मधुवन रहियो।काके कहे सँदेशो ल्याये
 किनि लिखि लेखि दयो ॥ को वसुदेव देवकीनंद को को यदुवंश उजागर । इहां तिन्हसों पहिचानि
 न काहु फिरि लेइ जैए कागर । गोपीनाथ राधिका वल्लभ यशुमति सुवन कन्हई ॥ दिन प्रति लेत
 दान वृंदावन दूनी रीति चलाई ॥ मधुकर हा तुम भये सयाने कहत औरकी और । सूर सुपथ का-

हू वहि कायो कै भूली यहि ठौर॥५२॥इहां तुम कहत कौनकी बातैं । बिना कहे हम समझत नाहीं
 फिरि फिरि बूझति तातैं॥को नृपभयो कंस किन मारयो को वसुदेव सुत आहि । इहां यशुमति सुत
 परम मनोहर जीजतहै मुखचाहि ॥ दिन उठि जात धेनु बन चारन गोप सखनके संग । वासरगत
 रजनी मुख आवत करत नैन गनि पंग॥को परिपूरण को अविनाशी को बिधि वेद अपार । सूर विरथ
 बकवाद करतहो यहि ब्रज नंदकुमार॥५३॥राग गूजरी॥डसी री माई श्याम भुअंगम कारोचितवानि फिरि
 मुसुकानि महाविष लागत ज्यों शर डारो॥तंत्र न फुरै मंत्र नहिं लागै चले गुणी गुण हारे । प्रेमप्रीतिकी
 व्यथा तप्त तनु सो मोहिं डारत मारे ॥ भली भई तुम आए ऊधो वंद दे चले हमारे । आनहुँ बेगि
 गारु री गोविंदहि जो यहि विषहि उतारे ॥ आवति लहरि मदन विरहाकी को हरि वेद हँकारे । सूरदास
 गिरिधर जो आवहिं हम शिर गारुड टारे ॥५४॥ राग केदारो॥ नेह न होइ पुरानो रे अलि । जलप्रवाह
 ज्यों शोभासागर नित नव तन ब्रजनाथ इहाँ बलि ॥ जीवतहै आनंद रूप रस बिन प्रतीतिको मीन
 चढो थलि । अमी अगाध सिंधु सार विहरत पीवतहू न अघात इते जलि॥दिन दिन बढत नीर नलिनी
 ज्यों श्यामरंग में नैन रहे पलि।सूर गोपाल प्रीति जिय जाके छूटत नाहिन नेह सती सलि॥५५ धनाश्री॥
 अपने सगुन गोपाल माई यहविधि काहे देति । ऊधोकी इनि मीठी बातनि निर्गुण कैसे लेति ॥ धर्म
 अर्थ कामना सुनावत सब सुख मुक्ति समेति । काकी भूख गई मनलाडू सो देखहु चित चेति ।
 जाको मोक्ष विचारत वर्णत निगम कहतहै नेति । सूर श्याम तजिको भुस फटकै मधुप तुम्हारे
 हेति ॥५६॥हमरी सुधिहु भूलि अलि आए।अब कछु कान्ह कहत औरै हैं समझि सखा गुण गाए ॥
 निज स्वारथ रसरीति समझि उर विकल निमेष न चाहे । कहतहि सुगम सबै कोउ जानत कठिन हेतु
 निरवाहे ॥ अब परतीति बातकी मानै कहतहैं श्याम पराए । कबलौं चलै कपटको नातो सूर सनेह
 बनाए ॥५७॥ मधुकर हम सब कहा करैं । पठए हो गोपाल हेतु करि आयसु ते न टरैं ॥ रसना उर वारैं
 ऊधो पर इहि निर्गुणके साथ । यहपै नेकु बिलगु जिनि मानौं अँखियां नाहिन हाथ ॥ कवनभाँति
 गुण कहौं तिहारे हितको धीर धरावो । महाविचित्र नीर बिनु नौका बिन जलमीन जिआवो ॥
 सेवाहीन अपूरव दर्शन कब आवहुगे फेरि।सूरदास प्रभुसों यों कहियो केलापोष सँग उबरी बेरि॥५८॥
 ॥ राग गौरी॥ए अलि जन्म कर्म गुणगाए।हम अनुरागी यशुमतिसुतकी नीरस कथा बहाए ॥ कैसे कर
 गोवर्धन धारयो कैसे केशी मारयो । कालीदमन कियो कैसे अरु बक्रको वदन विदारयो ॥
 कैसे नंद महोत्सव कीनो कैसे गोपी धाए । पटभूषण नानाभाँतिनके ब्रजयुवतिन पहिराए ॥
 दधि माखनके भाजन कैसे गोप सखा लै धाए । वनको धातु चित्र अँग कीनो नाचत भेष
 सुहाए । तबते कछु न सुहाइ कान्ह बिनु युग सम बीतत याम । सूर मरहिंगी विरह वियोगिनि
 रटि रटि माधो नाम ॥ ५९ ॥ राग नट ॥ मधुप आए योग गथलै दुख अरु हांसीको सहै । कान
 मुद्रा भस्म कंथा मृगतुचा आसन डहै ॥ कान्हतौ वै निटुर कहिए सखा तिनके
 रावरे । जरे ऊपर लोन लावहि को है उनते बावरे ॥ श्यामके गुण हम जु जानै मानु बाँधे नल कियो ।
 संग खेलि खवाइ अपने सोच तो इतनो दियो ॥ एकदिन बैकुंठवासी रास वृंदावन रच्यो । सोइ
 स्वरूप विलोकि माधो आइ इन विधि तनु खच्यो ॥ शरद यामिनि इंदु राका लाज तजि कुंजनि
 गई । बाँसुरीको शब्द सुनिकै बधिककी मृगिनी भई ॥ मुरलीहै मदनमूरति मो मन हृदय रमिरई ।
 याहीते हम जगत जानी वेद भेटो दृढभई ॥ मंदमति हम कर्महीनी दोष काहि लगाइए । प्राणपति
 सों नेहबाँध्यो कर्म लिख्यो सो पाइए ॥ हम न जानै जन्म ऐसो रैनिको सपनो भयो । अंजुरिन जल

घटत जैसे तैसही यातन गयो ॥ भेदिआसों भेद कहिवो छेदसों छाती परौ । अंत नाहिंन और आवै ए सुख सब कुबिजा करौ ॥ योग जप तप ध्यान पूजा इह तौ हृदय न आवई । सुधारस जेहि स्वाद चारुयो तिनहि और न भावई ॥ ज्ञान दृढ तप ध्यान पूजा हरिचरण जिनके हिए । विमुख हैं जे सूर स्वामी फल कहा तिनके जिए ॥ ६० ॥ उद्धव वचना ॥ रागमलार ॥ वे हरि सकल ठौरके वासी । पूरण ब्रह्म अखंडित मंडित पंडित मुनिन विलासी ॥ सप्तपताल अध ऊर्ध्व पृथ्वीतल जल नभ वरुन बयारी । अभ्यंतर दृष्टी देखनको कारण रूप मुरारी ॥ मन बुधि चित अहंकार दशेन्द्रिय प्रेरक रथमनकारी । ताके काज बियोग बिचारत ये अबला ब्रजनारी ॥ जाको जैसो रूप मन रुचै सो अपवश करि लीजै । आसन वैसन ध्यान धारणा मन आरोहण कीजै ॥ षटदल अष्ट द्वादशदल निर्मल अजपा जाप जपाली । त्रिकुटी संगम ब्रह्म द्वार भिदि यों मिलिहै वनमाली ॥ एकादशगीता श्रुति साखी जिहि बिधि सुनि समुझाए । ते सँदेश श्रीमुख गोपिनको सूर सु मधुप जनाए ॥ ६१ ॥ अथ गोपी वचना ॥ कर्णाटी ॥ देखि रे प्रेम प्रगट द्वादश मीन । ऊधो एकबार नंदलाल राधिका बनते आवत सखिही सहित गिरिधर रसमीन ॥ गए नव कुंज कुसुमनिके पुंज अलि करैं गुंज सुख हम देखि भई लवलीन ॥ षट उडुगण षट मनिधर राजत चौबीस धात केहि चित्र कीन । षट इंदु द्वादश पतंग मनो मधुप सुनि खग चौअन माधुरी दश पीना द्वादश बिबाधर सो बानवै बज्र कन मानो षट दामिनि षट जलज हँसि दीन ॥ द्वादश धनुष द्वादशै विष्का मनमोहन पटै चिबुक चिह्न चित चीन । द्वादश व्याल अधोमुख झूलत मधुमानो कंजदलसों बीसद्वै बंसीन ॥ द्वादशै मृणाल द्वादश कदली खंभ मानो द्वादश दारिम सुमन प्रवीन । चौबीस चतुष्पद शशि सौ बीस मधुकर अंग अंग रस कंद नवीन ॥ नील नीलै मिलि घटा विविध दामिनि मनो षोडश शृंगार शोभित हरिहीन । फिरि फिरि चक्र गगनमें अमी बतावत युवती योग मौन कहूँ कीन ॥ वचन रचन रसरस नंदनंदन ते वही योग पौन हृदये लवलीन । नंद यशोदा दुखित गोपी गाय ग्वाल गोसुत सब मलिन गात दिनही दिन दुखीन ॥ बकी बका शकटा तृण केशी वच्छ वृषभ रासभै अलि बिनु गोपाल इनि बैर कीन । उद्धव यहां मिलाइ परै पाँय तेरे सूर प्रभु आरति हरै भई तनु छीन ॥ ६२ ॥ राग गौरी ॥ मधुकर ल्याए योग सँदेशो ॥ भली श्याम कुशलात सुनाई सुनतहि भयो अँदेशो ॥ आशरही जिय कबहुँ मिलैकी तुम आवतही नाशी । युवतिनि कहत जटा शिर बांधौ तौ मिलिहैं अविनाशी ॥ तुमको जिन गोकुलहि पठाए ते वसुदेव कुमार । सूर श्याम हमते कहूँ न्यारे होत न करत विहार ॥ ६३ ॥ राग मलार ॥ मधुकर वादि वचन कत बोलै । आपुन चपल चपलके संगी चपल चहुँ दिश डोलै ॥ इन बातनको कौन पत्यैहै अंतर कपट न खोलै । कंचन कांच कपूर कटुखरी एकहि सँग क्यों तोलै ॥ अब अपनीसी हमहि दिखावत मति भूलहु यहु जोलै । सूर श्याम बिन रटत बिरहिनी बिरह दाग जनि छोलै ॥ ६४ ॥ राग नट ॥ ऊधो सुनत तिहारे बोल । ल्याये हरि कुशलात धन्य तुम घर घर पारचो गोल ॥ कहन देहु कहा करै हमारो वरु उठि जैहै झोल । आवतही याको पहिचान्यो निपटहि ओछो तोल ॥ जिनके सोच नहीं कहिबेको ए बहुगुणनि अमोल । जानी जात सूर हम इनकी बतचल चंचल लोल ॥ ६५ ॥ राग धनाश्री ॥ मीठी बात हमारे आगे बारबार अलि कहा सुनावहु । हमहिं खिझाइ आपु पति खोवत यामें कहौ कहा तुम पावहु ॥ कहों न जाइ नगर नारिनसों वै सुनिहैं तिनको समुझावहु । ब्रजवासिनी अहीरिनि विरहिनि तिन आगे तुम काहे गावहु ॥ लोचन गए श्याम सँगही बडे चतुर तौ वो नहीं बुलावहु । सूर चकोर चंद्र दरशन तजि कैसे जीवैं तरनि दरशावहु ॥ ६६ ॥ राग धनाश्री ॥

मधुकर कहा करन ब्रज आए । योग ज्ञान हमको परबोधन हरितौ नहीं पठाए ॥ जा मुख मुरली धरि अद्भुत सुर गाइ बजाइ रिझावत । तेहि मुख श्याम कहेंगे ऐसे यह तौ तुमहि बनावत । अंग अंग आभूषण अपने कर करि हमहि बनावै । सूरदास प्रभु कैसे तुमकर कंथा जोरि पठावै ॥ ६७ ॥ कहा कहत रे मधुमतवारे । आयो धाइ योग उपदेशन प्रेमभजन गहिडारे ॥ जेहि मुख सुधा श्याम रस अचवत अब पीवै जल खारे । यह अक्रूरहिते अतिखोटो डारतिहौ अहि कारे ॥ हम जान्यो यह श्याम सखाहै यहतो औरै न्यारे ॥ सूर कहा याके मुख लागत कौन याहि अवगारे ६८ रे अलि कासों कहत बनाइ । बिन समुझे फिरि फिरि बूझतहै बारक बहुरो गाइ ॥ कौने गमन कियो स्यंदनचढि सुफलकसुतके संग । किन वधिरजक लिये नानापट पहिरे अपने अंग ॥ केहि हति चापि निदरि गज मारयो केहि बल मल्ल मथि भाने । उग्रसेन वसुदेव देवकी केहि व निगडहति आने ॥ काकी करत प्रशंसा निशिदिन कौने घोष पठाए । केहि मातुल वधि लियो जगतयश कौन मधुपुरी छाए ॥ माथे मोर सुकुट उरगुंजा मुख मुरली कल गाजै । सूरदास यशोदानंदन गोकुल सदा विराजै ॥ ६९ ॥ राग सारंग ॥ तैं अलि कहा पढी यह नीति । लोक वेद श्रुति ज्ञान रहित सब कहत कथा विपरीति ॥ जन्म भूमि ब्रज जननि यशोदा केहि अपराध तजे । अतिकुल निर्गुण रूप जो अतिसुख दासी जाइ भजै ॥ योगसमाधि मूढ सुनि मारग क्यों समुझैं हम ग्वारी ॥ जो वै गुण अतीति व्यापकता तौ हम कोहे न्यारी ॥ रहि मधु ढीठ कपट स्वारथहित जिय ये वचन विरोधै । मन क्रम वचन बचति वा नाते सूर श्याम तनु धोषै ॥ ७० ॥ राग सारंग ॥ मधुकर जाहि कहो सुनि मेरो । पीत वसन तनु श्याम जालकी राखत परदा तेरो ॥ यहि ब्रजको उपदेशन आयो कत जोरहो करि डेरो । एते मान यह सखी महाशठ छाँडत नाहिंन खेरो ॥ ऐसी बात कहो तुम तिनसों होइ जो कहिबे लायक । इहां यशोदा कुँवर हमारे छिनु छिनु । प्रति सुखदायक ॥ ज्यों तू पुहुव पराग छाँडिकै करहि ग्राम वशबास । तौ हम सूर इहै करि देखहि निमिष न छाँडहि पास ॥ ७१ ॥ राग रामकली ॥ ऊधो मौनै साधि रहे । योग कहि पछितात मन मन बहुरि कछु न कहे ॥ श्यामको यह नहीं बूझे अतिहिरह्यो सिखाइ । कहा मैं कहि कहि लजानो नैन रह्यो नवाइ ॥ प्रथमही कहि वचन एकै लियो गुरु करि मानि । सूर प्रभु मोको पठायो इहै कारण जानि ॥ ७२ ॥ राग कल्याण ॥ कहा न कीजै अपने काजै । अब दिन दश ऐसो करि देखो जो हरि मिलैं योगके साजै ॥ माथे जटा पहिरि उर कंथा लावहु भस्म अंग मुख माजै । सींगी बजाइ पहिरि मृगछाला लोचन मूँदि रहौ किन आजै ॥ सन्मुख है शर सहो सयानी नाहिंन वचन आजुके भाजै । योग विरहके बीच परमदुख मरियतुहै यह दुसह दुराजै ॥ ऊधो कहै सत्य करि मानो वर्षा वदत पंचमी गाजै । ज्यों यमुना जल छाँडि सूर प्रभु लीन्हें वसन तजी कुल लाजै ॥ ७३ ॥ राग सारंग ॥ ऊधो कहा मति दीनो हमहि गोपाल । आवहु री सखी सब मिलि सोचैं जो पावैं नँदलाल ॥ घर बाहरते बोलिं लेहु सब जावदेक ब्रजबाल । कमलासन बैठहु री माई मूँदहु नैन विशाल ॥ षटपद कही सोऊ करि देखी हाथ कछु नाहिं आई । सुंदर श्याम कमलदल लोचन नेकु न देत दिखाई ॥ फिरि भई मगन विरहसागरमें काहुहि सुधि न रही । पूरण प्रेम देखि गोपिनको मधुकर मौन गही ॥ कछु ध्वनि सुनि श्रवणन चातककी प्राणपलटि तनु आए । सूर सो अबके टेरि परीहै विरही मृतक जिवाए ॥ ७४ ॥ राग सारंग ॥ मधुकर भलेही आए वीर । दुर्लभ दर्शन सुलभ पाए जानिहौ पर पीर ॥ कहत वचन विचारि बिनबहु शोधि हो मनमार्हि । प्राणपतिकी प्रीति ऊधो हैकि हमसों नाहिंन ॥ कौए तुमसों कहै मधुकर कहन योगी नाहिं ।

दशमस्कन्ध

प्रीति - न्यारा जानिहौ मनमार्हि ॥ नैन नींद न परै निशिदिन विरह डाढी देह ।
 कठिन निर्दय नंदके सुत जोरि तोरो नेह ॥ कौन तुमसों कहै मधुकर गुप्त प्रगटित बात । सूरके प्रभु
 क्यों बनै ज्यों करै अबलाघात ॥ ७५ ॥ राग सारंग ॥ ऊधो तैं कत चतुर कहावत । जेनहिं जानै पीर पराई
 है सर्वज्ञ जनावत ॥ जो पै मीन नीरते बिछुरे को करि जतन जियावत । प्यासे प्राण जातहैं जल
 बिनु सुधा समुद्र बतावत ॥ हम विरहिनी श्यामसुंदरकी तुम निर्गुणहिं बचावत । योग भोग
 रस रोग शोग सुख जाने जगत सुनावत ॥ ए दृग मधुप सुमन सब परिहरि कमल वदन
 रस भावत । सोवत जागत स्वप्न रैन दिन वह मूरति मोहिं भावत ॥ कहि कहि कपट सँदेशन मधुकर
 कत बकबाद बढावत । कारो कुटिल निदुर चित अंतर सूरदास कवि गावत ॥ ७६ ॥ मधुकर
 एमन एसो वैरन । अहो मधुप निशिदिन मरियतु है कान्ह कुँवर अवसेरन ॥ चित चुभि रही
 मनोहर मूरति चपल दृगनके हेरन । तन मन लियो चुराइ हमारो वा मुरलीकी टेरन ॥ कहत
 न बनै कांछ कामरि छबि बन गैयनकी घेरन । वरणि न जाइ सुभग उर शोभा पीतांबरकी फेरन ॥
 तुम प्रवीन हरि हमहिं बतावत अगहि गहत भट भेरन । नंदकुमार छाँडिको लैहै योग दुखनकी
 टेरन ॥ जहां न परम उदार नंदसुत मुक्त परो किन झेरन । सूर रसिक बिनु को जीवतिहै निर्गुण
 कठिन करेरन ॥ ७७ ॥ राग विलावल ॥ काहेको रौकत मारग सूधो । सुनहु मधुप निर्गुण
 कंटकटे राजपंथ क्यों सूधो ॥ कै तुम सिखै पठाए कुबिजा कही श्याम घन जीधो । वेद पुराण
 स्मृति सब ढूँढो युवतिन योग कहूँधो ॥ ताको कहा परेखो कीजै माँगत छाँछ न दूधो । सूर सूर
 अक्रूर गयो लै ध्याज निवेरत ऊधो ॥ ७८ ॥ राग सारंग ॥ मधुकर समुझि कहो किन बात । काहेको
 हियरा सु लगावत उठि न इहांते जात ॥ जेहि उर वसत यशोदा नंदन निर्गुण कहा समात । कत
 भटकत डोलत कुसुमनि सँग तुम कित पातन पात । यद्यपि सकल वेलि वन विहरत जाइ वसत
 जलजात । सूरदास ब्रज मिलवत आए दासीकी कुशलात ॥ ७९ ॥ राग धनाश्री ॥ तुमतो अपनेही मुख
 झूठे । निर्गुण छबि हरि बिनु को पावै ज्यों आँगुरी अँगूठे ॥ निकट रहत पुनि दूरि बतावत होरस
 माहँ अपूछे । दुइ तरंग दुइ नाव पाँव धरि ते कहि कवनन मूठे ॥ हमसों मिले वर्ष द्वादश दिन
 चारिक तुमसों टूठे । सूर आपने प्राणन खेलै ऊधो खेलें हूठे ॥ ८० ॥ राग मलार ॥ ऊधो बृझतिहै अनुमान ।
 देखिअत नाहिं जतन जीबिको इत विरहा उत ज्ञान ॥ इतहि चंद्र चंदन समीर मिलि लागत अनल
 निधान । उत निर्गुण अवलोकन मनको कठिन विरोधी प्रान ॥ इत भूषण भै करत अंगको सब
 निशि जागि बिहान । उत कहूँ सुनत समाधि कछू नहिं गूढ कठिनको जान ॥ दुसह दुराइ विपत्ति
 वियोगहि नृप बडे दोउ समानाको राखै सूरज यहि अवसर कमलनैन बिन आन ॥ ८१ ॥ राग सारंग ॥
 मधुकर राख योगकी बात । कहि कहि कथा श्याम सुंदरकी शीतल करि सखात ॥ जेइ निर्गुण गुण
 हीन गनैगो सुनि सुंदरि अलसात । दीरघ नदी नाउ कागरकी को देखो चढिजात ॥ हम तन
 हेरि चितै अपनो पट देखि पसारहि लात । सूरदास वा सगुण वासिकै कैसे कल्प बिहात ॥ ८२ ॥ राग मलार ॥
 योगसों कौने हरि पाए । निज आज्ञा तप कियो विधाता कब रस रास खिलाए ॥ योग युक्ति शंकर
 आराधी परम तत्त्व नवलाए । भुज धरि ग्रीव कबहिं नंदनंदन हिलिमिलि कल सुर गाए ॥ बगदालभ्य
 महाक्राधि कबहूँ तृण छाया न कराए । वर्षत दुखित जानि मन मोहन कब गिरिवर कर छाए ॥
 अति तप पुंज विप्र दुर्वासा दूर्वा तृण नित खाए । चक्र सुदर्शन तपत महाभुनि कब
 मुख अनल समाए ॥ बहु तप कियो मार्कंडे द्विज आय सिंधु भरमाए । सप्तकल्प बीती कब कहि

मरसागर ।

हरि वरुणपासमों ल्याए॥भक्त विरह कातर करुणामय वेद नरतर गाए ॥ ८३ ॥ राग मलार॥ हमारे कौन वेदविधि साधै । बटुआ झोरी दंड अधारा इतनेनको आराधै ॥ जाको कहूँ थाह नहिं पड़अत अगम अपार अगाधै । गिरिधर लाल छबीलेको यह कहा पठायो पाधै ॥ सुनु मधुकर जिन सर्वस चाख्यो सों अब क्यों सजु पावत आधै । सूरदास मणि श्याम छांडिकै घुँघुचि गांठिको बाधै ॥ ८४ ॥ जिहि तनु गोकुलनाथ भज्यो । ऊधो हरि बिछुरत ते विरहिनी सो तनु तबहिं तज्यो ॥ अब या औरै सृष्टि विरहकी बकत बाइ बौरानी । तिनसों उत्तर कहा देतहौ तुमतो पूरण ज्ञानी ॥ जब स्यंदन चढि गमन कियो हरि फिरि चितयो गोपाल । तबहीं परम कृतज्ञ प्राणसँग उठिलागे तेहिकाल ॥ अब औसान घटत कहि कैसे उपजी मन परतीति । सूरदास कछु कहत न आवै कठिन विरहकी रीति ॥ ८५ ॥ राग गौरी॥ मधुप बार बार काहेको और कथा कहत । प्रभुकी प्रतीति गए नाहिंन कछु रहत ॥ पवन तेज अरु आकाश पृथ्वी अरु पान्यो । तामें ते नंदन कहा घालि सान्यो ॥ कमलनैन श्याम सुंदर कौन नहिं भावै । ताको तू गुप्तकरै आनै कछु गावै ॥ सूरसो नंद प्रभु दयालु लीला वपुधारी । निर्गुणते सगुणभए संतन हितकारी ॥ ८६ ॥ राग सारंग॥ कहिये तासों जो होइ विवेकी । तुमतौ अलि उनहींके संगी अपनीगोंके टेकी ॥ ऐसीको ठाली वैसीहै तोसों भूड चढावै ॥ झूठी बात तुसीसी बिन कन फटकत हाथ न आवै ॥ अजहूँ लौं अंगहु नहिं छाँडत यह मूरख मतिभोरे । मन क्रम वचन सूर अभ्यंतर नंदनंदन हितमोरे ॥ ८७ ॥ कहिये तासों जो होइ विवेकी । एतो अलि उनहींके संगी अपने बातके टेकी ॥ ऐसी बात कहौ तुम उनसों जो नहिं जानै बूझै । सूरदास प्रभु नंदनंदन बिनु देखे और न सूझै ॥ ८८ ॥ राग कान्हरो॥ ऊधो निर्गुण कहत हो तुमही धौं नेहु । सगुणमूरति नंदनंदन हमहिं आनिय देहु ॥ अगमपंथ परमकठिन गमन तहां नाहिं । सनकादिक भूलि फिरे अबला कहां जाहिं । पंचतनु परमकान्ह अपर कैसे जानी । मन वच करि कर्मरहित वेदहुकी वानी ॥ कहिए जो निबहिबे अकथन कहूँ सोही । सूर श्याम मुख सु चंद्रलीनी युवतिमोही ॥ ८९ ॥ ऊधो सूधे नेकु निहारो । हम अबलनिको सिखवन आए सुनो सयान तिहारो ॥ निर्गुण कहो कहा कहियतहै तुम निर्गुण अतिभारी । सेवत सगुण श्यामसुंदरको मुक्तिलही हम चारी ॥ हम सालोक्य स्वरूप सरो ज्यो रहत समीप सहाई । सो तजि कहत औरकी औरै तुम अलि बडे अदाई ॥ हम मूरख तुम बडे चतुरहो बहुत कहा अब कहिए । वेही काज फिरत भटकत कत अब मारग निज गहिए ॥ अहो अज्ञान कताहि उपदेशत ज्ञानरूप हमही । निशिदिन ध्यान सूर प्रभुको अलि देखति जित तितही ॥ ९० ॥ ऊधो कोउ नाहिंन अधिकारी ॥ लै न जाहु यह योग आपनो कत तुम होत दुखारी ॥ यह तौ वेद उपनिषदको मत महापुरुष व्रतधारी । हम अबला अहीरि ब्रजवासिनि देख्यो हृदय विचारी ॥ को है सुनत कहत कासोंहो कौन कथा अनुसारी ॥ सूर श्याम सँगजात भयो मन अहि कांचुली उतारी ॥ ९१ ॥ राग केदारो ॥ ऊधो राखिए यह बात । कहतहो अनगठिन अनहद सुनत हो चपिजात ॥ योग अलि कूष्मांड जैसो अजा मुख न समात । बार बार न भाषिए कोउ अमृत तजि विष खात ॥ नैन प्यासे रूप जलके दिये नहिंन अघात । सूर प्रभु मन हरयो जबलौं तौलगि तनु कुशलात ॥ ९२ ॥ राग सारंग ॥ ऊधो औरै कथा कहो । तजिये ज्ञान सुनत तावत तनु वरगहि मौन रहो ॥ रुचि द्रुम प्रीति रीति नैनन जल सींचि ध्यान झर लागी । ताके प्रेम सुफल मुनि श्राव ॥ श्याम सुरंग अनुरागी ॥ ग्रीषम अलि आए उपजी ब्रज कठिन योग रवि हेरो । वन मुरझात सूरको राखै

महानेह बिन तेरो ॥९३॥ राग सोरठा ॥ कै तुमसों छूटैं लरि ऊधो कै रहिए गहि मौन । इक हम जैँ जरे पर जारत बोलहु वकुची कौन ॥ एक अंग मिले दोऊ कारे काको मन पतिआए । तुमसी होइ सो तुमसों बोलैं लीने योगहि आए ॥ जा काहुको योग चाहिए सो लै भस्म लगावै । जिन उर ध्यान नंद नंदनको तहँ क्यों निर्गुण भावै ॥ कहो सँदेश सूरके प्रभुको यह निर्गुण आँधियारो । अपनो बोयो आप लोनिये तुम आपहि निरुवारो ॥ ९४ ॥ राग केदारो ॥ कहा रस वरिआईकी प्रीति । जो न गडै उर अंतर ऊधो भुसपर कीसी भीति ॥ नैन बैन अरु हृदय मिलत तब बाढत प्रेम प्रतीत । ए दोउ हंस होत जब सन्मुख लेत मनहि मन जीति ॥ ऊधो यहै सँदेशो कहियो मधुवन कैसी रीति । सूरदास सोई जन जानै गई जनु हिमही बीति ॥ ९५ ॥ राग मलार ॥ जोपै इहै प्रीतिकी बात । तौ ऊधो तुम निकट रहत कत निरखि साँवरे गात ॥ बात कहत भरिलेत नैनजल सुरत करत अकुलात । जो घट घट हरि रहत निरंतर तौ कतही मधुपुरी जात ॥ सगुण प्रीति ऐसी प्रतिपालत दुखित होत तनुगात । तुम निर्गुणसों प्रीति करनको सूर समुझि पछितात ॥ ९६ ॥ राग सारंग ॥ ऊधोजनि मधुवन तन देखो । कछुक दिवस औरो ब्रज वसिकै जन्म सफल करि लेखो ॥ कहा जाइ लेइहो हौं जामें राजकाजकी बात । बालकिशोर कुमार निरखि मुख घर पर माखनखात ॥ तुम निर्गुण नित कहत निरंतर निगम नेति यह नीति प्रगट रूप मदमत्त नयन क्यों छँडे दरशन प्रीति ॥ शिव विरंचि सनकादिक मुनि मन संतन जाको धावत । सूरदास प्रभु गोप सुतन सँग गोधन वृंद चरावत ॥ ९७ ॥ राग मलार ॥ ऊधो जीवन धन हम पैए । सोइ होइ जो रचो विधाता औरन दोष लगैए ॥ कीजै कहा कहत नहिँ आवै सोचि हृदय पछितैए । मोहनसों वर कुबिजा पायो हमको योग बतैए ॥ आज्ञा होइ सोइ पै कीजै विनती इहै सुनैए । सूरदास प्रभु तृषा बढी अति दरशन सुधा पियैए ॥ ९८ ॥ राग केदारो ॥ ऊधो खरी जरी हरिके झूलनकी । कुंज किलोल किये बनही बन सुधि बिसरी उन बोलनकी ॥ अरु यह प्रीति कहाँलौं वरणौं या यमुना जल कूलनकी ॥ वह छबि छाके अतिहैं दोऊ लोचन बहि गहि झूलनकी । सूरदास प्रभु दरशन दीजै अरु लीजै अनकूलनकी ॥ ९९ ॥ राग सारंग ॥ हरि बिनु यह बिधिहै ब्रज रहियत । पर पीरहि तुम जानत ऊधो ताते तुमसों कहियत ॥ चंदन चंद्र किरनि पावक सम मिलि मिलिहै तन दहियत । जागत याम जात युगयामिनि जतन नहीं निरवहियत ॥ वासरहू या विरह सिंधुको कैसेहु पार न लहियत । फिरि फिरि वहइ अवधि अवलंबन बूडत ज्यों तृणगहियत ॥ एक जु हरि दरशनकी आशा तालगि यहु दुख सहियत । मन क्रम वचन शपथ सुन सूरज और नहीं कछु चहियत ॥ ३३०० ॥ हरि बिनु यह बिधिहै ब्रज जीजतु । पंकज वरषि वरषि उर ऊपर सारंग रिपु जल भीजतु ॥ वायस अजा शब्द की मिलवनि याही दुख तनु छीजतु । चन्द न चौथे जात गोपिनको मधुप परखि यश लीजतु ॥ तारापति अरिके शिर ठाढी निमिष चैन नहिँ कीजतु । सूरदास प्रभु बेगि कृपाकरि प्रगट दरशमोहि दीजतु ॥ १ ॥ हमारे धन जीवन कृष्णमुकुंद । परमउदार कृपानिधि कोमल पूरण परमानंद ॥ निठुर वचन सुनि फटतु हियो यों रहुरे अलि मतिमंद । ब्रज युवतिनको सुगम जनावत योग युक्ति सुखद्वंद ॥ यहुतौ जाइ उनै उपदेशो सनकादिक स्वच्छंद । बारक हमें दरश देखरावो सूर श्याम नंदनंद ॥ २ ॥ राग सारंग ॥ वै बातैं यमुनातीरकी । कबहुँक सुरति करतहैं मधुकर हरन हमारे चीरकी ॥ लीने वसन देखि ऊँचे द्रुम रवाँकि चढनि बलवीरकी । हम ठाढी जलमाहिँ गुसाँई खरी जुडाई नीरकी ॥ दोऊ हाथ जोरिकै माँगो दोहाई नंद अहीरकी । सूरदास प्रभु सब सुखदाता

जानत हैं परपीरकी ॥ ३ ॥ राग धनाश्री ॥ अब हरि क्यों बसैं गोकुल गवाई । बसत नगर नांगर
 लोगनमें नई पहुँचानि भई ॥ इक हरि चतुर हुते पहिलेही अब बहुते उन गुरु सिखई । हम सब
 गर्वगवारि जानि जड अधपर छाँडि दई ॥ ऊधो मुख जोवत कुबिजाको ब्रजवनिता सब बिसरि
 गई । याहीते चतुर सुजान सूर प्रभु औ ए ग्वाली सँग न लई ॥ ४ ॥ राग गौरी ॥ प्रेम न रुकत हमारे
 बूते । किहि गयंद बाँध्यो सुन मधुकर पद्मनालके काचे सूते ॥ सोवत मनसिज आनि जगायो पठै
 संदेश श्यामके दूते । विरह समुद्र सुखाइ कवन विधि किरचक योग अग्निके लूते ॥ सुफलक
 सुत अरु तुम दोउ मिलि लै जैये मुक्ति हमारेदूते । चाहति मिलन सूरके प्रभुको क्यों पतियाहिं
 तुम्हारे धूते ॥ ५ ॥ राग मलार ॥ वै गोपाल गोकुलके वासी । ऐसी बातें बहुते सुनि सुनि लोग करत
 हैं हाँसी ॥ मथि मथि सिंधु सुधासुर पोषे शंभुभए विष आसी । इमि हति कंसराज औरहिदै आपु
 चले हैं दासी ॥ बिसरयो हमहिं विरह दुख अपनो सुनत चाल ए रासी । जैसे टग
 विलोकि गुप्त निधि प्रगट न परखै फाँसी ॥ आरजपंथ छुडाइ गोपिका कुल मर्यादा नासी ।
 आप करत सुख राज सूर प्रभु हमें देत दुख गासी ॥ ६ ॥ राग धनाश्री ॥ इह कछु नाहिं न
 नयो । अहो मधुप माधव सों इह ब्रज बिधिते पहिले भयो ॥ बीज मन माली मदन चुर आल
 वाल बयो । प्रेमपय सींचो पहिलही सुभग जीवरि दयो ॥ इते श्रम तन श्यामसुंदर बिरवा विमल
 बढ्यो । सुरली मुख छवि पत्र शाखा दृग दुरेफ चढ्यो ॥ कमल तजि तनु रचत नाहीं आकको आ-
 मोद । सूर जो गुण वचन परसत बिन गोपाल विनोद ॥ ७ ॥ राग मलार ॥ ऊधो अब यह समुझि
 भई । नंदनंदनके अंग अंग प्रति उपमा न्याइ दई ॥ कुंतल कुटिल भँवर भामिनि वर मालति भुरै
 लई । तजत न गहरु कियो तन कपटी जानि निराश गई ॥ आनन इंदु वरन संपुट तजि कर खेत
 न नई । निर्मोही नवनेह कुमुदिनी अंतहु हेम मई ॥ तन घन सजल सेइ निशिबासर रटि रसना
 छिजई । सूर विवेकहीन चातक मुख बूँदै तौन श्रई ॥ ८ ॥ राग सारंग ॥ ऐसो माई एक कोदको हेतु जैसे
 बसन कुसुंभरंग मिलिकै नेक चटक पुनि श्वेत ॥ जैसे करनि किसान बापुरो नौनौ बाँह देत । एतेहू
 पर नीर निठुर भयो उमंगि आपुही लेत ॥ सब गोपी पूछहिं ऊधोको सुनियो बात सुचेत । सूर
 दास प्रभु जनते बिछुरे ज्यों कृत राई रेत ॥ ९ ॥ राग सारंग ॥ मुख देखेकी कौन मिताई । जैसे कृपणाहि
 दीन माँगनो लालच लीने करत बडाई ॥ प्रीतम सो जो रहै एक रस निशिबासर बढि प्रेम सवा-
 ई । चितमाहि और कपट अंतर्गति ज्यों फल खीर नीर चिकनाई ॥ तब वह करी नंदनंदन अलि
 वन वेली रसरास खिलाई । अब यह कितही दूर मधुपुरी ज्यों उडि भँवर बेलि तजि जाई ॥ योग
 सिखाए क्यों मन मानै क्यों व ओसकण प्यास बुझाई । सूरदास उदास भई हम पाखंड प्रीति उघरि
 निज आई ॥ १० ॥ राग मलार ॥ मधुकर मन सुनि योग डरै । तुमहूँ चतुर कहावत अतिही इतनी न
 समुझि परै ॥ और सुमन जो अनेक सुगंधिका शीतल रुचि जो करै । क्यों तुमको कहि बनै सारै
 ज्यों और सबै अनरै ॥ दिनकर महाप्रताप पुंज वर सबको तेज हरै । क्यों न चकोर छाँडि मृग
 अंकहि वाको ध्यान धरै ॥ उलटोइ ज्ञान सकल उपदेशत सुनि सुनि हृदय जरै । जब वृक्ष कहो क्यों
 लंपट फलवर अंबु फरै ॥ मुक्ता अवाधि मराल प्राणमैं अबलगि ताहि चरै । निघटत निपट सूर
 ज्यों जल बिनु व्याकुल मीन मरै ॥ ११ ॥ राग आसावरी ॥ ऊधो योग योग हम नाहीं । अबला
 सार ज्ञान कहा जानै कैसे ध्यान धराहीं ॥ ते ये मूँदन नैन कहत हैं हरि मूरति जामाहीं ॥ ऐसे कथा
 कपटकी मधुकर हमते सुनी न जाहीं ॥ श्रवण चीर अरु जटा बाँधावहु ए दुख कौन

समाहीं ॥ चंदन तजि अंग भस्म बतावत विरह अनल अति दाहीं । योगी भरमत जेहि
 लगि भूले सोतो है अपु माहीं । सूर श्याम ते न्यारे न पल छिन ज्यों घटते परछाहीं ॥
 ॥१२॥ राग मलार ॥ ऊधो कहिए बात जो हुती । जाहि ज्ञान सिखवन तुम आए सो कहो ब्रजमें को
 हुती ॥ अंतहु सिखवन सुनहु हमारी कहियत बात बिचारी । फुरत न वचन कछू कहिवेको रहे बैन
 सो हारी ॥ देखियतहै करुणाकी मूरति सुनियतहै परपीरक । सोइ करौ जो मिटै हृदयको दाहु
 परै उरसीरक ॥ राजपंथते टारि बतावत उज्ज्वल कुचल कुपैडो । सूरदास सो समाइ कहांलौ
 अजा वदनमें कुम्हडो ॥ १३॥ राग सारंग ॥ हमतो नंदघोषके वासी । नाम गोपाल जाति कुल गो-
 पक गोप गोपाल उपासी ॥ गिरिवरधारी गोधनचारी वृंदावन अभिलासी । राजानंद यशोदा रानी
 जलहि नदी यमुनासी ॥ मीत हमारे परममनोहर कमलनयन सुखरासी । सूरदास प्रभु कहाँ कहांलौ
 अष्टसिद्धि नवनिधि दासी ॥ १४ ॥ राग सारंग ॥ गोकुल सब गोपाल उपासी । जो गाहक साधनको
 ऊधो ते सब वसत ईशपुर कासी ॥ यद्यपि हरि हम तजी अनाथ करि तऊ रहति चरणन रसरासी ।
 अपनी शीतलता नहिं तजई यद्यपि बिधु भयो राहु गरासी ॥ किहि अपराध योग लिखि पठवत
 प्रेमभक्तिते करत उदासी । सूरदास सो कौन विरहिनी मँगि मुक्ति छाँडै गुणरासी ॥ १५ ॥ राग मलार ॥ ब्रज
 जन सकल श्यामव्रतधारी । बिना गोपाल और जेहि भावत ते कहिहैं व्यभिचारी ॥ योग मोट
 शिखोझ आनि तुम कतधौं घोष उतारी । इतनिक दूरि जाहु चलि काशी जहां विकतहै प्यारी ॥
 यह संदेश सुनै को मधुकर अतिमंडली अनन्य हमारी । जो रसरीति कही हरि हमसों सो क्यों
 जाति बिसारी ॥ महामुक्ति कोऊ नहिं बाँछै यदपि पदारथ चारी । सूरदास स्वामी मनमोहन मूरति
 की बलिहारी ॥ १६ ॥ राग धनाश्री ॥ कहांलौं कीजै बहुत बडाई अति अगाध मन अगम अगोचर मनसों
 तहाँ न जाई ॥ जाके रूप न रेख बरन वपु नाहिंन संगत सखा सहाई । ता निर्गुण सों नेह निरंतर
 क्यों निबहै री माई ॥ जल बिन तरंग भीति बिन लेखन बिन चेतहि चतुराई । या ब्रजमें कछु
 नहीं चाहै ऊधो आनि सुनाई ॥ मन बुभि रह्यो माधुरी मूरति अंग अंग उरझाई । सुंदर श्याम
 कमलदल लोचन सूरदास सुखदाई ॥ १७ ॥ राग नट ॥ ऊधो कछुक समझि परी ॥ तुम जु हमको योग ल्याए
 भली करनी करी ॥ इक बिरह जरि रही हरिके सुनत अतिही जरी । जाहु जिनि अब लोन लावहु
 देखि तुमही डरी ॥ योगपाती दई तुम कर बडे चतुर हरी ॥ सूरदास स्वामीके रँग रचि कहां धरैं गठरी ॥
 ॥ १८ ॥ राग कान्हरो ॥ कहत अलि तेरे सुख बातौ ॥ कमलनयनकी कपट कहानी सुनन भयो तनुतातौ ॥ कत
 ब्रजराज काज गोकुलको सबै किए गहिनातौ ॥ तब नहिं निमिष वियोग सहति उर करत काम नहिं
 हातौ ॥ मधुवन जाइ कान्ह कुबिजा संग मति भूलहु सुधि सातौ ॥ ज्यों गज यूथ नेक नहिं बिछुरत शरद
 मदन मदमातौ । सूर श्याम बिन हम सब अबला या तन कहाँ समातौ ॥ १९ ॥ राग धनाश्री ॥ तुम अलि
 कमलनयनके साथी । देखत भले काजको जैसे होत धूमके हाथी ॥ सुंदर श्याम गंड मद लंकृत
 सम श्रम जलकन छाजै । योग ज्ञान दोउ दशन भोग रद करनी कुंभ विराजै ॥ जब शिशुहुते कुमार
 असुर हति याते प्रीतम जानें । अब भए जाइ विवश दासीके ब्रजते प्रगट पराने ॥ करिकै कपट
 तुच्छ विद्यावश भगन करत अँग भटज्यों । सूर अवधि पढि मंत्र सजीवन मरिजीवति है नटज्यों ॥
 ॥ २० ॥ राग सारंग ॥ ऐसो सुनियत द्वै वैशाख । जानत हौं जीवन काहेको जतन करौ जो लाख ॥
 मृगमद मिलै कपूर कुमकुमा केसरि मलया खाख । जरति अग्निमें ज्यों घृत नायो तनु जरिहै है
 राख ॥ ता ऊपर लिखि योग पठावत खाहु नींब तजि दाख । सूरदास ऊधोकी बतियां उडि

उडि बैठी ताख ॥२१॥ राग नट ॥ जानी ऊधोकी चतुराई । बार बार तुम कहत अध्यातम पावत कौन
 बडाई ॥ जो तुम कहत अगाध अगोचर हरिरस तजो न जाई । कौतुक कहत उकुति अपनीतैं
 कौ तुम कहत कहाई ॥ बाहर भीतर ध्यान सगुन बिनु सुनियत दूरि भलाई । सूरदास
 प्रभु विरहजरी है बिनु पावक दौ लाई ॥ २२ ॥ राग सारंग ॥ जानी अलि ऊधो चतुराई ।
 ब्रजमंडली दशा देखिकै कथा सबै बिसराई ॥ परमप्रिया पथ देखन पठए कहि गति योग
 बनाई । इनको आन भाव बिछुरनके लै बाजनि हम लाई ॥ कहा कहाँ हरि कहा सुन्यो इनि
 कहि लीला मुखगाई । यद्यपि विबुध बडे यदुकुलके नेक न बढी बडाई ॥ गुणमहि मंत्र सदा
 श्रीपतिके मुक्तिपुरी अब गाई । नहि देखी ब्रजवनकी लीला सूर श्याम लरिकाई ॥ २३ ॥ राग मलार ॥
 इहिविधि पावस सदा हमारे । पूरव पवन श्वास डर ऊरध आनि जुरे एकठारे ॥ बादर श्याम श्वेत
 नयननमें वरपि आँसु जलढारे । अरुन प्रकाश पलक दुति दामिनि गर्जन नाम पिप्यारे ॥ चातक
 दादुर मोर प्रगट ब्रज वसत निरंतर धारे । ऊधो ए तबते अटके जब श्याम रहे हिततारे ॥ कहिए
 काहि सुनै कत कोऊ या ब्रजके व्यवहारे । तुमहींसों कहिकै पछितानी सूर विरहके धारे ॥ २४ ॥
 ॥ राग केदारो ॥ जोपै कोऊ मधुवनहूँलों जाइ । पतियाँ लिखौ श्यामसुंदरको कंकन देहों ताहि ॥
 नयननीर सारंग रिपु भीजत युग सम रैनि बिहाइ । अब यह भवन भयो पावक सम हारि बिन
 मोहि न सुहाइ ॥ पछिली प्रीति कहा भई ऊधो मिलते वेणु बजाइ । सूरदास प्रभु बेगि मिलहु किन
 पुनि कहा करोगे आइ ॥ २५ ॥ राग विलावल ॥ ऊधो कोकिल कूजत कानन । तुम हमको उपदेश
 करतहो भस्म लगावन आनन ॥ औरौ सींगी सखी संगलै टेरत चढै पषानन । बहुरो आइ पपीहा
 केमिस मदन दहत निज बानन ॥ हमतौ निपट अहीरि बावरी योग दीजिए जानन । कहा कथत
 मोसिके आगे जानत नानी नानन ॥ तुमतौ हमहिं सिखावन आए मुक्ति होइ निर्वाणन । सूर मुक्ति
 कैसे पूजतिहै वा मुरलीके तानन ॥ २६ ॥ राग सारंग ॥ ऊधो हरिके अवैरें डंग । जहां न अनंग रस
 रूप नेहको तहाँ दई गति जो अनंग ॥ आपु विषमता तजि दोऊ सम भै बानक ललित त्रिभंग ।
 मानों मरिचि देखि तनु भूली भूपथ सुरभि सुरंग ॥ तजे कुसुमकर कंटक वन भ्रमि नहि कामो
 भ्रमंग । कनकबेलि सतदल शर मंडित दृढ तर लता लवंग ॥ श्यामा सदन बिसारि
 भजे पुर चंचल नारि पलंग ॥ ते सुख बहुत बहुत पावहिंजे जे करिहैं अंगसंग । काकेहोहिं जो नहिं
 गोकुलके सूरज प्रभु श्रीरंग ॥ २७ ॥ राग आसावरी ॥ ऊधो हम दोउ कठिन परी । जो जीवैं तो मुनि जड ज्ञा-
 नी तनु तजि रूप हरी ॥ गुण गावैं तौ शुक सनकादिक धाय लीला फरी । आशा अवधि बिचा-
 रिहैं तौ धर्म न ब्रज सुंदरी ॥ सखीमंडली सब जो सयानी विरहा प्रेम भरी । शोक समुद्र तरिबेको
 नौका जे मुख मुरली धसे ॥ निशिवासर निरंकुश अति बड मातो मदन करी । ढाहत धाम सूर
 प्रभु चितवत गमन करै कैसे री ॥ २८ ॥ राग केदारो ॥ ऊधो सुनिहो बात नईसी । प्रेमबानिकी
 चोट कठिनहै लागी होइ कहो कत ऐसी ॥ तुमहिं बिचारि कहा कहि दीजे हो आनि कहत रे
 जैसी । जानै कहा बाँझ व्यावर दुख जातक जनहि न पीरहै कैसी ॥ हम बावरी न आनि
 बौरावत कहत न तुम्हें बूझिए ऐसी । सूरदास न्याइ कुबिजाको सरवसु लेइ हमारो वैसी ॥
 ॥ २९ ॥ यशोमति वचन ॥ केदारो ॥ ऊधो उदित भई सब दुखकी करनी । ब्रजवेली सब सुखन लागी बात
 कही नंदघरनी ॥ कमल वदन कुंभिलात सबनके गौवन छाँडी तृणके चरनी । सुख संपति बीति
 गयो सब नीकी लागी री अलि अनजलकी झरनी ॥ देखो चारौ चन्द्रमुख शीतल बिन दरशन क्यों
 मिटती जरनी । सुत सनेह समुझति सु सूर प्रभु फिरि फिरि यशुमति परती धरनी ॥ ३० ॥

राग सारंग ॥ ऊधो पृच्छति ते बावरी । गोकुल तजो कुँवरि कारण नेह न होति जो रावरी॥जैसे बीज
 बोइए तैसे लुनिए लोग कहत सब बावरी । सूरदास प्रभु पारस परसै लोहो कनक बराबरी ॥ ३१ ॥
 राग गौरी॥मधुकर देखो दीनदशा॥इतनी बातें तुमसों कहतिहैं जो तम श्याम सखा ॥ जे कारेतें सबै
 कुटिलहैं मृतगनके जोहता । तुम विरहिनी विरह दुख जानत कही यह गूढ कथा ॥ मन वशभयो
 श्रवण सुनि मुरली कुंजनि कुंज बसी । अबतौ एक न भए सूर प्रभु घर बन लोग हँसी ॥ ३२ ॥
 राग सारंग॥जैसे कियो तुम्हारे प्रभु अलि तैसे भयो ततकाल । ग्रंथित सूत धरत तेहि ग्रीवा जहां धरते
 बनमाल ॥ टेरी देत श्रीदामा द्रुम चढि सरस वचन गोपाल । ते अब श्रवण अकूर प्रमुख सब
 कहत कंस कुशलात ॥ कोमल नील कुटिल अलकावलि रेखी राजत भाल । ऐसे शर त्यागे सुन
 सूरज फंदा न्याइ मराला॥३३॥राग मलार॥विरचि मन बहुरि राचो आइ।टूटी जुरै बहुत जतननि करि तऊ
 दोष नहि जाइ ॥ कपट हेतुकी प्रीति निरंतर नोथि चोखाइ गाइ । दूध फाटि जैसे भइ क्रांजी कौन
 स्वाद करि खाइ॥केरा पासि ज्यों वेरि निरंतर हालत दुख दैजाई । स्वाति बूँद जैसे पुरै फनिक
 मुख परत विषैहैजाइ ॥ एती केती तुमरी उनकी कहत बनाइ बनाइ । सूरदास दिगंबर पुरते
 रजक कहा व्योसाइ ॥ ३४ ॥ ऊधो तुमहो अति बडभागी । अपरस रहत सनेह तगाते
 नाहिंन मन अनुरागी ॥ पुरइनि पात रहत जल भीतर तारस देह न दागी । ज्यों जल
 माँह तेलकी गागारि बूँदन ताको लागी ॥ प्रीतिनदी मँह पाँव न बोरयो दृष्टि न रूप परागी ।
 सूरदास अबला हम भोरी गुरचैटी ज्यों पागी ॥ ३५ ॥ राग घनाश्री ॥ हमते हरि कबहीन उदास।रास
 खिलाइ पिआइ अधररस क्यों बिसरत ब्रजबास ॥ तुमसों प्रेमकथाको कहिबो मनहु काटिबो
 घास । बहिरो तान स्वाद कहा जानै गूँगो खात मिठास ॥ सुन री सखी बहुरि हरि ऐहैं वह सुख
 बढे विलास । सूरदास ऊधो हमको अब भए ते रहोमास॥३६॥तेरो बुरो न कोई मानै । रसकी बात
 मधुप नीरस सुनि रसिक होइ सो जानै ॥ दादुर बसै निकट कमलनके जन्म न रस पहिचानै।अलि
 अनुराग उडत मन बाँध्यो कही सुनत नहिं कानै ॥ सरिता चली मिलन सागरको कूल सबै द्रुम
 भानै । कायर बकै लोभते भागै लरै सो सूर बखानै ॥ ३७ ॥ हम सब जानत हरिकी घातै ।
 तुम जो कहत वो राज्य करत नहिं जानत हौ कछु कातै ॥ मारे कंस सुरन सुख दीनो असुर
 जरे पिर पातै । उग्रसेन बैठारि सिंहासन लोग कहत कुलनातै ॥ तपते राज राजते आगे तुम सब
 समुझत बातै । सूर श्याम यहि भाँति सयाने हमहीको वडु सातै ॥ ३८ ॥राग नट ॥ऊधो है तू हरिके
 हितको । हम निर्गुण तबहीं ते जान्यो गुण मेख्यो जब पितुको ॥ समुझहु नेक श्रवण दै सुनिए प्रगट
 बखानो नितको।कूप रत्नघट कहु क्यों निकसै बिनुगुन बहुतै वितको॥पूरणतातो तबहीं बूडी संग गए
 लै चितको । हमतौ खगहि सूर सुनि षटपद लोक बटाऊ हितको ॥३९॥राग काफी ॥ आयो घोष बडो
 व्यापारी । लादि पोष गुणज्ञान योगकी ब्रजमें आनि उतारी॥फाटक दैकै हाटक भागत भोरो निपट
 सुधारी । धुरहीते खोटो खायोहै लिये फिरत शिर भारी ॥ इनके कहे कौन डहकावै ऐसी कौन
 अनारी । अपनो दूध छाँडि को पीवै खोर कूपको वारी ॥ ऊधो जाहु सबेरे ह्याते बेगि गहर
 जनि लावहु। मुख माँगो पैहो सूरज प्रभु साहुहि आनि दिखावहु॥४०॥राग घनाश्री॥ऊधो योग कहा है की
 जतु । ओढिअतहै की डसिअतहै कीधौं कहियत कीधौं जु पतीजत ॥ की कछु भलो खेलबनी सुंदरि की
 कछु भूषण नीको । हमरे नंदनंदन जो कहियत जीवन जीवन जीको । तुम जो कहत हरि निगम
 निरंतर निगम नेति हैं रीति । प्रगट रूपकी राशि मनोहर क्यों छाँडे परतीति ॥ गाइ चरावन गए घोषते

अबहीं है फिर आवत । सोई सूर सहाय हमारे वेणु रसाल बजावत ॥४१॥ राग मलार ॥ मधुकर जानो
 ज्ञान तिहारो । जाने कहा राजलीलाकी अंत अहीर बिचारो ॥ एक मली हम सबै सयानी एक सयानी सों
 मनमानों । लाज लए प्रभु आवत नाहीं है जो रहे खिसिआनो ॥ लै आवो हम कछु न कैहैं मिलिहैं
 प्राणपियारे । व्याहो बीस धरो दश कुविजा अंतहु श्याम हमारे ॥ सुन री सखी कहूं नहिं कहिए
 माधो आवन दीजै । सूरदास प्रभु आनि मिलै जो हाँसी करि करि लीजै ॥४२॥ मधुकर तुमहीं श्याम
 सखाई । पालागौ यह दोष बकसियो सन्मुख करत ढिठाई ॥ कौने रंक संपदा विलसी सोवत सपने
 पाई । धाम धुआँको कहो कवनकै कवनै धाम उठाई ॥ अरु कनके माला कर अपने कौने गूँथ
 बनाई । कहि कागजकी तरनी कीन्हें कौन तरयो सरजाई ॥ किन अकाशते तोरि तुरैआ आनि
 धरी घरमाई । और कौन अबलन व्रत धारयो योग समाधि लगाई ॥ इहि उर आनि रूप देखेकी
 आगि उठै अगिआई । सुन ऊधो तुम फिरि फिरि आवत यामें कौन बडाई ॥ सूरदास प्रभु ब्रज
 युवतिनको प्रेम कह्यो नहिं जाई ॥४३॥ राग गौरी ॥ मनकी मनहीं माँझ रही । कहिए जाई कौनपै ऊधो
 नाहिन परत कही ॥ अवधि अधार आश आवनकी तन मन व्यथा सही । चाहति हुती गोहारि
 जितहिते तितहिते धार बही ॥ अब इन योग सँदेशन सुनि सुनि बिरहिनि बिरह दही । सूरदास अब
 धीर धरहि क्यों मर्यादा न लही ॥४४॥ राग गौरी ॥ तुमहिं दोष नहिं हम अति वारी । रूप निरखि दृग
 लागेहैं ठोरी ॥ चित चोराइ लियो मूरति सो री । सुभग कलेवर कुमकुम खोरी ॥ गुंजमाल उर पीत
 पिछोरी । यहिते जो नेकुलु बुधियो री ॥ गहत सोइ जो समात अको री । सूर श्यामसों कहियो एक
 ठोरी ॥ यह उपदेश सुनिहि ते ओरी ॥ ४५ ॥ राग नट ॥ श्याम तुम ठगसों प्रीति करी । काटे
 नाक पछोरे पूँछत ताते सब सुधरी ॥ ह्याँ ऊधो काहेको आए कौनसी अटक परी । सूरदास प्रभु
 तुम्हरे मिलन बिनु सब पाती उधरी ॥४६॥ राग सारंग ॥ ऊधो बनत न राज भयो । नए गोपाल
 नई कुविजा बनी नौतन नेह ठयो ॥ नए सखा जोरे यादवकुल अरु नृपकंस हयो । नव तन नारि
 नए पुर कीन्हों तिन अपनाइ लयो ॥ विसरे रास विलास कुंज सब अपनी जात गयो । सूरदास
 प्रभु बहुत बढोरी दिन दिन होत नयो ॥ ४७ ॥ अब तुम कापर कपट बनावत । नाहिन कंस कान्ह
 नहिं गोकुल को पठवत कहा आवत ॥ जिन मोहन बंसी वारिज करि सुख तन सींचि बँढायो ।
 सो पुनि ऊधो कर कारनको योग कुठार पठायो ॥ इतनो तो मानुषही जानै जिनकेहैं मति थोरी ।
 धोखेही बिरवा लगाइकै काटत नाहिं बहोरी ॥ वै प्रवीन ऊधो अति नागर जानि परस्पर प्रेम । कैसे
 कै पठवत वै आवत टारनको हित नेम ॥ स्वर्गहु गए कंस अपराधी परयो हमारे खोज । दृष्टिते टारि
 ध्यानहुते टारत वाऊ सबको चोज ॥ विद्यमान आए जे छल करि तिन अपनो फल पायो ।
 ह्यौहैं हृदय सूर श्याम प्रभुजौ बनत न स्वांग बनायो ॥४८॥ अपने स्वारथके सब कोऊ । चुप
 करि रहो मधुप सुन लंपट तुम देखे अरु ओऊ ॥ जो कछु कहो कह्यो चाहतहो करि निरवारो
 सोऊ । अब मेरे मन ऐसी पटपट होवे होहु सु होऊ ॥ तब कत रास रच्यो वृंदावन ज्यों ज्ञानीहू तोऊ ।
 लीने योग फिरत युवतिनमें बडे सुपथ तुम दोऊ ॥ छुटिगयो मान परेखो रे अलि हृदय हतो
 बहु जोऊ । सूरदास प्रभु गोकुल विसरो चित चितामणि खोऊ ॥ ४९ ॥ राग नट ॥ कहत
 कत परदेशीकी बात ॥ मंदिर अरध अवधि बदी हमसों हरि अहार चलिजात ॥ शशि
 रिपु वरप सूर रिपु युगवर हर रिपु किए फिरे घात । मध पंचक लै गए श्याम घन आइ बनी
 यह बात ॥ नक्षत्र वेद ग्रह जोरि अर्ध करि को बरजै हम खात । सूरदास प्रभु तुम

हि मिलनको कर मीडत पछितात ॥ ५० ॥ राग मलार ॥ ऊधो जानी न हरि यह बात । बैठे रथ पर चढे भोरही हँसत मधुपुरी जात ॥ सुफलकसुत मिलि ढँग ठान्यो है साथे विषमन घात । जेत क बडे धर्मध्वजा नामी संग प्रेम पथ पात ॥ यदुकुलमें दोउ संत सबै कहैं तिनके ए उतपात । एकन हरे प्राण गोकुलके या पर योग कुशलात ॥ यद्यपि सूर प्रताप श्यामको दानव दूरि दुरात । तद्यपि भवन भाव नहिं ब्रज बिनु खोजो दीपै सात ॥ ५१ ॥ हम अलि कैसेकै पतिआहि । वचन तुम्हारे हृदय न आवत क्योंकर धीर धराहि ॥ वपु आकार भेष नहिं जाको कौन ठौर मन लागे । हौं करि रही कंठमें मनिआ निर्गुण कहा रसहि ते काज । सूरदास सगुणमिलि मोहन रोम रोम सुखराज ॥ ५२ ॥ राग मलार ॥ मधुकर जानतहैं सबकोऊ । जैसे तुम अरु सखा तिहारे गुणन आगरे दोऊ ॥ सुफलकसुत कारे नख शिखते कारे तुम अरु वोऊ । सरवस हरन करत अपनेसुख कोउ कितो गुण होऊ ॥ प्रेम कृपण थोरे वित वपुरी उबरत नाहिंन सोऊ । सूर सुनेह करै जो तुमसों सो पुनि आपु बिगोऊ ॥ ५३ ॥ मधुकर तुम रसलंपट लोग । कमलकोशानित रहत निरंतर हमहिं सिखावत योग ॥ अपने काज फिरत बन अंतर निमिष नहीं अकुलांत । पुहुप गए बहुरौ बछिनके नेक निकट नहिं जात ॥ तुम चंचल अरु चोर सकल अँग बासनको पतिआत । सूर बिधाता धन्य रचे एइ मधुप साँवरे गाता ॥ ५४ ॥ राग सारंग ॥ मधुप रावरीये पहिंचानि । बासर समय अनत उंठि बैठत पुहुपनकी तजि कानि ॥ बाटिका बहु विपिन जिनके एक वै कुम्हिलानि । तहां अगणित फूल फूले कौन ताके हानि ॥ काम पावक जरत छाती लोन लायो आनि । योग पाती हाथ दीनी विष लगायो सानि ॥ शीशकी मणि हरी जाकी कौन जामें बानि । निडुरहौ तुम सूरके प्रभु ब्रज तज्यो यह जानि ॥ ५५ ॥ को कहिहै हरिसों बात हमारी । यहतौ हम तबते जिय जानी जबते भए मधुप अधिकारी ॥ एकै प्रकृति एकई तवगति जे मनसिज असितहि क्यों भावै । प्रगटे नित नवकंज मनोहर ब्रजकी सरक करन कत आवै ॥ कुटिल खान चंपक चंचल मति सबही ते जु निनारी । ताअलिकी संगति बसि मधुपुरी सूरदास प्रभु सुरति बिसारी ॥ ५६ ॥ मधुकर तुम अति चतुर सुजान । जे पहिले मनरंगे श्यामरंग अब न चढै रंग आन ॥ ए दोऊ लोचन विराटके बिधि किये एक समान । भेद चकोर कियो ताहुमें विधु प्रीतम रिपुमान ॥ विरहा भेद भयो पालागौं तुमहौ पूरण ज्ञान । दादुल जलबिन जिवै पवन भख मीन तजै हठिप्रान ॥ वारिजवदन नैन मेरे षटपद कब करिहै मधुपान । सूर दास गोपिन परतिज्ञा छुवहिं न योग बिराना ॥ ५७ ॥ ऊधो बिरहो प्रेम करै । ज्यों बिन पुट पट गहत न रंगको रंगनरसै परै ॥ ज्यों धर देह बीज अंकुर गिरि तौ सतफरनि फरै । ज्यों घट अनल दहत तन अपनो पुनि पय अमी भरै ॥ ज्यों रण शूर सहत शर सन्मुख तौ रवि रथहि ररै । सूर गोपाल प्रेम पथ चलि करि क्यों दुख सुख न डरै ॥ ५८ ॥ राग मलार ॥ मधुकर प्रीति किए पछितानी । हम जान्यो ऐसेहि निबहैगी उन कछु औरै ठानी ॥ वा मोहनको कौन पतीजै बोलत मधुरी वानी । हमको लिखि लिखि योग पठावत आपु करत रजधानी ॥ अवतौ सेज सुहाइ न हरि बिन चितवत रैनि बिहानी । जबते गमन कियो मधुवनको नैनन वरषत पानी ॥ कहियो जाइ श्याम सुंदरको अंतर्गतिकी जानी । सूरदास प्रभु मिलिकै बिछुरे ताते भई दिवानी ॥ ५९ ॥ हमरे हरि हरि लकी लकरी । मन क्रम वचन नंदनंदन उर यह दृढ़ करि पकरी ॥ जागत सोवत स्वप्न दिवस निशि कान्ह कान्ह जकरी । सुनत योग लागत हमैं ऐसो ज्यों करुई ककरी ॥ सुतौ व्याधि हमको लै आए देखी सुनि न करी । यह तौ सूर ताहि लै सौंपो जिनके मन चकरी ॥ ६० ॥ राग सारंग ॥ बात

हमारी माने जौतौ । आवन कह्यो हुतो हमजीवति ताते उनही कौतौ ॥ एक बोलकै लीन्हें सोइ अप-
नी खोई देवति । ताते खरी मरत इहि ठाहर वाही वचनहि सेवति ॥ इतनो कह्यो करो धरि राखो
योग आपनो घरको । पैज खैंचि भेटन आए हो तनक उजारो खरको ॥ नैदनंदन लै गए हमारी
सब ब्रज कुलकी ऊब । सूर श्याम तजि औरै सूझै ज्यों खेरे की दूब ॥ ६१ ॥ राग मलार ॥ श्याम मुख
देखेही परतीति । जो तुम कोटि जतनकरि सिखवहु योग ध्यानकी रीति ॥ नाहि न कछु सयान
ज्ञान महि यह हम कैसे मानै । कहो कहा गाहिए अनुभवको कैसे उरमें आनै ॥ एही मन इक इक
वह मूरति भृंगी कीट समानै । सूर शपथदै पूछो ऊधो यह ब्रज लोग सयानै ॥ ६२ ॥ राग सारंग ॥
हरिहैं राजनीति पढिआए । समुझी बात कहत मधुकरसे समाचार सब पाए ॥ पहिलेही अति चतुर
हुते अरु गुरु सब ग्रंथ दिखाए । बाढी बुद्धि कहत युवातिनको योग सँदेश पठाए ॥ आगेहुके लोग
भलेहो परहित डोलत धाए । अब अपने मन फेरि पाइहैं चलत जो होहिं पराए ॥ ते क्यों नीति
करैं आपुन जिन औरन अपथ छडाए । राजधर्म सुनि इहै सूर जिहि प्रजा न जाहिं सताए ॥ ६३ ॥
वारक मिलत कहाहैं होत । इतनेहु मान कहा उहि कुबिजा पाएहैं परिपोत ॥ इतनिक दूर भए
कछु औरै विसरचो भोक्कुल गोत । कैसे जियहि वदन बिनु देखे विरहिनि विरहिनि सोत ॥
आए योग देन अवलनिको सुरभिकंठ वृष जोत । सूरदास प्रभु तौ पै जीवहिं देखहिं रविहि
उद्योत ॥ ६४ ॥ राग मलार ॥ मधुकर नाहि न काज सँदेशो । इहि ब्रज कौने योग लिख्यो है
कोटि जतन उपदेशो ॥ रविके उदय मिलन चकईको शशिके समय अँदेशो । चातक क्यों बन
वसत बापुरो वधिकहि काज वधेसो ॥ नगर आहि नागर बिनु सुनो कौन काज बसिबेसो । सूर
स्वभाव मिटै क्यों कारे फनिकहि काज डसेसो ॥ ६५ ॥ ऊधो हम वह कैसे मानैं । धूत धौल
लंपट जैसे हरि तैसे और न जानैं ॥ सुनत सँदेश अधिक तनु कंपत जानि कोउ डर तहाँ आनै ।
जैसे वधिक गँवहिते खेलत अंत धनुहिया तानै । निर्गुणवचन कहहु जानि हमसों ऐसी करटि न
कानै ॥ सूरदास प्रभुकी हौं जानों और कहै औरै कछु ठानै ॥ ६६ ॥ राग मलार ॥ ऊधो अब कछु
कही न जाइरानीभई कूवरीदासी कापै वरणी जाइ ॥ जोइ जोइ मंत्र कहत कुबिजाहै सोइ सोइ लिखत
बनाइ । अंत अहीर प्रीति दासीसों मिटत न सहज सुभाइ ॥ छुटत नहीं गुण अवगुण जाँको कीजै
कोटि उपाइ । सूर सुभाइ तजै नाहिं कारो जो कीजै कोटि उपाइ ॥ ६७ ॥ राग मलार ॥ बदलेको बदलो लै जाहु ।
उनकी एक हमारी दोइ तुम बडे जनैओ आहु ॥ तुम अलि जानि अतिहि भोरे संसारो चाहत दाव ।
अपनी बेर मुकुरके भागत हिए चौगुने चाव ॥ अब तुम साखि बँधो तहाँ जाई काहेको पछिताहु ।
सूरदास वह न्याउ निबेरहु हम तुम दोऊ साहु ॥ ६८ ॥ राग मलार ॥ ऊधोजी यहि ब्रज बिरह बडे । घर
बाहर सरिता सर वन उपवन देखहु दुमन चढे ॥ दिन अरुरैनि सधूम भवनकै दिशि दिशि तिमिर
मढे । द्वंदकरत अति प्रबल बलीबल जीवन अनल उढे ॥ जरि नाहिं भई भसम तेही छिन जब
हरि वचन रढे । सूरदास विपरीति विधातै यहितनु फेरि ठढे ॥ ६९ ॥ ऊधो जो तुम बात कही ।
ताको कछुअ न उत्तर आवै समुझि विचारि रही ॥ पालागौं तुमही वृझतहौं तुमपर बुधि उमही ।
कैसे शीतल होइ पवन जल पिए वियोग दही ॥ कुबिजासों पढि तुमहिं पठाए नागर नवल लही ।
अब जोई पद देहि कृपाकरि सोइ हम करैं सही ॥ बिछुरत बिरह अग्नि नाहीं जरी नैनन जलन
वही । अब सुनि शूल सहति सब सूरज कुलमर्याद ढही ॥ ७० ॥ योग मिटि पतिआहु व्योहार ॥
मधुवन बसि मधुरिषु सुनु मधुकर छाँडे ब्रज आभार ॥ धरणीधर गिरिधर कर धरिकै मुरली घर

सुखसारु । अब लिखि योग सँदेशो पठवत व्यापक अगम अपारु ॥ हाँसी अरु दुख सुनहु सखी सुठि
 श्रवण दशा संचारु । सूर प्राणतन तजत न याते सुमिरि अवधि आधारु ॥ ७१ ॥ राग सारंग ॥ मधुकर जो
 हरि कही सो करो । राजकाज चित दियो साँवरे गोकुल क्यों बिसरों ॥ जेजे घोष रहे हम तेहिलौं
 संतत सेवा कीनी । बारक कबहुँ उलूखल बाँधे उहै बाँधि जिय लीनी ॥ जो हमसों कोटि करैं ब्रज
 नायक बहुतै राजकुमारी । तौ एई नंद कहा मिलिहैं और यशोमति सी महतारी ॥ गोवर्धन कहुँ
 गोप वृंद सचु कहा गोरस सच पैबो ॥ सूरदास अब सोई करिए बहुरि गोकुलहि ऐवो ॥ ७२ ॥ राग सोरठा ॥ ऊधो
 हरि यह कहा बिचारी ॥ सदा समीप रहत वृंदावन करत बिहार बिहारी ॥ एकतौ रंग रचे कुबिजाके
 बिसरि गए सब नारी । कछु इक मंत्र कियो उन दासी तेहि बिनोद अधिकारी ॥ दिन दश और रहौ तुम
 इहां देखो दशा बिचारी । प्राण रहतहैं आशा लागे कब आवैं गिरिधारी ॥ तुमतौ कहत योगहै नीको
 कहो कवन बिधि कीजै । हम तन ध्यान नंदनंदनको निरखि निरखिसो जीजै ॥ सुंदर श्याम कंठ वैजंती
 माथे मुकुट विराजै ॥ कमलनैन मकराकृत कुंडल देखतही भव भाजै ॥ याते योग न आवै मनमें तू नीके
 करि राखि । सूरदास स्वामीके आगे निगम पुकारत साखि ॥ ७३ ॥ राग बिहागरो ॥ मधुकर बहुरि न
 कबहुँ मिलैं हरि । कमलनयन मिलबेके कारण अग्रनो सो जतन रही बहुतै करि ॥ जेजे पथिक
 जात मधुवनको तेहि सो व्यथा कहति पाँयन परि । कहे न प्रगट करौ यदुपतिसों दुसह
 दोषकी अवधि गई ढरि ॥ धीर न धरत प्रेम व्याकुल मन लेत उसाँस नीर लोचन भरि । सूरदास
 तनु थकित भयो अति इह वियोग सायर न सकत तरि ॥ ७४ ॥ राग सारंग ॥ मधुकर अब भयो नेह
 बिरानी । बाहर हेत हातो कहवावत भीतर काज सयानी ॥ ज्यों शुक पिंजर माहँ उचारत ज्यों
 ज्यों कहत बखानी । छूटतही उडि मिले अपुन कुल प्रीत न पल ठहरानी ॥ यद्यपि मन नहिं तजत
 मनोहर तद्यपि कपटी जानी । सूरदास प्रभु कवन काजको माखी मधु लपटानी ॥ ७५ ॥ राग सोरठा ॥
 हरिते भलो सुपति सीताको । जाके विरह जतन ए कीने सिंधु कियो नीताको ॥ लंका जारि
 सकल रिषु मारे देखतही सुखताको । दूत हाथ उन लिखि जो पठयो ज्ञान कछो गीताको ॥
 तिनको कहा परेखो कीजै कुबिजाके मीताको । चढे सेज सो तो सुधि बिसरी जो सब
 सुख चीताको ॥ चढि चढि सेज सातहू सिंधू बिसरी जो चीताको ॥ करि अति कृपा योग लिखि
 पठयो देखो डराइ ताको । सूरदास प्रभु हम कहा जानैं अब लोभी बनिताको ॥ ७६ ॥ राग नट ॥
 ऊधो हम ब्रजनाथ बिसारी । जबते गमन कियो मथुराको चितवत लोचन हारी ॥ महाप्रलय तब
 काहेको राखी इंद्र त्रास भंवटारी । छूटत नहीं त्रास हृदयते तब न मुई अब मारी ॥ अवधि बंदी हरि
 ते सब बीते आवन कहि जो सिधारी । सूरदास प्रभु कबधौं मिलैंगे लैए प्राण हमारी ॥ ७७ ॥
 राग मलार ॥ प्रीति उन देखनको उत जानत । तौ यों बात कहत अलि ऐसैं व्यथा नहीं पहिचानत ॥
 जे गोपाल गृह गृह ब्रजमें ते चोर दूध दधि खात । ते अब दुखित देखि ब्रजवासिन निठुर भए ते
 जात ॥ सूर कुटिलता जे सुनियतहैं लोग पुराणनि गावतानख शिखलौं विषरूप बसतपै मधुवन नाम
 कहावत ॥ ७८ ॥ तू अलि बात नहीं कहि जानत । निर्गुण कथा बनाइ कहत नहिं विरह व्यथा उर
 आनत ॥ प्रफुलित कमल देखि उठि धावत सब कुल संग लिए । और सुमन सौ बंधु याचतहौ
 फाटि न जात हिए ॥ चातक स्वाति बूंद जो गाहक सदा रहत इकरूप । कहा जानै दादुर जलपैरत
 सागर औ सम कृपा ॥ बात कहौ सजि ऐसी जासों जाके जिय तुम भावहु ॥ सूर वचन जैसो उपदेशत तैसोही
 तुम पावहु ॥ ७९ ॥ राग सारंग ॥ कुटिल बिनु और न कोई आवै ॥ तौ ब्रजराज प्रेमकी बातें ताके हाथ पठावै ॥ प्रीति

पु तन सुमिरि सांवरे सुरति सँदेशो दीनी । तैं अलि कहत औरकी औरै श्रुति मतिकी उर
 लीनी ॥ ये हो सखा कहे नहि मानत गहे योगकी टेक । ऐसे सूर बहुत मधुवनमें कहा दोषहै
 एक ॥ ८० ॥ राग धनाश्री ॥ बतिअन सबकोऊ समुझावै । ऐसो कोउ नाहिनै प्रीतम लै ब्रजनाथ
 मिलवै ॥ आयो दूत कपटको बासी निर्गुण ज्ञान बतावै । हमारे सखा श्याम मनोहर नैनन
 भरि न देखावै ॥ ज्ञान ध्यानको मर्म न जानै चतुरहि चतुर कहावै । सूरजदास सबै काहूको अपनो
 ही हित भावै ॥ ८१ ॥ राग मलार ॥ ऊधो क्यों विसरत वह नेह । हमरे हृदय आनि नंदनंदन राचि
 राचि कीन्हें गेह ॥ एक दिवस गई गाइ दुहावन तहां जो वरषो मेह ॥ लिये वोढाय कामरी मोहन
 निजकरि मान्यो देह ॥ अब हमको लिखि लिखि पठवत है योग युक्ति तुम लेहु । सूरदास बिरही
 क्यों जीवै कौन सयानप येहु ॥ ८२ ॥ ऊधो नंदको गोपाल गिरिधर गयो तृण जो तोर । मीन
 जलकी प्रीति कीनी नाहि निबही वोर ॥ अबकै जब हम दरश पावैं देहि लाख करोर । हरिसों
 हीरा खोइ कैहौ रहि समुंद्र ढँढोर ॥ ऊधो हमारो कछु दोष नाहीं वै प्रभु निकट कठोर । हौं जपौं
 तुम नाम निशि दिन जैसे चंद्रचकोर ॥ हम दासी बिनमोलकी ऊधो ज्यों गुड्डी वश डौर । सूरको
 प्रभु दरश दीजै नहीं मनसा और ॥ ८३ ॥ राग सौरा ॥ ऊधो अवैरै कान्ह भए । जबते यह ब्रज छाँडि
 मधुपुरी कुबिजा धाम गए ॥ कै वह प्रीति प्रीति गोकुलबसि दुख सुख प्रीति निबाहत । अब इन्ह
 करत वियोग देह हम सुनत काम दव डाहत ॥ जहां स्वारथ हरि गुण साँवरो निर्गुण कपट
 सुनावत । सूर सुमिरि ब्रजनाथ आपने कत न परेखो आवत ॥ ८४ ॥ राग मारू ॥ ऊधो जो तुम हमहि
 बतायो । सो हम निपट कठिनई करि करि या मनको समुझायो ॥ योग याचना जबहि अगहगहि
 तबहीं है सो ल्यायो । भटक परचो वोहितके खग ज्यों फिरि हरिहीपै आयो ॥ अबकै तौ सोई
 उपदेशो जेहि जिय जाइ जियायो । बारक मिलैं सूरके प्रभु तौ करौ आपनो भायो ॥ ८५ ॥ राग धनाश्री ॥
 ऊधो मन मानेकी बात । दाख छोहारा छाँडि अमृतफल विषकीरा विषखात ॥ जो चकोरको देइ
 कपूर कोउ ताजि अंगारहि अघात । मधुप करत घरकोरे काठमें बँधत कमलके पात ॥ ज्यों पतंग
 हित जानि आपनो दीपकसों लपटात । सूरदास जाको मन जासों सोई ताहि सुहात ॥ ८६ ॥ राग सोरठा ॥
 बातें कहत सयाने कीसी । कपट तिहारे प्रगट देखिअत ज्यों जलना ऐसीसी ॥ होंतो कहति
 तिहारे हितकी एतेमो कत भरमति । हौंहु मया तिहारे हितकी कछु व्यौरोसों मरमति ॥ छाइ वसाइ
 गए सुफलकसुत नेकहु लागी बारन । सूर कृपाकरि आए ऊधो तापर लागे टारना ॥ ८७ ॥ राग विलावल ॥
 ऊधो हम ऐसे गोपाल बिनु । सबहीये जैसे हरु ओ तनु ॥ सोचत गनत जाइ यहि बिधि दिनु ।
 युगांशि होत हमहि एको छिनु ॥ कहियो सूर संदेश श्याम तिनु । जिनि राखो प्रभु पोच वचन
 ऋनु ॥ हरि कित भये ब्रजके चोर । तुम्हरे मधुप वियोग उनके मदनकी झकझोर ॥ ८८ ॥ इक कमल पर
 धरैं गज रिपु एक कमल पर शशिरिपु जोर । दोऊ कमल एक कमल ऊपर जगी एकटक
 भोर ॥ इक सखी मिलि हँसति पूछति खँचि करकी कोर । तज सुवाइ सु भखत नाहीं
 निरखि उनकी ओर । बिरस रासनि सुरति करि करि नैन बहुजल तोरि । तीन त्रिवली
 मनो सरिता मिली सागर छोर ॥ पट कंध अधरनि माल ऊपर अजयारिपुकी घोर । सूर
 अबलनि मरत ज्यावो मिलो नंदकिशोर ॥ ८९ ॥ राग सारंग ॥ मधुकर तोहि कौनसों हेतु । जोपै चढत
 रंगतौ ऊपर त्यों पै होव श्यामता सेतु ॥ मोहन मणिनिडार मोलीते करि आए मुख प्रीति । अतिशठ
 ढीठ बसीठ श्यामको हमें सुनावत गीति ॥ जो कारिख तनु मोटो चाहत तो कमल वदन तनु चाहि ।
 सूर गोपाल सुधारसमें मिलि आवन संग समाहि ॥ ९० ॥ राग ब्रह्म ॥ ऊधो सुनौ वृथा तनुतात ।

पारधी मारि भाल क्यों काढै है उरझी हृदयगात ॥ ऐसे अधिक मृगन मारनको माथे बांधे पात ।
 सुंदर श्याम नाद बंसीके बंधी काम शर घातायह तौ पीर बिरहिनी जानै बहुत जियै दिनसात । सूर
 अबै न आपने जानै क्यों पूछै कुशलात ॥९१॥ राग नट ॥ जोपै मोहिं कृष्ण जिय भावहि । तो सुन
 मधुप यशोदानंदन अबहीं गोकुल आवहि ॥ जिन नैनन मोहन मुख निरख्यो निशिदिन रूप
 बिचारयो । ते नैना जो रहत सुने गृह प्रीति न हृदय बिदारयो ॥ जेहि तनु आसन शयन संग मुख
 हरि समीप रुचि मानी । जिहि तनु बिरह न छूटत सुमिरि गुण नेकहु व्यथा न जानी ॥ जिनि श्रवणन
 सुनि वचन मनोहर मुरली कल मुख बाजति । तिन श्रवणन हरि सुनत मधुपुरी देत सँदेशन लाजति ॥
 अतिप्रचंड यह अंड महाभट जाहि सबै जग जानत । सो मदहीन दीनहै बपुको कोपि धनुष
 सर तानत ॥ सर सौरभ शशि अनिल त्रिविध गुण वैसिय प्रकृति निबाहत । विषम बिरह निज जानि
 मानिमिति तौ या तनुहि न दाहत ॥ बन बिलास ब्रजबास रास रस देखि देखि दुख पावत । सूरदास
 बहुरौ वियोग गति कुकवि निलज है गावत ॥ ९२ ॥ राग धनाश्री ॥ अब हरि औरहि रंग राचे । तुम सम सखा
 श्यामसुंदरके परम सयानप काचे ॥ बालापनते निकट रहतही सुन्यो न एक पखानो । जैसे वास
 बसतहै कोऊ तैसो हो तुम सयानो ॥ अरु अपने सुख तुम जु कहतहो प्रभु सबही भरिपूर । आवा-
 गमन करतहो कापै को लागत को दूर ॥ अरु उपमा पटतर लै दीजै ते सब उनाहिन लायक । जोपै
 अलख रह्यो चाहत तौ बादि भए ब्रजनायक ॥ अरु जो जतन करहुगे हमको ते सब हमहिं
 अलेखैं । सूर सुमनसा तव मुख मानै कमलनैन मुख देखैं ॥ ९३ ॥ राग मलार ॥ हरिबिनु जान लगे दिनही
 दिन । कैसेकै राखैं प्राण कान्ह बिन ॥ करत जतन कतहि छिनही छिन । सिंह कैसे जीभ धरे हरे तृण ॥
 जोपै नाहीं मानत प्रभु वचन ऋन । तौ का कहिए सूर श्याम सिन ॥ ९४ ॥ अब कोउ ऐसी बात कहो ।
 छाँडहु सकुच मिलहु नंदनंदन हितकरि दुखन दहो ॥ तुम प्रभु समाधानके कारण पठए कहन सँदेश ।
 अधिक आय आरति उपजाई मेटहु बिरह कलेश । इक तुम निकट रहत उनके अरु जानत
 सकल सुभाइ । सोई करहु प्रगट दरशन जेहि बेगि मिलैं यदुराइ ॥ हम किंकरी कमललोचनकी
 बशकीनी मृदुहास । सूरदास प्रभु क्यों बिसरतहैं नख शिख अंग प्रकाश ॥ ९५ ॥ इहै
 प्रकृति परिआई ऊधो अनुदिन या मन मेरे । जो कोउ कोटि जतन करौ कैसेहुँ फिरत
 नहीं मति फेरे ॥ जादिनते यशुदा गृह जनमें सुंदर यादवराई । तादिनते वा दरश परस बिनु
 और न कछु सुहाई ॥ क्रीडत हैसत कृपा अवलोकत छिन समान दिन जाते । परमवृत्ति सबही
 अंग होती लोचन पै न अघाते ॥ जागत सोवत स्वप्न श्याम घन सुंदर तनु अति भावै । सुकहि
 सूर ता कमलनयन बिन बातन क्यों बनिआवै ॥ ९६ ॥ ऐसी नियत हृदये माँह । याहीमें सब
 बात बूझबी चतुर शिरोमणि नाह ॥ आवन कह्यो बहुत दिन लायो करी पाछिली गाह । हमहिं
 छाँडि कुबिजहि मन दीनों मेटि वेदकी राह ॥ एते पर लिखि योग पठावत सिद्ध बतावत थाह ।
 सूर श्याम अब ब्रज किन आवहु दिन दश मानहु साह ॥ ९७ ॥ यहि डर बहुरि न गोकुल आए । सुन
 री सखी हमारी करनी समुझि मधुपुरी छाए ॥ आधीरातको उठि बालक सब मोहिं जगोहै आइ ।
 बिन पल्लव बन बहुरि पठैहै मोहिं चरावन गाइ ॥ सुने भवन जाइ रोकत हो अघ चोरत नवनीत ।
 पकरि यशोदा पै लइ जैहैं नाचहु गावहु गीत ॥ जानो मोहिं बहुरो बाँधेगी कै तव बचन सुनाइ ।
 वै दुख सुमिरि सूर मनहीं मन बहुरि सहै को जाइ ॥ ९८ ॥ ऊधो वेदबचन परमान । कमल मुख
 पर नैन खंजन निरखि है को आन ॥ श्रीनिकेत समेत सब मुख रूप प्रगट निधान । अधर सुधा

पिआइ बिछुरे पठै दीनो ज्ञान ॥ एनहीं हैं कृपालु केशव एहैं हिए समान । निकरि क्यों न गोपाल
 बोलत दुखिन के दुख जान ॥ रूप रेख न देखिए तहाँ मूठ सुमिरि भुलान । इनहि दंड अडारि
 हरि गुण योगजान बखान ॥ बीतराग सुजान योगिन भक्त जनन निवास । निगमबाणी भेटि कहि
 क्यों सकै सूरजदास ॥ ९९ ॥ आवन आवन कहि गए पै ऊधो अजहूं नहि आए । इतनी दूरि
 गोपाल सँदेशन मधुपन दये पठाए ॥ चलत चितै सुसकाइकें मृदु वचन सुनाए । तेही ठग मौदक
 भए मनधार न हरि तन छूछो छिटकाए ॥ जगमोहन यदुनाथके गुण जानिहु पाए । मनहु सूर यहि
 लाजते घनश्याम सुंदर वर बहुरि न चरण देखाए ॥ ३४०० ॥ माधो मन मर्याद तजी । ज्यों गज मत्त
 जानि हरि तुमसों बात विचारि सजी ॥ माथे नहीं महावत सतगुरु अंकुश ध्यान कर टूटो । धावत
 अध अवनी आतुर तजि साकर सगुण सु छूटो ॥ इहै यूथ संग लए विहरत त्रिया काननहु
 माहि । क्रोध सोच जलसों रतिमानी कामभक्ष हित जाहि ॥ अयुत आधार नहीं कछु समुझत
 भ्रम गहि गुहारहै । सूर श्यामके हरि करुणामय कवनहि विरदु गहै ॥ १ ॥ राग नट ॥ सखी री पुर-
 वनिता हम जानी । याहीते अनुमान करतहैं षटपदसे अगवानी ॥ अब तौ राजतहाँ सुनियतहै कुवि-
 जासी पटरानी । प्रथम ग्वाल गाइन संग रहते भए छाँछके दानी ॥ अर्ध निशा ब्रजनारि संगलै वन
 बंसी लीला ठानी । मन हरि लियो बजाइ वाँसुरी अब होइ बैठे ज्ञानी ॥ महामल्ल मारत मन मोहन
 नार्ही समता आनी । सूरदास ए कलपतनैना कहै कौन अब बानी ॥ २ ॥ राग बिलावल ॥ जिन
 कोई वशपरो बरिआए । सरबस दियो आपनो उनको तऊ न कछु कान्हके भाए ॥ सहज समाधि
 रहत योगी ज्यों मुद्रा जटा विभूति लगाए । राज करौ इह दान तिहारो जोपै देहु बहुत हरि ध्याए ॥
 ना जानौं अब भलो मानिहै ऊधो नाचे गाए ॥ सूरदास प्रभु दर्शन कारण मानो फिरत धतूरा खाए ॥
 ॥ ३ ॥ राग मलार ॥ जोपै कोउ विरहिनको दुख जानैतो तजि सगुण साँवरी मूरति कत उपदेशै ज्ञानै ॥
 कुमुद चकोर मुदित विधु निरखत कहा करै लै भानै ॥ चातक सदा स्वातिको सेवक दुखित
 होत बिनपानै ॥ भवै कुरंग काक कोयलको कविजन कपट बखानै । सूरदास जो सरवस दीजै कारे
 कृतहि न मानै ॥ ४ ॥ राग मलार ॥ श्याम बिनु क्यों जीवैं ब्रजवासी । इहि घट प्राण रहत क्यों ऊधो
 बिछुरे कुंजबिलासी ॥ कुविजा वर पायो मोहनसों मनो तपकियो काशी ॥ सूर श्यामको इहै परेखो इ-
 क दुख दूजी हाँसी ॥ ५ ॥ राग गौरी ॥ ऊधो कैसे जीवैं कमलनैन बिनु । तबतौ पलक लगत दुख पावत
 अब जो निराखि भरिजात अंग छिनु ॥ जो ऊजर खेरेके देवनको पूजै को मानै । तो हम बिनु
 गोपाल भए ऊधो कठिन प्रीतिको जानै ॥ तुमते होइ करो सो ऊधो हम अबला बलहीन । सूर
 वदन देखे हम जीवैं ज्यों जलभीतर मीन ॥ ६ ॥ राग धनाश्री ॥ लरिकारिको प्रेम कहो अलि कैसे छूटत ।
 कहा करौ ब्रजनाथ चरित अंतर्गति लूटत ॥ वह चितवन वह चाल मनोहर वह मुसुक्यानि जो मंद
 ध्वनि गावन । नटवर भेष नंदनंदनको वह विनोद जोवनको आवन ॥ चरणकमलकी सौंह करतहैं इह
 संदेश मोहि विपसों लावत । सूरदास मोहि पलक न बिसरत मोहन मूरति सोवत जागत ॥ ७ ॥
 उद्धव वचन राग धनाश्री ॥ यह उपदेश कह्योहै माधो । करि विचार सन्मुखहै साधो ॥ इंगला पिंगला
 सुषमना नारी । शून्यो सहजमें बसाहि मुरारी ॥ ब्रह्मभाव करि मैं सब देखो । अलख
 निरंजन ही को लेखो ॥ पद्मासन इक मन चित ल्यावो । नैन मूँदि अंतर्गति ध्यावो ॥
 हृदयकमलमें ज्योतिप्रकाशी । सो अच्युत अविगति अविनाशी ॥ यहिप्रकार विष मत्त
 मतरिये । योगपंथ क्रम क्रम अनुसरिए ॥ दुसह सँदेश सुनत ब्रजबाला । मुरछि परी धरणी

बेहाला ॥ अरे मधुप लंपट अनिआई । यह संदेश कत कहै कन्हाई ॥ नंदभवनमें सदाविराजै ।
 नटवर भेष सदा हरि राजै ॥ रासविलास करै वृंदावन । बिच गोपी बिच कान्ह श्यामघन ॥
 अलि आयोहै योग सिखावन । देखिप्रीति लागे शिर नावन ॥ भवैरगीत जो दिन दिन गावै ।
 ब्रह्मानंद परमपद पावै ॥ सूर योगकी कथा बहाई । शुद्ध भक्ति गोपी जन पाई ॥ सांचो मतो जो
 जिहि विधि धावै । तैसो भाव हरि हिय भरि पावै ॥ ८ ॥ अथ गोपी वचन ॥ राग धनाश्री ॥ इहां हरि जी बहु
 क्रीडा करी । सो तो चितते जात न टरी ॥ इहां पय पीवत वकी संहारी । शकट तृणावर्त इहां हरि
 मारी ॥ वत्सासुरको इहां निपात्यो । बका अघा इहां हरिजी घातो ॥ हलधर मारयो धेनुकको इहां ।
 देखो ऊधो हत्यो प्रलंब जहां ॥ इहाँते ब्रह्मा हमको गयो हरि । और किए हरि लगी न पलक धरि ॥
 ते सब राखे संपति नरहरि । तब इहां ब्रह्मा आय अस्तुति करि ॥ इहां हरि काली उर्ग निकास्यो ।
 लगेउ जरावन अनल सो नाश्यो ॥ वस्त्र हमारे हरि जु इहां हरि । कहां लगि कहिए जे कौतुक करि ॥
 हरि हलधर इहां भोजन किए । विप्रतियनको अति सुख दिए ॥ इहां गोवर्धन कर हरि धारयो ।
 मेघ वारिते हमै निवारयो ॥ शरद निशामें रास रच्यो इहां । सो सुख हमपै बरण्यो जात कहां ॥ वृषभ
 असुर को इहां संहारयो । भ्रुम अरु केशी इहां पछारयो ॥ इहँ हरि खेलत आँखि मुचाई । कहां लगि
 बरनै हरिलीला गाई ॥ सुनि सुनि ऊधो प्रेम मगन भयो । लोटत धर पर ज्ञान गर्ब गयो ॥ निरखत
 ब्रज भूमि अतिसुख पावै । सूर प्रभुको पुनि पुनि गावै ॥ ९ ॥ राग धनाश्री ॥ ऊधो जो करि कृपा पाउँ धरत
 हरि तौ मैं तुमहि जनावों । मौन गहे तुम बैठि रहोहो मुरली शब्द सुनावों ॥ अबहिं सिधारे बन
 गोचारन हो बैठी यश गावों । निशि आगम श्रीदामाके संग नाचत प्रभुहि देखावों ॥ को जानै
 दुबिधा संकोचमें तुम डर निकट न आवें । तब इह इंद्र बढै पुनि दारुण सखियन प्राण छोडावै ॥
 छिन न रहै नंदलाल इहां बिनु जो कोउ कोटि सिखावै । सूरदास ज्यों मनते मनसा अनत कहूं
 नहिं धावै ॥ १० ॥ पुनि उद्धव वचन ॥ राग सारंग ॥ मैं ब्रजबासिनकी बलिहारी । जिनको संग सदाहै क्रीडत श्री
 गोवर्द्धन धारी ॥ किनहुँके घर माखन चोरत किनहुँके संग दानी । किनहुँके संग धेनु चरावत हरिकी
 अकथ कहानी ॥ किनहुँके संग यमुनाके तट बंसी टेर सुनावत । सूरदास बलि बलि चरणनकी
 इह सुख मोहिं नित भावत ॥ ११ ॥ राग सारंग ॥ हों इहि मोरनकी बलिहारी । बलिहारी वा वाँस वंशकी
 बंसीसी सुकुमारी । सदा रहतहै करज श्यामके नेकहु होत न न्यारी ॥ बलिहारी वा कुंजजातकी
 उपजी जगत उजियारी । सदा रहत हृदय मोहनके कबहुँ टरत न टारी ॥ बलिहारी कुल शैल सर्व
 बिधि कहत कालिंदि दुलारी । निशि दिन कान्ह अंग आली गण आपुनहुं भई कारी ॥ बलिहो
 वृंदावनके भूमिहि सो तो भागकि सारी । सूरदास प्रभु नांगे पाँयन दिनप्रति गैया चारी ॥ १२ ॥
 ॥ अथ गोपी वचन ॥ राग मारू ॥ अलि तुम जाहु फिरि वहि देश । चीर फारि करिहौं भगौंहौं शिखनि
 शिखि लवलेश ॥ भाल लोचन चंद्र चमकनि कठिन कंठहि सेस । नाद मुद्रा विभूति भारो करौ
 रावर भेस । वहां जाइ संदेश कहियो जटा धारैं केश । कौन कारण नाथ छाँडी सूर इहै अँदेश ॥
 ॥ १३ ॥ राग मलार ॥ हमपर हेतु किए रहिबो । वा ब्रजको व्यवहार सखा तुम हरिसों सब कहिबो ॥
 देखे जात अपनी इन आँखिअन या तनको दहिबो । बरनौं कहा कथा या तनुकी हिरदैको सहिबो ॥
 तब न कियो प्रहार प्राणनिको फिरि फिरि क्यों चाहिबो । अब न देह जरिजाइ सूर इन नैननको
 बहिबो ॥ १४ ॥ अपने जिय सुरति किए रहिबो । ऊधो हरिसों इहै बीनती समो पाइ कहिबो ॥
 घोष बसतकी चूक हमारी कछू न चित गहिबो । परमदीन यदुनाथ जानिकै गुण बिचारि

सहिवा ॥ अवकीबेर दयालु दरशदै दुखकी राशि दहिबो । सूर श्याम हम कहैं कहाँ लग वचन
 लाज बहिबो ॥ १५ ॥ राग कल्याण ॥ यदुपतिको सँदेश सखी री कैसेकै कहाँ । बिनहीं कहे आपनेहि
 मनमें कवलग शूल सहौं ॥ जो कछु बात बनाऊं चितमें रचि पचि सोचि रहौं । मुख आनत ऊधो
 तन चितवत नवहु विचार बहौं ॥ सो कछु सीख देहु मोहिं सजनी जाते धीर गहौं । सूरदास
 प्रभुके सेवकसों विनती करि निबहौं ॥ १६ ॥ राग विलावल ॥ कर कंकनते भुज ठाढ भई ॥ मधुवन
 चलत श्याम मनमोहन आवन अवधि जु निकट दई ॥ जो अति पंथ मनावत शंकर निशिवासर मो
 गनत गई । पाती लिखत विरह तनु व्याकुल कागर है गयो नीर भई । ऊधो मुखके वचनन
 कहियो हरिकी शूल नितप्रति नई । सूरदास प्रभु तुम्हरे दरशको विरह वियोगिनि विलक
 भई ॥ १७ ॥ राग कल्याण ॥ कहियो मुख सँदेश हाथलै दीजो पाती । समयपाइ ब्रजबात चलाई सुखही
 माँझ सुहाती ॥ हम प्रतीत करि सरवस अरप्यो गन्यो नहीं दिनराती । नँदनंदन यह जुगत न होई
 लैजु रहे मनु थाती ॥ जो तव साधि दीज तौ कोऊ तो अब कत पछताती । सूरदास प्रभु मुकुर
 जानती तौ संग लीन्हें जाती ॥ १८ ॥ राग धनाश्री ॥ ऊधो नँद नंदनसों इतनी कहियो । यद्यपि ब्रज
 अनाथ करि डारयो तदपि सुरति चित किये रहियो ॥ तिनकी तोर करहु जिनि हमसों एक
 बोंसकी लाजनि बहिबो । गुण अवगुणन देखि नहिं कीजतु दासन दासकी इतनी सहियो ॥ तुम
 बिनप्राण त्याग हम करिहैं यह अवलंब न सुपनेहु लहियो । सूरदास प्रभु लिखिदे पठयो कहाँ
 योग कहा पियनंदहियो ॥ १९ ॥ राग नट ॥ ऊधो इतनी जाइ कहो । सबै विरहिनी पाँइ लागति हैं
 मथुरा कान्ह रहो ॥ भूलिहु जिनि आवहिं यहि गोकुल तप्त रैनि ज्यों चंद । सुंदर वदन श्याम
 कोमलतनु क्यों सहिहैं नँदनंद ॥ मधुकर मोर प्रबल पिक चातक वन उपवन चढि बोलत ।
 मनहुँ सिंहकी गर्ज सुनत गो वत्स दुखित तनु डोलत ॥ आसन भये अनल विष अहि सम भूषण
 विविध विहार । जित जित फिरत दुसह द्रुम द्रुम प्रति धनुष धरे मनुमार ॥ तुमहो संत सदा
 उपकारी जानतहौ सब रीति । सूरदास ब्रजनाथ बचै तौ ज्यों नहिं आवै ईति ॥ २० ॥ राग मलार ॥
 मधुकर इतनी कहियहु जाइ । अति कृश गात भई ए तुम बिनु परमदुखारी गाइ ॥ जलसमूह बर-
 षति दोउ आखैं हूँकति लीने नाउँ । जहां तहां गोदोहन कीनो सूँघति सोई ठाउँ ॥ परति पछार
 खाइ छिनही छिन अति आतुरहै दीन । मानहु सूर काढि डारीहै वारि मध्यते मीन ॥ २१ ॥ राग नटा ॥
 तुम बिनु हम अनाथ ब्रजवासी । इतनो सँदेशो कहियो ऊधो कमलनैन बिनु त्रासी ॥
 जादिन ते तुम हमसों बिछुरे भूख नौंद सब नासी । विह्वल विकल कलहू न परत तनु ज्यों
 जल मीन निकासी ॥ गोपी ग्वाल बाल वृंदावन खग मृग फिरत उदासी । सबई प्राण तज्यो
 चाहतहैं को करवत को कीसी ॥ अंचल जोरे करत बीनती मिलिबेको सबदासी । हमरो प्राण
 घातहै निबरे तुम्हरे जाने हाँसी ॥ मधुकर कुसुम न तजत सखी री छाँडि सकल अविनाशी ।
 सूर श्याम बिन यह वन सूनो शशि बिनु रैनि निरासी ॥ २२ ॥ राग धनाश्री ॥ सबै करति मनु
 हारि ऊधो कहियो हो जैसे गोकुल आवै । दिन दश रहे सु भली कीन्ही अब जानि गहरु लगावै ॥
 नहिंन सोहात कछु हरि तुम बिनु कानन भवन न भावै । धेनु विकल सो चरत नहीं तृण बछा
 न पीवन धावै ॥ देखत अपनी आँखि तुमहिं तन और कहा बात न समझावैं । सूरदास प्रभु कठिन
 हीन तन कत अव वै ब्रजनाथ कहावैं ॥ २३ ॥ राग गौरी ॥ ऊधो हरि वेगहि देहु पठाइ । नँदनंदन दरशन
 बिनु रटि मरैं ब्रज अकुलाइ ॥ मातु यशुमति सहित ब्रजपति परे धरणि मुरझाइ । अति बिकल तनु

प्राणत्यागत करै कछु गति आइ ॥ सकल सुरभी यूथ दिनप्रति रुदति पुर दिश धाइ । जहांजहां
 दुहि बन चराइ मरति तहां बिललाइ ॥ परमप्यारी शरद राधिका लई गृह दुख छाइ । तजत चक्र
 नवक्र चखबिनु करै कोटि उपाइ ॥ योगपदलै देहु योगिहि हमहिं योग मिलाइ । मधुप बिछुरे वारि
 मीनहि अनत कहा सोहाइ ॥ आजु जेहि विधि श्याम आवैं कहो तेहिबिधि जाइ । सूरदास विरह
 ब्रज जन जरत लेहु बुझाइ ॥ २४ ॥ राग जैतश्री ॥ अलि मलीन वृषभानु कुमारी । हरिश्चम जल
 अंतर तनु भीजे तालालच न धुआवत सारी ॥ अधोमुख रहति ऊरध नहिं चितवति ज्यों गथहारे
 थकित जूथ आरी । छूटे चिहुर वदन कुम्हिलाने ज्यों नलिनी हिमकरकी मारी ॥ हरि सँदेश सुनि
 सहज मृतक भई एक विरहिनि दूजे अलिजारी । सूर श्याम बिन यों जीवतिहै ब्रजवनिता सब
 श्याम दुलारी ॥ २५ ॥ राग सारंग ॥ ऊधो देखेही ब्रज जात । जाइ कहियो श्यामसों यों विरहके उतपात ॥
 नैनन कछु न सूझई अरु श्रवण कछु न सोहात । श्याम बिन सब ब्रजहि सूनो दुसह सरवन घात ॥
 आइ वौ तौ आइधौ हरि बहुरि शरीर समात । सूर प्रभु पछिताहुगे तुम अंतहू गए गात ॥ २६ ॥ राग मलार ॥
 हरिजीसों कहियो हो जैसे गोकुल आवहिं । दिन दश रहे भली कीनी वहा अब जिनि गहर लगा-
 वहिं ॥ नाहिं कछु सुहात तुमहिं बिनु कानन भवन न भावहि । बाल विलख मुख गौ न चरति तृण
 बछ पय पियन न धावहि ॥ देखत अपनी अँखिअन ऊधों हम कहि कहा जनावहिं । सूर श्याम बिनु
 तपत रैन दिन मिले भलेहि सजु पावहिं ॥ २७ ॥ राग विहागरो ॥ ऊधो तुमहिं श्यामकी सौँहै । मुख
 देखत कहियो तुम उनसों जित तित लगी मदनकी दौँहै ॥ जो मन योग जुगुति आराधै सो मनतो
 सबको उन पैहै । जैसे बसन तजतहैं पंगन सो गति कान्ह करी हमकोहै ॥ हम बावरी त्यों
 न चलि जान्यो ज्यों गज चलत आपनी गौँहै । सूरदास कपटी चित माधो कुबिजा मिलि कपटी
 की खोहै ॥ २८ ॥ राग केदारो ॥ ऊधो एक मेरी बात । बूझियो हर बाइ हरिसों प्रथम कहि कुशलात ।
 तुम जो इह उपदेश पठायो आनि योग मन ज्ञान । सत्यहु सब बचन झूठो मानिये मन न्यान ॥ और
 ब्रज कहि दूसरोहु सुन्यो कहा बलवीर । जाहि बरजन इहां पठयो करि हमारी पीर ॥ आपु जबते गए
 मथुरा कहत तुमसों लोग । सहजही ता दिवसते हम भूलियो भय भोग ॥ प्रगट पति पितु मात प्रभु
 जन प्राण तुम आधीन । ज्यों चकोरहि संग चकोरी चित्त चंदहि लीन । रूप रसन सुगंध परसन
 रुचि न इंद्रिन आन ॥ होति हौंस न ताहि विषकी कियो जिन मधुपान । हैगयो मन आपुही सब गिनत
 गुन गन ईश ॥ ज्ञानकी अज्ञान ऊधो तृणतोरि दीजै शीश ॥ बहुत कहा कहैहि केशो राइ परम प्रवीन ।
 सूर सुमत न छाँडिहै जहां जीवत जल बिन मीन ॥ २९ ॥ राग सारंग ॥ मधुकर कहियो सुचित
 सँदेशो । समै पाइ समुझाइ श्यामसों हम जिय बहुत अँदेशो ॥ एक बार रसरास हमारे मुरली मन
 जो हेरसो । तब उन बेणु बजाइ बोलाई अब निर्गुण उपदेशो ॥ और बार उनि योग जुगतिको भेद न
 कहो परेसो । तब पतिव्रत तुम करन कहत अब उखरो ज्ञान गडेसो ॥ और कहाँलौं हम कहैं ऊधो
 अबलनको दुख ऐसो । सूरदास इन पर हँसि मरियतु कुबिजाकेशव कैसो ॥ ३० ॥ पुनः ऊधोवचन ॥
 राग नट ॥ अब अति चकितवंत मन मेरो । आयो हौं निर्गुण उपदेशन भयो सगुनको चेरो ॥
 मैं कछु ज्ञान कह्यो गीताको तुमहिं न परहो नेरो । अति अज्ञान जानिकै अपनो दूत भयो उन केरो ॥
 निजजन जानि हरि इहां पठायो दीनो बोझ घनेरो ॥ सूर मधुप उठि चले मधुपुरी बोरि योगको बेरो ॥
 ॥ ३१ ॥ गोपीवचन ॥ राग केदारो ॥ ऊधो तिहारे मैं चरणन लागौं बारक यहिब्रज करियो विभावरी । निशि
 न नींद आवै दिवस न भोजन भावै चितवत मगभई दृष्टि झावरी ॥ एक श्याम बिन कछु न भावै

रटत फिरत जैसे बकत बावरी । या वृंदावन सघन श्याम बिनु तहां यमुना बहै सुभग सांवरी ॥
 लाज न होति उहै चलिजाती चलि न सकति आवै बिरह ताबरी । सूरदास प्रभु आनि मिलावहु
 ऊधो कीरति होइ रावरी ॥ ३२ ॥ अथ यशोमति संदेश उद्धवप्रति ॥ राग धनाश्री ॥ ऊधो तिहारे पाँइ लागतिहौं कहि
 यो श्यामसों इतनी बात । इतनी दूर बसत क्यों बिसरे अपनी जननी ताता ॥ जादिनते मधुपुरी सिधारे
 श्यामे मनोहर गात । तादिनते मेरे नैन पपीहा दरश प्यास अकुलात ॥ जहाँ खेलनको ठौर तुम्हारे
 नंद देखि सुरझात ॥ जो कबहुं उठिजात खरिकलौं गाइ दुहावन प्रात ॥ दुहत देखि औरनके लरिकी
 प्राण निकासि नहिं जात । सूरदास बहुरो कब देखों कोमल कर दधिखात ॥ ३३ ॥ राग मलार ॥ तब
 तुम मेरे काहेको आए । मथुरा क्यों न रहे यदुनंदन जोपै कान्ह देवकी जाए ॥ दूध दही काहेको
 चोरयो काहेको बन गाइ चराए । अघ अरिष्ट काली नहिं काढयो विष जलते सब
 सखा जिआए । सूरदास लोगनके भोरए काहे कान्ह अब होत पराए ॥ ३४ ॥ राग सोरठ ॥
 ऊधो हम ऐसे नहिं जानी । सुतके हेत मर्म नहिं पायो प्रगटे शारंगपानी ॥ निशिवासर छातीसों
 लाई बालकलीला गाइ । ऐसे कबहुं भाग होहिंगे बहुरो गोद खेलाइ ॥ को अब ग्वाल सखा सँग
 लीन्हें सांझ समै ब्रज आवै । को अब चोरि चोरि दधि खैहै मैया कवन बोलावै ॥ वि-
 दरत नहिं वज्रकी छाती हरि वियोग क्यों सहिए । सूरदास अब नंदनंदन बिनु कहो कौन बिधि
 रहिए ॥ ३५ ॥ राग धनाश्री ॥ ऊधो जो अब कान्ह न ऐहैं । जिय जानौ अरु हृदय बिचारो हम अतिही
 दुख पैहैं ॥ पूछो जाइ कवनको ठोटा तब कहा उत्तर दैहैं ॥ खायो खेले संग हमारे याको कहा
 बतैहैं ॥ गोकुल अरु मथुराके वासी कहाँलौं झूठै कैहैं । अब हम लिखि पठयो चाहत हैं उहां पत्त
 नहिं पैहैं ॥ इन गायन चरवो छाँडो है जो नहिं लाल चरैहैं । इतने पर नहिं मिलत सूर प्रभु फिरि पाछे
 पछितैहैं ॥ ३६ ॥ राग सारंग ॥ तबते छीन शरीर सुभाहु । आनंद मिट्यो मिटी सब लीला काहु न मन उत्साहु ॥
 नंद गोप पिछवारे डोलत नैनन नीर प्रवाहु । आनंद मिट्यो मिटी सब लीला काहु न मन उत्साहु ॥
 एक बेर बहुरो ब्रज आवहु दूध पतूखी खाहु । सूर सुपथ गोकुल जो बैठहु उलटि मधुपुरी जाहु ॥ ३७ ॥
 ॥ राग नदा ॥ कहियो यशुमतिकी आशीसा जहाँ रहो तहां नंदलाडिलो जीवो कोटि वरीस ॥ मुरली दई दोह-
 नी घृत भारि ऊधो धारि लई शीश । इह घृत तौ उन्हीं सुरभिनको जो प्यारी जगदीश ॥ ऊधो
 चलत सखा मिलि आए ग्वाल बाल दश बीश । अबके इहां ब्रज फेरि बसावो
 सूरदासके ईश ॥ ३८ ॥ अथ सखा वचन ॥ राग बिलावल ॥ ऊधो देखतहो जैसे ब्रजवासी । लेत उसाँस नैन जल
 पूरित सुमिरि सुमिरि अविनासी ॥ भूलि न उठत यशोदा जननी मनो भुअंगम डासी । छूटत
 नहीं प्राण क्यों अटके कठिन प्रेमकी फाँसी ॥ आवत नहीं नंद मंदिरमें बह्यो फिरत पनियासी ।
 प्रेम न मिले घेनु दुर्बल भई श्याम विरहकी त्रासी । गोपी ग्वाल सखा बालक सब कहूँ न सुनि-
 यत हासी ॥ काहे दियो सूर सुख में दुख कपटी कान्ह लवासी ॥ ३९ ॥ उद्धववचन ॥ राग सारंग ॥ धन्य नंद धन
 यशुमति रानी ॥ धन्य कान्ह प्रकटे सुखदानी ॥ धन्य ग्वाल धन्य धन्य गोपिका जेहि खेलाए शारंग पानी ।
 धन्य ब्रज भूमि धन्य वृंदावन जहाँ अविनाशी आए ॥ धन्य धन्य सूर आजु हमहुं जो तुम सब देखे
 आए ॥ ४० ॥ अथ दूसरी लीला ॥ भवैगीत ॥ गोपीवचन ॥ राग आसावरी ॥ छंद त्रिभंगी ॥ हरि रथ रतन जरयो
 अनूप दिशाते आवै । जेहि मग कृष्ण गयो तेहि मगते दर्शवै ॥ वै मगते आवै सखन बोलावै
 देखो नैन बिचारी । मुकुट कुंडल तनु पीत बसन कोउ गोविंदकी अनुहारी ॥ वैतो भूषण परखन
 लागी तब लगि निअरे आए । ऊधो जिय जानी मन कुँभिलानी कृष्ण संदेश पठाए ॥ १ ॥ चली

चली पृष्ठें कछु बातैं । कहि कहि ऊधो हरि कुशलातैं ॥ छंद ॥ कहि कुशलातैं सांचीबातैं आवन कछो
 हरि नाथै । कै गरवाने राजसभा अब जीवत हम न सुहाथै ॥ ठाढी तनु कापै टेरै झांकै बार बार
 अकुलाइ । अब जिय कछु कपट जिन राखो वृद्धैं सौह दिवाइ ॥ २ ॥ कहो ऊधो तुम क्यों ब्रज
 आए । तब हँसि कछो हम कृष्ण पठाए ॥ छंद ॥ कृष्ण पठाये तो ब्रज आए कहत मनोहर बानी ।
 सुनहु संदेशो तजहु अँदेशो हो तुम चतुर सयानी ॥ गोप सखा जिय हिय जिन राखौ अविगत
 है अविनासी । मोहन माया बैर न दाया सब घट आपु निवासी ॥ ३ ॥ ऊधो जिन इह कहो
 तुम प्रभुकी प्रभुताइ । सुनि जिय अंगहि बढ्यो रिसि सही न जाइ ॥ रिस सही ना जाइ अंगहि
 बढ्यो अति इह तुमरी चतुराइ । दासी कुबिजा सेजकी संगत कवन वेद मतिपाइ ॥
 तुमहूँ भली कहनको आए हमको भली सु बानी । जो कछु बस्तु देखिअत नैननसों क्यों
 नहि मनमानी ॥ ४ ॥ गोबिंदकी बाणी सब कोइ जानी । परबश भई कहत अब सोई मानी ॥
 ॥ राग छंद ॥ सब कोइ जानै क्यों मनमानै अब न कछु कहि आवै । जो कछु कुबिजाके मनभावै सोइ
 सोइ नाच नचावै ॥ वाको न्याउ दोष सब हमको कर्मरेखको जानै । गोरस देखि जो राख्यो गाहक
 बिधिनाकी गतिआनै ॥ ५ ॥ ऊधो कमलनयनसों कहियो जाइ । एक बेर ब्रज देखो आइ ॥ राग छंद ॥
 जिहके प्रीति निरंतर मनमें सो मन क्यों समुझावै । शंकर ब्रह्म शेष अरु सुरपति कोउ हरि दर-
 शन पावै ॥ वैसे राज विलास कोलाहल घर घर मखन हरई । मूरदास प्रभु मिलत बहुत सुख विरह
 श्वास कत जरई ॥ ६ ॥ ४१ ॥ उद्धव वचन ॥ राग भैरव ॥ मैं तुमपै ब्रजनाथ पठायो । आतमज्ञान सिखावन
 आयो ॥ आपुहि पुरुष आपुही नारी । आपुहि वानप्रस्थ ब्रह्मचारी ॥ आपुहि पिता आपुही माता ।
 आपुहि भगिनी आपुही भ्राता ॥ आपुहि पंडित आपुहि ज्ञानी ॥ आपुहि राजा आपुहि रानी ॥
 आपुहि धरती आपु अकासा । आपुहि स्वामी आपुहि दासा ॥ आपुहि ग्वाल आपुही गाइ ।
 आपुहि आप चरावन जाइ ॥ आपुहि भवैरा आपुहि फूल । आतमज्ञान बिना जगमूल ॥ राव रंक
 दूजा नहिं कोई । आपुहि आप निरंजन सोई ॥ इहि प्रकार जाको मनलागै । जरा मरनसे भवभय
 भागै ॥ योगसमाधि ब्रह्म चित लावहु । ब्रह्मानंद तबहिं सुख पावहु ॥ ७ ॥ गोपी उद्धवप्रति उत्तर ॥
 योगी होइ सो योग बखानै । नौधाभक्ति दास रति मानै ॥ भजनानंद अली हम प्यारो । ब्रह्मानंद
 सुख कौन बिचारो ॥ बतियां रचिपचि कहत सयानी । अँखियाँ हरिके रूप लोभानी ॥
 व्यावर बिथा न बंझा जानै । बिन देखे कैसे रतिमानै ॥ पुनि पुनि पुनि वोही सुधि आवै । कृष्णरूप
 बिन और न भावै ॥ नवकिशोर जेहि नैन निहारयो । कोटि योग वा छविपर वारयो ॥ शीश
 मुकुट कुंडल बनमाला । क्यों बिसरै वे नैन विशाला ॥ मृगमद मलय अलक धुँधुरारे । उन मोहन
 मन हरे हमारे ॥ भुकुटी कुटिल नासिका राजै । अरु न अधर मुरली कल बाजै ॥ दाडिम दशन
 दामिनि दुति सोहै । मृदु मुसुकान जो तन मन मोहै ॥ चंद्रझलक कंठ मणि मोती । दूर करत
 उडुगणकी ज्योती ॥ कंकन किंकिणि पदिक विराजै । गजगति चाल नूपुर कल बाजै । वनके
 धातु चित्र तनुकिए । श्रीवत्स चिह्न राजत अतिहिए ॥ पीतवसन छवि वरणि न जाई । नखशिख
 सुंदर कुँवर कन्हई ॥ रूपराशि ग्वालनको संगी । कब देखै वह ललित त्रिभंगी ॥ जो तू हितकी
 बात बतावै । मदनगोपालहि क्यों न मिलावै ॥ ८ ॥ उद्धववचन ॥ जाके रूप बरन वपु नाहीं ।
 नैन मूँदि चितवो चितमाहीं ॥ हृदय कमलमें ज्योति विराजै । अनहद नाद निरंतर बाजै ॥
 इडा पिंगला सुषमन नारी ॥ सहज सुतामें वसै मुरारी । माता पिता न दारा भाई ॥

जल थल घट घट रह्यो समाई ॥ इहि प्रकार भव दुख सरितरहू । योगपंथ क्रम क्रम अनुसरहू ॥
 ॥ ९ ॥ उत्तर गोपिका ॥ हम ब्रजबाल गोपाल उपासी । ब्रह्मज्ञान सुनि आवै हाँसी ॥ ब्रजमें
 योगकथा तैं लयायो । मनो कुबिजा कूबर माँह दुरायो ॥ श्यामसौं गाहक पाइ देखायो । सो माधो
 तुम हाथ पठायो ॥ हम अवला ठगी अल्प अहीरी । वहां भलो ठग्यो कंसकी चेरी । राम
 जन्म सीता जो दुराई । भली भई कुबिजा वधूपाई ॥ तब सीता वियोग दुख पायो । अब कुबिजा
 पाइ हियो सिरायो ॥ इह नीरस ज्ञान कहा लै कीजै । योगमोट दासी शिर दीजै ॥ १० ॥ उद्धववचन ॥
 वै परब्रह्म अच्युत । अविनाशी । त्रिगुणरहित प्रभु धरै न दासी ॥ नहिं दासी ठकुराइन कोई । जहां
 देखो तहां ब्रह्म है सोई ॥ अपने औरै ब्रह्महि जानो । ब्रह्म बिना दूजो नहिं मानो ॥ ११ ॥ गोपिकावचन ॥
 खरे करव अलियोग सँवारो । भक्त विरोधी ज्ञान तुम्हारो ॥ कहा होत उपदेशे तेरे । नैन सुवस
 नाहीं अलि मेरे ॥ हरिपथ जोवै छिन छिन रोवै । कृष्णवियोगी निमिष न सोवै ॥ नंदनंदनको
 देखे जीवै । योग पंथ याते नहिं पीवै ॥ जब हरि आवैं तब सच पावै । मोहन मूरति कंठ
 लगावै ॥ दुःसह वचन हमें नहिं भावै ॥ इह योग कथा वोढैकि बिछावै ॥ १२ ॥ उद्धववचन ॥
 ऊधो कहि कहि धनि ब्रजबाला । जिनके सर्वस मदनगोपाला ॥ मैं जो कही सो आवन
 न पाई । तुमरे दरशभक्ति निजमाई ॥ तुम मम गुरु मैं दास तिहारो । भक्ति सुनाइ जगत निस्तारो ॥
 भवै गीत जो सुनै सुनावै । प्रेम भक्ति गोपिनकी पावै ॥ सूरदास गोपी बडभागी । हरि दरशनकी
 ढवरी लागी ॥ १३ ॥ १४ ॥ अथ दूसरी लीला भँवरगीत ॥ गोपीवचन जैतश्री ॥ ऊधोको उपदेश सुनो किन
 कानदै । निर्गुण सँदेशो श्याम पठायो आनदै ॥ कोउ आवत मोहि वोर जहां नंदसुवन
 पधारे । सरस वेणुध्वनि होहि मनो आए ब्रजप्यारे ॥ धाये सब गलगाजिकै ऊधो देखे
 जाइ । लै आए ब्रज राज गृह आनंद उर न समाइ ॥ अर्घ्य आरती तिलक दूब दधि
 माथेमें दीनी । कंचन कलश भराइ और परिकर्मा कीनी ॥ गोपभीर आँगन भई जुरि बैठे
 इकजाति । जलझारी आगे धरे पँछत हरि कुशलाति ॥ कुशल क्षेम वसुदेव कुशल देवै
 कुबिजाऊ । कुशल क्षेम अकूर कुशल नीके बलदाऊ ॥ पँछि कुशल गोपालकी रहे सकल गहि
 पाँइ । प्रेम मगन ऊधो भए पेखत ब्रजके भाइ ॥ मनमें ऊधो कहै ऐसी बूझिए न गोपालहि । ब्रजके
 हेतु बिसारि योग सिखवैं ब्रजबालहि ॥ इनकी प्रीति पतंगलौं जारतहै सब देह । वै हरि दीपक
 ज्योति ज्यों नेक न उनके नेह ॥ तब ऊधो करलै लिखी हरिजूकी पाती । पढी परत नहिं नेक
 रहे गंभीर करि छाती ॥ पाती बाँचि न आवई रहे नयन जल पूरि । देखि प्रेम गोपीनके ऊधो ज्ञान
 गर्व गयो दूरि ॥ फिरि इत उत बहराइ नीर नैननके शोधे । ठानी कथा प्रबोधि तबहिं फिरि गोप समोधे ॥
 जो व्रत सुनि वर ध्यानहीं पावाहिं नर अवतार ॥ ते व्रत सिखैं सब गोपिका देहि विषय बिसारे ।
 सुनि ऊधोके वचन रही नीचै कै तोरे । मानों मांगति सुधा आनि व्यालनि विष जारे ॥ हम
 अबलौं कहा जानई योग शुक्तिकी रीति । नंदनंदन व्रत छाँडिकै को लिखि पूजै भीति ॥
 अगमते अगह अपार आदि अविगत है सोऊ । आदि निरंजन नाम ताहि रंजै सब
 कोऊ ॥ नयन नासिका अग्रहै तहाँ ब्रह्मको बास । अविनाशी बिनशै नहीं सहज
 ज्योति परगास ॥ ऊधो जो पग पानि नहीं ऊखल क्यों बांधे । नयन नासिका मुख
 न चोरि दधि कौने खाधे । तब जो खिलायो गोदमें बोलि तोतरे बैन । ऊधो ताको बतावही जाहि न
 सूझै नैन ॥ माया अनित्य अधारी ता लोचन दुइ नापे । ज्ञान नयन अनंत ताहि सूझै परमापै ॥

वृद्धो निगम बोलाइकै कहैं भेद समझाइ । आदि अंत जाको नहीं कौन पिता को माइ ॥ ऊधो घर
 लागे अरु घर कहो मन कहा धावै । अपनो घर परिहरै कहो को घर बतावै ॥ मूरख याद्व जातिहैं
 हमहिं सिखावहिं योग । हमसों भूली कहतहैं हम भूली किधौं लोग ॥ प्रेम प्रेमते होइ प्रेमते परहै
 जाँए प्रेम बंधो संसार प्रेम परमार्थ लहिए ॥ एकै निश्चय प्रेमको जीवनमुक्ति रसाल । सांची निश्चय
 प्रेमको जिहिरे मिलैं गोपाल ॥ ऊधो कहि सतभाव न्याय तुम्हरे मुख सांचि । योगप्रेम रस कथा
 कहो कंचनकी कांचि ॥ जाके परहै हूजिए गहिए सोई नेम । मधुप हमारी सों कहो योग
 भलो किधौं प्रेम ॥ सुनि गोपीके बयन नेम ऊधोके भूले । गावत गुण गोपाल फिरत कुंजनम
 फूले ॥ खन गोपी कै पाँइ परै धन्य सोइहै नेम । धाइ धाइ दुम भेंटई ऊधो छाके प्रेम ॥ धनि
 गोपी धनि ग्वाल धन्य सुरभी वनचारी । धनि इहां पावन भूमि जहां गोविंद अभिसारी ॥ उपदेश
 न आये हुते मोहिं भयो उपदेश । ऊधो यदुपतिपै चले धरे गोपकी भेष ॥ भूले यदुपति नाव
 कहो गोपाल गोसाईं । एकबार ब्रज जाहु देहु गोपिन देखराई ॥ वृंदावन सुख छाँडिकै कहां
 बसेहो आइ ॥ गोवर्धन प्रभु जानिकै ऊधो पकरे पाँइ । ऊधो ब्रजको प्रेम नेम वरणो सब आई ।
 उमँग्यो नैनन नीर बात कछु कह्यो न जाई ॥ सूरु श्याम भूलत भए रहे नैन जल छाइ । पोंछि
 पीतपट सों कह्यो भले आए योग सिखाइ ४३ ॥ इति भवैगीत ॥ अध्याय ॥ ४८ ॥ अथ उद्धवमथुरा आए श्रीकृष्णप्रति
 वदति ॥ राग सारंग ॥ ऊधो जब ब्रज पहुँचे जाइ । तबकी कथा कृपाकरि कहिए हम सुनिहैं मन
 लाइ । बाबानंद यशोदा मइया मिले सबन हित आइ । कबहुं सुरति करत माइनकी किधौं रहे
 बिसराइ ॥ गोप सखा दधिखात भात वन अरु चाखते चखाइ । गऊ बच्छ मुरली सुनि उमडत अबहिं
 रहत केहि भाइ ॥ गोपिन गृह व्योहार बिसारे मुख सन्मुख सुखपाइ । पलकवोट निमि पर अन
 खाती यह दुख कहा समाइ ॥ एक सखी उनमें जो राधा जब हो इहँते गयो । तब ब्रजराज सहित
 सब गोपिन आगे हैं जो लयो ॥ उतरे जाइ नंदबाबाके सबही शोध लह्यो । मेरी सों सांची कहु
 ऊधो मैया कछु कह्यो ॥ बारंबार कुशल पूछी मोहिं लै लै तुम्हरो नाम । ज्यों जल तृषा बढी
 चातक चित कृष्ण कृष्ण बलराम ॥ सुंदर परम विचित्र मनोहर वह मुरली देख चाली । लई
 उठाइ उरलाइ सूर प्रभु प्रीति आनि उरशाली ॥ ४४ ॥ सुनिए ब्रजकी दशा गोसाईं ।
 रथकी ध्वजा पीतपट भूषण देखतही उठि धाई ॥ जो तुम कही योगकी बातें ते मैं
 सबैं सुनाई । श्रवण सुँदि गुण कर्म तुम्हारे प्रेम मगन मनगाई ॥ औरो कछु संदेश सखी इक
 कहत दूरि लौ आई । हुतो कछु हमहूसों नातो निपट कहा बिसराई ॥ सूरदास प्रभु वनविनोद
 करि जो तुम गऊ चराई । ते गाय ग्वालन हेरी देय हरति मानों भई पराई ॥ ४५ ॥ राग सारंग ॥ ब्रजके
 विरही लोग दुखारे । बिन गोपाल ठगेसे ठाढे अतिदुर्बल तनुकारे ॥ नंद यशोदा मारग जोवत
 नित उठि साँझ सवारे । चहुँ दिशि कान्ह कान्ह करि टेरत अँसुवन बहत पनारे ॥ गोपीगाइ ग्वाल
 गोसुत सब अतिही दीन बिचारे । सूरदास प्रभु बिन यों शोभित चंद्र बिना ज्यों तारे ॥ ४६ ॥ राग
 केदारे ॥ हरिजी सुनो वचन सुजाना विरह व्याकुल छीन तन मन हीन लोचन प्राना ॥ इहँहै संदेशा ब्रज
 को माधो सुनहु निदान । मैं सबै ब्रज दीन देखे ज्यों बिना निर्मान ॥ तुम बिना शोभा न ज्यों गृह-
 बिना दीप भयान । आस श्वास उसाँस घटमें अवध आशाप्रान ॥ जगत जीवन भक्त पालन
 जगतनाथ कृपाल । करि जतन कछु सूरके प्रभु जो जीवै ब्रजबाल ॥ ४७ ॥ राग जैतथी ॥ सुनहु
 श्याम वै सब ब्रजवनिता विरह तुम्हारे भई बावरी । नाहिन नाथ और कहि आवत छाँडि

जहां लगी कथा रावरी ॥ कबहुँ कहत हरि माखन खायो कौन वसैया कठिन गाँव री । कबहुँ कहत
 हरि ऊखल बांधे घर घर ते लै चलौ दाँव री ॥ कबहुँ कहत ब्रजनाथ बनगए जोवत मगभई दृष्टि
 झाँव री। कबहुँ कहत वा सुरली महियाँ लै लै बोलत हमारो नाँउ री ॥ कबहुँ कहत ब्रजनाथ साथ ते
 चंद्र उग्यो है एहि ठाँव री। सूरदास प्रभु तुम्हरे दरशाबिनु अब वह सूरति भई साँवरी ॥४८॥ राग विहागरो ॥
 हरि आए सो भली कीन्ही । मोहि देखत कहि उठी राधिका अंक तिमिरको दीन्ही ॥ तनु अति
 कँपति विरह अति व्याकुल उर धुकधुकी खेद कीन्ही । चलत चरणगहि रही गई गिरि खेद सलिल
 भयभीनी ॥ छूटी वट भुज फूटी बलया टूटी लरफटी कंचुकी झिनी । मानो प्रेमके परन परेवा
 याहीते पडि लीन्ही ॥ अवलोकति इहिभाँति रमापति मानो छूटी अहिमाणि छीनी । सूरदास प्रभु
 कहाँ कहाँ लगी है अयान मति हीनी ॥४९॥ मलार ॥ सुनो श्याम यह बात और कोउ क्यों समुझाय कहै।
 दुहुँदिशिको रति विरह विरहिनी कैसेकै जो सहै । जब राधे तबहीं सुख माधो माधो रटतरहै । जब
 माधो होइजात सकल तनु राधा विरह दहै । उभयअग्र दौदारु कीट ज्यों शीतलताहि चहै । सूर-
 दास अति विकल विरहिनी कैसेहु सुख न लहै ॥ ५० ॥ राग केदारो ॥ चितदै सुनो श्याम प्रबीन। हरि तुम्हारे
 विरह राधा मैं जु देखी छीन ॥ तज्यो तेल तमोल भूषण अंग वसन मलीन । कंकना करवाम
 राख्यो गढी भुजगहि लीन ॥ जब संदेशा कहन सुंदरि गवन मोतन कीन। खसि सुद्रावलि चरन अरुझी
 गिरी धरनि बलहीन ॥ कंठवचन न बोल आवै हृदय परिहस भीन। नैन जल भरि रोइ दीनो ग्रसित
 आपद दीन ॥ उठी बहुरि सँभारि भट ज्यों परम साहस कीन । सूर प्रभु कल्याण ऐसे जीवहि
 आशालीन ॥ ५१ ॥ भरि भरि लेत ऊरध श्वास । साँवरे ब्रजनाथ तुमबिनु दुखित पंचशर त्रास ॥ अ-
 मित पीर अधीर डोलत समर मीन बिलास । तेई सुख दुख भए दारुण मिलि गए रस रास ॥
 निगम गुरुजन लोगन डरत जगकरत उपहास । सूर श्याम बिनु विकल विरहिनी मरत दरश विन
 प्यास ॥५२॥ राग धनाश्री ॥ उमँगि चले दोउ नैन विशाल । सुनि सुनि यह संदेश श्यामघन सुमिरि
 तुम्हारे गुण गोपाल ॥ आनन वपु उरजनिके अंतर जलधारा बाढी तेहिकाल । मनुयुगजलज सुमेर
 शृंगते जाइ मिले सम शशिहि सनाल ॥ भीजे विय अंचर उर राजित तिनपर वर मुकुतनकी
 माल । मानों इंदु आये नलिनी दल लंकृत अमी ओस कण जाल ॥ कहा वह प्रीति रीति राधासों
 कहाँ यह करनी उलटी चाल । सूरदास प्रभु कठिन कथनते क्यों जीवै बिरहिनि बेहाल ॥ ५३ ॥ राग
 मारु ॥ तुम्हरे बिरह ब्रजनाथ राधिका नैनन नदी बढी । लीने जाति निमेष कूल दोउ एते यान चढी ॥
 गोलकनाउ निमेष न लागत सो पलकनि वर बोरति । ऊरध श्वास समीर तरंगिनि तेज तिलक तरु
 तोरति ॥ कज्जल कीच कुचील किए तट अंबर अधर कपोल । थकि रहे पथिक सुयश हित हीके
 हस्त चरण मुख बोल ॥ नहिँब और उपाय रमापति विन दरशन जो कीजै । अंशु सलिल बूडत सब
 गोकुल सूर सुकर गहि लीजै ॥५४॥ राग मलार ॥ नैन घट घटत न एक घरी। कबहुँ न मिटत सदा पावस
 ब्रज लागी रहत झरी ॥ विरह इंद्र वरपत निशिवासर इहि अति अधिक करी । उरध उसाँस समीर
 तेज जल उर भुवि उमँगि भरी ॥ वूडति भुजा रोमद्रुम अंबर अरु कुच उच्च थरी। चलि न सकत पथिक
 रहे थकि चंद्रकी चखरी ॥ सब ऋतु मिटी एक भई ब्रज महि यहि विधि उलटि धरी ।
 सूरदास प्रभु तुम्हरे बिछुरे मिटि मर्याद टरी ॥५५॥ राग केदारो ॥ देखी मैं लोचन चुवत अचेत। मनहुँ कमल
 शशि त्रास ईशको मुक्ता गनि गनि देत ॥ द्वार खडी इकटक मग जोवत ऊरध श्वास न लेत ।
 मानहुँ मदन मिले चाहति है मुंचत मरुत समेत ॥ श्रवणन सुनत चित्र पुतरी लौं समुझावत

जित नेत । कहूँ कंकन कहूँ गिरी मुद्रिका कहूँ ताटक कहूँ नेत ॥ मनहु विरह दव जरत विश्व
 सब राधा रुचिर निकेत । धुज होइ सुखिरही सूरज प्रभु बधी तुम्हारे हेत ॥ ६६ ॥ राग मलार ॥ नैननि होइ
 बदी बरषासों । राति दिवस बरसत झर लाए दिन दूरी करखासों ॥ चारि मास बरषे जल खूटे
 हारि समुझ उनमानी । एतेहू पर धार न खंडित इनकी अकथ कहानी ॥ एते मान चढाइ चढी अति
 तेजी पलककी सीव । मैं दिन दिन उन मानो महाप्रलयकी नीव ॥ तुमपै होइ सो करहु कृपा
 निधि ए ब्रजके व्यवहार । अबकी बेर पाछिले नाते सूर लगावहु पार ॥ ६७ ॥ राग गौरी ॥ ब्रजते द्वै ऋतु
 पैनगई । ग्रीष्म अरु पावस प्रवीन हरि तुम बिनु अधिक भई ॥ उरध उसाँस समीर नैन घन सब
 जल योग जुरे । बरषि प्रगट कीन्हें दुख दादुर हुते जु दूरी दुरे ॥ तुम्हरो कठिन वियोग विषम
 दिन कर सम उदो करै । हरिपद विमुख भए सुनु सूरज को इहि ताप हरै ॥ ६८ ॥ राग कान्हरो ॥ नाहिन कछु
 सुधि रही हिण । सुनो श्याम वै सखिहि राधिकहि युगवति जतन किए ॥ कर कंकन कोकिला उडावत
 बिनमुख नाम लिए । सैन सूचना नखनि नितं किसलय श्रवणन शबदाबिए ॥ शशिशंका निशि जाल
 निके मग वसन बनाइ किये । दिशि दिशि शीत समीरहि रोकत अंबर ओट दिए ॥ मृगमद मलै परस
 तनु तलफत जनु विष विषम पिण । जो न इते पर मिलहु सूर प्रभु तौ जान बिजए ॥ ६९ ॥ राग गौरी ॥
 कहाँलौं कहिए ब्रजकी बात । सुनहु श्याम तुम बिनु उन लोगइ जैसे दिवस बिहात ॥ गोपी गाइ
 ग्वाल गो सुत वै मलिन वदन कृषगात । परमदीन जनु शिशिरहि मीहत अंगुज गन बिनपात ॥
 जाकहुँ आवत देखिदूरते सब पूँछति कुशलात । चलन न देत प्रेम आतुर उर कर चरणन लपटात ॥
 पिकचातक बन वसन न पावहि बाइस बलिहि न खात । सूर श्याम संदेशनके उर पथिक न उहि
 मग जात ॥ ७० ॥ राग मलार ॥ ब्रजकी कही न परतिहै बातें । गिरितनयापति भूषण जैसे विरहजरी दिनरा
 तैं ॥ मलिन वसन हरिहित अंतर्गति तनु पीरो जनु पाते । गदगदवचन नैन जल पूरित बिलखि वदन
 कृषगाते ॥ मुक्तो ताते भवन ते बिछुरे मीन मकर बिललाते । सारंगारिषु सुत सुहृदपति बिना दुख
 पावति बहु भाँते ॥ हरि सूर भषन बिना विरहाने छीन भई तनु ताते । सूरदास गोपिन परतिज्ञा
 मिलहु पहिलके नाते ॥ ७१ ॥ राग कल्याण ॥ रहति रैन दिन हरि हरि हरि रट । चितवत इकटक मग
 चकोर लौं जबते तुम बिछुरे नागर नट ॥ भरि भरि नैन नीर ढारतिहै सजल करति अति कंचुकिके
 पट । मनहुँ विरहकी ज्वरता लागि लियो नेम प्रेम शिव शीशसहसघट ॥ जैसे युवके अग्र ओसकण
 प्राण रहत ऐसे अवधिहिके तट । सूरदास प्रभु मिलौ कृपाकरि जेदिन कहे तेउ आए निकट ॥ ७२ ॥
 ॥ राग सारंग ॥ दिनदश घोष चलहु गोपाल । गाइनके अवसेर मिटावहु लेहु आपने ग्वाल ॥ नाचत
 नहीं मोर तादिनते बोले न वर्षाकाल । मृग दुबरे तुम्हारे दरश बिनु सुनत न वेणु रसाल ॥ वृंदावन
 हरयो होत न भावत देखो श्याम तमाल । सूरदास मइया अनाथहै घरुचलिए नँदलाल ॥ ७३ ॥ राग
 सोरठ ॥ ऊधो भलो ज्ञान समुझायो । तुमसों अब यों कहा कहतहैं मैं कहि कहा पठायो ॥ कह-
 वावतहौ बडे चतुरपै वहां न कछु कहि आयो । सूरदास ब्रजवासिनको हित हरि हिय मांझ दुरायो ॥
 ॥ ७४ ॥ राग सारंग ॥ मैं समुझाई अति अपनोसो । तदपि उन्हें परतीति न उपजी सबै लखो सपनो-
 सो ॥ कह्यो तुम्हारो सबै कहीमैं और कछु अपनी । श्रवणन वचन सुनतहैं उनके जो घटमाँह अक-
 नी ॥ कोई कहै बात बनाइ पचासक उनकी बात जो एक । धन्य धन्य जो नारी ब्रजकी बिन
 दरशन इहि टेक ॥ देखत उमँग्यो प्रेम यहांके धरी रही सब रोयो । सूर श्याम हौं रहौं ठगोसो ज्यों
 मृग चौको भोयो ॥ ७५ ॥ बातें सुनहु तौ श्याम सुनाऊं । वै उमँगी जलनिधि तरंग ज्यों तामें थाह

न पाऊं ॥ कौन कौन को उत्तर दीजै तातें भग्यो अगाऊं । वे मारे शिर पटिया पारे कंथा काहि उठाऊं ॥ एक अँधेरो हियेकी फूटी दौरत पहिर खराऊं । सूर सकल षट् दर्शन वैहैं बारहखरी पठाऊं ॥ ६६ ॥ सुनि लीन्हों उनहींको कह्यो । अपनी चाल समुझि मनहीं मन गुनि अरगाइ रह्यो ॥ अबलनि सों कही परि जापै बात तोरि कनि कानि । अनबोले पूरो दै निबह्यो बहुत दिन नको जानि । जानि बूझि कैहो कत पठयो शठ बावरो अयानो । तुमहं बूझि बहुत बातनको वहां जाहु तौ जानौ ॥ अज्ञाभंग होय क्यों मोपै गयउ तुम्हारे ठीले ॥ सूर पठावनहीकी वोरी रह्यो जु गजसों लीले ॥ ६७ ॥ राग मलार ॥ हो हरि बहुत दाँउदै हारचो । आज्ञा भंग होइ क्यों मोपै वचन तुम्हारे पारचो ॥ हारि मानि उठि चलयो दीनहै जानि आपुन पै कैहु । जानिलेहु हरि इतनेही में कहा करैनी मनको वैदु ॥ उत्तर को उत्तर नहिं आवत तब उनहीं मिलि जातु । मेरी किती बात ब्रह्माको अर्थ वचन में मातु । अपनो चाल समुझि मनहीं मन घलयो बसीठी तोरि । सूर एकहू अंग न काची मैं देखी टकटोरि ॥ ६८ ॥ कहिवे में न कछु शक राखी । बुधि विवेक उनमान आपने सुख आई सो भाखी ॥ हौ मरि एक कहौं पहरकमें वै छिनमाँझ अनेक । हारि मानि उठि चलयो दीनहै छाँडि आपनी टेक ॥ हौं पठयो कत कौने काजै शठ मूरख, जो अयानो । तुमहिं बुझावहु ते बातनकी वहां जाहु तौ जानो ॥ श्रीसुखकी सिखई ग्रंथों कत ते सब भई कहानी । एकहोइ तौ उत्तर दीजै सूर सु मठी उभानी ॥ ६९ ॥ राग सोरठ ॥ माधोजी मैं योगको बोझा भरचो । श्याम उन सुख विधु वचन सुधारस सुनि सुनि कछु न कह्यो ॥ तौलौं भार तरंग मो उदधि सखी लोचन उमह्यो । तुम जो कह्यो ज्ञानको मारग सो वातें जो बह्यो ॥ मोहिं आश्चर्य एक जो लागत तौ कैसे जात सह्यो । सूर दास प्रभु सखा सयानी लै भुज बीच गह्यो ॥ ७० ॥ राग नट ॥ कोऊ सुनत न बात हमारी । कहा मानै योग युक्ति यादवपति प्रगट प्रेम ब्रजनारी ॥ कोऊ कहति इंद्र जब बरषो टेकि गोवर्धन लेत । कोऊ कहति हरि गए कुंजवन शीश धाम वे देत ॥ कोऊ कहत नागकारे सुनि गए हरि यमुनातीर । कोऊ कहै गए अघासुर मारन संगलि ए बलवीर ॥ कोऊ कहै ग्वाल बाल सँग खेलत वनमें जाइ लुकाने । सूर सुमिरि गुणमाथे तुम्हारे कोऊ कह्यो नामानै ॥ ७१ ॥ राग सारंग ॥ हरि तुम्हैं बारंवार सँभारै । कहहु तौ सब युवतिनके नाम कहो जे हितसों उर धारै ॥ कबहुँक आँखि मूँदिकै चाहति सब सुख अधिक तिहारे । तब प्रसिद्ध लीला सँग बिहरत अबचित डोर विहारे ॥ जाको कोऊ जेहि विधि सुमिरे सोउ तेही हित मानै । उलटीरीति सबै तुम्हरेहै हमतो प्रगट कहिजानै ॥ जो पतिआहो तुम पठवत लिखि बीच समुझि सब पाउ । सूर श्याम है पलक धाममें लखि चित कत बिललाउ ॥ ७२ ॥ माधोजू कहा कहौं उनकी गति । देखत बनै कहत नहिं आवै परम प्रतीति तुमते रति ॥ यद्यपि हो पडमास रह्यो ढिग लही नहीं उनकी मति । कासों कहौं सबै एकै बुधि परबोधी मानै नाहीं अति ॥ तुम कृपालु करुणामय कहियत ताते मिलत कहा क्षति । सूर श्याम सोईपै कीजै जाते तुम पावहु पति ॥ ७३ ॥ तुम्हारोइ चित्र बनाउ कियो । तब को इंद्रु सम्हारि तुरतही मनसिज साजि लियो ॥ ब्रति गहि युग अंगुलीके बीचै उन भरि पानि पियो । पुरप्रति करति लेखको प्रारंभ तबहिं प्रहार कियो ॥ वै पथ विकल चकित अति आतुर भर्मत हेतु दियो । भृति बिलंबि पृष्टिदै श्यामा श्यामै श्याम वियो ॥ या गति पाइ रही राधा अब चाहति अमृत पियो ॥ सूरदास प्रभु प्रति उलटि परी है कैसे जात जियो ॥ ७४ ॥ राग केदारो ॥ अब जिनि बाँधि वेहि उराहु । दूध दधि माखन मनोहर डारि देहु अरु खाहु ॥ सदा बैठे घोष रहियो बन न दैहै जा

न । पलकहु भरि दुख न देंहैं राखि है ज्यों प्राण ॥ सब तिहारो कहे करिहैं वचन माथे मानि ।
 परम चतुर सुजान ईते मांझ लीजो जानि ॥ अब न कौनो चूक करिहैं यह हमारे बोल । किंकिरि
 निकी लाज धरि ब्रज सुबस करहु निटोल ॥ समुझि निज अपराध करनी नारि नावति नीचि ।
 बहुत दिनते बरति है कै आंखि दीजै सीचि ॥ मनासि वचन अरु कर्मना कछु कहति नाहिंन
 राखि । सूर प्रभु यह बोल हृदय सातराजा साखि ॥ ७५ ॥ राग सारंग ॥ कहत न बनै ब्रजकी रीति । नाथ
 मम शठको पढ्यो भयो देखि उनकी प्रीति ॥ युवति वल्लभ कत कहावत करत सकल अनीति । मोहि तौ
 यह कठिन औरो क्यों करिहैं परतीति ॥ सुनौ धौं दै कान अपनी लोक लोकनि कीति । सूर प्रभु
 अपनी खचाई रही निगमन जीति ॥ ७६ ॥ राग नट ॥ परम वियोगिनी सब ठाढी । ज्यों जल हीन दीन
 कुसु दिनि वन रवि प्रकाशकी डाढी ॥ जिहि विधि मीन सलिल ते बिछुरे तिहि अति गति अकुलानी ।
 सुखे अधर कहि न आवै कछु वचन रहित सुखवानी उन्नत श्वास विरह विरहातुर कमलबदन कुम्हि
 लानी । निंदतिनैन निमेष छिनहि छिन मिलन कठिन जिय जानी । बिनु बुधि बल विचित्र कृत
 शोभित चलि न सकी पचिहारी । सूरदास प्रभु अवधि गयो नतो प्राण तजत ब्रजनारी ॥ ७७ ॥ राग मारू ॥
 सब ब्रज घर घर एकै रीति । ज्यों कुरुखेत गडेको सोनौ त्यों प्रभु तुम्हरी प्रीति ॥ वै सब परम
 विचित्र सयानी अरु सबही जग कीति । उनको ज्ञान सुनतही शठ भयो ज्यों बहु दिनकी भीति ॥
 एकै गहन धरी उन हठ करि मेटि वेद विधि नीति । गोपवेष निज सूर श्याम ले रही विश्व वर जीति ॥
 ॥ ७८ ॥ राग केदारी ॥ ब्रजजन दुखित अति तनु छीन । रटत इक टक चित्र चातक श्यामघन तन लनि ॥
 नाहिं पलटत वसन भूषन दृगन दीपक तात । मलिन वदन बिलखि रहत जिमि तरनि हीन
 जलजात ॥ कहन जो तुम कहेउ सो रति मति पच्यो करि उपदेश । धरत नलनी बूँद ज्यों जल
 वचन नहिं परवेश ॥ धरे मुरली मोर चंद्रिका पीतपट बनमाल । रही वह छबि एक अंगनि लपट
 श्याम तमाल ॥ दिवस बितवति सकल जन मिलि कथति गुण बलवीर । रैनि उडुपति निरखि
 तलफति मीन ज्यों जल तीर ॥ हौंहो करुणानाथ बंधो कहेउ ऊधो गहि पाइ । सूर प्रभु अब दरश
 दै करि लेहु मरति जिआइ ॥ ७९ ॥ राग सारंग ॥ तबते इन सबहिन सचुपायो । जबते हरि संदेश तुम्हारो
 सुनत तवारो आयो ॥ फूले व्याल दुरेते प्रगटे पवन पेट भरि खायो । फूचो यश मृचोको चरणन तेहु
 तौ सब बिसरायो ॥ निकसि कंदराहूते केहरि शिरपर पूछ हिलायो । गह्वरते गजराज आइ अंगही
 सर्व गर्व बढ़ायो ॥ ऊंचे वैसि विहंगम भाँसै शुक्र बनराइ कहायो ॥ किलकि किलकि कुल सहित आपनी
 कोकिल मंगल गायो ॥ अब जिनि गहर करोहो मोहन जो चाहतहौ ज्यायो । सूर बहुरिहैंहैं
 राधाको सब वैरिनिको भायो ॥ ८० ॥ राग धनाश्री ॥ आजु विरहिनी विरह तुम्हारे कैसो रटत रही ।
 चारि याम निशि तुम्हारोई सुमिरन और न बात कही ॥ बासर कथा कठिन मन करि करि क्रम
 क्रम व्यथा सही । संध्या शशि देखि उठि चली जब अंकन रहत गही ॥ मृगमद मलय कुमकुमा
 उरजल सरिता सेज बही । ते क्यों शीतल होहि सूर प्रभु पिय जू विरह दही ॥ ८१ ॥ राग सारंग ॥ कान्ह
 तुम्हारी विकल विरहिनी विलपति विरह वियोग । अति आरत न सम्हारत तन मन इकटकलोम-
 ग योग ॥ कतर मिलो लोचन वरषत अति दुखमुखके छबि रोयो । राहु केतु मानौ सुमीडि
 विधु आंक छुटावत धोयो ॥ अबला कहा योग मत जानै मन्मथ व्यथाबिगोयो । सूरदास क्यों नीर
 चुवतहैं नीरस बसन निचोयो ॥ ८२ ॥ राग सोरठ माधोजू सुनो ब्रजको प्रेम । बुझि मै षटमास देख्यो
 गोपिकनको नेम ॥ हृदयते नहिं टरत उनके श्याम नाम सुहेत । अँसुव सलिल प्रवाह उर मनौ

अरध नैनन देत ॥ चमर अंचल कुच कलश मनो पाव पाणि चढाइ । प्रगट लीला देखि उनकी कर्म उठती गाइ ॥ देह गेह सनेह अर्पण कमल लोचन ध्यान । सूर उनको भजत देखत फीको लागत ज्ञान ॥ ८३ ॥ माधोजू सुनिये ब्रज व्यवहार । मेरो कह्यो पवनको भुसभयो गावत नंदकुमार ॥ एक ग्वालि गोसुतहैं रँगति एक लकुट कर लेति । एक ग्वालि मंडलीकरि बैठति छाँक बाँटिकै देति ॥ एक ग्वालि नटवत बहुलीला एक कर्मगुण गावति । बहुत भाँति करि मैं समुझाई नेक न उरमें आवति ॥ निशिबासर याही ढँग सब ब्रज दिन दिन नवतनु प्रीति । सूर सकल फीको लागत है देखत वह रँगरीति ॥ ८४ ॥ राग मलार ॥ बातें बूझति यों बहरावति । सुनहु श्याम वै सखी सथानी पावसऋतु राधाहि न सुनावति ॥ घन गर्जत मनु कहत कुशलमति कूँजत गुहा सिंह समुझावति । नहिं दामिनि द्रुम दवा शैलचढि फिरि बयारि उलटी झर धावति ॥ नाहिं न मोर बकत पिक दादुर ग्वालमंडली खगन खिलावत । नहिं नभ वृष्टि झरना झर ऊपर बूँद उचटि इत आवत ॥ कबहुँक प्रगट पपीहा बोलत कहि कुवेष करतारि बजावत । सूरदास प्रभु तुम्हरे मिलन बिन सो बिरहिनि इतनो दुख पावत ॥ ८५ ॥ राग नयानेकहू काहू सोच न कीन्हों । सुन ब्रजनाथ सबनके अवगुण मिलि मिलिहैं दुख दीन्हों ॥ ऋतुवर्षत अनसमै अधममति पिकसहाउ लै धावत । प्रीतम संग न जानि युवती रुचि बोलेहु बोल न आवत ॥ सदा शरदऋतु सकल कलालैं सन्मुख रहत जन्हाइ । सो सितपच्छ कुहू सम बीतत कबहुँ नदेत देखाइ ॥ त्रिविध समीर सुमन सौरभ मिलि मत्त मधुपगुंजार । जोइ जोइ रुचै सु कियो बाँधि बल तजि मन सकुच बिचार ॥ रतिपति अति अनीति कीवैको कोटिधूमध्वजमानो ॥ लैकर धनुष चितै तुम्हरो मुख अब बोलै तब जानौ ॥ इहि विधि सबन वीन पायो ब्रज काढत बैर दुरासी ॥ सूरदास प्रभु बेगि मिलहु अब पिशुन करत सब हाँसी ॥ ८६ ॥ राग सारंग ॥ सबते परम मनोहर गोपी । नैदनंदनके नेह मेह जिनि लोक लीक लोपी ॥ बरि कुबिजाके रंगहि राचे तदपि तजी सोपी । तदपि न तजै भजै निशि बासर नेकहू न कोपी ॥ ज्ञानकथा कीमथि मन देखो ऊधो बहुधोपी । टेरति घरी छिन नेक न अँखिया श्यामरूप रोपी ॥ जे तिहि तिहि हरिके अवगुणकी ते सबई तोपी । सूरदास प्रभु प्रेम हेम ज्यों अधिक ओष ओपी ॥ ८७ ॥ राग सारंग ॥ मोमन उनईको भयो । परचो प्रभु उनके प्रेमको समै तुमहूँ बिसारि गयो ॥ तुमसों शपत करि गयो माधव बेगि कह्योहो आवन । तिनहिं देखि वैसोई हूँ गयो लग्यो उनहि मिलि गावन ॥ समुझि परी षटमास बीतेते कहां हुतो हों आयो । सूर अनकही दै गोपिनसों श्रवण मूँदि उठिधायो ॥ ८८ ॥ राग गंधार ॥ उनमें पांचो दिन जो वसिएनाथ तुम्हारी सौं जिय उपजत फेरि अपनो यों कसिए ॥ वह विनोदलीला वह रचना देखेही बनि आवै । मोको कहा बहुरि वैसे सुख बडभागी सो पावै । मनसा वचन कर्मना अबहैं कहत नहीं कछु राखी । सूर काढि डारयो ब्रज ते ज्यों दूध मांझते माखी ॥ ८९ ॥ राग सोरठ ॥ माधोजू मैं अतिही सचुपायो । अपनो जानि संदेश साजि करि ब्रजमें मिलन पठायो ॥ क्षमा करो तो करौं बीनती उनहि देखि जो आयो । सकल निगम सिद्धान्त जन्मकर श्याम उन सहज सुनायो ॥ नहिं श्रुति शेष महेशप्रजापति जो रस गोपिन गायो । कथा गंग लागी मोहिं तेरी उह रस सिंधुउमहायो ॥ तुम्हरी अकथ कथा तुम जानौ हमैं जिन नाथ बिसरायो ॥ सूर श्याम सुंदरि इह सुनि सुनि नैनन नीर बहायो ॥ ९० ॥ राग मलार ॥ जोपै प्रभु करुणाके आलै । तौ कत कठिन कठोर होत मन मोहिं बहुत दुख शालै ॥ वहो विरदकी लाज दीन पति करि सुटाष्टि देखो । मोसों बात कहत किन सन्मुख कहा अबनि अब लेखो ॥ निगम कहत वश होत भक्तिते

सोऊहै उन कीनी । सूर उसाँस छाँडि हाहा ब्रज जल अँखिया भरि लीनी ॥ ९१ ॥ राग मारु ॥ सुन
ऊधो मोहिं नेक न बिसरत वै ब्रजबासी लोग । तुम उनको कछु भली न कीनी निशि दिन दियो वियोग ॥
यदपि वसुदेव देवकी मथुरा सकल राज सुखभोग । तदपि मनहिं बसत बंसीबट ब्रज यमुना
संयोग ॥ वै उत रहत प्रेम अवलंबन इतते पठयो योग । सूर उसाँस
छाँडि भरि लोचन बढ्यो विरहज्वर शोग ॥ ९२ ॥ ऊधोमोहिं ब्रज बिसरत नाहीं । वृंदावन
गोकुल तन आवत सघन तृणनकी छाहीं । प्रात समय माता यशुमति अरु नंद देखि
सुखपावत । माखन रोटी दह्यो सजायो अतिहित साथ खवावत ॥ गोपी ग्वाल बाल संग खेलत
सब दिन हँसत सिरात । सूरदास धनि धनि ब्रजबासी जिनसों हँसत ब्रजनाथ ॥ ९३ ॥
भक्तबल्लभ वसुदेव कुमारचले एकदिन सुफलकसुतके गृह पंडवहेत बिचार ॥ मिलो सो आय पाय
सुधि मगमें बार बार परि पाइ । गयो लिवाय सुभग मंदिरमें प्रेम न बरनो जाइ ॥ चरण पखारि धारि
जल शिरपर पुनि पुनि दगन लगाइ ॥ विविध सुगंध चीर आभूषण आगे धरे बनाइ ॥ धन्य धन्यमें
गृह मम धन धन भाग हमारे । जो प्रभु ज्ञान ध्यान नहिं आवत तिन मम गृह पग धारे ॥ प्रभु
तव माया अगम अमोघहै लहि न सकत कोउ पार । दीजै भक्ति अनन्य कृपा करि होइ सो मम
उद्धार ॥ अरु जेहि कारन प्रभु पग धारे कहिये सोई बिचारि । करहु ताहि तुमरी कृपातें आयसु
माथे धारि ॥ यह अक्रूर दशा जो सुमिरै सिखै सुनै अरु गावै । अर्थ धर्म कामना सुक्ति फल चारि
पदारथ पावै ॥ हरिजी कह्यो मनोरथ तुम्हरो करिहैं श्रीभगवान । जो जानत सोई सो पावत यह
निश्चय जिय जान ॥ तुम जानतहौ पाण्डवके सुत हैं अति हितू हमारे । कुरुपति अंध मोहवश
तिनको देत सदा दुख भारे ॥ तात जाइ उनको तुम भेंटो हमरी कुशल सुनावहु । बहुरौ समाचार
सब उनके लै हम पै चलि आवहु ॥ यह कहि श्याम राम ऊधो मिलि अपने भवन सिधारे । सुफ-
लकसुत आयसु माथे धारि पंडव गृह पग धारे ॥ पहिले कौरवपतिसों भेंट्यो पुनि पंडव गृह आए ।
पकरि चरन कुंतीके पुनि पुनि सुनै गले लगाए ॥ कुशल भाषि सब यादव कुलकी प्रभुको कह्यो
संदेश ॥ भयो परम संतोष तबहिं सुनि कह्यो हम शरन तुम्हारी । कुरुपति अंध मोह पुत्रनके देत
सदा दुख भारी ॥ पुनि कुरुपतिसों मिलि सुफलकसुत कह्यो ब्रहुत समझाइ । चारि दिवसके जीवन
ऊपर तुम कत करत अन्याइ ॥ अन्याईको बास नरकमों यह जानत सब कोइ । गर्वप्रहारी हैं
त्रिभुवनपति जो कछु करैं सो होइ ॥ कुरुपति कह्यो मैंहु यह जानत पै मोहन न बसाय । नमस-
कार मेरो यदुपतिसों कहिबो गहिकै पाय ॥ सुफलकसुत सब कथा तहांकी आइ श्यामसों भाखी ।
सूरदास प्रभु सुनिकै तोसों हृदय आपने राखी ॥ ३४९४ ॥

॥ इति श्रीसूरसागरदशमस्कन्ध पूर्वार्ध समाप्त ॥



॥ श्रीः ॥

अथ सूरसागर ।

दशमस्कन्धोत्तरार्धः ।

जरासंध आगमन द्वारकाहेतु ।

॥राग मारु॥ श्याम बलराम जब कंस मारयो । सुनि जरासंध वृत्तान्त अस सुतासे युद्ध हित कटक
 अपनो हँकारयो ॥ जोरिदल प्रबल सो चलो मथुरापुरी सुन्यो भगवान जब निकट आयो । तब दुहूँ
 वीर दल साजिकै आपनो नगरते निकसि रणभूमि छायो ॥ दुहूँदिशि सुभट बाँके बिकट अति जुरे मनो
 दोउ दिशि घटा उमाडि आई ॥ सूर प्रभु सिंहध्वनि करत जोधा सकल जहाँ तहाँ करन लागे लराई ॥ १ ॥
 ॥ मलार ॥ मानहु मेघ घटा अति गाढी । बरषत बाण बूँद सेनापति महानदी रण बाढी ॥ जहाँ बरन
 वरन बादर बानैत अरु दामिनि करि करि वार । उडत धूरि धुँरवा धुर दीसत शूल सकल जलधार ॥
 गर्जनि पणव निसान शंखरव हय गज हींस चिकार । प्रगटत दुरत देखियत रविसम द्वै वसुदेवकुमा-
 र ॥ कुंजर कूल रमित अतिराजत तहँ शोणित सलिल गंभीर । धनुष तरंग भँवर स्यंदन पग जलचर
 सुभट शरीर ॥ उडत ध्वजा पताक छत्र रथ तरुवर टूटत तीर । परमनिशंक समर सारिता तट
 क्रीडत यादव वीर ॥ सुने किये भुवन भूपतिके सुवस किए सुरलोक । छिनक मध्य हरि हरयो
 कृपाकरि उन सबहिनके शोक ॥ आनंदे मधुवनके वासी गई नगरकी रोक । जरासंधको जीति
 सूर प्रभु आये अपने वोक ॥ २ ॥ अध्याय ॥ ५१ ॥ कालयवनदहन ॥ मुचुकुंद उद्धार ॥ राग सारंग ॥ बार सत्रह
 जरासंध मथुरा चढि आयो । गयो सो सबदिन हार जात घर बहुत लजायो ॥ तब खिसिआइके
 कालयवन अपने संग ल्यायो । हरिजी कियो बिचार सिंधुतट नगर बसायो ॥ उग्रसेन सब
 कुटुमलै ता ठौर सिंघायो । अमरपुरीते अधिक सुख तहँ लोगन पायो ॥ कालयवन मुचुकुंद सो हरि
 भस्म करायो । बहुरि आइ भरमाइ अचल सब ताहि जरायो ॥ जरासंध वहँते बहुरि निज देश
 सिंघायो । श्याम राम गये द्वारका सूरज यश गायो ॥ ३ ॥ अथ द्वारका प्रवेश ॥ राग कल्याण ॥ देख री
 आजु नैन भरि हरिजूके रथकी शोभा । योग यज्ञ जप तप तीरथ व्रत कीजतहै जेहि लोभा ॥
 चारु चक्र मणि खचित मनोहर चंचल चमर पताका । श्वेतछत्र मनो शशि प्राची दिशि
 उदै कियो निशिराका ॥ घन तन श्याम सुदेश पीतपट शीशमुकुट उरमाला । जनु
 दामिनि घन रवि तारागण प्रगट एकही काला ॥ उपजत छबिकर अधर शंखमिलि
 सुनियत शब्द प्रशंसा । मानहु आसन कमल मंडलमें कूजतहै कलहंसा ॥ मदनगोपाल

देखियतहै अब सब दुख शोक बिसारी । बैठैहैं सुफलकसुत गोकुल लेन जो वहाँ सिधारी ॥ आनं-
 दित चित जननि तात हित कृष्ण मिलन जिय भाए । सूरदास दुहुँ कुल हित कारण अब माधो
 मधुपुरी जु आए ॥४॥ अध्याय ॥ ५२ ॥ द्वारकाकी शोभा ॥ राग कल्याण ॥ दिन द्वारावती देखन आवत ।
 नारदादि सनकादि महामुनि ते अवलोकि प्रीति उपजावत ॥ विद्रुम स्फटिक पची कंचन खचि
 मणिमय मंदिर बने बनावत । जितनेतर नर नारि उपर खग सबहिनको प्रतिबिंब दिखावत ॥ जल
 थल रंग विचित्र बहुत बिधि अवलोकत आनंद बढ़ावत । भूलि रहे अति चतुर चितै चित कौन
 सत्य कछु मर्म न पावत ॥ वन उपवन फल फूल सुभगसर शुक सारिका हंस पारावत । चातक
 मोर चकोर वदत पिक मनहु मदन चटसार पढावत ॥ धाम धाम संगीत सरस गति बीणा वेणु
 मृदंग बजावत । अतिआनंद प्रेम पुलकित तनु जहां तहां यदुपति यश गावत ॥ निशिदिन रहत
 विमान रूठ रुचि सुरवनितानि संग सब आवत । सूर श्याम क्रीडत कौतूहल अमरन अपनो भवन
 न भावत ॥ ५ ॥ राग सारंग ॥ श्रीमनमोहन खेलत चौगान । द्वारावती कोट कंचनमें रच्यो रुचिर
 मैदान ॥ यादव वीर वराइ बटाई इक हलधर इक आपै ओर । निकसे सबै कुँवर असवारी उच्चैःश्रवाके
 पोरे ॥ लीले सुरंग कुमैत श्याम तेहि परदे सब मन रंग । बरन अनेक भांति । भांतिनके चमकति
 चपलावेग ॥ जौन जराइ जु जगमगाइ रहे देखत दृष्टि भ्रमाइ । सूर नर मुनि कौतुक सबै लागे
 इकटक रहे लुभाइ ॥ जबहीं हरिलै चले गोइ कुदासौ लाइ । तबहीं औचकही वेल हलधर पाइ ॥ कुँवर
 सबै घेरि फेरे फेरत छुडत नहिनै गुपाल । बलै अछत छल बल करि सूरदास प्रभु हाल ॥ ६ ॥
 रुक्मिणीपत्रिका आवन ॥ राग विलावल ॥ हरि हरि हरि हरि सुमिरन करो । हरि चरणारविंद उर धरो ॥
 हरि सुमिरण जब रुक्मिणि करयो । हरि करि कृपा ताहि तब बरयो ॥ कहाँ सो कथा
 सुनो चितलाई । कहै सुनै सो रहै सुखपाई ॥ कुंदनपुरको भीषम राई । विष्णुभक्तिको तामन
 चाई ॥ रुक्म आदि ताके सुत पांच । रुक्मिणि पुत्री हरिरंग राच ॥ नृपति रुक्मसों कह्यो सुनाई ।
 कुँवरि योग्यवर श्रीयदुराई ॥ रुक्म रिसाइ पितासों कह्यो । सुनि ताको अंतर्गत दह्यो ॥ रुक्म
 चंदेरी विप्र पठायो । व्याहकाज शिशुपाल बुलायो ॥ सो बरात जोरि तहां आयो । श्रीरुक्मिणिके
 जिय नहि भायो ॥ कह्यो मेरोपति श्रीभगवान । उनही बरो के तजो परान ॥ भीषम सुता रुक्मिणी
 वाम । सूरजपति निशि दिन वहनाम ॥ ७ ॥ राग कान्हरो ॥ द्विज पतियां दे कहियो श्यामहि । कुंदनपुरकी
 कुँवरि रुक्मिणी जपति तुम्हारे नामहि ॥ पालागौं तुम जाहु द्वारावति नंदनंदनके ग्रामहि । कंचन
 चीर पटंबर देही करकंकनजे नामहि । यह शिशुपाल मजैत श्रीदीनबंधु ब्रजनाथ कबै सुखदेखिहौं ।
 कहि रुक्मिणि मनमाहैं सबै सुख लेखिहौं ॥ गावहि सब सहचरी कुँवरि तामसकरि हेरयो । सब दिन
 सुखसाथिनी आज कैसे सुख फेरयो ॥ मेरे मन कछु औरहै तुम कछु गावति और । प्राण तजौंगी
 आपनो देखि असुर शिरमौर ॥ तिहँलोकके धनी मनी तुमहीकी सोहै । सत्यकीर्ति औ पुरुषहि समरथ
 सब मोहै ॥ पर पुरुषारथ काग हंसानिके घर आवै । कामधेनु खरुलेइ काल अमृत उपजावै ॥
 कुटुंब वैर मेरे परे वरनि वरे शिशुपाल । करनि सिंह तुम्हरी धरी कैसे चपै शृगाल ॥ भुवन चतुर्दश
 राज सकल सूर नर मुनि देवा । करजोरे शशि सूर पवन पानी करैं सेवा ॥ अबहीं औरकी और
 होति कछु लागै बारा । ताते मैं पाती लिखी तुम प्राणअधारा ॥ कटहि भूख औ नींद जीवनहौं
 जानति नाहीं । अनदेखे वे नैन लगे लोचन पथवाहीं ॥ कै यदुपति लै आवहु करों प्राणलागि घाउ ।
 बाजै शंख जानिहौं सांची आयो यादवराउ ॥ जो मांगौ सो देउ लेहु माधो संग आए । कोटि

यज्ञफल होइ पिता वहि दर्शन पाए ॥ रोइ रुक्मिणी यों कह्यो धरो पाणिमें माथ । यह पाती लै
 पिता दीजियो प्राणनाथके हाथ ॥ विप्रभवन रथ चढ्यो चलत तब बार न लाई । छपनकोटिके मध्य
 राजतहँ यादवराई ॥ छाँडि सकुच पाती दई तब पूँछी कुशलात । जानि चीन्ह पहिचानि कुँवरमन
 फूले अंग न मात ॥ आपुन झारी माँगि विप्रके चरण पखारे । इती दूरि श्रम कियो राज द्विज भए
 दुखारे ॥ पाती बाँचन आवई माँग्यो तुरत विमान । लोचन भरि भरि आवही मानहु कर जल पान ॥
 लीन्हों विप्रचढाइ बोलि बलसों कहि सारा सकल सभा जिय जानिकसे साजे हथिआरा ॥ कहहु नाथ
 कहां आवहीं कियो कौन पर छोडु । भीषमकै रुक्मिणिहरण सावधान सब होहु ॥ आवत देख्यो विप्र
 जोरि कर रुक्मिणि धाई कहा कहेगो आनि हिए धकधकी लगाई ॥ विप्र आनि मालादए कहै कुशलके
 बैन । कुँवर पतियारो तब कियो जब रथ देख्यो नैन ॥ गए कंचुकि बंद टूटि लूटि हृदय सो पाइ करति
 मनहि मन सेव निकट रथ दयो देखाइ ॥ तिहुँलोकके कंतहौ हों दासी प्रभु जानि । रुक्मिणि बिनती
 करतिहै लाजहि आपुहि मानि ॥ बैठि असुर सब सभा रुक्मसों मतौ बिचारयो । आयो सुन्यो
 अहीर मनो यहिकाल हैकारयो ॥ गाइ चरावन ग्वालहू आयो मुजरा देन । देखहु ढीठो दूरिते
 आयो भातहि लेन ॥ सब दल होहु हुसियार चलहु मठ घेरहि जाई । परपंचीहै कान्ह कछू मति
 करै ठिठाई ॥ कुँवर गौरि पाँयनपरी मन धाँछित फल जानि । हौं यदुपति वर पाइहौ वदन धरौ
 दोउ पानि ॥ गौरि कहै सुन कुँवर पाँय मेरे जिनि लागहि । कहा कुटुंबके बैन नैन श्रीमति बैरागहि ।
 आधो श्रीवृषभानुको आधो दीन्हों तोहि ॥ राज सोहाग बढो सबै कहा निहोरो मोहि ॥ अब गावहु करि
 सगुण बोलि मुख अमृत वानी । दूल्ह श्रीनंदलाल दुलहिनी रुक्मिणि रानी ॥ याको जननी दीजियो
 करत सखिनसों नेह । हौं यदुपति घर जाति हौं जाको है यह देह ॥ अंबर बाणी भई सजल बादर
 दल छाए । देव तेतीसौ कोटि जो यज्ञ तवासे आए ॥ हरन रुक्मिणी होत है दुहुँ ओर भई भीर ।
 अति अघात कछु नार्हिन सुझत वज्र चलिहि ज्यों नीर ॥ लागे रुक्म गोहारि संग शिशुपाल न
 छोडै । छाँडहि बान विशाल युद्ध ऐसोको वोडै ॥ चक्र धरे हरि आवहीं सुनि असुरन जिय गाज ।
 टेरि कह्यो शिशुपालसों कीजो कंकन लाज ॥ सकल सैन संहारि रुक्म हलधर गहि लीन्हों ।
 आगे इहि सों काम रुक्मिणी सों प्रण कीन्हों ॥ सात शिखा शिर राखिकै तब बूझी कुशलात ।
 कंचनराजको काज सँवारयो भूपन को यह काज ॥ नगर बधाई बाजि नाथ बहुतै सुख मान्यो ।
 पूरण कीन्हों नेह रुक्मते सत्यहि जान्यो ॥ कंकन छोरयो द्वारका बाज्यो अनंद निसान । भुक्ति
 मुक्ति न्यवछावरी पाई सूर सुजान ॥ ८ ॥ राग कान्हरो ॥ पतियां दीजै श्याम सुजानहि । मुख सँदेश
 बनाइ विप्र ज्यों प्रभु न ढीठ करि मानहि ॥ श्रीहरि योग्य रुक्मिणी लिखितं बिनती सुनहि
 प्रभु धरि कानहि । बाँचत बेगि आइबो माधव जात धरे मेरे प्रानहि ॥ समुझत नहीं दीन दुख कोऊ
 सिंह भखहि शृगालके पानहि । मणि कर्मट कर देत मूढमति मृगमद रजमें सानहि ॥ कबलगि
 सहों दुःख दरश दीन भई मीन बिना जलपानहि । सूरदास प्रभु अधर सुधाघन वरषिदेहु जियदा-
 नहि ॥ ९ ॥ ॥ राग सांग ॥ द्विज कहिबो हरिसों समुझाइ । सकत शृगाल सिंहको भोजन दुर्बल
 देखिकै छीने खाइ ॥ परमित गए लाज तुमहींको हंसिनि व्याहि काग लै जाइ । काहेको नेम धर्म
 व्रत कीन्हों माघमास जल शीत अन्हाइ ॥ श्वान संग सिंहिनि रति अजगुत वेद विरुद्ध असुर करै
 आइ । सूरदास प्रभु बेगि न आवहु प्राण गए कहा लेहौ आइ ॥ १० ॥ द्विज कहियो यदुपति सन
 वात । वेद विरुद्ध होत कुंदनपुर हंसको अंश कागलै परात ॥ जिनि हमरो अपराध बिचारो कन्या

लिख्यो मेदि गुरु तात । ताते यह द्विज बेगि . पठायो नेम धर्म मर्यादा जात ॥ तनु आत्मा सम-
 पित तुम कहै पाछे उपजि परी यह बात । कृष्णसिंह बलि धरी तिहारी लेबेको जंबुक अकुलात ॥
 कृपाकरहु उठि बेगि चढहु रथ लग्न समै आवहु परभात । सूरदास शिशुपाल पानि गहै पावक
 जारि करौ तनुघात ॥ ११ ॥ राग धनाश्री ॥ हौं प्रभु जन्म जन्मकी चेरी । भीषम भवन रहतहौं मैं ज्यों
 लुब्धक असुर सैन्य मिलि चेरी ॥ प्रातकाल शिशुपाल कालते यदुपति आवैं बेगि सबेरी । कछु
 विपरीति बात नहि आवैं उपजी प्रीति ग्राह गज केरी । सूरदास प्रभु कृष्णप्रीति बिनु प्राणबिना
 तनु लागत पेरी ॥ १२ ॥ राग मारू ॥ द्विज बेग धावहु कहि पठावहु द्वारकाते जाइ । कुंदनपुर एक
 होत अजगुत बाध घेरी गाइ ॥ दीनहैं करि करहुं बिनती पाती दीजहु जाइ । रुक्म वरवस व्याहि
 देहै गनै पितहि न माइ ॥ लग्न लै जु बरात साजी उनत मंडप छाइ । पैज करि शिशुपाल आए
 जरासंध सहाइ ॥ हंसको मैं अंशराख्यो काग कत मँडराइ । गरुडवाहन कृष्ण आवहु सूर बलि
 बलि जाइ ॥ १३ ॥ अथ द्विजसंदेश कृष्णप्राप्ति वदत ॥ राग आसावरी ॥ बाल मृगीसी भूली आँगन ठाढी ।
 नवल विरहिनी चित चिंता बाढी ॥ तुम्हारो पंथ निहारै स्वामी । कबहि मिलहुगे अंतर्यामी ॥ मंडपपुर
 देखे उर थरथर करै । मनु चहुँदिशि दौ लागी धीरज तन न धरै ॥ अपने विवाहके दुंदुभी
 सुनि सुनि । चकृत मन मानो महासिंह ध्वनि ॥ सखिनकी माल जाल जिय जानति । व्याधरूप
 शिशुपालहि मानति ॥ सूरदास युगभरि बीतत छिनु । हरि नवरंग कुरंग पीव बिनु ॥ १४ ॥
 अध्याय ॥ ५ ॥ कुंदनपुर श्रीकृष्णगण ॥ राग सारंग ॥ सुनत हरि रुक्मिणिको सँदेश । चढिरथ चले
 विप्रको संगलै कियो न गेह प्रवेश ॥ बारंवार विप्रको पूँछत कुँवरि वचन सो सुनावत । दीन वचन
 करुणानिधान सुनि नयननीर भरिआवत ॥ कह्यो हलधरसों आवहु दललै मैं पहुँचतहौं धाई । सूरप्रभु
 कुंडिनपुर आए विप्रजू जाइ सुनाइ ॥ १५ ॥ कुँवरि सुनि पायो अतिआनंदन । मनहींमनहिं बिचारकरत
 इह कब मिलिहैं नंदनंदन ॥ हार चीर पाटंबर देकरि विप्रहि गेह पठायो ॥ पै इह भेद रुक्मिणी
 निज मुख काहु कहि न सुनायो ॥ हरि आगमन जानिकै भीषम आगे लेन सिधायो । सूरदास
 प्रभु दर्शन कारन नगर लोग सब धायो ॥ राग आसावरी ॥ १६ ॥ देख रूप सब नगरके लोग ।
 बारंवार अशीश देत सब यह वर बन्यो रुक्मिणी योग ॥ जो कछु चतुराई विधनामों
 जानत युगस रीति । तौ अजहूं लौं राजसुतापति हरिहैंहै शिशुपालहि जीति ॥ जो राजा कौतुक
 चलिआए ते मुख निरखि कहतहैं बात । परत न पलक चकोर चंद्रलौं अवलोकत लोचन
 अकुलात ॥ मनसाको हीता जगजीवन सुंदर वर वसुदेव कुमार । सूरदास जाके जिय जैसी
 हरिकीन्हें तैसो व्यवहार ॥ १७ ॥ सखी वचन रुक्मिणी प्रति सुही ॥ राग विलावल ॥ सोच सोच तू डार उठि
 देख दीनदयालु आयो । निरखि लोचन प्रणत मोचन कुँवरि फल बाँछो सो पायो ॥ सुनत भइ अकु-
 लाह ठाढी ज्यों मृतक बिधि दै जिवायो ॥ चढि सदन वह वदनकी छबि परखि दीनो दव बुझायो ॥
 ले बलाई सुकर लगायो निरखि मंगलचार गायो । नैन आरति अर्घ्य आँसु पुहुप तन मन धन
 चढायो । जानि हौं ब्रजनाथ जियकी कियो सो जो तुम बतायो । अपहरन पुन वरन वंश हरि
 जानि हौं कहि योग भायो ॥ भक्तके वश भक्तवत्सल विदुर सातोसाग खायो ॥ सुदित है गई
 गौरि मंदिर जोरि कर बहु बिधि मनायो ॥ प्रगट तेहि छिन सूरके प्रभु बाँह गहि कियो वाम
 भायो । कृपासागर गुणन आगर दासि दुख दीनहि विहायो ॥ १८ ॥ रुक्मिणी हरन ॥ आसावरी ॥ रुक्मिणी
 देवी मंदिर आई । धूप दीप पूजा सामग्री अली संग सब ल्याई ॥ रखवारीको बहुत महाभट

दीन्हें रुक्म पठाई । ते सब सावधान भए चहुँदिशि पंछी इहाँ न जाई ॥ कुँवरि पूजि गौरी
 बिनती करि वरदेहु यादवराई । मैं पूजा कीन्ही या कारण गौरी सुनि सुसुकाई ॥ पाइ प्रसाद
 अंबिका मंदिर रुक्मिणि बाहेर आई । सुभट देख सुंदरतां मोहे धरणि गिरे सुरझाई ॥
 यहिअंतर यादवपति आए रुक्मिणि रथ बैठाई । सूर प्रभु पहुँचे अपने घर तब सबहिन
 सुधिपाई ॥ १९ ॥ राग आसावरी ॥ याहीते झूल रही शिशुपालहि । सुमिरि सुमिरि पछताति सदा वह मान
 मंगके कालहि ॥ दुलहिनि कहति दौरि दीजहु द्विज पाती नंदके लालहि । वर सुबरात बुलाइ बडे हित
 मनसि मनोहर बालहि ॥ आये हरषि हरन रुक्मिणि रिस लगी दनुज उर शालहि । सूरज
 दास सिंह बलि अपुनो लीनी दलकि शृगालहि ॥ २० ॥ अध्याय ॥ ५४ ॥ श्रीकृष्ण रुक्मिणीविवाह ॥ राग सोरठ ॥
 श्याम जब रुक्मिणि हरि लै सिधारे । सुनि जरासंध शिशुपाल धाए ॥ शालव दंतवक्र बना-
 रसीको नृपति चढे दलसाजि मानो रविहि छाए । सांगकि झलक चहुँदिशि चपला चमकि
 गजगर्ज सुनत दिग्गज डेराए ॥ श्याम बलराम सुधिपाइ सन्मुख भये बाणवर्षा करन लगे सारे ।
 रुक्मिणी भय कियो श्याम धीरज दियो बानसों बान तिनके निवारे ॥ राम हल मूशल संभारि
 धायो बहुरि विपुलरथ औ सुभट सब संहारे ॥ रुंड पर रुंड धुकि परे धरि धरणिपर गिरत ज्यों संग
 कर वज्रमारे ॥ जरासंग जीवते भजो रणखेतते शाल दंतवक्र या विधि पराई । प्रातके समै ज्यों
 भातुके उदयते भलै होइ जात उडगन नशाई ॥ गह्वो भगवान शिशुपालको जीवते ताहि सो वचन
 याविधि उचारे । रुक्मिणी लिये मैं जात तुम देखतहि पै नहीं हरष कछु मन हमारे ॥ पुरुषको
 भाजिवेते मरनहै भलो जाइ सुरलोक द्वारे उचारे । पुरुषको हार अरु जीतदोउ होतहै हर्ष अरु
 सोच नहि चित्तधारे ॥ बीज बोइये जोइ अंतलोनिये सोइ समुझि यहबात नहि चित्त धरई । करन
 कारण महाराजहैं आपही तिनहि चित राखि नित धर्म करई ॥ बहुरि भगवान शिशुपालको
 छाँडिदियो गयो निज देशको सो खिसाई । शस्त्र धनु छाँडिकै भाजि नरपतिगये यादवनहेत
 हरिदै लुटाई ॥ रुक्म यह सुनि चल्थो सौंह करि नृपनपै श्याम बलरामको बाँधि ल्याऊं । आइ इहाँ
 कह्यो शिशुपाल सो मैं नहीं आपनो बल तुम्हें अब दिखाऊं ॥ बाण वर्षा लग्यो करन या भाँति कहि
 कृष्ण ज्यों तिनहि मगमें निवारयो । आपने बाणको काटि ध्वज रुक्मके असुर औ सारथी तुरत
 मारयो ॥ रुक्म भू परचो उठि युद्ध हरिसों करयो हरि सकल शस्त्र ताके निवारे । बहुरि खिसिआइ
 भगवानके ढिगचल्यो ज्यों चलत पतंग दीपक निहारे ॥ खड्गलै ताहि भगवान मारनचले
 रुक्मिणी जोरि कर विनय कीयो । दोष इन कियो मोहि क्षमा प्रभु कीजिए भद्रकर शीश
 जिवदान दीयो ॥ राम अरु यादवन सुभट ताके हते रुधिरके नहर सरिता बहाई । सुभट मनो
 मकर अरु केश सेवार ज्यों धनुष त्वच चर्म क्रूरम बनाई ॥ बहुरि भगवानके निकट आये सकल
 देखिकै रुक्मको हँसे सारे । कह्यो भगवानसों कहा यह कियो तुम छाँडिबो हुतो या भलो मारे ॥
 मरते अप्सरा आइ ताको बरति भाजिहैं देखि अब गेह नारी । रुक्मिणीसों कह्यो सोच नहि
 कीजिए होतहै सोइ जो होनिहारी ॥ रुक्म शिरनाइ या भाँति बिनती करी नाथमैं बुद्धि मर्म तुम्हरो
 न जान्यो । ब्रह्म तुम अनंत तुमहि कारण करण मैं कौन भाँति तुमको पहिचान्यो ॥ दीन
 वंदु कृपासिंधु करुणाकर सुनि विनय दयाकरि ताहिको छाँडि दीन्हों । बहुरि निज नगरपैठ्यो
 न सो लाज करि बनहि तिन आपनो वास कीन्हों ॥ आइ भीषम दियो दाइज ता ठौर बहु श्याम
 आनंद सहित पुर सिधाये । सुनत द्वावावती मारु उतसों भयो सूर जन मंगलाचार गाये ॥ २१ ॥

॥ राग आसावरी ॥ देखहिं दौरे द्वारकावासी । सुनत सकल पुर जीतं रुक्मिणी लै आए यदुपति अवि
नासी ॥ लेति बलाइ करत नवछावरि बलि भुज दंड कनक अति त्रासी । नर नारीके नैन निरखि
करि चातक तृषित चकोरी प्यासी ॥ कर आरती कलश लै धाई चीन्हि न परति कुलवधू दासी ।
देश देश भयो रहसि सूर प्रभु जरासंध शिशुपालकी हाँसी ॥ २२ ॥ राग धनाश्री ॥ आवहु री मिलि मंगल
गावहु ॥ हरि रुक्मिणिहि लिये आवत हैं इह आनंद यदुकुलहि सुनावहु ॥ बाँधो बंदनवार मनोहर कनक
कलश भरि नीर भरावहु । दधि अक्षत फल फूल परमरुचि अंगन चन्दन चौक पुरावहु ॥ कदली यूथ
अंनूप कुशल दल सुरंग सुमन लै मंडल छावहु । हरद दूब केशर मग छिरकौ भेरी मृदंग निसान
बजावहु ॥ जरासंध शिशुपाल नृपतिते जीते हैं उठि अर्घ्य चढावहु । बल समेत तनु कुशल
सूर प्रभु हरि आयें आरती सजावहु ॥ २३ ॥ विवाह वर्णन ॥ राग विलावल ॥ छंद त्रिभंगी ॥ श्री यादव
पति व्याहन आया । धन्य धन्य रुक्मिणि हरि वर पाया ॥ छंद ॥ हरि श्याम घन तन परमसुंदर तडित
वसन बिराजई । अँग अँग भूषण सुरस शशि पूरणकला मानों भ्राजई ॥ कमल मुखकर कमल लो-
चन कमल मृदुपद सोहहीं । कमल नाभिः कमल सुंदर निरखि सूर मुनि मोहहीं ॥ १ ॥ सुधा सरो
वर छिटकिं अनूपम । ग्रीव कपोत मनो नासा कीरसमा ॥ छंद ॥ कीर नासा इंद्रधनु भू भँवर से अलका-
वली । अधर विद्रुम बज्रकन दाडिम किधौं दशनावली ॥ खौर केशरि अति विराजत तिलक
मृदमदको दियो । कामरूप बिलोकि मोह्यो वास पद अंबुज कियो ॥ २ ॥ वसुदेवनंदन त्रिभुवन
मनहरन । मुकुट तरुन मनो मकर कुंडल श्रवन ॥ छंद ॥ मुकुटकुंडल जडित हीरा लाल शोभा
अतिबनी । पन्ना पिरोजा लागे बिच बिच चहुँदिशि लटकत मनी ॥ सेहरो शिर पर मुकुट
लटक्यो कंठमाला राजई । हाथ पहुँची वीर कानग जरित सुंदरी भ्राजई ॥ ३ ॥ उर बैजंती
माल शोभा अतिबनी । चरणन नूपुर कटतट किंकिनी ॥ छंद ॥ किंकिनी कट चरण
नूपुर शब्द सुंदर कुंजही । कोकिला कलहंस बाल रसालते नहिं पुंजही ॥ तुरई बाजनि बीना
ताजनि चपल चपला सेहरी । जौन जरित जराव वागहिलगे सब मुकुतासरी ॥ ४ ॥ चढि यदु-
नंदन बनित बनाइकै । साजि बरात चले यादव चाइकै ॥ छंद ॥ चले साजि बरात यादव कोटि
छप्पन अतिबली । उग्रसेन वसुदेव हलधर करत मन मन अति तली ॥ शंख भेरि निशान
बाजहिं नचाहिं शुद्ध सोहावनी । भाट बोलैं बिरद नारी वचन कहैं मन भावनी ॥ ५ ॥ सुरपति
आयो संगहै शची ॥ शुद्ध मुहूरत चौरी बिधि रची ॥ छंद ॥ रची चौरी आपु ब्रह्मा जरित खंभ लगाइकै ।
इंद्र सुरदारनि सहित बैठे तहां सुखपाइकै ॥ चौक मुक्ताहल पुरायो आइ हरि बैठे तहां । निरखि
सूर नर सकल मोहे रहिगए जहँके तहां ॥ ६ ॥ कुँवारि रुक्मिणी कमला अवतरी । शशि षोडश
कला शोभा तनुधरी ॥ छंद ॥ कुँवारि शशि षोडशकला शृंगार करि ल्याई अली । विविध बिधि कियो
व्याह बिधि वसुदेव मन उपजी रली ॥ सूर पुहुप बरसैं हरषिकै गंधर्व किन्नर गावहीं । शारदा
नारद आदि सुयश उच्चार जयति सुनावहीं ॥ ७ ॥ विप्रगणउ दिष्ट बहु युगुति सुरति करि । किए
अयाची याचक जन बहुरि ॥ छंद ॥ बहुरि निज मंदिर सिधारे करी सुभद्रा आरती । देवकी पीवो वार
नीरददई अशीशा भारती ॥ युवा युवती खेलाइ कुल व्यवहार सकल कराइबो । जनन मन भयो
सूर आनंद हरषि मंगल गाइबो ॥ ८ ॥ रागसारंग ॥ तोसों गारि कहा कहिदीजै हो यदुनंदन । जग वपु
नाउँ कौनको लीजै हो यदुनंदन ॥ छंद ॥ वपु जगत काको नाउँ लीजै हो यदुजाति गोतन जानिए ।
गणरूप कछु अनुहारि नहिं का बखान बखानिए ॥ सब शोधि रह्यो न शोधपायो बिन सुने का

कीजिए । बलिजाउँ यादवपति तुम्हारी गारिका कहि दीजिए ॥ तेरी मैया सब जग खोयो । सोकी
 जो बल न विछोयो ॥ छंद ॥ सोको जो नबल करि विगोयो फिरत निशि वासर बनी ।
 शिरधेत पट कटि नील लहंगा लाल चोली बिन तनी ॥ कछु मंद मुख मुसुकाइ सुर
 नर नाग भुज भीतर लए । बलिजाउँ यादवपति तुम्हारी माया कुल बिनु तुम किए ॥
 कछु कहि न जाइ गति ताकी । नित रहत मदनमद छाकी ॥ नित रहत मन्मथ मदाहि
 छाकी निलज कुच झाँपत नहीं । तब देखि देखि जु छयल मोहित बिकलहै धावत तहीं ॥
 इक परत उठत अनेक अरुझत मोह अति मनसा मही । यहि भाँति कथा अनेक ताकी
 कहत हू न परै कही ॥ बहतौ नित नवतनु रति जोरै । चित चितवनिही मँहहै चोरै ॥
 ॥ छंद ॥ अति चतुर चितवनि चित चुरावति चलत धर धीर न धरै । फिरि चमक चोप लगाइ
 चंचल तनहिं तब अंतर करै ॥ कछु भौहकी छवि निरखिं नैननि सु को जन व्रतते टरै । इहि
 भाँति चतुर सुजान समधिनि सकति रति सबसों करै ॥ इनही भूलि रहे सब भोगी ।
 वश कीने ब्राह्मण जे योगी ॥ वश किये ब्राह्मण बहुत योगी छत्रपति कैतेकहौं । और अग जग
 जीव जल थल गनत सुनत न सुधि लहौं ॥ ते परमआतुर काम कातुर निरखि नित
 कौतुक नए । यहि भाँति समधिन संग निशिदिन फिरत भ्रम भूले भए ॥ अब तुमहौ
 परम सयाने । तुम ठाकुर सब जगजाने ॥ छंद ॥ ठाकुर सबनके कृपानिधि हरि
 सुयश सब जग गाइए । या लोकके उपहास आपुन ताहि बरजि मिटाइए ॥ कहि एकही भल
 पांच माघो और अनत न सुझिए । सुनि सूर श्याम सुजान इहिकुल अब न ऐसी कीजिए ॥ २४ ॥
 अध्याय ॥ ५५ ॥ प्रद्युम्नजन्म ॥ राग विलावल ॥ प्रद्युम्न जन्म शुभघरी होऊ । काम अवतार लीन्हों विदित
 बात यह तासु सम तूल नहिं रूप दोऊ ॥ पृथ्वीपर असुर शंबरभयो अति प्रबल तिन्ह उदाधि
 माँह तेहि डारि दीन्हों । मक्षालियो भक्ष सो भक्ष गह्यो असुर तब कौनसों लेइकै भेंट
 कीन्हों ॥ मक्षके उदरते बाल परकटभयो असुर मायावती हाथ दीन्हों । कह्यो तेहि काम पर
 माण नारद वचन सुमिरि अति हर्षसों ताहि लीन्हों ॥ भयो जब तरुण तब नारि तासों कह्यो
 रुक्मिणी मात हरि तात तेरो । नाम ममरति विदित बात जानत जगत कामतुअ नाम पुनि पुरुष
 मेरो ॥ असुरको मार परिवारको देहि सुख देउँ विद्या तोको मैं बताई । बिना विद्या असुर जीत
 सकही नहीं भेदकी बात सब कहि सुनाई ॥ प्रद्युम्न सकल विद्या समुझि नारिसों असुर सों युद्ध
 माँग्यो प्रचारी । काटि करवारि लियो मारि ताको तुरत सुरन आकाश जयध्वनि उचारी ॥
 बहुरि आकाश मधि जाइ द्वारावती मात मनमोद अतिही बढायो । भयो यदुवंश अति रहसमानो
 जन्म भयो सूर जन मंगलाचार गायो ॥ २५ ॥ अध्याय ॥ ५६ ॥ मणिहेतु सत्यभामा जाम्बवती विवाह ॥ सारंग ॥
 हरिदर्शन सत्राजित आयो । लोगन जान्यो आवत आदित हरिसों जाइ सुनायो ॥ हरि कह्यो
 रवि न होइ सत्राजित मणि है ताके पास । रवि प्रसन्न होइ दीन्ही ताको यह ताको
 परकाश ॥ आइ गयो सोऊ तेहि अवसर तेहि हरि कह्यो सुनाइ । यह मणि अति अनुपम है
 सो सुनि रहि न सक्यो ललचाइ ॥ एक दिन ताते अनुज सो माँगी ले गयो अखेटक काजा ।
 ताको मारि सिंह मणि लै गयो सिंह हत्यो रिछराजा ॥ ऋच्छराज वह मणि तासों लै
 जाम्बवतीको दीन्ही ॥ प्रसमनको विलंब भयो तब सत्राजित सुध लीन्ही ॥ जहां तहांको लोग पठा-
 यो काहू खोज न पायो । सूरदास सत्राजित भ्रमसों चोरी हरिहि लगायो ॥ २६ ॥ अध्याय ॥ ५७ ॥ शत
 धन्वा वय अकूर संवादराग ॥ सौराट ॥ शुकदेव कहत सुनहु हो राजा । ज्ञानी लोभ करत नहिं कबहूँ लोभ

विगारत काजा ॥ करिकै लोभ अमृत जो पीवै विष समान सो होई । विष अमृत होइ जाइ लोभ
 बिन यह जानत जन कोई ॥ एक समय यदुपति औ हलधर पंडव गृह पग धारी । शतधन्वा अरु
 सुफलकसुत मिलि कीन्हों मंत्र बिचारी ॥ सत्राजितको हति मणि लीजै ज्यों जानै नहिं कोई ।
 ऐसो समय बहुरि फिरि नाहीं पाछे होइ सो होई ॥ निशि अँधियारी जाइ शतधन्वा मारि ताहि
 मणि ल्यायो । फैलगई यह बात नगर सब तब मनमें पछितायो ॥ सतभामा करि शोक पिताको
 यदुपति पास सिधार्ह । शतधन्वा करत करी सो हरिसों कहि समुझाई ॥ सुनि यदुपति हलधर
 उठि धाये वेग विलंब न लाई । लेहैं वैर पिता तेरेको जैह कहां पराई ॥ तब मणि डारि अक्रूर पास
 वह मिथिलापुरको धायो । शत योजन मग एक दिवसमें तुरंग जाइ पहुँचायो ॥ द्वारावति पैठ-
 त हरिसों सब लोगन खबरि जनाई । मिथिलापुरी जाइ तिन मारचो पै मणि वहां न पाई ॥ तब हरि
 कह्यो हत्यो बिन दूषण हलधर भेद बतायो । वहां जाइ खोज तुम कीजो द्वारावति धरि आयो ॥
 हलधर रहे गदायुध सीखन हरि द्वारावति आये । सतभामा मन हरष भयो जब समाचार सब
 पाये । सुफलकसुत मनहीं मन सकुच्यो करों कहा अबकाजा । देत न बनै बनै नहिं राखत उर डेरा-
 त उठि भाजा । सब यादव मिलि हरिसों इह कह्यो सुफलकसुत जहां होइ । अनावृष्टि अतिवृष्टि
 होति नहिं इह जानत सब कोई ॥ कीजै दोष क्षमा अब ताको हरि तब ताहि बुलायो । कहो
 कहा कहिए अब तुमसों तिन शिर नीचो नायो ॥ पुनि कह्यो मणि सतभामाको दै याते भय भयो
 तोहीं । मणि वनदै बहुरोहि तेही देइ कह्यो लोभ नहिं मोहीं । लोभ भलो नाहीं दूनों
 पुर लोभ किये तप जाई । सूर लोभ कीनो सो बिगोयो शुक्र यह कहि समुझाई ॥ २७ ॥
 अध्याय ॥ ५८ ॥ पंचपटरानीका विवाह श्रीकृष्णसों भया ॥ राग विलावल ॥ हरि हरि हरि सुमिरो सब कोई ।
 हरि हरि सुमिरत सब सुख होई ॥ हरि हरि सुमिरचो है जिन जहां हरि तेहि दरशन दीन्हों तहां ॥
 हरि सुमिरन कालिन्दी कीन्हों । हरि वहां जाइ दरश तेहि दीन्हों ॥ पाणिग्रहण पुनि ताको कीन्हों ।
 सबै भाँति ताको सुख दीन्हों ॥ हरिहि मित्रविंदा चित ध्यायो । हरि तहां जाइ विलंब न लायो ॥
 करि विवाह ताही लै आयो । तासु मनोरथ सकल पुजायो ॥ हरि चरणन सीता चित दीन्हों ।
 ताको पिता परण यह कीन्हों ॥ सात बैल इह नाथै जोइ । सीता व्याह ताहि संग होइ ॥ हरि तहां
 जाइ तासु प्रण राख्यो । धन्य धन्य सब काहु भाष्यो ॥ ताके पिता व्याह जब कियो । दाइज बहु
 प्रकार पुनि दियो ॥ बहुरो भद्रा सुमिरो हरी । गये पास तब विलम न करी ॥ ऐसेही त्रिभुवनपति
 राई । ताके मनकी आश पुराई ॥ बहुरि लछमना सुमिरन कीन्हों । ताहि स्वयंवरमें हरि लीन्हों ॥
 पांचौ वारि व्याह घर आये । सूरदास यश मंगल गाये ॥ २८ ॥ द्वारका प्रवेश शोभा वर्णन ॥ राग मलार ॥
 देखो माई हरिजूके रथकी शोभा । योग यज्ञ तप कठिन कर्म सब कीजत है जिहि लोभा ॥
 चारु चक्र मणि पानि विराजत चंचल चमर पताका । श्वेत छत्र मनु शशि प्राचीदिशि प्रगट्यो
 रजनी राका ॥ उपजत छवि कर अधर शंख निश सुनियत दुष्ट प्रशंसा । मानहु अरुन कमल
 मंडलमें कूजतहैं कलहंसा ॥ श्यामसुंदर सुदेश पीतपट शीश मुकुट उरमाला । जनु घन दामिनि
 रवि तारागण उदित एकही काला ॥ आनंदित सुत बंधु जनानि पितु कृष्ण मिलन पिय भावै ।
 सूरदास प्रभु द्वारकावासिनि प्राणनाथ हिय भावै ॥ २९ ॥ अध्याय ॥ ५९ ॥ भौमासुर वध ॥ नृप कन्या मोक्ष
 सुरतरु आगमन ॥ षोडशसहस्र रानी विवाह ॥ राग गौरी ॥ सतभामासों इती बात जबते न कही री । कि-
 तिक कठिन सुरतरु प्रसूनकी या कारण तू रूठि रही री ॥ पर मुख सुख जना उन दीने बिन काजे दि-

श देह दही री। आपनी सों सुनि सतभामा तैं मैं मन बच यह सुधि न लही री॥सूनो निपट अकेलो
 मंदिर चंद्रकला जनु राहु गही री । तुववियोगकी पीर कठिन अति सुकहि सूर क्यों जाति सही री
 ॥३०॥ राग आसावरी ॥ रटत कृष्ण गोविंद हरि हरि मुरारी । भक्त भयहरन असुर अंतकारी ॥ षटदश
 सहस कन्या असुर बंदिमें नींद अरु भूख अहानिशि बिसारी । प्रीति तिनकी सुमिरि भय
 अनुकूल हरि सत्यभामा हृदय यह उपाई ॥ कल्पतरु देखिबेकी भई साध मोहि कृपाकरि नाथ
 ल्यावहु देखाई । सत्यभामा सहित बैठे हरि गरुडपर भौमासुर नगर गए तुरत धाई । एकही
 बान पाषाणको कोट सब हुतो चहुँओर सो दियो ढहाई । गरुड चहुँपासके नाग लियो निगल
 जल बरषिकै अग्नि ज्वाला बुझाई ॥ करे हरि शंखध्वनि जग्यो तब असुर सुनि कोपकरि भवन
 ते निकस धायो । देखिकै गरुडको लगो ता हृदय दव कठिन त्रिशूल तब गहि चलायो ॥ असुर
 शिर टेक तब कह्यो निज नृपतिसों नहिं तिहुँ भुवन कोउ सम तुम्हारे । युद्धको करत छाजत
 नहीं है तुम्हें सुनो महाराज इह चाहत हमारे ॥ कियो तब युद्ध वन क्रोध होइ श्यामसों हरि कह्यो
 गरुड याहति प्रचारी । गरुड सुनि धाइ गह्यो जाइ ताको तुरत नैनहू शीश डारे प्रहारी ॥ तासु पुत्रन
 बहुरि युद्ध हरिसों कियो मारते सोऊ कादर डेराने । असुर कटि कटि परे कोऊ उठि उठि लरे कोऊ
 डर डर विदिश दिश पराने ॥ तब असुर अग्नि जलवान डारन लग्यो तासु माया
 सकल हरि निवारी । असुरके तनहिको लग्यो कलपन तुरंग गज उडि चले लागी बयारी ॥ असुर
 अजरूढ होइ गदा मोरे फटाकि श्याम अंग लागि सों गिरैं ऐसे । बालके हाथते कमल अमल नाल
 युत लागि गजराज तन गिरत जैसे ॥ आप जगदीश सब शीश ता असुरकी मारि त्रिशूल सोइ
 काट डारे । छँडिसो प्राण निर्वाणपदको गयो सुर पुहुप वर्षि जै जै उचारे ॥ पृथ्वीगहि पाइ
 माला कुंडल छत्र लै जोरि कर बहुरि बिनती सुनाई । नाथ मम पुत्रको दीजिये परमगति हरि
 कह्यो पुत्रको मुक्ति पाई ॥ बहुरि गये तहां कन्याहुती सब जहां निरखि हरि रूप सो सब लुभाई ।
 चरणही लागि वडभाग लखि आपने कृपाकरि हरि सो निजपुर पठाई ॥ बहुरि गयो इंद्रपुर
 इंद्र रह्यो पौंड्रपर कल्पतरु वृक्ष तासों भेंगाई । त्रिदशपति मोति अरु रत्न कुंडल दई वृक्ष लै आप निज
 पुरी आई ॥ बहुरि बहु रूप धरि गए हरि सबन घर व्याह करि सबनकी आश पूरी । सबनके भौन हरि
 रहहिं सब रैन दिन सबनसों नेक नहिं होत दूरी ॥ सबनको पुत्र दशदश कुँवारे एक एक दै सक-
 लको धर्म गृह किए सिखाई । कोटि ब्रह्मांड नायक सो वसुदेव सुत सूर सोई नंदनंदन कहाई ॥
 ॥ ३१ ॥ अध्याय ॥ ६० ॥ रुक्मिणभक्ति परीक्षा ॥ राग विलावल ॥ भक्तवत्सल हरिभक्त उधारन । भक्त
 परीक्षाके हित कारन ॥ रुक्मिणिसों बोले सति भाई । हम जानी तुमरी चतुराई ॥
 राउ चंदेरीको शिशुपाल । ज्योको सेवत सब भूपाल ॥ तासो तेरी भई सगाई । तैं पाती क्यों हमहिं
 पठाई ॥ जाति पाँति उन सम हम नाहीं । हम निर्गुण सब गुण उनपाहीं ॥ उन सम नहिं हमरी
 ठकुराई । पुरुष भलें ते नारि भलाई ॥ निःकंचन जिनमें ममवासा । नारि संगमें रहौं उदासा ॥ जो
 कहैं मोहिं काहे तुम्ह ल्याये । ताको उत्तर द्यौंसमुझाये ॥ कुंडिनपुर बहु भूपति आये । तिनके हृदय
 गर्वसों छाये ॥ वरजोरी में तोहिं हरि ल्यायो । उनके मनके गर्व नशायो ॥ इह सुनि रुक्मिणि भई
 बेहाल । जानि परचो नहिं हरिको ख्याल ॥ लै उसाँस नैन जल डारे । मुखते वचन न कछुक उचारे ॥
 ताकी दशा देखि हरि जानी । इन्ह मम भक्ति भली पहिंचानी ॥ हाँसि बोले तब शारंगपानी ।
 प्राणप्रिया तुम क्यों बिलखानी ॥ मैं हाँसी करि बात चलाई । तुम्हरे मन इह साँची आई ॥ आंसू

पोंछि निकट बैठारी । हँसी जानि बोली, तब प्यारी ॥ कहां तुम त्रिभुवनपति गोपाला कहां बापुरो
 नर शिशुपाला ॥ कहां चंदेरी कहां द्वावावती । जाके सरवर नहीं अमरावती ॥ तुम अमर वह जनमै मरै ।
 मूरख उन तुम सरवर करै ॥ तुमसन और नहीं यदुराई । याही जानि मैं शरणन आई ॥ इह सुनि
 हरि रुक्मिणिसों कह्यो । ज्यों तुम मोको चितमें चह्यो ॥ त्योंही हम चित चाहत तुमको । नहीं
 अंतर कछु हमसों तुमसों । यदुपतिको यह सहज सुभाउ ॥ जो कोउ भजै भजहि तेहि भाउ । जो इह लीला
 हितकरि गावै । सूर सो प्रेम भक्तिको पावै ॥ ३२ ॥ अध्याय ॥ ६१ ॥ प्रद्युम्न विवाह रुक्मकलिंग राजावध मारु ॥
 श्याम बलरामको सदा गाऊं । यही मम यज्ञ जप इहै तप नेम व्रत यहै मम प्रेम फल यही पाऊं ॥
 श्याम बलराम प्रद्युम्नके व्याह हित रुक्मके देश जबहीं सिधाये । कलिंगको राउ अरु रुक्म बलभद्र
 सों कपट करि सारि पासा खिलाये ॥ दांव बलरामको देखि उन छल कियो रुक्म जीत्यो कहन
 लगे सारे । देववाणी भई जीतभई रामकी ताउपै मूढ नहीं सम्हारे ॥ कलिंगको राउ करि हँसी
 लाग्यो करन बन वसन हार कहा खेल जानो । सभाके लोगहू लगे हाँसी करन राम तब हृदयमें
 क्रोध आन्यो ॥ रुक्म औ कलिंगको राउ मारचो प्रथम बहुरि तिनके बहुत सुभट मारे ।
 सूर प्रभु राम बलराम रणजीत भये प्रद्युम्न व्याहि निजपुर सिधारे ॥ ३३ ॥ अध्याय ॥ ६२ ॥
 ऊषा अनिरुद्ध विवाह वर्णन ॥ राग मारु ॥ कुँवर तन श्याम मानों कामहै दूसरो सपनमें देखि ऊषा लोभाई ।
 चित्ररेखा सकल जगतके नृपनकी छिनिकमें मुरति तब लिखि देखाई ॥ निरखि यदुवंशको रहस
 मनमें भयो देखि अनिरुद्धसों युद्ध माझ्यो । सूर प्रभु ठटी ज्यों भयो चाहै सो त्यों फांसि
 करि कुँवर अनिरुद्ध बाँध्यो ॥ ३४ ॥ अनिरुद्धव्याह ॥ अध्याय ॥ ६३ ॥ राग मारु ॥ श्याम बलराम यह
 सुनत धाये । आइ नारद कह्यो द्वारका नाथसों बाणासुर चोर अनिरुद्ध बाँधाये ॥ छोहनी दुइदशहुतो
 हरि सँग कटक जातही नगर ताको लुटायो । देखि यह असुर सन्मुख भयो श्यामके रुद्र निज से-
 न ल तहां आयो ॥ रुद्र भगवान अरु बान सांबुक भिरे राम कुंभाड मांडी लराई । सैनपति
 कोपि प्रद्युम्नसों भिरचो सांतुकुंकर दोऊ भिरन धाई ॥ तेज भगवानको पाय जलावन लगे असुर
 दल चलयो सबही पराई । रुद्र तब कोपि करि अग्नि वरषाकरी श्याम जल वर्षि डारचो बुझाई ॥
 पुनि महादेव जो बाण संधान लियो आप भगवान ताको प्रहारचो । देखि यह युद्ध सूर असुर चकृत भ-
 ये लख्यो तब बाण जो रुद्र धारचो ॥ बाण तब आइ भगवान सन्मुख भयो बाण वर्षा करन लग्यो
 भारी । एकहु बाण आयो न हरिके निकट तब गह्यो धनुष सारंगधारी ॥ एकही बाण संधान रथके
 तुरंग ध्वजा अरु धनुष सब काटि डारी । शंखको शब्दकरि लियो असुर तेज हरि ध्वनि रही फैल
 नभ पृथ्वीसारी ॥ देखि यह असुरकी मातुधाई नगन तुरत भगवानके निकट आई । नगन त्रिय
 देखि वे जगत नाहिन कह्यो जानि इह हरि रहे मुख फिराई ॥ असुर यह घात तकि गयो रणते
 सटकि विपतिज्वर दियो तब शिवपठाई । सप्तज्वर युद्धकरि कियो विह्वल तिसे तिन तबहि आइ
 बिनती सुनाई ॥ प्राणदाता तुहीं स्थल छूँछिम तुही सर्वआत्मा तुही धर्मपालक । ज्ञान तुही कर्म
 तुही विश्वकर्मा तुही अनंत शक्ति प्रभु असुर शालक ॥ संपत्ति अरु विपतिको मिलि चलै
 प्रभु तहां जहां नहि होइ सुमिरन तिहारो । करत दंडवत मैं तुम्हैं करुणाकरन कृपाकरि
 ओर मेरे निहारो ॥ सुनत यह वचन हरि कह्यो अब मौन करि कृपाकरि तोहि परवीर धारी ।
 संपत्ति अरु विपतिको भय न होइहै तिसे सुनै जो यह कथा चित्तधारी ॥ विपति ज्वर कह्यो
 शिरनाइ हरिको तुरत बाणासुर बहुरि रणभूमि आयो । चक्रपरिहार हरि कियो ताको निरखि रुद्र

शिरनाइ तब कहि सुनायो ॥ प्रगट तुम कपट तुम तुमहिं सब आत्मा निकारयो अग्नि रुद्र कति-
 हारी । बुधि बिधि चंद्रमा मन अहंकारमें धरि चरण रोम तू पृथ्वी सारी ॥ शीश आकास अरु श्रवण
 दशहं दिशा इंद्र करलोक नृप बपु तिहारो । बाण जगदीश मोहिं जान मम ईश तुम राखितेहि अब
 नाथ हाथचारो ॥ बिहंसि जगदीश कह्यो रुद्र जो तोहिं भजै तहां में जाउँ यह प्रण हमारो । कियो प्रह्लाद
 कुल अभै मैं पथ महिबाण कियो अमर भाषै तिहारी । करै जो सेव तुम्हरी सो मम सेवहै विष्णु शिव
 ब्रह्म ममरूप सारी ॥ बाण अभिमान मन माँह धारयो हुत्यो यों बिदित हाथ ताते सँहारी । रुद्र अरु
 बान अनिरुद्ध सन्मान करि तुरत भगवानके निकट ल्याये । बहुरि उषा दुई व्याह दाइज सहित करै
 सुमिरनतिसे भै न होई । कह्यो जो व्यास शुकदेव भागवतमें कही अब सूर जन गाइ सोई ॥ ३५ ॥
 अध्याय ६४ नृग राजा उद्धार ॥ राग सारंग ॥ अविगति गति जानी न परै । राईते पर्वत करि डारै राई
 मेरु करै ॥ नृगराजा नित सहस गऊदै करत हुत्यो जलपान । नृगते गिरगिट कीन्हें
 ताको कौंकरि सकै बखान ॥ कृपमाहिं तेहि देखि बालकन हरिसों कह्यो सुनाई । कृपानिधान
 जानि अपनोजन आये तहँ यहुराई ॥ अंधकूपते काढि बहुरि तेहि दरशनदै निस्तारा । सूरदास
 सब तजि हरि भजिये जब कब करै उधारा ॥ अध्याय ६५ ॥ बलभद्र वृंदावन आये ॥ राग विलावल ॥ श्याम
 रामके गुण नित गावों । श्याम रामहीसों चितलावों ॥ एक बार हरि निज पुर छये । हलधरजी
 वृंदावन गये । यह देखत लोगन सुखपाये । जान्यो राम श्याम दोउ आये ॥ नंद यशोमाति जब
 सुधिपाई । देह गेहकी सुरति भुलाई ॥ आगे है लेबेको धाए । हलधर दौरि चरण लपटाये ॥
 बलको हित करि गले लगाये । दै अशीश बोले ता भाये ॥ तुमतो भली करी बलराम । कहाँ रहे
 मनमोहन श्याम ॥ देखी कान्हरकी निठुराई । कबहुं पातीहू न पठाई ॥ आपुजाइ वहां राजा
 भए । हमको बिछुरि बहुत दुखदये ॥ कहो कबहुँ हमरी सुधि करत । हमतो उन बिनु बहु दुख
 भरत ॥ कहा करैं वहां कोउ न जात । उन बिनु पल पल युगसम जात ॥ यहि अंतर आए सब
 ग्वार । बैठे सवन यथा व्यवहार ॥ नमस्कार काहुको कियो । काहुको भर अंकम लियो ॥
 गोपी जुरीं मिली वन आई । अतिहित साथ अशीश सुनाई ॥ हरि करि सुध सुधि बुधि बिस-
 राई । तिनको प्रेम कहो नहिं जाई ॥ कोउ कहै हरि व्याही बहु नार । तिनके बढ्यो बहुत परिवार ॥
 उनको इह हम देत अशीस । सुखसों जीवैं कोटि बरीस ॥ कोऊ कहै हरिहि नहिं चीन्हों ॥ बिन चीन्हें
 उनको मन दीन्हों ॥ निशिदिन रोवत हमैं बिहाइ । कहो कहा हम करैं उपाइ ॥ कोउ कहै इहां चरावत
 गाइ । राजा भये द्वारका जाइ ॥ काहेको वै आवैं इहां ॥ भोग विलास करत नित उहां ॥ कोउ कहै हरि
 रीत सब नई ॥ और मित्रनको सब सुख दुई ॥ विरह हमारो कहां रहि गयो । जिन हमको अतिही दुख
 दयो ॥ कोउ कहै जे हरिजीकी रानी ॥ कौन भाँति हरिको पतियानी ॥ कोउ कहै चतुर नारि जो होई ।
 करिहै नहीं निवारो सोई ॥ कोउ कहै हम तुम क्यों पतिआई । उनको हित कुल लाज गवाँई ॥ हरि कछु
 ऐसो टोना जानत । सबको मन अपने वश आनत ॥ कोउ कहै हम हरि सब बिसराइ ॥ कहा कहैं कछु
 कह्यो न जाइ ॥ हरिको सुमिर नयनजल ढारे ॥ नेक नहीं मन धीरज धारे । इह सुनि हलधर धीरज धार ।
 कह्यो आइहै हरि निरधार ॥ जब बल इह संदेश सुनायो । तब कछु इक धीरज मन आयो ॥ बलि तहँ
 रहे बहुरि दुह मास । ब्रजवासिनसों करत विलास ॥ सबसों मिलि पुनि निजपुर आये ।
 सूरदास हरिको गुण गाये ॥ ३७ ॥ राग सारंग ॥ वारुणी बल घूर्म लोचन विहरत बन सचुपाए । मनहु महा
 गजराज विराजत करनि यूथ सँग लाए ॥ मुकुलित केश सुदेश देखि अत नीलबसन लपटाये ।

भरि अपने कर कनक कचोरा पीवति प्रियहि चुखाए ॥ हंसत रिसात बुलावत बरजत तरसत
 भौह चढाए । उदित मुदित उठि चलत डगमगत अनुज सुरति जिय आये ॥ इंद्र धनुष भुव
 चाप अधिक छबि वर बनितनके भाये । सर्वस रीझि देत अपने रस सूर श्याम गुण गाये ॥ ३८ ॥ सारंग ॥
 वारुणी बलराम पियारी । गौतम सुता भगीरथ वीवर सबहिनते सुंदरि सुकुमारी ॥ ग्रीवाँ बाहु
 गला रन गाजत सुखसजनी सतिभाय सवारी ॥ संकर्षणके सदा सुहागिनि अति अनुराग
 भाग बहुभारी ॥ बसुधा धर जु वाम गिरिराजत भ्राजति सकल लोक सुखकारी । प्रथम समागम
 आनंद आगम दूलह वर दुलहिनी दुलारी ॥ रतिरस रीति प्रीति परगटकरि राम काम पूरणप्रति
 पारी । सूर सु भाग उदित गोपिनके हरिजू रति भेंटे हलधारी ॥ ३९ ॥ कालिंदी सुन कह्यो
 हमारो । बोली बेगि चलहि बन बिहरत न्हाहि शरीर भयो श्रम भारी ॥ अतिही सतरहोइ
 जिनि सरित । छोडि गर्व या गुणको गारो । आपनि सौह कृष्णकी कानी राखतहौं यश मान
 तुम्हारो ॥ इतहु महातम मोहिं देखावत भवैतरंग प्रवाह पसारो । इन खुनसन गोपाल
 दोहाई हल करि खैंचि करों नदि नारो ॥ शिव विरंचि सनकादि सकल मुनि बोल वचन को ऊधो
 टारो । सूर सुभद्र श्यामके भैयहि निपट नदी जानत मतवारो ॥ ४० ॥ यमुना आइगई
 बलदेव । जो तुमको हौं सौह करीहौं संतत सादर सेव ॥ सुर नर मुनि जन गन गंधर्व ए सब
 बचननके देव । सूर भनो यह मानु करतहौं अवलंबनकी टेव ॥ ४१ ॥ कालिंदीहै हरिकी
 प्यारी । जैसे मोपै श्याम करतहैं तैसी तुम करहु कृपा निनारी ॥ यमुना यशकी राशि चहुं युग
 यम जेठी जगकी महतारी ॥ सूर कछु जिय जिनि दुखपायो कहा करौं यह टेव तिहारी ॥ ४२ ॥ राग रामकली ॥
 श्रीयमुनाजी तिहारो दरश मोहिं भावै । बंशीबटके निकट बसतहौ लहरनिकी छबि आवै ॥ दुखह-
 रनी सुखदेनी श्रीयमुना प्रातहि जो यश गावै । मदनमोहनजूकी अधिक पियारी पटरानीजू कहावै ॥
 वृंदावनमें रास विलासै मुरली मधुर बजावै ॥ सूरदास दंपति छबि निरखत विमल विमल यशगावै ॥ ४३ ॥
 अध्याय ॥ ६६ ॥ पुंडरीकउद्धार ॥ राग बिलावल ॥ हरि हरि हरि सुमिरहु सब कोय । हरिके शत्रु मित्र नहिं
 दोय ॥ ज्यों सुमिरै त्योंही गति होइ । हरि हरि हरि सुमिरहु सबकोइ ॥ पुंडरीक काशीको राइ । हरिको
 सुमिरै वैर सुभाइ ॥ अहनिशि रहै एहि लवलाई । क्यों करि जीतौ यादवराई ॥ द्वा रावती तिन
 दूत पठायो । ताको ऐसे कहि समुझायो ॥ चारि भुजा मम आयुध धारा । वासुदेव मैही निरधारा ॥
 योंही कह्यो यदुपतिसों जाई । कपट तजौं की करो लराई ॥ दूत आइ हरिसों सब कह्यो । हरिजी
 तेहि यह उत्तर दयो ॥ जो तैं कही सो हम सब जानी । पुंडरीककी आयु सिरानी ॥ कहो जाइ करैं युद्ध
 बिचार । सांच झूठ होइहै निरुआर ॥ दूत आइ निज नृपहिं सुनायो । तब उन मनमें युद्ध ठहरायो ॥
 जहां तहांते सबन बुलाइ । तब लगि यदुपति पहुँचे आइ ॥ पुंडरीक मुनि सुन्मुख आयो । पांच
 क्षोहनी दल सँग ल्यायो ॥ सेना देखि अस्त्र संभारी । यदुपतिके लोगनपर डारी ॥ हरि कह्यो तू अजहूं
 संभारी । सांच झूठ जिय देख बिचारी ॥ ताकी मृत्यु आइ निअरानी । जो हरि कही सो मन नहिं
 आनी ॥ यदुपति तब निज चक्र सँभारयो । ताकी सेना ऊपर डारयो ॥ ऐसे हैं त्रिभुवनपति राई ।
 जाकी महिमा देवन गाई ॥ कोऊ भजो काहू परकारा । सूरदास सो उतरै पारा ॥ ४४ ॥ अध्याय ॥ ६७ ॥
 द्विविद व सुतीक्ष्ण वध ॥ राग मारू ॥ द्विविद करि क्रोध हरि पुरी आयो । नृप सुदक्षिण जरयो जरी वारा-
 णसी धाइ धावन जबहिं यह सुनायो ॥ द्वारका माँह उत्पात बहुभाँति करि बहुरि रेवत अचल
 गयो धाई । तहाँहु देखि बलरामकी सभाको करन लागो निडर है ढिठाई ॥ लख्यो बलराम

यह सुभटवंत है कोऊ हल मुशाल शस्त्र अपना सँभारयो । द्विविद लै शालवृक्ष सन्मुख
 भयो फुरत करि राम तनु फेंकि मारयो ॥ राम दल मारि सो वृक्ष चुरकुट कियो
 द्विविद शिर फटगयो लगत ताके । बहुरि तरु तोरि पाषाण फटकन लग्यो
 हल मुशाल करन परहार बाँके ॥ वृक्ष पाषाणको जब वहां नाश भयो मुष्टिका युद्ध दोऊ प्रचारी ।
 रामकी मुष्टिका लगे गिरयो सो धरणिपर निकसि गयो प्राण सुधि बुधि बिसारी ॥ सुरन आकाश
 से पुहुप वर्षा करि करि नमस्कार जैजै उचारे । देवता गये सब आपने लोकको सूर प्रभु राम
 निजपुर सिधारे ॥४५॥अध्याय ॥ ६९ ॥ साँव विवाह ॥ राग आसावरी ॥ श्याम बलरामको सदा गाऊँ श्याम
 बलराम बिनु दूसरे देवको स्वप्नहू माहिं नहिं शीश नाऊँ ॥ श्याम सुनि साँव गयो हस्तिनापुर तुरत
 लक्ष्मणा जहां स्वयंवर रचायो । देखते सबनके ताहि बैठारि रथ आपने देशको पलटि धायो ॥ कर्ण
 दुर्योधनादिक लियो घेरि तेहि कर्ण ढिग आइ बहुबाण मारे साँव तेहि काटि निज बाण संधान करि
 तुरंग रथ नाश करि सब संहारे ॥ हतेउ पुनि सारथी एकही बाण करि परचोसो धरणि गिरि सुधि बि-
 सारी ॥ एक इक बाण भेज्यो सकल नृपनपै मानो सब साथ कीन्हें जोहारी ॥ देखि यह सुरन धनि धन्य
 सबहिन करयो पुनि करण अश्वरथके संहारी । साँवपै कोप करि बैठारि रथ आपने सुभट सब
 हस्तिनापुर सिधारी ॥ आइ नारद कही तुरत भगवानसों चले भगवान हलधर बोलाई । कह्यो
 मैं जाइकै ल्याइहौं साँवको कौरवनसों सदा हित हमारे । प्रीतिकी रीति समुझाइकै न तरु मैं
 एकही मुशाल सबको सँहारों । जाइ बलराम भेंटे सकल कौरवन बहुरि तिन सबन पुनि कहि
 सुनायो । साँवसों चूक जो भई बालक हुतो तुम्हें नहिं वृद्धिये जो बँधायो ॥ कह्यो दुर्योधन
 अति कोप तेहि दोष नहिं दोष सब लगै पुर गये हमारे । जो मने कियो सन्मान निज सभामें बहुरि
 इन ओर हित करि निहारे । जाम्बवंत सुता सुत कहां मम सुता बुधिवंत पुरुष यह
 सब सँभारै । अरु सदा देत यादवसुता कौरवन कहत अब बात बल सुनि बिचारे ॥ कह्यो बलराम
 यह साँव सुत श्यामको रुद्र विधि रेणु जाकी न पावैं । इंद्र सुर सकल दरबार ठाढे रहैं
 सिद्ध गंधर्व गुण सदा गावैं ॥ बहुरि करि कोप हल अग्र पर चक्र धर कटकभे दरर चाहत
 डुबायो । कौरवन मिलि बहुरि भौंति विनती करी दोष तिनको द्विजन मिलि क्षमायो ॥ साँवको
 लक्ष्मिना सहित ल्याये बहुरि दियो दाइज अगिन गिन न जाई । सुर प्रभु राम बलराम अतुल कौ-
 तुहल नीके करै आनंद निज पुरी आई ॥४६॥अध्याय ॥ ७० ॥ नारदसंशय द्वारका आगमन ॥ राग धनाश्री ॥ हरि
 की लीला देखि नारद चकृत भये । मन यह करत बिचार गोमती तर गये ॥ अलख निरंजन निर्वि-
 कार अच्युत अविनाशी । सेवत जाहि महेश शेष सुर माया दासी ॥ धर्म स्थापन हेतु पुनि धारयो
 नर अवतार । ताको पुत्र कलत्रसों नहिं संभवत पियारे ॥ हरिके षोडश सहस रहे पतिवर्तानारी ।
 सबसों हरिको हेत सबै हरिजीकी प्यारी ॥ जाके गृह दुइ नारि होंइ ताहि कलह नित
 होइ । हरि विहार केहि विधि करत नैनन देखों जोइ ॥ द्वारावति ऋषि पैठ भवन हरि जूके
 आयो । आगे होइ हरि नारि सहित चरणन शिरनायो ॥ सिंहासन बैठारिकै प्रभु धोये
 चरण बनाइ । चरणोदक शिर धरि कह्यो कृपाकरी ऋषिराइ ॥ तब नारद हाँसि कह्यो
 सुनो त्रिभुवनपतिराई । तुम देवनके देव देतहौ मोहिं बडाई ॥ विधि महेश सेवत तुम्हें
 मैं बपुरा केहिमाहीं । कहत तुम्हें ब्राह्मण देवता यामें अचरज नाहीं ॥ और गेह ऋषि
 गये तहां देखे यदुराई । चमर ढोरावत नारि करत दासी सेवकाई ॥ ऋषिको रूखे

देखि हरि बहुरि कियो सन्मान । उहँऊते नारद चले करत ऐसो अनुमान ॥ जागृहमें
 मैं जाउँ श्याम आगेही आवत । ताते छाँडि सुभाउ जाउँ अब कैसे धावत ॥ जहाँ
 नारद श्रम करि गये तहाँ देखे घनश्याम । पालनहु ऋडा करत करजोरे खडी बाम ॥
 नारद जहाँ जहाँ जाई तहाँ तहाँ हरिको देखै । कहुँ कछु लीला करत कहुँ कछु लीला पेखै ॥ योही
 सब गृहमें गये भयो न मन विश्राम । तब ताको व्याकुल निरखि हँसि बोलै घनश्याम ॥ नारद
 मनकी भर्म तोहिं यतनो भरमायो । मैं व्यापक सब जगत वेद चारों मुख गायो । मैं कर्ता मैं
 भुक्ता मोहिं बिनु और न कोइ । जो मोको ऐसो लखै ताहि नहीं भ्रम होइ ॥ बूझो सब घर
 जाइ सबै जानत मोहिं योही । हरिकी हमसों प्रीति अनत कहूँ जात न क्योंहीं ॥ मैं उदास सबसों
 रहों इह मम सहज सुभाइ । ऐसो जानै मोहिं जो मम माया न रचाइ ॥ तब नारद करजोरि कह्यो
 तुम अज अनंत हरि । तुमसे तुम बिन द्वितिय कोउ नहीं उत्तमदुरि ॥ तुम माया तुम कृपा बिनु
 सकै नहीं तरिकोइ । अब मोको कीजै कृपा ज्यों न बहुरि भ्रम होइ ॥ ऋषि चरित्र मम देखि कछु
 अचरज मतिमानो । मोते द्वितिया और कोऊ मनमाहि न आनो ॥ मैंही कर्ता मैंही भुक्ता नहिं
 यामें संदेहु । मेरे गुण गावत फिरौ लोगनको सुख देहु ॥ नारद करि परणाम चले हरिके गुण
 गावत । बारबार उरहेत ध्याइ हृदयमें ध्यावत ॥ इह लीला करि अचरजकी सूरदास कहिगाइ ।
 ताको जो गावै सुनै सो भवजल तरिजाइ ॥ ४७ ॥ अध्याय ॥ ७१ ॥ भगवान हस्तिनापुर चले जरासंध वधहेतु ॥
 ॥ राग मारू ॥ चले हरि धर्मसुअनके देश । बंदित जन भूभार उत्तारन काटन बंदी कठिन नरेश ।
 जब प्रभु जाइ शंखध्वनि कीनी ठाढ़े नगर प्रवेश । सुनि नृपवधू सकल उठिधाई डारि चरण
 रजुकेश ॥ शीशनाइ करजोरि कह्यो तब नारद सभा सहेस । तत्क्षण भीम धनंजय माघो धन्य
 द्विजनको भेस ॥ पहुँचे जाइ राजगिरि द्वारे धुरे निसान सुदेश । यांच्यो जाइ आतिथि रूप
 है आशिश युद्ध नरेश ॥ जरासंधको युद्ध अथरबल रहत न क्षत्रीलेश । सूर श्याम दिन सात बीत
 तिन तोरिब काटि कलेश ॥ ४८ ॥ राग कान्हरो ॥ राजरवनि गावत हरिको यश । रुदन करत सुतको
 समुझावति राखति श्रवणन प्यार सुधारस ॥ तुम जिनि जीव डरहु रे बालक कृपासिंधुके शरन
 सदावसु । तजि जिय सोच तात अपनेको करि प्रतीति निश्चय है है हँसु ॥ जिन प्रभु जनकसुता प्रण
 राख्यो अरु रावणके शीश सकल नशु । सोई सूर सहाय तुम्हारो मोचन गोप गयंद महापशु ॥ ४९ ॥
 ॥ राग घनाश्री ॥ इहाँ और कासों कैहौं गरुडगामी । दीनबंधु दयासिंधु अशरन शरन सत्य सुखधाम
 सर्वज्ञ स्वामी ॥ इन जरासंध मदअंध मम मान मथि बाँधि बिनु काज बल इहाँ आने । भए आरूढ
 अति क्रोध जिनि गिरि गुहा रहत भृंगी क्रीट ज्यों त्रासमाने ॥ नाहिनै नाथ जिय सोच धन
 धरणिको मरनते अधिक यह दुख सतावै ॥ भृत्यकी रीति तजि होत मागध सकल नाथ जिनि
 दमत उद्वेग पावै ॥ मधु कैटभ मथन सूर भौम केशी भिदन कंस कुल काल अनुसाल हारी ।
 जानि युगजूपमें भूप तद्रूपता बहुरि करिहै कलुष भूमि भारी ॥ वदत नृप देत भैभीत उर मीरता
 सुनत हरि सूर सारथि बोलायो । भयो आरूढ तकि ताहि उत्तर दियो जाइ सुख देहु या हेतु
 आयो ॥ ५० ॥ अध्याय ॥ ७२ ॥ जरासंधवध ॥ राग मारू ॥ कंसखलदलन रन राम रावणहतन सँहारी ।
 दीन दुखहरन गज मुक्तकारी ॥ नृपति चहुँदेशके बंदी जरासंधके रैन दिन रहत जिय दुखित भारी ।
 सुने यदुनाथ इह बात तब पथिकसों धर्मसुतके हृदय यह उपाई । राजसूयज्ञको कियो आरंभ मैं
 जानिकै नाथ तुमको सहाई । भीम अर्जुन सहित विप्रको रूपधरि हरि जरासंधसों युद्ध

मांग्यो । दियो उनपै कह्यो तुम कोऊ क्षत्रिआ कपटकरि विप्रको स्वांग स्वांग्यो ॥ हरि कह्यो
 भीम अर्जुन दोऊ सुभट ये कृष्ण मैं देखि लोचन उधारी । वचन जो कही प्रतिपाल ताको करो
 कै सभा माँह सत जाहु हारी ॥ पार्थ अरु तुम समर्थ सम युद्धको भीमसों उन यह कह सुनाई ।
 बीस औ सप्तदिन यों गदायुद्ध कियो दोउ बलवंत कोउ लियो न जाई ॥ श्याम तृणचीर देखराय दियो
 भीमको भीम तब हर्षि ताको संहारयो । जरा जरासंधकी संधि जोरयो हुत्यो भीम ता संधको
 चीर डारयो । नृपनको छोरि सहदेवको राज्यदियो देव नर सकल जैजै उचारयो । सूर प्रभु भीम
 अर्जुन सहित तहांते धर्मसुत देशको पुनि सिधारयो ॥ ५१ ॥ अध्याय ॥ ७३ हस्तिनापुरआये ॥ राग सारंग ॥
 जीत्यो जरासंध बंदि छोरी । युगल कपाट विदारि बाटकरि लतनि जुही संधियोरी ॥ विषम जाल बल
 बांधि व्याधलौं नृप खग अवलि बटोरी । जनु सु अहेरो हति यादवपति गुहापीजरी तोरी ॥ निकसे
 देत अशीश एकमुख गावत कीरति कोरी । जनु उडचले विहंगम कोगन कटी कठिन पग डोरी ॥
 मिटिगए कलह कलेश कुलाहल जनु करि बीती होरी ॥ सूरदास प्रभु अतुलित महिमा जो कछु कह्यो
 सो थोरी ॥ राग मारू ॥ जीत्यो जीत्यो हो यदुपति रिपु दल मारयो । तउन तजत हठ परम शठ ना जानौ
 कुबुद्धि जड कै वासै विदारयो ॥ वरवरमूढा उठि खेलत बालक सुठि आनितइधन दौरि दौरि
 संचारयो ॥ ऐसे इहु नृप नर सकल सकेलि घरके साककरन हृद रस बकुल जारयो ॥ कह्यो न काहुको
 करै बहुरि बहुरि औरै एकही पाइदै इक पग पकरि पछारयो । सूर स्वामी अतिरिस भीमकी भुजाके
 मिस व्यौतत वसन ज्यों सुत तन फारयो ॥ ५२ ॥ समूह राजा विनती ॥ राग विलावल ॥ जाहि कहा अपराध भरे ।
 तुम माता तुम पिता जगतगुरु तुमहि सहोदर बंधु हरे ॥ वसन कुंचील देह अति दुर्बल उमंगि
 प्रेम जल सिथिल भरे । राजा सबै बंदिते छोडे आइ कृष्णके पाँइ परे ॥ सावधान करि बिदा दई
 हरि उठे कमल कर शीश धरे ॥ सूरदास प्रभु तुम्हरी कृपाते भवसागरके माझ तरे ॥ ५३ ॥ अध्याय ॥ ७४ ॥
 पांडवयज्ञ शिशुपालगति ॥ राग विलावल ॥ हरि हरि हरि सुमिरो सबकोइ । शत्रु मित्र हरि गिनत न दोइ ॥
 जो सुमिरै ताकी गति होइ । हरि हरि हरि सुमिरो सब कोइ ॥ वैरभाव सुमिरयो शिशुपाल ।
 ताहि राजसूमें गोपाल ॥ चक्र सुदर्शन करि संहारयो । तेज तासु निज मुखमें डारयो ॥ भक्त
 भाव भक्तन उद्धारत । वैरभाव असुरन निस्तारत ॥ कोऊ सुमिरो काहु प्रकार । सूरदास हरिनाम
 उधार ॥ ५४ ॥ अध्याय ॥ ७५ ॥ पांडवसभा दुर्योधन क्रोध ॥ राग विलावल ॥ भक्तकाज हरि जित कित सारे ।
 यज्ञराजसु माहि आप हरि सबके पाँइ परवारे ॥ अष्टनायका द्रुपदसुताकी करै तहाँ सेवकाई । दुर्यो-
 धन यह रीति देखिकै मनमें रह्यो खिसाई ॥ भक्त संग हरि लागे डोलत भक्तवत्सल प्रभु भोरी ।
 सब विधि काज करत भक्तनके गनत नहीं हम कोरी ॥ जीते जीतत भक्त आपनकी हारे हार बिचा-
 रत । सूरदास प्रभु रीति सदा यह प्रणयुगयुग प्रतिपारत ॥ ५५ ॥ अध्याय ॥ ७६ ॥ तथा ॥ ७७ ॥ शाल्वद्वारका
 आक्रमण मद्युम्नशाल्व युद्ध शाल्व वध ॥ राग मारू ॥ सुभट शाल्व करि क्रोध हरिपुरी आयो ॥ हत्यो शिशुपालको
 राजसू माँह हरि धाई धावन जबहिं इह सुनायो ॥ वृक्ष बन काटि महलात ढाहन लग्यो नगरके
 द्वार दीनों गिराई । सर्व पाषाणकी वृष्टि करि लोग पर पाइ अति पलक बीते जराई ॥ प्रद्युमन साँब
 रणनिकसि सन्मुख भये नंदनंदन सुनत तुरत धाई । तहाँ चारि देश दिश साजि दल मिलि सकल हाँकि
 रथ तुरंग ता ठौर आई । सुमिरि गोपाल तब शाल्व मारयो फटकि प्रद्युमन बाण दिशिते चलायो ।
 मिट्यो अंधकार तब बाण वर्षा करी तुरंग रथ सारथी सो गिरायो ॥ सैन्यके लोग पुनि बहुत घायल
 किये लरयो ध्वजा धरि धर परयो सुरछाई । शाल्व इह देखिकै चकृत सों होइ रह्यो शस्त्रके गहन

की सुध भुलाई ॥ अस्त्र विद्या समर बहुरि लाग्यो करन कबहुँ लघु कबहुँ दीरघ सो होई । गुप्त कबहुँ
 कबहुँ प्रगट तेहि देखिकै धरती रहहि कबहुँ आकाश सोई ॥ अग्रि कबहुँक बरखि वारि बर्षा करै प्रद्युमन
 सकल माया निवारी । शाल्व परधान उदमान मारी गदा प्रद्युमन सुरछित भये सुधि विसारी ॥
 धर्मपति सारथी गयो एकांतलै उहां जब चेत है सुधि संभारी । खीझ कह्यो ताहि क्यों इहां
 ल्यायो मुझे मम पिता मातको लगै गारी ॥ कहा कहिहैं हमैं राम भगवान सुनि नारि मम सुनत
 अति दुखित होई । मरे रण सुयश त्रैलोक्य सुख पाइये मंदमति तैं दोऊ बात खोई । धर्मपति कह्यो
 करि विनय मम शोक नहिं सारथी धर्म मोहिं गुरु सिखायो । मूर्च्छित सुभटहो नहीं राखिये खेतमें
 जानि यह बात मैं इहां ल्यायो ॥ प्रद्युमन कह्यो जो भई सो भई अब बात नहिं जिन्ह कोऊ सो
 सुनैये । ताहिदै शपथ करि आचमन यों कह्यो चलो रणभूमि अब बेगि जैये । आइ रणभूमिमें सबन
 धीरज दियो शाल्व रथ तुरंग चारों संहारे । छत्र ध्वज तोरि मारचो बहुरि सारथी देखि यह दूर कियो
 सुभट सारे ॥ हस्तिनापुर गये हते हरि पांडु गृह तहांते चले यह बात जानी । शाल्वउत्पात कियो
 द्वारका माँह बहु हांकि रथ कह्यो सारंगपानी ॥ सारथी पाय रुख दये सटकार हय द्वारकापुरी
 जब निकट आई । शाल्वके भटन लखि कटक भगवानको आपने नृपतिसों कह्यो जाई ॥
 सुनि सो भगवानके आइ सन्मुख भयो सारथी दौरि बछीं चलाई । ताहि आवत निरखि श्याम निज
 सांगको काटिकारि शाल्वकी सुधि भुलाई ॥ बहुरि तिन कोपि निज बाण संधानकरि धनुष
 भगवानको काटि डारचो । टूटते धनुषके शब्द आकाश गयो शाल्व निज जिय समुझि पुनि
 उचारचो ॥ रुक्मिणी माँगि शिशुपालकी तुम हरी बहुरि तेहि राजसूमें संहारचो । जाइहो अब
 कहां शिशु दाँव लैहैं इहां छँडितीजार आपा संभारचो ॥ कह्यो भगवान सुनु शाल्व जे शूरनर ते
 नहीं करत निज सुख बडाई । जंगमें शूर तिनको नहीं जानिये भाषि यह गदा ताको चलाई ॥
 गदाके लगतही गयो सो गुप्तहोइ धारि धावन रूप यह सुनायो । कह्यो वसुदेव जगदीश
 सुनु अस्त्रजे तुअ अछत शाल्व मोहिं बांधि ल्यायो ॥ बहुरि करि कपट वसुदेव तहां
 प्रगट कियो कह्यो तिन नाथ मैं दुखित भारी । शाल्व करबारलै श्यामके देखते
 डारिदियो ताको शीश उतारी ॥ कह्यो भगवान करि कपट इन यह कियो तासु माया तुरत
 हरि निवारी । भागि निज पुर चलयो श्याम पहिलेहि पहुँचि पुनि गदा खैंचि ता शीश मारी ।
 शाल्व कियो युद्ध बहु बेरलौ गदाकी बहुरि हरि सांग ताको चलाई । लगत ताके गए प्राण
 वाके निकसि सुरन आकाश दुंदुभि बजाई ॥ शीश ताको बहुरि काटि करबालसों नगर सब समुद्र
 में डारि दीन्हों । सूर प्रभु रहे ताठौर दिन और कछु मारि दंतवक्र पुर गवन कीन्हों ॥ ५६ ॥ अध्याय ॥
 ७८ ॥ दंतवक्रपरमगति ॥ राग मारु ॥ हरि निकट सुभट दंतवक्र आयो । कह्यो शिशुपाल तुम राज
 सूमें हत्यो धनि सो यह हेत सुनि दरश पायो ॥ भृत्य तुम हने संशय नहीं कछु हमैं दोउ बिधि आइ
 प्रभु हित हमारी । जीवै तो राज सुख भोग पावै जगत मुये निर्बाण नीरस तुम्हारी ॥ बहुरि लै गदा
 प्रहार कियो श्यामपर लगे ज्यों लकुट अंजुजप भारी । हरि गदा लगत गये प्राण ताके निकसि बहुरि
 हरि निज बदन माँह धारी ॥ अनुज ताको बडो रथ लग्यो फिरन यों चक्रसो शीश ताको प्रहारचो ।
 सूर प्रभु युद्ध भयो मुनि जन हरषिये सुर पुहुप वरषि जै जै उचारचो ॥ ५७ ॥ अध्याय ॥ ७९ ॥ बल्लल
 वध, रामतीर्थगमन ॥ राग मारु ॥ श्याम बलरामको सदा गाऊं । यही मम ज्ञान यह ध्यान सुमिरन यही
 इहै स्नान फल इहै पाऊं ॥ श्याम दंतवक्र अरु शाल्वको जीत करि करत आनंद निज पुरी

आयेराम गंगा और यमुना स्नान करि नैमिषारण्य में जाइ न्हाये॥सूत तहां कथा भागवतकी कहत
 हैं ऋषि अठासी सहस्र हुते श्रोता । रामको देखि सन्मान सबही कियो सूत नहिं उच्चो निज जानि
 वक्ता ॥ रामतेहि हत्यो तव सब ऋषिन मिलि कह्यो विप्र हत्या तुम्हैं लगी भाई । वाहिनिमित्त
 सकल तीर्थ स्नान करो पाप जो भयो सो सब नशाई ॥ पुनि कह्यो ऋषिन दानव महा प्रबल इहां
 हमें दुख देत सोई सदाई । ताहि जो हतौ तो होइ कल्याण तुम्हैं हम करें यज्ञ सुखसों सदाई ॥
 राम दिन कइक ता ठौर अवरो रहे आइ वल्लव तहां दई देखाई । रुधिर औ मांसकी लगो वर्षा
 करन ऋषि सकल देखिकै गये डेराई ॥ राम हलसों पकरि मृशलसों हत्यो तेहि प्राण तजि तिन
 सकल सुधि विसारे । सुरन आकाशते पुहुप वर्षा करी ऋषिन आशीशदै जै ध्वनि
 उचारी ॥ बहुरि बलभद्र परणाम करि ऋषिन्हको पृथ्वी परदक्षिणाको सिधाये ।
 प्रभु रची ज्योंहिं ज्यों होइ सो त्योंहिं त्यों सूर जन हरि चरित कहि कहि सुनाये ॥ ५८ ॥
 ॥ अध्याय ॥ ८० ॥ तथा ॥ ८१ ॥ सुदामा दारिद्रमंजन ॥ राग विलावल ॥ हरि हरि हरि हरि सुमिरन करो ।
 हरि चरणारविंद उर धरो ॥ विप्र सुदामा सुमिरे हरी । ताकी सकल आपदा टरी ॥ कहौ सो कथा
 सुनो चितधार । कहै सुनै सो लहै सुखसारा ॥ विप्र सुदामा परमकुलीन । विष्णुभक्त सो अतिलवलीन ॥
 भिक्षा वृत्ति उदर नित भैर । निशिदिन हरि हरि सुमिरन करै ॥ नाम सुशीला ताकी नारी । पति-
 व्रता अति आज्ञाकारी ॥ पति जो कहै सो करै चितलाइ । सूर कह्यो इक दिन या भाइ ॥ राग विला-
 वल ॥ कहि न सकति सकुचति इक बात । कितीक दूरि द्वारका नगरी काहे न द्विज यदुपति लौं
 जात ॥ जाके सखा श्यामसुंदरसे श्रीपति सकल सुखनके दात । उनके अछत आपने आलस काहे
 कंत रहत कृशगात ॥ कहियत परम उदार कृपानिधि अंतर्यामी त्रिभुवन तात । द्रवत आपु देत दास-
 नको रीझत हैं तुलसीके पात ॥ छाँडौ सकुच बाँधि पट तंदुल सूरज संग
 चलो उठि प्रात । लोचन सफल करौ प्रभु अपने हरि मुख कमल देखि बिलसात ॥ ५९ ॥
 ॥ राग नट ॥ श्रीकंत सिधारो मधुसूदनपै सुनियतहै वै मीत तुम्हारे । बाल सखाकी
 विपति विहंडन संकट हरन मुरारे ॥ और जु अति आदर सुन्यो हम निज जन प्रीति
 विचारे । यद्यपि तुम संतोष भजतहौ दरश निकट सुख भारे ॥ सूरदास प्रभु मिले सुदामें सब
 भाँति सुख दैजु नारे ॥ ६० ॥ राग विलावल ॥ दूरिहिते देखै बलवीर । अपने बाल सखा सुदामा मलिन
 बसन अरु छीन शरीर ॥ पौढे हुते प्रयंक परम रुचि रुक्मिणि चमर डोलावत तीर । उठि अकुलाइ
 अगमने लीने मिलत नैनभरि आये नीर ॥ तेहि आसन बैठारि श्याम घन पूँछी कुशल करौ
 मन धीर । ल्यायेहौ सु देहु किन हमको अब कहा राखि दुरावत चीरा ॥ दरशन परसि दृष्टि संभाषन
 रही न उर अंतर कछु पीर । सूर सुमति तंदुल चबातही कर पकरचो कमला भइ भीर ॥
 ॥ ६१ ॥ राग धनाश्री ॥ यदुपति देखि सुदामा आये । विह्वल विकल छीन दारिद्रवश करि प्रलाप रुक्मिणि
 समझाये ॥ दृष्टि परे ते दिये संभाषण भुजा पसारि अंक लै आये । तंदुल देखि बहुत दुख
 उपज्यो मांगु सुदामा जो मन भाये ॥ भोजन करत गह्यो कर रुक्मिणि सोइ देहु जो मन न डुलावै ।
 सूरदास प्रभु नव निधि दाता जापर कृपा सोइ जन पावै ॥ ६२ ॥ राग विलावल ॥ ऐसी प्रीतिकी बलिजाँ
 सिंहासन तजि चले मिलनको सुनत सुदामा नाउँ ॥ गुरुबांधव अरु विप्र जानिकै चरणन हाथ
 पखारे । अंकमाल दै कुशल वृद्धिकै अर्चासन बैठारे ॥ अर्घ्यगी वृद्धत मोहनको कैसे हितू तुम्हारे ।
 दुर्बलदीन क्षीन देखतिहैं पाँउ कहाँते धारे ॥ संदीपनके हम औ सुदामा पढे एक

चटसार । सूर श्यामकी कौन चलावै भक्तन कृपाअपार ॥६३॥ राग धनाश्री ॥ गुरु गृह जब हम वनको
जात । तुरत हमारे बदले लकरा ये सब दुख निजगांत ॥ एक दिवस वर्षा भई वनमें रहिगये ताही
ठौर । इनकी कृपा भयो नहिं मोहिं श्रम गुरु आये भये भोर ॥ सो दिन मोहिं विसरत न सुदामा
जो कीन्हों उपकार । प्रतिउपकार कहाकरौं सूर अब भाषत आप सुरार ॥ ६४ ॥ हरिको मिलन
सुदामा आयो । बिधि करि अरघ पाँवडे दीने अंतर प्रेम बढ़ायो ॥ आदर बहुत कियो यादवपति
मर्दन करि अन्हवायो । चोवा चंदन अगर कुमकुमा परिमल अंग चढायो ॥
पूरब जन्म अदात जानिकै ताते कछु मैगायो । मूठिक तंदुल बाँधि कृष्णको बनिता बिनय
पठायो ॥ समदै विप्र सुदामा घरको सर्वसु दै पहुँचायो । सूरदास बलि बलि मोहनकी
तिहुँ लोक पद पायो ॥ ६५ ॥ वह सुधि आवत तोहिं सुदामा । जब हम तुम बनगए लकरियन
पठए गुरुकी भामा ॥ चपल समीर भयो तेहिरजनी भीजे चारों यामा । कांपत हृदय वचन नहिं
आवै आए सत्वर धामा ॥ तबहिं अशीश दई परसन है सफल होहु तुम कामा । सूरदास प्रभुको जो
मिलन यश गावत सुर नर नामा ॥ ६६ ॥ राग विलावल ॥ सुदामा गृहको गमन कियो । प्रगट विप्रको
कछु न जनायो मनमें बहुत दियो ॥ वोई चीर कुचील वोई बिधि मोको कहाँ कियो । धरिहौं कहा
जाइ त्रिय आगे भरि भरि लेत हियो ॥ भयो संतोष भाव मनहीं मन आदर बहुत कियो । सूरदास
कीन्हें करनी बिन कोपति आइ वियो ॥ ६७ ॥ सुदामा मंदिर देखि डरयो । शीशधुनै दोऊ करमोडै
अंतर साँच परयो ॥ ठाढी त्रिया मार्ग जो जीवै ऊँचे चरण धरयो । तोहिं आदरयो त्रिभुवनको
नायक अब क्यों जात फिरयो ॥ इहां हुती मेरी तनिक मडैआ को नृप आनि छरयो । सूरदास
प्रभु करि यह लौला आपद विप्र हरयो ॥ ६८ ॥ देखत भूलि रह्यो द्विज दीन । डूँढत फिरै न पृच्छन
पावै आपुन गृह प्राचीन ॥ किधौं देवमाया बौरायो किधौं अनतही आयो ।
तृणहुकी छाँह गई निधि मांगत अनेक जतन करि छायो ॥ चितवत चकित चहुँदिशि ब्राह्मण
अद्भुत रचना रीति । ऊँचे भवन मनोहर छाजा मणि कंचनकी भीति ॥ पति पहिचानि धरी
मंदिरते सूर त्रिया अभिराम । आवहु कंत देखि हरिको हित पाउँ धारिये धाम ॥ ६९ ॥ भूलो
द्विज देखत अपनो घर । औरहि भाँति रची रचना रुचि देखतही उपज्यो हृदय डर ॥ कै यह
ठौर छिनाइ लियो कहूँ आइ रह्यो कोऊ समरथ नर । कैहौं भूलि अनतखंड आयो यह कैलास
जहां सुनियत हर ॥ बुधजन कहत दुबल घातक बिधि सोइ न आजु लह्यो यह पटतर । ज्यों
नलनी बन छाँडि वसी जल दाही हेम जहां पानी सर ॥ जगजीवन जगदीश जगतगुरु अवि-
गति जानि भरयो । आवो चले मंदिर अपनेही कमलाकंत धरयो ॥ ता पीछे त्रिय उतारि
कह्यो पति चलिए घरहि गहे कर से कर । सूरदास यह सब हित हरिको रोप्यो द्वार सुभग
ति कलपतर ॥ ७० ॥ कहा भयो मेरो गृह माटीको । होतो गया गुपालहि भेंटन और खर्चतंदुल गांठी
को ॥ विनु ग्रीवा कल सुभग न आन्यो हुतो कमंडलु दृढ काठीको । धुनो बाँस गत बुन्यो खटोला
काहूको पलंग कनक पाटीको ॥ नौतन धीरे दिकुयुगतीपै भूषण हुते न लोहू माटीको । सूरदास
प्रभु कहा निहोरों मानतुरंक त्रास टाटीको ॥ ७१ ॥ राग धनाश्री ॥ कहौ कैसे मिले श्याम संघाती । कैसे
गए सु कंत कौन बिधि परसे हुते वस्तर कुचिलकुजाती ॥ सुनि सुंदरि प्रतिहार जनायो हरि समीप
रुक्मिणी जहाती । उभै मुठी लीनी तंदुलकी संपति संचित करीही थाती ॥ सूर सु दीनबंधु
करुणामय करत बहुत जो श्रीनरिसाती ॥ ७२ ॥ राग विलावल ॥ ऐसे मोहिं और कौन पहिचानै । सुन सुंदरी

दीनबंधु विन कौन मिताई मानै ॥ कहां हम कृपण कुचील कुदरशन कहां वै यादवनाथ गुसाईं ।
 भेटे हृदय लगाइ अंक भरि उठि अग्रजकी नाई ॥ निज आसन बैठारि परमरुचि निजकर चरण
 पखारे । पूंछी कुशल श्याम घन सुंदर सब संकोच निवारै ॥ लीन्हें छोरि चीरते चाउर करगहि मुख-
 में मेलै । पूरव कथा सुनाइ सूर प्रभु गुरु गृह वसे अकेले ॥ ७३ ॥ राग धनाश्री ॥ हरि विन कौन दारि-
 द्र हरै । कहत सुदामा सुन सुंदरि जिय मिलन न हरि बिसरै ॥ और मित्र ऐसे समया महँ कत पहिंचा-
 न करै । विपति परे कुशलात न बूझै बात नहीं बिचरै । उठिकै मिले तंदुल हरि लीने मोहन वचन
 पुरै । सूरदास स्वामीकी महिमा टारी निधि न टारै ॥ ७४ ॥ और को जानै रसकी रीति । कहां हों दीन कहां
 त्रिभुवनपति मिले पुरातन प्रीति । चतुरानन तन निमिष न चितवत इती राजकी नीति । मोसों
 बात कही हृदयकी गए जाहि युगवीति ॥ विनु गोविंद सकल सुख सुंदरि भुस पर कीसी भीति ।
 हों कहा कहां सूरके प्रभुके निगम करत जाकी क्रीति ॥ ७५ ॥ गोपाल बिना और मोहिं ऐसो कौन
 सँभारै । हँसत हँसत हरि दौरि मिले सु उरते उर नहिं टारै ॥ छीन अंग जीरन वस्त्र दीन सुख नि-
 हारै । ममतन रज पथ लागी पीतपट सों झारै ॥ सुखद सेज आसन दीन्हों सुहृथ पायँ पखारै । हरि
 हित हर गंग धरे पदजल शिर डारै ॥ कहि कहि गुरु गेह कथा सकल दुख निवारै । न्याय निज वषु
 सूरदास हरिजी ऊपर वै वारै ॥ ७६ ॥ राग केदारो ॥ दीन द्विज द्वारे आइ रहो ठाढो । नाम सुदामा
 कहत नाथ जो दुखी आहि अति गाढो ॥ सुनतहि वचन कमलदल लोचन कमला दल उठि
 धाए । त्रिभुवन नाथ देखि अपनो प्रिय हितसों कंठ लगाए ॥ आदर करि मंदिर लै आने कनक
 पलंग बैठाए । कथा अनेक पुरातन कहि कहि गुरुके धाम बताए ॥ खड्गबेको कछु भाभी
 दीन्हों श्रीपति श्रीमुख बोले । फेंट ऊपरतें अंजुल तंदुल बलकरि हरिजू खोले ॥ दुइ मूठी तंदुल
 मुखमें ले बहुरो हाथ पसारयो । त्रिभुवन दैकरि कछो रुक्मिणी अपुनो दान निवारयो ॥
 बिदा कियो पहुँचे निज नगरी हेरत भवन न पायो । मंदिर रही नारि पहिंचान्यो प्रेम समेत बुलायो ॥
 दीनदयालु देवकीनंदन वेद पुकारत चारो । सूर सु भेंटि सुदामाको दुख हरि दारिद्र मिटारो ॥
 ॥ ७७ ॥ श्रीकृष्ण द्वारका गमन हेतु पंथीप्रति व्रजनारी वदति ॥ राग मलार ॥ लबते बहुरि न कोऊ आयो । उहै
 जु एकबेर ऊधोसों कछु सँदेशो पायो ॥ छिन छिन सुरति करत यदुपतिकी परत न मन समुझायो ।
 गोकुलनाथ हमारे हितलगी लिखिहू क्यों न पठायो ॥ यहै बिचार करहु धौं सजनी इतौ गहर
 क्यों लायो । सूर श्याम अब बेगि न मिलहु मेघनि अंबर छायो ॥ ७८ ॥ राग गौरी ॥ बहुरचो ब्रज बात न चाली ।
 वहै सु एक बेर ऊधो कर कमलनैन पाती दै चाली ॥ पथिक तुम्हारे पाँइन लागति मथुरा जाउ
 जहां वनमाली । कहियो प्रगट पुकार द्वार है कालिंदी फिरि आयो काली ॥ तबहूँ कृपाहुती नंद
 नंदन रचि रचि रसिक प्रीति प्रतिपाली । माँगत कुसुम देखि ऊंचे द्रुम लेव उछंग गोद करि आली ॥
 जब वह सुरति होत उर अंतर लागति काम बाणकी भाली । सूरदास प्रभु प्रीति पुरातन सुमिरत
 उरह झूल अति शाली ॥ ७९ ॥ राग धनाश्री ॥ तुम्हरे देश कागर मसि खूटी । भूख प्यास अरु नींद गई सब
 हरि विन विरह लयो तनु टूटी ॥ दादुर मोर पपीहा बोले अवाधि भई सब झूठी । हम अपराधिनि
 मर्म न जान्यो अरु तुमहूते तूटी ॥ सूरदास प्रभु कबहुँ मिलहुगे सखी कहत सब झूठी ॥ ८० ॥
 अध्याय ॥ ८२ ॥ कुरुक्षेत्र यशोमति गोपी मिलन ॥ पथिक कहियो ब्रजजाइ सुने हरि जात सिंधु तट । सुनि
 सब अंग भये शिथिल गयो नहिं वज्रहियो फट ॥ नर नारी घर घर सबै इह करति बिचारा ।
 मिलिहैं कैसी भांति हमैं अब नंदकुमारा ॥ निकट बसत हुती अस कियो अब दूर पयाना । बिना

कृपा भगवान उपाउ न सूर अपाना ॥८१॥ राग गौरी ॥ हमारे श्याम चलन कहत हैं दूरी। मधुवन वसत
 आशहुती सजनी अब मरिहैं जु बिसूरी ॥ कौने कहौ कौन सुनि आई किहि रुख रथकी धूरि ॥
 संगहि सबै चलौ माधवके नातौ मरिहौ हरि ॥ दक्षिणदिशि यह नगर द्वारका सिंधु रह्यो
 जलपूरि । सूरदास प्रभु बिनु क्यों जीवों जात सजीवन मूरि ॥ ८२ ॥ गोपिका विरह ॥ राग धनाश्री ॥
 नैना भये अनाथ हमारे । मदनगोपाल वहाँते सजनी सुनियत दूरि सिधारे ॥ वै जलहर
 हम मीन बापुरी कैसे जिवहिं निनारे । हम चातक चकोर श्यामघन वदन सुधानिधि
 प्यारे ॥ मधुवन वसत आश दरशनकी जोइ नैन मगहारे । सूर श्याम करी पिय ऐसी मृतकहुते
 पुनि मारे ॥ ८३ ॥ राग धनाश्री ॥ अब निज नैन अनाथ भये । मधुवनहुते माधो सजनी कहियत दूरि गये ॥
 मथुरा बसत हुती जिय आशा यह लागत व्यवहार । अब मन भयो भीमके हाथी सुपने अगम
 अपार ॥ सिंधुकूल इक नगर बतावत ताहि द्वारका नाउँ । यह तनु सौँपि सूरके प्रभुको और
 जन्मधारि जाउँ ॥ उती दूरते को आवै री । जासों संदेश कहि पठऊँ इहाँते सो कहि कहन कहाँ
 पावै री ॥ कंचनके बहु भवन मनोहर राजा रंक न तृण छावै री । वहाँके बासी लोगनको क्यों ब्रजको
 बसिबो भावै री ॥ सिंधुकूल इक देश वसतहै देख्यो सुन्यो न मन धावै री । बहुविधि करत विलाप
 विरहिनी अनेक उपाय दुख पावै री ॥ कहा करौ कहाँ जाउँ सूर प्रभु को हरि पियपै पहुँचावै री ॥ ८४ ॥
 ॥ राग सारंग ॥ हौँ कैसेकै दरशन पाऊँ । सुनहु पथिक वहिदेश द्वारका जो तुम्हरे संग आऊँ ।
 बाहिर भीर बहुत भूपनकी बृझत वदन दुराऊँ । भीतर भीर भोग भामिनिकी तेहिठाँ कौन
 पठाऊँ ॥ बुधि बल युक्ति जतन करि वहिपुर हरि पियपै पहुँचाऊँ । अब बन बसि निकुंजरसि-
 क बिन कौनहिं दशा सुनाऊँ ॥ श्रमकै सूर जाउँ प्रभुपासहि मनमें भले मनाऊँ । नवकिशोर
 मुख सुरली बिना इन नैनन कहा देखाऊँ ॥ ८५ ॥ राग नट ॥ मानो विधि अब उलटि रची री । जानति
 नहीं सखी काहेते वही न तेज तजी री ॥ बूडि न मुईनीर नैननके प्रेम न प्रजरि पची री । विरह अग्नि
 अरु जलप्रवाहते क्यों दुहुँ बीच बची री ॥ जो कछु सकल लोककी शोभा लै द्वारका सची री ।
 वहाँ कि वारिधि बडवानलमें रेतन आनि बची री ॥ कहिये संकर्षणके भ्राता कीटानि कितन मची री ।
 सूर श्याम या जग मोह्यो सोई मुख निरखि नची री ॥ ८६ ॥ राग मारू ॥ ओ नहीं माईको इतौ । सुन री
 सखी संदेशदुर्लभ भए नैन थके मग जोइतो । गोकुल छाँडि निवास सिंधु कियो प्राण जीवन
 धनसोइतौ ॥ द्वारावती कठिन अति मारग क्यों करि पहुँचै लोइतो । मिती मिलनकी आशअवाधि
 गई ब्रजबनिता कहि रोइतौ ॥ सूरदास प्रभु तुम्हरे मिलनको त्रिपति कहूँ नहिं होइतौ ॥ ८७ ॥
 ॥ राग मलार ॥ ताते अब अति मरियत अपसोसनि । मथुराहुते गए सखी री अब हरि करे
 कोसनि ॥ यह अचरज सु बडो मेरे जिय यह छाँडनि वह ओसनि । निपट निकाम जानि
 हम छाँडी ज्यों कमान बिन गोसनि ॥ इक हरिके दरशन बिनु मरियत अरु कुबिजाके ठोसनि ।
 सूर सु जरनि कहा उपजी जो दूर होत करि वोसनि ॥ ८८ ॥ राग मारू ॥ जोपै लै जाइ कोऊ मोहिं
 द्वारका देश । संग ताके चलौ सजनी जटाहू करि केश ॥ बोलि धौं हर वाइ पूँछहु आपने समेस ॥
 जैसही जो कहै कोऊ बनै तैसे भेस ॥ यदपि हम ब्रजनाथ युवती यूथनाथ नरेश । तदपि शशि कुमुद-
 नी सूरज रची प्रीति परेस ॥ ८९ ॥ राग सारंग ॥ उघरि आयो परदेशी को नेह । तब जो सबै मिले कान्ह
 करि भूलतही अवलेहु । काहेको सखी अपनो सरवस हाथ पराये देहु ॥ लहियो महिमा भंग मथुरा
 छाँडि जाइ समुद्र कियो गेहु ॥ कहा अब करी अग्नि तनु उपजी बाढ्यो अतिहि संदेहु । सूरदास

विह्वल भई गोपी नैनन वर्षत मेहु ॥९०॥ राग मलार ॥ कैसे है बनत इहि ब्रज हरिको आवन । कहियत है
 मधुवनते सजनी कहूं कान्ह कियो दूरि गवन ॥ निकट वसत मातिहानि भई हम मिलिहूं न आई सु
 त्यागि भवन । अब अपने यदुकुल समेतलै दूरि सिधारे जीति जवन ॥ अगम सुपंथ दूरि दक्षिणादि-
 शि तहैं सुनियत सखी सिंधुलवन । सूरदास तरसत मन निशिदिन यदुपति लैं लैजाइ कवन ॥९१॥
 ॥ राग धनाश्री ॥ सुनियत कहूं द्वारका वसाई । पश्चिम देश तीर सागर के कंचन कोट गोमती सों खाई ॥
 पंथ न चलत संदेश न आवत उहां लगि नर कोऊ नहिं जाई । शत योजन मथुराहूते कहियत
 यह हम सुधि निगमहूषे पाई ॥ बन उपवनमें जन मंदिर छवि कोकिल कीर हंस ध्वनि लाई ।
 द्वारपाल चातक द्रुम सु पचनि मांझ कोट निधि पाई ॥ घोष ग्वाल पशुपाल अधम कुल ईश
 एकको कौन सगाई । सूर श्याम ब्रजवास बिसारे बाबानंद यशोदा माई ॥९२॥ राग मारू ॥ उडुपति
 सों विनवति मृगनैनी ॥ तुम कहियत उडुराज अमृत मय तजि सुभाउ वर्षत कत बहनी ॥ उमयापति
 रिपु अधिक दहत है हरि रिपु प्रीतम सुखत तौनी । छपा न छीन होत सुन सजनी भूमि
 डसन रिपु कहा दुरोनी ॥ श्याम संदेश बिचार करति है कहां रहे हरि छाई बछोनी । सूर श्याम
 विनु भवन भयानक जो अति रहति गोपालकी अवनी ॥ ९३ ॥ राग केदारो ॥ दधिसुत जातिहौ वहि
 देश । द्वारकामें श्यामसुंदर सकल सुवन नरेश ॥ परम शीतल अमृतदाता करत है उपदेश ।
 श्यामसुंदर वियोगिनीको लेहु यह संदेश ॥ नंदनंदन जगतवंदन धरे नटवर भेष । काज अपनी
 सारि स्वामी रहे जाइ विदेश ॥ भक्त वत्सल विरद तुमरो मोहिं इह अंदेश । अबकी बेर तुम मिलहु
 कृपाकरि कहैं सूर सु देश ॥९४॥ राग मलार ॥ वीर बटाऊ पाती लीजो । जब तुम जाहु देश द्वारका
 हमरेइ लाल गोपालहि दीजो ॥ रंगभूमि रमणीक मधुपुरी वारि चढाइ कहो दह कीजो । खारि
 समुद्र छाँडि किन आवत निर्मलजल यमुनाको पीजो ॥ या गोकुलकी सकल ग्वालिनी देत
 अशीश बहुत युग जीजो । सूरदास प्रभु हमरेकोते नंदनंदनके पाँई परीजो ॥ ९५ ॥ राग सारंग ॥
 हौं तो आइ मिलत गोपालहि । सिंधु धरनि यह जुगुन न तेरी दुख दीनो ब्रजबालहि ॥ कहा
 करों पट नील पीत वर दुइते भये भुज चारि । बहु सुख कहा जु तब मन होतो भेंटत श्याम
 मुरारि ॥ संतत सूर रहत पति संगम सब जानति रुचि जीकी । तू क्यों नहीं धरति या भेषहि जोपै
 मुक्ति अति नीकी ॥ ९६ ॥ राग मलार ॥ श्याम विन भई शरदानिशि भारी । हमैं छाँडि प्रभु गये
 द्वारका ब्रजभूमि कैसे बिसारी ॥ निर्मल जल यमुनाको छाँड्यो सेवत समुद्र जल खारी । कहियो
 जाइ पथिक जैसे आवैं चरणनकी बलिहारी ॥ अबला कहा योग कर जानै ब्रजवासी जो बिसारी ।
 सूरदास प्रभु तुम्हरे दरशको रत राधिका प्यारी ॥ ९७ ॥ राग मलार ॥ ब्रजपर मदर करत है काम ।
 कहियो पथिक जाइ श्यामसों राखहि आइ आपनो धाम ॥ जलाधि कमान वारि दाहभरि ताडित
 पलीता देत । गर्जन औ तर्पन मानो गो पहरकमें गढ लेह ॥ लेहु लेहु सब करत बांदिजन कोकिल
 चातक मोर । दादुर नगर करि जीवन ढोवा अलग बिलग चहुँ ओर ॥ ऊधो मधुप जसूस देखि
 कर कह्यो लुटाऊँ धीरजपारन । रखिबे होइ तौ आनि राखिये सूर लोक निज जारन ॥९८॥ राग मलार ॥
 ब्रजपर बहुरो लागे गाजन । ज्यों क्योंहू पति जात बडेकी मुख न देखावत लाजन ॥ चहुँदिशिते
 दल बादल उमडे सुने लागे वाजन । घोषके लोग कान्ह बल तिन अब जित कित लागे
 भाजन ॥ आपुन जाइ द्वारका छाये लागे श्याम विराजन । सूरदास गोपी क्यों जीवै बिछुरे हरिजी
 साजन ॥ ९९ ॥ राग मारू ॥ अब मोहिं निशि देखत डर लागे । बारबार अकुलाइ देहते निकसि

निकसि मन भागै ॥ प्राचीदिशा पेखि पूरण शशि है आयो तन तातो । मानहु मदन मदन विरहि-
निको करि लीनी रिसरातो ॥ भुकुटी कुटिल कलंक चाप मानों अति रिसिसों शरसाधे । चहुँघा
किरनि पसारे पासिनि हठिकर योगिनि बाँधे ॥ सुनि शठसहै प्राणपति मेरो जाको यश जग जानै ।
सूर सिंधु बूडत ते राख्यो ताहु कृतहि न मानै ॥ १०० ॥ रुक्मिणि वचन श्रीभगवानप्रति ॥ राग धनाश्री ॥
रुक्मिणि बूझतहै गोपालहिं । कहौ बात अपने गोकुलकी केतिक प्रीति ब्रजबालहिं ॥ कहा देखि
रीझे राधासों चंचल नैन विशालहिं । तब तुम गाय चरावन जाते उरधरते बनमालहिं ॥ इतनी सुनत
नैन भरि आये प्रेमनंदके लालहि । सूरदास प्रभु रहे मौनहै घोष बात जनि चालहि ॥ १ ॥ राग धनाश्री ॥
रुक्मिणि मोहिं निमेष न बिसरत वै ब्रजवासी लोग । हम उनसों कछु भली न कीनी निशिदिन
मरत बियोग ॥ यदपि कनकमय रची द्वारका सखी सकल संभोग । तदपि मन जो हरत बंसीवट
ललिताके संयोग ॥ मैं ऊधो पठयो गोपिनपै देह सँदेशो योग । सूरदास देखि उनकी गति किन्ह
उपदेशो योग ॥ २ ॥ राग मलार ॥ रुक्मिणि मोहिं ब्रज बिसरतु नाहीं । वा क्रीडा खेलत यमुनातट
विमल कदमकी छाहीं ॥ गोपवधूकी भुजा कंठ धरि विहरत कुंजनमाहीं । अनेक विनोद कहाँलौं
वरणों मोमुख वरणि न जाई ॥ सकल सखा अरु नंद यशोदा वे चितते न टराहीं । सुत हित
जानि नंद प्रतिपाले बिछुरत विपति सहाहीं ॥ यद्यपि सुखनिधान द्वारावाति तोउ मन कहूँ न रहाहीं ।
सूरदास प्रभु कुंजविहारी सुमिरि सुमिरि पछिताहीं ॥ ३ ॥ राग धनाश्री ॥ रुक्मिणि चलहु जनम
भूमि जाहीं । यदपि तुम्हारे हतो द्वारका मथुराके सम नाहीं ॥ यमुनाके तट गाय चरावत अमृत
जल अचवाहीं । कुंजकेलि अरु भुजा कंधधरि शीतल द्रुमकी छाहीं ॥ सरस सुगंध मंद मलया
गिरि विहरत कुंजन माहीं । जो क्रीडा श्रीवृंदावनमें तिहुँलोकमें नाहीं । सुरभी ग्वाल नंद अरु यशु-
मति मम चितते न टराहीं । सूरदास प्रभु चतुर शिरोमणि सेवा तिनकी कराहीं ॥ ४ ॥ श्रीकृष्णकुरुक्षेत्रआव-
न राग सारंग ॥ ब्रजवासिनको हेतु हृदयमें राखि सुरारी । सब यादवसों कहाँ बैठिकै सभा मँझारी ॥ बडो
पर्व रवि गहन कहा कहौं तासु बडाई । चलौ सबै कुरुक्षेत्र तहां मिलि न्हैये जाई ॥ तात मात
निज नारिलै हरिजी सब संग । चले नगरके लोग साजि रथ तरल तुरंगा ॥ कुरुक्षेत्रमें आइ दियो
इक दूत पठाई । नंद यशोमति गोपी ग्वाल सब सूर बुलाई ॥ ५ ॥ सखीवचन राधिकाप्रतिशकुनविचार ॥
राग सारंग ॥ बायस गहगहात शुभवाणी विमल पूर्वदिशि बोली । आजु मिलाओ श्याम मनोहर तू सुनु
सखी राधिके भोली ॥ कुच भुज अधर नयन फरकत हैं विनहि बात अंचल ध्वज डोली ॥ सोचनिवार
करो मन आनंद मानो भाग्य दशा विधि खोली ॥ सुनत सु वचन सखीके सुखते पुलकित प्रेम तर-
कि गई चोली ॥ सूरदास अभिलाष नंदसुत हरषी सुभग नारि अनमोली ॥ ६ ॥ राग केदारो ॥ माधवजी
आवनहार भये । अंचल उडत मन होत गहगहो फरकत नैन खये ॥ देही देखि सोच जिय अपने
चितवत सगुन दये । ऋतुबसंत फूली द्रुमवल्ली उलहे पात नये ॥ करति प्रतीति आपु आपुनते
सबन शृंगार ठये ॥ सूरदास प्रभु मिलहु कृपाकरि अवधिहु पूजिगये ॥ ७ ॥ श्रीभगवान दूत वचन नंद यशोमति
प्रति ॥ राग धनाश्री ॥ हौं इहां तेरेही कारण आयो । तेरीसों सुन जननी यशोदा हठि गोपाल
पठायो ॥ कहा भयो जो लोग कहतहैं देवकी माता जायो ॥ खान पान परिधान सबै सुख तैहीं
लाड लडायो । इतो हमारो राज द्वारका मो जी कछू न भायो ॥ जब जब सुरति होत उहि हितकी
बिछुर वच्छ ज्यों धायो ॥ अव वे हरि कुरुक्षेत्रमें आये सो मैं तुम्हें सुनायो । सब कुल सहित नंद
सूरज प्रभु हितकरि वहां बोलायो ॥ ८ ॥ राधिकावचन सखीप्रति ॥ सारंग ॥ राधा नैन नीर भरि आई कबधौं श्याम

मिलें सुंदर सखी यदपि निकट है आई॥ कहा करौं केहि भाँति जाउँ अब पेपहि नहिं तिन पाई । सूर श्याम
 सुंदर घन दरशे तनुकी ताप नशाई॥ ९॥ सखीवचनराधिकाप्रति॥ राग केदारो॥ अब हरि आई हैं जिन सोचै । सुन
 विधुसुखी वारि नयनन ते अब तू काहे मोचै ॥ सत्य जानि चित चेत आनि तू अब नख क्यों तनु
 नोचै॥ मदन मुरादि सँभारि सुमिरि सुख तुम समीपको बोचै॥ लै लेखनि मसि करि करि अपने लिखि सं-
 देश छाँडि संकोचै॥ सूर सु विरह जनाउ करत कित प्रबल मदन रिपु पोचै॥ १०॥ गोपी संदेश श्रीभगवान् प्रति
 ॥ राग सारंग ॥ पथिक कहियो हरिसों यह बात । भक्तवच्छल है विरद तिहारो हम सब किये सनाथ ॥
 प्राण हमारे संग तुम्हारे हमहू हैं अब आवत । सूर श्यामसों कहत संदेशो नयनन नीर बहावत ॥
 ॥ ११ ॥ कुरुक्षेत्र श्रीभगवान् मिलन॥ राग सारंग॥ नंद यशोदा सब ब्रजवासी । अपने अपने शकट साजिकै
 मिलन चले अविनाशी ॥ कोउ गावत कोउ वेणु बजावत कोउ उतावल धावत । हरि दरशन लालसा
 कारन विविध मुदित सब आवत ॥ दरशन कियो आइ हरि जीको कहत सपनकी साँची । प्रेम
 मानि कछु सुधि न रही अँग रहे श्याम रँग राची ॥ जासों जैसी भाँति चाहिये ताहि मिल्यो त्यों
 धाइ । देश देशके नृपति देखि यह प्राण रहे अरगाइ ॥ उमँग्यो प्रेम समुद्र दशहुँदिशि परमिति
 कही न जाइ॥ सूरदास इह सुख सो जानै जाके हृदय समाइ॥ १२॥ राग कान्हरो॥ तेरी जीवनि मूरि मिलहि
 किन माई । महाराज यदुनाथ कहावत तबहीं हुते शिशु कुँवर कन्हवाई ॥ पानि परे भुज धरे कमल
 मुख पेपत पूरव कथा चलाई । परमउदार पानि अवलोकत हीन जानि कछु कहत न जाई ॥ फिरि
 फिरि अब सन्मुखही चितवति प्रीति सकुच जानी न दुराई । अब हँसि भेटहु कहि मोहिं निज जन
 बाल तिहारो हो नंद दोहाई ॥ रोम पुलकि गदगद तनु तिहि छिन जलधारा नैनन वरपाई । मिले
 सु तात मात बंधू सब कुशल कुशल करि प्रश्न चलाई ॥ आसन देइ बहुत करि बिनती सुत धोखे तब
 बुद्धि हेराई॥ सूरदास प्रभु कृपाकरी अब चितहि धरे पुनि करी बडाई ॥ १३ ॥ राग मलार ॥ माधव या
 लंगि है जग जीजतु । जाते हरिसों प्रेम पुरातन बहुरि नयो करि कीजतु ॥ कहँ रवि राहु भयो
 रिपु मति रचि विधि संयोग बनायो । उहिउपकार आज यहि औसर हरि दरशन सचुपायो ॥ कहाँ
 बसहिं यदुनाथ सिंधु तट कहँ हम गोकुल वासी । वह वियोग यह मिलनि कहाँ अब काल चाल
 औरासी ॥ सूरदास मुनि चरण चरचि करि सुरलोकनि रुचि मानी । तब अरु अब यह दुसह प्रमा-
 नी निमिषो पीर न जानी॥ १४॥ श्रीभगवान् रुक्मिणि प्रत्युत्तरा॥ राग कान्हरो ॥ हरि जूसों वृझत है रुक्मिणि
 इनमें को वृषभानु किशोरी । वारेक हमैं देखावो अपने बालापनकी जोरी ॥ जाको हेतु निरंतर
 लीये डोलत ब्रजकी खोरी । अति आतुर होइ गाइ दुहावन जाते पर घर चोरी ॥ रजनी सेज सु-
 करि सुमननकी नवपल्लव पुट तोरी । बिनु देखे ताके मन तरसै छिन बीते युग मोरी ॥ सूर सोच सुख
 करि भरि लोचन अंतर प्रीति न थोरी । शिथिल गात मुख वचन फुरत नहिं है जो गई मति भोरी ॥
 ॥ १५॥ राग धनाश्री॥ वृझति है रुक्मिणि पिय इनमें को वृषभानु किशोरी । नेक हमैं देखरावहु अपनी बाला
 पनकी जोरी ॥ परमचतुर जिन कीने मोहन अल्प वैसही थोरी । वारेते जिहि यहै पढायो बुधि
 बल कलविधि चोरी ॥ जाके गुणगनि गुथति माल कबहुँ उरते नहिं छोरी । सुमिरन सदा बसतहीं
 रसना दृष्टि न इत उत मोरी ॥ वह देखो युवति बृंद में ठाढी नीलवसन तनु गोरी । सूरदास मेरो
 मन बाकी चितवन देखि हरचोरी ॥ १६ ॥ राग मारू ॥ गोविंद परम कृपा मैं जानी । निगम जु कहत
 दयालु शिरोमणि सत्य सु निधि बानी ॥ अब ये श्रवन वरन कर स्वारथ तुम जु दरश सुख दीनो ।
 या फल योग सुकृत नहिं समुझत दीन देखि हित कीनो ॥ यह दिन धन्य धन्य जीवन जस धन्य

भाग्य प्रभु पाये । शिव सुनि मन दुर्लभ चरणांबुज जनहि प्रगट परसाए ॥ हरषित सुजन सखा
 त्रिय बालक कृष्णमिलन जिय भाये । सूरदास सकल लोचन जनु शशि चकोर कुलपाए ॥ १७ ॥
 राग सारंग ॥ हरिजी इते दिन कहाँ लगाये । तबहिँ अवधि मैं कहत न समुझी गनत अचानक आये ॥
 भली करी जु अबहिँ इन नैनन सुंदर चरण दिखाये । जानी कृपाराज काजहुँ हम निमिष नहीं
 बिसराए ॥ विरहिनि विकल विलोकि सूर प्रभु धाइ हृदय करलाए । कछु सुसुकाइ कह्यो साराथि
 सुन रथके तुरंग छुराए ॥ १८ ॥ राग मलार ॥ हरिजू वै सुख बहुरि कहाँ । यदपि नैन निरखत वह
 मूरति फिरि मन जात तहां ॥ सुखमुरली शिरमोर पखौवा गर धुँधुँचनिको हार । आगे धेनु
 रेनु तनु मंडित चितवन तिरछी चाल ॥ राति दिवस अंग अंग अपने हित हँसि मिलि खेलत खात ।
 सूर देखि वा प्रभुता उनकी कहि नहिँ आवै बात ॥ १९ ॥ राग धनाश्री ॥ रुक्मिणि राधा ऐसे बैठी।
 जैसे बहुत दिननकी बिछुरी एक बापकी बेटी ॥ एक सुभाउ एकलै दोऊ दोऊ हरिको प्यारी ।
 एक प्राण मन एक दुहुँनको तनु करि देखिअत न्यारी ॥ निज मंदिर लै गई रुक्मिणी पहुनाई
 बिधि ठानी । सूरदास प्रभु तहँ पग धारे जहां दोऊ ठकुरानी ॥ २० ॥ राग धनाश्री ॥ राधा माधव भेंट
 भई । राधा माधव माधव राधा क्रीट भृंग गति होइ जो गई ॥ माधव राधाके रँग राचे राधा माधव
 रंगरई । माधो राधा प्रीति निरंतर रसना कहि न गई ॥ बिहँसि कह्यो हम तुम नहिँ अंतर यह
 कहि ब्रज पठई । सूरदास प्रभु राधा माधव ब्रजविहार नित नई नई ॥ २१ ॥ राग धनाश्री ॥ राधावचन सखी
 प्रति ॥ करत कछु नहीं आजु बनी । हरि आए हौं रही ठगीसी जैसे चित्तधनी ॥ आसन
 हर्षि हृदय नहिँ दीन्हों कमलकुटी अपनी । न्यवछावर उर अरघ न अंचल जलधारा जो
 बनी ॥ कंचुकी ते कुचकलश प्रगटहै टूटि न तरक तनी । अब उपजी अतिलाज
 मनहिमन समुझत निजकरनी ॥ सुख देखत न्यारेसी रहिहौं बिनु बुधिमति सजनी ।
 तदपि सूर मेरी यह जडता मंगल माँझ गनी ॥ २२ ॥ भगवान वचन ब्रजवासी प्रति ॥ राग सारंग ॥
 ब्रजवासिनसों कह्यो सबनते ब्रजहित मेरे । तुमसों मैं नहिँ दूर रहतहौं सबहिनके नियरे ॥ भजै
 मोहिं जो कोइ भजौं मैं तिनको भाई । सुकुरमाँह ज्यों रूप आपनो आपुन सम दरशाई ॥ यह
 कहिकै समदे सकल जन नयनरहे जल छाई । सूर श्यामको प्रेम कछु मोपै कह्यो न जाई ॥ २३ ॥ राग सारंग ॥
 सबहिनते सबहै जन मेरो । जन्म जन्म सुन सुबल सुदामा निबह्यो इह प्रण मेरो ॥ ब्रह्मादिक
 इंद्रादि आदि दै जानत बलि वसि केरो । इक उपहास त्रास उठि चलते तजिकै अपनो खेरो ॥
 कहा भयो जो देश द्वारका कीन्हों दूरि बसेरो । आपु नहीं या ब्रजके कारण करिहौं फिरि फिरि
 फेरो ॥ यहां वहां हम फिरत साधहित करत असाध अहेरो । सूर हृदय ते टरत न गोकुल अंग
 छुअतहौं तेरो ॥ २४ ॥ वचन ब्रजवासी ॥ राग सारंग ॥ हमतो इतनेहीं सचुप्रायो । सुंदर श्याम कमलदल
 लोचन बहुरो दरश देखायो ॥ कहा भयो जो लोग कहतहैं कान्ह द्वारका छायो । सुनि यह दशा
 विरह लोगनकी उठि आतुर होइ धायो ॥ रजक धेनु गज कंस मारिकै कियो आपनो भायो ॥
 महाराज होय मातु पिता मिलि तऊ न ब्रजबिसरायो ॥ गोपी गोप अरु नंद चले मिलि प्रेम समुद्र
 बहायो । येते मान कृपालु निरंतर नैननीर ढरिआयो ॥ यद्यपि राज बहुत प्रभुता सुनि हरि हित
 अधिक जनायो । वैसाहिँ सूर बहुरि नंदनंदन घर घर माखन खायो ॥ २५ ॥ अध्याय ॥ ८३ ॥ अष्टनायिका
 द्रौपदी प्रश्न ॥ राग बिलावल ॥ हरि हरि हरि सुमिरहु दिनराति । नातरु जन्म अकारथ जाति ॥ सौबात-
 नकी एकै बात । हरि हरि हरि सुमिरो दिन रात ॥ हरि कुरुक्षेत्र अन्हान सिधाये । तब सब

भूपति दरशन आये ॥ हरि तेहि सबको आदर कियो । भयो संतुष्ट सबहिनको हियो ॥ तब
 भूपति हरिको शिरनाइ । करनलगे अस्तुति या भाइ ॥ परमहंस तुम सबके ईश । बचन तुम्हारे
 श्रुति जगदीश ॥ तुम अच्युत अविगति अविनाशी । परमानंद सदा सुखरासी ॥ तुम तनु
 धारि हरयो भुवभार । नमो नमो तुम्हैं बारंबार ॥ पुनि रानी रानिनपै आई । द्रुपदसुता तब बात
 चलाई ॥ ज्यों करि भयो तुम्हारो व्याह । कहो सो तिनको मोहि उत्साह ॥
 कह्यो सबन्ह हरि अज अविनाशी । भक्तवच्छल सब जगत निवासी ॥
 ना हमको नहि सुंदरताई । भक्त जानिकै सब अपनाई ॥ व्याह सबनको ज्यों ज्यों भयो । बहुरो
 तिन्हते वहि त्यों कह्यो ॥ द्रुपदसुता सुनि मन हरषाई । कह्यो धन्य तुम धनि यदुराई ॥ धन्य सकल
 पटरानी रानी । जिन वर पायो शारंगपानी ॥ धन्य जो हरि गुण अहनिशि गावै । सूरदास तिनकी
 रज पावै ॥ २६ ॥ अध्याय ॥ ८४ ॥ ऋषिस्तुति ॥ राग विलावल ॥ हरि हरि हरि सुमिरहु सब कोई । बिनु हरि
 सुमिरन मुक्ति न होई ॥ श्रीशुक व्यास कह्यो यह गाई । सोइ अब कहैं सुनो चितलाई ॥
 सूरज गहन पर्व हरि जान । कुरुक्षेत्रमें आए न्हान ॥ तहां ऋषि हरि दरशन हित आये ।
 हरि आगे होइ लेन सिधाये ॥ आसन दे पूजा हित करी । हाथ जोरि बिनती उच्चरी ॥ दरश
 तुम्हारे देवन दुर्लभ । हमको भयो सो अतिही सुल्लभ ॥ यों कहि पुनि लोगन समुझायो ।
 जैसे वेद पुराणन गायो ॥ हरिजीकी पूजै हरिजान । ताको होइ तुरत कल्याण ॥ गुरु पूजा बहु
 विधिसों कीजै । तीरथ जाइ दान बहु दीजै ॥ यह सब किये होइ फल जोइ । संत संगसों
 छिनमें होइ ॥ यह सुनिकै ऋषि रहे लजाइ । पुनि हरिसे बोले या भाइ ॥ तुम सबके गुरु सबके
 स्वामी । तुम सबहिनके अंतर्यामी ॥ तुम्हैं वेद ब्राह्मणहि बखानत । ताते हमरी अस्तुति ठानत ॥
 हम सेवक तुम जगत अधार । नमो नमो तुम्हैं बारंबार ॥ तुम परब्रह्म जगत करतारा । नरतनु धरयो
 हरन भूभारा ॥ सुरपूजा औ तीर्थ बतावत । लोगनके मतिको भरमावत ॥ तुम रूपहि यहि भौंति
 छिपायो । काठ माँह ज्यों अग्नि दुरायो ॥ वसुदेव तुमको जानत नाहीं । और लोग बपुरे
 किन माहीं ॥ कोउ न मानत कोउ न जानत । कोउ शत्रु मित्र करि मानत ॥ सर्व अशक्ति तुम सर्व
 अधार । तुम्हैं भजै सो उतरै पार ॥ जैसे नींद नाहि कोइ होय । बहुविधि सपनो पावै सोय ॥
 पै तेहि वहां न कछु सम्हार । कहि देखत को देखनहार ॥ त्यों जिय रहै विपैरस भोइ । तेहिके शुद्धि
 बुद्धि नहि कोइ ॥ जापर कृपा तुम्हारी होइ । रूप तुम्हारो जानै सोइ ॥ घट घट माँह तिहारो बास ।
 सर्व ठौर ज्यों दीप प्रकाश ॥ इहि विधि तुमको जानै जोइ । भक्तिरु ज्ञानी कहिये सोइ ॥ नाथ कृपा
 अब हमपर कीजै । भक्ति आपनी हमको दीजै ॥ प्रेम भक्ति बिन कृपा न होइ । सर्व शास्त्रमें देखे
 जोइ ॥ तपसी तुमको तपस्करि पावै । सुनि भागवत गृही गुण गावै ॥ कर्मयोग करि सेवत कोई । ज्यों
 सैवै त्योंही गति होई ॥ ऋषि यहि विधि हरिके गुणगाइ । कह्यो होइ आज्ञा यदुराइ ॥
 हरि तिनको पुनि पूजा करी । कीरति सकल जगत विस्तरि ॥ वेद पुराण सबनको
 सार । व्यास कह्यो भागवत विचार ॥ बिनु हरि नाम नहीं उद्धार । वेद पुराण सबनको
 सार । सूर जानि यह भजो मुरार ॥ २७ ॥ अध्याय ॥ ८५ ॥ श्रीकृष्ण देवकी पद्मपुत्र आनयन ॥
 ॥ राग विलावल ॥ श्रीगोपाल तुम कहो सो होइ । तुमहीं कर्ता तुमहीं हर्ता तुमते और
 न कोइ ॥ अबलौ मैं तुमको नहि जान्यो पुत्रभावकरि मान्यो । तुमहो देव सकल देवनके अब
 तुमको पहिचान्यो ॥ गुरुसुत आनि दिये तुम जैसे कृपाकरी यदुराई । ममसुतहुं जे कंस संहारे

ते प्रभु देहु जिवाई ॥ मेरे जिय यह बड़ी लालसा देखों नैनन जोई । दूध पिवाई हृदयसों लावों पाछे
होइ सो होई ॥ यह सुनि हरि पाताल सिधारे जहां हुते बलिराइ ॥ करि प्रणाम बैठारि सिंहासन हितकरि
धोये पाइ ॥ तासों कह्यो देवकीके सुत पृष्ठ कंस जे मारेनेक मैगाइ देहु ते हमको हैं वे लोक तुम्हारे ॥
तहैंते आनि दिये हरि बालक माता लाड लडाये । सूरदास प्रभु दरश परसकैं ते वैकुण्ठ सिधायें २८ ॥
अध्याय ॥ ८६ ॥ वेदस्तुति वर्णन राग विलावल ॥ हरि हरि हरि हरि सुमिरन करो । हरि चरणारविन्द उरधरा ।
हारिके रूप रेख नहिं राजा । अरु हरि सम द्वितिया न विराजा ॥ अलखरूप हरि कह्यो न जाई ।
देवन कछु वेद उक्ति बताई ॥ हरिजीके हृदय यह आई । देवन सबन निरूप देखाई ॥ तीनलोक
हरि करि विस्तार । ज्योति अपनिको कियो उजियार ॥ जैसे कोऊ गेह सँवार । दीपक वारि करै उ-
जिआरा ॥ त्यों हरि ज्योति अपनी प्रगटाइ । घट घटमें सोई दरशाइ ॥ तीन लोक सरगुण तनु जान्यो ।
ज्योति स्वरूप आपनो मान्यो ॥ श्वासा तासु भये श्रुतिचार ॥ करि सो अस्तुति या परकार ॥ नाथ
तुम्हारी ज्योति अभास । करत सकल जगमें परकास ॥ थावर जंगम जहँ लों भयो । ज्योति तुम्हार
चेतन कियो ॥ तुम सब ठौर सबनते न्यारे । को लखि सकैं चरित्र तुम्हारे ॥ सो प्रकाश तुम
साजे सदा । जीव कर्म करि बंधन वधा ॥ सर्वव्यापी तुम सब ठाहर ॥ तुमहिं दूर जानत नर
नाहर ॥ तुम प्रभु सबके अंतर्यामी । बिसरि रह्यो जिव तुमको स्वामी ॥ तुम्हरी
लीला अगम अपार । युग प्रमान कीन्हों व्यवहार ॥ तुम्हरी माया जगत उपाया । जैसेको तैसे मगलाया ॥
अद्भुत सगुण चरित्र तुम्हारे । जो करिकैं भुवभार उतारे ॥ तेहिको समुझि सकत नहिं जोइ । नि-
र्गुण रूप लखै क्यों सोइ ॥ नरतनु भक्ति तुम्हारे होइ । जीव तनुमें जिव आसरे सोइ । करिये भक्ति
उतरिये पार । नमो नमो तुम्हैं बारंबार ॥ शुक जैसे वेद अस्तुति गाई । तैसेही मैं करि समुझाई ॥ जो
पद अस्तुति सुनै सुनावै । सूर सु ज्ञान भक्तिको पावै ॥ २९ ॥ राग विलावल ॥ नमो नमस्ते बारंबार ।
मदन सुदन गोविंद सुरार ॥ माया मोह लोभ अरु मान ॥ ए सब त्रयगुण फांस समान ॥ काल
सदा शरसाधे रहै । क्यों करि नर तुव सुमिरन कहै । तुम निर्गुण उदय निराकार । सूर अमर हम
रहे पचिहार ॥ तुमरो मर्म न जानै सार । नर वपुरो क्यों करै विचार ॥ अरुण असित सित वपु उन
हार । करत जगतमें तुम अवतार ॥ सो जगको मिथ्या कहिजाइ । जहां तरे तुमरे गुण गाइ ॥ प्रेम
भक्ति बिनु मुक्ति न होइ । नाथ कृपाकरि दीजै सोइ ॥ और सकल हम देखौं जोइ । तुम्हरी कृपा
होइ सो होइ ॥ इह तनुहैं प्रभु जैसे ग्राम । यामें शब्दादिक बिश्राम ॥ अधिष्ठाता तुमहो भगवान ।
जान्यो जगत न तुम अस्थान ॥ तुम श्वासाते पुहुमी नाथ । श्वासरूप हम लख्यो न बात ॥ कहा कहि
तुम्हरी अस्तुति करैं । बाणी नमो नमो उच्चरौ ॥ जगतपिता तुमहोहो ईश ॥ याते हम बिनवत जगदीश ॥
तुम सम द्वितिया और न आहि । पटतर देहिं नाथ हम काहि ॥ शुक जैसे वेद अस्तुति गाई । तैसेही
मैं कहि समुझाई ॥ सूर कह्यो श्रीमुख उच्चार ॥ कहै सुनै सो तरे भवपार ॥ ३० ॥ नारद स्तुति ॥ राग धनाश्री ॥
प्रभु तुअ मर्म समुझि नहिं परचो । जगसिरजत पालत संहारत पुनि क्यों बहुरि करचो ॥ ज्यों
पानीमें होत बुड्बुदा पुनि तामाहि समाही ॥ त्योंही सब जग कुटुम्ब तुमते पुनि तुम माहि बिलाही ॥
माया जलाधि अगाध महाप्रभु तारि न सकैं तेहि कोई । नाम जहाज चढै जो कोई तुवपद पहुँचै
सोई ॥ पापी तरचो तरचो सबही सम प्रभुजी नाहीं तासु निबाही । काठ उतारत वारिवोहिमं नाम
तुम्हारे ताही ॥ पारस परसि होत ज्यों कंचन लोहपना भिटजाई । ज्यों अज्ञानी ज्ञानहिं पावत
नाम तुम्हारे गाई ॥ अमरहोत ज्यों संशयनाशे रहत सदा सुखपाइ । याते होत अधिक सुख

भक्तन चरणकमल चितलाइ ॥ थावर जंगम सब तुम आश्रित सनक सनंदन बानी । ब्रह्मा
 शिव स्तुति न सकैं करि मैं वपुरो केहिमाहीं ॥ योग ध्यान करि देखत योगी भक्तसदा मोहिं
 प्यारो । ब्रजवनिता भज्यो मोहिं नारद मैं तेहि पार उतारो ॥ नारद ज्योंही अस्तुति कीनी शुक
 त्यों कहि समुझाई । सूर प्रेम भक्तिकी महिमा श्रीपति श्रीमुखगाई ॥ ३१ ॥ अध्याय ॥ ८७ ॥ सुभद्राविवाह
 वर्णन ॥ राग विलावल ॥ भक्तवच्छल श्रीयादवराई । भक्तकाज हरि कृत सुखदाई ॥ अर्जुन तीरथयात्रा सिधायो ।
 फिरत फिरत द्वारावति आये ॥ सुन्यो बिचार करत बलयेइ । दुर्योधनहिं सुभद्रा देइ ॥
 तब अर्जुनके मन इह आई । याको मैं लैजाउँ दुराई ॥ भेष तापसीको तिन गह्यो । चारि मास द्वारा-
 वति रह्यो ॥ बल देवताको नेवत बुलायो । भोजन हेतु सो बल गृह आयो ॥ लख्यो सुभद्रा इह
 संन्यासी । राजकुँवर कियो भेष उदासी ॥ मेरे मनमें इह उत्साह । मेरो या सँग होहिं विवाह ॥
 इकदिन सो हरि मंदिरगाई । वहां भेंट पारथसों भई ॥ देखि ताहि रथ ठाढो कियो । हरि दोउको
 चेहरो लिखिलियो ॥ धनुषबाण अपनो तब दियो । अर्जुन सावधान होइ लियो ॥ यह सुनिकै हलधर
 उठिधायो । तब हरि अर्जुन नाम सुनायो ॥ बल कह्यो जो तुम मन ऐसी आइ । तौ तुम क्यों कीन्हों
 न सगाइ ॥ हरि कह्यो अबहुँ बुलावहु ताहि । भली भाँतिको करो विवाहि ॥ तब बल पारथ तुरत
 बुलायो । शुद्ध सुहृद लख धरायो ॥ करि विवाह अर्जुन घर आये । सूरदास जन मंगल गायो ॥ ३२ ॥
 ॥ राग नट ॥ बिनती करत गोविंद गोसाई । दैसवसौं अनंत लोकपति निपट रंककी नाई ॥ धरि धन
 धाम सजनके आगे श्याम सकुचि कर जोरे । टहल योग इह कुँवरि सुभद्रा तुम सम नहीं कोरे ॥
 इतनी सुनत पंडुके नंदन कह जो यहै वचन प्रभु दीजै । सूरज दीनबंधु अब इहि कुल कन्या
 जन्म न कीजै ॥ ३३ ॥ अध्याय ॥ ८८ ॥ जनकदेवमिलाप परमारथ ॥ हरि हरि हरि सुमिरहु सब कोई । रावरंक
 हरि गिनत न दोई ॥ जो सुमिरै ताकी गति होई । हरि हरि हरि सुमिरहु सब कोई ॥ श्रुतदेव ब्राह्मण
 सुमिरयो हरी । ताकी भक्ति हृदयमें धरी ॥ राउ जनक हरि सुमिरन कीन्हों । हरिजू सोउ हृदय
 धरि लीन्हों ॥ तब हरि ऋषिहि पथिक सँग किये । तिनके देश प्रीति वश गये ॥ दोउ रूप हरि
 दोउनको मिले । तोपि तेहि पुनि निजपुर चले ॥ हरिजीको यह सहज सुभाव । रंक होइ भावै कोउ
 रावा ॥ जो हित करै ताहि हित करै । सूर प्रभु नहिं अंतर धरै ॥ ३४ ॥ राग कान्हरो ॥ घरही बैठे दोऊ दास । ऋद्धि
 सिद्धि मुक्ति अभयपद दायक आइ मिले प्रभु हरि अनयास ॥ आये सुने श्याम उपवनमें भेटलई
 भुज परमसुवास ॥ चर्चित गात चंद्रमुख चितवत उर सरवर भयो कमल विगास ॥ भूपति चमर
 विप्र कर वस्तर करत वाउ अति अंग हुलास । आनंद उमंगि चलयो नैनन जल सुरत देव द्विज
 नृप बहुलास ॥ जाको ध्यान धरत मुनि शंकर शीशजटा दिग अंबर तास । कामदहन गिरि
 कंदर आसन वा सूरतिकी तऊ पिआस ॥ भक्तवच्छलता प्रगट करीहै भयो विप्र धरकर कलि ग्रास ।
 सूरदास स्वामी सुमिरन वश अछत निरंजन सेवा पास ॥ ३५ ॥ अध्याय ॥ ८९ ॥ भस्मासुर वध ॥ वनाश्री ॥
 तेऊ चाहत कृपा तुम्हारी । जिनके वश अनमुख अनेक गन अनुचर आज्ञाकारी ॥ महादेव
 वर दियो असुरको जब उन निज तनु जारयो । शिवके शीशधरन लाग्यो कर शिव वैकुण्ठ
 सिधारयो ॥ विप्ररूप हरि कह्यो असुरसों इह वर सत्य न होइ । शिर अपने परधरो असुरकर
 भस्म होइ गयो सोइ ॥ शिव कैलास गये अस्तुति करि आनंद उपज्यो भारी । सूरदास
 हरिको यश गायो श्रीभागवत अनुसारी ॥ ३६ ॥ अध्याय ॥ ९० ॥ भृगुपरीक्षा अर्जुन निजरूप दर्शन ॥
 शंखचूड पुत्रल्यावन ॥ राग विलावल ॥ हरिसों ठाकुर और न जनको । तिहूँ लोक भृगुजाइ आइ कह्यो या विधि

सब लोगनको ॥ ब्रह्मा राजसगुण अधिकारी शिवतामस अधिकारी । विष्णु सत्य केवल अधिकारी
 विप्रलात उरधारी ॥ मुख प्रसन्न शीतल सुभाउ नित देखत नैन सिराइ । इह जिय जानि भजो
 सब कोई सूर प्रभू यदुराइ ॥ ३७ ॥ राग विलावल ॥ हरि हरि हरि हरि सुमिरन करो । हरि चरणारविंद
 उरधरो ॥ हरि इकदिन निज सभा मँझार । बैठे हते सहित परिवार ॥ अर्जुनहूँ ता ठौर सिधाये ।
 शंखचूड तब वचन सुनाये ॥ द्वा रावती बसत सब सुखी । महीं एक अह अरु निशि दुखी ॥ मेरे पुत्र
 होतहैं जबहीं । अंतर्ध्यान होत सो तबहीं ॥ अर्जुन कह्यो द्वारका माहीं । ऐसो कोउ धनुधारी
 नाहीं ॥ जो तुअ सुतकी रक्षाकरै । अरु तेरो पर दुख परिहरै ॥ मैं तुअ सुतकी रक्षा करों । अरु
 तेरो इह दुख परिहरों ॥ यह प्रतिज्ञा जो न निबाहों । तौ तनु अपनो पावक दाहों ॥ विप्र कह्यो
 तुम श्यामकिराम । कै प्रद्युमन अनिरुद्ध अभिराम ॥ अर्जुन कह्यो मैं उनमें नाहीं । पै हौं उनके दासन
 माहीं ॥ अर्जुनहैं मेरो निजनाम । धनुष काम दियो भ्रम अभिराम ॥ तू निहंचित बैठ गृहजाइ । समै
 होय कह मोसों आइ ॥ पुत्र प्रसूति समय जब आयो । विप्र अर्जुनसों आनि सुनायो ॥ अर्जुन
 तब शर पंजर कियो । पवन संचार रहन नहिं दियो ॥ गृहको द्वारो राख्यो जहां । अर्जुन सावधान
 भयो तहां ॥ ब्राह्मण कह्यो समय अव भयो ॥ अर्जुन धनुष बाण तब गह्यो ॥ बालकहैं भयो अंतर्धान ।
 अर्जुनहैं रह्यो चकृत समान ॥ विप्र नारि तब गारी दुई । लख्यो प्रतिज्ञा कहा होइ गई ॥ तैं पुरुषा-
 रथ कहां ते पायो । मिथ्याही कहि वाद बढायो ॥ हरिसैं दुःख अब कहिहों जाई । अर्जुन कह्यो
 तासों या भाई ॥ तेरे सुतको मैं अब ल्याऊं । तेरो सब संताप नशाऊं ॥ अर्जुन तिहुंलोक फिरि
 आयो । ऐसो बालक कहूं न पायो ॥ अर्जुन वार श्याम तन आए । हरि अर्जुनसों वचन सुनाए ॥
 तुम्ह बालक काहीं नहिं राख्यो । सो वृत्तांत हमैं तुम भाण्यो ॥ कह्यो जो मैं प्रतिज्ञा करी । सो
 मोसों पूरण नहिं परी ॥ बालक होत कौन लैगयो ॥ सो मोको कछु ज्ञान न भयो ॥ मैं देख्यो तेहि त्रिभुवन
 जाइ । पै ताकी कहूं सुधि नहिं पाइ ॥ विप्रकाज प्रभु अब तुम करो । नातरु मोको जानो मरो ॥
 हरि रथ पर अर्जुन बैठाइ । पहुँचे लोकालोकहि जाइ ॥ उहहूँते जब आगे धाई । दारुक हरिसों
 वचन सुनाई ॥ अंधकार मग नहिं दरशाइ । याते रथ नहिं सकत चलाइ ॥ चक्र सुदर्शन आगे
 कियो । कोटिकरवि परकाशित भयो ॥ तब हरि अर्जुन पहुँचे तहां । गतिनाहीं काहुकी जहां ॥
 तहां जाइ देख्यो इक रूप । तासम और न द्वितिय स्वरूप ॥ नैन निरखि चकृत होइ गये । मन
 वाणी दोऊ थकिरये ॥ कहिबे योग होइतौ कहै । तहां कछु आकार न लहै ॥ शयन नाग फन मुकुट
 स्थान । नैन प्रभा मानो कोटिकभान ॥ हरि अर्जुन कियो निरखि प्रणाम । सुन्यो तहां एक
 शब्द अभिराम ॥ तुम्हरे हेतु चरित्र यह कियो । बोझ पृथ्वीको हरयो भयो ॥ आवहु
 अब तुम अपने धाम । पूरण भये सुरनके काम ॥ दशपुत्र ब्राह्मणके दीन्हें । हरि अर्जुन
 प्रणाम तब कीन्हें ॥ नहिं जान्यो मैं कहां सिधायो । और यहां मैं कैसे आयो ॥ हरि अर्जुनको
 निज जन जान । लैगये तहां न जहां शशि भान ॥ निजस्वरूप अपनो दरशायो । जो कछु देख्यो
 वा नहिं पायो ॥ ऐसे हैं त्रिभुवनपति राई । कहा सकै रसना गुणगाई ॥ ज्यों शुक नृपसों कहि
 समुझायो । सूरदास ताही बिधि गायो ॥ ३८ ॥

इति श्रीमद्भागवते सूरसागरे कविवर सूरदासरुते दशमस्कन्धोत्तरार्द्धः समाप्तः ॥ १० ॥

श्रीः ।

अथ सूरसागर.

एकादशस्कन्ध ।

॥ राग नटनारायण ॥ तुम्हरो वचन न मेढ्योजाइ । प्राणनाथ कृपालु परमगुरु सुजान यादवराइ ॥
 कहत पठवन बद्रिका मोहि गूढज्ञान सिखाइ । सकुच साहस करत मनमें चलत परत न पाँइ ॥ पता-
 काके दंडलौ मन लेत संग लगाइ । कहा करौ चित चरण सन्मुख वसन सदृश उडाय ॥ मेरही या
 हृदयकी हरि कठिन सकल उपाइ । सूर सुनत जु गयो तवहीं खंड खंड नशाइ ॥ १ ॥ राग सारंग ॥
 हरिसों हौं कहा कहौं । प्रभु अंतर्यामी सब जानत यह सुनि सोचि रहौं । बिनु बुधि मनुज देह
 दयानिधि क्यों करि लै निवहौं । समुझि आपनी करनी गोसाईं काहे न शूल सहौं ॥ मैं यह ज्ञान
 छली ब्रजवनिता दियो सु क्यों न लहौं । प्रकट पाप तनुताप सूर प्रभु केहिपर हठहि गहौं ॥
 ॥ २ ॥ राग नट ॥ कैसे करि आवत श्याम इती । मन क्रम वचन और नहिं मेरे पदरज
 त्यागि हितौ ॥ अंतर्यामी यहौ न जानत जो मो उरहि बिती । ज्यों कुजुवारि रस बीधि
 हारि गथु सोचतु पटकि चिती ॥ रहत अवज्ञा होइ गुसाईं चलत न दुखहि मितौ । क्यों
 विश्वास करहिगो कौरौ सुनि प्रभु कठिन क्तिती ॥ इतर नृपति जिहि उचत निकट करि
 देत न मूठि रिती । छूटत न अंश सुनितहि कृपिणके प्रीति न सूर रिती ॥ ३ ॥ राग केदारो ॥
 क्यों करि सकौं आज्ञा भंग । करुणामय पद कमल लालच नाहिन छूटत संग ॥ यह रजायसु
 होत मोसन कहत बदरी जान । कहा करौ मम पाप पूरण सुनि न निकसत प्रान ॥ मैं अपराधी
 ब्रजवधू सों कहै वचन विष तूल ॥ मोहि तजि अवर को वियसहै ऐसे शूल ॥ अब न जो तुम
 जाहु अधो मिटै युग भूत रीति ॥ हौं जु तेरी सकल जानत महा मोसन प्रीति ॥ सकल ज्ञान प्रबोधि
 उनसों कहि कथा समुझाइ । यादवनको प्रलय सुनि वे मरहिगी अकुलाइ ॥ अति विषाद सुहृदय
 करि करि उठि चलयो ह्वै हीन । सूर प्रभु तू कृपासागर किनभयो हौं मीन ॥ ४ ॥ राग विलावल ॥
 हरि हरि हरि हरि सुमिरन करो । हरि चरणारविंद उर धरो ॥ नारायण जब भये अवतार । कहौं
 सो कथा सुनो चितधार ॥ धर्म पिता अरु मूरति माई । भये नारायण सुत तेहि आई ॥ बदरीका-
 श्रम रहे पुनि जाइ । योग अभ्यास समाधि लगाइ ॥ उनके और कामना नाहिं । सुख पावे त्रिभु-
 वन मन माहिं ॥ सुरपति देखत गयो डेराइ । कामसैन सँग दियो पठाइ ॥ ऋतुवसंत फूली
 फुलवाइ । मंद सुगंध बयार बहाइ ॥ करत गान गंधर्व सुहाइ । नृत्य भली अप्सरा देखाइ ॥ काम
 बाण पांचों संधाने । नारायणते मनहिं न आने ॥ तब तिन सबन तहां भय पायो । कद्यो इन्द्र
 हमें कहाँ पठायो ॥ तब नारायण आँख उचारी । उन सबकी कीन्हीं मनुहारी ॥ तुम कछु मनमें भय मति

धरो । अभय हमारे आश्रम करो ॥ दोष तुम्हारे है कछु नाहिं । तुमहिं पठायो है सुर नाहिं ॥ इन्द्रहुको
 कछु दूषण नाहिं । राजहेतु डरपत मन माहिं ॥ उन कर जोर बीनती उचारी । नारायण हरि हरि
 बनवारी ॥ उधरत लोग तुम्हारे नाम । क्यों करि मोह सकै तुम काम ॥ जे न शरण प्रभु तुम्हरे
 करै । तिनको अंत राइ हम करै ॥ और संभारि मनोरथ धरै । ते सब हमको अहनिशि डरै ॥ कहूं
 पुत्र मोह उपजावै । कहूं त्रियाके रूप लोभावै ॥ भूख प्यास होइ कबहुं संतापै । ऐसे विधि हम
 उनको व्यापै ॥ जो कोउ तुम्हरे शरण न आवै । सुख संसार सकल बिसरावै ॥ तासों हमरो कछु
 न बसावै । होय चेत सो तुमपै आवै ॥ नारायण तहां प्रगट करी । इन्द्र अपसरा सो भगिरी ॥ सहस
 अपसरा सुंदर रूप । एक एकते अधिक अनूप ॥ काम देखि चकृत होइ गयो । रूप अवनि हम देख्यो
 नयो ॥ कौन जितै सबहीं इन माहिं । इन सम इन्द्र लोक कोउ नाहिं ॥ तब नारायण आज्ञा करी ।
 इनमें लेहु एक सुन्दरी ॥ पुनि प्रणाम हरिको तिन कीन्हीं । नाम उर्वशी इक उन लीन्हीं ॥ सो सुरपतिको
 दीन्हीं जाइ । कह्यो सकल वृत्तांत सुनाइ ॥ पुनि भयो नारायण अवतार । सुर कह्यो भागवत अनुसार
 ॥ ५ ॥ हंस अवतार वर्णन ॥ राग बिलावला ॥ हरि हरि हरि हरि सुमिरन करो । हरि चरणारविंद उर धरो ॥ हरि
 ज्यों धरयो हंस अवतार । कहौ सो कथा सुनो चित्तधार ॥ सनकादिक ब्रह्मा पै गये । नमस्कार कर
 पूछत भये ॥ किधौ विषय को चित गहि रह्यो । की विषहीमें चितको गह्यो ॥ नीर क्षीर ज्यों दोउ
 मिलि गये । न्यारे होत न न्यारे कये ॥ हमतो जतन करी बहु भाइ । तुम अब कहो सो करै उपा-
 इ ॥ ब्रह्माको उत्तर नाहिं आयो । तब सनकादिक गर्व बढायो ॥ ज्ञान हमारो अतिशय जोइ । ब्रह्म
 रह्यो निर उत्तर होइ ॥ ब्रह्मा हरिपद ध्यान लगाय । तब हरि हंस रूप धरि आय ॥ सबहिन रूप
 देखि सुख पायो । सबहिन उठिकै माथो नायो ॥ सनकादिकन कह्यो या भाइ । हमको दीजै प्रभु
 समुझाइ ॥ को तुम क्यों करि इहां पधारे । परमहंस तब वचन उचारे ॥ यह तो प्रश्न योग है नाहिं ।
 एकइ आतम हम तुम माहिं ॥ जो तुम देह देखिकै पूछे । तोहू प्रश्न तुम्हारे छूछे ॥ पंचभूत ते सब
 तनु भए । कहा देखिकै तुम भ्रमि गए ॥ यह कहि उनको गर्व निवारयो । बहुरो या विधि वचन
 उचारयो ॥ विषय चिंता दोऊहै माया । दोऊ चपरि ज्यों तरुवर छाया ॥ तरुवर डोलै डोलै सोइ ।
 त्यों जिव लागि चित चेत न होइ ॥ बहुरि चित्त चेत विषे तनु जोवै । चित्त विषय संयोग तब होवै ॥
 ऐसी भाँति रहै दोउ गोइ । तिन्हें न्यारे करि सकै न कोइ ॥ ज्यों सुपनेमें सुख दुख जोइ । जानि
 सत्य राखै चित लोइ ॥ जब जागै तब मिथ्या जानै । ज्ञानी इनको नित यों मानै ॥ विषय चित्त
 दोऊ भ्रम जानो । आतमरूप सत्य करि मानो ॥ श्रवणादिकमें चित्त लगावहु । प्रेम सहित मम
 रूपहि ध्यावहु ॥ ऐसे करत विषयहू होइ । अरु मम चरण रहै चित गोइ ॥ जो ऐसे विधि साधन
 करै । सो सहजहि मम पद अनुसरै ॥ और जो बीचहि तनु छुटि जाय । तौलै जन्म भक्त गृह
 आय ॥ वहां हू प्रेम भक्ति को थान । पावै मेरो परम स्थान ॥ सनकादिक सों कहि यह ज्ञान ।
 परमहंस भये अंतर्धान ॥ जो यह लीला सुनै सुनावै । सुर सो प्रेम भक्तिको पावै ॥ ६ ॥

इति श्रीमद्भागवते मूरसागरे कविवरसूरदासकृते एकादशस्कन्धः समाप्तः ॥ ११ ॥

॥ श्रीः ॥

अथ सूरसागर.

द्वादशस्कन्ध ।

राग विलावल ॥ हरि हरि हरि हरि सुमिरन करो । हरि चरणारविंद उर धरो ॥ शुकदेव हरि चरणन शिरनाइ । राजासों बोल्यो या भाइ ॥ कहौं हरि कथा सुनो चितलाय । सूर तरो हरिके गुणगाय ॥ १ ॥ बौद्धावतारवर्णन ॥ राग विलावल ॥ हरि हरि हरि हरि सुमिरन करो । हरि चरणारविंद उर धरो ॥ बौद्धरूप जैसे हरि धार्यो । अदिति सुतनको कारज सार्यो ॥ कहौं सो कथा सुनो चित धार ॥ कहै सुनै सो तै भवपार ॥ असुर एक समय शुक पै जाइ । कह्यो सुरन जीतैं केहि भाइ ॥ शुक कह्यो तुम जग विस्तरो । करिकै यज्ञ सुरनसों लरो ॥ याही बिधि तुमरी जय होइ ॥ या बिनु और उपाय न कोइ ॥ असुर शुककी आज्ञा पाइ । लागे करन यज्ञ बहु भाइ ॥ तब सुर सब हरि जू पै जाइ । कह्यो वृत्तांत सकल शिर नाइ ॥ हरि जू तिनको दुःखित देख । कियो तुरत सेवरिको भेष ॥ असुरन पास बहुरि चलि गए । तिनसों वचन ऐसी बिधि कए ॥ यज्ञ माहिं तुम पशुन यों मारत । दया नहीं आवत संहारत ॥ अपनो सो जीव सबनको जानि । कीजै नाहिं जीवनकी हानि ॥ दया धर्म पालै जो कोइ । मेरी मति ताकी जय होइ ॥ यह सुन असुरन यज्ञ त्यागि । दया धर्म मारग अनुरागि ॥ या बिधि भयो बुद्ध अवतार । सूर कह्यो भागवत अनुसार ॥ २ ॥ भविष्य कल्की अवतार वर्णन ॥ राग विलावल ॥ हरि हरि हरि हरि सुमिरन करो । हरि चरणारविंद उर धरो ॥ हरि करिहैं कलंक अवतार । जेहि कारण सों कहो चित धार ॥ कालिमें नृप होइहैं अन्याई । कृषी आईहैं सब लेहैं बरिआई ॥ झूठे नरसों लेहिं अंकोर । लावहि सांचे नरको खोर ॥ प्रजाधर्मरत होइ नर कोइ । वरन धर्म न पहिंचानै सोइ ॥ दूरि तीर्थन श्रम करि जाहिं । जहां रहैं तहां लख्यो न ताहिं ॥ जाके गृहमें प्रतिमा होइ । तिन तजि पूजै अनतै सोइ ॥ ब्राह्मण पूछे जान्यो जाइ । संन्यासी फिरै भेष बनाइ ॥ गृही न अपनो धर्म पहिंचानै । उन नहिं आए को सन्मानै ॥ दया सत्य संतोष नशाइ । दया धर्मकी रीति बिलाइ ॥ फल सुधर्मको जानै सोइ । पै सुधर्मको करै न कोइ ॥ पापनको फल चाहै नाहीं । अहनिशि पाप करतही जाहिं । वर्षा समै न वर्षा होइ । बिना अन्न दुख पावै लोइ ॥ दान देहिं तो यशके काज । कलि न होइ पृथ्वीपति राज ॥ मन इन्द्रिय वश करै न लोग । ज्यों त्यों कीन्हों चाहैं भोग ॥ शत सम्भवत आयुः कुल होइ । सोऊ जीवै बिरला कोइ ॥ नृप ऐसे आयुर्दा पाइ । पृथ्वी हित नित करै उपाइ ॥ पृथ्वी देखि तिन हाँसी करही । ऐसो को जो मो पर रहही ॥ मन्वंतर लागि कियो जेहि राज । तेऊ नृप गय मोहिं त्याज ॥ पृथु से पृथ्वीपति जग भए । तेऊ नृप छाँडि मोहि गए ॥ तुच्छ आयु परिश्रम करत । आपु आपुमें लरि लरि मरत ॥ इनहिं देखि मोहिं हाँसी आवत । इनको इतनी समझि न आवत ॥ सतयुग सत त्रेता जग करते । द्वापर पूजा मनमें धरते ॥ कलियुग एक बडो उपकार । जो हरि कहै सो उतरै पार ॥ कालिमें पाप करै नित लोइ । कहाँलुगि कारिये अंत न होइ ॥ हरि हरि कहत पाप पुनि जाइ । पवन लागि ज्यों रूइ

उडाइ ॥ अजामेल सुत हित हरि भाष्यो । यमदूतनते तेहि हरि राख्यो ॥ कलिमें राम कहे जो
कोइ। निश्चय भव जल तरिहै सोइ ॥ जवलगि बढै अधर्म अपार । रहै विष्णुजसधर्म सत हार ॥ ताग्रह
संभल कलंकी होइ। करै संहार दुष्ट नर लोइ ॥ पृथ्वी अकास तहां रहिजाइ । राजदेहि जो कुंभ बैठाइ ॥
समदृष्टि होवे सब लोइ । दुष्ट भाव मन धरै न कोइ ॥ यों होइहै कलंकि अवतार । कलिमें राम नाम
आधार ॥ शुक नृपसों कह्यो जा परकार । सूर कह्यो ताही अनुसार ॥ ३ ॥ राजा परीक्षित हरिपद प्राप्ति
वर्णन ॥ राग विलावल ॥ हरि हरि हरि हरि सुमिरन करो । हरि चरणारविंद उर धरो ॥ बिनु हरिभक्ति
मुक्ति नहिं होइ। कोटि उपाय करौ किन कोइ। रहट घरी ज्यों जग व्यवहार । उपजत बिनशत बारंवार ॥
उत्पति प्रलय होत जा भाइ । कहौं सुनो सो नृप चितलाइ ॥ राजा प्रलय चतुर्विध होइ ।
आवत जात चहूं में लोइ ॥ युग परलय तो तुमसों कही । तीन और कहिबे को रही ॥ चतु-
र्युगी बीतै एकहत्तर । करै राज तब लगि मन्वतर ॥ चौदह मौन ब्रह्मा दिन माहिं । बीतत तासों
कल्प कहाहिं ॥ रात होइ तब परलय होइ । निशि मर्यादा दिन सम होइ ॥ प्रात भए जब ब्रह्मा
जागै । बहुरो सृष्टि करन को लागै ॥ दिन सौ तीन साठ जब जाहिं । सो ब्रह्माको वरष कहाहिं ॥
वर्ष पचाश परारध गए । प्रलय तीसरी या बिधि लए ॥ बहुरो ब्रह्मा सृष्टि उपावै । जब लौं परारध
दूजो आवै ॥ शत संवत भये ब्रह्मा मरै । महाप्रलय नित प्रभुजू करै ॥ माया माहिं नित्य ले
पावै । माया हरिपद माहिं समावै ॥ हरिको रूप कह्यो नहिं जाइ । अलख अखंड सदा इक भ-
इ ॥ बहुरि जब हरिकी इच्छा होइ । देखै माया के दिशि जोइ ॥ माया सब तबहीं उपजावै । ब्रह्मा
सों पुनि सृष्टि उपावै । तब हम प्रलय सदा पुनि होइ । जन्मै मरै सवाई लोइ ॥ हरिको भजै सो
हरि पद पावै । जन्म मरन तेहि ठौर न आवै ॥ नृप मैं तोहिं भागवत सुनायो । और तो हिय माहिं
बसायो ॥ मुक्ति माहिं संशय नहिं कोइ । सुने भागवत में सोइ होइ ॥ सप्तम दिवस आजु है राउ। हरि
चरणारविंद चित लाउ । इह अछेद अभेद अविनासी । सर्व गति अरु सर्व उदासी ॥ दृष्टिहि
दृष्टि सोइ दृष्टि टारि । काको दीजै को दिखहारि ॥ हरि स्वरूप सों रतिहि बिचारि । मिथ्या तनुको
मोह पसारि ॥ नृप कह्यो तनुको मोह न कोइ । याको जो भावै सो होइ ॥ मोहिं अब
सर्व ब्रह्म दरशावै । तक्षक भय मनमें नहिं आवै ॥ तुम प्रसाद मैं पायो ज्ञान । छूटि अमिथ्या
देह अभिमान ॥ अब मैं गहि हरिपद अनुराग । करिहौं मिथ्या तनुको त्याग ॥ शुक जान्यो
नृपको जो ज्ञान । आज्ञा लैकरि कियो पयान ॥ तक्षक नृप शरीरको डस्यो । तब तनु तजि हरि
पदमें बस्यो ॥ सूत शौनकनि कहि समुझायो । मैहू ता अनुसार सुनायो ॥ अंत समय हरिपद
चित लावै । सूरदास सो हरिपद पावै ॥ ४ ॥ जन्मेजय कथा ॥ राग विलावल ॥ हरि हरि हरि हरि
सुमिरन करो । हरि चरणारविंद उर धरो ॥ जन्मेजय जब पायो राज । एकवार निज
सभा बिराज ॥ पिता वैर मनमें सो बिचार । विप्रनसों यों कह्यो उचार ॥ मोको तुम अब यज्ञ
करावहु । तक्षक कुटुंब समेत जरावहु ॥ विप्रन सेत कुली जब जारी । तब राजा तिनसों उच्चारी ॥
तक्षक कुल समेत तुम जारौ ॥ कह्यो इन्द्र निज शरन उबारौ ॥ नृप कह्यो इन्द्र सहित तेहि जारौ ।
विप्रनहूं इह मतो बिचारो ॥ आसतीक तेहि अवसर आयो । राजासों यह वचन सुनायो ॥ कारण
करनहार भगवान । तक्षक डसन हार मति जान ॥ बिनु हरि आज्ञा द्वितिय न बात । कौन सकै
काहू संताप ॥ हरि जो चाहै त्योंहीं होइ । नृप तामें संदेह न कोइ ॥ नृपके मन यह निश्चय आयो ।
यज्ञ छाँडि हरिपद चित लायो ॥ सूत शौनकनि कहि समुझायो । सूरदास त्योंहीं करि गायो ॥ ५ ॥
इति श्रीमद्भागवते सूरसागरे कविवर सूरदासकृते द्वादशः स्कन्धः समाप्तः ॥ १२ ॥

इति श्रीसूरसागर सम्पूर्ण ॥

["श्रीवेङ्कटेश्वर" स्टीम प्रेस-बंबई.]

“श्रीवेङ्कटेश्वर” स्टीम् प्रेसकी क्रय्यपुस्तकें (संगीत-राग-गद्य पद्य)

की. रु.

नाम.

सूरसागर-सूरदासजीकृत संपूर्ण भागवत बारहोंस्कंध विविध प्रकारके रागरागिनीमें भक्तगणोंको कंठस्थ करने योग्य अतिललित माधुरी भाषा संयुक्त (जिल्दबँधा)	६५
भजनामृतसार-इसमें मंगल गौरी होली जयध्वनी पद विनय आरती इत्यादि अनेक भजन हैं भगवत् भक्तोंके वास्ते अति उत्तमहै... III =)	
वृजविहार-वृन्दावन निवासी श्रीनारायणस्वामीजीकृत इसमें श्रीकृष्णचंद्र आनंदकंद वृन्दावनविहारी तथा श्रीवृषभानुनंदिनी राधे महारानीकी संपूर्ण लीलाओंका वर्णन अनेक प्रकारके भजन दोहे कवित्त और वार्त्तिकमें अति मधुरतासे किया गया है जिसके पढ़नेसे श्रीकृष्णचरणानुरागियोंका मन प्रेममें एकदम मग्न होजाता है इसमें वही लीला सम्मिलित की गई हैं कि जिनको आजकलके रासधारीलोग करते हैं अन्तमें अनुरागरसभी है जगह २ पर चित्रभी सुन्दरलीलानुकूल लगाये गये हैं पुस्तककी रक्षाके निमित्त विलायती कपड़ेकी जिल्दभी बांधी गई है जिसपर सोनेके अक्षर लिखे हैं १॥१॥	
नवरत्नरासविलास-इसमें श्रीकृष्णजीकी अनेक प्रकारकी रासलीला हैं.... III	
रागरत्नाकर-अर्थात् भक्तचिन्तामणि रागमालासहित जिसमें अति चटकीले २००० पद हैं और छः राग ३६ रागिनीमें भजन गानेका अतिउत्तम ग्रंथ है समय २ का राग वर्णन भक्तिमय सैकड़ों भक्तोंके मनरञ्जन करनेवाला है जिसके बाँचनेसे भगवानकी लीलाओंका जानो सन्मुख दर्शन होता है ज्यादा क्या प्रशंसा करें स्वयं मंगवाकर अनुभव कर लें २	
अनुभवरस-इस ग्रंथमें वृन्दावनविहारी आनन्दकन्द कृष्णजीकी परम मनोहर अनेक लीलायें यथा क्रम राग रागिनियोंमें वर्णित हैं, जो कि नित्यविहारमें आप सदैव रचते रहते हैं सपुष्ट बढिया कागज और विलायती कपड़ेकी जिल्द सहित १॥	
शैवमनोरंजन-शिवभक्ति देविसहाय इत्यादि भक्तनके अपूर्व भजन रागरागिनीमें १॥	
भजनमनोरंजनी-अर्थात् अतिमनोहर भजन कवित्त दोहा सवैया स्तोत्र आदि अत्यंत सुंदर पद हैं १॥	
श्रीसीतारामरसपीयूष-अतिमनोहर रागरागिनीमें १॥	
संगीतलहरी-गानेलायक दुमरी टप्पा गजल पद इत्यादिका अपूर्व संग्रह १॥	
संगीत सुधानिधि-प्रथमभाग चुनी हुई गजलोंका संग्रह १॥	
नटनागरविनोद-श्रीयुत रत्नसिंहजीकृत कवित्त और सवैयाओंमें १॥	
सितारचंद्रिका-(सितार बजानेकी रीति) इसमें सितारमें कौन रागमें किसतरहसे परदा रखना और डाडिङ्ग सारीगम इत्यादि भलीभाँति वर्णित हैं I =)	
स्वरतालसमूह-अर्थात् संपूर्ण सितार बजानेकी रीति उदाहरण सहित गानेकी चीजें सारिगमके अनुसार हैं १॥	
पदावली-(रामसखेकृत) रामचंद्रजीकी भक्तिरस प्रधान पदावली I =)	

नाम.	की. रु.
आनंदगान-(यथा नामः तथा गुणाः) यह पुस्तक पढ़नेसे अपूर्व आनंद प्राप्त होता है 1)	
कजरीरागसंग्रह-श्रावण भादौमें गानेलायक अत्युत्तम संग्रह है 2)	
प्रभातीसंग्रह-भक्तानुरागी सबके उठके श्रीराम कृष्णजीकी प्रभाती गाते 2)	
भजनावली-श्रीरामचरणदासकृत इसमें भक्तिज्ञान मार्गी भजन पद बिनय प्रभाती दोहा आरती कवित्त छंद इत्यादिका रागरागिनीमें वर्णन है 1=)	
भजनपुष्पावली-इसमें प्राचीन नवीन महात्माओंके रसीले भजन अनेक रागरागिनीमय 1)	
श्रावणपुष्पमाला तथा प्रेमपुष्पमंजरी-जिसमें नानाप्रकारके सुललित पद कवित्त दोहा लावनी बिनयादि और वैराग्योपदेशादि श्रीभगवत्प्रेम भजन रूप वर्णित हैं 1-)	
रघुराजविलास-महाराजरघुराजसिंहजुदेवकृत इसमें श्रीकृष्णजीके पद होरी, इत्यादि राग रागिनीमें वर्णित हैं 1=)	
भजनरत्नावली बड़ी-जिसमें प्राचीन महात्माओंके अनेक रागरागिनीमें रामकृष्णके भजनोंका संग्रह है संप्रदायी साधुसंतके उपयोगी है 1)	
स्त्रीपुरुष रागमनोहर-गानेलायक अच्छा संग्रह है... .. 2)	
लावनी ब्रह्मज्ञानकी-काशीगिरि बनारसीकृत इसमें संपूर्ण लावनी ऐसी भावगंभीरतासे बनाई गई हैं कि जिनका अर्थ शृंगार वैराग्य दोनों पक्षोंपर मिलता है 1)	
आनंदप्रकाश-अर्थात् लावनी तुरा 1)	
प्रेमवाटिका-(रोचक भजन)... .. 2)	
प्रेमपुष्पमंजरी-अच्छे २ भजन उनमें पंजाबदेशके भी भजन हैं 1)	
प्रेमपुष्पलता-अच्छे २ भजन कई एक रागरागिनियोंमें संगृहीत हैं... .. 1)	
रसरंगप्रकाश-(इसमें अच्छे २ कवियोंके मनभावने पदसंग्रह किये गये हैं 1)	
पावससुंदरी-(वर्षाके दिनोंमें गानेलायक) 2)	
पावसमंजरी " 2)	
भजनसागर-महात्माओंके पदोंका अनूठा संग्रह 1=)	
संगीतरत्नाकर-इसमें समय २ के रागोंका संग्रह 1)	
दिलबहलाव-(शौकीनोंके गानेलायक) 2)	
अनुरागरस-नारायणस्वामी कृत 2)	
गुलवहार-अर्थात् अमसी व लावनी ख्याल तुरा 1)	
गुलचमन वेनजीर-अर्थात् गानेलायक उमदा २ गजलोंका संग्रह 1)	
गजलसंग्रह-(५४ कवियोंकी २२५ के करीब गानेलायक गजलोंका संग्रह) 1=)	
मनरंजनसंग्रह-मनको प्रसन्न करने योग्य.... .. 1)	
होरी चौतालसंग्रह-वसंतपंचमीसे फाल्गुनतक गानेलायक होरीका संग्रह 1)	
प्रेमांकुर-श्रीकृष्ण यशगायन 1)	
गोविंदाष्टक भा० टी० 1)	
वसंतफागसंग्रह-(होली) गानेलायक उमदी चुनी हुई होलियोंका संग्रह... .. 1)	

नाम.

नागरसमुच्चय-नागरीदासजीकृत भक्तिरस संपूर्ण ईश्वराराधन लयहोनेकामार्ग वैराग्य, शृंगार और पदसागर युक्त अपूर्व नागरीदासके जीवनचरित्र समेत	 १॥
कल्याणकल्पद्रुम-रोचकछन्दबद्ध वेदान्त मार्गमें सूक्ष्मरामायण	 १
सद्योमुक्तिप्रकाश-(चित्र) अर्थात् संस्कृतकी श्रेणीसे (ज्ञान चौपड)	 १
जंजीराहनुमानजीका	 १॥
अग्रदासजीकीकुंडलिया-(वेदान्तोपदेश)	 १
गंजीफा इकतीसी-(खेलकी निपुणता)	 १
उपदेशरत्नाकर-उपदेशसम्बन्धी अमूल्य उदाहरणोंयुक्त भक्तिज्ञान वैराग्यसंयुक्त सामयिक दोहे वर्णित हैं	 १
निर्भयविलास-भगवद्भक्तोंके हितार्थ अठ्ठे गानेलायक पदहैं	 १॥
भक्तिसागर-(१७ ग्रंथ) (चरणदासकृत योगग्रन्थ) ब्रजचरित्र अमरलोक अष्टांगयोग षट्कर्म हठयोग ज्ञानस्वरोदय भक्तिपदार्थ ब्रह्मज्ञान शब्दवर्णन आदि उपदेशिकविषय- रोचक पद्योंमें वर्णित है	 १॥॥
श्रीकृष्णचंद्रिका-गणेशसिंहजीकृत श्रीमद्भागवतके द्वादशस्कंधोंकी कथा दोहा, चौपाई आदि मनहरण छंदोंमें वर्णित है	 १
ब्रह्मज्ञानदर्पण-(योगग्रन्थ) नामहीसे ज्ञात होताहै कि पढनेसे ब्रह्मज्ञानमें सदा मग्न रहतेहैं	 १
ज्ञानस्वरोदय भाषा-(चरणदासकृत) प्रश्नज्ञानमें तात्कालिक है	 १
श्रीब्रह्मज्ञानसागर ,, (योगग्रन्थ)	 १
भक्तिज्ञानानन्दामृतवर्षिणी-राधाकृष्णनाममाहात्म्य भक्तिज्ञान प्रेमका उपदेश	 १
गुरुगीता-गुरुपूजापद्धति भाषाटीकासमेत (निगमानिगममंडली)	 १
गुरुमहिमा और गुरुअष्टक-दोहा चौपाईमें गुरुपदेशके वास्ते अवश्यक है	 १

संपूर्ण पुस्तकोंका "बड़ासूचीपत्र" अलगहै । देखनाहो तो मँगालीजिये.

पुस्तकमिलनेका पता-

खेमराज श्रीकृष्णदास,

"श्रीवेङ्कटेश्वर" स्टीम-यन्त्रालय-बंबई.







